



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



HARVARD
DIVINITY
SCHOOL
*Andover-Harvard
Theological Library*



PATROLOGIÆ CURSUS COMPLETUS

SIVE
BIBLIOTHECA UNIVERSALIS, INTEGRÆ, UNIFORMIS, COMMODA, OECONOMICA,
OMNIUM SS. PATRUM, DOCTORUM SCRIPTORUMQUE ECCLESIASTICORUM
QUI
AB ÆVO APOSTOLICO AD INNOCENTII III TEMPORA
FLORUERUNT;

RECUSIO CHRONOLOGICA
OMNIUM QUÆ EXSTITERE MONUMENTORUM CATHOLICÆ TRADITIONIS PER DUODECIM PRIORA
ECCLESIAE SÆCULA,

JUXTA EDITIONES ACCURATISSIMAS, INTER SE CUMQUE NONNULLIS CODICIBUS MANUSCRIPTIS COLLATAS,
PERQUAM DILIGENTER CASTIGATA;
DISSERTATIONIBUS, COMMENTARIIS LECTIONIBUSQUE VARIANTIBUS CONTINENTER ILLUSTRATA;
OMNIBUS OPERIBUS POST AMPLISSIMAS EDITIONES QUÆ TRIBUS NOVISSIMIS SÆCULIS DEBENTUR ABSOLUTAS
DETECTIS, AUCTA;
INDICIBUS PARTICULARIBUS ANALYTICIS, SINGULOS SIVE TOMOS, SIVE AUCTORES ALICUIUS MOMENTI
SUBSEQUENTIBUS, DONATA;
CAPITULIS INTRA IPSUM TEXTUM RITE DISPOSITIS, NECNON ET TITULIS SINGULARUM PAGINARUM MARGINEM
SUPERIOREM DISTINGUENTIBUS SUBJECTAMQUE MATERIAM SIGNIFICANTIBUS, ADORNATA;
OPERIBUS CUM DUBIIS TUM APOCRYPHIS, ALIQUA VERO AUCTORITATE IN ORDINE AD TRADITIONEM
ECCLESIASTICAM POLLENTIBUS, AMPLIFICATA;
DUOBUS INDICIBUS GENERALIBUS LOCUPLETATA: ALTERO SCILICET RERUM, QUO CONSULTO, QUIDQUID
UNUSQUISQUE PATRUM IN QUODLIBET THEMA SCRIPSERIT UNO INTUITU CONSPICIATUR; ALTERO
SCRIPTURÆ SACRÆ, EX QUO LECTORI COMPERIRE SIT OBIVIUM QUINAM PATRES
ET IN QUIBUS OPERUM SUORUM LOCIS SINGULOS SINGULORUM LIBRORUM
SCRIPTURÆ TEXTUS COMMENTATI SINT.
EDITIO ACCURATISSIMA, CÆTERISQUE OMNIBUS FACILE ANTEPONENDA, SI PERPENDANTUR: CHARACTERUM NITIDITAS
CHARTÆ QUALITAS, INTEGRITAS TEXTUS, PERFECTIO CORRECTIONIS, OPERUM RECUSORUM TUM VARIETAS
TUM NUMERUS, FORMA VOLUMINUM PERQUAM COMMODA SIBIQUE IN TOTO OPERIS DECURSU CONSTANter
SIMILIS, PRETII EXIGUITAS, PRÆSERTIMQUE ISTA COLLECTIO, UNA, METHODICA ET CHRONOLOGICA,
SEXCENTORUM FRAGMENTORUM OPUSCULORUMQUE HACTENUS HIC ILLIC SPARSORUM,
PRIMUM AUTEM IN NOSTRA BIBLIOTHECA, EX OPERIBUS AD OMNES ÆTATES,
LOCOS, LINGUAS FORMASQUE PERTINENTIBUS, COADUNATORUM.

SERIES SECUNDA,

IN QUA PRODEUNT PATRES, DOCTORES SCRIPTORESQUE ECCLESIAE LATINÆ
A GREGORIO MAGNO AD INNOCENTIUM III.

Accurante J.-P. Migne

BIBLIOTHECÆ CLERI UNIVERSÆ,

SIVE

CURSUM COMPLETORUM IN SINGULOS SCIENTIÆ ECCLESIASTICÆ RAMOS EDITORUM

PATROLOGIA BINA EDITIONE TYPIS MANDATA EST, ALIA NEMPE LATINA, ALIA GRÆCO-LATINA. —
VENEUNT MILLE FRANCIS DUCENTA VOLUMINA EDITIONIS LATINÆ; OCTINGENTIS ET
MILLE TRECENTA GRÆCO-LATINÆ. — MERE LATINA UNIVERSOS AUCTORES TUM OCCIDENTALES, TUM
ORIENTALES EQUIDEM AMPLECTITUR; HI AUTEM, IN EA. SOLA VERSIONE LATINA DONANTUR

PATROLOGIÆ TOMUS CLXXXI.

VEN. HERVEUS BURGIDOLENSIS MONACH. HILDEBRANDUS JUNIOR. AIMO ABB. S. PETRI
DIV. ET PETRUS MONACH. GUIDO CARILOCI ABBAS. HERIBERTUS MONACH. BARTHOLO-
MÆUS CATAL. EPISC. BERNARDUS CARTHUSIÆ PORTARUM PRIOR I. S. BERNARDUS
ABB. CISTERC. V. HUGO MATISCONENSIS ANTISS. EPISC.

EXCUEBATUR ET VENIT APUD J.-P. MIGNÈ EDITOREM,
IN VIA DICTA D'AMBOISE, PROPE PORTAM LUTETIÆ PARISIORUM VULGO D'ENFER NOMINATAM
SEU PETIT-MONTROUGE.

BR
60
.M4
t. 181

AMERICAN
BOOKS VTBVND

SÆCULUM XII

VEN. HERVEI

BURGIDOLENSIS MONACHI

OPERA OMNIA

DEMUM RESTITUTA ET NUNC PRIMUM IN UNUM COLLECTA

ACCEDUNT

HUGONIS MATISCONENSIS ANTISSIODORENSIS EPISCOPI, BARTHOLOMÆI
CATALAUNENSIS EPISCOPI, BERNARDI CARTHUSIÆ PORTARUM PRIORIS I
S. RAINARDI ABBATIS CISTERCIENSIS V, AIMONIS ABBATIS S. PETRI
DIVENSIS ET PETRI MONACHI, GUIDONIS CARILOCI AB-
BATIS, HERIBERTI MONACHI, HILDEBRANDI JUNIORIS

OPUSCULA, DIPLOMATA, EPISTOLÆ

ACCURANTE J.-P. MIGNE

BIBLIOTHECÆ CLERI UNIVERSÆ

SIVE

CURSUM COMPLETORUM IN SINGULOS SCIENTIÆ ECCLESIASTICÆ RAMOS EDITORE

TOMUS UNICUS

VENIT 9 FRANCIS GALLICIS

EXCUDEBATUR ET VENIT APUD J.-P. MIGNE EDITOREM
IN VIA DICTA D'AMBOISE, PROPE PORTAM LUTETIÆ PARISIORUM VULGO D'ENFER NOMINATAM
SEU PETIT-MONTROUGE

1854

ELENCHUS

AUCTORUM ET OPERUM QUI IN HOC TOMO CLXXXI CONTINENTUR.

VEN. HERVEUS BURGIDOLENSIS MONACHUS.

Commentaria in Isaiam. col. 18
— in Epistolas divi Pauli. 591

HILDEBRANDUS JUNIOR.

Libellus de contemplatione. 1691

AIMO ABBAS S. PETRI DIVENSIS ET PETRUS MONACHUS.

Aimonis Epistola ad fratres. 1707
Petri monachi Divensis Gesta septem abbatum Beccensium. 1709

GUIDO CARILOCI ABBAS.

Tractatus de correctione cantus ord. Cisterc. 1719

HERIBERTUS MONACHUS.

Epistola de hæreticis Petragoricis. 1721

BARTHOLOMÆUS CATALAUNENSIS EPISCOPUS

Epistola ad Sugerium abbatem. 1721

BERNARDUS CARTHUSIÆ PORTARUM PRIOR I.

Epistolæ tres. 1723

S. RAINARDUS ABBAS CISTERCIENSIS V.

Instituta capituli generalis ordinis Cisterciensis. 1723

HUGO MASTICONENSIS EPISCOPUS ANTISSIODORENSIS.

Epistolæ ii ad Sugerium. 1741

Charta. 1743

ANNO DOMINI MCL

VEN. HERVEUS BURGIDOLENSIS MONACHUS

NOTITIA

(R. P. Bernardus Pzizus, Dissertatio isagogica in tom. III *Thesauri Anecdot.*, p. IV).

Herveus, quem Joannes Mabillonius *Annalium Benedictinorum* tomo III, pag. 357, sub finem sæculi undecimi, Casimirus Oudinus in *Supplemento Bellarm. De Script. eccles.*, pag. 394, anno circiter 1136 floruisse scribunt, illustre monasterii Dolensis seu Burgidolensis in dioecesi Bituricensi decus et ornamentum fuit. Porro hujus monasterii fata non sine gemitu paucis exponunt Lucas Acherius in observationibus præviis ad tomum II *Spicilegii*, et laudatus Mabillonius pag. 558, ubi memorat id anno 1623 destructum esse, petente serenissimo principe Condæo Henrico Borbonio, qui ejus et monasterii S. Salvatoris loco, duo canonicorum collegia (egregia scilicet reformatione) instituit, unum intra palatium Castri-Radulfi, alterum Dolis. Cæterum ad uberiores vitæ, ab Herveo hic loci exactæ, historiam quod attinet, eam nobis egregia et ampla Dolensium monachorum encyclica de illius obitu epistola præbet, ex ms. cod. abbatiæ Clarævallensis ab Acherio in supra citato *Spicilegii* tomo, pag. 515, publicata, quæ quia ob Acheriani operis in his regnis raritatem paucissimis visa est, hic totidem verbis reddenda visa est. En igitur eam :

« Cum propheta dicit : *Dominus virtutem operum suorum annuntiabit populo suo*, si ipse non pro sua, sed pro auditorum salute proprias enarrat laudes, quomodo nos, quorum tota salus in laudibus ejus est, tacere audebimus magnalia ipsius, quæ nostris temporibus ostendere nobis dignatus est? Noverit itaque quisquis hæc auditurus est vel lecturus, nos nequaquam vanis vel falsis laudibus velle mortuos extollere, sed ad laudem et gloriam Christi salutemque audientium pro amore veritatis de veritatis ipsius amatore veraci stylo pauca describere.

« Fuit igitur vir tam quam doctrina venerabilis, Herveus nomine, Dolensis cœnobii monachus, degens ibi circiter quinquaginta annis in prædicanda morum probitate, patriæ autem Cenomanensis indigena, multa apud nos suæ fidei et sapientiæ, nec non et innocentie monimenta relinquens. Jam namque juvenis et a puero Scholarum dogmatibus multipliciter imbutus, cum prædictum Monasterium ingressus fuisset, totum se studio sanctarum Scripturarum dedit, atque catholicos tractatores, Augustinum videlicet, Hieronymum, Ambrosium, Gregorium, ac reliquos frequentare cœpit, jugiterque diebus ac noctibus eorum lectioni incumbere, meditationi inservire non destitit, nec quolibet impedimento ab inquisitione veritatis avelli potuit. Cumque singularis ingenii atque inæstimabilis memoriæ esset, cœpit in vasculo cordis sui multa profutura recondere, et columbæ more meliora grana eligere, sibi que memoria retinere scriptoque commendare.

« Fecit ergo primum *Expositionem mirabilem super librum B. Dionysii De hierarchiis angelorum*.

« Deinde exposuit totum librum *Isaiæ prophetæ*, et *Lamentationes Jeremiæ*, extremamque partem *Ezechielis*, ibi incipiens, ubi sanctus Gregorius papa dimiserat, et ad finem usque perducens.

« Simul etiam *Deuteronomium Moysi et Ecclesiastem Salomonis*, nec non quoque *librum Judicum*, et *bellum Ruth*, *librumque Tobie*, omnia, quæ in illis minus intelligentibus solam litteram sonare videntur, in convincibili ratione ostendens, Christi et Ecclesiæ contestari et prædicare mysteria.

PATROL. CLXXXI.

1

1197 D. L.

« Præterea *Apostoli et Pauli Epistolas* cum tanta sapientiæ affluentia exposuit, ut qui eas legerunt, asserant nunquam se illis comparabiles cognovisse, et vix aut nunquam tanta expositas diligentia posse alicubi reperire.

« Ad ultimum cum fama doctrinæ ejus circumquaque spargeretur, et jam nullus ei, sicut attestantur, qui eum veraciter cognoverunt, canonicarum Scripturarum scientia primus haberetur, *Librum duodecim Prophetarum et librum Genesis* ex integro tam mirabili sensu exposuit, ut expositionem super illos necdum potuerimus invenire, quæ suæ æquiparari possit.

« Inter hæc quippe fecit plurimas *Expositiones de lectionibus sanctorum Evangeliorum, Canticorum* etiam, quæ in Ecclesia leguntur.

« *Libellum* quoque de *connezione quarumdam lectionum*, ostendens aliter in quibusdam Ecclesiis legi quam in sacra historia continentur : de quibus unum quod subditur exemplum, sufficiat. Legitur in *Quadragesima lectio* quædam de libro Esther, et ita in quibusdam *Lectionariis* incipit lectio libri Esther : oravit Esther ad Dominum dicens : *Domine Deus rex omnipotens, in ditione tua cuncta sunt posita*. Quam orationem ipse illic ex auctore sacræ historiæ probat non fecisse Esther, sed fecisse Mardocheum, et ideo non esse legendum : oravit Esther, sed legendum esse : oravit Mardocheus. Et multa similia ibidem asserit.

« *Librum* etiam non minimum fecit de *miraculis S. Mariæ Dei Genitricis*, quæ eadem inviolata Virgo temporibus ejus gessit in Dolensi templo, quæ ipse mox postquam gesta erant, sicut audiebat ab ipsis, in quibus fiebant, et a monacho custode monasterii, sine aliqua dilatione scribebat.

« Demum, quamvis propinquum finis sui terminum paulatim vigore deficiente sensisset, tamen sine consueto scribendi opere esse non poterat, et rogatus a nonnullis, ut, qui omnes Scripturas super cunctos memoriter retinebat, de *Cæna S. Cypriani Cæciliæ Carthaginensis episcopi* fere de omnibus libris canonicis aggregata, quæ, quid intimaret, eatenus apud nos incognitum erat, edoceret, ipse, quid de ea sentiret, acquievit rogantibus dicens, dum scriberet, se fortassis cum ista præsentem vitam finire. Et quia prior liber *Expositionum* suarum de dictis SS. Patrum, Dionysii videlicet Areopagitæ, extiterat, de eorundem SS. Patrum dictis iste posterior esset. Sicque contigit. Namque cum eandem Cœnam usque ad illum locum exposuisset, quo dicitur : *confundebatur Elisabeth, stupebat Maria, videbat de facto Sara* : quo loco videlicet apud nos terminabatur, arbitraretur autem de ea non nimiam abesse partem, tam ipse quam dominus abbas Girbertus, qui hoc ei tanquam monacho et filio suo mandaverat, eamque, quæ deerat, partem ab abbate S. Savini, qui se eam habere dicebat et mittendam eis promiserat, expectabant. Multa siquidem in ea vel dempturus fortasse vel additurus illam, sicut erat, in abolitione reliquit.

« Et cum tempus *Quadragesimæ* in maxima mentis, et majore corporis, quam nuper fuerat, virtute, in multa abstinentia multisque quotidianis virgarum verberibus, devotis atque assiduis orationibus, et in quotidiana sacrosancti sacramenti corporis et sanguinis Domini reverenda celebratione, cum alacritate et gaudio sancti Spiritus consummasset, in die sanctæ Cœnæ Domini nos dulcifluo Verbi Dei pane in capitulo refecisset, in die sanctæ Paschæ missæ hebdomadarius fuit, et sermonem in capitulo fecit. Secunda feria missam in conventu cantavit, et postmodum debilitate correptus, quarta feria inunctus est, sed tunc communicari non potuit, quod ipse postea aliquantulum convalescens divina providentia accidisse asseruit dicens, non Dominum ad se, sed se ad Dominum venire debere, et sic sequenti, quam præcedenti die non audierat, ipsiusque diei missam audivit, et confessus prius sacrosancta mysteria corporis et sanguinis Domini in tutelam exituræ in proximum animæ devotissime accepit, sicque per totam hebdomadam, cum missam quotidie audisset, quam nullo modo omittere volebat, et dominum abbatem, qui tunc forte deerat, antequam recederet, multum videre vellet, postquam venit, ab eo visitatus atque absolutus, inter manus ipsius, cui se accusabat, cœpit acri quidem sed brevissimo dolore fatigari usque ad mortem, Dominica in Octavis Paschæ transiens ex hac vita, et scandens, ut credimus, ad siderea regna.

« Ne vero longius protrahatur epistola, de omni tempore vitæ ejus breviter dixerimus, in diebus nostris majoris abstinentiæ, pudicitæ mundioris, sanioris consilii, humilitatis altioris, taciturnitatis magis assiduæ, locutionis plus circumspectæ prorsusque a vanitate alienæ, purioris vel amplius Catholicæ doctrinæ, inque universa morum honestate præclariorem nullum nos cognovisse. Hæc scribimus vobis, quoniam frater erat, ut de tanto fratre gaudeatis, et quod ei promiseratis, devote persolvatis, in regno Dei ad quod eum evolasse confidimus, ei consociari sperantes. Valet. »

Hactenus epistola funebris monachorum Dolensium de vita, moribus et doctrina Hervei. Juvat nunc in catalogum operum, ab iisdem, ut vidimus, contextum, nonnulla observare. Porro ex omnibus hic recensitis Hervei operibus nullum adhuc prelo subjectum fuit, nisi commentarius in Epistolas Pauli, quem

tanquam *γρίστην* S. Anselmi Cantuariensis archiepiscopi, sanctissimi pariter ac eruditissimi viri opus *venrandus et generosus dominus Renatus Castenus a situ et squalore vindicavit* et primus in folio edidit Coloniz ex officina Eucharii Cervicorni, anno 1533, cum præfatione Godefridi Hittorpii Coloniensis civis. Eundem deinde diligentius et auctius in lucem dedit sub ejusdem S. Anselmi nomine Joannes Picardus, canonicus regularis Sancti Victoris Parisiensis, tomo II Operum S. Anselmi, quæ Coloniz ex officina Choliu. anno 1612, in folio, emergerunt. Sed eum non Anselmi, sed Hervei Dolensis genuinum esse fetum nunc viri eruditi omnes agnoscunt. Vide de hoc plura apud Labbeum tom. I Dissert. ad Script. eccles.; Bellar., Casimirum Oudinum in Supplem., pag. 395; Guilielmum Cave in Hist. litter. ad annum 1130, aliosque recentiores bibliothecarios passim. Atque hæc ipsa causa est quod hi Commentarii in novissima et accuratissima Operum S. Anselmi editione, quam eruditissimus Gabriel Gerberon e congregatione S. Mauri Lutetiz Parisiorum anno 1675 procuravit, prætermissa, et in quædam inter spuria Cantuariensis archiepiscopi opera recusa fuerint.

Alterum opus Hervei, quod deinceps editis accensebitur, est amplissimus *Commentarius in Isaiam*, in libros octo divisus, qui totam primam hujus nostri voluminis partem absumit. Ad eum accurate ac emendate edendum duobus codicibus mss. membraneis in folio bonæ notæ usi sumus. Primum nobis suppeditavit bibliotheca celeberrimi Austriæ monasterii S. Crucis ord. Cisterc., studia nostra strenue ibidem curante A. R. et cl. Daniele, viro præstante, cui etiam brevi plura debebunt eruditi. Is codex sexcentorum annorum est. Alterum nobis e bibliotheca inclyti monasterii Garstensis prope Stiram, nobilem superioris Austriæ urbem, ordinis nostri, misit A. R. P. Petrus Oberhueber, ibidem subprior, amicus, et nostrorum studiorum fautor acerrimus. Nec hic ætate multum Sancto Crucensi cedit. Ex utroque textum restituimus, variantibus lectionibus, etsi perpauca, in marginem conjectis. Exstat et tertium quoddam manu exaratum hujus operis exemplum in bibliothecæ Campilliensis codice membraneo in folio, quingentorum annorum, quod sine dubio illud ipsum est quod in catalogo quodam a quadringentis annis Campillii confecto sub nomine *Curveii super Isaiam* laudatur. Postremo ideo Hervei opus *ad Joannem abbatem Dolensem* in bibliotheca Claromontana Parisiis ms. asservari ex Labbeo fidem facit Caveus, cui addendus Oudinus, qui id etiam in Bibliotheca Longipontis ord. Cisterciensis in episcopatu Suessionensi haberi affirmat. Cæterum luculenti et Hervei caractere ac ingenio, quod Dolenses monachi supra depinxerunt, plenissimi hujus commentarii editionem respublica litteraria acceptam referat R. P. Godefrido Depischio, sodali et contubernali nostro, qui pertinaci sane ac improbo labore id integrum ex laudatis codicibus exscripsit et singulari quadam industria et diligentia prelo paravit. Nec is defugeret laborem etiam reliqua Herveana opera eruendi, modo codices quibus ea contineri viri docti scribunt, ad nos mitterentur.

Oudinus in Supplem., pag. 395, testatur vidisse se Hervei *Postillas breves in Deuteronomium ms.* apud S. Germanum Parisiensem. Clarissimus S. Edmundus Martene in *Itinere suo Litterario*, Gallice edito, part. 1, pag. 57, scribit, in Monasterio S. Mariani Antissiodorensis, ord. Præmonstratensis, reperisse se *Commentaria Hervei in minores prophetas*. Sed ab his locis majori intervallo disjuncti sumus, quam ut inde quidquam expectemus. Cætera autem Hervei opera, an et ubi hodieque supersint, hactenus ne fama quidem comperimus.

NOTITIA ALTERA.

(*Histoire littéraire de la France par des religieux bénédictins*, t. XII, p. 344).

Hervé naquit au Mans, et non en Bretagne (1), comme l'a cru Genébrard (2); ni dans le Limousin, comme l'assure le P. le Long (3). Un esprit vif, pénétrant, et un grand amour pour l'étude furent les premiers traits qui se développèrent en lui, et ceux qui le caractérisèrent durant tout le cours de sa vie. Après d'heureux essais de ses talents, il entra dans l'abbaye du Bourg-Dieu, ou Bourg-Deols, en Berry, vers l'an 1100. Cette époque a pour garant la lettre circulaire sur sa mort, où il est dit qu'il finit ses jours dans sa cinquantième année de religion, sous l'abbé Gilbert; ce qui revient, selon le P. Pagi, à l'an 1149 (n. 4), ou selon les auteurs du nouveau *Gallia Christiana* (t. II, p. 151), à l'an 1150. Depuis son entrée dans le cloître, Hervé n'étudia plus que les livres saints, et ce qui pouvait lui en faciliter l'intelligence, c'est-à-dire les interprètes sacrés, surtout saint Ambroise, saint Jérôme, saint Augustin et saint Grégoire. Il passait tout

(1) Fabr. *Bibl.*, t. III.

(2) Ad. an. 1110.

(3) *Bibl. Sacr.*, t. II, p. 775.

l'intervalle des exercices réguliers dans cette occupation, sans que rien fût capable de l'en distraire : *Nec quotibet impedimento ab inquisitione veritatis avelli potuit*. Le riche fonds de savoir qu'il acquit par là le mit en état d'entreprendre des ouvrages considérables sur l'Écriture, qui lui firent une grande réputation. Ses travaux littéraires étaient ennoblis par les motifs les plus purs du christianisme, et la piété allait de pair chez lui avec l'érudition. C'est le témoignage que lui rendent les auteurs de la lettre circulaire déjà citée. Sa mort arriva le dimanche de l'octave de Pâques, à la suite d'un redoublement de jeûnes, de veilles et d'autres austérités dans lesquelles il avait passé le carême pour se préparer à ce moment terrible, dont, il y a lieu de croire, qu'il avait quelque pressentiment. Le jeudi saint précédent, il avait prêché dans le chapitre, et, le jour de Pâques, il avait encore eu la force de célébrer le grand-messe, et de faire une exhortation à la communauté.

La lettre circulaire des religieux du Bourg-Dieu fait honneur à Hervé des ouvrages suivants : une explication du livre de la *Hiérarchie céleste*, attribué à saint Denys ; des commentaires sur toute la prophétie d'Isaïe, sur les Lamentations de Jérémie, sur la dernière partie du prophète Ezéchiel, c'est-à-dire, sur tout ce qui n'avait pas été expliqué par saint Grégoire le Grand ; d'autres commentaires sur le Deutéronome, sur l'Éclésiaste, sur les livres des Juges, de Ruth et de Tobie ; une exposition des Épîtres de saint Paul, qui fut regardée comme son chef-d'œuvre, et lui mérita la réputation du premier homme de son siècle pour l'intelligence des livres saints ; des commentaires sur les douze petits prophètes, avec plusieurs explications des leçons des saints Évangiles et des cantiques qui se chantent à l'église.

Hervé fit encore une espèce de concorde, ou plutôt une critique des différences qui se rencontrent dans plusieurs passages de l'Écriture, dont les leçons variaient en diverses églises, où quelquefois on avait altéré le texte sacré. Par exemple, il faisait voir qu'au lieu de lire : *Oravit Esther ad Dominum, dicens : Domine Deus Rex omnipotens*, comme portaient certains Lectionnaires, il fallait lire : *Oravit Mardocheus*. Ce Livre avait pour titre : *De conexione quarumdam lectionum*. Mais ce titre ne serait-il pas lui-même corrompu, et ne faudrait-il pas plutôt lire, de correctione ?

Il composa de plus un recueil de miracles que Dieu opérât de son temps dans l'église du Bourg-Dieu par l'intercession de la sainte Vierge.

Enfin, touchant au terme de sa carrière, il fut engagé, par son abbé Gilbert, et par quelques-uns de ses confrères, à commenter un ouvrage sur la Cène, attribué à saint Cyprien. Mais la mort ne lui permit pas d'achever cette tâche.

Tels sont les écrits d'Hervé, que nous plaçons dans le rang que les auteurs de la lettre circulaire leur ont donné. Il est à présumer qu'ils ont suivi l'ordre chronologique.

On peut regarder comme perdu le commentaire sur les livres attribués à saint Denys.

Son commentaire sur Isaïe a vu le jour par les soins de dom Bernard Pez, qui lui a donné place dans le III^e volume de ses *Anecdotes* (p. 776 et seqq.) ; mais il y manque l'épître dédicatoire qui se trouve, suivant dom Liron, dans les manuscrits de France (4). Il est partagé en huit livres, ornés d'une préface adressée à Jean, son abbé. Nous n'examinerons point si c'est Jean I^{er} qui gouverna depuis 1103 jusqu'en 1158, ou Jean II, son successeur ; cette question, non moins obscure que frivole, ne mérite pas qu'on se mette en frais pour l'éclaircir. On remarque dans ce commentaire une grande lecture des Pères dont l'auteur a, pour ainsi dire, exprimé le suc dans ses explications. Il parle de la grâce en vrai disciple de saint Augustin, et de l'Église comme un homme fort attaché à son unité. Souvent son zèle éclate en plaintes contre les pasteurs de son temps, qu'il peint sous des couleurs qui ne relèvent ni leur savoir ni leur vertu. A l'occasion des derniers temps, il dit qu'Elie viendra pour réformer les abus qu'on voit se multiplier, chaque jour, parmi les Chrétiens ; que comme l'Église a eu les apôtres dans sa naissance, elle aura, vers sa fin, Elie, Enoch et d'autres excellents docteurs qui ne seront point inférieurs aux hommes apostoliques. Hervé regarde comme un point de foi que la persécution de l'Antechrist ne durera que trois ans et demi ; mais il ne pense pas que sa mort doive être immédiatement suivie du jugement dernier.

Le moine Alberic fait un grand éloge de cet ouvrage (5) ; mais il se trompe sur le nom de l'auteur. *Magister Henricus*, dit-il (il devait dire *Herveus*) *degens in Bituria, de nigro ordine monachus, nobile opus in Isaiam et multa alia edidit*.

Le commentaire d'Hervé sur les Épîtres de saint Paul fut livré au public, mais sous le nom de saint Anselme, par René de Chataigner, à Paris, l'an 1533, en un volume in-folio, chez Poncet le Preux. La même erreur d'attribution a été copiée dans les deux nouvelles éditions qui en furent faites, l'une à Venise, in-4^o, l'an 1547 ; l'autre à Paris, in-folio, l'an 1549, chez les frères Marnefs ; et enfin dans plusieurs recueils des Œuvres de saint Anselme, où cette production se trouve, à commencer par celui que publia Melchior Hittorpius à Cologne, l'an 1553, chez Euchaire Cervicorne. Sixte de Sienna (6) observa le premier que les anciens exemplaires manuscrits de ce commentaire portaient le nom du moine Hervé. D'après cette remarque, François Ribera, jésuite, commença à douter, au rapport de Cornelle la Pierre, qu'il fût émané de l'archevêque de Cantorbéri. Bellarmin (7) ensuite a décidé nettement qu'il ne lui appartenait point. Mais, pour n'avoir pas consulté les anciens manuscrits, il est tombé dans une autre méprise en adjugeant cette production à Hervé Nedellec, général des Dominicains, mort en 1325. Son autorité a fait illusion sur ce point à d'autres critiques. Enfin le P. Labbe ayant découvert la source de l'erreur, tous les savants se sont réunis à lui pour restituer ce commentaire à notre auteur.

Les explications de quelques évangiles de l'année ont eu longtemps la même destinée que le Commentaire sur saint Paul, c'est-à-dire, qu'elles ont passé pour être de saint Anselme. On les voit parmi les Œuvres véritables dans toutes les anciennes éditions, sans excepter celle du P. Théophile Raynaud (8), avec ce titre : *Divi Anselmi in aliquot Evangelia enarrationes*.

Les autres écrits d'Hervé sont demeurés dans l'obscurité. Plusieurs bibliothèques en conservent des exemplaires. Dom Rivet avait vu dans celle de Clairvaux l'explication de la dernière vision d'Ezéchiel,

(4) *Singularités historiques*, t. III, p. 40.

(5) *Chron. ad an. 1156*, p. 328.

(6) *Bibl. l. iv*, p. 225.

(7) *Script.*, p. 289.

(8) *Exstant etiam in editione Gerberonii quam Patrologiæ tomo CLVIII recudimus, sed sub titulo : Homiliæ et exhortationes. Vide Censuram Operum S. Anselmi Cantuariensis eidem tomo præfixam, col. 26.*

dans un beau manuscrit in-fol. du XII^e siècle avec ce titre : *Liber quem Herveus composuit super ultimam visionem Ezechielis prophetæ*. Il y avait pareillement vu le commentaire sur le Deutéronome, qui commence en cette sorte : *Addabarim, id est Deuteronomium liber iste vocatur*. Le même ouvrage se rencontre à Saint-Germain des Prés, sous le titre de *Courtes postilles sur le Deutéronome*.

Les notes d'Hervé sur le livre des Juges, sur celui de Ruth, sur les douze petits prophètes, sur les Lamentations de Jérémie et sur l'Ecclésiastique, font partie des manuscrits de l'abbaye de Vauluisant au diocèse de Sens. Il s'en trouve aussi des portions dans celle de Pontigni.

A la cathédrale de Tours, un manuscrit de cinq cents ans renferme, à la suite des lettres de saint Cyprien, le commentaire d'Hervé sur le sermon de la Cène attribué à ce Père (9). C'est le dernier fruit, mais non pas le meilleur, de la plume de notre auteur : ce commentaire se ressent et des défauts du texte, et de l'état de langueur où Hervé le composa. La mort, comme on l'a dit, le surprit dans ce travail, et ne lui permit pas d'y mettre la dernière main. Le même ouvrage est encore à Clairvaux, précédé des notes de notre auteur sur les cantiques d'Anne et d'Habacuc.

A ces productions littéraires d'Hervé, détaillées dans la lettre circulaire dont on a parlé, dom Gerberon (10) ajoute un commentaire sur saint Matthieu, un autre sur le Cantique des cantiques, et un troisième sur l'Apocalypse. Ce savant homme s'était même proposé de les donner au public avec tous les autres écrits d'Hervé sur les livres saints. Nous ignorons sur quel fondement il attribue ces trois derniers à notre auteur. Pour nous, il nous paraît certain qu'ils appartiennent à Anselme de Laon, et nous en avons donné la preuve dans le dixième volume de cette Histoire (11).

Enfin, pour ne rien omettre de ce qui concerne les écrits de notre auteur, nous observerons que la lettre circulaire qui doit servir de règle pour les discerner a été imprimée trois fois, savoir, dans le deuxième tome du Spicilege, dans le deuxième volume des Anecdotes de D. Pez, et dans le sixième volume des Annales Bénédictines.

(9) « On peut remarquer à cette occasion, dit dom Liron (*Sing. Hist.*, t. III, p. 38), le peu de critique de ce temps-là ; car c'est un ouvrage pitoyable que ce sermon attribué à saint Cyprien. Il était déjà ancien du temps d'Hervé ; car j'apprends qu'un certain Maur (copiste) l'a dédié autrefois à Lothaire, roi de France, mort l'an 986. »

(10) Ansel. Opp. præf.

(11) Vide Patrologiæ tom. CLXII in Anselmo Laudunensi.

VEN. HERVEI

BURGDOLENSIS MONACHI

COMMENTARIORUM IN ISAIAM LIBRI OCTO.

(Eruit ex ms. cod. inclyti monasterii S. Crucis ord. Cisterc. in Austria, collato eum cod. inclyti monasterii Garstensis prope Styram ord. S. Bened., R. P. Godefridus Depisch Benenedictinus Mellicensis; edidit R. P. Bernardus PEZIZA, *Thesauri Anecd. t. III*, parte 1, p. 2. Augustæ Vindelicorum et Græcii, sumptibus fratrum Veith, anno 1721, fol.)

LIBER PRIMUS.

CAPUT PRIMUM.

Vers 1. — « Visio Isaïæ filii Amos, quam vidit super Judam et Jerusalem in diebus Ozïæ, Joathan, Achaz, Ezechïæ, regum Juda. »

Subintelligitur in primis *Hæc est*, ut ita integer sit sensus : *Hæc est visio Isaïæ filii Amos*. Usus vero prophetiæ locutionis est, ut prius personam, regnum vel urbem ac tempus describat, et postmodum dicere mysteria prophetiæ incipiat, quatenus ad veritatem solidius ostendendam, ante historiam radicem figat, et post fructus Spiritus per signa et allegorias proferat. Isaïas igitur primo personam suam declarat dicens : *Visio Isaïæ*. Qui ut bene personam indicet, etiam genus narrat, eum subjicit :

A Filii Amos. Regnum quippe, de quo principaliter est locuturus, urbemque denuntiat, dicens : *Quam vidit super Judam et Jerusalem*. Tempus etiam describit, adjungens : *In diebus Ozïæ, Joathan, Achaz, Ezechïæ, regum Juda*.

Nec movere nos debet quod non ait : *visio mea*, sed *visio Isaïæ*. Mos enim sacræ Scripturæ est, ut ipsi qui scribunt, sic de se in illa quasi de aliis loquantur ostendentes quia non ipsi loquuntur, sed Spiritus sanctus. Hinc est enim quod Moyses ait : « Erat Moyses vir mitissimus super omnes homines, qui morabantur in terra (*Núm. XII, 3*). » Qui enim non ait : *Eram*, sed *erat*, profecto aperte indicat quia is qui per illum de illo loquebatur, alius erat.

Hinc et Joannes ait : « Discipulus ille, quem diligebat Jesus (*Joan. xiii, 23*). » Scriptores igitur sacri eloquii, quia impulsu sancti Spiritus aguntur, sic de se in illo testimonium tanquam de aliis proferunt. Sanctus ergo Spiritus per Moysen locutus est de Moyse; Spiritus sanctus per Joannem locutus est de Joanne; Spiritus sanctus per Isaiam locutus est de Isaia. Bene itaque vir Deo plenus ait : *Visio Isaiaë*, et non visio mea; quia per hoc quod repletus Spiritu sancto super se trahitur, quasi extra semetipsum sit, et de se quasi de alio sententiam profert, etiam in hoc devitans ne jactanter loqui videatur. *Qui visionem hanc vidit super Judam et Jerusalem.* Quia, licet de duodecim tribubus prophetaverit, specialiter tamen de tribu Juda et urbe regali, in qua templum erat, vaticinatus est.

Sed quærendum nobis est cur exorsus sit, dicens : *Visio Isaiaë, filii Amos*, nec subjungere videatur quid viderit, aut indicare quæ sit ista visio.

Ad quod respondendum, quia tria sunt genera visionum, id est corporale, spiritale atque intellectuale. Ecce enim in hoc uno præcepto cum legitur : « Diliges proximum tuum sicut te ipsum (*Matth. v, 43*), » tria occurrunt genera visionum : unum per oculos, quibus ipsæ litteræ videntur, alterum per spiritum hominis, quo proximus et absens cogitatur, tertium per contuitum mentis, quo ipsa dilectio intellecta conspicitur. In his tribus generibus illud primum manifestum est hominibus. In hoc enim videtur cælum et terra, et omnia quæ in eis conspiciuntur oculis nostris.

Nec illud alterum, quo absentia corpora cogitantur, insinuare difficile est. Ipsum enim cælum et terram, et quæ in eis videre possumus, etiam in eis constituti cogitamus, ubi nihil videntes oculis corporeis, animo tamen corporales imagines intuemur seu veras, sicut ipsa corpora vidimus, et memoria retinemus, seu fictas, sicut cogitatio formare potuerit. Aliter enim cogitat quis Romam, quam vidit, aliter Jerusalem, quam non vidit.

Tertium vero illud, quo dilectio intellecta conspicitur, eas res continet, quæ non imagines habent sui similes, quæ non sunt, quod ipsæ. Nam homo quidem vel arbor, aut sol, aut quæcunque alia corporea sive cælestia sive terrestria et præsentia videntur in suis formis, et absentia cogitantur imaginibus animo impressis, et faciunt duo genera visionum, unum per corporis sensus, alterum per spiritum, quo illæ imagines continentur. Dilectio autem nunquid aliter videtur præsens in specie, qua est, et aliter absens in aliqua imagine sibi simili? Non utique. Sed quantum mente cerni potest, ab alio magis, ab alio minus ipsa cernitur. Si autem aliquid imaginis corporalis cogitatur, non ipsa dilectio cernitur. Neque enim imaginaliter, sed proprie videtur, et non per corpus, sed in mente ab omni vitiorum labe mundata, ejus denique dilectionis gratia repleta.

Hæc sunt tria genera visionum. Primum ergo ap-

pellemus corporale, quia per corpus percipitur et corporis sensibus exhibetur. Secundum autem spiritale. Quidquid enim corpus non est, sed tamen aliquid est, jam recte spiritus dicitur. Et utique non est corpus, quamvis corpori similis sit, imago absentis corporis, nec ille ipse obtutus, quo cernitur. Tertium vero intellectuale ab intellectu dicimus. Præstantior est autem visio spiritualis, qua similitudines corporum spiritu non mente cernuntur, quam corporalis, qua per oculos corporis ipsa corpora videntur. Et rursus ambabus præstantior intellectualis, quia mente pura videntur divina non per aliquam spiritaliter vel corporaliter figuratam significationem, sed puro et acuto intellectu mentis.

Ex his itaque tribus visionum generibus secundum et tertium in visione Isaiaë invenitur. Est enim intellectualis visio ejus, et nonnunquam etiam spiritualis. In spiritu quippe formatis imaginibus vidit « Dominum sedentem super solium excelsum et elevatum, » atque « seraphim » stantes in circuito ejus (*Isa. vi, 1*); sed mentis acumine, quæ viderat, intellexit quod prophetarum mentibus est proprium. Nam signa per aliquas rerum corporalium similitudines demonstrantur in spiritu; sed accedit mentis officium, ut etiam intelligantur. Spiritus enim hominis vocatur vis animæ quædam mente inferior, ubi corporalium rerum similitudines imprimuntur, sed vivacitate mentis non intelliguntur. Quod autem non imaginaliter sed proprie videtur, et non per corpus, hoc sola mente cernitur sicut justitia, veritas et sapientia et hujusmodi cætera. Itaque visio Isaiaë est intellectualis, et aliquoties fortasse spiritualis simul et intellectualis. Nam, ea quæ in hoc volumine descripta sunt, *visionem* suam appellat. Patet igitur causa, cur præmittat, dicens : *Visio Isaiaë, filii Amos*, et nihil de corporea visione subjungat; quoniam cælestis oraculi sententiæ quas explicat, ipsa est visio intellectualis quam narrat. Nam propter hujusmodi visiones prophetæ vocabantur videntes, id est intelligentes. Visionem ergo suam narrare inchoans ait :

VERS. 2. — « Audite cæli, et auribus percipe terra, quoniam Dominus locutus est : Filios enutrivit, et exaltavit; ipsi autem spreverunt me. »

Omnes, qui prædicationis officium in Synagoga tenuerunt, cæli recte vocati sunt, quia nimirum sapere superna credebantur. Terra vero plebs Judæorum appellata est. Unde et Moyses cum sacerdotibus et populum ad verba suæ admonitionis excitaret, dixit : « Audite, cæli, quæ loquor (*Deut. xxxii, 1*), » etc. Cælos videlicet ordines præpositorum appellans, terram vero subditam plebem : eadem ratione cælos et terram nunc Isaias affatur. Sed cælos jubet audire, terram vero auribus percipere. Auditus enim in Scripturis sanctis non est iste, qui in aure sonat, sed qui corde percipitur. Unde Dominus : « Qui habet aures audiendi, audiat (*Matth. xi, 15*). » Audit enim, qui verba veritatis in aure cordis intel-

ligendo suscipit; auribus vero percipit, qui sonum verborum auribus corporeis audiens interiorē sensum eorum minime capit. Et quia sacerdotum atque doctorum est intelligere mystica, populi vero nudam historię superficiem auditu corporis haurire, ideo cœli jubentur audire et auribus terra percipere. Et hoc in omnibus Scripturis notandum quoties hæc duo verba junguntur. Audire ergo cœli monentur et auribus terrę percipere, quia Deus conquestus sit, dicens: *Filios enutrivit, et exaltavit, ipsi autem spreverunt me.* Et quos nunc appellat *filios* nisi Judæos de quibus ait Moyses: « Vidit Dominus, et ad iracundiam concitatus est, quia provocaverunt eum filii sui et filię (Deut. xxxii, 19), » quos enutrivit manna pascens in deserto quadraginta annis, et exaltavit eos in terra, quam patribus eorum promiserat, sicut et Paulus ait: « Deus plebis Israel elegit patres nostros, et plebem exaltavit? (Act. xiii, 17) » ipsi autem spreverunt eum, quia legem ejus projecerunt atque dæmonibus immolaverunt et novissime filium ejus unicum dehonesterunt. Unde et subditur:

VERS. 3. — « Cognovit bos possessorem suum, et asinus præsepe domini sui; Israel autem me non cognovit, populus meus non intellexit. »

Quis enim *bos* nisi Judaicus populus exstitit, cuius cervicem jugum legis attrivit? Et quis *asinus* nisi gentilitas fuit, quam quilibet seductor, qui reperit, quasi brutum animal et nulla ratione renitens, quo voluit, errore substravit? *Bos possessorum, et asinus præsepe domini coanovit*; quia et Hebraicus populus Deum, quem colebat, sed ignorabat, reperit; et gentilitas legis pabulum, quod non habebat, accepit. *Præsepe* enim hoc loco sacra Scriptura non inconvenienter intelligitur, in qua verbi pabulo animalia sancta satiantur, de quibus per Psalmistam dicitur: « Animalia tua habitabunt in ea (Psal. lxxvii, 11). »

Hinc etiam natus Dominus a pastoribus in præsepi repertus est (Luc. ii, 16); quia ejus incarnatio in ea, qua nos reficiunt prophetę, Scriptura recognoscitur. Bos itaque idem Hebræorum populus jugo legis edomitus cognovit possessorem suum, id est Christum in carne præsentem, et asinus, id est gentilis populus, qui voluptatibus deditus erat, et (12) gravius brutus agnovit præsepe Domini sui, id est Scripturam Dei, in qua pabulum vitę perciperet. *Israel autem*, id est pars illa Judaici populi, quę in infidelitate maluit persistere, non cognovit eundem possessorem suum. « Si enim cognovissent, nunquam Dominum glorię crucifixissent (I Cor. ii, 8). » Et qui peculiaris populus Dei erat, non intellexit majestatem in carne latentem. Debuisset enim præ omnibus eum intelligere, quia cæteris eum agnoscentibus iste solus amisso cordis lumine non intellexit occultum Dei adventum.

Nec prætereundum, quia ejusdem Salvatoris adventum magnus Isaias non solum voce et persona,

sed et nomine suo prophetat. *Isaias* quippe *salus Domini* Christus est, de quo idem Dominus promiserat: « Juxta est salus mea, ut veniat (Isa. lvi, 1). » Pater autem Isaię vocatus est Amos. Amos vero *robustus* vel *potens* dicitur. Et quis robustus et potens nisi Pater Domini nostri Jesu Christi? Rursus Amos interpretatur *populum avellens*. Et Deus Pater populum Judæorum avulsit de terra sua propter necem Salvatoris, captivumque per omnes gentes dispersit. *Isaias* itaque *filius Amos* Unigenitum summi Patris designat. Sed Isaias *visionem vidit super Judam et Jerusalem*. Et super nos Christus visionem vidit, id est nostram salutem prævidit, et gratię suę illustratione respexit, cum pro discipulis orans subjungeret: « Non pro his autem rogo tantum, sed et pro eis qui credituri sunt per verbum cœrum in me (Joan. xvii, 20). » Judas namque *confitens* vel *confessio* interpretatur. Et Dominus super Judam visionem videbat, cum diceret: « Omnis quicumque confessus fuerit me coram hominibus, et Filius hominis confitebitur eum coram angelis Dei (Luc. xii, 8). » Jerusalem vero dicitur *visio pacis*. Et Dominus visionem super Jerusalem intuebatur, quando dicebat: Quia « multi ab Oriente et Occidente venient, et recumbent cum Abraham et Isaac et Jacob in regno cœlorum (Matth. viii, 11). » Et: « Beati mundo corde, quoniam ipsi Deum videbunt (Matth. v, 8). » Ibi namque erit perfecta, ac perpetua pacis visio, cum ipsum pacis fontem sine fine viderimus.

Vidit autem hanc visionem *in diebus Ozia, Joathan, Achaz, Ezechię, regum Juda*. Nam hi quatuor reges quatuor evangelistas non incongrue designant, de quibus Joannes ait: « Animal primum simile leoni, et secundum animal simile vitulo, et tertium animal habens faciem quasi hominis, et quartum animal simile aquilę volanti (Apoc. iv, 7). » Ozias enim qui *robustus Domini* dicitur, intelligi mystice potest animal simile leoni. Joathan vero, qui *consummatus* interpretatur, animal simile vitulo; quia vitulus consummari solebat in Dei sacrificio. Achaz autem, qui in lingua nostra *continentem* sonat, animal habens faciem quasi hominis; quia hominis est, ut sit continens et castus. Ezechias vero, qui dicitur *apprehendens Dominum*, animal simile aquilę volanti; quia quartus evangelista quasi apprehendit Dominum, dum incomprehensibilis divinitatis ejus arcana profundius rimatur, sicut et aquila sublimius cæteris omnibus avibus volare consuevit, et in reverberatis obtutibus radios solis respicere. Quę scilicet animalia, id est sancti evangelistę non immerito reges Juda vocantur, quia per eos usque in finem mundi sancta Ecclesia regitur.

In quorum diebus Isaias, id est Salvator noster, visionem super Judam et Jerusalem, ut dictum est, videt; quia in terris corporaliter conversans oculis misericordię suę super omnes qui erant credituri,

(12) Ita diserte ambo codices.

levavit. Cujus visio panditur in hoc prophetæ libro, quia quicquid ipse fidelibus Novi Testamenti facere disposuit, iste liber satis prædixit. Omnia enim evangelicæ gratiæ mysteria in hoc volumine prænuntiata (13) leguntur. Isaias autem sicut persona et nomine suo typum Salvatoris gessit, ita prædicatione sua eum præfiguravit. Unde mox idem Salvator per eum aperire visionem suam incipiens subdit: « Audite, cœli, quæ loquar, et auribus percipe terra, quoniam Dominus locutus est. Filios enutrivit et exaltavi, ipsi autem spreverunt me. »

Visionem quippe narrat, dum ea, quæ apud Patrem vidit vel audivit, loquitur. Et quia de cœlestibus ad ima pro nobis descendit, descensionem hanc in primordio suæ locutionis ostendit. Qui enim ab initio docet in excelsis angelos, ipse nunc in terram homines docere venit: et ideo pulchre cœpit: « Audite, cœli, et auribus percipe terra. » Quid enim cœlorum nomine, nisi ii qui in cœlestibus sunt conditi, spiritus angelici designantur? Et quid appellatione terræ nisi humana natura exprimitur, quæ de terra est? Unde et in oratione nostra dicere voce ejusdem Salvatoris instruimur: « Fiat voluntas tua sicut in cœlo et in terra (Matth. vi, 10); » ut nimirum voluntas Dei sicut a superiore natura agitur, ita in hominibus, et ab humana infirmitate servetur.

Possunt etiam mentes electorum nominam per cœlos exprimi a cunctis terrenis contagiis intimo amore suspensæ, quæ quamvis corpore degant in infimis, tamen jam corde inhærent supremis, veraciter dicentes: « Quoniam conversatio nostra in cœlis est (Philip. iii, 20). Per terram vero peccatores designari possunt, quia peccanti homini dictum est: Terra es, et in terram ibis (Gen. iii, 19). » Vel certe non peccatores et reprobi, sed ii qui terrenis actibus occupati, eleemosynarum et lacrymarum ope ad æternam vitam perveniunt. Itaque vel angelica (14) et humana natura, vel justis et peccatores, vel contemplativi et activi per cœlum et terram exprimiuntur. Et hi omnes audire querimoniam jubentur, quam super ingratis filiis Deus facit, ut omnis rationalis creatura testis existat pravitatis eorum. Alit enim: *Filios enutrivit et exaltavi, ipsi autem spreverunt me.* Et quos appellat filios, nisi quos per aquam et Spiritum Ecclesia gignit? Quos ipse enutrit in fide atque doctrina cœlesti, et exaltat, ut, « quæ sursum sunt » quærant, « non quæ super terram (Coloss. iii, 1). » — « Conresuscitavit enim, et consedere fecit nos in cœlestibus in Christo Jesu (Ephes. ii, 6). » Sed nos post tanta beneficia, proh dolor! spernimus eum, quia prædicatorum ejus verba contemnimus, quibus ait unigenitus ejus: « Qui vos audit, me audit; et qui vos spernit, me spernit; qui autem me spernit, spernit eum qui me misit (Luc. x, 16). » Ergo carnales isti, qui nomine

A Christiano censentur, sed prælatus Ecclesiæ magis deonestare quærent, quam eis obedire, ipsi sunt ingrati filii, de quibus conquestus est Dominus, quod ab eis spretus sit. De quibus et hoc, quod subditur, apte potest intelligi.

Cognovit bos possessorem suum, et asinus præsepe domini sui; Israel autem non cognovit me, populus meus non intellexit; quia quem Hebraicus et gentilis populus Deum cito cognovit, et ad ejus gratiam a pristino ritu facile convolvit, hunc populus iste falsorum Christianorum, qui cum lacte carnis ab uberibus sanctæ Ecclesiæ nutritus est et ex parentibus Christianis ortus, cognoscere non valuit. Nam « qui dicit se nosse Deum, et mandata ejus non custodit, mendax est (I Joan. ii, 4). » Et: « Qui non diligit, non novit Deum: quia Deus charitas est (I Joan. iv, 8). » Hæc igitur hominum multitudo, quæ fidem sine charitate et bonis operibus habet, nequaquam Deum videt (15), sed tamen vocatur Israel, id est *videns Deum*; quia quem dilectione et bonis operibus nescit, hunc fide in aliquo cernit. Ubi et apte seu prophetica seu Dominica voce subjungitur:

VERS. 4. — « Væ genti peccatrici, populo gravi iniquitate, semini nequam, filiis sceleratis. »

Væ perpetuo dolorem et gemitum (16) designat et amaritudinem æterni supplicii. Quamvis autem inter peccatum et iniquitatem nihil distare perhibeat dicens: « Omnis qui facit peccatum, et iniquitatem facit, et iniquitas peccatum est (I Joan. iii, 4), » ipso tamen usu loquendi plus iniquitas quam peccatum sonat, et omnis homo se libere fatetur peccatorem; iniquum autem dicere nonnunquam erubescit. Nequitia vero dicitur ab eo quod est nequicquam, quia per eam quisque tendit ad non esse. Scelus autem et pondus peccati transit, quia sceleratos vocare solemus homicidas et hujusmodi criminosos. Et quolibet quidem peccato Deum quisque offendit, cui peccatum omne displicet; iniquitate autem, ut magni ponderis arcina gravatur. Nequitia vero deficit, atque a vero Dei esse longe fit, atque ab æterno amore tepescens, in appetitu temporalium exardescit; scelere autem exercet crudelitatem. Talibus ergo culpis implicato Judæorum vel Christianorum populo debitum væ perpetui cruciatus et amaritudinis æternæ promittitur. Unde et subditur:

« Dereliquerunt Dominum, blasphemaverunt sanctum Israel, abalienati sunt retrorsum. » *Dereliquerunt Dominum* Judæi, sicut per Jeremiam dictum est eis: « Omnes dereliquistis me, dicit Dominus (Jerem. ii, 29). » Sanctus Israel Christus est, cui canebatur a turbis: « Hosanna! benedictus, qui venit in nomine Domini, rex Israel! (Joan. xii, 13). » Ipse enim Sanctus sanctorum naturaliter est, « quem Pater sanctificavit et misit in mundum

(13) Cod. Cruc., *pronuntiata.*

(14) Cod. Cruc., *itaque angelica et human.*

(15) Codic. Garst., *nequaquam Dominum cognovit.*

(16) Codic. Garst., *vel gemitum.*

(Joan. x, 36). » Quem Judæi blasphemaverunt dicentes: « Dæmonium habet, et insanit (*ibid.*). » Nam blasphemia est, per quam de ipso Deo falsa dicuntur. Qui et *abalienati sunt a Deo retrorsum*, sicut ei tandem pœnitentes dicunt: « Facti sumus sicut in principio, cum non dominareris nostri, neque invocaretur (17) nomen tuum super uos (*Isa. LXIII, 19*). »

Sed et multi, qui Christiana professione censentur, derelinquunt Dominum, qui relictis cœlestibus terrena quærunt. Deserto enim Creatoris amore creaturam diligunt, desertis supernis gaudiis in infirmis rebus gaudent, et omissis cœlestibus, terrenum est omne quod sitiunt. De iis ergo vere dici poterit, quia *dereliquerunt Dominum*. Qui et *blasphemaverunt Sanctum Israel*; quia de Deo multa loquuntur inepta, et frequenter judicia ejus audent reprehendere, et multa dicunt non bene ordinata ab eo non recte fieri. Atque retrorsum abalienantur; quoniam ad pristinas iniquitates suas revertuntur, et a Deo sunt alieni (18), quibus esset « melius non cognoscere viam justitiæ, quam post agnitionem retrorsum converti ab eo quod illis traditum est, sancto mandato (*II Petr. II, 21*), » quos increpat, cum subjungit:

Vers. 5. — « Super quo percutiam vos ultra ad dentes prævaricationem? »

Super quo, id est de quo peccato, jam *ultra percutiam vos*, inquit, id est de qua culpa vos emendare verberibus tentabo, qui non de verbere proficitis, sed culpas amplius multiplicatis, et prævaricationes prævaricationibus additis? Prævaricationes quippe addit quisquis, dum de culpa sua corripitur, murmurat, vel qui mala, quæ pro correctione sustinet, non deserit vel vitia, pro quibus correptus est, sed magis impatientiæ se facibus inflammat. Unde et sequitur:

« Omne caput languidum, et omne cor mœrens. » *Caput* namque interioris hominis mens est. Differt autem mens a corde; quia quædam superior vis animæ vocatur mens, ubi ratio consistit, et veritas cernitur. *Cor* autem quodammodo carnale est; quia ibi proprie humana voluntas et affectio locum habet. *Caput* ergo prævaricatorum *languidum* est; quia mens eorum, qui illicita voluntarie committunt, infirmatur languore peccati. Et ubi caput languidum est, efficitur *cor mœrens*; quia, si mens sanitatem amisit et ab intentione cœlestium desiderium per desidiam et acediam languere cœperit, confestim cor ex his, quæ pro sua correptione patitur, fit mœrens ac triste, et contra flagella murmurans. Neque enim cor in adversis mœrere potest, nisi mens languida fuerit, sed magis cum Paulo gloriabitur in tribulationibus. Sed horum, de quibus sermo est, infirmato capite universos artus languor invasit; quia mente eorum morbo peccati debilitata

A omnia actionum membra infirmantur eodem spiritali morbo. Nam sequitur:

Vers. 6. — « A planta pedis usque ad verticem non est in eo sanitas. »

Et quid per *plantam* nisi extrema quæque, et minima actio designatur? Quid vero per *verticem*, nisi fidei sublimitas exprimitur? Unde et per Jeremiam tali animæ dicitur: « Filii quoque Memphæos et Thaneos [*al.*, Taphnes] constupraverunt te usque ad verticem (*Jerem. II, 16*). » Usque ad verticem quippe constuprari est post malæ operationis usum jam in ipsa etiam fidei sublimitate corrumpi. Cum enim nequissimi spiritus uniuscujusque animam in pravis operibus involvunt, sed integritatem fidei vitare non possunt, quasi adhuc inferiora membra polluunt, sed ad verticem non pertingunt. Quisquis autem in fide corrumpitur, jam usque ad verticem constupratur. Malignus enim spiritus quasi ab inferioribus membris usque ad summum pertingit, quando activam vitam polluens, castam celsitudinem fidei diffidentiæ morbo corrumpit. Aptè igitur de unoquoque talium dicitur, quoniam *a planta pedis usque ad verticem non est in eo sanitas*. Quia peccati languor omnia occupavit ab extrema ejus actione usque ad summam fidei celsitudinem. His enim, qui moribus insequuntur, quod credulitate venerantur, divino judicio sæpe contingit, ut per hoc, quod nequiter vivunt, et illud perdant, quod salubriter credunt. Incessanter namque se pravis actionibus inquinant, et super hoc vindictam judicii retribui posse diffidunt. Et sæpe, dum bene vivere intelligunt, etiam nullo persequente usque ad perfidiam dilabuntur. Nam qui imminere districtum judicium non credunt, qui inulte se peccare suspiciantur, quo pacto vel esse vel dici fideles possunt? Fidem quippe perdidisse est, incorrectis malis operibus digna supplicia reddi posse non credere. Sed et Judæorum populus, dum digna fidei opera facere contemneret, fidem perdidit, quia cæcatus malitia sua Redemptorem, quem venturum crediderat, venisse non credidit. Itaque vel de Judæorum vel de pseudo-Christianorum populo, sive de unoquoque eorum convenienter accipitur dictum: *A planta pedis usque ad verticem non est in eo sanitas*. Nam serpens antiquus lethale virus suum per omnes artus actionum ejus diffundit, a minimis ejus inchoans, et usque ad summa paulatim perveniens. Sed tantus languor ex eo irremediabiliter convalescit, quod ei non est adhibita medicina. Sequitur enim:

« Vulnus et livor et plaga tumens non est circumligata, nec curata medicamine, neque fota oleo. » Aut hiant, inquit, vulneribus corpora, aut livent verberibus, aut tument plagis. Quid autem nomine vulneris intelligi debet nisi plaga luxuriæ, de qua scriptum est: « Convulneravit lumbos meos? (*Job XVI, 14*). » — « Multos enim vulneratos dejecit, et fortissimi quique dejecti sunt ab ea, » sicut Salomon

(17) Codic. Garst., *no invoc.*

(18) Codic. Garst., *sunt alieni.*

ait (*Prov. vii, 26.*) Quid vero livoris appellatione designatur nisi invidia, quæ mentem facit lividam, dum de alienis bonis torquetur intrinsecus? Et quæ est *plaga tumens* nisi ægritudo superbix, quæ mentem sauciam reddit et turgidam? referamus singula singulis, ut dicamus, quia *vulnus non est circumligatum*, neque livor *curatus* medicamine, nec *plaga tumens fota oleo*.

Vulnus autem circumligatur, cum luxuria, quæ et conscientiam, et carnem vulnerat, per continentiam coarctatur, sicut præcepit Dominus: « Sint lumbi vestri præcincti (*Luc. xii, 35.*) » Quo contra iste propheta ei qui castitatem amisit, improperat: « Non est cingulum ultra tibi (*Isa. xxiii, 10.*) » Livor vero tabescentis invidiæ curatur medicamento benevolentix, cum Paulus dicit: « Omnis amaritudo, et ira, et indignatio, et clamor, et blasphemia tollatur a vobis cum omni malitia; estote autem in vicem benigni, misericordes (*Eph. iv, 31, 32.*) » Atque *tumens plaga* superbix fovetur oleo, ut sanitatem recipiat, id est suavi blandimento sacræ admonitionis, cum Dominus demulcet dicens: « Discite a me, quia mitis sum et humilis corde, et invenietis requiem animabus vestris (*Matth. i, 29.*) » Sed Judæorum vel multitudinis hujus carnalium Christianorum *vulnus et livor, et plaga tumens non est circumligata, nec curata medicamine, neque fota oleo*, quia nullus in Synagoga, et rarissimus valde jam in Ecclesia præpositus invenitur, qui salutem animarum gregis sibi commisi quærat, et vulneribus mentium adhibere spiritalia medicamina studeat. Sacerdotes enim ut spiritalia medici deberent subjectis suis undique prohibendo et constringendo circumligare vulnus fornicationis ac medicamine Scripturarum curare livorem invidiæ, et eos, qui inflati sensu carnis suæ tumentem superbix, vel inanis gloriæ plagam sub pectore portant, fovere oleo, id est dulci et gratiosa monitione, quæ demulcet mentem et ungit, non quia superbus, cum opportunum fuerit, dura increpatione feriendus non sit, sed quia elatus ille, qui aliter tangi non potest, blanditiis sacræ admonitionis quasi quibusdam præcantationibus sit mitigandus, ut humilitatis mansuetudine sanetur.

Quod si verba singula, quemadmodum ostensum est, reddita singulis non fuerint, et aliquis fortasse quid aliud nomine vulneris et livoris ac plagæ tumentis intellexerit, quodlibet peccati vulnus primo circumligatum est inhibendo atque coercendo; deinde curandum acri medicamento poenitentix, et, cum se in poenitentia peccator affligerit, fovendus est, ne desperet, oleo piæ consolationis. Unde et Samaritanus, id est Dominus Jesus saucium curaturus, id est genus humanum, « alligavit vulnera ejus infundens oleum et vinum (*Luc. x, 35.*) » Alligavit enim vulnera prohibendo peccata; infudit vinum mordacitatis terrendo de pœna futuræ damnationis peccantium. Adhuc autem pravorum mala describuntur, cum subditur:

VERS. 7. — « Terra vestra deserta, civitates vestræ succensæ igni. »

Et quid per terram nisi caro designatur, quæ de terra facta est? Unde et in psalmo canitur, quia « Veritas de terra orta est (*Psal. lxxxiv, 12.*) » id est Christus de virgine natus est. Terra vero corporis nestri sacrarum disciplinarum exercitio debet excoli, ut fructum honorum operum proferat, omniaque ejus membra divinis actibus mancipari debent, et conditoris imperio deservire. Quod si hæc nobis defuerint, tunc et nobis dici poterit: *Terra vestra deserta*. Eorum quippe terra est deserta, quorum disciplinis et actionibus sacris caro non est occupata.

Quid autem per hujus terræ civitates nisi sensus corporis exprimuntur, id est visus, auditus, gustus, odoratus et tactus? Unde et fidei servo Dominus ait: « Tu esto supra quinque civitates (*Luc. xix, 19.*) » Civitates ergo succenduntur igni, quando flamma vitiorum exurit quinque sensus corporis, quando mulierum formas oculi libenter contemplantur et aures libidinosa verba delectabiliter audiunt, os gustus illicitis avidè sumit, nares odoribus pascuntur illicitis, manus ea tangere delectantur, quæ ad peccatum pertinent. Quorum enim sensus ita sunt concupiscentiarum ardore inflammati, horum profecto civitates succensæ sunt igni. Quibus adhuc deteriora monstrantur accidere, cum subjungitur:

« Regionem vestram coram vobis alieni devorant, et desolabitur sicut in vastitate hostili. » Quid enim regionis nomine nisi latitudo conversationis eorum exprimitur, de cujusmodi regionibus dictum est apostolis: « Levate oculos vestros, et videte regiones, quoniam albæ sunt jam ad messem, et qui metit, mercedem accipit, et congregat fructum in vitam æternam? (*Joan. iv, 35, 36.*) » Alieni vero sunt maligni spiritus ab electorum sorte in perpetuum alienati. Horum ergo regionem coram eis alieni devorant; quia maligni spiritus conversationem eorum jam ex integro diripiunt, non jam latenter insidiando nescientibus. Vim quippe nonnullis scientibus faciunt, quia sæpe sic bona opera tollunt, ut hæc se amittere ipse, qui vim patitur, dolens cernat. Nam gemit plerumque animus, et tamen delectationibus carnis superatus, bona quæ fecerat, amans perdit; ea, quæ susinet damna, considerat et tamen violentiæ dæmonum bona sua diripientium resistere non valet. Aliis vero, non necesse est, ut vim inferant, quia paratos ad obsequium voluntatis suæ semper eos inveniunt. Itaque regionem istorum coram eis alieni devorant, quia immundi spiritus omnia bona conversationis eorum videntibus ipsis comedunt.

Et desolabitur ipsa regio conversationis eorum sicut in vastitate hostili; quia super eam hostis antiquus cum omni exercitu vitiorum irruit, ut quidquid in ea superest viride aut fertile, quidquid pulchrum aut utile, quidquid justum et bonum, barbarica crudelitate destruat et dissipet. Sequitur:

VERS. 8. — « Et derelinquetur filia Sion ut um-

braculum in vinea, et sicut tugurium in cucumerario, et sicut civitas quæ vastatur. »

Quia Sion *speculatio* dicitur, *filia Sion* est anima, quæ solebat in alto residere velut in specula, et adventus tentationum sollicita circumspectione prævidens refellere. Sic enim vigilabat, ac sibi prævidebat, dum Christum habitatorem haberet, qui eas mentes, quas inhabitat, vigilare facit, et ad suimet custodiam sollicitas esse. Nunc vero relinquenda dicitur *ut umbraculum in vinea, et sicut tugurium in cucumerario*. In umbraculo quippe vineæ custos manet, qui eam diu noctuque custodiat, et eo recedente umbraculum remanet vacuum. Similiter et hæc filia Sion custodem in se Deum habuit habitatorem, dum actiones ejus, quæ per vineam intelligi possunt, bonis fructibus abundarent. Sed quia nunc regionem conversationis ejus alieni devorant, et fructum justitiæ jam in actionibus suis habere desistit, relinquitur a Deo, sicut umbraculum vineæ deserit a custode. « Spiritus sanctus enim disciplinæ effugiet sictum, et auferet se a cogitationibus, quæ sunt sine intellectu, et corripietur a superveniente iniquitate (*Sap. 1, 5*). » Et *relinquetur sicut tugurium in cucumerario*; quia quemadmodum custos deserit mane tugurium, ubi cucumeres ex hortulo defecerint; ita Deus istam relinquet, quia jam in ejus vita et moribus dulcedines spiritualium fructuum velut cucumeres deficiunt.

Relinquetur etiam *ut civitas, quæ vastatur*. Quia sicut ex urbe, quam hostes capiunt, habitatores ejus, qui possunt evadere, fugiunt, et eam inimicis sine contradictione delendam relinquunt; ita Pater et Filius, et Spiritus sanctus exeunt de hac anima, quam hostis antiquus ingreditur, et ipsarum demonibus prædandam atque delendam relinquunt. Talia sustinet unaquæque anima, quæ per socordiam suam a malignis spiritibus invaditur, et a Christo deseritur. Ubi et vox eorum, qui talia passi sunt, protinus subditur dicens:

VERS. 9. — « Nisi Dominus exercituum reliquisset nobis semen, quasi Sodoma fuisset, et quasi Gomorrha similes essemus (19). »

Omnes enim Sodomitæ et Gomorrhæi « peccatores et pessimi erant nimis (*Gen. xiii, 13*), » unde et perire pariter meruerunt. Si igitur essent in hac carnalium multitudine soli peccatores reprobi, quos gehennæ devoraturum est incendium, tunc plebs ista foret *quasi Sodoma, et Gomorrha*. Sed ne Sodomæ et Gomorrhæ ex toto similis fiat, relinquitur ei *semen*; quia ex multitudine malorum nascuntur aliqui boni, qui ad præbendum sanctitatis exemplum reserventur. Ne ergo tota simul religio in hac plebe sicut apud Sodomitas pereat, et sola regnet iniquitas, relinquitur semen, quod salvetur; quia licet multitudo reproborum semper in hoc sæculo nimis abundet, et maxime circa mundi finem (20), nequaquam tamen electi omnes ita subtrahuntur, ut so-

(19) Cod. G., *semen, quasi Sodoma et Gomorrha fuisset*.

lummodo perversi remaneant sicut in Sodomis, sed omni tempore justii relinquuntur, qui cæteris exempla bonitatis ostendant.

Deum vero *Dominum exercituum* appellat; quia ipse judicium omne per angelos exercet in homines, et ejus imperio non solum bonorum angelorum exercitus, qui intueantur electos, ac subliment, famulantur, sed etiam malorum, qui impoenitentes, ac reprobos decipiant et aggravent. Hæc autem de acquiis eorum, qui cœlestia quærere desistentes a bonis operibus deficiunt, et propter vitam præsentem sola, quæ mundi sunt, sectantes innumeris peccatis implicantur, propheta disseruit. Multa enim in prioribus voluminis hujus partibus de illis, qui posteriora respiciunt, et retro convertuntur, dicit.

Historialiter autem ab eo quod dictum est: *Terra vestra deserta*, usque ad illud quod dicit: *Sicut civitas quæ vastatur*, prænuntiatum est excidium patriæ Judæorum, quod Romani perpetraverunt, quando facta est per Vespasianum *terra eorum deserta, urbesque succensæ, et regio tota coram eis ab exercitu alienigenarum devorata*, quando obsidente et capiente filio ejus Tito Jerusalem, relicta est sicut tugurium in cucumerario, et sicut urbs, quæ vastatur. Et nisi Dominus exercituum reliquisset eis semen, quasi Sodoma vel Gomorrha fuissent; quia nisi Christus apostolos, et qui per verbum eorum crediderunt, ibi reliquisset a Passione ejus, illic solummodo reprobi sicut in Sodomis remansissent. Sed quia perversitas eorum adeo crevit, ut de finibus suis omnes credentes expellerent, subjungens propheta sic eos alloquitur:

VERS. 10. — « Audite verbum Domini, principes Sodomorum, percipite auribus legem Dei nostri populi Gomorrhæ. »

Merito enim sacerdotes atque pharisæi et scribæ principes Sodomorum vocati sunt, atque Synagoga populi Gomorrhæ. Quia sicut Sodomitæ « vallaverunt domum sancti Lot a puero usque ad senem omnis populus simul (*Gen. xix, 1*), » et ut ipsi deleantur de terra, Lot justus cum uxore et filiabus de medio eorum eductus est; sic et omnes isti primitivam Ecclesiam unanimi conspersione invaserunt, et ut ipsi qui perirent, soli remaneret, Christum a se cum suis omnibus migrare fecerunt. Et quia se ista quasi zelo legis facere cæci putabant, recte ad audiendam legem invitantur. De Christo enim dixerat legislator: « Quoniam prophetam » vobis « suscitabit Dominus Deus vester de fratribus » vestris, « tanquam meipsum, audietis juxta omnia, quæcunque locutus fuerit vobis (*Deut. xviii, 15*). » Et iste, quem legislator in omnibus audiendum præceperat ait: « Lex et prophetæ usque ad Joannem: ex eo regnum Dei evangelizatur (*Luc. xvi, 16*). » Bene igitur audire verbum Domini, et legem auribus percipere jubentur, ac de lege quasi transgressores arguuntur, qui legem adhuc carnaliter

(20) Cod. G., *mundi terminum*.

observare volebant, quam ille terminatam esse docet, quem Moyses audiendum esse docet, juxta omnia, quæcunque locutus fuerit. Unde mox universa, quæ secundum legem offerri celebrari solebant, Dominus respuens subdit :

Vras. 11. — « Quo mihi multitudinem victimarum vestrarum, dicit Dominus? Plenus sum, » etc.

Quo defertis, inquit, mihi multitudinem carnalium victimarum vestrarum? Non indigeo vestris muneribus, quia *plenus sum* bonis omnibus. Reliqua vero, quæ nunc de reprobatione talium oblationum et solemnitatum subjiciuntur, quia sunt manifesta, secundum litteram exponere superfluum ducimus. Fuerunt enim hæc sacrificia tempore sub quodam necessaria propter rationem prophetico-
rum sacramentorum, quæ continebant. Sed ex quo Lex et Prophetæ prophetare desierunt, et quæ prophetata fuerant, apparuerunt; nihil jam utilitatis conferunt, sed magis Deum ad iracundiam provocant, et Idcirco respuuntur, quia veniente sole effugatur umbra. His igitur omissis ad spiritalem intelligentiam revertamur. Ait enim :

Audite verbum Domini, principes Sodomorum, percipite auribus legem Dei nostri populus Gomorrhæ. Et quos nunc principes Sodomorum et populum Gomorrhæ nominet, manifestum est ex superioribus; eos nimirum, de quibus supra dixit: *Væ genti peccatrici, populo gravi iniquitate, semini nequam, filiis sceleratis.* Et: *A planta pedis usque ad verticem non est in eo sanitas, et cætera, quæ ibi locutus est.* Jure enim, qui tales sunt, tam abhorrendo censentur, quia omnem miserunt sanctitatem, et omnibus nequitibus sunt repleti, atque suis iniquitatibus privatum et publicè dediti. Sed audire verbum Domini et auribus percipere legem ejus præcipiuntur, ut ibi se cum omnibus, quæ agunt, damnatos noverint. Non enim ad illos ista dicuntur, qui Deum penitus ignorant, sed ad eos potius, qui confitentur se nosse Deum, factis autem negant, cum sint abominati; et incredibiles, et ad omne opus bonum reprobi (Tit. 1, 16).

Fit tamen plerumque, ut hujusmodi homines jejuniis vacent, et pluribus modis seipsos affligant. Sed quoniam inquinatæ sunt eorum et mens et conscientia, nihilque simplici corde faciunt, omnes abstinentiæ vel afflictiones eorum, et opera Deo placere nequeunt. Unde per increpationem subditur: *Quo mihi multitudinem victimarum vestrarum dicit Dominus? Plenus sum.* Multitudinem victimarum mactant, qui carnem multipliciter edomant. Sed ubi in corde crimina regnant, vel etiam aliquoties in actibus, non potest exteriorem honestatem approbare internus Judex mentium, et inspector occulorum actuum. Non enim externæ conversationis munera suscipit, quando corda reprobant, nec opera, quæ foris ostentantur, laudat, quando ea, quæ in absconditis fuerint, damnat; et qui

bonis suis plenus est, exteriori datione non pascitur. Qui et subjungit :

« *Holocausta arietum, et adipem pinguium, et sanguinem vitulorum, et agnorum, et hircorum nolui.* » Holocaustum in lingua nostra *totum incensum* sonat; Holou quippe *totum* dicitur, caustis *incensio*; inde compositis partibus holocaustum dicitur, id est *totum incensum*. Holocaustum igitur offert, qui se totum igne compunctionis in oratione succendit. Sed *holocausta arietum* Deus noluit. Arietes quippe gregibus principantur. Et quid nunc per arietes nisi illi figurantur, qui inter innocentes, ac simplices velut inter oves positi se ipsos meliores æstimant eis, ac præferunt, et quasi dominationem inter eos vindicare sibi cupiunt? Quorum nimis perversus est conatus; quia dum se cæteris meliores ostendere, vel præferre quærunt, illum imitantur, qui socialem angelorum vitam despiciens, cunctis sublimior fieri per superbiam voluit dicens: « Super astra Dei exaltabo solium meum (Isa. xiv, 13). » id est super angelos.

Respuuntur itaque *holocausta arietum*; quia non suscipiuntur orationes superborum, quando se totos aliquoties igne compunctionis ad horam incendunt. Nam ut oratio divinitus suscipiatur, necesse est, ipsam ex humilitatis radicis consurgere, et cor in humilitate deinceps perseverare. Possunt autem et principes hæreticorum per arietes intelligi, qui, si ista, quæ diximus, holocausta obtulerint, non suscipiuntur. Neque enim solummodo de malis ca-
tholicis nunc agitur, sed etiam de nonnullis hæreticis.

Quid vero per *adipem pinguium* nisi lacrymæ expromptus orantium? Qui enim in precibus suis non flet, macram victimam offert; qui autem in oratione lacrymis infunditur, victimam pinguem immolat. Et sunt apud hæreticos nonnulli velut religiosiores, qui precibus et lacrymis occupari videntur. Sed eorum fletus et supplicationes Dominus se nequaquam approbare designat, dum *adipem pinguium* se noluisse testatur. Qui et *sanguinem vitulorum et agnorum et hircorum* noluit. Solebat autem sanguis victimarum sæmpre offerri Domino; nam carnes earum comedebantur. Et cum per *sanguinem* peccatum intelligi soleat, quid per effusionem sanguinis, qui offerebatur, nisi peccati confessio designatur? In *vitulis* autem superbos sæculi potentes, humilium oppressores, et noxia libertate dimissos sibi accipere possumus, quia Chaldæis Jeremias ait: « Exsultatis, et magna loquimini diripientes hæreditatem meam, quoniam effusi estis sicut vituli super herbam, et mugitis [mugistis] sicut tauri (Jer. 1, 11). » In *agnis* vero lascivos; quia Salomon de meretrice locutus subjecti de libidinoso dicens: « Statim eam sequitur quasi bos ductus ad victimam, et quasi agnus lascivus (Prov. vii, 22). » In *hircis* autem quoslibet peccatores; quia judex « statuet oves quidem a dextris tuis, hædos autem a sinistris (Matth. xxix, 33). » Sanguinem igitur vitulorum, et agnorum, et

hircorum notuit Deus; quia confessio eorum nunquam illi placuit, qui noxia libertate dissoluti sunt ut vituli deprecantes aliorum bona, et qui lasciviam sequuntur ut agni, cæterorumque peccantium, qui per hircos significantur. Quoniam sic peccata sua confiteri solent, ut non penitus ea relinquere velint, sed ad tempus intermittere, et post repetere, aut etiam quædam adhuc in corde suo retineant, et quædam confiteantur, vel aliquo errore mens eorum captiva tenetur. Unde cum ad Ecclesiam hæc et huiusmodi sacrificia detulerint, sicut subjungitur, dicit eis Dominus :

VERS. 12. — « Cum veniretis ante conspectum meum, quis quæsit hæc de manibus vestris, ut ambularetis in atriis meis? »

Dicitum est enim superius de hoc populo, quia *a planta pedis usque ad verticem*, id est a minima et extrema actione usque ad fidei celsitudinem *non est in eo sanitas*; et ideo ista nunc convenienter intelliguntur ad eos dici, qui infirmas actiones faciunt, et sanam fidem non habent, id est ad sectatores hæreticos Simonis, qui ordinationes, et ecclesias, cæteraque sacra vendunt vel emunt, aut mercatoribus huiusmodi consentiunt. Nam, cum in Ecclesiam emptitiam convenerint, et oblationes suas obtulerint, dicit eis, ut præmissum est, Dominus : *Cum veniretis ante conspectum meum, quis quæsit hæc de manibus vestris, ut ambularetis in atriis meis?* Neque enim Deus ista de manibus eorum quærit unquam, aut suscipit. « Sine fide enim impossibile est placere Deo (Hebr. xi, 6). » Unde et subdit :

VERS. 13. — « Ne afferatis ultra sacrificium (21) frustra. »

Ultra, id est postquam per simoniacam hæresim locum hunc cepistis, nolite jam in eo sacrificium offerre, quia profanatus est. Vel *ultra*, id est postquam infecti estis venenis Simonis, *ne afferatis sacrificium*, quia non suscipiam illud de manibus vestris amplius, quoniam reprobi sacerdotio semper habemini. Sequitur :

« Incensum abominatio est mihi. » Incensum, quod a talibus offertur in huiusmodi loco detestatur Dominus. Similiter et omnes solemnitates eorum se exsecrari demonstrat, subjungens : « Neomeniam et Sabbatum, et festivitates alias non feram, iniqui sunt cœtus vestri. »

VERS. 14. — « Kalendas vestras et solemnitates vestras odovit anima mea; facta sunt mihi molesta, laboravi sustinens. »

Quid enim per *Neomeniam*, et *Sabbatum*, et *Kalendas* ac *solemnitates* exprimitur, nisi omne quo ab istis festive celebratur? Faciant ergo Simoniaci vel alii hæretici quamlibet magnas et frequentes solemnitates (22), Deo absque dubio nimis sunt odibiles. *Iniqui sunt enim cœtus eorum in festivitatibus suis congregatorum*, quia omnes infecti sunt veneno hæ-

A reticæ impietatis, et ideo quiddam faciunt, abominatur Dominus.

Possumus autem hæc ad malos catholicos referre. Incensi enim nomine virtus orationis exprimitur, dicente Psalmista : « Dirigatur oratio mea sicut incensum in conspectu tuo (Psal. cxi, 2). » Orationem ergo iniquorum repellens Dominus ait : *incensum abominatio est mihi*. Nam juxta Salomonem : « Qui declinat aurem suam ne audiat legem, oratio ejus erit execrabilis (Prov. xxviii, 9). »

Neomenia vero Græcum est vocabulum; et *νέων Neon* quidem dicitur *novum*, *μήνη* autem *luna*. Inde composito nomine vocatur *Neomenia*, festivitas *novæ Lunæ*, quam Hebræi (23) celebrant in exordio mensium. *Neomenia* itaque *nova Luna* interpretatur. Et quid est *nova luna*, nisi *nova vita*? Et sunt nonnulli, qui ad vocem prædicationis quasi ex conversatione compuncti habitum, non animum mutant, ita ut religiosam vestem sumant, sed ante acta vitia non calcent, de ostensis quibusdam bonis ante humanos oculos superbiunt, præsentis mundi lucra inhianter quærentes, et de solo exteriori habitu, quem sumpserunt, sanctitatis fiduciam habentes. Horum ergo neomenia, id est fictio *novæ conversationis onerosa* est Deo.

Per *Sabbatum* autem quid intelligi debet nisi cessatio malorum operum? (Exod. xxxi, 15.) In Sabbato enim ab exteriori actione jussum est cessari. Sed qui foris a perverso opere quiescit, et intus pravis desideriis laborat, hujus Sabbatum grave est Deo. *Festivitatem* quoque agit, qui corde exultante Deum laudat. Sed *festivitas* laudationis ejus, de quo scriptum est : « Confitebitur tibi, cum benefeceris ei (Psal. xlviii, 19), » grata Deo non est; quia in prosperis laudat, et in adversis murmurat, et magis enim ob præsentia bona quam ob futura diligit. Bene itaque his, qui sub ostentatione justitiæ vitiis suis deserviunt, « habentes speciem quidem pietatis, virtutem autem ejus abnegantes (II Tim. iii, 5). » Dominus dicit. Quia *neomeniam et Sabbatum, et festivitates alias non feram, kalendas quoque et solemnitates eorum odovit anima ejus*, id est voluntas illius. Vel, cum sit Deus cunctis corporibus exterior, cunctis mentibus interior, ea ipsa vis ejus, qua omnia penetrat, omnia disponit, anima illius appellatur.

Hoc autem inter kalendas et neomeniam distinguere potest, ut neomenia sit nova conversatio, kalendæ vero exordium est. Sed cum dicit : « Kalendas vestras odovit anima mea, » exsecratur eorum exordia, qui sic ad fidem convertuntur ut Simon ille Magus (Act. viii), vel sic ad cœnobialem vitam convertuntur ut Ananias et uxor ejus, qui de pretio agri sui fraudem fecerunt (Act. v). Eorum detestatur exordia, qui Monachiam vel canonicam (24) sive ordinationem mercantur. Eorum damnat exordia, qui non intentione Deo placendi, sed ob aliud

(21) Cod. G., *sacrificia*.

(22) Codd., *solemnitates, quia Deo, etc.*?

(23) Cod. G., *Judæi*.

(24) Cod. G., *canonicam*.

aliquid veniunt ad monasticum ordinem. Omnes A denique redarguit, qui bonum opus non bona intentione inchoant. Horum igitur omnium atque similitum execratur mala initia, cum se kalendas eorum odisse denuntiat.

Nec solum talium kalendas eorum exordiorum abominatur, sed et solemnitates sequentium cogitationum, quibus se taliter incēpisse lætantur, vel illud quod ita cōperunt, gaudent retinere, et in eodem malo perseverare. Quo contra de pœnitente dicitur ei : « Quoniam cogitatio hominis confitebitur tibi, et reliquæ cogitationis solemnia celebrabunt tibi (25) (Psal. lxxv, 11). » Prima igitur cogitatio pœnitentis est, quæ damnat vitam priorem, et incipit confiteri; reliquæ vero cogitationis sunt, quæ et solemnia Deo celebrant, ut, qui liberatus B est, a peccatis, liberatori semper gratias agat, memor malorum, a quibus liberatus est. Sicut ergo prima cogitatio confitentis Deo grata est, et reliquæ cogitationis solemnia gratiarum pro sua ereptione celebrantis; ita kalendæ mali exordii istorum et solemnitates sequentium in eadem intentione cogitationum odibiles ei sunt.

Qui et se laborasse denuntiat, quia duras istorum pravitates jam tempore multo portavit. In se quidem quietus semper et incommutabilis permanet; sed tamen se, sicut dictum est, laborasse dicit quoniam duras iniquitates eorum diu jam cum tædio sustinuit. Qui etiam prolixas orationes nonnunquam faciunt, sed a pravitatibus suis non corriguntur. Unde subditur :

VERS. 15. — « Cum extenderitis manus vestras, avertam oculos meos a vobis; et cum multiplicaveritis orationem, non exaudiam : Manus enim vestræ sanguine plenz sunt. »

Consuetudo namque orantibus est, ut in altum manus extendant. Sed Deus extensionem manuum iniquorum non dignatur aspicere, orationem quoque eorum, licet multiplicatam exaudire recusat. Non enim propter prolixitatem, sed propter puram devotionem exaudit orationem. Unde suis in Evangelio præcipit : « Orantes, nolite multum loqui sicut ethnici; putant enim quod in multiloquio suo exaudiuntur. Nolite ergo eis assimilari (Matth. vi, 7). » Frustra igitur oratio multiplicatur a pravis D hominibus; quia non sermo oris, sed affectus cordis pensatur a Domino, et vita eorum obsistit, ne preces exaudiantur. Nam manus eorum plenz sunt sanguine, opera eorum preces a Domino respuuntur, et manus actionum eorum plenz sunt sanguine mortis animarum, quas interficiunt. Quibus lucusque in ira sua Deus locutus est, sed hinc secundum misericordiam loqui inchoat, dicens :

VERS. 16. — « Lavamini, mundi estote, auferte malum cogitationum vestrarum ab oculis meis. »

Lavamini per pœnitentiam; mundi estote per continuam observationem munditiæ. Nam lavatur et

mundus est, qui et præterita peccata plangit, et plangenda non admittit; lavatur autem, et non est mundus, qui plangit, quod gessit, nec deserit, et post lacrymas hæc, quæ fleverat, repetit. Post lavacrum namque mundus esse negligit, quisquis post lacrymas vitæ innocentiam non custodit. Et lavantur itaque, et nequaquam mundi sunt, qui commissa flere non desinunt, sed rursum flenda committunt.

Malum quoque perversarum cogitationum auferri debet ab oculis ejus, ut non solum in actione, sed in corde purissimus sit in conspectu ejus. « Occultas, inquit Gregorius (Moral. lib. xv, c. 5), mentis nostræ vias nullus hominum videt; et tamen ante Dei oculos tot gressus ponimus, quot affectus movemus. Toties ante illum labimur, quoties a recto itinere infirmæ cogitationis pede claudicamus. Nisi enim in conspectu ejus iste assiduus nostrarum mentium lapsus incresceret, minime clamaret : Auferte malum cogitationum vestrarum ab oculis meis. Hæc nimirum dicens vim coopertæ malitiæ nostræ quasi ferre se non posse testatur, quæ operta illi esse non potest, quia videlicet importune conspectui ejus ingeritur, quidquid a nobis illicitum occulte cogitatur. » Adhuc vero quid agendum sit, Dominus insinuat subdendo : « Quiescite agere perverse. »

VERS. 17. — « Discite benefacere, quærite iudicium, subvenite oppresso, iudicate pupillo, defendite viduam. »

VERS. 18. — « Et venite, et arguite me, dicit Dominus. »

Quiescite jam, inquit, a perversis actibus, et ex doctrina veritatis discite benefacere. Quærite iudicium a sapientibus, ne, si iudicium inter dissidentes factum non fuerit, prævaleat iniquus adversus justum. Et misericorditer subvenite oppresso, ac iudicate pupillo, id est causam ejus in iudicio defendite. Et cum hæc feceritis, venite et arguite me. Quem arguimus, rationis auctoritate contraimus. Et quid est, quod Dominus agere sancta nos jubet, adjungens (26) : Venite et arguite me, nisi quod aperte insinuat, quantam bonis actibus fiduciam præstat? Ac si aperte dicat : Recte agite, et animadversionis meæ motibus non jam per deprecationis gemitum, sed per fiduciam auctoritatis obviare. Hinc etenim Joannes dicit : « Si cor nostrum non reprehenderit nos, fiduciam habemus ad Deum (I Joan. iii, 21). » Hinc est quod argumentem se Dominus habuisse conqueritur, cum per prophetam dicit : « Quæsi de eis virum, qui interponeret sepe, et staret oppositus contra me, propterea [Vulg., pro terra] ne dissiparem eam et non inveni (Ezech. xii, 30). » Deum itaque arguere est iræ ejus fiducialiter obviare, et impetum animadversionis ejus retinere. Qui adhuc indicat, quid illi

(25) Alias, diem festum agent tibi.

(26) Cod. G., admonens subjungit.

per misericordiam consequantur, qui prædicta pietatis opera fecerint, dicens ad illos :

« Si fuerint peccata vestra ut coccinum, quasi nix dealbabitur, et si fuerint rubra, quasi vermiculus, quasi lana alba erunt. » Idem vero *coccinum* est sive coccus, quod *vermiculus*. David autem, cum de perpetracione incestus et homicidii pœnitentiam ageret, dixit : « Libera me de sanguinibus (*Psal.* l., 16). » Et quemadmodum apud David appellatione sanguinum ingentia peccata signantur, ita nunc apud Isaiam sanguineo colore vermiculi et cocci. Nix autem et alba laxe purgationem peccatorum et candorem justitiæ insinuat. Quia et prædictus Psalmista tunc ait : « Lavabis me, et super nivem dealbabor (*ibid.*, 9). » Cum itaque rubra peccata promittit dealbanda, sine dubio ingentes culpas in candorem justitiæ convertendas pollicetur. Sequitur :

VERS. 19. — « Si volueritis, et audieritis me, bona terræ comeditis. »

Si bonam, inquit, voluntatem habueritis et me obtemperanter audieritis, bona terræ illius comedetis, de qua dictum est : « Credo videre bona Domini in terra viventium (*Psal.* xxvi, 13). » Cum enim omnia elementa in motu sint, terra vero sola immobilis maneat, et solida, congrue per terram designatur soliditas æternæ quietis. Hujus terræ bona sunt amœna jucunditas patriæ cœlestis, societas angelorum, præsentia divinæ visionis, et cætera quæ nec « oculus vidit, nec auris audivit, nec cor hominis » excogitare potuit, quæ tunc animæ justorum comedunt, cum in his omnibus sine fine delectantur. Deinde subditur contrarium :

VERS. 20. — « Quod si nolueritis, et me ad iracundiam provocaveritis gladius devorabit vos. »

Si nolueritis, inquit, bona facere, et non addidit : et iram meam merueritis, sed : me ad iracundiam provocaveritis. Iram quippe Dei mereri est etiam nesciendo peccare ; eum vero ad iracundiam provocare est mandatis illius sciendo contraire ; scire bonum, sed despiciere, facere posse nec velle. Gladius autem vel sententiam judicis, vel cruciatum perpetuæ mortis designat. Nomine enim gladii quidquid occidit, quidquid cruciat, quidquid punit, et quidquid urit, intelligitur. Gladius ergo devorabit eos, qui Deum ad iracundiam provocant, cum audierint ab illo : « Discedite a me, maledicti, in ignem æternum (*Matth.* xxv, 41). » Tunc enim, ut scriptum est, « introibunt in inferiora terræ, tradentur in manus gladii (*Psal.* lxxii, x). » Quæ, quia sanctus vir non a semetipso dixit, sed a Deo audivit, congrue subjungit : « Quia os Domini locutum est. » Os enim Domini superna inspiratio est, quæ in mente prophetæ sine verborum sono formavit omnia, quæ foris ipse narravit. Sequitur :

VERS. 21. — « Quomodo facta est meretrix civitas fidelis, plena judicii? Justitia habitavit in ea, nunc autem homicidæ. »

(27) Alias, Dominus Deus exerc.

A Jerusalem civitas fidelis fuit, dum Christum regem suum in carne venturum fideliter expectaret. Fuit et plena judicii, dum in ea rectum frequentaretur judicium. Sed tunc facta est meretrix, quando Regem et Sponsum, quem venturum expectaverat, venientem suscipere noluit, sed antiquum corruptorem animæ admisit. Respuit enim legitimum virum, et suscepit adulterum.

Justitia quondam habitavit in ea; nunc autem homicidæ, qui et ipsum Salvatorem interfecerunt. Hoc enim de eo temporis spatio dictum est, quod a Passione Domini usque ad destructionem Jerusalem fluxit, ad quam subjungitur :

VERS. 22. — « Argentum tuum versum est in scoriam, vinum tuum mistum est aqua. »

B Purgamenta sordesque metallorum vocantur scoria, quæ et rubigo potest appellari. Argentum vero nitor sacri eloquii est, quoniam « eloquia Domini eloquia casta, argentum igne examinatum (*Psal.* xi, 7). » Et : « Argentum electum lingua justii (*Prov.* x, 20); » scoria autem traditiones Pharisæorum designat; Argentum ergo Jerusalem versum est in scoriam; quoniam sordida interpretatione Scribarum et Pharisæorum obscurata sunt apud Judæos eloquia sacra. Vinum quoque spiritualis sensus divinæ Scripturæ est, quo mentes audientium inebriantur : aqua vero carnalis intelligentia ejusdem Scripturæ, sicut Evangelista designat, ubi Dominum aquam in vinum convertisse refert. (*Joan.* ii). Vinum ergo Jerusalem mistum est aqua, quia sensus Scripturarum apud Judæos emollitus est admistione carnalis intelligentiæ. Sequitur :

VERS. 25. — « Principes tui infideles, socii furum, omnes diligunt munera, sequuntur retributiones. Pupillo non judicant causa viduæ non ingreditur ad eos. »

C Principes tui infideles, quoniam nec Deo nec homini fidem servant. Socii furum, quia et consocii sunt et participes furtorum. Omnes diligunt munera, quia pleni sunt avaritia. Sequuntur retributiones, quia vicem ab eis recipere quærent, quibus aliquid boni tribuunt. Pupillo non judicant, id est partem illius in judicio non sustentant. Et causa viduæ non ingreditur ad eos, quia non dignantur eam audire, vel ab injuriis defendere, quoniam non habet munera quæ porrigat. Tales erant principes Synagogæ, quando Salvator in terris corporaliter conversabatur. Sequitur :

VERS. 24. — « Propter hoc ait Dominus (27) exercituum fortis Israel : Heu! consolabor super hostibus meis, et vindicabor de inimicis meis. »

Vindicavit se Dominus de inimicis suis Judæis per Romanos. Unde et Dominum exercituum se dicit, quoniam exercitus Romanorum licet nescientes ei servierunt, dum Judæos ob necem ipsius perimerent et exterminarent. Vindicavit se de eis et postquam occisi sunt, quia pœnis gehennalibus eos tradidit. Et in hac ultione famulati sunt ei exer-

citius angelorum. *Fortem* quoque eum senserunt, A quem in passione putaverunt infirmum. In quorum ultione se *consolandum* asseruit, quia malis actibus eorum contristabatur. Sed cum dicit : *Heu! consolabor*, ostendit talem se noluisse consolationem. Unde et alibi loquitur : « Nunquid voluntatis meæ est mors impij, dicit Dominus, et non magis ut convertatur a viis suis et vivat? » (*Ezech. xviii, 23.*) Invitus enim facit, quando peccatores justo judicio compellit, « qui omnes homines vult salvos fieri (*1 Tim. ii, 4.*) » Deinde quod ad Jerusalem dicit, ad eam solummodo partem Israeliticæ gentis, quæ per novam prædicationem creditura erat, pertinet.

VERS. 25. — « Et convertam, » inquit, « manum meam ad te, et excoquam ad purum scoriam B tuam, et auferam omne stannum tuum. »

VERS. 26. — « Et restituam judices tuos ut fuerunt prius, et consiliarios tuos sicut antiquitus. Post hæc vocaberis civitas justi, urbs fidelis. »

Manum suam quippe convertit ad electam partem, quia relictis infidelibus signa et miracula potenter per eos qui crediderunt, operatus est ad illuminationem cæterorum. « Illi autem profecti prædicaverunt ubique Deo cooperante, et sermonem confirmante sequentibus signis (*Marc. xvi, 20.*) »

Et excoxit ad purum scoriam eorum, quoniam ablata rubigine veteris intelligentiæ « aperuit illis sensum, ut intelligerent Scripturas (*Luc. xxiv, 45.*) » C Et abstulit omne stannum eorum, quia ritum judaizandi paulatim ab eis removit. Stannum quippe, quod argenti colorem habet, sed vile metallum est, doctrinam Phariseorum designat, quæ divinis eloquiis videbatur similis. Stannum erat doctrina eorum, de quibus scriptum est : « Surrexerunt autem quidam de hæresi Phariseorum, qui crediderant dicentes : Quia oportet circumcidi eos, præcipere quoque servare legem Moysi (*Act. xv, 5.*) » Sed hoc stannum abstulit Dominus dicente Petro : « Quid tentatis imponere jugum super cervicem discipulorum, quod neque patres nostri neque nos portare potuimus? (*Ibid. 10.*) »

Et restituit judices Ecclesiæ, sicut fuerant prius; D quia, quæ patriarchas et judices prophetas antiquitus habuerat, nunc vice eorum apostolos et prophetas atque doctores accepit. Unde et alias dictum est ei : « Pro patribus tuis nati sunt tibi filii, constitues eos principes super omnem terram (*Psal. xlvi, 17.*) » Post hæc non jam Synagoga Judæorum, sed civitas justi vocata est, id est Ecclesia Christi, de quo canitur, quia « justus Dominus in omnibus verbis (28) suis (*Psal. cxlii, 17.*) » Qui et fidelis est, quia fidelis Dominus in omnibus verbis suis. Vel urbs ejus est fidelis, quia fidem integram regio suo servat. Sequitur :

(28) Cod. G., in omnibus viis suis.

VERS. 27. — « Sion in judicio redimetur, et reducent eam in justitia. »

Sion quæ dicitur specula, plebs Judæorum (29) est, quæ Christi præstolabatur adventum. Hanc enim Christus ipse veniens suo sanguine redemit in illo judicio discretionis, de quo dictum est : « Judica me Deus, et discerne causam meam de gente non sancta (*Psal. xlii, 1.*) » Vel : « Nunc judicium est mundi, et nunc princeps hujus mundi ejectionem foras (*Joan. xii, 31.*) » Et postquam redempta est, reduxerunt eam apostoli ad gratiam Redemptoris. Et hoc fecerunt *in justitia*; quia justum erat, ut ea filiis impleverentur, quæ fuerant promissa patribus. In hac justitia Petrus eam reducere satagebat, cum diceret : « Vos estis filii prophetarum, et testamenti, quod disposuit Deus ad Patres nostros, dicens ad Abraham : Et in semine tuo benedicentur omnes familiæ terræ : vobis primum Deus suscitans Filium suum, misit eum benedicentem vobis, ut convertat se unusquisque a nequitia sua (*Act. iii, 25, 26.*) » De illis vero, qui converti noluerunt, subjunctum est :

VERS. 28. — « Et conteret scelestos, et peccatores simul. »

Scelesti namque, id est illi qui Dominum occiderunt, et cæteri peccatores illius populi in obsidione Jerusalem simul contriti sunt pestilentia et fame et gladiis. *Scelestos* enim vocat homicidas. De illis quoque qui relicto quondam templo Domini conversi sunt ad idola, sequitur : « Et qui dereliquerunt Dominum consumentur. »

VERS. 29. — « Confundentur enim ab idolis, quibus sacrificaverunt. »

Nam et hi consumpti sunt gladio Babyloniorum et Assyriorum; et confusi sunt ab idolis suis, cum in tempore necessitatis juvari nequiverunt ab eis. Ad quos versa locutione subditur : « Et erubescetis super hortis, quos elegeratis. »

VERS. 30. — « Cum fueritis velut quercus defluentibus foliis, et velut hortus absque aqua. » Hortos elegerant, ut in eorum amenitate sacrificarent idolis. Sed super eis tunc erubuerunt, quando facti sunt ut quercus, de qua decidunt folia, et ut hortus, qui non irrigatur aqua. Quercus enim, cum folia deponit, jam nec fructum habet, nec foliorum viriditatem; et hortus sine aqua nihil viride gignit, sed quidquid in eo virebat, marcescit. Sic et isti per Assyrios et Chaldæos omnem venustatem pristini decoris et florem gloriæ, viroremque virtutis atque fructum honorum suorum perdiderunt, nec ad integrum postea recuperaverunt. Sequitur :

VERS. 31. — « Et erit fortitudo vestra ut favilla stupæ, et opus vestrum quasi scintilla, et succendetur utrumque simul, et non erit qui exstinguat. »

Pugnantibus Chaldæis et obsidentibus Jerusalem, fortitudo Judæorum contrita et arida fuit ut favilla

(29) Cod. G. Hebræorum.

stuparum; et opus rebellionis eorum sicut scintilla A
 genuit ignem, quo ipsi cremarentur. Nam si colla
 sua jugo Chaldæorum subjecissent, non perimeren-
 tur. Unde Jeremias: « Qui habitaverit in urbe hac, »
 inquit, « morietur gladio et fame, et peste: qui au-
 tem egressus fuerit, et transfugerit ad Chaldæos,
 qui obsederunt vos, vivet, et erit ei anima sua qua-
 si spoliū (*Jerem. xxi, 9*). » Opus igitur eorum in-
 star scintillæ effecit ignem, qui sicut stupam incen-
 deret fortitudinem eorum; quia, dum permanerent
 in Jerusalem, ut se defenderent, sic offenderunt
 Chaldæos, ut nullam mererentur clementiam. Et in
 illa tribulatione succensum est utrumque simul; et
 fortitudo, et opus eorum, nec fuit qui exstingeret
 ignem tribulationis illius, sed diutissime permissi
 sunt in eo decoqui. Adhuc autem ista, quæ discussi-
 mus, retractare libet.

« Quomodo, » inquit, « facta est meretrix civitas
 fidelis, plena iudicii? Justitia habitavit in ea, nunc
 autem homicidæ. » Civitas fidelis est Ecclesia, quæ
 Christo regi fidem suam servat. Et ipsa est vel fuit
 plena iudicii, omnia recte dijudicans et æqua lance
 quæque pensans. « Spiritalis enim iudicat omnia (*I
 Cor. ii, 15*). » Quæ scilicet Ecclesia non tota quidem
 facta est, aut fiet unquam meretrix; sed, quia pro-
 pinquante mundi termino tanta jam reprobatorum
 abundans multitudo, ut vix in ea quisquam iustorū
 appareat, miratur propheta, quomodo tantæ
 multitudinis sensus corrumpi, et castitatem, quæ in
 Christo est, amittere poterit, atque in vocem dolo-
 ris et admirationis erumpit, dicens: *Quomodo facta
 est meretrix civitas fidelis plena iudicii?* Meretrix
 enim facta est multitudo maxima populi hujus,
 qui Christianitatis vocabulum portat; quia legitimum
 virum, id est Christum deserens, fornicatur
 cum suis amatoribus, dum divinam voluntatem fa-
 cere respuit, et immundorum spirituum desideriis
 sese in voluptatibus et peccatis molliter prostituit.
 Nam et propheta, cur eam dixerit factam meretri-
 cem, consequenter insinuat, quoniam *justitia quon-
 dam habitavit in ea*, dum mandatorum cœlestium
 observatione plena esset. Nunc autem redundat homi-
 cidis, quæ alios vel gladio feriunt, vel odio habent.
 Nam « et omnis qui odit fratrem suum, homicida
 est (*I Joann. iii, 15*), » et omnis homicida sine cha-
 ritate est. Plebs ergo, quæ justitiam a se expulsi-
 et homicidis plena est, merito dicitur esse facta me-
 retrix; quia charitatem sponsi, qui Christus est,
 deseruit, et adulteris, qui sunt dæmones, ardentem
 adhæsit. Sed et nonnulli sacerdotes, qui ejus mo-
 res corrigere deberent, jam simili perversitate sunt
 depravati, ut et ipsi vitia subjectorum nutriant. Unde
 sequitur:

« Argentum tuum versus est in scoriam, vinum
 tuum mistum est aqua. » Plerumque enim doctor
 qui docere audet, quod negligit agere, cum desierit
 bona loqui, quæ operari contempsit, docere incipit

subjectos prava quæ agit, ut justo Dei iudicio jam
 non linguam bonam habeat, qui habere bonam
 actionem recusat, quatenus cum terrenarum rerum
 amori intenditur, de terrenis rebus semper loquatur,
 et locum regiminis quasi ad fructum voluptatis te-
 neat, non ad usum laboris. Argentum ergo prædica-
 tionis hujus versus est in scoriam sordidæ locu-
 tionis; quia pro cœlestibus terrena, pro spiritualibus
 carnalia, pro bonis mala loquitur.

Vinum quoque ejus, quo cæteros inebriare posset,
 mistum est aqua; quia spiritalem sensum Scripturæ
 sacræ suo sensu emollit, ut delectet potius audien-
 tes quam corrigat, nec eos igne charitatis inflam-
 met, sed in suæ sensualitatis (30) frigore torpentes
 remanere sinat.

Vel potius plebi dicitur: *Argentum tuum versus
 est in scoriam, vinum tuum mistum est aqua*; quia
 jam raro quisque eloquia divina populo Dei sine ad-
 mitione loquitur mendaciorum, et eorum quæ ad
 ædificationem non pertinent. Neque enim student
 observare moderni prædicatores hoc quod ait Pe-
 trus: « Si quis loquitur quasi sermones Dei (*I Petr.
 iv, 11*). » Et argentum plebis hujus dicitur argen-
 tum sacri eloquii, quod ipsa percipit a doctoribus.
 Hoc quoque quod subditur, evidenter depingit mo-
 res eorum, quos nunc potentia sæculari præditos vi-
 demus.

« Principes tui infideles, » et cætera. Infideles
 enim sunt sæculares isti principes; quia jam fere
 nemini fidem servant, sed erga omnes fraudulenter
 agunt. Sunt et *socii furum*, quos tuentur, et cum
 eis dividunt, quod illi furantur. « Omnes » non so-
 lum accipiunt, sed et « diligunt munera; quia non
 amore justitiæ, sed cupiditate pecuniæ consulunt
 subjectis aut opitulantur. Nam « sequuntur retri-
 butiones; » quia solummodo illis bona faciunt, a
 quibus retributionem sperant, quod electi tran-
 scendere jubentur beneficiis, cum audiunt: « Si
 bene feceritis iis, qui vobis benefaciunt, quæ vobis
 est gratia? Nam et peccatores hoc faciunt. Et si
 mutuum dederitis iis, a quibus speratis recipere,
 quæ vobis est gratia? Nam et peccatores peccatori-
 bus scenerantur, ut recipiant æqualia (*Luc. vi, 33,
 34*). » Hoc est sequi retributiones.

Prædicti vero principes « pupillo non iudicant, et
 causa viduæ non ingreditur ad eos; » quia, dum
 pro muneribus cuncta faciunt, innocentiam paupe-
 rum defendere negligunt, in quibus terrena lucra
 non sperant acquirere. « Propter hoc, ait Dominus
 exercituum fortis Israel: Heu! consolabor super
 hostibus meis, et vindicabor de inimicis meis! »
 Qui nunc malis actibus istorum irritatur, vindictam
 sumet de illis, quando de eis vindicabitur. Unde et
Dominus exercituum appellatur; quia vindictam per
 angelos exercet. *Fortis quoque Israel* dicitur, quia
 fortis potentia salvabit humiles, qui nunc affliguntur
 et damnabit potentes qui (31) eis non auxiliantur.

(30) Cod. G., *insensibilitatis*.

(31) C. Cruc., *potestates, qui*.

« Exiguo » enim, ut scriptum est, « concedetur misericordia; potentes autem potenter tormenta patientur, et fortioribus fortior instat cruciatio (Sap. vi, 7, 9). » Hostes et inimici ejus sunt præfati principes propter mala quæ descripsit eos facere, quibus judicium damnationis, ut scriptum est, imminet. Sed hæc mala, quæ depinxit hactenus, et quæ in hoc Christiano populo multiplicari quotidie cernimus, per Eliam corrigentur, ut credimus, quia Salvator in Evangelio dicit: « Elias venturus est, et restituet omnia (Matth. xviii). » Unde et hic subjungit:

« Et convertam manum meam ad te, et excoquam ad purum scoriam tuam, » etc. Avertisse enim videtur ab hac plebe, quæ nunc tot mala operatur, manum sanctæ operationis (32) suæ. Sed cum venerit Elias, et restituerit omnia, convertet ad eam rursus manum suam, ut sancta, sicut olium, mirabiliter operetur. Et per Eliam, inquit, *excoquam ad purum scoriam tuam*, id est purgabo rubiginem sæcularis intelligentiæ de Scripturis. Et *auferam omne stagnum tuum*, id est quidquid falsi dogmatis habueris; *Elias enim restituet omnia*.

« Et restituam iudices tuos, ut fuerunt prius; et consiliarios tuos sicut antiquitus, » ut quæ in principio apostolos habuisti, in fine similes habeas apostolis Eliam et Henoch, aliosque doctores egregios non inferiores iis qui fuerunt post apostolos. Post hæc, id est postquam hos tibi dederò, *vocaberis civitas justi, et urbs fidelis*, quæ nunc autem accusaris facta esse meretrix. Facta esse meretrix, sicut diximus, ingens multitudo populi hujus, quia se ipsam diabolo prostituit in voluptatibus. Sed postquam Elias, qui restituet omnia, reduxerit eam ad castum amorem legitimi viri, non jam meretrix vocabitur, sed civitas justi, id est plebs Dei. Et quia deinde veniet dies iudicii, congruè subditur:

« Sion in iudicio redimetur, » etc. Sion namque, id est Ecclesia justorum redimetur ab iis miseris in illo iudicio, de qua redemptione dicit ipse Salvator? « Respicite et levate capita vestra, quoniam appropinquavit redemptio vestra (Luc. xxi, 28). » Et reducent eam angeli in iustitia, quoniam « mittet Filius hominis angelos suos cum tuba, et voce magna, et congregabunt electos ejus a quatuor ventis (Matth. xxiv, 31), » et tunc conteret simul scelestos, id est interfectores sanctorum et alios peccatores; et qui, ab Antichristo seducti, dereliquerunt Dominum, consumuntur æternalibus suppliciis. *Confundentur enim ab idolis, quibus sacrificaverunt*. Idolis sacrificasse dicuntur, quia juxta fidem apocalypsis Joannis « adoraverunt draconem, qui dedit potestatem bestię, et adoraverunt bestiam et imaginem ejus (Apoc. xiii, 8 et seqq.); » aut habuerunt characteristicam ejus in dextera manu, et in frontibus suis, aut nomen ejus, aut numerum nominis ejus (Apoc. xiv, 9). Talibus idolis sacrificaverunt nequissimas

A actiones suas, sed ab his confundentur in adventu iudicis. Sequitur:

« Erubescetis super hortis, quos elegeratis, cum fueritis velut quercus defluentibus foliis, et velut hortus absque aqua. » Hortos eligit, quisquis se ex integro transitoriis voluptatibus tradit. Hortos elegerunt, qui sui similibus in libro Sapientiæ dicunt: « Venite, et fruamur bonis quæ sunt, et utamur creatura tanquam in juventute celeriter, vino pretioso et unguentis nos impleamus, et non prætereat nos flos temporis; coronemus nos rosis, antequam marcescant; nullum pratium sit, quod non pertranseat luxuria nostra; nemo sit exsors luxuriæ nostræ: ubique relinquamus signa lætitiæ, quoniam hæc est pars nostra, et hæc est sors nostra (Sap. ii, 6 et seqq.). » Ecce quomodo elegerunt amœnitates hortorum, et quid est hortos eligere? Super his graviter erubescunt, quando confusione pleni stabunt ante tribunal æterni Iudicis. Tunc namque erunt ut quercus, ex qua defluunt folia; quia nullum jam præteritæ delectationis fructum habebunt, et omnes prorsus decorem amittentes, nudi remanebunt et aridi, atque ad comburendum idonei.

Erunt et sicut *hortus absque aqua*; quoniam sol iustitiæ, apprensus in iudicio, terrebit illos, et omnem humorem ac viriditatem eorum exsiccat; unde Jacobus: « Exortus est sol, inquit, cum ardore, et arefecit fenum, et flos ejus decidit, et decor vultus ejus deperit (Jacob. i, 11). » Et addidit: « Ita et dives in itineribus suis marcescit (ibid.). » Sequitur:

« Et erit fortitudo vestra ut favilla stupæ, et opus vestrum quasi scintilla, et succendetur utrumque simul, et non erit qui exstinguat. » Iniquorum fortitudo, qui confidunt in virtute sua, et pro vitæ hujus concupiscentiis tot labores fortiter tolerant, erit in resurrectione contrita et arida, et ad concremandum apta ut favilla stupæ. Unde et alia dictum est: « Stupa collecta Synagoga peccantium, et consummatio illorum flamma ignis (Eccl. xxi, 10). » Et opus illorum quasi scintilla erit, quando incipiet eos incendere recordatio malorum, quæ fecerunt, quoniam scriptum est: « Venient in cogitatione peccatorum suorum timidi, et traduent illos ex adverso iniquitates ipsorum (Sap. iv, 20). » Nam sicut scintilla nutritur in stupis et incendit eas, sic peccatorum suorum memoria fiet istis inchoatio perpetuæ concremationis; et postquam audierint: « Discedite a me, maledicti, in ignem æternum (Matth. xxv, 41), » succendetur utrumque simul in gehenna, et ipsi scilicet et opus eorum. « Etenim quod factum est, cum illo qui fecit tormenta, patietur (Sap. xiv, 10); » sicut vir sapiens loquitur: *Et non erit qui exstinguat*: quoniam « vermis eorum non morietur, et ignis eorum non exstinguetur (Isa. lxvi, 24). »

CAPUT II.

VERS. 1. — « Verbum, quod vidit Isaias, filius Amos, super Judam et Jerusalem. »

Novum orsurus sermonem præmittit novum titulum, ut ea, quæ sequuntur, distinguat a superioribus. Qui se verbum nequaquam audisse dicit, sed vidisse; quia, quando non per subjectam creaturam, sed per semetipsum Dominus loquitur, de verbo ejus sine verbis ac syllabis cor audientis docetur. Deo enim quasi quædam verba nobis dicere est occulta vi ea, quæ agenda sunt, intimare, et cor hominis ignarum non adhibito strepitu æternitatis sermone doctum repente de absconditis reddere. Nam quia auditus ea, quæ fiunt ad se, non simul omnia dicta comprehendit, quippe qui et causas per verba, et particulatim verba, per syllabas percipit? visus autem in eo, quo se dirigit, totum subito et simul apprehendit; Dei locutio ad nos intrinsecus facta videtur potius quam auditur; quia dum semetipsam sine mora sermonis insinuat, repentina luce nostræ ignorantie tenebras illustrat. Bene itaque propheta, verbum se vidisse, testatus est; quoniam in secreto visionum cœlestium lucidissimo mentis intuitu simul totum cognovit, quod non simul totum foras loqui potuit. Vidit autem super Judam et Jerusalem; quia, quæ vel Synagogæ vel Ecclesiæ ventura erant, divinitus agnovit. Judas namque primo Judæorum, ac deinde Christianorum populus intelligitur: et Jerusalem primo Synagogam, deinde Ecclesiam significat. Propheta vero, quod viderat narrare incipiens subdit:

VERS. 2. — « Et erit in novissimis diebus præparatus mons domus Domini in vertice montium, et elevabitur super colles. »

Sed quærendum est, cur incipiat dicens: *Et erit*, et non potius, *Erit*. *Et* namque est copulativa conjunctio; et scimus, quia non conjungitur sermo subsequens nisi sermoni præcedenti. Hoc autem quod nunc in exordio narrationis hujus loquitur, continuari superioribus dictis non potest, quia prætulationis interpositione sequestratur ab eis. Quare ergo inchoat, dicens: *Et erit*, cum non sit sermo, cui iste subjungatur? Sed hac in re sciendum, quia sicut nos corporalia, sic prophetarum sensus spiritalia aspiciunt, eisque et illa sunt præsentia, quæ nostræ ignorantie absentia videntur. Unde fit, ut in mente prophetarum ita conjuncta sint exterioribus interiora, quatenus simul utraque videant, simulque in eis fiat et intus verbum, quod audiant, et foris, quod dicunt. Patet igitur causa, cur inchoavit, dicens: *Et erit*; quia illi verbum, quod foris protulit, illi verbo, quod intus audierat, conjunxit. Continuavit itaque verba, quæ foris protulit visioni intimæ, idcirco inchoavit, dicens: *Et erit in novissimis diebus*. Subjungit enim hoc, quod exterius loqui inchoat, ac si et illud foris sit, quod intus videt. Dies autem novissimos appellat tempus evangelicæ prædicationis. Nos enim sumus, « in quos fines sæculorum devenerunt (*I Cor. x, 11*). »

A « Erit in novissimis diebus præparatus mons domus Domini in vertice montium. » *Domus Domini* Israeliticus populus fuit. *Mons ergo domus Domini* ille appellatus est, qui ex Israelitico populo incarnari dignatus est. Fuerunt autem in eodem populo sancti viri, qui montes jure vocarentur, quia per vitæ meritum ad cœlestia propinquabant. Sed incarnatus Unigenitus istis montibus æqualis non fuit, quia merita omnium ex sua divinitate transcendit. Unde et recte mons super verticem montium dicitur, quia ex divinitate sua inventus est etiam super cacumina Sanctorum, ut qui multum in Deo perfecerunt, ejus vestigia vix potuissent tangere ex vertice cogitationis. Itaque *præparatus est in vertice montium*; quia inter homines apparuit super omnem prophetarum et apostolorum celsitudinem; et elevatus super colles, quia designavit et alios septuaginta duos (*Luc. x, 1*) discipulos, qui sublimes quidem fuerunt, sed tamen apostolis inferiores, ut montibus colles. Ipse enim super eos, qui fidem susceperunt, elevatur. Omnes quoque excellentes sancti, qui apostolos secuti sunt, in comparatione eorum *colles* vocari possunt. Sequitur: « Et fluent ad eum omnes gentes. »

VERS. 3. — « Et ibunt populi multi et dicent: Venite ascendamus ad montem Domini, et ad domum Dei Jacob, et docebit nos vias suas, et ambulabimus in semitis ejus. »

Quia per prædictos montes et colles totus oris ad Christum erat convertendus, recte subjunctum est: *Et fluent ad eum gentes, et ibunt populi multi*. Quia vero plurimi eorum, qui convertebantur, sese vicissim ad conversionem exhortabantur, congrue dicturi esse memorati sunt: *Venite, ascendamus ad montem Domini, et ad domum Dei Jacob*, id est ad Christum et ad Ecclesiam. *Et docebit nos vias suas*. Via autem ejus pax, via ejus humilitas, via ejus patientia est. Nam in mundum ad opprobria et ad contumelias, et ad passionem venit, et adversa æquanimiter pertulit, prospera fortiter vitavit, et ad æternæ vitæ præmia invitavit. Has vias ergo suas docuit eos, qui post ad fidem venerunt, ut sequerentur vestigia ejus. « Qui enim dicit se in ipso manere, debet, sicut ille ambulavit, et ipse ambulare (*I Joan. 11, 6*). » Sed unde sensus iste gentibus esset futurus, ut ad Christum confluerent, subjunctum est:

« Quia de Sion exhibit lex, et verbum Domini de Jerusalem. » Lex enim Moysi et verbum prædicationis evangelicæ ab Jerusalem per apostolos in universum orbem exivit, et omnes gentes vias suas docuit. Sequitur:

VERS. 4. — « Et judicabit gentes, et arguet populos multos. »

Judicavit *gentes* sermo Domini, quia malitiam eorum, ut ad bonum converterentur, damnavit, atque *populos* infidelitatis eorum arguit, ut resipiscerent. Vel ideo gentes dicit judicandas, quia credituræ erant. « Qui enim non credit, jam judicatus est

(Joan. III, 18). » Populos autem, id est Judæos non A
judicandos, sed arguendos, quod ad se missum Filium Dei non receperunt. Sequitur :

« Et conflabunt gladios suos in vomeres, et lanceas suas in falces. » Hoc in eis cernimus impleri, qui pro Christo arma deserunt, et religiosam vitam ducentes excolunt terram, ut ex justo labore sibi victum acquirant. Sequitur :

« Non levabit gens contra gentem gladium, nec exercebuntur ultra ad prælium. » Unitas fidei et charitatis omnes gentes in Christo pacificavit, ut nunquam gens contra gentem gladium arripiat. Nam justorum Ecclesia, quæ per omnes gentes est, gladium adversus quemquam levare prohibetur, cum audi: a Domino : « Qui te percutit in unam maxillam, præbe ei et alteram; et ab eo, qui aufert tibi B
vestimentum etiam tunicam noli prohibere; omni autem petenti te tribue, et qui aufert, quæ tua sunt, ne repetas (Luc. VI, 29, 30). » Gens ergo contra gentem non levat gladium? quia sanctorum Ecclesia in cunctis gentibus hæc præcepta custodit. Ista quippe sententia de electis solummodo prolata est, qui « digne » ambulant « vocatione, qua vocati » sunt, « cum omni humilitate et mansuetudine, cum patientia supportantes se invicem cum charitate, solliciti servare unitatem Spiritus cum vinculo pacis (Ephes. IV, 1-4). » Nam perversis, qui nomen Christianitatis habere videntur, et pro temporalibus discordias et pugnas faciunt, impropere Jacobus : « Concupiscitis et non habetis, occiditis et zelatis, et non habetis (33) adipisci, litigatis et belligeratis (Jac. IV, 2). » Electorum autem Ecclesia, quæ de gentibus universis congregata est, pugnare nescit ad invicem, pro quibus oravit Salvator, dicens : « Ut omnes unum sint sicut tu Pater in me, et ego in te, ut ipsi in nobis unum sint, ut mundus credat quia tu me misisti (Joan. XVII, 21). » De quibus et Psalmista dicit : « Pax multa diligentibus legem tuam, et non est illis scandalum (Psal. CXVIII, 165). » Bene itaque vocatis ad Christum gentibus dictum est, quia non levabit gens contra gentem gladium, nec exercebuntur ultra ad prælium. Post hæc Judaicam plebem ad hujus gratiæ novitatem invitat subdendo :

VERS. 5. — « Domus Jacob venite, ambulemus in D
lumine Domini. »

Id est, gressus bonorum operum ponamus in luce Evangelii. Videns autem eos obstinatis animis in vetustate perseverare, subito conversus ad Dominum, cur eos ad lumen venire monuerit indicat, dicens :

VERS. 6. — « Projecisti enim populum tuum, domum (34) Jacob. »

Id est, gentem Judæorum ob perfidiam expulisti. Et causas projectionis eorum adjungit, dicens : « Quia repleti sunt ut olim, et augures habuerunt ut Philisthim, et pueris alienis adhæserunt. » Repleti

sunt nunc opibus ut olim patres eorum. Vel iniquitatibus et idololatriæ sordibus repleti sunt ut olim ante legem. Et augures habuerunt, ut gens Philistinorum habere consueverat; quia magos et ariolos consulebant sicut et gentes, quæ notitiam Dei non acceperant. Et pueris alienis adhæserunt, quia etiam alienigenas pueros quærebant ad committendum illud abominabile flagitium. Qui divitiis intelliguntur repleti, nunc exponitur quomodo repleti sunt ut olim, cum subditur :

VERS. 7. — « Repleta est terra argento et auro, et non est finis thesaurorum ejus. »

VERS. 8. — « Et repleta est terra aquis et innumerabiles quadrigæ ejus. »

Non est finis thesaurorum ejus; quia semper avarus eget, non quo thesauri finem non habeant, sed quo possidentium animus non impleatur. Et innumerabiles quadrigæ ejus. Quia dignum numero non est, quod contra Dei imperium possidetur. Lex enim prohibuit regibus Israel equos et currus multiplicare (I Reg. VIII, 11). Sed quemadmodum iniquitatibus et idololatria repleti sunt ut olim, ostendit sermo subjunctus, quo dicitur : « Et repleta est terra idolis; opus manuum suarum adoraverunt quod fecerunt digiti eorum. »

VERS. 9. — « Et incurvavit se homo, et humiliatus est vir. »

Nam, sicut olim in Ægypto serviebant idolis, ita et nunc fecerunt, atque coram simulacris se incurvaverunt; quod tamen non ad adventum Domini, sed ad superiora tempora referendum est. Quia quando Salvator in carne apparuit, non colebant idola, sed antiquis temporibus ea coluerant, sicut et cætera, quæ scripta sunt, perpetraverunt. Nam cum eos propheta dixisset a Deo projectos, cœpit ostendere mala quæ jam ipsi fecerant, et opera quibus dedit erant, quando projecti sunt, ut ob meritum nimis perversitatis suæ illos declararet esse projectos. Unde et post descriptionem tantarum iniquitatum subjungit, dicens Domino, cui hactenus locutus est :

« Ne ergo dimittas eis. » Nam sic populus ille offendit, ut jam remissionem peccatorum obtinere non possit, quoniam Christum, qui solus a peccatis liberat, suscipere noluit. « Impossibile est enim sanguine hircorum et taurorum peccata auferri (Hebr. X, 4). » Unde eis et ipse Dominus ait : « Dixi vobis, quia moriemini in peccatis vestris : si enim non credideritis, quia ego sum, moriemini in peccato vestro (Joan. VIII, 24). »

Possumus autem domum Jacob intelligere plebem fidelium, quia de Christo dictum est : « Dabit illi Dominus Deus sedem David patris ejus, et regnabit in domo Jacob in æternum (Luc. I, 32). » In qua scilicet domo mali cum bonis permisti sunt, et omnes eodem Christianitatis vocabulo communiter appellantur. Quod autem nunc de domo Jacob dicitur,

(33) Alias, non potestis.

(34) Cod. G., domus.

non de justis, sed de hac multitudine peccantium, A quæ Christi nomen adhuc confitetur, debet intelligi. Quibus recte dicitur: *Domus Jacob venite et ambulemus in lumine Domini*; « quia lux venit in mundum, et dilexerunt homines magis tenebras quam lucem. Omnis enim qui male agit, odit lucem et non venit ad lucem, ut non arguantur opera ejus; qui autem facit veritatem, venit ad lucem, ut manifestentur opera ejus, quia in Deo sunt facta (*Joan. III, 10 et seqq.*). »

Dicit ergo peccantibus: *Venite et ambulemus in lumine Domini*. Ac si dicat: « Abjiciamus opera tenebrarum (*Rom. XIII, 12*), » et « ut filii lucis ambulemus. Fructus enim lucis est in omni bonitate et justitia et veritate (*Ephes. V, 8*). » *Ambulemus*, dicit, quia Catholicis loquitur, et idcirco secum eos ad bene agendum hortatur. Sed quia illi, monitionem ejus sequi contemntes, pertinaciter in tenebris operum malorum perseverant, deserit eos, et ad Dominum conversus, terribilem mox sententiam de ipsis profert: *Projecisti populum tuum domum Jacob, quia repleti sunt ut olim*. Repleti sunt divitiis, quas avide congregaverunt, et retinent sicut olim, antequam ad Christum advenissent, et ideo projecti sunt ab illo. Ipse enim, projiciens eos, dicit: « Omnis ex vobis qui non renuntiat omnibus quæ possidet, non potest meus esse discipulus (*Luc. XIV, 33*). »

Subduntur et aliæ causæ, propter quas projecit illos. *Quoniam augures habuerunt ut Philisthiim*, id est mathematicos et divinos, consuluerunt sicut ethnici. *Et pueris alienis adhæserunt*, id est immundis spiritibus in perpetratione malorum velut in fornicatione delectabiliter conjuncti sunt. Unde ad Ezechielem Dominus ait: « Fornicata est Oolla super me, et insanivit in amatores suos, in Assyrios, propinquantes principes et magistratus, juvenes cupidinis omnes (*Ezech. XXIII, 5*). » Oollam quippe vocat Samariam. Et quid per Samariam nisi multitudo ista peccantium exprimitur? Quid per amatores ejus Assyrios nisi maligni spiritus? Assyrii namque *coarguentes sive convincentes* interpretantur; et dæmones vocantur Assyrii, quoniam quos nunc in malitia sibi sociant, in futuro iudicio accusant et convincunt. Fornicata est igitur Oolla supervirum suum, et insanivit concupiscentia in amatores suos; quoniam plebs ista, quæ Christo desponsata fuerat, mandata Christi contemnit, et desideria malignorum spirituum libentissime facit. Qui sunt principes et magistratus adversariæ partis, quia « non est nobis colluctatio adversus carnem et sanguinem, sed adversus principatus et potestates, adversus mundi rectores tenebrarum harum (*Ephes. VI, 12*). »

Qui et *juvenes cupidinis* appellantur, quoniam ad animarum corruptionem fervent, et dum pravas delectationes suggerunt, seipsos velut speciosos interioribus oculis deceptæ mentis ostendunt. « Ipse enim Satanas transfiguratur se in Angelum lucis (*II Cor. XI; 14*). » Itaque malignos Spiritus, quos Ezechiel Assyrios, juvenes cupidinis appellat nunc

Isaias *pueros alienos* vocat; et quod ibi dicitur: *insanivit in amatores suos*, hoc est, quod hic dicit: *Et pueris alienis adhæserunt*. Quod autem dixerat: *Repleti sunt ut olim*, consequenter aperit, dicens: *Repleta est terra argento et auro, et non est finis thesaurorum ejus. Et repleta est terra ejus equis, et innumerabiles quadrigæ ejus*. Et manifestum est quia populus, qui talia sectatur, non quærit cœlestia. « Non enim potestis Deo servire et mammonæ (*Matth. VI, 24*), » id est divitiis. Ubi et mystice subditur:

Et repleta est terra idolis. Nam quid idolorum nomine designetur, ostendit Apostolus: « et avaritiam, » inquit, « quæ est idolorum servitus (*Coloss. III, 5*). » Quia ergo populus iste prædictas opes per avaritiam congregat, recte dicitur, quoniam *repleta est terra ejus idolis*. Sequitur: *Opus manuum suarum adoraverunt, quod fecerunt digiti eorum*. Opus manuum suarum adoraverunt; quia malum, quod quisque specialiter operatur, hoc quasi proprium Deum colit, sicut edaces, « quorum Deus venter est (*Philip. III, 19*). » Sequitur:

« Et incurvavit se homo, et humiliatus est vir. » Ad supernam lucem intuendam homo conditus fuerat; sed, peccatis exigentibus, foras missus mentis suæ tenebras portat, superna non appetit, infimis intendit, cœlestia non desiderat, terrena semper in animo versat. *Incurvavit igitur se homo, et humiliatus est vir*. Omnis enim peccator, terrena cogitans cœlestia non requirens, sponte incurvatus est; quia dum desideria inferiora sequitur, a mentis suæ rectitudine inclinatur. Terram quippe semper intuetur, qui incurvus est, et quo pretio sit redemptus, non meminit, quia ima quærit. Propter quæ omnia subditur: « Ne ergo dimittas eis. » Damnabilia enim sunt universa hæc, et iis, qui talia faciunt, repente superveniet dies ultionis æternæ. Unde et sequitur:

VERS. 10. — « Ingredere in petram, et abscondere in fossa humo a facie timoris Domini, et a gloria majestatis ejus. »

Petra vero duritiam cordis nostri designat, petram quippe ingredimur, cum cordis nostri duritiam penetramus: atque *a facie timoris Domini in fossa humo abscondimur*, si terrenas cogitationes egerentes, ab ira districti Judicis, in humilitate mentis nostræ celamur. Quo enim terra plus feriendo projicitur, eo pavimentum semper inferius demonstratur. Unde et nos si a nobis studiosius terrenas cogitationes ejicimus, quo apud nos abscondamur, humilius invenimus. Ecce enim quia divini iudicii dies imminet, quasi ipsa jam timoris ejus facies apparet; tanto magis necesse est, ut unusquisque illum terribilius timeat, quanto jam gloria majestatis ejus appropinquat. Quid ergo agendum est, quove fugiendum? Quo enim quis latere eum poterit, qui ubique est? Sed ecce petram ingredi, ac fossa humo occultari præcipimur, ut cordis nostri duritiam dirumpentes, eo iram invisibilem declinemus, quo ab amore visibilium apud nos in corde

subtrahimur, ut eum pravæ cogitationis terra ejicitur, mens apud se ipsam tanto tutius, quanto et humilius abscondatur. Postquam autem propheta consilium præmisit, quomodo quis ab ira diei illius occultari posset; de illis jam, qui sic ab ea seipso abscondere negligunt, subjungit:

Vers. 11. — « Oculi sublimis (35) hominis humiliati sunt, et incurvabitur altitudo virorum; exaltabitur autem Dominus solus in die illa. »

Adhuc futurum expectatur judicium, et jam quasi de præterito dicitur: *Oculi sublimis hominis humiliati sunt*. Sed apud Deum jam factum est judicium. « Qui enim non credit, jam judicatus est (Joan. III, 18). » Licet ergo terrena potestate sublimis adhuc foris appareat quilibet impetus, jam tamen intus ante Dei oculos humiliatus est, atque dejectus. Vel quod ait: *Oculi sublimis hominis humiliati sunt*, potest intelligi dixisse pro eo quod est, humiliabuntur. Et iste sublimis homo specialiter ille « illius perditionis » potest accipi, qui « adversatur et extollitur supra omne quod dicitur Deus, aut quod colitur, quem Dominus Jesus interficiet spiritu oris sui, et destruet illustratione adventus sui (II Thess. II, 4). »

« Et incurvabitur altitudo virorum. » Quia « omnis, qui se exultat, humiliabitur (Luc. XIV, 11). » *Exaltabitur autem Dominus solus in die illa*. Quia tunc perfecte complebitur quod dictum est: « Quia omnia subiecisti sub pedibus ejus. Nunc autem necdum videmus omnia subjecta ei (Heb. II, 8). » Propheta vero, qui dixerat, quod incurvabitur altitudo virorum, per partes enumerando probat, adjungens:

Vers. 12. — « Quia dies Domini exercituum super omnem superbum et excelsum, et super omnem arrogantem, et humiliabitur. »

Vers. 13. — « Et super omnes cedros Libani sublimes et erectas, et super omnes quercus Basan. »

Vers. 14. — « Et super omnes montes excelsos, et super omnes colles elevatos. »

Vers. 15. — « Et super omnem turrim excelsam, et super omnem murum munitum. »

Vers. 16. — « Et super omnes naves Tharsis, et super omne quod visu pulchrum est. »

Dies, inquit, vindictæ Domini super omnem superbum mente, et excelsum potentia, id est super omnem qui de excellentia potestatis intumescit, et super omnem qui jactantiam arrogantiam sectatur. Cedri vero tantæ sunt altitudinis, ut omnem arborum reliquarum altitudinem sua proceritate transcendant. Libanus autem *candidatio* dicitur. Et quid per Libanum nisi gloria hujus sæculi exprimitur? Quid vero per *cedros Libani sublimes et erectas* nisi illi figurantur qui, in excellentissimis sæculi dignitatibus positi, cervicem mentis in superbiam erigunt? Unde scriptum est: « Vidi impiam superexal-

tatum et elevatum sicut cedros Libani (Psal. XXXVI, 35). »

Quercus autem ingentes et robustæ sunt arbores. *Basan* vero *bruchus* sive *pinguedo* dicitur. Et quid per *bruchum*, qui pene totus est venter, nisi edacitas et ventris ingluvies intelligi potest; sed et *pinguedo* ex assidua ciborum abundantia nascitur. Quid ergo *quercus Basan*, nisi eos designant, qui ob potentiam sæcularem et ob firmatam cordis elationem grandes et rigidi sunt, atque per ventris ingluviem saginant carnem? Jure igitur veniet *dies ultionis super omnes cedros Libani sublimes et erectas, et super omnes quercus Basan*. Sed et per *montes excelsos* intelligi possunt reges et imperatores superbi, atque per *colles elevatos* consules cæteri et principes elati, quibus ultio debita superveniet.

Quid vero per *turrim excelsam*, nisi quælibet anima superbiens exprimitur, quæ cæteris in hoc mundo forti potentia supereminet? Et quid per *murum munitum*, nisi divites, qui muniuntur suis opibus, et alios male agentes muniunt et protegunt? Et super hos igitur ventura est dies Domini. Multis vero appellationibus designavit superbas potestates sæculi, quia multæ sunt in hoc mundo dignitates, per quas multi perditionem sibi acquirunt.

Tharsis autem *mare* dicitur. Et quid est mare, nisi sæculum istud? Quæ sunt ergo *naves Tharsis*, nisi mentes hominum, quæ per amarum pelagus sæculi hujus variis desideriis ducuntur? Rursus *Tharsis* interpretatur *exploratio gaudii*. Et quæ sunt *naves explorationis gaudii*, nisi humanæ mentes, quæ in hoc mundo gaudia præsentium voluptatum experiuntur, satisfaciendo concupiscentiis suis? Quid autem *visu pulchrum est*, nisi omne quod in mundo concupiscitur, dum falsa seu vana pulchritudine fallit oculos intuentium? Veniet itaque *dies Domini super omnes naves Tharsis, et super omne quod visu pulchrum est*. Ubi et præmissa replicatur sententia, cum subditur:

Vers. 17. — « Et incurvabitur sublimitas hominum, et humiliabitur altitudo virorum, et elevabitur Dominus solus in die illa. »

Tunc incurvabuntur, qui nunc superbe eriguntur; et Dominus tunc elevabitur, cujus nunc humilitas ab eis despicitur. Sequitur:

Vers. 18. — « Et idola penitus conterentur. »

Idola tunc conterentur, quia peccatum avaritiæ tormentis æternalibus panietur. Nam, sicut vir sapiens ait: « Conteretur cum delinquente delictum (Eccl. XXVII, 5). » Vel ita: *Dominus elevabitur, et homo inclinabitur, et idola conterentur*. Tandiu enim videtur humanus sermo habere rationem, quandiu divinæ scientiæ non fuerit comparatus. Cum autem mendacium veritati quasi stipula igni propinquaverit, cito voratur et deficit, et omnia dogmata falsitatis, quæ nunc idola nominantur, eo

quod simulata sunt atque conficta, *penitus contere-
tar*; cumque pavore Domini quis fuerit perterritus,
primum in spelunca pectoris sui, et in voraginibus
terræ abscondet hæc idola, non audens proferre
quod male finxerat. Sic Deus enim perfectus est,
ut hæc prius celata projiciat, et in se esse non pa-
tiatur. Sequitur :

VERS. 19. — « Et introibunt in speluncas petra-
rum, et in voragines terræ a facie formidinis Domini
et a gloria majestatis ejus, cum surrexerit percutere
terram. »

Hoc et in Apocalypsi Joannis ita legitur : « Reges
terræ et principes et tribuni, et divites et fortes, et
omnis servus et liber absconderunt se in speluncis
et petris montium, et dicunt montibus et petris :
Cadite super nos, et abscondite nos a facie seden-
tis super thronum, et ab ira Agni, quoniam veniet
dies iræ ipsorum, et quis poterit stare? » (Apoc. vi,
15-17.) Imminente igitur vicino adventu districti
Judicis, quando frequenter apparebunt signa magna
et horribilia « arecentibus hominibus præ timore
et exspectatione eorum, quæ supervenient universo
orbi (Luc. xxi, 26), » intrabunt in speluncas et in
voragines terræ, volentes se abscondere a facie su-
pervenientium malorum. Adventum ergo Judicis
vocat surrectionem ejus, sicut et beatus Job, cum
dicit : « Quid enim faciam, cum surrexerit ad judi-
cium Deus? » (Job xxxi, 14.) Nam modo sedet ad
dexteram majestatis in excelsis; sed tunc surget
percutere terram, quando veniet judicare sæcu-
lam.

Hæc tamen et de excidio gentis Judæorum, quod
per Romanos factum est, possunt accipi. Ait enim,
quia *dies Domini exercituum super omnem superbum
et excelsum*, etc. Nam superbi et arrogantes per
cedros Libani et quercus Basan; per *montes et colles*
intelligi possunt tam Pharisæi quam omnes qui, in
illo populo, primatum gerebant; per *turres et muros*,
civitates et præsidia eorum; per *naves Tharsis*, illi
qui contra Romanos tunc in aquis pugnaverunt sic-
ut in mari Galilææ; per *omne quod visu pulchrum
est*, generaliter quidquid in eis formosum aut hone-
stum videbatur. Nam super hæc omnia venit tunc
ira Dei.

Elevatus est autem Dominus solus in die illa, id
est in tempore illo; quia « Deus exaltavit illum, et
donavit illi nomen, quod est super omne nomen, ut
in nomine Jesu omne genu flectatur (Philip. ii, 9). »
Et gentibus ad fidem venientibus idola penitus con-
trita sunt. Judæi autem introierunt in speluncas pe-
trarum, et in voragines terræ a facie formidinis Do-
mini, quando surrexit per Romanos percutere terram
eorum; quia, captis urbibus, abscondebantur in an-
tris et subterraneis, ut et ipse Josephus cum so-
ciis suis. Et quia tunc gentilis quisque, cognita
veritate, conversus est ad pœnitentiam, recte sub-
junctum est :

VERS. 20. — « In die illa projiciet homo idola
argenti sui, et simulacra auri sui, quæ fecerat
sibi, ut adoraret talpas et vespertiliones. »

VERS. 21. — « Et ingredietur fissuras (36) petra-
rum, et cavernas saxorum a facie formidinis Do-
mini, et gloria majestatis ejus, cum surrexerit per-
cutere terram. »

Dies namque pro eo tempore, quo lux veritatis
mundum per apostolos irradiavit, posita est. *Homo*
autem vocari solet, qui bestialem sensum ratione
transcendit. *Homo* igitur, id est unusquisque ratio-
nabiliter cogitans, in illo tempore projecit *idola*.
Adorabat namque in eis *talpas et vespertiliones*.
Talpæ enim cæcæ sunt, et sub terra manentes in-
teriora terræ fodiunt atque foras expellunt. Et quid
per *talpas* nisi dæmones figurantur, qui luce visionis
intimæ carentes, corda carnalium velut terram sug-
gestionibus illicitis fodiunt, et quod male suggerunt,
in locutionem et in opus erumpere faciunt? *Vesper-
tiliones* vero incumbentibus tenebris et noctu vol-
lant, ac plerumque per terram gradiuntur. Sic et
amatores tenebrarum maligni spiritus, quoniam
de naturæ subtilitate superbiunt, volant; quia vero
de supernis projecti ad spem cœlestium nulla jam
respiratione se erigunt, per terram repunt.

Sed et mentibus hominum, quibus interna lux
deficit, per hæc duo vitia maxime illudunt; quo-
niam alios per superbiam, et alios per luxuriam
decipiunt. In eis quippe, quos in fastu superbiæ
quasi alta sapientes elevant, volant; in eis autem,
quos per luxuriam prosternunt, per terram repunt.
Has itaque talpas et vespertiliones adorabant in
idolls suis gentiles; et ideo quisque rationabiliter
cogitans projecit ea, ex quo prædicationem verita-
tis audivit, et ingressus est *fissuras petrarum et ca-
vernas saxorum a facie formidinis Domini*. Et Moysi
dictum est in Exodo : « Ponam te in foramine pe-
træ, et protegam dextera mea (Exod. xxxiii, 22). »
— « Petra autem erat Christus (I Cor. x, 4), »
foramen petræ plaga lateris Christi est, in quo
tutissime protegitur quisquis ad illud fideliter con-
fugit.

Sicut ergo Christus ibi per petram, ita in hoc loco
per petras et saxa intelliguntur sancti; et sicut per
foramen vulnus Domini lateris, ita per *fissuras
petrarum et cavernas saxorum* vulnera sanctorum
martyrum. Ingressitur itaque *fissuras petrarum et
cavernas saxorum a facie formidinis Domini et a
gloria majestatis ejus*, quæ revelabitur, cum sur-
rexerit percutere terram, quisquis peccatorum cons-
cius et futuræ discussionis, timidus, eorum quos
pro Christo passos novit, patrocina fideliter et hu-
militer requirit, et ipsorum meritis et interventioni-
bus ab ira ventura protegi deposcit. Vel tunc sur-
rexerit Dominus percutere terram, quando corda
gentilium concussit ad pœnitentiam. Et quotidie
percutit ipse terram, quoties mentem peccatoris con-

turbat, ut convertatur; et tunc homo, id est ratio- A qualis erat Balaam (Num. xxii, 5). Ipse enim fuit
nabiliter sapiens, ingreditur prædictas fissuras pe-
trarum.

Vel argentum et aurum sermone et sensu potest accipi, unde fiunt idola perversorum dogmatum; quæ qui projecit, ingreditur fissuras petrarum et cavernas saxorum, et non in terræ pulvere et vili luto, sed ut firma ratione versetur et inveniat sibi diversa virtutum foramina, per quæ ad veritatem pervenire valeat. Propheta vero multa paulo superius de excidio Judæorum locutus est. Unde nunc considerans, quia propter necem Salvatoris hæc omnia passuri erant, admonet illos ab ejus insectatione desistere, dicens :

VERS. 22. — « Quiescite ergo ab homine, cujus spiritus in naribus ejus, quia excelsus reputatus est ipse. »

Quid autem in naribus nisi præscientia, et quid in spiritu nisi scientia designatur? Sæpe enim id quod non videmus, odore comprehendimus, ita ut nonnullæ res etiam cum longe jaceant, flagrantia nobis qualitatis suæ innotescant; dumque per nares spiritum ducimus, plerumque aliqua et invisæ præscin. Redemptoris ergo nostri spiritus esse in ejus naribus dicitur, ut videlicet scientia illius esse in præscientia designetur; quia, quæcumque se scire in natura humanitatis innotuit, hæc nimirum ante sæcula ex divinitate præscivit. Qui unde spiritum in naribus habuerit, mox propheta subjungit, dicens : Quia excelsus reputatus est ipse. Ac si diceret : Inferius ventura desuper præscivit, qui ad ima de cœlestibus venit. Quiescite, inquit, ab hoc homine. Nam propter malum quod infertis ei, audite quid sequatur.

CAPUT III.

VERS. 1. — « Ecce enim dominator Dominus exercituum auferet a Jerusalem et a Juda validum et fortem, omne robur panis, et omne robur aquæ. »

VERS. 2. — « Fortem et virum bellatorem, et judicem et prophetam, et ariolum et senem. »

VERS. 3. — « Principem super quinquaginta, et honorabilem vultu, et consiliarium, sapientem de architectis, et prudentem eloquii mystici. »

Hæc omnia post passionem Domini contigerunt populo Judæorum. Nam per Romanos abstulit Dominus a Jerusalem et a plebe Judaica validum et fortem, et omne robur panis, et omne robur aquæ, et fortem et virum bellatorem, ita ut fame ac siti morerentur in illa obsidione, et ab hostibus suis tandem capti perimerentur, ac reliqui servitute misera ubique deprimerentur. Qui ex eo tempore judicem nullum habent, quia per orbem dispersi nullo rectore proprio gubernantur.

Et prophetam abstulit eis Dominus; quia verbum, quod in prophetis loqui solet, subtraxit. Jam quippe apud eos ultra non est, qui dicat : « Hæc dicit Dominus (Exod. v, 1). » Omnes enim conticuerunt, quia sermo Domini recessit ab eis. Nam neque vel ariolum habent ullum, id est talem prophetam,

ariolus, et tamen ei loquebatur Dominus, et ostendebat pleraque secreta sua. Nam sæpe etiam per alienigenas futura dicebantur, sicut ab isto Balaam legimus, et de divinis Philistinorum. Et ariolus ergo, id est qui interdum vera, et interdum falsa nuntiat, ablati sunt a Judæis, quoniam et vera et falsa pariter amiserunt. Senex etiam id est maturis moribus non est in eis. Qui neque principem saltem super quinquaginta jam ullum habent, eo quod Dominum Sabaoth, id est Christum occiderunt. Nec honorabilem vultu; eo quod speciosus forma præ illis hominum non sit visus eis habere speciem neque decorem. Neque consiliarium; quia sapientia deseruit eos, quæ dicit : « Meum est consilium, et æquitas (Prov. viii, 14). » Recessit enim ab illis angelus magni consilii. Jam non est apud eos, qui possit dicere : « Quasi sapiens architectus fundamentum posui (I Cor. iii, 10). » Migraverunt ab eis architecti, venerunt ad Ecclesiam, posuerunt fundamentum Jesum Christum. Quibus et prudentem eloquii mystici Dominus abstulit, quia nullus doctor est eis relictus. Cessavit autem apud eos legis et prophetarum interpretatio : legunt, et non intelligunt. Ubi et voce Dominica subjunctum est :

VERS. 4. — « Et dabo pueros principes eorum, effeminati dominabuntur eis. »

Habuerunt enim post Domini ascensionem principes pueros, id est puerilia sapientes atque pueriliter agentes. Et dominati sunt eorum effeminati, id est qui muliebriter prostituebantur. Quid autem vulgus egerit, audiamus.

VERS. 5. — « Et irruit populus, vir ad virum, unusquisque ad proximum suum; tumultuabitur puer contra senem, et ignobilis contra nobilem. »

Antequam Titus obsideret Jerusalem, pugnabat intrinsecus populus civitatis ad invicem, et irruerat vir ad virum, atque perimebat unusquisque proximum suum, et puer non deferebat honorem seni, sed litigabat contra eum, et ignobilis dehonestabat nobilem. Capta vero Jerusalem, cum paucæ eorum reliquæ in perniciem suam denuo rebellare tentarent, audiamus quid fecerint.

VERS. 6. — « Apprehendet enim, inquit, vir fratrem suum, domesticum patris sui : vestimentum tibi est, princeps esto noster; ruina autem hæc sub manu tua. »

Tales enim meruerunt habere principes, qui de Christo, sicut legitur, dixerunt : « Nolumus hunc regnare super nos. (Luc. xix, 14.) » Judicabant enim, dignum principem eum, qui saltem vestem habere poterat. Et non ob probitatem, sed ob consanguinitatem eum præferabant. Quod ait : ruina hæc sub manu tua, hunc sensum habet. Miseria et calamitas tuo sustentetur et protegatur auxilio. Sed quilibet talis, quem sic eligebant, quam invalidus esset, manifestatur etiam verbis ipsius. Nam protinus additum est :

VERS. 7. — « Respondebit in die illa, dicens : Non

sum medicus, et in domo mea non est panis, neque vestimentum, nolite me constituere principem populi. »

Non sum, inquit, *medicus*, id est nescio mederi vestræ infirmitati, ut pristinam sanitatem per me recuperetis, quatenus resistere vestris hostibus, ut quondam, valeatis. Ubi et propheta subjungit :

Vers. 8. — « Ruit enim Jerusalem, et Juda concidit; quia lingua eorum et adinventiones eorum contra Dominum, ut provocarent oculos majestatis ejus. »

Ruit Jerusalem, quia destructa est ab exercitu Romanorum; *et Juda concidit*, quia populus Judæorum illis miserabiliter succubuit. Et hoc idcirco factum est : *Quia lingua eorum fuerat contra Dominum, cum dicerent* : « Reus est mortis (Matth. xxvi, 66). » — « Crucifige eum (Marc. xv, 13). » Et *adinventiones*, quando dixerunt : « Quoniam nos audivimus eum dicentem : Ego dissolvam templum hoc manufactum, et post triduum aliud non manufactum ædificabo (Marc. xiv, 58). »

Sed nunc repentes videamus, utrum et de aliis quam de Judæis intelligi possint. « Quiescite, inquit, ab homine, cujus spiritus in naribus ejus. » — « Eos, qui semel sunt illuminati, gustaverunt bonum Dei verbum (37) virtutemque sæculi venturi, et prolapsi sunt, » dicit Apostolus : « Rursum crucifigentes sibi ipsi Filium Dei, et ostentui habentes (Hebr. vi, 4-6). » Et hi ergo necdum quieverunt ab homine, *cujus spiritus in naribus ejus*. Qui jam instante adventu Antichristi usque adeo multiplicati sunt, et cæteros pestilentiae odore suo infecerunt, ut raro nunc Christianus verus inveniat. Unde et ex parte magna jam completum esse dolentes accipiamus. Ac magis implendum adhuc esse non dubitamus, quod subditur :

« Ecce dominator Dominus exercituum, auferet a Jerusalem et a Juda validum et fortem, omne robur aquæ, » etc. Nam *Jerusalem et Juda* plebs ista fidelium est, quæ jam sic infirmata est, ut difficile sit quemquam in ea reperire *validum et fortem* ad opus spirituale. *Panis* autem est corpus Redemptoris, quod in mysterio sumitur : aqua vero scientia sacra. Sed *robur panis* auferitur; quia sacramenti virtus ab eis, qui indigne illud percipiunt, tollitur. Similiter et *robur aquæ*, id est virtus scientiæ auferitur indignis; quia si spiritus defuerit, scientia non habet virtutem, nec tribuere facultatem valet, ut bona, quæ nostri, facias.

Virum quoque *bellatorem* spiritualibus armis fideliter decertantem raro est jam invenire. Judex etiam ecclesiasticus, qui juste judicet, difficile reperitur in lege Dei habens scientiam judicandi; sed jam fere omnia vana, et caduca, et errore plena. Sed et propheta, id est doctor quilibet futura justorum gaudia, malorumque supplicia prænuntians, jam rarescit nimis. Vix enim quis verbum prædicationis huic po-

pulo jam erogat nisi occasione acquirendi pecuniam vel aliud quid transitorium. Et unusquisque talis prædicator per *ariolum* fortassis exprimitur. Quia, sicut Balaam ariolus superstitione avaritiæ suæ deseruit sermonem Domini, bonis, quæ voce prædicat, vivendo repugnat. Nam et Samuel ait : « Quoniam tanquam peccatum ariolandi est repugnare (I Reg. xv, 23), » id est nolle obedire, sed obstinere. Sed quisquis talis est ariolus, flatu novissimæ persecutionis subito rapietur.

Senem vero, id est qui morum grandævitate maturus sit, in hoc populo difficillimum est invenire. Quinquagenarius autem numerus pœnitentiam et remissionem peccatorum designare solet. Unde David pœnitens in quinquagesimo psalmo remissionem accepit. Pœnitens igitur in quinquagenario numero continetur. Quis est ergo *Princeps super quinquaginta*, id est super pœnitentes, nisi quicumque præbet exemplum pœnitentiæ, et annuntiat pœnitentiam, atque convertit ad eam cæteros? Hujusmodi princeps erat Joannes, qui vestimentum de pillis cameli habens, locustas et mel sylvestre edebat, et aliis, ut « dignos pœnitentiæ fructus facerent (Luc. iii, 8), » præcipiebat. Imo et Christus princeps pœnitentiæ est, et caput eorum qui salvantur per pœnitentiam. Unde et Judæi nolentes eum esse principem quinquagenarium, dixerunt ei : « Quinquaginta annos nondum habes (Joan. viii, 57). » Sed ille sciens se esse non solum pœnitentium principem, sed et justorum, respondit : « Antequam Abraham fieret, ego sum (ibid., 58). »

Honorabilis est *vultu*, cujus interna maturitas apparet in vultu ejus. Consiliarius est, qui dat consilium, quomodo superentur astutiæ dæmonum, et rectitudo custodiatur. Architectus est, qui prædicando ædificat Ecclesiam. Prudens *eloquii mystici*, qui mysticum eloquium Scripturæ prudenter intelligit, vel quicumque sapiens mystice loquitur. Prudens eloquii mystici videtur mihi vir eruditus et exercitatus tam in lege et prophetis quam in Evangelio et apostolis. Sed hujusmodi personæ magis magisque quotidie, dum tempus Antichristi vicinior imminet, subtrahuntur, et malitia remanentium multiplicius excrescit. Nam Antichristo regnante, si qui tales viri superfuerint, vel seducentur ab eo, vel perimentur. Unde Ecclesia per Jeremiam de tempore illo queritur, dicens : « Abstulit omnes magnificos meos Dominus de medio mei : vocavit adversum me tempus, ut contereret electos meos (Thren. 1, 15). » Recte itaque dictum est, quoniam Dominus *auferet a Jerusalem, et a Juda validum et fortem, atque omne robur panis, et omne robur aquæ, fortem, et virum bellatorem, et judicem et prophetam, et ariolum et senem, principem super quinquaginta, et honorabilem vultu; et consiliarium sapientem de architectis, et prudentem eloquii mystici*. Isti quidem auferuntur, sed loco eorum inutiles dantur.

(37) Cod. G., *gustaverunt etiam donum cæleste, et participes facti sunt Spiritus sancti; gustaverunt bonum Dei verbum, etc.*

*Dabo, inquit, pueros, id est lascivos et indomabiles, ac dissolutos et pueriliter agentes, principes eorum, id est sacerdotes ac praelatos, et effeminati, id est transitoriae laudis amatores dominabuntur eis. Effeminati enim sunt arrogant praepositi; quia, dum humanis laudibus mollia corda prostituunt, quasi a suis amatoribus corrumpuntur. Effeminati sunt, quia laudis luxuria corrupti. Si enim viriliter viverent, laus transitoria nulla eos corruptione vitaret. Qui, quoniam non Dei gloriam quaerunt, sed suam, magis dominari subjectis volunt quam prodesse, et eis non consulendo loqui, sed vix dominando dignantur. Quibus per alium prophetam dicitur: « Vos autem cum austeritate imperabatis, et cum potentia (Ezech. xxxiv, 4). » Cum austeritate enim et cum potentia imperant; quia subditos suos non tranquille ratiocinando corrigere, sed aspere inflectere dominando festinant. Et tales nunc sacerdotes ac praepositi in Ecclesia multipliciter abundant propter peccata populi. Nam quod hujusmodi praelatos habere populus subjectorum meruerit, sequentia indicant: *Irruet, inquit, populus vir ad virum, unusquisque ad proximum suum, id est pugnabit alter adversus alterum, vel laedet eum, aut nocebit. Et quia mali bonos dehonestare satagunt, tumultuabitur, inquit, puer contra senem, id est lascivos et pueriles actus habens litigabit adversus eum qui morum gravitate senuit. Et ignobilis contra nobilem, id est peccator contra justum. Quemadmodum autem populus iste pueros principes sortiatur, ostendit sermo subjunctus.**

« Apprehendet enim vir fratrem suum, domesticum patris sui: *vestimentum tibi est, etc.* » Nam quid per virum nisi quaelibet persona designatur? Et quid per fratrem vel domesticum nisi quilibet carnalis propinquus vel amicus accipitur? Apprehendit ergo vir fratrem suum, ut in principem constituat eum; quia jam, decrescente religione, frequenter accidit, ut ad ecclesiasticum regimen non sanctiores eum, qui dignus fuerit, eligant, sed potens quilibet eum, quem carnaliter diligit, praeponat. Ob hoc itaque pueros principes habet Ecclesia; quoniam, non tam propter vitae meritum, quam propter carnalem dilectionem eliguntur a potentibus. Et dicitur ei, qui sic eligitur: *Vestimentum tibi est, princeps esto noster.* Vestimentum hic intelligitur honestas quaedam conversationis, qua nonnulli se palliant, ut irreprehensibiles videantur hominibus, licet intus nihil verae aut perfectae virtutis habeant. Tales enim facile ab imperitiis eliguntur.

« Princeps, inquit, esto noster; ruina autem haec sub manu tua. » Ruina haec interioris hominis est, ruina haec mors est. *Ruina haec sub manu tua.* Non ait: Releva ruinam hanc, quia non curat eligere talem, qui corruentes relevet, sed tantummodo qui super caeteros appareat. Sed ille, qui eligitur, excusat se, dicens: « Non sum medicus, et in domo mea non est panis, neque vestimentum: nolite constituere me principem populi. » Quisquis ad pasto-

ralem curam eligitur, debet esse spiritalis medicus, ut diligenter mederi sciat interioris hominis languoribus; et in domo conscientiae suae debet habere panem spiritualis doctrinae, ut constitutus super familiam Domini sui « det illis cibum in tempore (Matth. xxv, 25). »

Vestimentum quoque necesse est ut habeat in domo sua, quatenus vestimento virtutum vestitus sit intrinsecus. Necessarias ergo causas excusationis opponens, ait: « Non sum medicus, et in domo mea non est panis neque vestimentum, » cui dictum fuerat: « vestimentum tibi est, » quod ad exteriorem conversationem retulimus. Ille autem de interiori veste cordis respondet: « quia in domo mea vestimentum non est, » ac si dicat: Etsi vobis honestate quadam conversationis vestitus appareo, in oculis tamen interni inspectoris nudus sum. Ecce iste et eligitur, et se excusat, nec tamen laude dignus est. Quid ergo de illis aestimabimus, qui quaerunt ad hujusmodi praelationes eligi, ut per has magnificentur apud homines? Quanti enim panem non habentes et vestimentum, cum ipsi esuriant, et nudi sint nec habeant spiritalem cibum neque Christi tunicam integram servaverint, aliis et alimoniam, et vestimenta promittunt, et pleni vulneribus medicos se esse jactant! Post haec autem prophetica voce subditur:

« Ruit Jerusalem et Juda concidit; quia lingua eorum, et adinventiones eorum contra Dominum, ut provocarent oculos majestatis ejus. Jerusalem, » id est Ecclesia, *ruit*; quia murus fidei et disciplinae circa finem saeculi dissipatus est, atque turres arduarum virtutum delapsae sunt. *Et Juda, id est fidelium populus concidit*; quia fere tota haec plebs statum rectitudinis amisit. *Quia lingua eorum contra Dominum, quoties ea quae Deo contraria sunt, loquuntur; et adinventiones eorum, quoties novos male agendi modos inveniunt. Unde provocant oculos majestatis ejus*; quia in suis adinventionibus ex deliberatione peccant. Omne enim peccatum aut per infirmitatem, aut per ignorantiam, aut per studium deliberationis committitur. Et pejus quidem est ex infirmitate scienter peccare quam ex ignorantia; sed multo gravius ex deliberatione quam ex infirmitate. Et ideo ii, qui malorum adinventionibus ex studio deliberationis prava committunt, non peccare in conspectu Domini, sed, quod est gravius, provocare dicuntur *oculos majestatis ejus*. Sequitur:

VERS. 9. — « Agnitio vultus eorum respondebit eis. »

Mens libidinosa et indisciplina solet in oculis et in vultu dignosci; oculorum autem nutus et indicia vultus sequitur nequitiae perpetratio. Unde nunc apte dicitur: *Agnitio vultus eorum respondebit eis*; ac si diceretur: Culpa cordis, quae per signa vultus se prodere coeperat, per carnis luxuriam in operis perpetracione respondebit eis, ut quales interius sint, ostendat foris turpitudine immundi operis. Hi vero,

postquam tale opus in consuetudinem vertunt, omnem verecundiam amittunt. Unde subditur :

« Peccatum suum quasi Sodoma prædicaverunt, nec absconderunt. » Peccatum quippe suum sicut Sodoma prædicant, qui opus confusionis, quod ipsi faciunt, aliis impudenter sive glorianter detegunt, ut eos ad simile opus (38) alliciant. Sed dum in talibus gloriantur, subitaneus illis supervenit interitus; ideoque velut de præterito subditur :

« Væ animæ eorum, quoniam reddita sunt illis mala. » Pro malis, quæ temporaliter fecerunt (39), perpetua mala recipit anima eorum. Unde nos ad laudem justis Judicis hortatur propheta, subjiciens :

VERS. 10. — « Dicite justo, quoniam bene, quoniam fructum adinventionum suarum comedit. »

Quis enim justus iste est, nisi cui canitur : « Justus es, Domine, et rectum judicium tuum? » (Psal. cxviii, 157.) » Cui debemus omnes dicere, quoniam bene egit, exterminans eos, qui peccatum suum, quasi Sodoma prædicabant, et adinventionibus studebant. Comedent enim fructum adinventionum suarum; quia pro culpis suis æternaliter punientur. « Peccatum quippe, cum consummatum fuerit, generat mortem (Jacob. 1, 15). » Iste est fructus peccati. Quia vero omnis, qui adhuc similia facit, similem postmodum sententiam accipiet, nisi citius per poenitentiam opera sua correxerit, recte subjungitur :

VERS. 11. — « Væ impio in malum : retributio enim manuum ejus fiet ei. »

Nam, quanto se beatiorum putat impius, dum ei ad votum cuncta proveniunt, tanto est infelicior. Quia, quo magis iniquitates multiplicat, eo amplius damnationem suam accumulatur. *Retributio enim manuum ejus fiet ei*, quia secundum omnia quæ nunc facit recipiet.

Sed et Judæis convenit, quod dictum est : « Væ, animæ eorum, quoniam reddita sunt eis mala, » etc. Nam mala, quæ in Christum exercuerant, ceperunt a Romanis; et comedent in poenis æternalibus fructum adinventionum suarum, quibus Dominum mendaciter accusaverunt. Sed et quicumque adhuc in eadem impietate Judaica perdurat, hæc illi, quia *retributio manuum ejus fiet ei*. Sequitur :

VERS. 12. — « Populum meum exactores sui spoliaverunt, et mulieres dominatæ sunt eis. »

Exactores vocantur, qui tributa exigunt atque cætera hujusmodi. Et antiquum Dei populum, qui censum exigebant, dum reddere forsitan nequirent, spoliabant servientes avaritiæ principum atque uxores potentium superba dominatione opprimebant eum. Similiter et nunc in hoc populo fieri sæpe cernimus et ab exactoribus, et ab uxoribus principum. Et hæc itaque sententia de illis, qui fideles spoliabant ac gravant, prolata est. De adulatoribus vero, qui eos immoderatis favoribus extollunt, subditur :

(38) Cod. G., ad similem nequitiam.

(39) Ibid., egerunt.

« Popule meus, qui beatum te dicunt, ipsi te decipiunt, et viam gressuum tuorum dissipant. » Adulator enim decipit eum, quem dicit beatum; quia mendacio fallit eum, et in vanam gloriam extollit; atque viam gressuum operationis ejus dissipat; quia dum ille beatum se credit, sufficere sibi credit bona quæ fecit, et viam suæ rectitudinis jam, ut consueverat, tenere negligit. Sic enim multi perierunt, dum circa finem remissius agerent, vel in culpas declinarent. Sed ne decipiamur humanis favoribus, illud terribile judicium Dei, quod adhuc nobis restat, semper cogitare debemus. Nam sequitur :

VERS. 13. — « Stat ad judicandum Dominus, et ad judicandum populos. »

Non ait : sedet, sed stat ad judicandum Dominus; quia nondum realiter exerit ipsum judicium, quod in sessione Judicis designatur, ut jam peccatores condemnet; sed adhuc stat, id est in stadio vitæ hujus currentes sive pugnantes aspicit et adjuvat, atque præmia illis præparata servat. Et e diverso male agentes considerat, ut eis secundum opera ipsorum in fine retribuatur. Nam qui modo stat ad judicandum, aliquando sedebit, id est ipsum actualiter faciet judicium. Sequitur :

VERS. 14. — « Dominus ad judicium veniet cum senibus populi sui, et cum principibus ejus. »

Qui sunt autem isti senes, nisi qui sapientia et moribus maturi sunt, id est omnes perfecti? « Senectus enim venerabilis est, non diuturna, neque numero annorum computata; cani autem sunt sensus hominis, et ætas senectutis vita immaculata (Sap. iv, 8 et 9). » Et qui sunt hi principes, nisi prophetæ et apostoli, atque boni rectores Ecclesiarum? Cum his ergo senibus et principibus veniet Dominus ad judicium; quia promisit eis, dicens : Vos qui reliquistis omnia, et secuti estis me (Matth. xii, 29), » etc. Qui idcirco maxime tunc veniet, ut raptos atque fidelium oppressores puniat. Unde protinus causam eorum subjiciens ait :

« Vos enim depasti estis vineam meam. » Vineam Domini plebs ejus est, quam depascitur quisquis bona fidelium diripit. Unde et evidentius addit : « Rapina pauperis in domo vestra, » et increpando subjungit :

VERS. 15. — « Quare atteritis populum meum, et facies pauperum commolitis? dicit Dominus exercituum. »

Atterunt namque populum Dei, qui servos ejus tribulant et affligunt; et facies pauperum commolunt vel attenuant, id est in acie afficiunt, qui victum eorum auferunt. Hi ergo contra se iram Dei vehementer accendunt. Sequitur :

VERS. 16. — « Et dixit Dominus : Pro eo quod elevatae sunt filiae Sion, et ambulaverunt extento collo, et nutibus oculorum ibant, et plaudebant, ambulabant, et in pedibus suis composito gressu (40) incedebant. »

(40) Alias, gradu.

VERS. 17. — « Decalvabit Dominus verticem filiarum Sion, et Dominus crinem earum nudabit. »

Historialiter quidem possunt hæc ad Judaicas mulieres, quæ sic ob superbiam et lasciviam agebant, referri, et in tempore obsidionis Jerusalem, quæ subito facta est, decalvatæ sunt ac deturpatæ. Sed quia Sion interpretatur *specula*, possumus subtiliori intellectu filias Sion accipere fideles animas, quæ velut in specula positæ venientes tentationes ab arce mentis solent circumspectione cauta prævidere. Sed plerumque tales animæ in superbiam elevantur, et omnem religiosam conversationem suam dissipant.

Nam quia etiam in vultu et in gestu corporis apparere solet mentis elatio, postquam hæc *filie Sion elevatæ sunt, ambulaverunt extento collo, et nutibus oculorum*. Quo contra sanctus David, quia nec in corde nec in vultu superbiam habebat, profitebatur : « Domine, non est exaltatum cor meum, neque elati sunt oculi mei (*Psal. cxxx, 1*). » *Ibant etiam filie Sion*, id est deambulabant, et *nutibus plaudebant* dissolutionis, lasciviæ et inanis lætitiæ, atque *composito gradu incedebant*, quia disciplinam cordis omnem abjecerant, et idcirco foris taliter agebant. Quia ergo *filie Sion*, id est animæ Christianæ, talia facere non timuerunt, *decalvabit Dominus verticem earum, et nudabit crinem ipsarum*.

Quid autem in decalvatione figuratur nisi nudatio verecundiæ? Frons enim, quæ in decalvatione detegitur, sedes est verecundiæ. Decalvat ergo Dominus *verticem earum*, cum illud in illis detegit, unde superba mens earum gravius erubescat, dum ab omnibus aspiciatur ludibriosa. Sed et *crinem capitis earum Dominus* nudat, quando perversam cogitationem cordis ipsarum manifestat. Et, quamvis etiam in hac vita plerumque ista decalvatio atque nudatio fiat, plenarie tamen non fiet « quoadusque veniat Dominus, qui et illuminabit abscondita tenebrarum, et manifestabit consilia cordium (*I Cor. iv, 5*). » Sequitur :

VERS. 18. — « In die illa auferet Dominus omne (41) ornamentum calceamentorum et lunulas. »

VERS. 19. — « Et torques, et monilia et armillas et mitras. »

VERS. 20. — « Et discriminalia et periscelidas, et murenulas, et olfactoriola, et inaures. »

VERS. 21. — « Et aunos et gemmas in fronte pendentes. »

VERS. 22. — « Et mutatoria et pallia (42), et linteamina, et acus. »

VERS. 23. — « Et specula, et sindones, et vittas, et theristra. »

His muliebribus ornamentis spiritalia mentium ornamenta congrue figurantur. Calceamenta enim, quæ ex pellibus mortuorum animalium fiunt, et pedes muniunt, exempla sanctorum Patrum designare possunt, quæ nostri operis gressus in via Dei muniunt. Lunula, quæ est bulla instar lunæ facta, et a collo de-

pendens in pectore, alicujus insigne virtutis in nocte præsentis vitæ lucentis, et ab operatione ad intelligentiam quasi a collo ad pectus pervenientis secundum illud : « A mandatis tuis intellexi (*Psal. cxviii, 104*). » *Torques* undique perfectum atque decorum bonæ operationis ornamentum, de quo Salomon ait : « Ut addatur gratia capiti tuo, et torques collo tuo (*Prov. i, 9*). » *Monile*, quo sponsæ pectus signatur et ornatur, spiritalis conjugii castæque dilectionis signaculum. *Armillæ*, quæ lacertos stringunt, validam operantium operationem. *Mitra fluctuantium cogitationum* velut capillorum cohibitionem. *Discriminale*, quo crines dividuntur, acumen discretionis, quæ bonas malasque cogitationes subtiliter discernit.

B *Periscelidæ* vero sunt apud feminas crurium ornamenta, quibus earum gressus decorantur, id est torques ex auro similes armillis, et circa talos ponuntur. Quid igitur in periscelidis figuratur nisi virtutis ornatus circa extremum actionis? Vel quia juxta sententiam Genesis antiquus serpens insidiatur *calcaneo* mulieris (*Gen. iii, 15*), id est labenti actioni animæ, ibi circumpositum munimen virtutis vel ornamentum religiosæ operationis sub periscelidarum appellatione figuratur, ubi serpens morsum infigere quærit.

C *Murenula* autem est quædam ordinis flexuosi catena, quæ auro in virgulas lentescente contextitur in similitudinem serpentis, et ad collum ornandum aptatur. Quid ergo per murenulam intelligi debet nisi veritatis aurea doctrina, quæ in multiples sensus ordinate flectitur, et in innumeras sententias velut in virgulas ita spargitur, ut eas in indice unius piæ intentionis connectat, serpentinam habens cautelam, et sancti operis laborem velut collum astringens, et adornans? Unde et in Canticis ad Sponsam dicitur : « Murenulas aureas faciemus tibi vermiculatas argento (*Cant. i, 10*). » Aureas dicunt, et argento vermiculatas, id est variatas; quia interdum auri et argenti virgulis texuntur, ut ibi sapientia et facundia permistæ significentur. Auro quippe sapientia, argento autem nitor eloquentiæ designari solet.

D *Olfactoriola* vero, quæ sunt vascula, in quibus habentur odora, possunt exprimere corda bonorum, ex quibus odor virtutum suavissimus spirat. *Inaures* auditum obedientium; annuli signaculum secretorum, aut certe fidem, qua sponsatur anima Christo. *Gemmæ pendentes in fronte* pretiosum gloriôsæ crucis signaculum, quod in fronte gestamus. *Mutatoria* alternationem religiosæ conversationis, ut in illis virtutibus quis exerceatur, et modo contemplativam, modo activam vitam ducat. *Pallia* exteriorem habitum bonæ operationis. *Linteamina* mundum et candidum mentis ornamentum. *Acus* compunctionem. *Acubus* enim ornata crinium compago retinetur, ne laxius fluant et sparsi dissipentur.

(41) Alias *deest, omne*.

(42) Alias *palliola*.

Sic et compunctionis virtus cogitationes inaniter A
fuitare non sinit, sed eas decenter et ordinate strin-
git.

Speculum sanctæ lectionis est studium, in cuius
consideratione deprehendimus, quid deformitatis,
quidve pulchritudinis interior homo noster ha-
beat. *Sindones* subtile vestimentum justitiæ eorum,
qui dicere possunt: « Exspoliavi me tunica mea
(*Cant.* v, 3), » id est veteri conversatione.

Vitiæ quæ capita mulierum decenter occultant, et
ornant, honestam mentis verecundiam exprimere
possunt.

Theristrum vero quasi æstivale dicitur indumen-
tum; quia *Theri* græce vocatur æstas. Fit enim hoc
vestimentum de optimo lino valde subtile, et utuntur
eo in æstate mulieres Mesopotamiæ, et Arabiæ atque B
Hispaniæ. Quid est ergo Theristrum animæ nisi subtilis-
simus atque mundissimus castæ mentis habitus
interior, non sinens eam carnalium vitiorum æstu
caleferi, sed optimum ei præstans refrigerium in
ardore tentationum?

Et hæc quidem tot et tanta bona, priusquam dele-
rentur, habuerunt *filie Sion*, id est fideles animæ.
Sed quia post religiosam conversationem elevatæ in
superbiam et lasciviam dissolvuntur, in die, qua
Dominus verticem earum decalvabit, auferet eis hæc
omnia, id est partim in hoc sæculo, et prorsus in
die iudicii, sicut amissionis tantorum bonorum
operum causa et initium erit superbia. Nihil enim
honorum operum remanere ibi poterit, ubi domina-
tur superbia. Quia sicut ventus pulverem, sic super-
bia omnes virtutes rapit. Unde et apte subjun-
gitur:

VERS. 24. — « Et erit pro suavi odore fetor, et pro
zona funiculus, et pro crispanti crine calvitium, et
pro fascia pectorali cilicium. »

Nam suavis odor opinio virtutum est, de qua di-
cit Apostolus: « Christi bonus odor sumus Deo
(*II Cor.* ii, 15). » Fetor vero mala opinio est et infam-
ia. Ubi ergo virtutes auferuntur, et vitia succe-
dunt, ibi *pro suavi odore est fetor*.

Zona autem cingulum castitatis significat; *funi-
culus* vero peccatum luxuriæ. Unde et de Domine
alias scriptum est: « Balteum regum dissolvit et
præcingit fune renes eorum (*Job* xii, 18). » Reges
enim sunt, qui membrorum suorum motus bene re-
gere sciunt. Sed cum de ipsa continentia elatione
mens tangitur, plerumque Deus, superbiam ejus de-
serens, hanc immunditia operis cadere permittit.
Regum vero balteum dissolvit, quando in his, qui
bene regere membra sua videbantur, propter elat-
ionis culpam, castitatis cingulum destruit. Et *præcin-
git fune renes eorum*, quatenus, dissoluto pudicitia
cingulo, membris eorum peccati delectatio domine-
tur, ut quos in occulto superbia inquinat, quam
sint detestabiles, etiam in publico ostendat. Hoc

(43) Cod. G. malorum cogitationum.

est itaque quod nunc de elatis filiabus Sion dicitur:
Quoniam erit eis pro zona funiculus.

Sed et *pro crispanti crine calvitium erit*. Si caput
intelligitur mens juxta Scripturarum consuetudinem,
qui sunt crines hujus capitis nisi sensus et cogita-
tiones? Crines ergo crispantur, quando sensus et co-
gitationes pulchris ordinibus disponuntur. Sed et
pro crispanti crine datur calvitium, quando pro
sensu formosis rationabilium cogitationum gra-
dibus dispositio pudenda et ridiculosa mentis exhi-
betur in perversi operis ostensione nudatio.

Fascia vero pectoralis est divina dilectio, quæ
vagarum cogitationum motus per amoris intimi vin-
cula restringit. In cilicio autem peccati asperitas
et punctio designari solet. *Pro pectorali igitur fa-
scia cilicium* est, quando pro charitate et cordis
disciplina, quæ mentem in cogitatione Deum di-
ligendi stringere consueverat, peccatorum aspe-
ritas et odiorum stimuli, malarum cogitationum (43)
punctione mentem lacerant. Sequitur:

VERS. 25. — « Pulcherrimi quoque viri tui gladio
cadent, et fortes tui in prælio. »

Pulcherrimi viri Ecclesiæ sunt, qui in spiritali
bello fortiter dimicant, viriliter agunt, et honestissime
conversantur in religione divina. Et *fortes* ejus sunt,
qui in spiritali bello fortiter dimicant. Sed nonnun-
quam etiam tales viri, dum de sua pulchritudine
gloriantur, cadunt a statu suæ rectitudinis, *glu-
cio*
nequissimæ delectationis transfossi; et qui *fortes* vi-
debantur, plerumque in *prælio* carnalium delecta-
tionum (44) victi succumbunt. Unde et Jeremias ait:
« Juvenes eorum confodiuntur gladio in prælio (*Jerem.*
xviii, 21). » Juvenes quippe gladio confodiuntur in
prælio, cum ii, qui in novitate vitæ fortiter ambu-
lant et alacriter, in articulo tentationis transiguntur
mucrone delectationis.

Quod si de animæ statu intelligimus, quæ post
virtutes peccaverit, pulcherrimos ejus viros accipi-
mus bona opera, quæ hostili *gladio* cadunt. Et *fortes*
ejus virtutes, quæ in spiritali *prælio* pereunt. Ubi
post tanta virtutum detrimenta, post tam multipli-
cem animarum ruinam, congrue subjungitur de Ec-
clesia:

VERS. 26. — « Et mœrebunt atque lugebunt
D portæ ejus, et desolata in terra sedebit. »

Portæ enim Ecclesiæ sunt sancti doctores et præ-
positi, per quorum ministerium Ecclesiam quisque
ingreditur. Qui inter hæc virtutum damna præcipue
mœrent et lugent; quia sicut lucrum animarum solli-
cite quærun, sic detrimentum earum affectuose
plangunt. Qui quotidie magis magisque vident, quæ
gravius defleant; quia venerunt dies et veniunt, de
quibus ait Apostolus: quod novissimis diebus in-
stabunt tempora periculosa et erunt homines seipsos
amantes, cupidi, elati, superbi, blasphemii, parenti-
bus non obedientes, ingrati, scelesti, sine affectione,
sine pace, criminatores, incontinentes, immites,

(44) Cod. G. tentationum.

sine benignitate, protervi, tumidi, proditores, voluptatum amatores magis quam Dei, habentes quidem speciem pietatis, virtutem autem ejus abnegantes (II Tim. III, 2-5). Nam hæc omnia mala redundare cernimus in hujus temporis hominibus. Unde et postmodum malis amplius excrescentibus, et Antichristo regnante, sancta Ecclesia desolata *sedebit in terra*, id est in humilitate et tristitia perdurabit lugens, nec ab homine consolabitur in tantis malis. Quod et Jeremias intuens, ait : « Quomodo sedet sola civitas plena populo? Facta est quasi vidua domina gentium (Thren. 1, 1).

Moraliter autem, quicumque locum dederit diabolo, et non omni custodia servaverit cor suum, lugent *portæ ejus*, et absente sponso, semper in luctu est, ac de excelsis corruens in terræ pulvere sedet. Itaque detrimenta eorum, qui post religiosam conversationem, diabolo insidiante, virtutes et bona quæ fecerunt amittunt, descripsit hactenus propheta multipliciter. Hinc ad illud tempus, quo septiformis Ecclesia venit ad Christum, reducit verba dicens : « Et apprehendent septem mulieres virum unum in die illa. » Sed historialiter, ut superius dicere cœpimus, tempore obsidionis Jerusalem, decalvavit Dominus verticem filiarum Sion, et abstulit eis ornamentum calcamentorum, et lunulas, et torques et cætera, quæ describuntur. Unde cum ad crucem duceretur, ait : « Filizæ Jerusalem, nolite flere super me, sed super vos ipsas flete, et super filios vestros : quoniam venient dies, in quibus dicent : Beatæ steriles, et ventres qui non genuerunt, et ubera quæ non lactaverunt. Tunc incipient dicere montibus : cadite super nos, et collibus : operite nos (Luc. XXIII, 28-30). » Quis enim pensare valeat afflictionem et tædium vitæ quod patiebantur, atque angustias, dum dicerent montibus : *Cadite super nos*? Omnia ergo, quæ nunc describuntur, completa sunt ibi. Nam et pulcherrimi Judæorum ceciderunt gladio Romanorum, et luxerunt portæ Jerusalem obsessæ, cum nemo posset egredi, vel ingredi, et desolata sedit in terra, quia dejecta est in illa tribulatione non habens consolatorem, et ad ultimum destructa. Et quia, quando vetus illa Jerusalem cecidit, nova surrexit, apte subjungitur :

CAPUT IV.

VERS. 1. — « Et apprehendent septem mulieres virum unum in die illa, dicentes : Panem nostrum comedemus, et vestimentis nostris operiemur : tantummodo invocetur nomen tuum super nos, aufer opprobrium nostrum. »

Nam quæ sunt istæ *septem mulieres*, nisi septem Ecclesiæ, quæ unam faciunt catholicam? Quis est vir nisi Christus? *Apprehendent ergo septem mulieres virum unum in die illa*; quia tempore, quo vetus Jerusalem destructa est, et gratia novæ prædicationis illuxit mundo, septem Ecclesiæ adhæserunt Christo, dicentes : *Panem nostrum comedemus*, id est

A refectionem spiritalis gratiæ, de qua genus humanum de paradiso expulsus, ait : « Percussus sum ut fenum, et aruit cor meum, quia oblitus sum comedere panem meum (Psal. CI, 5). »

Et vestimentis nostris operiemur, id est honorum operum indumentis, de quibus scriptum est : « Beatus qui vigilat et custodit vestimenta sua, ne nudus ambulet, et videant tarpitudinem ejus (Apo. XVI, 15). » Nam anima quæcumque panem hunc internæ refectionis invisibiliter comedere, et his religiosarum actionum vestibus indui negligit, non potest huic singulari viro placere, qui speciosarum Sponsus est animarum. Et hæc, inquit, faciamus, *tantummodo invocetur nomen tuum super nos*, ut tu vir noster voceris, et nos tuæ conjuges, vel ut a Christo Christianæ dicamur, et in nomine Christi cuncta faciamus. *Aufer opprobrium nostrum*, ut omnem peccatorum nostrorum memoriam deleas, ne postquam tibi legitime spiritaliter sociatæ fuerimus, impropere nobis, quia priusquam ad te veniremus, fornicatæ simus. Sequitur :

VERS. 2. — « In die illa erit germen Domini in magnificentia, et gloria, et fructus terræ sublimis, et exsultatio his qui salvati fuerint de Israel. »

Germen Domini in magnificentia et gloria fuit, cum sempiternus Dei Filius, in carne temporaliter apparens magnitudine virtutum et doctrinæ, mundo clarus effulsit. *Fructus quoque terræ sublimis* effectus est, quando carnem, quam de natura nostra quæ de terra est, mortalem Deus susceperat, in virtute resurrectionis immortalem jam redditam ad caelos sublevavit. Et tunc *exsultatio fuit his qui salvati erant de Israel*, id est, discipulis ejus; quia sic certificati sunt de gloria resurrectionis ejus, ut eo caelos petente ipsi non solum ulla tristitia afficerentur, sed etiam gaudio magno replerentur. Nam sicut scriptum est : « Reccedit ab eis, et ferebatur in caelum, et ipsi adorantes regressi sunt in Jerusalem cum gaudio magno, et erant semper in templo laudantes et benedicentes Deum (Luc. XXIV, 51, 53). » Et eandem lætitiâ habuit multitudo reliquorum fidelium Hebræorum, quorum erat cor unum et anima una. De quibus et subditur :

VERS. 3. — « Et erit omnis, qui relictus fuerit in Sion, et residuus in Jerusalem, sanctus vocabitur, omnis qui scriptus est in vita in Jerusalem. »

VERS. 4. — « Si abluerit Dominus sordem (45) filiarum Sion, et sanguinem Jerusalem laverit de medio ejus spiritu (46) judicii, et spiritu arboris. »

Omnis, inquit, qui relictus fuerit in Sion temporibus apostolorum, et *residuus in Jerusalem* terrena illa civitate Judæorum, *sanctus vocabitur*, sumpto nomine suo a Sancto sanctorum, ac si dicat : christianus appellabitur. Ergo Caiphas vocabitur sanctus? Annas vocabitur Sanctus? Pharisei et Scribæ vocabuntur sancti? Non. Sed *omnis qui scriptus est*

(45) Alias, sordes.

(46) Alias, in spiritu, etc.

in vita in Jerusalem, id est illi omnes, quibus dicitur: « Gaudete, quia nomina vestra scripta sunt in caelis (Matth. v, 12). Jerusalem nunc intellige illam supernam, de qua scriptum est: « Non commovebitur in æternum, qui habitat in Jerusalem (Psal. cxxiv, 1). » Omnis ergo, qui tempore apostolorum relictus est in Sion, sanctus est vocatus, qui inseribi meruerit in libro vitæ, sicut et Apostolus ait: « In hoc tempore reliquæ secundum electionem gratiæ salvæ factæ sunt. Omnis itaque qui relictus fuerit vocabitur sanctus (Rom. xi, 5). »

Si abluerit Dominus sordem filiarum Sion, id est si deleverit peccata Israelitici populi, et sanguinem Jerusalem, id est reatum effusionis Domini sanguinis laverit in spiritu iudicii, et spiritu ordoris, sicut ait Petrus jam corde compunctis consilium quærentibus, quia Salvatorem se crucifixisse intellexerant: « Pœnitentiam, inquit, agite, et baptizetur unusquisque vestrum in nomine Jesu Christi in remissionem peccatorum, et accipietis donum sancti Spiritus (Act. ii, 38). » Nam de spiritu iudicii dicit: pœnitentiam agite, et baptizetur unusquisque vestrum; de spiritu begnini ardoris addidit: et accipietis donum sancti Spiritus; vel quia idem Spiritus, per quem fit remissio peccatorum, primum quidem discipulis datus est Spiritus iudicii, deinde Spiritus ordoris: spiritus iudicii, quando audierunt: « Accipite Spiritum sanctum; quorum remisistis peccata, remittuntur eis, et quorum retinueritis, retenta sunt (Joan. xx, 22); » Spiritus ardoris, quando apparuerunt illis dispertitæ linguæ tanquam ignis, seditque supra singulos eorum, et repleti sunt omnes Spiritu sancto (Act. ii, 3). »

Cum autem dicitur: Si abluerit Dominus sordem filiarum Sion, dubitative dici videtur, non quia hoc incertum esset apud Dominum, sed quia vix inventi sunt vel pauci inter plurimos, qui mererentur abluï. Per hoc enim quod dicitur: Si abluerit Dominus, quia ex magna multitudine pauci forent abluendi, monstratur. Sequitur:

VERS. 5. — « Et creavit (47) Dominus super omnem locum montis Sion, et ubi invocatus est, nubem per diem, et fumum et splendorem ignis flammantis in nocte. »

Appellatione montis Sion designatur Ecclesia, sicut scriptum est: « Qui confidunt in Domino sicut mons Sion (Psal. cxxiv, 1). » Nubes vero divinam protectionem significat, sicut scriptum est: « Expandit nubem in protectionem eorum (Psal. civ, 39). » Dies autem prosperitatem designat, et nox adversitatem, sicut angelica voce canitur: « Projectus est accusator fratrum nostrorum, qui accusabat illos ante conspectum Dei nostri die ac nocte (Apoc. xii, 10). » Hostis enim antiquus prosperis nos male uti studet accusare, et in adversis patientiam non habere. Itaque super omnem locum montis Sion, id est in quocunque loco est Ecclesia, et ubi

(47) Alias, creabit.
(48) Alias, erit.

A invocatus est Dominus, id est ubicunque vel unus fidelium invocatus eum, creavit nubem protectionis et umbraculi spiritalis per diem prosperitatis. Nam quia in prosperis solet mentem gravius urere calor tentationis, ibi divina nubes necessaria est, quæ ardorem carnalium desideriorum semper amoveat, et mentis præstet refrigerium.

In nocte autem adversitatis creavit fumum et splendorem ignis. Quis est iste ignis, nisi de quo dicit: « Ignem veni mittere in terram, et quid volo, nisi ut ardeat? » (Luc. xii, 49.) Hic ergo ignis aliis fumum, et aliis splendorem habere videtur, juxta quod Apostolus ait: « Aliis quidem sumus odor mortis in mortem, aliis autem odor vitæ ad vitam (II Cor. ii, 16). » Dum enim unum idemque miraculum cernitur a pluribus, et alii quidem blasphemant, alii autem convertuntur, vel prædicationis verbum alii impugnant, alii recipiunt, procul dubio ignis iste aliis fumum, quo cæci fiant, et aliis splendorem, quo illuminentur, habet. Sed adhuc eadem sententia repetitur, cum subditur: « Super omnem enim gloriam protectio. »

VERS. 6. — « Et tabernaculum erunt (48) in umbraculo diei ab æstu, et in securitatem, et in absconsionem a turbine et a pluvia. »

Omnis namque electus quid est nisi gloria Dei? Ait enim: « Omnem, qui invocatus nomen meum, in gloriam meam creavi eum (Isa. xlvi, 7). » Super omnem itaque gloriam, id est super unumquemque electum protectio et tabernaculum est in umbraculo diei prosperitatis ab æstu vitiorum, ut, quando prosperitas aridet et æstus vitiorum torrere (49) mentem appetit, divina protectio nobis obumbret, ac spirituale præbeat refrigerium. Et eadem protectio nobis fit in securitatem a turbine tribulationum, et tabernaculum illud in absconsionem a pluvia blandimentorum, ut sub Dei protectione securi simus non timentes adversitatum turbines, et in tabernaculo obumbrationis ejus absconsa mens nostra non tangatur pluviis blanditiarum, et mollium sermonum, dicens: « Quoniam abscondit me in tabernaculo suo in die mala: protexit me in abscondito tabernaculi sui (Psal. xxvi, 5). » Hucusque verba secundæ visionis divinus vates protulit: hinc ad alia transitum facit

CAPUT V.

VERS. 1. — « Cantabo, inquit, dilecto meo canticum patruelis mei vineæ suæ. »

Canticum lætitiæ Moyses, transito mari Rubro, cecinit (Exod. xv), Debboraque, cum Barach peracta victoria (Jud. v), et David liberatus ab omnibus inimicis suis (II Reg. xxii); Jeremias vero canticum lamentabile cecinit, dicens: « Quomodo sedet sola civitas plena populo (Thren. i, 1), » etc. Novissimum quoque Moysi canticum tristitiæ magis est quam gaudii, quia ibi prædicitur infidelitas populi. Ita et nunc Isaias canticum mœroris cantaturus est: Can-

(49) Cod. G., errore.

tabo, inquit, *dilecto meo*, id est Deo Patri, *canticum A* *patruelis mei*, id est Domini Jesu, qui mihi futurus est consanguineus assumptione carnis, *canticum* dico habitum *vineæ suæ*, id est plebi suæ. *Patruelis* est filius patruis, patruus vero est frater patris, sicut avunculus frater matris. Patruelcem ergo suum appellat propheta Christum, propter generis propinquitatem, quia ex illa plebe sumpturus erat humanitatem.

Vel Christus est dilectus, cui Pater ait : « Tu es Filius meus dilectus (*Marc. i, 2*). » Et ille dilectus carmen fecit lugubre vineæ suæ, quod ego *cantabo dilecto* populo meo. Canticum vero sic incipit : « Vineam factam dilecto meo in cornu filio olei. » Et in sequentibus dicitur : « Vineam enim Domini Sabbaoth domus Israel est. » Quid autem *cornu* nisi fortitudinem regni designat? *Facta est ergo vinea dilecto meo in cornu*, quando antiquus Dei populus in regnum profecit. *Facta est in cornu filio olei*, quia virtus regni ejus fuit ex gratia Dei. Sequitur :

VERS. 2. — « Et sepivit eam, et lapides elegit ex illa, et plantavit eam electam. »

Sepivit vel sepit eam angelorum custodiis. *Et lapides elegit ex illa*, quia reliquias Amorrhæorum abstulit, et adversarios expulit. *Et plantavit eam electam*, quia elegit eos sibi « in peculium ex cunctis gentibus, quæ sub cælo sunt (*Exod. xix, 5*). » Sequitur :

« Et ædificavit turrinam in medio ejus, » id est templum. « Et exstruxit torcular (50), » id est altare, in quo sanguis hostiarum effundebatur, sicut exprimitur uva in prelo. Post hæc omnia beneficia subditur :

« Et exspectavit, ut faceret uvam, et fecit labruscas. » *Exspectavit*, ut vinea sua secundum naturæ suæ dulcedinem *faceret uvam*, id est, ut populus Dei jucundos ac dulces honorum operum fructus redderet; sed e contrario *fecit labruscas*, id est amara, et agrestia paganitatis opera. Labrusca quippe racemus agrestis est, et vocatur labrusca; quia in labris terræ nascitur, id est juxta vias in sepibus, significans opera gentium, quæ erant in circuitu eorum. *Fecit labruscas vineam Domini*, quia Judæa, degenerans a fructu patriarcharum, non justitiæ fructum, sed paganitatis opera fecit. Deinde vox ipsius patrisfamilias infertur, dicentis :

VERS. 3. — « Nunc ergo, habitatores Jerusalem et viri Juda, judicate inter me et vineam meam, » etc.

Hoc loco tacetur quid habitatores Jerusalem censentes responderint. Sed in Evangelio declaratur. Dixerunt enim : « Malos male perdet, et vineam suam locabit aliis agricolis, qui reddant ei fructum temporibus suis (*Matth. xxi, 41*). Cumque se proprio condemnassent iudicio, subjecit exponendo Dominus : « Auferetur a vobis regnum Dei, et dabitur genti facienti fructus ejus (*ibid.*). » Simili modo

et hic loquitur : *Judicate*, inquit, *inter me et inter vineam meam*.

VERS. 4. — « Quid est, quod debui ultra facere vineæ meæ, et non feci ei? An quod exspectavi ut faceret uvam, et fecit labruscas? »

Subaudi : facere non debui? Nunquid enim mea culpa est, quia fecit labruscas, dum exspectarem ut faceret uvam?

VERS. 5. — « Nunc (51), inquit, ostendam vobis quid ego faciam vineæ meæ. »

Et quod in Evangelio dicit : « Auferetur vobis regnum Dei (*Matth. xxi, 43*), » hoc loco subjungit : « Auferam sepem ejus, et erit in direptionem; diruam maceriam ejus, et erit in conculcationem. »

VERS. 6. — « Et ponam eam desertam, » etc.

Auferam sepem ejus, id est custodiam angelorum, et munimen defensionis meæ, *et erit in direptionem* exercitui Romano. *Diruam maceriam ejus*, id est murum Jerusalem, obsidente Tito, *et erit in conculcationem* cunctis transeuntibus; quia « cadent in ore gladii, et captivi ducentur in omnes gentes (*Luc. xxi, 24*). » *Et ponam eam desertam* adeo et incultam, ut nullum jam domestici operis fructum proferat, sed agrestia semper opera faciat.

« Non putabitur et non fodietur, et ascendent super eam vepres et spinæ. » *Non putabitur*; quia rami vitiorum ab ea non abscedunt, sed in peccatis suis moriuntur, et ligone prædicationis *non fodietur*, ut fructificet. *Et ascendent super eam vepres et spinæ*, id est punctiones peccatorum et criminum.

« Et nubibus, inquit, mandabo, ne pluant super eam imbrem. » Hoc et apostoli dicunt huic vineæ : « Vobis oportebat primum loqui verbum Dei. Sed quoniam repellitis illud, et indignos vos judicatis vitæ æternæ, ecce convertimur ad gentes. Sic enim præcepit nobis Dominus : Posui te in lumen gentibus (*Act. xiii, 46 et 47*). » Ipsi enim sunt nubes, quia de eis dicitur : « Qui sunt isti, qui ut nubes volant (*Isai. lx, 8*). » His ergo jussum est, *ne prædicationis imbrem*, super infructuosam vineam *pluant*, quia missi sunt ad gentes, ubi fructum inveniant. Hactenus mystice locutus, jam evidenter, quæ sit hæc vinea declarat, subjungens :

VERS. 7. — « Vineam enim Domini exercituum domus Israel est, et vir Juda germen delectabile ejus. »

Domus Israel decem tribus significat, et *vir Juda* domum Juda, de qua ortus est Dominus. Propter generis propinquitatem viri omnis Juda *germen delectabile* est; reliquæ vero tribus tantummodo *vineam* ejus, id est populum ejus.

« Et exspectavi ut faceret iudicium, et ecce iniquitas : et justitiam, et ecce clamor. » *Inter me et Barrabbam* debuit facere iudicium (*Matth. xxvii, 21*); sed fecit iniquitatem, id est legis transgressionem,

(50) Alias, *torcular in ea*.

(51) Alias. *Et nunc*.

bomicidam, quem lex damnat (*Num. xxxviii*), liberans; νόμος, nomos quippe Græco eloquio vocatur *lex*, et inde *anomia* dicitur iniquitas, quidquid sine lege vel contra legem est. Et *justitiam exspectavi*, ut faceret condemnans impium, et *ecce clamor* adversum me dicentium: « Crucifige, crucifige eum (*Luc. xxiii, 21*). »

Nunc videamus si hæc de illis intelligi possint qui nomine Christiano censentur. « Vineam, inquit, factam dilectam meam in cornu filio olei. » Ecclesia est vinea Dei, quæ quot sanctos profert, quasi tot palmites mittit, quibus ipse loquitur: « Ego sum vitis, vos palmites (*Joan. xv, 5*). » Per cornu vero, id est per angulum agri designatur egregia et optima pars terræ, et per hanc electa pars humani generis. Facta est igitur in cornu vinea, quoniam in electa parte hominum plantata est Ecclesia: Per oleum autem sancti Spiritus unctio figuratur. Ait ergo: « Vineam factam dilectam meam in cornu filio olei. » Filius quippe olei populus fidelis est, qui ad fidem Dei interna sancti Spiritus unctione generatur. De quo rursus oleo dicitur: « Computrescat jugum a facie olei (*Isa. x, 27*). » Jugum quippe a facie olei computrescit, quia dum gratia sancti Spiritus unguimur, a captivitatis nostræ servitute liberamur, dumque maligni spiritus dominatio superba repellitur, jugum conteritur, quo libertatis nostræ colla premebantur. Vineam ergo factam dilectam meam in cornu filio olei, quoniam Ecclesia facta est Christo in electis et spiritalibus viris, qui ex cœlesti gratia nati sunt.

« Et sepsit eam et elegit lapides ex illa, et plantavit eam electam. » Sepsit eam, sicut scriptum est: « Salvator ponetur in ea murus (*Isa. xxvi, 1*). » Et in Zacharia: « Ego ero ei, ait Dominus, murus ignis in circuitu (*Zach. ii, 5*). » Vel munitio disciplinæ sepsis nomine designari potest. Sepsit ergo eam, quia munimen disciplinæ dedit ei. Quid vero per lapides vineæ noxios nisi duritia figuratur eorum, qui in incredulitate permanserunt, dum fidem mundum suscipere? Elegit igitur lapides ex illa; quoniam reliquias infidelium diligenter abstulit de medio habitationis fidelium, et omnia, quæ Dei cultum impedire poterunt.

« Et plantavit eam electam. » Quia, sicut alibi dicitur: « Qui seminat bonum semen, est filius hominis. Bonum igitur semen, hi sunt filii regni (*Matth. xiii, 37, 38*). » Licet igitur zizania superseminaverit inimicus, tamen pater familias non nisi bonum semen in agro suo seminavit, et vineam suam plantavit electam.

« Et ædificavit turrim in medio ejus, et torcular extruxit in ea. » Ædificavit in ea turrim; quia dedit ei præpositos, quorum conversatio velut turris excelsa superemineret, ac provideret ei, custodiretque illam, de quibus dicitur: « Et abundantia in turribus tuis (*Psal. cxxi, 7*). »

Quid autem per torcular nisi pressura tribulationis et districtio disciplinæ figuratur, quæ purgat electos

A a sordibus vitiorum, et separat a reprobis, sicut eliquatur uva in prelo, et oleum ab amurca dividitur? Unde et nonnulli psalmi pro torcularibus intitulantur. Itaque tot et tantis Dei beneficij accipitis videamus, quid homo reddiderit. Sequitur:

« Et exspectavit, ut faceret uvam, et fecit labruscas; » quia postquam Deus ei tot bona tribuit, et reliquias infidelium quasi lapides eiecit, pacem illi ubique largiens, mox crescente carnalium multitudine vitis adhæsit, et in plerisque, qui Christiani dicuntur, gentiliter vivit. Non solum Ecclesiam, sed et unumquemque nostrum diu superna pietas ad bene agendum exspectat. Unde et pollicetur dicens: « Si venerit in secunda vigilia, et si in tertia vigilia, venerit, et ita invenerit, beati sunt servi illi (*Luc. xii, 38*). »

« Et fecit, inquit, labruscas, » quia, pro dolor! nec exspectati erubescimus carnaliter vivere et perversorum exempla sectari, atque infidelium opera facere.

« Nunc ergo, habitatores Jerusalem, et viri Juda, iudicatis inter me et vineam meam. » Habitatores Jerusalem ii sunt qui habitant in Ecclesia. Hæc enim civitas magni Regis, hæc est visio pacis. Pax quippe in nobis, si tamen filii pacis sumus, multiplicatur. Sed et viri Juda nos sumus propter Christum, qui ex Juda natus est. Ipsum quoque nomen Juda refertur ad Christum, sicut scriptum est: « Juda, te laudabunt fratres tui, manus tua in cervicibus inimicorum tuorum, adorabunt te filii patris tui (*Gen. xlii, 8*). » Nunc itaque sermo est ad habitatores Jerusalem, id est ad eos qui sunt in Ecclesia, et ad viros Juda, haud dubium quin ad Christianos. Et hoc eis dictum intelligere possumus, qui sedebunt « super thronos duodecim iudicantes duodecim tribus Israel (*Matth. xix, 28*). » Nam et modo iudicatur per eos vinea Domini: « quia tempus est, ut incipiat iudicium de domo Domini (*I Petr. iv, 17*), » quæ et vinea ejus est.

« Et nunc, inquit, ostendam vobis, quid ego faciam vineæ meæ. » Auferam sepe munitionem et defensionem ejus; quia ego murus eram in circuitu ejus. Et erit in direptionem avidis prædonibus, id est malignis spiritibus, qui virtutum bona diripient. Diruam maceriam ejus, id est munimen disciplinæ ejus destruam, ac religionem ipsius. Et erit in conculcationem; quia in cœno vitiorum conculcabitur ab immundis spiritibus. Unde et alias dicitur: « Aperite, ut exeant, qui conculcent eam (*Jerem. l, 26*). » Et ponam eam desertam, ut jam nullum boni operis fructum proferat.

« Non putabitur, et non fodietur, et ascendet super eam vepres et spinæ. » Putatio est æstimatio, Quando enim vitem quis ad purgandum sumit, putat, id est considerat et æstimat quid abscindere debeat, et quid dimittere. Ita et Deus opera fidelium suorum considerat, et bona quidem conservat, mala vero resecat; qui vero malis actibus assidue sunt dediti, et obstinato animo præcepta conculcant, non

facile eorum recidit vitia, sed terribili iudicio derelinquit eos in malitia sua. Et hoc est quod nunc minatur, quia *non putabitur*, neque proscindetur, nec de malis, quæ facit, increpabitur, sed in horrore iniquitatum suarum inculca deseretur.

« Et nubibus mandabo, ne pluant super eam imbrem. » Nubes sunt sancti prædicatores, qui arentem humani pectoris terram cœlestis intelligentiæ fluentis rigant. Sed jubentur continere pluviam, cum indigna fuerit auditoris anima imbre (52) cœlesti, sicut per Salomonem dicitur : « In auribus insipientium ne loquaris, quia despiciunt doctrinam eloquii tui (Prov. xxiii, 9). » Nam propter nimis subjectorum culpas sermo prædicationis aufertur doctoribus. Unde Ezechieli Dominus dicit : « Linguam tuam adhærescere faciam palato tuo, et eris mutus, nec quasi vir objurgans, quia domus exasperans est (Ezech. iii, 26). » Hinc et Amos ait : « Prudens in tempore illo tacebit, quia tempus malum est (Amos v, 19). » Hoc est ergo quod dicitur ; quia *nubibus mandabo, ne pluant super eam imbrem*, quod nostris diebus nimium compleri gemimus, quia vix jam verbum Dei populo ejus quam loquitur.

« Vineam enim Domini exercituum domus Israel est, et vir Juda germen delectabile ejus. *Domus Israel* est, cui per Apostolum dicitur : « Si autem vos Christi, ergo Abraham filii estis, secundum promissionem hæredes (Galat. iii, 22). » *Domus Israel* Ecclesia est, quæ fidem patriarcharum sequitur ; et Ecclesia *vineam* Dei est. *Vir Juda* Christianus quilibet est, sicut supra monstravimus, et ideo *vir Juda germen delectabile ejus* est ; quia in iis filiis delectatur Deus « qui non ex sanguinibus, neque ex voluntate carnis, neque ex voluntate viri, sed ex Deo nati sunt (Joan. i, 19). »

« Exspectavi, ut faceret iudicium, et ecce iniquitas ; et justitiam, et ecce clamor. » Facere iudicium et justitiam Dei est, ut in omnibus operibus, quæ cogitas facere, primo cogites Deum ; et si secundum Deum est quod cogitas, diligenter examines ; et si est rectum coram Domino, pericias illud. Si vero adversum fuerit repertum, amputes illud ab anima tua. Sed qui levitatem suæ voluntatis sequuntur, dum *exspectantur, ut faciant iudicium et justitiam*, erumpit *iniquitas et clamor*. Qui enim minora peccata committit, quasi loquitur prava in auribus Dei ; qui vero gravia mala perpetrat, jam ad aures Omnipotentis *clamat*. Unde scriptum est : « Clamor Sodomorum et Gomorrhæ multiplicatus est (Gen. xviii, 20). » Talis ergo clamor ad Deum quotidie ab iniquis ascendit. Sequitur :

VERS. 8. — « Væ qui conjungitis domum ad domum, et agrum agro copulatis usque ad terminum loci ; nunquid habitatis (53) soli vos in medio terræ ? »

Nunc de perditis moribus populi sui manifeste

(52) Cod. Cruc., *ore*.

A Propheta loquitur interpretando, quod superius allegorice dixerat, vineam Domini fecisse labruscas, increpans avaros et sectatores ebrietatis, et eos, qui iniquitates protrahunt, et qui malum laudant, bonumque blasphemant, vel qui sibi sapientiam arroganter vindicant, aut qui multum se bibere vinum gloriantur, et singulis istis *væ* perpetuæ amaritudinis minatur. Sed sicut hucusque ea quæ de populo Judæorum dicta sunt, ostendimus et de Christianorum populo dici : ita et nunc ad illos pariter, qui Christiano censentur vocabulo, et talia faciunt, comminationes propheticas intelligamus dirigi. Quicumque ergo aliena rapere contendunt, cum multiplicare largæ habitacionis spatia, vel agrorum fines extendere cupiunt, audiant quod dicitur : *Væ qui conjungitis domum ad domum, et agrum agro copulatis usque ad terminum loci ; nunquid habitatis soli vos in medio terræ ?* Ac si dicatur : Quousque vos extenditis, quasi habere in communi mundi habitacione consortes minime possitis ? Sequitur :

VERS. 9. — « In auribus meis sunt hæc, dicit Dominus exercituum. »

Talia opera, sicut et supra dictum est, ad aures superni Judicis clamant. Qui iratus adjungit : « Nisi domus multæ desertæ fuerint. » Defectio dictionis est signum vehementer, et quod minatur, maxime confirmantis. Unde cum Pharisæi signum de cœlo quærerent ab illo tentantes illum, « ingemiscens spiritu ait : Amen dico vobis, si dabitur generationi isti signum (Marc. viii, 12). » Et alibi : « Sicut juravi in ira mea, si introibunt in requiem meam (Psal. lrv, 11). » Iratus ergo, eis qui conjungunt domum ad domum dicit : *Nisi domus multæ desertæ fuerint ; quia dum avari multiplicandis possessionibus insistunt, inopinata morte rapiuntur*. Unde dives, qui dicebat : « Destruam horrea mea, et majora faciam, et illuc congregabo omnia quæ nata sunt mihi bona mea, et dicam animæ meæ : Anima, habes multa bona reposita in annos plurimos, requiesce, comede, bibe, epulare (Luc. xii, 18, 19), » divinitus audivit : « Stulte, hac nocte repetent animam tuam a te ; quæ autem præparasti, cujus erunt ? » (Ibid. xx.) Hoc itaque minatur dicens : *Nisi domus multæ desertæ fuerint*. Et ad hoc quod dixerat : *agrum agro copulatis*, subjungit :

VERS. 10. — « Decem enim jugera vinearum facient lagunculam unam, et triginta modii sementis facient modios tres. »

Nam quia agros copulant agris, ut exinde frugum abundantiam colligant, justo Dei iudicio fiunt vineæ et agri eorum steriles, ut *decem jugera vinearum vix lagunculam* musti reddant, et latitudo agrorum ubi *triginta modii sementis* jacti sunt, vix *tres modios* reddat. Sæpe enim propter avarorum iniquitatem accidit terre sterilitas. Unde et Aggæus dicit : « Respexistis ad amplius, et ecce factum est minus. »

(53) Recentiores editiones, *habitabitis*.

(*Agg. 1, 9.*) Post hæc Isaias ebriorum luxuriam A increpat dicens :

VERS. 11. — « Væ qui consurgitis mane ad ebrietatem sectandam, et potandum usque ad vesperam, ut vino æstuetis. »

VERS. 12. — « Cithara et lyra, et tympanum, et tibia, et vinum in conviviis vestris, et opus Domini non respicitis, nec opera manuum ejus consideratis. »

Hæc et sine expositione manifesta sunt. Talibus enim delectationibus corrumpuntur, qui futuræ vitæ gaudia non quærent. Et dum musicis sonis, ac vino resolvuntur, *opus Domini non respiciunt*, id est quid eis Dominus agendum præcipiat, non cogitant. *Nec opera manuum ejus*, quæ per ipsum in carne gessit, considerant. Unde et maligni spiritus in omnem vi- B tiorum servitutem eos sibi subjugant. Nam sequitur :

VERS. 13. — « Propterea captivus ductus est populus meus, quia non habuit scientiam, et nobiles ejus interierunt fame, et multitudo ejus siti exaruit. »

Dum enim conviviis et potationibus vacant, spiritali fame et siti moriuntur. Sed Judæorum populus idcirco per omnes gentes a Romanis ductus est captivus, *quia non habuit scientiam* Scripturarum, ut Christum, quem sibi Moyses et prophetæ promiserant, cognoscens susciperet. Scriptura vero sacra aliquando nobis cibus est, aliquando potus. Cibus est in locis obscurioribus; quia exponendo quasi cibus frangitur, et mandendo glutitur. Potus vero est in locis apertioribus, quia ita sorbetur, sicut invenitur. Quasi cibum enim ac potum vidit propheta huic populo defuisse dicens :

« Nobiles ejus interierunt fame, et multitudo ejus siti exaruit. » Paucorum quippe est fortia et occulta cognoscere; multorum vero historię aperta sententia. Et idcirco Judææ nobiles non siti, sed fame interiisse asserit; quia, ii qui præesse videbantur, dum totos se exteriori intelligentiæ dederant, quod de intimis discutiendo manderent, non habebant; quia vero sublimioribus ab interno intellectu cadentibus parvulorum intelligentia et in exterioribus exsiccat, recte adjungitur : *Multitudo ejus siti exaruit*; D ac si aperte diceret : Dum vulgus vitæ suæ studium deserit, jam nec fluente historię exquirat. Sequitur :

VERS. 14. — « Propterea dilatavit infernus animam suam, et aperuit os suum, absque ullo termino; et descendent fortes ejus et populus ejus, et sublimes gloriosique ejus ad eum. »

Quisquis ab inferno rapitur, in immensum devoratur. Immensam namque ejus latitudinem explicare volens propheta ait : *Dilatavit infernus animam suam*, id est interiora sua. *Et aperuit os suum absque ullo termino*, subaudi, ut infinitam peccantium

multitudinem devoret. Sine termino quippe dilatatus et apertus dicitur, quia ad se innumerabiles trahit, et quos in se suscipit, quasi in quadam abyso suæ immensitatis absorbet. Sed et beatus papa Gregorius scribit (*Dialog.*, lib. iv, c. 35), quia « præ cæteris locis in Siciliæ insulis eructante igne tormentorum ollæ patuerunt; quæ, ut solent narrare, qui noverunt, laxatis quotidie sinibus excrescunt, ut mundi termino propinquante quando certum est illuc amplius exurendos colligi, tanto et eadem tormentorum loca amplius videantur aperiri. Quod omnipotens Deus ad correctionem viventium in hoc mundo voluit ostendi, ut infideles, qui inferni tormenta esse non credunt, tormentorum loca videant, quæ audita credere recusant. » Bene itaque dicitur, quia, excrescente malorum multitudine, *dilatavit infernus animam suam, et aperuit os suum absque ullo termino.* « Et descendent, inquit, fortes ejus et populus ejus, et sublimes gloriosique ejus ad eum. » Hoc de Judæis tunc maxime completum est, quando Romanis obsidentibus urbem Jerusalem, tam nimia multitudo infidelis illius populi fame et peste et gladiis interiit. De quibus et additur :

VERS. 15. — « Et incurvabitur homo, et humiliabitur vir, et oculi sublimium deprimentur. »

VERS. 16. — « Et exaltabitur Dominus exercituum in judicio, et Deus sanctus sanctificabitur in justitia. »

Nam qui se contra Romanos, imo contra Deum erigebant, capta Jerusalem incurvati sunt catenis Romanorum, et in captivitate depressi. *Et exaltatus est Dominus Jesus conculcans eos*, qui se hactenus conculcaverant, qui in se sanctus est in justitia, et in conspectu hominum juste condemnans hostes suos et Romanis tradens, quibus deletis vel exterminatis Ecclesiæ prædicatio vires obtinuit. Nam sequitur :

VERS. 17. — « Et pascentur agni juxta ordinem suum, et deserta in ubertatem versa, advenæ comedent ea. »

Agnos dicit pascentos, de quibus audivit Petrus : « Pasce agnos meos (*Joan. xxi, 16.*) » Et quibus per Jeremiam dicit Dominus : « Dabo vobis pastores juxta cor meum, et pascent vos scientia et doctrina (*Jerem. iii, 15.*) » Et horum singuli *pascentur juxta ordinem suum*; quia, cum sint in Ecclesia diversi ordines, sancti doctores noverunt qualiter unumquemque debeant instruere. *Deserta* autem vocantur Scripturæ sacræ, quæ apud Judæos incultæ erant, dum spiritalis earum sensus non frequentaretur (54). Sed hæc *deserta in ubertatem versa* spiritalis intelligentiæ *comedent nunc advenæ*, id est gentiles.

Populus quoque Christianus spiritaliter captivus ducitur (55), quia Scripturarum scientiam habere negligit, dum litteras minime discit. *Et nobiles ejus*, id est sacerdotes *interierunt fame verbi Dei* : quia

(54) Cod. G., *spiritalis e. s. n. frequentantur.*

(55) Cod. Cruc., *dicitur.*

nec ipsi Scripturas intelligunt terrenis actibus de-
dit. *Et multitudo ejus*, id est simplices, scientiæ si-
tim patitur. *Propterea dilatat infernus animam
suam*; quia propter eos amplificantur loca tormen-
torum. *Et descendant fortes ejus ad eum*; quia « po-
tentes potenter tormenta patientur (Sap. vi, 7). »
Et populus ejus; quia sicut Osee dicit: « Populus
non intelligens vapulabit (Osee. xl, 14). » *Et incur-
vabitur homo ad pœnam*, qui nunc erigitur in su-
perbiam. *Et oculi sublimium humiliabuntur*. Sed
hæc intelligenda relinquentes ad alia transeamus.

Sequitur :

VERS. 18. — « Væ qui trahitis iniquitatem in
funiculis vanitatis, et quasi vinculum plaustri pec-
catum. »

VERS. 19. — « Qui dicitis : Festinet, et cito veni-
at opus ejus, ut videamus, et appropiet, et veniat
consilium sancti Israel, et sciemus illud! »

Iniquitas in funiculis trahitur vanitatis, cum per
augmentum culpa protelatur. *Funiculus enim vani-
tatis peccatum est*, qui et peccatorem constringit et
tamen in seipso nihil est, quia substantiam non ha-
bet. Unde per Psalmistam dicitur: « Funes pecca-
torum circumplexi sunt me (Psal. cxvi, 61). »
Quia enim funis addendo torquetur, ut cres-
cat, non immerito peccatum in fune figuratur,
quod perverso corde semper dum defenditur, multi-
plicatur.

Vinculum autem plaustri corripit, quæ bovem
ligat, ut jugum portet et plaustrum oneratum tra-
hat. *Et quasi vinculum plaustri peccatum trahitur*,
quando diaboli jugum cum ingenti iniquitatum one-
re portatur. Sed ita protrahunt nequitiam, qui ma-
lis operibus digna quandoque supplicia pati non
credunt. Unde et irridentes, dicunt: *Festinet, et
cito veniat opus ejus*, quod facturus est in die judi-
cii. *Et veniat consilium Sancti Israel*, quod ipse
cogitavit de præmiis justorum et retributione malo-
rum, *et sciemus illud*. Hæc ideo sic loquuntur, quia
se puniendos non æstimant. Sequitur :

VERS. 20. — « Væ qui dicitis bonum malum (56),
et malum bonum ponentes tenebras lucem, et
lucem tenebras, ponentes amarum in dulce, et
dulce in amarum. »

Culpa, cui væ nunc indicitur, vix ab ullo
vivente potest evitari. Sæpe enim *malum*, quod nobis
placet, *bonum* dicimus; et *bonum*, quod nolumus,
malum appellamus. Sæpe *tenebras* erroris nostri
lumen scientiæ jactamus, et *lumen* consilii alicujus
fratrum *tenebras* imperitiæ vocamus. Sed et ama-
ritudines quibus replemur, dum concupiscentiis
nostris servire volumus, dulces æstimamus, quia
præsens sæculum diligimus; et dulcedinem spiri-
talis conversationis amarum judicamus. Et ejusdem
criminis est bonum lucemque et dulce contrariis
vocare nominibus, cujus *malum, tenebras, et ama-
rum*, vocabulis appellare virtutis. Hoc contra eos,

(56) Alias, *malum bonum, bonum malum, etc.*

A qui peccatum non putant, si bono detrahant, et non
æstimant delictum, si laudent malum. Judæi quoque
tunc præcipue *malum bonum* vocaverunt, et *bonum
malum*, quando dixerunt Domino: « Nonne benedi-
cimus nos, quia Samaritanus es tu, et dæmonium
habes? » (Joan. viii, 48.) Posuerunt *tenebras lucem*,
et *lucem tenebras*, dicentes cæco: « Tu discipulus
ejus sis; nos autem Moysi discipuli sumus (Joan.
ix, 28). » Posuerunt amarum in dulce, et dulce in
amarum, quando in Passione Salvatoris clamave-
runt: « Tolle hunc, et dimitte nobis Barrabam (Luc.
xxiii, 18). » Potest et aliter atque aliter adhuc hæc
sententia intelligi. Sed ad alia festinamus. Sequitur :

VERS. 21. — « Væ qui sapientes estis in oculis
vestris, et coram vobismetipsis prudentes. »

B Superbus semper sibi sapiens videtur, et se pru-
denter æstimat agere. Si quis fratrum consilium ei
dederit, et dixerit ei: Frater non sic debes agere,
non dignatur audire, quia sapienterem se putat
quam illum. Unde bene per Apostolum dicitur, quia
« qui se putat aliquid scire, nondum novit, quomodo
oporteat eum scire (I Cor. viii, 9). » Providendum
est enim, ne accepta sapientia, cum ignorantie te-
nebras illuminat, humilitatis lumen tollat, et sa-
pientia jam esse nequeat, quæ etsi virtute locutio-
nis exterius fulgeat, elationis tamen velamine cor
loquentis obscurat. Qui enim sibi sapiens arroganter
videtur, tanto longe est a luce veræ sapientiæ,
quanto apud se humilis non est. Tales erant Scribæ
et Pharisei, qui se sapientes jactabant, et sapientiam
Dei, quæ est Christus, persequantur. Sequitur :

VERS. 22. — « Væ qui potentes estis ad bibendum
vinum et viri fortes ad miscendam ebrietatem! »

VERS. 23. — « Qui justificatis impium pro munc-
ribus, et justitiam justis aufertis ab eo. »

« Modico » quidem « vino » Timotheus sanctus
« propter stomachum et frequentes suas infirmitates
uti (I Tim. v, 23) » jussus est. Sed quod justus parce
sumit necessitate coactus, hoc perversi immoderate
capiunt delectatione illecti, et in eo gloriantur,
quod multum vinum bibere possunt, quo ingurgitati
statum mentis amittunt, et in judicio propter pecu-
niam justificant reum, et justum, quia munera non
porrigit, damnant. Talia enim sunt opera ebrietatis
et avaritiæ. Ea vero, quæ hactenus propheta mora-
liter est locutus, tam ad Judaicum populum quam
ad Christianum referuntur; quæ autem his subjungit,
de Judæis intelligamus. Nam quia hæc operati
sunt, quæ hucusque redarguit, videamus quid sub-
inferat :

VERS. 24. — « Propter hoc sicut devorat stipulam
lingua ignis et calor flammæ exurit; sic radix eorum
quasi favilla erit, et germen eorum quasi pulvis
ascendet. »

Hoc de die judicii dicitur, de quo Malachias ait:
« Ecce dies veniet succensa quasi caminus, et erunt

omnes superbi et omnes facientes iniquitatem stipula, et inflamabit eos dies veniens, dicit Dominus exercituum, quæ non relinquet eis radicem et germen (*Malach. iv, 1.*) Sicut ergo stipula devoratur ab igne; sic radix eorum quasi favilla erit. Stipula enim, quæ comburitur, in favillam redigitur.

Radix eorum favillæ fiet similis, quia et a societate justorum evelletur et concremabitur. *Et germen eorum*, quod non apparet viride, ut *pulvis ascendet*, quando Judex ventilabro purgabit aream suam. Erunt enim quasi palææ ante faciem venti, et sicut favilla, quam turbo dispergit. Et quare?

« Abjecerunt enim legem Domini (57), » quæ per Moysen data fuerat, ac deinde « eloquium sancti Israel, » id est prædicationem Christi, « blasphema verunt. » Nam si legem Domini non abjecissent prædicationem sancti Israel non blasphemarent, qui ait: « Si crederetis Moysi, crederetis forsitan et mihi. De me enim ille scripsit: Si enim litteris illius non creditis, quomodo verbis meis credetis? (*Joan. v, 46, 47.*) Sequitur:

VERS. 25. — « Ideo iratus est furor Domini in populo, et extendit manum suam super eum, et percussit eum, et conturbati sunt montes, et facta sunt morticina eorum quasi stercus in medio platearum. »

Furor est vehementissima commoti animi adversus delinquentem inflammatio. Deus autem furorem in se habere non potest; quia, cum sit immutabilis, non mente movetur irascens, sed quod justum est, tranquillus operatur. Sed quia peccatorem percutit, quasi furore commotus in eum videtur.

Iratus est furor Domini in populo Judæorum, et extendens in eum manum suam, percutiens eum per *Vespasianum* et filium ejus *Titum*. *Et conturbati sunt montes*, id est elati Judæorum optimates. *Et facta sunt morticina eorum quasi stercus in medio platearum*; quia in obsidione Jerusalem tanta multitudo eorum mortua est fame et pestilentia, ut nemo sufficeret eos sepelire. Sequitur:

« In omnibus his non est aversus furor ejus, sed adhuc manus ejus extenta. » Usque hodie ira Dei super reliquias Judæorum juste perseverat. Ira enim ejus non est ut hominis, id est perturbatio concitati animi, sed tranquilla dispositio simpliciter constituta. Nam quia ipsi permanent adhuc in malitia, ideo cælestis ira adhuc super eos permanet. *Adhuc manus ejus extenta* super eos est; quoniam adhuc eos affligit. Sequitur:

VERS. 26. — « Et elevabit signum in nationibus procul, et sibilabit ad eum de finibus terræ, et ecce festinus velociter veniet. »

Signum victoriæ suæ signum crucis Rex noster in gentibus levavit, ut inde sibi milites aggregaret. *Et sibilavit ad eum*, id est ad crucis signum more pastoris pecora sua sibilo congregantis; et eos *de finibus terræ* congregavit, quia per prædicationem apostolorum etiam ultimos orbis recessus ad fidem

(57) *Alias, Domini exercituum.*

A suam convocavit. Unde et in Zacharia dicit: « Sibi labo eis, et congregabo illos, quia redemi eos (*Zach. x, 8.*) » Et congregatis ad fidem gentibus *ecce festinus velociter veniet* ad judicium, ut reddat illis mercedem; quia juxta dies Domini, juxta et velox nimis (*Sophon. 1, 14.*) Cito enim transvolat hujus vitæ brevitatis, et mox Christus venit æterna justis laborum præmia reddere. Qui fideliter hæc cogitant, alacriter omnia nunc tolerant, et non deficiunt. Unde subditur:

VERS. 27. — « Non est deficiens, neque laborans. »

Non est deficiens in eo; quia « Qui perseveraverit usque in finem hic salvus erit (*Matth. xxiv, 19.*) » Non est ergo in Salvatore nostro quicumque in adversis deficit, quia salutem non habet, neque Christi membrum est. *Neque laborans* in eo est, quia delectabile sanctis est, quidquid pro eo patiuntur. Sequitur:

« Non dormitabit, neque dormiet. » Divinum somnum dicimus remotum Dei, et incommutabile a provisio. Qui rursus vigilat, dum providet eis doctrina aut salute deprecantibus succursum. Electis ergo magnis, de quibus nunc sermo est, nequaquam dormit; quia semper utilia eis providet, et adjuvat eos. Sed neque dormitat; quia nec in modico suos oculos ab eorum providentia claudit. Dormire enim nonnunquam eis fortasse creditur, quia in justorum crudelitibus hic sine vindicta lacerantur. Sed famulis suis tunc magis vigilat, cum injuste eos nequitia persequentis affligit. Videns enim, quid hic humiliter tolerant, nimirum prævidet quid illic eis misericorditer recompenset. Sequitur:

« Neque solvetur cingulum renum ejus, nec rumpetur corrigia calceamenti ejus. » Ut infra legimus: « Fides est cinctorium renum ejus (*Isa. xi, 5.*) » *Non ergo solvetur cingulum renum ejus*; quia non auferetur fides a nobis. Sæpe enim conati sunt persecutores fidem ejus extinguere, et de mundo tollere. Calceamentum vero prædicationem evangelicam designat, dicente Apostolo: « Calceati pedes in præparatione Evangelii pacis (*Ephes. vi, 15.*) » *Non itaque rumpetur corrigia calceamenti ejus*; quia non dissipabitur ligatum calceamentum evangelicæ prædicationis. Ligata est enim doctrina cælestis in cordibus prædicantium, sicut scriptum est: « Liga testimonium, et signa legem in discipulis meis (*Isa. viii, 16.*) » Nunquam rumpitur corrigia, quæ calceamentum hoc evangelicum ligat in nobis. Sequitur:

VERS. 28. — « Sagittæ ejus acutæ, et omnes arcus ejus extenti. »

Quid in arcubus nisi divinæ Scripturæ figurantur, de quibus sententiæ quasi sagittæ prosiliunt, ut adversariorum corda feriantur? *Acutæ* ergo sunt *sagittæ* ejus; quia ad eos quos per terrorem corrigit, acute ferientes et penetrantes verborum sententias emittit. *Et omnes arcus ejus extenti*; quia omnes

divinæ Scripturæ cunctis peccatoribus minas intendunt. Sequitur :

« Ungulæ equorum ejus ut silex, et rotæ ejus quasi impetus tempestatis. » Solet in equi ungula laboris fortitudo cognosci. Qui sunt autem equi Dei nisi prædicatores sancti, in quibus sedens suos impellit adversarios? Quid per ungulas *equorum*: nisi virtutum perfectio, id est recti cursus fortitudo signatur? *Ungulæ igitur equorum ejus ut silex*; quia virtus velocis incessus evangelistarum, quo ad prædicandum currunt, robustissima est. Quid autem in rotis nisi volubilitas prædicationis (58) exprimitur? Unde Ezechiel vidit « rotam in medio rotæ (Ezech. 1, 16); » quia Novum Testamentum intra vetus est. *Rotæ itaque ejus quasi impetus tempestatis feruntur*; quia prædicationes ejus valida virtute feriunt et conturbant mentem peccatoris. Sequitur :

VERS. 29. — « Rugitus ejus ut leonis, rugiet ut catuli leonum, et frendet, et tenebit prædam, et amplexabitur, et non erit, qui eruat. »

VERS. 30. — « Et sonabit super eum in die illa sicut sonitus maris. »

Rugitus ejus ut leonis fuit; quia terribiliter clamavit, dicens: « Serpentes, genimina viperarum, quomodo fugietis a judicio gehennæ? » (Matth. xxiii, 33.) Et: « Omnis arbor quæ non facit fructum bonum, excidetur, et in ignem mittetur (Matth. iii, 10). Rugiit ut *catuli leonum*; quia terrorem ejusdem judicii per apostolos, qui sunt filii prophetarum quasi catuli leonum, in deserto sæculi hujus clamavit. »

« Et frendet, inquit, et tenebit prædam, et amplexabitur, et non erit, qui eruat. » Frenduit, quando persecutoribus respondit: « Ego sum (Joan. xviii, 5). » Mox quippe « abierunt retrorsum, et occiderunt in terram (ibid. 6). » Tenuit *prædam*, quam rapuerat, id est discipulos quos elegerat, subjungens: « Si ergo me quæritis, sinite hos abire (ibid. 8). » Ubi subjecit Evangelista: « Ut sermo Jesu impleretur, quem dixit: quia quos dedisti mihi, non perdiidi ex ipsis quemquam (ibid. 9). » Tenuit igitur et amplexatus est *prædam* quasi leo confidens in virtute sua; quia et hostes suos uno sermone prostravit et ex discipulis electis nullum perdidit. Tenuit *prædam*, cum de suis ovibus diceret: « Non rapiet eas quisquam de manu mea (Joan. x, 28). »

« Et non erit, inquit, qui eruat, et sonabit super eum. » Quis sonabit? Qui prædam ei frustra conabatur eripere, id est populus Judæorum. *Sonabit super eum sicut sonitus maris*, id est tumultuosa et confusa multitudo clamans: « Reus est mortis, crucifige, crucifige eum (Joan. xix, 6). » Sic autem sonuerunt super eum, qui prædam ei tollere nitebantur, quia idcirco eum occiderunt, ut multitudines fidelium ab eo separarent. Unde et alias scriptum est: « Quia cogitaverunt intra se dicentes: Hic est hæres, occidamus eum, ut nostra fiat hæreditas (Matth. xxi,

28). » Quia vero nullus ex eis deinceps ad gaudia Patriæ cœlestis mentem erexit, et desolatio Jerusalem atque captivitas ejusdem populi [per manus Romanorum secuta est, voce eorum subjungitur :

« Aspiciemus in terram, et ecce tenebræ tribulationis, et lux obtenebrata est in caligine ejus. » *Aspiciemus*, inquit, *in terram*, qui ad cœlum solebamus aspiciere, id est jam de terrenis solummodo cogitabimus. *Et ecce tenebræ tribulationis*, erumpent; quoniam tota subito patria per Vespasianum et Titum delebitur. *Et lux mentis nostræ obtenebrata est in caligine ejus*; quia fugit a nobis consilium atque sapientia et intellectus præ confusione ac nimietate tribulationis. Hucusque ea, quæ sibi sub Ozia rege divinitus ostensa sunt, Isaias est locutus, amodo, quæ sub rege Joathan viderit vel audierit, locuturus.

CAPUT VI.

VERS. 1. — In anno quo mortuus est rex Osias, vidi Dominum sedentem super solium excelsum et elevatum, et ea quæ sub ipso erant implebant templum. »

VERS. 2. — « Seraphim stabant super illud. »

Quandiu regnum Ozias tenuit, Isaias Dominum Sabaoth videre non potuit. Ozias enim adversus voluntatem divinæ legis ingressus est templum quasi pontifex, et ob hoc lepra percussus est in fronte ita ut extra civitatem ejectus inter immundos computaretur (II Paral. xxvi). Quia ergo per nefas ingressus est sanctuarium, merito jam, dum ille viveret, arcanum divinæ visionis non patuit. Grandis enim offensio male reserantis sanctuarium fuit. Et idcirco dignum fuit, ut divinæ habitationis palatium in diebus ejus clausum permaneret. Eo itaque mortuo superna patent palatia, et divinæ majestatis gloria cernitur.

« Vidi, inquit, Dominum sedentem super solium excelsum et elevatum. » Sedere regnantis est, quia « sedebit Dominus rex in æternum (Psal. xxviii, 10). » Dominatus vero est non subditorum excellentia tantum, sed omnis honorum et optimorum perfectissima et omnimoda possessio, et vera et immutabilis firmitas. Et idcirco solus ille summus imperator jure vocatur *Dominus*. *Solium* ejus specialis ordo spirituum est angelicorum, qui proprie thronus appellatur, *excelsum* in natura sua *et elevatum* contemplatione divina.

« Et ea quæ sub ipso erant replebant templum. » *Templi* nomine superna cœlorum habitatio designatur, Joanne attestante qui ait: « Vidi, et ecce apertum est templum tabernaculi testimonii in cœlo (Apoc. xv, 5). » Atque post pauca: « Et nemo poterat introire in templum, donec consumerentur septem plagæ septem angelorum (ibid. 8). » *Ea ergo, quæ sub ipso erant implebant templum*; quia

superna illa cœlorum habitatio plena est innumera- A
bili frequentia multorum millium angelorum.

Seraphin vocatur ordo qui primus est et summus omnium, qui *stant super templum*; quia etiam loci positione super omnes reliquos sunt, ita ut inter hos et Deum nulli alii spiritus intersint. Unde et in alia translatione dicitur, quia « *Seraphin stabant in circuitu ejus.* » Et ob hoc *Seraphin*, id est *ardentes* vel *incendentes* vocantur; quia tanto magis in amore conditoris ardent, quanto hunc vicinius vident. Sequitur :

« *Sex alæ uni, et sex alæ alteri.* Duabus velabant faciem ejus, et duabus velabant pedes ejus, et duabus volabant. » Quia iste beatorum spirituum ordo charitate pro cæteris ardet, quæ in duobus præceptis distinguitur, et inter duos præcipue cognoscitur, idcirco dicuntur duo *Seraphin*, cum sint innumera- B
biles. Et quod dicitur : *Sex alæ uni, et sex alæ alteri*, non numerum indicare credamus, sed quia prima, et media, et extrema intellectualium virtutum eorum absolute et libere in Deum volant. Unde circa facies, et medium, et pedes, habere geminas alas describuntur, ut universaliter volabile eorum insinuetur largissime sursum in divina tendens.

Sed per faciem Dei potest accipi fortasse Divinitas, et per *pedes ejus* humanitas. Velant ergo *faciem*; quia et ipsis ea, quæ sunt de Deo, incomprehensibilia sunt. Velant *pedes ejus*, quia sicut Dionysius Areopagita asserit, secundum nos « *Jesu divina formatio et arcana est rationi omni, et incognita intellectui omni, et ipsi præstanti honorabilissimorum angelorum.* » C

Aut certe per faciem et pedes ejus altiora et profundiora divinarum intelligentiarum accipiamus. Altum quippe Dei est : quia ipse nihil existentium est, neque aliquid alicui existentium cognitum, et neque verbum ejus neque nomen, neque scientia est, sed exaltatur in obscurum super omnia. Profundum quoque ejus est omnibus existentibus incomprehensibili obscuritas et ignorantia. Dum ergo faciem ejus et pedes tegere dicuntur, et solis mediis alis volare, intelligendum est, quia tam sublimis præcellentissimorum ordo spirituum beatorum timidus est circa divinarum, intelligentiarum sublimiora et profundiora, et mediis alis in commensuratione ad Dei visionem et intelligentiam exaltatur. Faciem quippe ejus et pedes velantes incomprehensibile illis notitiam quadam venerationis obumbratione sibi ipsis pie occultant, sicque nobis exemplum cautæ formidinis dant, ne quando præsumamus discutere Deum, sed semper laudemus, quoniam ipsi nunquam discutiunt, sed assidue laudant. Itaque faciem et pedes ejus velant, atque mediis alis volant; quoniam sublimia et profunda divinarum ultra modum non perscrutantur, sed in Dei scientia mediocriter et temperate volant. Mediarum quippe volatus alarum incessabile actionum Deum imitantium in mensura est, et altivolum assidue motionis eorum. Sequitur :

VERS. 3. — « *Et clamabant alter ad alterum, et dicebant : Sanctus, sanctus, sanctus Dominus Deus exercituum, plena est omnis terra gloria ejus.* »

Dum clamare dicuntur *alter ad alterum*, aninadvertamus, quia divinas suas intelligentias sibi invicem copiose tradunt. Unde et *seraphim* vocantur, quod interpretatur *principium oris eorum*. Qui enim primi, laudes et scientias divinas loquuntur, ac deinde cæteris angelorum subjectis ordinibus loquendas tradunt, merito et *Seraphin*, id est *principium oris eorum* dicuntur.

Clamabant igitur alter ad alterum, et dicebant : Sanctus, sanctus, sanctus, Dominus Deus exercituum. » Tertio *Sanctus* clamant, nec adjungunt Domini dii, sed *Dominus Deus*, insinuantes quia Pater et Filius, et Spiritus sanctus non tres Domini nec Dii sunt, sed unus Dominus Deus. Qui *exercituum Dominus* appellatur, quia omnis militia cœlorum nutui ejus deservit. In hoc autem hymno diligenter animadvertendum, quia primus iste beatorum ordo angelorum ab ipso Deo theologicam scientiam edoctus est, per quam seipsum velut magistrum demum reliquis tradidit clamando illis : « *Sanctus, sanctus, sanctus Dominus Deus.* »

Et quia ipse trinus in personis, et unus in substantia Dominus Deus, a supercœlestibus essentiis usque ad novissima terræ extendit in omnia, quæ sunt, providentiam et bonitatem suam, utpote benignus omnium Conditor, et omnia regit et continet. « *Attingit enim sapientia ejus a fine usque ad finem fortiter, et disponit omnia suaviter (Sap. viii, 4).* » Unde et ipse cœlestium *exercituum Dominus* dicitur, et *omnis terra gloria ejus plena esse* canitur. Sic enim in cœlo et in terra ubique dominatur. Nam et « *omnia, quæcunque voluit Dominus, fecit in cœlo et in terra (Psal. cxiii, 5).* » Qui juxta Augustinum in supernis spiritibus summa pace atque amicitia copulatis, et in una voluntate quodam spiritali igne charitatis conflatis tanquam in excelsa et secreta sede residens velut in domo sua et in templo suo, inde se quibusdam ordinatissimis creaturæ motibus primo spiritalibus, deinde corporalibus per cuncta diffundit, et utitur omnibus ad incommutabile arbitrium sententiæ suæ sive incorporeis, sive corporeis rebus, sive rationabilibus, sive irrationabilibus spiritibus, sive bonis per ejus gratiam, sive malis per propriam voluntatem

Sed quemadmodum corpora crassiora et inferiora per subtiliora, et potentiora quodam ordine reguntur; ita omnia corpora per spiritum vitæ rationalem, et Spiritus vitæ rationalis deservit atque peccator per spiritum vitæ rationalem pium, et justum, et ille per ipsum Deum, ac sic universa creatura per Creatorem suum, ex quo, et per quem, et in quo etiam condita atque constituta est. Ac per hoc voluntas Dei est prima et summa causa omnium corporalium specierum atque motionum. Nihil enim fit visibiliter et sensibiliter, quod non de interiore invisibili, atque intelligibili aula summa imperatoris

aut jubeatur, aut permittatur secundum ineffabilem A
justitiam præmiorum atque pœnarum, gratiarum et
retributionum in ista totius creaturæ amplissima
quadam immensaque republica. Sic ergo intellige
hoc quod canitur: « Dominus Deus exercituum,
plena est omnis terra gloria ejus. » Sequitur:

VERS. 4. — « Et commota sunt superliminaria
cardinum a voce clamantis. »

Quod est templi sive domus hujus ostium, nisi
janua regni cœlorum? Et qui sunt cardines hujus
ostii, nisi illi Spiritus angelici, quorum ministerio
patriæ cœlestis ingressus aperitur nobis, vel clau-
ditur? « Ejecit enim Dominus Adam, et collocavit
ante paradisum voluptatis cherubim, et flammeum
gladium, atque versatilem ad custodiendam viam
ligni vitæ (Gen. iii, 24). » Et ascendente Christo cla-
matum est: « Tollite portas, principes, vestras (Psal.
xxiii, 7). » Ipsi ergo commissa est janua vitæ, ut eam
vel claudant, vel aperiant. Et ideo cardines accipi-
mus eos, quia in ipsis velut in cardinibus ostium
illud vertitur. Sed quæ sunt *superliminaria cardi-
num* istorum, nisi mentes angelorum? *Commota* ergo
sunt superliminaria cardinum a voce clamantis; quia
dum majores cantant: *Plena est omnis terra gloria
ejus*, mentes minorum flectuntur ab obstinatione dis-
cordiæ, quam ob peccatum protoparentis habebant
adversus eos, qui in terra degunt.

« Et domus, inquit, impleta est fumo. » Subaudi
a voce clamantis. Hoc et Joannes sic ait: « Et tem-
plum impletum est fumo a majestate Dei, et virtute
ejus (Apoc. xv, 8). » *Domus* quippe vel templum
impletur fumo a majestate Dei; quia et ipsi spiritus
angelici, qui semper eum in cœlis vident, potentiam
majestatis ejus ad integrum comprehendere ne-
queunt. Nam « nubes et caligo in circuitu ejus (Psal.
xcvi, 2). » Et « Posuit tenebras latibulum suum
(Psal. xvii, 12). » Hanc caliginem Moyses ingressus
est, ut ibi gloriam Dei videret (Exod. xx, 21). Hæc
enim caligo vel fumus iste lux illa inaccessibleis est,
in qua Deus inhabitare dicitur. Fumus ergo a *maje-
state Dei domum implet*; quia omnis creatura in ejus
cognitione caligat. Sequitur:

VERS. 5. — « Et dixi: Væ mihi quia tacui, quia
vir pollutus labiis ego sum, et in medio populi pol-
luta labia habentis ego habito, et regem Dominum D
exercituum vidi ego oculis meis! »

Reprehendit se de silentio, et labiorum pollutio-
ne; quia et nonnulla bona, quæ loqui debuisset,
tacuit, et aliqua locutus est inutilia. Tenendus est
enim discretionis modus, ut et bona, prout opportu-
num fuerit, loquamur, et inania verba semper loqui
vel audire caveamus. Multum quippe deorsum duci-
mur, dum locutione continua sæcularibus admisce-
mur. Quod bene in semetipso reprehendit nunc pro-
pheta dicens: « Væ mihi, quia tacui, quia vir pol-
lutus labiis ego sum! » Qui cur polluta labia haberet,
aperuit, cum subjungit:

(59) Codd. *prophetae*.

« In medio populi polluta labia habentis ego ha-
bito. » Pollutionem namque labiorum se habere do-
luit; sed unde hanc contraxerit, indicavit, cum in
*medio populi polluta labia habentis se habitare per-
hibuit*. Unde enim difficile est, ut lingua sæcularium
mentem non inquinat quam tangit. Quia dum ple-
rumque eis ad quædam loquenda condescendimus,
paulisper assueti hanc ipsam locutionem, quæ nobis
indigna est, etiam delectabiliter tenemus, ut ex ea
jam redire non libeat, ad quam vel ex condescen-
sione ducti venimus inviti; sicque fit, ut ab otiosis
ad noxia, a levibus ad graviora verba veniamus.
Sed propheta sanctus unde se pollutum labiis co-
gnoverit, insinuat subjungens: *Et regem Dominum
exercituum vidi oculis meis*. Ex divina enim visione
illuminatus est, ut ea cognosceret in semetipso, quæ
prius non advertebat. Sequitur:

VERS. 6. — « Et volavit ad me unus de Seraphim,
et in manu ejus calculus, quem forcipe tulerat de
altari. »

VERS. 7. — « Et tetigit os meum, et dixit: Ecce
tetigit hoc labia tua, et auferetur iniquitas tua, et
peccatum tuum mundabitur. »

Valida traditione Patrum antiquorum, et qui au-
ditores apostolorum fuerant, affirmatum tenemus,
primas virtutes angelicas, quæ sunt in circuitu Dei,
nequaquam huc descendere. Cur ergo Seraphim, di-
citur ad Isaiam venisse? Sed in hac propheta (59)
sententia vult intelligi, quia ii spiritus, qui mittuntur,
eorum vocabulum percipiunt, quorum officium
gerunt. Quia enim ut peccata locutionis incendat,
de altari angelus carbonem portat, *Seraphim* voca-
tur, quod *incendium* dicitur. Ex minoribus ergo
fuit angelus, qui missus est; quoniam summæ illæ
potestates in ministerium foras nequaquam venire
creduntur. Qui et carbonem cœlestis ardoris in *for-
cipe* geminæ dilectionis attulit, sive calculum, qui
est lapis durissimus atque rotundus et ex omni
parte lenissimus, virtutem sancti Spiritus in eo de-
signans, quod virum fortem atque perfectum et in-
tegrum, ac mansuetum reddit. Altare vero, quod
est in conspectu Dei cumulatam his carbonibus,
quid sentire debemus nisi supernarum corda virtu-
tum, ubi sancti Spiritus ignis semper abundat?
Unde ad prophetam carbo missus est, id est portio
quædam illius ignis, quæ sufficeret sermonis peccata
purgare. Sed his per anagogen dictis lectionem a
capite revolvamus, sensum in ea mysticum inda-
gantes.

Vidit enim Isaias *Dominum* non quidem sicuti
est, sed modo quodam significativo, sicut propheta
visio fuerat informanda. Quandiu enim in hac mor-
tali carne vivitur, nullus ita in contemplationis vir-
tute proficit, ut in ipso jam incircumscripti luminis
radio mentis oculos infigat; neque omnipotens
Deus jam in sua claritate conspicitur, sed quid-
dam sub illo speculatur anima, unde refota profi-

ciat, ut post ad visionis ejus gloriam pertingat. Cum enim Dominum se vidisse propheta fatetur, dicens : « In anno, quo mortuus est rex Ozias, vidi Dominum sedentem super solium excelsum et elevatum, » protinus subjungit : « Et ea, quæ sub ipso erant, implebant templum. » Quando Ozias rex superbus ac præsumptor moritur, Dominus videtur; quia, mundi hujus elatio a desiderio mentis absceditur, tunc ipsa mens Dei gloriam contemplatur.

Et notandum, quod Dominus *super solium excelsum et elevatum* sedet. Quid namque est *solum* ejus nisi creatura angelica vel humana, cui per intellectum, quem dedit, præsidet; quod videlicet *solum excelsum et elevatum* dicit; quia natura humana ad cœlestem gloriam elevata proficit, et creatura angelica, dum multis spiritibus cadentibus in cœlo solidata est, ne cadat, inde elevata est, unde confirmata. *Templum* vero ejus hoc est, quod *solum*; quia Æternus rex ibi habitat, ubi præsidet. Nos ergo templum illius sumus, in quorum mentibus habitare dignatur.

Sed ea quæ sub ipso erant replebant templum; quia, quidquid nunc de illo conspicitur, adhuc non est ipse, sed sub ipso est. Sic Jacob angelum vidit, et vidisse se Dominum fatetur (*Gen. xxxii, 30*); quia cum et mysteria ejus conspicimus, jam multum est, quod super nosmetipsos levamur. Notandum vero quod dicitur : *implebat templum*. Quoniam et si angelus apparet, infirmæ tamen mentis desiderio satisfacit, ut si adhuc majus non potest, jam tamen minus quod videt, admiretur. Ea ergo, quæ sub ipso sunt, *implent templum*; quia, sicut dictum est, cum mens in contemplatione profecerit, non jam quod est ipse, sed quod sub ipso est, contemplatur. Sequitur :

« Seraphim stabant super illud. » Hoc est quod apud Moysen, duo Cherubim, stant super arcam Testamenti (*Exod. xxv, 18*). Nam per templum vel arcam Ecclesia; per duos seraphim, vel duos cherubin, duo Testamenta figurantur. Quæ super Ecclesiam stant, quia nos protegunt, et omnem intellectum nostrum superant. Seraphim, namque, sicut jam diximus, *incendium* dicitur; quia testamenta Dei corda audientium igne charitatis inflammant. Unde Jeremias : « Nunquid non verba mea sunt quasi ignis, ait Dominus? » (*Jerem. xxiii, 29*.) Et Moyses : « In dextera ejus lignea lex (*Deut. xxxiii, 2*). » Et Psalmista : « Ignitum eloquium tuum vehementer (*Psal. cxviii, 140*). » Sequitur :

« Sex alæ uni, et sex alæ alteri, duabus velabant faciem ejus, et duabus velabant pedes ejus, et duabus volabant. » Quid per *faciem pedesque* Dei signatur, nisi hoc quod ante sæcula fuit, et quod post finem sæculi futurum est? *Duabus*, inquit, *velabant faciem ejus*. Quis enim ejus potest scire principium? quid antequam conderet istum mundum, in rerum fuerit æternitate? quando thronos

ac dominationes et angelos, totum ministerium cœleste, contiderit? *Et duabus velabant pedes ejus*. Nam extrema quoque ejus quis scire potest? quid post consummationem sæculi sit futurum? Quid postquam humanum genus fuerit judicatum? Quæ sequatur vita, an rursus alia futura sit terra, et post transitionem alia rursus elementa, vel alius mundus solque condendus sit? In Deo etiam maxime, qui nec principium, nec finem habet, omnis ab hac cognitione principii ejus et finis excluditur visus. Ne quæras principium ejus, vel finis ejus arcana, quæ non sunt. Habes præsens esse ejus; sed laudato, non discute.

« Et duabus, inquit, volabant. » Media tantum cognoscimus, quæ nobis ex Scripturarum lectione panduntur, quando plasmatus homo, quando diluvium, quando data lex sit, qualiter ex uno homine universa spatia terrarum completa sint, et extremo tempore Dei Filii carnem sumpserit. Cætera vero, quæ diximus, isti duo seraphim in facie pedibusque texerunt. Nam quia Testamentum Vetus in lege et in prophetis occultat ea, quæ fuerunt ante mundi principium, unus seraphim, duabus alis faciem Dei velabat. Et dum in Evangelio et apostolorum doctrina Testamentum Novum itidem abscondit ea quæ fuerunt ante sæculi creationem, alius seraphim, duabus alis velat ejus faciem. Eodem modo dum ipsa duo Testamenta in lege et prophetis atque in Evangelio et apostolis occultant ea quæ futura sunt post sæculi terminum, uterque seraphim, geminis alis pedes ejus velat; et duabus mediis uterque volat, dum per legem et prophetas, dum per evangelicam et apostolicam doctrinam ea quæ fiunt ab initio sæculi usque in finem, nobis panduntur. Sicque *sex alæ uni sunt, et sex alæ alteri*. Sequitur :

« Et clamabant alter ad alterum. » Pulchre positum est : *alter ad alterum*. Quidquid enim in Veteri Testamento legimus, hoc idem et in Novo reperimus; et quod in Novo fuerit lectitatum, hoc ex Veteris auctoritate deducitur : nihil in eis dissonum, nil diversum. « Et dicebant : Sanctus, sanctus, sanctus Dominus Deus exercituum. » In ambobus testamentis prædicatur Trinitas. « Plena est omnis terra gloria ejus. » Hoc de tempore evangelicæ prædicationis dicitur. Ubique enim sunt Ecclesiæ beatorum, quæ sunt gloria ejus. In omnibus quippe, qui conversatione sua glorificant Deum, gloria ejus est, atque ita *omnis terra plena est gloria Dei*. Olim non omnis terra plena erat ejus gloria, sed unus angulus terræ, quando dicebatur : « Notus in Judæa Deus, in Israel magnum nomen ejus (*Psal. lxxv, 1*), » nunc vero totus orbis gloria ejus est plenus.

Sed quid tibi prodest, si omnis terra plena sit gloria, tu autem non sis particeps plenitudinis gloriæ Dei? Si enim ea quæ facis, si ea quæ loqueris, in gloriam Dei fiant, si sermo tuus, si tactus, si processus et ingressus tuus, si cibus ac potus, et omnes actiones tuæ in gloriam Dei fiant, et parti-

ceps dicti hujus es : « Plena est omnis terra gloria A
ejus. » Sequitur :

« Et commota sunt superliminaria cardinum a voce clamantis. » In alia translatione dicitur : « Et ablatum est superliminare a voce, qua clamabant. » Moysi et Aaron ad ostium tabernaculi semper loquebatur Dominus (*Exod. xxix, 4 et seq.*) quasi designans ante Evangelium, quia necdum eos in sancta sanctorum introduxerit (60), sicut Ecclesia post introducta est, dicens : « Introduxit me Rex in culicium suum (*Cant. 1, 3*). » Quando ergo Dominus descendit ad terram, *superliminare* illud, id est, qua i quodam obstaculum intrare cupientibus est ablatum. Vel quando Christus inferni portas confregit et sanctorum animas secum educens ad superna victor r : meavit, et regna cœlorum aperuit, tunc *ablatum est superliminare*. B

In eo autem quod nova editio habet : « Et commota sunt superliminaria cardinum a voce clamantis, » sic illam admonitionem intelligamus, ut fidelibus aperiri possit superni templi janua, et infidelibus clausa permaneat. Nam « a diebus Joannis Baptistæ usque nunc regnum cœlorum vim patitur (*Matth. xi, 12*). » Possumus ergo vim inferre huic januæ, et nobis eam aperire, si volumus ; quia *commota sunt superliminaria* ejus, quæ prius eam immobiliter clausam tenebant.

Et hinc dicitur : A *voce clamantis*, et non : a voce clamantium ; quia per gratiam solius evangelicæ prædicationis aperitur porta regni cœlestis. Neque enim Moysi dictum est, quod Petrus audire meruit : C « Quia tibi dabo claves regni cœlorum (*Matth. xvi, 19*). » Sequitur :

« Et domus impleta est fumo. » — « Deus » noster « ignis consumens est (*Deut. iv, 24*). » Ex hoc igitur igne, quia totam substantiam capere non possumus, levior quædam in universam Ecclesiam, et, ut ita dicam, rarior funi natura dispergitur. Quam nos capientes dicamus : « Ex parte cognoscimus, et ex parte prophetamus (*I Cor. xiii, 9*). » Et : « Videmus nunc per speculum in ænigmate (*ibid., xii*). »

« Et volavit, inquit, ad me unus de seraphim, » etc. Quia per duos seraphim duo Testamenta intelligimus, Novum Testamentum missum ad prophetam dicimus, quod habens in se utraque mandata, id est et sua, et Veteris Instrumenti, igitur sermonem Dei duplici præceptorum acie comprehendit, et tactis labiis, quidquid fuerit ignorantia (hoc enim labia nunc interpretari possumus immunda) purgationis suæ repulit veritate. Vere enim carbo, qui linguam puram faciat a peccato, sermo divinus. Sed quia in Hebræo pro carbone *calculus* legitur, videtur mihi sermo divinus ex calculi appellatione signari. Sicut enim calculus genus est lapidis durissimi, et rotundi, et omni parte lenissimi, ita sermo Dei, qui nec hæreticorum nec omnium adversariorum potest contradictionibus cedere, *calculus* dicitur. Videntur autem mihi, et LXX Interpretes in eo, quod *anthraca* transtulerunt, idem sensisse. *Anthrax* quippe, quem nos *carbunculum* interpretamur, genus est lapidis salsigidi atque lucentis, quem et in duodecim lapidibus invenimus (*Exod. xxviii, 18*). Sive igitur calculum sive carbunculum lapidem accipimus, et in calculo quidem d vini sermonis veritas et rigor, in carbunculo autem doctrina lucens et manifesta monstratur.

Quod autem seraphim volasse dicitur, intellige velocem divini sermonis adventum super prophetam, ac Novi Testamenti repentinam cognitionem. Quia ubi Deus magister est, nulla mora fit in discendo. « Et in manu ejus calculus. » *Calculus* in manu sermo est in operatione. Novum enim Testamentum per gratiam facit operibus impleri, quod Vetus nequivit per austeritatem facere. « Quem tulerat de altari. » Quia evangelicum sermonem prædicationis de ara Dominicæ crucis accepit. Et dixit : « Ecce tetigit hoc labia tua, » etc. Tactu calculi, id est divini sermonis, purgatum peccatum, sicut discipulis Dominus ait : « Jam vos mundi estis propter sermonem, quem locutus sum vobis (*Joan. xv, 3*). » Purgatus itaque propheta, et igitur cœlitus succensus subjungit :

VERS. 8. — « Et audivi vocem Domini dicentis : Quem mittam, et quis ibit nobis? Et dixi : Ecce ego, mitte me. »

Et hic declaratur unus Deus in pluralitate personarum. Sicut enim in Genesi dicitur : « Faciamus hominem ad imaginem, et similitudinem nostram (*Gen. 1, 2*); » ita et hic puto dictum : *Quis ibit nobis? Nobis* enim quibus aliis æstimandum est nisi Patri et Filio et Spiritui sancto, quibus vadit, quicumque eorum obsequitur voluntati. Et in eo, quod unius loquentis persona præponitur divinitatis est unitas; in eo vero, quod dicitur *nobis*, personarum diversitas indicatur.

« Et dixi, inquit, Ecce ego, mitte me, Deus, qui vocat ea quæ non sunt quasi sint (*Rom. iv, 17*), » et qui dixit : « Ego sum qui sum (*Exod. iii, 14*). » Quoscunque vocaverit, statim facit subsistere; quoniam omnia, quæ absque eo sunt non sunt. Unde et propheta purgatus a vitis ausus est dicere : *Ecce ego sum*. Notandum autem, quomodo ad id quod dixerat Dominus : « Quem mittam, et quis ibit nobis; » propheta ex parte responderit : « Ecce ego sum, mitte me, » et de sequenti tacuerit, intelligens nullum dignum esse hominem, qui Deo pergeret, et omne iter suum ejus faceret esse, qui mitteret, qui cum diceret : *Mitte me*, per activam vitam prodesse proximis cupiens officium prædicationis appetit. Illa est enim vera charitas, quæ sic ad Deum festinat, ut proximum non deserat. Purgatus ergo per altaris calculum et charitate fervens ultro se, ut mittatur,

offert, quatenus gratiæ, quam acceperat, alios faceret participes. Sed qui præsentibus pio amore prodesse volebat, mala, quæ futuris erant ventura, primo prophetare visus est, ac deinde audivit eorum bona. Nam sequitur :

VERS. 9. — « Et dixit : Vade, et dices populo huic : Audite audientes, et nolite intelligere; et videte visionem, et nolite cognoscere. Excæca cor populi hujus, » etc.

Locus enim iste ad illud tempus pertinet, quo Dominus in terris conversatus est nova docens et mira faciens, qui de Judæis tunc ait : « Ideo in parabolis eis loquor, quia videntes non vident, et audientes non audiunt, neque intelligunt, ut impleatur in eis prophetia Isaïæ dicens : Auditum audietis, et non intelligetis, et videntes videbitis, et non videbitis. Incrassatum est enim cor populi hujus, et auribus graviter audierunt, et oculos suos clausurunt, ne quando oculis videant, et auribus audiant, et corde intelligant, et convertantur, et sanem eos (Matth. XIII, 13-15). » Quia ergo parabolis Judæis non intelligentibus loquebatur Dominus, et signa coram eis faciebat, nec intelligebant, quia totum carnaliter sapiebant, merito divina eis sententia per increpationem prophetiæ dixerat : *Audite*, subaudi verba Salvatoris et nolite cognoscere, quid ea significant.

VERS. 10. — « Excæca, inquit, cor populi hujus, et aures ejus aggravata, et oculos ejus claude, ne forte videant (61) oculis suis, et auribus suis audiant (62), et corde suo intelligant (63), et convertantur (64), et sanentur (65). »

Quis nunc in Isaïa figuratur, qui populum Judæorum excæcare præcipitur, nisi persona prophetarum et ipsius legislatoris? Isaïæ ergo dicitur : « Excæca cor populi hujus. » Quia sicut Apostolus ait : « Moyses ponebat velamen super faciem suam, ut non intenderent filii Israel in faciem ejus, quod evacuatur, sed obtusi sunt sensus eorum. Usque in hodiernum enim diem ad ipsum velamen in lectone Veteris Testamenti manet revelatum, quoniam in Christo evacuatur. Sed usque in hodiernum diem cum legitur : Moyses, velamen est positum super cor eorum. Cum autem conversi fuerint ad Dominum, auferetur velamen (II Cor. III, 13-16). » Itaque quoniam Scriptura legis et prophetarum velamine litteræ obumbratur, et carnalis Judæorum populus solam litteræ superficiem sequitur, Isaïas scriptorum Testamenti Veteris personam gerens cor ejus excæcare dicitur :

Cum autem dicit : *Ne forte videant oculis suis*, sciendum, quia Deus in sua cæcitate reliquit eos deserendo et non adjuvando; quod non iniquo, sed occulto judicio fecit. Sive enim quando adjuvat, misericorditer facit, sive quando non adjuvat, juste facit; quia omnia non temeritate sed judicio.

(61) Alias, *videat*.

(62) Alias, *audiat*.

(63) Alias, *intelligat*.

Nam quia non ex fide, sed tanquam ex operibus tumuerunt, ipso suo tumore cæcati offenderunt in lapidem offensionis. In eo autem quod addidit : *Et convertantur et sanentur*, aut [a superioribus subaudiendum est, ut dicatur : non convertantur, et non sanentur; aut de supernæ medicinæ misericordia factum intelligendum est, ut quoniam perversæ et superbæ voluntatis erant, et justitiam suam constituere volebant, ad hoc in sua cæcitate deserentur, ut offenderent in lapidem offensionis, et impleverunt facies eorum ignominia, et humiliati quærerent nomen Domini, et non suam, qua inflatur superbus, sed Dei justitiam, qua justificatur impius. Hoc enim multis eorum profecit in bonum, qui de suo scelere compuncti in Christum postea crediderunt. *Aures* autem, quæ nunc aggravantur, et *oculos*, qui clauduntur, non exterioris hominis esse putes, sed potius interioris. Propheta vero, postquam ei dictum est : « Excæca cor populi hujus, » subjicit :

VERS. 11. — « Et dixi : Usquequo Domine? Et dixit : Donec desolentur civitates absque habitatore, et domus sine homine, et terra relinquatur deserta. »

VERS. 12. — « Et longe faciet Dominus homines. »

Tam diu enim perduraverunt in cæcitate cordis, donec per Vespasianum et Titum civitates eorum desolarentur, ut non remaneret in eis habitator, et terra eorum relinqueretur deserta, et longe fierent homines Judaici generis, ab ea captivi per omnes gentes ducti. Sed quia reliquiæ hujus plebis circa finem sæculi convertentur, videamus quid subjungat : « Et multiplicabitur, quæ derelicta fuerat in medio terræ. »

VERS. 13. — « Et adhuc in ea decimatio, et convertetur, et erit in ostensionem sicut terebinthus, et sicut quercus, quæ expandit ramos suos, semen sanctum erit, id quod steterit in ea. »

Medium terræ Jerusalem est, sicut per Ezechielem dicit Dominus : « Ista est Jerusalem, in medio gentium posui eam, et in circuitu ejus terras (Ezech. v, 5). » In hoc medio terræ dereliquit Dominus plebem Judæorum dicens : « Ecce relinquetur vobis domus vestra deserta. Dico enim vobis, non me videbitis amodo, donec dicatis : Benedictus, qui venit in nomine Domini (Matth. XXIII, 38). » Sed plebs ista, quam Dominus, dum adhuc habitaret in Judæa, reliquit, et quæ postmodum per totum orbem dispersa est, appropinquante sæculi termino multiplicabitur, et ad fidem veniet, sicut scriptum est : « Si fuerit populus tuus quasi arena maris, reliquiæ convertentur ex eo (Isa. x, 22). »

Decimatio significat impletionem legis propter Decalogum ejus. Adhuc ergo erit in ea decimatio; quia futurum est, ut legem suam impleat, et convertetur ad prædicationem Eliæ. *Et erit in ostensio-*

(64) Alias, *convertatur*.

(65) Alias, *sanem eum*.

nem sicut terebinthus et quercus; quia longe lateque Asparget exempla sublimis conversationis suæ, et magnæ sanctitatis. Terebinthus enim et quercus nimis magnæ sunt arbores. *Semen sanctum erit id quod tunc in ea steterit*; sicut de illa gente dicit Apostolus: « Si radix sancta est, et rami (Rom. xi, 16). » Sicut enim radix sancta est in patriarchis; sic sancti erunt rami in his filiis. Hæc, regnante Joathan, vidit Isaias, vel prophetavit.

CAPUT VII.

VERS. 1. — « Et factum est in diebus Achaz filii Joathan, filii Ozia regis Juda, ascendit Rasin rex Syriæ et Phacee filius Romeliæ rex Israel in Jerusalem ad præliandum contra eam, et non potuerunt debellare eam. »

VERS. 2. — « Et nuntiaverunt domui David dicentes: Requievit Syria super Ephraim, et commotum est cor ejus, et cor populi ejus sicut moventur ligna silvarum a facie venti. »

Hæc secundum Historiam veraciter credimus facta. Sed quoniam « hæc omnia in figura contingebant illis (I Cor. x, 11), » requiramus, quid in istis præfiguratum sit. Quia enim Achaz interpretatur *apprehendens*, quid per Achaz nisi typus apostolorum, ac temporis illius reliquorum fidelium, qui Christum in carne apparentem fideliter apprehenderunt (unde et Simeon « accepit eum in ulnas suas (Luc. ii, 28), » et quid per Joathan, qui interpretatur *cujus et frater eorum*, nisi prophetæ signantur, qui satis declaraverunt, *cujus* sit Christus, populi Judaici an Christiani, qui secundum carnem *frater est* Judæorum? Dicitur quoque *Joathan Domini perfectio*; quia a Domino data est prophetis perfectio, quam habuerunt. Quid vero per Oziam, qui *robustus* dicitur, nisi virilis patriarcharum cuneus? Achaz ergo nascitur ex Joathan, et Joathan ex Ozia; quoniam apostoli sunt prophetarum filii et prophetæ filii patriarcharum. Achaz vero rex Juda est, quoniam apostoli sunt rectores Ecclesiæ.

Quid autem per Syriam, quæ *sublimis* dicitur, nisi superba gentilitas exprimitur? Quid per Rasin, qui interpretatur *placencia* sive *complicatio*, nisi principes gentium erroribus implicati? Quid per Israel nisi perfidus Judæorum populus? Quid per Phacee regem Israel, qui dicitur *aperiens*, nisi doctores Judæorum, qui Scripturas aperire deberent interpretando? Romelia vero dicitur *Excelsus Domini*, et Phacee filius Romeliæ est; quia isti carnales et perfidi Judæorum magistri ab antiquis patribus descenderunt, qui vita sublimes ante Deum fuerunt.

Itaque rex Syriæ et rex Israel in diebus Achaz ad præliandum contra Jerusalem venerunt; quia principes gentium atque Judæorum temporibus apostolorum cæperunt mox impugnare Ecclesiam. Et non potuerunt debellare eam: quia « portæ inferi non prævalebunt adversus eam (Marc. xvi, 18). » Et

(66) Alias, in malum.

nuntiaverunt domui David, id est rectoribus Ecclesiæ. Requievit Syria super Ephraim: id est gentilitas Judaico populo concordat in persecutione fidelium. Sic enim legitur in Actibus apostolorum: « Qui vero increduli fuerant Judæi, suscitaverunt, et ad iracundiam concitaverunt animas gentium adversus fratres (Act. xiv). » Et post paululum: « Cum autem factus esset impetus gentilium et Judæorum cum principibus suis in apostolos, ut contumeliis afficerent eos, et lapidarent (ibid., 5), » id est Paulum et Barnabam, « intelligentes confugerunt ad civitates Lycaoniæ (ibid., 6). » Itaque rex Syriæ et rex Israel ascenderunt contra Jerusalem, dum fieret impetus gentilium et Judæorum cum principibus suis in apostolos. Itaque requievit Syria super Ephraim, dum Judæi gentilium animos inflammassent adversus fratres. Et commotum est cor ejus, et cor populi ejus, quia et præpositi et subjecti metu passionis titubaverunt. Contra quam fluctuationem venit Salvator noster roborare, et consolari eos. Nam sequitur:

VERS. 3. — « Et dixit Dominus ad Isaiam: Egredere in occursum Achaz tu, et qui derelictus est Jasub filius tuus ad extremum aquæductus piscinæ superioris in via agri fullonis. »

VERS. 4. — « Et dices ad eum: Vide, ut sileas, noli timere et cor tuum ne formidet a duabus caudis titionum fumigantium istorum in ira furoris Rasin regis Syriæ, et filii Romeliæ. »

VERS. 5. — « Eo quod consilium inierit contra te Syria malum (66), Ephraim et filius Romeliæ dicentes: »

VERS. 6. — « Ascendamus ad Judam, et suscite eum ad nos (67), et ponamus regem in medio ejus filium Tabeel. »

VERS. 7. — « Hæc dicit Dominus Deus: Non stabit, et non erit istud. »

VERS. 8. — « Sed caput Syriæ Damascus, et caput Damasci Rasin. »

Isaias enim, qui dicitur *salus Domini*, egreditur in occursum Achaz; quia in angustia tribulationis nostræ occurrit menti nostræ, quomodo Filius Dei missus ad passionem in mundo fuit. Unde Apostolus: « Recogitate, inquit, eum, qui talem sustinuit a peccatoribus adversus semetipsum contradictionem, ut ne fatigemini animis vestris deficientes (Hebr. xii, 3). » Egressio enim Isaïæ commemoratio Dominici Adventus est nobis. Jasub vero filius ejus derelictus quid significat nisi eos, de quibus dictum est: « Omnis qui relictus fuerit in Sion, et residuus in Jerusalem sanctus vocabitur? » (Isa. iv, 5.) Unde Jasub interpretatur *revertens*; quia illi, qui de circumcisione crediderunt, prædicantibus apostolis reversi sunt ad eum.

Quid autem per piscinam superiorem nisi Evangelium exprimitur legi superpositum? Quid per aquæductum nisi Vetus Testamentum, unde procedit Novum? Egressus est igitur Isaias ad extremum

(67) Alias, et avellamus eum ad nos.

aqueductus piscinae superioris; quia Christus in fine legis natus est, et adhuc inde nobis apparet. Quid vero per agrum *fullonis*, ubi sordes et maculae vestium purgabantur, nisi Ecclesia Salvatoris figuratur, in qua nos, qui Christi vestes sumus, remissionem peccatorum consequimur? Quid per viam *agri nisi actio Ecclesiae*? Isaias itaque exiit *in via agri fullonis*; quia Christus in actione, quam Ecclesia servat, apparet, et ait: *Vide, ut sileas*; id est ut vocem querelae non proferas. *Noli timere*, subaudi, « eos, qui occidunt corpus (*Matth. x, 28*). »

Duas caudas *titionum fumigantium* iram gentilium et Judaeorum vocat. Quia in prima parte comburuntur igne suae malitiae, et in ultima comburendi sunt igne gehennae, qui per iram ardent adversus Ecclesiam, et per erroris nebulam funant, et *Judam*, id est Christianum populum ab Ecclesia quaerunt avellere ad se, et suis erroribus involvere. Sic enim Judaei Galatas avellere coeperant, cum eos per Epistolam Paulus ad Ecclesiam revocaret. Sic gentiles avulserunt omnes, qui Christum in persecutionibus negaverunt.

Tableel autem bonus Deus interpretatur. Et gentiles atque Judaei bonitatem Redemptoris nostri negantes meliora putant ea quae ipsi colunt. Querunt igitur Judam avellere, ut regem in medio ejus ponant *filium Tableel*, id est *boni Dei*, qui sui erroris cultores cuperent in nobis praepositos et doctores constituere.

Sed non erit, et non stabit istud. Sed caput *Syriae Damascus*, qui dicitur *sanguinis poculum*; quia principes gentium sanguinem fidelium sitiunt (68). Et caput *Damasci*, id est ipsius crudelitatis gentilium *Rasin*, id est *cursus*; quia veloci cursu transibit eorum tyrannica dominatio. Vel *complicatio erroris caput saevitiae ipsorum erit. Rasin quippe cursus vel complicatio, sive placencia dicitur. Sequitur:*

VERS. 9.— « Et adhuc sexaginta et quinque anni, et desinet Ephraim esse populus. »

« Et caput Ephraim Samaria, et caput Samariae filius Romeliae. Si non credideritis, non permanebitis. »

A Nativitate Domini usque ad rebellionem Judaeorum adversus Romanos *sexaginta et quinque anni* fuerunt. Nam sexagesimo sexto anno rebellaverunt sub Fullo praeside (69). Cujus rebellionis pertinacia succedente post tempore in tantum convaluit, ut et ipsi delerentur, et urbes eorum, et captivi ducerentur in omnes gentes. Bene ergo dicitur: « Adhuc sexaginta et quinque anni, et desinet Ephraim esse populus. » Fortasse et aliud temporis spatium per omnes *sexaginta quinque annos* mystice designatur. Nam sexies decem sexaginta sunt. Et quia sex diebus licet operari secundum legem, senarius operationem designat; denarius legem propter Decalogum quinquarius quinque sensus corporis. Quid ergo per *sexaginta et quinque annos* exprimitur nisi tempus

(68) Cod. Cruc., *sitiunt*.

A omne, quo perfidus iste Judaeorum populus carnalem legis actionem tenet, et quinque sensibus corporeis servit? Post cujus spatium Elia praedicante deficiet incredulus Judaeorum populus, ut multiplicetur credentium numerus. « Nam caecitas ex parte contigit in Israel, donec plenitudo gentium intraret, et sic omnis Israel salvus fieret (*Rom. xi, 25, 26*). » Sic ergo quasi post sexaginta et quinque annos apostata *Ephraim desinet esse populus*, nullo jam fere remanente incredulo ex ejus multitudine; quia postquam plenitudo gentium intraverit, omnis Israel salvus fiet. Unde et subditur:

« Et caput Ephraim Samaria, et caput Samariae filius Romeliae. » *Samaria* quippe *custodia* dicitur, et *Romelia, excessus Domini*. Custodia ergo caput illorum erit; quia tunc observantiae praepceptorum Dei veraciter se subjicient. Et caput hujus custodiae erit *filius excelsi Domini*. Quia principes religionis habebunt, qui patriarchae Abraham filii non solum carne sed fide erunt ac moribus. Ut autem haec omnia mystice dicta esse declaret, exponendo subjungit ad hos, qui contra Ecclesiam pugnant, dicens: *Si non credideritis, scilicet in Christum, non permanebitis, sed cito peribitis ab orbe terrarum, Ecclesia crescente: « Qui enim recti sunt, habitabunt in terra, et simplices permanebunt in ea; impii vero de terra perdentur, et qui inique agunt, auferentur ex ea (*Prov. 11, 21*). »*

Si quis autem hos sexaginta quinque annos historialiter ad captivitatem decem tribuum referre voluerit, videat quod tres reges Juda in hac narratione propheta posuerit, sub quibus et prophetavit. « Et factum est, inquit, in diebus Achaz filii Joathan filii Oziae. » Et ideo computet, ut Hebraei volunt, a vicesimo quinto anno regni Oziae usque ad sextum annum regni Ezechiae, in quo Salmanasar cepit Samariam, et transtulit Israel in Assyrios. Quando enim Ozias, sub quo et iste prophetare coepit, ingressus est lepra, volunt Hebraei fuisse annum regni ejus vicesimum quintum, cujus reliqui anni sunt viginti septem. Omnes enim anni, quibus regnavit, quinquaginta duo anni fuerunt. Post quem regnavit Joathan filius ejus annis sexdecim, et hujus filius Achaz sexdecim aliis. Et post hunc regnavit Ezechias, cujus sexto imperii anno Samaria capta est; atque ita simul fiunt anni sexaginta quinque. Sequitur:

VERS. 10.— « Et adjecit Dominus loqui ad Achaz dicens: »

VERS. 11.— « Pete tibi signum a Domino Deo tuo in profundum inferni, » etc.

VERS. 12.— « Et dixit Achas: Non petam, et non tentabo Dominum. »

VERS. 13.— « Et dixit: Audite ergo, domus David: Nunquid parum vobis est molestos esse hominibus, quia molesti estis et Deo meo? »

VERS. 14.— « Propter hoc dabit Dominus ipse vo-

(69) Cod. G. *Follo*.

his signum. Ecce Virgo concipiet, et pariet filium, A id est *nobiscum Deus*. *Nobiscum Deus* vocatur; quia et vocabitur nomen ejus Emmanuel. »

Vers 15. « Butyrum et mel comedet, ut sciat reprobare malum, et eligere bonum. »

Etsi hic non posset intelligi, tamen ex Matthæi volumine nobis innotesceret, a Domino dictum: « Ecce Virgo concipiet, et pariet filium (Matth. 1, 23). » Et Dominus, qui hoc dicit præmittit, dicens: « Nunquid parum vobis est molestos esse homini, quia molesti estis et Deo meo? » Quis est ergo Dominus, qui dicit: « Molesti estis et Deo meo nisi qui alias loquitur: « Ascendo ad Patrem meum et Patrem vestrum, Deum meum, et Deum vestrum? » (Joan. xx, 17.) Ipse enim propter mysterium futuræ incarnationis jam Deum suum dicit Deum Patrem, et sic de se incarnando quasi de alio loquitur:

« Pete, inquit, tibi signum in profundum inferni, sive in excelsum supra. » Signum quippe in profundum et in excelsum descensio Christi ad inferos et ascensio ad celos. Annon mirabile signum fuit, quando infernum confregit et spoliavit, atque regna cælorum ascendens aperuit? Quod jubetur signum petere Achaz non simpliciter sed sibi; quia Christus non propter se, sed propter nos usque ad inferni profunda descendit, et usque ad solium paternæ majestatis ascendit. Sed Achaz utpote peccator ignorans mysteria Dei: « Non petam, inquit, et non tentabo Dominum. » Putabat enim hoc tentationem fore, si tale signum peteret. Et Dominus totam incredulorum progeniem increpans, ait:

Audite ergo, domus David, quæ signum ereptionis vestræ et salvationis petere non vultis: « Nunquid parum vobis est molestos esse hominibus quia molesti estis et Deo meo? » Molesti erant hominibus, id est ratione utentibus, qui, quod humanæ salutis exigebat ratio, postulare nolebant. Neque enim genus humanum salvari poterat, nisi confringeretur infernus, qui cunctorum animas suscipiens retinebat, et aperiretur cælum populo sanctorum. Sed et Deo molesti erant; quia, quod Deus dare volebat, ipsi nolebant petere. Deo quippe salutem humanam quærenti molestus est, quisquis se saluti subtrahit, nec talem exhibet, qui facile salvare possit. Propter hoc, inquit, quod non solum hominibus, sed et Deo molesti estis nolentes petere signum triumphi Christi, D per quod salvi sitis, dabit ipse Dominus vobis non postulatus signum nativitatis suæ.

« Dabit Dominus vobis signum. » Et quod signum? « Ecce Virgo concipiet, et pariet Filium. » Recte conceptio et partus Virginis vocatur signum, quæ sic mater effecta est, ut virginitatis non amitteret sigillum. Signum quippe sigillum appellari solet; et ipsa propter hoc perpetuæ virginitatis intactum signaculum vocatur in Canticis canticorum: « Hortus conclusus, fons signatus (Cant. iv, 12). » Vel signum, id est miraculum vocatur conceptus et partus ejus; quia totus orbis lætus admiratur, quoniam virgo conceperit, et pepererit et in æternum virgo permanserit. Et vocabitis, o domus David, nomen ejus Emmanuel,

id est *nobiscum Deus*. *Nobiscum Deus* vocatur; quia cum sit Unigenitus Dei, super terram in carne visus est, « et cum hominibus conversatus est (Baruc. iii, 38), » et corporaliter ascensus in cælum promisit nobis: « Ecce ego vobiscum sum omnibus diebus usque ad consummationem sæculi (Matth. xxviii, 20). » Domus enim David, quæ nomen ejus Emmanuel vocat, primo Maria et Joseph « de domo et familia David sunt (Luc. 1, 27), » ac universa deinde Ecclesia.

« Butyrum et mel comedet. » Butyrum ex lacte est, et lac ex carne; mel autem cadit ex aere. Quid ergo per butyrum nisi scientia humanitatis ejus exprimitur? Et quid per mel nisi dulcedo divinæ sapientiæ ejus? Comedit itaque butyrum et mel, quia humanam et divinam sapientiam habuit. Et propterea scivit reprobare malum et eligere bonum; quia per prudentiam humani et divini sensus omne, quod malum est, sapienter respuit, et omne bonum elegit. Hinc enim factum est, ut ipse peccatum nullum committeret, omnemque justitiam adimpleret, atque in fine sæculi genus humanum judicaret.

Sed ut mysticam intelligentiam in his prosequamur, jubetur Achaz signum petere in profundum, et in excelsum, et respondet: Non petam, ac si diceretur apostolis, ut mortem Salvatoris et ascensionem optarent, et illi magis eam expavescerent. Scriptum est enim, quoniam « cœpit Jesus ostendere discipulis suis, quia oportet eum ire Jerosolymam, et multa pati a senioribus, et scribis, et principibus sacerdotum, et occidi, et tertia die resurgere. Et assumens eum Petrus increpabat eum dicens: Absit a te, Domine; non erit tibi hoc. Qui conversus dixit Petro: Vade retro me Satanas, scandalum es mihi (Matth. xvi, 21-23). » Nam quod Dominus mortem suam et resurrectionem prænuntiat discipulis, et Petrus ait: « Absit a te, Domine, non erit tibi hoc, » hoc est juxta mysterium quod Achaz præcipitur signum inferius et superius petere, et dicit: « Non petam, et non tentabo Dominum. » Et quod Petrus audit: « Scandalum es mihi, » hoc est quod domui David quasi discipulis Christi dicitur: « Nunquid parum vobis est molestos esse hominibus, quia molesti estis et Deo meo? » Molesti erant apostoli non solum sanctis hominibus, id est prophetis, sed etiam Deo, quia nolebant ut moreretur Christus et resurgeret, sicut prophetæ prædixerant, et Deus disposuerat.

« Propter hoc, inquit, dabit vobis signum ipse Dominus; » quia ecce virgo Ecclesia concipiet, et pariet filium, id est, masculinæ virtutis populum electorum, et vocabitis nomen ejus Emmanuel, id est Christianum. Nam et in participatione sui nominis est Christus nobiscum, dum ab illo Christiani vocamur. « Butyrum et mel comedet. » Butyrum spiritalis gratiæ pinguedinem designat, dicente Salomone: « Qui fortiter premit ubera ad eliciendum lac, exprimit butyrum (Prov. xxx, 33). » Ubra quippe fortiter premimus, cum ubera sacri eloquii subtili intellectu pensamus. Qua pressione dum lac quærimus

butyrum invenimus; quia dum nutrirī vel tenui intellectu quærimus, ubertate internæ pinguedinis unguimur. *Mel* vero dulcedinem cœlestis doctrinæ designat, ut prædictus Salomon ait: « Comede, fili, mel, quia bonum est, et favum dulcissimum gutturi tuo; sic et doctrina sapientiæ tuæ (*Prov. xxiv, 13*). » Tali itaque butyro et melle pascitur electorum populus, quem gignit Ecclesia, et per hoc scit *reprobare malum, et eligere bonum*. Non enim sufficit nobis eruditio Scripturarum, nisi et unctio Dei doceat nos de omnibus. Sequitur:

VERS. 16. — « Quia antequam sciat puer reprobare malum, et eligere bonum, derelinquetur terra, quam tu detestaris, a facie duorum regum suorum. »

Qui sunt isti *duo reges*, superius dictum est, scilicet rex Syriæ et rex Israel pugnantes contra populum Dei. Et *antequam puer* Jesus per humanitatis sensum discernere sciret inter bonum et malum, derelicta est terra, quam Achaz, id est princeps ecclesiasticus detestatur, conversis ad eum magis atque pastoribus. Syria quippe ab Oriente est; et magi venerunt ab Oriente Jerosolymam, dicentes: « Ubi est, qui natus est rex Judæorum? Vidimus enim stellam ejus, » etc. « Audiens autem Herodes rex turbatus est, et omnis Jerosolyma cum illo. Et congregans omnes principes sacerdotum et Scribas populi, sciscitabatur ab eis, ubi Christus nasceretur. At illi dixerunt: In Bethlehem Judæ (*Math. ii, 2* etc.). » Dum dicitur: Herodes iratus et omnis Jerosolyma cum illo, patet, quia jam tunc Syria cœpit requiescere super Ephraim contra Judam. Nam ex duobus his regibus alium hoc loco possumus Herodem accipere qui gentilis erat, et alium principes sacerdotum et Scribas populi. A facie quorum dereliquerunt terram eorum magi, « qui cum audissent regem, abierunt, et invenerunt puerum cum Maria matre ejus, et procidentes adoraverunt eum (*Math. ii, 9 et 10*). » Pastores quoque deseruerunt terram detestabilem, et « venerunt festinantes, et invenerunt Mariam et Joseph et infantem positum in præsepio (*Luc. ii, 16*). » Quamvis autem utrique loca mutaverint ad Christum venientes, tamen detestabilis terra, quam reliquerunt, magis intelligenda est perfidia Judæorum, et infidelitas gentium. Sequitur:

VERS. 17. — « Adducet Dominus super te, et super populum tuum, et super domum patris tui dies, qui non venerunt a diebus separationis Ephraim a Juda cum rege Assyriorum. »

Juxta quod hucusque tractavimus, Achaz apostolorum gerit formam atque summorum Ecclesiæ sacerdotum. Ait ergo: *Adducet Dominus super te et super populum tuum ecclesiasticum, et super domum patris tui*, id est super ordinem sacerdotum, *dies bonos, quales non venerunt*, ex quo separatus est *Ephraim a Juda*, id est populus Judaicus a populo fidelium, et sociatus cum rege Assyriorum id est cum principe dæmonum diabolo. Assyrii quippe

convincentes interpretantur vel *coarguentes*; quia maligni spiritus eos ante tribunal æterni Judicis convincent et coarguunt, qui nunc eis iniquitatem persuadentibus consentiunt. Cur autem dies promiserit optabiles, subdendo manifestat.

VERS. 18. — « Et erit in die illa: sibilabit Dominus muscæ, quæ est in extremo fluminum Ægypti, et api, quæ est in terra Assur. »

VERS. 19. — « Et venient et requiescent omnes in torrentibus vallium, et cavernis petrarum, et in omnibus fructibus, et universis foraminibus. »

Quid enim in sibilo nisi vel sonus divinæ prædicationis præfiguratur, vel interna aspiratio? Musca vero nimis insolens, et inquietum animal est atque immundum et nigrum. In qua quid aliud quam superbus quisque et inquietus peccator exprimitur? Et quæ sunt Ægypti flumina nisi defluentia carnis vitia? Differt autem esse in fluminibus Ægypti, et esse in extremo fluminum Ægypti. Est enim in fluminibus Ægypti, qui moratur in vitis et cæcitate cordis; et est in extremo fluminum Ægypti, qui ad pessimam flagitiorum omnium pervenit nequitiam. Qui itaque per muscam extremi fluminum Ægypti designatur nisi vel gentilitas, vel quælibet anima omnibus peccatis et erroribus detenta?

Quid vero per apem, quæ est in terra Assur, nisi philosophi et poetæ gentilium ore dulcia ferentes, et in postremis latenter pungentes, et occultum virus infundentes, vel omnes qui verba sua primitus indulcant, et in fine acriter pungunt? Quæ est enim terra Assur nisi infidelitas, vel impiorum mens et voluntas, ubi regnat hostis antiquus: hæc est enim longinqua regio, in qua minor filius dissipavit bona sua « vivendo luxuriose (*Luc. xv, 15*). » Et huic ergo muscæ vel api Dominus sibilum vocis suæ non denegat.

Vel per muscam designatur Judaicus populus, qui ad sacrificiorum sanguinem more muscarum concurrebat. Et hæc musca, quoniam in sordibus ultra modum sorduerat, in extremo fluminum Ægypti, exsulabat, quia, quantum plebs ista Deo exstiterat familiarior, tantum ultra illos, « qui in tenebris et in umbra mortis sedebant (*Luc. i, 79*), » per inobedientiam deterius effluebat

Per apem vero, quæ mellifica naturaliter est, gentilitas exprimitur; quia, cum « gentes, quæ legem non habent, naturaliter ea, quæ legis sunt, faciunt, ejusmodi legem non habentes ipsi sibi sunt lex, qui ostendunt opus legis scriptum in cordibus suis (*Rom. ii, 14*). » Naturaliter ergo gentes sine duce, sine doctore mellificare satagebant, cum sine lege, quæ legis erant, faciebant. Sed næc apis erat in terra, de qua dictum est: « Terra es, et in terram ibis (*Gen. iii, 10*), » in terra infructuosa, in terra Assur, quod interpretatur *captivatio*, vel *elatio*, vel *devastatio*, ut a diabolo captivitas et elatas et devastatas gentilium animas usque ad adventum Domini intelligamus.

Quid vero per torrentes vallium nisi doctrinæ fl-

gurantur humilium? Et quid per cavernas *petrarum* nisi vulnera martyrum? Torrentes enim vocamus rivos, qui aquis Niemalibus colliguntur, et æstivo tempore siccantur. Jure ergo prædicationes sanctorum *torrentes vallium* appellantur; quia, dum in præsentī vita in nobis influunt, quasi in hieme colliguntur aquarum multitudines. Sed æstivo sole adveniente se subtrahunt; quia, cum æternæ patriæ lux emicuerit, doctores prædicare cessabunt. De cavernis autem *petrarum* supra diximus: Requiescunt ergo muscæ et apes in *torrentibus vallium et cavernis petrarum*; quia conversi peccatores et prædicationes doctorum delectabiliter bibunt, et martyrum patrocinia quærunt. Quid vero per fruteta nisi pungens asperitas disciplinæ signatur? Solent enim apes ex frutetis mella colligere. Quia, qui in disciplina conversantur, æternam ex ea dulcedinem percipiunt. Quid autem in *foraminibus* nisi mysticorum eloquiorum perforationes figurantur et apertiones? Nam, sicut lapis pretiosus diversis modis perforatur et sculpiritur, ita mysticus sermo Dei diversis interpretationibus aperitur. Et in his ergo *foraminibus* requiescunt muscæ et apes; quia in spiritali intelligentia Scripturarum delectantur conversi peccatores. Sequitur:

VERS. 20. « In die illa radet Dominus in novacula conducta in his, qui trans flumen sunt, in rege Assyriorum caput et pilos pedum, et barbam universam.

Quid per *caput* nisi summa sacerdotii designatur? Quid per *rasos capillos* nisi sacramentorum subtilitas ablata? Quid per *pilos pedum* nisi sacramenta levitarum? Quid per *barbam* nisi virtus regni? Rasit ergo Dominus in his, qui trans flumen sunt, in rege Assyriorum caput; quia sacramentis præceptorum suorum nudavit sacerdotium Judæorum, qui per baptismum nolentes transire ad Christum in diaboli regno permanent. Rasit et *pilos pedum*; quoniam a levitarum ministerio spiritalia sacramenta abstulit. Rasit et *barbam*; quia regnum Israeliticum deserens decorem virtutis ejus amputavit. Rasit hæc in *novacula conducta*; quoniam gladio Romani exercitus abstulit eis regnum, abstulit et templum, in quo sacerdotum et levitarum complebantur officia. Sequitur:

VERS. 21. — « Et erit in die illa: Nutriet homo vaccam boum, et duas oves. »

VERS. 22. — « Et præ ubertate lactis comedet butyrum. »

Quis est iste *homo* nisi mediator Dei et hominum homo Christus Jesus? Et quæ est hæc *vacca boum*, quam nutrit, nisi Ecclesia apostolorum atque doctorum quasi boum filia? Hanc enim *vaccam* et in Abrahamæ sacrificio legimus (*Gen. xv, 19*). Quæ sunt oves duæ nisi simplices ac mansueti de utroque populo fideles, de quibus ait: « Non sum missus nisi ad oves quæ perierunt domus Israel (*Matth. xii, 12*). »

(70) *Alias manducabit.*

A Et: « Alias oves habeo, quæ non sunt ex hoc ovili (*Joan. x, 16*). » Lac vero introductorius sermo est, quo imbuuntur minus capaces, sicut ait Apostolus: « Tanquam parvulis in Christolac vobis dedi non escam (*I Cor. iii, 2*). » Sed ex vacca et duabus ovibus *præ ubertate lactis comedet homo butyrum*; quia Dominus ab Ecclesia, ubi circumcisio et præputium est, præ ubertate boni sermonis pinguedine pascitur, dum membra ejus pascuntur. Sequitur:

« Butyrum enim et mel comedet (70) omnis, qui relictus fuerit in medio terræ. » Medium *terræ* Judæa et Jerusalem est. *Relictus in medio terræ* ille est, de quo superius ait: « Omnis qui relictus fuerit in Sion, et residuus in Jerusalem, Sanctus vocabitur. » Mel vero desuper cadit; butyrum autem ex animalium lacte colligitur. Mel igitur ex aere; butyrum vero ex carne est. Summi autem Patris Unigenitus, cum sit Deus super omnia, homo factus est inter omnia. Qui cum nos dulcedine divinitatis suæ, et mysterio incarnationis replet, melle nos pariter et butyro satiat. Quia ergo Spiritus Christi mentes fidelium Hebræorum, quas replevit, et divinitatis ejus dulcedine et incarnationis fide lætificavit, recte dictum est, quia « butyrum et mel manducabit omnis, qui relictus fuerit in medio terræ. » Sequitur:

VERS. 23. — « Et erit in die illa: Omnis locus ubi fuerint mille vites, et mille argentei (71) et in spinas, et in vepres erunt. »

VERS. 24. — « Cum sagittis et arcu ingredientur illuc. »

Quid per *vites* nisi sancti designantur botros operum bonorum ferentes, quibus ait Dominus: « Ego sum vitis, vos palmites? » (*Joan. xv, 5*). Quid per *argenteos* nisi sermones boni figurantur? Nam « argentum electum lingua justī (*Prov. x, 20*) est. » Quid per *millenarium* nisi plenitudo numeri? Ubicumque fuerint *mille vites*, erunt et *mille argentei*; quia ubi fuerit copia virorum spiritalium, ibi et erit prædicationis copia. Nam sub Veteri Testamento vix inveniebatur, qui scientiam prædicationis haberet. Sed in tempore revelatæ gratiæ, de quo nunc sermo est, redundant ora fidelium ubique verbo veritatis. Et in *spinis et in vepres erunt*; quoniam contra peccata et vitia gentilitatis directi sunt. Quid enim per *spinas et vepres* nisi punctiones peccatorum insinuat, quibus velut desertum plena erat gentilitas? *Cum sagittis et arcu ingredientur illuc*; quia nimirum sancti apostoli ad feriendam gentilium vitæ duritiam cum districtis verborum spiculis venerunt. Scriptura enim sacra *arcus* est, de qua ad corda hominum sicut ferientes sagittæ, sic terrentes sententiæ veniunt. Sequitur: « Vepres enim et spinæ erunt in universa terra. »

VERS. 25. — « Et omnes montes, qui in sarculo sarrientur, non veniet illuc terror spinarum et ve-

(71) *Alias, mille vites mille argenteis, et in, etc.*

prium, et erit in pascua bovis, et in conculcationem pecoris. »

Vepres et spinæ vel peccata vel peccatores designant; *montes* vero sanctos conversatione sublimes. *Sarculum* autem ferrum est fossorium bidens, verbum doctrinæ significans acutum ab utroque Testamento. *Montes* igitur, qui in sarculo sarrientur, id est fodientur, non veniet eis terror spinarum et reprium; quia, qui verbis doctrinæ purgabuntur, non timebunt peccata et vitia, quoniam noxias vitiorum herbas divini verbi sarculo eradicabunt, neque metuent eos, qui occidunt corpus (*Matth. x, 28*). » Et erit, subaudi terra, in pascua bovis; quia sanctus quisque prædicator in tota mundi latitudine inveniet quos sibi incorporet. Et in conculcationem pecoris; quia cætera fidelium multitudo tantum conculcat terrena, nec conversione peccatorum pascitur ut prædicator: bos quippe doctor est, pecus vero plebs fidelium. Sequitur:

CAPUT VIII.

VERS. 1. — « Et dixit Dominus ad me: sume tibi librum grandem, et scribe in eo stylo hominis; velociter spolia detrahe, cito prædare. »

VERS. 2. — « Et adhibui mihi testes fideles Uriam sacerdotem, et Zachariam filium Barachie. »

VERS. 3. — « Et accessi ad prophetissam, et concepit, et peperit filium. Et dixit Dominus ad me: Voca nomen ejus; accelera spolia detrahere, festina prædari. »

VERS. 4. — « Quia antequam sciat puer vocare patrem suum et matrem suam, auferetur fortitudo Damasci, et spolia Samariæ coram rege Assyriorum. »

Quid nunc per Isaiam visus Moyses et prophetæ signantur? Quid per *librum grandem*, nisi Scriptura Vetus? Quid per *stylo hominis* nisi scientia rationalis animi? Quid per *Uriam sacerdotem* nisi qui sub lege functi sunt sacerdotio? Urias enim interpretatur *lux mea Dei*; quia lumen veritatis et justitiæ, quod in eis erat, donum esse Dei fatebantur. Quid per *Zachariam*, qui dicitur *memor Domini*, nisi doctores, qui, in lege Domini die ac nocte meditantes, divinam semper habebant memoriam? Barachia vero interpretatur *benedictio Domini*. Et Barachia pater Zachariæ est; quia sancti doctores filii sunt benedictionis Domini, Quid vero per *prophetissam* nisi Synagoga figuratur? Quid per *filium ejus* nisi Redemptor noster?

Isaias itaque librum sibi sumens, *stylo hominis* in eo scribit dicens puero Jesu: *Velociter spolia detrahe, cito prædare*; quia omnes Veteris Testamenti scriptores rationabili sententia in eo scripserunt, quod Dei Filius, in carne apparens, regnum diaboli festinanter invasurus erat, et ab eo captivos homines erepturus. Cujus rei testes adhibuit sibi propheta Uriam et Zachariam; quia Moyses et cæteri, qui libros Testamenti Veteris scripserunt, arcana eorum mysteria sacerdotibus et doctoribus tradide-

PATROL. CLXXXI.

runt. Quibus in testimonium adhibitis, accessit Isaias ad prophetissam, ut impregnaret eam; quia sancti prophetæ testibus sacerdotibus et magistris cordi Synagogæ fidem Dominicæ Incarnationis infuderunt. Synagoga enim Christum concepit, ex quo nasciturum hunc ex sua carne credere cepit; quem et peperit, quando per partum Virginis eum nobis incarnatum edidit. Cujus nomen propheta vocavit: *Accelera spolia detrahere, festina prædari*; quia prævidit eum mox tempore nativitatis suæ pastores et magos ad se tracturum. Et alacribus desideriis eum hortabatur, ut hæc agere festinaret. Debellaturus enim in toto orbe regnum diaboli hæc prima puer illi spolia detraxit, ut a perfidia Judæorum pastores ad se converteret et magos ad se adorandum conversos a peste illius superstitionis averteret. Qui tunc ob infantilem ignorantiam nesciebat vocare patrem suum, id est nutritium suum Joseph, et matrem suam, Virginem, sicut et in Jeremia dicit: « Ecce nescio loqui, quia puer ego sum (*Jerem. i, 6*). » Sapientia enim Dei novit omnia; expertus autem agnitionis infantia per humanam utique imprudentiam, quod adhuc non didicerat, ignorabat; unde « proficiebat sapientia et ætate, et gratia (*Luc. ii, 52*). » Nam in divinitate non habuit proficere. Sed tamen abstulit fortitudinem *Damasci et spolia Samariæ*.

Syriam quippe *gentilitatem* significare diximus; *Damascus* autem *sanguinis poculum* vel *sanguinem bibens* interpretatur. Et *caput Syriæ Damascus*; quia culturæ dæmonum subdita gentilitas animam suam velut proprium sanguinem diabolo in poculum libat. Quid itaque fortitudinem *Damasci* et idololatriæ et mortis animarum et crudelitatis putamus nisi magos? In arte enim magica totius erroris et prædicationis virtus convalescebat. Quid vero per *Samariam* nisi Judæorum perfidia signatur? Dum ergo magos atque pastores ad se Puer converteret, abstulit virtutem *Damasci et spolia Samariæ*. Et hoc factum est coram rege Assyriorum; quia cognovit diabolus magorum suorum damnum quod pertulit. Unde et Herodem inflammavit, ut, natum Regem extinguere querens, omnes pueros sibi cœtaneos occideret (*Matth. ii*). Sequitur:

VERS. 5. — « Et adjecit Dominus loqui ad me. adhuc dicens:

VERS. 6. — « Pro eo quod abjecit populus iste aquas Siloe, quæ vadunt cum silentio, et assumpsit magis Rasin et filium Romeliæ. »

VERS. 7. — « Propter hoc ecce Dominus affluet super eos aquas fluminis fortes et multas, regem Assyriorum, et omnem gloriam ejus, et ascendet super omnes rivos ejus, et fluet super omnes ripas ejus. »

VERS. 8. — « Et ibit per Judam inundans et transiens, et usque ad collum veniet, et erit extensio alarum ejus implens latitudinem terræ tuæ, o Emmanuel. »

Quoniam *Siloe* missus interpretatur, per *Siloam* intelligimus Christum, qui missus est mundum re-

dimere, et per *aquas Siloe* prædicationem ejus. Per *A* *aquas* enim doctrina designatur, sicut scriptum est: « *Aqua sapientiæ salutaris potavit illum (Eccli. xv, 13).* » *Quæ*, scilicet, *aquæ vadunt cum silentio*, id est mentem spiritali potentia leniter sine strepitu et clamore verborum ingrediuntur; quia, sicut Salomon ait: « *Verba sapientum audiuntur in silentio (Eccli. ix, 17).* » Quid vero per *Rasin regem Syriæ* nisi Cæsarem intelligi voluit? Quid per *Phacee filium Romeliæ* nisi Phariseos et legis doctores? *Abjecit* ergo *populus Judæorum aquas Siloe* quia prædicationem Domini respuit. Et elegit *Rasin*, id est regem gentium, dicens: « *Non habemus regem nisi Cæsarem (Joan. xix, 15).* » Unde *Rasin* interpretatur *Placentia*; quia secundum placentiam et libitum voluntatis suæ dixerunt hoc, et assumpserunt *B* potius *filium Romeliæ*, id est Phariseos et scribas, qui a sanctis Patribus originem ducunt.

Propter hoc adduxit Dominus super eos aquas fluminis fortes et multas, id est humani generis validos et copiosos populos, regem scilicet Assyriorum, id est Vespasianum duces Romanorum. Quia enim Assyrii dicuntur *coarguentes*, merito Romani vocantur Assyrii, qui Judæorum iniquitatem arguentes ulciscabantur. Et quia *populus Romani exercitus aquas fluminis appellavit*, loquitur metaphorice de eo quasi de flumine nimium excrecente et cuncta replente. Vel per *aquas fluminis impetum tribulationis illius*, quam tunc Judæi pertulerunt, intelligamus. *Aquæ* enim vel *populos* vel *tribulationes* hic significant.

Et ascendet, inquit, super omnes rivos ejus, etc. *Rivos ejus* singulas tribus ac familias fortasse nominat, et *ripas* terminos tribuum et familiarum. Sed iste fluvijs tribulationum excedens omnes et tribus et limites tenuit, et per *Judam inundans* et *transiens usque ad collum* excrevit, ut submergeret omnes sicut flumen, cum usque ad collum venerit. Et *extensio alarum ejus exercitus* implevit *latitudinem terræ Emmanuel*, id est Judæam, et omnem Galilæam; deinde cerneus propheta omnes Judæos in Jerusalem conventuros, atque per Titum Vespasiani filium superandos, ait:

VERS. 9. — « *Congregamini populi, et vincemini (72), et audite universæ procul terræ: confortamini et vincemini, accingite vos et vincemini.* »

VERS. 10. — « *Inite consilium, et dissipabitur, loquimini verbum, et non fiet, quia nobiscum Deus.* »

Hæc enim tempore obsidionis et captivitatis illius completa sunt. Neque enim cum Judæis jam erat Deus, sed cum Christianis. Nam sequitur:

VERS. 11. — « *Hæc enim ait Dominus ad me: Sicut in forti manu erudivit me, ne irem in via populi hujus, dicens:* »

VERS. 12. — « *Non dicatis: Conjuratio. Omnia enim quæ loquitur populus iste, conjuratio est.* »

(72) Alias ubique, *vincimini*.

(73) Alias, *ejus*.

Nobiscum Deus est, id est Christus: *Ait enim ipse Christus Dominus ad me: Sicut in forti manu erudivit me Deus Pater meus, id est sicut eum, cui validam virtutem dederat; non enim ad mensuram dat Deus Spiritum, ne per viam populi hujus incederem, infirmas actiones ejus imbecillo animo sequens, et inerudito corde per iter insipientium gradiens, sed ut directionis meæ viam fortiter et sapienter tenerem. Unde contra eum indignantes dixerunt apud se: « Gravis est nobis etiam ad videndum, quoniam dissimilis est aliis vita illius, et immutatæ sunt viæ illius, tanquam nugacês æstimati sumus ab illo; et abstinet se a viis nostris tanquam ab immunditiis (Sap. ii, 15, 16).* » Non ergo ixit *in via populi hujus*, sed qui eum valida manu confortavit et sapienter erudivit, *ne in via populi hujus iret*, ipse ei ac discipulis ejus dixit: *Ne dicatis: Conjuratio fit adversus nos; omnia enim, quæ loquitur populus iste, de nobis, conjuratio est. Conjuraverunt enim adversus Salvatorem, et « conspiraverunt, ut si quis illum confiteretur Christum, extra synagogam fieret (Joan. ix, 22), » et quasi conjurationem semper facientes nunquam cessaverunt mala contra eum machinari, donec interemerunt eum. Sic et in discipulos ejus quasi juratas semper habuere discordias, semper eis mala fabricantes. Unde et subditur: « Et timorem eorum (73) ne timeatis, neque paveatis.* »

VERS. 13. — « *Dominum exercituum ipsum sanctificate, ipse sit pavor vester, et ipse terror vester.* »

Ac si diceretur: « *Nolite timere eos qui occidunt corpus, animam autem non possunt occidere; sed potius eum timete, qui potest et animam et corpus perdere in gehennam (Matth. x, 28).* » Sicut et Petrus ait: « *Timorem eorum ne timueritis, ut non conturbemini; Dominum autem Christum sanctificate in cordibus vestris (I Petr. ii, 14).* » Sequitur:

VERS. 14. — « *Erit vobis in sanctificationem, in lapidem autem offensionis, et in petram scandalî duabus domibus Israel, in laqueum et in ruinam habitantibus Jerusalem.* »

VERS. 15. — « *Et offendent ex eis (74) plurimi, et cadent, et conterentur, et irretientur, et capientur.* »

In sanctificationem fuit discipulis, quia Spiritus sui gratiam dedit eis. Sed *duabus domibus Israel*, id est Judæ et reliquis decem tribubus factus est *in lapidem offensionis, et in petram scandalî*. Sperabant enim eum Judæi venturum. Sed quia venit humilis et occultus, contempserant eum et offenderunt in illum. Nam, apud se superba sapientes, indignati sunt in eum credere, quem cernebant numilem. Fuit ergo eis *lapis offensionis*. Quem, cum etiam mori cernerent, gravius in illum pertulere scandalum, ut nulla ratione jam Deum credere possent, quem mo-

(74) Cod. Cruc., *in eis*.

rientem viderant, sicque etiam petra scandali factus est. Et habitatoribus Jerusalem fuit in laqueum et in ruinam; quoniam in eo quod eum specialiter persecuti sunt, semetipsos laqueo suæ deceptionis involverunt, et ruinam sibi non solum animarum, sed et totius urbis acquisierunt, ut cum ipsis tota deleteretur civitas.

« Et offenderunt, inquit, ex eis plurimi. » Non omnes offenderunt, sed plurimi; quia inter eos multi erant in Christum credentes. « Et cadent, inquit, et conterentur. » *Cadentes contriti sunt*; quia relictis cœlestibus terrena quæsierunt. Quis enim major casus, vel quæ potest esse major contritio quam, derelicto Creatore, creaturam quærere, desertis supernis gaudiis, infimis rebus inhiare? Casum igitur et contritionem passi sunt; quia, amissis cœlestibus desideriis, terrenum est omne, quod sciunt. *Et irretientur peccatis suis, et capientur laqueo perpetuæ mortis.* Vel in obsidione Jerusalem sunt irretiti, quando civitas capta est, et illi sunt capti. Quia ergo multitudo Judæorum offendens in lapidem offensionis confracta est, electio autem veram consecuta est justitiam, idcirco apte subjungitur:

VERS. 16. — « Liga testimonium, signa legem in discipulis meis. »

VERS. 17. — « Et exspectabo Dominum, qui abscondit faciem suam a domo Jacob; et præstolabor eum. »

Nam vox Christi nunc ad prophetam dirigitur. Prophetam quippe *testimonium* Christi in nobis ligat; quia fidem ejus sermo propheticus menti valde tenacius agglutinat, cum certum nobis sit, ea quæ dixerunt prophætæ, nullatenus fingi potuisse. *Legem* quoque signat in nobis, quoniam præcepta ejus cordi nostro firmius includit. Libenter enim « Memores sumus mandatorum ejus ad faciendam ea (Psal. cii, 18), » de cujus potentia et promissione dubitare nequimus. *Liga*, inquit, *testimonium Veteris Testamēti*, et trade illud *discipulis meis*, id est apostolis et fidelibus, qui Evangelium susceperunt, et signa legem in eis. Quia ergo fidem Salvatoris et legem discipuli tenuerunt, quam Judæi maxime tempore passionis ejus amiserunt. *Liga*, inquit, *testimonium, signa legem in discipulis meis; Et exspectabo Dominum*, ut me resuscitet; quia « *erō mea requiescit in spe (Psal. xv, 9).* » *Qui abscondit faciem suam a domo Jacob*; quia ex quo me negaverunt, et Patrem pariter amiserunt. « Omnis enim qui negat Filium, nec Patrem habet (Joan. ii, 25). » Sequitur:

VERS. 18. — « Ecce ego et pueri mei, quos dedit mihi Dominus in signum et in portentum Israelis a Domino exercituum, qui habitat in monte Sion. »

Pueri vocantur qui mandatis cœlestibus inserviunt, et puerorum nomine discipulos suos nunc exprimit, qui præcepta ejus specialiter servaverunt. *Ecce ego*, inquit, *et pueri mei, quos dedit Dominus in*

(75) *Alias, req. visionem pro vivis & mortuis.*

A signum et in portentum Israelis, id est ego et discipuli mei signa et portenta faciemus in populo Israel. Deum patrem dicit habitare *in monte Sion*, id est in cœlis, non quia ipse Filius cum Patre semper non maneret in cœlis, sed quia corporaliter conversabatur in terris. Mons namque Sion ille nunc intelligitur, de quo dicit Apostolus: « Accessistis ad Sion montem et civitatem Dei viventis Jerusalem cœlestem et multorum millium angelorum frequentiam, et Ecclesiam primitivorum, qui conscripti sunt in cœlis (Hebr. xii, 22). » Sequitur:

VERS. 19. — « Et cum dixerint ad vos: Quæritis a pythonibus et divinis, qui strident incantationibus suis: Nunquid non populus a Deo suo requiret pro vivis ac mortuis? » (75)

B VERS. 20. — « Ad legem magis, et ad testimonium. Quod si non dixerint juxta verbum hoc, non erit eis matutina lux. »

Quid pythonica divinatio gerat artis in libro Regum invenimus (*I Regum xviii*), ubi, rogante Saul, pythionissa vel animam Samuelis, vel pro ea potius spiritum immundum evocavit ab inferis. Quod magicæ phantasie genus ab Apolline Pythio repertum, atque ab ejus cognomine sic dicunt esse vocatum. Sed et interpretatio nominis congruit, quia Pythion dicitur *os abyssi*. Videamus ergo sententiam:

« Ego, inquit, et pueri mei signa et prodigia facturi sumus in Israel; vos autem, qui hæc exspectatis, videte, ne mendacibus signis pseudoprophetarum decipiāmini. Cum enim dixerint vobis quilibet seductores: *Quærite a pythonibus et divinis*, id est consulite magos, ut agnoscatis per eos *a mortuis* veritatem, respondete illis: *Nunquid populus non requiret a Deo suo pro vivis ac mortuis*, etc., pro omnibus (75)? Omne enim quod inquiritur, aut pro vivis aut pro mortuis quæritur, aut forsitan pro utrisque. Cur ergo dæmones consuleremus, cum a Deo quærenda sunt omnia?

Ad legem magis et ad testimonium ejus attendamus. Quod si filii Israel non dixerint juxta verbum hoc, id est ut, repudiatis maleficis, ad legem Dei, quæ cuncta prohibet maleficis, ad testimonium legislatoris et prophetarum de adventu Salvatoris attendant, *non erit eis matutina lux*, id est exordium novæ gratiæ: « quia si Moysen et prophetas non audiunt, neque si quia ex mortuis resurrexerit, credent ei (*Luc. xvi, 31*), » id est Redemptori nostro, qui ait: « Si crederetis Moysi, crederetis forsitan et mihi. De me enim ille scripsit. Si enim illius litteris non creditis, quomodo verbis meis credetis? » (*Joan. v, 46*.) Quoniam igitur ad legem et ad testimonium non attenderunt, non sunt illustrati luce matutina, prædicante Domino, qui vespertinam vix habituri sunt apparente Elia. Sequitur:

VERS. 21. — « Et transibit per eam, et corruet, et esuriet; et cum esurierit, irascetur, et maledicet regi, suo et Deo suo.

(75*) C. Garst., id est pro omnibus.

Transibit Judaicus populus *per eam* lucem, id est *A* ledixerunt ei, « qui cum malediceretur, non maledicebat; cum pateretur, non comminabatur (*I Pet.* 11, 23). » Post ejus passionem, quia Jerusalem obsidenda erat et capienda, recte subjungitur: « Et suspiciet sursum. »

VERS. 22. — « Et ad terram intuebitur, et ecce tribulatio et tenebræ, dissolutio et angustia, et caligo persequens, et non poterit avolare de angustia sua. »

Suspiciet sursum Judaicus populus ad Dei cognitionem et auxilium, et ecce *tribulatio* adversitatis, et *tenebræ* ignorantiae: quia Deus excæcavit corda eorum, nec liberavit eos. *Et ad terram*, id est ad ea quæ circa se in terra lient, *intuebitur*, et ecce *tribulatio*. « Et erit, inquit, pressura magna super terram, et ira populo huic, et cadent in ore gladii, et captivi ducentur in omnes gentes, et Jerusalem calcabitur a gentibus donec impleantur tempora nationum (*Luc.* 21, 23, 24). » Hoc enim et hic dicitur: « Dissolutio et angustia, et caligo persequens, et non poterit avolare de angustia sua. » Similiter et apud Daniëlem legimus: « Post finem belli statuta desolatio (*Dan.* 12, 96). » Sequitur:

VERS. 23. — « Et ad terram intuebitur, et ecce tribulatio et tenebræ, dissolutio et angustia, et caligo persequens, et non poterit avolare de angustia sua. »

Suspiciet sursum Judaicus populus ad Dei cognitionem et auxilium, et ecce *tribulatio* adversitatis, et *tenebræ* ignorantiae: quia Deus excæcavit corda eorum, nec liberavit eos. *Et ad terram*, id est ad ea quæ circa se in terra lient, *intuebitur*, et ecce *tribulatio*. « Et erit, inquit, pressura magna super terram, et ira populo huic, et cadent in ore gladii, et captivi ducentur in omnes gentes, et Jerusalem calcabitur a gentibus donec impleantur tempora nationum (*Luc.* 21, 23, 24). » Hoc enim et hic dicitur: « Dissolutio et angustia, et caligo persequens, et non poterit avolare de angustia sua. » Similiter et apud Daniëlem legimus: « Post finem belli statuta desolatio (*Dan.* 12, 96). » Sequitur:

LIBER SECUNDUS.

CAPUT IX.

VERS. 1. — Primo tempore alleviata est terra Zabulon, et terra Nephthali, et novissimo aggravata est via maris trans Jordanem Galilææ gentium. »

VERS. 2. — « Populus, qui ambulabat in tenebris, vidit lucem magnam; habitantibus in regione umbræ mortis, lux orta est eis. »

Nunc de eo tempore sermo est, quo Dominus inter homines degens, Evangelium prædicare per se ipsum dignatus est. Nam post baptismum ad jejunium ejus scribit Matthæus, quia « secessit in Galilæam, et relicta civitate Nazareth venit, et habitavit in Capharnaum maritima, in finibus Zabulon et Nephtholim, ut adimpleretur quod dictum est per Isaiam prophetam: Terra Zabulon, et terra Nephtholim, via maris trans Jordanem Galilææ gentium. Populus, qui ambulat in tenebris, vidit lucem magnam, et sedentibus in regione umbræ mortis lux orta est eis. Et inde cœpit Jesus prædicare et dicere: Pœnitentiam agite; appropinquavit enim regnum cœlorum (*Matth.* 4, 12-17).

Itaque primo tempore Dominicæ prædicationis alleviata est onere peccatorum terra Zabulon, et terra Nephtholim; quia ibi Salvator, antequam discipulos elegisset, prædicare cœpit remissionem peccatorum et ingressum regni cœlestis, promittens pœnitentibus. Qui et de *via maris*, id est de regione maritima, novissimo tempore prædicationis ejus *aggravata* pondere peccatorum, in sequentibus Evangelii

ait: « Væ tibi, Corozaim! væ tibi, Bethsaida! quia si in Tyro et Sidone factæ fuissent virtutes quæ vobis factæ sunt, olim in cilicio et cinere sedentes pœniterent. Verumtamen Tyro et Sidoni remissius erit in judicio quam vobis. Et tu, Capharnaum, usque ad cœlum exaltata, usque ad infernum demergeris (*Matth.* 11, 21-23). »

Via itaque *maris gentium Galilææ*, quæ erat *trans Jordanem, novissimo aggravata est*: in suis iniquitatibus, quia prædicationem Dominicam obstinato animo contempsit. *Populus autem gentium, qui prius in tenebris* ignorantiae constitutus, latam viam sæculi, quæ ducit ad perditionem, *ambulabat, vidit lucem magnam*, prædicante Domino, et miraculis coruscante. *Lucem vidit* non parvam, ut aliorum prophetarum, sed *magnam* ut ejus, qui dicit: « Ego sum lux mundi (*Joan.* VIII, 12). » Atque habitatoribus regionis *umbræ mortis*, id est peccatorum et infidelitatis nova *lux* justitiæ et fidei est exorta. Hoc enim inter mortem et umbram mortis distingui potest, quod mors eorum intelligatur esse, qui cum operibus mortuis ad inferos descenderunt, quoniam « anima, quæ peccaverit, ipsa morietur (*Ezech.* XVIII, 20); » umbra vero *mortis* eorum, qui, dum peccent, nec dum de vita egressi sunt; quia, si voluerint agere pœnitentiam, possunt. Hæc tamen et aliter possunt intelligi. Ait enim:

« Primo tempore alleviata est terra Zabulon, etc. Nempe Zabulon interpretatur *jusjurandum ejus*.

Nephtalim *discretio*. Et Judæorum populus juramentum Dei perceperat sicut per Zachariam dicitur : « Juravit ad Abraham patrem nostrum datum se nobis (*Luc.* 1, 73). » Qui et discretus erat, id est a cæteris omnibus populis sequestratus. *Primo igitur tempore alleviata est terra Zabulon, et terra Nephtali*; quia Dominus in terra Judæorum docuit, quibus hoc olim juraverat, et quos ex omnibus populis, qui sub cælo sunt, elegerat, ibique primo discipulos ad prædicandum misit. Sequitur :

« Et novissimo aggravata est via trans Jordanem Galilææ gentium. » Quid per viam nisi actio designatur? Et quid per mare nisi sæculum? quid vero per *Jordanem* nisi baptismus? Unde et *Jordanis descensio eorum* interpretatur; quia, qui baptizantur, ad ima humilitatis ab elatione sua descendunt. *Galilæa* vero, quæ dicitur, *transmigratio perpetrata*, transitus est de peccatis ad justitiam. Itaque *via maris*, id est actio sæcularis, quæ *trans Jordanem*, id est post baptismum est perpetratae transmigrationis gentium, *novissimo tempore aggravata est* pondere peccatorum; quia et nos, qui ex gentibus ad Christum vocati sumus, postquam per baptismi sacramenta transivimus, postquam ad virtutes a vitiis transmigravimus, nunc circa mundi terminum, quando tepuit charitas multorum, et abundavit iniquitas, rursum sæculi viam ingredimur, et secularibus negotiis implicamur, qui Deo militare debemus, sicque peccatorum sarcina nimium gravamur, ut vix ad cæleste desiderium cor levare queamus.

Vel etiam ita possunt hæc exponi. Adveniente Christo, et prædicatione illius coruscante primo, *terra Zabulon et Nephtalim* a scribarum et Phariseorum erroribus est liberata, et gravissimum Judaicarum traditionum jugum excussit de cervicibus suis; postea vero Evangelium apostoli Pauli, qui novissimus apostolorum omnium fuit (*I Cor.* 14, 9), ingravata est, id est multiplicata prædicatione, et in terminos gentium, et viam universi maris, id est sæculi, Evangelium Christi splenduit. Nam *populus gentilis*, qui ante *sedebat vel ambulabat in tenebris*, et idololatriæ ac mortis vinculis tenebatur, clarum Evangelii lumen aspexit. Unde et adjungitur :

« Habitantibus in regione umbræ mortis, lux orta est eis. » Regio enim *umbræ mortis* terra gentium est, quoniam umbra mortis imitatio hostis antiqui intelligitur. Ipse enim, quia mortem intulit, mors vocatur, Joanne attestante qui ait : « Nomen illi mors (*Apoc.* 6, 8). » Per umbram igitur mortis ejus imitatio designatur, quia sicut umbra juxta corpus ducitur, ita actiones iniquorum de specie imitationis ejus exprimentur. Cernens itaque propheta gentiles populos in antiqui hostis imitatione defecisse, eosque ad veri solis ortum resurgere, quæ certe futura noverat, quasi ex præteritis narrat, dicens : « Habitantibus in regione umbræ mortis, lux orta est eis. » Ac de eorundem multitudine gentilium, qui nequa-

quam ejusdem lucis gaudia cognoverunt, subjungit :

VERS. 3. — « Multiplicasti gentem, non magnificasti lætitiā. »

Multiplicata enim fuerat gens per totius mundi latitudinem. Sed necdum magnificata fuerat lætitia, dum adhuc tantum in Judæa notus erat Deus: quia completum adhuc non fuerat : « Evangelizo vobis gaudium magnum, quod erit omni populo (*Luc.* 11, 10). » Sed jam de ejus magnificatione sequitur :

« Lætabuntur coram te, sicut lætantur (76) in messe, » etc. Copiosam quippe messem generis humani collegerunt apostoli, quando non solum Judæos, sed etiam gentes congregaverunt ad fidem.

Unde et dictum eis fuerat : « Levate oculos vestros, et videte regiones, quoniam albæ sunt jam ad messem; et qui metit, mercedem accipit, et congregat fructum in vitam æternam, ut et qui seminat, simul gaudeat, et qui metit. Ego misi vos metere, quæ non laborastis. Alii laboraverunt, et vos in labores eorum introistis (*Joan.* 14, 35 38). » In hac itaque messe lætati sunt *coram Domino* sancti prædicatores, dum de conversione gentium gauderent. Qui et accepto desuper Spiritu sancto antiquum hostem et universam ejus militiam superantes « omne enim, quod natum est ex Deo vincit mundum (*I Joan.* 4, 4), » sicut *victores* exsultaverunt. Et exsultantes *spolia* diviserunt; quoniam eloquia sacra cunctis per orbem nationibus distribuerunt. Nam spoliolorum nomine divina eloquia signantur, sicut scriptum est : « Lætabor ego super eloquia tua, sicut qui invenit spolia multa (*Psal.* cxviii, 162). »

Vel *multiplicasti gentem* fidelium, o Christe, qui Ecclesiam tuam toto orbe dedicasti; sed *non magnificasti lætitiā*; quia de perfidia Judæorum reliquisti nobis tristitiam. Sed cum veneris, et Christianiorum gens tota simul fuerit congregata, tunc *lætabuntur* apostoli *coram te* sicut messorum; quia fructus humanæ messis congregatus erit in vitam æternam; et *sicut exsultant victores*, qui captam *dividunt* prædam; quia tunc perfecte victus erit diabolus, et homines dividuntur in dextros et in sinistros. Sed cur isti victores in divisione spoliolorum exsultaverint demonstratur, cum de gentili populo subjungitur :

VERS. 4. — « Jugum oneris ejus, et virgam humeri ejus, et sceptrum exactoris ejus superasti sicut in die Madian. »

Eripiens quippe gentilitatem Dominus superavit *jugum oneris ejus*, cum eam adventu suo ab illa dæmoniacæ tyrannidis servitute liberavit. Superavit *virgam humeri ejus*, cum persecutionem illius, quæ ex perverso opere graviter deprimebat, ab humano genere Redemptor compescuit. Superavit *sceptrum exactoris ejus*, cum regnum diaboli, qui pestifera perpetracione vitiorum exigere consuevit debita pœ-

(76) Alias, qui lætantur.

narum, de fidelium corde destruxit. Sed quomodo hæc acta sint audiamus.

Sicut in die Madian, id est sicut sanctus Gedeon in trecentis viris innumeram multitudinem Madiatarum vicit. Libet hoc loco digressionem facere et quare triumphus Christi victoriæ Gedeonis assimiletur ostendere. Scriptum est enim in libro Judicum: « Omnis Madian, et Amalec, et orientales populi congregati sunt simul. Et transeuntes Jordanem castra metati in valle Jezrael. Spiritus autem Domini induit Gedeon. Qui clangens buccina convocavit domum Abiezer, ut se sequeretur. Misitque nuntios in universum Manassen, qui et ipse secutus est eum; et alios in Afer et Zabulon et Nephtholim, qui occurrerunt ei. Dixitque Gedeon ad Dominum: Si salvum facis per manum meam Israel, sicut locutus es, ponam vellus hoc lanæ in area: si ros in solo vellere fuerit, et in omni terra siccitas, scio quod per manum meam, sicut locutus es, liberabis Israel. Factumque est ita. Et de nocte consurgens, expresso vellere, concham rore complevit, dixitque rursus ad Dominum: Ne irascatur furor tuus contra me, si adhuc semel tentaveram signum quaerens in vellere: oro ut solum vellus siccum sit, et omnis terra rore madens. Fecitque Dominus nocte illa, sicut postulaverat, et fuit siccitas in solo vellere, et ros in omni terra (*Judic. vi, 33*), etc. »

« Igitur Jerobaal, qui et Gedeon, de nocte consurgens, et omnis populus cum eo venit ad fontem qui vocatur Arrath (77). Erant autem castra Madian in valle ad septentrionalem plagam collis excelsi. Dixitque Dominus ad Gedeon: Multus tecum est populus, nec tradetur Madian in manus ejus, ne gloriatur contra me Israel, et dicat: Meis viribus liberatus sum. Loquere ad populum, et cunctis audientibus prædica: Qui formidolosus et timidus est, revertatur. Recesseruntque de monte Galaad, et reversa sunt de populo viginti duo millia virorum, et tantum decem millia remanserunt. Dixitque Dominus ad Gedeon: Adhuc populus multus est; duc eos ad aquas, et ibi probabo illos, et de quo dixerō tibi, ut tecum vadat, ipse pergat; quem autem prohibuero, revertatur. Cumque descendisset populus ad aquas, dixit Dominus ad Gedeon: Qui lingua lambuerint aquas sicut solent canes lambere, separabis eos seorsum; qui autem, curvatis genibus, biberint in altera parte erunt. Fuit itaque numerus eorum qui, manu ad os projiciente aquas lambuerant, trecenti viri; omnis autem reliqua multitudo flexo poplite biberat. Et ait Dominus ad Gedeon: In trecentis viris qui lambuerunt aquas, liberabo vos, et tradam Madian in manu tua: omnis autem reliqua multitudo revertatur in domum suam.

« Sumptis itaque pro numero cibariis et tubis, omnem reliquam multitudinem abire fecit in tabernacula sua, et ipse cum trecentis viris se certamini dedit. Castra autem Madian erant subter in valle.

A Eadem nocte dixit Dominus ad eum: Surge et descende in castra, quia tradidi eos in manu tua. Sin autem solus ire formidas, descendat tecum Phara puer tuus. Et cum audieris quid loquantur, tunc confortabuntur manus tuæ, et securior ad hostium castra descendes. Descendit ergo ipse et Phara puer ejus in partem castrorum, ubi erant armatorum vigiliæ. Madian autem et Amalec et omnes Orientales populi fusi jacebant in valle ut locustarum multitudo. Cameli quoque innumerabiles erant sicut arena quæ jacet in littore maris. Cumque venisset Gedeon, narrabat aliquis somnium proximo suo, et in hunc modum referebat quod viderat: Vidi somnium, et videbatur mihi quasi subcinericius panis ex hordeo volvi, et in Madian castra descendere.

B Cumque pervenisset ad tabernaculum, percussit illud atque subvertit, et terræ funditus coæquavit. Respondit is cui loquebatur: Non est hoc aliud nisi gladius Gedeonis, filii Joas, viri Israelitæ. Tradidit Deus in manu ejus Madian, et omnia castra ejus.

« Cumque audisset Gedeon somnium, et interpretationem ejus, adoravit et reversus est ad castra Israel, et ait: Surgite, tradidit enim Deus in manus vestras Madian, divisitque trecentos viros in tres partes, et dedit tubas in manibus eorum lagenasque vacuas ac lampades in medio lagenarum, et dixit ad eos: Quod me fecere videritis, hoc facite. Ingrediar in partes castrorum, et quod fecero, sectamini. **C** Quando personuerit tuba in manu mea, vos quoque per circuitum castrorum clangite, et conclamate: Domino et Gedeoni. Ingressusque est Gedeon et trecenti viri, qui erant cum eo, in partem castrorum incipientibus vigiliis noctis mediæ, et custodibus suscitatis cœperunt buccinis clangere et complodere inter se lagenas. Cumque per gyrum castrorum in tribus personarent locis, et hydrias confregissent, tenuerunt sinistris manibus lampades, et dextris sonantes tubas, clamaveruntque: Gladius Domini et Gedeonis, stantes singuli in loco suo per circuitum castrorum hostilium. Omnia itaque castra turbata sunt, et vociferantes, ululantesque fugerunt. Et nihilominus instabant trecenti viri buccinis personantes. Immisitque Dominus gladium in omnibus castris, et mutua se cæde truncabant, fugientes usque Bethsetta, et crepidinem Abelmebula in Tabbath. Conclamantes autem viri Israel de Nephtholim et Aser et omni Manasse persecuti sunt Madian. Misitque Gedeon nuntios in omnem montem Ephraim, dicens: Descendite in occursum Madian, et occupate aquas usque Bethbera atque Jordanem. Clamavitque omnis Ephraim, et præoccupavit aquas usque Bethbera, apprehensosque duos viros Madian Oreb, et Zeb interfecit, Oreb in Petra Oreb, Zeb vero in torculari Zeb, et persecuti sunt Madian, capita Oreb et Zeb portantes ad Gedeon transfluenta Jordanis (*Judic. vii, 1 et seqq.*). » Hactenus Historiæ

sacræ verba posuimus. Sed quid prodest verba posuisse, nisi et mysticam eorum intelligentiam saltem breviter attingamus.

Gedeon igitur, ad prælium veniens, Redemptoris nostri signat adventum, de quo scriptum est: « Tollite portas, principes vestras, et introibit rex gloriæ. Quis est iste rex gloriæ? Dominus fortis et potens, Dominus potens in prælio (*Psal. xxiii, 7*). » Hunc Redemptorem nostrum non solum opere, sed etiam nomine prophetavit. *Gedeon* quippe interpretatur *circuiens in utero*. Dominus enim noster per majestatis potentiam omnia circumplectitur, et tamen per dispensationis gratiam intra uterum Virginis venit. Quid enim *circuiens in utero* nisi omnipotens Deus sua nos dispensatione redimens, divinitate cuncta complectens, et humanitatem intra uterum sumens, in quo utero incarnatus esset, et clausus non esset, quia et in utero fuit per infirmitatis substantiam, et extra uterum per divinitatis potentiam

Madian vero interpretatur *de judicio*. Ut enim hostes ejus repellendi destruendique essent, non de vitio repellentis, sed *de judicio* juste judicantis fuit. Et idcirco *de judicio* vocantur, quia alieni a gratia Redemptoris justæ damnationis meritum etiam in vocabulo nominis trahunt.

Amalec autem *populus lambens* interpretatur. Et quid per lambentem populum nisi mentes sæcularium designantur, quæ terrena cuncta ambiendo quasi lambunt, dum solis temporalibus delectantur?

Orientalis vero dicuntur: quia, sicut orti sunt, ita permanent neque circumcisi, neque baptizati. « Omnis ergo *Madian* et *Amalec* et *orientales* populi congregati transierunt *Jordanem*; » quoniam isti omnes una conspiratione in eos, qui baptizati sunt, irruerunt. Nos quippe baptismum quasi *Jordanem* Jesu dicere transivimus, et jam quasi repromissionis terram inhabitamus Ecclesiam. Dum igitur infideles adversus nos veniunt, quasi ad eorum devastationem, qui in terra trans *Jordanem* sunt, properant.

Et castrametati sunt in valle Jezrael; quia in peregrinatione vitæ præsentis tyrannice depresserunt et conculcaverunt humilitatem fidelium. *Jezrael* quippe *semen Dei* dicitur; et « qui seminat bonum semen, est filius hominis; bonum vero semen sunt filii regni (*Matth. xiii, 37*). »

« Spiritus autem Domini induit *Gedeon*; » quia, « *Jesu* baptizato et orante, descendit Spiritus sanctus corporali specie sicut columba in ipsum (*Luc. iii, 22*). » « Qui clangens buccina convocavit domum *Abiezer*; » quia cœpit *Jesu* prædicare, et eligit discipulos. *Abiezer* quippe *Pater meus adjutor* interpretatur. Quo nomine quid nisi prophetarum et antiquorum patrum persona designatur, cujus domus fuit discipulorum Domini collegium?

« Misitque nuntios in universum *Manassem*, » id est apostolos, dicens: « In viam gentium ne abieritis, sed ite ad oves domus Israel (*Matth. x, 5, 6*). » « *Manasses* » enim, qui interpretatur *necessitas*, figura est illius populi, qui necessitate Deo servivit, id est timore. « Et alios in *Aser*, et *Zabulon*, et *Nephtholim*; » quia *Paulum* et *Barnabam* misit ad gentilem populum, qui factus est in Christo beatus, et fortitudine plenus, et charitate dilatatus. *Aser* enim *beatus* dicitur, *Zabulon habitaculum fortitudinis*, *Nephtholim dilatatus* vel *dilatavit me*. *Ros* in vellere, et *siccitas* in omni terra fides est in omni populo Judæorum, et infidelitas in gentibus.

« De nocte consurgens, expresso vellere, conchamore complexit; » quia de morte Christus, ante lucem resurgens, fidei gratiam a Judæis abstulit, quæ discipulorum mentem replevit. Item *siccitas* in vellere et *ros* in omni terra perfidia est in Judæis, et fides in toto orbe. *Gedeon*, id est Christus. *Jeroabaal* (78), id est *judicem habens*, ad improprium scilicet diaboli, qui reprobos habens non tamen potest judicare, et vindicare destructionem idololatriæ. Qui *de nocte consurgens venit ad fontem* nomine *Harad*; quoniam ante lucem de sepulcro resurgens, venit ad immortalem fontem in cælum ascendens. *Harad* quippe *consurrectio descensionis* interpretatur. *Et omnis populus credentium cum eo resurgens venit ad hunc fontem*; quia « Deus conresuscitavit, et consedere fecit nos in cœlestibus in Christo Jesu (*Ephes. ii, 6*). »

Madian erant in valle, id est in profundo vitiorum, *ad septentrionalem plagam*, id est in sinistra et glaciali, tenebrosaque infidelitate. *Collis excelsus* Ecclesia est in latere Christi lancea patefacto consistens, qui est mons in vertice montium.

Mons *Galaad*, qui interpretatur *acervus testimonii*, præcelsum et multiplex testimonium est, quod in passionibus martyres reddiderunt. De quo monte reversa sunt viginti duo millia timidorum, id est multitudo transgressorum utriusque Testamenti et apostatarum. Nam viginti duo his undecim sunt, et undenarius transgressionem designat, denarius observantiam præceptorum. Nam *decem millia remanserunt* cum *Gedeone*. Sed quia non omnes prædicare sufficiunt vel pati pro Christo, qui legem servare creduntur, *adhuc populus est multus*.

Ducti sunt igitur ad fluvium, ut aquas lamberent, et qui aquas flexis genibus hauserunt, a bellica intentione remoti sunt. Aquis namque doctrina sapientiæ, stantibus autem genu recta operatio designatur. Qui vero dum aquas biberent, genu flexerunt, a bellorum certamine revocati sunt; quia cum illis contra hostes fidei Christus pergat ad prælium, qui cum doctrinæ fluentia hauriunt, rectitudinem operum non inflectunt, ut sapientiæ doctrina et operum virtute polleant. Nam, quia dissolutio operum in ipsa genium incurvatione signatur, *Paulus* ait: »

« Remissas manus, et dissoluta genua erigite, et A
gressus rectos facite pedibus vestris (Hebr. xii, 12). »

« Fuit itaque numerus eorum, qui manu ad os
projiciente aquas lambuerant, trecenti viri. » Solet
in centenario numero plenitudo perfectionis intelligi.
Quid igitur in centenario ter ducto nisi perfecta cog-
nitio Trinitatis intelligitur (79)? Cum his quippe
Dominus adversarios fidei destruit, cum his ad præ-
dicationis bella descendit, qui sciunt de Trinitate,
quæ Deus est, perfecta sentire.

*Eadem nocte, qua cœnavit cum discipulis, dixit
Dominus ad eum : Surge a cœna, et descende in ca-
stra, id est in locum quo venturus est Judas cum
turba Judæorum. « Sin autem solus ire formidas,
descendat tecum Phara puer tuus. » Hoc, nisi fal-
lor, Marcus ita ait : « Assumpsit Petrum et Jaco-
bum et Joannem secum, et cœpit pavere et tædere
(Marc. xiv, 33). » Phara quippe, qui interpretatur
laguncula, typus est apostolorum, qui nova gratia
velut musto sunt repleti. « Descendit ergo ipse et
Phara puer ejus in partem castrorum, ubi erant ar-
matorum vigiliæ; » quia venit cum discipulis in
hortum, quo se capiendum noverat a ministris
Pharisæorum et cohorte militum. In camelis torti-
tudo vitiorum signatur, et in locustis instabilitas
mentium. Qui narrabat somnium vel interpretabatur,
divinos significare videtur et sapientes sæculi, non-
nullos quoque vates gentium, quibus pleraque de
Christo revelata sunt, sicut sybillæ et Nabuchodo-
nosor.*

Subcinericius panis ex hordeo Christum, qui pec-
cantibus asper et acutus, pungensque est, designat.
Quia sicut panis sub mole cineris coquitur, et Chri-
stus ignem passionis sustinuit sub multitudinæ Ju-
dæorum, et ad resurrectionis virtutem duruit. Qui
volvitur linguis prædicantium, ut ad humana corda
descendat. « Percussit tabernaculum, atque subver-
tit, et terræ funditus coæquavit, » vel quando car-
nem persecutorum, in qua manebant animæ eorum,
per mortem redegit in pulverem; vel quando vitia
carnis eorum gladio prædicationis misericorditer fe-
riens destruxit, et ipsos humiles reddidit. Vel po-
tius Scriptura Veteris Testamenti potest in pane ex
hordeo designari, cujus interior sensus tenacissimus
litteræ paleis tegitur. Hoc enim et quinque panes D
hordeacei designant in Evangelio, ex quibus turbas
pavit Dominus (Joan. vi). Qui scilicet panis est *sub-
cinericius*; quia vetus Scriptura secundum carna-
lem sensum in pulvere terrenarum cogitationum
jacet.

« Non est hoc aliud nisi gladius Gedeonis filii
Joas. » Joas, qui interpretatur sperans, antiquum
Dei populum designat, qui Salvatore ex se nasci-
turum sperabat. *Cumque noster Gedeon audisset, id
est suis audiri fecisset, somnium et interpretationem
ejus, admodum membra sua gaudio replevit, et ad
gratiarum actionem accendit. Divisitque trecentos vi-*

(79) Cod. G., exprimitur.

*ros, id est sanctos prædicatores in tres partes mun-
di, quæ sunt Asia, et Europa, et Africa. « Et dedit
tubas in manibus eorum, lagenasque vacuas, ac
Lampades in medio lagenarum. » In tubis desi-
gnatur clamor prædicationum; in lampadibus
claritas miraculorum; in lagenis fragilitas cor-
porum.*

« Ingressusque est Gedeon, et trecenti viri cum eo
in partem castrorum. » Quia cœpit Jesus in prædi-
catoribus suis partem infidelium aggredi; ut eos sa-
lubriter vincens, subjiceret sibi. *Incipientibus vigiliis
noctis mediæ, id est profundi erroris, et custodibus
suscitatis; quia sæculi principes cœperunt astutiores
errorum veterum custodes ponere contra novam
apostolorum prædicationem. Cœperunt buccinis clan-
gere, id est cœperunt prædicare. Et complodere in-
ter se lagenas, id est corpora sua in passione col-
lidere. Nam sonuerunt tubis, cum prædicarent;
confregerunt lagenas, dum solvenda in passione sua
corpora hostilibus gladiis opponerent.*

« Confractis vero lagenis, resplenduerunt lampa-
des, » et post solutionem corporum miraculis co-
ruscaverunt. Moxque hostes in fugam versi sunt;
quia dum mortuorum martyrum corpora miraculis
coruscare conspiciunt, luce veritatis fracti, quod
impugnaverant, crediderunt. Cecinerunt ergo tubis,
ut lagenæ frangerentur; lagenæ fractæ sunt ut lam-
pades apparerent; apparuerunt lampades, ut hostes
in fugam verterentur, id est prædicaverunt marty-
res, donec eorum corpora solverentur; corpora
eorum in morte soluta sunt, ut miraculis corusca-
rent; coruscaverunt miraculis, ut hostes suos ex
divina luce prosternerent, quatenus nequaquam
Deo erecti resisterent, sed eum subditi formida-
rent.

Et notandum quod steterunt ante lagenas, fugerunt
ante lampades; quia nimirum persecutores fidei
prædicatoribus adhuc in corpore positos restiterunt,
post solutionem vero corporum apparentibus mira-
culis in fugam versi sunt; quia pavore conter-
riti a persecutione fidelium cessaverunt. Præ-
dicationem scilicet tubarum fractis lagenis cor-
porum visis timuerunt lampadibus miraculo-
rum.

« Cumque per gyrum castrorum in tribus perso-
narent locis, » id est in Asia, Europa et Africa præ-
dicarent, « et hydrias confregissent, tenuerunt in
sinistris lampades, et in dextris sonantes tubas. »
Pro dextro habere dicimus, quidquid pro magno
pensamus; pro sinistro autem, quod pro nihilo du-
cimus. Bene igitur *in dextra tubas, et in sinistra la-
genas, sive lampades tenuerunt*; quia Christi marty-
res pro magno habent prædicationis gratiam, et cor-
porum utilitatem vel miraculorum gloriam pro
nihilo (80).

« Immisitque Dominus » divini verbi « gladium in
omnibus castris, et mutua se cæde truncabant, » id

(80) Cod. G., pro minimo.

est conversationem pristinam ad invicem in se perimebant, « fugientes usque Bethsetta, et crepidinem Abelmeola in Thæbath. » Bethsetta *domus spinæ* dicitur : Abelmeola *luctus parturientis*; Thabath *bona exceptio*. Et quæ est domus spinæ nisi mens quæ de peccatis suis compungitur? Quæ est ista parturiens nisi Ecclesia, quæ spirituales Deo filios parturire non cessat? Et quæ est crepido luctus parturientis hujus, nisi plaga lateris Christi? Inde enim causam sibi lugendi sumit Ecclesia. Fugerunt igitur usque Bethsetta, qui de sceleribus compuncti sunt agentes pœnitentiam. Et usque ad crepidinem luctus parturientis fugerunt, id est usque ad fidem Dominicæ passionis, unde luctus Ecclesiæ cœpit. Et fugerunt in Thabath, id est in bonam exceptionem. Conclamantes autem voce prædicationis viri Israel, id est fideles, qui Deum oculis fidei vident de Nephthalim, id est de latitudine charitatis vel amplitudine mundi, et de Aser, id est de gente beatorum, et de omni Manasse, id est de iis qui ea quæ retro sunt, obliviscuntur, persequebantur Madian celestibus armis instructi. Nephthalim quippe latitudo dicitur; Aser beatus; Manasses obliuosus vel oblitus.

« Misitque Gedeon nuntios in omnem montem Ephraim, » qui dicitur *ubertas*, id est Christus prædicatores in universum mundum. *Descendite*, inquit, in occursum Madian, id est humilitatem assumite, ut hostium superbiæ resistatis. *Et occupate aquas sapientiæ usque Bethbera*, id est usque in Ecclesiam, ubi puteus aquarum viventium est. Bethbera quippe *domus* dicitur. *Et usque ad Jordanem*, id est ad descensionem et humiliationem eorum. Interpretatur enim Jordanis *descensio eorum*, vel Baptismus appellatione Jordanis intelligi poterit.

« Apprehensosque duos viros Madian Oreb et Zeb interfecit. » Oreb interpretatur *Corvus*, Zeb *lupus*. Uterque autem et corvus et lupus cadavere pascitur. Sed lupus quidem rapit et occidit animalia, et carnibus eorum vescitur; corvus autem licet carnes comedat, occidere tamen non valet. Quid ergo per lupum nisi insatiabilis eorum rabies designatur, qui martyres interficiebant, et mortibus eorum pascebantur? Quid per corvum nisi illi, qui peccatis nigri morte quidem et cruciatibus justorum delectabantur, sed eos perimere non sufficiebant? Interpretatur etiam Oreb *foramen*. Et coluber ingredi foramen solet. Et quid per *foramen* nisi illi designantur, in quorum corde serpens antiquus ingredi et habitare consueverat.

Ephraim itaque *interfecit Oreb et Zeb*; quia conversi gentiles vel ad fidem converterunt, vel patientes superaverunt et eos, in quibus serpentina malitia hæbat; ut de pœnis justorum gauderent et eos, qui martyres ipsos peremerunt. Et Oreb quidem, id est in duritia sua. Zeb vero, id est reptator et devorator sanctorum; in *torculari Zeb*, id est in pressura, qua justos affligebant. In eo enim, quod a sanctis usque ad mortem sunt tolerati, dum se justos occi-

dere putarent, occisi sunt. Quorum *capita*, id est triumphum de illis martyres reportaverunt ad Gedeon, id est ad Christum, *trans fluenta Jordanis*, id est trans sacramenta baptismi, per quæ ad eum fit transitus. Bene itaque de gentilitate Deo dicitur; quia « jugum oneris ejus, et virgam humeri ejus, et sceptrum exactoris ejus superasti sicut in die Madian. » Et quia jam superatum sit exactoris ejus sceptrum, probatur, cum subditur :

VERS. 5. — « Quia omnis violenta prædatio cum tumultu et vestimento mistum sanguine erit in combustionem, et cibus ignis. »

Violentam enim *cum tumultu* prædam agere consueverat exactor improbus iste; quia semel humano generi nummum deceptionis contulerat, et ab hoc quotidie mortis debitum expetere non desistebat. Violentam *cum tumultu* prædationem agebat; quia, cum impetu et clamore effrenato irruens tempore mortis, animas violenter rapiebat. Sed jam hæc *violenta prædatio*, id est antiqui hostis importuna crudelitas, in æternam erit *combustionem*.

Vestimentum vero corpus nostrum est, quo induta est anima; sanguis autem peccata carnis sunt, de quibus dicitur: « Libera me de sanguinibus (Psal. l, 15). » *Vestimentum sanguine* miscetur, quando corpus desideriis carnalibus inquinatur. « Vestimentum ergo mistum sanguine erit cibus ignis; » quia caro luxuriantium gehennalibus mancipabitur incendiis. Sed cur hæc violenta prædatio, et vestimentum sanguine pollutum in combustionem erit? Quia jam in carne apparuit rex pacis et justitiæ, qui cunctis in se credentibus non solum animæ, sed et carnis munditiam tribuat.

VERS. 6. — « Parvulus natus est nobis, filius datus est nobis, et factus est principatus super humerum ejus. »

Hic est enim *parvulus* ille, qui « minoratus est paulo minus ab angelis (Hebr. ix), » qui « non venit ministrari, sed ministrare (Matth. xx, 28). » Reges autem sæculi non in humeris sed in capite portant insigne regium. Sed solus Rex noster gloriam potestatis suæ in humeris extulit. Unde et Isaac cum ad immolandum a patre duceretur, ligna sibi ipse portavit (Gen. xxii, 6), eximiam ejus patientiam designans crucem passionis suæ gestantis. Itaque *principatus ejus est super humerum ejus*; quia dum crucem propriis portaret humeris, vicit mundi principem, et in iis quos redemit principatum acquisivit. Sequitur :

« Et vocabitur nomen ejus Admirabilis, Consiliarius, Deus fortis, Pater futuri sæculi, Princeps pacis. » *Admirabilis consiliarius* est in omnibus, quæ per se ipsum in Evangelio docuisse legitur. *Deus fortis* in resurrectione cognitus est; quia virtute divina hostem antiquum prostravit et suam carnem resuscitavit. Separatim quoque legi possunt hæc nomina *Admirabilis* et *Consiliarius*, nec non *Deus atque fortis*. *Admirabilis* est enim, quia ipse est

« speciosus forma præ filiis hominum (*Psal. XLIV, A 5*), » « in quem desiderant angeli prospicere (*I Petr. 1, 12*). » *Consiliarius* est, quia dicit : « Ego sapientia habito in consilio, et meum est consilium (*Prov. VIII, 12*). » *Deus* est, ex substantia Patris, *Fortis* est, quia ipse est Dei virtus. Et, sicut Adam pater est præsentis sæculi et princeps discordiæ, quæ fuit inter nos et Deum, ita et Christus est *Pater futuri sæculi, et Princeps nostræ pacis* ad Deum. Nam « primus homo de terra terrenus, secundus homo de cælo cælestis. Qualis terrenus, tales et terreni, et qualis cælestis, tales et cælestes (*I Cor. XV, 47 et seqq.*). » Et : « sicut per unius delictum in omnes homines in condemnationem, ita et per unius justitiam in omnes homines in justificationem vitæ (*Rom. V, 18*). » Sequitur :

VERS. 7. — « Multiplicabitur ejus imperium, et pacis non erit finis. Super solium David, et super regnum ejus sedebit, et corroboret in judicium et justitiam amodo et usque in sempiternum. »

Multiplicabitur ejus imperium, « ut in nomine Jesu omne genu flectatur cælestium, terrestrium, et infernorum (*Philipp. II, 10*). » *Et pacis non erit finis*, quia nos in æternum pacificavit Deo per mortem suam. Et ubi fient hæc? *Super solium David, et super regnum ejus*; quia « dabit illi Dominus Deus sedem David Patris ejus, et regnabit in domo Jacob in æternum, et regni ejus non erit finis (*Luc. I, 32*). » *Solium* quippe *David* regia sedes est. *Regnum* vero juxta Dionysium est omnis finis, et ornatu legis, et ordinis distributio. Vel *solium David et regnum ejus* populus Dei est.

Ut confirmet, inquit, illud et corroboret; quia dum idem solium et regnum per evangelicam gratiam innovatum est, et de carnali factum spiritale, ita confirmatum est et corroboratum, ut sine fine perduret. Confirmabit autem illud in judicio et justitia; quia, sicut Salomon de eo dicit : « Rex, qui judicat in veritate pauperes, thronus ejus in æternum firmabitur (*Prov. XXIX, 14*). » Et : « Quoniam justitia firmatur solium (*Prov. XVI, 12*). » *Amodo*, id est ex quo factus est principatus super humerum ejus et usque in sempiternum. Sequitur :

« Zelus Domini exercituum faciet hoc. » Zelari D dicitur, qui cum cruciatu mentis castitatem custodit uxoris. Deus igitur quomodo zelatur, vel zelum habet, qui in custodienda castitate nostra nullo cruciatu mentis tangitur? Sed tamen quia castitatem animæ uniuscujusque custodit, humano modo zelans vocatur, quamvis cruciatu mentis non tangatur. Dionysius vero Areopagita dicit : « Omnium causarum bonorum omnium amore per excellentiam amarioris bonitatis fit in existentia omnia providentis, et bonitate, et dilectione et amore fovetur. Propter quod et zelotem eum divina sapientes appellant velut multum in existentia optimum amorem, et ut

suscitatorem eam ostendentem, et concupita zelantem, et provisus existentibus eum per semetipsam zelantibus. » Talis ergo zelus Domini faciet hoc, quod de incarnatione Christi, et regno supra dictum est. Sequitur :

VERS. 8. — « Verbum misit Dominus in Jacob, et cecidit in Israel. »

Jacob quidem *supplantator*, Israel vero *vir videns Deum* dici perhibetur. Et quid per *Jacob* nisi Judæus populus, quid per *Israel* nisi gentilitas designatur? Quia quem Judæa per carnis mortem supplantare studuit, hunc nimirum per oculos fidei gentilitas Deum vidit. *Verbum* igitur *ad Jacob* missum in *Israel* cecidit; quia eum, quem ad se venientem Judæus populus respuit, hunc repente confitens gentilis populus invenit. Sequitur :

VERS. 9. — « Et sciet omnis populus Ephraim, et inhabitantes Samariam in superbia et magnitudine cordis, dicentes »

VERS. 10. — « Lateres ceciderunt, sed quadris lapidibus ædificabimus : sycomoros succiderunt, sed cedros immutabimus. »

Ephraim vocabantur decem tribus, quæ derelicto templo Domini vitulos Jeroboam adorabant, et terra eorum dicebatur Samaria. Quid ergo per *Ephraim* et per *inhabitantes Samariam*, nisi gentilis populus designatur? *Sciet* itaque *populus omnis Ephraim, et inhabitantes Samariam*, id est universitas gentium, quia verbum quod in Jacob missum fuerat, cecidit in Israel. *Superbia* vero nonnunquam pro erectionis auctoritate ponitur, sicut Ecclesiæ Dominus ait : « Ponam te in superbiam sæculorum (*Isa. LX, 15*). » Et sapientia : « Mecum sunt, inquit, divitiæ et gloria, opes superbiæ et justitiæ (81) (*Prov. VIII, 18*). » Quia ergo populus gentilis, ad fidem conversus, non necessitate timoris adhuc astringendus erat ut olim Judæus, sed gratia libertatis relaxandus, quæ ei auctoritatem erectionis daret, recte in *superbia* locuturus asseritur, et non in pusillanimitate, sicut Judæi, sed in *magnitudine cordis*. Et quid loquetur?

« Lateres ceciderunt, » etc. Quid per *lateres* nisi luteus Judæorum populus exprimitur? Et quid per *quadros lapides* nisi sanctos accipimus quorum vita in prosperitate et adversitate novit fortiter stare? Lapis enim quadrus æque stat, in quocunque latere fuerit versus. Quisquis ergo prosperitate non extollitur, adversitate non frangitur, suasionibus ad mala non trahitur, vituperationibus a bono opere non revocatur. Lapis quadrus est, et quasi ex omni latere statum habet, qui casum in qualibet permutatione non habet. Cernens itaque propheta Judæorum populum a fide periisse, et apostolos in Ecclesia surgere, per quos multi erant ex gentibus in fidei et vitæ fortitudine solidandi, in magna consolatione locutus est voce gentilitatis, dicens : « Lateres ceciderunt, sed quadris lapidibus ædificabimus. »

(81) Alias, *oves superbiæ et just.*

Videns quippe in Ecclesia apostolos, martyres et doctores surgere de laterum casu, id est Judæorum perditione, minus doluit, quia Dei ædificium, id est sanctam Ecclesiam de *quadrīs lapidibus* ædificari conspexit.

Sycomorus autem, quæ est arbor foliis moro similis, sed altitudine præstans, *ficus fatua* dicitur. Cedrus vero miri odoris est, ac natura imputribilis, miræque celsitudinis. Quid ergo per sycomoros nisi *fatuitas* carnalium Judæorum exprimitur? Quid per *cedros* nisi sublimis et bene redolens vita sanctorum, quæ nulla jam terreni amoris putredine corrumpi potest? *Sycomoros* itaque, id est carnales Judæos *succiderunt* maligni spiritus, et a fidei statu deiecerunt. Sed Ecclesia *cedros immutavit*, id est viros spirituales et odoriferos loco eorum substituit. Sequitur :

VERS. 11. — « Et elevabit Dominus hostes Rasia super eum, inimicos ejus in tumultum vertet. »

Ex libro Regum cognovimus (*I Reg. xvi*), quod Theglathphalasar, rex Assyriorum, pecuniis ac precibus Achaz acquiescens, Damascum venerit, et Rasin, regem Syriæ, peremerit. Sequitur :

VERS. 12. — « Syriam ab oriente, et Philistiim ab occidente » subaudi elevabit Dominus, « et devorabunt (82) Israel toto ore. »

Multum enim antiquitus hæ duæ gentes populum Israel afflixerunt, et præcipue paulo ante tempus captivitatis decem tribuum, ut in diebus Achab et cæterorum tunc temporis, ac deinceps. Sequitur :

« In omnibus his non est aversus furor ejus, sed adhuc manus ejus extenta. » Quia illi non sunt conversi ab iniquitatibus suis propter mala, quæ passi sunt hactenus, nec Dominus aversus est a furore suo, sed adhuc tribulationes eorum augebit tradens eos in captivitatem. Sic enim subjungitur :

VERS. 13. — « Et populus non est reversus ad percipientem se, et Dominum exercituum non inquisierunt. »

VERS. 14. — « Et disperdet Dominus ab Israel caput et caudam, incurvantem, et refrenantem die una. »

Id est quando captivi ducentur in Medos. Quid vero sit *caput* vel *cauda*, exponit ipse propheta subdendo :

VERS. 15. — « Longævus et honorabilis ipse est caput; et propheta docens mendacium ipse est cauda. »

Quid vero per *incurvantem* exprimitur nisi doctor subditos sub disciplina humilians? Et quid per *refrenantem* nisi doctor quilibet? De falsis autem prophetis adhuc subditur :

VERS. 16. — « Et erunt, qui beatificant populum istum seducetes, et qui beatificantur, præcipitanti. »

Et quia omnes idcirco morti et captivitati sunt

A traditi, quoniam pseudoprophetae crediderunt, sequitur :

VERS. 17. — « Propter hoc super adolescentulig ejus non lætabitur Dominus, et pupillorum ejus et viduarum non miserebitur; quia omnis hypocrita est et nequam, et universum os locutum est stultitiam. »

Hypocritæ erant, quia populum Dei se esse simulant; et loquebantur *stultitiam*, quia laudabant idola et sanctos prophetas deridebant. Sequitur versus, qui sæpius interponitur :

« In omnibus his non est aversus furor ejus, sed adhuc manus ejus extenta. » Sed sciendum est quia Deus in se ipso nec furorem, nec iram habet. Irasci enim dicitur, qui fervore animi contra puniendum vitium accenditur. Deus ergo quomodo irascitur, qui in ulciscendis vitiis nostris nulla perturbatione animi commovetur? Sed qui culpas percussit, modo humanæ locutionis dicitur irasci, vel furorem habere, quamvis nulla animi perturbatione moveatur. Ita enim Deus irasci non potest, sicut nec mutari, ullatenus potest. Cujus et *manus extenta* dicitur, ut habitus in eo ferientis describeretur, licet ipse nullis membrorum lineamentis terminetur. Cur autem furor ejus non sit aversus ab eis, ostendit propheta subjungens :

VERS. 18. — « Succensa est enim quasi ignis impietas, veprem et spinam vorabit, et succendetur in densitate saltus, et convolvetur superbia fumi. »

Impietas idololatriæ et crudelitatis *succensa* est in regibus Israel, et vorabit veprem et spinam, id est eos, de quibus in carmine David dicitur : « Prævaricatores autem quasi spinæ evellentur (*II Reg. xxiii, 6*) » universi. Et succendetur ignis impietatis in densitate saltus, ut totum Israel devoret. Sed cum impietas vocetur ignis, quis est iste fumus de hoc igne procedens nisi doctrina impietatis? Et *superbia fumi* superbia perversæ doctrinæ est. Convolvitur igitur in densitate saltus *superbia fumi* dum in multitudine populi Israel arrogantia idololatriæ implicatur, ut jam ab ea populus ille expediri nequeat, in qua totus est involutus. Sequitur :

VERS. 19. — « In ira Domini exercituum conturbata est terra, et erit populus quasi esca ignis. »

Terra Israel conturbata est in ira Domini. Et quia impietas ignis est, populus quasi esca ignis efficitur; quoniam ab impietate malorum principum affligitur, et unusquisque proximum lædit. Nam sequitur : « Vir fratri suo non parcat. »

VERS. 20. — « Et declinabit ad dextram et esuriet, et comedet ad sinistram et non saturabitur. »

Declinabit ad dexteram, ut adversetur bonis; et ad lævam, ut noceat malis. Sequitur :

« Unusquisque carnem brachii sui vorabit. Quid per brachium nisi proximus quilibet necessarius, in quo fortitudinem quisque habeat, et per quem suas

actiones impleat (83), designatur? *Carnem ergo brachii sui vorat*, qui substantiam proximi et amici sui rapit. Quod quia non solum vir in virum sed etiam tribus in tribum agebat, sequitur :

Vers. 21. — « Mauasses Ephraim, et Ephraim Madassen » subaudi vorabit : « simul ipsi contra Judam. »

Sic conturbata est terra in ira Domini. Post hæc de iis, qui leges iniquas in populo Israel promulga-verunt, agitur, et captivitas eis debita promittitur. « Væ, inquit, qui conduunt leges iniquas, etc. (Isa. x, 1). » Demum multa de rege Assyriorum dicuntur, quæ nunc historialiter tractare omitimus. Sed quia Spiritus prophetiæ in eisdem verbis diversa complecti solet, videamus si juxta superiorem sensum hæc intelligi possint.

« Et levabit, inquit, Dominus hostes Rasin super eum. » Quia Rasin rex Syriæ fuit, et per Syriam intelligimus gentilitatem, quid per *Rasin* nisi principes reliquiarum gentilitatis, quæ credere noluerunt, designatur? Super quos elevantur hostes sui sicut Joannes ait : « Væ terræ et mari, quia descendit diabolus ad vos habens iram magnam (Apoc. xii, 12). » Sequitur :

« Syriam ab oriente, et Philistiim ab occidente, et devorabunt Israel toto ore. » Syria *sublimis* interpretatur ; Philistiim *ruina duplex* vel *ceciderunt duo*. Et quid per *Syriam* nisi sublimis angelorum natura figuratur in excelsis creata? Quid per *Philistiim* nisi genus humanum, quod a paradisi felicitate depulsum est quasi in occidentem, id est in hanc vallem lacrymarum, ubi, deficiente luce, nox et abysus interminabilis damnationis invenitur? Nam quod Philistiim dicitur : *ceciderunt duo*, in ipsis apparet protoplastis, qui duo peccaverunt, et a paradisi amœnitate expulsi sunt (84), atque corporis et animæ ruinam perpassi sunt.

« Elevat ergo Dominus Syriam ab oriente, et Philistiim ab occidente, ut devoret Israel toto ore ; » quia divino judicio et maligni spiritus ab origine in principio vitiatum Judaicum populum superant, et homines de præsentis sæculo a passione et occasu Salvatoris persequuntur eum. Nec videatur absurdum, quod *Rasin*, et *Israel* atque *Ephraim* et cætera nomina sub diversis significationibus accipimus. Magna enim legentium discretio esse debet, ut in sacro eloquio, cum quilibet sermo unus dicitur, non semper unam eandemque rem significare credatur sed varie pro locorum diversitate, prout oportuerit, accipiatur. Sequitur :

« In omnibus his non est aversus furor ejus, sed adhuc manus ejus extenta. » Dum Vespasianus regiones Judææ vastaret, noluit Dominus propitiari, quia illi noluerunt converti. Nam sequitur : « Et populus non est reversus ad percipientem se, et Dominum exercituum non inquisierunt, » id est Christum.

« Et disperdet Dominus ab Israel caput et caudam, incurvantem et refrenantem in die una, » id est Titus, quando Jerusalem cepit. In ipsa autem obsidione, Joannes et Simon cæterique Judæorum principes populum suis adulationibus perniciose decipiebant, asserentes nihil esse Deo gratius quam pro libertate pugnare, de quibus additur : « Et erunt, qui beatificant populum istum, seducentes, et qui beatificantur, præcipitati. » Et quia omnis sexus, et omnis ætas deperiit, apte subjungitur :

Propter hoc super adolescentulis ejus non lætabitur Dominus, et pupillorum illius, et viduarum non miserebitur. » Et causa eorum adhuc subditur : « Quia omnis hypocrita est et nequam, et universum os locutum est stultitiam. » Omnis populus erat hypocrita utpote corruptus « fermento Phariseorum quod est hypocrosis (Matth. xvi, 6). » « Et universum os eorum locutum est stultitiam, » cum dicerent : « Tolle hunc, et dimitte nobis Barrabam (Luc. xxiii, 18). » Et « nos legem habemus, et secundum legem debet mori, quia Filium Dei se fecit (Joan. xix, 7). » Et : « Sanguis ejus super nos, et super filios nostros (Matth. xxvii, 25). » Sequitur : « In omnibus his non est aversus furor ejus, sed adhuc manus ejus extenta. » Et cur ad feriendum adhuc *manus ejus extenta* sit subjungitur :

« Succensa est enim quasi ignis impietas, veprem et spinam vorabit. » *Impietas* principum Judæorum *succensa est ut ignis* adversus apostolos resurrectionem Domini constanter prædicantes. *Veprem et spinam vorabit*, id est Judaicum populum eadem impietas inflammabit in apostolos. De qualibus spinis et vepribus dicitur : « Sicut liliam inter spinas, sic amica mea inter filias (Cant. ii, 2). » — « Et succendetur, inquit, in densitate saltus, » id est in agresti populo gentilium eadem invidiæ flamma adversus Christianos exardescet. « Et convolvetur superbia fumi ; » quia omnes principes gentium in hoc conspiraverunt, ut veterem errorem idololatriæ defenderent, et novam doctrinam Christianæ prædicationem unanimiter impugnant. Et quia totus mundus contra Christianos est commotus, recte subjungitur :

« In ira Domini exercituum commota est terra, et erit populus quasi esca ignis. » Ignis enim persecutionis populum sanctorum vorabit. Unde eis Dominus ait : « Tunc tradent vos in tribulationem et occident vos, et eritis odio omnibus gentibus propter nomen meum. Et tunc scandalizabuntur multi, et invicem tradent, et odio habebunt invicem, et multi pseudoprophetæ surgent, et seducent multos (Matth. xxiv, 9-11). » Similiter et hic sequitur : « Vir fratri suo non parcat. Et declinabit ad dextram et esuriet : et comedet ad sinistram et non saturabitur, » etc. « Vir fratri suo non parcat. — Tradet enim frater fratrem in mortem (Matth. x, 21). » Et *declinabit ad dextram* adversus justos, et *esuriet* pœnam eorum ; et

(83) Cod. hic : *actiones habent.*

(84) Cod. G. *Amœnitate ceciderunt.*

comedet ad sinistram peccatores, et non saturabitur afflictione eorum. Per brachium vero jam intelleximus amicum necessarium, in quo quis fortitudinem habeat, et per quem actiones suas impleat. *Carnem ergo brachii sui vorat*, qui corpus amici perimit aut cruciat.

Quid vero per *Manassen*, qui dicitur *obliviosus*, nisi gentilis populus designatur, qui Creatorem suum oblitus creaturam adoravit? Et quid per *Ephraim*, qui interpretatur *ubertas*, et derelicto templo Dei serviebat idolis, nisi multitudo hæreticorum exprimitur? Et quid per *Judam* nisi Catholicorum populus figuratur? *Vorabit igitur Manasses Ephraim, et Ephraim Manassen*; quia et gentiles persequebantur hæreticos æstimantes esse Christianos, et hæretici, quos poterant ex gentibus, ad suam sectam velut ad religionem convertiebant; rursusque *simul ipsi*, id est gentiles et hæretici *contra Judam*, id est contra Ecclesiam sæviebant. Sed postquam hæc completa sunt, nondum persecutiones quieverunt, nam sequitur: « In omnibus his non est aversus furor ejus, sed adhuc manus ejus extenta. » Nam de principibus impiis, qui tunc leges iniquas contra Christianos dederunt, subjungitur:

CAPUT X.

VERS. 1. — « Væ qui condunt leges iniquas, et scribentes injustitiam scripserunt! »

VERS. 2. — « Ut opprimerent in judicio pauperes, et vim facerent causæ humilium populi mei, ut essent viduæ præda eorum, et pupillos diriperent. »

Postquam enim martyres injusto judicio condemnaverant, aut peremerant, diripiebant bona eorum, nihil uxoribus ac filiis eorum relinquentes. Quos de die futuri examinis, in quo reddetur unicuique secundum opus suum, propheta terrere volens, subjicit:

VERS. 3. — « Quid facietis in die visitationis et calamitatis de longe venientis? »

Nam illa discussio sæpe in Scripturis appellatur *visitatio*: « Visitabo, inquit, super orbis mala, et contra impios iniquitatem eorum (*Isa. XIII, 11*); quia dies iræ dies illa, dies calamitatis et miseriæ (*Sophon. I, 15*). » Quæ calamitas de longe venire dicitur juxta illud: « Ecce nomen Domini venit de longinquo; ardens furor ejus et gravis ad portandum (*Isa. XXX, 27*). » De cujus adhuc diei districtione additur:

« Ad cujus fugietis auxilium, et ubi derelinquetis gloriam vestram, ne incurvemini sub vinculo, et cum interfectis cadatis? » Neque enim reges et tyranni tunc auxilium vel effugium invenient, sed sub vinculo perpetuæ mortis curvabuntur cum cæteris, quos Dominus interficiet spiritu oris sui, dicens: « Ite, maledicti, in ignem æternum (*Matth. XXV, 41*). » Sequitur:

(85) Alias: *existimabit*.

VERS. 4. — « Super omnibus his non est aversus furor ejus, sed adhuc manus ejus extenta. »

Adhuc enim tribulationes manent, adhuc mala crebrescunt. Vel ab impiis non est aversus furor ejus, postquam eos gehennæ tradidit, sed adhuc manus ejus est super eos, ut absque ullo fine vel termino puniantur. Sequitur:

VERS. 5. — « Væ Assur! virga furoris mei et baculus ipse est, in manu eorum indignatio mea. »

Assur, qui *coarguens* vel *convincens* interpretatur, hostis antiquus est, qui eos in examine futuri judicii convincet et coarguet, qui nunc suggestionibus ejus consentiunt. Et iste *Assur virga* vel *baculus furoris Dei* est; quoniam ipso feriuntur hi, quibus irascitur Deus. Et ipse est in manu principum sæculi, qui per eum mala faciunt, et est idem indignatio Dei. Nam quia per se ipsum *Satanas* nihil agere potest, recte *virga Dei* vocatur, quem Dominus in manu eorum quodammodo ponit vel dimittit, qui per eum iram Dei faciunt. Sequitur:

VERS. 6. — « Ad gentem fallacem mittam eum, et contra populum furoris mei mandabo illi, ut auferat spolia, et diripiat prædam, et ponat illum in conculcationem quasi lutum platearum. »

VERS. 7. — « Ipse autem non sic arbitrabitur, et cor ejus non ita æstimabit (85), sed ad conterendum erit cor ejus, et ad interneccionem gentium non paucarum. »

Quid nunc *gentem fallacem* vel *populum furoris sui* nominat nisi plebem Judaicam? Ad quam misit hunc hostem; quia relaxavit eum adversus eam, ut auferret ab ea virtutum spolia, et prædam animarum diriperet, et poneret hunc populum in conculcationem ut lutum platearum, ut ex toto lutum fieret ut olim in *Ægypto*, et ab immundis spiritibus conculcicaretur in operibus carnis late jacens. *Ipsæ autem* *Satanas non sic* arbitratus est, id est quod eum Dominus ad Judæos miserit, et a cæteris gentibus prohibuerit. Sed ad conterendum multos est adhuc cor ejus, et maligna cogitatio; quia non paucas gentes extinguere adhuc nititur. Unde sequitur:

VERS. 8. — « Dicit enim: Nunquid non principes mei simul reges sunt? »

VERS. 9. — « Nunquid non ut Carcanus (86) sic Galano, et ut Arphad sic Emath? Nunquid non ut Damascus sic Samaria? »

VERS. 10. — « Quomodo invenit manus mea regna idoli, sic et simulacra eorum de Jerusalem et Samaria. »

VERS. 11. — « Nunquid non sicut feci Samariæ et idolis ejus, sic faciam Jerusalem et simulacris ejus? »

Hoc post apostolorum tempora loquitur hostis antiquus. Dicit autem Paulus: Quia non est nobis colluctatio adversus carnem et sanguinem (*Ephes. VI, 12*), id est adversus ullum hominem, sed adversus principes et potestates, adversus mundi

(86) Alias: *Charcamis*.

rectores tenebrarum harum (*ibid.*), id est malorum et infidelium hominum. Hos ergo principes suos, id est malignos spiritus Satan jactat esse reges, quia sunt rectores mundi tenebrarum harum.

Carcanus vero civitas est juxta Euphraten, ubi Nabuchodonosor percussit exercitum Pharaonis (*Jerem. XLVI, 2*). *Calano* autem interpretatur omnes nos. Præsumit igitur improbus hostis, quia sicut in Carcanus prævaluit rex Babylonis superans multitudinem Ægyptiorum, in typo ejusdem antiqui hostis multitudinem sæcularium superantis; sic prævalebit Calano, id est in omnibus nobis.

Arphad dicitur sanatus, et Emath indignatio. Et ille malesanus est, qui jam dicere negligit: « Miserere mei, Domine, quoniam infirmus sum (*Psal. vi, 3*). » In multa vero sapientia, multa est indignatio (*Eccle. i, 18*). Dicit ergo impudens adversarius, quia sicut Arphad, id est negligens quisque, qui sanum se putat, sic erit et Emath, id est mens eorum, qui de transitoriis indignantes ad æterna festinant.

Damascus vero vel sanguinem bibens, vel sanguinis populum interpretatur, *Samaria* autem custodia eorum. Et cogitat hostis, quia, sicut sanguinis poculum, id est homicidii peccatum, sic erit custodia eorum, id est, quidquid illi secundum custodiam mandatorum Dei facere videntur, qui in reatu effusionis sanguinis non tenentur.

« Quomodo, inquit, invenit manus mea regna idoli, id est omnes gentes: « sic et simulacra eorum de Jerusalem, » etc. *Jerusalem* intelligimus *Ecclesiam*. Et plerique nuncupantur *Ecclesie* filii, in quibus scimus esse avaritiam, « quæ est idolorum servitus (*Ephes. v, 5*). » Hæc sunt simulacra eorum de Jerusalem, id est eorum de Ecclesia. Quid vero nunc *Samaria* nisi impiam hæreticorum Ecclesiam designat? Cujus simulacra sunt omnes hæreticorum adinventiones et doctrine. Præsumit itaque seductor antiquus, quia sicut gentes sibi subjecit, sic per avaritiam Catholicos superare possit, et per falsa dogmata hæreticos. Rursusque addit:

« Nunquid non sicut feci Samariæ, id est dogmatibus ejus, sic faciam Jerusalem, id est Ecclesie, et simulacris ejus, id est avaritiæ et adinventionibus ejus falsis? Quia sicut hæreticos a Deo separavit, et suæ damnationi sociavit, sic et Christianos adhuc decipere se posse præsumit. Tales sunt hostis nostri cogitationes, contra quos oportet nos sollicite semper cogitare, quia nequaquam talia cogitare nisi et ex parte ea nonnunquam faceret. Sequitur:

VERS. 12. — « Et erit, cum impleverit Dominus cuncta opera sua in monte Sion et in Jerusalem, visitabo super fructum magnifici cordis regis Assur, et super gloriam altitudinis oculorum ejus. »

*Cuncta opera sua Dominus in monte Sion impleverat, cum in loco Calvarie crucifixus diceret: « Consummatum est (*Joan. xix, 30*). » Et post cœnam Patri locutus est: « Ego te clarificavi super*

A terram, opus consummavi, quod dedisti mihi ut faciam (*Joan. xvii, 4*). » Atque tunc visitavit super fructum magnifici cordis regis Assur, quia per mortem destruxit eum, qui habebat mortis imperium, id est diabolus. Magnificum cor ejus dicitur, quia talia facere cogitat. Fructus cordis ejus opus est quod ex hujusmodi cogitationibus procedit. Qui et oculorum habet altitudinem, quia cunctos velut in imo respicit, dum se super omnes superbe extollit. Vel in monte Sion, et Jerusalem, id est Ecclesia tunc impleta erunt cuncta opera Salvatoris, cum in fine sæculi completus fuerit omnis electorum numerus, et opera eorum consummata. Qui tunc visitabit super fructum regis Assur, quia malitiam ejus puniens præcipitabit eum, cunctis videntibus, in ignem æternum. Sed adhuc ante Redemptoris adventum, quid iste cogitaverit, subditur:

VERS. 13. — « Dixit enim: In fortitudine manus meæ feci, et in sapientia mea intellexi, et abstuli terminos populorum, et principes eorum deprædatus sum, et detraxi quasi potens in sublime residentes. »

VERS. 14. — « Et invenit quasi nidum manus mea fortitudinem populorum, et sicut colliguntur ova, quæ derelicta sunt; sic universam terram ego congregavi; et non fuit qui moveret penam, et aperiret os, et ganniret. »

Dixit hostis antiquus: in fortitudine manus meæ feci; quia nemo sibi resistere valebat, sed omnes ubique vincebat, postquam primum hominem sibi subjugaverat. Nemo quippe eum nisi per Christi gratiam superat. Et dum primos parentes deciperet, male sapiens fuit; quia « serpens callidior erat cunctis animantibus terræ (*Genes. iii, 1*). » Nam genus humanum callida fraude seduxit.

Quid vero terminos populorum nisi naturalem legem appellat; videamus hos terminos. « Quod tibi non vis fieri, alii ne feceris. Et prout vultis ut faciant vobis homines, et vos facite illis similiter (*Luc. vi, 31*). » Isti sunt termini, quos unicuique ratio naturaliter posuerat. Sed eos hostis antiquus abstulit; ut per omnes iniquitatis vias humanum genus passim incederet, et principes eorum deprædatus est, ac residentes in sublimi arce sanctitatis detraxit, ut Balaam et Salomonem et cæteros hujusmodi.

« Et manus ejus invenit quasi nidum fortitudinem populorum; » quoniam actio ejus requiem in illis invenerat, qui pro defensione idolorum vel errorum pugnabant. Ovis autem derelictis universam terram, id est omnes habitatores terræ, comparat; quia Creator universas gentes ob iniquitates eorum deseruerat, et hostis ad se congregavit eas in unionem suæ malitiæ. Nam velut aliena ova genus humanum diabolus, quod non creaverat, occupaverat, et quod non genuerat, mentito patris nomine possidebat, nec confovebat mi-

serandam sobolem, sed premebat, et sub pondere A
servitutis captivam tenebat.

« Et non erat qui moveret pennam, et aperiret os, et ganniret. » Quia nondum ille venerat, qui se similavit gallinæ, dicens ad Jerusalem: « Quoties volui congregare filios tuos, quemadmodum gallina congregat pullos suos sub alas, et noluisti? » (*Matth. xiii, 37.*) Nulla enim alia avis sic mater cognoscitur ut gallina, quæ sic in pullis suis infirmatur, ut sit alis submissis, plumis hispida, voce rauca, omnibus membris demissa et abjecta, ut etiamsi ipsi pulli non sequantur, filios non videas, matrem tamen intelligas. Sic ergo pro nobis infirmatus est Jesus, ut nos velut ova seu pullos foveret et protegeret, ac nutriret. Qui protegens more pullorum infirmos adhuc discipulos B quasi pennam movit, et aperuit os, et gannit, dicens persecutoribus: « Ego sum. Si ergo me queritis, sinite hos abire (*Joan. xviii, 15.*) » Ubi Evangelista subjecit: « Ut impleretur sermo quem dixit: quia quos dedisti mihi, non perdi ex ipsis quemquam (*ibid. 9.*) » Bene itaque pullos protegens movit pennam, et aperuit os, et gannit velut gallina contra raptorem; quia ne quemquam ex ipsis perderet, solus teneri voluit. Movit ergo pennam, fideles suos quasi sub alis protegens; aperuit os, contradicens antiquo prædoni; gannit, quia ipse infirmitates nostras accepit et agrotationes portavit. Sed antequam ille venisset, communis adversarius ea quæ dicta sunt cogitans, gloriabatur. Unde contra stultitiam ejus propheta C subjungit:

Vers. 15. — « Nunquid gloriabitur securis contra eum, qui secat in ea? Aut (87) elevabitur serra contra eum, a quo trahitur? Quomodo si elevetur virga contra elevantem se, et exaltetur baculus, qui utique lignum est. »

Sicut enim securis aut serra sive baculus per se nil secare aut ferire valet; sic et diabolus per se nihil agere potest, sed est quasi virga vel securis in manu Dei; et quod ipse contra Deum idcirco superbit, quoniam adversus multos prævalet, tale est ac si securis vel serra sive baculus aut virga contra eum, qui percutit, ex ea superbiat. Sequitur:

Vers. 16. — « Propter hoc mittet dominator Dominus exercituum in pinguibus ejus tenuitatem, et subtus gloriam ejus succensa ardebit quasi combustio ignis. »

Propter hoc, quia contra Deum exaltatus est, quasi sine illo posset aliquid. Sed qui sunt pingues ejus nisi sacerdotes idolorum mundanis divitiis et honoribus redundantes, aut quilibet superbi divites? In his ergo pinguibus inmittetur tenuitas; quia sacerdotes idolorum ab omni jam seculo contemnantur; et superbi nonnunquam amittunt divitias, ut humilientur:

« Et subtus gloriam ejus ardebit, quasi combustio ignis. » Quia consumetur intrinsecus igne malitiæ suæ, cum eos, quos possidebat, amiserit, licet extrinsecus gloriatur, et se principem sæculi jactet, ut cum tentaret Dominum, dicens: « Tibi dabo potestatem hanc universam, et gloriam eorum, quia mihi tradita sunt, et cui voluero, do illa (*Luc. iv, 6.*) » Vel: « Subtus gloriam ejus quasi combustio ignis ardebit; » quia, qui foris gloriatur Satanæ, et angeli ejus ubicunque vel in aere volitent, vel in terris vel sub terris vagentur, sive detineantur, suarum semper secum ferunt tormenta flammæ instar fabricantis, qui, etsi in lectis eburneis et in locis ponatur apricus, fervorem tamen vel frigus insiti sui languoris evitare non potest. Sic ergo dæmones, etsi in templis colantur auratis et per aera discurrant, igne semper ardent gehennali, et ex ipsa pœna sua sunt commoti: deceptis quoque hominibus fomitem vitiorum, unde et ipsi pereant, invidendø suggerunt.

Vers. 17. — « Et erit lumen Israel in igne, et Sanctus ejus in flamma, et succendetur, et devorabitur spina et vepres in die una. »

Sanctus Pater Ambrosius (*lib. 1 De Spiritu sancto. cap. 14*): « Isaias, inquit, significat non solum lumen, sed etiam Spiritum sanctum ignem esse, dicens: Et erit lux Israel in igne. » Et addidit: « Itaque prophetat tum in igne ardenti, quia in istis tribus generibus propensius majestatem divinitatis advertimus, quoniam et sanctificare Divinitatis, et illuminare ignis et lucis est proprium, et in specie ignis exprimi vel videri diviniæ est consuetudinis. Deus enim ignis consumens est, sicut Moyses dixit (*ibid.*). » Fuit ergo lumen Israel in igne, quia Spiritus in igneis linguis apparuit (*Act. 11, 3*).

Et Sanctus ejus in flamma, quia Salvator passionem sustinuit. Vel, erit in flamma, quia veniet « in flamma ignis (*II Thes. 1, 8*) » reddere singulis secundum opera eorum. Et succendetur ignis Spiritus sancti in cordibus humanis, et devorabitur spina, id est originale peccatum. Et vepres, id est vitiorum asperitates, in die una, id est in tempore gratiæ, vel in die passionis Christi. Sequitur:

D Vers. 18. — « Et gloria salus ejus et Carmeli ejus ab anima usque ad carnem consumetur, et erit terrore profugus. »

Vers. 19. — « Et reliquiæ ligni saltus ejus præ paucitate numerabuntur, et puer scribet eos. »

Quid per saltum nisi gentilitas designatur? Et quid per Carmelum, qui dicitur *cognitio circumcissionis*, nisi populus Judæorum carnaliter circumciscus? Et quid est gloria Satanæ in hoc saltu vel carmelo nisi peccatum? Sed hæc gloria consumitur ab anima usque ad carnem, quia per Christi gratiam remittuntur tam animæ quam carnis peccata. Et primo quidem saltus, deinde Carmeli gloria consu-

(87) Alias exaltabitur.

mitur, quia gentilitas prius quam Judæa, gratiam A « Diliges Dominum Deum tuum ex toto corde tuo, et proximum tuum sicut te ipsum (*Matth.* xxii, 37), » subiecit : « In his duobus mandatis universa lex pendet et prophetæ (*ibid.*). » Hæc est brevis consummatio, quæ justitiam affluenter inundat. Itaque prophetata conversione Israelitarum, consolationem interim subjungit. Nam sequitur :

*Reliquiæ autem ligni saltus ejus sunt reliquiæ gentilitatis, quæ fidem recipere noluerunt. Sed jam præ paucitate numerari possunt, quia raro invenitur quis, qui Christianus non sit. Quis vero puer est, scribit eos, nisi de quo supradictum est : « Puer natus est nobis, et filius datus est nobis? » Scribit enim in libro vitæ eos qui credunt, sicut locutus est eis : « Gaudete et exsultate, quia nomina vestrâ scripta sunt in cælis (*Luc.* x, 20). »*

VERS. 20. — « Et erit in die illa, non adjiciet residuum Israel, et hi, qui fugerunt de domo Jacob, inniti super eum qui percutit eos, sed innitetur super Dominum Sanctum Israel in veritate. » B

Hoc de illis dictum est Judæis, qui crediderunt prædicantibus apostolis. Nam *residuum Israel* est, de quo Paulus ait : « In hoc tempore reliquiæ secundum electionem gratiæ salvæ factæ sunt (*Rom.* xi, 5). » Et illi *fugerunt de domo Jacob*, id est de Synagoga, qui tandem intelligentes hunc esse Christum, quem crucifixerunt, « compuncti sunt corde, et dixerunt ad apostolos : Quid faciemus, viri fratres? » (*Act.* ii, 37.) Jam enim quærebant effugium. Nec innisi sunt ultra super eum, qui percutiebat eos, id est super hostem antiquum, qui persequabatur illos et vherabat animas eorum; sed innisi sunt super fundamentum, quod est Christus, perseverantes in doctrina apostolorum. Potest hoc etiam de illis intelligi qui, prædicante Elia credituri sunt. Nam « cæcitas ex parte contingit in Israel, donec plenitudo gentium intraret et sic omnis Israel salvus fieret (*Rom.* xi, 15). » Sed sive de illis qui tempore apostolorum crediderunt, sive de illis qui in fine credituri sunt accipiat, evidens est quod subditur :

VERS. 21. — « In veritate reliquiæ convertentur, reliquiæ, inquam, Jacob ad Deum fortem. »

VERS. 22. — « Si enim fuerit populus tuus Israel quasi arena maris, reliquiæ convertentur ex eo. »

Et quia in Christo perfectam secuti sunt justitiam, qui in lege non poterant justificari, pulchre subjungitur : « Consummatio abbreviata inuudabit justitiam. » — « Omnis enim lex, sicut Paulus ait, in uno sermone impletur : Diliges proximum tuum sicut te ipsum (*Galat.* iv, 14). » Sequitur :

VERS. 23. — « Consummationem enim et abbreviationem Dominus Deus exercituum faciet in medio omnis terræ. »

Dominus, cum per se ipsum doceret in terra Judæorum, qui est *medium universæ terræ*, fecit *consummationem et abbreviationem*, dicens : « Omnia quæcunque vultis ut faciant vobis homines bona, ita et vos facite illis : hæc est enim lex et prophetæ (*Matth.* vii, 12). » Rursumque cum dixisset :

« Diliges Dominum Deum tuum ex toto corde tuo, et proximum tuum sicut te ipsum (*Matth.* xxii, 37), » subiecit : « In his duobus mandatis universa lex pendet et prophetæ (*ibid.*). » Hæc est brevis consummatio, quæ justitiam affluenter inundat. Itaque prophetata conversione Israelitarum, consolationem interim subjungit. Nam sequitur :

VERS. 24. — « Propter hoc hæc dicit Dominus Deus exercituum : Noli timere, populus meus, habitator Sion, ab Assur. »

Id est, noli timere hostem antiquum, tu plebs Hebræa, quæ Salvatoris exspectas adventum. Sequitur : « In virga percutiet te, et baculum suum levabit super te in via Ægypti. » Dum in Sion, id est in fide Domini adventus, permanseris, non tanget te. Sed si cæperis in Ægyptum ire, id est in tenebras infidelitatis, mox *in virga percutiet te*, id est persecutionem tibi ex perverso opere movebit. Cur autem dixerit : *Noli timere ab Assur*, manifestat subdendo :

VERS. 25. — « Adhuc enim paululum modicumque, et consummabitur indignatio et furor meus super scelus eorum. »

Quia, sicut de tempore gratiæ per Jeremiam dicitur : « Propitius ero iniquitatibus eorum, et peccata eorum jam non memorabor (*Jerem.* xxxvi, 5). » Quod de illis specialiter accipitur, qui compuncti sunt ad prædicationem Petri, quorum maximum scelus fuerat mors Salvatoris. Sed et *super hoc scelus eorum consummata est indignatio ejus*, quia et hoc peccatum dimisit illis. Sequitur :

VERS. 26. — « Et suscitabit super eum Dominus exercituum flagellum juxta plagam Madian in petra Oreb, et virgam suam super mare, et levabit eam in via Ægypti. »

De plaga *Madian in petra Oreb*, quæ sub Gedeone facta est, non est necesse nunc dicere. Quomodo autem *super mare Dominus virgam suam levaverit* agnoscitur, ubi locutus est Moysi : « Eleva virgam tuam, et extende manum tuam super mare, et divide illud, ut gradientur filii Israel in medio mari per siccum. Ego autem indurabo cor Ægyptiorum, ut persequantur vos, et glorificabor in Pharaone, et in omni exercitu ejus (*Exod.* xiv, 16). » Et item : « Extende manum tuam super mare, ut revertantur aquæ ad Ægyptios super currus et equites eorum (*ibid.* xxvi). » *Mare* autem baptismum significat; *virga* crucem Domini vel doctrinam ejus; *submersio* Ægyptiorum abolitionem peccatorum.

« Et levabit eam in via Ægypti. » Sicut olim quando Moyses ivit in Ægyptum « portans virgam Dei in manu sua (*Exod.* iv, 20); » sic etiam Christus per apostolos venit ad gentes, cui canitur : « Virga directionis virga regni tui (*Psal.* xlii, 7). » Vel quia diabolus virgam suam et baculum levat adversum nos in *via Ægypti* sicut olim, ut virtutes feriat, Christus econtrario benignam extendit virgam disciplinæ in *via Ægypti*, ut vitia corrigat. Sequitur :

VERS. 27. — « Et erit in die illa : Auferetur onus a persequutionem gentilium persecutio facta est hæreticorum, recte subjungitur :

Onus et jugum ejus a collo mentis nostræ Dominus abstulit, quia nos ab illa dæmoniæ tyrannidis servitute, qua graviter deprimebamur, liberavit, dicens : « Venite ad me omnes, qui laboratis et onerati estis, et ego reficiam vos. Tollite jugum meum super vos, et discite a me quia mitis sum et humilis corde, et invenietis requiem animabus vestris. Jugum enim meum suave est, et onus meum leve (*Matth. xi, 28-30*). » Nam contra jugum asperum inimici posuit in nobis jugum suave, et contra onus grave dedit nobis onus leve.

« Et computrescet, inquit, jugum a facie olei. » Sub jugo quippe, ut dictum est, tenebamur dæmoniæ servitutis. Sed uncti sumus oleo Spiritus sancti. Et quia nos unxit gratia libertatis, dæmoniæ damnationis *jugum* computruit, Paulo attestante, qui ait : Ubi Spiritus Domini, ibi libertas (*II Cor. iii, 17*). » Sequitur :

VERS. 28. — « Veniet in Aiath, transibit in Magron, apud Machmas commendabit vasa sua. »

VERS. 29. — « Transierunt cursim, Gabea (88) sedes nostra obstupuit Rama, Gabaath Saulis fugit. »

VERS. 30. — « Hinni voce tua filia Gallin, attende Laisa, paupercula Anathoth. »

VERS. 31. — « Migravit medemena, habitatores Gabim confortamini. »

VERS. 32. — « Adhuc dies est ut in Nobe stetur, agitabit manum suam super montem filiæ Sion, collem Jerusalem. »

Aiath dicitur *condemnatio*, Magron *guttur*. Veniet igitur in Aiath, id est in condemnationem, quia « Princeps mundi hujus judicatus est (*Joan. xvi, 11*). » Transibit in Magron, id est in guttur, id est quia damnato ejus dominio cultores idolorum jam non audentes errorem publice prædicare, docebunt occulte superstitiones suas. Machmas autem *vile tributum* interpretatur. Vasa vero Satanz sunt homines reprobi, de quibus ait Apostolus, quia « Deus sustinuit in multa patientia vasa iræ apta in interitum (*Rom. ix, 22*). »

Commendat ergo *vasa sua* apud vile tributum, quia semper iniqui manent in tributo flagitiosæ actionis, quod ei reddere non desistunt. Sed tamen eadem vasa ejus præcipua *transierunt cursim*, quoniam reliquias infidelium cursus vitæ temporalis per mortem citius abstulit. Quibus ablatis Gabea, id est *colles facti* sunt sedes nostra, illi scilicet colles, de quibus ait Jacob : « Donec veniret desiderium collium æternorum (*Gen. xlix, 26*), » id est prophetarum et apostolorum. In sede vero auctoritas magisterii designatur. Colles igitur *sedes nostra* sunt, quia doctrinam apostolorum et prophetarum sancta Ecclesia cum auctoritate prædicat. Sed quia post

(88) Alias, Gaba.

persequutionem gentilium persecutio facta est hæreticorum, recte subjungitur :

« *Obstupuit Rama*, id est Ecclesia sanctorum, quam dicit : « Nostra conversatio in cælis est (*Philip. iii, 20*). » Rama quippe dicitur Ecclesia. Et Dominus hæreticorum ac sequacium Antichristi persecutionem prænuntians ait : « Exsurgent pseudochristi, et pseudoprophetæ, et dabunt signa et portenta ad seducendos, si fieri potest, etiam electos (*Marc. xiii, 22*). Propter hæc obstupuisse dicitur Rama, id est Ecclesia, et propter impiam eorum doctrinam. Post hæc exspectamus Israelitarum conversionem. Unde sequitur :

« Gabaath Saulis fugit. » Gabaath namque *collis patruelis* dicitur ; Saul vero *expetitus*. Et quis est expetitus nisi Redemptor humani generis, quem expetebant prophetæ, dicentes : « Ostende nobis, Domine, misericordiam tuam, et salutare tuum da nobis ? » (*Psal. lxxxiv, 7*). Qui et filius David est dicente Matthæo : « Liber generationis Jesu Christi filii David (*Matth. i, 1*), » etc. Cæteros autem Judæos, qui fuerunt tempore David, fratres ejus accipimus, id est patros Domini, quorum filii *patruelles* ejus sunt, id est nepotes David. Omnes vero de genere David post eversionem Jerusalem perimi jussit Domitianus, ut soli patruelis Domini remanerent peremptis ejus fratribus, id est filiis David. Cæsa igitur Judæorum prosapia, quæ descendit a fratribus David, id est ab antiquis Patribus, *collis patruelis Saulis*, id est Christi vocatur. Itaque *Gabaath Saulis fugit*, dum populus Israel Christo propinquus fugiens ab ira ventura fidem recipit. Ubi congrue subditur :

« Hinni voce tua filia Gallin, » id est filia *transmigrantium*. Tunc enim adventu Eliæ roborata hinniet, id est jubilabit et prædicabit exsultans Ecclesia, quæ tribulationibus pressa mœrens siluerat. Hinniet autem non voce prædicatorum Antichristi, non infidelium Judæorum, non hæreticorum, non gentilium, sed voce dulci, voce domestica, voce propria. Gallin vero, id est *transmigrantes*, sunt illi qui radicem cordis in amorem sæculi hujus non fixerunt, sed ad cœlestia festinant, dicentes : « Non enim habemus hic manentem civitatem, sed futuram inquirimus (*Hebr. xiii, 14*). » Quorum filia ex Ecclesia ex prædicatione eorum et imitatione generata. Ad cujus consolationem subjungitur de exterminatione Antichristi.

« Attende Laisa, paupercula Anathoth, migravit medemena. » Quod interpretatum sic dicitur : *Attende leonem, paupercula* obediens ; *migravit* a saltu ejus, attende leonem, considera Christum, quia moriens migravit a saltu ejus, id est a gentibus, in quibus regnans sæviebat ut leo in saltu, o paupercula obediens, id est humilis Ecclesia Christo serviens.

Deinde eos alloquitur, qui in ultimo fine sæculi

hujus post mortem Antichristi pœnitentiam agent : **A** cecidit, quia Christus jam mundi gloriam stravit, et elatos humiliavit, Sequitur :

O, inquit, habitatores *Gabin*, id est fossarum, qui in profundis malitiæ latibulis lucusque mansistis, *confortamini* et pugnate contra Satan. *Adhuc enim dies est*, id est aliquantulum vitæ hujus spatiolum superest, *ut in Nobe stetur*, id est contra latratum suggestionum diaboli stetur. *Nobe* quippe *latratus* dicitur. Nam post mortem Antichristi supererunt quadraginta quinque dies, sicut ex libro Danielis colligitur, et tunc ad pœnitentiæ remedia multî confugiendi quos Antichristus seduxerat. Et quia in Jerusalem et in locis illis præcipue sæviet Antichristus, idcirco forsitan subditur :

« Agitabit manum suam super montem filiæ Sion, collem Jerusalem. » Potest et de tentatione, qua cunctos impetit hostis antiquus, intelligi. Quid enim **B** per *manum* ejus nisi tentatio designatur? *Manum ergo suam super montem et super collem* agitatur, quia fideles universos et majores et minores tentationibus vexat. Sequitur :

VERS. 33. — « Ecce dominator Dominus exercituum confringet lagunculam in terrore, et excelsi statura succidentur, et sublimes humiliabuntur. »

VERS. 34. — « Et subvertentur condensa saltus ferro, et Libanus cum excelsis cadet. »

Confringet Dominus in terrore lagunculam, sicut olim in prælio Gedeonis factum est (*Judic. vii. 20*). In lagena quippe fragilitas corporis figuratur. *Confrigit ergo Dominus in terrore lagunculam*; quia, moriente Christo, « tenebræ factæ sunt, et velum templi scissum est, et terra mota est, et petræ scissæ sunt, et monumenta aperta sunt, et multa corpora sanctorum, qui dormierant surrexerunt (*Matth. xxvii, 45-52*). » Centurio autem, et qui cum eo erant custodientes Jesum viso terræ motu, et his, quæ fiebant, timuerunt valde dicentes : « Vere Dei Filius erat iste (*ibid. 54*). » Sic in terrore contracta est laguncula Dominici corporis.

Et post hæc *excelsi statura*, id est principes Judæorum alii succisi sunt a Romanis, id est perempti, et alii humiliati, id est in captivitatem ducti. *Condensa saltus subversa sunt ferro*, quia Jerusalem destructa est; *et Libanus cum excelsis cecidit*, quia templum est incensum, et sacerdotes ejus superbi dejecti.

Vel excelsos *statura* reges et principes sæculi sive quoslibet in sublimitate constitutos, aut certe superbos possumus accipere, quos Christus Evangelio coruscante vel per mortem succidit, vel per pœnitentiam humiliavit. « Et subvertentur, inquit, condensa saltus ferro. » — « Jam enim securis ad radicem arborum posita est. Omnis ergo arbor non faciens fructum bonum excidetur et in ignem mittetur (*Matth. iii, 10*). » Libanus enim quid est nisi mundana gloria? *Libanus enim candidatio* dicitur, et qui dignitatem sæculi consequuntur, candidati sunt extrinsecus et ornati. Hic ergo Libanus eum excelsis

CAPUT XI.

VERS. 1. — « Et egredietur virga de radice Jesse, et flos de radice ejus ascendet. »

Jesse patriarcha regalis familiæ fuit. *Radix Jesse* familia regalis. *Virga* Maria, *flos* Mariæ Christus, qui bonum odorem fidei toto sparsurus orbe virginali ex utero germinavit, sicut ipse dixit : « Ego flos campi, et lilium convallium (*Cant. ii, 1*). » Flos odorem suum et succisus reservat, et contritus accumulatur, nec avulsus amittit. Ita et Dominus Jesus in illo patibulo crucis nec contritus emarcuit, nec avulsus evanuit, et illa lanceæ punctione succisus, sacro speciosior fusi cruoris colore vernavit, mori ipse nescius, et mortuus æternæ vitæ munus exhalans. *Virga* etiam caro Domini potest forsitan accipi, quæ de radice terrena ad superna se subrigens odoriferos sacræ religionis fructus circumtulit mundo, mysterio divinæ revelationis gratiam cœlestibus altariis superfundens. Potest et ipse Christus et *virga* et *flos* intelligi. *Virga* ei, qui suppliciis plectitur; *virga* ei, qui indiget increpatione; *virga* ei, qui necesse habet, ut arguatur. *Flos* vero ei, qui jam eruditus est; *flos* ei, qui valet a flore incipere, et ad perfectum fructum provehi. Sequitur :

VERS. 2. — « Et requiescet super eum Spiritus Domini, spiritus sapientiæ et intelligentiæ, spiritus consilii et fortitudinis, spiritus scientiæ et pietatis. »

VERS. 3. — « Et replebit eum spiritus timoris Domini. »

Ideo super Christum tanta dona Spiritus prædicantur, quia in eo non ad mensuram Spiritus sanctus habitat (89-90) sicut in nobis, sed tota inest plenitudo divinitatis, et gratiarum. Qui quoniam de cœlis ad nos descendit, descendendo potius istos gradus propheta super eum numerat, id est sapientiam, intellectum, consilium, fortitudinem, scientiam, pietatem, timorem. Nam cum scriptum sit : « Initium sapientiæ timor Domini (*Psal. cx, 9*), » constat, quod a timore ad sapientiam ascenditur, non a sapientia ad timorem reditur, quia perfectam habet sapientia charitatem, et « perfecta charitas foras mittit timorem (*I Joan. iv, 18*). » Propheta ergo quia de cœlestibus ad ima loquebatur, cepit magis a sapientia, et descendit ad timorem. Sed nos, qui a terrenis ad cœlestia tendimus, ascendendo numeramus, ut a timore ad sapientiam perveniamus. In mente enim nostra primus ascensionis gradus est timor Domini, secundus pietas, tertius scientia, quartus fortitudo, quintus consilium, sextus intellectus, septimus sapientia. Est enim *timor Domini* in mente. Sed qualis est iste timor, si cum eo pietas non est? Qui enim proximo misereri nescit, qui compati ejus tribulationibus dissi-

mulat, hujus timor ante Dei oculos nullus est, quia non sublevatur ad pietatem.

Sed sæpe pietas per inordinatam misericordiam errare solet, si peccata, quæ ferri gehennæ ignibus possunt, disciplinæ verberibus non corrigunt. Ut ergo vera et ordinata sit pietas, ad gradum est alium sublevanda, id est ad scientiam, ut sciat vel quid per severitatem puniat, vel quid ex misericordia dimittat. Sed quid si sciat, quid agere debeat, virtutem vero agendi non habeat? Scientia ergo nostra crescat ad fortitudinem, ut, cum videt, quid agendum sit, hoc agere per mentis fortitudinem possit. Sed sæpe fortitudo si improvida fuerit, et minus contra vitia circumspiciat, ipsa sui præsumptione in casum ruit. Ascendat ergo ad consilium, ut prævidens præmuniat omne quod agere fortiter potest. Sed esse consilium non potest, si intellectus deest; quia, qui non intelligit malum quod agentem gravat, quomodo potest bonum solidare quod adjuvat? Itaque ascendamus a consilio ad intellectum. Sed quid si intellectus magno quidem acumine vigilet, et moderari se nesciat per maturitatem? Ab intellectu ergo ascendatur ad sapientiam, ut hoc, quod acute intellectus invenit, sapientia mature disponat. Itaque per timorem surgimus ad pietatem, per pietatem ad scientiam ducimur, per scientiam ad fortitudinem roboramur, per fortitudinem ad consilium tendimus, per consilium ad intellectum proficimus, per intellectum in sapientiam maturescimus. Sed ut hanc ascendere scalam valeremus, ipse Creator ad nos usque descendere dignatus est, et ad nos eam afferre, ac in se ipso ostendere. Et de cæteris quidem gradibus perspicuum est. Sed de timore Dei fortasse quis ambigit, an in eo fuerit. Sed absque dubio replevit eum *spiritus timoris Domini*, quia, ut superbum hominem redimeret, contra superbiam nostram mentem humilem assumpsit, in qua timuit Deum. Sed iste, qui talis in primo advratu apparuit, ut nos ad imitationem suam informaret, quid in secundo facturum sit, audiamus. Sequitur: « Non secundum visionem oculorum judicabit, neque secundum auditum aurium arguet. »

Vers. 4. — « Sed judicabit in justitia pauperes, et arguet in æquitate pro mansuetis terræ. »

Qui conscientiarum testis est, non juxta visum exteriorem vel auditum judicabit ut sæculi iudices, qui corda non agnoscunt et testibus indigent, sed secundum intentionem cordium judicabit opera. Pauperes vero sunt, de quibus ait: « *Beati pauperes* (Matth. v, 3). » Quos in justitia judicabit, quia per justum iudicium eos liberabit, et pro mansuetis terræ arguet eos, qui afflixerant illos. Sequitur:

« Et percutiet terram virga oris sui, et spiritu labiorum suorum interficiet impium. » Terra est peccatorum quisque, quia post transgressionem dictum est homini: « Terra es, et in terram ibis (Gen. iii, 19). » Virga oris Domini sententia judicialis est. « Percutiet ergo terram virga oris sui, »

A quando dicit peccatoribus: « Discedite a me, maledicti, in ignem æternum (Matth. xxv, 41). » — « Et spiritu labiorum suorum interficiet impium, » id est Antichristum, sicut Paulus ait: « Quem Dominus Jesus interficiet spiritu oris sui (II Thess. ii, 8). » Et notandum quia his verbis evidenter declaratur Spiritus sanctus coæternus Filio, et sic ex eo procedere, ut semper in eo maneat; quia spiritus labiorum ejus est, et spiritus oris ejus. Deinde primum ejus adventum propheta respiciens subjungit:

Vers. 5. — « Et erit justitia cingulum lumborum ejus, et fides cinctorium renum ejus. »

In lumbis esse luxuria solet hominibus aliis; hic autem solus contra vitiorum nostrorum languores sanitatem in se ipso virtutum, quam nobis infunderet, attulit. Et ideo recte dicitur *justitia cingulum lumborum ejus*, quia ibi maxime, justitia circumdatus est, ubi cæteri homines justitiam magis amittere solent, et ad peccatum solvi. Quod si mysterium Incarnationis ejus in lumbis debet accipi, et justitiam, qua cingitur, nostram oportet intelligi, *justitia nostra cingulum est lumborum ejus*, dum Deo pro nobis incarnato bonis operibus inhæremus. In renibus designari potest idem Incarnationis mysterium. Fides ergo nostra *cinctorium renum ejus* est, dum firmissime credimus veritatem Incarnationis illius. Quem quia secuta est Ecclesia, recte subjicitur:

Vers. 6. — « Habitabit lupus cum agno, et pardus cum hædo accubabit; vitulus et leo et ovis simul morabuntur, et puer parvulus minabit eos. »

Vers. 7. — « Vitulus et ursus pascentur simul, requiescent catuli eorum, et leo quasi bos paleas comedet. »

« Nos, inquit beatus Gregorius (lib. ii in *Ezech.* homil. 4), qui religioso habitu induti videmur, ex diversa mundi qualitate convenimus, atque ex dissimilibus iniquitatibus in Sanctæ Ecclesiæ concordia congregati sumus, ut jam patenter factum esse videatur, quod de Sanctæ Ecclesiæ promissione dicitur: « Habitabit lupus cum agno, » etc. Nam per sanctæ charitatis viscera lupus cum agno habitat, quia ii, qui in sæculo raptores fuerant, cum mansuetis ac mitibus in pace quiescunt. Et pardus cum hædo accubat, quia is, qui peccatorum suorum maculis varius fuit, cum eo qui se despicit, et peccatorem fatetur, humiliari consentit.

« Vitulus et leo, et ovis simul morabuntur, quia et is, qui per contritum cor ad quotidianum se Deo sacrificium præparat; et alius qui tanquam leo ex crudelitate sæviebat; et alter, qui velut ovis in innocentia suæ simplicitate perdurat, in caulis sanctæ Ecclesiæ convenerunt. »

« Et puer parvulus minabit eos. » Quis est iste *puer parvulus*, nisi de quo scriptum est: « Puer natus est nobis, filius datus est nobis? » Qui simul habitantes minat; quia, ne in terrenis rebus corda nostra inhæreant, hæc per internum desiderium quotidie inflammat. Et hoc ipsum ejus minare est, ad summum amorem incessanter accendere, ne,

cum nos vicissim diligimus, mente in hoc exilio remaneamus, ne quies hujus vitæ sic placeat, ut ad oblivionem patriæ perducatur; ne delectata mens prosperis torpeat, dum Domini flagella sui pertimescit, sed nobis omne, quod nos in sæculo delectabat, amarescat, et illud incendium insurgat in animo, quod nos semper ad cœleste desiderium inquiete [*f. in quiete*], excitet, atque, ut ita dicam, delectabiliter mordeat, suaviterque cruciet, hilariter contristet. *Puer* ergo nos *parvulus* minat; quia is qui paulo minus quam angeli minoratus est, per charitatem, quam nobis tribuit, nos in hoc mundo mentem figere non permittit.

« Vitulus et ursus pascentur simul, » quia is, qui Deo sacrificium, et ille qui sævus et horridus fuerat, eadem doctrinæ sanctæ pabula percipiunt. « Et catuli eorum, » id est illi, qui de imitatione ipsorum nati fuerint, jam in eodem ovili requiescunt simul. Sed dum hæc de electis propheta loqueretur, cernens vitam peccantium ab antiquo et insatiabili hoste devorari, ait :

« Et leo quasi bos comedet paleas. » Quid enim palearum nomine nisi carnalium vita designatur? Sed cur iste *leo*, id est diabolus in comessatione palearum non equo sed bovi comparetur, agnoscimus, si utrisque animalibus, quæ sit nutrimentorum distantia, perperdamus. Equi namque fenum quodlibet sordidum comedunt; aquam vero non nisi mundam bibunt. Boves autem quamlibet aquam sordidam bibunt, sed feno vel paleis non nisi mundo vescuntur. Quid est ergo, quod bovi, qui mundo pabulo vescitur, leo iste comparatur nisi hoc quod de isto hoste antiquo per prophetam alium dicitur : « Esca ejus electa? » (*Habac. 1, 16.*) Neque enim eos se rapere gaudet, quos pravis ac sordidis actionibus implicatos in imis secum respicit voluntarie jacere. *Paleas* ergo comedere sicut *bos* appetit, quia suggestionis suæ dente conterere mundam spirituum vitam querit.

Sed quomodo leo iste sicut bos paleas comedens vitam spiritualium consumere dicitur, si, ut supra dictum est, palearum nomine vita carnalium signatur? Esca quippe ejus electa jam non erit, si paleas comedens carnales rapit. Sed nonnulli hominum et apud Deum palea sunt, et apud homines sanctitatis nomine censentur, cum et ante oculos humanos aliud ostendit vita, et ante divina judicia aliud intendit conscientia. Nunc enim sermo de iis est, qui ficto corde religiosam conversationem inter vere religiosos ducunt. Hi itaque apud humana judicia electi sunt, sed apud subtile Dei examen paleæ. Quia ergo nonnulli mundam quidem vitam per studium ducunt, sed ex illa intus placere non appetunt, recte et esca ejus electa dicitur, et tamen paleas sicut bos comedere leo iste perhibetur. Quasi enim ante os ejus munda palea in terra atque in infimis jacet, cum et vita quasi innocens per mandatorum

A custodiam agitur, et tamen Inter actionem, quæ bona ostenditur, cor ad appetenda sublimia non elevatur. Quid itaque utilitatis agit, qui in se munditiam vitæ custodit, si per intentionem infimam in ore leonis hujus inveniendum se in terra derelinquit? Sequitur :

VERS. 8. — « Et delectabitur infans ab ubere super foramine aspidis, et in caverna reguli, qui ablatus fuerit, manum suam mittet. »

VERS. 9. — « Non nocebit [*Vulg., nocebunt*], et non occident in universo monte sancto meo. »

Quem nunc infantem *ab ubere*, vel eum, qui *ablatus fuerit*, nisi Dominum appellat? Quid autem *foramine aspidis* vel *cavernis reguli* nisi corda signavit iniquorum? Quia hostis antiquus dum totum se in eorum consensu contulit, quasi in foramine proprio coluber tortuosus sinus astutiæ suæ colligendo glomeravit. Quem et *aspidis* appellat nomine occulte sævientem, et *reguli* aperte ferientem. *Manum* ergo *suam* Dominus in *foramine reguli atque aspidis* misit, quando iniquorum corda divina potentia tenuit, et comprehensum exinde regulum vel aspidem, id est captivum diabolium traxit, ut in *monte sancto* ejus, quod est Ecclesia, electis fidelibus non noceret ipse vel angeli ejus.

Tunc vero primum delectatus est *infans ab ubere*; *super foramine aspidis*, quando jacens adhuc in cæcibus orientales magos ad se convertit. Cur autem de cavernis suis serpens ejectus sit, ostendit propheta subdendo :

C « Quia repleta est terra scientia Domini sicut aquæ maris operientes. » Jam enim Evangelium quasi pelagus totum orbem implevit, jam universum mundum *scientia* veritatis quasi diluvium quoddam *operuit*, et omnia falsitatis dogmata submersit. Et quomodo *aquæ maris* operiunt profunda maris, id est terram, quæ operata est fluctibus; sic omnis *terra completa est scientia Domini*. Et bene sacra scientia mari comparatur, quia navibus mare transimus, cum ad desideratas terras tendimus. Nobis autem quid est in desiderio nisi illa terra, de qua scriptum est : « Portio mea in terra viventium? » (*Psal. CXXI, 6.*) Ligno autem, ut dixi, evchitur, qui mare transit. Nobis ergo, qui ad patriam tendimus, scientia divinæ prædicationis mare est, quæ crucem annuntiat, quia nos ad terram viventium ligno portat. Sequitur :

VERS. 10. — « In die illa radix Jesse, quæ (91) stat in signum populorum, ipsum gentes deprecabuntur, et erit sepulcrum ejus gloriosum. »

Quomodo *radix Jesse*, id est Christus filius David *stat in signum populorum, ipsumque gentes* deprecabuntur, ipse exponit, dicens : « Sicut *Moyse* exaltavit serpentem in deserto; ita exaltari oportet Filium hominis, ut omnis, qui credit in ipso, non pereat, sed habeat vitam æternam (*Joan. III, 14.*) » Sicut enim illi, qui fuerant percussi a serpentibus, cum aspicerent æneum serpentem, quem pro signo *Moyse*

(91) Alias, qui.

exaltaverat, a temporali morte liberabantur et salutem recuperabant (Num. xxi, 9); ita omnes, quibus maligni spiritus vulnera peccatorum inflixerunt; si Christum in cruce exaltatum fideliter aspexerint, ac deprecati fuerint, a periculo mortis æternæ liberantur et vitam sempiternam consequuntur. Sic enim *radix Jesse stat in signum populorum exaltatus in cruce, ut ipsum deprecentur omnes, et per eum salvi fiant. Unde et per omnes basilicas imago sacra statua est representans eum in cruce suspensum. Sepulcrum vero ejus gloriosum est, quia præter illam reverentiam, quam ob illius sepulturam et resurrectionem habet, locus ille coruscans miraculis gloriæ suæ causa ad se omnem contrahit mundum.* Sequitur:

VERS. 11. — « Et erit in die illa: Adjiciet [Vulg. adjiciat] Dominus secundo manum suam ad possidendum residuum populi sui, quod relinquetur ab Assyriis, et ab Ægypto, et a Phetros, et ab Æthiopia, et ab Ælam, et a Sennaar, et ab Emath, et ab insulis maris. »

Post Judæorum vocationem, quæ superius descripta est, cum diceretur: « Habitabit lupus cum agno, » etc. « adjiciet Dominus secundo manum suam ad possidendum residuum populi sui, » sicut ipse ait: « Alias oves habeo, quæ non sunt ex hoc ovili, et illas oportet me adducere, et vocem meam audient, et fiet unum ovile et unus pastor (Joan. x, 16). » Quod residuum populi ejus relinquitur ab Assyriis, quia maligni spiritus gentilitatem, quam possederant, amittent. Assyrii namque *convincentes* interpretantur: et sicut frequenter diximus, et jugi memoria semper retinendum est, idcirco dæmones vocantur Assyrii, quia illos iniquitatis convincent ante tribunal judicis, qui nunc eis persuadentibus iniquitatem faciunt.

Ægyptus vero *tenebræ* dicitur, Phetros *dissolvens*. Æthiopia *caligo*, Ælam *oppositi vel abjecti*, Sennaar *factor eorum*, Emath *indignatio*, insula autem sic appellatur, eo quod in salo, id est in mari sit posita. Gentilitas vero veniens ad Christum *relinquetur ab Ægypto*, id est a tenebris infidelitatis et ignorantiae, et a Phetros, id est a dissolvente negligentia vel pigritia, et acedia, et ab Æthiopia, id est a caligine errorum, et ab Ælam, id est ab immundis spiritibus, qui a consortio beatorum abjecti sunt angelorum, et se inter nos et cælum opponere nituntur, ne illud ascendamus, omnibusque bonis actibus nostris oppositi sunt et contrarii; et a Sennaar, id est a fetore pristinæ conversationis, quem de se sparserat; et ab Emath, id est ab indignatione Dei, quæ super eam manserat; et ab insulis maris, id est a remotis mundi excessibus procul in mari positia vel adversis gentibus, ut gentes per insulas accipiamus. Sequitur:

VERS. 12. — « Et levabit signum in nationes, et congregabit profugos Israel, et dispersos Juda colliget a quatuor plagis terræ. »

Signum crucis levabit Dominus ad gentes, et a

A quatuor orbis partibus in Ecclesia Catholica congregabit omnes electos, qui dispersi fuerant ubique exules a paradiso, et tunc fugient ab ira ventura. Quid autem *Israel* designat, qui interpretatur *videns Deum*, nisi fidem, qua nunc videtur Deus? *Juda* vero dicitur *confessio*. Et bene Israel et *Juda*, id est fides et confessio sit ad salutem. Potest elevatio signi atque dispersorum congregatio et ad diem judicii forsitan referri, quia « tunc apparebit signum Filii hominis in cælo, et mittet angelos suos cum tuba et voce magna, et congregabunt electos ejus a quatuor ventis, a summis cælorum usque ad terminos eorum (Matth. xxiv, 30). » Sequitur:

VERS. 13. — « Et auferetur zelus Ephraim, et hostes Juda peribunt. »

B Et quid per Judam nisi Ecclesia Christum confitens? Quid per Ephraim nisi perfidus Judæorum populus exprimitur? Et in primis quidem magnum contra nos zelum populus Judæorum exercuit, sed succedente tempore zelus eorum, quo nostros persequabantur, tepuit. *Hostes quoque Juda*, id est adversarii catholicæ confessionis jam de mundo perierunt, et adhuc magis *peribunt*. Sequitur:

« Ephraim non æmulabitur Judam, et Judas non pugnet contra Ephraim. » Ita nunc inter nos et Judæos videtur agi, quia nec ipsi nos æmulantur, ut servitutis suæ observationi nos subjicere conentur, nec nos frequentibus disputationibus cum eis pugnamus, quia cor eorum obcæcaturum cernimus, et obduratum. Sequitur:

C VERS. 14. — « Et volabunt in humeros Philisthiim per mare, simul prædabunt filios orientis. Idumæa et Moab præceptum manus eorum, et filii Ammon obedientes erunt. »

Philisthiim interpretantur *cadentes potione*. Casus vero nonnunquam in bona parte ponitur. Video enim Saulum bene cecidisse, ut iterum surgens diceret: « Vivo autem jam non ego, vivit vero in me Christus (Galat. ii, 20). » Est autem quædam potio amara quidem, sed salutifera, quæ talibus propinari solet. Unde Dominus: « Potestis, inquit, bibere calicem, quem ego bibiturus sum? » (Matth. xx, 21.) Hac enim potione cadunt, cum martyrio corpus eorum in mortem prosternitur. Quid igitur hoc loco *Philisthiim*, id est *cadentes potione* nisi vel martyres accipere debemus, vel quoslibet in casu et crectione Saulo similes? *Philisthiim* itaque doctores sanctos hic accipimus. Volant ergo populi *in humeros Philisthiim* cum ad fidem certatim currentes sanctis doctoribus se portandos committunt. Et volant *per mare*, id est per fluctus sæculi. Mare enim fluctivagos tumultus, furoresque hujus mundi designat, ubi homines improbi quasi pisces avidissimi se invicem persequuntur, et devorant. Et inter hæc discrimina volant ad Christum, et *in humeros* sanctorum portandi insiliunt, qui portum salutis invenire cupiunt.

Quos autem *filios orientis* nuncupat nisi eos, qui secundum quod ex Adam orti sunt, ita permanere soleant, neque circumcisionem, neque baptismum.

consecuti? Sed et istos *prædabuntur* et diabolo tollunt prædicatores sancti, et ad Christum ducunt. Quid vero per Idumæam, quæ est Esau regio, et interpretatur *terrena* vel *rubea*, nisi qui primitiva sua perdidit, terrenus Judæorum populus sanguine Christi cruentatus? Qui et per *Moab*, et *Ammon* designatur. Quia sicut filia Lot inebriaverunt eum, ut cum ei dormientes conciperent (*Gen. xix, 35*); sic domus Israel, et domus Juda spiritalem legis sensum soporaverunt, ut carnalia gignerent filios. Unde *Moab* dicitur *ex patre*, quia ex carnali intelligentia legis hic populus est genitus quasi ex patre ebrio ac dormiente. *Ammon* quoque *filius populi mei* interpretatur, quia de antiquo populo Dei nati sunt hi, quos infideles videmus, Judæi.

Itaque *Idumæa* et *Moab* *præceptum est manus*, id est operationes eorum, quia justum est apostolis, ut salutem populi hujus operarentur prædicando. Vel hic populus percepit *præceptum manus eorum*, id est exemplum actionis apostolorum, quia faciebant omnia, quæ præcepturi erant. *Et filii Ammon*, id est illi, qui nascuntur ex hoc perfido Judæorum populo, *obedientes erunt* prædicationi Eliæ.

Notandum vero quia propheta raro servat ordinem. Nam et paulo superius de passione Salvatoris locutus, de Nativitate subjicit oraculum, dicens: « Egre dietur virga de radice Jesse, » etc.; ac deinceps nunc gentium vocationem, nunc Judæorum hucusque multifarie vaticinatus est variato nonnunquam ordine. Et ita fere semper in libris Prophetarum agitur, ut, quod ordine primum est, sæpe sit in narratione postremum vel medium. Sequitur:

Vers. 15. — « Et desolabit linguam maris Ægypti, et levabit manum suam super flumen in fortitudine spiritus sui: et percutiet eum in septem rivis, ita ut transeant per eum calceati. »

Lingua *maris* est scientia doctrinæ sæcularis. Bene autem mare Ægyptium dicitur, quia peccati obscuritate fuscatur. *Linguam ergo maris Ægypti*, Dominus desolat, id est exterminat, quia hujus mundi falsam sapientiam per carnem se ostendendo destruxit. Ubi est enim nunc academicorum error, qui certe conatur astruere certum nil esse, qui impudenti fronte assertionibus suis fidem ab auditoribus exigunt, cum vera esse nulla testantur? Ubi mathematicorum superstitio, qui, dum signorum cursus suspiciunt, vitas hominum in siderum momenta suspendunt, quorum aperte doctrinam sæpe geminorum nativitas dissipat, qui, cum uno eodemque momento horæ prodeant, non una conversationis qualitate perdurant? Ubi tot prædicamenta falsitatis, quæ enumerare longum nimis est?

Desolavit ergo Dominus *linguam maris Ægypti*, quia apparens in carne omnia errorum prædicamenta damnavit. Ejus quippe veritate cognita illæ falsitatis doctrinæ tacuerunt. Unde *et super flumen præfate maris linguæ manum suam levare* dicitur *in fortitudine sui Spiritus*, quia per evangelicæ gra-

tia operationem et Spiritus sui virtutem stultam fecit sapientiam hujus mundi. *Et percussit eumdem mundanæ doctrinæ fluvium in septem rivis*, in quibus erat contrarius septem donis Spiritus sancti. Quo percusso, transierunt *per eum calceati*, quia prædicatoribus ibi via patuit, quibus dicitur: « Et calceati pedes in præparatione Evangelii pacis (*Ephes. vi, 16*). » Calceatos enim evangelistas hic accipimus, id est divini verbi ministros. *Calceati ergo transierunt per fluvium*, quia prædicationis ibi viam invenerunt, doctrinæ sæcularis fluentia copiosius emanare solebant. Deinde baptismi sacramentum evidenti prænuntiatur oraculo, cum subditur:

Vers. 16. — « Et erit via residuo populo meo, qui relinquetur ab Assyriis sicut fuit Israeli in die illa, qua ascendit de terra Ægypti. »

Sicut enim populus Israel ad promissam hæreditatem per mare Rubrum transit; ita nunc populus acquisitionis ad cœlestia regna per sacramentum baptismi transit. Vel sicut Israel per medium maris, ita populus fidelium per diversum flumen doctrinæ sæcularis incedit. Unde et subditur:

CAPUT XII.

Vers. 1. — « Et dices in illa die: Confitebor tibi, Domine, quoniam iratus es mihi, conversus est furor tuus, et consolatus es me. »

Vers. 2. — « Ecce Deus salvator meus, fiducialiter agam, et non timebo, quia fortitudo mea, et laus mea Dominus, et factus est mihi in salutem. »

Nam, sicut olim Hebræorum populus de Ægypto ascendens post maris Rubri transitum cecinit cæcinit Domino, sic nunc percussa lingua maris Ægypti, et flumine illius arefacto atque conciso Christianorum populus Deum glorificat, dicens: « Confitebor tibi, Domine, » etc. Confitetur enim et gratias agit Deo populus fidelium, eo quod linguam maris Ægypti desolaverit, et fluvium ejus percussit. Nam sustinuit iram Dei, dum adhuc idem fluvius manaret, impediens viam ejus, sed siccato flumine furor Domini *conversus est* in misericordiam, et famulos suos *consolatus est*.

Vel confessio peccatorum fortassis intelligi potest. Quid enim confitetur iste populus nisi quia « conversati sumus in desideriis carnis nostræ facientes desiderium carnis nostræ et cogitationum? » (*Ephes. ii, 3*). Quid est, quod ait: *Iratus es mihi*, nisi quia « eram natura filii iræ sicut et cæteri? » (*ibid.*) Sed « conversus furor tuus est, inquit, et consolatus es me, » quia « Deus, qui dives est in misericordia, propter nimiam charitatem suam, qua dilexit nos, cum essemus mortui peccatis, convivificavit nos Christo (*ibid.*). »

Deinde: « Ecce, inquit, Deus Salvator meus. » — « Iratus olim Dominus contra Israel tradidit eos in manus Cusankasathaim regis Mesopotamiæ, servierunt quoque ei octo annis. Et clamaverunt ad Dominum, qui suscitavit eis Salvatorem, et liberavit eos,

Othoniel videlicet filium Cenez (92) fratrem Caleb A minorem. Rursus addiderunt illi Israel facere malum in conspectu Domini, qui confortavit adversus eos Eglon regem Moab, servieruntque ei decem et octo annis. Et postea clamaverunt ad Dominum: Qui suscitavit eis Salvatorem vocabulo Ahoth (*Judic. III, 8 et seqq.*). Multosque salvatores alios antiquitus habuisse legitur populus Israel, ut liberarentur per eos a calamitatibus suis. Ab illa vero captivitate, qua non hostis antiquus tenebat, eripi non valebamus, nisi nos eripere veniret ipse Deus. Unde nunc bene fidelium populus ab ea per eum solutus exsultat, dicens: « Ecce Deus Salvator meus. » Non enim propheta, non patriarcha, non angelus, non archangelus, sed Dei Unigenitus *salvator* nobis datus est.

Et quia per Apostolum nobis dicitur: « Non accepistis spiritum servitutis iterum in timore, sed accepistis Spiritum adoptionis filiorum, in quo clamamus: Abba pater (*Rom. VIII, 15*); » — « fiducialiter, inquit, agam, et non timebo. » Abstulit enim Salvator a nobis timorem servitutis antiquæ, et dedit gratiam novæ libertatis, ut bonum quod agimus, non ex timore faciamus, sed ex charitate.

« Quia fortitudo mea et laus (93) mea Dominus, ut dicam: « Omnia possum in eo, qui me confortat (*Philip. IV, 13*). » Et: « In Domino laudabitur anima mea (*Psal. XXXIII, 3*). » Ille enim fortitudinem suam esse Dominum non æstimat, qui se per se ipsum aliquid boni facere posse putat; et Dominum habere laudem negligit, qui de bonis, quæ operatur humanas laudes requirit. « Et factus est mihi in salutem. » Non quia ipse aliquid cœpit esse, quod non erat, sed quia ego salutem in eo, quam aversus non haberem, cœpi habere conversus. Sequitur:

VERS. 3. — « Haurietis aquas in gaudio de fontibus Salvatoris. »

Fontes Salvatoris corda apostolorum Domini Jesu sunt, de quibus fluente veritatis emanant. Ad eorum quippe doctrinam sitientes pergitimus, et veritate plenas cordium nostrorum, lagunculas reportamus. Et bene antea fluvius linguæ maris percuitur, ac deinde fontes Salvatoris aperiuntur; quia, prius doctrina sæcularis contemnitur, et tunc apostolica prædicatio sitienter bibitur. Sequitur:

VERS. 4. — « Et dicetis in illa die: Confitemini Domino et invocate nomen ejus: notas facite in populis adinventiones ejus, mementote quoniam excelsus est nomen ejus. »

VERS. 5. — « Cantate Domino, quoniam magnificè fecit: annuntiate hoc in universa terra. »

« Confitemini, inquit, Domino, et invocate nomen ejus (*Psal. CIV, 1*). » Noli antequam confitearis, invocare. Confitere, et invoca. Illum enim, quem invocas, in te vocas. Quid est enim invocare nisi in te ipsum vocare? Si invocatur a te, id est si vocatur in te a te, ad quem accedit? Ad superbum non accedit. Confitere ergo et invoca. Confitendo

(92) Cod. G. *Enes.*

A enim mundas templum, quo veniat invocatus.

« Notas facite adinventiones ejus, » subaudi, quibus antiqui hostis fefellit astutias. Cum enim diabolus in illa nos parentis primi radice supplantatos sub captivitate sua teneret, amittere nos juste nequebat, nisi deleteretur culpa, quæ nisi per sacrificium deleri non poterat. Sed per quod sacrificium? Neque enim justum erat, ut pro homine brutorum animalium victimæ cæderentur. Homo namque pro hominibus offerri debuit, ut pro rationabili peccante rationalis hostia mactaretur. Sed homo sine peccato inveniri non poterat, qui ex peccati commistione descenderet, et oblata pro nobis hostia, quando nos a peccato mundare potuisset, si et ipsa hostia peccati contagio non careret. Inquinata quippe inquinatos mundare non posset. Proinde venit propter nos in uterum virginis Dei Filius; ibi pro nobis factus est homo: sumpta est ab illa natura, non culpa, fecit pro nobis sacrificium corpus suum, exhibuit pro peccatoribus victimam sine peccato, quæ et humanitate mori, et justitia mundare potuisset. Namque quia per feminam mors in mundum introierat, congrua dispensatione fecit Salvator, ut et vita rediret per feminam, atque salutem nostram in ligno crucis constituit, ut, unde mors oriebatur, inde vita resurgeret, et hostis, qui in ligno prævaricationis vincebat, in ligno redemptionis vinceretur. Nam unde accepit exterius potestatem Dominicæ carnis occidendæ, inde interior potestas ejus, qua nos tenebat, occisa est. Ipse enim interius victus est, dum quasi vicit

C exterius, et qui nos jure debitores mortis tenuit, jure in nobis jus mortis amisit, quia per satellites suos ejus carnem perimendam appetiit, in quo nil ex culpæ debito invenit. Has itaque et hujuscemodî *adinventiones* Salvatoris præcipitur fidelibus, ut *notas faciant in omnibus populis*. Post quas et apte subditur:

« Mementote quoniam excelsus est nomen ejus, » quia « Deus illum exalavit, et donavit illi nomen, quod est super omne nomen (*Philip. II, 9*). » Et quia tunc ejus triumphos sancti prædicatores in toto orbe decantaverunt, pulchre subjunctum est: « Cantate Domino, quoniam magnificè fecit » Dominus Jesus mortem destruens et hostem religans atque hominem liberans, et de morte resurgens, qui, licet humanitate in cælum ascenderit, divinitate tamen hic semper nobiscum manet. Unde et sequitur:

VERS. 6. — « Exsulta et lauda, habitatio Sion, quia magnus in medio tui Sanctus Israel. »

D Nam *habitatio Sion* habitatio est Ecclesiæ in præsentis sæculo, quæ jubetur *exsultare et laudes decantare, quia Sanctus Israel*, id est Christus *magnus est in medio ejus*. Nam, ut dictum est, carne quidem *ascendit in cælum, et sedet ad dexteram Patris*, sed tamen et hic est. Non enim recessit præsentia majestatis. Nam secundum majestatem, secundum providentiam, secundum ineffabilem et invisibilem gratiam impletur, quod ab eo dictum est: « Ecce ego

(93) Cod. Cruc., *quia sors mea et laus, etc.*

voliscum sum omnibus diebus usque ad consummationem sæculi (*Matth.* xxviii, 20). » Per fidem quoque tenemus hic eum, per evangelistarum et apostolorum doctrinam, per crucis signaculum, per baptismi sacramentum, per altaris cibum et potum. Per hæc igitur omnia *Sanctus Israel est in medio Ecclesiæ magnificus et gloriosus, omnesque suo spiritali gaudio replet, et ad laudandum accendit.*

CAPUT XIII.

VERS. 1. — « Onus Babylonis, quod vidit Isaias filius Amos. »

Nunc novo rursus genere prophetare inchoat. Decem quippe describit onera illos deprimentia, qui per observantiam decem præceptorum leve onus Christi respuunt ferre, seu respuerunt. Nam, sicut olim Ægyptus percussa est decem plagis contra salutem, quam per decem mandata Dei accepturus erat populus Israel, ita nunc qui suave Christi jugum portare nolunt, quod eos sublevet, describuntur gravari decem oneribus. De cujusmodi fasciculis, et Apostolus ait : « Unusquisque onus suum portabit (*Gal.* vi, 5). » Et inter hæc onera primum ponitur *onus Babylonis*, quia principale est, et ejus angeli, qui primus peccavit, aliorumque malorum principum damnationem et pœnam habet (94). *Babylon* quippe, quæ *confusio* interpretatur, civitas illa magna iniquorum est, contraria nostræ Jerusalem, cujus cives sunt omnes apostatæ angeli, et universi homines reprobi, cujus onus propheta loqui incipiens ait :

VERS. 2. — « Super montem caligosum (95) levate signum, exaltate vocem, levate manum, et ingrediantur portas duces. »

Dicit autem beatus Gregorius (*lib. xxxiii Moral. c. 1*), quia per montem angelus apostata designatur, sicut sub regis Babylonis specie de antiquo hoste prædicatoribus dicitur : « Super montem caligosum levate signum. » — « Prædicatoribus quippe sancti super montem caligosum signum elevant, quando contra Satanae superbiam, qui sæpe sub nebulis simulationis absconditur, virtutem crucis exaltant. » Qui et *vocem* prædicationis atque *manum* bonæ operationis *exaltare* contra eum jubentur, ut et dictis et actibus eum impugnent. *Portas* quoque Babylonis potenter ingrediuntur, et capiunt eam, quando virtute prædicationis suæ conscientias peccantium aperiunt, et in eis mansiones Christa parant. Sequitur :

VERS. 3. — « Ego mandavi sanctificationis meis et vocavi fortes meos in ira mea, exsultantes in gloria mea. »

Sanctificati sunt, qui in Christo Jesu sanctitatis gratiam adepti sunt, quibus ipse mandavit, quod præmissum est, videlicet : « Super montem caliginosum levare signum, et ingredi portas Babylonis. » *Fortes* autem sunt, quos nulla potest adversitas fran-

gere. *Ira* vero ejus nunc ea dicitur, qua domatur hostis antiquus, et de manu ejus peccator eripitur. Unde et in Psalmo de hac ira dictum est : « Exsurge, Domine, in ira tua, et exaltare in finibus inimicorum tuorum (*Psal.* vii, 6). » In hac ergo ira Dominus *fortes* suos vocavit, quia genus humanum de potestate inimici eripere volens prædicatoribus, quos nulla posset adversitas vincere, ad prædicandum ascivit. Qui exsultaverunt *in gloria ejus*, quia non suam sed Dei quæsierunt. Sequitur :

VERS. 4. — « Vox multitudinis in montibus quasi populorum frequentium, vox sonitus regum et gentium congregatarum. »

Montes sunt apostoli, in quibus *vox multitudinis* resonat, quando secundum doctrinam eorum fit Ecclesiæ confessio.

Reges vero *gentium* sunt rectores ecclesiarum. *Vox sonitus regum*, vox prædicationis doctorum est, quia « in omnem terram exivit sonus eorum (*Psal.* xviii, 4). » Gentes vero sunt congregatæ, quia de universis gentibus coadunata est Ecclesia. Sequitur : « Dominus exercituum præcepit militiæ (96-97) suæ. »

VERS. 5. — « Venientibus de terra procul, a summitate cœli : Dominus et vasa furoris ejus, ut disperdat omnem terram. »

Militia belli exercitus sanctorum est contra malignos spiritus in hoc sæculo pugnantium, de cujusmodi militia dicit Apostolus : « Nemo militans Deo implicat se negotiis sæcularibus (*II Tim.* ii, iv). » Quibus præcepit Dominus, quia sicut bonus dux, qualiter in hac acie prælienter, disponit eis. Qui *de terra procul*, id est de gentilitate ad eum veniunt, et *a summitate cœli*, id est, ab oriente et occidente, et aquilone et austro. Cum hoc igitur exercitu Dominus contra Babylonem venit, quia zelo suo istos accendit, ut confusam peccantium vitam insequantur.

Possunt isti bellatores et angeli intelligi, qui in fine mundi mittentur, ut zinaniorum manipulos incendiant. Omnis quoque terra disperditur, cum terrena opera subvertuntur. Quæ sunt autem *vasa furoris ejus* nisi maligni spiritus? Non solum quippe sanctos prædicatoribus adversus Babylonem adducit, qui peccatores ad pœnitentiam provocent, sed et apostatas angelos, qui corda impenitentium magis aggravent. Unde et supra dixit : « Væ Assur, virga furoris, et baculus ipse, in manu eorum indignatio mea. Ad gentem fallacem mittam eum, et contra populum furoris mei mandabo illi. » Ipse ergo *vasa furoris* sui mittit, id est malignos spiritus relaxat, ut eos gravius possideant, qui in malis perseverare eligunt. Et cum omnibus his venit, « ut disperdat omnem terram ; » quia sic finem hujus sæculi adducit, ut alii quotidie per sanctos prædicatoribus a peccatis suis convertantur, et ad vitam transeant ; alii vero

(94) Cod. G., et pœnam continet.
(95) Alias, caliginosum.

(96-97) Alias, militiæ belli ; cod. G., militiæ cœli.

per Iniquos angelos in malitia permanere cogantur, ut pereant. Unde mox de novissimo die, quo peccatores punientur, nos terret, et ad lamentum pœnitentiæ nos provocat, subjungens :

VERS. 6. — « Ululate, quia prope est dies Domini, quasi vastitas a Domino veniet. »

« Prope est dies Domini, » *dies*, in quo judicabit mundum, vel unumquemque de hac vita egressum, et ostendet potentiam suam, quia sicut et alius propheta loquitur. « Juxta est dies Domini, juxta et velox nimis. » — « Quasi vastitas a Domino veniet (Sophon. 1, 14), » quia tunc sic mundus iste vastabitur, ut in terra nihil relinquatur. Sequitur :

VERS. 7. — « Propter hoc omnes manus dissolventur, et omne cor hominis tabescet, et conteretur »

VERS. 8. — « Torsiones et dolores tenebunt, quasi parturiens dolebit. »

Metu futuri judicii *dissolventur manus*, quæ fortes erant in opere malo, et *cor hominis*, id est rationabiliter cogitantis, dolore pœnitentiæ *tabescet*, et *conteretur*. *Torsiones ventris tenebunt* eos, quia unusquisque torquebitur propria conscientia. Parturiens vero cum dolore ejicit, quod intus diu cum pondere gestavit. Pœnitentes ergo « quasi parturiens dolebit, » quia peccata diu latentia et se intus gravantia per confessionem cum dolore ejicient. Sive cum *dies* judicii vel dormitionis advenerit, tunc omnes *manus dissolventur*, quia nullum opus dignum justitia Dei reperietur, et *omne cor tabescet*, conscientia peccati sui. Sequitur :

« Unusquisque ad proximum suum stupebit, facies combustæ vultus eorum. » *Unusquisque stupebit ad proximum suum* præ magnitudine pavoris, et admirationis, ubi de illa nimis horrenda reproborum damnatione cogitare cœperit. Et *facies combustæ erunt vultus eorum*, quia igne timoris et squalore pœnitentiæ decor facierum illorum immutabitur. Vel facies habebunt combustas illo igne, quem sibi succenderunt. Et « unusquisque stupebit ad proximum suum » videns eum in iisdem esse tormentis, quibus ipse cruciatur. Cur autem sic stupeant atque tabescant, adhuc consequenter indicatur, cum dicitur :

VERS. 9. — « Ecce dies Domini veniet crudelis et indignationis plenus, et iræ furorisque ad ponendam terram in solitudinem, et peccatores ejus conterendos de ea. »

Crudelis vero dicitur, qui districte feriendo non parcit. *Dies* vero veniens *crudelis* erit, quia non jam cum venia, sed cum restrictione peccatores feriet. *Plenus* quoque *indignationis et iræ ac furoris* erit, quando reprobis dicitur : « Discedite a me, maledicti, in ignem æternum, qui paratus est diabolo et angelis ejus. Esurivi enim et non dedistis mihi manducare (Matth. xxv, 41 et seqq.), » etc. Atque *terram ponet in solitudinem, et peccatores ejus de terra conteret*, quia tunc universam terræ superficiem

A ignis ille concremans omnia, quæ in mundo sunt, consumet, ei in barathrum perditionis impios rapiet. Sequitur :

VERS. 10. — « Quoniam stellæ cœli, et splendor earum non expandent lumen suum : obtenebratus est sol in ortu suo, et luna non splendet in lumine suo. »

Hoc et alibi ita dicit Dominus. « Sol obscurabitur, et luna non dabit lumen suum, et stellæ cadent de cœlo (Matth. xxiv, 29). » Cum dies Domini crudelis advenerit, et furor ejus omnia vastaverit, tunc timoris magnitudine mortalibus cuncta tenebrescent, et luminaria suam videbuntur negare fulgorem, et prementibus malis nil aliud sentient homines, nisi quod omnis tribulatio videre compellet. Vel fulgore suo Christus obscurabit omnia sidera. Sequitur :

VERS. 11. — « Et visitabo super orbis mala, et contra impios iniquitatem eorum ; et quiescere faciam superbiam infidelium, et arrogantiam fortium humiliabo. »

Visitabo super orbis mala, quia publicum examen faciet, et omnia reproborum peccata coram omnibus angelis et hominibus in lucem producet. Et tunc in faciem impiorum ostendet omnem *iniquitatem ipsorum*, ut confundantur, et pereant. Superbia quoque ipsorum quiescet jam, id est cessabit, quia sic humiliabuntur, ut ultra superbire non addant. Et notandum quam patenter hoc loco propheta se loqui in hac visione demonstret non de ea Babylone, in qua populus Judæorum captivus fuit, sed de ea potius, quæ per totum orbem est usque in finem sæculi. Nam sicut Jerusalem, id est Ecclesia civitas est eorum, qui cœlestia diligunt, sic Babylon civitas illorum est, qui præsens amant sæculum. Quicumque temporalia intimo corde diligit, civis est Babylonis istius ; et quicumque æternorum amore pascitur, civis est nostræ Jerusalem. Sed quia inter multitudinem civium Babylonis, qui tunc pereunt, raro quisquam civis Jerusalem invenitur, qui de sorte eorum tollatur, ideo fortasse, cum de multis dictum sit reprobis, quia *visitabo super orbis mala*, quasi singulari numero de electis nunc subditur :

VERS. 12. — « Pretiosior erit vir auro, et homo mundo obrizo. »

Vir namque vocari solet, qui viriliter et strenue agit, sicut scriptum est : « Viriliter agite, et confortetur cor vestrum omnes, qui speratis in Domino (Psal. xxx, 25). » *Homo* autem dicitur, qui rationali sensu a bestialibus moribus distinguitur, dicente Domino : « Vos autem greges pascuæ meæ homines estis (Ezech. xxxiv, 31). » Cujuslibet ergo talis viri vel hominis futuram gloriam prænuntians, ait : « Pretiosior erit vir auro, et homo mundo obrizo. » Nam ex quo Jesus reformaverit corpus humilitatis nostræ configuratam corpori claritatis suæ, *vir* quisque strenuus, licet nunc vilis ac despectus appareat, *erit pretiosior auro*, quia corpus ejus incontaminatum et indeficientem largumque splendorem

habeat. Et omnis homo, qui nunc inter bestiales A impiorum mores, rationabiliter vivit, erit tunc pretiosior mundo obrizo, id est purgato et recenti, novoque ac fulgenti auro. Quia sicut gloria resurrectionis ac demutationis innovabuntur sanctorum corpora, ut perpetuum fulgoris (98) claritatem retineant, nulloque jam senio veterascant.

Et hoc congrue ad *onus Babylonis* pertinet, quia et in eo valde gravatur multitudo reproborum in illo die, quod non solum de sua confusione dupliciter erubescit, sed et illorum gloriam, quos contempserat, priusquam in barathrum perditionis corruiat, intuetur. Vel quando tanta fient ab Antichristo signa et portenta, ut in errorem ducantur, si potest fieri, etiam ceciti, tunc « pretiosior erit vir auro, et homo mundo obrizo. » Pretiosior autem intelligitur B rarior. Omne enim, quod rarum est, dicitur et pretiosum. Rarus ergo tunc erit vir, quia, « cum venerit Filius hominis, putas inveniet fidem super terram? » (Luc. xviii, 8.) Sequitur :

VERS. 13. — « Super hoc cælum turbabo, et movebitur terra de loco suo propter indignationem Domini exercituum, et propter diem iræ furoris ejus. »

Super hoc, id est quia visitabo super orbis mala, cælum turbabo, et movebitur terra, quia cælum pariter et terra concutietur in adventu Judicis. Et inter in plerique (99) Babyloniorum, id est peccatorum sceleritatem animadversionis illius ad mentem sagaciter adducentes atque formidantes præcavent eam fugiendo ad poenitentiae remedium. Unde protinus de Babylone subditur :

VERS. 14. — « Et erit quasi damula fugiens, et quasi ovis, et non erit qui congreget. »

Damula quippe vel ovis timidum et mansuetum animal est. Babylon igitur sicut damula fugiens, et sicut ovis erit, quia peccatores conversi deposita ferocitate et superbia mansueti ac pavidi poenitendo fugient iram Judicis. « Et non erit, qui congreget eos, » rursus ad cives Babylonis, quia deceptor antiquus non valebit illos jam per actionem iniquitatis adungere peccatis, sed per opera justitiæ sociabuntur civibus Jerusalem. Unde et sequitur :

« Unusquisque ad populum suum convertetur, et singuli ad terram suam fugient. » Homines plurimi prædestinati in gloriam Dei, qui futuri sunt per adoptionem cohæredes Christi, nunc captivi tenentur in hac Babylone per peccatum. Incipiunt autem inde exire prius corde per confessionem iniquitatis et amorem justitiæ, deinde in fine sæculi etiam corpore inde separandi. Exeunt enim multi latenter de hac Babylone, quæ est confusio, et exeuntium pedes sunt cordis affectus. Qui primo confusi erant similibus cupiditatibus, incipiunt charitate distingui. Jam distincti non sunt confusi, et si adhuc corpore permisti sunt, desiderio tamen sancto separantur. Et propter commistionem corporalem nondum exie-

runt, sed propter affectum cordis coeperunt exire. Incipit enim exire, qui incipit amare. « Unusquisque ergo ad populum suum convertetur, et singuli ad terram suam fugient, » quia quicumque prædestinatus ad vitam, quicumque de populo sanctorum futurus, quicumque terram viventium hærediturus adhuc in Babylone per peccatum est, nequaquam ad subversionem ejus, id est usque ad mortem suam manebit in ea. Sequitur :

VERS. 15. — « Omnis, qui inventus fuerit, occidetur, et omnis, qui supervenerit, cadet in gladio. »

Invenitur in Babylone, et occiditur, qui præsentem vitam in peccatis finiens æternæ morti traditur. Supervenit autem in ea et gladio cadit, qui diu religiose, prout videbatur, vixerat, sed circa finem vitæ labitur in aliquod crimen, et ita demum sine poenitentia moriens per sententiam animadversionis divinæ præcipitatur in tartarum.

Vel diabolus, et omne dogma contrarium veritati fugiet quasi damula, nec erit, qui discipulos ejus congreget. Quia liberati a magistris pessimis convertentur ad populum ecclesiasticum, unde abducti fuerant, et ad terram suam, quæ est Ecclesia, fugient, et unusquisque ipsorum in eo, in quo invenitur, occiditur, ut hæreticus esse desistat, et quicumque supervenerit, cadet gladio spirituali. Sequitur :

VERS. 16. — « Infantes eorum allidentur in oculis eorum, diripiuntur domus eorum, et uxores eorum violabuntur. »

Qui infantum appellatione nisi tenera (100) adhuc opera designantur? Infantes igitur Babyloniorum allidentur (101) in oculis eorum, quia sæpe mens recta cernit, nec tamen audenter contra perversa se erigit, et renitens vincitur, dum hoc ipsum, quod agit, dijudicat et carnis suæ delectatione superatur. Nam sæpe et recta operatio exterius perditur, et tamen adhuc rationis lumen in corde retinetur, sicut Jeremias insinuat, qui, dum Sedechiæ captivitatem narrat, ordinem captivitatis internæ denuntiat, dicens : « Occidit rex Babylonis filios Sedechiæ in Reblatha in oculis ejus, et omnes nobiles Juda, oculos quoque Sedechiæ eruit (Jerem. LII, 10). » Rex quippe Babylonis est hostis antiquus, possessor intimæ confusionis, qui prius filios ante intuentis oculis trucidat, quia sæpe sic bona opera interficit, ut hæc se amittere ipse, qui captus est, dolens cernat. Nam gemit plerumque animus, et tamen carnis suæ delectationibus victus, bona, quæ gemit, amans perdit; ea, quæ patitur damna, considerat, nec tamen virtutis brachium contra regem Babylonis levat. Sed dum videns nequitiae perpetratione percutitur, ad hoc quandoque peccati usu perducitur, ut ipso quoque rationis lumine privetur. Unde Babylonis rex extinctis prius filiis Sedechiæ oculos eruit, quia malignus spiritus subductis prius bonis operibus post hæc intelligentiam lumen tollit. Quod recte Sedechias in Reblatha patitur. Reblatha quippe

(98) Cod. G., *perpetuum fulg.*

(99) Cod. G., *plurimique.*

(100) Cod. G., *terrena.*

(101) *Ibid.* *allidentur.*

multa hæc interpretatur. Ei enim quandoque et lumen rationis tollitur, qui pravo usu ex iniquitatis suæ multitudine gravatur. Bene itaque de Babylo- niis hic dicitur : « Quia infantes eorum allidentur, in oculis eorum. »

Quid autem domos eorum appellat nisi mentes ipsorum? *Diripiuntur ergo domus eorum* dum a malignis spiritibus omnia mentium eorum bona devorantur. Nam, postquam filios suos in oculis allidi suis sinunt, ad hoc usque infelicitatis deinde deveniunt, ut omnium virtutum supellectilem, quæ in domibus cordium ipsorum erat, amittant.

Uxores vero intelligentias ipsorum accipe, cum quibus rationalis animus opera bona velut legitimos filios gignit. Unde et per quemdam de sapientia dictum est : « Hanc amavi, et exquisivi a juventute mea, et quæsi mihi sponsam assumere, et amator factus sum formæ illius (*Sap. viii, 2*). » *Uxores* ergo violantur, cum intelligentiæ corrumpuntur. Nam quod hic uxores Babylo- niarum violari dicuntur, hoc ferme est quod apud Jeremiam Sedechias oculos amisisse refertur. Vel Medi intelliguntur magistri Ecclesiarum, qui allidunt *infantes* hæreticorum, eos videlicet, qui necdum ad perfectam venerunt ætatem erroris. Diripiunt *domos*, id est Ecclesias eorum. Violant *uxores*, id est pravam eorum sapientiam, doctrinamque perversam. Sequitur :

VERS. 17. — « Ecce ego suscitabo super eos Medos, qui argentum non quærunt, nec aurum velint. »

VERS. 18. — « Sed sagittis parvulos interficient, et lactentibus uteri non miserebuntur, et super filios eorum non parcat oculus eorum. »

Medi interpretantur *mensurati*. Et quid per *Medos* nisi dæmones exprimentur, qui nocere nequaquam valent nisi secundum mensuram, qua divinitus relaxantur, qui *nec argentum nec aurum*, sed internas divitias rapere quærunt? Quid autem parvulorum nomine nisi cogitatus designantur. Quid appellatione lactentium *uteri* nisi tenera opera, quæ adhuc velut lacte indigent admonitione blanda? Et quid per *filios* nisi viriles actus? Medi itaque *sagittis parvulos interficient*, quia et maligni spiritus spiculis tentationum bonos cogitatus allidunt. « Et lactentibus uteri non miserebuntur, » quia bona opera mox ut nata fuerint, et antequam roborentur, impie quærunt extinguere. « Et super filios non parcat oculus eorum, » quia ubicunque vident robustos et viriles actus, non desistunt eos impugnare. Tanto enim quisque gravioribus urgeri plerumque solet dæmonum infestationibus, quanto ipse fortior est in bonis operibus. Vel nos utinam nec argentum nec aurum velimus eloquentiæ et sapientiæ secularis, sed filios hæreticorum et omnium, qui decepti sunt, interficiamus sagittis spiritalibus, id est Scripturarum testimoniis, et qui lacte nutriuntur erroris, absque ulla misericordia trucidentur, ut elementis crudelitate pereant, nulliusque misereamur infantiæ, ut illa beatitudine digni simus! « Beatus, qui

tenebit, et allidet parvulos tuos ad petram (*Psal. cxxx, 9*). » Post filiorum autem, id est post honorum operum amissionem subjungitur et ipsius civitatis æterna perditio. Nam sequitur :

VERS. 19. — « Et erit Babylon illa gloriosa in regnis, incluta in superbia Chaldæorum, sicut subvertit Dominus Sodomam et Gomorrhæam. »

Babylon gloriosa est in regnis, quia confusa sæculi dignitas amatoribus mundi præclara videtur, et divitiæ, voluptatesque carnalibus æstimantur optimæ. Chaldæi vero interpretantur *captivantes*, vel *quasi dæmones*. Iniqui etenim, qui et ipsi iniquitatem perpetrant, et ad iniquitatem alios persuadendo trahunt, nimirum captivantes sunt. Qui recte quoque et *quasi dæmones* interpretantur, quia il, qui alios ad iniquitatem persuadendo pertrahunt, in semetipsis ministeria dæmonum ad iniquitatem suscipiunt, quamvis dæmones per naturam non sint.

In istorum ergo mente superba valde est *Babylon incluta*, quoniam « lætantur, cum male fecerint, et exsultant in rebus pessimis (*Prov. ii, 14*). » Sed ista Babylon quandoque erit sicut Sodoma et Gomorrhæa, ut perpetuo subversa devoretur incendio. Sed interim quid patiat, audiamus. Sequitur :

VERS. 20. — « Non habitabitur usque in finem, et non fundabitur ad generationem et generationem. »

Christus namque manere in Ecclesia se pollicitus est usque in finem sæculi. Quo contra Babylon « non habitabitur usque in finem, » quoniam « in malevolam animam non introibit sapientia (*Sap. i, 4*), » quæ est Christus, « nec habitabit in corpore subdito peccatis (*ibid.*). » *Usque in finem* vero dicit eam non habitari, quia notum est omnitus, quod in ea mente Deus post finem vitæ præsentis nullatenus habitat, in qua prius, quam finiret temporalem vitam, nullatenus habitavit. *Et non fundabitur in fundamento*, quod est Christus, *usque ad generationem et generationem*, id est nec in generatione antiqui populi Dei, qui præcessit adventum ejus, nec in generatione novelli, qui vocatur Christianus. Sequitur :

« Nec ponet ibi tentoria Arabs, nec pastores requiescent ibi. » *Arabs* interpretatur *occidentalis* sive *campester*. Et *occidentalis* jure vocatur, qui per occasum veri solis, id est per mortem Christi mortuus est peccato. *Campester* quoque est, qui charitate dilatatus copiosos boni operis fructus facit ut fertilis campus. Illic igitur Arabs in Babylone tentorium non ponit, quia mentem in ea non locat. *Nec pastores* animarum *requiescent ibi*, sed potius laborant, quia sermonem suum contemni vident. Urbs itaque confusionis subvertetur sicut Sodoma, ut nullum in eo maneat pristinæ mansionis vestigium, sed postquam fuerit cælum novum, et terra nova, et præterierit figura hujus mundi, non habitabitur in perpetuum, nec eundem statum recipiet. *Non ponet ibi tentoria Arabs*, qui dicitur *occidentalis* et *vesperinus*, eo quod præteritorum obliviscatur, et semper se extendat ad priora. *Nec requiescent ibi pastores,*

qui gregem Domini pascunt, vel angeli, qui præsunt A humano generi. Nam in fine sæculi vel mortis uniuscujusque decidet omnis præsens gloria et superbia, nec iste mundi status erit ultra, sed peribit in æternum. Sequitur :

VERS. 21. — « Sed requiescent ibi bestię, et domus eorum replebuntur draconibus, et habitabunt ibi struthiones, et pilosi saltabunt ibi. »

VERS. 22. — « Et respondebunt [*Vulg.* ibi] ululæ in ædibus ejus, et sirenes in delubris voluptatis. »

Bene iidem sævi dæmones semper in *Babylone*, quæ est confusio, requiescunt. *Domus* vero *Babyloniorum* mentes sunt sæcularium. Quid autem per dracones nisi malitia, et quid per struthiones nisi hypocrisis designatur? Struthio quippe avis est, quæ pennas quidem habet, sed nequaquam volat. Sic et hypocrita pennas quidem bonæ operationis habere videtur, sed nunquam a terra per desiderium elevatur. « *Domus ergo* *Babyloniorum* replentur draconibus, et habitant ibi struthiones, » quia in confusis delictorum (102) mentibus in latens (103) malitia callide occultatur, et simulatio bonitatis foras ostenditur.

Quid vero pilosorum appellatione nisi quorumlibet peccatorum asperitas designatur? *Pilosi* enim ab humana effigie superius inchoant, sed ab extrema parte in bestias desinunt. Sic et peccatum licet quasi ab obtentu rationis plerumque incipiat, semper tamen ad irrationabilem finem perducit. *Pilosi* igitur in *Babyloniorum* domibus saltant, quia in confusis mentibus peccata dura atque aspera quasi grege facto concorditer ludunt.

Ululæ vero sunt aves a planctu et luctu nominatæ. Cum enim clamant, aut fletum imitantur, aut gemitum. *Sirenes* autem monstra sunt partim virgines et partim volucres, ut fertur, quæ cantu suo nimium delectabili navigantes ad periculosa loca pertrahunt. Quid igitur ulularum nomine nisi dæmones figurantur, qui sæculi tristitiam suggerunt, quæ mortem operatur? Quid autem per *sirenes* nisi deceptorum spiritus exprimuntur, qui vanam suadendæ lætitiæ ad periculum æternæ mortis incautus trahunt? Itaque in ædibus *Babylonis* sunt ululæ atque sirenes, quia in confusis mentibus nunc tristitiam nunc lætitiæ faciunt nequissimi spiritus. Respondent igitur *ululæ in ædibus ejus*, dum in turbulentis mentibus tristitia tristitiæ occurrit, et planctus planctum adducit.

Et *sirenes* respondent sibi in *delubris voluptatis*, quia in illis, qui voluptatibus carnis deserviunt, lætitiæ fallax inani lætitiæ rependitur, et gaudium, quod ex alicujus delectationis opportunitate nascitur, occurrit gaudio, quod ex alicujus peccati perpetratione provenit. Tales *sirenes*, id est fallaces lætitiæ semper sunt in mari, id est in hoc sæculo, et navigantes, id est ad portum cœlestis patriæ

(102) Codd., *dilectorum*.

tendentes submergere quærunt. Delubra vero voluptatis corpora sunt voluptuosorum, vel mentes eorum. Vel per omnes has bestias intelliguntur dæmones, quibus traditur *Babylon* ad puniendum. Sequitur :

CAPUT XIV.

VERS. 1. — « Prope est, ut veniat tempus ejus, et dies ejus non elongabuntur. »

Id est tempus et dies *Babylonis*, quo pereat, jam imminet, sicut et *Moyses* cecinit : « Juxta est dies perditionis, et adesse festinant tempora (*Deut.* xxxii, 35). » Sequitur :

« Miserebitur enim Dominus Jacob, et eliget adhuc de *Israel*, et requiescere eos faciet super humum suam. » — « Miserebitur enim Dominus Jacob, et eliget adhuc de *Israel*, » quia in veritate reliquiæ convertentur *Elia* prædicante, reliquiæ, inquam, *Jacob* ad Deum fortem, id est ad Christum, quia « vocabitur nomen ejus Admirabilis, consiliarius, Deus fortis (*supra* ix, 6). » — « Et requiescere eos faciet super humum suam, » sicut per *Ezechielem* pollicetur, dicens : « Ecce ego aperiam tumulos vestros, et educam vos de sepulcris vestris, populus meus, et inducam vos in terram *Israel* (*Ezech.* xxxvii, 12). »

Illud tamen, quod ait : « Prope est, ut veniat tempus ejus, » id est *Babylonis*, ut destruat, potest ad adventum Salvatoris referri, in quo per totum orbem subversa est *Babylon*, id est, veterum errorum ac vitiorum confusio gentibus ad fidem conversis. « Miserebitur enim Dominus Jacob, id est, populo *Judæorum*, qui per mortem carnis eum supplantare studuit, cum in die Pentecostes ex ipsis tria millia *Petro* prædicante crediderunt. « Et eliget adhuc de *Israel* (*Act.* ii, 41), » quia deinceps multa millia per doctrinam apostolorum conversa sunt. « Et requiescere eos faciet super humum suam, » id est in *Ecclesia*, dum sæculi cupiditatibus exuti omnia, quæ mundi sunt, reliquerunt, et apostolicæ doctrinæ adhærentes cor unum et animam unam omnes habuerunt. Sequitur : « Adjungetur advena ad eos, et adhærebit domui Jacob. »

VERS. 2. — « Et tenebunt eos populi, et adducent eos in locum suum : et possidebit eos domus *Israel* super terram Domini in servos et ancillas, et erunt capientes eos, qui se ceperant, et subjicient exactores suos. »

Adjungetur advena, id est gentilis populus ad eos, qui de circumcissione crediderunt, ut ex utroque fiat unum ovile. *Et tenebunt eos populi gentilium*, quia prædicationem eorum avidè suscipient. Prædicatores enim non tenet, qui doctrinam eorum abjicit. *Et adducent eos*, id est gentiles, in locum suum, id est in *Ecclesiam*. *Et possidebit eos domus Israel*, id est apostoli, super terram Domini, id est in *Ecclesia*, in servos et ancillas, quia obedientes erunt doctrinæ eorum. *Et erunt capientes eos, qui se ceperant*, id est convertent eos, qui se decipiebant. Et

(103) Cod. G., *latens*.

subjicient extractores suos, quia malignos spiritus vincunt. Extractores enim sunt dæmones, qui malæ persuasionis nummum semel hominibus commendatum quotidie cum usuris exigere solent. Sequitur :

VERS. 3. — « Et erunt in die illa : cum requiem dederit tibi Deus a labore tuo, et a concussione tua, et a servitute dura, qua ante servisti, sumes parabolam istam contra regem Babylonis et dices :

VERS. 4. — « Quomodo cessavit exactor, quievit tributum ? »

VERS. 5. — « Contrivit Dominus baculum impiorum, virgam dominantium. »

VERS. 6. — « Cædentem populos in indignatione plaga insanabili, subjicientem in furore gentes, persequentem crudeliter. »

« Cum requiem dederit tibi Deus a labore tuo, » id est universas tibi concupiscentias abstulerit, et sua gratia te feverit juxta illud : « Venite ad me omnes, qui laboratis et onerati, etc. (*Matth. xi, 28*). » Quid enim in hac vita laboriosius quam terrenis desideriis æstare? Aut quid hic quietius quam hujus sæculi nihil appetere? « Et requiem tibi dederit a concussione tua, » ut jam non sis parvulus fluctuans, et circumferaris omni vento doctrinæ, sed dicas ei : « Susceptor meus, non movebor in æternum (*Psal. lxi, 3*). » Est autem dura quædam servitus, de qua Dominus ait : « Omnis, qui facit peccatum, servus est peccati (*Joan. viii, 34*). » Et Petrus : « A quo enim quis superatus est, hujus et servus est (*II Petr. ii, 19*). »

Sed ab hac servitute Dominus liberat, qui dicit : « Si vos filius liberaverit, vere liberi eritis (*Joan. viii, 36*). »

« Sumes parabolam, inquit, contra regem Babylonis, id est contra diabolum, qui est rex confusionis. *Extractor* etiam est importunus iste persuasor, qui semel in paradiso humano generi pecuniam peccati commodavit, sed crescente iniquitate hanc multiplicato fenore quotidie exigit. *Tributum* quoque est, quod unusquisque ei, dum peccat, solvit. Sed per Christum « cessavit exactor, et quievit tributum, » quia, sicut Joannes ait : « Omnis, qui natus est ex Deo, non peccat, sed generatio Dei conservat eum, et malignus non tangit eum (*I Joan. v, 18*). » Unde et additur :

« Contrivit Dominus baculum impiorum, virgam dominantium. » Impii namque dominatores erant maligni spiritus in hoc mundo. Baculus et virga eorum potestas lædendi, quam habebant, potest intelligi. Sed hunc *baculum et virgam* Christus jam *contrivit*. Cædebat enim hæc virga *populos in indignatione plaga insanabili*, quia dæmones humanum genus graviter flagellabant, et ei mortiferas peccati plagas inferebant, atque *subjiciebant in furore gentes*, quia sæpe tyrannidi violenter eas affligendo subdebant, et peccatis servire cogebant, et persequabantur eas *crudeliter* intus et foris, non solum animas ipsarum lædendo, sed etiam corpora vexando

A miserabiliter ac occidendo. Possunt hæc et de fine sæculi intelligi.

« Et erit, inquit, cum requiem dederit tibi Deus. » Requiem enim a labore tuo dabit tunc tibi Deus, sicut scriptum est : « Beati mortui, qui in Domino moriuntur. Amodo jam dicit Spiritus, ut quiescant a laboribus suis (*Apoc. xiv, 13*). » Et a concussione tua, « quia justus in æternum non commovebitur (*Psal. cxii, 6*). » Et alibi scriptum est : « Non dabit in æternum fluctuationem justo (*Psal. lxxv, 23*). » Et a servitute dura, de qua dicit Apostolus : « Non enim quod volo bonum, hoc ago, sed quod odi malum, illud facio (*Rom. vii, 15*). » Et post aliquanta : « Igitur ego ipse mente servio legi Dei; carne autem legi peccati (*ibid., 25*). » Ab hac servitute liberi erimus, quando jam morti insultantes dicemus : « Ubi est, mors, victoria tua? Ubi est, mors, stimulus tuus? Stimulus enim mortis peccatum est (*I Cor. xv, 55*). » *Extractor* vero nondum penitus cessavit a nobis, neque tributum quievit, quia dum hic vivimus, diabolus nos ad peccandum incitare nititur, et vitare peccatum ex toto non possumus, sed « in multis offendimus omnes. Non est enim homo justus in terra, qui faciat bonum, et non peccet (*Jac. iii, 2*). » Sed postquam mortale hoc induerit immortalitatem, *extractor* jam cessabit, et *tributum* jam quiescet, quia nec diabolus ultra suadebit cuiquam, ut peccet, nec aliquis peccabit. Bene ergo tunc electorum populus in regno triumphans exultat, dicens : « Quomodo cessavit exactor, quievit tributum ? » Ibi enim vera libertas erit. Nam et hoc tunc vere complebitur, quod subjunctum est : « Contrivit Dominus baculum impiorum, » etc.

Cum enim Christus diabolum et angelos ejus de hoc mundo expellens in infernum perpetualiter includerit, tunc omnino conteret baculum et virgam eorum, ne jam nos deinceps percutere valeant, sed et ipsi persecutionibus æternalium tormentorum subjaceant. Sed ad superiorem sensum revertentes videamus sequentia. Nam ligato mundi principe et gentibus ad fidem conversis impletum est, quod nunc subjungitur :

VERS. 7. — « Conquievit et siluit omnis terra, gavisata est et exultavit. »

VERS. 8. — « Abietes quoque lætatae sunt super te, et cedri Libani. Ex quo dormisti, non ascendit, qui succidat nos. »

VERS. 9. — « Infernus subter conturbatus est, in occursum adventus tui suscitavit tibi gigantes. Omnes principes terræ surrexerunt de solis suis, omnes principes nationum. »

VERS. 10. — « Universi respondebunt et dicent tibi, et tu vulneratus es sicut et nos, nostri similis effectus es. »

Gentibus enim ad Christum converis *conquievit omnis terra*, sicut ipse ait : « Tollite jugum meum super vos et discite a me, (*Matth. xi, 29*), etc. » Et *siluit* sedatis pravæ actionis tumultibus. Nam, sicut et supra diximus, omnis iniquitas habet apud secreta

judicia Dei voces clamoris. Unde scriptum est : A « Clamor Sodomorum et Gomorrhæ multiplicatus est (Gen. xviii, 20). » *Siluit* igitur omnis terra, quia totus orbis Christi gratia repletus est, et a malitiæ tumultibus liberatus est in his, qui crediderunt. *Gavisus est et exultavit*, sicut scriptum est : « Dominus regnavit, exsultet terra (Psal. xcvi, 1). »

Libanus autem *candidatio* dicitur. Et quid per Libanum nisi mundus iste signatur, qui amatoribus pulcher et candidus est? Quippe per *abies* et cedros *Libani* nisi principes sæculi hujus figurantur? *Abies* igitur et *cedri Libani lætatæ sunt* super Babylonis regem, quia et potentes ac nobiles hujus mundi gaudent super religatione hostis antiqui. Sed prius *terra siluit ac gavisus est*, ac deinde *abies et cedri lætatæ sunt*, quia prius crediderunt populi, post etiam principes. *Lætatæ sunt* itaque cedri dicentes : *Ex quo dormisti*, id est ex quo sopita est sævitia tua, ex quo tibi potestas est ablata, ex quo religatus es in abyso per triumphum Christi crucis, *non ascendit* aliquis dæmonum de abyso, *qui succidat nos*, ut tu faciebas, id est qui supplantet nos, et a statu rectitudinis corruere faciat. Victo isto forti, et direptis vasis ejus etiam cæteri satellites cessaverunt.

« Non ascendit, qui succidat nos. » Quantos isti lignorum succisores suis securibus succiderunt et corruere fecerunt! Terra quidem conquievit et gavisus est, ex quo perdidisti potestatem lædendi. Sed *infernus subter conturbatus est* præ magnitudine stuporis et admirationis, cum tu captivus illuc deducereris, quem nunquam vinci posse putabat. Et *in occursum tuum suscitavit tibi gigantes*, id est robustos sæculi principes, quia jam illuc erant damnati insultantes ruinæ tuæ. Nam quos gigantes suscitaverit, subditur :

« Omnes, inquit, principes terræ surrexerunt de solis suis, » etc. Quid enim hic soliorum, id est sedium nomine nisi loca pœnarum designantur, in quibus isti principes erant? *Surrexerunt ergo de solis suis* in occursum Satanæ corruenti insultantes ei. Unde et Ezechiel ait : « Loquentur ei potentissimi robustorum de medio inferni, qui cum auxiliatoribus ejus descenderunt, et dormierunt incircumcisi interfecti gladio (Ezech. xxxii, 21). »

Omnes principes nationum de inferno respondebunt ei victo post diem judicii. Similiter respondebunt post passionem Domini, dicentes : « Et tu vulneratus es sicut nos, nostri similis effectus es. » Ac si dicant : Nunc minus dolemus interfectos nos esse divinæ animadversionis gladio, cum et tu eodem vulneratus gladio corrueris, qui nos occidi fecisti. Licet enim dolor et tristitia eorum sit semper immensa, qui torquentur in illis suppliciis, et ex consortio Satanæ tunc credatur crescere; aliquod tamen solatium erit eis, dum hunc viderint eadem tormenta sustinere, quæ ipsi patiuntur per eum

decepti. Nam et dives, qui ardebat apud inferos, cupiebat, ne quinque fratres sui, quos reliquerat, in eodem loco tormentorum descenderent (Luc. xvi, 30). Consequens ergo est, ut quo amicos venire nolebat, illuc inimicos optaret demergi. Non itaque dubium est eos, qui in inferno sunt, cupere diabolum, per quem seducti sunt, ibidem cruciari, ut vel sic vindicentur de eo, licet a pœnis non liberentur. Dicunt igitur insultantes ei : « Et tu vulneratus es sicut nos, nostri similis effectus es, » atque adjungunt :

VERS. 11. — « Detracta est ad inferos superbia tua, concidit cadaver tuum : subter te sternetur tineas, et operimentum tuum erunt vermes. »

Qui se extollebat super omnia, *detractus est ad inferos*, ut sit infra omnia. *Cadaver* ejus, id est ipse dejectus a supernis sedibus. *Cadaver* enim a cadendo dicitur. Stetit autem hoc cadaver, dum Satanæ in mundo regnaret. Sed *concidit cadaver* ejus, quando ipse præcipitatus est in abyssum.

Tinea vero vestimentorum vermis est dicta, quod teneat, et eo usque insideat, ut erodat. *Sternetur ergo tinea* sub antiquo hoste, quia sub ipso erunt tormenta mordacia, ubi perpetuo jacens corrodatur. Quid autem nomine vermium nisi inquietudo pœnarum designatur? Natura enim vermium est momentis singulis incessanter moveri. Satanæ igitur *operimentum erunt vermes*, quia super eum universa mordacissimarum pœnarum genera stipabuntur, quibus sine fine putrefactus incessabiliter agitabitur et lacerabitur. Hæc requies diaboli, hic lectus ejus est.

Putredo et tinea et operimentum vermium pœnæ sunt æternæ, quas propria gignit conscientia, vel suppliciorum materia, quæ ex propriis peccatis nascitur. Sicut enim quandiu cadaveris materia est, et aliquis humor in cadavere, vermes nascuntur ex putredine; sic ex ipsa materia peccatorum supplicia gignuntur. Sed inter hæc ad memoriam propheta revocat, quantæ dignitatis olim miser iste fuerit, et quot lapsuum gradibus inde corruerit. Nam subdit :

VERS. 12. — « Quomodo cecidisti de cælo Lucifer, qui mane oriebaris? Corruisti in terram, qui vulnerabas gentes? »

D VERS. 13. — « Quid dicebas in corde tuo (104) : In cælum conscendam, super astra cæli exaltabo solium meum, sedebo in monte Testamenti in lateribus aquilonis. »

VERS. 14. — « Ascendam super altitudinem nubium, similis ero Altissimo. »

VERS. 15. — « Verumtamen ad infernum detraheris in profundum laci. »

Sicut Lucifer omnibus aliis sideribus est clarior, sic angelus iste omnibus reliquis angelis lucidior fuit, et splendidior. Qui et *mane* oriebatur, quia in exordio novæ lucis gloria conditionis clarus admirabili splendore radiabat. Sed tam felix creatura quo-

(104) Alias, *de corde tuo*.

modo tam infeliciter cadere potuerint, propheta miratur.

Primo enim *de cælo* cecidit, amissa beatitudine, et statu dignitatis angelicæ, et in mundo principatum iniquitatis super idololatrias gentes habuit. Unde et « princeps mundi (*Joan. xii, 31*) » appellatus est. Sed prædicantibus apostolis corruit *in terram, qui vulnerabat gentes*, id est qui mucrone tentationis sauciabat mentes eorum, quia eos, quos per idololatriam possederat, amisit, et Judeos paucasque gentium reliquias infideles nunc tenet. De gentibus, quas vulnerabat in terram cecidit, id est de eorum mentibus, qui ad fidem venerunt, in corda illorum, qui in incredulitate permanserunt; non quia in eis et ante non esset, sed quia ab istis exclusus amplius illis dominari cœpit.

Ruinam vero ejus excepit terra, quoniam terrena sapientum mentes invasit totus, qui de supernis projectus præsumebat in corde suo, dicens: *In cælum conscendam*, id est super sanctos Dei præclaros *exaltabo solium meum*. Annon in cælum Satanæ conscendit, quando cor Salomonis intravit? Annon super astra Dei solium suum posuit, quando Saul et Salomonem et Judam et septimum diaconem sibi subjecit? Quod si in primordio superbiæ suæ ista cogitavit, antequam de cælo projectus esset, cœli nomine electorum mentes designantur angelorum, quam ingredi superbus iste adversus Deum, et occupare voluit. Et astrorum vocabulo singulæ beatorum spirituum personæ, quas subjugare sibi tentavit, quando ex ipsis eos, qui nunc dæmones appellantur, in perniciem traxit.

Deinde « sedebo, inquit, in monte Testamenti in lateribus aquilonis. » Malignus enim Spiritus *montem Testamenti* tenuit, quia Judaicum populum, qui legem acceperat, sibi in perfidiam subjugavit. Quando enim corda doctorum tenet, *montem Testamenti* diabolus possidet. Qui etiam *in lateribus aquilonis* sedet, quia mentes hominum frigidas præsumendo inhabitat. Adhuc autem superbus iste præsumptor adjugebat, dicens:

« Ascendam super altitudinem nubium, » id est angelorum vel prædicatorum. « Et similis ero altissimo. » Et ut beatus Papa Gregorius loquitur (*lib. xxiii Mor. c. 6*): « Quisquis bonum se habere singulariter gaudet, quisquis videri sublimior cæteris quærit, illum imitatur, qui despecto bono societatis angelorum, sedem suam ad aquilonem ponens et Altissimi similitudinem superbe appetens per iniquum desiderium quasi ad quoddam culmen conatus est singularitatis erumpere. » Ad cujus similitudinem ducitur, qui, singulare culmen appetens et socialem angelorum vitam despiciens, ait: « Ascendam super altitudinem nubium, similis ero Altissimo. » Qui quoniam perverso ordine, id est per superbiam Deo similis fieri voluit, a contrario dissimilitudinem habere meruit. Nam ille ait: « Discite a me, quia mitis sum, et humilis corde (*Matth. xi*) »

et iste « est rex super omnes filios superbiæ (*Job xli, 25*). » Ille, « cum in forma Dei esset, non rapinam arbitratus est esse se æqualem Deo (*Philip. ii, 6*); » iste per rapiam usurpare similitudinem Dei, quam naturaliter non habuit, cupiens: « Similis, inquit, ero Altissimo. » Sicut ille est caput omnium justorum, et omnes justi membra ejus, sic et iste caput est omnium iniquorum, et omnes iniqui membra hujus. Sicut ille super omnia est Altissimus, sic et iste infra omnia dejectissimus, et omnibus modis omnino contrarii sunt Satanæ et Altissimi.

Postquam præsumptionis hujus Satanæ cogitationes Spiritus sanctus per prophetam nobis indicavit: « Veruntamen, inquit, ad infernum detraheris; » licet in cælum conscendere cogitares; « et in profundum lacus » demergeris, qui ad Altissimi similitudinem exaltari optasti. *Infernus* vero dicitur *lacus*, quia hos, quos semel ceperit, semper fluctuantes et trepidos tormentis circumfluentibus absorbet. In quem præcipitari adversarium hunc non sufficit, nisi et *in profundum* ejus, novissimum demergatur, ut crucietur infra omnia, qui gloriari voluit super omnia. Quem quia electi in regno constituti semper visuri sunt perpetuæ ignominie mancipari, ut inde gaudium eorum crescat, recte subjungitur:

VERS. 16. — « Qui te viderint, ad te inclinabuntur, teque prospicient; nunquid iste est vir, qui conturbavit terram, qui concussit regna? »

VERS. 17. — « Qui posuit orbem desertum, et urbes ejus destruxit, vincis ejus non aperuit carcerem? »

Qui te viderint in novissimo *profundi lacus* *Barathro*, *ad te inclinabuntur* velut ad aliquem in imo putei constitutum. *Teque prospicient*, quia longe eris, et te mirantes in pœnis dicent: « Nunquid iste est vir, quia conturbavit terram? » Diabolus enim parabolice *vir* appellatur, sicut et in Evangelio dicitur de illo: « Inimicus homo hoc-fecit. Qui conturbavit et concussit regna (*Matth. xiii, 28*); » quia tribulationes et bella movet in mundo, et omnia mala reliqua.

« Qui posuit orbem desertum, quia veri Dei cultum gentibus abstulit. « Et urbes ejus destruxit, » quia veræ religionis ædificia de cordibus hominum subvertit. Vel *terram conturbavit*, id est eos, qui audiunt cum Adam: « Terra es, et in terram ibis (*Gen. iii, 19*). » Et *regna Ecclesie concussit* tentando, non subvertit. *Et orbem fecit esse desertum*, ut nullam haberet virtutem, sed vitiis subjaceret, quibus plena est gentium solitudo. *Urbes quoque ejus destruxit*, ut de Ecclesiis Christi faceret Synagogas Satanæ hæretica peste corrumpens fidem earum.

Vincis ejus, id est illis, qui peccatorum vinculis erant astricti, *non aperuit carcerem* cordis eorum, quia non dedit eis libertatem, ut egrederentur per confessionem. Omnis enim, qui male agit, conscientiam suam sibi carcerem facit, quia, dum vindic

cante (105) Deo in malitiæ suæ tenebris relinquitur, A quasi inter semetipsum includitur, ne evasionis locum inveniat, quem invenire non meretur. Talibus ergo *vinctis* Satanæ *carcerem non* aperit, quos in se ipsis semper inclusos tenere satagit. Sequitur :

VERS. 18. — « Omnes reges gentium, universi dormierunt in gloria, vir in domo sua. »

VERS. 19. — « Tu autem projectus es de sepulcro tuo quasi stirps inutilis, pollutus et obvolutus cum his, qui interfecti sunt gladio, et descenderunt ad fundamenta laci quasi cadaver putridum. »

VERS. 20. — « Non habebis consortium neque cum eis in sepultura. Tu enim terram (106) disperdidisti, tu populum tuum occidisti. »

Si nunc isti *reges* mystice sunt accipiendi, quos intelligere debemus nisi rectores Ecclesiarum, qui B defuncti dormiunt *in gloria*, quoniam apud Deum requiescunt in honore? Et unusquisque *in domo sua*, id est in mansione sua, quia « in domo Patris mansiones multæ sunt (Joan. xiv, 2), » ubi quisque pro merito suo mansionem accipit.

« Tu autem projectus es de sepulcro tuo, » id est de corde gentilium, ubi velut in sepulcro putridus jacebas. Sepulcra enim mortuos tegunt. Et quis alius mortem pertulit, quam is, qui conditorem suum despiciens vitam reliquit? Quem videlicet mortuum cum humana corda per consensum malitiæ suscipiunt, ejus procul dubio sepulcra fiunt. Sed *de sepulcro suo projicitur*, cum per Dei gratiam de corde hominum expellitur.

Stirps autem, ut dictum reperi, proprie est, quod C in radicibus arborum nascitur juxta stipitem, ideoque dicitur *inutilis*, quia virtutem aufert arbori poma ferenti, neque fructum gignit. Si enim inde abscinderetur, proficeret plurimum arbori ad recuperandam virtutem, et ad fructificandum. Ita et hostis antiquus in radice cordis humani juxta illud, quod in eo principale est, quasi *stirps* juxta stipitem arboris plerumque per immissionem malarum cogitationum velut nascitur, crescit ac roboratur et virtutem rationis auferens non sinit facere fructum boni operis. Sed exinde nonnunquam absciditur ferro verbi Dei, ut in ignem mittatur, et homo virtutem recuperat bene fructificandi.

Apte ergo Satanæ *de sepulcro suo quasi stirps inutilis* dicitur esse *projectus*. Et *projectus* est *pollutus* et *obvolutus* velut *cadaver putridum*, quod nemo tangere, vel ejus fetorem teterrimum sufferre potest. Cadaver enim diaboli *putridum* ob magnitudinem peccatorum dubitare non poterit, qui legerit peccatis esse fetidissimum ipso peccatore dicente : « Putruerunt, et corruptæ sunt cicatrices, etc. (Psal. xxxvii, 6). » Hinc e contrario virtus boni odoris est.

« Projectus est pollutus, » quia, qui pulcher in humana mente videbatur? dum adhuc ibi malitia ejus placeret, tandem ut ejiceretur, cognitum est

(105) Cod. G., *judicante*.

(106) Alias, *terram tuam*.

quantæ sit turpitudinis et immunditiæ. « Et obvolutus, » quia cœlestium judiciorum potentia simul undique coarctatus est et circumobsitus. « Projectus est, inquam, cum iis, qui interfecti sunt gladio Dei, et descenderunt ad fundamenta laci; » quia cum cæteris peccatoribus in tartarum novissime præcipitatur.

Non habebit in sepultura consortium vel cum eis, qui interfecti sunt gladio judicis, quia alterius pœnæ est auctor delicti, et alterius, qui ab auctore compulsus est. Et illis quasi quædam requies erit, quod ad comparationem hujus utcumque tolerabilius cruciabantur. Ipse enim omnem *terram* disperdidit, quia humanum genus post se in perniciem traxit. Sequitur :

« Non vocabitur in æternum semen pessimum, » quia nulla unquam erit apud Deum recordatio eorum, qui semel ob id apud inferos damnati sunt, quia dæmonum malitiam pessimorum quasi patrum vestigia sequebantur. Vel quia prope est, ut omnis impiorum generatio per adventum judicis exterminetur. Unde et subditur :

VERS. 21. — « Præparate filios ejus occisioni in iniquitate patrum eorum (107). »

Tunc enim angeli præparabunt *occisioni filios* hujus Satanæ in *iniquitate* pessimorum *partum eorum*, quam imitati fuerant, id est, dæmonum vel peccatorum hominum, quando « mittet Filius hominis angelos suos, et colliget de regno ejus omnia scandala, et eos qui faciunt iniquitatem, et mittent eos in caminum ignis (Matth. xiii, 41). » Nam quod hic subjungit : « Non consurgent, nec hæreditabunt terram, nec implebunt faciem orbis civitatum. » Hoc est quod alibi de Antichristo legimus : « Non erit semen ejus, neque progenies in populo suo, nec ullæ reliquiæ in regionibus ejus (Job xviii, 19). Hoc enim caput malorum cum omni corpore suo peribit in adventu judicis. Inde est quod sequitur :

VERS. 22. — « Et consurgam super eos, dicit Dominus exercituum, et perdam Babylonis nomen, et reliquias, et germen, et progeniem, dicit Dominus. »

VERS. 23. « Et ponam eam in possessionem ericii, et in paludes aquarum et scopabo eam in scopam terens, dicit Dominus exercituum. »

D In die enim judicii, in die ultionis consurgit Dominus *super eos* ut perdat *Babylonis nomen* et *reliquias*, ne vel memoria ejus remaneat, vel aliquis de progenie ejus. Qui facit peccatum, semen diaboli est. Cujus seminis filii, id est pessimæ cogitationes et actiones ejus, quæ ex dæmonibus natæ sunt, trucidandæ sunt, ne ultra consurgant, et possideant terram cordis nostri, et impleant urbibus vitiorum. Et quia non est hominis perfecta victoria, consurgit ipse Dominus adversum pessimos filios, et disperdit ex nobis nomen et reliquias confusio- nis, atque germen ejus.

(107) Alias, *suorum*.

« Et ponet eam in possessionem ericii, et in paludes aquarum. » Quis est iste ericius nisi antiquus hostis, cujus omne corpus aculeis et spinis est circumdatum? Ipse enim caput omnium malorum est, et omnis multitudo malorum corpus ejus, et unusquisque perversorum, qui infirmiores operarios iniquitatis obumbrat, et protegit, et quos tangit bonos, per malitiam pungit, in hoc corpore spina est. Tot namque spinas, quibus circumtegatur, et muniatur, hujus ericii corpus habet, quot defensores malorum. *Ponitur ergo Babylon in possessionem ericii*, quoniam asperrimo diabolo perpetualiter in tormentis possidenda traditur, cum audit: « Ite, maledicti, in ignem æternum, qui præparatus est diabolo, et angelis ejus (*Matth. xxv, 41*). » *Paludes vero aquarum tartareos lacus, quibus animæ suffocantur, et ardent velut in aquis ferventibus, intellige, de quibus infra scriptum est: « Quia convertentur torrentes ejus in picem (*Isa. xxxiv, 9*). »*

« Et scopabo, inquit, eam in scopa terens. » Quia sicut contra scopam fortiter pressam nihil sordium stare valet, aut palearum, sic ante districtam judicis sententiam resistet nullus reproborum. Unde et Joannes de eo prævidens hanc scopam ait: « Cujus ventilabrum in manu ejus et purgabit aream suam, et congregabit triticum in horreum suum, paleas autem comburet igne inextinguibili (*Matth. iii, 12*). » Nam judicis sententiam, quæ hic appellatur *scopa*, ipse ventilabrum nominat.

Vel juxta sententiam Domini, qui curas hujus sæculi, et fallaciam divitiarum *spinas* appellavit (*Marc. iv, 18*), ericius intelligi potest, qui gaudet in incerto divitiarum, et punitionibus peccatorum armatur. Et tales habitatores habet Babylon deserta virtutibus, ubi non est ager, qui fructus afferat, sed *paludes* infertiles limosæ ac lutosæ, id est immundæ conscientiæ, in quibus sordidi spiritus quasi animalia cæno gaudentia reptant. Quamobrem clementissimus Dominus scopabit eam vehementissime terens, et quasi quodam everticulo ad purum usque mundabit, ut Babylonis semina perdat. Sequitur:

VERS. 24. — Juravit Dominus exercituum dicens: si non ut putavi, ita erit; et quomodo mente tractavi. »

VERS. 25. — « Sic eveniet, ut conteram Assyrium in terra mea, et in montibus meis conculcem eum, et auferetur ab eis jugum ejus, et onus illius ab humero eorum tolletur. »

De juramentis Dei nos instruens Apostolus ait: « Abrahæ namque promittens Deus, quoniam neminem habuit, per quem juraret majorem, juravit per semetipsum dicens: Nisi benedicens benedicam te, et multiplicans multiplicabo te. Et sic longanimiter ferens, adeptus est repromissionem. Homines enim per majorem sui jurant, et omnis controver-

sia eorum finis ad confirmationem est juramentum, in quo abundantius volens Deus ostendere pollicitationes hæredibus, immobilitatemque consilii sui, interposuit jusjurandum, ut per duas res immobiles, quibus impossibile est mentiri Deum, fortissimum solatium habeamus, qui confugimus ad tenendam propositam spem (*Hebr. xiii, 6* et seqq.).

Dum ergo Deus, qui nunquam mentitur, jurat, immobilitatem consilii sui firmissime constitutam insinuat, quam sine dubio completurus est, cum et homines, qui sæpe mentiuntur, juramenta custodiant, et nihil juramento firmiter habeant. Defectus quoque dictionis indicium est validissimæ confirmationis, cum dicit: « Si non, ut putavi, ita erit, et quomodo mente tractavi, sic eveniet. » Non tamen nostro more Deus aliquid futurum æstimat, sed quodcumque vult, disponit, ut fiat, et qualiter ac quando fiat. Sed quid est, quod tam firmiter asserit futurum? Non enim pro modica re jurare Deus credendus est.

*Ut conteram, inquit, Assyrium, id est diabolum in terra mea, id est in mente electorum meorum, vel in Ecclesia, sicut eidem Assyrio dictum est in Genesi: « Ipsa conteret caput tuum (*Gen. iii, 15*). » Caput quippe diaboli initium est pravæ suggestionis. Quod videlicet caput Ecclesia conterit, quia suggestiones diaboli in ipso mox initio ad nihilum redigit. Jurat ergo Dominus, quia in terra sua, id est in mente suorum conteret Assyrium, ut in corde nostro omnem ejus tentationem vincat. Quem et in montibus suis, id est, in apostolis et majoribus sanctis conculcat, sicut eis loquitur: « Ecce dedi vobis potestatem calcandi supra serpentes et scorpiones, et nihil vobis nocebit (*Luc. x, 19*). » — « Et auferetur ab eis jugum ejus, » de quo dicit Apostolus: « Nolite jugum ducere cum infidelibus (*II Cor. vi, 14*). » Et onus illius, id est, tyrannica dominatio tolletur ab humero cordis eorum. Sequitur:*

VERS. 26. — « Hoc consilium, quod cogitavi super omnem terram, et hæc est manus extenta super universas gentes. »

Cogitavit hoc quod supra dictum est, in toto orbe facere, ut in gentibus cunctis ad fidem venientibus ubique conterat Assyrium, et conculcet in electis suis, atque jugum servitutis, quo deprimebat eos, auferat. Rursumquæ hoc inevitabiliter esse futurum ostendit, subjungens.

VERS. 27. — « Dominus enim exercituum decrevit, et quis poterit infirmare? » Id est decretum ejus debilitare? « Et manus ejus extenta est, ut Assyrium feriens conterat, et nullus avertet eam, quia omnipotens est. Hactenus ea, quæ temporibus Achaz Isaias vidit, tractata sunt; cætera, quæ sequuntur usque ad finem Libri sub glorioso rege Ezechiâ prophetavit.

LIBER TERTIUS.

SEQUITUR CAPUT XIV.

VERS. 28. — « In anno quo mortuus est rex Achaz factum est onus istud. »

VERS. 29. — « Ne læteris Philisthæa omnis tu, quia comminuta est virga percussoris tui. De radice enim colubri egredietur regulus, et semen ejus absorbens volucrem. »

Binarius numerus significare solet opus immunditiæ, quoniam bina de singulis animalibus immundis ingressa sunt in arcam (*Gen. vii, 2*). Unde et nunc onus Philisthææ, quæ interpretatur *cecidere duo*, vel *ruina poculi*, in secundo gradu ponitur, ut advertamus, quia de immundis agitur. Nam in abominatione fornicationis est ruina duorum. Et poculo cadit, qui terrenis cupiditatibus debriatus statum rectitudinis amittit. Quid autem rex peccator Achaz nisi vel quemlibet Ecclesiæ præpositum, vel omnes malos Ecclesiæ rectores designat? Quid *Philisthæa* nisi carnalium multitudinem subjectorum? Quid mors Achaz nisi grave peccatum cujuslibet præpositi? Si vero prælatus aliquid turpè commiserit, mox indisciplinatorum turba subditorum quasi de morte Achaz Philisthæa gens lætatur. Sed « in anno quo mortuus est rex Achaz factum est onus istud, » quod sequitur: quia dum prælatus offendit et vulgus insultat, gravem sibi peccatorum sarcinam imponit. Quicumque enim disciplinam oderunt, valde lætari solent, si præpositus eorum ita corruat, ut eos libere corripere jam non audeat, sed eis dicitur:

« Ne læteris Philisthæa omnis tu, quia comminuta est virga percussoris tui. » Id est quia præpositus, qui te *virga* disciplinæ pro culpa solebat percutere, virgam justæ severitatis pro suarum pudore vel metu culparum amisit. Dum enim te disciplina gaudes exutam, Antichristi jugum in te suscipis.

« De radice enim colubri egredietur regulus. » Coluber quippe occulte mordet, et virus infundit. Sic et nunc diabolus humana corda latenter vulnerat, et veneno malitiæ suæ inficit. Sed *de hujus radice colubri*, id est de occultis Satanæ suggestionibus et latentis malitiæ *egredietur regulus*, id est pestifera Antichristi perversitas. *Regulus* enim non morsu perimit, sed flatu consumit. Sæpe quoque flatu aerem adscit, et quidquid vel longe positum contigerit, sola narium inspiratione tabefacit. Sic et Antichristus odore pestiferæ exhalationis totum orbem afficiens, humanis mentibus mortiferum virus immittet.

Regulus enim ipse est basiliscus. Et dicitur regulus eo quod rex serpentium sit, adeo ut eum videntes fugiant, quia flatu suo eos necat. Nam et homines, si vel inspiciat, interimat; siquidem ejus aspectum nec avis ulla volans illæsa transit, sed quamvis procul sit, ejus ore combusta devoretur. A mustelis

A tamen vincitur, quas illis homines cavernis inferunt, in quibus delitescit, et occiditur ab eis. Similiter et Antichristus, qui rex iniquorum est, flatu suo, id est doctrina sua corrumpet omnia, et aspectu suo rationabilia sapientes in anima perimet, et eos, qui in altum contemplationis volabant, devorabit; ab agilibus tamen et parvulis fidelibus, quos venena ejus inficere non poterunt, velut a mustelis superabitur. Quod autem propheta subjunxit:

« Et semen ejus absorbens volucrem, » potest intelligi *semen ejus*, id est colubri, ipse Antichristus, qui etiam contemplativos velut aves volantes absorbebit. Vel illud *ejus* non ad colubrum, sed ad regulum referamus dicentes: *Semen ejus*, id est reguli discipulos Antichristi, qui etiam spirituales contemplationi studentes in suam perniciem pertrahent. Hæc idcirco dicuntur iis, qui de sua impunitate dum delinquant, et de præpositi sui ruina lætantur, quoniam vel colubri hujus veneno, vel reguli flatu perimuntur, vel seminis ejus ore trahuntur. Sed licet Achaz mortuus sit, id est pastor in culpam delapsus, flet tamen quod sequitur:

VERS. 30. — « Et pascentur primogeniti pauperum, et pauperes fiducialiter requiescent. »

Potens est enim Deus sensus et virtutes electorum suorum nutrire, etiam si prædicator defuerit. Qui sunt enim *pauperes* isti, nisi de quibus dicitur: « Beati pauperes spiritu? » (*Matth. v, 3*.) Et qui sunt *primogeniti* eorum nisi primi boni cogitatus, quos in eorum cordibus gratia præveniens generat, primusque ardor juste vivendi? Unde dictum est in lege: « Primogenitum filiorum tuorum dabis mihi (*Exod. xxii, 29*). » Vel primogenitos eorum, quæcunque præcipua et optima sunt in operibus eorum, accipe; de quibus ait Dominus: « Primum querite regnum Dei, et justitiam ejus (*Matth. vi, 33*). » Tales ergo primogeniti pascentur gratia Dei. Et licet Antichristi persecutio sæviat, pauperes tam *fiducialiter requiescent*, quia scriptum est: « Qui timet Deum nihil trepidabit et non pavebit, quoniam ipse est spes ejus (*Eccli. xxxiv, 16*). » Sequitur:

« Et interire faciam in fame radicem tuam, et reliquias tuas interficiam. » De electis dixerat, quia *pascentur primogeniti pauperum*, licet Achaz mortuus esset, id est prædicator spiritualiter extinctus. Et nunc e contrario dicitur Philisthææ, id est immundorum et indisciplinatorum multitudini, qui de morte ejus et impunitate sua lætantur, quia *interire faciam in fame verbi Dei radicem tuam*, id est cogitationem cordis tui, quoniam verba salutis ab homine tu non audies, et ego mentes electorum meorum intrinsecus pascam. « Et reliquias tuas interficiam, » id est si qua bona in te remanserant, extinguam ea: quia penitus tollam a te gratiam meam. Unde et subjungitur:

VERS. 31. — « Ulula, porta; clama, civitas, prostrata est Philisthæa omnis. »

Porta enim ululare, id est fidelis vel prædicator sanctus quilibet lamentari jubetur, et civitas clamare, id est plangere, quia per Antichristum in perfidiam « prostrata est Philisthæa omnis, » id est religiosorum (108) multitudo universa. Quod autem jam factum prophético more dixerat, futurum adhuc ostendit subdendo :

« Ab aquilone enim fumus veniet, et non est, qui effugiat agmen ejus. » Nam frigidus aquilo malignus spiritus est, cui dicitur in Cantico : *Surge, aquilo* (Cant. iv, 16), id est fuge, diabole; fumus autem noxius est oculis (Prov. x, 26). Veniet igitur ab aquilone fumus, id est a diabolo per Antichristum tenebrosa errorum doctrina, quæ cæcabit oculos humanorum cordium. Nunc quoque multorum oculos hæcæcat jam fumus exaltationis ejus, et suggestionis illius. *Et non est, qui effugiat agmen exercitus ejus, qui totum replebit orbem, et omnes ei subjiciet.* Sed quia nunc populus electorum videbatur ab illo posse superari, quoniam dictum erat : « Non est, qui effugiat agmen ejus, » ideo subjungitur :

VERS. 32. — « Et quid respondebitur nuntiis gentis? Quia Dominus fundavit Sion, et in ipso sperabunt pauperes populi ejus. »

« Quid, inquit, respondebitur nuntiis gentis, » id est quid respondebunt fideles legatis Antichristi? Hoc scilicet respondebunt, quia Dominus supra firmam petram fundavit Sion, id est Ecclesiam. « Et in ipso sperabunt pauperes populi » sui, id est sancti humiles. Hæc enim erit electorum fiducia.

CAPUT XV.

VERS. 1. — « Onus Moab. Quia nocte vastata est, Ar Moab conticuit; quia nocte vastatus est murus Moab, conticuit. »

Non multum ædificationis affert, si nunc historialiter de populo Moabitarum loquamur, et vastationem ejus, atque captivitatem, quæ primo per Assyrios, deinde per Chaldæos, sicut hic prædicitur, facta est, referamus. Videamus ergo, quid mystice per Moab accipiendum sit, et mystica prophetæ verba, reserante Deo, mystice discutiamus.

Moab quippe, qui interpretatur *de patre*, Judaicum populum designare solet. Quia sicut filia Lot inebriavit eum, et dormivit cum eo, atque concepit, et peperit filium, quem idcirco vocavit Moab, id est ex patre: sic et Synagoga spiritalem legis intellectum carnali traditione inebrians ac sopiens, genuit exinde carnalem hunc populum velut Moab ex patre nasciente.

Civitas autem metropolis Moabitarum vocabatur Ar, quod interpretatur *vigilia* vel *vigilans* sive *consurgens*. Et Judæorum populus quondam habuit Ar, id est *vigilantem*, et vigilantem sensum in electis suis, et ad superna consurgentem velut fortissimam civitatem, ubi tutus inhabitabat: quia Christum exspe-

ctans in fide vigilavit, et cor ad cælestium amorem levavit. Sed quia venientem hunc agnoscere ac suscipere noluit, in nocte infidelitatis vastata est Ar, id est vigilia eorum, et omnes obdormierunt. Dormire enim animæ est oblivisci Deum suum.

Vastata est ergo Ar, id est vigilia fidei; conticuerunt omnes a confessione Christi: « Conspiraverunt omnes, ut si quis illum confiteretur Christum, extra Synagogam fieret (Joan. ix, 22). » Et quia fidei vel disciplinæ murus in nocte incredulitatis ac negligentiae vastatus est a malignis spiritibus, Moab iste conticuit, a veritatis confessione. Sed quoniam populi hujus conversionem haud dubie præstolamur, sicut et per Jeremiam dicitur: « Convertam captivitatem Moab in novissimis diebus, dicit Dominus (Jer. xlviii, 47), » nunc de pœnitentia ejus subditur:

VERS. 2. — « Ascendit domus et Dibon ad excelsa in planctum super Nabo, et Medaba Moab ululabit. »

Dibon quippe *intelligens satis* interpretatur, vel *sufficiens ad intellectum* sive *abundanter intelligens*; Nabo sessio, Medaba aquæ imminentes. Et quid per domum nisi Synagoga figuratur? Et quid per Dibon nisi doctores legis designantur, qui sapientes erant in oculis suis? Quid per Nabo nisi auctoritas magisterii eorum? Solet enim magister sedens docere. Quid per Medaba nisi aqua sapientiæ eorum, quæ videtur eis esse excelsa? Ascendit ergo domus, id est Synagoga, et etiam Dibon, id est legisperiti in planctum pœnitentiæ ad excelsa fidei, et recognitiæ veritatis, atque virtutum. Super Nabo plangent, id est super sessionem et magisterium Pharisæorum. Nam « super cathedram Moysi sederunt Scribæ et Pharisæi (Matth. xxiii, 2). » Et super Medaba, id est super eminentes aquas sapientiæ et doctrinas eorum. Sequitur: « In cunctis capitibus ejus calvitium, omnis barba radetur. »

VERS. 3. — « In triviis ejus accincti sunt sacco, super tecta ejus, et in plateis omnis ululatus descendet in fletum. »

Quid in capitibus nisi mentes exprimuntur? Quid in calvitio nisi verecunda detectio intentionis mentis. Quæ enim frons est mentis nisi intentio ejus, ubi et verecundia quasi in fronte habere sedem solet? Igitur in cunctis capitibus ejus calvitium erit, quia unusquisque conscientiam suam per humilem confessionem deteget, ac de peccatis suis erubescet. Et omnis barba radetur, quia omnem propriæ virtutis confidentiam a se rejicient. In barba quippe robur virile notatur. Et barba raditur, quando fiducia propriæ virtutis amputatur, ac propriæ infirmitatis fragilitas incipit aperte cognosci.

Trivia autem eorum in hoc sunt, quod omnes canonicas Scripturas in tres partes dividunt, in legem, in prophetas, in hagiographa. In triviis igitur accincti sunt sacco, quia pœnitentiam agent se in omnibus divinis Scripturis errasse, dum re-

spuerant Christum. Illi vero, qui ex eis in sanctitate videbantur excrevisse, erant quasi *super tecta* corporum; reliquis autem populus *in plateis* latæ conversationis. *Ululatus* ergo desuper tectis et de plateis ascendet in fletum, quoniam et eminentiores, et populares ululatum planctus attollent, et in pœnitentiæ fletibus humiliabuntur. Sequitur:

VERS. 4. — « Clamavit Hesebon, et Eleale, usque Jasa audita est vox eorum. »

Hesebon *cognitio mœroris*, vel *cingulum mœroris* dicitur, aut etiam *cogitatio mœroris*. Eleale *ad ascensum*, Jasa *dimidia* vel *factum mandatum*. Clamavit ergo lugens Hesebon, id est cognitio mœroris, vel cingulum mœroris, et clamavit Eleale, id est *ad ascensum* arduæ viæ, quæ ducit ad vitam. *Usque Jasa*, id est usque ad dimidiam vel usque ad medietatem *audita est vox eorum*, quia solummodo de Veteri Testamento loqui noverant, ubi medietas est eloquiorum Dei, nec aliam medietatem, quæ in Novo est, recipiebant. Vel *usque Jasa*, id est usque ad factum mandatum *audita est vox eorum*. quia glorian- tur quasi ex operibus. Sequitur:

« Super hoc expediti Moab ululabunt, anima ejus ululabit sibi. » *Expediti* solent dici, qui uxores aut filios non habent et ad bella sunt idonei, quia exercitus vel equitatio dicitur expeditio. Igitur « expediti Moab ululabunt » super hoc, id est de hoc, quod « usque Jasa audita est vox eorum, » quia et hi, qui ad spiritale bellum expediti videbantur, ululatum doloris ex hoc pœnitentes dabunt, quod se quasi de operibus jactabant, et solam legis antiquæ doctrinam prædicabant. « Anima ejus ululabit sibi, » quia unusquisque se ipsum planget. Cujus dolori propheta compatiens subdit:

VERS. 5. — « Cor meum ad Moab clamabit. » Atque post adjungit: « vectes ejus usque ad Segor vitulam consternantem. »

Segor una de quinque civitatibus est, interpretatur *parva*. Et quia lex in quinario librorum numero continetur, atque eorum actio, qui sub lege sunt, parva est, et sæpius in peccatum consternitur, *vectes ejus usque ad Segor, vitulam* lascivam, seque *consternantem*. *Vectes* namque *ejus* doctores Synagogæ sunt, qui nunc *usque ad Segor* captivi feruntur, quia carnalem legis observantiam, quæ similis est lascivienti vitulæ, miseri adhuc prædicant. Sequitur:

« Per ascensum enim Luith (109) flens ascendet, et in via Oronaim clamorem contritionis levabunt. »

VERS. 6. — « Aquæ enim Nemrim desertæ erunt quia aruit herba, defecit germen, viror omnis interiit. »

Luith interpretatur *genas* vel *maxillas*. Et sanctos prædicatores *genas* Ecclesiæ vocat sponsus in Canticis dicens: « Pulchræ sunt genæ tuæ sicut turturis (Cant. 1, 10). » Rursus eosdem prædicatores *maxillas* Ecclesiæ Jeremias nuncupat sub Judææ

A spiritu dicens de ea: « Plorans ploravit in nocte, et lacrymæ ejus in maxillis ejus (Thren. 1, 2), » quia in adversitate Ecclesiæ illi amplius plangunt, qui vitam carnalium confringere prædicando noverunt. Per ipsos quippe sancta Ecclesia iniquos a vitiis conterit, et quasi glutians in sua membra convertit. Per *ascensum* ergo *Luith*, id est *maxillarum flens ascendet*, quia cum pœnitentiam egerit, per prædicatores ducetur ad alta virtutum, et in profectu justitiæ imitabitur quotidianum ascensum eorum.

Oronaim vero *foramen mœroris* dicitur. Et quod est foramen mœroris eorum nisi plaga Dominici lateris? « Clamorem ergo contritionis levabunt in via Oronaim, » quia venientes ad fidem passionis Christi vehementer plangent. « Aquæ enim Nemrim, » id est doctrinæ apostatarum Pharisæorum, qui suorum maculis peccatorum varii sunt, « desertæ erunt, quia aruit herba, » id est virorem gratiæ spiritualis amisit actio, quam docent; *defecit germen* bonæ cogitationis et justitiæ, vel fidei *viror omnis* de eis *interiit*. Nemrim quippe *pardorum* vel *apostatarum* interpretatur, sævitiam et varietatem apostatarum Pharisæorum atque Scribarum designans. Sequitur:

VERS. 7. — « Secundum magnitudinem operis et visitatio eorum. »

Quia sicut immaniter peccaverunt occidendo Auctorem vitæ; sic et magno misericordiæ respectu visitabuntur, cum venerit Elias, qui, sicut Dominus ait: « Restituet omnia (Matth. xvii, 11). » Sed Antichristi prædicatores *ducent eos*, quos de illis seducere poterunt, *ad torrentem salicum*, id est ad decursum infructuosorum hujus sæculi amatorum. Sic enim sequitur: « Ad torrentem salicum ducent eos. »

VERS. 8. — « Quoniam circuiit clamor terminum Moab. »

Per *torrentem* quippe decursus generis humani exprimitur, per salices infructuosi hemines. *Ad torrentem* igitur *salicum* captivus ducitur, quisquis ad defluxum carnalis conversationis sæcularium illicitur. « Quoniam circuiit clamor terminum Moab, » quia circumquaque audietur pœnitentia de Israel. Sequitur: « Usque ad Gallim ululatus ejus, et usque ad Puteum Elim clamor ejus. »

VERS. 9. — « Quia aquæ Dibon repletæ sunt sanguine. »

« Usque ad Gallim, » id est usque ad « transmigrantes, ululatus ejus. » Quia per pœnitentiæ luctum pertinet ad societatem eorum, qui de vitiis ad virtutes et de temporalibus ad æterna transmigrant. *Elim* vero, qui dicitur *Aries*, Christum designat. Et Puteus *Elim* profunditas est divinitatis Christi, et mysteriorum ejus. Igitur « usque ad Puteum Elim clamor ejus, » quia per hoc, quod se reum clamabit, dum pœnitentiam egerit, usque ad arcana Divinitatis penetrare merebitur ut inde potam vitæ hau-

riat. « Quia aquæ Dilon, » id est doctrinæ scribarum et Phariseorum, qui sibi videntur sapientes, « repletæ sunt sanguine, » id est mortibus animarum. Sequitur : « Ponam enim super Dibon additamenta his, qui fugerint de Moab leonem, » id est Antichristum. Et quibus hæc ponam? « His, qui fugerint de Moab, » id est qui de populo Judæorum Eliæ prædicationem effugerint nolentes converti. « Et reliquias terræ, » id est aliis omnibus reprobis, qui in mundo fuerint. Antichristi enim persecutionem trium semis annorum futuram fides Ecclesiæ tenet; sed ne hæc improvisa veniens omnes passim, quos imparatos invenerit, involvat, Henoch et Eliam ante hujus exortum venturos in mundum, qui Israeliticam plebem ad fidei gratiam convertant, et ad pressuram tanti turbinis in parte electorum insuperabilem reddant. Qui, cum in primos tres semis annos prædicaverint, tunc exardescens illa horrida persecutio ipsos in primis martyrii virtute coronat (110), deinde cæteros fideles corripiens vel martyres vel apostatas faciet. Bene ergo Judæis, qui fugerint Eliæ prædicationem *Leo* Antichristus poni dicitur, et cæteris gentium infidelibus. Sed interim propheta considerans, quia hic populus Christum venientem suscipere primo noluerit, rogat, ut de eo transeat ad Ecclesiam. Nam subjungit :

CAPUT XVI.

VERS. 1. — « Emitte Agnum, Domine, dominatorem terræ, de Petra deserti ad montem filię Sion. »

Eum quippe dicit « Agnum, qui tollit peccata mundi (Joan. 1, 29). » Quem et terræ dominatorem asserit juxta illud : « Et dominabitur a mari usque ad mare (Psal. LXXI, 8), » etc. « Emitte, inquit, o Domine, Agnum, » id est Christum tuum « de Petra deserti, » id est de duritia gentis hujus Judaicæ, quam ob infidelitatem suam deseruisti, « ad montem filię Sion, » id est ad celsitudinem novæ conversationis Ecclesiæ. Sequitur :

VERS. 2. — « Erit sicut avis fugiens, et pulli de nido avolantes, sic erunt filię Moab in transcensu Arnon. »

Sicut avis foeta et pulli ejus a nido avolant, et fugiunt, si venientem ad nidum suum viderint raptorem, sic doctores Judæorum, et illi quos fovebant, de nido veteri fugient, judicii diem cernentes imminere propinquum, et ad suam devorationem, si in nido vitæ veteris inventi fuerint, inhiare diabolium. « Sic enim erunt filię Moab in transcensu Arnon. » Arnon quippe maledictio eorum interpretatur : Et maledictio eorum est, qui dixerunt de Christo : « Sanguis ejus super nos, et super filios nostros (Matth. XXVII, 25). » Sed hanc maledictionem transcendent, cum ad Christum transierint. Sequitur :

VERS. 3. — « Ini consilium, coge concilium, pone quasi noctem umbram tuam in meridie, absconde fugientes, et vagos ne prodas. »

A VERS. 4. — « Habitabunt apud te profugi mei : Moab esto latibulum eorum a facie vastatoris. »

Ut præfatam, inquit, maledictionem transcendas, et hostem, qui te devorare venit, evadas, *ini consilium*, o plebs Judaica, et quid agendum tibi sit, diligenter tracta, et accepto simul consilio, ut prædicatores Christi accipias, *pone quasi noctem umbram tuam*, in qua celes eos ab infidelibus *in meridie*, id est in fervore persecutionis. Tunc enim quicumque inventi fuerint Christiani, trahentur ad supplicia. Sed *absconde fugientes* rabiem persecutionis, et *vagos ne prodas*, qui in uno consistere loco non audebunt, sed per diversa latitantes vastabuntur. Sequitur : « Finitus est enim pulvis, consummatus est miser, defecit, qui conculcabat terram. »

B VERS. 5. — « Et præparabitur in misericordia solium, et sedebit super eum in veritate in tabernaculo David judicans et quærens judicium, et velociter reddens, quod justum est. »

Finitus est pulvis, id est mortuus est Antichristus, qui se pulverem esse non cognoscebat, sed extollebatur supra omne quod dicitur Deus, aut quod colitur, et omnem *terram* sua tyrannide *conculcabat*. Percusso autem divinitus illo perditionis filio non mox dies judicii secuturus esse credendus est; alioquin scire possent homines illius ævi tempus judicii, si post tres semis annos inchoatæ persecutionis Antichristi confestim sequeretur. Nunc autem, quia ante consummatum tempus persecutionis illius dies judicii non veniat, scire omnibus licet; post quantum vero consummatæ ejusdem persecutionis venturus sit, nemini prorsus scire conceditur. Unde nunc bene, postquam de morte Antichristi dictum est : « Defecit, qui conculcabat terram, » adhuc venturus post aliquantulum dies judicii inuinitur, cum de futuro subdidit :

« Et præparabitur in misericordia solium. » *Præparabitur* enim Christo *solium* judicii, ut sedeat super sedem majestatis suæ judicans orbem in æquitate. *In misericordia*, sicut et alio loco de timetibus Deum et cogitantibus nomen ejus dicitur : « Erunt mihi, ait Dominus exercituum, in die, qua ego facio, in peculium, et parcam eis sicut parci vir filio suo servienti sibi (Malach. III, 17). » Sic electos in misericordia judicabit, et in servis suis miserebitur.

Et sedebit super eum in veritate » judicii, ut reddat unicuique secundum opus ejus. Et hoc fiet « in tabernaculo David, » id est in domo regali, quæ est Ecclesia, et velociter post mortem Antichristi. Vel hic dum vivimus præparatur in *miseriordia solium* ejus, quia per misericordiam ipsius præparatur in cordibus nostris sessio et mansio ipsius, non enim nostris meritis præparari potest. Nunc quidem paratur misericordia, sed futuro sæculo sedebit super eum in veritate, quia « universæ viæ Domini misericordia et veritas (Psal. XXIV, 10). » In misericor-

dia paratur, sed in veritate sedetur, sicut scriptum est : « Misericordiam et iudicium cantabo tibi, Domine (Psal. 1). » Deinde vates ad descriptionem Judaicæ perversitatis revertitur dicens :

VERS. 6. — « Audivimus superbiam Moab, superbus est valde : superbia ejus, et arrogantia ejus, et indignatio ejus plus quam fortitudo ejus. » Et addit :

VERS. 7. — « Idcirco ululabit Moab ad Moab, ululabit universus. »

Audivimus, inquit, in spiritu nos prophetæ *superbiam Moab*, id est Judæorum apostatarum istorum. Superbus est valde, » quia de operibus legis singulariter glorians omne genus humanum despicit, et se solum Dei populum esse jactat. *Superbia ejus* est, quod « ignorantes justitiam Dei, et suam volentes statuere, justitiæ Dei non sunt subjecti (Rom. x, 11). » *Arrogantia* quoque *ejus*, quod de justis operibus arroganter se jactat. *Indignatio ejus* est quod peccatores dedignatur, et Christianis irascitur, et hæc *plus quam fortitudo ejus*, quia plus quam ipse justitiam operari valeat, superbit, et arrogat de justitiæ operibus; et plus indignatur aliis, quia justus non sint, quam ipse fieri justus possit, atque fidelibus plus optat malefacere, quam potest. *Idcirco ululabit* alter ad alterum, cum venerit tempus conversionis eorum. Sequitur :

« His, qui lætantur super muros cocti lateris, loquimini plagas suas. »

VERS. 8. — Quoniam suburbana Hesebon deserta sunt, et vinea (111) Sabama, Domini gentium exciderunt flagella ejus, usque Jazar pervenerunt, erraverunt in deserto : propagines ejus relictæ sunt, transierunt mare. »

Vos, inquit, o apostoli, *loquimini plagas suas his, qui lætantur super muros cocti lateris*, id est qui confidunt in carnali observantia legis. Per laterem quippe significatur opus carnale et terrenum; quia et hic populus in Ægypto Pharaoni lateres faciebant. Sed later coquitur, cum opus carnale sit ex timore. Murus autem præsidium est justæ operationis, in quo tutus quis ab invisibilibus adversariis manet. Lætatur itaque *super muros cocti lateris*, quisquis ex hoc gaudet, quod justificatus est, ut arbitratur, ex operibus legis, et munitus contra Satanam. Propheticus autem Spiritus, qui jussit prædicatoribus, ut his, qui lætantur super muro hujusmodi loquerentur plagas suas, ipse jam eos loqui et annuntiare per se ipsum inchoat.

« Quoniam suburbana Hesebon deserta sunt, et vinea Sabama. » *Hesebon* namque dicitur *cingulum mæroris* sive *cogitatio mæroris*, et designat tristitiam pœnitentiæ. *Deserta sunt* igitur *Judæis suburbana Hesebon*, quia quidquid in eis extra pœnitentiam licet in proximo vel contiguo fuerit, Christus deservit. Nihil enim Deus ab eis nisi primo pœnitentiam suscipit. A quo « deserta est et vinea Sabama, »

id est plebs ipsa Judæorum, quæ solebat excelsum laudibus extollere. « Vineam enim Domini exercituum domus Israel est (supra v, 7), » et *Sabama* dicitur *extollens excelsum. Domini gentium*, id est *Vespasianus* et *Titus exciderunt flagella ejus*, id est occiderunt, et captivos duxerunt filios ejus.

Jazer interpretatur *auxilium* vel *fortitudo*. Et « usque ad *Jazer*, » id est usque ad auxilium et fortitudinem eorum, scilicet usque ad Jerusalem et templum, ubi confidentia virtutis, et auxilii eorum erat, « pervenerunt domini gentium, » ut fortitudinem eorum destruerent. Sed « erraverunt in deserto » paganitatis et ipsi domini gentium, quia Christum, qui dedit eis victoriam, non cognoverunt. « Propagines ejus relictæ sunt, » id est plantarum aliquod Judaicæ plebis post destructionem Jerusalem remansit, quod cresceret. Quæ propagines « transierunt mare, » quia transcenderunt malitiam sæculi vel gentilitatis. *Mare* enim sæculum vel gentilitatem designare solet. *Transierunt ergo mare* propagines istæ, quia reliquæ hujus populi sceleratiores sunt quam gentiles, aliæ sæculares. Sequitur :

VERS. 9. — « Super hoc plorabo in fletu *Jazer*, vineam *Sabama* : inebriabo te lacryma mea *Hesebon* et *Eleale*, quoniam super vindemiam tuam et super messem vox calcantium irruit. »

Condolens propheta miseris et perditioni gentis suæ, super hoc, inquit, id est ex hoc quod supra dictum est, *plorabo vineam Sabama*, id est plebem Israeliticam, *in fletu Jazer*, id est auxilii et fortitudinis eorum, quia sic auxilio destituti sunt et fortitudine. « Inebriabo te lacryma mea, » id est continua te lacrymarum inundatione plangam, o *Hesebon et Eleale*, id est *cogitatio mæroris ad ascensum*, scilicet quod hic mærore quis afficitur, ut ad superna gaudia conscendere debeat. « Quoniam super vindemiam tuam, et super messem tuam, » id est super obitum tuum, *vox calcantium*, id est clamor dæmonum, *irruit*. *Vindemia* quippe vel *messis finis* est uniuscujusque eorum, qui de sæculo migrant. *Vox calcatorum* hujus vindemiæ calumnia nunc malignorum spirituum est, qui animam rapere nituntur. Quia ergo Judæi cujuslibet morientis animam dæmones rapere veniunt, « super vindemiam et messem eorum vox calcantium irruit. » Unde et sequitur :

VERS. 10. — « Et auferetur lætitia et exultatio de Carmelo, et in vineis non exultabit, neque jubilabit, vinum in torculari non calcabit, qui calcare consueverat, vocem calcantium abstuli. »

VERS. 11. — « Super hoc venter meus ad Mœal quasi cithara sonabit, et viscera mea ad murum cocti lateris. »

Nam in obitu singulorum « auferetur lætitia de Carmelo, » id est de cognitione circumcisionis, quia Judæus quisque moriens non ad gaudium, sed

ad pœnam ducitur. « Et in vineis non exsultabit, neque jubilabit, » quia in suis actionibus, cum mortuus fuerit, non gaudebit, nec in vocem erumpet lætitiæ.

« Vinum in torculari non calcabit, qui calcare consueverat, » quia Judæorum animas de corpore exeuntes a Domini passione jam Christus aut bonus angelus non suscipit, ut ante consueverat. Torcular quippe pressura mortis vocatur, dicente Domino : « Torcular calcavi solus (Isa. LXIII, 3). » Anima quoque vini liquore significari potest, quia Job dixit : « Quomodo si recedat aquæ de mari, et fluvius vacuefactus arescat : sic homo, cum dormierit (Job XIV, 11). » Animam quippe comparat aquis maris et fluvio. Torcular itaque contritio et angustia mortis est; vinum autem anima. Sicut enim cum uvæ exprimuntur in torculari, vinum exit, et acinum remanet; sic per mortis angustiam elicitur anima de corpore. Vinum ergo calcatur in torculari, qui animam in morte urget egredi de corpore, et egredientem suscipit.

Vocem calcantium abstulit, quia sancti angeli, qui justorum animas suscipiunt, pro defensione animarum Judæorum contra malignos Spiritus non loquentur, sed eis sine contradictione relinquunt animas. Ubi mox propheta pius adjungit : *Super hoc*, id est ex hoc, quia si relictus est dæmonibus, « venter meus ad Moab quasi cithara sonabit, » id est mens mea multiplices doloris modos in planctu Judaici populi formabit, et cogitanti de eo nil nisi flere libebit. « Et viscera mea sonabunt ad murum cocti lateris, » quia totis visceribus cordis et compassione charitatis dolebo super his, qui operibus legis sine gratia Christi putant se tutos a morte animæ, et inimicis invisibilibus. Sequitur :

VERS. 12. — « Et erit, cum apparuerit, quod laboravit Moab super excelsis suis, ingredietur ad sancta sua, ut obsecret, et non valebit. » Atque subjungitur :

VERS. 13. — « Hoc verbum, quod locutus est Dominus ad Moab extunc. »

VERS. 14. — « Et tunc locutus est Dominus dicens : In tribus annis quasi anni mercenarii auferetur gloria Moab super omni populo multo, et relinquetur in eo sicut racemus parvus et modicus, nequaquam multus. »

In fine sæculorum « cum apparuerit, quod laboravit iste » Moab super excelsis suis, id est quod meruit pro labore carnalium operum legis, quæ putabat justa, et præexcelsa, « ingredietur ad sancta sua, ut obsecret, » id est revertetur ad cor suum, et cogitabit intentionem, qua fecit hæc carnalia legis opera, ut inde misericordiam a Judice postulet, cujus legem se servare putavit : « Et non valebit » obsecrare, quia recognoscens se hæc opera non fide fecisse Christi, non audebit ab eo veniam petere, cujus fidem et gratiam in operibus suis habere noluit. Hucusque multipliciter exposuit plagas eorum, quæ : lætantur super muro cocti lateris. »

Deinde, « hoc est, » inquit, « verbum, quod locutus est Dominus ad Moab, » id est ad Judaicum populum, *extunc*, id est ex quo legem dedit eis, qui per Moysen prædixit eis omnes plagas has, et nunc quoque per me vel cæteros prophetas locutus est dicens : « In tribus annis, » etc. Tres anni tria tempora sunt : a Moyse usque ad David, a David usque ad captivitatem Babyloniam, a captivitate usque ad Christum, in quibus Judæorum populus non ut filius, sed ut mercenarius Deo servivit, quia propter carnalem legis observantiam non æternam hæreditatem expectavit, sed temporales mercedes quæsitit. Dum ergo propter suas impietates per hæc tria tempora frequenter ab hostibus captivaretur, ac perimeretur, ita ut pauci sæpe remaneret de pluribus, *in tribus annis* ablata est gloria ejus *super omni populo multo quasi gloria anni mercenarii*, et decursis his tribus annis post eversionem Jerusalem, relictus est in eo sicut post vindemiam racemus parvus et non multus, parvus quantitate, et non multus numero. Et hæc sunt plagæ eorum, « qui lætantur super muros cocti lateris. » Sed jam terminata hujus visionis explanatione addendum existimo, quod hoc onus in tertio loco post duo superiora positum est propter hos tres annos, vel propter hoc, quod supra dictum est : « In triviis ejus accincti sunt sacco (supra xv, 3), » vel propter aliud quodlibet latens sacramentum. Sequitur :

CAPUT XVII.

VERS. 1. — « Onus Damasci. Ecce Damascus desinet esse civitas, et erit sicut acervus lapidum in ruina. »

Damascus *sanguinis poculum* vel *sanguinem bibens* interpretatur, sive *sanguinem propinans*. Quid ergo per Damascus nisi persecutorum crudelitas exprimitur? Et bene persecutorum onus in quarto gradu positum est, quia quatuor genera persecutorum tolerat Ecclesia. Patitur enim persecutiones a Judæis, et a gentilibus et ab hæreticis, et a falsis fidelibus. Sed et in quatuor orbis partibus affligitur electorum populus ab his, qui divinæ religioni adversantur. Nam et Daniel omnes fidelium persecutores sub specie quatuor bestiarum comprehendit, dicens : « Quatuor bestię grandes ascendebant de mari diversæ inter se, prima quasi læna, secunda similis urso, tertia quasi pardus, quarta terribilis atque mirabilis, et fortis nimis (Dan. VII, 3 et seq.). » Et Angelus in Apocalypsi : « Clamavit voce magna quatuor angelis, quibus datum est nocere terræ et mari, dicens : Nolite nocere terræ et mari, neque arboribus, quoadusque signemus servos Dei in frontibus eorum (Apoc. VIII, 2). » Bene in quarto loco est onus persecutorum, quia quatuor angeli, quorum officium est nocere, cohibentur a læsione, et apud Danielem quatuor bestiarum potestas aufertur. Unde et hic dicitur : « Ecce Damascus desinet esse civitas, et erit sicut acervus lapidum in ruina. » Damascus enim *desinet esse civitas*, quia sceleratæ et homicidæ atque servorum Dei persecutores poten-

tiam et dignitatem ac regnum velociter amittentes ad nihilum redigentur. *Et eversa, erit sicut acervus lapidum in ruina civitatis cum corpora eorum per mortis sententiam redacta in terram fuerint.*

Potest et gentium vocatio per Damascum intelligi, quæ prius crudelitate et sanguine pascebantur, sed postquam in Christum crediderint, pristinae conversationis civitas esse desistent. « Et erit sicut acervus lapidum in ruina. » Quomodo enim acervi lapidum, qui in agris dispersi sunt, in unum tumulum comportantur; sic de universis nationibus acervus credentium congregandus est in ruina Judæorum, illis cadentibus, et nobis resurgentibus. Sequitur :

VERS. 2.— « Derelictæ civitates Aroer gregibus erunt, et requiescent ibi, et non erit, qui exterreat. »

Aroer dicimus *myricas*. Myricæ autem parvæ sunt arbores infructuosæ, et semper nimis virides et amarissimæ in desertis nascentes. Et quid per myricas nisi homines amari et infructuosi, et huic mundo per desiderium inhærentes figurantur? Greges vero nuncupat ovium Dei cœtus, de quibus per Zachariam dicitur, quia « visitavit Dominus gregem suum domum Juda (Zach. x, 3). » Et Ezechiel : « Multiplicabo, inquit, eos ut gregem hominum, ut gregem sanctum, ut gregem Jerusalem (Ezech. xxxvi, 37). » His ergo « gregibus derelictæ erunt civitates Aroer, » id est myricarum, quia ubi infructuosi et amari infideles habitaverunt, ibi populus fidelium manebit. « Et non erit, qui exterreat, » quia deficient persecutores sive per mortem subtracti, sive ad Deum conversi. Sequitur :

VERS. 3.— « Et cessabit adjutorium ab Ephraim, et regnum a Damasco : et reliquiæ Syriæ sicut gloria filiorum Israel erunt, dicit Dominus exercituum. »

« Cessabit adjutorium ab Ephraim, » id est a multitudinæ gentilium populorum. *Ephraim* quippe dicitur *ubertas*. « Et regnum a Damasco cessabit, » quia sanctorum persecutores omnem, quam habebant in mundo, potentiam amittent. Vel peccatum ultra non regnabit in eis, sed justitiæ servient, et cultores religionis obtinebunt regnum et gloriam in toto orbe. « Et reliquiæ Syriæ, » id est gentilitatis, quæ conversæ fuerint ad Deum, erunt « sicut gloria filiorum Israel, » quia pares erunt credentibus ex circumcissione.

Vel per Ephraim perfidus Judæorum populus designari potest, et per Damascum principatus, et caput gentilium. Damascus enim metropolis est Syriæ. « Cessabit igitur adjutorium ab Ephraim, » quia nemo Judæis auxiliabitur adversus Titum. « Et regnum a Damasco, » id est a paganis imperatoribus, quia omnes sæculi principes erunt Christiani, et hostes religionis exterminabuntur. « Et reliquiæ Syriæ, » id est, qui de gentibus in incredulitate perduraverunt, erunt « sicut gloria filiorum Israel, » id est, sicut ignominia Judæorum, quia ad summam pervenient ignominiam et abjectionem, qui non

crediderint, tam gentiles quam Judæi. Gloriam enim ironice pro ignominia, et dedecore posuit. Sequitur.

VERS. 4.— « Et erit in die illa : attenuabitur gloria Jacob, et pingues carnes ejus emarcescent. »

VERS. 5.— « Et erit congregans sicut in messe, quod restiterit, et brachium ejus spicas leget, et erit sicut quærens spicas in valle Raphaim. »

VERS. 6.— « Et relinquetur in eo sicut racemus, et sicut excussio oleæ duarum aut trium olivarum in summitate rami, sive quatuor aut quinque in cacuminibus ejus fructus ejus, dicit Dominus Deus Israel. »

In die illa, qua prædicabitur Evangelium, attenuabitur et exilis fiet gloria Jacob, id est Judaici populi, qui Christum per mortem supplantare voluit, quia ingloriosi erunt in universo orbe Judæi, et pingues carnes eorum tabescent non habentium prophetas, non signa atque virtutes, non templi dignitatem, sed omne corpus gentis eorum emarcescet, et redigetur ad nihilum.

Et quomodo pauca spinæ et olivæ remanere solent in agro vel in arbore, sic relinquentur pauci in Israel. Et cum de gentium vocatione dicatur : « Messis quidem multa, operarii autem pauci (Matth. ix, 37), » illi pauperes messis reliquias, quæ per apostolos salvatæ sunt, et rarissimas spicas legent non in montibus, sed in valle Raphaim, id est in valle gigantum, qui sunt scribæ et Pharisei, id est in vilitate litteræ. Raphaim enim gigantes sonat.

Plebs Judæorum audivit : « Olivam fructiferam vocavit te Dominus (Jer. xi, 16), » sed tamen Christus vix paucas, id est duas in ea reperit esuriens. Nam duæ et tres olivæ et quatuor et quinque duodecim apostoli possunt intelligi, id est duodecim, quos refert Evangelium atque Paulus et Barnabas. Vel duæ et tres olivæ Petrus et Joannes et Jacobus accipe, qui Dominum in monte transfiguratum viderunt, et ad filiam archisynagogi suscitandam cum eo intraverunt. Quatuor autem et quinque reliquos novem apostolos faciunt, qui utique pro diversitate gratiarum, quæ nobis ignota est, in quatuor et quinque olivas separati sunt, ut Evangeliorum numerum et legis in se volumina demonstrarent quasi prædicatores utriusque Testamenti.

Vel ita secundum historiam. « Et erit » iste Jacob « sicut congregans in messe, quod restiterit ; » quia dum per Vespasianum perimetur, quæret et congregabit ad repugnandum adhuc eos, qui supererunt. « Et brachium ejus spicas leget, » quoniam ea virtute, qua poterit, singulos Judæorum colliget. « Et erit sicut quærens spicas in valle Raphaim, » id est gigantum, quia capta per Titum Jerusalem quæret aliquas Judæorum reliquias in humiliatione superbiorum principum suorum, qui se quasi gigantes æstimabunt fortes. Sicut enim rarissimæ remanent spicæ post terga metentium, ita paucissimæ Judæorum reliquiæ post eversionem Jerusalem remanebunt.

« Et relinquetur in eo fructus ejus, » id est poste-

ritas ejus, « sicut racemus » unus post vindemiatores, vel « sicut excussio oleæ duarum aut trium olivarum in summitate rami ejus, seu quatuor aut quinque olivarum in cacumine ejus » remanentium. Quando enim olivæ excutiuntur ex olea, remanere solent in cacumine ejus, vel in summitate rami alicujus duæ vel tres, aut quatuor olivæ. Sic et Judæorum reliquiæ fuerunt paucae post excidium Jerusalem. Post exterminium autem Judæorum subjungitur conversio gentium, cum dicitur :

VERS. 7.— « In die illa inclinabitur homo ad Factorem suum, et oculi ejus ad sanctum Israel respicient. »

VERS. 8.— « Et non inclinabitur ad altaria, quæ fecerunt manus ejus, et quæ operati sunt digiti ejus. »

Hoc enim manifestum est. Sequitur : « Non respiciet lucos et delubra. » *Lucus* nemorosa dicuntur et opaca loca, in quibus propter amœnitatem ponebant idola sua, et omnem voluptatem ante eorum aras explebant. *Delubra* vero templa erant a *deluendo* vocata, vel quia ibi se putarent delui (112), id est mundari a peccatis suis per multitudinem sacrificiorum, vel quia non longe erant rivi, in quibus se deluebant et hostias lavabant. Rursus vero de Judaica plebe subditur :

VERS. 9.— « In die illa erunt civitates fortitudinis ejus derelictæ, sicut aratra et segetes, quæ derelictæ sunt a facie filiorum Israel. »

Nam, sicut olim ante filios Israel temporibus Josue Chanaanæ deseruerunt regiones suas, sic nunc Judæi civitates suas a facie Romanorum. Ubi et adjicitur : « Et erit deserta. »

VERS. 10.— « Quia oblita es Dei Salvatoris tui, et fortis adjutoris tui non es recordata. »

Nam quia gens hæc Deum, qui se semper adjuvare potenti manu solebat, oblivioni tradidit, *deserta* est ab eo in manus Romanorum; desertæ sunt et spirituales ejus virtutes in manus hostium internorum et invisibilium. Nam sequitur :

« Propterea plantabis plantationem fidelem, et germen alienum seminabis. » Plantatio quippe fidelis est, quando vineam quis plantat, et ejus ipse fructum colligit. Plantatio autem infidelis est, et *germen alienum*, quando, quod quis plantat aut seminat, non colligit, sed hostes diripiunt illud. Quod igitur ait : « Propterea plantabis plantationem fidelem, ironice dictum intelligatur. Quodque subjungit : « Et germen alienum seminabis, » affirmando legendum est. Quidquid enim virtutis plantat in agro cordis sui, et quidquid boni operis seminat iste populus, nullum ex eo fructum percipiet, sed maligni spiritus devorabunt illud.

Vel *plantationem fidelem plantabis*, unum Deum prædicans, et *germen alienum seminabis* non recipiens Filium, qui consubstantialis est Patri, sed blasphemiam contra eum seminans. Ideo non uva sed *lu-*

(112) Cod. G., *dilui*.

(115) Quæ hinc sequuntur ex cod. Crucensi, de-

brusca infidelitatis erit in plantatione tua. Et quamvis semen tuum inprimis sub specie religionis floreat, non tamen fructum ex eo percipies in die hæreditatis. Sequitur :

VERS. 11.— « In die plantationis tuæ labrusca, et mane semen tuum florebit : ablata est messis in die hæreditatis, et dolebis graviter (113). »

Ille plantat, qui in se ipso vel in alio virtutes ædificat. Sed Judæa labruscam in die plantationis suæ perficit, quia dum plantare se virtutes æstimat, agrestia gentilitatis opera facit aut docet. Quid enim tam paganum, quam mactare hircum et immolare bovem? Talia enim sunt idolorum sacrificia. Dum igitur actiones hujusmodi Judæa pro virtutum operibus docet aut facit, in die plantationis labruscam B habet.

Semen quoque nostrum opus bonum quod nunc agimus, ut in futuro metamus fructum retributionis ejus. Sed *semen* Judæorum vel hypocritarum *mane* floret, quia de bonis, quæ faciunt, humanos favores, et transitorias retributiones quærunt, de quibus Judex dicit : « Amen dico vobis, quia receperunt mercedem suam (Matth. vi, 2). » Unde et hic additur : « Ablata est messis in die hæreditatis, » id est fructum non invenies in die retributionis, quia in flore nunc exinanescit nebula humanæ laudis et infimæ appetitionis.

« Et dolebis graviter, » quia alibi dicitur : « Cum intraverit paterfamilias, et clauserit ostium, incipietis foris stare, et pulsare ostium dicentes : Domine, Domine, aperi nobis, et respondens dicet vobis : Nescio vos, unde sitis, recedite a me operarii iniquitatis. Ibi erit fletus et stridor dentium (Luc. xiii, 25). » Sic quinque fatuarum virginum *semen* mane floruit, et in die hæreditatis ablata messe doluerunt graviter, quæ, quia « oleum in vasis suis (Matth. xxv) » non servaverunt, veniente sponso, extinctis lampadibus, foras remanserunt. Post Judæorum vero probationem et calamitatem subjungi reor de adventu Antichristi, quem expectant exercitus ejus.

VERS. 12.— « Væ multitudini populorum multorum ut multitudo maris sonantis, et tumultus turbarum sicut sonitus aquarum multarum ! »

VERS. 13.— « Sonabunt populi sicut sonitus aquarum inundantium. »

Nam legimus in Daniele quia quasi tempestas « veniet rex aquilonis (Dan. xi, 15), » qui est Antichristus, « contra regem Austri (ibid.), » id est Ægypti, in curribus et in equitibus et in classe magna, et ingreditur terras, conteret, et pertransiet, de cujus exterminio subditur : « Et increpabit eum, et fugiet procul, et rapietur sicut pulvis montium a facie venti, et sicut turbo coram tempestate. »

VERS. 14.— « In tempore vesperi et ecce turbatio : in matutino et non subsistet. »

Nam juxta Danielem « fiet tabernaculum suum super montem inclytum, et sanctum (ipse est mons siderantur omnia in cod. Garstensi usque ad capitis sequentis vers. 7.

Oliveti) et veniet usque ad summitatem ejus, et nemo auxiliabitur ei (*Dan. xi, 43*), » quem sicut Apostolus ait : « Dominus Jesus interficiet Spiritu oris sui, et destruet illustrationem adventus sui (*II Thess. ii, 8*). » Increpabit eum Judex veniens, sicut et sanctus Job significat dicens : « Quis arguet coram eo viam ejus, et quæ fecit, quis reddet illi? (*Job. xxi, 31*). » — « Et fugiet procul, » a facie Judicis atque « rapietur sicut pulvis montium a facie venti, et sicut turbo coram tempestate, » quando, sicut scriptum est, « expellet de luce in tenebras, et de orbe transferet eum (*Job. xviii, 18*). » Nam « ignis in conspectu ejus, et in circuitu ejus tempestas valida (*Psal. xlix, 4*). »

Hujus ergo turbine tempestatis rapietur iste filius perditionis, et in gehennam præcipitabitur. *In tempore vesperi*, id est finis sæculi tyrannidem adhuc exercere volet, et ecce super eum *turbatio* repentina veniet; in *matutino*, id est in tempore resurrectionis omnium visitabitur, et non subsistet.

Vel de paganis, qui persecuti sunt Ecclesiam, potuit dici : « Væ multitudini, etc. » — « Sonabunt populi » in spectaculis theatralis luxuriæ, et amphitheatri crudelitate, et circi furoribus. « Sicut sonitus aquarum inundantium, » quando consona impietatis voce blasphemabunt, et ducent christianos ad leonem et cætera hujusmodi. Sed illis instar maris furentibus, increpabit Dominus auctorem seditionis eorum, et fugabit illum ab eis, et sicut pulvis motus in montibus quanto excelsior est, tanto fortius rapietur, et sicut turbo, qui de terra consurgit subita tempestate fertur in sublime, ita et ille raptus a credentium populo separabitur, et fugiet, ne in abyso religetur. Cumque dies consummationis advenit, quod est vespera, tunc erit tribulatio sua peccata noscentis, et in tempore matutino, id est die resurrectionis non subsistet.

« Hæc pars eorum, qui vastaverunt nos, et sors diripientium nos. » Hanc sibi partem ac sortem vastatores Ecclesiæ acquirunt, ut tam horribili plectantur exterminio, præcipue tamen sequaces Antichristi, de quo rursus subditur :

CAPUT XVIII.

VERS. 1. — « Væ terræ cymbalo alarum, quæ est trans flumina Æthiopiæ ! »

VERS. 2. — « Qui mittit in mare legatos, et in vasis papyri super aquas. Ite, angeli veloces, ad gentem convulsam, et dilaceratam, ad populum terribilem, post quem non est alius, gentem expectantem et conculcatam, cujus diriperunt flumina terram ejus. »

Nam, sicut incarnata Veritas in prædicatione sua pauperes idiotas et simplices elegit, sic econtra ille condemnatus homo, quem in fine mundi apostata angelus assumet, ad prædicandam falsitatem astutos ac duplices atque hujus mundi sapientiam habentes electurus est. Unde nunc recte dicitur : « Væ terræ cymbalo alarum ! » etc. Terra quippe, cui Væ dicitur, ille principaliter damnatus homo

A est, qui *alarum* cymbalum vocatur quia hi, qui per superbiam in altitudine cogitationis evolvunt, eundem perversum hominem prædicando sonant. Quæ scilicet terra recte « trans flumina Æthiopiæ » esse perhibetur. Æthiopia enim nigrum populum miuit. Et omnem hominem mundus iste, quia peccatorem profert, quasi Æthiopia nigrum populum parit. Sed terra, cui *væ* dicitur, *trans flumina Æthiopiæ* esse perhibetur, quia damnatus ille homo tanta immensitate iniquus est, ut omnium peccantium peccata transcendat. « Qui mittit in mare legatos, » quia prædicatores suos in sæculo spargit. De quibus recte subditur, qualiter mittantur, cum dicitur :

« In vasis papyri super aquas. » Ex papyro quippe charta est. Quid ergo per papyrum nisi sæcularis scientia designatur? Vasa ergo papyri sunt corda doctorum sæcularium. *In vasis itaque papyri super aquas legatos* mittere, est prædicationem suam in sapientium carnalium sensibus ponere et defluentes ad culpam populos vocare. *Mittit igitur in mare legatos*, dicens : *Ite, angeli veloces*, id est nuntii mei, *ad gentem Judæorum convulsam* a solo proprio, *et dilaceratam* ab hostibus, *ad populum olim terribilem*, qui Dei utebatur imperio, *post quem non fuit alius*, id est ad cujus potentiam nullus alius comparandus erat, *gentem expectantem* Salvatoris adventum, *et conculcatam* interim ab hostibus.

Flumina, quæ diriperunt terram ejus, Titum et Vespasianum cum exercitibus suis possumus accipere, quia superius ait : « Aquas fluminis fortes et multas regem Assyriorum, et omnem gloriam ejus (*supra viii, 7*). »

Post hujus autem adversarii persecutionem dies iudicii ventura est, sicut ait Dominus : « Statim post tribulationem dierum illorum sol obscurabitur, et luna non dabit lumen suum, et stellæ cadent de cælo (*Matth. xxiv, 29*). » Unde et hic sequitur :

VERS. 3. — « Omnes habitatores orbis, qui morantur in terra, cum elevatum fuerit signum in montibus. »

VER. 4. — « Videbitis, et clangorem tubæ audietis. »

Omnes enim habitatores orbis videbunt signum crucis, et clangorem tubæ audient, quia « virtutes cælorum commovebuntur, et tunc apparebit signum Filii hominis in cælo, et tunc plangent se omnes tribus terræ, et videbunt Filium hominis venientem in núbibus cæli cum virtute magna et majestate. Et mittet angelos suos cum tuba et voce magna, et congregabunt electos ejus a quatuor ventis et a summo cælorum usque ad terminos eorum (*ibid.*). » Elevabit ergo *signum in montibus*, id est in excelsis, quia apparebit inter agmina virtutum cælestium in nubibus. Et clangor tubæ audietur « Canet enim tuba, et mortui resurgent (*I Cor. xv, 52*). » Sed quia Judex singulorum opera intuetur subjungit propheta :

« Quia hæc dicit Dominus ad me : Quiescam, et

considerabo in loco meo, sicut meridiana lux clara est, et sicut nubes roris in die messis. » Quis vero est locus Dei nisi cor angelorum vel hominum electorum? « Templum enim Dei sanctum est, quod estis vos (I Cor. III, 17), » ait Apostolus. Qui cum incorrigibiles ad penitentiam provocat, laborare dici potest. Hinc namque ait : « Laboravi sustinens (supra. 1, 14). » Sed cum peccantes in malitia sua derelinquens in solis electis residet, non jam suadens iniquis penitentiam, sed ad futurum eos iudicium reservans, quasi post laborem invenit quietem. Proinde nunc dicit : « Quiescam in loco meo, » id est tantum in corde sanctorum, ubi requies mihi est, habitabo, nec in correptione perversorum ultra laborabo quia incassum fatigor in eis. Et ita quiescam, « sicut nubes roris est in die messis. » Quia, sicut messoribus fatigatis gratissima est nubes roris, sic mihi dulce erit refrigerium, quod in mentibus electorum invenio fatigatus ab iniquorum malitia, quorum mens terrenis exurit desideriiis. Nec immerito Dominus messori comparatur, quia velut ab agro segetes, quotidie ab hoc sæculo per mortis sententiam abscidit homines. « Et considerabo, » inquit, actiones uniuscujusque ita manifeste, « sicut meridiana lux clara est. » Nunc enim omnia quæ facimus Judex, qui latet, sine intermissione considerat, ut pro his quod justum fuerit quandoque retribuatur. Sequitur :

VERS. 5. — « Ante messem enim totus effloruit, et immatura perfectio germinavit (114), et præcedentur ramusculi ejus falcibus, et quæ derelicta fuerint abscindentur et excutientur. »

VERS. 6. — « Et relinquentur simul avibus montium, et bestiis terræ, et erunt æstate perpetua super eum volucres, et omnes bestię terræ super illum hiemabunt. »

Sicut seges vel arbor, quæ citius quam debuerat florescit, opportunum fructum non facit; sic qui non propter expectationem supernæ retributionis, sed propter mundanarum rerum cupiditatem operatur quæ facit, fructum boni operis facere nequit, quoniam ante tempus florens exinanescit. Flos enim futuri operis præcedens cogitatio est. Sed qui in opere, quod agendum esse proponit, non æternam retributionem appetit sed temporalem, ante messem floret, quia flos cogitationis ejus ad messem futuræ vitæ non germinat. Messis enim consummatio sæculi est. Et immatura perfectio illius germinat, qui ante diem novissimum sufficere sibi quæ fecit æstimat, quasi jam perfectus. ⁴

Appropinquante igitur orbis termino dicitur, quia totus « ante messem effloruit, et immatura perfectio germinavit, » quia tunc præcipue genus humanum præsentia diligit, et expectare futura negliget. Ramusculus ejus, id est orbis vel humani generis, quasi alicujus arboris, singuli homines; falces vero sententiæ superni Judicis. Et ramusculi arboris hujus

A præciduntur falcibus, cum singulos homines ab hac vita sententiæ Judicis abscidunt. Et quæ derelicta fuerint, abscidentur, cum totus orbis pariter finietur. Et abscissa excutientur, quia in iudicio discutientur et examinabuntur.

Et postquam isti, qui ante messem effloruerant, in iudicio damnati fuerint, « relinquentur avibus montium, » id est malignis spiritibus in corde superbiorum habitantibus, « et bestiis terræ, id est sævis dæmonibus, qui peccatores vel terram conculcant. Aves enim dæmones esse Dominus insinuat dicens de seminibus : « Aliud cecidit secus viam, et conculcatum est, et volucres cæli comederunt illud (Luc. VIII, 5). » Et inferius exponens ait : « Quod autem secus viam, hi sunt, qui audiunt, deinde venit diabolus, et tollit verbum de corde eorum (ibid. 12). »

B Bestię quoque sunt ipsi dæmones, qui ad rapiendas mortis tempore peccatorum animas violentia crudelitatis efferantur, contra quos dicitur : « Ne tradas bestiis animas confidentes tibi (Psal. LXXIII, 19). » Montes sunt superbi quique, quia « montes sicut cera fluent a facie Domini (Psal. xcvi, 5); » terra vero peccator est, qui audire meruit : « Terra es, et in terram ibis (Gen. III, 19). » Aves itaque montium et bestię terræ, quibus excussi isti relinquantur, maligni spiritus sunt; æstas vero perpetua regnum Dei post iudicium est. Comparavit enim illud æstati dicens : « Videte ficulneas et omnes arbores, cum producant jam ex se fructum, scitis, quoniam prope est æstas; ita et vos, cum videritis hæc fieri, scitote, quoniam prope est regnum cælorum (Marc. XXI, 29). »

C Hiems autem damnatio reprobiorum quia « ibi erit fletus et stridor dentium (Math. VIII, 12). » Nam propter nimium frigus solent stridere dentes. Et Job dicit : « Ad calorem nimium transeat ab aquis nivium (Job. XXIV, 19). » Aquæ enim nivium frigidissimæ sunt. « Erunt igitur æstate perpetua super eum volucres, » quia quando justi fulgebunt sicut sol in regno Patris eorum, tunc maligni spiritus fasciculos zizaniorum comburent.

« Et omnes bestię terræ super eum hiemabunt. » Quoniam omnes sævissimi dæmones, qui nullum omnino charitatis sentiunt calorem in frigore damnationis perpetuæ, super eos constricti torpebunt, atque contracti super eos in pœnis jacebunt, ac pariter punientur. Post hæc de conversione Israel, quæ sub Elia fiet, sequitur :

D VERS. 7. — « In tempore illo deferretur munus Domino exercituum a populo divulso, et dilacerato, a populo terribili, post quem non est [Vulg., fuit] alius, a gente expectante et conculcata, cujus diripuerunt flumina terram ejus ad locum nominis Domini exercituum, montem Sion. »

Id est ad Ecclesiam. Tunc enim gratum fidei munus operumque honorum Hebraicus populus

(114) Vulg., germinabit.

Christo deferret ad Ecclesiam, ubi confessio nominis A
ejus habitat.

Vel ita : *ramusculi*, qui inutiles sunt, *præcidentur
fulcibus* dicente Domino : « Ego sum vitis vera et
Pater meus agricola est. Omnem palmitem in me
non ferentem fructum tollet eum (*Joan. xv, 1*). » Et
quæ præcisa sunt, *relinquentur avibus et bestiis
terræ*, id est dæmonibus, ita ut, qui a Deo præcisis
fuerit et delectus, et de corpore illius, quod est
Ecclesia, separatus, tam in æstate quam in hieme,
id est et in prosperis, et in adversis, volucrum et
bestiarum fiat mansio. Ac sicut hi, qui infructuosi
sunt in Ecclesia, amputantur et projiciuntur, ne
fermentum modicum totam massam corrumpat ; ita
econtra potest fieri, ut, qui hæretico errore sunt de-
cepti et avulsi a Deo, atque lacerati, et horribiles
ob blasphemiam, frustra que mendacia præstolantes,
et conculcati a dæmonibus et a fluviis in partes va-
rias dissipati, veniant ad Ecclesiam.

CAPUT XIX.

VERS. 1. — « Onus Ægypti. Ecce Dominus ascen-
det super nubem levem, et ingreditur Ægyptum,
et movebuntur simulacra a facie ejus, et cor Ægy-
pti tabescet in medio ejus. »

Onus istud et in quinto gradu est, et in eodem
ita dicitur, quia « quinque civitates erunt in terra
Ægypti loquentes lingua Chanaan (*infra, v. 18*), »
ut advertamus, quia de illis nunc agitur, qui quin-
que sensibus corporis sunt dediti. Ægyptus enim,
qui interpretatur *tribulatio* vel *tenebræ*, mundum
significat tribulationibus et angustiis plenum, sive gen-
tilitatem tenebris errorum coopertam. Hæc enim,
quæ de Ægypto dicuntur, ad Salvatoris adventum
et mundi reconciliationem, gentium conversionem
referenda sunt.

« Ecce enim Dominus ascendet super nubem le-
vem. » *Nubem levem* aut proprie corpus Domini
accipere debemus, quia leve fuit, id est nullo pec-
cato prægravatum, aut certe matrem ejus Virginem
nullo humano semine prægravatam. *Super nubem
ergo levem Dominus* ascendit, et in Ægyptum venit
quando, carnem humanitatis nostræ assumens, sine
peccati gravedine in mundo apparuit.

Vel *nubem levem* apostolos ab omni terrena pos-
sessione exoneratos accipere possumus, de quibus
dicitur : « Qui sunt isti, qui ut nubes volant ? » (*Isa.
ix, 8*.) Super quos Dominus sedens ingressus est
Ægyptum, quia per eos venit ad gentes. Et com-
mota sunt *simulacra Ægypti a facie ejus*, quia veritate
coguita fugati sunt errores, et idola destructa
sunt, ubi Deus innouit gentibus. Et *cor Ægypti*,
id est tenebrosa mens eorum qui in infidelitate
perduraverunt, nimio dolore contabuit, cum viderent
idolorum evacuari culturam. Sequitur :

VERS. 2. — « Et concurrere faciam Ægyptios
adversus Ægyptios, et pugnabit vir contra fratrem
suum, et vir contra amicum suum, civitas adversus
civitatem, regnum adversus regnum. »

Hoc prædicatio Domini Jesu fecit in toto orbe,

dum alii fidem susciperent, et alii eam penitus im-
pugnare conarentur. Unde, et per se ipsum hoc
idem prænnuntiaverat dicens : « Nolite arbitrari,
quia venerim mittere pacem in terram. Non veni
pacem mittere sed gladium. Veni enim separare
hominem adversus patrem suum et filiam adversus
matrem suam, et nurum adversus socrum suam,
et inimici hominis domestici ejus (*Matth. x, 34*). »
Sequitur :

VERS. 3. — « Et dirumpetur spiritus Ægypti in
visceribus ejus, et consilium ejus præcipitabo. »

Diruptus est *spiritus Ægypti*, qui prius erat inte-
ger in malitia, id est gentilium voluntas divisa est
aliis credere volentibus, aliis recusantibus. *Et con-
siliium* impiorum quo fidem impugnare sagaciter vo-
luerunt persecutiones excitando præcipitatum est
quia fides perseverat, et illi sunt exterminati. Se-
quitur :

« Et interrogabunt simulacra sua, et divinos suos
et pythones, et ariolos. » Sollicite sciscitati sunt
infideles et a diis, et a sapientibus suis, quare talia
in mundo nunc essent exorta, ut genus humanum
consuetudinem antiquam deserens novæ religionis
cultum susciperet. Sequitur :

VERS. 4. — « Et tradam Ægyptum in manu domi-
norum crudelium, et rex fortis dominabitur eorum,
ait Dominus Deus exercituum. »

Crudelis dicitur, qui districte feriendo non parcat.
Si ergo Ægyptus in eis, qui corripuntur, hic acci-
pitur, quid appellatione *dominorum crudelium* nisi
pia severitas magistrorum Ecclesiæ designatur qui
zelo Dei ferventes peccata subjectorum non delin-
unt ? Aut hoc loco crudeles districte peccata ferien-
tes intelligamus, et ulciscendis culpæ non parcentes.
Nam et ipsi Deo beatus Job in afflictione positus
ait : « Mutatus es mihi in crudelem, et in duritia
manus tuæ adversaris mihi (*Job. xxx, 21*). » Si
ergo Deum vir sanctus crudelem dicere non timuit,
quia sibi non parcebat, cur nos sanctæ Ecclesiæ
præpositos benigne crudeles non dicamus qui culpas
delinquentium misericordiæ severitate feriunt ? *Talibus*
itaque Dominis crudelibus traditur Ægyptus,
id est hic mundus, ut sub eorum disciplinis compo-
natur.

Et *rex fortis*, id est Christus dominator eorum.
Quod si in reprobris Ægyptum intellexerimus, Ægy-
ptus datur in manus *dominorum crudelium* ; quia,
qui converti nolunt, traduntur acrius possidendi ma-
lignis spiritibus. Sed ne ipsi dæmones ultra modum
sæviant, *rex fortis* Dominus Jesus dominatur eorum.
Post hæc de doctrinis falsitatum, quomodo ad ni-
hilum redigendæ erant, subjungit dicens :

VERS. 5. — « Et arescet aqua de mari, et fluvius
desolabitur, atque siccabitur. »

VERS. 6. — « Et deficient flumina, attenuabuntur,
et siccabuntur rivi aggerum. Calamus et juncus
marcescet. »

VERS. 7. — « Nudabitur alveus rivi a fonte suo,

et omnis seminis irrigua siccabitur, arescet, et non erit. »

Quid est enim *aqua* maris nisi scientia doctrinæ sæcularis? Et quid est *fluvius* aquæ istius nisi exuberans fluxus carnalis sapientiæ? *Arescet* igitur *aqua de mari*, quia mundana doctrina deficiet de sæculo. *Et fluvius* humanæ sapientiæ *siccabitur*, quia stultam faciet Deus sapientiam hujus mundi.

Et deficient flumina diversarum doctrinarum, quæ per orbem defluebant. « Et siccabuntur rivi aggerum, » id est carnales scientiæ de cordibus humanis. Qui enim rivum per aggerem ducere nititur, terram excavat, ut aquam ducat illuc, quo naturaliter impetus eam non dirigebat. Similiter qui scientiæ sæcæ rivulum in cor alterius studet emanare, ipsum cor ejus in altum fodit, et cogitationes velut terram, quæ rivulum currere non sinebat, ejiçit. Sic faciebant doctores gentilium, ut scientiam sui erroris sine obice ponerent in cordibus audientium. Sed jam per prædicationem evangelicam tales rivi aggerum attenuati sunt, atque siccati.

Quid autem per calamum, quo scriptura fiebat antiquitus, nisi peritiam scribentium designatur? Quid per juncum nisi auditorum viriditas? *Marcescet* ergo *calamus et juncus*, id est doctor et discipulus terrenæ sapientiæ, cum fides Christi florere cœperit.

Nudabitur altrens rivi scientiæ sæcularis *a fonte suo*, id est a suggestione diaboli, quia ipse deceptor antiquus ultra non infundet eis aquam fallacis sapientiæ, cum per Christi gratiam siccata fuerit. Unde et per Jeremiam de Babylone vel ejus rege dictum est : « Desertum faciam mare ejus, et siccabo venam ejus (*Jer.* I, 36). » Semen autem irrigabatur, dum erroris doctrina suggestionibus diaboli humectaretur. Omne ergo « semen irriguum siccabitur, arescet, et non erit, » quia diaboli vena rigans obstruetur, et doctrina sæculi, quam irrigabat, deficiet. Sed inter hæc, quid hujusemodi doctoribus acciderit, audiamus. Sequitur :

VERS. 8. — « Et mœrebunt piscatores, et lugebunt omnes mittentes in flumen hamum, et expandentes rete super faciem aquæ, et emarcescent [*Vulg.* amarescent]. »

VERS. 9. — « Confundentur, qui operabantur linum, pectentes et textentes subtilia. »

VERS. 10. — « Et erunt irrigua ejus flaccientia, omnes qui faciebant lacunas ad capiendos pisces. »

Quid enim per *piscatores* nisi philosophi designantur, et cæteri tales quasi pisces in mari hominibus miseris in hoc sæculo decipientes; nam de captura, quæ per evangelicam prædicationem facienda erat, dictum est apostolis : « Venite post me, faciam vos fieri piscatores hominum (*Matth.* IV, 19). » Sic et hoc loco piscatores hominum sed in malam partem accipimus. Quid vero per *flumen* designatur nisi genus humanum, quod ab ortu usque ad finem defluit, et quasi aquæ more usque ad competentem terminum ex carnis liquore percurrit. Quid autem per *hamum* nisi deceptorum philosophorum atque poctarum

rum doctrina; in hamo quippe esca monstratur, et aculeus occultatur. Sic et in doctrina gentilium dulcedo verborum prætenditur, et venenum deceptionis absconditur. Mittebant igitur *in flumen hamum*, qui doctrinam deceptionis in humanum genus porrigebant. Quid vero per *rete* eorum nisi fallax prædicationis exprimitur? Quasi enim retia quædam sunt complexæ prædicantium dictiones, quæ eos, quos ceperint, non facile amittunt; unde et retia quasi retinentia dicuntur. Expandebant igitur retia *super faciem aquæ*, qui falsitatis prædicationem super cor populi spargebant. Aqua enim populus est. Hi itaque *piscatores*, qui ante gaudebant dum multos ceperent, luxerunt, et doluerunt temporibus evangelicæ prædicationis, cum jam neminem capere possent.

Et confundentur, inquit, philosophi, qui *operantur linum*, id est subtiliorem doctrinam. Nam de virtutibus et vitiis atque rerum secretioribus naturis et causis, interdum etiam de Deo, subtilia multa tractabant, et omnis doctrina eorum subtilior erat quam poctarum. Pectebant enim *subtilia*, cum dividerent, et minus subtilia velut stupas extraherent, et abjicerent sicut in dialecticis divisionibus agitur. *Textebant subtilia*, cum acutas ratiocinationes concluderent, sententiasque sententiis connecterent, et libros impleverunt. Sed omnes isti *confundentur*, cum Salvatoris doctrina gentibus illuxerit. *Et irrigua fluminis hujus*, id est corda hominum, quæ irrigabantur sæculari doctrina, *erunt flaccientia* et marida, quia virorem amoris præsentium amittent, ut in amore futurorum virescant. « Lacunas faciebant ad capiendos pisces, » qui doctrinas errorum fodiebant, et construebant ad deceptionem hominum. Sequitur :

VERS. 11. — « Stulti principes Taneos, sapientes consilarii Pharaonis dederunt consilium insipientes : quomodo dicetis Pharaoni : Filius sapientium ego, filius regum antiquorum? »

VERS. 12. « Ubi sunt nunc sapientes tui. Annuntiant tibi et indicent quid cogitaverit Dominus exercituum super Ægyptum. »

Tanis, quæ dicitur *mandans humilia* vel *mandatum humile*, doctrina sapientium sæculi est. Præceptores enim sæcularium litterarum nesciunt jubere nisi humilia et infima, quæ propter præsentem vitam observentur. At vero præcepta doctrinæ celestis alta et sublimia sunt, quia propter regna cælorum data sunt. Sed *principes Taneos*, id est sæcularis scientiæ, *stulti* fuerunt, nescientes prævidere futura. Pharaonem autem diabolus est, sicut Ezechiel indicat dicens « Ecce ego ad te, Pharaon rex Ægypti, draco magne, qui cubas in medio fluminum tuorum (*Dan.* XXIX, 3). Unde Pharaon interpretatur *nudavit eum* vel *dissipavit eum*, quia diabolus in primo homine genus humanum veste immortalitatis, et indumento justitiæ nudavit, et mentem ejus ab unitate cogitationis dissipavit, et per varia desideria sparsit.

Qui vero *consilarii* hujus *Pharaonis* nisi dæmo-

nes? Qui dant *consilium insipiens*, quando prava hominibus quasi rationabiliter *consulendo suggerunt*. Vel philosophos atque idolorum sacerdotes et hæreticos intelligamus consiliarios ejus, qui *dederunt principibus hujus sæculi consilium insipiens*, scilicet ut Ecclesiam persequerentur, et fidem Dei laborarent extinguere. Vel ipsi Pharaoni *dederunt consilium*, quia sunt nonnulli homines tam prompti ad inveniendum malum, ut astutiam diaboli præcurrere videantur in adinventionibus suis. *Dederunt ergo Zabulo consilium*, ut errorum dogmatibus mundum repleret, quatenus omnes fortius irretitos teneret, quia tam veloces fuerunt in seminandis erroribus, ut ipsi magis suggerere talia videantur diabolo, quam hæc ab illo discere. Quando enim vel ipse diabolus ea posset excogitare, quæ adinvenit Arius? Quando ea linxisset, quæ cæteri reppererunt inventores errorum? *Dederunt itaque consilium Pharaoni*, sed consilium eorum fuit *insipiens*, quia errores jam destructi sunt, et scientia veritatis jam illuminatus est mundus, et a jugo Pharaonis liberatus.

O, inquit, sapientes mundi, *quomodo dicetis unusquisque vestrum Pharaoni*, id est principi hujus sæculi prædicantibus apostolis: « Filius sapientium ego, et regum antiquorum, » id est philosophorum, id est quomodo vos in auxilio Satanæ patris jactabitis vos esse filios veterum sapientum, qui hæc errorum dogmata invenerunt, quæ vos adversus Evangelii prædicatores defendere non valetis? *Ubi sunt nunc, o Pharao, sapientes tui? Annuntient tibi*, si possunt *quid cogitaverit Dominus super Ægyptum*, id est super gentilem populum, scilicet errores universos destruere, et lumen veritatis omnibus notum facere, cunctosque mortales liberare.

Vel ita: *stulti erunt principes Taneos* quæ dicitur *mandatum humile*. Omnes enim hæretici contrariam altitudinem humiliati docent, et detrahunt ad inferos, et sunt principes humilis dejectique mandati. *Consiliarii quoque Pharaonis*, qui rex Ægypti est, et recte dissipator, et divisus, et in partem varias separat, *insipiens* arguentur dedisse *consilium*, quando disperdet Dominus sapientiam sapientum, et reprobat. Solent autem hæretici huic regi suo, id est tumido sensui dicere: *Filii sumus sapientum*, qui ab initio doctrinam nobis apostolicam tradiderunt. *Filii sumus regum antiquorum*, qui appellantur reges philosophorum, et habemus scientiam Scripturarum junctam scientiæ sæculari. Quem regem interrogant, ubi sint sapientes ejus, qui contemnebant ecclesiasticam simplicitatem. Sequitur:

VERS. 13. — « Stulti facti sunt principes Taneos, emarcuerunt principes Mempheos, deceperunt Ægyptum angulum populorum (115). »

VERS. 14. — « Dominus miscuit in medio ejus

(115) Alias, *populorum ejus*.

A Spiritum vertiginis: et errare fecerunt Ægyptum in omni opere suo sicut erat ebrius et vomens. »

VERS. 15. — « Et non erit Ægypto opus, quod faciebat, caput et caudam, incurvantem et refrenantem. »

Ex quo Deus stultam fecit sapientiam hujus mundi, *stulti facti sunt et principes Taneos*, id est ejusdem mundanæ sapientiæ, quæ est mandans humilia et terrena: *et emarcuerunt principes Mempheos*, id est doctores vaniloquorum. Memphis enim interpretatur *ab ore*. *Deceperunt Ægyptum*, id est sæculum, *angulum populorum*, id est dolosarum impurarumque mentium duplicitate plenum. Quid enim per *angulum* (duplices quippe semper sunt in angulo parietes) nisi impura corda signantur quæ, dum veritatis simplicitatem fugiunt, ad semetipsa quodammodo duplicitatis perversitate replicantur quibus aperte per Jacobum dicitur: « Purificate corda duplices animo? (Jac. iv, 8.) » Bene ergo mundum vel gentilitatem vocat *angulum populorum*, quia in omnibus populis et nationibus erat ista duplicitas, et iste dolositatis angulus.

« Dominus miscuit in medio ejus spiritum vertiginis, » id est erroris, quia justo judicio lumen cognitionis suæ abscondens, spiritum erroris in eam permisit ingredi. *Et errare fecerunt Ægyptum in omni opere suo prædicti principes*, id est magistri perversorum dogmatum. *Sicut errat ebrius et vomens*, quia rationem ei tollentes idololatriæ marcipaverunt eam. Qui enim ebrius est, et vomit, sic rationis sensu privatus est, et mente confusus aut alienatus, ut ea, quæ facit, aut patitur nesciat. Sed vertiginis ducebatur, ut mala, quæ operabatur, non intelligeret, et nimiam ebrietatis suæ crapulam vomebat, id est spurcitiam erroris, qua repleta erat, ore proferebat, dum laudaret idola, atque aures audientium, et mentes quasi vicinas auras fetidissimo odore polluebat.

Et cum prædicatores gratiæ venerint, *non erit Ægypto*, id est parti eorum, qui in infidelitate permanserunt, *opus quod faciebat*, ut eos inhibere possit: *caput et caudam*, id est primum et ultimum errare fecerunt supradicti principes, *incurvantem*, id est alios sub disciplina tenentem, *et refrenantem*, id est regentem subditos. Sequitur:

VERS. 16. — « In die illa erit Ægyptus quasi mulieres, et stupebunt, et timebunt a facie commotionis manus Domini exercituum, quam ipse movebit super eam. »

VERS. 17. — « Et erit terra Juda Ægypto in festivitatem (116) omnis, qui illius fuerit recordatus, pavebit a facie consilii Domini exercituum, quod ipse cogitavit super eam. »

Ægyptus, id est gentilitas erit pavida id est imbecilla quasi mulieres. *Et stupebunt Ægyptii*, id est gentiles, atque *timebunt* pro iniquitatibus a facie commotionis manus Domini, quia commovebit gra-

(116) Alias, *in pavorem*.

nium corda, et omnes terrendo, ac concutiendo ad pœnitentiam excitabit. Et post commotionem perturbationis ac pavoris ex malorum conscientia erit terra Juda, id est Ecclesia Catholica, extra quam confessio veritatis non est, Ægypto, id est gentilitati, in festivitatem, id est in lætitiâ et venerati-
o-nem.

Omnis Ægyptius qui recordatus fuerit illius, id est Ecclesiæ, pavebit a facie consilii Domini, qui cogitavit gentes a simulacris vanis ad Deum vivum convertere, et eos, qui converti noluerint, acerbius damnare. Comparatione Christianorum omnes pagani quasi mulieres sunt infimas habentes sententias, et quidquid dixerint, vertitur in stultitiâ, dum stupent tantæ gentis conversionem, atque mirantur, et intelligunt manum Domini. Et quicumque eorum fuerit nominis Christiani recordatus, imbecillitatem idololatricæ timore fatetur; si vero conversus fuerit, sit ei terra Juda in festivitatem, id est scientia Scripturarum: Lex et Prophetæ, Evangelium, et apostolorum Epistolæ, omnisque qui hujus terræ fuerit recordatus, pavebit, sed pavore (117), qui ducit ad vitam. « Præcipuum enim sapientiæ timor Domini (Prov. 1, 17). » Sequitur:

VERS. 18. — « In die illa erunt quinque civitates in terra Ægypti loquentes lingua Chanaan, et jurantes per Dominum exercituum: civitas solis vocabitur una. »

Quid nunc per quinque civitates nisi quinque sensus corporis designantur? Nam ut hoc innueret propheta, addidit exponendo, quia civitas solis vocabitur una ex illis. Quæ est enim civitas solis in homine nisi visus, qui totum corpus illuminat sicut sol mundum? Chanaan vero mutatus dicitur. Quinque ergo civitates in terra Ægypti lingua Chanaan, id est lingua mutata loquuntur, dum quinque sensibus corporis in gentibus a peccato mutatis serviunt justitiæ. Qui enim hos quinque a pravis delectationibus non refrenat, loquitur adhuc lingua Ægyptia. Qui vero jam eos virtutum operibus occupat, lingua Chanaan loquitur in suis quinque civitatibus, quia de vitiis ad virtutes est mutatus. Deo enim non tam verbis loquimur quam operibus.

Nonnulli quinque civitates vel legem Domini, quæ in Alexandria primum interpretata est, vel Ecclesiæ ordines, episcopos, presbyteros, diacones, fideles, catechumenos senserunt, aut certe spiritalem legis intelligentiam, de qua et Apostolus ait: « Volo quinque verbis loqui in Ecclesia sensu meo, quam decem millibus in lingua (I Cor. xiv, 19). »

Et una quinque civitatum appellatur civitas solis justitiæ, quæ mihi videtur referri ad visum. Sicut enim civitas, ut videatur, sole et luna indiget; ita ut oculi nostri illuminentur, indigemus sole, qui est Christus. Lex ergo lingua Chanaan, id est lingua mutata loquitur, dum Græcè interpretatur vel spiritaliter exponitur. Et jurat ver Dominum exercituum,

quia omnes sententias suas, in Christo confirmat. Quantum vero ad nos, quærendum est, cur non lingua Hebræa, sed Chananitide loquantur hæ civitates. Sed Hebræus transiorem sonat, qui de loco transit ad locum. Et nos licet sancti, quandiu in Ægypto sumus, id est dum in hujus mundi tenebris versamur, non possumus lingua Hebræa, id est lingua transeunte loqui, sed lingua Chanaan. Chanaan quippe interpretatur quasi motio, vel quasi respondens. Quando igitur ab Ægypto recedere volumus, et exire de potestate Pharaonis cupientes peccato prorsus carere, et in patria sanctorum, ubi justitia regnat, habitare, tunc movemur, et quasi respondemus Christo nos vocanti; et tamen, quia adhuc in præsentis sæculo detinemur, lingua Hebræa nec dum loqui possumus, donec ab hac vita transeamus. Sequitur:

VERS. 19. — « In die illa erit altare Domini in medio terræ Ægypti, et titulus (118) juxta terminum ejus Domini. »

VERS. 20. — Et erit in signum, et in testimonium Domino exercituum in terra Ægypti. »

In Ægypto, id est in gentibus erit altare Domini, ut ab ortu solis usque in occasum in omni loco juxta Malachiam offeratur nomini ejus « oblatio munda (Malach. 1, 1). » Sicut autem una est Ecclesia, sic et unum est altare in toto orbe, quia et unum sacrificium. Titulus juxta altare est Evangelium, et apostolorum doctrina.

Vel altare fides est, in qua offerimus hostias, de quibus ait Petrus: « Superædificamini domos spirituales, sacerdotium sanctum, offerentes spirituales hostias (I Petr. 11, 5). » Titulus juxta altare hoc bona operatio est, et Dominicæ passionis imitatio. Et erit illud altare vel titulus in signum et in testimonium resurrectionis ejus. Sequitur: « Clamabunt enim ad Dominum a facie tribulantis, et mittet eis salvatorem ac propugnatorem, qui liberet eos. »

VERS. 21. — « Et cognoscetur Dominus ab Ægypto, et cognoscent Ægyptii Dominum in die illa, et colent eum in hostiis et muneribus, et vota vovebunt Domino, et solvent. »

A facie hostis antiqui tribulantis eos in perversis operibus clamabunt, tandem ad Dominum sicut Cornelius, qui « erat deprecans Deum semper (Act. x, 2). » Et mittet eis per apostolos Christum salvatorem, qui liberet eos.

Vel martyres et cæteri fideles afflictionibus pressi, clamabunt ad Dominum a facie mundi tribulantis et impugnantis eos. Et spiritaliter mittet eis salvatorem suum, quia per Christi gratiam liberabit eos, et contra infideles pro eis pugnabit. Quoties enim a persecutoribus vel impugnatione dæmonum affligimur vel qualibet adversitate, et Dei auxilio liberamur, ac protegimur, Deus Filium suum ad nos quodammodo mittit salvatorem ac propugnatorem, qui nos liberat. Sic igitur fidelibus suis tunc misit

(117) Ambo Codd., et pavore.

(118) Alias, titulus Dominici juxta terminum ejus.

eum, dum post martyrum afflictionem pacem A dedit.

« Et cognoscetur, inquit, Dominus ab Ægypto, » quia postquam persecutiones quieverunt, universus credidit orbis. « Et cognoscent Ægyptii Dominum in die illa, et colent eum in hostiis et muneribus » spiritualibus bonorum operum, et vota piæ conversationis ei vovebunt et solvent. Votum enim Domino offert, et solvit, qui est sanctus corpore et spiritu. Sequitur :

VERS. 22. — « Et percutiet Dominus Ægyptum plaga, et sanabit eam, et revertentur ad Dominum, et placabitur eis, et sanabit eos. »

Duobus modis vulnerat Deus, quos ad salutem reducere curat. Aliquando enim carnem percutit, et mentis duritiam suo pavore tabefacit. Vulnerando ergo ad salutem revocat, cum electos suos affligit exterius, ut interius vivant. Aliquando etiam, si flagella exterius cessare videantur, intus vulnera infligit, quia mentis nostræ duritiam suo desiderio percutit. Sed percutiendo sanat, quia terrore sui jaculo (119) transfixos ad sensum nos rectitudinis revocat. Corda enim nostra male sana sunt, cum nullo Dei amore sauciantur, cum peregrinationis suæ ærumnam non sentiunt, cum erga infirmitatem proximi ne quolibet minimo affectu languescunt. Sed plaga percutientur, ut sanentur, quia amoris spiculis mentes Deus insensibiles transfigit, moxque has sensibiles per ardorem charitatis reddit. Unde dicit et sponsa in Canticis : « Vulnerata charitate ego sum (Cant. iv). » Male enim sana anima, atque hujus exsiliis statu cæca, securitate prostrata nec videbat Deum, nec videre quærebat. Percussum autem cor charitatis ejus spiculis vulneratur, quia in intimis affectu pietatis ardet desiderio contemplationis, et miro modo vivificatur ex vulnere, quæ prius mortua jacebat in salute; æstuat, anhelat, et jam videre desiderat, quem fugiebat.

Percussione ergo ad salutem reducit, quæ ad securitatem quietis intimæ amoris sui perturbatione revocatur. Pulchre itaque dictum est, quia « percutiet Dominus Ægyptum plaga, et sanabit eam. » Et revertentur, inquit, ad Dominum charitate stimulati a quo recesserant concupiscentiis illecti. Et placabitur eis pœnitentiam agentibus quibus iratus fuerat peccantibus. Et sanabit eos a languore peccati, atque torporis intimi. Vel Ægyptum, id est credentes ex gentibus percussit Dominus, quia tradidit martyres passioni. Sed rursus eos in resurrectione sanabit. « Quem enim diligit Dominus, corripit; flagellat autem omnem filium, quem recipit (Prov. iii, 12). » Sequitur :

VERS. 25. — « In die illa erit via de Ægypto in Assyrios et intrabit Assyrius in Ægyptum, et Ægyptus in Assyrios, et servient Ægyptii Assur. »

Via erit de Ægypto in Assyrios, id est de genti-

litate in sanctorum Ecclesiam, qui se et alios bene dirigunt. Assyrii quippe dirigentes interpretantur, et Assur dirigens. Et intrabit Assyrius, id est prædicator Ægyptum, id est gentilitatem, et Ægyptus in Assyrios, id est gentilis in Ecclesiam. Et servient Ægyptii Assur, quia gentiles obedient Christo. Assur enim, ut dictum est, interpretatur dirigens. Et quis est iste dirigens nisi cui dicitur : « Dirige me in veritate tua, et doce me, quia tu es Deus salvator meus? (Psal. xxiv, 5). » Tunc autem primum via patuit de Ægypto in Assyrios, quando jussum est Cornelio ut ad Simonem Petrum mitteret (Actor. x). Et intravit Assyrius Ægyptum, quando Petrus est ingressus domum Cornelii. Ægyptus intravit in Assyrios, id est gentilis incorporatus est sanctorum Ecclesiæ, quando « cecidit Spiritus sanctus super omnes qui audiebant verbum, et jussit eos baptizari Petrus (ibid. xlv). » Et servierunt Ægyptii Assur, quando Cornelius, et qui cum eo baptizati fuerant, custodierunt, quod a Petro audierant, quoniam « non est personarum acceptor Deus, sed in omni gente, qui timet Deum, et operatur justitiam, acceptus est illi (ibid. xxxiv). » Sequitur :

VERS. 24. — « In die illa erit Israel tertius Ægyptio, et Assyrio : Benedictio in medio terræ. »

VERS. 25. — « Cui benedixit Dominus exercituum, dicens : Benedictus populus meus Ægypti, et opus manuum mearum Assyrio hæreditas autem mea Israel. »

Israel, id est vir videns Deum, erit tertius Ægyptio, id est gentili converso, et Assyrio, id est prædicatori. Vel Israel et Ægyptius circumcisio et præputium est. Et cum prædicator est in gentibus, Israel, id est Hebræorum populus, additur eis tertius. Benedictio in terra, id est in Ecclesia. « Cui benedixit Dominus dicens : Benedictus populus meus Ægypti, » id est gentilitatis, et opus manuum mearum erit Assyrio, quia cooperabor prædicatoribus, sicut ait Marcus : « Prædicaverunt ubique Domino cooperante, et sermonem confirmante sequentibus signis (Marc. x). » Et Paulus : « Qui operatus est Petro in apostolatu circumcisionis, operatus est et mihi inter gentes (Gal. ii, 8). » — « Hæreditas autem mea Israel, » quod interpretatur vir videns Deum sive princeps cum Deo, quia illi erunt hæreditas Dei, qui sine fine videbunt eum, et regnabunt cum eo. Hæc quidem ad electos : sequentia vero spectant ad reprobos, cum dicitur :

CAPUT XX.

VERS. 1. — « In anno, quo ingressus est Tharthan in Azotum, cum misisset eum Sargon rex Assyriorum, et pugnasset contra Azotum, et cepisset eam. »

VERS. 2. — « In tempore illo locutus est Dominus in manu Isaia filii Amos, dicens : Vade et solve saccum de lumbis tuis, et calcamenta tua tolle de

(119) Ita uterque Cod. pro terroris sui iaculo

pedibus tuis. Et fecit sic vadens nudus et discalceatus. »

VERS. 5. — « Et dixit Dominus : Sicut ambulavit servus meus Isaias nudus et discalceatus, trium annorum signum et portentum super Ægyptum erit, et super Æthiopiam. »

VERS. 4. — « Sic minabit rex Assyriorum captivitatem Ægypti, et transmigrationem Æthiopiæ, juvenem et senem, nudam et discalceatam discooperitis natibus ad ignominiam Ægypti. »

VERS. 5. — « Et timebunt, et confundentur ab Æthiopia spe sua, et ab Ægypto gloria sua. »

VERS. 6. — « Et dicet habitator insulæ hujus in die illa : Ecce hæc erat spes nostra, ad quos confugimus in auxilium, ut liberarent nos a facie regis Assyriorum, et quomodo effugere poterimus nos? »

Quid autem nunc de tempore, quo Tharthan cepit Azotum, ad captivitatem Ægypti et Æthiopiæ pertinet? Sed quanto minus congruere videtur sensus historicus, tanto competentior est spiritalis intelligentiæ ratio. Quid enim per *Azotum*, quæ dicitur *ignis generationis*, nisi genuinus libidinis ardor exprimitur? Quid per *Thartan*, qui *superfluous* vel *elongans* interpretatur, nisi superfluous et a Deo separans cogitationes designatur : « Perversæ enim cogitationes separant a Deo (*Sap. 1, 3*). » Et ipse dicit : « Contrivi cor eorum fornicans et recedens a me (*Ezech. vi, 9*). » Cor enim quod fornicationem diligit, a Deo recessit.

Quid per *Sargon*, qui dicitur *princeps horti*, id est voluptatis et luxuriæ, et est rex Assyriorum, nisi princeps dæmonum diabolus? mituit itaque Sargon rex Assyriorum Tharthan contra Azotum, ut expugnet eam, et capiat, quia hostis antiquus superfluous et fornicarias cogitationes in corde suggerit, quæ genuinum ignem libidinis exagitant, ut urbem castitatis expugnent. Et tempore quo Tharthan Azotum cepit (in qua comprehensione caro vel mens genuino ardore æstuans significata est per immissionem cogitationum a diabolo superata) « locutus est Dominus in manu Isaiæ, » quia ex ejus actione verba sua formavit. « Solve, inquit, saccum de lumbis tuis, » etc. Quid est autem, quod propheta solvit *saccum de lumbis suis, et calceamenta de pedibus* nisi hoc quod multi lumbos suos a cingulo castitatis erant soluturi, quos antea pœnitentiæ vel disciplinæ cilicio vestitos constrinxerant, et operum gressus a munimine paternorum exemplorum nudaturi? Et forte quia plures, qui membra Christi putabantur, tam ignominiose captivantur in luxuriam et iniquitates a diabolo, Isaias, qui *salus Domini* dicitur, et Christum significare solet, soluto de lumbis cilicio vadit nudus et discalceatus. Idcirco enim per tri-duum nudus, ut intelligi datur, ambulavit, triennii captivitatem portendens, ut nonnullos ex eis sic captivari designaret, qui Trinitatis fidem constituentur. Nam dicente Domino : Sicut ambulavit servus meus Isaias nudus et discalceatus, trium annorum signum et portentum super Ægyptum

erit, et super Æthiopiam; sic minabit rex Assyriorum captivitatem Ægypti, » intelligitur propheta tribus diebus nudus ambulasse, ut trium annorum captivitatem significaret trium dierum impudenda deambulatio. Solet enim nonnunquam in Scripturis dies annum significare, sicut Ezechieli dictum est : « Diem pro anno, diem, inquam, pro anno dedi tibi (*Ezech. iv, 6*). » Et sub Moyse reversis exploratoribus, ac terræ, quam inspexerant, detrahentibus, cum dolerent filii Israel de Ægypto se egressos, dicit Dominus : « Juxta numerum quadraginta dierum, quibus considerastis terram, annus pro die imputabitur, et quadraginta annis recipietis iniquitates vestras (*Num. xiv, 34*). » Sic et in hoc loco propheta, ut triennium figuraret, triduo nudus ambulavit, potuit etiam una deambulatio vel triennium vel quantum voluit Dominus, significare.

Quid igitur per hoc captivitatis triennium exprimitur nisi Christianorum tempus a Domini resurrectione usque ad mundi terminum, in quo sic captivantur, qui Domini gratiam transferunt in luxuriam? « Sic enim minabit rex Assyriorum captivitatem Ægypti, et transmigrationem Æthiopiæ, » et cætera. Ut jam diximus, rex Assyriorum diabolus est. Quid autem Ægyptus, quæ dicitur *tenebræ*, et Æthiopia, quæ *caligo* interpretatur, designat nisi obscuratas nonnullorum conscientias? Dæmones enim juxta Apostolum « rectores sunt mundi tenebrarum harum (*Ephes. vi, 12*). » Minat ergo rex Assyriorum captivitatem Ægypti, et transmigrationem Æthiopiæ, quoniam hostis antiquus eos secundum desiderium suum de vitio in vitium captivos ire facit, quorum mens scientia doctrinæ Dei non est illuminata, vel post illuminationem consensu peccati rursus est obscurata.

Minat juvenem, quia et eum, qui spiritali robore ac sanitate mentis floridus putabatur, captivat, et senem, quia et eum quoque, qui maturus moribus atque perfectus videbatur, in viam iniquitatis impellit. Sic minari volebat, qui precabatur dicens : « Manus peccatoris non moveat me (*Psal. xxxv, 12*). » Nudam minat eam, id est indumento justitiæ spoliatam et discalceatam exemplis patrum. Pedes enim operum nostrorum a morsu serpentis antiqui muniuntur quasi mortuorum pedibus animalium, dum intra regulam vitæ patrum tenentur. Discalceatus ergo vadit, qui nullius precedentium patrum in suis operibus imitatur exempla.

Ægyptus quoque *persequens* vel *tribulans* interpretatur, et Æthiopes *humiles* atque *dejecti*, quia « omnis qui se exaltat humiliabitur (*Luc. xiv, 11*). » Qui ducendi sunt in captivitatem, in quam ibunt juvenes et senes, quia malitia roborati sunt, et ad perfectæ ætatis vitia pervenerunt; nudi, ut omnia eorum scelera pateant. « Nihil enim occultum, quod non reveletur (*Luc. viii, 17*). » Et discalceati, ne pascha Domini comedere valeant, sed a serpentibus mordeantur. Quid autem in *discooperitis natibus*, per quas stercora digeruntur, nisi turpium atque pudæ-

darum actionum detectio figuratur, unde fama fe-
tensis odoris egreditur?

Et hæc ignominia *Ægypti*, id est eorum, qui ob
sui cæcitate cordis usque ad detestandas actiones
perducti sunt. Nam propter has ignominiosi habentur
et infames. Captivatis itaque tam miserabiliter
nonnullis, qui sanctitate magni putabantur, minores,
qui sequebantur eos, ante casum eorum *timebunt*,
ne et ipsi similiter cadant, et confundentur ab
Æthiopia spe sua, et ab *Ægypto* gloria sua, quia
nunc ab his erubescunt, in quibus salutis suæ spem
magnam habebant, et in quibus gloriabantur, quia
verò sanctos æstimabant eos. Hoc enim sæpe et no-
stris diebus contingit.

« Et dicit habitator hujus insulæ, id est qui
permanserit stabilis in hac religione. Ecce isti sunt,
in quibus spem habebamus, et ad quorum consi-
lium et adiutorium confugebamus, ut nos instruendo
atque orando liberarent a facie regis Assyriorum,
id est ab impugnatione Satanae, qui nunc semetip-
sos liberare non valuerunt! Et quomodo nos infirmi
poterimus resistere vel effugere, cum isti fortes tam
enerviter victi sint in certamine tentationum? Se-
quitur :

CAPUT XXI.

Vers. 1. — « Onus deserti maris. »

Sexto gradu positum est onus istud, quia eorum
est, qui neque ad Sabbatum quietis animarum post
mortem pertingunt, neque ad octavam beatæ resur-
rectionis, sed præsentis vitæ, quæ per sex dies labo-
ricos exprimitur, toti animaliter inserviunt. Est
autem Babylonis et hoc onus, et illud generaliter
omnium peccatorum, id est et reproborum et eor-
um qui ad penitentiam redeunt. Mare enim eos
significat, de quibus iste propheta dicit : « Impii
autem quasi mare fervens, quod quiescere non po-
test (*Isa. LVII, 26*). » Corda quippe hominum ter-
rena quærentium diversis cogitationum fluctibus in-
tumescunt, qui elatione superbiæ concitati dum
alterna intentione se impetunt, quasi adversanti se
unda collidunt. Mare ergo cor iniquorum est, quod
videlicet mare desertum est, quia a Deo derelictum
ac reprobatum. Sed videamus, quod onus hoc mare
sustineat. Sequitur : « Sicut turbines ab Africo ve-
niunt, de deserto venit, de terra horribili. »

Vers. 2. — « Visio dura nuntiata est mihi. »

Quid per desertum vel terram horribilem nisi
mens reproborum designatur angelorum? Quid per
Africum qui calidus est ventus, nisi Spiritus sancti
flatus exprimitur? Unde Zacharias ait : « Dominus
Deus in tuba canet, et vadet in turbine austri (*Zach.
ix, 14*). » Auster enim et Africus idem significant.
Deus quippe in tuba canit, cum Christus vel per
suos prædicatores, vel per seipsum prædicat. Et
vadit in turbine austri, quia cum nostra mens di-
vina formidine vehementer concutitur, Deus ad eam
venit. Turbo enim austri timor est, quem divina
gratia peccatori incutit, ut convertatur. Sed sicut
in divinæ formidines ab Africo Spiritus sancti

veniunt, quæ malum subruant ædificium; sic a
deserto multitudinis dæmonum e contrario venit
turbo tentationum statum mentis concutiens atque
subvertens. Quod et aliter intelligi potest.

Quid enim per Africum, nisi calidus inimicarum
suggestionum flatus designatur? Quid per desertum
nisi destitutio boni? Vacua enim timore Dei pectora
et ab irratione gratiæ cœlestis arentia *deserto*
squalentis eremi comparantur. In hoc deserto vidit
Joannes et mulierem sedentem super bestiam cocci-
neam plenam nominibus blasphemiarum (*Apoc. xvii,
3*). Mulier enim Babylon, bestia diabolus. Sicut
ergo turbines, id est vitiorum perturbationes, quæ
cor evertunt, ab Africo, id est a calida suggestione
veniunt inimici; ita et de *deserto*, id est de eo, qui
bonum sponte deseruit, venit onus hujus deserti
maris, quia juxta prophetam alium « ex semetipso
judicium et onus ejus egredientur. (*Habac. i,
7*). »

Visio, inquit, dura nuntiata est mihi divinitus de
terra horribili, dæmonum terribiliter amatoribus
sæculi prævalentium. Unde et per Joannem dicitur.
« Væ terræ et mari, quia descendit diabolus ad vos
habens iram magnam (*Apoc. xii, 12*). » Hæc est
visio dura, quæ nuntiata est prophetæ; itaque visio
vel pondus contra hujus sæculi mare cernitur; et
quantis tentationibus mundus iste plenus sit, pro-
pheta considerat. Hæc autem ipsa tentationum tem-
pestas a *deserto* venit, in quo tentatus et Dominus
est, atque Israelitæ serpentium morsibus extincti.
In his tentationibus et angustiis horribilibus et dura
visio auditur. Recte enim turbines atque tempestates
de deserto veniunt, et de terra horribili, ubi non
est habitator Deus, et ubi universa terrena
sunt.

Et quicumque incredulus est, agit rem congruam
infidelitati suæ, et qui depopulator est, vastat. Nam
hoc sequitur :

« Qui incredulus est, infideliter agit, et qui depo-
pulator est, vastat. » Quicumque sanctis prædicato-
ribus non credit, infidelitatis opera facit. Et qui de-
pulator ac dissipator est, vastat Ecclesiam ut Saulus
(*Act. viii, 3*). Vel hostis antiquus, qui depopula-
tor honorum est, vastat intrinsecus Babylonem, id
est sæcularium cor. Sequitur

« Ascende Ælam, obside Medæ : omnem gemitum
ejus cessare feci. » Ælam interpretatur sæculum
vel ante fores, vel pro foribus, aut sæcularia; Medus
vero mensuratus, vel mensurans. Quid ergo per
Ælam nisi omnia temporalia significantur ista,
quæ nobis ante fores sunt, id est præ oculis; et
quid per Medum nisi Satanas, qui nocere non
potest nisi juxta mensuram, qua divinitus relaxatur.
Ascendit itaque contra eam Ælam, cujus mentem
sæcularia et visibilia per delectationem superare
nituntur; et Medus obsidet cum diabolus undique
mentem tentationibus diuturnis circumvallat et im-
pugnat. Et inter hæc omnia, inquit, gemitum ejus, id
est Babylonis, confusæ scilicet mentis, cessare feci,

quia sæculari gaudio debriata nequaquam sentire valet spiritualia damna, quæ patitur intus, et idcirco nescit, cur gemat. Sed propheta pius, quantum de tali anima doleat, atque miretur, ostendit subjungens :

VERS. 3. — « Propterea repleti sunt lumbi mei dolore, angustia possedit me sicut angustia parturientis : corruam cum audirem, conturbatus sum, cum viderem. »

VERS. 4. — « Emarcuit cor meum, tenebræ stupefecerunt me. »

Angustia parturientis tenuit prophetam, quia cum nimio dolore proferebat, quod intus habebat, mœstam scilicet visionem, quæ sibi ostensa fuerat super Babylonem, quam audiens stare non potuit, sed dolore emarcuit, et elanguit ad terram jacens, et tenebræ confusi cordis, oculorumque corporis stupefecerunt eum, ut immensa absorptus tristitia diu sine corporis visu, et animi sobrio intellectu stupefactus et languidus faceret. Qui cur talia pertulerit, vix tandem dicere valens adjungit :

« Babylon, dilecta mea, posita est mihi in miraculum. » Affectu pietatis et compassionis vir sanctus Babylonem dilectam suam vocat, quia in omnibus hominibus naturam suam diligit, et omnium miseriis benigne compatitur. Quanta enim charitate putabis hunc plenum, qui et Babylonem sic diligit? Quæ est autem hæc Babylon nisi ea pars humani generis, quæ mundum hunc solum amat? Quæ posita est propheta in miraculum, quia vidit eam in puncto florentem, et mox exterminatam. Videtur vita præsens longa his qui de æterna non cogitant. Sed propheta cœlestibus et æternis intentus consideravit, quam cito gloria hæc temporalis finiatur. Qui et adjecit, dicens Babyloni :

VERS. 5. — « Pone mensam, contemplare in specula : comedentes et bibentes, surgite, principes, arripite clypeum. »

Pone, inquit, tibi mensam, id est sæcularem doctrinam, in qua variis carnalis scientiæ ferculis pascaris. Vel mensam, id est apparatus delectationum pone tibi. Sed dum ad hanc mensam sederis, contemplare in specula, id est ab alto mentis eminus, prospice quanta tibi perniciēs immineat. Et vos, principes Babyloni, id est sapientes mundi, qui et obscuram et manifestam sæcularem scientiam comeditis, et bibitis, surgite ab hoc convivio, et arripite clypeum protectionis, quem diaboli jaculis opponatis, ut ab imminente gladio mortis vos protegatis. « Baithasar enim rex Babyloni fecit grande convivium optimatibus suis, præcepitque jam, temulentus, afferri vasa quæ fuerant in templo Domini, et biberunt in eis rex et optimates ejus, uxoresque et concubinæ ejus; bibebant in eis vinum, et laudabant deos suos, et eadem nocte interfectus est Baithasar (Dan. v, 1 et seqq.). »

Ita et sapientes hujus sæculi et hæretici familia-

res et subjectos suos Babylonio cibo pascunt et inebriant, id est doctrina confusionis, qua debriati, et quos ab Ecclesia possunt abducere, bibunt in eis vinum confusionis et amentię, suosque laudant errores. Sed in nocte ejusdem confusionis et temulentię perimuntur a diabolo quia sine cognitione veritatis moriuntur. « Qui enim dormiunt, nocte dormiunt, et qui ebrii sunt, nocte ebrii sunt (I Thes. v, 7). »

In hac ergo nocte mentis et ebrietate et somno occiduntur ab hoste antiquo. Unde et diviti Dominus ait : « Stulte, hac nocte repetunt animam tuam abs te (Luc. xii, 20). » Contra hanc ebrietatem, et somnum et mortem Petrus nos caute admonet, dicens : « Sobrii estote, et vigilate, quia adversarius vester diabolus tanquam leo rugiens circuit, quærens quem devoret (I Petr. v, 8). » Hoc itaque convivium et imminens nocte mortem propheta considerans ait : « Pone mensam, contemplare in specula, comedentes et bibentes surgite principes, arripite clypeum. » Scire enim debent hujusmodi convivæ, quia inimicus eorum Satanas improvisam eis necem præparat, et se munire contra eum non possunt.

Vel prophetæ præcipitur, ut vescens in mensa Domini, et illius saturatus cibo diligenter contempletur, quæ ventura sunt mundo, diciturque per eum ad omnes credentes, ut comedentes et bibentes corpus et sanguinem Domini vertantur in principes Ecclesiæ, et cum apostolis audiant : « Surgite (Joan. xiv, 31), » arripiantque clypeum fidei de armatura apostoli Pauli, in quo possint « ignita diaboli jacula extinguere (Ephes. vi, 16). » Sequitur : « Hæc enim dixit mihi Dominus. »

VERS. 6. — « Vade et pone speculatorem, et quocumque viderit, annuntiet. »

VERS. 7. — « Et vidit currum duorum equitum, ascensorem cameli, et contemplatus est diligenter multo intuitu. »

VERS. 8. — « Et clamavit leo : Super speculam Domini ego sum stans jugiter per diem, et super custodiam meam ego stans (120) totis noctibus. »

VERS. 9. — « Ecce iste venit ascensor vir bigæ equitum, et respondit et dixit : Cecidit Babylon, et omnia sculptilia ejus contrita sunt in terram. »

Pone, inquit, in corde tuo speculatorem, id est providam mentis vigilantiam, quæ ventura vitiorum ac demonum certamina ex alta consideratione prænoscat, et quæ in mundo futura sunt, prophético spiritu prævideat. Prophetarum quippe sensus afflatus intimis repletus ab imo levatur, et ad superna conscendit, atque inde quasi de quodam rerum vertice, quæ infra se ventura sunt, videt.

Speculator itaque, quem propheta posuit, sensus ejus non incongrue accipitur. Qui super speculam prophetiæ considerationis positus vidit in hoc sæculo currum duorum equitum, id est superbam pom-

pam diaboli et Antichristi. *Vidit ascensorem asini*, id est diabolum, et *ascensorem cameli*, id est Antichristum; asinus enim stultus et irrationabilis populus gentium est, qui ante Redemptoris adventum possessus a diabolo est; camelus vero tortuosa perversissimorum hominum multitudo, quæ Antichristum sequetur :

Et contemplatus est, inquit, astutias eorum *diligenter multo intuitu*. Et ne qualibet arte eorum deciperetur, *clamarit leo* confidenter dicens ac fortiter : « Super speculam Domini ego sum stans, » etc. *Stat enim super speculam Domini*, cujus mens in appetitione patriæ supernæ forti stabilitate figitur. A cunctis quippe externis motibus eandem intentionem suam quasi quemdam secretissimum recessum petit, ibique incommutabiliter inhærens, et mutabilia cuncta transcendens ipsa jam tranquillitate quietis suæ in mundo extra mundum est.

Stat et super custodiam suam, qui per solertiam disciplinæ terrenis desideris non succumbit, sed supereminet, ut dum semper stantem appetit æternitatem, infra sit ei omne quod transit. Sanctorum namque provida discretio, dum sollicitè circumquaque respicit in alto posita prius, quam veniat culpa, deprehendit, eamque, quo vigilanter prænotat, eo fortiter declinat.

Potest quoque specula *per diem* custodia virtutum accipi; custodia vero *in noctibus* cauta observatio adversus tentamenta vitiorum. Sed diei speculam Domino attribuit; custodiam noctium suam esse testatur, quia virtutes, si quas habemus, ex Deo sunt, et non ex nobis ipsis sunt nobis. Et quocumque modo accipiatur hæc sententia, nox ipsa nobis attribuitur, et Domino dies.

Quidam sic interpretatus est, ut *ascensorem asini* juxta evangelicam lectionem Christum diceret (*Matth. xxi*), et e contrario *ascensorem cameli* contrariam fortitudinem propter fœditatem tortuosi animantis. Alii vero duos ascensores litteræ et spiritus ad duo referunt testamenta.

Ecce, inquit, *ecce speculator venit iste vir*, id est Antichristus, qui homo, non angelicus spiritus erit, *ascensor bigæ equitum*, id est possessor gloriæ sæculi potentum. *Et respondit speculator* iniquitati ejus et dixit : « Cecidit, cecidit Babylon. » Tanta enim perversitate consurget adversus Dominatorem cœli pestifer homo ille, ut propter ejus malitiam finiatur mundus, et ipse cum tota Babylone, id est iniquorum omnium congregatione præcipietur in tartarum, qui extollebatur supra omne quod dicitur Deus, aut quod colitur. Unde nunc recte post ejus adventum dicitur : « Cecidit, cecidit, Babylon, » id est et anima et corpore missa est in tenebras exteriores. « Et omnia sculptilia deorum ejus, » id est universa signimenta falsorum dogmatum ejus contrita sunt in terram tenebrosam, et operam mortis caliginæ. Sicut autem speculator ista dicit apud Isaiam : similiter et Joanni visus est angelus dicens : « Cecidit, cecidit Babylon illa magna quæ a vino iræ

fornicationis suæ potavit omnes gentes (*Apoc. xiv, 8*). » Et alius angelus secutus est, dicens : « Si quis adoraverit bestiam et imaginem ejus, et acceperit characterem in fronte sua, hic bibet de vino iræ Dei (*ibid. 9*). » Hæc erunt tunc *sculptilia deorum Babylonia*, bestia scilicet, id est Antichristus et imago atque character ejus, et numerus nominis ejus. Sed hæc sculptilia conterentur Babylone cadente, quia percutibus impiis destruetur Antichristus, et idola ejus.

Alio sensu *vir ascensor bigæ equitum*, incarnatus Dominus intelligitur, sedens super bigam Ecclesiæ, in qua sunt equites prædicatores atque rectores. Qui ascensor bigæ desideranti prophetæ, et verba ejus audire volenti « respondit et dixit : Cecidit, cecidit Babylon; » totius orbis confusio, et in adventu meo cecidit, et penitus corruet in fine sæculi, et *idola ejus contrita sunt*. Hucusque propheta retulit, quomodo Babylon posita sit ei in miraculum et in stuporem, et cur tanto mœrore affectus sit in hac visione. Et post hæc ad plebem fidelium conversus subjungit :

VERS. 10. — « Tritura mea, et filia aræ meæ, quæ audivi a Domino exercituum Deo Israel, annuntiavi vobis. »

Id est ruinam infidelium subitanam, dum in suis iniquitatibus extolluntur. *Tritura* vero est Ecclesia, quæ præsentibus malis atteritur, ut per hæc a paleis grana separantur, id est a reprobis justi cœlestibus horreis digni.

VERS. 11. — « Onus Duma. Ad me clamat ex Seir : Custos quid de nocte? custos quid de nocte? »

VERS. 12. — « Dixit custos : Venit mane et nox : si quæritis, quærite, convertimini, et venite. »

Onus istud Judæorum est prope finem sæculi credere velle inchoantium, et in septimo gradu propter Sabbatum est.

Duma quippe *silentium* vel *gaudium* interpretatur. Et a confessione Redemptoris siluerunt Judæi, ex quo « conspiraverunt, ut si quis illum confiteretur Christum, extra Synagogam fieret (*Joan. ix, 22*). » Qui tunc jure gaudebunt, quando rursus eum confiteri incipient. Hoc ergo præsens silentium Judæorum, et quod adhuc futurum est gaudium ipsorum, portat onus istud, quod nunc propheta describit : *Ad me*, inquit Salvator, *clamat*, quisque *ex Seir*, id est ex spinoso populo Judæorum, quem designavit Seir, id est Esau, qui natus est totus in modum pellis hispidus (Seir namque *pilosus* dicitur sive *hircus*) « Custos quid de nocte? custos quid de nocte? » Subaudiis venisti? *Custos* quippe noster *de nocte* venit, quia protector humani generis et manifestus in carne apparuit, et tamen hunc pressa perfidia suæ tenebris Judæa minime agnovit. Unde tamen r. s. piscere insipientes conqueritur, quare ipse *in nocte* venoritur? Cui custos pervigil, qui custodit Israel dixit : *Venit mane* illuminationis gentium, et *nox* excæcationis Judæorum. Nam per ejus præscu-

tam et nova lux mundo inclaruit, et tamen in corde infidelium vetus cæcitas remansit. Imo excæcati sunt quidam in adventus ejus. Si me, inquit, fide jam *quæritis*, *quærite* me et operibus, *convertimini* a vetustate, et *venite* ad novitatem. Hoc enim, ut præmisimus, eis dicitur, qui jam aliquatenus cœverunt credere.

Vel Ecclesia potest dicere, quod Dominus de Scir, id est de terrenis locis ad se vociferetur, seque provocet ad salutem, et ad ipsum loqui: O custos, qui de nocte consurgens versaris in tenebris, qui absque peccato in carne es peccatrice, qua causa voluisti humanum corpus assumere: respondet custos, id est Samaritanus, qui vulneratum jumento suo imposuit (*Luc. x, 33 et seqq.*): *Venit mane et nox*, id est gentium multitudini ortus est Sol justitiæ, et Judæis venerunt tenebræ. Et gentibus dicit: Si me *quæritis*, studiosius *quærite*, *convertimini* ab erroribus et *venite* ad me.

Vers. 13. — « Onus in Arabia. In saltu ad vesperam dormietis in semitis Dodanim (121). »

Vers. 14. — « Occurrentes sitienti ferte aquam, qui habitatis terram austri, cum panibus occurrite fugienti. »

Vers. 15. — « A facie enim gladiatorum fugerunt, a facie gladii imminenti, a facie arcus extenti, a facie gravis prælii. »

Vers. 16. — « Quia [hæc dicit Dominus Deus (122)]: Adhuc in uno anno quasi in anno mercenarii, et auferetur omnis gloria Cedar. »

Vers. 17. — « Et reliquæ numeri sagittariorum fortium de filiis Cedar, imminuentur: Dominus enim Deus Israel locutus est. »

Onus hoc, nisi fallor, pœnitentium est, ideoque in octavo positum est ordine propter metum scilicet futuri examinis. Nemo enim pœnitentiam agit nisi diem judicii metuens. Qui dies erit octavus, quia post temporalia sæcularia, quæ septem diebus peraguntur, veniet. In Arabia vero dicitur *onus* istud, quoniam ad eos spectat, qui de suis humiliantur peccatis, et vitæ suæ terminum propinquare credunt vel de eo cogitant.

Arabia quippe, quæ *humilis* interpretatur vel *occidentalis*, vel *respertina* terminum hujus vitæ, aut senectutem designat. In Arabia ergo, id est in humili mente pœnitentis, et ad finem vitæ se propinquare considerantis est *onus* istud. Vos, inquit, o pœnitentes *dormietis*, id est a strepitu cupiditatum quiescetis, *in salin*, id est in aspera et horrida conversione pœnitentiæ, *ad vesperam*, id est occumbente sole desideriorum carnalium, vel prope finem præsentis vitæ.

Vel in saltu, id est in remota et secreta conversatione *dormietis* a strepitu mundi, *in semitis Dodanim*, id est in viis Christi, qui nobis propinquus fieri dignatus est. *Dodanim* quippe *patruelis* dicitur, quod nobis specialiter, qui ex gentibus credimus, est

(121) Alias *Dedanim*.

(122) Alias *Quoniam hæc dicit Dominus ad me, etc.*

Christus. Duo etenim fratres sunt populus Judæorum, et gentium. Et Christus quidem Judaici populi filius est; nos vero nati sumus ex gentili populo. Christus ergo *patruelis* est nobis, id est patris nostri filius. In *semitis* itaque *Dodanim* dormit, qui turbulentis sæculi actionibus derelictis angustas Christi vias quieto corde sectatur. In his quippe *semitis* dormiebat Jacob quando scalam, cujus summitas cœlos tangebatur, in somnis vidit (*Gen. xxviii, 12 et seqq.*).

Vel ita: Arabia dicitur *vespera*, quæ noctis tenebrarumque principium est; omnisque, qui habet initium peccatorum, versatur in vespera; qui autem venit ad summum, in media nocte consistit; et qui in malitia cœperunt esse, ac peccatorum viam ingrediuntur, non dormiunt, vel morantur in agris et segetibus, sed in infructuosis saltibus. Recteque, quia *vespera* principium malorum est, in *semitis Dodanim*, quæ interpretatur *judicia*, dicuntur habitare. Quot enim habent peccatorum genera, tot judiciorum merentur sententias. Potest etiam *Dodanim grande judicium* interpretari.

Jam vero spiritales admonet propheta, quod humanitatis offertorium impendant cuilibet pœnitenti. *Ferte*, inquit, *aquam*, spiritualis doctrinæ *sitiendi* poculum divinæ predicationis, vos *qui habitatis terram austri*, id est qui in Ecclesia spiritualiter vivitis; *cum panibus* sacri pabuli *occurrere* unicuique *fugienti* inquisitiones mundi, atque supplicia futuræ damnationis. Aqua quippe scientiam sacræ Scripturæ significat, quia scriptum est: « Aqua sapientiæ salutaris potabit illum (*Eccli. xv, 3*). » Et: « Aqua profunda verbo ex ore viri (*Prov. xviii, 4*). » In terra vero *austri* habitant, qui in sancta Ecclesia positi sancti Spiritus aura perfiantur.

In *panibus* quoque eruditio doctrinæ cœlestis designatur, sicut scriptum est: « Cibabit illum pane vitæ et intellectus (*Eccli. xv, 3*). » Fugit autem, qui hujus mundi mala evadere concupiscit. Qui ergo in terra austri habitat, fugientibus cum panibus occurrat, id est qui jam sancto Spiritu intra sanctam Ecclesiam plenus est, eum, qui mala sua evadere nititur, eruditionis alloquio consoletur. *Fugienti* quippe *cum panibus* occurrere est, metuenti æterna supplicia doctrinæ sacræ escas offerre, et modo timorem terrore comprimere, modo pavorem per exhortationem fovere.

Locus hic proprie adversus eos intelligi potest, qui tradentes se otio atque desidii propria salute contenti sunt, nec pœnitentibus atque conversis manum porrigunt. *Fugerunt enim*, inquit, pœnitentes, isti *a facie* gladiatorum, quos sancti in judicio tenebunt, sicut scriptum est: « Gladii ancipites in manibus eorum ad faciendam vindictam (*Psal. cxxix, 6*). » *A facie gladii imminenti*, de quo dicit Job: « Fugite a facie gladii (*Job xix, 29*) » *imminenti*. De quo tantus (122) gladius est? « Et scitote esse

(122) Uterque cod. tantum.

Judicium (*ibid.*). » A facie arcus extenti, de quo dicitur : « Dedisti metuentibus te significationem, ut fugiant a facie arcus (*Psal. LIX, 5*). » Nam et gladius et arcus judiciale sententiam hoc loco designant. A facie gravis praelii, futuri scilicet examinis, de quo Dominus ait : « Quis rex iturus committere bellum adversus alium regem non sedens prius cogitat, si possit cum decem millibus occurrere ei qui cum viginti millibus venit adversus se? Alioquin adhuc illo longe agente legationem mittens rogat ea, quæ pacis sunt (*Luc. XIV, 31*). » Rex quippe est unusquisque qui seipsum bene regit. Qui est iturus committere bellum adversus alium regem, quia in fine a Domino judicandus est. Sed cum decem millibus occurrere non potest ei, qui cum viginti millibus venit adversus eum, quia cum perfectione operum respondere Judici non sufficit, quia non solum de operibus, sed etiam de cogitationibus rationem quæret. Mittat ergo precum et pœnitentiæ ad eum interim legationem, rogans ea quæ pacis sunt. Itaque futuram discussionem grave praelium nominat, quia nemo tam sanctus est, ut pondus illud districti examinis portare queat, si remota pietate discutiatur. Vei gladios hæreticorum fugerunt, doctrinam gentilium, blasphemias Judæorum. Et quia multos viderunt eorum jaculis interfectos, et cecidisse in praelio plurimos ipsi cupiunt vestro auxilio liberari.

Deinde quid in hac vita consequantur, qui toto cordo pœnitentiam agunt, demonstrat : *Adhuc*, inquit, *in uno anno*, id est in residuo vitæ eorum spatio, auferetur ab eis omnis gloria Cedar, id est peccatum eorum, in quo principes tenebrarum demones gloriabantur. Cedar enim tenebræ dicitur. Sed annus iste erit quasi annus mercenarii, quia se judicabunt indignos appellari filios Dei solo mercenariorum nomine contenti. Unde et in persona eorum pœnitens ille dicit : « Pater, peccavi in cœlum, et coram te, jam non sum dignus vocari filius tuus : fac me sicut unum de mercenariis tuis (*Luc. XV, 18*). »

Vel quia mercedem supernæ remunerationis a Domino merebuntur, anius iste quasi annus mercenarii vocatur. Unde beatus Job de tali servo loquitur : « Recede paululum ab eo, ut quiescat, donec optata veniat sicut mercenarii dies ejus (*Job VII, 1*). » In hoc itaque mercenarii anno auferetur ab eis omnis gloria Cedar, id est tenebrarum, ut audiant. « Fuitis aliquando tenebræ, nunc autem lux in Domino (*Ephes. V, 8*). » Et : « Quem fructum habuistis tunc, in quibus nunc erubescitis? (*Rom. VI, 21*). » — « Et reliquæ numeri sagittariorum de filiis Cedar immuentur, a quia filii tenebrarum demones paulatim quotidie minus minusque tentationum jacula cordibus eorum audebunt immittere. Sequitur :

CAPUT XXII.

VERS. 1. — « Onus vallis visionis. »

In nono gradu positum est onus istud, ut insinuetur nobis, quia eorum est, qui intra fidei sacramentum in Ecclesia contineri videntur. Nam quia ter

tria sunt novem, recte novenarius numerus mysterio fidei optatur. Vel fidei transgressores potest locus iste vocare. Nam cum Ecclesia sit mons, cur modo vallis dicitur, nisi ut omnes perversorum dogmatum principes qui corruperunt de sublimitate sensus Scripturarum, et ad ima devoluti sunt, sciatur in valle versare visionis?

Vallis quoque visionis Ecclesia est, quæ in virtute humilitatis consistens oculos cordis illuminatos habere solet. Sed et hæc nimis grave portat onus, qui reproborum multitudine premitur, et tentationum pondere multipliciter gravatur, præcipue tamen circa finem sæculi. Unde nunc eis dicitur : « Quidnam tibi quoque est, quia ascendisti et tu omnis in tecta? »

B VERS. 2. — « Clamoris plena, urbs frequens, civitas exultans? »

Ac si dicatur: Decæteris quos hucusque descripsi, mirum valde non est, si diversa malorum onera sustinent. Sed tibi quoque quidnam accidit, quia et tu omnis ascendisti in tecta, id est super calmina domorum, prospicere undique mortes filiorum tuorum, elamore lamentationis plena, quæ eras multitudine civium frequens, et in filiis tuis vel in prosperitate exultans? Quid autem in tectis nisi terrena corpora signantur? Ascendunt igitur in tecta, qui corporis ita transcendunt desideris, ut Apostolus ait : « Vos autem in carne non estis, sed in spiritu, si tamen spiritus Dei habitat in vobis (*Rom. VIII, 11*). » Quibus et a Domino dicitur : « Quod in aure audistis, prædicate super tecta (*Matth. X, 27*). »

Itaque Ecclesia, quæ pacis quondam tempore mansit in tectis, irruente novissima tribulatione ascendet omnis in tecta; quia quæ terrenis licite utebatur ad corporis commodum, omnia tunc mundana relinquens arcem mentis conscendet, et inimicorum tentationes undique sibi prævidendo refellens de suorum civium spiritali morte lugebit. Nihil enim Christianus quisque in terra tunc possidere poterit scientibus Antichristi sequacibus. Sequitur :

« Interfecti tui non interfecti gladio, nec mortui tui in bello. » Hæc est vehementis causa doloris, qui non materiali gladio corporaliter occiduntur cives sanctæ Ecclesiæ, sed invisibili mucrone tantationum spiritaliter perfossi moriuntur. Et quid faciunt pastores, dum sic perimuntur oves? Sequitur :

VERS. 3. — « Cuncti principes tui fugerunt simul, dureque ligati sunt : omnes qui inventi sunt, vincti sunt pariter, procul fugerunt. »

Huic loco consonat quod in Evangelio Dominus ait : « Mercenarius, et qui non est pastor, cujus non sunt oves propriæ, videt lupum venientem, et dimittit oves et fugit (*Joan. X, 12*). » Nunc enim de inutilibus Ecclesiæ principibus sermo est, qui videntes iniquitatem contradicere non audent, sed se sub silentio abscondunt. Fugiant enim hujusmodi principes non mutando locum, sed subtrahendo solatium; fugiunt, quia injustitiam vident, et tacent. Quia igitur circa finem sæculi omnes fere qui videbantur

Ecclesiae praepositi, sub silentio se abscondunt, dum resistere injustitiae perversorum nequaquam praesument. *Cuncti, inquit, principes tui fugerunt simul,* non quia omnes, qui in toto orbe fuerint, tunc fugiant, sed quia omnes, qui in plerisque regionibus erunt, percussi formidine cedent, sicque suorum vinculis peccatorum dure ligantur quibus data potestas fuerat, ut aliorum vincula solverent. « Omnes, qui inventi sunt, vinculi sunt pariter, » quia universi, qui in nonnullis reperti fuerint provinciis, ab Antichristo vincuntur, sicuti tunc quoque multi ab iniquitatibus variis superantur. *Procul, inquit, fugerunt :* quia longe a Justitia, dum sibi metuerent, recesserunt.

Vel ita : « Quidnam tibi quoque est, » etc. Id est cum philosophi tumeant, et omnis sapientia secularis de sublimibus disputans simplicitatem contemnat Ecclesiae : cur tu quoque excelsa sectaris ; « Clamoris plena, » etc. Doctrina haereticorum non in sensu, sed in multiloquio et clamore versatur. Unde ob multitudinem deceptorum *frequens civitas* appellatur, et *exultans* propter superbiam. « Interfecti tui, » etc. Maxima pars absque ullo certamine et disceptatione haereticorum deceptionibus supplantatur, nec vulneratur gladio, sed sponte sua transit ad haereticos. Et omnes eorum principes ab Ecclesia migraverunt ad synagogam Satanæ, et transierunt simul discordes in perfidia, concordēs in transcriptione, Ideoque *dure ligati sunt* in erroribus suis, et procul a Deo fugerunt. Sequitur :

VERS. 4. — « Propterea dixi : Recedite a me, amare flebo, nolite incumbere, ut consolemini me super vastitate filiae populi mei. »

Solito more vir misericors visionem moestam videns praenimio dolore, ni fallor, cecidit, et accedentibus amicis, ut eum erigerent vel consolarentur ; *Recedite a me, inquit, amare flebo.* Tanto enim dolore ab intimis animi medullis erat affectus, ut nulla ratione consolationem reciperet. Cumque protinus ad eum jacentem inclinarentur, qui moestitiam ejus lenire volebant, adjecit : « Nolite incumbere, ut consolemini me. » Et cur consolationem respuat, ostendit adhuc, dicens :

VERS. 5. — « Dies enim interfectionis et conculcationis et fletuum a Domino Deo exercituum in valle visionis scrutans murum et magnificus super montes. »

Tempore enim extremæ persecutionis interficient opera justorum, et qui ad iniquitatem consenserint, conculcabuntur a demonibus in caeno vitiorum.

Vel animæ eorum interficientur, qui consensum Antichristo praebuerint ; cæteri vero conculcabuntur, et ab omnibus affligentur, et inter hæc pili quique flebunt. Et *ista dies a Domino,* quia divinitus est olim dispositum, ut tempus tribulationis illius veniat. *Scrutans murum,* quia tunc undique mentem pulsans, quantum uniuscujusque conscientia virtutibus sit munita, probabit. *Et magnificus super mon-*

tem Ecclesiae, quia sublimiores sanctos mirabilibus aggredietur tentationibus.

Vel dies judicii et interfectionis a Domino in valle visionis oritur, et ut singulorum opera demonstret, scrutatur murum haereticorum, quem contra Ecclesiam quasi firmissimum propugnaculum construxerunt ; et magnificent gloriosumque, id est quemlibet doctorem eorum, qui se super Christo monte consistere gloriatur. Sequitur :

VERS. 6. — « Et Ælam sumpsit pharetram, currum hominis equitis, et parietem nudabit clypeus. »

Ælam interpretatur *sæculum* vel *ante fores* sive *pro foribus*, vel certe *sæcularia*, et significat hunc mundum, et omnia hæc visibilia, quæ nobis velut apte fores oculorum sunt. Rursus Ælam interpretatur *oppositi*, significans omnes qui nobis in via Dei sunt oppositi. Quid vero per *pharetram* nisi laedendi consilium accipitur ? Quid per *currum* nisi permissa sæculi gloria ? Quid per *hominem equitem*, cujus est iste currus, nisi Antichristus, qui in sæculari gloria præ omnibus dominabitur ?

Ælam ergo vallem visionis obsidens sumit *pharetram*, quia vel hic mundus, vel hostis antiquus Dei famulos expugnare volens malignum tractat consilium, de quo mortifera subito jacula quasi de pharetra sagittas in eos mittat. Et quæ est hæc pharetra ? *currus hominis equitis*, id est gloria, quam Antichristus possidebit. Per hoc enim multos superabit, quod ille tunc perditionis filius omnem mundi gloriam obtinebit.

Vel sumet *pharetram currus hominis equitis* ; quia ut fidelium corda vulneret, temporalem eis gloriam, quam quisque potens in sæculo possidet, offeret. *Et parietem nudabit clypeus*, quia multi fideles, qui exterioribus Ecclesiae ministeriis dedit erant velut parietes templi, fidem, qua repellere universa diaboli machinamenta poterant, abjicientes nudi remanebunt ante ejus pharetram currum gloriæ sæcularis amantes. Unde et Joanni dictum est : « Atrium autem, quod est foris templum, ejice foras, et ne metiaris illud, quoniam datum est gentibus (Apoc. xi, 2). » Quod enim apud Isaiam *paries*, hoc apud Joannem dicitur *atrium*, et quod paries clypeo nudatus describitur, hoc est quod « atrium foras ejectum et gentibus datum » ostenditur. Clypeus namque fides est, quia Paulus ait : « In omnibus sumentes scutum fidei, in quo possitis omnia tela nequissimi ignea extinguerere (Ephes. vi, 16). » *Parietem* itaque *nudabit clypeus*, quia exterioribus occupationibus fidem amittent.

Vel Ælam, qui interpretatur *ascensus eorum*, sive Elamitæ, qui *contemptores* dicuntur, sumpserunt pharetram, « ut sagittent in obscuro rectos corde (Psal. x, 2), » qui sunt in curru et equites homines, ut parietem Sion et Ecclesiae firmamentum suo clypeo et impugnatione denudent. *Erunt autem electæ valles* et humilia dogmata plena *quadrigarum* superbæ, et per ecclesiasticos viros Deus revelabit

operimenta *Judæ*, et omnia secreta eorum qui in A confessione fidei constituti sunt. Sequitur :

VERS. 7. — « Et erunt electæ valles tuæ plenæ quadrigarum, et equites ponent sedes suas in porta. »

VERS. 8. — « Et revelabitur operimentum *Judæ*, et videbitur in illa die armamentarium domus saltus. »

Electæ valles, id est illi qui propter humilitatem, quam ostendebant, æstimabantur electi, replebuntur in tempore illo quadrigis inanis gloriæ. Tanta enim tunc animarum erit pernicietas, ut, qui jam in electorum sorte per nimiam humilitatis gratiam computati videbantur, prohi dolor! in superbiam elati divitias et honores sæculi Christo præferant.

Et equites, id est maligni spiritus, qui super cervices iniquorum equitant, ponent sedes suas in porta fidei, quia multis obstruent confessionis januam. « Ore enim confessio sit ad salutem (Rom. x, 10). » Sed quia multi tunc erunt, qui præ timore se Christianos non confitebuntur, licet fidei veritatem in corde teneant : « *Equites sedes suas in porta* » illorum positori dicuntur, quia fidei eorum dominabuntur.

« *Et revelabitur operimentum *Judæ*, » quia conscientia eorum qui se Christianos tempore pacis confitebantur, patebit. *Judas* quippe confessio dicitur. *Armamentarium* vero locus est, ubi conservantur arma. Et quæ sunt arma fidelium nisi virtutes et verba sacri eloquii? Quod est *armamentarium* talium armorum nisi cor justorum? Quæ est enim domus saltus nisi perfectorum conscientia, quæ repulso strepitu desideriorum carnalium vacat, et videt, quoniam Dominus est Deus? « *Videbitur ergo in illa die armamentarium domus saltus,* » quoniam tribulatio tentationis mentem electorum, quæ erat munjanis remota tumultibus, et armis repleta cælestibus, manifestabit. Post hæc manifestius hæreticorum perversitas describitur. Subjungit enim :*

VERS. 9. — « Et scissuras civitatis David videbitis, quia multiplicatæ sunt. »

Civitas quippe *David* Ecclesia Dei est, quam hæretici in reprobis per varias sectas scindere nituntur. Quibus congruit, et quod subditur : « *Et congregastis aquas piscinæ inferioris.* »

VERS. 10. — « Et domos Jerusalem numerastis, et destruxistis domos ad muniendum murum. »

VERS. 11. — « Et lacum fecistis inter duos muros, et aquam piscinæ veteris : et non suspexistis ad eum qui fecerat eam, et operatorem ejus de longe non vidistis. »

Quæ est enim piscina inferior nisi doctrina eorum tendens semper ad ima? Qui *et domos Jerusalem numerant*, quia non profectu sed copioso numero discipulorum gaudent. *Et destruunt domos*, id est subvertunt mentes fidelium, quos seducere possunt, ut *murum* suæ protectionis adversus Ecclesiam muniant. Dumque Vetus reproband Instrumentum,

nec Novum secuti sunt, quia Novum Veteris testimoniis roboratur. Propterea inter duos muros, veterem et novum fecerunt sibi novas aquas, quas interiores esse putant, et majora continere mysteria, quam in Testamento Veteri continentur, nec puteum, qui vitales et perpetuas haberet aquas, sed lacum cœnosum, qui continere non possit aquas, fecerunt inter duos muros Veteris et Novi Testamenti *et aquam piscinæ veteris*, id est antiquæ Legis umbram. *Et non respexerunt Deum*, qui Veteris Testamenti conditor est. *Et a longe noluerunt eum videre*, dum adhuc differt ad judicium venire. Sed ipse nollet eos perire sed respicere. Nam sequitur :

VERS. 12. — « Et vocabit Dominus Deus exercituum in die illa ad fletum, et ad planctum et ad calvitium et ad cingulum sacci. »

Quotidie enim Dominus hæreticos et peccatores vocat ad fletum pœnitentiæ, et ad planctum malorum, quæ fecerunt, et ad calvitium, ut frontem, quæ sedes est verecundiæ, detegant, et peccata de quibus erubescunt, vel erubescere habent, consistendo denudent, et ad cingulum sacci, ut asperitate pœnitentiæ accingantur. Sed illi econtra pro fletu et planctu habent, vel habuerunt gaudium et lætitiâ, et quasi morte omnia finirentur, occidentes vitulos et arietes jugulantes, dum comederent carnes, et biberent vinum, locuti sunt verba blasphemantium. Dum in præsentis sæculo sumus, deliciis affluamus. Crastina enim dies, id est futurum tempus sine sensu erit.

Vel in die mortis ad fletum et ad planctum vocabitur, qui ante mortem noluit plangere mala, quæ fecit. In calvitio quoque et cingulo sacci habitus plangentium ostenditur. Quam videlicet diem bene Dominus in Evangelio super unumquemque hujusmodi prælatum ostendit venturam, dicens : « Si dixerit malus ille servus in corde suo; moram facit dominus meus venire, et cœperit percutere conservos : manducet autem et bibat cum ebriis : veniet dominus servi illius in die qua non sperat, et hora quæ ignorat, et dividet eum, partemque ejus ponet cum hypocritis : illic erit fletus et stridor dentium (Matth. xxiv, 48; Luc. xii, 45). » Qui enim superius tot mala fecisse describuntur quasi percutiendi conservos, et post hæc ad fletum vocandi dicuntur; nunc interim epulari et bibere cum ebriis declarantur, cum subditur

VERS. 13. — « Ecce gaudium et lætitiâ occidere vitulos et jugulare arietes, comedere carnes, et bibere vinum. Comedamus et bibamus, cras enim moriemur. »

Nam qui se morituros non ambigunt, dum adhuc potestatem habent, inanibus gaudiis et potationibus et luxuriis occupantur, ut nullo metu malorum, quæ futura sunt, mordeantur, sicut et alibi loquuntur : « Vino pretioso et unguento nos impleamus, et non prætereat nos flos temporis. Coronemus nos rosis, antequam marescant; nullum præteritum, et

quod non pertranseat luxuria nostra, nemo nostrum sit exors luxuriæ nostræ, ubique relinquamus signa lætitiæ; quoniam hæc est pars nostra, et hæc est sors nostra (*Sup.* II, 7).

Hoc itaque, quod in gaudio et lætitia dicuntur comedere carnes, et bibere vinum dicentes: « Comedamus et bibamus, cras enim moriemur, » manifeste declarat, quia alii reproborum idcirco præsentibus resolvuntur delectationibus, quoniam se in hac vita diu mansuros putant; alii, quia facultatem se citius amissuros æstimant, luxuriosius eisdem voluptatibus serviunt dicentes, ut præmisimus: « Quoniam hæc est pars nostra, et hæc sors nostra. » Adeo enim præsentis vitæ delectationes amant, ut nullam deinceps spem delectationis habeant. Sæpe etiam unus idemque homo et diu se hic vivere putat, et facultatem fruendi voluptatibus carnis per mortem amittere velociter metuit, ut et longitudinem vitæ simul et vicinitatem mortis sibi promittat, nec tamen ab iniquitatibus desistat. Sed de his propheta divinam annuntiat sententiam sequitur:

VERS. 14. — « Et revelata sunt in auribus meis Domini exercituum (123). »

Merito enim in iniquitatibus suis morituri asseruntur, qui, quanto viciniorem suspicantur mortem, tanto magis augent iniquitatem dicentes: « Comedamus et bibamus, cras enim moriemur. » Cum e contrario deberent dicere: « Jejunemus, et oremus, cras enim moriemur. » Non dimittetur eis hæc iniquitas, donec aut peccato moriantur et vitis, aut cum delictis suis ad inferos pertrahantur. Dicente autem Domino: « Si dimittetur hæc iniquitas vobis, » defectus sermonis indicat affectum vehementer indignantis et comminationem confirmantis, quemadmodum et in Psalmo cum dicit: « Sicut juravi in ira mea, si introibunt in requiem meam (*Psal.* xciv, 11). » Sequitur:

VERS. 15. — « Hæc dicit Dominus Deus exercituum: Vade et ingredere ad eum, qui habitat in tabernaculo ad Sobnam præpositum templi, et dices ei: »

VERS. 16. — « Quid tu hic, aut quasi quis hic? Quia excidisti tibi hic sepulcrum, excidisti in excelso memoriam diligenter in petra tabernaculum tibi. »

Tabernaculum vel *templum* Ecclesia præsens est, de qua dicitur: « Ecce tabernaculum Dei cum hominibus (*Apoc.* xxi, 3). » Et: « Templum Dei sanctum est, quod estis vos (*I Cor.* iii, 17). » Præpositus hujus templi quilibet superbus pontifex inutilis est, qui in Evangelio *mercenarius* appellatur (*Joan.* x, 12). Unde Sobnas interpretatur *revertens*, quia sacerdotes hujusmodi revertuntur ad ea quæ retro sunt: non extenduntur in ea, quæ ante sunt. Cum autem dixit Dominus: « Vade et ingredere ad eum qui habitat in tabernaculo, » ostendit, quia perfectus quilibet sanctus increpare debet secreto tales præ-

A positos, sicut Samuel increpavit Heli principem sacerdotum.

Sed v. deamus, quid dicat tali prælato: « Quid, inquit, tu hic agis? Ac si dicat: Nihil hic subjectis proficis. » Aut quasi quis hic? » Il est: Tu es hic quasi quis, quia locum tenes prælationis, et opus prælati non imple. « Quia excidisti tibi hic sepulcrum, » id est tu spiritualiter mortuus corda hominum corrupisti, ut te diligenter, et in mentibus tibi faventium quasi in sepulcro condereris. Inutilis enim sacerdos, cum favores hominum acquirit, cor eorum sibi sepulcrum, in quo spiritualiter jam mortuus quiescat, facit.

Excidisti in excelso memoriam tuam, quia quævisisti etiam post mortem laudibus humanis in locum extolli, *diligenter in petra*, id est in dura mente sæcularium *excidisti tabernaculum tibi*, in quo te protegeres. Sequitur:

VERS. 17. — « Ecce Dominus asportari te faciet sicut asportatur gallus gallinaceus, et quasi amictum sic subleabit te. »

VERS. 18. — « Coronans coronabit te tribulatione, quasi pila mittet te in terram latam, et spatiosam; ibi morieris, et ibi erit currus gloriæ tuæ, ignominia domus Domini tui. »

VERS. 19. — « Et expellam te de statione tua, et de ministerio tuo deponam te. »

Gallus gallinaceus est eunuchizatus cui comparatur inutilis præpositus. Quia sicut iste gallus fecundare gallinas nequit, sic et hujusmodi præpositus, amissa virilitate mentis spirituale, semen in corda subjectorum mittere non valet. Sed sicut vulpes gallos, sic dolosius dæmon asportat hujus animam. *Et sicut amictum*, id est vestimentum prædo sublevat, ita corpus ejus in resurrectione tollet raptor antiquus; et cui corona vitæ promissa fuerat, si recte ageret, nunc perpetua tribulatione coronabitur, id est circumdabitur.

Pila vero globus est pilorum, quo juvenes ludunt. Tunc ergo mittetur iste quasi pila in terram latam et spatiosam, quia ludibrio dæmonum longe lateque jactabitur, et ab omnibus ferietur, et agitabitur, *ibi-que æterna morte morietur. Et ibi erit currus gloriæ* ejus, id est ad hoc redigetur pompa jactantiæ et elationis ejus. Qui videlicet *currus gloriæ* ejus *ignominia domus Domini* vocatur, quia sacerdotis pomposa elatio ignominia est totius Ecclesiæ: et idcirco talis plerumque etiam ante mortem expellitur de statione sua, ut in loco ejus melius substituat. Unde et subditur:

VERS. 20. — « Et erit in die illa: vocabo servum meum Eliacim filium Helciæ. »

VERS. 21. — « Et induam illum tunica tua, et cingulo tuo confortabo eum, et potestatem tuam dabo in manus ejus, et erit quasi pater habitantibus Jerusalem et domui Juda. »

VERS. 22. — « Et dabo clavem domus David su-

per humerum ejus, et aperiet, et non erit qui claudat et claudet, et non erit qui aperiat. »

VERS. 23. — « Et figam illum paxillum in loco fidei, et erit in solium gloriæ domui patris sui. »

VERS. 24. — « Et suspendam super eum omnem gloriam domus patris ejus, vasorum diversa genera, omne vas parvulum a vasis craterarum usque ad omne vas musicorum. »

VERS. 25. — « In die illa dicit Dominus Deus exercituum auferetur paxillus, qui fixus fuerat in loco fidei, et frangetur et cadet, et peribit, quod pependerit in eo quia Dominus locutus est. »

Quid enim per *Eliacim* intelligendum est, qui interpretatur *Dei resurrectio vel Deus resuscitavit*, nisi divinæ gratiæ resuscitatio? Et sanctæ religionis ac piæ conversationis, quæ per bonos pastores divinitus excitatur, reformatio? Sæpe enim sub malis rectoribus sanctæ religionis ac sacri ordinis instituta labuntur. Sed postquam loco malorum boni pastores successerint, qui sunt filii Helciæ, qui interpretatur *pars Domini*, id est qui sunt filii dilectionis, omnia, quæ ceciderant, resuscitantur.

Deposito itaque Sobna succedit Eliacim filius Helciæ, qui sit *pater habitantibus Jerusalem*; quia plerumque morientibus vel ob culpam suam degradatis inutilibus Ecclesiæ pastoribus loco eorum dulces ac pii pastores subrogantur, qui paterno affectu cuncta provideant, et paternis visceribus singulis consolantur fidelibus.

Jerusalem et domus *Juda* catholica est Ecclesia. Et quamvis pastores sæpius deteriores melioribus succedant, quam meliores deterioribus, propheta tamen divinæ gratiæ prænuntiator illud, quod per gratiam Dei faciendum novit, præloquitur: *Et dabo, inquit, clavem domus David*, id est Ecclesiæ *super humerum ejus*, quia ipse portabit onus curæ pastoralis, et in operibus velut in humeris portabit discretionem ac potestatem aperiendi et claudendi, id est solvendi et ligandi, ut quæ solverit et ligaverit, operibus suis demonstret esse solvenda sive liganda, id est, faciat ea pro quibus alios solverit, et non faciat ea, pro quibus alios ligaverit.

« Et aperiet, et non erit, qui claudat, » quia « quodcumque solverit super terram, erit solutum et in cælis (*Matth. xvi, 19*). » — « Et claudet, et non erit qui aperiat, » quia « quodcumque ligaverit super terram, erit ligatum et in cælis. »

Vel ita: *clavem David* intellige discretionem et scientiam interpretandi Scripturas, quia aperiuntur ea quæ exponuntur et clauduntur, quæ nobis abscondantur. Quæ portatur in humero, ut doctor, quod intelligit, aut loquitur, faciat.

« Et figam illum paxillum in loco fidei, » id est in Ecclesia, ut omnium actio pendeat ex ejus magisterio et omnes erigat, atque sustineat ejus firma rectitudo. « Et erit in solium gloriæ domus patris sui, » quia requiescent et gloriabuntur in eo omnes electi. Pater enim ejus Helcias est, qui dicitur *pars Domini*. *Vasa* quæ suspenduntur in eo, homines

sunt quos sursum tendere facit. *Vasa craterarum* illi sunt, qui mentes fidelium poculo sanctæ prædicationis inebriant. *Vasa musicorum*, qui divinis cantibus auditorum corda demulcent. Aut certe vas musicum est, quicumque veraciter dicit: « Cantabiles mihi erant justificationes tuæ in loco peregrinationis meæ (*Psal. cxviii, 54*). » Omnes ergo isti et cæteri, qui describuntur, suspendentur in eo, quia in ejus exemplis ac sermonibus attendentes ima deserent, et ad superna erigentur.

« In die illa auferetur paxillus, qui fuerat fixus in loco fidei, et frangetur; » quia, sicut dictum est, succedente bono præpositus inutilis dejicitur.

Si autem nomine *vallis visionis* Ecclesiam signari generaliter intellexeris, id est ab initio sæculi usque in finem, poteris per *Sobnam* sacerdotes Instrumenti Veteris et doctrinam eorum accipere, et per *Eliacim* sacerdotium Christi, quod in Novo Testamento est, ac sacerdotes ejus prædicatores resurrectionis illius. Quis est enim, qui habitat in tabernaculo Judæorum et in domo quondam Dei nisi Judaicus sermo, et ratio, quæ in Veteris Instrumenti lectione versata est? Huic itaque traditioni dicitur atque doctrinæ: « Quid hic agis? » Cur tibi vis ædificare domum in occidente littera, et tabernaculum, quod non habet fundamentum in duritia ejusdem litteræ? Ob hoc autem dico tibi, quod in excisione sepulcri ubi mortuos recondas, vel ipse mortuus jaceas, laborare non debes, quia transferet Domini sacerdotium tuum sicut transferri solet gallus effeminatus, qui nec generare valet, nec cantare.

Sobnas enim interpretatur *convertens vel conversio*. Dicitur ergo principi Judæorum, ut convertatur de lege ad Evangelium, et victimarum imaginibus derelictis transferat se ad spiritualis sacrificii veritatem. Eliacim vero, qui dicitur *Dei resurrectio*, vel *Deus resuscitavit*, interpretatione sui nominis designat Christum a mortuis resuscitatum. Qui et *filius Helciæ*, id est *patris Domini*, est. Hunc enim pater signavit Deus, et ait illi: « Tu es Filius meus dilectus, in te complacuit mihi (*Matth. iii, 17*). » Deposito igitur in Sobna veteri sacerdotio surgit novum in Eliacim juxta ordinem Melchisedech. « Vocabo, inquit, servum meum Eliacim, et induam illum tunica tua, » etc. Christus sacerdotali tunica est indutus, id est propria carne vel sancta Ecclesia, et cingulo sacerdotali confortatus, quia « indutus est Dominus fortitudine, et præcinxit se virtute (*Psal. cxii, 1*). »

Vel sacerdotale cingulum est justitia, quia scriptum est: « Sacerdotes tui induantur justitia (*Psal. cxxxii, 9*). » Quo cingulo Dominus est confortatus, quia de illo prædictum fuerat: « Et erit justitia cingulum lumborum ejus (*Supra xi, 5*). » Cui data est *clavis domus David*, sicut ipse loquitur: « Hæc dicit Sanctus et verus, qui habet clavem David, qui aperit, et nemo claudit; claudit, et nemo aperit. Scio opera tua (*Apoc. iii, 7*). » Quam videlicet clavem habet *super humerum*, quia per crucem, quam

in humero gestavit, regna cœlorum nobis aperuit, et omnia Legis et Prophetarum arcana patefecit. Sed et primo pastori personam cæterorum gerenti dedit eam dicens : « Tibi dabo claves regni cœlorum (Matth. xvi, 19). »

« Et figam, inquit, illum paxillum in loco fideli, » quia ipse continet Ecclesiam suam, et firmat, ne portæ inferi prævaleant adversus eam. « Et erit in solium gloriæ domui patris ejus, » quoniam « dabit illi Dominus Deum sedem David patris ejus, et regnabit in domo Jacob in æternum (Luc. 1, 32), » — « ut sedeat cum principibus et solium gloriæ teneat (I Reg. 11, 8). »

« Et suspendam super eum omnem gloriam domus patris ejus, » ut omnes honorificent Filium, sicut honorificant Patrem, « qui, cum sit splendor gloriæ et figura substantiæ ejus, portansque omnia, sedet ad dexteram majestatis in excelsis (Hebr. 1, 3). » Bene ergo super eum omnis gloria domus patris ejus suspendi asseritur, qui portans omnia dicitur, « in quem desiderant angeli prospicere (I Petr. 1, 12), » et ipsi in eum suspensi. Neque enim, quisquam glorificatur in domo Patris ejus per eum : « Quia non est in alio aliquo salus (Act. 14, 12). »

Et *diversa vasorum*, id est hominum, genera suspenduntur in eo, sicut ipse ait : « Ego, si exaltatus fuero a terra, omnia traham ad meipsum (Joan. xii, 32). » Quomodo autem cæteris sacerdotibus hæc convenient, facile ex superioribus intelligitur. In die illo, id est in tempore Antichristi, auferetur paxillus, qui fixus fuerat in loco fideli, et frangetur, quia multi rectores de Ecclesia tollentur, et adversitatibus frangentur ac dejicientur, et fracto paxillo, id est justo pastore cadet a fide populus, qui *perpenderit in eo, et peribit*. Ut autem hæc omnia inevitabiliter sic ventura fore monstraret, in fine subjunxit : « Quia Dominus locutus. »

CAPUT XXIII.

VERS. 1. — « Onus Tyri. Ululate naves maris, quia vastata est domus, unde venire consueverant : de terra Cethim revelatum est eis. »

Onus istud in decimo gradu positum ad eos pertinet, qui præcepta Dei, quæ per denarium numerum designantur, speciali professione se custodituros promiserunt. Tyrus namque dicitur *angustia*, conversationem eorum significans, quibus dicitur : « Intrate per angustam portam, quia lata et spatiosa via est, quæ ducit ad perditionem, et multi sunt, qui intrant per eam. Quam angusta porta et arcta via est, quæ ducit ad vitam, et pauci sunt, qui inveniunt eam! (Matth. vii, 13). » Inde et Tyrus posita est in insula, sacrorum cœnobiorum figuram tenens, ubi degunt hi qui turbines et naufragia sæculi evaserunt, et ad stabilitatem solidæ conversationis pervenerunt. Quibus nonnulli ex ipsis, ut victui necessaria præparent, aliquas sæculi actiones sustinere compelluntur, et nunc velut *naves*, ut victum deferant, per sæculi pelagus incedunt, nunc ad monasterium velut ad quietum littoris refugiunt.

A Quid igitur istos nisi *naves maris* dixerimus? Sed quia jam in plerisque monasteriis religio nimium defecit, *Ululate*, inquit, *naves maris*. Qui enim de religione monasterii sui gloriabantur et exultabant, nunc de ejus irreligiositate erubescunt et contristantur. Et cur eos ululare et lamentari præceperit, addidit : « Quia vastata est domus, unde venire consueverant, » id est de monasterio eorum internas rapuere divitias hostes invisibiles, et destruxere virtutum munitiones.

« De terra Cethim revelatum est eis, » quia plerumque destructionem religionis suæ magis advertunt, dum bonam sæcularium vitam aspiciunt, aut loquuntur cum eis. Quid enim per terram Cethim, quæ et Græcia significatur, nisi conversatio sæcularium; nam, quia viri sæculares nunquam recte vivunt et futuram discussionem metuunt, Cethim interpretantur *signati et formidantes*. Signatus enim merito dicitur, in cujus conversatione videtur similitudo bonitatis diviniæ; formidans vero est, de quo Salomon ait : « Beatus homo, qui semper pavidus (Prov. xxviii, 14). » Jure igitur de terra talium revelatur eis vastitas domus suæ, quia ex consideratione religionis eorum cognoscunt suos amisisse religionem.

Vel omnis anima vitiis occupata, et pravis cogitationibus Tyrus, id est, *angustia* vocari potest. *Naves maris* sunt mentes deditæ sæculi desideriis et actibus, quæ jubentur ululare penitentiam agendo, quia « Mundus transit et concupiscentia ejus (I Joan. 11, 17), » et cuncta sæcularia. Mare enim hoc ultra non poterit navigari, sed omnia congelascent. Jam enim torpet hoc sæculum, et quasi glaciali frigore constringitur, ita ut ejus actiones vix queant exerceri. Unde patet, quia ipse mundus prope finem est. Sequitur :

VERS. 2. — « Tacete, qui habitatis in insula : negotiatores Sidonis transfretantes mare repleverunt te : »

VERS. 3. — « In aquis multis semen Nilii, messis fluminis fruges ejus : et facta est negotiatio gentium. »

Tacete, inquit, *tacete vos, qui habitatis in insula*, id est monasterio, quia præ confusione non audebitis aperire ultra os. Habitamus in insula, quando tentationibus hujus sæculi tundimur, et ex omni parte nostra insula atque navicula marinis feritur fluctibus. Cujus insulæ negotiatores de Sidone sunt, quæ interpretatur *venatrix*, et in qua venatores habitant, de quibus scriptum est : « Liberavit me de laqueo venantium (Psal. xc, 5). » Omnes autem negotiatores gentium segetibus comparantur, quæ cito arescunt, vel messibus fluminis, quæ de cœlo non habent pluviam, sed aquam de terra, et in eo cum gentibus sunt periturae.

Sed ad priorem sensum redeamus. Sidon dicitur *venatio inutilis*. Quæ est igitur negotiatio venationis inutilis nisi actio quorundam professorum religionis, qui toto corde *terrena* *recepta*

mundanis actionibus et negotiis semper inservire satagunt? Qui *transfructantes mare*, id est euntes per mundum replent negotiationem istam *in aquis*, id est in populis multis, quia huc illucque discurrunt in diversis locis aggregant temporales divitiis.

Semen Nili, id est quod seminatur juxta Nilum, et *fruges ejus*, id est Tyri, et *messis fluminis ejusdem*, id est quæ mundationibus Nili crevit, et *fruges ejus*. Quantum ad litteram terra Chanaanæsum, in qua Tyrus est, infecunda est; Ægyptus vero, quam Nilus irrigat, fertilissima est, ideoque negotiatores Tyri de Ægypto frumentum navibus afferbant. Et hoc est quod dicit, quia quod Ægyptii seminabant, Tyrii sumebant, et messis Ægyptiorum erat fruges Tyriorum. Sic et religionis sanctæ professores a sæcularium viris, vel ab Ægyptiis ea, quæ ad victum pertinent, accipientes, spiritalia dona recompensare eis solent. Verum si talis negotiatio immoderate fiat, nocet plurimum religiosis. Et ideo nunc sub specie Tyri, quæ fruges Ægyptiorum percipit reprehenditur vita eorum, qui sæculo renuntiassent se dicunt, et nihil manibus suis operantes bona sæcularium virorum sumere semper omni aviditate quærent.

Et facta est vita eorum negotiatio gentium, quia plurimi dantes eis carnalia accipiunt spiritalia. Quæ tamen negotiatio non secundum perversitatem Simonis agitur, sed secundum quod servi Dei pro suis benefactoribus orare consueverunt, eisque spiritalia reddere beneficia, et secundum Apostoli sententiam, qui de pauperibus sanctis, qui erant in Judæa loquens ait: « Si spiritalium eorum participes facti sunt gentiles, debent et in carnalibus ministrare eis (Rom. xv, 27). » Sequitur:

VERS. 4. — « Erubescere Sidon, ait mare, fortitudo maris dicens: Non parturivi et non peperivi, et non enutrivivi juvenes, nec ad incrementum perduxivi virgines. »

Sæculi hujus *mare*, in quo sunt animalia pusilla cum magnis, et draco, quem plasmavit Deus ad illudendum ei, videns a venatoribus Christi de omni monte et colle venatos et captos illos, qui prius a dæmonibus capti fuerant, loquitur ad contrariam fortitudinem venatorum, qui interpretatur Sidon, et dicit ei: « Erubescere Sidon, ait mare. » Non enim *parturivi nec peperivi, nec captos a te nutrivivi juvenes, nec educavi virgines*, quarum stultitia in Evangelio condemnetur. Mala enim parturitiō, et partus, et nutrimentum, et educatio virginum apostolorum Christi parturitione deleta est, quorum unus loquebatur: « Filioli mei, quos iterum parturio (Gal. iv, 19). » Et: « Lac vobis potum dedi (I Cor. iii, 2). » Et: « Respondi vos uni viro virginem castam exhibere Christo (II Cor. xi, 2). »

Sanctus Papa Gregorius de beato Job loquens

A ait (In præf. ad lib. i *Moral.*): « Homo gentilis, homo sine lege ad medium ducitur, ut eorum, qui sub lege sunt, pravitas confundatur. Quod bene per prophetam ac breviter dicitur: « Erubescere, Sidon, ait mare. » In Sitione quippe figuratur stabilitas in lege positorum; in mari autem vita gentilium. Erubescere ergo, Sidon, ait mare, quia ex vita gentilium redarguitur vita sub lege positorum, atque ex actione sæcularium confunditur actio religiosorum, dum illi etiam promittendo non servant quæ in præceptis audiunt; et isti vivendo ea custodiunt, in quibus mandatis nequaquam legalibus astringuntur. »

Item Gregorius in Pastoralis (part. iii, cap. 28). Plerumque, inquit, in actione sæcularium vita confunditur continentium cum et illi ultra habitum assumunt opera, et isti juxta ordinem proprium non excitant corda. Unde bene per prophetam dicitur: « Erubescere, Sidon, ait mare. » Quasi enim per vocem maris ad verecundiam Sidon adducitur, quando per comparisonem vitæ sæcularium atque in hoc mundo fluctuantium ejus, qui munitus et quasi stabilis videtur, vita reprobat; » fortitudo autem maris virtus bonæ actionis sæcularium est.

Quæ dicit: « Non parturivi et non peperivi, » quia sæculares viri per prædicationem filios parere non student. Ubiunque autem hoc duo verba simul ponuntur, parturire est ante partum dolere, parere vero partum effundere. Et illi spiritaliter parturiunt, et pariunt, qui labores sanctæ conceptionis tolerant, et proferendos Deo filios intra uterum charitatis portant, ut eos in sancta conversatione pariant sicut viri religiosi, qui lucrandis animabus invigilant, qui Deo filios generant convertendo, et enutriunt bonis moribus informando. *Juvenes* autem et *virgines* fortasse propter utrumque sexum dicit, quia et sancti viri juvenes Deo nutriunt, et religiosæ feminæ. Sidon itaque verecundiam faciens, « ait mare et fortitudo maris: Non parturivi et non peperivi, et non enutrivivi juvenes, nec ad incrementum perduxivi virgines. » Ac si vita sæcularium exprobrat ordini religiosorum, dicens: Tu, qui alios parere Deo spiritaliter, ac nutrire solebas, et bonis moribus usque ad perfectionem informare, non observans illud Apostoli: « Ne forte cum aliis prædicaverim, ipse reprobus efficiar (I Cor. ix, 27). » Quod prædicare cæteris consuevisti, ipse non agis, cum ego, quæ nunquam alios convertendo peperivi, aut enutrivivi, sancta faciem opera, de qua tam mirum non esset, si sæculariter viverem, quam de te, qui sæculo renuntiasti. Sequitur:

VERS. 5. — « Cum auditum fuerit in Ægypto, dolent cum audierint de Tyro. »

Quia boni sæculares dolent audientes casum religiosorum. Vel cum audierit Ægyptus, quæ interpretatur *tribulans* et *coarctans*, etiam ipsa terretur, se quoque intelligens eadem, quæ Ty-

rus passa est, esse passuram. Quod cum ad omnia vitia referatur, potest etiam in hæresium diversitate sentiri, quando alia capta hæresi alia pertimescit, et in alterius confusione alter capiendum esse se sentit. Sequitur :

VERS. 6. — « Transite, maria, ululate, qui habitatis in insula. »

« Quid per maria nisi amari fluctus actionum sæcularium designantur? Religiosis ergo, qui mundanas actiones exercere cupiunt, per ferientem sententiam divinitus dicitur : ut transeant maria, quia sæcularium vitam in terrenis negotiis, et turbulentis actionibus superare permittuntur. Tyrus quippe transit maria, quando religiosus amaritudines terrenarum actionum magis quam sæculares viri sectatur. Sed his maria sic transeuntibus ululare jubentur, id est lapsum religionis eorum plangere illi, qui in monasterio habitant velut in insula, et ordinis adhuc rectitudinem servare, si fieri posset, vellent.

Vel transito animo maria, id est sæcularia, festinantes ad portum cœlestis patriæ, et lugete peccata vestra vos, qui habitatis in insula, qui ex omni parte expositi estis tentationum fluctibus. Sequitur :

VERS. 7. — « Nunquid non hæc vestra est, quæ gloriabatur a diebus pristinis in antiquitate sua? Ducent eam pedes sui longe ad peregrinandum. »

Tyrus « gloriabatur a diebus pristinis in antiquitate sua, » quia plerique monachi et religionum professores plus de longo tempore conversationis, quam de morum perfectione gloriari solent. Sed « ducent eam pedes sui longe ad peregrinandum, » quia instigante occulto insidiatore nonnunquam tales fugiunt de monasterio.

Vel pedes ejus, id est affectiones cordis ejus ducent eum longe a justitia, et ad peregrinas actiones, id est ad iniquitates, quas non noverat.

Vel quæ in antiquis erroribus gloriabatur, nunc ab his longe recedet, et Evangelium devota suscipiet, ut peregrina sit et hospes super terram. Sequitur :

VERS. 8. — « Quis cogitavit hoc super Tyrum quondam coronatam, cujus negotiatores principes, institores ejus inclyti terræ? »

VERS. 9. — Dominus exercituum cogitavit hoc, ut detraheret superbiam omnis gloriæ, et ad ignominiam deduceret universos inclytos terræ. »

« Quis, inquit, cogitavit hoc super Tyrum? » Ac si dicat : Quis hoc æstimaret venturum super Ecclesiam religiosorum, ut sic caderet? Tyrum inquit quondam coronatam, id est discipulis ornatam. Corona enim doctorum discipuli eorum sunt. Unde Paulus his, quos Domino acquisiverat dixit : « Quæ enim est spes nostra, aut gaudium aut corona gloriæ? Nonne vos ante Dominum Jesum estis in adventu ejus (I Thess. II, 19); » Itemque : « Gaudium meum, et corona mea sic stete in Domino, charissimi (Philip. XIV). »

A Tyrus ergo quondam coronata erat, quia hi qui sæculo renuntiaverant, alios verbo et exemplo convertentes, frequentia discipulorum ornabantur. Cujus negotiatores principes erant. Prædicatores enim sunt negotiatores, quia talentum verbi erogant, et bona conversatione auditorum locupletantur. Unde eis paterfamilias dicit : « Negotiamini, dum venio (Luc. XIX, 15). »

Institor autem vocatur, qui semper negotiis insistit. Institor ergo spiritalis est, qui facit, quod Apostolus ait : « Prædica verbum, insta opportune (II Tim. IV, 2). Hi itaque negotiatores et institores Tyri erant principes et inclyti terræ, quia præfiebantur ecclesiis, et habebantur ubique præclari. Sed, quia prosperis succedentibus superbire cepit hæc Tyrus et de sanctitate foris gloriari, divino judicio permissa est in culpas foris cadere, de quibus in conspectu hominum erubesceret, sicque per exteriorem confusionem humiliata rediret ad gratiam, a qua per elationem, dum laudes humanas quæreret, recesserat.

Nam Dominus exercituum cogitavit hoc, ut detraheret ab ea superbiam omnis gloriæ ejus, et ad ignominiam deduceret universos inclytos terræ, id est ignominiosos ostenderet omnes, qui se sanctitate inclytos, dum adhuc super terram essent, jactabant, vel qui putabantur meritis inclyti. Vel inclytos terræ ejus, id est egregias virtutes mentis ejus propter elationem deduceret ad ignominiam et confusionem. Sequitur :

VERS. 10. — « Transi terram tuam quasi flumen filia maris, non est cingulum ultra tibi. »

VERS. 11. — « Manum suam extendet super mare, conturbabit regna, Dominus mandavit adversum Chanaan, ut contereret fortes ejus. »

VERS. 12. — « Et dixit : Non adjicies ultra, ut gloriaris calumniam sustinens virgo filia Sidonis : in Cethim consurgens trans freta, ibi quoque non erit requies tibi. »

Sicut fluvius, cum vehementer excreverit, aquam suam intra alveum cohibere non valet, sic plerumque prava anima eo usque cogitationum illicitarum fluctu repletur, ut exuberantem nequitiam fluvium jam in secreto cordis continere nequeat, sed in actionem foras erumpere sinat. Unde nunc apte per increpationem subditur : « Transi terram tuam quasi flumen filia maris. » Terram quippe corporis sui transit mare fluminis ripas extendentis, qui malitiam in corde conceptam actu corporeo promit. Et recte non filia Jerusalem, sed filia maris, id est sæculi vocatur hæc anima, quia non ex amore superno, sed ex malitia præsentis sæculi nequam generata sunt in corde ejus hujusmodi desideria, et sæcularem intra se malitiam suscipiens effecta est filia sæculi.

Quia vero post immundas cogitationes deperit carnis integritas, « non est, inquit, cingulum ultra tibi. » In cingulo quippe restrictio luxuriæ designatur. Unde et Dominus ait : « Siut lumbi vestri

præcincti (*Luc. xii, 38*). Lumbos enim præcingimus, A eum carnis luxuriam per continentiam coarctamus. Qui ergo carnem in luxuriam relaxat, recte cingulum jam non habere perhibetur. Sed quia in prosperitate sic cogitat anima perversa, et cingulum continentiae deponit, justum est, ut adversitatibus sariatur, si forte vel in adversis resipiat.

Extendet ergo Dominus manum suam super mare, commovens tumultuosas sæculi tempestates adversus eam, et conturbabit regna mundi contra eam : quod enim quasi de una anima dicitur, de multis est intelligendum. Et *ideo mare*, id est sæculum consurgit adversus quamlibet talem animam, et regna conturbantur adversus eam, quia in omnibus regnis terrarum detestantur viri sæculares religiosos, et disponente Deo consurgunt in eos adversa sæculi.

Chanaan vero *motus eorum* interpretatur. Et motus eorum est, de quo per Psalmistam dicitur : « Mei autem pene moti sunt pedes, pene effusi sunt gressus mei (*Psal. lxxii, 2*). » Et de quo rursus dicit : « Non veniat mihi pes superblæ, et manus peccatoris non moveat me (*Psal. xxxv, 12*). » Quia ergo vel blanda sæculi diligentes, vel de virtutibus superbientes impellente manu Satanae moventur a statu perseverantiæ. « Dominus mandavit adversus Chanaan, » id est adversus motum eorum multimoda scandala movit, ut adversitatibus conteret fortis ejus, id est virtutes, de quibus superbiere cœperant, et contritis fortibus, id est confractis virtutibus dixit :

Non adjicies ultra, ut de religiosa conversatione gloriaris filia Sidonis, quondam virgo, sed nunc ignominiosæ actionis calumniam et opprobrium sustinens. Permittit enim Dominus virtutes conteri, de quibus mens elationem sumebat, ut ei vanæ præsumptionis gloriationem auferens humilitatis sensum infundat. Quæ virgo dicitur, non quia jam virgo sit, sed postquam statum salutis amisit, ad confusionis suæ cumulum appellatur, quod fuit. Et ob hoc etiam *filia Sidonis* vocatur, cum in Sidone stabilitas vitæ continentiam exprimitur. Deinde per increpationem ait :

« In Cethim consurgens trans freta. » Ac si dicat : Vade in sæculum, o religiose : « ibi quoque non erit requies tibi ; » quia et ibi graviora nimis adversa patieris. Omnis etiam anima, quæ in sæculi fluctibus posita est, et circumfertur omni vento doctrinae, Chanaan appellanda est, quod interpretatur quasi fluctuatio sive commotio. Prodest igitur Tyro et ejus angustiis robur perire Chanaanæorum, ut dicatur ejus habitatoribus, quod ultra non valeant injurias facere, et opprimere iniquitate virginem filiam Sidonis. Quicumque a diabolo captus est in diversorum perturbatione vitiorum, et traditus in contumelias ignominia, ut polluat corpus suum voluptatibus et turpitudine, iste filius vel filia Sidonis est. Cæterum vero dicitur *plaga consummata*. Et sæpe videmus in sæculo quosdam de alio pro-

posita transire ad aliud, ut verbi gratia, qui militiam male experti sunt, fiunt negotiatores, rursusque caudidici arripiant arma; tamen, qui salvandi sunt ex eis, dispensante Deo semper laborem et miseras inveniunt, ut discant non in sua industria sed in Deo confidere. Sequitur :

VERS. 13. — « Ecce terra Chaldæorum, talis populus non fuit. Assur fundavit eam; in captivitatem transdixerunt robustos ejus, suffoderunt domos ejus, posuerunt in ruinam. »

Chaldæi quasi verba, vel quasi ferri dicuntur. Et homines illi quasi verba sunt, de quibus Salomon ait : « Fili mi, si lactaverint te peccatores, ne acquiescas eis (*Prov. i, 10*). » Illi autem quasi ferri sunt, id est ferarum more viventes, de quibus a Domino discipulis dictum est : « Ecce ego mitto vos sicut agnos inter lupos (*Luc. x, 3*). Hos igitur Chaldæos intellige, qui Tyrum subverterunt. Homines namque perversi, vel etiam dæmones duobus modis nos decipere conantur, id est blandendo et terrendo.

« Talis populus non fuit, » quia valde sunt ad decipiendum astuti. Quorum terram, id est gravidam eorum mentem « fundavit Assur, » id est diabolus, sicut et contrario Dominus fundavit Sion. Nam sicut Christus fundamentum congregationis est religiosorum; ita diabolus fundamentum est congregationis reproborum. Et hujusmodi homines sive maligni spiritus in captivitatem transdixerunt robustos Tyri, quia vel blandis persuasionibus, vel asperis terroribus traxerunt in peccatum religiosos, qui mentis fortitudine robusti putabantur.

Domus vero, id est mentes eorum, suffodiuntur, quia deserente Deo corda eorum internum retributionis præmium non requirunt, et in eo suffodiuntur, quia falluntur, ut pro æterna gloria de temporali gratulentur. Suffodiuntur, quia dum futura celestis patriæ negligunt, in suis voluptatibus cadunt: Suffossis etiam domibus ponitur in ruinam Tyrus, quoniam ablato fundamento caritatis ruit Ecclesia religiosorum. Nam, si in charitate radicati et fundati firmiter persisterent, nullatenus a Chaldæis in ruinam poni valeret civitas eorum. Qua subversa sententiam in initio præmissam repetit propheta dicens :

VERS. 14. — « Ululate, naves maris, quia vastata est fortitudo vestra. »

Dissipata enim de monasteriis religione et elapsò ordine robur amiserunt, qui foras ad utilitates necessarias egredi solebant.

Vel omnia bona sæculi hujus et universus mortali labor incerto navium cursui comparantur, quod cito peritura sint, et cuncta navigantium fortitudo solvatur. Sequitur :

VERS. 15. — « Et erit in die illa : In oblivionem eris, o Tyre, septuaginta annis sicut dies regis unius. Post septuaginta autem annos erit Tyro quasi cantum meretricis. »

Per Tyrum, ut sæpe dictum est, intelligitur vitæ

religiosorum, vel Ecclesia eorum, sive anima quælibet religiosa. Sed Tyrus in ruinam posita erit in oblivionem, quia quæ fama celebris ubique habebatur, dum sancte viveret, jam a statu suo lapsa in oblivionem data est omnibus, et vilis effecta, atque in nihilum tam Deo quam hominibus est deputata *septuaginta annis*, id est usque ad completionem septuaginta annorum, hoc est usque ad perfectionem bonorum operum. Anni enim septuaginta quibus et Israel servivit bonorum operum plenitudinem designant, quæ per sancti Spiritus gratiam datur secundum legis Decalogum. Nam septies decem septuaginta sunt, et septenarius ad septiformem gratiam pertinet: denarius ad numerum præceptorum Dei.

« In oblivionem, inquit, eris sicut dies regni unius, » id est sicut aliquo rege mortuo dies, quibus regnavit, oblivioni traduntur; ita dies, quibus in te justitia regnum habuit, erunt in oblivionem, quoniam justitia, quæ regnavit in te, mortua est, et loco ejus successit alius rex, id est peccatum; scriptum quippe est: « Etiamsi dixero justo, quod vita vivat, et confusus in justitia sua fecerit iniquitatem, omnes justitiæ ejus oblivioni tradentur (Ezech. xxxiii, 13). »

« Post septuaginta autem annos, » id est post tempus quo injustitiæ servivit, « erit Tyro quasi canticum meretricis, » id est malorum suorum recordatio, id est plañtus pœnitentiæ. Meretrix enim, postquam fornicari desierit solet mœrens eorum recordari, quæ gessit, et cum lugubri cantico memorare ea. Similiter et anima, quæ immundorum spirituum suggestionibus velut corruptorum libidini subjecta dñi consensit, tandem resipiscens confunditur super his, quæ fecit, et plangit ea quæ turpiter egit. Canticum enim non gaudii sed mœstitiæ ac lamentationis vocem hunc designat. Sequitur:

VERS. 16. — « Sume citharam, circui civitatem meretrix oblivioni tradita: bene canta, frequenta canticum, ut memoria tui sit. »

Quid in cithara nisi carnis castigatio figuratur? Cithara quippe ab inferiori parte sonum reddit, ita et corporis maceratio atque humilis pœnitentia ab imo canticum dulce sursum in aures superni inspectoris modulatur. Sume ergo, inquit, citharam, id est carnis mortificationem, in qua dulce melos coram Deo resonet, et circui civitatem Ecclesiæ, id est esto inter pœnitentes, qui stare solent extra domum orationis, vel esto inter ultimos fidelium. Alii enim fidelium sunt in medio civitatis sanctæ hujus; alii in extremis ejus. Nam sanctissimi quique sunt in medio ejus, qui vero minimi sunt in corpore Christi, degunt in extremis ejus. Civitatem ergo circui, qui inter istos humiliter se computans opera iustitiæ sectatur.

Bene, inquit, cano, id est convenienter malâ, quæ gessisti, plango, et universas chordas virtutum,

A quæ quondam fuerant relaxatæ, in laudes compone. *Frequenta canticum*, id est sæpe lamentare, ut apud Deum *memoria tui sit*, qui te oblivioni tradiderat, quia et tu præceptorum ejus oblita fueras. Sequitur:

VERS. 17. — « Et erit post septuaginta annos: visitabit Dominus Tyrum, et reducet eam ad mercedes suas, et rursum fornicabitur cum universis regnis terræ super faciem terræ. »

VERS. 18. — « Et erunt negotiationes ejus, et mercedes ejus sanctificatæ Domino: non condentur, neque reponentur, quia his, qui habitaverint coram Domino, erit negotiatio ejus, ut manducent usque ad saturitatem, et vestiantur usque ad vetustatem. »

Post septuaginta annos, id est post actam pœnitentiam et operum bonorum plenitudinem visitabit Dominus Tyrum, pristinam ei gratiam reddens, et post hæc reducet eam ad mercedes suas, id est ad lucra sua, ut iterum bona temporalia sufficienter acquirat.

Et rursum, ut solebat, fornicabitur, id est negotiabitur. Fornicatio enim pro negotiatione vel divitiarum acquisitione ponitur. Nam quod ait: « Fornicabitur, et erunt mercedes ejus sanctificatæ Domino; quia his, qui habitaverint coram Domino erit negotiatio ejus » ei sententiæ consonat, qua Dominus admonet: « Facite vobis amicos de mammona iniquitatis (Luc. xix, 9). » Mammona quippe interpretantur divitiæ, quæ licet justo labore acquisitæ, tamen divitiæ iniquitatis appellantur, quia iniquum, id est ab æquitate discrepans est, ut alius divitiis abundet, alius egeat. Quarum appetitus dicitur fornicatio, quia ille solus amor castus est, quo Deus ac proximus diligitur; quidquid infra diligitur, præsertim ab his, qui sæculo renuntiaverunt, non casto amore diligitur: et ideo sicut dictum est, appetitus, et acquisitio bonorum temporalium appellatur fornicatio.

Sed ejus, qui sic fornicatur, *negotiationes ac mercedes sanctificatæ sunt Domino*, atque his, qui habitant coram Domino, sit negotiatio ejus, quando facit sibi amicos de mammona iniquitatis; quando divitias non ob aliud acquirit, nisi ut eas ministret servis Dei. Itaque *fornicabitur iterum cum regnis universæ terræ super faciem terræ*, quia in omnibus regnis et gentibus compelluntur hujus vitæ necessitatibus acquirere justis bona temporalia.

« Et erunt negotiationes ejus et mercedes ejus, » quas in ipsis negotiationibus assequitur, *sanctificatæ Domino*, quia in usus eleemosynarum ac pietatum expendent eas. *Non enim condentur avare, neque reponentur* in proprios usus conservandæ. *His enim, qui habitaverint coram Domino*, id est qui in monasteriis manserint, serviet, *negotiatio ejus, ut manducent, et vestiantur ex ea. Manducent in saturitatem*, id est non ad luxuriam, sed ad satietatem

naturæ. Terminatis vero decem oneribus, atque A minemus, ut aliis voluminibus explanemus se-tractatibus eorum jam præsentem libellum ter-quentia.

Explicit liber tertius.

LIBER QUARTUS.

CAPUT XXIV.

VERS. 1. — « Ecce Deus dissipabit terram, et nudabit eam, et affliget faciem ejus, et disperdet habitatores ejus. »

VERS. 2. — « Et erit sicut populus sic sacerdos, et sicut servus sic dominus ejus, sicut ancilla sic domina ejus, sicut emens sic ille qui vendit, sicut B fenerator sic qui mutuam accipit, sicut qui repetit sic ille qui debet. »

VERS. 3. — « Dissipatione dissipabitur terra, et direptione prædabitur: »

Hæc et sequentia de Judæorum captivitate et excidio specialiter intelligi possunt, quia et per se ipsum Dominus ipse prænuntiavit, dicens: « Cum videritis ab exercitu circumdari Jerusalem, tunc scitote quia appropinquavit desolatio ejus. Tunc qui in Judæa sunt, fugiant in montes, et qui in medio ejus, discedant, et qui in regionibus, non intrent in eam: quia dies ultionis hi sunt, ut impleantur omnia quæ scripta sunt. Væ autem prægnantibus et nutrientibus in illis diebus. Erit enim pressura magna super terram, et ira populo huic, et cadent in ore gladii, et captivi ducentur in omnes gentes (Luc. C XXI, 20). »

Itaque circa sensum, qui in his Domini verbis est, intelligi potest versari sermo propheticus ab eo loco, quo ait: « Ecce Dominus dissipabit terram, » usque ad eum, quo dicitur: « formido et fovea et laqueus super te, qui habitator es terræ. » Tunc enim per Vespasianum et Titum opinis tercia Judæorum in vindictam Domini sanguinis dissipata est et vastata, ab omnibus bonis nudata, et habitatores ejus in captivitatem sunt dispersi per omnes gentes, et populus ac sacerdotes, et servi ac liberi, atque divites et pauperes in eodem excidio pariter perierunt, aut in captivitatem ducti sunt, cætera D vero, quæ sequuntur, juxta hunc modum intelligenda studiosis ob breviter relinquitur. Sed exordium sermonis repetentes ad diem judicii generaliter ista referamus.

Tunc enim « Dominus dissipabit terram, » quia montes æquabit vallibus, et omnia quæ in terra sunt igne consumet, « et nudabit eam » ab universis habitatoribus atque herbis et arboribus, et ab omni sorde. « Et affliget faciem ejus, » quia omnis superficies terræ ardebit. « Et disperdet habitatores ejus, » quia congregabuntur ante eum omnes gentes, et separabit eas ab invicem sicut pastor separat oves ab hædis (Matth. xxv, 32). » Sed et ipsos reprobos in diversa disperdet, ut sint seorsum su-

perbi cum superbis, avari cum avaris, homicidæ cum homicidis, fallaces cum fallacibus, et quique similes cum similibus. Quod autem sequitur:

« Et erit sicut populus sic sacerdos, » etc., usque: « Sicut qui repetit, sic qui debet, » juxta illud intelligendum est, quod ait Dominus: « In diebus Lot edebant et bibebant, et emebant, et vendebant, plantabant, et ædificabant; qua die autem exiit Lot de Sodomis pluit ignem et sulphur de cælo, et omnes perdidit. Secundum hæc erit, qua die Filius hominis revelabitur (Luc. xvii, 28). » Itaque sicut in Sodomis omnes diversis mundi actionibus intenti simul perierunt, sic et in fine sæculi omnes pariter hi peribunt, de quibus nunc propheta loquitur, quia cum suis habitatoribus mundus terminabitur. Et tunc « dissipatione dissipabitur terra, » quoniam ab hac specie, quam nunc habet, tota immutabitur. « Et direptione prædabitur, » quia peccatores universi de ea rapiuntur. Sequitur: « Dominus enim locutus est verbum hoc. »

VERS. 4. — « Luxit et defluxit terra, et infirmata est altitudo populi terræ. »

VERS. 5. — « Et terra interfecta [Vulg. infecta] est ab habitatoribus suis, quia transgressi sunt leges, mutaverunt jus, dissipaverunt fœdus sempiternum. »

VERS. 6. — « Propter hoc maledictio vorabit terram, et peccabunt habitatores ejus; ideoque insanient cultores ejus, et relinquuntur homines pauci. »

Mala, quæ prope finem sæculi, id est temporibus nostris ventura erant, his verbis denuntiat Dominus? *Luxit, inquit, terra.* Sicut terra letatur in virtutibus accolarum, sic luget in vitiis et iniquitatibus eorum. *Et defluxit orbis,* quia ubique exuberat nequitia. Nequitia enim, quæ dicitur ab eo, quod est nequidquam, defectio boni est, qua quisque tendit ad nihilum. Et ideo *terra defluere dicitur,* et infirmari, quia ejus habitatores nequitia defluunt, ac deficiunt, et mente infirmantur a bono. *Defluxit orbis,* quia in toto orbe non solum cordis, sed etiam corporis bona valde sunt immutata, et pene in nihilum redacta. « Infirmata est altitudo populi terræ, » quoniam elatio terrenorum hominum debilitata est. « Et terra interfecta est ab habitatoribus suis, » quæ solitam fertilitatem perdidit propter malitiam inhabitantium in ea.

Vel tropica locutione positum est terram interfectam, dum terreni homines dicantur malis operi-

bus interempti. Exposuit enim, quomodo interfectam dixerit terram, cum carnales ut insipientes actione pessima demersos ostenderit, quia *transgressi sunt leges Dei* sequendo concupiscentias suas, *mutaverunt jus* in injuriam, *dissipaverunt fœdus sempiternum* mutuae societatis et amicitiae. Jure enim fraternae dilectio et societatis fœdus sempiternum dicitur: « Quia charitas nunquam excidit (1 Cor. xiii, 8). »

Propter hoc, quia sic operati sunt, *maledictio vorabit terram*, quia propter malitiam humanam cœlestis maledictio terram absorbet, ut fructum non faciat. Unde primus homo post culpam audivit: « Maledicta terra in opere tuo (Gen. iii, 17). » Divina enim pietas nequid maledicere vult homines, sed maledictionem, quam ipsi merentur, ad terram intorquet, ut ex ejus sterilitate afflicti respiciant.

Sed proh dolor! humana pravitas afflictionibus jam non corrigitur, sed pejor efficitur. Hoc est enim, quod dicit: « Maledictio vorabit terram, et peccabunt habitatores ejus. » Nam quanto magis fecunditatem terrae maledictio cœlestis adimit, tanto avidius peccant nonnulli habitatores ejus; *ideoque* in suis iniquitatibus, irascente Domino, relaxati, *insanient* adhuc graviore malitia *cultores ejus*, ut amissa ratione, bestialiter invicem perimant. *Et relinquuntur homines pauci*, cæteris fame et gladio et multimoda calamitate consumptis.

Vel in adventu judicis *insanient* præ timore tormentorum imminutum et confusione cordis et dolore. Quibus expulsis, *relinquuntur homines pauci*, id est soli electi; « multi enim sunt vocati, pauci vero eiecti (Matth. xx, 16). » Qui ad comparisonem multitudinis reproborum pauci sunt, sed in suo numero multi. Sed iniquorum futura calamitas describitur multifarie, cum subditur:

VERS. 7. — « Luxit vindemia, infirmata est vitis, ingemuerunt omnes qui lætabantur corde. »

VERS. 8. — « Cessavit gaudium tympanorum, quievit sonitus lætantium, conticuit dulcedo citharæ. »

VERS. 9. — « Cum cantico non bibent vinum, amara erit potio bibentibus illam. »

VERS. 10. — « Attrita est civitas vanitatis, clausa est omnis domus, nullo introeunte. »

VERS. 11. — « Clamor erit super vino in plateis: deserta est omnis lætitia, translatum est gaudium terræ. »

VERS. 12. — « Relicta est in urbe solitudo, et calamitas opprimet portas. »

Vindemia vero est, cum singuli homines de hoc mundo quasi de vinea botri colliguntur. Sed *vindemia luxit*, quia peccantium finis mœstus ac flebilis est. *Vitis* vero genus humanum, quia « vitis frondosa Israel (Ose. x, 1). » Sed *vitis infirmata est*, quia qui nunc ad perpetranda mala fortes sunt, in resurrectione erunt infirmi. Et tunc *ingemiscent omnes, qui lætabantur corde*. Justi enim, licet aliquoties læ-

tari foris videantur, intus tamen eorum conscientia, dum hic peregrinantur, semper tristis est; reprobi autem in prosperitatibus mundanis toto corde lætantur. Unde per Salomonem dicitur: « Cor stultorum ubi lætitia, et corsapientium ubi tristitia (Eccl. vii, 5). » Qui ergo nunc corde lætantur in presentibus, in fine gement. De quo et additur:

Quia « cessavit gaudium tympanorum, quievit sonitus lætantium, conticuit dulcedo citharæ. » Omnia enim, in quibus perversi homines nunc lætantur, transacta tunc erunt, et Judex apparebit, qui reddat unicuique secundum opus ejus. Et peccatores *tum cantico jam non bibent vinum, sed amara erit eis potio* calicis iræ Dei. Audiant hoc, qui in convivii non solum gula et ebrietate, sed et auribus luxuriant, ut omnis sensus, et animæ fortitudo mollescat, quibus omnis potio et ebrietas, quæ nunc eis dulcedinem mentitur, vertetur in amaritudinem.

« Attrita est civitas vanitatis, » id est civitas illa magna Babylon, cujus cives sunt omnes reprobi, in cujus figura civitatem prius ædificavit homicida Cain (Gen. iv, 17). Inde et illud est, quod per Osee Dominus ad Israel dicit: « Quoniam Deus ego et non homo in medio tui sanctus, et non ingrediar civitatem (Ose. xi, 9). » Sed hæc impia civitas, quam Deus non ingreditur, et cujus exordium a maledicto fratricida fuit, *civitas est vanitatis*. Omnia enim transeuntia vanitatis nomine censentur, dicente Scriptura: « Vanitas vanitatum et omnia vanitas (Eccli. i, 1). » Hæc itaque civitas in fine conteretur. Quæ sunt autem *domus* civitatis hujus nisi reproborum singuli? Unde pessimus dæmón loquitur: « Revertar in domum meam, unde exivi (Luc. xi, 24). » Nunc enim apertæ sunt domus istæ, quia perversorum mentes patent omnibus dæmonum suggestionibus, et libenter eas suscipiunt. Sed tunc *clausa erit omnis domus, nullo introeunte*, quia tunc sero reprobi claudent conscientias suas, ut malignorum sprituum voluntati jam non consentiant, cum puniri cœperint.

« Clamor erit super vino in plateis, » quia qui per spaciosam viam sæculi incedunt, et vino vel terrenis curis inebriantur, amara flebunt. Quid enim per vinum designatur nisi vel immoderatus potus, vel cura sæculi, vel quidquid mentem male debriat? Et quid per plateas, quæ a latitudine dicuntur, nisi vita eorum exprimitur, qui latam viam, quæ ducit ad perditionem, ambulat? *πλάτος*, platos enim græce *latitudo* vocatur apud nos, et inde platea nomen accepit. *Clamor itaque erit super vino*, id est, ex vino *in plateis* quia « tunc plangent se omnes tribus terræ (Matth. xxiv, 3). » Unde et additur, quia « deserta est omnis lætitia, translatum est gaudium terræ. » *Translatum* utique ad cœlum. Et quia, sicut dictum est: « Attrita est civitas vanitatis, » congrue sequitur, quia « relictæ est in urbe solitudo, et calamitas opprimet portas. » Quæ est enim hæc urbs nisi Babylon? Et quæ sunt portæ urbis illius?

nisi doctores errorum, qui eos, quos ceperint, in A confusionem ducunt velut in Babylonem? Sed in hac urbe solitudo relinquatur, quia Babylon, in tenebras exteriores missa, a nullo hominum deinceps visifabitur. « Et calamitas opprimet portas, » quia magistri errorum tormentis subiacebunt. Vel portæ sunt peccata, quæ tunc opprimuntur calamitate, quia punientur æternaliter. Sequitur :

VERS. 13. — « Quia hæc erunt in medio terræ, in medio populorum. »

Hæc, quæ supra descripsit, erunt in medio terræ, quia Dominus, ut fertur, ad iudicium veniet in aere super montem Oliveti. Vel quia illud quod est commune dicitur medium, hæc fient in medio terræ; quia communiter omnibus aderit Dominus, ut omnes rationem reddant, et absque personarum acceptione iudicentur singuli. Dixerat autem superior, quia « relinquuntur homines pauci, » id est electi soli, pereuntibus cæteris. Et nunc dat similitudinem quomodo sint relinquendi, subjungens :

« Quomodo si paucae olivæ quæ remanserunt, excutiantur ex olea, et racemi, cum fuerit finita vindemia. » Quia sicut paucae olivæ remanent in arbore post excussionem, et pauci in vinea racemi post vindemiam, ita pauci remanebunt electi in die iudicii. Olea namque est arbor, oliva autem pomum, oleum vero jus, olivum autem liquor; sed invicem pro se poni solent. Expositus autem, versus ita etiam pronuntiari potest : « Quia hæc erunt in medio terræ, in medio populorum : quomodo si remanentes olivæ, quæ remanserunt, excutiantur de olea, et racemi, cum fuerit finita vindemia; » ita etiam fient hæc, quæ de electis subduntur; quomodo si remanentes olivæ vel racemi colligantur. Collecta enim multitudine reproborum, de quibus supra dixerat : « Quoniam luxit vindemia, » et in torculari vini furoris Dei calcata; pauci, qui superfuerint electi, ducentur ad gaudia de quibus subditur :

VERS. 14. — « Hi levabunt vocem suam atque laudabunt. »

Complebunt namque Scripturam, quæ dicit : « Beati, qui habitant in domo tua, in sæcula sæculorum laudabunt te (Psal. LXXXIII, 5). » Sequitur :

« Cum glorificatus fuerit Dominus, hinnient de mari. » In die iudicii secundum Apostoli sententiam. « Veniet Dominus glorificari in sanctis suis, et admirabilis fieri in omnibus qui crediderunt (II Thess. 1, 3). » Cum ergo fuerit glorificatus, hinnient de mari, quia vocem exultationis emittent sancti de hoc sæculo revertentes ad patriam. Tunc enim qui redempti sunt a Domino, revertentur et venient in Sion laudantes, et lætitia sempiterna super capita eorum (Isa. xxxv, 10). » Sequitur :

VERS. 15. — « Propter hoc in doctrinis glorificate

A Dominum, in insulis maris nomen Dominum Dei Israel. »

Quia exterminabuntur impii, quia glorificabitur Dominus in sanctis suis, propter hoc, o vos prædicatores, glorificate in doctrinis vestris Dominum, et non solum in toto orbe sed etiam in remotis insulis maris, prædicate nomen Domini Dei Israel; qui in sola quondam Judæa notus fuit. Deinde vox prophetarum inducitur, dicens :

VERS. 16. — « A finibus terræ laudes audivimus, gloriam justi. »

Propheta enim audierunt in spiritu resonare laudes Christi non solum ab orbe, sed etiam a finibus orbis. Unde et dicunt : « Cantate Domino canticum novum, laus ejus ab extremis terræ (Isa. XLII, 10). »

B Vel fines terræ intelligamus, ubi terrenâ desideria finiuntur. Laudes ergo veniunt a finibus terræ, quia, postquam in nobis finitæ fuerint terrenæ cupiditates tunc demum Deum laudare possumus. « Non est enim speciosa laus in ore peccatoris (Eccli. xv, 9). » Ibi autem propheta gloriam Christi decantandam in tota mundi latitudine vidit, considerans, quod a populo Judæorum gloria hæc cognoscenda non esset, adjecit

« Secretum meum mihi, secretum meum mihi (124). » Ac si dicat : Quod ego novi, populus iste Judaicus nesciat, sed in meo fideliumque corde læteat. Rursumque cernens, quia zelo legis commoti Dominum Sabbatis infirmos curantem persecuti sunt, et discipulos ejus nova prædicantes, cum e contrario legem inde potius violaverint, doluit super eorum cæcitate et nequitia, dicens :

C « Væ mihi ! prævaricatores prævaricati sunt, et prævaricatione transgressorum prævaricati sunt. » Prævaricati sunt legem, cum legem adversus Christum, et discipulos ejus defenderent. Vel post consideratam malorum damnationem, justorumque retributionem locutus est sibi ipsi propheta interno cordis affectu : Non possum cuncta narrare quæ cerno, hæret lingua mea faucibus meis, vox dolore concluditur. Væ mihi ! quantas considero pœnas ! et ob id maxime doleo, quia omnes prævaricati sunt legem Dei, et a justo Judice feriuntur. Sed ad priorem sensum redeamus. Nam quia persecutiones D exinde sunt secutæ, subjecit :

VERS. 17. — « Formido et fovea, et laqueus super te, qui habitator es terræ. »

VERS. 18. — « Et erit, qui fugerit a voce formidinis, cadet in foveam : et qui se explicuerit a fovea, tenebitur laqueo. »

Temporibus enim persecutionum Christianus habitator terræ, id est, cujus conversatio in cælis non erat, qui radicem cordis in amore terrenorum plantaverat, mala temporalia metuens dicebat apud seipsum : quia si nos urget hæc persecutio, negabo me Christianum verbis tantummodo, et agam postea pœnitentiam; aliter enim evadere nequeo. Et talia

(124) Alias, Et dixi : Secretum, etc.

cogitans dum fugeret a voce formidinis, id est minas persecutorum evadere quæreret, cadebat in foveam negationis; et dum se explicare vellet de fovea, id est pœnitentiam agere cogitaret, subito perimebatur a persecutoribus, vel quacunque morte præoccupabatur, et sic laqueo perpetuæ damnationis cum Satana ligatus tenebatur.

Potest et cupiditas intelligi *laqueus*, quo tenebatur ille, qui se explicabat de fovea, quia sæpe quilibet de talibus impediatur agere pœnitentiam, dum ea, quæ in mundo possidebat, timeret amittere. Similiter et temporibus Antichristi fiet, post cuius persecutionis atrocitatem, quia dies iudicii veniet, recte subjungitur :

« Quia cataractæ de excelsis apertæ sunt, et concutientur fundamenta terræ, » etc. Tunc enim *apertæ* erunt *cataractæ*, id est fenestræ de excelsis, quia cœli visibiliter patebunt, ut electos suscipiant, et reprobis unde sine fine contristentur ostendant. « Et concutientur fundamenta terræ, » quia tantus erit terræ motus, quantus nunquam fuit. Mystice vero terra peccator est, quia post culpam audivit homo : « Terra es, et in terram ibis (Gen. III, 19). » Sed quid tunc passura sit hæc terra, id est unusquisque peccator, ostenditur, cum dicitur :

VERS. 19. — « Confractioe confringetur terra, contritione conteretur terra, commotione commovebitur terra. »

VERS. 20. — « Agitatione agitabitur terra sicut ebrius, et auferetur quasi tabernaculum unius noctis : et gravabit eam iniquitas sua, et corruet, et non adjiciet ut resurgat. »

Sic enim reprobis quisque tunc conteretur, et agitabitur ac sicut tabernaculum, in quo mansit una nocte præsentis vitæ, auferetur in mane, id est in resurrectione. Et gravabit eam pondus iniquitatis suæ, ut a terra levari nequeat, quando sancti rapiuntur « in nubibus obviam Christo in aera (I Thess. IV, 16). Et corruet in barathrum æternæ damnationis, et non adjiciet ut resurgat, quia nunquam ulterius exibat inde. Sequitur :

VERS. 21. — « Et erit in die illa : visitabit Dominus super militiam cœli in excelso, et super reges : qui super terram sunt. »

Militiam cœli dæmones appellat, qui sunt in hoc aere. Aer quippe cœlum vocatur, sicut scriptum est : « Milvus in cœlo cognovit tempus suum (Jer. VIII, 7). » Visitabit ergo Dominus super militiam cœli in die illa, quia super aereas potestates vindicabit. Et super reges terræ, id est super principes sæculi, vel super dæmones, qui sunt rectores mundi tenebrarum harum. Sequitur :

VERS. 22. — « Et congregabuntur in congregationem unius fascis in lacum, et claudentur ibi in carcerem, et post multos dies visitabuntur. »

Cum de novissima die propheta dixisset, quia « in die illa visitabit Dominus super militiam cœli et terræ, » mox ad ea, quæ quotidie fiunt in morte reproborum, mentis oculum reduxit. Exeuntes enim

de corporibus congregantur in lacum tartareum, et sicut illi, qui in vinea laborasse dicuntur, omnes denarium vitæ æternæ communiter acceperunt (Matth. XX, 10), « licet in domo Patris mansiones multæ sint (Joan. XIV, 2), » et « stella a stella in claritate differat (I Cor. XV, 41) : » sic et omnes reprobi in congregationem unius fascis æternæ damnationis congregantur, licet per fasciculos et zizania comburantur. Quamvis vero varia sint genera pœnarum, omnes tamen colligati sunt in uno fasce. Nam, sicut uno sole omnes tangimur, nec tamen sub eo uno ordine omnes æstuamus, quia juxta qualitatem corporis sentitur etiam pondus caloris : sic damnatos et una est gehenna quæ afficit, et tamen non una qualitate omnes comburit ; quia quod hic agit validitate corporum, hoc et illic exhibet dispar causa meritorum.

Exeuntes itaque de hac vita congregabuntur singuli in congregationem unius fascis in lacum, et claudentur ibi in carcerem. Infernus vero, sicut præmissum est, dicitur lacus, quia omnes, quos semel ceperit, semper fluctuantes et trepidos tormentis circumfluentibus absorbet. Carcer quoque vocatur, quia quicumque ab eo capti fuerint, stabiliter retinentur. Claudentur, inquit, in carcerem de corporibus educti. Et post dies multos, id est in fine sæculi, visitabuntur, ut corpora resumere veniant, et deinceps puniantur dupliciter. Sequitur :

VERS. 23. — « Et erubescet luna, et confundetur sol, cum regnaverit Dominus exercituum in monte Sion, et in Jerusalem, et in conspectu senum suorum fuerit glorificatus. »

« Erubescet luna et sol confundetur, » quia « sol obscurabitur, et luna non dabit lumen suum (Matth. XXIV, 29). » Fertur tamen quia sol aut luna, vel stellæ lumen suum tunc non amittent, sed ad comparisonem lucis, quæ Christus est, omnia luminaria videbuntur obscurari, sicut et cereus lumen non habet in radio solis.

Vel erubescet luna, et confundetur sol, cernens homines, qui suo fruebantur lumine, nihil dignum Dei bonitate fecisse, « qui solem suum oriri facit super bonos et malos (Matth. V, 45), » quomodo si dispensator et villicus, veniente Domino, cernat familiam variis subjici cruciatibus, et nequaquam sua implesse præcepta.

Mons Sion et Jerusalem Ecclesia est. « Illa enim quæ sursum est Jerusalem libera est, quæ est mater nostra (Gal. IV, 26). » Senes morum senectute maturi sunt. « Cani enim sunt sensus hominis, et ætas senectutis vita immaculata (Sap. IV, 9). » Regnabit ergo Dominus in monte Sion, et in Jerusalem, id est Ecclesia, et in conspectu senum suorum, id est fidelium, qui maturi sunt moribus, glorificabitur.

Vel mons Sion altitudo contemplationis est, quia Sion dicitur specula, Jerusalem visio pacis est. Senes ejus sunt apostoli et patriarchæ, et principes religionis. In hoc igitur monte, et in hac Jerusalem manifestabit se Rex sæculorum, et coram his senibus gloriam suam aperiet. Itaque prophetata repro-

borum damnatione et justorum gloria, super his omnibus hymnum Deo propheta canit, subiungens :

CAPUT XXV.

VERS. 1. — « Domine, Deus meus es tu, et exaltabo te, et confitebor nomini tuo : quoniam fecisti mirabilia, cogitationes antiquas fideles. Amen. »

Confitebor, inquit, id est gratias ago nomini tuo, quoniam fecisti mirabilia, reddendo peccatoribus quæ minatus eras, et sanctis quæ promiseras. De quibus complesti cogitationes antiquas, dicens electis : « Venite, benedicti Patris mei, percipite regnum, quod vobis paratum est a constitutione mundi (Matth. xxv, 34). » Et idem reprobis : « Discedite a me, maledicti, in ignem æternum, qui præparatus est diabolo et angelis ejus (ibid., 41). » Antiquitus enim cogitasti, quod a constitutione mundi præparasti. Et hæc cogitationes fuerunt fideles, quia fideliter adimplesti quæ cogitaveras, sicut in libro Josue prophetico sermone de futuro justorum regno quasi de præterito dicitur : « Non unum quidem verbum, quod illis præstiturum se esse promiserat, irritum fuit, sed rebus expleta sunt omnia (Josue xxi, 43). » Unde et additur Amen, quod interpretatur vere vel fideliter. Sed quæ mirabilia fecerit, vel quas cogitationes compleverit, et hic quoque declaratur, cum subditur :

VERS. 2. — « Quia posuisti civitatem in tumulum, urbem fortem in ruinam, domum alienorum, ut non sit civitas, et in sempiternum non ædificetur. »

Quæ est autem hæc civitas nisi de qua superius ait : « Attrita est civitas vanitatis ? » Cum autem civitas ex toto destruitur, in tumulo redigitur. Posuit ergo Dominus civitatem in tumulum, quia magnam illam Babylonem in iudicio penitus subvertit. Quæ et domus alienorum est, id est eorum, qui sunt a consortio justorum alieni. Sed hæc jam ultra non erit civitas, nec in sempiternum ædificabitur, sicut supra dictum est : « Et erit Babylon illa gloriosa in regnis, inclita in superbia Chaldæorum, sicut subvertit Dominus Sodomam et Gomorrhæam (supra xiii, 19). » Sequitur :

VERS. 3. — « Super hoc laudabit te populus fortis, civitas gentium robustarum timebit te. »

VERS. 4. — « Quia factus es fortitudo pauperi, fortitudo egeno in tribulatione, spes a turbine, et umbraculum ab æstu. »

Super hoc, id est ex hoc, quod posuisti civitatem in tumulum sempiternum, laudabit populus fortis, electorum concordans iudicii justitiæ tuæ, et civitas gentium robustarum, id est Ecclesia sanctorum de cunctis gentibus congregatorum timebit te.

Est enim « timor Domini castus permanens in sæculum sæculi (Psal. xviii, 10), » quo timore semper Ecclesia justorum et in illo beatitudinis regno timebit Deum, quia perfecte non diligeret, nisi et timeret Deum. Sed populus iste dicitur fortis, et hæc civitas gentium robustarum, quia sancti fortes sunt hic in spiritali pretio, et ibi virtute resurrectionis confortati. Cur autem laudare et timere debeant consequenter ostenditur.

« Quia factus es, inquit, fortitudo pauperi, » etc. Quis vero iste pauper est nisi ille, « qui pro nobis pauper factus est, cum esset dives, ut illius inopia ditaremur ? » (II Cor. viii, 9.) Et quis egenus iste nisi Christus Dominus vel quilibet pauper spiritu ? Factus est ergo Dominus fortitudo pauperi in tribulatione, quia virtutem in passione Christo suo dedit, ut Judæorum ævitiam superaret patiendo. Egeno quoque factus est in tribulatione fortitudo, quia cui-libet pro se patienti adfuit. Et factus est ei spes a turbine tribulationum, quia speravit in eo inter adversa. Nam « tribulatio patientiam operatur, patientia autem probationem, probatio vero spem (Rom. v, 3). » Et umbraculum ab æstu passionum factus est ipsi egeno, ne mens ejus ureretur igne doloris immoderati. Sequitur :

« Spiritus enim robustorum quasi turbo impellens parietem. » Sicut turbo impellit parietem, ut subruat, ita Spiritus robustorum, id est animositas fortium persecutorum impetit corpus nostrum, ut in mortem illud præcipiet. Sed in tanto turbine suos Dominus protegere non desistit. Vel quomodo si ventus impingat parietem atque pertranseat ; sic turbo blasphemantium ac sævientium Judæorum Christo nocere non potuit. Sequitur :

VERS. 5. — « Sicut æstus in siti, tumultum alienorum humiliabis, et quasi calore sub nube torrente propaginem fortium marcescere facies. »

Sicut æstus humiliat tumultum hominum quando ipsi tumultuatores sitim patiuntur, quia vox eis deficit, sic humiliabis tumultum quo contra martyres latrant persecutores, qui sunt a sorte electorum alieni. Æstus enim tribulationum fatigabit eos, quando retribuet Deus tribulationem his, qui justos tribulant, et sitim patientur, quia nihil eorum quæ desideraverint habere poterunt.

Vel in æstu et siti humiliabuntur, quando cum igne devolventur in Tartarum a facie Judicis. Ac sicut marcescunt propagines vineæ, dum fortiter torrentur calore solis sub nube latentis, ita propaginem fortium persecutorum marcescere facies. Quid enim per solem sub nube latentem nisi iudex, qui nondum apparet, figuratur ? Ipse est enim « Sol justitiæ (Malach. iv, 2). » Quid per calorem solis nisi sententia iudicis ? Calor igitur occulti solis propaginem vitis siccat, quia latentis adhuc Judicis sententia vitam peccantium in morte facit marcescere. Sequitur :

VERS. 6. — « Et faciet Dominus exercituum omnibus populis in monte hoc convivium pinguium, convivium medullatorum vindemiæ defæcatæ. »

Supra dixerat, quia « confundetur sol, cum regnaverit Dominus in monte Sion et in Jerusalem (supra xxiv, 23), » et nunc ad ea respiciens subjungit : Quia faciet Dominus convivium in monte hoc, videlicet in monte Sion, id est in regno cælorum, quia « videbitur Deus deorum in Sion (Psal. lxxxiii, 8). » Convivium autem intelligamus, de quo scriptum est : « Beati qui ad cœnam nuptiarum Agni vocati sunt

(*Apoc. xix, 9*). » Et item: « Justi epulentur, et exultant in conspectu Dei, et delectantur in lætitia (*Psal. lxxvii, 4*). » Rursumque: « Secura mens quasi iuge convivium (*Prov. xv, 15*). » Illud enim convivium satietas est internæ dulcedinis, qui ex visione conditoris percipient, ut in æternum vivant. Quod omnibus populis in monte Sion faciet Dominus, quia sicut Lucas dicit: « Venient ab oriente et occidente, et aquilone, et austro et accumbent in regno Dei (*Luc. xiii, 29*). »

Et hoc convivium erit pinguium, et medullatorum, quia internæ pinguedinis adipe saginati sunt, et medullis charitatis sunt pleni; sive quia pingues sunt in bono opere, et medullati in gratia rectæ intentionis, illuc congregantur. Erit et vindemiæ defæcatæ, quia finis humani generis est vindemia, et singuli homines sicut racemi. Sed electorum vindemia est defæcata, quia non moriuntur in facibus peccatorum suorum, sed ante mortem defæcari student. Erit ergo convivium illud vindemiæ defæcatæ, quoniam illi soli ad epulas illas introducuntur qui vitam hanc immaculati finiunt. Sequitur:

VERS. 7. — « Et præcipitabit in monte isto faciem vinculi colligati super omnes populos, et telam quam orditus est super universas nationes. »

VERS. 8. — « Præcipitabit mortem [*Vulg. montem*] in sempiternum. »

Quid appellatione vinculi nisi mortalitas hæc designatur? Unde scriptum est: « Diripisti vincula mea, tibi sacrificabo hostiam laudis (*Psal. cxv, 16*). » Et quid per telam nisi mortalitatis vita figuratur? Dicit enim Job: « Dies mei velociores transierunt, quam a texente tela succiditur (*Job ix, 25*). » Vinculum autem est super omnes populos colligatum, quia omnes homines astricti tenentur vinculis carnis. Facies vinculi facies est mortalitatis hujus, quæ cernitur in corporibus nostris.

Telam quoque super universas nationes Dominus orditus est, quia propter Adæ peccatum ablata vivendi æternitate temporalem interim vitam dedit humano generi, donec interveniente morte immortalitas ei per resurrectionem restituatur, cujus resurrectionis adveniente die « præcipitabit Dominus in monte isto faciem vinculi colligati super omnes populos, » quia faciem mortalitatis, quæ paret in carne cunctorum, delebit a corporibus justorum, quando « mortui resurgent incorrupti, et nos immutabimur (*I Cor. xv, 51*). » Ob hoc namque in monte isto qui est Ecclesia, præcipitari dicitur facies vinculi hujus, quia in cæteris resurgentium, qui non mutabuntur, nequaquam facies mortalitatis abolebitur, quoniam adhuc passibiles erunt.

Similiter et telam præcipitabit, quia mortalem miseramque vitam hanc omnibus auferet, ut beatam immortalitatem dignis tribuat. Exponens autem propheta, quod dixerat faciem vinculi telamque generalem præcipitandam, « præcipitabit, inquit, mor-

tem in sempiternum. » Neque enim ultra poterunt mori, sed æquales angelis erunt, qui digni habebuntur sæculo illo. Sequitur:

« Et auferet Dominus Deus omnem lacrymam ab omni facie, et opprobrium populi sui auferet de universa terra, quia Dominus locutus est. » Variis de causis nunc flent electi, quia nunc est tempus flendi. Alius idcirco plangit, quia malum fecit; alius, quia bonum non fecit; alius, quia vitis impugnatur; alius quoniam a regno Dei peregrinatur. Opprobrium quoque patiuntur a pravis et infidelibus. Sed in die illa Dominus auferet lacrymam ab omni facie eorum, quia « gaudium et lætitiâ obtinebunt, et fugiet dolor et gemitus (*Isa. xxxv, 10*). » Et opprobrium eorum auferetur de universa terra, quia nusquam adversus eos quisquam audebit mutirè, sed ab angelis honore magno congregabuntur a quatuor plagis terræ, et subvehentur in cælum. Vel opprobrium eorum auferet, qui ad imaginem conditoris fuerant conditi, et tunc diaboli ac mortis evadent servitatem.

VERS. 9. — « Et dicent in illa die: Ecce Deus noster iste, exspectavimus eum, et salvabit nos iste Dominus: sustinimus eum, exsultabimus et lætabimur in salutari ejus. »

VERS. 10. — « Quia requiescet manus Domini in monte isto. »

In monte Sion « dicent in die illa: Ecce Deus noster iste, » quia juxta Psalmistam: « Videbitur Deus deorum in Sion (*Psal. lxxxiii, 8*). » — « Beati enim mundo corde, quoniam ipsi Deum videbunt (*Matth. v, 8*). » Nam « videmus nunc per speculum in ænigmate, tunc autem facie ad faciem (*I Cor. xiii, 12*). » Ita enim Deus nobis erit notus atque conspicuus, ut videatur spiritu a nobis singulis in singulis nobis, videatur ab altero in altero, videatur in se ipso, videatur in cælo novo et in terra nova, atque in omni, quæ tunc fuerit creatura, videatur, et per corpora in omni corpore, quocunque fuerint spirituales oculi acie perveniente directi.

Ad hanc ergo visionem, post vitæ hujus tenebras, electi pervenientes exsultabunt ad invicem, dicentes: « Ecce Deus noster iste, exspectavimus et sustinimus eum » inter adversa tentationum, sicut scriptum est: « Exspecta Dominum, viriliter age, et confortetur cor tuum et sustine Dominum (*Psal. xxvi, 14*). » Et quoniam in hoc sæculo gaudere nonimus, exsultabimus, et lætabimur amodo in salutari ejus, id est in Jesu Filio ejus, quia requiescet in monte isto manus, id est operatio Domini. Licet enim in Genesi requievisse legatur Sabbato ab operibus suis (*Gen. ii, 2*), tamen dicit Veritas ejus: « Pater meus usque modo operatur, et ego operor (*Joan. v, 17*). » Postquam igitur ea quæ quotidie creat operari desierit in fine sæculi, requiescet ab operatione manus ejus in monte Ecclesiæ justorum, « ut ipsi requiescant a laboribus suis (*Apoc. xiv, 13*). » Quid autem de reprobis tunc fiat subjungitur:

« Et triturbabitur Moab sub eo sicut teruntur pa-

læ in plastro. » Moab quippe, sicut Hieronymus ait, dicitur *ex patre*, id est recedens a Deo Patre. Quicumque igitur a Deo, qui Pater omnium est, peccando elongatur, est Moab. Nam et diabolus omnesque contrarias fortitudines sub appellatione Moab indicat humiliandas, et deducendas in Tartarum et instar pulveris conterendas. Sed iste *Moab triturabitur*, id est conculcando teretur, ut ab electis separatur, nihilque remaneat integrum. *Sicut teruntur paleæ plastro*, ut separentur a granis. In nonnullis enim regionibus agricolæ, collectis in unum segetibus, plaustra cum rotis serratis superducunt, ut triticum excutiat, et stramina comminuantur in paleas, ut animalibus pabulum fiant. Sic igitur, ut electi velut triticum soli remaneant, iste *Moab triturabitur* in illa tempestate, quæ fiet in adventu Judicis. Nam « ignis in conspectu ejus exardescet, et in circuitu ejus tempestas valida (*Psal. XLIX, 2*). » Hac igitur tempestate triturabitur iste bonitatis refuga, id est Moab a Deo recedens. Sequitur :

VERS. 11. — « Et extendet manus suas sub eo sicut extendit natans ad natandum. »

Quando quis ad imum de superioribus labitur, extensis manibus ruit, sicut qui natat. Cum ergo præcipitabitur in barathrum iste Moab, id est populus reproborum, expansis manibus velut natans, ruet circumfluentibus tormentis fluctuans. Et sicut solet, qui natat, totum corpus extendere, sic et iste allidetur in terram, irruens sonitum faciet.

« Et humiliabit gloriam ejus cum allisione manuum ejus, » ut in novissimum laci depositus pro temporali gloria opprobrium sustineat sempiternum. *Et humiliabit eum cum allisione manuum ejus*, quibus iniquitates operabatur, quia sicut scriptum est : « Per quæ peccat quis, per hoc et torquetur (*Sap. XI, 17*). » Ad quem propheta conversus adjungit :

VERS. 12. — « Et munimenta sublimium murorum (125) ejus concident, et humiliabuntur, et detrahentur in terram usque ad pulverem. »

Sublimes muri Moab homines nequissimi sunt, atque superbi qui per potentiam sæculi tuentur alios minus fortes iniquos. Sed in die illa *concident munimenta murorum* istorum, quia tutatores malorum in pœnas tunc corruent, et per mortis sententiam *humiliabuntur ac detrahentur in terram usque ad pulverem*, quia caro eorum pulvis efficietur.

Possumus et aliter istam murorum ruinam intelligere, juxta hoc, quod Apostolus loquitur : « In carne enim ambulantes, non secundum carnem militamus. Nam arma militiæ nostræ non carnalia sunt, sed potentia Deo ad destructionem munitio- num, consilia destruentes et omnem altitudinem extollentem se adversus scientiam Dei, et in captivitate redigentes omnem intellectum in obsequium Christi (*II Cor. x, 5*). » Dum igitur per apostolos ac reliquos prædicatores sanctos hæc fiunt, comple-

tur quod ait propheta : Quoniam munimenta sublimium murorum tuorum concident, » etc.

In terram quippe detrahitur, *usque ad pulverem*, qui, deposito superbiæ fastu, se terram et pulverem esse cognoscit. Potest et subversio Jerusalem, quæ per Romanos facta est, his verbis prænuntiari. Nam et populum Judæorum superius ostendimus mystice vocari Moab, Unde et quod ait quia *triturabitur Moab sub eo*, de illa Judæorum tribulatione potest intelligi. Sed et aliud, quod ait paulo superius, quia « posuisti civitatem in tumulum. » Vel, quia « relicta est in urbe solitudo (*supra XXIV, 12*), » ad eandem destructionem Jerusalem referri potest, quod ob breviter præterivimus. Sequitur :

CAPUT XXVI.

VERS. 1. — « In die illa cantabitur canticum istud in terra Juda : Urbs fortitudinis nostræ Sion ponetur in ea murus et antemurale. »

VERS. 2. — « Aperite portas et ingrediatur gens justa custodiens veritatem. »

VERS. 3. — « Vetus error abiit, servabis pacem : pacem, quia in te speravimus, » etc.

In die illa, qua concident munimenta murorum Moab, id est tempore quo prædicatores destruent omnem altitudinem extollentem se adversus scientiam Dei, vel in die judicii, quo peribunt omnes malorum defensores, *cantabitur* hoc carmen exultationis *in terra Juda*, id est in terra confessionis, quæ est Ecclesia. Juda quippe *confessio* dicitur sive *laudatio*. Confessores igitur et laudatores Christi decantant dicentes : « Urbs fortitudinis nostræ Sion, » etc. Sion interpretatur *specula*, et specula dicitur *urbs fortitudinis* justorum, quia pervigil eorum mens, dum sollicitè circumquaque respicit in alto posita, priusquam veniat culpa, deprehendit, eamque quo sagaciter prævidet, et fortiter superat.

Vel Ecclesia est *urbs fortitudinis nostræ*, quia nullus extra eam resistere valet antiquo adversario. In cujus Ecclesiæ ædificio Salvator *murus* poni dicitur. Ipse enim vobis murus est, quia ad corda nostra pertingere malignorum spirituum cursum vetat. Qui nostræ quoque fidei *et antemurale* posuit, quia, priusquam se per carnem ostenderet prædicatores mysterii sui prophetas misit. Recte enim antemuralis nomine vocantur, qui, dum subsequentem prædicarent Dominum, quasi ante murum steterunt.

Vel divinitas ejus est nobis *murus*, et humanitas *antemurale*, post cujus adventum, quia universæ gentes ad fidem susceptæ sunt : *Aperite*, inquit *portas Sion*, o prædicatores, *et ingrediatur gens justa*, id est gentilitas sine legis operibus per fidem justificata, *custodiens* deinceps operando *veritatem* evangelicam. Nam *vetus error* idolorum *abiit*. Dicit autem Paulus : « Justificati igitur ex fide, pacem habemus ad Deum, per Dominum nostrum Jesum Chri-

stum, per quem accessum habemus per fidem in gratiam istam, in qua stamus, et gloriamur in spe gloriæ filiorum Dei (*Rom. v, 1*). » Similiter et hoc loco : « Servabis, inquit, pacem : pacem, quia in te speravimus. » Qui enim non in se sed in Domino confidunt et sperant, eis gratia divina pacem servat, ne aliqua offensione gratiam ejus amittant.

Vel angelis dici potest : *Aperite portas regni cœlorum, et ingrediatur gens justa Christianorum custodiens operibus veritatem fidei. Error enim ignorantia veteris totus abiit, quoniam non docebit ultra unusquisque proximum suum et fratrem suum, dicens : Cognosce Deum. Omnes enim, inquit, scient me a minore usque ad majorem eorum (Jer. xxxi, 34).* » Doctor namque tunc cessabit, quia Deum, sicuti est, videbunt omnes, et dicent, quia *vetus error abiit ignorantia prioris. Et quia certissime scient nunquam se gratiam ejus, quam semper, dum hic viverent quaesierunt, amissuros, vel adversitatis aliquid jam passuros, congratulabuntur, dicentes : « Servabis pacem : pacem, quia in te speravimus. » Forsitan propter animæ corporisque tranquillitatem ingeminat pacem, Quod aiunt? Quia in te speravimus, propheta confirmat et exponit, dicens :*

VERS. 4. — « Sperastis in Domino in sæculis sempiternis, in Domino Deo forti in perpetuum. »

Sperant enim electi non in transitoriis sed in *sempiternis sæculis* a Domino mercedem accipere, qui fortis in *perpetuum* perpetua dare tormenta suis hostibus potest. Nam sequitur :

VERS. 5. — « Quia incurvabit habitatorem (126) in excelso, civitatem sublimem humiliabit : humiliabit eam usque ad terram, detrahet eam usque ad pulverem. »

VERS. 6. — « Conculcabit eam pes pauperis, gressus egenorum. »

Tempore mortis *incurvabit in excelso* habitantes, quia superbos humilians æternis mancipabit suppliciis, atque *civitatem eorum sublimem humiliabit usque ad terram, et detrahet usque ad pulverem*, quia elatam carnem eorum, in qua habitaverunt, in terram et pulverem reverti faciet.

Vel civitas hæc intelligatur illa magna Babylon. Aut certe Dominus incurvat habitantes in *excelso*, dum superbos ad humilitatis gratiam inclinat. *Et sublimem civitatem humiliat usque ad terram et pulverem*, quando elatam mentem sic humiliat, ut se terram et pulverem esse cognoscat. Quam et *pes pauperis* conculcat, et *gressus egenorum*, quia premitur exemplo Dominicæ humilitatis ejusque discipulorum. Eum namque pauperem hic accipimus, de quo Paulus ait : « Quoniam propter nos egenus factus est, cum esset dives, ut illius inopia nos divites essemus (*II Cor. viii, 9*). »

Egeni quoque fuerunt, quibus ab eo dictum est : « Nolite possidere aurum neque argentum, neque

A pecuniam in zonis vestris, non peram in via, neque duas tunicas, neque calceamenta, neque virgam portetis (*Matth. x, 9*). » De quorum gressu dictum est ibi : « Ite ad oves, quæ perierunt domus Israel. Euntes autem prædicate dicentes : quia appropinquavit regnum cœlorum (*ibid.*). » *Pes igitur pauperis* transitus est Dominicæ Incarnationis, qua de loco in locum ivit, atque *gressus egenorum* incessus prædicationis apostolorum. Eum itaque conculcat *pes pauperis*, et *gressus egenorum*, cujus elationem conterit humilitas et conversatio inter homines atque doctrina Salvatoris discipulorumque ejus.

Historialiter autem incurvavit habitantes in excelso, quia Judæos qui erant in arce Sion, subjecit Tito captivos. Et *civitatem Jerusalem humiliavit usque ad pulverem*, quia non est in ea relictus lapis super lapidem. Quam conculcaverat *pes pauperis, et gressus egenorum*, quia ibi Dominus ipse, et discipuli ejus prædicaverant, ac deambulaverant. De cujus conversatione subditur :

VERS. 7. — « Semita justi recta est, rectus callis justi ad ambulandum. »

Semita quippe vel *callis* justi actio est tritæ conversationis, quam Christus gessit, dum præsentis vitæ cursum incederet. Quæ *semita recta est ad ambulandum*, ut omnes, qui rectæ conversationis viam sequi cupiunt, per eam incedere post illum non dubitent. Ad quem prophetarum voce subjungitur :

VERS. 8. — « Et in semita judiciorum tuorum, Domine, sustinimus te, nomen tuum et memoriale tuum in desiderio animæ. »

Prophetæ enim sustinuerunt Dominum, quia divitiis expectaverunt ejus adventum. Quæ est *semita judiciorum* ejus nisi rectitudo conversationis, quæ probatur in judiciis ejus? In hac enim sustinuerunt eum prophetæ sancti. Cujus *nomen et memoriale erat in desiderio animæ* eorum, quia ejus charitate vulnerata mens eorum multum delectabatur, si vel nomen aut mentionem ejus ab ore cujusquam audiret.

Potest et Scripturam sacram *memoriale* ejus dici, quia ibi memorantur opera ejus. Quæ est *in desiderio animæ*, quia sancta anima lectiones divinas audire desiderat. Nam et omnes, qui veraciter diligunt Salvatoris adventum, possunt ei versum istum decantare. Nam qui nomen Domini habet in corde, aliud non desiderat. Deinde propheta suum pandit desiderium, dicens.

VERS. 9. — « Anima mea desideravit te in nocte, sed et spiritu in præcordiis meis de mane vigilabo ad te. »

Nox vero vita est præsens in qua, quandiu sumus, dum interna suspicimus, sub incerta imaginatione caligamus. Unde propheta nunc ad videndum Dominum, quadam se premi caligine sentiens, loquitur : « Anima mea desideravit te in nocte. »

Ac si dicat : In hac obscuritate vitæ præsentis videre te appeto, sed adhuc infirmitatis nubilo circumscribor. Ille autem in præcordiis vigilat ad Dominum, qui torporis et negligentia tenebras a se repellens, mentis oculos ad aspectum veri luminis apertos tenet. *Mane* vero primæva ætas est. Vel *mane* sit in nobis, cum erroris nostri obscuritas veritatis illustratione irradiatur. *Mane* sit in nobis, cum corda nostra justitiæ fulgor illuminat, quæ cæcitas culpæ velut nox deprimebat. *De mane* ergo propheta vigilare se ad Deum in præcordiis suis asserit, quia vel a primæva ætate, vel ex quo luce cognitionis ejus est illustratus, semper ad eum intendens voluntati ejus obsequi studet. Atque de his, qui vigilare negligunt, sententiam subjungit, dicens : « Cum feceris judicia tua in terra, justitiam discent habitatores orbis. »

Justitiam discent, id est vigilare incipient habitatores orbis, id est qui mente mundum inhabitant. Sed quando discent justitiam? « Cum feceris judicia tua in terra. » Te enim ad iudicium veniente ad cor suum quisque reducit, ut sancta jam, cum agere non valet, sentiat ; et rectum, quod sequi debuit, ex tortitudinis suæ pœna cognoscat. Unde bene per Jeremiam dicitur ; « Congrega eos quasi gregem ad victimam, et sanctifica eos in die occisionis (Jer. xii, 3). » In die enim occisionis sanctificant reprobi, quia tunc sancta, quæ debuerant agere sentiunt, cum digna pravitatis supplicia jam declinare non possunt. Sequitur :

VERS. 10. — « Misereamur impio, et non discet facere justitiam, in terra sanctorum iniqua gessit, et non videbit gloriam Domini. »

VERS. 11. — « Domine, exaltetur manus tua, et non videant : videant et confundantur zelantes populi, et ignis hostes tuos devoret. »

Vox est eorum, qui supra dicebant : « In semita iudiciorum tuorum, Domine, sustinuimus te. » *Misereamur*, aiunt, *impio* non statim condemnantes eum, sed adhuc expectantes, et divinam misericordiam ei annuntiantes, si forte pœnitentiam egerit. Et nos quidem ei miserebimur, sed ille *discet facere justitiam*, id est juste vivere. Unde et sequens ejus actio perversa. Et postquam est misericordiam consecutus, additur, scilicet quia *in terra sanctorum iniqua gessit*, id est inter bonos male vixit ad iniquitatis augmentum. Nam sicut magna laus est inter malos bene vivere, sic grandis ignominia est inter sanctos inique agere. Et ideo qui sic induratus est iniquitate, ut et inter justos inique vivere non erubescat, *non videbit gloriam Domini*, quam soli videbunt electi, sed in æternum damnatus perpetuas sustinebit tenebras

Vel Dominus ait : *Misereamur impio*, id est misericordiam potius consequatur impius, et discat clementiam meam, dum etiam ipse salvetur. Cui ex persona humanæ impatientiæ propheta respondet : « Et non discet facere justitiam. » Et est sensus : Et quomodo poterit nosse tuam justitiam, si tantam

A clementiam fuerit expertus? Redditque causas, quare eum velit Dei justitiam discere : Quia « in terra sanctorum iniqua gessit, » et contra sanctos tuos jugiter dimicavit, debet sentire tormenta. Rursumque Dominus sententiam temperans : « Et non videbit, inquit, gloriam Domini, » id est sufficiet ei pro universa pœna, quod me cum sanctis meis non videbit in mea majestate regnantem. Sed qualiter omnes iniqui fallantur, adjungitur :

« Domine, exaltetur manus tua, et non videant : videant, et confundantur zelantes populi, » id est fidelibus invidentes. Intellectum quippe reproborum nunc merita obscurant, sed tunc cognitio reatus illuminat, ut et modo sequenda æterna non videant, et tunc ea, postquam amiserint, cernant. Nunc enim ea intelligere negligunt, vel appetere intellecta contemnunt; sed tunc ea intelligentes procul desiderantesque conspiciunt, cum desiderata assequi nequaquam possunt. Et tunc *confunduntur*, cum eos in conspectu Judicis testis addicit [f. adducit]. Tunc enim Judex exterius cernitur, et accusator interius toleratur. Tunc enim omnis ante oculos culpa reducit, et mens super gehennæ incendia suo igne gravius torquetur, ac demum gehennalibus flammis traditur. « Videant, inquit, et confundantur, et ignis hostes tuos devoret. » *Manus* enim divinæ operationis nescientibus reprobis exaltatur, quia dies iudicii latenter appropinquat. Aliter tamen hæc intelligi possunt.

Quis enim est impius nisi Judæorum populus, qui Salvatorem impie peremit? Sed « Misereamur, inquit, impio, » quia post passionem Domini diutius est expectatus ad pœnitentiam ille perfidus populus, « Et non discet facere justitiam, » quia nec expectatus respiscere voluit, ut crederet in eum qui justificat impium. « In terra sanctorum iniqua gessit, » quia replevit iniquitatibus Jerusalem et Judæam, in qua sancti patres habitaverant. « Et non videbit gloriam Domini, » sed videbunt in quem compunxerunt (Zach. xii, 10). Neque enim gloriam divinitatis ejus videbunt, sed formam servi, quam crucifixerunt. Vel in primo adventu viderunt gloriam ejus sicut nos, quando « Verbum caro factum est, et habitavit in nobis, et vidimus gloriam ejus (Joan. 1, D 14). »

« Domine, inquit, exaltetur manus tua, et non videant, » etc. *Manus* enim Domini Christus est, quoniam « omnia per ipsum facta sunt (Joan. 1, 3). »

Exaltata est ergo manus Domini, et non viderunt Judæi, quia Christus in cœlum ascendit non credentibus eis. Cum autem ad iudicium venerit, videbunt et confundentur hi Judæorum populi, qui zelo legis persecuti sunt apostolos, et ignis gehennæ devorabit *hostes* ejus. Ubi voce electorum subditur :

VERS. 12. — « Domine, dabis pacem nobis: omnia enim opera nostra operatus es nobis. »

Tunc enim *pacem* dabit æternam illis qui, dum hic viverent, contra diabolium quotidie pugnaverunt. Quibus *omnia opera eorum operatus est*, quia

sicut Apostolus ait : « Divisiones ; operationum sunt, idem vero Deus, qui operatur omnia in omnibus (I Cor. xii, 6). » Sed, licet omnia justorum opera Deus operetur in ipsis, ea tamen sic remunerat, ac si illa omnia hæc sine ipso fecerint. Et notandum, quod nihil pravi operis habeant, quibus omnia opera sua Deus operatus est. Deinde poenitentes aiunt, quod ad reliquias Israel, quæ sub Elia credent, congrue potest referri.

VERS. 15. — « Domine Deus noster, possederunt nos domini absque te, tantum in te recordemur nominis tui. »

Hoc enim loquuntur, qui Domino servire debuerunt, sed ab immundorum spirituum dominio post hæc in iniquitatibus possessi sunt. Sed nunc recordari volunt nominis illius, ut semper ejus memores eum offendere jam caveant; et tantum in eo recordari quærent nominis ejus, quia « nemo potest quibus dominis servire (Matth. vi, 24). » Recordatur enim nominis ejus, sed non in eo tantum, qui et Deum cogitat, et ea, quæ sunt extra placitum ejus, aliquoties facit. Sequitur :

VERS. 14. — « Morientes non vivant, gigantes non resurgant : propterea visitasti et contrivisti eos, et perdidisti omnem memoriam eorum. »

Gigantes vel apostatas angelos vel superbos quosque homines nil obstat intelligi, cum propheta dicit : « Morientes non vivant, gigantes non resurgant. » Quos namque alios mortuos nisi peccatores nominat? Et quos gigantes, nisi eos, qui de peccato etiam superbiunt, appellant? Morientes ergo non vivunt, quia peccando viam justitiæ perdidit. Gigantes etiam resurgere post mortem nequeunt, quia post culpam suam, inflati per superbiam, et ad poenitiæ remedia non recurrunt. « Propterea visitasti, et contrivisti eos, » id est absque dubio visitabis et conteres eos in die judicii. Et perdidisti, id est perdes omnem memoriam eorum, ne jam ultra sit vel ulla memoria eorum. Sequitur :

VERS. 15. — « Indulsisti genti, Domine, indulsisti genti. Nunquid glorificatus es? Elongasti omnes terminos terræ. »

Genti Judæorum Dominus sæpe indulsit, id est peccata condonavit; sed non est ab ea glorificatus, imo valde exonoratus. Et in tantum dilexit hanc gentem, ut eam eligeret solam, et omnes terminos terræ, id est universas de circuitu nationes elongaret a se, et alienas reputaret. Sed quia et istæ post resurrectionem ejus accesserunt poenitentes ad eum, apte sequitur :

VERS. 16. — « Domine, in angustia sua requisierunt te, in tribulatione murmuris doctrina tua eis. »

Omnes enim termini terræ, id est omnes orbis nationes requisierunt eum in angustia cordis afflicti. Et doctrina ejus in tribulatione murmuris fuit eis, dum, spiritu contribulato, præcepta ejus meditarentur. Murmur namque gemitum et orationem poenitentium hic designat. Et quia ex ipsis gentibus multi

A per totum orbem facti sunt martyres, subjungitur vox eorum, dicens :

VERS. 17. — « Sicut quæ concipit, cum appropinquaverit ad partum, dolens clamat in doloribus : sic facti sumus a facie tua, Domine. »

VERS. 18. — « Concepimus, et quasi parturivimus, et peperimus spiritum salutis. »

Sicut enim mulier, quæ concipit, instante partu, clamat in doloribus suis; ita sancti martyres, verbum Dei corde concipientes, quasi parturierunt, id est angustia dolorum in tormentis afflicti sunt, atque pepererunt spiritum, id est reddiderunt animam. Ut enim jam diximus, parturire est ante partum dolere; parere vero, partum effundere. Parturient ergo beati martyres, dum in passione doloribus urgerentur, atque pepererunt cum emitterent animas. Quorum fortassis adhuc voce subditur :

« Salutes non fecimus in terra, ideo non ceciderunt habitatores terræ. »

Nam in cælo, id est in corde electorum, salutes multimodis operati sunt martyres; sed in terra, id est in mente reproborum, salutes non fecerunt. Et ideo non ceciderunt, sed in superbiam adhuc eriguntur habitatores terræ, id est illi, qui præsens exilium pro habitatione patriæ diligunt. Vel eorum vox est, qui tempore pacis post martyres fuerunt : « Salutes in terra non fecimus. » Nam viri fortes Israel, cum ingentes hostium strages darent, salutes in populo suo fecisse dicebantur, sicut Samson, cum maxilla asini mille Philisthæos interfecisset, ait ad Dominum : « Tu dedisti in manu servi tui salutem hanc maximam, atque victoriam (Jud. xv, 18). » Sed et Jonathan, filius Saul, Philisthæos percussit, atque dictum est : « Quia fecisti salutem magnam in Israel (I Reg. xiv, 45), » et ita dici solebat. Aiunt ergo : « Salutes non fecimus in terra, ideo non ceciderunt habitatores, » Ac si dicant : Prædicationis gladio gentem vitiorum potenter non exstinximus, pro populo virtutum pugnantes, et ideo prostrata non sunt vitia nostræ carnis, id est habitatores terræ non ceciderunt.

Vel amatores sæculi sunt habitatores terræ, quia mens eorum in terrenis habitat, qui non ceciderunt ab elatione sua. Quoniam salutes non fecimus in terra, id est gladio verbi Dei potenter eorum malitiam et internum languorem non interfecimus. Sequitur vox Ecclesiæ dicens de martyribus :

VERS. 19. — « Vivent mortui tui, interfecti mei resurgent. »

Patet enim hoc. Qui enim pro Christo mortem subierunt, vere victuri sunt. Sequitur :

« Exspersgiscimini, et laudate, qui habitatis in pulvere, quia ros lucis ros tuus, et terram gigantum detrahes in ruinam. »

« Exspersgiscimini, qui habitatis in pulvere, » id est evigilate, qui dormitis in sepulcris, quia ros tuus, o Domine, quo irrigabuntur ut resurgant, ros lucis, id est gratia, quam eis infundes, illuminans est, ut, cordis nebulis effugatis, gloriam tuam jam

manifeste videant. Quomodo enim jactis in terram seminibus ros paulatim crescere facit herbas, et ad fruges sui generis pervenire; sic tuus ros in electis operabitur. « Et terram gigantum detrahes in ruinam, » id est carnem superbiorum demerges in infernum.

Vel ita : « Exspargiscimini, qui habitatis in pulvere, » id est torporem et negligentiam abjicite, qui terrena semper cogitatis. In pulvere enim habitant, quorum mens in terrenis cogitationibus moratur. Sed quomodo tales ad laudem Creatoris exspargisci possint, aperitur ; quia ros tuus, quo lavas ab hoc pulvere, ros lucis est, id est gratia tua, per quam cor a terrenis cogitationibus mundas, illuminatrix est. Pulvis namque cogitationum carnalium excæcat mentem, sed ros gratiæ supervenientis illuminat eam. « Et terram gigantum detrahes in ruinam, » quia mentem superbiorum gravabis, ut deterius coruant. Sequitur :

VERS. 20. — « Vade, popule meus, intra cubicula tua, claude ostia tua super te, abscondere modicum ad momentum, donec pertranseat indignatio. »

Vadimus, cum operamur; cubicula ingredimur, cum secreta nostræ mentis intramus, ostia claudimus, cum desideria illicita coercemus. Ostia quippe nostræ mentis desideria ejus sunt. Euntes ergo jubemur ingredi cubicula, ut operantes non remaneamus foris in favore laudantium, sed ad secretum cordis revertentes, ibi gloriam quæramus. Ostia quoque diligenter claudenda sunt, ne fiat in nobis, quod Jeremias plangit : « Ascendit mors per fenestras nostras, ingressa est domos nostras (Jerem. ix, 21). » Mors enim per fenestras sive per ostia domus ingreditur, cum peccatum per auditum et visum, aut per desideria mentes nostras penetrat. Abscondi vero parumper ad momentum præcipimur, ut, dum in præsentis vita sumus, gloriam foris non quæramus de nostris operibus. Omne enim tempus vitæ humanæ ad comparisonem æternitatis breve est ut momentum. Omnipotentis autem Dei indignatio in hoc quotidie vim suæ restrictionis peragit, quod viventes indigne dignis suppliciis demergit. Quæ scilicet indignatio nunc quidem transit, sed in fine pertransit, quia modo agitur, sed in mundi termino consummatur. Quousque igitur pertranseat, id est usque in finem sæculi, jubetur Ecclesiæ populus abscondi, quia Dominus in nocte præsentis vitæ transit per terram Ægypti, id est per hunc mundum, percutiens primogenita Ægyptiorum, et omnes quos foras invenerit. Sequitur :

VERS. 21. — « Ecce enim Dominus egredietur de loco suo, ut visitet iniquitatem habitatoris terræ contra eum : et revelabit terra sanguinem suum, et non operiet ultra interfectos suos. »

Quis est Domini locus nisi supernum cælorum habitaculum; unde scriptum est : « Quis ascendet in montem Domini, aut quis stabit in loco sancto ejus? » (Psal. xliii, 3.) Egredietur itaque de loco sancto suo, quia de cælo venit ad judicium. « Ut

visitet iniquitatem habitatoris terræ contra eum, » id est examinet pravitatem populi reproborum, qui mente mundum inhabitat, et adversans eam ulciscatur.

« Et revelabit terra sanguinem suum, » quem corporibus humanis fusum biberat, quia tunc omnis sanguis, qui effusus est, manifestabitur, et quare effusus sit declarabitur atque indicabitur. « Et non operiet amplius interfectos suos, » quia tunc omnes resurgent.

Vel de loco suo Dominus egreditur, quando misericors, et miserator, et clemens pater filios negligentes ferire compellitur, et quodammodo de sua sententiâ commutari. Ut visitet, et iram suam inducat super habitatores terræ. Quomodo enim, qui in carne sunt, Deo placere non possunt; sic qui in terra habitant. Terra vero nunc animam designat quæ carnaliter vivit. Quæ revelabit sanguinem suum, si quempiam scandalizavit et a vita dilectionis exstinxit. Vel sanguinem nostrum, quem susceperat, revelabit, nec operiet nos amplius, sed producet foras. Sequitur :

CAPUT XXVII.

VERS. 1. — « In die illa visitabit Dominus in gladio suo duro et grandi et forti super Leviathan serpentem vectem, et super Leviathan serpentem tortuosum, et occidet cetum, qui in mari est. »

Gladius Domini est sententiâ judicis, de quo Job dicit : « Fugite a facie gladii, quoniam ultor iniquitatum gladius est, et scitote esse judicium (Job xix, 29). » Qui gladius est durus, quia dure percutit, et grandis, quia tam grandi plaga percutit, ut æternam mortem inferat; et fortis, quia frangi vel flecti non potest a rigore suo, quo punit æternaliter impios.

Hoc igitur gladio visitabit Dominus in die illa super Leviathan, quia perpetuis diabolus tormentis tradet. Leviathan quippe dicitur additamentum eorum, id est, additamentum hominum. Nam serpens iste, quia hominibus, quos Deus creavit, peccatum addidit, vocatur Leviathan, id est additamentum eorum. Vel quia, dum se divinitatem eis additurum fallaciter polliceretur, immortalitatem abstulit, per irisionem dicitur Leviathan. Sed propheta, qui nunc serpentem dixerat, tortuosumque subjungit, interposuit vectem, quia in serpentis tortitudine fluxa molities, in vecte autem est duritia rigiditatis. Ut ergo hunc et durum signaret, et mollem, etiam vectem nominat, et serpentem. Durus quippe est per malitiam, mollis per blandimenta. Vectis ergo dicitur, quia usque ad necem percutit; serpens autem, quia se per insidias molliter infundit.

Quid vero maris appellatione nisi corda carnalium tumidis cogitationibus fluctuosa figurantur? Quid autem ceti nomine nisi antiquus hostis exprimitur, qui dum mentes sæcularium possidendo penetrat, quasi in eorum lubricis cogitationibus natat? Hunc ergo cetum interficiet Dominus in die illa,

quia perpetuis eum suppliciis mancipabit. Sequitur :

VERS. 2. — « In die illa vinea meri cantabit ei. »

Vinea meri plebs Israelitica est, quæ quondam in sanctis Patribus merum gratiæ spiritualis et bonorum operum habuit, sed in passione acetum pro mero dedit ei sitiendi. Sed quando reliquiæ illius in fine convertentur, et dicent : « Benedictus, qui venit in nomine Domini, in die illa vinea meri cantabit ei (*Matth. xxi, 9*), » quam quia Dominus ipse quondam custodire semper solebat, et tamen per Romanos eam afflicurus erat, subjungit :

VERS. 3. — « Ego Dominus, qui servo eam, repente propinabo ei. »

Hoc de antiquis et novellis temporibus dicitur. *Servo eam* temporibus Ezechiæ, temporibus Zorobabel, temporibus Machabæorum, temporibus apostolorum. Sed nunc *repente propinabo ei* calicem iræ meæ per Vespasianum et Titum. Rursum de priori tempore dicit :

« Ne forte visitetur contra eam, nocte et die servo eam. » *Ne visitetur contra eam*, id est ne fiat ei malum ab aliquo. *Nocte et die*, in prosperis et adversis, vel assidue *servo eam*. Et pro malis quæ sub Novo Testamento fecit in eum, adjicit :

VERS. 4. — « Indignatio non est mihi. »

Jure enim indignatus est Dominus, quoniam « In propria venit, et sui eum non receperunt (*Joan. i, 11*). » Et adjunxit :

« Quis dabit me spinam et veprem in prælio, » id est me faciet durum et asperum, ut per Romanos consurgam in prælium contra gentem hanc, qui semper mansuetus et misericors esse consuevi? Atque subdit :

« Gradiar super eam, succendam eam pariter. »

VERS. 5. — « An potius tenebo (127) fortitudinem meam? »

Gradiar super eam conculcans eam; et *succendam pariter*, id est totam simul gentem igne iræ meæ consumam. *An potius tenebo fortitudinem meam* parcendo illi? Utique parcam illi, quia sequitur :

« Faciet pacem mihi, faciet pacem mihi. » Pacem sub apostolis, pacem sub Elia faciet.

VERS. 6. — Qui ingrediuntur impetu ad Jacob, florebit, et germinabit Israel, et implebunt faciem orbis semine. »

Apostoli qui, « ubi erat impetus spiritus, illic gradiabantur (*Ezech. i, 12*), » *ingrediebantur impetu* vehementis spiritus *ad Jacob*, id est ad populum Judæorum, Evangelium illis prædicantes; et tunc *Israel*, id est populus Hebraicus, floruit fide bonisque cogitationibus, et germinavit, sanctis operibus; ac deinde ipsi prædicatores, qui *ingrediebantur impetu spiritus ad Jacob*, *impleverunt faciem* totius orbis *semine* prædicationis. Cum autem dicitur : « Qui ingrediuntur impetu ad Jacob, » in-

terponitur : « Florebit, et germinabit Israel; » atque de illis qui ingrediebantur impetu ad Jacob, subditur : « Et implebunt faciem orbis semine. » Sequitur :

VERS. 7. — « Nunquid juxta plagam percutientis se percussit eum, aut sic cecidit (128) interfectos ejus sicut occisus est? »

Non ita percussit Dominus populum judaicum, quomodo ipse percussus est ab eo; neque sic occidit eum, quomodo ille martyres ejus. Illi enim sine misericordia crucifixerunt eum, et prædicatores ejus interfecerunt; ille autem per quadraginta annos spatium pœnitentiæ misericorditer eis concessit. Sed quid de hac plebe subditur nolente converti?

VERS. 8. — « In mensura contra mensuram, cum abjecta fuerit, judicabis eam. »

« Cum abjecta fuerit, » id est ab apostolis derelicta nolens agere pœnitentiam, « judicabis eam in mensura contra mensuram, » ut qualia egit, talia recipiat. Occidit Salvatorem: occidatur a Romanis. Dispersit per mundum prædicatores expellendo a finibus suis: dispergatur a solo proprio per universum orbem. Sequitur : « Meditata est in spiritu suo duro per diem æstus. »

VERS. 9. — « Idcirco super hoc dimittetur iniquitas domui Jacob, et iste omnis fructus, ut auferatur peccatum ejus. »

Dies æstus est tempus tribulationis. Judæa ego per diem æstus, id est eo tempore quo Christum persequatur, *meditata est in spiritu suo duro*, quia in corde suo adamantino se exercuit ad malum, et excogitavit adversa, quæ faceret Domino juxta illud : « Qui cogitaverunt iniquitatem in corde, tota die constituebant prælia (*Psal. cxxxix, 3*). » Semper enim studuerunt eum persequi. Idcirco, quia persecuti sunt eum usque ad mortem, *super hoc*, id est ex hoc quod ita meditati sunt contra eum, *dimittetur iniquitas domui Jacob*, id est illis qui post resurrectionem ejus per apostolos credent, quibus ipse dixit : « Cum exaltaveritis Filium hominis, tunc cognoscetis quia ego sum (*Joan. viii, 28*). » Et Petrus postea jam corde compunctis et consilium quærentibus, quia se Christum crucifixisse cognoverant : « Pœnitentiam, inquit, agite, et baptizetur unusquisque vestrum in nomine Domini nostri Jesu Christi in remissionem peccatorum vestrorum, et accipietis donum Spiritus sancti (*Act. ii, 38*). » Ait igitur quia *ideirco dimittetur iniquitas domui Jacob*, et iste omnis fructus ejus est : ut auferat peccatum ejus. Nam nisi offenderent in lapidem offensionis, ut implerentur facies eorum ignominia, non quærerent nomen Domini Jesu, per quod datur remissio peccatorum. Vel Dominus in *Spiritu suo duro* atque vehementi meditatus est contra Judæam in die æstus, id est in tempore persecutionis, quando ardentior indignationis dies est atque pœnarum. Sequitur :

(127) Alias tenebit.

(128) Alias, occidit.

« Cum posuerit omnes lapides altaris sicut lapides cinerum allisos, non stabunt luci et delubra. »

Quod facturi erant Romani, Judæam dicit facturam, quia propter ejus rebellem pertinaciam factum est; Romani enim posuerunt omnes lapides altaris Dei sicut lapides cinerum allisos, quia templum succenderunt, sicut et in Psalmo dictum fuerat: « Incenderunt igni sanctuarium tuum (Psal. LXXIII, 7). » Sed quando destructum est templum Jerusalem non steterunt luci et delubra, quia tunc prædicantibus apostolis in gentibus succisa sunt idolorum nemora, et subversa sunt fana, ut ibi ædificaretur Ecclesia. Nam de destructione Jerusalem adhuc subditur:

VERS. 10. — « Civitas enim munita desolata erit, speciosa relinquetur, et dimittetur quasi desertum; ibi pascebitur vitulus, et ibi accubabit, et consumet summitates ejus. »

Muris namque munita erat Jerusalem, et gloria sæculi speciosa; sed tandem, abscedentibus Romanis, dimissa est quasi desertum. Vitulum appellat Titum Vespasiani filium, quia et Jeremias Chaldæis ait: « Exsultatis, et magna loquimini diripientes hæreditatem meam, quia effusi estis sicut vituli super herbam, et mugistis ut tauri (Jer. I, 11). » Hic ergo vitulus pastus est ibi, et accubavit, quia ibi cuncta devoravit; et ibi obsedit, et summitates ejus consumpsit, qui turres illius destruxit. Sequitur:

VERS. 11. — « In siccitate messes illius conterentur, mulieres venientes et docentes eam. »

Quia « messis est consummatio sæculi (Matth. XIII, 39), sicut ait Dominus; messis populi hujus vocari potest mors, quam in illa obsidione pertulit, quia fere totus fame et peste, et gladiis est interemptus. Sed messis ista siccitatem habuit, quia sine gratia Dei et fide mortui sunt omnes hi. Quo contra de populo electorum dicit: « Ros morabitur in messione mea (Job XXIX, 19). » Ros enim, qui desuper cadit, gratia est, quæ de sursum descendit. Et ros moratur in messione justorum, quia præsentem vitam in gratia Dei finiunt.

In siccitate ergo messes illius, contritæ sunt mulieres, quia non solum virilis, sed et femineus sexus ibi consumptus est in peccato perfidiæ. « Mulieres, inquit, venientes et docentes eam. » Instante obsidione, forsitan veniebant antea mulieres industres [f. illustres] in Jerusalem, et docebant viros, quemadmodum resisterent hostibus. Vel mulierum nomine signari possunt reliquæ civitates Judæorum, quæ Jerosolymitanis auxiliabantur. Sed quod mulieres viros docuerint credi potest, et ex eo quod sequitur:

« Non est enim populus sapiens. » Quia videlicet sapientiam Dei, quæ Christus est, ignoravit, ideoque et humanam industriam perdidit. Atque de ejus excidio subditur: « Propterea non miserebitur ejus, qui fecit eum; et qui formavit eum, non parcet ei. » Vel sapiens non est, quia Scripturarum scientiam perdidit, et propterea venientibus Romanis non parci ei Dominus. Sequitur:

VERS. 12. — « Et erit in die illa, percutiet Dominus ab alveo fluminis usque ad torrentem Ægypti, et vos congregabimini unus et unus filii Israel. »

Percutiet atque vastabit Dominus terram Judæorum ab Euphrate sive a Jordane usque ad Nilum sive Ryonorum; et vastatis regionibus, pauci qui superfuerint Judæi, congregabuntur in diversis locis unus et unus, ut adhuc rebellare conentur. Sed his de Judæorum exterminio dictis, de gentilium vocatione subditur:

VERS. 13. — « Et erit in die illa, clangetur tuba magna, et venient, qui perditii fuerant de terra Assyriorum, et qui ejecti erant in terra Ægypti, et adorabunt Dominum in monte sancto in Jerusalem. »

Tuba quippe magna vox apostolicæ prædicationis est. Terra Assyriorum gentilitas est. Assyrii namque sunt dæmones, qui convincent iniquitates, et coarguent in adventu Judicis peccatores. Sed et terra Ægypti gentilitas est, quoniam Ægyptus dicitur tenebræ, et appellatione tenebrarum exprimitur caligo mentium lumen veritatis ignorantium. Mons sanctus in Jerusalem Christus est in Ecclesia. Sequitur:

CAPUT XXVIII.

VERS. 1. — « Væ coronæ superbiæ, ebriis Ephraim et Bori decidenti gloriæ exultationis ejus, qui erant in vertice vallis pinguissimæ errantes a vino! »

VERS. 2. — « Ecce validus et fortis Dominus sicut impetus grandinis, turbo confringens, sicut impetus aquarum multarum inundantium, et emissarum super terram spatiosam. »

VERS. 3. — « Pedibus conculcabitur corona superbiæ ebriorum Ephraim. »

VERS. 4. — « Et erit flos decidens gloriæ exultationis ejus, qui est super verticem vallis pinguium quasi temporaneum ante maturitatem autumnii; quod cum aspexerit videns, statim ut manu tenuerit, devorabit eum. »

VERS. 5. — « In die illa erit Dominus exercituum corona gloriæ: et sertum exultationis residuo populi sui. »

VERS. 6. — « Et spiritus judicii sedenti super judicium, et fortitudo revertentibus de bello ad portam. »

VERS. 7. — « Verum hi quoque præ vino nescierunt, et præ ebrietate, absorpti sunt a vino, erraverunt in ebrietate, nescierunt videntem, ignoraverunt judicium. »

VERS. 8. — « Omnes enim mensæ repletæ sunt vomitu, sordibusque, ita ut non esset ultra locus. »

Textum litteræ posuimus, ut ad ejus sensum verius attingamus. Decem tribus vocabantur Ephraim, vel ab Ephraim filio Joseph, cujus tribus copiosior erat et nobilior, vel a Jeroboam filio Nabath Ephrateo, qui primus super eas rex est constitutus.

Væ, inquit, coronæ superbiæ! id est multitudini superbiæ, scilicet ebriis Ephraim, id est errantibus

idololatris decem tribuum! et vae *flori gloriae ejus*, quia cito decidet. *Qui erant temporibus David et Salomonis in vertice vallis pinguisimae*, id est in monte templi, qui est super vallem Gethsemani. Nam a parte vallis illius veniebant ad templum, ibique figebant tentoria.

Ecce validus et fortis Dominus, ut expugnet eos per manus Assyriorum, sicut vehemens turbo confringens impetus grandinis, et aedificia subvertens. Et sicut impetus aquarum fortiter inundantium per terram plenam omnia levia facile trahit, sic Dominus per impetum multitudinis Assyriorum rapit decem tribus in captivatem. Et tunc inimicorum pedibus conculcabitur corona superbiae istorum, quia destruetur regnum eorum.

Et erit flos gloriae ejus quasi temporaneum ante maturitatem, quod mox devoratur. Hoc est dicere: Quomodo si inveniatur racemus in vinea, vel in arbore fructus ante maturitatem autumnii, et mox, ut eum aliquis aspexerit, concupiscentia ductus rapiat eum avide, et comedat, ita Sennacheribet exercitus ejus, videns gloriam decem tribuum, concupiscent eam, et auferet atque bona earum omnia.

In die illa, hoc est in tempore, quo decem tribus in captivatem ductae fuerint, erit Dominus residuo populi sui, id est Judae et Benjamin, corona gloriae, ut protegat eos et honorificet. Et ipse erit spiritus iudicii Ezechiae sedenti super iudicium, id est in throno iudiciali, quia inspirabit quomodo iudicet. Et ipse erit fortitudo revertentibus de bello (IV Reg. xix, 35), quo percussit Angelus Domini in castris Assyriorum centum octoginta quinque millia. Ierunt enim Judaei colligere spolia eorum, et reversi sunt Jerusalem de caelo habentes fortitudinem.

Verum hi quoque, id est duae tribus praevino erroris nescierunt liberatorum suum, et praevibrietate, id est per idololatriam, et per Manassen erraverunt. Sacerdos et propheta nescierunt praevibrietate errorum, quia sacerdos immolavit idolis, et propheta vaticinatus est in Baal. Omnes enim mensae repletae sunt vomitu, sordibusque quia in omnibus eorum mensis erant carnes, quae fuerant idolis immolatae, et caetera daemoneum sacrificia, ita ut nullus superesset locus ibi absque sordibus huiusmodi, ne Dominus in eis locum habitationis haberet.

Sed haec intelligi et aliter possunt. Quid enim per decem tribus, quae deserentes templum Domini coluerunt idola nisi multitudo signatur haereticorum; hi enim erroribus suis ebrii sunt, id est a sensu rationis alieni. Corona vero magistrorum discipuli sunt sicut ait Apostolus his, quos converterat: Quae est spes nostra aut gaudium, aut corona? Nonne vos ante Dominum (I Thess. ii, 19)? Similiter et haeretici eos, quos seduxerunt, quasi coronam suam fore gloriantur. Sed vae huic coronae! quia sicut beatus Job de quolibet haeretico dicit: Si multiplicati fuerint filii ejus, in gladio erunt (Job xxvii, 14).

Quis autem sit flos huius coronae, docet iste pro-

pheta: Omnis caro fenum, et omnis gloria ejus quasi flos feni (Isa. xl, 6). Sed hic flos est decedens, quoniam exsiccatum est fenum, et cecidit flos, quia Spiritus Dei sufflavit in eo (ibid. 7). Qui erant in vertice vallis pinguisimae, quia deprimebant Ecclesiam. Quasi enim supra verticem ei erant, quam saeculari potentia conculcabant. Vel quia non sequebantur tenuitatem mannae, et humilitatem ecclesiasticam, sed in monte superbiae pinguisimo versabantur ebrii erroribus.

Ecce validus et fortis Dominus sicut impetus grandinis, turbo confringens, quia secundum libri huius sequentia, veniens ad iudicium allidet eos in turbine et in lapide grandis (Isa. xxx, 30); sicut impetus aquarum multarum inundantium, quia Spiritus ejus velut torrens inundans usque ad medium colli, et ad perdendas gentes ad nihilum (ibid. 28).

Pedibus conculcabitur corona superbiae ebriorum Ephraim, sicut iustis per Malachiam dicitur: Egrediemini et salietis sicut vituli de armento, et calcabitis impios, cum fuerint cinis sub planta pedum vestrorum in die, qua ego facio dicit Dominus (Malach. iv, 2).

Et erit flos decidens gloriae ejus quasi temporaneum ante maturitatem autumnii, quod mox, ut mane venerit, comedetur, quoniam haeretici, eum de hac vita exierint, non exspectant ad tormenta diem iudicii, quae per maturitatem autumnii potest intelligi, sed statim ab antiquo hoste devorantur in aeternae perditionis barathrum absorpti.

In die illa erit Dominus corona gloriae residuo populi sui, id est his, qui in Ecclesia permanent, quia perfecti, cum de hoc saeculo exeunt, mox regni coronam percipiunt. Et ipse Dominus erit Spiritus iudicii sedenti super iudicium, quia intimabit Salvatori nostro, quemadmodum iudicet, qui ait: Non possum ego a me ipso facere quidquam, sed sicut audio, iudico (Joan. v, 30).

Et ipse Dominus erit fortitudo revertentibus de bello, id est de vitae huius certamine: ad portam, id est ingressum regni caelorum. Solet enim hostis antiquus cum suis satellitibus ante regni januam gravia concitare praelia, ut fidelium animas de corporibus egressas caelum intrare non sinat, et idcirco Dominus electis suis ad portam fortitudo est.

Verum hi quoque praevino nescierunt quia et hi, qui sunt in Ecclesia, curis saecularibus inebriantur, et variis desideriis. Multae enim sunt ebrietates: inebriamur ira, tristitia, amore, concupiscentia et vana gloria, caeterisque vitiorum potionibus; et quidquid ita mentem debriat, appellatione vini potest designari. Nam, sicut videmus ebrii corpus moveri, vacillare pedes, caput et tempora praegravari, linguam ligari, ac haerentibus labiis verba praecidi: similiter est videre eos, qui mente sunt ebrii, quomodo moveantur, quomodo instabiles gressu sint, quomodo et debilitante mente et fluctuante cogitatu nihil firme teneant, sed perturba-

tionibus semper agantur incertis. Qui enim sensum deserit Deum jugiter cogitandi, cor hujus commotione, ac perturbatione, ac malitia repletur et amaritudine. Nam dura quidem ex præsentis vitæ amore tolerant homines, et tamen affectu nimis cupiditatis obligati laborem ejusmodi tolerantis voluptatem putant. Unde recte Jeremias totius in se humanæ conversationis speciem sumens, per lamentum queritur, dicens: « Inebriavit me absinthio (*Thren. III, 15*). » Ebrui enim, quod patitur, nescit. Qui vero absinthio debriatur, et hoc quod sumpsit, amarum est, et tamen non intelligit eandem, qua repletur amaritudinem.

Humanum igitur genus recto Dei judicio in voluptatibus suis sibi dimissum, atque per easdem voluptates spontaneis tribulationibus traditum absinthio est ebruium, quia et amara sunt, quæ pro hujus vitæ amore tolerat, et tamen eandem amaritudinem cæcitate cupiditatis quasi insensibilitate ebrietatis ignorat. Mundi enim gloriam sitiens, dum multas pro ea tribulationes reperit, amarum est quod bibit. Sed quia hoc nimis inhianter sumpsit, ejusdem amaritudinis malum discernere jam præ ipsa ebrietate non sufficit. Quoniam igitur non solum gentiles et hæretici, sed etiam multi, qui se fideles esse fatentur, et insuper etiam plerique religionum professores hujusmodi ebrietatibus confusi sensum rationis amiserunt, recte nunc dicitur: « Verum hi quoque præ vino nescierunt, et præ ebrietate erraverunt. » Nam vino cupiditatum ebrii regulam veritatis ignorant. Sed adhuc gravius est, quod subditur, quia sacerdos et propheta nescierunt præ ebrietate. Quis enim sacerdos hic dicitur nisi qui officium quidem sacerdotale suscepit, sed opus officii non implet? Et quis hoc loco propheta vocatur nisi quilibet prædicator, qui ventura justorum gaudia malorumque tormenta prædicat: Sed et isti præ ebrietate nescierunt, quia dum mens eorum occupatur ad temporalia, providere subjectis nescit æterna; et dum exterioribus dediti sunt, interiorum scientiam amiserunt. Vix enim sacerdos jam invenitur aut prælatus Ecclesiæ, qui Scripturas Dei meditatur, sed « absorpti sunt a vino, erraverunt in ebrietate, » quia sæcularibus curis intenti, tanto sunt ab eisdem curis absorpti, quanto a divina contemplatione foras exierunt, et animus eorum usu temporalis curæ obdruit a cœlesti desiderio, atque per actionem sæculi ipso usu obduratus ad ea vix emolliri valet, quæ pertinent ad charitatem Dei.

Et quia plerique eorum caute non cogitant, quod omnia, quæ nunc aguntur, Deus consideret, qui et de omnibus facturus est judicium, nescierunt omnia videntem Deum, ignoraverunt judicium ejus futurum.

« Omnes enim mensæ repletæ sunt vomitu, sordibusque. » Quid mensarum nomine nisi Scripturæ sanctæ signantur, quæ spiritalibus epulis nos pascunt? Unde et Psalmista: « Parasti, inquit, in conspectu meo mensam (*Psal. XXI, 5*). Quid vero per sordes nisi peccata? Unde Jeremias de negli-

A gente anima: « Sordes ejus in pedibus ejus, nec recordata est finis sui (*Thren. I, 9*). » Sordes namque in pedibus peccata sunt in operibus. Quid autem per vomitum nisi peccata per confessionem ejecta deincepsque resumpta figurantur? Nam « sicut canis, qui revertitur ad vomitum suum, sic imprudens iterat stultitiam suam (*Prov. XXVI, 11*). »

Quia igitur omnia Scripturarum præcepta sanctorum operuerunt isti vel semel actis vel iteratis culpis, omnes mensæ eorum dicuntur repletæ vomitu sordibusque, ita ut locus jam in eis non appareat, quem sordibus non inquinaverunt. Vel universa doctrina eorum, et cuncta mysteria vomitu plena sunt et sordibus, dum Scripturarum sanctorum non digerunt cibos, sed immaturos et fetentes egerunt, ita ut nullum in eis Deus reperiat locum.

Sed his ita discussis studioso lectori suggerimus, quia potest adhuc per Ephraim designari perfidus iste populus Judæorum, et per residuum populi Dei populus Christianorum; aut certe per Ephraim, qui ubertas interpretatur, multitudo carnalium, qui sunt in Ecclesia, et per residuum populi Dei sacrarum professores religionum. Sed juxta superiorem sensum videamus sequentia. Clamat enim propheta Judæis, dicens:

VERS. 9. — « Quem docebit scientiam, et quem intelligere faciet auditum? Ablactatos a lacte, avulsos ab uberibus. »

VERS. 10. — « Quia manda, remanda, manda, remanda; exspecta, reexspecta, exspecta, reexspecta: modicum ibi, modicum ibi. »

VERS. 11. — « In loquela enim labii, et lingua altera loquetur ad populum istum. »

VERS. 12. — « Cui dixit: Hæc est requies mea, reficite lassum, et hoc est refrigerium meum, et noluerunt audire. »

VERS. 13. — « Et erit eis verbum Domini: Manda, remanda, manda, exspecta, reexspecta, exspecta, reexspecta; modicum ibi, modicum ibi, ut vadant, et cadant retrorsum, et confundantur, et illaqueentur, et capiantur. »

Quem, inquit, ex Judæis docebit Dominus, ut, quod audierit, intelligat et operetur? Non docebit istos, qui lacte semper indigent, sed Christianos oblactatos, id est abstractos a lacte puerilis scientiæ, et avulsos ab uberibus infantilis doctrinæ. « Omnis enim, qui lactis est particeps, expers est sermonis justitiæ, parvulus enim est; perfectorum autem est solidus cibus eorum, qui pro ipsa consuetudine exercitatos habent sensus ad discretionem boni et mali (*Hebr. V, 13*). » Non igitur istos pueriliter docebit ultra Dominus, sed alios, qui lacte jam non egeant, et sermonem justitiæ possint suscipere. Isti enim dicere consueverunt: « Manda, remanda, » etc. Cum enim per aliquem ex prophetis increparet eos Dominus, et ad pœnitentiam hortaretur, atque captivitates et mala minaretur eis, illi cernentes, quia mox captivitas et afflictio prædicta non veniebat, non credebant prophetæ, sed irridebant eum, dicen-

tes : « Manda, remanda ; » ac si dicerent : Præcipe, A præcipe quid facere debeamus, et minare nobis mala. Non enim veniet super nos quod minaris. Econtra vates respondebat : « Exspecta, reexspecta ; modicum ibi, modicum ibi, » id est in illa comminatione, quam per os meum audisti, quia post modicum veniet tibi malum quod locutus sum.

« In loquela enim labii et lingua altera loquetur ad populum istum, » id est præsens loquetur, et aliter loquetur, quia malum, quod locutus fuerit, adducet mox super eos non dans ultra pœnitentiæ locum.

« Hæc est, inquit, requies mea, reficite lassum, » id est quietem et epulas in vobis mihi præbeatis bene vivendo, quia diu sum fatigatus iniquitates vestras tolerando. Qui enim ad pœnitentiam conversus bonis operibus, insistit, reficit Dominum dicentem : « Manducemus et epulemur, quia hic filius meus mortuus fuerat, et revixit, perierat, et inventus est (Luc. xv, 23). » Qui vero permanet in peccatis, laborare facit cum dicentem : « Præbuisit mihi laborem in iniquitatibus vestris (Isa. xliii, 24). » Sed hoc audire noluerunt Judæi, ut ei refrigerium in se ipsis darent.

« Et erit, inquit, eis verbum Domini : Manda, remanda. » Cum enim ad pœnitentiam eos, ut diximus, hortaretur aliquis propheta, et minaretur eis adversitates, illi se non corrigebant, sed insuper prophetæ verbum sumebant in derisionis canticum, dicentes : « Manda, remanda, manda, remanda ; exspecta, reexspecta, exspecta reexspecta ; modicum ibi, modicum ibi. » Ac si desiperent, dicentes : Præcipe atque præcipè quid agamus, et ut exspectemus captivitatem præstolantes, modicum jubeto frequentius. Ante enim ex hac vita migrabimus, quam hoc veniat quod prænuntias. Sic enim dicere consueverant et iniquitates augere, donec ab adversariis ducerentur captivi. Unde convenienter ait, quia « erit eis verbum Domini : Manda, remanda, etc., ut vadant, et cadant retrorsum, et confundantur, et illaqueentur, et capiantur. » Ibant enim in adinventioibus suis, ut caderent in manibus hostium, et illaquearentur ab eis, et confunderentur.

Sed hæc et ad eos, qui sunt in Ecclesia, referamus. Rejectis enim Judæis, quem docebit Christus pati pro nomine suo futuras tribulationes ? Eos utique qui ablactati sunt a lacte, id est apostolos et eorum sectatores. Exspecta, inquit, etc. Loquitur autem ad chorum apostolorum omniumque credentium, ut non ad unam, sed ad multas se paret tribulationes, ut cum tribulatus fuerit, atque pressus, speret, et super Deo spem habeat. Quod si paululum tardaverint quæ promissa sunt, non sit incredulus. Modicum enim parumque, et venient quæ promissa sunt. Sed impii noluerunt audire, apostolos, quin potius gladiis ac blasphemis sæviebant. Unde hoc, quod ad populum Dei dicebatur : Tribulationem sustine, exspecta spe, exspecta spe, adhuc modicum, adhuc modicum ; illis versum est in pœnam, ut vadant, et corruant retrorsum, et in periculum

æternis mortis incidant, et absque ullo miseriarum fine capiantur.

Notandum vero, quod cæteri codices non ablactatos habent, sed ablactatum, neque avulsos ab uberibus, sed avulsam. Sic enim dicitur : « Quem docebit scientiam, et quem intelligere faciet auditum ? Ablactatus a lacte, avulsus ab uberibus. » Unigenitus autem Dei pro nobis homo factus ubera matris sugere puer est dignatus, ut nos animarum lacte semper ut parvuli non egeremus ; et ætate proficiens avulsus est ab uberibus, ut nos ad solidum cibum æternæ vitæ proveheret. Sed vix invenitur, qui ista sic cogitans puerilem transcendat sensum, et infantiles maturo profectu deserat mores. Unde inter multitudines eorum, qui se Christianos fatentur, propheta clamat : « Quem docebit scientiam, et quem intelligere faciet auditum ? Ablactatus a lacte, avulsus ab uberibus. » Raro enim docibilem se quisquam præbet, raro quisquam, qui sapientiæ percipiat intellectum ; sed fere omnibus convenit illud Apostoli : « Non potui vobis loqui quasi spiritalibus, sed quasi carnalibus ; tanquam parvulis in Christo lac vobis potum dedi non escam : nondum enim poteratis, sed necdum quidem potestis : adhuc enim estis carnales (I Cor. iii, 1). » Unde et eorum voce, qui tales esse perseverant, subditur : « quia manda, remanda. » Nam cum obedientiam in initio pollicentur, dicunt prædicatori : Manda, id est jube quid agamus. Sed quoniam audiunt, ac deinde venit diabolus, et tollit verbum de corde eorum, redeunt ad prædicatorem, dicentes : Remanda nobis adhuc quæ prius mandasti. Quia vero et postquam verbum retinuerint, implere illud opere non festinant, exspecta, inquit, sicut et illi qui in Aggæo dicebant : « Nondum est tempus ædificandi domum Domini (Agg. i, 2). » Et adhuc de die in diem differentes ac longa vitæ spatia sibi promittentes, aiunt : Reexspecta nos adhuc, quia satis superest temporis : et modicum est ibi, id est in exspectando, quia post modicum faciemus quæ præcipis. Itemque si de tarditate corripiantur, impudenti fronte respondent, quia modicum est ibi in ulla cunctatione, sicque semper innectendo moras usque ad finem vitæ, bona, quæ didicerunt, differunt facere, et subito rapiuntur ad tribunal æterni judicis, ut secundum sua opera recipiant.

« In loquela enim labii loquetur ad populum istum. » Sed quod vates ingeminat, « quia manda, remanda, manda, remanda ; exspecta, reexspecta, exspecta, reexspecta ; modicum ibi, modicum ibi, » declarat nobis propheta, quod et ipse grandi tædio sit affectus in hujuscemodi verbis istorum, et nimis onerosa sit ei pertinacia pravitate eorum. Qui quoniam verbis Dei, quæ per prædicatores audiunt, non obtemperant, loquitur ad eos in loquela labii, et in lingua altera. Nunc enim per Scripturarum paginas et doctorum linguas loquitur : cum autem ore proprio verba protulerit, apparens in judicio, tunc in loquela proprii labii loquitur, et in altera lingua, quia qui modo per Ecclesiæ præpositos, ipse tunc

per semetipsum loquitur; et dicit eis: « Esurivi, et non dedistis mihi manducare, hospes fui, et non collegistis me (*Matth.* xxv, 42). » Idcirco enim pauper factus est, et labore fatigatus pro nobis, ut nos eum in pauperibus et lassis reficeremus, et diceret nobis: « Quandiu fecistis uni de minimis meis, mihi fecistis (*ibid.*, 40). » Hoc quippe est quod hic loquitur: « Hæc est requies mea, reficere lassum, et hoc est refrigerium meum. » Sed hoc *audire nolunt* qui semper operari bona differunt. Et idcirco « erit eis verbum Domini: Manda, remanda, » ut semper obedientiam promittentes et nunquam obedientes, sed in longum agere sancta protelantes, *vadant* post concupiscentias suas, et in fine *cadant retrorsum*, id est in ignota præcipitentur supplicia, et tunc sero *confundantur* de malis suis, cum nihil eis jam profuerit, et in hora mortis *illaqueantur* a malignis spiritibus, ac deinde *capiantur* ab eis, ad tormenta ducendi.

In eo autem quod ait: *Et cadant retrorsum*, notandum est, quia boni semper in Scripturis sanctis dicuntur *in faciem suam* cadere, mali autem *retrorsum*. Et cur hoc nisi quia, qui in faciem cadit, ibi cadit ubi videt; qui vero retrorsum cadit, non videt quo cadit? Et electi hic sponte se humiliantes vident in quibus dejiciantur; reprobi autem, cum in morte volentes humiliantur, nesciunt ubi corruant. Ad ignota enim rapiuntur supplicia. Jam vero videamus sequentia. Ait enim propheta principibus synagogæ dicentibus: « Manda, remanda, exspecta, reexpecta. »

VERS. 14. — « Propter hoc audite verbum Domini, viri illusores, qui dominamini super populum meum, qui est in Jerusalem. »

Illusores enim erant qui prophetis illudabant, dicentes: *Manda, remanda*. Et adhuc causa eorum subditur gravior, cum dicitur:

VERS. 15. — « Dixistis enim: Percussimus fœdus cum morte, et cum inferno fecimus pactum. Flagellum inundans, cum transierit, non veniet super nos, quia posuimus mendacium spem nostram, et mendacio protecti sumus. »

Cogitabant enim, dicentes: Incassum laboravimus observantes legem Domini, quia descensuri sumus ad infernum sicut et cæteræ gentes. Levius enim et tolerabilius erit illis quam nobis, quia illæ quotidie placant hostiis et muneribus principes inferni. Melius ergo nobis est, ut ritum gentium imitantes, statuamus pactum cum diabolo et pœnarum principibus, et offeramus eis sacrificia. Sicque cogitantes aut etiam loquentes, immolabant dæmoniis. Hoc est itaque, quod dicunt: « Percussimus fœdus cum morte, et cum inferno fecimus pactum. »

Et de præsentī vita subjiciunt, quia *flagellum inundans*, id est quælibet vagabunda tribulatio, veniens, « cum transierit, non veniet super nos, quia posuimus, inquit, mendacium spem nostram. »

(129) Locus corruptus in utroque cod.

A Sperat autem in mendacio contra flagellum veniens, qui se mendaciis excusare parat, et culpam suam defendere, ne flagellum correptionis sentiat, sicut et nunc plerique faciunt; et illi tunc faciebant, qui et *mendacio* protegebantur, quia sub obtentu religionis prædicabant avaritiam suam. Præceperat enim Deus, ut filii parentes suos honorarent subsidia victus illis ministrando; isti vero dicebant, melius esse, ut filii parentibus offerrent (129) quam in templo Domini, et illi sumebant oblationes populi. Unde et ab ipso Salvatore sic increpati sunt: « Quare vos transgredimini mandatum Dei propter traditionem vestram? Nam Deus dixit: Honora patrem tuum et matrem tuam. Vos autem dicitis: Quicumque dixerit patri vel matri suæ, munus quodcumque ex me tibi est, proderit, et non honorificaverit patrem suum et matrem suam, et irritum fecistis mandatum Dei propter traditionem vestram (*Matth.* xv, 3-6). » Sic ergo mendacio se protegebant. Sequitur:

VERS. 16. — Idcirco hæc dicit Dominus Deus: Ecce ego mittam in fundamentis Sion lapidem probatum, angularem, pretiosum, in fundamento fundatum: qui crediderit, non festinet. »

VERS. 17. — « Et ponet (130) iudicium in pondere, et justitiam in mensura: et subvertet grando spem mendacii, et protectionem aquæ inundabunt. »

VERS. 18. — « Et delebitur fœdus vestrum cum morte, et pactum vestrum cum inferno non stabit. Flagellum inundans, cum transierit, eritis ei in conculcationem. »

« Quandocumque pertransierit, tollet vos, quoniam male diluculo pertransibit in die et in nocte, et tantummodo sola vexatio intellectum dabit auditui. »

Quia dixistis, inquit, « Manda, remanda, » quia dixistis: « Percussimus fœdus cum morte, » quia dixistis: « Flagellum inundans non veniet super nos; idcirco dicit Dominus: Ecce ponam in fundamentis Sion lapidem probatum, » etc. Nova enim Ecclesiæ fundatio jacienda est, quia vetus ædificium Synagogæ dirutum est. Hoc loco congruunt et Psalmistæ verba dicentis: « Tempus faciendi, Domine, dissipaverunt legem tuam (*Psal.* cxviii, 126). » Tunc enim Dominus corporaliter inter homines conversans fecit, id est implevit legem, cum eam Judæi prævaricationibus suis et traditionibus vel interpretationibus falsis dissipassent.

Quia ergo synagogæ populus *Manda, remanda* dicens fecit cum inferno pactum, et ejusdem populi principes, idcirco Deus Pater aliud firmius construit ædificium, « Mittit lapidem in fundamentis Sion. » Fundamenta autem Sion, id est Ecclesiæ, sunt apostoli et prophetæ, sicut scriptum est: « Fundamenta ejus in montibus sanctis (*Psal.* lxxxvi, 1). » Et item: « Sed estis cives sancti, et domestici Dei superædificati super fundamentum apostolorum et propheta-

(130) Alias, et ponam.

rum ipso summo angulari lapide Christo Jesu, in quo omnis ædificatio constructa crescit in templum sanctum in Domino (*Ephes. II, 19*). » In his ergo fundamentis per Incarnationis mysterium lapis Christus mittitur, ut omnis sacri ædificii structura superædificetur, qui tentationibus est probatus. Unde et ait : « Domine, probasti me, et cognovisti me (*Psal. CXXXVIII, 1*). »

Angularis vero dicitur, quia duos in se parietes conjungit, id est circumcisionem et præputium vel angelos et homines, sive contemplativam et activam vitam. Pretiosus autem vocatur, quia tanta sanctitas et justitia est in eo, ut in ejus comparatione nullus hominum quidquam sanctitatis et justitiæ cognoscatur habere. Unde et pretiosum sanguinem suum dedit redemptionem pro mundo. Qui et in sacri ædificii fundamento fundatus est, quia solus totum ædificium sustinet. Nam sicut ordines lapidum in pariete alii portantur ab aliis, ita portantur fideles quique a præcedentibus in Ecclesia justis. Portant et ipsi sequentes per doctrinam et tolerantiam usque ad ultimum justum, qui, cum a prioribus portetur, quem portare ipse debeat, sequentem non habebit. Qui autem omne ædificium portat, et ipse a nemine portatur, Dominus est Jesus Christus. Et ideo sicut præmissus dicitur in fundamento fundatus.

« Et quicumque crediderit in eum, non festinet, » sed patienter exspectet promissiones ejus. Nam « hæreditas, ad quam festinatur in principio, benedictione carebit in novissimo (*Prov. XX, 20*). » Qui in eum crediderit, non festinet, ut in primo ejus adventu querat, quod in secundo redditurus est. Vel non festinet, ne videlicet tardus ei videatur Christi adventus. « Si enim tardaverit » juxta Habacuc, nemo desperet, « quia veniens veniet (*Habac. II, 3*), » et promissa sua complebit.

Et ponam, inquit, per eum judicium in pondere, ut æqua lance pensans omnia judicet, et justitiam in mensura, ut unusquisque juxta modum actionis suæ recipiat. « Eadem quippe mensura, qua mensi fueritis, remetietur vobis (*Matt. VII, 2*). » Nunc etiam fit in æquitatis pondere judicium ejus, etiam cum secundum proprias actiones hominibus reddere non videtur. Nam et quod a nobis non intelligitur, ex occulti judicii non injusta lance profertur; et si minus recta videntur esse, quæ patimur, recto tamen et occulto examine decernuntur. Illi autem non judicabant in pondere justo, qui diabolum Domino comparantes sive præferentes legem ejus abjiciebant, et cum inferno pactum statuebant, atque mendacio se protegebant contra veritatem, quibus consequenter ait :

Quia subvertet grando, id est multiplex coelestium judiciorum percussio; spem mendacii et aquæ, id est tribulationum impetus; inundabunt, id est submergent, atque delcubunt protectionem mendacii quæ vos tuebatur. « Et delebitur fœdus vestrum cum

morte, » quia mors æterna gravius vos torquet quam cæteras gentes, qui putabatis levius idcirco fore vobis, quia dæmonibus immolabatis. *Flagellum inundans, cum* vel per Romanos vel per aliam occasionem in vestris regionibus transierit conculcabit vos et conteret.

« Quoniam mane diluculo pertransibit. » Diluculum quasi dubia lux dicitur. Vocatur enim diluculum, cum jam nocturna tempora in claritatem lucis mutantur. Mane vero, postquam ortus est sol, vocatur. Cum ergo dicitur mane diluculo, tale est ac si dicatur : Primo mane, vel veniens mane. Et quid per summum mane nisi præveniens velocitas exprimitur? Dies vero prosperitatem, et nox adversitatem designare solet. Vel per noctem et diem assiduitas intelligi potest. *Flagellum ergo inundans* (131), id est late diffusum, mane diluculo, id est summa velocitate pertransibit in die et in nocte, id est in prosperis et adversis, vel assidue.

Potest per hoc flagellum intelligi afflictio, quæ super unumquemque peccatorem in hora mortis irruit, quæ mane diluculo pertransibit, id est incipiente finire nocte, id est in omni tempore, vel tam ad eos, qui in prosperitate, quam ad illos qui in adversitate sunt. Et tunc tantummodo sola vexatio gehennalium tormentorum dabit intellectum auditui vestro, id est faciet vos intelligere quod audistis, nec intelligere voluistis, scilicet bonum quod agere debueratis, dum diceretis : « Manda, remanda. » Iniquorum enim oculos nunc culpa claudit, sed ad extremum pœna aperit; nesciunt enim mala quæ fecerunt, nisi cum pro eisdem malis puniri jam cœperint. Bene ergo dicitur : « Et tantummodo sola vexatio intellectum dabit auditui, » quia tunc intelligunt, quod audierunt, cum se jam pro contemptu vexari doluerint.

Sed ista, quæ de principibus synagogæ interpretati sumus, et de pessimis Ecclesiæ præpositis, aut etiam hæreticis intelligi forsitan possunt. Ait enim : « Audite verbum Domini viri illusores, qui dominamini super populum meum, qui est in Jerusalem. » Illusores quippe sunt nonnulli Ecclesiæ prælati, qui bonum, quod aliis annuntiant, ipsi plerumque derident. « Qui dominantur super populum Jerusalem, » id est Ecclesiæ; quia, velut in quodam sibi videntur summitatis culmine residere, eosque, quibus præsumunt loqui, sed vix dominando dignantur. Non enim prodesse eis quærunt, sed dominari, quia non Christi, sed suam sectantur gloriam. Et quodammodo dicunt : « Percussimus fœdus cum morte, et cum inferno fecimus pactum, » dum se sic egisse testantur, ut a morte secunda nunquam se lædendos esse confidant, vel ab inferno puniendos. Et flagellum inundans, non venturum super se pronuntiant, quia præsentis vitæ prosperitatem sibi conquieserunt, ac vehementer confirmaverunt. « Et men-

(131) Cod. Cruc., Fl. vero inun.

dacium spem suam posuerunt, atque mendacio protecti sunt, quia semper suas negare et occultare culpas, et bona de se loqui consueverunt.

Sed ut talium hypocrisis dissipetur, lapis-Christus in fundamentis Sion, id est in radice cordis credentium mittitur, ut Christi doctrina firmiter teneatur, et horum pravitas respuatur. Licet enim jam dudum lapis iste positus sit in fundamentis Sion, quotidie tamen in eorum fundamento ponitur, qui convertuntur. « In quem, qui crediderit non festinet » in presenti beati cum istis. « Et subvertet grando » celestium judiciorum « spem mendacii » istorum, quia quod semper mendacio tegere sperant, detegetur in examine superni Judicis. « Et protectionem aquæ inandabunt, » quia mandatum, quo suas nunc iniquitates excusando protegent, inundatio novissimarum tribulationum dissipabit. « Et delebitur fœdus eorum, quod cum morte pepigerant, » quia mors eis pacata jam non erit, sed aternaliter eis adversabitur.

Et flagellum inundans, cum transierit, conculcabit eos, quia et in presenti affligentur adversis, qui se semper tutos ab adversitate putabant. Conculcabit enim eos flagellum, quia tribulatione superabuntur. Sed et post hoc, quod ait mittendum in fundamentis Sion lapidem, ut non staret pactum, quod isti cum inferno fecerant, qui plebis Dei principes erant, congrue subditur :

VERS. 20. — « Coangustatum est enim stratum, ita ut alter decadat, et pallium breve utrumque operire non potest. »

Hoc tale est ac si maritus uxori dicat adulterium juxta se volenti suscipere : O conjux, stratum istud angustum est, non potest me simul, et corruptorem tuum capere, et hoc pallium breve est, nec valet me, et adulterum operire. Qui enim Deo servire se dicebant, et cum inferno, id est cum inferni principibus pactum faciebant, adulterum juxta sponsum in cubili cordis sui admittere volebant. Sed coangustatum est stratum humani cordis, ita ut alter decadat, aut vir legitimus, aut adulter, id est aut Christus, aut diabolus, quia « Nemo potest duobus dominis servire (Matth. vi, 24). » Et pallium nostræ operationis non potest utrumque operire quia sub actione unius hominis Satanas cum Christo non potest quiescere. Unde et adjungitur :

VERS. 21. — « Sicut enim in monte divisionum stabit Dominus, et sicut in valle, quæ est in valle Gabaon, irascetur. »

Sicut in monte divisionum stetit Dominus inter David et Saul persecutorem ejus, sic stabit inter Christianum et Judaicum populum separans eos. Incedebat enim David cum suis fugiens ex hac parte montis, et Saul cum suis persequens ex alia. Cumque viri in modum coronæ cingerent David, ut comprehenderent eum, nuntius venit ad Saul, quia Philisthiim infuderant se super terram, sicque recessit a David, et ideoque vocaverunt locum illum « Petram dividentem (I Reg. xxiii, 28). » Quid ergo

A per montem nisi testamentum Dei signatur? Unde scriptum est : « Dominus a Libano veniet, et sanctus de monte umbroso, et condenso (Habac. iii, 3). » Inde enim venire dicitur, unde promissus fuerat, id est a testamento suo opacitate mysteriorum umbroso et condenso. Quid vero per David nisi Christus, et quid per Saul nisi Judæorum populus exprimitur, et quid per Philisthæos nisi Romanorum exercitus? Ibat autem David cum suis ex una parte montis, et Saul ex altera cum suis Domino separante, quia in lege Dei Christus incedit cum suis in novitate spiritus, populus vero Judaicus in vetustate litteræ. Saul non destitit persequi David, donec se Philisthiim super terram cõfunderent, quia Judæorum populus Christum et fideles ejus usque ad adventum Romanorum persecutus est. Ait itaque propheta, quia sicut in monte divisionum stabit, id est excrecente gratia religionis sub Novo Testamento dividet inter eos, qui vetustatem litteræ sectantes Deo pariter atque diabolo servire volunt, et eos qui in novitate spiritus soli Deo serviunt.

Vel ille mons divisionum intelligi potest, in quem, cum David consulto Domino ac jubente ad Philisthæos, qui contra se venerant, ascendisset, percussit eos ibi, et ait : « Divisit Dominus inimicos meos per manum meam, sicut dividuntur aquæ. Et ideoque vocatum est nomen loci illius Baalpharasim, id est habens divisiones, ibique dereliquerunt deos suos (II Reg. v, 20). » Sicut ergo Deus adversarios David per manum ejus percutiens divisit, ut diffugerent, et idola sua post tergum relinquerent, ita et nunc adversarios Christi per manum ejus gladio prædicatorum illius spiritaliter percussit ac dividit, ut alii prædicationem fugientes in malitia magis obdurent, alii relinquunt deos suos, id est vitia, quibus servierant, et ad Christum convertantur.

Sic itaque stabit Dominus inter nos velut in monte divisionum dividens ac dijudicans latenter actiones nostras, ut aut ex parte Christi quisque sit, aut ex parte adversarii. « Nunc enim judicium est mundi, nunc princeps hujus mundi ejicietur foras (Joan. xii, 33). » Sed et irascetur Dominus inimicis Ecclesiæ, sicut in valle Gabaon iratus est contra Chananæos pugnante Josue. De quibus scriptum est : « Quoniam irruit Josue super eos repente, et conturbavit eos Dominus a facie Israel, contrivitque eos plaga magna in Gabaon (Josue. x, 9). » Gabaon autem interpretatur collis mæroris. Et quid per collem mæroris nisi præsens Ecclesia figuratur, quæ in latere summi montis, id est Christi consistens mærore nunc afficitur et tristitia? Quid autem per Chananæos nisi infideles? Quid per Israelitas nisi fideles exprimentur? Irruente ergo Josue conturbavit Dominus Chananæos a facie Israel, quoniam gratia Christi coram prædicatoribus mentes infidelium conturbat ad pœnitentiam. Et conteret eos plaga magna in Gabaon, quia cor contritum et humiliatum dat eis in Ecclesia, omnemque pristinam pravitatem eorum ad nihilum redigit. Bene ergo

dicitur est, quia « sicut in valle, quæ est in Gabaon, A Dominus irascetur. » De quo et apte subditur :

« Ut faciat opus suum, alienum opus ejus, ut operetur opus suum, peregrinum est opus ejus ab eo. » Opus enim Dei est animas, quas creavit, colligere, et ad æterna lucis gaudia revocare. Flagellari autem atque conspui, crucifigi, mori ac sepeliri non hoc in sua substantia opus Dei est, sed opus hominis peccatoris, qui hoc meruit per peccatum. Sed peccata nostra ipse pertulit in corpore suo super lignum; et qui in natura sua semper manet incomprehensibilis, in natura nostra comprehendi dignatus est, ac flagellari, quia nisi ea, quæ erant infirmitatis nostræ, susciperet, nunquam nos ad fortitudinis suæ potentiam levaret. « Ut ergo faciat opus suum alienum opus ejus; » et, « ut operetur opus suum, peregrinum est opus ejus ab eo, » quia incarnatus Deus, ut nos ad sua colligeret, dignatus est pro nobis tanquam peccator homo vapulare. Et alienum opus fecit, ut faceret proprium, quia per hoc, quod infirmus mala nostra sustinuit, nos qui creatura illius sumus, ad fortitudinis suæ gloriam perduxit. Quem quia Pharisei in passione sua derisuri erant, diligenter eos præmonere curavit propheta subjungens :

VERS. 22. — « Et nunc nolite illudere, ne forte constringantur vincula vestra. »

Illuserunt enim dicentes : « Alios salvos fecit, se ipsum non potest salvum facere (Matth. xxvii, 43). » Et ideo vincula peccatorum eorum, quæ per ejus mortem solverentur, si ipsi crederent, ita sunt constricta, ut in æternum laxari nequeant. Sequitur :

« Consummationem enim et abbreviationem audivi a Domino Deo exercituum super universam terram. » Consummationem scilicet justitiæ, et abbreviationem præcepti. « Finis enim præcepti est charitas de corde puro, et conscientia bona et fide non ficta (I Tim. 5). » Consummationem igitur et abbreviationem fecit Dominus super universam terram, quia omnibus, qui in mundo sunt, hominibus, dedit unum præceptum, in quo omnis consummatio justitiæ continetur. « Plenitudo ergo legis est dilectio (Rom. xiii, 10). » Deinde alium orsurus sermone præmittit, dicens :

VERS. 23. — « Auribus percipite et audite vocem D meam, attendite et audite (152). »

Auribus percipite corporis, et auribus cordis audite vocem meam, attendite diligenter et intelligite eloquium meum. Hæc præmittens intentos quærit auditores, et quæ dicturus est, ostendit esse mystica. Nam subjungit :

VERS. 24. — « Nunquid tota die arabit arans, ut serat, proscindet, et sarriet humum suam ? »

VERS. 25. — « Nonne cum adæquaverit faciem ejus, seret gith, et cyminum sparget, et ponet triticum per ordinem, et hordeum, et millium et viciam in sinibus suis ? »

VERS. 26. — « Et erudiet illum in iudicio, Deus suus docebit illum. »

VERS. 27. — « Non enim in serris triturabitur gith, nec rota plaustrum super cyminum circuiet, sed in virga excutietur gith et cyminum in baculo. »

VERS. 28. — « Panis autem comminuetur. Verum non in perpetuum triturans triturabit illum, neque vexabit eum rota plaustrum, nec in unguis suis comminuet eum. »

VERS. 29. — « Et hoc a Domino Deo exercituum exivit, ut mirabile faceret consilium, et magnificaret justitiam. »

Semper a notis ad ignota congrue dicuntur similitudines, sicut et nunc de his, quæ videmus, parabolam dedit, ut nos de invisibilibus instrueret. Quis enim mystice sit arans iste docet Dominus, dicens : « Pater meus agricola est (Joan. xv, 1). » Ager autem est mundus, id est omne genus humanum. Quem videlicet agrum excolens, non tota die, id est toto vitæ singulorum tempore arat eum sine satione, sed primo rudem mentis campum proscindit vomere novæ prædicationis aut scientiæ, rursumque sarriet eum, herbas vitiorum noxias evellendo vel rescando.

Vel non tota die præsentis vitæ singulorum proscindit eum doctrina inchoationis, et sarriet sarculo correptionis, ut nihil seminis mystice spargat. Nam cum adæquaverit faciem ejus, id est aptam reddiderit mentem ad suscipiendum semen doctrinæ, seret gith, et cyminum sparget, et cætera. Gith simile est cymino, et parumper candidiora et grossiora habet grana, et melius saporata; cyminum autem reor esse euminum. Et quid per gith et cyminum designatur nisi gentes intellectum et legem naturalem a Domino percipientes? « Erat enim lux vera, qua illuminat omnem hominem venientem in hunc mundum (Joan. i, 9). » Nec mirum si proscindere et sarrire dicatur humum agricola, ut gith et cyminum serat, quia neque scientiam naturalis legis suscipere quis valet, nisi prius exerceatur mens ejus meditationibus, atque purgetur. Et cum per gith et cyminum accipiamus gentes, non est absurdum, quod agricola serere dicitur gith et cyminum, qui doctrinam potius serit juxta illud de Evangelio : « Semen est verbum Domini : quod autem in spinis cecidit, hi sunt qui audierunt, et a sollicitudinibus, et divitiis, et voluptatibus vitæ euntes suffocantur, et non referunt fructum (Luc. viii, 4). » Semen quippe dicit esse verbum Dei, et semen, quod cecidit in spinis, illos esse qui verbum audierunt, et a sollicitudinibus, et divitiis, et voluptatibus suffocantur. Eodem nunc locutionis genere dicitur agricola noster serere gith et cyminum, atque per ordinem triticum et hordeum ponere, et millium, et viciam spargere.

Quid autem per triticum et hordeum nisi pastores Ecclesiæ signantur dulces et asperi, dulces per mansuetudinem, asperi per severitatem? Et quid

(152) Alias, audite eloquium meum.

per millium et viciam nisi duo genera subjectorum exprimuntur? Alii enim sunt iustitia candidi ut millium; alii peccato nigri sicut vicia. Et gith quidem atque cyminum indiscrete spargitur, et seritur, quia gentium conversatio sparsa est, et inordinata, triticum vero et hordeum per ordinem ponitur, ut vita præpositorum Ecclesiæ regularis et ordinata signetur. Millium autem et vicia ponuntur in finibus agri, ut subjectorum ostendatur humilitas, qui se computant in novissimis Ecclesiæ membris.

Et erudiet, inquit, illum videlicet agricolam Deus iudicio, id est docebit illum, ut agat tempore messis, sicut acturus est Dominus in iudicio.

« Non enim in serris triturabitur gith, » etc. Serra lignum est multos habens dentes, quod boves trahunt. Tangitur enim iuxta litteram hic consuetudo quarumdam regionum, in quibus agricolæ profeni penuria, sicut et supra dictum est, congregatis in unum segetibus plaustra serratas habentia rotas desuper circumducunt, ut grana purgentur, et in paleas stramina redigantur, ut animalibus pabulum fiant. Sed gith et cyminum in serris et plaustris ut cæteræ fruges non triturantur sed in virga excutitur gith et cyminum in baculo; sic et in iudicio gentes non examinabuntur, sed absque retractatione punientur. « Quicumque enim sine lege peccaverunt, sine lege peribunt (Rom. II, 12). »

Quid autem per virgam vel baculum nisi Satanas figuratur, de quo scriptum est : « Væ Assur furoris mei virga et baculus! (supra x, 5.) Excutitur ergo gith in virga, et cyminum in baculo, quia diabolus gentilium animas a corporibus cum tormentis excutit.

Quid vero per plaustrum nisi Dominus ipse designatur, qui per Amos dicit : « Ecce ego stridebo subter vos sicut stridet plaustrum onustum feno? (Amos II, 13.) Et quid per rotas plaustris nisi voluntas verborum iudicis? Dicit enim reprobis : « Descendite a me, maledicti, in ignem æternum, qui præparatus est diabolo et angelis ejus. Esurivi enim, et non dedistis mihi manducare; sitiivi, et non dedistis mihi bibere; hospes fui, et non collegistis me; nudus, et non operuistis me; infirmus et in carcere fui, et non visitastis me (Matth. xxv, 41). » Hic ergo sermonum circuitus per rotas intel-

ligitur. Quid autem per serras nisi asperæ iudicis sententiæ, quæ velut paleas reprobos conterunt, et electos ut grana separant? Sed « nunquam in serris triturabitur gith, neque rota plaustris super cyminum circumiet, » quia infidoles neque saltem verba iudicis audire digni erunt, ut examinentur, atque damnentur, sed sine discussione peribunt.

Panis autem, id est triticum et hordeum, unde fit panis, comminuetur in serris et in rota plaustris, quia prælati Ecclesiæ discutientur in iudicio. De millio autem et vicia non dicit, an trituretur, quia subjecti quotidie de suis actibus infirmis per prælatos iudicantur, et si præsens iudicium patienter

susceperint, ac de cætero mores suos emendaverint, non ultra iudicabuntur : alioquin et ipsi iudicabuntur. « Panis autem comminuetur, » quia per seipsum Dominus facta præpositorum examinabit.

« Verum non in perpetuum triturans triturabit illum, » quia post hanc vitam nonnullos, ut a quibusdam peccatis levioribus purgentur, affligit, quos non in perpetuum puniet. Unde dicit Apostolus : « Si cuius opus arserit, detrimentum patietur, ipse autem salvus erit, sic tamen quasi per ignem (I Cor. III, 14). » Plerique enim post mortem sustinent purgatorium ignem, qui tandem perveniunt ad requiem. Sed et in igne, qui in adventu iudicis diffundetur, aliquos electorum a quibusdam levioribus admittis purgari beatus Augustinus in libro De civitate Dei vicesimo ex prophetarum dictis intelligit. Cui et Beda consentit in libro De tempore.

Non igitur in perpetuum triturans triturabit illum, id est conculcabit, et conteret, neque vexabit illum in perpetuum rota plaustris, id est exprobrantia verba iudicis; nec in unguibus suis, id est in novissimis sectionibus in perpetuum comminuet eum. Ungula enim acuta est, et ipsa est finis digiti.

Rursus ne parvipenderemus ista, subjungit in hanc locutionis, quia hoc, quod nunc de seminibus, et trituratione dictum est, « exivit a Domino Deo exercituum, ut mirabile faceret consilium, et magnificaret iustitiam. » Mirabile enim facit consilium in hac diversitate seminum, et magnificat iustitiam in excussione et trituratione eorum sapienter et juste faciens omnia super humani generis dispositione. Sequitur :

CAPUT XXIX.

Vers. 1. — « Væ Ariel, Ariel civitas, quam expugnavit David : additus annus ad annum, solemnitates evolutæ sunt. »

Hæc de destructione Jerusalem, quæ per Romanos contigit, et captivitate Judæorum historialiter accipimus. Ariel quippe leo Dei dicitur, et Jerusalem leo Dei vocata est propter fortitudinem, quam Domino protegente quondam habuit. Quam expugnavit David expellens inde rebellium Jebusæorum reliquias. Sed nunc habet Væ! quia miserabiliter est subversa. Et idcirco dolentis affectu ingeminat : Væ Ariel, Ariel! quia, quæ erat insuperabilis, sic destructa est, ut non relinqueretur in ea lapis super lapidem, et templo cremato captivatisque Judæis additus est annus captivitatis ad annum, et annus ad annum, quia omni tempore usque ad adventum Eliæ captivas hæc perseverat. Et solemnitates Paschæ et Pentecostes atque Tabernaculorum, aliæque festivitates evolutæ sunt, quia non fiunt, sed in nihilum versæ sunt. Sed quod velut præteritum narravit, qui futurum adhuc erat, quibus hoc modis esset complendum, evidenter aperuit, dicens :

VERS. 2. — « Et circumvallabo Ariel, et erit tristis A et mœrens, et erit mihi quasi Ariel. »

Circumvallabo Ariel obsidione Romanorum. *Et erit tristis, et mœrens*, quando fame cruciabitur et nullus poterit ingredi vel egredi. *Et erit mihi quasi Ariel*, quia solum nomen pristinum habebit, amissa dignitate, potentiaque et religione. Sed quod dixerat: *Circumvallabo Ariel*, diligenter exposuit, adjiciens:

VERS. 3. — « Et circumdabo quasi sphæram in circuitu tuo, et jaciam contra te aggerem, et munimenta ponam in obsidionem tuam, et humiliaberis. » Sic enim per Romanos factum est. Sequitur:

VERS. 4. — « De terra loqueris, et de humo audietur eloquium tuum: et erit quasi pythonis de terra vox tua, et de humo eloquium tuum mussitabit. »

De terra loqueris, qui de cœlestibus loqui consueveras. *Et de humo audietur eloquium tuum*, qui posueras in cœlum os tuum. *Et erit quasi pythonis de terra vox tua*, quia in antris et subterraneis abscondent se plerique habitatores tui vel a facie prædonum, dum obsessa, vel a facie Romanorum, quando fueris capta. Sed quia et ipsi Romani velociter perituri erant, et in nihilum redigendi, quoniam Christum non cognoverunt, sub junctum est.

VERS. 5. — « Et erit sicut pulvis tenuis multitudo ventilantium te, et sicut favilla pertransiens multitudo eorum, qui contra te prævaluerunt. »

Disperierunt enim *sicut pulvis*, quem turbo dispergit. Rursumque de eorum adventu potest accipi, quod subditur:

VERS. 6. — « Eritque repente confestim. A Domino exercituum visitabitur in tonitruo, et commotione terræ, et voce magna turbinis et tempestatibus, et flammæ iguis devorantis. »

Hæc enim omnia facta sunt in illa tribulatione. Sed quia Romani vitam, quæ Christus est, non habuerunt, quam sint inanes, ostendit propheta, subjungens:

VERS. 7. — « Et erit sicut somnium visionis nocturnæ multitudo omnium gentium, quæ dimicaverunt contra Ariel: et omnes, qui militaverunt, et obsederunt, et prævaluerunt adversus eam. »

VERS. 8. — « Et sicut somniat esuriens, et comedit, cum autem fuerit expergefactus, vacua est anima ejus; et sicut somniat sitiens, et bibit, et postquam fuerit expergefactus, lassus adhuc sitit, et anima ejus vacua est; sic erit multitudo omnium gentium, quæ dimicaverunt contra montem Sion. »

Hæc enim illis exercitiis conveniunt, qui contra Jerusalem tunc fuerunt. Sed superiora repetentes videamus an possint universa hæc et aliter intelligi.

« Væ, inquit, Ariel, Ariel! etc. » Quid per *Ariel* nisi Ecclesia designatur? *Quam expugnavit David*, qui interpretatur *desiderabilis* vel *manu fortis*, quia Christus ex ea gentem vitiorum expulit. Sed hæc habere *væ* dicitur, quia temporales sustinet tribulationes. *Væ!* enim non semper æternam significat amaritudinem, sed nonnunquam afflictionem transitoriam. Unde et in Apocalypsi Joannis dicitur: « *Væ unum abiit!* (Apoc. ix, 12.) » Itemque « *Væ secundum abiit!* (Apoc. xi, 15.) » Quod ergo ait: « *Væ Ariel!* » de tribulationibus et tentationibus Ecclesiæ intelligatur

« Additus est, inquit, annus ad annum, solemitates evolutæ sunt, » id est transierunt, quia tempore persecutionis per multos annos non audebant Christiani festivitates agere publice.

Et circumvallabo, subaudi tentationibus et adversis. *Ariel*, id est Ecclesiam, vel quemlibet fidelem et robustum. *Et erit tristis et mœrens*, quia timebit se Deum offendisse, et idcirco talia pati, ac propterea contristabitur ad pœnitentiam. *Et tunc erit mihi quasi Ariel*, id est in conspectu meo fortis, licet in oculis hominum appareat debilis. Deinde eadem inculcando repetit, quia non semel talia patitur Ecclesia.

« Circumdabo, inquit, quasi sphæram in circuitu tuo. » Ac si dicat: Tentationibus te cingam, ut ab omni parte sentias adversa. *Et jactiam contra te aggerem*, id est molem tentationum: *et munimenta ponam in obsidionem tuam*, id est undique machinis inimicorum invisibilium vel visibilium arctabo te: *Et humiliaberis*, id est adversis deprimeris, vel agendo pœnitentiam humiliaberis.

« De terra loqueris, et de humo audietur eloquium tuum, » quia dices: « Quoniam humiliata est in pulvere anima nostra, conglutinatus est in terra venter noster (Psal. xliii, 25). » Et: « Adhæsit pavimento anima mea; vivifica me secundum verbum tuum (Psal. cxviii, 25). » « Et erit quasi pythonis de terra vox tua, » quia loqueris de barathro perditionis exempta. Per artem quippe pythonicam evocantur ab inferis animæ. Cujus ergo vox quasi pythonis est de terra? Qui de profundo iniquitatis liberatus de inferno se dicit abstractum cum Psalmista canens: « Quia misericordia tua magna est super me, et cruxisti animam meam ex inferno inferiori (Psal. lxxv, 13). »

« Et de humo, inquit, eloquium tuum mussitabit, » sicut et Jeremias de religioso viro dicit: « Ponet in pulvere os suum, si forte sit spes (Thren. viii, 29). » Os enim in pulvere ponit, qui se pulverem esse humiliter fatetur. Sed quid de ipsis persecutoribus Ecclesiæ, quæ sic angustiat in præsentibus et humiliatur, faciendum in tempore judicii sit, additur:

« Et erit sicut pulvis tenuis multitudo ventilantium te, » id est tribulantium te, id est aridi et mæ-

nes, et vagi et leves erunt, ut scriptum est : « Non sic impij, non sic, sed tanquam pulvis, quem projicit ventus a facie terræ (Psal. 1, 5). » — « Et sicut favilla pertransiens multitudinem eorum, qui contra te prævaluerunt, » quia ut Job sanctus ait : « Erunt sicut paleæ ante faciem venti, et sicut favilla, quam turbo dispergit (Job xxi, 18). »

« Eritque repente confestim. A Domino visitabitur, » quia juxta est, et velox nimis, et sic improvisus, ut nesciatur, quando veniat, sero, an media nocte, an galli cantu, an mane. *Confestim* igitur, id est valde velociter a Domino Deo exercituum visitabitur actio singulorum. « In tonitruo et commotione terræ, et voce magna turbinis et tempestatibus, et flammæ ignis devorantis, » quia tunc elementa omnia concutientur, et conturbabuntur, et Dominus in igne veniet, atque omnes, qui in monumentis sunt, audient vocem ejus, et procedent.

« Et erit sicut somnium visionis nocturnæ multitudo omnium gentium, quæ dimicaverunt contra Ariel, et omnes, qui militaverunt, et obsederunt, et prævaluerunt adversus eam, » quia sicut phantasma pertransibit virtus et gloria persecutorum Ecclesiæ. Omnis enim potentia sæculi somnium est, non veritas.

« Et sicut somniat esuriens, et comedit, cum autem fuerit expergefactus, vacua est anima ejus : et sicut somniat sitiens et bibit, et postquam fuerit expergefactus, lassus adhuc sitit, et anima ejus vacua est; sic erit multitudo omnium gentium, quæ dimicaverunt contra montem Sion. » Id est, quæ gladiis vel linguis vel pravis moribus pugnaverunt adversus Ecclesiæ religionem. Qui enim in hoc sæculo delectantur rebus secundis, ita sunt, sicut qui in somnis manducat, et bibit. Videtur sibi cito aut potu, dum dormit, repleti, sed cum evigilaverit, plus incipit esurire; et tunc intelligit, quam inanis ille cibus et potus fuerit somniantis. Sic qui in hoc dormit sæculo, et non aperit oculos ad mysteria divina, quam diu somno gravatur torporis, putat alicujus momenti esse hanc sæcularem potentiam quasi in somnis eam videns. Ubi evigilaverit, deprehendit, quam inanis hujus sæculi voluptas sit. Hinc est, quod de electis laborantibus hic et afflictis econtra dicit Apostolus : « Quasi tristes, semper autem gaudentes (II Cor. vi, 10). » Tristitia enim justorum quasi habet; sed gaudium eorum quasi non habet, quia spes certa est. Quare tristitia justorum quasi habet? Quia sicut in somnio transit. Si quis somnium judicat, addit quasi, quasi sedulam, quasi loquebar, quasi prandebam, quasi equitabam, quasi disputabam, totum quasi, quia, cum evigilaverit, non invenit quod videbat. Quasi thesaurum inveneram, dicit mendicus. Si quasi non esset, mendicus non esset. Sed quia quasi erat, mendicus est.

Itaque qui nunc ad lætias sæculares oculos aperunt, et corda claudunt, transit quasi eorum, et venit verum ipsorum, Quasi ipsorum felicitas est sæ-

culi : verum ipsorum pœna est. Nostrum autem quasi tristitia est, gaudium non est quasi; non enim ait Apostolus : Quasi gaudentes, sed ait : « Quasi tristes, semper autem gaudentes. » Bene itaque præsentium voluptatum dilectores ei comparantur, qui in somnis comedit, et bibit. In somnis quippe agunt, dum in hac vita sunt. Comedunt et bibunt, dum suas voluptates satiant. Sed in tempore mortis vel resurrectionis evigilabunt, et anima eorum erit vacua, quia omnis voluptas eorum transacta tunc erit, et pœna manebit. Vacua erit anima ipsorum, quia nullus animam cibus satiare potest, ut non esuriant, nisi ille qui ait : « Ego sum panis vitæ; qui venit ad me, non esuriet, et qui credit in me, non sitiet unquam (Joan. vi, 35). » Sequitur :

VERS. 9. — « Obstupescite et admiramini, fluctuate, et vacillate. »

Obstupescite et admiramini, o perfidi Judæi, videntes miracula Salvatoris; et doctrinam ejus audientes *fluctuate* animo, et *vacillate* dicentes : « Quousque animam nostram tollis? Si tu es Christus, dic nobis palam (Joan. x, 24). » Quia vero tunc responsum est Judæis. « Loquor vobis, et non creditis (ibid. 25), » et postmodum sustulere lapides, ut lapidarent eum, congrue subditur : « Inebriamini et non a vino : movemini, et non in ebrietate. » Non enim vino tunc, sed, quod pejus est, incredulitate sunt inebriati; nec ebrietate, sed infidelitate sunt in eum commoti. Sequitur :

VERS. 10. — « Quoniam miscuit vobis Dominus spiritum soporis. »

Somnus animæ est oblivisci Deum suum. Quæcunque anima oblita fuerit Deum suum, dormit. Quia ergo Judæi Christum præsentem obliti fuerant, cujus memoriam, dum esset venturus, semper habuerant, et ipse nunc eos sua cognitione justo iudicio privaverat, recte eis dicitur : « Quoniam miscuit vobis Dominus spiritum soporis. » Mente enim soporati erant, qui præsentem eum non agnoscebant. Ipse enim vigilare facit animas, quas illuminat. Si autem lumen suum detrahat, obdormiunt; aut si ab illo aversi obdormiunt, præsens est illis lumen, et non possunt videre, quia dormiunt. Sicut et qui corpore dormit, interdum ortus est sol, atque dies jam calet, et ille tanquam in nocte est, quia non vigilat, ut videat jam ortum diem; sic et isti quia somnus animæ graviter eos oppresserat, solem justitiæ præsentem nesciant, quibus consequenter dicitur :

« Claudet oculos vestros, et prophetas et principes vestros, qui vident visiones, operiet. » Superborum quippe Judæorum oculos deserens Dominus clausit. Unde et per Psalmistam dicitur : « Posuisti tenebras, et facta est nox (Psal. ciii, 20). » Tenebras quippe Dominus posuit, quia peccatis iudicia rependens lumen intelligentiæ suæ subtraxit Judæis. *Et facta est nox*, quia mens eorum ignorantiam suæ erroribus cæcata est. Nam præcedentia peccata fa-

ciunt, ut ad peccandum tenebris subsequentibus involvantur, ut eo jam lumen justitiæ, vel rectæ intelligentiæ nequeant videre, quo illustrari, quando poterant, noluerunt.

Claudere autem *oculos* eorum, et operire mentis caligine *prophetas et principes* eorum dicitur Dominus, non quia ipse tenebras inferat, sed quia ipse peccantium et superbiorum obscura corda misericorditer non illustrat ut hoc ipsum Domino sit oculos eorum clausisse, vel operuisse, a cæcitatibus tenebris liberare noluisse. Sed clausis oculis eorum et principibus, id est doctoribus atque prophetis operis subditur :

VERS. 11. — « Et erit vobis visio omnium sicut verba libri signati, quem, cum dederint scienti litteras, dicent: Lege istum, et respondebit: Non possum signatus est enim. »

VERS. 12. — « Et dabitur liber nescienti litteras, diceturque ei: Lege, et respondebit: Nescio litteras. »

Visio omnium prophetarum clausa vobis erit, et involuta sicut verba libri signati, quia propheticas Scripturas intelligere nullatenus valebitis, qui eum, de quo omnes prophetæ locuti sunt, reprobastis. Prophetas enim solus Christus adventu suo, passione ac resurrectione aperuit. Unde quisquis eum venisse non credit, et passum resurrexisse, dicta prophetarum nulla ratione valet intelligere. Hic enim liber est, quem Joannes in dextera sedentis super thronum vidit « signatum sigillis septem (*Apoc. v, 1*), » et postmodum Agnus aperuit « septem signacula ejus (*ibid. v*). » Omnis enim divina Scriptura, quia uno spiritu Dei scripta est, unus liber vocatur. Quia igitur Judæi non habent hunc Agnum, nondum eis aperta sunt libri hujus, id est Scripturæ divinæ sigilla, sed « usque in hodiernum diem, cum legitur Moyses, velamen est positum super cor eorum. Cum autem conversi fuerint ad Deum, auferetur velamen (*II Cor. iii, 15*). » Nunquam igitur apud eos vel litteratus vel illiteratus sensum libri hujus agnoscere poterit, donec veniant ad eum, « qui aperit et nemo claudit, claudit, et nemo aperit (*Apoc. iii, 7*). » Sic enim cæcati sunt, ut similiter aut deterius in eis errent litterati sicut et idiotæ. Sequitur :

VERS. 13. — « Et dixit Dominus: Eo quod appropinquat populus iste ore suo, et labiis suis glorificat me, cor autem eorum longe est a me, et timerunt me mandato hominum et doctrinis. »

VERS. 14. — « Ideo ecce ego addam, ut admirationem faciam populo huic miraculo grandi et stupendo. »

Apud Marcum legimus: « Quia convenerunt ad Jesum Pharisæi, et quidam de scribis venientes ab Jerosolymis, et cum vidissent quosdam ex discipulis ejus communibus manibus id est non lotis manducare, vituperaverunt. Pharisæi et omnes Judæi nisi crebro lavent manus, non manducant tenentes traditiones seniorum, et a foro, nisi baptizentur,

A non comedunt, et alia multa, quæ tradita sunt illis servare, baptismata calicum, et urceorum et æramentorum et lectorum. Et interrogabant eum Pharisæi et Scribæ: Quare discipuli tui non ambulant juxta traditionem seniorum, sed communibus manibus manducant panem? At ille respondens dixit eis: Bene prophetavit Isaias de vobis hypocritis, sicut scriptum est: Populus hic labiis me honorat, cor autem eorum longe est a me. In vanum autem me colunt docentes doctrinas, et præcepta hominum, baptismata urceorum et calicum, et alia similia his facitis multa (*Marc. vii, 1 et seqq.*). »

Hæc itaque et Evangelii verba prophetica exponunt sententiam. Appropinquabat enim ore suo populus iste ad Dominum, et corde longius recedebat, sicut ipse Salvator eum increpat, dicens: « Progenies viperarum, quomodo potestis bona loqui, cum sitis mali? » (*Matth. iii, 7*). Ore suo propinquabant Deo, quia unius Dei cultum habere se gloriabantur, et respuere idola; sed cor eorum longe erat ab ipso, quia non credebant Christo ejus, et timebant eum mandato hominum et doctrinis sicut ostensum est. Idcirco se facturum eis *admirationem testatur miraculo grandi et stupendo*. Et quænam sit admiratio illa, declaratur, cum subditur :

« Peribit enim sapientia a sapientibus ejus, et intellectus prudentium ejus abscondetur. » Quia, inquit, « populus iste labiis glorificat me, cor autem ejus longe est a me, et timerunt me mandato hominum, et doctrinis, ideo peribit sapientia a sapientibus ejus. » Sic enim factum est. Reliquerunt præcepta Dei servando traditiones hominum, et ob hoc ipsi doctores ad tantam pervenere cæcitatem, ut omnem sapientiam amitterent, et omnis *intellectus* absconderetur ab eis. Nam si mandata Dei servarent, Filium utique ejus susciperent, qui est sapientia ejus quem quia non susceperunt, cæcati sunt, ne eum recipiant, qui in littera continetur. Dum enim venturus esset, et illi crederent eum venturum, recte sapiebant. Sed ex quo venit, et eum venisse non crediderunt, sed venturum adhuc putaverunt, intelligentiam perdidit. Et sicut resurgens aperuit sensum discipulis suis, ut intelligerent Scripturas, ita e contrario clausit illis sensum, ut quod intelligebant amitterent.

Et hæc est admiratio, quam se facturum eis asseruit, quia mirum valde est, quomodo omnes pariter excæcati sunt. Juxta quem sensum et istud congrue potest accipi, quod superius ad eos dixit: « Obstupescite, et admiramini, fluctuate, et vacillate, » etc. Obstupescere enim et admirari possunt, quia sic omnem intelligentiam perdidit, et in tenebris remanserunt. Sequitur :

VERS. 15. — « Væ qui profundi estis corde, ut a Domino adscondatis consilium, quorum sunt in tenebris opera, et dicunt: Quis videt nos et quis novit nos? »

Principes sacerdotum, et Scribæ, et Pharisæi erant *profundi corde, ut absconderent a Domino consilium*

quando miserunt insidiatores, qui se esse justos A
 simularent, ut caperent eum in sermone, et trade-
 rent eum principatui, et potestati præsidis, et inter-
 rogaverunt eum dicentes : « Magister, scimus
 quia recte dicis et doces, et non accipis personam,
 sed in veritate viam Dei doces, licet nobis tributum
 Cæsari dare, an non? » (*Matt. xxii, 16.*) Hæc et
 hujusmodi fuit profunditas cordis eorum contra Dei
 sapientiam, *quorum erant in tenebris opera.* Quæ
 enim in occulto liebant ab ipsis turpe est etiam
 dicere. Unde et Dominus increpavit eos, dicens :
 « A foris apparetis hominibus justii, intus vero pleni
 estis hypocrisi et iniquitate (*Matth. xxiii, 28.*) »
 Multa enim in secreto mala committentes, dice-
 bant : *Quis videt nos, et qui novit ea quæ hic agi-*
 mus. Putabant enim cæci se divinitus non videri, B
 quos arguit propheta, subjungens :

VERS. 16. — « Perversa est hæc vestra cogitatio :
 quasi si lutum contra figulum cogitet, et dicat opus
 factori suo : Non fecisti me, et figmentum dicat
 fictori suo : Non intelligis. »

Lutum quippe contra figulum cogitabat, dum Ju-
 dæi contra Christum inirent consilium. Et opus di-
 cebat factori suo : *Non fecisti me,* dum Creatorem
 suum hunc negarent esse. Christus enim figulus est,
 Judæi vero lutum et plasmatio ejus, sicut in fine
 penitentes loquuntur : « Et nunc, Domine, Pater
 noster es tu, nos vero lutum ; et fictor noster, et
 opera manuum tuarum omnes nos (*Isa. Lxiv, 6.*) »

Bene ergo dicitur his qui contra eum faciebant C
 consilium, quia « perversa est hæc vestra cogitatio :
 quasi si lutum cogitet contra figulum, et dicat
 opus factori suo : Non fecisti me. » Sed et dicebat
 figmentum factori suo : *Non intelligis,* dum illi mala
 perpetrantes in tenebris æstimabant se Divinitatis
 aspectum effugisse, dicentes : « Quis videt nos, et
 quis novit nos? » Sequitur :

VERS. 17.— « Nonne adhuc in modico et in brevi
 convertetur Libanus in Charmel, et Charmel in
 saltum reputabitur.

Modicum breve fuit a tempore prædicationis' Do-
 minicæ usque ad gentium vocationem. Tunc namque
 Libanus in Charmel est conversus. Libanus quippe
 candidatio sive dealbatio dicitur, Charmel cognitio
 circumcissionis. Et quid per Libanum nisi populus
 gentilis, qui lotus est in baptismo, et pristinis sor-
 dibus purgatus ac dealbatus, exprimitur? Quid per
 Charmel nisi populus Judæorum carne circumci-
 sus? Conversus est ergo Libanus in Charmel, quo-
 niam « oleaster insertus factus est socius radicis, et
 pinguedinis olivæ (*Rom. xi, 17.*) » Consecutus est
 enim populus gentilis gratiam et fidem, quæm habe-
 bat Hebraicus. Sed et Charmel in saltum reputatus
 est, quia populus Judæorum amissa fide in tortuo-
 sam silvam gentilitatis est versus, sicut ait : « Facti
 sumus sicut in principio, cum non dominareris nos-
 tri, neque invocaretur nomen tuum super nos
 (*Isa. Lxiii, 19.*) » Tales enim nunc sunt Hebræi,

A quales temporibus erant Tharæ, et deteriores. Se-
 quitur :

VERS. 18. — « Et audient in die illa surdi verba
 libri et de tenebris et caligine oculi cæcorum vi-
 debunt. »

In die illa, qua conversus fuerit Libanus in Char-
 mel, et Charmel in saltum, *audient surdi,* id est
 gentiles *verba libri,* qui signatus manet apud Ju-
 dæos, nec aperiri potest, id est sacræ Scripturæ; et
 interiores oculi cæcorum gentilium *de tenebris et ca-*
ligine veteris ignorantia videbunt mysteria libri,
 quem nobis aperuit leo de tribu Juda. Sequitur :

VERS. 19. — « Et addent mites in Domino læti-
 tiam, et pauperes homines in sancto Israel exsul-
 tabunt. »

Apostoli, qui prius gavisii sunt convertentes mil-
 lia Judæorum, *addent in Domino* gaudere, cum con-
 verterint gentiles. *Et pauperes homines,* id est mul-
 tudo credentium, qui possessiones et substantias
 vendiderant, et pretia earum ad pedes apostolorum
 posuerant (*Act. iv, 34*), *in sancto Israel,* id est in
 Christo *exsultabunt.* Sed quod audire surdi verba
 libri queant, pauperes spiritu gaudere in Domino,
 proficit sententia, quæ subditur :

VERS. 20. — « Quoniam defecit, qui prævalebat,
 consummatus est illusor. »

Prævalebat enim hostis antiquus jugo suo genus
 humanum opprimens, et illudebat ei delectationes
 fallaces suggerens, et peccatis servire faciens. Sed
 nunc *defecit, et consummatus,* id est consumptus
 est ; quia per Christum victus atque ligatus est, et
 nihil factus. Sequitur : « Et succisi sunt, qui vigila-
 bant super iniquitatem. »

VERS. 21. — « Qui peccare faciebant homines in
 verbo, et arguentem in porta supplantabant, et de-
 clinaverunt frustra a justo. »

Romanorum ferro *succisi sunt* Judæi, qui *vigila-*
bant super iniquitatem, id est persequi Salvatorem
 studebant. *Qui peccare faciebant homines in verbo,*
 id est faciebant ut homines blasphemarent, quia
 « conspiraverunt, ut si quis illum confiteretur
 Christum, extra synagogam fieret » (*Joan. ix, 22*).
Et supplantabant eum arguentem eos in porta, id
 est in loco iudicii, quia dum per illos quinque dies
 ante passionem suam acrius eos argueret in tem-
 plo, semper insidias machinabantur, ut ad ejus ne-
 cem pertingerent.

Et declinaverunt frustra a justo, id est ab eodem
 Domino, quia non eis profuit dicere : « Non habemus
 regem nisi Cæsarem (*Joan. xii, 15.*) » In porta
 autem veteres agere solebant iudicia. Unde et per
 prophetam dicitur : « Constituite in porta iudi-
 cium (*Amos. v, 15.*) » Dominum igitur *arguentem*
eos in porta dicit, quia malitiam eorum dijudicans
 increpabat. Quod si materialis porta quæritur, in
 porticu Salomonis arguit eos, dicens : « Vos non
 creditis, quia non estis de ovibus meis (*Joan. x, 26.*) »
 At illi *supplantabant eum,* quia « sustulerunt lapi-
 des, ut jacerent in eum (*ibid. 31.*) »

Vel dæmones succisi sunt, qui rigilabant ad iniquitatem, et peccare faciebant universum hominum genus in verbo blasphemix, ut negarent verbum Dei, et errorum dogmata prædicarent, et arguentem in porta atque iudicio, quantum in se erat, supplantabant, et a justitia declinare faciebant, qui erat in portis filix Sion exaltatus de portis mortis, et corripiebat eos, qui odorant in portis arguentem. Sequitur :

VERS. 22. — « Propter hoc hæc dicit Dominus ad domum Jacob, qui redemit Abraham : non modo vultus ejus erubescet. »

VERS. 23. — « Sed cum viderit filios suos, opera manuum mearum in medio sui sanctificantes nomen meum, et sanctificabunt sanctum Jacob, et Deum Israel prædicabunt. »

VERS. 24. — « Et scient errantes spiritu intellectum, et mussitatores discent legem. »

Quia pauperes in sancto Israel exsultabunt, et qui vigilabant ad iniquitatem, succidentur, propter hoc hæc dicit Dominus, qui redemit Abraham. Habet autem vetus traditio, quod Chaldæi projecerunt Abraham, et Aram in ignem, qui lingua eorum appellatur *Ur*, eo quod ipsum colere nollent. Chaldæi quippe adorabant ignem. Mortuus est autem ibi Aram in *Ur* Chaldæorum, et Abraham exivit illæsus. Unde et ei Deus perhibetur dixisse : « Ego sum, qui eduxi te de *Ur* Chaldæorum (*Gen. xv, 7*), » id est de igne Chaldæorum. Nam in *Esdra* libro legitur evidenter ipse Dominus Abraham liberasse « de igne Chaldæorum (*II Esdr. ix, 7*). » Hoc ergo dicit hic commemorari, dum dicitur : « Hæc dicit Dominus ad domum Jacob, qui redemit Abraham. » Sed cur hoc, antiquitus gestum, replicat locuturus de novis prædicatoribus, nisi quia quemadmodum Abraham tunc eripuit, et hostes ejus confudit, sic nunc fideles suos eripiet, qui sacrilegorum jussa contempserunt, et persecutores eorum confundet? Sæpissime enim martyres ignem superavere materialem, et omnes ignem tribulationis vel concupiscentix vicerunt.

Non modo, inquit, confundetur Jacob, id est tempore, quo propheta loquebatur hæc, populus Judæorum sustinebit verecundiam, nec modo vultus ejus erubescet, sed cum viderit filios suos, id est apostolos et credentes, quos mex manus in operibus bonis creabant, in medio Jerusalem sanctificantes nomen meum bene vivendo, et prædicando. Effuso enim Spiritu sancto et apostolis magnalia Dei loquentibus infideles Judæi vehementer confusi sunt, alii ut in suis iniquitatibus tabescentes livore torquerentur adversus credentes. Cum autem subjicit, quia « sanctificabunt sanctum Jacob, et Deum Israel prædicabunt, » manifeste declarat apostolos non alium prædicaturos nisi Deum, quem adoravit Israel, et sanctum, quem expectavit Jacob. Dixit enim moriens : « Salutare tuum expectabo, Domine (*Gen.*

XLIX, 18). » Evangelizantibus autem novis prædicatoribus hoc salutare, id est Dominum Jesum scient intellectum errantes spiritu, id est Judæi, qui corde semper errabant, licet operibus recte viderentur incedere. Et mussitatores, id est iidem ipsi Judæi, qui more balbutientium infantium mussitabant doctrinam legis, discent legem, quam antea disserere nullo studio valuerunt. Docebit enim gratia Christi, quod homo docere nequivit. Sequitur :

CAPUT XXX.

VERS. 1. — « Væ filii desertores! dicit Dominus, ut faceretis consilium et non ex me : et ordiremini telam, et non per spiritum meum, ut adderetis peccatum super peccatum. »

VERS. 2. — « Qui ambulatis, ut descendatis in Ægyptum, et os meum non interrogastis sperantes auxilium in fortitudine Pharaonis, et habentes fiduciam in umbra Ægypti. »

VERS. 3. — « Et erit vobis fortitudo Pharaonis in confusionem, et fiducia umbræ Ægypti in ignominiam. »

VERS. 4. — « Ierant enim in Tanis principes tui, et nuntii tui in Tanes pervenerunt (133). »

VERS. 5. — « Omnes confusi sunt super populo, qui eis prodesse non poterit : non fuerunt in auxilium, et in aliquam utilitatem, sed in confusionem, et in opprobrium. »

Hæc prophetia secundum historiam impleta est sub Jeremia, quando post eversionem Jerusalem reliquix, Juda contradicente Deo, fugerunt in Ægyptum a facie Chaldæorum, et ibi cum Ægyptiis pariter peremerunt.

Sed quid in reliquiis Juda nisi fideles nonnulli signantur, qui temporibus novissimæ persecutionis resides invenientur aliis jam captivatis? Nunc enim fit illa spiritalis captivitas populi Dei, quam sanctus Jeremias tam graviter plangit, et ex magna parte jam completa est. Quid ergo reliquix Juda nisi non designant, qui superstites adhuc sumus, cæterosque, qui futuri sunt nostri similes? Sed, quid talibus dicatur, audiamus, et caveamus.

« Væ filii desertores! dicit Dominus. » Filii sunt, quia Christiani; desertores, quia Patrem deserunt. Mandata quippe Dei relinquunt ut peccatis adhæreant. Qui faciunt consilium et non ex Deo, quia caute sibi consulere se putant, dum prospera mundi quærere, suasque voluptates explere decernunt. Et ordiuntur telam, et non per spiritum Domini, quia proponunt, vel inchoant agere, quæ non licet, sicque peccatum operis additur super peccatum cogitationis eorum.

Qui ambulat, id est operantur, ut descendant in Ægyptum, id est in sæculum. Quid est enim ambulare nisi operari? Et quid per Ægyptum nisi mundus iste figuratur, vitaque sæcularium vel infidelium? Quid autem per os Domini nisi Scriptura sacra figuratur, vel quilibet justitiæ prædicator.

(133) Alias, Erant enim Tani principes tui, et nuntii tui usque ad Hanes pervenerunt.

Quid vero per regem *Ægypti* nisi potentes sæculi? **A** Ambulant enim, ut in *Ægyptum* descendant, qui eas actiones operantur, per quas ab alto religionis in sæcularem conversationem deveniant.

Et hæc agentes non interrogaverunt os Domini, quia in Scripturis non quæsierunt, vel ab aliquo sanctorum si liceret eis agere talia. Cupiunt autem in *Ægyptum* descendere, id est sæcularem vitam ducere, quia sperant *auxilium* adversus persecutores. In fortitudine *Pharaonis*, id est principum sæculi, si eis familiariter adhæserint. Et ab æstu tribulationum habent fiduciam in umbra *Ægypti*, id est in protectione sæculi. Quibus *fortitudo Pharaonis*, id est potentum sæculi non in auxilium, sed in *confusionem erit*, et spes *umbræ Ægypti in ignominiam*; quia fortasse nec ipsi principes sæculi poterunt eos tueri sub Antichristo, ne puniantur, æternumque portabunt improperium, quia formidantes pati tribulationem, justitiam vel fidem reliquerunt, et tribulationem non evaserunt. Sic enim multis eventurum credimus in illa persecutione novissima, quoniam vel ob solum Christianitatis nomen quod habuerunt, torquebuntur, aut subito perimentur, dum adhuc fideles esse credentur. Sed et nunc plerique religiosi divitibus iniquis nimium familiares flunt, et obsequuntur sperantes eorum defensione semper ab adversitate protegi, vel hujus vitæ prospera consequi. Sed exurgente procella tribulationis non per eos juvantur, imo magis confunduntur.

Ierant enim in Tanis, etc. *Principes* et præpositi Ecclesiæ cuncti in *Tanis*, id est in mandatum humile, hoc est terrenum, quando præceptis sæcularium principum contra suum Canonem obediunt. *Et usque ad Tanes*, quod interpretatur *nunquid commutatus est*, perveniunt, dum cuilibet apostatæ fuerint similes, de quo non appareat, quod ab infidelitate commutatus ad justitiam non est. Sic enim temporibus Antichristi facient, et aliqui jam fecerunt.

Sed quid additur? « Omnes confusi sunt super populo, qui eis prodesse non poterit. » Non enim proderit illis populus *Ægyptiorum*, id est sæcularium aut infidelium adversus Nabuchodonosor, id est diabolum, sed temporaliter, vel æternaliter ab eo punientur, aut certe temporaliter et æternaliter. Nam sicut reliquiæ Juda perierunt cum *Ægyptiis*, ad quos, ut tribulationem evaderent, confugerant; sic et isti cum iniquis peribunt, quibus metu persecutionum sociabantur. Sequitur :

VERS. 6. — « Onus jumentorum austri. In terra tribulationis et angustiae læna et leo, ex eis vipera et regulus volans portantes super humeros jumentorum divitias suas, et super gibbum camelorum thesauros suos ad populum, qui eis prodesse non poterit. »

VERS. 7. — « Ægyptus enim frustra et vane auxiliabitur, ideo clamavi super hoc : Superbia tantum est, quiesce. »

Decem superius onera descripsimus, et nunc apponit undenarium ut de transgressoribus se loqui designet. Denarius enim numerus perfectionem legis exprimit, et undenarius transgressionem ejus. Nam et hic historiam prædicit, quæ temporibus Jeremiæ facta est, quando post interfectionem Godoliæ, Joannan, filius Carce, cæterique principes reliquias Juda transdixerunt in *Ægyptum* contra præceptum Domini, qui per Jeremiam præcipiebat, ut manerent in terra Juda. Quæ scilicet reliquiæ vocantur jumenta, quia insensatæ erant, et brutæ colentes adhuc idola; jumenta *austri*, quia tribus Juda plagam austri possedit.

Terra tribulationis et angustiae latitudo est illius eremi, per quam fugerunt in *Ægyptum* metu Chaldaeorum; *læna* plebs reliquiarum; Joannan *leo*, et alii duces. *Vipera et regulus* ex eis nascens, id est ex læna et leone filii sunt eorum, qui crudelibus orti parentibus virulenti fuerunt. Et *divitias suas* licet exiguas in humeris *jumentorum et gibbis camelorum* portaverunt fugientes *ad populum Ægypti, qui eis prodesse non potuit*. Nam sublatis omnibus, quæ habere poterant, illuc transfugerunt. Veniente autem Nabuchodonosor cum ipsis pariter *Ægyptiis*, in quibus confidebant, perierunt fame et gladio. *Ægyptus enim frustra*, id est incassum eis auxiliata est *et vane*, quoniam defecit atque evanuit ejus auxiliatio. Idcirco vates populo reliquiarum properanti in *Ægyptum* clamat : *Superbia tantum, in Ægypto est*, non fortitudo, *quiesce* residens in terra Juda. Quo non quiescente, præcipit Dominus Jeremiæ dicens :

VERS. 8. — « Nunc ingressus scribe eis super buxum, et in libro diligenter exara illud, et erit eis in die novissimo in testimonium usque in æternum. »

Ingressus cum eis in *Ægyptum* *scribe eis in buxo*, quod est lignum imputribile, ut semper durare queat; *et in libro exara*, ut ab omnibus agnoscat, quia Dominus interdixit, ne abirent in *Ægyptum*, et abierunt : *et erit eis ad testimonium* damnationis in die novissimo. Sequitur :

VERS. 9. — « Populus enim ad iracundiam provocans est, et filii mendaces, filii nolentes audire legem Domini. »

Similiter et in Jeremia legitur. Quem cum mitterent consulere Dominum, dixerunt : « Sit Dominus inter nos testis veritatis et fidei, si non juxta omne verbum, in quo miserit te Dominus Deus tuus ad nos, sic faciemus (*Jer. XLII, 5*). » Et cum eis respondisset Dominus, « non audivit Joannan filius Carce, et omnes principes bellatorum, et universus populus vocem Domini, ut maneret in terra Juda (*Jer. XLIII, 4*). » Sequitur :

VERS. 10. — « Qui dicunt videntibus : Nolite videre, et aspicientibus : Nolite aspicere nobis ea quæ recta sunt : loquimini nobis placencia, videte nobis errores. »

VERS. 11. — « Auferte a me viam, declinate a me a semitam, cesset a facie nostra sanctus Israel. »

Hoc est, quod Jeremiæ jam in Ægypto dixerunt : « Sermonem, quem locutus es ad nos in nomine Domini, non audiemus ex te, sed facientes faciemus omne verbum, quod egredietur de ore nostro, ut sacrificemus reginæ cœli, id est : lunæ (Jer. XLIV, 16). » et his similia sæpe loquebantur. Dicebant *videntibus*, id est Jeremiæ et Baruch : *Nolite nobis videre ea quæ recta sunt.* Dicebant : *Cesset a facie nostra sanctus Israel*, quia nec loqui valebant de Deo, nec audire, vel memoriam ejus ante faciem mentis venire. Sequitur :

VERS. 12. — « Propterea hæc dicit Dominus sanctus Israel : Pro eo, quod reprobastis verbum hoc, et sperastis in calumnia, et in tumultu, et innixi estis super eo. »

VERS. 13. — « Propterea erit vobis iniquitas hæc sicut interruptio cadens, et requisita in muro excelso, quoniam subito, dum non speratur, venit contritio ejus. »

VERS. 14. — « Et comminuetur, sicut conteritur lagena figuli contritione pervalida : et non inveniatur de fragmentis ejus testa, in qua portetur igniculus de incendio, aut hauriatur parum aquæ de fovea. »

Præcepi, inquit, vobis, ut maneretis in terra Juda, sed vos ex ore Jeremiæ *verbum hoc reprobastis, et sperastis in calumnia verborum, et in tumultu, dicentes : Non misit te Dominus.* « Sed Baruch filius Neriz incitat te adversum nos (Jer. XLIII, 5), » et *propterea erit vobis iniquitas* « incredulitatis, et contradictionis hujus » *sicut interruptio muri quæsitâ ab hostibus, et inventa nescientibus his, qui intus sunt, quia dum vos a Chaldæis in Ægypto tute putatis abscondere, viam eis ad vos panditis, et ex improvise capiuntur, et comminuetur sicut lagena figuli, quemadmodum et de Jerusalem per Jeremiam dictum est : « Sic conteram populum istum, et civitatem istam sicut conteritur vas figuli, quod non potest ultra instaurari (Jer. XIX, 11). »* Sic ergo et reliquiarum populus in Ægypto contritus est, ut amplius recuperari nequiret. Et sicut *de fragmentis contritæ lagenæ testula non invenitur, in qua parum ignis vel aquæ portetur*, ita ex illis nullus supervit, qui ad aliquod opus bonum jam foret aptus. Sequitur :

VERS. 15. — « Quia hæc dicit Dominus Deus sanctus Israel : Si revertamini, et quiescatis, salvi eritis : in silentio et in spe erit fortitudo vestra. »

Hoc est evidens. Si revertamini in terram Juda et quiescatis ibi, salvi eritis a Chaldæis, quos memistis. Sequitur :

VERS. 16. — « Et nolulistis, et dixistis : Nequaquam, sed ad equos fugiemus : ideo veloces (134) erunt, qui persequentur vos. »

Et hoc manifestum est. Nam quia fugerunt ad equos, ideo contingit, ut fugerent Chaldæos ; et quia super veloces ascenderunt equos, ut loquuntur, ideo veloces fuerunt Chaldæi persequentes eos, ut non evaderent. Sequitur :

VERS. 17. — « Mille homines a facie terroris unius, et a facie terroris quinque fugietis : donec relinquamini quasi malus navis in vertice montis, et quasi signum super colle. »

Mille Ægyptiorum, in quibus confiditis, fugient a facie unius Chaldæorum, et omnes vos Judæi fugietis a facie quinque Chaldæorum, donec relinquamini quasi malus navis, vel signum in colle. Sicut enim cum post naufragium positus fuerit malus in vertice montis, vel super colle pro signo, omnes, qui vident eum, intelligunt dissipatam esse navim, ita pauci Judæorum remanentes omnibus se cernentibus manifestaverunt Jerusalem esse destructam. Qui quoniam inter inimicos diutius afflicti sunt captivitate et miseria, consolatur eos propheta, subjungens :

VERS. 18. — « Propterea expectat Dominus, ut misereatur vestri, et ideo exaltabitur parcens vobis, quia Deus judicii Dominus : Beati omnes, qui expectant eum. »

VERS. 19. — « Populus enim Sion habitabit in Jerusalem, plorans nequaquam plorabis, miserans miserebitur tui. »

Non vos, inquit, oblitus est Dominus in manu hostium vestrorum, ut putatis, sed ob hoc expectat liberare vos, ut misereatur vestri relaxando peccatum, et eripiendo vos. Et ideo vestros hostes comprimens exaltabitur super eos, et parcat vobis ab hac afflictione, quam sustinotis, quia Deus judicii est Dominus, id est omnia justo judicio faciens, sive dum vos affligit, sive quando parcat. Et beati erunt, qui per ejus misericordiam expectant liberari, quoniam *populus Sion*, qui captivus in Perside tenetur, habitabit rursus liber in Jerusalem, et affluet bonis, et tunc *nequaquam plorabis*, o Israel, sed exsultabis, quoniam Dominus *miserebitur tui* a cunctis tribulationibus eripiens.

Nunc ab exordio lectionem repetentes, videamus, si possit et aliter exponi, quoniam sæpe contingit, ut sermo propheticus in uno multa complectatur. « Onus inquit, jumentorum austri. » Quid sit *auster*, apud Ezechielem cognoscimus, cui Dominus ait : « Fili hominis, pone faciem tuam contra viam austri, et stilla ad Africum, et propheta ad saltum agri meridiani, et dices saltui meridiano : Hæc dicit Dominus Deus : Ecce ego succendam in te ignem, et comburam in te omne lignum viride, et omne lignum aridum (Ezech. XX, 46). » Et eadem repetendo sic exposuit : « Fili hominis pone faciem tuam contra Jerusalem, et stilla ad sanctuaria, et propheta contra humum Israel, et dices terræ Israel : Hæc dicit Dominus : Ecce ego ad te, et ejiciam gla-

dium meum de vagina sua, et occidam in te justum et impium (*Ezech. xxi, 2*). » Quod enim dixerat : *Pone faciem tuam contra viam austri, et stilla ad Africum*, hoc interpretatus est dicens : « Pone faciem tuam ad Jerusalem, et stilla ad sanctuaria. »

Via igitur australis, Jerusalem est, id est Ecclesia, et Africus vel auster sanctuarium est. Quæ sunt ergo jumenta austri vel sanctuarii nisi homines, qui Christianam religionem professi sunt, sed more jumentorum vivunt? « Homo cum in honore esset, non intellexit, comparatus est jumentis insipientibus, et similis factus est illis (*Psal. xlviii, 13*). » Jumenta quippe ratione carent, et onus quodcumque sibi imponitur, indifferenter portant. Sic et homo, qui mentis ratione bonum et malum subtiliter non discernit reprobando malum et eligendo bonum, sed quamlibet impositam sibi peccatorum sarcinam ferre consentit, jumentum est.

Onus vero hic pondus peccatorum designat et afflictionum.

« In terra tribulationis et angustiarum læna et leo, ex eis vipera et regulus volans portantes super humeros jumentorum divitias suas, et super gibbum camelorum thesauros suos ad populum, qui eis prodesse non poterit. » Quæ terra tribulationis et angustiarum nisi in qua fideles affliguntur? In hac enim est læna, et leo, id est Babylon et diabolus. Nam sicut Christum et Ecclesiam designare solent læna et leo, quoties in bono accipiuntur? ita diabolus et Babylonem figurant, quoties in mala significatione leguntur :

Ex quibus videlicet leone et læna oritur *regulus volans*, id est pestifer Antichristus, qui per superbiam in altitudine cogitationis super omnia evolat : et *vipera* id est virulenta prædicatorum ejus turba. Qui jumenta sanctuarii sumentes, id est Christianos, et religionum professores imponunt *super humeros cordis eorum divitias suas*, id est peccata, et *super gibbos camelorum*, id est super elationem tortuosæ mentis ipsorum *thesauros suos*, id est iniquitates. Ex his enim sunt, « qui penetrant domos, et captivas ducunt mulierculas oneratas peccatis, quæ ducuntur variis desideriis (*II Tim. v, 6*). »

Diabolus igitur et Antichristus eorumque sequaces licet et nunc in humeris jumentorum austri divitias suas imponant, præcipue tamen in illa persuasionem novissima fideles ab Ecclesia falsis pollicitationibus seducentes auferent, et onerabunt peccatis et afflictionibus. Nam « qui voluerint divites fieri, incidunt in tentationem, et in laqueum diaboli, et desideria multa et inutilia, quæ mergunt homines in interitum, et perditionem. Radix enim omnium malorum est cupiditas, quam quidem appetentes erraverunt a fide, et inseruerunt se doloribus multis (*I Tim. vi, 9*). » Per avaritiam ergo decipiuntur hæc austri jumenta, ut tantum iniquitatum et miseriarum suscipiant onus. Incidunt enim per eam in laqueum diaboli, et in desideria quæ trahunt homines in perditionem. Et dum Antichristo consentiunt

cupiditate victi, errant a fide, et inserunt se doloribus multis

« *Læna* quippe et *leo*, *vipera* et *regulus* ducunt eos peccatis oneratos in Ægyptum, id est in tenebras infidelitatis ad populum gentilium et infidelium, qui eis *prodesse non poterit in die novissimo*, sicut Ægyptii non profuere reliquiis Juda venientibus Chaldeis. Ægyptus enim, id est tenebrosa sæcularium et infidelium multitudo frustra auxiliabitur eis, quia *non proficiet, et vane*, quia evanescit atque transibit.

Vel leoni et lænæ viperæ et regulo prodesse nequibit populus infidelium puniendo martyres, quoniam per tormenta transibunt ad requiem et gloriam, magisque roborabunt adversus Antichristum Ecclesiam. Et quoniam Ægyptus frustra auxiliabitur, ideo clamavi super hoc, quod Austri jumenta cum sarcinis ad eam descendunt. *Superbia tantum est*, non utilitas, quia descendit in Ægyptum infidelitatis, o quicumque terram Juda, id est Ecclesiam, in qua confessio veritatis est, deseris : *Quiesce* ab hoc itinere perverso residens in Ecclesiam. Sed quia nolunt quiescere, o Elia, nunc ad eos *ingressus scribe eis super buzum*, id est in abstinenti conversatione tua, quæ per pallorem buxi figuratur, quid agere debeant eis exprime, et in libro diligenter *exara illud*, id est in corde eorum memoriter assignare labora prædicando. Unicuique enim liber est memoria conscientiarum suarum, et in libro scribimus, dum aliquid imprimimus conscientiarum proximi.

« *Et erit*, inquit, eis scriptura hæc in die novissimo ad testimonium justæ damnationis, quia bonum, quod agere debuissent, non ignoraverunt, sed contempserunt. *Populus enim ad iracundiam provocans est*, quoniam ille Deum ad iracundiam provocat, quia mandata ejus sciendo transgreditur. *Populus igitur iste ad iracundiam provocans est, et filii mendaces*, id est quod Deo promiserunt, non implentes, *filiis nolentes jam audire legem Dei*, sed legem voluntatis suæ sequentes : *qui dicunt videntibus*, id est religionum magistris : *Nolite videre*, an ordinate ambulemus : et *aspicientibus*, id est qui vitam his subjectorum, *recta sit* incessanter aspiciunt. *Nolite aspiciere nobis ea, quæ recta sunt, sed loquimini nobis placentia*, id est quæ ad vanam delectationem pertinent : *Videte notis errores*, quos sequamur.

Auferte a me viam justitiæ, ut incedam per devia : *declinate a me semitam* arcæ conversationis, et ambulabo per amplam viam perditionis. *Cesset a facie nostra sanctus Israel*, id est Deus, ut jam ante faciem cordis nostri non veniat. Sic loqui vel cogitare descendere est in Ægyptum. Hæc enim jam loquuntur, et magis adhuc locuturi sunt, qui religionem Christianam deserentes Antichristo sociantur. « *Erit enim tempus*, cum sanam doctrinam non sustinebunt, sed ad sua desideria coacervabunt sibi magistros prurientes auribus; et a veritate quidam auditum avertent, ad fabulas autem convertentur

(II Tim. iv, 3). » — « Nam in novissimis temporibus discedent quidam a fide attendentes spiritibus erroris (I Tim. iv, 1), » id est doctrinæ dæmonum in hypocrisi loquentium mendacium, « et cauteriatam habentium conscientiam suam (ibid.). » Ili ergo dicent : « Auferte a me viam, cesset a facie nostra sanctus Israel. » Quibus divina respondet sententia : *Pro eo, quod reprobastis verbum hoc, quo præcepi vobis, ut quiesceretis ire in Ægyptum infidelitatis; vel hoc reprobastis, ut aspicientes aspicerent vobis ea, quæ recta sunt, et sperastis in calumnia et in tumultu calumniam moventes contra sanam doctrinam, et tumultuantes, ac procaciter innixi estis super tumultum contradictionis et inobediendiæ : Propterea erit vobis iniquitas hæc sicut interruptio muri cadens, et ab hostibus quæsitæ foramen quærentibus.* Dum enim in Ægypto, id est infidelium consortio sicut intra muri ambitum fore vos tutos æstimatis ex improviso capiimini, et peribitis, qui in Ecclesia tuti fuissetis.

Et comminuetur murus protectionis vestræ, sicut conteritur lagena figuli, quia corpora carnalium, qui vos tuebantur, in morte salventur. « Et non inveniatur de fragmentis ejus testa, in qua portetur igniculus de incendio, vel parum aquæ hauriatur de fovea, » quia reprobi, postquam in morte contriti sunt, non invenitur quisquam ex eis, qui vel aliquantulum charitatis jam igniculum ab incendio, quo mentes electorum ardent, sumere valeat, vel parum aquæ compunctionis haurire de fovea humilitatis. *Testa enim quisque peccator est, cui dicitur : Væ, qui contradicit factori suo, testa de sammis terræ ! » (Isa. xlv, 9.)* Sed hæc testa post contritionem nequit portare igniculum de incendio, quia per diem Sabbati, sicut lex dicit : « Non succendetis ignem in omnibus habitaculis vestris (Exod. xxxv, 5). » Sabbatum quippe est, cum jam nil operari post mortem licet. Sed nemo per diem Sabbati succendet ignem in habitaculo suo; quia, qui nunc ignem charitatis in corde suo non accendit, post mortem illum accendere non valebit. Sed et aquam compunctionis haurire non potest; quia, quamvis in inferno sit fletus et stridor dentium, nequaquam tamen aqua mundans invenitur ibi. De eis namque lacrymis loquimur, qui flentem abluunt. Ostense autem, quid eis maneat, qui in Ægyptum, id est in sæculum et infidelitatem descendunt, rursum quid consequantur, si ad Ecclesiam velut ad terram Juda redierint, indicat, subjungens.

« Si revertamini et quiescatis, salvi eritis : in silentio, et in spe, » non in calumnia et tumultu, « erit fortitudo vestra » quia resistetis hostibus vestris invisibilibus. Sed isti superbia et cupiditate cæcati respondent : « Nequaquam, sed ad equos fugiemus. » Propheta vero solers corrigere nititur delinquentes, et arguendo revocat peccatores, stringit passionum impetus, frena rationis imponit, revocat culpam, statuit errorem, dum suadet, ut revertantur, et quiescant, nec ad equos in Ægyptum

descendant. Equus enim stare nescit, velox ad impetum, cervicem suam exaltans, hinniens ad libidinem. Quid tam simile peccati? Fervet enim primo culpa impetu, et omnem recti cogitationem prævenit, motuque immaturo exsilit, ut eam difficile ratio revocare possit. Fertur et in præceps, et ascensorem suum projicit in mare istud hujus sæculi cervice tumida recusans jugum correptionis. Et specialis quædam forma est libidinis, quæ vocem mutet hominis, verba amantis corrumpat, suisque se probet sermonibus. Ad ejusmodi equitatum, inquit, festinant, qui se revocanti dicunt. « Nequaquam revertemur, sed ad equos fugiemus. » Declinant enim, et defluunt sensus eorum, et disciplinam mentis abjecerunt, ideoque foris in actione dissipantur, et ad culpam proruant.

Ad equos, inquit, fugiemus, ne patiamur adversa sæculi, quibus propheta respondet : ideo fugietis adversarios invisibiles in tempore necessitatis, quia nunc disciplinam fugitis. Illi vero adjungunt : *Et super veloces ascendemus, id est in peccatis exaltabimur, quæ nos ad ea velociter ferant, quæ nequiter consideramus.* Et sermo divinus : *Ideoque, inquit, veloces erunt maligni spiritus, qui vos in hora mortis persequentur.*

« Mille homines a facie terroris unius, et a facie terroris quinque fugietis. » Irruit enim tempore mortis Satanas cum satellitibus suis, ut animam rapiat. Unde Salomon cum dixisset : « Custodi Jeggem atque consilium, et erit vita animæ tuæ (Prov. xxxi, 21), » paulo post de hora mortis subjunxit : « Ne paveas repentino terrore, et irruentium tibi potentias impiorum (ibid., 25), » subaudi, ideo custodi legem atque consilium. Isti ergo qui legem et consilium custodire respuunt, dicentes : « Nequaquam, sed ad equos fugiemus, » subripiente mortis articulo pavebunt, et fugient a facie dæmonum. Fugient quidem, sed non evadent sicut et reliquæ Juda fugerunt in Ægyptum Chaldæos, sed non effugerunt. Fugit enim persecutores suos anima tempore egressionis suæ, quia fugere quærit, et tepidans per artus discurrit. Nam et de Babylone scriptum est : « Quoniam in una die venient plagæ ejus, mors et luctus et fames, et igni comburctur, et flebunt et plangent se super illam reges terræ, qui cum illa fornicati sunt, et in deliciis vixerunt, cum viderint fumum incendii ejus, et longe stantes propter timorem tormentorum ejus dicent : Væ, væ civitas illa magna Babylon, civitas illa fortis ! » (Apoc. xviii, 8-10.) Sed hi reges non loco sed affectu, nec corpore sed voluntate longe stabunt, quoniam cum ea pariter cremabuntur. Sicut ergo longe stare dicuntur, qui in eadem damnatione sunt, quia longe vellent esse; sic nunc isti fugere perhibentur in morte adversarios suos, quos fugere cupiunt. Itaque reprobis de suo sine dicitur : « Mille homines a facie terroris unius, et a facie terroris quinque fugietis, » etc.

Quis vero est unus iste, qui peccatores in extre-

mis persequitur nisi diabolus? Et qui sunt isti quinque persecutores nisi maligni spiritus, qui eorum quinque sensus corporeos ad peccandum illexerunt? Quid autem per millenarium nisi universitas designatur? Ait ergo his qui novissima providere negligunt: *Mille homines*, id est vos omnes tempore vocationis vestræ *fugietis a facie terroris unius, Satanæ, et a facie terroris quinque*, id est dæmonum, qui vos in quinque sensibus corporis fecerunt delinquere. *Fugietis*, inquam, *donec relinquamini quasi malus navis in vertice montis*, id est donec corpus vestrum exanime relinquatur, et omnibus pateat vos in pelago sæculi hujus pertulisse naufragium. *Et relinquamini quasi signum super collem*, quod viatoribus ostendit iter in montem, quia formidine supplicii vestri persuadebitis cæteris, ne sicut vos a via rectitudinis exorbitent, sed ad superna recto calle tendant. Unde et uxor Lot, quia post se respexit, versa est in statuam salis omnibus condimentum animi facta, ne retro jam aspiciant. Eadem quippe sententia est de his, qui nunc relinqui dicuntur quasi malus navis in summitate montis, vel quasi signum super collem, et de muliere, quæ remansit in statuam salis conversa. Deinde longanimitatem electorum corroborat propheta, subjungens:

« Propterea expectat Dominus, ut misereatur vestri, et ideo exaltabitur parcens vobis, quia Deus iudicii Dominus: Beati omnes, qui expectant eum. » Superioribus autem verbis, quibus arguit eos, qui circa finem sæculi in errores declinabunt, consonat Petrus in Epistola, dicens: « Venient in novissimis diebus in deceptione illusores juxta proprias concupiscentias ambulantes, dicentes: Ubi est promissio aut adventus ejus? Ex quo enim patres dormierunt, omnia sic perseverant ab initio creaturæ (II Petr. III, 3). » Et nunc quod propheta dicit: « Propterea expectat Dominus, ut misereatur vestri, et ideo exaltabitur parcens vobis, » Petrus ita scribit: « Non tardat Dominus promissis, sed patienter agit propter vos nolens aliquos perire, sed omnes ad penitentiam reverti (ibid. 9). » Et quod hic sequitur: « Quia Deus iudicii Dominus: Beati omnes, qui expectant eum. » Ibi Petrus adjecit: « Adveniet autem dies Domini ut fur, in qua cæli magno impetu transient, elementa vero calore solventur (ibid. 10). » Cum igitur hæc omnia solvenda sint, quales nos oportet esse in sanctis conversationibus et pietatibus expectantes et properantes in adventum diei, per quam cæli ardentes solventur, et elementa ignis ardore tabescent? Novos vero cælos et novam terram secundum promissa ipsius expectamus, in quibus justitia habitat. Quibus apostoli verbis et illud consonat, quod in hoc loco subditur:

« Populus enim Sion habitabit in Jerusalem. » Sion namque dicitur *specula vel mandatum*; Jerusalem autem *visio pacis*. Et fidelium populus manet nunc in mandato et in specula, quia legem Dei custodiens ab arce mentis circumquaque vigilanter

aspicit, et vitiorum tentamenta, priusquam veniant, deprehendit et venientia fortiter superat. Hic ergo *populus habitabit in Jerusalem*, quia pro bellis temporalibus in æterna pace versabitur.

Vel Sion intelligenda est præsens Ecclesia, Jerusalem vero futura. Et *populus Sion habitabit in Jerusalem*, quia qui in errores non declinaverint, sed fideliter et juste in hac Ecclesia perseveraverint, absque dubio in illa regnabunt; et qui nunc variis de causis lamentantur, sine fine tunc gaudebunt. Nam sequitur: « Plorans nequaquam plorabis. » Et quia tunc misericordiam invenient in auxilio opportuno, « miserans, inquit, miserebitur tui (Psal. cxxxiv, 14), » quia « judicabit Dominus populum suum, et in servis suis miserebitur, quoniam in æternum misericordia ejus (Psal. cxxxv, 1). » Post hæc de gratia Novi Testamenti dicitur:

« Ad vocem clamoris tui statim, ut audierit, respondebit tibi. » Ad nostram petitionem Dominus respondet mox, *ut audierit clamorem* petitionis nostræ faciendo, quod petimus, si justum et utile est, et si tempus advenit, quo fieri debet, atque digni sumus, ut hoc nobis faciat. *Si justum et utile est*, diximus, quia Paulus rogavit auferri a se Angelum Satanæ, qui judicante Domino colaphizabat eum, et non obtinuit, sed tantum ad vocem responsum est: « Sufficit tibi gratia mea, nam virtus in infirmitate perficitur (II Cor. xii, 9). » *Si jam tempus advenit*, diximus, quia cum dicimus: « Adveniat regnum tuum (Matth. vi, 10), » exaudimur quidem, sed nequaquam mox idem regnum percipimus. Eorum vere, qui indigni sunt, non auditur clamor quia « qui declinat aurem, ne audiat legem, oratio ejus erit execrabilis (Prov. xxviii, 9). » Neque enim promissum est hoc nisi vel electorum populo, vel cuilibet justo. Et notandum, quia non ait: *Faciet*, quidquid petieris, sed *respondet tibi*, scilicet prout oportuerit, atque justum sed respondit, quod utile erat. Sequitur: fuerit sicut Paulo non fecit, quod petebat.

VERS. 20. — « Et dabit vobis Dominus panem arctum, et aquam brevem. »

Quid per *panem et aquam* nisi doctrina sapientiæ designatur? Scriptum quippe est: « Cibavit illum pane vitæ et intellectus, et aqua sapientiæ salutaris potavit illum (Eccli. xv, 3). » Delit ergo Dominus nobis in Novo Testamento *panem arctum, et aquam brevem*. « Omnis enim lex, ut Apostolus docet in uno sermone impletur: Diliges proximum tuum sicut in ipsum (Gal. v, 14). » Quid hoc sermone brevius, in quo tota latitudo præceptorum comprehenditur? Sequitur: « Et non faciet ultra avolare doctorem tuum. » Hoc est quod ipse doctor ait: « Ecce ego vobiscum sum omnibus diebus usque ad consummationem sæculi (Matth. xxviii, 20). » Sequitur: « Et erunt oculi tui videntes præceptorem tuum. »

VERS. 21. — « Et aures tuæ audientes verbum post tergum monentis. »

In Scriptura sacra nonnunquam quod transcriptum

est, ponitur quasi futurum. Nam de Agar legimus, quia concepisse se videns despexit dominam suam. Adligente igitur eam Sarai, fugam iniiit. Cumque invenisset eam Angelus Domini in solitudine, dixit ei: Ecce concipies et paries filium (*Gen. xvi, 11*). Tale est, quod nunc propheta dicit, quia spiritu æternitatis plenus præterita simul et futura dilatato mentis oculo conspicit, atque de antiquis et novissimis velut de futuris sententiam profert, dicens homini: « Et erunt oculi tui videntes præceptorem tuum, » etc. In paradiso quippe viderunt homines præceptorem suum, quia sicut legimus: « Testamentum æternum constituit cum illis, et justitiam, et judicia sua ostendit illis, et magnalia honoris ejus vidit oculus illorum, et honorem vocis audierunt aures illorum (*Eccli. xvii, 10*). » Humanum ergo genus in faciem Deus monuit, quando in paradiso condito homini, atque in libero arbitrio stanti, quid facere, quidve non facere deberet, indixit. Sed homo in faciem Dei terga dedit, cum superbiens ejus jussa contempsit. Nec tamen superbiemtem Deus deseruit, quia ad renovandum hominem legem dedit, exhortantes angelos misit, in carne nostræ mortalitatis apparuit. Ergo post tergum stans nos admonuit, quia ad recuperationem nos gratiæ et contemptus vocavit. Bene itaque dicitur humano generi: « Et erunt oculi tui videntes præceptorem tuum, et aures tuæ audientes verbum post tergum momentis. »

Sed quod generaliter de cunctis intelligitur, hoc necesse est specialiter sentire de singulis. Quasi enim coram Deo positus quisque verba admonitionis ejus percipit, cum, priusquam peccata perpetraret, voluntatis ejus præcepta cognoscit. Adhuc enim ante faciem ejus stare est necdum cum peccando contemnere. Cum autem derelicto bono innocentiae iniquitatem eligens appetit, terga jam in ejus faciem mittit. Sed ecce adhuc et post tergum Deus subsequens monet, quia etiam post culpam ad se redire persuadet. Aversum revocat, cum commissa respicit, revertenti sinum pietatis expandit. Vocem ergo post tergum momentis audimus, si ad invitantes nos Dominum saltem post peccata revertimur. Debemus ergo pietatem vocantis erubescere, si justitiam volumus formidare, quia tanto graviori improbitate contemnitur, quanto et contemptus adhuc revocare non dedignatur. De cujus admonitione propheta subjungit:

« Hæc est via; ambulat in ea: neque ad dexteram neque ad sinistram. » Hæc admonitio Salvatoris est via justitiæ, per quam debemus incedere, nec in partem quamlibet ab ea deflectere. Exorbitat enim ad dexteram, qui de justitia superbit, vel immoderate, quod justum est, agit. Unde monet Salomon: « Nesimus nimium justi (*Eccl. vii, 17*). » Ad sinistram vero declinat, qui ad malum opus deviat. In neutram ergo patrem exorbitemus, sed recto gressu per doctrinam Salvatoris ambulemus. Post cujus adventum quia gentes fidem ejus erant

A suscepturæ, adjungit propheta, dicens gentili populo:

VERS. 22. — « Et contaminabis laminas sculptilium argenti tui, et vestimentum conflatis auri tui, et disperges ea sicut immunditiam menstruatæ: Egrederere, dices ei. »

Omnia enim idolorum ornamenta cum ipsis idolis contaminavit, atque projecit gentilitas ad Christum veniens. Unde et consequenter dicitur ordini prædicantium:

VERS. 23. — « Et dabitur semini tuo pluvia, ubicunque seminaveris in terra, et paus frugum terræ erit uberrimus et pinguis. »

Semen quippe est verbum prædicationis, pluvia, quæ desuper cadit, et semen germinare facit, irrigatio gratiæ supervenientis. Ubicunque ergo semina jecerit doctor, pluvia dabitur, quia in omni gente et natione gratia sequitur verbum prædicationis, sicut in domo Cornelii, loquente Petro, « cecidit Spiritus sanctus super omnes, qui audiebant verbum (*Act. x, 44*). » Sic enim data est semini ejus pluvia.

Quid vero per panem frugum terræ designatur nisi bonorum operum refectio de cujusmodi pane Dominus ait: « Meus cibus est, ut faciam voluntatem ejus qui misit me? (*Joan. iv, 34*) » Paus ergo frugum terræ erit uberrimus, quia fideles uberime reficientur bonis operibus. Erit et pinguis, id est spiritali pinguedine saginatus. Sequitur: « Pascetur in possessione tua in die illa agnus spatiosæ. »

VERS. 24. — « Et tauri tui, et pulli asinorum tuorum, qui operantur terram, commistum migma comedent sicut in area ventilatum est. »

Quæ est possessio fidelium nisi bonæ conversationis ager, virtutumque divitiæ? In qua scilicet possessione bonis operibus velut herbis Agnus Christi pascitur spatiosa charitatis amplitudine. Tauri vero præbent armentis ducatum. Et quid per tauros nisi rectores Ecclesiarum signantur? Quid autem per asinos nisi gentiles exprimuntur? Asinus enim vocatur populus gentilis, cum dicitur: « Cognovit bos possessorem suum, et asinus præsepe Domini sui (*supra 1, 3*). » Quid ergo per pullos asinorum nisi filios gentilium accipiemus, qui paternum errorem relinquentes venerunt ad Christum? Qui operantur terram; qui meditationibus et disciplinis suam exarant conscientiam. Migma vero est hordeum pariter cum palca. Et quid per palcam nisi superficies litteræ designatur? Quid per hordeum nisi interior intelligentia? Tauri itaque et pulli, id est prælati et subjecti in Ecclesia velut in stabulo commistum migma comedunt, quia et historicum et mysticum sensum recipiunt, et in utroque pascuntur, et comedunt illud, sicut in area ventilatum est id est in Ecclesia purgatum et examinatum. Non enim vel allegorico vel historico pascuntur intellectu, nisi prius ab errore purgetur, et auctoritate ecclesiastica probetur. Sequitur:

VERS. 25. — « Et erunt super omnem montem A excelsum, et super omnem collem elevatum rivi currentium aquarum in die interfectionis multorum, cum ceciderint turres. »

Quid per montes et colles nisi eminentiores sancti figurantur? Quid per rivos *aquarum* nisi sanctarum flumina doctrinarum? « Erunt ergo super omnem montem excelsum et super omnem collem elevatum rivi currentium aquarum, » quia qui per vitæ meritum cœlestibus propinquant, flumina doctrinæ fluentis emanant. Et quando? *In die interfectionis multorum*, id est tempore revelatæ gratiæ, quo multi gladio verbi Dei a pristina conversatione extinguuntur mortificantes membra sua, quæ sunt super terram, fornicationem, immunditiam, libidinem, et his similia.

Turres etiam cadunt, quia hi plerumque qui contra Deum obfirmati, id est in superbiam se exerant, humiliantur, dum prædicatores destruunt munitiones, et omnem altitudinem extollentem se adversus scientiam Dei.

Vel per rivos *aquarum* intellige spiritualium fluentia gratiarum. « Erunt igitur super montes et colles rivi currentium aquarum, » quia sanctus Spiritus in septem rivis gratiarum super electos inundabit. Et hoc fiet *in die interfectionis multorum*, id est in die iudicii, quando reproborum omnis multitudo peribit. *Et turres cadent*, id est omnes superbi et potentes sæculi deicientur. Sequitur :

VERS. 26. — « Et erit lux lunæ sicut lux solis et septemplex sicut lux septem dierum in die, qua alligaverit Dominus vulnus populi sui, et percussuram plagæ ejus sanaverit. »

Hoc ad litteram nostri majores acceperunt, quia finito iudicio cum fuerit cœlum novum, et terra nova, sumet luna splendorem, quem habet nunc sol, et sol *septemplex* lucebit quam nunc. Quod si in mysterio debet intelligi, *sol et luna* Christus est et Ecclesia, cujus facies in transfiguratione resplenduit sicut sol. *Erit ergo lux lunæ sicut solis*, quia « tunc justi fulgebunt sicut sol in regno Patris eorum (*Matth. xiii, 43*). » « Facies ejus resplenduit sicut sol, » *et justi fulgebunt sicut sol* (*Matth. xvii, 12*). « Erit igitur lux lunæ sicut lux solis. Scimus enim, quia cum apparuerit, similes ei erimus, quia videbimus eum sicuti est (*I Joan. iii, 2*). »

« Et lux solis erit sicut lux septem dierum, » juxta quod in Apocalypsi Joannis canitur : « Dignus est Agnus, qui occisus est, accipere virtutem, et divinitatem, et sapientiam, et fortitudinem, et honorem, et gloriam, et benedictionem (*Apoc. v, 12*). » Hi sunt *septem* dies, quorum in sua resurrectione lucem accepit Sol justitiæ, id est virtus et divinitas, sapientia et fortitudo, honor et gloria et benedictio.

Vulnus autem et *plaga populi*, in eo est, quod immortalitatem et ejus similitudinem ob peccatum protoparentis amisimus. Sed *Dominus* alligabit in resurrectione *vulnus populi sui*, quia corpora justo-

rum immortalia reddet, atque incorruptibilia et impassibilia.

Et percussuram plagæ ejus sanabit, quia menti eorum, quæ variis nunc cogitationibus dissipatur, immobilem reformabit tranquillitatem, ut semper in eodem statu permanens nunquam sibi metipsum fiat dissimilis. In qua die quando Judex venit, apte subditur :

VERS. 27. — « Ecce nomen Domini venit de longinquo, ardens furor ejus, et gravis ad portandum : labia ejus repleta sunt indignatione, et lingua ejus quasi ignis devorans. »

Nomen Domini Unigenitus est, quia dum auditur Filius, intelligitur Pater, sicut et homo proprio nomine cognoscitur. Sed *nomen Domini venit de longinquo*, quia Unigenitus Patris ad exterminandum peccatores descendit. « Longe enim a peccatoribus salus (*Psal. cxviii, 155*). » De longinquo igitur venit, cum de regione vivorum ad eos, qui longe a salute sunt, Judex accedit. Vel *de longinquo venit*, quia ut cogitationem suam impleat, ad puniendos peccatores longo post tempore descendit.

Ardens furor ejus, et gravis ad portandum, quia reprobis videbitur nimio furore succensus, dum eos jam sine venia ferire cœperit, quamvis nulla animi perturbatione moveatur, et pondus iræ ejus nemo ferre poterit. *Labia ejus impleta sunt indignatione*, quando sinistris improperat, dicens : « Esurivi, et non dedistis mihi manducare; sitiivi, et non dedistis mihi bibere, hospes eram, et non collegistis me (*Matth. xxv, 42*). » *Et lingua ejus quasi ignis devorans*, cum dixerit eis : « Discedite a me, maledicti, in ignem æternum, » etc. (*ibid., 4*). Sequitur :

VERS. 28. — « Spiritus ejus velut torrens inundans usque ad medium colli ad perdendas gentes in nihilum, et frenum erroris, quod erat in maxillis populorum. »

Sicut rapidus *torrens* cum usque ad collum cujusquam hominis excrescendo pervenerit, præcipitat eum atque submergit; sic *spiritus iræ* Judicis infideles et reprobos suffocabit, et perdet, atque *frenum erroris*, id est diabolum, qui per viam erroris infideles regebat, et ad libitum suæ voluntatis inflectebat, quemadmodum equus freno regitur. His contra reprobos ita dictis de electorum gaudio subjungitur :

VERS. 29. — « Canticum erit vobis sicut vox [*Vulg., nox*] sanctificatæ solemnitate, et lætitiæ cordis, sicut qui pergit cum tibia, ut intret in montem Domini ad fortem Israel. »

Sicut in aliqua solemnitate præcipua nil agere solet populus Dei nisi solennes decantare laudes, ita post iudicium electi complebunt Scripturam dicentem : « Beati, qui habitant in domo tua, in sæcula sæculorum laudabunt te (*Psal. lxxxiii, 5*). »

Et sicut populus Israel, quando primitias et decimas suas ad templum Domini referebat, *cum tibia*, et vocis exsultatione pergebat, quia terræ fructibus abundabat; ita sancti in die iudicii templum illud et

sanctuarium patriæ cœlestis cum omni lætitia cantantes intrabunt. « Venientes enim venient cum exultatione portantes manipulos suos (Psal. cxxv, 8).

Possumus et hoc ad tempus evangelicæ prædicationis referre sic distinguendo : « Et frenum erroris, quod erat in maxillis populorum, canticum erit vobis sicut vox sanctificatæ solemnitis. » Frenum quippe *erroris* maxillas *populorum* constrinxerat, quando idolorum errore obligata gentilitas Deo vero confessionis laudes dare nesciebat. Sed hoc ipsum erroris frenum jam nobis in *canticum*, versum est, dum dicimus : « Quoniam omnes dii gentium dæmonia : Dominus autem cœlos fecit (Psal. xcvi, 5). »

Bene autem dicitur : *Sicut vox sanctificatæ solemnitis*, quia, dum confessionis laudem Deo reddimus, in sanctificata solemnitate gaudemus. Et *lætitiæ cordis* est nobis, dum ad fidem ingredimur, sicut filius Israel erat ascendentibus ad templum Domini cum tibiis et canticis. Sed juxta superiorem sensum videamus sequentia. Sequitur :

VERS. 30. — « Et auditam faciet Dominus gloriam vocis suæ, et terrorem brachii sui ostendet in comminatione furoris, et flammæ ignis devorantis. »

Auditam faciet gloriam vocis suæ, quia omnes, qui in monumentis sunt, audient vocem Filii Dei, et procedent. *Et terrorem brachii sui*, id est virtutis suæ; *in comminatione furoris, et flammæ ignis devorantis*, quando, ut supra dictum est, reprobis dicit : « Discedite a me, maledicti, in ignem æternum (Matth. xxv, 41), » etc. Sequitur :

« Allidet in turbine et in lapide grandinis. » *Allidet reprobos in turbine*, quia tunc omnia elementa commovebuntur, *et in lapide grandinis*, quia « in circuitu ejus tempestas valida (Psal. xlix, 2). » Unde et in libro Sapientiæ dicitur : « A petrosa ira plenæ mittentur grandines. Candescet in illos aqua maris, et flumina concurrent duriter. Contra illos stabit spiritus virtutis, et tanquam turbido venti dividet illos (Sap. v, 23). » Sequitur :

VERS. 31. — « A voce enim Domini pavebit Assur virga percussus. »

VERS. 32. — « Et erit transitus virgæ fundatus, quoniam requiescere faciet Dominus super eum. »

Assur diabolus est, *virga* flagellum est, quo Judex eum feriet. Qui *percussus pavebit* a facie Domini, quia et ipse sententiam Judicis expavescet, cum puniri cœperit. *Transitus hujus virgæ* est de judicio ad infernum descensio. Accepta namque sententia mox omnes reprobi incipient torqueri, et cum ipsis tormentis in barathrum a facie Judicis corruent : Hic ergo est iste (153) virgæ transitus. Sed *transitus iste fundatus* est, id est firmus, quia nunquam supplicia flectuntur, aut mollescunt, quæ cum ipsis in infernum descendunt. Unde et additur : quia hanc virgam *requiescere faciet super Assur*, quoniam sine fine super hostem antiquum tormenta manebunt. Sequitur :

(153) Ita Cod. pro istius

PATROL. CLXXXI.

« In tympanis, et citharis, et in bellis præcipuis expugnabit eos. » Quid per *tympana* et citharas nisi plausus et lætitia sanctorum designatur? Et quid per bella præcipua nisi sententiarum in impios emissio, quibus velut gladiis feriuntur? *In tympanis ergo, et in cytharis, et in bellis præcipuis expugnabit eos* Dominus, quia sanctorum lætitiæ fugient, et per sententiam expellentur. Sequitur :

VERS. 33. — « Præparata est enim ab heri Topheth, a rege præparata, profunda, dilatata. Nutrimenta ejus ignis, et ligna multa : status Domini sicut torrens sulphuris succendens eam. »

Tophet *gehenna vivacitatis* interpretatur. Toph namque *gehenna* dicitur, Phet vivacitas. Infernus ergo *gehenna vivacitatis* appellatur, quia ibi vivax ignis est, et vermis, qui non moritur. Rex vero Christus est; *heri* autem præteritum tempus est. Topheth itaque, id est *gehenna reprobis omnibus a Rege præparata est ab heri*, id est jam olim ab exordio mundi, *profunda* nimium, ut absorbeat, *et dilatata*, ut impios omnes capere sufficiat. *Nutrimenta ejus*, id est *gehennæ, est ignis*, quia ignis ille pœnam nutrit semper, *et ligna multa*, id est reproborum corpora nutriunt eam, qui reproborum geminant ipsorum afflictionem et accendunt.

Sed et *status Domini succendit eam*. Nos quando flamus, aerem ab exterioribus introrsum trahimus, et introrsus tractum exterius reddimus, ita fit flatus. Flare ergo Deus vindictæ retributionem dicitur, quia ab exterioribus causis introrsus consilium judicii concipit, et ab interno consilio extrorsus sententiam emittit. Nam quasi flante Deo ab exterioribus aliquid introrsus trahitur, quando foris mala concipit, et intus disponit; et rursus quasi flante Deo ab interioribus spiritus extorsus emittitur, quando ab intrinsecus concepto consilio exterius judicium damnationis infertur.

Hic itaque est *status Domini gehennam succendens*, qui torrenti *sulphuris* comparatur, quia valido impetu exuberans descendit in impios fetorem cum ardore ferens. Quid enim est aliud sulphur quam fomentum ignis? Quod tamen ignem sic nutrit, ut fetorem gravissimum exhalet. *Flatus ergo Domini*, qui gehennam incendit, *sicut torrens sulphuris* est, quia emissio sententiæ Judicis, quæ peccatores punit, fetorem fetori reddit, et ardorem ardori. Qui enim ardore libidinum, cæterorum vitiorum arserunt, comburentur igni perpetuo; et qui fetore peccatorum delectati sunt, æterno fetore cruciabuntur. Postquam vero justorum futuram lætitiæ, et iniquorum damnationem propheta demonstravit, revertitur ad eos qui in Ægyptum, id est in tenebras vitæ sæcularis et infidelitatis descendunt, subjungens :

CAPUT XXXI.

VERS. 1. — Væ qui descendunt in Ægyptum auxilium in equis sperantes, et habentes fiduciam super quadrigis, quia multæ sunt; et super equi-

tlbus, quia prævalidi nimis : et non sunt confisi super sanctum Israel, et Dominum non requisierunt. »

VERS. 2. — « Ipse autem sapiens adduxit malum, et verba sua non abstulit : et consurget contra domum pessimorum, et contra auxilium operantium iniquitatem. »

Superius vero graviter eos arguit, qui in Ægypto descendunt, et væ eis minatus est, et tamen revocat eos. Nunc autem jam non revocat, sed damnationem ipsorum certam denuntiat. Equus vero, quid significet superius diximus, id est peccatum, et rationem inde protulimus, imo verba Ambrosii posuimus. Eques ergo qui super hunc equum ascendit, peccator est, qui male agendo sublimis in hoc mundo sit. Quid autem quadriga nisi pompam gloriæ sæcularis designat? Unde superbo pontifici superius dictum est : « Ibi erit currus gloriæ tuæ (supra xxii, 18). »

Qui ergo disciplinam vel fidem relinquentes in Ægyptum, id est in tenebras vitiorum sæcularium vel infidelitatis declinant, in equis, id est in peccatis : sperant, dum suas explere voluptates vel cupiditates expectant : et in quadrigis, id est in pompa gloriarum sæculi, quia multæ sunt, fiduciam habent in hoc mundo sublimari, et super equitibus, id est super potentibus sæculi peccatoribus, quia prævalidi sunt ad malum, et cæteros in iniquitate tuentur.

Sed væ fidelibus, qui talia sacre religioni præponunt confidentes in talibus, et ad ea festinantes, et non confidunt super sanctum Israel, qui est Christus, et Dominum pio studio non requirunt. Vel : Non requirunt, id est non interrogant eum, si hæc agere debeant. Ipse autem sapienti consilio malum super eos adduxit, quod non formidabant, et verba sua, quibus perditionem eis minatus fuerat, non abstulit, id est irrita non fecit, sed complevit.

Et consurget in iudicio contra domum pessimorum, id est contra generationem eorum, qui religionem abjicientes in Ægyptum vitæ sæcularis descendunt ; et contra auxilium, quod illis in malo præbent Ægyptii, id est sæculares, et infideles, qui operantur iniquitatem. Omnes enim disperdet Dominus, et qui ad malum adjuvant, et qui sic adjuvantur. Sequitur :

VERS. 3. — « Ægyptus homo, et non Deus, et equi eorum caro, et non spiritus. »

Ægyptus homo, id est Ægyptii homines sunt. « Ægyptus homo et non Deus. » — « Maledictus homo, qui confidit in homine, et ponit carnem brachium suum, et a Domino recedit cor ejus (Jer. xvii, 5). » Væ his, qui descendunt in Ægyptum. « Et equi eorum caro, et non spiritus. » Et : « Spiritus quidem promptus est, caro autem infirma (Matth. xxvi, 41). » Rursumque : « Spiritus est, qui vivificat ; caro non prodest quidquam (Joan. vi, 64). » Infirmi ergo sunt tales equi, et inutiles. Ægyptus homo, et non Deus, quia tenebræ sæcularium errorum ex homine sunt, et non ex Deo. Et equi eorum caro, et non spiritus,

quoniam peccata eorum ex carne sunt, et non ex spiritu. Sequitur :

« Et Dominus inclinabit manum suam, et corruet auxiliator, et cadet, cui præstatur auxilium, simulque omnes consumentur. » Dominus inclinabit manum suam, qua sustentabat eos, et corruet populus sæcularium et infidelium, qui ad iniquitatem declinantibus auxiliabatur ; et cadet omnis, qui in Ægyptum corde descendit, cui præbent ad nequitiam auxilium Ægyptii, simulque omnes, tormentis æternis consumentur et decipientes et decepti.

His de novissima perditione reproborum dictis, quando non invenient adiutorem, mox oraculum de primo Salvatoris adventu subjungitur, in quo pro electis contra diabolium pugnavit, atque sanguine suo redimens nos ab æterna damnatione salvavit. Ac si dicat : Vere peribunt, et liberatorem non invenient omnes, qui religionem deserentes in errorem defluunt, quia hi qui in ecclesiastica religione permanent, Domino protegente salvabuntur. Sic enim subditur :

VERS. 4. — « Quia hæc dicit Dominus ad me : Quomodo si rugiat leo, et catulus leonis super prædam suam, cum occurrerit ei multitudo pastorum, a voce eorum non formidabit, et a multitudine eorum non timebit, sic descendet Dominus exercituum, ut prælietur super montem Sion, et super collem ejus. »

VERS. 5. — « Sicut aves volantes sic proteget Dominus exercituum Jerusalem protegens et liberans, transiens et salvans. »

Nam Salvator noster leo est, de quo Salomon ait : « Leo fortissimus bestiarum ad nullius pavebit occursum (Prov. xxx, 30). » Et ipse est catulus leonis sicut ait Jacob : Juda te laudabunt fratres tui, manus tua in cervicibus inimicorum tuorum, adorabunt te filii patris tui : catulus leonis Juda (Gen. xlix, 8). » Hæc enim verba non nisi de Christo possunt intelligi, qui rugit supra prædam quam cepit, quia terribilem suæ divinitatis potentiam aperuit, dicens de ovibus suis : « Non rapiet eos quisquam de manu mea. Pater meus quod dedit mihi majus omnibus est, et nemo potest rapere de manu Patris mei. Ego et Pater unum sumus (Joan. x, 28). »

Cui occurrit multitudo pastorum synagogæ veniens eum tradente Juda comprehendere. Nam ad ejus comprehensionem venit multitudo pastorum sicut Lucas insinuat, scribens : « Dixit autem Jesus ad eos, qui venerant ad se principes sacerdotum, et magistratus templi, et seniores : quasi ad latronem existis cum gladiis et fustibus (Marc. xiv, 48). » Sed a voce eorum non formidavit et a multitudine eorum non expavit, quia juxta Joannem : « Processit, et dixit eis? Quem queritis? responderuntque ei : Jesum Nazarenum. Dixit eis Jesus : Ego sum. Ut ergo dixit eis : Ego sum, abierunt retrorsum et ceciderunt in terram (Joan. xviii, 5-7). »

Qui et præliatus est contra diabolum super montem Sion et super collem ejus, id est in domo pastorum.

Unde hic dicitur : « Sic descendet Dominus exercituum, ut prælietur super montem Sion, et super collem ejus. » Ad hoc enim descendit in mundum, ut ita præliaretur pro nobis. Sed quia solus in passione pugnavit, jam post resurrectionem solus non fuit. Comparatur enim in ascensione non avi, sed avibus, quia ipse primus in cælum volavit, et electorum animas, qui sunt ejus membra, post se volare, cum de corporibus exeunt, quotidie facit. « Ubiunque enim fuerit corpus, illic congregabuntur et aquilæ (Luc. xvii, 57), » quia ubi Redemptor noster per materiam carnis est, illuc adunantur justorum animæ.

Sed hæ volucres, id est Dominus et sancti ejus, qui jam in cælum volaverunt, protegunt Jerusalem, id est Ecclesiam, sæpius ad nos descendentes atque super nos invisibiliter volitantes. Jure igitur ait, quia « sicut aves volantes sic proteget Dominus exercituum Jerusalem. » Unde et per Moysen de eo dicitur : « Sicut aquila provocans ad volandum pullos suos et super eos volitans expandit alas suas, et assumpsit eos (Deut. xxxii, 11). » Quia enim nos parvulos, dum protegit, nutrit, et non gravi atque onerosa, sed levi et blanda protectione nos refovet, dum suas in nos misericordias exserit, quasi more avium super nos alas tendit. Qui et adversum tentationes protegit Ecclesiam, et ab adversis eam liberat, transiensque de judicio ad regnum salvat eam perpetua, veraque salute. Sequitur :

VERS. 6. — « Convertimini, sicut in profundum recesseratis, filii Israel. »

(136) Cod., *subjacet.*

Omnis qui viam vitæ deserens in peccatorum se tenebras dejicit, semetipsum quasi in foveam mergit. Unde et Jeremias, dum Judæam in iniquitatibus longa consuetudine obrutam fuisse conspiceret, in lamentis sub ejus specie semetipsum deplorat, dicens : « Lapsa est in lacum vita mea, et posuerunt lapidem super me (Thren. iii, 53). » In lacum quippe vita labitur, dum labe iniquitatis inquinatur. Lapis vero superponitur, dum etiam dura consuetudine mens in peccato devoratur, ut si velit resurgere, jam utcumque non possit, quia mole consuetudinis desuper male premitur.

Sed quia divinæ potentie subjaceret (136), et post angusta pravæ consuetudinis ad bonæ actionis amplitudinem revocaretur, bene propheta gratiam Dei prædicans populum suum hortatur ad poenitentiam dicens : « Convertimini sicut in profundum recesseratis, filii Israel. » Nam qui post iniquitatis jugum ad libertatem boni operis poenitendo reducitur, manu gratiæ exaltantis adjutus, ut in quantam peccatorum voraginem demersus fuerat, ad tantam justitiæ libertatem resurgat, iste sicut in profundum recesserat, revertitur juxta illud Apostoli : « Sicut exhibuistis membra vestra servire immunditiæ et iniquitati ad iniquitatem, ita nunc exhibete membra vestra servire justitiæ in sanctificationem (Rom. vi, 19). » Nam et hi de filiis Israel, qui Salvatorem crucifixerant, et post in eum per apostolos crediderunt, sicut in profundam recesserant, conversi sunt. Sequitur deinde gentilium conversio, cum subditur

LIBER QUINTUS.

SEQUITUR CAPUT XXXI.

VERS. 7. — « In die enim illa abjiciet vir idola argenti sui, et idola auri sui, quæ fecerunt vobis manus vestræ in peccatum. »

Hoc expositione non indiget. Sed qualiter fieri posset, ut gentiles, quos diabolus in suo captos laqueo tenebat, idola desererent adjungitur :

VERS. 8. — « Et cadet Assur in gladio non viri, et gladius non hominis vorabit eum, et fugiet non a facie gladii : et juvenes ejus vectigales erunt. »

VERS. 9. — « Et fortitudo ejus a terrore transibit, et pavebit, fugientes principes ejus. »

Assur namque Satanas est, qui cadit in gladio non viri, sed Dei, quia non humanæ, sed divinæ potestatis est tantum adversarium dejicere. Nam Dominus Jesus per mortem destruxit eum, qui habebat mortis imperium, id est diabolus. Cum autem dicit propheta, quia « cadet Assur in gladio non viri, et gladius non hominis vorabit eum, » nequaquam Redemptorem nostrum negat hominem esse, qui et Deus est, sed Apostolo consonat dicenti : « Paulus apostolus non ab hominibus, neque per hominem,

C sed per Jesum Christum (Gal. i, 4). » Itaque cadet Assur non gladio viri, sed triumpho Christi, et fugiet non a facie gladii, sed a facie crucis Domini.

Et juvenes ejus, id est hi, qui ad peccandum alacres erant et fortes, erunt vectigales, id est jugo Christi se subjicientes, humiliter ei servient. Et fortitudo ejus, qua gentes premebat, transibit fugiens de loco in locum, et postea de mundo a facie terroris prædicatorum Christi. Et principes ejus, id est dæmones pavebunt fugientes. Fugato itaque diabolo cum satellitibus suis de Christi regno, et apostolorum principatu subditur :

« Dixit Dominus, cujus ignis est in Sion, et caminus ejus in Jerusalem. »

CAPUT XXXII.

D VERS. 1. — « Ecce in justitia regnabit rex, et principes in judicio præerunt. »

Sion autem, quæ dicitur specula, præsentem designat Ecclesiam, quæ in arce mentis adversus dæmonum insidias vigilat, et cœlestia, licet per imaginem, contemplatur gaudia. Jerusalem vero, quæ visio pacis interpretatur, illa est beatorum in

cœlis gloria, ubi pax regnat et securitas. *Ignis autem et caminus* Dei incendium charitatis ejus est. Sed considerandum est quia ignis parvus esse potest in comparatione camini. Solet enim *caminus* ingenti semper exuberare incendio. Quia igitur electorum corda nunc ignem divini amoris concipiunt, sed in illo beatitudinis regno valde copiosius eodem igne replentur, *ignis ejus est in Sion, et caminus ejus in Jerusalem*. Tantum quippe distat, et multum amplius inter illum charitatis ardorem, quem hic habent electi, et eum, quem habituri sunt in regno cœlorum Deo conjuncti, quantum inter exiguum igniculum differt et ingentem caminum. Ideirco autem ignis mentionem præmisit, cum de Christi regno locuturus esset, quia Christus in eorum solummodo cordibus regnat, in quibus ignis iste dilectionis est. « Si quis enim spiritum Christi non habet, hic non est ejus (*Rom. viii, 9*). » *Ecce, inquit, in justitia regnabit rex Christus, expulso Satana, qui in iniquitate tyrannidem exercebat. Et apostoli principes in judicio præerunt, quia principes Assur in fugam conversi sunt, qui sine judicio dominari querebant. Sequitur*

VERS. 2. — « Et erit vir, sicut qui a vento absconditur, et celat se a tempestate, sicut rivi aquarum in siti et umbra petræ prominentis in terra deserta.

*Vir quisque, id est in fide viriliter agens, erit in Ecclesia, sicut qui absconditur a vento et celat se a tempestate, quoniam sub divina protectione tutus erit a vento flatus dæmonum, et a tempestate tribulationis, ut dicat de Domino : « Quoniam abscondit me in tabernaculo suo in die mala, protexit me in abscondito tabernaculi sui (*Psal. xxvi, 5*). »*

*Et erit sicut rivi aquarum in siti, quia « flumina de ventre ejus fluent aquæ vivæ (*Joan. vii, 38*), » quæ propinabit sitientibus proximis. Erit etiam sicut umbra petræ prominentis in terra deserta, ut ad eum confugiant, qui tribulationum æstu fatigantur. Possumus per terram sæculi hujus eremum intelligere : « Petra autem erat Christus (*I Cor. x, 4*). » Per umbram petræ imitatio Christi designatur, quia sicut umbra secundum qualitatem corporis ducitur; sic vita justorum de specie imitationis ejus exprimitur. *Erit ergo vir sicut umbra prominentis petræ in terra deserta, quia sanctus quisque ad sui Redemptoris similitudinem sublimis et robustus fiet, atque conspicuus in medio nationis pravæ et perversæ. Rursum de his, qui Christum in carne visuri erant et audituri, subditur :**

VERS. 3. — « Non caligabunt oculi videntium, et aures audientium diligenter auscultabunt. »

Videntes enim et audientes hic appellantur. quibus dictum est : « Vestri autem beati oculi, qui vident, et aures, quæ audiunt. Amen quippe dico vobis : Quia multi prophetæ et justii cupierunt videre, quæ videtis, et non viderunt : et audire, quæ auditis, et non audierunt (*Matth. xiii, 16*). » Sed horum oculi non caligaverunt, et aures eorum diligen-

ter auscultaverunt, sicut dictum est eis : « Vobis datum est nosse mysterium regni Dei, cæters autem in parabolis, ut videntes non videant, et audientes non intelligant (*Luc. viii, 10*). » Exponebat enim eis Dominus seorsum omnia, quæ loquebatur ad turbas in parabolis, de quibus et subditur :

VERS. 4. — « Et cor stultorum intelliget scientiam, et lingua balborum velociter loquetur et plane. »

Quid enim *stultorum et balborum* appellatione nisi simplices et illitteratos designat piscatores, quos elegit Dominus in apostolos? Nam « quæ stulta sunt mundi, elegit Deus, ut confundat sapientes, et infirma mundi elegit Deus, ut confundat fortia (*I Cor. 1, 27*). » Sed horum *cor* intellexit scientiam, et *lingua* eorum velociter et plane locuta est, quia Dominus « aperuit eis sensum, ut intelligerent Scripturas (*Luc. xxiv, 45*), » et accepto Spiritu sancto, « loquebantur variis linguis magnalia Dei (*Act. 11, 41*). » Sed his in tantam auctoritatem erectis doctores Synagogæ confutati sunt atque dejecti. Nam sequitur :

VERS. 5. — « Non vocabitur ultra is, qui insipiens est, princeps : neque fraudulentus appellabitur major. »

Quis enim est *insipiens et fraudulentus* nisi scribæ et pharisæi, et principes sacerdotum, qui sapientiam Dei, quæ est Christus, respicientes, semper in eum fraudes et insidias moliti sunt; sed isti jam in populo Dei non vocantur *principes* et majores, quia regi Christo servire noluerunt. Quorum adhuc perversitas subditur :

VERS. 6. — « Stultus enim fatua loquetur, et cor ejus faciet iniquitatem, ut perficiat simulationem, et loquatur ad Dominum fraudulenter, ut vacuum faciat animam esurientis, et potum sitienti auferat. »

*Stultus enim, ut diximus, vocatur conventus eorum, quibus ait Dominus : « Væ vobis, duces cæci, qui dicitis : Quicumque juraverit in templo, nihil est; qui autem juraverit in auro templi, debitor est. Stulti et cæci! Quid enim majus est aurum aut templum, quod sanctificat aurum? (*Matth. xxiii, 16*). » Hic ergo stultus fatua de Domino locutus est dicens : « Non est hic homo a Deo, qui Sabbatum non custodit (*Joan. ix, 16*). » Et : « Quomodo potest homo peccator hæc signa facere? » (*ibid.*)*

*Et cor ejus fecit iniquitatem, quia, cum dixisset paralytico : « Confide, filii, remittuntur tibi peccata tua (*Matth. ix, 2*), » ecce quidam de scribis dixerunt intra se : « Hic blasphematur (*ibid. 3*); » et mox audierunt : « Ut quid cogitatis mala in cordibus vestris? » (*ibid. 4*). Cor stulti hujus fecit iniquitatem, ut perficeret simulationem, et loqueretur ad Dominum fraudulenter, quando principes sacerdotum et scribæ miserunt insidiatores, qui se justos simularent, et caperent eum in sermone, et traderent eum principatui et potestati præsidis, et interrogaverunt illum dicentes : « Magister scimus quia*

recte dicis et doces, et non accipis personam, sed in veritate viam Dei doces : licet nobis dare tributum Cæsari an non? » (*Matth.* xii, 16.) Considerans autem dolum illorum dixit ad eos : « Quid mentatis? (*ibid.* 18.)

Sed et animam esurientis plebis vacuum facere conabatur stultus iste, et potum Dominicæ prædicationis auferre sitiienti populo. Omnis enim populus suspensus erat audiens illum; Pharisei autem et Scribæ dicebant : « Dæmonium habet, et insanit, quid eum auditis? » (*Joan.* xi, 20.) Unde et dictum est eis : « Væ vobis, Scribæ et Pharisei hypocritæ, qui clauditis regnum cælorum ante homines : vos non intratis nec introeuntes sinitis intrare (*Matth.* xxiii, 13.) » De quibus et subditur :

VERS. 7. — « Fraudulenti vasa pessima sunt. Ipse enim cogitationes concinnavit ad perdendos mites in sermone mendacii, cum loqueretur pauper iudicium. »

VERS. 8. — Princeps vero ea, quæ digna sunt principe, cogitavit, et ipse super duces stabit. »

Fraudulentus enim cœtus est Scribarum, et Phariseorum atque sacerdotum, quorum vasa sunt corda hominum, quibus malitiam suam insuderunt. Hic ergo fraudulentus cogitationes concinnavit, id est præparavit, ad perdendos mites, id est ad seducendos per vasa sua simplices in sermone mendacii, quando principes sacerdotum congregati cum senioribus accepto consilio pecuniam copiosam dederunt militibus dicentes : « Dicite quia discipuli ejus nocte venerunt, et furati sunt eum vobis dormientibus (*Matth.* xxviii, 13.)

« Pauper vero qui, cum esset dives, pro nobis factus est egenus, loquebatur iudicium (*II Cor.* viii, 9), » dicens : « Si non facio opera Patris mei, nolite credere mihi ; si autem facio, et si non vultis mihi credere, operibus credite (*Joan.* x, 37). » Et de adultera : « Qui sine peccato est vestrum, prior in illam lapidem mittat (*Joan.* viii, 7), » et his similia. Fraudulento autem cogitante perditionem princeps noster Christus ea, quæ digna sunt principe, cogitavit, quia morte victa resurgens ait discipulis suis : « Data est mihi omnis potestas in cælo et in terra. Euntes ergo docete omnes gentes baptizantes eos in nomine Patris, et Filii, et Spiritus sancti, docentes eos servare omnia, quæcunque mandavi vobis (*Matth.* xxviii, 18). » Et ipse super duces Ecclesiarum stat, sicut et illic adjunxit : « Ecce ego vobiscum sum omnibus diebus usque ad consummationem sæculi (*ibid.* 20). » Sequitur :

VERS. 9. — « Mulieres opulentæ, surgite, et audite vocem meam : filix confidentes, percipite auribus eloquium meum. »

VERS. 10. — « Post dies enim et annum, vos conturbamini confidentes. Consummata est enim vindemia. collectio ultra non veniet. »

VERS. 11. — « Obstupescite, opulentæ; conturbamini, confidentes : exuite vos, et confundimini, accingite lumbos vestros super ubera (137). »

VERS. 12. — « Plangite super regione desiderabili, super vinea fertili. »

Mulier in sacro eloquio aut pro sexu ponitur, aut pro infirmitate. Pro sexu, ut ibi : « Misit Deus Filium suum factum ex muliere (*Gal.* iv, 4). » Pro infirmitate, ut quidam sapiens ait : « Melior est iniquitas viri quam beneficiens mulier (*Eccli.* xlii, 14.) » Vir enim fortis quilibet et discretus vocatur; mulier vero mens infirma vel indiscreta accipitur. Et sæpe contingit, ut etiam discretus quisque subito labatur in culpam, atque indiscretus alius et infirmus bonam exhibeat operationem. Sed is, qui indiscretus et infirmus est, nonnunquam, quod bene egerit, amplius elevatur, atque gravius in culpam cadit; discretus vero quisque etiam ex eo quod se male egisse intelligit, ad discretionis regulam arctius reducitur; et inde altius ad justitiam proficit, unde ad tempus a justitia cecidisse videbatur. Recte ergo dicitur : « Melior est iniquitas viri quam beneficiens mulier, » quia nonnunquam etiam culpa fortium virtutis occasio fit, et virtus infirmorum occasio peccati.

Hoc itaque loco mulierum nomine quid nisi infirmitas mentium figuratur? Ad has ergo mulieres, id est ad infirmas animas sermo propheticus dirigitur. Unde et opulentas atque confidentes nuncupat, quia se virtutum operibus refertas æstimant, et velut de propria confidunt justitia. Sunt enim plerique religionum professores, quos nunc sermo divinus sub mulierum appellatione denotat, qui se sanctorum arbitrantur, quia exteriorem mutaverunt habitum, et in nullis exercentur virtutibus. Quos a sui torporis ignavia excitare volens : « Surgite, inquit, et audite vocem meam. » Ille enim surgit audire vocem prophetæ, qui negligentiam atque desidiam relinquens intento corde sacra eloquia audit paratus ad faciendum.

« Post dies, inquit, et annum conturbabimini. » Quid per dies, quod infinite ponit, nisi præsentis vitæ tempus exprimitur, cujus dierum numerus est incertus? Et quid per annum designatur nisi spatium illud, quod ab unius cujusque obitu protenditur usque ad resurrectionem omnium, de cujusmodi anno per Psalmistam dicitur : « Benedices coronæ anni benignitatis tuæ? » (*Psal.* lxiiv, 12.) Post dies igitur et annum, id est in die iudicii vos conturbamini, qui nunc quasi de justitiæ merito confiditis. Consummata est enim tunc vindemia, id est genus humanum in die illa penitus abscissum est de sæculo. Collectio ultra non veniet, id est amplius nulli nascentur homines in terra, qui per mortem inde colligantur. Dum ergo licet poenitentiam agere, nunc obstupescite futuram iniquorum damnationem, quæ putatis vos spiritualiter esse opulentas conside-

(137) Alias, lumb. vestros. Super ubera plangite, etc.

rantes quia « horrendum est incidere in manus Dei A viventis (Hebr. x, 31). » Et conturbamini ad poenitentiam salubri metu concussæ, quæ velut de sanctitate confiditis. *Exuite vos et confundimini*, id est nolite in vobis exteriorem, quæ patet hominibus, quasi religiosam attendere conversationem, sed quales sub illius tegumento sitis, inspicite, et de interioris hominis deformitate erubescite.

« Accingite lumbos vestros super ubera, » id est carnis luxuriam in pectoris cogitationibus cohibete, et reprimite, ut non solum carne, sed et corde castitatem servetis. In lumbis quippe luxuria est, in uberibus vero cogitationes designantur. Accingit igitur *lumbos super ubera*, qui luxuriam in cogitationibus coarctat per continentiam ut neque pectus per imundas cogitationes spargatur.

Dehinc *plangite*, inquit, *super regionem*, etc. Quid per *regionem desiderabilem* nisi multitudo religiosorum vel vita eorum designatur? Unde per Malachiam Dominus populo suo promittit, dicens: « Eritis enim vos terra desiderabilis (Malach. III, 42). » Et quid per *vineam fertilem* nisi plebs fidelium vel actio eorum exprimitur ferens botros spiritualium fructuum: « Vineam enim Domini exercituum domus Israel est (Isa. v, 7). » Indicit ergo planctum *super regionem desiderabilem, et super vineam fertilem*, quia multorum jam vita religiosorum gratiam religionis amittit; et qui spirituales fructus piæ conversationis facere solebant, jam lamentabiles actus proferunt, atque succrescentibus vitiorum sentibus C sit eorum vita quasi desertum. Unde et sequitur:

VERS. 13. — « Super humum populi mei spinæ et vepres ascendunt: quanto magis super omnes domos gaudii civitatis exsultantis? »

Humum quippe *populi sui* Dominus electorum omnium mentem vocat, super quam spinas et vepres ascendere prohibet, quia nec ipsam quoque esse absque punctationibus vitiorum videt. Domus vero *gaudii civitatis exsultantis* mens pravorum est, quæ, dum ventura supplicia conspiciere negligit, in carnis voluptate se deserens inaniter hilarescit. Ait ergo: « Super humum populi mei spinæ et vepres ascendunt: quanto magis super omnes domos gaudii civitatis exsultantis? » Ac si aperte dicat: Si D et illorum mentem vitia deprimunt, qui se pro cœlestibus desideriiis affigunt, quibus culpis substrati sunt, qui sine ulla formidine se in carnis voluptate derelinquunt. Sequitur:

VERS. 14. — « Domus enim dimissa est, multitudo urbis relicta est. »

Domus, id est mens iniquorum *dimissa est* ab eo, qui ait: « Dimisi eos secundum desideria cordis eorum (Psal. LXXX, 13). » Qui et multitudinem urbis reliquit, quia humani generis partem, quæ latam viam ingreditur, quæ per abundantiam iniquitatis multa est, a regni sui sorte reprobavit, et in imundis spiritibus dereliquit. Unde et subditur: « Tenebræ et palpato factæ sunt super speluncas

usque in æternum. Gaudium onagrorum pascua gregum. »

VERS. 15. — « Donec effundatur super nos spiritus de excelso. »

Quid enim per *speluncas* nisi profundas et horridas iniquorum mentes in deserto hujus sæculi designat, quibus supra dixit: « Væ qui profundi estis corde, ut a Domino abscondatis consilium (supra XXIX, 15). » Onager vero dicitur asinus agrestis. Et quid per onagros nisi fortes ac superbi principes vel magistri infidelium exprimuntur, qui velut onagri in solitudine vagabantur, dum propriæ voluntatis arbitrium inter infideles sequerentur? Quid autem per greges bestiarum nisi multitudo figuratur vitiorum et dæmonum? *Domus ergo et urbis B multitudo relicta* versa est in solitudinem, et super solitudinis hujus *speluncas*, id est super profundas peccantium mentes *factæ sunt tenebræ*, quia lumen veritatis peccando perdiderunt.

Sed *et palpato* facta est ibi, id est cæca infidelitatis actio, quia sicut quis positus in tenebris huc illucque palpat, sic infideles et errantes nesciebant, quo se deberent vertere, vel quid agere. Et hoc factum est *usque in æternum* super eorum mentes, qui sine fine mortui sunt.

Et factum est *gaudium onagrorum* ibi, quia in eis, quos Deus reliquerat, gavisus sunt superbi doctores errorum, et proprii cordis sectatores. *Greges* quoque bestiarum agrestium, id est dæmonum et vitiorum habuerunt ibi *pascua*, usque dum *Spiritus sanctus* super apostolos plebemque credentium effunderetur, qui gentes ad Dominum revocarent. Unde et apte subjunctum est: « Et erit desertum in Charmel, et Charmel in saltum reputabitur. »

VERS. 16. — « Et habitabit in solitudine iudicium, et justitia in Charmel sedebit. »

Desertum quippe vocat multitudinem urbis derelictam, id est gentilitatem, in qua tenebræ et palpato fuerat. *Charmel* vero dicitur *molle* vel *tere-rum*, sive *cognitio circumcisionis*, atque Judaicam populum, cujus cor a fide mollium fuerat, et carnis circumcisionem noverat. Effuso ergo Spiritu sancto *desertum* versum est in *Charmel*, quia gentilis ex naturali excisus est oleastro, et contra naturam in-desertus est in bonam olivam patriarcharum. *Desertum in Charmel* est conversum, quia cor derelictæ gentilitatis emollium est ad fidem, et spiritaliter circumcisum. *Et Charmel in saltum* reputatus est, quia populus Judæorum in infidelitatis solitudinem versus est. In *solitudine* vero gentilitatis habitat *iudicium* rectæ discretionis, quia fideles ex gentibus omnia jam, quæ facturi sunt, æquitatis iudicio prius examinant; *et in Charmel* ejusdem conversæ gentilitatis *sedet* atque regnat *justitia* justæ conversationis. Sequitur:

VERS. 17. — « Et erit opus justitiæ pax, et cultus justitiæ silentium, et securitas usque in sempiternum. »

Antiquitus fuit *opus justitiæ*, ut sancti suos refo-

rident inimicos. Nunc autem est *opus justitiæ pax*, quia, qui neminem lædit, sed omnes sicut se ipsum diligit, et prout vult, ut faciant sibi homines bona, et ipse facit eis similiter, iste justitiam operatur.

Et *cultus justitiæ silentium* est, quia qui justitiam colere desiderat, necesse est ut ori suo custodiam ponat. Nam mentis justitia desolatur, quando ab immoderata locutione non parcitur. Ille etiam silet, qui nullis pravæ actionis clamoribus perstrepat. Et hoc silentium est cultus justitiæ, quia per hoc, quod se quis a peccato custodit, etiam justitiam colit.

Vel, « *pax*, quæ exsuperat omnem sensum (*Philip. iv, 7*), » erit *opus justitiæ* sanctorum; et *cultus justitiæ silentium*, ut non in multiloquio Judæorum, sed in brevitate fidei adorent Dominum. Mira autem est *securitas*, cordis conscientiam habere bonam. Ex qua videlicet securitate etiam perennis nascitur requies, quia a bona et tranquilla cogitatione ad gaudia æterna transitur. Sequitur :

VERS. 18. — « Et sedebit populus meus in pulchritudine pacis, et in tabernaculo fiduciæ, et in requie opulenta. »

Populus Dei sedet in *pulchritudine pacis*, quia ipse « inhabitare facit unius moris in domo (*Psal. lxxvii, 7*), ut « multitudinis credentium sit cor unum, et anima una (*Act. iv, 32*). » Pulchritudo namque pacis est, ut id ipsum dicant omnes et non sint in eis schismata, sint autem perfecti in eodem sensu, et in eadem scientia.

Tabernaculum vero *fiduciæ* vel mansiones cœnobica sunt religiosorum, vel conventus et ordines eorum in Christo confidentium. Qui sedent in *requie opulenta*, dum hujus sæculi nihil appetunt, et virtutum opulenta ditantur interioribus. Hæc licet in eis, qui sub regula in monasteriis usque hodie degunt, venerabiliter impleantur, maxime tamen facta sunt in primitiva Ecclesia. Unde mox de illis Judæis, qui credere noluerunt, sententia subditur dicens :

VERS. 19. — « Grando autem in descensione saltus, et humilitate humiliabitur civitas. »

Saltus quippe vocatur populus Judæorum, quia Charnel in saltum reputatus est. Sed quæ est descensio *saltus* hujus nisi dejectio elationis ejus? Cujus descensionem *grando* vehementissimæ tempestatis per Romanos incubuit, et *civitas* Jerusalem humiliata est, et ad solum usque destructa. Sed quia sancti tunc prædicatores verbum vitæ per totum orbem disseminabant, sequitur :

VERS. 20. — « Beati qui seminatis super omnes aquas immittentes pedem bovis et asini. »

Aquas namque populos esse docet angelus in Apocalypsi Joannis; bos autem et asinus Judaicus atque gentilis populus est, quia « cognovit bos possessorem suum, et asinus præsepe domini sui (*supra 1, 3*). » Itaque *super omnes aquas* seminare est cunctis populis fructuosa vitæ verba prædicare; *pedem vero bovis et asini* immittere est vias Israeli-tæ ac gentilis populi per præceptorum cœlestium

vincula religare. Quia vero prædicationem infideles alii quidem persecuti sunt, alii vero contempserunt, idonee subditur :

CAPUT XXXIII.

VERS. 1. — « Væ qui prædaris, nonne et ipse prædaberis? Et qui spernis, nonne et ipse sperneris? Cum consummaveris deprædationem, deprædaberis : cum fatigatus desieris contemnere, contemneris. »

Prædabantur enim, qui martyres ad supplicia trahebant, atque bona eorum diripiebant. Spernebant autem, qui in fine de eis dicturi sunt : « Illi sunt, quos aliquando habuimus in derisum, et in similitudinem improperii. Nos insensati vitam illorum æstimabamus insaniam, et finem illorum sine honore (*Sap. v, 3*). » Sed væ istis, quia jam prædati sunt eos maligni spiritus, et opprobrium sustinent, quod nunquam delebitur. Et justum valde est ut, quicumque prædat, et ipse præda fiat, et qui spernit, et ipse spernatur. « Eadem quippe mensura qua mensi fueritis, remetietur vobis (*Matth. vii, 2*). »

Potest et de modernis raptoribus atque contemptoribus hæc sententia intelligi. Qui enim aliena rapit, et ipse in exitu suo rapietur; et qui bona spernit, erit decidens sine honore, et in contumelia inter mortuos in perpetuum. Sequitur :

VERS. 2. — « Domine, miserere nostri. Te enim expectavimus : estc brachium nostrum in mane, et salus nostra in tempore tribulationis. »

Hæc vox fidelium Hebræorum est Christum in adventu primo suscipientium. Occurrentes quippe ei dicunt : « Domine, miserere nostri, » etc. *Mane* autem fit in nobis, quando cognitione veritatis irradiari cœperimus et illustrari fulgore justitiæ, qui velut nocte deprimebamur obscuritatis, erroris et culpæ. Ubi vero tenebris errorum exuimur, necesse jam est, ut contra diaboli suggestiones reluctemur. Sed nisi per Dei adjutorium eas vincere nequimus. Quod si mentes nostras sibi per consensum subjicere Satanas non valuerit, mox adversa foris contra nos excitare molitur. Unde nunc isti, postquam Christum susceperunt, aiunt : *Esto brachium nostrum in mane*, id est fortitudo nostra adversus Satanæ impugnationes internas, id est in exordio conversionis nostræ; et *salus nostra in tempore tribulationis*, quam passuri sumus exterius, ubi vinci nequiverimus intrinsicis. Sic enim factum est apostolis. Nam cum principibus sacerdotum non acquieverunt præcipientibus, « ne loquerentur in nomine Jesu (*Act. iv, 18*), » gravissimas passi sunt tribulationes. Similiter et cæteris fidelibus contingere solet. Sequitur :

VERS. 3. — « A voce angeli fugerunt populi, et ab exaltatione tua dispersæ sunt gentes. »

Quid per hunc *angelum* nisi chorus exprimitur apostolorum? A *cujus voce* fugerunt populi (*Act. iii, 41*), quia misso Spiritu sancto per eorum prædicationem tria millia crediderunt ex his, qui ad solemnitatem convenerant, ac deinceps ex eisdem Ju-

dæis multa millia. *Fugerunt enim Hebræi, qui cre-*
diderunt, quoniam evadere supplicia æterna, quæ
propter decem Salvatoris meruerant quæsierunt.
Sed et gentes ab ejus exaltatione dispersæ sunt, quia
a tempore ascensionis illius alii cœperunt ex genti-
lus ad fidem venire, et alii pertinacius in infide-
litate persistere. De Judæis vero, qui credere no-
luerunt subditur :

VERS. 4. — « Et congregabuntur spolia vestra,
 sicut colligitur bruchus, velut cum fossæ plenæ
 fuerint de eo. »

Quid enim *spolia*, eorum appellat nisi corpora
 eorum? Caro enim indumentum est animæ. Solent
 enim homines multitudinem bruchi de agris collige-
 re, quia fruges devorat, et ex eo fossas implere,
 humoque superjecto necare. Sic in obsidione Je-
 rusalem collecta sunt corpora eorum, qui fame, gla-
 dio et pestilentia mortui sunt. Vel *spolia* substantias
 eorum intellige, quas Romani velut multitudinem
 bruchi collegerunt absque numero. Sequitur :

VERS. 5. — « Magnificatus est Dominus, quoniam
 habitavit in excelso : implevit Sion iudicio et justitia. »

VERS. 6. — « Et erit fides in temporibus suis. »

Dominus post ascensionem suam *magnificatus est*
 in mundo per apostolos, *quoniam habitavit in excelso*
 cœlorum habitaculo, qui cum hominibus in terra ha-
 bitaverat. *Implevit Sion*, id est Ecclesiam *iudicio et*
justitia, ut omnia examinando probet, et quod bo-
 num et justum est, teneat.

Tempora autem fidei sunt, de quibus ait Aposto-
 lus : « Priusquam veniret fides, sub lege custodieba-
 mur conclusi in eam fidem, quæ revelanda erat.
 Itaque lex pædagogus noster fuit in Jesu Christo,
 ut ex fide justificemur. At ubi venit fides, jam non
 sumus sub pædago (Gal. III, 25). » Nunc ergo
 sunt tempora fidei, quia nunc Deus justificat gentes
 per fidem sine operibus legis, et in toto orbe fides
 fructificat. Bene itaque dictum est : « Quoniam erit
 fides in temporibus suis. » Sequitur :

« Divitiæ salutis sapientia et scientia : timor Do-
 mini thesaurus ejus. »

Distat enim ab æternorum contemplatione actio,
 quæ bene utitur temporalibus rebus, et illa *sapientia*,
 hæc *scientia* deputatur. Nam scriptum est in
 libro Job : « Ecce pietas est sapientia : abstinere
 autem a malis scientia (Job xxviii, 28). » In hac
 differentia intelligendum est ad contemplationem
 sapientiam, et ad actionem scientiam pertinere. Ita-
 que *sapientia et scientia divitiæ sunt salutis*, quia
 per hoc ad æternam salutem pervenit Ecclesia,
 quod et cœlestium contemplatione jam aliquatenus
 pascitur, et temporalibus atque terrenis bene uti-
 tur. De cujusmodi operibus et Apostolus ait disci-
 pulis : « Gratias ago Deo meo semper pro vobis in
 gratia Dei, quæ data est vobis in Christo Jesu : quia
 in omnibus divites facti estis in illo in omni verbo
 et in omni scientia (I Cor. I, 4). »

Sed et *timor Domini* castus, timor sobrius, timor
 securus, *ipse est thesaurus ejus*, non timor iste ser-

vilis, quem foras mittit charitas, sed timor ille san-
 ctus, qui permanet in sæculum sæculi, id est quem
 gignit charitas. Aliter enim timet conjugem uxor
 amans, et aliter timet Dominum ancilla peccans.
 Sic ergo sponsa Christi Ecclesia, abstracto timore le-
 gis, repleta est timore læto, quatenus Christum et
 amans timeat, et timens amet.

Et timor ille locuples *thesaurus* est, ut quicumque
 hunc habuerit, omnes sæculi divitias parvipendat.
 His itaque salutaribus divitiis, id est scientia, et sa-
 pientia, et timore rex noster suos venit ditare mili-
 tes, « qui propter nos egenus factus est, cum esset
 dives, ut illius inopia nos divites essemus (II Cor.
 VIII, 9). » Sed quia Judæi noluerunt opes istas ac-
 cipere, dedit eas gentibus. Unde sequitur :

B VERS. 7. — « Ecce videntes clamabunt foris, an-
 geli pacis amare sœbunt. »

Videntes enim sunt, quibus dictum est : « Beati
 oculi, qui vident, quæ vos videtis (Matth. XIII, 16). »
 Et ipsi sunt *angeli pacis* annuntiantes mundo recon-
 ciliationem, quia scriptum est de eis : Quam speciosi
 pedes evangelizantium pacem, evangelizantium bona
 (Rom. X, 15). » Videntes ergo clamaverunt *foris*,
 id est extra Judæam, quoniam apostoli prædicave-
 runt gentibus usque ad fines terræ.

Et *angeli pacis fleverunt amare*, quia ipsi apostoli,
 qui gentibus pacem annuntiabant, iram Dei super
 Judæos manere lugebant. Unde quidam ex ipsis ait:
 « Tristitia est mihi magna, et continuus dolor cordi
 meo. Optabam enim ego ipse anathema esse Christo
 pro fratribus meis, qui sunt cognati mei secundum
 carnem, qui sunt Israelitæ (Rom. IX, 3). » De quo-
 rum Israelitarum destructione subditur :

VERS. 8. — « Dissipatæ sunt viæ, cessavit transi-
 ens per semitam, irritum factum est pactum, pro-
 jecit civitates, non reputavit homines. »

VERS. 9. — « Luxit, et elanguit terra, confusus
 est Libanus, et obsorduit; et factus est Saron sicut
 desertum, et concussa est Basan et Carmelus. »

Dissipatæ sunt viæ in terra Judæorum vastata per
 Romanos omni regione. *Cessavit ibi etiam per soli-*
tudinis semitam transiens, quia sine habitatore re-
 licta est terra. *Irritum enim factum est pactum*,
 quod Dominus promiserat, dicens : « Ponam locum
 populo meo Israel, et plantabo eum et habitabit in
 eo, et non turbabitur amplius, nec addent filii ini-
 quitatis, ut affligant eum, sicut prius ex die, qua
 constitui iudices super populum meum Israel (II
 Reg. VII, 10). » Hoc ergo *pactum* Judæis factum est
irritum, quia Dominus *projecit eorum civitates*, et
 quasi in nihilum reputavit eos. Et inter hæc *luxit et*
elanguit terra eorum.

Quid vero per Libanum debet intelligi nisi tem-
 plum, quod erat in Jerusalem? Unde per Zachariam
 dictum est : « Aperi, Libane, portas tuas, et come-
 dat ignis cedros tuas (Zach. XI, 1). » *Libanus ergo*
confusus est, et obsorduit, quia templum Judæorum
 ab alienigenis contaminatum est et exhonorum
 imo destructum. *Saron* vero provincia est inter

Joppen et Lyddam, quæ per Romanos facta est sicut desertum. Basan quoque trans Jordanem concussa est per eos, et Carmelus in possessione Juda. Quia vero Judæi propter necem Salvatoris hæc omnia passuri erant, ipse autem morte sua mortem destructurus erat, moxque resurrecturus, et in æternum jam regnaturus, apte sequitur :

VERS. 10. — « Nunc exsurgam, dicit Dominus, nunc exallabor, et nunc sublimabor. »

Nunc exsurgam a mortuis, nunc exallabor in cælo, nunc sublimabor in regno. Et quia contra prædicatores resurrectionis ejus principes Judæorum igne livoris erant inflammandi, recte subjungitur :

VERS. 11. — « Concipietis ardorem, parietis stipulam : Spiritus vester ut ignis vorabit vos. »

Concipietis ardorem invidiæ contra apostolos, o principes sacerdotum et Pharisei ac seniores. Parietis stipulam, id est opus flammis ultricibus dignum. Stipula enim opus est, quod in die judicii comburetur sicut Apostolus ait : « Fundamentum aliud nemo potest ponere præter id quod positum est, quod est Christus Jesus. Si quis autem superædificat super fundamentum hoc aurum et argentum, lapides pretiosos, ligna, fenum, stipulam, uniuscujusque opus manifestum erit; dies enim Domini declarabit, quia in igne revelabitur, et uniuscujusque opus quale sit, ignis probavit. Si cuius opus manserit, quod superædificavit, mercedem accipiet : si cuius opus arserit, detrimentum patietur (I Cor. iii, 11-16). » Parietis ergo, inquit, stipulam, id est opus, quod in die illa cremabitur. Spiritus vester ut ignis vorabit vos, quia sic interius vastabimini ardore malitiæ vestræ, sicut postmodum vastandi estis foris igne gehennæ. Sed quia et subjecti concremandi erant hoc igne livoris, qui prius in corde præpositorum arsit, sequitur :

VERS. 12. — « Et erunt populi quasi de incendio cinis. »

Omnes enim combusti sunt igne malitiæ quasi zelo legis persequentes apostolos prædicatores gratiæ. Et quia simul in Jerusalem obsidentibus Romanis erant perituri, congrue subditur :

« Spinæ congregatæ igni comburentur. »

Spinæ enim sunt, de quibus in libro Regum David loquitur : « Prævaricatores autem quasi spinæ evellentur universi, qui non tolluntur manibus et si quis eas tangere voluerit, armabitur ferro, et ligno lanceato, ignique succensæ comburentur usque ad nihilum (II Reg. xxiii, 6). » Quid autem sit ignis docet apud Ezechielem Dominus, qui, cum dixisset ad Jerusalem : « Ecce ego succendam in te ignem, et comburam in te omne lignum viride et omne lignum aridum (Ezech. xxvi, 47), » sic exposuit, quod dixerat : « Ecce ego ad te, et ejiciam gladium meum de vagina sua, et occidam in te justum et impium (Ezech. xxi, 3). » Spinæ ergo sunt prævaricatores Judæi; ignis vero gladius Dei est. Spinæ itaque congregatæ igni combustæ sunt, quia Judæi,

A qui in Jerusalem ad solemnitatem Paschæ confluerunt, gladio cœlestis vindictæ perierunt. Post quorum exterminium Dominus subjunxit :

VERS. 13. — « Audite qui longe estis, quæ fecerim, et cognoscite, vicini, fortitudinem meam. »

VERS. 14. — « Conterriti sunt in Sion peccatores, possedit tremor hypocritas. »

Vos, inquit, qui longe estis ab Jerusalem, id est prope terminos mundi, audite, quæ fecerim Judæis infidelibus : et vos, vicini, id est Moabitæ et Palæstini cæteræque de proximo gentes, cognoscite fortitudinem meam, qua debellavi eos. Nam conterriti sunt in Sion, id est in monte templi, peccatores, qui, « si non venissem, et locutus eis non fuisset, peccatum non haberent (Joan. xv, 22). » Et capta Jerusalem, possedit ibi tremor hypocritas Phariseos et Scribas, qui de divino frustra confidebant auxilio.

Sea hæc et aliter intelligi possunt. Ait enim : « Dissipatæ sunt viæ, » etc. Et quid per vias nisi actiones appellat? Semitam vero hic accipimus, de qua Dominus ait : « Arcta est via, quæ ducit ad vitam, et pauci sunt, qui inveniunt eam (Matth. vii, 14). » Appropinquante ergo sæculi fine dissipantur viæ, id est actiones hominum, qui regulam justitiæ non servant. Cessavit transiens per semitam, quia deest jam, qui per angustiæ conversationis viam præsentis vitæ iter peragat, sed omnes latam viam sæculi incedere satagunt. Et ob hoc irritum factum est pactum, id est promissio regni cœlorum. Inchoantibus enim promittitur corona, sed consummantibus datur; his vero, qui non perseverant, irritum fit pactum promissionis hujus.

Et projecit Dominus civitates, id est multitudines eorum, qui lata perditionis itinera sequuntur. Neo reputavit homines, id est quasi non essent, sic æstimavit eos. Vel eos non reputavit esse homines, qui suo vitio jumenta esse voluerunt. Quicumque enim charitatem non habet, nihil est apud Deum, sicut ait Apostolus : « Si habuero prophetiam, et noverim omnia mysteria et omnem scientiam, et si habuero omnem fidem, ita ut montes transferam, charitatem autem non habeam, nihil sum (I Cor. xiii, 2). » Sed inter hanc iniquitatis abundantiam luget terra, id est Ecclesia, et mœrore animi languet.

Libanus autem dealbatio sive candidatio dicitur. Et quid per Libanum nisi dealbata conversatio figuratur hypocritarum? Unde cuidam talium Paulus ait : « Percutiat te Deus, paries dealbate (Act. xxiii, 3). » Confusus est ergo Libanus, et obsorduit, quia plerumque dealbatio eorum, qui religiosam foris conversationem non religiosa cordis intentione custodiunt, de manifesta perpetrato iniquitatis confusionem opprobrii sustinent, et evidentibus peccatorum maculis in fine sordescit

Saron vero princeps mœroris, vel cantans tristitiam interpretatur. Et quid per Saronem nisi quilibet religiosus designatur, qui mœrori deditus eo

lumbino more genitum pro cantu habet? *Factus est ergo Saron sicut desertum*, quia jam nimis excrecente malitia sanctus quisque vilis habetur, et infrequentatus, et derelictus, quia mundi gloriam respuit, et fleibus gaudet.

Basan autem *pinguedo* dicitur, Carmelus vero *mollis*. Et pinguedinem hic accipimus, de qua per Psalmistam dicitur: « Sicut adipe et pinguedine repletur anima mea (Psal. LXXII, 6). » Mollis autem erat animus sancti Job cum diceret: « Deus mollivit cor meum, et Omnipotens conturbavit me (Job XXIII, 45). » Basan ergo pinguedo gratiæ spiritualis intelligitur: Carmelus vero niueus ad charitatem et pietatem mollis. Interpretatur autem et Carmelus *cognitio circumcisionis*. Et ille circumcisionem bene novit qui corde, et opere, et lingua circumciscus est.

« Concussa est autem Basan et Carmelus, » quia etiam mens justorum in illa tentatione novissima concutitur. « Surgent enim pseudoprophetae, et pseudochristi, et dabunt signa magna et prodigia, ita ut in errorem inducantur, si fieri potest, etiam electi (Marc. XIII, 12). »

Sed quia post tribulationem dierum illorum videbunt Filium hominis venientem in nubibus cæli cum virtute magna et majestate, recte subjungitur hic:

« Nunc exurgam dicit Dominus, » etc. *Nunc exurgam* de nimia patientia mea, qui hucusque velut jacui, dum contemnerer et conculcarer, nec me vindicarem; *Nunc exurgam*, sicut scriptum est: « Exsurge, Deus, iudica causam tuam, minor esto inferiorum tuorum (Psal. LXXIII, 22). » *Nunc exaltabor*, quia exaltabitur Dominus solus in die illa, et quia tunc « *plangent se omnes tribus terræ* (Matth. XXIV, 30). » *Concipientis*, inquit, *ardorem doloris interni, parietis stipulam* inanum verborum ducentes: « Lassati sumus in via iniquitatis et perditionis, et ambulavimus vias difficiles; viam autem Domini ignoravimus. Quid nobis profuit superbia aut divitiarum jactantia, quid contulit nobis? Transierunt omnia illa tanquam umbra. Talia enim dicturi sunt in inferno hi qui peccaverunt, quoniam spes impii tanquam lanugo est, quæ a vento tollitur (Sap. V, 7 et seq.) »

Concipientis, inquit, *ardorem seræ* penitentiæ in die illa, et *parietis stipulam* verborum planctus inanis. *Spiritus vester ut ignis vorabit vos*, quia tunc omnis ante oculos culpa reducetur, et mens super gehennæ incendia suo gravius igne cruciabatur. *Et erant populi reproborum quasi de incendio cinis*, sicut per Malachiam dicitur electis: « Egredimini et salietis sicut vituli de armento, et calcabitis impios, cum fuerint cinis sub planta pedum vestrorum (Malach. IV, 2). » Tunc enim *spinæ*, id est peccatores *comburentur igni* inextinguibili; et *comburentur congregatæ*, quia « congregabuntur in congregationem unius fascis in lacum (supra XXIV, 22). »

His ita de reproborum damnatione dictis, eos cui adhuc vivunt, deterret: ab iniquitate volens subjun-

git: « Audite, qui longe estis, quæ fecerim, » etc. Vos, qui longe estis a justitia, audite, quæ fecerim, id est quæ facturus sim reprobis in die illa; et vos justis, qui per vitæ meritum vicini estis mihi, *agnoscite fortitudinem meam* in eos. *Contriti sunt enim*, id est conterentur in Sion, id est in Ecclesia peccatores, qui de eo præsumebant quod dicitur: « Qui crediderit, et baptizatus fuerit, salvus erit (Marc. XVI, 16). » Sed conterentur, cum audierint: « Discedite a me, maledicti, in ignem æternum: Esurivi enim, et non dedistis mihi manducare (Matth. XXV, 42), » etc. Et tunc *possidebit tremor hypocritas*, quia qui nunc de sanctitate gloriantur in oculis hominum, tunc confundentur, cum apparuerit Juxta cordium. Quia enim reprobi tunc omnes mittendi sunt in caminum ignis, qui non exstinguetur, recte adhuc subditur ad terrorem viventium.

« Quis poterit habitare de vobis cum igne devorante? quis habitabit ex vobis cum ardoribus sempiternis? » Tanta enim est gehennalium flammarum asperitas, ut tolerari nequeat, et tunc impii sine fine cruciabuunt in ea. Cum autem denuo cuique, qui in inferno habitaturus est, dixisset: « Quis habitabit ex vobis cum ardoribus sempiternis? » mox e contrario subjecti de quolibet regni cælorum habitatore futuro:

VERS. 15. — « Qui ambulat in justitiis, et loquitur veritatem, qui projicit avaritiam ex calumnia, et excutit manus suas ab omni munere, qui obturat aures suas, ne audiat sanguinem, et claudit oculos suos, ne videat malum, »

VERS. 16. — « Iste in excelsis habitabit, munimenta saxorum sublimitas ejus, panis ei datus est, aquæ ejus fideles sunt. »

VERS. 17. — « Regem in decore suo videbunt oculi ejus, cernent terram de longe. »

VERS. 18. — « Cor tuum meditabitur timorem. »

In justitiis vero ambulat, qui vitam suam in bonis actionibus ducit. *Qui veritatem loquitur*, si quod noverit, sine dolo simpliciter protulerit; et *avaritiam ex calumnia projicit*, si recusaverit aliis per calumniam auferre, quod sibi acquirat. Tres vero sunt acceptiones munerum, id est a corde, ab ore, a manu. Munus namque a corde est captata gratia a cogitatione; munus ab ore est gratia per pavorem; munus ex manu est præmium per dationem. Sed justus quisque *manus suas excutit ab omni munere*, quia in eo quod recte agit, nec ab humano corde inanem gloriam, nec ab ore laudem, nec a manu recipere dationem quærit.

Quid autem est obturare *aures suas, ne audiat sanguinem*, nisi peccatis suadentibus, quæ de carne et sanguine nascuntur, non præbere consensum? Et quid est, *ne malum videat, oculos claudere*, nisi omne quod rectitudini adversum est, non approbare? Sed his de activa conversatione dictis mox ad quantos contemplationis gradus ascendatur per hæc, ostendit propheta: « Iste, inquit, in excelsis habita-

bit, » etc. *Iste in excelsis habitabit*, quia, quamvis **A** cum caro in inferioribus retineat, mentem jam in sublimioribus fixit.

Munimenta saxorum sublimitas ejus, quia dum abjecta desideria terrenæ conversationis cavet, ad supernam patriam per præcedentium Patrum exempla se sublevat; et quia per contemplationis donum gratia spiritali pascitur, *panis eis datus est*, id est refectionem spiritalis gratiæ percepit, quia se a bonis infimis cœlestia sperando suspendit. *In excelsis ramque habitare est cor in cœlestibus ponere*, et *munimenta saxorum sublimitas* nostra est, cum fortium Patrum præcepta et exempla aspicimus, atque ab illa cogitatione separamur. *Munimenta saxorum sublimitas* nostra est, cum mente choris castriusque cœlestibus jungimur, et insidiantes malignos spiritus stantes in arce cordis quasi subterpositos expugnamus.

Tunc nobis etiam *panis* datur, quando in supernis erecta intentio æternitatis contemplatione reficitur. *Aquæ enim nostræ fideles sunt*, quia doctrina Dei, quod hic per spem promittit, hoc illic in munere exhibet. Sapientia autem hujus mundi infidelis est, quia mansura post mortem non est. Sed *aquæ nostræ fideles sunt*, quia verba vitæ, quod ante mortem insinuant, hoc etiam post mortem demonstrant.

Regem in decore suo oculi nostri conspiciunt, quia Redemptor noster in judicio et a reprobis homo videbitur, sed ad divinitatis ejus intuendam celsitudinem soli, qui electi sunt, sublevarunt. Quasi enim **C** quamdam fœditatem regis videre est solam servilem formam, in qua ab iniquis despectus est, cernere. Sed ab electis *in decore suo rex cernitur*, quia ultra semetipsum rapti in ipso Deitatis fulgore oculos cordis figunt. Qui quandiu in hac vita sunt, quia illam viventium patriam, sicut est, videre non possunt, recte subjungitur :

« Cernent terram de longe. » Humana autem mens, quo altius elevata, quæ sunt æterna, considerat, eo de factis temporalibus gravius tremefacta formidat, quia tanto se ream verius cernit, quanto se ab ipso lumine discrepasse, quod desuper intermicat, conspicit; sicque fit, ut illuminata plus metuat, quia magis aspicit, a veritatis regula per quanta **D** discordat. Ducta namque ad internam regulam nostra rectitudo, si districtum judicium invenit, multis tortitudinum suarum sinibus in intimam rectitudinem impingit. Unde nunc ad eum, de quo loquebatur, versa locutione subjungit propheta. « Cor tuum meditabitur timorem. » Si quis vero quondam ita vivere voluisset, impediatur plurimum hinc carnali doctrina Judæorum, illinc vaniloquiis gentilium. Nunc autem utraque sunt evacuata, multosque jam adjutores invenit justus. Nam sequitur : « Ubi est litteratus? Ubi legis verba ponderans? Ubi doctor parvulorum? »

VERS. 19. — « Populum imprudentem [Vulg. impudentem] non videbis, populum alti sermonis, ita ut

non possis intelligere disertitudinem linguæ ejus, in quo nulla est sapientia. »

Litteratus enim Pharisæus erat, quia solam litteræ superficiem sectabatur, et ipse non sensum sed *verba legis* velut in trutina ponderabat, ostendens, quæ essent graviora. Et *doctor erat parvulorum*, quia docebat plebem Judæorum, qui lacte semper indigent ut parvuli.

Populus vero imprudens gentilis est, qui veram ignorabat prudentiam. Qui erat *alti*, id est *profundi sermonis*, ita ut simplicitas fidelium vix intelligere posset *disertitudinem*, id est *facundiam linguæ ejus*. Sed tamen in eo nulla erat sapientia, quia diserte nimis et polite verba proferebat, sed nullum in eisdem verbis sapientiæ sensum habebat. Sicut enim **B** doctrina cœlestis non verba, sed sensum attendit, sic doctrina sæculi non in sensu, sed in compositione verborum et in eloquentiæ jactantia gloriatur. Sed jam doctores hujusmodi cum suis doctrinis evanuerunt, ut evangelica prædicatio maneat, quemadmodum et Apostolus ait : « Ubi sapiens? ubi scriba? ubi conquisitor hujus sæculi? Nonne stultam fecit Dominus sapientiam hujus mundi? Nam quia in Dei sapientia non cognovit mundus per sapientiam Deum, placuit Deo per stultitiam prædicationis salvos facere credentes (I Cor. 1, 20). » Deficientibus ergo inanium doctrinarum prædicatoribus et Ecclesia surgente, propheta subjungit :

VERS. 20. — « Respice, Sion, civitatem solemnitatis nostræ : oculi tui videbunt Jerusalem habitationem opulentam, tabernaculum, quod nequaquam transferri poterit ; nec auferentur clavi ejus in sempiternum, et omnes funiculi ejus non rumpentur. »

VERS. 21. — « Quia solummodo ibi magnificus Deus noster. »

Sion quippe vel Jerusalem Ecclesia est. Quæ *solemnitatis nostræ civitas* est, quia ibi laudes Creatoris decantamus. Neque enim extra Ecclesiam laudare quis Deum bene valet, quia scriptum est : « Quomodo cantabimus canticum Domini in terra aliena? » (Psal. cxxxvi, 4.) Rursumque : « Te decet hymnus Deus in Sion, et tibi reddetur votum in Jerusalem. » (Psal. lxxiv, 2.) Et ipsa est habitatio opulenta, quia ibi sunt divitiæ salutis sapientia et scientia, et timor Domini thesaurus ejus, quibus ditantur habitatores urbis hujus. Vel ita dicendum : Oculi tui cernent visionem æternæ pacis, et divitias insperatas, quas oculus non vidit, nec auris audivit, nec cor hominis excogitavit.

Sed et *tabernaculum* Ecclesia vocatur, quia in peregrinationis hujus itinere Dei hospitium vel habitaculum est. Quod videlicet tabernaculum transferri nequaquam potest, quoniam Ecclesia in eo quod credit, permanet. *Nec offerentur clavi ejus in sempiternum*, quoniam verba prædicationis ejus non tollentur, sicut Joannes ait : « Vos quod audistis ab initio, maneat, in vobis (I Joan. 11, 24). » Et in ejus Apocalypsi dicitur « Evangelium æternum (Apoc. xiv, 6). »

Et omnes funiculi ejus non rumpentur, quoniam A præcepta ejus nunquam destruentur. Antiquum enim tabernaculum sæpe translatum est, ut de solitudine in Silo, in Nobe, et inde in Jerusalem, quoniam Synagoga quibusdam semper erat profectibus promovenda, donec veniret in Ecclesiam. Tabernaculum vero novum nequaquam transfertur, quia non est jam ultra religio, in quam ab ista, quam tenet Ecclesia, promoveatur dicente Domino: «Tantum, quod habetis, tenete, donec veniam (Apoc. III, 11).»

Quod autem clavorum nomine verba ejus signentur, ostendit Salomon dicens: «Verba sapientum quasi stimuli, et sicut clavi in altum defixi (Eccl. XII, 11).» Et subtilitas spiritualium ejus præceptorum exprimitur appellatione funiculorum, quando Jeremias extrahi legitur funiculis de lacu (Jer. XXXVIII, 11). Significat enim peccatorem, qui de profundo iniquitatum educitur per observantiam spiritualium mandatorum. Clavi itaque verba sunt, et funiculi præcepta. Et sicut tabernaculum clavis firmatur, et funibus extenditur, sic Ecclesia validis Scripturæ sanctæ dictis roboratur, et præceptis in actione dilatatur. Qui videlicet clavi et funiculi nunquam auferentur, neque rumpentur, sicut ablati et rupti sunt clavi et funiculi veteris tabernaculi. Ablata sunt enim verba, quæ de futuro dicebant: «Ecce virgo concipiet, et pariet filium (supra VII, 14).» Et dicitur, quia «postquam venit plenitudo temporis, misit Deus Filium suum factum ex muliere (Gal. IV, 4),» id est ex femina. Et rupta sunt præcepta de oblationibus victimarum, et otio Sabbatorum, et cæteris observationibus hujusmodi. Verba autem novæ prædicationis Ecclesiæ et mandata ejus nunquam mutabuntur, aut destruentur, quia solummodo ibi magnificus Deus noster. Nihil enim magnum agit Deus noster apud infideles, quantacunque eis beneficia temporalia operetur, sed in Ecclesia tantummodo magna operatur, quia remissionem peccatorum et gratiam sanctitatis largitur suis, et ad vitam eos sempiternam perducit.

Vel superna Jerusalem æternum Dei tabernaculum est, ubi ipse perenniter habitat, unde nunquam hoc tabernaculum transferri poterit, quia nequaquam ultra mutabit locum, sed perpetualiter manebit in illo beatitudinis regno. Propterea et subditur metaphorice: «Quia clavi ejus non auferentur in sempiternum, neque funiculi ejus rumpentur,» ut stabili firmitate in uno loco sine fine manere monstraretur: «quia solummodo ibi magnificus Dominus,» quoniam videtur, et intuitibus se gaudia præstat æterna. Sequitur:

«Locus fluviorum, rivi latissimi et patentes.» Ecclesia est locus fluviorum, quia prophetis et apologeticis fluminibus exuberet, et sunt in ea rivi expositionum latissimi. Aperta enim dicta exponentium faciunt nobis esse conspicuas sententias antiquorum Patrum, et quod Patres breviter dixerunt, isti latius exponentes patefaciunt. Isaias ergo plana

sanctæ Ecclesiæ expositionis verba conspiciens, et non allego-riarum tenebris obscura ait: «Locus fluviorum rivi latissimi et patentes.» Testamenti enim Veteris dicta quasi angusti et clausi rivi fuerant, qui universas scientiæ suæ sententias collectione obscurissima constringebat; at contra doctrina sanctæ Ecclesiæ rivi patentes sunt, quia ejus dicta et inventibus multa sunt, et quærentibus plana. Sequitur: «Non transibit per eum navis remigum, neque trieris magna transgreditur eum.»

VERS. 22. — «Dominus enim judex noster, Dominus legifer noster, Dominus rex noster ipse salvabit nos.»

Non pertransibit per eum navis remigum, id est per prædictum locum fluviorum. Quid vero per navem remigum nisi mens designatur reproborum, quæ per mare hujus sæculi a malignis spiritibus velut a remigibus ducitur? Unde et propheta iste in sequentibus dicit Chaldaeos in navibus suis gloriantes, quia nequissimi dæmones in eorum cordibus gloriantur, quos ad voluntatem suam variis desideriis per sæculi turbulentas amaritudines ducunt.

¶ Trieris autem est, navis tres remorum ordines habens. Et quid per trierem magnam nisi prædicta mens iniquorum sive Babylon exprimitur? Quæ tres habet ordines remorum, quia in cogitatione et in verbo, atque in actu regitur a malignis spiritibus. «Non ergo transibit per eum navis remigum, neque trieris magna transgreditur eum,» quia mens iniquorum ponere gressum malitiæ suæ non poterit in cœtu justorum. Transiret namque per eum, si voluntatem suam exleret in eo. Sed non transibit, quia quod male de bonis facere tentat, non poterit. Dominus enim salvabit nos, id est custodiet, ne per nos iniquorum malitia transeat. Dominus judex noster salvabit nunc nos, quia novam legem per semetipsum dedit, «Unus est enim legislator et judex, qui potest perdere et liberare,» sicut ait Jacob (cap. IV, 12). Et ipse est rex noster, qui nunc nos regit, et in æternum in nobis regnabit. Hic ergo, qui judicaturus est nos, et normam vivendi nobis in Evangelio dedit, et nos invisibiliter regit, ipse nos intertentionum pericula salvat, ne victi pereamus.

Vel æterna Jerusalem est locus fluviorum, quia ibi D semper emanant flumina spiritualium gratiarum septem copiosis Spiritus sancti meatibus, et late ac patenter per omnia diffunduntur. Non transibit per eum navis remigum, quia nullus impugnator sive tentator inquietabit illos. Dominus enim peracto judicio salvabit eos perpetualiter ab omnibus malis. Sed quia de reproborum mente quasi de navi propheta loquebatur, et de Ecclesia justorum velut de fluvio, quem navis illa transire non posset, adhuc conatum navis hujus in hunc fluvium ostendit subjungens:

VERS. 23. — «Laxati sunt funiculi tui, sed non prævalebunt.»

O navis, laxati sunt funiculi tui, ut laxatis velorum funibus fortius impellaris vento flatus dæmo-

num ad impugnandam Ecclesiam. *Sed non prævalebant*, quia « portæ inferi non prævalebunt adversus eam (Matth. xvi, 18). » Qui vero sunt *funiculi* hujus navis nisi peccata, de quibus dicitur : « Væ qui trahitis iniquitatem in funiculis vanitatis ! » (sup. v, 18.) Hos igitur funes laxat hæc navis, ut fluvium transeat, quia mens impiorum totas iniquitatis suæ remittit habenas, dum Ecclesiam impugnare nititur. Sequitur :

« Sic erit malus tuus, ut dilatare signum non queas, » id est velum expandere. Quid per malum navis hujus, qui stat in altum erectus, nisi elatio mentis iniquorum exprimitur? Unde scriptum est : « Superbiæ eorum, qui te oderunt, ascendit semper (Psal. lxxiii, 23). » Hoc est malus in sublime porrectus. Quid vero per *signum*, id est per velum, quod in hoc malo suspensum est, nisi velamen erroris designatur, quod ab elatione superbiæ descendens conscientiam iniquorum ohnubilat, et flatibus tentationum impellit? Ait ergo : *Sic erit malus tuus, id est elatio tua, ut dilatare signum, non queas, id est erroris velum per orbem terræ expandere.* Error enim arcebitur ubique et destruetur, et evangelica prædicatio per universas nationes dilatabitur. Unde et sequitur : « Tunc dividuntur spolia prædarum multarum : claudi diripient rapinam. »

VERS. 24. — « Nec dicet vicinus : Elangui. »

Spolia namque *prædarum multarum* homines sunt, qui tolluntur antiquo hosti, sicut scriptum est : « Cum fortis armatus custodit atrium suum, in pace sunt ea quæ possidet. Si autem fortior illo superveniens vicerit eum, universa arma ejus auferet, in quibus confidebat, et spolia ejus distribuet (Luc. xi, 21). » Custodiebat enim diabolus hunc mundum armatus velut atrium suum, et nullo repugnante possedit. Sed desuper veniens nobis Salvator vicit eum, et arma ejus, id est potestatem nocendi abstulit ei, atque spolia ejus, id est homines, quos male possidebat, distribuit in Ecclesia sua. Nam « ipse dedit quosdam quidem apostolos, quosdam autem prophetas, alios vero evangelistas, alios autem pastores et doctores (Ephes. iv, 11). » Tunc ergo divisa sunt spolia prædarum multarum, quando posuit Deus in Ecclesia « primum apostolos, secundo prophetas, tertio doctores, exinde virtutes, deinde gratias curationum, opitulationes, gubernationes, genera linguarum (I Cor. ii, 28). »

Claudi vero sunt, quibus pes amoris sæculi emarcuit. Unde Jacob (Gen. xxxii), qui angelum tenuit, uno pede claudicavit, quia qui vero amore sublimia respicit, jam in hoc mundo duplicibus incedere desiderii nescit. Uno enim pede innititur, qui solo Dei amore roboratur, et in solo Dei amoris pede tota virtute se sustinet, et in ipso stat, quia pedem amoris sæculi, quem ponere in terra consueverat, jam a terra suspensum portat. Tales ergo *claudi rapinam* diripiunt, dum eos, quos diabolus possiderat, ad Christum convertunt.

Nec vicinus dicet : Elangui, quoniam ad similem

rapinam exemplo eorum libenter excitantur proximi. Sequitur :

« Populus, qui habitat in ea, auferetur ab eo iniquitas. » Populus fidelium, qui, sicut oportet, in Ecclesia perseverat, remissionem suorum solus obtinebit peccatorum. Sequitur :

CAPUT XXXIV.

VERS. 1. — « Accedite gentes, et audite, et populi attendite : audiat terra, et plenitudo ejus, orbis et omne germen ejus. »

VERS. 2. — « Quia indignatio Domini super omnes gentes, et furor super omnem malitiam eorum. »

Nunc de universali judicio locuturus et damnatione malorum convocat omne genus hominum simul ad audiendum, quæ de omnibus reproliis est dicturus. *Accedite*, inquit, huc animo gentes, et intento corde, quæ loquor, *audite : audiat omnis terra* generale judicium, et *plenitudo ejus*, id est universi, qui in ea sunt, et totus orbis metuat, et *omne germen ejus*, id est omnes, qui in eo nascuntur. Et quid est, quod ita jubentur omnes audire? *Quia indignatio Domini super omnes gentes* in die novissimo veniet, et *furor ejus super omnem malitiam eorum*, quia si illi in ignem æternum ituri sunt, qui esurienti non dederunt manducare, quid passuri sunt raptores et homicidæ? Nunc quoque *indignatio ejus super omnes infideles* est. « Qui enim incredulus est Filio, non videbit vitam, sed ira Dei manet super eum (Joan. iii, 36), » ut Joannes Baptista loquitur. Nam in hoc sæculo cum ira Dei nascimur omnes, sicut Apostolus ait : « Eramus natura filii iræ sicut et cæteri (Ephes. ii, 3). » Sed per gratiam solam Christi removetur a nobis ira Dei. Bene ergo dicitur, *quia indignatio Domini est super omnes gentes, quæ non credunt.* Sequitur : « Interfecit eos, et dedit eos in occisionem. » Hoc est quod ipse Dominus ait : « Timeate eum, qui postquam occiderit, habet potestatem mittere in gehennam (Luc. xii, 5). » Sequitur :

VERS. 3. — « Interfecti eorum projicientur, et de cadaveribus eorum ascendet fetor. »

Interfecti eorum projicientur a facie Domini, cum audierint : « Discedite a me, maledicti, in ignem æternum (Matth. xxv, 41). » *Et de cadaveribus eorum ascendet fetor*, quia de corporibus fornicatorum fetor intolerabilis exibat. Sequitur : « Tabescent montes a sanguine eorum. »

VERS. 4. — « Et tabesceat omnis militia cœlorum. »

Quid hoc loco *montes* nisi sæculi hujus potentes accipimus, qui pro terrena substantia altum tument, de quibus Psalmista ait : « Tange montes, et fumigabunt? » (Psal. cxliii, 5.) Et quid per sanguinem nisi crudelitatis peccatum? Unde quibusdam supra dictum est : « Manus vestræ sanguine plenæ sunt (supra i, 15), » id est actiones vestræ crudelitate redundant. *Tabescent ergo montes a sanguine eorum*, quia principes in tormentis æternaliter deficient pro

crudelitate, quam sub ipsis exercuerunt hi, quibus A præerant. In ipsos enim redundabit, quidquid a subjectis offensum fuerit per ducatum eorum.

Militiam vero *cælorum* dæmones aeris hujus appellat, de quibus per Paulum dicitur : « Non est nobis colluctatio adversus carnem et sanguinem (*Ephes. vi, 12*), » id est adversus homines, « sed adversus principatus et potestates, adversus mundi rectores tenebrarum harum (*ibid.*), » id est iniquorum et infidelium hominum, « contra spiritalia nequitiae in cælestibus (*ibid.*). » Cælus autem non æthereos hic accipimus, sed aereos. Unde et aves cæli nominamus, quas in aere volitare videmus. *Tabescet igitur omnis militia* eorum, quia universi dæmones, qui per hunc aerem vagantes quotidie pugnant contra nos, in die novissimo devolventur in infernum, et ibi sine fine tabescent, et deficient. Sequitur :

« Et complicabuntur sicut liber cæli, et omnis militia eorum defluet sicut defluit folium de vinea et de ficu. »

VERS. 5. — « Quoniam inebriatus est in cælo gladius meus. »

Considerandum, quod non dicat interire cælus, sed complicari quasi librum, ut, postquam omnia peccata aperta fuerint, et relicta, complicantur, qui prius aperti fuerant, et nequaquam ultra scribantur in eis delicta multorum.

Vel nunc expansi sunt cæli *sicut liber*, ut quotidie scribantur in eis nomina bene viventium. Unde Dominus electis discipulis ait : « Gaudete, quia nomina vestra scripta sunt in cælis (*Luc. x, 20*). » Sed in die illa *complicabuntur sicut liber*, ut jam nullius deinceps nomen in eis scribatur.

« Omnis militia eorum defluet sicut folium de ficu, » quia sicut arboris folium postquam aruerit et ceciderit, nequaquam virescit, et in arborem revertitur, sed in terra putrescit, ita spiritus illi de cælestibus lapsi nequaquam in pristinum statum reducentur, aut per poenitentiam revirescent, sed in gehennalibus pœnis æternaliter putrescent.

Vel *militia eorum defluet* instar foliorum, quia « stellæ cadent de cælo (*Matth. xxiv, 29*). » Quia *inebriatus est*, inquit, *in cælo gladius meus*, ac si diceret : Quia ira seriam superbos, tunc perpendite, si ipsos etiam, quos in cælo juxta condidi, pro elationis vitio percutere non peperci. Vel *in cælo*, id est in aere est inebriatus feriendo potestates aeris. Sequitur :

« Ecce super Idumæam descendet, et super populum interfectionis meæ ad judicium. »

Idumea *terrena* dicitur sive *rubea*. *Descendat* ergo, inquit, gladius ultionis meæ *super Idumæam*, id est super eam generis humani partem, quæ terrena est, et peccatorum sanguine rubea : *et super populum interfectionis meæ*, id est super omnem eorum, quos occisurus sum, multitudinem ad judicium damnationis, de quo dicitur : « Qui vero mala egerunt, in resurrectionem judicii (*Joan. v, 29*). » Sequitur :

VERS. 6. — « Gladius enim Domini repletus est sanguine, *incrassatus* est adipe de sanguine agnorum et hircorum, de sanguine medullatorum arietum. »

Ut multos occidisse gladius iste monstretur, *repletus sanguine* dicitur et *incrassatus adipe*. Quia vero agni, arietes et hirci solebant immolari, illam grandem victimam reproborum omnium, quam nunc immolat, de agnis, arietibus et hircis fore memorat. Unde per Jeremiam dicit : « Deducam eos quasi agnos ad victimam, quasi arietes cum hædis (*Jer. li, 40*). » Talibus ergo nominibus appellantur, qui occasione mortis æternæ sunt prædestinati sicut hæc animalia immolationi. Aut certe per sanguinem intelligimus peccatum carnis, quia scriptum est « Libera me de sanguinibus (*Psal. l, 15*); » et per *adipem* superbiam, de qua dicitur : « Prodiit quasi ex adipe iniquitas eorum (*Psal. lxxii, 7*). »

Quid autem per agnos nisi qui mites videntur et innocentes, sed non propter Deum tales se facere studuerunt designantur ? Quid vero per hircos nisi principes infidelium per potentiam sæcularem cornuti, et per libidinem fetentes; et quid per arietes nisi populorum duces exprimuntur copia divitiarum involuti sicut lana ? Quid autem per medullam *arietum* nisi superbia cordis eorum ? *Gladius ergo Domini repletus est sanguine, et incrassatus adipe*, quia maxime percutit luxuriam et superbiam. *De sanguine agnorum*, id est de peccato eorum, qui simplices videbantur et innocentes sed non propter Deum, *et hircorum*, id est libidinosorum principum, *et medullatorum arietum*, id est superbiorum ducum. Sequitur :

« Victima enim Domini in Bosra, et interfectio magna in terra Edom. »

Victima enim est illa generalis reproborum occisio. *Bosra tribulatio* dicitur, *Edom vero terrenus*. Et quis sit *terrenus* liquet. Nam « primus homo de terra terrenus; secundus homo de cælo cælestis. Qualis terrenus, tales et terreni, et qualis cælestis, tales et cælestes (*I Cor. xv, 47*). » *Victima ergo Domini immolatur in Bosra*, quoniam peccatores occiduntur in tribulatione. *Et interfectio magna fit in terra Edom*, id est in terra terreni, quoniam omnes, qui sunt Adæ similes, perimuntur, qui sicut portaverunt inaginem terreni, non portaverunt inaginem cælestis. Sequitur :

VERS. 7. — « Et descendent unicornes cum eis, et tauri cum potentibus. »

Cum eis, quos supra dixit, *descendent unicornes*, id est cum agnis et hircis et arietibus. Quid autem *unicornes* appellat nisi imperatores illos, qui monarchiam totius mundi tenuerunt, ut Alexander et Cæsar et Augustus et Antichristus ? Quid vero tauros, nisi cæteros reges, qui cornibus regni suos impetebant adversarios ? Quid autem potentes, nisi reliquos sæculi principes ? Descendunt igitur *unicornes* in infernum *cum eis*, quia et summi imperatores cum cæteris peccatoribus in baratrum damnationis illius

corruent : *et tauri cum potentibus*, quia reges cum suis optimatibus ignominiose dejicientur. Unde scriptum est, quoniam « iudicium durissimum in his, qui præsunt, fiet. Exiguo enim concedetur misericordia : potentes autem potenter tormenta patientur (Sap. vi, 6). » Sequitur :

« Inebriabitur terra eorum sanguine, et humus eorum adipe pinguium. »

Quid per terram vel humum eorum nisi infernalis habitatio designatur, de qua scriptum est : « Terram tenebrosam et operam mortis caligine, terram miseriæ et tenebrarum (Job, x, 21), » et item : « Iste locus ejus, qui ignorat Deum (Job xviii, 21). » Quomodo ergo inebriabitur hæc terra eorum sanguine et adipe, cum jam eorum corpora post resurrectionem immortalia sint et incorruptibilia, quamvis sensum doloris et tunc habentia, nec sit necesse, ut qui nunc pingues sunt, cum eadem pinguedine resurgant? Sanguinem igitur et adipem aliter oportet intelligi. Nam et alibi scriptum est : « Quicumque fuderit humanum sanguinem, fundetur sanguis illius (Gen. ix, 6). » Quæ sententia secundum litteram stare non potest. Multi enim effuderunt humanum sanguinem, quorum sanguis in hac vita effusus non est : et ridiculosum videbitur, ut in resurrectione mortuorum dicat quis fundi sanguinem eorum. Sanguis igitur hominis vitale, quo vegetatur, et sustentatur, et vivit, debet intelligi, quod qui effuderit sive scandalo sive perversitate doctrinæ, in die iudicii fundetur ex eo, cum etiam id quod habebat vitale, cogetur amittere, ut perpetuo moriatur.

Itaque quando « anima carnis, ut Moyses ait, in sanguine est (Lev. xvii, 14), » per effusionem sanguinis designatur, amissio vitæ, id est mors illa reproborum æterna. Adeps vero interioris hominis superbia cordis est, quæ mentem hebetat et gravat. Unde scriptum est : « Incrassatum est cor populi huius (Act. xxviii, 27). » Nam sicut pinguedo corporis ex ciborum abundantia generari solet, sic superbia cordis ex copia divitiarum. Quid ergo per adipem pinguium nisi superbia divitum figuratur? Solet autem ignis calore adeps liqueferi ignemque citius accendere injectus et pascere. Et quid per adipem igne solutum debet intelligi nisi superbia reproborum in incendiis gehennalibus sine fine tabescens et ardens? *Inebriabitur itaque terra eorum sanguine, et humus eorum adipe pinguium*, quia tartarus immoderate replebitur eorum morte, quæ per amissionem sanguinis intelligitur, et combustionem, quæ liquefacto adipe indicatur. Sequitur :

VERS. 8. — « Quia dies ultionis Domini, annus retributionis Sion (138). »

Tunc erit *dies ultionis Domini*, quam de suis hostibus sumet, et tunc erit *annus*, in quo *Sion*, id est Ecclesia potestate iudicii accepta persecutoribus suis reddet, quod merentur : « Tunc enim stabunt iusti in magna constantia adversus eos, qui se angustia-

verunt (Sap. v, 1). » Unde et in Apocalypsi dicitur eis de iniqua Babylone : « In poculo, quo miscuit vobis, miscete illi duplum (Apoc. xviii, 6). » *Dies* autem et *annus* vel *tempus* iudicii designat, vel spatium illud interminabile, quod erit post finem sæculi. Sequitur :

VERS. 9. — « Et convertentur torrentes ejus in picem, et humus ejus in sulphur : et erit terra ejus in picem ardentem. »

VERS. 10. — « Nocte et die non exstinguetur, in sempiternum ascendet fumus ejus : a generatione in generationem desolabitur in sæcula sæculorum. »

Præmiserat, quoniam inebriabitur terra eorum sanguine, id est infernus, et nunc de eadem terra loquens plenius subjungit, quia *convertentur torrentes ejus in picem*. Refert autem in Dialogo beatus Gregorius fluvium in locis pœnalibus a quodam, qui huc reversus est, visum fuisse, in quo multi cruciabantur, et ex eo nebula fetoris ascendebat. Sed et cæteri Patres orthodoxi sæpe scripserunt similia. Torrentes ergo credibile est in inferno esse, in quibus animæ damnatorum decoquantur : Qui videlicet *torrentes convertentur in picem*, quia similes erunt pici ferventi, ut, quidquid tetigerint, incendiant et teneant. *Et humus ejus convertetur in sulphur*, quia simul ardebit, et fetorem gravissimum exhalabit. *Et erit terra ejus in picem ardentem*, quia sicut pax ardebit ibi terra.

Quid vero per noctem et diem designatur (ibi enim perpetua nox est) nisi pœnarum mutabilitas? Semper enim per varia miseri tormenta discurrunt. *Terra enim erit in picem ardentem nocte ac die*, quia in omnibus pœnarum varietatibus terra sicut pax ardebit, nec exstinguetur in sempiternum, sed æternaliter ardens cruciabit impios, ut nunquam in illis sæculis careant supplicio, qui in hac vita nunquam voluerunt carere peccato.

Vel *in die* cruciabantur improbi, quando cogitant in inferno de gloria sanctorum; et *in nocte*, dum consideraverint immanitatem damnationis suæ. Sed terræ hujus ardentis *ascendet fumus a generatione in generationem*, quia in tempore generationis Hebræorum fidelium, quæ præcessit adventum Salvatoris, et in tempore generationis Christianorum, quæ sequitur, fumus hujus incendii perdurat, et peracto iudicio *desolabitur in sæcula sæculorum* omnes, quos tenuerit, quia omne remedium eis auferet. Sequitur : « Non erit transiens per eam, » quia non erit quisquam justorum, qui visitet eos.

VERS. 11. — « Et possidebunt illam onocrotalus, et ericius, et ibis, et corvus habitabunt in ea. »

Onocrotalus est avis, quæ sic vocatur, eo quod in modum cymbali sonum in aqua rostro faciat. κρόταλον *crotalon* enim Græce *cymbalum* dicitur. Quia vero scientia Scripturæ sacræ per aquam potest accipi, quid per onocrotalum nisi prædicatores

illi designantur, qui charitatem non habentes facti sunt « sicut æs sonans aut cymbalum tinniens (I Cor. xiii, 1). » *Ericius* autem animal est spinis ac sentibus pro pillis obsitum, et vulnerans quidquid tetigerit: et quid per *ericium* figuratur nisi peccator quisque punctionibus vitiorum circumdatus, qui mala responsione cor ejus vulnerat, quicumque eum tangere corripiendo tentat? *Ibis* vero, id est ciconia avis est lenta et propter aquas habitans, sed in eis minime natans. Et quid per *Ibidem* nisi illi signantur, qui Scripturas frequenter audiunt, sed lenti sunt ad faciendum, nec in earum intelligentia natant, quia nec pertingunt ad illa? *Corvus* autem nigredinem peccantium vel infidelium exprimit.

Isti ergo possidebunt terram illam, quæ sicut *pix* ardebit, et habitabunt in ea, quoniam hæc est iniquorum propria mansio, quæ parata est illis ab origine mundi. Aut certe de magna illa *Babylone* licet nomen ejus hic taceatur, intelligamus hæc omnia. Nunc enim possident illam *onocrotalus* et *ericus*, et *ibis*, et *corvus* habitant in ea, quoniam hi, qui talibus appellari nominibus meruerunt, per iniquæ conversationis studium cives ejus sunt. Sequitur:

« Et extendetur super eam mensura, ut redigatur ad nihilum, et perpendicularum in desolationem. »

Super terram ardentem *extendetur mensura, ut redigatur ad nihilum*, quia peccatores æternaliter ibi deficient secundum mensuram, qua Deus eorum poenas justo disponet judicio. « Et perpendicularum in desolationem, » id est in demolitionem, quia damnati ibi dissipabuntur, et discerpentur supplicis juxta arbitrium justitiæ summi opificis. Perpendicularum enim vocatur, quo commentarii maceriam ad rectitudinem deducunt, vel arcus æqua rotunditate curvant. *Desolatio* autem non a *desolor*, *desolatus* dicitur hic, sed a *desolo*, *desolatus* quod significat terræ dissipationem. Vel super *Babylonem* *extendetur mensura ut redigatur ad nihilum, et perpendicularum in desolationem*, quia destruetur juxta modum justæ dispositionis Dei, et exterminabitur secundum regulam-judicii ejus. Sequitur:

VERS. 12. — « Nobiles ejus non erunt ibi, regem potius invocabunt. »

Nobiles ejus sunt electi, qui inter reprobos nascuntur in hoc sæculo vel conversantur. *Qui non erunt ibi*, id est in illa damnatione perpetua, sed dum advixerint *invocabunt regem* Christum; et salvabit eos. Sequitur.

« Et omnes principes ejus erunt in nihilum. » *Principes ejus* sunt potentes sæculi et sapientes, qui in die ultionis *erunt in nihilum*, quia nil eis valebit potestas eorum, vel sapientia seu fortitudo. Sed ante diem illius damnationis, quid interim in hac *Babylone* fiat, audiamus. Sequitur:

VERS. 13. — « Et orientur in domibus ejus spinæ et urticae, et *paliurus* in munitionibus ejus. »

Quid per *urticas*, nisi cogitationum pruriges, quid vero per *spinas* nisi punctiones vitiorum accipimus? In *domibus* ergo *Babylonis* *urticae* et *spinæ*

pullulant, quia in confusis iniquorum mentibus et desideria cogitationum surgunt, quæ exasperent, et operum peccata, quæ pungant. Sed hæc agentes habent etiam nequiores alios defensores suos. Unde et additur: « Et *paliurus* in munitionibus ejus. » *Paliurus* quippe tanta spinarum circumdatione dense-scit, ut præ asperitate vix tangi possit. Tales nimirum, tales sunt pravi homines, qui duris peccatorum aculeis circumdati nequaquam a corrigente tangi patiuntur. Intus *urtica* et *spina* nascitur, et foris in munitione *paliurus*, quia minores iniqui mala quælibet faciunt, sed ea nequissimi majores tumentur. Sequitur: « Et erit cubile draconum, et pascua *struthionum*. »

VERS. 14. — « Et occurrent *dæmonia onocentauris*, et *pilosus* clamabit alter ad alterum. »

Quid per *dracones* nisi malitia quid vero *struthionum* nomine nisi hypocrisis designatur? *Struthio* quippe spiritum volandi habet, sed usum volandi non habet, quia et hypocrisis cunctis intuitibus imaginem sanctitatis de se insinuat, sed tenere virtutem sanctitatis negligit. In perversa igitur mento draco cubat, et *struthio* pascitur, quia et latens malitia callide tegitur, et intuituum oculis simulatio bonitatis antefertur.

Quid autem *Onocentaurorum* nomine nisi et lubrici figurantur et elati? Græco quippe eloquio *ὄνος* onos asinus dicitur, et appellatione asini luxuria designatur, propheta attestante, qui ait: « Ut carnes asinorum carnes eorum (Ezech. xxiii, 20). » *Tauri* autem vocabulæ cervix superbiæ demonstratur, sicut voce Dominica de Judæis superbientibus per *Psalmistam* dicitur: « *Tauri* pingues obsederunt me (Psal. xxi, 13). » *Onocentauri* ergo sunt, qui subiecti luxuria vitii inde cervicem erigunt, unde humiliari debuerant. Qui carnis suæ voluptatibus servientes expulsa longe verecundia non solum amittere se rectitudinem non dolent, sed adhuc etiam de opere confusionis gaudent. *Onocentauris* ergo *dæmonia* occurrunt, quia maligni spiritus valde ad votum deserviunt, quos de eis gaudere conspiciunt, quæ flere debuerunt. Ubi apte subjungitur:

« Et *pilosus* clamabit alter ad alterum. » Qui namque *pilosus* alii appellatione figurantur nisi hi, quos Græci *πανας* (*panas*), Latini vero *incubos* vocant? Quorum nimirum forma ab humana effigie incipitur, sed bestiali extremitate terminatur *Pilosus* ergo nomine cujuslibet peccati asperitas designatur, quod, etsi quandoque ab obtentu rationis incipit, semper tamen ad irrationabiles motus tendit; et quasi homo in bestia desinit, dum culpa per rationis imaginem inchoans usque ad irrationabiles effectus trahit. Nam sæpe edendi delectatio servit gulæ, et servire se simulat necessitati naturæ, cumque ventrem ingluvies extenderit, membra in luxuriam erigit. *Pilosus* ergo alter ad alterum clamat, cum perpetrata nequitia ad perpetrandam nequitiam provocat, et quasi quædam cogitationis voce commissa jam culpa ad culpam adhuc, quæ comitatur, invitat. *Pilosus* ergo et

ter ad alterum clamat, quando sub aliqua ratiocinandi specie perversam mentem culpa subsequens ex occasione culpæ præcedentis illaqueat, cumque hanc peccata dura atque aspera depriment, quasi convocati in ea concorditer pilosi dominantur. Sequitur :

« Ibi cubavit lamia, et invenit sibi requiem. »

VERS. 15.—« Ibi habuit foveam ericius, et enutrivit catulos, et circumfodit, et fovit in umbra ejus. »

Per lamiam hypocritæ designantur, per ericum vero malitiosi quique, qui diversis se defensionibus contegunt. Lamia enim humanam faciem habere dicitur, sed corpus bestiale. Sic et omnes hypocritæ in prima facie, quod ostendunt, quasi ex ratione sanctitatis est. Sed corpus bestiale sequitur, quia valde iniqua sunt, quæ sub boni specie moliantur. Ibi ergo cubavit lamia, et invenit sibi requiem, quoniam inter mundi amatores nutritur hypocritarum fictio.

Ericii autem nomine malitiosarum mentium defensionis designatur. Ericius enim, cum apprehenditur, ejus et caput et pedes et corpus omne conspicitur, sed mox ut apprehensus fuerit, semetipsum in spheram colligit, pedes introrsus subtrahit, caput abscondit, et intra tenentis manus totum simul amittitur, quod totum simul antea videbatur. Sic nimirum, sic malitiosæ mentes sunt, cum in suis excessibus comprehenduntur. Caput enim ericii cernitur, quia quo initio peccator ad culpam accesserit, videtur. Pedes ericii conspiciuntur, quia, quibus vestigiis nequitia sit perpetrata, cognoscitur; et tamen adductis repente excusationibus malitiosa mens introrsus pedes colligit, quia cuncta iniquitatis suæ vestigia abscondit. Caput subtrahit, quia miris defensionibus nec inchoasse se pravum aliquid ostendit, et quasi spheram in manu tenentis remanet, quia is qui corripit cuncta quæ jam cognoverat, subito amittens involutum intra conscientiam peccatorem tenet; et qui totum jam deprehendendo viderat, tergiversatione pravæ defensionis illusum totum pariter ignorat. Foveam ergo ericius in reprobis habuit, quia malitiosa mens sese intra se colligens in tenebris defensionis abscondit.

Sed quia non sufficit his, qui ejusmodi sunt, quod sic se tenebris latibulis abscondunt, nisi et alios ad ejusdem versutæ perversitatem informant, enutrisse catulos ericius dicitur. Qui et circumfodit, quia semper isti tales undique perscrutantur, et causas excusationum inquirent. Et fovit catulos in umbra ejus simulationis ac defensionis, quia sub protectione majorum proficiunt ad iniquitatem, et roborantur minores. Sequitur

« Illuc congregati sunt milvi alter ad alterum. »
Milvi congregati sunt, quia cupidi et raptores sibi consociantur, et in commune rapinis inhiant. Sequitur :

VERS. 16.—« Requirit diligenter in libro Domini et legit: unum ex eis non deficit, alter alterum non

A quæsitiv: quia, quod ex ore meo processit, ille mandavit, et spiritus ejus congregavit ea. »

Librum Domini fortasse dic istum, quem Domino jubente scripsit, in quo præcipit, ut diligenti investigatione requiramus quid hæc volucres et bestia, quas nunc posuit, significant, id est agni et hirci, et tauri, et arietes atque onocrotalus, et ericius, et ibis, et corvus et cætera hujusmodi. Singula enim quæque certam in reprobis significationem habent, et unum ex eis non remansit, sed omnia hæc sunt in illis. Alter ex arietibus vel ibidibus sive pilosis aut milvis alterum non quæsitiv, quia sese pariter absque labore inquisitionis invenerunt. Tanta quippe iniquorum abundantia est, ut non necesse sit, ut alter alterum quærat. Et ut nos ista diligenter investigare non pigeat, nequaquam hæc a semetipso propheta locutus est, sed quod ex ore processerit, Dominus præcepit, ut loqueretur, et spiritus ejus in corde prophetantis congregavit hæc omnia.

Vel certe librum Domini memoriam omnium, quæ est apud sapientiam ejus, intelligere possumus, de qua per Malachiam dicitur: « Attendit Dominus et audivit, et scriptus est liber monumenti coram eo (Malach. III, 10). » In quo scilicet libro requirere diligenter ista jubemur et legere, quoniam unum ex his non deficit, quia vigilantè indagare debemus hæc apud notitiam sapientiæ Dei, et pensare qualiter ibi habeantur ista, quæ sub metaphora volucrum immundarum atque bestiarum nobis describuntur, et terræ in perpetuas solitudines conversæ. Sequitur :

VERS. 17. — « Et ipse misit eis sortem, et manus ejus divisit eam illis in mensura: usque in æternum possidebunt eam, in generatione et generationem habitabunt in ea. »

Qui « dignos nos fecit in partem sortis sanctorum in lumine (Coloss. I, 12), » ipse misit peccatoribus sortem reprobationis, ut omnes in una sorte damnationis tenerentur. Et manus ejus divisit eam illis in mensura, ut juxta modum culpæ sit et modus vindictæ, quatenus homicidæ cum homicidis, fornicatores cum fornicatoribus, fallaces cum fallacibus, avari cum avaris, et quique similes cum suis similibus puniantur. Usque in æternum possidebunt eam damnationis sortem, ut sine fine ardeant, qui finem suis iniquitatibus, dum hic viverent, non posuerunt. Et interim ante diem quoque judicii ab exitu suo de corporibus habitabunt in eadem sorte poenarum, vel ardente terra in tempore generationis Synagogæ et generationis Ecclesiæ.

Descripta itaque reproborum moderna conversatione et futura ipsorum damnatione sub specie immundarum avium et bestiarum, atque regionis in solitudinem æternam et combustionem versæ, nunc ad electorum partem propheta se confert, eorumque conversationem et vitam atque glorificationem sub typo solitudinis in omnem amoeni-

tatem conversæ describit. Nam de gentilitate sub-
jungit :

CAPUT XXXV.

VERS. 1.— « Lætabitur deserta et invia, et exsul-
tabit solitudo, et florebit quasi lilium. »

VERS. 2.— « Germinans germinabit, et exsultabit
lætabunda, et laudans : gloria Libani data est ei, de-
cor Carmeli, et Saron. »

Deserta namque gentilitas fuit, in qua patriarcha
non erat, propheta non erat. Namque ibi, qui rati-
one uteretur ad intelligendum Deum, non erat,
homo ibi non erat. Sed et *invia* fuit hæc gentilitas,
ad quam via Domini verbo non patuit. Redemptore
quippe nostro veniente sic accepit vocationem gra-
tiæ, ut non in ea prius fuerit via prophetiæ. Sed
ad Christum conversa lætata est, et exsultavit au-
diens ab apostolo : « Gaudete in Domino semper,
iterum dico gaudete (*Philip. iv, 4*). » Et floruit sicut
lilium, quia ibi se candida et odorifera justorum vita
expandit

Et *germinans* in corde germinavit in opere, et
exsultavit *lætabunda et laudans*, quia in Dei lau-
dibus delectata est. Libanus autem, sicut diximus
candidatio vel *dealbatio* interpretatur; Carmelus
vero *cognitio circumcisionis*; Saron *cantans tristitia-
m*. *Gloria ergo Libani*, id est dealbationis, *data
est ei* juxta illud Psalmistæ : « Lavabis me, et su-
per nivem dealbabor (*Psal. l, 9*). » Et *decor Car-
meli datus est ei*, ut noverit se circumcidere corde
et lingua et manibus atque oculis et auribus. Et
decor Saron datus est illi, quia per donum gratiæ
cælesus delectatur stribus, et pro cantu tristitiam
diligit. Dealbata est itaque candore justitiæ conversa
gentilitas, et spiritaliter ab omnibus vitiis circum-
cisa, atque compunctioni cordis studens tristitiam
decantat. Sed quid post hæc agendum est, nisi ut sic
mundata ad visionem supernæ majestatis introduca-
tur, atque temporali tristitiæ lætitia succedat æterna?
Unde subjungitur :

« Ipsi videbunt gloriam Domini et decorem Dei
nostri. » *Gloriam* namque *Domini* reproborum nul-
lus videbit, sed isti gloriam majestatis et decorem
conspicient, quia « Regem in decore suo videbunt
(*supra xxxiii, 17*). » Sed quisquis ad hanc perve-
nire sperat visionem, quotidie magis magisque se-
metipsum in bonis actionibus exercere debet. Unde
sequitur :

VERS. 3.— « Confortate mane dissolutas. »

Quia « qui mollis et dissolutus est in opere suo,
frater est sua opera dissipantis (*Prov. xviii, 9*). »
— « Et genua debilia, » id est actiones infirmas
« roborate, » ut in pravis operibus jam non flectantur
et ad peccandum ex cordis debilitate non curventur.
Sequitur :

VERS. 4.— « Dicite pusillanims : Confortami-
mini, nolite timere : ecce Deus vester ultionem
adducet retributionis, ipse veniet, et salvabit vos. »

Vos, inquit, o doctores, dicite his qui pusillo

animo sunt : *Confortamini*, et viriliter agite, et
confortetur cor vestrum. « Nolite timere eos qui
occidunt corpus, animam autem non possunt occi-
dere (*Matth. x, 25*). » *Ecce enim Deus vester*, pro
quo patimini, retribuet tribulationem his qui vos
tribulant, et vobis, qui tribulamini, requiem in re-
velatione Domini nostri Jesu Christi de cælo : *Ecce
Deus vester ultionem adducet super eos justæ retri-
butionis*. Deus ipse per semetipsum veniet, et salva-
bit vos. Eodem spiritu Apostolus Philippensibus ait :
« Audiam de vobis, quia statis in uno spiritu una-
nimes collaborantes fidei Evangelii, et in nullo ter-
reamini ab adversariis quæ est illis causa perditionis
vobis autem salutis (*Philip. i, 27*). Nam quod
his, qui pusillo animo sunt propheta dicit : *Confortami-
mini*, hoc est, quod Apostolus hortatur discipulos,
ut « Stent in uno spiritu unanimis collaborantes
fidei Evangelii. » Et quod Isaias adjungit : *Nolite
timere*, hoc est, quod Paulus subjicit : « Et in nullo
terreamini ab adversariis. » Quodque sequitur hic :
Ecce Deus vester ultionem adducet retributionis,
illuc adjicitur : « Quæ est illis causa perditionis. »
Et quod hic subjungitur : *Deus ipse veniet et salvabit
vos*, illi subditur : « Vobis autem salutis. » Sed quid
in illo Salvatoris adventu fiat, cum omni desiderio
audiamus. Sequitur :

VERS. 5.— « Tunc aperientur oculi cæcorum, et
aures surdorum patebunt. »

VERS. 6.— « Tunc saliet sicut cervus claudus, et
aperta erit lingua mutorum. »

In hac enim vita cæci sumus, quoniam a paradisi
luce depulsi damnationis nostræ tenebras patimur.
Unde et Moysi dictum est : « Non poteris videre
faciem meam : non enim videbit me homo, et vi-
vet (*Exod. xxxiii, 20*). » Surdi quoque nunc sumus
quia internæ laudis carmina, quæ ab angelis decan-
tantur, audire n̄ quimus. Sed et claudi sumus, dum
hic vivimus, quia, licet mens rectitudinis viam te-
neat, corpus tamen ex infirmitate vacillat. Unde
Apostolus : « Condelector, inquit, legi Dei secun-
dum interiorem hominem; video autem aliam legem
in membris meis repugnantem legi mentis
meæ, et captivantem me in lege peccati, quæ est
in membris meis (*Rom. vii, 22*). » Et item : « Igitur
ego ipse mente servio legi Dei, carne autem
legi peccati (*ibid., 25*). Claudus ergo est, qui mente
servit legi Dei, carne autem legi peccati.

Muti etiam sumus, quia supernas laudes, ut
oportet, loqui non possumus. Unde David cum diceret :
« Lauda, anima mea, Dominum (*Psal. cxlv, 4*), » quia se,
dum adhuc viveret, mutum esse cognovit, mox addidit :
« Laudabo Deum in vita mea (*ibid.*), » id est post
corpo:um resurrectionem. Et apud eloquentiam Dei mutum
se penitus et irrationabilem se conspexit dicens :
« Ut jumentum factus sum apud te (*Psal. lxxii, 22*). »
Itaque cæci et surdi sumus, et claudi et muti. Sed
veniente Domino *aperientur oculi cæcorum*, quia
luce peccatis nostræ fugata caligine facultas eum
videndi nobis

tribuetur, sicut ait ipse : « Pater, quos dedisti A mihi, volo, ut ubi ego sum, et illi sint mecum, ut videant claritatem meam (Joan. xvii, 24). » — « Scimus enim, quoniam cum apparuerit, similes ei erimus, quoniam videbimus eum sicuti est (Joan. iii, 2).

Et aures surdorum patebunt, quia tunc reseratis auribus cordis non solum angelicos concentus, sed et ipsum Dei singulare Verbum manifeste audiemus, sicut pollicetur dicens : « Palam de Patre annuntiabo vobis (Joan. xvi, 25). »

Et tunc saliet sicut cervus claudus, quia sanctorum corpora mutabuntur omni molestiæ sensu, atque omni corruptibilitate et tarditate detracta, et omni fragilitate ac labe terrena in cœlestem puritatem ac stabilitatem mutata atque conversa. Ii ergo salient sicut cervus, quia fragilitate nulla vel tarditate præpedientur. Unde et per Malachiam eis de agilitate illa promittitur : « Egrediemini et salietis sicut vituli de armento (Malach. iv, 2). »

Et aperta erit lingua mutorum, quia tunc in Dei laudes aura justorum reserabuntur, cum audierint : « Laudem dicite Deo nostro, omnes sancti ejus (Apoc. xix, 5). » Et loqui tunc poterunt illa arcana verba a Paulo quondam in paradiso audita, « quæ modo non licet homini loqui (II Cor. xii, 4). »

In primo quoque adventu ejus non solum corporaliter, sed et spiritualiter impleta sunt, et implentur quotidie, dum hi, quos infidelitas cæcaverat, mentis oculos ad veritatis lumen aperiunt; et qui Scripturarum verba surdis auribus audire non poterant, post ad Dei præcepta lætantur; qui prius erant claudi, et rectam viam non tenebant, saliant in profectu justitiæ sicut cervi, imitando agiles et spiritales viros; et lingua mutorum aperitur, quorum Satanæ ora clauserat, ne possent Deum verum confiteri. Sequitur :

« Quia scissæ sunt in deserto aquæ, et torrentes in solitudine. »

Vers. 7. — « Et quæ erat arida, erit in stagnum, et sitiens in fontes aquarum. »

Quid per aquas et torrentes accipere debeamus, Salomon indicat dicens : « Aqua profunda verba ex ore viri, et torrens redundans fons sapientiæ (Prov. xviii, 4). » Hæc igitur aquæ, id est verba cœlestis doctrinæ, vel etiam aquæ baptismatis scissæ sunt, id est emanaverunt in deserto gentilitatis, et torrentes sapientiæ redundaverunt in solitudine gentium prædicantibus apostolis. Et ipsa gentilitas, quæ erat arida, id est absque omni humore sapientiæ, facta est in stagnum, id est in immensam profunditatem spiritualis intelligentiæ, et quæ erat sitiens, nunc emittit fontes doctrinarum cœlestium. Sequitur :

« In cubilibus, in quibus prius dracones habitabant, orietur viror calami, et junci. »

Quid in calamo nisi scriptores? quid per juncum, qui juxta aquam semper in humore nascitur, nisi pusilli ac teneri auditores sacri eloqui designantur? In cubilibus ergo draconum calami et junci viror

oritur, quia in eis populis, quos antiqui hostis malitia possidebat, et doctorum scientia, et auditorum obedientia coacervatur. Sed quia ad humorem aquæ et juncus et calamus nasci solet, atque ex una eademque aqua uterque proficiunt, et calamus qui lem ad scribendum sumitur, cum juncus autem scribi non potest. Quid in juncus et calamo accipere debemus, nisi quod una est doctrina veritatis, quæ multos auditores irrigat, sed irrigati alii videlicet ad hoc usque proficiunt in verbo Dei, ut etiam scriptores fiant tanquam calami; alii vero verbum vitæ audiunt, et bonæ spei, et rectorum operum viriditatem tenent, sed tamen ad scribendum proficere non possunt? Sequitur :

Vers. 8. — « Et erit ibi semita et via, et via sancta vocabitur : non transibit per eam pollutus. »

Erit ibi semita in martyribus, *via* in confessoribus. Vel *semita* in his, qui cuncta, quæ mundi sunt, deserunt : *via* in eis, qui licite mundanis utuntur. Et hæc *via*, id est conversatio fidelium, qua ad patriam tendunt, *vocabitur sancta*, ut quicumque peccatis inquinatus fuerit, transire per eam nequeat. Nam juxta Dionysium (*De divin. nom. c. 12*): « Sanctitas est omni iniquatione libera, et perfectissima, et incontaminatissima puritas. » *Non ergo transibit per sanctitatis viam*, quicumque vitiorum sordibus pollutus fuerit, sed « Beati immaculati in via, qui ambulant in lege Domini (*Psal. cxviii, 1*). » Sequitur :

« Et hæc erit vobis directa via, ut stulti non errent per eam. »

Vers. 9. — « Non erit ibi leo, et mala bestia non ascendet per eam, nec inveniatur ibi. »

Electorum via, qua per observantiam mandatorum Dei festinant ad patriam, *directa* est. *Stulti* vero dicuntur, qui relicta noxia sapientia didicerunt laudabilem fatuitatem, sicut ait Apostolus : « Si quis videtur inter vos sapiens esse in hoc sæculo, stultus fiat, ut sit sapiens (I Cor. iii, 18). » Ii ergo *stulti non errant per viam justitiæ*, sed tanto cautius incedunt per eam, quanto humilior se stultos esse cognoscunt. « Stulta enim mundi elegit Deus, ut confundat sapientes (*ibid.*, 27). » Nam quia sapientia hujus mundi stultitia est apud Deum, tanto uniusquisque amplius intus stultus sit, quanto conatur exterius sapiens videri.

Leo autem diabolus est, qui *non erit ibi*, id est in via justorum, quia de malignis spiritibus dictum est : « Juxta iter scandalum posuisti mihi (*Psal. cxxxix, 6*). » Et *mala bestia* hostis antiquus est, qui hujus mundi rapinis insidians humana quotidie morte satiatur, qui ad rapiendas mortis tempore peccatorum animas violentia crudelitatis efferatur. Qui *non ascendet per eam*, qua gradiuntur electi, viam, quia sine venia damnatus nulla emendatione revertetur ad cœlestem patriam. *Nec inveniatur ibi*, id est in via justitiæ, quia per viam iniquitatis semper incedit.

Vel juxta Gregorium (lib. xxvii *Mor.*, c. 26) dicamus : « Mala bestia non transibit per eam, » id est Ecclesiam. Bestia namque, sicut diximus, hostis ille est, qui deceptionem primi hominis sævus impeliit, et integritatem vitæ illius mala suadendo laniavit. Contra quem nunc de sancta electorum Ecclesia in antiquo statu restauranda dicitur : « Et mala bestia non transibit per eam, » atque additur : « Nec invenietur ibi, » subaudi, olim serpens in paradiso, quia per Christi gratiam meliora sunt adepturi, quam per Adam perdidimus. Nusquam est enim hostis in illa vita, vel insidiator invenietur, aut metuetur. Facta ergo via in gentilitate, quæ prius erat deserta et invia, subditur :

« Et ambulabunt, qui liberati fuerint. »

VERS. 10. — « Et redempti a Domino convertentur et venient in Sion cum laude, et lætitia sempiterna super caput eorum : gaudium et lætitiā obtinebunt, et fugiet dolor et gemitus. »

Qui per Christum liberati et redempti fuerint de captivitate Babylonis, id est « de vana sua conversatione paternæ traditionis, ambulabunt (I Petr. i, 18) » per viam justitiæ, quam illis Deus in hac solitudine præparavit : et convertentur ad antiquam paradisi sedem, et venient in Sion, id est supernam Jerusalem cum laude Salvatoris : et lætitiæ, quæ sine carebit, super caput, id est super mentem ipsorum erit. Appellatione enim capitis mens vocatur; quia, sicut caput membra regit, ita cogitationes mente disponuntur. Adhuc vero ad multiplicem felicitatis cumulum additur, quia gaudium et lætitiā obtinebunt, et possidebunt. Quid enim facerent in illa beatitudine nisi gaudere semper, et lætari de visione Creatoris? Unde et per Psalmistam dicitur : « Justi epulentur et exsultent in conspectu Dei, et delectentur in lætitia (Psal. lxxvii, 4). » Et fugiet dolor et gemitus, quia nihil ultra sentient afflictionis, nihilque jam, quod eos contristare valeat, erit, sed tranquilla et jucunda illis erunt omnia. Sequitur :

CAPUT XXXVI.

VERS. 1. — « Et factum est in quarto decimo anno regis Ezechix ascendit Sennacherib rex Assyriorum super omnes civitates Juda munitas, et cepit eas. »

In Scriptura sacra et ea, quæ accipi secundum historiam possunt, plerumque spiritaliter intelligenda sunt, ut fides habeatur in veritate historiæ, et spiritalis intelligentia capiatur de mysteriis allegoriæ, sicut ea, quæ nunc de rege Assyriorum et Ezechia narrantur, veraciter quidem secundum historiam tunc temporis facta esse credimus, sed tamen alia, quæ Novo Testamento facienda erant, præfigurasse.

Quid enim per Ezechiam regem Juda, qui fortitudo Domini, sive fortis Dominus interpretatur, nisi rex noster Christus, qui Dei virtus est, designatur? Quid per quartum decimum annum regis Ezechix, nisi tempus illud exprimitur, quo Christus inter ho-

mines cot versans corporaliter utrumque Testamentum adimplevit? Quaternarius enim Novum Testamentum designare solet propter quatuor libros Evangelii, denarius vero legem propter Decalogum ejus. Quid per regem Assyriorum nisi diabolus accipitur? Qui vocatur Sennacherib, id est levans deserta, quoniam infidelium corda contra fideles excitans in persecutionem elevat. Quid per civitates munitas nisi mentes Judæorum figurantur, qui se contra divinam prædicationem munierant? Igitur in quarto decimo anno Ezechix rex Assyriorum cepit omnes civitates munitas, quia apparente Domino in carne diabolus Judaicum populum sibi subjugavit. Sequitur :

VERS. 2. — « Et misit rex Assyriorum Rabsacen de Lachis in Jerusalem ad regem Ezechiam in manu gravi, et stetit in aquæductu piscinæ superioris in via Agri fullonis. »

Rabsaces interpretatur princeps deosculans sive multas osculo. Et quid per Rabsacen nisi ficta Scribarum et Pharisæorum amicitia designatur, cum dicunt : « Magister, scimus quia verax es, et viam Dei in veritate doces (Matth. xxii, 16), » et cætera hujusmodi? Lachis vero dicitur interest vel sibimet vir. Quid per Lachis nisi populus Hebræorum accipitur qui inter eos populos legem solus percepit, et sibi soli viriliter egit? Quid vero per Jerusalem nisi Ecclesia designatur? Captis ergo civitatibus Juda rex Assyriorum misit Rabsacen de Lachis in Jerusalem ad Ezechiam, quia, subjugatis in perfidia Judæis, antiquus hostis principes sacerdotum et Scribas et Pharisæos ex eodem populo Judæorum adversus Christum instigavit, et adversus fideles ejus; et misit eos in manu gravi, id est cum fortitudine populi Synagogæ.

Quæ est autem piscina superior nisi præcellens Evangelii doctrina? Et quis aquæductus piscinæ hujus nisi latens scientia Testamenti Veteris, in qua tegitur, et de qua tandem procedit exuberans fons evangelicæ prædicationis? Stetit ergo Rabsaces, quia Scribæ et Pharisæi hypocritæ persistentes in vetustate litteræ non venerunt ad novitatem spiritus. Dicitur autem de Christo per Malachiam : « Ipse enim quasi ignis conflans, et quasi herba fullonum (Malach. iii, 2). » Si ergo Christus est quasi herba fullonum, quis est ager in quo nata est hæc herba, nisi populus Judæorum? Ager itaque fullonis est Judaicus populus. Via ergo Agri fullonis actio Synagogæ, in qua scilicet via stetit Rabsaces, quia Pharisæi et Scribæ non dimiserunt carnales observantias.

Sic tamen Pharisæos, et Scribas atque pontifices per Rabsacen intelligamus, ut cæteros principes adversariorum Ecclesiæ secundario per cum posse accipi non negemus, id est hæreticorum et gentilium patronos. Unde et in libro Regum (IV Reg. xviii, 17) venisse cum eo referuntur alii duo principes, id est Tharthan et Rabsaris. Nam et Ezechias sanctos rectores Ecclesiæ, qui membra Christi sunt, designare forsitan potest; et quartus decimus annus Eze-

chiæ tempus eorum, quo Testamentum utrumque A custodiunt; rex Assyriorum tumidum sensum perversorum dogmatum; civitates Juda munitæ mentes eorum qui se Christianos fatentur, et corda sua verbo prædicationis claudunt. *Cepit ergo rex Assyriorum civitates Juda munitas*, quia tempore persecutionis facile consenserunt errori gentilium aut hæreticorum Christiani, qui doctrinam Ecclesiæ cum obedientia non suscipiebant. Lachis, quæ dicitur *interest*, plebem hæreticorum exprimere potest, quæ velut media inter nos et gentiles est. Sed et hoc quod Lachis interpretatur *sibimet vir*, ostendit, quod hæretici sunt seipso amantes: « Charitas enim non quærit quæ sua sunt (I Cor. xiii, 5). » Sed hæretici omnes, quæ sua sunt, quærunt, non quæ Jesu Christi. *De lachis ergo*, id est de plebe hæreticorum *venit Rabsaces*, id est unusquisque hæresiarcha in Jerusalem, id est contra Ecclesiam.

Ager autem *fullonis*, in quo sordes lavantur, populus est credentium, in quo Christus fullo delet maculas cordium. *Via agri fullonis* actio Christianæ plebis, *piscina superior* divina Scriptura. Quæ scilicet *piscina est in via agri fullonis*, quoniam mandata Scripturæ cælestis in operatione sunt fideles populi. Aquæductus *piscinæ* hujus occulta est prædicationis hæreticorum velut ex Scriptura sacra latenter educta. Unde meretrix apud Salomonem, quæ typum hæresis tenet, dicit: « Aquæ furtivæ dulciores sunt (Prov. ix, 17). » In hoc itaque *aquæductu stetit Rabsaces* contra Jerusalem, quoniam hæresiarchæ contra Ecclesiam in sua furtiva prædicatione constituerunt. Sed et principes erroris gentilium iste Rabsaces figurare potest. Sed nos ad cætera transeamus. Sequitur:

VERS. 3. — « Et egressus est ad eum Eliacim filius Helciæ, qui erat super domum, et Sobna scriba, et Joahe filius Asaph a commentariis. »

Eliacim interpretatur *Deus resuscitavit*, Helcias *pars Domini*, Sobna *sedens*, Joahe *Domini frater* vel *fratris factura*, Asaph *congregans*. Et quid per *Eliacim* præpositum domus Domini figuratur nisi apostolorum præeminens apex? Qui jure vocatur *Deus resuscitavit*, quia præcipue resurrectionem Salvatoris asserere studuit. Scriptum est enim, quia « virtute magna reddebant apostoli testimonium resurrectionis Jesu Christi Domini nostri (Act. iv, 33). » Qui sunt filii partis Domini, id est electionis, sicut ipse ait: « Quos dedisti mihi, non perdi ex eis quemquam (Joan. xviii, 9). »

Scriba vero scriptor est, sicut Jeremias declarat, dicens de quibusdam: « Vere mendacium operatus est stylus mendax scribarum (Jer. viii, 8). Et quid per hunc scribam nisi patres designantur, qui canonicas Scripturas composuerunt; unde et Sobna, id est *sedens* appellatur, quia in sessione designatur auctoritas magisterii, sicut Dominus insinuavit, dicens: « Super cathedram Moysi sederunt Scribæ et Pharisei. Omnia ergo quæcunque dixerint vobis servate et facite (Matth. xxiii, 2). »

Commentarios autem vocare consuevimus expositiones librorum. Quid ergo per *Joahe*, qui a suis *commentariis* egressus est cum aliis duobus ad Rabsacem, nisi expositores Scripturarum sacrarum figurantur? Unde et Joahe, id est *Domini frater* nuncupatur, quia sancti doctores per vitæ meritum facti sunt propinqui Salvatoris, qui ait: « Quicumque fecerit voluntatem Patris mei qui in cælis est, ipse meus frater, et soror et mater est (Matth. xii, 50). » Et illud quod *Joahe fratris factura* interpretatur, in eodem sensu accipitur: « Ipsius enim sumus factura creati in Christo Jesu in operibus bonis, quæ præparavit Deus, ut in illis ambulemus (Ephes. ii, 10). » Nam ipse Christus frater nobis fieri dignatus est. Inde est, quod Joahe filius Asaph, id est *filius congregantis* est. Congregans quippe Deus appellatur, quoniam electorum Ecclesiam ex omnibus populis et nationibus congregat, sicut scriptum est: « Domus mea domus orationis vocabitur cunctis populis, ait Dominus, qui congregat dispersos Israel (Isa. lvi, 7). » Quod imitantes sacri eloquii tractatores gregem fidelium adunare satagunt, et ideo *filii congregantis* merito dicuntur.

Possimus et sanctos prædicatores per Sobnam scribam intelligere. Scriba enim non semper scriptorem, sed et sapientem plerumque designat, sicut Dominus ostendit, ubi ait: « Omnis scriba doctus in regno cælorum similis est homini patrifamilias qui profert de thesauro suo nova et vetera (Matth. xiii, 52). » Per Joahe vero commentariensem eos qui gesta singulorum temporum post apostolos scripserunt, accipere possumus. Commentariensis enim, id est cancellarius vocatur, qui gesta rerum conscribit, et commentarii nuncupantur libelli chartularum, quas scribit.

Egressus est itaque Rabsacem *Eliacim filius Helciæ, qui erat super domum, et Sobna scriba, et Joahe filius Asaph a commentariis*, quoniam apostoli et Scripturarum sanctarum auctores, vel Ecclesiæ præpositi, sapientes, atque sacri eloquii expositores, sive gestorum sacrorum scriptores rationem de nostra fide sæpius reddiderunt Judæis et gentilibus atque hæreticis. Ad eum namque a nobis ipsis egredimur, ad quem nostræ mentis arcana loquendo proferimus. Sequitur:

VERS. 4. — « Et dixit ad eos Rabsaces: Dicitis Ezechia: Hæc dicit rex magnus Assyriorum: Quæ est ista fiducia, qua confidis? »

VERS. 5. — « Aut quo consilio vel fortitudine rebellare disponis? Super quem habes fiduciam, quia recessisti a me? »

Rabsaces, quia typum Judæorum gerit et hæreticorum atque gentilium, voce omnium istorum loquitur. Et primo quidem voce Judæorum atque gentilium inchoat loqui: *Dicite*, inquit, vos præpositi, *dicite Ezechia*, id est Ecclesiæ, quæ corpus Christi est. Una enim persona est Christus et Ecclesia, et ideo quod dicitur de Christo, nunc ad caput, nunc ad corpus est referendum. *Hæc dicit rex magnus, rex*

Assyriorum, id est ingens doctrinæ nostræ sensus : *Quæ est ista fiducia, qua confidis, o plebs Christiana?* Putant enim Judæi et gentiles frustra nos in Christo confidere et sensum dogmatum suorum Evangelio præferunt. Sensus autem erroris eorum pro diabolo accipitur, quem significat rex Assyriorum. Nam et cum dici ur, quia « intravit Satanæ in Judam (Luc. xxii, 3), » sensum et malitiam Satanæ in eum intelligimus intrasse, non ipsum Satanam essentialiter.

Quæ est, inquit, ista fiducia, quam nuper assumpsisti, ut non timeas eos qui occidunt corpus; Aut quo consilio vel fortitudine disponis adversum me rebellare? Rebellamus enim contra sensum Judæorum et gentilium, quia ad Evangelium conversi carnalem legis intelligentiam et errorem idololatricæ jam non recipimus, sed impugnamus. Et hoc facimus consilio, de quo scriptum est : « Ego sapientia habito in consilio, et eruditus intersum cogitationibus (Prov. viii, 12); » et fortitudine, qua dicitur : « Omnia possum in eo qui me confortat (Philipp. iv, 13). » Sed nostrum consilium aut fortitudinem cæcus hostis nescivit. Et repetens : *Super quem, inquit, habes fiduciam, quia recessisti a me? Recessimus enim ab idololatria, recessimus a carnali doctrina Pharisæorum fiduciam habentes in Christo.* Deinde Judæorum et hæreticorum voce subjungit Rabsaces, quod ipsum caput nostrum est referendum.

VERS. 6. — « Ecce confidis super baculum arundineum contractum istum, super Ægyptum : cui si innixus fuerit homo, intrabit in manum ejus, et perforabit eam : sic Pharaon rex Ægypti omnibus, qui confidunt in eo. »

Pharisæi namque et hæretici, qui quasi de propria religione gloriantur, *Ægyptum*, id est gentilitatem deridendo vocant *baculum arundinis contractum*, quia foris nitens, intus vacua erat, et mentis ejus robur peccatis cedens erat contractum. *Cui si quisquam ratione utentium inniti volens ad bene agendum superponeret manum suæ actionis ad sustentandum, mox ejus actio lacerabatur ab ea, et peccato quasi sanguine operiebatur. Sic Pharaon rex Ægypti faciebat, id est tales erant sapientes gentilium omnibus, qui se eis committebant volentes in doctrina eorum bene vivere.* Sed tamen et in his confusus est Dominus, quia conversos ad fidem suam fecit eos prædicatores. Post hæc Rabsaces voce gentilium addit :

VERS. 7. — « Quod si responderis mihi : In Domino Deo nostro confidimus : nonne ipse est, cujus abstulit Ezechias excelsa et altaria, et dixit Judæ et Jerusalem : Coram altari isto adorabitis? »

VERS. 8. — « Et nunc trade te Domino meo regi Assyriorum, et dabo tibi duo millia equorum nec poteris præbere ex te ascensores eorum. »

VERS. 9. — « Et quomodo sustinebis faciem judicis unius ex servis Domini mei minoribus. »

Hæc ad populum dicta sunt. *Excelsa vero et altaria doctrinas et sectas hæreticorum intelligimus,*

quas iste Domini esse dicit, quia gentiles esse putant a Deo prædicatores hæreticorum. Sed has abstulit Ezechias, id est Christus, et dixit Judæ et Jerusalem, id est Ecclesiæ suæ : *Coram altari isto adorabitis*, id est in una fide Catholica Deum colentis. *Equorum* autem vocabulo dignitates sæculi designantur, Salomone dicente : « Vidi servos in equis, et principes ambulantes quasi servos super terram (Eccli. x, 7), » id est peccatores in dignitatibus sublimibus, et justos viles ac despectos velut peccatores.

In millenario autem consummata numerorum perfectio est. *Duo millia* igitur equorum offert, qui et foris omnem sæculi gloriam, et intus omnem superbiam dare vel polliceri paratus est sibi consentientibus, sicut et ipse rex Assyriorum regi nostro dicere cæcus præsumpsit, cum tentavit eum : « Tibi dabo potestatem hanc universam, et gloriam illorum, quia mihi tradita sunt, et cui volo, do illa. Tu ergo si adoraveris me, tua erunt omnia (Luc. iv, 6). » Sic et in hoc loco populus gentilium vel quilibet princeps eorum populo fidelium dicit : « Trade te domino meo regi Assyriorum, id est consentiens esto culturæ idolorum, et dabo tibi duo millia equorum, id est universis sæculi dignitatibus te sublimabo, nec poteris ex te præbere ascensores eorum, id est non invenies ex tuis, qui tot honores percipiant, quot ego dare volo.

¶ Sed post blandimenta seductionis terrorem subjungit : *Quomodo, inquit, sustinebis faciem judicis unius, id est cujuslibet principis gentium, si contra te venerit iratus? Sic loquebantur olim prælati sæculi martyribus nostris.* Rursus voce Pharisæorum et hæreticorum adjungit Rabsaces dicens ad Christum :

« Quod si confidis in Ægypto, in quadrigis et equitibus :

VERS. 10. — « Et nunc nunquid sine Domino ascendi ad terram istam, ut disperderem eam? Dixit Dominus ad me : Ascende super terram istam, et disperse eam. »

In Ægypto, id est in gentilitate Christus confidit, Christus confidit in quadrigis et equitibus, de quibus ei dictum fuerat, quia « ascendes super equos tuos, et quadrigæ tuæ salvatio (Habac. iii, 8). » Equi namque ejus sancti prædicatores sunt, equites ejus animæ prædicatores. Super equos suos ascendit Dominus sicut scriptum est : « Glorificate et portate Deum in corpore vestro (I Cor. vi, 20). » Quadrigæ ejus evangelicæ prædicationes sunt. Sed Pharisæi non sine Domino ascendisse se dicunt ad terram Ecclesiæ disperdendam, quia divinæ voluntati deservire se putant, dum novæ fidei prædicatores persequuntur, sicut ipse Dominus prædixit : « Venit hora, ut omnis, qui interficit vos, arbitretur obsequium se præstare Deo (Joan. xvi, 2). » Unde et Apostolus testimonium illis perhibet, quod « emulationem Dei habent, sed non secundum scientiam (Rom. x, 2). » Uoc est, quod iste nunc ait : *Dominus dixit ad me :*

Ascende super terram istam, id est super Ecclesiam, et disperde eam. Similiter et hæretici, quia se pro Deo loqui arbitrantur, a Deo se missos adversus Ecclesiam asserunt. Sequitur :

VERS. 11. — « Et dixit Eliacim et Sobnās et Joabe ad Rabsacen : Loquere ad servos tuos Syra lingua : intelligimus enim. Ne loquaris ad nos Judaice in auibus populi, qui est super murum. »

In eo quod dicitur : *Loquere ad servos tuos*, humilitas fidelium ostenditur. *Syra lingua* vox infidelium est ; Judaica lingua vox fidelium. Et Judæi plerumque atque hæretici loquuntur *Judaice*, id est vocem rectæ confessionis emittunt, dum audiuntur a Catholicis, ut facilius decipiant. Unde Rabsaci per Sobnam eorum genti dicitur : *Loquere Syra lingua*, id est loquere ut infidelis, loquere ut hæreticus. *Ne loquaris ad nos Judaice*, id est velut Catholicus, aut qui Deum noverit, ne per hanc simulationem fideles ad te trahas. Ili sunt enim sedentes *super murum*, id est fundati in Christo, qui murus est nobis sicut scriptum est : « Urbs fortitudinis nostræ Sion Salvator, ponetur in ea murus (*supra xvi, 1*). » Sequitur :

VERS. 12. — « Et dicit ad eos Rabsaces : Nunquid ad dominum tuum, et ad te misit me dominus meus, ut loquerer omnia verba ista, et non potius ad viros, qui sedent super murum, ut comedant stercora sua, et bibant urinam pedum suorum vobiscum. »

Nequaquam ad Dominum vestrum, id est ad Christum, et ad hos tres viros, id est ad Ecclesiæ præpositos missus est, ut ait : ita loqui, *sed ad viros potius, qui in muro sedent*, id est ad populares, qui sunt in Ecclesia. Neque enim seductores querunt alloqui robustos et eruditos, qui mente trahi jam nequeunt, sed infirmos et idiotas, qui facile decipiuntur. Apostolus autem (*Rom. xi*), qui fuerat circumcissus octava die ex genere Israel de tribu Benjamin, Hebræus ex Hebræis, secundum legem Pharisæus, secundum æmulationem persequens Ecclesiam Dei, secundum justitiam, quæ in lege est, conversatus sine querela, propter Christum hæc omnia detrimentum fecit, et arbitratus est *velut stercora*, ut Christum lucrificaret, et inveniretur in illo non habens suam justitiam, quæ ex lege est, sed illam, quæ ex fide est Jesu Christi. Hæc sunt *stercora*, et hæc est *urina* pedibus fidelium conculcata, quæ Rabsaces iste comedit rursus, et bibi vult ab eis. Sic enim scriptum est in Actibus apostolorum : « Quidam descendentes de Judæa docebant fratres, quia, nisi circumcidamini secundum morem Moysi, non potestis salvari (*Act. xv, 1*). » Et iterum : « Surrexerunt quidam de hæresi Pharisæorum, qui crediderunt dicentes : quia oportet circumcidi eos præcipere quoque servare legem Moysi (*ibid., 5*). » Unde et hic subditur :

VERS. 13. — « Et stetit Rabsaces, et clamavit voce magna Judaice, et dixit : Audite verba regis magni, regis Assyriorum. »

VERS. 14. — « Hæc dicit rex : Non seducat vos Ezechias super Domino, quia non poterit eruere vos. »

VERS. 15. — « Et non vobis tribuat Ezechias fiduciam super Domino dicens : Eruens liberabit nos Dominus, non dabitur civitas ista in manu regis Assyriorum. »

Judaice enim clamavit Rabsaces, quia quidam de hæresi Pharisæorum, qui crediderant, errorem docebant. Nam quod hic dicitur *Judaice*, hoc ibi *qui crediderant*. *Judaice* enim clamant, qui quasi sub nomine Christi, quod loquuntur, pronuntiant. Ubi et hoc notandum, quia item sunt Pharisæi et hæretici, dum dicitur : « Quia surrexerunt quidam de hæresi Pharisæorum. » *Audite*, inquit, *verba regis magni*, id est doctrinam largi sensus nostri. *Non seducat vos Ezechias, quia non poterit eruere vos*, hoc est dicere : « Nisi circumcidamini secundum morem Moysi, non potestis salvari. » *Et non vobis tribuat fiduciam Ezechias*, id est Christus, *super Domino dicens : Eruens liberabit vos Dominus*, id est per gratiam Dei sine legis observatione salvabimini. *Et non dabitur civitas ista*, id est Ecclesia *in manu regis Assyriorum*, id est in actionem carnalis intellectus Pharisæorum. Vel non dabitur in manu hostis antiqui populus Ecclesiæ, cum de hac vita migraverit. Sequitur :

VERS. 16. — « Nolite audire Ezechiam : hæc enim dicit rex Assyriorum : Facite mecum benedictionem, et egredimini ad me, et comedite unusquisque ficum suam, et bibite unusquisque vineam suam, et aquam cisternæ suæ. »

VERS. 17. — « Donec veniam et tollam vos ad terram, quæ est ut terra vestra, terra frumenti, et vini, terram panum et vinearum. »

Facite, inquit, *mecum benedictionem*, id est communicate hæreticis *et egredimini ad me* de Ecclesia, *et comedite unusquisque vineam suam*, id est agat unusquisque proprium opus, quod agere solebat. *Vineæ enim nostræ sunt actiones in quibus quotidiano labore desudamus. Et unusquisque ficum suam comedit*, id est quod sibi bonum et dulce visum fuerit, assumat. *Et bibite unusquisque aquam cisternæ suæ*, id est scientiam suam, quam apud nos *D* singuli reconditam habetis. Et interim hæc agite, *donec veniam*, et penitus vos ab Ecclesia separans *tollam vos ad terram quæ est ut terra vestra*, id est ad hæreticorum congregationem, quæ aliquo modo similis est Ecclesiæ, ubi videtur esse frumentum internæ refectionis, et vinum spiritualis debriationis, panis intelligentiæ, et vinea rectæ actionis. Hæc enim se omnia jactant habere hæretici. Sequitur :

VERS. 18. — « Non conturbet vos Ezechias dicens : Dominus liberabit vos. Nunquid liberaverunt dii gentium unusquisque terram suam de manu regis Assyriorum? »

VERS. 19. — « Ubi est deus Emath, et Arphad? ubi est deus Sepharvaim? nunquid liberaverunt Samariam de manu mea? »

VERS. 20. — « Quis ex omnibus diis terrarum istarum, qui eruerit terram suam de manu mea, ut eruat Dominus Jerusalem de manu mea? »

Vox est regis Assyriorum per os Rabsacis, id est hostis antiqui per hæreticos. *Non vos*, inquit, *conturbet Ezechias*, id est Christus dicens : *Dominus liberabit vos* ab ira ventura vel ab hoste antiquo. Et doctrinam Salvatoris æquiparans doctrinæ gentilium ore canino blasphematur, quia sicut illi per eos nequiverunt salvari, ita nec nos per istam poterimus. Quid enim deos gentilium nisi spirituales sensus singularum sectarum appellat? Unicuique Deus est, quod specialiter colit. Sapientibus hujus mundi deus est sapientia singularis. Sed *dii gentium*, id est uniuscujusque secta gentilium non liberaverunt uniuscujusque terram suam, id est plebem suam de manu regis Assyriorum, id est diaboli, quia nemo per doctrinas eorum salvatus est.

« Ubi est, inquit, Deus Emath? » etc. Emath indignatio est, Arphad sanatus vel sanans, Sepharvaim libri vel litteræ. Fuerunt autem quidam philosophi, qui se justos æstimantes indignabantur cæteris male agentibus, et acriter eos redarguebant, et dum se sanatos a languore peccatorum crederent, alios etiam sanare se dicebant. Librorum quoque lectionibus et litterarum studiis erant dediti. Sensus igitur eorum, quo peccantibus indignabantur, *deus Emath*, id est deus indignationis vocatur, sensus quo se putabant sanatos, aliisque salutem pollicebantur; *deus Arphad*, id est deus sanati vel sanantis : intellectus, quem in libris sæcularibus habebant; *deus Sepharvaim*, id est deus librorum et litterarum. Sed ubi est, inquit, iste sensus indignationis et sanantis, et iste sensus litterarum?

Nunquid liberaverunt Samariam, id est gentem idololatrarum, *de manu mea*? Nequaquam. Non enim poterunt gentiles salvari per inanes philosophorum religiones. Samaria vero pro idololatriâ posita est, quia ibi populus Israel ad cultum idolorum conversus est.

Quis est, inquit, ex omnibus diis terrarum istarum, qui eruerit terram suam de manu mea? Quæ est ex omnibus doctrinis gentilium, quæ sectatores suos ab æterna morte liberaverit? *Ut eruat Dominus*, id est doctrina Domini *Jerusalem*, id est Ecclesiam *de manu mea*? Præsumit enim improbus hostis quia sicut fideles rapere non omisit propter illa, quæ colebant; sic et fideles adhuc rapere non desistit propter Dei doctrinam, cui serviunt. Sed, protegente Domino, non ita nobis faciet, sicut infidelibus fecit. Potest et superbus sensus hæreticorum hæc loqui, et præsumere, quia sicut gentiles quoque velut a religione convertens ad se traxit? ita et catholicos sit rapturus. Sed post Rabsacis hujus insaniam propheta subjungit de viris in muro sedentibus :

VERS. 21. — « Et siverunt, et non responderunt ei verbum. Mandaverat enim rex dicens : Ne respondeatis ei. »

Hex Christus præceperat habitatoribus erusa, em,

A id est his qui in Ecclesia sunt, ne responderent ei dicens per Salomonem : « Ne respondeas stulto juxta stultitiam suam, ne efficiaris ei similis (Prov. xxvi, 4). » Populus huic respondere prohibitus est, quia sapientes hæreticis respondere debent, qui dolos eorum dissipare sciunt, non simplices et imperiti, qui seduci possunt Sequitur :

VERS. 22. — « Et ingressus est Eliacim filius Helciæ, qui erat super domum, et Sobnas scriba, et Joahe filius Asaph a commentariis ad Ezechiam scissis vestibibus, et nuntiaverunt ei verba Rabsacis. »

Ingressi sunt ad Ezechiam, quia in secreto mentis audierunt Christum. *Et nuntiaverunt ei verba Rabsacis*, quia in oratione conquesti sunt ei de blasphemis hæreticorum et infidelium. Vestes autem prædicatorum sunt auditores eorum, qui concorditer eis undique cohærent. In *vestibus* ergo fidelium doctorum *scissis* designatur in populo fidelium schisma factum esse per verbum hæreticorum. Sequitur :

CAPUT XXXVII

VERS. 1. — « Et factum est, cum audisset rex Ezechias, scidit vestimenta sua, et obvolutus est sacco, et intravit in domum Domini. »

VERS. 2. — « Et misit Eliacim, qui erat super domum, et Sobnam scribam, et seniores de sacerdotibus opertos saccis ad Isaiam filium Amos prophetam. »

C Rex Ezechias verba principum suorum audivit, quando Christus orationes præpositorum Ecclesiæ, quas pro hæreticorum blasphemis effundebant, misericorditer exaudivit. Exauditis ergo precibus, quid egerit, videamus. *Scidit vestimenta sua*, id est justo judicio permisit eos ab hæreticis abstrahi de Ecclesia, quos noverat perituros? et quos ad vitam præordinaverat, retinuit. Vestes quippe Domini fideles ejus sunt. « Quicumque enim in Christo baptizati estis, Christum induistis (Gal. iii, 27). » Vestes ergo scidit, quoniam a reprobis electos divisit. Cætera quæ nunc Ezechias fecisse subditur, ad populum electorum, qui corpus est Christi, referenda sunt.

Saccus vero habitus pœnitentium est. *Obvolutus est igitur sacco* populus fidelium, quia inter adversa conversus est ad pœnitentiam. *Et intravit in domum Domini*, quia mente cælum ingressus est, et tribulationis arctatus *misit Eliacim et Sobnam et seniores de sacerdotibus*, id est doctores et præpositos suos, *ad Isaiam prophetam*, id est ad sermonicum propheticum inspiciendum, ut inquirerent quidnam de his afflictionibus prophetæ senserint. *Isaias* enim propheticam Scripturam designare monstratur, ubi legimus, quia vir Æthiops eunuchus (Act. viii, 27 et seq.) venerat adorare Jerusalem, et revertebatur sedens super currum suum, legensque Isaiam, id est librum Isaiæ prophetæ. Unde et Isaias interpretatur *salus Domini*, ut salutarem doctrinam Scripturæ sacræ declaretur significare. Amos vero pater ejus in nostra lingua fortis dicitur, sive robustus

vel *potens*, si tamen ab Aleph littera incipiat, et A
 finiatur in Sade. Quod si exordium sumit ab Am et
 consummatur in Nun interpretatur *populum divel-*
lens. Et quid per hunc robustum populum et
 potentem nisi virtus Spiritus sancti designatur, qui
 et *populum divellens* recte vocatur, quia populum
 acquisitionis a mundo divellit. Amos ergo pater est
 Isaiaë, quia sanctus Spiritus auctor est Scripturæ
 sacræ. Sequitur

VERS. 3. — « Et dixerunt ad eum : Hæc dicit
 Ezechias : Dies tribulationis et correptionis et blas-
 phemiæ dies hæc, quia venerunt filii usque ad partum
 : et virtus non fuit parienti (139). »

VERS. 4. — « Si quo modo audiat Dominus Deus
 tuus verba Rabsacis, quem misit rex Assyriorum
 dominus suus ad blasphemandum Deum viventem, B
 et ad exprobrandum sermonibus, quos audivit, do-
 minus tuus : leva ergo orationem pro reliquiis, quæ
 repertæ sunt. »

Non verbis sed corde sic locuti sunt ad Isaïam,
 id est ad sermonem propheticum, quia sic cogita-
 bant in corde suo, dum Scripturas sacras anxii
 consulerent. Hæc, inquit, dicit Ezechias, id est
 populus fidelium : *Dies hæc dies est tribulationis*, id
 est tempus hoc tempus tribulationis est, quia nunc
 graviter affligimur, et *correptionis*, quia corripimur
 a Domino, et *blasphemiae*, quia Deus ab impiis
 blasphematur, *quia venerunt filii usque ad partum,*
nec est virtus Ecclesiæ parienti. Sancta enim Ec-
 clesia cum per doctores de conversione vel profectu C
 auditorum cogitat, quasi in utero conceptionem
 portat. Sed dum obsistentibus adversitatum impe-
 dimentis necdum convertere sinitur, quos conver-
 tere satagit, vel ad profectum ducere, quos cupit,
 quasi mulier in utero habens prolem edere nititur
 dolens, et non valet. Bene ergo dicitur : « Dies tri-
 bulationis, et blasphemiae, et correptionis dies hæc,
 quia venerunt filii usque ad partum, nec est virtus
 parienti. » Namque dum hostes Ecclesiæ verbis aut
 gladiis in eam divino iudicio sævire permittuntur,
 tunc ipsa rarius quemquam convertendo parit, aut
 conversum roborare sinitur. Ubi et congrue sub-
 jungit fluctuans populus :

Si quo modo audiat, id est audire se demonstret
 Dominus Deus tuus verba Rabsacis, id est Phari- D
 sæorum, hæreticorum et gentilium, quos misit rex
 Assyriorum dominus suus, id est Satan, qui
 dominatur eis, aut superbus perversorum dogmatum
 sensus, ad blasphemandum Deum viventem, id est
 Filium Dei Dominum Jesum Christum, qui « resur-
 gens a mortuis jam non moritur (Rom. vi, 9). » In
 hoc enim præcipue nos deridebant olim gentiles
 atque Judæi, quia credimus in crucifixum, confi-
 dentes miseri mortem Redemptoris nostri, sed
 resurrectionem ejus negantes, ac per hoc Deum
 viventem blasphemant, quoniam eum, qui in prin-
 cipio Deus erat, et circa mundi finem nostram

assumpsit humanitatem, in qua resurgens in æter-
 num jam vivit, irridebant aut certe Deum viventem
 blasphemant, qui minorem Patre Filium garriunt,
 vel aliquid male de illa Trinitate, quæ Deus est,
 loquuntur.

Leva ergo, inquit, orationem ad Dominum pro
 reliquiis, quæ repertæ sunt, id est pro his, qui in-
 venti sunt in Ecclesia residui, quos non abduxerunt
 hæretici. Sed si propheticum sermonem Isaïas desi-
 gnat, quomodo pro reliquiis populi Dei sermo pro-
 pheticus orabit? Hoc tamen invenire facillimum est.
 Erat enim propheticus Spiritus pro populo Dei
 contra blasphemias hostium, qui diis similem
 Deum nostrum ut Rabsaces iste putabant, dicens :
 « Deus quis similis erit tibi? Ne taceas neque com-
 pescaris, Deus, quia ecce inimici tui sonuerunt, et
 qui oderunt te, extulerunt caput. Super populum
 tuum malignaverunt consilium, et cogitaverunt ad-
 versus sanctos tuos (Psal. LXXXII, 1). » Sic levat
 orationem sermo propheticus pro reliquiis fidelium.
 Sequitur :

VERS. 5. — « Et venerunt servi regis Ezechiaë ad
 Isaïam. »

Artificiali ordine, quod ante gestum est narrat
 inferius. Prius enim venerunt, et post locuti sunt
 verba, quæ superius posuit. Sequitur :

VERS. 6. — « Et dixit ad eos Isaïas. »

Id est sermo prophetiæ. Hæc dicetis Domino vestro,
 id est populo fidelium, qui est corpus Christi.
 « Hæc dicit Dominus : Ne timeas a facie verborum,
 quæ audisti, quibus blasphemaverunt pueri regis
 Assyriorum me. » Hoc est : Nolite timere opprobria
 hominum et blasphemias eorum ne metuatis. Se-
 quitur

VERS. 7. — « Ecce dabo ei spiritum, et audiet
 nuntium, et revertetur in terram suam, et corruere
 eum faciam gladio in terra sua. »

Versus iste patebit in sequentibus. Sequitur :

VERS. 8. — « Reversus est autem Rabsaces, et
 invenit regem Assyriorum præliantem adversus
 Lobnam. Audierat enim quod profectus esset de
 Lachis. »

Reversus est Rabsaces a Jerusalem, quia Judæi
 atque gentiles et hæretici tandem Ecclesiam perse-
 qui desierunt, et inventuri sunt in Antichristo dia-
 bolum regem suum præliantem adversus Lobnam,
 id est contra plebem reliquiarum Israel. Lobna
 enim, quæ dicitur alba vel candida, vitam illorum
 fidelium Hebræorum candore justitiæ vernantem
 designat, contra quos diabolus acriter pugnabit. Qui
 profectus est de Lachis, quia Judæos olim impugnare
 desiit, ex quo eos sibi in perfidiam subiecit. Lachis
 enim, quæ dicitur interest, antiquum illum Judæo-
 rum exprimit populum, qui in medio gentium po-
 situs terram promissionis excoluit.

Sed quia per Jerusalem accipimus Ecclesiam, et
 per Lachis populum Hebræorum, qui præcessit Ro-

demptoris adventum, atque per Lobnam eos qui in fine mundi credituri sunt ex Judæis : querendum videtur, quare rex Assyriorum, qui diabolus est, per semetipsum pugnet adversum Lachis et Lobnam, ad Jerusalem vero non veniat ipse, sed suos mittat? Ad quod respondendum quia nunc per Dominicæ crucis victoriam ligatus est antiquus hostis, qui prius in mundo principabatur, rursusque temporibus Antichristi ad apertiora certamina revocabitur, atque totus contra nos in suis viribus relaxabitur. Sic enim dicit Joannes : « Vidi, inquit, Angulum descendentem de cælo habentem clavem abyssi, et catenam magnam in manu sua, et apprehendit draconem, serpentem antiquum, qui est cialolus et Satanas, et ligavit eum per annos mille, et misit eum in abyssum (Apoc. xx, 1). » Et item : « Cum completi fuerint mille anni, solvetur Satanas (ibid., 7). » Nunc igitur catenatus tenetur, sed tunc solvetur. Patet namque cur ad Jerusalem non venerit, qui contra Lachis et Lobnam per se preliatus est. Sequitur :

VERS. 9. — « Et audivit de Tharacha rege Æthiopiæ, dicentes : Egressus est, ut pugnet contra te. »

Tharacha dicitur *elongatus*, Æthiopia *caligo* vel *tenebræ*. Quid ergo per Æthiopiam nisi gentilitatis error exprimitur? Nam conversis gentilibus dicit Apostolus : « Fuistis aliquando tenebræ, nunc autem lux in Domino (Ephes. v, 8). » Quid per istarum regem tenebrarum, qui *elongatus* appellatur, nisi principes eorum accipiuntur, id est philosophi et poetæ atque potentes sæculi docentes idololatriam, et defendentes, qui longius a Creatore suo recesserant? Sed tandem egressi sunt ad lumen veritatis de caligine veteris ignorantiae, ut contra regem Assyriorum, qui diabolus est, in stadio vitæ presentis bene vivendo pugnantem coronam mereantur æternam accipere. De quibus audivit Satanas, qui in abyssu ligatus est, malignos spiritus sibi dicere, quia egressi sunt, ut pugnent contra te. Sequitur :

Quod cum audisset, misit nuntios ad Ezechiam dicens :

VERS. 10. — « Hæc dicetis Ezechiæ regi Judææ loquentes : Non te decipiat Deus tuus, in quo tu confidis, dicens : Non dabitur Jerusalem in manus Regis Assyriorum. »

VERS. 11. — « Ecce tu audisti omnia quæ fecerunt reges Assyriorum omnibus terris, quas subverterunt : et tu poteris liberari? »

VERS. 12. — « Nunquid eruerunt eos dii gentium, quos subverterunt patres mei, Gozam et Haram et Reseph, et filios Eden, qui erant in Thalassar? »

VERS. 13. — « Ubi est rex Emath, et rex Arphad, et rex urbis Sepharvaim, Ara et Ava? »

Postquam comperit Satanas religionem nostram usque adeo excrevisse, ut ipsos quoque gentium principes et philosophos converteret, addidit alios adhuc blasphematores contra Ecclesiam mittere sicut Arium et cæteros hujusmodi. *Hæc*, inquit, di-

A cetis Ezechiæ, id est populo fidelium, qui membra Christi sunt : *Non te decipiat Deus tuus*, id est noli errare sic credendo, sicuti credis de Deo, *in quo confidis*, id est in qua fide salvari speras dicens : *Non dabitur Jerusalem*, id est Ecclesia in manu regis Assyriorum, id est antiqui hostis punienda, cum de præsentis sæculo migraverit. Conati sunt enim hæretici dicere, quia in fide, quam tenet Ecclesia, non poterit salvari. Vel *non dabitur Jerusalem in manu regis Assyriorum*, id est non subicietur Ecclesia sensui hæreticorum. Unde et adjungunt :

Ecce audisti, quæ fecerunt reges Assyriorum, id est hæresiarchæ, *omnibus terris*, id est omnium terrarum gentibus, *quas subverterunt*. Et poteris ab eis tutus esse vel liber.

B Nunquid dii gentium, id est ea quæ colunt gentes, liberaverunt eos, *quos subverterunt patres mei* hæresiarchæ? Et qui sunt isti dii gentium? *Gozam*, id est *fortitudo eorum*, et *Haram*, id est *decor*, et *Reseph*, id est *cursus*. Gentibus enim pro diis erat fortitudo earum, et pulchritudo et velocitas, quæ a his serviebant et in his confidebant. Unicuique enim erranti quidquid ipse colit, spiritaliter Deus est, sicut de inimicis crucis Christi dicitur : « Quorum finis interitus, quorum Deus venter est (Philip. iii, 10). » Hinc et « avaritia dicitur idolorum servitus (Gal. v, 20) ; » qui viderit mulierem et concupierit, libido illi est Deus, qui confidunt in virtute sua, virtus eorum Deus illis est. Unicuique enim talium, quod cupit et veneratur, hoc illi et Deus est. Erant ergo dii gentibus *Gozam* et *Haram* et *Reseph*, id est fortitudo eorum et decor et cursus, quia in his gloriabantur. Sed isti dii non eruerunt eos a regibus Assyriorum, quoniam superati sunt ab hæresiarchis, et in eorum sectas veit in religiones adducti :

Eden vero dicitur *voluptas* vel *deliciæ* vel *ornatus* ; Thalassar vero *appensus princeps* vel *appendens principem*. Et quis est appensus princeps nisi diabolus, qui in ea cruce, in qua Dominum suspendi fecit, est suspensus, sicut Aman in ligno, quod paraverat Mardocheo? (Esth. vii, 10.) Unde et Apostolus testatur, quia « delevit, quod adversus nos erat, chirographum decreti, quod erat contrarium nobis, et ipsum tulit de medio affgens illud cruci, exspolians principatus et potestates traduxit confidenter palam triumphans illos in semetipso (Coloss. ii, 14). »

Quod si Thalassar dixerimus interpretari *appendens principem*, quis est qui appendit principem nisi gentilis populus, qui in Pilati militibus Christum appendit in cruce? Gentiles namque fuerunt milites qui crucifixerunt eum. Thalassar itaque vel diabolus, vel gentilem populum non incongrue designat. Quos ergo nominat *filios Eden*, id est filios voluptatis et deliciarum, qui erant in Thalassar, nisi eos, qui voluptatibus et deliciis carnalibus affuebant in gentibus? Sed nec istos eruerunt dii sui, id est voluptates quibus serviebant, quia subverti

sunt ab hærestarchis, vel ab Assyriorum regibus, hoc est in eorum sectas inducti.

Vel ita possunt hæc intelligi : *Audisti omnia, quæ fecerunt reges Assyriorum*, id est maligni spiritus omnibus terris, id est omnibus gentibus, quas in tempore mortis subverterunt ; et tu poteris in hora mortis ab eis liberari ? Ac si dicat hæreticus : Sicut audisti gentes universas, cum de corporibus exeant, ab immundis spiritibus ad tormenta rapi, sic et tu in hora tui exitus rapieris, quia sectam nostram sequi contemnis. Subjungens autem : « Nunquid eruerunt eos dii gentium, quos subverterunt patres mei, » id est quos dæmones in tartara demerserunt, nequaquam voce, sed operibus confutatur hæreticus, dæmones esse suos patres (140). In eo enim quod agit, declarat se filium esse iniquorum spirituum, quos semper imitatur. Ait ergo : *Nunquid eruerunt eos dii gentium, quos in egressione eorum a corporibus subverterunt*, id est præcipitaverunt in mortem patres mei, videlicet dæmones.

Et qui sunt dii, qui non liberaverunt eos ? Fortitudo eorum spiritualis, quam in anima sese putabant habere contra vitiorum molliem ; et decor religiosæ conversationis, quam videbantur ducere ; et cursus rectæ actionis. Hæc omnia plerumque gentiles habere visi sunt qui Christum ignoraverunt. Sed per hæc erui non potuerunt, quia « omne, quod non est ex fide peccatum est (Rom. xiv, 23). » Et « Longe a peccatoribus salus (Psal. cxviii, 155). » Sed et *filios Eden* non liberaverunt dii sui, id est eis qui tam religiose conversari videbantur, ut quasi paradisi voluptatis et hortus deliciarum esse putarentur ornati virtutibus. Qui erant in *Thalassar*, id est in populo gentium, qui in cruce appendit principem vitæ Jesum. Nemo enim sine Christo salvari potuit, quia « non est in alio salus (Act. iv, 12). »

Ubi est, inquit, *rex Emath*, id est sensus indignationis, quo peccantibus indignabantur philosophi ? *Et rex Arphad*, id est sensus sanantis, quo sanare philosophus quisque volebat eos, qui peccati languore tenebantur ? *Et rex urbis Sepharrain*, id est sensus validæ munitiois litterarum ? *Ana*, id est *Nunquid commutatus est iste sensus a malitia sæculi ?* Non est commutatus ab ea, sed *Ava*, id est *iniquitas*, quoniam sapientia carnis inimica est Deo. Interpretatur enim *Ana*, *nunquid commutatus est*, et *Ava*, *iniquitas*, quoniam sensus sapientium sæculi non est commutatus a mundana nequitia, sed est iniquitas. Sed omnes isti reges gentium vel dii hucusque descripti non valuerunt cultores suos liberare ; et conantur astruere nuntii regis Assyriorum, id est hæretici, quia similiter nec nos salvare poterit Deus noster, id est fides, quam habemus de Deo. Sequitur :

Vers. 14. — « Et tulit Ezechias libros de manu

nuntiorum, et legit eos, et ascendit in domum Domini, et expandit eos coram Domino. »

Quod nunc fecisse Ezechias narratur, ad pastores Ecclesiæ, qui sunt membra Christi referendum est. *Tulit Ezechias libros de manu nuntiorum et legit*, quia Catholici doctores frequenter legere solent hæreticorum libros, ut ex eorum dictis eos convincant. *Et ascendit in domum Domini*, quia boni doctores ab hæreticorum conflictu revertuntur in Ecclesiam. *Et expandit libros coram Domino*, quia magistri denudant ac manifestant populo Dei fraudes, quæ sunt in libris hæreticorum. Sequitur :

Vers. 15. — « Et oravit ad Dominum dicens : »

Vers. 16. — « Domine exercituum Deus Israel, qui sedes super cherubim, tu es Deus solus omnium regnorum terræ, tu fecisti cælum et terram. »

Vers. 17. — « Inclina, Domine, aurem tuam, et audi : aperi oculos tuos, et vide, et audi omnia verba Sennacherib, quæ misit ad blasphemandum Deum viventem. »

Vers. 18. — « Vere enim, Domine, desertas fecerunt reges Assyriorum terras et regiones earum. »

Vers. 19. — « Et dederunt deos earum igni. Non enim erant dii, sed opera manuum hominum, lignum et lapis, et comminuerunt eos. »

Vers. 20. — « Et nunc, Domine Deus noster, salva nos de manu ejus, et cognoscant omnia regna terræ, quia tu es Dominus solus. »

Oratio hæc principaliter quidem est præpositorum Ecclesiæ, sed secundo etiam totius populi fidelium. Deus autem vocatur *Dominus exercituum*, quoniam ejus voluntati famulantur exercitus angelorum pro nostra defensione contra malignos spiritus præliantium, sicut scriptum est : « Michael et angeli ejus præliabantur cum dracone (Apost. xii, 7), » quæ prælia non labore, sed impetio peragunt.

Ordo beatorum spirituum, in quo specialiter Dominus sedet, thronus appellatur. Sed tamen quia in ipsis distinctionibus agminum ordo sanctorum *cherubin* jungitur ordini thronorum, sedere etiam *super cherubin* ex vicini agminis æqualitate perhibetur. Cherubin vero dicitur *plenitudo scientiæ*. Et sublimiora illa agmina idcirco cherubin vocata sunt, quia tanto perfectiore scientia plena sunt, quanto claritatem Dei vicinios contemplantur, ut secundum creaturæ modum eo plene omnia sciant, quo visioni Conditoris sui per meritum dignitatis appropinquant. Vel *super cherubin*, id est super plenitudinem scientiæ sedere dicitur, quia ejus sublimitatem nulla unquam scientia comprehendit.

Qui est *Deus omnium regnorum terræ*, quia non est Deus præter eum, neque fides est nisi una. *Aurem* vero suam inclinare dicitur, quando ab illa æternitatis immensa sublimitate auditum suum quadam benigna dignatione humiliat, ut suorum vota

(140) Verba hæc in eo, etc., usque ad : *ait ergo*, etc., desunt in coa. Garst.

elementer audiens compleat, qui magis mentes audit A quam linguas. Nam « desiderium pauperum exaudivit Dominus, præparationem cordis eorum audivit auris tua (Psal. x, 16). »

Sed et oculos suos aperit et videt, quando gratiæ suæ adjutorium servis suis ostendens, mala, quæ patiuntur, abigit, sicut scriptum est : « Rex, qui sedet in solio judicii, dissipat omne malum intuitu suo (Prov. xx, 8). » Respicendo enim tribulationes fidelium dissipat, et magna pacis et gratiæ beneficia largitur. Nam quasi non videre est, dum suos hic affligi permittit.

Desertas fecerunt reges Assyriorum terras, quoniam hæresiarchæ vanas religiones gentium destruxerunt, ut ad suas eos pestiferas sectas velut ad veritatis viam converterent.

Et dederunt deos earum igni, quia testati sunt eos, qui talia colunt, esse dignos igne perpetuo. Non erunt dii, sed opera manuum hominum, quia malum, quod quisque specialiter operabatur, hoc quasi proprium Deum colebat ; imo quot peccatis subjectus erat, tot diis serviebat. Per lignum autem opus peccati robustum intelligi potest, per lapidem vero obdurata iniquitatis perpetratio. Aut cum in voluntate quis peccat, quasi lapidem colit. Istiusmodi deos dederunt igni reges Assyriorum, quoniam et hæretici asserunt hæc opera flammis gehennalibus digna.

Et nunc, Domine, salva nos de manu regis hujus, qui est sensus hæreticorum, ne capiamur ab illo. Et cognoscant omnia regna terræ, quia tu es solus Dominus, id est catholica fides per totum orbem teneatur, non hæreticorum adinventiones.

Vel desertus fecerunt terras reges Assyriorum, quia demones pietatem et Dei cultum de cunctis per orbem nationibus abstulerunt. Et dederunt deos earum igni, quia gentiles cum falsis religionibus ipsorum miserunt in ignem æternum. « Et nunc, Domine, de manu ejus salva nos, » id est de manu hostis antiqui, ne nos in tentationibus circumveniens decipiat, vel ne mortis tempore nos rapiat. Et cognoscant omnia regna terræ, quia tu es Dominus solus, quem Ecclesia prædicat, non quem hæretici pro suo arbitrio fingunt. Sequitur :

VERS. 21. — « Et misit Isaias filius Amos ad Ezechiam dicens : Hæc dicit Dominus Deus Israel : Pro quibus rogasti me Sennacherib rege Assyriorum. »

VERS. 22. — « Hoc est verbum, quod locutus est Dominus super eum : Despexit te, subsannavit te virgo filia Sion, post te caput movit filia Jerusalem. »

Isaias, id est sermo propheticus misit doctores ad Ezechiam, id est ad populum Ecclesiæ, qui corpus Christi est, dicens : Hæc dicit Dominus Deus : Pro tuis precibus, quibus me rogasti de rege Assyriorum, id est diabolo, vel hæreticorum sensu tumido, audi quæ locutus sum de eo. Rex vero iste vocatur Sennacherib, id est ievans deserta, quia, ut jam dictum est, infidelium corda contra nos elevat.

In eo autem quod Dominus adjungit : Hoc est verbum, quod locutus est Dominus super eum, declaratur alia esse persona Patris, alia Filii, alia Spiritus sancti. Locutus est Dominus super eum dicens ad eum : O rex iniquitatis, rex Assyriorum, filia Sion, id est Ecclesia, quam te superaturum putabas, despexit te. Sion namque vel Jerusalem illa beatorum Ecclesia est, quæ jam regnat in cælis, cujus filia est hæc, quæ peregrinatur in terris. « Illa enim, quæ sursum est, libera est, quæ est mater nostra (Gal. iv, 26). » Filia Sion appellatur (141) virgo, quia fides Ecclesiæ corrumpi non potest. Nunc enim de Ecclesia electorum fit sermo, non de reproborum multitudine, de quibus supra dixit : « Quomodo facta est meretrix civitas fidelis ? » (Supra 1, 21.)

B Itaque filia Sion, id est sanctorum Ecclesia despexit te, o rex Assyriorum, sicut ipsa loquitur : « Dominus mihi adjutor, et ego despiciam inimicos meos (Psal. cxvii, 7). » Despexit ergo te sævientem, subsannavit te blandientem, et te recedente movit admiratione caput suum post te. Nam quando superata jam inimici tentatione cogitamus dicentes : O quid fecissem, si seductoris hujus persuasionibus acquievissem, nonne caput super regem hunc abeuntem movemus ? Ad quem et subditur :

VERS. 23. — « Cui exprobrasti, et quem blasphemasti, et super quem exaltasti vocem, et levasti altitudinem oculorum tuorum ? Nonne ad sanctum Israel ? »

C VERS. 24. — « In manu servorum tuorum exprobrasti Domino. »

His verbis evidenter antiqui hostis vesania increpatur. Sed quid cogitaverit, dum vehementer Ecclesiam arctaret, audiamus. Sequitur : « Et dixisti : In multitudine quadrigarum mearum ego ascendi altitudinem montium juga Libani : et succidam excelsa cedrorum ejus et electas abietes illius, et introibo altitudinem summitatis ejus, saltum Carmeli ejus. »

VERS. 25. — « Ego fodi et bibi aquam, et exsiccavi vestigio pedis mei omnes rivos aggerum. »

Sicut per Domini quadrigas evāgelicæ prædicationes designari solent, ita per quadrigas regis Assyriorum intelligi possunt prædicationes hæreticorum. Quid vero per montes, nisi eos, quorum conversatio sublimis videbatur, exprimitur ? Et quid per Libanum nisi sancta Ecclesia designatur ? Libanus enim mons est miræ magnitudinis, cujus arbores odoriferæ sunt, et imputribiles, significans altitudinem Ecclesiæ dicentis : « Nostra autem conversatio in cælis est (Philip. iii, 20). » Cujus electi redolent opinione virtutum, neque corrumpuntur redolent vitiorum. Unde et Libanus interpretatur candidatio ad demonstrandam sanctificationem Ecclesiæ dicentis : « Lavabis me, et super nivem dealbabor (Psal. l, 9). »

Quid ergo per juga Libani signatur nisi juga sacrarum disciplinarum Ecclesiæ, sub quibus tenetur

vita monachorum et eremitarum, atque sanctimonialium, cæterorumque religiosorum? Dicit ergo honorum antiquus inimicus, quia *in multitudine quadrigarum mearum ego ascendi altitudinem montium et juga Libani*, quoniam per multiplices hæreticorum prædicationes subjugavit sibi plerosque, qui velut montes Dei supereminebant in populo fidelium, et qui religiosam ducere conversationem videbantur.

Vel quadrigas accipere possumus sæculi pompas et gloriationes. Ascendit ergo *altitudines montium et juga Libani in multitudine quadrigarum* suarum, quia per superbiam, per inanem gloriam, per arrogantiam, per jactantiam, per elationem frequenter nonnullos superat ex eis qui jam ad virtutum sublimia pervenerunt, vel qui sub jugo disciplinæ vivunt.

Cedri vero omnem reliquarum arborum altitudinem sua proceritate transcendunt, mirique sunt odoris et naturæ imputribilis. *Abietes* quoque valde sunt sublimes, ita ut nubibus altitudine sua propinquant. Quid vero per *Libani cedros* nisi qui in Ecclesia excellentissimi, designantur, quos nulla putredo terreni amoris corrumpit, qui dicere possunt. « Christi bonus odor sumus Deo? » (II Cor. II, 15.) Et quid per *electas abietes illius* nisi hi demonstrantur, qui inter eos sunt egregii, qui licet terram adhuc corpore tangant, jam tamen juxta æthera verticem mentis atollunt in virtute contemplationis vehementer proficientes?

Jactat ergo adversarius noster se succisurum de Ecclesia *cedros Libani, et electas abietes ejus*, quia summos et electos Ecclesiæ viros dejicere se posse præsumit maxime temporibus persecutionum, de quibus nunc agitur. *Altitudinem quoque summitatis Libani* se dicit intraturum, quia puram electorum mentem, qui in Ecclesia sunt, nititur ingredi vel quidquid inter sanctos superexcellit.

Carmelus autem, ut et supra dictum est, *cognitio circumcisionis* dicitur. Et cognitio circumcisionis Ecclesiæ quæ sit, norunt fideles. « Non enim qui in manifesto Judæus est, neque quæ in manifesto in carne circumcisio, sed qui in abscondito Judæus est, et circumcisio cordis in spiritu, non littera, cujus laus non ex hominibus sed ex Deo est (Rom. II, 28). » *Saltus vero Carmeli* hujus, id est notitiæ circumcisionis conversatio sanctorum est ab omni strepitu carnalium desideriorum quieta, et ab omni tumultu malæ actionis vacua. *Saltum vero Carmeli* Ecclesiæ se jactat ingressurum hostis antiquus, scilicet secretam et liberam electorum conversationem, qui se semper ab omni superfluitate vitiosa circumcidere spiritaliter norunt, aliquo aditu intrare querit et inquinare.

Hæc omnia tunc præcipue tentavit facere, quando per hæreticos vehementer impugnabat Ecclesiam. Unde addidit, quia *ego fodi et bibi aquam. Aquam quippe fodit*, qui scientiam profunde scrutando querit: eamque bibit inventam, dum sese potu scientiæ repertæ satiat. Fodit ergo Satan, ut aquam

A inveniret, quia ipse doctrinas hæreticorum exquirens invenit; et inventam bibit, quia malitiæ suæ desiderium dogmatibus complevit, dum juxta voluntatem suam errare per ea multos faceret.

Rivi autem *aggerum* sunt, qui artificiose eo per fossata ducuntur, quo naturaliter non ibant. Et quid per *rivos aggerum* nisi spiritalia dona signantur in eis cordibus perfluentia, a quibus terrenæ cogitationes ejectæ sunt? Ait igitur Zabulus, quia *exsiccati vestigio pedis mei omnes rivos aggerum*, quia dum per hæreticos in humanis cordibus vestigium iniquitatis imprimeret, ab his omnia gratiarum spiritalium exciuit charismata. Ubiunque enim pedem ille fixerit, mox inde spiritalis rivuli cursus avertit. Hæc hostis antiquus, dum Ecclesiam nimis arctaret, ut diximus, in corde suo loquebatur jam se prævaluisse jactans. Cui Dominus respondet subjungens:

VERS. 26. — « Nunquid non audisti, quid olim fecerim ei? »

Subaudi Libano vel filiæ Sion, id est Ecclesiæ. Et aperiendo subjicit: « Ex diebus antiquis, » id est, ab initio creaturarum « ego plasmavi, » id est formavi et disposui prædestinando « illud, » quod ad Ecclesiæ probationem facturus eram, « et nunc » per tuam sævitiam « adduxi » in actionem. Statutum est enim, quantum vel tota Ecclesia vel electus quisque præsentibus malis atteratur. Unde et Paulus ait: « Adimplebo ea, quæ desunt passionum Christi in carne mea (Colos. I, 24). » Sequitur.

« Et factum est in eradicationem collium compugnantium et civitatum munitarum. »

VERS. 27. — « Habitatores earum breviate manu contremuerunt, et confusi sunt: facti sunt sicut fennum agri, et gramen pascuæ, et herba tectorum, quæ exaruit, antequam maturesceret.

Malum adversitatis, quod adduxi, *factum est in eradicationem collium compugnantium, et civitatum munitarum*, quia rex Assyriorum ascendit super universas civitates Juda munitas, et cepit eas. *Eradicati* sunt enim de terra viventium colles compugnantes, id est elati Judæorum principes Dominum persequentes, et civitates munitæ, id est cæterorum mentes Judæorum contra doctrinam D ejus clausæ.

Vel ut de his, qui nostri esse videbantur, dicamus, colles compugnantes eradicati sunt, quia nonnulli qui jam virtutibus excreverant, sed non fuerant « solliciti servare unitatem spiritus in vinculo pacis (Ephes. IV, 3), » ab Ecclesia per hæreticos vel per gentiles abstracti sunt tempore persecutionis. Et civitates munitæ, id est cordium munitiones et altitudines adversus scientiam Dei se extollentes similiter sunt evulsæ de Ecclesia. Qui enim contra verbum prædicationis corda sua munierant, facile sunt a persecutoribus eradicati.

Habitatores vero talium civitatum dum latam sæculi viam incederent manus suas. ad faciend-

dum quod vellent, longe porrigebant. Sed adveniente persecutionis angustia manus eorum brevata est, quia parum explere voluntatem suam potuerunt: *breviatæque manu contremuerunt*, quoniam adversa pati formidaverunt. Neque enim audire præceptum illud voluerunt: « Nolite timere eos qui occidunt corpus (Matth. x, 28). » Metuetes ergo tormenta perdidit fidem, et amissa fide confusi sunt.

Et facti sunt sicut fenum agri, id est ex toto carnales, quia « omnis caro fenum, et sicut gramen pascuæ (Isa. xl, 6), » quia dati sunt in pascuum gregibus omnium animalium, id est turbis vitiorum. Et sicut herba tectorum, quæ exaruit, antequam maturesceret, quia virorem justitiæ perdidit ante præsentis vitæ terminum, *Herba* quippe tectorum in alto nascitur, sed non pingui radice solidatur, quia inanis Christianus summa quidem agere nonnunquam cernitur, sed non in eis ex cordis puritate roboratur. Quæ nimium herba, et antequam maturescat crescit, quoniam pseudo religiosus, et antequam consummationem hujus vitæ pertingat, jam sanctitatis opera quasi viriditatis speciem amittit. Sequitur:

VERS. 28. — « Habitationem tuam, et egressum tuum et introitum tuum cognovi, et insaniam tuam contra me. »

Habitationem tuam in terra tua cognovi, o rex Assyriorum, id est in mente infidelium: et egressionem tuam inde, cum aliopea nequitie procederes, qui latebas; et introitum tuum huc cum tuis ad persecutionem sanctorum, et insaniam tuam, cum per ora blasphemantium hæreticorum atque gentilium insauires contra me. Unde et additur:

VERS. 29. — « Cum fureres adversum me, superbia tua ascendit in aures meas. »

Patet hoc. Sequitur:

« Ponam ergo circulum in naribus tuis, et frenum in labiis tuis, et reducam te in viam, per quam venisti. »

Sicut per nares insidiæ, sic per circulum divinæ virtutis omnipotentia designatur. Quæ cum apprehendi nos tentationibus prohibet miris ordinibus antiqui hostis insidias circumplectens tenet. Circulus igitur ei in naribus ponitur, dum circumducta protectionis supernæ fortitudine ejus sagacia tenetur, ne contra infirmitates hominum tantum prævaleat, quantum perditionis argumenta latenter explorat.

Potest et circuli nomine occulti iudicii adiutorium designari, quod in hujus hostis naribus ponitur, dum a callida sua crudelitate refrenatur. Unde quia nunc a fidelium læsione prohibetur, bene ei dicitur: *Ponam circulum in naribus tuis*, ac si aperte diceret: Cogitando insidias suspiras, sed explere, quæ appetis non valendo omnipotentis mee circulum in naribus portas, ut, cum

A honorum mortem avidentius anhelas, ab eorum vita vacuus redeas.

Frenum quoque ei ponitur in labiis, dum sic divinæ virtutis potentia retinetur, ut non nisi quantum relaxatur, sævire possit. Quia scilicet potentia infrenatus per viam, qua venerat, est reductus, quoniam ab infidelium cordibus venerat adversus Ecclesiam, et ab Ecclesiæ persecutione coactus est ad infidelium et iniquorum corda reverti, ut usque ad Antichristi adventum ibi lateat. Hæc antiquo adversario Dominus respondit lætanti se jam ascendisse jugum Libani et succisurum excelsa cedrorum ejus. Et post hæc alii Ezechiam, id est ad Dominum Jesum loquitur dicens:

VERS. 30. — « Tibi autem hoc erit signum: **B** Comede hoc anno, quæ sponte nascuntur, et in anno secundo pomis vescere: in anno autem tertio seminate et metite, et plantate vineas, et comedite fructus earum. »

Appellatione trium annorum designari solent tria tempora, primum ante legem, secundum sub lege, tertium sub gratia. Unde et in Evangelio paterfamilias ait: « Ecce anni tres sunt, ex quo venio querens fructum in ficulnea hac, et non invenio (Luc. xiii, 7). » Tertio quippe anno venit ad ficulneam suam paterfamilias querens fructum, quia Dominus per patriarchas et prophetas atque per semetipsum venit ad plebem Judaicam fructum justitiæ querens in ea, sed non inveniens.

C De his ergo tribus annis hic dicitur: *Comede hoc anno*, id est ante legem, quæ sponte nascuntur, id est opera bona, quæ quisque sponte agit absque legis necessitate; et in anno secundo, id est sub lege, *omnis vescere*, id est fructibus arborum dulcibus, videlicet hominum justorum bonis actionibus.

Præcipue tamen arborum domesticarum est facere poma. Et quæ sunt domesticæ arbores nisi Judæi quondam cives et domestici Dei? Secundo igitur anno usus est Dominus pomis, quia tempore legis delectatus est bonis operibus Hebræorum. Nec huic intelligentiæ refragatur, quod in ficulnea fructus non est inventus, quia hic de infidelibus loquitur Dominus electis, et ibi de infidelibus queritur reprobus.

« In anno autem tertio, » id est tempore gratiæ jubentur apostoli seminare et metere, id est verba vitæ prædicare, et eos, qui crediderint, colligere: et plantare vineas, et comedere fructus earum, id est fundare ecclesias, et satiari bona conversatione.

Datur itaque signum Ezechiae, quia Jerusalem a rege Assyriorum capienda non sit, hoc, quod ipse primo anno, quæ sponte nascuntur, comedit, et secundo pomis vescitur, atque in tertio seminat et metunt, quia per hoc certa ad apud Redemptorem nostrum salutem Ecclesiæ quod ipse et ante legem, et sub tempore legis atque sub

gratis bonis fructibus electorum pascitur. Ille enim certam apud Deum salutem suam facit, qui bonis operibus perseveranter insistit. Sequitur :

VERS. 31. — « Et mittet id quod salvatum fuerit de domo Juda, et quod reliquum est, radicem deorsum, et faciet fructum sursum, »

VERS. 32. — « Quia de Jerusalem exhibunt reliquiae, et salvatio de monte Sion. »

Id quod de domo Juda, hoc est de plebe confessorum, fuerit salvatum ab Assur, et quod reliquum est, id est residuum in Ecclesia, quod haeretici vel gentiles non tulerunt, mittet radicem bonae cogitationis deorsum, et faciet fructum operis sursum. Radicem quippe deorsum mittere est cogitationem bonam in auditibus multiplicare: fructum vero sursum facere est efficacia operis recta, quae cogitavit, ostendere. Recte enim per radicem cogitatio designatur occulta, quia per hoc quod intus non cernitur, erumpit, quod videtur foras. Ait ergo: Mittet radicem deorsum, et faciet fructum sursum. Ac si aperte diceret: In imis cogitatio nascetur, ut in summis ret: ibitio detur.

Quia de Jerusalem exhibunt reliquiae, id est non debetur nunc Ecclesia, sicut hostis putabat, sed filii, qui nascentur, et exsurgent, enarrabunt filiis suis laudes Domini. Et salvatio de monte Sion, id est de sublimitate Ecclesiae exhibit a l'omnes nationes orbis, ut quanto nunc coarctatur Ecclesia justorum: tanto tunc dilatetur. Sequitur:

« Zelus Domini exercituum faciet istud. » **Zelus Domini** est affectus amatoriae bonitatis ejus, quo castitatem animarum nostrarum custodit, ne vel haereticorum fraudibus vel antiqui serpentis astutijs corrumpantur sensus nostri, et excidant a simplicitate, quae est in Christo Jesu. Ille ergo zelus faciet istud, quod dictum est, ut quod salvatum fuerit de domo Juda, mittat radicem, et faciat fructum, ac de Jerusalem exeant reliquiae, et salvatio de monte Sion. Sequitur:

VERS. 33. — « Propter haec dicit Dominus de rege Assyriorum: Non intrabit civitatem hanc, et non jacet ibi sagittam: et non occupabit eam clypeus, et non mittet in circuitu ejus aggerem. »

VERS. 34. — « In via, qua venit, per eam revertetur, et civitatem hanc non ingredietur, dicit Dominus. »

VERS. 35. — « Et protegam civitatem istam, ut salvem eam propter me et propter David servum meum. »

Rex Assyriorum, qui mentes fidelium corrumpere quaerit, non intrabit civitatem Ecclesiae, id est electorum cor, quoniam zelus Domini custodit eam. Et non jacet ibi sagittam, quia mentem justorum, mox ut vitia pulsaverint, reprobata resiliunt, nec ad interiora penetrant. Electus enim quisque tanto minus hostis antiqui jacula metuit, quanto contra haec venientia fortiter pectus munit. Et non occupabit eum clypeus expugnantis inimici, quia vetus Ecclesiae persecutor non est sic ab armis fidelium

A valebit protegere, ut eam expugnet, sed percussus retrorsum corruet.

Et non mittet in circuitu ejus aggerem, quia quorum conversatio in caelis est, eorum mens non includitur congerie terrae, id est implicata non tenetur terrenis. Aggerem quippe mittit inimicus in circuitu ejus, cujus mentem in amore saeculi deprehensam undique de terrenis angustat, et affligit, atque tentat, ut ita jam evadendi ad libertatem locum is, qui sic ostenditur, non inveniat. Non ergo mittit aggerem in circuitu nostrae civitatis, sed repellente Deo per viam, qua venit, revertitur, quoniam ad latebras mentis iniquorum, unde adversum nos erumpit, redit.

Et civitatem hanc non ingredietur, quoniam ejus malitia in sanctorum cordibus non recipitur. Et protegit Dominus inter pericula temptationum civitatem hanc, id est Ecclesiam, ut in aeternum salvet eam propter semetipsum, et propter David servum suum, id est propter Christum, qui formam servi accipiens factus est obediens usque ad mortem (Philip. II, 7). » Christus enim vocatur David et servus Domini, sicut et alibi loquitur ipse Dominus: « Inveni David servum meum, olco sancto meo unxi eum (Psal. LXXXVIII, 21). » Atque post pauca subjungit: « Ipse invocabit me: Pater meus es tu, Deus meus, et susceptor salutis meae. Et ego primogenitum ponam illum excelsum praerogibus terrae (ibid., 27). » Christus ergo, sicut praemisimus, appellatur David. Unde et David interpretatur desiderabilis vel manu fortis. Nam Christus est desiderabilis, de quo per Aggaeum dicitur: Quia crederet desideratus cunctis gentibus (Agg. II, 8). » Et ipse est manu fortis, qui fortem adversarium ligavit sicut scriptum est: « Cum fortis armatus custodit atrium suum, in pace sunt omnia quae possidet; si autem fortior illo superveniens vicerit eum, universa arma ejus auferet, in quibus confidebat, et spolia ejus distribuet (Luc. XI, 21). » Post verba Domini subjungitur in narratione propheta:

VERS. 36. — « Egressus est autem Angelus Domini, et percussit in castris Assyriorum castrum octoginta quinque millia. Et surrexerunt mane, et ecce omnia cadavera mortuorum. »

Sed ut mysterium inquiramus, quid per millenarium designatur nisi reproborum omnium universitas? Nullus enim numerus ultra millenarium procedit. Et quid per centenarium nisi consummatio vitae praesentis accipitur? Unde scriptum est, quia « puer centum annorum morietur, et peccator centum annorum maledictus erit (Isa. LXV, 20). » Quid vero per octogenarium nisi dies iudicii figuratur, quae saepe in Scripturis appellatur octava? Quid autem per quinarium nisi carnalitas eorum exprimitur, qui quinque sensibus corporis sunt dediti? Et quid per Angelum, qui percussit eos, nisi sententia iudicis designatur? Qui nocte sunt percussi, quia « dies Domini sicut fur in nocte ita veniet (I Thess. V, 2). »

Egressus est igitur angelus Domini, et percussit in A castris Assyriorum centum octoginta quinque millia, quoniam sententia divinitus missa reproborum omnium multitudinem, qui diabolo militaverunt, perevit in consummatione vitæ hujus, et in die iudicii, qui secundum quinque sensus corporis vixerunt, id est carnaliter. *Mane* vero tempus resurrectionis designat, sicut electorum Ecclesia Domino dicit : « Mane astabo tibi, et videbo (*Psal.* v, 5). »

Quid autem per *cadavera mortuorum* nisi corpora reproborum exprimuntur, qui nequaquam immutabuntur ad incorruptibilitatem et impassibilitatem sicut electi? Unde per hunc prophetam de iustis dicitur : « Videbunt cadavera mortuorum qui prævaricati sunt in me (*Isa.* LXVI, 24), » id est corpora B eorum qui peccaverunt. *Surrexerunt ergo mane*, qui percussi fuerant, quia omnes reprobi in die illa a somno suæ mortis excitantur. *Et ecce omnia cadavera mortuorum inventa sunt*, quia carnem rursus gravidam et passibilem habebunt licet immortalem. Sequitur :

VERS. 37. — « Et egressus est, et abiit, et reversus est rex Assyriorum, et habitavit in Ninive. »

Rex Assyriorum, id est Satanas, *egressus est* a regionibus fidelium, *et reversus est ad infideles et habitavit in Ninive*, id est in mente reproborum, quæ gaudet in præsentibus, et speciosa sibi videtur in voluptatibus suis. Ninive enim *festiva* vel *speciosa* dicitur, vel *germen pulchritudinis*. Sequitur :

VERS. 38. — « Et factum est cum adoraret in templo Nesroch deum suum, Adramelech et Sarasar filii ejus percusserunt eum gladio, fugeruntque in terram Ararat, et regnavit Asarhaddon filius ejus pro eo. »

Sicut electis dicitur : « Templum Dei sanctum est, quod estis vos (*I Cor.* III, 17); » ita templum Satanae sunt omnes reprobi. Nesroch vero dicitur *tentatio tenera* vel *tentatio mollis*. Malum autem, cui spiritaliter quis servit, hoc, sicut diximus, quasi proprium Deum habet diabolus ergo tentationem teneram pro Deo colit, quia valde in hoc delectatur, ut ejus suggestio mox, ut mentem pulsaverit, excipiat. Itaque hostis antiquus in templo suo, id est in corde reproborum *adorat deum suum*, qui vocatur D tentatio tenera, quia statim ut ejus tentatio mollis et tenera nascitur in mente pravorum, substernunt se ei parati ad obsequium ipsi perversi. Quod enim instigante Satana fit in corde reproborum, id Satanas ipse dicitur facere ; sicut contra de Spiritu sancto scriptum est : « Quoniam postulat pro nobis gemitibus inenarrabilibus (*Rom.* VIII, 26), » quia postulantes facit eos quos repleverit, et gementes. Sive ergo ipse caput malorum diabolus, sive hi, qui membra ejus sunt, tentationem teneram, adorare dicuntur, quia Satanas eam valde veneratur, et reprobi libenter ei se subjiciunt. Quo contra de electorum Ecclesia dictum est eidem hosti, quia « ipsa conteret caput tuum (*Gen.* III, 15). » Caput namque

serpentis antiqui, id est tentationem teneram conterit, qui initium pravæ suggestionis conculcat, et ad nihilum redigit.

Adramelech vero *stola regis* vel *decor regis*, et Sarasar *princeps tribulationis* dicitur, et ille *stola* vel *decor regis* Assyriorum est, qui se ipsum exhibet Satanae vestem vel gloriam. Princeps vero tribulationis est, qui mundana potestate præditus mala sanctis irrogat. Et si sunt *filii regis Assyriorum*, qui digni sunt audire : « Vos ex patre diabolo estis (*Joan.* VIII, 44). » Sed plerumque tales ad Deum convertuntur, atque veritatis etiam prædicatores fiunt ; et tanto fortius et acrius hostem antiquum persequuntur, quanto familiarius ei non jam ut servi, sed ut filii prius adhærere solebant. Unde et *gladio* prædicationis eum percussisse nunc describuntur, sicut per Ezechielem ei sub appellatione principis Tyri dictum est : « Ecce ego adducam super te alienos, robustissimos gentium, et nudabunt gladios suos super pulchritudinem sapientiae tuae, et polluent decorem tuum. Interficiet et detrahent te, et morieris in interitu incircumcisorum in corde maris (*Ezech.* XXVIII, 7). » Nam quod paulo superius idem propheta dicit eidem principi, diabolo manifestum est dici : « Tu signaculum similitudinis, » etc.

Quos igitur Isaias nominat Adramelech et Sarasar, id est decorem regis, et principem tribulationis, filios regis Assyriorum : hos Ezechiel appellat *alienos, robustissimos gentium*. Qui enim filii sunt regis Assyriorum, id est diaboli, necesse est ut a Deo sint *alieni*. Et quod Isaias mystice refert, *quia percusserunt eum gladio*. Hoc per Ezechielem prænnuntiat, quia « nudabunt gladios suos super pulchritudinem sapientiae tuæ, et polluent decorem tuum, atque interficient, et detrahent te. » Quis enim sit gladius, quo rex iste moritur docet Apostolus dicens : « Et gladium spiritus, quod est verbum Dei (*Ephes.* VI, 17). » Hujusmodi gladios nudaverunt gentiles super pulchritudinem sapientiae diaboli, quia prædicando veritatem, destruxerunt antiquos errores. Et polluerunt decorem ejus, quia quam pollutus sit, ostenderunt. Et interfecerunt eum, quia malitiam ejus de cordibus eorum, qui conversi sunt, extinxerunt. Hoc quoque, quod Isaias narrat eum in templo suo fuisse percussum, illud est quod Ezechiel prædixit, quia « morieris in interitu incircumcisorum in corde maris (*Ezech.* XXVIII, 8). » Cor namque maris, id est mens sæcularium templum ejus est, ubi ipse quodammodo perimitur in interitu incircumcisorum, dum peccatores convertuntur. Interitus quippe incircumcisorum conversio peccatorum est. Itaque dum *adorat rex Assyriorum in templo Nesroch deum suum, Adramelech et Sarasar filii ejus percusserunt eum gladio*, quia dum adhuc teneram suggestionem suam diabolus in corde perversorum adorari faceret ubique per orbem, plurimi eorum, qui sibi familiares fuerant, conversi sunt, et prædicatores veritatis effecti nequitiam ejus in corde proximorum gladio verbi Dei percusserunt.

« Fugeruntque in terram Ararat. » *Ararat ipsa* A (cap. xxiii, 2) moriturus convocaverit majores natu filiorum Israel, et attentius exhortans instruxerit, quid post mortem ejus agere deberent, id est ut Dominum Deum suum diligenter, et illi adhererent, et legem ejus sollicitè custodirent. Tunc enim præfiguratum est, quia Jesus de hoc mundo transiturus ad Patrem apostolorum diligentius erat instructurus, et *domui suæ*, quæ est discipulorum congregatio, singula quæque dispositurus. Itaque moriturus disposuit domui suæ in illo sermone præclaro, quem post cœnam vel in cœna locutus est discipulis. Dum vero dicit : *Quia morieris tu, et non vives*, nequaquam resurrectionis gloriam mox futuram denegat, sed quia Salvator mortaliter jam non sit victurus, sed ad immortalitatis gloriam, superata morte, venturus. Sequitur :

Quæ est ergo *terra montis vulsi* vel *ligati*, nisi conversa gentilitas, quam prius hostis antiquus possedit, qui nunc est inde avulsus, atque per Christum ligatus? Itaque qui percusserunt huic regem, mententes æterna supplicia, *fugerunt in terram Ararat*, id est in Ecclesiam de gentibus conversam, ut ibi salvarentur. Fugit enim, qui mundi hujus mala evadere concupiscit, ut ab ira ventura tutus esse possit. Mors autem regis hujus extinctio infidelitatis et erroris est per totum orbem, fideique plenitudo.

Sed licet rex iste sit mortuus, id est paganitas cum erroribus suis extincta, et ubique successerit Christianitas, *filius tamen regis hujus adhuc regnat* pro eo, quia tyrannus quisque non desiit exercere potentiam in hoc mundo. Filius enim regis Assyriorum est, qui diaboli tyrannidem imitatur. Hic C ergo filius, qui regnat pro patre, tyrannos, qui adhuc in sæculo principantur, designat. Unde et nomen ei datur *Asarhaddon*, quod interpretatur *vincens vel exacutus*, quia qui fuerit ad crudelitatem acutior, ut omnia sicut gladius cædat, et cæteros vicerit, iste regnum in mundo, qui totus in maligno positus est, obtinere poterit. Sequitur :

CAPUT XXXVIII.

VERS. 1.— « In diebus illis ægrotavit Ezechias usque ad mortem. »

Ezechias, id est Redemptor noster *ægrotavit*, quia scriptum est : « Ipse infirmitates nostras accepit, et ægrotationes portavit (Matth. viii, 17). » Ei namque ægrotare fuit infirmitatem carnis assumpsisse, in qua esuriit, et laboravit, et fatigatus est. Et D *ægrotavit usque ad mortem*, quia tandiu mortalem carnem gestavit, donec per mortem et resurrectionem perveniret ad immortalitatem. Sequitur :

« Et intravit ad eum Isaias, filius Amos, propheta, et dixit ei : Hæc dicit Dominus : Dispone domui tuæ, quia morieris tu, et non vives. » Jam diximus, quo Isaias, filius Amos, sermonem propheticum designet. Qui videlicet sermo propheticus foras mansit, dum carnaliter intelligeretur, nec adhuc in Christo completeretur. Sed *intravit ad eum*, quando cœpit in eo compleri, ac de eo spiritaliter intelligi. Ad quem ingressus, ait : *Dispone domui tuæ, quia morieris*. Sed quis propheticus sermo talia Domino dixit? Hæc nimirum historia, quæ refert, quia Josue

VERS. 2.— « Et convertit Ezechias faciem suam ad parietem, et oravit ad Dominum. »

Per *faciem* intentio mentis exprimitur, per *parietem* vero maceria peccati, quæ separat inter nos et Deum, sicut scriptum est : « Iniquitates vestræ dividerunt inter vos et Deum vestrum (Isa. lix, 2). » Unde Ezechiel de peccatore, cujus opera mala adulatores laudant, dicit : « Ipse ædificabat parietem, illi autem linebant eum (Ezech. xiii, 10). » Parietem quippe ædificat, qui peccat; et ædificatum parietem liniunt, qui, perpetratum malum laudantes, in bonum convertunt. Ezechias ergo addictus morti *faciem suam convertit ad parietem*, quia Salvator noster in passione sua convertit intentionem suam ad peccatum nostrum, qui pro peccato mundi passus est. Et *oravit ad Dominum*, quia, ut Lucas ait : « Positis genibus, orabat, dicens : Pater, si vis, transfer calicem istum a me. Et factus in agonia, prolixius orabat (Luc. xxii, 41). » Sequitur :

VERS. 3. — « Et dixit : Obsecro, Domine, memento, quæso, quomodo ambulaverim coram te in veritate et in corde perfecto et quod bonum est, in oculis tuis fecerim. »

Ac si diceret : « Ego te clarificavi super terram, opus consummavi, quod dedisti mihi ut faciam; et nunc clarifica me tu, Pater, apud teipsum (Joan. xvii, 4). » Sequitur : « Et flevit Ezechias fletu magno, » quoniam Salvator « cœpit contristari et mœstus esse, et ait : Tristis est anima mea usque ad mortem (Marc. xiv, 34). » Sequitur :

VERS. 4.— « Et factum est verbum Domini ad Isaiam, dicens :

VERS. 5.— « Vade et dic Ezechiaë : Hæc dicit Dominus Deus David patris tui : Audivi orationem tuam, vidi lacrymas tuas. »

Factum est verbum Domini ad Isaiam, id est præcepit Dominus sermoni prophético, dicens : *Vade, et dic Ezechiaë*, hoc est, fecit, ut intelligeretur de Christo dicere ea quæ subduntur. Quid est enim sermoni prophético dicere *vade* nisi prophetas ad spiritalem intellectum promoveri? Dixit ergo prophetæ, ut iret et diceret Ezechiaë nostro, *quia hæc dicit Dominus : Audivi orationem tuam, lacrymas*

tuas quando feci intelligi de Christo, quod de Salomone scriptum est, quia cum orasset in dedicatione templi, dictum est ei divinitus : « Exaudi orationem tuam et deprecationem tuam, qua deprecatus es coram me. Sanctificavi domum istam, quam aedificasti, ut ponerem nomen meum ibi in sempiternum, et erunt oculi mei et cor meum ibi cunctis diebus (*III Reg. ix, 3*). » Salomon namque Christus est, et domus Salomonis Ecclesia, pro qua Dominus oravit, dicens discipulis : « Pater sancte, serva eos quos dedisti mihi (*Joan. xvii, 11*). » Et item : « Non rogo ut tollas eos de mundo, sed ut serves eos a malo (*ibid. 15*). » Et rursum : « Non pro his autem rogo tantum, sed et pro eis, qui credituri sunt per verbum eorum in me, ut omnes unum sint (*ibid. 20*). »

Præcepit itaque Dominus prophetæ ea ratione, qua dictum est, ut diceret Christo pro nobis oranti : « Hæc dicit Dominus Deus patris tui David : Audivi orationem tuam, vidi lacrymas tuas. » Qui videlicet Christus quoniam factus est ex semine David secundum carnem, filius David appellatur, sicut evangelista dicit : « Liber generationis Jesu Christi, filii David (*Matth. i, 1*). » Cujus orationem Dominus audivit, et lacrymas vidit, sicut et Apostolus de eo dicit : « Qui in diebus carnis suæ preces supplicationesque ad eum qui posset illum salvum facere a morte, cum clamore valido et lacrymis offerens, exauditus est pro sua reverentia (*Hebr. v, 7*), » sive ergo pro se, sive pro Ecclesia Dominus Jesus oraverit, Pater orationem ejus audivit et lacrymas vidit. Sequitur :

« Ecce ego adjiciam super dies tuos quindecim annos. »

VERS. 6. — Et de manu regis Assyriorum eruam te et civitatem istam, et protegam eam. »

Juxta historiam in primis est notandum, quia statutum est omni homini, quantum in hac vita mortali temporaliter vivat. Nam, etsi hic annos quindecim Ezechiae regi ad vitam addidit omnipotens Deus, cum eum mori permisit, tunc eum præscivit esse moriturum. Qua in re quæstio oritur, quomodo ei per prophetam dicatur : « Dispone domui tuæ, quia morieris tu, et non vives, » cui cum mortis sententia dicta est, protinus ad ejus lacrymas est vita addita. Sed per prophetam dicit, quo tempore mori ipse merebatur, per largitatem vero misericordiæ illo eum tempore ad mortem distulit, quod ante sæcula ipse præscivit. Non est propheta igitur fallax, quia tempus mortis innotuit, quo ille mori merebatur, nec Dominica statuta convulsa sunt, quia ut ex largitate Dei anni vite crescerent, hoc quoque ante sæcula præfixum fuit, atque spatium vitæ, quod inopinate foris est additum, sine augmento præscientiæ fuit intus statutum.

Sed his juxta sensum historiæ breviter dictis mysterium inquiramus. Quindenarius numerus propter septem et octo, quibus constat, vel vitam, quæ nunc est, vel futuram, vel Vetus et Novum

A Testamentum, vel Sabbatum animarum in futuro et carnis resurrectionem, vel certe aliud aliquid celestis sive spiritalis contactus arcani. Quindecim igitur anni Domino post passionem adjiciuntur, quia de morte ejus oritur vita Ecclesiæ, quæ et post mortem quiescendi spem habet, et in fine resurgendi, atque ideo nunc utriusque Testamenti præcepta vivendo custodit. Quindecim anni Domino adjiciuntur, quia ex ejus temporali morte data est nobis vita præsens animarum et futura etiam corporum, atque scientia utriusque Testamenti revelata omnisque regula vivendi et sperandi monstrata.

Sed et de manu regis Assyriorum, id est antiqui hostis eruitur Dominus, sicut in Psalmo precatur, dicens : « Salva me ex ore leonis (*Psal. xxi, 22*). » Et civitas ejus, id est Ecclesia simul eruitur, quia Satanæ potestas ab humano genere per Salvatoris mortem expellitur. Inter pericula quoque tentationum protegatur semper hæc civitas a Domino. Post hæc suam promissionem confirmare volens, Deus ait :

VERS. 7. — Hoc autem tibi erit signum a Domino, quia faciet Dominus verbum hoc, quod locutus est. »

VERS. 8. — « Ecce ego reverti faciam umbram linearum, per quas descenderat in horologio Achaz in sole retrorsum decem lineis. »

Quibus Domini verbis propheta subjungit : « Et reversus est sol decem lineis per gradus, quos descenderat. »

Ubi considerandum est juxta veritatem historiæ, quia cum duodecim horas habere dies soleat, iste in quo sol decem lineis reversus est, triginta duas habuisse comprobatur. Nam decem horas jam expleverat sol, quando cœpit reverti, decemque rursus, dum ad orientem reverteretur, confecit, et iterum ab oriente remeans usque ad locum, unde reverti cœperat, adhuc decem alias expendit, atque post diem consummans usque ad occasum duas superaddidit, sicque factus est, ut diximus, dies horarum triginta duarum, id est quatuor horas minus habens, quam spatium dierum trium expleve conævit.

Quo in loco mentem movere poterit, quod alibi sancta Scriptura refert, quia ad vocem Josue stetit sol in medio cœli, et non festinavit occumbere spatio unius diei, atque mox subjungit : « Quia non fuit ante et postea tam longa dies, obediens Domino voce hominis, et pugnante pro Israel (*Josue x, 14*). » Cum enim dicitur, quia non festinavit sol occumbere spatio unius diei, declaratur, quia dies ille spatium duorum tenuit dierum, sicut et Jesus, filius Sirac, manifestat, dicens : « Iracundia ejus impeditus est sol, et unus dies factus est quasi duo (*Eccli. xi, vi, 5*). »

Cum ergo dies iste sub Ezechia plus habuerit horas octo quam ille, in quo sanctus Josue solem stare fecit, quid est quod ibi dicitur, quia « non

fnit ante et postea tam longa dies? » Multo enim longior fuit ista. Sed ille, qui scripsit librum Josue, ante Ezechiam fuisse intelligitur, et de his, quæ retroacta cognoverat, testimonium perhibuisse. Nam cum dicit, quia « non fuit ante et postea tam longa dies, » intelligimus ab origine mundi usque ad tempus Josue, et a tempore Josue usque ad scriptorem illius historiæ, vel ad tempus in quo scripta est. Et ideo non contradicit Isaia longiorem diem post inducenti, quia cum dixisset: « Non fuit ante et postea tam longa dies, » non addidit: « neque futura est. » Quod si addidisset, omnino contrarius Isaia videretur

His ita secundum historiam explicitis spiritalem sensum, aperiente Domino, cernere studeamus. « Ecce ergo, inquit, reverti faciam umbram linearum, » etc. Quid per decem lineas horologii, id est decem horas, nisi Decalogus legis exprimitur? Unde et Redemptor noster, ut legis doctor esse monstraretur, hora quasi decima, dictum est ei a discipulis Joannis: « Rabbi, quod dicitur interpretatum magister (Joan. 1, 38). » Quid vero per umbram linearum, nisi obumbratio atque velatio Testamenti Veteris designatur? Quid autem per horologium, in quo sunt duodecim lineæ, nisi Vetus Testamentum, in quo sunt rectissima vitæ præcepta, figuratur, et quod omnia tempora quasi singulas horas, vel historiam texendo, vel prophetando, loquitur? Et quid per Achaz, auctorem horologii, nisi scriptores ejusdem Testamenti signantur? Unde Achaz interpretatur continens, ut religiosam continentiam prophetarum significet. Quid vero per solem, nisi intellectus exprimitur? Unde impii feruntur esse dicturi, quia « Sol intelligentiæ non est ortus nobis (Sap. v, 6). »

Reversus est ergo sol decem lineis in horologio per gradus, quos descenderat, quia divinæ legis intellectus, qui traditionibus Phariseorum jam ad effectum propinquabat, ad eam intentionem est reductus, quam in initio Moyses habuit et propheta. Solem quippe illuc unde venerat reverti, est Scripturam intelligentiam ad pristinum redire, ut quomodo intellectus sunt a Moysse et prophetis, sic intelligantur et a nobis, non secundum carnalem Phariseorum interpretationem, quibus sol intelligentiæ jam occubuit, et nox ignorantiae mentes eorum operuit. Descenderat enim sol per decem lineas horologii, et umbram in eis reliquerat, quia intellectus Decalogi per Judæos declinaverat, et umbra litteræ Decalogum ipsum eis operuerat. Sed nunc umbra sole fugata est retrorsum decem lineis, quia obumbratio Decalogi, id est Veteris Testamenti, per spiritalem intelligentiam repulsa est.

Itaque quod umbra linearum revertitur in horologio retrorsum decem lineis, per quas solem sequendo descenderat, signum est Ezechia, quia Dominus adjiciet super dies ejus quindecim annos, ac demanu regis Assyriorum eruet eum, et civitatem ejus, quia in eo, quod legis arcana in passione

Domini revelantur, evidenter innuitur, quod de morte ejus resurrectura sit Ecclesia, et princeps hujus mundi nihil in eo habeat, sed per eum omnes, qui crediderunt, salventur. Evidens enim signum salutis nostræ est hoc quod spiritualis intelligentia legis panditur nobis, ut spiritaliter eam impleamus, quæ carnaliter a Judæis impleri non potuit. Et per hoc Dei Filius esse Jesus declaratur, quia in ejus morte legis obscuritas removetur. Unde velum templi scissum (Matth. xxvii, 51) fuisse describitur, et centurio dixisse, quia vere homo hic Filius Dei erat (ibid. 54). Sequitur:

VERS. 9. — « Scriptura Ezechia regis Judæ, cum ægrotasset, et convaluisset de infirmitate sua. »

VERS. 10. — « Ego dixi: In dimidio dierum meorum vadam ad portas inferi, quæsi residuum annorum meorum. »

VERS. 11. — « Dixi: Non videbo Dominum Deum in terra viventium: non aspiciam hominem ultra, et habitatorem quietis, » etc.

Ezechias est rex Judæ, id est Salvator noster est rex confessionis, quia « si confitearis in ore Dominum Jesum, et in corde tuo credideris quia Deus illum suscitavit a mortuis, salvus eris (Rom. 1, 9). » Rex est Judæ, id est confessionis, « ut omnis lingua confiteatur, quia Dominus Jesus est in gloria Dei Patris (Philipp. 11, 11). » Nam ut aperte monstraretur esse rex Judæ, posuerunt in cruce super caput ejus causam ipsius scriptam: « Hic est Jesus Nazarenus rex Judæorum (Matth. xxvii, 38). » Cui ægrotare fuit infirmitatem nostræ mortalitatis assumpsisse, ac de infirmitate sua convaluisse ei fuit ad gloriam resurrectionis pervenisse.

Scriptura vero, quam tunc Ezechias dedit, cum ægrotasset et convaluisset, eam designat Scripturam, quam post resurrectionem suam Dominus per evangelistas et apostolos condidit. Qui quoniam caput est Ecclesiæ, voce corporis sui inchoat loqui dicens: Ego quondam, antequam veniret gratia, dixi: In dimidio dierum meorum vadam ad portas inferi, id est a mundi exordio usque ad passionem Redemptoris, cum de hac vita migravero, descendam ad inferos. Tunc enim omnes illum descendebant.

Et notandum, quod non ait: vadam ad profundum inferni, sed: vadam ad portas inferi, quia justi illuc descendentes in superioribus locis absque tormento tenebantur; peccatores autem in inferioribus puniebantur. Quia vero a passione Domini usque ad finem sæculi adhuc permansura fuerit Ecclesia, subjungit:

Quæsi residuum annorum meorum, id est spatium temporis mei, quod supererat usque ad mundi terminum, rogavi donari mihi. Hoc est quod alias voce Ecclesiæ dicitur: « Ne revoces me in dimidio dierum meorum (Psal. c1, 25), » id est non me finias, donec omnes dies in consummatione sæculi compleam. Et quia naturam nostræ humanitatis Dominus assumpsit, voce humani generis in infernum sine spe descendens ait: Dixi: Non videbo Domi-

nam Deum in terra viventium, id est in cœlesti patria, quoniam « vadam et non revertar ad terram tenebrosam, et opertam mortis caligine (Job x, 21). »

Non aspiciam hominem ultra, cum fuero missus in tenebras exteriores, quia nocte damnationis æternæ cæcabor. Nec habitatorem quietis jam videbo, sed inter eos, qui in tormentis morabantur, detinebor. Hæc enim per peccatum meruit homo. Et ideo Dominus humanitatis nostræ factus particeps vocem eorum, qui propter peccatum peribant, in se suscepit, ut peccati remissionem obtinens, peccatores a morte salvaret. Unde et in Psalmo causam nostram suscipiens, ait : « Dominus Deus, respice in me, quare me dereliquisti? Longè a salute mea verba delictorum meorum (Psal. xxi, 2). » Qui quoniam plebem Judæorum, ex quibus carnem assumpserat, amisit, recte subjungit :

VERS. 12. — « Generatio mea ablata est, et convoluta est a me quasi tabernaculum pastorum. »

Ejus namque generatio ablata est ei, quia Judæam perdidit. Et sicut tabernaculum pastorum in uno fasciculo convolvitur, et ad ignem deportatur, ipsis absentibus ; sic, recedente Domino, plebs illa convoluta est in congregationem unius fascis (142) in lacum, ut æternaliter ibi comburatur. Cujus plebis voce subditur :

« Præcisa est velut a texente vita mea : dum adhuc ordire succidit me. »

Loquitur enim Dominus voce Judaici populi, quia per mysterium assumptionis humanitatis unum cum eo factus est. Quia vero « justus ex fide vivit (Rom. 1, 17), » hic autem populus in adventu Domini fidem, ex qua vivebat, amisit, præcisa est, inquit, vita mea, id est fides mea, et amputata. Quæ scilicet vita comparatur telæ, quæ textitur, quia fides illius rudis populi quibusdam incrementis proficiebat sicut tela, cum textitur. Et quemadmodum tela duobus lignis infra supraque religata innectitur, ut textatur, ita fides illius populi in humanitate et divinitate Redemptoris tenebatur, ac proficiebat.

Præcisa est ergo vita ejus, velut si tela præcidatur a texente, quia Dominus, qui fidem ejus augere solebat, justo judicio præcidit eam. Qui videlicet populus, dum adhuc ordiretur, præcisus est, quia quando fidei vitam perdidit, adhuc inchoabat. Unde et Apostolus improperat eis, dicens : « Cum deberetis magistri esse propter tempus, rursus indigetis ut vos doceamini, quæ sint elementa exordii sermonum Dei, et facti estis, quibus lacte opus sit, non solido cibo. Omnis enim qui lactis est particeps, expers est sermonis justitiæ : parvulus enim est (Hebr. v, 12). » Adhuc ergo populus ille ordiebatur, id est incipiebat, quando succisus est. « Nihil enim ad perfectum adduxit lex (Hebr. vii, 19). »

Rursus voce electæ partis ejusdem populi subjicitur : « De mane usque ad vesperam finies me. » Et a superioribus intelligitur : Dixi. Quod enim bis su-

perius ait, Dixi frequenter subintelligi potest in sequentibus. Quid vero mane, nisi tempus illud dicit, quo populus ille, vel per Abraham, vel per Moysen cæpit Deum cognoscere? Et quid vesperam, nisi occasum solis justitiæ, id est passionem Domini nuncupat? Dixit itaque populus Hebræorum quia « de mane usque ad vesperam finies me, » quoniam se religiose victurum prophetavit ab initio datæ legis usque ad passionem Domini. Quotidie enim finiur, qui ob amorem patriæ cœlestis ab amore presentium magis magisque deficit, et desideria carnis exstinguit, secundum illud Apostoli : « Semper mortificationem Jesu in corpore vestro circumferentes, ut et vita Jesu Christi in corpore vestro manifestetur. Semper autem nos, qui vivimus, in mortem tradimur propter Christum, ut et vita Jesu manifestetur in carne nostra mortali (II Cor. iv, 10). Nam et sub Veteri Testamento sic vivebant nonnulli. Deinde propria voce Dominus adjungit :

VERS. 13. — « Speravi usque ad mane. »

Id est expectabam resurrectionem secundum illud : « Caro mea requiescet in spe (Psal. xv, 9). » Mane enim horam resurrectionis appellat. Nam de vespera, quam præmisit, et de isto mane scriptum est alias : « Ad vesperum demorabitur fletus, et ad matutinum lætitia (Psal. xxxix, 6). » Fleverunt enim discipuli, moriente Domino ; sed, eo resurgente, lætati sunt. Post multiplicem itaque vocum variationem lucusque frequenter immutantem personas loquentium jam diutius Ecclesiæ vox in his quæ sequuntur, perseverat. Subjungit enim :

« Quasi leo sic contrivit omnia ossa mea, » etc. In ossibus quippe est fortitudo corporis. Et quæ sunt ossa hujus sacri corporis, id est Ecclesiæ, nisi Apostoli? Quasi ergo si conterat Leo cujusquam ossa, quem devorat ; sic contrivit Satanas, tempore Dominicæ passionis, ossa Ecclesiæ, quia tunc omnium apostolorum mentes confregit, et constantiam eorum contrivit. Sed hoc periculum cito præterit, ut Ecclesiæ religio usque ad consummationem sæculi perduraret. Consequenter enim loquitur : « De mane usque ad vesperam finies me. » Nam mane, sicut et superius, horam Dominicæ resurrectionis appellat, vesperam vero finem mundi. Et de mane usque ad vesperam finiur, quia ex tempore resurrectionis Dominicæ usque ad mundi terminum carnem suam crucifigens, cum vitiis et concupiscentiis Apostolum imitatur, dicentem : « Quotidie morior (I Cor. xv, 31). » Et adjungit :

VERS. 14. — « Sicut pullus hirundinis sic clamabo, meditabor ut columba. »

Clamabo, inquit, ut pullus hirundinis, qui natus clausos habet oculos usque ad diem octavum, et clamat propter cæcitatem et famem. Sic enim homo, in hujus vitæ cæcitate natus, usque ad diem novissimæ resurrectionis positus in tenebris et egestate, clamare jugiter debet pro his ad Deum, et compon-

ctioni studens, meditari ut *columba*, quæ pro cantu *A* gemit assidue. Postquam vero justorum Ecclesia vel quælibet sancta anima diutius ita clamavit, et meditata est, subsequitur, dicens :

« Attenuati sunt oculi mei suspicientes in excelsum. » Ex sæcularibus enim curis et cogitationibus infimis crassitudine quadam hebetantur oculi cordis sicut de quibusdam dicitur, quia « incrassatum est cor populi hujus (*Matth. xiii, 15*). » Qui vero terrena omnia mente transcendit, et cogitationes suas subtiliter mundans, cœlestium contemplatione desideroque pascitur, hujus oculi, in *excelsum suspicientes*, attenuantur. Sic enim oculos attenuari sanctus Job volebat, cum diceret : « Spiritus meus attenuabitur (*Job xvii, 4*). » Bene ergo dicit Ecclesia contemplationi supernorum intenta, quia *attenuati sunt oculi mei suspicientes in excelsum*. Sed ab altitudine contemplationis rediens ad considerationem malorum, quæ inferius tolerat, subjungit obsecrando : « Domine, vim patior, responde pro me. » Et intra se cogitando addit :

VERS. 15. — « Quid dicam, aut quid respondebit mihi, cum ipse fecerit? »

Domine, inquit, *vim tribulationis patior, responde tibi pro me*, quia non valeo respondere tibi, cum scriptum sit : « O homo quis es, ut respondeas Deo? » (*Rom. ix, 20*.) *Responde ergo pro me*, id est causam meam contra severitatem justitiæ tuæ misericorditer defende, ut vim afflictionis, quam juste patior, amovere possis per rationem justitiæ. *Quid enim*, inquit, *dicam Deo meo?* Ac si dicat : « Si justificare me voluero, os meum condemnabit me. Si innocentem ostendero, pravum me comprobabit (*Job ix, 20*). *Aut quid respondebit mihi, cum ipse fecerit*, id est quam rationem mihi reddet de his quæ patior, cum ipse conditor meus sit, qui me vel affligit vel affligi permittit? Qui enim me benigne condidit, nequaquam injuste cruciari permittit. Sed est, quod inter hæc salubriter agam : « Recogitabo omnes annos meos in amaritudine animæ meæ, » id est ad memoriam revocabo omne tempus vitæ meæ transactum, et omnia deflebo, quæ me male egisse recognovero.

VERS. 16. — « Domine, si sic vivitur, et in talibus vita spiritus mei. »

In præsentī vita *sic vivitur*, ut supra dixit de se, id est dolores et afflictiones patiendo. Omnes enim, qui vivimus, afflictione premimur, et ei, qui nos affligit, respondere non possumus. *Et in talibus doloribus est vitæ spiritus mei*, id est vita, quam spiritus his artubus confert.

Vel *sic vivitur* vera vita, id est recogitando cum amaritudine penitentiae præteritos annos. *Et in amaritudinibus talibus et recordationibus est vitæ spiritus mei*, quia per penitentiam reviviscit anima, quæ in peccatis mortua erat. Sive in talibus afflictionibus enutritur *vita spiritus mei*, quia tanto verius vivit Spiritus mentis, quanto fortius caro conteritur. Unde et additur :

« Corripies me, et vivificabis me. » *Corripies me* flagellando exterius, et per hoc *vivificabis me* interiorius ut dicere possim, quia « castigans castigavit me Dominus, et morti non tradidit me (*Psal. cxvii, 18*). » Hæc loquitur Ecclesia vel quilibet justus cum Paulo, glorians in tribulationibus. Sed qui sic corripit desiderat, videamus quid agat, cum correctio foris cessaverit. Subjungit :

VERS. 17. — « Ecce, in pace amaritudo mea amarissima. »

In pace enim est *amaritudo* electorum *amarissima*, quia qui semper in amaritudine cordis sunt, tunc vehementius amaritudine replentur, cum nihil adversitatis exterius patiuntur. Sed quid per hanc correptionem et amaritudinem meruerint, sequitur : « Tu autem eruisti animam meam, ut non periret, » id est ab imminente periculo damnationis æternæ salvasti. Et quomodo eam a periculo mortis eruisti? Sequitur : « Projecisti post tergum tuum omnia peccata mea, » id est a conspectu tuo auferens, in his quæ retro sunt ea reliquisti, ut jam in anterioribus, id est in futuris sæculis non videantur. Sequitur :

VERS. 18. — « Quia non infernus confitebitur tibi, neque mors laudabit te : non expectabunt, qui descendunt in lacum, veritatem tuam. »

VERS. 19. — « Vivens, vivens ipse confitebitur tibi sicut et ego hodie : pater filiis notam faciet veritatem tuam. »

Quod animam meam a morte erueris, dum peccata dimitteres, inde comprobatur, quia *infernus non confitebitur tibi*, id est his qui in inferno sunt, per confessionem peccatorum, non dabitur jam remissio : *neque mors laudabit te*, id est qui in illa morte sunt. *Et qui semel in lacum perditionis illius descendunt*, jam *veritatem doctrinæ tuæ non expectabunt* cognoscere, quoniam, in sua stultitia consumpti, sine remedio punientur.

Vel certe *veritatem* promissionis tuæ *non expectabunt*, quam expectant electi. Infernus et mors non confitebuntur, sed *vivens, vivens ipse confitebitur tibi*, id est, dum in præsentī sæculo quisque vivit, habet potestatem confitendi peccata sua, sicut et ego, dum adhuc hodie vivo, confiteor. *Et illi, qui descendunt in lacum, non expectabunt veritatem tuam*. Sed *pater* quisque spiritualis *notam faciet veritatem tuam filiis* suis, quos in Christo Jesu per Evangelium genuerit. In hac enim vita locus est discendi, non in inferno, et hic est locus peccata confitendi atque purgandi. Hucusque Dominus voce corporis tui locutus est. Sed post hæc voce propria loquitur ad Patrem, dicens :

VERS. 20. — « Domine, salvum me fac. »

Id est resuscita me. Rursumque membrorum suorum voce subjungit : « Et psalmos nostros cantabimus cunctis diebus vitæ nostræ in domo Domini, » id est in Ecclesia permanebimus in psalmis et hymnis et canticis spiritalibus cantantes et psallentes in cordibus nostris Domino. Hoc enim a re-

surrectione Domini fideles agunt ubique. Et hæc est oratio Ecclesie deprecantis in Psalmo : « Domine, salvum fac regem, et exaudi nos in die qua invocaverimus te (Psal. xix, 10). » Nam quod ibi dicitur : « Domine, salvum fac regem, » hoc est, quod ipse rex ait hic : *Domine, salvum me fac*; et quod ibi sequitur : « Et exaudi nos in die qua invocaverimus te, » hoc loco subditur : « Et psalmos nostros cantabimus cunctis diebus vite nostræ in domo Domini. » Terminata itaque oratione regis Ezechie, sequitur in narratione prophetica :

Vers. 21. — « Et jussit Isaias, ut tollerent massam de ficis, et cataplasment super vulnus, et sanaretur. »

Dominus autem in Osee dicit : « Quasi uvas in deserto inveni Israel, quasi prima poma ficulneæ (Osee ix, 10). Et Jeremias, visionem quamdam referens ait inter alia : « Calathus unus ficus bonas habebat nimis, ut solent esse ficus primi temporis (Jerem. xxiv). » Et subjungit Dominum dixisse : « Sicut ficus hæc bonæ : sic cognoscam transmigrationem Juda, quam emisi de loco isto in terram Chaldæorum in bonum, et ponam oculos meos super eos ad placandum (ibid., v).

Quid ergo per *massam* ficorum designatur, nisi multitudo electorum dulcis et suavis? Quid itaque est, quod super vulnus Ezechie ponitur massa ficorum, nisi quod, dum Redemptor noster in cruce pendens lancea vulneratur, Ecclesiam proprio cruore mercatur? Unde Paulus ait : « Regere Ecclesiam Dei, quam acquisivit sanguine suo (Act. xx, 28). » Vulneratus igitur acquisivit Ecclesiam quod est massam ficorum esse vulnere superpositam.

Et cataplasmata est hæc massa de ficis super vulnus, quia justorum Ecclesia glutino charitatis adhæret Dominicæ passioni. Ut autem massa hæc super vulnus est cataplasmata, sanatus est rex, quia postquam Christus patiendo agglutinavit sibi multitudinem electorum, qui omnes unum sunt, calcata morte, suriexit jam non reversurus in corruptionem. Sanatus est enim, quia gloria resurrectionis indutus est. Sequitur :

Vers. 22. — « Et dixit Ezechias : Quod erit signum quia ascendam ad domum Domini. »

Cum hoc dixisset rex, Isaias respondit ei, quod supra positum est voce Domini : « Hoc erit tibi signum a Domino, quia facit Dominus verbum hoc quod locutus est : Ecce ego reverti faciam umbram linearum (Apoc. iii, 7), » etc. Ezechias ascensusus erat in domum Domini, quia Christus, a mortuis resurgens, ascendit in illam æternitatis domum, ubi nunc sedet in dextera Dei Patris. Sed hujus ascensionis fuit signum, quod decem lineis sol reversus est, quia dum in ejus morte et resurrectione patefierent arcana legis, datum est evidens indicium, quia ipse regna quoque cælorum reseraturus erat. Nam neque legem, neque cælum aperire poterat nisi sanctus et verus, « qui habet clavem David, qui aperit et nemo claudit, claudit et nemo aperit (Apoc. iii,

A 7). » Post ejus ascensionem quia gentes ad fidem venerunt, bene subditur :

CAPUT XXXIX.

« In tempore illo misit Merodach Baladan filius Baladan rex Babylonis libros et munera ad Ezechiam; audierat enim, quod ægrotasset et convalescisset. »

Quid enim per *Merodach*, qui interpretatur, *amara arrogantia* vel *amaritudinem immittens*, nisi magistros sapientiæ sæcularis designat, qui propter eandem suam sapientiam assumpserant nimiam arrogantiam et sequacibus suis immittebant amaritudinem arrogantiae vel sapientiæ suæ? Qui et *Baladan* cognominatur, quod dicitur : *Venit sibi met judicans*, quia sapientes sæculi ad hoc venerunt, ut sibi met judicantes præferrent sua his quæ erant aliorum, de quibus recte Dominus ait : « Omnes quotquot venerunt, fures sunt et latrones (Joan. x, 8). » Atque *filius Baladan* est iste Merodach, quia hi, qui ex sapientibus mundi crediderunt, ex doctrina veterum sapientum erant primogeniti. *Rex quoque Babylonis*, id est *confusionis* dicitur fuisse Merodach, quia sapientes sæculi principes erroris fuerunt.

Hic ergo Merodach *misit ad Ezechiam*, id est ad Christum *libros* sanæ doctrinæ, et *munera* bonorum operum. Multi enim ex sapientibus gentium conversi libros optimos scripserunt, et munera suæ devotionis obtulerunt Christo, sicut Justinus philosophus, et Arcopagita Dionysius, et Augustinus Aurelius. *Audierat enim* per apostolos iste Merodach, *quod Ezechias ægrotasset, et convalescisset*, id est Christus infirmitatem nostræ mortalitatis assumpsisset, et ad immortalitatis gloriam pervenisset. Sequitur :

Vers. 2. — « Lætatus est Ezechias super eis, et ostendit eis cellam aromatum, et argenti et auri, et odoramentorum, et unguenti optimi, et omnes apothecas supellectilis suæ, et universa, quæ inventa sunt in thesauris ejus. »

Lætatus est Christus super conversis gentilibus, et *ostendit eis cellam aromatum*, id est introduxit eos in Ecclesiam, quæ referta est aromatibus virtutum. Quæ cella est *et argenti*, id est divini eloquii, *atque auri*, id est supernæ sapientiæ, et *odoramentorum*, quæ sunt orationes sanctorum, et *unguenti optimi*, id est unctionis Spiritus sancti. Unguentum enim optimum est Spiritus sanctus, quia prædicavit « Jesum a Nazareth, quomodo unxit eum Spiritu sancto Deus (Act. x, 38). »

Ἀποθήκη *Apotheca* vero græce, latine dicitur *repositorium* vel *reconditorium*. Quid autem supellex Ezechie designat, nisi virtutum ornamenta, et bonorum operum instrumenta varia? Quid ergo per apothecas supellectilis ejus, nisi congregationes fidelium intelligere debemus, sive mentes eorum, ubi recondita est multimoda virtutum supellex? Deinde quod per partes descriperat, generaliter adjungens *universa quæ inventa sunt in thesauris ejus*, omnia bona nuncupat : et cuncta hæc ostendit Christus conversis gentilibus. Sequitur :

« Non fuit verbum, quod non ostenderet eis Ezechias in domo sua, et in omni potestate sua. »

Domus ejus est Ecclesia. Potestas ejus est, de qua dicit : « Data est mihi omnis potestas in cœlo et in terra (Matth. xxviii, 18). » Non fuit ergo verbum, quod non ostenderet eis in domo sua, et in omni potestate sua, quoniam omnia, quæ sunt in Ecclesia vel in cœlo et in terra, prout nunc ea nosse debet pietas christianæ religionis, manifestavit eis, sicut ait : « Vos autem dixi amicos : quia quæcunque audivi a Patre meo, nota feci vobis (Joan. xv, 15). » Sequitur :

VERS. 3. — « Introivit autem Isaias propheta ad regem Ezechiam, et dixit ei : Quid dixerunt viri isti, et unde venerunt ad te? »

Vocatis ad fidem gentibus intravit Isaias, id est sermo propheticus ad Ezechiam, id est ad Christum locuturus de eis, quia tunc in eorum moribus impleri cœpit, quod de eorum conversatione dudum fuerant locuti prophetæ. De quibus quasi de ignotis interrogat, quia prophetæ velut incognitos habebant gentiles, quibus præsentialiter non loquebantur. Sequitur :

« Et dixit Ezechias : De terra longinqua venerunt ad me, de Babylone. » Longe erant gentiles a Deo in Babylone, id est dum in confusione erroris idololatriæ morarentur. Unde fertur adolescentior ex duobus fratribus, accepta portione substantiæ, abiisse « in regionem longinquam (Luc. xv, 12), » et ibi eandem substantiam suam dissipasse vivendo luxuriose, sed tandem, aliquando surgens, rediisse ad patrem suum. Venerunt igitur de terra longinqua, de Babylone gentiles, qui conversi sunt ab antiquis erroribus ad Christum. Sequitur :

VERS. 4. — « Et dixit : quid viderunt in domo tua? Et dixit Ezechias : omnia, quæ in domo mea sunt, viderunt : non fuit res, quam non ostenderem eis in thesauris meis. »

Omnia quæ sunt in domo Domini, id est in Ecclesia, viderunt conversi gentiles et agnoverunt, atque diligenter instructi sunt de omnibus. Non fuit res in thesauris ejus, quam non ostenderit eis, quoniam omnes divitias animæ et virtutum opes manifestavit eis. Sed jam videmus atque gemimus ex magna parte compleri quod sequitur.

VERS. 5. — « Et dixit ad Ezechiam Isaias : Audi verbum Domini exercituum : »

VERS. 6. — « Ecce dies venient, et auferentur omnia quæ in domo tua sunt, et quæ thesaurizaverunt patres tui usque ad diem hanc, in Babylone : non relinquetur quidquam, dicit Dominus. »

Dies veniunt, atque jam cœperunt, de quibus ait Apostolus : « Quoniam in novissimis diebus instabunt periculosa tempora, et erunt homines seipsos amantes, cupidi, elati, superbi, blasphemi, parentibus non obedientes, ingrati, scelesti, sine affectione, sine pace, criminatores, incontinentes, immites, sine benignitate, proditores, protervi, tumidi, volupta-

tum amatores magis quam Dei, habentes quidem speciem pietatis, virtutem autem ejus abnegantes (I Tim. iii, 1-5). » Quantum igitur ad multitudinem hujusmodi pseudochristianorum, auferentur in diebus illis spiritaliter in Babylone omnia quæ sunt in domo Domini. Neque enim de infidelibus loquitur Apostolus hæc omnia, sed de his potius qui dicuntur Christiani, de quibus et Dominus ait : « Verumtamen veniens Filius hominis, putas, inveniet fidem super terram? » (Luc. xviii, 8.) Quid ergo mirum, si omnia quæ sunt in domo Domini dicuntur in Babylone tollenda, cum ipse Dominus in adventu suo. vix inventurus sit fidem super terram?

Nec tamen ita dicendo negamus nonnullos tunc strenuissimos fore justos, sed de eorum multitudine loquimur, de quibus scriptum est : « Quoniam, abundante iniquitate, refrigescet charitas multorum. (Matth. xxiv, 12). » Omissis ergo paucis justis de reproborum copiosa, quæ tunc abundabit, multitudine sermo est, cum dicitur, quia tollentur in Babylone omnia quæ sunt in domo Ezechiae, id est in hac plebe Christiana, videlicet aromata virtutum, et fragrantia opinionis optimæ, et argentum divini eloquii, et aurum cœlestis sapientiæ, et odora menta orationum, et cætera superius descripta.

Patres autem Domini prophetæ vocantur et patriarchæ, qui thesaurizaverunt in domo ejus usque hodie thesauros morum honorum et sapientiæ, quia per eorum facta et dicta spiritalibus divitiis repletur Ecclesia. Sed omnes hi thesauri post paucos dies auferentur in Babylone, id est in confusionem, quia per Antichristum omnia interioris hominis bona ducentur captiva. Non relinquetur quidquam, dicit Dominus, quia ille pestifer omnia corrumpet et destruet. Sed his de damno morum præmissis, de captivitate fidelium subjungitur :

VERS. 7. — « Et de filiis tuis, qui exibunt de te, suos generis, tollent, et erunt eunuchi in palatio regis Babylonis. »

Non ait : omnes filios tuos tollent, sed de filiis tuis tollent. Ubi satis apparet, non omnes tunc fideles seducendos esse. Omnes enim Christiani sunt filii ejus, sicut ipse demonstrat, cum dicit : « Nunquid possunt filii sponsi jejuna, quoad cum illis est sponsus? » (Marc. ii, 19.) Et bene dicitur : Qui exibunt de te, quia secundum Apostolum sumus « de carne ejus, et de ossibus ejus (Ephes. v, 50). »

De his ergo filiis nonnullos tollent prædicatores Antichristi, et facient eos eunuchos esse, id est absque mentis virilitate, in palatio regis Babylonis, id est in curia principis hujus sæculi, qui est Sathanas. Eunuchus namque est, qui mentis virilitatem, qua spiritales filios gignere prædicando deberet, amisit. Unde per Moysen dicitur : « Quia non intrabit eunuchus, attritis vel amputatis testiculis et abscisso veretro Ecclesiam Domini (Deut. xxiii, 2). » Atteruntur enim testiculi ejus, cujus interna virilitas adversis comminuitur. Amputantur vero testiculi ejus cum veretro, cujus spiritalia virilia, quibus

Per Evangelium filios generare posset, auferuntur. A Sed quicumque talis est, intrare non valet Ecclesiam Domini supernam, quam soli ingrediuntur electi. Recte itaque dicitur, quia « de filiis tuis exibunt, quos genueris, tollent, et erunt eunuchi in palatio regis Babylonis, » quoniam sub Antichristo multi seducentur ex Christianis, et adhærebunt enerviter obsequio regis intimæ confusionis. Sequitur :

VERS. 8. — « Et dixit Ezechias ad Isaïam : Bonum verbum Domini, quod locutus est. »

Bonum est, ut multitudo reproborum, quæ modo gravat Ecclesiam, tota per Antichristum separetur ab electis. Sequitur :

« Et dixit : Fiat tantum pax et veritas in diebus meis. »

Dierum nomine signari solet electorum conversatio, Salomone dicente : « Justorum autem semita quasi lux splendens procedit, et crescit usque ad perfectam diem (Prov. iv, 18). » Qui sunt ergo dies Ezechie, id est Christi, nisi electi ejus, quibus ait Apostolus : « Fulistis aliquando tenebræ, nunc autem lux in Domino ? » (Ephes. v, 8.) *Fiat ergo pax in diebus istis, ut sit « in terra pax hominibus bonæ voluntatis (Luc. ii, 14), » re spiritaliter expugnentur a rege Babylonis, et captiventur. Fiat in eis et veritas, ne sint ex illis, quibus per Antichristum Deus immittet operationem erroris, ut credant mendacio, sicut ait Apostolus : « Eo quod charitatem veritatis non receperint, ut salvi fierent (II Thes. ii, 10). » Licet enim iusti persecutionem foris patiantur, semper tamen est in eis pax, quoniam in eis audire merentur : « Pax Dei, quæ exsuperat omnem sensum, custodiat corda vestra, et intelligentias vestras in Christo Jesu (Philip. iv, 7). » Quorum enim corda et intelligentias pax Dei custodit in Christo, in his recte pax fieri dicitur, quoniam a pace Dei nulla impugnatione hostili separantur. Et in his *tantum fit pax*, quia « non est pax impiis dicit Dominus (Isa. xlviii, 22). » *Veritas quoque fit in eis*, dum, veritatem facientes in charitate, crescunt in illo per omnia, qui est caput Christus. Sed quoniam tristitia de spiritali captivitate fidelium prædicta sunt, apte subjungitur electorum consolatio, cum dicitur :*

CAPUT XI.

VERS. 1. — « Consolamini, consolamini, popule meus, dicit Deus vester.

VERS. 2. — « Loquimini ad cor Jerusalem, et avocate (143) eam, quoniam completa est mania ejus, dimissa est iniquitas illius : suscepit de manu Domini duplicia pro omnibus peccatis suis. »

Considerans enim Dominus abominationem desolationis illius novissimæ, qui per Antichristum fiet, benigne suos inter adversa consolatur, dicens : « Consolamini, consolamini, popule meus. » Et ut consolationem qui jam perceperunt, alios consolari studeant, adjungit :

(143) Alias, *advocate*.

« Loquimini ad cor Jerusalem, et avocate eam. » Ad cor namque est loqui tristem blande consolando alloqui. Unde Ruth dixisse fertur ad Booz : « Consolatus es me, et locutus es ad cor ancillæ tuæ (Ruth ii, 15). » Huic autem loco consonat Apostolus, dicens : « Benedictus Deus et Pater Domini nostri Jesu Christi, Pater misericordiarum, et Deus totius consolationis, qui consolatur nos in omni tribulatione nostra; sic ut possimus et ipsi consolari eos qui in omni tribulatione sunt, per exhortationem qua exhortamur et ipsi a Deo, quoniam sicut abundant passionem Christi in nobis, ita et per Christum abundat consolatio nostra (II Cor. i, 5-5). »

Nam quod ait Dominus : *Consolamini, consolamini, popule meus*, Apostolus dicit : « Qui consolatur nos in omni tribulatione nostra. » Et quod Dominus subdit : *Loquimini ad cor Jerusalem*, Apostolus adjungit : « Ut possimus et ipsi consolari eos qui in omni tribulatione sunt, » etc. *Loquimini igitur*, inquit, *ad cor Jerusalem*, id est Ecclesiæ, vel cujuslibet fidelis animæ inter adversa positæ, dicentes ea quæ cor ejus audire desiderat, et *avocate eam*, ut discedat ab iniquitate omnis qui invocat nomen Domini, quatenus humanæ conversationis prava studia deserens, terrenorum hominum, qui præ abundantia iniquitatis multi sunt, perditos mores non imitetur.

Quoniam in illa tribulatione novissima completa, id est *finita est malitia ejus*, ea scilicet malitia, de qua scriptum est : « Nolite solliciti esse in crastinum. Crastinus enim dies sollicitus erit sibi ipsi. Sufficit enim diei malitia sua (Matth. vi, 34). » Tunc enim omnem corporeæ necessitatis sollicitudinem, quæ nunc appellatur malitia, relinquere compelletur quisque fidelis, et se ipsum in ovem occisionis deputare. Terminata est ergo tunc malitia ejus, quia omnem mundi sollicitudinem abjiciet; et quia persecutionem patitur propter justitiam, dimissa est iniquitas illius, quam forte ante commiserat. *Suscepit namque de manu Domini duplicia pro omnibus peccatis suis*, quia et in corpore et in anima vehementissime cruciatus est pro omnibus peccatorum, præteritis delectationibus. « Erit enim tribulatio magna, qualis non fuit ab initio mundi usque modo, neque fiet (Matth. xiii, 21). »

Possunt tamen hæc super adventu Domini convenienter intelligi. Præcipua namque consolatio populi Dei fuit adventus Christi, quia ex quo patribus promitti cœpit, multis sanctorum lacrymis desideratus fuerat. Unde senex ille Simeon erat « expectans consolationem Israel : et responsurum acceperat a Spiritu sancto, non visurum se mortem, nisi videret Christum Domini (Luc. ii, 25). » Hanc ergo consolationem Israel, quæ per adventum Christi futura erat, offert propheta nunc eidem populo, dicens : « Consolamini, consolamini, popule meus,

dicit Dominus Deus vester; » atque sul jungit, dicens ad apostolos : *Loquimini ad cor Jerusalem*, id est, ad cor plebis Judæorum, blande et rationabiliter ad penitentiam Dominicæ necis exhortantes eam. *Et advocat eam*, ab infidelitate ad fidem, a vetustate ad novitatem, *quoniam completa est malitia ejus*, occidendo Salvatorem, et post *dimissa est iniquitas illius* credendo in eum.

Ut autem intelligamus, quod sequitur : « Suscepit de manu Domini duplicia pro omnibus peccatis suis, » meminerimus in hoc corpore corruptibili, quod aggravat animam, vita nos misera vivere. Sed quia jam redempti per mediatorem sumus, et Spiritum sanctum pignus accepimus, beatam vitam in spe habemus, etsi rem ipsam nondum tenemus. « Spes autem, quæ videtur, non est spes. Quod enim videt quis, quid sperat? Si autem, quod non videmus, speramus, per patientiam exspectamus (*Rom. viii, 24*). » In malis autem quæ quisque patitur, non in bonis quæ fruitur, opus est patientia.

Hanc ergo vitam, de qua scriptum est : « Nunquid non tentatio est vita humana super terram? (*Job. vii, 1*), » in qua quotidie clamamus ad Dominum : « Libera nos a malo (*Matth. vi, 13*), » cogitur homo tolerare etiam remissis peccatis, quamvis, ut in eam veniret miseriam, primum fuerit causa peccatum. Productor est enim pœna quam culpa, ne parva putaretur culpa, si cum illa finiretur et pœna. Ac per hoc vel ad demonstrationem debitæ meritiæ, vel ad emendationem labilis vitæ, vel ad exercitationem necessariæ patientiæ, temporaliter hominem detinet pœna, etiam quem jam ad damnationem sempiternam reum non detinet culpa. Bene itaque, cum dictum esset : « Dimissa est iniquitas illius, » subjunctum est : « Quoniam suscepit de manu Domini duplicia pro omnibus peccatis suis, » quia dum peccaret, et postquam peccare desiit, afflictionem præsentis vitæ sustinuit. Sequitur :

Vers. 3. — « Vox clamantis in deserto : Parate viam Domini, rectas facite in solitudine semitas Dei nostri. »

Interrogatus Joannes Baptista quis esset, respondit : « Ego vox clamantis in deserto : Dirigite viam Domini sicut dixit Isaias propheta (*Joan. i, 23*). » Joannes ergo vox dicitur, quia verbum præcedit. Sicut enim ex usu nostræ locutionis cognoscimus, vox ante sonat, ut verbum postmodum possit audiri. Adventum itaque Dominicum præcurrens, Joannes vox appellatur, quia per ministerium illius Verbum Patris auditur. Verbum est ipsa cogitatio, quæ adhuc intra secreta conscientiæ retinetur; vox vero sonus index cogitationis. Verbum quippe dicitur esse, quod intra animi silentium mente concipimus; vox autem, per quam verbum proferimus. Verbum etiam est ratio, quæ per vocem auditur. Sicut ergo quando verbum corde concipimus, necessaria est vox quasi quoddam vehiculum verbi, et licet ipsum verbum per oris sonum ad alium transferamus, tamen ad integrum etiam intra nos manet, id est, sic clausum

a loquente transfertur, ut tamen in sua sede teneatur; ita omnipotens Pater innotescere volens nobis sapientiam et Verbum, quod in principio erat Deus apud Deum, sicut ipse ait : « Eructavit cor meum verbum bonum (*Psal. xlii, 2*), » beatum Joannem quasi vocem, per quam ad nos Verbum suum proferret, assumpsit; et verbum illud, de illa cœlesti sede sic ad nos descendit, ut tamen in profundo paterni pectoris maneret, terrena visitans, et cœlestia non relinquens. Bene itaque Joannes vox dicitur, cujus, inchoante præconio, sacramentum redemptionis humanæ surda dudum cœpit audire mortalitas. *In deserto etiam vel in solitudine clamat*, quia derelictæ et destitutæ Judææ solatium suæ salutis annuntiat.

Vel per desertum et solitudinem designari potest destitutio boni. Vacua enim timore Dei pectora deserto squalentis eremi comparantur. Clamat ergo Joannes in deserto, dicens : « Parate viam Domini, rectas facite semitas Dei nostri (*Luc. iii, 4*), » quia « multos filiorum Israel convertit ad Dominum Deum ipsorum præcedens ante illum parare Domino plebem perfectam (*Luc. i, 16*). » Et nobis adhuc præcepit, ut in medio nationis pravæ et perversæ, id est, inter iniquos cum quibus degimus, viam in nobis ipsis Domino paremus bene vivendo, qui ait : « Si quis diligit me, sermonem meum servabit, et Pater meus diligit eum, et ad eum veniemus, et mansionem apud eum faciemus (*Joan. xiv, 23*). »

Potest per viam actio designari, et per semitas cogitationes. Præcipit igitur nobis parare viam Domini, et rectas facere semitas ejus, quatenus et exteriorem conversationem nostram, et internas mentis nostræ cogitationes ei spiritaliter venienti præparemus.

Vel etiam prædicatoribus jubet parare viam Domini. Parat enim viam Domini, qui mentibus audientium gloriam ejus prædicat, ut eas et ipse post veniens per amoris sui præsentiam illustret. Parat quisque rectus prædicator viam Domini, quoniam verba exhortationis præcurrunt, atque per hoc veritas in mente suscipitur. Sequitur :

Vers. 4. — « Omnis vallis exaltabitur, et omnis mons et collis humiliabitur, et erunt prava in directa, et aspera in vias planas. »

Quid hoc loco vallium nomine, nisi humiles, et quid montium et collium nisi superbi homines designantur? In adventu igitur Redemptoris valles exaltatæ, montes vero et colles humiliati sunt, quia juxta ejus vocem « omnis, qui se exaltat, humiliabitur, et qui se humiliat exaltabitur. (*Luc. xiv, 14*). »

Prava autem directa fiunt, cum malorum corda per injustitiam detorta ad justitiæ regulam diriguntur. Et aspera in vias planas immutantur cum immites atque iracundæ mentes per infusionem supernæ gratiæ ad lenitatis mansuetudinem redeunt. Quando verbum veritatis ab iracunda mente non recipitur, quasi asperitas itineris gressum pergentiæ

repellit. Sed cum mens iracunda per acceptam mansuetudinis gratiam correptionis vel exhortationis verbum recipit, ibi planam viam prædicator invenit, ubi prius, præ asperitate itineris pergere, id est prædicationis gressum ponere, non valebat. His de primo adventu Salvatoris dictis, mox de secundo subditur :

VERS. 5. — « Et revelabitur gloria Domini, et videbit omnis caro pariter, quod os Domini locutum est. »

Tunc enim *revelabitur gloria Domini*, quia « videbunt Filium hominis venientem in nubibus cæli cum virtute magna et majestate (*Matth. xxiv, 50*). » Nam quia *omnis caro* accipitur omnis homo, tunc, revelata gloria Domini, *videbit omnis caro pariter quod os Domini locutum est*, quando, apertis cælis, ministrantibus angelis, consedentibus apostolis, in sede majestatis suæ Christus apparuerit. Quem omnes electi a reprobis pariter videbunt, ut et justi de munere retributionis sine fine gaudeant, et injusti in ultione supplicii perpetuo gemant. *Videbit itaque omnis caro*, id est omnis homo pariter quod os Domini locutum est de gloria sanctorum et damnatione malorum. Sequitur :

VERS. 6. — « Vox dicentis : Clama. Et dixi : Quid clamabo? Omnis caro fenum, et omnis gloria ejus quasi flos agri. »

VERS. 7. — « Exsiccatum est fenum, et cecidit flos, quia Spiritus Domini sufflavit in eo. Vere fenum est populus. »

VERS. 8. — « Exsiccatum est fenum, et cecidit flos : verbum autem Domini manet in æternum. »

Vox, inquit, audita est Domini dicentis ad me : Clama. Et dixi : Quid clamabo? Et ait : Omnis caro fenum. Fides prophetæ probatur oraculo. Clama, inquit Dominus. Et prophetæ : Quid clamabo? Atque Dominus : Omnis caro fenum. Vide jubentis imperium, obtemperantis obsequium, interrogantis affectum, obsequentis oraculum. Credit enim qui quod clamaret exposcit, et quod credidit prophetavit. Antequam vero Christus venisset, qui nobis gloriam vitæ alterius innotuit, putabatur aliquid esse gloria hujus sæculi, vita carnis mortalis ; sed in eo didicimus, quam fragilis et caduca sit. Unde nunc vates, postquam ejus adventum annuntiavit, clamare jubetur, quia *omnis caro fenum, et omnis gloria ejus quasi flos agri*.

Et bene *caro* dicitur *fenum*, quia velociter ab hac vita succiditur, et arefcit, ac sicut fenum viriditatem habet nascendo, et decorem pullulando, sed abscissum siccatur, et in pulverem redigitur : ita caro mortalis in pueritia viret, et in juventute nitet ; sed cum per mortem abscissa fuerit, pulvis efficitur.

Brevis quoque temporalis ejus gloria demonstratur, cum additur, quia *omnis gloria ejus quasi flos agri*. Iniquorum quippe gloria flori feni vel agri comparatur, quia carnis gloria, dum nitet, cadit ;

dum apud se extollitur, repentino intercepta sine terminatur. Nam flos feni et odoratu delectat et visu, sed citissime gloriam suæ venustatis et suavitatis amittit, ideoque huic rectissime præsens carnalium felicitas assimilatur, quæ nullatenus esse diuturna valet.

Exsiccatum est fenum et cecidit flos, quia carnalium decor temporalis in fine consumitur. Quia Spiritus Dei sufflavit in eo, id est sententia districti Judicis vitam carnis quasi viriditatem feni arefaciens. « Vere fenum est populus quoniam tanquam fenum velociter arefcet (*Psal. xxxvi, 2*). » — « Verbum autem Domini, » id est Christus « manet, in æternum (*I Petr. 1, 25*) » in ea carne, quam suscitavit. Quid autem prædicatorum ejus inter eos, qui fenum sunt, agere debeant audiamus. Sequitur :

VERS. 9. — « Super montem excelsum ascende tu, qui evangelizas Sion : exalta in fortitudine vocem tuam, qui evangelizas Jerusalem : exalta, nol timere. Dic civitatibus Judæ : Ecce Deus vester. »

Super montem excelsum ascende tu, id est communem cæterorum hominum conversationem sublimiter transcendere, ut ab infimis cogitationibus ad superna desideria, et a terrenis actibus ad virtutum exercitia conscendens, aliis exemplum appetendi sublimia præbeas, *tu qui evangelizas Sion*, id est speculam provide circumspectionis contra singulorum adventum vitiorum. *Exalta in fortitudine robusti operis vocem tuæ prædicationis*, qui *evangelizas Jerusalem*, id est visionem illius pacis perpetuæ. *Exalta in libertate vocem tuam, noli timere adversarios*, quia cito veniet pax quam annuntias. *Dic civitatibus Judæ*, id est Ecclesiis catholicæ confessionis : *Ecce Deus vester* jam jamque veniet dare vobis visionem pacis sempiternæ, qui temporaliter pro justitia pugnat. Unde et additur :

VERS. 10. — « Ecce Dominus Deus in fortitudine veniet, et brachium ejus dominabitur : ecce merces ejus cum eo, et opus illius coram illo. »

In magna fortitudine veniet Dominus, et brachium ejus, id est virtus ejus, *dominabitur*, quia « cum venerit Filius hominis in majestate sua, et omnes angeli ejus cum eo, tunc sedebit super sedem majestatis suæ, et congregabuntur ante eum, omnes gentes (*Matth. xxv, 51*). » *Ecce merces ejus cum eo*, quia tunc dicet his, qui a dextris ejus erunt : « Venite, benedicti Patris mei, possidete regnum quod præparatum est vobis a constitutione mundi (*ibid. 54*). »

Et opus illius, id est opus mercedis erit coram ipso, quia pensabit et examinabit opus, cui tantam mercedem restituet, subjungens : « Esurivi enim, et dedistis mihi manducare (*ibid., 35*), » etc. Vel *opus ejus*, id est genus humanum, quod ipse condidit, erit coram eo, quando, sicut dictum est « congregabuntur ante eum omnes gentes. » — « Omnes enim manifestari oportet ante tribunal Christi, ut referat

unusquisque propria corporis, prout gessit, sive bonum, sive malum (*II Cor. v, 10*). » Sequitur :

VERS. 11. — « Sicut pastor gregem suum pascet, in brachio suo congregabit agnos, et in sinu suo levabit, fœtas ipse portabit. »

Inter homines Dominus, corporaliter conversans, gregem ovium suarum pavit sicut pastor, dicens : « Ego sum pastor bonus, et cognosco meas, et cognoscunt me meæ (*Joan. x, 14*). » Pavit gregem suum prædicatione sua, et corpore ac sanguine suo adhuc pascere eum non cessat. Qui et agnos, id est mansuetos et innocentes ac simplices in brachio virtutis suæ congregavit, et congregat, atque completendo portat, et in sinu pietatis suæ fovens, et pro-

tegens levat, atque fœtas oves, quæ propter filios infirmatæ sunt, clementer portat, id est sanctos doctores, qui eis quos spiritaliter genuerunt dicunt : « Facti sumus parvuli in medio vestrum, tanquam si nutrix foveat filios suos (*I Thes. ii, 7*). » Qui feminino genere nuncupantur et propter maternum affectum et charitatis viscera misericordemque infirmationem. Portat igitur fœtas, quoniam eos propensiori pietate sustentat, et sustollit atque provehit, qui misericorditer infirmantur, ut infirmos lucrifaciant.

Tunc enim vere impletur, quod scriptum est, quia « virtus in infirmitate perficitur (*II Cor. xii, 9*). » Sed jam libelli hujus finem faciamus, ut in aliis opusculis sequentia tractemus.

LIBER SEXTUS.

SEQUITUR CAPUT XL.

VERS. 12. — « Quis mensus est pugillo aquas, et cœlos palmo ponderavit? Quis appendit tribus digitis molem terræ, et libravit in pondere montes, et colles in statera. »

Errorem idololatriæ propheta multipliciter improbaturus primo Deum docet esse incircumscriptum, et immensum, atque omnipotentem, et omnisipientem, ut, quantæ sit amentia lapideam vel metallicam imaginem Deum esse credere manifestius innotescat.

Quis mensus est, inquit, pugillo aquas, subaudi, nisi Deus, qui eas omnes pugillo suo includens mensus est? Et quis palmo cœlos ponderavit, nisi idem conditor, qui eorum latitudinem palmo suo sustentans ponderavit, ut orientalis pars et occidentalis ipsorum æqui ponderis essent, et aquilonaris non præponderaret australi, nec levior esset? Et quis appendit tribus digitis molem terræ, librans eam in medio aquarum, nisi summus Artifex? Et quis libravit in pondere montes, ut non ab alia parte magis terram gravarent quam ab alia, et colles in statera, ut æqui ponderis essent, suspendit, nisi Creator ipsorum?

Quantus ergo est iste, qui pugillo suo continens mensus est omnes aquas; et cœlos amplitudine palmi sustinens ponderavit, atque terram super aquas tribus digitis appendit? Immensus esse non dubitatur, qui hæc agere potuit, non quia ipse erendus sit habere corporea membra, sed quia per has similitudines intimatur magnitudo potentia divinitatis ejus. Mensus est enim pugillo aquas, quia virtute actionis suæ inclusit eas, et quantum voluit exuberare fecit vel minui. Et cœlos palmo ponderavit, quia larga potentia suæ operationis eos in æquitate disposuit. Et appendit tribus digitis molem terræ, quoniam trina virtute fundavit eam. Similiter montes et colles trina potentia operationis instituit, id est virtute, qua operatur Trinitas.

B Quod si moraliter hæc intelligi debent, per aquas bonorum mentes fidei prædicamenta sequentium designari solent, sicut ait superius : « Beati, qui seminatis super omnes aquas (*Isai. xxxii, 20*). » Et Psalmista : « Vox Domini supra aquas (*Psal. xxviii, 3*). » Hoc igitur loco quid aquarum nomine, nisi electorum corda, signantur, quæ per intellectum sapientia auditum jam supernæ vocis acceperunt? De quibus recte dicitur : Quis mensus est pugillo aquas, subaudi : nisi solus Deus? Sancti enim, qui, sublevante spiritu, ad summa rapiuntur, quandiu in hac vita mortali sunt, ne aliqua elatione superbiant, dispensante manu Domini, quibusdam tentationibus reprimuntur, ut nequaquam tantum proficere valeant, quantum volunt; quia pugillo Dei in mensura constringuntur, pugillo suo eos Dominus metitur, quia sic ipsos modificat, ut unusquisque eorum nec infra minima negligens deficiat, nec ultra maxima superbiens tendat, nec minus conetur explere quam sufficit, nec plus arripiat quam cœpit, ne aut ad mensuram quam debet non perveniat, aut eandem mensuram deserens extra limitem cadat. Unde Corinthiis ait Apostolus : « Non in immensum gloriamur, sed secundum mensuram qua mensus est nobis Deus, mensuram pertingendi ad vos (*II Cor. x, 13*). » Recte ergo dicitur, quia mensus est Deus pugillo aquas.

Quid autem cœlorum nomine nisi mentes justorum exprimuntur a cunctis terrenis contagiis intimo amore suspensæ, in quibus jam Dominus quasi in cœlestibus regnat? Cœlos igitur palmo ponderavit, quia sanctis virtutum copiam larga manu tribuens, qua suspenduntur, pondus adhuc infirmitatis, qua deprimuntur, non aufert. Ad ima namque trahit eos caro ne extollat spiritus; ad summa trahit spiritus, ne prosternat caro; et sic, certo moderamine sublevante et deprimente manu Domini, ut dum unusquisque eorum jam quidem interius ad summa rapitur, sed adhuc tentatur exterius, ne desperatio

nis lapsum vel elationis incurrat, quoniam nec tentatio exterior culpam perficit, quia interior intentio sursum trahit, nec rursus interior intentio in superbiam elevat, nec rursus exterior, dum gravat, humiliat, sed dum spiritus trahit, et caro retrahit, subtilissimo iudicii interni moderamine infra summa et supra infima in quodam medio anima libratur. *Cælos* itaque Dominus *pulmo ponderavit*, sicut Salomon testatur, quoniam « spirituum ponderator est Dominus (*Prov. xvi. 2.*) »

Quid vero per terram, nisi Ecclesia figuratur, quæ semen prædicationis suscipit, et fructum boni operis reddit? Dominus ergo *tribus digitis appendit molem terræ*, quoniam in gratia fidei suspendit gravitatem Ecclesiæ, ut quæ sursum sunt quærat, non quæ super terram. Nam propter divinam Trinitatem per *tres digitos* designatur fides, quamvis et dona Spiritus sancti nomine digitorum intelligi possint, sicut ait Psalmista : « Quoniam videbo cælos tuos, opera digitorum tuorum (*Psal. viii. 4.*) id est sanctos, quos operata est gratia spiritualium donorum tuorum. His itaque *digitis*, id est gratia fidei, appenditur moles animæ nostræ, ut, terrena transcendens suspendatur in amore et contemplatione cælestium.

Quid autem *montes et colles* nisi sanctos expriment, qui per vite meritum cælestibus appropinquant? Salomon vero dicit, quia « pondus et statera iudicia Domini (*Prov. xvi. 11.*) » sunt. *Libravit igitur in pondere montes, et colles in statera*, quia sanctos in iudiciorum suorum iusto moderamine, sicut supra dictum est, ad alta suspendit. Sequitur :

VERS. 15. — « Quis adjovit spiritum Domini, aut quis consiliarius ejus fuit, et ostendit illi? »

VERS. 14. — « Cum qui iniit consilium, et instruxit eum, et docuit eum semitam justitiæ, et erudit eum scientia, et viam prudentiæ ostendit illi? »

Quis adjovit spiritum Domini? Subaudi : nullus, quia omnipotens est. *Aut quis consiliarius ejus fuit, et ostendit ei qui agere debeat?* subaudi : nullus, quia novit omnia, nec aliunde scientiam accepit, et ipse fons sapientiæ, in quo sunt omnes thesauri sapientiæ et scientiæ absconditi. *Cum quo iniit consilium ut instrueretur ab eo?* subaudi : cum nemine, quoniam æternaliter omnia scit. « In quo etiam sorte vocati sumus, prædestinati secundum propositum : » s qui operatur omnia secundum consilium voluntatis suæ (*Ephes. i. 11.*) » *Et quis docuit eum semitam justitiæ*, id est per quam viam subtilitatem justitiæ suæ duceret eis miserando quibus justum erat, et eis irascendo quibus juste irasci debeat? Subauditur nullus : quia secundum Apostolum, « Cui vult miseretur, et quem vult, indurat (*Rom. ix. 18.*) » *Et quis erudit eum scientia?* Nullus, quia sine initio scit universa. *Et quis viam prudentiæ ostendit illi*, per quam incederet eligendo bona, et respuendo mala atque prudenter agendo per omnia? Nullus ei quidquam horum suggestit, quia per se ipsum omnia potest, et omnia scit. Sed cum *tantæ magnitudinis atque potentæ ac sapientiæ*

A Deus esse monstratus sit, videamus, quid illi, qui de eo falsa sentiunt, æstimentur apud eum. Sequitur :

VERS. 15. — « Ecce gentes quasi stilla situlæ, et quasi momentum stateræ reputatæ sunt ei : ecce insulæ quasi pulvis exiguus. »

VERS. 16. — « Et Libanus non sufficit ad succendendum, et animalia ejus non sufficient ad holocaustum. »

VERS. 17. — « Omnes gentes quasi non sint, sic sunt coram eo, et quasi nihilum et inane reputatæ sunt ei. »

Gentes idolis servientes reputatæ sunt ab eo quasi *stilla situlæ*, id est pro nihilo, sicut stilla aquæ decidens ex situla pro minimo ducitur a portante, quia velut a vase deciderunt ab Ecclesia fidelium in idolatriam. *Momentum* vero dicitur a motu, id est minima inclinatio libræ, et celerrima in alterutram partem, quæ fit ex parvo pendere. *Gentes ergo reputatæ sunt Deo quasi momentum stateræ*, quod levi motu flectitur in quamlibet partem, quia mente sunt instabiles, et ab æquitate semper exorbitantes. Hoc etiam in libro Sapientiæ sic dicitur : « Quoniam tanquam momentum stateræ sic ante te est orbis terrarum, tanquam gutta roris, antelucani, quæ descendit in terram (*Sup. xi. 23.*) » Pro minimo itaque æstimentur apud Deum universi, qui in mundo sunt, nequitiam sectantes. Sed et *insulæ maris cum habitatoribus suis reputatæ sunt quasi pulvis exiguus*, qui in radio solis cernitur ad magnitudinem Dei.

C *Libanus* autem est mons miræ altitudinis, arboribus abundans et uberrimis pascuis. Sed *Libanus* cum lignis et *animalibus* suis non sufficit ad holocaustum Domini, quia, etsi cuncta animalia, quæ pascuntur in Libano, immolentur ei, et ligna quæ ibi sunt omnia succiderentur ad comburenda holocausta, non satis esse possent ad placandam tantam majestatem. Hæc dicit, ut errorem gentilium destrueret, qui sanguine pecorum æstimabant se posse placare Deum in simulacris suis.

Quod autem præmiserat, quia gentes quasi *stilla situlæ reputatæ sunt*, adhuc innuit subdendo, quoniam *omnes gentes quasi non sint, sic sunt coram eo*. Nam quia recesserunt ab eo qui solus veraciter ait : « Ego sum qui sum (*Exod. iii. 14.*) », merito sic esse dicuntur, *quasi non sint*, quoniam ad non esse tendunt per nequitiam, licet omnino nihil esse nequeant. Ostenso itaque, quia immensus est Deus omnipotens, et omnia novit, et quod omnes gentes pro nihilo reputatæ sunt ejus magnitudini, redarguit imprudentiam gentilium, subdendo :

VERS. 18. — « Cui ergo similem Deum fecistis? Aut quam imaginem ponetis ei? »

VERS. 19. — « Nunquid sculptile confluxit faber, aut aurifex auro figuravit illud, et laminis argenteis argentarius? »

Cum sit Deus incircumscriptus et incorporeus, *cui fecistis eum similem* fabricantes vobis ex materia deum? *Aut quam imaginem ponetis ei*, qui spiritus

est? *Nunquid faber conflavit* aliquod *sculptile* simile ei qui mensus est pugilo aquas et cœlos ponderavit palmo? Aut *aurifex auro figuravit* illud simulacrum quod ei simile sit qui libravit in pondere montes et colles in statera? Aut *argentarius laminis argenteis* faciet ejus imaginem de quo dictum est: « Quis adjuvit Spiritum Domini, aut quis consiliarius ejus fuit? » Nequaquam, quia sicut subditur:

VERS. 20. — « Forte lignum et imputribile elegit artifex sapiens, et quærit, quomodo statuat simulacrum, quod non moveatur. »

Ordo prophetiæ disputationis diligenter est intuendus, quia primo Deum omnia circumplecti et sustentare docet, deinde omnipotentem esse declarat eum, et sapientiam ejus esse incomprehensibilem, et quod ad immensitatem ejus omnes gentes quasi nihil reputentur; deinde opinionem illam, quæ de idolis erat, aperta ratione devincit, quod omnium Dominus, qui et incircumscribitus est, et immensus est, templis nequeat includi saxeis, aut imagine aliqua figurari, quod omnis beneficii largitor sanguine victimarum non egeat, aut placetur; quod omnium denique Creator et gubernator non possit hominis manu creari; quod postremo Deus, ad cujus homo imaginem est factus, non debeat in metallis et simulacris æstimari. Nam et Apostolus simili modo philosophatus est apud Athenienses, dicens: « Deus, qui fecit mundum et omnia, quæ in eo sunt, hic cœli et terræ cum sit Dominus, non in manufactis templis habitat, nec manibus hominum colitur indigens aliquo, cum ipse det omnibus vitam, et inspirationem et omnia (Act. xvii, 24). » Et post pauca: « Genus ergo cum simus Dei, non debemus æstimare auro aut argento aut lapidi sculpture artis, et cogitationis hominis divinum esse simile (ibid. 29).

Juxta tropologiam vero possumus dicere, quod increpentur principes hæreticorum diversa idola de corde suo fingentes, quæ vel eloquii venustate quod interpretatur argentum, vel splendore auri, quod refertur ad sensum, vel ligno imputribili, quæ viliora sunt dogmata et perpetua putantur a fingentibus, et dialectica arte firmantur, ne moveantur, et corruant, sed solida radice consistant. Sequitur:

VERS. 21. — « Nunquid non scitis? nunquid non audistis? nunquid non annuntiatum est ab initio vobis? nunquid non intellexistis fundamenta terræ? »

Nunquid naturali ingenio *non scitis*, quia nulla creatura similari potest Creatori? Et si naturaliter hoc non potestis scire, *nunquid* saltem *non audistis* a prædicatoribus? Et *nunquid* hoc *non annuntiatum est vobis ab initio*? Quoties audistis, quia « in principio creavit Deus cœlum et terram (Gen. 1, 1), » ibi enim, quis esset Creator intelligere potuistis. « A magnitudine enim speciei et creaturæ cognosci-

biliter poterit horum Creator videri (Sap. xiii, 5). » *Nunquid* etiam *non intellexistis fundamenta terræ*, quæ sunt ab eo condita, ut per hoc intelligeretis potentiam virtutis ejus. Sequitur:

VERS. 22. — « Qui sedet super gyrum terræ, et habitatores ejus sunt quasi locustæ. »

Non ait: *Qui sedet super terram*, sed *super gyrum terræ*, id est: orbem terrarum, sedet enim super omnem terram pariter, qui super ambitum terræ sedere dicitur, cum et ipse replat orbem terræ. Per hoc igitur magnitudo ejus declaratur, et quia nullum simulacrum ei simile fabricari possit, ad cujus magnitudinem omnes *habitatores orbis quasi locustæ*, id est minimi. Non tamen juxta corporalem molem sedere super gyrum terræ putandus est, cum ipse sit Spiritus, sed quia ubique terrarum totus est, et ubique regnat. Sedi quippe cui præsidet, id est, gyro terræ interior et superior manet: interior scilicet per subtilitatem, et superior per potentiam: interior quia replet, superior quia regnat. Bene itaque dicitur: « Qui sedet super gyrum terræ. » Sequitur:

« Qui extendit velut nihilum cœlos, et expandit eos sicut tabernaculum ad inhabitandum. »

Cœlos extendit velut nihilum, id est, subtilissimos atque tenuissimos quasi fumum.

Et sicut tabernaculum expandit eos ad inhabitandum, ut sub eorum rotundo tegmine quasi in tabernaculo habitarent homines, et animalia reliqua. Sequitur:

VERS. 23. — « Qui dat secretorum scrutatores quasi non sint, iudices terræ velut inane fecit. »

Scrutatores, id est philosophos et sapientes sæculi dedit Dominus *quasi non sint*, quemadmodum Apostolus ait: « Ubi sapiens? ubi scriba? ubi conquisitor hujus sæculi? nonne stultam fecit Deus sapientiam hujus sæculi? » (I Cor. 1, 20.) Sed et *iudices terræ*, qui Christianos injuste damnabant, *fecit velut inane*, potentiam eorum auferens. Hæc enim duo genera hominum, id est sapientes sæculi et iudices multum resistebant evangelicæ prædicationi, et idcirco specialiter de illis sententia divinitus proferri debuit. De quibus additur:

VERS. 24. — « Equidem neque plantatus, neque satus, neque radicatus in terra truncus eorum. »

Nulla enim fortitudine corpus eorum in terra solidatum est, ut non facile subverti posset. Sequitur:

« Repente flavit in eos, et perierunt, et turbo quasi stipulam auferet eos. » *Repente flavit in eos* Dominus, id est ex improvise sententia judicis venit super eos, et per mortem a viriditate vitæ præsentis aruerunt; et *turbo* Dominicæ animadversionis rapuit eos ab hac vita, *velut stipulam*, aridos et inanes ad comburendum. Postquam vero Dominus opera

potentiæ suæ et magnitudinem suam declaravit, A rursus eos qui se in aliqua imagine eum posse figurare putabant increpat, dicens :

VERS. 25. — « Cui assimilastis me et adæquastis, dicit Sanctus? »

Id est cui imagini me similem, et æqualem fecistis, qui tam magnus sum? Sequitur :

VERS. 26. — « Levate in cælum oculos vestros, et videte quis creavit hæc. »

Id est in cælum suspicite, et quis sit, qui ea quæ ibi sunt creavit, intelligite. Vani sunt enim omnes homines, quibus non subest scientia Dei, et de his, quæ videntur bona, non potuerunt eum qui est intelligere, nec operibus attendentes agnoverunt, quis esset artifex. « Invisibilia enim ipsius, a creatura mundi, per ea quæ facta sunt intellecta, conspiciuntur, sempiterna quoque virtus ejus et divinitas, ut sint inexcusabiles (Rom. 1, 20). Sequitur :

« Qui eduxit in numero militiam cælorum (145), et omnes ex nomine vocat. » *Militiam cælorum* stellas vocat, sicut ostendit Moyses dicens de quibusdam, « quia transgrediuntur pactum Domini, ut vadant et serviant diis alienis, et adorent eos, solem et lunam, et omnem militiam cæli (Deut. xvii, 2). » *Educit* igitur in numero militiam cælorum, quia certis temporibus sidera profert, ut luceant, et numerum eorum in sua sapientia continet. *Et omnes stellas ex nomine vocat*, quia ipse solus novit earum nomina. Hoc et per Psalmistam sic dicitur : « Qui numerat multitudinem stellarum, et omnibus eis nomina vocat (Psal. cxlvi, 4). » Sive *militiam cæli* angelos interpretari possumus, et omnes cælorum exercitus. Sequitur :

« Præ multitudine fortitudinis et roboris virtutisque ejus neque unum reliquum fuit. » *Neque unum* horum siderum *reliquum fuit*, id est nec unum defuit *præ multitudine fortitudinis ejus* qui creavit hæc. Multimoda namque est illa virtus, quæ sic omnia hæc operata est, ut nec unum deesset, et magnitudo fortitudinis ejus suo facit ordini semper cuncta servire. Sequitur :

VERS. 27. — « Quare dicis, Jacob, et loqueris, Israel : Abscondita est via mea a Domino, et a Deo judicium meum transivit? »

Decem tribus, quæ jam captivæ tenebantur in Assyriis, cum hæc Isaias loqueretur, præ nimietate malorum quæ patiebantur, ad hoc devenerant, ut æstimarent Deum ignorare quæ hic aguntur, dum se plus quam justum erat affligi putarent. Dicebat enim ille populus : *Abscondita est via mea a Domino*, id est actionem meam Dominus non videt : *et a Deo meo judicium meum transivit*, id est judicare me Deus omisit, quia indigne tot mala patior. Ac si diceret : Ad Deum terrena non pertinent, quia sedens in cælo non considerat, quid unusquisque nostrum faciat; et ideo non injuste hic affligimur,

(145) *Alias, eorum.*

quia rectorem non habemus aut defensorem. Unde nunc divinitus increpatur, cum dicitur : « Quare dicis Jacob, et loqueris, Israel : Abscondita est via mea a Domino, et a Deo meo judicium meum transivit? »

Nostris quoque temporibus magna pars populi hujus, qui Christianus appellatur, similia loquitur, dum Deum existimat aut non videre tot iniquitates quæ hic aguntur, aut justo judicio permittere fieri. Dicit enim : *Abscondita est via mea a Domino*, qui suam conversationem ab eo conspici non æstimat : *et judicium suum a Deo* transisse loquitur, qui se nequaquam ab eo juste jam judicari in his, quæ patitur, putat. Qui et subsequentiis verbis increpatur, quibus dicitur :

VERS. 28. — « Nunquid nescis, aut non audisti : B Deus sempiternus Dominus, qui creavit terminos terræ, non deficiet neque laborabit, nec est investigatio sapientiæ ejus? »

Qui viam tuam dicis a Domino absconditam, et judicium tuum a Deo transiisse, *nunquid* per te ipsum dicis, aut ab alio *non audisti*, quia *Deus*, qui *sempiternus* est *Dominus*, et *creavit* non solum ista, quæ cernis, sed et novissimos *orbis terminos*, ut omnia, quæ intra terminos ejus sunt, intelligatur creasse, *non deficiet*, cum sit æternus, *neque laborabit*, cum sit impassibilis, nec investigari potest ejus sapientia? Nam si ab eo transiisse judicium tuum dixeris, eum, qui creavit omnia, et dominatur universis æterna potestate, ac regit, et disponit omnia, defecisse putabis a consueta gubernatione cunctorum, quasi sine labore condidit omnia, et sine inquietudine regit universa. Et si viam tuam ab eo putaveris absconditam, æstimabis sapientiam ejus, qui novit æternaliter omnia, exiguum esse. Nam quod ipse nequeat delicere, comprobatur ex eo, quod subditur :

VERS. 29. — « Qui dat lasso virtutem, et his qui non sunt fortitudinem, et robur multiplicat. »

Quomodo enim deficiet aut laborabit, qui lassum confortat? Eos vero, *qui non sunt*, appellat illos, ut æstimo, de quibus ait Apostolus : « Quoniam ignobilia mundi et contemptibilia elegit Deus, et ea quæ non sunt, ut ea quæ sunt, destrueret (I Cor. 1, 28). »

D *Et his fortitudinem* boni operis atque *robur* mentis Dominus *multiplicat*. Quorum fortitudo consequenter ostenditur cum dicitur :

VERS. 30. — « Deficient pueri, et laborabunt, et juvenes in infirmitate cadent. »

VERS. 31. — « Qui autem sperant in Domino, mutabunt fortitudinem, assument pennas sicut aquilæ, current et non laborabunt, ambulabunt et non deficient. »

Pueri, id est adolescentes *deficient* labore, *et juvenes* infirmabuntur, id est qui inter sæculares magna incolumitate vigent, ac robustissimi sunt et agiles, fatigabuntur in laboribus suis, et infirmi erunt,

quia et florens ætas cito concidet, atque corpora robusta marcescent. *Qui autem sperant non in suis viribus, sed in Domino, valentiores erunt omnibus viris sæcularibus*

Mutabunt fortitudinem, quia qui prius erant fortes in carne, fortiores erunt in spiritali opere. Alia est enim fortitudo justorum, et alia reproborum. Justorum quippe fortitudo est carnem vincere, propriis voluptatibus contraire, delectationem vitæ præsentis exstinguere, hujus mundi aspera pro æternis præmiis amare, adversantem inimicum in corde superare. Reproborum vero fortitudo est transitoria sine cessatione diligere, contra flagella conditoris insensibiliter perdurare, ad inanem gloriam etiam cum detrimento vitæ pervenire, bonorum vitam non solum verbis et moribus, sed etiam gladiis impugnare, in semetipsis spem ponere, iniquitatem quotidie sine ullo desiderii defectu perpetrare. Quam bene utramque fortitudinem propheta nunc complexus est, dicens: « Qui autem sperant in Domino, mutabunt fortitudinem! » Qui enim nequaquam sumunt, sed *mutabunt*, dixit, profecto patenter innotuit, aliam esse quæ deponitur, et aliam quæ inchoatur.

Assument autem pennas sicut aquilæ, quia contemplando volant. *Currunt, et non laborabunt*, quia velocibus magna celeritate prædicant. *Ambulant, et non deficiunt*: quia intellectus sui velocitatem retinent, ut tardioribus condescendant.

Vel qui nunc in bono opere fortitudinem habent, in resurrectione *mutabunt fortitudinem*, quia « mortui resurgent incorrupti, et nos immutabimur (I Cor. xv, 52). » — « Seminatur enim corpus in infirmitate, sed surgit in virtute (ibid. 43). »

Assument pennas, id est volatum ut aquilæ, quando rapientur in nubibus obviam Christo in aera. *Currunt et non laborabunt*, quia « tunc saliet sicut cervus claudus (Sup. xxxv, 6). » Unde et per Malachiam eis, sicut jam sæpe diximus, promittitur: « Egrediemini, et salietis sicut vituli de armento (Malach. iv, 2). »

Ambulabunt et non deficient, quando « sequentur Agnum quocunque ierit (Apoc. xiv, 4). » Namque per illam immutationem detrahetur ab eorum corporibus omnis corruptibilitas, et tarditas, omnisque molestiæ sensus, et omnis fragilitas, ita ut quocunque voluerint ire, sine mora et difficultate possint, et agere quidquid placuerit. Cum itaque Deus tantam virtutem sperantibus in se tribuat, manifestum est, quia ipse non deficiet, neque laborabit. Sequitur:

CAPUT XLI.

VERS. 1. — « Taceant ad me insulæ, et gentes mutant fortitudinem. »

Insulæ, quæ procul in mari sunt, *taceant ad me* audiendum, ut jam non veteres errores loquantur, sed doctrinam meam auscultent. Atque *gentes mutant fortitudinem sperantes in Domino*, ut quæ fortes erant in carne, fiant fortes in spiritu; et quæ ser-

viant peccato, serviant nunc justitiæ. Sequitur:

« Accedant, et tunc loquantur, simul ad iudicium propinquemus. »

Accedant ad me per fidem, et tunc loquantur, sicut scriptum est: « Credidi, propter quod locutus sum (Psal. cxv, 10). » Qui enim longe est a Deo in errore, nescit recta loqui. *Simul ad iudicium propinquemus*, ut videntes in cordibus suis vel quæ bona perceperunt a me, qui omnibus vitam et inspirationem et omnia tribuo, vel quæ mala beneficiis meis perverse vivendo reddiderint, justificent me, et pravitates suas corrigan. Sequitur:

VERS. 2. — « Quis suscitavit ab oriente justum, vocavit eum, ut sequeretur? Dabit in conspectu ejus gentes, et reges obtinebit, dabit quasi pulverem gladio ejus et sicut stipulam vento raptatam arcui ejus. »

VERS. 3. — « Persequetur eos, transibit in pace, semita in pedibus ejus non apparebit. »

Judaicus populus vocatur oriens, quia de ejus carne ille natus est, qui sol justitiæ appellatur. Justus vero dicitur idem Salvator noster, « qui peccatum non fecit, nec inventus est dolus in ore ejus (I Petr. ii, 22). » Ait ergo Pater: *Qui suscitavit ab oriente justum*, id est a Judaico populo Christum, nisi ego? Quem vocavit idem Pater, *ut sequeretur se* ad populos nationum, quia « non potest Filius a se facere quidquam, nisi quod viderit Patrem facientem. Quodcunque enim fecerit ille, hoc et Filius similiter facit: Pater enim diligit Filium, et omnia demonstrat ei quæ ipse facit (Joan. v, 19). » Jure ergo Pater vocare dicitur Filium, ut sequatur se in indifferenti operatione et inseparabili, quia Filius ex Patre est. Qui scilicet Pater *dabit in conspectu ejus gentes*, secundum quod legati populorum ad Holofernem dixisse feruntur: « Ecce nos servi Nabuchodonosor regis magni in conspectu tuo sumus: utere nobis, ut placet ante faciem tuam (Judith iii, 1-7). » *Dabit ergo in conspectu ejus gentes*, ut in omnibus utatur eis, prout libuerit. *Et ipse reges obtinebit*, id est superabit spiritaliter, et capiet, ut serviant ei, et adorent eum omnes gentes.

Gladium vero ejus appellat « gladium spiritus, quod est verbum Dei (Ephes. vi, 17), » et *arcum ejus* Scripturam sanctam, de qua ad corda hominum sicut ferientes sagittæ sic terrentes sententiæ veniunt quoniam « arcum suum tetendit, et paravit illum (Psal. vii, 13). » *Pulvis autem et stipula levis et arida*, quam ventus facile impellit, levitatem peccantium, qui vento tentationis agitantur, designat, quia peccator audire meruit: « Pulvis es, et in pulverem reverteris (Gen. iii, 19). » Et iterum de peccatore dictum est: « Stipulam siccam persequeris (Job xiii, 25). »

Dedit ergo Pater *quasi pulverem gladio ejus, et sicut stipulam vento agitatam arcui ejus*, quia prædicatio illius omnes paganos peccatores invenit, et aridos inanesque, et vagos, ut nullo pondere rationis aut veritatis ante eum stare valerent, sed levitate sua diffugerent. Quos ille gladio prædicationis

suæ fugientes *persequens* de loco ad locum, in doctoribus transivit *in pace*, cum jam, crescente fide, nullus auderet sanctis ejus bellum inferre. Et *semita in pedibus ejus non apparuit*, quia super inimicorum suorum colla, quocumque pergeret, calcavit, et velut terram non tetigit.

Vel in ejus conspectu reges et gentes colla submittent, et gladio illius ac sagittis adversæ potestates quasi stipula subjicientur et pulvis. *Persequetur eos* reges scilicet et principes gentium singularum, et *pertransibit in pace* ad pacem cunctos vocans, ut reconcilientur Deo. *Semita in pedibus ejus non apparebit*, id est viæ laborem non sentiet, nec aliquam imbecillitatis humanæ lassitudinem, sed « de torrente in via bibet, propterea exaltabit caput (*Psal. cix, 7*). » Sequitur :

VERS. 4. — « Quis hæc operatus est, et fecit vocans generationes ab exordio? Ego Dominus, primus et novissimus ego sum. »

Quis hæc, quæ supra dicta sunt, *operatus est*, nisi ego Deus Pater, qui et singulas generationes ab exordio mundi ad cognitionem meam vocavi? Ego Dominus operatus sum. Nam *primus et novissimus ego sum*, ideoque et in antiquis et in novissimis temporibus humanum genus vocavi ut sempiternus Dominus. Vocavi namque per angelos, per Noe, per Abraham, et per cæteros patriarchas, per legislatorem, per prophetas, per doctores in antiquis temporibus, et in novissimis per novæ gratiæ præcones. Sequitur :

VERS. 5. — « Viderunt insulæ et timuerunt, extrema terræ obstupuerunt, appropinquaverunt et accesserunt. »

Insulæ, id est remotiora loca Oceani *viderunt* gentes, quæ sunt in orbe, *datas quasi pulverem gladio Justi mei, et timuerunt*, quoniam « initium sapientiæ timor Domini (*Eccli. i, 16*). » *Extrema terræ*, id est limites mundi, *audita prædicatione evangelica, obstupuerunt*, et immanitatem peccaminum suorum exhorruerunt, atque damnationem, quæ talibus imminet, expaverunt. Et post timorem *appropinquaverunt* per fidem ad hunc Justum, qui gladio suæ prædicationis omnes trucidat, ut salubriter vulnerantur, et *accesserunt* per operationem. Sequitur :

VERS. 6. — « Unusquisque proximo suo auxiliabitur, et dicet fratri suo : Confortare. »

VERS. 7. — « Confortavit faber ærarius percutiens eum malleo, qui eudebat tunc temporis dicens glutino bonum esse, et confortavit eum in clavis, ut non moveatur. »

Unusquisque accedentium ad Christum *auxiliabitur proximo suo*, ut « qui audit, dicat : Veni (*Apoc. xxii, 17*). » Illa est enim vera charitas, quæ sic festinat ad Deum, ut non relinquat proximum. Et unusquisque firmiter imbecilliori fratri suo dicet : *Confortare in Domino*, quia nihil sunt idola quæ deos esse putabatur. *Confortavit enim idolum faber ærarius percutiens eum malleo, qui eudebat tunc tem-*

A poris, quando siebant idola, *dicens glutino ferri vel æris* : *Donum est*, id est bene fabricatum est : et postquam perfecit ipsum idolum, posuit in loco suo, et *confortavit in clavis*, ne aliquo impulsu moveretur aut caderet. Sic loquebatur qui aliquem gentilem nuper conversum confortare volebat in fide. Post gentium itaque conversionem alloquitur ipsam Ecclesiam de gentibus, et contra persecutionem infidelium corroborat, dicens :

VERS. 8. — « Et tu, Israel, serve meus, et Jacob quem elegi, semen Abraham amici mei. »

VERS. 9. — In quo apprehendi te ab extremis terræ, et a longinquis ejus vocavi te, et dixi tibi : Servus meus es tu, elegi te, et non abjeci te, » etc.

Nam spiritualis Israel sive Jacob est iste, de quo nunc agitur, de quo et Apostolus ait : « Quicumque hanc regulam secuti fuerint, pax super illos et misericordia et super Israel Dei (*Galat. vi, 16*). » Illic est enim Israel Dei, id est populus credentium, quia qui ex fide sunt, hi filii sunt Abraham, qui est pater omnium nostrum sicut scriptum est : « Quia patrem multarum gentium posui te ante Deum, cui credidisti (*Rom. iv, 17*). » Populus ergo, qui ex gentibus ad fidem congregatus est, *semen Abraham* vocatur, sicut et Apostolus dicit : « Si autem vos Christi, ergo Abraham semen estis secundum promissionem hæredes (*Gal. iii, 29*). » In quo Abraham apprehensus est idem fidelium populus, sicut ostendit Apostolus, cum ait : « Providens autem Scriptura, quia ex fide justificat gentes, prænuntiavit Abraham, quia benedicentur omnes gentes in te (*ibid. 8, 9*). »

Hic itaque populus filiorum Abraham de toto orbe convocatus est. Cui ad fidem ingresso Dominus ait : *Servus meus es tu*, quia hunc specialiter obedientem reperit. Grande enim privilegium electionis est, cum Dominus aliquem præ cæteris dignatur appellare *suum*. *Elegi*, inquit, *te*, ut meus esses, *et non abjeci te*, licet in tentationes varias incideris. Vel primitivam Ecclesiam possumus nunc *Israel* accipere, quam *ab extremis terræ et a longinquis ejus vocavit* de universis nationibus congregans primum populum Judæorum. Sequitur :

VERS. 10. — « Ne timeas, quia ego tecum sum : D nec declines, quia ego Deus tuus. »

Ne timeas sævitiam persecutorum, *quia ego tecum sum*, qui te protegam, et opera tua dirigam : *nec declines* a viâ veritatis blandimento seductus infidelium, *quia ego sum Deus tuus*, qui te illumino. Sequitur : « Confortavi te, et auxiliatus sum tui, et suscepit te dextera Justi mei, » id est Christi. Hoc manifestum est. Sequitur :

VERS. 11. — « Ecce confundentur et erubescunt omnes qui pugnant adversum te. »

Erubuerunt hostes Ecclesiæ, quando fidelitas prævaluit, et infidelitas paulatim defecit cum adiutoribus suis. Unde et adhuc evidenter subditur :

« Erunt quasi non sint, et peribunt viri qui contradicunt tibi. »

VERS. 12. — « Quæres eos, et non invenies viros rebelles tuos : erunt quasi non sint, et veluti consumptio hominis bellantis adversum te. »

Id est velut si contra quilibet homuncio conetur pugnare, et dum contra bellaverit, consumatur, et nihil fiat. Hic evidentissimum de exterminatione inimicorum Ecclesiæ prolatum est oraculum. Sequitur :

13. — « Quia ego Dominus Deus tuus apprehendens manum tuam, dicensque tibi : Ne timeas, ego adjuvi te. »

Ego sum Deus, qui apprehendo *manum tuam*, ut te sustentans deducam, et dicas mihi . « Tenuisti manum dexteram meam, et in voluntate tua deduxisti me, et cum gloria suscepisti me (*Psal. LXXII, 24*). » **B** Ego sum, qui dico tibi : *Ne timeas* ullum adversarium vel laborem quoniam *ego adjuvi te*. Sequitur :

VERS. 14. — « Noli timere vermis Jacob, qui mortui estis ex Israel. »

Vermis Jacob vocatur Ecclesia imitans illum, qui ait : « Ego sum vermis et non homo (*Psal. xxi, 7*). » Vermis enim sine semine procreatur, et illi sine semine corruptibilibus sunt generati, « qui non ex sanguinibus, neque ex voluntate carnis, sed ex Deo nati sunt (*Joan. 1, 13*). » Vermis conculcatur, sicut et Ecclesia tunc ab impiis conculcabatur, et abjecta erat. Vermis ore terram penetrat; sicut et Ecclesiæ sermo corda fidelium terebat. Hinc ergo vermi, id est Ecclesiæ Dominus præcipit, ne timeat adversarios. Cujus electi sunt huic mundo spiritaliter mortui, ut Deo vivant, sicut eis et ab Apostolo dicitur : « Mortui enim estis, et vita vestra abscondita est cum Christo in Deo (*Coloss. III, 3*). » Et his quoque ne timeant, imperatur. Sequitur :

« Ego auxiliatus sum tui, dicit Dominus, et Redemptor tuus Sanctus Israel. »

Ego auxiliatus sum tui, dicit Dominus, ut omnes inimicos tuos per patientiam vinceres. Et Christus meus auxiliatus est tui, qui de suo sanguine redemit, et qui Sanctorum sanctus est, quem exspectavit Israel, dicens : « Salutare tuum exspectabo, Domine (*Gen. XLIX, 18*). » Sequitur :

VERS. 15. — « Ego posui te quasi plaustrum triturans novum habens rostra serrantia. »

Sicut in tritura *novum plaustrum habens rostra serrantia* super segetes ducitur, ut paleam conterat et grana eliciat, sic inuovata per Christum Ecclesia linguas acutissimas super humanum genus incedit, ut electos purgando manifestet, et reprobos calcando conterat. Et bene plaustrum comparatur Ecclesia. Plaustrum et Ecclesia libris quatuor Evangelii portatur. et a sanctis prædicatoribus laborioso conamine per viam æquitatis ducitur. Sequitur :

« Triturabis montes, et comminues, et colles quasi pulverem pones. »

VERS. 16. — « Ventilabis eos, et ventus tollet, et

turbo disperget eos, et tu exsultabis in Domino, et in sancto Israel lætaberis. »

Quid hoc loco per *montes et colles* nisi eos accipimus, qui ex sæculari potentia tument? *Triturabis* ergo, inquit, *montes*, id est conteres prædicando corda superbiorum sæculi potentum, *et colles*, id est principes elatos pones quasi pulverem, id est facies, ut se pulverem esse cognoscant.

Ventilabis, id est agitabis eos doctrina tua, *et ventus tollet*, id est vita præsens, quæ sicut ventus velociter transit, per mortem eos auferet, *et turbo* Dominicæ animadversionis *disperget*. Vita autem ventus appellatur sicut Job dicit : « Memento quia ventus est vita mea (*Job VII, 7*). » Et sententia judicis appellatione turbinis designantur, sicut et supra dictum est, quia *turbo quasi stipulam* auferet eos. Hostibus ergo fidei sublatis et pace data *tu exsultabis in Domino*, quia totum orbem tibi subiecit.

Vel hoc significat, quod prædicatio evangelica conterat adversarias potestates, et spiritalem nequitiam elevantem se contra scientiam Dei, quæ pro varietate superbicæ montes appellantur et colles, illisque sublatis, et turbinis more dispersis exsultet Israel in Domino. Rursus de gentium conversione sermonem inchoat, dicens :

VERS. 17. — « Egeni et pauperes quærent aquas, et non sunt; lingua ipsorum siti aruit. Ego Dominus exaudiam eos, Deus Israel non derelinquam eos. »

Egeni namque *et pauperes* vocantur gentiles internas divitias non habentes, qui quærebant *aquas* veræ scientiæ, sicut Æthiops ille, qui venerat adorare in Jerusalem, et revertebatur sedens super currum suum legens Isaiam prophetam. Sed non erant eis aquæ, sicut nec Æthiops aquam intelligentiæ valebat invenire, cui cum Philippus dixisset : « Putasne intelligis, quæ legis? respondit : Et quomodo possum intelligere nisi aliquis ostenderit mihi (*Act. VIII, 30*). » *Lingua ipsorum siti aruit*, quia sermo veritatis ab ore eorum præ ignorantia recessit. Vel per diversos magistros et per diversa philosophorum dogmata quærebant aquas salubres, nec inveniebant, quia non erant ibi. *Lingua eorum siti aruit sine lege et prophetis.*

Sed *Deus Israel non eos penitus dereliquit* : *Ego Dominus exaudiam eos*, ut Cornelium, qui erat cum omni domo sua religiosus ac timens Deum, atque faciens eleemosynas multas plebi, et deprecans Deum semper (*Act. x, 2*). »

Ego Deus Israel non derelinquam eos, quoniam « alias oves habeo, quæ non sunt ex hoc ovili, et illas oportet me adducere, et fiet unum ovile, et unus pastor (*Joan. x, 10*). » Sequitur :

VERS. 18. — « Aperiam in supinis collibus flumina, et in medio camporum fontes : ponam desertum in stagna aquarum, et terram inviam in rivos aquarum. »

Quid per supinos colles nisi hi designantur, qui-

bus ait Apostolus : « Si conresurrexistis cum Christo, A quæ sursum sunt quærite, ubi Christus est in dextera Dei sedens? » (Coloss. iii, 1.) Nam cum Christus sit mons, recte colles vocantur, qui huic adhærentes cum eo sunt erecti, qui et supini, id est ad alta suspicientes sunt, dum ea, quæ sursum sunt, quærent. In his ergo collibus fluvios prædicationis inter gentes Deus aperuit. Ecce enim in sanctis prædicatoribus et non ex Judæa progenitis per cunctam Ecclesiam toto orbe diffusam fluentia cœlestium mandatorum ubertim manant gentilium ore. Et in medio camporum, id est in medio populorum fontes novæ scientiæ patefecit, ut ad eos omnes sitientes pergant ac veritate plenas cordium suorum lagunculas reportent.

Desertum quoque, id est gentilem populum, qui B erat aridus et infructuosus, posuit in stagna aquarum, id est in ubertatem et profunditatem scientiarum veritatis : et terram inviam, id est eandem gentilitatem, per quam prædicator nullus ambulaverat, in rivis aquarum, doctrinæ cœlestis Sequitur :

VERS. 19. — « Dabo in solitudine cedrum et spinam, et myrtum, et lignum olivæ : ponam in deserto abietem, ulmum et buxum simul. »

VERS. 20. — « Ut videant, et sciant, et recogitent, et intelligant pariter, quia manus Domini fecit hoc, et Sanctus Israel creavit illud. »

De rationalibus arboribus promittit nunc sermo divinus, de quibus nunc dicit : « Ut videant, ut sciant, et intelligant pariter. » Et nos ergo rationabiliter eas intelligere studeamus. Nam quia magni odoris est atque imputribilis naturæ cedrus, cedri nomine signantur hi, qui virtutes et signa operantur, qui dicere possunt : « Christi bonus odor sumus Deo (II Cor. ii, 15). » Quorum corda ita interno amore solidata sunt, ut ea jam terreni amaris putredo nulla corrumpat.

Per spinam vero signantur doctores, qui dum de peccatis ac virtutibus disserunt, et modo supplicia æterna minantur, modo cœlestis regni gaudia promittunt, sic audientium mentem dolore compunctionis perforant, ut ab eorum oculis quasi quidam sanguis animæ lacrymæ decurrant.

Myrtus vero temperativæ virtutis est, ita ut soluta D membra temperando restringat. Per myrtum vero signantur hi, qui afflictionibus proximorum compati sciunt, eorumque tribulationem per compassionem temperant. Qui dum afflictis proximis verbum vel opem consolationis ferunt, eos ad statum rectitudinis restringunt ne immoderata tribulatione in desperationem solvantur.

Oliva quippe misericordies exprimit, quia et Græce oleos misericordia vocatur, et quasi olivæ liquor ante Dei oculos misericordiæ fructus lucet.

Abies vero, quia valde crescendo ad alta sustollitur, sanctos designat, qui in terrenis adhuc corpore positi mente jam cœlestia contemplantur, et quamvis nascendo de terra exterint contemplantur.

tamen jam juxta æthera verticem mentis attollunt.

Ulmus autem, quia proprium fructum non habet, sed tamen portare vitem cum fructu solet, eos exprimit, qui, dum terrenis curis inserviunt, nullum spiritalium virtutum fructum ferunt, sed tamen sanctos donis spiritalibus plenos sua largitate sustentant.

Buxus vero, quæ in altum non proficit, et quamvis fructum non gignat, viriditatem habet, eos designat in Ecclesia, qui adhuc ex ætatis infirmitate bona opera ferre non valent, sed fidem perpetuæ viriditatis ex imitatione Patrum tenent.

Post quæ omnia apte subditur : « Ut videant, et sciant, et recogitent, et intelligant. » Ad hoc enim cedrus in Ecclesia ponitur, ut quisquis odoramina virtutum a proximo trahit, ipso quoque ad donorum cœlestium desideria ignescat. Ad hoc spina ponitur, ut, qui prædicationis ejus verbo compunctus fuerit, ipse quoque aliorum corda prædicationis verbo compungere discat. Ad hoc myrtus ponitur, ut, qui in ardore tribulationis ab ore vel ab opere proximi compatientis temperamentum consolationis accipit, ipse etiam discat, quemadmodum afflictis proximis consolationis temperamentum proferat. Ad hoc oliva ponitur, ut qui alienæ misericordiæ opera cognoscit, discat et ipse indigentibus misereri. Ad hoc abies ponitur, ut qui vim contemplationis ejus cognoverit, ad contemplanda æterna præmia succendatur. Ad hoc ulmus ponitur, ut, qui videt eum, qui virtutum fructus habere non valet, spiritales viros sustentantem, ipse quoque sanctis ministrare studeat. Ad hoc buxus ponitur, ut, qui pueros fide virentes conspicit, infidelis esse erubescat.

Bene autem additur : pariter, quia cum diversi in Ecclesia hominum mores, diversi sint ordines, necesse est ut omnes simul discant, dum in ea spiritales viri diversæ qualitatis ætatis et ordinis ad imitandum simul videntur. Nam quid videre et intelligere debeant, subnectitur, scilicet : Quia manus Domini exercituum fecit hoc, ut in solitudine gentium prædictæ arbores crescerent, id est supradictæ sanctorum diversitates, ut in eis unusquisque, quod imitari debeat, inveniat. « Et sanctus Israel creavit illud, » quod dictum est de arboribus. Hæc est enim nova creatura (II Cor. v, 17), quam laudat, Apostolus. Post hæc ad eos gentiles sermo convertitur, qui noluerunt credere, præcipiens, ut de infidelitate, in qua permanere magis elegerunt, rationem reddant.

VERS. 21. — « Prope, inquit, facite judicium vestrum, dicit Dominus : asserite, si quid forte habetis, dicit rex Jacob. »

VERS. 22. — « Accedant, et nuntient vobis quæcunque ventura sunt. »

Prope facite judicium vestrum, quo judicatis bonum esse in idololatria permanere, id est huc ante me illud facite, et videamus, si justo iudicio credere

respuistis. *Afferte huc, si forte habetis aliquid justæ causæ, quare non vultis videre et scire, et recogitare, et intelligere, quia ego præfatas arbores in solitudine vestra posui, ut eam odore suo totam respergerent, et innovarent.*

Vel si quid forte, id est si quid validum honestæ defensionis habetis, afferte illud.

Accedant huc dii, quibus servire maluistis, et nuntient vobis quæ ventura sunt. Si enim dii sunt, absque mendacio possunt ventura prædicere; quod si non possunt, liquet eos non esse deos. Nemo quippe ventura prædicere potest veraciter nisi Deus, quoniam nec prophetæ prænosse valent nisi per spiritum ejus. Ille enim solus, qui disponit omnia, scit quemadmodum sit dispositurus singula, et qui omnia quæcunque vult facit, solus novit quæ facturus sit, nisi revelare quid alicui voluerit. Deinde ad ipsos, qui dicuntur dii gentium versa locutione subditur :

« Priora, quæ fuerunt, nuntiate, et ponemus cor nostrum, et sciemus novissima coram, et quæ ventura sunt indicate nobis. »

VERS. 23. — « Annuntiate quæ ventura sunt in futurum, et sciemus quia dii estis vos. »

Priora, quæ ante mundum fuerunt, nuntiate nobis, o dii gentium, si potestis, et ponemus in his cor nostrum, id est cogitabimus de eis, sciemus novissima eorum, quia qui novit priora, scire potest et novissima. Et quæ post finem sæculi ventura sunt, annuntiate, et sciemus quia dii estis vos. Hæc enim scientia solius Divinitatis est. Quæ enim creatura nosse potest, quid antequam mundus iste condideretur, in rerum æternitate fuerit? Aut quis scire valet, quid post consummationem sæculi sit futurum? Unde et seraphim, qui per meritum dignitatis immediate Deo assistunt, « faciem ejus et pedes velare (supra vi, 2) » dicti sunt, significantes omnes creaturæ abscondita esse priora et novissima. Bene ergo his, qui vocabantur dii gentium, dicitur quia si hæc annuntiaverint, sciatur quod dii sint, quia solius divinæ scientiæ est, ista cognoscere. Unde quisquis hæc annuntiare nequit, manifestum est hunc non esse Deum.

Significatur etiam in hac sententia, quod post adventum Christi omnia idola conticuerunt. Ubi est enim Apollo Delphicus et cæteri dæmones futurorum scientiam pollicentes, qui potentissimos reges deciperunt? Cur de Christo nil potuerunt prædicare, quomodo aliena vel mala vel bona potuerunt nuntiare? Quod si quis dixerit, multa ab idolis esse prædicta, sciendum quod semper mendacium junxerint veritati, et sententias temperaverint, ita ut sive boni sive mali aliquid accidisset, utrumque posset intelligi. In eo quoque quod summa Divinitas ait : *Ponemus cor nostrum, notandum est, quia unum cor, id est una voluntas et una sapientia demonstratur esse Patris et Filii, et Spiritus sancti.* Sequitur :

« Bene quoque aut male, si potestis, facite, et loquamur et videamus simul. »

Diligentium sic inutiles sunt, ut non solum annuntiare nequeant prima et novissima, sed etiam nec bene nec male possunt facere, quia « manus habent, et non palpabunt, pedes habent, et non ambulabunt (Psal. cxiii, 7). » Loqui etiam aut videre non valent, quia « os habent, et non loquentur, oculos habent, et non videbunt (ibid. 5). » Sequitur :

VERS. 24. — « Ecce vos estis ex nihilo, et opus vestrum ex eo quod non est : abominatio est, qui elegit vos. »

Idola sunt *ex nihilo*, quia qui facere vult idolum, fingit in corde illud quod nunquam fuit aut erit, et ad similitudinem actæ cogitationis suæ fabricat imaginem. Bene ergo dicitur eis, quia « vos estis ex nihilo, et opus vestrum, » id est quod in deos estis fabricati, est *ex eo quod non est*, quia nullus Deus unquam similis fuit his imaginibus. *Abominatio* igitur, id est abjectio et detestatio est, *quicunque vos elegit colere.* Sequitur :

VERS. 25. — « Suscitavi ab aquilone, et veniet ab ortu solis : vocabit nomen meum et adducet magistratus quasi lutum, et velut plastes conculcans humum. »

Quid per *aquilonem* nisi gentilitas designatur infidelitatis frigore constricta? Hinc est enim, quod antiquus hostis sedem suam ad aquilonem ponere cogitavit (supra xiv, 15). Et quid per *ortum solis* exprimitur nisi Judaicus populus, in quo sol justitiæ secundum carnem natus primo fulgere cœpit, ac deinceps orbem totum illuminavit? *Suscitavi* ergo, inquit, ad fidem gentes ab *aquilone*, id est ab infidelitate, et per apostolos *veniet* ad eas Salvator *ab ortu solis*, id est a populo Judæorum, qui splendore fidei primitus est illustratus. *Suscitatus* erat Cornelius ab aquilone, quando continuis precibus et elemosynis insistebat, ac demum per Petrum verus sol accessit ad eum (Act. x). Sed et eunuchus Æthiops ab aquilone suscitatus venerat in Jerusalem adorare, et per Philippum divinitus est illustratus (Act. viii). *Vocabit, inquit, nomen meum*, quia in nomine Patris sui faciet omnia.

Et adducet magistratus quasi lutum, id est potestates hujus sæculi in lutum rediget prosternens omnem mundi gloriam. *Et sicut plastes*, id est *figulus conculcans humum* nova facit vasa, prout vult; ita et Christus conculcabit omnem sæculi fastum ut vasa misericordiæ juxta placitum suum componat qui per Jeremiam dicit : « Ecce sicut lutum in manu figuli; sic vos in manu mea domus Israel (Jer. xviii, 6). » Sequitur :

VERS. 26. — « Quis annuntiavit ab exordio, ut sciamus, et a principio, ut dicamus : Justus es? Non est neque annuntians, neque prædicens, neque audiens sermones vestros. »

Quis ex omnibus diis gentium annuntiavit hæc ab exordio, sicut et ego dicens Abrahæ, quia « possidebit semen tuum portas inimicorum suorua, et benedicentur in semine tuo omnes gentes terræ (Gen.

xxii, 17.) » Et quis ex illis annuntiavit hæc a principio ut, cum ea, sicut prænuntiavit fecerit, dicamus ei: *justus es*, qui, sicut prædixeras, omnia complesti? Nullus ex diis vestris hæc agere potest, sed ego solus hæc facio, qui solus sum Deus. Nam *neque annuntians neque prædicens* ventura quisquam ex illis est, *neque audiens sermones vestros*, si dixeritis ei: *justus es*, quoniam insensibilis statua nihil audire aut loqui valet. Multimoda ratione Dominus ostendere dignatur idola divinitatem habere non posse. Sequitur:

VERS. 27. — « Primus ad Sion dixit: Ecce adsum, et Jerusalem evangelistam dabo. »

Primus est, de quo legimus, quia « In principio erat Verbum (Joan. 1, 1). » Qui dixit ad Sion, id est ad populum Judæorum: *Ecce adsum*, quia « Verbum caro factum est, et habitavit in nobis, et vidimus gloriam ejus, gloriam quasi Unigeniti a Patre (ibid. 14); » dixit enim: *Ecce adsum*, quando se, qui expectabatur adesse, præsentem innotuit. Qui quoniam Evangelium in Judæa prædicavit, recte de eo Pater adjungit, *quia Jerusalem evangelistam dabo*, id est prædicatorem Evangelii, qui ait: « Spiritus Domini super me, propter quod unxit me, evangelizare pauperibus misit me (Luc. iv, 18). » Evangelista namque boni annuntiator dicitur, et annuntiator boni Christus est, de quo legimus: « Quam pulchri super montes pedes annuntiantis et prædicantis pacem, annuntiantis bonum, prædicantis salutem (Isa. lxi, 7). » Misso autem hoc Evangelista in Jerusalem subjungit Pater de contemporaneis ejus:

VERS. 28. — « Et vidi, et non erat neque ex istis quisquam qui iniret consilium, et interrogatus responderet Verbum. »

Vidi, id est consideravi omnes homines qui tunc erant in terra, *et non erat in eis quisquam qui iniret consilium*, quemadmodum ad salutem pertinere posset, *et interrogatus responderet verbum* de sua conversatione. *Neque ex istis*, id est Jerosolymitis videlicet, ex Judæis erat quisquam qui hoc faceret. Nam et Judæi notitiam Scripturarum amiserant, atque consilium credenti in Christum vel bene agendi inire nolebant, et de his interrogati, quæ faciebant, respondere non poterant. Sequitur:

VERS. 29. — « Ecce omnes injusti, et vana opera eorum, ventus et inane simulacra eorum. »

Ecce omnes injusti, sicut ait Apostolus: « Causati sumus Judæos et Græcos omnes sub peccato esse, sicut scriptum est: Non est justus quisquam, non est intelligens, non est requirens Deum. Omnes declinaverunt, simul inutiles facti sunt, non est qui faciat bonum, non est usque ad unum (Rom. iii, 9). » Tales erant omnes, quando Salvator in carne apparuit. *Et vana opera eorum*, quia pro temporali vita faciebant omnia. « Ventus et inane simulacra eorum. *Scimus enim, quia nihil est idolum in mundo, et quod Deus nullus nisi unus (I Cor. viii, 4).* »

Sed inter tales, qualis Redemptor noster inventus sit, audiamus. Sequitur:

CAPUT XLII.

VERS. 1. — « Ecce servus meus, suscipiam eum, electus meus, complacuit sibi in illo anima mea: dedi spiritum meum super eum, judicium gentibus proferet. »

VERS. 2. — « Non clamabit, neque accipiet personam, neque audietur foris vox ejus. »

VERS. 3. — « Calamum quassatum non conteret, et linum fumigans non exstinguet, in veritate educet judicium. »

VERS. 4. — « Non erit tristis neque turbulentus, donec ponat in terra judicium, et legem ejus insulæ expectabunt. »

Ecce servus meus, quem supra dedi Jerusalem evangelistam. *Servus* enim hic appellatur ille, « qui cum in forma Dei esset, non rapinam arbitratus est esse se æqualem Deo, sed semetipsum exinanivit formam servi accipiens (Philip. ii, 6). » Et hic *electus* ex omnibus, « Hunc enim Pater signavit Deus (Joan. vi, 27). » In quo bene *complacuit sibi anima*, id est voluntas Patris, quia in omnibus hunc vidit. Quod autem interponit: *Suscipiam eum*, de gloria ejus assumptionis dicit. Suscepit namque eum « constituens eum ad dexteram suam in cœlestibus supra omnem principatum et potestatem et virtutem, et dominationem, et omne nomen, quod nominatur non solum in hoc sæculo sed et in futuro, et omnia subjecit sub pedibus ejus (Ephes. i, 20). »

Dedi, inquit, *spiritum meum super eum*. Sicut et testimonium perhibuit Joannes, dicens: « Quia vidi Spiritum descendentem quasi columbam de cœlo, et mansit super eum (Joan. i, 32). » Et bene *super eum* ait, quia de Filio hominis loquitur, quem et servum suum appellavit. Nam et secundum divinitatem non super Christum est Spiritus, sed in Christo, quia sicut Pater in Filio et Filius in Patre, ita et Spiritus sanctus in Patre et Filio. Non ergo secundum divinitatem super Christum est, quia non super se Trinitas est, sed super omnia; supra se autem non est, sed in se.

Protulit autem Salvator *gentibus judicium* justæ discretionis, de quo dicitur, quia « non est judicium in gressibus eorum (Isa. lxi, 8). » Gressus enim vocantur operationes, quibus innituntur. Sed non est judicium in gressibus horum, quia actiones suas examinare negligunt, ut omnia cum judicio facientes mala devitent et bona operentur. Hujusmodi ergo judicium Dominus per apostolos suos gentibus edidit, verbum eis scientiæ largiens, quæ tenebantur erroribus.

Quod autem sequitur, quia *non clamabit, neque accipiet personam, neque audietur foris vox ejus*, ita legitur in Matthæo: « Non contendet neque clamabit, neque audiet aliquis in plateis vocem ejus (Matth. xii, 19). » Hoc igitur in mansuetudine morum ejus intelligendum est, quia non clamosa, neque contentiosa voce locutus est. In hoc etiam veri-

tas apparet, quia nullius personam accepit, ut alicui blandiretur, sed omnes prout decebat, increpavit. Modestia quoque illius ex eo demonstratur, quia nemo « foras per plateas vocem ejus audivit. » Neque enim otiosum unquam verbum protulit aut leve, sicut hi, qui clamant in plateis vanitatem sui cordis ostendentes. Vel *non audita est foris vox ejus*, quia non extra Galilæam atque Judæam vel Samariam evangelium prædicavit.

Quid autem calami nomine nisi Judaici populi temporale regnum (146) designatur, nitens quidem exterius, sed interius vacuum? Et quia in eodem populo genus jam regale defecerat, atque regnum ejus alienigena possidebat, apte hoc regnum calamus quassatus vocatur. Quid vero per *linum* nisi ejus sacerdotium exprimitur, quod lineis vestibus utebatur! Quod quia in adventu Domini charitatis ardorem perdidit, quasi amisso jam igne fidei non ardens sed *fumigans* fuit. Incarnatus ergo Dominus *calamum quassatum non confregit et linum fumigans non exstinxit*, quia Judææ regnum, quod pene destructum jam fuerat, ejusque sacerdotium, quod ignem fidei non tenebat, non potestate judicii perculit, sed eum patientiæ longanimitate toleravit.

Sive *calamum quassatum non conteret*, quia in peccantibus placabilis erit, atque veniam dabit peccatoribus. *Et linum fumigan. non exstinguet*, quia qui vicini erant extinctioni, ejus clementia servabuntur. Nam in secundo adventu *judicium educet in veritate*, quando reddet unicuique secundum opera sua. Vel etiam in primo adventu *judicium eduxit in veritate*, sicut ait : « In judicium ego in hunc mundum veni, ut, qui non vident, videant, et qui vident, cæci fiant (Joan. ix, 39). »

Qui non fuit *tristis neque turbulentus*, sed semper hilariter et mansuete suas actiones operatus est, donec poneret in terra *judicium*, id est donec omnes ad imitationem suam informaret, ut cum *judicio*, sicut et supra dictum est, cuncta faceret. Manifestum est autem, quia postea *tristis aut turbulentus non fuit*, sed de eo tempore, quo dubitari poterat, perhibuit propheta testimonium, sicut et evangelista, cum de matre ejus Virgine loqueretur, asseruit, quia Joseph non cognoscebat eam, « donec peperit Filium (Matth. i, 25), » quam certe nec postea cognovit. Tali enim genere locutionis frequenter utuntur divinæ Scripturæ. Postquam vero Dominus *posuit in terra*, id est in latitudine mundi, *judicium*, quo credentes in eum dijudicant omnia, quæ facere volunt, perceperunt et *insulæ*, id est remotiora loca Oceani, *legem*, prædicationis ejus, quam exspectabant. Ad quem versa locutione Pater subjungit :

VERS. 5. — « Hæc dicit Dominus Deus creans cœlios et extendens eos : firmans terram, et quæ germinant ex ea : dans flatum populo, qui est super eam, et spiritum calcantibus eam. »

VERS. 6. — « Ego Dominus vocavi te in justitia,

et apprehendi manum tuam, et servavi te, et dedi te in fœdus populi, in lucem gentium. »

VERS. 7. — « Ut aperires oculos cæcorum, et educeres de conclusione vinctum, de domo carceris sedentes in tenebris. »

Dominus quidem *creans cœlos*, extendit eos sicut tabernaculum ad inhabitandum, et ipse firmavit alta mole *terram*, ut non inclinetur in sæculum sæculi. Ea quoque, *quæ germinant ex illa* sicut *arbores*, firmat ipse, ut super stipitem suum erecta subsistant. *Qui et flatum*, id est anhelitum, *dat populo, qui est super eam*, ut animaliter vivant, *et Spiritum sanctum calcantibus eam*, id est contemnentibus terrena.

Sed iste Dominus, qui talia facit, Christum alloquitur dicens, quia *vocavi te in justitia*, ut tu justus justificare mundum pergeres. *Et apprehendi manum tuam*, ut te confortans ducerem in voluntate mea, quia quidquid operatur Filius, operatur et Pater. *Et servavi te*, inquit, a peccato, *et dedi te in fœdus populi*, id est in societatem amicitiae multitudinis Hebræorum credentium, quorum erat cor unum, et anima una. *Et in lucem gentium dedi te*, ut illuminares hos, qui in tenebris et in umbra mortis sedebant, *ut interiores oculos cæcorum gentilium aperires*, ut lumen veritatis cernerent. Cæci namque erant gentiles, quia non accepta lege, quo ire debuissent, non viderunt.

Et educeres, inquit, *de conclusione cordis populum gentilem peccatorum suorum funibus vinctum, et de domo carceris cordis sedentes in tenebris errorum et ignorantiae*. Nam omnis homo, per id quod male agit, quid sibi aliud quam conscientiae suæ carcerem facit? Quia cum judicante Deo in malitiae suæ cecitate relinquitur, quasi intra semetipsum clauditur, ne evadendi locum inveniat, quem invenire non meretur. Sæpe enim nonnulli exire a pravis actionibus cupiunt, sed eorundem actuum pondere premuntur, ita ut in malæ consuetudinis carcerem inclusi a semetipsis exire nequeant. Et quidem culpas proprias punire cupientes, hoc quod recte se agere aestimant, in graviora peccata vertunt, fitque modo mirabili, ut quod exitum putant, hoc inclusionem inveniant. Sic reprobis Judas cum mortem sibi post peccatum intulit, ad aeternæ mortis supplicia pervenit, et pejus de peccato poenituit quam peccavit. De hujusmodi ergo conclusione venit *Salvator vinctum ducere de tali domo carceris*, liberare missus est *sedentes in exterioribus tenebris*. Sequitur :

VERS. 8. — Ego sum Dominus, hoc est nomen meum : gloriam meam alteri non dabo, et laudem meam sculptilibus. »

Se Dominum nominari voluit, ut sibi omnia deservire monstraret, sicut et per Psalmistam ei dicitur : « Quoniam omnia serviunt tibi (Psal. cxviii, 91). » Cujus dominationis *gloriam alteri non dedit*, quia « unus Dominus, una fides, unum baptisma (Ephes. iv, 5). » Nam, sicut duæ fides seu plures

esse non possunt, vel duo baptismata; sic nec duo, nec tres domini sive numerosiores. Unus enim Dominus est Pater et Filius, et Spiritus sanctus. Qui gloriam suam alteri non dabit, id est ulli idolo, sicut aestimaverunt hi, qui incontaminabile nomen lapidibus et lignis imposuerunt. « Et mutaverunt gloriam incorruptibilis Dei in similitudinem imaginis corruptibilis hominis, et volucrum et quadrupedum, et serpentium (Rom. 1, 23). » Tali enim imagini Dominus gloriam suam non dabit, sicut voluerunt isti « qui commutaverunt veritatem Dei in mendacium, et coluerunt, et servierunt creaturæ potius quam Creatori (ibid. 25). » Nam ut Pater ostenderet nequaquam Filium a gloria sua per hanc sententiam excludi, sed idola, subjunxit: *Et laudem meam sculptilibus*, subaudi non dabo. Filius enim non separatur a gloria Patris, qui ait: « Omnia, quæ habet Pater, mea sunt (Joan. xvi, 15). » Et: « Ego et Pater unum sumus (Joan. x, 30). » Sequitur:

VERS. 9. — « Quæ prima fuerunt, ecce venerunt: nova quoque ego annuntio: antequam oriantur, audita vobis faciam. »

Primo fuerant ventura, quæ superius de adventu Salvatoris dicta sunt, ut ibi nostra salus inciperet. Sed hæc, inquit, jam venerunt. Nova quoque vobis annuntio secutura, id est apostolorum prædicationem, gentium vocationem. *Antequam oriantur, audita vobis faciam*, ut non ea dubitetis esse ventura, sicut et hæc venisse jam cernitis. Nam quæ sint hæc nova, quæ vobis annuntio, declaratur cum

VERS. 10. — « Cantate Domino canticum novum, laus eius ab extremis terræ, qui descenditis in mare, et plenitudo ejus, insulæ et habitatores earum. »

Novum quippe canticum est præconium evangelicæ prædicationis, in qua res nova auditur, id est Incarnatio Christi, mors, et post resurrectionem ascensio, et Spiritus sancti missio, totiusque mundi vocatio. Hoc canticum ubique cantat Ecclesia, quoniam pro se Christum talia peregrisse jugiter recollit ac prædicat, depositoque veteri homine per gratiam baptismatis ipsa fideliter innovata est, et in novitate vitæ ambulat. Qui enim veterem adhuc conversationem servat, id est terrena diligit, vetus canticum resonat; qui vero æterna diligit, novum canticum cantat. Novus enim homo cantat canticum novum, non ille vetus, qui necdum Adæ peccata deponens in prævaricatione veteris hominis perseverat. Novum utique, quia nunquam aliquid simile visum est aut auditum; novum, quod nulla vetustate sordescat, sed semper in suæ dignitatis gratia perseveret.

Hoc itaque canticum totus orbis Deo cantare jubetur, ut et « ab extremis terræ laus ejus » resonet, secundum quod et in Psalmo dicit Ecclesia: « A finibus terræ ad te clamavi (Psal. lx, 3). » Vel aliter intelligere possumus, quod dicitur: *Laus ejus*

ab extremis terræ. Sunt enim alii primi terræ, sunt alii novissimi. Qui sunt primi? Sapientes sæculi, nobiles, divites, optimates. Qui sunt extremi? « Stulta mundi elegit Deus, ut confundat sapientes, et ignobilia mundi, et contemptibilia elegit Deus, et ea quæ non sunt, ut ea quæ sunt, destrueret (I Cor. 1, 27). » Ab his ergo extremis terræ laus Dei semper intonat.

Mare vero sæculum istud est amarum et turbulentum, in quod mare descenderunt piscatores hominum sagenam evangelicæ prædicationis mittere, de qua dicitur: « Simile est regnum cælorum sagenæ missæ in mari, et ex omni genere piscium congreganti, quam cum impleta esset, educentes et secus littus sedentes elegerunt bonos in vasa sua, malos autem foras miserunt (Matth. xiii, 47). » Plenitudo autem istius maris multitudo sæcularium vel gentilium; insulæ vero diversæ gentes vel regiones. Et his omnibus præcipitur, ut novæ laudis canticum Domino decantent. Sequitur:

VERS. 11. — « Sublevetur desertum, et civitates ejus, et in domibus habitabit Cedar. »

Sublevetur desertum, id est ad amorem supernæ patriæ cor gentilium erigatur, et civitates eorum in spem salutis æternæ mentem elevent. Cedar filius Ismael fuit, a quo et provincia nomen accepit, et qui de ejus progenie sunt, non in domibus, sed in tabernaculis habitare solent, et per deserta vagari. Interpretatur autem tenebræ, et significat gentilem populum, qui in tenebris errorum per hujus sæculi desertum vagus incedebat, sed per apostolos ad fidem conversus cœpit in domibus, id est: in Ecclesiis, ut domesticus, manere. Sequitur:

« Laudate habitatores Petræ, de vertice montium clamabunt. » Qui sunt habitatores Petræ nisi qui in cordis sui duritia manent? Sed et isti ad laudandum excitantur per respectum novæ gratiæ. Prædicatores autem de vertice montium clamant, cum in culmine virtutum stantes ac terrena despicientes ad appetitum supernorum eos, qui in infimis animo degunt, convocant. Sequitur:

VERS. 12. — « Ponent Domino gloriam, et laudem ejus in insulis nuntiabunt. »

Prædicatores Domino gloriam ponunt in cordibus auditorum, atque prædicationes ejus laudem non solum in toto orbe; sed etiam in insulis maris procul annuntiant. Et quia post hæc Judex venturus est, ut reddat unicuique secundum opus suum, congrue subditur.

VERS. 13. — « Dominus ut fortis egredietur, et sicut vir præliator suscitabit zelum. »

Qui enim prius egressus est sicut infirmus, secundo sicut fortis egredietur, quando videbunt Filium hominis venientem in nubibus cum virtute magna et gloria. Et sicut vir præliator suscitabit zelum ulciscendi se de hostibus suis, quando, sicut et liber Sapientiæ dicit: « Accipiet armaturam zelus illius, et pugnabit cum illo orbis terrarum contra insensatos (Sav. v, 18). » Solet enim præliator, quando pugna-

urus est contra suos hostes, zelum et iram in animo suo suscitare, ne per mansuetudinis spiritum parcat adversariis. Dominus ergo sicut vir præliator *zelum* suscitaturus esse dicitur, quia cum tali animo veniet, ut inimicis suis non parcat. Sequitur :

« Vociferabitur, et clamabit, et super inimicos suos confortabitur. »

VERS. 14. — « Tacui, semper silui, patiens fui, quasi parturicus loquar : dissipabo, et absorbebo simul. »

VERS. 15. — « Desertos faciam montes et colles, et omne gramen eorum exsiccabo. »

Qui quondam sicut agnus coram tondente se obmutuit, et non aperuit os suum, nunc *vociferabitur, et clamabit*; et qui suos hostes ita super se confortavit, ut ligari et flagellari posset ab eis et crucifigi, tunc, ut inimicos suos puniat, *confortabitur* super eos, dicens : « Tacui, semper silui, » etc. Sed quomodo *semper* siluit, qui per legem et prophetas, per Evangelium et apostolos clamare non cessavit? Siluit, quidem per iudicium, sed non siluit per præceptum. *Patiens* quoque nunc est, quia peccatores diu sustinet, ut respiscant. *Parturiens* vero cum dolore eiecit, quod intus diu cum pondere portavit. Post longum ergo silentium sicut *parturiens* Dominus loquitur; quia, quod apud se nunc tacitus tolerat, in ultione quandoque iudicii quasi cum dolore manifestat. Qui semper siluerat, *sicut parturiens loquitur*, quia qui sine ultione diu facta hominum pertulit, quandoque cum fervore examinis quasi cum dolore mentis ostendet, quantæ animadversionis sententiam intus servaverit. Qui et dissipat in furore suo tunc omnes reprobos, et absorbet, id est in profundum abyssi iudiciorum suorum *immergit*.

Montes quoque tunc similiter *desertos* facit et *colles*, ut non remaneat in eis habitator. Quid enim per *montes et colles* accipitur nisi superbi principes huius sæculi? Quid vero per habitatores montium nisi populus exprimitur, quem principes regendo portant? Nam sicut montes sustinent cultores suos, ita principes pondus eorum sustinent, quos regunt. *Desertos* ergo faciet Dominus in iudicio *montes et colles* quia superbis principibus omnem potentiam prælationis auferet. Sed *et gramen eorum* exsiccabit, quoniam vetustatem carnalis actionis eorum arecere faciet, ut concremari possit. Hæc de secundo adventu suo Dominus locutus est, atque de his, quæ in primo (147) fuerat acturus, subjungit :

« Et ponam flumina in insulas et stagna arefaciam. »

VERS. 16. — « Et ducam cæcos in via quam nesciebant, et in semitis quas ignoraverunt ambulare eos faciam : ponam tenebras coram eis in lucem, et prava in directa. »

Flumina quippe posuit in *insulas*, quoniam fluenta Evangelii usque in remota Oceani loca manare fa-

cit; vel in universas gentes exuberare, ut gentes per *insulas* exprimantur. *Et stagna arefacit*, quia profunditatem scientiæ Judæorum, quæ in uno populo quasi in uno loco torpebat, exsiccavit. *Arefacta est enim sapientia Scribarum et Phariseorum*. *Via* vero ille est, qui ait : « Ego sum via (Joan. xiv, 6). » *Semitæ* autem prophetæ sunt. Unde et per Jeremiam dicitur : « Interrogate de semitis antiquis quæ sit via bona, et ambulate in ea, et inveniatis refrigerium animalibus vestris (Jer. vi, 16). » Antiquas enim semitas appellat prophetas, qui omnes unam viam singulariter bonam ostendunt, per quam ad refrigerium animarum perveniamus, id est ad Christum. Per hanc ergo viam, id est per hujuscemodi semitas Dominus cæcos gentiles ducit illuminatis cordibus eorum. Sive per viam scientiæ Dei et per semitas prophetales *ambulare* facit eos. Posuit enim *tenebras* veteris ignorantie *coram eis in lucem* veræ scientiæ, et *prava* eorum corda per iniquitatem distorta rectificavit. Sequitur :

« Hæc verba feci eis, et non dereliqui eos. »

VERS. 17. — « Conversi sunt retrorsum. »

Hæc, quæ dicta sunt, complevit nobis Dominus, et non derelinquit nos, sed est nobiscum omnibus diebus usque ad consummationem sæculi (Matth. xxviii, 20). Nos vero beneficii ejus ingrati *retrosum* *conversi* ad vitia sæculi, de quibus nos liberaverat. Vel quod ait : *Conversi sunt retrorsum*, ad habitationem paradisi, quam peccando reliqueramus, potest forsitan intelligi. Post hæc de reliquiis gentilium, quæ in idololatria permanere maluerunt, subdit :

« Confundantur confusione, qui confidunt in sculptili, qui dicunt conflati : Vos dii nostri. » Non ait eos dicere conflati : « Tu es Deus noster, » sed : *Vos dii nostri*, sicut et illi dicebant de vitulo : « Isti sunt dii tui, Israel, qui eduxerunt te de terra Ægypti (Exod. xxxii, 4). » Qui enim idolum colit, unum Deum, qui verus est, deseruit, et pluribus diis, qui falsi sunt, se servum exhibuit. Illuminatis autem gentilibus ubique et directis atque cultoribus idolorum confusis, increpat Dominus Judæorum duritiam, cum subjungit :

VERS. 18. — « Surdi, audite, et cæci, intuemini ad videndum. » Atque de eodem populo subjicit :

VERS. 19. — « Quis cæcus nisi servus meus? et surdus, nisi ad quem nuntios meos misi? »

Cæcus quippe est ille populus, qui semper ex timore Deo servivit, quia lumen charitatis nescit : et *surdus*, quia prophetas ad se clamantes non audit. De quo et additur : « Quis cæcus, nisi qui venundatus est? quis cæcus nisi servus Domini? » Quis enim tam cæcus, quam qui peccando venundatus est, et se liberum æstimat? Cujus adhuc cæca visio et surda auditio increpatur, cum subditur :

VERS. 20. — « Qui vides multa, nonne custodices? qui apertas habes aures, nonne audies? »

Videbant enim in Scripturis multa, sed non custodiebant. Aures enim cordis apertas ad intelligendum multa habebat, sed ut faceret, audire nolebat. Unde et per Apostolum ei dictum est : « Qui alium doces, te ipsum non doces? qui prædicas non furandum, furaris? qui dicis non mœchandum, mœcharis? qui abominaris idola, sacrilegium facis? qui in lege gloriaris, per prævaricationem legis Deum inhonoras? (Rom. II, 21). »

Sed hæc et de carnalibus, qui sunt in Ecclesia, possunt intelligi. Surdi enim sunt, qui verba Dei in aure cordis non percipiunt, inter cujusmodi surdos ipse clamat : « Qui habet aures audiendi, audiat (Matth. XI, 15). » Cæci vero sunt, qui terrenis lucris occupati damna, quæ intus patiuntur, non vident. Unde nunc talibus surdis præcipitur, ut auribus cordis audiant; et cæcis, ut ad videndum intueantur, qui non ad videndum intueri solent. Ad videndum quippe intueri est de his cogitare, quæ mentem illuminant. Nam ad non videndum intuetur, qui terrenis suum exercet ingenium. De quo reete subditur :

« Quis cæcus nisi servus meus? et surdus nisi ad quem nuntios meos misi? » Hic est *servus*, qui « non manet in domo in æternum (Joan. VIII, 35). » Qui *cæcus* est, quia spiritalibus oculis non videt; et *surdus*, quia prædicatores sanctos auribus cordis non audit. Cui congruit, et quod additur? « Quis cæcus nisi qui venundatus est? Quis cæcus nisi servus Domini? » Hic enim carnalis est *venundatus* sub peccato, nec intelligit, quia peccando semetipsum diabolo vendidit. Et ipse, cum sit inutilis, servus Domini cæcus est, quia « servus nescit quid faciat dominus ejus (Joan. XV, 15). »

Sed cum subditur, qui *vides multa, nonne custodias*, monstratur iste servus esse et cæcus et videns. Cæcus quidem non videndo; videns autem non intelligendo. Simili modo cum *adjungitur* : *Qui avertas habes aures, nonne audies*, et surdus et audiens esse declaratur. Surdus namque ad faciendum esse manifestatur, sed aures habere apertas non ad intelligendum. Quicunque enim Scripturas intelligit, sed non facit, id est unusquisque mihi similis increpatur hoc loco, cum dicitur : « Qui vides multa, nonne custodies? qui apertas habes aures, nonne audies? » Sequitur :

VERS. 21. — « Et Dominus voluit, ut sanctificaret eum, et magnificaret legem, et extolleret. »

VERS. 22. — « Ipse autem populus direptus, et vastatus : laqueus juvenum omnes simul, et in domibus carcerum absconditi sunt. »

Dominus voluit, ut sanctificaret hunc servum, id est populum Judæorum vel etiam Christianorum carnalem, sed servus noluit ab eo sanctificari. Aut certe *voluit Dominus, ut eum servus iste sanctificaret* semetipso, juxta quod scriptum est : « Dominum exercituum sanctificate (suova VIII, 13). » Vel : « Do-

minum Christum sanctificate in cordibus vestris (I Pet. III, 15). »

Et *voluit, ut sanctificaret* (148), legem operando et extolleret intelligendo. Legem quippe « magnificat et extollit, quisquis in observatione cœlestium mandatorum ita proficit, ut et mens ejus ad altiora spiritalis intelligentiæ elevetur. Sed piger servus legem magnificare negligit et extollere, quia Judæorum populus carnaliter eam intelligit vel observat, et Christianorum inanium iste populus nil magnum operatur, sed corde semper in infirmis repit. Propter quod uterque *populus* ab inimicis suis *direptus et vastatus est*, ille quidem a Romanis, hic autem, quod gravius est, a malignis spiritibus. Sunt enim *omnes laqueus juvenum*, id est eorum, qui carnis ardore fervent, quia secundum Petri sententiam : « Pelliciunt in desideriis carnis eos qui paululum effugiunt (II Pet. II, 18). » *Laqueus juvenum omnes* isti sæculares sunt, qui suis confabulationibus illi-ciunt eos ad peccandum, qui calore tentationum æstuant. Nam et « bonos mores corrumpunt colloquia mala (I Cor. XV, 33). »

Qui *et in domibus carcerum absconditi sunt*, quia in conscientiarum suarum tenebrosis latibulis, ubi tenentur a diabolo captivi, fraudem malitiæ suæ contegunt. Neque enim vere tales sunt, quales se foris ostendunt, sed tales potius, quales intus latent. Talibus a Domino dictum est : « Væ vobis Scribæ et Pharisæi hypocritæ, quia similes estis sepulcris dealbatis, quæ aforis apparent hominibus speciosa, intus vero plena sunt ossibus mortuorum, et omni spurcitia : sic et vos quidem aforis apparetis hominibus justis, intus vero pleni estis hypocrisi et iniquitate (Matth. XXIII, 27). »

Hoc est itaque, quod *in domibus carcerum absconditi* esse dicuntur, de cujusmodi carceribus supra disseruimus. Sequitur :

« Facti sunt in rapinam, nec est qui eruat : in direptionem, et non est, qui dicat : Redde. »

Judæi populo Romanorum *facti sunt in rapinam, et in direptionem, nec est qui eruat eos, vel dicat : Redde*, quoniam adhuc tenentur captivi. Nonnulli etiam ex his, qui nomine censentur Christiano, *facti sunt dæmonibus in rapinam*, ut quidquid boni videbantur habere, diripiatur ab invisibilibus adversariis : *nec est, qui eruat eos*, quoniam justo Dei judicio relictis sunt in sua malitia. Deinde propheta in multitudine populi clamat et dicit :

VERS. 23. — « Quis est in vobis, qui audiat (149) hoc, audiat, et auscultet futura? »

Quis est in vobis, o Judæi, *qui audiat hoc*, quod de vobis indubitanter futurum verbo præteriti temporis dixi : « Facti sunt in rapinam, nec est qui eruat. » Qui enim hoc audierit, timebit peccare, ne fiat in rapinam. Nobis quoque dicitur : « Quis est in vobis, qui audiat hoc? » Quia in plebe christiana rarus auditor hujus sermonis invenitur. Rarus enim

(148) Ita uterque cod.

(149) Alias. attendat.

quisquam est, qui de animæ captivitate cogitet, et bona cordis invisibilibus adversariis diripientibus amittere metuat, atque illa, quæ se in futuro sæculo manent, sollicitè attendat, vel audire studeat. Sequitur :

VERS. 24. — « Quis dedit in direptionem [vulg., directionem] Jacob et Israel vastantibus? Nonne Dominus ipse est, cui peccavimus? »

Populum Judæorum vastantibus Romanis dedit in direptionem ipse Dominus Jesus, qui peccaverant occidentes eum. Nos quoque propter peccata, quorum nobis consci sumus, occultis adversariis, qui nos sensibiliter excrucient, futurum est ut tradamur, nisi pœnitentiam egerimus. Sequitur :

« Et noluerunt in viis ejus ambulare, et non audierunt legem ejus. »

Id est Judæi vel pseudochristiani noluerunt in viis ejus ire, aut legem, ut facerent, audire. Non ait : Nescierunt aut nequiverunt in viis ejus ambulare, sed noluerunt, ut non ex ignorantia vel infirmitate, sed ex superbia demonstraret eos peccasse, qui mandata Dei sciendo contempserunt, aut scire recusaverunt. Merito tales in direptionem dati sunt. Sequitur :

VERS. 25. — « Et effudit super eum indignationem furoris sui, et forte bellum. »

Super populum Judæorum Dominus indignationem suam per Romanos effudit, et validum bellum, sicut et in Psalmo dictum est : « Effunde super eos iram tuam, et furor iræ tuæ comprehendat eos. Fiat habitatio eorum deserta, et in tabernaculis eorum non sit qui inhabitet (Psal. LXXIII, 26). Unde et subjungitur :

« Et combussit eum in circuitu, et non cognovit : et succendit eum, et non intellexit. »

Combussit eum undique totam Judæam concremans, et succendit eum Jerusalem igne consumens. Sed populus iste qui sic combustus est, non cognovit cur hæc pateretur, nec intellexit quia propter nocem Salvatoris ita succendebatur. Ut autem spiritaliter juxta superiorem sensum hæc intelligamus, sciendum est, quia indignatio vel ira Dei appellatur, a bonis actionibus infirmari, sicut scriptum est : « Ne quando irascatur Dominus, et pereatis de via justa (Psal. II, 12). » Si igitur irasci Dominus prohibetur, cum viam justitiæ homines perdunt, super eum indignationem furoris sui latius effundit, qui nolens in viis ejus ambulare, rectitudinis tramitem sciendo deserit.

Bellum quoque patitur, qui carnis suæ tentationibus impugnatur. Hoc tamen bellum quodammodo adhuc infirmum est. Sed forte bellum Dominus desuper effundit, quando superbum cor percussit, et judiciorum suorum gladii opera ejus, quæ videbantur bona, terribiliter destruit. Forte bellum effundit, quando antiquum hostem justo judicio relaxat in viribus suis. Qui videlicet adversarius comburit eum in circuitu, et non cognoscit, et succendit eum, et non intelligit. Ipse enim Satanus

facit, quod Dominus nunc facere dicitur, quia nihil facere potest diabolus, nisi a Domino potestatem acceperit. « Non est potestas nisi a Domino (Rom. XIII, 1). » Antiquus ergo deceptor potestate divinitus accepta comburit eum in circuitu, quem undique tentans undique vitiorum ignibus inflammat. Circuit enim ille nos singulos, et ab omni parte vitia suggerit. Offert oculis formas illices, et faciles voluptates, ut visu castitatem destruat; aures peccatorum musica tentat, ut vi soni dulcioris auditum solvat, et Christianum figorem molliat; linguam convicio provocat; manum injuriis lacescentibus ad petulantiam cædis instigat, ut fraudatorem faciat, lucra apponit injusta; honores terrenos promittit, ut celestes adimat; ostendit falsa, ut vera scribiat. Bene ergo de eo, quem ita diabolus undique tentans vitiis inflammat, dicitur, quia combussit eum in circuitu, et non cognovit : et succendit eum, et non intellexit. Neque enim comburi se, qui sic comburitur, cognoscit, quia cæcatus mundanis voluptatibus spiritalia, quæ patitur, non intelligit.

Potest autem, quod additur : *Et succendit eum*, nec dicitur : *in circuitu*, ad interiorem hominem referri, ut quod dictum est : *Et combussit eum in circuitu*, de exteriore homine intelligatur. Et foris igitur et intus est succensus, qui carnis ac spiritus bona vitiorum igne perdidit. Nam si per cordis munditiam libidinis flamma non exstinguitur, incassum quælibet virtutes oriuntur, sicut per Moysen dicitur : « Ignis ab ira mea exarsit, et ardebit usque ad inferos deorsum, comedit terram, et nascentia ejus (Deut. XXXII, 22). »

Ignis quippe terram atque nascentia ejus comedit, cum libido carnem atque per hanc omnia bene acta consumit. Nam quidquid prodit ex fruge rectitudinis, hoc nimirum concremat flamma corruptionis. Solo itaque libidinis igne totus homo concrematur et intus et foris, etiamsi cæterorum incendia vitiorum deessent.

Sed postquam hæc de reprobis, qui fidem tenere videntur, dicta sunt, ad electos sermo subsequens dirigitur. Aut certe vastatos per Romanos Judæorum fideles ex circumcissione, quos ad prædicandum per orbem sicut agnos inter lupos misit, alloquitur consequenter, dicens :

CAPUT XLIII.

VERS. 1. — « Et nunc hæc dicit Dominus creans te Jacob, et formans te Israel : Noli timere, quia redemi te, et vocavi te nomine tuo : meus es tu. »

Quotiescunque Jacob vel Israel cum additamento honoris ponitur, de spiritali Jacob intelligendum est. Ubi vero sine adjectione electionis dicitur, de carnali Jacob vel Israel accipi debet, de populo Judæorum seu de carnalibus, qui sunt in Ecclesia. Nunc ergo cum dicitur : « Hæc dicit Dominus creans te Jacob, et formans te Israel, electos Novi Testamenti cultores indubitanter Dominus alloquitur. Ipse quippe creavit eos, non solum ut essent, sed etiam ut justii essent. « Ipsius enim sumus, inquam,

creatura creati in Christo Jesu in operibus bonis A (Ephes. II, 10). » Et ipse formavit eos ad imaginem et similitudinem suam, ut forma bonitatis ejus cerneretur in eis. Quibus propter Catholicam unitatem velut uni loquitur, dicens : *Noli timere* adversa pati propter nomen meum, quia pretioso in sanguine meo redemi te, et vocavi te : *Meus es tu*, pro quo tam grande pretium dedi.

Sed fortasse quærat aliquis, cur omnipotens Deus electorum suorum adversarios temporaliter exerescere permiserit? Ideo scilicet, ut malorum sævitia purgaretur vita honorum. Nunquam quippe Deus adversarios honorum esse permetteret, nisi etiam, quantum prodesse, videret. Nam dum injusti sæviunt, justii purgantur : et utilitati innocentie militat vita pravorum, dum hanc et premiando humiliat, et humiliando semper ad melius informat. Unde et Salomon ait : « Qui stultus est, serviet sapienti (Prov. II, 29), » quia contra sapientis vitam dum stultus præminens terrorem potestatis exercet, dum hunc laboribus fatigat, contumeliis lacerat, profecto hunc ab omni vitiorum rubigine utendo purgat. Stultus ergo sapienti et dominando servit, quem ad meliorem statum premendo provehit. Suos itaque Dominus temporaliter affligi permittit, sed inter adversa solatium suæ pietatis semper eis tribuit. Unde et nunc subdit :

VERS. 2. — « Cum pertransieris per aquas, tecum ero, flumina non operient te : cum ambulaveris in igne, non combureris, et flamma non ardebit in te. »

VERS. 3. — « Quia ego Dominus Deus tuus, Sanctus Israel, salvator tuus. »

Quam videlicet promissionem et secundum litteram sancti martyres esse veram frequenter experti sunt. Nam plerique eorum in aquis et fluminibus missi Deo sibi præsentem submergi non potuerunt aut lædi; plerique deambulantes in igne non valuerunt aduri, neque vel capillum eorum flamma cremando non tetigit. Sed quia nonnulli eorum in aquis vel ignibus consumpti sunt, debemus spiritaliter magis hanc promissionem intelligere, ne in aliquo falsa videatur.

Aquarum namque vel fluminum appellatione designantur tribulationes, sicut per Salomonem dicitur : « Aquæ multæ non potuerunt extinguere charitatem, nec flumina obruent illam (Cant. VIII, 7). » Ignis autem vel flamma passionis ardorem exprimit, sicut Apostolus docet : « Quorum, inquit, animalium infertur sanguis pro peccato in sancta per pontificem, horum corpora cremantur extra castra. Propter quod et Jesus, ut sanctificaret per suum sanguinem populum, extra portam passus est (Hebr. XIII, 11). » Cum enim crematio illa corporum animalium passionem Domini præfiguraverit, patet, quid ignis mystice designet.

Ait ergo : *Cum transieris per aquas*, id est per

tribulationum fluctus, *tecum ero*, ut te custodiam, et *flumina*, id est rapidi impetus tribulationum non operient, id est non submergent te, quia non superabunt. *Cum ambulaveris in igne*, id est in ardore sævientium passionum, non combureris in anima, quia spiritale refrigerium intrinsecus dabo (150) : et *flamma*, id est furor persecutorum non ardebit in te, qui non pertinet ad animam tuam, licet in corpore sæviat. Ego enim sum Dominus Deus tuus, quem contra falsorum deorum cultores in passione confiteris, et ego Sanctus sanctorum, quem expectavit Israel. Qui et *Salvator tuus* sum, quoniam a præsentibus malis te eripiens ad æternam salutem perducam

Vel aquæ et flumina sunt actiones sæculi. Et illos flumina operiunt, quos actiones hujus sæculi mentis perturbatione non confundunt. Nam qui Spiritus sancti gratia tenentur in mente, transeunt aquas; et tamen fluminibus non operiuntur, quia et inter medias populorum catervas sic peragunt gressus sui itineris, ut non submittant actionibus caput mentis. Sequitur :

« Dedi propitiationem tuam Ægyptum, Æthiopiam et Saba pro te. » Ægyptus dicitur *tenebræ* vel *tribulatio*. Æthiopia vero et nigros populos mittit, et interpretatur *caligo*. Saba autem *captivitas* vel *rete* dicitur. Et quid per Ægyptum et Æthiopiam et Saba designatur nisi gentilitas, quam antiquus hostis in errorum caligine positam tribulabat, et in reticulo suo captivam tenebat? Ait ergo ordini prædicatorum Dominus : « Dedi propitiationem tuam Ægyptum, Æthiopiam et Saba pro te. » Ac si diceret : Hanc tibi misericordiam et propitiationem dedi, ut gentilem populum pro te salvarem. Sequitur :

VERS. 4. — « Ex quo honorabilis factus es in oculis meis, et gloriosus, ego dilexi te. »

Israel iste *honorabilis* et *gloriosus* coram Deo factus est, ex quo per totum orbem prædicare cepit et ubicunque signis coruscare, universasque gentes convertere. Et extunc præcipue dilexit eum Dominus, licet et antea eum dilexisset, sed tunc eum diligere forsitan non videbatur, quem inter persecutores miserat. Sequitur :

« Et dabo homines pro te et populos pro anima tua. » Hoc est, nisi fallor, quod Salomon ait : « Pro justo dabitur impius, et pro rectis iniquus (Prov. XXI, 18). » Et rursum : « Justus de angustiis liberatus est, et tradetur impius pro eo (Prov. XI, 8). » Unde et adhuc contra persecutores hunc electum Israel corroborat subdendo :

VERS. 5. — « Noli timere, quoniam ego sum tecum. »

Fecundamque prolem fidelium ei pollicetur, cum subjungit : « Ab oriente adducam semen tuum, et ab occidente congregabo te. »

VERS. 6. — « Dicam aquiloni : Da, et austro : A illis ambulemus (*Ephes. 11, 10*). » Quia vero « cæcitas ex parte contigit in Israel, donec plenitudo gentium intraret (*Rom. xi, 25*), » recte subjungitur :

Manifeste enim hoc loco demonstravit Ecclesiam a quatuor mundi partibus fuisse congregandam. Unde et ad ultimum fideles etiam ab extremis orbis limitibus venturi declarantur, cum subditur :

« Affer filios meos de longinquo, et filias meas ab extremis terræ. »

Quod si spiritualiter hæc intelligenda sunt, quid per orientem accipitur nisi populus Judæorum, qui primus lumen cognitionis divinæ habuit, et Solem justitiæ mundo protulit? Et quid per occidentem nisi populus gentilium, qui per amorem caducorum in occiduis erat, et prope mundi terminum velut in sine diei solem justitiæ Christum accepit? **Ab oriente ergo semen Ecclesiæ adducitur et ab occidente,** quia fideles et a circumcissione et a præputio veniunt.

Per aquilonem quoque gentilitas designatur, quæ velut in sinistra et glaciale, tenebrosa que regione posita fuit in infidelitate. Per austrum vero Judæa figuratur, quæ quasi meridiano sole incaluit, quia Redemptore in carne apparente fervorem fidei prima suscepit. Aquiloni ergo dicitur : *Da*, cum offerre Deo fidei suæ munera gentilitas imperatur. Austro jubetur, *ne prohibeat*, quia Hebræis in fide consistentibus præcipitur, ne vitam gentilium repellendo contemnant. Voluerunt enim, primo gentiles respuere sicut Actus apostolorum satis declarant.

De longinquo autem filios suos afferri Dominus imperat, ut filius, qui in regionem longinquam abiit, ubi luxuriose vivendo bona sua dissipavit, redeat ad patrem suum (*Luc. xv*). Sed et *filias* suas, id est infirmas et contemptibiles personas ab extremis vilitatibus terræ jubet afferri, quoniam « infirma mundi elegit Deus, ut fortia confundat; et ignobilia mundi et contemptibilia elegit, et qua non sunt, ut ea quæ sunt, destrueret (*I Cor. 1, 27*). » Hæc sunt enim filia: venientes ab extremis terræ. Sequitur :

VERS. 7. — « Et omnem, qui invocat nomen meum, in gloriam meam creavi eum, et formavi, et feci eum. »

Omnem qui invocat nomen ejus creavit in gloriam suam Dominus. « Omnis enim quicumque invocaverit nomen Domini salvus erit (*Rom. x 13*). » *Invocat autem nomen ejus*, qui cor suum mundat, et ejus adventum tota devotione precatur ad se ipsum. Quicumque ergo taliter agit, Deus illum creavit in justitia et sanctitate veritatis in gloriam suam renovatum spiritu mentis suæ.

Formavit eum ad similitudinem suam, quia bonitatis suæ formam expressit in eo. Et justum fecit eum. « Ipsius enim sumus factura creati in Christo Jesu in operibus bonis, quæ præparavit Deus ut in

illis ambulemus (*Ephes. 11, 10*). » Quia vero « cæcitas ex parte contigit in Israel, donec plenitudo gentium intraret (*Rom. xi, 25*), » recte subjungitur :

VERS. 8. — « Educ foras populum cæcum, et oculos habentem, surdum, et aures ei sunt. »

Missus est *foras* iste cæcus et surdus Judæorum populus, et gentes ad fidem loco ejus ingressæ sunt. Unde et subditur :

VERS. 9. — « Omnes gentes congregatæ sunt simul, et collectæ sunt tribus. »

Universitas enim gentium in una fide congregata est, et de cunctis tribus Israel multitudo credentium collecta est. His itaque prænuntiatis errorem gentilium Dominus arguit, qui Deos esse putabant eos, qui nihil horum prædicere poterant, cum subdit :

« Quis in vobis annuntiet istud, et quæ prima sunt, audire nos faciet? Dent testes eorum, et justificentur, et audiant et dicant (*151*). » *Quis*, inquit, ex diis vestris *annuntiet in vobis*, o gentiles de gentium et Judæorum unifica societate? *Et quæ prima sunt*, id est ea quæ Salvator in carne gesturus est, quis ex diis vestris *audire vos faciet*? Subauditur nullus. Ipsi dii vestri *dent testes* eorum, quæ prima sunt, si annuntiant ea, sicut ego prophetas et apostolos do testes eorum, quæ annuntio. *Et justificentur* in verbis suis, cum vera prædicere cognoscuntur, sicut et ego justificor in sermonibus meis. Et audiant ea, quæ sibi objiciuntur, *et dicant*, id est respondeant. Nam si vere dii sunt, hæc omnia debent agere. Redargutis autem infidelibus, qui tales deos colebant, alloquitur fideles Dominus ostendens hæc omnia se fecisse, sicut Deum decebat. Nam sequitur :

VERS. 10. — « Vere vos testes mei, dicit Dominus, et servus meus quem elegi, ut sciatis, et credatis mihi, et intelligatis, quia ego ipse sum. »

Vos, inquit, o apostoli et credentes estis verborum meorum *testes* et divinitatis meæ; et ille « qui, cum in forma Dei esset, non rapinam arbitratus est esse se æqualem Deo, sed semetipsum exinavit, formam servi accipiens (*Philip. 11, 6*), » testis meus est, *quem* ad hoc ipsum præ omnibus *elegi*, ut per eum *sciatis* quod de me mortalibus est sciendum, et indubitanter *mihi credatis* per omnia, et *intelligatis quia ego ipse sum* immutabilis æternaliter permanens. Sequitur :

« Ante me non est formatus Deus, et post me non erit. »

Ante me non est formatus aliquis ex his, quos gentiles in deos sibi formant, quia ego sum, antequam aliquod idolum fieret; *et post me non erit* quisquam eorum, sed ego post omnes illos ero, quia destructis idolis ego sine fine permanebo. Quædam temperatio divinæ locutionis est hæc, qua, dum de se minus dicit, majus vult intelligi et ita loquens

ostendit non posse quemquam talium deorum similem esse sibi. Sequitur :

VERS. 11. — « Ego sum Dominus, et non est absque me salvator. »

Ego solus sum Dominus, cui competit universa servire, quia non solum subjectis præsideo, sed omnia bona possideo. Et non est absque me salvator, quia præter me non est qui salvare possit. Neque enim dii gentium cultores suos salvant, sed perdunt. Non enim Filium negat esse Salvatorem Pater, dum dicit, quia non est absque me Salvator, quoniam Unigenitus Filius, qui est in sinu Patris, non est absque Patre, sed Pater in Filio, et Filius in Patre, ac per hoc Pater et Filius non sunt duo salvatores, sed unus Salvator, sicut nec duo domini sed unus Dominus. Sequitur :

VERS. 12. — « Ego annuntiavi et salvavi, auditum feci, et non fuit in vobis alienus. »

Annuntiavi per prophetas, salvavi per Christum, auditum feci per apostolos, et non fuit in vobis Deus alienus, sed ego in omnibus vobis tam sub lege quam sub gratia. Sequitur :

« Vere vos testes mei, dicit Dominus, et ego Deus, » quia ego sum solus Deus. Sequitur :

VERS. 13. — « Et ab initio ego ipse, et non est qui de manu mea eruat. »

Ac si dicat Dominus : Nemo antiquior me, et nemo fortior me. Unde et subdit : « Operabor, et quis avertet illud ? » Nemo enim poterit opus ejus avertere, qui salutem mundi operari disposuit. Nam sequitur :

VERS. 14. — « Hæc dicit Dominus redemptor vester sanctus Israel : Propter vos emisi in Babylonem, et detraxi vectes universos, et Chaldæos in navibus suis gloriantes. »

VERS. 15. — « Ego Dominus sanctus vester, creans Israel, rex vester. »

Proprie quidem et usitate redemptor appellari solet Filius hominis, qui dedit animam suam redemptionem pro multis; sed tamen, quoniam inseparabilia sunt opera Patris et Filii, Pater quoque redemptor appellari potest, non quia ipse pro nobis passus sit, sed quia nos sanguine Filii sui redemit. Nam pro ereptione vel liberatione poni solet redemptio.

Sed et juxta Dionysium (De divin. nom. c. 8) nominatur Dominus redemptio, quantum non sinit (152) vera existentia ad non esse cadere; et quantum etiam si quid ad delictum aut inordinatum deceptum sit, et diminutionem quamdam patitur priorum bonorum perfectionis, et hoc a passione et inertia redemit implens indigentiam et paterne infirmitatem despiciens et restituens a malo, magis autem stans in bono, et ordinans et ornans inordinatum ejus et inornatum, et integritatem perficiens, et omnium solvens maculas. Juxta hunc ergo sensum redemptor est vel redemptio non so-

(152) Cod. Garst. sine.

lum Filius, sed et Pater et Spiritus sanctus, quoniam tota Trinitas operatur hæc omnia.

Simili modo Sanctus Israel appellatur non solum Filius, sed et Pater, et Spiritus sanctus attestantibus primis virtutibus, quæ clamant : « Sanctus, sanctus, sanctus, Dominus Deus exercituum (supra vi. 3). » Illic enim Dominus naturaliter sanctus est, et per semetipsum sanctus, et omnia sanctificans, ideoque Sanctus Israel dicitur quasi Sanctus sanctorum. Et Pater ergo Sanctus Israel appellatur, qui propter nos emisit. Unigenitum suum in Babylonem, id est in hunc mundum vitiis et erroribus confusum, et detraxit universos vectes portarum Babylonis, ut ablatis vectibus portæ patescerent, et egredierentur liberi, qui in hac Babylone tenebantur captivi. Quid autem nomine vectium designatur, Salomon insinuat dicens : « Judicia quasi vectes urbium (Prov. xviii, 19). » Nam, dum gentiles adhuc judicarent idolis potius quam Deo serviendum, hujusmodi servitia quasi vectes obfirmatas eis tenebant portas Babylonis, ne possent eas ingredi, aut prædicatores veritatis admittere. Dum judicaremus melius esse servire peccato quam justitiæ, judicia nostræ voluntatis instar vectium obfirmabant nobis portas hujus confusæ Babylonis. Detrahit ergo Dominus vectes perversorum judiciorum hujusmodi, ut ablatis vectibus et repagulis malæ voluntatis egredieremur a nobismetipsis, qui tenebamur intra nosmetipsos velut in Babylone captivi.

Chaldæi quoque gloriabantur in navibus suis, quia maligni spiritus in mentibus hominum, quas per amarum pelagus sæculi hujus vagas deducebant, nimis exsultabant. Sed et istos detraxit Dominus, quia de cordibus eorum, quos sic possidebant, ejecit illos. Qui noster est sanctus, quia ipse naturaliter sanctus, qui nos per donum suæ gratiæ sanctificat, ideoque solus recte sanctus, quia « nemo bonus nisi unus Deus (Matth. xix, 17). » Qui et spiritale Israel creat in operibus bonis, « quoniam in Christo Jesu neque circumcisio aliquid valet neque præputium, sed nova creatura (Gal. 5, 6). » Et ipse est rex noster, qui regit nos, et regnat in nobis. Sequitur :

VERS. 16. — « Hæc dicit Dominus, qui dedit in mari viam, et in aquis torrentibus semitam. »

VERS. 17. — « Qui eduxit quadrigam et equum, et agmen et robustum : simul obdormierunt, nec resurgent : contriti sunt quasi linum et extincti sunt. »

Dominus in mari viam fecit, quia sicut Exodus refert : « Divisa est aqua, et ingressi sunt filii Israel per medium maris sicci (Exod. xxi, 29). » Sed et in torrentibus Arnon præbuit semitam. Unde dictum est in libro bellorum Domini : « Sicut fecit in mari Rubro, sic faciet in torrentibus Arnon (Num. xxi, 14). » Jordanem quoque « per arenam aiveum transivit (Joan. iii, 17) » Israel siccante Domino aquas ejus.

Qui eduxit post filios Israel quadrigam Pharaonis, et equum ejus, agmenque Ægyptiorum, et robustum ducem eorum. « Immutatum est enim cor Pharaonis et servorum ejus super populo Israel, et dixerunt: Quid volumus facere, ut dimitteremus Israel, ne serviret nobis? Junxit ergo currum, et populum suum assumpsit secum, tulitque sexcentos currus electos, quidquid in Ægypto curruum fuit, et duces totius exercitus. Induravitque Dominus cor Pharaonis regis Ægypti, et persecutus est filios Israel (Exod. xiv, 5). » Idcirco autem Dominus se hæc egisse commemorat, ut intelligamus, quia sicut de Ægypto per mare filios Israel eduxit, ita nunc de tenebris infidelitatis per baptismum credentes educit. Sicut in aquis torrentibus dedit eis semitam, ut libere transirent ad terram promissæ hæreditatis, ita nunc fidelibus per tribulationes pandit iter ad regnum cælorum. Sicut Pharaonem cum exercitu suo persequentes filios Israel demersit in mare, ita nunc diabolum cum suis angelis et turba vitiorum persequentem fideles exstinguit in baptismo. Unde et dicit, quia *simul obdormierunt, nec resurgent*. Consopita est enim potestas eorum, qua nos in peccatis antea detinentes affligebant. *Contriti sunt quasi linum*, ex quo per penitentiam in nostro corde contrivimus eorum suggestiones? *et exstincti sunt*, si jam in nobis exstincta est eorum malitia. Sequitur:

VERS. 18. — « Ne memineritis priorum, et antiqua ne intueamini. »

Vos, inquit, o apostoli, *ne memineritis jam priorum*, quia nunc majora facturus sum quam olim per Moysen feci, quando dedi *in mari viam, et in aquis torrentibus semitam*. Nam sequitur causa, cur non debeant meminisse iterum gestorum.

VERS. 19. — « Ecce, inquit, ego facio nova, et nunc orientur, utique cognoscetis ea. »

Et, quæ sint illa *nova*, subjungit: « Ponam in deserto viam, et in invio flumina. » *In deserto gentilitatis dabo viam eundi ad Deum; et in invio paganorum populo, per quem nullus prædicator veritatis incessit, ponam fluentia Evangelii*. Sequitur:

VERS. 20. — Glorificabunt me bestię agri, dracones et struthiones, quia dedi in deserto aquas, flumina in invio, ut darem potum populo meo, electo meo. »

Quoniam ager est mundus, bestia agri vocatur homo quisque in hoc mundo bestialiter vivens. Et quæ sit hæc bestia, declaratur, scilicet *dracones et struthiones*, quid autem draconum nomine nisi malitiosorum hominum vita designatur, de quibus et alias dicitur: « Traxerunt ventum quasi dracones? (Jer. xiv, 6.) » Perversi etenim quique ventum quasi dracones trahunt, cum malitiosa superbia inflantur. Quid vero struthionum appellatione nisi simulatores intelligi solent? Struthio enim pennas habet, volatum non habet, quia simulatores speciem sanctitatis habent, sed virtutem sanctitatis non habent. Visio quippe eos bonæ actionis decorat, sed a terra minime penna virtutis levat. Tales sunt

A qui, cum religionem servare videntur, et Christiani non sunt. Itaque bestia Deum glorificat, cum ejus fidem gentilitas exaltat, quam et draconum nomine propter malitiam, et struthionum propter hypocrisis notat. Quasi enim pennas gentilitas accepit, sed volare non potuit, quæ et naturam rationis habuit, et rationis actionem ignoravit. Hujusmodi ergo *dracones et struthiones* tandem glorificaverunt Deum, quia dedit *in deserto gentium aquas sapientiæ, et in invio gentilitatis flumina doctrinarum electorum, ut potum daret supernæ prædicationis populo credentium ex gentibus*. Sequitur:

VERS. 21. — « Populum istum formavi mihi, laudem meam narrabit. »

Sicut et per Petrum dicitur: « Vos autem genus electum regale sacerdotium, gens sancta, populus acquisitionis, ut virtutes annuntietis ejus, qui de tenebris vos vocavit in admirabile lumen suum (I Petr. ii, 9). » Hæc de electo gentium populo locutus populum mox increpat Judæorum sive carnalium, qui sunt in Ecclesia, cum subjungit:

VERS. 22. — « Non me invocasti, Jacob, nec laborasti in me, Israel. »

Invocat autem Deum, qui purgato corde eum in se supplex venire precatur, et laborat in eo, qui in ejus fide bonis operibus insudat. Sic enim quisque debet agere, ut et piis orationibus insistat, et sanctis laboribus exerceatur. Sed Judæus vel carnaliter Christianus hæc non egisse redarguitur. Sequitur:

VERS. 23. — « Non obtulisti mihi arietem holocausti tui, nec victimis tuis glorificasti me. »

Quoniam aries principatur gregi, non incongrue per *arietem* exprimitur, quidquid in cogitationibus nostris est præcipuum, quia et ipse cogitationes per *gregem* designari possunt. Holocaustum vero totum incensum dicitur. Offert ergo Deo *arietem holocausti sui*, qui illud quod in desideriis et cogitationibus suis maximum et præcipuum est, totum igne charitatis accendit, sicut Abraham nobis exemplo suo figuravit, dum unigenitum suum, quem singulariter diligebat, offerret holocaustum, imo arietem pro eo (Gen. xxii). Hunc arietem holocausti immolat, qui Deum super omnia diligit, ut major sit in eo charitas Dei quam ullus amor alius. Sed carnalis quisque non obtulit arietem hujusmodi, quia « dilexerunt homines magis tenebras quam lucem (Joan. iii, 19). »

Quid autem nomine victimarum nisi interemptio carnis vitiorum designatur? Has enim victimas jubet immolare Apostolus, cum dicit: « Mortificate membra vestra, quæ sunt super terram, fornicationem, immunditiam, libidinem, concupiscentiam malam, et avaritiam, quæ est idolorum servitus (Coloss. iii, 5). » Quas qui mactat, Deum glorificat, sicut idem Apostolus dicit: « Glorificate et portate Deum in corpore vestro (I Cor. vi, 20). » Sed hoc vel Judæus vel inanis Christianus agere negligit, a quo, quia Dominus carnalia dona non quæsit, recte subjungit:

« Non te servire feci in oblatione, nec laborem A tibi præbui in thure. »

Neque enim exteriora dona suscipit, quando ipsum datorem interius non approbat. Sequitur :

VERS. 24. — « Non enisti mihi argento calamum, et adipe victimarum tuarum non inebriasti me. »

« Eloquia Domini eloquia casta, argentum igne examinatum (Psal. xi, 7). » Calamus vero surculus esse dicitur arboris aromaticæ. Joannes autem in Apocalypsi sua interpretatus est *odorama* esse *orationes sanctorum* (Apoc. v, 8). Quid ergo per *calamum* nisi hi designantur, qui per virtutem orationis suave Deo redolent cum Paulo dicentes, quia « Christi bonus odor sumus Deo (II Cor. ii, 15). » Emit igitur *argento calamum Deo*, qui et tales acquirunt prædicando. Sed hoc Judæus non egit, quia non cordis munditiam, sed quasi honestatem actionis docuit. Christianus quoque carnalis hoc agere nequivit, quia, qui bonum in se ipso non habet, meatem aliorum perfecte ædificare loquendo non valet.

Victimæ vero sunt, ut diximus, extinctiones vitiarum, aut etiam bonorum actiones. Sunt autem nonnulli, qui mactant victimas extinguendo vitia, et bene operando, sed tamen in bonis quæ agunt minime compunguntur; et quia se ex amore ad lacrymas non accendunt, victimæ eorum *sine adipe* sunt. Hinc enim dicitur : « Holocaustum tuum pingue fiat (Psal. xix, 4). » Holocaustum quippe siccum est bonum opus, quod orationis lacrymæ non infundunt; holocaustum vero pingue est, quando hoc, quod bene agitur, corde humili etiam per lacrymas irrigatur. Unæversus per Psalmistam dicitur : « Holocausta medullata offeram tibi (Psal. lxxv, 15). » Qui enim bona operatur, et visioni jam Creatoris sui inhiat, atque ad æternæ contemplationis gaudia pervenire festinat, sequitur ipsum ex amore, quo accenditur, in fletibus mactat, holocausta Domino medullata dedit. Hujusmodi autem victimarum et holocaustorum *adipe* Dominus *inebriatur*, quia piis humilium lacrymis delectatus obliviscitur omnium, quæ prius male egerant. Qui enim inebriatur, oblivioni tradit ea quæ memoriter in corde tenebat. Quia ergo Judæus quisque, vel fictus Christianus talibus hostiis Deum non placat, ut peccata ejus oblivioni tradat, *adipe*, inquit, *victimarum tuarum non inebriasti me*. Sequitur :

« Verumtamen servire me fecisti in peccatis tuis; præbui tibi mihi laborem in iniquitatibus tuis. »

Servire quodammodo *facit Deum in peccatis suis*, et *laborem* ei præbet in *iniquitatibus suis*, qui per divinam patientiam in diuturnis pravitatibus suis expectatur, ut quandoque respiciat. Unde misericorditer ei paratus ignoscere subdit :

VERS. 25. — « Ego sum, ego sum ipse, qui deleo iniquitates tuas propter me, et peccatorum tuorum non recordabor. »

Et qua conditione debeat iniquitates ejus, et peccatorum obliviscatur, adjungit

VERS. 26. — « Reduc me in memoriam, et judicemur simul : narra si quid habes, ut justificeris. »

Iniquitates, inquit, *tuas*, o popule Judæorum propter bonitatem meam sanguine Christi deleo, tu tantum *reduc me in memoriam*, quem nimis oblitus es, et in corde tuo *judicemur simul*, ut tu ipse judices, quis erga alium justius egerit, ego erga te an tu erga me; et si quid habes injustitiæ, *narra*, id est confitere illud, *ut justificeris*. Nam ut te justum esse non æstimes, culpam eorum innotesco tibi, quos inter justos crederes esse maximos. Sequitur enim :

VERS. 27. — « Pater tuus primus peccavit, et interpretes tui prævaricati sunt in me. »

VERS. 28. — « Contaminavi principes sanctos. » Quod enim dicitur, quia *pater tuus primus peccavit*, senserunt ante nos alii de beato Abraham, quia cum ei Deus dixisset : « Ego sum, qui eduxi te de Ur Chaldæorum, ut darem tibi terram istam, et possideres eam (Gen. xv, 7), » quasi incredulus respondit : « Domine Deus, unde scire possum quod possessurus sim eam? » (*Ibid.* viii.) Qui, etsi tunc non peccavit, scimus quia præsentem vitam sine peccato transire non potuit. « Non est enim homo justus in terra, qui faciat bonum, et non peccet (Eccle. vii, 21). »

Interpretes autem vocantur in hoc loco Moyses et Aaron, qui verba Domini ad populum, et populi verba referebant ad Deum. Qui prævaricati sunt, sicut eis dictum est divinitus : « Prævaricati estis contra me in medio filiorum Israel ad aquas contradictionis (Deut. xxxii, 51). » Eisdem etiam dicitur *principes sanctos*, sed tamen ob culpam prævaricationis contaminavit eos, ut nec ipsam terram promissionis intrarent. Sequitur :

« Dedi in internecionem Jacob, et Israel in blasphemiam. »

Internecio vel internecium vocari solet bellum in quo omnes pereunt. Et Jacob tunc datus est ad *internecionem*, licet non in prælio, quia omnes præter duos qui egressi fuerant de Ægypto, mortui sunt in solitudine. In *blasphemiam* quoque datus est, ut incredulitatem ejus accusarent.

Rursus unicuique nostrum moranti in peccatis suis dicit Dominus, quia *deleo iniquitates tuas*, tu tantum *reduc me in memoriam*, *ut judicemur simul*, ut me corde concipias, et sollicita inquisitione sub mea præsentia tuos actus discernas; et si quid iniquitatis habes, narra illud in confessione, ut justificari possis. Debet enim uniuscujusque mens et causas suas apud Deum, et causas Domini contra se sollicita inquisitione discutere; debet caute pensare, vel quæ ab eo bona perecepit, vel quæ mala bonis illius perverse vivendo responderit. Accedere debet ad secretarium Judicis, et intra sinum cordis considerare, quam districte quandoque seriat, qui diu patienter expectat, atque flendo punire, dum licet, quidquid se male egisse cognoverit. Nam ut se sine peccato esse non æstimet, culpa generationis

suz ei ad memoriam revocatur, ut se iniquitatibus conceptum meminerit se peccatorem esse non dubitet. *Pater*, inquit, *tuus primus*, id est qui secundum carnem te genuit, in ipso coitu, dum te gigneret, *peccavit*. Nam secundus pater ille est, qui secundæ nativitatis est auctor.

Sed *et interpretes tui*, id est sacerdotes et cæteri, qui tibi verba mea interpretando manifestare debuerunt, prævaricati sunt in me, quia hoc, ut oportebat, non egerunt, sed tua potius quam mea quæsierunt. Et ideo *contaminavi sanctos principes*, quia propter malorum sacerdotum culpam infamati sunt et boni præpositi.

Et dedi ad internecionem Jacob, quia multitudinem pravorum Christianorum perdi. *Et Israel*, id est eos, qui spiritualiter vivunt, *dedi in blasphemiam*, id est in infamiam propter exempla perversorum, sum quibus habitant. Unde ad ipsos spiritales consequenter sermo vertitur, qui eos inter iniquos degentes consoletur. Vel certe duritiam Judæorum increpans hactenus alloqui blande jam inchoat primitivam Ecclesiam, dicens :

CAPUT XLIV.

VERS. 1. — « Et nunc audi, Jacob serve meus, et Israel, quem elegi. »

VERS. 2. — « Hæc dicit Dominus faciens et formans te, ab utero auxiliator tuus : Noli timere, serve meus Jacob, et rectissime, quem elegi. »

Dominus *fecit hunc Jacob*, quia creavit eum in operibus bonis, et formavit eum in hac juste vivendi forma, ut nobis diceret : « Imitatores mei estote, fratres, et observate eos, qui ita ambulant, sicut habetis formam nostram (*Philip. III, 17*). » Cui et *ab utero matris Ecclesiæ fuit auxiliator* in omni prælio spiritualis conflictus. Unde et præcepit ei, ne timeret eos, qui occidunt corpus.

Israel vero secundum proprietatem Hebraicæ linguæ *rectissimus* interpretatur. Quod autem *vir videns Deum* dici solet, non in conscriptione litterarum sed in sono vocis consistit. Et quod nunc Dominus ait : *Et rectissime quem elegi*, tale est ac si diceret : *Et Israel, quem legi*. Sed et interpres maluit ponere *rectissimum*, ut ostenderet quia de spiritali Israel nunc sermo est. Cur autem Israel iste timere non debeat, subjungitur :

VERS. 3. — « Effundam enim aquas super sitientem, et fluenta super aridam.

Effundam aquas sapientiæ vel spiritalis gratiæ super sitientem gentilitatem, et fluenta supernæ prædicationis super aridam mentem gentilium. Unde noli timere eos, quia doctrinam tuam libenter suscipiunt. Sequitur :

« Effundam spiritum meum super semen tuum, et benedictionem meam super stirpem tuam. »

Spiritum meum effundam super semen tuum, id est super eos, quos in Christo Jesu per Evangelium genueris, *et benedictionem gratiæ meæ super stirpem eorumdem spiritalium filiorum tuorum*. Nam filii Ecclesiæ renascentes ex aqua et spiritu accipiunt

A donum Spiritu sancti, et supernam benedictionem.

VERS. 4. — « Et germinabunt inter herbas quasi salices juxta præterfluentes aquas. »

Infructuosæ quidem sunt arbores salicum, sed tantum tamen viriditatis habent, ut arescere vel abscissæ radicitus vix possint et projectæ. Unde quia electorum vitam per constantiam suæ viriditatis exprimunt, recte de filiis Ecclesiæ dicitur, quia *germinabunt inter herbas quasi salices juxta præterfluentes aquas*. Sanctæ enim Ecclesiæ filii *inter herbas sicut salices germinant*, dum inter arescentem vitam carnalium hominum et multiplici numerositate et perpetua viriditate mentis perdurant. Qui bene juxta præterfluentes aquas germinare perhibentur, quia unusquisque eorum ubertatem ad fructum percipit ex doctrina sacri Eloquii, quæ temporaliter percurrit. Sequitur :

VERS. 5. — « Iste dicit : Domini ego sum, et ille vocabit in nomine Jacob, et hic scribet manu sua Domino, et in nomine Israel assimilabitur. »

Iste dicit : Domini ego sum, id est confitebitur se Christianum, *et ille factus Jacob*, id est supplantator vitiorum, *vocabit nomen Domini in adiutorium sibi; in isto nomine*, id est in eo quod per meritum actionis suæ nominatur Jacob, id est supplantator et luctator. *Et hic scribet manu sua Domino*, quia meritum suum in libro divinæ memoriæ propria actione assignans, dirigit in cælum. *Et in nomine Israel assimilabitur*, ut sit *rectissimus*, quod interpretatur *Israel*. Assimilabitur enim in nomine Israel, dum talis fuerit, quale est nomen Israel. Sequitur :

VERS. 6. — « Hæc dicit Dominus rex Israel et redemptor ejus Dominus exercituum : Ego primus et novissimus, et absque me non est Deus. »

Hæc verba Filio congruunt. Ipse est enim rex Israel, de quo cantatur : « Benedictus qui venit in nomine Domini rex Israel (*Joan. XII, 13*). » Ipse est redemptor ejus, « qui visitavit et fecit redemptionem plebis suæ (*Luc. I, 68*). » Ipse est Dominus exercituum cælestium, quia « Angeli accesserunt, et ministrabant ei (*Matth. IV, 11*). » Ipse est primus, quoniam « in principio erat Verbum (*Joan. I, 1*). » Ipse novissimus, quoniam « Verbum caro factum est (*ibid. 14*) » in fine temporum. Unde et « novissimus Adam » vocatus est ab Apostolo (*I Cor. XV, 45*). Ipse est primus, per quem in initio facta sunt omnia; ipse novissimus, per quem in fine restaurata sunt universa.

Et absque me non est Deus, inquit, ac si diceret : Quia in me est Pater et ego in Patre, vel : « Ego et Pater unum sumus (*Joan. X, 30*). » Cum enim dicit quia *absque me non est Deus*, se solum cum Patre et Spiritu sancto Deum esse docet, idola vero non esse deos. Et quia se solum dicit esse Deum subjungit :

VERS. 7. — « Quis similis mei? »
Id est quis Deus ut ego? Sequitur

« Vocet et annuntiet, et ordinem exponat mihi, ex A omnes, et stabunt, et pavēbunt, et confundentur simul. »

Si quis, inquit, est similis mei, vocet me et annuntiet mihi, et exponat ordinem singulorum, quæ facta sunt, ex quo constitui populum Judæorum; aut ea, quæ non sunt, vocet, quasi sint, et exponat ordinem creaturæ meæ, qua cuncta ratione libaverim, ex quo hominem feci super terram. Vel vocet ad se genus humanum, et annuntiet ei futura, si vere est Deus ut ego. Unde et adjungit de illis falsis, qui putabantur esse dii: « Ventura, et quæ futura sunt, annuntient eis. » Si enim sunt dii, debent suis cultoribus annuntiare futura. Moxque suos Dominus contra eos, qui talium deorum culturam defendebant, corroborat, dicens:

VERS. 8. — « Nolite timere, neque conturbemini. »

Nolite timere sævitiam eorum, neque turbari propter minas eorum. Et subsequitur dicens eorumdem fidelium populo: « Extunc audire te feci, et annuntiavi, vos estis testes mei. » Extunc, id est ex quo constitui populum antiquum audire te feci a principio libri Genesis, quia non est similis mei, neque Deus præter me quisquam. Et vos estis inde testes mei contra eos, qui plures deos esse garriunt. Rursus quasi ratiocinando subdit:

« Nunquid est Deus præter me, et formator, quem ego non noverim? » Qui enim omnia novit, sciret utique, si alius præter se Deus esset, et si alius formator esset, et alius mundus, quia Deus noster mundum hunc formavit, sicut Genesis docet. Sed quia formatorem præter se Dominus esse negavit, responderet forsitan aliquis, dicens: « Nunquid illi, qui faciunt idola, non sunt formatores absque te? » Et ad hoc subjungit:

VERS. 9. — « Plastæ idoli omnes nihil sunt. »

Ut vero Apostolus ait: « Scimus quia nihil est idolum (II Cor. VIII, 4). » Et de idolis dictum est: « Similes illis flant, qui faciunt ea (Psal. CXXII, 8). » Si igitur idolum nihil est et similes illis flant, qui faciunt ea, profecto omnes plastæ, id est formatores idolorum nihil sunt, de quibus et subditur: « Et amantissima eorum non proderunt eis; ipsi sunt testes eorum, quia non vident, neque intelligunt, » sicut ipsorum conscientia testis est, quia ea fecerunt ex insensuali materia, et idcirco, qui hoc faciunt, et ea deos dicunt, confundentur. Unde stultitiam eorum exprobrans ait:

VERS. 10. — « Quis formavit Deum, et sculptile conflavit ad nihil utile? »

Et de justa retributione subjungit:

VERS. 11. — « Ecce omnes principes (153) ejus confundentur. »

Id est qui faciunt, et qui colunt illud. Sequitur:

« Fabri enim sunt ex hominibus: convenient

(153) Alias, om. participes ejus.

omnes, et stabunt, et pavēbunt, et confundentur simul. »

Convenient in die judicii omnes fabricatores et adoratores idoli, et stabunt paventes et confusi ante tribunal æterni Judicis. Demum ut evidentius ostendat idola deos esse non posse, refert quam vile exordium habuerint.

VERS. 12. — « Faber, inquit, ferrarius lima operatus est, et in prunis et in malleis formavit illud, et operatus est in brachio fortitudinis suæ. » Et eodem fabro subdit: « Esuriet et deficiet, non habet aquam (154), et lassescet. »

Constat enim idolum non habere divinitatem, quod ita fabricatum est hominis arte et labore, et cujus auctor, dum illud fabricaret, dum nisi exterioribus alimentis sustentaretur, deficiebat. Hæc de ferreis idolis dicta sunt, et de ligneis subjungitur.

VERS. 13. — « Artifex lignarius extendit normam, » id est lineam, « formavit in runcina, fecit illud in angularibus, » id est in quadratum, « et in circino tornavit. »

Runcina vero ferramentum lignarii est gracile, et recurvum, quo cavantur tabulæ domus, ut una alteri inseratur. Circinus autem vocatur inde quod circulum efficit vergendo, et est ferrum duplex, unde pictores faciunt circulos. Sed de fabricatore idoli subditur: « Et fecit imaginem viri quasi speciosum hominem habitantem in domo. » Et hoc manifestum est. Sequitur:

VERS. 14. — « Succidit oedros, tulit ilicem et quercum, quæ steterat inter ligna saltus, et plantavit pinum, quam pluvia nutrit. »

VERS. 15. — « Et facta est hominibus in focum: sumpsit ex eis, et calefactus est, et succendit, et coxit panes: de reliquo autem operatus est Deum, et adoravit: fecit sculptile, et curvatus est ante illud. »

Talibus diis servierunt gentiles, de quibus adhuc subditur:

VERS. 16. — « Medium ejus igni combussit, de medio ejus carnes comedit, coxit pulmentum, et saturatus est, et calefactus est, et dixit: Vah! calefactus sum, vidi focum. »

VERS. 17. — « Reliquum autem ejus Deum fecit, et sculptile sibi: curvatur ante illud, et adorat illud, et obsecrat illud, dicens: Libera me, quia Deus meus es tu. »

Nusquam manifestius quam hoc loco declaratur error idololatrarum, de quibus et subditur:

VERS. 18. — « Nescierunt, neque intellexerunt. oblitii enim sunt, ne videant oculi eorum, et ne intelligant corde suo. »

VERS. 19. — « Non recogitant in mente sua, neque cognoscunt neque sentiunt, ut dicant: Medieta-tem ejus combussi igne, et coxi super carbones ejus

(154) Alias, bibet aq.

panes, coxi carnes et comedi, et de reliquo ejus A
idolum faciam, ante truncum ligni procidam. »

VERS. 20. — « Pars ejus cinis est. »

Hæc ideo sic transimus, quia expositione non indiget. Adhuc autem de idolo subjungitur :

« Cor ejus insipiens adoravit illud, et non liberavit (155) animam suam, neque dicet : Forte, id est forsitan mendacium est in dextera mea. »

Hucusque vero Dominus stultitiam gentilium manifestans satis evidenter probavit, quod supradixerat : « Quoniam absque me non est Deus. » Quid demum populum Judæorum alloquitur, dicens :

VERS. 21. — « Memento horum Jacob et Israel, quoniam servus meus es tu. »

Memento horum, quæ de idolis diximus, ne eis servire velis, *quia servus meus es*. Sequitur :

« Formavi te, servus meus es tu Israel, ne obliviscaris mei. » *Formavi te* in utero matris, ut mihi servus esses; non tu me formasti sicut idolorum cultores deos sibi formant, quibus serviant, et ideo ne me tradas oblivioni sequens tales deos. Ac de tempore gratiæ subditur :

VERS. 22. — « Delevi ut nubem iniquitates tuas, et quasi nubem peccata tua. »

Nubes enim vel nebula solis calore solvitur, atque deletur, quæ solem ipsum videre non sinebat. Sic et peccata, quæ cor Judæorum obumbrabant, tandem in lumine veri solis, qui est Christus, fugata sunt atque deleta, ex quo illi ad fidem sunt conversi. Nam « usque in hodiernum diem cum legitur Moyses, velamen positum est super cor eorum, qui non credunt ex illis. Cum autem conversus fuerit ad Deum, auferetur velamen (II Cor. iii, 15). » Unde et eundem populum admonens subjungit : « Revertere ad me, quoniam redemi te. » Et quia post ejus resurrectionem totus orbis triumphos ejus decantavit, congrue sequitur :

VERS. 25. — « Laudate, cæli, quoniam fecit Dominus (156): jubilate, extrema terræ; resonate, montes, laudationem, saltus et omne lignum ejus, quoniam redemit Dominus Jacob, et Israel gloriabitur. »

Quod enim dicitur : *Laudate cæli, quoniam fecit Dominus*, quoniam adimpletum est, quando resurrectionem ejus annuntiaverunt angeli. Vel cælorum nomine designari possunt apostoli, de quibus dictum est, « quoniam cæli enarrant gloriam Dei (Psal. xviii, 2). » Qui laudaverunt, *quoniam fecit Dominus*, quia triumphum resurrectionis ejus ubique prædicaverunt. Unde et *extrema terræ* jubilaverunt in laudem ejus. Jubilus autem vocatur, quando ineffabile gaudium mente concipitur, quod nec abscondi possit nec sermonibus aperiri, et tamen quibusdam motibus aperitur, quamvis nullis proprietatibus exprimitur. Hinc sanctus David intuens electorum animas tantum gaudium concipere, quantum sermone non valet aperire, ait : « Beatus populus

(155) Alias, *liberabit*.

(156) Alias, *quoniam misericordiam fecit*.

qui scit jubilationem (Psal. lxxxviii, 16). » Non enim ait : Qui loquitur, sed : *Qui scit*, quia sciri quidem jubilatio intellectu potest, sed exprimi dictu (157) non potest. Per illam quippe sentitur quod ultra sensum est. Et cum vix ad hoc contemplandum sufficiat conscientia sentientis, quando ad hoc exprimendum sufficiet et lingua dicentis ?

Quia ergo prædicantibus apostolis, dum « in omnem terram exivit sonus eorum, et in fines orbis terræ verba eorum (Psal. xviii, 4), » lux veritatis electorum cordibus ubique gentium se manifestans inenarrabili gaudio mentes eorum replevit, pulchre etiam *extrema terræ*, id est fines orbis *jubilare* præcipiuntur. Et ut omnis terra jubilaret, *montes*, id est sancti per vitæ meritum ad cælestia propinquantes *resonaverunt laudationem*, id est post apostolos prædicaverunt Evangelium.

Saltus quoque, id est gentilitas, *et omne lignum ejus*, id est omnis homo gentilis resonare jussus est, *quoniam redemit Dominus* sanguine suo *Jacob*, id est populum suum, *et Israel*, id est isdem electorum populus *gloriabitur* in Domino Redemptore suo. Post hæc omnipotens Pater magnitudinem operum suorum nobis innotescere volens ait :

VERS. 24. — « Hæc dicit Dominus redemptor tuus et formator tuus ex utero : Ego sum Dominus faciens omnia. »

Nam Unigeniti sui sanguine redemit nos, antequam crearemur, ac deinde formavit nos in utero matris Sequitur :

« Extendens cælos solus, stabiliens terram, et nullus mecum. » Latitudinem cælorum potentia sua Creator extendit, ut omnia tegetet; et *terram* stabilivit, ut immobilis staret.

Possunt vero sancti per *cælos*, et Ecclesia per *terram* designari. Extendit ergo Dominus *cælos*, quia facit, ut justis eorum quæ retro sunt obliviscentes, in anteriora extendantur. Extendit cælos, dum sanctis suis viam prædicationis aperiens eos in mundi latitudinem circumquaque diffudit. Terram quoque stabilivit, quia Ecclesiam in Christo fundavit.

Aut per *cælos* sacra volumina exprimi possunt, ex quibus in Patribus stellæ exemplorum atque virtutum nobis elucent. Quos Dominus extendit, quia ante oculos nostros per verba doctorum exponendo expandit. Extensis vero cælis stabilitur terra; quia expositis sacris voluminibus confirmatur mens nostra, « ut jam non simus parvuli fluctuantes, et circumferamur omni vento doctrinæ in nequitia hominum, in astutiæ et circumventionem erroris (Ephes. iv, 14). » Cum autem hæc omnia se solum Pater facere testatur, non excludit a sua operatione Filium, sed idola. « Quæcunque enim Pater fecerit, hæc et Filius similiter facit (Joan. v, 19). » Inseparabilis quippe est operatio Trinitatis. Sequitur :

VERS. 25. — « Irrita faciens signa divinatorum, et hariolos in furorem vertens. »

(157) Cod. Cruc., *dictum*.

Divini signa quædam observabant, a quibus causas divinationis sumebant. Sed hæc Dominus irrita fecit, ut nihil veri per ea nosceretur. *Hariolos* etiam, qui juxta dæmonum aras vaticinabantur, in *furorem* vertit, ut nihil nisi furere et bacchari spiritu dæmoniaco possent. Sequitur :

« Convertens sapientes retrorsum, et scientiam vorum stultam faciens. »

Sapientes sæculi convertit retrorsum, id est in insipientiam : et vanam scientiam eorum stultam fecit. Scriptum est enim : « Perdam sapientiam sapientium, et prudentiam prudentium reprobabo. Ubi sapiens, ubi scriba, ubi conquisitor hujus sæculi? nonne stultam fecit Deus sapientiam hujus mundi? Nam quia in Dei sapientia non cognovit mundus per sapientiam Deum, placuit Deo per stultitiam prædicationis salvos facere credentes (I Cor. 1, 19-21). » Unde subditur :

VERS. 26. — « Suscitans verbum servi sui, et consilium nuntiorum suorum complens. »

Servus enim hoc loco vocatur Dominus Jesus propter formam servi, quam ipse assumpsit. Cujus verbum, id est quicquid ille in Evangelio per se ipsum locutus est, Pater suscitavit ut fieret. Nuntii vero ejus nominantur apostoli, quorum fuit consilium, ut dispersi per quatuor mundi climata unum concorditer Evangelium prædicarent, et omne genus humanum ad fidem converterent. Et hoc consilium ut ab eis fuerat definitum, Dominus complevit. Sequitur :

« Qui dico Jerusalem : Habitaberis : et civitatibus Juda : Ædificabimini, et deserta suscitabo. »

Nunc juxta historiam reditum Israelitici populi de Perside significat in Judæam. Mystice vero Jerusalem Ecclesia est, quam a credentibus inhabitandam pollicetur Dominus. Civitates Juda, id est civitates confessionis diversæ Ecclesiæ fidelium sunt, quæ tamen unam faciunt. *Deserta* Ecclesiæ vel confessionis sunt homines ad vitam præordinati, sed adhuc in infidelitate permanentes ; vel fidem jam habentes, sed bonis operibus carentes, vitiisque repleti, quia somno veteris inertiae suscitantur, quando mentem eorum divina gratia tangens excitat, ut convertantur. Sequitur :

VERS. 27. — « Qui dico profundo : Desolare, et flumina tua arefaciam. »

Flumina Babylonis industria Medorum arefacta esse feruntur, quando Balhasar interfectus est, ut per arentia flumina caperetur civitas. Sed juxta spiritualem intelligentiam quid profundum est, id est mare, nisi præsens sæculum? Quod desolatur, dum gloria mundi destruitur et potentia ejus, et quod scriptum est impletur : « Nolite diligere mundum, neque ea quæ in mundo sunt (I Joan. 11, 15). » Et *flumina* arefaciant dum dogmata sæcularis scientiæ annullantur.

Vel certe profundum Dominus annullavit, quando Salvatore nostro ad infernum descendente confregit portas ejus, et inde suos extraxit electos. Cujus

A *profundi flumina* arefecit, quando lubricas dæmonum suggestiones de cordibus nostris exsiccavit. Sequitur :

VERS. 28. — « Qui dico Cyro : Pastor meus es, et omnem voluntatem meam complebis. »

Cyrus rex Persarum pastor Dei fuit, quia gregem populi Israel custodivit, divinamque voluntatem in relaxationem captivitatis ejus complevit. Interpretatur autem *hæres*, et significat eum, cui Pater dixit : « Postula a me, et dabo tibi gentes hereditatem tuam, et possessionem tuam terminos terræ (Psal. 11, 8). » Cyro ergo ait Dominus : *Pastor meus es*, quia Salvator noster est bonus pastor, qui posuit animam suam pro ovibus suis, ut a Patre mandatum acceperat, et ipse veraciter omnem Patris voluntatem in omnibus complevit. Sequitur :

« Qui dico Jerusalem : Ædificaberis ; et templo : Fundaberis. » Et hic restorationem et templi et Jerusalem significat, quæ per Nehemiam et Zorubabel facienda erat (I Esdr. 11, 2 ; II Esdr. 11). Nostra quoque Jerusalem, quæ sursum est, vivis lapidibus per Christum ædificatur. Templum etiam fundatur, quando mens credentium in fide collocatur. « Templum enim Domini sanctum est, quod estis vos (I Cor. 11, 17), » ait Apostolus, « et fundamentum aliud nemo potest ponere præter id quod positum est, id est : Christus Jesus (ibid. 11). »

CAPUT XLV.

VERS. 1. — « Hæc dicit Dominus christo meo Cyro, cujus apprehendi dexteram, ut subjiciam ante faciem ejus gentes, et dorsa regum vertam, et aperiam coram eo januas, et portæ non claudentur. »

VERS. 2. — « Ego ante te ibo, et gloriosos terræ humiliabo, » et cætera.

Reges in populo Israel ungebantur oleo sancto, et idcirco vocabantur *christi*, id est uncti, sed apud gentiles non fiebat hæc unctio. Cur ergo Cyrus appellatur *christus*, cum non sit oleo benedictionis unctus? Quia imperialis dignitas reputatur ei pro unctione. Quod autem ait : *Hæc dicit Dominus christo meo Cyro*, tale est, ac si diceret : Hæc dico ego Dominus christo meo Cyro. Vel Cyrum dicit Pater suum regem esse. Et quæ Spiritus sanctus ei dicat, innotescit : *Cujus*, inquit, *apprehendi dexteram*, id est virtutem dedi, ut nullus fortitudini ejus valeret resistere. *Ut subjiciam ei gentes*, id est Babylonios, et Medos, et Ægyptios cæterasque gentes, *et dorsa regum earum in faciem ejus vertam*, ut fugiant. Quæ enim gens illi resistere potuit? Quis regum non ei terga dedit? « Et apertam coram eo januas, et portæ non claudentur. » Quæ enim civitas illi non patuit?

Ego, inquit, *ante te ibo*, id est terrorem meum eis inmittam, ad quos venturus eris : *et gloriosos terræ humiliabo* sub manu tua, *portas æreas contegram et vectes ferreos confringam*. Et hoc ita factum est. Qui enim muri prius inexpugnabiles obsidente

Cyro non sunt subversi? Cætera in hunc modum A facile possunt intelligi. Subdit enim :

VERS. 3. — « Et dabo tibi thesauros absconditos, et arcana secretorum, ut scias quia ego Dominus, qui voco nomen tuum, Deus Israel. »

VERS. 4. — « Propter servum meum Jacob, et Israel electum meum. »

Longe antequam nasceretur, vocatus est proprio nomine Cyrus a Domino propter populum Israel, quem de captivitate erat relaxaturus. Sequitur :

« Et vocavi te nomine tuo assimilavi te, et non cognovisti me. »

Nominatim vocati te, priusquam esses, ut Isaac et Josiam olim ante vocaveram. Assimilavi te in appellatione Filio meo, ut et tu Christus, id est unctus vocaberis, atque Cyrus, id est hæres, eo quod B avuuculis tui Darii hæreditatem, id est regnum illius susceperis. Et non cognovisti me, quoniam in errore idololorum permansisti. Nam si me pura mente cognovisses, scires quod sequitur :

VERS. 5. — « Ego Dominus, et non est amplius, et extra me non est Deus. »

Non ergo cognovisti me, quia deos esse alienos præter me credidisti. Sequitur

« Accinxi te et non cognovisti me. »

VERS. 6. — « Ut sciant hi, qui ab ortu solis, et qui ab occidente, quoniam absque me non est Deus. »

Accinxi te potentia, ut populum meum dimitteres, quatenus ex eorum relaxatione multi ab oriente et ab occidente cognoscerent, quia solus ego sum C Deus, qui sic eos, quando volui, liberavi.

Sed jam videamus utrum et aliter hæc intelligi queant. Notum enim cunctis est, quis sit Christus Domini, nimirum ille, quem unxit Deus Spiritu sancto et virtute, qui et Cyrus est, id est hæres secundum quod Apostolus ait, quia sumus « hæredes quidem Dei, cohæredes autem Christi (Rom. viii, 17). » Cujus, inquit, apprehendi, dexteram, ut diceret mihi : « Tenuisti manum dexteram meam, et in voluntate tua deduxisti me (Psal. lxxii, 32). » Ut subjiciam tunc faciem ejus gentes, ut « in nomine Jesu omne genu flectatur (Philipp. ii, 10). » Et dorsa regum earum vertam, quia dæmones in fugam convertam. Et aperiam coram eo januas humanorum cordium, et portæ mentium ei non claudentur, sed patebunt, ut gaudentes eum suscipiant.

Quod autem sequitur : Ego ante te ibo, et gloriosos terræ humiliabo, secundum quod superius ait, intelligi debet : « Quis suscitavit ab oriente justum vocans eum, ut sequeretur se? dabit in conspectu ejus gentes, et reges obtinebit (supra xli, 2). » — « Portas, inquit, æreas conteram, et vectes ferreos confringam. » Æs quia rubigine non consumitur, valde durabile est. Et quid per portas æreas nisi diu obstrati humanarum mentium aditus exprimuntur? Quid per vectes ferreos nisi dura obstinatio malæ voluntatis figuratur, quæ januam cordis Christo non sinit aperiri? Conteram ergo virtute Spiritus

mei portas mentium æri similes in diuturna duritia, et vectes internæ obstinationis ut ferrum duras, ut et durissima corda adventui gratiæ tuæ pateant.

Et dabo tibi thesauros absconditos, et arcana secretorum, ut « in te sint omnes thesauri sapientiæ et scientiæ absconditi (Coloss. ii, 3). » Vel thesauros absconditos, id est homines ad vitam præordinatos, sed adhuc peccatis opertos. Latens enim thesaurus erat Saulus, dum Ecclesiam persequeretur. Hujusmodi ergo thesauros dabo tibi, et arcana secretorum manifestabo tibi, ut de singulis scias, quis in malitia vel sanctitate perseveraturus sit, aut quis minime. Et ut scias, id est membris tuis facias sciro, quia ego Dominus, qui voco nomen tuum, Cyrus, id est hæredem propter servum meum Jacob, id est propter eos qui cum vitiiis luctantur, et nondum amici, sed adhuc servi merentur vocari. Et propter Israel electum meum, id est propter eos, qui contemplationi cœlestium sunt intenti. Nam propter fideles meos vocavi te hæredem meum, quia ipsi sunt hæreditas mea, quam dedi tibi.

Et vocavi te nomine tuo Jesum, id est Salvatorem. Tu enim salvum facies populum tuum a peccatis eorum. Vel nomine tuo, sicut dictum est, vocavi te hæredem, quia « dabo tibi gentes hæreditatem tuam (Psal. ii, 8). » Et assimilavi te cæteris hominibus, quia es « in similitudinem hominum factus, et habitu inventus ut homo (Philipp. ii, 7). » Hæc omnia propter servum meum Jacob, et propter Israel electum meum.

Quod autem subjungitur : « Et non cognovisti me, » nullo modo ad personam Redemptoris nostri fas est referri. Sed quia idem Dominus ex Judæis carnem assumens unum cum eis in genere factus est, potest, ut mihi videtur, ad infidelem Judæorum populum referri, quod ait : Et non cognovisti me. Qui enim olim tanto tempore coluerunt Baal, et Domino quoque sacrificia reddebant, non cognoverunt eum. Unde et addit :

« Ego Dominus, et non est amplius, et extra me non est Deus. » Nam qui deos alios esse putabant, eum qui solus est Deus et Dominus, non cognoscebant. Deinde accinxi te, inquit, o Christe, mirifica potentia, et tu, popule Judæorum, non cognovisti me. Ideo te, Christe meus, accinxi, ut per te sciant hi qui ab ortu solis, et qui ab occidente sunt, quoniam absque me non est Deus, ut sit « ab ortu solis usque ad occasum laudabile nomen Domini, et excelsus super omnes gentes Dominus (Psal. cxii, 5). » Inde et repetit : Ego Dominus, et non est alter. Atque subjungit :

VERS. 7. — « Formans lucem et creans tenebras, faciens pacem et creans malum : ego Dominus faciens omnia hæc. »

Lucem veræ scientiæ Dominus in nobis format, et tenebras afflictionis exterius creat. Pacem mentis intrinsecus facit et mala adversitatis forinsecus creat. De quibus malis et per beatum Job dicitur :

« Si bona suscepimus, de manu Domini mala quare non sustineamus (*Job. II, 10.*)? » Non enim mala, quæ nulla sua natura subsistunt, a Domino creantur, sed creare mala Dominus se indicat, cum res bene conditas nobis male agentibus in flagellum format, ut ea ipsa et per dolorem, quo feriant, delinquentibus mala sint, et per naturam, qua existunt, bona. Unde et venenum mors quidem est homini, sed vita serpenti. Amore enim præsentium ab auctoris nostri dilectione recessimus, et perversa mens, dum dilectioni creaturæ se subdidit, a Creatoris societate se disjunct. Ex his a Creatore ferienda erat, quæ errans Creatori præposuerat, ut unde homo culpam non timuit superbus admittere, inde poenam corrigendus inveniret, et tanto citius resipisceret ad illa quæ perdidit, quanto doloris plena esse conspiceret, quæ quæsit. Unde et bene dicitur: *Formans lucem et creans tenebras*, quia cum per flagella exterius tenebræ creantur, intus per eruditionem lux mentis accenditur. *Faciens pacem, et creans mala*, quia tunc nobis pax cum Deo redditur, cum hæc, quæ bene condita sed non bene concupita, in ea quæ nobis mala sunt, flagella vertuntur. Per culpam quippe Deo discordes exstitimus. Dignum ergo est, ut ad pacem illius per flagella redeamus, ut dum unaquæque res bene condita nobis in dolorem vertitur, correctam ad auctoris pacem humiliter reformetur. Hæc itaque flagella Dominus mala nominat, quia salutis et tranquillitatis bonum perturbando feriant. Sed quia de his, quæ per Christum erat acturus, vel ei facturus hucusque præmisit, nunc de ejus nativitate subjungit :

VERS. 8. — « Rorate cœli desuper, et nubes pluant justum : aperiatur terra, et germinet Salvatorem, et justitia oriatur simul : ego Dominus creavi eum. »

Id est veniat angelus, prædicet verbum : *aperiatur terra*, audiat Maria : *et germinet Salvatorem*, et pariat Jesum : *et justitia oriatur simul*, ut ille non post justificetur, sed cum justitia nascatur. Justus enim et sanctus est natus attestante Angelo, qui matri ejus dixerat : « Spiritus sanctus superveniet in te, et virtus Altissimi obumbrabit tibi, ideoque et quod nascetur ex te sanctum, vocabitur filius Dei. (*Luc. I, 35.*) » Unde et addit : quia ego Dominus creavi eum. Ac si dicat : Per operationem Spiritus mei creatus est in utero virginis, non per coitum viri generatus. Sed quia hunc Judæus quisque non filium virginis sed filium Joseph asserit, recte subjungitur :

VERS. 9. — « Væ qui contradicit fictori suo, testa de samis terræ !

Contradicit enim fictori, id est plasmatori suo, quando carnalis Judæus Jesum, quem conditor omnium Deus singulariter creasse se testatur, viri semine, sicut cæteros, creatum dicit. Samis autem insula vel civitas est, in qua dicitur ars figulorum inventa, et ideo fictilia vasa vocantur *samia*. Quod

(158) *Alias, Do. San. 18r.*

(159) *Alias, filios meos et super opus man. mear., etc.*

igitur ait : *Testa de samis terræ*, tale est ac si diceret : *Testa de testis terræ*, luteum vas ex luteis vasis terræ. *Testa de samis terra* est omnis qui ex viro et femina generatus est. Et hæc testa contradicere audet *fictori suo*, si ipse ex eodem luto facere voluerit quoddam mirabile vas in honorem singulariter sanctificatum et utile ad omne opus bonum paratum? Unde et sequitur :

« Nunquid dicit lutum figulo suo : Quid facis, et opus tuum absque manibus est? »

Lutum enim dicit figulo suo : Quid facis, quando Iteus homo contra sui plasmatoris actionem, quæ Christum ex Virgine creat, audet disputare et dicit ei : *Opus tuum absque manibus tuis est*, id est tuæ manus non sunt in hoc opere, quando negat eum fecisse, quod fecit, id est Christum ex Virgine creasse. Unde et adhuc subditur :

VERS. 10. — « Væ qui dicit patri : Quid generas? et mulieri : Quid parturis? »

Dicit enim patri : *Quid generas*, vel qui latentes causas æternæ generationis Filii Dei temerarie scrutari conatur, vel qui eidem generationi contradicit in aliquo. *Et mulieri*, id est electæ seminae, quæ virgo eum genuit : *Quid parturis*, vel qui partum ejus temerarie præsumptione discutere nititur, vel qui eundem partum ejus reprehendit. Mulier enim hoc loco pro sexu posita est, sicut et ibi : « Misit Deus Filium suum factum ex muliere (*Galat. IV, 4.*) » Vel patri dicit : *Quid generas?* qui prædicatorem ex eo increpat, quod per Evangelium Deo filios adoptionis gignit. *Et mulieri dicit : Quid parturis?* qui Ecclesiæ indignatur, quia spiritaes filios parit. Sequitur :

VERS. 11. — « Hæc dicit Dominus Deus (158) Israel plastes ejus : Ventura interrogate me. »

Plastes Israel est, qui ait alibi : « Ecce sicut lutum in manu figuli, sic vos in manu mea filii Israel (*Jer. XVIII, 6.*) » Vel illud ejus refertur ad Christum, quem Deus per Spiritum sanctum plasmavit in utero Virginis. Qui et nunc dicit eidem populo Israel : Nolite mihi contradicere in his, quæ de incarnatione Christi prænuntio, sed magis *interrogate me ventura* de eo, vel de ejus Ecclesia. Et increpando subjungit : « Super filios meos, et super filias meas, et super opus manuum mearum mandate mihi (159). » Ac si dicat : Non necesse est ut quæ de Christo et Ecclesia facturus sum, vos mihi, qualiter ea faciam, præcipiatis. Unde potentiam suæ actionis demonstrans subjicit :

VERS. 12. — « Ego feci terram, et hominem super eam creavi ego : manus meæ tetenderunt cœlos, et omni militiæ eorum mandavi. »

Ita est, ipse fecit *terram et hominem*, atque *cælos* tetendit, et *omni militiæ eorum* mandavit, id est angelis ut ministeria et officia sua implerent, et stellis, ut suos cursus peragerent, et locis ac temporibus suis apparerent. Potest vero per *terram* Ecclesia,

et per *hominem* mediator Dei et hominum homo A
Christus Jesus intelligi.

Quid autem per *cælos* nisi mentes electorum designantur a cunctis terrenis contagiis intimo amore suspensæ? Quos videlicet *cælos manus Domini* extendit, quia luce visionis intimæ laxatur mentis sinus, tantumque expanditur in Deo, ut superior existat mundo, cumque in Dei lumine rapitur, etiam super se in interioribus ampliatur; et dum se sub se conspicit, exaltata comprehendit, quam breve sit, quod comprehendere humiliata non poterat. Sic ergo Dominus *cælos* extendit, quia quamlibet parum deliciae Creatoris meus aspexerit, angustum fiet ei omne quod creatum est. Quæ est autem *militia* talium *cælorum* nisi conversatio justorum? Nam « *militia est vita hominis super terram (Job. vii, 1).* » Cui *militiæ Dominus mandavit*, quia vitæ sanctorum præcepta sic agendi dedit. Qui de Christo suo, de quo frequenter est locutus, subjungit :

VERS. 13. — « Ego suscitavi eum ad justitiam, et omnes vias ejus dirigam. »

Suscitavi, id est nasci feci *eum ad justitiam* faciendam, sicut et alibi dicitur : « Quia suscitabo David germen justum, et faciet iudicium et justitiam in terra (Jer. xxiii, 5). » Et omnes vias *ejus dirigam*; quia « voluntas Domini in manu ejus dirigetur, et omnia quæcunque faciet, prosperabuntur (Isa. liii, 16).

« Ipse ædificabit civitatem meam, et captivitatem meam dimittet non in pretio, neque in muneribus, C
dicit Dominus Deus exercituum. »

Supernam Jerusalem vivis lapidibus ædificabit, et nos de Babylonis hujus, id est confusi sæculi captivitate gratis liberabit. Peccante enim proto-parente nostro captivatus est a diabolo, et in peregrinationis hujus ejectus in exilium a patria sua. Unde fit, ut omnes ejus filii in hoc sæculo velut in Babylone captivi teneantur, donec per eum liberentur, qui ait : « Si vos Filius liberaverit, vere liberi eritis (Joan. viii, 36). » Hanc ergo *captivitatem ipse dimittit*, dum nos ad antiquæ felicitatis patriam reducit, non in pretio, quod a nobis accipiat, neque in muneribus, sed gratuita miseratione. « Gratis enim estis salvati (Ephes. ii, 8), » ait Apostolus. Ad quem scilicet liberatorem nostrum paterna promissione consequenter dicitur :

VERS. 14. — « Hæc dicit Dominus : Labor Ægypti, et negotiatio Æthiopiæ et Sabbaim viri sublimes ad te transibunt, et tui erunt : post te ambulabunt, vinctis manibus (160) pergent, et adorabunt, teque deprecabuntur. Tantum in te est Deus, et non est absque te Deus. »

VERS. 15. — « Vere tu es Deus absconditus, Deus Israel salvator. »

VERS. 16. — « Confusi sunt, et erubuerunt, omnes simul abierunt in captivitatem fabricatores errorum. »

VERS. 17. — « Israel salvatus est in Domino salute æterna. »

Ægyptus, ut supra dictum est, interpretatur *tenebræ*, Æthiopia *caligo*, Sabbaim vero dicuntur *captivi*. Et quid per Ægyptum et Æthiopiam nisi gentes exprimuntur tenebris obscuratum habentes intellectum, alienati a via Dei per igurantiam, quæ est in illis propter cæcitate cordis illorum? Et qui sunt *Sabbaim viri sublimes*, id est *captivi viri superbi* nisi de quibus optamus, ut det illis pœnitentiam Deus ad cognoscendam veritatem, et respiciant a diaboli laqueis, a quo captivi tenentur ad ipsius voluntatem?

Laborabat autem Ægyptus, et Æthiopia negotiatur, quia cæci gentiles labori terreno incumbant, et negotiis sæcularibus implicabantur. Sed *labor Ægypti, et negotiatio Æthiopiæ* transibit ad te, qui captivitatem non in pretio dimittis, ut gentiles, qui in tenebris infidelitatis pro temporali vita laborabant, in tua fide laborent pro sempiterna; et qui carnalia sectabantur negotia, spirituales fiant negotiatores internas divitias acquirentes. Hinc enim : « Simile est regnum cælorum homini negotiatori quærenti bonas margaritas, qui inventa una pretiosa margarita, abiit, et vendidit omnia quæ habuit, et emit illam (Matth. xiii, 45, 46).

Captivi quoque *viri sublimes*, id est hæretici vel potentes sæculi, aut quilibet versi contumaces, nunc fideliter *ad te transibunt*, maceriam peccati, quæ inter te et illos erat, transilientes, vel antiqui hostis castra deserentes, et in tuam partem transeuntes, *et tui erunt et post te ambulabunt* vestigia tua sequentes. « Qui enim dicit in Christo se manere, debet sicut ille ambulavit, et ipse ambulare (I Joan. ii, 6).

Vincti manicis pergent, quia sic viam justitiæ sequentur, ut manus eorum vinculis præceptorum tuorum ab opere malo restringantur. *Et te suppliciter adorabunt, teque deprecabuntur* dicentes, quia *tantum in te est Deus, et non est absque te Deus*. Non enim Deus in adversæ atque alienæ a se naturæ habitaculo est, sed in suo atque a se genito manet Deus in Deo, Pater in Filio. Ait enim : « Quia ego in Patre et Pater in me est (Joan. x, 38). » *Et non est, inquit, absque te Deus*, o Christe. Proprium etenim Filio Dei est ne absque eo Deus quisquam sit. Pater enim non est absque Filio, qui ait : « Ego et Pater unum sumus (ibid. 30). » Et : « Quia in me est Pater, et ego in Patre. » Non enim sunt duo dii Pater et Filius, sed unus Deus. Eodem modo sciendum est de Spiritu sancto.

Deinde viri sublimes, *vere*, inquit, *tu es Deus absconditus*, quem miser iste mundus ignorat, Deus qui salvas Israel, qui solus salvare potes. Neque enim dii gentium suos cultores salvare valent. Vel *tu es Deus absconditus*, quia « Verbum erat apud Deum, et Deus erat Verbum (Joan. i, 1). » Recte

(160) Alias, *vincti manicis*. Cod. G. *vinctis manicis*. Crucensis infra : *vincti manicis*.

enim *Deus absconditus* dicitur unigenitus Filius, qui est in sinu Patris. Sive propter corporis assumpti sacramentum vocatur *Deus absconditus*. Ubi autem iste *Deus absconditus* innotuit mundo, *confusi sunt fabricatores errorum* gentiles ac hæretici, et *erubuerunt omnes simul* opprobrium insipientiæ suæ potantes, et *abierunt* in captivitatem sempiternæ damnationis, ubi cum diabolo perpetualiter vincti custodientur in infernali carcere.

Israel vero, id est electorum populus, *salvatus est in Domino salute æterna*. « Scimus quoniam si terrestris domus nostra hujus habitationis dissolvatur, quod ædificationem ex Deo habemus domum non manufactam æternam in cœlis (II Cor. v, 5). » Sed quia pii solent ab impiis derideri (161), bene ad eos consolatoria promissione subditur, quia *non confundemini, et non erubescetis in sæculum sæculi*. Non confundemini propter blasphemias infidelium in præsentem sæculo, donec *sæculum sæculi* veniat, id est sæculum illud quod huic succedet, in quo perpetualiter gloriabimini. Et cur (162) confundi vel erubescere non habeatis. Sequitur :

Vers. 18. — « Quia hæc dicit Dominus creans cœlos, ipse *Deus formans terram, et faciens eam, ipse plastes ejus* : non in vacuum (163) creavit eam : ut habitaretur, formavit eam : Ego Dominus, et non est alius. »

Ideo, inquit, non erubescetis, quia Dominus Jesus, qui *creavit potentia suæ divinitatis cœlos, et fecit, et formavit terram, ut habitaretur* ab hominibus, ipse modo cunctis habitatoribus clamat se solum esse Dominum, et præter se nullum esse Dominum. Sequitur :

Vers. 19. — « Non in abscondito locutus sum, in loco terræ tenebroso. »

Hoc est, nisi fallor, quod in Evangelio dicit : « Ego palam locutus sum mundo, ego semper docui in synagoga et in templo, quo omnes Judæi conveniunt, et in occulto locutus sum nihil (Joan. xviii, 20). » Nam qui communem salutem annuntiabat cunctis ad se generaliter confluentibus, quomodo in abscondito loquebatur? At contra hæresis in occulto loquitur, in loco terræ tenebroso, quia (164) dicitur in Proverbiis . « Aquæ furtivæ dulciores sunt, et panis absconditus suavior (Prov. ix, 17). » Vel non in absconso locutus est se solum esse Deum, qui in monte Sina de excelso ejus vertice clamavit : « Non erunt tibi dii alieni absque me, nec facies tibi idolum (Deut. v, 7). » Sed melius de apostolica prædicatione accipitur. Dominus vero subdit :

« Non dixi semini Jacob : Frustra quærite me. »

Ac si dicat : Non incassum eos adventum meum expectare feci, quoniam ad eos, ut promiseram, veni. Et de doctrina sua subjungit : « Ego Dominus

(161) Cor. G., *irrideri*.

(162) In cod. Garst. verba hæc : *et cur, etc.*, usque ad : *quia hæc, etc.*, desiderantur.

(163) *Alias, in vanum*.

loquens justitiam, annuntians recta. » Ac si dicat : Omne quod ex ore meo procedit, justum et rectum est. Et revera sic est. Quid enim *rectum* quam quod in Evangelio præcepit, aut loquitur? Hac enim justitia fideles justificantur, qui in lege non poterant justificari. Qui sicut tibi ait : « Venite ad me omnes, qui laboratis et onerati estis (Matth. xi, 28), » ita et hic quoque subjicit, dicens :

Vers. 20. — « Congregamini et venite, et accedite simul, qui salvati estis ex gentibus. »

Congregamini in caulas Ecclesiæ, et in merito bonæ actionis *venite, et accedite simul* omnes, qui spe *salvati estis ex gentibus*. « Spe enim salvi facti sumus (Rom. viii, 24). » Et cur ad me festinanter debeat accedere, sequitur :

B « Nescierunt, qui levant signum sculpturæ suæ, et rogant Deum non salvantem. » Qui enim sibi sculptunt idolum, et adorant, nesciunt quid faciunt, quia obscuratum est insipiens cor eorum. Deinde præconibus Evangelii præcipitur :

Vers. 21. — « Annuntiate et venite, et consiliamini simul. »

Sancti enim prædicatores postquam annuntiaverunt venientes consiliati sunt simul, quando Judæi asserentes, oportere gentiles, qui ad fidem veniebant, circumcidi, Paulus cum Barnaba Jerosolymam ascendit audire (Act. xv), quid de hac resentirent priores apostoli. Nunc etiam præpositi ecclesiarum consiliantur simul in synodis et conciliis sæpe convenientes. Conversis vero gentibus subjungit Dominus :

Quis auditum fecit ab initio (165)? Et sibi ipsi respondet : *Ex tunc prædixi illud?* (166) Prædixit enim ex tunc, id est ab initio conversionem gentium prænuntians Abrahæ, « quia in semine tuo benedicentur omnes gentes (Gen. xxii, 18). » Rursum se solum contestatur esse Deum dicens : « Nunquid non ego Dominus, et non est ultra Deus absque me? Deus justus et salvans non est præter me. » Hoc evidens est. Nam qui dicuntur dii gentium injusti sunt omnes, et suos cultores non servant sed perdunt. Sequitur :

Vers. 22. — « Convertimini ad me, et salvi eritis, omnes fines terræ, quia ego Deus, et non est alius. »

D Et hoc manifestum est. Nullus enim Deus præter Christum, qui totum orbem ad se conversum salvat. Sequitur :

Vers. 23. — « In memetipso juravi, egredietur de ore meo justitiæ verbum, et non revertetur, quia mihi curvabunt omnia genua (167), et jurabit omnis lingua. »

« In memetipso, inquit, *juravi*, quoniam neminem habuit, per quem juraret majorem, juravit per semetipsum. Homines enim per majorem sui jurant,

(164) Ambo codd. *quæ*.

(165) *Alias, fecit hoc ab initio*.

(166) *Alias, prædixit*.

(167) *Alias, curvabitur omne genu*.

et omnis controversiæ eorum finis ad confirmationem est juramentum. In quo abundantius volens Deus ostendere pollicitationis hæredibus immobilitatem consilii sui interposuit jusjurandum, ut per duas res immobiles, quibus impossibile est mentiri Deum, firmissimum solatium habeamus (*Hebr. vi, 13 et seqq.*).

Sed quid juraverit, audiamus. *Egredietur de ore meo justitiæ verbum*, id est sententia judicandi per fidem omnes qui crediderunt. *Et non revertetur*, quia in sempiternum manebit justitia, quæ per fidem electis dabitur, nec me poenitebit hoc verbum emisisse. Nam *mihi curvabunt omnia genua*, « ut in nomine Jesu omne genu flectatur (*Philip. ii, 10*). » *Et omnis lingua jurabit mihi*, « ut omnis lingua confiteatur quia Dominus Jesus Christus in gloria est Dei Patris (*ibid. 11*). » *Omnis lingua jurabit mihi*, quia linguarum omnium diversitas in hoc concordabit, ut devotum mihi famulatum juret.

Vel quod ait, *quia mihi curvabunt omnia genua, et jurabit omnis lingua*, sic intelligamus ut Apostolus exposuit dicens : « Omnes stabimus ante tribunal Christi. Scriptum est enim : Vivo ego, dicit Dominus, quia mihi flectetur omne genu, et confitebitur omnis lingua. Itaque unusquisque nostrum pro se reddet rationem Deo (*Rom. xiv, 10-12*). » Nam juxta hunc sensum flectere genu Deo est stare ante tribunal Christi, et confiteri vel jurare Deo, rationem ei pro se reddere. Sequitur :

VERS. 24. — « Ergo in Domino dicit : *Meæ sunt justitiæ, et imperium.* »

Quoniam egredietur de ore meo justitiæ verbum, et flexo genu mihi jurabit omnis lingua; ergo omnis lingua mihi jurans dicit in Domino, id est in Patre meo : *Meæ sunt justitiæ*, quia per verbum Christi sum justificata : *et meum imperium*, quia in Christo regina facta sum. Hæc enim dicit Ecclesia, quæ in omnibus linguis et gentibus est. Quæ et inde suum dicit imperium, quia in toto orbe dominatur. De illis vero, qui Evangelium Dei non recipiebant, sequitur :

« Ad eum venient, et confundentur omnes qui repugnant ei. »

Ad Dominum enim veniunt vel nunc credendo, et confundentur de malis suis poenitentiam agendo, vel postmodum ut ante tribunal ejus stent, et æternæ confusionis opprobrium portent. De electis autem subditur :

VERS. 25. — « In Domino justificabitur, et laudabitur omne semen Israel. »

In Domino Jesu Christo justificabitur, sicut et Paulus Judæis ait : « Notum sit vobis, viri fratres, quia per hunc vobis remissio peccatorum annuntiabitur ab omnibus quibus non potuistis in lege Moysi justificari. In hoc omnis, qui credis, justificatur (*Actor. xiii, 38*). » *Et laudabitur in illo*, quia « laudabuntur omnes, qui jurant in eo (*Psal. lxxii,*

12). » Justificabitur in hac vita, laudabitur in illa omne semen Israel non carnale, sed spiritale. « Non enim omnes, qui ex Israel, si sunt Israelitæ, neque qui semen Abraham, omnes filii : sed in Isaac vocabitur tibi semen, id est non qui filii carnis hi filii Dei, sed qui filii promissionis sunt, æstimantur in semine (*Rom. ix, 6-8*). » Justificatis autem in Christo fidelibus et omnibus linguis ei jurantibus congrue subditur :

CAPUT XLVI.

VERS. 1. — Conflatus (168), est Bel, contritus est Nabo : facta sunt simulacra eorum bestiis et jumentis. »

Credentes enim omnia conflaverunt et contriverunt idola. *Bel* namque et *Nabo* fuerunt idola. Interpretatur autem *Bel* *vetustus*, et *Nabo* *sessio*. Et quis est hic vetustus nisi antiquus hostis? aut quæ est hæc sessio, nisi quam voluit, dum sedem suam ad aquilonem ponere cogitaret? Sessio hæc regnum in infidelibus est. *Bel* igitur *conflatus est* et *Nabo contritus* quia diabolus tartareis incendiis est traditus, et regnum ejus poenitentia contritum de corde eorum, qui crediderunt.

Simulacra eorum, id est diaboli et dominationis ejus fuerunt idola, et hæc *bestiis et jumentis facta sunt*, quia homines, qui bestiali ferocitate sæviebant, et qualibet onera sibi a dæmonibus imposita non renitentes portabant, coluerunt ea, quibus deinde dicitur :

« Onera vestra gravi pondere usque ad lassitudinem. »

VERS. 2. — « Contabuerunt, et contrita sunt simul : non potuerunt salvare portantem. »

Idola enim, quæ gravi pondere eos fatigabant, qui se portabant, postmodum confracta sunt, et computruerunt, nec suos bajulatores salvare valuerunt. Nam sequitur :

« Et anima eorum in captivitate ibit. » Id est æternis vinculis stricta ducetur in carcerem perpetuæ damnationis.

Vel hoc dicendum, quod gravissimum onus in gentibus errorum idololatriæ fuerit, quæ cultores suos deprimebat in terram; dii quidem gentium facti sunt a cultoribus suis, et portantur ab eis, nec eos salvare possunt, a quibus portantur; sed Deus noster ipse fecit nos, et ipse portat, et salvat nos. Sequitur :

VERS. 3. — « Audite me, domus Jacob, et omne residuum domus Israel, qui portamini a meo utero, qui gestamini mea vulva. »

VERS. 4. — « Usque in senectam ego ipse, et usque ad canos ego portabo : ego feci, et ego feram, et ego portabo et salvabo. »

Nam *domus Jacob* Ecclesia est fidem patriarcharum tenens, quia Christus « regnabit in domo Jacob in æternum (*Luc. i, 33*). » Et quod est *residuum domus Israel*, nisi de quo dictum est, quia « omnia

qui relictus fuerit in Sion, et residuus in Jerusalem, **A** quo positus est in loco suo, non potuit se movere, sanctus vocabitur (*supra* iv, 3). » Potest et historialiter accipi *domus Jacob* et *residuum domus Israel* antiquus Dei populus.

In utero autem concipitur proles, quæ in hanc vitam profertur. Quid ergo uterum seu vulvam Dei nisi ejus consilium debemus accipere, in quo ante sæcula per prædestinationem recepti sumus, ut creati per sæcula producamur? Ambrosius autem loquens de Unigenito: « Sicut sinus Patris spiritalis intelligitur intimum quoddam paternæ charitatis naturæque secretum, in quo semper est Filius, ita etiam Patris est vulva spiritalis interioris arcanum, de quo tanquam de genitili alvo processit Filius. » Nos vero, quia de adoptivis filiis loquimur, vulvam vel uterum Dei, sicut diximus, consilium ejus accipimus. **B** A quo scilicet utero portamur, quia Deus consilio sapientiæ patienter nos portat cognoscens qui sunt ejus.

Quæ est autem ejus senectæ nisi perpes infinitas? *Usque ad senectam* ergo ipse est, qui usque in æternum sine varietate mutationis permanet, cui dictum est: « Tu autem idem ipse es, et anni tui non deficient (*Psal.* ci, 28). » Ipse quidem usque ad senectam suam, quæ est perpetua immortalitas, et infinitas, manet; nos vero *portat usque ad canos* senectutis nostræ, id est longanimiter nos tolerat usque ad finem vitæ præsentis, et tunc singulis, quod meruere, restituet. Vel *usque ad senectam* non suam sed nostram *ipse nos portat* tolerans et pro- **C** veheans, atque justa miseratione perpetualiter salvabit. Et in omnibus his operibus suis omnino contrarius est diis gentium. Unde rursum idololatrias increpat, dicens:

Vers. 5. — « Cui assimilastis me et adæquastis, et fecistis similem? »

Vers. 6. — « Qui confertis aurum de sacculo, et argentum statera ponderatis: conducentes artificem, ut faciat deum. »

Eum quippe in sua æstimatione similem faciebant idolo materiali, « Qui, sicut Apostolus ait, mutaverunt gloriam incorruptibilis Dei in similitudinem imaginis corruptibilis, hominis, et volucrum, et quadrupedum, et serpentium (*Rom.* i, 25). » De quibus et subditur: « Et procidunt, et adorant. » **D**

Vers. 7. — « Portant illum in humeris gestantes et ponentes in loco suo, et stabit, et de loco suo non movebitur, sed cum clamaverint ad eum, non exaudiet (169), de tribulatione non salvabit eos. » Totum hoc manifestum est. Sequitur:

Vers. 8. — « Mementote istud, et fundamini (170): redite, prævaricatores, ad cor. »

Vers. 9. — « Recordamini prioris sæculi, quoniam ego sum Deus, et non est ultra Deus, nec est similis mei. »

O, inquit, cultores idoli, *mementote*, id est recogitate illud, quia Deus vester ita fabricatus est, et ex

quo positus est in loco suo, non potuit se movere, nec suos cultores audire valet aut juvare, *et fundamini* in veritate, ne per varios errores meas vestra fluctuet.

Redite ad cor vestrum sub imagine, quam foras cernitis, quia sensum rectæ cogitationis in talibus amisistis. Quid autem nobis vicinius est corde nostro? Et tamen cum per pravas cogitationes spargitur, a nobis cor nostrum longius evagatur. Longius ergo istos mittit, quos ad cor suum redire præcipit, quia quo se exterius fuderint, eo a se, unde possint redire, vix inveniunt. Sparsis enim foris mentibus ad semetipsas redire difficile est, quia qui terrenis desideriis implicantur, eos prava itinera semel captos tanto delectabiliter tenent, quanto in eis omne quod libuerit, licet. Quippe nullus disciplinæ murus obviat, qui stringat, nulla retributionis prospicitur poena, quæ terreat, sed clausis oculis cordis eo anima præcipitatur in infirmis, quo obscuratur a summis; et tanto securius mala temporalia perpetrat, quanto durius æterna bona desperat.

Tales erant illi « qui, cum cognovissent Deum, non sicut Deum glorificaverunt, aut gratias egerunt, sed evanuerunt in cogitationibus suis, et obscurati est insipiens cor eorum: dicentes enim se esse sapientes, stulti facti sunt, et, « ut prædictum est, » mutaverunt gloriam incorruptibilis Dei in similitudinem imaginis corruptibilis, hominis, et volucrum, et quadrupedum et serpentium. Propter quod tradidit illos Deus in desideria cordis eorum, in immunditiam, ut contumeliis afficerent corpora sua in semetipsis (*Rom.* i, 21-24). » Cum ergo divinæ bonitati placet respicere tales, congrue dicit eis: *Redite prævaricatores ad cor.* *Prævaricatores* enim sunt qui, cum cognovissent Dominum, non sicut Deum glorificaverunt. In eo enim quod Deum cognoverunt, quodammodo legem acceperunt, ut ei gloriam darent, sed hanc prævaricati sunt in cultura idolorum. Vel naturalem legem prævaricati sunt inique agendo.

Quos postquam a vanitate, qua se foras sparse- rant in idololatria, redire ad cor suum præcepit: *Recordamini*, inquit, *prioris sæculi*, quia tunc nec nominatum fuerat idolum. Si enim idola dii essent, utique mundum fecissent. Sed in priori sæculo non fuerunt, ideoque dii esse non possunt. *Ego enim*, qui mundum creavi, *sum Deus*, et non est ultra Deus, sicut nec ultra mundus, nec est quisquam *similis mei*. Ad hoc autem, quod dixerat, quia *non est similis mei*, bene subjectit:

Vers. 10. — « Annuntians ab exordio novissimum, et ab initio quæ nondum facta sunt, dicens: Consillum meum stabit, et omnis voluntas mea fiet. »

Annuntiavit enim Deus *ab exordio novissimum* dicens in Adam, quia « relinquet homo patrem suum (*Gen.* ii, 24), » id est Christus a solio majestatis

(169) *Alias, non audiet, etc.*

(170) *Alias, confundamini.*

suæ descendet, et matrem (*Gen. 11, 4.*), id est Synagogam deseret, et adhærebit uxori suæ (*ibid.*), id est Ecclesiæ et erunt duo in carne una (*ibid.*). Cujus consilium stabit, et omnis voluntas ejus fiet, quoniam ejus voluntati nec illa obsistent, quæ contra voluntatem illius fieri videntur, quia ad hoc nunquam permittit fieri, et quod non præcepit, ut per hoc certius impleatur, quod jubet. Apostatæ enim angelo perversa voluntas est, sed tamen a Deo mirabiliter ordinatur, ut ipsæ quoque ejus insidiæ utilitati bonorum serviant, quos purgant, dum tentant. Sic ergo consilium ejus stat, ut inde magis voluntatem suam impleat, unde voluntatis ejus consilio quis contraire nititur.

Sed dum ab exordio novissimum, et ab initio quæ necdum facta sunt, annuntiat dicens: Quia consilium meum stabit, et omnis voluntas mea fiet, satis ostendit se de eo consilio dicere, quo disposuit, ut propinquante mundi termino diabolus per passionem Salvatoris humanum genus amitteret. Hoc enim annuntiavit ab exordio dicens serpenti, quia inimicitias ponam inter te et mulierem et semen tuum, et semen illius (*Gen. 11, 15.*) Et voluntas ejus salus mundi est, qui omnes homines vult salvos fieri, et ad agnitionem veritatis venire (*1 Tim. 11, 4.*) Et hæc voluntatem suam ab initio denuntiavit Abraham promittens ei, quia in semine tuo benedicentur omnes gentes (*Gen. 22, 18.*) Sed hæc nondum erant facta, id est voluntas ejus in salvatione mundi necdum erat impleta, dum per prophetam hæc loqueretur. Qui quoniam Christum suscitavit a mortuis, et constituit ad dexteram suam in cœlestibus, bene post denuntiationem consilii illius passionis de ipso subjungit:

VERS. 11. — Vocans ab oriente avem, et de terra longinqua virum voluntatis meæ.

Eum quippe nuncupat avem, qui corpus carneum, quod assumpserat, ascendendo ad æthera libravit. Et eundem appellat virum voluntatis suæ, de quo et alibi testatur: Hic est Filius meus dilectus, in quo mihi bene complacui (*Matth. 11, 17.*) Jam vero diximus, quia Judæorum populus idcirco vocatur oriens; quia de carne ejus idem Salvator natus est, qui sol justitiæ dicitur. Terra autem longinqua nominatur hæc regio nostra, in qua peregrini et hospites exsulamus. Vocavit itaque Deus ab oriente avem, et de terra longinqua virum voluntatis suæ, quando Christum de Bethania levavit in cœlum.

Vel gentilitas potest appellari longinqua terra, quia longe erat a Deo, dum serviret idolis. Qui vocavit ab oriente avem, quando Christum per apostolos a Judæis ad gentes misit. Et rursus de terra longinqua vocavit virum voluntatis suæ, quando per Eliæ prædicationem a gentibus eum reducit ad Hebræos. Et in his omnibus implebitur, quod ait: Quia consilium meum stabit, et omnis voluntas mea fiet. De quo etiam subdit:

Et locutus sum, et adducam illud: creavi, et faciam illud. Locutus sum per prophetas consilium meum, et adducam illud in tempore suo, et creavi illud prædestinando, et faciam illud operando. Unde sequitur:

VERS. 12. — Audite me duro corde, qui longe estis a justitia.

VERS. 13. — Prope feci justitiam meam, non elongabitur; et salus mea non morabitur. Dabo in Sion salutem, et in Jerusalem gloriam meam (171).

Nam duro corde semper fuere Judæi, et longe a justitia. Ignorantes enim justitiam Dei, et suam volentes constituere, justitiæ Dei non sunt subjecti (*Rom. 10, 3.*) Quibus ait: Prope feci justitiam meam, non elongabitur, et salus mea non morabitur, id est appropinquavit tempus, ut reveleetur (172) per Christum justitia fidei. Neque enim ultra elongabitur, et salus æterna, quæ per eum danda est credentibus, non morabitur amplius.

Dabo in Sion salutem æternam his, qui crediderint in vobis, et in Jerusalem gloriam meam super his, qui fidem Christi mei receperint, ut Spiritu sancto repleti loquantur omnibus linguis, et prophetent, atque signis et virtutibus coruscent. Hoc factum est in illa multitudo credentium, quorum erat cor unum, et anima una (*Act. 14, 52.*) Sequitur:

CAPUT XLVII.

VERS. 1. — Descende, sede in pulvere, virgo filia Babylonis, sede in terra.

Reprobis, et cum occasio deest peccatum perpetrandi, desideriorum cogitationes eorum cordibus nullatenus desunt; et cum non semper diabolus sequantur in opere, valde tamen se ei obligant in cogitatione. Unde nunc recte dicitur: Descende, sede in pulvere, virgo filia Babylonis, sede in terra. Cum enim semper pulvis sit terra, non tamen terra semper pulvis, quid per pulverem nisi cogitationes debemus accipere, quæ dum importune ac silenter in mente evolant, ejus oculos excæcant? Et quid per terram nisi terrena actio designatur? Et quia reproborum mens prius ad prava cogitanda ducitur, et postmodum ad facienda, recte filia Babylonis, quæ ab internæ rectitudinis judicio descendit, per ferientem sententiam dicitur, ut prius in pulvere, et post in terra sedeat, quia nisi se in cogitatione prosterneret, in malo opere non inhæsisset. Hoc enim loco humana mens virgo non incorrupta, ut arbitrator, dicitur, sed infecunda.

Et quia Babylon confusio interpretatur, recte infecunda mens Babylonis filia vocatur, quæ in eo, dum nequaquam bona opera germinat, dum nullo ordine recte vivendi componitur, quasi confusione matre generatur. Sin autem virgo non infecunda dicitur, sed incorrupta, postquam statum salutis perdidit, ad confusionis suæ cumulum appellatur, quod fuit. Cui apte per increpationem dicitur: De-

(171) Alias, et in Israel gloriam meam.

(172) Uterque cod., reveleetur.

scende. In alto quippe stat humanus animus, quando supernis retributionibus inhiat. Sed ab hoc statu *descendit*, cum turpiter victus sese defluentibus mundi desideriis subjicit. Cui bene mox additur: *Sede in pulvere.* Descendens enim in pulvere residet, qui cœlestia deserens terrenis cogitationibus aspersus in infimis vilescit. Ubi adhuc ingeminando subjungitur: *Sede in terra.* Ac si exprobrans dicat: Quia cœlestis conversatione nolui te erigere, sub temetipso humiliatus in terrenis actibus humiliare. Unde et necessario protinus additur:

Non est solum filia Chaldæorum. »

Chaldæi namque feroces sunt, quia voluntates proprias sequentes nec suis parcere mortibus sciunt. Feroces sunt terrena desideria, quæ non solum contra præcepta Conditoris, sed sæpe et contra percussionum verbera duram atque insensibilem mentem reddunt. Sed filia ferocium non habet solum, quia mens, quæ ad amorem mundi ex pravis desideriis nascitur, atque eisdem desideriis obduratur, in eo quod se terrenis concupiscentiis subjicit, sedem iudicii amittit, nullique apud se solio præsidet, qui examine discretionis caret. Et quasi a iudicii sui sede expellitur, qui per exteriores concupiscentias vagatur. Liquet enim, quod mens, quæ intus concillii sedem perdidit, foras se per desideria innumerabiliter spargit, et quia agere intellecta dissimulat, cæcatur recte, ut etiam nesciat quid agat, et sæpe justo iudicio in ipsa sua voluntate relinquitur, et sub ea, quæ anxie appetit, laboriosa mundi ministeria relaxatur. Unde et apte subditur:

« Quia non vocaberis mollis et tenera. »

Vers. 2. — « Tolle molam, et mole farinam. »

« Constat nimirum (S. GREG. M. lib. vi, *Moral.* cap. 16), quo teneræ filia parentes parcunt, nec duris atque servilibus hanc operibus affligunt. Omnipotens ergo Deus quasi teneram filiam vocat, quando dilectam uniuscujusque animam a laboriosis hujus mundi servitiis revocat, ne, dum exterioribus actibus afficitur, ab internis desideriis induretur. Sed Chaldæorum filia mollis et tenera non vocatur, quia mens pravis desideriis dedita in eo quem anxie appetit, hujus sæculi labore relinquitur, ut foris mundo velut ancilla serviat, quæ intus Deum ut filia nequaquam amat. Unde et molam tollere, et farinam

« Mola in gyro ducitur, et farinam profert. Unaquæque ergo mundi hujus actio mola est, quæ dum multas curas congerit, humanas mentes quasi per gyrum vertit, atque ex se velut farinam projicit, quia seducto cordi semper minutissimas cogitationes gignit. Nonnunquam vero, qui quietus alicujus esse meriti creditur, positus in qualibet actione denudatur. Unde protinus subinfertur:

« Denuda turpitudinem tuam, discooperi humerum, revela crura, transi flumina. »

« In administratione quippe operis turpitudinem denudatur, dum vilis mens abjectaque in operis ostentatione cognoscitur, quæ quieta prius magna puta-

batur. Humerum mens discooperit quando opus suum, quod ignorabatur, ostendit. Crus revelat, quia, quibus desideriorum passibus lucris mundi inhiet, manifestat. Flumina etiam transit, quia actiones hujus sæculi, quæ quotidie ad terminum defluunt, indesinenter appetit. Dumque alias relinquit, et alias insequitur, quasi semper de flumine ad flumen venit. » Hæc beatus Gregorius ait ostendens, quo jaceat mens a solio sanctæ intentionis excussa, quia si ad ea, quæ super ipsam sunt, inhiare cessaverit, sub semetipsam etiam indesinenter ruit. Cujus occulta turpitudinem, quia nunc per reprobationem operis, sicut dictum est, denudatur, aut etiam postmodum in ultimo examine palam cunctis ostenditur, recte subjungitur.

B Vers. 3. — « Revelabitur igitur ignominia tua, et videbitur opprobrium tuum. »

Nam de vindicta, quæ in illo fiet iudicio, vel in obitu cujuslibet reprobis, manifeste subdit: « Ultionem capiam et non resistet mihi homo. » Tunc enim nemo jam resistet ei. Quondam vero Moyses pro populo resistit iræ ejus dicens: « Dimitte ei hanc noxam, alioquin dele me de libro tuo, quem scripsisti (*Exod.* xxxii, 32). » Sic et Aæron ei restitit, quando inter vivos ac mortuos thuribulum sumpsit, et animadversionis ignem fumo incensi temperavit (*Num.* xvi, 46). David etiam iræ ejus restitit (*II Reg.* xxiv, 16), qui angelo percutienti se offerens, placationis gratiam et ante tempus propositum exigit. Sed et omnes sancti, qui iræ ejus obviant, ab ipso accipiunt ut contra impetum percussionis ejus opponantur, atque ut ita dixerim, cum ipso se erigunt contra ipsum, eosque divina vis sibi opponit secum, quia in eo quod adversum se sævientis iram foris obtinent, intus eos irascentis gratia fovet, et famulantes interius levat, quos quasi adversantes exterius tolerat.

Portat ergo contradictionem deprecantium, quam aspirat, et velut nolenti imponitur quod ab ipso, ut fiat, imperatur, sicut in verbis ejus apparet, cum dicit Moysi: « Dimitte me, ut irascatur furor meus contra eos, et deleam eos (*Exod.* xxxii, 10). » Quid est dicere servo: *Dimitte*, nisi deprecanti ausum præbere? Cum vero superna indignatio sese, ut ita dixerim, medullitus movet, hanc oppositio humana non retinet, nec se utiliter cujuslibet deprecatio objicit, cum semel Deus aliquid ab intimis irascendo disponit. Unde per beatum Job dicitur: « Deus, cujus iræ resistere nemo potest (*Job.*, ix, 13). » Nullius enim interventu divina ira restringitur, cum implacabiliter excitatur.

Hac igitur inexorabili indignatione adversus filiam Babylonis commotus dicit: « Ultionem capiam, et non resistet mihi homo. » Homo enim resistere ei omnino non valet, quando se ad ulciscendum excitat, et precem, quæ ei funditur, non aspirat. Unde et per Salomonem dicitur: « Non parcat in die vindictæ, nec acquiescet cujusquam precibus, nec suscipiet pro redemptione dona plurima (*Prov.* vi,

34). Quam sententiam attendere debent, qui pro pessimis hominibus defunctis missas celebrant, vel orationes aut elemosynas faciunt. Plerumque verotalis anima potentia in hoc mundo adepta Dei servos affligit, sicut olim plebs Chaldæorum in Babylone filios Juda. Sed, cum hujusmodi princeps in die mortis suæ ad ultionem ducitur, populus Dei, quem servitute deprimebat, redimitur de manu ejus. Unde mox ejusdem populi voce subditur :

VERS. 4. — « Redemptor noster, Dominus exercituum nomen illius, sanctus Israel. »

Qui enim nos de manu oppressoris redimit, id est liberat, vocatur *Dominus exercituum*, quia exercitus angelorum ei famulantur ad vindictam malorum. Et nomen illius *Sanctus Israel* est, qui filia Babylonis irreligiositatem ultra tolerare noluit. Unde et subjungit :

VERS. 5. — « Sede, tace (173), intra in tenebras, filia Chaldæorum, quia non vocaberis ultra domina regnorum. »

Sedet enim, quæ stabat, cum prostrata vilescit, quæ erecta gloriabatur. Tacet, cum excusationem perversitatis suæ non inveniens mœrore tabescit. Et intrat in tenebras, cum in noctem perpetuæ damnationis mittitur dicente Domino : « Ligatis manibus et pedibus mittite eum in tenebras exteriores (Matth. xxii, 13). » Nec jam vocatur *domina regnorum*, quia gloriam potentiæ singularis amittit cum vita. Sequitur :

VERS. 6. — « Iratus sum super populum meum, contaminavi hæreditatem meam, et dedi eos in manu tua. »

Hoc manifestum est. Sæpe enim Dominus populo suo iratus asperum vel crudelem dat ei principem, quia scriptum est : « Regnare facit hominem hypocritam propter peccata populi (Job. xxxiv, 30). » Sequitur :

« Non posuisti eis misericordias, super senem aggravasti jugum tuum valde. »

VERS. 7. — « Et dixisti : In sempiternum ero domina. »

Et hoc perspicuum est. Immisericorditer enim populum Dei princeps malus affligit, et inhumane tractat, neque vel senibus ab afflictione servitutis parcit, ac velut in sempiternum se dicit dominaturum, dum tempore longo se potestatem exercere putans, de die ultima cogitare negligit. Unde et subditur :

« Non posuisti hæc super cor tuum, neque recordata es novissimi tui. » *Non posuisti super cor tuum*, id est non cogitasti, quia ego iratus populo meo dedi eum in manus tuas. *Neque finis tui recordata es*, quando ultionem ego de te capiam nemine resistente. Sequitur :

VERS. 8. — « Et nunc audi hæc delicata et habitans confidenter, quæ dicis in corde tuo : Ego sum,

et non est præter me amplius : non sedebo vidua, et ignorabo sterilitatem. »

VERS. 9. — « Venient tibi duo hæc subito In die una ; sterilitas et viduitas. »

Delicata est anima, quæ suis voluptatibus in præsentia fruitur deliciis affluens ; et *confidenter habitat*, dum nullo metu mortis cogitur, sed peregrinationem præsentis exsilii velut habitationem æstimat patriæ ; et dum se cæteros potentia honoris præire conspicit, cunctos velut nihilum despiciens et se exaltans in cogitationibus suis. « Ego sum, et non est præter me amplius. »

Quæ et *viduam* se non sessuram dicit, quia se semper intellecturam sapienter æstimat. Intellectus enim plerumque dicitur vir animæ de quo Dominus mulieri Samaritanæ verba sua non intelligenti dicit : « Voca virum tuum (Joan. iv, 16), » id est adhibe intellectum tuum, et *veni huc*, id est ad ea quæ dico, accede huc. Nam sicut vir mulierem, sic intellectus animam regit. Et sicut mulier ex viro, sic anima concipit ex intellectu, quod in operationem parit. At ergo : *Non sedebo vidua*, id est non ero despecta intellectu amisso, quia nunquam illum amittam, sed prudenter intelligam semper. Et *ignorabo sterilitatem*, id est non ero infecunda, sed semper dilecta mihi opera velut filios pariam. Sed quæ sic loquitur, audire debet quid ei divinitus respondeatur : *Venient tibi duo hæc*, id est *sterilitas et viduitas subito in die una*, id est in hora mortis, ut ne quid amplius operari possis, et intellectum amittas. Et quasi jam hæc illi acciderint, subjungit

« Universa venerunt super te propter multitudinem maleficiorum tuorum : et propter duritiam incantatorum tuorum vehementem. » *Universa*, quæ superius tibi minatus sum, *venerunt super te propter multitudinem* malorum quæ faciebas. Quid vero per *incantatores* ejus exprimitur nisi cæteri potentes, qui huic ministrantes per vanitatem sæcularis potentiæ vel dolositatis suæ quasi phantasiam magicæ artis in his, quæ fraudulenter operantur, fallunt oculos intuentium, ut vel bona vel honesta putent eorum opera ? Qui *vehementem* habent *duritiam*, quia ignorantes viscera miserationis innocentes lædunt, et eorum bona diripiunt. Et propter horum ergo duritiam princeps eorum punitur, quia debuerat impietatem eorum compescere. Cui adhuc dicitur :

VERS. 10. — « Et fiduciam habuisti in malitia tua, et dixisti : Non est qui videat me. »

In malitia fiduciam habuit, quia per malam astutiam se cæteros superare confisus est, et prospere semper agere. In malis etiam, quæ faciebat, non videri se divinitus arbitrabatur. Sed sequitur :

« Sapientia tua et scientia tua hæc decepit te. »

Hæc *sapientia*, qua confidebas in malitia tua, nec te videri a me putabas, *decepit te*, quia malis operi-

bus tuis semper implicabat te. Vel prius pronuntietur *sapientia tua, et scientia tua*, deinde subjiciatur: *hæc decepit te*, ut non de ista solummodo, sed de omni sapientia et scientia ejus dictum intelligatur, quoniam « sapientia carnis inimica est Deo (Rom. viii, 7). » Congrue autem sapientia et scientia ejus dicitur eam decepisse. Nam « prudentia carnis mors est (ibid. 6.). » Et: « Scientia inflat (I Cor. vii, 1). » Unde et præfatus tumor illius, quod de temporali gloria se extollens cæteros despicit, replicatur, cum subditur:

« Et dixisti in corde tuo: Ego sum, et non est præter me altera. » Adeo enim singulariter extollitur, ut se solam esse gloriatur, quia neminem sibi parem cernit. Cujus elationi debita mors imprevisto superventura promittitur, cum mox subjungitur:

VERS. 11. — « Veniet super te malum, et nescies ortum ejus, et irruet super te calamitas, quam non poteris expiare: veniet super te repente miseria, quam nescies. »

Hæc enim omnia tempore mortis fient. Contra cuius adventum huic filiaæ Babylonis, quæ de potestate singulariter gloriatur, protinus exprobrando dicitur:

VERS. 12. — « Sta cum incantatoribus tuis, et cum multitudine malefactorum tuorum, in quibus laborasti ab adolescentia tua, si forte quid prosit tibi aut si possis fieri fortior. »

Si enim vere potens est, stet nunc adversus mortem, et potenter ei resistat. Omnes etiam suos incantatores, videlicet subjectos sibi potentes ac sapientes, qui vanitate dolosæ actionis deludunt humanos oculos, et artificiosis locutionibus suis velut quibusdam præcantationibus immutant sensus hominum, assumat secum in auxilium.

Multitudinem quoque malorum in quibus ab adolescentia se exercuit, opponat divinæ animadversioni, quæ super eam venit, quia fiduciam habuit in malitia sua. Cum igitur his omnibus stet, id est resistat iræ cœlesti si forte, quid ei valuerit hoc, aut fortior contra Deum fieri potuerit. Et quia prædicti incantatores multimoda consilia dant, sed nihil valent adversus Deum consilia eorum, recte subditur:

VERS. 13. — « Defecisti in multitudine consiliorum tuorum. »

Rursumque impropere subjungitur:

« Stent, et salvent te augures cœli, qui contemplabantur sidera, et supputabant menses, ut ex his annuntiarent ventura tibi. »

Quid vero per *augures cœli, qui contemplabantur sidera, et supputabant menses, ut ex his annuntiarent ventura*, nisi homines superstitiosi designantur, qui ex elementis temporum explorare futura conantur? Qualibus ait Dominus: « Cum videritis nubem orientem ab occasu, statim dicitis: Nimbis venit, et fit. Et cum austrum flantem, dicitis: quia æstus erit, et fit. Hypocritæ, faciem cœli et terræ nostis

A probare (Luc. xii, 54-56). » Et Paulus. « Dies observatis, et menses, et tempora, et annos: timeo, ne forte sine causa laboraverim in vobis (Gal. iv, 10). » Quia ergo supradicta Babylonis filia, id est mens superstitiosi et perversi principis magis in talibus quam in Deo speravit, recte jam circa obitum ei per increpationem dicitur: « Stent et salvent te augures cœli, qui contemplabantur sidera, et supputabant menses, ut ex eis annuntiarent ventura tibi. » Sed qui pro se ipsis stare non valent, quomodo stabunt pro aliis? Aut quomodo salvabunt alium, qui salvare se ipsos non possunt? Sequitur enim:

VERS. 14. — « Ecce facti sunt quasi stipula, et combussit eos ignis: non liberabunt animam suam de manu flammæ: non sunt prunæ, quibus calefiant, et focus, ut sedeant ad eum. »

Facti sunt in morte aridi et inanes velut *stipula, et combussit eos ignis gehennalis nec jam poterunt liberare animas suas de manu flammæ* illius, sed ibi sine fine detinebuntur et ardebunt. Neque enim *prunæ* sunt in illo igne, quibus isti *calefiant* delectabiliter, quemadmodum in his omnibus ignibus, neque ignis ille est *focus, et sedeant ad eum*, qui ibi sunt, sed totam gehennam ignis ille compiet, omnesque reprobos intra se continens cruciat, neque prunas habet, quia lignis non pascitur, sed inextinguibiliter ardet. Vel in hac vita *non sunt eis prunæ, quibus calefiant, et focus, ut sedeant ad eum*, id est nullam habent caloris scientiam, nec illuminantem sensum, qui eorum tenebras excutere possit, et frigus erroris expellere. Sequitur:

VERS. 15. — « Sic facta sunt tibi, in quibuscunque laboraveras. »

Id est omnia opera tua igne illo consumpta sunt. Nam, ut Apostolus loquitur: « Uniuscujusque opus manifestum erit. Dies enim Domini declarabit, quia in igne revelabitur, et uniuscujusque opus quale sit, ignis probabit. Si cuius opus manserit, mercedem accipiet; si cuius opus arserit, detrimentum patietur (I Cor. iii, 13) » Sequitur:

« Negotiatores tui ab adolescentia tua unusquisque in via sua erraverunt, et non est qui salvet te. »

Dives iste iniquus *ab adolescentia sua negotiatores* D et pecuniarum multiplicatores habere studuit. Qui omnes *in via* negotiationis suæ *erraverunt*, quia sicut « nemo militans Deo implicat se negotiis sæcularibus (II Tim. ii, 4); » ita qui sæcularibus negotiis implicatur, militare Deo non potest. Et quia omnes, qui huic opitulari volebant, propriis reatibus astringuntur, *non est qui salvet eum a morte perpetua*. Hæc contra quemlibet potentem superbum, qui populum Dei affligit, dicta sunt. Et mox ad eundem populum, qui pro peccatis suis traditus est, consequenter dicitur:

CAPUT XLVIII.

VERS. 1. — « Audite hoc, domus Jacob, qui vocamini nomine Israel, et de aquis Juda existis, qui

juratis in nomine Domini, et Dei Israel recordamini non in veritate, neque in justitia. »

Nunc enim ad carnales, qui sunt in Ecclesia, loquitur sermo divinus. Nam et ipsi sunt *domus Jacob* quia fidem patriarcharum sequuntur, licet mores eorum fugiant. Vos inquit: *O domus Jacob, audite hoc, quod principi, qui vos opprimit, locutus sum: vel quæ vobis locutus sum: qui vocamini nomine Israel, id est qui vocabulo Christianitatis censemini, et de aquis Juda, id est de aquis confessionis, quæ sunt aquæ baptismatis, existis, vel de populis christianis orti estis, qui juratis in nomine Domini, id est qui Christianos vos asseritis, et Dei Israel recordamini, id est de Christo recogitatis, non in veritate, quia eum non vere diligitis, neque in justitia, quia, quod ipse præcipit, non facitis. Ad hujusmodi Christianos loquitur Dominus, quos ob irreligiositatem eorum impio rectori tradidit castigandos. De quibus subditur:*

VERS. 2. — « De civitate enim sancta vocati sunt, et super Deum Israel constabiliti sunt: Dominus exercituum nomen illius. »

Ideo debent audire verba solatii, quia *de civitate sancta convocati sunt* divinitus. Dominus enim, qui in cœlesti Jerusalem habitat, ipse vocavit eos. *Et super Deum Israel constabiliti sunt, id est super Christum fundati, qui vocatur Dominus exercituum, eo quod illi deserviant exercitus militiæ cœlorum. Ad quem videlicet populum Christianorum carnalium consequenter a Domino dicitur:*

VERS. 3. — « Priora extunc annuntiavi, et ex ore meo exierunt, et audita feci ea: repente operatus sum, et venerunt. »

Quæ autem sunt priora, nisi quæ secundum Apocalypsim Joannis « oportet fieri cito (Apoc. 1, 1), » id est tentationes et mala, quæ fideles in hac vita tolerant. « Omnes enim, qui pie volunt vivere in Christo Jesu, persecutionem patiuntur (II Tim. III, 12). » Et quæ nos in futuro sæculo manent, posteriora sunt. Audi quæ sunt priora: « Fili, accedens ad servitutum Dei sta in justitia et timore, et præpara animam tuam ad tentationem (Eccli. II, 1). » Audi priora: « Quicumque quæsierint animam suam salvare, perdent eam (Luc. XVII, 33). » Hæc ergo priora annuntiavi et audita feci tibi extunc, id est ex quo de aquis Juda existis, et ex quo supra Deum Israel constabilitus es. Et sicut a principio tibi annuntiaveram, ita tunc repente operatus sum, et venerunt omnia. Prædixi tibi universa quæ passurus eras, ne, si te ignarum invenissent, opprimerent, et ex ore meo, quæ facere debueras, audisti, ut excusationem de ignorantia non haberes. Sequitur:

VERS. 4. — « Scivi enim quia durus es tu, et nervus ferreus cervix tua, et frons tua ærea. »

Durus es, quia molliri ad amorem Dei non potes. Et cervix cordis tui nervus ferreus, quia jugo meo conteri non potest. Et frons tua ærea, quia diu persistis in impudentia tua, nolens de malis actibus tuis

A erubescere. In fronte enim sedes est pudoris; æs vero durable nimis est. Æream ergo frontem habet, qui valde contra verecundiam semper durus perseverat. Sequitur:

VERS. 5. — « Prædixi tibi extunc, antequam venirent, indicavi tibi, ne forte diceres. Idola mea fecerunt hæc, et sculptilia mea, et conflatilia mandaverunt ista. »

VERS. 6. — « Quæ audisti, vide omnia; vos autem non annuntiastis (174). »

Quid nunc per *idola et conflatilia, sive sculptilia*, nisi falsæ cogitationes designantur? Nam quasi idolum sibi fabricat animus, dum sibi cogitationem erroris format; et velut sculpsit eam, quando, quæ sibi in ea videntur, in forma recidit, eamque format ad libitum suum: et quasi conflat, quia spiritu mentis suæ decoquit intrinsecus antequam fabricet.

Quid igitur in idolis et sculptilibus et conflatilibus nisi opiniones errorum, quas sibi, prout cogitaverit, mens format, exprimuntur? Ait ergo, quia ventura prædixi tibi extunc, id est ex quo supra Dominum constabilitus es, et antequam venirent ea, indicavi tibi ne forte quando venirent, diceres, quia idola mea, id est falsæ opiniones meæ fecerunt hæc, sculptilia mea et conflatilia, id est errores, quos mihi formavi mandaverunt ista. Multis enim erroribus plenus est iste carnalium populus, et multa quæ fiunt, non tam Deo, quam superstitionibus suis et opinionibus ascribit. Et idcirco prædixi, inquit, universa tibi per Scripturas meas, et per ora doctorum, et quæ tunc audisti, omnia vide nunc, quia sicut prænuntiaveram, ita tibi eveniunt cuncta. Vos autem cæteris non annuntiastis, quæ annuntiaveram vobis, quia de talibus loqui neglexistis. Sequitur:

« Audita feci tibi nova extunc et conservata, quæ nescis. »

VERS. 7. — « Nunc creata sunt, et non extunc et ante diem, et non audisti ea, ne forte dicas: Ecce ego cognovi ea. »

VERS. 8. — « Neque audisti, neque cognovisti, neque extunc aperta auris tua. »

Nova quidem novæ conversationis audita feci tibi ex quo de aquis Juda existis, id est ex quo renatus es ex aqua et spiritu, et præmia justorum in cœlis conservata, quæ nescis. Et quæ de spiritali conversatione vel tentatione audieras, nunc creata sunt, id est nunc a me tibi datum est, ut ea, si volueris, facere possis, et non ab initio vel ante diem, sed in tempore suo. Non enim puer mox ardua novæ conversationis arripere valet, sed in ætate perfecta sustinere tentationes, et spiritalibus disciplinis semetipsum exercere potest. Et Dominus singula quæque temporibus suis disponit, quoniam « omnia tempus habent, et suis spatiis transeunt universa sub cœlo (Eccl. III, 1). » Dans ergo opportuno tempore homini gratiam bene conversandi, nisi piger fuerit,

(174) Alias, num annuntiastis.

recte ei denuntiat, quia jam creata sunt nova, et A
non extunc et ante diem.

Sed cum dixerit, quia *audita feci tibi nova extunc*, videtur contraria adjungere, cum subjicit, quia *non audisti ea*. Sed aure corporis audivit, et aure cordis non audivit. *Non audisti*, inquit, *ea*, id est non intellexisti, ne forte scientia inflatus dicas, quia *ecce ego cognovi ea*. Sed *neque audisti ea*, id est non intellexisti ea, *neque cognovisti, neque extunc aperta est auris tua*, id est cordis tui. Nam quia audisti quidem bona, sed facere neglexisti, quæ audisti non audisti. Et sicut nemo novit quid sit charitas nisi sit charitas in eo, ita nemo vere intelligit præcepta cœlestia nisi qui facit. Bene igitur ei, quæ bona quæ audivit operari contemnit, dicitur, quia *neque audisti, neque cognovisti, neque extunc*, id est ex quo super Dominum constabilitus es, *aperta est auris tua*. Sequitur :

« Scio enim, quia prævaricans (prævaricaberis, et transgressorem de ventre vocavi te. »

Scio, quia necdum malitiam tuam desereres, sed adhuc mandata mea prævaricando calcabis. Tu es de filiis Adam, per quem in hunc mundum peccatum intravit, et per peccatum mors, et ita in omnes homines transiit, in quo omnes peccaverunt. Unde et *transgressorem de ventre matris vocavi te*.

Hucusque duritiam uniuscujusque eorum Dominus objurgavit, quos increpat alibi dicens. « Quid autem vocatis me, Domine, Domine, et non facitis, quæ dico (Luc. vi, 46.)? » Jam vero secundum illud quod Moysi ait : « Miserebor cui miserebor et misericordiam præstabo cui miserebor (Rom. ix, 15), » quid ei, cui voluerit misereri, misericorditer agat, ostendit subjungens :

VERS. 9. — « Propter nomen meum longe faciam furorem meum, et laude mea infrenabo te, ne intereas. »

Non propter te, inquit, sed *propter nomen*, quod invocatum est super te, *longe faciam a te furorem meum*, quo te tradideram filiæ Babylonis affligendum. Es enim adhuc dignus furore meo, sed jam tibi misertus parcam, et ne ultra male liber, quo volueris, eas sequendo concupiscentias tuas, *infrenabo te laude mea*, ne mortem sempiternam incurras, sed lætus decantes : « Benedicam Dominum in omni tempore, semper laus ejus in ore meo. In Domino laudabitur anima mea (Psal. xxxiii, 2). » Sequitur :

VERS. 10. — « Ecce excoxi te, sed non sicut argentum, elegi te in camino paupertatis. »

Excoxi te in igne tribulationis sub manu filiæ Babylonis, id est cujuslibet personæ potentis, et tyrannidem exercentis, *sed non quasi argentum*, quia purgatus non es a sordibus tuis. Argentum enim purgatur in igne, sed tu non es purgatus in tribulatione, quia nec in adversis omisisti peccare. *Sed in camino paupertatis decoquens elegi te*. De hac sententia non necesse habemus nunc aliud dicere, nisi quod in homilia quadam beatus Gregorius admonet (hom.

40, in *Evang.*) : « Quicumque, inquit, bona in hoc sæculo habetis, cum quoslibet pauperes nonnulla reprehensibilia perpetrare conspiceris, nolite despicerere, nolite desperare, quia fortasse quos superfluitas tenuissimæ pravitatis inquinat, caminus paupertatis purgat. De vobis omnino pertimescite, quia nonnulla etiam male acta prospera vita secuta est ; de illis vero sollicitè pensate, quia eos magistra paupertas cruciat, quousque ad rectitudinem perducat. » Et infra : « Cum quoslibet in hoc mundo abjectos aspiceris, etiamsi quæ reprehensibilia eorum esse videantur, nolite despicerere, quia fortasse quos morum infirmitas vulnerat, medicina paupertatis curat. » Sequitur :

VERS. 11. — « Propter me, propter me faciam, ut non blasphemet, et gloriam meam alteri non dabo. »

Propter bonitatem meam *faciam* te vivere sicut nomen meum non blasphemetur propter te ; et *gloriam*, qua in te gloriari debeo, *alteri*, id est satanæ, non dabo, quia gloriatur in eis, quos in perditionem trahit. Post hæc ad priora Ecclesiæ tempora revertitur sermo divinus. Sequitur namque :

VERS. 12. — « Audi me, Jacob et Israel, quem ego voco, ego ipse, ego primus, ego novissimus. »

Jacob quippe vel Israel, *quem Dominus vocat*, fideles ex circumcissione sunt, quos per internam aspirationem ad Christum suum trahit, quibus ait : *Ego sum ipse*, non alius, quia non mutor. *Ego sum primus, et novissimus*, quia sum ante omnia, et post omnia. Nam esse Dei totum simul est, et semper est quod neque cœpit unquam neque aliquando cessabit, inseparabile quoddam et sine fine existente pelagus, nullis terminis limitibusque circumdatum, omnem supergrediens sensum, et omne tempus atque naturam. Qui deinde potentiam actionis suæ denuntiat, dicens :

VERS. 13. — « Manus quoque mea fundavit terram, et dextera mensa est cœlos, ego vocabo eos, et stabunt simul. »

Ipse enim terram et cœlos fecit, et omnes cœli obtemperant nutui ejus. Potest vero, ut sæpe jam diximus, per *terram* Ecclesia designari, quæ semen prædicationis suscipiens fructum boni operis facit ; et per *cœlos* sancti prædicatores, qui tanquam imbres mittunt eloquia sapientiæ suæ. *Manus* ergo Domini *fundavit terram*, quia super fundamentum, quod est Christus, posuit Ecclesiam. *Et dextera ejus mensa est cœlos*, id est prædicatores, sicut discipulis per Apostolum dicitur : « Non in immensum gloriamur, sed secundum mensuram regulæ, quam mensus est Deus, mensura pertingendi usque ad vos (II Cor. x, 13). » Et rursus : « Unicuique nostrum data est gratia secundum mensuram donationis Christi (Ephes. iv, 7). » Cum autem dicit : « Ego vocabo eos, et stabunt simul. » Ostendit omnes illos ad obsequium esse paratos. Qui enim vocati stant, parati stant, parati sunt facere, quod sibi jussum fuerit. Præmisso autem exemplo foundationis Ecclesiæ et

obeditionis sanctorum dicit ad Israel, cui loquebatur :

VERS. 14. — « Congregamini omnes vos, et audite. »

Congregamini omnes vos in una eadem voluntate, ut sit omnibus vobis cor unum, et anima una, et audite me sicut cœli me audiunt. Sequitur : « Quis de eis annuntiavit hæc? Dilexit Dominus eum, faciet voluntatem suam in Babylone, et brachium suum in Chaldæis. »

Quis ex cœlis, id est prædicatoribus annuntiavit hæc, quæ dicta sunt de obedientia eorum, et cætera nunc præmissa? Subaudi Christus. Ipse enim dignatus est unus ex illis fieri : Dominus dilexit eum dicens : « Hic est filius meus dilectus (II Petr. 1, 17). » Et ipse, voluntatem suam explebit in Babylone, id est in hoc confuso sæculo, vel in gentilitate, « qui omnes homines vult salvos fieri, et ad agnitionem veritatis pervenire (I Tim. 2, 4). » Et brachium virtutis suæ faciet in Chaldæis, quia exspolians principatus et potestates traducet confidenter palam triumphans illos in semetipso. Chaldæi enim maligni spiritus sunt. Sequitur :

VERS. 15. — « Ego locutus sum, et vocavi eum, et adduxi eum, et directa est via ejus. »

Ego Pater locutus sum de eo per prophetas, et vocavi eum in hunc mundum, adduxique eum, et directa est via conversationis ejus, eo quod iniquitatem non fecerit, nec inventus sit dolus in ore ejus. Cujus vox protinus subintroducitur, dicens :

VERS. 16. — « Accedite ad me, et audite hoc : Non a principio in abscondito locutus sum, ex tempore antequam fierent, ibi eram, et nunc Deus misit me, et spiritus ejus. »

Accedite, inquit, fide ad me, popule meus, et nolite me filium Joseph æstimare, vel a conceptu Virginis initium sumpsisse, sed potius audite quod dico. Non enim in occulto locutus sum a principio, sed in manifesto est me nominatissimis quibusque patribus ab origine mundi locutum fuisse. Nam ex tempore, id est ab initio temporis eram ibi, videlicet apud Patrem, quia « in principio erat Verbum, et Verbum erat apud Deum (Joan. 1, 1). » Et ne me putetis cum tempore cœpisse, antequam creaturæ fierent, ibi eram. Tunc quidem eram apud Deum, et nunc ipse misit me et spiritus ejus, ut Verbum caro fieret et habitaret in nobis. Pater enim Filium misit, quia hunc incarnari eum constituit. Sed et Spiritus sanctus eum misit, quia incarnationis ejus auctor fuit. Nam superveniente Spiritu sancto concepit eum virgo. Spiritus eum misit, ut, cum legis, quia idem Filius Spiritum mittit, non credas Spiritum inferioris esse potentiae. Nam et Filius eum mittit, qui ait : « Cum venerit Paracletus, quem ego mittam vobis a Patre (Joan. xv, 26). » Si ergo se invicem Filius et Spiritus mittunt, non subjectionis injuria, sed cœmunitas est potestatis. Sequitur :

VERS. 17. — « Hæc dicit Dominus Deus redemptor tuus sanctus Israel : Ego Dominus Deus tuus docens te utilia, et gubernans te in via qua ambulas. »

Redemptor noster populo suo dicit, quia ego sum Dominus Deus tuus. Nam et ipse est Dominus et Deus quemadmodum et Pater. Ait enim : « Ego et Pater unum sumus (Joan. x, 30). » Et : « Omnia, quæ habet Pater, mea sunt (Joan. xvi, 15). » Se ergo Dominum et Deum esse testetur, ut omnes honorificent Filium sicut honorificant Patrem. Qui nos et in Veteri et in Novo Testamento satis utilia semper mandata docet, et in via justitiæ, qua gradimur nos, gubernat, et dirigit. Qui quam utilia nos docuerit, et quantum salutem nostram optaverit, indicat, cum subjungit :

VERS. 18. — « Utinam attendisses mandata mea ! facta fuisset sicut flumen pax tua, et justitia tua sicut gurgites maris. »

VERS. 19. — « Et fuisset quasi arena semen tuum, et stirps uteri tui ut lapilli ejus : non interisset, et non fuisset attritum nomen ejus a facie mea. »

VERS. 20. — « Egreddimini de Babylone, fugite a Chaldæis. »

Utinam, inquit, attendisses, o homo, præcepta vitæ, quæ in paradiso tibi dederam ! Nam, sicut aqua fluminis indelicenti abundantia semper fluit, sic pax tua perseverans semper afflueret. Et sicut multiplici undarum volumine gurgites maris abundant; sic justitia tua multiplicibus virtutum cumulis in immensum excrevisset. Et sicut arena est innumerabilis; sic multitudo filiorum esset, quos in paradiso genuisses. Non interisset semen tuum, quia nullus ex filiis tuis moreretur. Et non fuisset attritum nomen ejus a facie mea, quia non lueret penas in æternam oblivionem projectus a conspectu meo. Nam si primus homo non peccasset, nunquam gehennæ filios generaret, sed tot solummodo filios in paradiso generaturus erat, quot electi ponentur in die resurrectionis ad dexteram judicis, quorum completa multitudine sine ulla morte vel afflictione ad perpetuam vitam angelorum et societatem erant perventuri.

Hæc, inquit, omnia sic fuissent, si voluisses attendere mandata mea. Sed quoniam res in contrarium lapsa est, nunc saltem filii Adam egreddimini de Babylone, id est de confusione cupiditatum, in qua detenti estis hucusque captivi, ut ad patriam æternæ hæreditatis redire liberi possitis; et fugite a Chaldæis, id est cum omni velocitate recedite longius a malignis spiritibus vos in hac confusione passionis vitiorum captivantibus. Chaldæi quippe captivantes interpretantur. Venit enim Salvator ab exilio nos ad patriam revocare, a sæculo ad paradisum, a captivitate ad regnum. Unde etiam (175) præconibus suis præcipiens subjungit :

In voce exultationis annuntiate omnibus egressiorem de Babylone, et cunctis, qui in orbe sunt, om-

ditum facite hoc, quod nunc per gratiam meam data est eis facultas revertendi ad paradysum.

Et ferte illud etiam usque ad extrema terræ, ut nemo sit in mundo, qui hoc non audiat. Sequitur :

« Dicitur : Redemit Dominus servum suum Jacob. »

VERS. 21. — « Non sitierunt in deserto, cum educeret eos, aquam de petra produxit eis, et scidit petram, et fluxerunt aquæ. »

Dicite, quia Dominus sanguine Filii sui redemit servum suum, et fideles ejus non sitierunt in deserto hujus sæculi, cum educeret eos de tenebris ignorantiae et infidelitatis quasi de Ægypto. Nam de petra, quæ Christus est, produxit eis aquam sapientiae salutaris, quæ portaret eos, et scidit petram, id est vulneravit Christum in cruce, et fluxerunt aquæ vitæ potus. His dictis propheta subjungit :

VERS. 22. — « Non est pax impiis, dicit Dominus. »

Id est Christus Dominus meus. Supra dictum est

A homini, quia « si attendisses mandata mea, facta fuisset sicut flumen pax tua. »

Et nunc econtrario negatur pax impiis, quia mandata Dei attendere nolunt. Nam sicut Salvatore nato « pax annuntiata est hominibus bonæ voluntatis (Luc. 11, 14); » ita nunc eo veniente, sicut consequens est, denegatur pax impiis, quoniam « justitia et pax osculatae sunt (Psal. LXXXIV, 11). » Impii enim neque cum Deo, neque cum angelis, neque cum homine, neque secum pacem habere possunt. Est enim pax virtus sibi copulans omnes, et sibi-metipsis, et invicem, quæ omnia ad se contemperat per inconfusam eorum unitatem, per quam unam et insolubilibus omnium complicatio secundum divinam ejus harmoniam substituitur, et compaginatur consonantia perfecta. Ab hac tamen longe est mens impiorum, quæ semper etiam secum rixatur. Sed jam libellum hunc terminantes paululum respiremus, ut ad sequentia validius accingamur.

LIBER SEPTIMUS.

CAPUT XLIX.

VERS. 1. — « Audite, insulæ, et attendite populi de longe : Dominus ab utero vocavit me, de ventre matris meæ recordatus est nominis mei. »

VERS. 2. — « Et posuit os meum quasi gladium acutum. »

Ista nunc loquitur Christus, qui ab utero Virginis matris a Domino solus dignus vocari fuit. Nam sicut eo nato Angelus apparens pastoribus ait : « Ecce evangelizo vobis gaudium magnum, quod erit omni populo, quia natus est hodie Salvator, qui est Christus Dominus (Luc. 11, 10, 11); » ita nunc idem Salvator omnibus, qui longe sunt, populis annuntiat, quia ipse sit a Domino vocatus ab utero matris. Nos enim a baptismo vocat Dominus, quia tunc primum filii Dei nominamur, et Christianitatis vocabulum, quod ipse nominare dignetur, accipimus. Hunc autem ab utero vocavit, quia et Sanctus et Filius Dei natus est, sicut matri ejus dixerat angelus : « Quod nasceretur ex te Sanctum, vocabitur Filius Dei (Luc. 1, 35). » Hoc ergo omnes populi jubentur attendere, ut sciant, quia iste solus sine peccato natus est, ut omnium peccata deleteret. Solus venit justus, ut omnes, qui crediderint, justificaret.

Audite, inquit, o insulæ gentium, attendite, omnes, qui procul moramini, vel qui longe a Deo recessistis, cognoscite omnes, qui in iniquitatibus concepti estis, quia Dominus ab utero vocavit me nomine meo, utpote natum ex Virgine. Mox enim, ut natus est, vocavit eum proprio nomine per angelum dicens pastoribus : quia « natus est vobis hodie Salvator, qui est Christus Dominus (Luc. 11, 11). » Et sic de ventre matris eius recordatus est no-

minis illius, quia nomen ejus Salvatorem, id est Jesum appellavit, « quod vocatum est ab Angelo, priusquam in utero conciperetur (ibid. 21). » Idcirco autem hunc ita nasci fecit, ut liber a peccato libere peccatores increparet, quatenus ad poenitentiam eos converteret. Unde et posuit os ejus quasi gladium acutum, ut verbis suis quasi gladio fortiter feriret delinquentes dicens : « Serpentes genimina viperarum, quomodo fugietis a judicio gehennæ? » (Matth. xxiii, 33.) Et : « Omnis arbor, quæ non facit fructum bonum, excidetur, et in ignem mittetur (Matth. iii, 10). » Quia vero Judæi, quos sic feriebat, frequenter eum apprehendere voluerunt, et interficere, sed nunquam potuerunt nisi hora, qua Pater disposuerat, recte subjungit :

« In umbra manus suæ protexit me. »

Et quia manu Domini protectus corda eorum verbo suo vehementissime transfigebat, addit :

« Et posuit me sicut sagittam electam. » Penetrat enim sicut acutissima sagitta mentes eorum. « Vivus est enim sermo Domini et efficax, et penetrabilior omni gladio ancipiti pertingens usque ad divisionem animæ et spiritus compagum quoque et medullarum (Hebr. iv, 12). » Quando dicit sagittam electam ostendit habere Deum sagittas plurimas, sed non electas. Quæ sagittæ sunt prophetæ et apostoli, qui in toto orbe discurrunt, de quibus alias dicitur : « Sagittæ tuæ acutæ (Psal. XLIV, 6). » Christus autem de multis sagittis, et filiis plurimis una sagitta electa, et Filius unigenitus est. Sequitur :

« In pharetra sua abscondit me. »

VERS. 3. — « Et dixit mihi : Servus meus es tu, Israel, quia in te gloriabor. »

Per pharetram Dei occultum ejus judicium designatur. Salvator igitur in pharetra Dei absconditus est, quoniam occulti consilii dispositione in primo adventu venit occultus. Vel dum puer esset, in pharetra Dei est absconditus, quia in profundo ejus consilio tectus latuit sicut in pharetra sagitta. Et sicut sagitta ex pharetra, sic ipse ex occultatione sua subito prosiliit, ut hominum gentes prædicando transigeret. Qui dum adhuc in hac pharetra lateret, audit a Patre: « Servus meus es tu Israel, quia in te gloriabor. » *Servus* appellatus est, quia « formam servi accipiens humiliavit semetipsum factus obediens usque ad mortem (Philip. II, 7). » In quo Pater gloriatus est dicens: « Hic est Filius meus dilectus, in quo mihi bene complacui (Matth. XVII, 5). » Israel quoque vocatur, id est princeps cum Deo, quia semper cum Patre regnat. Israel enim princeps cum Deo interpretatur. Vel ideo vocatus est *Israel*, quia natus est ex semine Judæorum. Sequitur:

VERS. 4. — « Et ego dixi: In vacuum laboravi, sine causa et vane fortitudinem meam consumpsi. Ergo judicium meum cum Domino, et opus meum cum Deo meo. »

Profunda est valde ut reor ista sententia, de qua, quid nobis visum sit, ita loquemur, ut, si quis ea melius exponere valuerit, nos libentius sensum ejus sequi parati sumus. Ait ergo Redemptor noster in terris corporaliter conversans: *In vacuum laboravi*. Solent enim homines propter temporalia commoda laboribus exerceri. Ipse autem et labores in carne sustinuit, et laborum præmia in hoc sæculo nulla percepit. Quia igitur per actiones suas transitoria lucra non quæsit, a mundi compehdiis vacuum laborem duxit.

Qui et fortitudinem suam sine causa et vane se consumpsisse dicit. Nam propter primæ transgressionis culpam omnis homo addictus mortalitati tot doloribus in hac vita fatigatur, ut in malis, quæ patitur, non diu subsistens deficiat et moriatur. Hic autem licet ex carne Adam carnem assumpserit, vitium tamen ex carne non traxit. Sed neque hic vivendo peccatum fecit, et ideo quantum in se est, sine causa poenas nostræ mortalitatis sustinens fortitudinem suam consumpsit. Annon fortitudinem consumpserat, quando « fatigatus ex itinere sedebat super fontem? » (Joan. IV, 6.) Quam et vane in eo consumpsit, quod missus ad oves, quæ perierunt domus Israel, eundem populum convertere non potuit. Quantum igitur ad eos spectat, qui doctrinam ejus audientes et miracula videntes non crediderunt, vane, id est in vanum consumpsit fortitudinem suam, quando illi remedia salutis animarum suarum non receperunt, pro quibus ipse corporaliter infirmatus usque ad mortem laboravit. Unde et congrue subiungit:

« Ergo, inquit, judicium meum cum Domino. » — « Ego enim gloriam meam non quæro, est qui quærat, et judicet (Joan. VIII, 50). » — « Et opus meum

A cum Deo meo. » Quia « non potest Filius a se ipso facere quidquam, nisi quod viderit Patrem facientem. Quæcunque enim ille fecerit, hæc et Filius similiter facit. (Joan. V, 19). »

Aliter tamen intelligi possunt. Cum enim Dominus noster audisset a Patre: « Servus meus es tu Israel, quia in te gloriabor, » ait: « In vacuum laboravi, sine causa et vane fortitudinem meam consumpsi. » Fortasse ergo quia nomine Israel appellatus est, in persona populi Israel, quod nox adjungit locutus est. Populus itaque circumcisionis tandem intelligens, quia non justificatur homo ex operibus legis nisi per fidem Jesu Christi, loquitur in Christo nunc dicens: « In vanum laboravi, sine causa et vane fortitudinem meam consumpsi. » — « Israel enim, ait Apostolus, sectans legem justitiæ, in legem justitiæ non pervenit. Quare? quia non ex fide sed quasi ex operibus (Rom. IX, 31). » In vacuum ergo laboravit, atque sine causa, et vane fortitudinem suam consumpsit, qui se suis viribus per carnalem legis observantiam justificari posse putavit. « Quoniam autem in lege nemo justificabitur apud Deum, manifestum est, quia justus ex fide autem vivit. Lex ex fide non est, sed qui fecerit ea, vivet in illis (Galat. III, 11). » In vacuum ergo ac sine causa laborasse Apostolus iste gemit, qui in legis operibus justificari sine fide laboravit. Sicut et Apostolus « octava die circumcisis ex genere Israel, de tribu Benjamin, Hebræus ex Hebræis, secundum legem Phariseus, secundum æmulationem persequens Ecclesiam Dei, secundum justitiam, quæ in lege Dei est, conversatus sine querela, omnia quæ sibi fuerint lucra, hæc arbitratus est propter Christum detrimenta, propter quem omnia detrimentum fecit, et arbitratus est velut stercora, ut Christum lucrifaceret, et inveniretur in illo non habens suam justitiam, quæ ex lege est, sed eam, quæ ex fide est, Jesu Christi (Philip. III, 5). »

Juxta hunc itaque sensum illa pars eorum, quæ fidem suscepit loquitur voce capitis sui: « In vacuum laboravi, sine causa et vane fortitudinem meam consumpsi. » Et addit: « Ergo judicium meum cum Domino, » id est jam ita judicabo, ut Dominus judicet, videlicet optimum esse, ut non in lege justificari, sed spiritu ex fide spem justitiæ expectemus. *Et opus meum cum Deo meo*, quia cooperante Deo opus meum faciam, et adjuvante gratia legem implebo.

Adhuc tamen et alio modo possunt hæc, nisi fallor, intelligi. Nam quia Dominico homini dictum est: *Servus meus es tu Israel*, idcirco forte voce servi, id est voce humani generis mox locutus est: *In vacuum laboravi*. Nam propter mysterium assumptionis humanitatis assumit in se vocem aliorum hominum, sed jam pœnitentium. Recte enim in hoc loco ex eorum persona vox humani generis accipitur, qui post ignorantie suæ caliginem ad amorem justitiæ convertuntur, et veritatis radiis

Illustrati fletibus luunt, quod erraverunt. Illumina-
tus enim quisque respicit, quam turpe fuerit, quod
præsentis vitæ amore laboravit. In eis ergo genus
humanum, in quibus ad vitam revertitur, præteri-
tum laborem suum pro nihilo ducens ait : *In va-
uum laboravi*. Conspicit enim, quam vacue pro
ista vita laboratur. Amore enim sæculi adversa ali-
qua perpeti et *vacuum* simul et *laboriosum* est, quia
et ex adversitate mens afficitur, et remunerationis
præmio non repletur. Qui igitur mala mundi pro
mundo tolerat, in *vacuum* laborat, quia vitæ suæ
tempora sine remuneratione expendit. Sed et *forti-
tudinem* suam in hujusmodi laboribus *sine causa* et
vane consumit, quia ejus vitam retributio subse-
quens nulla remunerat, et præsens tribulatio fatigat.
Ad omnia hæc idonee confirmanda Salomonis testi-
monium sufficit dicentis : « Vidi cuncta quæ sunt
sub sole, et ecce universa vanitas, et afflictio Spi-
ritus (Eccle. 1, 14). » Et iterum : « Cumque me con-
vertissem ad universa opera quæ fecerant manus
meæ, et ad labores, in quibus frustra sudaveram,
vidi in omnibus vanitatem et afflictionem animi, et
nihil permanere sub sole (Eccle. 11, 11). »

Itaque post ignorantiae tenebras anima lamine
veritatis illustrata dolet se *sine causa* laborasse pro
commodis temporalibus, et terrore futuri examinis
attonita subjungit : « Ergo judicium meum cum
Domino. » Ac si dicat : Hucusque futurum judicium
ignorabam, sed nunc scio quia *judicium meum* erit
cum Domino, quoniam in extremis meis cum illo ju-
dicabor, quando de singulis actibus meis, et e di-
verso de beneficiis mihi collatis in illo tremendo exa-
mine fiet discussio. *Et opus meum cum Deo meo*,
quia quidquid hic operor, apud eum servatur in
die novissimo judicandum, sicut ait : « Ecce scri-
ptum est coram me (Isa. LXV, 6). » Et ut Malachias
loquitur : « Attendite Dominus, et audivit, et scri-
ptus est liber monumenti coram eo (Malac. III, 16). »
Vel *opus meum cum Deo meo*, quia jam operabor cum
Deo, quæ sancta et justa, faciens cum ipsius adjuto-
rio. Hæc, qui melius potuerit, interpretetur ; nos
vero sequentia videamus. Subjungit enim Redemp-
tor noster, dicens :

VERS. 5. — « Et nunc dicit Dominus formans me
ex utero servum sibi, ut reducam Jacob ad eum, et
Israel non congregabitur. »

Bene ait : *Ex utero*. Ex utero enim virginali for-
matus est cooperante Spiritu sancto, non ex utris
utriusque parentis genitus. Qui formatus est servus,
quia secundum servi formam, quam ex Virgine sus-
cepit, creatus est. Ob hoc etiam dicitur eum Domi-
nus *ex utero servum sibi* formasse, quia ad hoc ven-
it, ut faceret voluntatem Dei ; et natus est servus
Dei, cum nos e contrario nascamur servi diaboli. In
baptismo namque post effimur servi Dei. *Dominus*,
inquit, *formans me ex utero servum sibi* dicit nunc,
ut *reducam Jacob ad eum*. Ac si dicat : « Non sum
missus nisi ad oves, quæ perierunt, domus Israel
(Matth. x, 6). » Sed quia non omnes credituri sunt,

Israel totus non congregabitur In Ecclesiam, sed
magis per totum orbem captivus dispergetur. Se-
quitur :

« Et glorificatus sum in oculis Domini. » Cui, cum
dixissem : « Pater, clarifica Filium tuum (Joan. XVI,
1), » respondit de cælo dicens : « Et clarificavi, et
iterum clarificabo (Joan. XII, 18). » — « Et Deus
meus » in passione « factus est fortitudo mea, » quia
Pater mecum est. Et quia « oportebat Christum pati,
et resurgere a mortuis die tertia, et prædicari in no-
mine ejus penitentiam et remissionem peccatorum
in omnes gentes incipientibus a Jerusalem (Luc. XXIV,
46), » recte subjungitur :

VERS. 6. — « Et dixit : Parum est, ut sit mihi
servus ad suscitandas tribus Jacob, et sæces Israel
convertendas. Dedi te in lucem gentibus, ut sis salus
mea, usque ad extremum terræ. »

Parum quippe fuit, ut Filius Dei formam servi ac-
ciperet propter tribus Israel ad fidem convertendas,
et *sæces Israel*, id est carnales Judaici populi reli-
quias *convertendas*, nisi et cunctas per orbem gentes
illuminaret, atque omnes, qui sunt in tota mundi
latitudine, si crediderint, salvaret. Paulus vero et
Barnabas a Judæis repudiati dixerunt : « Ecce con-
vertimur ad gentes. Sic enim præcepit nobis Domi-
nus : Posui te in lucem gentibus, ut sis in salutem
usque ad extremum terræ (Act. XIII, 46). » Quod qui-
dem Christo Domino specialiter dictum esse, man-
ifestum est. Sed tamen hoc sibi jam dictum arbi-
trantur apostoli membra illius se esse recolentes,
sicut etiam ipse propter ejusdem corporis unionem
dixit : « Saule, Saule, quid me persequeris ? » (Act. IX,
4.) Ob hoc etiam interpretati sunt apostoli dictum
esse sibi, quod Christo dictum est, quia non per se
ipsum sed per apostolos Christus prædicavit geni-
tibus. Sequitur :

VERS. 7. — « Hæc dicit Dominus redemptor Israel
Sanctus ejus ad contemptibilem animam, ad abomi-
natam gentem, ad servum dominorum : Reges
videbunt, et consurgunt principes, et adorabunt
propter Dominum, quia fidelis est, et sanctum Israel,
qui elegit te. »

Ad contemptibilem animam gentilium, *ad abomi-
natam gentem* paganorum, *ad populum gentilem*
multorum servum dominorum, id est idolorum *dicit*
nunc *redemptor et Sanctus Israel*, quia *reges vid-
ebunt in te salutem meam usque ad extremum terræ,
et principes consurgunt* a somno pristinae infidelitatis,
et *adorabunt Deum vestrum non propter te, sed pro-
pter Dominum, qui fidelis est* in promissione qua
dixit Abraham : « Quoniam benedicentur in semine
tuo omnes gentes (Gen. XXII, 18) ; » et *propter San-
ctum Israel, qui per immensam pietatem suam nunc
elegit te*. Idcirco enim tandem crediderunt reges et
principes, quia viderunt ubique gentes fidem susce-
pisse. Sequitur :

VERS. 8. — « Hæc dicit Dominus : In tempore
placito exaudivi te, et in die salutis auxiliatus sum
tui. »

Tempus placitum est a resurrectione Salvatoris A ruptis et montuosis, et asperis erant pascua fidelium, quando rigida, et involuta legis doctrina pascabantur, sed nunc in planis et latis doctorum sermonibus alimonia dulci reficiuntur. Sequitur :

VERS. 10. — « Non esurient, neque sitient, et non percutiet eos æstus et sol, quia miserator eorum reget eos, et ad fontes aquarum potabit eos. »

Non esurient, neque sitient, sicut ait Dominus. « Ego sum panis vitæ, qui venit ad me, non esuriet, et qui credit in me, non sitiet unquam (Joan. vi, 35). » *Et non percutiet eos æstus et sol*, id est tribulationis ardor non fatigabit aut lædet mentem eorum, quia divinitus protegentur, sicut scriptum est : « Obunbrasti super caput meum in die belli (Psal. cxxxix, 8). » Et iterum : « Sub umbra illius, quem desiderabam : sedi (Cant. ii, 3). » *Quia miserator eorum reget eos*, ut dicant : « Dominus regit me, et nihil mihi deerit, in loco pascuæ ibi me collocavit (Psal. xxii, 2). » *Et ad fontes aquarum potabit eos*, de quibus dictum est : « Hauretis aquas in gaudio de fontibus Salvatoris (supra xii, 3). » Fontes enim aquarum sunt apostoli, de quibus fluentia veritatis emanant. Sequitur :

VERS. 11. — « Et ponam omnes montes in viam, et semitæ meæ exaltabuntur. »

Qui per vias et fontes signati sunt, ipsi et per montes exprimuntur, id est apostoli per meritum vitæ cœlestibus propinquant, quibus dictum est : « Illuminans tu mirabiliter a montibus æternis (Psal. lxxv, 5). » Qui ponuntur omnes in viam, quando ab prædicandum mittuntur, ut totum orbem ad cœleste regnum perducant. Et notandum quia non in vias, sed in viam ponuntur, quia omnes ipsi fiunt una via, quæ est Christus, et omnes unum Evangelium concorditer prædicant. *Semitæ vero sunt prophetæ*, qui exaltantur, quando ad spiritalem intellectum dicta eorum elevantur.

Vel præcepta divina per *semitas* designari possunt, quæ in Novo Testamento exaltantur, sicut ait Dominus : « Audistis, quia dictum est antiquis : Non mœchaberis. Ego autem dico vobis, quia omnis, qui viderit mulierem ad concupiscendum eam, jam mœchatus est eam in corde suo (Matth. v, 27). » Rursumque : « Audistis, quia dictum est antiquis : Oculum pro oculo, dentem pro dente. Ego autem dico vobis non resistere malo, sed si quis te percusserit in unam maxillam, præbe illi et alteram (ibid., 38). » Et item : « Audistis, quia dictum est antiquis : Diliges proximum tuum, et odio habebis inimicum tuum. Ergo autem dico vobis : Diligite inimicos vestros, benefacite his qui oderunt vos, et orate pro persequentibus et calumniantibus vos (ibid., 45). » Sic exaltatæ et ad cœlestem conversationem sublimatæ sunt semitæ Dei, id est præcepta ejus, quæ prius in infimis jacebant.

Vel *montes in viam* ponit, et *semitas exaltat*, quoniam omnia offendicula, quæ credentium poterant impedire græssus, vertit eis in planum excelsa humilians, et humilia sublimans, ut iter planum la-

Tempus placitum est a resurrectione Salvatoris A ruptis et montuosis, et asperis erant pascua fidelium, quando rigida, et involuta legis doctrina pascabantur, sed nunc in planis et latis doctorum sermonibus alimonia dulci reficiuntur. Sequitur :

VERS. 10. — « Non esurient, neque sitient, et non percutiet eos æstus et sol, quia miserator eorum reget eos, et ad fontes aquarum potabit eos. »

Non esurient, neque sitient, sicut ait Dominus. « Ego sum panis vitæ, qui venit ad me, non esuriet, et qui credit in me, non sitiet unquam (Joan. vi, 35). » *Et non percutiet eos æstus et sol*, id est tribulationis ardor non fatigabit aut lædet mentem eorum, quia divinitus protegentur, sicut scriptum est : « Obunbrasti super caput meum in die belli (Psal. cxxxix, 8). » Et iterum : « Sub umbra illius, quem desiderabam : sedi (Cant. ii, 3). » *Quia miserator eorum reget eos*, ut dicant : « Dominus regit me, et nihil mihi deerit, in loco pascuæ ibi me collocavit (Psal. xxii, 2). » *Et ad fontes aquarum potabit eos*, de quibus dictum est : « Hauretis aquas in gaudio de fontibus Salvatoris (supra xii, 3). » Fontes enim aquarum sunt apostoli, de quibus fluentia veritatis emanant. Sequitur :

VERS. 11. — « Et ponam omnes montes in viam, et semitæ meæ exaltabuntur. »

Qui per vias et fontes signati sunt, ipsi et per montes exprimuntur, id est apostoli per meritum vitæ cœlestibus propinquant, quibus dictum est : « Illuminans tu mirabiliter a montibus æternis (Psal. lxxv, 5). » Qui ponuntur omnes in viam, quando ab prædicandum mittuntur, ut totum orbem ad cœleste regnum perducant. Et notandum quia non in vias, sed in viam ponuntur, quia omnes ipsi fiunt una via, quæ est Christus, et omnes unum Evangelium concorditer prædicant. *Semitæ vero sunt prophetæ*, qui exaltantur, quando ad spiritalem intellectum dicta eorum elevantur.

Vel præcepta divina per *semitas* designari possunt, quæ in Novo Testamento exaltantur, sicut ait Dominus : « Audistis, quia dictum est antiquis : Non mœchaberis. Ego autem dico vobis, quia omnis, qui viderit mulierem ad concupiscendum eam, jam mœchatus est eam in corde suo (Matth. v, 27). » Rursumque : « Audistis, quia dictum est antiquis : Oculum pro oculo, dentem pro dente. Ego autem dico vobis non resistere malo, sed si quis te percusserit in unam maxillam, præbe illi et alteram (ibid., 38). » Et item : « Audistis, quia dictum est antiquis : Diliges proximum tuum, et odio habebis inimicum tuum. Ergo autem dico vobis : Diligite inimicos vestros, benefacite his qui oderunt vos, et orate pro persequentibus et calumniantibus vos (ibid., 45). » Sic exaltatæ et ad cœlestem conversationem sublimatæ sunt semitæ Dei, id est præcepta ejus, quæ prius in infimis jacebant.

Vel *montes in viam* ponit, et *semitas exaltat*, quoniam omnia offendicula, quæ credentium poterant impedire græssus, vertit eis in planum excelsa humilians, et humilia sublimans, ut iter planum la-

« Et servavi te, et dedi te in fœdus populi ut suscitares terram, et possideres hæreditates dissipatas. »

VERS. 9. — « Ut diceres his, qui vincti sunt : Exite ex his, qui in tenebris : Revelamini. »

Servavi te a malo, o Ecclesia, de gentibus et dedi te in fœdus populi, ut suscitares terram, ut omnem populum ita confederares, ut omnes unum essent in Christo induti « novum hominem, qui renovatur in agnitionem Dei secundum imaginem ejus, qui creavit eum, ubi non est Judæus et gentilis, circumcisio et præputium, barbarus et Scythia, servus et liber sed omnia in omnibus Christus (Coloss. iii, 10). » *Ut suscitares, inquit, terram*, id est terrenorum hominum mentem a somno pristini torporis ad bene agendum excitans, pervigilem reddens, vel ab interna morte jam suscitares ; et *hæreditates dissipatas*, id est gentes, quas per diversos errores maligni spiritus dissipaverant, *possideres in Christo, ut diceres his, qui in sui cordis carcere vincti sunt peccatorum funibus : Exite foras confitendo mala, quæ intus occultatis : et his, in tenebris obscuratum habentes intellectum, alienati a via Dei per ignorantiam, quæ est in illis propter cæcitatem cordis ipsorum diceres : Revelamini*, id est velamen ignorantiae, quo mens vestra tegitur, abjicite, ut abjecto velamine luce veritatis illustrari possitis. Sequitur :

« Super vias pascentur, et in omnibus planis pascua eorum. »

Quid per vias nisi apostoli designantur, qui nos recto cursu reducant ad patriam nostram? Via enim cum singulariter legitur, solet Christus intelligi; cum autem viæ plurali numero ponuntur, apostolos plerumque significant. *Super vias igitur, id est super apostolos, videlicet in doctrina eorum, pascentur, fideles, et in omnibus planis pascua eorum*, quia in apertis et latis expositorum dictis mens eorum spiritali cibo reficitur. Olim vero non in planis et latis expositorum sermonibus, sed in præ-

ruptis et montuosis, et asperis erant pascua fidelium, quando rigida, et involuta legis doctrina pascabantur, sed nunc in planis et latis doctorum sermonibus alimonia dulci reficiuntur. Sequitur :

VERS. 10. — « Non esurient, neque sitient, et non percutiet eos æstus et sol, quia miserator eorum reget eos, et ad fontes aquarum potabit eos. »

Non esurient, neque sitient, sicut ait Dominus. « Ego sum panis vitæ, qui venit ad me, non esuriet, et qui credit in me, non sitiet unquam (Joan. vi, 35). » *Et non percutiet eos æstus et sol*, id est tribulationis ardor non fatigabit aut lædet mentem eorum, quia divinitus protegentur, sicut scriptum est : « Obunbrasti super caput meum in die belli (Psal. cxxxix, 8). » Et iterum : « Sub umbra illius, quem desiderabam : sedi (Cant. ii, 3). » *Quia miserator eorum reget eos*, ut dicant : « Dominus regit me, et nihil mihi deerit, in loco pascuæ ibi me collocavit (Psal. xxii, 2). » *Et ad fontes aquarum potabit eos*, de quibus dictum est : « Hauretis aquas in gaudio de fontibus Salvatoris (supra xii, 3). » Fontes enim aquarum sunt apostoli, de quibus fluentia veritatis emanant. Sequitur :

VERS. 11. — « Et ponam omnes montes in viam, et semitæ meæ exaltabuntur. »

Qui per vias et fontes signati sunt, ipsi et per montes exprimuntur, id est apostoli per meritum vitæ cœlestibus propinquant, quibus dictum est : « Illuminans tu mirabiliter a montibus æternis (Psal. lxxv, 5). » Qui ponuntur omnes in viam, quando ab prædicandum mittuntur, ut totum orbem ad cœleste regnum perducant. Et notandum quia non in vias, sed in viam ponuntur, quia omnes ipsi fiunt una via, quæ est Christus, et omnes unum Evangelium concorditer prædicant. *Semitæ vero sunt prophetæ*, qui exaltantur, quando ad spiritalem intellectum dicta eorum elevantur.

Vel præcepta divina per *semitas* designari possunt, quæ in Novo Testamento exaltantur, sicut ait Dominus : « Audistis, quia dictum est antiquis : Non mœchaberis. Ego autem dico vobis, quia omnis, qui viderit mulierem ad concupiscendum eam, jam mœchatus est eam in corde suo (Matth. v, 27). » Rursumque : « Audistis, quia dictum est antiquis : Oculum pro oculo, dentem pro dente. Ego autem dico vobis non resistere malo, sed si quis te percusserit in unam maxillam, præbe illi et alteram (ibid., 38). » Et item : « Audistis, quia dictum est antiquis : Diliges proximum tuum, et odio habebis inimicum tuum. Ergo autem dico vobis : Diligite inimicos vestros, benefacite his qui oderunt vos, et orate pro persequentibus et calumniantibus vos (ibid., 45). » Sic exaltatæ et ad cœlestem conversationem sublimatæ sunt semitæ Dei, id est præcepta ejus, quæ prius in infimis jacebant.

Vel *montes in viam* ponit, et *semitas exaltat*, quoniam omnia offendicula, quæ credentium poterant impedire græssus, vertit eis in planum excelsa humilians, et humilia sublimans, ut iter planum la-

beant, atque campestre. Quia vero per has vias et aemitas ad eum totus mundus erat venturus, congrue subiecit :

VERS. 21. — « Ecce isti de longe venient, et ecce illi ab aquilone et mari, et isti de terra australi. »

Ad Christum namque per fidem venerunt alii a septentrionali; alii a meridiana parte, et alii a caeteris longinquis regionibus. Quæ tamen loca et spiritaliter intelligi possunt. *Ecce, inquit, isti venient de longe*, id est a criminosa conversatione, *et illi ab aquilone et mari*, id est a frigida et amara, turbulentaque gentilitate, *et isti de terra australi*, id est de plebe Judaica quæ fervore sæculi quasi meridiano sole quondam incaluit, et aura spiritus velut calido vento perlata est. Propter hanc omnium convocationem, quæ resuscitato Christo facta est, gaudere præcipitur omnis creatura, cum subditur :

VERS. 13. — « Laudate, cœli, et exsulta terra, jubilate montes laudem, quia consolatus est Dominus populum suum, et pauperum suorum miserebitur. »

Possunt autem per cœlos virtutes angelicæ designari, et per terram Ecclesia, per montes vero sancti prædicatores. *Cœli* igitur, id est habitatores cœlorum angeli laudare jubentur, atque *terra*, id est Ecclesia exsultare, *montesque laudem* jubilate, id est apostoli gloriam Dei prædicare, quia ipse Dominus Jesus *consolatus est*, per se ipsum visitavit, et redemit *populum suum*, et post vitæ hujus tribulationem *miserebitur pauperum suorum*, qui pro ejus amore spontaneam nunc paupertatem tolerant dicens, quia « propter verba labiorum tuorum ego custodivi vias duras (Psal. xvi, 4). » Tales enim pauperes plenariam consequentur misericordiam, cum venerint tempora refrigerii. Quia ergo duris interim afflictionibus premuntur, et nulli eorum inter adversa pusillamines fiunt, apte subjungitur :

VERS. 14. — « Et dixit Sion : Reliquit me Dominus, et Dominus oblitus est mei. »

Putat enim Sion, id est anima Christiana minus adhuc perfecta vel etiam Ecclesia in suis membris infirmantibus se inter adversa relictam a Domino, quia mox a tribulationibus non eripitur; et oblivioni datam se ab eo, quia diutius malis præsentibus atteri permittitur. Dei autem memoria nec oblivione rumpitur, nec recordatione sarcitur, sed cum aliqua deserens prætermittit, more mentium oblivisci dicitur; et cum post longum tempus, quæ voluerit, visitat, nostræ mutabilitatis consuetudine recordatus vocatur. Tempore igitur persecutionis aliquoties æstimavit Ecclesia se divinitus oblivioni traditam, quia tot et tanta mala per multos annos passa est ab adversariis, ut per semetipsam desperare cogereetur. Sed huic ejus æstimationi Dominus respondet :

VERS. 15. — « Nunquid oblivisci potest mulier infantem suum, ut non misereatur filio uteri sui? Et si illa oblita fuerit, ego tamen non obliviscar tui. »

Nihil in hoc mundo inveniri potest, quod tanto

affectu quis diligit, quanto mater filium diligit. Sed tamen uberioribus charitatis visceribus, et perseverantiori affectu diligit Deus filios suos. Nemo ergo, cum aliquid patitur molesti, æstimet se a Deo derelictum, aut oblivioni traditum : « Quoniam quem diligit Dominus, corripit; flagellat autem omnem filium quem recipit (Prov. iii, 12). » Qui et subjungit dicens ad Sion.

VERS. 16. — « Ecce in manibus meis descripsi te : muri tui coram oculis meis semper. »

VERS. 17. — « Venerunt structores tui : destruentes et dissipantes a te exibunt. »

In manibus meis descripsi te, qualis eras construenda sicut Ezechieli monstratum est in ultima voluminis sui visione, quia diligenter ibi determinavit mensuras uniuscujusque virtutis. Omnes enim descriptiones et mensuræ domus illius ædificium Ecclesiæ, moresque justorum depingunt, unde et eidem prophetæ dictum est : « Fili hominis, ostende domui Israel templum, ut confundantur ab iniquitatibus suis, et metiantur fabricam et erubescant ex omnibus, quæ fecerunt figuram domus et fabricæ ejus, exitus et introitus, et omnem descriptionem ejus, et universa præcepta ejus, cunctumque ordinem ejus, et omnes leges ejus, ut custodiant omnes descriptiones ejus, et præcepta illius, et faciant ea (Ezech. xliii, 10). » Sic et in manibus meis descripsi, et pulchra varietate depiuxi, et te semper in manibus meis teneo, sicut de meis ovibus dixi, quia « non rapiet eas quisquam de manibus meis (Joan. x, 28). »

Sed et *muri virtutum tuarum semper sunt coram oculis meis*, quia sine intermissione eas intuens custodio, ne qualibet ex parte frangantur, et ad interiora sua inimicos admittant. Non igitur, ut æstimaveras, te dereliqui aut oblitus sum, cui semper tam chara fuisti. Ego quidem, sicut eras construenda, *descripsi te*, et nunc *venerunt structores tui*, qui te, sicut eis descripsi, ædificant, id est sancti prædicatores, ex quibus unus ait : « Ut sapiens architectus fundamentum posui (I Cor. i, 3). » Qui vero te destruebant, et dissipabant, id est gentiles, qui filios tuos idolis immolare compellebant, vel hæretici, qui eos seducebant, nunc *exibunt a te*, id est procul expellentur de finibus tuis. Sequitur :

VERS. 18. — « Leva in circuitu oculos tuos et vide omnes isti congregati sunt, venerunt tibi. Vivo ego, dicit Dominus, quia omnibus his velut ornamento vestieris, et circumdabis tibi eos quasi sponsa. »

Leva oculos in circuitu, id est omnem partem orbis circumpice, quia *omnes*, qui sunt *in circuitu tuo*, id est in oriente et in occidente, in septentrione et meridie, *congregati sunt* in una voluntate credendi, et passibus cordis *venerunt tibi optulari*.

Quod vero dicitur : *Vivo ego, dicit Dominus, juramentum Dei est. Jurat ergo dicens : quia omni-*

bus his, qui congregati sunt velut ornamento pretioso vestieris, et circumdabis tibi eos quasi sponsa d. core magno. Sicut enim indumentum Christi tota Ecclesia generaliter dicitur, sic indumentum sunt Ecclesie singulorum animarum, quæ ab errore conversæ eandem Ecclesiam credendo eique fideliter inhærendo circumdant. Felix qui tanti meriti est, tantæque virtutis, ut ornamentum dicatur Ecclesie! Sequitur :

VERS. 49. — « Quia deserta tua, et solitudines tuæ, et terra ruinæ tuæ nunc angusta erunt præ habitatoribus, et longe fugabuntur, qui absorbent te. »

Deserta et solitudines tuæ, id est loca tua, in quibus raro quisquam fidelium habitabat, et terra ruinæ tuæ, id est ubi filii tui corruerant in idololatriam timore pœnarum, nunc omnia hæc loca erant angusta fidelibus, qui in eis habitaverint. Et gentiles, qui filios tuos absorbent in voraginem idololatriæ, vel hæretici qui eosdem natos tuos vel absorbendo sibi incorporabant, longe fugabuntur de regionibus tuis. Sequitur :

VERS. 20. — « Adhuc dicent in auribus tuis filii sterilitatis tuæ : Angustus est mihi locus, fac mihi spatium, ut habitem. »

Diu quidem quasi sterilis fuisti in temporibus martyrum, quia vix quemquam generare per Evangelium poteras. Sed nunc tot filios habituras, ut amplissimas basilicas fabricare tibi necesse sit. Vel ita dicent filii tui : Angustus mihi locus est in synagogis : fac mihi spatium in Ecclesiis, ut habitem latius, ut non comprimar blasphemis Judæorum, ut totum orbem tua mecum capiat latitudo. Sequitur :

VERS. 21. — « Et dices in corde tuo : Quis genuit mihi istos ? Ego sterilis et non pariens, transmigrata et captivata, et istos quis enutrivit ? Ego destituta et desolata (176), et isti ubi hinc erant ? »

Pace tandem Ecclesie data cum totus orbis ad fidem convolaret, mirata est ipsa filiorum suorum multitudinem, quod tanta fecunditate donaretur, quæ prius quasi sterilis fuerat, et de loco ad locum propter adversarios migrare consueverat secundum illud : « Cum vos persecuti fuerint in civitate ista, fugite in aliam (Matth. x, 23), » et in terra inimicorum suorum velut in Chaldæa tenebatur captiva et servilibus officiis mancipata. Unde et omni auxilio destituta videbatur, et desolata inter manus hostium. Ideoque et ipsa stupuit, unde sibi tam subito provenerit tanta fecunditas. Quomodo autem posset fieri ut copiosa multitudo filiorum ejus diceret : « Angustus est mihi locus, fac mihi spatium, ut habitem, » Dominus insinuat subjungens :

VERS. 22. — « Hæc dicit Dominus Deus : Ecce levo ad gentes manum meam, et ad populos exal-

tabo signum meum, et afferent filios tuos in ulnis, et filias tuas super humeros portabunt. »

Levo, inquit Dominus Jesus, ad gentes manum meam quasi nutu ejus advocans eas, et dicens : « Venite ad me omnes qui laboratis et onerati estis, et ego vos reficiam (Matth. 11, 28); » et ad omnes populos, qui sub cælo sunt, exaltabo regale signum meum, id est virtutem crucis meæ, ut omnes ad illud congregentur. Et afferent filios tuos in ulnis, id est virtute exemplorum bonæ actionis suæ quasi sustentando ad bene vivendum eos adducent, et filias tuas, id est animas imbecilles cum patientia portabunt super humeros cordis sui, ut eas tibi fideliter offerant. Sequitur :

VERS. 23. — « Et erunt reges nutritii tui, et reginæ nutrices tuæ. »

Sancti viri reges vocantur, quia prælati cunctis motibus carnis modo luxuriæ appetitum frenant, modo æstum avaritiæ temperant, modo gloriam elevationis inclinant, modo suggestiones livoris obruunt, modo ignem furoris exstinguunt. Reges ergo sunt, quia tentationum suarum motibus non consentiendo succumbere, sed regendo præesse noverunt. Similiter et reginæ sunt vel sanctæ feminæ, vel minus fortes animæ electæ. Et hi reges nutritii sunt Ecclesie, et nutrices ejus tales reginæ. Et audiamus ipsos nutritios ejus. Paulus, et Silas et Timotheus discipulis aiunt : « Facti sumus parvuli in medio vestrum, tanquam si nutrix foveat filios suos (I Thess. 11, 7). » Et item Paulus : « Tanquam parvulis in Christo lac vobis potum dedi non escam (I Cor. 11, 2). » Nec non et Petrus : « Sicut modo geniti infantes rationabiles sine dolo lac concupiscite, ut in eo crescatis in salutem (I Petr. 11, 2). » Sed et reliqui sancti doctores quasi reges eam usque hodie nutriunt. Eodem modo et sanctæ feminæ in conventibus ancillarum Dei faciunt. Bene itaque dictum est Ecclesie, quoniam reges erunt nutritii tui et reginæ nutrices tuæ. Sequitur :

« Vultu in terram demisso adorabunt te, et pulverem pedum tuorum lingent. »

Hoc adimpletum est, quando pagani ad Ecclesiam venientes projiciebant se ad pedes sanctorum osculantes eos, ut peccatorum suorum indulgentiam consequerentur et baptismi gratiam. Vel quia caput Ecclesie Christus est, caput adoratur in corpore. Et pulvis pedum ejus lingitur, quia prædicti reges quidquid in pedibus Ecclesie terreni operis adhæret, suo sermone tergunt atque lingunt. Sequitur :

« Et scies, quia ego Dominus, super quo non confundentur, qui expectant eum. »

Quando facta sunt hæc omnia, tunc pro certo cognovit Ecclesia, quæ prius se derelictam, et ob livioni datam putabat, quia quicumque Dominum

Jesum in suis tribulationibus et tentationibus expectant, non confundentur, quoniam aderit illis in auxilio opportuno, ut liberet eos atque glorificet. *Non confundentur*, inquit, *qui expectant eum*. Et quare non confundantur, etiam sequentibus verbis ostendit, dicens :

VERS. 24. — « Nunquid tolletur a forti præda, aut quod captum a robusto, salvabitur (177)? »

Apud homines quidem videtur impossibile, ut præda, quam fortissimus tyrannus rapuerit, ei possit excuti, et quod robustissimus prædo ceperit, salvari queat de manu ejus. Sed quia Deo nihil est difficile, Dominus Jesus non hominem, sed eum, qui omnes homines captivos tenebat antiquum hostem prostravit, ac deinceps tulit ab eo captivitatem, id est omnem gentem, quam sibi captivam in peccatis servire cogebat, et quod ille robustus violenter abstulerat, ipse omnipotenti miseratione salvavit. Et hæc captivitas tunc præcipue liberata est, quando gentilitas, quæ in idolis huic robusto tyranno serviebat, ad fidem conversa est. Quæ quia persecutiones ab infidelibus sustinuit, postquam in Christo pie vivere cœpit, apte subditur :

VERS. 25. — (178) « Eos vero, qui judicaverunt te, ego judicabo, et filios tuos ego salvabo. »

VERS. 26. — « Et cibabo hostes tuos carnibus suis, et quasi musto sanguine suo inebriabuntur, et sciet omnis caro, quia ego Dominus salvans te, et redemptor tuus fortis Jacob. »

Nam eos, qui *judicaverunt martyres*, judicabit Dominus in die novissimo secundum cruciatus, quos eis intulerunt; et *filios Ecclesiæ*, quos olim infideles condemnaverunt ipse salvabit in regno cœlorum. Et tunc *hostes* ejus pascet *carnibus* eorum, quia faciet, ut carnalitatem suam dentibus interioris hominis præ nimio dolore devorent sine fine plangentes, et secum rixantes quia carnaliter vixerunt. Cibabit eos *carnibus suis*, ut nequaquam aliorum, sed sua morte saturentur, et quia carnales sunt, et spiritum Dei non habent, suis vescentur carnibus.

Et quasi musto sanguine, id est peccato, quod ex carne et sanguine est, *inebriabuntur*, quando, sicut scriptum est, « commotione commovebitur terra (Isa. xxiv, 9), » id est quisque peccator a cogitatione agitabitur sicut ebrius. Recordatio quippe malorum, quæ fecerunt, conturbabit mentem eorum et inebriabit, ne quieto et sobrio corde possint lætitiæ justorum fieri participes. *Et tunc omnis caro*, id est omnis homo et bonus et malus *sciet* indubitanter, quia Dominus est, qui salvat electorum Ecclesiam, et quia *fortis Jacob*, id est ille, qui luctatus est cum Jacob (Gen. xxxii, 24), redemit eam ab omnibus malis, nam « videbunt Filium hominis venientem in nubibus cœli cum virtute multa et majestate, et mittet angelos suos cum tuba et voce ma-

(177) Alias, *salvum esse poterit*.

(178) Suppl. ex recent. edit. : *Quia hæc dicit Dominus : Equidem et captivitas a forti tolletur, et*

agna, et congregabunt electos ejus a quatuor ventis, a summis cœlorum usque ad extremos eorum (179) (Matth. xxiv, 30). » Hucusque Dominus Jesus electis suis multa bona promisit. Et nunc infideles Judæos inchoat alloqui. Nam sequitur :

CAPUT L.

VERS. 1. — « Hæc dicit Dominus : Quis est hic liber repudii matris vestræ, quo dimisi eam? Aut quis est creditor meus, cui vendidi vos? Ecce in iniquitatibus vestris venditi estis, et in sceleribus vestris dimisi matrem vestram. »

VERS. 2. — « Quia veni, et non erat vir : vocavi, et non erat qui audiret. »

Libellum quidem *repudii* dabat maritus odiosæ uxori quando dimittebat eam, et homo indigens nonnunquam filios suos vendebat creditori suo. Sed Dominus Jesus matri Judæorum, id est synagogæ velut odibili conjugi se dedisse libellum repudii non agnoscit, quoniam ipsa potius eum reliquit quam ipse eam. Et eos creditori non vendidit, quia census alienum nequaquam mutuaverat, id est peccatum non commiserat, ut necessitate compulsus avaro creditoris, id est diabolo eos redderet. Nihil enim ab hoc creditore accepit : « Venit enim, inquit, princeps hujus mundi, et in me non habet quidquam (Joan. xiv, 30). » Non ergo Dominus ipse Judæos vendidit, sed ipsi potius *se in iniquitatibus* suis vendiderunt diabolo sumentes pecuniam ejus. Homicidium namque pecunia diaboli est : « Ille enim ab initio homicida fuit (Joan. viii, 44). » Fecisti homicidium? diaboli pecuniam suscepisti. Adulterium diaboli pecunia est. Diaboli enim in eo imago est et subscriptio. Commisisti adulterium? Accepisti a diabolo numisma. Furtum, falsum testimonium, rapacitas, violentia, invidia, superbia, hæc omnia diaboli census est, diaboli et thesaurus. Talis enim pecunia de ejus moneta procedit. Hac pecunia emit ille, quos emit, et elicit sibi servos omnes, qui de hujusmodi censu quantumcunque susceperint.

Non igitur a Domino, sed a se ipsis *renundati sunt* Judæi *in iniquitatibus* suis, quoniam sponte propria quisque se diabolo vendit, dum voluntaria peccat. Hinc namque de Achab dicitur, quia « venundatus est, ut faceret malum (III Reg. xxi, 25). » Ii itaque qui auctorem vitæ interfecerunt, qui falsum testimonium adversus eum qui veritas est, protulerunt, qui per invidiam eum tradiderunt, merito *in suis iniquitatibus venditi* esse perhibentur.

Quorum *mater in sceleribus eorum* dimissa est, quia tanta in Dominum et in discipulos ejus mala commiserunt, ut et omnis synagoga sibi consentiens in perditionem simul iret, ex quo principes sacerdotum et seniores persuaserunt populis, ut peterent Barrabbam, Jesum vero perderent, ex quo populus ille universus ait : « Sanguis ejus super filios no-

quod ablatum fuerit a robusto salvabitur. Eos vero qui, etc.

(179) Alias, *ad terminos eorum*.

stros (*Matth.* xxvii, 25). » Venit enim Salvator ad eos nascens ex Virgine, et non erat in eis vir aliquis, id est viriliter agens, sed « omnes declinaverunt simul inutiles facti sunt (*Psal.* xliii, 3). » Vocavit eos ad gratiam novitatis prædicatione sua, et non erat ex eis, qui audire eum vellet. Non erat ex eis vir sive homo. Omnes enim veri Dei imaginem relinquentes bestiarum et serpentium sumpserunt imaginem. Non libellum repudiū eorum matri dedit Dominus, nec creditori vendidit eos, sed scelera eorum atque peccata dæmonibus eos vendiderunt in præsentis sæculi voluptatibus irretiti (180), ut illi parentem, et illa conjugem relinqueret, quam velut aulteram ulterius tenere ipse non potuit, sed volentem abire permisit. Idcirco dimissi sunt ab eo, ut innumeris calamitatibus nullo auxiliante opprimantur. Ad quos et subjungit dicens :

« Nunquid abbreviata, et parvula facta est manus mea, ut non possim redimere? Aut non est in me virtus ad liberandum? » Magna enim manus, id est potestas ejus, qua quondam Patres eorum a cunctis tribulationibus eripere solebat, non est abbreviata, ut et istos redimere similiter non posset a captivitate, qua per totum orbem dispersi tenentur, si redimi mererentur. Neque ei virtus deest, ut ab hac servitute longissima liberaret, si liberatione digni essent ut patres eorum. Nam ut virtutem suam non minoratam esse demonstrat, adjungit :

« Ecce in increpatione mea desertum faciam mare, ponam flumina in siccum, computrescent pisces sine aqua, et morientur in siti. »

VERS. 3. — « Induam caelos tenebris, et saccam ponam operimentum eorum. »

Qui quondam increpavit mare Rubrum et exsiccavit, nunc in increpatione sua desertum faciet mare sæculi hujus, id est turbulentam et amarā idololatriam, vel mendaciam malitiam. Et qui siccavit aquas Jordanis, ut transiret populus Israel, siccabit nunc flumina sæcularium dogmatum, ut sine obstaculo per viam rectitudinis populus electorum transeat ad regna polorum. Siccatis autem hujusmodi fluminibus computrescent pisces eorum, id est vel dæmones, qui in eis natabant, vel infideles homines, qui ex eis in malitia generati, in eis semper in malo cæci vivebant noxia libertate propriis voluntatibus sub errorum profundo dimissi. Computrescent pisces sine aqua mundanæ sapientiæ, quia damnatis omnibus errorum prædicamentis apparebit fetor impietatis eorum. Et morientur in siti, qui postquam veritate cognita siluerint illæ falsitatis doctrinæ, deficiet vita perversitatis eorum, quæ ex aquis hujusmodi dogmatum subsistebat.

Cæli quoque, id est doctores synagogæ, qui supra sapere videbantur, induentur, id est operientur tenebris ignorantæ, ut lumen veritatis vel intelligentiæ in eis non appareat. Et saccus, qui est habitus lugentium vel pœnitentium, fiet operimen-

tum eorum, ut sub apostolis vel sub Elia pœnitentiam agant. Vel si in sacco designatur asperitas, et punctio peccatorum, doctores Judæorum operiuntur sacco, quia circumdantur peccatrice conversatione, ut nil in eis nisi peccatum appareat. Deinde Salvator ad illud tempus, quo inter eos conversatus est, locutionem suam convertit, subdens :

VERS. 4. — « Dominus dedit mihi linguam eruditam, ut sciam sustentare eum, qui lapsus [*Vulg.* lassus] est, verbo. »

Nam juxta dispensationem assumpti corporis eruditus est, et linguam accepit disciplinæ, ut sciret, quando deberet loqui, quando reticere. Linguam namque eruditam ad prædicandum dedit ei Pater, ut eum, qui lapsus in peccato fuerat, sustentare verbo suo prudenter sciret, ne in pejus caderet, sed magis ad bonum consurgeret. Linguam eruditam habebat, quoniam et inimici et amici ejus confitebantur, quid « nunquam sic locutus est homo sicut hic loquitur (*Joan.* vii, 46). » Verbo sustentabat eum, qui lapsus fuerat, cum diceret paralytico : « Confide, fili, remittuntur tibi peccata tua (*Matth.* ix, 2). » Et alii : « Ecce salvus factus es, jam noli peccare, ne deterius tibi aliquid contingat (*Joan.* v, 14). » Et mulieri : « Nec ego te condemnabo, valde, et amplius jam noli peccare (*Joan.* viii, 10). » Atque simul omnibus : « Pœnitentiam agite, appropinquavit enim regnum cælorum (*Matth.* iv, 17). » Ita verbo suo Dominus sustentabat eos, qui laosi fuerant. Sequitur :

C « Erigit mane, mane erigit mihi aurem, ut audiam quasi magistrum. »

Quid per mane, nisi supernus adventus divinæ contemplationis exprimitur, quando mens divino lumine tota circumfunditur? Mane ergo erigebat Dominus aurem Filio hominis, ut audiret eum quasi magistrum, quia luce contemplationis suæ mentem ejus circumfundens ad summa levabat, et in illa luce accessibili docebat eum, quidquid homines docturus erat. Unde et ait : « Quia ego ex me ipso non sum locutus, sed, qui misit me Pater, ipse mihi mandatum dedit, quid dicam aut quid loquar, et scio quia mandatum ejus vita æterna est. Quæ ergo loquor, sicut dixit mihi Pater, sic loquor (*Jcan.* xii, 49). » Et cum prædicationem suam consummaret, dixit discipulis suis : « Quæcunque audivi a Patre meo, nota feci vobis (*Joan.* xv, 16). » Sequitur :

VERS. 5. — « Dominus Deus aperuit mihi aurem, ego autem non contradico : retrorsum non abii. »

Dominus Deus aurem cordis ei aperuit, ut verba ejus intelligeret, et præcepta ejus audiret. Ipse autem non contradixit his quæ audiebat, sed in omnibus obediens fuit. Neque ab his, quæ præceperat, retrorsum abiit, sed in eis usque ad finem perseveravit, factus obediens usque ad mortem (*Philipp.* ii, 8). » At contra nos postquam Dominus aurem

nobis aperuit, contradicimus ei, quia facere bona nolumus, quæ intelligimus; et si quid boni inchoavimus, plerumque fit, ut ab eo *retrosum* convertamur. Sed « qui dicit se in Christo manere, debet, sicut ille ambulavit, et ipse ambulare (Joan. II, 6), » ut præceptis Dei, quæ audit, non contradicat, sed in omnibus obediatur, ut ab eadem obedientia *retrosum* non eat, sed in bonis quæ cœpit, usque in finem perseveret. Redemptor vero noster hoc præcipue mandat accepit a Patre suo, ut animam suam, in qua servavit obedientiam, mox narrare inchoat, dicens :

VERS. 6. — « Corpus meum dedi percutientibus, et genas meas vellentibus : faciem meam non averti ab increpantibus et conspuentibus in me. »

Hæc enim facta sunt, quando Judæi damnaverunt eum reum esse mortis, et cœperunt conspuere eum et velare faciem ejus, et colaphis cædere, et dicere : « Prophetiza (Luc. XXI, 64), » et ministri eum alapis cædebant, et quando Pilatus tradidit eum flagellis cæsum, ut crucifigeretur, atque milites duxerunt eum intro in atrium prætorii, et convocantes totam cohortem induerunt eum purpura, et imposuerunt sibi plectentes coronam spinam, et cœperunt salutare eum : « Ave rex Judæorum (Matth. XXVII, 24), » et percutiebant caput ejus arundine et conspuent eum. Sequitur :

VERS. 7. — « Dominus Deus auxiliator meus, et ideo non sum confusus; ideo posui faciem meam ut petram durissimam, et scio, quoniam non confundar. »

VERS. 8. — « Juxta est, qui justificat me. »

In certamine passionis hujus est mihi *Dominus auxiliator*. Non enim sum solus, sed Pater mecum est (Joan. XVI, 52). *Et ideo non sum confusus* inter tot contumelias, et irrisiones, et opprobria, sed proposito mihi gaudio sustineo crucem confusione contempta. *Ideo posui faciem meam ut petram durissimam*, inter omnes illusiones et injurias, ut nullatenus erubescam. *Et scio, quoniam propter omnia, quæ perfero, non confundar*, sed potius gloriabor, quia qui de cruce Judæis insultantibus nunc descendere nolo, postmodum militibus exterritis resurgam de sepulcro. *Juxta est, qui justificat me*, quia, « qui me misit, mecum est, et non reliquit me solum, quia quæ placita sunt ei, facio semper (Joan. VIII, 29). » Sequitur :

« Quis contradicet mihi? Stemus simul : quis est adversarius meus? accedat ad me.

Si quis, inquit, contradicit mihi, veniat, et *stemus simul* ante tribunal Pilati, ut accuset me, quantum potuerit. Et si quis est *adversarius meus*, accedat ad me, ut iniquam voluntatem suam in pœnis meis expleat. Et notandum in his verbis, quantum pro nobis pati Salvator optaverit. Sequitur :

VERS. 9. — « Ecce Dominus Deus auxiliator meus, quis est, qui condemnet me. »

Dominus Deus auxiliator meus, quia « Videbitis Filium hominis sedentem a dexteris virtutis Dei, et venientem in nubibus cœli (Matth. XXVI, 64).

Quis igitur audeat me condemnare? Cum enim Dominus hoc dixisset, mox princeps sacerdotum scidit vestimenta sua, dicens : « Audistis blasphemiam quid vobis videtur? At illi responderunt : reus est mortis (Marc. XIV, 64). » Sed ut atrocitas eorum non timeretur, infirmitas eorum demonstratur, cum subditur :

« Ecce omnes quasi vestimentum conterentur, tinea comedet eos. »

Ac si dicatur : Citius inveterati morientur, et a vermibus comedentur. Aut certe *quasi vestimentum animæ in tormentis æternalibus conterentur*. Vel quia nullus eorum potest justificari præsentem Domino, omnes quasi vestimentum veterascent. « Quod autem inveterascent, perditioni proximum est (Hebr. VIII, 12). » Et quasi *tinea comedet eos* conscientia videlicet peccatorum, et zelus gentium salvatorum. Rursum ad eos Dominus clamat :

VERS. 10. — « Quis ex vobis timens Deum audiens vocem servi sui?

Ac si dicat : Si quis est in vobis qui Deum timeat, audiat *vocem* meam. Neque enim : « A me ipso veni, sed ille me misit (Joan. VII, 28). » — « Quare loquelam meam non cognoscitis? (Joan. VIII, 43). » — « Si veritatem dico, quare vos non creditis mihi? Qui ex Deo est, verba Dei audit, propterea vos non auditis, quia ex Deo non estis (ibid. 46). » Sequitur :

« Quis ambulavit in tenebris, et non est lumen ei? Speret in nomine Domini, et innitatur super Deum suum. »

Quis, inquit, conversationem suam hactenus in tenebris ignorantie duxit, et necdum veritatis lumine illustratus est? *Speret in nomine Domini*, quia amodo « Omnis, quicumque invocaverit nomen Domini salvus erit (Rom. X, 13), » sive Judæus, sive gentilis. *Et innitatur super Deum suum*, id est non in operibus legis quærat justificari, sed credat in eum, qui justificat impium, ut ei sua fides reputetur ad justitiam secundum propositum gratiæ Dei. « Si enim Abraham, ait Apostolus, ex operibus justificatus est, habet gloriam, sed non apud Deum (Rom. IV, 2). » Qui ergo non ex fide, sed ex operibus suis nititur justificari, non *super Deum*, sed super se ipsum innititur. Ille vero innititur super Deum suum, qui in Christo Jesu credit, ut justificetur ex fide Christi et non ex operibus legis. Iterum persecutoribus suis dicit Dominus :

VERS. 11. — « Ecce vos omnes accendentes ignem accincti flammis. » Et addit : « Ambulate in lumine ignis vestri, et in flammis, quas succendistis : de manu mea factum est hoc vobis : in doloribus dormietis. »

Ignem enim passionis succenderunt ei, et flammis accincti sunt, id est furore armati in eum. Sed de hoc igne lumen refulsit : quia ex passione et resurrectione Salvatoris totus mundus illuminatus est. Hoc ergo, quod ait : « Ecce omnes vos accendentes ignem accincti flammis. » Et misericorditer ammonendo subdit :

Ambulate in lumine ignis vestri, id est ponite

gressum actionis vestrae in luce fidei, quae de passione mea cujus auctores fuistis, per gloriam resurrectionis vobis respondet. *Et in flammis, quas succendistis, ambulate*, id est ardores tribulationum, quos mihi excitastis inimici, nunc pro nomine meo tolerate libenter amici, sicut Saulus mala, quae sanctis intulerat, postmodum ipse pertulit. *De manu mea factum est hoc vobis*, quia donatum est vobis non solum ut in me credatis, sed ut etiam pro me patiamini. *In doloribus dormietis*, id est in passionibus pro nomine meo delectabimini et requiem eas aestimabitis.

Quod si ad eos, qui in infidelitate permanserunt, hic sermo dirigitur, per sententiam justae retributionis eis dicitur : « Ambulate in lumine ignis vestri, et in flammis, quas succendistis. » Ac si dicat : *Ignem passionis quam mihi succendistis, patimini, et per flammam transite, quas mihi accendistis, ut qui. l. quid ego vel discipuli mei passi sumus a vobis, vos patiamini a Romanis. De manu mea factum est hoc vobis*, ut omnia mala haec pateremini, quia contra vos feci venire Romanos, et de vobis victoriam illis concessi. Ducti vero in captivitatem *dormietis in doloribus* quia usque ad adventum Eliae jacebitis in miseriis hujus captivitatis, et somno infidelitatis gravabimini. Vel post omnem hanc tribulationem *dormietis in doloribus*, quia cum corpus in morte soporatum fuerit, anima vestra gehennalium tormentorum dolores sustinebit.

Vel sibi ipsos omnes succenderunt ignem et flammam roboraverunt, quia habebant in se ligna, fennum, stipulam, spinas, tribulos ac lolium. Et quia accincti sunt flammis, ac circumdati, et sibi incendium roboraverunt, provocantur ad salutem et dicitur eis : « Ambulate in lumine ignis vestri, et in flammis, quas succendistis, » ut in poenis atque suppliciis discant Dei potentiam, et redeant ad salutem. Significat autem, ut dictum est, captivitatem ipsorum. Haec de excidio perfidiae Judaeorum locutus, de destructione Ecclesiae consequenter loquitur ad illos, qui ex eodem populo fidem susceperunt, dicens :

CAPUT LI

VERS. 1. — « Audite me, qui sequimini quod justum est, et quaeritis Dominum : attendite ad petram unde excisi estis, et ad cavernam laci, de qua praecisi estis. »

VERS. 2. — « Attendite ad Abraham patrem vestrum, et ad Saram, quae peperit vos, quia unum vocavi eum, et benedixi, et multiplicavi eum. »

VERS. 3. — « Consolabitur Dominus Sion, et consolabitur omnes ruinas ejus, et ponet desertum ejus quasi delicias, et solitudines ejus quasi hortum Domini : gaudium et laetitia invenitur in ca gratiarum actio, et vox laudis. »

Audite, inquit *me*, vos, qui sequimini justitiam, quae ex fide est, et quaeritis non aurum neque argentum, sed Dominum Patrem festinantes, ut ad ejus visionem portingatis. *Attendite ad petram*

unde excisi estis, id est considerate duritiam cordis infidelium, unde ferro praedicationis meae estis abscissi per gratiam meam, ut vivi lapides in aedificio Ecclesiae poneremini. *Et ad cavernam laci, de qua praecisi estis*, attendite, id est, fauces barathri, de quibus misericorditer liberati estis, cogitate. Populus enim ille perfidus ex magna parte sui jam damnatus est in inferno, et in eis qui ex eo moriuntur, quotidie damnatur. Sed vos in eadem perfidia positi, cum in eundem locum tartareum ruituri essetis, ab ore illius estis praecisi, antequam penitus devoraremini, id est ante terminum vitae praesentis.

Haec, inquit, attendite, ac deinde attendite ad Abraham patrem vestrum. Tale est, quod Apostolus Ephesiis ait : « Mementote, quia aliquando vos eratis gentes in carne, qui dicebamini praeputium ab ea quae dicitur circumcisio in carne manufacta, qui eratis illo in tempore sine Christo alienati a conversatione Israel, et hospites testamentorum, promissionis spem non habentes et sine Deo in hoc mundo ; nunc autem in Christo Jesu, vos qui aliquando fuistis longe, facti estis prope nunc in sanguine Christi (Ephes. 11, 11). » Similiter et Christus hoc in loco adjungit : « Attendite ad Abraham patrem vestrum, cujus filii facti estis per fidem. Non enim omnis qui ex Israel, hi sunt Israelitae, neque qui semen sunt Abraham omnes filii, sed in Isaac, inquit, vocabitur tibi semen, id est, non qui filii carnis, hi filii Dei, sed qui filii sunt promissionis, aestimantur in semine (Rom. 11, 6). »

Et ad Saram, quae peperit vos, attendite, quia non estis ancillae filii, sed liberae. Judaei enim generati in servitum legis sunt filii Agar ; Christiani vero filii Sarae in libertatem gratiae geniti. *Quia unum inquit, vocavi eum, et benedixi, et multiplicavi eum, » ut sit pater omnium credentium, non eorum tantum, qui sunt ex circumcisione, sed eorum, qui sectantur vestigia fidei ejus ex gentibus (Rom. 11, 11), » quia qui ex fide sunt, hi filii sunt Abraham sive Judaei sive gentiles.*

Consolabitur ergo Dominus, id est Pater meus Sion, id est Ecclesiam. Aut si forte Pater ista loquatur, dum dicit : quia consolabitur Dominus Sion et ruinas ejus, de Filio dicere intelligendus est vel de Spiritu sancto. Consolabitur ergo Dominus Sion dans ei post afflictionem pacem, post tristitiam gaudium, post sterilitatem fecunditatem. *Et consolabitur omnes ruinas ejus* erigens dejecta, restaurans diruta, quoniam « allevat Dominus omnes, qui corruunt, et erigit omnes elisos (Psal. CXLIV, 14). » Et quomodo fiat consolatio, subditur :

Quia ponet desertum ejus quasi delicias, etc.

Hoc autem loco per desertum vel solitudinem Ecclesiae quid aliud quam boni destitutio designatur ? Unde et sub Judaei typo Jeremias peccatoris animam deplorat, dicens : « Quomodo sedet sola civitas plena populo ? (Thren. 1, 1). » Vacua enim timore Dei pectora, et humore caelestis gratiae arentia deserto squalentis eremi comparantur. In desertum

versus fuerat hic mundus, quando Redemptor in A carne apparuit. Desertus enim erat ab omni cultura et fidei et timoris Dei, et peccatorum spinis obsitus. Squalebat tanquam ager incultus, et nullam penitus bonorum operum fecunditatem habebat, nullum imbrem spiritualis gratiæ excipiebat. Sed apostolica prædicatione rudis campus proscinditur et excolitur, et divini verbi semine fecundatur, ac virtutum floribus adornatur quasi deliciarum paradisi vernans. Bene ergo, cum promittitur plena mundi reconciliatio, dicitur, quia Deus *ponet desertum Sion quasi delicias, et solitudinem ejus quasi hortum Domini*, ut, « ubi abundaverat peccatum; superabundet gratia (Rom. v, 20), » et sit anima eorum juxta Jeremiam « quasi hortus irriguus (Jer. xxxi, 12). » Quod autem additur : Quia *gaudium et lætitia invenietur in ea, gratiarum actio, et vox laudis*, de exultatione fidelium et publicis Ecclesiæ solemnitatibus, quæ, postquam cessavere persecutiones, ubique fiunt, dictum intelligimus. Post hæc omnipotens Pater plebem suam de adventu novæ gratiæ alloquitur, dicens :

VERS. 4. — « Attendite ad me, popule meus, et tribus mea, me audite, quia lex a me exiit, et iudicium meum in lucem populorum requiescet. »

Nam populum suum decem tribus appellat, et tribum suam populum Juda, qui et tunc multo tempore Deum coluit, quando Israel serviebat idolis, et de quo Salvator erat nasciturus. Cujus adventum ut populus iste semper sollicitus expectaret ac suspensus, jubet eum ad se *attendere* dicens : *Quia lex a me exiit* scilicet lex nova, quoniam vetus jam dudum fuerat data; *et iudicium meum*, quo inter eos, qui in me credere voluerint, et eos, qui respuere voluerint, iudicabo, *requiescet in lucem populorum*, id est in illuminatione gentium. De hoc iudicio dicit Filius Dei : « In iudicium ego veni in hunc mundum, ut qui non vident, videant, et qui vident, cæci fiant (Joan. ix, 39). » Id est humiles gentiles videant, et superbi Judæi caritatem cordis incurrant. Jam vero de præsentia ejusdem Unigeniti subditur :

VERS. 5. — « Prope est justus meus, egressus est Salvator meus. »

Prope est, quia inter vos conversatur, et nescitis. *D Egressus est enim de illa secreta habitatione æternitatis suæ; quia « a summo cælo egressio ejus (Psal. xviii, 7). »* Vel de utero Virginis « egressus est tanquam sponsus procedens de thalamo suo (ibid., 6). » Ubi et de principibus Ecclesiarum subnectitur :

« Et brachia mea populos iudicabunt. « Quæ sunt *brachia Domini nisi apostoli, per quos fortia potentur operatur? Nam, sicut singulare fundamentum Ecclesiæ Christus est, atque fundamenta ejus apostoli et prophete, ita « et brachium Domini Christus est, et brachia ejus apostoli. Qui iudicabunt populos, sicut eis dictum est : « Quorum remisistis peccata, remittuntur eis, et quorum retinuerit's, re-*

tenta sunt (Joan. xx, 23). » Tunc quoque iudicabunt populos, quando sedebunt « super sedes duodecim iudicantes duodecim tribus Israel (Matth. xix, 28). » Sequitur :

« Me insulæ expectabunt, et brachium meum sustinebunt. »

Non solum, inquit, regiones, quæ sunt in amplâ mundi latitudine, sed *insulæ maris expectabunt me, sustinebunt brachium meum*, id est præstolabuntur Filium meum, quia « ipse erit expectatio gentium (Gen. xlix, 10). » Possunt et hæc *insulæ* intelligi animæ sanctorum, quæ in persecutione mundi istius firma in Deum solidatæ sunt fide, vel ecclesiarum multitudo ex gentibus. Pater enim venit in Filio, quoniam « Deus erat in Christo mundum reconcilians sibi (II Cor. v, 19). » Sed Pater prius nominatur ac deinde Filius, id est, brachium Patris, quia Filius ex Patre est, non Pater ex Filio. Brachium enim Dei Filius ejus est, non quod Deus Pater figura determinetur carnis humane, eique Filius tanquam membrum corporis hæreat, sed quia « omnia per ipsum facta sunt (Joan. 1, 5), » ideo brachium Domini dictus est. Sicut enim tuum brachium, per quod operaris, ita Dei brachium dicitur ejus Verbum, quia per Verbum operatus est mundum. Cur enim homo brachium, ut operetur aliquid, extendit, nisi quia non continuo fit, quod dixerit? Si autem tanta potestate prævaleret, ut sine ullo corporis sui motu fieret, quod diceret, brachium ejus, verbum ejus esset. Sic unigenitus Filius non est paterni corporis membrum, sed quia per ipsum Pater omnia operatur, brachium Patris est, qui et verbum Patris. Tale enim brachium nec porrectum extenditur, nec collectum contrahitur. Se ergo Pater et Filium suum ad gentes per apostolos venturum denuntians tunc primum gentes salutem consecuturas ait : « Me insulæ expectabunt, et brachium meum sustinebunt. »

Quod si hoc de die iudicii dicitur : *Insulæ expectabunt*, quia et illi, qui sunt in insulis, omnes reprobi tunc eum in Filio venientem formidabunt, et pondus brachii ejus sustinebunt, cum eos insanabili plaga percusserit, dicens : « Ite, maledicti, in ignem æternum (Matth. xxv, 41). » Nam quia sententia hæc juxta hunc sensum magis intelligenda sit, sequentia verba demonstrant, cum protinus subditur.

VERS. 6. — « Levate in cælum oculos vestros, et videte sub terra deorsum, quia cæli sicut fumus liquescent, et terra sicut vestimentum atteretur, et habitatores ejus sicut hæc interibunt : salus autem mea in sempiternum erit, et justitia mea non deficiet. »

Levate, inquit, in cælum oculos vestros, id est spectate hoc cælum, *quia cæli sicut fumus liquescent* in die novissimo. Tunc enim sicut ait Petrus : « Cæli ardentes solventur, et elementa ignis ardore tabescent (II Petr. iii, 22); » cæli vero non ætherici, sed acrei. Nam ignis illo tantum occupabit hujus ætriæ

spatium, quantum ascendit aqua diluvii, et eosdem A caelos concremabit, quos aqua tunc operuit. Superius autem de Domino legimus, « qui extendit velut nihilum caelos (supra xl, 22), » et nunc dicitur : *Quia caeli sicut fumus liquescent.* Unde satis apparet, quæ vel qualis sit natura caelorum videlicet similis naturæ nubium levis aut non solida, aut dura.

Et videte, inquit, id est cogitate ea, quæ sunt *sub terra deorsum*, videlicet gehennales pœnas, quoniam *terra*, quam nunc diligenter improbi, *sicut vestimentum atteretur* asperitate illius ignis, complanabitur, ut in meliorem speciem commutetur, et *habitatores ejus*, qui in ea semper habitare voluissent, *interibunt sicut ipsa.* Sancti enim « rapiuntur in nubibus obviam Christo in aera (I Thess. iv, 17); » reprobi vero relinquuntur in terra, ut cum ipsa ardeant, et in barathrum perditionis corruant cum diabolo.

Vel : sicut *atteretur terra*, ut in melius commutetur, sic et *habitatores ejus interibunt* non in perditionem sui, sed in abolitionem mali vilitatis antiquæ, et innovationem futuræ gloriæ, quando justi fulgebunt sicut sol, et abeuntibus præteritis facta fuerint omnia nova. *Salus autem*, quam tunc consequentur electi, *in sempiternum erit, et justitia*, quæ dabitur eis, *non deficiet*, quia et hoc in munere retributionis accipient, ut nunquam ulterius peccare possint, qui modo, quantumcunque possunt, peccata fugiunt. Deinde electos suos contra mundanas adversitates corroborat, dicens :

VERS. 7. — « Audite me, qui scitis justum, populus meus, lex mea in corde ipsorum ; nolite timere opprobria hominum, et blasphemias eorum ne metuat. »

Hæc enim Dominus illis loquitur, quibus et Apostolus ait : « Omnia facite sine murmurationibus et hæsitacionibus, ut sitis sine querela, et simplices filii Dei sine reprehensione in medio nationis pravæ et perversæ, inter quos luceatis sicut luminaria in mundo verbum vitæ continent (Philip. ii, 14). » Qui enim tales sunt, hi certe sciunt, quod *justum est, et lex divina in corde eorum est*, dum præcepta Dei cogitant. Et quondam ab infidelibus opprobria patiantur quasi credentes in crucifixum, quando grave crimen erat esse Christianum, et blasphemabantur quasi seductores et malefici. Nunc etiam quicumque boni sunt, inter malos vivunt, et a pseudochristianis irrisiones et opprobria sustinent atque blasphemantur. Sed istis omnibus a Domino dicitur : Ne metuant opprobrium insultationis et criminacionis, quod a pravis hominibus patiantur, et blasphemias, quæ sibi mendaciter obijciuntur ab eis. Cur autem detractiones eorum timere non debeant, subditur :

VERS. 8. — « Sicut enim vestimentum sic comedit eos vermis, et sicut lanam sic devorabit eos ti-

nea ; salus autem mea in sempiternum erit, et justitia mea in generationes generationum. »

Sicut vermis de veste nascitur, vel *tinea* de lana, et eandem vestem, vel lanam comedit; sic postquam isti mortui fuerint, ex carne eorum orietur vermis, qui comedit eam, et ideo non sunt timendi, quia post paululum tales sunt futuri.

Vel quia caro est quasi vestis animæ, *vermis*, qui hanc comedit, est carnalis tentatio, quia de ipsa carne nascitur, et eandem lacerat. Peccator enim *sicut vestimentum* a verme comeditur, cum ejus caro corruptibilis tentatione, quam fingit, ad interitum pervenit. Eadem sententia repetitur de lana et tinea, quæ dicta est de vestimento et vermæ. Homo (181) enim tentatione consumitur, sicut lana devorari solet a tinea, cui de se oritur, ut laceretur et interimatur. Tales sunt persecutores sanctorum, et ideo non sunt timendi.

Vel in pœnis sempiternæ damnacionis *sicut vestimentum sic comedit eos vermis, et sicut lanam sic devorabit eos tinea*, quia « vermis eorum non morietur, et ignis eorum non exstinguetur (Isa. lxxvi, 24). » *Salus autem Domini*, quam dabit sanctis suis, *in sempiternum erit*, quia « justus in perpetuum vivit, et apud Dominum est merces eorum (Sap. v, 16). » *Et justitia ejus*, quam illis dabit permanebit *in generationes generationum*, quia qui consummatam illam justitiam consecuti fuerint, nunquam ulterius eam poterunt amittere, sed in omnes generationes sæculi sæculorum justus esse feliciter perseverabunt, quia nunc justitiam quantum possunt, sectantur.

Justi itaque timere non debent opprobrium, quod ab infidelibus et pravis hominibus patiantur, scientes quia caput eorum Christus graviora pertulit ab illis. « Et si patremfamilias Beelzebub vocaverunt, quanto magis domesticos ejus ? » (Matth. x, 25.) Totum enim opprobrium illud, quod sanctis obijci solet, præcipue scriptum est de passione Salvatoris. Unde et Apostolus cum dixisset, quia Jesus extra portam passus est, subjecit admonendo : « Excemus igitur ad eum extra castra improprium ejus portantes (Hebr. xiii, 13). » Hinc et propheta nunc eandem ejus passionem, cujus improprium electi ejus portant, ad memoriam reducens alloquitur eum velut in sepulcro positum, et ut resurgat, admonet, dicens :

VERS. 9. — « Consurge, induere fortitudinem brachium Domini. »

Consurge de monumento, *inducere fortitudinem*, id est immortalitatis virtutem. Sequitur :

« Consurge sicut in diebus antiquis in generationibus sæculorum. »

Consurge sicut in diebus antiquis, ut sicut olim per Moysen filios Israel de manu Pharaonis liberatos transduxisti per medium maris in eremum; ita nunc per te ipsum, qui ad vitam præordinati sunt,

(181) C. Garst., *Verme. Non enim tent., etc.*

et adhuc principi mundi in luto carnalium voluptatum serviunt, per aquam baptismatis ad novam conversationem transducas. Sicut per Josue dedisti eis terram, quam promiseras; ita nunc per te repromissionem accipiant, qui vocati sunt aeternæ hereditatis. Sicut per Gedeonem liberasti eos de manu Madian, ita nunc per te ipsum libera credentes de manu infidelium. Sicut per David expugnasti inimicos eorum, et interfecisti vel subiecisti: ita nunc per te ipsum universos Ecclesiæ destructores debellans aut converte aut perime. Ita ergo *consurge* faciens nunc magnalia *sicut fecisti in diebus antiquis in generationibus* eorum, quæ transacta sunt, *sæculorum*. Sequitur:

« Nunquid non tu percussisti superbum, vulnerasti draconem? »

In passione percussus antiquum hostem, qui se cunctos homines vicisse superbiebat, *percussisti*, et lancea vulneratus virulentum *draconem*, qui veneno malitiæ suæ omnes interfecerat, *vulnerasti*. Sequitur:

VERS. 10. — « Nunquid non tu siccasti mare, aquam abyssi vehementis? »

Quid per *mare*, nisi sæculum designatur? Et quid per *aquam abyssi*, nisi caliginosa gentiliū errorum scientia? Quæ quia comprehendere ad integrum non poterat, sed sectatores suos in profundiora errorum seniper demergebat, et mendacia sua quibusdam figuratis locutionibus obumbrabat, velut ingens *abyssus* penetrari nullo ab usu poterat (182). Sicca-
vit ergo Dominus *mare* videlicet *aquam vehementis abyssi*, id est mundum purgavit annullans veterum errorum doctrinam, quia « stultam fecit hujus mundi sapientiam (I Cor. II, 20). » Sequitur:

« Qui posuisti profundum maris viam, ut transirent liberati. »

Si mare sæculum debet intelligi, nihil prohibet *profundum maris* inferni claustra sentire. Quod *profundum maris* Dominus petiit, cum inferni novissima electorum suorum animas erepturus intravit. Recte ergo dicitur: « Posuisti profundum maris viam, ut transirent liberati. » Hoc namque *profundum maris* ante Redemptoris adventum non via fuit, sed carcer quia in se etiam honorum animas quamvis non in locis pœnalibus clausit. Quod tamen *profundum* Dominus *viam* posuit, quia illuc veniens electos suos a claustris inferi ad cœlestia transire concessit. Unde et recte subditur: *Ut transirent liberati*. Sequitur:

VERS. 11. — « Et nunc, qui redempti sunt a Domino, revertentur, et venient in Sion laudantes: et lætitia sempiterna super capita eorum, gaudium et lætitiā tenebunt, fugiet dolor et gemitus: »

Qui de manu mortis a Domino redempti sunt, revertentur nunc ad paradysum, unde expulsi fuerant, et venient in eam, quæ sursum est, Jerusalem in

A voce exsultationis *laudantes* Redemptorem suum: et *lætitia sempiterna* manebit *super capita*, id est super mentes eorum, quam a Creatore. quem super se intuebuntur, accipient: *gaudium et lætitiā* sine intermissione *tenebunt* in illa beatitudine, et *fugiet* ab eis *dolor*, quia per illam felicem immutationem fient impassibiles: et *gemitus* elongabitur ab ipsis, quia nihil erit jam, unde possint gemere. Sequitur:

VERS. 12. — « Ecce ego ipse consolabor vos. »

Ipsa Dominus consolabitur eos, quia cum se ipsum ostenderit, faciet, ut omnes præteritas afflictiones pro nihilo pendant. Hanc enim consolationem cogitabat Apostolus cum diceret: « Quia non sunt condignæ passionibus hujus temporis ad gloriam, quæ revelabitur in nobis (Rom. VIII, 18). » Sequitur:

« Quis tu, ut timeres ab homine mortali, et a Filio hominis, qui quasi fenum ita arescet? »

VERS. 13. — « Et oblitus es Domini factoris tui, qui tetendit celos, et fundavit terram: et formidasti jugiter tota die a facie furoris ejus, qui te tribulabat, et paraverat ad perdendum, ubi nunc est furor tribulantis? »

VERS. 14. — « Cito veniet gradus ad aperendum, et non interficiet usque ad internecionem, nec deficiet panis ejus. »

A plurali numero in singularem veniens, ad personam subito infirmi uniuscujusque transivit, fortasse quia melius a singulis recognoscitur, quidquid dici singulariter auditur, ut ad cor suum quisque redeat, et in seipso, quod de unoquoque dicitur, reprehendat. Singularem igitur numerum tenuit, dicens: « Quis tu, ut timeres ab homine mortali, et a filio hominis, qui quasi fenum ita arescet? Et oblitus es Domini factoris tui? » Quisquis enim adversitatum tribulatione frangitur, a quo factus sit, minime reminiscitur. Nam qui fecit, quod non erat, factum sine gubernatione non describit; et qui benigne hominem condidit, nequaquam injuste cruciari permittit, nec sinit neglecte perire, quod est, qui hoc etiam, quod non erat, creavit ut esset.

Cum ergo causam tribulationis nostræ quærimus, et fortasse tardius invenimus, est ista consideratio, quod nihil injuste patiamur, quia si Deo auctore sumus, qui non fuimus, Deo regente non affligimur injuste, qui sumus. Ob hoc etiam timere non debemus adversa, quæ nobis ab homine inferuntur, quia ipse, qui nos persequitur, cum sit mortalis, hodie floret, et cras in *fenum arescet*. Conditor autem noster, qui nos gubernat, ac protegit magnitudine potentiæ suæ, cælum et terram fecit, et ideo quæcumque in cælo et in terra fiunt, optime disponit; quia ergo infirmus quisque cum premitur, a spe gaudii nimia pusillanimitate lassatur, et dum foris adversa tolerat, aut tolerare formidat, intus obliviscitur, quod gaudebat, recte nunc increpando

dicitur : « Quis tu, ut timeres ab homine mortali, et a Filio hominis, qui quasi fenum ita arescet? Et oblitus es Domini factoris tui, qui tetendit caelos et fundavit terram : et formidasti jugiter tota die, » id est toto tempore vitæ præsentis a facie, id est a præsentia furoris ejus, qui te pro Redemptoris nomine tribulabat, et paraverat ad perdendum, id est ad trahendum in æternam perditionem, si faceres, quod ille suadebat? Ista velut jam a præsentis vitæ malis exempto et ad gaudia perpetuæ pacis introducto dicuntur. Unde et apte dicitur : « Ubi nunc est furor tribulantis? »

Rursusque in præsentī adhuc certamine agonizantī dicitur : *Cito veniet Dominus factor tuus gradient super undas istius tribulationis ad aperiendum tibi januam regni caelorum, et non interficiet te furor tribulantis usque ad internecionem*, id est totum simul non interimet; quia licet corpus occidat, animam tamen non potest occidere (*Matth. x, 25*). » Vel totam Ecclesiam non interficiet usque ad internecionem, sed nonnullos, quibus datum est, glorificabit martyrio. Sive etiam Dominus dicitur non interficere usque ad internecionem, quia suorum animas semper a morte custodit illæsas, quamvis corpora affligat temporaliter, vel etiam interimat. *Nec deficiet panis ejus*, id est panis Domini, quo te semper intus pascet, dum famem et tormenta foris patieris, quia quanto exterior homo tuus corrumpetur, tanto magis interior renovabitur. Sequitur :

VERS. 15. — « Ego autem sum Dominus Deus tuus, qui conturbo mare, et intumescunt fluctus ejus, Dominus exercituum nomen meum. »

Mare est hoc sæculum, fluctus maris tribulationes sæculi. Et plerumque tempestas maris exsurgit in nos, id est principatus et potestates mundi concitantur et in tumore iracundiæ spumant, ut nos feriatur atque submergant. Sed ne timeamus hanc tempestatem. Dominus Deus noster est, qui conturbat mare, et intumescunt fluctus ejus. » Dum enim in hac Ecclesiæ navicula per hunc undosum supernatamus mundum, ipse patientiam nostram exercere volens, sicut nobis expedire novit, et amaros et elatos hujus sæculi fluctus concitat. Nec sævire fluctus possunt, nisi usque ad littus, ubi ipse terminum posuit. Nulla enim tentatio est, quæ non accipiat mensuram a Domino. Sint ergo tentationes, sint tribulationes maris, ex his non consumeris. Vide autem, utrum ipsæ tentationes non prosint; attende Apostolum : « Fidelis Deus, qui non vos sinat tentari supra id quod potestis ferre, sed faciat cum tentatione etiam exitum, ut possitis sustinere (*I Cor. x, 13*). » Non ait : Non vos sinat tentari omnino. Si enim recusas tentationes, recusas refectionem. Ergo recideris; et si recideris, in manibus artificis es. Aliquid tibi tollit, aliquid corrigit, aliquid complanat, aliquid mundat, agit quibusdam ferramentis suis, ipsa sunt scandala hujus sæculi, tu tantum de manu artificis noli cadere, nihil tentationis accidet ultra vires tuas. « Ego, in-

quit, sum Dominus Deus tuus, qui conturbo mare, et intumescunt fluctus ejus. » Ergo ne timeas fluctus sæculi, quos Dominus Deus tuus ad probationem tuam benigna dispensatione facit intumescere, sed in Domino Deo tuo confidens esto. Non sinit illos ultra sævire, quam novit ille mensuram, ex qua proficias. Hoc enim agit, vel agi permittit Deus ad utilitatem tuam, unde tu possis proficere.

Qui et Dominum exercituum se vocari commemorat, quia serviunt ei exercitus non solum legionum angelorum, qui electos inter discrimina vitæ hujus custodient et adjuvent, sed et malorum, qui eos tentando probent, et reprobos homines, qui bonos affligunt, exterminent. Post hæc et in nestrū caput sermo revertitur, dicens :

VERS. 16. — « Posui verba mea in ore tuo, et in umbra manus meæ protexi te, ut plantes caelos, et fundes terram, et dicas ad Sion : Populus meus es tu. »

Hæc enim verba Salvatori inter homines conversanti loquitur Pater. Posuit namque verba sua in ore ejus, sicut de eo Joannes ait : « Quem enim misit Deus, verba Dei loquitur (*Joan. iii, 34*). » Et ipse dixit, quia « ego a me ipso non sum locutus, sed qui misit me Pater, ipse mihi mandatum dedit, quid dicam, aut quid loquar (*Joan. xii, 49*). » Quem et in umbra manus suæ Deus inter adversarios ab æstu tribulationum protexit, ut nunquam eum tangere possent, nisi quando voluit. Ideo autem protectus est, ut libere prædicans plantaret in file caelos, id est apostolos, et fundaret terram, id est Ecclesiam, et diceret ad Sion, id est ad Hebræos fideles : *Populus meus es tu*. « Nunquid enim repulit Deus plebem suam, quam præscivit? » (*Rom. xi, 4*.) Hinc ergo dixit : *Populus meus es tu*, quando se Deum ejus illi innotescens gratia sua elegit eam. Ubi et congrua subditur admonitio :

VERS. 17. — « Elevare, elevare, consurge Jerusalem quæ bibisti de manu Domini calicem iræ ejus. »

Elevare ad spiritalem sensum, elevare ad cælestia regna, consurge ad spiritalem conversationem. *O Jerusalem*, id est plebs Hebræa, quæ bibisti de manu Domini calicem iræ ejus, id est amaritudinem afflictionis irascente Deo peccatis tuis sensisti. Calix enim designat passionem, sicut Dominus indicat, ubi Petro dicit : « Calicem, quem dedit mihi Pater non vis ut bibam illum? » (*Joan. xviii, 11*.) Jerusalem ergo biberat calicem iræ Dei, quando venit iste, qui dixit ad eam : *Populus meus es tu*, quia, dum Redemptoris expectaret adventum, multis interim malis afflicta est. Vel ad eam plebem Judaicam quæ non recepit eum, sed negavit, fit ista exhortatio, et monetur agere pœnitentiam, quia propter Salvatoris necem usque hodie captivitatis afflictionem tolerat. Sequitur :

« Usque ad fundum calicis soporis bibisti, et potasti usque ad fæces. »

Calix soporis nimietas afflictionis est, quæ mentem ab interna sui custodia obdormire facit, dum

In consideratione malorum, quæ foris patitur, plus A quam necesse est, vigilat. Fundus calicis ultima profunditas passionis malorum. Fæx calicis peccatum, quod ex profunditate afflictionis sumit, quia multis tribulationibus pressus non emendatur, sed pejor redditur. Jerusalem ergo usque ad fundum calicis soporis bibit, dum tantis afficeretur malis, ut his ebriata et soporata mentem suam oblivisceretur, et cœlestium bonorum non recordaretur, sed semper de malis exterioribus, quæ patiebatur, cogitaret. *Et potavit usque ad fæces*, quia usque in ultimam deveniens miseriam non est per tribulationem a peccatis intrinsecus mundata, sed multo amplius repleta sordibus. Sequitur :

VERS. 18. — « Non est, qui sustentet eam ex omnibus filiis, quos genuit, et non est, qui apprehendat manum ejus ex omnibus filiis, quos enutrivit. »

Quando venit Dominus, non erat, *Qui sustentaret eam ex omnibus filiis* ejus, aut *manum ejus* apprehendens supportaret imbecillum, et duceret per viam justitiæ, quia, sicut scriptum est : « Omnes declinaverunt, simul inutiles facti sunt (Psal. xiii, 3). » Multo tamen amplius post passionem deserta est omni solatio, quia non propheta, non apostolus exinde fuit in ea, qui ipsam consolatus sit, et apprehenderit manum ejus et jacentem elevaverit. Sequitur :

VERS. 19. — « Duo sunt, quæ occurrerint tibi : quis contristabitur super te ? Vastitas et contritio, et fames et gladius. »

Duo, inquit, mala occurrerunt tibi, o Jerusalem. *Et quis contristabitur super te*, quæ talia pateris ? Quæ sunt autem, quæ occurrerunt tibi adventum Salvatoris expectanti ? *Vastitas et contritio, et fames et gladius*. *Duo* dixit, quæ occurrerant, et quatuor subjecit occurrisse. Sed fortassis ipsa duo bis exposuit, velut si quæreremus, quæ essent illa duo, et ille responderet : *Vastitas et contritio*, iterumque eadem interpretari volens diceret, quia *fames et gladius* sunt illa duo. Sic enim sæpe loquitur scilicet verba sua quadam urbanitate sicut vir eloquens ingeminando. Sequitur :

« Quis consolabitur te ? »

VERS. 20. — « Filii tui projecti sunt, dormierunt in capite omnium viarum sicut bestia (185) illaqueata, pleni indignatione Domini, increpatione Dei tui. »

Quis, inquit, te poterit consolari in tantis malis ? *Projecti enim sunt in sinu tuo filii tui*, et exsules a te *dormierunt* in diversis viis afflictivi vinculis inimicorum *sicut bestia illaqueata*, dum ducebantur captivi *pleni ira Dei*, et *increpatione* illius, attriti flagellis et subjecti opprobriis atque contumeliis. Hæc et similia pertulit Jerusalem sub Nabuchodonosor et sub Antiocho, sed durius sub Tito. Sequitur :

VERS. 21. — « Idcirco audi hoc paupercula, et ebria non a vino. »

VERS. 22. — « Hæc dicit dominator tuus Dominus et Deus tuus, qui pugnavit pro populo suo : Ecce tuli de manu tua calicem soporis, fundum calicis indignationis meæ. »

Pauperculum vocat, quæ miserias pertulit. Quæ et ebria non a vino, sed ab afflictione erat. Cujus dominator Christus est, qui contra diabolum pugnavit pro populo suo. Quæ in manu calicem soporis habebat, dum pro perversa operatione sua divino iudicio tantam pateretur afflictionem, ut internam mentis amitteret evigilantiam. *Fundum quoque calicis* divinæ indignationis cum fæce gerebat extrema malorum irascente Domino patiens, et fæcem peccatorum inde contraherat. Sed postquam dominator ejus pugnavit pro populo suo, tulit *de manu ejus calicem soporis, et fundum calicis indignationis* suæ, quia resurgens a mortuis convertit eam ad se, et mala, quibus merito suæ pravitatis afflicta spiritualiter sopiebatur, avertit, et profunditatem miseriarum, in quibus amissa patientia, sordibus peccatorum murmurans implebatur, abstulit. Unde et apte subditur :

« Nor adjicies, ut bibas illud ultra. »

Neque enim ille populus, ex quo ad novitatem gratiæ conversus est, hoc poculum bibit, quia, etsi multa pro Christo pertulit, tamen peccati fæcem in calicem passionis non sumpsit; sed si quid fæcis in eodem calice habebat, mudatus est ab ea, neque sopitus est in afflictionibus, sed vigilantior effectus. *Ista quoque pars illius, qui necdum credit, adhuc calicem istum bibere non desistit et in fæcibus ejus versari*. Sed si pœnitentiam egerit, et elevata surrexerit, sciat calicem soporis et ruine de manu sua tollendum, et se ultra non bibituram eum. Sequitur :

VERS. 23. — « Et ponam illum in manu eorum, qui humiliaverunt te, et dixerunt animæ tuæ : Incurvare, ut transeamus. » Atque subjungitur : « Et posuisti ut terram corpus tuum, et quasi viam transcurrentibus. »

Immundi spiritus hunc populum humiliaverunt, quia mentem ejus ad desideria terrena inclinaverunt, et dixerunt animæ ejus : *Incurvare, ut transeamus*. Recta enim stat anima, cum superna desiderat, et non ad ima flectitur. Sed maligni Spiritus cum hanc in sua rectitudine conspiciunt, per eam transire non possunt. Transire namque illorum est immunda desideria illi spargere. Dicunt ergo : *Incurvare, ut transeamus*. Quia si ipsa se ad ima appetenda non dejecit, contra hanc illorum perversitas nullatenus convalescit; et transire per eam nequeunt, quam contra se rigidam in superna intentione pertimescunt.

Dixerunt itaque animæ Jerusalem : *Incurvare, ut transeamus*. Quia ut illi possent eam immundis implere desideriis, persuaserunt ei, ut se ipsam ad appetitum infirmorum ipsa inclinaret. Illa vero non solum animam persuadentibus illis incurvavit, sed et

corpus suum quasi terram posuit, et quasi viam ipsis transeuntibus, ut non solum per animam ejus transirent concupiscentias spargendo, sed et corpus ejus immunditia nequissimi operis velut terram colerent, et per illud quasi per viam assiluis operationibus peccati transeuntes vestigia suæ iniquitatis imprimerent. Sed tandem hæc per gratiam Redemptoris erigitur, et poculum soporis, quod ipsa biberat, ponitur in manu eorum, qui eam humiliaverant, ut amaritudinem æterni doloris bibentes in pœnis, ut Jeremias ait : « Dormiant somnum semperiternum (Jer. LI, 59). » Unde et subditur :

CAPUT LII.

VERS. 1. — « *Consurge, consurge, induere fortitudinem tuam Sion, induere vestimentis gloriæ tuæ Jerusalem civitas sancti : quia non adjiciet ultra, ut pertranscat per te incircumcisis et immundis.* »

Quia, inquit, animam tuam dæmonibus incurvasti, et corpus tuum terram eis conculcandum posuisti, *consurge* nunc in anima ab impetu terrenorum, *consurge* in corpore de luto vitiorum; et quia te impugnare aggredientur, ex quo eis subjacere nolueris, *induere*, id est circumdare fortitudine tua, ut potenter undique tentationibus eorum resistas. *Induere vestimentis gloriæ tuæ*, id est circumtegere virtutum ornamentis tu *civitas sancti*, id est Dei, qui ait : « Sancti estote, quia ego sanctus sum (Lev. XI, 44), » ut Regis tui sanctitatem imitari studeas. *Quia non pertransibit ultra per te incircumcisis et immundis*, id est quisque dæmonum jam te penitus, ut solebat, substratam sibi in consensu malitiæ conculcare non poterit. Transibit quidem, sed non pertransibit, quia sæpe volatiles tibi cogitationes immittet, sed voluntatem suam ex toto complere jam in te nequibit. Per eum namque pertransit, quem sibi consentientem invenit, quia usque ad effectum pravi operis hunc conculcare non desistit. Sequitur :

VERS. 2. — « *Excute de pulvere, consurge, sede Jerusalem, solve vincula colli tui, captiva filia Sion.* »

VERS. 3. — « *Quia hæc dicit Dominus : Gratis venundati estis, et sine argento redimimini.* »

Excute de pulvere terrenarum et inanium cogitationum, in quibus hucusque jacuisti; consurge inde et sede, id est cor tuum aliquando subleva ab infimis cogitationibus, et mala, quæ perpetrasti, desiste et pœnitentiam agendo *solve vincula peccatorum tuorum, et malarum cogitationum de collo tuæ mentis, quibus a diabolo captiva teneris. Gratis enim in iniquitatibus vestris Satanzæ venditi estis, et sine argento redimimini*, quia seductor ille pretium pro vobis non dedit, neque pro vestra redemptione argentum vel aurum non accipiet, sed sanguine meo redimimini. Sequitur :

VERS. 4. — « *Quia hæc dicit Dominus Deus : In Ægyptum descendit populus meus in principio, ut*

A colonus esset tibi, et Assur absque ulla causa calumniatus est eum. »

In Ægyptum descendit in principio populus Dei, ut colonus esset tibi, quia genus humanum a paradiso dejectum in tenebras sæculi hujus devenit, ut hic peregrinaretur, donec incolatus sui tempore finito licentiam revertendi ad patriam suam acciperet. *Et Assur, id est antiquus hostis, absque ulla causa calumniatus est eum*, quasi suus esset, quia et justos vindicare sibi nitetur ob reatum primi parentis. Et justa causa non erat, ut qui propriæ iniquitatis merito damnari non poterant propter culpam alienæ iniquitatis perirent, cum scriptum sit : « Filius non portabit iniquitatem patris (Ezech. XVIII, 20). »

Quod tamen de illis solummodo dicimus, qui computantur in populo Dei, non de abortivis et cæteris talibus, qui sunt ex multitudine perditorum, licet nihil egerint. Sed omnes, qui justitiam sectantes iniquitatem fugiebant, hos *sine causa* propter Adæ peccatum *calumniatus est Assur*, quia, ut lex divina censuit. « Non occidentur patres pro filiis, neque filii pro patribus, sed unusquisque in sua iniquitate morietur (Deut. XXIV, 16). » Et electos itaque Dei, licet sine causa, calumniatus est improbus iste calumniator, ita ut ad infernum propter hanc calumniam descendere cogerentur, ubi in locis quietis detinerentur, donec per redemptionis gratiam finita prorsus calumnia liberi transirent ad regna cælorum. Sequitur :

VERS. 5. — « *Et nunc quid mihi est hic dicit Dominus, quoniam ablati sunt populus meus gratis?* »

Quid mihi est hic, id est quid mihi est in hoc mundo, quid in terra habeo, quandoquidem *populus meus ablati sunt mihi gratis*, id est non propter suam, sed alterius culpam, videlicet ob peccatum primi hominis. Sequitur :

« *Dominatores ejus inique agunt dicit Dominus et jugiter tota die nomen meum blasphematur.* »

Dominatores ejus, id est dæmones, *inique agunt* vindicando sibi dominationem super eum, *et jugiter in universo mundo blasphematur nomen meum tota die*, id est toto tempore, dum ubique idola prædicantur. Sequitur :

VERS. 6. — « *Propter hoc sciet populus meus nomen meum in die illa, quia ego ipse, qui loquebar, ecce adsum.* »

Quia inique agunt dominatores populi mei, et nomen meum jugiter blasphemari faciunt, *propter hoc populus meus, quem ad vitam prædestinavi, sciet nomen meum*, quod adhuc ignorando blasphemavit, *in die illa*, qua sine argento redimimini, id est tempore resurrectionis meæ, quando prædicabitur hoc evangelium regni in universo orbe in testimonium omnibus gentibus. Nam *ego ipse*, qui per prophetas hæc vobis loquebar, *ecce adsum in carne præsens*, ut vos, sicut locutus sum, redimam. Dein de propheta Redemptoris hujus conversationem *inter homines* considerans, ait :

VERS. . — « Quam pulchri super montes pedes annuntiantis et prædicantis pacem, annuntiantis bonum, prædicantis salutem, dicentis Sion : Regnabit Deus tuus? »

Quam pulchri, inquit, hoc est admirabiliter pulchri *super montes*, id est super excellentissimos montes, super prophetas et apostolos *pedes annuntiantis pacem*, id est gressus actionum Christi, qui veniens evangelizavit « pacem vobis, qui longe fuistis, et pacem his, qui prope sunt (Isa. LVII, 19). » Nam, ea quæ ipse operatus est, dum reconciliationem nobis ad Deum prædicaret, et bonum patriæ cœlestis pollicendo annuntiaret, salutemque perpetuam promittendo prædicaret, adeo præclara sunt et admiranda, ut omnia sanctorum sic transcendant cacumina, ut hi, qui multum in Deo proficiunt, operum ejus vestigia vix tangere queant admirantes ex vertice cogitationis. Bene ergo admiratur propheta *pedes ejus pulchros super montes*. Qui et dicebat Sion : *Regnabit Deus tuus*, quando prædicare cœpit et dicere : « Pœnitentiam agite, appropinquavit enim regnum cœlorum (Matth. IV, 17). » Dicebat : *O Sion regnabit Deus tuus*, quoties fidelibus loquebatur de regno Dei, quoties regnum diaboli evertendum annuntiavit, et regnum Dei venturum. Qui et apostolos, id est regnum prædicare misit. Unde et ad ipsam versa locutione subditur :

VERS. 8. — « Vox speculatorum tuorum levaverunt vocem. »

Speculatores namque ejus sunt hi, quos ipse præposuit ecclesiis, qui in culmine superioris gradus constituti bona et mala ventura prævident, et spiritalibus inimicis venientibus subjectos populos ad bellum tuba prædicationis excitant. Horum ergo *speculatorum*, id est apostolorum atque doctorum vox audita est. *Levaverunt enim in prædicationem vocem suam*, ut a multis audirentur. Hæc postquam velut præterita vates est locutus, considerans adhuc esse futura, subjecit :

« Simul laudabunt, quia oculo ad oculum videbunt, cum converterit Dominus Sion. »

Speculatores enim, id est apostoli *simul laudaverunt*, quia unum Evangelium in toto orbe concorditer prædicaverunt. *Viderunt enim oculo ad oculum*, et facie ad faciem, *cum ad novitatem gratiæ converteret*, Dominus populum Sion, quia tunc eis dictum est : « Beati oculi, qui vident, quæ vos videtis. Dico enim vobis, quod multi prophetæ et reges voluerunt videre quæ videtis, et non viderunt, et audire quæ auditis, et non audierunt (Matth. XIII, 16). » Sequitur :

VERS. 9. — « Gaudete et laudate simul deserta Jerusalem, quia consolatus est Dominus populum suum, redemit Jerusalem. »

Laudantibus speculatoribus vos quoque laudate et gaudete simul, o deserta Jerusalem, id est homines, qui desituti a bono eratis in plebe Judæorum sed tamen ad vitam præordinati, *quia Dominus Jesus visitatione sua consolatus est populum suum Israeli-*

ticum, et sanguinis sui pretio redemit Jerusalem, id est Hebraicam plebem vel Ecclesiam. Deinde Evangelium omni creaturæ prædicatum est in universo mundo. Nam sequitur :

VERS. 10. — « Paravit Dominus brachium sanctum suum in oculis omnium gentium, et vident omnes fines terræ salutare Dei nostri. »

Dominus, inquit, hoc est : Deus Pater *brachium*, id est Unigenitum suum *paravit omnibus in interioribus oculis omnium gentium*, ut eum obtutibus fidei conspiciant. Et non solum gentes, quæ sunt in latitudine mundi, sed et eas, quæ sunt in marginibus ejus, faciet videre et agnoscere *salutare suum*, id est Dominum Jesum. Unde et credentes consequenter propheta admonet a contagio vitæ infidelium *recedere*, cum subjungit :

VERS. 11. — « Recedite, recedite, exite inde, pollutum nolite tangere : exite de medio ejus, munjimini, qui fertis vasa Domini. »

Recedite magis corde et opere quam loco ab iniquatione conversationis infidelium, et discedat ab iniquitate omnis, qui nominat nomen Domini. Recedite ergo plus actionis quam loci mutatione. Exite inde, id est a pristina conversatione. *Pollutum nolite tangere*, id est : cujusquam peccatis consentire. Quid est enim *tangere pollutum* nisi consentire peccatis? *Exite de medio ejus*, id est de medio mali, de medio pollutionis, de medio pristinæ conversationis, de medio sæcularium illecebrarum.

Aliud est esse in mala conversatione, et aliud esse in *medio ejus*. Potest quippe fieri ut aliquis in ea sit, sed cum in extremis finibus ejus moretur, quodammodo extra eam esse videatur. Qui vero in *medio ejus* moratur, ita est malo circumseptus, ut ex omni parte æquale sit ei spatium ejus. Unde nunc *de medio ejus* quasi de corde ejus peccatores exire jubentur. Qui enim in vitiis valde demersus est, hic in *medio* veteris conversationis habitat; qui vero paulatim relinquens malum, et sese ad meliora convertens non tam cœperit virtutes possidere quam cupere, iste, licet ex medio vitæ veteris discesserit, necdum tamen ab ea exivit.

Hoc quoque nobis in Ecclesia manentibus adhuc præcipitur, quod illis fidelibus, qui inter gentes cœperunt credere, dictum est : « Recedite, recedite, exite inde, pollutum nolite tangere. » *Recedite non corporaliter, sed spiritaliter, non loco sed animo. Exite inde*, id est malos corripite, ne et vos, si tacueritis, involvamini peccatis eorum. *Pollutum vitiis nolite tangere*, id est, nolite ei vestrum assensum præbere, ne participes sitis delictorum eorum. Quid enim est *recedere inde*, nisi cor suum a malo separare? Quid est *exire inde*, nisi facere, quod pertinet ad correptionem malorum, quantum uniuscujusque gradu aut persona salva pace fieri potest? Quid est *pollutum non tangere* nisi peccatis alienius non consentire? Relinquendo enim peccatum recessisti inde; oburgando autem in cæteris existi liber inde in corde, et in conspectu Dei : continendo te

deinceps a consensu non tetigisti pollutum. Vel apostolis et prædicatoribus atque credentibus jubetur, ut recedant a Jerusalem, et in toto mundo prædicent Evangelium, nec immunditias carnalis observantiae legis attingant.

Quod autem sequitur: « Mundamini, qui fertis vasa Domini, » sic exposuit Gregorius (*Reg. past. cap. 2*): « Rector, inquit, semper cogitatione sit mundus, quatenus nulla hunc immunditia polluat, qui hoc suscepit officium, ut in alienis quoque cordibus pollutionis maculas tergat, quia necesse est, ut esse munda studeat manus, quæ diluere sordes aliorum curat, ne tacta quæque deterius inquinet, si corda insequens lutum tenet. Hinc namque per prophetam dicitur: Mundamini, qui fertis vasa Domini. » — « Domini etenim vasa ferunt, qui proximorum animas ad interna sacraria perducentes in suæ conversatione fidei suscipiunt. Apud semetipsos ergo quantum debeant mundari, conspiciant, qui ad æternitatis templum vasa viventia in sinu propriæ actionis portant. » Sequitur:

VERS. 12. — « Quoniam non in tumultu exhibitis, nec in fuga properabitis. Præcedet enim vos Dominus, et congregabit vos Deus Israel. »

Non in tumultu exhibitis a veteri conversatione, sed in silentio latenter, quia et exeuntium pedes erunt cordis affectus. Incipietis enim inde exire prius corde per confessionem iniquitatis et amorem justitiæ, deinde post ea in fine sæculi etiam corpore ab his, qui in malitia permanent, separabimini. Nec in fuga properabitis, quia Christo duce non timebitis: diabolum, et quas vobis admolietur adversitates. Nam sicut scriptum est: « Qui timet Dominum, nihil trepidat, et non pavebit, quoniam ipse est spes ejus (*Eccli. xxxiv, 16*). » Præcedet enim vos Christus Dominus, relinquens vobis exemplum, ut sequamini vestigia ejus, et congregabit vos in Ecclesia sua.

Vel ab hac vita non exhibitis in tumultu, quia in obitu vestro non audietis effrenatos clamores anti-qui hostis, quibus tempore mortis animas peccantium calumniatur. Neque in fuga properabitis, quia, Christo duce, non timebitis diabolum, qui molietur vos persequi, et retinere. Præcedet enim vos Dominus Jesus, et congregabit in regno cælorum, quia « ubicunque fuerit corpus, illuc congregabuntur aquilæ (*Luc. xvii, 37*), » id est ubi Redemptor fuerit corpore, illuc adunabuntur sanctorum animæ.

Vel de Apostolis hæc sententia potest accipi, qui nequaquam victi de Jerusalem, sed ut victores recesserant, ut, qui quotidie prædicantes in templo Evangelium Dei millia Judæorum Christi fidei subjecerant, etiam mundum ipsius Evangelio subjugarent. Prævium enim habebant Dominum, qui congregaret eos, id est de orbe terrarum unum gregem faceret, de quo et subditur:

VERS. 13. — « Ecce intelliget servus meus, exaltabitur et elevabitur, et sublimis erit valde. »

Servus enim vocatur ille, « qui cum in forma

ΠΑΤΡΟΛ. CLXXXI.

A Dei esset, semetipsum exinanivit formam servi accipiens (*Philipp. ii, 6*). » Qui suos ad gloriam resurrectionis præcedens intellexit, id est intelligere fecit et intelligentiam dedit, quia tunc « aperuit illis sensus, ut intelligerent Scripturas (*Luc. xxiv, 45*). » Quod tempus Anna intuens ait: « Recedant vetera de ore vestro, quia Deus scientiarum Dominus est (*I Reg. ii, 3*). » Vel etiam ipse intellexit non ut Verbum Dei, sed ut servus, quia « proficiebat ætate et sapientia (*Luc. ii, 52*). » Et loquitur in psalmo: « Benedicam Dominum, qui tribuit mihi intellectum (*Psal. xv, 7*). » Qui deinde exaltatus est super omnes cælos, et elevatus est super cunctos ordines angelorum, et sublimis est valde, quia considet in dextera sedis magnitudinis in excelsis. Nam « Deus suscitavit illum a mortuis, et constituit ad dexteram in excelsis supra omnem principatum, et potestatem, et virtutem, et dominationem, et omne nomen quod nominatur, non solum in hoc sæculo, sed et in futuro, et omnia subjecit sub pedibus ejus (*Ephes. i, 20*). » De cujus adhuc humilitate, qua contemnendus erat, subjungitur:

VERS. 14. — « Sicut obstupuerunt super te multi, sic inglorius erit inter viros aspectus ejus, et forma ejus inter filios hominum. »

Et ad Jerusalem, nisi fallor, sermo dirigitur, quæ dum olim magnis calamitatibus aliquoties premere-tur, multi, qui eam tempore felicitatis admirabantur, obstupuerunt super eam videntes magnitudinem afflictionum ejus. Sed harum afflictionum populi sui voluit Redemptor pia conversatione fieri princeps, ut et super eum, qui passiones viderent, obstupescerent. Ait itaque: « Sicut obstupuerunt super te multi, » o Jerusalem, intuentes miseriam tuam et afflictionem: « sic inglorius erit inter viros aspectus ejus, et forma ejus inter filios hominum, » qui eum passibilem et humilem cernentes contemnent. Vel ad ipsum potest dici, quia obstupuerunt super te multi, cum tua signa viderent. Sed hinc majus miraculum fuit, quod his qui tot virtutibus gloriam suam declaraverat, tempore passionis visus est inglorius. Inglorius enim fuit inter viros aspectus ejus, quando « sprexit eum Herodes cum exercitu suo, et illudit (*Luc. xxiii, 14*); » et forma ejus gloriam non habebat inter filios hominum, quando Pilati milites chlamidem coccineam circumdederunt ei, et coronam de spinis posuerunt super caput ejus, et arundinem in dextera ejus, et genu flexo ante illum illudebant, dicentes: « Ave Rex Judæorum (*Matth. xxvii, 24*). » Sequitur:

VERS. 15. — « Iste asperget gentes multas. »

In lege dictum est (*Num. xix, 13*), ut mundus homo aqua expiationis aspergeret eos, qui immundi erant, ut mundari possent. Non aliter mundabantur Sed et sanguine hostiarum aspergebantur, quæ sanctificanda erant. Iste ergo, qui solus est ab omni sorde peccatorum immunis, iste summus sacerdos emundaturus gentes aspergit eas vel aqua expiationis, id est ablutione baptismi, seu gratia Spiritus

suū, de qua promiserat, quia « effundam super vos aquam mundam, et mundabimini ab omnibus inquinamentis vestris (*Ezech. xxxvi, 25*). » Vel sanguine hostiæ suæ, id est proprio cruore, de quo Petrus ait : « In obedientiam et aspersionem sanguinis Jesu Christi (*I Petr. 1, 2*). » Sequitur :

« Super ipsum continebunt reges os suum. »

Reges, qui contra Christianos leges sævissimas promulgabant, et eum blasphemabant, tandem continuerunt *os suum*, postquam gentes aspersæ fuerunt aqua baptismatis. Sequitur :

« Quia quibus non est narratum de eo, viderunt, et qui non audierant, contemplati sunt eum. » Israel vero, qui semper de eo verba prophetarum audierat, non cognovit eum. Unde et subditur :

CAPUT LIII.

VERS. 1. — « Quis credidit auditui nostro, et brachium Domini, cui revelatum est. »

Quis, subaudi, Judæorum, *credidit auditui nostro*, quem nos prophetæ perceperimus a Domino de Christo ejus vel prædicationi, quam audivit a nobis iste populus? *Et brachium Domini*, quod ipse idem Christus est, *cui Judæorum est revelatum?* Cum enim tanta signa fecisset coram eis, sicut Joannes loquitur : « Non credebant in eum, ut sermo Isaïæ impleretur, quem dixit : Domine, quis credidit auditui nostro, et brachium Domini cui revelatum est (*Joan. xii, 38*). »

VERS. 2. — « Et ascendet sicut virgultum coram eo, et sicut radix de terra sitiēti. »

Brachium Domini *sicut virgultum* ascendit coram eo, quia tanquam frutex terræ in alvo Virginis genuerunt, et maternis visceribus splendor novæ lucis emissus ascendit. Ascendit autem *sicut virgultum coram eo*, quia *factus est ei ex semine David secundum carnem* (*Rom. 1, 3*), et dignus apparuit, ut eum Dominus amico vultu semper libens aspiceret, ac per ætatum incrementa sicut verus homo profecit. *Et sicut radix de terra sitiēti*, id est de terra arida surrexit, quia ex carne Virginis est creatus, quæ humano semine rigata non fuerat. Sequitur :

« Non est ei species neque decor, et vidimus eum, et non erat aspectus, et desideravimus eum. »

VERS. 3. — « Despectum et novissimum virorum, virum dolorum, et scientem infirmitatem; et quasi absconditus vultus ejus, et despectus. Unde nec reputavimus eum. »

In his verbis perfidia Judæorum significatur, a quibus longe ante desideratus est Christus, et cum præsens adesset quia venit humilis, visus est eis non habere speciem, neque decorem. Nobis enim videtur « speciosus forma præ filiis hominum (*Psal. xlii, 3*). » *Vidimus*, inquit, *eum, et non erat aspectus*, quia in infirmitate brachium Domini latebat. *Vidimus eum despectum*, sicut ait : « Ego honorifico Patrem meum, et vos inhonorastis me (*Joan. viii, 49*). » *Et novissimum virorum*, quia non venit ministrari, sed ministrare. *Virum dolorum*, nam multi-

alices in carne pertulit. *Et scientem*, id est expertum in se ipso corporis hujus infirmitatem.

Et quasi absconditus vultus ejus et despectus; quia, licet electis nonnunquam facies ejus luceret, infideles tamen in eo majestatem non intelligentes *despectum* habebant vultum ejus, quem cernebant humilem et infirmum, quia humano corpore divina potentia celabatur. Unde, inquit, quia talis apparuit, non reputavimus eum esse, quod erat, id est non æstimavimus eum esse brachium Domini. *Et brachium Domini cui revelatum est ex nobis? Brachium Domini coæternus est Filius, et consubstantialis Patri, qui et virtus ejus est. De quo non jam errantium, sed recte consentientium voce subditur :*

VERS. 4. — « Vere languores nostros ipse tulit, et dolores nostræ mortalitatis misericorditer portavit in sua carne temporaliter, ut æternam vobis animarum et corporum sanitatem conferret.

Et portavit eos non fecte vel phantastice, sed vere, utpote homo veraciter infirmus et dolens. Quem ita infirmatum Judæi cernentes, non agnoverunt eum. Nam vox eorum rursus evidenter apparet, cum subditur : « Et nos putavimus eum quasi leprosum, et percussum a Deo et humiliatum. » Qui tamen jam cognoscentes eum, adjungunt protinus :

VERS. 5. — « Ipse autem vulneratus est propter iniquitates nostras, attritus est propter scelera nostra. »

Nos, inquit, *putavimus eum quasi leprosum*, id est lepra animæ intrinsecus contaminatum, dum diceremus : « Non est hic homo a Deo, qui Sabbatum non custodit Et quomodo potest homo peccator hæc signa facere (*Joan. ix, 16*). » Vel : « In Beelzebub, principe dæmoniorum, ejicit dæmonia (*Matth. ix, 34*). » *Et æstimavimus eum in passione percussum a Deo, et humiliatum*, quando insultabamus, dicentes : « Alios salvos fecit, se ipsum salvum facere non potest? Si rex Israel est, descendat de cruce, et credimus ei : confidit in Deo, liberet eum nunc, si vult. Dixit enim : Quia Filius Dei sum (*Luc. xxiii, 35; Matth. xxvii, 42*). » Hæc, inquit, dicentes putavimus eum pro culpæ suis a Deo percussum. Ipse autem *clavis et lancea vulneratus est propter iniquitates nostras*, et flagellis est *attritus propter scelera nostra*. Unde et subditur :

« Disciplina pacis nostræ super eum, et livore ejus sanati sumus. »

Disciplina namque vocari solet, quando quis virgis cæditur aut flagellis. Et quasi per disciplinam Pilatus eum volens emendare (*Luc. xxiii, 16*), apprehendit et flagellavit. Sed hæc *disciplina* fuit *pacis nostræ*, quia cum Deo per hanc *pacem* consecuti sumus. In qua videlicet flagellatione dorsum ejus est affectum *livore*. Sed et dum Judæi cæderent eum colaphis, ac palmas in faciem ejus darent, liventes factæ sunt genæ ejus, et collum ejus lividum percussionibus. Sed his livoribus et percussionibus reddita est nobis sanitas, quam in primo parente perdidimus.

Bene ergo dicitur, quoniam *disciplina pacis nostræ*

super eum, et livore ejus sanati sumus, quia per flagella, quæ pro nobis pertulit, dimissa sunt peccata nostra, et reconciliati sumus Deo, atque in amicitiam recepti, et per livorem verberum, quæ passus est, æterna sanitas nobis data est. Quod enim nos pro nostris sceleribus sustinere debebamus, ille pro nobis passus est « pacificans per sanguinem crucis suæ, sive quæ in terra sive quæ in cœlis sunt (*Coloss. 1, 20*). » Ubi suæ pietatis formam nobis præbuit, quia cum posset nobis etiam non moriendo concurrere, subvenire tamen moriendo hominibus maluit. Nam minus non amasset, nisi et vulnera nostra susciperet, nec vim nobis suæ dilectionis ostenderet, nisi hoc quod a nobis tolleret, ad tempus ipse sustineret. Passibiles quippe et mortales nos reperit et qui nos existere fecit ex nihilo, revocare videlicet etiam sine sua morte potuit a passione. Sed, ut quanta esset virtus compassionis, ostenderet, fieri pro nobis dignatus est, quod esse nos noluit, ut in semetipso temporaliter mortem susciperet, quam a nobis in perpetuum fugaret. Sequitur :

VERS. 6. — « Omnes nos quasi oves erravimus, unusquisque in viam suam declinavit, et Dominus posuit in eo iniquitatem omnium nostrum. »

Antequam bonus iste pastor veniret, *erravimus sicut oves absque pastore per desertum hujus sæculi plenum savis bestiis, id est dæmonibus : omnes nos, id est omnes homines, et unusquisque nostrum declinavit a recto itinere in viam suam, id est in actionem proprii negotii, dum voluntatem cordis sui pravi sequeretur. Unde Apostolus : « Causati sumus, inquit, Judæos et Græcos omnes sub peccato esse sicut scriptum est : Quia non est justus quisquam, non est intelligens, non est requirens Deum, omnes declinaverunt, simul inutiles facti sunt, non est, qui faciat bonum, non est usque ad unum (*Rom. 11, 9*). » Et paulo post : « Omnes enim peccaverunt, et egent gloria Dei justificati gratis per gratiam ipsius, per redemptionem, quæ est in Christo Jesu, quem proposuit Deus propitiationem per fidem in sanguine ipsius (*ibid. 23*). » Similiter et hic additur, quia *Dominus posuit in eo iniquitatem omnium nostrum, ut scilicet ipse solus portaret eam atque delecret, et omnes nos justificaret. Sequitur :**

VERS. 7. — « Oblatus est, quia ipse voluit, et non aperuit os suum. »

*Oblatus est ut agnus in sacrificium pro peccato mundi. Et oblatus est non invitus, sed sponte, quia ipse voluit. Ait enim : « Propterea me Pater diligit, quia ego pono animam meam, et iterum sumo eam. Nemo tollit eam a me, sed ego pono eam a me ipso. Et non aperuit os suum (*Joan. x, 17*) ; » quia Pilato et pontificibus pauca, Herodi autem nulla respondit. Hæc quasi transacta propheticus sermo narravit. Sed rursus hæc ipsa considerans nondum esse facta tunc, sed adhuc facienda, subjecit :*

« Sicut ovis ad occisionem ducetur, et quasi agnus coram tondente se obmutescet, et non aperiet

os suum. » *Sicut ovis, cum ad victimam ducitur, non repugnat : sic ille cum ad passionem duceretur, non est renisus, sed quidquid adversariis placuit, absque reluctatione patienter pertulit. Et sicut agnus, dum tondetur, spoliatur, ut alios vestiatur : sic ille spoliatus est, ut nos vestiret, et carne exutus est, ut indumento justitiæ et stola immortalitatis nos circumdaret. Non solum enim suo nos sanguine redemit, sed et latus aperuit, ut argentes infidelitate sua veste calefaceret, et audiremus ab Apostolo : « Quique in Christo baptizati estis, Christum induistis (*Gal. 3, 27*). » Sed dum agnus iste sic spoliaretur, obmutuit, et non aperuit os. Unde et evangelista scribit : « Cum accusaretur a principibus sacerdotum, et a senioribus, nihil respondit. Tunc dicit illi Pilatus : Non audis, quanta adversum te dicunt testimonia ? Et non respondit ei ad ullum verbum, ita ut miraretur præses vehementer (*Matth. xxvii, 12*). » Et semper in passione silentio studuit, ne a persecutoribus cognosceretur. « Si enim cognovissent, nunquam Dominum gloriæ crucifixissent (*I Cor. 11, 8*). » Qui et ideo dicitur tacuisse ut agnus, videretur tacuisse ut reus. Sequitur :*

VERS. 8. — « De angustia et de judicio sublatus est : generationem ejus quis enarrabit ? Quia abscissus est de terra viventium. »

*De angustia mortis, et iniquo judicio sublatus est, per virtutem resurrectionis. Et quare ? quia sine culpa fuit, quem ineffabiliter Virgo genuerat, et Deus ante sæcula de Patre natus est. Nam generationem ejus quis enarrabit ? Impossibile enim est divinæ ejus nativitatis nosse mysteria, de qua Pater loquitur : « Ante luciferum genui te (*Psal. cix, 3*). » Ipse enim in eo, quod virtus et sapientia Dei est, de Patre ante tempora natus est ; vel potius quia nec cepit nasci, nec desiit, dicamus verius : semper natus. Non autem possumus dicere : semper nascitur, ne imperfectus esse videatur. At vero, ut æternus designari valeat et perfectus, et semper dicamus, et natus, quatenus et natus ad perfectionem pertineat, et semper ad æternitatem, ut quocumque modo illa essentia sine tempore valeat temporali verbo designari. Nam neque natum præcessit genitor, neque genitorem subsecutus est genitus. Dicimus enim et Patrem sempiternæ natum esse. Sed in hujus generationis consideratione palpitat infirmus aspectus, et ineffabilem candorem lucis æternæ non potest intueri. Et cum nulla mens eam, sicut est, excogitare queat, quis eam enarrabit ?*

Vel de partu Virginis accipienda est hæc sententia, quia difficulter possit exponi, cujus rationem Mariæ quærenti ab angelo dictum est : « Spiritus sanctus superveniet in te (*Luc. 1, 35*), » ut vel ab angelo vel ab evangelista tantum nativitatis ejus sacramentum dicatur, cujus narrator rarissimus est, ne, si a pluribus diceretur, diabolus illam intelligeret, et eum crucifigi non faceret. Nunc autem quia improbus hostis inculpatam ejus generationem nescivit, pœnam ab eo mortis cæcus ex-

petiit. Nam *abscissus est de terra viventium*, id est per passionem mortis ablatus est de hoc mundo, in quo mortalem vitam ducimus, ut immortaliter vivat in cœlo. Cujus passionis causam Pater aperit subjungens : « Propter scelus populi mei percussi eum. » Hoc enim manifestum est. Sequitur :

Vers. 7. — « Et dabit impios pro sepultura, et divitem pro morte sua, eo quod iniquitatem non fecerit, neque dolus fuerit in ore ejus. »

Impios Judæos, qui cum crucifixerunt, *dabit pro sepultura* sua, quia ex quo sepultus est ab eis, projecit illos, ut jam sui non sint. Unde et Danieli dixerat angelus : « Occidetur Christus, et non erit ejus populus, qui negaturus est (Dan. ix, 29), » id est populus Judæorum. Sive *impios* gentiles, qui pietatem fidei non habebant, et *divitem*, id est populum Judæorum, qui divitiis Scripturarum affuebant, *dabit in vitam pro sepultura et morte sua*, quia pro salute utriusque populi passus est.

Vel *impios* dæmones *dabit pro sepultura* sua, ut ipsi sepeliantur et recludantur in inferno perpetua-liter mortui, quia hunc persecuti sunt usque ad sepulturam. Et *divitem dabit pro morte sua*, quia princeps hujus mundi, qui eum occidi fecit, judicatus est æternæ perditioni datus. Et cur suos interfectores dabit pro sepultura, et morte sua? Quia injuste preemptus est ab eis. Nam *iniquitatem non fecit*, sed inter peccatores sine peccato vixit, *neque dolus simulationis fuit in ore ejus*, sed semper simplex et pura veritas. Sequitur :

Vers. 10. — « Et Dominus voluit contere eum in infirmitate. »

Dominus enim passione voluit in infirmitate assumptæ mortalitatis *contere*, quia nisi Domino volente non possent ei adversarii quidquam facere. Sequitur :

« Si posuerit pro peccato animam suam, videbit semen longævum, et voluntas Domini in manu ejus dirigetur. » *Si pro peccato mundi posuerit animam suam*, id est mortem subierit, *videbit semen longævum*, id est filios suos longævitatē perpetuæ immortalitatis habentes. Vel *semen*, quod seminavit in bona terra, videbit ipse longævum, quia gaudebit doctrinam suam usque in finem sæculi permanere. « Et voluntas Domini, qui omnes homines vult salvos fieri, et ad agnitionem veritatis venire, dirigetur in manu (I Tim. ii, 4), » id est in operatione ejus, cum suos apostolos ad prædicandum ubique miserit, ut totus mundus in eum credat et salvetur. Sequitur :

Vers. 11. — « Pro eo quod laboravit anima ejus, videbit et saturabitur. »

Laboravit anima ejus, cum diceret : « Nunc anima mea turbata est (Joan. xii, 27). » Et : « Tristis est anima mea usque ad mortem (Matth. xxvi, 38). » Et : « Quia repleta est malis (Psal. lxxxvii, 4), » id

est doloribus *anima mea*. Sed quia *laboravit*, ideo *videbit* illud propter quod laboravit, id est salutem humani generis, et *saturabitur*, quia omnes, ut optaverat, salvabit. *Laboravit anima ejus* multo tempore, requiem non inveniens in Judæis. Sed nunc *videbit* Ecclesias in toto orbe consurgere, et earum fide *saturabitur*. Vel faciem Patris *videbit* illa beata anima, et *saturabitur*, sicut ait : « Adimplebis me lætitia cum vultu tuo (Psal. xv, 11). » Non enim in manufacta sancta introivit, exemplaria verorum, sed in ipsum cœlum, ut appareat nunc vultui Dei pro nobis. Sequitur :

« In scientia sua justificabit ipse justus servos meos multos, et iniquitates eorum ipse portabit. »

Ipsa solus inter peccatores *justus justificabit multos in scientia sua*, id est in agnitione nominis sui et fide et in doctrina. Unde et apostolis ait : « Jam vos mundi estis propter sermonem, quem locutus sum vobis (Joan. xv, 3). » Hos enim in sua scientia justificaverat. Et Paulus asserit, quia « non justificabitur homo ex operibus legis nisi per fidem Jesu Christi (Gal. ii, 16), » et quia « credenti in eum, qui justificat impium, reputabitur fides ejus ad justitiam (Rom. iv, 5). » Ut autem peccatores justificaret, *ipse iniquitates eorum*, quas illi portare non poterant, et quarum pondere opprimebantur, *portavit* in corpore suo super lignum, ut peccatis mortui, justitia viverent. Sequitur :

Vers. 12. — « Ideo disperit (184) ei plurimos, et fortium dividet spolia, pro eo quod tradidit in mortem animam suam et cum sceleratis reputatus est. »

Quia servos meos justificabit, et iniquitates eorum portabit *ideo disperit ei plurimos*. Vel *spoliu fortium*, id est homines, quos ab eis tulerit, *dividet* apostolis suis, ut Petrus et Jacobus et Joannes circumcisi populi principes fiant; Paulus autem et Barnabas ad gentes mittantur, locis non animo separati sub uno Domino stent in diversa acie, in toto orbe sibi Ecclesias ejus dividentes. Et quare *dividet spolia hæc*? Quia *tradidit in mortem animam suam*. « Venit enim non ministrari sed ministrare, et dare animam suam redemptionem pro multis (Matth. xx, 28). »

« Et cum sceleratis reputatus est. »

Id est inter latrones crucifixus est. Scribit enim Marcus : « Quia cum eo crucifixerunt duos latrones unum a dexteris, et alium a sinistris, et adimpleta est Scriptura, quæ dicit : Cum iniquis deputatus est (Marc. xv, 25). » Sequitur :

« Et ipse peccatum (185) multorum tulit, et pro transgressoribus rogavit. »

Ipsa peccatum multorum tulit, quia ipse est Agnus, qui peccatum mundi tulit immolatus; et *pro transgressoribus rogavit*, quia dum crucifigeretur, dice-

(184) *Alias, disperitiam.*

(185) *Alias, peccata.*

bat : « Pater dimitte illis. Non enim sciunt, quid A faciunt (Luc. xiiii, 34). » Sequitur .

CAPUT LIV.

VERS. 1. — « Lætare sterilis, quæ non paris, decanta laudem, et hinni, quæ non pariebas, quia multi filii desertæ magis quam ejus, quæ habebat virum, dicit Dominus. »

Postquam de capite locutus est, corpus alloquitur. Hucusque enim de humilitate ac passione Domini protulit oraculum; et nunc quando multitudo fidelium ex uno pro omnibus mortuo in tota mundi latitudine erat surrectura, demonstrat. *Lætare*, inquit, o Ecclesia sterilis, quæ non paris, decanta laudem, id est prædica, hinni, id est jubila, quæ ncn pariebas, quia nunc multo plures erunt filii, Ecclesiæ quondam desertæ quam Synagogæ, quæ erat B viro conjuncta. Per multos enim annos Ecclesia, quæ futura erat in omnibus gentibus, in filiis suis, id est in sanctis suis non apparuit. Sed nunc plures filii dicuntur futuri desertæ quam ejus, quæ habebat virum.

Nomine viri significatur lex vel rex, quam accepit primus populus Israel. Neque acceperant gentes legem eo tempore, quo loquebatur propheta, neque rex Christianorum adhuc apparuerat, ex quibus tamen gentibus longe fertilior, et numerosior sanctorum multitudo provenit. Lætatur ergo Ecclesia diffusa per gentes quondam sterilis, nunc in pluribus filiis fecundior quam Synagoga, quæ legem sive regem tanquam virum acceperat. Unde et additur ;

VERS. 2. — « Dilata locum tentorii tui, et pelles tabernaculorum tuorum extende, ne parcas; longos fac funiculos tuos, et clavos tuos consolida. »

Si enim dilatât Ecclesia locum tentorii sui omnes nationes et linguas occupans, ut longius quam Romani imperii jura tendantur, usque in Persas et Indos aliasque barbaras gentes funiculos porrigat. Tentorium autem Ecclesiæ potest accipi præsens Ecclesia in itinere hujus vitæ; tabernacula ejus plures Ecclesiæ, quæ simul unam Catholicam faciunt. Nam qui in tabernaculo est, firmam atque perpetuam non possidet mansionem, sed semper mutat loca, et ad altera festinat præteritorum obliviscens, donec perveniat ad bravium supernæ vocationis. Finis enim tabernaculorum æternæ domus possessio est : pelles tabernaculorum sancti, qui se ipsos in Ecclesiis mortificant vitiis, Quæ scilicet pelles non parce extenduntur, dum electi ad prædicandum in totam mundi latitudinem circumquaque diffunduntur. Funiculi ejus, præcepta ejus sunt, qui fiunt longi dum usque in barbaras procul nationes porriguntur. Clavi illius verba ejus sunt, qui solidantur, dum prædicatio ejus auctoritate robusta firmatur, vel assertionem veritatis constans efficitur.

Vel hoc dicendum, quia in filiis Noe Deus omnes gentes vocaverit sed deinde Abraham elegerit, et multitudinem dimiserit gentium. Gentilitas ergo,

quæ diu viduata permansit, et confusionem portavit, quod a legitimo viro deserta fuerit, prædicantibus apostolis reducit ad virum pristinum, et tantam gratiam consequitur, ut omnem priorem confusionem oblivioni tradat, et opprobrii viduitatis suæ non recordetur, quia dominationem excussit dæmonum, et Creatori pium exhibet famulatum. Sequitur.

VERS. 3. — « Ad dexteram enim et ad lævam penetrabis, et semen tuum gentes hæreditabit, et civitates desertas inhabitabit. »

Intrante gentium multitudine ad dexteram et ad lævam penetrat sancta Ecclesia regiones infidelium, quia hinc inde paulatim per universum orbem dilatatur inter incredulos. Vel ad dexteram penetrat, dum ad eos, qui justificandi sunt, pertingit. Ad lævam quoque penetrat, dum ad se quosdam in iniquitate permansuros admittit. Ad dexteram ergo per veros Christianos, et in sinistram per fictos Christianos in tam multis populis extenditur, et semen ejus hæreditat gentes et civitates quæ a vero Dei cultu et a vera religione desertæ fuerant inhabitat. Quæ, quia per orbem inter infideles ubique diffusa persecutiones et opprobria multa sustinuit, apte subjunctum est :

VERS. 4. — « Noli timere, quia non confundes, neque erubesces. »

Non enim timuit hominum minas et furias, quando sanguine martyrum tanquam honore purpureo vestiebatur tam multis tamque vehementibus et potentibus persecutoribus suis prævalens. Et jam non confunditur, neque erubescit, quia nunc ab omnibus populis glorificatur quæ prius a cunctis subsannabatur, quando magnum erat crimen fieri vel esse Christianum. Sequitur :

« Non enim te pudebit, quia confusionis adolescentiæ tuæ oblivisceris, et opprobrii viduitatis tuæ non recordaberis amplius. »

Non pudet eam nunc, quod olim detestabilis fuerit, quæ tempore, quo Dominus in terra conversatus est, parvula fuit, quia a nativitate recens verbum prædicare præ infirmitate non poterat. Adolescentula vero facta est tempore apostolorum, quando Dei verbo copulata per prædicationis ministerium cœpit in filiorum conceptione fetari. Adolescentula scilicet non jam vetusta per culpam, sed novella per gratiam, non senio sterilis sed ætate mentis ad spiritalem congrua fecunditatem. Quæ quia spiritaliter Christo conjuncta est, eo mortuo dicitur vidua. In hac autem adolescentia sua confusionem ipsa pertulit, quia in primis temporibus, ut dictum est, ubique subsannabatur, et opprobrium viduitatis suæ patiebatur, dum infideles impropere ei, Christum esse mortuum. Sed jam oblita est confusionis adolescentiæ suæ, nec recordatur opprobrii viduitatis suæ, quia paululum derelicta, et opprobriis subjecta tamen eminenti gloria reflorescit. Sequitur :

VERS. 5. — « Quia dominabitur tui, qui fecit te, Dominus exercituum nomen ejus. »

Jam dudum persecutores et increduli desierunt Ecclesiam dominari, solus conditor ejus dominatur illius. Sequitur :

« Et Redemptor tuus sanctus Israel, Deus omnis terræ vocabitur. » Redemptor Ecclesiam, qui quondam vocabatur *sanctus Israel*, qui tantum in Judæa notus erat et colebatur, nunc vocatur *Deus omnis terræ*, quoniam « exaltatus est super omnes cælos, et super omnem terram gloria ejus (*Psal. lvi, 12; Psal. cvii, 6*). » Sequitur :

VERS. 6. — « Quia ut mulierem derelictam et mœrentem spiritu vocavit te Dominus, et uxorem ab adolescentia abjectam dixit Deus tuus. »

Quasi a viro mulier derelicta corporaliter a Christo est Ecclesia, et ideo mœrore animi afficitur, sicut ipse prænuntiaverat, dicens : « Nunquid possunt filii sponsi jejunare quandiu cum illis est sponsus? Venient autem dies, cum auferetur ab eis sponsus, et tunc jejunabunt (*Matth. ix, 15*). » Neque jejunare, vel lugere poterant apostoli, dum Christus cum eis esset, quia Deum corporaliter secum conversare gaudebant. Sed ex quo Christus abiit in cælum, coeperunt sancti jejunare et flere, et in hac afflictione persistunt, donec ipse redeat. Hoc ergo est quod Ecclesiam ut *mulierem derelictam et mœrentem spiritu vocavit*.

Quæ et uxori ab adolescentia abjecta comparatur, quia Christo, qui Sponsus et vir ejus est, cælos ascendente, ipsa inter miseras sæculi a primis temporibus suis remansit. Vel gentilitatem per apostolos vocavit ad se Dominus ut *mulierem derelictam, et uxorem ab adolescentia abjectam*, quia quam temporibus Abraham reliquerat, hanc sibi nunc reconciliavit. Sequitur :

VERS. 7. — « Ad punctum in modico dereliqui te, et in miserationibus magnis congregabo te. »

In puncto mox, ut stylus ponitur, levatur, nec mora agitur, ut per exprimendam lineam trahatur. Tribulatio igitur electorum est ad puncti similitudinem, quia apparet ad momentum, sed disparet in perpetuum. Et sicut stylus in puncto, dum ponitur, levatur: sic præsentis vitæ afflictionem electus quisque, dum tangit, amittit. Omnis enim longitudo temporis vitæ præsentis punctus esse cognoscitur, cum fine terminatur. Cum enim quisque ad extremum perducitur, de præterito jam nihil habet quia tempora cuncta dilapsa sunt; in futuro nihil habet, quia unius horæ momenta non restant. Vita ergo, quæ sic angustari potuit, punctus est.

Quia igitur omnipotens Deus vel Ecclesiam vel quemlibet electum in hujus vitæ brevitate affligi permittit, recte nunc dicit ei : « Ad punctum in modico dereliqui te. » Eos enim, quos in æternum diligit, ad tempus relinquere consuevit. Unde et Psalmista precatur, dicens : « Non me derelinquas usquequaque (*Psal. cxviii, 8*). » Derelinqui enim esse ad modicum posse utiliter noverat, qui, ne usquequaque relinqueretur, pelevat. Sanctos quippe

suos Dominus veniendo adjuvat, derelinquendo probat, donis firmat, tribulationibus interrogat.

Sive longo igitur sive brevi tempore electus quisque vel Ecclesia tribulationibus subiaceat, apte dicitur ei : « Ad punctum in modico dereliqui te. » Et quia post hæc ad consortium beatorum congregabitur, ut pro temporali labore sempiternam requiem inveniat, pulchre adjicitur : « Et in miserationibus magnis congregabo te. » Quamvis hoc, quod ait : *Ad punctum in modico dereliqui te*, de eo tempore specialiter intelligendum sit, quo persecutiones olim passa est Ecclesia, et quod adjunxit : *Et in miserationibus magnis congregabo te*, de tempore pacis, quo sancti, quos infideles disperserant, congregati sunt, et omnes gentium reliquias ad fidem congregaverunt, ut nemo jam superesset, qui Ecclesiam persecutionem moveret. Quæ sententia reperitur protinus ad confirmationem, cum subditur :

VERS. 8. — « In momento indignationis meæ abscondi faciem meam parumper a te, et in misericordia sempiterna misertus sum tui, dixit Redemptor tuus Dominus. »

Momentum quippe *indignationis* suæ tempus illud persecutionum appellat, a quo *faciem* suam, id est respectum favoris sui atque auxilii et gratiæ parumper abscondit ab Ecclesia, dum eam tribulationibus probandam breviter ad tempus relinqueret. Sed postea *misertus* est ejus in *miseriordia sempiterna*, quia pacem ejus largitus est usque ad finem sæculi, quo consummato sempiternam perciperet tranquillitatem.

Quod si momentum divinæ *indignationis* vel omne spatium vitæ præsentis, vel omne tempus, in quo quisque tentatur, acceperis, in hoc momento *faciem* suam Dominus unicuique electorum abscondit, quoniam ad tempus eum in tribulationibus provida dispensatione relinquit. Sed post hæc Redemptor ejus Dominus in *miseriordia sempiterna miseretur* ejus, quia, « Cum probatus fuerit, accipiet coronam vitæ (*Jac. i, 12*). » Sive gentium multitudinem reliquit Dominus *ad punctum in modico*, id est ab Abraham usque ad Salvatoris adventum, quia omne tempus ad comparisonem æternitatis modicum est, et puncto simile. Sed per apostolos ad fidem totus orbis congregatus est. Momentum enim fuit tempus, in quo faciem suam Deus justo judicio abscondit a gentibus, sed postea sempiternam misericordiam illis prærogavit. Sequitur :

VERS. 9. — « Sicut in diebus Noe istud mihi est, cui juravi, ne inducerem aquas ultra super terram : sic juravi, ut non irascar tibi, et non increpem te. »

Sicut post diluvium juravit Dominus ad Noe, non se ultra inducturum aquas diluvii super terram (*Gen. ix, 11*) : sic post vitæ hujus afflictiones jurat unicuique justorum, quia jam ei non sit irasciturus vel increpaturus. Nunc enim suos misericorditer increpat, dicens : « Ego, quos amo arguo, et castigo

(Apoc. iii, 19.) Sed post hanc vitam nec irascetur eis, nec increpabit eos. Ait enim : « Qui verbum meum audit, et credit ei qui misit me, habet vitam æternam, et in iudicium non venit, sed transit a morte ad vitam (Joan. v, 24.) Hoc est ergo, quod nunc ait, quia *juravi, ut non irascar tibi, et non increpem te*

Vel sicut famulo suo Noe juravit Dominus, ne induceret aquas diluvii ultra super terram, sic post tempora martyrum juravit Ecclesiæ, ut jam amplius non irascatur ei, id est non faciet eam iras persecutorum sentire, et non increpet eam, id est non cinat ab inimicis increpari. In qua sententia satis apparet arcam significasse Ecclesiam, et diluvium tribulationes Ecclesiæ. Sicut ergo jam non erit diluvium dissipans terram; sic generalis persecutio sanctorum non erit usque ad tempus Antichristi, quando et mundus terminabitur. Nam quia pax perseverans ei sit declarat et sermo subsequens, quo dicitur :

VERS. 10. — « Montes enim commovebuntur, et colles contremiscent; misericordia autem mea non recedet, et fœdus pacis meæ non movebitur, dixit miserator tuus Dominus. »

VERS. 11. — « Paupercula, tempestate convulsa absque ulla consolatione. »

Facilius est, inquit, montes et colles moveri quam meam sententiam mutari. *Paupercula* vero dicitur Ecclesia de gentibus, quæ non habebat legem et prophetas, nec sermonem Domini. Et *tempestate* erat *convulsa*, quoniam multos sæculi turbines sustinuerat, et in varios idolorum fluctuabat errores, nec ullam habuit consolationem. Vel per *montes et colles* reges et principes designantur, qui tandem comperta veritate commoti sunt corde ad pœnitentiam, et contremuerunt iudicium Dei.

Divina Dei misericordia, quia parci ei tribulationibus non recedit ab ea, et *fœdus pacis* non movetur, sed perseverat usque ad regnum Antichristi cum ea. Erat enim hæc *paupercula*, id est humilis et pauper Ecclesia, *tempestate* tribulationum jactata, et a locis suis *convulsa*, ut exsul et vaga persecutores suos diffugeret, nec ullam inveniebat in mundo consolationem. De cujusmodi tempestate pauperulam hanc inconsolabiliter jactante dicit Corinthiis Paulus : « Non enim volumus ignorare vos, fratres, de tribulatione nostra, quæ facta est in Asia, quoniam supra modum gravati sumus supra virtutem, ita ut tæderet etiam nos vivere. Sed ipsi in nobis ipsis responsum mortis habuimus, ut non simus fidentes in nobis, sed in Deo, qui suscitavit mortuos, qui de tantis periculis eripuit nos (1^a Cor. i, 8.) Tales autem graviores multas tempestates post sustinuit hæc paupercula, donec placeret Deo mitigare fluctus hujus sæculi, et tempestates sedare, ut tranquilla jam navigatione portum salutis perpetuæ nostræ pauperula adire posset. Veniente ergo pace subjungitur

« Ecce ego sternam per ordinem lapides tuos, et fundabo te in sapphiris. »

VERS. 12. — « Et ponam jaspidem propugnacula tua, et portas tuas in lapides sculptos, et omnes terminos tuos in lapides desiderabiles. »

VERS. 13. — « Universos filios tuos doctos a Domino, et multitudinem pacis filiis tuis. »

VERS. 14. — « Et in justitia fundaberis. »

Stravit enim in Ecclesia Dominus *per ordinem lapides*, quia in ea sanctas animas meritum diversitate distinxit; et fundavit eam *sapphiris*, qui scilicet lapides coloris aerei in se similitudinem tenent, quia robur Ecclesiæ in animabus celestia petentibus solidatur. Et quoniam jaspis viridis est coloris, *jaspidem propugnacula* ejus posuit, quia contra adversarios illi pro sanctæ Ecclesiæ objecti sunt defensione, qui internis desideriis virentes nulla teporis reprobi ariditate marcescunt.

Portas vero ejus in *lapides sculptos* posuit. Ii quippe portæ sunt Ecclesiæ, per quorum vitam atque doctrinam intrat in eam multitudo gentium. Qui pro eo etiam, quod magis operibus pollent, et id quod loquentes asserunt, viventes ostendunt, non puri sed sculpti lapides esse memorantur. In quorum enim vita recta operatio cernitur, quasi in eisdem ipsis exprimitur, quod egerunt. Ubi omnem quoque sanctorum numerum generali collectione concludens subdit : « Omnes terminos tuos in lapides desiderabiles. » Et tanquam si audientes ista peteremus, ut hos lapides, quos diceret, indicaret, adjunxit : « Universos filios tuos doctos a Domino. » Filii enim Ecclesiæ, quos intrinsecus unctio Spiritus sancti docet de omnibus, ipsi sunt lapides desiderabiles, quos in ædificio supernæ civitatis ponere desiderant angeli. Quibus et *multitudinem pacis* se daturum pollicetur, ipsamque Ecclesiam in *justitia* fundatam asserit, ut in justitia firmiter stabilietur. Et hæc quidem pene omnia in Ecclesia fuerunt tempore persecutionis; sed valde copiosius et honestius sub tempore pacis: ideoque et inter promissiones pacis et ista promittuntur. Sequitur :

« Recede procul a calumnia, quia non timebis; et a pavore, quia non appropinquabit tibi. »

Recede a calumnia, quam infideles tibi faciebant; *et a pavore* furoris eorum. Vel si inimicos timere non vis, *recede a calumnia*, ut nemini calumniam inferas, nec injuste res alicujus auferre cupias, quia tunc securus et absque timore eris. Nam si pavorem abjicere volueris, *non appropinquabit tibi*, quia Dominus te proteget et securum faciet. Sequitur :

VERS. 15. — « Ecce accoia veniet, qui non erat mecum, advena quondam tuus adjungetur tibi. »

Data pace, venit ad me per fidem *accoia*, id est gentilis quisque, qui in regionibus fidelium quasi extraneus morabatur, et *non erat mecum*, sed cum diabolo. Et qui quondam erat *tuus advena*, nunc *adjungetur tibi*, o Ecclesia, fietque tuus civis et indigena. Hoc de reliquiis infidelium dictum est;

quæ, postquam pacem ubique habuit, conversæ A riendo perimeret eum, et opera ejus disperderet. Hæc enim ita esse demonstrat subjuncta sententia.

VERS. 16. — « Ecce ego creavi fabrum sufflantem in igne prunas, et proferentem vas in opus suum. Et ego creavi interfectorem ad disperdendum. »

VERS. 17. — « Omne vas quod fictum est contra te, non dirigetur, et omnem linguam resistantem in judicio judicabis. »

Quis est iste faber nisi Satanas, qui contra bonos, in quantum potest, mala fabricare non desistit? Et hunc enim Deus essentialiter creavit. Qui sufflat in igne prunas, quia humanas mentes in ardore perversorum desideriorum instigat. Unde alibi de eo Dominus ait: « Halitus ejus prunas ardere facit (Job. xli, 17). » Quid enim prunas nisi succensas internas cogitationes vel concupiscentias reproborum mentes appellat? Pruna enim vocatur, quando ardet, cum autem extincta fuerit, nominatur carbo. Pruna quippe a *perurendo* dicitur; et *carbo*, quia *caret* flammis. Prunas igitur mentes propriis concupiscentiis exustas intellige; halitum vero vel sufflationem antiqui hostis occultam instigationem ejus. Halitus ergo ejus prunas ardere facit, quia persuasio ejus mentes iniquorum, quæ per se ipsas succensæ sunt, mundanis desideriis multo gravius inflammat. Ardent enim, cum quodlibet temporale appetunt, quia nimirum urunt in desideria, quæ quietum et integrum esse animum non permittunt. Itaque sufflat in igne prunas, quia suggestionem suam mentes reproborum tangit, et igne concupiscentiarum vehementer accendit. Vel etiam contra bonos inflammat, sicque sufflando fabricat, et *profert vas iniquitatis in opus suum*, quoniam non desistit flatum suæ instigationis cordi ejus, quem decipit immittere, donec efficiat illud vas malitiæ suæ, et in operationem pravitatis perducatur. Ita enim fabricavit, et in opus iniquitatis suæ protulit iste faber vasa, de quibus Apostolus loquitur, quia Deus « sustinuit in multa patientia vasa iræ apta in interitum (Rom. ix, 22). »

Contra quem *fabrum* creatus est interfecto ad disperdendum vasa iniquitatis. Et quis est hic nisi Dominus noster, qui « spiritu labiorum suorum interficiet impium? (II Thess. ii, 8.) » Creatus est enim secundum humanitatem. et *creatus est ad disperdendum omne vas* pessimi fabri, quia « custodit Dominus omnes diligentes se, et omnes peccatores disperdet (Psal. cxliv, 20). » Creavit illum Deus ad disperdendos malos, quoniam « dedit ei potestatem judicium facere, quia Filius hominis est (Joan. v, 27). » — « Neque enim Pater judicat quemquam, sed judicium omne dedit Filio (ibid. 22). » Ait itaque: « Ecce ego creavi fabrum sufflantem in igne prunas, et proferentem vas in opus suum. Et ego creavi interfectorem ad disperdendum. » Hoc est: Creavi primum angelum, qui, postquam iniquitatem operari cœpit, non cessat humanas mentes instigare, donec mala quæ suggerit, perficiat; et contra *isem* *seci* *carnem* assumere Filium meum, qui mo-

Omne, inquit, *vas*, quod fictum est contra te, non dirigetur, id est omnis homo, qui factus est adversum te; malus ergo faber, qui contra Ecclesiam fingebat vasa sua. *Et omnem linguam*, inquit, quæ tibi resistit contradicens doctrinæ, *judicabis in judicio*, quia de reliquiis gentium, quæ non crediderint, judicabis, ut volueris. Hæreticos autem anathematizando damnabis. Vel in futuro judicio judicabis omnes, qui tibi contradicunt. Unde et subditur:

« Hæc hæreditas servorum Domini, et justitia eorum apud me, dicit Dominus. »

Hæc enim est hæreditas et justitia servorum Domini, ut omnem linguam nunc resistantem sibi judicent in futuro judicio. Demum ad fluentia sacræ locutionis universas gentes convocat. dicens.

CAPUT LV.

VERS. 1. — « Omnes sitientes venite ad aquas, et qui non habetis argentum, properate, emite, et comedite. »

Sitientes quippe erant gentiles, qui potum supernæ prædicationis desiderabant. Aquarum autem nomine scientia sacræ Scripturæ designatur, quæ suos auditores et a peccatorum sordibus abluere, et divinæ cognitionis fonte potare solet. Unde scriptum est: « Aqua sapientiæ salutaris potavit eum (Eccli. xv, 3). » Argenti vero appellatione eloquia divina signantur sicut Psalmista testatur dicens: « Eloquia Domini eloquia casta, argentum igne examinatum (Psal. xi, 7). » Qui igitur argentum non habent, ad aquas vocantur, quia nimirum gentilitas, quæ Scripturæ sacræ præcepta non acceperat, sacri eloquii inundatione satiatur. Quoniam tanto nunc avidius potat, quanto hanc diu sicca sitiebat. Nec solum bibit eam, sed et comedit, quoniam Scriptura sacra potus est in locis apertioribus, quia ita sorbetur, ut invenitur; cibus vero in locis obscurioribus, quia exponendo quasi frangitur, et mandendo glutitur. Emitur autem sine pretio a fidelibus, qui dum bona, quæ noverunt, libenter faciunt, ad internam intelligentiam perducuntur. Sic enim Psalmista bene vivendo emerat eam, ait: « A mandatis tuis intellexi (Psal. cxviii, 104). »

Vel *sitientes* intelligamus eos, « qui esuriunt, et sitiunt justitiam (Matth. v, 6); » *aquas* vero infusionem spiritualium gratiarum. Quid igitur ait: *Omnes sitientes venite ad aquas*? Hoc est, quod in Evangelio clamat: « Si quis sitit, veniat ad me, et bibat. Qui credit in me sicut dicit Scriptura, flumina de ventre ejus fluent aquæ vivæ (Joan. vii, 58). » Ubi mox evangelista subjungit: « Hoc autem dixit de Spiritu, quem accepturi erant credentes in eum (ibid., 39). » Cum ergo dicit: *Omnes sitientes venite ad aquas*, credentes ad spiritualia charismata vocat. Et qui non habent argentum, properare jubentur ad eas, quia difficile, qui pecunias habent, regnum Dei possunt intrare: et « Beati pauperes spiritus:

quoniam ipsorum est regnum cœlorum (*Math. v, 3*). » Pauperes ergo vocat, quia « qui non renuntiavit omnibus, quæ possidet, non potest meus esse discipulus (*Luc. xiv, 33*). » Sequitur:

« Venite, emite absque argento, et absque ulla commutatione vinum et lac. »

Quid per *vinum* nisi Scripturæ divinæ sensus spiritualis signatur mentes fidelium lætificans et debriando immutans? Unde in Proverbiis dicitur: « Date siceram mœrentibus, et vinum his, qui amaro sunt corde; hibant, et obliviscantur egestatis suæ, et doloris non recordentur amplius (*Prover. xxxi, 6*). » Quid vero lactis appellatio nisi dulces et apertæ sententiæ designantur, quibus simplices et parvuli nutriuntur? Unde et per Petrum eis dicitur: « Sicut modo geniti infantes rationabiles sine dolo lac concupiscite, ut in eo crescatis in salutem (*I Petr. ii, 2*). » *Vinum igitur et lac* nos emere jubet *absque argento et absque ulla commutatione pretii*, sed tamen emere, quia vel fortem vel simplicem Scripturæ sensum non pecunia emimus, sed bene vivendo acquirimus; non pretio comparamus, sed bene vite merito assumimus. Quia vero cunctos ad novitatem spiritualium donorum vocat, idcirco Judæos ad spiritalem intelligentiam venire nolentes increpat subjungens:

VERS. 2. — « Quare appenditis argentum non in panibus, et laborem vestrum non in saturitate? »

Panes enim refecionem Scripturæ sacræ non inconvenienter designant, quia scriptum est: « Cibavit illum pane vite et intellectus (*Eccli. xv, 3*). » Ait ergo Judæis solam litteram reservantibus: *Quare appenditis argentum non in panibus?* Ac si dicat: Pensatis sacra eloquia, sed non in refecione, quia dum solam speciem litteræ custoditis, de spiritali intelligentia pinguedinem internæ refecionis amittitis. Unde apte subditur: *Et laborem vestrum non in saturitate?* Neque enim scientia, quam discere laborant, poterit aliquando mentem eorum saturare, quia « semper sunt discentes, et nunquam ad notitiam veritatis pervenientes (*II Tim. xxxvii*). » Similiter increpantur illi, qui sequuntur sapientiam sæcularem, simulatasque doctrinas hæreticorum et omnem falsi nominis scientiam; ac magni pretii argentum et laborem continuum appendunt pro ea disciplina, in qua non sunt panes, et sudant pro iis cibis, in quibus nulla saturitas est. Unde patet eam sectandam esse sapientiam, quæ non est in foliis et flore verborum, sed in medullis et fructibus sensuum, quæ non prætervolat aurem, sed animum reficit. Sequitur:

« Audite audientes me, et comedite bonum, et delectabitur in crassitudine anima vestra. »

Vos, inquit, o Judæi, qui me aure corporis, auditis, *audite me* auribus cordis, *et comedite bonum* spiritualis sensus, *et delectabitur in crassitudine anima vestra*, quia relinquentes maciem litteræ impinguabimini gratia spiritualis intelligentiæ, et a terrenis desideriis ad sublimem cœlestis amoris elevabimini.

A Servare enim solam superficiei litteræ, vel in imo cogitationem ponere quid est aliud quam quædam macies cordis? Qui vero per spiritalem intellectum vel per amorem supernorum delectationis intimæ cibo pascitur, quasi largiori alimento pinguescit. Hac enim pinguedine saginari cupiebat Psalmista cum diceret: « Sicut adipe et pinguedine repleatur anima mea (*Psal. lxxii, 6*). » Bene ergo promittit delectaturam in crassitudine animam eorum, qui bonum spiritualis gratiæ comederint. In hac crassitudine delectabatur anima sanctæ illius multitudinis « credentium, quorum erat cor unum, et anima una (*Act. iv, 32*). » Sequitur.

VERS. 3. — *Inclinate aurem vestram* superbam ad eloquium meum, *et venite ad me*, per eum, qui ait: « Ego sum via et veritas et vita, et nemo venit ad Patrem nisi per me (*Joan. xiv, 6*). » *Audite eum, et obedite ei, et vivet anima vestra.*

Ait enim. « Qui verbum meum audit, et credit ei, qui misit me, habet vitam æternam (*Joan. v, 24*). » Vel me audite in omnibus præceptis, quæ vobis nunc de susceptione novitatis dedi, et vivetis. Sequitur:

« Et feriam vobiscum pactum sempiternum misericordias David fidelis. »

Feriam vobiscum pactum sempiternum, id est constituam inter me et vos Testamentum Novum, quod erit æternum. Et quod Testamentum? *Misericordias David fidelis*, id est quæ David misericorditer promisi, ipsa vobis certissime fidelis sponsor implebo, Christum videlicet de ejus stirpe nasciturum. Has enim *misericordias* illi fideliter me facturum promisi, et has etiam vobis, si me audieritis, faciam. Et hoc est pactum sive Testamentum æternum, quod feriam vobiscum, quod faciam, ut per Christum mediatorem reconciliemini mihi, et pacem æternam apud me consequamini. Hoc est enim Testamentum Novum, Testamentum evangelicum, videlicet de adventu Christi. Paulus tamen hoc ad resurrectionem ejus retulit, dicens de Patre: « Quod autem suscitaverit eum a mortuis amplius jam non reversurum in corruptionem, ita dixit: Quia dabo vobis sancta David fidelis (*Act. xiii, 34*). » Sancta enim David resurrectionem Salvatoris interpretatus est, et hæc sancta esse *fidelis*, quia Christus amplius non sit reversurus in corruptionem. Similiter et nos misericordias David, ut in nova translatione legimus, resurrectionem Dominicam dicimus, easque *fideles*, quia « Christus resurgens a mortuis jam non moritur (*Rom. vi, 9*). » Et hoc est testamentum æternum de morte et resurrectione ejus, « quia ipse Novi Testamenti mediator est, ut morte intercedente in redemptionem earum prævaricationum, quæ erant sub priori testamento reprobationem accipiant, qui vocati sunt æternæ hereditatis. Ubi enim testamentum, mors necesse est intercedat testatoris. Testamentum enim in mortuis confirmatum est (*Hebr. ix, 15*). » Bene itaque de incarnatione vel resurrectione Christi dicitur:

Feriam vobiscum pactum sive testamentum sempiternum misericordias David fidelis. Sive, quod in antiqua translatione legitur : « Constituum vobis testamentum æternum sancta David fidelia. » Sequitur :

VERS. 4. — Ecce testem populis dedi eum, ducem ac præceptorem gentibus. »

Dedi Christum in eum testem populis, ut testetur illis de me, et omnium, quæ promisi, sit testis et assertor, ostendens me fidelem esse in verbis meis. Vel *dedi eum testem populis*, ut omnia, quæ nunc faciunt seu cogitant homines, videat et omnium sit testis et iudex in die novissimo. *Ducem ac præceptorem gentibus dedi eum*, ut eas ad viam ducat et doctrinam veritatis eis proferat. Quod quia per ministerium prædicationis Ecclesiæ faciendum erat, recte ad eam conversa locutione subjungitur :

VERS. 5. — « Ecce gentem, quam nesciebas, vocabis, et gentes, quæ non cognoverunt te, ad te current propter Dominum Deum tuum, et sanctum Israel, quia glorificavit te. »

Ipsa quippe vocavit ad fidem gentem alienigenam, quam prius ignorabas, et gentes quæ non noverant, cucurrerunt omnes ad illam, quia viderunt eam sic divinitus glorificatam, ut totus orbis veneretur illam. Sed forte vox ista potius ad Christum dirigi videbitur. Nam et ipse gentem per apostolos, quam nesciebat, id est non approbat, vocavit, de qua per Psalmistam dicit : « Populus, quem non cognovi, servivit mihi, in auditu auris obedivit mihi (Psal. xvii, 45). » Omnesque nationes, quæ non cognoverant eum, concurrerunt toto orbe ad eum propter Dominum ejus, qui et *Sanctus Israel est*, id est propter Patrem ejus, qui secundum humanitatem est Dominus et Deus ipsius, *quia glorificavit eum* et exaltans eum, et dans ei nomen quod est super omne nomen, ut in nomine Jesu omne genu flectatur cælestium, terrestrium et infernorum (Philip. ii, 9). » Unde et propheta cunctos mortales de hoc tempore reconciliationis et gratiæ consequenter admonet, dicens :

VERS. 6. — « Quærite Dominum, dum inveniri potest ; invoke eum, dum prope est. »

Nondum enim in iudicio Dominus apparuit, et si quæritur, invenitur. Nam miro modo cum in iudicio venerit, et videri potest, et inveniri non potest. Modo non videtur, et prope est ; tunc videbitur, et prope non erit. Hinc namque per Salomonem de reprobis dicit : « Tunc invocabunt me, et non exaudiam, mane consurgent, et non invenient me (Prov. i, 28). » Nunc ergo quærendus est, dum invenitur, nunc invocandus, dum exaudit, utpote is qui *prope est*. Quomodo autem quærendus sit et invocandus ostendit propheta subjungens :

VERS. 7. — « Derelinquat impius viam suam, et vir iniquus cogitationes suas, et revertatur ad Dominum, et miserebitur ejus, et ad Deum nostrum, quoniam multus est ad ignoscendum. »

Omnes ergo sequamur consilium vel admonitio-

nem prophetæ, ut quicumque est, *impius, derelinquat citius viam suam*, id est actionem impietatis suæ, et quicumque *iniquus* deserat quantocius non solum opera sed et *cogitationes* iniquitatis, ac toto corde *revertatur ad Dominum*, invenietque sine dubio misericordiam, quia Deus noster *multus est ad ignoscendum* resipiscentibus. Neque enim sicut homo cogitat, ut memor injuriarum suarum ultionem quærat, si eos, qui injurias ei faciebant, pœniterit. Nam ita subjungitur :

VERS. 8. — « Non enim cogitationes meæ cogitationes vestræ, neque viæ meæ viæ vestræ, dicit Dominus. »

Non enim divinæ *cogitationes* ut nostræ, quia Deus aliter cogitat et aliter homo. Neque *viæ*, id est actiones ejus *viæ vestræ*, quia bonitas ipsius aliter agit quam humanæ duritiæ pravitas, ut omnes pœnitentium culpas misericorditer deleat. Sequitur :

VERS. 9. — « Quia sicut exaltantur cæli a terra ; sic exaltatæ sunt viæ meæ a viis vestris, et cogitationes meæ a cogitationibus vestris. »

Quantum cæli supereminet terræ, tantum et ultra superexcellunt divinæ cogitationes a cogitationibus humanis, et divinæ actiones ab humanis, quia homines caduca et terrena cogitant et faciunt, Deus vero æterna et superna, cujus cogitationes et actiones omnem sensum exsuperant. Unde Apostolus admirans exclamat, dicens : « O altitudo divitiarum sapientiæ et scientiæ Dei, quam incomprehensibilia sunt judicia ejus, et investigabiles viæ ejus (Rom. xi, 33). » Nemo igitur discutere tentet, cur aliis ignoscat, et aliis non ignoscat, quia secreta iudicio suo cuncta faciens « cui vult miseretur et quem vult indurat (Rom. ix, 18), » ejusque *cogitationes a nostris exaltatæ sunt sicut cæli a terra*. Qui et de Unigeniti sui adventu promissionem replicans subjungit :

VERS. 10. — « Et quo modo descendit imber et nix de cælo, et illuc ultra non revertitur, sed inebriat terram, et infundit eam, et germinare eam facit, et dat semen serenti, et panem comedenti ; »

VERS. 11. — « Sic erit verbum meum, quod egredietur de ore meo. »

Verbum Dei Filius est, qui idcirco *verbum* dicitur, quia si verbum humanum immissum in auribus plurimorum non dividitur per singulos, ut pars sit in alio et pars in altero, sed in omnibus, qui illud audiunt, integrum et plenum habetur, ut in unoquoque totum sit : quanto magis Verbum Dei Unigenitum ubique totum est in cælo et in terra, et non dividitur, neque in partes efficitur, sed totus totum tenet, totum implet, totum illustrat et possidet ? Neque enim sic Verbum caro factum est, ut esse desineret Deus, sicut verbum, quod corde gestamus, fit vox, cum in ore proferimus, nec tamen verbum in vocem convertitur, sed illo integro manente ista, in qua procedat, assumitur, ut et

intus maneat, quod intelligatur, et foris sonet quod audiatur. Idem tamen profert in sono quod ante sonum erat in silentio. Atque ita verbum cum sit vox, non mutatur in vocem, sed manens in mentis luce, et assumpta carnis voce procedit ad audientem, et non deserit cogitantem. Nam cum ipsa vox in silentio cogitatur, quæ vel Græcæ est vel Latinæ vel alterius cujuslibet linguæ, ante omnem linguarum diversitatem res ipsa, quæ dicenda erat, adhuc in cubili cordis quodammodo nuda est intelligenti, quæ ut inde procedat, loquentis voce vestitur. Sic et Verbum Dei egressum est, de ore ejus, quando carnem assumens venit ad nos, sed tamen permansit in corde ejus, neque mutatum est in carnem, sed permansit esse Verbum.

Quod ita descendit sicut imber et nix de cælo, quia non humana operatione, sed divina bonitate missum est. Et sicut imber in cælum non revertitur, sed terram inebriat et infundit, atque fecundat; sic et Filius Dei non est reversus ad Patrem vacuum, sed omnia, propter quæ missus fuerat, operatus est in terra, vel adhuc operatur manens hic divinitate nobiscum sicut promisit: « Ecce ego vobiscum sum omnibus diebus usque ad consummationem sæculi (Matth. xxviii, 20). » Inebriat namque terram, id est Ecclesiam inundatione scientiæ suæ cor illius immutando, ut temporalium obliviscatur, et æterna cogitet: infundit gratiam Spiritus sui, et germinare eam facit, id est bona opera proferre. Serenti etiam, id est prædicanti dat semen prædicationis, et comedenti, id est facienti, largitur panem, id est bonum opus, quo pascatur. Serere namque prædicare est, et comedere facere. Unde et beatus Job: « Si secutus est oculus meus cor meum, et in manibus meis adhæsit macula, seram et alius comedat (Job. xxxi, 7), » id est dicam bonum, et alius illud faciat.

Bene itaque summus Pater promisit: « Non revertetur ad me vacuum. » Non enim vacuum aut inanis reversus est ad eum Filius, sed omnem voluntatem ejus adimplevit et prosperatus est in his, ad quæ missus fuerat, sicut Psalmista de illo prædixerat: « Quoniam omnia quæcumque faciet, prosperabuntur (Psal. i, 3). » Quæ sint autem ea quæ Pater voluit, atque ad quæ misit illum, ipse declarat subdendo:

VERS. 12. — « Quia in lætitia egrediemini, et in pace deducemini: montes et omnes colles cantabunt coram vobis laudem, et omnia ligna plaudent manu. »

Idcirco enim Christus ad nos venit, ut ligato mundi principe captivitatis vasa diriperet, et educeret de conclusione victos, de domo carceris sedentes in tenebris. « Quomodo enim potest quisquam in domum fortis intrare, et vasa ejus diripere, nisi prius alligaverit fortem? Et tunc domum ejus diripiet (Matth. xii, 29). » Ad hæc missus est Christus, et in his prosperatus est, quia ligavit hunc fortem, id est diabolium, et ingressus domum ejus, id est gentilitatem, diripuit vasa ejus, id est homines, qui

A vasa malitiæ illius effecti fuerant, ad cultum suum convergit. De hac domo fortis, de hac domo carceris Christo liberante egressi sumus in lætitia, quoniam magno repleti sumus gaudio, cum intelligeremus nos a vinculis Satanæ per Christum liberatos. Et in pace deducti sumus, ligato adversario qui nos tenebat captivos. Et nisi ligatus esset, non sineret nos in pace deduci. Ut autem a via justitiæ, qua sic deducimur, non exorbitemus, montes, id est apostoli, et colles, id est cæteri doctores cantant coram nobis laudem prædicationis, et omnia ligna, id est omnes homines regionis plaudunt manu ad vocem cantici, id est exsultant bene operando. Illi enim manu plaudunt ad vocem modulationis, qui libenter et alacriter faciunt hoc quod in sacra prædicatione audiunt.

Potuit et sanctis, qui in inferno tenebantur, promitti, quia in lætitia egrediemini, et in pace deducemini, scilicet ad regna cælorum. Illis etiam justis, qui in corpore adhuc peregrinantur, de exitu suo congrue dici potest, quia in lætitia egrediemini de hac vita, et in pace deducemini ab angelis ad locum beatæ mansionis. Et utrisque convenit, quod subditur, scilicet, quia mentes et colles, id est angelicæ virtutes cantabunt coram vobis laudem, et omnia ligna regionis, id est universi habitatores illius patriæ plaudent manu, cum vos viderint tripudiantes de vestra societate. Propter omnes istos, quos ita Christus egredi facit, et in pace deducit, dixerat Pater de Verbo suo, quia « non revertetur ad me vacuum, sed faciet quæcumque volui, et prosperabitur in his, ad quæ misi illud. » Non enim vacuum ad Patrem redit, qui tot secum ad vitam perducit, et in his omnibus prospere agit. Adhuc vero in promissione subjungitur.

VERS. 13. — « Pro saliuuca ascendet abies, et pro urtica crescet myrtus. »

Pro saliuuca namque ascendit abies in Ecclesia, dum in corde sanctorum pro abjectione terrenæ cogitationis altitudo exoritur supernæ contemplationis. Urtica autem igneæ omnino naturæ est; myrtum vero temperativæ ferunt esse virtutis. Pro urtica crescet myrtus, cum justorum mentes a pruriginis et ardore vitiorum ad cogitationum temperiem tranquillitatemque perveniunt, dum jam terrena non appetunt, dum flammam carnis cælestibus desideriis extinguunt. Sequitur:

« Et erit Dominus nominatus in signum æternum, quod non auferetur. » Dominus qui nominatus erit in signum æternum, ipse est « radix Jesse, qui stat in signum populorum (Supra xi, 10). » Signum enim quod non auferetur, signum Dominicæ passionis et crucis est, quia in æternum parebit in eis signaculum crucis, qui per crucem redempti sunt, et ipsi Redemptor sine fine voluit idem signum in se ipso apparere, quia cum a mortuis resurgeret, noluit cicatrices vulnerum suorum abolere. Erit ergo Dominus nominatus in signum æternum, quia sine fine sanctis inde laudabitur, quod crucis supplicia pertu-

lit; cum viderint in carne ejus vestigia vulnerum. A De cujus primo adventu Pater iterum promissionem faciens præcipit Judæis, ut parati sint in occursum ejus. Nam sequitur :

CAPUT LVI.

VERS. 1. — « Hæc dicit Dominus : Custodite judicium, et facite justitiam, quia juxta est salus mea, ut veniat : et justitia mea, ut reveletur. »

VERS. 2. — « Beatus vir, qui facit hoc, et Filius hominis, qui apprehendit istud : custodiens Sabbatum, ne polluat illud, custodiens manus suas, ne faciat omne malum. »

Custodite, inquit, judicium, et facite justitiam. Si quis omne opus suum, antequam inchoet illud, examinaverit, utrum Deo sit placiturum, an non ; et ubi Deo gratum fore quod acturus est, non no- B verit, incunctanter illud deseruerit : iste custodit judicium et justitiam facit. Sic igitur agere vult Hebræos, dum Christum expectant. Ipse est enim *salus et justitia Dei*, qui juxta Apostolum : « Factus est nobis sapientia a Deo et justitia, et sanctificatio et redemptio (I Cor. 1, 30). » Vel salutem dicit eam, quæ per Christum danda erat : et justitiam fidei ejus, quæ revelanda erat. Ad hoc autem, quod dixerat : *Custodite judicium, et facite justitiam*, subne- ruit, quia *Beatus vir, qui facit hoc, et filius hominis, qui apprehendit illud*, ut scilicet non solum faciat, quod justum est, sed stricta manu teneat. Quam sententiam et per Psalmistam confirmat dicens : « Beati qui custodiunt judicium, et faciunt justitiam C in omni tempore (Psal. cv, 3). »

Sabbatum vero custodit, qui ab appetitu mundanarum rerum quiescens omni custodia servat cor suum. Quid enim in hac vita laboriosius quam terrenis desideriis æstuarè ? Aut quid hic quietius quam hujus sæculi nil appetere ? Qui ergo Christum expectat, observet Sabbatum, id est requiem mentis, ut nullo in hac vita desideriorum carnalium appetitu fatigetur. Polluit enim Sabbatum, si suggestionibus consentiens mentem suam desideriis immundis sordidaverit. Custodiat ergo Sabbatum, ne polluat illud, qui beatus esse desiderat, quia : « Beati mundo corde, quoniam ipsi Deum videbunt (Matth. v, 8). » Sequitur :

VERS. 3. — « Et non dicat filius advenæ, qui adhæret Domino, dicens : Separatione dividet me Dominus a populo suo. Et non dicat eunuchus : Ecce ego lignum aridum. »

Advena fuit gentilis populus : « Filius advenæ, qui adhæret Domino, » populus, qui ad Christum venit ex gentibus, quem non divisit Dominus a populo suo Israelitico, sed consociavit. » Ipse est enim pax nostra, qui fecit utraque unum (Ephes. 11, 14). » *Eunuchus* vero talis hic intelligitur, quales sunt illi, de quibus in Evangelio legimus : « Quia sunt eunuchi, qui se ipsos eunuchizaverunt propter regnum cælorum (Matth. xix, 12). » Et hujusmodi eunuchis prohibetur dicere : *Ecce ego lignum aridum, id est homo infructuosus, quia non de car-*

nali, sed de spiritali fecunditate debet cogitare. Sequitur :

VERS. 4. — « Quia hæc dicit Dominus eunuchis : Qui custodierint Sabbata mea, et elegerint, quæ volui, et tenuerint fœdus meum, »

VERS. 5. — « Dabo eis in domo mea, et in muris meis locum et nomen melius a filiis et filiabus : nomen sempiternum dabo eis, quod non peribit. »

Eunuchi sunt, qui pressis motibus carnis effectum in se pravi operis excidunt. *Sabbata* vero divina custodiunt, qui sacra otia non violant, sed a malo opere quiescunt et a labore carnalium desideriorum. Sed quia non satis est a malis abstinere, nisi bona quisque studeat agere, eligenda sunt, quæ Dominus voluit. Cum quo et fœdus facit, qui ejus voluntati concordans obedientiam ei promittit. Hoc ergo fœdus usque in finem perseveranter tenendum est.

Vel *Sabbata* custodit eunuchus talis, ut nunquam faciat opera nuptiarum, et eligit, quæ Dominus voluit, ut plus offerat quam præceptum est, ut non indulgentiam apostoli ejus, sed voluntatem consideret Domini sui. Et tenet fœdus ejus sempiternum, ut non ad tempus vacet orationi, et iterum revertatur ad idipsum. Eunuchi itaque, qui custodiunt Sabbata Dei, et elegerunt quæ voluit, et tenent fœdus ejus sempiternum, audiant præmia quæ merentur, ut libenter calcant labores tentationum, quos tolerant. Si enim attendatur felicitas, quæ sine transitu attingitur, leve sit omne quod transseundo laboratur.

Dabo, inquit, eis in domo mea, et in muris meis, scilicet in illa regali aula mea cœlesti, locum electæ mansionis, et nomen melius a filiis et filiabus meis, quia majorem gloriam habebunt quam cæteri sancti. Quem igitur apud Patrem tales eunuchi, id est virgines locum habeant, ostenditur, quia in domo Patris id est in æterna mansionem etiam filiis præferuntur. Similiter et in libro Sapientiæ dicitur, quia « Spado, qui non operatus est per manus suas iniquitatem, nec cogitavit adversus Deum nequissima, dabitur illi fidei donum electum, et sors in templo Domini acceptissima (Sap. 111, 14). » Et quia « incorruptio facit esse proximum Deo (Sap. vi, 20), » longe præferuntur virgines cæteris sanctis, qui Deo præ aliis appropinquant, et sequuntur Agnum, quocumque ierit. Quibus nomen sempiternum datur, quod non peribit, ut nomen æternæ laudis in illo regno possideant, et supra cæteros egregii et præclari resplendeant. Sequitur :

VERS. 6. — « Et filios advenæ, qui adhærent Domino, ut colant eum, et diligant nomen ejus, ut sint ei in servos ; omnem custodientem Sabbatum, ne polluat illud et tenentem fœdus meum, »

VERS. 7. — « Adducam eos in montem sanctum meum, et lætificabo eos in domo orationis meæ. »

Filios advenæ, qui adhærent Domino, dicit eos, qui ex gentili populo conversi sunt ad fidem. Nam ipsi colunt eum, et diligunt nomen ejus, et sunt ei in

servos, quia tota devotione serviunt ei. Et ipsi *custodiunt Sabbatum, ne polluant illud*. In Sabbato quippe servile opus prohibetur fieri. Et servile opus peccatum est. « Omnis enim, qui facit peccatum, servus est peccati (Joan. VIII, 34). » Semper ergo custodiendum est Sabbatum, quia semper ab actione peccati cessandum et observandum est, ne polluantur. Ille enim *Sabbatum polluit*, qui post malorum operum renuntiationem malum rursus, a quo semper quiescere debuit, operatur. *Sabbatum* custodimus, quando ab appetitu temporalium mente quiescimus. *Fœdus quoque tenendum est*, quod cum Deo percussimus, ne jam ab ejus concordia disjungamur, et rebellare contra cum perversis operibus incipiamus, qui cum eo pacem et fœdus consentiendo sibi fecimus.

Hos itaque *filios advenæ, qui adherent Domino*, et custodiunt spiritale *Sabbatum* et tenent *fœdus* ejus, adduxit ipse *in montem sanctum* suum, id est in Ecclesiam, ut qui erant longe, fierent prope in sanguine Christi. Vel adducet *eos in montem sanctum* suum, id est in regnum cœlorum. Et *lætificat eos in domo orationis* suæ, dicens per Apostolum : « Semper gaudete, sine intermissione orate (1 Thess. v, 16). » Nam domus orationis vocabitur Ecclesia, non nugacitatis, ut quicumque est in Ecclesia, deserat fabulas, et otiosa verba; et ubicunque sit corpore positus Christianus, semper studeat orare, etsi non semper ore, tamen corde. Sequitur :

« *Holocausta eorum, et victimæ eorum placebunt mihi super altari meo.* »

Quia holocaustum totum incensum dicitur, quid per *holocaustum* filiorum advenæ designatur nisi successio cordis conversorum gentilium, dum se vehementissimo charitatis igne totos sic inflammarent, ut jam nihil sibi de se relinquerent. sed ex integro se totos offerrent Deo? Et quid per *victimæ eorum* nisi mortificatio carnis ipsorum? « Qui enim sunt Christi, carnem suam crucifixerunt cum vitis et concupiscentiis (Galat. v, 24). » Et quid per *altare* nisi fides exprimitur? Recte ergo juxta hunc sensum dicitur : Quia « *holocausta eorum et victimæ eorum placebunt mihi super altare meum.* » *Holocausta* eunuchi offerunt, qui totos se consecrant Deo; *victimæ* autem cæteri, qui ad tempus vacant orationi. Quæ conferuntur in altari, quod est in cœlo, ad cujus similitudinem fecit Moyses altare tabernaculi. Sequitur :

« *Quia domus mea domus orationis vocabitur cunctis populis,* »

VERS. 8. — « *Ait Dominus, qui congregat dispersos Israel.* »

Domus Dei est Catholica Ecclesia, quia secundum Apostolum « *Christus est tanquam filius in domo sua, quæ domus sumus nos (Hebr. III, 6).* » Et hæc domus vocatur *domus orationis omnibus populis* : universæ nationes ex longinquo ad eam veniant, et munera offerentes adorent Dominum in ea. *Congregat enim Dominus ad eam dispersos Israel*, id est

dispersos populi sui, videlicet omnes, quos ad vitam prædestinavit, qui, per totum orbem dispersi sunt, vel per varios errores. Sequitur :

« *Adhuc congregabo ad eum congregatos ejus.* »

Eos, qui jam in unitate fidei et dilectionis sunt *congregati*, congregabit. Dominus adhuc populum suum, sicut unusquisque de hac vita exierit, quia « *multi ab oriente et occidente venient, et recumbent cum Abraham et Isaac et Jacob in regno cœlorum (Matth. VIII, 2).* » Et quia « *filiis regni,* » id est Judæi « *ejicientur in tenebras exteriores (ibid. 12).* » apte hoc in loco subjungitur :

VERS. 9. — « *Omnes bestię agri, venite ad devorandum, universæ bestię saltus.* »

Postquam enim filios advenæ id est credentes ex gentilitate conjunxit populo suo, et in montem sanctum suum adduxit lætificans in domo orationis suæ, consequenter infideles Judæos ad devorandum, dæmonibus tradit. *Venite*, inquit, *ad devorandum omnes bestię agri*, id est omnes sævi dæmones, qui per latitudinem mundi hujus crudeli rabie vagamini quærentes, quem devoretis; ager enim est mundus. *Et universæ bestię saltus*, id est omnes maligni spiritus, qui morari consuevistis in populo paganorum. Et cur ab hujusmodi bestiis iste grex populi Judæorum præcipue devorandus esset, ostenditur, cum protinus additur :

VERS. 10. — « *Speculatores ejus cæci omnes, univ ersi canes muti non valentes latrare.* »

Speculatores enim vocantur sacerdotes, qui in eminentiori loco positi vigilantia cautela debent conspiciere, et adventus inimicorum spiritualium a longe prævidere, ac subjectis prænuntiare. Sed *speculatores* Judææ omnes cæci sunt duces cæcorum. Et ipsi omnes nescierunt, quia Scripturarum intelligentiam amiserunt, et Christum ignoraverunt. *Canes* etiam dicuntur prædicatores, qui curam Dominicarum ovium gerunt, quia dum pro Domino suo diurnis et nocturnis vigiliis intenti clamant, quosdam, ut ita dicam, latratus prædicationis edunt. Sed *canes* Judaicæ gentis omnes sunt *muti, non valentes latrare*, quia invisibilibus bestiis gregem eorum devorantibus non valent contradicere, nec vocem prædicationis adversus insidias eorum emittere. De quibus et subditur :

« *Videntes vana, dormientes et amantes somnia.* »

Vana vident, quia carnalem intelligentiam in Scripturis considerant, et ea quæ nil prosunt, in eis aspiciunt sicut otia Sabbatorum et manu factam in carne circuncisionem et cætera hujusmodi, quæ sunt umbra futurorum. Qui et dormiunt in negligentia et nocte cordis sui, atque diligunt *somnia*, nolentes unquam excutere torporem suum, ut ad lumen veritatis evigilent, sed phantasmata opinionum intelligentiæ suæ quasi nocturnas somniorum visiones semper intueri quærentes. Sed et dæmonum visionibus in somno delectantur. Sequitur :

VERS. 11. — « Et canes impudentissimi nescierunt A saturitatem. »

Sicut avidi canes absque omni verecundia parati sunt semper comedere : sic et isti, quos sub specie canum describit, non contra bestiarum incursus pro grege suo vigilant, sed famem suæ cupiditatis temporalibus lucris impudenter quærunt pascere. Sed nequeunt eam saturare, neque suo unquam satiantur errore. Sed hæc quæ sub metaphora speculatorum et canum locutus est, incipit jam explanare subdendo :

« Ipsi pastores ignoraverunt intelligentiam, omnes in viam suam declinaverunt, unusquisque ad avaritiam suam a summo usque ad novissimum. »

VERS. 12. — Venite sumamus vinum, et impleamur ebrietate, et erit sicut hodie sic et cras et multo amplius. »

Quod enim dixerat : « Speculatores ejus cæci, » hoc exponit nunc dicens : « Ipsi pastores ignoraverunt intelligentiam. » Et quod asseruerat, quia *canes impudentissimi nescierunt saturitatem*, hoc interpretatur dicens, quia *omnes in viam suam declinaverunt, unusquisque ad avaritiam suam. Pastores quippe sunt, qui hoc susceperunt officium, ut verbo prædicationis pascant mentes hominum. Unde et per Jeremiam promisit nobis Dominus, dicens : « Dabo vobis pastores juxta cor meum, qui pascant vos scientia et doctrina (Jer. III, 15). » Sed pastores Judæorum ignoraverunt intelligentiam* eloquii sacri, quia non venerunt ad eum qui aperit et nemo claudit, claudit et nemo aperit; qui morte calcata resurgens aperuit sensum discipulis suis, ut intelligerent Scripturas. *Declinaverunt omnes in viam suam, propria commoda singuli quærentes, et unusquisque ad avaritiam suam declinavit de primo usque ad novissimum* eorum, et sic declinantes dixerunt ad invicem.

« Venite sumamus vinum, et impleamur ebrietate, et sicut bene nobis est hodie, sic et cras erit et multo amplius. »

Nescierunt enim saturitatem, nec præterita voluptas satiantur, sed futuras delicias parant multo majores, quam quibus usi prius fuerant. Talibus namque delectabantur sacerdotes Judæorum, et talibus vacare volunt. « Amant enim primos recubitus in cœnis, et primas cathedras in synagogis (Matth. XIII, 16). » Unde non solum corporeo, sed et spiritali vino, id est mundana cupiditate et desiderio inanis gloriæ se debriant. Spiritualiter enim est ebrius, qui a sensu rationis est alienus. Cohortantur ergo se hujusmodi vinum de die in diem sumere, atque impleri *ebrietate*, dum sensum rectitudinis et sibi ipsis invicem depravant, atque hoc sibi exemplum vicissim tradunt, ut velint ambulare in stolis, et ament salutationes in foro, et devorent domus viduarum, simulantes longam orationem (Matth. VII, 14). Talia enim cupere quid est aliud quam ebrietas meritis? Sequitur :

CAPUT LVII.

VERS. 1. — « Justus perit, et nemo est, qui recogitet in corde suo : et viri misericordiæ colliguntur, quia non est, qui intelligat : a facie malitiæ collectus est justus. »

VERS. 2. — « Veniat pax, requiescat in cubili suo, qui ambulavit in directione sua. »

Dominus Jesus locum passionis suæ designans ait, quia « non capit prophetam perire extra Jerusalem (Luc. XIII, 35). » Similiter et quod hic dicitur, quia *justus perit*, tale est ac si diceretur, quia Christus moritur. *Justus ergo perit inter cæteros speculatores, quia Christus moritur inter scribas ac sacerdotes : et nemo ex illis est, qui recogitet in corde suo, quia nec postea resipuerunt. Et viri misericordiæ, id est fideles, qui in Judæa misericordiam consecuti fuerant, colliguntur inde, et ad regna cælorum congregantur, quia non est ex Judæis, qui intelligat, idcirco eos inter se positos esse, ut illi fidem et morem eorum imitarentur. A facie enim malitiæ collectus est justus, id est ablati sunt Christus, ne mala sæculi videret, sive propter malitiam hominum, quorum ipse peccata portavit, victor ascendit. Veniat ergo pax post persecutiones, quas ab eis justus iste pertulit injuste : requiescat in cubili suo, id est in mansione quietis æternæ justus : ambulavit in directione sua, id est qui vitam suam duxit in rectitudine sua.*

Possunt etiã hæc de nonnullis intelligi, qui Christiano censentur vocabulo. « Omnes bestię agri venite ad devorandum, universæ bestię saltus (Supra LVI, 9). » Per bestias agri vitia sæculi, per bestias saltus iniquitates paganorum exprimuntur. Convocati ergo Dominus omnes bestias agri et omnes bestias saltus ad devorandum omnes, quibus vehementer irascitur, quia justo permittit judicio, ut universa sæculi vitia, et omnia paganitatis flagitia in nonnullos, qui Christiani dicuntur, irruant, quatenus more sæcularium atque gentilium vivant. Hoc enim est quod ait : « Nunc ostendam vobis, quid ego faciam vineæ meæ, auferam sepem ejus, et erit in conculcationem, diruam maceriam ejus, et erit in direptionem (Supra V, 5). »

Idcirco autem facile devoratur populus sive grex iste, quia « speculatores ejus cæci omnes nesciunt, et universi canes ejus muti sunt non valentes latrare (Supra LVI, 10). Hoc enim de ineptis et reprobis solummodo sacerdotibus dicitur, qui etiam mercenarii vocantur. Itaque speculatores vineæ vel domus Domini sunt cæci et nescientes, quia sacerdotes quidem abundant in populo Dei, sed vix et omnibus illis quisquam invenitur, qui venientes tentationes prævidere sciat, et subjectis annuntiare. Et ipsi sunt *canes muti non valentes latrare*, quia qui gregem custodire debebant, et lupos abigere et latrare pro Domino, contulerunt, eo quod non habuerint prædicationis scientiam. Sed, etsi doctus quispiam eorum in Scripturis fuerit, obsistit ei perversitas propriæ actionis, ne libere loqui valeat

bona, quæ novit, et contra bestiarum adventum, A id est contra impugnationes vitiorum latrare.

Ipsi sunt « videntes vana, dormientes et amantes somnia (*ibid.*). » Vana enim sunt omnia temporalia, quoniam citius evanescent, et ad nihilum tendunt. Unde scriptum est : « Vanitas vanitatum et omnia vanitas (*Eccle. 1, 2*). » Vident ergo mali speculatores vana et ignavi canes. Unde et dormiunt ipsi in hoc sæculo, nec ad divina mysteria vel ad custodiam gregis oculos suos aperiunt, sed somnia diligentes, id est ea quæ in præsentī vita velut in somnis habentur, non possunt famelicam ingluviem suam saturare : De talibus enim dormientibus et saturari nescientibus supradictum est, quia « sicut somniat esuriens, et comedit, cum autem fuerit experectus, vacua est anima ejus, et sicut somniat sitiens et bibit, et postquam fuerit expergefactus, lassus adhuc sitit, et anima ejus vacua est : sicerit multitudi omnium, qui dimicaverunt contra montem Sion (*Supra xxix, 8*). » Nam inutiles sacerdotes dimicant contra montem Sion, quia religionem Ecclesiæ moribus impugnant et operibus, atque bonos insequuntur. Amant ergo somnia, id est honores et divitias hujus sæculi. Omnis enim potentia mundi hujus et gloria somnium est non veritas. Et comedunt, quia bonis temporalibus delectantur. Sed nesciunt saturitatem, quia mundanæ opes nunquam possunt humanæ mentis inopiam explere.

Vel ideo saturitatem nescire dicuntur, ut insatiabilis eorum avaritia demonstraretur ; quoniam, sicut C « impudentissimi canes » devorare semper bona quæ sibi dentur, quærunt. Et tam indoctus est grex populi Christianorum, ut ipsi pastores ignorent intelligentiam. Vix enim pastor Ecclesiæ jam inveniri potest, qui Scripturarum sanctarum intelligentiam habebat, sed « omnes in viam suam declinaverunt et unusquisque ad avaritiam suam (*Supra lvi, 11*). » « Omnes enim, quæ sua sunt, quærunt, non quæ Jesu Christi (*Philipp. 11, 21*). » Quia enim a via Dei declinantes suas semitas sunt secuti, propterea ardent avaritia. Et hoc faciunt a summo pontifice usque ad novissimum præpositum Ecclesiæ. Adhortantur etiam se ad invicem sumere vinum mundanæ cupiditatis, et inebriari exterioribus curis, ut de spiritalibus et interioribus non cogitent. Quo contra D in Proverbiis dicitur : « Noli regibus dare vinum, quia nullum secretum est, ubi regnat ebrietas (*Prov. xxxi, 4*). » Reges enim sunt rectores Ecclesiæ, qui hujusmodi vinum bibere non debent, ne mundanis sollicitudinibus inebriati secretum mentis amittant.

Vel immoderata et frequentia sacerdotum convivia denotantur hoc loco, qui percutiunt conservos, et manducant, et bibunt cum ebriosi. Sed dum isti de die in diem magis magisque bibunt, et inebriantur, justus quilibet perit, id est in afflictione moritur, et nemo ex istis est, qui recogitet, ex eo in corde suo, ut gloriam ejus mente pertractans vias ejus imitari velit. Petrus ad Gregorium (*Dial. lib. 111, c. 37*) :

« Quidnam, quæso, te esse existimas, quod boni quique subtrahuntur, et qui vivere ad multorum ædificationem poterant, aut penitus inveniri nequeunt, aut certe omnino rarescunt ? » Ad quem Gregorius : « Malitia remanentium meretur, ut hi qui prodesse poterant, festine subtrahantur. Et cum mundi finis appropinquat, electi tolluntur, ne deteriora videant. Hinc etenim scriptum est : « Aperite, ut exeant qui conculent eam, tollite de via lapides (*Jer. 1, 26*). » Quo ergo mundi finis urget, eo necesse est, ut vivi lapides ad ædificium cœlestis colligantur, quatenus Jerusalem nostra in mensuram suæ omnes constructionis excreseat. Nec tamen ita electos subtrahi credimus, ut solummodo perversi remaneant, quia nunquam peccatores ad lamentum penitentiae redirent, si nulla essent bonorum exempla, quæ eorum mentem traherent. » Ubi autem nemo est, qui eos imitetur, ibi subtrahi citius de medio malorum non immerito creduntur. Hanc enim causam subtractionis eorum ostendit propheta dicens : « Justus perit, et nemo est, qui recogitet in corde suo : et viri misericordiae colliguntur, quia non est qui intelligat. » Iniqui ergo dum sola temporalia appetunt, et quæ bona electos in æternum maneat, scire contemnunt, dum justorum afflictionem conspiciunt, et quæ sit afflictionis retributio, non agnoscunt, actionis suæ pedem in profundum porrigunt, quia a luce intelligentiæ sponte sua oculos claudunt. A facie enim malitiæ collectus est justus, quia raptus est, ne malitia mutaret intellectum illius, aut ne fictio deciperet animam ejus. Veniat itaque pax justo propter iniquitatem educto, ut requiescat in cubili suo, id est in mansione sibi a Deo parata, qui tortitudinem humanæ pravitatis non est secutus, sed ambulavit in directione sua.

VERS. 3. — « Vos autem, » qui de eo recogitare non vultis, « accedite huc » ad judicium, ut, quod justum est, recipiatis, o filii auguratricis, ac semen adulteri et fornicariæ. »

Auguratrix enim erat plebs, cui Paulus dicebat : « Quomodo convertimini iterum ad infirma et egena elementa, quibus denuo servire vultis ? Dies observatis et menses et tempora et annos (*Galat. iv, 9*). » Erat et fornicaria, quæ post fidem in errores declinavit. Quæ et perversis dogmatibus suis filios genuit nequissimos, id est hæreticos ex patre adultero, id est diabolo. Quibus apte dicitur :

VERS. 4. — « Super quem lusistis, super quem dilatastis os, et eiecistis linguam. »

Luserunt quippe super Dominum, quem ignorabant hæretici, et dilataverunt os suum, ejeceruntque linguam, dum multifarie blasphemarent eum, et insanirent dictis suis adversus eum. Hoc quoque, quod subditur, congruit illis.

« Nunquid non vos filii scelesti, semen mendax ? »

VERS. 5. — « Qui consolamini in diis subter omnia

lignum frondosum, immolantes parvulos in torrentibus subter eminentes petras? »

Scelesti enim sunt, qui mortes animarum quotidie operantur. *Semen mendax* sunt, qui se Christianos fatentur, sed ab omni Christianitate degenerant. Sed qui sunt dii eorum, nisi errores, quibus illi serviunt? Alterius vero naturæ est *lignum*, quod ubertate fertile est; alterius quod tantum abundat fronde foliorum. In nemoribus et lucis nemo plantat ficum, nemo vineam, nemo fertiles arbores, sed oblectatione tantum ligna frondentia. Tales sunt hæresiarchæ, qui orationem suam verborum decore componunt, ut non convertant audientes a vitiis, sed delectent. Qui ergo se subdiderunt hæresiarchis, ut errores eorum colerent, hi *consolantur in diis subter orne lignum frondosum*. Qui et *parvulos* eisdem diis suis immolant, dum simplices et infirmos spiritualiter extinguunt, ut suis erroribus applicentur.

Quid autem nomine torrentium nisi rapidus fluctus eloquentiæ eorum designatur? Et quid per *eminentes petras* nisi vel potestates sæculi hujus, vel prædicti hæresiarchæ? In partibus ergo torrentis *parvulos immolant subter eminentes petras* dum insipientium animas per facundiam suam interficiunt trahendo in errorem, protegendum se mundanis potestatibus, vel errorum inventoribus auctoritatem sibi præbentibus. Deinde sceleratæ illi plebi dicitur :

VERS. 6. — « In partibus torrentis pars tua; hæc est sors tua. »

Nam quia torrens intelligitur impetuusus excursus hæreticæ disertitudinis, *in partibus torrentis pars ejus est*, quia elegit in doctrina hæreticorum manere. Et *hæc est sors ejus*, quia jam a sorte Catholicorum separata est et anathematizata. Quæ et *libamen* diis suis *effundit*, et *sacrificium offert*, dum in sacrilegio missas celebrat, vel dum ea facit in occulto, quæ turpe est etiam dicere. Non enim sacrificium Deo offerunt hæretici, sed suis erroribus. Unde et commotus ait : « Nunquid super his non indignabor? » Subaudi : omnibus, quæ te fecisse retuli.

VERS. 7. — *Posuit cubile suum* ista meretrix *super montem excelsum et sublimem*, dum mentem suam delectabiliter collocaret super quemlibet elatum principem hæreseos, ut in ipso requiesceret. Hæc contra eos dicta sunt, qui in hæreses declinant. Deinde nequissimæ multitudini perversorum hominum qui sunt in Ecclesia, vel unicuique tali animæ congruunt sequentia. Ait enim Dominus :

VERS. 8. — « Post ostium et retro postem posuisti memoriale tuum, quia juxta me discooperuisti, et suscepisti adulterum. »

Post ostium cordis et retro postem ejusdem interioris ostii *ponit memoriale* iniquitatis suæ anima, quæ licet foris perversas actiones deseruerit, intus *lumen occultam malitiam in angulo cordis* reservat.

Et iuxta virum suum se discooperiens adulterum suscipit, quia cum sit Christo legitime conjuncta, aditum mentis suæ diabolo pandit. Unde Paulus : « Nolite locum dare diabolo (Ephes. iv, 27). » Sequitur :

« Dilatasti cubile tuum, pepigisti fœdus cum eis. » *Cubile cordis sui dilatat anima*, quæ Christum simul et diabolum vult in mente sua recipere. Sed hoc nullatenus fieri potest. « Coangustatum est enim stratum, ita ut alter decidat (supra. xxviii, 20). » *Fœdus* quoque paciscitur cum dæmonibus, quando suggestionibus eorum semper consentire decernit. Sequitur :

« Dilixisti stratum eorum manu aperta. »

Stratum eorum diligit anima aperta manu, quando cum eis mœchari desiderans actionem suam illis pandit, ut ad se libentius ingrediantur, non expectans, ut illi prius ei mala suggerant : sed omnem suggestionem eorum præveniens malis actibus, et sic eorum suggestiones parata suscipere non jam in peccato suo erubescens, nec fornicationis suæ turpitudinem abscondens sed tota libertate peccans. Sequitur :

VERS. 9. — « Et ornasti te regio unguento, et multiplicasti pigmenta tua. »

Unguento regio se ornat, ut amatoribus suis placeat, quia ex eo, quod chrismate sancto ungitur, a malignis spiritibus avidius corrumpitur. *Et pigmenta* sua multiplicat, dum varios odores et multiplices delectationes facit. Sequitur :

« Misisti legatos tuos procul, et humiliata es usque ad inferos. »

Legatos mittit procul ad amatores suos, dum suæ pravitatis famam longe porrigenz malignos ad se spiritus invitat. *Et humiliatur usque ad inferos*, dum mens ejus usque adeo inclinatur, ut in mala voluntate sit par dæmonibus. Vel utique *ad inferos*, per peccatum humiliatur, cum usque ad finem vitæ præsentis perseverat in malo. Unde et Job dicit : « Usque ad inferos peccatum illius (Job. xxiv, 19). » Peccatum quippe illius usque ad inferos est, qui peccare non desistit, donec in infernum descendat, id est donec vitam hanc pessime finiat. Vel *humiliata est usque ad inferos* hæc fornicaria non ea humilitate quæ in laudem est, sed qua Amnon sororem suam Thamar humiliavit (II Reg. xiii). Revera grandis est humilitas imo usque ad inferos præcipitatio de luce et culmine castitatis in tenebras lupanaris, imo in barathrum libidinum præcipitari. Sequitur :

VERS. 10. — « In multitudine viæ tuæ laborasti, non dixisti : Quiescam. »

In multitudine viæ suæ laborat, dum graves sustinet labores in variis actionibus, quas exercet. Unde et per Salomonem dicitur, quia « Deus dedit peccatori afflictionem et curam superfluam (Eccl. ii, 26). » Sed tamen dum multipliciter laborat, non dicit : *Quiescam*, quia nullis potest laboribus frangi, ut a mundanis actionibus quiescere velit. Sequitur :

« Viam (186) manus tuæ invenisti, propterea non A iter, declinate de semita, auferite offendicula de via rogasti. »

VERS. 11. — « Pro quo sollicita timuisti, quia mentita es, et mei non es recordata, neque cogitasti in corde tuo, quia ego tacens et quasi non videns, mei oblita es. »

Viam manus, id est viam operationis suæ invenit, quando ea quæ vult agere, potest. Et propterea dum plenis horreis fiduciam habet in divitiis, rogare Deum negligit, ideoque *sollicita metuit* plurimos. Non enim potest dicere: « Dominus mihi adjutor est, ego despicio inimicos meos (Psal. cxxxvii, 7). » Vel de eo non rogat, *pro quo sollicita metuit*, quia licet æternæ mortis supplicium formidet, non tamen ex corde precatur, ut evadat illud, dum a pravitatibus suis converti recusat. Nam, quomodo faciem suam ad Dominum in precibus levare poterit, nisi prius ea, de quibus ante illum erubescere potest, abjecerit? Mentitur enim, si se orationem ad eum fudere simulat, quia nec etiam recordatur illius, donec in talibus perseverare non desistit. Neque cogitat, quia ille nunc taceat, dum nos inique agimus: et quasi non videre æstimatur, eo quod se vidisse non mox ostendit percutiens nos, dum adhuc iudicium differt, ut ad pœnitentiam interim convertamur. De quo iudicio subditur:

VERS. 12. — « Ego annuntiabo justitiam tuam, et opera tua non proderunt tibi. »

VERS. 13. — « Cum clamaveris, liberent te congregati tui: omnes eos auferet ventus, tollet aura. »

Annuntiabo, inquit, *justitiam tuam*, quam tu secuta es, id est injustitiam tuam cuictis in die illa manifestabo, et *opera tua tibi tunc nil proderunt*, in quibus nunc labores. *Cum enim clamaveris ante januam thalami cum fatuis virginibus dicens: « Domine, Domine aperi nobis (Matth. xxv, 11), » liberent te, si possunt, amatores tui, qui undique congregabantur ad fornicandum tecum. Sed tunc eos omnes auferet ventus turbinis, et in abyssum præcipitabit.* Hactenus multitudini pravorum Catholicorum vel univocis hujusmodi animæ impropert mala, quæ agit; et nunc de electorum populo subjungitur:

« Quia autem fiduciam habet mei, hæreditabit D terram, et possidebit montem sanctum meum. »

Plebs quidem fornicaria, quæ in amatoribus suis, id est immundis spiritibus confisa est, peribit. Sed quicumque *fiduciam Dei habet*, ipse salvabitur. In Deo enim confidit, quem conscientia bonorum operum in spei fiducia confirmat. Unde Joannes: « Si cor nostrum non reprehenderit nos, fiduciam habemus ad Deum (I Joan. iii, 21). » Qui ergo hanc fiduciam habet, *hæreditabit terram* perpetuæ stabilitatis. firmæque quietis, et *possidebit montem* beatæ celsitudinis. Sequitur:

VERS. 14. — « Et dicam: Viam facite, præbete

iter, declinate de semita, auferite offendicula de via populi mei. »

VERS. 15. — « Quia hæc dicit Dominus excelsus et sublimis habitans æternitatem et sanctum nomen ejus in excelso, et in sancto habitans, et cum contrito et humili spiritu, ut vivificet spiritum humilium, et vivificet cor contritum. »

VERS. 16. — « Non enim in sempiternum litigabo, neque in finem irascar. »

« Dicam, inquit: *viam facite* electis meis, o prædicatores. *Præbete illis iter*, o infideles, qui volebatis viam eorum obstruere. *Declinate de semita eorum*, o dæmones, nec eis obsistatis in calle rectitudinis, quo gradiuntur. Aut ita: *Viam facite illis*, o angeli, *præbete eis iter*, quo transeant, o dæmones, id est fugite de itinere eorum. *Declinate de semita*, o vitiorum turbæ, quæ solebatis meritis eorum occurrere, ut illi, qui præibant et cæcum increpabant. Et vos prædicatores vel angeli « auferite offendicula de via populi mei (Luc. xviii, 39), » ut viam rectitudinis absque scrupulo carpant offensionis, et fiat, ut scriptum est: « Via justorum absque offendiculo (Prov. xv, 19). » Paulus omnino præcavere studuit, ne quod exemplum fratribus daret, unde scandalum offensionis sumi potuisset (I Cor. ix, 12). Similiter et cæteri boni procuratores Ecclesiæ fecerunt et faciunt.

Et ut Dominus populum suum crederetur sic honoraturus, addit: « Quia non in sempiternum litigabo, neque in finem irascar. » Quondam enim frequenter litigabat per prophetas cum populo Judæorum increpans iniquitates eorum, et irascebatur eis tradens eos in manus hostium. Sed non in sempiternum litigabit, nec usque in finem sæculi iratus est, quia per donum gratiæ mediatoris finita est jam ira et litigatio illa.

Excelsus autem et sublimis dicitur Deus, quia omnem sensum et intellectum exsuperat. Educit enim superessentialis divinitas et verbum et intellectum super omnia in obscuritatem, quia neque nomen illius essentiæ est, neque verbum, sed nimis exaltatur. Recte itaque dicitur *Deus excelsus et sublimis*. *Æternitas vero definitur esse interminabilis vitæ tota simul et perfecta possessio*. Quod ex collatione temporalium clarius liquebit. Nam quidquid vivit in tempore, id est præsens, a præteritis in futura procedit, nihilque est in tempore constitutum, quod totum vitæ suæ spatium possit amplecti, sed crastinum quidem nondum apprehendit, hesternum vero jam perdidit, in hodierna quoque vita non amplius momento vivit. Quod igitur temporis patitur conditionem, licet illud sicut humana anima sine fine vivat, nondum tamen tale est, ut æternum esse credatur. Non enim totum simul, infinitæ licet vitæ, spatium comprehendit, atque complectitur, sed futura nondum habuit, transacta jam non habet. Quod igitur interminabilis vitæ totam plenitudinem pari-

(186) Alias, *vitam*.

ter comprehendit ac possidet, cui neque futuri quidquam absit, neque præteriti fluxerit, id est æternum esse, vel æternitatem jure inhabitare perhibetur. Itaque Deus *æternitatem* habitat, quia esse ejus totum est, et semper est, nescitque mutabilitatem quod neque cœpit, unquam, neque aliquando cessabit, insuperabile quoddam ac sine fine existentia pelagus, nullis terminis, nullisque limitibus circumdatum, omnem supergrediens sensum, omne tempus atque omnem naturam.

Nomen quoque ejus sanctum est. Sanctitas enim est, quantum secundum nos dicendum, omni iniquatione libera et perfectissima et incontaminatissima puritas. Et ideo *nomen ejus sanctum* dicitur, quia valde superexcellentius quam intelligere mens ulla possit, est in eo supernaturalis munditiæ puritas, ita ut omnes, qui in hoc ejus nomine credunt, purificet atque sanctificet. « Qui et in excelso et in sancto habitat, quia in principio erat Verbum, et Verbum erat apud Deum, et Deus erat Verbum (Joan. 1, 1). » Pater enim est excelsum et sanctum habitaculum Filii sicut et Filius habitaculum Patris. Ait enim : « Quia ego in Patre, et Pater in me est (Joan. x, 38). » Similiter et Spiritus sanctus in Patre et Filio est. Sic igitur intelligamus, quod in *excelso et in sancto* Deus habitare dicitur, quia ipse sibi est excelsum et sanctum habitaculum, sicut et ipse est æternitas, quam inhabitat.

Potest et cor angelicorum spirituum intelligi hoc *excelsum et sanctum habitaculum*, in quo ipse habitat. Unde scriptum est : « Respice de sanctuario tuo, et de excelso cœlorum habitaculo (Deut. xxvi, 15). » Sed iste tam sublimis tam immensus non solum in excelso habitat, sed *et cum contrito et humili spiritu* misericorditer habitare dignatur, et « juxta est his, qui tribulato sunt corde (Psal. xxxiii, 19). » Qui propterea cum contrito et humili spiritu in homine habitat, ut gratia Spiritus sui vivificet spiritum *humilium et cor contritorum*, quia humilibus dat gratiam, et pœnitentes atque compunctos, qui per peccatum intrinsecus mortui fuerant, vivere facit, et ad amorem suum magis ac magis accendit. Hic itaque tam magnus et tam excelsus atque tam benignus non in *sempiternum* litigabit, ut olim cum Synagoga litigabat, sed resurgente Christo et ad cœlos revertente effundet de Spiritu suo super omnem carnem, ut jam non litiget vel irascatur, sed omnia per gratiam faciat. Unde et subdit :

« Quia Spiritus a facie mea egredietur, et flatus ego faciam. »

Spiritus enim egressus est a facie Domini, quando venit Paracletus, quem discipulis Christus a Patre misit Spiritum veritatis, qui a Patre procedit. *Et flatus fecit Dominus*, quando spiritalia dona dedit hominibus. « Unicuique enim nostrum data est gratia secundum mensuram donationis ejus (Ephes.

(187) Alias, *Abscondi a te faciem meam, etc.*

(188) Alias, *Vias ejus vidi, et sanavi eum, et reduxi eum, et reddidi, etc.*

A iv, 7). » Qui et de spiritu humilium, cum se benigne vivificare dixerat, adjungit :

VERS. 17. — « Propter iniquitatem avaritiæ ejus iratus sum, et percussi eum, abscondi (187) me ab eo, et indignatus sum : et abiit vagus in via cordis sui. »

VERS. 18. — « Vias (188) ejus vidi et dimisi eum, et reddidi consolationes ipsi, et lugentibus ejus. »

VERS. 19. — « Creavi fructum (189) labiorum pacem ei, qui longe est, et qui prope, dixit Dominus, et sanavi eum. »

Iniquitas avaritiæ humani spiritus fuit, quia gloriam sublimitatis in paradiso superbe cupivit, cum audisset a serpente : « Eritis sicut dii (Gen. iii, 5). » Iniquitas quippe avaritiæ fuit, quia divinitatem sibi inconcessam ambiit. Et propter hanc iniquitatem iratus est Dominus, et percussit eum, et abscondit se ab eo, et indignatus est ei, et dimisit abire vagum in via cordis sui. Antea enim spiritus hominis tranquilla mentis stabilitate fruebatur intentus supernæ contemplationi, sed post innumeris motibus fluxa mutabilitate substratus est. Nam cum stare animus in semetipso nititur, a se ipso aliquo modo etiæ nesciendo derivatur, et ab unaquaque re, cui intenditur, fastidio impellente removetur. Sed dum inaniter cogitanda fastidit, docet, quod aliunde pendet, qui quolibet positus, non requiescit. Ad illum quippe suspensus est, a quo creatus. Et quia ad Deum solum appetendum creatus est, omne autem quod infra appetit, minus est, jure ei non sufficit, quidquid Deus non est. Graviter ergo percussus est, quia unum, quem sufficienter habere poterat, amisit, et huc illucque per multa spargitur.

Percussit namque eum, ut dictum est, Dominus, intimam sanitatem ei auferens, et abscondit ab eo faciem suam præclaram, pulchritudinem suæ visionis illi subtrahens. Qui repulsus ab intimis abiit foras vagus in via cordis sui sequendo concupiscentias suas. Vias cogitationum ejus vidit Dominus, quia deserebat invisibilia et appetebat visibilia, et justo judicio dimisit eum secundum desideria cordis ejus. Abiit vagus in via cordis sui, quia levi mobilitate cogitationum ductus est. Grave autem consilium cordis omnem inconstantiam vagationis expellit, ut ab intentione Dei non jam leviter dissiliat, sed in eum fixa constantiæ gravitate consistat. Et quoniam sunt animæ, quæ levi motu nunc ista, nunc illa desiderant, omnipotens Deus, quia ipsas leves fluctuationes non leviter pensat, vagationem cordis relinquendo dijudicat. Sed, cum per gratiam respicit, vagam mentem in consilii stabilitate figit. Unde subdit :

Et reduxi eum, quia cum levis motus animæ misericorditer dignatur aspicere, hanc protinus ad constantiæ maturitatem format. Itaque spiritum hominis ob superbiam Deus in initio percutiens dimi-

(189) Alias, *Fructum labiorum pacem, pacem ei, etc.*

sit vagum in via cordis sui, ut amissa mentis stabilitate vagis motibus per varia desideria longe ab eo foras iret. Nam propterea exivit ab eo, quia superbus erat et visibilia sequebatur. Revertetur autem, si humiliatus confugerit intus ad protectionem illius, et appetierit ea quæ intus sunt. Etenim intrare intro appetere intima est, exire foris appetere.

Reduxi, inquit, eum, et reddidi consolationes ipsi. Ut humilitate regrederetur ad illud dulce solatium vel secretum animi, quod est sine amaritudine malarum cogitationum. Hoc enim per donum gratiæ factum est eis, qui Spiritum sanctum acceperunt. Revocavit ad se pius Dominus servum suum, reduxit fugitivum, condonavit pœnitenti super errore suo, consolatusque est dolentem dans ei Paraclitum consolatorum Spiritum. *Lugentes* vero ejus sunt, qui spiritum suum deshebant aut dellent a Deo percussum. Quibus *consolationes* Dominus reddidit, sanitatem mentis per medelam sancti Spiritus reformans eis. Creavit enim *fructum laborum pacem*, id est instituit, ut « ore confessio fieret ad salutem (Rom. x, 10). » Fructus quippe laborum fructuosa confessio oris est. Qui scilicet fructus est pax, quia dum confitemur peccata nostra, vel Christum coram hominibus, pacem cum Deo assequimur.

Et hæc pax « creata est ei, qui longe est, et qui prope (Ephes. ii, 17), » id est Judaico et gentili populo. Dicit enim Paulus de Christo gentibus: « Quia veniens evangelizavit pacem vobis, qui longe fuistis, et pacem his, qui prope (ibid.), » id est Judæis. Ubi vero creavit fructum laborum pacem, sanavit et spiritum humanum, quem percusserat, dum discors esset, quia per confessionem peccatorum no-

strorum ejicimus languores intimos, et sanitatem interioris hominis recipimus. Hæc per Christi gratiam in toto orbe facta sunt, et fiunt. Sed clectis pacem assequentibus, videamus, quid de reprobis dicatur. Sequitur:

VERS. 20. — « Impii autem quasi mare fervens, quod quiescere non potest, redundant fluctus ejus in conculcationem et lutum. »

VERS. 21. — « Non est pax impiis, dicit Dominus. »

Impii sunt quasi mare fervens, quia sunt furore turbidi, rixis amari, elationis superbia tumidi, fraude, malitia obscuri, qui et rabie crudelitatis ferventes contra bonos sæviunt, et redundant perversorum operum fluctibus in conculcationem et lutum. Conculcantur enim ab electis fluctus tribulationum quas movent; et lutum est immunditia carnalium operum, quæ faciunt. Recte enim *mare* vocatur, sive mari comparatur amara inquietudo mentis iniquorum, qui dum se vicissim inimicitiis impetunt, quasi adversantes se inde collidunt. Recte mari, quod assidue fervet, assimilatur vita perversorum, quia dum procellosis actionibus concutatur, ab itinere sapientiæ, quiete ac stabilitate disjungitur. Unde *pax* eis esse denegatur, quia semper in cordibus suis turbulenti sunt et inquieti, secumque etiam sæpe rixantes. Venit enim Salvator, ut esset « in terra pax hominibus bonæ voluntatis (Luc. ii, 14), » non autem malevolis. Ideoque pœnitentibus creavit *fructum laborum pacem*. Sed non est pax impiis, quoniam bona voluntate carent. Hucusque voluminis hujus mensuram extendisse sufficit, ut ad finem hujus operis in alio pertingamus.

LIBER OCTAVUS.

CAPUT LVIII.

VERS. 1. — « Clama, ne cesses, quasi tuba exalta vocem tuam, et annuntia populo meo scelera eorum, et domui Jacob peccata eorum. »

Hoc Dominus unicuique sacerdoti loquitur ostendens, quia præpositus Ecclesiæ nullatenus fieri debet, nisi qui doctrinam veritatis incessanter promulgare valet. Nam præconis officium suscipit, quisquis ad sacerdotium accedit, ut ante adventum judicis, qui terribiliter sequitur, ipse scilicet clamando gradiatur. Sacerdos ergo si prædicationis est nescius, quam *vocem* clamoris daturus est præco mutus? Qui, etsi assidue prædicaverit, vix quantum debet, reddere poterit. Non enim ait Dominus: Clama post multos dies. Sed: *Clama, ne cesses*, ut incessanter insistat prædicationi. Et Paulus discipulis ait: « Quoniam per triennium die ac nocte non cessavi cum lacrymis monens unumquemque vestrum (Act. xx 31). » Et si Apostolus, ut se apud Deum absol-

veret, die noctuque verbum Domini prædicare non cessavit, quid de illis fiet, qui vix post multos dies commisso sibi gregi spiritalia pasca provident?

Debet etiam sicut *tuba* exaltare prædicator *vocem* suam, ut a multis audiri possit, et omnium mentes ad spiritale bellum excitet. Debet sicut *tuba vocem* exaltare, ut quomodo in finem sæculi ad vocem tubæ fiet resurrectio mortuorum, sic auditores prædicatoris a morte animæ suscitentur. Debet annuntiare *populo scelera eorum, et domui Jacob peccata eorum*, id est ut mala Ecclesiæ, quæ faciunt, manifestet illis, et redarguat. Unde alibi Dominus minatur eis, dicens: « Si non annuntiaveris iniquo iniquitatem suam, sanguinem ejus de manu tua requiram (Ezech. iii, 18). » Domus autem *Jacob* Ecclesia est, quia Christus, ut scriptum est, « regnabit in domo Jacob in æternum (Luc. i, 32). » Cur autem populo fidelium annuntianda sint peccata eorum subditur:

VERS. 2. — « Me etenim de die in diem quærun-
t, et scire vias meas volunt : quasi gens, quæ justitiam
fecit (190). »

De die in diem, ac si dicatur : Quotidie. Vel *de die
in diem*, id est De luce in lucem, de intelligentia in
intelligentiam quærun-
t me. *Et volunt scire vias ju-
stitiæ*, per quas ad me veniant, *quasi gens, quæ ju-
stitiam fecerit*. Qui enim jam cœpit facere justitiam,
ille diligentius debet inquirere vias Dei, et qui mi-
nora, quæ nosse potuit, opere complevit, debet ma-
jora cognoscere, in quibus proficiat. Sequitur :
Rogant me judicium justitiæ, id est interrogant me,
ut notificem illis *judicia justitiæ* meæ, quibus alio-
rum actiones approbo, et aliorum improbo. *Et ap-
propinquare Deo volunt merito bonæ conversationis
dicentes :*

VERS. 3. — « Quare jejunavimus, » etc. Deus non
aspicere dicitur, et non scire hoc quod non accipit,
nec ei gratum est. Qui quare jejunium eorum et
humiliationem non aspexerit, manifestat respondens
illis : « Ecce in die jejunii vestri invenitur voluntas
vestra et omnes debitores vestros repetitis. »

VERS. 4. — « Ecce ad lites et contentiones jejuna-
tis, et percussis pugno impie. »

Hoc, inquit, reprehensibile invenitur in jejunio
vestro, quia dum jejunatis, perversam *voluntatem
vestram sequi* non omittitis, cum non vestram, sed
Dei voluntatem facere deberetis. *Et omnes debitores
vestros repetitis*. Qui debitorem suum hoc quod de-
dit, repetit, nihil injustum agit. Sed dignum est,
quisquis se in penitentia macerat, etiam hoc sibi,
quod juste competit, interdicit. Sic enim nobis afflic-
tis et penitentibus a Deo dimittitur, quod injuste
egimus, si pro amore illius et hoc quod nobis juste
competit, relaxamus. Abstinentes sollicite semper
aspiciant, ne dum gulæ vitium fugiunt, acriora iis
vitia quasi ex virtute generentur, quia nulla est
macera-
nt, ad impatientiam erumpant, quia nulla est
virtus, cum caro vincitur, si spiritus ab ira supera-
tur. Aliquando autem dum mens abstinentium ab
ira se deprimit, hanc quasi peregrina veniens lætitia
corrumpit; et eo abstinentiæ domum deperit quo se
a spiritalibus vitiis non custodit. Unde recte dici-
tur : « In diebus jejuniorum vestrarum inveniuntur
voluntates vestræ. » Et item : « Ecce ad lites et
contentiones jejunatis, et percussis pugno impie. »
Voluntas quippe ad lætiam pertinet : *lites et pugna*
ad iram. Incassum ergo per abstinentiam corpus at-
teritur, si inordinatis dimissa motibus mens vitiis
dissipatur, si a pravis suis voluptatibus animus non
refrenatur, si jurgia non sopiantur. Unde et subdi-
tur :

« Nolite jejunare sicut usque ad hanc diem, ut
audiatur in excelso clamor vester. »

In excelso quippe auditur clamor hæster quando
nos apud Deum accusat perversitas actionum no-
strarum. De cujusmodi clamore dictum est : « Cla-

mor Sodomorum et Gomorrhæorum multiplicatus
est (Gen. xviii, 20). » Vel auditur *in excelso clamor*
noster, quando clamorem peccati angeli ad Deum
de nobis deferunt. Sed frustra jejuniis affligimur,
quandiu clamor de nobis sursum auditur. Rursus
admonendi sunt abstinentes, ut abstinentiam suam
et semper sine immutatione custodiant, et nunquam
hanc apud occultum juicem eximie virtutis cre-
dant, ne fortasse si magni meriti esse creditur, cor
in elationem sublevetur. Unde subditur :

VERS. 5. — « Nunquid tale est jejunium, quod
elegi, per diem affligere hominem animam suam ? »

Sed ut acceptabile sit jejunium dicitur inferius :
« Frange esurienti panem tuum, et egenos vagosque
induc in domum tuam (infra v, 7). » Qua in re pen-
sandum est, virtus abstinentiæ quam parva aspici-
tur, quæ non ex virtutibus aliis commendatur. Ad
hoc autem, quod dixerat : « Nunquid tale est jeju-
nium, quod elegi ? » subnectit, dicens :

« Nunquid contorquere quasi circulum caput suum
et saccum et cinerem sternere ? »

Contorquere quasi circulum caput dicit nimium in-
clinare. Qui enim nimis caput humiliat, velut in
molam circuli se ipsum curvat. Sed ita caput in-
clinare, et jacere in sacco et cinere non commendat
jejunantem nisi et opera pietatis fecerit. Non enim
querit Deus afflictionem solam et humiliationem per
injuriam corporis, ut instar circuli caput torqueat,
qui corpus et colla submittat, nec ut sacco quis ve-
stiatur, et in cinere dormiat. Unde et subditur :

« Nunquid istud *rocar* jejunium et diem accepta-
bilem Domino ? » Uti autem Dominus jejunium,
quod ipse non approbat, ostendit : quod jejunium
sibi placeat manifestat, dicens :

VERS. 6. — « Nonne hoc est magis jejunium, quod
elegi ? Dissolve colligationes impietatis, solve fasci-
culos deprimentes : dimitte eos, qui contracti sunt,
liberos, et omne onus dirumpe. »

Si quos in carcerem captivos colligasti, *dissolve*
eos, quia istæ *colligationes* sunt *impietatis*; et *fasci-
culos*, quibus in captione suos quibusdam ponderi-
bus onerare. Vel *colligationes* istæ et fasciculi sunt
chartarum fasciculi, in quibus feneratorum calum-
niæ continentur et opprimuntur pauperes ære alieno.
Si quem etiam injuste sacerdos excommunicaverit,
cerno ibi colligationem *impietatis*. Si cui importa-
bile onus immoderate penitentiae imposuerit, video
ibi *fasciculum deprimentem*. Si cujus mentem impie-
tas colligaverit, considero ibi colligationem *impieta-
tis*. Omnes ergo hujusmodi colligationes et fascicu-
los oportet solvi, ut jejunium fiat acceptabile. Sed
et servi, qui senio *contracti* sunt, dimittantur jam
liberi, et *omne onus* dirumpatur ab eis. Hæc enim
omnia relaxare misericorditer debet, qui conscien-
tiæ suæ vincula relaxari divinitus querit. Et ut su-
perna beneficia capiat, operetur, quod subditur :

VERS. 7. — « Frange esurienti panem tuum, et

egros vagosque induc in domum tuam : cum vide-
ris nudum, operi eum, et carnem tuam ne despo-
neris. »

Id est carnem egentis proximi tui, quia tua est.

VERS. 8. — « Tunc erumpet quasi mane lumen
tuum, et sanitas tua citius orietur, et anteibit fa-
ciem tuam justitia tua, et gloria Domini colliget
te. »

VERS. 9. — « Tunc invocabis, et Dominus exau-
diat, clamabis, et dicet : Ecce adsum. »

Tunc, inquit, quando hæc feceris, erumpet quasi
mane lumen tuum, quia mox culpæ, quæ cor tuum
obscurabat, discedet, et fulgor justitiæ illustrabit
illud. Tunc erumpet quasi mane lumen tuum, quia
tenebræ peccatorum te deserent, et justitiæ luce
fulgeas. Et citius veniet sanitas animæ tuæ, quæ
in peccatis languerat. Et anteibit faciem tuam justit-
iæ tuæ, quoniam ante te præmittes ad Deum bona
opera tua, thesaurizans tibi thesauros in cælo, ac
deinde gloria Domini colliget te, cum audieris : « In-
tra in gaudium Domini tui (Matth. xxv, 23). » Vel :
« Percipite regnum (ibid. 34). » Cumque prædicta
pietatis opera feceris, tunc invocabis, et Dominus
exaudiet, quia citius exauditur oratio, quam boni
operis meritum adjuvat. Nam qui Deum jubentem
non vult exaudire, quomodo Deus orantem exau-
diat ? At enim : « Quid vocatis me, Domine, Domine,
et non facitis, quæ dico ? » (Luc. vi, 46.) Qui ergo
præcepta Domini libenter exaudit, id est facit, hujus
preces Deus gratanter accipit, et clamanti in ora-
tione respondet : Ecce adsum. Sequitur :

« Si abstuleris de medio tui catenam, et de-
sieris digitum extendere, et loqui, quod non prodest. »

VERS. 10. — « Cum effuderis esurienti animam
tuam, et animam afflictam repleveris : orietur in
tenebris lux tua, et tenebræ tuæ erunt sicut meri-
dies. »

In primis enim debes auferre catenam de medio
tui, id est de corde tuo, ut omne vinculum pec-
cati, quod mentem tuam constringit, abjicias. Dis-
solve etiam de corde tuo colligationes impietatis,
deinde soluto conscientie vinculo desine jam digi-
tum extendere, et loqui, quod non prodest, et indis-
ciplinatos motus et inutilia verba dimittas. In exten-
sione enim digiti et locutione, quæ non prodest,
vaga et indisciplinata manu et lingue notatur
dissolutio. Exterior enim motus indicat, quod nulla
interius boni consilii radice subsistat. Vel digitum
extendit et loquitur, quod non prodest animæ suæ,
qui singulos quasi digito notans detrahit eis. Ablata
vero cordis catena, et compositis exteriorum mem-
brorum motibus, debes jam inservire virtutibus sci-
licet esurienti misericorditer effundere animam tuam,
ut animi compassione piis operibus foras effundas
adjuvando eum, in quibuscunque potueris, ex animo
et bona voluntate, et afflictam egentis animam be-
neficiis eleemosynarum replere.

Et tunc orietur in tenebris vitæ præsentis lux tua,

A et tenebræ tuæ erunt sicut meridies, quia Dominus
« educet quasi lumen justitiam tuam, et iudicium
tuum tanquam meridiem (Psal. xxxvi, 6). » Orietur
in tenebris lux tua, quia in medio nationis prævæ et
perversæ lucebis sicut luminare in mundo. Et te-
nebræ tuæ erunt sicut meridies ; « Fuistis enim ali-
quando tenebræ, nunc autem lux in Domino (Ephes.
v, 8). »

Vel appellatione tenebrarum designari potest vita
futura, quia reprobi mittentur in tenebras exte-
res. Unde Dominus ait : « Me oportet operari opera
ejus, qui misit me, donec dies est. Veniet nox,
quando nemo potest operari (Joan. iv, 4). » Diem
quippe vitam præsentem appellat, vel etiam se
ipsum in hac vita ; noctem vero spatium, quod huic
vitæ succedit, quia tunc nemo valet operari. Orietur
ergo in tenebris lux tua, quia in illo sæculo vide-
bis lumen, quando peccatores tenebris erunt invo-
luti. Et tenebræ tuæ sicut meridies erunt, quia clari-
tate lucidissima circumdaberis.

VERS. 11. — « Et requiem dabit tibi Dominus
Deus tuus semper. »

Qui introducet te in requiem suam, ut cum eo
requiescas ; et cum egressa fuerit de corpore anima
tua, et implebit eam splendoribus æternæ lucis, et
ossa tua liberabit de interitu et igne perpetuo in fine
sæculi, quando corpus tuum suscitabit, et exul-
tabunt ossa humiliata (Psal. l, 10). Sed quid
interim per divinam gratiam assequeris, subditur :

C « Et eris quasi hortus irriguus, et sicut fons
aquarum, cujus non deficient aquæ. » Eris quasi
hortus irriguus, quia cælestis gratiæ rivulis perfusus
virtutum flores et opera virentia semper habebis.
Et sicut fons aquarum indeficientium, dicente Domi-
no : « Qui biberit ex aqua quam ego dabo ei, non
sitiet in æternum, sed fiet in eo fons aquæ salien-
tis in vitam æternam (Joan. iv, 15). » Sequitur :

VERS. 12. — « Et ædificabuntur in te deserta
sæculorum ; fundamenta generationis et generatio-
nis suscitabis. »

Deserta sæculorum sunt dicta et exempla patrum
antiquorum, quæ jam olim a sæcularibus homini-
bus derelicta sunt. Sed in te ædificabuntur, cum san-
ctorum Patrum dicta et facta in ædificio conversa-
tionis tuæ posueris. Fundamenta vero generationis
et generationis prophetæ sunt et apostoli. Unde di-
citur credentibus : « Quoniam estis cives sanctorum
et domestici Dei superædificati super fundamentum
apostolorum et prophetarum (Ephes. ii, 19). » Quæ
scilicet fundamenta quodammodo jacent in infimis
apud illos, qui ea negligunt, et præcepta moresque
eorum in suis operibus non extolunt. Sed tu ea sus-
citabis in te ipso, quando in fabrica vitæ tuæ ea
eriges. Sequitur :

« Et vocaberis ædificator sepium, avertens semi-
tas in quietem. »

Ædificator sepium vocaberis, quia arces vitæ ædifi-
cabis, cum desideria carnis coercens illicitas co-
rum vias obstruxeris. Sepia circumdabitur viam

Dei, quæ est anima tua vel Ecclesia, ut omnium be-
 natarum in eam prohibeantur accessus. Et *semitas*
 avertes in quietem, cum sæculi actiones deserens
 tranquilla mente Deo soli servieris. *Semitas* avertes
 in quietem, ut nequaquam ira Dei desæviat, sed pla-
 catus sit tibi Dominus, et omnes indignationis ejus
 semitæ conquiescant. Vel sepes ædificabis, et *semi-
 tas* avertes in quietem si amore religionis undique
 tibi aditus obstruxeris, ut jam foris per diversa va-
 gari desistas, et in loco tuo manens facias, quod
 scriptum est : « Vacate et videte, quoniam ego sum
 Deus (Psal. XLV, 11). » Unde et subditur :

VERS. 13. — « Si averteris a sabbato pedem tuum
 facere voluntatem tuam in die sancto meo, et voca-
 veris sabbatum delicatum, et sanctum Domini glo-
 riosum, et glorificaveris eum, dum non facias vias
 tuas, et non invenitur voluntas tua, ut loquaris
 sermonem. »

VERS. 14. — « Tunc delectaberis super Domino, et
 sustollam te super altitudines terræ, et cibabo te
 hæreditate Jacob patris tui. »

Sabbatum electorum est, ut actiones sæculi fu-
 giant, ne in eis involvantur peccato, sed liberi Deo
 vacare valeant. Et hoc Sabbatum est Sanctus dies
 Domini, quia tranquilla vita religiosorum est sancta
 et clara coram Deo. Ab hoc igitur Sabbato averte
 pedem tuum facere voluntatem tuam in hoc die san-
 cto Dei, ne foras ad actiones mundanas, ut volunta-
 tem tuam facias, egrediaris, qui Deo intus vacare
 elegisti, sed « a voluntatibus tuis avertere (Eccli.
 xviii 30), » ne sanctæ quietis sabbatum violes. Et
 voca *Sabbatum delicatum et sanctum Domini glorio-
 sum*, atque *glorifica eum non faciens vias tuas*. *Delicatum*
 enim, id est subtile debes vocare illud, ne Judaico
 sensu loquaris de eo putans ab omni opere
 illicito cessandum, sed etiam ab omni appetitu mun-
 danarum rerum. Tunc namque est *delicatum Sabba-
 tum*, cum mens ab omni labore cupiditatum quie-
 scit. Magna enim requies mentis est nil concupi-
 scentiaæ sæcularis habere. Nam si ad terrena appe-
 tenda cor inhiat, tranquillum esse nullatenus po-
 test, quia vel non habita concupiscit ut habeat, vel
 adepti metuit ne amittat. Si vero semel in appetitu
 celestium fortiter animus figitur, minus rerum tem-
 poralium perturbatione vexatur, quia velut in quodam
 secreto quiescit, et strepitum mundi non sentit.
 Ita ergo *delicatum* debes celebrare *Sabbatum et san-
 ctum* Deum, id est Christum ejus *voca gloriosum* de-
 cantans nomen ejus; et *glorifica eum, dum non facis
 vias tuas*, id est actiones proprias, ut qui vias actio-
 num tuarum pro ejus amore reliquisti, non sis otio-
 sus, sed eum in te ipso glorificare studeas, ut se-
 cundum legem diem sabbati sanctifices. Diem quippe
 Sabbati sanctificat, qui ab illicitis quiescit, et ea
 quæ sancta sunt, agit.

*Et glorifica eum, id est diem Sabbati, dum non
 facis vias tuas, ut qui a tuis actionibus et propriæ
 utilitatis operibus causa religionis quiescis, Sabba-
 tum hujus sanctæ quietis glorifices dignis operibus*

A justitiæ et sanctitatis. Et non invenitur voluntas
 tua, ut loquaris sermonem, sed in hoc frange volun-
 tatem tuam, ut non ad ejus arbitrium loquaris,
 atquæ silentium amore religionis custodi, ne forte
 delinquas in lingua tua. Et cum ita vixeris, tunc
 delectaberis super Domino, quia his sanctæ conver-
 sationis profectibus ad perfectam charitatem, quæ
 foras mittit timorem, pervenies, ut omnia hæc jam
 non ex necessitate, sed ex dilectione custodias, ut
 in amore Dei requiescas.

Et sustollam te super altitudines terræ, ut omnia,
 quæ apud homines alta sunt, transcendas. Quasi
 enim quædam inferiora terræ sunt damna, contu-
 meliæ, egestas, abjectio, quæ ipsi quoque dilectores
 sæculi, dum per latæ viæ planitiem ambulant, vi-
 tando calcare non cessant. *Altitudines vero terræ*
 sunt lucra rerum, blandimenta subditorum, divi-
 tiarum abundantia, honor et sublimitas dignitatum.
 Quæ quisquis per ima desideria adhuc incedit, eo
 ipso alta æstimat, quo magna putat. At si semel cor
 in celestibus figitur, mox, quam abjecta sint, cer-
 nitur, quæ alta videbantur. Nam, sicut cum montem
 quisque conscendit, eo paulisper cætera subterja-
 centia despicit, quo ad altiora amplius gressum ten-
 dit, ita qui in summis intentionem figere nititur,
 dum adnisi ipso nullam vitæ præsentis gloriam esse
 deprehendit, super altitudines terræ elevatur, et
 quod prius in infimis desideriis positus super ea
 credidit, post ascendendo proficiens sibi subesse co-
 gnoscit.

C Et cibabo, inquit, te hæreditate Jacob Patris tui,
 quia celestium contemplatione, satiaberis. Sicut,
 qui fidem habet, filius Abrahæ vocabitur; ita qui
 supplantat vitia atque peccata filius Jacob dicitur, et
 cujus quis virtutem imitatur, hujus quoque filius
 appellatur. Hæreditas autem Jacob patria illa beatæ
 mansionis est, de qua per Ezechielem Dominus his,
 qui mortui sunt, electis promittit : « Ego aperiam
 tumulos vestros, et educam vos, de sepulcris, popu-
 lus meus, et inducam vos in terram Israel (Ezech.
 xxxvii, 12). » Cibatur ergo hæreditate Jacob, qui
 mente patriam illam ingreditur et in contemplatione
 illius pascitur. Sed tunc plenarie justus omnes in illa
 hæreditate pascentur, quando « venient et recum-
 bent cum Abraham et Isaac et Jacob in regno celo-
 rum (Matth. viii, 11). » Ut autem hæc omnia
 vir Deo plenus auctoritate robusta firmaret, sub-
 jecit : « Os enim Domini locutum est. » Neque
 enim a se ipso propheta dixit, sed Deo in se
 loquente cuncta protulit. Ostenditque hactenus cui-
 libet fidelium, quantum in virtutibus successum ha-
 biturus sit, si totus ad religionem conversus toto
 corde justitiam sectari studuerit. Post hæc plebem
 hanc carnalium, quæ per suas nequitias a Deo
 longe recessit, affatur, dicens :

CAPUT LIX.

VERS. 1. — « Ecce non est abbreviata manus
 Domini ut salvare nequeat, neque aggravata est
 auris ejus, ut non exaudiat. »

VERS. 2. — Sed iniquitates vestrae diviserunt inter vos et Deum vestrum, et peccata vestra absconderunt faciem ejus a vobis, ne exaudiret. »

Putant enim nonnulli homines Deum alterius voluntatis vel potentiae nunc esse, quam olim fuit, dum audiunt patres nostros citius in oratione exauditos, et se non exaudiri conspiciunt, patres de suis tribulationibus quantocius salvatos, vel ad aeternam salutem perductos, se autem a diuturnis calamitatibus suis non salvari, neque perpetuam salutem posse adipisci. Quibus apte respondetur, quia non est abbreviata manus Domini, ut salvare nequeat, sicut olim patres salvavit, si quis salvari dignus fuerit: Neque aggravata est aures ejus, ut modo, sicut quondam, non exaudiat, si fuerit qui exaudiri mereatur.

« Sed iniquitates vestrae diviserunt inter vos, et Deum vestrum. » Tollite ergo iniquitates de medio, et Deum vobis proximum ipsi fecistis. Idcirco enim tam cito Deus aderat precibus sanctorum Patrum, quia medius separans non erat inter eos et Deum. « Et peccata vestra absconderunt faciem ejus a vobis, ne exaudiret. » Quia peccatorum tenebris obscuratum est cor vestrum, ne serenum vultum bonitatis et gratiae ejus queat videre, et ab ipso, quod petierit, obtinere. Sequitur :

VERS. 3. — « Manus enim vestrae pollutae sunt sanguine, et digiti vestri iniquitate: labia vestra locuta sunt mendacium, et lingua vestra iniquitatem fatur. »

Idcirco non estis digni, ut exaudiamini, quia manus vestrae pollutae sunt humano sanguine, quem fudistis. Vel sanguine, id est peccato inquinatae sunt manus vestrae; et digiti vestri qualibet iniquitate, quam operati estis; et labia vestra non solum otiosum sermonem, sed et mendacium protulerunt, quod est pejus, quia « os, quod mentitur, occidit animam (Sup. 1, 41). » Quomodo ergo exaudiri poterit deprecatio oris, quod talia loqui consuevit, nisi prius poenitentiam egerit; adhuc autem de hujusmodi hominibus subditur :

VERS. 4. — « Non est, qui invocet justitiam, nec est qui judicet vere; sed confidunt in nihilo, et loquuntur vanitates. »

Non est quisquam ex hac multitudinis pravorum, qui invocet justitiam, id est in corde suo justificari precetur. Ille enim, justitiam invocat, id est in se ipsum vocat, qui cor suum justitiae habitaculum idoneum parat, et justitiam a Deo postulat. Sed nemo est in istis, qui hoc faciat. Nec est qui judicet vere, quia falso mentis judicio aeternis temporalia praerponunt. Sed confidunt in nihilo, id est in praesenti vita, in viribus suis, in equis, in armis et divitiis. Omnia enim haec nihil sunt in comparatione caelestium et aeternorum. Et loquuntur vanitates, quia laudant temporalia vel proferunt otiosa verba et inaniam. Sequitur :

« Conceperunt laborem et pepererunt iniquitatem. »

A Conceperunt laborem, quia graviter in corde suo laboraverunt excogitantes, quomodo temporalia per fas et nefas acquirerent, et ceteros anteirent. Et pepererunt iniquitatem proferendo in operatione, quod intus conceperant. Sequitur :

VERS. 5. — « Ova aspidum ruperunt, et telas araneae texuerunt, qui comederit de ovis eorum, morietur; et quod confotum est, erumpet in regulum. »

Ova aspidum rumpuntur, quando malignorum spirituum consilia, quae in cordibus pravorum latent, perversis operibus aperiantur. Telas quoque araneae texunt, quia pro hujus mundi concupiscentia temporalia quaelibet faciunt. Quae dum nulla stabilitate solidata sunt, aura procul dubio vitae transeuntis pereunt. Bene autem dicitur: Qui comederit de ovis eorum morietur, quia qui immun-

B dorum spiritu consilia recipit, vitam in se animae occidit. Et quod confotum est, erumpet in regulum, quia consilium maligni spiritus, quod corde tegitur, ad poenam iniquitatum nutritur. Regulus namque serpentium rex dicitur: reproborum caput Antichristus. Quod ergo confotum fuerit, in regulum erumpit, quia qui in se nutrienda aspidum consilia recipit, membrum iniqui capitis factus, in corpus Antichristi accrescit. Sequitur :

VERS. 6. — « Telae eorum non erunt in vestimentum, neque operientur operibus suis; opera eorum inutilia, et opus iniquitatis in manibus eorum. »

C Telae eorum non erunt in vestimentum, quia ex his, quae operantur, non fiet indumentum animae. Neque operientur operibus suis, sed nudi remanebunt, et confusione pleni. Nam quoniam aeterna non quaerunt, bona temporalia cum tempore amittunt; et ante judicem nudi veniunt, quia vestem sibi bonorum operum texere noluerunt. Si enim nos apud Deum nostra opera quasi vestimentum non tegerent, nequaquam voce angelica diceretur: « Beatus qui vigilat, et custodit vestimenta sua, ne nudus ambulet, et ne videant turpitudinem ejus (Apoc. xvi, 15). » Turpitude enim nostra tunc cernitur, cum vita reprehensibilis ante justorum oculos in judicio nequaquam boni operis tegmine velatur. Non ergo operientur iniqui operibus suis, quoniam opera eorum sunt inutilia, dum pro temporali vita

D faciunt omnia. Sequitur :

VERS. 7. — « Pedes eorum ad malum currunt et festinant, ut effundant sanguinem innocentem; cogitationes eorum cogitationes inutiles, vastitas et contritio in visis eorum. »

VERS. 8. — « Viam pacis nescierunt, et non est iudicium in gressibus eorum, semitae eorum incurvae sunt eis: omnis, qui calcatur in eas, ignorat pacem. »

Pedes eorum ad malum currunt et festinant, quia properant ut aliorum bona rapiant. Et sanguinem innocentem effundunt, quia illos injuste perimunt, quorum substantias rapiunt. Cogitationes eorum inutiles, quia nil de aeternis bonis, sed de transitoria assidue cogitant, et mala proximis in corde suo

machinantur. *Vastitas et contritio in viis eorum*, A quia exercitiis congregatis regiones, per quas transeunt, vastant et conterunt.

Viam pacis nescierunt, quia quocumque pergunt, aliorum facultates invadunt. *Et non est iudicium in gressibus eorum*, quia indiscrete super bonos et innocentes irruunt sicut super malos vel sibi adversantes. Aut certe *rastitas et contritio in viis eorum est*, quia dum turbulentas actiones incessanter insequuntur, omnis eorum requies tam intus quam foris vastatur et conteritur. *Viam pacis nescierunt*, quia Deo concordare in actionibus suis non noverunt. Ille enim *viam pacis* sectatur, qui a veritatis itinere in viam scandali non derivatur. Unde per Zachariam dicitur : « Ad dirigendos pedes nostros in viam pacis (Luc. 1, 79). » Tunc enim gressus nostros in viam pacis dirigimus, quando per illud actionis iter pergimus in quo ab auctoribus nostri gratia non discordamus. Sed reprobam viam pacis nesciunt, quia pravitate voluntaria cæcati callem rectitudinis, qui divinæ voluntati concordat, ignorant. *Et non est iudicium in gressibus eorum*, quia in his quæ faciunt, examen discretionis non habent. *Gressus* quippe eorum actiones sunt, quibus innituntur, et quasi passibus promoventur. Sed *non est iudicium in gressibus eorum*, quoniam operationes suas examinare negligunt, dum suæ voluntatis libitum sequentes, quod sibi placet, faciunt sive bonum sive malum. *Semita eorum incurvatae sunt eis*, quoniam terrena semper et infima sequuntur in operationibus, per quas incedunt. *Omnis qui calcit per eas, ignorat pacem*. Quia « quicumque voluerit amicus esse hujus sæculi, inimicus Dei constituetur (Jacob., iv, 4). » Sequitur :

VERS. 9. — « Propter hoc elongatum est a vobis iudicium recti examinis. »

« Animalis enim non percipit ea, quæ sunt spiritus Dei; spiritalis autem dijudicat omnia (I Cor. ii, 14). » — « Et non apprehendet vos justitia, » quamdiu sic agitis, quia prius relinquenda est iniquitas, et post tribuatur vobis justitia. Post hoc populus Judæorum poenitentiam acturus, inducitur, cum protinus subditur.

« Exspectavimus lucem, et ecce tenebræ : splendorem, et in tenebris ambulavimus. »

VERS. 10. — « Palpavimus sicut cæci parietem, et quasi absque oculis attrectavimus; impegimus meridie quasi in tenebris, et in caliginosis quasi mortui. »

VERS. 11. — « Rugiemus quasi ursi omnes, et quasi columbæ meditantes gememus. »

Nam quia Redemptoris adventum diutius exspectaverunt, sed in adventu ejus tenebras infidelitatis incurrerunt, recte jam resipiscentes dicunt : « Exspectavimus lucem, et ecce tenebræ : splendorem, et in tenebris ambulavimus. » Christus enim lux est mundi, et splendor paternæ gloriæ. Quem isti venturum prophetando sustinuerunt, sed venientem non cognoverunt, et quos ad spem aperuerunt men-

tis oculos, ad præsentiam lucis clausurunt, et lumen respicientes tenebras elegerunt. Qui et subdunt : *Palpavimus sicut cæci parietem*. Aperta enim miracula viderant, et adhuc eum quasi palpantes inquirebant, cum dicerent : « Quousque animam nostram tollis ? Si tu es Christus, dic nobis palam (Joan. x, 24). » Ecce miraculorum lux ante oculos aderat, et tamen in cordibus suis tenebras offendentes adhuc inquirendo palpabant : Apertam enim jam januam lucis nolentes intrare credendo palpabant foris velut cæci parietem tentando. Unde et adjungunt :

« Impegimus meridie quasi in tenebris. » Dum enim divinæ virtutis miracula cernerent et tamen de ejus divinitate dubitarent, *in meridie tenebras* passi sunt, quia visum in ipso veritatis lumine perdididerunt. Insuper *in caliginosis impingebant quasi mortui*, dum visu cordis amisso offenderent in lapidem offensionis. Vel exspectaverunt *splendorem*, et ambulaverunt *in tenebris*, ita Scripturas sacras quasi parietem cæci palpantes, verba tantum earum, et folia, non fructum vel sensum, qui tenetur in litteris, quærentes. In toto enim orbe solis justitiæ splendore rutilante illi morantur in tenebris et infidelitatis errore. Sed pro his male gestis subjungunt de luctu poenitentiae suæ :

« Rugiemus quasi ursi omnes, et quasi columbæ meditantes gememus. » Ursus enim vehementissime rugit, quando plangit; columba vero pro cantu semper gemere consuevit. Sic et isti ad prædicationem Eliæ faciunt, et qui de cassa expectatione sua consequenter addunt : « Exspectavimus iudicium, et non est : salutem, et elongata est a nobis. » Diutissime enim in hac captivitate sua exspectaverunt, ut Deus causam eorum iudicans liberaret eos, sed frustra; et salutem ereptionis suæ præstolati sunt, sed elongata est ab eis. Et quare iudicium et salutem non invenerunt, ostendunt subdendo :

VERS. 12. — « Multiplicatæ sunt enim iniquitates nostræ coram te, et peccata nostra responderunt nobis. »

Nam ex quo Christum amiserunt, semper iniquitates iniquitatibus addiderunt. Quibus et *responderunt peccata sua*, quia secundum quod merebantur, ceperunt. Sequitur :

« Quia scelera nostra nobiscum, et iniquitates nostras cognovimus. »

VERS. 13. — « Peccare et mentiri contra Dominum. »

Ideo *multiplicatæ sunt iniquitates eorum, quia scelera ipsorum sunt cum eis*. *Scelera vero eorum cum eis sunt*, quia Christum, qui suo sanguine peccata solus lavit, amiserunt. « Impossibile est enim sanguine hircorum et taurorum auferri peccata (Hebr. xiii, 4). » Qui et peccaverunt, et mentiti sunt *contra Dominum*, quando falsis criminationibus accusaverunt eum, et occidi fecerunt. Sequitur :

« Et aversi sumus, ne iremus post tergum Dei nostri, ut loqueremur calumniam et transgressionem. »

Aversi sunt, ne irent post tergum Dei sui, quia Christum sequi noluerunt in gratia evangelicæ novitatis, sed locuti sunt calumniam et transgressionem, dicentes: « Non est hic homo a Deo, qui Sabbathum non custodit (*Joan. ix, 16*). » Vel: « Ecce homo vorax et potator vini, amicus publicanorum et peccatorum (*Matth. xi, 19*), » et his similia. Sed et illi aversi sunt, ne irent post tergum Dei sui, de quibus Joannes refert, quia « multi discipulorum ejus abierunt retro, et jam non cum illo ambulabant (*Jean. vi, 67*). » Locuti sunt *calumniam et transgressionem*, quia cum audissent de corpore et sanguine ejus comedendo et bibendo, dixerunt: **B** « Durus est hic sermo, quis potest eum audire? (*ibid.*) » Sequitur:

« Concepimus et locuti sumus de corde nostro verba mendacii. »

Dum Salvatorem accusare quærent, multa *verba mendacii* conceperunt et locuti sunt, et hoc fecerunt *de corde suo*. « De corde enim exeunt cogitationes malæ, homicidia, adulteria (*Matth. xv, 19*). » Vel *conceperunt de corde et locuti sunt mendaciam* contemnentes legem Dei, et sequentes traditiones, quas in suo corde simulaverunt. Sequitur:

VERS. 14. — « Et conversum est retrorsum iudicium, et justitia longe stetit, quia corrui in platea veritas, et æquitas non potuit ingredi. »

VERS. 15. — « Et facta est veritas in oblivionem, et qui recessit a malo, prædæ patuit. »

Conversum est retrorsum iudicium, quia principes sacerdotum ac scribæ et seniores, qui juste iudicare deberent, sine iudicio condemnaverunt Christum reum esse mortis. Et omnis tunc *justitia longe stetit* ab eis, cum per invidiam traderent eum. *Corruit enim veritas in platea*, quæ erat ante prætorium Pilati. In hac igitur platea corruit veritas, ubi regnavit Judæorum sola perversitas. *Æquitas illuc ingredi non potuit*, quia perfidia Judæorum nequam innocentem sed reum dimitti quæsivit. *Et exinde facta est Judæis veritas in oblivionem*, et populus credentium, *qui recessit a malo* perfidie eorum, *patuit prædæ violentorum*. Unde et laudari meruit ab Apostolo dicente: « Rapinam honorum vestrorum cum gaudio suscepistis cognoscentes vos habere meliorem et manentem substantiam (*Hebr. x, 34*). » Sequitur:

« Et vidit Dominus, et malum apparuit in oculis ejus, quia non est iudicium. »

Displicuit ideo, *quia iudicium non est apud Judæos*, dum Salvatorem injuste condemnant, vel in cæteris quæ deinceps faciunt. Sequitur:

VERS. 16. — « Et vidit Deus, quia non est vir; et aporiatu est, quia non est, qui occurrat. »

Non est vir in Judæis, id est probus et viriliter agens, *sed omnes sunt vulgares et amentes*, quia

« omnes declinaverunt, simul inutiles facti sunt, non est qui faciat bonum, non est usque ad unum. (*Psal. xiii, 3*). Unde et non est, *qui occurrat Deo*, quia non est inter eos justus quisquam, qui divinam iram objectu suæ intercessionis ab illo populo dignus sit avertere. Apriori vero laborare est, vel angustia: i sive affligi, quia poros vocamus foramina cutis, quibus sudor egreditur. *Vidit ergo Deus, quia in Judæis non est vir; et aporiatu est*, id est laboravit; *quia non est, qui sibi occurrat*. Quasi enim labor et afflictio grandis est Deo, quando nullus orando animalversioni ejus obviat. Vel, sicut dictum est ante nos, aporia est contemptus vel privatio. Unde Apostolus: « Aporiamur, inquit, sed non destituimur (*II Cor. iv, 8*), id est contemnimur, et tanquam propriis lucris privamur. *Porion* enim Græce, Latine *lucrum* dicitur. Hinc aporiarum dicimus contemni, et a propriis lucris privari; Deus enim *aporiatu est*, id est animarum lucra de Judæis amisit, *quia non est, qui occurrat iræ ejus*, et contemnitur ab eis. Sequitur:

« Et salvavit sibi brachium suum, et justitia ejus ipsa confirmavit eum. »

Salvavit sibi brachium, id est resuscitavit sibi Christum suum; *et justitia ejus*, quam habet contra Judæos, *ipsa confirmavit eum* a versus eos. *Vel justitia ejus*, id est justitia Christi *ipsa confirmavit eum* in regno. Unde ait Patri: « Me autem propter innocentiam suscepisti, et confirmasti me in conspectu tuo in æternum (*Psal. xl, 13*). » Sed hæc de malis Catholicis libet intueri. Aiunt enim:

« Expectavimus lumen, et ecce tenebræ: splendorem, et in tenebris ambulavimus. » Plerumque enim pravi homines, dum per illicitas actiones quærunť assequi splendorem prosperitatis et honoris, inveniunt *tenebras* tribulationis et confusionis. Qui et subjiciunt: « Palpavimus sicut cæci parietem. » Palpant enim *perversi parietem ut cæci*, quia sæpe in proximis, dum bona opera conspiciunt, si qua mala lateant, investigant; et sollicitis inquisitionibus laborant, si quid forte, quod accusare possint, inveniunt. Sana quidem membra conspiciunt, sed clausis oculis cordis vulnus palpantes quæunt. Et

D *impingunt meridie quasi in tenebris*, quia dies boni operis claret exterius, sed illi qui livoris sui tenebras intus tolerant, in luce quasi in nocte offendunt, quia dum bonum, quod vident accusare nequeunt, malum, quod non vident, ad accusationem quærunť; et quia hoc invenire nequeunt, *in meridie boni operis offendentes impingunt. Et in caliginosis oberrant quasi mortui*, quia tenebris suis circumdati, quo se magis vertere debeant, nesciunt, quoniam dilectionis vitam perdididerunt. « Nam qui odit fratrem suum, in tenebris ambulat, et nescit quo eat; quoniam tenebræ obcæcaverunt oculos ejus (*Joan. ii, 11*). » — « Et qui non diligit, manet in morte (*Joan. iii, 14*). » Sed quia et istos nonnunquam divina pietas ut mala sua dedeant, respicit, recte

subjungunt : « Rugiemus quasi ursi omnes, et quasi A columbæ meditantés gememus. »

Rursum quia diuturnis afflictionibus ob iniquitates suas plerumque deprimentur, « Expectavimus, inquit, iudicium, et non est : salutem, et elongata est a nobis. Multiplicatæ sunt enim iniquitates coram te, et peccata nostra responderunt nobis. » Expectant enim iudicium ereptionis suæ, et non est : salutem liberationis, et elongabitur ab eis, quoniam peccata sua responderunt eis afflictiones istas promittendo et reddendo. Qui adhuc conflentur, dicentes : « Quia scelera nostra nobiscum, et iniquitates nostras cognovimus, peccare et mentiri contra Dominum. » Scelera namque eorum cum eis sunt, quia veniam non merentur. Peccant enim assidue, et frequenter mentiuntur contra Dominum falso ju-

« Et aversi sumus, ne iremus post tergum Dei nostri, ut loqueremur calomniam, et transgressionem. » — « Qui dicit se in Christo manere, debet, sicut ille ambulavit, et ipse ambulare (I Joan. II, 6). » Sed falsi Christiani avertuntur post tergum Domini, quia vestigia ejus usque in finem non sequuntur, sed ad mundi concupiscentias revertuntur. Loquuntur enim calumniam et transgressionem, dum præpositos suos mandata divina transgredi calumniantur. Unde et subdunt : « Concepimus et locuti sumus de corde nostro verba mendacii. » Concipiunt enim sapiens, et loquuntur de corde suo verba mendacii etiam contra bonos.

Deinde : *Conversum est retrorsum iudicium*, quia jam plerique homines potiora esse iudicant carnalia quam spiritalia, terrena quam cœlestia. *Et justitia longestetit*, quia procul eam a suis actionibus repulerunt. *Platea vero nomen accepit a latitudine*, quia πλατος, *platos*, Græce *latitudo* dicitur. Et quid per plateam nisi qui latam viam sæculi incedunt, designantur? *Corruit igitur in plateis veritas*, quia dilectores sæculi calcant veritatem, et attollunt falsitatem. *Et æquitas non potest hanc plateam ingredi*, quam occupavit iniquitas. *Et facta est veritas in oblivionem*, quia pene nemo est, qui veritatis memor sit, sed omnes invicem mentiuntur sibi, ita ut nemo sciat, cui credere possit. *Et qui recessit a malo, paravit prædæ*, quia jam nemo est, qui innocentes contra violentiam raptorum defendat, qui bona eorum ita diripiunt, ut nec monachis nec eremitis jam parcant. « Et vidit Dominus, et malum apparuit in oculis ejus, quia non est iudicium. » Dum nemo vult suas actiones dijudicare, sed voluntatem suam unusquisque sequitur.

Et vidit Deus, qui corda solus novit, quia non est vir in hoc populo carnalium; et aporiatu est, id est laboravit, sive damna pertulit, *quia non est, qui occurrat ei pro plebe ista deprecans. Et brachium suum salvavit sibi*, quia virtus sua, id est virtus Dei etiam sine intermissione salvavit sibi, quos voluit. *Et justitia ejus ipsa confirmavit eum contra ceteros, ut nulla pietate flecteretur ad*

parcendum, sed ultionem de eis justam sumeret. Sequitur :

VERS. 17. — « Indutus est justitia ut lorica, et galea salutis in capite ejus : indutus est vestimentis ultionis, et opertus est quasi pallio zeli. »

VERS. 18. — « Sicut ad vindictam quasi ad retributionem indignationis hostibus suis, et vicissitudinem inimicis suis. »

Si prædictus sermo fuit de Filio, ut diceretur, quia *brachium suum*, id est Filius *salvavit sibi*, quos voluit; consequenter nunc dicitur, quia ipse Filius ad iudicium veniens *indutus est justitia ut lorica*, ut suos expugnet adversarios, quia undique circumdatus et munitus apparet justitia, cum a nulla parte possit injustus ostendi, ut cujusquam querelis valeat in aliquo feriri. Pateret enim ictibus querelarum eorum, qui pereunt, si ipse in aliqua parte videretur injustus, et peccatores ob injustitiam feriret. Sed undique justus apparet, cum ait : « Quid est, quod debui ultra facere vineæ meæ, et non feci ei? (Supra v, 4.) » *Justitia ergo indutus est*, quia omne quod debuit, fecit. Et hac justitia indutus est *ut lorica*, quia ita eum defendit propria justitia, ut pugnatorem lorica. Nam idcirco tunc nullus eum potest lædere, quia nullus eum valet in aliquo injustum demonstrare. *Et galea salutis in capite ejus*, quia desuper a Deo protegitur. *Indutus est vestimentis ultionis, et opertus quasi pallio zeli*, quia in tali habitu demonstratur forinsecus, ut cunctis ostendat se habere zelum indignationis, et ultionem venisse sumere de hostibus suis, et malorum vicem reddere inimicis suis. Sequitur :

« Insulis vicem reddet. »

VERS. 19. — « Et timebunt, qui ab occidente, nomen Domini; et qui ab oriente, gloriam ejus, cum venerit quasi fluvius violentus, quem Spiritus Domini cogit. »

VERS. 20. — « Et venerit Sion Redemptor, et eis, qui redeunt ab iniquitate in Jacob dicit Dominus. »

Non solum populo Judæorum et cæteris, qui prope sunt, sed et *insulis* gentium, qui procul sunt, reddet ipse vicem justæ retributionis. « Et timebunt hi, qui ab occidente sunt, nomen Domini, et qui ab ortu solis gloriam ejus, » quia « sicut fulgur exiit ab oriente et paret usque in occidentem; ita erit adventus Filii hominis (Matth. xxiv, 27). » Veniet enim Dominus *quasi fluvius violentus, quem Spiritus Domini cogit*. Quia sicut rapidus torrens trahit, quidquid apprehendit; ita vis animadversionis illius omnes simul reprobos raptim in gehennam devolvit. Et idem *veniet Sion*, id est Ecclesiæ Redemptor, et eis qui redeunt ab iniquitate in Jacob, id est qui pœnitentiam agunt in populo Dei. Sequitur :

VERS. 21. — « Hoc est fœdus meum cum eis, dicit Dominus. »

Hoc est fœdus meum cum eis, qui ab iniquitate redeunt, ut non pereant cum reprobis, sed veniat

eis sicut et justis Redemptor in die judicii. Ad Sion A vero, id est ad Ecclesiam subditur :

« Spiritus meus qui est in te, et verba mea, quæ posui in ore tuo, non recedent de ore tuo, et de ore seminis tui (191), dicit Dominus amodo et usque in sempiternum. »

Sanctus enim *Spiritus*, qui in Ecclesia justorum est, *nunquam recedet* ab eis. Sic quippe Salvator promisit discipulis : « Ego, inquit, rogabo Patrem, et alium Paracletum dabit vobis, ut maneat vobiscum in æternum (*Joan. xiv, 16*). » Sed et verba veritatis quæ Dominus posuit in ore ejus, non recedent de ore ejus, et de ore seminis illius, id est eorum, quos in Christo Jesu per Evangelium genuerat, quia prædicatio Ecclesiæ non deficiet usque in finem sæculi. *Amodo*, id est ex quo Spiritus est datus, et verba Dei posita sunt in ore Ecclesiæ, non deficient ea usque in sempiternum.

Vel ad Isaiam dicitur : « Spiritus meus, qui est in te, et verba mea, quæ posui in ore tuo, non deficient de ore tuo, » nec de ore filiorum ac nepotum tuorum, ut omnis per seriem generatio demonstretur, quod scilicet gratia prophetarum in apostolos veniat, et in cæteros, qui de Israel crediderint. Quod autem infert : *Amodo et usque in sempiternum*, juxta illud est : « Cælum et terra transibunt, verba autem mea non præteribunt (*Matth. xxiv, 35*). » Sequitur :

CAPUT LX.

VERS. 1. — « Surge, illuminare (192), quia venit lumen tuum, et gloria Domini super te orta est. »

Surge, inquit, tu Sion, id est Ecclesia, quia « hora est jam nos de somno surgere (*Rom. xiii, 11*). » Et *illuminare*, quoniam tenebræ transierunt, et verum lumen jam lucet. *Illuminare ergo, quia venit lumen* Dominus Jesus, qui ait : « Ego lux in mundum veni, ut omnis qui credit in me, in tenebris non maneat (*Joan. xii, 46*). » Et *gloria Domini super te orta est*; quia « Verbum caro factum est, et habitavit in nobis, et vidimus gloriam ejus, gloriam quasi Unigeniti a Patre (*Joan. i, 14*). » Sequitur :

VERS. 2. — « Quia ecce tenebræ operient terram, et caligo populos. »

In die judicii *tenebræ operient terram*, id est terrenos homines, et *caligo populos* reproborum, quia veniet dies Domini, quia prope est dies nubis et turbinis. « Super te autem orietur Dominus, » id est in splendore suo apparebit Dominus, sicut per Malachiam promisit. « Orietur, inquit, timentibus nomen meum sol justitiæ (*Malach. iv, 2*). » Et *gloria ejus in te videbitur*, « Cum venerit » juxta Apostolum, « glorificari in sanctis suis, et admirabilis fieri in omnibus, qui crediderunt (*II Thess. i, 10*). » Sed in principio, quid faciendum esset, subjungitur :

(191) Vulg., de ore tuo et de ore seminis.

VERS. 3. — « Et ambulant gentes in lumine tuo, et reges in splendore ortus tui. »

Gentes ambulant per viam rectitudinis et in lumine Evangelii, quo tu illuminaris. Et in splendore ortus tui ambulant reges, id est apostoli, qui fulgorem miraculorum Salvatoris a principio viderunt, et exordium nascentis Ecclesiæ. *Reges* enim sunt apostoli, qui rectores populorum sunt constituti. Sequitur :

VERS. 4. — « Leva in circuitu oculos tuos et vide : omnes isti congregati sunt, venerunt tibi. »

Circumfer, inquit, *oculos tuos* in universas orbis partes, quia *omnes isti*, qui sunt in circuitu tuo, congregati sunt in ovile fidelium, et *venerunt tibi* in auxilium. Vel in die Pentecostes dici potuit primitivæ Ecclesiæ, quia isti, qui de universo orbe ad diem festum congregati sunt (*Act. ii, 5*), *venerunt tibi*, quia sermonem apostolorum suscipiunt. Sequitur :

« Filii tui de longe venient, et filia tuæ de latere surgent. » *De longe*, id est de magnis iniquitatibus ut Jeremias admonet : « Qui fugistis gladium, venite, nolite stare, recordamini procul Deum, et Jerusalem ascendat super cor vestrum (*Jer. li, 50*). » Gladium enim fugere est imminentem sententiam futuri judicii pœnitendo præcavere. Sed quisquis hunc gladium fugit, non debet stare, sed ad Christum merito bonæ actionis festinanter propinquare.

« Et filia tuæ de latere surgent. »

De latere Redemptoris in cruce pro nobis vulnerato, quia infirmi plus de humanitate ac passione ejus profectum capiunt, quam de divinitate cæterisque mysteriis. Unde talibus ait Apostolus : « Nihil me judicavi scire inter vos nisi Christum Jesum, et hunc crucifixum (*I Cor. ii, 2*). » Vel *de latere*, id est de proximo, de minoribus peccatis surgent filia tuæ.

Et notandum quod *filii*, id est robusti dicuntur, qui *de longe veniunt*, et *filia*, id est imbecilles animæ, quæ *de latere surgunt*. Quia juxta sententiam Evangelicam ille debitor plus feneratorum « diligit, cui plus ab eo donatur : cui autem minus dimittitur, minus diligit (*Luc. vii, 47*). » Aut *de longe*, id est de remotis terris filii venturi dicuntur, et *de latere*, id est de proximis regionibus surrecturæ filia.

VERS. 5. — « Tunc videbis et afflues, et mirabitur, et dilatabitur cor tuum, quando conversa fuerit ad te multitudo maris, fortitudo Gentium venerit tibi. »

Quando conversa fuerit ad te multitudo maris v. sæculi. *Fortitudo gentium venerit tibi*, ut omne quod in sæculo vel orbe terrarum est, tuum sit. *Tunc videbis*, quod earum conversione tibi promiseram ; et *afflues* spiritualibus deliciis in modum fluminis inundantis : et *mirabitur cor tuum* super tanta rerum commutatione : et *dilatabitur*, cum videris eos ad morem veritatis conversos. Sequitur :

VERS. 6. — « Inundatio camelorum operiet te, dromedarii Madian, et Epha. »

(192) Alias, illuminare Jerusalem, etc.

Quid per camelos nisi tortuosæ gentilium mentes A signantur? *Dromedarii* quoque cameli sunt veloces. Est enim genus camelorum minoris quidem naturæ, sed velocioris, unde et nomen accepit. *Δρόμος* *Dromus* enim Græce *cursum* et *velocitas* appellatur. Centum enim milliaria et amplius ferunt in uno die pergere. Madian vero dicitur *iniquitas*. Et quid per *dromedarios* *Madian* nisi gentiles tortuosi figurantur veloces in cursu perversæ actionis? *Epha* quoque *di solutus* interpretatur. Et quis dissolutus erat nisi gentilis populus, qui nulla lege vinciebatur, sed male sibi dimissus erat? *Dromedarii* igitur *Epha* gentiles dicuntur, qui in illo populo noxia libertate dissoluti discurrebant vagi ad omnia mala, quæ volebant. *Inundatio* itaque *camelorum operuit* Ecclesiam atque *dromedarii Madian et Epha*, quia jam in hac plebe B fidelium non nisi conversa gentilitas cernitur. Tanta est enim multitudo gentium, qui crediderunt ad comparationem illorum, qui de circumcisione venerunt. De quibus adhuc subditur :

« Omnes de Saba venient aurum et thus deferentes, et laudem Domino annuntiantes. »

Saba captivitas vel *recte* dicitur. Per *Saba* Gentilitas vel infidelitas designatur, ubi genus humanum in retiaculo antiqui hostis captivum tenebatur. *Omnes ergo de Saba venerunt*, quia omnes gentes a Christo conversæ sunt. *Aurum* vero ad regis tributum pertinet, *thus* autem Dei sacrificium. *Aurum ergo et thus* gentiles ad Christum deferunt, cum in eo regiam Dignitatem et divinam majestatem fatentur. *Auro* tamen religionis fulgor, et innocentiae claritas exprimi potest, quam in nigredinem culpæ conversam Jeremias doluit, cum diceret : « Quomodo obscuratum est aurum (Thes. iv, 1). » *Thure* autem, quod Deo incenditur, virtus orationis designatur, Psalmista dicens : « Dirigatur oratio mea sicut incensum in conspectu tuo, Domine (Psal. cxi, 2). » *Aurum ergo* gentiles deferunt, quando pretiosam vitam ducentes ad Christum properant, ut cum in regno suo videre valent. *Thus* etiam deferunt, cum cogitationes carnis per sancta orationum studia in ara cordis incendunt, suave aliquid Deo per cæleste desiderium redoleant. Sed et laude Deum annuntiant, quia gloriam ejus cum cæteris prædicant. Sequitur :

VERS. 7. — « Omne pecus Cedar congregabitur tibi, arietes Nabaioth ministrabunt tibi, offerentur super placabili altari meo, et domum majestatis meæ glorificabo. »

Cedar quidem *tenebræ*, *Nabaioth* vero dicitur *propheta*. Et quid per *pecus tenebrarum* nisi gentiles figurantur, qui in tenebris ignorantiae suæ nati similes erant brutis animalibus, dum ad cognoscendum Deum ratione non uterentur? Quid vero per *arietes prophetae* nisi Hebræi designantur, qui, dum velut animalia munda et domestica familiares essent Deo, Christum esse venturum per prophetiam præscierunt? Congregatur ergo Ecclesiae *omne pecus Cedar*,

cum universa gentilitas ad fidem adducitur; et apostoli ministrant ei *arietes Nabaioth*, dum Judæos ad eam convertunt. Et hæc pecora Cedar vel arietes *Nabaioth offeruntur* Deo gratum servitium, id est sacrificium in altari fidei. Nam placabile altare Dei fides est Jesu Christi quam juxta Apostolum « proposuit Deus propitiationem per fidem in sanguine ipsius (Rom. iii, 25). » In hoc altari offertur Deo omnis populus electorum, dum « exhibent corpora sua hostiam viventem, sanctam, Deo placabilem (Rom. xii, 1) » Dumque mundus omnis a Christo convertitur, glorificat ipse *domum majestatis suæ*, id est Ecclesiam suam. Christus enim « tanquam filius est in domo sua, quæ domus sumus nos (Hebr. iii, 3). »

Possumus autem *arietes Nabaioth*, id est prophetiæ specialiter apostolos intelligere, de quibus olim Propheta dixerat : « Afferte Domino filios arietum (Psal. xxviii, 1). » Et : « Holocausta medullata offeram tibi cum incenso arietum (Psal. lxxv, 15). » Qui ministrant Ecclesiae juxta sermonem Domini dicitis : « Qui major est vestrum, erit minister vester (Matth. xxiii, 11). » De quibus admirando subjungitur :

VERS. 8. — « Qui sunt isti, qui ut nubes volant et quasi columbæ ad fenestras suas? »

Recte prædicatores Novi Testamenti nubibus assimilantur, quia verbis pluunt, miraculis coruscant. Qui *volare ut nubes* dicti sunt, quia in terra viventes extra terram sunt omne quod egerunt. Unde per quamdam nubem dicitur : « In carne ambulantes non secundum carnem militamus (II Cor. x, 3). » Priores etenim patres conjugii utebantur, filios procreabant, substantias possidebant, curæ rei familiaris intendebant. Istos vero videns propheta terrena despiciere, mente cælestibus proponere, verbis pluuere, miraculis coruscare, quos a terrenis contagiis et sancta cogitatio, et sublimis vita suspenderat, hos profecto volantes pariter et *nubes* appellat. *Fenestras* autem nostras sunt oculi, quia per ipsos anima respicit, quod exterius concupiscit. *Columba* est simplex animal, atque a malitia fellis alienum. *Quasi columbæ ergo ad fenestras suas* sunt, qui nihil in hoc mundo concupiscunt, qui omnia simpliciter aspiciunt, et in his quæ vident, rapacitatis studio non trahuntur. At contra nilvius et non columba ad fenestras suas est, qui ad ea quæ oculis considerat, rapacitatis desiderio anhelat. Quia vero per istos mundus universus Deum erat cogniturus apte mox subdit :

VERS. 9. — « Me etenim insulæ expectant, et naves maris in principio, ut adducam filios tuos de longe, argentum et aurum eorum cum eis nomini Domini Dei tui et sancto Israel, qui (193) glorificavit te. »

Mare namque turbida ac tumentia sæculi hujus volumina designat, in quibus prævi quilibet injuste delectati quasi profundis dediti pisces ruente ad su-

perna gaudia non intendunt. *Insulæ* autem diversæ gentes et provinciæ possunt accipi. *Naves maris* Ecclesiæ sunt, quæ per fluctus hujus sæculi ad portum salutis et stabilitatis, id est ad terram viventium tendunt. *Insulæ* ergo et *naves maris* expectabant Dominum in principio, quia ut regiones et Ecclesiæ, quæ sunt in hoc mundo, fidem ejus susciperent, prius oportebat, ut ipse ad eas per prædicatores suos accederet. Venit igitur ad eas prior ut filios matris Ecclesiæ de longe, id est de Gentilitate, atque argentum et aurum, id est eloquentiam et sapientiam eorum naturalem, cum eis nomini Domini adduceret, ut Deo serviret facundia, et sensus eorum adjunctis supernæ aspirationis charismatibus. De quibus subditur :

VERS. 10. — « Et ædificabunt filii peregrinorum muros tuos, et reges eorum ministrabunt tibi. »

Filii namque peregrinorum filii sunt infidelium ad fidem conversi. Qui ædificant muros Ecclesiæ, quia munimenta defensionum ejus et disciplinarum atque virtutum extruunt verbo et opere. Et reges eorum ministrant ei, quia vix sub universo cælo rex quisquam inveniri potest, qui non gaudeat Ecclesiæ servire. Sequitur :

« In indignatione mea percussi te, et in reconciliatione mea misertus sum tui. »

Percussi tempore tribulationis, et post misertus gratiam tibi dedi. Vel afflictam olim, et captivitati traditam in populo Judæorum in vocatione gentium reconciliavi te mihi. Sequitur :

VERS. 11. — « Et aperientur portæ tuæ jugiter : die ac nocte non claudentur, ut afferatur ad te fortitudo gentium, et reges earum adducantur. »

Portæ Ecclesiæ die ac nocte manent apertæ, quia semper eos, qui ad fidem intrare voluerunt, parata est Ecclesia recipere. Non enim clauduntur portæ ejus vel in die, id est in prosperitate, vel in nocte, id est in adversitate, sed sine intermissione patent omnibus, qui ad se confugerint. Et reges quoque earum simul adducantur ad Christum, ut adorent eum omnes reges, omnes gentes serviant ei, et afferatur ad eam fortitudo gentium ad fidem confluentium. Sequitur :

VERS. 12. — « Gens enim et regnum, quod non servierit tibi, peribit, et gentes solitudine vastabuntur. »

Quæcumque gens vel regnum non vult servire Ecclesiæ, ut præceptis ejus obediat, siue dubio in æternum peribit. Sed et in præsentem multos infidelitas et inobedientia perire de terra facit. Et gentes, quæ in incredulitate perseverant, devastantur, ut in solitudinem redigantur. Sequitur :

VERS. 13. — « Gloria Libani ad te veniet, abies et buxus, et pinus simul ad ornandum locum sanctificationis meæ, et locum pedum meorum glorificabo. »

Libanus templum Judæorum nonnunquam in Scripturis exprimere solet. Unde Zacharias, cum ejusdem templi combustionem probaret, ait : « Ape-

ri, Libane, portas tuas, et comedat ignis cedros tuas (Zach. xi, 1). » Valde enim inclutus et pulcher præ cæteris montibus est Libanus apte figurans illud quondam præ omnibus nobilibus templum. Sed jam diu est, ex quo templum illud est incensum, et gloria ejus ad Ecclesiam transiit. Abies vero, quia valde in altum crescit, sanctos designat, qui Paulum imitantes mente excedunt Deo. Buxus, quæ in altum non prolicat, sed in omni tempore viriditatem retinet, humiles exprimit, quorum viriditas nunquam marcescit, dum bonitas ipsorum nunquam deficit. Pinus resina exuberat, et omni tempore fructum habet, semperque viridis cernitur, electos significans spiritali gratia refuldantes, et immarcescibilem justitiæ vigorem habentes, ac semper boni operis fructus in se ipsis monstrantes. Has igitur pretiosas arbores polletetur Dominus ad ornandum locum sanctificationis suæ, qui est Ecclesia. Nam extra Catholicam Ecclesiam non est locus divinæ sanctificationis. Sed et pedum ejus locus est eadem Ecclesia, in qua ipse stare et ambulare spiritaliter consuevit. De hoc autem sanctificationis et pedum loco alias dictum est : « Introibimus in tabernaculum ejus (Psal. cxxxi, 7). » Et : « Deus tetit in synagoga deorum (Psal. lxxxii, 1). » Et : « Qui ambulat in medio septem candelarum aureorum (Apoc. ii, 2). » Hunc ergo locum promittit ornandum et glorificandum, sicut jam factum cernimus. Sequitur :

VERS. 14. — « Et venient ad te curvi filii eorum, qui humiliaverunt te, et ado abunt vestigia pedum tuorum omnes, qui detrahebant tibi. »

Curri, id est humiliati venerunt penitentes ad Ecclesiam, filii persecutorum, qui affligentes humiliaverunt eam, et omnes qui tempore persecutionis detrahebant ei, ubi pax data est, corruerunt ad pedes ejus veniam postulantes. Sequitur :

« Et vocabunt te civitatem Domini Sion sancti Israel. »

VERS. 15. — « Pro eo quod fuisti derelicta, et odio habita, et non erat, qui per te transiret. »

Civitatem summi regis Sion, id est sanctam urbem Dei Israel vocaverunt eam, qui prius reliquerant eam, et a consortio suo separaverant habentes eam odio. Nec transibat quisquam eorum per eam, quia nemo ad illam dignabatur aspicere, super mores ejus incedere. Longe enim ab Ecclesia erat transitus actionis eorum. Sequitur :

« Ponam te in superbiam sæculorum, gaudium in generationem et generationem. »

Superbia non tumorem elationis, sed libertatem ereptionis hoc loco significat. Nam et per Sapienciam dicitur de hujusmodi superbia : « Mecum sunt divitiæ et gloria, opes superbiæ et justitia (Prov. viii, 18). » Ait ergo : Ponam te in superbiam sæculorum, id est in auctoritatem erectionis, quæ in omnia sæcula permaneat ; et ponam te gaudium in generationem hujus sæculi, et generationem futuri. Sequitur :

VERS. 16. — « Et suges lac gentium, et mamilla A regum lactaberis; et scies quia ego Dominus salvans te, et Redemptor tuus fortis Jacob. »

Lac gentium suges, quando et ab ore gentilium ad fidem conversorum accivies verbum sacræ admonitionis. *Et mamilla regum lactaberis*, quia et a regibus dulce verbi poculum hauries, quo proficias, et nutriaris. Solent enim et pii reges populo Dei verba sacræ admonitionis edere. Cumque fides in tantum proliciet, ut a gentibus et regibus lac divinæ prædicationis sumas, tunc profecto scies, quia ego sum Dominus salvans te, et Redemptor tuus fortis Jacob, qui te redemit a cunctis tribulationibus, et reges, qui te persequebantur, feci nutritores tuos. Fortasse quis reges istos intelliget apostolos et prædicatores. Sed mihi major in hoc loco videtur promissio, si de regibus terrarum hæc acceperimus, præsertim cum sermo nunc sit de eo tempore, quo persecutiones quieverunt, et pax undique data est Ecclesiæ. Sequitur :

VERS. 17. — « Pro ære afferam aurum, et pro ferro afferam argentum, et pro lignis æs, et pro lapidibus ferrum. »

Cum dicitur : *Pro ære aurum et pro ferro afferam argentum*, æs et ferrum reprobatur. Rursumque cum additur : *Pro lignis afferam æs, et pro lapidibus ferrum*, æs et ferrum, quod reprobatur, aliter promittitur, quia quod reprobatur vel aufertur ad veterem vitam pertinet; et quod remittitur, ad novam. Per æs, quod valde sonorum est, prædicatorum sermo figuratur, qui dilectione caret. Unde dicit Apostolus : « Si linguis hominum loquar et angelorum (I Cor., 13, 1), » etc. Et quia charitas, quæ cunctis virtutibus pretiosior est, per aurum designatur, auri nomine pretiosa sanctorum conversatio, in quibus charitas fulget, exprimitur. De talibus Jeremias : « Filii Sion inelyti amicti auro primo (Thren. iv, 2). » *Pro ære Dominus aurum* affert, cum pro his, qui sine charitate prædicabant, charitate ornatos dat Ecclesiæ doctores.

Quid vero per ferrum nisi hi qui semper ferro utuntur, ut cæteros feriant, exprimuntur? Et qui per argentum nisi illi, qui candore cœlestis eloquentiæ nitent? Nam Salomon ait : « Argentum electum labia justii (Prov. x, 20). » *Pro ferro* igitur Dominus argentum affert, cum pro iis, qui ferro et armis utebantur, eos Ecclesiæ largitur, qui sacris eloquiis apud proximos luceant. *Ligna* vento facile concutiuntur, et plerumque subvertuntur. Per hæc carnales et imbecilles designantur, qui cito moventur adversitatibus, et franguntur. Per æs, quod diutius illæsum a rubigine perdurat, fortissimam longanimitatem patientium demonstrat. *Pro lignis* ergo promittitur æs, id est pro infirmis et impatientibus fortes et longanimes. Quid vero lapides nisi duritiam et insensibilitatem cordis eorum exprimunt, qui in iniquitate duruerunt? Et ferrum fortes viri sunt, qui acutissimis linguarum gladiis peccantium corda transiunt. Unde Job dicit : « Ferrum de terra tolli-

tur, et lapis calore solutus in æs vertitur (Job xxviii, 2). » *Ferrum de terra tollitur*, cum fortis propugnator Ecclesiæ a terrena, quam prius tenuit, actione separatur : *Et lapis calore solutus in æs vertitur*, quando durum cor et frigidum igne divini amoris liquatur, et ad veram fortitudinem commutatur, ut peccator, qui prius insensibilis exstiterat, postmodum per auctoritatem fortis, et per prædicationem sonorus fiat. *Pro lapidibus* itaque Dominus ferrum affert, cum pro his qui in malitia duri sunt ac frigidi, fortes et acutos dat Ecclesiæ prædicatores. Sequitur :

« Et ponam visitationem tuam pacem, et præpositos tuos justitiam. »

Antea per flagella correptionis Dominus visitaverat Ecclesiam, sicut scriptum est : « Visitabo in virga iniquitates eorum, et in verberibus peccata eorum (Psal. lxxxiii, 33). Sed nunc per pacem se pollicetur eam visitare, ut perseverantem pacem ei tribuat, et ad amorem suum per beneficia tranquillitatis vehementius eam accendat. Sed quia tempore pacis « omnes, qui pie volunt vivere in Christo, persecutionem patiuntur (II Tim. iii, 12), » in novissimo die magis ponet Dominus visitationem Ecclesiæ suæ pacem, quando ipsa per adventum et visitationem ejus pacem sempiternam percipiet. *Præpositos* Ecclesiæ futuros promittit adeo justos, ut sit ipsa justitia, sicut cernimus, quia ferrum in igne sit ignis, quando vehementer inflammatur. Sed tunc verius erunt justitia præpositi ejus, quando ipsum justitiæ fontem cernentes fient ei similes, quia jam nullas in se reliquias iniquitatis vel minimas habebunt. Unde et subditur :

VERS. 18. — « Non audietur ultra iniquitas in terra tua, vastitas et contritio in terminis tuis. »

In illa enim terra viventium, ubi tunc habitabit Ecclesia, nunquam audietur iniquitas, quia nullus jam e filiis ejus peccabit. Nec audietur vastitas et contritio in terminis ejus, quia incursus hostium nullus aderit, qui felicem illam regionem ab ulla parte vastet et conterat. Sequitur :

« Et occupabit salus muros tuos, et portas tuas laudatio. » *Muri* Ecclesiæ, qui nunc frequenter ab hostibus pulsantur, munimenta sunt virtutum. *Et portæ* ejus, in quibus nunc sæpe planctus auditur, sancti prædicatores sunt, qui in illam eos, qui ad fidem veniunt, introducunt, et eos lugent, qui per-eunt. Sed tunc muros ejus salus occupabit, et portæ laudatio, cum jam nullus impugnatur erit, nullusque de numero justorum perire poterit, sed de sua salute gratias et laudes Conditori sine fine cantabit. Sequitur.

VERS. 19. — « Non erit tibi sol amplius ad lucendum per diem, nec splendor lunæ illuminabit te, sed erit tibi Dominus in lucem sempiternam, et Deus tuus in gloriam tuam. »

VERS. 20. — « Non occidet ultra sol tuus, et luna tua non minuetur, quia Dominus erit in lucem sempiternam, et complebuntur dies luctus tui. »

Sol et luna non illuminabunt amplius Ecclesiam, sed splendor vultus Creatoris, qui tunc, sicuti est, videbitur. « Civitas enim illa non eget sole neque luna, ut luceant in ea. Nam claritas Dei illuminabit eam, et lucerna ejus est agnus (*Apoc. xxi, 23*). » Cui civitati *Deus erit gloria*, quia « cum apparuerit similes ei erimus, quoniam videbimus eum, sicuti est (*I Joan. iii, 2*). » Nam quicumque gloriam ejus viderint, similitudinem gloriæ ejus accipient. Hinc Paulus ait: « Nos omnes revelata facie gloriam Domini speculantes in eandem gloriam transformamur (*II Cor. iii, 18*). » Dictum etiam ad nos est, quia nec sol nec luna deinceps occasum petent, sed in locis, quibus creati sunt, sine fine manebunt, ne si ad occasum venerint, aliquid fortasse claritatis his, qui apud inferos damnati fuerunt, præbeant. Cum enim nox ultra non sit futura, sed perpetua dies; constat quia *sol ultra non occidet, nec luna minuetur* quoniam tunc « erit lux lunæ sicut lux solis et lux solis septemplex sicut lux septem dierum (*Supra. xxx, 26*). » Sed Ecclesiæ idcirco dicitur, quia *Sol ejus ultra non occidet, et luna ejus non minuetur*, quoniam ipsa jam sub sole non erit, nec lumine solis egebit, sed *Deus erit ei in lucem sempiternam*, ut splendore Creatoris in æternum perfruatur, et lumini creato non subjiciatur. Et cum ad hanc felicitatem pervenerit, *complebuntur*, id est finientibus *dies luctus* ejus, quia juxta Joannem « Neque luctus neque clamor, neque dolor erit ultra (*Apoc. xxi, 4*). » Sequitur:

VERS. 21. — « Populus autem tuus omnes justi in perpetuum hæreditabunt terram, germen plantationis meæ, opus manus meæ ad glorificandum. »

Populus Ecclesiæ erunt justii, et omnes qui in illo populo fuerint, justii erunt omnesque *terram perpetuæ stabilitatis et quietis in perpetuum hæreditabunt*. Hos enim *germinavit in Ecclesia plantatio cælestis dexteræ*. Quo contra de Pharisæis dictum est: « Omnis plantatio, quam non plantavit Pater meus cælestis, eradicabitur (*Matth. xv, 13*). » Hæc igitur plantatio justorum, quam Pater plantavit, nullatenus de terra viventium eradicari poterit, sed perpetualiter eam possidebit. Qui et *opus manus ejus sunt*, quia « ipse fecit nos, et non ipsi nos (*Psal. ix, 3*). » « Ipsius enim sumus factura creati in Christo Jesu in operibus bonis (*Ephes. ii, 10*). » Et hoc opus factum est *ad glorificandum*, quia ipse vasa misericordiæ præparavit ad gloriam. Vel ad se ipsum glorificandum fecit ipse hoc opus, id est justos. Sequitur:

VERS. 22. — « Minimus erit in mille, et parvulus in gentem fortissimam. »

Minimus justorum erit in mille, quia unusquisque juxta modum suum consummatam perfectionem, id est perfectum numerum spiritualium virorum habebit. In millenario enim numero consummatio est. *Et varvulus in gentem fortissimam*, quia gentem vir-

tutum proferet prævalentem genti vitiorum. Vel tunc qui in modico fidelis exstitit, super multa constituetur.

« Ego Dominus in tempore ejus subito faciam istud. »

Omne quod nunc promissi, *subito faciam absque difficultate*, cum venerit tempus, quo fieri debet. Nam quidquid degentium vocatione pollicitus est et temporali Ecclesiæ glorificatione, velociter implevit, ubi tempus advenit. Unde non est dubium, quin et ea, quæ de futura sanctorum beatitudine subjunxit, fideliter adimpleat, mox ut tempus adfuerit, quo se facturum ea promisit. Sequitur.

CAPUT LXI

VERS. 1. — « Spiritus Domini super me, eo quod unxerit Dominus me, ad annuntiandum mansuetis misit me, ut mederer contritis corde, et prædicarem captivis indulgentiam, et clausis apertionem. »

VERS. 2. — « Ut prædicarem annum placabilem Domino, et diem ultionis Deo nostro ut consolarem omnes lugentes. »

VERS. 3. — « Et ponerem fortitudinem (195*) lugentibus Sion, et darem eis coronam pro cinere, oleum gaudii pro luctu, pallium laudis pro spiritu mœroris. »

Trina tentatione diaboli superata, sicut refert Lucas: « Egressus est Jesus in virtute Spiritus in Galilæam, et fama exiit per universam regionem de illo, et ipse docebat in synagogis eorum, et magnificabatur ab omnibus. Et venit Nazareth, ubi erat nutritus, et intravit secundum consuetudinem suam die Sabbati in Synagogam, et surrexit legere, et traditus est illi liber Isaïæ prophetæ. Et ut revolvit librum, invenit locum ubi scriptum erat: Spiritus Domini super me, propter quod unxit me, etc. Et cum plicuisset librum, reddidit ministro, et sedit, et omnium in Synagoga oculi erant intendentes in eum. Cœpit autem dicere ad illos: Quia hodie impleta est Scriptura hæc in auribus vestris. Et omnes testimonium illi dabant, et mirabantur in verbis gratiæ, quæ procedebant de ore ipsius (*Luc. iv, 4*). »

Patet ergo, qui est qui loquitur: *Spiritus Domini super me*. Ille nimirum, qui *egressus est in virtute Spiritus in Galilæam*. Nam et superius in Evangelio legitur: Quia « descendit spiritus corporali specie sicut columba in ipsum (*Luc. iii, 22*). » Quo scilicet Spiritu ipse est *unctus*, quia juxta Joannem *unxit eum Deus Spiritu suo* (*Luc. iv, 18*). » Quem « evangelizare pauperibus misit, vel annuntiare mansuetis (*ibid.*) » et humilibus: quoniam « ipse venit in Galilæam prædicans evangelium regni Dei et dicens: Quoniam impletum est tempus, et appropinquavit regnum Dei. Pœnitentini et credite Evangelio (*Marc. i, 14*). » Medetur enim contractis et *contritis corde*, dum desperatis spem tribuit, et pœnitentibus regna promittit, ut ad regnum Dei veniant. Contractos di-

(195*) Nostra editio: ut ponerem lugentibus Sion, et darem, etc.

mittit in remissionem dum afflictis peccata relaxat; A et qui *captivus* a diabolo tenebatur, et a paradiso exulabat remissionem ei captivitatis suæ prædicat, cum pœnitentiam ei agere præcipit, ut ad regnum Dei, quod appropinquavit, redeat. Cæcis visum annuntiat, cum eos, qui lumen cordis non habebant, luce suæ prædicationis illuminat. Vel *clausis* carcere cordis prædicat *apertionem*, quando præcipit illis peccatorum confessionem.

Annus Domini acceptus et *placabilis* est hoc tempus reconciliationis et gratiæ, in quo Deus omnes, qui ad pœnitentiam convertuntur, placatus recipit. Nemo igitur hunc *placabilem annum* transire sibi vacuum sinat, quia post veniet dies retributionis, et ultionis iniquitatum, quo retribuetur unicuique secundum opus ejus. Post vero per annum intelligit B multitudo redemptorum: quia si, ut ex dierum multitudine annus dicitur, ita ex collectione bonorum omnium illa electorum innumerabilis universitas impletur. Hunc igitur annum perfectæ multitudinis Salvator annuntians ait: « Ut prædicarem annum placabilem Domini. » Annus enim placationis Domini prædicatur, cum plebs fidei ium veritatis lumine illustranda denuntiatur.

Omnes quoque *lugentes consolari* missus est Dominus, quia lacrymas humilium promissione futuri gaudii benigne relevare dignatus est, dicens: « Beati qui lugent, quoniam ipsi consolabuntur (Matth. v, 5). — Ipsi enim sunt *lugentes Sion*, id est populum Dei, quia populum Dei a paradiso expulsum, et in captivitate præsentis exsilii miserabiliter a diabolo C possessum desebant. Quibus *fortitudinem* Dominus *posuit*, ut diabolum potenter vincerent, et populum Dei liberarent, dicens: « Ecce dedi vobis potestatem calcandi super serpentes et scorpiones, et super omnem virtutem inimici (Luc. x, 19). »

« Et dedit eis coronam pro cinere. » Quia pro eo quod humiliati et mœrentes planxerant Sion, lætificavit eos de ejus ereptione. Solent enim cinere plangentes aspergi et gaudentes coronis ornari. Multitudo discipulorum vocatur gaudium et corona magistri, sicut ait Paulus his, quos Christo acquisiverat: « Gaudium meum et corona mea sic stete in Domino charissimi (Philip. iv, 1). » Coronam ergo *dedit eis pro cinere*, quia gaudere feci eos de salute conversorum, qui prius lugebant de perditione peccantium. Et *pro luctu dedit eis oleum gaudii*, id est gratiam Spiritus sancti, qui mentes, quas replet, ungit et lætificat. Sed et *pallium laudis*, id est hilaritatem mentis dedit illis *pro Spiritu mœroris*. Pallium enim laudis habitus est cordis laudes Deo gratulanter solventis. Sequitur:

« Et vocabuntur in ea fortes justitiæ, plantatio Domini ad glorificandum. » In ea, id est in Sion, *vocabuntur* non illi qui peccato fortes sunt, sed qui fortes sunt ut operentur justitiam. Ili sunt *plantatio Domini*, id est a Domino in charitate radicati et fundati. Et hæc plantatio facta est *ad glorificandum*. Sequitur:

VERS. 4. — « Et ædificabuntur deserta a sæculo, et ruinas antiquas erigent, et instaurabunt civitates desertas et dissipatas in generatione et generationem. »

Viri fortes justitiæ in Sion ædificabunt *deserta*, id est ponent in edificio Ecclesiæ gentes, quas Deus deseruerat ab initio, et *ruinas antiquas erigent*, id est quod antiquitus per Adam cecidit, nunc per Christum resuscitabunt. Et *civitates*, quæ in antiqua et nova generatione, id est ante adventum Salvatoris desertæ erant a Domino, et dissipatæ in pravis actionibus, nunc *instaurabunt* in melius, quæ in principio fuerant, ut Creatorem suum recognoscant, et compositis moribus ei fideliter serviant et inhabitentur ab eo. Has enim *civitates* possumus figuratim accipere vel gentium collectiones vel humanas mentes. Dominus vero conversa locutione ad prædictos fortes justitiæ, id est ad sanctos prædicatores ex circumcissione venientes subjungit:

VERS. 5. — « Et stabunt alieni, et pascent pecora vestra, et filii peregrinorum agricolæ et vinatores vestri erunt. »

VERS. 7. — « Vos autem sacerdotes Domini vocabimini: Ministri Dei nostri dicetur vobis: fortitudinem gentium comedetis, et in gloria earum superlietis. »

Alieni quippe et a Deo prius et a conversatione Israel erant gentiles. Qui postquam steterunt in fide, multi eorum prælati sunt Ecclesiis, et *pas-* C *runt pecora* istorum fortium justitiæ, id est populus, quos ad fidem apostoli converterant. *Filii quoque peregrinorum* illi fuerunt, qui carnaliter ab infidelibus parentibus geniti deseruerunt errores eorum venientes ad Christum. Qui facti sunt *agricolæ et vinatores*, quoniam agrum Dei, qui est populus fidelium, et vineam, quæ est homo, lignibus sanctæ pœnitentis excoluerunt. Apostoli vero *sacerdotes Domini*, id est sacra ei dantes cum magno honoris privilegio sunt vocati, et *ministri* ejus dicti, quia ipsi defertur auctoritas, ipsisque dantibus et ministrantibus quid quid habet, suscipit Ecclesia. Unde et illud est, quod dicunt: « Sic nos existimet homo, et ministros Christi, et dispensatores mysteriorum Dei (I Cor. iv, 1). »

D Qui et *fortitudinem gentium* comederunt, quia universam gentilitatem sibi incorporaverunt trajicientes in viscera Ecclesiæ. Specialiter tamen fortitudo *gentium* triumphus est martyrum. Et in gloria earum superbiunt, id est auctoritatem exultationis et fiducia sumpserunt, dicentes: « Quæ est spes nostra, aut gaudium aut corona gloriæ nisi vos ante Dominum? » (I Thess. ii, 19.) Deinde nisi fallor ad perfidos sacerdotes Judæorum, qui persecuti sunt apostolos, id est veros sacerdotes veteris sermo, cum subditur:

VERS. 7. — « Pro confusione vestra duplici et rubore laudabunt, partem eorum: propter hoc in terra sua duplicia possidebunt, lætitia sempiterna erit eis. »

VERS. 8. — « Quia ego Dominus diligens judicium et odio habens rapinam in holocausto. »

Cum enim justus Judæ apparuerit examinans cogitationes et opera singulorum, tunc principes sacerdotum, qui præcipiebant apostolis ne loquerentur in nomine Jesu, et Pharisei hypocritæ omnes simul reprobi *dupluciter confundentur*, et erubescunt, scilicet intus et foris, et in conspectu assistentium et in conscientiis suis. Et econtra *laudabunt omnes partem apostolorum atque fidelium*, ut ex confusione partis inimicæ major appareat gloria partis electæ.

Vel apostolis adhuc dicitur, quia pro eo, quod *duplicem habebatis confusionem* tam super populo Judæorum, qui a Deo recesserat, quam super nationibus, quæ idolis serviebant, videbitis [eos ad timorem Dei conversos laudare *partem suam*, id est Deum, quem soli elegerunt. Et sicut reprobi *dupluciter confundentur*, ita justii *in terra sua*, id est in regno celorum *duplicia possidebunt*, quia non solum animarum, sed et corporum beatitudine gaudebunt perpetua, et pro temporali tristitia erit eis *sempiterna lætitia*. *In terra sua duplicia possidebunt*, ut in ipsa quoque carne gaudeant, in qua pro Domino dolores et cruciatus pertulerunt. Nec mirum, si ista commutatio ab utraque parte fiat, ut reprobi, qui exsultant atque gloriantur, duplici tunc confusione teneantur, et electi, qui nunc tristes et abjecti sunt, duplicia bona possideant: *quia Dominus noster diligit judicium*, et quod justum est utrisque reddet. *Et rapinam detestatur in holocausto*, ut sacrificia Judæorum respuat, quæ illi ex rapinis et per fraudem acquisita afferebant, et omnes eleemosynas et oblationes, quæ fiunt ex raptis, reprobet, quoniam « qui offert sacrificium ex substantia pauperis quasi qui victimat filium in conspectu patris sui (*Eccli. xxxiv, 24*). »

De prædictis autem Novi Testamenti idoneis ministris subjunxit :

« Et dabo opus eorum in veritate, et fœdus perpetuum feriam eis. »

Dedit enim opus eorum in veritate, ut nequaquam, sicut in lege, fieret umbra veritatis, sed esset ipsa veritas. *Et fœdus* sive pactum *sempiternum* percussit eis, non quale pactum Moysi dederat, quod præterit, sed pactum Evangelii, de quo loquitur : « Cœlum et terra transibunt, verba autem mea non transibunt (*Matth. xxiv, 35*). » De quibus et subjicit :

VERS. 9. — « Et sciatur in gentibus semen eorum, et germen eorum in medio populorum. Omnes enim, qui viderint eos, cognoscent illos : quia isti sunt semen, cui benedixit Dominus. »

Hoc enim manifeste cernimus. Nam in omnibus populis et nationibus cognoscitur genus Christianorum, quod ab apostolis disseminatum est, et scitur quia benedictio Dei est super eos omnes. *Qui viderint eos, prima fronte cognoscent, quia semen sunt, cui benedixit Dominus*. Quis enim ex ordine vitæ, mansuetudine, continentia, hospitalitate, cæle-

risque virtutibus non intelligat populum Dei? Adhuc autem Salvator loquitur, dicens :

VERS. 10. — « Gaudens gaudebo in Domino, et exsultabit anima mea in Deo meo, quia induit me vestimento salutis, et indumento lætitiæ circumdedit me quasi sponsum decoratum corona, et quasi sponsam ornatam monilibus suis. »

Se gavisurum *in Domino* et beatam animam suam *in Deo* exsultaturam dicit, quia æternaliter in Patre gaudebit sedens ad dexteram majestatis in excelsis. Et quare gaudebit in eo? *Quia induit me vestimento salutis*, id est misit eum in similitudinem carnis peccati, ut contra omnes vitiorum languores *indumento salutis*, id est sacrosancta carne munitus esset, ne ad interiora ejus tentatio diabolica penetraret. *Vestimento salutis*, ac sanitatis est indutus, quia nihil contradictionis, nihil vitii tentantis in assumpta carne toleravit, et *indumento justitiæ* circumdatus est, quia omnem justitiam et sanctitatem habuit in carne, qua se induit. Et hoc indumento circumdatus est sicut Sponsus Ecclesiæ decoratus corona sempiterni regni. Quia vero una persona est ipse et Ecclesia, circumdatus est et quasi sponsa. Etenim caput et corpus, sicut hic liquido monstratur, unus est Christus. Nam unus idemque, sicut hic cernimus, loquitur ; « *Indumento justitiæ circumdedit me, quasi sponsum decoratum corona, et quasi sponsam ornatam monilibus suis* ; » non quia sine corpore non est integer, sed quia nobiscum integer esse dignatus est, qui et sine nobis semper integer est. Nam quomodo corpus ejus nos, si non et nobiscum unus Christus? Se itaque dicit *sponsum secundum caput, sponsam secundum corpus*. Duo videntur, et unus est. Unde et corpori debet convenire, quod dictum est : « Gaudens gaudebo in Domino, » etc. Gaudebit enim totus et anima et carne quisquis electus in Domino, qui gaudere noluit in sæculo, cum mortale hoc induerit immortalitatem. Nam dum hic viveret, indutus est *vestimento salutis* in mente, et *indumento justitiæ* circumdatus est in actione. Cum enim vestimento induimur, ex omni parte circumdamur.

Igitur *vestimento salutis* induitur, quisquis a languore peccati per Dei gratiam undique custoditur : et *indumento justitiæ circumdatur*, qui undique bono opere protegatur, ut nullam partem actionis suæ peccato nudam relinquat. Nam qui in aliis actionibus justus est, in aliis injustus, quasi unum latus operuit, aliud nudavit. Qui ergo undique in cunctis operibus suis justus est, hoc *indumento justitiæ* circumdatus est. Et tali veste induta est electorum Ecclesia, vel æterni Regis sponsa pretiosis virtutibus, quasi *monilibus* adornata, et in capite suo, quod est Christus, diademate regio decorata. Bene autem subnectitur :

VERS. 11. — « Sicut enim terra profert germen suum, et sicut hortus semen suum germinat : sic Dominus Deus germinabit justitiam, et laudem coram universis gentibus. »

Nam sicut terra germen suum, ita fidelis anima A germen bonæ cogitationis profert in opus. Et sicut hortus semen suum germinat, ita mens electorum susceptum semen divini verbi producit in fructum actionis, sed hoc facere Deus dicitur, quia ipse dat electis suis, ut hoc faciant. Atque ita justitiam recte vivendi et laudem prædicationis omnibus, quæ sub cælo sunt, gentibus electi pronuntiant. Post hæc Isaias personam omnium prophetarum gerens loquitur :

CAPUT LXII.

VERS. 1. — « Propter Sion non tacebo, et propter Jerusalem non quiescam, donec egrediatur ut splendor justus ejus, et Salvator ejus ut lampas accendatur. »

Sion namque et Jerusalem plebs fidelium dicta B est. Propter quam instruendam Isaias non tacuit, neque quievit prophetare, donec egrederetur ut splendor justus ejus, id est Christus. Quia « omnes prophetæ et lex usque ad Joannem prophetaverunt, et ex eo regnum Dei evangelizatur (Luc. xvi, 16). » Prophetæ enim silere cœperunt tempore Joannis, ubi evangelica prædicationis sumpsit exordium. Quo tempore justus, quem Sion exspectabat, ut splendor egressus est de utero Virginis, quia mox pastoribus nativitate ejus cum magna claritate apparens angelus nuntiavit, et magi stellam in Oriente viderunt. Et ut lampas accensus est, quia lumine miraculorum et doctrinæ clarus mundo resplenduit, atque fugata obscuritate peccati humano generi gratiæ suæ lumen intulit. Non cessavit ergo propheta C loqui propter Sion, donec egrederetur ut splendor justus ejus, quia necesse fuit, ut fideles illius temporis haberent propheticum sermonem, cui beneficientes intenderent quasi lucernæ lucentes in caliginoso loco, donec dies adventus Salvatoris illucesceret, et sol justitiæ mundum irradiaret. Post cujusmodi futurum splendorem apte subjecit propheta dicens ad Sion :

VERS. 2. — « Et videbunt gentes justum tuum, et cuncti reges inelytum tuum. »

Gentes enim et reges totius orbis videbunt eum, quia sicut lampas accendetur, ut omnibus resplendeat. Sequitur.

« Et vocabitur tibi nomen novum, quod os Domini nominabit. »

Nomen novum accipies, quia Christiana vocaberis. Sequitur.

VERS. 3. — « Et eris corona gloriæ in manu Domini, et diadema regni in manu Dei tui. »

Quia te Christus possidebit, ut ex te coronetur in gloria sua, videlicet diademate regio. Chorus namque sanctorum omnium corona Christi erit in illo beatitudinis regno. Sequitur:

VERS. 4. — « Non vocaberis ultra derelicta, et terra tua non vocabitur amplius desolata, sed vocaberis voluntas mea in ea, et terra tua inhabitabitur, quia complacuit Domino in te (194). »

Olim vocabatur Sion derelicta, quia dicebatur quod propter Adæ peccatum Deus plebem suam dereliquerat, quam a paradiso depellens luce visionis suæ privaverat. Cujus terra mens ejus intelligi potest secundum illud : « Anima mea sicut terra sine aqua tibi (Psal. cxlii, 6). » Quæ scilicet terra vocabatur desolata, quia dicebat non habere consolationem, dum non inveniret Redemptionem. Sed ubi invenerit redemptorem, non vocabitur derelicta, quia nunquam Relinquetur ab eo, qui ait : « Ego vobiscum sum omnibus diebus usque ad consummationem sæculi (Matth. xxviii, 20). » Sed extunc nomen ejus vocatum est : *Voluntas mea in ea*, quia Deus in plebe sua voluntatem suam fatetur esse, ex quo ipsa per Christi gratiam implere consuevit mandata ejus, quæ, dum auxilio gratiæ destituta esset, implere nequiverat. Et terra cordis ejus non vocabitur amplius desolata, sed vocabitur habitata, quia consolationem sancti Spiritus habebit, et inhabitabitur ab eo, qui ait : « Si quis diligit me, sermonem meum servabit, et Pater meus diliget eum, et ad eum veniemus, et mansionem apud eum faciemus (Joan. xiv, 23). » Et hoc ita fiet ; quia complacuit in ea Domino. Secundum beneplacitum gratiæ suæ quasi terram animæ ejus inhabitabit. Sequitur :

VERS. 5. — « Habitabit enim juvenis cum virgine, et habitabunt in te filii tui, et gaudebit sponsus super sponsam, et gaudebit super te Deus tuus. »

Juvenis habitabit cum virgine, id est Joannes apostolus cum matre Domini. Et filii Sion habitaverunt in ea, id est Ecclesia ; multitudo videlicet erat illa, quorum « credentium cor unum et anima una (Act. iv, 32). » Et gavisus est sponsus super sponsam, Christus super Ecclesiam, cum eam crescere ubique cerneret, et in religione proficere. Et gavisus est super Sion, id est super plebem fidelium Deus ejus. Quia vero post hoc in singulis locis per totum orbem constituti sunt rectores Ecclesiæ, convenienter subditur :

VERS. 6. — « Super muros tuos, Jerusalem, constitui custodes, tota die et tota nocte perpetuo non tacebunt. »

Muri quippe Jerusalem munitiones disciplinarum Ecclesiæ sunt. Super quos muros Dominus custodes D tota die et tota nocte constituit, quia in congregationibus religiosorum præpositos ordinavit qui diu noctuque custodiant observantiam disciplinæ, ne sacræ institutionis muros subjecti transgrediantur. Qui perpetuo non tacent, quia continuis exhortationibus cives, qui intra muros civitatis hujus commorantur, ad suimet custodiam movent, et contra spiritualium inimicorum insidias sedulo cautos reddunt. Vel per diem prosperitatis et per noctem tempus adversitatis intelligi potest. Dominus igitur super muros Jerusalem die ac nocte custodes posuit, quoniam Ecclesiæ prælatos dedit, qui et in prosperis et in adversis religionis muros pervigiles observent, ne

civitatem sanctam ex parte qualibet hostis irrum-
pat. Ubi apte subjungitur : « Qui reminiscimini
Domini, ne taceatis. »

VERS. 7. — « Et ne detis silentium ei, donec stabili-
liat, et donec ponat Jerusalem laudem in terra. »

Illi enim reminiscuntur Domini, qui frequenter
eum ante sui cordis oculos pia meditatione redu-
cunt. Antequam vero sancta Ecclesia in tantam au-
cloritatem ubique veniret, multa patiebatur ab infi-
delibus. Unde nunc eos, qui reminiscebantur Do-
mini, id est spiritales viros propheta commonuit,
ne tacerent a clamore precum, quoniam « oportet
semper orare, et non deficere, neque darent ei si-
lentium (Luc. XVIII, 1), » sed voces orationum sua-
rum in aures ejus instanter ederent, donec stabiliret
Jerusalem, id est statum firmitatis daret fluctuanti
Ecclesiae, et poneret eam laudem in terra, id est in
hoc mundo, ubi ipsa fuerat opprobrium et subsan-
natio. Sed et nobis adhuc præcipitur, si Domini
pio desiderio reminiscimur, ne taceamus indefessis
precibus ad eum clamare, donec Jerusalem nostram,
quæ fluctuat in pelago sæculi hujus, ipse stabiliat
in terra beatæ solitudinis, et ponat eam ibi laudem
et gloriam. Quia vero his, qui novam vitam ducunt,
loquitur Dominus, audiamus, quid et de illis, qui
pertinaciter in vetustate consistunt, promittat. Se-
quitur :

VERS. 8. — « Juravit Dominus in dextera sua, et
in brachio fortitudinis suæ : Si dederò triticum tuum
ultra cibum inimicis tuis, et si biberint alieni vinum
tuum, in quo laborasti. »

VERS. 9. — « Quia qui congregabunt illud, come-
dent, et laudabunt Dominum : et qui comporta-
bunt (195) illud, bibent in atriiis sanctis meis. »

Juratio namque Dei immobilis assertio ejus est.
Dextera vero et brachium fortitudinis ejus Christus
ejus est, triticum Sion pabulum sanctæ intelligentiæ,
inimici Sion Judæi persequentes Ecclesiam, vinum
ejus spiritalis scientia est, quæ fidelium mentes
lætificat et inebriat. Judæi quoque sunt alieni, qui
dereliquerunt Dominum, blasphemaverunt Sanctum
Israel, alienati sunt retrorsum. Juravit ergo Do-
minus in dextera sua, et in brachio fortitudinis suæ, id
est immutabiliter sanxit in Christo, qui est virtus
ejus, dicens : Si dederò triticum tuum ultra cibum
inimicis tuis, id est non dabo amplius sacram intel-
ligentiam Judæis in cibum animæ, quia jam Scri-
pturas ulterius non intelligent, ex quo Christum, qui
solus intelligentiam earum aperit, reprobaverunt. Et si
biberint alieni vinum tuum, id est non bibent ultra
Judæi tuum spiritalem sensum, quo cœlitus inebria-
ris, ut mente excedas Deo, quia qui triticum tuum,
id est sacri intellectus frugem ex latissimo divino-
rum eloquiorum campo congregabunt, comedent illud
ore cordis, et laudabunt Dominum dicentes : « Benedicam
Dominum, qui tribuit mihi intellectum (Psal.
xv, 7). » Qui vinum spiritalis sensus ex vinea Scri-

pturæ sanctæ comportant, botros sententiarum coa-
danando, bibent illud in atriiis sanctis meis, id est
in Ecclesiæ conventiculis, et distributis fidelium
ordinibus.

Vel dæmones sunt inimici et alieni, qui triticum
et vinum Judæorum comederunt, et biberunt, id est
omnes fructus laboris eorum devoraverunt, dum
illi inter Deum et idola fluctuarent. Ecclesiæ vero
triticum et vinum hostes non rapiunt, quoniam ipsa
soli Deo placere quærens ex operibus bonis labores
manuum suarum comedit, ac Deum æterna laude
sustollet, atque in atriiis æternalium mansionum
apud Patrem bibet. Nam quia in agro et in vinea
laboramus, ut triticum et vinum colligamus, recte
per vinum et triticum fructus supernæ remunera-
tionis exprimitur, quem assequimur pro labore,
quem in corpore ducimus. Deinde fidelibus Hebræis
præcipitur :

VERS. 10. — « Transite, transite per portas, præ-
parate viam populo, planum facite iter, et eligite
lapides, et elevate signum ad populos. »

Transite, inquit, per portas, id est per jussionem
apostolorum, quæ portæ sunt, exite gentibus præ-
dicare. Vel eis, qui foris sunt, dici potest, ut per
portas transeant, id est per doctrinam apostolorum
ingrediantur Ecclesiam. Præparate viam populo ve-
nienti, id est præmonstrate gentili populo viam fidei,
qua venit in Ecclesiam. Planum facite iter, id est
offendicula dissensionum, et scrupulos dubitationum
tollite de via fidelium, et quidquid impedire potest
gressum eorum, ut ad supernam habitationem pro-
perent. Et eligite lapides pretiosos ac vivos, ut quis-
quis sæculo renuntiaverit, inter sæculares non
maneat, sed frequentias eorum declinet, et cohabi-
tationes fugiat. Sive elegite lapides, id est omnem
emollite durtiam de cordibus credentium, et elevate
signum crucis ad omnes populos, ut universus exer-
citus militum Christi videat illud, et sequatur.

VERS. 11. — « Ecce Dominus auditum fecit » do-
nomine suo etiam illis gentibus, quæ sunt « in ex-
tremis terræ. » Sequitur :

« Dicite filiæ Sion : Ecce Salvator tuus venit : ecce
merces ejus cum eo, et opus illius coram ipso : »

Vos, inquit, o prædicatores, dicite filiæ Sion, id
est Ecclesiæ de gentibus, quæ filia est primitivæ
Ecclesiæ : Noli timere, noli deficere, quia ecce venit
ad judicium Salvator tuus, qui te a cunctis tribula-
tionibus eripiens salutem perpetua donabit. Et ecce
merces ejus, quam tibi reddet, cum eo est, opus illius
coram ipso, id est homo, quem creavit, ante tribunal
ejus stabit judicandus. Sequitur :

VERS. 12. — « Et vocabunt eos : Populus sanctus,
redempti a Domino. Tu autem vocaberis quæsitâ
civitas, et non derelicta. »

Hebræos, qui crediderunt, vocamus ita, ut dica-
mus : Iste est populus sanctus, et in sanctitate nu-
tritus, qui etiam redempti sunt a Domino. Ecclesia

(195) Alias, comportant et congregant.

vero de gentibus licet et ipsa populus sanctus vocari possit, tamen quia prius in squalore gentilitatis conversata est, non ita populus sanctus vocari consuevit, sed specialiter appellatur *civitas quæsitæ et non derelicta*, quoniam Salvator eam utpote perditam quæsit, et inventam non dereliquit. Sequitur :

CAPUT LXIII.

VERS. 1. — Quis est iste, qui venit de Edom, tinctis vestibus de Bosra? Iste formosus in stola sua gradiens in multitudine fortitudinis suæ. »

Hoc in persona primorum dicitur angelorum de Christi ascensione mirantium. Nam cernentes eum de hoc mundo remeantem ad superos, mirantur ad invicem vel intra se dicentes : *Quis est iste, qui venit de Edom?* id est qui de hoc terreno sæculo huc ad nos ascendit? Edom quippe *terrenus* interpretatur. *Tinctis vestibus*, id est cruenta carne sanguine passionis. Bosra namque *tribulatio* dicitur, et vestimentum Domini corpus ejus est, quod sumpsit ex Virgine, nec tamen aliud indumentum ejus est, atque aliud ipse. Nam nostrum quoque vestimentum caro dicitur, sed tamen ipsi nos sumus caro, qua vestimur. *Iste formosus in stola sua*, id est nullam prorsus in assumpta humanitate peccati deformitatem habens, mira sanctitatis pulchritudine fulget in ea. *Gradiens in multitudine fortitudinis suæ*, id est multiplici sua virtute gressum operationis suæ potenter agens.

Vel : *iste formosus in stola sua*, id est speciosus in carne glorificata per resurrectionem. *Gradiens in multitudine fortitudinis suæ*, id est cælum sua virtute petens. Sic apud se supernæ virtutes primo deliberant, ostendentes quia discunt, et divinam scientiam appetunt. Unde quia dixerant : *Quis est iste?* mox ipse Jesus appropinquans respondet eis, et docet eas dicens :

« Ego, qui loquor justitiam, et propugnator sum ad salvandum. »

Ego, qui loquor justitiam, id est qui hoc quod justum est in terris doceo, videlicet ut omnes persuasiones seductoris respuant, et voluntatem Creatoris faciant. *Et propugnator sum ad salvandum*, quia pro salute hominum pugno in passione contra hostem antiquum. Quo audito virtutes angelicæ quasi accepta loquendi cum eo licentia interrogant :

VERS. 2. — « Quare ergo rubrum est indumentum tuum, et vestimenta tua sicut calcantium in torculari? »

Cum tantæ sis, inquit, potestatis et justitiæ, quare ergo rubrum est indumentum tuum, id est, cur tua caro cruentata est? *Et vestimenta tua sicut calcantium in torculari*, id est corpus tuum cur simile est cæteris morientium corporibus? Quibus ipse respondet?

VERS. 3. — « Torcular calcavi solus, et de gentibus non est vir mecum; calcavi eos in furore meo, et conculcavi eos in ira mea, et aspersus est sanguis eorum super vestimenta mea, et omnia indumenta mea inquinavi. »

Torcular calcavi solus, id est mortem, quæ cæteros deprimit, ego solus resurgendo calcavi. *Solus enim torcular*, in quo calcatus est, calcavit, quia sua potentia eam, quam pertulit passionem, vicit. Nam qui usque ad mortem crucis passus est, de morte cum gloria surrexit. Bene autem subdit : *Et de gentibus non est vir mecum*. Quia hi, pro quibus pati venerat, passionis ejus participes esse debebant. Qui pro eo quod illo tempore necdum crediderant, de ipsis in passione queritur, quorum vita illa passione quærebatur. Quia vero gentes universas, quæ ante salutarem hanc ejus passionem de hoc sæculo migraverunt, sine misericordia damnavit apud inferos, paucissimis ut Melchisedech et Job evadentibus, *calcavi*, inquit, *eos in furore meo, et conculcavi eos in ira mea*. Eos namque calcavit in furore suo, quos in infernum iratus demersit. Et de gentibus nunc est sermo ejus. Quoniam autem peccata nostra ipse portavit in corpore suo super lignum, ut peccato mortui justitiæ vivamus, adjecit : *Et aspersus est sanguis eorum super vestimenta mea*, id est maculæ peccatorum eorum super carnem meam : *omnia indumenta mea*, id est totum corpus meum alienorum sordibus peccatorum inquinavi. Non quia ipse contaminatus sit nostris iniquitatibus, sed quia omnium nostrorum delicta solus, ut deleret, accepit, et passiones atque contumelias et abjectiones, quæ eis debebantur, pertulit.

Possunt tamen per *gentes* designari adversariæ fortitudines, quas ipse conculcavit atque contrivit. Et dicitur *aspersus sanguis eorum super vestimenta* ejus, non quia dæmones sanguinem habeant, sed talibus verbis ostenditur pugnasse contra illos, atque vicisse illos et occidisse. Qui adhuc subjungit :

VERS. 4. « Dies enim ultionis in corde meo, annus retributionis meæ venit. »

Quando patiebatur Salvator, prævidebat in corde suo diem ultionis, quo se per Titum et Vespasianum de suis persecutoribus Judæis vindicaret, et annum, quo eis retribuere, venientem cernebat. Unde et eadem passione sua imminente prædixit discipulis : « Cum videritis circumdari ab exercitu Jerusalem, tunc scitote quia appropinquavit desolatio ejus. Tunc qui in Judæa sunt, fugiant in montes, et qui in medio ejus, discedant, et qui in regionibus non intrent in eam, quia dies ultionis hi sunt, ut impleantur omnia quæ scripta sunt (Luc. xxi, 20). »

Potest et dies judicii *dies ultionis* intelligi, *annusque retributionis* spatium illud perpetuitatis, quod erit post finem sæculi, in quo justam meritorum suorum retributionem quisque sentiet. *Dies ergo ultionis est in corde* ejus, quia ipse novit, quando dies judicii veniet. Sed huic sententiæ potest objici, quod alias scriptum est : « De die autem illa et hora nemo scit neque angeli in cælo neque Filius nisi Pater (Marc. xiii, 32). » Cui scilicet objectioni respondendum est, quod usitata Scripturarum locutione dicitur Filius diem illam ignorare, quia facit

ut omnibus ignota sit. Neque enim Pater aliquid novit, quod Filius ignoret, quia Filius est sapientia Patris. Sequitur :

VERS. 5.— « Circumspexi, et non erat auxiliator, quæsi, et non fuit qui adjuvaret. »

Dominus in medio persecutorum positus circumspexit, et adiutorem non vidit, quia « discipuli omnes relicto eo fugerunt (Matth. xxvi, 56), » licet auxilium ei afferre non possent, etiam si starent. Vel circumspexit in tota mundi latitudine, et non erat auxiliator, quia nullus erat qui eum ad quærendam salutem humani patiendi adjuvaret. Sequitur :

« Et salvavit mihi brachium meum, et indignatio mea ipsa auxiliata est mihi. »

Ego quidem, inquit, auxiliatorem non inveni, sed brachium meum, id est virtus mea non solum me liberavit, sed et omnes, quos volebam, salvavit. Et salvavit eos non sibi ipsi sed mihi, ut jam non sibi vivant, sed ipsi, qui pro ipsis mortuus est et resurrexit. Qui enim peccatorum suorum remissionem percepit, vel aliquod periculum evasit, sed tamen adhuc sibi vivit, nondum Christo salvatus est, sed sibi. Qui peccatorum suorum veniam adeptus jam reliquum vitæ suæ spatium Deo dedicat, iste non sibi sed Deo salvatus est. Et qui de aliquibus adversis, quæ propter peccata sua patiebatur, ereptus jam deinceps religiose vivit, hunc sibi Christus salvavit.

Sed quid est quod addit : *Et indignatio mea ipsa auxiliata est mihi*, nisi quod de Judæis Apostolus dicit, quia « delictum eorum divitiæ sunt mundi, et diminutio eorum divitiæ gentium? » (Rom. xi, 12.) Si enim amissio eorum reconciliatio est mundi, profecto ira Dei, quæ super eos est, adjuvit nostræ salutis effectum. *Auxiliata est igitur ei indignatio ejus*, quia per hoc magis salutem mundi operatus est, quod Judæis fuerat iratus. De quibus et subiicit :

VERS. 6. — « Et conculcavi populos in furore meo, et inebriavi eos in indignatione mea, et detraxi in terram virtutem eorum. »

Conculcavit per Vespasianum et Titum in furere suo populos Judæorum, et inebriavit eos amaritudine tribulationum, atque in terram dejecit, omnem virtutem eorum confringens sub Romanis, ne jam ab hac humiliatione sua usque ad adventum Eliæ resurgere valeant. Vel indignatio ejus, quæ contra dæmones erat, adjuvit salutem nostram. Quos ipse conculcavit in furore suo, et detraxit in terram virtutem eorum, ut nos liberaret.

Post hæc vates ex sua et populi persona loquitur errans in se beneficia Dei, et duritiam cordis populi, ob quam et Jerusalem incendio et Israel captivitati traditus sit. Nam sequitur :

VERS. 7. — « Miserationum Domini recordabor, et laudem Domini super omnibus quæ reddidit nobis Dominus, et super multitudine honorum do-

mus (196) Israel, quæ largitus est eis secundum indulgentiam suam, et secundum multitudinem misericordiarum suarum. »

Pressus, inquit, pondere malorum, in nullo alio nisi in Dei misericordia spem habeo, qui facit misericordiam in millibus diligentibus se, et extendit clementiam his qui noverunt eum. Hoc autem non potest dicere nisi qui intelligit se juste sustinere quod patitur. Sequitur :

VERS. 8. — « Et dixit : Verumtamen populus meus filii non negantes, et factus est eis Salvator. »

Deus, qui justo iudicio captivitati tradidit populum istum, austeritatem justitiæ clementia mitigans dixit : « Genui quidem filios, et exaltavi; ipsi autem spreverunt me (supra, 1, 12). » Verumtamen quia *populus meus* sunt, et semel filii nominati, non peribunt in perpetuum, si me spernere et negare desierint, sed sentient Salvatorem Christum meum, qui factus est ex semine David secundum carnem, si in eum crediderint. Sequitur de Domino :

VERS. 9. — « In omni tribulatione eorum non est tribulatus, et angelus faciei ejus salvavit eos. »

Quod apte potest intelligi secundum illud, quod Job ait : « Si flagellat, occidat semel, et non de pœnis innocentium rideat (Job. ix, 23). » Flagellabat enim Deus, quia humanum genus pro peccatis eorum affligebat. Sed tandem occidit semel, quia ut geminam mortem nostram animæ scilicet et carnis destrueret, Christum sola carne mori fecit. « Quod enim mortuus est peccato, mortuus est semel (Rom. vi, 10). » Neque de pœnis innocentium jam risit, quia dilectum Filium suum exhibuit participem tribulationum eorum. Nam quasi ridebat de pœnis eorum, dum eis affectum compassionis suæ non ostenderet in afflictione redemptionis ipsorum. Similiter et hic dicitur, quia *in omni tribulatione eorum non est tribulatus*, dum afflictionem eorum cerneret, et Redemptorem necdum mitteret. Nam quod de pœnis innocentium risisse dictus est, ait nunc propheta, quoniam *in omni tribulatione eorum non est tribulatus*. Sed tandem *Angelus faciei ejus*, id est Filius ab eo veniens *salvavit eos*, quia qui flagellabat, occidit semel. Sequitur :

« In dilectione sua et indulgentia sua redemit eos, et portavit eos, et levavit eos cunctis diebus sæculi. » *In dilectione et in indulgentia redemit eos* sanguine Filii sui. « Commendat enim charitatem suam Deus in nobis, quoniam cum adhuc peccatores essemus, Christus pro nobis mortuus est (Rom. v, 8), » — « in quo habemus redemptionem per sanguinem ejus, remissionem peccatorum secundum divitiis gratiæ suæ (Ephes. 1, 7). »

Et portavit atque levavit cunctis diebus sæculi, id est præsentis vitæ, « quoniam in sæculum misericordia ejus (Psal. cv, 1). » Vel de *Ægypto redemit*, id est liberavit eos, et patienter portavit mores

eorum, atque sustentans levavit eos cunctis diebus A ab initio sæculi. Sequitur :

VERS. 10. — « Ipsi autem ad iracundiam provocaverunt, et affixerunt spiritum Sancti ejus : et conversus est eis in inimicum, et ipse debellavit eos. »

. *Affixerunt spiritum Sancti*, id est animam Christi ejus, et ipse debellavit eos per Titum et Vespasianum. Sed quia temporibus Eliæ pristinam reddet ei gratiam, aperte subditur :

VERS. 11. — « Et recordatus est dierum sæculi Moysi et populi sui. »

Id est fœderis sui *recordatus est*, quod per Moysen pepigit cum eis, quomodo eduxit eos de terra Ægypti, ut esset Deus eorum. Quia vero interim non respicit eos, sed diutissimis calamitatibus per totum B orbem dispersos affligi permittit, congrue propheta subjungit :

« Ubi est, qui eduxit eos de mari cum pastoribus gregis sui? » id est cum Moysen et Aaron. Qui enim Pharaonem cum exercitu suo projecit in mare, nunc vindictam in oppressores eorum non facit. Sequitur :

« Ubi est, qui posuit in medio ejus spiritum Sancti ejus? » *Qui Spiritum Sancti*, id est Christi sui, quondam *posuit* in isto populo, nunc ei nullam ejusdem Spiritus gratiam dat. Sequitur :

VERS. 12. — « Qui eduxit ad dexteram Moysen brachio majestatis suæ, qui scidit aquas ante eos, ut faceret sibi nomen sempiternum. »

Subaudi, ubi est? Nihil enim simile nunc eis operatur, sed recessit ab eis, et abscondit faciem suam. C *Qui eduxit ad dexteram Moysen*. Quia dexteram ejus spiritalem tenuit, cum educeret eum in virtutis suæ ductu de Ægypto. Et *aquas maris scidit ante eos*, ut mirabilium operum ejus memoria perenniter celebraretur. Sequitur :

VERS. 13. — « Qui eduxit per abyssos quasi equum in deserto non impingentem. »

VERS. 14. — « Quasi animal in campo descendens. »

Sicut equus absque obstaculo incedit libere per plana deserti, et quodlibet animal per amplitudinem campi, sic iste populus ducente Domino per profunda maris transivit. Sequitur :

« Spiritus Domini ductor ejus fuit. » Per mare et per desertum fuit *ductor ejus Spiritus Domini*, sed modo nullum ei ducatum præstat. Ut autem ad eos spiritus iste redeat, subjungunt pœnitentes, et Christo dicunt :

« Sic adduxisti populum tuum, ut faceres tibi nomen gloriæ. » Adduxit enim eos tot miraculis de Ægypto in terram promissionis, ut nomen ejus longe innotesceret, et glorificaretur. Qui et precando subjiciunt :

VERS. 15. — « Attende de cœlo, et vide de habitaculo sancto tuo, et gloriæ tuæ. »

Jam enim in cœlo Filium hominis esse constituentur suppliciter et in habitaculo gloriæ suæ. Sequitur :

« Ubi est zelus tuus et fortitudo tua, multitudo viscerum tuorum et miserationum tuarum? Super me continuerunt se. » *Ubi est zelus tuus*, quo me sicut sponsam diligebas, et *fortitudo* qua de manu adversariorum me liberabas? Diutissime enim jam *continuisti super me multitudinem viscerum* dilectionis et misericordiarum tuarum, quia nullo affectu pietatis et compassionis erga me motus es, ut de tam longa captivitate me eriperes. Sequitur :

VERS. 16. — « Tu enim, Domine, Pater noster, et Abraham nescivit nos, et Israel ignoravit nos; tu, Domine, Pater noster, Redemptor noster, a sæculo nomen tuum. »

Tu es *Pater noster*, quia Abraham vel Jacob, cujus nos esse filios jactabamus, *nescivit nos*, nec dignatus est filios agnoscere, quia te offendimus. Tu es *Pater noster*, quia creasti nos et dignatus es dicere : « Filius meus primogenitus Israel (Jer. xxxi, 9). » Tu *Redemptor noster*, quia sanguinem pro nobis fudisti. A *sæculo nomen tuum*. Quia in principio refert Moyses Deum singula quæque per Verbum suum, quod es tu, fecisse, quando dixit : « Fiat lux, et facta est lux (Gen. 1, 3), » cæteraque similiter verbo creavit. Sequitur :

VERS. 17. — « Quare errare nos fecisti, Domine, de viis tuis : indurasti cor nostrum, ne timeremus te? »

Errare fecit eos Dominus, quia justo judicio deseruit eos in superbia sua, et lumen intelligentiæ abstulit eis. Et *induravit cor eorum*, quia gratiam suam, qua molliri possent, juste subtraxit. Domino enim cor eorum indurasse est a duritia liberare noluisse, sed eandem duritiam crescere permisisse. Non igitur ad Deum, sed ad eos culpa refertur erroris et indurationis eorum, quia sic excæcari et indurari meruerunt. Quia enim non ex fide, sed tanquam ex operibus tumuerunt, ipso suo tumore erraverunt, et indurati sunt, ut ignorantes justitiam Dei, et suam volentes statuere justitiæ Dei non essent subjecti (Rom. x, 3). Hoc quippe est *errare* et non timere eum. Quicumque enim tam superbe sapiunt, ut suæ voluntatis viribus tantum existiment tribuendum, ut negent sibi necessarium divinum adjutorium ad bene vivendum, errant profecto a D viis mandatorum Domini, et indurato corde non timent eum. Sequitur :

« Convertere propter servos tuos, tribus hæreticitatis tuæ. »

Convertetur Dominus propter eos, quando gratiam suam rursus eis dare cœperit. Sequitur :

VERS. 18. — « Quasi nihilum possederunt populum sanctum tuum : hostes nostri conculcaverunt sanctificationem tuam. »

Capta Jerusalem *conculcaverunt* Romani *sanctificationem* templi, et *quasi nihilum possederunt* vilem populum istum dispergendo per omnia regna, captivum perimendo atque dehonestando. Sequitur :

VERS. 19. — « Facti sumus quasi in principio,

cum non dominareris nostri, neque invocaretur a VERS. 5. — « Occurristi lætanti et facienti justitiam. »

Ex quo Christum regem populus iste negavit, et dominium terreni atque alienigenæ imperatoris elegit, dicens: « Non habemus regem nisi Cæsarem (Joan. xix, 15), » factus est quasi in principio, cum serviret Pharaoni et Ægyptiis, quia extunc habere Deum regem desiit, neque Deo jam sed hominibus servivit. Sed tandem per hanc piæ confessionis humilitatem ac lamentationem revertitur ad gratiam sui regis. Unde jam confidenter novissimum ejus adventum exoptat, dicens:

CAPUT LXIV.

VERS. 1. — « Utinam dirumperes cœlos, et descenderes: a facie tua montes defluent. »

VERS. 2. — « Sicut exustio ignis tabescerent, atque arderent igni, ut notum fieret nomen tuum inimicis tuis: a facie tua gentes turbarentur. »

Nam quasi quædam cœlorum diruptio fiet eo descendente, quia patentibus cœlis, ministrantibus angelis, consedentibus apostolis ipse Rex regum in sede majestatis suæ veniet, ut ab omnibus tunc electis et reprobis videatur. Et quoniam ignis ante ipsum ardebit. « Utinam, inquit, a facie tua montes defluent, et sicut exustio ignis tabescerent atque arderent igni. » Nam ignis ille universos montes comburens æquabit vallibus, et omnem terram complanabit. Antequam vero Dominus veniat, Antichristus est regnaturus, qui ita humano generi tenebras suæ pravitatis infundet, ut pene nemo lucem veritatis inspiciat, sed eis etiam nomen Christi veritatis in ignorantiam, nec recordentur ejus nisi ad blasphemiam Domini. Sed ad hujus tetram caliginem depellendam velut fulgur quoddam ipse Christus veniet. Unde isti convenienter adjungunt: « Ut notum fieret nomen tuum inimicis tuis, et a facie tua gentes turbarentur. » Tunc quippe et inimicis notum fiet nomen ejus, atque subito turbabuntur a facie ejus, quia tunc, sicut scriptum est: « Plangent se omnes tribus terræ, et videbunt Filium hominis venientem in nubibus cœli (Matth. xxiv, 30). » In tanti autem pavoris magnitudine et omnes elati, qui adhuc in carne viventes inventi fuerint, valde formidabunt. Unde et subdunt:

VERS. 3. — « Cum feceris mirabilia non sustinebimus. »

Tunc enim mirabilia faciet, quæ vix ullus hominum sustinere possit. Quia « sol obscurabitur, et luna non dabit lumen suum, et stellæ cadent de cœlo, et virtutes cœlorum commovebuntur (ibid. 29). » Quæ ergo mens, cum hæc fieri cœperint, non expavescet? Sed quia metus electorum in securitatem vertetur, jam de præsentia Judicis gaudentes adjungunt:

« Descendisti, et a facie tua montes defluerunt. »

VERS. 4. — « A sæculo non audierunt, neque auribus perceperunt: oculus non vidit, Deus, absque te, quæ præparasti expectantibus te. »

Descendisti ad judicium, et ignis ante faciem tuam discurrens montes consumpsit, ut terram cœquans renovaret. Per montes intelligamus superbos, qui tunc defluent, quando superbia eorum tabescet, ut « sicut fluit cera a facie ignis, sic percant peccatores a facie Dei (Psal. lxxvii, 3). » Homines autem in carne viventes non audierunt, id est non intellexerunt a sæculo, id est ab origine mundi usque nunc, neque auribus corporis audierunt, nec cujuslibet oculus vidit absque te, id est nisi tu solus, quæ sint præmia quæ præparasti his qui te expectant, qui promissiones tuas longanimitè sustinent. Vel absque te, quia si quis illa videre potuit, te quoque pariter vidit. Nemo quippe nunc videre vel audire vel cogitare valet, quanta sit illa merces justorum, quam illi soli cognoscere potuerunt, qui possederunt; omnem enim visum et auditum et cogitatum superat. Sed in die illa dignis se manifestabit, et tunc Deus omni, qui nunc lætus operator justitiam, occurret gaudens, ut illum excipiat. Rursum de Judæis subditur:

« In viis tuis recordabuntur tui. » Et ipsi mox adjungunt: « Ecce tu iratus es, et peccavimus, et in ipsis fuimus semper, et salvabimur. »

In viis namque Domini recordabuntur illius, quando recognoscent, quod « non justificabitur homo ex operibus legis nisi per fidem Jesu Christi (Gal. ii, 16). » Nunc enim obliti sunt eum in viis ejus, quoniam non ex fide, sed ex operibus querunt justificari. Sed cum cognoverint quod viribus suis implere mandata legis nequeunt, et auxilium gratiæ implorare cœperint, tunc in viis ejus recordabuntur illius. Sed quia oblivioni tradiderunt eum, iratus est eis, et deseruit eos, qui postquam obliti sunt, peccare non desierunt. Et hoc est quod deplorant dicentes: « Ecce tu iratus es, et peccavimus. » Sed rursum de observatione viarum Dei gloriantes dicunt: « In ipsis fuimus semper. » Hoc est enim quod idem populus alibi se jactat, dicens: « Ecce tot annis servio tibi, et nunquam mandatum tuum præterivi (Luc. xv, 29). » In ipsis, inquit, fuimus semper, et in ipsis salvabimur. Quia « qui fecerit ea, vivet in illis (Rom. x, 5). » Mox autem resipiscentes subdunt lamentando:

VERS. 6. — « Et facti sumus sicut immundus omnes nos, et quasi pannus menstruatæ universæ justitiæ nostræ. »

Facti sumus ut immundus, quia ejecti sunt de Ecclesia fidelium sicut immundus de castris, nolentes facere quod eos de Christo monuit Apostolus: « Accedamus, inquit, ad eum vero corde, in plenitudine fidei, aspersi corde ab conscientia mala, et abluti corpus aqua munda (Hebr. x, 22). » Propter quod et universæ justitiæ illorum factæ sunt quasi pannus mulieris menstruatæ, quia ex immunditia carnalitatis ipsorum inquinatæ sunt, ita ut omnis, qui tetigerit eas, inquinetur. Unde et Apostolus illas carnales

cæremonias arbitratus est « velut stercore, ut Christum lucrifaceret, et inveniretur in illo non habens suam justitiam, quæ ex lege est, sed illam quæ ex fide est Jesu Christi (*Philip. III, 8*). » Ad quam et isti nunc accedentes panno *menstruatæ* comparant justitias suas, in quibus antea gloriabantur. In quo considerandum, quia justitia, quæ in lege est, ad comparationem evangelicæ puritatis immunditia nominetur. Sequitur :

« Et cecidimus quasi folium universi, et iniquitates nostræ quasi ventus abstulerunt nos. »

Universi ceciderunt sicut folium ab arbore patriarchici generis, quia secundum Apostolum « rami olivæ fracti sunt, et ceciderunt (*Rom. XI, 17*), » atque pro eis insertus est oleaster. Et *iniquitates suæ quasi ventus abstulerunt* eos velut ab arbore *folium*, quia dum de justitia falso gloriarentur, et iniquitatibus vere replerentur, separati sunt a fide patrum suorum, ut Salvatorem venientem non susciperent, quem illi venturum expectaverant.

Hæc autem sententia non solum de Judæis, sed etiam de universo humano genere potest intelligi. Quid est enim homo nisi *folium*, quod in paradiso ab arbore cecidit? Quid est nisi folium, qui tentationis vento rapitur et desideriorum flatibus elevatur? Mens quippe humana quot tentationes patitur, quasi tot flatibus movetur. Hanc enim plerumque ira perturbat. Cum recedit ira, succedit inepta lætitia, luxuriæ stimulis urgetur, æstu avaritiæ longe lateque ambiendi quæ terrona sunt, tenditur. Aliquando hanc superbia levat, aliquando vero inordinatus timor in infirmis ponit. Quia ergo tot tentationis flatibus humana corda elevantur et dejiciuntur, apte dicitur : « Cecidimus quasi folium universi, et iniquitates nostræ quasi ventus abstulerunt nos. » *Quasi ventus* quippe nos *iniquitas abstulit*, quia nullo fixos virtutis pondere in vanam elationem levavit. Bene autem homo *folium* appellatur, quia qui arbor fuit in conditione, folium a se ipso factus est in tentatione. Qui enim de alto cecidit, folium est. Sed ad Judæos redeamus; subjungunt enim plangentes :

VERS. 7. — « Non est qui invocet nomen tuum, qui consurgat et teneat te. »

Non enim est quispiam in eis, qui precibus nomen Domini invocans consurgat adversus motum indignationis ejus, *et eum teneat*, ne feriat, quia omnes injusti sunt, nullusque in eis invenitur, qui divinæ iræ possit obviare deprecando, sumens auctoritatem resistendi ex conscientia bene meriti, et eam, quæ in hunc populum sævit, cœlestem animadversionem retinere. Sequitur :

« Abscondisti faciem tuam a nobis, et allisisti nos in manu iniquitatis nostræ. » Abscondit ab eis *faciem* suæ divinitatis vel cognitionis, dicens : « Non me videbitis amodo, donec dicatis : Benedictus qui venit in nomine Domini (*Matth. XXIII, 39*). » *Et allisit eos in manu*, id est in actione *iniquitatis* eorum,

qui propter malitiam suam passi sunt tam gravia. Sed jam ex toto poenitentes omni humilitate procedunt, et cum obsecratione dicunt :

VERS. 8. — « Et nunc, Domine, pater noster es tu, nos vero lutum; et fictor noster, et opera manuum tuarum omnes nos. »

Ipse enim Christus *pater* eorum est, id est creator, illi *vero* sunt *lutum*; et ipse *fictor* ac *plastes* eorum, qui de limo terræ plasmavit eos, et ait : « Sicut lutum in manu figuli, et sic vos in manu mea, domus Israel (*Jer. XVIII, 6*); » qui in oratione subjungunt, dicentes :

VERS. 9. — « Ne irascaris, Domine, satis, et ne ultra memineris iniquitatis nostræ, ecce respice, populus tuus omnes nos. »

Et de destructione Jerusalem, quæ per Titum facta est, addunt :

VERS. 10. — « Civitas sancta tua (197) facta est deserta, Sion deserta facta est, Jerusalem desolata est. »

VERS. 11. — « Domus sanctificationis nostræ, et gloriæ nostræ, ubi laudaverunt te patres nostri, facta est in exustione ignis, et omnia desiderabilia versa sunt in ruinas. »

Ac deinde subjungunt :

VERS. 12. — « Nunquid super his continebis te, Domine, tacebis, et affliges nos vehementer? »

Quibus mox a Domino Jesu respondetur .

CAPUT LXV.

VERS. 1. — « Quæsierunt me, qui ante non interrogabant : invenerunt me, qui non quæsierunt me, » id est gentiles. « Dixi : Ecce ego, ecce ego, ad gentem quæ non invocabat nomen meum. »

Cœperunt enim gentiles post resurrectionem ejus quærere, et ipse sua sponte etiam non quærentibus se ipse offerre, ex quo a Judæis est reprobatus. De quibus subdit :

VERS. 2. — « Expandi manus meas tota die ad populum incredulum, qui graditur in via non bona post cogitationes suas. »

VERS. 3. — « Populum (198) qui ad iracundiam provocat me ante faciem meam semper. »

Si in eo quod ait : *Expandi manus meas*, crucis patibulum intellexerimus, quomodo intellecturi sumus : *Tota die?* Nunquid tota die pependit in ligno? Si vero diem pro tempore velimus accipere, maxime quod hoc nomen genere feminino posuit quod in Latino eloquio non nisi tempus significare solet, convenienter per extensas manus *tota die* continuationem bonorum operum intelligere possumus, a quorum nunquam intentione cessavit. Quæ scilicet opera, quia perfidus ille populus vidit, imo sensit, *ad populum incredulum* Dominus *manus suas* expandit. Possumus enim expansas manus et largitatem donantis accipere, quod nihil eis petentibus denegaret, sed statim roganti leproso sanitatem reddiderit (*Marc. I, 40*), et cæci a nativitate oculos ape-

(197) *Alias, civitas Sancti tui, etc.*

(198) *Alias, populus.*

ruit (*Joan. ix, 1*). Significant expansæ manus et parentis clementiam suos filios in sinu recipere gestientis. Hæc ipse populo Judæorum exhibuit. *Qui graditur per viam* malæ actionis sequendo *pravas cogitationes suas, ac semper Deum ad iracundiam provocat*, dum superba mente voluntatem ejus facere contemnit. Et *provocat eum ante faciem ejus semper, quia Dominus eum velut ante faciem suam posuit, cum ex omnibus populis hunc elegit*. Sed ipse ab initio non cessat perverse agere peccans in conspectu Domini, cujus oculis patent omnia, vel in templo idolis sacrificans. Nam et de illis, qui quondam in eodem populo conversi sunt ad idola, subjungitur:

« Qui immolant in hortis, et sacrificant super lateres. »

VERS. 4. — « Qui habitant in sepulcris, et in delubris idolorum dormiunt : qui comedunt carnem suillam, et jus profanum in vasis eorum. »

VERS. 5. — « Qui dicunt : Recede a me, ne appropinques mihi, quia immundus es. Isti fumus erunt in furore meo, ignis ardens tota die. »

Hæc enim et his similia faciebant antiqui Judæi cultores idolorum. Nam idololatriæ jungentes luxuriam in *hortis immolabant*, et pro uno altari, quod impolitis lapidibus lege constructum erat, *lateres hostiarum sanguine cruentabant. In sepulcris quoque habitabant, et in delubris idolorum dormiebant*, ubi stratis pellibus hostiarum incubare soliti erant, ut somniis futura cognoscerent, et quicumque simili errore non ducebatur, eum arbitrabantur immundum, contactumque ejus fugiebant.

Vel dicebant Deo: *Recede a me, et ne appropinques mihi*, dum hunc a se rejicere niterentur, ut more gentilium liceret eis vivere; atque dicebant ei: *Quia immundus es*, dum blasphemarent eum. Sed omnes *isti fumus erunt in furore ejus*, quia sicut fumus deficient a facie Judicis. Et erunt *ignis ardens tota die*, quia usque in æternum ardebunt sine intermissione. Ardebunt enim tota die æternitatis. Sequitur:

VERS. 6. — « Ecce scriptum est coram me : Non tacebo, sed reddam et retribuam in sinu meorum iniquitates vestras, et iniquitates patrum vestrorum, simul dicit Dominus. »

VERS. 7. — « Qui sacrificaverunt super montes, et super colles exprobraverunt mihi, et remetiar primum opus eorum in sinu eorum. »

Omne malum quod fecerunt, *scriptum est coram me*, id est quasi in libro manet assignatum in conspectu memoriæ meæ, et cum venerit dies judicii, *non tacebo* quod fecerunt illi filii vestri, *sed reddam in sinu*, id est in mente eorum, ut eos propria torqueat conscientia, *iniquitates vestras*, o pessimi patres, *et iniquitates patrum vestrorum simul*, id est mala quæ vos et patres vestri fecistis, retribuam filiis vestris, qui vestram et illorum perversitatem

imitati sunt? et primo *remetiar primum opus eorum*, ut pro suis et vestris parentumque vestrorum iniquitatibus puniantur. Unde et alias scriptum est: « Ego Dominus Deus tuus fortis zelotes visitans iniquitatem patrum in filios in tertiam et quartam generationem eorum, qui oderunt me (*Exod. xx, 5*). » Isti autem idololatriæ, quibus et novissimo die retribuetur, præcipue sub Nabuchodonosor exterminati sunt atque perempti. Sed quia non totus simul ille populus tunc erat delendus, licet ex maxima parte periturus esset, apte subjungit propheta:

VERS. 8. — « Hæc dicit Dominus : Quomodo si inveniatur granum in botro, et dicatur : Ne dissipes illud, quoniam benedictio est : sic faciam propter servos meos, ut non disperdam totum. »

Nam velut si ex botro granum eligatur ad reservandum, et botrus conteratur, ita populus ille tunc propter impietates suas deperit. Sed tamen ex eo reliquiæ sunt dimissæ, quæ sicut *benedictio* reservantur. Unde et sequitur:

VERS. 9. — « Et educam de Jacob semen, et de Juda possidentem montes meos, et hæreditabunt eam electi mei, et servi mei habitabunt ibi. »

VERS. 10. — « Et erunt campestria in caulas gregum, et vallis Achor in cubile armentorum populo meo, qui requisierunt me. »

Eduxit enim de *Jacob semen* Dominus, id est de decem tribubus, qui erant in captivitate, filios, qui reverterentur in terram suam, et de *Juda* qui captivus in Babylone tenebatur populum, qui rursus possideret montes ejus, et terram ejus inhabitaverunt *electi ejus*, de captivitate regressi. Et in campestribus manserunt greges ovium, atque in valle, ubi quondam lapidatus est Achan (199), qui peccaverat in furto anathematis, accubuerunt armenta boum, id est populus, qui Dominum in angustia captivitatis requisivit (*Josue vii, 25*). Sed postquam ipse bona hæc repromisit his, qui ad pœnitentiam erant revertendi, rursus idololatriæ, qui in hac tribulatione erant perituri, minatur dicens:

VERS. 11. — « Et vos, qui reliquistis Dominum, qui obliti estis montem sanctum meum, qui ponitis Fortunæ mensam, et libatis super eam. »

VERS. 12. — « Numerabo vos in gladio, et omnes in cæde corruetis pro eo quod vocavi, et non respondistis : locutus sum, et non audistis, et faciebatia malum in oculis meis, et quæ nolui elegistis. »

Dereliquerunt enim *Dominum*, et adhæserunt idolis, atque *montem* Sion, ubi templum illius erat, *obliti* sunt non venientes illuc adorare vel immolare, sed ponebant *Fortunæ mensam*, et sacrificabant in ea. Fuit enim in multis urbibus et maxime in *Ægypto* et in *Alexandria* idololatriæ vetus consuetudo, ut ultimo die anni ponerent mensam refertam varii generis epulis, et poculo mulso mistum, vel præteriti vel futuri anni fertilitatem aspicientes. Hoc et Judæi faciebant omnium simulacrorum portenta

venerantes, et nequaquam altari victimas, sed hujuscemodi mensæ libamina fundebant. Propter quod numerati sunt *gladio*, id est supplicio. Quidquid enim punit et percutit, torquet et cruciat, in Scripturis sanctis gladius appellatur. Nec ferro trucidatus est omnis ille populus, sed pœnis et cruciatibus deditus atque captivitati et servituti.

Vocaverat Dominus Judæos, quia collatis muneribus quasi emissis vocibus eos ad se ducere studuerat, sed non responderant, quia digna operadonis ejus reddere contempserant. Vocat enim nos Dominus, cum muneribus prævenit; respondemus vero vocationi ejus, cum digna juxta præcepta munera deservimus. Quia ergo Judæos vel etiam quosdam Christianos tot muneribus prævenit, dicit: *Vocavi*. Sed quia tot ejus munera contempserunt, subjungit: *Et non respondistis*. Vocaverat etiam eos per prophetas ad pœnitentiam, et non respondebant: loquebatur, et audire nolebant, sed magis iritabantur.

Sed fortassis hæc ad tempus apostolorum referenda sunt. Ait enim: « Quomodo si inveniatur granum in botro, et dicatur, ne dissipet illud, quoniam benedictio est: sic faciam propter servos meos, ut non disperdam totum. » Nam quasi *granum in botro* est inventum, quando pars, quæ doctrinam ecclesiasticam susceperat, reperta est in populo Judæorum. Sicut enim granum ad botrum, ita pauci credentes ex Judæis ad comparisonem fuerunt reliquæ multitudinis illorum, quæ credere nolens dispersiit. Et de hac minima parte electa dictum est: *Ne dissipet illud, quoniam benedictio est*, quando Patrem pro discipulis oravit. Et ideo Dominus populum illum non disperdidit totum, quoniam eos, qui fidem receperunt, a perditione salvavit, et ab excidio et captivitate illorum eripuit. De quibus et subdit:

Quia *educam de Jacob semen*. Illud scilicet semen de quo idem Apostolus ait, quia « nisi Dominus Sabaoth reliquisset nobis semen, sicut Sodoma facti essemus (Rom. ix, 29). » *Educam de Jacob*, id est de decem tribubus electionis filios, et de tribu Juda multitudinem credentium *possidentem montes meos*, id est prophetas et apostolos, quoniam « fundamenta ejus in montibus sanctis (Psal. lxxxvi, 1). » *Et hæreditabunt eam*, id est Ecclesiam, *electi mei, et servi mei habitabunt ibi*, quia non est jam locus, ubi extra Ecclesiam catholicam habitent. *Et erunt campestria in caulas gregum*, quia popularis multitudo fidelium plana et minus alta conversatione erit contenta. Quæ sunt enim *campestria* nisi hæc lata et infima conversatio infirmorum? Ubi tamen *caulas gregum* habemus, quia et intra caulas Dominicorum ovillum tenentur. Achor vero *turbatio* dicitur. Et quæ *vallis Achor* nisi humiliatio pœnitentiæ conturbans mentem peccatoris? Quid autem nomine *armentorum* nisi multitudo magnorum atque robustorum fidelium exprimitur? *Erit ergo vallis Achor in cubile armentorum, quia magni et fortes*

sancti jacent in humilitate pœnitentiæ, et de minimis offensis graviter conturbantur, et se affligunt. In hac enim valle jacebat ille magnus bos, qui dicebat: « Ego sum minimus apostolorum, qui non sum dignus vocari apostolus, quia persecutus sum Ecclesiam Dei (I Cor. xv, 9); » et ille, qui dicebat: *Si dixerimus quia peccatum non habemus, nos ipsos seducimus (I Joan. 1, 8).* » Et alius dicens: « Quia in multis offendimus omnes (Jacob. iii, 2). » Et hæc pollicitus est Dominus populo, qui sive ex Judæis, sive ex gentibus ad fidem veniens *requisivit eum*.

Sed vos, inquit, o perfidi Judæi, *qui dereliquistis Dominum*, dicentes: « Regem non habemus nisi Cæsarem (Joan. xix, 15). » Audite quid consecuti sitis. Vos *qui oblitis estis montem sanctum meum*, id est altitudinem spiritualis conversationis, vel sublimitatem patriæ cœlestis; *qui ponitis Fortunæ mensam*, id est divitiis aram, *et libatis super eam*, hoc est qui vestra sacrificia facitis propter solam præsentis vitæ remunerationem; *numerabo vos in gladio Romanorum vel novissimæ ultionis. Et omnes in cæde corruetis* vel per Romanos, vel per pœnam extremæ percussionis. *Pro eo quod vocavi vos ad fidem et gratiam, nec respondistis mihi, ut ad me veniretis: locutus sum vobis annuntians voluntatem Patris mei, et audire recusastis, et faciebatis malum in oculis meis, etiam cum inter vos corporaliter manerem, et Phariseorum præcepta traditionis, quæ nolui, elegistis*. Sequitur:

VERS. 13. — « Propter hoc hæc dicit Dominus: Ecce servi mei comedent, et vos esurietis: ecce servi mei bibent, et vos sitietis. »

VERS. 14. — « Ecce servi mei lætabuntur, et vos confundemini: ecce servi mei laudabunt præ exultatione cordis, et vos clamabitis præ dolore cordis, et præ contritione spiritus ululabitis. »

Servi mei comedent et bibent, quia « ego sum panis vitæ; qui venit ad me non esuriet, et qui credit in me, non sitiet unquam (Joan. vi, 35). » Sed vos, o Judæi, *esurietis et sitietis*, quia « mittam famem in terram, non famem panis neque sitim aquæ, sed audiendi verbum Domini (Amos viii, 11). » Neque enim ulterius invenietis, qui vos scientia Scripturarum pascat aut potet. *Servi mei*, accepto Spiritu sancto, *lætabuntur*, sed vos qui me crucifixistis, *confundemini*, videntes gloriam meæ resurrectionis ubique innotescere. *Servi mei lætabuntur* in Ecclesiis præ exultatione spiritualis gaudii, sed vos præ dolore cordis ululabitis, in miseriis, quas sustinebitis. Omnia hæc ita cernimus evenisse.

Quæ si ad futuram vitam referenda sunt, *servi Dei tunc comedent*, quia « faciet illos discumbere, et transiens ministrabit illis (Luc. xii, 37). » *Servi ejus bibent*, quia inebriantur ab ubertate domus ejus, et torrente voluptatis suæ potabit eos. Nam illa sanctorum convivia Dionysius exposuit (Epist. xix ad Tit.), dicens: « Significant hæc communem quamdam, et æque invisibilem sanctorum in divinis bonis societatem, et Ecclesiam primigenitorum de-

scriptorum in cœlis, et Spiritus justorum omnibus optimis perfectos, et primum optimis repletos. Et recubitum requiem arbitror, et multis doloribus vitam illæsam, et conversationem divinam in lumine et in regione viventium omni sensu sacro repletam, et largissimorum et beatorum optimorum copiosam dationem, per quam lætitia omni replentur, hoc autem lætari et recumbere eos faciente Jesu et ministrante, et æternam requiem donante, et plenitudinem bonorum distribuente simul et infundente. » Bene itaque dicitur : Quia servi ejus comedent et bibent, qui tali convivio intererunt. Unde et a contrario satis claret, quia tunc Judæi omnesque reprobi esurient et sitient, qui ad hujusmodi epulas non admittentur. De quibus paterfamilias iratus ait : « Quia nemo virorum illorum, qui vocati sunt, gustabant cœnam meam (Luc. xiv, 24). » Et tunc servi Dei in illo perpetuæ beatitudinis gaudio lætabuntur, Judæi vero, cæterique reprobi in opprobrio sempiterno confundentur et erubescunt. Tunc revera sancti laudabunt præ exultatione cordis, et impii præ contritione spiritus ululabunt et mugient. Adhuc autem Judæis carnalibus dictum est, quod sequitur .

VERS. 15. — « Et dimittetis nomen vestrum in juramentum electis meis. »

Nomen quippe eorum est : *Judæus* vel *Israelita*. Et Judæus interpretatur *confitens et glorificans* sive *laudans*, Israel vero *videns Deum*. Carnales igitur Judæi nomen suum reliquerunt in juramentum electis Dei, quia jam ipsum nomen amiserunt, et omnes electi jurant in illud, id est firmiter definiunt ore confiteri ad salutem atque laudare Christum, et glorificare, ut ad ejus visionem mereantur pertingere. Nam qui Deum confitetur, sive Deo confitetur, et laudat eum, ipse virtutem habet Judaici nominis; et qui Deum vel nunc in ænigmate videt, in futuro sæculo facie ad faciem, habet rem nominis Israel. Illic enim perfidus Judæorum populus, ut dictum est, virtutem nominis hujus cum fide perdidit, et eam electis Dei, qui juramento suæ professionis ad ipsam pertingerent, reliquit. Vel nomen eorum erit in juramentum electis Dei, ut pro malorum exemplo eos habeant, et detestentur talia sustinere, et jurent : Si aliter fecero. contingat mihi sicut Judæis Romanorum occisis. Cui additur in comminatione :

« Et interficiet te Dominus. » Atque subjungitur : « Et servos suos vocabit nomine alio. »

VERS. 16. — « In quo, qui benedictus est super terram, benedicetur in Domino amen; et qui jurat in terra, jurabit in Deo amen, quia oblivioni traditæ sunt angustię priores, et quia absconditæ sunt ab oculis nostris. »

Interficiet enim Dominus hunc populum gladio suo, cum venerit ad judicium.

Interfecit eum Dominus, qui est verus Deus, et vita æterna, cum se illi abstulit. Qui et servos suos non jam nomine, quo antiquitus appellaverat, vocat, sed alio quodam nobiliori vocabulo, quod novitatem

et gratiam sonat. Licet enim servi ejus rem antiqui nominis habeant, ipso tamen nomine non vocantur, sed appellatione Christianitatis venerabiliter nuncupantur. « Neque enim nomen aliud est datum sub cœlo hominibus, in quo oporteat nos salvos fieri (Act. iv, 12). » Unde jam nullus servorum Dei, sicut dictum est, vocatur Judæus vel Israelita, sed omnes Christiani. In quo Christianitatis nomine, qui benedictus est super terram, id est qui benedictionem illam, quæ in baptismo datur, consecutus est in hac vita, si perceptam benedictionem bene vivendo custodierit, benedicetur in Domino, cum audierit : Venite, benedicti Patris mei, percipite regnum (Matth. xxv, 34). » Et qui, dum in hac terra manent, jurant in eo cum Psalmista dicente Domino : « Juravi et statui custodire judicia justitię tuę (Psal. cxviii, 106), » jurabunt in eo Amen, id est asserent in illo beatitudinis regno vero : quia oblivioni traditæ sunt angustię priores, id est omnes afflictiones et necessitates, quibus in sæculo coarctabamur, et quia absconditæ sunt omnes ab oculis nostris, id est nec jam recordamur, nec videmus eas. Hoc enim tunc ille populus beatorum lætus proclamabit. Ubi ad confirmationem certissimæ veritatis interponitur Amen, quod interpretatur vere vel fideliter, ut ea quæ promittuntur, vere implenda monstrentur, et fideliter dignis reddenda. Sequitur :

VERS. 17. — « Ecce enim ego creo cœlos novos et terram novam, et non erunt in memoria priora, et non ascendent super cor. »

VERS. 18. — « Sed gaudebitis et exultabitis usque in sempiternum in his quæ ego creoo. »

Cœlos novos et terram novam faciet Dominus in novissimo die. Unde et Joannes in Apocalypsi determinato judicio subjecti dicens : « Et vidi cœlum novum, et terram novam. Primum enim cœlum, et prima terra abiit, et mare jam non est (Apoc. xxi, 1). » Utraque tamen hæc, id est cœlum et terra non alia condenda sunt, sed hæc ipsa renovantur, quia per eam quam nunc habent imaginem transeunt, sed per essentiam sine fine subsistunt. « Præterit enim figura hujus mundi (I Cor. vii, 31). » Cœli igitur ac terra et transeunt, et erunt, quia et ab ea, quam nunc habent, specie per ignem purgantur, et tamen in sua semper natura servantur. Unde et per Psalmistam dicitur : « Mutabis eos, et mutabuntur (Psal. ci, 28). » Itaque cœlos novos et terram novam creabit, quando istos igne judicii purgans renovabit. Neque ascendent super cor, quia tanta erit pulchritudo eorum, qui tunc erunt, ut nemo jam istorum, quæ nunc sunt, recordari dignetur, sed pro nihilo quisque reputabit hæc, et in illis quæ videbit, delectabitur. Nam omnes electi tunc sine fine gaudebunt in illis, quæ tunc creata fuerint a Domino. Sequitur :

« Quia ecce ego creoo Jerusalem exultationem, et populum ejus gaudium. » Jerusalem, id est Ecclesia non solum exultabit, sed etiam erit ipsa exultatio. Et populus ejus non solum gaudet, sed et ipse

gaudium erit. Nam et ferrum videmus in ignem converti, cum in igne positum valde succenditur. Sic et populus sanctorum, cum ingressus fuerit in gaudium Domini sui, commutabitur in gaudium. Sequitur :

VERS. 19. — « Et exultabo in Jerusalem, et gaudebo in populo meo. »

Tunc gaudebit Dominus in populo suo, cum jam nullum in eis peccatum fuerit, et omnes eos immortales ac beatos reddiderit. Quandiu enim peccamus, et mortales ac miseri sumus, non potest in nobis gaudere. Neque enim gaudet in nobis, dum adhuc tales sumus, quales nos in principio condidit. Cum igitur jam in antiquum statum nos reformaverit, tunc in nobis gaudium habebit. Sequitur :

« Et non audietur ultro in eo vox fletus, et vox clamoris. » Hoc manifestum est, quod in populo sanctorum neque luctus neque clamor, neque dolor erit ultra. Sequitur :

VERS. 20. — « Non erit tibi amplius infans dierum, et senex, qui non impleat dies suos. »

Infans dierum est, qui jam diu vixit, sed adhuc mente parvulus est. Hujusmodi enim infantes increpat Sapientia dicens : « Usquequo, parvuli, diligitis infantiam? (Prov. 1, 22.) *Senex vero qui non impleat dies suos*, est qui multum quidem vixit, sed ætatis suæ tempora in vanitate consumpsit. Ille enim dies suos implet operibus, qui sese in hac vita quotidie vigilantiter pensare non negligit, et ad omne quod recte facere potest, inertia nulla torpescit. Et in præsentem quidem Ecclesia multi tales pueri ac senes sunt. Sed in illa electorum Ecclesia futura non erit *infans dierum, et senex, qui non impleat dies suos*, quia quisquis semper moribus [deest forsitan, infans] esse perseverat, non perveniet ad illam, neque senex, qui dies vitæ suæ bonis operibus implere noluerit. Unde et subditur :

« Quoniam puer centum annorum morietur, et peccator centum annorum maledictus erit. » Centenarius perfectus est numerus, et ideo *centum annorum* nomine vel omne spatium vitæ præsentis, vel mora longi temporis exprimitur. Qui ergo centum annos explevit, et adhuc *puer* est, id est qui diu vixit, nec a factis puerilibus est correctus, *morietur* morte æterna. Et *peccator centum annorum*, id est qui nec temporis longinquitate compesci potuit a perpetrato peccato, *maledictus erit* in die novissimo, cum audierit : « Discedite a me, maledicti, in ignem æternum (Matth. xxv, 41). » De electis vero in hac vita adhuc degentibus subditur :

VERS. 21. — « Et ædificabunt domos, et inhabitabunt, et plantabunt vineas, et comedent fructus earum. »

VERS. 22. — « Non ædificabunt, et alius habitabit : non plantabunt, et alius comedet. »

Ædificabunt enim domos cordium suorum, et habi-

tabunt in eis per cogitationem non vagando foras per cupiditates sæculi. Nam qui suæ mentis interiora deserit, et exteriora sectatur, id est visibilia cogitat, non manet in domo sui pectoris. *Et plantabunt vineas*, id est statuent sibi actiones bonas, in quibus quotidiano labore exerceantur. *Et comedent fructus earum*, id est satiabuntur in futuro retributione bonorum operum suorum. « Non ædificabunt, et alius habitabit. » Quia hostis antiquus domum conscientiarum eorum, quam cælestibus disciplinis et virtutum lapidibus construent, habitare non poterit, sicut mentem negligentis, de qua dicit : « Revertar in domum meam, unde exivi (Matth. xii, 44). » *Non plantabunt, et alius comedet*, quia diabolus fructum actionis eorum non devorabit. *Alius enim comedet* fructum vinearum eorum, qui suis actibus fructum bonæ retributionis, quem expectabant, non consequuntur, sed magis Satanæ pœna eorum pascitur. Sed hoc electis contingere nequit.

Vel domus istæ sunt diversæ mansiones apud Patrem, quas jugiter possidebit, qui eas ædificaverit; et vineæ sunt plures Ecclesiæ, quarum fructus comeduntur et bibuntur, et lætificant cor hominis, et inebriant amicos Sponsi, atque in regno bibuntur quotidie, et æterna erit habitatio atque plantatio justorum, nec diaboli et satellitum ejus fraudibus supplantabitur. Sequitur :

« Secundum enim dies ligni erunt dies populi mei, et opera manuum eorum inveterabunt electis meis (200). »

Secundum dies ligni erunt dies populi mei, quia sicut lignum in diebus suis gignit fructum suum, ita populus electorum, dum sibi status vitæ præsentis duraverit, fructum boni operis facere non desistet. *Et opera manuum eorum inveterabunt electis meis*, quia usque in finem tenebunt, et perficient opera bona quæ cœperunt. « Qui enim perseveraverit usque in finem, hic salvus erit (Matth. x, 22). » Sequitur :

VERS. 23. — « Non laborabunt frustra, nec generabunt in conturbatione, quia semen benedictorum Domini est, et nepotes eorum cum eis. »

Non laborabunt frustra, quia quidquid boni agere laboraverint adjuvante gratia mea perficient, et labores manuum suarum manducabunt. *Neque in conturbatione generabunt*, quia, ut verbo veritatis spirituales filios generare possint, omnes vitiorum perturbationes, et cupiditatum sæcularium tumultus eliminabunt a cordibus suis, quatenus purificato mentis oculo, quod justum est videre et loqui libere valeant. *Quia semen benedictorum Domini est*, id est filii apostolorum Christi sunt isti, *et nepotes eorum*, id est filii filiorum eorum cum eis sunt. Illi enim sunt filii nostri, quos spiritualiter genuimus; *nepotes* vero nostri sunt, quos jam nostri spirituales filii spiritualiter genuerunt. Quia ergo talis propagatio multipliciter fit in Ecclesia, apte dicitur de sanctis

patribus : Quia nepotes eorum cum eis sunt. Sequitur :

VERS. 24. — « Eritque, antequam clament, ego exaudiam. »

Sicut scriptum est : « Desiderium pauperum exaudivit Dominus, præparationem cordis eorum audivit auris tua (Psal. ix, 10). » Et item : « Scit enim Pater vester, quid vobis necesse sit, antequam petatis eum (Luc. xii, 30). » Adhuc illis in oratione loquentibus ego audiam. Audiam eos semper ad eorum salutem, non tamen semper ad eorum voluntatem, sicut audi vi Paulum, ut gratia mea maneret in eo, non ut « stimulus carnis, » sicut ter rogaverat, « discederet ab eo (II Cor. xii, 8). » Hac promissione Dominus quantum electos Novi Testamenti diligit, ostendit, quorum petitiones tam libenter et tam cito facere semper se manifestat. Sequitur :

VERS. 25. — « Lupus et agnus pascentur simul, et leo et bos comedent paleas, et serpenti pulvis panis ejus; non nocebunt et non occident in omni monte sancto meo, dicit Dominus. »

Lupus, id est ille qui in sæculo fuerat, et agnus, id est qui semper fuit mitis et innocens, pascentur simul in Ecclesia uno cœlestis doctrinæ pabulo. Et leo et bos comedent paleas, quia sæcularis princeps et popularis homo pascentur eisdem eloquiis divinis. Paleæ vero simplicia verba Scripturæ sunt, triticum autem sensus interior. Et frequenter evenit, ut homines sæculi mysteria nescientes simplici Scripturarum lectione pascantur. Alio autem sensu leo Satanas est, « quia adversarius vester diabolus tanquam leo rugiens circuit, quærens quem devoret (I Pet. v, 8). » Bos vero prædicatorem designat, sicut scriptum est : « Non alligabis os bovi trituranti (I Cor. ix, 9). » Paleæ sunt peccatores, de quibus Joannes ait : « Paleas autem comburet igni inextinguibili (Luc. iii, 17). » Et leo igitur et bos comedent paleas, quia peccatorum alios hostis antiquus devorat, alios prædicatorem quilibet convertit, et sibi incorporat mittens in viscera Ecclesiæ.

Serpens quoque idem hostis est, sicut legitur : « Serpens antiquus, qui vocatur diabolus et Satanas (Apoc. xii, 9). » Pulvis etiam peccator est, quia primus homo post peccatum audivit : « Pulvis es, et in pulverem reverteris (Gen. iii, 19). » Serpenti ergo pulvis est panis ejus, quoniam diabolus devoratione peccatorum pascitur. Sed in monte sancto Dei, id est in excelsa justorum conversatione, non nocebunt hujusmodi leones et serpentes eisdem justis, licet affligant eos, et non occident quempiam eorum, id est venenum suæ malitiæ non spargent in eo. « Anima, quæ peccaverit, ipsa morietur (Ezech. xv, 4), » sed ab hac morte immunis est electorum anima. Et ne eis nocerent hujusmodi bestiæ audierunt a Domino : « Ecce dedi vobis potestatem calcandi super bestias (Luc. x, 19), » scilicet serpentes et scorpiones, « et super omnem virtutem inimici, et nihil vobis nocebit (ibid.). » Quia vero montem nominavit, ne Judaico sensu intelligeres montem,

A in quo fuit templum Judæorum, ostendit altiori ratione se non in parte rerum localiter esse, qui omnia replet, nec in ædificiis materialibus, sed in corde fidelium habitare. Sequitur enim :

CAPUT LXVI.

VERS. 1. — Hæc dicit Dominus : Cœlum mihi sedes est, et terra scabellum pedum meorum; quæ est ista domus, quam ædificabitis mihi, et quis est iste locus quietis meæ ?

VERS. 2. — « Omnia hæc manus mea fecit, et facta sunt universa ista, dicit Dominus. Ad quem autem aspiciam nisi ad pauperulum et contritum spiritu, et trementem sermones meos ? »

Nam cum dicit sedem suam cœlum, terram vero scabellum pedum suorum, ostendit se omnibus interioriorem et superiorem esse, quia ubique est a summis usque ad novissima et infima. Cœlum quippe excellit inter materialia, cui subest aer, ubi ignis et aqua, ultima vero terra est. Nam quarta pars distinctorum membrorum hujus mundi, et ea novissima invenitur terra, ut a cœlo incipiens aerem numeres secundum, aquam tertiam, quartam terram. Cum ergo dicit quia cœlum mihi sedes est, terra vero scabellum pedum meorum, declarat se in omnibus elementis esse, juxta quod per Jeremiam loquitur : « Nonne cœlum et terram ego impleo ? (Jer. xxiii, 23.) » Et quia in hoc universo mundi corpore maximam speciem cœlum habet, et terra minimam, tanquam præsentior sit excellenti pulchritudini vis divina, minimam vero ordinet in extremis atque infimis, congrue Deus in cœlo sedere dicitur, terramque calcare, quia « cœlum sursum et terra deorsum, » ut Scriptura loquitur (Prov. xxv, 3). Quia vero tantæ magnitudinis est Deus, ut omnia impleat et excedat, apte Judæos increpat, dicens :

« Quæ est ista domus, quam ædificabitis mihi ? » Non enim in domo manufacta habito. « Et quis est iste locus quietis meæ ? » Non enim alicubi localiter quiescere possum, ut vos in templo Salomonis me putetis habitare vel quiescere. Nam omnia hæc, quæ videtis, manus meæ fecerunt, et facta sunt universa ista. Sed ego in manufactis et materialibus habitaculum non habeo, quia cum sim Spiritus, spiritalem domum quæro. Ad quem enim respiciam, ut ad eum divertam, et in eo maneam, nisi ad pauperulum, id est ad humilem et contritum spiritu, id est qui flendo contrivit spiritum, id est duritiam cordis sui, et non contemnentem, sed trementem sermones meos ? Quisquis talis est, adhuc sereno vultu respiciam, et ad eum veniemus, et mansionem apud eum faciemus in templo non manufacto. Reprobato itaque materiali templo consequens fuit, ut et hostiæ carnales, quæ offerebantur in eo, respuerentur. Unde et subditur :

VERS. 3. — « Qui immolat bovem quasi qui interficiat virum, qui mactat pecus, quasi qui excerebret canem, qui offert oblationem, quasi qui sanguinem suillum offerat, qui recordatur thuris, quasi qui benedicat idolo.

Postquam enim verus Dei Agnus est immolatus, et mysterium propheticum his hostiis desiit, non placatur per eas Deus, sed graviter offenditur præsertim destructo templo, ubi solummodo licebat eas offerri. Apte ergo dicitur: « Qui immolat bovem quasi qui interficiat virum. » Nam Moyses dixerat: « Homo quilibet de domo Israel, si occiderit bovem aut ovem vel capram in castris vel extra castra, et non obtulerit oblationem Domino ad ostium tabernaculi, sanguinis reus erit, quasi sanguinem hominis fuderit, sic peribit de medio populi sui (Lev. xvii, 3). » Cum ergo tabernaculum jam vel templum nusquam sit, ubi talis oblatio offerri debeat, merito qui bovem adhuc immolat comparatur ei qui virum interficit, cum jam ad ostium tabernaculi oblationem ejus offerre non possit. Simili enim pœna uterque dignus est et bovem immolans et virum perimens. Sed et qui pecus, id est capram vel ovem maciat, æqualem facit abominationem, ac si super altare Dei cerebrum canis effunderet. Et qui oblationem quamlibet hujusmodi offert, tale crimen perpetrat, ac si sanguinem porcorum, quod nefas est, offerret. Qui thuris adhuc recordatur ad ponendum in sacrificio, par committit sacrilegium, ac si benediceret idolo. Paria enim sunt hæc sacrificia sacrificiis idolorum. Tantum enim perditionis est servire carnalibus observantiis, et salutem per eas querere, quam [f. quantum] idola colere. Nam ponere spem salutis et justificationis, ubi non est, idololatria est.

Si quis igitur in his sanctitatem et justitiam putet esse, idololatra est, quærens salutem, ubi non est; et umbram adhuc servare, negare est veritatem advenisse. Nam si adhuc servantur, aut significatur non fuisse promissus Christus, aut adhuc promittitur venturus, et negatur venisse. Manifestumque est jam cæremônias hujusmodi et perniciosas esse et mortiferas, ut quicumque eas observaverit, non dubium sit in barathrum diaboli esse devolutum. Scriptum est enim: « Lex et prophetæ usque ad Joannem (Luc. xvi, 16). » Non igitur jam Deo, sed diabolo servit, quisquis legem ultra terminum, quem Deus ei posuit, producere querit. « Finis enim legis Christus ad justitiam omni credenti (Rom. x, 4). » Sed de his, qui adhuc eam tenere volunt, perfidis Judæis subjungitur:

« Hæc omnia in viis suis elegerunt, et in abominationibus suis anima eorum delectata est. »

Respuentes enim præcepta vitæ, quæ audiebant a Salvatore, elegerunt in viis, id est in actionibus suis omnia hæc execranda, quæ nunc dicta sunt et in hujusmodi abominationibus delectati sunt, non in gratia Novi Testamenti, quæ eis offerebatur. Hinc namque ei, qui cæcus fuerat, dicebant: « Tu discipulis ejus sis, nos autem Moysi discipuli sumus (Joan. ix, 28). » Sequitur:

Vers. 4.—« Unde et ego eligam illusiones eorum, et quæ timebant adducam eis (Joan. xi, 45). »

Ipsi cogitaverunt contra Dominum dicentes: « Si

dimittimus eum sic, omnes credent in eum, et venient Romani, et tollent nostrum locum, et gentem (Joan. xi, 48). » Sed ex hoc, quod callide cogitaverunt adversus Dominum, illusit eis Dominus, quia ex eo, quod non dimiserunt eum, sic factum est, ut omnes crederent in eum. Et quæ timebant, adduxit eis quia fecit, ut venirent Romani et tollerent locum eorum et gentem, et hoc factum est propter abominandas carnales observantias, quas elegerant, quia idcirco a Romanis sunt exterminati, quod eis tributum pendere nolebant, dicentes injustum esse, ut populus qui decimas ac primitias et sacrificia Deo reddebat, hominibus quoque tributa solveret, cum Salvator eis jussisset ut redderent « quæ sunt Cæsaris Cæsari, et quæ sunt Dei Deo (Matth. xxii, 21). » Sequitur:

« Quia vocavi, et non erat qui responderet, locutus sum, et non audierunt, feceruntque malum in oculis meis, et quæ nolui elegerunt. »

Dominus, qui deinceps per apostolos vocavit nos, ipse primum vocavit Judæos. Sed illi non responderunt vocanti, quia bonis sermonibus, quos ab eo audierunt, opera bona non reddiderunt, nec per fidem accesserunt ad eum. Locutus est illis ea quæ in Evangelio scripta sunt, sed ipsi non audierunt, id est non obedierunt, sed incessanter mala fecerunt in oculis ejus, et carnalia litteræ præcepta, quæ ei displicebant, elegerunt atque vanas Phariseorum traditiones. Deinde multitudinem sanctorum, qui tunc in Judæa et Jerusalem erat, Salvator alloquitur, dicens:

Vers. 5. — « Audite verbum Domini, qui tremitis ad verbum ejus: dixerunt fratres vestri odientes vos, et abjicientes propter nomen meum: Glorificetur Dominus, et videbimus in lætitia vestra: ipsi autem confundentur. »

Unanimis enim illa multitudo primorum credentium non duro et insensibili corde, sicut nos, audiebat verbum divinæ prædicationis, sed cum tremore et reverentia excipiebant. Quorum pessimi fratres fuerunt cæteri Judæi, qui in perfidia manserunt, qui oderunt credentes, et de Synagoga vel finibus suis abjecerunt propter nomen Christi. Et dixerunt eis: Glorificetur Dominus, ut videamus eum, et vos lætemini. Quid vobis humilem introducitis Deum? quid crucifixum? Volumus eum, ut dicitis, in sua majestate conspicerere regnantem, ut et vos gaudeatis in conspectu ejus. Hæc infideliter deridendo loquebantur putantes hos frustra sperare in Christo. Ipsi autem cum viderint gloriam justorum, confundentur, dicentes: Hi sunt, quos aliquando habuimus in derisum, et in similitudinem improperii. Nos insensati vitam illorum æstimabamus insaniam, et finem illorum sine honore. Quomodo ergo computati sunt inter filios Dei, et inter sanctos sors illorum est? Ergo erravimus a via veritatis, et justitiæ lumen non luxit nobis, et sol intelligentiæ non est ortus nobis (Sap. v, 3). » Sic loquentur dolentes atque confusi, cum glorificatus fuerit

Dominus in lætitia istorum, quos odientes abjecerunt propter nomen ejus. Sed et in præsentī vita confusi sunt, cum viderent omnes ad fidem ejus, quem crucifixierant, confluere, et omnem linguam confiteri, quia Christus est in gloria Dei Patris, sibi que necis crimen a cunctis objici. Unde et sequitur :

VERS. 6. — « Vox populi de civitate, vox de templo, vox Domini reddentis retributionem inimicis suis. »

Vox enim populi de civitate resonabat laudes Dei ; et vox de templo, quia, sicut legitur : « Multa signa et prodigia per apostolos fiebant in Jerusalem, et metus erat magnus universis. Quotidie quoque perdurantes unanimiter in templo, et frangentes circa domum panem, sumebant cibum cum exultatione et simplicitate cordis collaudantes Deum (Act. 11, 43). » Sed post secuta est vox Domini per Romanos reddentis retributionem inimicis suis Judæis. Unde et per se ipsum antea loquens : « Erit, inquit, pressura magna super terram, et ira populo huic. Et cadent in ore gladii, et captivi ducentur in omnes gentes (Luc. XXI, 23). »

Aut certe vox clamoris et seditionis atque ploratus resonabat de templo et civitate Romano exercitu circumdata, et in tres partes seditionibus divisa, quando unus templum obtinuit, et omnia prius sancta possedit, et forinsecus contra hostes, intus contra cives dimicans, in urbe atque in templo tam sacerdotum et levitarum quam vulgi ignobilis, mulierumque ac puerorum ululatus auditus est, redente illis Domino justam retributionem. Quia vero tunc ubique populum ad fidem Ecclesia facile generabat, apte subjungitur :

VERS. 7. — « Antequam parturiret, peperit ; antequam veniret partus ejus, peperit masculum. »

Parturire enim est ante partum dolere, parere vero partum effundere. Et Ecclesia antequam parturiret peperit, quia antequam persecutionis angustias pateretur, multiplicem spiritualium filiorum sobolem edidit. Antequam veniret partus ejus, peperit masculum, id est robustum et virilem populum, quia, accepto Spiritu sancto in die Pentecostes mox ad vocem Petri ex populo circiter « tria millia (Act. 11, 41), » et alia die « quinque millia » crediderunt (Act. 14, 4). Antequam parturiret, peperit, quia sicut ecclesiastica narrat Historia, absque ullo obstaculo in ipsis initiis evangelicis sermo usquequaque percurrerat. Unde et factum est, ut repente quasi cœlitus lumen ostensum aut radius quidam solis erumpens totum orbem claritate superni luminis illustraret (201), et, ex quo et per omnes civitates ac vicus immensæ multitudines, velut (202, messium tempore frumenta ad areas, ita ad Ecclesias congregabantur. Unde et sermo propheticus admirando subjungit :

(201) Uterque Cod., *illustrat*.

VERS. 8. — « Quis audivit unquam tale, aut quis vidit huic simile? »

Nunquam enim tale quid super terram accidit, nunquam huic rei simile quidquam auditum est aut visum, ut omnes in brevi tempore crederent nationes, et de universis gentibus gens una fieret Christianorum, et completeretur dictum Apostoli : « Vetera transierunt, et ecce omnia facta sunt nova (II Cor. v, 17). » Ubi et additur :

« Nunquid parturiet terra in die una, aut pariet gens simul, quia parturivit et peperit Sion filios suos? » Quando enim prædicante Petro, sicut dictum est, crediderunt una die tria millia, et postmodum addita sunt multa millia, tunc fuit cernere gentem insimul natam sermone Dei una die, quam illustravit sol justitiæ, et sterilem repente parientem, cui dictum est : « Lætare, sterilis, quæ non paris, decanta laudem, et hinni, quæ non pariebas, quia multi filii desertæ magis quam ejus quæ habet virum (supra LIV, 1). » Ecclesia enim deserta erat a Deo ; habens autem virum Synagoga legem habebat et Deum. Sed postmodum sterilis et deserta multo fecundior effecta est, quam ea quæ viro juncta fuerat. Parturivit enim, et peperit filios suos. Parturivit eos exhortando, et peperit convertendo.

Vel quæ in exordio antequam parturiret, peperit, postea ut pareret, parturivit, quia ut filios Deo generare posset, multis conatibus enixa est, et multis doloribus cruciata verbum Dei prædicans, eos, quos intra uterum charitatis portabat, in fide vel in bona conversatione genuit. Sed quia ipse Dominus per se ipsum in terris prædicaturus erat, et hujusmodi filios generaturus, pulchre subjunctum est :

VERS. 9. — « Nunquid ego, qui alios parere facio, ipse non pariam, dicit Dominus? Si ego, qui generationem tribuo cæteris, sterilis ero, ait Dominus Deus tuus. »

Ipse enim alios parere facit, sicut illum qui ait : « Filioli mei, quos iterum parturio (Gal. 14, 19). » Sed et ipse peperit, quoniam ad fidem apostolos prædicando generavit. Unde et filios suos nominat eos, cum dicit : « Nunquid possunt filii Sponsi jejunare, quandiu cum illis est Sponsus? (Matth. 11, 15). » Generationem ipse tribuit cæteris, sicut ei qui dicit : « In Christo Jesu per Evangelium ego vos genui (I Cor. 14, 15). » Sed nec ipse est sterilis, quia « voluntarie genuit nos verbo veritatis (Jac. 1, 18). » Quia vero post hæc, crescente fide ac religione per totum orbem, Ecclesia prosperitatem et gloriam erat habitura, congrue subjicitur :

VERS. 10. — « Lætamini cum Jerusalem, et exultate in ea, omnes qui diligitis eam : gaudete cum ea gaudio universi qui lugetis super eam. »

VERS. 11. — « Ut sugatis, et repleamini ab uberibus consolationis ejus : ut mulgeatis et deliciis affluatis ab omnimoda gloria ejus. »

(202) Uterque *vel*.

Vos, inquit, omnes, qui dirigitis Jerusalem, id est Ecclesiam, lætamini cum ea de bonis quæ nunc habitura est, et exsultate in ea. Et vos, qui lugetis super eam propter tribulationes et mala quæ patitur, gaudete nunc gaudio magno cum ea, in bonis quibus jam replebitur, ut et vos effecti participes bonorum ejus, sugatis delectabiliter, et bibatis ac repleamini ab ubere consolationis ejus, id est ex poculo misericordiæ et dulcedinis ac beneficii, quo Deus eam modo consolabitur, quoniam « sicut socii passionum fuistis, sic eritis et consolationis (II Cor. I, 7). » Atque mulgeatis ab omnimoda gloria ejus, quam ubique jam est habitura, et deliciis inde tam corporalibus quam spiritalibus affluatis. Sequitur :

VERS. 12. — « Quia hæc dicit Dominus : Ecce declinabo super eam quasi fluvium pacis, et quasi torrentem inundantem gloriam gentium, quasi sugentis. »

Declinabo, inquit, id est descendere faciam super eam quasi fluvium pacis, id est plenam et perseverantem pacis affluentiam, et quasi magnum quemdam in vos torrentem deducam, qui inundanter afferet gloriam universarum gentium ut sugatis, id est velut lac bibatis eam, quia pace data confluent ad fidem omnes reliquæ gentium.

Vel apostolis vel apostolicis viris lugentibus Jerusalem, quæ in Judæis corrui, et novam Jerusalem, quæ surrectura erat, præstolantibus jubetur ut in ea et cum ea gaudeant, quia nunc ædificanda sit vivis lapidibus. Qui vero parvuli sunt in eis, et lacte consolationis indigent, sugant ab ubere consolatoris prædicationis ejus; qui autem post lac consolationis ad solidum cibum profecerint, deliciis affluant veritatis et scientia omnimodæ gloriæ. Et tunc Dominus declinabit super eam quasi fluvium pacis de quo dictum est : « Fluminis impetus lætificat civitatem Dei (Psal. xlv, 5). » Ut pace omnia possidente et nationum bellis cessantibus torrens doctrinarum Dei riget viam credentium. Sequitur :

« Ad ubera portabimini, et super genua blandientur vobis. » Ad ubera potavit Apostolus illos, quibus ait : « Tanquam parvulis in Christo lac vobis potum dedi, non escam (I Cor. III, 2). » Et super genua, id est super exempla bonorum operum suorum blandiebatur eis, quibus dicebat : « Quæcunque vera sunt quæcunque pudica, quæcunque justa, quæcunque amabilia, quæcunque bonæ famæ, si qua virtus, si qua laus disciplinæ, hæc cogitate; quæ et didicistis, et accepistis, et vidistis in me, et audistis, hæc agite, et Deus pacis erit vobiscum (Philip. IV, 8). » Similiter et cæteri sancti doctores portabant, et potant more matrum ad ubera doctrinæ parvulos filios suos, et in exemplis bonorum operum suorum velut in genibus fovendo sustentant eos, ac blandiuntur eis, ut proficiant. Nam quod in genibus opera designentur, ex historia Gedeonis agnoscimus, ubi trecenti viri, qui flexo recto genu aquam

biberant, vicisse in prælio referuntur (Judic. VII, 5). Aqua enim Scientia sacra est. Sequitur :

VERS. 13. — « Quomodo si cui mater blanditur, ita ego consolabor vos, et in Jerusalem consolabimini. »

VERS. 14. — « Videbitis, et gaudebit cor vestrum, et ossa vestra sicut herba germinabunt. »

Sicut parvulo suo flenti mater blanditur, ut a ploratu quiescat, ita ego vobis faciam, quia dum adhuc pusillanimes de malis, quæ propter correptionem patimini, vocem querelæ emisistis, multimoda consolatione blandiar vobis, et dulciter vos placabo. Sed et post transitum vitæ præsentis multo dulciorem invenietis consolationem, quia mox in supernam Jerusalem, ubi perpetualiter gaudeatis, ducemini, nec in infernum sicut antiqui patres descendetis. Et in illa Jerusalem, quæ non frustra visio pacis interpretatur, videbitis, sicut est, gloriam Creatoris, et ex medullis suis gaudebit cor vestrum in ejus aspectu. Cumque dies resurrectionis advenerit, tunc ossa vestra de pulvere germinabunt sicut herba, quia reviviscunt atque virescent, et immarcessibili gloria vernabunt. Nam hæc ita debere intelligi, sequentia declarant, cum protinus subditur :

« Et cognoscetur manus Domini servis ejus, et indignabitur inimicis suis. »

VERS. 15. — « Quia ecce Dominus in igne veniet, et quasi turbo quadrigæ ejus, reddere in indignatione furorem suum, et increpationem suam in flamma ignis. »

VERS. 16. — « Quia in igne Dominus dijudicabit, et in gladio suo ad omnem carnem. »

Tunc enim valida manus Domini cognoscetur servis ejus, quia in brachio virtutis suæ liberabit eos, et indignabitur inimicis suis, id est omnibus, qui ex corde eum non amaverunt. Ipse quippe veniet igne circumdatus, et quadrigæ ejus, id est virtutes angelicæ, in quibus sedet, venient sicut turbo, ut reprobos omnes subruant, et quasi paleas de mundo tormentis exagitantes rapiant. Veniet, inquam Dominus, ut impiis furorem suum cum magna indignatione reddat, et eos qui increpatione digni fuerint, in flamma ignis increpet. Nam « uniuscujusque opus quale sit, ignis probabit. Si cujus opus manserit, mercedem accipiet, si cujus opus arserit, detrimentum patietur (I Cor. III, 14-15). » Et præcipue reprobi tunc in igne erunt, ut increpentur, quia sancti mox rapiuntur in nubibus obviam Christo in aera, et in dextris ejus statuentur; peccatores vero relinquuntur in terra, et in sinistris ponentur, et igne circumdati, qui inferiora hujus aeris omnia cremabit, sententiam Judicis exspectantes, asperitatem gehennalium tormentorum prægustabunt. Nam ignis ille tantum spatium istius aeris occupaturus est, quantum occupavit aqua diluvii, quando quindecim cubitis altior fuit super montes quos operuerat sub universo celo.

Justis itaque in altum sublevatis et peccatoribus in medio ignis illius in imo derelictis reddet Domi-

nus eisdem peccatoribus, in flamma positus increpationem suam, dicens : « Esurivi, et non dedistis mihi manducare ; nudus fui, et non operuistis me (Matth. xxv, 42). » Nam in illo igne atque in gladio oris sui dijudicabit ad omnem carnem, id est adversus omnes carnales ; quia tunc comprobabitur quam juste erga eos in omnibus semper egerit, imo quam pie, et e diverso quam injuste erga eum illi semper egerint, ideoque ferientur gladio ejus, cum audierint : « Discedite a me maledicti in ignem æternum (ibid. xli). » Omnem enim carnem vocat omnes, qui gloriam incorruptionis per illam, quæ sanctis dabitur, immutationem adepti non fuerint. De qua videlicet carne dicit Apostolus : « Quoniam caro et sanguis regnum Dei possidere non possunt (I Cor. xv, 50). » Hæc igitur caro, quæ regnum Dei non ingreditur, igni et gladio foris traditur. Sed post hæc sententia valde formidanda subjungitur :

« Et multiplicabuntur, inquit, interfecti a Domino. »

VERS. 17. — « Qui sanctificabantur, et mundos se putabant in hortis post januam intrinsecus. »

Quid enim per internam januam, nisi ingressus religiosioris et secretioris conversationis exprimitur, ut eorum, qui sæculo renuntiant, vel ad altaris officium accedunt, sive quid sacratius cæteris agunt ? Et quid hortorum nomine nisi conversationes talium designantur adornatæ vitæ floribus et bonorum operum virtute vernantes ? In quibus fructificantur, quia sanctitatis actiones faciunt, et mundos se putant, quia jam se purgatos a peccatorum sordibus æstimant atque munditiam sibi sanctitatis arrogant. Et quia de suis meritis præsumunt, ideoque veniente eo, qui omnem superbiam percutit, interficiuntur. Hinc namque est quod alias unicuique talium dicitur : « Quo pulchrior es, descende, et dormi cum incircumcisis (Ezech. xxxii, 19). » Omnis enim, qui feditatem suæ infirmitatis considerare negligit, sed per elationis suæ fastum virtutis suæ gloriam attendit, quo pulchrior est, inde descendit, quia se extollendo de suis meritis inde in ima interius corruit, unde gloriosum se esse judicavit. Qui descendens cum incircumcisis dormit, quia in æternam mortem cum cæteris peccatoribus deficit.

Bene ergo dicitur, quoniam multiplicabuntur interfecti a Domino, qui sanctificabantur, et mundos se putabant in hortis, id est excultis virtutum plantaribus post januam intrinsecus, id est post ingressum sanctioris vitæ, quia multi, qui religiosiores et Deo viciniore esse videntur, in illo die gladio animadversionis ejus interficientur. Quis enim Deo se propinquare non æstimat, cum supernis excrescere virtutibus vel muneribus agnoscit, cum vel prophetiæ donum vel doctrinæ magisterium percipit, vel ad exercendam curationis gratiam convalescit ? et tamen sæpe mens, dum de virtutis suæ securitate resolvitur, insidiante adversario, inopinatæ culpæ telo perforatur, et in æternam longe a Deo sit, unde

PATROL. CLXXXI.

A ei ad tempus sine cautelæ custodia propinquavit.

Recte itaque de omnibus his atque talibus dicitur, quia « multiplicabuntur interfecti a Domino, qui sanctificabantur, et mundos se putabant in hortis post januam intrinsecus. » Nec ignoramus Judæos his verbis juxta historiam denotari, imo Scribas et Pharisæos, qui juxta Domini sententiam mundantes, quod foris erat, calicis et paropsidis, intus pleni erant immunditia (Matth. xxiii, 25). Præceperat enim per Moysen Deus, ut, si quis præventus fuisset in peccato, vaccæ rufæ aspersus cinere, et aliis expiationum modis per sacrificia et victimas rediret ad templum (Num. xix, 2) Quod illi negligentes in locis deliciarum et voluptatum, id est in hortis amœnissimis vel baptisteria exstruebant vel piscinas ad arcolas irrigandas, adulteria et omnem libidinum turpitudinem simplicibus abluere aquis se putantes. Dum enim scortis hæerent in modum canum, et masculi in masculos turpitudinem excrere, sanctificabantur in hortis, id est abluebantur et credebant se mundos, sed in adventu interni judicis occiduntur. Illi quoque Judæi veteres his verbis arguuntur, qui latenter in hortis colebant idola, et ibi sanctificabantur, id est laudabantur et mundos se putabant ; sed, veniente Domino, interficientur. Confundentur enim ab idolis quibus sacrificaverunt, et erubescunt super hortis quos elegerant.

Possumus etiam per idololatrias hæreticos accipere, qui, se ab unitate Ecclesiæ separantes, errorum suorum figmenta quasi quædam simulacra colunt in conventiculis suis, velut in hortis, ubi, secundum quod eis visum est, sanctificantur jejuniis ac vigiliis et diversis abstinentiis, atque mundos se judicant, quia luxuriantibus et ebriosis atque perjuris aliisque criminosis, qui sunt in Ecclesia, non communicant, et nos, quia malivimus inter tales habitare, quam nos ab unitate Ecclesiæ scindere, contaminari, peccatis existimant. Sed dubium non est, quin omnis istorum multitudo, quæ impietate sanctificatur, et de munditia sua gloriatur, veniente iudice, perimatur. Hoc est itaque quod dicitur, quia « multiplicabuntur interfecti a Domino, qui sanctificabantur, et mundos se putabant in hortis post januam intrinsecus. » Sequitur :

D « Qui comedebant carnem suillam, et abominationem et murem : simul consumentur, dicit Dominus. »

Ait autem lex : « Sus, quoniam dividit ungulas et non ruminat, immunda erit (Deut. xiv, 8). » Murem quoque inter immunda reputat (Lev. xi, 29). Et quid est unguam dividere et non ruminare, nisi scientiam quidem discretionis habere, cibos autem vitæ, id est verba justitiæ, non recogitare ac tractare, sed negligenter oblivioni tradere ? Quid ergo est suilla caro, nisi corpus infirmæ conversationis eorum qui discretionis acumen habent, sed præcepta Dei in corde suo ruminare negligunt ad faciendum ea ? Comedit igitur carnem suillam, qui exemplum immundæ actionis istorum quasi sapientiorum su-

scipit et imitatur. Abominatio autem est quodlibet execrabile peccatum.

Mus vero semper ob edacitatem laborat, eos denotans, qui ingluviem ventris sequuntur, et quorum Deus venter est (*Philip. III, 19*). » Et ille *murem* comedit, qui exemplum nimix edacitatis ab aliquo suscipit. Abominationem vero *comedit*, qui execrabile factum in se admittit. Itaque quicumque comedunt *carnem suillam et abominationem et murem*, nisi quantocius per pœnitentiam mundati fuerint, *consumentur omnes simul* in die illa. Vel *simul* cum immunditiis quas edunt, *consumentur*, ut *simul* percant et qui præbent exemplum iniquitatis, et qui suscipiunt. Vel *simul* cum eis qui se mundos putant in hortis suis. Sequitur :

VERS. 18. — « Ego autem opera eorum et cogitationes eorum venio ut congregem cum omnibus gentibus et linguis

Publicum tunc Dominus examen faciet, et in conspectu totius humani generis non solum *opera* singularum, sed et *cogitationes eorum* ab initio usque in finem vitæ ipsorum, nisi quæ per pœnitentiam deleta fuerint, congregabit, ac manifestabit, et unusquisque secundum ea quæ cogitavit et operatus est, recipiet. De electis vero subjungit : « Et venient, et videbunt gloriam meam. » Peracto quippe judicio et reprobis in supplicium corruentibus, introducet justos in regnum suum, et ibi manifestabit eis se ipsum, ut gloriam divinitatis ejus in æternum, sicuti est, videant, et in ejus aspectu sine fine gaudeant. Sequitur :

VERS. 19. — « Et ponam in eis signum. »

Ponet *in eis signum*, quia juxta Joannis Apocalypsin : « Nomen ejus habebunt scriptum in frontibus suis (*Apoc. XIV, 1*). » Vel ad tempora vitæ præsentis intelligi potest subito verba convertisse, quia nunc *signum* sanctæ crucis in omnibus qui ad fidem accedunt ponit. Unde et subdit : « Et mittam ex eis qui salvati fuerint, ad gentes in mare in Africam, in Libyam (203) tenentes sagittam ; in Italiam et Græciam, ad Insulas longe ad eos, qui non audierunt de me, et non viderunt gloriam meam. Et annuntiabunt gloriam meam gentibus. »

VERS. 20. — « Et adducent omnes fratres vestros de cunctis gentibus donum Domino in equis et in quadrigis, et in lecticis et in mulis, et in carrucis ad montem sanctum meum Jerusalem, dicit Dominus, quomodo si inferant filii Israel munus in vase mundo in domum Domini. »

VERS. 21. — « Et assumam ex eis in sacerdotes et in levitas, dicit Dominus. »

Ut enim Paulus de eo scribit : « Non ex operibus justitiæ, quæ fecimus nos, sed secundum suam misericordiam salvos nos fecit per lavacrum regenerationis (*Tit. III, 5*), » id est per baptismum. Et item : « Spe enim salvi facti sumus (*Rom. VIII, 24*). » Ex his qui baptismum et spe salvati fuerant, misi-

Christum *ad gentes*, ipsum Paulum et Barnaban ceterosque tales. In mare misit eos, id est ad insulas quæ sunt in mari. *Africam* vero, quæ est meridiana pars mundi et Libyam, quæ est superior, atque *Italiam*, quæ est ab occidente, et *Græciam*, quæ versus Aquilonem sita est, nominatim posuit sermo divinus, ac si meridiem et orientem, occasumque et aquilonem nominasset, et quia hæc principales sunt in orbe regiones. Sermo autem prædicationis vocatur sagitta, quia in eo, quod vitam ferit male viventium, corda transfigit. Præcones autem veritatis etiam *ad insulas* longius in Oceano missi sunt, et ad omnes qui *nihil* antea a Deo audierunt, *neque gloriam* mirabilium, quæ in carne gessit, *viderunt*.

B *Fratres* vero credentium sunt omnes, qui ad fidem veniunt, et Deum cum eis Patrem habere incipiunt. Qui de cunctis gentibus *adducuntur Domino* in equis et quadrigis et lecticis, et in mulis et in carrucis. Nam quid equos nisi deiferos prædicatores appellat? Et quid *quadrigas* nisi prædicationes eorum, qui quatuor voluminibus Evangelii quasi quatuor rotis feruntur, vel in lege et prophetis, atque in Evangelio et apostolis velut in quatuor rotis innuntantur? Unde et alias dictum est ei : « Qui ascendes super equos tuos, et quadrigæ tuæ salvatio (*Habac. III, 8*). » Lectica vero dicitur a lecti similitudine, et est gestatorium, in quo velut in curru super quatuor equos portari solebant filix nobilium coopertæ cortina desuper. Cui gestatorio simile fuit vas, quod ad Petrum de cælo submissum est. Vidit enim Petrus in excessu mentis « descendens vas quoddam velut linteum magnum quatuor initiis submitti de cælo in terram, in quo erant omnia quadrupedia et serpentina terræ et volatilia cæli, et facta est vox ad eum : *Surge, Petre, occide et manduca* (*Act. x, 11*). » Lectica ergo idem significare creditur quod et illud vas, id est vehiculum prædicationis evangelicæ, in quo molliter feruntur, acquiescunt et nutriuntur delicatæ animæ fidelium, et a streptu negotiorum sæcularium absconduntur. Lecticas autem plurali numero posuit, quia unusquisque prudens doctor et religiosus ex verbis et arte prædicationis suæ componit gestatorium hujusmodi ad nutriendum in secreto promovendumque fidelium animas quasi nobilium filias.

Quid autem per mulos sive per mulas, quæ semper sunt steriles, figuratur, nisi electorum sacerdotum perpetua castitas? Nam quod mula virginitatem seu continentiam significet, agnoscimus, cum Salomonem super « mulam David » imponi legimus, ut in regem super Israel constituatur (*III Reg. I, 38*). Quid enim per Salomonem nisi Christus, et quid per « mulam David, » nisi primitiva Ecclesia mente et corpore casta designatur? Super quam Salvator impositus rex est super universum Israel, id est super omnem populum credentium constitutus. In mulis

(203) *Alia, Lydiam, tendentes sagittam.*

ergo praelatos Ecclesiae semper castos intelligamus. A Carrucæ autem et ipsa sunt nobilia vehicula, quæ a Carro nomen acceperunt. Et quid in carrucis, nisi jam dictæ prædicationes exprimentur, quæ nos in via Dei portant, et ad cœlestia subvehunt: In equis itaque et in quadrigis et lectulis atque mulis et carrucis adducuntur fratres vestri de cunctis gentibus ad montem sanctum Domini Jerusalem, dum per sanctos prædicatores, ac per ministerium doctrinæ et actionis eorum adducuntur undique credentes ad Ecclesiam. Et adducuntur sicut munus, quod in vase mundo a filiis Israel inferri solebat in domum Domini, quia et ipsi sunt acceptabile munus atque in sancto vase prædicationis a doctoribus in Ecclesiam inferuntur.

Vel qui veloces sunt in fide, equis vehuntur, qui vero multiplices in gratia, quadrigis, qui consolatione indigent, tectis lectis et umbraculis, ut audire mereantur: « Per diem sol non uret te, neque luna per noctem (Psal. cxx, 6). » In mulis adducuntur continentes et steriles. Carrucæ vero illi intelligendi sunt, quibus loquitur Apostolus: « Invicem onera vestra portate (Galat. vi, 2). » Et in vase mundo casti corporis adducuntur Domino fratres vestri. Et ex his Dominus in sacerdotes et levitas assumit, quia non jam de sola tribu Levi, sed et de cunctis nationibus sacerdotes et levitæ digni Deo eliguntur. Quia vero hi quos sancti prædicatores ad Ecclesiam adducunt, Deo in æternum placeant. et cum eo regnant, pulchre subjungit:

VERS. 22. — « Quia sicut cœli novi et terra nova, quæ ego stare facio coram me, dicit Dominus: sic stabit semen vestrum et nomen vestrum. »

Nam sicut in æternum stabunt cœli novi, et terra nova, quæ Dominus ante se stare faciet post diem iudicii: sic stabit æternaliter coram eo semen prædicatorum, id est filii, quos per Evangelium genuerunt, et nomen eorum in Libro vitæ coram oculis Dei permanebit. Unde et beatus Apostolus de eo fidelibus scripsit: « Qui potens est vos conservare sine peccato, et constituere ante conspectum gloriæ suæ immaculatos in adventu Domini nostri Jesu Christi (Judæ 24). » Sine fine ergo stabunt electi ante faciem ejus, ubi a se ipsis ad illum erigentur intuentium, raptique intentione cordis et dulcedine contemplationis, decorem vultus ejus semper aspicient. Sequitur:

VERS. 23. — « Et erit mensis ex mense, et Sabbatum ex Sabbato. »

Mensis pro perfectione positus est. Quid enim mensis, nisi perfectio dierum? quid vero Sabbatum nisi requies, in qua fieri opus servile non liceat? Eris ergo mensis ex mense, quia qui hic perfecte vixerint, illic ad perfectionem gloriæ perducentur. Et Sabbatum erit ex Sabbato, quia qui hic cessaverint a perverso opere, illic requiescent in cœlesti retributione. Et quia Dominus in die resurrectionis etiam corpora justorum in illam viventium patriam introducet, congrue subditur:

« Et veniet omnis caro, ut adoret coram facie mea, dicit Dominus. »

Receptis enim corporibus, omnes electi ingredientur aulam perpetui regni, et ante sedem majestatis ejus venientes, procident in faciem suam, læti, gratias agentes, et adorabunt eum sicut ex Apocalypsi Joannis evidenter agnoscimus (Apoc. iv, 10). Mox ut incircumspectum lumen ejus viderint, quam angusta sint omnia, quæ creata sunt, deprehendent, et quid agatur in omni creatura, facile videbunt. Unde et subditur:

VERS. 24. — « Et egredientur, et videbunt cada-vera virorum qui prævaricati sunt in me. »

Non tamen corporaliter eos de illa regione beatorum credimus egressuros, sed magnitudine visionis egredientur, quia mentis eorum amplitudinem latitudo cœli concludere non poterit, sed visus eorum limites patriæ cœlestis excedet, ut non solum ea, quæ intus, sed et ea, quæ foris fuerint, manifestè conspiciant. Nam luce visionis intimæ laxatur sinus mentis. Cumque in Dei luminè rapitur super se, in interioribus ampliatur, tantumque expanditur in Deo, ut angusta ei videatur omnis creatura. Unde non loci mutatione, sed latioris ac purioris visus assumptione, dicuntur egressuri, ut videant cada-vera prævaricatorum, id est corpora peccantium in suppliciiis ardentia, quia dum incircumspectum lumen Conditoris aspiciunt, parum est, ut omnia, quæ in illo beatitudinis regno sunt, videant, nisi et cuncta quæ in universitate creaturæ sunt, liberæ mentis visu conspiciant. Justi itaque in tormentis semper intuentur injustos, ut inde eorum gaudium crescat, quia malum conspiciunt, quod misericorditer evaserunt; tantoque majores ereptori suo gratias referant, quanto vident in aliis, quid ipsi pati, si essent relictis, potuissent.

Nec illam tantæ beatitudinis claritatem apud justorum animum fuscat conspecta pœna reproborum, quia ubi jam compassio misericordiæ non erit, minuere procul dubio beatorum lætitiâ non valebit. Quid autem mirum, si, dum justi injustorum tormenta conspiciunt, hoc eis eveniat in obsequiis gaudiorum, quando et in pictura niger color subternitur, ut albus vel rubeus clarior videatur? Et quamvis eis sua gaudia ad perfruentium plene sufficiant, mala tamen reproborum ad augmentum lætitiæ absque dubio semper aspiciunt, quia, ut dictum est, qui Creatoris sui claritatem vident, nihil in creatura agitur, quod videre non possint. Cada-vera autem appellat corpora reproborum, quia fetentia sunt et æterna morte deficiunt. De quibus et subjungitur:

« Vermis eorum non morietur, et ignis eorum non extinguetur. » Ignis enim ille gehennalis nunquam extinguetur, sicut et Joannes asserit, dicens de Domino: « Paleas autem comburet igni inexstinguibili (Matth. iii, 12). » In quo et vermes immortales esse credendi sunt, qui carnes impiorum sine fine comedant, ut non solum ab igne perpetuatim cruciantur

tur, sed et a vermibus devorentur. Unde et Judith in Cantico suo ait : « Dabit ignem et vermes in carnes eorum, ut urantur, et sentiant mala usque in sempiternum (*Judith. xiv, 21*). » Et alibi scriptum est : « Vindicta carnis impii ignis et vermes (*Eccli. vii, 19*). » Sicut ergo corporeus est ille ignis; sic et vermes sunt corporei, quia et ignis corpora reproborum concremat, et vermes ea dilacerant. Vel in verme putredo gehennæ designatur, et in igne ardor. Seu *vermis* dicitur sera scelerum pœnitudo, quæ nunquam in tormentis conscientiam afflictorum mordere cessabit, ut ignis sit pœna extrinsecus æviens, vermis dolor intrinsecus accusans. De quibus adhuc subditur :

« Et erunt usque ad satietatem visionis omni carni. »

Usque ad satietatem quippe *visionis* erunt, quia de eorum visione satiabuntur omnes justī, quos sine intermissione videbunt ante oculos suos perpetuæ ignominie mancipari. Nam omnem carnem vocat nunc omnes electos post resurrectionem corporum gloria incorruptionis vestitos.

His dictis propheticus liber finem accipit. Et pulchre beatus Isaias librum suum in hoc loco terminat, ut qui de his maxime, quæ in præsentī vita fiunt, hucusque locutus est, nunc illis, quæ in futuro complebuntur, finem dicendi faciat.

Nos quoque ad resurrectionis gloriam, quæ in fine hujus libri ostenditur, et octonario numero frequenter designari solet attingere cupientes dicta ejus, prout cœlestis inspiratio nobis aperuit, ac juxta sensum Catholicæ veritatis, quæ in omnibus libris

orthodoxorum Patrum invenitur, et secundum rationem fidei, quam tenet Ecclesia, octo voluminibus compendiose pertractavimus non præjudicantes aliorum intelligentiæ, qui de his forsitan aliter senserunt, vel sentiant, sed simpliciter, quod nobis visum est, ostendentes.

Nihil enim obest Scripturam sacram aliter atque aliter intelligi, dummodo veritas Catholica teneatur, et quod intellectum fuerit, pietatem nutriat, nec ab aliis Scripturæ sententiis improbari possit. Unde qui melius hæc interpretari poterit, manifestet impigre, quod multis utile novit, ne in novissimo pecuniam domini sui arguatur occultasse. Qui vero hæc melius non exposuerit, aut meliorem Libri hujus explanationem non habuerit, huic non detrahat, quam nostra exiguitas edidit. Nam quia opus erat expositore, ut propheticus iste liber tam utilis ac necessarius, quem et plus cæteris prophetarum libris frequentat Ecclesia, intelligi posset, et nusquam in regionibus nostris integram super eum explanationem inveniebamus, impulsus sum opus istud aggredi, ut quantulamcunque darem intelligentiam his qui prophetæ dicta legebant vel audiebant, et non intelligebant.

Qui ergo prophetam hunc non intelligit, et aliam ejus expositionem non habuerit, vel non invenerit, non dedignetur istam recipere, nisi semper Isaiam voluerit ignorare. Si quis vero hanc forte gratam sibi esse judicaverit, aut aliquem ex ea fructum perceperit, Auctori bonorum omnium inde grates referat, ipsumque precetur, ut tanti laboris mercedem in futuro sæculo mihi restituat. Qui vivit et regnat Deus in omnia sæcula sæculorum. Amen.

HERVEI

BURGIDOLENSIS MONACHI

COMMENTARIA

IN

EPISTOLAS DIVI PAULI.

(Edit. Opp. S. Anselmi, Colonie, anno 1573, apud Maternum Cholinum data, fol., t. II.)

PRÆFATIO.

De epistolis Pauli apostoli, adjuvante Domino, *D* stola significet. *Epistola* Græce, *supermissa* Latine *locuturi*, *primo* videamus quid ipsum nomen *epi-* dicitur, sicut *epigramma super littera*, et *epita-*

phium *super sepulcrum* : *epi* enim græce, latine *A* *super* ; *stola* vero *missa* dicitur. Et hinc epistolæ dicuntur *supermissæ*, eo quod *super* id quod fideles acceperant, sint eis *missæ*. Acceperant enim Evangelium et adhuc *superadditæ* sint illis Epistolæ, et ob varias causas *directæ*. Nam sicut propheta post editam legem Moysi, in qua omnia Dei mandata *legebantur*, semper doctrina sua *compresserunt redi-viva* populi peccata, et propter exemplum libris ad nostram etiam memoriam *transmiserunt* : sic et Apostolus post Evangelium ; quod est legis supplementum, et in quo nobis exempla et præcepta *vi-vendi* plenissime digesta sunt, has epistolas voluit ad singulas ecclesias destinare, scilicet ut in initio nascentis ecclesiæ novis causis existentibus, et præsentia atque orientia *resocaret vitia* et post futu-
B *ras* excluderet quæstiones. Sicut ergo *necessariæ fuerunt* post legem prophetiæ, sic *necessariæ sunt* post evangelium epistolæ. Quoniam sicut ea, quæ in lege fuerant *obscurissime dicta*, per prophetas *aliquantulum manifestabantur*, et transgressores ejusdem legis per eos *corrigebantur* ; sic quod in Evangelio *obscure et generaliter dictum fuerat*, apostolica instructione per partes *elucidatum est*, et transgressores evangelicorum præceptorum sunt *correcti*, et ad observantiam eorum *incitati*.

Hujus autem Pauli apostoli epistolæ sunt quatuordecim, quas legit Ecclesia, qui tamen et quintam decimam ad Laodicenses sine dubio scripsit. Et cum in prima, quam habemus ad Corinthios, dicit : *Scripsi vobis in Epistola, ne commisceamini fornicariis* (I Cor. v), videtur significare aliam epistolam se jam eis scripsisse. Cum ergo plurimas epistolas scripserit, non sine certa mysterii ratione patres voluerunt, ut quatuordecim tantum legerentur in ecclesia : decem videlicet ad ecclesias *missæ*, quatuor autem ad discipulos. Sed et ex ipso epistolarum numero ostendere voluerunt, quod doctor egregius, legis et evangelii secreta rimatus esset, denarius enim numerus legem significat, propter decalogum ejus ; quaternarius autem evangelium, propter quatuor ejus libros. Decem itaque tenentur, quas scripsit ad ecclesias, ut demonstraretur Novum Testamentum a Veteri non discrepare, nec Apostolum in aliquo contra legem Moysi fecisse, *cujus*
D *epistolæ ordinantur ad numerum primorum Decalogi mandatorum ejusdem legis ; et quot præceptis Moyses filios Israel instituit a Pharaonis jugo liberatos, totidem hic epistolis a diaboli et idololatriæ servitute ereptos edoceret*. Per quatuor autem ad discipulos scriptas, Novum designatur Testamentum. Unde et iidem discipuli majoris perfectionis fuerunt, quam ecclesiæ, ad quas decem sunt *missæ*, ut significaretur imperfectio eorum qui sub lege fuerunt, et perfectio eorum qui evangelium custodiunt. Quod autem quatuor ad discipulos, post novem ad ecclesias posuere patres, et illam, quæ est ad Hebræos, ad ultimum locaverunt : certissime dat intelligi, quod Novum in Veteri Testamento con-

tinetur, et quod unum sine altero non prodest. Sicut enim quaternarius denario junctus explet hanc summam, id est quatuordecim, ita Novum et Vetus Testamentum unum quid operantur, et intendunt fidei veritatem ac morum honestatem intimare cordibus auditorum suorum.

Itaque quatuordecim epistolis continetur doctrina Pauli, qua tam majores quam minores, quomodo vivant et credant, instruuntur, quoniam sancta ecclesia juxta ejus institutionem utrumque Testamentum custodiens, et tam secundum legis catalogum, quam secundum quatuor evangelii libros vivens, ad perfectionis culmen proficit.

His ita præmissis, videndum est qua ratione alio ordine a sanctis Patribus Spiritus sancti consilio istæ epistolæ in uno volumine sunt collectæ, quam ab Apostolo factæ. Quæ et nobis derelictæ sunt ad correctionem et exhortationem nostram, ut omnes quotquot vulnerati cadimus, ibi inveniamus quomodo resurgere queamus, et inde recuperare quod amisimus. Ideo quemdam gradationis ascensum in his notare possumus, quoniam ecclesiæ, quæ magis in fide et morum honestate quam declaratione illarum regitur, epistolæ sunt præpositæ, ut secundum quod minus perfectis ecclesiis *missæ præcedunt* epistolæ, et subsequuntur ad perfectiores destinatæ, gradus quidam ascensionis a minoribus ad majora inveniantur. Nemo enim repente lit summus, sed a minimis quisque inchoat ut ad majora perveniat.

Epistola ergo ad Romanos prima est, quia cum fides prima virtus sit et fundamentum aliarum virtutum, et sine qua impossibile est placere Deo (Hebr. xi), dignum fuit ut illa epistola in capite aliarum locaretur, in qua de prima virtute agitur, et in qua corriguntur, atque ad fidei perfectionem revocantur, quicumque Romanis secundum fidei imperfectionem sunt similes. Illa vero quæ est ad Corinthios, jure huic supponitur, quoniam eos qui fidem jam acceperant, in bono opere instruit. Primo enim jaciendum est fundamentum, id est fides, et inde bona opera sunt superædificanda. Propter quod in illa ad Romanos facta est omnibus fidelibus instructio secundum fidem ; in hac autem ad Corinthios, secundum operationem. Sic et cætera deinceps congruo ordine sunt positæ.

Fuerunt nonnulli tamen qui dixerunt epistolam ad Romanos ideo primam esse positam, quia Romani tam rudes erant, ut non Dei gratia, sed suis meritis crederant se esse salvatos. Sed hoc non ita declarat in omnibus textus ipsius epistolæ, quæ omnibus sensu profundior est. Ideoque magis credendum est quod illi qui membra epistolarum in uno corpore collegerunt, illam judicaverunt sedere in capite, quæ ad urbem directa est, quæ in illo tempore caput totius exstitit orbis, et quia usque hodie Romana ecclesia omnium ecclesiarum obtinet principatum.

Materia vero omnium epistolarum est fides, et

bont mores. Intentio autem est, ipsam fidem ac mores commendare, et ad illos provocare, videlicet suadendo bona, dissuadendo mala; prave agentibus mala comminando, bene agentibus bona promittendo. Et propter quam finalem causam? Nulli dubium quin propter veram beatitudinem promerendam. Ad hanc igitur unam et generalem intentionem aliæ speciales reducentur intentiones, nec quidquam per omnes diversos tractatus interseritur, quod non ad instructionem fidei et morum vel principaliter, vel secundario operetur. Et ideo ad ethicam pertinet tractatus earumdem epistolarum. Illa vero quæ est ad Romanos, quantum ex ejus textu intelligi potest, quæstionem habet talem: Utrum Judæis evangelium Christi venerit propter merita operum legis, an vero nullis operum meritis præcedentibus, omnibus gentibus venerit justificatio fidei quæ est in Christo Jesu, ut non, quia justi erant homines, crederent, sed credendo justificati, deinceps juste vivere inciperent.

In hac igitur epistola docere intendit Apostolus omnibus venisse gratiam evangelii Christi. Quam et ideo gratiam vocari ostendit, quia non quasi debitum justitiæ redditum est, sed gratuito datum. Cœperant enim nonnulli, qui ex Judæis crediderant, tumultuari adversus gentes, et maxime adversus ipsum Paulum, quod incircumcisi et a legis vetustæ vinculis liberos ad evangelii gratiam, prædicans eis ut in Christum crederent, nullo imposito carnalis circumcisionis jugo. Sed Apostolus tanta moderatione invicem utrosque conciliat, ut nec Judæos superbire permittat, tanquam de meritis operum legis, nec gentes merito fidei adversus Judæos inflari quod ipsi receperint Christum quem crucifixerunt (*II Cor. v*). Pro Christo enim, sicut alibi dicit, legatione fungens, id est pro lapide angulari utrumque populum tam ex Judæis quam ex gentibus connectit in Christo per vinculum gratiæ, utrisque auferens omnem superbiam meritorum, et justificandos utrosque per disciplinam humilitatis associans. Quod si quis quæsierit quomodo Judæi, qui Romæ erant conversi, murmurarent contra Paulum, quem necdum viderant, sciat ipsum non eis ignotum fuisse, quia fama prædicationis ejus ubique audiebatur, et quidam ex discipulis ejus atque ex discipulis Petri jam venerant Romam, et

A multos ibi tam ex Judæis quam ex gentibus ad fidem converterant. Sed inter eos nuper conversos erat, ut diximus, schisma et altercatio; Judæi enim gloriabantur de suis meritis et nobilitate generis, non intelligentes se ad fidem per gratiam Dei venisse, sed æstimantes hoc suis et patrum meritis accepisse; gentiles autem, licet non præcessissent merita eorum de quibus gloriari possent, ut se Judæis anteferrent, tamen Judæos quasi interfectores Christi ac prævaricatores legis despiciebant, et se soli ignorantia præpeditos fuisse, quod non antea crederant, asserebant, scilicet viribus rationis et arbitrii sui, non æstimantes necessarium esse opus divinæ gratiæ. Utrisque ita contentiose viventibus, sic corrigit Apostolus. Judæis enim ostendit fidem et cætera spiritalia bona nullis præcedentibus meritis evenisse, sed ex sola gratia, quoniam lex neminem justificavit, solummodo dans peccati notitiam. Sic etiam probat gentes non ex ignorantia, sed scienter ex studio multumque graviter Deum offendisse, quia licet scriptam legem non habuerint, naturalem tamen habuerunt. Et cum cognitum de creatura Creatorem, ut Deum venerari debuissent, gloriam ejus in manufacta simulacra mutaverunt. Utrisque etiam similiter veniam consecutos, æquales esse verissima ratione demonstrat, præsertim cum in lege prædictum sit, et Judæos et gentes ad Christi fidem esse vocandos. Quamobrem vicissim eos humilians, ad pacem et concordiam cohortatur.

C Occasio itaque hujus epistolæ fuit eorum altercatio, circa quam totum versatur negotium. In quo tractatu intendit Apostolus superbiam et elationem utriusque partis reprimere, per quam ad invicem dissentiebant, ut nullo jure nullisque suis meritis gloriantur, sed ad humilitatem potius revocentur, et totum quidquid boni habent, gratiæ Dei deputent, et ita per humilitatem in concordiam et pacem redeant.

Materia vero hujus epistolæ est ecclesia Judæorum et gentilium, ob supra dictas causas discordantium. Sed his jam explicitis, ad librum accedamus. Apostolus enim priusquam exponere incipiat quod intendit, prologum facit, quo auditores attentos, dociles ac benevolos reddit, salutaturque, dicens:

EXPOSITIO IN EPISTOLAM AD ROMANOS.

CAPUT PRIMUM.

Paulus, servus Jesu Christi, vocatus Apostolus, segregatus in Evangelium Dei, quod ante promiserat per prophetas suos in Scripturis sanctis de Filio suo, qui factus est ei ex semine David secundum carnem, qui prædestinatus est Filius Dei

D in virtute, secundum Spiritum sanctificationis, ex resurrectione mortuorum Jesu Christi Domini nostri, per quem accepimus gratiam, et apostolatam ad obediendum fidei in omnibus gentibus pro nomine ejus, in quibus estis et vos vocati Jesu Christi, omnibus qui sunt Romæ, dilectis Dei vo-

« caulis sanctis : Gratia vobis et pax a Deo Patre, et a Domino nostro Jesu Christo. »

Jam primum videamus, cur is qui antea dictus est Saulus, nunc dicatur Paulus. Saul rex superbus et infrenis fuit, et persecutor sancti David, atque de tribu Benjamin natus. De qua tribu et iste Saulus fuit, atque nomen et sævitiam, velut hæreditatem, a Saule percepit. Saulus ergo nomen est superbi persecutoris. Sed et Saul atque Saulus, idem nomen est. Quod enim Saulus a nobis dicitur, hoc idioma græcum et latinum fecit, ut Hebræa nomina ad suorum casuum similitudinem declinaret; et sicut pro Joseph Josephus, pro Jacob Jacobus, ita Saul quoque Saulus in nostra lingua dicitur. Qui cum Paulum proconsulem Christo subjugasset, ipse quoque ex Saulo Paulus appellari voluit, ob tam clara pulchræ victoriæ insignia. Plus enim hostis vincitur in eo quem plus tenet, et de quo plures tenent (204). Plus autem superbos tenet nomine nobilitatis, et de his plures nomine auctoritatis. Sicut ergo ille qui Africam subegit Scipio, dictus est Africanus; sic et Apostolus iste post Pauli subjugationem, semper vocatus est Paulus, qui antea solebat appellari Saulus. Nec immerito: nam Saulus sive Saul interpretatur *petitus*, eo quod ad debellandam Ecclesiam a diabolo fuerat postulatus. Paulus vero dicitur mirabilis, et digne ad prædicationem gentium missus. Nominatur Paulus, idem, mirabilis, ut mirabiliter lucrificeret mercedem fidei. Est enim dux valde mirabilis, qui non in sapientia verbi, non in divitiis, non in eloquentia, non in vana sæculi gloria, sed in Christi passionibus gloriatur. Potest et alia ratio super hac re proferri, quia forsitan binomius fuit, scilicet ut et Saulus vocaretur et Paulus. Nam et hoc probabilius dici videtur, quia quod eum a Paulo proconsule quem Christo subjecit, Paulum vocari diximus, nulla talis consuetudo in divinis Scripturis deprehenditur. Sed in eisdem Scripturis invenimus nonnullos binis, alios etiam ternis usos esse nominibus, sicut Sedechiam, eundemque Joachim; sicut Oziam eundemque Azariam; sicut Salomonem, eundemque Ididan sive Ecclesiasten, aliosque plurimos. Sed nec apostolis Christi mos iste defuit. Nam unus ex eis vocatus est Matthæus et Levi, alius autem Lebbæus et Judas Thadæus. Quia ergo moris erat binis vel ternis nominibus uti Hebræos, videtur et hic apostolus duplici usus esse vocabulo; et donec quidem genti proprie ministrabat, Saulus esse vocatus, quia hoc magis appellationi patriæ vernaculum videbatur (Act. xiii); Paulus cum Græcis et gentibus leges ac præcepta daret. Nam et hoc ipsum quod Scriptura dicit, Saulus autem qui et Paulus, manifeste videtur ostendere, non ei tunc primum Pauli nomen impositum esse, sed veteris appellationis id fuisse. Sive ergo ista, sive prior ratio sit verior, unum pro certo est, quia iste apostolus ex quo ad prædicand-

dum gentibus cum Barnaba missus est, maluit Paulus vocari quam Saulus. Et hoc nomen suum celebre, et omnibus cognitum præponit in hac epistola, ut Romani, audito tanti viri nomine, attendant quid eis velit persuadere, quid dignetur præcipere, scilicet ut ad audiendum solliciti, et ad obediendum existant parati. *Paulus*, inquit, ac si diceret: Vos Romani pacem debetis inter vos habere, quia ille qui vobis scribit, est Paulus, id est non persecutor Christianorum, sed doctor; non dissipator Ecclesiæ, sed constructor; neque dissensionis, sed unitatis et concordie persuasor. Nec debetis in elationem tolli, quia ille qui vos docet, est *servus*, id est humilis, et non absque jugo Domini. Servus enim nomen humilitatis est, ut ad eam provocet. Sed cum Dominus electis discipulis dicat: « Jam non dicam vos servos (*Joan. xv*), » quomodo iste est servus? Sed sunt duo genera servitutis: unum timoris, alterum dilectionis; unum timentium servorum, alterum diligentium et placentium filiorum. Electi ergo discipuli non sunt servi secundum servitutem timoris, quem perfecta dilectio foras mittit (*I Joan. iv*), sed secundum servitutem casti timoris, quem perfecta charitas gignit. Paulus itaque servus est, non ex servili timore, sed ex casto amore serviens Deo. Qui personam suam et officium primo commendat, ut sermonibus suis et correctionibus Romani facilius acquiescant, et exemplum ab eo humilitatis et concordie sumant. Paulus enim, sicut diximus, interpretatur *mirabilis*. Et ipse revera mirabilis erat, quem Deus tanta meritorum prærogativa mirificaverat. Et tamen se in omnibus humiliabat, et se servum humiliter fatebatur, ut exemplum omnibus daret humilitatis, ne quisquam de suis meritis aut viribus gloriaretur, sed omnes gratiæ Domini reputarent, quidquid boni haberent: et se non superbe liberos, sed humiliter servos cognoscerent. Quod autem alii dicunt Paulum dici latine *modicum*, et Græce *quietum*, nos multum non approbamus, quia hoc nomen non est græcum aut latinum, sed hebraicum, ideoque juxta hebraicum sensum intelligendum.

Paulus servus Jesu Christi. Ac si dicat: Non me liberum facio, nec me domino meo æquiparo, sed ejus servum me reputo et subjectum, et quidquid boni habeo, ejus gratiæ totum ascribo. Vos autem non servos ejus, sed liberos constituitis, et donum gratiæ ejus, quod in vobis est, derogantes, meritis vestris et ingenii viribus ascripsistis. Servus, inquit, sum Jesu Christi. Et hoc ad commendationem personæ suæ valet, quia et servus et honestus, et Dominus incomparabiliter honestior. Ideoque tanti Domini tam honestus servus, libenter debet suscipi. Nondum se dicit apostolum, sed tantummodo servum, cum in aliis epistolis mox præferat nomen auctoritatis, quia nondum Romanis prædicaverat, nec adhuc apostolus esse videbatur. Et ideo eis-

præponit nomen humilitatis, cum illos ad humilitatem invitaret, quod si per auctoritatis nomen ad obediendum constringeret.

Servus Jesu Christi. Aliam significationem habet Jesus, aliam Christus, cum sit unus Jesus Christus, Salvator noster (205). Jesus enim proprium nomen est illi, quomodo Moyses proprio nomine appellatus est, quomodo Aaron, quomodo Elias. Christus autem sacramenti nomen est, quomodo si dicatur legislator, quomodo si dicatur sacerdos, quomodo si dicatur propheta. Sic enim et Christus commendatur unus, in quo esset redemptio totius populi Israel. Quem Judæi venturum expectabant, sed quia venit humilis, non cognoverunt eum.

Vocatus apostolus in Evangelium Dei. Vocatus est ab infidelitate ad fidem, quando pergenti ire ad Damascum Christus illi de cælo est locutus (Act. ix). Et institutus est Apostolus, quod latine dicitur *missus*, quando post oranti in templo apparuit illi Dominus, dicens: « Festina et exi velociter ex Jerusalem, quoniam non recipient testimonium tuum de me. Vade, quoniam ego ad nationes longe mit- tam te (Act. xxii). » Qui et *segregatus est in Evangelium Dei*, dicente post apud Antiochiam Spiritu sancto: « Segregate mihi Barnabam et Paulum in opus ad quod assumpsi eos (Act. xiii). » In his omnibus gloriari Paulus posset, quoniam hæc omnia, Domino apparente et loquente, consecutus est. Magnus enim ostenditur, quem sic Deus per seipsum promoveri dignatur. Sed cum maximas gloriandi occasiones habeat, in omnibus tamen se humiliat, ut omnes exemplo sui ad humilitatem trahat. Et ideo servum se in prima fronte nominat. Vocatus autem, qua vocatus est, non illa est de qua dicitur: « Multi sunt vocati, pauci vero electi (Matth. xx), » sed illa potius de qua ipse loquitur: « Quos autem prædestinavit, hos et vocavit; et quos vocavit, hos et justificavit (Rom. viii). » Qui et Apostolus, id est a Christo missus est, ut legatione pro eo fungens, omnes ad vitam vocaret. Et non sicut cæteri apostoli missus est, sed segregatus in Evangelium Dei. Cum enim unicuique apostolorum destinata esset ad prædicandum sua provincia, Paulo et Barnabæ commissum est officium prædicandi in omnibus gentibus. Et ita segregati sunt isti duo, id est seorsum a grege cæterorum prædicatorum, evangelizare mis- si. Vel segregati in Evangelium, quia de grege cæterorum prædicatorum, qui Antiochiæ morabantur, electi sunt a Spiritu sancto in opus prædicationis. Evangelium interpretatur *bonum nuntium*, quia ibi nuntiatur humana salus per incarnationem et mortem et resurrectionem Christi. Quod Evangelium non est hominum, sed *Dei*, id est non ab hominibus institutum vel inventum, sed a Deo.

Quod ante promiserat per prophetas suos. Ad commendationem prædicatoris, ponit commendationem Evangelii. Unde etiam prædicator ipso satis

A posset gloriari, quasi dicat: Segregatus sum in Evangelium, quod non est subitum nec improvisum, quia ante completionem promiserat illud Deus, ut cum desiderio expectaretur, et veniens devote et absque ullo scrupulo susciperetur. Non est frivolum neque recens, quod Deus Pater promiserat gratis, et non noviter, sed ante, id est per multa prius sæcula. Promiserat illud ante per prophetas, neque per alienos prophetas, sed suos. Nam et prophetae qui non fuerunt sui, nonnulla de Christo prædixerunt, sicut Sybilla et Virgilius. Sed Apostolus de illis prophetis loquitur qui fuerunt ejus, sicut Isaias et Jeremias. Promiserat, inquam, per prophetas, et hoc non verbis tantum, sed in Scripturis, non sæcularibus, sed *sanctis*, id est divinis. Nam in libris gentium inveniuntur testimonia veritatis, sicut idem Apostolus Atheniensibus loquens ostendit. Sed qui in eisdem libris etiam errores prædicantur, ideo non sunt sancti, quamvis aliquid in eis ad Christum pertinens, inveniatur. Sed Scripturæ illæ sunt sanctæ, quæ fuerunt Hebræorum populo divinitus creditæ, et in eis leguntur promissiones Evangelii dandi, quas per veros prophetas suos ab antiquis temporibus fecit. In eis Scripturis relictæ sunt promissiones scriptæ, ne oblivioni darentur, et ad notitiam posterorum non pervenirent. Scripturis dico, *de Filio suo*, quia omnes illæ de unigenito Dei sunt factæ, et omnes ejus divinitatem, per quam omnia facta sunt, prædicant ejusque humanitate omnia restauranda prænuntiant.

Qui factus est, id est qui manens quod erat, assumpsit quod non erat. Dico, factus est hoc non secundum divinitatem, sed *secundum carnem*, quia secundum divinitatem genitus est a Patre, non factus; secundum carnem vero factus est ei, id est ad honorem ejus, ut Pater glorificaretur per humilitatem incarnationis et obedientiæ illius. Factus est, et hoc non ex qualibet stirpe, sed *ex semine David*, quia incorrupta mater ejus, ex cujus sanctificato virginali utero ipse carnem assumpsit, orta est ex progenie David, cui Deus promiserat quod ex semine ejus rex æternus esset suscitandus. Sic enim dixisse legitur: « Cumque completi fuerint dies tui, et dormieris cum patribus tuis, suscitabo semen tuum post te, quod egredietur de utero tuo, et firmabo regnum ejus. Ipse ædificabit domum nomini meo, et stabiliam thronum regni ejus usque in sempiternum. Ego ero ei in patrem, et ipse erit mihi in filium (I Paral. xvii). » Secundum istam promissionem Filius Dei ex semine David factus est homo, ut ædificaret domum, quæ est ecclesia, et regnaret in sempiternum.

Qui prædestinatus est Filius Dei in virtute. Prædestinatus, id est præordinatus a Deo Patre secundum humanitatem, hoc est sola gratia præelectus, ut qui futurus erat secundum carnem filius David

esset tamen in virtute divinitatis Filius Dei, id est **A** ita susciperetur humanitas a Verbo Dei in unitate personæ, ut idem homo Filius Dei esset propter unionem Verbi, Filius Dei esset *secundum Spiritum sanctificationis*, id est secundum quod Spiritus sanctus uterum virginis ex quo ille nasceretur, sanctificavit, sicut et angelus dixit: « Spiritus sanctus superveniet in te, et virtus Altissimi obumbrabit tibi, ideoque et quod nascetur ex te Sanctum, vocabitur Filius Dei (*Luc. 1.*) » Prædestinatus est, et hoc *ex resurrectione mortuorum*, id est ut præcederet resurrectionem mortuorum. Quorum mortuorum? *ejusdem Domini nostri Jesu Christi*. Ac si diceretur, suorum mortuorum, qui ad eum pertinent et membra ejus sunt. Hos enim præcessit, qui cum ad cælesti regnum, quo eos præcessit, secuturi sunt, et **B** ad beatam incorruptionem. Ex resurrectione autem cæterorum mortuorum non est prædestinatus, quos non erat præcessurus, sed damnaturus, quia non præcessit illos, qui eum secuturi non erant ad gloriam vitæ æternæ, id est reprobos qui ad poenas resurrexerunt. Vel ita: *Qui prædestinatus est secundum carnem*, quoniam Deus ab æterno prædestinavit, ut Verbum ejus caro fieret, quam et resuscitans glorificaret. Prædestinatus est, ut sit Filius Dei in virtute immortalitatis et potentia, de qua post resurrectionem ait: « Data est mihi omnis potestas in cælo et in terra (*Matth. xxviii.*) » Nam cum de electis ipse dicat, quia filii sunt Dei, cum sint resurrectionis, cur non ipse magis qui secundum divinitatem naturaliter est semper Filius Dei, in resurrectione secundum humanitatem factus esse dicatur Dei filius? Hoc enim docet idem Paulus, ubi de patre dicit in Actibus apostolorum: « Resuscitans Jesum Christum, sicut in psalmo secundo scriptum est: Filius meus es tu, ego hodie genui te (*Act. xiii.*) » Pater ergo resuscitans Christum, dixit ei: « Filius meus es tu, ego hodie genui te, » ut illa resuscitatio, secundum Pauli sensum, intelligatur quædam generatio, quia et nostra resurrectio vocatur generatio, dicente Domino: « In regeneratione cum sederit Filius hominis in sede majestatis suæ (*Matth. xix.*) » Christus itaque secundum humanitatem, qui, dum esset mortalis, erat Filius hominis, in resurrectione vestiens immortalitatem, factus est **D** Dei, nec tamen destitit esse filius hominis, quia verus homo permansit, sed gloriam quam humanitas non habebat, accepit. Et hoc est quod nunc dicitur, quia prædestinatus est esse Filius Dei in virtute ex resurrectione, nec dicitur ex resurrectione sua, sed quod majoris virtutis est, ex *resurrectione mortuorum*, quia multos mortuos fecit secum resurgere: Et ne generalem bonorum atque malorum resurrectionem intelligeremus, quæ futura est in die novissimo, *mortuorum*, in *Jesu Christi*, id est solummodo electorum, ad Christum pertinentium, quia tunc non nisi sancti cum eo surrexerunt. Unde et Dominum nostrum vocat eum, quia qui in morte sua mortem nostram et hostem antiquam destruxit,

in resurrectione debitum super nos dominatum accepit: sicut præmisimus, cum tunc dixisset: « Data est mihi omnis potestas in cælo et in terra (*Matth. xxviii.*) » Prædestinatus est, inquit, esse Filius Dei in virtute ex resurrectione, et hoc *secundum Spiritum sanctificationis*, id est secundum quod Spiritus sanctus eum sanctificavit ab ipso exordio conceptionis ejus. Nam per Spiritum quo sic sanctificatus fuerat, suscitatus est a morte, ut esset eo modo quo diximus, Filius Dei, quia et nobis dicitur: « Qui suscitavit Jesum a mortuis, vivificabit et mortalia corpora vestra propter inhabitantem Spiritum ejus in vobis (*Rom. xlviii.*) » Vel *prædestinatus est*, ut diximus, secundum humanitatem ut esset Filius Dei in virtute, id est in eadem potentia cum Patre per unionem Verbi, cui personaliter homo ille unitus, *secundum Spiritum sanctificationis*, id est secundum quod operatus est Spiritus sanctus conceptionem ejus in utero virginis. Qui Spiritus est sanctificationis, quia sanctificat omnes qui sanctificantur. Et hæc sanctificatio est a resurrectione mortuorum, id est incipit a remissione peccatorum. Qui enim mortui sunt in anima, prius resurgunt a morte peccati, et tunc sanctificantur per Spiritum sanctum. Et tales mortui qui sic ad vitam redeunt, sunt Jesu Christi Domini nostri. Præordinati enim sunt ad vitam ut sint membra Christi; ideo non perseverant in morte peccati, sed pœnitendo resurgunt. Itaque cum audimus, Filius Dei in virtute Jesu Christi, vel Filius Dei secundum Spiritum sanctificationis Jesu Christi, vel Filius Dei ex resurrectione mortuorum Jesu Christi, cum dici potuisset usitate, in virtute sua, vel Spiritum sanctificationis suæ, vel ex resurrectione mortuorum ejus, vel mortuorum suorum, non cogimur intelligere aliam personam, sed unam eandemque, scilicet Filii Dei Domini nostri Jesu Christi, *per quem accepimus gratiam*. Ad commendationem suæ personæ commendaverat Evangelium quod ipse prædicat, et ad commendationem Evangelii commendavit Christum qui auctor ejus est. Et nunc, quid ipse per eum sit adeptus, indicat. Quasi dicat: Talis ac tantus est Christus, per quem mediatorem accepimus a Patre ego et Barnabas vel cæteri apostoli gratiam et apostolatam: *gratiam*, cum omnibus fidelibus; *apostolatam* vero, non cum omnibus. Si tantummodo apostolatam diceret se accepisse, ingratus esset gratiæ qua illi peccata dimissa sunt, et tanquam meritis priorum operum accepisse videretur apostolatam. Optime ergo tenet ordinem causæ, ut nemo audeat dicere meritis vitæ prioris ad Evangelium se esse perductum, cum nec ipsi apostoli accipere apostolatam proprio potuissent, nisi prius communiter cum cæteris gratiam, quæ peccatores sanat et justificat, accepissent. Prius itaque *gratiam*, qua purgarentur a peccatis et sanctificarentur, acceperunt; et post *apostolatam*, id est legationem ut excurrerent ubique prædicare ipsam Evangelii gratiam. *ad obediendum fidei*, id est obediatur fidei,

pro nomine Christi, id est ut omnes credant in Christum, et signentur in ejus nomine qui salvari cupiunt. Et hoc fiat non in Judæis tantum, sed in omnibus gentibus, ubicunque per totius orbis amplitudinem diffusæ sunt gentes. Vel obediat fidei ut faciant fideles quæcunque fides expetit, non solum credendo, sed etiam operando: et hoc pro nomine Christi, id est pro gloria ejus, non pro sua, scilicet ut in bonis quæ fecerint, non suam, sed Christi gloriam quarant; nec suum, sed Christi nomen magnificare cupiant. Accepi, inquit, apostolatam in omnibus gentibus, ut in eis obedire faciam plurimos fidei pro nomine Christi glorificando. In quibus gentibus, super quas scilicet mihi datus est apostolatus, estis etiam vos. Hoc dicit ut familiarius admoneat. In quibus fidei obedientibus estis et vos, o Romani! qui per gratiam prædicationis estis ad fidem vocati, et estis non eorum qui vos vocaverunt, sed Christi ad quem vocaverunt.

Vocati enim Jesu Christi estis, id est ad hoc vocati ad fidem, ut sitis Jesu Christi, non Petri vel alterius. Illicque dictum est, quis esset qui scribit epistolam. Est enim qui scribit, Paulus servus Christi Jesu, vocatus Apostolus, segregatus in Evangelium Dei. Sed quia occurrebat quod Evangelium, respondit: Quod ante promiserat per prophetas suos in Scripturis sanctis de Filio suo. Item quia occurrebat de quo Filio suo, respondit: Qui factus est ex semine David secundum carnem, qui prædestinatus est Filius Dei in virtute, secundum Spiritum sanctificationis, ex resurrectione mortuorum Jesu Christi Domini nostri. Et si diceretur, quomodo tu ad eum pertines? respondit: Per quem accepimus gratiam et apostolatam ad obediendum fidei in omnibus gentibus pro nomine ejus. Item si diceretur, quæ igitur causa, ut scribas ad nos? respondit: In quibus estis et vos vocati Jesu Christi. Deinde adjungit ex more epistolæ, quibus scribat: Omnibus, inquit, qui sunt Romæ, dilectis Dei, vocatis sanctis. Non sanctis ait, diligentibus Deum, sed dilectis dicitur, ut bonitatem Dei potius quam meritum illorum significaret (I Joan. iv). Prior enim dilexit nos ante omnia merita, ut nos dilecti eum diligeremus. Quos et gratuito suo munere prædicatores vocavit, atque per baptismum sanctificavit. Omnia ergo bona divinæ gratiæ, non humanis meritis sunt ascribenda. Eos enim, qui odibiles et procul ac turpes erant dilexit et vocavit et sanctificavit. Vel, ut brevius concludam, dilexit, ut vocaret ad sanctitatem. Post hæc, ut compleatur usitatum epistolæ principium, salutatos illos, dicens: Gratia vobis et pax a Deo Patre nostro et a Domino, etc. Gratia et pax sit vobis a Deo, quia non omnis gratia neque omnis pax est Dei vel a Deo. Nam et iudices mali præbent gratiam in accipiendis personis aliqua cupiditate illecti, aut timore perterriti, atque mala pax est, qua vitii aut diabolo concordatur. Sed illa gratia est a Patre et Christo, qua nobis remittuntur peccata, quibus adversamur Deo; et pax, qua reconciliamur ei.

Cum enim per gratiam remissis peccatis, assumptæ fuerint inimicitia, restat ut pace adhæreamus ei, a quo nos sola peccata dirimebant. Gratia vocatur, quia non ex merito retributa, sed ex donante concessa est. Talis, inquit, gratia et pax sit vobis a Deo Patre nostro, qui nos in filios adoptavit et amari atque honorari vult a nobis ut pater, et a Domino Jesu Christo, id est a Filio qui nos de manu inimici redemit, et suo dominio mancipavit, et est Salvator atque rex noster. Gratiam et pacem optat a Patre et Filio, nec adjungit Spiritum sanctum, quia ipse Spiritus sanctus donum Dei est; et donum Dei, gratia et pax est. Ideoque tota trinitas in hac salutatione ponitur, dum Pater et Christus a Patre nominantur, et Spiritus sanctus gratia et pace significatur. Nullo enim modo dari hominibus gratia potest qua liberamur a peccatis, et pax qua reconciliamur Deo, nisi in Spiritu sancto.

Primum quidem gratias ago Deo meo per Jesum Christum pro omnibus vobis, quia fides vestra annuntiatur in universo mundo.

Commendata multis modis sua persona, et facta salutatione, sicut mos est in epistolis, iterum reddit eos benevolos, nimiam erga eos ostendendo se habere charitatem. Nam quia illos asperrime erat remorsurus, primo leniter inchoat, et illorum benevolentiam captat, ne si statim eos acriter reprehendere cœpisset, illorum impatientia reprehensiones illas graviter ferret, quasi dicat: Multa sum vobis dicturus. Et primum quidem, antequam illa dicam, hoc vobis intimo, quia gratias ago Deo meo pro omnibus vobis, congaudens boho inceptui vestro. Ago, inquam, gratias Deo meo, qui cum sit natura et potestate Deus omnium merito et voluntate paucorum est. Ideo dixit: Deo meo. Non enim potest vox ista esse nisi sanctorum, quorum Deus dicitur, sicut Deus Abraham, et Deus Isaac et Deus Jacob. Non potest vox ista eorum esse, quorum Deus venter est, vel qui vitium aliud quodlibet fecere sibi Deum. Ago gratias Deo, id est sacrificium laudis illi offero, non per me, sed per magnum pontificem, id est Jesum Christum. Qui enim vult Deo sacrificium offerre, per manus pontificis debet offerre. Et ego tale sacrificium per hunc sacerdotem offero pro omnibus vobis, ut et vos similiter faciatis, ageutes semper Deo gratias pro beneficiis quæ vobis contulit. Agere enim Deo gratias est sentire omnia bona ab eo esse data, et pro his laudare corde, voce et opere. Agatis et vos gratias Deo per Jesum mediatorem, per quem vobis dedit Deus quidquid boni habetis, et per quem accipitis quidquid boni offertis. Vel ita: Ago gratias pro omnibus fidelibus. Et primum quidem pro omnibus vobis, scilicet quia vos primi estis, quoniam Romana ecclesia primatum habet inter omnes ecclesias. Et hic quoque patet quod hæc epistola debuit prima poni. Ago gratias Deo, quem digne colendo meum facio, non per legem, sed per Christum. Ago, inquam, gratias, primum quidem pro vobis, deinde pro cæteris. Pri-

mun pro vobis, de quibus magna omnibus utilitas venit, quia fides vestra, etsi nondum perfecta, jam tamen *annuntiatur in universo mundo*. Roma tunc erat caput mundi, et de toto orbe illuc conveniebant, atque Romanos suscepisse fidem Christianæ religionis ubique divulgabant, sicque jam securius cæteræ per orbem nationes eandem fidem suscipiebant. Et hæc est laus fidelium Romanorum, quia tale de eis exemplum ubique spargebatur. Ideoque cavere debebant, ne sicut fama fidei ipsorum procul audita fuerat, ita rumor dissensionis audiretur, et multis noceret. Incitantur enim ad profectum per hoc quod fides eorum ubique renuntiatur. Fides est divinitatis confessio, et religionis solidum fundamentum, quia veraciter credimus id quod videre non possumus. Proprie vero nomen fidei inde vocatur, quia fiat quod dictum est aut promissum. Fides enim est dicta ab eo, quod fit illud quod inter utrosque placitum est, id est inter Deum et hominem, scilicet ut homo faciat opere quod dicit ore, et Deus reddat ei beatitudinem quam promisit.

« Testis enim mihi est Deus, cui servio in spiritu meo in Evangelio Filii ejus, quod sine intermissione memoriam vestri facio semper in orationibus meis, obsecrans si quo modo tandem aliquando prosperum iter habeam in voluntate Dei veniendi ad vos. Desidero enim videre vos, ut aliquid impartiar vobis gratiæ spiritualis ad confirmandos vos, id est simul consolari in vobis, per eam quæ invicem est, fidem vestram atque meam. »

Dixi quia gratias ago pro vobis, et hoc non fallaciter dixi; nam Deus est mihi testis quod semper sum vestri memor in orationibus meis. *Deus*, cujus scientia non fallitur, ipse *mihi testis est*, qui novit arcana, qui veritatem considerat, ipse mihi testis est, quod vera sunt quæ dico. *Cui servio in spiritu meo*, id est in affectu mentis meæ, quia non per simulationem illi famulatum exhibeo, sed quidquid foris bene erga servitutum ejus operor, hoc intus in voluntate cordis similiter facio. Servio illi, et hoc in *Evangelio Filii ejus*, id est in prædicatione unigeniti ejus, per cujus incarnationem et mortem ac resurrectionem annuntio datam esse mundo salutem. Et ipse Pater mihi testis est, quod in orationibus meis semper facio memoriam vestri, id est quotiescunque oro pro me, oro et pro vobis; nec vestri obliviscor in precibus meis, sed jugiter memoro, et hoc sine intermissione. Ecce prior facit Apostolus, quod alius præcipit: « Sine intermissione orate (*Thess. v.*) » Et tamen quod ait, *sine intermissione memoriam facio vestri*, non sic accipiendum est, quasi semper hoc ageret, cum fragilitas humana hoc implere non possit, sed ita potius intelligendum est quod nullus dies pertransiret, in quo pro eis non oraret. Hoc etiam dicit ut eum diligant, et audire desiderent, quem tanto studio pro ipsis orantem cognoscunt. Memor vestri sum in precibus meis, *obsecrans*, id est ob sacra quæ percepistis: Deum orans, *si quo modo*, id est ut aliquo modo prospero vel adverso,

tandem, id est post multa desideria, *aliquando*, id est saltem semel, si sæpius non potero; seu aliquando, id est aliquo tempore, sive æstatis, sive hiemis, *habeam iter prosperum*, id est efficax desideriorum meorum, *iter dico veniendi ad vos*, et hoc in *voluntate Dei*, quia tunc erit utilis adventus meus. Prosperum iter habeam in voluntate Dei, quoniam aliter prosperum iter non habeo, nisi voluntas Dei, quæ omnia novit, et bonis omnibus nos prævenit ac fovet, illuc me direxerit, ubi fructum aliquem habeam. Vel prosperum iter habeam in voluntate Dei, quia non semper prosperitas itineris in Dei voluntate perficitur, sicut eorum qui prosperis successibus ad malum currunt. Ideo venire ad vos obsecro, quia *desidero videre vos*, et hoc scilicet, *ut impartiar vobis aliquid*, id est ut faciam vos in aliquo participes spiritualis gratiæ, qui nunc carnali sensu ad invicem contenditis. *Impartiar vobis aliquid gratiæ spiritualis* quæ in me est, id est gratuiti beneficii Dei, videlicet prædicationis, vel miraculorum, *ad confirmandos vos*, id est ut vos confirmem, quia jam aliquid habetis, sed adhuc infirmi et vacillantes estis, ideoque spirituali gratia ad confirmationem indigetis per quam firmi esse possitis. Volo, inquam, vobis impartiri aliquid gratiæ spiritualis ad confirmandos vos in fide, id est volo simul consolari in vobis, *per eam quæ invicem est fidem*, ut per communem fidem invicem consolemur, et de gratia sancti Spiritus invicem gratulemur. Modo enim sum ego desolatus, et vos similiter, licet non sentiat. Sed sic consolationem accipiemus ego et vos, si ego opus meum in vobis firmum et stabile videro, et si vos apostolicæ gratiæ fueritis participes. Et ita *simul*, id est vicario modo et ego in vobis, et vos in me, consolationem habebimus, *per eam fidem quæ est invicem*, id est communis, quod est Græcæ Catholica, *fidem, dico vestram atque meam*, id est si vestram fidem videro meam, et meam esse vestram, ut una eademque sit et vestra et mea fides, tunc simul consolabimur.

« Nolo enim vos ignorare, fratres, quia sæpe proposui venire ad vos, et prohibitus sum usque adhuc, ut aliquem fructum habeam in vobis, sicut et in cæteris gentibus Græcis ac barbaris, sapientibus et insipientibus debitor sum, ita quod in me promptum est, et vobis qui Romæ estis, evangelizare. »

Credendum est quod dixi, me desiderium habere veniendi ad vos, quia, o fratres mei! id est ejusdem matris ecclesiæ filii, *nolo vos ignorare* quod non solum volui, sed *proposui venire ad vos*, et hoc sæpe *proposui*, sed efficere nondum potui, quia *prohibitus sum usque adhuc*, id est usque ad hoc tempus, vel a Spiritu sancto, vel a membris diaboli multa impedimenta mihi, dispensante Deo, ingredientibus. Ideo toties proposui ad vos venire, *ut habeam in vobis aliquem fructum æternæ mercedis, sicut et in cæteris gentibus*, id est ut pro labore prædicationis, quam vobis inpendo, habeam fructum supernæ retributionis, sicut habiturus sum pro cæteris gentibus,

quibus hucusque prædicavi a Jerusalem in circuitu A per universam Asiam usque in Illyricum, ubi Europa incipit. Exemplo gentium istarum, provocat Romanos. Vel *habeam fructum in vobis*, id est ut vos, accepto semine prædicationis, fructificetis virtutes et opera bona, quia fructum illum reputo meum. Volo, inquam, fructum in vobis taliter acquirere, sicut et in cæteris, quia in omnibus *sum debitor*, omnibus debitorem fecit me Deus, *Græcis ac barbaris, sapientibus et insipientibus*. Græci duabus appellationibus omne hominum genus distinxerunt, dicentes unumquemque vel græcum esse vel barbarum. Nam quia ipsi Græci legibus utebantur, omnes reliquos tanquam sine legibus viventes, barbaros appellaverunt. Et Apostolus non solum Græcis, sed et barbaris, nec solum sapientibus, sed et insipientibus debitor est, quia omnibus prædicare missus est. Græcos dicit sapientes, apud quos omnis philosophia erat; barbaros autem vocat insipientes, velut imperitos. Sed quomodo his omnibus est debitor, qui nihil ab eis accepit, nisi quia per gratiam sancti Spiritus ei datum est, ut omnium istorum linguis loqui posset? Nam quia linguarum notitiam non pro se quis, sed pro his quibus prædicandum est, accipit, debitor omnibus illis efficitur, quorum accipit a Deo linguæ notitiam. Sapientibus autem debitor est per hoc quod accepit sapientiam in mysterio absconditam, quam perfectis et sapientibus loqueretur. Insipientibus quoque factus est debitor in eo quod patientiæ gratiam et longanimitatis accepit. Summæ etenim patientiæ est, ferre insipientium motus. Itaque debitor est Apostolus *sapientibus*, ut eos ad majora sapientiæ arcana promoveat; et *insipientibus*, ut illos erudiat, quod tandiu patienter ferat, donec ab illis insipientiam removeat. Possunt etiam justi nomine sapientium, atque peccatores appellatione insipientium designari. Et Apostolus debitor est *sapientibus et insipientibus*, quia prædicatoris est debitum, justis invigilare ne cadant, et peccatoribus ut resurgant; justes admonere ut viam justitiæ teneant, peccatores corripere ut viam iniquitatis deserant. Debitor sum Græcis et barbaris, atque sapientibus et insipientibus. *Ita et vobis qui Romæ estis*, sum debitor evangelizare, quia sicut aliis, sic et vobis deo prædicare, quoniam ad omnes sum missus. De Judæis tacet, quia magister gentium est. Quod scilicet *evangelizare promptum est in me*, quia ad hoc agendum sum paratus et velox.

« Non enim erubescio Evangelium. Virtus enim
 « Dei in salutem omni credenti, Judæo primum et
 « Græco. Justitia enim Dei revelatur in eo ex fide in
 « fidem, sicut scriptum est: Justus autem ex fide
 « vivit (*Habac. ii; Hebr. x*). »

Ideo sum promptus ad evangelizandum, quia non erubescio Evangelium, id est nulla est mihi erubescencia ex prædicatione evangelii, sicut nonnullis qui erubescerant prædicare Christum crucifixum, non intelligentes nihil dignius Deo, quam quod ad humanam salutem proficit. Nam insignis virtutis et pietatis

est, quod Dominus propter salutem Imaginis suæ dignatus est usque ad passionem crucis humiliari. Quod nunc Apostolus intuens, non erubescio, inquit, *Evangelium*. Et quare non erubescis? Quia ipsum Evangelium est virtus Dei, id est quod in Evangelio prædicatur, videlicet crux et mors et resurrectio Salvatoris, est virtus Dei, quamvis stultitia videatur incredulis. Nulla enim major virtus est, quam devicta morte, homini vitam perditam reddere. Talis virtus est Evangelium, videlicet quia virtutem victoriæ Christi annuntiat. Et virtus est quia gratiam præstat, per cujus auxilium valeamus facere quæ præcipit. Quod quia lex non fecit, infirma fuit. Virtus est valens, in salutem omni credenti, *Judæo primum, ac deinde Græco*, id est gentili, hoc est, omni credenti, tam de circumcissione quam de præputio, valet Evangelium ad æternam salutem. Judæus causa patrum, et quia prior cognovit Deum, præponitur gentili, quamvis non sit jam dignior propter hoc quod Dominus dixerat: Filius meus primogenitus Israel. Vere Evangelium est virtus Dei, nam justitia Dei revelatur in eo, quæ velata fuerat in Veteri Testamento. Vel ita: Vere Evangelium valet in salutem omni credenti, nam justitia Dei revelatur in eo. id est justitia fidei quæ tegebatur in lege. Justitia enim Dei est qua gratis justificat impium per fidem sine operibus legis. Quam revelat Evangelium, dum dat fidem homini, per quam justificatur qui credit Deum justum et veracem in promissis, ut inquirentes se remuneret, et contra negligentes se damnet. Justitia dico, tendens ex fide in fidem, id est ex fide Veteris Testamenti in fidem Novi. Populus enim Israel in fide erat, quia crediderat Deo et Moysi famulo ejus. Ex qua fide nunc ad fidem evangelicam transit. Ejus quippe est justitia, qui transit de fide in fidem, ut libenter transeat Judæus, et quicumque alius ex fide Veteris in fidem Novi Testamenti. Justitia enim revelatur ex fide legis, ubi prædicatur unus Deus, in fidem Evangelii, ubi manifestatur Pater et Filius, et Spiritus sanctus. Ex fide primi adventus Domini, in fidem secundi. Ex fide resurrectionis primæ, in fidem secundæ. Ex fide prædicatorum, in fidem populorum. Ex fide humanitatis Christi, in fidem ejus divinitatis. Ita revelatur in Evangelio ex fide justitia, per quam salvamur, sicut scriptum est in Habacuc: *Justus autem ex fide*, id est qui justificatus est ex fide, vivit, id est æternam vitam consequitur. Et ita ex fide justitia, et ex justitia vita. Vel justus vivit interim ex fide, dum est in hac peregrinatione, donec ad patriam perveniens, vivat ex specie. Per fidem vivere incipit anima, quæ per infidelitatem erat mortua. Fides autem qua vivitur, ipsa est quæ per dilectionem operatur; quoniam fides si non habeat opera, mortua est in semetipsa (*Jacob. ii*). Quod tamen de illis qui tempus operandi habent, intelligitur. Nam si quis mox ut per fidem in baptismo justificatus est, ex hac luce migraverit, hic sola fide sine ullis operibus vitam consequetur. Qui vero

tempus bene operandi habet, et operari negligit, frustra de fide præsumit. Quod Apostolus dixit, quia *justus ex fide vivit*. In propheta sic legimus : « Justus autem in fide sua vivet. » Sed ideo Apostolus magis translatione septuaginta Interpretum usus est, quia scribebat Romanis, qui Scripturas Hebraicas nesciebant : nec erat ei cura de verbis, cum sensus esset in tuto, et damnum ex eo præsens disputatio non haberet ; quia et Hebræi qui Græcas litteras didicerant, editionem septuaginta Interpretum legébant. Ob hoc ergo et istud et alia plura testimonia quæ ponit, ab Hebraicæ veritatis translatione, qua nunc utimur, discordare videntur, quia aliquando sumit a septuaginta Interpretibus, aliquando sicut loquens eodem spiritu quo prophetæ, sensum sumit tantummodo, utens suis verbis suaque dispositione.

« Revelatur enim ira Dei de cælo super omnem impietatem et injustitiam hominum eorum qui veritatem Dei in injustitia detinent, quia quod notum est Dei, manifestum est in illis (*Galat. III*). Deus enim illis manifestavit. Invisibilia enim ipsius a creatura mundi per ea quæ facta sunt intellecta, conspiciuntur ; sempiterna quoque virtus ejus et divinitas, ut sint inexcusabiles. »

Nunc aggreditur gentiles secundum priorem statum, qui jactabant bonam naturam, et excusabant suas turpitudines per ignorantiam, ostendens eos et prius notitiam habuisse, et post per culpam perdidisse, atque bonam naturam sibi ipsis a Deo relictam, in omnia mala præcipitatum. Quasi dicat : In Evangelio *revelatur justitia Dei*, non solum qua justificat per fidem penitentes, sed et qua damnat in malitia perseverantes. Nam ira Dei quam juste peccantibus inferet, id est vindicta qua eos percutiet, revelatur in eodem Evangelio super eos ventura de cælo. Vel ita : Ex fide est justitia, et inde salus, quia ex impietate est injustitia, et inde ira, id est pœna. *Nam ira Dei revelatur*, etc. Non dixit inferitur, sed revelatur. Ubi enim revelatur, non inferitur, non percutit ; sed revelatur, ut terreat, et territatis non inferatur. Revelatur per Evangelium, quæ ante erat occulta hominibus. Revelatur ira Dei, id est animadversio districti judicis. Revelatur *de cælo*, ut noverint homines non solum beneficia, sed et plagas expectare de cælo. Vel *de cælo*, id est de Ecclesia revelatur ira futuri judicii, quoniam ab Ecclesia manifestatur peccantibus ira judicis venturi de cælis in fine sæculi, *super omnem impietatem et injustitiam hominum*, id est ad conculcandam in suppliciis eorum perversitatem, qui debitum cultum Deo denegant, et qui in luxuria cæterisque vitiis male vivunt. Impietas enim infidelitatem significat, injustitia vero criminosa conversationem. Impietatem hominum, eorum hominum dico, *qui veritatem Dei detinent in injustitia*. Omne quod mutari potest, veritas non est. Veritas Dei est invisibilis et incommutabilis ejus substantia. Quam detinent in injustitia, quicumque per visibiles et mutabiles creaturas, hominibus de-

A monstraverunt colendam idolorum culturam. *Veritatem Dei*, id est quod ipse est verus Deus, *detinent in injustitia*, quia cum vere sciant uni Creatori Deo debere cultum summæ venerationis exhiberi, eum injuste exhibent creaturæ. *Veritatem Dei*, id est veram de Deo cognitionem, *detinent in injustitia*, id est in malo opere, malentes injuste morari in voluptatibus suis, nec pro Dei veritate quæ se illis sponte offert, volente a nequitia sua recedere, sed ipsam veritatem in nequitia, si fieri possit, detineri secum. Dixi quia detinent veritatem Dei, nec sinunt ut ad aliorum notitiam perveniat, dum simulacra pro Deo docent adorari. Nam illi noverunt ipsam veritatem, quam cæteris abscondunt, quia *quod notum est Dei*, id est quod naturali ingenio sciri potest de Deo, *manifestum est illis*. Multa enim sunt quæ de Deo per naturam sciri non possunt, sicut est mysterium Incarnationis et Passionis, quod latuit sapientes mundi. Sed hoc de Deo naturaliter sciri potest, quod ipse sit Deus, quia omnis creatura ostendit se non esse Deum, sed esse alium qui eam fecerit, cujus servitio parere necesse sit ; ita quod notum est de Deo, manifestum est illis. Vel manifestum est in illis, id est in cordibus eorum, quamvis exterius in opere ipsorum non appareat. Habent enim in se unde noscant eum, scilicet naturalem rationem. Vere manifestum est in illis, sive illis, quia Deus per opus suum manifestavit illis quoniam virtus ejus occulta ex his quæ palam sunt, manifestatur. Dominus manifestavit, id est non solum naturalis ratio profuit, sed Deus quotidie adjuvit, ne sola natura sufficere videretur. Deus illis manifestavit ostensione creaturarum, quoniam naturali ingenio intellexerunt quia hoc non est Creator, quod creatura. *Nam invisibilia ipsius*, id est æternitas, virtus, divinitas et omnipotentia conspiciuntur a creatura mundi, id est ab homine, in quo per quamdam affinitatem omnes creaturæ sunt, quia commune habet esse cum lapidibus, vivere cum arboribus, sentire cum animalibus, intelligere cum angelis. Ab hac creatura mundi, id est ab homine, *conspiciuntur invisibilia Dei, intellecta per ea quæ facta sunt*, id est per creaturas. Nam si vigilanter exteriora conspiciamus, per ipsa eadem ad interiora revocamur. Vestigia quippe Creatoris sunt mira opera invisibilis creaturæ, quoniam per hæc quæ ab ipso sunt, imus ad ipsum ; menti enim nostræ peccato suo exterius sparsæ, necdum Deus sic interius innotescit ; sed dum facturæ suæ decus foras proponit, quasi quibusdam nutibus innuit, et quæ intus sequamur ostendit, ac miro modo ipsis formis exterioribus nos ad interiora perducit. Viæ quippe ad Creatorem sunt opera considerata creaturæ, quæ dum facta cernimus, potentiam factoris miramur. Nam quocumque se verterit anima si vigilanter intendit, in eisdem ipsis Dominum invenit, per quæ reliquit ; ejusque potentiam eorum rursus consideratione cognoscit, quorum amore deseruit ; et per quæ adversa cecidit, per hæc conversa revocatur. Ubi enim lapsi sumus,

ibi incumbimus ut surgamus. Et quasi ibi surgendo A
manum considerationis figimus, ubi pede amoris lu-
brici corruentes, negligendo jacebamus. Quia enim
ab invisibilibus per visibilia cecidimus, dignum est
ut ad invisibilia ipsis rursus visibilibus innitatur;
et quo casu anima venit ad infima, eo gradu rever-
tatur ad summa. Bene itaque dicitur, quod *invisibi-*
lia Dei conspiciuntur a creatura mundi, id est ab ho-
mine; *intellecta per ea quæ facta sunt*, quoniam per
visibiles facturas intelligitur invisibilis factor. Sic
enim et gentiles, quamvis legem aut prophetas non
haberent, cognoverunt Deum, per visibilem scilicet
creaturam pervenientes ad intelligentiam invisibilis
Creatoris. *Invisibilia ipsius a creatura mundi*, id est
ab homine, qui omni creaturæ mundi præeminet;
vel *a creatura*, id est a constitutione mundi, conspi-
ciuntur intellecta per ea quæ facta sunt ab eo, *sem-*
piterna quoque virtus ejus et divinitas, quæ nihilo-
minus sempiterna ex conjecturis agnoscitur crea-
turæ similiter (206). Virtus est quæ regit omnia, di-
vinitas quæ replet universa. Potest etiam *sempiterna*
virtus ejus intelligi Filius ejus, per quem facta sunt
omnia, et qui nunquam cœpit esse, sed sempiternus,
id est semper æternus est cum eo, divinitas autem
Spiritus sanctus. Intelligitur itaque per visibiles
creaturas invisibilis Pater, et sempiterna virtus ejus,
quæ est Filius, ac divinitas, id est Spiritus sanctus,
ad quem maxime sanctificatio pertinet. Ita ut et gen-
tiles qui Scripturas divinas non habebant, sint in-
excusabiles, quoniam non fuerunt veritatis ignari,
sed ipsi veritati quæ se illis revelaverat, exstiterunt
ingrati.

« Quia cum cognovissent Deum, non sicut Deum
« glorificaverunt, aut gratias egerunt, sed evanue-
« runt in cogitationibus suis, et obscuratum est in-
« sipientis cor eorum : dicentes enim se esse sapien-
« tes, stulti facti sunt (*Ephes. iv*). Et mutaverunt
« gloriam incorruptibilis Dei, in similitudinem ima-
« ginis corruptibilis hominis, et volucrum et qua-
« drupedum et serpentium. Propter quod tradidit
« illos Deus in desideria cordis eorum in immundi-
« tiam, ut contumeliis afficiant corpora sua in se-
« metipsis, qui commutaverunt veritatem Dei in
« mendacium, et coluerunt et servierunt creaturæ
« potius quam Creatori, qui est benedictus in sæ-
« cula. Amen. »

Non possunt excusari de ignorantia, sicut vole-
bant asserere. Qui revera per naturalem rationem
cognoverunt Deum. *Et cum cognovissent eum*, non
glorificaverunt eum sicut Deum, bene vivendo
et colendo; aut etiam *gratias illi non egerunt* de co-
gnitione ejus, quam, ipso donante, perceperant. De-
buissent enim illum glorificare digne colendo et
prædicando, atque voluntatem ejus faciendo, et
gratias illi semper agere quod eorum cordibus noti-
tiam sui dignatus esset infundere. Gratias agere, id
est, pia devotione grati existere, ut recognoscerent

(206) *Locus obscurus.*

se sapientiam et omnia bona ab illo habere. Sed
non glorificaverunt eum, nec gratias ei reddide-
runt, sed sibi tribuentes sapientiam, quam a se non
habebant, et se putantes aliquid esse, cum nihil es-
sent, evanuerunt in cogitationibus suis, quas a se,
non a Deo conceperant; *et obscuratum est paulatim*
cor eorum, donec omnino steret insipientis. *Evanue-*
runt, quoniam vani, et falsi fuerunt *in cogitationi-*
bus suis, et ratio mentis eorum fumo superbix obs-
curata est, dum in se ipsis gloriarentur. Et vere
evanuerunt, *nam dicentes se esse sapientes*, id est,
jactantes se quasi proprio sensu sapientiam inve-
nisse, *stulti facti sunt*, id est obscuratum est insi-
piens cor eorum. Cum enim quidam eorum non so-
lum ad instituta utilissimarum artium, et doctrinam
B liberalium disciplinarum, sed etiam ad inquisitionem
summi boni aciem mentis intenderint, et invi-
sibilia Dei per ea quæ facta sunt, intellecta conspe-
xerint, non agentes tamen gratias Deo, nec confi-
tentes illum sibi esse hujus facultatis auctorem, sed
dicentes se esse sapientes, id est, non in Deo, sed
in semetipsis gloriantes, quasi ad veritatis inspec-
tionem suis studiis, atque rationibus propinquas-
sent, *evanuerunt in cogitationibus suis*, quod, illumi-
nante Dei gratia, invenerant, obcæcante superbia
perdiderunt, relapsi a superna luce in tenebras suas,
id est, ab incommutabili atque æterno bono, ad
mutabilem corruptibilemque naturam. *Et muta-*
verunt non solum sensu, sed et opere, quantum ad
se mutaverunt *gloriam incorruptibilis Dei*, talem sci-
licet fingentes Deum, qualis non est, et non sicut
eum cognoverunt tradentes hominibus, sed simula-
C cra pro Deo coli censentes. Qui dum per cogitatio-
num suarum vanitatem formas et imagines in Deo
requirerent, Dei imaginem perdiderunt; et in tan-
tas stultitiæ tenebras devoluti sunt, ut gloriam Dei
ad corporalem et corruptibilem humanæ formæ effi-
giem verterent, et divinæ majestatis eminentiam ad
brutorum animalium formas inclinarent.

Mutaverunt gloriam Dei, qui est incorruptibilis et
æternus, *in similitudinem imaginis corruptibilis ho-*
minis, quasi similem facientes gloriam Dei, id est,
gloriosum Deum, imagini hominis, et ipsam imagi-
nem velut Deum colentes. Nec solum in similitudi-
nem hominis mutaverunt gloriam Dei, sed etiam in
D similitudinem *volucrum et quadrupedum et serpen-*
tium. A dignioribus creaturis ad minus dignas gra-
datim descendit, ut ostendat illos in profundiores
stultitiæ tenebras corruisse. Mos fuit ab antiquo
Romanis adorare simulacra hominum, ut Romuli,
Jovis et aliorum, maxime ab adventu Ænæe in Ita-
liam; volucrum autem et quadrupedum atque ser-
pentium, ex quo Alexandria ab Augusto victa est et
Romæ subjugata. Consueverant enim colere deos
omnium gentium quas superassent. In tam viles
formas mutaverunt, ut dictum est, gloriam Dei.
Propter quod Deus tradidit. Id est, dimisit, illos in

desideria cordis eorum. Tradere enim dicitur Deus, dum non retinet delinquentes, propter arbitrii libertatem ad malum promptissimam. Manifestum quoque est Deum operari in cordibus hominum, ad inclinandas eorum voluntates quocumque voluerit, sive ad bona pro sua misericordia, sive ad mala pro meritis eorum, iudicio utique suo, nonnunquam aperto, nonnunquam occulto, semper autem iusto. Nam, propter præcedentia peccata, multiplicantur sequentia. Et Deus qui peccatorem diu expectat ut redeat, non redeunti atque contemnti ponit adhuc ubi gravius impingat. Peccatum quippe quod per pœnitentiam citius non deletur, aut peccatum est et causa peccati, aut peccatum et pœna peccati, aut peccatum simul et causa et pœna peccati. Omne enim quod prius male committitur, peccatum est. Sed si citius pœnitendo non tergitur, iusto iudicio omnipotens Deus obligatam peccantis mentem, etiam in culpam alteram permittit cadere. Peccatum ergo quod pœnitentiæ lamento non diluitur, peccatum est simul et causa peccati, quia ex illo oritur, unde adhuc peccatoris animus alius obligetur. Peccatum vero quod ex peccato, id est, ex secundo sequitur, peccatum simul est et pœna peccati, quia, excrescente cœcitate, ex retributione prioris culpæ generatur, ut quasi jam quadam sint in peccatore supplicia ipsa incrementa vitiorum. Fit vero nonnunquam ut unum idemque peccatum, et peccatum sit et pœna peccati simul et causa peccati. Quod bene Apostolus hoc loco demonstrat, dicens de infidelibus ac lubricis : *Cum cognovissent Deum, non sicut Deum glorificaverunt aut gratias egerunt, sed evanuerunt in cogitationibus suis.* Ecce est peccatum et causa peccati. Ex qua causa quid sequitur adjungit : *Et obscuratum est insipiens cor eorum. Dicentes enim se esse sapientes, stulti facti sunt. Et mutaverunt gloriam incorruptibilis Dei, in similitudinem imaginis corruptibilis hominis et volucrum et quadrupedum et serpentium.* Ecce est peccatum solummodo. Et pœna peccati esset, si non adhuc ex hoc peccato et aliud sequeretur. Nam post infidelitatem eorum subditur, *Propter quod tradidit illos Deus,* etc. Qui igitur cognoscentes Deum, non sicut Deum glorificaverunt, ex eo peccato et causa peccati ad hoc quoque perducti sunt, ut ad cultum serpentium et volucrum laberentur. Sed quia per hanc etiam cœcitatem usque ad immunditiam carnis et contumelias ceciderunt, ipsa infidelitatis eorum cœcitas præcedenti intellectui et peccatum est et pœna peccati; subsequenti vero immunditiæ, peccatum facta est et causa peccati. Prioris itaque peccati merito, peccatorum subsequentium fovea tegitur, ut qui malum sciens perpetrat, deinceps iuste in aliis etiam nesciens cadat. Hoc quippe agitur, ut culpis culpæ feriantur, quatenus supplicia fiant peccantium ipsa incrementa vitiorum. Merito itaque post idololatriæ culpam subditur : *Propter quod tradidit illos Deus,* et cætera, quoniam Deus illos iuste deseruit et propriis

voluntatibus, qui sibi prætuleraut idola, et sicut Scriptura loquitur : « Initium fornicationis est exquisitio idolorum, et adinventio illorum corruptio vitæ est (Sap. xiv). » Tradidit igitur illos ob idololatriam, id est subtrahendo grâtiâ suam, permisit illos in *desideria cordis eorum*, id est ut inciderent in ea quæ cor eorum desiderabat secundum carnis ardorem; desideria dico tendentia in *immunditiam*, id est in carnis maculationem, usque adeo ut afficiant corpora sua *contumeliis*, id est ut scilicet ipsi applicent corpora sua in *contumeliis*, id est in contumeliosis operibus. Contumelia est quæ ingeritur alicui contra dignitatem personæ. Et isti corporibus suis ac naturæ grandem fecere contumeliâ, subdendo se tam pudendis turpitudinibus. Contumeliis affecerunt corpora sua, et hoc in *semetipsis*, id est, se soli sine aliis maculantes. Illi sic afficiunt corpora sua, qui commutaverunt veritatem Dei in mendacium, id est quod de Deo verum est, dederunt idolo, quando sicut Scriptura dicit : « Incommunicabile nomen imposuerunt lignis et lapidibus (Sap. xiv). » Nomen quippe deitatis est incommunicabile creaturis, quoniam solus Creator proprie et vere Deus nominatur. Sed gentiles hoc nomen imposuerunt lignis et lapidibus, quando idola lignea et lapidea instituerunt appellari Deum. Et hoc est quod nunc dicuntur in mendacium mutasse veritatem Dei. Veritas enim Dei, quod ipse veraciter Deus sit. Quam veritatem vertit in mendacium, qui idolum dicit vel putat esse Deum. Falsum est enim hoc. Nec solum ita veritatem mutaverunt in falsitatem, æstimantes idola deos esse, quod falsum est, sed etiam coluerunt ipsa idola, ne dicerent, non colo simulacra, sed res eorum, ut solem et cætera huiusmodi. Coluerunt non Creatorem, sed creaturam, id est, non Deum, sed idola, diligenter ornando coronis aureis ipsas imagines dæmonum, et eas, flexis genibus, adorando, et servierunt thura et sacrificia offerendo *creaturæ potius quam Creatori*, quasi esset melius servire creaturæ, id est idolis et dæmonibus, quam Deo, qui est *benedictus in sæcula*, id est in æternum, *amen*, id est, vere. Cui qui adhæserunt, et ipsi cum eo benedicti erunt in sæcula veraciter. Sed gentiles effecti sunt maledicti et temporales, qui benedictum in sæcula reliquerunt.

« Propterea tradidit illos Deus in passiones ignominie. Nam femine eorum immutaverunt naturalem usum, in eum usum qui est contra naturam. Similiter autem et masculi, relicto naturali usu femine, exarserunt in desideriiis suis in invicem, masculi in masculos turpitudinem operantes, et mercedem quam oportuit erroris sui in semet ipsis recipientes. »

Dixi quia servierunt creaturæ, *propterea tradidit illos Deus*, id est ire permisit in *passiones*, id est in voluptates, quæ, et si delectent, sunt passiones naturæ. Ecce iterum vindicta. Præcedens enim culpa qua servierunt creaturæ, vindicta est, subsequenti-

bus turpitudinum passionibus. Superius dicti sunt **A** mutasse gloriam Dei in similitudinem imaginis volucrum et serpentium, nec tamen coluisse dixit eos fla. Et propterea ceciderunt in immunditiam carnis, vindice Deo, cujus gloriam in idola mutaverunt. Deinde, crescente errore, coluerunt pro Deo ipsa idola quæ fecerant, et servierunt eis, sicut Apostolus loquitur, ac propterea detestabilioribus adhuc immunditiis puniuntur. *Tradidit illos Deus in passionibus ignominia*, id est in ardore voluptatum nec nominandarum. Ignominia enim dicitur, quasi sine nomine. Appellatur enim ignominia, eo quod desinat habere dignitatis nomen ille, qui in aliquo crimine deprehenditur. Et vere in ignominiosas passiones traditi sunt: *Nam feminae eorum immutaverunt naturalem usum*. Non dixit conjugalem usum, sed naturalem, cum volens intelligi qui sit in membris ad hoc creatis, ut per ea possit ad generandum uterque sexus commisceri. Ac per hoc cum eisdem membris etiam meretrici quisque miscetur, naturalis est usus, nec tamen laudabilis, sed culpabilis. Ab ea vero parte corporis, quæ non ad generandum est instituta, etsi conjuge quis utatur, contra naturam est et flagitiosum. Ita immutaverunt feminae eorum naturalem usum, in cum qui est contra naturam, quia ipsæ feminae in feminas turpia exercuerunt. Nec solum feminae contra naturam fornicatae sunt, sed etiam masculi, similiter relictis feminis, quibus naturaliter possent misceri, exarsunt per iniquam voluptatem in desideriiis suis, id est a se genitis. *Exarsunt spiritu fornicationis invicem*, et nequissima desideria compleverunt turpissimis operibus, *et mercedem quam oportuit erroris sui*, id est vindictam dignam et congruam peccato erroris sui receperunt *in semetipsis*, id est Deum vindicaverunt in natura sua. Ideo enim Apostolus ipsa crimina evidenter expressit, ut cognoscamus eos rationem perdidisse naturæ, qui tam amentes effecti sunt, ut omnia perverterent in Deum perversi. Neque enim ordinem naturæ servare poterant, qui auctorem naturæ dereliquerant. Idcirco feminae in feminas, et viri in viros turpia egerunt, in quibus par culpa fuit, tam seminarum quam etiam virorum.

« Et sicut non probaverunt Deum habere in notitia, tradidit illos Deus in reprobum sensum, ut faciant ea quæ non conveniunt, repletos omni iniquitate, malitia, fornicatione, avaritia, nequitia, plenos invidia, homicidio, contentione, dolo, malignitate, susurrone, detractores, Deo odibiles, contumeliosos, superbos, elatos, inventores malorum, parentibus non obedientes, iusipientes, incompositos, sine affectione, absque fœdere, sine misericordia. Qui cum justitiam Dei cognovissent, non intellexerunt, quoniam qui tale agunt, etiam qui consentiunt facientibus. »

Prædicta mala fecerunt gentiles. Et quia necdum *respicere voluerunt, adhuc in alia ceciderunt*. Com-

miserunt enim abominanda quæ diximus, et non probaverunt Dominum hæc habere in notitia, id est cum multis rationibus possent probare Deum habere in notitia hæc crimina, tamen putaverunt Deum ignorare et negligere ea. Et sicut ex sua culpa hoc putaverunt, sic ex eadem culpa factum est, quod tradidit illos Deus in reprobum sensum, ut putarent omnia reprobanda esse facienda; et cum tam turpia operarentur, nescirent se malum operari. Vel ita: Non solum supradictas abominaciones fecerunt, sed etiam non probaverunt, id est non elegerunt, Deum habere in notitia, id est ut cognoscerent eum. Ille probat, id est probum et laudabile esse judicat, habere Deum in notitia, qui pia devotione studet eum in animo semper habere, et tanquam præsentem timet eum ac reveretur et peccare non audet. Sed hoc gentiles non fecerunt. *Et sicut non probaverunt Deum habere in notitia*, id est ut haberent eum in notitia sua, vel eum scirent nosse mala quæ faciebant, *tradidit*, id est dimisit illos Deus in reprobum sensum, ut jam nihil intelligant, nisi quod a probitate remotum est, *ut faciant ea quæ non conveniunt rationi vel naturæ*. Ea quæ non conveniunt facere, est illa agere quæ divinæ leges detestantur. Illos dico non parum habentes iniquitatis, sed repletos omni iniquitate. Cujus partes enumerantur, cum subditur: *Malitia, fornicatione, etc.* Genus enim præmittitur, et species subjunguntur, ut gentiles evidentius accusentur et terreantur. Malitia pertinet ad mentem, fornicatio ad carnem. Malitia enim est, qua quis machinatur lædere alium quocumque modo. Fornicatio autem dicitur a fornicibus, id est ab arcuatis, in quibus meretrices prostituiebantur. Sed hoc in loco intelligitur fornicatio nominari, quidquid extra legale connubium committitur. Avaritia vero est insatiabilis amor habendi. Nequitia est temeritas vel præsumptio, quando quis audet quod nequit efficere. Vel nequitia dicitur a NEQUIDQUAM; et est defectio boni, quando quis ab amore celestium deficit, et in amorem terrenorum exardescit. Sic enim tendit ad nequidquam, id est ad vanitatem et ad non esse, recedens a vero Dei esse. Invidia vero est, quæ aliena felicitate torquetur, et in duplicem scinditur passionem, cum quis aut quod ipse est, alium esse non vult, aut alium videns esse meliorem, dolet se non esse consimilem. Homicidium autem, ex homine et cæde compositum est. Et pulchre homicidium invidiæ sociavit Apostolus, quoniam ipsa est prima hujus criminis materia. Nam primum homicidium et diaboli et Cain de invidia ortum est, et adhuc nonnunquam fiunt homicidia per invidiam. Contentio autem est, ubi non ratione aliquid, sed animi pertinacia defenditur; et ubi non veritas queritur, sed animositas fatigatur. Dolus vero est mentis calliditas, ab eo quod eludat. Aliud enim agit et aliud simulat. Dolus, inquam, est occulta malitia, blandis sermonibus adornata, cum aliud sonat in ore, et aliud latet in corde. Malignitas autem est mala voluntas, quæ malo igne

accensa, neminem vult amare, nec operari unde debeat amari. Inter malitiam et malignitatem hæc distinctio est, quod cogitatio prava mentis malitia dicitur; malitiæ autem votum vel opus malignitas appellatur. Susurrones vero sunt, qui in auribus alicujus loquuntur malum de alio. Detractores autem, qui virtutes ab aliquo suis verbis detrabunt et minuunt. Susurro quippe a sono locutionis dicitur, quia non in facie alicujus, sed in aure loquitur secrete derogando. Detractio autem est, aliorum bene gesta opera vel in malum vitiose mutare, vel invidendo fallaci fraude diminuere, cum aut mala dicuntur quæ bona sunt, aut parva bona quæ magna sunt. Detrahere enim est, bona alterius deorsum trahere, id est inclinare et premere, vel de ipsis bonis aliqua trahere, ut pauciora seu minora quam sunt, ostendantur esse. Ne autem viderentur susurrones et detractores parum peccare, mox addidit: *Deo odibiles*. Odibiles enim sunt Deo, qui male susurrant de proximis suis vel detrahunt eis. Vel Deo odibiles dicuntur, qui seminant inter amicos discordias. Unde Salomon testatur (*Prov. vi*), quia sex sunt quæ odit Deus, et septimum quod detestatur anima ejus; ipsumque septimum est ille, qui seminat inter fratres discordiam. Contumeliosi vero vocantur, qui veloces sunt in verborum vel factorum injuriis. Contumelia enim dicitur factum vel dictum, quod indignum et inconveniens est illi, cui injuste et contumaciter infertur. Superbi sunt, qui judicant de se supra quam debeant esse. Superbia enim est, perversæ celsitudinis appetitio. Perversa autem celsitudo est, deserto eo cui debet animus inhærere principio, sibi quodam modo fieri principium. Hoc fit, cum sibi nimis placet, id est cum ab illo incommutabili bono deficit, quod magis ei placere debuit, quam ipse sibi. Elati quoque sunt, qui efferunt supra mensuram suam, vel qui majorum institutis non acquiescunt, dum nolunt pati priorem vel parem. Inventores malorum sunt, qui nova genera peccandi reperiunt, vel nova tormenta, quibus alios crucient, sive novas leges injustas, aut alia quælibet mala primi inveniunt. Hæc enim malis studiis illi solent agenda invenire, quibus non sufficit, ut faciant mala quæ priores sui fecerunt, aut quæ contemporaneos suos adhuc facere conspiciunt. Qui vero sunt parentibus non obedientes, feris sunt indomabiliore, quoniam feræ suis parentibus sunt subditæ et acquiescentes. Insipientes autem sunt, qui ab ipso fonte sapientiæ, qui Deus est, recesserunt. Et ideo incompositi, quia omnis insipiens inordinatus est. Incompositi sunt habitu, incessu et motu. Incompositio enim corporis indicat qualitatem mentis. Sine affectione sunt, qui viscera dilectionis, quibus erga alterum moveantur, non habent, sed durum et insensibile cor erga proximi dilectionem gerunt. Absque fœdere sunt, qui societatem omnium fugiunt, qui fœdus concordiæ et societatis habere cum nullo volunt. Sine misericordia sunt, qui non compatiuntur miseriis aliorum. Et om-

nia hæc mala fuerunt in gentilibus. Qui cum justitiam Dei cognovissent, non intellexerunt, quoniam qui talia agunt, digni sunt morte. Per hoc quod eis naturaliter displicet malum, cognoverunt justitiam Dei. Et, licet hanc ita cognovissent, non intellexerunt eos qui talia faciunt, dignos esse perpetua morte. Quoniam si intellexissent, timuissent; si timuissent, nunquam talia commisissent. Amiserunt enim lumen intelligentiæ, ex quo deseruerunt fontem cœlestis sapientiæ. Et ideo, quamvis non intellexissent, non possunt excusari, quia præcedentibus culpis meruerant sic excacari. Qui ne putarentur, his tantum poenis affligi, quibus delectabantur, id est supradictis criminum turpitudinibus, addit ultimam mortem æternam Apostolus: *Digni sunt, inquit, morte qui talia faciunt*. Ubi cum magno timore notandum est, quia nonnulla quæ putantur levia, posuit inter ista pro quibus æterna mors acquiritur, sicut sunt ea quæ faciunt susurrones et detractores, et incompositi vel contentiosi. *Digni, inquit, sunt morte non solum qui faciunt ea, sed et qui consentiunt facientibus*, ut nullus excusetur. Sunt enim quidam qui se reos non putant, si non operantur quæ mala sunt, consentiunt autem facientibus. Consentire autem est, si quis cum possit reprehendere, taceat vel aduletur. Sed facientes et consentientes, æternam mortem merentur. Hucusque vitia gentilium Apostolus detestando manifestavit, ne jam de pristinis actibus se excusarent; sed quales antea fuerant, humiliter recognoscerent, ne se Judæis superbe præferrent, sed tanto magis Deum diligenter, ac gratiæ ejus obnoxii fierent, quanto plura et majora peccata ab eo sibi esse dimissa considerarent.

CAPUT II.

« Propter quod inexcusabilis es, o homo omnis qui judicas (*Matth. vii*). In quo enim judicas alterum, teipsum condemnas. Eadem enim agis, quæ judicas. Scimus enim quoniam iudicium Dei est secundum veritatem in eos qui talia agunt. »

Omnes, inquit, et facientes, et assentientes, digni sunt morte. Propter quod, id est propter quam causam, *inexcusabilis es, o homo! omnis qui judicas* alios. Homo dico, non gentilis tantum, sed et omnis, sive gentilis, sive Judæus, sive major, sive minor. Cum enim dicit omnis, subintrat jam monstrare non solum gentilem, sed etiam Judæum, qui secundum legem volebat judicare de gentilibus. Communiter ergo nunc de Judæis et gentilibus agit, Judæus enim judicabat gentilem secundum pristinam conversationem, et gentilis Judæum. Uterque autem homo. Si Judæus gentilem judicat de idololatria, et multi Judæorum coluerunt idola. Si gentilis Judæum de legis prævaricatione, et ipse prævaricator est legis naturalis. *Inexcusabilis, inquit, es, o homo! omnis qui judicas*. Hic ostendit, quia unusquisque homo naturaliter scit, quamvis se hoc scire non advertat, scilicet se a Deo secundum actus

proprios judicandum. Quomodo enim ipse alium A peccantem judicio suo damnaret, si Deum ita facturum naturali sensu non videret? Omnes enim per naturalem legem atque rationem norunt, et innocentiam præmium, et malitiam mereri supplicium. Inexcusabilis es, quia tu ipse testis es damnationis tuæ. Nam *in quo judicio judicas alterum* ad damnationem, *in eo condemnas teipsum*, quoniam eadem agis tu ipse, quæ judicas in altero esse damnabilia. Et sicut judicas de alio, sic potes scire quod Deus judicabit de teipso. Et vere judicaberis a Deo, sicut judicas alios qui faciunt ea quæ et tu facis, quia scimus quod judicium Dei est secundum veritatem in eos qui talia faciunt. Non enim accipiet personam in judicio; sed sive major, sive minor, sive Judæus, sive gentilis sit quisque, Deus illum vero iudicio, prout dignum fuerit, judicabit. Notandum quoque, quod hæc sententia similiter damnandum manifestet etiam nostri temporis quemlibet judicem, vel ecclesiasticum, vel sæcularem, qui facit ea, quæ in aliis judicat.

« Existimas autem hoc, o homo! qui judicas eos qui talia agunt et facis ea, quoniam tu effugies iudicium Dei? An divitias bonitatis ejus et patientiæ et longanimitatis contemnis, ignorans quoniam benignitas Dei ad pœnitentiam te adducit? Secundum duritiam autem tuam et cor impœnitens thesaurizas tibi iram in die iræ et revelationis justi iudicii Dei, qui reddet unicuique secundum opera ejus (Matth. xvi): his quidem, qui secundum patientiam boni operis, gloriam et honorem et incorruptionem quæerunt, vitam æternam; his autem qui sunt ex contentione, et qui non acquiescunt veritati, credunt autem iniquitati, ira et indignatio, tribulatio et angustia in omnem animam hominis operantis malum, Judæi primum et Græci. Gloria autem et honor et pax omni operanti bonum, Judæo primum et Græco. »

Nos scimus iudicium Dei esse in eos qui talia faciunt. Sed tu cum eadem facias, putas te evasurum illud iudicium? Et hoc est quod increpative dicitur: *Existimas autem hoc, o homo! qui judicas*, id est iudicio tuo damnas eos qui talia agunt, et facis ea, *quoniam tu effugies iudicium Dei?* Quamvis enim potestatem nunc super cæteros habeas, et non sit qui te in hoc mundo iudicet, non tamen existimare Deum tibi parciturum debes, si male egeris. Putare enim posset aliquis imperitus, quod tanto liberius sibi peccare liceret, quanto diligentius alios a peccato compesceret. *Existimas quoniam iudicium ejus effugies*, id est nunquid tibi de impunitate blandiris, quia Deus in præsentem non reddit? *An contemnis divitias bonitatis ejus*, id est divitem et copiosam ejus bonitatem, quia nunc misericordiæ tempus est, *et divitias patientiæ ejus*, quæ peccantes patienter tolerat, *et longanimitatis*, quæ

diutius illos ad pœnitentiam exspectat? Severe loquitur Apostolus, quia mala et dura mens non revocatur nisi terrore. Divitiæ autem bonitatis Dei in hoc manifestantur, quod tanta quotidie in terris mala faciunt homines. et tamen eis Deus solem suum producit, et pluvias ministrat, aliaque multa bona largitur (Matth. vii), blandiens, ut ad pœnitentiam per beneficia provocet. Dives esse monstratur et patientia ejus, qui tot et tanta mala facientes patienter sustinet. Dives est et longanimitas ejus, quoniam non statim punit eos, sed exspectat ad pœnitentiam per multa tempora. Sed has divitias bonitatis et patientiæ et longanimitatis contemnit, qui non sic utitur eis ad pœnitentiam, ut Deus intendit, sed ad vanam securitatem vertit, æstimans Deum aut non curare humanas res, aut donare quod differt. An contemnis, inquit, has divitias, *ignorans*, id est non cogitans, *quoniam benignitas*, id est pia misericordia Dei adducit te, quantum in se est, *ad pœnitentiam*, dum tibi spatium adhuc temporis indulget? Ipsa te provocat ad pœnitendum. Sic tu *secundum duritiam tuam et cor impœnitens, thesaurizas tibi iram*, quia durus es et in malitia tua pertinax, de qua nec corde pœnites. Sunt enim quibus mala quæ agunt, displicent. Sed tu nec in corde pœnitentiam agis, quia nimis induratum est in malitia cor tuum. *Et secundum hanc duritiam tuam thesaurizas tibi iram*, id est accumulans et reponis tibi vindictam exercendam *in die iræ*, id est in die ultionis extremæ. *Iram thesaurizas*, id est in occulto multiplicas tibi, deterius peccando per indultum temporis spatium. Nam qui converti non vis, etiam spatium temporis accepto, per hoc mala tua ad reatum auges, per quod ea diluere poteras, si converti velles. De benignitate enim Dei iram sibi reprobus thesaurizat, quia dum ad pœnitentiam tempus accipit et ad peccandum expendit, ipsum remedium gratiæ vertit in augmentum culpæ. Unde et omnipotens Deus, quia collata remedia conspicit ad culpæ argumentum trahi, ipsam benignitatem quam contulit, in iudicii distributionem (207) vertit, ut inde plus feriat, unde modo amplius exspectat; et quia homo deserere malum non vult ut vivat, augeat unde moriatur. *Thesaurizas*, inquit, *tibi iram venturam in die iræ*, id est in die iudicii, quæ Deus videbitur iratus esse reprobis, licet nulla mentis perturbatione moveatur, *et in die revelationis justi iudicii*, id est in qua revelabitur quod nunc occultum est, iustum iudicium Dei, qui tam juste judicabit, *ut reddat unicuique secundum opera ejus*. Et vere ita unicuique reddet, nam bonis bona, et malis mala. Et hoc est: *His quidem* reddet gloriam, qui sunt boni operis *secundum patientiam*, id est qui bona operantur, bene utentes patientia Dei, vel qui *secundum patientiam* bene operantur, id est mercedem boni operis sui per patientiam exspectant, perdurantes usque in finem in bono et patientia, ut bona

faciant et mala tolerant. His reddet *gloriam*, ut fulgeat sicut sol in regno patris eorum; *honorem*, ut sint ei similes sicut Johannes dicit: « Quia cum apparuerit, similes ei erimus (I Joan. III), » et *incorruptionem*, id est immortalitatem. Hæc reddet Deus illis, qui sunt secundum patientiam boni operis, et hoc *quærentibus vitam æternam*, id est illis solummodo, qui ex patientia et bona actione sua nil aliud quam vitam æternam quærent. Etsi enim patientiam boni operis ostendunt, gloriam tamen et incorruptionem non recipient, si intentione cordis vitam æternam non quærent. Istis quidem gloria dabitur. Sed his qui sunt ex contentione, sicut vos qui nunc contenditis adinvicem, qui sunt ex contentione, id est ex veritatis impugnatione, ubi quod asseritur, non ratione, sed animi pertinacia defenditur; et qui non acquiescunt evangelicæ veritati, cum eis annuntiat, ut faciant quod veritas præcipit, sed credunt iniquitati, quam diligunt, promittentes sibi impunitatem malorum quæ faciunt. His reddetur *ira*, id est justa ultio Dei et indignatio, id est severitas ejus, *tribulatio* de reatu conscientie et *angustia* de vana pœnitentia, quando erunt inter se pœnitentiam agentes, et præ angustia spiritus gementes. Vel *ira*, id est pœna, et *indignatio*, qua sibi ipsis indignabuntur, quod male agentes iram Dei meruerunt. Hujusmodi *ira et indignatio* dabitur corporibus et animabus eorum in futuro. Et antequam animæ eorum resocientur corporibus, interim veniet *tribulatio*, quantum ad exteriorem cruciatum; et *angustia* quantum ad conscientiam, quæ torquet intrinsecus ipsas animas. Vel post resurrectionem *tribulatio* in corporibus, et *angustia* in animabus. Hæc pœna veniet in omnem animam operantis malum, quia anima prima peccat, et idcirco pœnam principaliter sentit. Superius etiam dictum erat, reprobum thesaurizare sibi iram in die judicii. Et nunc, ne quis putaret quod reprobi usque ad diem illam sine pœna essent, additur, pœnam esse dandam in omnem animam hominis operantis malum. Ac si dicatur: Non solum in illa die et deinceps sentiet iram malus, sed et ante. In omnem animam operantis malum, Judæi primum et deinde Græci, id est gentilis. Judæus gentili in culpa præfertur, quia præter naturalem legem, et Moysi legem scriptam habuit, ac prævaricatus est. Judæus semper ante ponitur, quia primus Deum cognovit: et credens, propter Abraham honorificentior est; diffidens autem, pejor tractandus, quoniam promissa patribus refutavit. Ostenso autem quod male operantes ex utroque populo sint puniendi, ostendit econtra quod bene agentes ex circumcissione et præputio sint glorificandi, ideoque sententiam præmissam repetit: Pœna erit male operanti. Sed *gloria*, id est splendor clarificati corporis, et *honor*, id est locus ad dexteram judicis, et *pax*, id est omnimoda qui est in regno, erit omni operanti bonum; non dico omni qui videtur operari bonum, sed qui veraciter operatur quod Deus bonum judicat. Judæo vrimus. Pri-

imum credulitatis tempore, non dignitate. Judæi enim primo crediderunt, ac bonum operati sunt, et postea Græci, per quos signantur gentiles, sed nunc utrique parem in regno locum beatitudinis habent.

« Non est enim personarum acceptio apud Deum. Quicumque enim sine lege peccaverunt, sine lege peribunt. Et quicumque in lege peccaverunt, per legem judicabuntur. Non enim auditores legis justi sunt apud Deum, sed factores legis justificabuntur. »

Jure æquipari Judæum et gentilem in pœna et gloria, quia Deus judicat non secundum personas, sed secundum merita. Non enim est apud Deum acceptio personarum, sed acceptio honorum operum. Sive enim Judæus, sive gentilis, unusquisque secundum opera sua judicatur a Deo. Et vere Deus personam non accipit. Nam quicumque peccaverunt sine lege, sicut gentiles, qui legem scriptam non acceperunt, peribunt sine lege, id est non fiet de eis legale judicium, quia in gehennam sine judicio præcipitabuntur. Et quicumque in lege peccaverunt, sicut Judæi, qui legem Moysi non servaverunt, per legem judicabuntur, id est damnabuntur, quia ipsi audient verba judicis, ut pereant propter legem ejus quam acceperunt ac violaverunt. Vel hoc potest hæc sententia intelligi demonstrare, quod quicumque minus peccat, minus punietur; et qui magis peccat durius damnabitur. Nam quicumque peccaverunt sine lege, id est sine legis transgressione, sicut gentes, scilicet qui minus peccaverunt, sine lege peribunt, id est minus punientur, quia tantum propter peccata sua damnabuntur, non propter transgressionem legis Mosaicæ, quia non habuerunt illam. Et e diverso quicumque peccaverunt in lege, id est gravius peccaverunt legem transgrediendo, per legem judicabuntur, id est atrocius damnabuntur, quia et propter legis prævaricationem, et propter peccata sua punientur. Et vere per legem judicabuntur, ut pereant, quia propter solam legis notitiam non salvabuntur, quoniam solo legis auditu non justificantur, et sine justitia nemo salvatur. Non enim illi qui tantum auditores sunt legis, justi sunt apud Deum, quamvis apud homines æstimentur justi, sed factores legis justificabuntur, id est justi justificabuntur. Factores enim legis, utique justi sunt. Ac per hoc tantumdem est ac si diceretur: Factores legis creabuntur, non quia erant, sed ut sint, ut vel sic intelligerent etiam Judæi legis auditores, indigere se gratia justificatoris, ut possent esse factores. Vel justificabuntur, id est justi deputabuntur. Factores enim legis illi sunt qui credunt in Christum, quem lex promisit, et de quo Moyses ait: « Ipsum audietis tanquam me (Deut. xxiv). » Sed credere in eum et audire eum, id est obedire ei, nemo potest nisi donante ipsius gratia.

« Cum enim gentes quæ legem non habent, naturaliter ea quæ legis sunt faciunt, ejusmodi legem non habentes, ipsi sibi sunt lex, qui ostenduntur »

« dunt opus legis scriptum in cordibus suis, te-
 « stimonium reddente illis conscientia ipsorum,
 « et inter se invicem cogitationum accusantium,
 « aut etiam defendentium in die. qua judicabit Deus
 « occulta hominum secundum Evangelium meum
 « per Jesum Christum. »

Factores legis justificantur, quia etiam gentes.
 Et hoc est quod adjungit : *Cum enim gentes*, etc.
 Vel ita dixerat gentilem damnari si male ope-
 raretur, et salvari si bene. Sed cum legem non
 habeat, et quasi nesciat quid sit bonum, et quid
 sit malum, videretur neutrum sibi debere im-
 putari. Contra Apostolus : *Etsi non habet le-
 gem scriptam, habet naturalem, qua intelligit et
 sibi conscius est, quid sit bonum vel malum; et
 ideo credendus est bene vel male operari, et
 merito salvari vel damnari. Quod non est nisi
 per gratiam et fidem, quæ renovat naturalem
 imaginem Dei in homine scriptam, sine qua re-
 novatione male operatur et damnatur, accusante
 eum conscientia. Et hoc est quod ait : Gentes,
 quæ legem Mosaicam non habent, naturaliter, id
 est naturali ratione suadente, faciunt ea quæ le-
 gis sunt, id est quæ lex fieri jubet, non habentes
 legem ejusmodi, id est scriptam, ipsi sunt sibi
 lex, id est naturalis ratio est eis lex, qui bona
 laudantes, et mala damnantes, ostendunt opus le-
 gis esse scriptum in cordibus suis, id est firmiter
 impressum rationi eorum. Nullus enim est qui
 facit alteri injuriam, nisi qui fieri nolit sibi. Et
 in hoc transgreditur naturæ legem, quam non si-
 nitur ignorare, dum id quod facit, non vult pati.
 Opus enim legis est, non occidere, non mœchari,
 non furari, non concupiscere, non falsum testimo-
 nium dicere, patrem et matrem honorare, et his
 similia facere, unumque Deum Creatorem om-
 nium credere (Exod. xx). Et hæc omnia natura-
 lis ratio scripsit in corde gentium. Et ita no-
 verunt quid agendum esset, et quid vitandum,
 testimonium reddente illis in die judicii conscien-
 tia ipsorum de his quæ fecerunt, quia ipsi sibi
 testes erunt bonorum et malorum quæ gesserunt,
 scientis inde se merito salvari vel damnari. Nec
 solum conscientia operum, sed et cogitationum
 malarum vel bonarum, cogitationum dico accu-
 santium inter se invicem aut etiam defendentium
 quia vicissim se accusabunt vel defendent ipsæ
 cogitationes in conspectu judicis, ut cogitationes
 nostræ omnes uno tempore congregatæ, justum
 judicem probent, dum aut accusat nos nostra con-
 scientia aut excusat, utrum plura sint peccata,
 an bona opera; et utrum vetera an nova, utrum
 deleta poenitentia an novis sceleribus instaurata.
 Ita vel accusabunt vel defendent nos cogitationes
 nostræ, non utique illæ, quæ tunc erunt, sed
 istæ, quæ nunc sunt in nobis. Cum enim sive
 bona sive mala cogitamus velut incerta, sic in*

A corde nostro tam bonarum quam malarum cogi-
 tationum notæ quædam et signacula relinquuntur.
 Quæ in occulto nunc pectoris posita, in die illa
 revelabuntur ab eo, qui solus potest occulta ho-
 minum scire. Quarum notarum causas non la-
 tere Deum, etiam conscientia nostra contestabi-
 tur. Et quia non solum opera, sed etiam cogita-
 tiones in illo judicio tam subtiliter exquirentur;
 ideo fidelis quisque semetipsum debet introrsum
 discutere nunc, et vehementer ante judicium exami-
 nare, ut districtus iudex eo jam tranquillus ve-
 niat, quo reum suum discutere appetit, jam pro
 culpa punitum cernit. *Testimonium, inquit, red-
 dente illis conscientia*, quoniam conscientia pro-
 pria sufficit unicuique ad testimonium (208). Con-
 scientia, subauditur operum, et cogitationum inter
 se invicem accusantium vel etiam defendentium.
 Non dicit quod eadem cogitationes accusant et
 defendunt, sed quod vicissim quædam accusant,
 et quædam defendunt contra malignorum spiri-
 tum accusationem. *Conscientia reddente testimo-
 nium in die qua judicabit Deus, vel in die, id est
 in luce, cum judicabit Deus, occulta hominum,*
 id est secreta cordis vel peccata latentia, per con-
 fessionem non manifestata, judicabit Deus; et hoc
 secundum Evangelium meum, id est secundum
 Evangelium quod ego prædico, et judicabit non
 per seipsum, sed per Jesum Christum, quia « Pa-
 ter non judicat quemquam per seipsum, sed per
 Filium, quoniam omne judicium dedit Filio. »
 (Joan. v.)

« Si autem tu Judæus cognominaris, et re-
 « quiescis in lege, et gloriaris in Deo, et nosti
 « voluntatem ejus, et probas utiliora, instructiora
 « per legem, confidis teipsum ducent caecorum
 « esse, lumen eorum qui in tenebris sunt, erudi-
 « torem insipientium, magistrum infantum, ha-
 « bentem formam scientiæ et veritatis in lege. »

Postquam allocutus est gentium partes, vel com-
 muniter de Judæis et gentibus est locutus, nunc
 ad solos Judæos sermonem dirigit, cupiens eos
 humiliare, quoniam ex accepta lege superbiebant,
 et gratias quasi peccatrices despiciebant. Gravius
 enim accusat illos peccasse prævaricando legem.
 Quasi dicat : Gentilis habet tantum naturalem le-
 gem, sed tu si Judæus vocaris, et legem scri-
 ptam habes, majora dona divinitus accepisti, et
 majora bona debes operari; si tu cognominaris
 Judæus, id est si a tua cognatione trahis hoc
 nomen quod est Judæus, non habens nominis
 significatum, hoc est non rei veritate Judæus, sed
 solo nomine, quod tibi propter dignitatem ven-
 dicas a Juda, qui dignior fuit inter filios Jacob.
 Et requiescis in lege, id est delectaris in scri-
 ptura legis, quia non est tibi laborandum ad
 perquirendam veritatem, sicut gentilibus, qui le-
 gem non habent. Et gloriaris in Deo, non eo

modo quo postulat gratia, quæ non operum meritis, sed gratuita datur, sed velut qui solus merueris legem ejus accipere. *Et nosti voluntatem ejus*, id est quid ipse velit ab hominibus fieri, vel voluntatem ejus, de redemptione humani generis. *Et probas utiliora*, id est de utilibus utiliora scis eligere, *instructus per legem*, quia per naturam multa utilia probantur, per legem vero utiliora, et per gratiam perfectiora; si talis es, *confidis teipsum esse ducem cæcorum*, id est te posse ducere per viam justitiæ eos qui non intelligunt quid debeant agere, et te esse lumen eorum qui in tenebris sunt, quod scilicet possis eos illuminare. Cæcos in tenebris positos, intelligamus gentiles, qui et lumine rationis privati sunt; et si quid sciunt, tamen in tenebris sunt. Vel quoslibet mente cæcos et in tenebris ignorantie constitutos accipiamus, quorum Judæus se non solum manu ductorem, sed et illuminatorem esse gloriatur propter legis notitiam. *Et eruditorem insipientium*, id est quod imperitqs Judæos ponere possit extra ruditatem, qua legem aliquo modo sciunt, sed quomodo eam debeant intelligere, dubii sunt, et inde inter se loquuntur, et *magistrum infantium eorum* Judæorum, qui neque fari sciunt de legis dubietatibus, *habentem formam scientiæ et veritatis in lege*, ut aliis exemplar scientiæ legis sit et veritatis. Quidam enim habent scientiam et intellectum alicujus libri, et ita sentiunt sicut auctor ipse sensit, non tamen habent inde veritatem, quia nesciunt quomodo sit verum, nec etiam verum esse sciunt. Sed Judæus habere se jactat et sensum legis, et scire verum esse illum sensum legis, ita ut aliis habere volentibus sit exemplar, tanquam qui ex legis littera formam scientiæ et veritatis acceperit. Et quia hæc omnia profitetur quidem, nec tamen vere tenet, ideo subjungitur:

« Qui ergo alium doces, teipsum non doces? qui prædicas non furandum, furaris? qui dicis non mœchandum, mœcharis? qui abominaris idola, sacrilegium facis? qui in lege gloriaris, per prævaricationem legis Deum inhonoras? Non enim Dei per vos blasphematur inter gentes, sicut scriptum est (*Isa. LI. xxxvi.*)

Quandoquidem ita gloriaris de lege, et alios te docere jactas, ergo tu qui alium doces, cur non doces teipsum, id est tu dux cæcorum, quomodo viam rectam non vides? Si enim videres, per ipsam utique ambulares. Tu lumen eorum qui in tenebris sunt, quomodo non abjicis opera tenebrarum? Eruditor insipientium, cur etiam timorem Domini, qui st initium sapientiæ, reliquisti? (*Eccle. i.*) Magister infantium, cur puer es sensu? Qui habes formam scientiæ et veritatis in lege, cur nec ipse sequeris, nec alios sequi malo tuo exemplo permittis? Quare non convenit vita tua doctrinæ tuæ, et opus tuum destruit fidem tuam? Qui prædicas non furandum, furaris? » *qui dicis*

A non mœchandum, id est non adulterandum, *mœcharis? qui abominaris idola, sacrilegium facis?* id est tu ipse facis, quod prædicas fieri non debere, dum fidem Christi a lege per malam interpretationem subripis, et legem adulteras, quum ablata veritate mendacium ponis; ac sacrilegus es, dum Christum, quem propheticus sermo significat, negas. Et cur hæc facis? Cur sensum de Christo furaris ex lege? Et cur mœcharis, id est adulteras, hoc est mentem tuam falsitate corrumpi facis, contemnendo veritatem Christianæ fidei quasi legitimum virum, et eligendo mendacium velut adulterum? Non enim est una mœchatio, sed omne quod totum Deo debes, si alii quam Deo reddideris, sive amorem, sive timorem, sive servitium sive obedientiam, sive spem. Et ideo gravius ab illo delinquitur, a quo perfectio prædicatur. Et tu qui idola detestaris, cur sacrilegium facis, id est cur auferis Christum de sacro, hoc est a lege, negando eum ibi sonari? Sacrilegium enim vocatur sacri furtum, quia legere vel sublegere, furari dicitur. Sacrilegium quippe est, vel sacrum de sacro auferre, sicut reliquias de ecclesia, vel sacrum de non sacro, sicut crucem de domo laici; vel non sacrum de sacro, sicut capam laici de ecclesia. Et sacrilegium facit, qui sacrum Christi intellectum a sacra lege tollit. Sacrilegium enim est in hoc loco proprie, quod in Deum committitur, quasi sacri violatio, vel mandatorum prævaricatio. Unde et additur: *Qui in lege gloriaris*, id est qui de lege quam solus ex omnibus populis qui sub cælo sunt, accepisse te jactas, *cur Deum per prævaricationem ejusdem legis inhonoras*, faciendo furta et adulteria et sacrilegia? Nam secundum litteram multi Judæorum hoc fecisse reperiuntur, furta videlicet et adulteria et sacrilegia. Figuratur autem per hunc, quem ita nunc increpat Apostolus, quilibet doctor ecclesiæ, qui bona prædicat et mala facit, destruens moribus, quod astruit vocibus. Cui recte dicitur: *Qui alium doces, teipsum non doces, etc.* Deinde probat quod Judæi prævaricando legem, inhonoraverint Deum. Vere Deum inhonoras tu, et similes tui. *Nam nomen Dei*, id est gloria et fama nominis Dei blasphematur, id est vituperatur, *inter gentes per vos*, id est per malam conversationem vestram. Sicut enim bona vita fidelium causa est, ut Deus glorificetur a videntibus: sic quando illi qui legem Dei acceperunt, male vivunt, illorum prava conversatio causa est, ut Deus blasphemetur, sicut scriptum est. Ileo non apposuit ubi, vel quibus verbis hoc scriptum sit, quia Judæis loquebatur, qui legem et prophetas habebant; et ubi hoc scriptum esset, satis noverant, videlicet in Ezechiele, per quem Deus de illis qui in Chaldæa tenebantur captivi, conquestus est, dicens: « Ingressi sunt ad gentes, et polluerunt nomen sanctum meum, cum diceretur de eis. Populus Domini iste est, et de terra egressi sunt (*Ezech.*

xxxvi). » Sic tunc per illos blasphemabatur nomen Domini, quod ipsi malis operibus suis polluerant in oculis gentium. Putabant enim gentes quod ea quæ Judæi faciebant, placerent Deo ipsorum, et ideo vituperabant eum. Similiter et per eorum nequitiam, qui tempore quo Paulus hæc scribebat, dispersi inter gentes erant, blasphemabatur Deus a gentibus. Sic et nunc per nonnullos religionis professores, dum pravitatis exempla de se ostendunt, blasphematur plerumque Deus ab imperitis et secularibus.

« Circumcisio quidem prodest, si legem observes. Si autem prævaricator legis sis, circumcisio tua præputium facta est. Si igitur præputium justitias legis custodiat, nonne præputium illius in circumcisionem reputabitur, et judicabit id quod ex natura est præputium, legem consummans, te qui per litteram et circumcisionem legis prævaricator es? Non enim qui in manifesto Judæus est, neque quæ in manifesto in carne est circumcisio, sed qui in abscondito Judæus, et circumcisio cordis in spiritu, non littera, et ejus laus non ex hominibus, sed ex Deo est. »

Ostenderat legem non valere Judæis, et nunc ostendit nec circumcisionem illis prodesse. Probarat eos non posse gloriari de lege, quia transgressi sunt eam, id est moralia præcepta ejus. Possent ipsi respondere, dicentes: Quamvis ipsa lex non proficiat nobis quia transgressi sumus illam, sicut tu dicis, tamen de circumcissione possumus gloriari, quia per eam præcellimus gentes incircumcisas. Et Apostolus: *Circumcisio quidem prodest, si legem observes*, id est cum observantia moralium præceptorum in fide factorum. *Sed si sis prævaricator legis*, sicut es, ut probavimus, id est si quod circumcisio exigit, non impleas, tunc *circumcisio tua carnalis*, de qua multum gloriaris, *facta est præputium*, id est plus non valet tibi quam si circumcisus non esses. Prodest, inquit, suo tempore circumcisio, quia Judæum facit vivere et non exterminari. Prodest circumcisio, quia facit in lege esse. Prodest, quia obediendo Deo facit signum futuræ veritatis, dum populus rudis sub timore custoditur; carnis enim circumcisio vera cordis circumcisionem præsignat. Et ideo ante Salvatoris adventum prodest carnalis circumcisio, *si legem observes*, id est si et moribus circumcidaris. Non enim alia intelligitur esse vera circumcisio, quam animæ purgatio, et vitiolorum abjectio. Et ideo, prodest carnis circumcisio, si et mens per observantiam moralium præceptorum legis circumcisa sit. Signum prodest, si res adsit. Cæterum signum sine re superfluum erit. Hoc est enim quod subditur, quia *si prævaricator legis sis, circumcisio tua præputium facta est*, quoniam cum sis carne circumcisus, opere es incircumcisus. Similiter dici potest Christiano: Baptismus prodest, si Evangelium observes. Si autem prævaricator legis sis, id est Evangelii, baptismus tuus *nihil tibi valebit*. Sic et monacho cuculla prodest,

si regulam observes. Si autem prævaricator regulæ sis, cuculla tua inutilis facta est. Deinde inferitur a contrariis sic. Quando quidem si prævaricator legis fueris, circumcisio tibi non plus prodest quam præputium; igitur si præputium observet legem, tantumdem prodest ad salutem, quantum circumcisio cum observatione legis. Et hoc est: *Si præputium*, id est gentilis, qui in præputio carnis ad fidem Christi venit, *custodiat justitias legis*, id est præcepta moralia, per quæ justificatur homo, sicut: « Non mœchaberis, Non concupisces, Honora patrem et matrem, et, Diliges proximum tuum sicut teipsum (Exod. xx), » *nonne præputium illius reputabitur in circumcisionem?* id est nonne ipse habens præputium, æquiparabitur Judæo habenti circumcisionem cum legis observatione? id est non oberit ei præputium habere, si legem spiritaliter observet, sed in filiis Abrahæ reputabitur; et quod circumcisio facit Judæo legem observanti, idem faciet ei præputium, postquam cum fide præcepta legis observabit. Et non solum æqualis erit Judæo, sed etiam Judæum judicabit, non potestate judicii, sed comparatione facti melioris; *præputium*, id est præputiatus; *consummans*, id est complens legem, te, o Judæe, qui per litteram et circumcisionem es prævaricator legis. Præputium, inquam, quod est ex natura, id est quod ita permanet ut natura dictavit, nec circumcidendo resecavit, quod sibi natura dedit, illud præputium custodiendo naturalem legem, quam tu prævaricaris in littera, *judicabit te*, id est comparatione sui judicabilem te ostendet. Ita sæcularis vir, si religiose vixerit, condemnabit respectu sui eum, qui religionis habitum et professionem habet, nec tamen religiose vivit. Dixi quod circumcisio tua præputium facta est, et præputium gentilis in circumcisionem reputabitur. Nec immerito: *Non enim est verus Judæus ille qui in manifesto Judæus est*, id est in vocabulo et natione et legis observantia carnali, neque est vera circumcisio illa, *quæ in manifesto*. id est quæ corporeis oculis videri potest *in carne*, id est in cutis ablatione; sed ille est verus Judæus, *qui in abscondito Judæus est*, id est in secreto cordis confitens et laudans Deum, et illa est vera circumcisio, quæ est cordis. Antiqui patres et circumcisionem carnis habebant propter signaculum fidei, et circumcisionem cordis propter ipsam fidem. Sunt ergo Judæi in circumcissione carnis, et sunt Judæi in circumcissione cordis. Ab his patribus degenerantes isti, qui in nomine gloriantur et facta perdiderunt, remanserunt in carne Judæi, et in corde pagani. Qui idcirco maxime Judæi sunt appellati, quia Judas unus erat ex duodecim filiis Jacob, et de tribu ejus regnum veniebat Judæis, sicut et ipse Jacob prophetaverat, dicens: « Non auferetur sceptrum de Juda et dux de femoribus ejus, donec veniat qui mittendus est (Gen. xlix). » Nunquam ergo post David habuerunt regem Judæi, nisi de tribu Juda, donec Christus veniret, qui et ipse de tribu Juda nasci dignatus est, utpote verus rex. Herodes enim,

sub quo Dominus natus est, primus ex alienigenis A regnavit in Judæa. Itaque ipso jam veniente Domino, eversum est regnum Judæorum et sublatum ab eis. Modo non habent regnum, quia noluerunt cognoscere regem verum. Qui ergo a Juda, de cujus stirpe regem habebant vocabantur Judæi, videamus si jam hoc nomine sunt appellandi. Ipse enim voce sua abdicaverunt se ab isto nomine, ut Judæi non sint digni appellari, nisi tantum carne. Cum enim sævirent in Christum, qui de Juda et de David rex eis datus fuerat, ait illis Pilatus : « Regem vestrum crucifigam? (Joan. xix.) » At illi : Non habemus regem nisi Cæsarem (ibid.). » Si non habebant regem nisi Cæsarem, ablatum erat sceptrum ex Juda. Et si ablatum erat sceptrum ex Juda, jam venerat qui mittendus erat, et illi virtutem Judaici nominis perdiderant. Illi autem vere sunt Judæi, qui Christiani facti sunt ex Judæis. Cæteri vero Judæi, qui in Christum non crediderunt, etiam nomen ipsum perdere digni fuerunt. Judæa ergo vera, Christi ecclesia est, credens in illum regem, qui venit ex tribu Juda per virginem Mariam. Recte itaque dicit Apostolus non vere Judæum esse, qui in manifesto Judæus est, neque veram, quæ in manifesto in carne circumcisio est, sed eum qui in abscondito Judæus est, et eam circumcisionem, quæ est cordis in spiritu, non in littera, id est ut secundum spiritum, non secundum litteram lex intelligatur. Circumcisio cordis, est voluntas pura ab omni illicita concupiscentia. Quæ circumcisio non fit littera docente et minante, sed spiritu adjuvante et sanante. Cujus, C circumcisionis vel Judæi, laus non ex hominibus, sed ex Deo est, quia non ex inani vocabulo laudatur ab hominibus, sed ex intima veritate a Deo, qui per suam gratiam præstitit ei, unde laudari possit et dicere : « In Domino laudabitur anima mea (Psal. xxxiii.) » Nam etiamsi homines talem Judæum vel talem circumcisionem laudent, laus illa non ex hominibus est, sed ex Deo, id est non ex humanis meritis, sed ex Dei gratia. Non enim jure quisquam laudari potest solis meritis, si ei gratia superna defuerit, sed cuicumque gratia illa adfuerit, hunc vere laudabilem facit. Sic et nonnulli gloriantur apud homines de exteriori habitu religionis, qui tamen intus non habent quod foris ostendunt; alii vero D moribus sunt religiosi, qui vestem non gerunt religionis; nec ab hominibus laudantur quasi religiosi, sed a Deo, qui novit quod sunt.

CAPUT III.

« Quid ergo amplius est Judæo? aut quæ utilitas circumcisionis? Multum per omnem modum. Primum quidem quia credita sunt illis eloquia Dei. Quid enim si quidam illorum non crediderunt? nunquid incredulitas illorum fidem Dei evacuavit? Absit! Est autem Deus verax, omnis autem homo mendax (Psal. cxv), sicut scriptum est : Ut justificeris in sermonibus tuis, et vincas cum judicaris. »

Dixerat Apostolus quod circumcisio, si legem ser-

vet, utilis est; si vero prævaricaretur, in præputium vertitur; et econtra, si præputium impleat legem, reputatur in circumcisionem. Nunc autem quia videt quod sibi possent objicere Judæi : Ergo nihil est amplius nobis, quam gentilibus, et sic Deus superflue fecit nos circumcidi, ipsemet ponit illam objectionem, ostendendo quid illis sit majus quam gentilibus. Quandoquidem circumcisio prævaricans legem, sit præputium; et præputium consummans legem, reputatur in circumcisionem, id est Judæus fit gentilis, et gentilis Judæus, ergo quid amplius est Judæo, qui dicitur peculiaris populus Dei quam gentili, qui dicitur canis immundus? aut quæ utilitas est circumcisionis, id est quid consecutus est de circumcisione? Huic interrogationi vel objectioni respondetur, quia multum amplius Judæo secundum priora tempora, et hoc per omnem modum, id est per corporalem et spiritalem modum. In utroque enim modo fecit Deus multa Judæis, quæ gentilibus non fecit; et ita secundum priorem statum sunt digniores, sed nunc in fide non excellentiores. Corporali modo pluit illis manna in deserto, et introduxit eos in terram promissionis, ac magnis opibus ditavit; spiritali quoque modo bene fecit eis, dans illis notitiam sui, et aperiens voluntatem suam, et justificans eos per fidem venturi Redemptoris. Primum quidem. Quasi dicat : Ut alia minora de temporalibus prætermittam, hoc primum et præcipuum pono, quod eloquia Dei, id est lex et prophetæ illis ut amicis sunt credita, per quæ intelligerent de futura incarnatione sapientiæ Dei, et redemptione hominum. Vel credita sunt ab illis, quia nos credimus veras esse Scripturas, quas illi tradiderunt nobis, et a nulla alia gente libros divinæ auctoritatis recepimus. Sive credita sunt ab illis, id est ipsi ea crediderunt, quæ prophetæ et lex de Christo prædixerunt : et ita facilius receperunt Christum, quem in ipsis eloquiis intelligebant promissum. Et vere credita sunt illis, hoc est illi ea crediderunt. Quid enim obest, si quidam illorum non crediderunt? Vel ita : Vere plus habuerunt in eo quod Deus creditis illis eloquia sua, quoniam propter hæc Christus ad eos venit, et ad fidem primos adduxit. Quid enim obfuit, si quidam illorum non crediderunt? Nunquid incredulitas illorum fidem Dei evacuavit, id est inanem fecit fidem Dei, qua credunt homines in Deum? Absit ut evacuet eam! Non enim ideo minus factum est credentibus, si alii credere noluerunt, nec fides propter eos vacua remansit, sed repleta est credentibus. Vel fides Dei est fides promissionis, quam fecit Abraham de Christo et multitudine spiritualium filiorum. Et si quidam Judæorum non crediderunt, nunquid incredulitas illorum evacuavit fidem Dei? id est nunquid vacuum et inexpectam fecit promissionem Dei? Absit hoc ab humanis cordibus, ut divinam promissionem putent evacuatam! Licet enim aliqui fuerunt increduli, tamen alii crediderunt, in quibus completa est veritas promissionis. Non est evacuata fi-

des promissionum Dei, sed Deus est in promissionibus suis verax, quoniam veraciter illas adimplet. *Deus quidem verax est*, in omnibus quæ loquitur, sed *omnis homo est mendax*. Hoc addit, ut appareat promissionem Dei factam esse et completam, non propter aliquam hominum dignitatem, sed propter miseriam, ut gratia detur indignis, et commendatio sit gratia. Deus dicitur verax, id est invariabilis, tam in essentia quam in promissis. Homo autem mendax, nec verum esse habens, propter peccata defluens. Omnis namque homo mendax est, id est humana natura sic est ex primitivo casu corrupta, veneno serpentis infecta, ut sine mendacio peccatorum non existat in hoc sæculo. Non enim solummodo verbis, sed et factis est mendax. Sed nonnulli qui per gratiam Dei supra homines sunt, etiam veraces per eandem gratiam efficiuntur. Quibus de causis fidem suam Deus non permisit evacuari, tum propter suam immutabilem veritatem, tum propter venialem statum humanæ fragilitatis, quæ postquam a veritate decidit, sine peccatorum mendacio non potest existere. Ita est Deus verax, et homo mendax, sicut scriptum est in Psalmo : *Ut justificeris in sermonibus tuis (Psal. I)*, Quasi diceret Psalmista : O Domine, pronuntiasti quidem sine personarum acceptione te in peccatores vindicaturum ; et dum nunc mihi remittis, propitiationem tuam mendacium judicant. Sed vincis, dum judicaris injustus esse remittendo peccata mea, quia dum homo ipse culpam in se lamentando persequitur, indulgentia pietatis tuæ non injusta esse probatur. Cum in me reatum arguis per prophetam, probas te habere de nostris operibus curam, et vincis eos qui te incuriosum humanorum actuum judicabant. Sicque tu verax esse probaris, homines autem mendaces. Peccavi, et malum coram te feci, ut tu, mittendo Filium tuum de stirpe mea, sicut promisisti, justificeris sermonibus tuæ promissionis, id est justus et verax esse comproberis, non dimittendo propter iniquitatem meam quin Filium tuum, sicut locutus es, ex semine meo carnem suscipere facias, ut mundum redimat, et vincas implendo promissa, cum judicaris non debere implere propter peccata mea. Justificeris in sermonibus tuis, implendo illos. Justitia enim sermonum est veritas, et vincas reprehensores tuos mendaces, cum judicaris ab illis injustis, dum mihi parcis, et dignum me tua promissione facis. Hanc lineam Apostolus sequitur nunc, quasi dicens : Vel transgressi quidem Judæi fecerunt nomen Domini blasphemari, ut diceretur : Hæc erat illa gens sancta et populus electus, qui se nunc transgressionem et inexplabilem sacrilegio et crimine in pietatis involvit : ecce per scelus eorum vacuata sunt promissa Dei. Sed non ita est. Nam si transgressores a gratia exciderunt, veridicam Domini promissionem obedientia fidelium consequitur. Ac sic confusis illis, qui eloquia divina in irritum adducta jactabant, justificatur Deus in sermonibus suis, et vincit cum judica-

tur, dum gratiam ab incredulis repudiatam, credentibus confert.

« Si autem iniquitas nostra justitiam Dei commendat, quid dicemus? Nunquid iniquus est Deus qui infert iram? Secundum hominem dico, Absit! « Alioquin quomodo judicabit Deus hunc mundum? « Si enim veritas Dei in meo mendacio abundavit in gloriam ipsius, quid adhuc et ego tanquam peccator judicor? Et non sicut blasphemamur, et sicut quidam aiunt nos dicere, faciamus mala, ut veniant bona, quorum damnatio juxta est. »

Dixit quod Dominus est verax, et omnis homo mendax, quod indignis dat bona, in quo apparet commendabilior ejus justitia et gratia. Unde perversus aliquis dicens Deum uti malis quasi instrumento ad gloriam suam, ex eo deducit ut dicat iniquum Deum, qui peccata punit quæ sibi prosunt. Quod Apostolus removet. Vertitur enim hoc loco duarum ratio personarum, id est cujuslibet imperiū male interpretantis, et Apostoli refellentis. Nam propter sententiam, qua dictum fuerat, ut justificeris in sermonibus tuis, et vincas cum judicaris, videbatur ei pars diversa respondere : O Apostole, magnum peccatis nostris solatium contulisti, dicendo quod justificetur Deus innumerorum indulgentia delictorum, quia injuste peccata nostra puniuntur, quæ ad manifestandam Dei patientiam benevolentiamque proficiunt. Et Apostolus : Deus quidem justificatur in sermonibus suis. Sed si iniquitas nostra, sicut tibi videtur, commendat justitiam Dei, id est majorem declarat, dum remittit aut judicat, quid dicemus subaudi, de hoc inconvenienti quod inde oritur? Scilicet, nunquid iniquus est Deus qui infert iram, id est pœnam propter peccata, id est tunc est iniquus, si nos punit propter peccata nostra, quæ illius gloriam augment. Secundum hominem dico, id est secundum carnalem sensum, qui de superiori sententia tam imperite sentis. Qua enim justitia damnabit injustitiam, si juxta opinionem tuam humana iniquitate sit injustior? Sed absit ut putetur iniquus, dum peccatores punit. Non ergo iniquitas nostra justitiam ejus commendat, nec eum peccata, sed bonorum operum gesta glorificant. Et ideo peccata juste ulciscitur, qui sanctis operibus pie delectatur. Vere non est iniquus feriendo peccatores. Nam alioquin, id est si alio modo est, si hoc non est quod non sit iniquus, quomodo judicabit ipse Deus hunc mundum? Repugnat enim ut sit iniquus et judex fiat, cum omnis judex sit æquus. Non potest ergo Judex esse, si iniquus est, inferendo peccantibus iram. Restat igitur esse eum justum et æquum in ultione peccatorum, ac per hoc juste judicaturum, cum bona bonis et mala malis reddiderit, quia non profuerunt ad commendandam justitiam ejus iniquitates nostræ, sicut dicebas, nec glorificatus est per eas. Adhuc autem respondet Apostolus prædictæ objectioni, probans quod iniquitas nostra justitiam Dei non glorificat, nec ipse est injustus, si punit. Vere ita est. Nam si veritas, id est justi-

tia *Dei in meo mendacio*, id est per meum peccatum abundavit, id est crevit in gloriam ipsius, hoc est, si mendacium peccati mei fecit crescere veritatem justitiæ Dei, ut gloria ejus per hoc magis dilataretur secundum opinionem tuam, *quid adhuc*, postquam ita peccando, secundum te glorificavi Deum, etiam ego judicor nunc ab eo, non solum in futuro *tanquam peccator*, quod non sum, si peccata mea glorificaverunt Deum? Iniquitas est genus sive totum; mendacium vero, species sive pars iniquitatis. Similiter justitia, genus est vel totum; veritas autem species sive pars justitiæ. Et idcirco veritas pro justitia est posita, quoniam omnis veritas est justitia; mendacium autem pro iniquitate vel pro peccato, quia omne mendacium est iniquitas vel peccatum. Quid adhuc, inquit, judicor, si mendacium iniquitatis meæ, secundum quod tu putas, glorificavit Deum? Et quid, id est cur, non facimus mala ut veniant bona, id est cur non assidue peccamus, ut Deus assidue dimittat et laudabilior fiat? *sicut blasphemamur*, id est sicut a perversis hominibus imponitur nobis hoc sentire, *et sicut quidam aiunt pravi nos dicere*, id est prædicare, *faciamus mala ut veniant bona*. Hoc non dicebant apostoli, sed dicebant, quia ubi abundaverat peccatum, superabundavit et gratia (Rom. v). Sed perversi homines occasione verborum hujusmodi, asserebant eos dicere: *faciamus mala, ut veniant bona*, ut auctoritate prædicationis apostolicæ peccata sua soverent et defenderent. *Quorum damnatio est justa*, quia juste damnabuntur, qui sibi in peccatis suis inimica securitate blandiuntur, et ex verbis apostolorum in malis suis confirmantur. Potest et aliter intelligi discussa sententia: Vere Deus, si infert iram malis, non est iniquus. Nam si aliter est, quid adhuc etiam post conversionem ego, qui nunc tantus Apostolus sum, judicor a vobis tanquam peccator, id est tanquam qui peccavi in persecutione fidelium, hoc est, si Deus malis juste iram non infert, cur magnitudinem iniquitatis meæ judicatis ad pœnam? Dico quia judicor, et merito, si veritas Dei abundavit, in meo mendacio, id est si mendacium infidelitatis et negationis meæ a Deo magnum fuit, ut veritas divinæ promissionis et fidei commendabilior inde fieret in gloriam ipsius. Hoc est dicere: Merito judicor, utpote peccator, quia veritatem Christianæ fidei negabam, et veritatem supernæ promissionis exinanire laborabam persequendo fideles; et tamen veritas ipsa fidei vel promissionis, per sævitiam meam clarior facta est in his, quos martyrizavi, sicut in Stephano. Et cum ego de his merito judicer, constat quia Deus non est injustus, dum peccatores in judicio damnat. Et non est ita de nobis, *sicut blasphemamur*, id est injuste et falso vituperamur, *et sicut quidam non nominandi aiunt nos dicere*, id est aliis prædicare, *faciamus mala*, id est peccemus, *ut veniant nobis a Deo bona*, id est ut Deus remedia suæ misericordiæ nobis tribuat condonando peccata. *Quorum*, id est eorum qui talia de nobis garriunt, *justa est damna-*

atio, id est justo Dei judicio tales damnantur, nec est Deus iniquus, dum infert eis iram.]

« Quid ergo? Præcellimus eos? Nequaquam. Causati enim sumus Judæos et Græcos omnes sub peccato esse, sicut scriptum est: Quia non est justus quisquam, non est intelligens, non est requirens Deum. Omnes declinaverunt, simul inutiles facti sunt, non est qui faciat bonum, non est usque ad unum. Sepulcrum patens est guttur eorum, linguis suis dolose agebant, venenum aspersionum sub labiis eorum (Psal. xi). Quorum os maledictione et amaritudine plenum est, veloces pedes eorum ad effundendum sanguinem (Isa. lxi). Contritio et infelicitas in viis eorum, et viam pacis non cognoverunt; non est timor Dei ante oculos eorum. »

Quia multum per omnem modum Judæo fuisse amplius quam Græco dixerat, ideo nunc Judæi volebant se præferre gentilibus, quasi qui per præcedentia justitiæ opera meruissent ad gratiam vocari. Sed ipse arrogantiam eorum deprimens, ostendit eos fuisse peccatores, sicut et gentiles. Quando quidem in priori statu multum fecit Deus per omnem modum amplius Judæo quam Græco. Igitur quid ex hac re videretur esse consequens, est inde consequens, quia præcellimus eos, id est Græcos, in gratia nova, quam nunc percepimus. Nequaquam est inde consequens, quod nos Judæi præcellamus eos, et digniores eis simus, quia et nos, sicut et illi, peccavimus. Nam *causati sumus*, id est multis causis et rationibus jam monstravimus, *Judæos et Græcos omnes ante gratiam istam sub peccato esse*. Et ideo nullus præcedit alium. Superius ostendit gentiles sub peccato esse, cum diceret: *Tradidit illos Deus in desideria cordis eorum*, etc. Judæos autem, ubi dixit: *Qui prædicas non furandum, furaris? qui dicis non mæchandum, mæcharis?* etc. Ita diximus eos sub peccato esse *sicut scriptum est de Judæis*, de quibus minus videbatur, *quia non est justus quisquam eorum*, quoniam ex operibus legis sine gratia nemo justificatur, *non est intelligens*, quia nullus eorum Scripturas sanctas intelligit vel Christum, nec per verba, nec per miracula Deum esse intelligit. *Non est requirens Deum*, quamvis Christus Deus venisset eos quærere, ut ad æternam eos patriam reduceret; tamen nullus eorum requirit eum, cum jam sit quæsitus ab eo. Hoc enim de illis dictum est, qui nondum venerunt ad Christum. *Non est requirens Deum* vel Judæus, vel gentilis quisquam, ut scilicet quærat ac requirat quomodo voluntatem ejus impleat, quatenus ad inventionem visionis ejus pertingere mereatur, sed omnes declinaverunt, id est deorsum ab ejus requisitione se retraxerunt, ponentes cor in infimis, et occupantes sollicitudinibus corporis. *Et simul omnes facti sunt inutiles*, id est nihil utilitatis sibi conquirentes, quia non solum Gentiles, sed et Judæi, qui per legem sine Christo voluerunt salvari, frustra laboraverunt. Non est qui facit bonum, cum Judæos prævaricatio mandato-

rum gentes vero naturæ lex violata condemnet. Et ideo etiam non est inter eos qui faciat bonum, quia quidquid fit sine fide Christi, nequaquam est bonum quamvis bonum videatur esse. Non est usque ad unum, id est nec unus ex eis qui faciat bonum, quia si quis per singulos eorum numerando et inquirendo usque ad unum transeat, non inveniet qui operetur bonum. Vel non est in omnibus qui faciat bonum usque ad unum, id est donec veniatur ad eum qui unus et singularis est, id est ad Christum, cui nemo comparari potest. Christus enim tantummodo facit bonum, et in se et in suis. Non est ex eis qui faciat bonum, sed omnes ipsi multa mala faciunt. *Nam guttur eorum est sepulcrum patens (Psal. XIII)*, quia sicut ex patenti sepulcro exit nimius fetor putrefacti cadaveris, sic ex aperto guttore eorum exit per mala colloquia fetor putentis conscientiæ ipsorum, ut inficiat et corrumpat mores audientium. Clausum enim sepulcrum esset guttur eorum, si pudor eos adhuc cohiberet, ne internum fetorem mortuæ suæ animæ foras in publicum loquendo proferrent. Sed patens sepulcrum est guttur eorum, quia quod in malis ultimum est, verecundiam perdidit, ut jam publice crimina sua loqui non erubescant, sed guttur suum impudenter aperiant, et ex eo fetorem mortuæ animæ circumstantibus proferant. Et etiam *linguis suis* suavia et blanda verba humiliter depromentes, *agebant dolose*, quoniam alia proferebant ore, et alia meditabantur in corde, juxta illud : « Loquuntur pacem cum proximo suo, mala autem in cordibus eorum (Psal. XXVII). » In verbis habebant bona, *sed venenum aspidum erat sub labiis eorum*, id est insanabile odium latebat sub dictis eorum. Aspidum quippe venenum perniciosius est quam cæterorum serpentium, ideoque per illud pessima designatur malitia. Et venenum aspidum tegitur sub labiis eorum, qui blanda loquuntur, sed morsu venenati verbi fraudulenter animam audientis necant, sicut detractores, sicut poetæ, sicut quilibet seductores. Hostes enim sunt animarum, licet se fingant amicos ; et idcirco per malitiam fraudis eas veneno suo inficiunt, ut interficiant. *Quorum os etiam maledictione plenum est et amaritudine*, quia non solum fictis verbis blandiuntur, sed etiam aliis pleno ore maledicunt et amara loquuntur. Hæc sunt enim artes pessimorum hominum, ut aliis adulentur, aliis maledicant, et aliis blandiantur, aliis amara loquantur. Nec dicuntur habere maledictionem et amaritudinem in ore, et os eorum plenum esse fertur maledictione et amaritudine, ut abundantia maledictionis et amaritudinis in ore ipsorum monstretur esse. *Pedes quoque eorum sunt veloces ad effundendum sanguinem*, quia cito currunt ad perpetrandum homicidium. Vel pedes, id est affectus, eorum sunt veloces, id est parati et festivi ad effundendum sanguinem, quia ex deliberatione faciunt homicidia. *Contritio et infelicitas est in viis eorum*, quia tam ipsi quam omnes qui in viis actionum ipsarum ambulat, conterentur gehennalibus suppliciis, et felici-

itate carebunt supernæ beatitudinis. Et hoc ideo, quia *non cognoverunt viam pacis*, id est viam justæ actionis, qua pervenirent ad quietem perpetuæ pacis. Nec mirum, si nesciunt viam qua tenderent ad æternam pacem, quia *timor Dei* « qui est initium sapientiæ (Eccl. I). » *non est ante oculos cordis eorum*. Nam quia initium sapientiæ abjecerunt, ad provectum sapientiæ nequaquam pervenerunt. Sicque superbia, qua timorem Dei ab intuitu suæ mentis removerunt, fecit ut viam pacis ignorarent, et viam mortis ambularent. Hæc de pravitatibus infidelium Judæorum atque gentilium, auctoritate prophetica, locutus est Apostolus, ut maxime Judæos, qui de legis operibus gloriabantur, convinceret multis peccatis irretitos fuisse. Non autem putandum est, eum ex solo tertio decimo psalmo ista posuisse, neque enim habentur in Hebræo simul ita per ordinem, sed potius ex diversis psalmis, et ex libro Isaïæ conjunxisse. Nam quod ait : *Quia non est justus quisquam, non est intelligens, non est requirens Deum, omnes declinaverunt, simul inutiles facti sunt, non est qui faciat bonum, non est usque ad unum*, ex tertio decimo psalmo sumpsit. Quod autem subjicit : *Sepulcrum patens est guttur eorum, linguis suis dolose agebant*, in quinto psalmo legitur. Quodque mox addidit : *Venenum aspidum sub labiis eorum*, centesimi tricesimi noni psalmi est. Rursumque quod ait : *Quorum os maledictione et amaritudine plenum est*, de nono psalmo sumptum est, ubi singulariter dicitur : *Cujus maledictione os plenum est et amaritudine*. Quod autem sequitur : *Veloces pedes eorum ad effundendum sanguinem, contritio et infelicitas in viis eorum, et viam pacis non cognoverunt*, in Isaïa reperitur. Et iterum quod in fine dicitur : *Non est timor Dei ante oculos eorum*, in tricesimo quinti psalmi principio sic est : *Dixit injustus, ut delinquat in semetipso, non est timor Dei ante oculos ejus*. Nec in hoc cuiquam videatur esse diversum, si quod in suis locis numero dicitur singulari, ab Apostolo pluraliter ponitur, qui scribebat ad plurimos, et in unum sensum multa colligebat exempla. Patet itaque non tam Apostolum de psalmo tertio decimo sumpsisse, quod in Hebræo non habetur, nec in septuaginta Interpretibus, sed in editione Vulgata, quam eos, qui artem contexendarum inter se Scripturarum Apostoli nesciebant, quæsisse aptum locum, ubi assumptum ab eo ponerent testimonium, quod absque auctoritate Scripturæ positum in epistola non putabant.

« Scimus autem quoniam quæcunque lex loquitur, « his qui in lege sunt loquitur, ut omne os obstruat, et subditus fiat omnis mundus Deo, quia ex « operibus legis non justificabitur omnis caro coram « illo. Per legem enim cognitio peccati, nunc autem « sine lege justitia Dei manifestata est, testificata a « lege et prophetis. Justitia autem Dei per fidem « Jesu Christi in omnes et super omnes qui credunt « in eum. »

Ne dicerent Judæi : Hæc quæ protulisti, non sunt

dicta de nobis, sed de gentibus, ostendit Apostolus, quia quæ in lege scripta sunt, his qui sub lege tenentur, dicta sunt. Legem appellat hoc loco librum psalmodum, sicut et Dominus, ubi ait : « Nonne scriptum est in lege vestra, quia ego dixi : Dii estis? » (Psal. LXXXI.) Vel totum Vetus Testamentum appellavit nunc legem. Quasi diceret : « Vos quidem ad alios vultis hæc detorquere, sed nos scimus quia non solum ista, sed etiam omnia quæcunque lex loquitur, his qui in lege sunt loquitur, id est Judæis, sive bona, sive mala. Quamvis ergo et in gentibus omnia mala hæc essent, quæ nunc Apostolus propheticiis verbis descripsit, de Judæis tamen proprie dicta sunt omnia, quia non necesse erat scelera gentium, de quibus nemo dubitabat, propheticiis testimoniis astruere, sed potius Judæorum, qui de transactis operibus justitiæ gloriari volebant. Quæcunque lex loquitur, his qui in lege sunt loquitur; quoniam omne quod in lege de gentibus dicitur, etiam ipsum hoc de Judæis dicitur, quia ipsorum principalis est causa. Omnia quæ lex loquitur, etiam dum pessima flagitia describit, loquitur sine dubio, his qui sunt in lege positi, et ad ipsos pertinet quidquid lex dicit, ita ut omne os, non solum gentium, sed etiam Judæorum, obstruatur, id est obmutescat, dum non habent unde gloriantur, sed omnes sub peccato esse monstrantur. Vel ideo loquitur lex omnia his qui in lege sunt, ut omne os etiam Judæorum obstruatur, non inveniens quid de meritis suis jactet, cum lex dicat : « Omnes declinaverunt, simul inutiles facti sunt (Psal. III). » Et ut subditus fiat omnis mundus Deo, ut sciat se sine gratia Dei salvum esse non posse, vel certe in confessione peccati speret misericordiam, cognoscens se esse in peccatis. Omnis mundus, id est omnes homines, qui in mundo sunt, non solum gentiles, sed et Judæi, fiant Deo subjecti. Quod debent humiliter facere, quia ex operibus legis non justificabitur omnis caro, id est in carne vivens non justificabitur ex carnali observantia legis coram Deo, qui videt intima cordis, licet coram hominibus videatur justificari. Hic contra eos incipit Apostolus disputare magno diuturnoque conflictu, qui gloriabantur in lege, et per legem se justificari credebant, non per gratiam, docens per ordinem, legem non potuisse auferre, sed potius auxisse peccatum, quod aufert gratia, quia lex jubere novit, cui succumbit infirmitas, sicut gratia juvare, qua infunditur charitas. Et notandum, quia nunc legem quinque libros Moysi nominat. Et cujus legis operibus nemo justificabitur coram Deo, quia nihil ad perfectum adduxit lex, quæ timorem pœnæ incussit, non amorem justitiæ infudit. Qui enim timore supplicii non amore sanctitatis observabat legem, mallet utique non esse quod timeret, ut impune legem ei præterire liceret. Ac præterea licet ipsam legem actibus impleret, et in oculis hominum justus appareret, in oculis tamen interni inspectoris erat injustus, quia quod foris in opere demonstrabat, intus in voluntate non

A habebat. Non dicimus non justificados fuisse eos qui fuerunt legi obedientes, sed dicimus : quia nisi ex gratia justificati fuissent, non essent vere obedientes. Vere ex legis operibus nemo veraciter justificatur, quia per legem est tantum peccati cognitio, non consumptio. Prohibet enim lex peccatum, non auferit, et prohibendo ostendit esse malum quod prohibet. Per legem fuit cognitio peccati, et per eam nemo sine gratia justificatus est; sed nunc in hoc tempore gratiæ est manifestata gratia Dei, quæ tempore legis fuit operata. Manifestata est sine lege, id est sine legis auxilio, justitia, non hominis, non propriæ voluntatis, sed Dei. Et justitia Dei, non qua justus est Deus, sed qua induit hominem, cum justificat impium. Et ut certius teneatur ista justitia, testificata est a lege et prophetis, id est testimonium ei perhibuerunt lex et prophetæ. Nam lex quidem dum juberet et minaretur, et neminem justificaret, satis indicavit dono Dei hominem justificari per adjutorium spiritus. Prophetæ autem, quia id quod prædixerunt, implevit adventus Christi. Et hæc justitia est sine lege, quia Deus eam per spiritum gratiæ credenti confert sine adjutorio legis, id est non adjutus a lege, quando quidem per legem ostendit homini infirmitatem suam, ut, ad ejus misericordiam per fidem confugiens, sanetur. Dixi justitiam Dei esse manifestatam. Sed hæc justitia Dei est per fidem Jesu Christi, id est per fidem, qua creditur in Christum. Sic enim ista fides Christi dicta est, qua credimus in Christum, sicut illa justitia Dei, qua justificamur a Deo. Utraque enim nostra est. Sed idcirco Dei et Christi dicitur, quia ejus largitate donatur. Hæc justitia quæ confertur per fidem, fidesque ipsa, occulta inspiratione Dei et gratiæ dono infunditur, non labore humano, nec opere Veteris Testamenti acquiritur, quia ipsius donum est ut credamus. Est ergo justitia hæc super omnes qui credunt, cœlitus data, superans merita omnium et Judæorum et gentilium. Ideo etiam per fidem super eos est justitia, quæ per legem esse non potuit, quia fides impetrat quod lex imperat.

« Non enim est distinctio. Omnes enim peccaverunt, et egent gloria Dei, justificati gratis per gratiam ipsius, per redemptionem quæ est in Christo Jesu, quem proposuit Deus propitiationem per fidem in sanguine ipsius, ad ostensionem justitiæ suæ propter remissionem præcedentium delictorum, in sustentatione Dei, ad ostensionem justitiæ ejus in hoc tempore, ut sit justus, et justificans eum qui ex fide est Jesu Christi. »

Ideo dixi super omnes æqualiter esse justitiam per fidem, quia non est distinctio in accipienda illa justitia, sed sive Judæus sive gentilis fidem habuerit, justificabitur. Vere non est distinctio utrorumque, quia omnes et Judæi et gentiles peccaverunt, vel in se vel in Adam. Quoniam lex sive in paradiso data, sive naturaliter insita, sive in litteris promulgata, prævaricata est ab ipsis. Omnes ergo peccaverunt et egent adhuc quotidie gloria Dei, id est ut

Deus magis magisque glorificetur in eis, tribuendo beneficia gratiæ suæ per remissionem quotidianorum delictorum, et multiplicationem virtutum. Non gloria sua egent, ut gloriantur quasi de suis meritis, sed egent gloria Dei, id est omnino necessarium est illis, ut gloria Dei dilatetur in ipsis. Si enim justitia ex operibus legis haberetur, jam ipsa justitia non esset gloria Dei, sed potius hominum legem observantium. Sed quia per gratiam, non per legem habetur justitia, illa justitia est gloria Dei, non hominum, ut quidquid habet homo, non sibi, sed Deo ascribat. Gloria Dei adhuc egent, jam tamen *justificati gratis*, id est sine ullis meritis. Et justificati non per legem, nec propriam voluntatem, sed *per gratiam*. Non quod sine voluntate nostra fiat, sed voluntas nostra ostenditur infirma per legem, ut sanet gratia voluntatem, et sana voluntas impleat legem, non constituta sub lege, nec indigens lege. Hoc totum idcirco Apostolus loquitur, ne fides ipsa superbiere incipiat et dicat: Si ex fide, quomodo gratis? Quod enim fides meretur, cur non potius redditur quam datur? Sed si quis dixerit: Ut merear justificationem, habeo fidem, respondetur ei: «Quid enim habes quod non accepisti? (I Cor. iv.)» Cum ergo fides impetrat justificationem, sicut unicuique Deus partitus est etiam ipsius mensuram fidei, non gratiam Dei aliquid meriti præcedit humani, sed ipsa gratia meretur augeri, ut aucta mereatur et perfici, comitante, non ducente pedissequa, non prævia voluntate. *Justificati*, inquit, *per gratiam*, quæ non meritis redditur, sed gratis datur, propter quod gratia nominatur. Quæ gratia venit *per redemptionem, quæ est in Christo Jesu*, non in alio aliquo. In eo enim inventa est redemptio humani generis, id est in ejus sanguine, quæ in nulla alia re poterat inveniri. Non enim nos Christus, quia per naturam ipsius semper fuimus, sed redemit quia captivi peccato tenebamur. Qui enim aliquem redimit, suum docet fuisse quem redimit. Ita Christus nos redeimit, quia ejus eramus. *Quem Christum Deus Pater proposuit*, id est longe ante præordinavit futuram propitiationem, id est expiationem peccatorum nostrorum, hoc est, ut per eum ipse Pater expiaret nos a peccatis, et propitius nobis fieret. *Vel proposuit*, id est in propatulo omnibus illum *posuit propitiationem in sanguine ipsius*, id est ut ipse esset non solum propitiator, sed etiam propitiatio, et illam propitiationem haberemus in sanguine ejus, qui in remissionem peccatorum effusus est. Nam absque sanguinis effusione, sicut iste dicit Apostolus, non fit remissio peccatorum, quia videlicet non nisi per sanguinem Christi dari valet propitiatio et remissio peccatorum. In cujus typo quotiescunque peccata in lege dimitti dicuntur, sanguis hostiæ offertur. *Proposuit autem Deus Christum propitiationem per fidem*, ut qui in eum crederent, ipsi propitiationem hanc haberent. *Vel proposuit eum propitiationem per fidem in sanguine ipsius, quoniam aliter non erit ipse propitiatio alicui, nisi*

A credat eum fuisse sanguinem suum pro redemptione generis humani, et subjungat huic fidei bona opera, prout poterit. *Proposuit, inquit, eum, id est in publico posuit per prædicationem apostolorum, hunc esse propitiationem pro peccatis nostris; et hoc fecit ad ostensionem justitiæ suæ, id est ut per eum manifestaret hominibus suam veram justitiam, quam prius latebat, dum putarent homines operibus legis se posse justificari. Veram ergo justitiam ostendit in Christo credentibus, et ostendit eam esse suam, non hominum, id est a seipso datam hominibus, non ab ipsis ortam, nec ex legis operibus habitam. Quam scilicet justitiam ostendit propter remissionem præcedentium delictorum, id est ut remitteret delicta, quæ præcesserant non solum in gentilibus, sed etiam in Judæis, qui veram justitiam necdum noverant. Omnes enim peccaverunt. Sed per ostensionem suæ justitiæ placuit Deo, ut remitteret illis præcedentes culpas, et justificaret eos, ut deinceps juste viverent. Præcedentia enim ob hoc Apostolus determinavit, ne quis intelligeret illa esse remissa, quæ post acceptam gratiam committit. Præcesserunt delicta, et hoc factum est, in sustentatione Dei, qui non statim percussit delinquentes, sed diu patienter sustinuit, ut ad pœnitentiam converteret. Sustentatione dico, prærogata ad ostensionem justitiæ ejus, id est ad hoc longanimiter sustinuit eos, ut tandem conversis ostenderet justitiam suam in hoc tempore gratiæ, quam prioribus temporibus non manifestaverat, dum putarent homines se per seipsum posse justificari. Ad hoc, inquam, sustinuit et justitiam suam qua justificari posset homines, ostendit, ut sit ipse justus, id est juste agens omnia. Justum namque fuit, ut qui in futuro sæculo judicaturus est singulos secundum opera eorum, in isto sæculo patienter eos sustineret, et quid agere deberent illis ostenderet. Justus ergo est in hac sustentatione et justitiæ ostensione, quoniam omnia quæ facere debuit, fecit. Et per hæc etiam est justificans eum qui est ex fide Jesu Christi, quia dum sustinet, et justitiam suam ostendit, infundit ipsam justitiam cordi credentis. Non justificat eum qui est ex lege, sed eum qui est ex Christi fide, id est ex fide qua creditur in Christum. Ex hac enim datur justificatio, et non ex operibus legis aut naturæ.*

«Ubi est ergo gloriatio tua? Exclusa est. Per quam legem? Factorum? Non, sed per legem fidei. Arbitramur enim justificari hominem per fidem sine operibus legis. An Judæorum Deus tantum? Nonne et gentium? Imo et gentium. Quoniam quidem unus est Deus qui justificat circumcisionem ex fide, et præputium per fidem. Legem ergo destruimus per fidem? Absit, sed legem statuimus.»

Quando quidem justitia est Dei, non hominis, et ex fide, non ex lege, ergo ubi est gloriatio tua, o Judæe? Id est ubi est elatio tua, in qua gloriaberis per legis opera te justificatum? hoc est, non habes materiam gloriandi in lege, quia exclusa est, id est ex-

cia et ablata tibi causa gloriandi, eliminata est gloriatio, quam in corde habebas. Et attende per quid. Nam per quam legem putas eam exclusam? Putas per legem factorum, id est operum? Non est exclusa per legem factorum, sed per legem fidei, id est non per laborem operum, sed per facilitatem fidei. Lex enim fidei est, qua in Christum credimus, et auxilium gratiæ ejus ad bene agendum precamur. Lex fidei est in spiritu juvante, lex factorum in littera jubente. Quod lex operum minando imperat, hoc lex fidei ei elendo impetrat. Lex operum dicit: « Non concupisces (Exod. xx). » lex fidei dicit: « Cum scirem quia nemo potest esse continens nisi Deus det, et hoc ipsum erat sapientiæ, scire cujus esset hoc donum, adii Dominum et deprecatus sum (Sap. viii). » Ipsa est illa sapientia quæ pietas vocatur, qua colitur Pater luminum, « a quo est omne datum optimum, et omne donum perfectum (Jac. i). » Colitur autem sacrificio laudis, actionibusque gratiarum, ut cultor ejus non in seipso, sed in illo gloriatur. Ac per hoc lege operum dicit Deus, Fac quod jubeo; lege fidei dicitur Deo: Da quod jubes. Non ergo per legem operum excluditur gloriatio eorum, qui cum sibi juste videntur vivere, ita gloriantur quasi non acceperint, sed per legem fidei, quia per eam quisque cognoscit si quid bene vivit, Dei gratia se habere, et ut perficiatur in dilectionem justitiæ, non se aliunde consecuturum. In lege itaque factorum, est Dei jubentis justitia; in lege autem fidei, subvenientis misericordia. Hæc est enim lex fidei, qua credimus et oramus per gratiam nobis donari, ut faciamus quod per nosmetipsos implere non possumus, ne ignorantes Dei justitiam et nostram volentes statuere, justitiæ Dei non simus subjecti. Vere, inquit, per legem fidei exclusa est gloriatio tua, qua de legis observatione tumebas, quia nos apostoli arbitramur, id est certi sumus, justificari quemlibet hominem per fidem sine operibus legis præcedentibus. Non ideo enim Apostolus hoc dicit, ut si quis crediderit, non ad eum pertineat bene operari; sed ideo potius, ut nemo putet meritis priorum bonorum operum se pervenisse ad donum justificationis, quæ est in fide. In hoc enim se gentibus in Christum credentibus Judæi præferre cupiebant, quod dicebant se meritis bonorum operum, quæ per legem sunt, pervenisse ad evangelicam gratiam. Ideoque scandalizabantur multi qui ex Judæis crediderant, quod incircumcisis gentibus Christi gratia traderetur. Unde nunc Apostolus dicit posse hominem sine operibus, scilicet præcedentibus, justificari per fidem. Nam justificatus per fidem, quomodo potest nisi justè deinceps operari, quamvis nihil antea justè operatus ad fidei justificationem pervenerit, non merito bonorum operum, sed gratia Dei. quæ vacare in illo non potest, cum jam per dilectionem bene operatur. Quod si cum crediderit, mox de hac vita decesserit, justificatio fidei manet cum illo, nec præcedentibus bonis ope-

ribus, quia non merito ad illam, sed gratia pervenit, nec consequentibus, quia in hac vita esse non sinitur. Unde manifestum est, quia quod Apostolus dicit justificari hominem per fidem sine operibus, non ita debet intelligi, ut accepta fide, si vixerit, dicamus eum justum etiamsi male vixerit, sed ut sciat se quisque per fidem justificari, etiamsi legis opera non præcesserint. Sequuntur enim justificatum, non præcedunt justificandum. De illis autem, qui post acceptionem fidei nolunt bene operari, testatur Jacobus, quia fides si non habeat opera, mortua est in semetipsa (Jacob. ii). Post hæc Apostolus ut ostendat et gentiles ad istam gratiam debere suscipi sicut Judæos, ait: An Judæorum Deus tantum? Quasi dicat: Vos putatis quod ad vos tantum Deus pertineat, et vos soli gratiam ejus suscipere debeatis. Sed nunquid hoc verum est? An Judæorum tantum est Deus? Nonne est etiam gentium sicut Judæorum? Imo, id est magis hoc eligam dicere, quia est et gentium et Judæorum, id est omnes homines fecit, et similiter de omnibus cura est ei. Non solum vobis, sed et gentibus venit Christus, vobis ex lege promissus, sed ad illas missus. Propterea multo magis et gentium, quia ante legem sancti in præputio placuerunt Deo. Ob hoc enim dixit, imo et gentium, ut ostenderet magis gentes, quoniam ante fuerunt sancti præputiati quam circumcisi, et Abraham ante circumcisionem fide justificatus est. Sed Judæi tumendo dicunt: Gentes idola colendo, Deum dereliquerunt. Quibus respondetur: Et vos. Sed nos, inquit, convertimur. Et illi: Nobis, aiunt, Christus venit promissus (209). Et illis: Non ergo videtur tantum est (sic) Deus, quoniam ex Adam nati sumus, et per prophetas prædictum est, gentes Christo credituras. Vere gentium Deus est, sicut Judæorum. Quod cum aliis modis possit probari, hoc unum pono quoniam quidem unus est Deus, non plures dii. Et in hoc apparet unus esse omnium, quia justificat omnes per eandem causam: Nam circumcisionem, id est circumcisos justificat ex fide, et præputium, id est præputiatis per fidem, hoc est enim ex fide, quod per fidem. Nam nec circumcisio, nec præputium sine fide justificatur. Et quando quidem homo justificatur per fidem sine legis operibus, ergo legem destruimus per fidem? Non, sed statuimus. Quod Judæus posset inferre, ipse Apostolus sub interrogatione infert, ut removeat. Quia, inquit, per fidem justificari dicimus quemlibet hominem sine legis opere, ergo per fidem destruimus legem? Absit ut destruiamus eam! Sed potius statuimus, id est firmam et stabilem esse facimus legem. Per legem enim cognitio peccati; per fidem impetratio gratiæ contra peccatum; per gratiam sanatio animæ: a vitio peccati; per animæ sanitatem, libertas arbitrii; per liberum arbitrium, justitiæ dilectio; per justitiæ dilectionem, legis operatio. Ac per hoc lex non destruitur, sed statuitur per fidem, quia fides impetrat gratiam, qua lex impletur, gra-

tia sanat voluntatem, qua justitia libere diligitur. Vel ita : *Legem ergo*, etc. Quoniam Apostolus dicebat hominem justificari per fidem sine legis observantia, ne Judæi dicerent : Legem ergo destruis, in qua omnes qui crediderunt justii, circumcisi fuerunt. Non solvo, ait, non destruo, sed confirmo, dum hanc prædico circumcisionem, quam illa prædixit. « In novissimis, inquit, diebus circumcidet Dominus Deus cor tuum, et cor seminis tui (*Deut. xxx*). » Tunc destruerem legem, si illam mentitam dicerem, hoc est non cessaturam cum illa promiserit se esse cessaturam, sicut Jeremias ait : « Ecce dies veniunt, dicit Dominus, et consummabo super domum Israel et super domum Juda testamentum novum, non secundum testamentum quod feci patribus eorum, in die qua apprehendi manus illorum ut reducerem eos de terra Ægypti ; sed hoc est testamentum quod disponam domui Israel post dies illos, dicit Dominus, dando leges meas in cordibus eorum, et in mentibus eorum superscribam eas (*Jer. xxxi* ; *Hebr. viii*). » Non destruitur lex, cum impleta cessat. Non eam destruimus, sed magis statuimus, id est stare facimus, dum probamus verum esse, quod dixit de antiquis justis et de gentibus credituris, et spiritalem circumcisionem venturam, dum hoc efficit fides, quod lex jubet.

CAPUT IV.

« Quid ergo dicemus invenisse. Abraham patrem nostrum secundum carnem? Si enim Abraham ex operibus justificatus est, habet gloriam, sed non apud Deum. Quid enim Scriptura dicit? Credit Abraham Deo, et reputatum est illi ad justitiam (*Gen. xv*). »

Revocat illos ad caput circumcisionis, ut quod in initio constiterit, id habeatur in toto. Quando quidem fide justificatur homo sine operibus, et nemo justificari valet absque fide, ergo quid dicemus, id est quid possumus dicere, *Abraham patrem nostrum*, quem imitari debemus, *invenisse secundum carnem*, id est secundum carnis circumcisionem vel secundum carnalia legis opera? Ac si dicat : Nihil justificationis dicere possumus eum invenisse secundum carnem, sed potius secundum mentem, circumcisio enim in carne est, fides autem in mente. Et ipse non per circumcisionem, sed per fidem legitur invenisse justificationem, sicut generaliter dictum est, omnem hominem posse justificari per fidem sine operibus. Vel secundum carnem est pater noster, quia ex eo carnis originem ducimus, et circumcisionem carnis ab ipso habemus nos Judæi. Secundum fidem vero, pater est credentium ex gentibus. Et quid dicimus eum invenisse per quod justus esset? Opera legis? Non. Quia si dixerimus quod ex operibus legis sit justificatus, hoc inconveniens incurreremus, quod habet gloriam de suis operibus, sed non apud Deum, quod omnino falsum est, quia omnes scimus eum habere gloriam apud Deum. Non ergo ex operibus, sed ex fide justificatus est. Sicut enim fides sine

subsequentibus operibus bonis vacua est, ita quilibet opera bona ante fidem. *Habet gloriam, apud semetipsum vel apud homines, sed non apud Deum*. Multi enim gloriantur de operibus, et multi pagani propterea nolunt fieri Christiani, quia quasi sufficiunt sibi de bona vita sua. Et dicit aliquis talium, Bene vivere opus est. Quid mihi præcepturus est Christus, ut bene vivam? Jam bene vivo. Quid mihi necessarius est Christus? Nullum homicidium, nullum furtum, nullam rapinam facio, res alienas non concupisco, nullo adulterio contaminor, non invenitur aliquid in vita mea quod reprehendatur, et qui reprehenderit, faciat me Christianum. Iste talis habet gloriam, sed non apud Deum. Non autem sic pater noster Abraham gloriatum est. Non enim ex operibus legis invenit justitiam, utpote qui ante legem fuit, sed potius ex fide, quia promissis Dei credit. Vere non ex operibus est justificatus. *Nam quid dicit Scriptura in Genesi? id est unde dicit Scriptura justificatum Abraham? Ex fide*. Testatur enim quia *credidit Abraham Deo* promittenti, quod semen ejus futurum esset multiplex et clarissimum sicut cæli, et quod ita firmiter credidit, *reputatum est illi divinitus ad justitiam*, id est per hanc credulitatem non solum liberatus est ab omni originali et actuali peccato, sed et justus est a Deo *reputatus*. Ergo ex fide justificatus est Abraham. Sed si fidem opera non præcesserunt, tamen secuta sunt. Nam qui prius ex fide justificatus est in conspectu Dei, postea et ex operibus est justificatus etiam in conspectu hominum. Unde et Jacobus apostolus in epistola sua contra eos qui volebant bene operari, sed de sola fide præsumebant, ipsius Abrahamæ opera commendavit, dicens : Vis autem scire, o homo inanis, quoniam fides sine operibus otiosa est? Abraham pater noster nonne ex operibus justificatus est, offerens Isaac filium suum super altare? Nec est Jacobus in hac sententia contrarius Paulo dicenti, quia si Abraham ex operibus justificatus est, habet gloriam, sed non apud Deum, ac per hoc asserenti quia non ex operibus est justificatus. Uterque enim verum dicit. Paulus quippe, commendans justitiam quæ ex fide est, adversus eos qui fidem negligentes, gloriabantur de justitia quæ est ex operibus, dixit Abraham non esse justificatum ex operibus, sed quæ fidem præcederent. Jacobus autem, ut dictum est, adversus illos qui percepta fide torquebant otio, et putabant se per eandem fidem, utpote justificados, posse salvari, etiam si bona opera non haberent, dixit Abraham ex operibus esse justificatum, sed quæ fidem secuta sunt. Unde ut ostenderet, se non dissentire a Paulo, sed potius concordare, protinus addidit : Vides quoniam fides cooperabatur operibus illius, ut ex operibus fides consummata est, et suppleta est Scriptura, dicens : *Credidit Abraham Deo, et reputatum est illi ad justitiam* (*Gen. xv*), et amicus Dei appellatus est. Et adhuc subjicit : Videtis quoniam ex operibus justificatur homo, et non

ex fide tantum? Manifestum est enim, eum loqui de operibus quæ fidem subsequuntur. Quia Paulus sine præcedentibus operibus dixit, hominem sola fide posse justificari. Nemo enim fidem suis præcedentibus meritis habere potest. Et ideo qui per fidem gratis sibi datam justificatur, non in se, sed in Domino gloriatur, quia dum non ex operibus, habet fiduciam, per omnia Deo se intelligit debitorem, nihil inveniens, quod sibi arrogare possit ex meritis.

Ei autem qui operatur, merces non imputatur secundum gratiam, sed secundum debitum. Ei vero qui non operatur, credenti autem in eum qui justificat impium, reputatur fides ad justitiam secundum propositum gratiæ Dei, sicut et David dicit beatitudinem hominis, cui Deus accepto fert justitiam sine operibus: Beati quorum remissæ sunt iniquitates, et quorum tecta sunt peccata. Beatus vir, cui non imputavit Dominus peccatum (Psal. xxxi).

Dixi, quia Abraham justus est ex fide. Sed ei qui operatur opera legis quæ Abraham non fecit, vel aliqua bona ut gratiam mereatur, ut Judæus se fecisse dicebat, si merces est ei, non est ex gratia, sed ex debito meriti sui. Sed si quis quærere voluerit, ante gratiam, quid meruerit ut acciperet eam, mala sua poterit invenire, non bona. Gratia enim gratis datur, unde etiam nuncupatur. Si ergo gratia, non jam ex operibus. Alioqui gratia jam non est gratia. Errat igitur Judæus, vel quilibet alius, qui se putat merito præcedentium operum pervenisse ad gratiam Dei. Quis enim prior dedit illi, et retribuetur ei? Putat quod ipse prior dederit Deo, et pro mercede sui operis acceperit evangelicam gratiam, quod non ita est. Huic enim qui ante operatur, non gratia, sed debitum redditur. Illi vero qui non facit opera legis, sed absque præcedenti opere accedit ad fidem, sufficit ipsa fides ad justitiam. Ita attribuit Apostolus aliis, quod de Abraham dixerat, scilicet quod si est justus ex operibus, habet gloriam, sed non apud Deum, et ideo ex fide. Vel hoc modo fides in exordio justificat sine operibus. Sed qui sic justificatus est, non debet deinceps a bonis operibus torpere. Nam ei, qui post fidem quam gratis acceperit, operatur opera bona, non imputatur merces, id est non recompensatur æterna remuneratio secundum gratiam, id est secundum fidem tantum, sed secundum debitum operationis suæ. Ita fit ei, qui post acceptam fidem vivit et bene operatur: non enim aliter a Domino mercedem percipit. Sed ei qui non operatur, id est qui postquam baptizatus est, non habet tempus operandi, vel propter infirmitatem non potest operari, quanquam velit, sed absque opere de hac vita rapitur cum fide et bona voluntate, huic nihil operanti, sed tantummodo credenti in eum qui justificat impium, id est, in Deum, reputatur fides ejus ad justitiam, id est sola fides sufficit ei ad justitiam, et ita ad salutem secundum propositum gratiæ Dei, id est secundum quod Deus per gratiam

suam longe ante proposuit, vel secundum gratiam Dei propositam omnibus credere volentibus. Credenti, inquit, in eum qui justificat impium. Aliud est credere eum, aliud est credere ei, aliud credere in eum. Credere eum, est credere quod ipse sit; credere ei, est credere quod ipse vera dicat: credere in eum, est credendo amare, credendo in eum ire, et ejus membris incorporari. Et idcirco fides qua creditur in eum, ipsa est sola quam ille approbat. Credenti in eum qui justificat impium. Impius est, qui non recte credit etiamsi nihil cuiquam auferat, si pauperibus tribuat, si uxorem alienam non concupiscat, si nulli fraudem faciat, si depositum reddat, quia hæc omnia facit non ea intentione qua debuit; et idcirco bona non sunt, quoniam non de bona radice prodeunt. Quisquis ergo sine fide operari bona vult, impius profecto est. Sed credat in eum qui justificat impium, ut et ipse ex impio fiat pius: et per fidem justificatus, possit deinceps opera pietatis et justitiæ facere. Ei qui sic credit, reputatur fides ejus ad justitiam secundum propositum gratiæ Dei, qui sic per gratiam suam proposuit et decrevit, ut, cessante lege, fides justificet. Et hoc dico ego ex gratia fieri, sicut et David dicit hic (Psal. xxxi) et in futuro esse beatitudinem illius hominis, cui accepto, id est ad gratiam assumpto, Deus fert justitiam sine operibus præcedentibus. Magna enim beatitudo est hominis, sine labore legis vel penitentia, fidem per solam gratiam promereri secundum propositum Dei, quo proposuit gratis peccata dimittere. Illi accepto fert Deus justitiam sine operibus, qui per fidem qua primum Deo credit, et de præterito absolvitur, et de præsentibus justificatur et ad futura fidei opera præparatur. Probare vult Apostolus, et in ipsa lege prædici, justitiam sine operibus prodesse, nec se hoc de suo defendere, sed prophetæ testimonio confirmare. Beati, inquit, sunt illi quorum iniquitates sunt remissæ, et quorum peccata sunt oculis Dei tecta. Iniquitas est, contra legem vel extra legem agere. Unde et Græce dicitur anomia, id est sine lege, quia lex νόμος, nomos. Iniquitas ergo est, a lege deviare, vel contra legem agere. Peccatum vero etiam illud dici potest, quod contra quam natura docet, et conscientia arguit, delinquitur. Et juxta hunc sensum iniquitas ad Judæos, peccatum autem ad gentes pertinere videtur. Sed utrorumque culpas Dominus per gratiam suam, si crediderint, abluit. Quod enim remittitur, non est; et quod tegitur, non apparet, et ideo non imputatur. Beati sunt illi, quorum iniquitates sunt remissæ in baptismo, vel etiam igne dilectionis postea liquefactæ et consumptæ, sicut illius peccatricis, cui remissa sunt peccata multa, quia dilexit multum (Luc. vii). Et quorum peccata superpositis acibus bonis sunt tecta. Omne enim quod tegitur, interius ponitur; et hoc unde tegitur, desuper ducitur. Quando igitur abdicamus mala quæ fecimus, et eligimus bona quæ facimus, quasi tegimen rei superducimus, quam erubescimus Judæi (sic). Et ita ante Dei oculos teguntur

peccata, dum eis superducuntur bona facta. Potest etiam ad gentes magis pertinere iniquitas, quæ dicitur anomia, id est sine lege, quia gentes sine lege erant. Et possumus totum in baptismo intelligere fieri id est et iniquitates remitti, id est deleri, et peccata tegi, ut ultra non videantur ad pœnam. *Beatus est etiam vir ille, cui credenti Dominus propter filiam suam non imputavit ad pœnam peccatum originale vel aliquod peccatum.* Sicut enim Abrahamæ reputata est fides ad justitiam, ita et omni credenti, cum fides ad justitiam in baptismo reputatur, peccatum utique non imputatur.

« Beatitudo ergo hæc in circumcissione tantum
 « manet, an etiam in præputio? Dicimus enim quia
 « reputata est Abrahamæ fides ad justitiam. Quomodo
 « ergo reputata est? In circumcissione, an in præpu-
 « tio? Non in circumcissione, sed in præputio. Et
 « signum accepit circumcissionis, signaculum justi-
 « tiæ fidei, quæ est in præputio, ut sit pater om-
 « nium credentium per præputium, ut reputetur
 « et illis ad justitiam, et sit pater circumcissionis,
 « non his tantum qui sunt ex circumcissione, sed
 « his qui sectantur vestigia fidei, quæ est in præpu-
 « tio patris nostri Abrahamæ. »

Quandoquidem David universaliter dicit, eum esse beatum, cujus iniquitates vel peccata Deus gratis remittit, ergo hæc beatitudo repromissionis peccatorum manet tantum in circumcissione, id est in Judæis, an et in præputio, id est in gentilitate? Id est cum constet quod beatitudo ista per fidem sit ex gratia, modo quaeritur in quibus sit, in Judæis tantum, an etiam in gentibus? Quod ideo quaero, quia constat de Abraham, quod justus est per fidem. Et cum hoc constet, quaero in quo statu sit justificatus, postquam est circumcissus vel ante. Et sicut in eo videbitur, sic in aliis credi poterit. Et hoc est: Idcirco quaerimus an sit etiam in præputio ista beatitudo, quia dicimus omnes et confitemur, quia fides Abrahamæ reputata est ad justitiam, id est fide justificatus est. Quomodo ergo reputata est ad justitiam? In circumcissione, an in præputio? Id est cum omnes confiteamur, eum per fidem justificatum, videamus utrum propterea sit justus, quia est circumcissus: an ideo sit circumcissus, quia inventus est justus. Non in circumcissione est reputata fides ejus ad justitiam, sed in præputio. Id est ante justificatus est per fidem, quam circumcideretur. Non ergo propter circumcissionem justificatus est. Quomodo, inquit, reputata est fides ejus? Cum esset in circumcissione, an cum esset in præputio? Si enim fuisset tunc temporis in circumcissione, videtur utique a fidei hujus gratia exclusum esse præputium. Sed erat adhuc tunc in præputio. Et cum in præputio positus per fidem sit justificatus, jure princeps et pater dicitur omnium credentium in præputio. In præputio est justificatus. Cur ergo post circumcissus? Non hoc superflue factum est, sed accepit signum circumcissionis, non qua fieret, sed qua ostenderetur justus. In præputio per fidem justificatus est, et deinde acce-

pit signum circumcissionis, id est circumcissionem exteriorum, quæ esset signum interioris. Signum enim dicitur, cum per hoc quod videtur, aliud aliquid indicatur. Bene ergo circumcissio signum appellatur in Abraham, quia et ipsa aliud videbatur, et aliud intelligebatur, quia jam tunc carnalis illa circumcissio signum erat spiritalis circumcissionis, quæ non in carne suscipitur, sed in corde. Et tale signum quod sit signaculum, id est habens similitudinem signatæ rei, ut sicut carne libidinis, sic spoliatur omnibus primæ nativitatis sordibus. Et quia nondum dixerat cujus signum, subdit: *Justitiæ fidei, id est, quæ est ex fide.* Fidei dico, quæ est in præputio, id est quam ipse habuit existens in præputio. Vel signaculum, id est celans quoddam mysterium. Signaculum enim dicitur, cum alicui rei servandæ pro tempore custodia imponitur, quod nemo alius nisi ipse qui impressit, debeat resignare. Sic in circumcissione Abrahamæ conclusum est pro tempore mysterium quoddam, quod celaretur inimicis, et servaretur amicis ad similitudinem sigilli, scilicet quod sicut jussum est Abrahamæ ut octava die circumcideretur homo ex ejus semine, sic in octava post finem septem dierum sæculi auferretur omnis vetustas et corruptio ab electis Dei. Vel hoc mysterium sigillatum est in eo, quod Abraham primo justificatus est, et post accepit circumcissionem, quæ esset signaculum justitiæ fidei ejus, ut ipse sit pater credentium per præputium, id est in præputio, et sit pater circumcissionis. Effectus enim est utriusque generis pater, his qui sunt in præputio per fidem, et his qui sunt in circumcissione, per carnem. Et hoc Abrahamæ sigillum tunc credimus resignandum, id est aperendum, cum plenitudo gentium introierit, et omnis Israel salvus erit. Tunc enim patenter cognoscetur Abraham esse pater non solum gentium, sed etiam circumcissionis per fidem. Nam idcirco ante justificatus est in fide, dum adhuc esset incircumcissus, et post circumcidi jussus est, ut ostenderetur primo pater futurus multarum gentium, et postea illorum qui ex circumcissione credituri sunt. Neque enim hi qui secundo carnem nascuntur ex Abraham, filii Abrahamæ dicendi sunt, nisi fidem et opera Abrahamæ habeant. Hoc itaque sigillabatur in circumcissione Abrahamæ, ut sit pater, id est exemplum omnium credentium per præputium, id est in præputio. Sic enim dicitur per præputium, pro in præputio, sicut dicere solemus, per illud tempus, pro in illo tempore, vel sit pater per præputium, id est per id quod datum est ei tempore præputii. Si enim post circumcissionem datum esset, diceretur ex ea hoc accepisse, per hoc quod accepit in præputio, id est per fidem sit pater credentium de gentibus, ut reputetur et illis credulitas ad justitiam, id est ut sicut Abraham in præputio justificatus est per fidem, ita et illi justificentur credendo, licet præputium non exuerint. Et circumcissionem ideo accepit, ut sit pater circumcissionis, id est est Hebræorum. Nam ante in præputio justus fuit, ut esset incircumcisorum ju-

storum pater; et circumciscus justus permansit, ut circumcisorum justorum fieret pater. Fieret, inquam, pater, non his tantum qui sunt ex carnali circumcissione, id est Judæis; sed et his qui corde sunt circumcisi, non carne, id est, gentilibus, qui sectantur vestigia fidei Abrahæ, hoc est qui illum in fide imitantur, ut ita ample credant sicut ille. Quæ fides est in præputio patris nostri Abrahæ, id est apparet in patre nostro Abraham, dum ipse est adhuc in præputio. Ideo toties repetit de præputio, ut ostendat gentiles eodem modo per fidem justificari, sicut et Judæos.

« Non enim per legem promissio Abrahæ aut semini ejus, ut hæres esset mundi, sed per justitiam fidei. Si enim qui ex lege hæredes sunt, exinanita est fides, abolita est promissio. Lex enim iram operatur. Ubi enim non est lex, nec prævaricatio. Ideo ex fide, ut secundum gratiam firma sit promissio omni semini, non ei qui ex lege est solum, sed et ei qui ex fide est Abrahæ, qui est pater omnium nostrum, sicut scriptum est (Gen. xvii): Quia patrem multarum gentium posui te ante Deum cui credidisti, qui vivificat mortuos, et vocat ea quæ non sunt tanquam ea quæ sunt. »

Vere Abraham est pater omnium credentium Judæorum et gentium, quia per fidem adeptus est hanc paternitatem, non per legem. Non enim per legem facta est ei promissio, quia lex nondum erat. Non per legem, sed per justitiam fidei, id est quam per fidem obtinuerat, facta est Abrahæ promissio, et semini ejus, id est Christo. Hæc scilicet promissio, ut ipse esset hæres mundi, id est possessor aliquorum de toto mundo, qui eum imitentur; et in Christo qui ex eo nasciturus erat, possideret omnia. Abraham est hæres mundi, id est possidens totum orbem per fidem, quia ipse est omnibus exemplum fidei, et omnes sancti sunt filii ejus per fidem. Semen quoque ejus, id est Christus, est hæres, id est Dominus mundi secundum regiam potestatem, per quem benedictio filiis Abrahæ, et cui Pater dixit: « Dabo tibi gentes hæreditatem (Psal. 11), » etc. Et hæc promissa fuerant Abrahæ et semini ejus, non per legem quæ nondum erat, sed per fidem qua ipse Deo crediderat. Et merito. Legis enim observantia pœnam tantummodo effugit, fidei vero meritum spem repositionis expectat. Et præceptum servis imponitur, fides ab amicis quæritur. Vere non per legem, sed per fidem Abraham est hæres mundi, quia si illi qui sunt ex lege, id est carnales Judæi, sunt hæredes, id est possessores hæreditatis quam Deus Abrahæ promisit, tunc fides est exinanita, id est inanis et inutilis facta, cum gentes per eam non possint hæreditare coelestem patriam, et abolita, id est deleta et in irritum ducta est promissio Dei qua dictum est Abrahæ, quia « in semine tuo, » id est in Christo, « benedicentur omnes gentes (Gen. xxii), » id est benedictionem hæreditatis possidebunt. Nam si ex lege tantum

fierent hæredes, ut Judæi volebant astruere, gentes quæ lege carent sine benedictione hæreditatis remanerent. Non ergo per legem Abraham est hæres mundi, quia nec filii ejus sunt per legem hæredes, id est æternæ hæreditatis possessores. Nam si hoc esset, inconvenientia sequerentur, quod scilicet superflua esset fides qua ipse justificatus est, et qua justificantur cæteri, cum per eam non posset hæreditas æterna acquiri, et promissio divina remaneret inexplata, quæ promisit omnes gentes benedicendas, quoniam nullus gentilium benediceretur, et ita nulli essent hæredes. Et vere ex lege non est hæreditas. Nam lex potius iram operatur, quia peccantem in se aut lapidari continuo, aut igne cremari, aut alio genere supplicii jubet interfici. Lex iram operatur et prævaricationem. Ex ea enim est prævaricatio, nam sine ea non est. Ubi enim non est lex, nec prævaricatio, id est transgressio. Qui ergo legem non acceperunt, iniqui dici possunt, prævaricatores non possunt. Judicantur utrique secundum merita sua, sed tamen ira Dei major est in prævaricatores qui per legem cognoscunt peccatum et tamen faciunt. Et ita non potest per legem hæreditas haberi, sed potius ira. Ideo ex fide sunt hæredes. Ex fide, quæ est donum misericordiæ et justificat credentes, habetur hæreditas, ita ut secundum gratiam Dei, non secundum merita hominum, firma, id est verax et rara sit promissio quam Deus fecit Abrahæ de multiplicatione filiorum, qui perpetuam hæreditatem essent possessuri. Non enim firma esset, sed potius infirma et irrita, nisi ipse per gratiam suam impleset eam. Ideo non de nostræ voluntatis potestate, sed de sua prædestinatione promisit. Promisit enim quod ipse facturus fuerat, non quod homines. Quia, etsi faciunt homines bona quæ pertinent ad colendum Deum, ipse facit ut illi faciant quæ præcepit, non illi faciunt ut ipse faciat quod promisit. Alioquin ut Dei promissa compleantur, non in Dei, sed in hominum potestate est; et quod a Domino promissum est, ab ipsis redditur Abrahæ. Sed non ita fieri potest, per gratiam ergo Dei gratuito munere nobis concessam implentur ejus promissa, dum per donum suæ gratiæ facit ut credamus et bene operemur, sicque hæredes efficiamur. Firma sit promissio omni semini Abrahæ, id est non parti seminis, sed omni semini. Volebant enim Judæi ut quantum ad eos firma esset, et quantum ad gentiles cassa. Sed non ita Deus promisit, cum diceret: In semine tuo benedicentur omnes gentes. Firma sit omni semini, id est omni populo fidelium imitatori Abrahæ, non solum ei qui ex lege est, id est qui ex Veteri Testamento venit ad Novum, sed et ei qui est ex fide Abrahæ, id est qui non sibi promissa lege sequitur fidem Abrahæ, qui sine lege per fidem justificatus esse memoratur. Qui est pater non omnium hominum, sed omnium nostrum, id est non solum qui ex lege descendimus, sed et qui ex fide legi succedimus, scilicet et circumcisorum et præputiatorum credentium est pater, id est institutor et exemplum. Ita est

pater credentium, sicut in Genesi scriptum est, dicente Domino. *Quia patrem*, id est auctorem secundum fidem, non dico Judæorum, sed multarum gentium posui te (Gen. xvii). Multarum autem, non quarumdam, sed omnium. Si ergo pater multarum gentium futurus esse promittitur, recte non solum eorum qui ex circumcissione veniunt, sed eorum qui ex gentibus credunt, pater nominatur. In eo enim quod ipse dicitur pater multarum gentium, superbia confunditur Judæorum, quia Judæorum carne, gentium autem fide pater est. Ubi recte Apostolus ex sua interpretatione addidit, *ante Deum cui credidisti*, significans fidem in interiore homine esse in conspectu Dei, non in ostentatione hominum, sicut carnalis circumcisio; et per eandem fidem, non per carnem eum esse patrem gentium, quas ante Dei oculos in fide generavit. *Qui Deus*, sicut Apostolus subjungit, *vivificat mortuos*, id est a morte animæ suscitatur per baptismum Judæos, et vocat, ad fidem ea quæ non sunt, id est gentiles, de quibus scriptum est: Omnes gentes quasi non sint, sic sunt coram eo. Ipse enim vere est qui ait: « Ego sum qui sum (Exod. iii). » A quo quisquis recedit etiam esse amittit, ut jure dicatur non esse. Et tales erant gentes idolis servientes. Sed ipse vocat ea quæ non sunt tanquam ea quæ sunt, id est gentiles ad fidem adducit, sicut Judæos qui ob unius Dei cultum dicuntur esse. Vel omnes peccatores sive gentiles, intelligamus mortuos. Et hos enim Deus per gratiam suam vivificat, ut ex fide vivant. *Et vocat ea quæ non sunt, tanquam ea quæ sunt*. Apud eum quippe factum est, quod ejus dispositione futurum est, quia de illo per prophetam dicitur: *Qui fecit quæ futura sunt*. Nondum erant quibus promitteretur, quando Abraham loquebatur, ne quisquam de meritis gloriaretur. Et quibus promissum est, etiam ipsi promissi sunt, ut totum corpus Christi dicat: « Gratia Dei sum id quod sum (I Cor. xv). » Dum enim Deus vocare dicitur ea quæ non sunt, sola gratia vocantis apparet, non aliquod meritum eorum, qui nec esse adhuc habuerunt quando vocantur. « Elegit, inquit, nos ante mundi constitutionem (Ephes. 1). » In mundo facti sumus, nec mundus erat quando electi sumus. Quis hoc explicare sufficiat? Eliguntur qui non sunt, nec erat qui elegit, nec vane elegit. Eligit tamen, et habet electos, quos creaturus est, eligendos. Habet autem apud semetipsum, non in natura sua, sed in præscientia sua. Recte itaque dicitur vocare ea quæ non sunt tanquam ea quæ sunt. De Abraham vero subditur.

« Qui contra spem in spem credidit, ut fieret pater multarum gentium, secundum quod ei dictum est: « Sic erit semen tuum (Gen. xv) sicut stellæ cæli et sicut arena maris. » Et non infirmatus est fide, nec consideravit corpus suum emortuum, cum ferecentum annorum esset, et emortuam vulvam Saræ. In re promissione etiam Dei non hæsitavit diffidentia, sed confortatus est fide, dans gloriam Deo, plenissime sciens, quia quæcunque promisit, po-

tens est et facere. Ideo reputatum est illi ad justitiam, sed et propter nos, quibus reputabitur creditibus in eum, qui suscitavit Jesum Christum Dominum nostrum a mortuis, qui traditus est propter delicta nostra, et resurrexit propter justificationem nostram. »

Incipit commendare fidem Abrahamæ, ut imitemur. Sæpe enim jam dixerat eum credidisse, et ideo pergit nunc ostendere, quomodo et quam firmiter crediderit. Qui credidit in spem habendi filium per promissionem Dei, et hoc contra spem carnis suæ, quæ jam erat quasi per naturam deliciens et frigida contra spem, id est contra hoc quod prius sperabat se non amplius filium generare, credidit eundo in spem, id est ut speraret se posse generare, quia Deus promittebat. Dum enim viridi essent ætate, speravit secundum naturam ex juvenula uxore sobolem habere, nec potuit. Modo autem contrarium speravit, ut scilicet vetulus ex vetula et sterilli generaret per Dei potentiam. Sicque contra veterem spem credidit in novam spem. Majus est enim sperare contra aliquod insperatum quam simpliciter sperare. *Credidit Abraham ut fieret pater multarum gentium*, id est tam valide credidit, ut propter fidei meritum susciperet ex sua conjugæ filium, de quo populus Hebræorum propagaretur, et ex illo populo Christus carnem assumeret, in quem omnes gentes crederent. Hoc enim ordine factus est Abraham pater multarum gentium. Et hoc juxta quod dictum est ei divinitus.

Sic erit semen tuum sicut stellæ cæli et sicut arena maris. Non quod essent tot vel carnaliter vel spiritualiter ex eo processuri, quot sunt stellæ vel arena quæ numerari non potest, sed quod illi, qui ex eo sive carnaliter sive spiritualiter erant nascituri, ita futuri essent hominibus innumerabiles, ut stellæ et arena. Mystice vero per stellas intelliguntur spirituales filii cælo inhærentes, et desuper lucentes fulgore virtutum; per arenam vero sive Judæi sive Christiani carnales, in infimis corde jacentes, et fructum boni operis non ferentes. Abraham credidit. Et quia posset ad horam credere et postea deficere, subditur, quia *non infirmatus est fide*. Credidit enim Deo promittenti, et in illa fide non est infirmatus, id est debilitatus, cum multas causas infirmandi haberet secundum humanam rationem, scilicet quod nec ipse jam nec uxor ejus idonei essent ad generandum. Ideo enim quod credidit, non consideravit corpus suum emortuum, et vere emortuum, cum esset ferecentum annorum. Et licet tanto tempore vixisset, tamen non hoc attendit, nec etiam cogitavit vulvam Saræ emortuam. Sara enim sterilis erat, et cruore menstruo jam destituta, propter quod jam parere non posset, etiam si sterilis non fuisset. Porro si femina ita sit provectoris ætatis, ut ei solita mulierum adhuc fluant, de juvene parere potest, de seniore non potest, quamvis adhuc possit ille senior, sed de adolescentula gignere, sicut Abraham post mortem Saræ de Cethura potuit, quia vividam ejus ætatem invenit. Hoc ergo est quod mirum commendat Apo-

stolus, et ad hoc dicit Abraham jam fuisse corpus emortuum, quoniam non ex omni femina, cui adhuc esset aliquod pariendi tempus extremum, generare ipse in illa ætate adhuc posset. Ad aliquid enim emortuum corpus intelligere debemus, non ad omnia. Nam si ad omnia, non jam senectus vivi, sed cadaver esset mortui. Sara quoque magis erat destituta cunctis viribus generandi. Et tamen nihil horum consideravit Abraham, cum audiret sibi a Deo solem promitti, sed potentiam promittentis attendens, nihil difficile esse credidit in his, quæ promittebat Omnipotens. Ita fuit credulus in promissione qua dictum est ei, Quoniam qui egredietur de utero tuo, ipsum habebis hæredem; vel quando audivit, Quia ex Sara dabo tibi filium cui benedicturus sum. In repromissione etiam Dei, id est quando Deus iterum ei promisit, Quia revertens veniam ad te tempore isto, vita comite, et habebit filium Sara uxor tua, non hæsitavit diffidentia, id est non dubitavit ut diffideret de completionem promissionum, sed confortatus est fide, id est omnino fortis et constans factus est in fide, dans gloriam Deo, id est glorificans Deum qui per munus gratiæ suæ daturus erat et filium contra naturam ex vetula sterili, et per illum filium in Christo populum credentium plenissime, id est multo intuitu veritatis et potentiæ Dei, sciens quia quæcumque promisit, potens est etiam facere. Deus igitur eos quos promisit bonos, facit ut ipsi faciant bona. Neque enim eos propterea promisit Abraham, quia præscivit a seipsis bonos futuros. Nam si ita est, non suum, sed eorum est quod promisit. Non autem sic credidit Abraham, sed dedit gloriam non humanis meritis, sed Deo, plenissime credens quia quæ promisit potens est et facere. Non ait quæ præscivit potens promittere, aut quæ prædixit potens ostendere, quæ promisit potens præscire, sed quæ promisit potens et facere. Ipse ergo facit bonos eos qui boni fiunt, et ipse facit in bono perseverare eos qui perseverant. Hoc enim promittit Deus quod ipse facit. Non enim promittit, et aliud facit. Quod jam non est promittere, sed prædicere. Cavendum est igitur ne homo se, extollat adversus Deum, dicens se facere quod promisit Deus. Ipse enim et fidem gentium, sicut Abraham promiserat, facit qui potens est facere quod promisit, et omnia bona operatur in sanctis. Hæc ita credidit Abraham, id est reputatum est illi ad justitiam. Diceret aliquis: Quid ad nos quod Abraham credidit, quod per fidem justificatus est? Hoc illius gloria fuit. Et Apostolus: Ipse quidem ita per fidem magnificatus est. Sed tamen non est scriptum tantum propter ipsum, id est propter laudem et commendationem ipsius, hoc scilicet, qui reputatum est illi ad justitiam quod bene credidit, sed etiam propter nos instruendos, ut profectum fidei ex illa Scriptura caperemus, intelligentes quia si ita credamus Deo, ut ille credidit, etiam nobis reputabitur fides ad justitiam credentibus in eum, qui suscitavit Jesum a mortuis, id est a numero mortuorum perpetualiter separavit, suscitans

eum amplius non reversurum in corruptionem, quod Judæi non credunt. Suscitavit eum a mortuis, ut nos a vitiorum sordibus faceret resurgere. Qui Jesus traditus est in mortem, ut nos possemus mori delictis nostris; et resurrexit, ut nos in virtutum honestatem resurgeremus justii. Etenim mors ipsius significat interitum veteris vitæ nostræ, resurrectio autem gratiam novæ conversationis. Traditus est in manus persequentium propter delicta nostra tollenda, ne nos propter illa traderemur in manus dæmonum cruciandi; et per mortem jure diaboli destructo, resurrexit propter justificationem nostram, id est ut nos justificando suscitaret a morte animæ, quatenus juste viveremus, quod aliter non poteramus. Traditus est propter delicta nostra, et resurrexit propter justificationem nostram. Sonat in ejus traditione delictum, sonat in ejus resurrectione justitia. Ergo moriatur delictum, et resurgat justitia.

CAPUT V

« Justificati igitur ex fide, pacem habeamus ad Deum, per Dominum nostrum Jesum Christum, per quem et accessum habemus per fidem in gratiam istam in qua stamus, et gloriamur in spe gloriæ filiorum Dei. Non solum autem, sed et gloriamur in tribulationibus, scientes quod tribulatio patientiam operatur (Jacob 1), patientia autem probationem, probatio vero spem. Spes autem non confundit, quia charitas Dei diffusa est in cordibus nostris per Spiritum sanctum, qui datus est nobis. »

Quandoquidem multis modis hactenus probatum est, non ex operibus legis, nec ex viribus liberi arbitrii, sed ex fide justificari hominem, igitur ex fide sumus justificati, non ex lege, nec ex nobis. Et nos ita justificati, habeamus pacem ad Deum, quam non habetis, dum invicem arrogatis falsam justificationem, alii per legem, alii per vires liberi arbitrii. Quasi dicat: Hæc dissensio contra Deum est, quæ de meritis vestri gloriamini, quasi per vosmetipsos justificati. Sed justificatio quæ ex fide est, pacem cum Deo facit, quia inimicas præsumptiones humanorum meritorum expellit, et animam Deo humiliter subjicit, dum se sola gratia salvari cognoscit. Ex fide sumus justificati, et tamen gratis, quia et ipsa fides donum supernæ gratiæ est. Et cum fides impetrat justificationem, non gratiam Dei aliquid meriti præcedit humani, sed ipsa gratia meretur augeri, ut aucta mereatur et perfici comitante, non ducente pedissequa, non prævia voluntate. Ita ergo justificati, jam de cætero pacem habeamus ad Deum, quia reconciliati sumus ei per mediatorem Jesum. Non jam a divina voluntate discordemus, sed pacem ad Deum habere studeamus, per Dominum Jesum, id est non per nosipos, sed per auxilium et gratiam reconciliatoris nostri, per quem habemus non solum ablutionem nostræ vetustatis in sanguine ipsius, ut sic ascendamus ad indumentum justitiæ et novitatis, sed etiam accessum habeamus per illum, in istam

gratiam, id est in hanc virtutum sublimitatem gratiis datam, et hoc non per legem, sed *per fidem*. Hoc est dicere: Fides concessa nobis ex gratia, apud Deum impetrat et remissionem delictorum, et perfectionem omnium virtutum, per Christum qui est ostium, accessimus per fidem in gratiam istam, id est in bonæ vitæ observantiam, *in qua stamus*, id est statum rectitudinis habemus, qui in Adam cecideramus, quia qui manet in vitiis, non stat, sed prostratus jacet. Elias vero stabat qui ait: « Vivit Dominus, in cujus conspectu sto (*III Reg. xvii; IV Reg. iv*). » Stamus, inquit, in hac gratia, non cadentes ab illa nec recedentes, et *gloriamur in spe gloriæ filiorum Dei*, id est in eo quod speramus gloriam quam habent filii Dei. Tantum enim est quod speramus, quantum ex se præsumere nullus audeat, quia in sola Dei virtute est ut homo in filiorum Dei numerum possit ascendere. Et magna valde gloria est, per fidem ac spem in numerum filiorum Dei ascisci. Quod adeo magnum est, ut a multis pro ipsa magnitudine incredibile videatur, eo quod speramus gloriam filiorum Dei nos consecuturos. *Non solum autem gloriamur de spe gloriæ hujus, sed etiam gloriamur per Christi gratiam in tribulationis*, per quas « oportet nos intrare in regnum cælorum (*Act. xiv*). » Gloriamur sine periculo vanitatis de tolerantia tribulationum, quia novimus quanta merces inde sequatur. Et hoc est quod gradatim ascendendo prosequitur. Gloriamur in tribulationibus, quia sumus *scientes quod tribulatio operatur in nobis patientiam*, id est facit nos esse patientes. Nemo enim patiens esse potest, nisi in adversis; *patientia autem operatur probationem*, quia cujus patientia vinci non potest, ille perfectus esse probatur. Multi enim ante experimentum tribulationis putant se fortes esse, qui in ipso experimento deficiunt et imbecilles esse apparent, et multi prius se putant infirmos, qui in ipso articulo passionis apparent fortissimi, dum omnia viriliter patientiando superant. Et ita probationem operatur patientia, dum et sibi et aliis unumquemque liquido manifestat, qui antequam pati inciperet, et sibi et aliis ignotus erat; *probatio vero operatur spem*, quia unusquisque ex eo quod per tribulationes insuperabilis esse probatus est, incipit habere spem, id est certitudinem futuræ gloriæ, quæ humanæ rationi vana videtur, sed testimonio virtutis firmatur. Si quis enim nondum sibi probatur sperat præmium, non sperat, sed præsumit. Nam tribulationes quibus patientia fidelium probatur, non solum eas debemus intelligere quæ extrinsecus accidunt, id est de damnis vel languoribus, vel ex quolibet corporis cruciatu, sed eas etiam quas intus sibi faciunt aut perferunt, dum in requie positi semetipsos affligunt et atterunt, obstando voluptatibus suis, refrenando libidinem, etc., quæ ad bonum continentiæ vel abstinentiæ pertinent, *faciendo*. Ex quibus sine dubio nascitur patientia, quæ probabilis effecta, generat spem. Spes autem est honorum expectatio futurorum. Quæ

A exprimit humilitatis affectum et sedulæ servitutis obsequium, quæ non est inanis, quia non confundit, id est non generat confusionem sic speranti, quia quidquid speravit adipiscitur. Ille enim sua spe confunditur qui dicit: Ego quod sperabam non inveni. Vir autem qui per patientiam in tentationibus est probatus non confunditur sua spe, quoniam magnitudine præmii quod invenit, exsuperatur magnitudine spei ejus. *Spes non confundit*, quia in Deo posita est, qui fallere non potest, quia verax est; non in homine, qui falleret quia mendax est. In Deo posita est, et idcirco sequitur, *quia charitas Dei*, etc. Vel ita: Spes non facit erubescere, quia impletur. Et constat eam esse implendam ex eo quod jam Spiritum sanctum in arham habemus, quo et late diligitur. Et hoc est: Quia charitas Dei, id est quam ex Deo habemus, postquam Deum et proximum diligitur, *diffusa est*, id est late et copiose data in cordibus nostris. Ubi enim charitatem, angustia esse potest, quia mox angustia excluditur, et cor dilatatur, ut tantum habitorem, id est, Spiritum sanctum intra se possit habere. Non enim a nobis ipsis, sed a Spiritu sancto possumus habere charitatem. Nam cum dixisset, Charitas Dei diffusa est in cordibus nostris, ne putaret quisque a se sibi esse quod diligit Deum, continuo addidit, *per Spiritum sanctum qui datus est nobis*. Ut ergo ames Deum, habitet in te Deus et amet se de te, id est ad amorem suum moveat te, accendat te, illuminet te, excitet te. Per Spiritum, inquit, sanctum qui datus est nobis, quia et Deus est et donum Dei. Et propter hunc divitem habitorem faciebat Apostolus quod supra dixit: *Gloriamur in tribulationibus*. Quomodo enim in his gloriatur, si egestatem intus pateretur? Videbantur foris angustiae, sed intus latitudo erat. Quid autem facit malus homo cum cœperit tribulari? Foris nihil habet, ablata sunt omnia, in conscientia nullum solatium est. Non est quo exeat, quia dura sunt; non est quo intret, quia mala sunt. Male secum torqueatur necesse est, quia sibi ipse tormento est. Ipse est enim pœna sua, quem torquet conscientia sua. Boni vero quidquid exterius patiuntur, facile per internam consolationem vincunt. Et si in hac vita, ubi tanta tormenta sunt, possunt boni et justii viri, cum talia patiuntur, non solum æquo animo tolerare, sed etiam in Dei charitate gloriari, quid cogitandum est de illa vita quæ nobis promittitur, ubi nullam de corpore molestiam sentiemus?

« Ut quid enim Christus cum adhuc infirmi essemus, secundum tempus pro impiis mortuus est? « vix enim pro justo quis moritur. Nam pro bono forsitan quis audeat mori (*I Petr. iii*). Commentat autem Deus charitatem suam in vobis, quoniam cum adhuc peccatores essemus, secundum tempus, Christus pro nobis mortuus est. Multo magis igitur justificati nunc in sanguine ipsius, « salvi erimus ab ira per ipsum. »

Cum Deus nos diligat, vel nos cum per Spiritum

sanctum, spes nostra implebitur. Nam nisi ita sit, frustra passus est Christus. Et hoc est: *Ut quid Christus pro impiis*, id est pro dilectione impiorum mortuus est, nisi ut spes implicatur? Vel ita: Volens Apostolus ostendere plenius virtutes charitatis, quam per Spiritum sanctum diffusam in cordibus nostris dixerat, exponitur quibus causis diffusa sit in nobis, asserens Christum pro impiis esse mortuum. Impii namque eramus, antequam converteremur ad Deum Christum. Et Christus utique mortem pro nobis, antequam crederemus, excepit. Quod proculdubio non fecisset, nisi nimiam et abundantissimam erga nos charitatem habuisset, vel ipse Christus moriendo pro impiis vel Deus Pater unigenitum suum pro impiorum redemptione tradendo. Vere charitas Dei diffusa est in cordibus nostris. Nam quare mortuus est Christus pro nobis, nisi ut charitas Dei diffunderetur in nobis, ut diligeremus eum qui prior dilexit nos? *Ut quid enim*, id est propter quid aliud *Christus pro nobis mortuus est, eum adhuc essemus infirmi?* id est indigentes medico. Tam graviter enim ægrotabamus, ut non aliter quam medici morte sanari possemus. Mortuus est *secundum tempus*, id est non ut alii qui morte detinentur, sed ad horam pro nobis mortem sustinuit, resurgens die tertia, ne desperemus de ejus potentia, cujus apparet in morte benevolentia. Mortuus, inquit, est, et hoc non pro quibuslibet, sed *pro impiis*, id est pro foedis et execrandis et a Deo penitus separatis. Et ipse tam magnum fecit, ut pro talibus mori temporaliter dignaretur, ut æternam mortem ab eis averteret. Hinc beneficiorum ejus apparet magnitudo, ut qui indebite ab eo tantum dilecti sumus, consideremus quantum eum diligere debeamus, aut si quid ei præponere debeamus, cum ille nobis impiis nec vitam suam præposuerit, nec mortem denegaverit. Pium enim Dominum usque ad mortem diligere debemus, quem pro impiis servis cruciatus mortis excepisse cognoscimus. Ubi et præsumptio humana reprimitur, ne suis meritis aliquid tribuat. Et vere miranda ejus bonitas, qui pro impiis dignatus est mori. *Vix enim pro justo quis moritur*, id est raro est ut aliquis pro justo moriatur, nedum pro impio, quoniam dubitat unusquisque mortem subire, etiamsi mortis sit causa justa. Raro dico, nam forsitan potest inveniri ut quis audeat mori pro bono, id est pro re bona vel pro bono viro. Quasi dicat: Difficile hoc invenitur, metu mortis cuncta terrente. Vel per justum intelligatur justitia legis; per bonum vero, bonitas evangelicæ gratiæ; et vix pro justo quis moritur, quia veteri lege in qua justitia est, vix pauci inventi sunt, qui suum in martyrio sanguinem fuderunt. *Nam pro bono forsitan quis audeat mori*, quoniam in Novo Testamento, in quo bonitas est atque clementia, innumerabiles exstiterunt, qui suas in mortem audacter animas tradiderunt. Sed tamen ad comparationem carnalium et mori pro Domino trepidantium tam pauci fuerunt, ut propter raritatem dicatur de

A eis, forsitan quis audeat mori. Forsitan, dicitur propter eos qui mori necdum audent, quis, propter raritatem eorum qui audent, licet sint innumerabiles. Nonnulli vero sic interpretantur: Si ille pro nobis impiis mortuus est et peccatoribus, quanto magis nos absque ulla dubitatione pro justo et bono debemus occumbere? Justum autem et bonum non putemus esse diversum, nec aliquam proprie significare personam, sed absolute justam rem et bonam; pro qua difficulter, sed interdum aliquis inveniri potest qui suum sanguinem fundat. Vix pro justo et bono quis moritur. Dominus autem noster pro impiis et peccatoribus est mortuus, in quo laudabilior charitas fulget. Neque enim merita nostra præcesserant, pro quibus Filius Dei moreretur; sed magis quia nulla erant merita, magna erat misericordia. Diceret aliquis: Cum Deus sit omnipotens, et aliis modis nos potuisset liberare, cur Filium suum pro nobis mori voluit? Ad quod Apostolus: Non sine causa Deus id fecit, sed hoc modo *commendat charitatem suam in nobis*. Quando indebite aliquid redditur, tunc charitas commendatur. Et quid tam indebitum, quam ut sine peccato Dominus pius pro peccatoribus servis impiis moreretur? Et in hoc commendatur nobis charitas Patris, quia sic nos dilexit. Cur ergo non fieret mors Christi, imo cur prætermittis aliis innumerabilibus modis, quibus ad nos liberandos uti potuisset omnipotens, id potissimum non eligeretur ut fieret, ubi nec de divinitate ejus aliquid immulatum est, et de humanitate suscepta tantum beneficii collatum est hominibus, ut a Dei Filio mors temporalis indebita redderetur, quia eos ab æterna morte debita liberaret? Peccata enim nostra diabolus tenebat, et per illa nos merito tenebat in morte. Dimisit ea illi qui sua non habebat, et ab illo est immerito perductus ad mortem. Tantum enim valuit sanguis ille, ut neminem Christo indutum in æterna morte debita detinere debeat, qui Christum morte indebita vel ad tempus occidit. Commendat itaque Deus Pater nimiam charitatem suam in nobis, *quoniam cum adhuc peccatores essemus*, nihilque nobis nisi pœna deberetur, Christus pro nobis pœnam mortis excepit, ut nos a cruciatu perpetuæ mortis salvaret. Qui ergo peccatoribus donavit mortem suam, quid servat justis nisi vitam suam? Incredibilis est enim quod mortuus est æternus, quam ut in æternum vivat mortalis. Jam quod incredibile est tenemus. Si propter hominem mortuus est Deus, non est victurus homo cum Deo? Non est mortalis victurus in æternum, propter quem mortuus est qui vivit in æternum? Carne tamen sola mortuus est. Mortuus est pro nobis peccatoribus. Multo magis ergo salvabit justificatos. Nam qui fecit quod majus et difficilius est, multo levius faciet quod minus et facilius est, difficilius quippe est pro peccatoribus mori et peccata tollere, quam justos et cooperantes salvare. *Multo magis igitur nos justificati*, id est a peccatis omnibus liberati, nunc id est in hoc tempore gratiæ, in sanguine ipsius sine

culpa pro peccatis nostris emuso, *salvi erimus ab ira*, id est a poena damnationis æternæ, *per ipsum mediatorem et reconciliatorem.*

« Si enim cum inimici essemus, reconciliati sumus Deo per mortem filii ejus, multo magis reconciliati, salvi erimus in vita ipsius. Non solum autem, sed et gloriamur in Deo per Dominum nostrum Jesum Christum, per quem nunc reconciliationem accepimus. »

Vere salvi erimus ab ira per ipsum. Nam *si cum essemus inimici*, id est per amorem iniquitatum Deo contrarii, *reconciliati*, id est in pacem reducti sumus Deo *per mortem Filii ejus*, tunc multo magis qui jam sumus reconciliati, erimus salvi in vita ipsius, quia qualem ipse jam secundum humanitatem habet vitam, talem et nos habebimus. In vita erimus salvi, qui per mortem sumus reconciliati. Dedit enim pro nobis mortem suam, et reconciliatus, qui alienati et inimici facti fueramus per transgressionem. Nemo enim reconciliatur, nisi ex inimicitia. Inimicos autem nos Deo primi parentis fecit transgressio. Quos supra dixerat peccatores, hos nunc inimicos Dei nominat; et quos supra justificatos in sanguine Christi, hos nunc reconciliatos Deo per mortem filii ejus; et quos supra salvos ab ira per ipsum, eos nunc salvos in vita ipsius. Non ergo ante gratiam istam quoquo modo peccatores, sed in talibus peccatis fuimus, ut inimici essemus Dei. Sed reconciliati sumus ei per mortem Filii ejus. Quomodo per mortem? An cum irasceretur nobis, vidit mortem Filii sui pro nobis et placatus est nobis? Nunquid ergo Filii ejus usque adeo nobis jam placatus erat, ut pro nobis etiam mori dignaretur; Pater vero usque adeo adhuc irascebatur, ut nisi Filius pro nobis moreretur, non placaretur? Non. Superius enim dictum est: « Commendat autem charitatem suam Deus in nobis, quoniam cum adhuc peccatores essemus, Christus pro nobis mortuus est. » Habebat ergo Pater erga nos charitatem, etiam cum inimicitias adversus cum exercentes, deserviremus peccatis. Et in sequentibus epistolæ hujus dicitur: « Si Deus pro nobis, quis contra nos? Qui etiam proprio Filio non pepercit, sed pro nobis omnibus tradidit illum (*Rom. viii*). » Nunquid ergo si implacatus nobis esset, filium pro nobis traderet? Veraciter enim dictum est ei quia nihil odisti eorum quæ fecisti (*Sap. ii*). Sed tamen nihilominus veraciter ei dictum est: « Odisti omnes qui operantur iniquitatem (*Psal. v*). » Proinde miro modo et diligebat nos, et oderat. Diligebat quales ipse fecerat, oderat quales per operationem iniquitatis fueramus per nos facti. Et quadam justitia Dei in potestatem diaboli traditum erat genus humanum, peccato primi hominis in omnes utriusque sexus commistione nascentes originaliter transeunte, et parentum primorum debito universos posteros obligante. Si ergo commissio peccatorum per iram Dei justam hominem subdidit diabolo, profecto *remissio peccatorum per reconciliationem Dei beni-*

gnam eruit hominem a diabolo. Non enim sicut hominis animi perturbatio, est ira Dei, sed *justa vindicta* vocatur ejus ira. Etsi *justa divina vindicta* tale nomen accepit, etiam *reconciliatio Dei*, quæ non recte intelligitur, nisi cum talis ira finitur. Nec aliter inimici eramus Deo, nisi quemadmodum *justitiæ* sunt inimica peccata. Quibus remissis, *tales inimicitia* finiuntur, et reconciliantur *justo quos ipse justificat*. Quos tamen etiam inimicos utique dilexit, quandoquidem pro his cum adhuc inimici essent, *Filium tradidit*. Quod ergo reconciliati sumus Deo per mortem Filii ejus, non sic intelligatur, quasi nos ideo reconciliaverit ei Filius, ut jam inciperet amare quos oderat, sicut reconciliatur inimicus inimico, ut deinde sint amici et invicem diligant qui oderant invicem, sed jam nos diligenti reconciliati sumus ei, cum quo propter peccatum inimicitias habebamus. Et per hanc *reconciliationem* a diabolo sumus erepti, qui non potentia Dei, sed *justitia* superandus fuit. Nam quid omnipotente potentius, vel cujus creaturæ potentia valet ei comparari? Sed cum diabolus vitio perversitatis suæ factus sit amator potentia et desertor oppugnatoreque justitiæ, in quo homines magis eum imitantur, placuit Deo ut non potentia diaboli sed *justitia* vinceretur, atque ita et homines imitantes Christum, *justitia* quærent diabolum vincere, non potentia.

Quæ est igitur *justitia*, qua victus est diabolus a Christo? Quia cum in eo nihil morte dignum inveniret, occidit eum tamen. Et utique *justum* est ut debitores quos tenebat, liberi dimittantur, in eum credentes quem sine ullo debito occidit. Hoc est quod *justificari* dicimur in sanguine Christi. Sic quippe in remissionem peccatorum nostrorum innocens ille sanguis effusus est. Hoc est quod *reconciliati* Deo dicimur per mortem Filii ejus. Remissis enim peccatis nostris, finiuntur inimicitia, et *pacem* cum Deo assequimur, a quo nos sola peccata dirimebant. Sic ergo per mortem ejus *reconciliati*, *multo magis salvi erimus, in vita ipsius*, qui in vita nostra perieramus. Nam si mors ipsius tantum potuit ut illud faceret quod difficilius erat, tunc *vita*, id est resurrectio et gloria ejus illud facere poterit, ubi minor difficultas est. *Non solum autem salvi erimus in futuro, sed etiam non gloriamur spe in Deo*, id est in eo quod consideramus nos cum Deo futuros in illa gloria. Vel non in nobis, sed in Deo gloriamur; nec per nos, sed *per Dominum nostrum Jesum Christum, per quem nunc* jam in præsentia *vita reconciliationem accepimus*, secundum ea quæ superius disputata sunt.

« Propterea sicut per unum hominem in hunc mundum peccatum intravit, et per peccatum mors, et in omnes homines pertransiit, in quo omnes peccaverunt. Usque ad legem enim peccatum erat in mundo. Peccatum autem non imputabatur, cum lex non esset. Sed regnavit mors ab Adam usque ad Moysen, etiam in eos qui non

« peccaverunt, in similitudinem prævaricationis A
« Adæ, qui est forma futuri. »

Nunc prolixius disputare inchoat de duobus hominibus : uno primo Adam, per cuius peccatum et mortem tanquam hæreditariis malis et posteri ejus obligati sumus ; altero autem secundo Adam, qui non homo tantum, sed et Deus est. Quo pro nobis solvente quod non debebat, a debitis et paternis et propriis liberati sumus. Proinde, quoniam propter unum illum tenebat diabolus omnes per ejus vitiatam carnem concupiscentialiter generatos, justum est, ut propter hunc unum dimittat omnes per ipsius immaculatam gratiam spiritaliter regeneratos. Nam quia dixerat Apostolus, nos esse per Christum Deo reconciliatos, pergit ostendere quam convenienter per unum obedientem simus reconciliati, qui per unum inobedientem fuimus a Deo separati. Reconciliationem accepimus per Christum, *propterea*, id est quia per eum sumus reconciliati, idcirco *sicut per unum hominem intravit peccatum in orbem, et per peccatum mors*, ita subaudi per unum redemptorem reddita est justitia, et per justitiam vita. Per unum hominem qui primus peccavit, intravit originale peccatum in hunc miserum mundum, id est in universum genus humanum quoniam peccando omnem suam stirpem in seipso tanquam in radice vitiauit, ut quidquid proles ex simul damnata per quam peccaverat conjuge (per carnalem concupiscentiam in qua inobedienti pœna similis retributa est) nasceretur, traheret peccatum originale. Sicut enim Christus, in quo omnes vivificabuntur, præter id quod se ad justitiam exemplum imitantibus præbuit, dat etiam sui spiritus occultissimam fidelibus gratiam, quam latenter infundit et parvulis baptizatis ; sic et Adam in quo omnes moriuntur, præter id quod eis qui præceptum Domini voluntate transgrediuntur, imitationis exemplum est, occulta etiam tabe carnalis concupiscentiæ suæ tabefecit in se omnes de sua stirpe venturos. Peccatum enim generationis hic intelligitur, non imitationis. Nam sicut a muliere initium peccati fuit, sic initium generationis a viro est. Prior enim vir seminat, ut foemina pariat. Ideo per unum hominem peccatum intravit in mundum, quia per semen generationis intravit, quod a viro excipiens femina concipit. Opus hoc D castum in conjuge non habet culpam, sed origo peccati trahit secum debitam pœnam. Non enim maritus, quia maritus est, mortalis non est, aut aliunde nisi peccato mortalis est. Itaque per unum hominem peccatum intravit in mundum, et per peccatum mors, quia si homo non peccasset, nunquam moreretur. *Et ita in omnes homines peccatum sive mors pertransiit*, ut nullus ex viro et femina genitus, immunis esset a peccato et morte. Notandum est enim quod dicitur, pertransiit. Inde est parvulus reus. Peccatum nondum fecit, sed traxit. Etenim illud peccatum non in fonte mansit, sed pertransiit in omnes per vitiatam carnem genitos. *In quo*, id est in primo homine omnes peccaverunt,

quia quando ipse peccavit, omnes in illo erant, et tota humani generis massa in illo est infecta peccati veneno. Sic et in Christo justificantur omnes qui credunt in eum, propter occultam communicationem et inspirationem gratiæ spiritalis, quia quisque adhæret Domino, unus spiritus est cum eo. Et sicut per peccatum primi hominis, quod in omnes pertransiit, amisimus vitam, sic per justitiam secundi hominis, quæ in omnes qui membra ejus fiunt diffunditur, recuperabimus vitam. Dixi quia peccatum in omnes pertransiit, et verum dixi. Nam ab Adam usque ad legem peccatum originale in omnibus fuit. De Judæis non probò quod fuerint sub originali peccato, quia legem habebant, et se esse sub illo per legem cognoscere poterant ; sed de illis, qui ante legem fuerant, et peccatum originale non cognoscebant. Nam usque ad legem Moysi, peccatum illud erat in toto mundo. Erat quidem, sed non imputabatur, id est non intus in anima esse putabatur aliquod hujusmodi peccatum, cum lex non esset, quæ casum primi hominis, ex quo peccatum illud propagatum est, intimaret. In omnes itaque peccatum illud pertransiit, quia etiam ante legem, cum non ita videretur, lege non doerente. Vel ita : Quoniam Judæi vellent dicere justitiam, et vitam esse redditam per legem potius quam per Christum, ut Apostolus docebat, ostendit Apostolus justitiam non potuisse reddi per legem, quæ peccatum auferre non valuit. Nam *usque ad legem*, id est quandiu lex mansit, *peccatum originale erat in mundo*, id est non fuit deletum per legem. Istud usque, non est terminale, sed comprehensivum, sicut cum dicitur : « Et vitam usque in sæculum (*Psal.* cxxxii). » Usque ad legem fuit peccatum, quia nec lex potuit illud auferre, quæ subintravit ut magis abundaret peccatum : sive naturalis lex, in qua quisque jam ratione utens, incipit peccato originali addere et propria ; sive ipsa quæ scripta per Moysen populo data est. Quod igitur ait, quia usque ad legem peccatum erat in mundo, non idcirco dictum est quod deinceps non fuerit, sed quia non poterat per litteram legis auferri, quod solo poterat spiritu gratiæ. Ne quisquam ergo fidens viribus, non dico voluntatis, sed potius vanitatis suæ, putaret libero arbitrio legem potuisse sufficere, et Christi gratiam derideret, ideo ait Apostolus, quia usque ad legem peccatum erat in mundo. Et addidit : *Peccatum autem non imputabatur, cum lex non esset*. Non dixit : Non erat, sed *Non imputabatur*, id est ignorabatur, et peccatum esse non putabatur. Neque enim a Domino Deo tanquam non esset habebatur, sed ab hominibus cæcis nesciebatur, quia non erat lex, qua arguente demonstraretur sive lex rationis in parvulis, sive lex litteræ in populo. Ante legem non imputabatur peccatum, sed regnavit mors, secure possidente homines diabolo pro impunitate credita, usque ad Moysen, per quem rediit cognitio unius Dei. Prius enim aut ignorabant Deum homines, aut non putabant cum curare quid egissent.

Sed ubi lex data est, noverunt Deum curare humana et judicare. *Regnavit, inquit, mors ab Adam usque ad Moysen*, id est a primo homine fusque ad ipsam etiam legem, quæ divinitus promulgata est quia nec ipsa potuit regnum mortis auferre, quæ non regnat utique nisi per peccatum. Regnum enim mortis vult intelligi, quando ita dominatur in hominibus reatus peccati, ut eos ad vitam æternam quæ vera vita est, venire non sinat, sed ad secundam etiam, quæ pœnaliter æterna est, mortem trahat. Hoc regnum mortis sola in quolibet homine gratia destruit Salvatoris, quæ operata est etiam in antiquis sanctis, quicumque antequam in carne Christus veniret, ad ejus tamen adjuvantem gratiam, non ad legis litteram, quæ jubere tantum, non adjuvare poterat, pertinebant. Quod autem dicit : *Usque ad Moysen*, id est usque ad finem legis, et initium gratiæ mortem regnasse, eo genere locutionis ait, quod dicimus, verbi gratia, fuerunt Huni usque ad Attilam. Non enim principium regni ejus, sed finem designamus. Sic et usque ad Moysen, id est usque ad finem legis et principium gratiæ, pestis late diffusa per orbem regnabat, quia medicus deerat. Ubi vero de cœlis medicus advenit, mors potestatem perdidit. Ergo in omnibus regnavit mors ab Adami usque ad Moysen, qui Christi gratia non adjuti sunt, ut in eis regnum mortis destrueretur. Vere in omnibus, etiam in eis qui non peccaverunt in similitudinem prævaricationis Adæ, id est, qui nondum sua et propria voluntate, sicut ille, peccaverunt, sed ab illo peccatum originale traxerunt. Quia in seipsis cum jam non nati essent, nec ratione adhuc uterentur, qua ille utebatur quando peccavit, nec præceptum accepissent, quod ille transgressus est, solo originali vitio tenebantur obstricti, per quod eos regnum mortis traheret ad condemnationem, quod est occidi in gehenna. Potest et sic intelligi, ut cum dixisset, *Regnavit mors etiam in eis qui non peccaverunt*, quasi nōs moneret, quare in eis regnaverit qui non peccaverunt, adderet in similitudinem prævaricationis Adæ, id est quia erat in horum membris similitudo prævaricationis Adæ : *Qui est forma futuri*, quia ipse formam mortis infixit posteris suis. In illo enim constituta est forma condemnationis futuris posteris, qui ejus propagine crearentur, ut ex uno in condemnationem nascerentur, ex qua non liberat nisi gratia Salvatoris. Vel forma est futuri, id est Christi, partim a simili, partim a contrario. A simili, quia sicut Adam sine patre a Deo ex virgine terra factus est, ita Christus ex virgine Maria sine semine a Deo creatus est. Sicut ille est pater omnium secundum carnem, sic Christus secundum fidem. Dormivit Adam ut fieret Eva, mortuus est Christus ut fieret Ecclesia. Dormienti Adæ facta est Eva de latere, mortuo Christo lancea percussus est latus, ut profunderent sacramenta quibus formaretur Ecclesia. A contrario quoque est Adami forma Christi, ut quomodo per illius inobedientiam peccatores constituti sunt multi, ita per Christi obedientiam

justi constituentur multi. Et sicut in illo omnes moriuntur, sic et in Christo omnes vivificentur. Sicut enim manducatum est ad Adam, suadente diabolo, et omnes qui nascuntur ex eo, morti addicti sunt; ita jejunatum est a Christo, et omnes qui per eum renascuntur, vitæ æternæ restituuntur. Sicut illi communicare potuit filiis peccatum et mortem, sic iste suis justitiam suam et vitam. Sicut ille est pater præsentis sæculi, et princeps discordiæ, sic iste pater futuri sæculi et princeps pacis (*Isa. ix*). Sed non sicut delictum, ita et donum.

« Si enim unius delicto multi mortui sunt, multo magis gratia Dei et donum in gratia unius hominis Jesu Christi in plures abundavit. Et non sicut per unum peccatum, ita et donum. Nam judicium quidem ex uno in condemnationem gratia autem ex multis delictis in justificationem. Si enim unius delicto mors regnavit per unum, multo magis abundantiam gratiæ et donationis et justitiæ accipientes in vita, regnabunt per unum Jesum Christum. Igitur sicut per unius delictum in omnes homines in condemnationem, sic per unius justitiam in omnes homines in justificationem vitæ. Sicut enim per unius hominis inobedientiam peccatores constituti sunt multi, ita et per unius obedientiam justii constituentur multi. »

His verbis declarat Apostolus, qualiter Adam forma Christi sit a contrario, et qualiter eadem forma non sit ex omni parte conformis. Nam similes quidem a contrario sunt, sed tamen in hoc differunt, quod non sicut delictum Adæ, ita et donum Christi, quia plus boni Christus confert, quam ille mali. Similes enim sunt Christus et Adam, sed non sicut delictum, ita et donum, id est non sic est efficax peccatum Adæ ad damnationem, ut gratia Christi ad salvationem. Quamvis enim delictum et donum in hoc sint similia, quod sicut delictum operatur discordiam inter nos et Deum, et tandem in nobis mortem, ita donum reconciliationem et æternam beatitudinem, atque sicut per unum hominem intravit peccatum in omnes, et per peccatum mors, ita donum per unum venit in omnes et per donum vita; in hoc tamen differunt, quod delictum operatur in omnibus mortem temporalem, donum autem vitam sempiternam. Plus ergo præstat Christus regeneratis, quam nocuit Adam generatis. Et vere donum est majus et potentius quam delictum, Nam si delictum unius adeo potuit et efficax fuit, ut multos duceret in mortem, multo magis abundavit gratia Dei, id est remissio peccatorum, quam Deus gratis dat sine præcedenti merito humano; et donum, id est largitio virtutum. Hæc, inquam, gratia et donatio, abundavit in gratia unius hominis Jesu Christi, id est in perfectione virtutum quæ in homine Christo est, et abundavit in plures, id est in omnes suos abundanter venit. Non in plures transit gratia quam delictum, neque enim plures justificantur quam condemnantur, cum iniqui multo

plures sint; sed in plures dictum est, velut si diceretur, non in paucos. Neque enim pauci, sed plures sunt, in quos redundat ista gratia. Et multo magis abundat quam delictum, quia omnes qui per Christum liberantur, temporaliter propter Adam moriuntur, propter ipsum autem Christum sine fine victuri sunt. In eo autem quod præmisit. *Si enim unius delicto multi mortui sunt*, dum diceret *multi*, et non omnes, innuit se dicere de illis, in quibus delictum Adæ mortem animæ fecit. Sed *gratia Dei multo magis abundavit*, quia primus parens unum delictum in omnes misit, Christus autem etiam delicta illa quæ homines propria voluntate addiderunt originali, in quo nati sunt, gratia sua solvit, et justificationem atque vitam æternam dedit. Et non sicut per unum peccantem venit condemnatio, ita et donum gratiæ post datum est, quia majus est donum quam delictum. Ostenderat delictum et donum differre secundum effectum, quia delictum genuit mortem, donum autem vitam; et nunc rursus ostendit quod alio modo differunt, quia non sic, sed copiosius est donum gratiæ per unum Christum donantem, sicut fuerat delictum per unum Adam peccantem. Non solum in hoc, inquit, non æqualis est forma, quia Adam temporaliter nocuit eis quos in æternum Christus redemit, sed etiam quia illius uno delicto posterius ejus, nisi a Christo redimantur, traduntur in condemnationem; Christi autem redemptio etiam multa delicta dissolvit, quæ originali sunt addita. Et vere ita est. *Nam iudicium quidem*, id est sententia divini iudicii ex uno delicto Adæ ducit in condemnationem, sed *gratia*, id est gratuitum donum Dei ex multis delictis in baptismo liberans ducit in justificationem, quia non solum ignoscit, sed et justificat. Ideo dixit iudicium ex uno delicto in condemnationem, quia sufficeret ad condemnationem, etiamsi non esset in hominibus nisi originale peccatum. Quamvis enim condemnatio gravior eorum sit, qui originali delicto etiam propria conjunxerunt, et tanto singulis gravior, quanto gravius quisque peccavit, tamen etiam illud solum quod originaliter tractum est, non tantum a regno Dei separat, verum et a salute ac vita æterna facit alienos, quæ nulla esse alia potest præter regnum Dei, quo sola Christi societas introducit. Ac per hoc ad Adam in quo omnes peccavimus, non omnia nostra peccata, sed tantum originale traximus; a Christo vero, in quo omnes justificamur, non illius tantum originalis, sed etiam cæterorum quæ ipsi addimus, peccatorum remissionem consequimur. Et ideo non sicut per unum peccatum, ita est donum. Nam iudicium quidem ex uno delicto si non remittitur, id est originali, in condemnationem jam potest ducere; *gratia vero ex multis delictis* remissis, hoc est non solum originali, verum etiam omnibus cæteris, ad justificationem perducit. Quicumque enim ex illo uno hominæ multi in seipsis futuri erant tamen in illo unus erant. Proinde illud peccatum solius esset, si ex illo nullus exisset. Porro autem in quo erat na-

tura communis, ab ejus vitio nullus est immunis. Sed inde sola Christi gratia liberat, quæ non secundum merita hominum, sed gratis datur, quoniam Deus misericors est; nec omnibus datur, quoniam Deus iudex est; et justo ejus iudicio in aliis demonstratur quid in eis quibus datur conferat gratia. Non ergo simus ingrati ei, qui secundum placitum voluntatis suæ tam multos liberat de tam debita perditione, ut si inde liberaret neminem, non esset injustus, sed qui liberantur, gratiam diligant, qui non liberantur, debitum agnoscant. Si in remittendo debitum apparet bonitas, et in exigendo æquitas, laudent misericordiam qui liberantur, non culpent iudicium qui puniuntur. Dixerat autem quod gratia nos a multis delictis emundans justificavit, et nunc consequenter adjungit, quod per florum delictorum remissionem et justitiæ adeptionem non solum vivemus, sed et regnabimus, et hoc per Jesum Christum. Sed præmittit inde quasi quamdam probationem, quia si in peccato Adæ moriebamur, multo magis in gratia Christi vivemus. Et hoc est: Gratia Dei nos a delictis multis liberans et justificans salvavit a condemnatione cæterorum, qui per illam regnabimus. *Nam mors per unum* in cæteros transiens, *delicto*, id est ob delictum unius, *regnavit*, id est regnum occidendi omnes potenter obtinuit. Vel per unum regnavit, quia sic in omnibus regnum obtinuit, ut in illo uno qui primus peccavit; habet initium regni sui. Sive per unum, ut diximus, in cæteros venit, quia quas vires in illo habuit, in omnes posteros exercuit. Et si mors ita per unum in delicto unius regnavit, tunc multo magis regnabunt, *per unum Christum accipientes*, id est non a se, sed a Deo habentes *abundantiam gratiæ*, id est remissionem peccatorum abundantem; quia non solum originale, sed et actualia remittuntur, et *abundantiam donationis*, id est spiritualium charismatum, et *justitiæ*, id est bonæ operationis. Isti inquam, qui hæc divinitus consequuntur, regnabunt per unum Jesum Christum. Regnabunt multo magis quam in eis mors regnavit, quia ipsi regnabunt æternaliter, mors autem regnavit temporaliter. Itaque ob unius delictum mors regnavit per unum, quia mortis vinculo tenebantur omnes in illo uno, in quo omnes peccaverunt, etiam si propria peccata non adderent. Alioquin non ob unius delictum mors per unum regnavit, sed ob delicta multorum per unumquemque peccantem. Sed abundantiam gratiæ et donationis et justitiæ accipiunt, quia non solum eis peccatum illud, in quo omnes peccaverunt, sed etiam quæ addiderunt, gratia remissionis deletur; eisque tanta justitia donatur, ut cum Adam consenserit ad peccandum suadenti, non cedant isti etiam cogenti. Qui multo magis in vita regnabunt, quia in æterna vita sine fine regnabunt magis quam in eis mors temporaliter, et cum fine regnavit. *Igitur sicut per unius, etc.* Quoniam multa interposuerat ad propositam probationem pertinentia, ostendendo donum efficacius esse quam delictum, et esse multiplicius quam delictum,

repetit antecedens, ut convenienter subinferat ipsum A consequens. Et hoc est: Quoniam *per unius delictum transiens in omnes homines* perventum est ab hominibus *in condemnationem igitur et per unius justitiam in omnes homines* transeuntem, pervenitur *in justificationem*, quæ est causa *vitæ pærennis*. Et sicut illud factum est, sic fit et istud, id est quam digne illud, tam digne et istud. Vel ita: Quandoquidem Adam est forma Christi, et quia majus est donum Christi atque plus confert, igitur sicut justè per delictum unius transiens in omnes homines, itum est in condemnationem corporis et animæ, sic justo judicio etiam per unius justitiam venientem in omnes homines electos, itum est in justificationem, ut participatione justitiæ Christi justificentur, quæ justificatio est causa vitæ sicut condemnatio causa mortis æternæ. Sicut ubi delictum solum sine actuali peccato omnes præcipitavit in condemnationem, et sic in mortem, ita sine nostro opere præcedente gratia Christi nos duxit ad justificationem, et sic ad vitam æternam. Eam quippe justificationem dicit, qua Christus justificat impium. Quæ justificatio transit in omnes homines, non quia omnes homines veniant ad gratiam justificationis Christi, cum tam multi alienati ab illa in æternum moriantur, sed quia omnes qui renascuntur in justificationem, non nisi per Christum renascuntur, sicut omnes qui nascuntur in condemnationem, non nisi per Adam nascuntur. Nemo est quippe in illa generatione præter Adam, et nemo in ista regeneratione præter Christum. Ideo dictum est, omnes et omnes. Nam si aliqui possent carne generari non per Adam, et aliqui spiritu regenerari non per Christum, non liquido omnes, sive hic, sive ibi dicerentur. Eosdem autem omnes, postea multos dicit. Possunt quippe in aliqua re omnes esse, qui pauci sunt. Sed multos habet generatio carnalis, multos et spiritualis, quamvis non tam multos hæc spiritualis quam illa carnalis. Sed tamen sicut illa omnes habet homines, sic ista omnes justos homines, quia sicut nemo præter illam homo, sic nemo præter istam justus homo, et in utraque multi. De quibus subditur: *Sicut enim per inobedientiam*, etc. Et determinat Apostolus delictum unius et justitiam unius, ut sicut ille merito peccati multos perdidit, sic et iste merito justitiæ inde liberasse videatur. Vere sicut delictum unius condemnavit omnes, sic justitia unius justificat omnes. Nam sicut per inobedientiam unius primi hominis, quæ est delictum ipsius, *peccatores constituti sunt multi*, id est omnes qui ex eo nati sunt, originale peccatum ex eo traxerunt, ita et per obedientiam unius hominis Christi, *constituentur multi justi*, id est justificabuntur fide incarnationis et passionis ejus, in qua fuit obediens usque ad mortem. Ideo hic Christum hominem dicit, cum sit et Deus, ne quis existimet vel antiquos justos, per Deum tantummodo Christum, id est per verbum quod erat in principio, non etiam per fidem incarnationis ejus, qua et homo est, potuisse justificari. Hic fini-

tur disputatio de duobus, Adam scilicet et Christo, ex quibus alter nobis peccatum et mortem intulit, alter justitiam et vitam reddidit. Sequitur:

« Lex autem subintravit, ut abundaret delictum.
« Ubi autem abundavit delictum, superabundavit
« gratia, ut sicut regnavit peccatum in mortem, ita
« et gratia regnet per justitiam in vita æternam, per
« Jesum Christum Dominum nostrum.

CAPUT VI.

« Quid ergo dicemus? Permanebimus in peccato
« ut gratia abundet? Absit! Qui enim mortui sumus
« peccato, quomodo adhuc viveamus in illo? »

Supra dixerat, quia usque ad legem peccatum in mundo fuit, quod non originale tantum, sed omne peccatum intelligi voluit. Et ideo usque ad legem fuit, quia nec lex potuit illud auferre. Usque ad legem enim dictum est, ut etiam ipsam legem sententia ista concluderet, quomodo dictum est in Evangelio, omnes generationes ab Abraham usque ad David, generationes quatuordecim (*Math. 1*). Non enim excepto David, sed ipso etiam computato numerus iste completur. Sic lex non est extra permutationem peccati, quod dictum est, usque ad ipsam fuisse. Imo sicut nunc dicitur, *lex subintravit ut abundaret delictum*. Intraverat enim in mundum ab initio peccatum sive delictum, sed lex subintravit, id est subsequenti tempore intravit, non ut per eam finiretur delictum, sed ut abundaret ex prævaricatione. Lex enim, sive naturalem intelligamus, quæ in eorum apparet ætatibus, qui jam ratione uti possunt; sive conscriptam, quæ data est per Moysen, non potuit vivificare aut liberare a lege peccati et mortis, quæ tracta est ab Adam, sed magis addidit prævaricationis augmentum. Ubi enim non est lex, nec prævaricatio. Prævaricata ergo lege, quæ in paradiso data fuerat, nascitur homo ex Adam cum lege peccati et mortis, de qua dicitur: « Video aliam legem in membris meis (*Rom. vii*), » etc. Quæ tamen nisi mala consuetudine postea roboretur, facilius vincitur, non tamen sine gratia Dei. Lege autem alia prævaricata, quæ est in usu rationis animæ rationalis, in ætate hominis jam ratione utentis, prævaricatores fiunt omnes peccatores terræ. Prævaricata vero lege, etiam illa quæ data est per Moysen, multo amplius abundat delictum. Lex ergo subintravit ut abundaret delictum, sive cum homines negligunt quod Deus jubet, sive cum de viribus suis præsumentes, adjutorium gratiæ non implorant, et addunt infirmitati superbiam. Qui enim tales sunt, ignorant qua dispensatione lex data sit. Non enim data est lex, quæ posset vivificare, quia gratia vivificat per fidem. Sed data est lex ad ostendendum, quantis peccatorum vinculis constringerentur, quia de suis viribus ad implendam justitiam præsumebant. Et ideo peccata non minuit, sed adjecit. Non tamen propter hunc effectum data est, sed ex hominum pravitate hoc contingit. Non enim vitio legis, sed illorum sic abundavit peccatum, cum et concupiscentiæ ex prohibitione ardentior facta est, et peccantibus con-

tra legem prævaricationis crimen accessit. Non ergo A
 Judæi de lege gloriantur, quia non sunt per eam justifi-
 cati, sed abundantiori delicto gravati, ideoque magis humilientur et confugiant ad implorandam Christi gratiam, per quam et a peccato prævaricationis liberentur atque sanentur. Delictum enim abundavit per legem. Sed non ideo despiciantur Judæi, qui ad Christum venerunt, quia ubi, id est in quibus abundavit delictum, quoniam, accepta lege, non ignoranter, sed scientes delinquebant, ibi, id est in eis superabundavit gratia Dei, hoc est sic abundavit, et sic dona sua multiplicavit, ut deleret omnino delictum, et superior atque major existeret quam fuerat delictum. Superabundavit, quia et hos perficit quos diabolus vincere non potuit; et delictum ad tempus fuit, gratia vero in æternum. Ita superabundavit gratia, ut sicut regnavit in mortem peccatum, etiam quod non ex Adam traxerunt homines, sed sua voluntate addiderunt, ita et gratia regnet per justitiam in vitam æternam. Non tamen est aliqua justitia præter Christum, sicut aliqua peccata præter Adam. Ideo cum dixisset, sicut regnavit peccatum in mortem, hic non addidit, per unum, aut per Adam, quia supra dixerat etiam de peccato illo, quod subintrante lege abundavit, et hoc utique non est originis, sed jam propriæ voluntatis. Cum autem dixisset sic, et gratia regnet per justitiam in vitam æternam, addidit: per Jesum Christum Dominum nostrum, quia generante carne illud tantummodo trahitur, quod est originale peccatum, regenerante autem spiritu, non solum originalis, sed etiam voluntariorum remissio peccatorum. Ita ergo superabundavit gratia, ut sicut regnavit peccatum in mortem, id est sicut prævaluit actuale peccatum, et effe-
 cax fuit ducere homines in mortem; sic et gratia, id est remissio peccatorum, et accumulatio virtutum regnet, id est prævaleat, et omnem voluntatem suam in nobis potenter compleat; per justitiam, id est per subsequentem bonam operationem nostram, ducens nos in vitam æternam, non per nos ipsos, neque per legem, sed per Jesum Christum. Post hæc quæstionem, quæ ab alio fieri poterat, ipse sibi facit; et quod opponi poterat, removet. Quasi dicat: Quoniam supra dixi, quia ubi abundavit peccatum, superabundavit gratia, ergo quid ex hoc dicemus? Permanebimus in peccato, ut gratia abundet in nobis, id est ut abundantiam gratiæ consequamur? Absit! ut in eo jam maneamus! Nam qui jam sumus mortui peccato, id est qui per baptismum jam extincti peccato sumus, quomodo adhuc vivemus in illo? Obedire desiderii peccati, hoc est vivere peccato. Sed cum id gratia præstiterit, ut moreremur peccato, quid aliud facimus, si vivimus in eo, nisi ut gratiæ simus ingrati? Neque enim qui laudat beneficium medicinæ, morbos docet et vulnera, a quibus hominem illa sanat, sed quanto magis medicina prædicatur, tanto magis vulnera et morbi vituperantur. Sic laus et prædicatio gratiæ, vituperatio et damnatio est delictorum.

« An ignoratis, quia quicumque baptizati sumus
 « in Christo Jesu, in morte ipsius baptizati sumus?
 « Consepulti enim sumus cum illo per baptismum
 « in mortem, ut quomodo surrexit Christus a mor-
 « tuis per gloriam Patris, ita et nos in novitate am-
 « bulemus.

Mortui sumus peccato per baptismum, quem in morte Christi percepimus (Ephes. iv; Colos. iii), et an hoc ignoratis? An ignoratis, quia quicumque, sive servi, sive liberi, sive parvuli, sive magni, baptizati, id est tincti et abluti sumus in Christo Jesu, id est in nomine Christi in morte ipsius baptizati sumus? Ac si dicatur: Nunquid sacramentum ipsius baptismi ignoratis? In morte quippe Christi baptizamur, ut in ipsius morte credentes et imitantes quasi mortui vivamus. Mortui enim per baptismum peccato, non debemus ei iterum vivere, ut iterum mori ei necesse sit, quia in morte Christi, id est in similitudinem mortis Christi sumus baptizati, ut sicut ille semel mortuus est, et semper vivit, ita nos semel mortui malo, semper vivamus bono. Quomodo enim mortuus peccare non potest, ita et nos in Christo sumus commortui, et implicari peccatis capitalibus non debemus, quia qui crucifixus est, nihil aliud facit, nisi horam mortis expectat, et spiritum suum Deo commendat, nihilque jam in hoc mundo appetit. Nam quemadmodum pedes et manus Christi cruci sunt affixi, ut in nullam partem moveri possent, ita manus et pedes nostri debent imitatione mortis ejus ligari, ut non possint ad peccatum moveri. Et ita nihil aliud intelligamus esse Christi baptismum, nisi mortis Christi similitudinem; nihil autem aliud mortem Christi crucifixi, nisi remissionis peccati similitudinem, ut quemadmodum in illo mors vera facta est, sic in nobis vera remissio peccatorum; et quemadmodum in illo vera rerurrectio est, ita et in nobis vera justificatio. Et si hinc ostendimus mortui esse peccato, quia in morte Christi baptizati sumus, profecto parvuli qui baptizantur in Christo, peccato moriuntur, quia in morte ipsius baptizantur. Nullo enim excepto dictum est, quia quicumque baptizati sumus in Christo Jesu, in morte ipsius baptizati sumus. Et ideo dictum est, ut probaretur nos mortuos esse peccato. Cui autem peccato parvuli renascendo moriuntur, nisi quod nascendo traxerunt? Vel in morte Christi sumus baptizati, quia mors ejus est causa huius purificationis. Vere in morte Christi sumus baptizati, id est in baptismo similes morti ejus effecti, quia etiam consepulti sumus illi per baptismum. Sicut enim nemo vivus potest sepeliri cum mortuo, ita nemo qui adhuc vivit in peccato, potest in baptismo consepeli in Christo. Consepulti sumus cum illo per baptismum, ut quemadmodum ipse fuit sepultus corpore, sic peccatum nostrum lateat et sepeliatur sepulcro aquæ; sicut ipse tribus diebus in sepulcro jacuit, sic nos tribus vicibus sepulcro baptismatis immergimur. Nam quod tertio mergimur, triduanæ sepulturæ sacramenta signamus; et dum tertio ab aquis educimur, resurrectio

triduum temporis exprimitur. Quia in illo aquarum elemento sepelitur, ut renovati per Spiritum sanctum resurgamus. In aqua enim imago mortis, in spiritu pignus est vitæ, ut per aquam moriatur corpus peccati, quæ quasi quodam tumulo corpus includit, ut per virtutem spiritus renovemur a morte peccati. Consepulti sumus cum illo per baptismum, et hoc *in mortem*, id est in defectum vitiorum, ut vitia in nobis sint mortua ad exemplum mortis ejus. Ad hoc sumus commortui et consepulti, *ut quomodo surrexit Christus a mortuis per gloriam Patris, ita et nos* a vitis surgentes ad bona opera, *ambulemus* de bono in melius *in novitate vitæ*. Id est ut quomodo glorificatur Pater per resurrectionem filii, ita et per conversationis nostræ novitatem glorificetur. Novitas autem vitæ est, ubi veterem hominem cum actibus suis deponimus, et induimus novum, qui secundum Deum creatus es, in justitia et sanctitate veritatis.

« Si enim complantati facti sumus similitudini mortis ejus, simul et resurrectionis erimus, hoc scientes quia vetus homo noster simul crucifixus est, ut destruat corpus peccati, ut ultra non serviamus peccato (*Ephes. iv; Colos. iii*). Qui enim mortuus est, justificatus est a peccato. Si autem mortui sumus cum Christo, credimus quia simul etiam vivemus cum illo. »

Debemus exemplo resurrectionis Christi ambulare in novitate vitæ, ut novam et incorruptibilem conversationem ducamus, nec jam vitiorum putredine corrumpamur. Nam *si sumus facti complantati*, id est a veteri ritu avulsi, et in novitatem conversationis translati, hærentes *similitudini mortis ejus*, id est imitantes pro posse nostro mortem ejus, ut abstineamus nos a peccato, quo ille prorsus caruit, *simul et resurrectionis ejus similitudini erimus complantati*. Arbor quæ plantatur, moritur antequam crescat, et demortua vivificatur, et vivificata fructificat. Sic et Christus, qui lignum vitæ est, juxta Salomonem (*Prov. ii*), avulsus de præsentis sæculo, mortuus est, et per resurrectionem vivificatus, crevit in totam mundi latitudinem, in quo et multum fructum affert. Notandum autem quia non dixit Apostolus: *si enim complantati sumus morti ejus, sed et similitudini mortis ejus*. Christus enim semel ita mortuus est peccato, id est carni, ut peccatum omnino non fecerit. Nos autem ipsa morte quia ille mortuus est, peccato non possumus mori, ut omnino nesciamus peccatum, similitudinem tamen habere possumus, ut imitantes eum abstineamus nos a peccato. Hoc enim recipere potest humana natura, ut in similitudine mortis ejus fiat, dum ipsum imitando non peccat. Debemus ergo complantari similitudini, id est ad similitudinem mortis ejus, ut imitantes innocentiam mortis ejus, exstinguamur vitiiis, et fructificemur in operibus bonis. Tunc enim et resurrectionis ejus similitudini complantabimur. Omnis enim plantatio post hiemis mortem, resurrectionem in vere germinat. Si igitur et nos in Christi morte complantati sumus per hiemen hujus sæculi, in vere futuri sæ-

culi proferemus ex ipsa radice fructus justitiæ. In similitudinem resurrectionis ejus complantabimur, quando reformabit corpus humilitatis nostræ configuratum corpori claritatis suæ. Complantemur, inquit, similitudini mortis ejus, *hoc scientes, quia vetus homo noster simul crucifixus est*, quoniam in illa morte Domini, peccati nostri figura pependit. Crucifixio quippe veteris hominis, pœnitentiæ doloris intelliguntur et continentia salubris cruciatus. Christus enim qui vixerat vetus homo secundum penam, id est secundum famem et sitim et hujusmodi, hoc modo vetustatem, id est nostræ mortalitatis infirmitatem finivit et deposuit, ut dolorem crucis sustinens, sic haberet membra distenta et confixa, ut ad priores actus moveri non possent, a quibus etiam sepultus, quievit humanis subtractus aspectibus, exigens a nobis ut vetustatem peccatorum cum dolore pœnitentiæ deponamus, et membra nostra per continentiam sint confixa, ne ad priora redeamus, a quibus ita perfecte quiescamus, ut nec eorum visio et memoria habeatur. Etsi jam ista complevimus, tunc vere vetus homo noster simul cum Christo crucifixus est. Vetus enim homo, est vetusta conversatio, fomes et consuetudo peccati, et quidquid vitiorum ex primo parente sumpsit initium. Qui tamen noster est, quia ex nobis, non ex Deo. Et iste vetus homo cum crucifixione Christi ita debilitatus est, ut dominante ratione destruat corpus peccati, id est tota peccatorum massa, ita *ut ultra non serviamus peccato*. Corpus peccati, id est peccatum, secundum omnia membra sua destruat. Unum enim vitium, membrum est peccati; corpus vero, universitas delictorum, quorum principium est originale peccatum. Christus autem non ex parte, sed integer est crucifixus, ut nos ex toto moriamur peccato et vivamus Deo. Gratia enim Dei per baptismum Christi, qui venit in similitudine carnis peccati, id agit, ut destruat corpus peccati. Destruitur autem, non ut in ipsa vivente carne concupiscentia conspersa et innata repente absumatur et non sit, sed ne obsit mortuo, quæ inerat nato. Destruitur, non ut interim non sit, sed ut non cogamur ei servire. Hoc enim est quod ait, *ut ultra non serviamus peccato*. Et vere non cogemur peccato servire, quia justificati sumus; et vere justificati, quia mortui. *Qui enim mortuus est cum Christo, justificatus est*, id est liber effectus a peccato et alienatus, nec potest jam peccare, quia sicut et Joannes ait: « Omnis qui natus est ex Deo, non peccat (*i Joan. iii*). » Crucifixus enim, omnibus membris dolore occupatis, peccare non potest, sed concupiscentiis et passionibus contradicit. Et qui sunt Christi, carnem suam crucifixerunt cum vitiiis et concupiscentiis (*Galat. v*). Ille est justificatus, qui mortuus est, id est qui seipsum pro Christo vitiiis mortificavit, aut martyrium pertulit. Sed *si mortui sumus cum Christo*, id est si imitatione mortis ejus vitiiis sumus mortificati, ut ultra non vivamus eis, *credimus* et pro certo speramus, *quia simul etiam*

vivemus cum illo, ut ubi ipse est, et nos simus; et quomodo ipse in æternum et beatæ vivit ita et nos vivamus.

« Scientes quod Christus resurgens ex mortuis, jam non moritur, mors illi ultra non dominabitur. Quod enim mortuus est peccato, mortuus est semel; quod autem vivit, vivit Deo. Ita et vos existimate, vos quidem mortuos esse peccato, viventes autem Deo in Christo Jesu. »

Vivemus cum Christo, qui sine fine vivit, nos dico jam scientes quod Christus resurgens ex mortuis, jam amplius non moritur, id est non dissolvitur, sicut et Lazarus et filius viduæ, quos ipse suscitavit, iterum mortui sunt. Non enim talis fuit ejus resurrectio, qualis eorum; sed talis, ut amplius mori non possit, et talis etiam nobis promissa est. Jam non moritur Christus, et mors illi ultra non dominabitur, quæ ad horam illi per ipsius piam voluntatem dominata est in cruce. Hoc dictum est contra Manichæos, qui negant Christum veram carnem habuisse. Ad hoc enim humanitatem suscepit, ut mors ei temporalis in passione dominaretur, id est veraciter affligeret eum sicut verum hominem et occideret, sicque mors æterna dominium in nobis amitteret. Sed non ultra dominabitur ei mors aliqua passione, quia jam nihil molestiæ sustinebit. Impii vero licet post generalem resurrectionem jam non moriantur, tamen sine fine mors illis dominabitur, quia sicut scriptum est: « Mors depascet eos (Psal. XLVIII). » Et ad distinctionem talis immortalitatis, dicitur nunc Christus ita post resurrectionem suam immortalis, ut ei per alicujus molestiæ passionem mors ultra dominari nequeat. Nam et electis ejus similis incorruptio et impassibilitas tribuetur. Vere jam non moritur Christus, quia seme est mortuus, id est ita ut mortem ultra non iteret. Semel, quia pro peccato tollendo, quod una mors sufficit tolerare, et ideo non est opus repetitione. Et hoc est: Quod enim mortuus est peccato, mortuus est semel. Vel peccato mortuus est, id est carni, in qua erat non peccatum, sed similitudo peccati. Peccato enim mortuus est, quia similitudini carnis peccati mortuus est, quando moriendo exutus est carne, ut per hoc mysterium significaret, eos qui in morte ipsius baptizantur, mori peccato ut vivant Deo. Peccatum enim non inerat ei. Et tamen quodammodo peccato mortuus est, dum moreretur carni, in qua erat similitudo peccati, ut cum secundum vetustatem peccati nunquam vixisset, nostram ex morte veteri, qua in peccato mortui fueramus, revisiscentem vitam novam sua resurrectione signaret. Et ideo mortuus est semel, ut nos a duplici morte liberaret. Nos enim quia et mente a Deo recessimus, et carne ad pulverem redimus, pœna duplæ mortis astringimur. Sed ille pro nobis sola carne mortuus est, ut simplam mortem suam duplæ nostræ conjungeret, et nos ab utraque morte liberaret. Quod ergo mortuus est peccato, id est peccati similitudini, mortuus est semel, id est sola carne. Sed quod post resur-

rectionem vivit, vivit Deo, id est in æterna beatitudine Patris, quia sicut vita Patris, ita et vita Christi nullam inquietudinem recipit. Ita et vos, id est sicut mors Christi semel peccato facta est, et vita Deo perenniter manet, ita vos semel peccato moriamini, ut jam amplius peccato non vivatis, ne iterum oporteat vos peccato mori, et Deo semper in bonis operibus vivatis. Et hoc est: Ita et vos existimate, vos imitatione Christi mortuos quidem peccato, id est alienatos a peccato tempore baptismatis, sed viventes Deo in virtutibus et novitate vitæ, quæ est prima resurrectio, ut adhæreatis Deo, et unus cum eo spiritus efficiamini; et hoc non in viribus arbitrii vestri, sed in Christo Jesu, id est in ejus gratia et virtute, quia sicut Petrus ait: « Non est in alio aliquo salus (Act. IV). » Non sine causa autem dictum est, existimate, id est cogitate, vos mortuos esse peccato. Qui enim cogitat vel existimat apud semetipsum peccatum mortuum esse, non peccat, verbi gratia: si me concupiscentia mulieris trahat, si argenti, si auri, si prædii cupiditas pulset, et ponam in corde meo quod mortuus sim cum Christo, et de morte cogitem, exstinguitur continuo concupiscentia, et effugatur peccatum. Omnia hæc ad illam respiciunt quæstionem, ne videatur Apostolus dedisse locum peccandi in eo, quod ait: « Ubi abundavit peccatum, superabundabit gratia. »

« Non ergo regnet peccatum in vestro mortali corpore, ut obediat concupiscentiis ejus. Sed neque exhibeatis membra vestra arma iniquitatis peccato, sed exhibete vos Deo tanquam ex mortuis viventes, et membra vestra arma justitiæ Deo. Peccatum enim vobis non dominabitur. Non enim sub lege estis, sed sub gratia. »

Quia dixit mortuos esse peccato, et non debet revivere in eo, cum nemo sit sine peccato, determinat, a quibus maxime est cavendum, quasi concludat quod supra querebatur, permanebimus in peccato? Quia, inquit, mortui estis peccato, et tamen non potestis in hac vita esse sine peccato, ergo saltem non regnet peccatum in vestro mortali corpore. Non ait, non sit, sed non regnet. Peccatum quippe in corpore mortali non prohibuit esse, sed regnare, quia in carne corruptibili non regnare potest, sed non esse non potest. Hoc ipsum namque de peccato tentari, ei peccatum est, quo quia quoad vivimus perfecte omni modo non caremus. Apostolus, quoniam hoc expellere plene non potuit, ei de cordibus nostris regnum tulit, ut appetitus illicitus, etsi plerumque bonis nostris cogitationibus occulte se quasi fur ingerit saltem si ingreditur, non dominetur. Quum enim quælibet culpa cor iniqui pulsat, et resistens illud non invenit, sed suo Domino subternit, procul dubio regnat in eo, quoniam ad vitia mox ut pulsaverit, inclinatur. Sed non ita fiat in vobis. Etsi sic peccatum, id est fomes et delectatio peccati, in corpore vestro, id est jam vestri juris, corpore dico mortali, et ideo non sine peccato, tamen non reanet in eo peccatum, id est non faciat

quod illicite cupit. In corpore mortali dictum est, quia in immortalis corpore non erit peccatum. Inest modo peccatum cum delectaris, regnat si consenseris. Est itaque peccatum in corpore, sed non regnet, ut *obediatis concupiscentiis ejus*, quæ ex carnis infirmitate nascuntur. Si enim non obedieritis, etsi est peccatum in carne, quod suadeat, quod delectet ad malum, non obediendo facitis ut non regnet quod est, et ita fiet postea ut non sit quod erat, quando absorbebitur mors in victoriam. Et non solummodo non regnet in vobis per consensum, sed etiam non regnet per operationem. Et hoc est : Non obediatis per consensum *illicitis concupiscentiis, sed neque exhibeatis*, id est tribuatis peccato, id est fomiti peccati *membra vestra arma*, id est instrumenta iniquitatis, hoc est prævæ actionis, qua virtutes debellantur sicut quibusdam armis. Membra vocantur arma, quia his vel justitiæ, vel peccato militamus. Et unumquodque membrum, si officium suum in malos usus converterit, arma iniquitatis efficitur, ad justitiam expugnandam, si manus furto, linguaque mendacio sit intenta, si oculus concupiscentiæ serviat ad expugnandam pudicitiam, et cætera membra similibus vitiis sint occupata. Peccatum enim quod est in corpore nostro, quidam tyrannus est pugnans adversum nos, et membra nostra pro armis habere quærit ad debellandum nos. Non ergo sinamus eum membris nostris contra nos pugnare. Surgit ira? non demus iræ linguam ad maledicendum, manum aut pedem ad feriendum. Non surgeret ira ista irrationabilis, nisi peccatum esset in membris. Sed tollamus illi regnum, non habeat arma, quibus contra nos pugnet. Discet enim non surgere, cum arma cœperit non invenire. Ne exhibeatis, inquam, membra vestra peccato arma iniquitatis, id est quibus impleatur iniquitas, *sed exhibete vos Deo tanquam viventes ex mortuis*, id est velut jam a morte resuscitati. Post resurrectionem enim non carnaliter vivitur, nec peccatur, sed divinis et spiritalibus intenditur, et vos qui a morte animæ surrexistis, jam spiritaliter et sancte et Deo vivere debetis, *et membra vestra exhibere Deo arma justitiæ*, ut per ea Deus pro justitia pugnet adversus regnum peccati. Deus enim est qui operatur in vobis, scilicet ut manus quæ ante rapiebat aliena, nunc tribuat sua : oculus qui ante videbat ad peccandum, nunc videat ad boni operis ministerium. Sic et cætera membra justitiæ serviant. Quod bene si vultis, implere potestis. *Nam peccatum*, id est fomes peccati et delectatio iniquitatis, quæ in carne est, *non dominabitur*, id est non prævalebit vobis, ut olim solebat. Ideo non dominabitur, quia *non estis* modo *sub lege* jubente et non juvante, *sed sub gratia* liberante et juvante. Sub lege enim positus, non sub gratia dominatur peccatum, a quo non fit homo liber lege, sed gratia. Non quia lex mala est, sed quia illa non libera est, quos reos facit jubendo, non adjuvando. Gratia quippe adjuvat, ut legis quisque sit factor, sine

qua gratia sub lege positus, tantummodo erat legis auditor.

« Quid ergo? Peccabimus, quoniam non sumus sub lege, sed sub gratia? Absit! Nescitis quoniam cum exhibetis vos servos ad obediendum, servi estis ejus cui obedistis, sive peccati ad mortem, sive obediendi ad justitiam? Gratias autem Deo, quod fuistis servi peccati, obedistis autem ex corde in eam formam doctrinæ, in qua traditi estis. Liberati autem a peccato, servi facti estis justitiæ. »

Quoniam sub gratia sumus, ergo quid facimus? Peccabimus, quoniam non sumus sub lege, sed sub gratia? id est, ergo cessante vindicta legis impune peccabimus? Absit ut peccemus? Lex enim peccantem mox interfici jubebat, gratia vero etiam post culpam exspectat ad penitentiam. Et ideo nunc isti volebant apostoli sententiam ad hoc inflectere, ut liceret eis peccare, quoniam exuti erant a legis terrore. Sed hoc ipse removet. Absit, inquit, ut ideo licentius peccemus, id est criminalia et capitalia peccata committamus, qualia lex damnare consueverat, nam sine minoribus peccatis hæc vita non potest duci. Vere non debetis peccare, sed potius bene operari, quia si peccaveritis, servi peccati eritis, sicut e contra si bene egeritis, servi justitiæ efficiemini. Et minus turpe est, ut cum Dei gratia non a peccato liberaverit, rursus occasione ejus peccato serviat. An nescitis, id est an ignoratis quia *cui exhibetis*, id est præparatis et præsentatis, *vos servos*, id est pronos ad obediendum, *servi estis ejus*, id est voluntati ejus servire habetis, *cui obedistis*, id est cujus obediendi colla vestra subjecistis? Postquam illi obedistis, servi ejus estis, etsi non antea, cum primum illi consentiendo vos exhiberetis. Cuicumque obedistis, servi ejus estis, sive peccati ducentis ad mortem æternam, sive sanctæ obediendi ducentis vos ad justitiam, id est ad justitiæ consumptionem. Qui enim per fidem primo justificati estis, nunc si divinis præceptis obedientes fueritis, ad summam justitiæ perfectionem ascendetis. Ejus estis servi, cui obedistis. Sed gratias ago Deo, quia licet prius fuissetis servi peccati, jam tamen non estis. Inde gratias refero, non vobis, non libero arbitrio vestro, sed Deo, per quem factum est, ut peccati servitutem evaderitis. Gratias, inquit Deo, quia *servi peccati fuistis*, sed ipso liberante et adjuvante jam non estis, quoniam *obedistis* Deo non ex timore legis, sed *ex corde*, id est ex bona cordis voluntate, vel non specie tenus, non simulatione, sed ex cordis puritate. Obedistis dico, tendentes in eam formam, id est regulam evangelicæ doctrinæ, in qua traditi estis. Hoc est in doctrinam informantem et commouentem mores vestros, in qua traditi estis a gratia Dei, non per vos accessistis, vel a doctoribus estis in ea traditi. Quæ scilicet doctrina est forma, quia imaginem Dei deformatam restituit. Nec solum obedistis, sed etiam *liberati estis a peccato* per Spiritum sanctum quem accepistis in baptismo, quia ubi spiritus Do-

mini, ibi libertas (*II Cor. III*). » Et a peccati servitute liberati, *facti estis* consentiendo et operando *servi justitiæ* quod est summa libertas. Servi justitiæ estis, cui obedistis, id est Christi qui factus est nobis sapientia a Deo et justitia et sanctificatio.

« Humanum dico, propter infirmitatem carnis vestræ. Sicut enim exhibuistis membra vestra servire immunditiæ et iniquitati ad iniquitatem, ita nunc exhibete membra vestra servire justitiæ in sanctificationem. »

Hactenus non esse peccandum, hinc quid deinceps sit agendum, de quo nullus possit se excusare, quia nullus est qui non possit bene operari, saltem voluntate, quod item est per gratiam. *Humanum*, inquit, *dico*, id est quod potestis portare dico, quod non excedat vires humanitatis et fragilitatis vestræ, sed quod satis compleere potestis, et hoc facio *propter infirmitatem*, id est debilitatem et fragilitatem carnis, id est carnalitatis vestræ, quia video vos adhuc esse debiles secundum carnem, et ideo humane vos instruo. Vere est humanum, id est leve et non asperum quod dico, quia hoc præcipio: *Sicut exhibuistis*, id est præparavistis membra vestra *servire* operando *immunditiæ*, id est libidini, quæ carnem maculat: et *iniquitati*, id est iniquæ actioni, quæ etsi vestrum corpus non inquinat, proximo tamen nocere appetit, iniquitati dico, ducenti *ad iniquitatem* aliam majorem, ut per incrementa malorum proficeretis semper in pejus, *ita nunc* post conversionem cum sitis liberati, *exhibete*, id est præparate membra vestra quæ sunt vestri juris, *servire* operando *justitiæ* ducenti *in sanctificationem*, id est in boni consummationem, et ideo est serviendum justitiæ, ex qua provenit tanta utilitas et honestas. Hoc est, sicut tunc nullus timor coegit, sed voluptas peccati duxit, ita nunc delectatio justitiæ adultæ, etsi nondum perfectæ. Si nequaquam amplius potestis, saltem tales estote in fructu honorum, quales fuistis dudum in actione vitiorum, ne debiliores vos habeat sancta libertas, quos in carne validos habuit usus terrenæ voluptatis. Ita scilicet unusquisque vestrum virtutibus serviat, sicut vitiis serviebat. Multo enim amplius et multo intentius justitiæ, quam immunditiæ, serviendum est. Sed ego, inquit, humane ægo. Eadem postulo, similia requiro, ut unumquodque membrum ministerium quod exhibuit vitiis, aptet virtutibus; et actum quod exhibuit immunditiæ, ad castitatem nunc sanctificationemque convertat. Si non plus potestis, vel tantum nunc agite quantum tunc egistis, ne fidem et doctrinam nostram quasi asperam et importabilem fugiatis. Quid est autem sicut illud, ita et hoc agite, nisi quemadmodum ad peccandum nullus vos coegbat timor, sed ipsius libido voluptasque peccati; sic ad juste vivendum non vos supplicii metus urgeat, sed delectatio ducat, charitasque justitiæ; et quam fortiter et instanter illa egistis, tam fortiter et instanter ista nunc agite. Et hæc quidem nondum est perfecta justitia. Tantumne enim digna est justi-

tia, quantum digna fuit iniquitas? Sic amanda est ista, quomodo amatur illa? Absit ut sic, et vitam vel sic. Ergo plus est amanda. In iniquitate enim secuti estis voluptatem, sed pro justitia debetis tolerare dolorem. Ecce nescio quis impudicus adolescens injectit oculos in conjugem alienam, adamavit, cupit pervenire, quærit tamen latere. Sic enim amat voluptatem, plus ut timeat dolorem. Suavitas enim illa voluptatis non est tanta, ut vincat etiam dolorem pœnarum. Pulchritudo autem et delectatio justitiæ tanta est, ut cuicumque amorem suum perfecte inspiraverit, faciat eum contemnere non solum quidquid in hoc mundo delectabat, sed et quidquid terret, quidquid cruciat. Ad hanc justitiæ perfectam delectationem hortari nunc volebat Apostolus, sed auditores suos minus idoneos vidit. Ideoque descendit eorum infirmitati, et præceptum quod eis dabat temperavit. *Humanum*, inquit, *dico*, etc, usque *in sanctificationem*. Justitiam hic pro omnibus simul virtutibus nominavit, sicut e contrario iniquitatem pro omnibus simul vitiis posuit. Deinde addit justitiæ sanctificationem, quo videlicet castitatis partem et generaliter cum cæteris, et per semetipsam specialiter commendaret. Et monet auditores, ut si necdum pro justitia pœnas, dolores mortemque contemnere valent, saltem justitiæ delectationem præponant voluptatibus sui corporis, ut paulatim proficiant ad majora justitiæ merita, et fortius atque devotius serviant sanctitati quam luxuriæ prius servierant, nec jam aliquid pro justitia pati respuant. Sicut enim ille est iniquissimus, quem nec pœnæ corporales deterrent ab immundis operibus sordidæ voluptatis, ita ille est justissimus, qui nec pœnarum corporalium terrore revocatur a sanctis operibus luminosissimæ charitatis.

« Cum enim servi essetis peccati, liberi fuistis justitiæ (*Joan. VIII*). Quem ergo fructum habuistis tunc in illis, in quibus nunc erubescitis? Nam finis illorum mors est (*Isa. I; Ezech. xxxv.*). »

Ideo justitiæ servire debetis, non immunditiæ, quia *cum essetis servi peccati*, id est cum peccatum dominaretur vobis, et regnaret in corpore vestro mortali, *liberi fuistis justitiæ*, id est caruistis domino justitiæ, quia « nemo potest duobus dominis servire (*Matth. VI; Luc XVI*). » Quamdiu enim quis peccato servit, liber est justitiæ, id est alienus a justitia. Et notandum est esse et libertatem culpabilem, et servitutem laudabilem. Nam liberum esse justitiæ, crimen est; servum vero ejus esse, laudabile est. Liberum autem arbitrium usque adeo in pectoribus non perit, ut per ipsum peccent maxime omnes, qui cum delectatione peccant, et amore peccati. Nam dicente Apostolo: *Cum essetis servi peccati, liberi fuistis justitiæ*, ostenduntur etiam peccato non potuisse servire, nisi alia libertate. Liberi ergo a justitia non sunt, nisi arbitrio libertatis; liberi autem a peccato non fiunt, nisi gratia Salvatoris. Propter quod admirabilis doctor etiam verba ipsa discrevit. Liberos enim dixit justitiæ, non liberatos;

a peccato autem non liberos, ne sibi hoc tribuerent, sed vigilantissime maluit paulo superius dicere liberatos, referens ad illam Domini sententiam : « Si vos filius liberaverit, tunc vere liberi eritis (Joan. viii). » Sed hæc voluntas, quæ libera est in malis, quia delectatur malis, ideo libera in bonis non est, quia liberata non est. Male libera est, quando eam peccare delectat. Liberaliter enim servit, qui sui domini voluntatem libenter facit. Ac per hoc ad peccandum liber est, qui peccati servus est. Unde ad juste faciendum liber non erit, nisi a peccato liberatus, justitiæ servus esse cœperit. Ipsa est vera libertas propter recte facti lætitiâ, simul et pia servitus propter præcepti obedientiam. Et quando quidem peccato servivistis, ergo quem fructum, id est quam utilitatem habuistis tunc in illis vitiorum actibus, in quibus majorem turpitudinem erubescitis nunc, cum sanæ mentis estis? Quasi dicat : Nullum fructum ibi tunc habuistis, vel si quem voluptatis fructum habere vos putatis, ille talis fuit, unde merito nunc erubescitis. Hæc remuneratio facit eos priora abhorrere, et magis obnoxios esse gratiæ. Merito nunc de præteritis erubescitis, nam finis illorum, id est exitus vitæ est mors. Vel ita : De fructu quæro, nam de fine patet, quia finis illorum est mors, non illa quæ communis est omnibus, sed illa quam nullus evadere valet, nisi qui convertitur ad justitiam, et de præteritis male gestis erubescit.

« Nunc vero liberati a peccato, servi autem facti a Deo, habetis fructum vestrum in sanctificationem, et finem vero vitam æternam. Stipendium enim peccati, mors. Gratia autem Dei vita æterna in Christo Jesu Domino nostro. »

De servitute peccati habuistis fructum confusionis, et in fine habituri eratis mortem æternam; sed de Dei servitio nunc habetis fructum sanctificationis, et in fine habebitis vitam sempiternam. Et hoc erat tunc quidem ita. Sed nunc cum conversi estis per Christi gratiam, liberati a peccato cui serviebatis, nec solum a peccati servitio erepti, sed etiam facti Deo servi, qui tunc eratis liberi justitiæ, ut jam libere possitis opera bona facere, et habetis fructum vestrum, id est vobis utilem et congruum, qui fructus procul dubio charitas est et opera ejus, quam nullo modo per nos habere possumus, sed per Spiritum D sanctum qui datus est. Hunc fructum habetis donante Spiritu sancto, ducti in sanctificationem, id est in virtutum consummationem; nec solum hoc habebitis, sed etiam finem laboris, quem in Dei servitio sustinetis, percipietis vitam æternam corporis et animæ. Dixi quia finis illorum quæ prius faciebatis, est mors, et merito dixi. Nam stipendium, id est præmium peccati est mors. Sed rursus e contrario subjecti, quia pro nobis quæ nunc facitis, consequemini in fine vitam æternam, quoniam gratia Dei quæ misericorditer bene agentes remunerat, est vita æterna. Stipendium dicitur a stipe et pendo. Et quod est merces operanti, hoc est stipendium militanti. Stipendium ergo peccati merito mors dicitur, quia mi-

litæ diabolicæ mors æterna tanquam debitum redditur. Ubi cum posset Apostolus dicere, et recte dicere : Stipendium autem justitiæ vita æterna, maluit dicere : Gratia autem Dei vita æterna, ut hinc intelligeremus, non meritis nostris Deum nos ad æternam vitam, sed pro sua miseratione perducere. Cum enim dixisset, stipendium peccati mors, quis non eum congruentissime et consequenter addere judicaret, si diceret, stipendium autem justitiæ vita æterna. Et verum est, quia sicut merito peccati tanquam stipendium redditur mors, ita merito justitiæ tanquam stipendium vita æterna. Sed adversus elationem caute militans, stipendium, inquit, peccati mors. Recte stipendium, quia debetur, quia digne retribuitur, quia merito redditur. Deinde ne justitia de humano se extolleret hono merito, sicut humanum meritum malum non dubiatur esse peccatum, non a contrario retulit, dicens : Stipendium justitiæ vita æterna, sed gratia, inquit, Dei vita æterna. Et hæc ne præter mediatorem aliqua via alia quæreretur, adjecit, in Christo Jesu Domino nostro. Tanquam diceret : Audito quod stipendium peccati sit mors, quid te disponis extollere, o humana non justitia, sed nomine justitiæ plane superbia? Quid te disponis extollere, et contrariam morti vitam æternam tanquam debitum stipendium flagitare? Cui debetur vita æterna, vera justitia est. Si autem vera justitia est, ex te non est. « Desursum est, descendens a Patre luminum (Jac. i), » ut haberes eam, profecto accepisti. « Quid enim boni habes, quod non accepisti? (I Cor. iv.) » Quapropter si accepturus est vitam æternam, justitiæ quidem stipendium est, sed tibi gratia est, cui gratia est et ipsa justitia. Tibi enim tanquam debita redderetur, si ex te tibi esset justitia cui deberetur. Nunc vero de plenitudine ejus accepimus non solum gratiam (Joan. i), quia nunc juste in laboribus usque in finem vivamus, sed etiam gratiam pro hac gratia, ut in requie postea sine fine vivamus. Gratia enim nisi gratis esset, gratia non esset. Et ideo intelligendum, ut diximus, etiam ipsa hominis bona merita, esse Dei munera. Quibus cum vita æterna redditur, gratia pro gratia redditur.

CAPUT VII.

« An ignoratis, fratres (scientibus enim legem loquor), quia lex in homine dominatur, quanto tempore vivit? Nam quæ sub viro est mulier, vivente viro alligata est legi (I Cor. vii). Si autem mortuus fuerit vir ejus, soluta est a lege viri. Igitur vivente viro vocabitur adultera, si fuerit cum alio viro. Si autem mortuus fuerit vir ejus, liberata est a lege viri, ut non sit adultera, si fuerit cum alio viro. Itaque, fratres mei, et vos mortificati estis legi, per corpus Christi, ut sitis alterius qui ex mortuis resurrexit, ut fructificaremus a Deo. »

Dicerent Judæi : Cur dicis in Christo Jesu vitam æternam esse, et non potius in legis observantia?

Et Apostolus : Quia jam finem habet, et non dat vitam, sed auget peccatum. Hactenus enim de vi gratiæ locutus est, et nunc incipit difficultatem legis ostendere, et quod ultra non sit tenenda, ut illos hortetur sine timore sub gratia vivere. Ne enim mirarentur quod dixerat, non estis sub lege, sed sub gratia, inchoat per rationes demonstrare, legem esse finitam, et prius etiam non justificasse subditos, sed magis peccatores constituisse. Nam usque ad Christum fuit data, et ideo post acceptionem gratiæ non est tenenda. Quod in his sententiis ostenditur : *An ignoratis, fratres, etc.* Ordo est : *An ignoratis hoc quod lex in homine dominatur, ut ei obediat quanto tempore vivit, id est quandiu statum habet ipsa lex.* Quod non debetis ignorare, quia legem scitis, et *ego loquor scientibus legem, in qua quod dico, manifestatur.* Scientes legem, intelligamus Hebræos, quos secundum legem, de legis fine instruit Apostolus. Vel etiam gentiles Romani sciebant legem, quia non erant barbari, sed naturalem justitiam comprehenderant partim ex Græcis, sicut Græci ex Hebræis. Lex in homine dominatur, quanto tempore ipsa lex vivit, et ideo cum mortua fuerit, non dominabitur illi amplius, sed liberum dimittet. Docet autem Dominus eam esse jam mortuam, id est cessasse juxta carnalem intelligentiam vel observantiam, dicens : « Lex et prophetæ usque ad Joannem, ex eo regnum Dei evangelizatur » (*Matth. xi.*) Quod bene præfiguratum est, quando mortuus est Moyses, et Jesus suscepit principatum populi Israel. Moyses enim legem designavit, et Jesus Dominum Christum, atque gratiam evangelicam. Mortuo igitur Moysæ, successit Jesus in principatum, quoniam mortua lege secundum carnales observantias, succedit evangelica gratia. Et hoc est quod Apostolus dixerat : Non estis sub lege, sed sub gratia, id est non estis sub Moysæ, sed sub Jesu, quia Moyses mortuus est, et Jesus imperat. Justum ergo fuit, ut Moyses (id est, lex) dominaretur in quolibet homine subjecto quandiu viveret, et post mortem suam dominium amitteret, quatenus quicumque tempore legis serviliter cogebantur eam facere, post liberatoris adventum possent liberi ad evangelicam libertatem venire. Quod Apostolus per simile probat. *Nam mulier quæ est sub viro, vivente viro, alligata est legi viri, ut non possit ab eo discedere. Sed si vir ejus fuerit mortuus, soluta est a lege viri.* Sic etiam quandiu lex statum habuit, debet servari ; sed si lex statum amittit, solvitur homo ab ea. Et quia, vivente viro, alligata est legi, igitur vivente viro vocabitur adultera, si fuerit cum alio viro. Sic finita et sublata lege, liberatus est homo per gratiam, ut non prævaricaretur, si ad Christum transierit, dimissis figuris. Hoc enim exemplo docet Apostolus, Christianum a lege factorum exutum, non ab omni lege, sicut mulier a lege viri exuitur, non a lege naturæ, nec ultra debere esse sub lege. Si enim lex ei vivit, adulter est, nec prodest Christianum dici. Nam si legem servat, adulter est in fide, et in lege, nec

prodest ei Christus. Hæc etiam similitudo tota debet intelligi mystica, ut vir sit Moyses, hoc est, lex ; mulier, anima vel plebs. Nam mulier quæ est sub viro, id est plebs vel anima Judaica, quæ est sub Moysæ, vivente viro, id est vivente Moysæ, hoc est statum habente lege, alligata est legi, ut non possit recedere ab ejus carnali observatione. Si autem mortuus fuerit vir ejus, id est Moyses, quemadmodum supra docuimus, soluta est mulier a lege viri, id est plebs Hebræorum a jugo legis, ut non impediatur Christo copulari. Et quia nunc solummodo solvitur, igitur, vivente viro, id est vivente Moysæ, durante legis actu, vocabitur adultera, si fuerit cum alio viro, id est crimen incurrit adulterii, si carnalem legis observantiam deserens, solam spiritalem Christi doctrinam tenere voluerit. Non enim deserenda fuit suo tempore illa carnalis observatio legis, sicut et nunc non est assumenda. Sed si mortuus fuerit vir ejus Moyses, id est si lex, actu cessante, dormierit, liberata est ipsa plebs Hebræorum a lege viri, id est a contritione Mosaicæ institutionis, ut non sit adultera, sed casta, si fuerit cum alio viro, id est cum Christo, ut illi soli complexibus amoris inhæreat, et solam spiritalem doctrinam custodiat. Deinde Apostolus adaptat similitudinem. Quando quidem, inquit, vivente viro, alligata est mulier, et eo mortuo, soluta est, juxta sensum qui tractatus est, *itaque et vos, o fratres mei!* quemadmodum nos apostoli, mortificati estis legi, ut ulterius non vivatis in ea. Debuisset dicere, mortificati estis legi, sed hoc inter Judæos dicere, adhuc intractabile videbatur, et ideo magis intelligendum reliquit. Et idem valet quod dixit : Lex enim mortua est, quando carnalis ejus actio penitus cessat. Et ille legi mortuus est, qui ab hujusmodi actione cessavit. Caute ergo locutus est Apostolus, ne Judæos offenderet, eligens potius dicere, mortificati estis legi, quam mortificata est lex vobis, cum utrumque idem significet. Nihil, inquit, legi debetis, quæ data est usque ad Christum sed mortificati estis illi per corpus Christi, id est per hoc quod Christus carnem assumpsit. Ex quo enim ille corpus induit, lex mori cœpit in actione fidelium, quia lex et prophetæ usque ad Joannem, sicut ipse loquitur (*ibid.*). Dimissis ergo per novitatem gratiæ peccatis, cessante in vobis actione legis, mortificati estis legi per corpus Christi, id est per mysterium incarnationis ejus. Vel mortificati estis legi, id est figurativis umbris, per Corpus christi, id est per completionem solidæ veritatis, quæ est in Christo. Quantum enim distat inter umbram et corpus, tantum inter illa quæ fiebant in Veteri Testamento et ea quæ sunt in Novo. Et ideo per corpus Christi mortuus est legi, quia per veritatem evangelicam cessavit ab umbratili actione legis. Mortificati estis legi, id est soluti a lege, mortuo vobis Moysæ, ut sitis sponsa alterius viri, cujus non pudet esse, quia surrexit ex mortuis, et superata morte in æternum vivit. Vel merito debetis ejus esse, quia vos

anguine suo redemit, et, calcata morte, surrexit, ut vos possideat, quos moriendo acquisivit. Ideo surrexit, ut et nos a mortis animæ faceret resurgere ut fructificemus, id est fructum boni operis faceremus Deo, qui antea fructificabamus morti.

« Cum enim essemus in carne, passiones peccatorum, quæ per legem erant, operabantur in membris nostris, ut fructificarent morti. Nunc autem soluti sumus a lege mortis, in qua detinebamur, ita ut serviamus in novitate spiritus, et non in vetustate litteræ. »

Vere nunc debemus fructificare Deo, cum simus lege mortificati, quoniam prius fructificavimus morti. *Nam cum essemus in carne, quæ carnis sunt operantes, quod est sub lege esse, passiones peccatorum quæ per legem erant, operabantur in membris nostris.* Cum essemus in carne, inquit, id est carnalibus desideris stricti teneremur. Cum essemus in carne, id est præsumeremus de carne. Non enim qui loquebatur Apostolus, jam exierat de ista carne, aut eis loquebatur, qui jam exierant de ista carne, sed adhuc et qui loquebatur, et quibus loquebatur, in carne erant. Quid est ergo, cum essemus in carne, nisi cum de carne præsumeremus, hoc est, de nobis confideremus? De homine enim dictum est: « Videbit omnis caro salutare Dei (*Luc. III*). » id est omnis homo. Ergo cum essemus in carne, id est in concupiscentiis carnalibus versaremur, et ibi totam spem nostram tanquam in nobis poneremus, passiones peccatorum, id est incentiva vitiorum, quæ per legem erant, quia per legem accesserant (ubi enim non erat gratia liberatoris, augebat peccandi desiderium prohibitio peccatorum), illæ passiones operabantur in membris nostris, id est ducebant membra nostra ad mala opera. Et hoc ideo, quia eramus in carne. Passiones enim illæ peccatorum, id est vehementes concupiscentiæ, dictæ passiones, quia intrinsecus mentem affligunt, idcirco nos vicerunt, quia in malo loco nos invenerunt, hoc est in carne. Migrandum est ergo a carne, etiam dum adhuc vivimus in carne, ut non simus in carne, sed in spiritu, id est non in nobis, sed in Deo spem ponamus; nec in carnalibus, sed in spiritualibus delectemur. Nam qui in carne est, id est qui in se remanet, nec se transcendit ut ad Deum cor sublevet, non habet Deum adiutorem, et idcirco superatur, et sit non adimpletor legis, sed prævaricator. Et ita passiones peccatorum, id est concupiscentiæ vehementes et immoderata desideria operantur in membris eorum qui in carne sunt, id est ducunt ad effectum operis mala quæ cupiunt, dum manus agunt mala, os loquitur mendacium, oculi vident illicita, aures delectantur audire prava. Quæ passiones sunt per legem, quoniam ipsa legis prohibitio fuit causa, ut ille appetitus carnis adeo vehemens esset. Minor enim erat concupiscentia, quando ante legem securus homo peccabat. Multo autem major facta est quando legem Dei cœpit transgredi. Et hæc, sicut dictum est, passiones operabantur in membris nostris, ut

fructificarent morti, id est ut facerent opera digna morte æterna. Fructus enim peccati, mors est. Et si damnandus erat peccator, quam spem habet prævaricator? Tunc quidem sub lege positi fructificabamus morti. Sed nunc cum simus mortificati legi per corpus Christi, soluti sumus per libertatem novæ gratiæ a lege. Quæ dicitur lex mortis, quia per medium, id est per peccatum fuit causa mortis, dum peccantes non ad pœnitentiam expectaret, sed mox interficere iuberet. Ideo etiam lex mortis, quia stipendium peccati, mors; aculeus vero mortis, peccatum; virtus autem peccati lex. Peccando enim ad mortem animæ labimur, et vehementius peccamus, lege prohibente, quam si nulla lege prohiberemur. Sed jam, remissis peccatis, *soluti sumus ab hac lege in qua detinebamur*, id est vi quadam necessitatis carnalia ejus mandata servare cogebamur, nec ad spiritalem libertatem assurgere permittebamur, quia nunquam solvi, nisi per gratiam Christi poteramus. Soluti, inquam, sumus, *ita ut serviamus Deo in novitate spiritus, et non in vetustate litteræ*, id est spiritualis gratiæ præceptis obediamus, non litteram legis sequentes, quæ jam seniuit, ut mori, id est cessare debeat. Quod enim antiquatur et se nescit, prope interitum est. Et lex quid aliud est, quam sola littera eis qui eam legere non poterunt, et implere non possunt? Non enim ignoratur ab eis, quibus conscripta est. Sed quoniam in tantum nota est, in quantum scripta legitur, non in quantum dilecta perficitur, nihil est aliud talibus nisi littera. Quæ littera non est adiutrix legentium, sed testis peccantium. Ab ejus ergo damnatione liberantur, qui per Spiritum sanctum innovantur, ut jam non sint obligati litteræ ad pœnam, sed intellectui per justitiam copulati. Itaque serviamus in novitate spiritus, id est in novitate, quam dat Spiritus sanctus infundendo charitatem, et innovando interiori hominem. Et sic in hac novitate serviamus, ut nihil addamus de legis operibus, quæ vetusta sunt, et sepulturæ magis tradenda,

« Quid ergo dicemus? Lex peccatum est? Absit! sed peccatum non cognovi, nisi per legem. Nam concupiscentiam nesciebam, nisi lex diceret: Non concupisceas (*Exod. xx; Deut. v*). Occasione autem accepta, peccatum per mandatū operatum est in me omnem concupiscentiam. »

Videbatur Apostolus per supradicta verba legem culpasse, et ideo sentiens contra obscuritatem dictorum suorum cogitationes hominum commoveri, prior ipse voluit dicere et removere, quod sibi aliquis poterat objicere: Quia dixi, inquit, passiones peccatorum esse per legem, quia dixi, soluti sumus a lege mortis, in qua detinebamur, quia dixi, serviamus in novitate spiritus, et non in vetustate litteræ, ergo quid dicemus ex his verbis meis? Dicemus ex his esse consequens quia *lex peccatum est? Absit* ut hoc dicamus, absit ut lex sit peccatum! Non est peccatum lex, quia non est mala, sed bona quantum ad se. Et quamvis bona, non tamen sufficiens ad

salutem sine gratia. Quod nunc Apostolus ingreditur ostendere, et loquitur voce humani generis: Lex, inquit, non est peccatum, sed index peccati, quia peccatum non cognovi nisi per legem. Quare intelligimus legem ad hoc datam esse, non ut peccatum insereretur, neque ut extirparetur, sed tantum ut demonstraretur, quatenus animam humanam quasi de innocentia securam, ipsa demonstratione peccati ream faceret, ut quia peccatum sine gratia vinci non posset, ipsa reatus sollicitudine ad percipiendam gratiam converteretur. Idcirco non ait. peccatum non feci nisi per legem, sed: peccatum non cognovi nisi per legem. Unde apparet, per legem peccatum non insitum, sed demonstratum esse. Et quomodo medicina non est causa mortis, si ostendat venena mortifera, licet his mali homines abutantur ad mortem, et vel se interficiant, vel insidiantur inimicis: sic lex data est, ut peccatorum venena monstraret, et hominem male libertate sua abutentem, qui prius ferebatur improvidus, et per præcipitia labebatur, freno legis retineret, et compositis doceret incedere gressibus. Lex docuit hominem quid esset peccatum, quia prius nesciebantur quædam vel esse peccata, vel adeo gravia, vel esse punienda. Vere peccatum non cognovi, nisi per legem. *Nam concupiscentiam esse peccatum nesciebam, nisi lex diceret: Non concupisces.* Hoc ideo elegit Apostolus generale quiddam, quo cuncta complexus est, tanquam hæc esset vox legis, ab omni peccato prohibentis, quod ait: *Non concupisces.* Neque enim peccatum ullum, nisi concupiscendo committitur. Non ait: concupiscentiam non habebam, sed: nesciebam eam esse peccatum. Habebam quidem eam, sed tanquam naturale bonum esse credebam. Postquam autem lex dixit: *Non concupisces*, cognovi non naturale bonum, sed per peccatum accidens esse malum concupiscentiam. Per hæc et sequentia Apostolus in se solo generalem agit causam, et sub persona sua fragilitatem describit conditionis humanæ. Nesciebam, inquit, concupiscentiam esse malum, donec audivi eam prohiberi in lege. Sed peccatum, id est fomes peccati, accepta occasione stimulandi, per mandatum legis operatum est in me omnem concupiscentiam. Peccati enim nomine, vel fomes peccati nunc intelligitur, vel diabolus auctor peccati. Et talis est nostra carnalitas, ut ardentius desideret prohibita, quibus non memoratis, jaceret quasi sopita. Sed et diabolus videns legem in auxilium hominibus datam, magis exarsit. et magis institit, ut eam illis verteret in perniciem, cum prius quasi secure possidens, eos minus tentaret. Et sic occasione per mandatum accepta, fecit in me omnem concupiscentiam. Minor enim concupiscentia erat, quando ante legem securus peccabam. Minor erat, quando meam movebat libidinem. Omnis est, quando transcendit legem. Cum ergo putarem, quod propriis viribus, jubente lege, possem concupiscentiam libidinis vincere, majoribus urgebar ejus stimulis, et confirmante me, ejus cupiditas augebatur. Nam ubi

A Spiritus sanctus non adjuvat, inspirans pro concupiscentia mala concupiscentiam bonam, id est diffundens in cordibus charitatem, profecto lex quamvis bona, auget prohibendo desiderium malum; sicut aquæ impetus, si in eam partem non cesset influere, vehementior fit obice opposito, cujus molem cum evicerit, majore cumulo præcipitatus, vehementius per prona provolvitur. Similiter namque et fluvius concupiscentiæ, oppositis sibi legis obicibus, frenatus est, non siccatus: ac postmodum ruptis eisdem obicibus, vehementior exivit. Nescio enim quomodo hoc ipsum, quod concupiscitur, fit jucundius dum vetatur. Recte itaque dicitur, quia peccatum, occasione stimulandi accepta, per mandatum legis operatum est in me omnem concupiscentiam, quia ubi non est gratia Liberatoris, auget peccandi desiderium prohibitio peccatorum; et lex dum concupiscentiam prohibet, quodammodo eam inflamat.

« Sine lege enim peccatum mortuum erat. Ego autem vivebam sine lege aliquando. Sed cum venisset mandatum, peccatum revixit, ego autem mortuus sum, et inventum est mihi mandatum quod erat ad vitam hoc esse ad mortem. Nam peccatum, occasione accepta, per mandatum secum duxit me, et per illud occidit. »

Vere per legem cognovi peccatum. Nam sine lege erat peccatum mortuum, id est latebat, non apparebat, et omnino tanquam sepultum ignorabatur. Vel ita: Juro dixi, per mandatum. Nam quando lex non erat, peccatum mortuum, id est debile et quasi sopitum erat, dum prohibitione legis non iucitaretur. Peccatum quidem erat mortuum ante legem. Sed ego vivebam sine lege aliquando, id est prius quam data esset lex. Vivebam sine lege, id est nulla ex peccato morte terrebar, quia non apparebat, cum lex non esset. Patet quia non ex persona sua proprie, sed generaliter ex persona hominis loquitur Apostolus. Vivebam, id est vivere me arbitrabar, quia nesciebam animam meam per peccatum esse mortuam, dum me sine peccato esse putarem. Sed cum venisset mandatum, id est cum data esset lex, illico peccatum revixit, id est apparuit, sentire cepit, rebellare adversum me cepit. Revixit peccatum, quia aliquando vixerat. Non enim potest reviviscere, nisi quod vixit aliquando; vixerat enim aliquando peccatum in paradiso quando contra datum præceptum satis apparebat admissum. Cum autem a nascentibus trahitur, tanquam mortuum sit latet, ne repugnans justitiæ malum ejus prohibitione sentiatur. Cum enim aliud jubetur atque probatur, et aliud delectat atque damnatur, tunc peccatum quodammodo in notitia nati hominis reviviscit, quod in notitia primi facti hominis aliquando jam vixerat. Sic igitur, adveniente mandato legis, revixit peccatum, quod mortuum fuerat, id est occultatum, cum mortales nati sine mandato legis homines viverent, sequentes concupiscentias suas sine ulla cohibitione. Peccatum quidem revixit, sed ego

mortuus sum, id est mortuum me esse cognovi manifestatione peccati. Quia jam etiam prævaricatione peccat, qui videt per legem quid facere non debeat, et tamen facit. Mortuus sum in anima, quia prævaricator factus sum, et inde me mortuum esse perspexi. Vel ideo vidi me mortuum, quia reatus prævaricationis certum mortis supplicium comminabatur. *Et inventum est mihi mandatum quod erat datum ad vitam consequendam, hoc esse ad mortem incurrendam.* Quod enim, si custodiretur, proficiebat ad vitam, hoc neglectum perduxit ad mortem. Mandato enim si obediatur, utique vita est. Sed inventum est esse ad mortem, dum fit contra mandatum, ut non solum peccatum fiat, quod etiam ante mandatum fiebat, sed hoc abundantius et periculosius, ut jam a sciente et prævaricante peccetur. Inventum est mihi, id est non Deus ad mortem dedit mandatum, sed visum est mihi tanquam mortiferum, eo quod illud virtute propria implere non possem, cum ego non mandati vitio, sed stimulo concupiscentiæ, morte percussus, morerer. Stimulus enim mortis peccatum est. Idem igitur mandatum quod erat datum ad vitam intentione dantis, quia bonum erat obedienti, inventum est, id est probatum, mihi peccanti esse ad mortem. Et vere ad mortem. *Nam peccatum, id est fomes et delectatio peccati, occasione accepta per mandatum, quod erat contra se, seduxit me* falsa dulcedine, id est seorsum a bono duxit, et in malum traxit, *et per illud occidit*, id est per mandati transgressionem ad æternam damnationem perduxit. Gladio enim quem portabam, id est mandato legis, occidit me inimicus, quia præsumebam de viribus meis, et ideo sum victus. Seduxit enim me peccatum, occasione accepta per mandatum, sive quia suasio delectationis ad peccandum vehementior est, cum adest prohibitio, sive quia, etiam si quid homo fecerit secundum jussa legis, si adhuc non sit fides quæ in gratia est, vult sibi tribuere, non Deo, superbiendo plus peccat. Peccatum itaque non legitime utens lege, ex prohibitione aucto desiderio, dulcius factum est, et ideo seduxit vel fefellit. Fallax enim dulcedo est, quam plures atque majores poenarum amaritudines sequuntur. Quia ergo ab hominibus nondum spiritalem gratiam consequentibus suavius admittitur quod vetatur, fallit peccatum falsa dulcedine; quia vero accedit etiam reatus prævaricationis, occidit. Hæc diximus, legem quæ per Moysen data est, intelligentes. Est autem et naturalis lex, quæ in corde scripta omnes continet nationes; et nullus hominum est, nisi qui adhuc expertus est rationis, qui hanc nesciat legem. Unde et omnis mundus sub peccato, et universi homines prævaricatores legis sunt. Et idcirco justum judicium Dei est scribentis in corde humani generis: « Quod tibi fieri nolueris, alteri ne feceris (*Tob. iv, Matth. vii*). » Quis enim ignoret homicidium, adulterium, furtum et omnem concupiscentiam esse malum, ex eo quod sibi nolit fieri? Si enim mala esse nesciret, nunquam sibi doleret illata. Hanc legem nescit pueritia,

A ignorat infantia; et peccans absque mandato, non tenetur lege peccati. Maledicit patri et parentes verberat, et quia necdum accepit legem sapientiæ, mortuum est in eo peccatum. Cum autem mandatum venerit, hoc est, tempus intelligentiæ appetentis bona et vitantis mala, tunc incipit ei peccatum reviviscere, et ille mori reusque esse peccati. Atque ita fit ut tempus intelligentiæ, quo Dei mandata cognoscimus ut perveniamus ad vitam, operetur in nobis mortem, si agamus negligentius, et occasio sapientiæ seducat nos atque supplantet, et ducat ad mortem. Non quod intelligentia peccatum sit, lex enim intelligentiæ sancta et justa et bona est, sed per intelligentiam peccatorum atque virtutum mihi peccatum nascitur, quod priusquam intelligerem peccatum esse non noveram. Atque ita factum est, ut quod mihi pro bono datum est, meo vitio mutetur in malum.

« Itaque lex sancta quidem, et mandatum sanctum et justum et bonum (*I Tim. i*). Quod ergo bonum est, mihi factum est mors? Absit! Sed peccatum ut appareat peccatum, per bonum mihi operatum est mortem, ut fiat supra modum peccans peccatum per mandatum. »

Quandoquidem lex dicit: « Non concupisces (*Exod. xx*), » et mandatum legis datum est ad vitam, itaque lex quidem est sancta, id est sine vitio, quoniam prohibenda prohibet, et mandatum, id est quidquid a me est jussum fieri, est sanctum, id est non reprehensibile, et justum, id est æquum, quia nil præter æquitatem mandat faciendum dum dicit: « Oculum pro oculo, pedem pro pede, dentem pro dente exiges, » et similia. Hoc enim valde justum est, et bonum (*Exod. xxi*) est mandatum, id est utile et fructuosum. Lex ipsa est sancta, id est pura a sorde omnis vitii, quia nihil iniquationis in se habet, sed absque vitio docet, dum dicit: « Non concupisces, Non mœchaberis (*Deut. v*), » et similia, quamvis per eam pravi homines magis inflammentur ad concupiscendum et mœchandum. Et mandatum, id est hoc quod per eam præcipitur, est sanctum in se et justum, id est justificans peccatorem; et bonum, id est utile, vitam acquirens. Lex enim in hoc loco dicitur secundum quod prohibet malum velut cum dicit: « Non concupisces, Non furaberis, Non falsum testimonium dices; » mandatum autem secundum quod præcipit facere bona, sicut est: « Honora patrem et matrem, et: Diliges proximum tuum sicut teipsum. » Et notandum, quam patenter ab Apostolo nunc lex laudatur. Paulo ante verbo illo quo dixerat: Absit! defenderat eam a crimine, nondum laudaverat. Aliud est enim a crimine objecto defendere, aliud est debito præconio prædicare. Crimen objectum fuit; Quid ergo dicemus? lex peccatum est? Defensio, Absit! Modo autem itaque lex quidem, etc. Lex quidem sancta est, sed illi non sunt sancti qui male utuntur lege. Nam in male utente vitium est, non in mandato ipso quod bonum est. Quoniam lex bona est, si quis ea legitime utatur.

tur. Male autem utitur lege, qui non se subdit Deo pia humilitate, ut per gratiam lex possit impleri. Neque enim lex jubet delictum, ut, illa subintraente, abundaret delictum, sed superbos etiam adjectores prævaricationis effecit, ut eo modo humiliati discederent ad gratiam pertinere per fidem, ut jam non essent legi subditi per reatum, sed sociati per justitiam. Lex quidem sancta est, et mandatum bonum. Et cum hoc constet quod ipsa sancta sit, et mandatum ejus bonum, et tamen idem mandatum quod erat ad vitam, inventum sit mihi esse ad mortem, ergo mandatum quod bonum est, factum est mihi mors? Id est nunquid mandatum bonum, quod contra mortis opera datum est, in mortem mihi est commutatum? Absit! Ego videlicet quod morior, non mandati boni vitio morior, sed mandatum bonum vitio meo transgressus sum, et ita mortem merui. Non mihi mandatum per se causa mortis existit, sed ego mihi feci qui peccando morte digna commisi. Non mandatum est mihi efficiens causa mortis, sed peccatum, id est fomes peccati, qui bonam rem vertit in malum, est efficiens causa mortis. Nam peccatum, id est fomes peccati, et incentiva vitiorum, ac delectatio mala, vel diabolus auctor peccati, operatum est mihi mortem, id est fecit me operari opera digna morte, per bonum, id est per transgressionem boni mandati. Ita operatum est mihi mortem animæ, ut ipsum peccatum quod prius latebat in corde meo, appareat foris peccatum esse in manifesto opere. Ita scilicet appareat, ut idem peccatum, id est fomes peccati et concupiscentia, fiat supra modum peccans peccatum, id est plus quam antea per mandatum sine quo nec tantum ardebat, et per quod accrevit prævaricatio. Vel ita intelligendum est: Ut per legem appareat peccatum, quod per ignorantiam latebat; jam enim dixerat: sine lege peccatum mortuum erat, id est latebat et ignorabatur, tanquam in quibusdam ignorantie tenebris sepultum. Modo autem videamus quam vere dicat peccatum ut appareat peccatum. Non enim dicit, ut sit, quia erat et quando non apparebat peccatum. Quid est, ut appareat peccatum? Quia concupiscentiam nesciebam, nisi lex diceret: « Non concupisces, » non ait concupiscentiam non habebam; sed concupiscentiam nesciebam. Sic etiam hic non ait, ut sit peccatum; sed, ut appareat peccatum, per bonum operatum est mihi mortem. Quam mortem? Ut fiat supra modum peccans peccatum per mandatum. Supra modum, quia accessit et prævaricatio. Quando enim delinquebam sine mandato, minus erat. Quando autem delinquo per mandatum, excedo modum. Lex enim modificaverat omnia, sed ego modum legis transgredior instinctu concupiscentiæ impulsus. Vel supra modum, quia valde immoderatus crevit peccatum per legem, dum per ejus prohibitionem magis inflammaretur, et eam scienter transgrediretur. Quod quidem ad hoc utile fuit, ut sentiret anima seipsam, non sufficere ad extrahendum se de servitute peccati, atque hoc modo

A de tumescente et extincta omni superbia, subderetur Liberatori suo, et auxilium gratiæ ejus imploraret.

« Scimus enim quod lex spiritalis est, ego autem carnalis sum, venundatus sub peccato. Quia enim operor, non intelligo. Non enim quod volo bonum, hoc ago; sed quod odi malum, illud facio. »

Superius dixi, quia lex est sancta. Et vere est sancta, quia scimus quod ipsa est spiritalis, id est a sancto Spiritu data, et mandans spiritalia, atque spiritum hominis alens et instruens de divinis et cœlestibus. Sed ego sum carnalis, id est carni consentio, et venundatus sum peccato, id est peccans pretio temporalium voluptatum. Dulcedo enim mortiferæ voluptatis, pretium est quo se vendit unusquisque diabolo, ponens se sub peccato, id est faciens se servum peccati. Vere animam meam diabolo vendidi, accipiens pretium voluptatis et subdens me peccato. Nam quod operor non intelligo, quia aliud video me agere, et aliud per legem scire. Quod operor non intelligo, id est non agnosco in præceptis veritatis, ubi est vera scientia. Secundum hanc locutionem dicit Dominus peccatoribus: « Non novi vos (Matth. vii). » Non enim eum aliquid latet. Sed quia peccata non inveniuntur in regulis præceptorum quas habet Veritas, ideo ipsa Veritas peccatoribus dicit: « Non novi vos. » Sicut enim tenebræ oculis non videndo, sic peccata mente ignorando sentiuntur. Vere non intelligo in lege faciendum esse, quod facio. Quia bonum quod secundum rationem volo, non hoc ago, sed malum quod odi secundum rationis judicium, illud ago secundum carnis appetitum. Nam ratio quidem naturaliter vult bonum, sed hæc voluntas semper caret affectu, nisi per gratiam fuerit adjuta. Et hæc quidem verba hoc modo conveniunt homini carnali et sub legeposito, sed melius intelliguntur esse etiam spiritalis hominis, jamque sub gratia constituti, vel ipsius Apostoli. Scimus, inquit, quod lex spiritalis est, id est spiritalia jubet. Hucusque legem excusaverat, quod non debet refundi in eam culpa. Hic ostendere incipit quod nec in principalem naturam debet refundi, et ita non in Creatorem, sed in homines qui ex se vitiati sunt, ut pravis nequeant motibus resistere. Lex spiritalis est, sed ego carnalis sum, id est carnale corpus adhuc gero, in quo et carnales motus sentio. Quandiu enim hic vivitur, sic est. Ita ergo, dixit Apostolus, ego autem carnalis sum, ideo quia nondum spiritale corpus habebat, sicut posset dicere, ego autem mortalis sum, quod utique non nisi secundum corpus intelligeretur dixisse, quod nondum fuerat immortalitate vestitum. Item quod adjunxit, venundatus sub peccato, ne quisquam eum nondum redemptum Christi sanguine existimet, hoc etiam secundum illud potest intelligi, quod ait: Et ipsi in nobismetipsis ingemiscimus adoptionem filiorum, exspectantes redemptionem corporis nostri. Si enim secundum hoc se dicit venundatum sub peccato,

quod adhuc non est redemptum a corruptione corpus ejus, vel venundatum aliquando in prima transgressione præcepti, ut haberet corpus corruptibile quod aggravat animam, quid prohibet hic Apostolum de se hoc dicere, quod ita dicit, ut etiam in ipso possit intelligi, etiamsi in sua persona non se solum, sed omnes accipi velit, qui se non verunt spirituali dilectione cum carnis affectione sine consensione configere? (*Sap. ix.*) Venundatus, inquit, sum: quia quod operor non affectu consentiendi et implendi, sed ipso motu concupiscendi, non intelligo in regulis præceptorum cælestium. Vel non intelligo, id est non approbo. Et vere non intelligo quod operor. Nam bonum quod volo, hoc non ago; sed malum quod odi, illud facio. Non hoc sic intelligamus tanquam vellet Apostolus esse castus, et esset adulter; aut vellet esse misericors, et esset crudelis; aut vellet esse pius, et esset impius. Sed ad quid? Volo non concupiscere et concupisco. Et si concupiscentiæ non consentio, et post concupiscentias meas non eo, tamen adhuc concupisco. Et hoc est, quia bonum quod volo, id est non concupiscere, hoc non ago; sed malum quod odi, id est concupiscere, illud facio, id est ex carne concupisco. Quandiu enim caro mortalis est, non potest a concupiscentiis penitus esse libera. Minui quidem quotidie possunt concupiscentiæ, sed ex toto non possunt auferri, quandiu hic vivitur. Et ideo non ago bonum quod volo, id est ut non concupiscam; sed facio malum quod odi, id est concupisco, quamvis non cedam, quamvis non consentiam, ut desiderio peccati non obediam.

« Si autem quod nolo, illud facio, consentio legi quoniam bona est. Nunc autem non jam ego operor illud, sed quod habitat in me peccatum. Scio enim quia non habitat in me, hoc est in carne mea, bonum. Nam velle adjacet mihi, perficere autem bonum non invenio. Non enim quod volo bonum, hoc facio, sed quod nolo malum, hoc ago. Si autem quod nolo, illud facio, non ego operor illud, sed quod habitat in me peccatum.

Dixi me non facere quod volo, sed potius quod nolo. Sed si ego illud facio quod nolo, id est si ex carnis infirmitate concupisco quod nollem facere, consentio legi, quia nolo quod non vult. Dum quod nolo ago, id est dum nolo concupiscere et concupisco, consentio legi quoniam bona est, quia et ego ipse nolo quod lex. Quia nolo concupiscere, et lex dicit: « Non concupisces. » In hoc enim quod volo quod et lex vult, absque dubio consentio legi; concupisco tamen, quia non sum sine peccato. Non implet legem infirmitas mea, sed laudat legem voluntas mea. Ergo si quod nolo hoc ago, ideo consentio legi, quia nolo, non quia ago. Ipsum autem quod ago, concupiscere est, non concupiscentiæ consentire. Lex dicit: « Non concupisces (*Exod. xx; Deut. v.*) » et ego nolo concupiscere, sed tamen concupisco, quamvis concupiscentiæ meæ assensum non præbeam, quamvis post illam non eam. Resisto

A enim, avertō mentem, nego arma, teneo membra, et tamen sit in me quod nolo. Quod non vult lex, nolum cum lege; ergo consentio legi. Nunc autem jam non ego operor illud. Nunc jam, id est jam redemptus, qui fui ante sub peccato venundatus, nunc jam sub gratia, quæ liberavit delectationem meæ voluntatis consensione cupiditatis, libera est meus, caro captiva. Non ego operor illud, quia non consentio, sed peccatum quod habitat in me, id est fomes peccati et concupiscentiæ quæ est in carne mea. Quando enim peccatum quod in nobis habitat operatur in nobis, tunc nos id non operamur, cum nequaquam ei voluntas nostra consentit, et tenet etiam corporis membra, ne obediant desideriis ejus. Quid enim operatur peccatum nolentibus nobis, nisi sola illicita desideria? Quibus si voluntatis non adhibetur assensus, movetur quidem, sed nullus ei relaxatur effectus. Operatur ergo peccatum in nobis hæc desideria. Quibus si obedimus, et nos operamur. Si vero non eis obedimus, non nos illud operamur, sed quod in nobis habitat peccatum. Si autem desideria nulla haberemus illicita, nec nos, nec peccatum mali aliquid operaretur in nobis. Motum porro illiciti desiderii (cui non obediendo non id nos operamur) ideo nos agere dicimus, quoniam non est naturæ vigore alienæ, sed languor nostræ naturæ. A quo languore omnimodo salvi erimus, cum et animo et corpore immortales facti fuerimus. Languoris hujus et infirmitatis, unde illicita desideria commoventur, quod peccatum appellat Apostolus, universus reatus sacramento baptismatis est solutus, cum omnibus quæ illi obediētes fecimus, diximus, cogitavimus. Nec nobis deinceps languor iste obsesset, si desideriiis ejus illicitis nullis unquam obedientiam præberemus, si-ve operatione, si-ve locutione, si-ve tacita assentione, donec etiam ipse sanaretur. Cum autem omne aliud peccatum sit voluntarium, ita ut præter voluntatem omnino fieri non possit: hoc solum de quo nunc agitur, etiam præter voluntatem sit eo modo quo exposuimus. Sed ideo peccatum vocatur, quia peccato factum est, et pœna peccati est. Non ego, inquit, operor illud, sed quod habitat in me peccatum. Multum autem fallitur, qui consentiens concupiscentiæ carnis suæ, putat se adhuc posse dicere, non ego operor illud, etiamsi oderit, quia consentit. Nam si concupiscit et consentit et agit, quomodo non ipse illud operatur, etiamsi se operari doleat et vincit graviter ingemiscat? Dixi quia peccatum habitat in me. Quod ideo dixi, quoniam scio quia bonum non habitat in me, hoc est in carne mea. Aliter fortasse acciperetur, quod dixit, in me, et ideo exposuit, addens: Hoc est, in carne mea, ac per hoc apertissime ostendit unde loqueretur. Ac si diceret: Certus sum quod hæc concupiscentia, quæ est conatui meo adversa in corpore meo, non est bonum. Vitium carnis in re bona, non est bonum. Quod cum esse desisterit, caro erit, sed jam vitiosa vel vitiosa non erit. Non dico caro mea non est bona; sed, bonum in carne mea non habitat, quam peccati deprimit

consuetudo, quod vincere nequeo. Vere in carne mea non habitat bonum, nam ideo non possum perficere bonum quod volo. *Nam velle adjacet mihi, id est præsto est mihi bona voluntas sed perficere bonum non invenio, id est tam longe est a me perfectio boni, ut eam invenire non possim. Hoc est perficere bonum, ut ne concupiscat homo. Imperfectum autem bonum est quando concupiscit, etiamsi non concupiscentiæ consentit ad malum. Quia tunc perficitur bonum, quando desideria mala nulla sunt; sicut tunc perficitur malum, quando malis desideriis obeditur. Quando autem sunt quidem, sed non eis obeditur, nec malum perficitur, quia nec eis obeditur, nec bonum, quia sunt; sed fit ex aliqua parte bonum, quia concupiscentiæ malæ non consentitur, et ex aliqua parte remanet malum quia concupiscitur* (210). Ideo Apostolus non dixit, facere bonum non invenio, sed, perficere. Multum enim boni facit, quia facit quod scriptum est: Post concupiscentias tuas non eas (*Eccli. xviii*), sed non perficit, quia non implet quod scriptum item est: « Non concupisces (*Exod. xx; Deut. v*). » Erit autem quandoque perfectio boni, quandoque consumptio mali: Illud summum, hoc erit nullum. Quod si in ista mortalitate sperandum putamus, fallimur. Tunc enim erit, quando mors non erit; et ibi erit, ubi vita æterna erit. Ad hoc igitur dixit lex: « Non concupisces, » ut nos in hoc morbo nosipsos invenientes jecere, medicinam gratiæ quæreremus, atque in eo præcepto sciremus, et quod debeamus in hac mortalitate, proficendo semper in melius conari, et quod possit a nobis ad illam immortalitatem beatissimam, ubi concupiscentia non erit, perveniri. Nisi enim quandoque perficiendum esset ut non concupisceremus, nec malum desiderium ullum haberemus, nunquam fuisset jussum. Quod donec in nobis compleatur, semper nos debemus agnoscere peccatores et in bono imperfecto, atque pugnare adversus peccatum et in bono proficere. Non invenio perfectionem boni, quandiu in hac mortalitate vivo, quia non possum ex toto carere concupiscentia. *Non enim quod volo bonum, hoc ago, etc.* Volo enim non habere concupiscentiam, et tamen habeo. Eadem quæ superius dixerat, repetit inculcans, et tanquam tardissimis ostendit, somno eos excitans. *Non enim facio bonum quod volo, sed ago malum quod nolo.* Quia volo, ut dixi penitus carere concupiscentia, sed non valeo. Et nolo concupiscere, sed tamen concupisco ex carne, non ex mente. Quod nolo, illud facio; *sed si quod nolo, illud facio*, id est si invitus concupisco, *non ego operor illud*, quia mente non consentio, *sed peccatum quod habitat in me, operatur illud*, id est fomes peccati et concupiscentia habitans in carne mea, quæ scilicet concupiscentia et peccati libido vel delectatio, per transgressionem primi parentis ex vitiosa natura mihi transfusa est.

« Invenio igitur legem volenti mihi facere bonum,

« quoniam malum mihi adjacet. Condelector enim legi Dei secundum interiorem hominem, video autem aliam legem in membris meis repugnantem legi mentis meæ, et capti vantem me in legem peccati, quæ est in membris meis. Infelix ego homo! quis me liberabit de corpore mortis hujus? Gratia Dei per Jesum Christum Dominum nostrum. Igitur ego ipse mente servio legi Dei, carne autem legi peccati. »

Quando quidem ego non operor malum, sed volo operari bonum, igitur invenio legem mihi esse bonam, volenti facere quod ipsa jubet, quoniam malum adjacet. Bonam invenio legem. Bona est lex, Unde probo? Quia implere eam volo. Igitur mihi volenti facere bonum invenio legem bonam, id est utilem invenio illam, dum docet quid fieri debeat et quid non. Vere bonum aliquid est lex, quoniam non ei, sed mihi malum adjacet ex concupiscentia, cui tamen non consentio. Malum pravi delectationis adjacet, id est vitium mihi est et mihi incumbit, nec me sinit perficere bonum quod volo. Mihi malum adjacet, id est peccatum quod habitat in carne mea, videlicet carnalis concupiscentia, quæ peccati nomine appellatur, quoniam ex illa oriuntur cuncta peccata. Quidquid enim est peccatorum in dictis, in factis, in cogitationibus, non oriuntur nisi ex mala cupiditate, non oriuntur nisi ex illicita delectatione. Hæc ergo illicita delectatio, cui tamen resisto, malum est quod adjacet mihi, id est carni meæ. Non enim caro mea, aut de alia substantia caro, aut de alio principio caro, aut anima ex Deo, et caro de gente tenebrarum, sed languor repugnat sanitati, quoniam semivivus jacet in via. Vere malum mihi adjacet, quia cum secundum interiorem hominem condelector legi Dei, video tamen aliam legem in membris meis repugnantem legi mentis meæ. Vel ita: Vere consentio legi, et invenio illam esse bonum quiddam et utile, quamvis malum mihi adjacet. Nam *condelector legi Dei*, id est in hoc lex quam Deus dedit, delectatur, et ego delector, quia quidquid ei placet, et mihi simul placet, *secundum interiorem hominem*, id est secundum spiritus et rationis affectum. Condelector quidem ei secundum bonæ voluntatis affectum, sed tamen eam complere non sufficio, quoniam *video*, id est attendo, *aliam*, id est diversam a Dei lege, *legem*, id est pravam suggestionem in membris meis, quæ recte dicta est lex, quoniam legitime factum est ut homo qui noluit obedire Domino suo, non ei serviret caro ipsius. Nam supra hominem Deus est, et infra hominem caro. Et quia homo contempsit superiorem, torquetur ab inferiore. Tunc enim nata est hæc lex, quando in paradiso contempta et transgressa est ab homine prima lex. Ut enim vetitum cibum comedit, protinus illicitum carnis motum sentire cœpit (*Gen. ii*). Video aliam legem, id est peccati pruriginem. in membris meis, ut in auribus ad audiendum

illicita, et in oculis ad concupiscendum. Hujusmodi legem, id est peccati fomitem qui male regit, video in membris meis *repugnantem legi mentis meæ*, id est rationi, quæ est lex naturaliter scripta in corde omnium, *et captivantem me*, id est captivare conantem, hoc est ad consentiendum implendumque cogentem *in lege peccati*, id est carnalem concupiscentiam *quæ est in membris meis*, et ibi movet illicita desideria, tantoque periculosior est, quanto vicinior. Quatuor leges ostendit Apostolus invicem dimicantes, legem Dei et legem mentis, quæ duæ in bono concordant, id est legem Moysi et legem naturæ vel fidei; itemque legem suggestionis et legem peccati, quæ in malo sibi consentiunt. Et in harum legum contrarietate et repugnantia est labor et conflictus omnium militum Christi, dum resistunt, ne pravis legibus consentiant. Possumus etiam istam aliam legem et legem peccati, non duas, sed unam intelligere, id est sarcinam mortalitatis, per quam fit sæpe, ut etiam injuste delectet quod non licet, et quod ait, *captivantem me*, id est captivantem carnem meam in legem peccati, id est in seipsam. Captivantem enim me, dixit, quia et in ipsa carne non est aliena natura, sed nostra. Quam nisi teneret carnalis concupiscentia, quam legem peccati vocat, non utique in ea ullum illicitum desiderium, cui mens obedire non debeat, commoveret. Ex parte enim captivatur, et ex parte jam liber est, nam mens quæ interius habet alias delectationes suas, non consentit, sed repugnat delectationibus carnis. Condelector, inquit, legi Dei, delectat me lex, delectat me quod jubet lex, delectat me ipsa justitia secundum interiorem hominem. Ecce libertas ex parte superiore. Libertas enim delectat. Nam qui adhuc timore facit quod justum est, nondum Deus eum delectat, ideoque servus est. Cum vero non jam timerit poenam, sed amaverit justitiam, in ipso amore et delectatione justitiæ liber erit. Video autem, inquit, aliam legem in membris meis. Hæc est quæ remansit infirmitas. Et ex hac parte sentit homo captivitatem, ubi non est impleta justitia. Nam ubi cum delectatur legi Dei, non captivus, sed legis amicus est. Et ideo libet, quia amicus. Sed nondum tota, nondum pura est, nondumque plena libertas, quia nondum æternitas. Est in me quiddam mortuum, et quiddam vivum. Mors contendit, mens non consentit. Quid inde sperandum est? *Infelix ego homo*. Etsi non in mente, tamen in carne infelix homo. Non enim in mente homo, et in carne non homo; sed in mente homo, et in carne homo. Infelix sum ego homo. Ita qui se infelicem exclamat, lugendo implorat consolatoris auxilium. Nec parvus est ad beatitudinem accessus, cognitio infelicitatis suæ. Infelix ego homo. Et cum per me ab hæc infelicitate non possim liberari, *quis me liberabit*, quis hoc facere poterit, nisi magnus aliquis, ut me liberet *de corpore mortis hujus*, id est de hoc corpore corruptibili, in quo *mors est*? *Hæc est vox militis pugnantis et gemen-*

tis in labore certantinis. Cui gementi et auxilium liberatoris imploranti, respondetur: Gratia Dei te Liberabit a corpore mortis hujus per Jesum Christum Dominum nostrum, quando corpus habebis immortale, ubi nulla concupiscentia remanebit. De corpore enim mortis hujus non omnes liberabuntur, qui finiunt hanc vitam, quoniam aliud est exire de corpore, quod omnes homines dies hujus vitæ novissimus cogit; aliud liberari de corpore mortis hujus, quod non lex, non vires propriæ, sed sola Dei gratia per Jesum Christum sanctis et fidelibus ejus impertit. Liberari enim a corpore mortis hujus, est omni sanato languore concupiscentiæ carnis, non ad poenam corpus recipere, sed ad gloriam. Nam impii utique non liberantur a corpore mortis hujus, quibus eadem corpora redduntur ad æterna tormenta. Tunc enim corpus mortis hujus redit ad impium, nec inde aliquando solvetur. Et tunc non erit ei vita æterna, sed mors æterna, quia poena æterna. Justus autem liberabitur a corpore mortis hujus, non ut hoc corpus non habeat, sed ut mortale et onerosum non habeat. Habebit enim ipsum corpus, sed immortale et leve et sine molestia. In his verbis, ut supra dictum est, recte intelligitur Apostolus, non quidem se solum in sua persona, sed etiam alios sub gratiâ constitutos significasse. Quandoquidem condelector legi Dei secundum interiorem hominem, et video aliam legem in membris meis; *igitur ego ipse mente servio legi Dei*, amando justitiam et resistendo concupiscentiæ, *carne autem servio legi peccati* concupiscendo. Ego ipse hæc facio. Non enim alius in mente, et alius in carne, sed ego ipse in mente, ego in carne, non duo, sed unus ex utroque. Mente servio legi Dei in libertate Christi, carne autem legi peccati ex vetustate Adæ. Novitatis gaudio suspensor, vetustatis onere prægravor. Est mihi bellum adversum me. Sed ex qua parte displiceo mihi, jungor Deo. Et ex qua parte jungor Deo, idoneus ero ad vincendum me, quia ille mecum est, qui omnia superat. Mente servio legi Dei, volendo quod ipsa vult, et nolendo quod non vult; carne aut legi peccati, non quidem dando membra committendis iniquitatibus, sed tantum concupiscendo, quamvis illicitæ concupiscentiæ non deum manus.

CAPUT VIII.

« Nihil ergo nunc damnationis est his, qui sunt
 « in Christo Jesu, qui non secundum carnem ambulat. Lex enim spiritus vitæ in Christo
 « Jesu liberavit me a lege peccati et mortis.
 « Nam quod impossibile erat legi, in quo infirmabatur per carnem, Deus, Filium suum mittens in
 « similitudinem carnis peccati, et de peccato damnavit peccatum in carne, ut justificatio legis impleteretur in nobis, qui non secundum carnem ambulamus, sed secundum spiritum. »

Igitur ego ipse mente servio legi Dei, carne autem legi peccati. Et quidem ego, qui in me significo quemlibet justum sub gratia constitutum, necur-

servio legi; Dei ergo nihil damnationis est nunc, etsi ante fuit, his qui sunt in Christo Jesu, in quo per baptismum soluta sunt illis omnia. Dum non essent in Christo, et consentirent concupiscentiæ, erat illis damnatio. Nunc autem, cum sint in Christo, et repugnent concupiscentiæ, nihil damnationis est illis, quanquam ex carne concupiscant, quia non pugnatore, sed victi damnantur; nec est damnabile si existant desideria carnalia, sed si eis ad peccandum obediatur. Nil damnationis est his qui sunt in Christo. Et ne putares hoc postea futurum, ideo additum est, nunc. Postea illud exspecta, ut nec concupiscentia sit in te contra quam contendas, quia nec ipsa erit. Nihil ergo damnationis est nunc illis, quanquam alia lex in membris eorum adhuc repugnet legi mentis ipsorum. His qui sunt in Christo, non est damnatio, his dico, qui non ambulant secundum carnem, id est qui non operantur secundum carnalem appetitum. Sunt enim nonnulli, qui dicuntur Christiani, et tamen secundum desideria cordis ambulant, ad quorum distinctionem dicitur nunc non esse damnatio illis Christianis, qui non secundum carnem ambulant, id est non carnaliter vivunt. Vere non est damnatio his qui sunt in Christo, nam lex non litteræ in monte Sina, sed spiritus vitæ in Christo Jesu, liberavit me a lege peccati et mortis, per quam legem erat damnatio. Inest adhuc membris meis lex illa peccati, sed jam reum me non facit, quia liberatus sum ab illa, ideoque liber pugno contra illam. Lex Moysi est spiritalis, sed non vitæ, quia non vivificat dimissis peccatis. Lex autem quam Spiritus sanctus ponit, est vitæ, quia vivificat remittendo peccata. Lex Moysi est lex Dei, sed factorum; lex operum, lex quæ jubet, non juvat; lex quæ ostendit peccatum, non tollit. Lex autem spiritus lex est fidei, lex gratiæ, lex misericordiæ, lex quæ tollit peccatum, et liberat a lege membrorum, quæ non est Dei, sed peccati et mortis, quoniam reos facit et mortem operatur. Et hoc est, lex enim spiritus vitæ liberavit me a lege peccati et mortis. Lex illa bona liberavit me ab ista lege mala. Et hoc in Christo Jesu, id est in sanguine et gratia Jesu Christi. Me, id est quemlibet justum sub gratia constitutum liberavit in Christo, ut non consentiam legi peccati et mortis, id est concupiscentiæ. Et quomodo sim liberatus, ac damnationem evaserim, consequenter exponitur: Nam quod impossibile erat legi, Deus in Christo fecit, id est damnare peccatum et dare justitiam. Impossibile erat legi naturali vel scriptæ liberare a lege peccati et mortis, quia nec peccatum tollere, nec mortem vincere prævalebat, nec sibi obedientem aut perfectum quenquam facere poterat. Quod impossibile erat legi, Deus fecit, in quo impossibili infirmabatur ipsa lex per carnem, id est ab infirmis non poterat impleri per carnem, quia per spiritum impletur. Lex enim infirmari intelligitur, eo quod non impletur, non quod ipsa infirma sit, sed quod infirmos faciat, minuendo pœnam, nec adjuvando per

gratiam. Quæ infirmata esse per carnem dicitur, quia caro non implet, quod per spiritum impletur, id est per gratiam spiritualem. Nam caro ubi non erat gratia, invictissime resistebat. Et lex infirmabatur per carnem, id est per carnis desideria et per fomitem vitiorum, qui in carne est, quia caro nimium rebellabat, et audiens legem plus incitabat concupiscentiam. Infirmabatur ergo lex litteræ per carnem, id est non efficiebat justos deditos carni, quoniam caro fortiter obsistebat ne lex adimpleretur, et lex non habebat vires, quibus impetum carnis frangeret. Vel per carnem infirmabatur lex, id est per carnalem intellectum, et per carnalem observantiam erat imbecilla, non per seipsam. Sed quod lex infirma non poterat, Deus fecit, qui Filium suum mittens in similitudinem carnis peccati, etiam peccatum de peccato damnavit in carne. Deus Filium suum, id est sibi proprium et consubstantialem atque coæternum misit, id est incarnari constituit, ut manens quod erat, assumeret quod non erat. Misit eum in similitudinem carnis peccati, non quasi caro non esset, sed in similitudinem carnis peccati, quia caro erat, sed peccati caro non erat. Nostra enim caro est peccati caro, quia per libidinis usum generata est. Sola autem illius caro non fuit caro peccati, quia non eum mater concupiscentia, sed gratia concepit. Tamen similitudo carnis peccati fuit, id est passibilis et mortalis, quæ nutrir et esurire et sitire et dormire et fatigari et mori potuit. Mors enim et infirmitas non est nisi de peccato. Et utique corpus illud mortale erat et infirmum, ut cæterorum corpora. Caro peccati habet mortem et peccatum, similitudo autem carnis peccati habuit mortem sine peccato. Si haberet peccatum, caro esset peccati. Si mortem non haberet, non esset similitudo carnis peccati. Talis venit Salvator. Et de peccato damnavit peccatum in carne, id est suscipiendo carnem hominis peccatoris, et docendo quemadmodum viveremus, peccatum in ipsa carne damnavit, ut æternorum charitate spiritus noster flagrans, non duceretur captivus in consensionem libidinis. Mortem enim non meruit Adam nisi peccando, et Christus carnem suscepit mortalem. Ergo sic dicitur mors peccatum, quæ facta est peccato, sicut dicitur lingua Græca, lingua Latina, non ipsum membrum carnis, sed quod sit per membrum carnis. Lingua enim Græca verba Græca sunt, non quia verba lingua, sed quia verba per linguam. Sic igitur peccatum Domini, quod factum est de peccato, quia inde carnem assumpsit de massa ipsa; quæ mortem meruerat ex peccato. Et ut celerius dicam, Maria ex Adam mortua propter peccatum, nisi divinitus exempta fuisset et caro Domini ex Maria mortua propter delenda peccata. De peccato itaque, id est de morte quæ per peccatum accidit, damnavit peccatum in carne. Vel de peccato, id est de sacrificio pro peccatis oblato. Peccatum enim vocabatur in lege, sacrificium pro peccato. Et tale peccatum fuit caro Domini. De peccato igitur,

Id est de sacrificio quod factus est pro peccatis, inde damnavit peccatum, ut justificatio legis, id est justificatio quam præcepit sive promisit, impleretur in nobis per spiritum qui adjuvat, hoc est lex litteræ impleretur in nobis per spiritum vitæ. In nobis, dico, qui non secundum carnem ambulamus, id est operamur, sed secundum spiritum. Caro de terra facta est, spiritus autem a Deo datus est. Utraque ergo desiderant illud unde sunt, caro terrena, spiritus cœlestia. Si igitur spiritus carnem superaverit, operantur in eo cœlestia. Si autem carni consenserit, prævalent ei terrena. Illi ergo non secundum carnem ambulant, sed secundum spiritum, qui non terrenis et carnalibus, sed cœlestibus et spiritalibus sunt intenti, nec carnaliter observant legem, sed spiritaliter. Quid est enim secundum carnem ambulare? carnalibus concupiscentiis consentire. Et quid est secundum spiritum ambulare? adjuvari spiritu in mente et concupiscentiis carnis non obedire. Sic ergo impletur in nobis per Christum justificatio legis, non adhuc illa quæ dicit: « Non concupisces (Exod. xx), » sed interim illa quæ jubet: « Post concupiscentias tuas non eas (Eccli. xviii). »

« Qui enim secundum carnem sunt, quæ carnis sunt sapiunt. Qui vero secundum spiritum, quæ sunt spiritus sentiunt. Nam prudentia carnis, mors est; prudentia autem spiritus, vita et pax. Quoniam sapientia carnis inimica est Deo. Legi enim Dei non est subjecta, neque enim potest. Qui autem in carne sunt, Deo placere non possunt. »

Vere in illis impletur justificatio, qui non secundum carnem ambulant, sed secundum spiritum. Nam qui secundum carnem sunt, id est qui carni consentiunt, et sequendo appetitum carnis vitam suam ducunt, sapiunt ea quæ sunt carnis, id est sciunt carnalia, et curiosi sunt in carnalibus, atque saporem delectabilem illis habere videntur temporalia et terrena, quæ carnis sunt vel ad carnem pertinent, ideoque tales non justificantur. Sed illi qui sunt secundum spiritum, id est qui sancto Spiritui consentiunt et ei concordant, ut spiritaliter vivant, sentiunt ea quæ sunt spiritus, id est divina et spiritalia bona sentiunt interius, et spiritali dulcedine replentur, ideoque justitia legis per charitatem in illis adimpletur. Vere illi qui sapiunt ea quæ sunt carnis, non justificantur, sed illi potius qui sentiunt ea quæ sunt spiritus. Nam finis rerum hoc indicat, cum sapientia carnis generet mortem, et sapientia spiritus, vitam. Pœna enim vel præmium evidenter declarant: et eos qui moriuntur non fuisse iustificatos, et eos qui vitam adepti sunt implisse justitiam. Nam prudentia carnis mors est æterna; prudentia autem spiritus, vita et pax. Prudentia enim carnis est cor machinationibus tegere, sensum verbis velare, quæ falsa sunt vera ostendere, quæ vera sunt fallacia demonstrare. Hæc nimirum prudentia usu a juvenibus scitur, hæc

A a pueris pretio discitur. Hanc qui sciunt, cæteros despiciendo superbiunt; hanc qui nesciunt, subjecti et timidi in aliis mirantur, quia ab eis hæc eadem duplicitas, æquitatis nomine palliata diligitur, dum mentis perversitas urbanitas vocatur; hæc sibi obsequentibus præcipit honorum culmina quærere, adepta temporalis gloriæ vanitate gaudere, irrogata ab aliis mala multipliciter reddere; cum vires suppetunt, nullis resistentibus cedere; cum virtutis possibilitas deest, quidquid explere per malitiam non valet, hoc impacifica bonitate simulare. Jure ergo talis prudentia mors animæ dicitur. Prudentia vero spiritus, id est justorum sapientia est, nihil per ostensiones fingere, sensum verbis aperire, vera ut sunt diligere, falsa devitare, bona gratis exhibere, mala libentius tolerare quam facere, nullam injuriæ ultionem quærere; pro veritate contumelias pati, lucrum putare. Et hæc prudentia est vita animæ et pax, non solum in futuro sæculo, sed etiam in præsentī. Diffinitio autem prudentiæ, in appetendis bonis et vitandis malis explicari solet. Eadem namque animæ natura, et prudentiam carnis habet cum inferiora sectatur, et prudentiam spiritus cum superiora eligit, sicut aquæ natura et frigore congelascit, et calore solvitur. Per prudentiam carnis propterea Deum Judæi colebant, ut eis secundum carnem bene esset, ideoque secundum animam erant mortui. Per prudentiam autem spiritus justī Deum grātis colunt, id est quia ipse bonus est, non quia dat alia bona, quæ dat et non bonis. Et ideo per hanc spiritalē prudentiam vivunt etiam nunc in anima et pacem habent, concordantes voluntati divinæ, et amantes proximos, nec se vindicantes cum læsi fuerint. Multo magis autem in futuro vitam habebunt æternam, et pacem tranquillitatis perpetuæ. Et econtra, qui carnaliter sunt prudentes, id est qui appetunt temporalia bona, et timent temporalia mala, vel suas astute ulciscuntur injurias, et magis naturalibus credunt rationibus, quam divinis sentiētiis, mortem animæ et corporis æternam patientur. Et vere per talem prudentiam moritur anima et corpus. Quoniam sapientia carnis, id est quæ carnalibus intendit, et carnalia studiose agit, inimica est Deo, quem non sibi finem constituit. « Quicumque enim voluerit amicus esse sæculi hujus, inimicus Dei constituetur (Jac. iv). » Inimica est Deo, dum nil putat, Dominum posse præter quod in naturis rerum videtur: inimica est Deo, quia ejus voluntati non obtemperat. Legi enim Dei non est subjecta. Et facere contra legem, hoc est inimicum Dei esse. Non quia Deo aliquid nocere potest, sed quia sibi ipsi nocet, quisquis resistit voluntati Dei. Quod ergo ait, sapientia carnis inimica est Deo, non sic accipiamus quasi inimica ista possit lædere Deum. Resistendo enim inimica est, non nocendo. Illi autem nocet, in quo est sapientia carnis, quia vitium est. Naturæ nocet in qua inest. Pellatur vitium, et natura sanabitur. Hæc carnalis sapientia non est subiecta legi

Dei, neque enim potest ei esse subjecta. Non dixi, A homo non potest; non dixi: anima non potest; non dixi: caro non potest; sed dixi: quoniam sapientia carnis non potest, id est vitium non potest, non natura; quomodo si dicatur: claudicatio rectæ ambulationi non est subjecta, neque enim potest. Pes potest, sed claudicatio non potest. Tolle claudicationem, et videbis rectam ambulationem. Sed quando claudicatio est, non potest. Non sit sapientia carnis, et homo est. Sic dictum est: *Legi enim Dei non est subjecta, neque enim potest*, tanquam si diceretur: Nix non calefacit, neque enim potest. Quando enim nix est, non calefacit. Sed resolvi potest et fervere, ut calefaciat. Sed cum hoc facit, jam nix non est. Sic et prudentia vel sapientia carnis dicitur, cum anima pro magnis bonis temporalia bona concupiscit. Quando enim appetitus talis animæ inest, legi Dei subjecta esse non potest, id est non potest implere quæ lex jubet. Sed si spiritualia bona desiderare cœperit, et temporalia contemnere, desinet esse carnis prudentia, et spiritus non resistet legi. Sapientia carnis non subjicitur divinæ legi. Nec hoc tantum dico, sed etiam istud, quod illi qui sunt in carne, id est qui voluptatibus carnis acquiescunt, Deo placere non possunt. Ipsi enim in carne sunt, qui in carne confidunt, qui concupiscentias suas sequuntur, qui in his habitant, qui earum voluptatibus oblectantur, qui in earum delectationibus beatam felicemque vitam constituunt. Et ideo quando tales sunt, nihil Deo quod placeat agere possunt.

Vos autem in carne non estis, sed in spiritu, C et si tamen spiritus Dei habitat in vobis. Si quis autem Spiritum Christi non habet, hic non est eius. Si autem Christus in vobis est, corpus quidem mortuum est propter peccatum; spiritus vero vivit propter justificationem. Quod si spiritus ejus qui suscitavit a mortuis Jesum, habitat in vobis, qui suscitavit Jesum Christum a mortuis, vivificabit et mortalia corpora vestra, propter inhabitantem spiritum ejus in vobis.

Illi qui sunt in carne, non possunt Deo placere. Sed vos non estis in carne, et propterea Deo placeatis. In hoc quidem sæculo adhuc vivitis, sed tamen in carne non estis, quia non in voluptate carnis jacetis, sed carnalia desideria supergressi estis. Ne quis enim illud quod præmissum est, quia qui in carne sunt Deo placere non possunt, de his dictum putaret qui de hac vita nondum exierunt, opportunissime subjunxit: *Vos autem non estis in carne*. Utique adhuc in vita hæc constitutis loquebatur, et tamen dixit eos non esse in carne. Romanis quidem scribebat, sed universæ electorum Ecclesiæ dixit: tritico dixit, non palcæ: massæ latentis, non stipulæ apparenti. Non estis in carne quia non facitis opera carnis, consentiendo concupiscentiæ carnis. Sed estis in spiritu, quia secundum interiorum hominem condelectamini legi Dei. Et hoc est, si tamen spiritus Dei habitat in vobis. Nam si spiritu vestro præsumitis, adhuc in carne estis. Sic ergo

non estis in carne, ut in spiritu Dei sitis. Nam si recedit spiritus Dei, pondere suo spiritus hominis revolvitur in carnem. Redit ad facta carnalia, redit ad concupiscentias sæculares. Sic igitur habete liberum arbitrium, ut imploretis auxilium. Non estis in carne. Et hoc viribus vestris? absit. Unde ergo? Si tamen spiritus Dei habitat in vobis, tunc enim in carne non estis, sed spiritum Dei habitatorem habetis. Sed si quis spiritum Christi non habet, hic non est ejus, id est non possidetur a Christo, nec est membrum Christi. Spiritum Dei dixerat, et spiritum Christi subjunxit, quia non sunt duo Spiritus sancti tanquam singulorum, unus Patris et alter Filii, sed unus potius Patris et Filii. Sicut autem anima mea, id est spiritus meus vivificat omnia B membra corporis mei; sic spiritus Christi vivificat omnia membra corporis Christi, id est omnes electos ejus. Si quis autem spiritum Christi non habet, id est si quis non vegetatur spiritu Christi, si quis non vivit spiritu Christi, hic non est membrum Christi, nec possessio Christi, sed diaboli. Caritas vero testis est esse spiritum Christi in eo corde quod ipsa repleverit. Nunquid enim spiritum Christi habet ille, cujus mentem odia dissipant, elatio inflat, ira usque ad divisionem mentis exasperat, avaritia cruciat, luxuria enervat? Non utique. Quia spiritus Christi ubi habitat, facit amicos et inimicos diligere, terrena despici, pro cœlestibus æstuari, carnem propter vitia conteri, mentem a concupiscentiis frenari. Et iste spiritus est quasi quidam titulus divinæ possessionis. Quo quisquis ex toto caret, ad Christum non pertinet. Sed si Christus est in vobis, qui ibidem habitat ubi spiritus ejus est, et non alibi; corpus quidem mortuum est, non propter fragilitatem terrenam, quia de terræ pulvere factum est, sed propter peccatum. Non dico mortale, sed mortuum. Nam antequam immutaretur in illam incorruptionem, quæ in sanctorum resurrectione promittitur, poterat esse mortale, quamvis non moriturum, sicut hoc nostrum potest esse ægrotabile, quamvis non ægrotaturum. Cujus enim caro est quæ non ægrotare possit, si etiam alio casu priusquam ægrotet occumbat? Sic et aliud corpus primi hominis jam erat mortale et antequam peccasset. Quam mortalitatem fuerat assumptura mutatio in æternam incorruptionem, si in homine justitia, id est obedientia permaneret. Sed ipsum mortale non est factum mortuum, nisi propter peccatum, quia mox, ubi præceptum transgressus est homo, ejus membris velut aliqua ægritudo lethalis mors ipsa concepta est. Quam ægritudinem mortis et in nos omnes ipse transfundit, ac per eam necessario moriturus sumus. Corpus ergo nostrum non tantum moriturum est propter animæ abscessum, qui futurus est, sed etiam mortuum est propter infirmitatem carnis et sanguinis. Habet quidem adhuc vitam, sed tamen comparatur ærpori illi, quod in resurrectione futurum est, invenitur mortuum, quamvis adhuc habens vitam. Corpus quidem ita mortuum est ad

huc propter peccatum, sed spiritus jam vivit propter justificationem. Et hæc vita ex fide facta est, quoniam justus ex fide vivit (*Habac. 11; Rom. 1; Hebr. 11*). Anima enim jam pia, quæ fuit impia, propter justitiam fidei dicitur ex morte revixisse atque vivere. Et hoc interim nobis præstitit gratia Salvatoris, ut anima jam per justitiam vivat, sicut per peccatum mortua fuerat. Hoc enim dictum est, ne ideo putarent homines vel nullum vel parvum se habere beneficium de Christi gratia, quia necessario morituri sunt corpore; attendere quippe debent, corpus quidem adhuc peccati meritum gerere, quod conditione mortis obstrictum est, sed jam spiritum cœpisse vivere propter justitiam fidei, qui et ipse fuerat quadam morte infidelitatis exstinctus. Non igitur, inquit, parum vobis muneris putetis esse collatum, per id quod Christus in vobis est, quod in corpore propter peccatum mortuo, jam propter justitiam vester spiritus vivit. Nec ideo de vita quoque ipsius corporis desperetis, sed credite quod si spiritus ejus qui suscitavit Jesum a mortuis habitat in vobis, qui suscitavit Jesum Christum a mortuis, vivificabit et mortalia corpora vestra. Vel ita continuatur: Spiritus quidem vester jam vivit, sed si Spiritus Dei habitat in vobis, corpus quoque vestrum vivet, sicut corpus Christi, quod jam suscitatum est, vivit. Dixerat: Si autem Christus in vobis est; subjecit: Quod si Spiritus pacis habitat in vobis. Quem Spiritum Christi dixerat, hunc Spiritum pacis adjunxit: quia ubi Christus, ibi sine dubio Spiritus sanctus habitat, atque unus est Spiritus Christi et Dei. Quia vero in illa resurrectione futura mutatio non solum nullam mortem, quæ facta est propter peccatum sed nec mortalitatem habitura est, quod corpus animale habuit ante peccatum; nunc ait: Qui suscitavit Jesum Christum a mortuis, vivificabit et mortalia corpora vestra, ut scilicet jam non solum non sint mortua, sed nec mortalia, cum animale resurget in spirituale, et mortale hoc induet immortalitatem, et absorbebitur mortale a vita. Cum enim præsentis temporis gratiam determinans, diceret mortuum esse quidem corpus propter peccatum, quia vero nondum per resurrectionem renovato peccati meritum manet, hoc est necessitas mortis, spiritum ait vivere propter justitiam; quia, licet adhuc corpore mortis hujus oneremur, jam secundum interiorum hominum cœpta renovatione in fidei justitiam respiramus; tamen ne humana ignorantia de resurrectione corporis nihil speraret, etiam ipsum quod propter peccati meritum in præsentis sæculo dixerat mortuum, in futuro propter justitiæ meritum dicit vivificandum, nec sicut tantum ex mortuo vivum fiat, verum etiam ex mortali immortale. Dono enim Dei quod animæ datur, id est Spiritu sancto, non solum anima cui datur, salva et pacata et sancta fit, sed ipsum etiam corpus vivificabitur, eritque in natura sua mundissimum. Vivificabit, inquit, mortalia corpora vestra, non propter merita vestra, sed propter munera sua, id est propter inhabitantem

Spiritum ejus in vobis. His gradibus homine perfecto, nulla substantia invenitur malum. Neque lex mala est, quæ ostendit homini in quibus peccatorum vinculis jacet, ut per fidem implorato Liberatoris auxilio et solvi et erigi et firmissime constitui mereatur. In prima ergo actione quæ est ante legem, nulla pugna est cum voluptatibus hujus sæculi. In secunda quæ sub lege est, pugnamus, sed vincimur. In tertia quæ est sub gratia, pugnamus et vincimus. In quarta quæ est in resurrectione, non pugnamus, sed perfecta et æterna pace requiescimus, quia nihil nobis tunc resistit non resistentibus Deo. Subjungitur enim nobis, quod inferius nostrum est, quod propterea non subjungelatur, quia superiorem nobis deserueramus Deum.

« Ergo, fratres, debitores sumus non carni, ut secundum carnem vivamus. Si enim secundum carnem vixeritis, moriemini. Si autem spiritu facta carnis mortificaveritis, vivetis. »

Dixi qui in carne non estis, sed in spiritu, si tamen Spiritus Dei habitat in vobis, et si Christus est in vobis, et quia Deus vivificabit et mortalia corpora vestra propter inhabitantem Spiritum ejus in vobis.

Ergo, fratres, accepto adjutorio, porrecto nobis desuper divino auxilio, brachio Domini, porrecto nobis auxilio a Spiritu sancto, debitores sumus, id est ex debito servire nos oportet, non carni, sed Spiritui divino, qui in nobis habitat et tanta bona præstat. Debitores, inquam, sumus, sed non carni, ut secundum carnem vivamus, id est secundum carnis voluptates et illecebras vitam ducamus. Hoc enim modo fiet, ut propter inhabitantem Spiritum Dei vivificentur et mortalia corpora vestra, id est ut vita in se mortem mortificando convertat, si non secundum carnem, sed secundum spiritum vivere studueritis.

Promissa est nobis et carnis immortalitas, propter Spiritum Dei, quem habemus in nobis. Ergo, fratres, si hanc immortalitatem adipisci volumus, debitores sumus non carni, ut secundum ejus illecebras vivamus, quia ipsa nos ad mortem trahit, sed potius Spiritui sancto, ut secundum eum vitam nostram dirigere studeamus, quia ipse nobis vitam præparavit æternam; et sic perveniemus ad illam, si nunc ejus voluntatem secuti fuerimus. Et vere ita se habet effectus utriusque partis. Si enim secundum carnem vixeritis, moriemini, id est si secundum mortem vixeritis, totum morietur; si secundum carnis concupiscentias vixeritis, moriemini perpetualiter et carne et anima. Si Spiritu sancto mortificaveritis facta carnis, id est secundum Deum vivendo, voluptates carnis et desideria ejus exstinxeritis, vivetis in æternum beati. Hoc est opus nostrum in hac vita, spiritu mortificare quotidie facta carnis, affligere, minuere, frenare, interimere. Quam multa enim proficientes jam non delectant, quæ antea delectabant. Quando autem delectabat, et non ei consentiebatur, mortificabatur. Si jam non delectat, mortificatum est.

« Quicumque enim Spiritu Dei aguntur, hi filii

« sunt Dei. Non enim accepistis spiritum servitutis iterum in timore, sed accepistis spiritum adoptionis filiorum, in quo clamamus : Abba Pater. Ipse enim spiritus testimonium reddit spiritui nostro, quod sumus filii Dei. Si autem filii, et hæredes : hæredes quidem Dei, cohæredes autem Christi, si tamen compatimur, ut et conglorificemur. »

Vere vivetis, si Spiritu sancto opera carnis mortificaveritis. Nunc enim filii Dei estis, et cum eo in perpetuum regnabitis. Et hoc est quod hæc Apostoli verba demonstrant. Vivetis, quia filii Dei estis. Nam quicumque Spiritu Dei aguntur, hi filii sunt Dei. Cum dixisset Apostolus : *Si autem spiritu facta carnis mortificaveritis, vivetis*, id est illas concupiscentias carnis, quibus non consentire magna laus est, et quas non habere perfectio est, metuendum erat, ne quisquam ad mortificanda facta carnis, de Spiritu sancto præsumeret. Ergo ne hic se extolleret humanus spiritus, et ad hoc opus se idoneum firmumque jactaret, subjecit et ait : *Quicumque enim Spiritu Dei aguntur, hi filii sunt Dei*. Non qui secundum carnem suam vivunt, non qui carnis voluptate ducuntur, non qui spiritu suo aguntur, non qui lege aguntur, sed quicumque Spiritu Dei aguntur, hi sunt filii Dei. Spiritus ergo Dei quo aguntur, ipse est spiritus, quo facta carnis mortificantur, quia ipse dat continentiam qua frenetur et dometur atque vincatur concupiscentia. Aguntur autem Spiritu Dei, ut et ipsi quod agendum est agant, et cum egerint, illi a quo aguntur, gratias agant. Spiritus enim Dei qui eos agit, agentibus est adiutor et ducior. Aguntur ergo ut agant, et ad hoc eis ostenditur quid agere debeant, ut hoc sicut agendum est agant, id est cum delectatione et delectatione justitiæ : quia qui Spiritu Dei aguntur, charitate aguntur et excitantur. Non ergo littera, sed spiritu ; non lege præcipiente, minante, promittente ; sed spiritu exhortante, illuminante, adjuvante aguntur. Non quia ipsi nihil agant, sed ne nihil agant boni, a bono aguntur ut agant. Nam tanto magis efficitur quisque filius bonus, quanto largius ei datur a Patre spiritus bonus. Plus vero est agi quam regi. Qui enim regitur, aliquid agit, et ideo regitur, ut recte agat. Qui autem agitur, agere ipse vix aliquid intelligitur, Quod ergo Spiritus Dei sanctus agit, hoc est quod Deus operatur omnia in omnibus. Nec aliquid in nobis libera voluntas melius agere potest, quam ut illi se commendet qui male agere non potest. Dixi quia filii Dei estis, si Spiritu Dei agimini. Et vere filii. Non enim accepistis spiritum servitutis, sed filiationis. *Non accepistis spiritum servitutis iterum*, id est sicut olim in lege. Non est vobis iterum spiritus iste servitutis, sed libertatis. Idem enim spiritus est legis et Evangelii, sed propter diversa opera dissimiliter appellatur. Judæis fuit spiritus servitutis, sed Christianis est spiritus libertatis. Quia eodem spiritu, id est digito Dei quo lex in tabulis lapideis scripta est, timor incussus est eis qui gratiam non-

dum intelligebant, ut de sua infirmitate atque peccatis per legem convincerentur, et lex illis fieret pædagogus, quo perducerentur ad gratiam, quæ est in fide Christi. Et timor ille servilis erat, quia per eum non tam justitia diligebatur, quam pœna timebatur. Jam ergo vobis non in timorem datur spiritus, sed in dilectionem, ut non servi, sed filii simus. Qui autem adhuc ideo bene agit, quia pœnam timet, et Deum non amat, nondum est inter filios. Mandatum enim Dei si timore sit pœnæ, non amore justitiæ, serviliter sit, non liberaliter, et ideo nec sit. Non enim bonus fructus est, qui non de charitatis radice procedit. Non accepistis in Novo Testamento spiritum servitutis iterum in timore, sicut quondam in Veteri, sed accepistis spiritum adoptionis filiorum, id est qui vos Deo adoptavit in filios in quo spiritu clamamus, id est toto mentis affectu dicimus, *Abba Pater*. Ipse spiritus facit nos Deum vocare Patrem nostrum. Et si ille est Pater noster, ergo nos filii ejus. Filii clamant, Abba Pater. Hoc est Abba, quod Pater. Abba enim Hebraice dicitur, pater autem Græce vel latine. Sed propter utrumque populum, circumcisionis videlicet et præputii, qui ad angularem lapidem, id est ad Christum accessit, posita sunt hæc duo nomina idem significantia. Hebræi enim fideles clamant, Abba ! gentiles autem, Pater ! Clamor iste cordis est, non faucium, non labiorum. Intus sonat auribus Dei. Cum autem clamant, aliquid petunt. Et quid petunt, nisi quod de illis dictum est. « Beati qui esuriunt et sitiunt justitiam, quoniam ipsi saturabuntur ? » (*Math. v.*) Quæ est ista petitio, nisi esuries sitisque justitiæ ? Huc ergo transeant qui sub lege sunt, ut ex servis filii fiant, nec sic tamen, ut servi esse desistant, sed ut tanquam filii Domino et Patri liberaliter serviant. Accepimus spiritum adoptionis, per quem vocamus Deum Patrem nostrum, nam ipse spiritus divinus testimonium reddit spiritui nostro, id est recognoscere et intelligere facit spiritum nostrum, quia sumus filii Dei. Ad ipsam enim pertinet quia efficimur unum corpus unici filii Dei. Et per hoc quod ipse Spiritus sanctus charitatem nobis infundit, quæ nos facit imitatores esse divinæ bonitatis, ut diligamus inimicos nostros et benefaciamus his qui oderunt nos (*Luc. vi*), sicut Pater « celestis solem suum oriri facit super bonos et malos, atque pluit super justos et injustos » (*Math. v.*) evidenti testimonio declarat menti nostræ nos esse filios Dei, cujus bonitatem pro modulo nostro sequimur. Filiorum enim est imitari patrem suum. Spiritus Dei dum facit nos bene agere, testatur quoniam sumus filii Dei. Sed si filii sumus, erimus et hæredes, id est ejusdem gloriæ participes. Non enim inaniter filii sumus, sed magnum inde commodum habebimus, quia hæredes Patris nostri erimus, imo ipse erit hæreditas nostra, sicut in Psalmo caui-mus : « Dominus pars hæreditatis meæ » (*Psal. xv.*) Hæredes quidem Dei erimus. Sed si hoc parvum videtur, audiamus adhuc unde amplius gaudeamus, quia erimus cohæredes Christi. id est simul cum

Christo hæredes, eamdem scilicet quam ipse possidet, beatitudinis hæreditatem cum eo possidentes. Hæredes quidem Dei efficiemur, cum ea quæ Dei sunt possidere cœperimus, id est incorruptionis et immortalitatis gloriam atque thesauros sapientiæ et scientiæ reconditos (*Colos. ii*). Cohæredes autem Christi efficiemur cum reformaverit ipse corpus humilitatis nostræ, configuratum corpori claritatis suæ (*Philip. iii*). Hæredes autem Dei erimus, sed non ejus morte hanc hæreditatem adipiscemur, cum ipse mori non possit, imo cum ipse sit hæreditas, quam ab eo percipiemus. Sed quoniam cum vocati sumus adhuc parvuli, et ad spiritalia contemplanda minus idonei, usque ad humilitatem nostræ cogitationis misericordia divina porrexit, ut quomodocumque cernere niteremur, quod non evidenter atque perspicue cernebamus, ipsum moritur quod in ænigmate cernebamus, cum facie ad faciem cernere cœperimus (*I Cor. xiii*). Convenienter ergo dicitur moriturum esse quod auferetur. Cum autem venerit quod perfectum est, auferetur quod ex parte est (*ibid.*). Ita nobis quodammodo moritur Pater in ænigmate, et idem ipse fit hæreditas cum facie ad faciem possidetur, non quia ipse moritur, sed imperfecta in eum nostra visio perfecta visione pervenitur. Et tamen, nisi illa prior nos nutriret, ut aliam plenissimam et evidentissimam non efficeremur idonei. Cohæredes etiam erimus Christi, cum in fine sæculi absorpta fuerit mors in victoria (*I Cor. xv*). Non vult ille habere cohæredes, quia hæreditas ejus non fit angusta si multi possederint. Homo enim si habeat unicum filium, gaudet ad illum magis, quia solus omnia possessurus est, et non habebit fratres, qui cum eo dividant hæreditatem, et pauper remaneat. Deus vero unicum, quem genuerat et per quem cuncta creaverat, misit in hunc mundum, ut non esset unus, sed fratres haberet adoptatos qui cum eo possiderent hæreditatem vitæ perennis. Hæreditas, inquam, in qua cohæredes ejus erimus, non minuitur multitudine filiorum, nec fit angustior numerositate cohæredum; sed tanta est multis, quanta paucis; tanta singulis, quanta omnibus. Cohæredes ejus erimus, ita tamen si computimur, id est si cum eo patimur, si passionum ejus nunc participes efficiamur; si qualia pro nobis ille pertulit, nos talia pro nomine ejus pati non recusamus; si non pro humano favore vel temporali commodò, sed pro amore illius adversa perferimus, ut et conglorificemur, id est cum eo glorificemur, facti cohæredes ejus et participes gloriæ ipsius. Conglorificabimur enim, si hoc ejus nobis gratia concesserit, quia cum apparuerit, similes ei erimus, quoniam videbimus eum sicuti est (*I Joan. iii*).

« Existimo enim quod non sunt condignæ passionum hujus temporis ad futuram gloriam quæ revelabitur in nobis. »

Ne cui videretur grave, quod dixerat nos debere compati, mox addidit non esse condignas passiones hujus temporalis ad futuram gloriam quæ reve-

labitur in nobis. Ostendit enim per hæc quod illa respicit quæ non videntur, id est gaudia sempiternæ beatitudinis, omnem tribulationem, quæcumque ei acciderit, quamvis sæva, quamvis diuturna videatur, levem ducit et momentaneam, etiam si tormentis subjiciatur et eculeis et unguis. Nam eo tempore quo supplicii corpus ejus atteritur, si aspiciat ad futuram gloriam et consideret quomodo per hæc tormenta corpus humilitatis suæ transformabitur, ut fiat conforme corpori gloriæ Unigeniti Dei, tribulationem præsentem pro minimo reputabit, remunerationem vero futuræ beatitudinis inæstimabiliter magnam judicabit. Et quanto magis multiplicari sibi tribulationem et pœnas viderit, tanto amplius sibi pondus et magnitudinem gloriæ intelliget cumulari.

In eo autem quod Apostolus nunc dicit *existimo*, non dubitat ipse, sed dubitantes increpat, sicut et alibi ad quosdam contemptores suos loquens: « Puto autem, inquit, quod et ego spiritum Dei habeam (*I Cor. vii*). » Qui enim dicit, puto vel existimo, dubitare videtur. Sed ille increpat, non dubitat. Et ipse Dominus qui omnia scit, increpans infidelitatem futuram generis humani: « Cum venerit, inquit, Filius hominis, putas inveniet fidem in terra? (*Luc. xviii*). » Nam et homines de his rebus quas certas habent, aliquando increpative dubitant, id est verbum dubitationis ponunt, cum corde non dubitent, velut si quis indignetur servo suo et dicat: « Contemnis me? Puto quia dominus tuus sum. Ita et nunc Apostolus dicens existimo, increpat illos qui hoc non æstimabant, vel non existimant. Nonnulli enim dum futura gaudia minus attendunt, putant intolerabilia esse præsentia mala, quæ perferunt. Et illorum pusillanimitatem vel infidelitatem increpat nunc Apostolus: *Si compatimur*, inquit *et conglorificabimur*. Et vere per passionem perveniemus ad glorificationem. Nam ego existimo, quod vos non æstimatis, id est ego indubitanter scio quod passionem hujus temporis, quod tam breve est, non sunt condignæ, id est omnes simul non sunt dignæ ad promerendam gloriam futuram, quæ revelabitur in nobis, id est quæ ita manifestabitur, ut sit in nobis, quia in unoquoque nostrum marebit, et foras apparebit. Hoc est, si quis pateretur omnes pœnarum acerbitates, quæ in tempore præsentis vitæ sufferri possunt, non essent omnes illæ passiones dignum meritum ad consecutionem futuræ gloriæ, quæ, ablato omni velamine, revelabitur in nobis, quando percipiemus illud « quod oculus non vidit, nec auris audivit, nec in cor hominis ascendit (*I Cor. ii*). »

« Nam expectatio creaturæ revelationem filiorum Dei expectat. Vanitati enim creatura subjecta est non volens, sed propter eum qui subiecit eam in spe. Quia et ipsa creatura liberabitur a servitute corruptionis in libertatem gloriæ filiorum Dei. »

Vere gloria revelabitur in nobis, qui nunc pro Deo molestias sustinemus, quia hæc gloria est ut filii Dei appareamus. Hanc enim expectamus. Nam

expectatio creaturæ revelationem filiorum Dei expectat. Quod est dicere: Nam et hoc ipsum quod in nobis dolet, cum facta carnis mortificamus, cum esurimus, vel sitimus per abstinentiam, dum frenamus delectationem concupiscentiæ per castitatem, dum injuriarum lacerationes et contumeliarum aculeos per patientiam sustinemus, dum, neglectis atque rejectis voluptatibus nostris, pro fructu matris Ecclesiæ laboramus, quidquid in nobis in hac et hujusmodi attritione dolet, creatura est. Dolet enim corpus et anima, quæ utique creatura est, et expectat revelationem filiorum Dei, id est expectat quando appareat quod vocatum est in ea gloria, ad quam vocatum est. Quia enim Filius Dei unigenitus non potest appellari creatura, quando quidem per ipsum facta sunt omnia quæcunque Deus fecit, distincte etiam nos vocamur creatura ante illam evidentiam gloriæ, et distincte vocamur Filii Dei, quamvis hoc adoptione mereamur. Nam ille Unigenitus natura filius est, non adoptione. Expectatio ergo creaturæ, id est expectatio nostra revelationem filiorum Dei expectat, id est quando appareat quod promissum est, quando re ipsa manifestum sit, quod nunc speramus (Filii enim Dei sumus, et nondum apparuit quid erimus. Scimus quia cum apparuerit similes ei erimus, quoniam videbimus eum sicuti est (I Joan. III.) Ipsa est revelatio filiorum Dei, quam nunc expectat expectatio creaturæ. Non quod creatura revelationem expectet alterius naturæ, quæ non sit creatura, sed ipsa qualis nunc est, expectat quando sit qualis futura est. Tanquam si diceretur: Operante pictore, subjectis sibi coloribus, et ad opus ejus paratis, expectatio colorum manifestationem imaginis expectat, non quia tunc alii erunt aut non colores erunt, sed tantum quod aliam dignitatem habebunt. Dixi quod expectatio creaturæ expectat ut revelentur filii Dei. Quod recte dixi. Nam ipsa creatura adhuc *subjecta est vanitati*, id est temporalibus rebus, quæ sunt vanitas, quia quod promittunt, implere non possunt, et evanescent id est deficiunt et transeunt. Ait enim Salomon: « Vanitas vanitatum, et omnia vanitas. Quæ abundantia est homini in omni labore suo, quem ipse laborat sub sole? (Eccle. 1.) » Cui ut a Domino dictum est: « In labore manducabis panem (Gen. III), » ita ergo subjecta est humana creatura vanitati. Et subjecta est non volens, quia homo sponte peccavit, sed non sponte damnatus est. Peccatum enim fuit voluntarium, id est contra præceptum facere veritatis, peccati autem pœna, id est subjeci fallaciæ, non voluntaria. Sponte, ut dixi, peccavit creatura hæc, et inimica facta est veritati; sed ut merito puniretur, non sponte subjecta est vanitati. Diligit homo sponte vanitatem, cum deserta soliditate veritatis, opinabilia sequitur, id est mutabilia. Vanitates enim sunt quæ mutantur et transeunt. Cum autem inde meritas pœnas luit, subicitur non sponte vanitati, sicut subjecta est in homine peccante. Vanitati enim creatura non volens subicitur,

A quia homo qui ingenite constantiæ statum volens deseruit, pressus justæ mortalitatis pondere, nolens mutabilitatis suæ corruptioni servit. Non ergo sponte creatura vanitati subjecta est, sed propter eum qui subjecit eam in spe, id est propter ejus justitiam atque clementiam, qui neque impunitum peccatum reliquit, neque insanabilem voluit esse peccantem. In spe est subjecta vanitati, propter misericordiam liberantis per remissionem peccatorum et adoptionem gratiæ. Ergo in spe, qua sperat se adhæsuram contemplandæ veritati, subjecta est interim vanitati. Quia et ipsa creatura, id est ipse homo, cum jam signaculo imaginis propter peccatum amisso, non tamen tota penitus imagine deleta, remansit tantummodo creatura, et ipsa creatura, id est et ipsa quæ nondum vocatur filiorum forma perfecta, sen tantum creatura, liberabitur a servitute corruptionis. Quod itaque ait, et ipsa liberabitur, facit intelligi, et ipsa quemadmodum nos, id est et de ipsis non est desperandum, qui nondum vocantur filii Dei, quia nondum crederunt; sed tantum creatura, quia et ipsi credituri sunt, et liberabuntur a servitute corruptionis, quemadmodum nos qui jam filii Dei sumus, quamvis nondum apparuerit quid erimus. Liberabitur ergo a servitute corruptionis, in libertatem gloriæ filiorum Dei, id est erunt et ipsi ex servis liberi, et ex corruptibilibus incorrupti in vita perfecta, quam habebunt filii Dei. Tunc enim creatura hoc a servitute corruptionis eripiet, cum ad filiorum Dei gloriam incorruptam resurgendo sublevabitur. Electos enim nunc pœna corruptionis aggravat, sed tunc incorruptionis gloria exaltat. Et quantum ad præsentis necessitatis pondera, nunc in Dei filiis de libertate nil ostenditur, tantum ad subsequentiæ libertatis gloriam tunc in eis de servitute nil apparet. Creatura ergo servitute corruptionis exuta, et dignitate libertatis adepta, in filiorum Dei gloriam vertitur, quia, unita Deo per spiritum, quasi hoc ipsum quod creatura est, transisse ac subegisse declaratur. Eique ita tunc inhæret, ut illi de corruptione quæ per resurrectionem vincitur, nihil jam in suo amore contradicat, sed unificati gloriæ sui Redemptoris fiat. Cujus Redemptoris respectu potest intelligi dictum, quia et ipsa liberabitur, scilicet jam a corruptione liberatus est ipse Dominus.

« Scimus enim quod omnis creatura ingemiscit et parturit usque adhuc. Non solum autem illa, sed et nos ipsi spiritus primitias habentes, et ipsi intra nos gemimus adoptionem filiorum, expectantes redemptionem corporis nostri. »

Vere non volens subjecta est creatura vanitati. Nam inde gemit: *Scimus enim quod omnis creatura ingemiscit.* Vel liberabitur a servitute corruptionis. Nam ideo gemit, quia non est adhuc inde liberata. In uno quoque autem homine, omnis creatura non universaliter, sicut est cælum et terra et omnia quæ in eis sunt, sed generatim quodammodo intelligi potest, quia rationalis in illo est, quam habere cre-

duntur angeli; sensualis, qua et bestiae non carent, utuntur enim sensibus et sensualibus motibus ad appetenda utilia et vitanda contraria, et vitalis privata sensu qualis adverti in arboribus potest. Nam et in nobis sine sensu nostro fiunt corporis incrementa, et capilli nec cum praecedunt sentiunt, et tamen crescunt. Jam vero corporalis creatura evidentius apparet in nobis, quae licet ex terra facta atque formata sit, insunt tamen illi ex omnibus hujus corporei mundi elementis quaedam particulæ ad temperiem valetudinis. Nam et calore membra vegetantur, qui est ab igne, cujus etiam lux per oculos emicat; et aere venarum decursus, quas arterias vocant, atque spiramenta pulmonis implentur; et humor nisi esset, nulla spiramenta confluerent, vitantque assumeret siccitas. Nam et ipse sanguis humido lapsu alias venas replens, quasi rivis et fluminibus per cuncta diffunditur. Ita nullum est creaturæ genus, quod non homini possit agnosci. Ac si omnis creatura in eo congemiscit adhuc. Propter quod et Dominus Evangelium jussit omni creaturæ prædicari (*Marc. xvi*), quia in uno quoque homine (sicut disseruimus) est omnis creatura. Omnis itaque creatura gemit in homine. Non tanta, sed omnis. Tanquam si dicatur quod solem omnes vident, qui sunt incolomes, sed non toti vident, quia tantum oculis vident, ita et in homine omnis creatura est, quia et intelligit et sentit et vivit et corpus habet; sed non tota creatura in ipso est, quia sunt præter ipsum et angeli qui intelligunt, et pecora quæ sentiunt, et arbores quæ vivunt, et lapides qui tantummodo sunt. *Scimus ergo quod omnis creatura*, id est homo fidelis *ingemiscit*, id est in interiori suo gemit ac gemitum semper recentem habet, quandiu subiecta est vanitati, *et etiam parturit*, id est cum summa difficultate et onere bonum opus facit. Nam sicut mulier magnis doloribus et conatibus profert filium, ita fidelis homo nisibus magnis et laboribus producit fructum boni operis. Laborat enim et affigitur vigiliis, et jeuniis, aliisque sanctis actionibus. Et hoc facit usque adhuc. Nam, etsi sunt aliqui jam in sinu Abrahamæ, et latro ille cum Domino in paradiso constitutus, illo die quo credit, gemere destiterit, tamen *usque adhuc* omnis creatura ingemiscit et parturit in illis sanctis, qui adhuc in præsentis vita laborant. *Non solum autem illa* ingemiscit, *sed et nos ipsi*, id est non solum in homine corpus et anima et spiritus simul dolent ex difficultatibus corporis, sed et nos ipsi, exceptis corporibus, in nobis ipsis ingemiscimus, nos dico *primitias spiritus habentes*, id est quorum jam spiritus tanquam sacrificium oblatus sunt Deo, et divino charitatis igne comprehensi. Hæ sunt enim primitiæ hominis, quia veritas primum spiritum nostrum obtinet, ut per hunc cætera comprehendantur. Jam ergo habet primitias oblatas Deo, qui dicit: «Mente servio legi Dei, carne autem legi peccati (*Rom. xvii*), » et de quo dicitur: « Spiritus quidem promptus est, caro autem infirma (*Marc. xiv*). » Non solum, inquit, omnis creatura,

id est cum corpore, sed etiam nos ipsi habentes primitias spiritus, id est nos animæ, quæ jam primitias mentes nostras obtulimus Deo, *in nobis ipsis ingemiscimus*, id est præter corpus, *adoptionem filiorum expectantes corporis nostri redemptionem*, id est ut etiam ipsum corpus accipiens beneficium adoptionis filiorum, qua vocati sumus, totos nos liberatos, transactis omnibus molestiis, ex omni parte Dei filios esse manifestet. Non solum illa ingemiscit, sed et nos ipsi primitias spiritus habentes, id est qui jam spiritu ideo servimus, qui jam mente Deo credimus, et in ipsa fide primitias quasdam dedimus ut primitias nostras sequamur. Et nos ipsi primitias spiritus habentes, id est qui nondum quidem ex toto quod sumus, sed ex ea parte qua peccatoribus meliores sumus, Deo, non vanitati subditi sumus; hoc est, per primitias spiritus et ipsi in nobismetipsis ingemiscimus. Videtur etiam specialiter designare apostolicam dignitatem in eo quod ait, *et nos ipsi primitias spiritus habentes*, id est qui primi Spiritum sanctum accepimus et digniora ejus dona habemus. Non solum, inquit, omnis creatura, id est omnis Ecclesia creata in operibus bonis, quæ subdita est nobis, sed et nos ipsi primitias spiritus habentes, id est nos apostoli qui ad hoc electi sumus, ut primitias spiritus acciperemus, et per hoc majores sumus quod ejus primitias habemus, vel quia primo venit in nos, vel quia dignius et evidentius dona sua declarat in nobis per genera linguarum, per sanationem infirmorum, per resurrectionem mortuorum, et per similia opera, et nos ipsi qui tanti sumus, qui jam primitiis sancti Spiritus acceptis lætamur, adhuc gemimus miseras habentes ut alii; gemimus intra nos, quia in nobis est unde gemamus. Vel quamvis non coram hominibus, tamen, intra nos, id est in interiore nostro gemimus; nec fictus est gemitus noster, sed intra mentis arcana resonat. Et gemimus expectantes adoptionem filiorum, quia per dilationem nec adversitate frangimur, sed longanimitate et fortiter expectamus adoptionem filiorum, id est ut secundum corpus accipiamus gloriam adoptionis, ut et anima et corpore toti simus immortales, et beati atque in omni substantia nostra appareamus adoptioni filii Dei. Hanc adoptionem expectamus, scilicet redemptionem corporis nostri, id est ut et ipsum quod adhuc corrumpitur, incorruptibile fiat et immortale. Hæc est enim redemptio nostri corporis, ut ab omnibus molestiis redimatur, id est liberetur et veram salutem consequatur. Nondum enim habet salutem. Nam esuries et sitis interficit, si subventum non fuerit. Medicamentum enim famis est cibus, et medicamentum sitis est et potus, et medicamentum fatigationis est somnus. Si sepositis istis non sunt morbi, est sanitas. Si autem habes aliquid quod te possit interficere nisi manducaveris, noli gloriari de sanitate, sed gemens expecta redemptionem corporis tui. Gaude redemptum, sed nondum re. Spe securus es. Etenim si non genueris in spe, non pervenies ad rem.

« Spe enim salvi facti sumus. Spes autem quæ videtur, non est spes. Nam quod videt quis, quid sperat? Si autem quod non videmus speramus, per patientiam expectamus. »

Quasi diceretur Apostolo : Quid tibi profuit Christus si adhuc gemis? et quomodo Salvator saluum te fecit? Qui enim genit adhuc, ægrotat, subjunxit atque ait : *Spe enim, etc.* Ideo gemimus quia *spe salvi facti sumus*, ideo speramus nos salvandos, et quod speramus, jam quidem expectamus, sed nondum tenemus; et donec teneamus, in tempore suspiramus, quia desideramus quod nondum teneamus. Nondum re salvati sumus, sed adhuc spe, quia nondum venit nostri gaudii plenitudo, nondum habemus corpus cœleste et spiritale, id est corpus angelicum in societate angelorum, sed speramus. Sed quidem jam habemus hanc salutem, hanc gloriam. Sed *spes quæ videtur, non est spes.* Et ideo nondum in re videmus ipsam salutem, quam in spe habemus. Certitudo quæ præsentialiter videtur, non est spes. Nam *quod videt quis, quid sperat?* Quod enim videtur, quare speratur? Non speratur, sed scitur. Sed *si nos speramus quod non videmus*, id est redemptionem corporis nostri et societatem angelorum, *per patientiam expectamus* illud. Spes enim ad augmentum meriti operatur in nobis expectationem futuræ salvationis, et etiam in ipsa expectatione patientiam, quia invisibilem salutem, spe nos confortante, expectamus longanimitèr patiendo mala præsentia, et ideo gemere cogimur. In malis enim si quisquam patitur, non in bonis quibus fru-

itur, opus est patientia.
« Similiter autem spiritus adjuvat infirmitatem nostram. Nam quid oremus sicut oportet nescimus, sed ipse spiritus postulat pro nobis gemitibus inenarrabilibus. Qui autem scrutatur corda, scit quid desideret spiritus, quia secundum Deum postulat pro sanctis. »

Spes nos adjuvat ut patienter expectare possimus, similiter autem et spiritus. Et ideo de expectatione vel patientia nihil nobis attribuimus, sed totum Deo, cujus beneficiis hæc possumus. Non solum enim spes nos adjuvat, sed etiam Spiritus sanctus *similiter adjuvat infirmitatem nostram*, quia charitatem nobis infundit, per quam nostra corroboratur infirmitas, ut patienter expectare valeat salutem quam sperat. Similiter ut spes, adjuvat nos charitas, id est Spiritus sanctus non solum in adversitatum tolerantia, sed et in orationibus, quia nec bene orare sine eo possumus. Nam quia ingemiscimus et petimus liberari, spiritus adjuvat ne vel ante tempus liberari petamus, vel contraria nobis dari. Adjuvat infirmitatem nostram docens et faciens orare. *Nam quid oremus sicut oportet nescimus, sed ipse postulat pro nobis.* Nescimus prout oportet quid orare debeamus, quia molestiæ tribulationesque temporales plerumque prosunt vel ad sanandum tumorem superbiæ, et ad probandam exercendamque patientiam, cui probatæ et exercitatæ clarior merces

superiorque servatur, vel ad quæcunque flagellanda et abolenda peccata, et tamen nos nescientes quid ista prosint, ab omni optamus tribulatione liberari. Quid enim nobis expediat, non satis scimus. Aliquando quod putamus obesse, prodest; et quod putamus prodesse, obest. Infirmi enim sumus; et quæ medicamenta nobis sint utilia, medicus quidam novit, nos autem ignoramus. In his ergo tribulationibus, quæ possunt et prodesse et nocere, quid oremus sicut oportet nescimus, et tamen quia dura, quia molesta, quia contra sensum nostræ infirmitatis sunt, universali humana voluntate, ut a nobis hæc auferantur, oramus. Sed hoc devotionis debemus Domino Deo nostro, ut si ea non abstulerit, non ideo nos ab eo negligi existimemus, sed potius pia patientia malorum bona speremus ampliora. « Sic enim virtus in infirmitate perficitur (II Cor. xii). » Vel etiam dum beatam vitam petimus, in qua sumus immortales atque incorruptibiles corpore et spiritu, quantum ipsa est pax, quæ præcellit omnem intellectum, etiam ipsam in oratione poscendo, quid oremus sicut oportet nescimus; sed quidquid cogitationibus occurrit, abjicimus, respicimus, improbamus, non hoc esse quod quærimus novimus, quamvis illud nondum quale sit noverimus. Est ergo in nobis quædam, ut ita dicam, docta ignorantia, sed docta Spiritu Dei, qui adjuvat infirmitatem nostram. Nos nescimus quid oremus sicut oportet, sed ipse spiritus postulat pro nobis, id est postulantes nos facit, *gemitibus inenarrabilibus*, Postulare enim nos facit, inspirans nobis desiderium etiam adhuc incognitæ tantæ rei, quam per patientiam expectamus. Et facit postulare gemitibus inenarrabilibus. Quomodo enim narratur, quando desideratur, quod ignoratur? Quod utique si omnimodo ignoraretur, non desideraretur. Et rursus si videretur, non desideraretur, nec gemitibus quæreretur. Minor vero est qui postulat, quam qui postulatur. Quomodo ergo spiritus postulare dicitur qui minor non est? Indigentis enim certissimum indicium est, postulare gemitibus. Nullius autem rei esse indigentem, fas est credere Spiritum sanctum. Sed juxta quod præmisimus ipse postulat, qui ad postulandum eos quos repleverit, inflamat. Et ipse dicitur gemere, eo quod nos gemere faciat desiderio futuræ beatitudinis. Ita enim dictum est, postulat, quia postulare nos efficit, nobisque postulandi et gemendi inspirat affectum, sicut illud in Evangelio : « Non enim vos estis qui loquimini, sed Spiritus Patris vestri qui loquitur in vobis (Matth. x). » Neque enim et hoc ita fit de nobis tanquam nihil facientibus nobis. Adjuvatorum igitur Spiritus sancti sic expressum est, ut ipse facere diceretur, quod ut faciamus facit. Usitati enim sunt tales locutionum modi, quando per efficientem significatur id quod efficitur; sicut frigus pigrum dicimus, quia pigros facit; et diem tristem vel lætum, quia tristes vel lætos facit. Sic et Dominus Abrahamæ dixit. « Nunc cognovi quod timeas Deum (Gen. xxi), » id est nunc

ut cognosceres feci. Secundum quam locutionem ipse qui est Dei sapientia, dixit se nescire diem vel horam finis sæculi (*Matth. xxv*). Quid enim potest esse quod ipse nesciret? Sed quia hoc utiliter discipulis occultabat, nescientem se esse dixit, quia illos nescientes occultando faciebat. Secundum hanc figuram et Patrem solum scire dixit ipsum diem, quia eundem Filium scire faceret. Eodem locutionis modo et Spiritus sanctus postulare vel gemere dicitur, quia eos in quibus habitat, postulantes et gementes facit. Vel appellatione Spiritus sancti designatur charitas, quæ per Spiritum sanctum diffusa est in cordibus nostris. Sanctus ergo Spiritus interpellat et pro nobis gemit, id est charitas interpellat, charitas postulat, charitas gemit, charitas orat. Contra hanc aures claudere non novit qui illam dedit, sed qui scrutatur corda, id est Deus, qui in occulto cogitationis suæ omnia eorum arcana videt, scit quid desideret spiritus, id est approbat et implet hoc quod spiritus facit nos desiderare, quia secundum Deum, id est secundum Dei voluntatem, postulat pro sanctis, id est postulare sanctos facit pro seipsis, vel spiritus, id est charitas, secundum Deum postulat pro sanctis, quia nihil petit charitas, nisi quod Deo gratum est, et ideo ipse scit, id est approbat desiderium seu petitionem ejus.

« Scimus autem quoniam diligentibus Deum omnia cooperantur in bonum, his qui secundum propositum vocati sunt sancti. Nam quos præscivit, et prædestinavit conformes fieri imaginis Filii sui, ut sit ipse primogenitus in multis fratribus. Quos autem prædestinavit, hos et vocavit; et quos vocavit, hos et justificavit, quos autem justificavit, illos et magnificavit. »

Dum patimur adversa, nescimus sicut oportet quid orare debeamus. Sed hoc pro certo scimus quia diligentibus Deum, ita ut ipsam dilectionem operibus probent, omnia vel adversa vel prospera cooperantur, id est simul fiunt in bonum. Passivam enim significationem hoc loco habet quod dictum est, cooperantur. Et dilectoribus Dei omnia cooperantur, id est simul fiunt cuncta in bonum, quia in bonum vertuntur illis omnia quæcunque ipsis accidunt, non solum illa quæ appetuntur ut molesta. Usque adeo prorsus omnia, ut etiam si qui eorum deviant et exorbitant, etiam hoc ipsum eis, proficiat in bonum, quia humiliores redeunt atque doctiores, et robustius atque cautius post insistunt bonis actibus. Vel diligentibus Deum omnia cooperatur ipse Deus in bonum, sive Spiritus sanctus, de quo supra dictum est, qui et Deus est. Cooperatur enim Deus, id est cum electis suis operatur, dum illi agunt et ipse cum eis. Et ita cooperatur eis, ut omnia vertat in bonum et utilitatem eorum. Sed quia nonnulli diligunt Deum, et in eo bono quod cæperunt non permanent usque in finem, mox determinando subditur: *his qui secundum propositum vocati sunt sancti*. Hi enim in eo, quod diligunt Deum, permanent usque in finem; et qui ad tempus inde deviant, re-

vertuntur, ut usque in finem perducant quod in bono esse cæperunt. Nam secundum propositum occultissimæ justitiæ bonitatisque suæ Deus quos prædestinavit, ipsos vocat et justificat et glorificat. Proposuit enim Deus illos ad vitam venire, cujus propositum mutari non potest. Secundum hoc propositum, non secundum suum meritum vocati sunt a Deo per prædicatores ut sancti sint. Et vere secundum Dei propositum, nam quos præscivit, etc. Ordo est: *Nam quos præscivit conformes fieri imaginis Filii*, id est imitatores futuros Christi, *etiam prædestinavit*, illos hoc fore, ita ut sit ipse primogenitus in multis fratribus, id est primatum habens in collegio sanctorum, et jure hæreditatem patris obtinens, aliisque fratribus dispertiens. Secundum propositum sunt vocati, id est quod vocati sunt, non aliunde est quam a præordinatione Dei. Nam Deus, quos ab æterno præscivit fieri conformes Filii sui, etiam prædestinavit, id est per appositam gratiam præparavit illos, ut verbo prædicationis crederent. Prædestinatio est gratiæ præparatio, quæ sine præscientia non potest esse, potest autem sine prædestinatione præscientia. Prædestinatione quippe Deus ea præscivit quæ fuerat ipse factururus. Unde dictum est: *Fecit quæ futura sunt, præscire autem potest etiam quæ ipse non facit, sicut quæcunque peccata*. Quocirca prædestinatio Dei quæ in bono est, gratiæ, ut dixi, præparatio est. Gratiæ vero est ipsius prædestinationis effectus. Hæc est prædestinatio sanctorum, præscientia scilicet et præparatio beneficiorum Dei, de quibus certissime liberantur quicumque liberantur. Ex his enim qui prædestinati sunt nullus cum diabolo perit, nullus usque ad mortem sub diaboli potestate remanebit. Horum enim si quisquam perit, fallitur Deus. Sed nemo eorum perit, quia falli non potest qui prædestinavit eos. Quod autem ait prædestinatos conformes fieri imaginis Filii Dei, potest secundum interiorum hominum intelligi, ut in mente conformemur illi. Potest et sic accipi, ut quemadmodum nobis ille mortalitate, ita nos illi efficiamur conformes immortalitate. Secundum hanc imaginem Filii, cui per immortalitatem conformamur in corpore, etiam illud agimus quod item dicit Apostolus: « Sicut portavimus imaginem terreni, portemus et imaginem ejus qui de cælo est (*I Cor. xv*), » ut scilicet qui secundum Adam mortales fuimus, secundum Christum immortales nos futuros fide vera et spe certa firmaque teneamus. Sic enim nunc eandem imaginem portare possumus nondum in visione, sed in fide; nondum in re, sed in spe. De corporis quippe resurrectione tunc loquebatur Apostolus, cum hæc diceret, deinde *ut sit*, inquit, *ipse primogenitus in multis fratribus*. Secundum id quod unigenitus est, non habet fratres; secundum id autem quod primogenitus est, fratres vocare dignatus est omnes qui post ejus et per ejus primatum in Dei gratiam renascuntur per adoptionem filiorum. Primogenitus enim dicitur respectu fratrum consequentium in id quod ipse præ-

cessit. Unde et alio loco primogenitum eum a mortuis dicit, ut sit ipse primatum tenens, quia resurrectio mortuorum, ut jam non moriantur, ante illum nulla; post illum autem, multorum sanctorum est. Dixi quia quos præscivit et prædestinavit, quos autem prædestinavit, hos et vocavit. Hic subaudire debemus, secundum propositum. Sunt enim et alii vocati, sed non electi, ac per hoc non secundum propositum vocati, et quos vocavit, hoc est secundum propositum, hos et justificavit. Quomodo si aliquis imperator disponderet aliquem intimum sublimare ad consulatum, et daret illi sumptus quibus se præparet idoneum, et ornaret ut digne promoveri posset ad tantum honorem; ita Deus illis quos prædestinavit ad vitam, dat virtutum et bonorum operum gradus, per quos ad tantam sublimitatem possint erigi. Vocat enim illos et justificat et magnificat. Et hæc sua dona quibuscunque ipse donavit, procul dubio se daturum esse præscivit, et in sua præscientia præparavit. Quos ergo prædestinavit, ipsos et vocavit vocatione illa de qua dictum est, sine pœnitentia sunt dona et vocatio Dei. Nam in sua, quæ falli mutarique non potest, præscientia opera sua disponere, in Domino nec aliud quidquam est prædestinare. Non ergo alios, sed quos prædestinavit, ipsos et vocavit; nec alios, sed quos ita vocavit, ipsos et justificavit; nec alios, sed quos prædestinavit et vocavit et justificavit, illos et magnificavit, sive glorificavit. Prædestinatio nostra in nobis facta est, sed in occulto apud ipsum in ejus præscientia. Tria vero reliqua in nobis fiunt, vocatio et justificatio et magnificatio. Vocamur prædestinatione pœnitentiæ, justificamur innovatione misericordiæ et timore judicii, magnificamur profectu virtutum, sive glorificamur æterna beatitudine. Ista omnia jam facta sunt, prædestinavit, præscivit, vocavit, justificavit, magnificavit, quoniam omnes jam præsciti ac prædestinati sunt, et multi jam vocati atque justificati et magnificati sunt, quamvis adhuc usque in finem sæculi multi vocandi et justificandi sint atque magnificandi. Verba tamen præteriti temporis, posita sunt de rebus etiam futuris, tanquam jam fecerit Deus, quæ jam ut fierent, ex æternitate disposuit qui fecit quæ futura sunt. Quicumque ergo Judæi providentissima dispositione præsciti, prædestinati, vocati, justificati, magnificati vel glorificati sunt; non etiam nondum renati, sed etiam non nati, jam filii Dei sunt, et omnino perire non possunt. Talibus ipse Deus omnia cooperatur in bonum.

« Quid ergo dicemus ad hæc? Si Deus pro nobis, quis contra nos? Qui etiam proprio Filio non pepercit, sed pro nobis omnibus tradidit illum, quomodo non etiam cum illo omnia nobis donavit. »

Quoniam quidem Deus tot et tanta beneficia nobis contulit, non pro meritis nostris, sed pro gratia, ergo quid dicemus ad hæc tam magna ejus dona? Videlicet dicemus ulterius, quod aliquid a nobis habeamus? Non, sed omnia gratiæ Dei ascribemus. Et si Deus gratuito manere suo tanta nobis confert,

A quis poterit nobis quidquam horum auferre? vel quis poterit ejus voluntati resistere, qui nos ad gloriam præordinavit perducere? Si Deus pro nobis, quis contra nos erit? Deus pro nobis ut prædestinaret nos, Deus pro nobis ut magnificaret sive glorificaret nos. Si Deus pro nobis, quis contra nos? Si Deus in his omnibus pro nobis est, qui nobis vult adversari, paret se, si potest bellare adversus Deum. Non enim lædit nos, nisi qui Deum vincit. Et quis est qui vincit Omnipotentem? Quicumque reluctari voluerit, sibi nocet. Si Deus pro nobis, quis contra nos? Etiam si totus mundus contra nos insurgat et omni genere tormentorum in nos sæviat, quid totus mundus, quando pro nobis est per quem factus est mundus? Quid est omnis qui Deo nititur resistere paranti nos ad regnum perducere? Qui etiam Filio proprio, id est non adoptivo, sed naturali et consubstantiali non pepercit, sed pro nobis omnibus, id est pro nostrum omnium salute, tradidit illum, id est exposuit in mortem. Et qui illud quod majus est dedit nobis, id est Filium, etiam illud quod minus est dabit nobis, id est regnum suum. Nam qui Filium dedit quomodo aliquid negare potuit? Quomodo non etiam omnia donavit nobis cum illo? Ubi enim dedit nobis illum in quo omnia bona sunt, ibi cum illo omnia nobis utilia dedit, id est fidem, remissionem peccatorum, perfectionem virtutum, diversa dona sancti Spiritus, et in futuro sæculo beatitudinem sempiternam. Et tunc qualis erit spiritus hominis, nullum omnino habens vitium, nec sub quo jaceat, nec cui cedat, nec contra quod saltem laudabiliter dimicet pacatissima virtute perfectus? Rerum ibi omnium quanta, quam speciosa, quam certa scientia, sine errore aliquo vel labore, ubi Dei sapientia de ipso suo fonte potabitur cum summa felicitate, sine difficultate? Quale erit corpus, quod omni modo spiritui subditum, et eo sufficienter vivificatum, nullis alimoniis indigebit? Non enim animale, sed spiritale erit, habens quidem carnis, sed sine ulla carnali corruptione, substantiam. Cum enim beatitudinem illam obtinuerimus, tunc habebimus omnia. Nostra quippe erunt ad vivendum superiora, nostra erunt ad convivendum æqualia, nostra erunt ad damnandum inferiora. Sic enim habentur ibi omnia, ut sint et omnium singula, et omnia singulorum.

« Quis accusabit adversus electos Dei? Deus qui justificat. Quis est qui condemnet? Christus Jesus qui mortuus est, imo qui et resurrexit, qui est ad dexteram Dei, qui etiam interpellat pro nobis. »

Vere salutem et omnia bona cum Christo Deus nobis donavit, et habebimus illa. Nam quis nos accusabit, ut faciat nos his privari? Quis adversus, id est quis contrarius accusabit electos Dei, quos secundum immutabile propositum vocavit? Vel quis accusabit, id est quis accusationem deferet adversus electos Dei? Nullius accusatio nocere illis poterit. Diabolus quidem nititur eos accusare. Sed quis est

diabolus, vel quæ ejus accusatio adversus eos, quos Deus eligit? ejus accusatio contra eos non valet. Quis ergo accusabit eos? *Deus*? Non; quia ipse *justificat eos*. Et repugnans est, ut quos justificat, illos accuset. Deus non vult illos accusare, alius non potest. Et cum nullus accuset, *quis est qui condemnet eos*? Nullus. Num condemnabit eos *Jesus Christus*? Nequaquam rex salvator condemnabit eos, *qui mortuus est* ut ipsi vivant. Dico mortuus est, ut nos peccato moriamur; imo ut majus beneficium designem, dico quia etiam *resurrexit* ut nos cum eo resurgamus, et primæ resurrectionis participes simus. Qui et in cœlum sublimatus est *ad dexteram Dei*, ut nos post se elevet, et dexteram partem, quæ perpetuam beatitudinem designat, tenere faciat (*I Joan. 11*). Potens est subvenire suis, quia est ad dexteram Dei, id est omni creaturæ prælatus, et in honore positus in quo Pater est, *quia etiam interpellat pro nobis*, quia hunc habemus apud Patrem advocatum et intercessorem. Unigenitum enim Filium pro hominibus interpellare, est apud coæternum Patrem, seipsum hominem demonstrare; eumque pro humana natura rogasse, est eandem naturam in divinitatis suæ celsitudinem suscepisse. Interpellat igitur pro nobis Dominus non voce, sed miseratione; quia quod damnari in electis noluit, suscipiendo liberavit.

« Quis ergo nos separabit a charitate Christi? « Tribulatio, an angustia, an persecutio, an fames, « an nuditas, an periculum, an gladius? Sicut scri- « ptum est: Quia propter te mortificamur tota die, « æstimati sumus ut oves occisionis (*Psal. XLIII*). « Sed in his omnibus superamus propter eum qui « dilexit nos. »

Quandoquidem Christus pro nobis mortem pertulit, et adhuc interpellat pro nobis, *ergo quis separabit nos a charitate Christi*? id est quis poterit separare nos ab amore quo diligimus Christum? Nullus hoc facere poterit. Num faciet hoc *tribulatio*, id est corporis afflictio? Nequaquam. *An angustia*, id est mentis anxietas hoc facere poterit, ut non diligamus Christum? Minime. *An persecutio*, id est de loco ad locum expulsio, separabit nos a Christi dilectione? Non. Etsi omnimodam tribulationem sustineamus, etsi animi angustia torqueamur, etsi nos adversarii per diversa loca persequantur, nunquam a Christi amore divelli poterimus. *An nos ab eo fames* separabit, id est desiderium comedendi sine abundantia cibi? Absit! *An nuditas*, id est penuria vestis hoc faciet? Nequaquam. *An periculum*, id est apparatus mortis nos dividet a Christo? *An gladius*, id est ipsa mors gladio facta valebit hoc facere? Nequaquam. Per hæc septem designantur universa quæ nos in hoc sæculo possunt affligere, quia septenarius universitatem solet exprimere. Sed nulum horum poterit nos ab amore Christi separare, si electi sumus. Et hoc dico *sicut scriptum est* de nobis, ubi vox nostra exprimitur, dicens Christo: *Quia propter te mortificamur* quoniam a te separari

non possumus. Non propter crimen, non propter humanum favorem, sed propter te mortificamur. Hæc est causa martyrum. Propter te a quo nolumus separari, mortificamur, id est variis poenis affici-mur, *tota die*, id est toto tempore illuminationis nostræ, ex quo de tenebris ad lucem venimus. *Æstimati enim sumus* ab adversariis nostris *sicut oves occisionis*, id est æstimant nos sine respectu misericordiæ debere occidi, cum nec resistamus eis, sed in simplicitate et mansuetudine nostra innocenter mori simus parati. Hæc omnia pro Christo patimur. nec ab his superamur, *sed in omnibus his superamus*, id est superiores et victores efficimur, non propter nostras vires, sed *propter eum qui dilexit nos*, quia dum in illius amore pendemus, sensum doloris non recipimus. Illius enim charitas qua nos dilexit, et nostrum ad se affectum rapuit, cruciatum corporis et dolorem sentire nos non sinit.

« Certus sum enim quia neque mors, neque vita, « neque angeli, neque principatus, neque virtutes, « neque instantia, neque futura, neque fortitudo, « neque altitudo, neque profundum, neque creatura « alia poterit nos separare a charitate Dei, quæ est « in Christo Jesu Domino nostro. »

Vere nihil nos separabit a charitate Dei, nam inde certus sum. Non opinor, sed *certus sum*, id est pro certo et constanti firmiter teneo quod *neque mors ulla, neque vita* temporalis promissa, nec aliquid eorum quæ subduntur, poterit nos separare ab amore Christi. Nemo nos separabit inde minando mortem, quia id ipsum, quod diligimus, Deum, mori non potest. Nemo inde separat nos pollicendo vitam, nemo enim ab ipso fonte separat nos aquam pollicendo. Non separat inde qui minatur mortem, quia qui credit in Christum, licet moriatur, vivit. Neque qui pollicetur vitam, quia Christus vitam dat æternam. Et ideo temporalis vitæ pollicitatio, æternæ comparatione, contemnenda est. *Neque angeli* separant inde, sive boni sive mali, quia etiam si boni angeli dicerent ut Christum non amaremus, quod nunquam docent, non eis acquiesceremus. Licet, inquit, angelus de cœlo evangelizet vobis præter id quod accepistis, anathema sit (*Gal. 1*). Non igitur angelus aliquis inde separat, quia non est angelus, cum inhæremus Deo, nostra mente potentior. *Neque principatus*, id est illi angeli qui habent principatum super alios, sive bonos, sive malos. In utrisque enim præminent alii aliis. Et Dominus contrarios principatus exspoliavit, triumphans illos in semetipso. Boni vero principatus nunquam nos ab illo separare volent, quorum maximum studium est, subjectos ad eum reducere. Nec etiam *virtutes* inde separant, id est adhuc sublimiores angelicæ fortitudines, quia si bonæ sunt, favent nobis ut conjungamur Deo; si vero malæ, reprimuntur ab eo. Enumeratis omnibus adversis quæ in terra sunt, ascendit in cœlum; et ostendere volens quia parum est si contemnat terrena supplicia propter Christum, adjungit etiam hoc, quia *neque angeli, neque principatus, neque vir-*

tutes, etc. Quod autem dicit, tale est: Non solum homines abstrahere me non possunt ab amore Christi, sed ne angeli quidem neque omnes simul cœlorum virtutes, si conveniant in unum, nec si a regno decedere me necesse sit, aut etiam in gehennam trahi pro Christo. Quod enim ait, altitudo et profundum, et vita et mors, regnum cœlorum et gehennam designare videtur. Hæc autem dicit, non quod angeli affectare possint aliquando eum a Christo separare, sed etiam ea quæ impossibilia sunt, fieri posse dicit magis quam se a Christi amore sejungi, ut per hæc quanta in eo vis esset Dei charitatis, ostenderet. *Neque instantia* adversa separant nos inde, hoc enim leviora eo sentimus, quo ei, a quo nos separare moliantur, arctius inhæremus. *Neque futura*, id est futurorum promissio, separat inde, quia quidquid boni futurum est, certius promittit Deus; et nihil est ipso Deo melius, qui jam profecto bene sibi inhærentibus præsens est. *Neque instantia*, id est aliqua imminencia præsentia adversa vel prospera, neque futura bona vel mala separant nos a Christo, hoc est nec præsentia nec futura temporalia, quæ vel delectant, vel premunt, vel spem dant, vel timorem incutiunt. *Neque fortitudo* alicujus fortiter nobis violentiam inferentis separat inde, quia ille cui inhæremus fortior est omnibus. *Neque altitudo*, id est si quis nos in altum levaverit, ut durius præcipitet. *Neque profundum*, id est si quis nos in profundum maris demerserit, aut in imum carceris deposuerit. Sive altitudo, id est sublimitas mundani honoris promissa; et profundum, id est ultima dejectio extremæ calamitatis, quæ in hoc mundo perferri potest, comminata. Vel altitudo et profundum, id est sublimitas eloquentiæ sæcularis, et profunda perscrutatio naturalium rerum. Sive etiam altitudo et profundum, id est inanis curiositas earum rerum, quæ vel in cœlo vel in abyso sunt aut esse putantur. Sed quocumque modo sublimitas et profundum intelligatur, non poterit nos ab amore Christi separare. *Neque creatura alia*, id est creatura visibilis, quia et nos sumus quidem creatura, sed visibilis. Et ideo alia creatura, id est diversa ab interiori homine nostro, quo Christum diligimus, non nos ab amore ejus dividet, quia amor corporum qui per creaturam aliam exprimitur, non hoc facit. Vel alia creatura melius intelligitur de his dici, quæ non sunt. Et ea ergo quæ non sunt commemorat, ut ostendat quia etiam si essent ea quæ non sunt, se tamen movere a proposito aut mutare non possent. Certus sum, inquit, quia nihil horum quæ enumeravi, poterit nos separare a charitate Dei, qui omnibus melior est, et tot tantaque beneficia nobis contulit quæ charitas est nobis in Christo Jesu Domino nostro, quia nobis charitatem suam in Christo Pater ostendit, quem pro nobis tradidit; et nemo Patrem diligere potest, nisi Christum dilexerit.

CAPUT IX.

« Veritatem dico in Christo Jesu, non mentior,

« testimonium mihi perhibente conscientia mea in Spiritu sancto, quoniam tristitia est mihi magna, et continuus dolor cordi meo. Optabam enim ego ipse anathema esse a Christo pro fratribus meis, qui sunt cognati mei secundum carnem, qui sunt Israelitæ, quorum adoptio est filiorum et gloria et testamentum et legislatio et obsequium et promissa, quorum patres, ex quibus est Christus secundum carnem, qui est super omnia Deus benedictus in sæcula, amen. »

Modo nihil potest me et alios electos a Christo separare, sed olim fui ab eo separatus, et optabam semper esse alienatus, unde nunc doleo, sicque mala vertuntur in bonum. *Nam veritatem dico*, etc. Vel ita continuatur: Certus sum quod nihil poterit nos ab amore Christi separare, cum ex supradictis beneficiis, quia nos præscivit et prædestinavit et vocavit et justificavit; tum ex hoc quod cum essem persecutor Ecclesiæ Dei, nullo modo potui fideles ab ejus charitate quantumcunque laboravi divellere. ut modo multum inde doleam, quod tantam crudelitatem in eos exercuerim. Nam ego existens in Christo, id est in corpore Christi, dico vobis veritatem ita puram quod non mentior sicut nonnulli qui dum vera loquuntur, intermiscunt falsa. Et quia nonnulli vera loqui videntur, qui non ita habent in corde, adjungo me veritatem ore proferre, *testimonium perhibente mihi conscientia mea*, quia, etsi vos non creditis, mea tamen conscientia mihi testis est quia verum dico; et testatur hoc non in sua auctoritate, sed in Spiritu sancto, qui facit eam hoc testari. De hoc dico tam firmam veritatem, quia tristitia est mihi non exigua, sed magna et dolor non horarius, sed continuus cordi meo. Et cur est mihi nunc tanta tristitia et tam longus animi dolor? Inde scilicet quia ego ipse qui modo sum tantus apostolus, ante fidem non solum volebam, sed et optabam esse anathema, id est alienatio aliorum a Christo, ut alienatos et divisos vel separatos a Christo facerem illos. Et hoc optabam pro fratribus meis, id est pro Judæis, qui mei sunt fratres in lege; quorum legem volebam defendere, qui sunt cognati mei secundum carnem, et ideo amplius juvandi erant, quia omnium commoda quærere debemus, sed maxime consanguineorum. Sed ego male juvabam eos, quia impediebam illos, ne in Christum crederent, qui sunt Israelitæ, id est de genere Israel descendentes. Vel aliter: Affectum suum erga Judæos ostendit Apostolus, dicens et juramento confirmandum, se eorum causa plurimum contristari, quod Christo credere noluerant, qui eis fuerat repromissus et ad eos venit missus. Tristitia, inquit, est mihi non levis, sed magna et dolor continuus cordi meo, non qui ad horam pungat et transeat, sed qui jugiter maneat. Doleo genus meum beneficio Christi privari. Optabam enim, id est jamdudum optare cœpi ego ipse esse anathema, id est alienatus a Christo pro fratribus meis Judæis, ut ipsi adhærent Christo; optabam perire, ut illi salvarentur. Juxta hunc consue-

et beatus Michæas, cum multa mala Judæis ventura prophetaret, ait: « Utinam non essem vir habens spiritum, et mendacium potius loquerer. » (Mich. II.) Amore enim gentis suæ voluit se alienum esse a Spiritu sancto et falsiloquum, dummodo plagas illas et captivitates et exitia, quæ ipse sua vaticinatione prædixerat, plebs Judaica evaderet. Sicut ergo Michæas a Spiritu sancto alienus fieri voluit præ amore plebis suæ, ita Paulus anathema, id est alienus optavit fieri præ nimietate dilectionis fratrum suorum. Par est enim alienum esse a Spiritu sancto, et alienum a Christo. Moyses quoque pro eodem populo mirabiliter intercessit, objiciens semetipsum pro eis, dicens: « Si dimittis eis peccatum, dimitte; si autem non vis, dele me de libro tuo, quem scripsisti (Exod. xxxii). » Ubi demonstratum est, intercessio sanctorum quantum pro illis valeat apud Deum. Securus enim Moyses de justitia Dei quæ eum delere non posset, impetravit misericordiam, ne illos quos juste posset, deleret. Intercessit ergo paratior deleri pro ipsis quam ipsos, sciens apud misericordiam se id agere, quæ quoniam nullo modo deleret ipsum, etiam illis parceret propter ipsum. Sed si consideremus Moysis vocem intercedentis, perspicimus eundem et Moysis et Pauli erga creditum sibi gregem affectum. « Pastor enim bonus ponit animam suam pro ovibus (Joan. x). » Et hoc ipsum est dicere: « Optabam anathema esse a Christo; » et: « Dele me de libro quem scripsisti. » Qui enim deletur de libro Dei, anathema fit a Deo. Simulque cernamus Apostolum, quantæ charitatis in Christo sit, ut pro illo cupiat mori et solus perire, dummodo omne in illum credat hominum genus. Perire autem non in perpetuum, sed in præsentiarum. Vult perire in carne, ut alii salventur in spiritu; suum sanguinem fundere, ut multorum animæ conserventur. Anathema enim interdum occisionem sonat, sicut et hoc loco. Optat ergo pro salute fratrum anathema esse, imitari volens Dominum, qui et ipse, cum non esset maledictio, pro nobis factus est maledictio. Scriptum enim de illo fuit: « Maledictus a Deo qui pendet in ligno (Deut. xxi; Gal. iii). » Et sicut Christus fuit maledictus a Deo, sic Apostolus anathema a Christo. Hoc est etiam hic anathema, quod ibi maledictus; et hoc est hic a Christo, quod ibi a Deo. Christus enim in cruce pendens fuit maledictus, id est morti addictus a Patre, et Paulus in passione martyrii fuit anathema a Christo, id est alienatus atque privatus vita, volente Christo. Optabam enim anathema esse a Christo pro fratribus meis, ut illi non essent a Christo alieni, qui sunt cognati mei, non secundum spiritum, sed secundum carnem, quia in spiritu sunt a me alieni. Affectum suum, ut diximus, circa illos ostendit, et multa de illis præconia enumerat, ut omnibus pro illis dolorem incutiat, quia tanto peiores sunt etiam gentibus. Quorum, inquit, est adoptio filiorum, de quibus quondam Dominus loquebatur: « Filius meus primogenitus

a Israel (Exod. ii); » et: « Filios enutrivit et exaltavit (Isa. i), » et quorum gloria, ut de cunctis gentibus eligerentur in peculiarem populum Dei, et quorum testamenta, unum in littera, alterum in spiritu, ut qui prius in carne servierant cæremonialis legis abolitis, postea servirent in spiritu mandatis Evangelii sempiterni. Testamenta enim ad illos præcipue pertinent, quia et Vetus Testamentum illis est datum, et Novum in Veteri figuratum, et quorum est legislatio, id est Veteris ac Novi Testamenti datio, quia in Veteri datum est eis et Novum. Vel legislatio, id est Mosaicæ legis datio, et quorum est obsequium, id est executio mandatorum cælestium, et cultus Dei, et quorum sunt promissa divina, ut quidquid promissum est patribus, compleatur filiis, nisi culpa eorum obstiterit. Multæ enim de Christo promissiones factæ sunt patribus eorum, quorum patres sunt illi nominatissimi, quos Vetus Scriptura laudat. et quod majus est omnibus, ex quibus est Christus secundum carnem de Maria virgine natus. Quorum patres, ecce laus a prioribus; et ex quibus Christus, ecce laus a posterioribus. Ex eis, id est ex genere eorum, est Christus secundum carnem, qui factus est ex semine David secundum carnem, sed ex natura suæ divinitatis, in qua est æqualis Patri, est ipse super omnia Deus benedictus in sæcula. Amen. Per hoc enim quod Deus super omnia dicitur, Deus naturaliter esse ostenditur. Deus enim aliquando nuncupative, aliquando vero essentialiter dicitur. Nuncupative, sicut Moysi dictum est: « Ecce constitui te Deum Pharaonis (Exod. vii). » Essentialiter sicut ait: « Ego sum Deus Abraham et Deus Isaac et Deus Jacob (Exod. iii). » Qui vero nuncupative dicitur Deus inter omnia, qui autem essentialiter dicitur Deus, super omnia. Ut ergo Paulus ostendere Christum naturaliter Deum, non hunc Deum tantummodo, sed super omnia Deum memoravit. Quia et electus quisque, sicut præmisimus, vel in exemplo prærogando positus, dici Deus potest, sed inter omnia, quantum nuncupative; Christus autem Deus super omnia, quia naturaliter Deus. Et hoc Amen, id est vere. Et propterea est dolor cordis Apostolo, quia iste tantus ac talis non recipitur a Judæis, de quorum stirpe generatus est. Et in quibus tanta fuerunt bona, dolet cur tanta nunc mala sint. Nihilominus tamen laudat iudicii veritatem, ne sententia Dei in propinquos et fratres suos displicere videatur, et vel austera esse vel nimia. Nam subdit:

« Non autem quod exciderit verbum Dei. Non enim omnes qui ex Israel, hi sunt Israelitæ: neque qui semen sunt Abraham, omnes filii, sed in Isaac vocabitur tibi semen. Id est non qui filii carnis, hi filii Dei; sed qui sunt promissionis, æstimantur in semine, promissionis enim verbum hoc est: Secundum hoc tempus veniam, et erit Saræ filius. »

Doleo, inquit, de perditione istorum, sed non ideo quod exciderit verbum Dei, id est non propterea quod evanuerit promissio Dei, qui semen Abraham

salvari promisit. Non ob hoc tamen contristor, quod A exciderit verbum Dei, quia non excidit, non irritum est deductum, sed ratum et stabile manet, licet quidam illorum non crediderint, quia verbum promissionis non est factum Judæis tantum, sed electis. *Non enim omnes qui sunt ex Israel*, id est ex carnali stirpe Jacob, *hi sunt Israelitæ*, id est per meritum fidei et justitiæ in Israelitica sorte numerandi; neque quia semen sunt secundum carnem, idcirco omnes filii sunt. Multi enim ex eo carnaliter procreati sunt, qui non censentur ejus filii, sicut omnes quos Cethura peperit vel filius Agar. Itaque verbum Dei excidere, esset promissa non impleri. Sed volens Apostolus ostendere quia non excidit verbum divinæ promissionis, non enim omnes, inquit, qui ex Israel, hi sunt Israelitæ: *neque qui semen sunt Abraham, omnes filii, sed in Isaac vocabitur tibi semen*. Hic enim declarat illos, qui non crediderunt, non esse Israelitas vel filios Abraham, nec Deum promississe vel decrevisse illos fore salvandos. Et ideo incipit ratiocinari, quare alto et justo judicio Dei, repulsis illis gentes sint intronissæ. Non omnes illi sunt filii, et idcirco habituri hæreditatem aut salutem, sed in Isaac, inquit, vocabitur tibi semen, *non qui filii carnis, hi sunt filii Dei: sed qui filii sunt promissionis, æstimantur in semine*. In Isaac quippe, qui Abraham promissus est filius, præfigurati sunt; non qui se justos ipsos, sed quos Deus fuerat ipse facturus. Propter quod et filii promissionis dicuntur, ac per hoc ipsi filii promissionis, ut sint semen Abraham, in Isaac vocantur, id est in Christum, vocante gratia, congregantur. Filii enim carnis pertinent ad terrenam Jerusalem, quæ servit cum filiis suis; promissionis autem filii ad eam quæ sursum est, liberam matrem nostram æternam in cælis. Illi ergo vere sunt filii Abraham, qui gratuito Dei munere sicut Isaac promittuntur, et gratuito ejus munere boni efficiuntur. Nam sicut Isaac non meruit, ut nasciturus promitteretur, sic et isti. Et vere promissus est Abraham filius. Nam *hoc est verbum promissionis*, id est in hoc verbo promisit Deus: *Secundum hoc tempus veniam*, id est revoluto anno, ostendam me tibi adesse in effectu virtutis, et erit tunc *Saræ filius* in utero. Secundum hoc, inquit, tempus veniam, ut verbi gratia, si tunc ver erat vel autumnus, sequenti anno veniret in vere vel autumnino. In hac sententia contendit Apostolus ostendere, quomodo Isaac non filius sit carnis, sed Filius Dei, rediens ad ea quæ de ipso in Genesi scripta sunt. *Promissionis*, inquit, *verbum*, etc. Non ergo per ordinem nativitatis carnalis, Isaac natus est, quippe cum et Abraham emortui jam corporis haberetur, et vulva Saræ esset emortua, sicut superius ostensum est; sed per virtutem ejus qui dixit: *Secundum hoc tempus veniam, et erit Saræ filius*, id est habebit Sara filium. Merito igitur non carnis, sed Dei filius esse dicitur, qui et adventu et sermone Dei nascitur, ac propterea spirituales Ecclesiæ filios aptissime præsignat.

« Non solum autem, sed et Rebecca ex uno concubitu habens Isaac patris nostri (*Gen. xxv*). Cum enim nondum nati fuissent, aut aliquid egissent boni aut mali, ut secundum electionem propositum Dei maneret, non ex operibus, sed ex vocante dictum est ei: Quia major serviet minori, sicut scriptum est: Jacob dilexi, Esau autem odio habui (*Malac. 1*). »

Isaac qui promissus est, utique nullis operibus promeruerat ut nasciturus promitteretur, ut in Isaac vocaretur semen Abraham, id est illi pertinerent ad sortem sanctorum, quæ in Christo est, qui se intellexerent filios promissionis, non superbientes de meritis suis, sed gratiæ vocationis deputantes, quod cohæredes essent Christi. Cum enim promissum est ut essent, nihil utique meruerunt qui nondum erant. Promissus, inquam, est Isaac. Sed non solum ille promissus est, qui reprobato Ismaele solus possideret hæreditatem patris, sed et Rebecca promissionem similem divinitus accepit, *habens in utero geminos ex uno concubitu Isaac patris nostri* quem ut patrem habemus imitari. Ex uno concubitu habuit eos Rebecca, ut non solum de suis, neque de parentum meritis, sed nec de ipsius quidem unius patris mutata sorte in melius voluntate gloriaretur Jacob, dicens ideo se a Creatore dilectum, quia pater ejus quando eum seminavit, melioribus laudabilioribusque moribus fuit. *Ex uno, inquit, concubitu*. Unum tunc ad seminandos eos meritum patris, unum ad concipiendos meritum matris. Simul enim ambo sunt uno tempore concepti. Promissio facta Saræ vel Abraham, ostendit quod nullus propter genus salvatur; ista Rebecæ, quod propter nullum meritum suum vel parentum aliquis eligitur, sed sola gratia. Vel ne quis diceret quod Ismael ex ancilla concubina genitus non debuit hæres fieri, sed Isaac ex libera uxore natus, quod scilicet ille per indignitatem matris sit hæreditate privatus, et iste non per Dei gratiam, sed per matris meritum et dignitatem sit hæres effectus, proponit Apostolus exemplum de aliis duobus, id est de Esau et Jacob, in quibus unum fuit meritum patris et matris, et ex quibus alter reprobatus est, alter vero sola gratia electus. Et hi duo sicut duo filii Abraham, tenuerunt figuram reprobatorum et salvandorum. Diximus quod Rebecca geminos in utero portans, accepit divinitus promissionem, in qua declaratum est, quod alter eorum reprobandus esset, et alter eligendus. Nam dictum est ei, quia major serviet minori. Et tunc facta est hæc promissio, quando nec boni nec mali quidquam adhuc fecerant filii. *Cum enim nondum nati fuissent, aut aliquid egissent boni vel mali*, quia et in utero videri possent aliquid meruisse luctando, dictum est ei, id est matri, quia « major serviet minori (*Gen. xxv*). » Ideo tunc dictum est, *ut propositum*, id est præfinitio vel præordinatio Dei, *maneret*, id est impleretur et rata constaret *secundum electionem*, id est secundum gratiam, qua eligit quos eligit. Et dictum est, *non ex operibus patris vel matris*,

nec ex futuris operibus filiorum, sed ex vocante, id est ex Deo qui per gratiam vocabat Jacob. Nam si futura opera vel bona hujus vel mala illius, quæ Deus utique præsciebat, vellet Apostolus intelligi, nequaquam diceret, non ex operibus, sed diceret, ex futuris operibus, *dictum est ei*, inquit, *quia major id est Esau qui erat primogenitus, serviet minori*, id est Jacob. Hic jam servitus unius, et libertas alterius prænuntiata est. Et utique servitus actionem iniquitatis hoc loco designat, libertas vero actionem justitiæ. Nam si ad corpoream servitutem respiciamus, magis videbitur Jacob illi servisse, quam ipse Jacob. Jacob quippe de Mesopotamia rediens, obtulit ei multa munera, et dominum eum vocavit, et humiliter adoravit. Quomodo igitur servivit ei Esau, nisi affligendo eum et premendo ac persequendo? Unde Salomon ait: « Qui stultus est, serviet sapienti (Prov. xi). » Quia contra sapientis vitam dum stultus præeminens terrorem potestatis exercet, dum hunc laboribus fatigat, contumeliis lacerat, profecto hunc ab omni vitiorum rubigine urendo purgat. Stultus ergo sapienti et dominando servit, quem ad meliorem statum premendo provelit. Et juxta hunc modum Esau fratri suo servivit. Secundum litteram autem Esau, id est populus Idumæorum, qui de Esau descendit, servivit minori, id est subditus fuit populo Judaico. Allegorice vero Esau, id est populus Judæorum, qui fuit primogenitus, servivit minori, id est populo Christianorum, qui secutus est. In qua sententia beatus Apostolus etiam testimonium Malachiæ longe posterioris assumpsit, ut intelligeremus hoc apertum postea per prophetam, quod antequam illi nascerentur, erant Judæi prædestinatione per gratiam. Ita, inquit, dictum est, « quia major serviet minori » sicut scriptum est, id est sicut in Genesi legitur, et sicut Malachias (Malac. i) longe post de hac re antiquum Dei consilium declaravit, dicentis: *Jacob dilexi, Esau autem odio habui*. Hoc enim quod dicitur, sicut scriptum est, et ad librum Genesis, et ad scripturam Malachiæ refertur. Quid vero Deus diligebat in Jacob antequam fecisset aliquid boni, nisi gratuitum misericordiæ suæ donum? Quid autem oderat in Esau antequam natus fecisset aliquid mali, nisi originale peccatum? Nam nec in illo diligeret justitiam, quam nullam ille fecerat; neque in isto odisset naturam, quam bonam ipse fecerat. Nam antequam nascerentur, nihil boni vel mali fecerant. Quo dicto declaratur quia nec in utero peccaverunt, aut justitiam fecerunt, nec in cælo animæ ipsorum ante corporum societatem conversate sunt, secundum fabulas gentilium. Nam si animæ illorum in cælo fuissent antequam corporibus sociarentur, fecissent utique ibi aliquid boni vel mali. Sed nihil fecerant. Unde patet, nec illorum animas in cælo unquam ante nativitatem fuisse. Nihil egerant, et quantum ad originale peccatum attinet, ambo pares erant, quantum autem ad proprium ullius eorum, nullum erat. Et tamen unus eorum eligitur, alter reprobat; unus succe-

dit in hæreditatem, alter exhæredatur. Non facit Deus populum suum de Esau, sed facit de Jacob. Semen unum, diversi qui concepti sunt; unus uterus, diversi qui nati sunt. Dum essent in utero, dictum est matri, « quia major serviet minori; » et dictum, non ex operibus, sed ex vocante, id est ex eo qui vocando ad fidem gratis justificat impium, ut secundum electionem propositum Dei maneret, non meritum hominis anteiret. Non enim dicit electionem voluntatis humanæ vel naturæ, compar enim esset in utroque mortis damnationisque conditio, sed electionem procul dubio gratiæ, quæ non invenit eligendos, sed facit. Propositum justificationis manet non secundum debiti, sed secundum gratiæ electionem, qua eligendos facit Deus, non invenit, quia nequaquam invenit opera bona in hominibus quæ eligat, sed facit ut ipsi faciant opera quæ possit eligere. Nemo autem eligitur, nisi jam distans ab illo qui rejicitur. Et propterea electionem præcedit justificatio. Et tamen ex his duobus antequam aliquid egissent, alter electus est, et alter repulsus, ut intelligat Jacob ex illa massa originalis iniquitatis, ubi fratrem, cum quo habuit communem causam, videt per justitiam meruisse damuari, non nisi per gratiam se potuisse discerni.

« Quid ergo dicemus? Nunquid iniquitas apud Deum? Absit! Moysi enim dicit: Miserebor cui miserebor, et misericordiam præstabo cui miserebor (Exod. xxxiii). Igitur non volentis neque currentis, sed miserentis est Dei. Dicit enim Scriptura Pharaoni, quia in hoc ipsum excitavi te, ut ostendam in te virtutem meam, et annuntietur nomen meum in universa terra (Exod. ix). Ergo cui vult miseretur, et quem vult indurat. »

Cum rem stupendam proposuisset Apostolus, quomodo de nondum natis, nec aliquid agentibus boni vel mali, recte dici potuerit, quod unum Deus dilexerit, et alterum odio habuerit, ipse sibi objecta quæstione motum exprimens auditoris. Quid ergo dicemus, inquit, Nunquid iniquitas est apud Deum? Absit! Vidit enim quod his auditis humana posset infirmitas, vel ignorantia cogitare, et eandem quæstionem sibi proponit. Si, inquit, Esau et Jacob necdum nati erant, nec aliquid boni aut mali egerant, ut vel promererentur Deum vel offenderent, et electio eorum atque abjectio, non merita singulorum, sed voluntatem eligentis et abjicientis ostenderet, ergo quid dicemus? Nunquid inferemus quod iniquitas sit apud Deum, qui alterum eligit, et alterum abjicit, cum uterque sit æqualis meriti, imo nullius meriti? Absit ut apud eum sit iniquitas! Et quare absit? Quia hunc per misericordiam eligit, illum per justitiam reprobat, in quo neutro est iniquitas. Hunc per misericordiam, quia ita, dicit Moysi: Miserebor ut credat, cui miserebor, ut eum vocem: et misericordiam præstabo, ut bene operetur, cui misertus fuero ut credat. Vel miserebor vocando, cui miserebor prædestinando; et misericordiam præstabo, vitam perennem dando, cui miserebor bona

opera largiendo. Vel miserebor inspirando bonam voluntatem, cui miserebor secundum prædestinationem; et misericordiam præstabo secundum bonæ voluntatis executionem, dando gratiam ad omne opus bonum peragendum, cui miserebor peccata dimittendo. In quibus verbis docemur, ex illa massa primi hominis, cui mors merito debetur, non ad merita hominum sed ad Dei misericordiam pertinere, quod quisque liberatur; atque ita non esse iniquitatem apud Deum, quia neque remittendo, neque exigendo quod debetur, injustus est. Ibi enim gratuita est indulgentia, ubi justa posset esse vindicta, ut hinc evidentius appareret a poena debita liberato et gratis justificato, quantum beneficii conferatur, quod alter æqualiter reus sine punientis iniquitate punitur. Non enim iniquus est Deus, sive iudicium pœnale ingerat digno, sive misericordiam præstet indigno. Ambo itaque gemini natura filii iræ nascebantur, nullis quidem operibus propriis sed originaliter ex eodem vinculo damnationis obstricti. Sed qui dixit: Miserebor cui miserebor, Jacob dilexit per misericordiam gratuitam, Esau autem odio habuit per iudicium debitum. Quod cum deberetur ambobus, in altero agnovit alter non de suis distantibus meritis sibi esse gloriandum, quod in eadem causa supplicium non incurrit, sed de divinæ gratiæ largitate. Similiter et omnis quicumque misericordiam consequitur, de propriarum virtutum meritis gloriari prohibetur, dicente Domino: *Miserebor cui miserebor*. Non enim ait: Miserebor talibus vel talibus, sed: Cui miserebor, ut neminem præcedentem bonis operibus suis misericordiam tantæ vocationis meruisse demonstret. In eo autem quod addidit, et misericordiam præstabo cui miserebor, intelligendum fortasse est, quod aut ipsius misericordiæ suæ firmitatem Deus ista repetitione monstravit, sicut: Amen amen, sicut, Fiat fiat, sicut repetitio somnii Pharaonis, pluraque similia: aut in utrisque populis, id est gentibus et Hebræis, hoc modo prænuuntiavit misericordiam se esse facturum. Et quando quidem nullo præcedente merito Deus per misericordiam elegit Jacob, et sic cæteros, igitur non volentis neque currentis, id est operantis, est ut perveniat ad vitam, sed miserentis est Dei qui præstat illi misericordiam. Si hoc, inquit, recipimus ut faciat Deus quodcumque voluit, et absque merito et operibus, ut eligat aliquem vel condemnet, igitur non est volentis neque currentis hominis, sed miserentis Dei. Non ergo ideo misertus est Deus, quia voluit et cucurrit Jacob, sed ideo voluit et cucurrit Jacob, quia misertus est Deus. Paratur enim voluntas a Domino, et a Domino gressus hominis diriguntur, et viam ejus volet (*Psal. xxxvi*). Dein quia propter Jacob dicta est ista sententia generalis (*Psal. xcvi*), non volentis neque currentis, sed miserentis est Dei, datur etiam exemplum de Pharaone propter id quod dictum est; *Esau autem odio habui*, et subditur: *Dicit enim Scriptura, etc.* Esau per justitiam Deus reprobavit, quia hoc dicit Scriptura, indu-

agens Deum loquentem Pharaoni per Moysen, quia in hoc ipsum excitavi te, ut ostendam in te virtutem meam. Non feci te malum, sed excitavi. Malus enim eras, sed quasi sopitus. Ego autem ostendens tibi signa, et mandans ut populum meum dimitteres, excitavi te in eandem malitiam ut deterior fias. Hoc enim justum est, ut qui in sordibus est, sordescat adhuc (*Apoc. xii*). Neque hoc est inutile, quod excitatus es, sed ut in te obdurato et resistente ostendam virtutem meam, multiplicando signa mea, et ad ultimum te submergendo atque populum meum potenter liberando. Et annuntietur nomen meum in universa terra, id est fama et gloria nominis mei resonet ubique terrarum, et omnes gentes notitiam mei discant, fama virtutis operum meorum ubique divulgata, scilicet quomodo valida manu populum meum eduxerim de medio inimicorum suorum, et ipsos a tergo persequentes in mari Rubro submerse- rim, ut nec unus suppresset. Post hæc ad utrumque, id est ad illud quod dictum est de Jacob, et ad illud quod de Esau vel de Pharaone, concluditur. Quando quidem, inquit, Deus sola misericordia Jacob elegit, Esau autem juste reprobavit, vel Pharaonem excitavit in perniciem ipsius, quia utrumque sic voluit, ergo cui vult miseretur, et quem vult indurat. Miseretur utique gratuito dono, indurat autem justissimo merito. Miseretur secundum gratiam quæ gratis datur, non meritis redditur; indurat autem secundum iudicium quod meritis redditur. Miseretur magna bonitate, indurata autem nulla iniquitate, ut nec liberatus de suis meritis gloriatur, nec damnatus nisi de suis meritis conqueratur. Sola enim gratia Redemptoris discernit a perditis, quos in unam perditionis concreverat massam, ab origine ducta causa communionis. Cum ergo totus mundus justissime posset damnari, Deus cui vult miseretur, et quem vult indurat, id est non miseretur ei, nec emollit cor ejus, nec tamen injusta est ejus voluntas volentis alii misereri, alii que non volentis. Quis enim dicat aliquem potentem injuste agere, si ex duobus reis unum juste velit interimere, et alterum misericorditer liberare? Sic et Deus in nullo potest reprehendi, sive damnet, sive misereatur. Meritum enim misericordiæ nullum est, meritum autem indurationis est peccatum totius massæ damnatæ. Nec indurat Deus impartiendo duritiam, sed non impartiendo misericordiam, sicut nec digni sunt. Quod facit æquitate occulta, ab humanis sensibus remota.

« Dicis itaque mihi: Quid adhuc quæritur? Voluntati enim ejus quis resistit? O homo, tu qui es qui respondeas Deo? Nunquid dicit figmentum ei qui finxit se, quid me fecisti sic? (*Isa. xlv*; *Jer. xviii*). Annon habet potestatem figulus luti ex eadem massa facere aliud vas in honorem, aliud vero in contumeliam? »

Ex prædicta sententia prævidit Apostolus moveri audacem infirmitatem eorum, scilicet qui secundum conjecturas cordis humani, inscrutabilem altitudinem iudiciorum Dei cogitare conantur, et de culpa

suis se excusare nituntur, et hanc sibi ex adverso opponens, ait : Quoniam dixi, quia Deus cui vult miseretur, et quem vult indurat, itaque, id est ergo dicis, id est objicis, mihi : Quid adhuc queritur Deus de nobis? Nam voluntati ejus quis resistit? Hoc est dicere : Quid de nobis sit querela, quod Deum offendamus male vivendo, cum illius voluntati nemo possit resistere, qui nos obduravit misericordiam non præstando? Conqueritur enim Deus sæpe de hominibus, sicut per innumerabiles apparet Scripturarum locos quod nolunt credere et recte vivere (*Luc. 1*). Unde et fideles ac facientes voluntatem ejus, conversari dicuntur sine querela, eo quod de illis non queratur Scriptura. De diversis autem queritur. Sed cur, inquit, queritur atque causatur nos non vel bona fecisse vel mala fecisse, cum in potestate illius sit et voluntate, absque bonis vel malis operibus, vel eligere aliquem vel abjicere, præsertim cum voluntati ejus humana fragilitas resistere non possit? Cur querelam faceret de peccatis hominum, cum nequeat vitare quod ipse vult? Sic solent carnales in voluptatibus viventibus adversus Deum murmurare, et voluntati ejus, non suo vitio quod mali sunt, deputare, validamque contra eum talibus verbis calumniam parare. Quos redarguit Apostolus ab hujusmodi præsumptione, et quæstionem eorum brevi sermone dissolvit, dicens : *O homo, tu quis es qui respondeas Deo?* Et est sensus : Et ex eo quod respondere vis, Deo calumniam facis, et quia de Scripturis tanta perquiris, ut loquaris contra Deum, et justitiam voluntatis ejus inquiras, ostendis te esse liberi arbitrii, et posse recte agere si volueris. Quidam autem stulti putaverunt hoc loco Apostolum in responsione defecisse, et inopia reddendæ rationis repressisse contradictoris audaciam. Sed magnum habet pondus quod dictum est : *O homo, tu quis es, etc.*, et in talibus quæstionibus ad suæ capacitatis considerationem revocare hominem verbo quidem brevi, sed re ipsa magna, est redditio rationis. Si enim hæc non capit, quis est qui respondeat? Si autem capit magis, non invenit quid respondeat. Videt igitur, si capit, universum genus humanum tam justo judicio divino in apostatica radice damnatum, ut etiam si nullus inde liberaretur, nemo recte Dei posset vituperare justitiam; et qui liberantur, sic oportuisse liberari, ut ex pluribus non liberatis atque in condemnatione justissima derelictis, ostenderetur quid commerisset universa conspersio, et quo etiam istos debitum judicium Dei duceret, nisi eis indebita misericordia subvenisset, ut volentium de suis meritis gloriari omne os obstruatur, et qui gloriatur, in Domino gloriatur. *O homo, tu quis es qui respondeas Deo?* Quis sit ille, attende; quis sis tu, attende. Ille Deus est, tu homo. Sed justitiam loqui videris tu, et fons ille justitiæ siccatus est? Satis sit interim tibi ex fide adhuc viventi, et nondum cernenti quod perfectum est, sed ex parte scienti, nosse vel credere quod neminem Deus liberet nisi gratuita misericordia, et neminem damnet nisi æquissima justitia. Cur autem

illum potius quam illum liberet, aut non liberet, scrutetur qui potest judiciorum ejus tam magnum profundum, sed caveat præcipitium. Tu enim homo quis es ut respondeas Deo? Respondere enim Deo non posse convincitur, qui homo nominatur; quia per hoc quod de humo sumptus est, judicia superna discutere dignus non est. *O homo*, id est carnalis pertinens ad Adam, tu lutens, *quis es*, id est cujus valentiæ, *qui respondeas Deo*, id est qui rationibus contra Deum agas, quod injuste eligat et reprobet; sive causas judiciorum ejus inquiras, cur istum eligat et illum reprobet. Deus per opera sua quodammodo te interrogat, et tu si causas et rationes operum ejus intellexeris, respondebis ei, quia consilium voluntatis ejus intelliges. Sed tu homo quis es ut hoc facias? Excede hominem, excede carnalitatem, excede mores et sensus humanos, si vis hoc attingere. Esto prius unus ex illis, de quibus dicitur : « Sapientiam loquimur inter perfectos (*I Cor. 11*), » et tunc demum recte et non præpostere audies, si qua sunt de animarum meritis, et de gratia vel justitia secreta omnipotentis Dei. Peccatores enim credere jubentur, ut a peccatis credendo purgentur. Nesciunt enim quod recte vivendo visuri sunt. Quapropter cum videre non possint, nisi recte vivant, nec recte vivere valeant nisi credant, manifestum est a fide incipiendum, ut præcepta quibus credentes a sæculo hoc avertuntur, cor mundum faciant ubi videri Deus possit. Ideo recte dicitur hominibus in vetustate vitæ manentibus, et propterea tenebrosi oculum animi gerentibus, *o homo tu quis es, etc.* Non enim sanctos hoc loco Apostolus prohibuit a quærendo, de quibus ait : « Spiritalis autem judicat omnia (*ibid.*), » sed luteos atque terrenos homines, qui adhuc imaginem illius portant, qui primus factus est de terra terrenus; et quia ei a quo factus est, obtemperare noluit, in id lapsus est, unde factus. Talibus ergo dicitur : *O homo, tu quis es qui respondeas Deo?* Et additur : *Nunquid dicit figmentum ei qui se finxit, quare sic me fecisti?* Ubi ostenditur quasi a simili et etiam a minori, quia Deus nihil injuste facit, si unius miseretur et ab alio misericordiam avertit. Si, inquit, figmentum formatum in immundum usum, non potest accusare de justitia fictorem suum, cum figmentum multo dignius opus sit quantum ad figulum, quam tu homo ad Deum; tum ille qui verus figulus, id est creator et artifex et formator noster est, habet potestatem salva justitia cujus vult misereri, et quem vult indurare. Sed tu quandiu figmentum es, nondum perfectus es filius, quia nondum habuisti plenissimam gratiam, quia nobis data est potestas filios Dei fieri (*Joan. 1*), ut possis audire. « Jam non dicam vos servos, sed amicos (*Joan. xv*), » et tamen jam vis respondere Deo et nosse consilium ejus. Qui si hominis tibi æqualis consilium nosse voluisses, impudenter faceres, nisi prius in amicitiam recipereris. Si ergo consilium Dei nosse vis, prius stude per meritum sanctitatis amicus ejus fieri, ut non sis luteum figmentum, sed

vir spiritalis. Nam ut manifestum sit, non sanctificato Spiritui, sed carnali luto ista dici, mox subditur : *Annon habet potestatem figulus luti, ex eadem massa facere aliud vas in honorem, aliud in contumeliam?* Ex quo enim in paradiso natura nostra peccavit, jam a Dei providentia non secundum cœlum, sed secundum terram, id est non secundum spiritum, sed secundum generationem mortalem formamur, et omnes ex una massa luti facti sumus, quod est massa peccati. Cum ergo meritum peccando amiserimus, et misericordia Dei remota, nihil aliud peccantibus nisi æterna damnatio debeat, quid sibi homo de hac massa vult, ut Deo respondeat et dicat : *Quare sic me fecisti?* Hæc massa si esset utique media, ut sicut nihil boni, ita nec mali aliquid mereretur, non frustra videretur iniquitas, ut ex ea fierent vasa in contumeliam. Cum vero per liberum arbitrium primi hominis in condemnationem universa defluerint, procul dubio quod ex ea fiunt vasa in honorem, non ipsius justitiæ, quæ gratiam nulla præcessit, sed Dei misericordiæ attribuendum est; quod vero in contumeliam, non iniquitati Dei, quæ nulla est, sed iudicio deputandum est. Qui figulus est, cum fragiles, infirmos et terrenos facit. Et ex eadem massa, quæ tota in Adam periit, facit secundum voluntatem suam alia vasa in honorem per misericordiam, alia in contumeliam per iudicium.

« Quod si volens Deus ostendere iram, et notam e facere potentiam suam, sustinuit in multa patientia vasa iræ apta in interitum, ut ostenderet divitias gloriæ suæ in vasa misericordiæ, quæ præparavit in gloriam, quos et vocavit nos non solum e ex Judæis, sed etiam ex gentibus, sicut in Osee e dicit : Vocabo non plebem meam, plebem meam; e et non misericordiam consecutam, misericordiam e consecutam. Et erit in loco ubi dictum est eis : e Non plebs mea vos ibi vocabuntur filii Dei vivi. »

Ostensum superius est, quia, etsi Deus nihil boni det, non tamen iniquus est, nec potest ei homo respondere. *Quod id est, sed ipse quibusdam etiam bona dedit, quid ei respondebis? Quid dices, si Deus bona illis impendit, scilicet cum essent apti in interitum, sustinuit eos in multa patientia, et interim dum expectaret, ostendit multis indicibus, vel ipsos nonnunquam puniendo, vel alios coram eis, futuram iram ut sibi caverent, et in hoc quod sustinuit et iram ostendit, notificavit potentiam, quia per malos purgat bonos? Quasi dicat : Potes dicere, quod juste subtrahit gratiam, et damnat illos, qui ita expectati noluerunt respicere, sed hac gratia abusi sunt, si volens Deus ostendere in perditis iram reddendo illis vindictam, et notificare potentiam suam bene utendo malis, quia tam potens est ejus bonitas, ut bene utatur etiam malis, sustinuit in multa patientia, id est diutissime patienter toleravit vasa iræ, id est homines qui pleni ejus ira sunt; vasa dico apta in interitum, id est idonea æternæ morti, si hoc fecit Deus, non est inde accusanda ejus patientia, sed eorum*

*A pertinacia, qui diu expectati noluerunt converti. Nam ideo sustinuit eos, cum sciret non convertendos, ut fierent inexcusabiles, et per eorum malitiam purgarentur boni. Idecirco sustinuit eos, ut in futuro sæculo ostenderet divitias gloriæ suæ, id est largifluas opes beatitudinis æternæ, venturas in vasa misericordiæ, id est in electos homines plenos misericordiæ ejus quæ electa vasa ipse præparavit in gloriam, cum e contrario vasa iræ sint apta in interitum cadere. Quia quod a vasis iræ exigit justitia punientis, hoc vasis misericordiæ dimittit pietas liberantis, et insuper gloriam ejus largitur gratia salvantis. Notandum autem, quia in eo quod superius ait, figulum habere potestatem ex eadem massa facere aliud vas in honorem, aliud in contumeliam, ostendit mystice Creatorem non posse reprehendi, si ex eadem humanæ naturæ massa alios creat ad honorem sanctitatis, alios autem sic creat, ut abire sinat in contumeliam nequissimæ operationis et justæ damnationis. In eo autem quod nunc dicitis, quod si volens Deus, etc. Declarat quia non potest accusari, si diu viventes in carne malos patienter tolerat, ut eos in malitia perseverantes postmodum acerbius puniat; et bonos eorum pravitate vexari permittit, ut eis pro patientiæ merito majorem gloriæ coronam reddat. Si eos, quos indurat patienter sustinet ut eos justius damnet, postquam diu sustinuerit, non ejus accusanda est patientia et infinita clementia, sed eorum duritia, qui bonitate ejus in perditionem abutuntur. Alioqui unus est solis calor, et secundum essentias subjacentes alia indurat, alia liquefacit, alia dissolvit, alia constringit. Liquatur enim cera, et induratur lutum, et tamen caloris non est diversa natura. Si et bonitas Dei atque clementia vasa iræ, id est populum Judæorum et ceteros reprobos indurat; vasa vero misericordiæ, id est electos, liquat. Non potest figmentum fictori suo dicere : *Cur me fecisti sic?* quia et ipse fictor habet potestatem facere ex eodem luto, prout voluerit, alia vasa ad honestos usus, alia ad inhonestos. Quod, id est si Deus volens ostendere iram, sustinuit in multa patientia vasa iræ, *tu quis es qui respondeas Deo?* Voluit Deus ostendere iram suam, non utique animi perturbationem, sicut est quæ circa homines nuncupatur, sed justam vindictam, et notam facere potentiam suam ad quam pertinet damnare iniquos. In hoc quoque demonstratur ejus potentia, quod et malis bene uti optimus possit. Ostendere ergo voluit hanc potentiam, qua bene utitur etiam malis, multa illis naturalia et temporalia bona largiens, eorumque malitiam et comparisonem ad exercendos et admonendos bonos accommodans, ut in eis discant agere gratias Deo, quod ab eis non suis meritis quæ in eadem massa paria fuerunt, sed illius miseratione discreti sunt. Si enim soli hi crearentur ex Adam, qui essent per gratiam redimendi, et præter hos qui ut Judæi in filios adoptantur, nulli alii homines nascerentur, lateret beneficium quod donaretur indignis, quia nullis ex eadem damnabili stirpe veniam-*

tibus debitum supplicium redderetur. Volens itaque Deus ostendere iram et notificare potentiam suam, sustinuit in multa patientia vasa iræ aptata in interitum, id est reprobos homines, in quibus latet iræ ejus, qui aptati sunt in perditionem, longanimitèr toleravit, ut ordinate disponeret eos, et uteretur illis ad instructionem salutis eorum quorum miseretur, ideoque vasa misericordiæ vocantur. Non quod illi essent necessaria sive angelica, sive humana peccata, cui nec justitia creaturæ cujusquam est necessaria, sed ut ostenderet divitias gloriæ suæ in vasa misericordiæ, ne se in bonis operibus tanquam de propriis extollerent viribus; sed humiliter intelligerent, nisi illis Dei gratia non debita, sed gratuita subveniret, id fuisse reddendum meritis suis, quod aliis in eadem massa redditum cernerent. Ita enim quid sibi præstetur dicunt gratis justificati, dum non suo merito, sed gloria ditissimæ Dei misericordiæ discernuntur a damnatis, cum quibus eadem justitia fuerant et ipsi damnandi; cæteri autem homines ad istam gratiam non pertinentes, quorum tamen et animam et corpus Dei bonitas operata est, et quidquid habet ipsa natura præter vitium, quod eidem infixit superbientis voluntatis audacia, propter hoc a Deo (qui illos ita peccaturos, ut æterno essent igne damnandi, sine dubitatione præscivit) creati sunt, ut in his ostenderet liberum desertoris arbitrium sine sui gratia quid valeret, et in eorum justis ac debitis pœnis vasa misericordiæ, quæ non suorum operum meritis, sed gratuita Dei gratia discreta sunt ab illa concreatione, quid sibi collatum esset, addiscerent « ut omne os obstruatur (Rom. 11), » etc. « Qui gloriatur, in Domino gloriatur (I Cor. 1). » Ut ostenderet, inquit, divitias gloriæ suæ, qua glorificatur in sanctis, bene faciens eos operari, in vasa misericordiæ, id est in homines quos replet sua misericordia, quæ, id est quos homines electos præparavit, id est præordinavit ad gloriam æternam. Quos et vocavit scilicet nos, non solum ex Judæis, ut ipsi Judæi volebant, sed etiam ex gentibus, ut ex utrisque fieret unus credentium populus. Ex quo ostenditur, non gentes eligi vel Judæos, sed hominum voluntates divinitus illuminatas. Quos et vocavit nos, pro eo positum est, ac si dixisset: Sicut nos quos vocavit non solum ex Judæis, sed etiam ex gentibus. Superiora enim quasi de Pharaone et Ægyptiis, qui fuerunt vasa iræ, et de filiis Israel qui erant vasa misericordiæ, disputare videtur. Nunc autem ne solum illi antiqui Israelitæ intelligerent vasa misericordiæ, ostendit quia et nos qui ad novam gratiam vocati sumus, non solum ex illo Hebræorum populo, sed etiam ex gentilitate, vocata vasa sumus ejusdem misericordiæ. Etiam ex gentibus vocavit nos Deus sicut ipse dicit loquens in Osee: Non plebem meam, id est gentilitatem quæ non erat plebs mea, vocabo plebem meam, id est vocabulum peculiaris populi mei dabo illi in gratiam nominis Christiani, et non misericordiam consecutam, id est eandem gentilitatem quæ misericordiam consecuta non fue-

rat, sed sine misericordia perditioni relicta erat, vocabo consecutam misericordiam, id est hoc vocabulum illi dabo, ut appelletur consecuta misericordiam, ut nomen indicet beneficium. Et erit istud in tempore gratiæ in loco, id est in terra gentium, ubi dictum est eis divinitus. Non plebs mea estis vos ibi, id est in eadem gentium regione vocabuntur, qui ibi fuerint, filii Dei vivi. Per hoc quod Deus gentiles ad cultum suum non vocabat, sed in errore reliquerat, dicebat eis: Non plebs mea vos. Sed in loco gentium ubi hoc antea dictum est, ibi postmodum prædicata per apostolos Evangelii gratia, vocati sunt qui illic crediderunt, filii Dei non mortui, sed vivi. Coluerunt enim prius multos deos mortuos, id est homines mortuos, quos sibi deos constituerant, sicut Jovem et Apollinem et Herculem, et ideo ne quis talium intelligeretur, nunc Deus a propheta dicitur, cum de gentilibus sermo esset, cognominavit Deum vivum.

« Isaias autem clamat pro Israel: Si fuerit numerus filiorum Israel tanquam arena maris, reliquiæ salvæ fient (Isa. x). Verbum autem consummans et abbrevians in æquitate, quia verbum brevium faciet Dominus super terram. Et sicut prædixit Isaias: Nisi Dominus Sabaoth reliquisset nobis semen, sicut Sodoma facti essemus, et sicut Gomorrha similes fuisset (Isa. 1). »

Quia hos dixerat vocatos non solum ex Judæis sed etiam ex gentibus, et gentium vocationem, de quibus minus videbatur, astruxerat prophético testimonio, vult similiter auctoritate prophetica Judæorum vocationem ostendere. Osee dicit de gentium conversione, sed Isaias clamat, id est aperte et publice testatur pro Israel, id est pro conversione Judæorum. Si fuerit numerus, etc.: Hoc est, etiam si multitudo non crediderit, tamen pauci credent. Et revera, si legamus Josephum, quanta hominum in Jerusalem et in Judæa fuerit multitudo quando passus est Dominus, intelligemus vix paucos in apostolis et in apostolicis viris salvatos esse ex Judæis. Sed non quia fracti sunt infideles et superbi, ac per hoc infructuosi rami, ut insereretur oleaster gentium, ideo perire potuit radix patriarcharum et prophetarum. Quia si fuerit, inquit, numerus filiorum Israel sicut arena maris, id est si fuerint tot Judæi, ut non possint numero comprehendi, sed omnem supputationem vicerit multitudo eorum, sicut arena quæ non potest numerari, reliquiæ salvæ fient, id est illi quos sibi Dominus relinquet, quando alios alijciet, salvabuntur. Vel si numerus eorum fuerit sterilis et gravis ut arena maris, reliquiæ quæ erunt fulgentes et cælo inhærentes sicut stellæ, salvabuntur. Utrumque enim promissum est Abrahæ. « Erit, inquit, semen tuum sicut stellæ cæli, et velut arena quæ est in litore maris (Gen. xxviii). » Vere salvabuntur, nam verbum erit consummans et abbrevians in æquitate. Ideo salvabuntur, quia verbum Evangelii quod eis tradetur, erit consummans hominem in justitia, id est perfectionem justitiæ.

dans, et ea consummans ac perficiens quæ lex non poterat. Et abbrevians, id est in uno geminæ charitatis præcepto comprehedens omnia, quæ lex multiplicibus præceptis instituerat. Et erit abbrevians in æquitate, secundum illud : « Quod tibi non vis ab alio fieri, tu alii ne feceris (Tob. iv). » Et prout vultis ut faciant vobis homines, et vos facite illis similiter (Matth. vii). Vel in uno Christo abbrevians omnia legalia, et hoc in æquitate, quia æquum est hoc verbum breviri, ut nihil desit ad justitiam de omnibus præfiguratis. Sive in æquitate, quia quæ æqua sunt, retinet, ut moralia; quæ jus est tolli, tollit, ut figuras. Vere novum verbum erit abbrevians, quia verbum brevium faciet Dominus Jesus super terram, id est ut compendio fidei per gratiam salvos faciat credentes, non per innumerabiles observationes, quibus Judæorum plebs serviliter onerata premebatur. Hoc verbum fecit Dominus super terram conversans inter homines. Dictum fuit, reliquias esse salvandas ex multitudine peruentium. Et sicut iterum prædixit Isaias : Nisi Dominus Sabaoth, id est exercituum, cui serviunt exercitus angelorum et hominum, reliquisset nobis Judæis semen, id est electos filios qui disseminarentur per orbem, sicut Sodoma facti essemus, et sicut Gomorrha similes fuissetis, id est sicut in Sodoma et Gomorrha post discessum Loth soli reprobis remanserunt qui simul perirent; ita et nos in Jerusalem post Christi resurrectionem soli reprobis et perituri remansissentis. Hi enim qui ex circumcissione crediderunt, vocantur semen, quia sparsi per terras multiplicati sunt, et velut grana seminis copiosam segetem fidelium germinaverunt. Et propter istos non fuerunt Judæi sicut Sodoma et Gomorrha, quia non omnes fuerunt reprobis, nec omnes perierunt, quoniam isti sunt electi atque salvati de multitudine illorum.

« Quid ergo dicemus? Quod gentes quæ non sectabantur justitiam, apprehenderunt justitiam, justitiam autem quæ ex fide est: Israel vero sectando legem justitiæ, in legem justitiæ non pervenit. Quare? Quia non ex fide, sed quasi ex operibus. Offenderunt enim in lapidem offensionis, sicut scriptum est: Ecce pono in Sion lapidem offensionis, et petram scandali, et omnis qui credit in eum, non confundetur (Isa. viii). »

Ab auctoritate utriusque prophetæ infert: Quandoquidem, inquit, Osee de gentibus dicit: « Vocabo non plebem meam, plebem meam (Ose. ii), » et Isaias de filiis Israel clamat, quia reliquæ eorum salvabuntur, id est pauci de multitudine, ergo quid dicemus, id est quid per hæc prophetarum dicta de gentibus et Judæis diffiniemus? Istud possumus ex prædictis oraculis inferre et asserere, quod gentes, quæ neque per hostias, neque per voluntatem sectabantur justitiam Dei, apprehenderunt justitiam, non quamcunque, non eam quæ est ex lege, sed eam justitiam quæ est ex fide, id est per gratiam, quia non superbierunt, sed in Christum credi-

derunt, sed Israel, id est carnalis populus Judæorum, sectando per carnales observantias legem justitiæ, id est legem quæ est justitiæ bene intellecta, non pervenit in legem justitiæ, id est venit quidem aliquantum in legem justitiæ, sed non pervenit in eam, quia quamvis opera legis faceret, non tamen ex amore justitiæ fecit ea, sed ex timore pænæ, et ita cordis innocentiam habere non potuit: Ubi probatur vera esse supradicta sententia, quia non volentibus neque currentis, sed miserentis est Dei, quoniam gentes, ut dictum est, quæ justitiam non quæsierunt, justitiam invenerunt; et Israel qui legem justitiæ sectabatur, non potuit in eam pervenire. « Terribilis ergo Deus in consiliis super filios hominum (Psal. lxxv), » et judicia ejus occulta sunt, non injusta. Gentes quæ non sectabantur justitiam, quæ ex lege est, quasi propriam suam apprehenderunt justitiam, quæ est ex fide. Israel autem sectans per opera legem justitiæ, non pervenit corde in legem justitiæ. Et quare? Quasi diligenter hoc attendamus, cur in eam pervenire non potuit. Quia non ex fide, id est quia non speravit in Deum, non illam petivit a Deo, non credit in eum qui justificat impium. Non ex fide, sed quasi ex operibus, id est quasi justitiam per semetipsum operans, non in se credens operari Deum. Deus est enim qui operatur in nobis et velle et operari pro bona voluntate. Sed Israel non quærebat justificari ex fide, sed quasi ex operibus, quia fidem non putavit esse causam et principium justitiæ, sed opera carnalium observationum justitiæ principium esse credidit, et glorians quasi de operibus, exclusit a se gratiam; ac quasi de sanitate præsumens, respuit medicinam. Vere non ex fide justificari quæsivit populus Judæorum, sed velut ex operibus, nam offenderunt in lapidem offensionis, id est Christum humilem per superbiam suam calcare volentes, gressum suæ rectæ actionis læserunt, et quassati corruerunt. Quasi ipsa sua justitia offenderunt in Christum, quia velut de justitia timuerunt, et fidem Christi spreverunt. Qui ad similitudinem parvi lapidis, a quo non cavetur, fuit eis habilis ad offendendum, latens in humilitate. Omnibus quoque malis est ipse Christus lapis offensionis, quia quidquid dicit, amarum est illis, et commoventur ex dictis ejus. Ita offenderunt in hunc lapidem, sicut scriptum est apud Isaiam dicente Patre: Ecce pono in Sion lapidem offensionis, id est per incarnationis mysterium pono Christum in Sion, hoc est in Ecclesia fundamentum, qui Judæis erit lapis offensionis, quia non sibi cavebunt ab illo humili et parvo, propter suæ mentis cæcitate, sed offendit in eum et corruent, et pono ibi petram scandali, id est eundem Christum, qui in passione erit illis petra scandali, id est deformis et asper et durus, in quo scandalizabuntur irascentes et indignantes, cum se Filium Dei dixerit. Lapis vocatur politus et lubricus, quando si calcatur, pes cito labitur; petra vero dicitur, quando est inculta et aspera. Christus ergo in nativitate vel in conversa-

tione et prædicatione sua Judæis lapis fuit offensionis, et in passione petra scandali, quia qui prius in ortu et humana conversatione visus est eis contemptibilis et conculcabilis, postmodum in passione nimium deformis et asper illis apparuit. Plus autem est scandalum, quam offensio, quia scandalum dicitur a Græco, quod est scandalizo, et est proprie impactio pedum. Ita ergo Judæi offenderunt in Christum, ut omnino impingerent pedem ibi et confringerent. Non solum enim contempserunt eum, sed et crucifixerunt. Pono hunc lapidem offensionis, quantum ad reprobos; et propter electos subjungo, quia *omnis* sive Judæus, sive gentilis, sive servus, sive liber, *qui crediderit in eum, non confundetur*, id est non erubescet in futuro cum ille venerit ad iudicium. Qui enim crediderit in eum, non habebit suam justitiam, quæ est ex lege, quamvis sit bona lex, sed implebit ipsam legem non sua justitia, sed data ex Deo. Ita enim non confundetur. Nam qui in se gloriatur, confundetur, non enim sine peccatis invenietur. Ille autem tantummodo non confundetur, qui in Domino gloriatur. Quicumque illum fide expectant, cum venerit, gaudebunt. Qui sine fide sunt, cum venerit quod nunc non vident, erubescunt; quomodo solent confundi qui inveniuntur in aliqua culpa, et eis insultatur ab omnibus; sed tamen non transiet illa confusio nec delebitur. Notandum autem, quia hoc testimonium Apostolus ex duobus locis libri Isaïæ, conjunxit. Ita enim ibi legitur: « Ecce ego mittam in fundamentis Sion lapidem probatum, lapidem angularem, pretiosum, in fundamento fundatum. Qui crediderit, non festinet (Isa. xxviii). » Atque alibi in eodem libro: Et erit, inquit, vobis in sanctificationem: in lapidem autem offensionis, et in petram scandali, duabus domibus Israel (Isa. viii). » Unde perspicuum est, apostolos in interpretatione Veterum Scripturarum sensum quæsisse, non verba, nec magnopere de ordine, sermonibusque curasse, cum intellectui res pateret.

CAPUT X.

« Fratres, voluntas quidem cordis mei, et obsecratio ad Dominum fit pro illis in salutem. Testimonium enim perhibeo illis, quod æmulationem Dei habent, sed non secundum scientiam. Ignorantes enim Dei justitiam, et suam quærentes statuere, justitiæ Dei non sunt subjecti: finis enim legis Christus ad justitiam omni credenti. »

Hinc jam incipit de spe Judæorum loqui, ne etiam gentes superbire audeant adversus eos. Sicut enim Judæorum superbia refellenda erat tanquam ex opere gloriantium, sic et gentibus occurrendum est, ne tanquam Judæis prælati superbiant. Dixi quia non pervenerunt in legem justitiæ, sed offenderunt in lapidem offensionis, non quia illos odio habeam, nec quia de illis omnino desperem. Nam sciatis, fratres, quia intima voluntas cordis mei fit pro illis in salutem, id est ex corde volo illorum sa-

lutem. Voluntas quidem cordis mei pro illis optat, ut accipiant salutem, quamvis illorum voluntas adhuc obsistat. Potens est enim Deus corda illorum convertere. Non solum voluntas, sed etiam *obsecratio*, id est oratio cum obstestatione sacrorum, fit a me pro illis ad Deum in salutem, id est ut efficacior sit oratio mea pro illis, facio eam cum adjuratione sacrorum, in salutem illorum dirigens intentionem, hoc est, ut credant, et per fidem consequantur salutem. Non enim aliter salvari poterunt. Quamvis Apostolus eis instanter evangelium prædicaret, parum tamen esse credebat, nisi pro illis etiam oraret ut crederent, quoniam voluntas ut ad vera credenda moveatur, non sibi sufficit, nisi per gratiam Deus illi opituletur, nec ipsa conversio fieri potest sine Dei adjutorio. Obsecro, inquit, pro illis, et justum est ut obsecrem, nam æmulationem Dei habent. Nam ego qui olim similis fui, et idcirco novi intentionem cordis ipsorum, *perhibeo illis testimonium, quod æmulationem Dei habent*, id est homo zelo movetur ad defendendam legem, *sed non secundum scientiam*, quia imprudenter agunt, dum nos quasi prævaricatores legis persequuntur. Nesciunt enim quia nos potius quam ipsi legem adimplemus, qui spiritualiter eam observamus; et idcirco bona quidem intentione volunt legem contra prævaricatores defendere, sed non secundum scientiam, quia nesciunt qui sunt illi contra quos moventur. Hoc et Dominus sic prænuñtiavit: « Venit hora ut omnis qui interficit vos, arbitretur obsequium se præstare Deo (Joan. xvi). » Putabant enim se Deo placere ex eo quod Christianos velut ex defensione legis interficiebant, quia æmulationem Dei habebant, sed non secundum scientiam. Vere non secundum scientiam. Nam *ignovantes justitiam Dei*, id est quæ a Deo datur per fidem Christi, *et quærentes statuere suam justitiam*, id est quam suis viribus per observantiam legis putant se facere, *non sunt subjecti justitiæ Dei*, id est Christo. De se enim præsumentes, gratiam repellebant, et in Christum propterea non credebant, ignorantes justitiam Dei, et suam volentes statuere; justitia Dei hic dicitur, non quam justus est Deus, sed quam dat homini, ut justus sit homo per Deum. Justitia autem illorum erat, quia de suis viribus præsumebant, et quasi impletores legis se ipsos ex sua virtute dicebant. Ignorabant ergo justitiam Dei, id est quam dat homini Deus, qui solus est justus atque justificans; et volebant constituere suam, id est velut a se sibi paratam, non ab illo impertitam; et ideo justitiæ Dei non erant subjecti, quia superbi erant, de suo putantes, non de Dei placere posse se Deo. Vere ignorabant justitiam Dei, nam *Christus* quem cæci respuebant, est *finis*, id est consummatio legis, quia in eo lex consummatur et perficitur. Finis, id est perfectio legis, est *Christus ad justitiam complendam omni in se credenti*, quia omnis qui in Christum credit, habet ipsum Christum consummationem legis, ut per eum faciat justitiam. Sunt enim opera quæ videntur nona

sine fide Christi, et non sunt bona, quia non referuntur ad eum finem ex quo sunt bona. Talia erant opera istorum, qui suam justitiam quærebant statuere, quia ipsum quod datur : « Non concupisces (Exod. xx), » et cætera hujusmodi mandata sancta et bona ipsis tribuebantur, quæ ut possit homo facere, Deus operatur in homine per Christi fidem, qui finis est ad justitiam omni credenti, cui per spiritum incorporatus factusque membrum ejus, potest quisque illo incrementum intrinsecus dante operari justitiam, de cujus operibus etiam ipse dixit, quia sine me nihil potestis facere (Joan. xv). » Finis enim dicitur ipse Christus, quia quidquid agimus, ad illum referimus; et cum ad eum pervenerimus, non habebimus ultra quod quæramus, sed ibi permanebimus. In eum namque dirigitur nostra intentio. Ad quem cum pervenerimus, non erit ultra quo tendamus, quia ibi est omnium bonorum plenitudo.

« Moyses enim scripsit, quoniam justitiam quæ ex lege est, qui fecerit homo, vivet in ea (Levit. xviii). Quæ autem ex fide est justitia, sic dicit : « Ne dixeris in corde tuo, quis ascendit in cælum? » (Deut. xxx) id est Christum deducere, aut quis ascendit in abyssum? hoc est Christum ex mortuis revocare. Sed quid dicit Scriptura? Prope est verbum in ore tuo et in corde tuo. Hoc est verbum fidei quod prædicamus, quia si constiteris in ore tuo Dominum Jesum, et in corde tuo credideris, quod Deus illum excitavit a mortuis, « salvus eris. »

Vere Christus est finis legis ad veram justitiam, nam in ipsa lege antequam ad Christum veniatur, est quædam umbratilis justitia. Moyses enim ita scripsit. Probat Apostolus auctoritate Moysi duas esse justitias, quia dixerat Judæos esse ignorantes justitiam Dei, et suam quærentes statuere. Vere sunt duæ, una per legem, altera per Christum. *Moyses enim scripsit, quia homo qui fecerit justitiam quæ ex lege est, vivet in ea, legem hoc loco pro ipsis operibus ponens.* Qui autem vivebant in his operibus, timebant utique, ne si non ea fecissent, lapidationem vel combustionem vel aliquid hujusmodi paterentur. Ergo qui fecerit, inquit, ea, vivet in illis, id est habebit præmium ne ista morte puniatur; non ergo apud Deum, ex cujus fide si quis in hac vita vixerit, cum hinc exierit, tunc eum magis habebit præsentissimum præmium. Non itaque ex fide vivit, quisquis præsentia quæ videntur, vel cupit vel timet, quia fides Dei ad invisibilia pertinet, quæ post dabuntur. Nam est et ista quædam in operibus justitia, quando sine suo præmio relicta non est, ut qui fecerit eam, vivat in illa. Unde et superius dictum est, quia etsi Abraham ex operibus justificatus est, habet gloriam, sed non apud Deum. Aliud est ergo, non justificari apud Deum; aliud, non justificari. Qui omnino non justificatur, nec illa servat quæ temporale habent præmium, nec illa quæ æternum; qui autem in operibus legis justi-

ficatur, non apud Deum justificatur, quia temporalem exinde expectat visibilemque mercedem. Sed tamen etiam ista est, ut dixi, quædam terrena carnalisque justitia. Hæc Moyses de justitia legis. Sed *quæ est ex fide justitia, sic dicit ipse : Ne dixeris in corde, etc.* Vel si justitia legis, in qua vivitur, est vera justitia intelligenda, quæ vitam præstat æternam, ideo proponitur justitia legis, quod qui fecerit eam, vivet in illa, ut cum quisque infirmitatem suam cognoverit, non per suas vires, neque per litteram legis ipsius, quod fieri non potest, sed per fidem concilians justificatorem, perveniat et faciat et vivat in ea. Opus enim quod qui fecerit, vivet in eo, non fit nisi a justificato. Justificatio autem ex fide impetratur, et ita per justitiam fidei completur vera justitia legis. De cujus fidei justitia sic dicit Moyses, vel ipsa dicit in corde hominis : *Ne dixeris in corde tuo, id est ne saltem cogites, quis ascendet in cælum? id est nullus homo ascendet, quia hoc est Christum deducere, quantum ad te, id est si hoc cogitaveris, Christum ascendisse negabis. Aut non dixeris in corde tuo, quis descendet in Abyssum? id est nullus pro contempta lege descendet in infernum, quia hoc est Christum a mortuis revocare quantum ad te, id est hoc cogitare, est non credere quod Christus pro nobis mortuus sit, et in infernum pro liberatione justorum, qui ibi tenebantur, descendit. Vel ita : Cum audieris post resurrectionem prædicari Christum ascendisse in cælum, noli dicere in corde tuo, mendacium est, quis enim ascendet?* Quia hæc infidelitas, quantum in te est, Christum de cælo ad terram deducit. Aut cum audieris prædicari quod ad infernum descendit, noli dubitare et putare hoc incredibile, quia hæc incredulitas, quantum ad te, revocat Christum a mortuis, id est negat Christum fuisse mortuum. Nam si in abyssum descendisse dubitetur, nec mortuus esse creditur, quia sicut mortuus est ut mortem occideret, sic in abyssum descendit ut suos inde retraheret. Et hæc est justitia fidei, distans a justitia mortalitatis legis, ut non dubitet quis de spe Dei, quæ in Christo est, ut non diffidat Christum spoliasse infernum, et cum sanctorum animabus cælum ascendisse, quia qui hoc credit, ex hoc efficitur justus. Potest et ita intelligi : *Ne dixeris in corde tuo, quis ascendet in cælum?* id est quis illuc ascendet Christum inde ad nos deducere, aut quis descendet in abyssum? hoc est quis in infernum descendet Christum inde ex mortuis revocare? Non enim expectavit Christus ut aliquis homo ascenderet in cælum ad deducendum eum, quod impossibile erat; sed ipse sua sponte descendit, a paterna sede veniens quærere, et salvum facere quod perierat. Neque fuit necesse vel possibile ut aliquis in abyssum descenderet ad revocandum inde Christum a mortuis, quia ipse sua virtute, ligato forti adversario et spoliato inferno, resurrexit a mortuis (Luc. xix). Ne dicas, inquit, quis ascendet in cælum Christum deducere? quasi et in terra non sit Christus, qui per divinitatem est ubique;

aut quis descendet in abyssum Christum ex mortuis A revocare? quasi Christus in abyssu contineri possit, qui nullo loco continetur, sed omnia continet; vel inter mortuos morari possit, qui vita est. Hoc ne dixeris. S. d. quid dicit Scriptura per Moysen (*Deut. xxx*) de Christo? *Prope est verbum*, id est Christus qui est verbum et sapientia Dei (*I Cor. 1*) est prope, hoc est, non longe est a natura animorum et loquendi ratione. Prope est in ore tuo ad confitendum, et in corde tuo ad credendum. Et ideo non per loca quæras eum, qui sicut verbum et veritas et sapientia ubique est, et in corde justorum manet atque in ore; sed credas quia verbum quod personaliter unitum est humanitati, prope nos est, quoniam non a locutione nostra remotum est, neque ab intellectu. Hoc verbum quod Moyses dicit ita esse prope, est B *verbum fidei quod prædicamus*, id est Christus, in quo nostra fides constat, quem annuntiamus. Hoc prædicamus de illo, quia si confitearis, etc. Vel ratio redditur, cur in ore et in corde verbum hoc debeat esse. *Quia si confitearis in ore tuo Dominum Jesum, et in corde tuo credideris, quod Deus illum excitavit a mortuis, salvus eris.* Non est laus fidei Christianorum, quia credunt mortuum Christum, sed quia credunt resurrexisse Christum. Nam mortuum et paganus credit. Hæc est laus fidei quia credimus eum resurrexisse, et speramus nos quoque per eum resurrecturos esse. Non enim ait, si confessus fueris; quia eum Deus tradidit ad occidendum; sed si confessus fueris, quia Deus eum suscitavit a mortuis, tunc salvus eris. Intantum salvus, inquantum justus. Quære autem credimus et mortuum? Quia credere eum resurrexisse non possumus, nisi prius mortuum fuisse credamus. Pertinet autem ista confessio præcipue ad martyres, qui coram tyrannis Christum confitebantur, et pro ejus confessione moriebantur. Nam nostro tempore facile est, ut quisque Christum voce confiteatur, ideoque vox sola non sufficit sine operibus.

« Corde enim creditur ad justitiam, ore autem
« confessio fit ad salutem. Dicit enim Scriptura :
« Omnis qui credit in illum, non confundetur (*Isa.*
« *xxviii*). Non est enim distinctio Judæi et Græci.
« Nam idem Dominus omnium, dives in omnes qui
« invocant illum. Omnis enim quicumque invocave-
« rit nomen Domini, salvus erit (*Joel. 11*). »

Vere si resurrectionem Christi, corde credideris, et ore confessus fueris, salvus eris, nam corde creditur ad justitiam, sed ore confessio fit ad salutem. Hoc est, qui corde credit, habet in præsentī justitiam, quia justus ex fide vivit (*Habac. 11*); et qui ore confitetur, habet in futuro salutem. Et ideo oportet nos esse et justitiæ memores et salutis, quandoquidem in sempiterna justitia regnaturi, a præsentī sæculo maligno salvi fieri non possumus, nisi et nos ad salutem proximorum nitentes, etiam ore profiteamur quod corde gestamus. Credere enim dat salutem, quia justitiam parit, quæ est causa salutis, si quod cor credit, os confiteatur. Hoc est enim confiteri,

dicere quod habes in corde. Si autem aliud in corde habes, et aliud dicis, loqueris, non confiteris. Noli erubescere de spe tua in conspectu hominum. Quomodo vivit in corde tuo, sic habitat in ore tuo, quia non sine causa signum suum Christus in fronte nobis figi voluit tanquam in sede pudoris, ne Christi opprobria Christianus erubescat. Parum est erge in corde habere Christum, et nolle confiteri dum timentur opprobrium. Qui enim salutem cupit habere, debet fidem suam ore proferre, quia ore confessio fit ad salutem. Alioquin credulitas cordis non dat salutem, quamvis corde credatur ad justitiam, vere fides ore prolata perducit ad salutem, nam Scriptura dicit in libro Isaïæ : Omnis non solum Judæus, sed et gentilis, qui credit in illum, hoc est in Christum, non confundetur, id est non erubescet in die judicii, quia salutem quam credit, consequetur. Et vere omnis. Non est enim distinctio Judæi et Græci, id est propheta neque Judæum, neque gentilem nominavit : sed in eo quod ait, omnis, ostendit de utroque populo, quia quicumque sincera fide rectisque operibus Deo ingemuerit, salvus esset possit. Vere non est distinctio. Nam idem Dominus est omnium, sive Judæorum, sive gentilium, dives in omnes, id est sufficiens ditare omnes qui invocant illum, id est qui pia devotione in seipsos vocant illum, præparando se dignos tali habitatore. Illis est dives qui invocant, non modo credunt, quia credere dat remissionem peccatorum, invocare impetrat promissa Dei. Orans invocatur, sed hoc non potest nisi prius credat. Jure dixi quia est dives in omnes, non in quosdam, vel in paucos invocatores suos, quia sicut Joel testatur, cum gratiæ tempus prænuntiat, omnis quicumque invocaverit nomen Domini salvus erit. Nullus excipitur, nulli gratia hæc denegatur; sed omnis Judæus et gentilis, cujuscunque gradus et conditionis sit, quicumque piis precibus invocaverit nomen Domini, præparans se dignum ad excipiendum in sui cordis templum habitorem Deum, salvus erit æterna salute.

« Quomodo ergo invocabunt in quem non cre-
« derunt? Aut quomodo credent ei quem non au-
« dierunt? Quomodo autem audient sine prædi-
« cante? Quomodo vero prædicabunt nisi mittantur,
« sicut scriptum est : Quam speciosi pedes evange-
« lizantium pacem, evangelizantium bona (*Isa. 111*);
« (*Nahum 1*). »

Probato quod de utroque populo assumuntur qui salvi fiant, ostendit quod per missionem ad utrosque factam assumuntur, quam qui non recipit, inexcusabilis est. « Quicumque invocaverit nomen Domini, salvus erit (*Joel. 11*). » Ergo oportet credere. Quia quomodo invocabunt in quem non crediderunt? Invocatio, inquit, salvat. Nemo autem invocatur qui non credit. Nisi enim crediderint, non invocabunt; et nisi invocaverint, non salvabuntur. Hoc maxime de gentibus dicitur, ne quis Judæos tantum putaret ad fidem vocandos. Quomodo invocabunt Christum in quem non crediderunt? Prius oportet ut credant. Aut quomodo credent in quem non audierunt? Prius enim

necesse est ut ab ore alicujus audiant illum. Credere namque est ex auditu. Sed *quomodo audient eum sine aliquo prædicante?* Necesse est ut aliquis prædicet, a quo cæteri audiant quid credere debeant. Non enim audient nisi prædicatum fuerit. Sed *quomodo doctores prædicabunt nisi mittantur?* Non possunt prædicare nisi missi fuerint, quia non sunt veri apostoli nisi missi. Et inanis est hominum conatus, nisi Deus missos suos juverit. Nec eis annuntiandi virtus ulla subsistit, nisi adfuerit illis ipse qui misit. Illis dictis refutat Apostolus eos, qui negabant ad incircumcisas gentes mittendos esse præcones Christi, et ostendit salutem per Dei gratiam omnibus advenisse. Salus, inquit, est ex invocatione, invocatio ex fide, fides ex auditu, auditus ex prædicatione, prædicatio ex missione, ut ita totum descendat ex fonte gratiæ. Omnia ergo non ex nobis, sed ex Dei gratia sunt nobis, qua præmissi sunt prædicatores nostræ salutis, *sicut in Isaiâ scriptum est: Quam speciosi, id est admirabiliter pulchri, pedes, id est gressus apostolorum mundum illuminantium, in quo apparet eos a Deo missos, quoniam aliter hoc facere non possent. Speciosi sunt, id est pulchritudine virtutum, et claritate miraculorum ac prædicationis decorati sunt; pedes, id est incessus apostolorum evangelizantium, id est bene nuntiantium hominibus pacem, id est reconciliationem et concordiam ad Dominum, et evangelizantium bona regni celorum.*

« Sed non omnes obediunt Evangelio. Isaias enim dicit: Domine, quis credidit auditui nostro? (Isa. lvi; Joan. xii.) Ergo fides ex auditu, auditus autem per verbum Christi. »

Apostoli quidem omnibus evangelizant pacem, sed non omnes obediunt Evangelio, ut pœnitentiam de præteritis agentes, et de cætero recte viventes, student habere pacem cum Deo. Nam cum auditus sit ex gratia, necessaria est et alia quæ cor moveat, quia nil foris proficit sermo docentis, si Deus intus cor non tetigerit audientis. Et vere non omnes obediunt Evangelio, sed pauci. Nam Isaias voce prædicatorum dicit, querimoniam faciens de raritate auditorum: Domine, quis, id est quam rarus est qui credidit auditui nostro, id est auditui prædicationis, quam a te audivimus et eis nuntiavimus? Raro ex multis invenitur aliquis qui credat. Et qui non credunt, manifestum est, quia non obediunt. Auditui prædicationis crediderunt pauci de multitudine, ergo fides est ex auditu; quia ex eo quod audivimus a doctoribus, incipimus credere; sed auditus est non per merita nostra, sed per verbum prædicationis Christi quod ab ejus gratia doctores perceperunt.

« Sed dico: Nunquid non audierunt? Et quidem in omnem terram exivit sonus eorum, et in fines orbis terræ verba eorum (Psal. xviii). »

Isaias dicit quod pauci crediderunt, sed ego dico: Nunquid non audierunt? Utique audierunt, et ideo inexcusabiles sunt qui non crediderunt. Et quidem

audire potuerunt non solum proximi, sed et remotissimi. Nam in omnem terram exivit sonus, id est fama eorum, id est apostolorum, et in fines orbis terræ, id est in omnes mundi terminos in circuitu processerunt ipsa verba eorum, ut veritas non solum per famam audiretur, sed et per ipsa prædicantium dicta cognosceretur. Quod tamen ex toto necdum fuerat impletum, quando scribebat Apostolus; sed verbis præteriti temporis locutus est, sicut et propheta quod futurum erat, et ex magna parte jam completum fuerat.

« Sed dico: Nunquid Israel non cognovit? Primus Moyses dicit: Ego ad æmulationem vos adducam in non gentem, in gentem insipientem, in iram vos mittam (Deut. xxxii). Isaias autem addet et dicit: Inventus sum a non quærentibus me, palam apparui his qui me non interrogabant. Ad Israel autem dicit: Tota die expandi manus meas ad populum non credentem, sed contradicentem mihi (Isa. lxxv). »

In omnes gentes usque ad orbis terminos processit fama Christiani nominis. Sed dico: Nunquid Israel non cognovit quod totus mundus audivit? Non ignoravit Israel hanc salutem, sed cognovit quia posset audisse et cognovisse. Cognovit, quia contradicere non potuit. Sed non vere cognovit, ut in mente ejus bene sederet. Cognovit ad testimonium suæ damnationis, non in adjutorium suæ salvationis. Vere cognovit, quia Moyses primus doctor eorum dicit hoc, et omnes prophætæ post eum similia loquuntur. Hoc enim innuitur in eo quod Moyses nunc primus appellatur, quem alii secuti sunt in eodem sensu. Moyses voce Dei dicit Judæis in cantico, dum infidelitatem eorum prænuntiat: Ego adducam vos ad æmulationem in non gentem, id est tale quid faciam genti paganorum, quæ nec gens dicenda est, propter stultitiam idololatriæ, unde vos æmulationem, hoc est, invidiam habebitis, invidia namque tabescunt Judæi, dum gentes Deum eorum suum dicant et legem atque prophetas ad se pertinere dicunt. Et ita adducti sunt ad invidiam in non gentem, hoc est contra gentilem populum, de quo dictum erat: Omnes gentes quasi non sint, sic sunt coram Deo (Isa. xl). Vel in non gentem, quæ cum esset gens, gentilitatem credendo deposuit; et facta est non gens, id est plebs Christiana per baptismum. Quandiu enim fuerat infidelis, fuit gens, sed in Ecclesia dicitur populus acquisitionis (I Petr. ii). Ita, inquit, mittam vos in æmulationem in non gentem, id est contra conversam gentilitatem, quæ fidem apprehendet quam vos respuetis, in gentem insipientem, id est contra eandem gentilitatem, quæ Dei sapientiam ignorabat, et stultitiam idololatriæ prædicabat, et mittam vos in iram, id est in indignationem, hoc est permittam vos irasci et indignari, hoc est tanta beneficia gentilitati tribuam, ut vos inde irascamini. Hoc Moyses dixit, et hanc Scripturam Judæi legunt et legerunt, ideoque præ-

ditionem Christi in gentibus per orbem esse cognoscunt. Hoc Moyses, sed *Isaias audet et dicit*, id est audacius loquitur de salute gentium, quia quamvis sciret sibi imminere periculum, audacter tamen verbum Dei prædicabat. Manasses enim rex, ut Hebraei testantur, serra lignea post serravit eum. Sciebat igitur Isaias contemnendum se esse ab impiis et interficiendum, et tamen abjecto timore prædicabat Dei gratiam, et ex persona Christi dicebat: *Inventus sum a non quærentibus me*, id est sponte me obtuli gentilibus, et per fidem me ab illis inveniri feci, qui me quærere non noverant, nec in Scripturis adventum meum scrutabantur sicut Judæi, qui adhuc in libris suis adventum Messiae quærunt et expectant, *palam*, non per ænigmata et figuras, sicut in lege, sed manifesta veritatis cognitione apparui his gentilibus qui me non interrogabant ab aliis, quia interrogare non didicerant. Ita ad gentes, sed ad Israel, carnalem dicit: *Tota die*, id est toto tempore quo cum eis in terra conversatus sum, illuminans mundum, *expandi manus meas*, id est ampliavi operum meorum beneficia, *ad populum Judaicum non credentem mihi*, et quod pejus est, *contradicentem*. Convenienter enim per extensas manus tota die, continuatio honorum operum intelligitur a quorum intentione Salvator nunquam cessavit, sed infideli populo semper exhibuit, ac sicut nutrix parvulum expansis manibus excipere paratus fuit. Significant enim expansæ manus, et parentis clementiam suos filios in sinum recipere gestientis. Possunt et largitatem donantis exprimere, quod nihil eis potentibus denegaverit, sed roganti leproso mox sanitatem reddiderit (*Matth. viii*), et oculos cæcorum rogantium protinus aperuerit (*Luc. xiiii*), sicque cætera potentibus dederit.

CAPUT XI.

« Dico ergo: Nunquid repulit Deus populum suum? Absit! Nam et ego Israelita sum ex semine Abraham de tribu Benjamin. Non repulit Deus plebem suam quam præscivit. »

Quia tot auctoritatibus confutavit Judæos, ne insultarent eis gentiles, et dicerent eos ex toto esse repulsos, incipit rursus de eorum salute loqui, ostendens non omnes esse reprobatos. Commemoraverat enim propheta testimonium de prænuntata futura incredulitate populi Israel. *Tota die expandi manus*, etc. Et ne quis male intelligens, universum illum populum crimine incredulitatis et contradictionis arbitraretur esse damnatum, continuo subjecit: *Dico ergo*, etc. Illic ostendit quam plebem dixerit utique Israeliticam. Quam si totam Deus reprobasset atque damnasset, non utique esset ipse Christi apostolus, ex semine Abraham et tribu Benjamin. Quia, inquit, dixi *populum non credentem et contradicentem*, ergo dico et hanc questionem facio: *Nunquid propter multitudinem incredulorum et contradicentium repulit Deus populum suum*, ut evacuaret promissiones quas patribus eorum fecerat? *Absit ut repelleret eum, qui tot millia credentium*

A inde elegit! Vere non omnem populum illum repulit, nam et ego qui hæc loquor, sum Israelita, id est sum ex eodem populo Judæus, non proselytus, ex semine Abraham, id est descendens ex Abraham, de tribu Benjamin, id est per lineam Benjamin. Non me repulit Deus, qui ita sum ex illa gente. Similiter non repulit plebem suam ex Israel, quam præscivit, id est prædestinavit. Prædestinatio enim hoc loco significatur nomine præscientiæ. *Non repulit*, inquit, *Deus plebem suam quam præscivit*, id est ad vitam prædestinavit. Atque ut ostenderet Dei gratia fuisse relictas Israeliticæ gentis reliquias, non meritis operum eorum, secutus adjunxit valde necessarium testimonium, dicens:

« An nescitis in Elia quid dicit Scriptura, quem admodum interpellat Deum adversus Israel? Domine, prophetas tuos occiderunt, altaria tua suffoderunt, et ego relictus sum solus, et quærunt animam meam (*III Reg. xix*). Sed quid dicit illi responsum divinum? Reliqui mihi septem millia virorum, qui non curvaverunt genua ante Baal. Sic ergo et in hoc tempore reliquæ secundum electionem gratiæ salvæ factæ sunt. Si autem gratia, jam non ex operibus. Alioquin gratia jam non est gratia. »

Inde, inquit, potest videri quod Deus multos sua gratia reservavit, quos non repulit, quoniam tempore Eliæ tam pauci fuerunt, ut ipsi Eliæ nulli viderentur esse quos non repulerit, et tamen tunc in tanta bonorum oppressionem fuerunt multi quos in gratia Dei sibi reservavit. Et hoc est, quod interrogando dicit ad increpationem eorum, qui totam plebem Israeliticam a Deo repulsam esse putabant: *An nescitis quid Scriptura tertii libri Regum dicit in Elia*, id est in gestis Eliæ, scilicet *quemadmodum ipse interpellat Deum adversus Israel*, id est inter se et illos judicem eum interpellat, et contra perfidos provocat? *Domine*, inquit, *prophetas tuos præcepto impiissimæ reginæ Jesabel occiderunt, et altaria tua suffoderunt*, id est a fundamentis subverterunt, et ego relictus sum solus ex tuis et quærunt animam meam, id est me occidere. Quasi dicat: Non debes eis parcere, quia tanta mala fecerunt. Ipse sic interpellabat, et se solum putabat. *Sed quid dicit illi responsum divinum?* id est quid respondet ei Dominus? *Reliqui mihi septem millia virorum*. Non ait, relictæ sunt mihi; aut, reliquerunt se mihi, sed *reliqui mihi*. Ubi non humanum opus, sed divina gratia patenter ostenditur. In septem vero millibus virorum, perfecta summa viriliter agentium exprimitur: *Reliqui*, inquit, *mihi*, id est per gratiam reservavi, *septem millia virorum*, quia tunc erant multi quos Deus sibi reservaverat, quamvis nesciret Elias, quoniam grana latebant sub acervo palearum. *Qui non curvaverunt genua ante Baal*, id est non adoraverunt dæmonium, quod adorabat populus Israel sub rege Achab. Ubi omnem populum simul propheta putaverat refutatum, inventa sunt septem millia virorum qui permanserunt in Testamento Dei. *Sic ergo*

et in hoc tempore gratiæ facilius saluæ factæ sunt reliquæ; hoc est quandoquidem ante tempus gratiæ Deus tot millia ex sua gratia reservavit contra opinionem tanti prophetæ; ergo sic, id est, simili modo etiam in hoc tempore gratiæ et prædicationis Evangelii credendum est multos esse quos Deus præscivit et suos esse prædestinavit, et hoc non secundum humanum meritum, sed secundum electionem gratiæ, quam nulla operum merita præcesserunt. In hac ergo electione et in his reliquiis est illa plebs, quam propterea Deus non repulit, quia præscivit. Præscivit enim reliquias quas secundum electionem gratiæ fuerat ipse facturus, hoc est prædestinavit. Dixi quia secundum electionem gratiæ sunt salvatæ. Sed si gratia salvatæ sunt, jam non ex operibus eorum processit illa salus. Alioquin, id est si aliter est, gratia, id est gratuitum donum Dei jam non est gratia, id est gratuitum donum, sed debitum. Si enim gratia ullis bonis meritis datur, jam non gratis datur, sed debita redditur. Ac per hoc non vero nomine nuncupatur, ubi merces non imputatur secundum gratiam, sed secundum debitum. Si autem vera est gratia, id est gratuita, nihil invenit in homine cui merito debeatur. Quod bene intelligitur in eo quod dictum est « pro nihilo salvos facies eos (Psal. LV). » Ipsa enim dat merita, non meritis datur; et prævenit etiam fidem, ex qua omnia bona opera incipiunt.

« Quid ergo? Quod quærenat Israel, non est consecutus, electio autem consecuta est; cæteri vero excæcati sunt, sicut scriptum est: Dedit illis Deus spiritum compunctionis, oculos ut non videant, et aures ut non audiant, usque in hodiernum diem. Et David dicit: Fiat mensa eorum coram ipsis in laqueum et in captionem, et in scandalum, et in retributionem illis (Psal. LXXVIII). Obscurentur oculi eorum ne videant, et dorsum eorum semper incurva. »

Quandoquidem non ex operibus, sed gratia Dei tantum salvatæ sunt reliquæ de multitudine Israelitarum, ergo quid dicendum est? Hoc scilicet, quia quod quærebat Israel, id est justitiam vel salutem, quam quærebat in lege populus Judæorum, non est consecutus per opera legis, sed electio, id est illa pars quæ ex eodem populo est electa, consecuta est per gratiam justitiam et salutem. Electio consecuta est, sed cæteri qui non pertinent ad sortem electionis, excæcati sunt justo Dei judicio, sicut scriptum est: Dedit illis Deus, id est juste permisit ut illi haberent, spiritum compunctionis, id est spiritum malignum, quo compungerentur et stimulerentur ad malum. Malam enim significat hic compunctionem, quia sæpe fit ut bonum homini sit molestum, ut Pharisæis doctrina Christi. Et dedit eis justo judicio oculos ut non videant, et aures ut non audiant, usque in hodiernum diem, id est usque ad præsens tempus. Hic enim oculos et aures interioris hominis debemus intelligere, quibus excæcati et surdi effecti sunt, qui Christum videntes in corpore et audientes

A in doctrina ejus, neque credere operibus quæ videbant, nec obedire verbo quod audiebant, voluerunt. Quicumque enim cum intellexisset, credere noluit id quod verum est, debet consequi quod vult, ut de cætero non possit credere. In voluntate ergo sua adjuti sunt, ut quia scientes verum dicebant esse falsum, de cætero non intelligerent. Cæci itaque sunt oculi cordis eorum, ut lucem veritatis Christi nequeant videre; et aures surdæ, ut spirituales Scripturarum sensus non possint audire. Ubi autem scripta sit hæc sententia, non satis apparet. Tamen beatus Hieronymus dicit eam in Isaia scriptam, ubi nos legimus: « Miscuit vobis Dominus spiritum soporis, claudet oculos vestros, prophetas et principes vestros qui vident visiones, operiet (Isa. XXI). »

B Ego autem si aliud quam tantus doctor auderem dicere, magis in Deuteronomio illam inveniri putarem, ubi Moyses loquitur: « Non dedit vobis Dominus cor intelligens et oculos videntes et aures quæ possint audire, usque in præsentem diem (Deut. XXI). » Hæc vel Isaïas vel Moyses de excæcatione et surditate eorum loquitur. Et David inde dicit (Psal. LXXVIII): Mensa eorum, id est Scriptura quæ variis sententiarum ferculis consuevit eos pascere, fiat in laqueum, id est vertatur eis in laqueum ut illaqueet eos, coram ipsis, id est videntibus ipsis, ut iniquitatem suam agnoscant, et in ea pertinacissime perseverent; tantumque valeat animi ipsorum præsumptio, ut coram ipsis laqueus sit, et incidant in eum. Hæc non optantis, sed prophetantis sunt verba; non imprecantis ut hoc fiat, sed prædicantis quod hoc fiet. Fiat ergo, quia non potest aliter, nisi ut talibus ista eveniant, esse. Fiat illis mensa in laqueum, ut Scriptura male intellecta illaqueet eos et faciat inhærere litteræ, ne veniant ad Christum et ad Evangelium, et fiat illis in captionem, ut capiat eos et teneat, ne recedere possint a vetustate; et fiat illis in scandalum, ut per eam scandalizentur in Christo Sabbatis operante virtutes, et fiat illis in retributionem, ut per eam recipiant malorum suorum vicissitudinem, id est æternam damnationem. Obscurentur oculi cordis eorum, ne videant, ut quoniam sine causa viderunt, fiat illis et non videre. Et post oculorum obtenebrationem incurva semper dorsum eorum, ut postquam cessaverint superna cognoscere, semper de inferioribus cogitent; qui enim supernis intendunt, curvum dorsum non habent, quia erecti stant, dum spem repositam sibi in cælo expectant. At vero qui futuræ vitæ spem non intelligunt, jam excæcati de terrenis et infimis cogitant, et hoc est habere dorsum curvum, quia terram semper intuetur qui curvus est. Et tales sunt nunc omnes Judæi, similes scilicet brutis animalibus, quorum vultus in terram pronus est ventri intentus.

« Dico ergo: Nunquid sic offenderunt ut caderent? Absit. Sed illorum delicto salus gentibus, et ut illos æmulentur. Quod si delictum illorum divitiæ sunt mundi, et diminutio eorum divitiæ gentium, quanto magis plenitudo eorum? »

Quoniam Judæos auctoritate prophetarum docuit excæcatos esse, et scandalum, id est offendiculum et impactionem pedum pertulisse, ne gentiles his verbis haberent occasionem spernendi eos, ingreditur iterum loqui de salute eorum. Quia, inquit, aspere locutus sum de excæcatione eorum, et offensione, ergo ne quis desperet de salute eorum, dico: *Nunquid sic offenderunt*, id est per libris impigerunt, *ut caderent?* id est ut tantammodo caderent quasi ad pœnam suam solum. *Absit*. Quasi non ceciderunt, quia nec omnes ceciderunt; et quidam ex his qui ceciderunt, Judæi prædestinatione semper stantes fuerunt, et ex casu cæterorum mundus est erectus. Non enim irreparabiliter et sine utilitate ceciderunt, sed casus eorum prodest, et ipsi possunt restitui. *Absit* ut ex toto caderent. Non ita ceciderunt, *sed illorum delicto salus est gentibus*. Ipsum eorum lapsum talem esse dicit, non ut illi caderent, *sed ut delicto suo salutem gentibus darent*. Deinde incipit ex hoc loco Judæorum populum commendare, et de ipso casu infidelitatis, ut non superbiat gentes, quia etiam casus Judæorum tam pretiosus exstitit pro salute gentium, sed magis caveant, ne dum superbiunt, similiter cadant. *Absit*, inquit, ut caderent, sed illorum delicto salus est gentibus. Non dixit quia non ceciderunt, sed quia illorum casus non fuit inanis, quoniam ad salutem gentium profecit, dum prædicatores Evangelii a se repellerent, et ad gentes migrare facerent. Delicto illorum salus est gentibus, quia propter necem Salvatoris dispersi, per omnes gentes gerant Scripturas sanctas, et testimonio nobis sunt, prophetias nos non fluxisse de Christo, et fidem gentium corroborant. Illorum delicto salus est gentibus, *ut illos æmulentur Judæi*, hoc est imitentur. Hoc sæpe factum est, et plenius [*al. sane*] fiet in fine sæculi, quando Judæi Christianos sequentur in fide Christi. Nam sicut nunc illorum lapsus salutem gentibus dedit, ita nunc gentium fides et conversatio Judæis æmulationem conversionis confert et salutis. Potest etiam intelligi, ut gentes Judæos æmulentur, id est ut credant sicut et ipsi credebant, ut Dei æmulatione contra opera eorum mala moveantur. Dixi delictum eorum prodesse, *Quod si*, hoc est, *sed si delictum*, id est quod Christum occiderunt, vel verbum prædicationis repulerunt, *divitiæ sunt mundi*, id est ditavit mundum fide et religiosis operibus et moribus, *et diminutio eorum*, id est paucitas ad fidem conversa; hoc est, pauci de eis conversi, *divitiæ sunt gentium*, id est ditaverunt gentes fide et virtutum perfectione, ac Spiritus sancti charismatibus, *quanto magis plenitudo eorum*, quæ in fine mundi convertetur, ditabit mundum? id est, si malum eorum vertit Deus in bonum, hoc est in divitias mundi, multo magis bonum eorum, cum in fine multitudo vel plenitudo eorum conversa fuerit, ditabit gentes doctrina et exemplo. In quo ostendit nec inutilem, *nec irreparabilem casum eorum*. Mirabiliter enim *disponit omnia Dei sapientia*, apud quam nec ipsa

A delicta, nec lapsus inutiliter cedunt. Nam cum unusquisque ex proposito sui libertate delinquat, dispensatio divinæ sapientiæ per hoc ipsum, in quo illi damno suæ negligentiae pauperes fiunt, alios divites facit, sicut nunc delictum Judæorum ditavit gentes, ut eorum sine labore legis herent cohæredes et concorporales. Potest et ita intelligi quod ait, si diminutio eorum divitiæ sunt gentium, quanto magis plenitudo eorum? id est si pauci eorum credentes tantum profuerunt gentibus ut eas spiritalibus divitiis replerent, quanto magis si plurimi vel omnes credidissent, prodesse illis poterant ad doctrinam? Duobus enim modis diminutio eorum versa est in divitias gentium, vel quia gentes ab illis paucis sumpserunt exemplum credendi, vel quia cum ipsi pauci credidissent ex Judæis, ventum est ad gentes, ut major fieret numerus credentium.

« Vobis enim dico gentibus: Quamdiu quidem ego sum gentium apostolus, ministerium meum honorificabo, si quo modo ad æmulandum proce vocem carnem meam, ut salvos faciam aliquos ex illis. »

Dixi quia plenitudo eorum convertetur. Bene enim poterunt converti, nam et ego pro conversione eorum laboro. *Vobis enim dico gentibus*, qui mihi specialiter estis commissi. *Quamdiu quidem ego sum apostolus gentium*, quod semper sum donec vivo, *honorificabo ministerium meum*. Gentium sum apostolus, non Judæorum, et tamen et horum minister. Et quamdiu sum apostolus gentium, ad quas specialiter missus sum, honorificabo, id est honorabile faciam ministerium meum per conversionem Judæorum. Quia cum sim positus ad prædicandum gentibus, non solum illis prædicabo, sed etiam ut Judæi convertantur laborabo. In quo honorabile ministerium meum facio, superaddendo ultra quam debeo. Ille vero ministerium suum reddit honorabile, qui quidquid sibi præceptum est et plus facit. Ille vero qui minus et remissius quam debet operatur, ministerium suum vituperabile reddit, honorificabo, inquam, ministerium meum, tentans *si quo*, id est aliquo modo *provoceam carnem meam*, id est Judæos, ex quorum genere venio, *ad æmulandum*, id est ad imitandum me, si quocunque modo talem me exhibeam, ut illi me æmulentur et desiderent tales esse. Si hac non potero via, aggrediar alia, id est nunc docendo, nunc exhortando, nunc scribendo, nunc bona exempla monstrando, nunc orando, nunc miracula faciendo, tentabo si aliquo modo provocare possim ad æmulandum me eos, qui sunt caro mea, ut et in spiritu mihi fiant fratres, *ut ita salvos faciam saltem aliquos ex illis*.

« Si enim amissio eorum, reconciliatio est mundi, quæ assumptio nisi vita ex mortuis? Quod si delibatio sancta est, et massa: et si radix sancta, et rami. »

Ideo laboro, ut aliquem ex illis ad fidem convertam, quia utilis erit eorum conversio. Nam si amissio illorum, id est quod Deus propter infidelitatem

amisi eos, et reliquit in manu hostis antiqui, est *A* *reconciliatio mundi*, id est causa ut gentes de toto mundo reconciliarentur Creatori suo, *quæ erit assumptio*, id est quod Deus assumet eos in fine sæculi, qui tunc erunt, *nisi vita ex mortuis*? Si hujus gentis abjectio reconciliationem præstitit mundo, et tanta fuit in hac gente gratia, quæ sublata ab ea, mundum universum Deo reconciliare sufficeret, quantum putemus tunc Deum misereri mundo, cum gens ista reconciliari meruerit Deo? Et quid sit, quod ex reconciliatione Israel mundus acquirat, breviter ostenditur, id est vita ex mortuis. Tunc enim erit assumptio Israel, quando jam mortui vitam recipient, et mundus ex corruptibili incorruptibilis fiet, et mortales immortalitate donabuntur. Absurdum namque videtur, si cum offensio eorum reconciliationem mundo donaverit, assumptio eorum non magis aliquid mundo et præstantio largiatur. Assumptio eorum erit vita ex mortuis. *Quod*, id est *sed si delibatio eorum sancta est, et massa*. Ne dicatis, inquit, fieri non posse ut multitudo eorum assumatur, quasi totum genus sit repudiatum, quia si delibatio, id est pauci de illis assumpti, ut apostoli et alii discipuli, si illa delibatio sancta est, tunc et massa (id est gens tota), potest sanctificari. Ostendit per simile, quia sicut illi pauci qui tempore apostolorum conversi sunt, dulces fuerunt, sic erit et multitudo eorum quæ in fine convertetur. Nam sicut delibatio alicujus panis est dulcis et bona similiter et ipsa massa quæ remanet, dulcis esse credenda est et bona. Est enim delibatio, parva ex aliqua re assumptio ad experimentum totius massæ, ut ex eibo vel potu. Sed si delibatio sancta est, et massa, quia sapor sanctitatis, qui in paucis primis inventus est, inveniatur et in multitudine novissimorum; et si radix est sancta, id est patriarchæ, a quibus trahunt humorem fidei, tunc et rami sancti sunt, qui de genere eorum excreverunt.

« Quod si aliqui ex ramis fracti sunt, tu autem cum oleaster esses, insertus es in illis, et socius radice et pinguedinis olivæ factus es, noli gloriari adversus ramos. Quod si gloriaris, non tu radicem portas, sed radix te. »

Sancti sunt et rami, *quod*, id est *sed si aliqui ex ramis fracti sunt*, id est ab arbore sanctæ plebis Dei per superbiam et infidelitatem excisi, noli gloriari. Putata est oliva, non amputata, et inde superbi rami fracti sunt, ipse est blasphemus et impius populus Judæorum. Manserunt tamen rami boni et utiles, nam inde apostoli et multi alii. Et cum ibi rami utiles relictis essent per Dei misericordiam, insertus es et tu gentilis, *cum esses oleaster*, id est agrestis et sterilis naturaliter, *insertus es in illis*, id est aliena operatione conjunctus radice in loco illorum. Illi enim amiserunt radicem, tu tenes eam. Hujus enim arboris radix Abraham et Isaac et Jacob, unde effloruit populus Dei; et isti nunc sunt in requie apud Deum in honore magno. Videamus ergo quemadmodum et ipse Dominus prænantiet et insertionem olea-

stri et fractionem ramorum. « Multi, inquit, venient ab Oriente et Occidente (*Matth. viii*). » Tam late terram occupaverat oleaster, amara silva et sterilis. Sed qui veniunt, jam præcisi sunt de silva. Ubi inserendi sunt ne arescant? Et recumbent, inquit, cum Abraham et Isaac et Jacob in regno cælorum. Et quid erit de illis qui venerunt ex stirpe Abrahæ? Quid fiet de ramis quibus erat plena arbor? Quid, nisi quia præceduntur et arescent ut isti inserantur? « Filii, inquit, regni ejicientur in tenebras exteriores (*ibid.*). » Hoc itaque commemorat Apostolus factum, quod Dominus prædixit faciendum. Si, inquit, *aliqui ex ramis fracti sunt*, id est aliqui ex filiis a sanctitate et promissione patrum abscissi, ut arescant et comburentur, sed *tu cum esses oleaster, insertus es in illis*, id est operatione divinæ pietatis in loco ipsorum plantatus, et factus socius radice, id est patriarcharum in fide et moribus, et pinguedinis olivæ, id est spiritualis gratiæ fructiferi populi Hebræorum ante adventum Domini, nunc factus es socius et particeps, *noli gloriari adversus ramos fractos*, id est noli insultare malis aliorum. Gentes enim jam in Christum credentes, erigebant se contra Judæos, quia crucifixerant Christum, cum et de ipsis veniret alius paries ad angularem lapidem, et ideo reprimit illas Apostolus: *Noli*, inquit, *gloriari adversus ramos*. *Quod*, id est *sed si gloriaris adversus eos*, scito quia *non tu radicem*, quæ est in patriarchis et prophetis, portas et sustines, *sed radix te*, id est non tu fundamentum et sustentatio es radice, sed radix tui. Gens illa nihil a te, sed tu ab illa fidem habes. Non es stabilis, sed illos per quos stas, destruis.

« Dicit ergo: Fracti sunt rami ut ego inserar. « Bene. Propter incredulitatem fracti sunt, tu autem fide stas. Noli altum sapere, sed time. Si enim Deus naturalibus ramis non percipit, ne forte nec tibi parcat. »

Quoniam dixi aliquos ex ramis fractos, te vero cum esses oleaster, insertum loco ipsorum, ergo propter verba mea hæc dicis mihi: *Fracti sunt rami*, ob hoc *ut ego inserar* loco fracturæ ipsorum. Et ad hoc increpative tibi respondeo, quia bene dicis. Quod est dicere: Non bene dicis, quia jactanter dicis, et falsum dicis. *Fracti sunt enim propter incredulitatem suam*, non propter insertionem tuam, *sed tu fide stas* in radice, de qua sunt præcisi. Nullis enim tuis meritis fidei [*al. fide*] insertus es gratis, ne putes quod personam tuam Deus acceperit, et illos sine causa projecerit. Dei est enim beneficium, non meritum tuum. Fide enim stas, id est non merito tuo, sed gratia Dei. Neque enim propter justitiam tuam vel meritum tuum fracti sunt rami, sed propter infidelitatem suam. Suo vitio fracti sunt, et inde tibi provenit opportunitas salutis, non propter te, sed propter Dei misericordiam. Et ideo *noli altum sapere*, id est superbire noli, quia insertus es, *sed time* ne frangaris per infidelitatem aut superbiam, sicut illi fracti sunt, quia in Christum credere no-

luerunt, qui semper in illa radice et in illa arbore A
 prædicatus est. Et ideo fracti sunt inde, qui in eum
 venientem non crediderunt; et tu insertus es ibi,
 quia in eum credidisti. Noli ergo altum sapere, id
 est noli extolli, sed time ne gratiam quam accepisti
 perdas. Time non servili timore, quam charitas expellit
 (*I Joan. iv*), sed timore casto, qui permanet in
 sæculum sæculi (*Psal. xviii*). Illo enim timetur,
 ne incidatur in tormentum supplicii; isto autem, ne
 dimittatur gratia beneficii. Illo mens pœna terretur,
 non iustitia delectatur; isto anima timet ne amittat
 gratiam, per quam in ea factum est, ut eam non
 peccare delectet, timens ne Deus eam deserat; etiam
 si nullus dolorum cruciatibus puniat. Hic timor cas-
 tus est, nec eum ejicit charitas, sed asciscit. Itaque
 noli altum sapere, sed timore isto time, quia qui al-
 tum sapit, et ideo non timet, utique perniciose non
 timet: Timor virtutum custos est; securitas ad
 lapsum facilis. Time offendere, time eradicari. Nam
 si Deus naturalibus ramis non pepercit, id est illis
 qui secundum patrum suorum instituta fuerunt
 in hac fidei radice plantati, et de hac patriarcharum
 stirpe naturaliter originem ducebant, timendum est
 ne forte contingat ut nec tibi parcat. Putas enim
 quod tibi adventitio parcat, si eum offenderis, qui
 nec naturalibus pepercit? si eos ob culpam incre-
 dultatis percussit et fregit, cave ne et te percutiat et
 conterat.

« Vide ergo bonitatem et severitatem Dei. In eos
 « quidem qui ceciderunt, severitatem; in te au- C
 « tem bonitatem Dei, si permanseris in bonitate.
 « Alioqui et tu excideris. Sed et illi si non perman-
 « serint in incredulitate, inserentur. Potens est enim
 « Deus iterum inserere illos. »

Quandoquidem justo Dei iudicio fracti sunt ra-
 mi, tu vero sola Dei gratia ipsorum loco insertus
 es, ergo vide, id est considera et attende ex una
 parte bonitatem divinæ pietatis qua donantur pec-
 cata conversis, et ex alia severitatem Dei, id est
 districtam justitiam, qua frangitur infidelis superbia
 naturalium ramorum. Salubriter enim non solum
 bonitas, sed etiam severitas Dei videtur, quoniam
 et amatur utiliter Deus, et timetur. Et Apostolus
 gentilem populum, ut in fide stabilis firmusque per-
 maneat, præcepto monet et exemplo terret. Vide, D
 inquit, piam bonitatem et rectam severitatem Dei,
 dum alios misericorditer eligit, alios juste repellit,
 et per utrumque disce humiliari. In eos quidem ra-
 mos qui fracti ceciderunt vide severitatem justæ per-
 cussionis, sed in te qui loco illorum misericorditer
 insertus es, et agnosce bonitatem gratiæ Dei, si ta-
 men permanseris in bonitate, ut bonis operibus hu-
 militer insistas usque in finem. Alioqui, id est nisi
 permanseris et perserveraveris in bona et religiosa
 conversatione, et tu excideris ab arbore gentis san-
 ctorum, in qua es insertus. Notandum quod hi qui
 ex propria oliva deciderunt, fracti dicuntur; hi
 vero qui ex oleastro inseruntur, si iterum peccave-
 rint, non frangendi, quod utique esset levius, sed

excidendi asseruntur. In quo acrior profecto Dei
 severitas demonstratur, si cum esset oleaster, ex
 peccatorum silva collectus est, et ad radicem fidei,
 atque sanctitatis adductus, postea rursus amaros
 malitiæ succos proferat. Si, inquit, bonus esse de-
 sieris, tu quoque excideris a bona radice. Nec so-
 lum tu, si ad malitiam redieris, excidium patieris,
 sed etiam illi inserentur, sicut tu jam insertus es,
 si non permanserint in incredulitate. Quod bene po-
 test fieri. Potens est enim Deus iterum per fidem
 revocare illos ad radicem suam et inserere.

« Nam si tu naturali excisus es oleastro, et
 « contra naturam insertus es in bonam olivam,
 « quanto magis hi secundum naturam inserentur
 « suæ olivæ? »

B Vere potest Deus iterum illos inserere, qui po-
 tuit te. Nam si tu excisus es ferro verbi Dei ex natu-
 rali oleastro, id est ex agresti gentilitate in qua na-
 tus eras, et contra naturam insertus es in bonam oli-
 vam, id est in fructiferam plebem Dei, quanto magis
 hi secundum naturam, id est sub lege nati, et per
 legem docti cultum Dei, inserentur suæ olivæ, id est
 unientur suæ plebi? Contra naturam insertus es in
 olivam, quia oliva solet in oleastrum inseri, non
 oleaster in olivam. Nam quisquis hoc fecerit, non
 inveniet fructum nisi oleastri. Quod enim inseritur,
 hoc crescit et ejus rei fructus. Sed Deus omni-
 potentia sua fecit, ut oleaster in radice olivæ inserere-
 tur, et non silvestres baccas, sed olivæ fructum
 daret. Id enim contra naturam dixit, quod est con-
 tra consuetudinem naturæ, quam notitia humana
 comprehendit, ut oleaster insertus in olea, non
 oleastri baccas, sed olivæ pinguedinem ferat. Deus
 autem creator et conditor omnium naturarum, nihil
 contra naturam facit. Id enim non incongrue dici-
 mus Deum contra naturam facere, quod facit con-
 tra id quod novimus in natura. Hinc enim etiam
 appellamus cognitum nobis cursum naturæ. Contra
 quem Deus cum aliquid facit, magnalia vel mirabi-
 lia nominantur. Contra illam vero summam naturæ
 legem a notitia remotam, sive impiorum, sive infir-
 miorum, tam Deus nullo modo facit, quam contra
 seipsum non facit. Populus itaque gentilis excisus
 est de oleastro, id est de ritibus sterilium gentium,
 et insertus est in bonam olivam, id est unitus per
 fidem patriarchis, ut fructum olivæ faciat contra
 naturam, id est contra institutiones patrum suorum,
 quoniam idololatria et hujusmodi opera gentibus
 ex usu sunt natura. Nomen autem olivæ ex libro
 Jeremiæ sumptum est, ubi Israeliticæ plebi dictum
 est: « Olivam uberem, pulchram, fructiferam,
 speciosam, vocavit Dominus nomen tuum (*Jer.*
 11). »

« Nolo enim vos ignorare, fratres, mysterium hoc,
 « ut non sitis vobisipsis sapientes, quia cæcitas ex
 « parte contigit in Israel, donec plenitudo gentium
 « intraret, et sic omnis Israel salvus fieret, sicut
 « scriptum est: Veniet ex Sion qui cripiat et aver-
 « tat impietatem a Jacob (*Isa. lxx*). Et hoc illis a

« me testamentum, cum abstulero peccata eorum. »

Dixi quia fracti rami iuserentur suæ olivæ. Et verum est, quia interim quidam, et in fine plenitudo eorum inseretur. Quod volo vos scire ut in spe salutis eorum gaudeatis. Nam *nolo vos, o fratres, ignorare hoc mysterium, id est secretum divini iudicii sacramentum, ut non sitis vobisipsa sapientes, id est ne putetis vos vestro iudicio et ingenio id posse discutere, vel ne superbiatis de vestra electione et illorum abjectione. Qui enim secundum Deum sapit, in beneficiis Dei non insultat abjectis, sed cum timore gratias agit misericordiæ largientis. Non vobis, sed Deo sitis sapientes, ut non vobis, sed Deo militet vestra sapientia. Hoc mysterium divini consilii nolo ut ignoretis, quia cæcitas contigit in Israel non ex toto, sed ex parte, id est Israelitæ cæcati sunt, non omnes, sed quidam, hoc est legis defensores, legis tractatores, legis doctores, legis intellectores auctorem legis ignoraverunt et crucifixerunt. Ipsa est cæcitas quæ ex parte contigit in Israel, ut crucifigeretur Christus. Ignoraverunt eum Judæi, et crucifixerunt. Ita contigit in eis cæcitas, mansura in ipsis donec plenitudo gentium intraret ad fidem, et sic, id est postquam plenaria gentium multitudo conversa esset, omnis Israel æmulando gentes salvus fieret, credens in Christum prædicante Elia. Terminus enim cæcitatibus Israel erit, ubi plenaria multitudo ex omnibus gentibus ingressa fuerit, quia tunc Judæi qui inventi fuerint, credent, et lumen oculorum mentis recipient ad prædicationem Eliæ et Henoch. Salvus fiet Israel accepta Christi gratia, sicut scriptum est in Isaia (cap. LIX) : Veniet ex Sion, id est nascetur Christus ex populo Judæorum, speculante a longe futuram salutem et humani generis redemptionem. Sion namque speculatio dicitur. Veniet, inquam, ille, qui cum quadam vi eripiat impietatem a Jacob, id est infidelitatem ab eis, de quorum stirpe nascetur. Quod fit interim, quia vix aliquis convertitur ex illis; et in fine avertat, quia tunc facile. Cultus Judæorum a passione Domini est impietas. Et hanc impietatem ab illis, qui de Jacob crediderunt, eripuit Christus quadam difficultate, videlicet multis prædicationibus et signis, multis novæ gratiæ præconibus. Hoc Christus in eis, qui tempore suo vel apostolorum ac deinceps crediderunt, fecit, et adhuc quotidie in his qui ex eodem populo fidem suscipiunt, et cum magno labore convertuntur, facit. Et plenius avertet ab eis impietatem, qui per Eliam et Henoch avertuntur ab infidelitate et idololatria, ne Antichristum ut Deum recipiant, sicut gentes. Et hoc testamentum, id est firma et stabilis promissio, ait Dominus, complebitur illis a me, scilicet ut impietas ab eis avertatur per Christum, cum abstulero peccata eorum in baptismo. Hoc est, tunc per Christi mei gratiam avertetur ab eis iniquitas, cum per ejusdem Christi sanguinem delevero peccata eorum. Hæc sententia sic legitur in Isaia : « Et venerit Sion redemptor, et eis qui redeunt ab iniquitate in Jacob*

(Isa. LIX), » dicit Dominus : « Hoc est fœdus meum cum eis (ibid.), » dicit Dominus. Nam quod in translatione nostra dicitur : « Venerit Sion redemptor, » Apostolus ait : *Veniet ex Sion qui eripiat*. Et quod additur. Et eis qui redeunt ab iniquitate Jacob, ipse posuit, *Et avertat impietatem a Jacob*. Et quod sequitur. « Hoc est fœdus meum cum eis, » ipse interpretatus est : *Hoc illis a me testamentum, et auctoritate apostolica addidit : Cum abstulero peccata eorum.*

« Secundum Evangelium quidem inimici propter vos, secundum electionem autem charissimi propter patres. Sine pœnitentia enim sunt dona et vocatio Dei. »

In fine convertentur, sed modo sunt inimici. Superius enim cum diceretur, quia cæcitas ex parte contigit in Israel, patuit quia pars illius populi excæcata est, et pars fidei lumine illustrata. Quod ideo accidit, quia alii ex ipsis facti sunt inimici Christo, et alii charissimi. Secundum Evangelium quidem sunt inimici, id est secundum quod Evangelii nova prædicatio evacuare videtur circumcisionem et Sabbatum, et carnales legis cæremonias. Et sunt inimici propter vos, qui ad fidem suscepti estis, quia inde graviter sunt irati, quod vos ad Dei cultum estis adducti. Vel propter vos, id est ut vobis locus intrandi fieret, permissi sunt ad inimicitias erumpere. Secundum Evangelium quidem inimici sunt propter vos, quia eorum inimicitia qua occiderunt Christum, Evangelium (sicut videmus) sine dubitatione profecit. Et hoc ex Dei dispensatione venit, qui bene uti novit etiam malis, non ut ei prosint vasa iræ, sed ut ipso illis bene utente prosvasis misericordiæ : est ergo in malorum potestate peccare. Ut autem peccando hoc vel hoc ex eorum malitia sequatur bonum, non est in eorum potestate, sed dividens tenebras et ordinans eas, ut hinc etiam quod faciunt contra voluntatem Dei, non impleatur nisi voluntate Dei. Tanta quippe ab inimicis Judæis adversus Jesum manus Dei et consilium prædestinavit fieri, quanta necessaria fuerant Evangelio propter vos. Ita secundum Evangelium sunt inimici propter vos, sed secundum electionem alii ex ipsis sunt charissimi, non propter merita sua, quia gratis sunt electi, sed propter patres quibus ista sunt promissa. Secundum electionem, quæ facta est de ipsis secundum gratiam, non secundum debitum, id est secundum hoc quod Deus elegit illos ab æterno, sunt charissimi propter patres, id est propter complendas promissiones patrum, scilicet ut Deus compleret in filiis quod patribus eorum promiserat. Jure dico, secundum electionem, non secundum opus eorum, quia dona Dei spiritualia, quæ suis fidelibus tribuit, et vocatio qua vocat eos ad fidem, sunt sine pœnitentia eorum, quoniam misericordia Dei prævenit omnem bonam voluntatem eorum vel actionem. Nec requirit divina gratia in baptismo gemitum vel planctum vel aliquod opus eorum, nisi solam fidem, sed omnia gratis condonat. Hoc ideo dicit, ne putent

illos non posse accipere misericordiam, quia eos dolere non vident. Vel ita potius: Secundum electionem sunt electi propter patres, quoniam dona virtutum quæ Deus præbet electis, et vocatio qua vocavit eos ab æterno, sunt sine pœnitentia ejus, id est sine mutatione stabiliter fixa sunt, sine mutatione consilii ejus permanent. Nam quia omnes pœnitentes mutare solent illud, unde pœnitentiam agunt, pœnitentia pro mutatione, ut causa pro effectu poni consuevit. Unde Scriptura testatur Dominum pœnituisse quod constituisset Saul regem (I Reg. xv), et dixisse de his, quos in diluvio erat delecturus: « Pœnitet me fecisse eos (Gen. vi). » *Sine pœnitentia ergo sunt dona*, id est promissa Dei gratuito facta, et *vocatio* ab æterno, quia non mutabit Deus vocationis vel largitionis suæ sententiam, sed quos ante mundi constitutionem in prædestinatione sua elegit (Ephes. i), hos fructum boni operis afferre faciet in tempore suo (Psal. i), et fructus eorum manebit, nec eum nisi manentem vitæ hujus inveniet finis, quia perseverantiam habebunt in benefactis. Non enim vocatione illa vocati sunt, de qua dictum est: « Multi vocati, pauci electi (Matth. xx); » sed illa, qua soli vocantur electi, qui intus audiunt a Patre et discunt, et veniunt ad Filium (Joan. xviii), istorum nemo perit, quia omne quod dedit ei Pater, non perdit ex eo quidquam. Quisquis ergo inde est, omnino non perit, nec erat inde qui perit. Propter quod dictum est: « Ex nobis exierunt, sed non erant ex nobis, nam si fulsissent ex nobis, permansissent utique nobiscum (I Joan. ii). »

« Sicut enim aliquando et vos non credidistis Deo, nunc autem misericordiam consecuti estis propter illorum incredulitatem, ita et isti nunc non crediderunt in vestram misericordiam, ut et ipsi misericordiam consequantur. Concluit enim Deus omnia in incredulitate, ut omnium miseretur. »

Vere cum plenitudo gentium ingressa fuerit, tunc omnis Israel salvus erit, quamvis modo sint inimici. Nam *sicut*, id est qua ratione vos scilicet ne causam superbix haberetis, *aliquando*, id est, longo tempore plus quam isti, *non credidistis Deo*, quod ad hoc valuit, ut modo humiles credatis, sed *nunc* id est nuper sive tempore gratiæ *consecuti estis misericordiam propter incredulitatem eorum* quæ aliqua causa est vestræ misericordix, *ita*, id est eadem ratione, *et isti*, ne postea cum fuerint conversi, habeant materiam in lege gloriandi, *nunc* in tempore gratiæ *non crediderunt* venientes in *vestram misericordiam, ut et ipsi* in fine humiliati *misericiordiam consequantur*. Hoc est, sicut vos gentes quondam non credidistis Deo, nec tamen idcirco penitus reliquit vos Deus, præsertim cum in vocatione temporis Israel nunquam exclusi sitis, sed semper vobis in proselytis janua patuerit revertendi, et aliquando plenam misericordiam ad ultimum consecuti estis, occasio tamen conferendæ in vos mise-

ricordix et populi incredulitas existit, ita etiam hi qui nunc de populo Israel non crediderunt, et pro incredulitate sua derelicti sunt, ut ad nos Dei misericordia flecteretur, non usquequaque derelinquentur in incredulitate sua, sed postquam plenitudinis gentium fuerit impleta dispensatio, etiam ipsi misericordiam consequentur; et quotidie patet eis ostium misericordix, si converti voluerint. Cum enim misericors Deus gentes traxit, iratus Judæam repulit. Actumque est ut sicut dudum ad percipiendam fidem gentilitas fuerat obdurata, ita postmodum ad fidem gentilitate suscepta, Judæa perfidix torpore duresceret. Hæc itaque sententia Apostoli primum quidem de vocatione Judæorum et repulsione gentium subtiliter est prolata. Ideo ita de utrisque actum est, quia *Deus conclusit*, id est concludi permisit *omnia*, id est Judæos et gentes *in incredulitate*, ut incredulitas concluderet eos ac detineret, quoniam aliter ex superbia ruerent, *ut omnium* id est Judæorum et gentium *miseretur*, non quod nullum damnaturus sit, quod quidam falso opinati sunt. Omnium itaque miseretur vasorum misericordix. Quid est omnium? Et eorum scilicet quos ex gentibus, et eorum quos ex Judæis prædestinavit, vocavit, justificavit, glorificavit. Deficiente enim ab utrisque fide, nisi iudicium suum potestas divina differret, universitas hominum sententiam damnationis exciperet. Sed in misericordiam ira translata est tunc præcipue, quando nemo poterat de suis meritis gloriari. Considerans igitur Apostolus tantas divitias bonitatis Dei, et tam magnum opus sapientiæ ejus erga rationales creaturas, qui tantum dives est in misericordia, et cujus tanta est bonitas et patientiæ longanimitas, dum immensitatem carum cordis oculis intuetur, repente stupore simul et pavore percussus exclamat, subjungens:

« O altitudo divitiarum sapientiæ et scientiæ Dei. Quam incomprehensibilia sunt judicia ejus, et investigabiles viæ ejus? Quis enim cognovit sensum Domini? (Sap. ix; Isa. xl; I Cor. ii). aut quis consiliarius ejus fuit? aut quis prior dedit illi, et retribuetur ei? Quoniam ex ipso et per ipsum et in ipso sunt omnia. Ipsi gloria in sæcula sæculorum. Amen. »

Nam quia superius multa posuerat, unde quæstiones istæ possent fieri, quare Jacob elegit, Esau vero reprobavit, et cur alios indurat aliisque miseretur, et quare prius Judæos quam gentes elegit, et post Salvatoris adventum quare Judæos populum suum reprobavit et gentes assumpsit, rursumque circa finem sæculi cur omnem Israel salvabit, et multitudinem gentium perire sustinebit, ne quis inde quæreret solutionem unde nunquam perveniretur ad finem, prorumpit in admirationem, in qua illa non esse humanis sensibus intelligibilia ostendit. Ne quis enim quæreret, quare sic salvantur cum multa alii modi salvationum sint, hoc non posse sciri per admirationem innuit Apostolus: *O, in-*

quilt, *altitudo*, etc., ac si dicat : Hic standum est, hic humana ratio deficit, nec secreta divinæ sapientiæ penetrat, ut intelligere possit cur ita divinitus agatur de singulis, ut isti eligantur et illi reprobentur, et nunc Judei, nunc gentiles ad fidem ingrediantur. Nam o quanta est altitudo divitiarum sapientiæ et scientiæ Dei, qui secreto consilio suo sic disponit omnia, ut servata unicuique arbitrii libertate, et mala aliorum vertat aliis in bonum, per incredulitatem aliorum operetur aliorum salutem. Tanta est hæc altitudo, ut exsuperet omnem sensum, quia educit super omnia in obscuritatem omnem intellectum et omnem rationem. Et hæc altitudo est divitiarum sapientiæ et scientiæ Dei; magnas enim divitias habet sapientia et scientia ejus, quæ novit omnia et sapienter disponit omnia (*Sap. viii*). Sapientia de divinis et spiritualibus dicitur, scientia de humanis atque corporalibus. Est enim sapientia in Deo, et de ipso et de Angelis, atque de omnibus supercælestibus creaturis, quoniam has præter ipsum Deum nemo perfecte cognoscit. Neque enim vel ipsi angeli seipsos perfecte cognoscunt, in quantum Deus illos perfecte intelligit usque ad plenum. Scientia quoque de omnibus humanis et mundanis rebus est in eo perfecta. Per hanc sapientiam et scientiam gubernat et disponit ipse sapienter omnia cælestia et terrena, licet nos absconditas causas operum ejus ignoremus. Juxta beatum Gregorium, publica sapientiæ supernæ sunt opera, cum omnipotens Deus regit quos creat, perficit bona quæ inchoat, et aspirando adjuvat quos visitationis suæ lumine illustrat. Cunctis enim liquet quia ipse perficit quod ipse ex munere suæ benignitatis inchoavit. Secreta vero sapientiæ supernæ sunt opera, cum Deus quos creavit deserit; cum bona quæ præveniendo cœperat, nequaquam proseguendo consummat; cum claritate nos suæ illustrationis illuminat, et tamen permissis carnis tentationibus, tenebris cæcitatibus pulsat; cum dona quæ contulit minime custodit; cum et mentis nostræ ad se desideria excitat, et tamen occulto judicio difficultatem nostræ imbecillitatis angustat. Quæ nimirum secreta ejus sapientiæ pauci valent inquirere, sed nullus invenire. Quia quod super nos de nobis ab immortalis sapientia non iniuste disponitur, justum profecto est ut a nobis adhuc mortalibus ignoretur. Sed hæc ipsa sapientiæ illius secreta conspiciere utcumque, jam incomprehensibilitatis ejus est potentiam videre, quia dum in ipsa consiliorum ejus inquisitione deficimus, deficiendo verius discimus quem timeamus. Ad hæc igitur sapientiæ illius secreta se extendens Apostolus, ait : *O altitudo divitiarum sapientiæ et scientiæ Dei ! Mira est enim celsitudo tantarum divitiarum divinæ sapientiæ et scientiæ, quam nihil latere potest vel effugere, sed ipsa uno intuitu conspiciat omnia, et virtute suæ omnipotentis continet universa. O quam incomprehensibilia sunt judicia ejus, id est, dispositiones de omnibus rebus, et investigabiles viæ ejus, per quas am-*

bulat in cunctis operibus suis, quoniam judicia ejus, quibus unamquamque animam atque omnem naturam rationalem dispensat, penetrare nemo sufficit; nec vias ejus quibus providenter incedit, investigare quisquam valet, id est nec homo, nec angelus. Valde ergo parvum sensum habemus ad discutendam justitiam judiciorum ejus, ad discutendam gratiam gratuitam nullis præcedentibus meritis, non iniquam quæ non tam movet, cum præstatur indignis, quam cum æque indignis aliis denegatur. Viæ autem ejus investigabiles illæ sunt, de quibus in Psalmo canitur : « Universæ viæ Domini misericordia et veritas (*Psal. xxiv*). » Misericordia igitur et veritas ejus investigabiles sunt, quia cujus vult miseretur, non justitiæ, sed misericordiæ gratia; et quem vult obdurat, non iniquitate, sed veritate vindictæ. Per has enim vias venit ad omnes, et investigari non potest cur ad hunc veniat per viam misericordiæ, ad illum vero per viam veritatis vel justitiæ. Nulla enim creatura perscrutari valet cur ipse misereatur huic potius quam illi. Vere sapientia et scientia ejus est mirabilis, et judicia ejus incomprehensibilia. *Nam quis cognovit sensum Domini in sapientia et scientia? Id est quis perfecte novit secreta sensus illius? quis arcanorum mentis ejus fuit conscius? Nullus, aut quis consiliarius ejus fuit in dispositione rerum, cujus consilio aliquid ageret, vel qui ejus consilium sciret? nullus. Hic versus ex libro Isaïæ sumptus est, cujus auctoritate probat Apostolus non debere talia investigari ab hominibus, quæ etiam propheta se ignorare demonstrat. Si quis novit consilium alterius, vel per hoc novit quod ipse consultus, id est interrogatus sibi dedit, vel quia quod ille invenit, sibi revelavit. Quare nulli datur scire occultum Dei consilium, cum ipse nec aliquem consuluerit, nec inventum alicui revelaverit. Nam sicut sensus ejus non potest cognosci, ita consilium ejus non potest sciri. Quis fuit consiliarius ejus: aut quis prior dedit illi quidquam, et per hoc retribuetur ei ab ipso? Nullus, quia ipse prævenit omnes. Hoc probat investigabiles esse vias ejus, quia cum sit initium omnium bonorum, investigari non potest cur ipse aliis gratiam suam gratuito munere tribuat, et aliis non tribuat, sicut cernimus factum in Jacob et Esau. Quis prior dedit illi, et retribuetur ei? Id est quis prior fecit aliquid boni sine Deo, cujus bonitatis est etiam quod sumus et vivimus? Nullus enim Deum meritis antecessit, ut tenere eum quasi debitorem possit; sed ipse potius omnes, ut dictum est, sua gratia prævenit, ut subsequi possint eorum bona opera. Quoniam ex ipso et per ipsum et in ipso sunt omnia. Et ipsum igitur initium fidei nostræ ex ipso est; neque enim hoc excepto ex ipso sunt cætera. Ex ipso sunt omnia, id est bona voluntas et bona actio et omnes naturæ. Neque enim ex ipso sunt peccata, quæ naturaliter subsistentia non sunt, sed bene conditam substantiam vitiant. Ex ipso autem, non hoc significat quod de ipso. Quod enim de ipso est, potest dici ex ipso; non autem omne quod ex*

ipso, recte dicitur de ipso. Ex ipso enim cœlum et terra, quia ipse fecit ea; non autem de ipso, quia non de substantia sua. Sicut aliquis homo si generet filium et faciat domum, ex ipso filius et ex ipso domus, sed filius de ipso, domus de terra et ligno. Sed hoc ideo quia homo est qui non potest aliquid etiam de nihilo facere. Deus autem ex quo omnia, et per quem omnia, et in quo omnia, non opus habet aliqua materia, quam ipse non fecerat, adjuvari potentiam suam, et ideo cuncta fecit de nihilo. Ex ipso potest intelligi ex Patre omnia; et per ipsum, per Filium omnia; et in ipso, in Spiritu sancto omnia. Per has præpositiones, *ex, per, in*, ostenditur diversitas personarum; per idem pronomen quod est ipse, designatur identitas substantiæ, dum dicitur, ex ipso et per ipsum et in ipso. Nec solum eadem substantia Patris et filii et Spiritus sancti, sed et æqualitas per hoc demonstratur, et tota Trinitas omnia creasse et continere declaratur. Et ideo *ipsi gloria in sæcula sæculorum. Amen.* Dicendo *ter*, ipsum, distinxit, ut diximus, personas; et subiungendo, *ipsi gloria*, non divisit substantiam. Possumus et absque personarum distinctione hæc de eodem, qui est Trinitas, intelligere. Sic enim exponit Ambrosius. Quid est ex ipso? Quod ipsius voluntate natura omnium sit, et ipse sit auctor omnium quæ esse cœperunt. Per ipsum, quid est? Quia per ipsum institutio et perseverantia omnibus impertita videtur. In ipso quid est? Quia omnia admirabili quoddam desiderio et inenarrabili amore auctorem vitæ et ministratorem gratiæ suæ ac muneris intuentur, secundum quod scriptum est: « Oculi omnium in te sperant, et aperies manum tuam, et implebis omnem animam bona voluntate (*Psal. cxxiv.*) » Et quoniam ita sunt ex ipso, et per ipsum et in ipso omnia, idcirco ipsi gloria in sæcula. Illi autem nolunt ut sit ipsi gloria in justificandis impiis gratuita gratia, qui ejus ignorantes justitiam, volunt suam constituere, ut sui meriti præcedat aliquid, quasi priores volentes dare ut retribuatur eis ab illo, et sua putantes præire merita ad illum ex quo omnia.

CAPUT XII.

« Obsecro itaque vos, fratres, per misericordiam Dei, ut exhibeatis corpora vestra hostiam viventem, sanctam, Deo placentem, rationabile obsequium vestrum. »

Ab hoc loco incipit moralis admonitio post tractatum legis et fidei, ac naturam Judaici populi et gentilis. Cum enim per omnem textum hujus epistolæ in superioribus docuisset Apostolus, quomodo a Judæis ad gentes, a circumcisione ad fidem, a littera ad spiritum, ab umbra ad veritatem, ab observantia carnali ad spiritalem, religionis summa translata sit, et hæc ita futura prophetice ostendisset vocibus designata, jam nunc spirituales observantiæ hujus, ad quam cultus Dei ritum docuit esse translatum, aggredditur mores et statuta sancire, et ad bonam vitam utrumque simul populum monere. Nuncusque enim ostensum est, ne alter adversus alterum su-

perbiret; nunc ut alter de alterius utilitate laboraret, quasi dicat: Hactenus vitia extirpavi, nunc itaque virtutes plantare disposui. Et ideo *obsecro vos, o fratres*, etc. Vel ita continuatur ad proximum. Quando quidem ex Deo sunt omnia, et ex gratia ejus habemus quicquid boni habemus, itaque *obsecro vos, fratres*, id est quod rogo, fraternitas exigit. Non per potentiam impero, nihil enim proficit legis imperium; sed quasi qui officium susceperim reconciliandi vos Deo, obsecro *per misericordiam Dei*, id est per misericordiam vobis a Deo factam. Quia enim omnes sub peccato conclusi sunt, non jam meritis hominum, sed misericordia Dei salus humana consistit. Ad quam misericordiam pertinet et sacrificium, quo se quisque Deo mactat extinguendo vitia, quia et in seipsum facit misericordiam sicut scriptum est: « Miserere animæ tuæ placens Deo (*Eccli. xxx.*) » Et ideo per misericordiam rogat Apostolus exhiberi corpora hostiam. Obsecro, inquit, *ut exhibeatis*, id est offeratis corpora vestra hostiam viventem. Hostia quippe et immolatur et viva est, quando et ab hac vita homo non deficit, et tamen se a carnalibus desideriis occidit. Hostia enim occiditur ut offeratur. Sed hostia vivens est, corpus pro Domino afflictum. Quod et hostia dicitur, et vivens, quia vivit in virtutibus, et est a vitiis occisum. Hostia videlicet, quia jam huic mundo est a pravis actibus mortuum; vivens autem, quia cuncta quæ prævalet, bona operatur. In lege corpora brutorum animalium hostia mortua, sed in Evangelio corpora hominum offeruntur hostia viva. Tunc hostia occidebatur, ut homines causa peccati subjecti, morti ostenderentur; nunc quia a peccato sunt liberi, viva offertur in signum vitæ æternæ. Qui enim membra sua mortificant ab incentivo libidinis, et actus corporis sui Deo placitos habent; hostiam viventem offerunt, et legem sacrificiorum, quæ in Levitico lata est, spiritualiter complent. Sic exhibete corpora vestra, hostiam viventem, *sanctam*, id est a peccati contagio mundam, et *Deo placentem*, id est virtutum meritis acceptabilem. *E; obsequium vestrum* in Dei cultum exhibete *rationabile* ut rationabiliter omnia faciatis, nec sit quidquam in actionibus obsequii quod Deo impendatis, unde rationem reddere non possitis. Vel rationabiliter, id est cum discretione facite omnia, ne quid nimis aut imprudenter agatis, sed cuncta moderate et sapienter (*Ephes. v; I Thess. iv.*)

« Et nolite conformari huic sæculo, sed reformamini in novitate sensus vestri, ut probetis quæ sit voluntas Dei bona et beneplacens, et perfecta. »

Ita vosipsos sacrificium facite. *Et nolite conformari huic sæculo*, id est nolite formam hujus sæculi vobis imprimere, ut similes efficiamini huic sæculo nequam, *sed reformamini*, id est rursus formamini ad imaginem Dei, quæ in vobis per peccatum deformata est, ut incipiat illa imago ab illa

reformari, a quo formata est. Non enim reformare A
reipsam potest, sicut potuit deformare. Ab ea de-
formitate, qua per cupiditates sæculares conforma-
mini huic sæculo, reformamini nunc in novitate
sensus vestri, ut sensus mentis vestræ semper
igne charitatis ut aurum innovetur. Sicut generalis,
prohibitio est in lege : « Non concupisces (*Exod.*
xx) ; » et generalis jussio est : Diliges ; ita nunc
apud Apostolum prohibitio est : *Nolite conformari*
huic sæculo ; jussio autem, sed reformamini in no-
vitate sensus vestri. Illud pertinet ad non concu-
piscere, hoc ad diligere ; illud ad continentiam, hoc
ad justitiam ; illud ad declinandum a malo, hoc ad
faciendum bonum. Non concupiscendo enim, vetu-
state exspoliatur ; et diligendo, novitate induimur.
Reformatur autem sensus noster per exercitia sa-
pientiæ et emundationem verbi Dei, ac legis ejus
intelligentiam spiritalem. Et quanto quis quotidie
ex Scripturarum proficit lectione, tanto altius in-
tellectus ejus ascendit, tantoque semper et quotidie
magis novus efficitur, et secundum hanc pulchritu-
dinem reformatur ad imaginem Dei. Justitia enim
cum in nobis est, vel quælibet virtus, qua recte sapien-
terque vivitur, interioris hominis pulchritudo est. Et
anima quæ se refert ad Deum, ut igne amoris ejus
accensa, formam concupiscentiæ sæcularis amittat,
ei tanquam incommutabili formæ subdita reformatur,
hinc ei placens, quod ex ejus pulchritudine ac-
ceperit. Reformamini, inquit, *in novitate sensus ve-*
stri ut probetis quæ sit voluntas Dei. Nisi enim a
Domino renovatus sit sensus noster, et Dei sapientia
illuminatus, probare non potest quæ sit voluntas
Dei. In multis enim putatur esse voluntas Dei et non
est ; ubi errant et falluntur, qui sensum non habent
divinitus reformatum. Probetis quæ sit voluntas Dei
bona in his qui bona inchoant, *et beneplacens* in his
qui perseverant, *et perfecta* in his qui consummant.
Vel *bona*, quantum ad conjugatos ; *beneplacens*,
quantum ad continentes ; *perfecta*, quantum ad
virgines.

« Dico enim per gratiam quæ data est mihi, om-
« nibus qui sunt inter vos, non plus sapere quam
« oportet sapere, sed sapere ad sobrietatem, et uni-
« cuique sicut Deus divisit mensuram fidei. Sicut
« enim in uno corpore multa membra habemus, om-
« nia autem membra non eundem actum habent, ita
« multi unum corpus sumus in Christo, singuli autem
« alter alterius membra. »

Voluntatem Dei, quæ in præceptis ejus est, pro-
betis, ut secundum eam recte vivatis, nam dico vo-
bis, id est præcipio, ne inscrutabilia ejus arcana
discutere præsumatis. *Dico enim per gratiam quæ*
data est mihi, id est per apostolatam gratis mihi da-
tum, *omnibus qui sunt inter vos, non plus sapere*, id
est non plus investigare de mysteriis *quam oportet*
sapere. Datur intelligi, fuisse quosdam inter eos,
qui se intromittebant de illis quæstionibus quas su-
perius denotavit, et conabantur rimari illa secreta
Dei. Quos nunc apostolica auctoritate corrigit,

id est non plus sapere, id est non plus inqui-
rere de occultis Dei, quam oportet, id est quam ad
fidem et religiosos mores pertinet ; *sed sapere ad so-*
brietatem, ut mens eorum non inebrietur, ut sensum
perdat nimietate sapientiæ, dum in his quæ supra
vires humanæ rationis sunt, se immerserit, sed mo-
derato intelligentiæ poculo sobria sit. Obediendum
valde est huic præcepto. Si enim pro viribus suis
alatur infans, fiet ut crescendo plus capiat. Si au-
tem vires capacitatis suæ excedat, deficiet ante-
quam crescat. Et ideo non est supra modum ex-
quirenda sapientia, sed in hujusmodi inquisitionibus
servanda est temperantia. Vel quod ait, non plus
sapere quam oportet sapere, sed sapere ad sobrietatem,
hoc est quod supra dixerat : « Noli altum
B sapere, sed time (*Rom. xi*). » Videt enim adhuc
superbientes ramos oleastri insultare ramis, qui
de bona oliva fracti sunt ; et ideo præcipit eis non
plus sapere quam oportet, id est non plus de se
sentire quam expedit, non plus de se gloriari propter
casum aliorum. Superbia enim semper sibi vi-
detur esse sapiens, et ideo plus quam oportet sa-
pere, hoc est superbire. Dico, inquit, omnibus, qui
sunt inter vos, non supra modum sapere, sed ad so-
brietatem, *et unicuique dico sapere, sicut divisit Deus*
singulis mensuram fidei, quia Deus unicuique men-
suram dedit fidei, ut ab alio minus, ab alio amplius
haberetur, et unicuique pro modo suæ perfectionis
propria mensura completeretur. Vel sapiat unusquis-
que sicut ei Deus divisit mensuram fidei, id est in-
telligat unusquisque quæ in eo sit mensura gratiæ
C Dei, quam consequi meruit per fidem. Interdum
enim accipit quis a Deo, ut sapiat in officio visi-
tandi infirmos, aut erga misericordias pauperum,
aut erga viduarum aut pupillorum defensionem, aut
erga hospitalitatis sollicitudinem. Hæc ergo singula
divisit unicuique Deus secundum mensuram fidei.
Sed nisi is, qui accepit gratiam, ut de uno aliquo
horum saperet, intellexerit mensuram gratiæ sibi
datæ, sed voluerit præsumere de sapientia Dei, de
verbo doctrinæ, de profundioris scientiæ ratione, in
qua gratiam non accepit, et non tam discere quam
docere quæ nescit, iste cum minus sapiat, plus vult
sapere quam oportet. Non enim sapit ad sobrietatem,
D et custodiat quomodo Deus divisit unicuique men-
suram fidei. Verum ut evidentius adhuc de his Aposto-
lus assignet, introduxit exemplum et dicit. *Sicut enim*
in uno corpore multa membra habemus, omnia autem
membra non eundem actum habent, ita multi unum
corpus sumus in Christo, singuli autem alter alte-
rius membra. Ordinatissime enim tali exemplo
componit omne corpus Ecclesiæ. Sicut, inquit,
membra corporis singula quæque proprios habent
actus, et officiis suis unumquodque membrum de-
servit, nec tamen possibile est ut non consensu mu-
tuo sibi invicem cedant, sic in Ecclesia quæ est cor-
pus Christi, diversos singuli habemus actus. Verbi
gratia : Alius studet sapientiæ et verbo doctrinæ, et
est oculus in hoc corpore. Alius est deditus mini-

sterio fratrum et curæ indigentium, et est manus A hujus corporis; alius est studiosus auditor verbi Dei, et est auris hujus corporis; alius ad visendos decumbentes, et requirendos tribulatos, et eruendos in necessitatibus positos est impiger, et est corporis Ecclesiæ pes. Et ita invenitur unusquisque erga unum aliquid officium specialius operam dare. Nec tamen unum debet sufficere, sed secundum formam propositi exempli, sicut verbi gratia, oculus speciale officium habet ut videat, unum tamen est ex omnibus et in omnibus membris, et cum singulis agit omnia, et cum ipso singula quæque agunt omnia, ita et qui per gratiam fidei unum aliquid donum speciale meruerit, illud quidem principaliter administrat, in omnibus vero actibus aliorum habetur et particeps. Et hoc est quod B dicit: *Vere divisa est unicuique mensura fidei, et diversa sunt dona fidei, nam ita est etiam in cæteris donis gratiæ. Sicut enim in uno, etc.* Vel ideo mensurate divisit Deus donum fidei, quia *multi unum corpus sumus*; et ideo omnia necessaria sunt danda, sed non uni membro, ut nec Ecclesia indigeat, et sit subserviendi materia, ut sit mutua dilectio, dum alter opus habet altero. Sicut enim corpus nostrum est unum, et in ipso multa habemus membra, ita unum est corpus Christi quod est Ecclesia, et in ipso sunt multi fideles quasi varia membra, quia multi unum corpus sumus in Christo. Nullus rejicitur major vel minor. Et sicut in corpore humano non omnia membra habent eundem actum, sed diversa diversos, et non omnia C habent omnes actus in se, sed per alia supplentur; eodem modo in Ecclesia singuli quique nostrum sumus membra alter alterius, ut invicem serviamus. Sicut enim manus servit oculo, oculus pedi, sic in Ecclesia omnium servitus debet esse communis. Nos multi per diversa dona vel opera sumus unum corpus per unitatem charitatis et concordie in Christo, sed singuli sumus membra alter alterius, id est aliis servientes et aliis indigentes, ut hoc modo charitatis inter nos vinculo conjungeremur, quoniam singuli singulis indigemus, et quod huic in seipso dæst, suppletur per alium.

« Habentes autem donationes, secundum gratiam quæ data est nobis, differentes. »

Singuli sumus membra, alter alterius, non uno quidem modo, sed *habentes diversas donationes spiritualium numerum differentes* ab invicem *secundum gratiam quæ data est nobis a Deo*, qua secundum quod unicuique Deus dedit gratis, habet iste hoc donum, et ille aliud.

« Sive prophetiam secundum rationem fidei; sive ministerium, in ministrando; sive qui docet, in doctrina. »

Nunc differentiam donationum incipit exponere, ac velut diversorum membrorum actus enumerare. Et quasi oculis visum, ita menti quæ interior est oculus, prophetiæ assignat mysterium. Et alii tanquam manui ministerium [al. officium] ascribit, et

alii tanquam linguæ doctrinam tribuit. Simili modo et cætera dividit. Singuli sumus invicem membra, ad hoc habentes dona differentia, *sive habentes prophetiam*, id est futurorum vel quorumlibet occultorum manifestationem, membra sumus aliorum, ut illis prophetemus, ut quemadmodum oculis aliis membris, ita et nos aliis fidelibus per prophetiam serviamus, prævidendo illis futura, quatenus ad evitanda imminencia mala reddamus illos cautiore. Nos dico, habentes hanc prophetandi gratiam *secundum rationem fidei*, ut nihil extra fidei regulam loquamur aut sapiamus. Vel secundum rationem fidei, quia prout fides credentium sive auditorum exigit capacitas seu salus, datur gratia prophetiæ. A prophetia incipit enumerare spirituales donationes, quia credentes accepto Spiritu sancto, mox prophetabant. *Sive habentes ministerium* sicut diacones, ut ministremus sacris altaribus, *in ministrando* sumus membra aliorum pro quorum utilitate ministramus. Vel ministerium, ut terrena alimenta sanctis ministremus, in ministrando sumus eorum membra. *Sive ille qui docet* ignorantes in doctrina, id est in exhibitione doctrinæ fit membrum eorum.

« Qui exhortatur in exhortando, qui tribuit in simplicitate, qui præest in sollicitudine, qui miseretur in hilaritate (Amos v). Dilectio sine simulatione (I Petr. ii). »

Qui exhortatur alios ut faciant bonum quod ipsi non faciunt, sed sciunt et negligunt, in exhortando fit membrum eorum. Qui tribuit de suo aliis, in simplicitate fit membrum eorum, id est si nihil repetat ab illis quibus dedit, sed tantum a Deo qui remunerator est omnium bonorum. Vel qui tribuit indigentibus, in simplicitate cordis hoc faciat, hoc est, ne videatur manibus bene facere indigentibus, et corde laudem quærat ab hominibus. Simplicitas excludit hypocrisim. Qui eleemosynam tribuit, faciat hoc in simplicitate supernæ intentionis, non in duplicitate præsentis et futuræ gloriæ. Qui præest fratribus vel Ecclesiæ, in sollicitudine præsit, ut sollicitus vigilet super custodiam gregis sibi commissi, non in sollicitudine humanarum causarum, aut sæcularium rerum, hæc enim sollicitudo abjicienda D est ab his qui Ecclesiæ præsent, sed in hujusmodi sollicitudine, qualem habebat Apostolus, gerens sollicitudinem omnium Ecclesiarum. Qui ergo præest Ecclesiæ, talem habere sollicitudinem debet, et illam sæcularem habere omnino non debet. Qui miseretur, in hilaritate hoc faciat; hoc est, qui misero pie compatitur, impendens illi beneficium misericordiæ, in hilaritate mentis hoc agat, quia « bilarem datorem diligit Deus. (II Cor. ix). » Qui enim res suas prærogat, si infidelis sit et recepturum se desperet, contristatur tanquam qui eas perdidit. Qui vero eum fide et spe hoc agit, in hilaritate et lætitia hoc agit, certus quod pro parvis magna recipiet, et insuper æternam consequetur vitam. Opera enim misericordiæ non ob aliud fiunt, nisi ut a miseris

liberemur, juxta illud: « Beati misericordes, quoniam ipsi misericordiam consequentur (Matth. v). » Quod contra Jacobus ait: « Judicium sine misericordia illi qui non facit misericordiam (Jac. ii). » Nam quia in multis offendimus omnes, suggeritur opus misericordiae tanquam quotidiana medicina quotidianis, etsi levioribus, tamen vulneribus. Misericordia vero multiplex est, scilicet peccanti ignoscere, oppresso subvenire, esurientem pascere, nudum vestire, et similia facere. Et ideo qui miseretur, in hilaritate hoc faciat, ut ex hilaritate vultus et animi gratum magis fiat beneficium ejus tam Deo quam hominibus. Jam dixerat: *Qui tribuit in simplicitate*, et nunc dicit: *Qui miseretur in hilaritate*. Et utriusque sententiae forsitan videtur unum opus esse, non tamen et operis ipsius unus affectus. Aliud est enim dare indigenti, aliud affectum misericordiae cum indigente partiri. Et aliud est simplicitas, aliud hilaritas, quoniam simplicitas duplicem excludit intentionem, hilaritas ostendit fretum animum spe caelestium praemiorum. *Dilectio* quoque *sine simulatione* sit in vobis. Omnis dilectio quae non est secundum Deum, simulata est et non vera, quia Creator animae Deus, idcirco ei cum caeteris virtutibus etiam affectum dilectionis inseruit, ut diligat Deum et ea quae vult Deus. Cum ergo hoc opus dilectionis Deus in anima dederit, quicumque aliud dilexerit quam Deum et quae Deo placeant, charitas in eo ficta et simulata dicenda est. Sed et si quis proximum suum diligat, et cum errantem viderit, non commoneat nec corrigat, simulata charitas ista dicenda est. Et ideo nihil adulatorium, nihil fucatum habere charitas debet.

« Odientes malum, adhærentes bono, charitatem fraternitatis invicem diligentes, honore invicem praevinentes, sollicitudine non pigri, spiritu ferventes, Domino servientes, spe gaudentes, in tribulatione patientes, orationi instantes, necessitatibus sanctorum communicantes, hospitalitatem sectantes (Hebr. xiii). »

Sitis *odientes omne malum et adhærentes bono*. Odit malum, qui non solum non vincitur voluptate, sed etiam odit opera voluptatis. Et adhæret bono, quem nulla tentatio nullaque adversitas separare valet a bono. Et ita debetis ex ordine proficere, ut primum oderitis et in vobis et in aliis omne malum; deinde firmiter adhæreatis bono, ne unquam delamini ab eo. Sitis *diligentes invicem charitatem fraternitatis*, id est amate inter vos fraternam charitatem, diligite et habere studeat ipsam dilectionem, quae vos mutuo foederat ut fratres. Iste erga illum, et ille erga istum diligat hanc charitatem fraternitatis et servare studeat. Et sitis alii alios *invicem praevinentes honore* ut unusquisque festinet alium magis honorare quam honorari ab illo, et majorem ei reverentiam exhibere, sibi que illum praeferre, et ille similiter huic faciat. Sitis etiam *sollicitudine non pigri*, id est, et solliciti corde et impigri opere, ut et de vestra aliorumque salute

A sitis solliciti, et quod ad salutem pertinet, agere non sitis pigri. Sitis etiam *spiritu ferventes* ut etsi actu semper implere non potestis quod pie desideratis, spiritus tamen igne charitatis serveat in vobis, ut nihil remissum, nihil tepidum sit in vobis. Sitis etiam *Domino servientes* ut nulli vitiorum serviat, sed Domino, cui servus vitiorum servire non potest. Domino servite, ut quidquid boni feceritis, ad Domini gloriam referatis; et quidquid pro ejus amore proximis feceritis, ei vos facere credatis. Sitis *spe caelestium honorum gaudentes*, ut non respiciatis ea quae videntur, sed expectetis ea quae non videntur. Sitis et *in tribulatione patientes* ut patienter propter caeleste praemium toleretis omnem tribulationem, ut nec conturbemini ira, vel odio contra persecutorem, neque murmuretis contra Deum. Et ut possitis adversa patienter sustinere, sitis *orationi instantes*, ne deficiatis in tribulatione. In quo enim non sufficit humana fragilitas, auxilium Dei orationibus implorandum est. Sitis *necessitatibus sanctorum vestra bona communicantes*, id est honeste et decenter non quasi eleemosynam indigentibus praebentes, sed sensum vestrum quodammodo cum ipsis habentes communem. Sitis et *hospitalitatem sectantes* non solum venientes ad domum vestram hospites suscipiatis, sed etiam sectemini ac perquiratis eos ubique, ne forte in plateis alicubi secedant, ne extra tectum jaceant.

« Benedicite persequentibus vos, benedicite, et nolite maledicere. Gaudete cum gaudentibus, flete cum flentibus. Id ipsum invicem sentientes, non alta sapientes, sed humilibus consentientes. »

Benedicite persequentibus vos, id est bona illis orate qui mala vobis fecerint; *benedicite illis et nolite maledicere*, id est nec saltem voluntatem maledicendi habeatis in corde. Removet eos a communi consuetudine, dum prohibet adversariis maledicere. Et quia grave et velut intolerabile erat eis hoc praecceptum, quo jussit persequentibus benedicere, ideo repetit ut magis mentibus eorum ingerat, et ut benedictio eis sit absque maledictionis admistione, dicens: *Benedicite, et nolite maledicere*. Scriptura vero sacra duobus modis maledictum memorat, aliud videlicet quod approbat, aliud quod damnat. Aliter enim maledictum profertur iudicio justitiae, aliter livore vindictae. Maledictum iudicio justitiae profertur, sicut Abraham dicitur: « Maledicam maledicentibus tibi (Gen. xii). » Rursus, quia maledictum livore vindictae promittitur, Apostolus nunc admonet: *Benedicite*, inquit, *et nolite maledicere*. Deus ergo maledicere dicitur, et tamen maledicere homo prohibetur, quia quod homo agit malitia vindictae, Deus non facit nisi examine et virtute justitiae. *Gaudere* subauditur debetis, *cum gaudentibus* de spirituali profectu, *et flere cum flentibus* de spirituali detrimento. Non enim quibuscumque gaudiis gaudio nostra sunt socianda, nec quibuscumque flentibus lacrymae nostrae jungendae. Neque enim praecceptum habemus, ut cum illis qui de acquisitione pecuniae vel hujus-

modi rebus gaudent, gaudeamus; sed potius cum illis, qui spe supernorum honorum gaudent, vel de accepta remissione peccatorum et gratia Spiritus sancti lætantur, et de similibus bonis. Similiter nec cum illis flere jubemur, quos flere facit tristitia sæculi, quæ mortem operatur, sed cum illis potius, qui pro suis vel aliorum peccatis flent, aut qui præ desiderio vitæ æternæ seu pro quibuslibet causis hujusmodi fundunt lacrymas. *Idipsum sitis invicem sentientes*, id est quod iste sentit, idipsum sentiat ille; et item quod ille sentit, idipsum sentiat iste, ut nulla dissensio sit inter vos, sed unanimis concordia, vos dico *non alta sapientes*, id est non in corde tumentes, non superbientes, *sed humilibus consentientes*, id est voluntati humilium acquiescentes, ut vos quoque sitis humiles. Consentientes sitis eis, quod non fit ore, sed corde, quia tunc vera humilitas est, cum non est in sola lingua.

« Nolite esse prudentes apud vosmetipsos. »

Id est nolite prudentiam vobis arrogare. Qui enim sibi ipsi prudens esse videtur, hic cum arrogantia extultus est. Nec potest veram sapientiam Dei scire, qui suam stultitiam quasi sapientiam colit (*Prov. III*). Qui ergo apud seipsum prudens est, apud Deum prudens esse non potest, quoniam « scientia inflat (*I Cor. VIII*). »

« Nulli malum pro malo reddentes. »

Qui enim malum pro malo reddit, aut simile peccatum, aut gravius facit. Nam ille qui malum prior intulit, non sensit forsitan malum esse quod fecit. Qui autem malum reddit, eo ipso quod ad ulciscendum motus est, probatur sensisse malum esse quod reddidit. Et ideo nullus se vindicet, ne deterius quam hostis ejus peccet.

« Providentes bona non tantum coram Deo, sed etiam coram omnibus hominibus. »

Sitis *providentes bona*, id est provida discretionem considerantes, ut ea quæ feceritis sint bona, *non tantum coram Deo* qui videt conscientiam; *sed etiam coram omnibus hominibus* fidelibus et infidelibus, qui vident actionem, ne possint eam reprehendere. Providenda sunt enim bona coram cunctis hominibus, non ut placeamus singulorum vel vitii vel moribus, ne simus contrarii sententiæ qua dicitur: « Si adhuc hominibus placerem, Christi servus non essem (*Gal. I*). » Sed qui vitæ suæ et morum actuumque libram sic tenet, ut non possit ab ullo homine reprehendi, iste bona coram omnibus hominibus providet, sive illis placeant quæ bona sunt, sive non placeant. Et ideo providendum est, ne ex bonis nostris fiat hominibus scandalum, sed bonum exemplum. Sunt enim nonnulli qui non curant quidquid dicatur de eis, dum modo ipsi intentionem bonam habeant. Sed qui salutem proximi negligit, crudelis existit.

« Si fieri potest, quod ex vobis est, cum omnibus hominibus pacem habentes (*Hebr. XII*). »

Sitis *habentes pacem cum omnibus hominibus, si fieri potest, quia difficile est* ut fiat, quod tamen est

ex vobis, id est habere pacem cum omnibus non remanet a vestra parte, quia vos erga nullum peccatum violatis. Vel si bonum quod a vestra parte est, videlicet observatio justitiæ, potest fieri, ut non impediatur ab illis hominibus, sitis habentes pacem cum cunctis hominibus. Juxta beatum vero Gregorium, direxit Apostolus hoc præceptum ad rectores ecclesiæ. Hortaturus enim ut pacem cum omnibus haberent, præmisit dicens: *Si fieri potest, atque subiunxit, quod ex vobis est*. Difficile quippe erat, ut si male acta corripere, habere pacem cum omnibus possent. Sed cum temporalis pax in pravorum cordibus ex nostra increpatione confunditur, inviolata necesse est in nostro corde servetur. Recte itaque ait, *quod ex vobis est*. Ad si diceret: *Quia pax ex duarum partium consensu subsistit, si ab eis qui corripuntur, expellitur, integra tamen in vestra qui corripitis, mente teneatur.*

« Non vosmetipsos defendentes charissimi, sed date locum iræ. Scriptum est enim: *Mihi vindictam, et ego retribuam*, dicit Dominus (*Deut. XXXII*). »

Dico, pacem habeatis, si fieri potest, cum omnibus, *non defendentes vosmetipsos charissimi*, si quis vos aggressus fuerit, id est non percutientes eum qui vos percusserit; *sed date locum iræ*, id est sinite iram persecutoris in vobis expleri, ille enim dat locum iræ, qui adversarium permittit facere quod vult. Vel ille dat locum iræ, qui iram superbientium humiliter fugiendo declinat, non se contra acceptas contumelias erigens, sed de loco pia humilitate recedens. Vel date locum iræ, id est iudicio Dei. Non præcipit ut nolint vindicari, sed ut nos ipsi vindicantes, demus locum iræ Dei, qui dixit: *Mihi vindictam, et ego retribuam* (*Deut. III; Hebr. X*). Neque enim propter exsaturandum odium desiderant sancti vindictam, quod ab eorum perfectione longe est. Nam justus quisque magis cupit inimicum suum corrigi quam puniri. Et cum in eum videt a Domino vindicari, non ejus delectatur poena (*Psal. LVII; Psal. CXXXIX*), quia non eum odit; sed divina justitia, quia Deum diligit. Sic quippe inimicus diligitur, ut non displiceat Dei justitia qua punitur. Et sic placet justitia qua punitur, ut non de malo ejus, sed de bono iudice gaudeatur (*Luc. XVIII*). Ait itaque: *Non vosmetipsos defendentes, charissimi, sed date locum iræ*. Ac si dicat: *Quid opus est vos ipsos vestras ultum iræ injurias, qui nec corda hominum nosse, nec agnita eorum scelera tranquillo valetis animo judicare? Quin potius quod in vos peccatur, quasi fratribus et proximis ex corde remittite, ut et vobis Deus vestra peccata remittat* (*Matth. VI*), scientes quia si corrigi voluerint, eos socios bonorum habebitis; sin aliter, rectius divino iudicio, quod errare non potest, sicut nec irasci potest, quam vestro damnabuntur. Et vere iudicium ejus debetis expectare, *scriptum est enim in Ezechiele (cap. IX)*. Nam ubi nos legimus secundum Hebraicam veritatem: *Appropinquarent visitationes urbis, septuaginta interpretes transtulerunt, mihi vindictam, et ego*

retribuam, dicit Dominus. Et ideo patet Hebræos A qui Romæ crediderunt, habuisse in auctoritate translationem septuaginta Interpretum, juxta quam Apostolus eis profert testimonium; non enim proferret eis testimonium ex Scriptura, quam non reciperent. Ob hoc, inquit, Dominum expectate, quia ipse sicut scriptum est, dixit: *Ego retribuam mihi vindictam, id est omnia mala quæ vobis irrogantur, mihi fiunt, licet sim impassibilis; sed ego vindictam mihi pro his retribuam, puniens æternaliter eos qui temporaliter vos affligunt.*

« Sed si esurierit inimicus tuus, ciba illum: si sitit, potum da illi (*Prov. xxv*). Hoc enim faciens, carbones ignis congeres super caput ejus. Noli vinci a malo, sed vince in bono malum. »

Non defendes te ab adversario ut referas eum, et malum illi pro malo reddas, sed potius bonum illi pro malo repende, ut juxta Salomonis præceptum, *si esurierit inimicus tuus pascas illum, si sitierit, potes illum. Et quare? quia hoc faciens, congeres super caput, id est accumulabis super mentem ejus carbones ignis, id est ferventes et urentes pœnitentiæ dolores. Beneficiis enim tuis victus, dolebit se injurias tibi fecisse, a quo bona recipit, et convertetur ad pœnitentiam, sicque lucraberis eum Christo. Vel carbones ignis, id est charitatem igne sancti Spiritus ferventem congeres super cor ejus. Hoc est dicere: Sicut carbones ardentes incendunt corpus super quod congeruntur, sic bona facta tua inflammabunt ad dilectionem cor ejus qui te persequabatur, sicque ad fervorem sancti Spiritus exemplo tuo provocabis eum ut bene agat. Absit enim ut credamus Salomonem vel Apostolum docere voluisse, ut eo animo bona faciamus inimicis nostris, ut ipsi in his ingrati persistentes, majora tormentorum incendia perpetuo sustineant. Non est hoc benefacere his qui oderunt nos (*Matth. v*), sed male illis facere. Sed hoc potius in hac sententia jubemur, ut misericordiam facientes egentibus inimicis, emolliamus fomentis beneficiorum durtiam cordis eorum, et ad redimendum nos in Domino studeamus inflammare illos, adhibito dilectionis igne, ut virtutem mansuetudinis et patientiæ nostræ mirantes incipiant imitari, rejectisque vitiis, ad virtutum opera convertantur. Unde ne quis hæc Salomonis verba Judaico sensu vellet intelligere, mox Apostolus subdidit: *Noli vinci a malo, sed vince in bono malum. Quomodo enim potest vincere in bono malum, qui in superficie bonus est, et in abdito malus; qui opere parcit et corde sævit, in animo mitis, voluntate crudelis? Noli vinci a malo, sed vince in bono malum. Contende cum malo, sed bonitate. Ipsa est enim vera contentio, vel certamen salubre, ut sit bonus contra malum, non ut sint duo mali. Si tu jam non es malus, obsta malo ut sis bonus. Si displicet tibi malus, noli fieri malus. Nam si repercutis, malo vis vincere malum. In sensibus vel motibus animorum ille dicitur vicisse, qui alterum ad suam traxerit partem, sicut hæreticum aut pagannum. Si ergo mali vicissitudinem a te receperit ille,**

non deberent dominari, etsi fideles deberent esse pares. Quam superbiam removet, dicens: *Omnis anima, id est omnis homo sit humiliter subdita potestatibus vel sæcularibus, vel ecclesiasticis sublimioribus se; hoc est, omnis homo sit subjectus significat sibi potestatibus. A parte enim majore significat totum hominem, sicut rursus a parte inferiore totus homo significatur, ubi propheta dicit: « Quia videbit omnis caro salutare Dei (*Isa. xl*). » Et recte admonet, ne quis ex eo quod in libertatem vocatus est, factusque Christianus, extollatur in superbiam, et non arbitretur in hujus vitæ itinere servandum esse ordinem suum, et potestatibus quibus pro tempore rerum temporalium gubernatio tradita est, non se putet esse subdendum. Cum enim constemus ex anima et corpore, et quandiu in hac vita temporali sumus, etiam rebus temporalibus ad subsidium ejusdem vitæ utamur, oportet nos ex ea parte quæ ad hanc vitam pertinet, subditos esse potestatibus, id est res humanas cum aliquo honore administrantibus; ex illa vero parte qua Deo credimus, et in regnum ejus vocamur, non debemus subditi esse cuiquam homini id ipsum in nobis evertere cupienti, quod Deus ad vitam æternam donare dignatus est. Si quis ergo putat quoniam Christianus est, non sibi esse vectigal reddendum sive tributum, aut non esse honorem exhibendum debitum eis, quæ hæc curant, potestatibus, in magno errore versatur. Item si quis sic se putat esse subdendum, ut etiam in suam fidem habere potestatem arbitretur eum, qui temporalibus administrandis aliqua sublimitate præcellit, in majorem errorem labitur. Sed modus iste servandus est, quem Dominus ipse præcepit, ut reddamus « Cæsari quæ sunt Cæsaris, et Deo quæ sunt Dei (*Matth. xxii; Luc. xx*). » Quamvis enim ad illud regnum vocati simus, ubi nulla erit potestas hujusmodi, in hoc tamen itinere conditionem nostram pro ipso rerum humanarum ordine debemus tolerare, nihil simulate facientes, et in hoc non tantum hominibus quam Deo qui hoc jubet, obtemperantes. Itaque omnis anima sit subdita sublimioribus potestatibus, id est omnis homo sit subditus primæ divinæ potestati, deinde mundanæ. Nam si mundana potestas jusserit quod non debes facere, contemne*

potestatem, timendo sublimiorem potestatem. Ipsos A humanarum rerum gradus advertit. Si aliquid jussit procurator, nonne faciendum est? Tamen si contra proconsulem jubeat, non utique contemnis potestatem, sed eligis majori servire. Non hinc debet minor irasci, si major prælata est. Rursus si aliquid proconsul jubeat, et aliud imperator, nunquid dubitatur, illo contempto, huic esse serviendum? Ergo si aliud imperator, et aliud Deus jubeat, quid faciemus? Nunquid non Deus imperatori est præferendus? Ita ergo sublimioribus potestatibus anima subjiçatur, id est homo. Sive idcirco ponitur anima pro homine, qui secundum hanc discernit, cui subdi debeat, et cui non. Vel homo qui promotione virtutum sublimatus est, anima vocatur a digniore parte. Vel, non solum corpus sit subditum, sed anima, id est voluntas hoc est non solum corpore, sed et voluntate serviatis. Ideo debetis subjiçci, quia non est potestas nisi a Deo. Nunquam enim posset fieri nisi operatione solius Dei, ut tot homines uni servirent, quem considerant unius secum esse fragilitatis et naturæ. Sed quia Deus subditis inspirat timorem et obediendi voluntatem, contigit ita. Nec valet quisquam aliquid posse, nisi divinitus ei datum fuerit. « Potestas omnis est a Deo (Joan. xix). » Sed ea quæ sunt a Deo, ordinata sunt, ergo potestas est ordinata, id est rationabiliter a Deo disposita. Itaque qui resistit potestati, nolens tributa dare, honorem deferre et his similia, Dei ordinationi resistit, qui hoc ordinavit ut talibus subjiçiamur. Hoc enim contra illos dicitur, qui se putabant ita debere uti libertate Christiana, ut nulli vel honorem deferrent, vel tributa redderent, unde magnum poterat adversus Christianam religionem scandalum nasci a principibus sæculi. De bona potestate patet, quod eam perfecit Deus rationabiliter. De mala quoque videri potest, dum et boni per eam purgantur, et mali damnantur, et ipsa deterius præcipitatur. Qui potestati resistit, cum Deus eam ordinaverit, Dei ordinationi resistit. Sed hoc tam grave peccatum est, quod qui resistunt ipsi, pro contumacia et perversitate sibi damnationem æternæ mortis acquirunt. Et ideo non debet quis resistere, sed subjiçci.

« Nam principes non sunt timori boni operis, sed mali. Vis autem non timere potestatem? Bonum D « fac, et habebis laudem ex illa. Dei enim minister « est tibi in bonum. Si autem male feceris, time. « Non enim sine causa gladium portat. Dei enim « minister est, vindex in iram ei qui male agit. Ideo « que necessitate subditi estote, non solum propter « iram, sed etiam propter conscientiam. Ideo enim « et tributa præstatis. Ministri enim Dei sunt, in hoc « ipsum servientes. Reddite ergo omnibus debita « (Matth. xxii); cui tributum, tributum; cui vectigal, vectigal; cui timorem, timorem; cui honorem, « honorem. »

Merito acquirunt sibi damnationem qui resistunt potestati, quia principes non sunt his timori qui sunt boni operis, sed qui sunt pravi, id est non bene ope-

rantibus, sed male agentibus. Principes occidit, qui propter corrigendam vitam et prohibenda adversa constituuntur, Dei habentes imaginem, ut sub uno sint cæteri homines. Qui non sunt timori bene agentibus, sed male, quia non ad bonos, sed ad malos puniendos sunt instituti. Naturaliter enim omnes norunt et innocentiam præmio, et malitiam supplicio dignam esse. Et princeps, si est bonus, bene operantem non punit, sed diligit. Si autem malus est, non nocet bono, sed purgat eum. Ideoque non est quod timere debeat, qui bene agit. Qui vero mala operatur, debet timere, quia principes ad hoc sunt constituti, ut mala puniant. Ille timeat. Sed si vis non timere potestatem, do tibi consilium, Bonum opus fac et habebis laudem ex illa. Bonum fecere apostoli et martyres, tamen non eos laudaverunt, sed potius interfecerunt potestates. Ideoque voluit Apostolus dicere: Bonum fac, laudabit te potestas; sed temperavit verba, et ait: Bonum fac et habebis laudem ex illa. Si enim justa est potestas, habebit laudem ex illa in ipsa laudante. Si autem iniqua est, mortuus pro fide, pro justitia, pro veritate habebit laudem ex illa, in illum sæviente. Ex illa enim habebit, non ipsa laudante, sed ipsa tibi laudis occasionem præbente. Hæc Augustinus. Gregorius vero sanctus sic ait: Paulus cum infirmum auditorem suum perpenderet, aut prava adhuc velle agere, aut de actione recta humanæ laudis retributione gaudere, ait: « Vis non timere potestatem? Bonum fac et habebis laudem ex illa. » Neque enim ideo bona agenda sunt, ut potestas hujus mundi nulla timeatur, aut per hæc gloria transitorie laudis quærratur. Sed cum infirmam mentem ad tantum robur ascendere non posse pensaret, ut et pravitatem simul vitaret et laudem, prædicator egregius etiam monendo aliquid obtulit, et aliquid tulit. Concedendo enim lenia, subtraxit acriora, ut quia ad deserenda cuncta simul non assurgeret, dum in quodam suo animus familiariter relinquitur, a quodam suo sine dolore tolleretur. Laudem habebis ex potestate, quia ille potens, sive bonus, sive malus sit, est Dei minister proficiens tibi in bonum. Nam si bonus fueris, nutritor tuus est; si malus fueris, tentator tuus est. Et nutrimenta libenter accipe, et in tentatione ut aurum probare. Si bene feceris, non timebis principem. Si male feceris, tunc time illum. Et timendus tibi est, quia non sine causa gladium portat, sed ut malos puniat. Gladium habet materiale, vel gladium, id est judicariam potestatem, ut reos feriat. Nec mirum, quia Dei minister est, vindex in iram ei qui male agit, ut loco Dei vindicet in malos. Est enim vindex ei, id est ad damnum ejus qui male agit. Est vindex in iram, id est propter iram Dei vindicandam, vel vindex in iram Dei ostendendam. Quia hæc punitio indicat persistentes in malo gravius puniendos. Nam si homo iudex amore justitiæ peccata subditorum punit, considerandum est qua animadversione Deus iudex, qui sine peccato est, et puram justitiam habet, peccata perversorum punit.

Princeps sæculi est minister Dei, ut vice eius a ultionem faciat, et iudicium eius præfiguret, nam fortia quæque crimina, quæ vindicari vult non per antistites et rectores ecclesiarum, sed mundanos iudices voluit vindicare. Et hoc Apostolus, recte eum ministrum Dei nominat dicem in eum qui male agit. Dei minister est. *Subditi estote illi necessitate* quia necesse est hanc vitam subditos illi vos esse, nec resisti quid auferre voluerit ex rebus huic temporariis, in quas sibi data est potestas. Subditi non solum propter iram, ut effugiatis offensa hominum, sed etiam propter conscientiam ut mulate quasi ad oculum hominum ista faciatis pura dilectionis conscientia propter Deum, omnes homines vult salvos fieri et in agnitionem eius venire (I Tim. II). Non solum propter iram pœnam vitandam subjiciamini illis, quod potest simulate fieri, sed etiam propter conscientiam ut in vestra conscientia certi sitis illorum dicit vos id facere, quibus vos Deus subjici vult debetis esse subditi, quia etiam ideo, id est obedientem subjectionem tributa præstatis easi reddituris, dum pugnant pro patria et iudicia. Tributa præstatis, et merito, quia *illi Dei sunt* qui vobis eos constituit. Cujus jussu homines nascuntur, hujus jussu reges reguntur, apti his qui eo tempore ab ipsis reperiuntur. Quidam enim illorum ad correptionem et tamen subjectorum et conservationem justitiæ, quidam autem ad timorem et pœnam et inionem, quidam vero ad illusionem et contumaciam et superbiam. Ministri Dei sunt, in hoc ipsum est ei, quod tributa exigunt a vobis, et potestatem exercent ad utilitatem honorum, et detrimentum malorum. Vel vos præstatis illis tributa, in sum Deo servientes, quia ministri Dei sunt. *erte illi qui tributa a vobis exigunt, in hoc vobis sunt servientes, quia propter illa quæ percipiunt, utilitati vestræ subserviunt, dum non defendunt et res vestras custodiunt. Et qui illi Dei sunt, qui vos illis subjecit, ergo reddite eis illis debita* sicut et Dominus pro se et Petro non reddidit, significans quod potestas spiritualis non aufert suum jus. Omnibus debita, ut sic laudetur ecclesiastica doctrina. *tributum debetis, reddite tributum; et cui vectigal reddite vectigal.* Tributum est redditus vel pensio: dictum est tributum, eo quod olim per tribus partes exigebatur, sicut post per singula territoria enim per tres partes divisus erat Romanus imperium, ut qui præerant in singulis partibus, iudicarentur. Unde etiam sumptus quos da populi, tributa nominarunt. Vectigal quod redditus est vel pensio, sive tributum fiscalis tamen vectigal a vehendo, id est a portandis, dictum est. Tributum illi census dicuntur, autem de terris, et quos homines de capitulis dant; vectigal vero, quod advenit de

de longinquis regionibus. Tributum, quod a presentibus datur; vectigal quod ex remotis provinciis mittitur. Tributum, quod regiones solvunt; vectigal, stipendium quod datur dominis quando per patrias vehuntur. Tributum, quod domi solvitur statutis temporibus; vectigal, quod a transeuntibus et sua negotia vehentibus datur pro rebus suis conservandis. *Cui timorem, debetis, timorem reddite, ut revereamini dominos atque timeatis, et cui honorem, ut honoretis regem, sive parentem aut senem, vel hujusmodi personam, honorem reddite.* Per hæc præcepta ordinat Apostolus ecclesiam Dei, ut nihil adversus principes sæculi gerens, per quietem et tranquillitatem vitæ opus justitiæ et pietatis exercent. Si enim ponamus, verbi gratia, credentes in Christo potestatibus sæculi non esse subjectos, tributa non reddere, neque vectigalia solvere, nulli timorem, nulli honorem deferre, nonne per hæc regum et principum merito in semetipsos arma converterent, et persecutores quidem suos excusabiles, semetipsos vero culpabiles facerent? Non enim fidei, sed contumaciæ causa impugnari viderentur, et essent eis causa quidem mortis digna, meriti vero mortis indignum. Sic namque Judæi perire meruerunt gladio Romanorum.

« Nemini quidquam debeatis, nisi ut invicem diligatis. Qui enim diligit proximum, legem implevit. Nam: Non adulterabis, Non occides, Non furaberis, Non falsum testimonium dices, Non concupisces, et si quod est aliud mandatum, in hoc verbo instauratur, Diliges proximum tuum sicut teipsum (Matth. xxii; Gal. v; Jac. ii). Diligenti lectio proximi malum non operatur. Plenitudo ergo legis est dilectio. »

Sic reddite omnibus debita, quamvis nemini quidquam debeatis, nisi ut invicem diligatis. Cætera enim cum reddita fuerint, non debentur, dilectio autem tanto magis debetur, quanto amplius impenditur. Ipsa quippe exigit debitum, ut fraternæ charitati servientes, eum qui se adjuvari recte velit, in quo possumus, adjuvemus, semper existentes debitores charitatis. Ipsa est enim quæ semper redditur et semper debetur. Debetur namque, etiam si reddita fuerit, quia nullum tempus est, quando impendenda non sit. Nec cum redditur amittitur, sed potius reddendo multiplicatur, quoniam habendo redditur, non carendo. Quoniam pecunia cum recipitur, accedit ad eum cui datur, sed ab eo recedit a quo datur. Charitas vero non solum apud eum crescit, qui hanc ab eo quem diligit, exigit, etiam si non recipit, sed etiam ille a quo eam recipit, tunc incipit habere cum reddit. Et ideo cætera sic solvite, ut non debeatis; charitatem vero ita solvite, ut semper habeatis et debeatis. Et merito semper est habenda, quia qui diligit proximum, legem implevit. Sola enim charitas justitiam legis adimplet, quam timor implere non poterat. Hoc loco sola dilectio proximi ad perfectionem præcipi videtur, et taceret dilectio Dei, cum in utroque præcepto, lex pendet

et prophetæ. Sed qui proximum diligit (*Matth. xxi*), A
consequens est ut ipsam dilectionem præcipue diligit. Nam nec proximum vere sine Deo, nec Deum vere sine proximo potest diligere. Sed cur Apostolus solam proximi dilectionem commemorare maluit, qui legem dixit impleri, nisi quia in dilectione Dei possunt homines mentiri, quia rariores tentationes eam probant; in dilectione autem proximi facilius convincuntur eam non habere, dum scilicet inique omnibus vel aliquibus agunt? Cum ergo alterum dilectionis præceptum sine altero teneri non possit, etiam unum eorum commemorare plerumque sufficit, cum agitur de operibus justitiæ, sed opportunius illud, de quo quisque facilius vincitur. Itaque dilectione proximi lex impletur. Et hoc per partes probatur. Nam omnia hæc præcepta complentur amore proximi. *Non adulterabis.* Quis enim adulterat uxorem ejus quem diligit? *Non occides.* Quis occidit eum quem diligit? *Non furaberis.* Quis furatur res ejus, quem sicut seipsum diligit? *Non falsum testimonium dices.* Quis falsum profert testimonium contra eum, quem sicut se diligit? Omnia igitur hæc mandata, et si quod est aliud mandatum simile his in lege, *instauratur*, id est adimpletur et perficitur in hoc verbo quo dicitur: *Diliges proximum tuum sicut teipsum*, id est recto amore quo te diligis. Qui enim se ut oportet diligit, ac deinde proximum tanquam se, necesse est ut cuncta præcepta hic custodiat. Nam hæc præcepta nulum prohibent. *Dilectio proximi malum non operatur.* Qui ergo amat homines, aut quia justus sunt, aut ut justus sint, amare debet. Sic enim et seipsum amare debet, aut quia justus est, aut ut justus sit. Sic enim diligit proximum tanquam seipsum sine ullo periculo. Qui enim aliter diligit se, injuste se diligit, quoniam ad hoc se diligit, ut sit injustus, ad hoc ergo ut sit malus, ac per hoc jam non se diligit. Qui enim diligit iniquitatem, odit animam suam (*Psal. x*). Tenenda est igitur vera dilectio, per quam omne malum opus vitatur, et omne bonum opus impletur. Et quando quidem qui proximum diligit, singula quæque præcepta legis implevit, quia nec malum operatur, et bonum facit; ergo *dilectio est plenitudo legis*, id est plenaria legis adimpletio, quia plene legem adimplet, dum et ab his abstinet D
quæ lex prohibet, et ea facit quæ lex jubet.

« Et hoc scientes tempus, quia hora est jam nos de somno surgere. Nunc enim propior est nostra salus, quam cum credidimus. »

Dixi ut nemini quidquam debeatis nisi dilectionem, quia per eam potestis universam legem implere; et nunc dico, ut sitis scientes, id est cognoscentes et intelligentes hoc tempus gratiæ in quo Spiritus sanctus datur credentibus, per quem charitate repleantur, qua legem impleant, sicque vitam æternam merito percipiant. Sciat is hoc tempus, in quo per adventum Salvatoris gratia Dei mundo illuxit, quia hora est, id est opportunum, sed breve spatium temporis; jam nos de somno surare, id est

ut surgamus ad bene agendum a torpore negligentiae vel ignorantiae Hora est, id est breve spatium, quia qui hodie habemus horam, nescimus si cras habuerimus vitam. Et ideo jam, id est cum celeritate quadam sine dilatione, surgendum est a somno desidiæ, ut mente vigilemus et bonis operibus occupemur. In vitiis nostris quiescebamus torpentes, et veluti quodam sopore detenti, sed nunc scire debemus quod sit hoc tempus in quo sumus, quia hora est ut jam ab illo somno mentis surgamus, et amodo in bonis operibus laboremur. Vere amplius non est nobis jacendum in somno, sed potius surgendum est, quia nunc est propior nostra salus æterna quam tunc erat cum credidimus, id est cum credere cœpimus, quoniam morti jam viciniore sumus, in qua B
retributionem percipiemus. Et cum magis ac magis ad salutem nostram propinquemus, et omnia ruant ad occasum, jam omnis torpor bene operandi a nobis excutiat, et ad salutem quæ jam instat, cum alacritate festinemus, cum hæc vita ad præsens finiatur. Turpius est enim, si non surgimus qui jam saluti propinquamus quæ nostra erit, si surrexerimus; alioquin salute carebimus. Vel nunc, id est quando surgimus, propior est nostra salus, id est nobis viciniore; hoc est magis ad nos pertinens, et magis nostri juris, quam tunc erat cum primum credidimus. Si enim tunc moreremur, salus et vita prope nos esset; sed nunc ad nos magis attinet, quoniam tunc ex sola misericordia erat venia, nunc vero ex gratia et meritorum nostrorum actione C
corona. Nam bene operans est viciniore æternæ vitæ. Baptismus vero est ad veniam, vita autem bona ad coronam.

« Nox præcessit, dies autem appropinquavit. Abiciamus ergo opera tenebrarum, et induamur arma lucis, sic ut in die honeste ambulemus. »

Vere propinquior est nostra salus quam antea. Nox enim infidelitatis et iniquitatis præcessit, sed dies fidei et justitiæ appropinquavit. Noctis enim tenebris premimur, cum perpetracione iniquitatis obscuramur. Sed nox in lucem vertitur, cum erroris nostri obscuritas veritatis cognitione radiatur. Nox in lucem vertitur, cum erroris nostri obscuritas veritatis cognitione radiatur. Nox in lucem vertitur, cum corda nostra justitiæ fulgor illuminat, quæ cæcitas culpæ deprimebat. Hoc nunc diluculum discipulorum mentibus oriri viderat Apostolus, cum dicebat: *Nox præcessit, dies autem appropinquavit.* Qui enim post discessum noctis, non jam venisse, sed appropinquasse diem insinuat, esse præcolum dubio ante solem post tenebras adhuc auroram demonstrat. Nondum enim in splendore suæ claritatis apparuit sol justitiæ Christus, sed jam vicinus ejus instat adventus. Et ideo nondum perfectum diem, sed adhuc diluculum et auroram habemus. Vita enim fidelium, quæ in hac carne et in hoc sæculo ducitur, in comparacione vitæ infidelis et impiæ, non irrationabiliter lux et dies appellatur, sed tamen in comparacione illius diei, quo æquales ange-

His facti, videbimus Deum sicuti est (*I Joan. III*), **A** in his Romanos fuisse, et ideo non esse illis jus adhuc nox est. Nox et dies. Dies in comparatione infidelium, nox in comparatione angelorum. Habent enim diem angeli, quem nos nondum habemus, sed tamen jam habemus, quem non habent infideles. Recte igitur prætermisso, quem nunc habet vita fidelium, dicitur, quia nox infidelitatis præcessit, et dies æternitatis appropinquavit. Dies æternæ beatitudinis appropinquavit, quia jam remissa sunt peccata, justificati jam credentes. Et quia nox præterit, et dies appropinquavit, *ergo abjiciamus opera tenebrarum*, id est illa facta quæ solebamus agere dum tenebris ignorantiae premeremur, *et induamur arma lucis*, id est virtutes quas exigit lux divinæ cognitionis, per quas impugnemus *opera tenebrarum* et principes talium operum, id est dæmones; minus enim decorum est, sub tempore novæ lucis opera veterum tenebrarum gerere, id est opera mala, quæ in tenebris ignorantiae venerunt, vel tenebras amant et ad tenebras ducunt. Opera vero lucis, non tam opera quam arma vocantur, quia dum recte agimus, dum lucem fidei bonis operibus sequimur, hostes nostros armis talibus debellamus. Induamus ut ornamentum opera lucis, id est opera quæ fides exigit; et acceptis hujusmodi armis, *ambulemus honeste sicut in die*, id est pergamus in via mandatorum Dei laudabiliter sicut decet in die fidei. Jam enim, sicut diximus, vita fidelium in comparatione vitæ infidelium, dies est. Et ideo nos qui jam in die sumus, debemus sicut in die honeste ambulare, ut honestas virtutum undique nos adornet in via nostræ actionis, quos illustrat dies fidei et notitia veritatis, in qua videmus quid honestum sit, et quid inhonestum. Quæ sint autem opera tenebrarum, quæ abjicienda sunt consequenter ostenditur, cum dicitur :

« Non in comessionibus et ebrietatibus, non in cubilibus et impudiciis, non in contentione et æmulatione (*Galat. v*; *I Petri II*). »

Et de armis lucis quæ induenda sunt subditur :

« Sed induimini Dominum nostrum Jesum Christum. »

Et post adjungitur :

« Et carnis curam ne feceritis in desideriis. »

Ambulemus honeste sicut in die, nos dico existentes, non in comessionibus, id est superfluis manducationibus, *et ebrietatibus*, id est nimis vini ingurgitationibus, non in cubilibus, id est pigritiis dormiendi *et impudiciis*, id est libidinibus quæ in nimis epulationibus et potationibus atque cubilibus nutriuntur. Comessiones enim sunt inhonesta et luxuriosa convivia, quibus necessaria comes est turpissima temulentia. Et quid aliud subsequitur, nisi cubilia et impudicia? **A** fœdis cubitationibus cubilia sunt appellata, quæ non tam rationalibus hominibus, quam feris et belluis conveniunt. In cubilibus enim et impudiciis agunt qui communes habent stratus, et more ferarum illicite commiscuntur ibi. Notandum est,

in his Romanos fuisse, et ideo non esse illis jus gloriandi. Et hæc quatuor vitia carnis sunt, dum autem quæ ad animum pertinent, subduntur, cum dicitur : *Non in contentione et æmulatione*. Agebant vero Romani in contentione et æmulatione, quia contendebant adinvicem, et se alii aliis præferebant, in quo minoribus majores invadebant. Horum autem morborum, id est contentionis et æmulationis, mater superbia est, et humanæ laudis aviditas, nec adhuc sanari potest, nisi qui superbiam calcaverit, et humanas laudes contempserit. In his non inveniamini, quia hæc sunt opera tenebrarum, *Sed induimini Dominum Jesum Christum*, quia hoc est arma lucis indui : Christus enim sapientia est et justitia et sanctificatio et veritas et omnes simul virtutes (*I Cor. II*). Quas qui assumpserit, Christum dicitur indutus esse. Christum induimini, id est formam Christi sumite vestem, ut habitus et forma illius undique fulgeat, et repræsentetur in vobis. Cum vestem induimur, ex omni parte circumdamur. Christum igitur est indutus, qui undique bono opere protegatur, ut nullam partem actionis suæ peccato nudam relinquat. Nam qui in aliis actionibus justus est, in aliis injustus, quasi hoc latus cooperuit, illud nudavit. Nec jam bona sunt opera, quæ subortis aliis pravis operibus inquinantur. Qui ergo undique Christianus apparet in cunctis operibus suis, hic Christum dicendus est esse indutus. Christum induimini, *et carnis curam ne feceritis*, non dico, in necessariis, sed in desideriis. In necessariis enim permittitur fieri, quia « nemo unquam carnem suam odio habuit (*Ephes. v*); » sed in desideriis prohibetur (*I Petri. II*), quoniam carnalia desideria militant adversus animam. Neque enim mortali in carne adhuc viventibus funditus cura carnis abscinditur, sed ut discrete serviat, temperatur. Discretionem enim magni moderaminis frenanda est, ut serviat, et non principetur; nec quasi domina animum vincat, sed subacta mentis dominio quasi ancilla famuletur; et ad necessitatem salutis fiat, non ad desideria voluptatis. Quæ enim in desideriis fieri prohibetur, procul dubio in necessitate conceditur. Quia videlicet mens nostra a carnali delectatione superanda est, sed a carnis cura necessaria separanda non est.

CAPUT XIV.

« Infirmum autem in fide assume, non in disceptionibus cogitationum. Alius enim credit et manducare se omnia. Qui autem infirmus est, et olus manducet. Is qui manducat, non manducantem non spernat : et qui non manducat, manducantem non judicet. Deus enim illum assumpsit ; quis es qui judicas alienum servum ? (*Jac. IV*). Suo domino stat aut cadit. Stabit autem. Potens est enim Deus statuere illum. »

Iterum quia erat inter Romanos aliud genus contentionis, redarguit eos iude, et ad concordiam

revocat. Contendebant enim de differentiis ciborum, quia quidam illorum cum integra fide omnes cibos comedebant; alii vero a quibusdam abstinentum esse credebant, et inde ab invicem dissentiebant. Illi enim qui ex gentibus crediderant, extollebant se in libertate fidei, quia nihil commune vel immundum esse crederent, adversus eos qui ex circumcissione venientes, observabant adhuc traditione legis ciborum differentiam. Et inde reprimit eos Apostolus, et monet ne insultent eis, quibus longa consuetudo in observandis cibis discretionem adhuc aliquam et cunctationem movebat. Et unum quemque talem vocat infirmum in fide, quia non credit omnia licere manducari. Perfecta enim fides nullum cibum Judaico sensu credit respuendum, quia omnis creatura Dei bona est, et nihil abjiciendum quod cum gratiarum actione percipitur. Sed quisquis ita non credit, adhuc infirmus est in fide, si jam fidem habet. Sed tamen hunc non abjici, sed assumi jubet Apostolus, nec quasi infidelem judicari. Aliud est enim infidelem esse, aliud infirmari in fide, quia infidelis non habet, infirmus autem jam habet, sed adhuc ex parte dubitat. Et ideo non est repellendus, sed assumendus. Et hoc est quod ait: *Infirmum autem*, etc. Quod sic continuatur: Ea quæ superius dixi, ita ut docui, facite in vobis ipsis, id est induite Christum, et his similia facite; sed hæc quæ nunc dico, facite erga proximos, scilicet infirmum in fide assumite ut sanetis eum, sicut Christus medicus peccatores, id est male habentes suscepit sanandos. Assumite eum non in disceptationibus cogitationum ejus, id est non de occulto cogitationum judicetis eum. Forte dubitat aliquid novitas ipsius. Amate abundantius dubitantem. Amore vestro curate de corde infirmi dubitationem. Et si incognitum nobis est quo animo id faciat, non inde disceptemus. Non nobis usurpemus dijudicare cogitationes aliorum, sed Deo probemus cogitationes nostras etiam pro illis, de quibus forte aliquid dubitamus. Vere infirmus est assumendus ab eo qui firmus est. Nam *alius credit licere manducare omnia* genera ciborum, et est firmus iste, atque infirmum debet assumere; alius vero non credit ita licere, et infirmus est, et indiget assumi. Hoc videtur debuisse dicere. Sed ponit consilium de illo, per quod satis intelligitur, dicens: *Qui autem infirmus est*, id est qui non credit omnia esse manducanda, *olus manducet*, id est relinquatur arbitrio suo, ne cum scrupulo edat, ut si voluerit, non solum ab omni carne, sed etiam a cæteris cibis abstineat, et olera tantum comedat. Alius credit manducare omnia, id est gentilis quisque ad fidem conversus omnes cibos indifferenter posse comedi judicat; sed qui infirmus est, id est Hebræus quilibet adhuc in fide pusillanimis et titubans, qui alias carnes mundas, et alias arbitratur immundas, *olus manducet, in quo nulla est suspicio immunditiæ*, sed

A indifferenter comeditur ab omnibus. Melius est enim ut permittatur illa solum comedere, quæ ritus legis in qua nutritus est, non prohibuit, et cum pusillanimitate retineatur in fide, ut paulatim crescendo ad sublimiora proficiat, quam ut de pusillanimitate eradicetur, et discedat penitus a fide. Et ideo *is qui manducat omnia*, id est gentilis qui nullum cibum credit immundum, *non spernat*, id est non vilem reputet *non manducantem*, id est Hebræum qui adhuc propter legis consuetudinem quosdam cibos respuit. *Et qui non manducat*, id est, Judæus qui se abstinere ab aliquibus, ne ritum legis violet; *non judicet*, id est non damnet *manducantem*, id est gentilem omnes cibos indifferenter sumentem. Gentiles enim quos carnalis intellectus legis a fide non retrahebat, firmiter credebant nihil abjiciendum, quod cum gratiarum actione percipitur, et ideo spernebant Judæos infirmiores in fide, quos adhuc videbant propter antiquam legis observantiam cibos discernere. Et econtra Judæi cum viderent illos alimenta illa percipere, quæ ipsi putabant immunda esse, graviter eos inde judicabant. Ideoque jubet illis Apostolus, ne istos quasi infirmos et hebetes spernant; et istos, ne illos quasi gulosos et immundos judicent. Erant etiam nonnulli inter eos, qui non propter legem, sed propter sobrietatem se abstinere a carnibus et vino, et spernebantur a cæteris, quasi qui Dei creaturas rejicerent. Ipsi vero judicabant cæteros quasi voraces et gulosos. Et idcirco præcipit Apostolus, ut *is qui manducat omnes cibos, nec jejunat, non spernat non manducantem*, id est jejunantem et a carnibus abstinentem, cum in voluntate uniuscujusque sit edere vel non edere; et rursus *is qui non manducat, sed abstinere et jejunat, manducantem bis in die, et carnibus vescentem vel hujusmodi cibis non judicet*, id est non de illo male existimet, cum possint bono animo et simplici corde sine vitio concupiscentiæ quicumque humani cibi indifferenter sumi. De talibus enim rebus, quæ bono animo possunt fieri, quamvis etiam possint non bono, volebant illi cum homines essent in occulto cordis ferre sententiam, de quibus solus Deus judicat, De manifestis enim judicare possunt homines, sed de his quæ incertum est quo animo fiant, quia possunt et bono et malo animo fieri, judicium relinquendum est Deo, ut non audeat quisque de alterius conscientia, quam non videt, judicare. Non enim damnandus est cujus cogitatio aperta non est, et de quo nescitur, qualis postea sit futurus. Jejunans non judicet manducantem, id est non credat peccare, cum nesciat quo animo manducet. *Et quare? Quia Deus illum assumpsit* ut suus esset. Et cum sit a Deo assumptus ut Dei sit et Deo serviat, *tu quis es*, id est cujus valentiæ, *qui judicas*, id est damnandum affirmas, *alienum servum? Cum enim non tuus servus sit, sed alterius, in eo quod illum judicas dominum illius præcipue offendis, quia*

servum ejus ipso prohibente judicare præsumis. Nam qua conscientia edat vel non edat quisque. Dominus est judex. Et idcirco non est ab homine judicandus, quia non homini, sed *suo Domino stat aut cadit*, id est ad honorem domini sui stat, si stat; et ad dominum suum pertinet et casus ejus, si cadit, quia potest illum vel erigere, vel judicare. Ideo dico, stat aut cadit, quia ambiguum est: fortasse enim stat qui putatur cadere, vel cadit qui putatur stare. *Stabit autem*. Hic innuitur quod ambigua debemus in meliorem partem vertere, et plus salutem hominis quam mortem optare; atque in futuro de illo spem boni habere, etiam si aliter sit in præsentia. *Stabit, quia Deus est potens illum statuere*, id est stare facere illum. Non ipse, sed Deus est potens hoc facere. Voluntate enim sua cadit qui cadit, sed voluntate Dei stat qui stat, vel surgit qui surgit. Nam per se potest cadere, sed per Deum resurgere. Quamvis de omnibus regeneratis et pie virtutibus loqueretur Apostolus dicens: *Tu quis es qui judicas alienum servum, suo domino stat aut cadit*, continuo tamen respexit ad prædestinatos et ait: *Stabit autem*. Et ne hoc sibi arrogarent, potest enim, inquit, *Deus statuere illum*. Ipse enim ergo dat perseverantiam, qui statuere potens est eos qui stant, ut perseverantissime stent, vel restituere illos qui ceciderint. Possunt hæc forsitan et de spiritali esu, vel jejunio sic intelligi. Infirmum autem in fidem assumite, ut infirmitatem ejus paulatim sanetis, non in disputationibus cogitationum, id est non ut de cogitationibus ejus disceptetis et disputetis, sed Deo judicandas relinquite illas, qui potest emendare quidquid ibi videtur sibi displicere. Alius enim, id est diversus ab isto infirmo et robustus, credit manducare omnia, id est credit se debere pro posse suo et intelligere, et operibus exercere omnia quæ in Scripturis dicuntur. Qui autem infirmus est, id est quem adhuc cordis et operis infirmitas detinet, olus manducet, id est infirmitati suæ congruos Scripturarum sermones comedat, per quos a vitiis carnis et ægritudine mentis satiatur. Is qui manducatur, id est qui intelligit arcana Scripturarum, non spernat non manducantem, id est cum qui hæc non valet intelligere. Et qui non manducatur, id est qui non intelligit, non judicet manducantem, id est intelligentem. Solent enim hi qui aliquantulum videntur in scientia proficere, spernere et nihil ducere eos qui altioris intelligentiæ minus capaces sunt, et econtra imperiti et indocti judicare, id est incusare et condemnare eos qui altiora et profundiora perquirunt, quæ ipsi capere vel assequi nequeunt. Et ideo Apostolus resecare volens culpam, ex utraque parte nascentem, illis quidem præcipit ne inferiores spernant atque despiciant; his vero, ne superiores judicent, cum peritiam judicandi non habeant. Qui non manducatur, ore cordis non præsumat judicare manducantem, id est intelligentem, quia Deus eum cui sic manducatur, assum-

psit sibi in servum. Et tu, imperite, quis es qui alienum servum judicas, id est qui Dei servum damnabilem esse censes? Suo Domino stat in bono opere, vel cadit in prava actione, quia si in bono steterit, Domino suo peribit, vel per Dominum suum resurget. Stat aut cadit. Sed stabit etiam si nunc jacet, quia potens est Deus illum erigere. Hoc contra indoctos dicitur, qui doctos reprehendunt, vel judicant de quibusdam actionibus suis infirmis

« Nam alius judicat diem inter diem, alius autem judicat omnem diem. Unusquisque in suo sensu abundet. Qui sapit diem, Domino sapit. Et qui manducatur, Domino manducatur. Gratias enim agit Deo. Et qui non manducatur, Domino non manducatur, et gratias agit Deo. »

B Jure dixi quia stabit ille qui comedit, sive qui abstinet, quia quod agit, ex judicio agit. *Nam alius eorum judicat diem inter diem* abstinentiæ ducendum, id est deputandum; *alius autem judicat omnem diem* in abstinentia ducendum, id est alius certis diebus, alius omni die judicat abstinentium. Quidam enim in animo suo judicant et statuunt, ut diem in abstinentia ducant, id est ut alio die abstineant, et alio non abstineant, sicut qui quarta et sexta feria jejunt et cæteris diebus comedunt; alii vero quia considerant vitam hanc esse brevem, judicant ut omnem diem, id est continuam vitam suam tempus transigant in abstinentia: *unusquisque*, id est ille qui nonnullis diebus, et iste qui omni die judicat abstinentium, *abundet*, operibus bonis, *in suo sensu*, id est faciat quod sentit facienum, quia utrumque acceptum est apud Deum. In suo sensu abundet, id est suo consilio remittatur, ne scandalum passus, a charitate, quæ est mater omnium, recedat. Et debet permitti abundare, quia *qui sapit diem* vel omnem, vel aliquem esse dandum abstinentiæ, *Domino sapit*, hoc est ad honorem Domini se placere putat. *Et qui manducatur*, id est qui non abstinet, *Domino manducatur*, id est ad laudem Domini, cujus omnia creata credit munda, et qui serviturus sustentatur ex eis. Vere Domino *gratias enim agit Deo* pro collatis sibi beneficiis. Effectus indicat, quia Domino manducatur, dum illi gratias agit. *Et qui non manducatur*, id est qui jejunt et abstinet, *Domino non manducatur*, id est ad honorem Domini jejunt, *et gratias agit Deo*, qui sibi dedit tolerantiam abstinentiæ. Ad hoc quippe additum est, *et gratias agit Deo*, ut ostenderetur quid esset, Domino facit, id est in ejus laudem facit. Tunc enim recte, tunc juste, tunc pie fit cum opus bonum in ejus sit laudem, cujus gratia donatur ut fiat. In quo affectu proficiens, quidquid boni facit, Domino facit: hoc est, in ejus laudem, cujus gratia percipit ut faciat. Gratia igitur Deo ab utroque referuntur, ab illo pro libertate vescendi, ab hoc autem pro fructu abstinentiæ, et idcirco neuter reprehendendus est. Aliter: Dixi quia stabit ille qui manducatur ore cordis cibum doctrinæ sanctæ. Nec mirum si ad standum erigitur. Nam alius ex his ita manducantibus judicat diem inter diem alius

dicat omnem diem, hoc est dicere : Alius quidem nonnulla intelligit, alius vero omnia ad intellectum possibilis, ita ut sunt videndo, cognoscit. Si enim ignorantiae obscuritas nox cordis est, intellectus non inmerito dies vocatur. Vel non de duobus hominibus, sed de homine et Deo accipiatur hæc sententia. Nam alius est qui judicat diem inter diem, alius qui judicat omnem diem. Homo enim judicat diem inter diem, id est præsens, quod est inter præteritum et futurum : Deus autem judicat omnem diem, id est præteritum, præsens, et futurum. Et ideo stabit qui non stare videbatur, quia Deus potens est statuere illum, qui omnem diem judicat ; et novit si cras steterit, qui hodie jacet. Qui judicat diem inter diem, homo est, quia potest hodie aliud, et cras aliud judicare, id est ut quem hodie malum, convictum confessumve damnaverit cras bonum inveniet cum se correxerit ; et quem hodie justum laudaverit, cras inveniet damnatum. Qui autem judicat omnem diem, Deus est ; quia non solum qualis quisque modo sit, sed etiam qualis fuit, et qualis omni die futurus sit, novit. Et ideo secundum præscientiam, qua novit quos ante mundi constitutionem prædestinavit. Multi etiam qui aperte mali videntur, multis bonis meliores sunt. Quid enim sint hodie videmus, quid cras futuri sint ignoramus. Et Deo quidem apud quem sunt præsentia quæ futura sunt, etiam quod futuri sunt jam sunt ; nos autem secundum id quod in præsentibus est, quemque hominem judicare possumus ; unusquisque igitur in suo sensu abundet, id est quantum humano intellectui, vel unicuique homini concessum est, tantum audeat judicare, nec sublimiora sacramentorum arcana temere discutiat, sed in eo sensu quem habet, bonis operibus abundare curet ; neque Dei sensum usurpet ut de futuro judicet, sed suo sensu contentus sit, quo de præsentibus tantum judicare potest. Qui sapit diem, Domino sapit, id est qui contentus est tantum præsentibus judicare, nihil contra Deum usurpat, quia hoc ipsum quod præsentem diem bene judicat, Domino sapit, id est ad honorem Domini. Hoc est autem bene judicare diem, ut noveris de ejus correctione non esse desperandum in futurum, de cujus manifesta culpa judicaveris in præsentibus. Et qui manducat intelligendo cibos sapientiae, Domino, id est ad honorem Domini manducat, quia gratias agit dicens : « Benedicam Dominum qui mihi tribuit intellectum (Psal. xv). » Et qui non manducat, id est qui fortiores sensus Scripturarum non caput, Domino non manducat, quia humilior inde fit. Et hoc est gratias agere, nihil de se præsumere, sed in humilitate Deo se prosternere.

« Nemo enim nostrum sibi vivit, et nemo sibi moritur. Sive enim vivimus, Domino vivimus : sive morimur, Domino morimur. Sive ergo vivimus, sive morimur, Domini sumus. In hoc enim Christus mortuus est et resurrexit, ut et mortuorum et vivorum dominetur. »

Dixi quia manducans ad honorem Domini man-

ducatur, et non manducans ad honorem Domini non manducat. Quod juste dixi. Nam omnes sive manducantes sive non manducantes, Domini sumus. *Nemo enim nostrum sibi vivit*, sed Domino, *et nemo nostrum sibi moritur*, sed Domino. Nemo sibi vivit, quia qui lege frenatur, non sibi, sed Deo qui legem dedit, vivit. Si lex non esset, tunc sibi quisque viveret. Modo autem paret mandato cœlitus sibi dato, et vivit ei qui dedit. Et nemo sibi moritur, sed Deo, quo iudice vel coronatur vel damnatur. Nam *sive vivimus Domino*, id est ad honorem Domini *vivimus*, cui servimus ; *sive morimur*, id est præsentem vitam dissolutione corporis et animæ terminamus, *Domino morimur*, id est ad gloriam ejus et secundum voluntatem ejus, quia non nostram, sed ejus gloriam et vivendo et moriendo quærimus. Et quia utrumque Domino facimus, *ergo sive vivimus, sive morimur, Domini sumus*, ut possideamur ab eo et viventes et mortui. Et si semper ipsius sumus vel in vita vel in morte, semper ad laudem ipsius fit, quidquid a nobis vel de nobis fit. Sive vivimus, sive morimur, Domini sumus, quia Christus morte sua et resurrectione dominium acquisivit super omnes fideles, sive dum vivunt, sive dum mortui sunt. *In hoc enim mortuus est Christus et resurrexit, ut et mortuorum et vivorum dominetur*. Domini sumus et port mortem, quia pretio sanguinis sui nos redemit et mortuus. Quomodo enim perdit servos mortuos cujus est mors pretium eorum ? Non enim tenebit regnum mortis eos, pro quibus est mortuus liber in mortuis. Dominatur vivorum et mortuorum, ne putetur tantum judicare de mortuis, quasi commissum sit super eos iudicium hominibus dum vivunt, sed post mortem Christo. Nam et nunc et tunc dominatur ipse et judicat, atque sancti et nunc cum illo regnant et tunc, quia et nunc conversatio eorum in cœlis est, et ipsi postmodum in cœlis erunt. Neque piorum animæ mortuorum separantur ab Ecclesia, quæ nunc etiam est regnum Christi, et cum eo nunc primum regnat in vivis et mortuis. Vel ita : Et manducans, et non manducans, ad gloriam Domini hoc facit, quia nemo nostrum sibi vivit in virtutibus, non enim suam, sed Christi gloriam quærit, a quo sic vivere habet, et nemo sibi moritur peccatis, quia non se per hoc, sed Christum glorificare quærit, qui sibi dedit ut semetipsum peccatis mortificare possit. Sive enim vivimus, id est in novitate vitæ ambulamus, Domino vivimus, id est Domino vita nostra deputatur, quia non a nobis, sed ab illo est et ad ejus laudem fit ; sive morimur, id est mundo et peccato mortificamur, Domino morimur, id est ad honorem Domini vitiis morimur, ut peccatis mortui, justitiæ vivamus. Sive ergo morimur peccato sive vivimus justitiæ, Domini sumus, ut et extinctio mali, et vivificatio boni fiat in nobis ad ejus gloriam. In hoc enim Christus et mortuus est et resurrexit, ut et mortuorum et vivorum dominetur. Illorum scilicet mortuorum, qui mortificant membra sua quæ sunt super terram, et morti-

ificationem Christi in corpore suo circumferunt; A
vivorum quoque illorum, qui resurrectionis ejus
exemplo novam et cœlestem vitam in terris agunt
(*Colos. iii; II Cor. iv*). Istorum dominatur Christus,
quia tales digni sunt dominio ejus.

Tu autem quid judicas fratrem tuum? (*Jac. iv*)
« aut quare spernis fratrem tuum? Omnes enim
« stabimus ante tribunal Christi (*II Cor. v*). Scri-
« ptum est enim: Vivo ego, dicit Dominus (*Isa. xlv*),
« quoniam mihi flectetur omne genu, et omnis lin-
« gua confitebitur Deo (*Philip. ii*). Itaque unusquis-
« que nostrum pro se rationem reddet Deo. Non
« ergo amplius invicem judicemus, sed hoc judicate
« magis, ne ponatis offendiculum fratri vel scanda-
« lum. »

Christus ita dominatur omnium. Sed tu quid, B
id est cur judicas fratrem tuum manducantem, cum
nescias qua necessitate manducet, aut quo animo?
aut tu manducans quare spernis fratrem tuum
non manducantem, cum ignores quam pia
devotione servet abstinentiam? Non debes judicare
vel spernere quia judicandus es. Omnes enim nos
abstinentes et manducantes stabimus judicandi ante
tribunal, id est ante sedem judicalem Christi. Judi-
cantis enim est sedere, judicandorum vero ante ju-
dicem stare. Omnes stabimus ante tribunal Christi.
Qui ergo fratrem judicat, tantum crimen elationis
incurrit, ut Christi tribunal sibi videatur assumere,
et ejus judicium prævenire. Cujus judicii species, ut
notior fieret hominibus judicandi forma ex his quæ
inter homines geruntur assumpta est, quatenus
agnosceremus, quia sicut judex terrenus celsior est,
et quemdam locum qui tribunal appellatur ascendit,
ut ex eo altior et eminentior sit cæteris qui judi-
candi sunt, ne conspectum ejus lateant vel supplicia
reorum, vel allegationes innocentium; ita et judex
omnium Christus natura et majestate cunctis emi-
nentior, introspicit corda et conscientias singulo-
rum, ac manifestabit occulta, ut bonis laudem tri-
buat, et mali pœnam quam merentur, accipiant.
Omnes astabimus Christo judici. *Scriptum est enim*
apud Isaiam de Christo in persona ipsius: *Vivo*
ego, dicit Dominus (Isa. xlv), Christus, *quoniam*
michi flectetur omne genu, id est qui fui mortuus,
vivo perpetualiter, ut jam mori non possim; et quod D
ego sic vivo, causa est quoniam mihi flectetur omne
genu, id est omnis rigor et fortitudo humiliabitur
meæ potestati, ut per flexionem genuum intelligatur
subjectio omnium, *et omnis lingua*, id est omnis
conscientia *confitebitur Deo* quidquid egit sive bo-
num sive malum. Hoc fiet in judicio. Et quando-
quidem, teste Scriptura, omnis lingua confitebitur
Deo, *itaque unusquisque nostrum reddet Deo judici*
rationem pro se, id est respondebit Deo pro his quæ
fecit, et cur ea fecerit. Hoc est enim reddere ratio-
nem Deo, quod est confiteri Deo. Et quia unus-
quisque respondebit pro se Deo judici, *ergo non*
amplius judicemus invicem ex opinione, sicut hacten-
us fecimus. Deo sunt enim, in quibus temerarium

judicium cavere debemus, cum incertum est quo
animo quidquam factum sit, vel cum incertum est
qualis futurus sit, qui nunc vel bonus vel malus
apparet. Si ergo quispiam (verbi gratia) conquestus
de stomacho, jejunare noluit, et tu id non credens,
edacitatis vitio id tribueris, temere judicabis. Item
si manifestam edacitatem, ebrietatemque cognoveris
et ita reprehenderis quasi nunquam illa possit corri-
giri atque mutari, nihilominus temere judicabis.
Non ergo reprehendamus ea, quæ nescimus, quo
animo fiant; neque ita reprehendamus quæ mani-
festa sunt, ut desperemus sanitatem. Maxime au-
tem hi temere judicant de incertis et facile repre-
hendunt, qui magis amant vituperare et damnare,
quam emendare et corrigere. Quod vitium vel su-
perbia est, vel invidentia. Non amplius invicem ju-
dicemus, id est neque abstinens manducantem, ne-
que manducans abstinentem; *sed hoc magis judicate*,
id est hoc potius decernite et præfinito in cordibus
vestris, *ne ponatis offendiculum fratri vel scandalum*,
id est ne faciatis per escam et jejunationem vestram
unde frater offendatur, vel scandalum incurrat. Hoc
potius statuite, ne per observantiam ciborum offen-
siones fratribus vel scandalum generetis. Eos qui
ex gentibus edebant monet, ne scandalizent He-
bræos cibo suo, qui adhuc in fide infirmiores erant,
et cibos discernabant. Gentiles enim qui firmioris
erant fidei, omnes cibos indifferenter sumi crede-
bant; sed Judæi scandalizabantur inde, cum vide-
rent eos coram se vesci communibus escis. Erant
et nonnulli ex eis qui scientes nihil esse idolum, et
omnem creaturam Dei bonam esse, comedebant
idolothyta. Quod alii videntes, et aliquid sanctifica-
tionis putantes esse in illis carnibus, quia idolis
erant immolatæ, ex eis comedebant et peribant, cæ-
teri vero irascebantur inde. Et hoc est quod dicit,
ne ponatis offendiculum fratri vel scandalum, id est
ne faciatis coram fratre unde pereat vestro exemplo
idem faciens, vel contristetur. Offendiculum enim
esset, si tali exemplo corrueret a fide Christiana;
scandalum vero, si ad tristitiam vel iram provocaretur.
Si enim videret a Christiano idolothytum
manducari, offenderetur, id est moveretur a fide,
quia putaret idolum esse aliquid. Si autem videret
ab eo comedi cibum quem putaret immundum,
scandalizaretur, id est ad indignationem et iram
compelleretur.

« Scio et confido in Domino Jesu, quia nihil
« commune per ipsum, nisi ei qui existimat quid
« commune esse, illi commune est. Si enim propter
« cibum frater tuus contristatur, jam non secun-
« dum charitatem ambulas. Noli cibo tuo illum
« perdere, pro quo Christus mortuus est. »

Non ideo dico offendiculum vel scandalum, quod
cibus sit immundus, aut quod ego more Judaico
suadeam observare ciborum differentiam, quia scio
et confido in Domino Jesu nihil esse commune, id
est scio nihil esse commune per hoc quod mihi fidu-
cia est in Domino Jesu, quæ postquam venit, absol-

vit a lege. Populus Judæorum partem Dei se esse jactans, communes cibos vocat, quibus omnes vescuntur homines, suillam carnem, ostreas, lepores et istiusmodi animantia, quæ unguam non findunt, nec ruminant, nec squamosa in piscibus sunt (*Lev. xi*). Commune ergo quod cæteris hominibus patet, et quasi non est ex parte Dei, pro immundo appellatur, et sicut vasa in ministeriis templi segregata, non communia, sed sancta dicebantur, ad quorum distinctionem reliqua vasa humanis usibus dedita, vocabantur communia; sic et ad distinctionem illorum ciborum, quos quasi mundos et secundum legem edendos Scriptura segregavit, reliqui omnes appellati sunt communes. Sed Apostolus jam a littera legis liberatus, dicit *quia nihil commune est per ipsum*, id est per seipsum. Nihil enim in creaturis Dei immundum est natura sui. Omnia namque a bono Deo creata, bona esse constat et munda. Nec tamen in his distinctionem legis accusat, ut absolute dicat, nihil esse commune eorum, quæ lex definivit immunda. Præmittit enim causam, cur per seipsum id est natura sui, nihil commune sit. *Scio*, inquit, *et confido in Domino Jesu*. Manifestum est enim Salvatoris beneficio omnia munda esse, qui de sub jugo legis eruens homines, reddidit eis statum pristinum libertatis (*Matth. vii*). Itaque vel propter Dei creationem, vel propter Salvatoris adventum, nihil in creaturis est naturaliter immundum. Unde et ipse dicit, quia « non quod intrat in os, coinquinat hominem (*Matth. xv*). » Nihil est commune, nisi ei qui existimat aliquid commune esse, illi enim commune est propter æstimationem, qua putat illud esse commune, id est immundum; cogitatio enim mentis cibum, qui natura sui non est communis vel pollutus, facit pollutum, cum e contrario cibum vere pollutum (vere enim est pollutus, qui idolis immolatur) simplicitas mentis, quæ nullam cogitationis scrupulositatem habet, ab omni suspicione contaminationis absolvat. Et rursus, etiamsi mundus sit cibus, suspicionem tamen aliquis patitur, quasi quod idolis immolatus sit, pollutus dicitur pro conscientiæ scrupulo. Dixi, ne ponatis offendiculum fratri vel scandalum, ideo scilicet, quasi si propter cibum tuum saltem contristatur frater tuus, jam non secundum charitatem ambulas, id est jam hujus operationis tuæ gressus non tenet viam fraternitatis; et idcirco graviter peccas, quia charitatem deseruisti, sine qua nihil placet Deo. *Noli cibo tuo illum perdere*. Non debes eum cibo tuo vel contristare. Plus autem cave, ne taliter eum perdas. Noli pro cibo tuo, pro tam vili re, tam cito peritura, perdere rem tam magni pretii, et tam dignam, pro qua Christus sustinuit mortem. Cum definisset apostolico dogmate, per Dominum Jesum nihil commune vel immundum natura sui putandum, et dedisset erga usus ciborum fidelibus quibusque absolutissimam libertatem; rursus ad ædificandam auctoritatem fratrum amoris, licentiam revocat libertatis, et dicit: Etiamsi commune nihil est,

A et omnis usus ciborum licenter admittitur, tamen tu si propter cibum quem licitum putas fratrem qui nondum scientiæ hujus capax est scandalizas, jam non secundum charitatem agis, nec affectum in te fraterni amoris ostendis. Et ideo ne lædas aut contristes eum, etiam a licitis abstinere debes, tibi enim abstinere a licitis, crimen nullum est; illi vero, in quibus discernit et putat non licere, contaminabilis usus est. Qui enim discernit, si manducaverit, damnatus est. Quod si facias, tu utique fratrem tuum spernis et perdis, *pro quo Christus mortuus est*, et tu ei causam perditionis acquis.

« Non ergo blasphemetur bonum nostrum. Non est enim regnum Dei esca et potus, sed justitia et pax et gaudium in Spiritu sancto. Qui enim in hoc servit Christo, placet Deo, et probatus est hominibus. Itaque quæ pacis sunt, sectemur: et quæ ædificationis sunt invicem custodiamus. »

Quandoquidem frater noster contristatur cibo nostro aut perditur, ergo, caveamus ne bonum nostrum blasphemetur. Blasphematur enim bonum nostrum, si propter escas contentiones oriuntur, quoniam bonæ in se comestio blasphemabilis est, dum aliis nocet. Et quia nocet, abstinere. Et abstinendum est, quia non est regnum Dei esca et potus, id est regnum Dei propter quod laboramus et currimus, neque per escam, neque per potum constat, sed aliena sunt hæc a regno Dei, et ab illa sanctorum conversatione futura. Non erunt ibi carnales epulæ, sed justitia et pax et gaudium. Et quia solent homines multum gaudere corporeis cibus, addidit in Spiritu sancto. Ideoque nos in his virtutibus exerceamus, quæ non bisicum possint transire ad regnum cælorum, id est in justitia, pace et gaudio spiritali. Has enim tres virtutes idcirco posuit, quoniam ad intentionem suam, et ad Romanorum correctionem specialiter militare vidit. Justitiam, ut unusquisque non faciat alii quod sibi non vult fieri; et quod sibi exoptat recte fieri, faciat alii. Pacem, ut illis quies et concordia sit, non gloriatio et discordia. Gaudium, ut unusquisque de bonis fratris sui gaudeat, sicut de suis. Et istæ virtutes sunt regnum Dei, quoniam virtutibus hujusmodi consistit [al. constat] regnum supernæ beatitudinis. Vel regnum Dei sunt, quia etiam in præsentem vitam regnat Deus in illis, in quibus sunt hæc virtutes. Vere istæ in Spiritu sancto sunt regnum Dei, nam qui in hoc, id est in Spiritu sancto, servit Christo, ut accepta Spiritus sancti gratia, studeat obedire mandatis Christi, placet Deo Patri qui de Christo dixit: « Ipsum audite (*Matth. xvii*; *Luc. ix*; *II Petr. i*). » et probatus est hominibus, qui videntes opera ejus bona, glorificant Patrem ejus qui in cælis est (*Matth. v*). Placet Deo secundum gaudium, quod est in Spiritu sancto, probatus apparet hominibus secundum justitiam et pacem. Et quia pax et gaudium est regnum Dei, atque per hæc placere potest quisque tam Deo quam ho-

manibus, itaque sectemur semper ea quæ pacis sunt et concordiæ, non quæ belli et discordiæ; et custodiamus ea quæ sunt ædificationis, id est observemus ea quæ ad ædificationem pertinent, invicem, id est Judæus ad gentilem, et gentilis ad Judæum, ut semper alterutrum magis ac magis ædificemur vel alii per nos.

« Noli propter escam destruere opus Dei. Omnia quidem munda sunt, sed malum est homini qui per
 « offendiculum manducat (Tit. 1; I Cor. viii). Bonum est non manducare carnem, et non bibere
 « vinum, neque in quo frater tuus offenditur aut scandalizatur aut infirmatur. Tu fidem habes penes
 « temetipsum? habe coram Deo. Beatus qui non judicat semetipsum in eo quod probat. Qui
 « autem discernit, si manducaverit, damnatus est, quia non ex fide. Omne autem quod non est ex
 « fide, peccatum est. »

Quæ sunt ædificationis custodire debemus, et ideo noli propter escam tuam destruere in aliis opus Dei, id est subvertere fidem et charitatem, quas in eis operatus est Deus. Solvit enim opus Dei et ædificium destruit charitatis, qui propter ciborum intemperantiam scandalum fratribus ponit. Omnia quidem genera ciborum munda sunt, sed tamen non nulla sunt intermittenda, ne per hæc destruatur opus Dei, quia malum est homini qui per offendiculum aliorum manducat, id est qui ita manducat, ut alii per ejus manducationem cadant et a fide deticiant. Quod ergo sui natura bonum est, ex offensione elicitur malum, ex eo quod offenditur frater te utente his cibis, in quibus ille scandalum patitur. Omnia enim naturaliter munda sunt, quamvis lex Moysi quædam munda et quædam immunda significaverit, ut populus qui sub lege censebatur, discerni per hujusmodi observantias a cæteris gentibus videretur. Et quandiu quidem populus ille sanctus et segregatus a cæteris nationibus habebatur, æqua discretio de mundis et immundis necessaria videbatur, quæ populum illum secerneret a nationibus, quas ignorantia Dei et cultus idolorum faciebat immundas. Nunc vero gentilibus cunctis ad fidem ingressis non necesse est distantias hujusmodi observare, sed omnem creaturam Dei, sicut revera est, bonam æstimare. Omnia itaque munda sunt et bona, sed in malum convertuntur eis qui per offensionem fratrum comedunt ea. Et ideo ne frater offendatur, abstinendum est ab eis. Nam bonum est non manducare carnem, nec bibere vinum per offensionem fratris, neque aliud in quo frater tuus offenditur aut scandalizatur, aut infirmatur. Alioqui manducare carnem et non manducare, vel bibere vinum et non bibere, neque malum neque bonum est, sed medium et indifferens. Potest enim non manducare carnem et non bibere vinum etiam malus homo et a fide alienus, ut sæpe etiam nonnullos idolorum causa hoc facere contingit. Sed ne frater offendatur vel offendant, ideo non manducare carnem et non bibere vinum, non jam medium vel indifferens, sed vere

bonum est. Bonum est enim abstinere a carne et vino, si in eis frater offenditur. Omnia enim ob hoc fieri oportet, ne destruatur opus Dei. Ideo et manducandum est, si in eo frater ædificatur; et non est manducandum, si per hoc decrescit opus Dei. Et bibendum est, si per hoc proficiat frater ad fidem; et non bibendum, si per hoc aut frater damnus fidei, aut tu detrimentum charitatis incurras. Sunt et aliæ causæ, propter quas a talibus cibis plerique religiosorum abstinere, sed nunc tacentur ab Apostolo, quia rudibus loquitur. Ob hoc enim solummodo suadet nunc abstinendum, ne frater offendatur, aut scandalizetur, aut infirmetur. Offenditur enim, si propter comestionem aut bibitionem offensus recedit a fide. Vel offendit perturbatus nesciens quid teneat. Scandalizatur, si contristatur. Infirmatur in fide, si quamvis non recedat, dubitare incipit. Et ne frater ista propter cibum tuum patiat, abstinere debes. Quod bene potes facere, quia de tuo bono nihil perdis. Tu enim habes penes temetipsum, id est in corde tuo, unde nullus auferre potest, fidem, quia credis licitum manducare omnia, habere illam coram Deo, id est serva illam intra conscientiam, nec jactes illam coram hominibus, ne magis in ostentatione fiat quod credis quam in virtute. Sufficit tibi habere coram Deo hujusmodi fidem. Non tamen idcirco cogendus est et alius ut omnia manducet, qui nondum habet talem fidem, ut credat omnia esse manducanda. Et ideo noli apud homines gloriari de hac fide tua, spernendo cæteros qui nondum sic credunt, sed in oculis interni arbitrii eam retine. Nam beatus est qui non judicat semetipsum, id est qui non facit damnabilem seipsum noncogendo aliis, in eo quod probat, id est in eo facto quod laudat et bonum judicat. Beatus qui non aliud facit quam quod utile probat. Nam ille semetipsum judicat, id est proprio judicio se damnat, qui quod dicit non debere se facere, facit. Bona enim est fides, qua credimus omnia esse munda, et hanc probamus apud nosmetipsos veraciter esse bonam. Sed si hoc fidei bono male usi fuerimus, ut per offendiculum infirmorum fratrum manducemus, nosmetipsos judicamus, quia scienter hoc facimus, quod non esse faciendum mens nostra judicat. Ille quidem beatus est, qui non ita se judicat. Sed ille qui discernit, id est qui discretionem habet in cibis, putans alios esse mundos et alios immundos, si tali conscientia manducaverit, damnatus est, quia non ex fide manducat. Et ideo non debemus eum cogere ut manducet, nec exemplo nostro ad manducandum provocare, sed nos potius propter eum a talibus escis abstinere. Si manducaverit, jam conscientia arguente damnatus est, quia non ex fide manducat, dum cibum illum nequaquam credit esse mundum, et tamen comedit. Digne enim subjacet damnationi, quoniam aliter credit agendum, et aliter agit. Ille non ex fide comedit. Sed omne opus quod non est ex fide, peccatum est. Igitur quia comestio illius peccatum est, rite damnatur. Omne quod non est ex fide,

peccatum est, quia etiam illud quod est bonum, si A
putetur esse malum et tunc fiat, peccatum est. Velut
si quis (verbi gratia) castitatem crederet esse malum,
et viveret castus, profecto peccaret. Et propterea
omnis infidelium vita peccatum est, nihilque bonum
est sine summo bono. Ubi enim deest agnitio æternæ
et incommutabilis veritatis, falsa virtus est etiam
in optimis moribus.

CAPUT XV.

« Debemus autem nos firmiores imbecillitates in-
firmorum sustinere, et non nobis placere. Unus-
quisque nostrum proximo suo placeat in bono, ad
ædificationem. Etenim Christus non sibi placuit,
sed sicut scriptum est: Improperia impropertium
tibi ceciderunt super me (Psal. LXXVIII). »

Infirmus si edit, damnatus est, sed nos firmiores B
debemus sustinere talium imbecillitates. Vel ita:
Offendiculum vel scandalum fratri ponere non debe-
mus, sed potius nos qui firmiores sumus debemus
sustinere imbecillitates infirmorum, ut ea in quibus
alii pro infirmitate delinquant, nos robustiores pa-
tienter feramus, et non continuo spernentes, abji-
ciamus et abhorrescamus illos, si forte in aliquo
infirmitatis vitio vincuntur, neque sub specie purioris
vitæ, a conventu fratrum et ecclesiæ societate depel-
lamus eos. Cum enim non possint se ad nos erigere,
debemus nos patienter eorum imbecillitates susti-
nere, id est portare et erigere, non abjicere et despi-
cere. Quoniam si portetur infirmus, aut erubescit
diutius portari, et corrigit consuetudinem delin-
quenti; aut si se corrigere noluerit, qui eum portat
præmium patientiæ habebit; et ille deterius peribit.
Debemus, inquam, eorum imbecillitates sustinere,
ne cadant qui titubant, et non nobis placere, id est
privato amore diligere, ut diligentes nos ipsos, de
aliis non curemus; et propria commoda quærentes
utilitatem aliorum negligamus. Hoc nullus faciat.
Sed unusquisque nostrum proximo suo non in con-
sensu nequitiae ipsius, vel in alio quolibet malo
placeat, sed potius in bono opere et sermone ad
ædificationem illius. Non enim propter humanum
favorem proximo placere debemus in bono quod
agimus, sed propter illius ædificationem, ut verbis
et exemplis ædificemus eum. Non nobis placeamus,
sed proximo in bonis ad utilitatem ejus. Etenim D
Christus qui est caput nostrum et dux noster sic
fecit, non sibi placuit, quia « cum in forma Dei
esset, non rapinam arbitratus est esse se æqualem
Deo (Philipp. II). » Sed volens hominibus placere,
ut eis exemplum bene agendi tribueret et ad salu-
tem eos reduceret, semetipsum exinanivit, formam
servi accipiens, et sicut scriptum est, impropertiam
sustinuit. Ceciderunt, inquit, super me impropertiam
impropertantium tibi (Psal. LXXVIII), o Pater. Dum
enim mihi impropertarent, impropertabant tibi quia
sicut « qui me recipit, recipit eum qui me misit
(Luc. IX); » et « qui me spernit, spernit eum qui
me misit (Joan. XIII); » qui mihi impropertat, im-
propertat ei qui me misit. Improperia ergo Judæo-

rum, hoc modo tibi impropertantur ceciderunt super
me, id est onere mortis oppresserunt me. Dixerunt
enim me blasphemare in te, et ob hoc occiderunt
(Matth. IX; Marc. II; Joan. X). Sicque peccata pec-
cantium in te ceciderunt super me, quia innocens a
peccatoribus occisus sum quasi blasphemus: et tu
qui me miseris, es exonoratus.

« Quæcunque enim scripta sunt, ad nostram do-
ctrinam scripta sunt, ut per patientiam et conso-
lationem Scripturarum spem habeamus. »

Dixi quia Christus quem nos sequi debemus susti-
nuit, sicut scriptum est, impropertiam pro salute ho-
minum, et non sibi placuit, sed aliis, ut salvi fierent.
Et vere nos per hanc psalmi scripturam docemur
exemplo ejus non nostra, sed aliorum commoda
quære. Quæcunque enim in Veteri Testamento
scripta sunt, ad nostram doctrinam, id est ut nos per
hæc doceamur, scripta sunt. Ostendit Apostolus
utilitatem lectionis Veterum Scripturarum. Quas
quia Judæi non intellexerunt, nos autem Christo
aperiente intelligimus, non ad illorum, sed ad no-
stram doctrinam scripta sunt quæ ibi leguntur. Quæ
enim scribuntur, propter eos sine dubio scribuntur,
qui intellecturi sunt et utilitatem ex eis capturi. Et
ideo propter nos scripta sunt omnia quæ in lege et
prophetis leguntur, ut nos qui intellecturi eramus,
doceremur per ea quid credere et agere deberemus
vel sperare, ut scilicet per patientiam et consolatio-
nem Scripturarum spem habeamus, per patientiam
habeamus spem, quoniam patientia operatur pro-
bationem, probatio vero spem (Rom. XV; Jac. I). Et
per consolationem Scripturarum habeamus spem,
quia dum Scripturæ nos in adversis consolantur, in
spem supernæ beatitudinis mentem nostram eri-
gunt. In ipsis Scripturis docemur per patientiam,
ut communicemus passionibus Christi, et pro salute
proximorum libenter sustineamus, sicut ille susti-
nuit pro nobis. Et ibi percipimus consolationem, id
est mœroris et afflictionis allevationem, ne nimia
absorbeamur tristitia. Consolatio enim non doloris
ablationem significat, sed temperantiam et quamdam
mitigationem. Et hanc ex Scripturis habemus, at-
que per hanc spem, quia dum præsentem tristitiam
nostram Deus per Scripturarum suarum sententias
levigat et in hilaritatem vertit, dat spem perveniendi
ad illud gaudium, cui tristitia non erit admista.
Consolatio nobis datur in recreatione passionum
Christi, quia dum legimus vel audimus quot et
quanta ille sine culpa sustinuit, intelligimus nos
peccatores omnia debere libenter sustinere, ac
deinde sequitur spes, quia per has afflictiones spe-
ramus ad illam beatitudinem pervenire, ad quam
Christus merito suæ passionis pervenit.

« Deus autem patientiæ et solatii det vobis id-
ipsum sapere in alterutrum secundum Jesum
Christum, ut unanimes uno ore honorificetis Deum
et Patrem Domini nostri Jesu Christi. Propter
quod suscipite invicem, sicut et Christus susce-
pit vos in honorem Dei. »

Scripturæ nos docent, sed Deus vobis tribuat, ut possitis agere quod Scripturæ docent. Deus luce et virtute suæ gratiæ vestram imbecillitatem corroborat, ut operari velitis et possitis quod in Scripturis auditis. Deus dico patientiæ et solatii id est a quo est patientia et solatium, sicut et cæteræ virtutes. Cum dicitur Deus patientiæ, hoc intimatur, quia Deus cum his est, qui habent in se virtutem patientiæ; sicut et cum dicitur, Deus justitiæ, ostenditur in illis esse Deus, qui servant justitiam. Similiter et Deus solatii cum dicitur, ostenditur esse cum illis, qui ex Scripturis divinis per intelligentiam spiritualem capiunt solatium. *Deus patientiæ et solatii det vobis idipsum sapere in alterutrum.* More patriarcharum et prophetarum tribuit nunc Romanis Apostolus benedictionem. Grandis enim est ista benedictio, qua precatur illis divinitus dari, ut idipsum sapiant in alterutrum, hoc est ne jam sit in eis ulla dissensio, sed unum idemque sapiant omnes atque sentiant; et sicut sibi, ita et proximo suo velit unusquisque. Bene autem addidit, *secundum Jesum Christum.* Potest enim fieri, ut et in malitia aliqui unum vicissim sapiant et consentiant. Qui autem secundum Christum sapiant, sine dubio omne quod sapiant, bonum est. Det, inquit, vobis idipsum sapere invicem, id est det vobis tantam concordiam invicem, ut quod unus sentit, sentiat alter, et sapientiæ sensus transeat in alterutrum, id est de isto in illum, et de illo in istum. Et hoc secundum Christum, id est in omni bono per quod regem nostrum sequimur, non in malo per quod ei contraimus. Ita sapiatis, ut *unanimes*, id est unum omnes animum habentes, *uno ore honorificetis Deum et Patrem Domini nostri Jesu Christi.* Uno ore dicitur, quando unus atque idem sensus et sermo per diversorum ora procedit. Idem sapiatis, ut *unanimes uno ore Deum honoretis*, quoniam aliter eum honorare non potestis. Non enim honoratur nisi ab illis qui idipsum in Christo sapiant, ut unanimi voluntate atque eadem oris confessione laudent eum. Qui secundum humanitatem Christi, est Deus ejus; et secundum divinitatem ejus, est pater ipsius. Uno sensu et concordi vita debetis eum honorare. Propter quod, id est ut eum concorditer honoretis, *suscipite invicem alii alios*, ne jam alter alterum abjiciat, causa mundorum vel immundorum ciborum dissentiens ab eo. Ubi pro eis orationem præmisit, ostendit quia non ex viribus et meritis hominum, sed ex Dei gratia salus est. Ubi vero admonitionem subjungit, ut se invicem suscipiant, liberum arbitrium in eis demonstrat; et quod ex suo arbitrio per præcedentem Dei gratiam corroborato, salutem suam operari possint, indicat. Nam si nihil possent ex viribus suis, non eos admoneret; et si solo arbitrio sufficerent, Deum pro ipsis non oraret, sed solummodo exhortaretur eos. *Suscipite vos invicem, sicut et Christus suscepit vos*, qui nullius horruit immunditias, nec reputavit alicui delicta sua. Nihil ergo de immunditia animalium judicetis,

sicut nec ille immunditias credentium reputavit. Suscepit autem vos *in honorem Dei*, quoniam ad hoc vos suscepit, ut juxta præceptum ejus, videant homines opera vestra bona, et glorificent Patrem vestrum qui in cælis est (*Matth. v.*)

« Dico enim Christum Jesum ministrum fuisse circumcisionis, propter veritatem Dei ad confirmandas promissiones patrum, gentes autem super misericordia honorare Deum, sicut scriptum est. Propterea confitebor tibi in gentibus, et nomini tuo cantabo (*II Reg. xxii, Psal. xvii*). Et iterum dicit: « Lætamiui gentes cum plebe ejus (*Deut. xxxii*). Et iterum: Laudate omnes gentes Dominum (*Psal. cxvi*), et magnificate eum omnes populi. Et rursus « Isaias dicit: Erit radix Jesse, et qui exsurgit regere gentes, in eum gentes sperabunt (*Isa. xi*). »

Vere suscepit vos Christus, nam Judæos propter veritatem, gentiles propter misericordiam. *Dico enim Jesum Christum ministrum fuisse circumcisionis*, id est ego cui indubitanter credendum est, ego qui non ab homine, sed ab ipso Christo didici, ego qui tantus apostolus sum, dico quia Christus fuit minister circumcisionis, id est apostolus et prædicator eorum qui sunt ex circumcisione, sicut ait: « Non sum missus nisi ad oves quæ perierunt domus Israel (*Matth. xv*), » et hoc *propter veritatem Dei* complendam, qui locutus fuerat Abraham et David, quod ex eorum semine Christus esset venturus (*Gen. xxi; Psal. cxxxii*), ad confirmandas promissiones patrum, id est ut ratas et firmas redderet promissiones, quæ de ejus adventu factæ patribus in Scripturis leguntur. Ad illos enim venire debuit, quorum patribus fuerat promissus. Non autem clausit Deus fontem bonitatis suæ etiam in alienigenas gentes, sed per eundem redemptorem misericorditer eas salvavit. Vel pro eo quod circumcisionem in carne sua Christus suscepit, dicitur minister fuisse circumcisionis, ut aperte declararet quod ex semine Abraham veniens, cui Deus promiserat, quia in semine ejus benedicerent omnes gentes, completeret in semetipso quæ patribus fuerant promissa, ut per hoc gentiles intelligerent non esse penitus judicandos eos, qui in legis observationibus demorantur, cum etiam Christus in carne sua circumcisionis minister, id est observator exstiterit. Dico Christum fuisse ministrum circumcisionis propter veritatem Dei, *sed gentes dico honorare Deum*, id est dico quod gentes ad fidem conversæ bonis operibus et religiosis moribus honorant Deum *super misericordia*, id est de misericordia aut pro misericordia sibi ab eo collata. Veritas enim in Judæis, misericordia in gentibus. Veritas ibi, ubi erant eloquia Dei; misericordia in illis qui dimiserant Deum et converterant se ad diaboli cultum, nullamque promissionem divinitus acceperant, et nullum justitiæ meritum habebant. Ita per solam misericordiam vocavit Deus gentes ad honorandum et glorificandum se, sicut in psalmo scriptum est in *persona*

Christi (*Psal. xvii*) : *Propterea*, id est propter resurrectionem meam et ascensionem, quia ab insurgentibus in me exaltabis me, a viro iniquo eripies me, o Deus qui subdis populum sub me, *confitebor tibi in gentibus*, id est, tibi per me confitebuntur gentes, et *nomini tuo cantabo*, id est cantantes faciam. Ostendit a gentibus majores Deo gratias referendas. « Cui enim plus dimittitur, plus diligit (*Luc. vii*). » Et Judæis arrogantiam tollit, dum et gentium salutem similiter docet esse prædictam. Quod Dominus ait : *Confitebor tibi in gentibus*, declarat ut ipse confitetur in eis, sicut et loquitur in eis, utpote in membris suis. Confessio autem non tantum peccatorum est, sed et laus Dei. Et quod ait : *Cantabo*, hoc est illud canticum novum, de quo dicit alius psalmus : « Cantate Domino canticum novum, cantate Domino omnis terra (*Psal. xcvi*). » Ipse quippe cantat in nobis, cujus gratia cantat in nobis. Intus est gaudium, ubi vox laudis et canitur et auditur, qua voce laudatur, qui gratis amandus est toto corde, tota anima, et tota mente, amatoremque suum accendit in se gratia Spiritus sancti. Hæc de gentium salute David in psalmo (*Psal. xvii*). *Et iterum* Moyses in cantico Deuteronomii, ubi nos habemus : « Laudate gentes populum ejus (*Deut. xxxii*). » juxta septuaginta Interpretes dicit : *Lætamine gentes cum plebe ejus*, id est cum Judæis unum ovile in Christo factæ gaudete. Et iterum David : (*Psal. cxvi*), *Laudate, omnes gentes, Dominum* quia auxit plebis suæ numerum nobis omnibus associatis, et *magnificate eum*, id est magnum et gloriosum vestris operibus ostendite *omnes populi* Judæorum, id est duodecim tribus et omnes familiæ Israel. *Et rursum* *Isaias* ait (*Isa. xi*), quod ad idem pertinet : *Erit radix Jesse*, id est principium regalis familiæ, et ex hac radice erit Christus, *qui exsurget a mortuis regere gentes*, id est ut regat gentes per fidem et bona opera ; et ideo *gentes sperabunt in eum* venturum ad judicium, ut recipiant ab eo coronam gloriæ. Vel quia ipse Christus in Apocalypsi Joannis dicit : *Ego sum radix et genus David* (*Apoc. xxii*), ipse potius est intelligendus radix Jesse, id est originem carnis per David et Mariam trahens ex Jesse. Radix, inquit, erit Jesse, id est erit filius Jesse, erit ducens genus Jesse, et ipse erit qui de morte exsurget regere gentes, et in eum, ut diximus, gentes sperabunt, ut cum redierit, percipiant ab eo regnum (*Matth. xxv*).

« Deus autem spei repleat vos omni gaudio et pace in credendo, ut abundetis in spe et virtute Spiritus sancti. »

Pulchre qui dixerat in *Isaia* scriptum esse, quod in eum gentes sperabunt, subjungit : *Deus autem spei*, velut si scriptum fuisset, quod in eum gentes crederent, et adjecisset, Deus autem spei. Deum autem spei invocatur super eos qui sperant in eum, a quo eis benedictionis munus pre-

atur augeri, quasi dicat : Ego Scripturarum testimoniis ostendi vos tam gentiles quam Judæos per Christum ad fidem pertinere, sed Deus qui potest omnia adimplere quæ dixi, Deus spei, id est qui dat spem, vel in quo speramus, *repleat vos omni gaudio* spiritali, ut nullus vestrum jam contristetur, sicut solebatur in lite (211) mutuo contristari, sed de profectu vestro et spe gaudeatis, et repleat vos *pace*, id est concordia in credendo, ne in vestra credulitate sit ulla discordia, sed pax ad invicem, *ut abundetis* bonis operibus in spe futuræ remunerationis et *virtute Spiritus sancti* qua nunc confortamini. Vel abundetis per opera bona, id est certius speretis æternam beatitudinem, et abundetis in unitate et virtute Spiritus sancti, id est abundantius replemini ejusdem Spiritus fortitudine, ut ad omnia sitis robusti

« Certus sum autem, fratres mei, et ego ipse de vobis, quoniam et ipsi pleni estis dilectione, repleti omni scientia, ita ut possitis alterutrum monere. »

Ne videretur omnes intelligere discordes, et ad corrigendum insipientes removet illud. Quod ideo incipit, ut admoveat perfectiores de correptione minorum, et inde proponit se exemplum qui laborabat de aliis. Et opus est ut hoc isti faciant, cum ipse aliis impeditus, ad eos venire nondum possit. *Mo- neo*, inquit, vos invicem suscipere et concorditer vivere, non tamen omnes, sed *certus sum* de vobis majoribus, o *fratres mei*, et *ego ipse*, qui ita loquor, quoniam non ego solus, sed vos *ipsi pleni estis dilectione*, qua velitis aliis prodesse, et *repleti omni scientia*, qua possitis implere quod vultis erga profectum aliorum. Repleti omni scientia veteris et novæ legis, etsi non plenarie, tamen ex parte, *ita ut possitis alterutrum monere*, id est in tantum didicistis omnem Scripturæ scientiam, ut possitis per eam invicem alterutrum monere ad bene agendum, nisi in vestra culpa remanseritis.

« Audacius autem scripsi vobis, fratres, ex parte tanquam in memoriam vos reducens, propter gratiam quæ data est mihi a Deo, ut sim minister Jesu Christi in gentibus, sanctificans evangelium Dei, ut fiat oblatio gentium accepta et sanctificata in Spiritu sancto. »

Certus sum de vobis, et vos scientia repletos esse novi, sed tamen *audacius* quam fortasse putaretis, *scripsi vobis*, o *fratres*, et scripsi *ex parte*. Cum nunc Apostolus, a quo scientiæ sermo nobis transfusus est, ex parte se dicat scripsisse, credendum est quod quamvis ipse alibi dicat : « Ex parte cognoscimus et ex parte prophetaniam (*I Cor. xiii*), » plura tamen et multo plura sciret quam scripserit. Tanquam enim ipse multa sciret, nec tamen auderet multa proferre, audacius se fecisse dicit, ut salutem aliquam per Scripturam eis dirigeret. Quod vero ait, *tanquam in memoriam vos reducens*, indicat fuisse quidem sibi jam sermonem de talibus, et se frequen-

ter disseruisse de mysteriis; sed quæ solo sermone dicta sunt facile interciperi posset oblivio, per hæc pauca quæ scripsit, revocat illos in memoriam eorum, quæ latius sæpe disseruerat. Vel audacius scripsi vobis, reprehendendo audacius quosdam vestrum male se habentium, scripsi dico, non quasi putans vos insipientes, sed quasi in memoriam vos reducens, id est quasi faciens vos memores quid agere debeatis. Per laudem eos revocat ad meliora, more exhortantis. Unde nec dicit se docere eos, sed monere, quasi quod sciatur, sed subterfugiat animo. Ubi tamen latenter eos arguit, quasi oblitos quod mente sedula retinere debuissent. Scripsi, inquit, vobis, et hoc *propter gratiam apostolatus quæ data est a Deo*, quasi dicat: Pro officio meo omittere non potui. Ob hoc data est mihi gratia, ut *sim minister Christi in gentibus*, id est ut ministrem et serviam Christo, prædicans illum gentibus. Non temere scribit, sed Apostolus gentium constitutus, audeat scribere omnibus gentibus. Sum minister Christi, quem ipse, non alius instituit, ego dico *sanctificans Evangelium Dei*, id est exemplo meo sanctum ostendens, quod cum tanta reverentia ministro, ut *fiat oblatio gentium accepta*, id est ut omnes offerantur Domino, tanquam acceptabile sacrificium, cum in Christum credentes per Evangelium sanctificentur. Vel fiat oblatio gentium accepta, id est ut gentes quas offero, sint acceptæ Deo fidei perfectione, et *sanctificatæ* bona operatione in *Spiritu sancto*, id est in Spiritu sancti gratia.

« Habeo igitur gloriam in Christo Jesu ad Deum. « Non enim audeo aliquid loqui eorum, quæ per me « non efficit Christus in obedientiam gentium verbo « et factis; in virtute signorum et prodigiorum, in « virtute Spiritus sancti, ita ut ab Jerusalem per « circuitum usque ad Illyricum repleverim Evangelio « Christi. »

Dixi quia sum minister Jesu Christi, sanctificans Evangelium Dei. *Igitur habeo gloriam in Christo Jesu*, cui ministro, *ad Deum*, cujus Evangelium sanctifico. In Christo gloriam istam habeo, quia nullus apud Deum gloriam habere potest, nisi in Christo. Christus enim veritas et sapientia et justitia, et sine his nemo gloriam habet apud Deum. Habeo gloriam in Christo, et recte, quia *non audeo* ut pseudoapostoli *loqui aliquid eorum quæ per me non efficit Christus*, id est dedecus grande putarem, si aliquid loquerer quod per me Christus non operetur, *in obedientiam gentium*, id est ut gentes ei obediant *verbo meæ prædicationis et factis meæ operationis, in virtute signorum et prodigiorum*, id est potentia mysticorum et simplicium miraculorum, *factorum in virtute Spiritus sancti*. Quæ loquor, inquit, non sunt alieni operis verba; nec aliorum gestorum laudator efficiar, sed quæ Christum per me fecisse novi, hæc scribo vobis, quæ per obedientiam gentium verbo in me et opere explevit, verbo doctrinæ, opere autem signorum et prodigiorum. Signa appellantur, in quibus cum aliquid sit mirabi-

le, indicatur etiam aliquid futurum. Prodigia vero, in quibus tantummodo mirabile aliquid ostenditur. Signa autem et prodigia, quasi quæ utrumque continent, dixit. Scriptura vero divina interdum tenet istas proprietates, interdum abusive et prodigia pro signis, et signa pro prodigiis ponit. Hæc ideo per se facta dicit Apostolus, ut probet se nihil minus posse quam priores apostolos, qui cum Christo fuerant. In virtute autem Spiritus sancti potest illa potestas intelligi, qua manus imponebat super credentes, et accipiebant spiritum sanctum, vel super infirmos et sanabantur. Ita, inquit, operatur in me Christus, *ut a Jerusalem usque ad Illyricum repleverim Evangelio Christi* omnes populos per circuitum, vel Evangelium Christi repleverim, id est plene prædicaverim usque ad Illyricum, quæ est regio magna, incipiens a principio Europæ, et habens provincias decem et novem, ex quibus Dalmatia ex utraque Pannonia, Epirus et Achaia, Macedonia et Thessalia.

« Sic autem prædicavi Evangelium hoc, non ubi « nominatus est Christus, ne super alienum funda- « mentum ædificarem, sed sicut scriptum est: Quo- « niam quibus non est annuntiatum de eo, videbunt; « et qui non audierunt, intelligent. Propter quod « impediabar plurimum venire ad vos. Nunc autem « ulterius locum non habens in his regionibus, cu- « piditatem autem habens veniendi ad vos ex multis « jam præcedentibus annis, cum in Hispaniam pro- « ficisci cœpero, spero quod præteriens videam vos, « et a vobis deducar illuc, si vobis primum ex parte « fruitus fuero. »

Replevi omnia Evangelio per tam longa terrarum spatia, nec post alios id feci, sed *sic prædicavi hoc Evangelium*, ut omnes anticiparem, quia prædicavi illud *non ubi nominatus est Christus*, id est non in locis in quibus ab aliis prædicatus fuerat, *ne super alienum fundamentum ædificarem*, id est ne super fundamentum fidei ab alio positum adderem meæ prædicationis ædificium, et alieni operis gloriam aubriperere viderer, *sed sicut* in Isaia (Isai. LI) *scriptum est feci*, ubi legitur: Quia quibus non est annuntiatum de eo, id est de Christo, *videbunt eum oculis cordis; et qui antea non audierunt prædicationem de eo, intelligent* quæ de ipso dicuntur. Secundum hoc prophetiæ testimonium observavit diligenter Apostolus, ut illis Christum nuntiaret, quibus a nullo fuerat nuntiatum, et illi de eo intelligerent, qui a nullo ante didicissent. Nam quia sciebat pseudoapostolos sub nomine Christi falsa dicere, quod postea corrigere maximi erat laboris, ideo erat sollicitus prævenire, et veritatem integre tradere, ubi Christus nondum erat nuntiatum; utque verus de eo esset intellectus, festinabat gentes veritate imbuere, quatenus contra pseudoapostolorum commenta cautos omnes faceret. Tot, inquit, gentibus prædicavi Christum ignorantibus. *Propter quod*, id est quia detinebar occupatione fundandi ecclesias, et in illis locis fundandi, ubi nullum fidei

fundamentum præcesserat, dum per circuitum irem, et pseudomagistros prævenirem, *impediebar plurimum venire ad vos*, quos sicut in principio epistolæ dixi videre desidero. Sed *nunc ulterius non habens locum*, id est causam morandi in his regionibus, quia omnes notitia Dei replevi, *sed cupiditatem diu habens veniendi ad vos ex multis jam præcedentibus annis, cum cæpero proficisci in Hispaniam*, ad quam difficile itur a pseudoapostolis, et ideo tardare licuit: *spero quod præteriens videam vos*. Videtur hæc in Achaia positus dicere apud Corinthum. Quæ utique Achaia vicina et cohærens est Macedonia. In quibus locis degens, cum singula quæque peragrasset, Evangelium prædicans in his duntaxat finibus, ubi Christus, ante non fuerat prædicatus, et agnitione Dei repletus omnia, dicit se ulterius locum non habere in his regionibus, id est nullum sibi superesse Christi prædicatione vacuum, et tempus jam adesse, quo desiderium suum videndi Romanos debeat implere, quod conceptum ex multis annis gerebat, sed propter alios assidue convertendos, distulerat. Nec falsum loquitur, qui se in Hispaniam profecturum pollicetur. Profectus est enim, sicut Hieronymus et Beda cæterique doctores testantur. Unde et Narbonam præteriens, quemdam discipulum suum nomine Paulum, fertur ibi reliquisse episcopum. Pervenit igitur usque ad Hispanias, et a mari Rubro usque ad Oceanum prædicando cucurrit, imitans solis cursum ab oriente usque ad occasum, ut ante ei terra deficeret quam studium prædicandi. Quia ergo et apud Hispanias pseudoapostolos prævenire festinabat, cum in Hispaniam, inquit, proficisci cæpero, spero quod videam vos, quasi dicat: Ex me nil possum, sed spero quod Deus dabit ut vos videam, et hoc præteriens, quia non indigetis longa mora, et alii prorsus indigent adventu meo. Spero quod videam vos, *et a vobis deducar illuc*, si interim vos præparatis, ne me a cæteris retardetis, videlicet *si vobis primum fructus fuero*, id est si primum de vobis fructum habuero, si primum de vestro fructu lætatus fuero, et hoc ex parte vestrum, id est ex illis qui nondum talem fructum faciunt, qualem oportet. Quod ait, spero quia præteriens videam vos, non ita accipiendum est, quasi tam parvo amore erga Romanos teneretur, ut eos in transitu solummodo et aliquo pergens iudicaret visendos. Unde subjungit, si vobis primum ex parte fructus fuero. In quo utique in ipsorum potestate videtur ponere, quandiu pro eis debeat relaxare propositum alio pergendi; et hoc quodammodo amorem ipsorum erga se invitat et nutrit, ut ipsi insatiabili erga Apostolum teneantur affectu, sciant etiam ipsum id habere propositi, ut non prius ab eis discedat, neque alio quam charitatis ipsorum gratia perfruat; non tamen ex integro, sed ex parte satisfiet eidem charitati. Præmonet enim quod præferenda sit eis necessitas evangelizandi pluribus. Et bene his quos nondum secundum carnem viderat, et ad quos *nondum in corpore venerat*, præsentiam sui et re-

tardationem moderatius pollicetur. *Desiderabilis enim suscipimus bona quæ cito metuimus auferenda; securius vero negligimus, quæ nos diutius contentatos credimus.*

« Nunc ergo proficiscar Jerusalem ministrare sanctis. Probaverunt enim Macedonia et Achaia collationem aliquam facere in pauperes sanctorum, qui sunt in Jerusalem. Placuit enim eis, et debitores sunt eorum. Nam si spiritualium eorum participes facti sunt gentiles, debent et in carnalibus ministrare eis (I Cor. ix). Hoc igitur cum consummavero, et assignavero eis fructum hunc, proficiscar per vos in Hispaniam. Scio autem quoniam veniens ad vos, in abundantia benedictionis Christi veniam.»

Quandoquidem hic amplius non habeo locum et vos desidero, igitur non indilate proficiscar Jerusalem, ut inde veniam ad vos. Proficiscar ministrare sanctis, qui rerum suarum venditarum pretia posuerunt ad pedes apostolorum (Act. iv). Et habeo quod illis ministrem, quia probaverunt, id est probum justificaverunt, Macedonia et Achaia, id est Macedones et Achaici, collationem aliquam facere. Non ergo coegi, sed ipsi probaverunt facere aliquam collationem pecuniæ in pauperes sanctorum, id est in illos sanctorum qui sunt pauperes in Jerusalem. Non enim omnes sunt pauperes, sed illi qui omnia vendiderunt, et ad pedes apostolorum, ut diximus, pretium posuerunt. Hic subtiliter et verecunde, dum laudat Græcos, hortatur Romanos, facilius enim devotæ mentes, ad bene agendum exemplis quam sermonibus invitantur. Et qui per misericordiam Dei vivunt, misericordes debent esse confratribus. Probaverunt, inquam, facere rerum suarum collationem, quam sanctis egentibus mittant, quia placuit eis hoc facere, et merito placuit, quia debitores sunt eorum. Similiter et Romani sunt debitores eorum. Adeo vult Apostolus esse misericordes, ut et hoc debere dicat ab eo, qui misericordiam expectat. Debitores sunt. Nam si gentiles facti sunt participes spiritualium eorum, id est spiritualium bonorum quæ habent Hebræi, qui prædicatores eis miserunt, debent ipsi gentiles ministrare eis in carnalibus bonis. Isti se totos dederant divinis obsequiis, nihil mundanum curantes, et exemplum bonæ conversationis dabant credentibus. Ideoque gentiles qui non poterant omnia quæ mundi sunt relinquere, constituit illis Apostolus tanquam stipendiarios, provinciales, ut ex rebus suis victum eis ministrarent. Et quia illis hoc placuit, igitur cum ego consummavero hoc ministerium, et assignavero, id est sub signo uniuscujuscunque ecclesiæ vel regionis tradidero eis fructum hunc ex bona arbore natum, proficiscar per vos in Hispaniam, et ideo interim vos corrigite, per vos transibo, nec inutiliter, sed scio, id est certus sum quoniam veniens ad vos, veniam in abundantia benedictionis Christi, id est multum vobis prodero. Hoc non nisi per spiritum prophetiæ pollicetur. Supra hominem namque est scire de futuris, quod non

solum in benedictione Christi, sed et in abundantia A benedictionis venturus sit ad eos, ubi et venientis gratia, et suscipientium merita pariter designantur.

« Obsecro igitur vos, fratres, per Dominum nostrum Jesum Christum et per charitatem Spiritus sancti, ut adjuvetis me in orationibus vestris ad Deum, ut liberer ab infidelibus, qui sunt in Judæa, et obsequii mei oblatio accepta fiat in Jerusalem sanctis, ut veniam ad vos in gaudio per voluntatem Dei, et refrigerer vobiscum. »

Quandoquidem iturus sum Jerusalem, ac deinde ad vos migraturus, igitur obsecro vos, fratres, ut si me vultis videre, impetretis orando ut possim liberatus ad vos venire. Obsecro vos per Dominum nostrum Jesum Christum et per charitatem Spiritus sancti, id est quam Spiritus sanctus dat, ut si Dominum Jesum diligitis, et si in vobis est charitas quam Spiritus sanctus facit, adjuvetis me in orationibus vestris ad Deum, ut quod ego solus obtinere nequeo, vestris adjutus orationibus obtineam. Multi enim in unum dum congregantur unanimes, fiunt magni, et multorum preces impossibile est ut non impetrent. Adjuvetis me ut liberer ab infidelibus qui sunt in Judæa, ne me diutius teneant, et salutem vestram aliorumque retardent, nec victum quem sanctis defero, tollant. Orate ut liberer ab his incredulis, ut oblatio obsequii mei, id est mihi injuncti, fiat accepta, id est sufficiens, non diminuta, sanctis in Jerusalem. Vel accepta, grata et placens eis, ut intelligentes charitatem meam erga se, mecum unanimes gratias agant. Magnus enim mihi profectus erit, si meo ministerio lætificati, Deum laudaverint. Orate ut hæc ita compleam, sicque venire possim ad vos in gaudio futuri profectus vestri per voluntatem Dei, et refrigerer vobiscum, id est requiescam in pace et concordia vestra. Non enim refrigerium habeo in vobis, si dissidentes fueritis. Licet per prophetiam dixisset superius, quia veniens ad vos, in abundantia benedictionis Christi veniam, nihilominus tamen sciebat etiam in his quæ manifeste futura cognoverat, orationem esse necessariam. Quæ utique nisi fuisset adhibita, sequeretur sine dubio non impleri quæ fuerant prophetata. Quis ergo est qui hæc legens vel audiens quod Paulus deprecetur eos qui Romæ sunt orare pro se, contemnat orationes Ecclesie postulare, etiam si inferiores meritis esse videantur hi, a quibus oratio postulatur? Ecce enim Paulus apostolicis præditus meritis, discipulos humiliter hortatur ut orent pro se. Notandum etiam quia sunt nonnulli qui dicunt: Quare laboremus bonis operibus ad vitam pervenire? Nam si prædestinati sumus, sine dubio ad eam perveniemus. Quorum errorem destituit, dum Romanos hortatur ut orent impleri ea, quæ ipse per spiritum prophetiæ futura prædixerat. Deus enim multa sic prædestinavit futura, ut sancti ea cum labore obtineant; et ideo qui laborare neglexerit, non apprehendet illa. Videamus quam validis, quamque religiosis sa-

cramentis semper astringat. Obsecro, inquit, per Dominum nostrum Jesum Christum, et per charitatem Spiritus sancti, ut adjuvetis me in orationibus vestris ad Deum, ut liberer ab infidelibus qui sunt in Judæa. Non tamen pati meruit ab incredulis ea pro Christo, quæ ad apostolatus ejus gloriam pertinent, sed impediri veretur, ne diutius obstaculis retentus vel minus gratum exhibeat sanctis ministerium, vel desiderium ejus quod erga Romanos habet visendos, diutius differatur. Si enim hæc ita gesserit, tunc pro bene gestis gaudens rebus, cito veniet ad eos per voluntatem Dei, et refrigerabitur cum eis, id est requiescet in charitate et bonis operibus eorum. Ibi enim refrigerium habet Apostolus, ubi requiescit Spiritus sanctus.

B « Deus autem pacis sit cum omnibus vobis. Amen. »

Ego, inquit, cito venire cupio. Sed sive cito, sive tarde venero, Deus pacis sit cum omnibus vobis, Amen, qui vos omnes in pace custodiat, id est Christus qui se usque in finem sæculi cum suis futurum promisit. Pulchre autem in pace finivit, duobus populis in concordiam revocatis, ostendens quia non nisi in pacificis Deus pacis inhabitat. Ex hoc autem loco incipit multos proponere, quibus Romani debeant credere. Nam subdit:

CAPUT XVI.

« Commendo autem vobis sororem nostram Phœben, quæ est in ministerio Ecclesie quæ est Cenchreis, ut eam suscipiatis digne in Domino sanctis, et assistatis ei in quocunque negotio vestri indiguerit. Etenim ipsa quoque astitit multis et mihi ipsi. »

C Cenchræ dicitur locus Corintho vicinus, id est portus Corinthi. Phœbe autem et nobilissima et ditissima mulier erat, quæ ecclesiam in loco Cenchreis sua substantia sustentabat. Et tunc temporis pro aliquo negotio Romam profecta est, et ideo eam Romanis commendat Apostolus, ut suscipiant eam digne sanctis, ut dignum est sanctos suscipi, et per eam fortasse misit hanc epistolam. Docet etiam feminas locus iste apostolica auctoritate in ministerio ecclesie constitui, in quo positam Phœben Apostolus nunc magna laude commendat, enumerans etiam gesta ejus præclara, et dicens quia intantum omnibus astitit, et in necessitatibus præsto fuit, ut etiam mihi ipsi in necessitatibus meis apostolicis devotione mentis astiterit. Ostendit etiam quia hi qui bono operi in ecclesiis dant operam, vicem recipere debent a fratribus et honorem, ut in quibuscunque necesse fuerit, sive spiritualibus, sive etiam carnalibus officiis, adjuventur; et honorifice habeantur.

« Salutate Priscam et Aquilam adjutores meos in Christo, qui pro anima mea suas cervices supposuerunt, quibus non solus gratias ago, sed et cunctæ ecclesie gentium, et domesticam eorum ecclesiam. »

Prisca, quæ in Actibus apostolorum Priscilla no-

minatur, uxor erat Aquilæ. De nis enim dicit Lucas : « Egressus ab Athenis Paulus venit Corinthum (Act. xviii). » Et invenit quemdam Judæum nomine Aquilam, Ponticum genere, qui nuper venerat ab Italia, et Priscellam uxorem ejus, eo quod præcepisset Claudius discedere omnes Judæos a Roma, accessit ad eos. Et quia ejusdem erat artis, manebat apud eos, et operabatur. Erant autem scenofactoriæ artis, id est artifices tabernaculorum, videlicet sutores. Creditur autem quod quia illo tempore pulsus ex urbe Judæis per præceptum Cæsaris Corinthum venerant, rursus mitigata principis sævitia, Romam regressi essent quando Paulus hanc misit epistolam. Hi ergo *adjutores ejus in Christo*, id est in Christi prædicatione, quia recte crederant, et apostolici laboris se socios fecerant, ut et ipsi hortarentur cæteros ad fidem rectam, denique Apollo quamvis exercitatus esset in Scripturis, ab his tamen in via Domini diligentius est instructus. Quos et apparet Judæorum insidiis, Paulo periclitante, semetipsum subjecisse, ut ille liber abscederet. Et hanc eorum laudem ipse non silet, sed omnibus eam ecclesiis admirandam tradit. *Supposuerunt*, inquit, *pro anima mea cervices suas quibus non solus ego gratias ago, sed et cunctæ ecclesiæ gentium*. Merito enim gentium ecclesiæ his gratias agebant, qui seipsum morti obtulerant, ut doctor gentium liber evaderet, et ad opus prædicationis excurreret. Unde Romani eis obedire debent, quia pro exhortatione ad confirmationem eorum Romam reversi sunt. Hos, inquit, *salutate, et domesticam eorum ecclesiam*, id est familiam ipsorum, quia sanctitatem eorum imitatur.

« Salutate Epænetum dilectum mihi, qui est primitivus Ecclesiæ Asiæ in Christo Jesu. »

Iste primus omnium ex Asia credidisse intelligitur, et ad Romanorum confirmationem venisse Romam. Sic et alii quos salutat Apostolus, intelliguntur illuc venisse pro fratrum ædificatione.

« Salutate Mariam, quæ multum laboravit in vobis. »

Et hæc pro utilitate Ecclesiæ non exiguum, sed multum et magnum laborem instituit.

« Salutate Andronicum et Juniam cognatos et conceptivos meos, qui sunt nobiles in apostolis, qui et ante me fuerunt in Christo Jesu. »

Hi secundum carnem cognati fuerunt Pauli, et cum eo causa fidei captivitatem pertulerunt. De quibus et hoc fortasse potest intelligi, quod ex septuaginta duobus discipulis Domini fuerint, qui et apostoli jure nominantur. Ideo *nobiles* dicuntur *in apostolis*, id est in illis septuaginta duobus, *qui et ante Paulum fuerunt in Christo*, id est in Christi fide. Vel ipsi duo fuerunt ante eum in Christo, quia secuti sunt priores apostolos, et ideo nobiles in apostolis dicuntur, id est inter prædicatores, qui discipuli erant apostolorum.

« Salutate Ampliatum dilectissimum mihi in Domino. »

Quamvis nihil egregium præ cæteris huic videatur ascribi, tamen hoc ipsum quod dilectissimum est Apostolo, manifestat eum laudabilem et salutatione dignum esse.

« Salutate Urbanum adjutorem nostrum in Christo Jesu, et Stachyn dilectum meum. »

Et istos salutatione dignos cæteris conjungit, sed Urbanum in laude præfert. illum enim *adjutorem* apostolorum *in Christo*, id est participem apostolici operis; Stachyn vero *dilectum suum*, id est amicum proprium, etsi non adjutorem, dicit.

« Salutate Apellen probum in Christo. »

Hic, etsi non specialis amicus erat Apostoli vel particeps apostolici operis, tamen per tentationes inventus est fidelis in Christo. Intelligitur enim per multas tribulationes patienter et fortiter sustentatas transisse, et ideo probus ab Apostolo pronuntiari, juxta quod superior ait, quia « tribulationem patientiam operatur, patientia autem probationem (Rom. v, Jac. 1). »

« Salutate eos qui sunt ex Aristobuli domo. »

Aristobulus fuisse congregator fratrum in Christo intelligitur. Cujus factum sic probat Apostolus, ut eos quos ille congregabat, dignos salutatione sua designaret.

« Salutate Herodionem cognatum meum. »

Hic tantum cognatus Apostoli dicitur; nullum ejus evidenter meritum ostenditur, nisi quod religiosus in Christo fuisse declaratur, cum ab Apostolo salutatur.

« Salutate eos qui sunt ex Narcissi domo, qui sunt in Christo. »

Narcissus dicitur fuisse presbyter, qui peregrinando confirmabat fratres exhortationibus. Et quia præsens tunc non erat, suos Apostolus salutat. Quia vero non omnium illorum merita noverat, discernit qui sunt in Domino, id est eos, qui digni sunt salutatione mea propter meritum quod habent in Domino.

« Salutate Tryphænam et Tryphosam, quæ laborant in Domino. »

Labor istarum non pro hoc mundo fiebat, nec pro vita præsentis, sed pro spe quam habebant in Domino. Intelliguntur autem in ministerio sanctorum laborasse.

« Salutate Persidem charissimam, quæ multum laboravit in Domino. »

Hæc longe præfertur istis duabus, quia et charissima dicitur, et non solum laborasse, sed et multum laborasse in Domino asseritur.

« Salutate Rufum electum in Domino, et matrem ejus et meam. »

Hunc credo, sciebat Apostolus esse de numero non multorum qui vocati sunt, sed paucorum qui electi sunt (Matth. xx). Vel electus, id est promotus erat ad ecclesiasticas res agendas, ut in aliquo gradu honoris præesset. Cujus et mater tantum meritum habuit, ut etiam Apostolus suam hanc nominaverit matrem, unumque cum eo partus sit

matris affectum, sicut Joannes cum Christo (*Joan.* 111). Eadem enim femina et Rufi mater erat secundum carnem, et Pauli secundum charitatem ac beneficentiam. Vel fortasse carnalis mater Apostoli erat tunc Romæ degens cum ista.

« Salutate Assyncritum, Philegontem, Hermam, Patrobam, Hermen, et qui cum eis sunt fratres. »

Isti quos nominat intelliguntur simul habitasse, et in Christiana amicitia unanimes fuisse, atque famosi in religione, et secum alios fratres habuisse, qui non tanti meriti erant vel tantæ famæ. Puto autem quod Hermas iste scriptor sit libelli illius, qui Pastoris appellatur.

« Salutate Philologum et Juliam, Nereum et sororem ejus, et Olympiadem, et omnes qui cum eis sunt sanctos. »

Et hi simul unanimes erant, et qui nominatim exprimuntur, majores fuisse designantur. Omnes autem quos hucusque salutavit, intelliguntur præclari fuisse fide et meritis, ut eos jure deberent honorare Romani, et credere verbis eorum.

« Salutate invicem in osculo sancto. »

Vos ipsos invicem salutate in osculo non ficto, non subdolo, non libidinoso sed sancto, religioso et casto. In osculo sancto, id est in pace Christi vos salutate, ut non simulata vel carnalia, sed religiosa sint oscula vestra. Ex hoc præcepto et aliis similibus, mos ecclesiæ traditus est, ut post orationem osculo se invicem suscipiant fratres.

« Salutant vos omnes Ecclesiæ Christi. »

Per hoc dictum intelligitur Ecclesias posse dici, quæ non sunt Christi. Unde Psalmista : « Odivi Ecclesiam malignantium (*Psal.* xv). » Omnium autem illorum locorum Ecclesias dicit Romanos salutare, ut crescant in fide et religione.

« Rogo autem vos, fratres, ut observetis eos qui dissensiones et offendicula præter doctrinam quam didicistis, faciunt, et declinate ab illis. » Hujusmodi enim Christo Domino non serviunt, sed suo ventri (*Philip.* 111), et per dulces sermones et benedictiones seducunt corda innocentium. »

Nunc monet Apostolus ut super omnia caveant a pseudoapostolis. Quasi dicat : Eos quos præmisi, salutate et imitamini, sed hos notate et vitate. Jussi ut illos salutetis, sed rogo ut istos caveatis. Rogo vos, o fratres, filii matris Ecclesiæ, ut observetis, id est discernatis et notetis eos qui faciunt dissensiones, id est mentium et sensuum discordias, et offendicula, id est fratrum invicem offensiones, ut alius offendat alium. Vel offendicula, id est culpæ præcipitia præparant, ut incautos ruere in opera nequitie faciant. Et hæc agunt præter doctrinam quam vos a bonis prædicatoribus didicistis, quoniam talia opera transgressiones sunt sanctæ doctrinæ quam accepistis. Idcirco observate eos et declinate ab illis. Et quare? quia hujusmodi homines in subdola prædicatione quam faciunt, non Christo, sed ventri suo serviunt; quoniam non amore audi-

entium prædicant, sed intentione accipiendi ab eis cibos, et per dulces sermones, quibus venenum nequitie suæ dulciter infundunt et per benedictiones fallaces seducunt corda innocentium. Hoc enim est proprium hæreticorum, et eorum qui decipiunt audientes, ut dulciter eis loquantur. Semper insidiosa, callida, blanda est adulatio: pulchreque adulator apud philosophos definitur blandus inimicus. Possunt dulces eorum sermones intelligi peccatorum allevationes, dum dicunt ea non esse gravia, et securitatem peccandi præbent stultis, promittentes eis impunitatem ex Dei misericordia, crebroque benedictiones illis dant, ut sancti eis appareant. Sicque seducunt, id est seorsum a via rectitudinis ducunt corda innocentium, id est simplicium cavere nescientium. Non enim Romanis tantum qui tunc in carne erant, sed inagis omnibus ubique fidelibus usque in finem sæculi jubet Apostolus ut diligentius considerent et perspiciant, qui sint qui dissensiones et offendicula in ecclesiis generant. Dicit namque dissensiones et offendicula commovere, præter Christi doctrinam esse quam didicimus. Et ideo alienus a nobis sit, nec omnino recipiatur inter nos, quisquis certamina commovet, quisquis servit jurgiis, quisquis lites excitat et studia contentionis exercet. Qui enim tales sunt, Christo Domino, qui est pax nostra, non serviunt, sed ventri suo potius obsequuntur. Cur enim jurgia et lites in ecclesiis suscitentur. Spiritus sanctus per Apostolum nunc indicat. Ventris, inquit, gratia, id est quæstus et cupiditatis. Unde et nonnulli circumeunt domos, loquentes ad gratiam cum omni deceptione adulationis, non ut verbo Dei ædificent animas ad virtutes, sed ut per adulationes dulcesque sermones periniant, ut etiam proficere hortentur in vitiis, laudantes et benedicentes ea quæ correctione sunt digna.

« Vestra enim obedientia in omnem locum divulgata est. Gaudeo igitur in vobis, sed volo vos sapientes esse in bono, et simplices in malo » (*Matth.* x).

Ideo, inquit, vos moueo ut vitetis deceptores, quia non solum fides, sed et obedientia vestra ubique audita est, quoniam estis in capite mundi; et sic exemplo vestro jam alii corrumpi possent, si essetis seducti. Vel rogo ut eos vitetis, quia leviter obeditis, sicut ubique jam divulgatum est. Subtiliter indiscretam et facilem eorum obedientiam, non in omni re laudat, sed divulgatam dicit. Et ne eos rursum inobedientes efficeret, si hoc apertius corrigeret, addidit. Gaudeo igitur in vobis, quasi dicat: Facile obeditis, et hoc bonum est, atque hinc gaudeo quia sic obeditis. Sed tamen volo vos sapientes esse in bono et simplices in malo, id est volo ut sitis sapientes in bono discernendo et sine aliqua parte mali, ut sapienter discernatis quibus bonum obedientiæ præbere debeatis, ne si incaute perveris obediens fueritis, bono vestro se misceat malum duplicitatis. Non enim simplex sed duplex erit quod

egeritis, si et propter obedientiam bonum fuerit, et propter indiscretionem malum. Simples sitis in malo, id est sine aliqua plicatione, hoc est sine aliqua admistione vel associatione sitis, ne bono vestro se malum aliquod adjungat. Sapientes etiam in bono estote, ut bonum sapienter et caute faciatis. Simplicitati enim adjungere prudentiam debetis, quatenus sic securitatem de simplicitate possideatis, ut circumspeditionem prudentiæ non omittatis. Simplicitas enim et ignorantiam quamdam significat, ut sitis in malo simplices, id est nescii, videlicet malum nescientes per actionem.

« Deus autem pacis conterat Satanam sub pedibus vestris velociter. »

Volo ut sitis sapientes ad cavendum malum. Sed *Deus pacis* largitor et amator *conterat velociter Satanam*, id est omnem qui vobis adversatur iu via Dei. Satanus enim *adversarius* interpretatur. Quo nomine hostis antiquus designatur, vel quilibet perversus, qui sanctis ad Deum tendentibus contraria molitur. Sed Deus pacis eum cito conterat *sub pedibus* eorum, ut suggestio antiqui adversarii, mox ut mentem ipsorum pulsaverit, conculcet et conterat, atque in nihilum redigatur, et omnis pseudopredicator vel quilibet pacis dissipator, cito conteratur aut de mundo tollatur. Satanam sub pedibus ecclesiæ Deus pacis contrivit, quia membra ejus, in quibus ecclesiam persequabatur, ad fidem convertens, ipsi Ecclesiæ subjugavit.

« Gratia Domini nostri Jesu Christi vobiscum. Amen. »

Ut Satanus conteratur, gratia Christi sit vobiscum custodiens vos et adjuvans.

« Salutat vos Timotheus adjutor meus, et Lucius et Jason et Sosipater, cognati mei. Saluto vos ego. Tertius, qui scripsi hanc epistolam in Domino. »

Timotheus consors laborum Apostoli fuit, qui nullo tempore cum eo ad prædicandum perrexit, et tandem episcopus ab eo factus, magna sollicitudine gubernabat ecclesiam. Sed de Lucio scriptum est, quia erant in ecclesia quæ erat Antiochiæ, prophetæ et doctores, in quibus Barnabas et Simeon qui vocabatur Niger, et Lucius Cyrenensis; Jason vero ille est Thessalonicensis, qui in Actibus apostolorum legitur (Act. XIII, XX, XXIV), et Sosipater Berrhœensis. Hi, inquit, vos salutant. Ac si diceret: His estis curæ. Et ego qui scripsi epistolam, saluto vos in Domino. Tertius nomine, non numero, ut Timotheus qui specialis adjutor designatur, primus intelligatur; deinde Lucius et Jason et Sosipater, quasi unus accipiatur, secundus, sicque scriptor epistolæ tertius. Vel post Jasonem et Sosipatrem tertius, qui videlicet scriptor vel ipse Apostolus est intelligendus; vel ut aliis visum est, notarius Apostoli. Nam melius est ut Tertius intelligatur nomen proprium, quia Tertius interpretatur *adjungens*, id est applicans se.

« Salutat vos Gaius hospes meus, et universa

« Ecclesia. Salutat vos Erastus arcarius civitatis, et Quartus frater. »

Ex his verbis apparet epistolam de Corintho scriptam. De hoc enim Gaius dicit Corinthiis: « Gratias ago Deo meo, quia neminem vestrum baptizavi, nisi Crispum et Gaium (I Cor. I). » Et de Erasto scribit ad Timotheum: « Erastus remansit Corinthi (II Tim. IV). Videtur autem indicari de Gaius, quoniam hospitalis fuerit, ut non solum Paulum ac singulos quosque adventantes Corinthium hospitio receperit, sed et Ecclesiæ universæ in domo sua conventiculum præbuerit. Hoc enim patenter innuere videtur Apostolus, qui, cum dixisset: *Salutat vos Gaius hospes meus*, mox addidit: *et universa Ecclesia*: illa videlicet Corinthiorum Ecclesia, quæ apud Gaium conveniebat. Nam et Joannes cuidam Gaius scribit (III Joan. I), qui forsitan iste est, laudans eum quia fratribus ministrabat. Erastus autem ab arca dicitur arcarius, quia dispensator civitatis erat quasi curator, quia dictante justitia civitatem gubernabat, maxime in moderandis pretiis. Ad laudem Ecclesiæ Corinthiorum scribitur de isto Romanis, quod is qui princeps erat civitatis, non erubesceret in Christum credere crucifixum, et credentibus in eum salutationem dirigere. Hos omnes Apostolus enumerat nominatim in salutatione Romanorum, ut scirent quales et quanti viri congauderent bono incepto eorum.

« Gratia Domini nostri Jesu Christi cum omnibus vobis. Amen. »

Tot et tanti salutationem vobis mandant, sed gratia Christi vobiscum maneat. Hoc paulo ante dixerat, sed præ nimietate æstuantis amoris repetit quod valde exoptat.

« Ei autem qui potens est vos confirmare juxta Evangelium meum et prædicationem Jesu Christi, secundum revelationem mysterii temporibus æternis taciti, quod nunc patefactum est per Scripturas prophetarum, secundum præceptum æterni Dei ad obeditionem fidei in cunctis gentibus cogniti, soli sapienti Deo per Jesum Christum, cui honor est et gloria in sæcula sæculorum. Amen. »

Ego vos in hac epistola sic instruxi et monui, sed ei qui potens est vos confirmare, soli sapienti Deo sit honor et gloria in sæcula sæculorum. Deo a quo sunt omnia, dat gloriam, ut ceptum Romanorum (quia potens est) dignetur complere, confirmando in fide et charitate animas eorum, in quo epistolæ summa notatur. Et sit gloria *qui potens est vos confirmare juxta Evangelium meum et prædicationem Jesu Christi*, id est qui potest vos ad tantum perfectionem ducere, quantam ego evangelizo; et quantam Christus prædicavit et prædicando instituit. Quod Evangelium et quæ prædicatio sit *secundum revelationem mysterii*, id est secundum quod revelatum est de occulto Dei consilio ipsum mysterium incarnationis Christi, mysterii dico, *taciti æternis temporibus*, id est spatiis quæ fuerunt ante

mundi constitutionem, quia soli Deo notum erat quod unigenitus patris humanitatem pro hominum salute esset assumpturus. Sed et factum jam mundo, tacitum est, hoc mysterium Christi iucarnationis, et humanæ reparationis, quia licet aliquatenus esset antiquis patribus notum, nulli tamen eorum plenarie fuit cognitum. *Quod nunc patefactum est per Scripturas prophetarum*, id est adventu, Christi revelatum est, Scripturis prophetarum ab eo reseratis, quæ testimonium dant huic prædicationi. *Patefactum est secundum præceptum æterni Dei*, id est secundum quod præcepit Deus, qui hoc ab æterno ordinaverat. *Et est patefactum ad obedientiam fidei in cunctis gentibus*, id est ad hoc manifestum est nunc in universis nationibus, ut omnes obediant fidei bene operando. *Mysterii dico olim taciti aliis, sed cogniti soli sapienti Deo*, quia, etsi sit hominibus modo revelatum, tamen soli Deo cognitum est, qui solus novit cur ita factum est. In quo reprimit Apostolus inquisitores, qui quærunt cur distulit Deus tantum, cur tot gentes perire permisit. Solus autem sapiens Deus, Pater et Filius et Spiritus sanctus, quoniam Trinitas unus Deus est. Qui propterea solus sapiens dicitur recte, quoniam solus secundum sapientiam suam et substantialiam sapiens est, non secundum accidentem vel accedentem participationem sapientiæ, sicut sapiens est rationalis quæcunque creatura. Trinitas, inquam, est solus sapiens Deus, qui omnino nec potuit unquam esse insipiens, nec poterit, non per gratiam particeps sapientiæ, sed sapiens immobilitate naturæ. Soli igitur sapienti Deo gloria sit *per Christum Jesum*, hoc est clara cum laude notitia, quia innotuit gentibus Deus Trinitas. Ideo per Jesum Christum, quia

ut alia taceam, ipse præcepit baptizari omnes gentes in nomine Patris et Filii et Spiritus sancti (*Matth. xxviii; Marc. xvi*), ubi præcipue commendata est hujus individuae gloria Trinitatis. Quod vero additum est: Cui, ut diceretur, cui gloria, cum sufficeret, si dictum esset, ei autem gloria, inusitatam nostræ linguæ locutionem indicat, non sensum quem requiramus, vel de quo ambigamus, insinuat. Quid sensui deperit, si dicamus, et gloria cui per Jesum Christum gloria? hoc namque est ei, per Jesum Christum cui gloria, quod est, cui per Jesum Christum gloria. Sed alter horum inusitatus, alter usitatus ordo verborum. Vel dictum est, ei gloria cui per Jesum Christum gloria, sive ei gloria per Jesum Christum, cui gloria, ut intelligeremus eum qui in seipso semper gloriosus est, per incarnationem et resurrectionem Christi apud homines glorificari. Vel ei qui potens est vos confirmare, id est Trinitati, sit gloria per Jesum Christum, cui Jesu Christo et secundum humanitatem *est honor et gloria*, sicut in Psalmo canitur: « Gloria et honore coronasti eum (*Psal. viii.*) » Quod subjunxit, *in sæcula sæculorum*, moris est Scripturæ divinæ, immensitatem per hoc temporum designare. Vel in sæcula sæculorum, in æterna sæcula, quæ digniora erunt labentibus sæculis, sicut Sancta sanctorum et Cantica canticorum præstantiora sunt cæteris sanctis et canticis; vel sicut Rex regum et Dominus dominorum cæteris regibus et dominis est præstantior. *Amen* autem quod interpretatur *vere* vel *fideliter*, quasi ad confirmationem omnium quæ superius scripta sunt, in fine posuit, per quod vernaculo Hebræorum sermone vera et fidelia esse, quæ sunt scripta, signaret.

IN EPISTOLAM I AD CORINTHIOS.

ARGUMENTUM.

Corinthus est civitas metropolis, caput Achaicæ, decus Græciæ. Ad quem Paulus veniens, multos civium convertit ad fidem. Ubi et Dominus ei nocte per visionem dixit: Noli timere, sed loquere, et ne taceas. Propter quod ego sum tecum, et nemo apponetur tibi ut noceat te, quoniam populus est mihi multus in hac civitate. Sedit ergo annum et sex menses docens apud eos verbum Domini. Post cuius abscessum, subversi sunt quidam eorum a pseudoapostolis, quidam etiam a mundanæ eloquentiæ sectatoribus, nonnulli vero judaicis traditionibus depravati. Quidam etiam eorum attendentes dignitatem personarum in baptismo, putabant quod plus gratiæ et remissionis peccatorum acciperent, si a dignioribus et sanctioribus viris baptizati fuissent. Et per hoc se aliis præferre volebant, qui tam dignos baptizatores non habuerant. Multa-

que alta in eis erant schismata et vitia. A quibus omnibus intendit Apostolus eos corrigere et modum illos Christianæ conversationis docere, scribens ab Epheso. Hæc epistola post illam ad Romanos jure locata est, licet ante illam scripta sit, quia quisquis in fide jam instructus est, de qua cum Romanis agitur, debet consequenter a subrepentibus vitiis corrigi, et in virtutibus plenius informari, sicut nunc corriguntur et instruuntur Corinthii. Ob hoc etiam posita est hæc post illam, quoniam in materia quamdam habet affinitatem cum illa. Ut enim illi de meritis suorum antecessorum gloriabantur, et suam salvationem non gratiæ deputabant, sed quidam legis observationibus, quidam vero facultati ingenii et libertati arbitrii; sic et isti de sanctitate suorum baptizatorum glorientes, et quidquid boni habebant illi ascribentes, alii aliis præferri volebant. Sed veniamus ad litteram.

CAPUT PRIMUM.

« Paulus vocatus apostolus Christi Jesu per voluntatem Dei, et Sosthenes frater, Ecclesiae Dei quae est Corinthi, sanctificatis in Christo Jesu, vocatis sanctis, cum omnibus qui invocant nomen Domini nostri Jesu Christi, in omni loco ipsorum et nostro, gratia vobis et pax a Deo Patre nostro et Domino Jesu Christo. »

Paulus interpretatur *mirabilis*. Et vere mirabilis doctor, cui nullus comparari potest in scientia; mirabilis operarius, qui plus omnibus laboravit. Hoc ergo nomine jam reddit attonitos auditores suos, et tanti nominis auctoritate comprimit, ne verbis sequentibus audeant contradicere, vel inobedientes resistere. Qui et vocatum se dicit, ut majoris appareat auctoritatis, quia non sicut ceteri ab hominibus est ad fidem vocatus, sed a Christo ipso de caelo (*Act. ix*). Qui etiam *apostolus*, id est missus *Jesu Christi*, a quo audivit: « Vade ego longe ad gentes mittam te (*Act. xxii*). » Apostolus Jesu Christi est *per voluntatem Dei*, id est a Christo missus ad gentes per voluntatem Patris. Per quod tangit etiam illos, quos neque Christus miserat, neque per voluntatem Dei praedicabant. Paulus talis et tantus scribit Corinthiis, et *Sosthenes frater*. Etiam istum adjungit ad confirmationem omnium quae scribit, quia magnae erat apud eos auctoritatis, utpote qui princeps ibi synagogae fuerat, et ad fidem conversus, multas a Judaeis persecutiones ante tribunal Gallionis proconsulis viriliter sustinuerat (*Act. xviii*). Paulus et Sosthenes scribunt *Ecclesiae non baptizantium*, sed *Dei quae est Corinthi*. Ideo scribit Ecclesiae, quia adhuc singulis Ecclesiis rectores non erant constituti. Paulus Ecclesiae Dei, videlicet *sanctificatis*, id est baptismo regeneratis *in Christo Jesu*, id est infiguratione mortis et resurrectionis Christi Jesu. Sanctificatis in Christo, non in Petro vel Paulo, vel alio quolibet baptizatore, quia Christus sanctificationem istam aequaliter operatur per omnes suos ministros, et ideo nulli gloriandum est in meritis sui baptizatoris. Ecclesiae se dixit scribere, et addidit sanctificatis in Christo, ut ostenderet omnem Ecclesiam sanctificatam fuisse in Christo, sed quosdam illorum post male coepisse conversari. Scribit etiam *vocatis* praedicatione evangelica, et *sanctis* bona conversatione sua. Vel vocatis sanctis, id est vocatis ad hoc ut sint sancti; hoc est, ut non recedant a regula sanctitatis, declinantes in aliquem errorem vel in malum, actionem; vel etiam vocatis ab aeterno divinitus, id est praedestinati ante mundi constitutionem, et sanctis in tempore conversationis suae. His scribit Paulus *cum omnibus qui invocant nomen Domini nostri Jesu Christi, in omni loco ipsorum et nostro*, id est conversis ad fidem Judaeis jungit et gentes, quia salus ex Judaeis est (*Joan. iv*), et in omni loco, et ubi gentes quae invocant nomen Domini, et ubi tales Judaei sunt similiter sint omnes unum. Vel ita potius Corinthiis scribit, cum omnibus qui invocant nomen Domini nostri Jesu Christi,

A in omni loco ipsorum Corinthiorum, id est subiecto eis, hoc est cum omnibus suffraganeis Corinthi, cum omnibus qui subiecti Corintho ut metropolitanae civitati. Cum omnibus qui Deum invocant in omni loco ipsorum Corinthiorum, id est famulante illis, et nostro, id est ad nos similiter pertinente, sicut ad eos. De nostro namque apostolatu sunt illi qui sunt in locis Corintho subiectis, et ideo scribimus eis sicut Corinthiis. Deum autem invocat, qui suis precibus nihil aliud ab eo quam ipsum Deum quaerit. Quid enim invocat Deum ut dives fiat, Deum non invocat, sed illud quod vult ad se venire. Quid enim est invocare, nisi in se vocare? Nam cum dicis Deo, da mihi divitias, non vis ut Deus ipse in te veniat, sed vis ut divitiae veniant ad te. Quod vis ut ad te veniat, hoc invocas. Si autem Deum invocares, ipse ad te veniret, ipsum haberes divitias. Ergo illi qui propter saecularia commoda, qui propter terrenam felicitatem invocant Deum, non invocant Deum. Sed illi invocant Deum, illi invocant nomen Domini, qui nihil ab eo quaerunt nisi ipsum, qui hoc ab eo pie postulant, ut ipse dignetur in eos venire et in eis habitare, eosque templum suae gloriae facere. Meritoque tales ubicunque maneant, sociantur illis quibus scribit Apostolus. Quos simul omnes salutatur, dicens: *Gratia vobis sit*, qua vobis peccata remittantur et virtutes conserventur. Gratia lapsis ut resurgant, stantibus ut maneant. *Et pax sit vobis*, qua reconcilientur Deo, qui per peccata ejus facti sunt inimici; et qua stabiliter ei inhaerant, qui non recesserunt ab ejus amore. Quae scilicet gratia et pax sit vobis, non a baptizatoribus vestris, vel ab aliis hominibus, sed a *Deo Patre nostro*, qui nos in filios adoptare dignatus est, et a *Domino Jesu Christo*, id est salvatore, rege, Domino nostro, id est qui de potestate Satanae nos eripuit, et suo domo. Io nos mancipavit. Servi namque ejus sumus, licet Pater ejus nos in filios adoptaverit, quia ipse est Filius per naturam, nos per gratiam; ille Creator, nos creatura; ille sine peccato, nos liberati a peccato.

« Gratias ago Deo meo semper pro vobis in gratia Dei, quae data est vobis in Christo Jesu, quia in omnibus divites facti estis in illo, in omni verbo et in omni scientia, sicut testimonium Christi confirmatum est in vobis, ita ut nihil vobis desit in ulla gratia, expectantibus revelationem Domini nostri Jesu Christi, qui et confirmabit vos usque in finem sine crimine, in die adventus Domini nostri Jesu Christi. Fidelis Deus (*I Thea. v*), per quem vocati estis in societatem filii ejus Jesu Christi Domini nostri. »

Haec epistola cum ad unius scribatur populum civitatis, pro varietate habitantium, id est sanctorum et peccatorum, nunc laudat eos, nunc corripit, nunc docet, nunc reprehendit, ut unusquisque in ea intelligat, quid pro se, quid adversum se dicatur, ut, cum laudat eos, sciant boni ad se verba dirigi; et cum reprehendit, sciant qui male egerunt, ad se haec dici. Ecce enim a perfectis inchoat, quos multa

laude prosequitur, ut postmodum ad infirmos veniat, quos reprehensurus est. Alloquitur primo perfectos, ostendendo eos commendatione dignos, ut qui hactenus boni permanserunt, meliores fieri studeant; et cæteri qui in aliquo errore deciderunt, erubescant et coeurentur ut his similes flant. *Gratias*, inquit, *ago Deo meo semper pro vobis*. Deo qui omnium est, sed tamen speciali privilegio sanctitatis, quam mihi contulit, meus est, ago pro vobis semper gratias, quia quidquid boni habetis, ab illo vobis datum esse scio, non ab hominibus. *Gratias ago in gratia Dei quæ data est vobis*, id est propter gratiam quam Deus contulit vobis in Christo Jesu, non in Petro vel Paulo. Gratia enim data est in Christo, quia hoc constitutum est a Deo, ut qui credit in Christo, salvus sit sine opere, sola fide, et gratis accipiat remissionem peccatorum. Nec hoc solum isti perciperent, sed et charismata spiritualia fuerant illis multa divinitus concessa. Vere magna gratia vobis data est in Christo, *quia divites in illo facti estis in omnibus* donis spiritualibus, ut abundetis omnibus divitiis spiritualibus. Et suppono partes aliquas divitiarum, scilicet *in omni verbo*, id est in omni genere linguarum, ut Græca et Latina et Hebraica lingua, cæterisque linguis omnibus loqui possitis. Vel in omni verbo, id est in omni modo prædicandi parvulis tenuiter, et mediocribus mediocriter, ac perfectis perfecte, *et in omni scientia*, id est Scripturarum intelligentia, quæ est secundum historiam et mysticum et moralem sensum. Ditati estis in omni verbo prædicandi et scientia intelligendi, *sicut testimonium Christi*, id est quod Christus de semetipso moriendo et resurgendo testatus est, *confirmatum est in vobis*, id est in vestra vita, in vestris moribus. *Ita estis donis omnibus ditati, ut nihil desit vobis in ulla gratia* Spiritus sancti, quia prophetiam habetis, genera linguarum, virtutem curationum et cætera charismatum dona. Nihil deerat vobis, quod nec esse sit habere, quia si non habetis omnia quæ habent apostoli, omnia tamen habetis quæ necesse est ut habeatis. Ita repleti estis, ut nihil vobis desit, vobis dico *expectantibus*, id est cum desiderio præstolantibus et digne paratis excipere revelationem Domini nostri Jesu Christi, quando revelabitur in flamma ignis ad iudicium veniens, et apparebit omnibus. Hanc revelationem impii timent et venire nolunt; pii vero, qui propter meritum bonæ conversationis suæ sperant se cum Christo regnuros, totis desideriis cupiunt ut reveletur, quia sperant in ejus revelatione ad visionem gloriæ ejus pertingere. Et ideo infatigabiles in bonis operibus perdurantes expectant eam; et cauta circumspectione invigilant ne, cum venerit, reprehensibiles in aliquo inveniantur. Sic expectatis revelationem Domini, in qua ipse bonis et malis se in iudicio manifestabit. *Qui et per auxilium gratiæ suæ faciet ut ab hac expectatione non deliciatis, quia confirmabit vos* in virtutibus et bonis operibus *usque in finem*, id est usque ad obitum uniuscujusque

vestrum. Confirmabit, inquam, vos in bonis, *sine crimine*, id est sine ullo criminali peccato vel animi vel carnis. Nonnulli enim expectant revelationem Domini, quasi de justitia securi, et tamen in criminibus manent, id est in invidia, detractatione, odio, dissensione, et his similibus. Sed vos ab his et talibus immunes Dei gratia conservabimini *in die adventus Domini nostri Jesu Christi*, id est ut in illo die sine ullius criminis reatu inveniamini. Qualis enim quisque moritur, talis in illo die invenitur. Et etiam mortis dies est unicuique dies adventus Domini, sicut ipse declarat, dicens: « Vigilate, quia nescitis qua hora Dominus vester venturus sit (Matth. xxiv). » Alacri animo confusus de spe istorum Apostolus, securus est, quia inviolati usque in diem novissimum erunt. Qui enim inter tot discrimina sensuum et perturbationes diversitatum mutari non potuerunt, procul dubio se in sua bonitate permansuros ostendunt. Quos dum laudat Apostolus, cæteros qui errore pseudoapostolorum depravati fuerant, invitat. Dum enim istorum fidem et sanctitatem prædicat, illos ad pœnitentiam vocat. Dixi quia vos confirmabit usque in finem. Et vere confirmabit, quia *fidelis*, id est verax est in promissis suis *Deus*, quia fideliter reddet quidquid promisit. Promisit salutem æternam et beatam vitam cum angelis sine fine, et hæreditatem immarcessibilem, gloriam sempiternam, dulcedinem vultus sui, domum sanctificationis suæ in cælis, resurrectionem a mortuis, ubi nullus deinceps moriendi metus erit (1 Petr. i). Talia promisit, et in horum redditione fideis erit, quia sine mendacio reddet ea illis quibus promisit. Fidelis Deus *per quem vocati estis*, quia qui aversos vocavit, jam facilius confirmabit. Vocati estis *in societatem* non modo apostolorum vel angelorum, sed etiam *filiis ejus Jesu Christi Domini nostri*, ut sitis participes hæreditatis et gloriæ quam possidet Filius ejus. Hoc enim dedit vobis esse, quod credidistis, ut quia credidistis Christum esse Filium Dei, vos quoque efficeremini filii Dei, mansuri in eadem dignitate in qua manet Christus. Societas enim fraternitatis est. Et vos fratres ejus et socii facti estis, quem Dei Filium firmiter credidistis.

Hucusque præfatio cum laude. Hinc jam dissensionis causam exsequitur, subdendo:

« Obsecro autem vos, fratres, per nomen Domini nostri Jesu Christi, ut id ipsum dicatis omnes, et non sint in vobis, schismata, sitis autem perfecti in eodem sensu et in eadem scientia. Significatum est enim mihi de vobis, fratres mei, ab his qui sunt Chloes, quia contentiones sunt inter vos. Hoc autem dico, quod unusquisque vestrum dicit: Ego quidem sum Pauli, ego autem Apollo, ego vero Cephæ, ego autem Christi. Divisus est Christus? »

Si qualiter quid dicatur, et quibus dicatur, non vigilanter aspicitur, valde periculosum est. Verocundæ etenim mentes, si quas fortassæ culpas admiserint, leniter arguendæ sunt, quia si asperius

increpentur, franguntur potius quam erudiuntur. Quod nunc bene demonstrat Apostolus, qui cum Corinthios cognosceret pro amore personarum in schismate divisos, eorum verecundiæ consulens, locutionem suam eis a gratiarum actione et laudibus incæpit. Et quos in omni verbo et in omni scientia laudaverat, quibus nihil deesse in ulla gratia dixerat, paulisper loquens, et ad increpandum leniter veniens, divisos erga seipsos reprehendit. Et quorum prius salutem narraverat, postmodum vulnera patefecit. Peritus enim medicus vulnus secandum videns, sed ægrum timidum esse conspiciens, diu palpavit, et subito percussit. Prius blandam manum laudis posuit, et postmodum ferrum increpationis fixit. Nisi enim verecundæ mentes fuerint palpando reprehensæ, ita ut ex aliis rebus audiant quod in consolationem sumant, per increpationem protinus ad desperationem cadunt. Non autem mentitus est Apostolus, ut prius eis nihil deesse in omni gratia diceret, quibus postmodum dicturus erat unitatem deesse. Sed quia erant inter eos quidam omni gratia repleti, et erant quidam in personarum favoribus scisci, cœpit, ut dictum est, a laudibus perfectorum, ut modesta invectione ad reprehensionem pertingeret infirmorum. Et in hoc quoque ad medicinam cordis, a medicina corporis usum traxit. Nam cum feriendum vulnus medicus aspicit, prius ea membra quæ circa vulnus sana sunt, palpat, ut post ad ea quæ vulnerata sunt, leniter palpando perveniat. Cum ergo Paulus perfectos in Corinthiis laudavit, sana membra juxta vulnus tetigit; cum vero infirmos de divisione reprehendit, vulnus in corpore percussit. Sed jam verba ejus tractemus. Videtur enim dicere: Pro perfectis qui in bono permanserunt gratias ago; sed vos fratres, qui seducti estis et meritis hominum gloriamini, obsecro per nomen Domini nostri Jesu Christi, qui vos solus redemit, et in cujus nomine baptizati estis, ut id ipsum dicatis omnes. Id ipsum, videlicet quod dicunt illi quos laudavi, dicatis omnes vos uno ore, et non sint in vobis, id est inter vos vel in cordibus vestris, schismata, id est divisiones. Hæc schismata intelliguntur aliquorum in fide divisiones, dum diversa sentirent, quia cum deberent omnes dicere se esse Christi, dicebat alius. Ego sum Pauli; alius, Ego sum Petri. Non sint in vobis schismata, sed sitis perfecti in eodem sensu, id est in eadem voluntate, in qua sunt illi quorum laudem præmissi; et in eadem scientia, id est in eadem Scripturarum intelligentia, in qua sunt illi. Vel id ipsum dicatis, id est unam fidem catholicam omnes pariter loquamini; et non sint in nobis schismata, id est mentium aut verborum discisiones, sed sitis perfecti in eodem sensu, quem vobis tradidi de Christo, ut omnes perfecte sentiat in eo solo gloriantur, non in hominibus; et in eadem scientia, quam vobis de Christo tradidi, ut perfecte sciatis vos ejus sanguine redemptos et in ejus nomine per baptismum sanctificatos. Potest sensus ad Christi

A divinitatem referri, scientia vero ad humanitatem, ut vos omnes eundem sensum atque intellectum de ejus divinitate, et eandem scientiam de humanitate firmiter teneatis, quatenus omnes simul idem de divinitate et humanitate illius credatis. Hæc ideo dico, quia significatum est mihi de vobis per litteras, o fratres mei, ab his qui sunt Chloes, id est in illo loco qui sic vocatur, quia contentiones sunt inter vos. Quamvis aversi fuissent, fratres tamen vocat eos Apostolus, ut per id non dissentirent ab eo cui conventus fratrum qui habitabant Chloes intimavit quia contentiones essent inter eos, per quas manifestabatur diversitas mentis eorum de disciplina Dominica. Fratres illi significaverunt mihi vestras contentiones. Nec solum illas scio, sed etiam verba quæ dicitis. Sed hoc dico quod unusquisque vestrum dicit, id est nullus ex vobis est qui non dicat unum horum quæ subjicio. Nam alius quidem dicit: Ego sum Pauli; alius autem, Ego sum Apollo, id est filius peritissimi doctoris; alius vero, Ego sum Cepha, id est Petri; alius autem qui solus sapit, dicit: Ego sum Christi. Sicque divisi estis in partes, ac si alii ex vobis essent Pauliani, alii Apollani, alii Petriani et alii Christiani. Et ita secundum vos divisus est Christus. Quasi dicatur: Multos facitis Christos, id est datores gratiarum. Vel qui operatur idem in omnibus, divisus est, dum creditur in isto plus gratiæ operari, in illo minus. Vel divisus est, id est abscissus et separatus est a vobis, qui caput vestrum erat, quia ab illo vos subtraxistis, quando meritis hominum causam vestræ salutis ascribere cœpistis. Errorem quidem ostendit Apostolus, sed auctorum nomina non prodidit. Neque enim in loco stabant, sed circuibant ad eversionem simplicium. Nam hi quos nominavit, sine dubio boni erant doctores, sed horum specie falsos apostolos tangit. Si enim in his gloriantur, quanto magis in malis doctoribus, quorum doctrinam pravam in subjectis significat? Inter eos tamen hos perseverantes designat, qui dicebant se Christi esse, non hominis, quos superius laudavit, et ad horum similitudinem alios invitavit. Divisus autem Christum dixit, quia gloriam ejus homines sibi partiti sunt, sicut hæretici, qui se aut Photinianos aut Arianos vel Manichæos vocari non horruerunt. Nam et Corinthii diversis hæreticorum nominibus subjici cœperant, ut viderentur loco Christi homines venerari. Qui diversa de Christo accipiunt, Christum dividunt. Unus enim hominem tantum accipit Christum, alter Deum purum sine corpore profitetur. Alius per prophetas prædictum Christum dicit, alius negat prophetas de Christo locutos. Cum ergo Christus unus sit Deus et homo, isti sibi dum alius aliud, et alius aliud de eo vindicat, dividunt Christum,

« Nunquid Paulus crucifixus est pro vobis, aut in nomine Pauli baptizati estis? Gratias ago Deo meo quod neminem vestrum baptizavi, nisi Crispum et Gaium, ne quis dicat quod in nomine meo baptizati estis. Baptizavi autem et Stephanum do-

« num. Cæterum nescio, si quem alium baptizave-
« rim. »

Non debetis dicere, ego sum Pauli, quia *nunquid Paulus crucifixus est pro vobis* ut vos sanguine suo redimeret, et auctor salutis esset, *aut in nomine Pauli baptizati estis*, ut invocatio nominis Pauli mundaret vos a peccatis in baptismo? Nequaquam Paulus, sed Christus pro vobis crucem justus pro injustis pertulit; et non in Pauli, sed in Christi nomine baptismum suscepistis. Modeste et humiliter sanctus Apostolus zelans Ecclesiam, sed sponso, non sibi, et horrens eos qui voluerunt dicere, ego sum Pauli, ego Apollo, ego Cephæ, suam personam potius assumpsit quam calcaret et contemneret, ut Christum glorificaret. Repulit a se, sed ut mittat ad Christum. Non vult a sponsa amari pro sponso. Id-
circo enim seipsum maluit contemnere ad commen-
dandum Christum, ne forte si alios nominatim contemneret, ideo putaretur eorum refutare personas, ut suam commendaret. Si, inquit, pro vobis Christus mortuus est, et in nomine ejus sanctificationem baptismi percepistis, quomodo ad ejus injuriam nunc gratiam et beneficium ipsius imputatis ulli hominum? Nam quia de baptizatoribus gloriamini, *gratias ago Deo meo ex hoc quod neminem vestrum baptizavi, nisi Crispum et Gaium*, qui non sunt de contentione vestra, non quod malum sit baptizare, sed ne quis dicat quod in nomine meo baptizati estis, de quo magis gloriaremini. Non solum non estis in nomine meo baptizati, sed nec in meo ministerio, et inde gratias ago Deo meo, qui me noluit hujus occasionem esse erroris. Non baptizavi nisi Crispum archisynagogum et Gaium, qui nobiles erant, et in primis crediderunt; nec gratiam baptismi deputabant ulli hominum, sed soli Christo, et intelliguntur ex illis esse, qui superius sunt laudati. Nec solum hos, sed baptizavi et domum *Stephanæ*, id est familiam illius nobilis matronæ, de quibus in postremis epistolæ hujus dicitur, quoniam sunt primitiæ Achaïæ, et in ministerium sanctorum ordinaverunt seipsos. De his, inquit, certus sum quod eos baptizavi, sed præter hoc nescio si quem alium ex vobis baptizaverim. Per quod ostendit se non esse salvatorem. Nam si aliquos salvaret a se justificatos non ignoraret. Baptizasse se quosdam dicit, non tamen eo modo, quo ille consuevit baptizare, de quo dictum est: « Illic est qui baptizat in Spiritu sancto (Joan. 1). » Baptizavit enim Paulus tanquam minister, non tanquam ipsa potestas. Baptizavit autem Christum tanquam potestas. Et potuit hanc potestatem servo dare, sed noluit. Si enim daret hanc potestatem servis, id est ut ipsorum esset quod Domini erat, tot essent baptismi quod servi, ut quomodo dictum est, baptismus Joannis, sic diceretur, baptismus Petri, baptismus Pauli, baptismus Jacobi, et cætorum. Ergo ne tot baptismi dicerentur, quot essent servi qui baptizabant accepta potestate a Domino, sibi tenuit baptizandi Dominus potestatem, servis ministerium dedit, ut in illo spes esset baptizato-

rum, a quo se baptizatos cognoscerent. Noluit ergo servum spem ponere in servo. Et ideo sibi soli retinuit hanc potestatem. Quam si vellet, potuit vel alicui vel unicuique servorum suorum dare, ut tanta vis esset in baptismo servi, quantam vim habet baptismus a Domino datus, sed noluit, ideoque non differt sive bonus sive malus, cui contingit ministerium ut baptizet, quia quisquis sit minister, Christus est Dominus qui baptizat; propter quod tantum valet baptismus per hominem contemptibilem, quantum per apostolum datus.

« Non enim misit me Christus baptizare, sed
« evangelizare, non in sapientia verbi, ut non eva-
« cuetur crux Christi. Verbum enim crucis per-
« euntibus quidem stultitia est, his autem qui solvi
« fiunt, id est nobis, virtus Dèi est. Scriptum est
« enim: Perdam sapientiam sapientium, et pruden-
« tiam prudentium reprobo (Isa. xxix; *ibid.* viii).
« Ubi sapiens, ubi scriba, ubi inquisitor hujus sæ-
« culi? (Isa. xxxiii.) Nonne stultam fecit Deus sa-
« pientiam hujus mundi? Nam quia in Dei sapientia
« non cognovit mundus per sapientiam Deum, pla-
« cuit Deo per stultitiam prædicationis salvos facere
« credentes. »

Ideo tam paucos baptizavi, quia non ad hoc missus sum. Non enim Christus, cujus ego minister sum, misit me baptizare, sed evangelizare, id est prædicare. Quoniam majus est evangelizare quam baptizare, quia non omnis qui baptizat, idoneus est evangelizare. Quia igitur et minores possunt baptizare, qui sapientiam et virtutem prædicandi non habent, ideo non baptizare missus sum, ne retardare a prædicatione, sed Evangelii semina spargerem. Quo dicto illi humiliantur, quibus Corinthii multum dabant eo quod ab illis baptizati fuerant, dum innotescit non magnum esse baptizare. Missus sum evangelizare, et hoc non in sapientia Verbi, quia prædicatione Christiana non indiget pompa et cultu sermonis. Ideoque piscatores, homines imperitii electi sunt, qui evangelizarent, ut doctrinæ veritas ipsa se commendaret teste virtute, ne hominum versutia et calliditate humanæ sapientiæ acceptabilis videretur, non veritate, sicut disciplinæ ab hominibus inventæ, in quibus non ratio, non virtus, sed
D verborum compositio quæritur. Ac per hoc gloriam suam quærit, qui fidem Christi verbis exornare studet, quia obscurat illam splendore verborum, ut non illa sed ille laudetur. Sicut et pseudoapostoli ne stulti viderentur prudentibus mundi, in sapientia hominum prædicabant Christum, devitantes ea quæ mundus in nobis stulta judicat, ut neque incarnatum Dei Filium et de Virgine natum docerent, neque morte ejus homines salvari prædicarent; neque carnis nostræ futuram resurrectionem, quia mundanæ sapientiæ ratio judicat hæc stulta. Hoc enim habet physicalis sapientia, quod Deus non fiat homo, quod invisibilis non fiat visibilis quod immortalis non fiat mortalis, quod virgo concipere et parere non possit, quod mori non possit auctor vitæ, quod

mors unius non possit multos vivificare, quod mortuus aperto sepulcro resurgere nequeat, quod verum corpus humanum clausis januis intrare non possit in domum. Nos autem hæc omnia de Christo prædicamus. Ideo Apostolus non in sapientia hominum evangelizat, quæ sapientia est verbi, id est locutionis ornata secundum dialecticam et rhetoricam. Non sum missus, inquit, evangelizare in sapientia verbi, id est ut secundum humanam calliditatem verbis compositis auditores ad fidem argumentando cogere, sed simpliciter veritatem omnibus annuntiarem. Ideo non in sapientia verbi hominum, *ne evacuaretur crux Christi*, id est ne vacua, ne otiosa putetur passio Christi, sed plena hominum redemptione et salute. Si enim possibilitas naturalis per liberum arbitrium sufficit sibi, quemadmodum sæculi sapientes dicunt, et ad cognoscendum quomodo vivere debeat, et ad bene vivendum, ergo Christus gratis mortuus est, et crux ejus ab omni utilitate vacua est. Sed impossibile est crucem ejus vacuam ac superfluum esse, quia salus humana non nisi per crucem illam poterat evenire. Ergo stulta est sapientia verbi sæcularis, quæ hoc ignoravit. Vere evacuaretur crux in sapientia verbi, quia *verbum crucis*, id est prædicatio crucifixi Christi *est*, id est videtur esse *stultitia pereuntibus*, id est sapientibus mundi, quorum sapientia perit ac falsa ostenditur; et ipsi damnandi inde sunt, quia spem suæ salutis in cruce Christi non constituunt. Stultitia enim videtur illis, Dei Filium dicere crucifixum, et ideo sunt in perditione, quia infernæ morti non sunt erepti. Incredulis et pereuntibus est stultitia, sed *his qui salvi fiunt, id est nobis credentibus, est virtus Dei ipsa crux*. Credimus enim non infirmitatem esse crucem Christi, sed virtutem, intelligentes mortem victam in cruce; cujus signum qui habent sunt fortes et salvi fiunt, quia teneri a morte non possunt. Non enim in verbo crucis Christi dicitur aliquid, ubi virtus et fortitudo Christi non appareat, quia moriendo mortem vicit et diabolum atque infernum et peccatum, hominemque liberavit, et ignem portæ paradisi sanguine suo exstinxit credentibus, omniaque mundi regna superavit, et regnum cælorum aperuit. Nulla ergo est tanta virtus, quanta est in omnibus quæ de Christo crucifixo dicuntur. D

Non prædico in sapientia verbi, ne taliter crux evacuaretur; quæ evacuaretur, si aliquo modo præter illius sacramentum ad justitiam vitamque æternam pervenire homines posse dicerentur, quia *scriptum est* in Isaia quod Deus perditurus esset sapientiam mundi. Ideo enim non misit me Dominus evangelizare in mundana sapientia, quoniam ipse (sicut Scriptura testatur) prædixerat quod eam non reciperet in prædicatione evangelica, sed perderet et reproharet de collegio prædicatorum suorum. Unde ait: *Perdam sapientiam sapientium, et prudentiam prudentium reprobo*. Non suam sapientiam Deus in eis perilit et reprobat, quam ipse donavit, sed quam sibi arrogant, qui non habent ipsius. Notan-

A dum enim sapientiam aiem esse in subtili excogitatione rerum, prudentiam vero in exspolita ipsarum rerum explanatione. Vel sapientiam, qua de Deo humanis rationibus disputant, et incarnationem mortemque ejus velut stultam contemnunt; prudentiam vero quam habent in moribus, vel qua excogitant aliquid probandum. Et Deus perdidit, id est irritam fecit et destruxit sapientiam sapientium, atque reproboavit prudentiam prudentium, quando fecit illa quæ illi negant posse fieri, et pisces ad prædicandum misit. Ubi enim fecit ut Dei Filius incarnaretur de Virgine et crucifigeretur pro humana salute, obviavit sapientiæ sapientium et destruxit eam. Et ubi illiteratos et idiotas fecit prædicatores, ut per eos simplicibus verbis ad fidem converteret dialecticos et rhetores, reproboavit a sua prædicatione prudentiam prudentium, et astutiam moresque eorum rejecit. Sciendum vero quod hæc sententia juxta Hebraicum sic dicitur in Isaia de populo Judæorum: « Peribit sapientia a sapientibus ejus, et intellectus prudentium abscondetur (Isa. xxxix). » Quod completum est post adventum Domini, quando uno eodemque tempore successa est Jerusalem templumque destructum, et omnis majorum scientia ablata. Nam quia sapientes illius populi Christum qui est Dei sapientia, non receperunt, periit ab eis omnis sapientia eorum. Et quia prudentes astutis machinationibus studuerunt contraire eidem sapientiæ Dei, inter homines corporaliter conversanti, absconditus est ab oculis cordis eorum omnis intellectus, quem habebant in Scripturis, ne scilicet Christum reperiant qui in littera continetur. C

Quod et huic loco epistolæ multum congruit, quia ex illis infatuatis doctoribus Judæorum erant pseudoapostoli, contra quos nunc Paulus agit, qui se per mundum sparserant, loquentes in sapientia mundi ad subversionem eorum qui nuper ad fidem venerant. Post propheticum vero testimonium subdit Apostolus: *Ubi sapiens*, etc. Ac si dicat: Ita olim prophetatum est, et nostro tempore videmus illud completum. Nam *ubi est sapiens?* id est in qua Ecclesia de Judæis aut gentibus aliquis rhetorum vel dialecticus est prædicator Evangelii constitutus? Si enim prædicator in Ecclesia esse voluit, sapientiam sæculi abjicere oportuit. Et *ubi est electus ad prædicandum scriba?* id est qui de moribus vel artibus præcepta dat aut libros componit. Et *ubi est electus ad docendum in Ecclesia inquisitor hujus sæculi?* id est qui secreta naturæ rimatur. Scribæ sunt, naturalium et moralium librorum auctores, et artium sæcularium scriptores, id est de ipsis artibus præcepta dantes. Inquisitores autem sæculi, qui constellationibus agi mundum credunt, et duodecim signis ortus et occasus fieri decernunt, nihil omnino sine horum motu putantes fieri posse; qui sapientia sua inquirunt et discutiunt atque investigant de occultis rebus ac naturis singulorum. Sapiens generale vocabulum utriusque est. Ilos reprobatos et adnihilatos esse prohibet Apostolus, non quod doctri-

nam eorum ex toto improbet, in multis enim concordant sacris litteris, sed quia quædam senserunt et scripserunt contraria Christianæ religioni, et maxime de cultura pluralitatis deorum. Tales non recepit Deus, sed stultos fecit. Insultat ergo Apostolus sapientiæ et astutiæ, probatæ falsæ et reprobæ, cum dicit : *Ubi sapiens, ubi scriba, ubi inquisitor hujus sæculi?* quasi dicat : Nil valet talium astutia, et est invecio in Judæos et gentiles. Nam Judæorum scribæ et legis doctores, Deum Filium habere, stultum putant credi. Simili modo quotidie et gentes istud risui deputant. Sed Judæi, quia hoc non tam aperte in lege significatum est, diffidunt. Gentiles vero quia mundi ratio istud non recipit, nihil enim dicit posse gigni sine commistione duorum, stultum judicat. Sed ubi sunt, inquit, tales dogmatizatores? quasi dicat : Confusi sunt et retrorsum pulsati, vel in nihilum reducti. *Nonne stultam fecit Deus sapientiam hujus,* id est quæ est secundum rationes hujus mundi, utique stultam fecit eam, faciens illa quæ dicebat non posse fieri. Et ita quæ se sapere putabat, inventa est insipiens. Quod enim illa impossibile judicabat, possibile declaratum est. Stultam fecit Deus talem sapientiam, quia per stultitiam dedit salutem credentibus. *Nam quia in Dei sapientia,* hoc est, in luce divinitatis filii Dei *mundus,* id est, quilibet mundi amator vel mundanæ sapientiæ sectator per superbam sæculi sapientiam *non cognovit Deum,* quoniam Creatorem invenire non potuit, multiplicibus disputationibus et solertissima inquisitione, qua pervenit ad investigationem creaturæ, propterea *placuit Deo salvos facere credentes per stultitiam prædicationis,* id est per rem prædicatam quæ stulta videtur, hoc est per incarnationem et humilitatem Filii sui. Verbum quippe Dei, sapientia est. Sed stultitia hujus sapientiæ, dicta est caro Verbi. Vel quia carnales quippe per carnis suæ prudentiam pertinere non valebant ad sapientiam, per stultitiam prædicationis, id est per carnem Verbi prædicatam sanarentur. Et hoc est, quia in Dei sapientia non cognovit mundus, etc. Ac si dicatur : Cum Deum qui est sapientia, nequaquam per sapientiam suam mundus inveniret, placuit ut Deum hominem factum per humanitatis stulta cognosceret, quatenus ejus sapientia ad nostra stulta descenderet, et lucem supernæ prudentiæ luto carnis suæ illuminata, nostra cæcitas videret, sicut ille cæcus, qui luto super oculos accepto illuminatus est (*Joan. ix*).

« Quoniam et Judæi signa petunt, et Græci sapientiam quærunt; nos autem prædicamus Christum crucifixum, Judæis quidem scandalum, gentibus autem stultitiam, ipsis autem vocatis Judæis et Græcis, Christum Dei virtutem et Dei sapientiam. Quia quod stultum est Dei, sapientius est hominibus; et quod infirmum est Dei, fortius est hominibus. »

Idcirco mundus non cognovit per sapientiam Deum, quia Judæi signa potentiae quærunt, consueti ab an-

aliquo; et Græci sapientiam, utrum quod prædicatur, natura patiatur; et nos contra prædicamus Christum crucifixum, quod non est Judæis signum potentiae, sed scandalum, quia irascuntur contra præcones rubore sceleris sui, et gentilibus est stultitia, quoniam secundum mundanam rationem non congruit ut Deus pro hominibus moreretur. Et hoc est : *Judæi signa petunt,* id est non physicis vel argumentosis rationibus, sed miracula postulant : et non diffidunt posse fieri contra naturam, sed an factum sit quærunt, scientes virgam Aaron aridam germinasse et fructum attulisse (*Num. xvii*), scientes Jonam post tres dies de ventre piscis vivum exiisse (*Jon. ii*), et alia multa divinitus facta esse, et ideo signa consueverunt petere (*Matth. xii*). Græci vero sapientiam quærunt quia nolunt audire ea quæ mundi ratione non possibilia sunt, quoniam contra naturam nihil posse fieri putant, et ideo secundum physicas rationes diligenter inquirunt, si possit fieri quod audiunt, eam quæ ingenio hominis sapientia videtur, invenire cupiunt. Judæi et gentiles sic agunt, sed nos contra prædicamus Christum crucifixum, Judæis quidem scandalum, gentibus autem stultitiam. Judæi enim turbantur et indignantur atque irascuntur, dum audiunt Dei Filium prædicari eum, quem ipsi crucifixerunt. Gentiles vero stultitiam putant, immortalem potuisse mori, et eum qui in potestate habebat persecutores una voce prosternere, pertulisse ab illis se flagellari, conspui, teneri, spinis coronari, crucifigi. Stultum quippe gentilibus videtur, ut pro hominibus auctor vitæ moreretur, quia hoc mundanæ sapientiæ non congruit. Christum crucifixum pro mundi redemptione prædicamus, quod ut diximus, scandalum Judæis incredulis est, et stultitia Græcis. Sed ipsis Judæis atque Græcis, qui hoc prius putabant scandalum et stultitiam, *vocatis,* id est postquam sunt ad fidem vocati vel conversi, vel vocatis ad vitam non communi vocatione, sed qua soli prædestinati sunt ante mundi principium vocati, prædicamus *Christum Dei virtutem,* quia mortuus vicit, et *Dei sapientiam,* qua prudenter fefellit diabolum. Virtutem nunc ad signa retulit Apostolus propter Judæos, sapientiam autem ad doctrinam propter Græcos, id est gentiles. Hæc enim virtus sufficit Judæis signa quærantibus, si crediderint; et hæc sapientia sufficit Græcis sapientiam petentibus. Credentes enim intelligent hæc signa virtutis in Christo quod mors ejus mortem nostram destruxit, et mortuus ipse vitam nobis dedit æternam. Græci quoque, si crediderint, in eo videbunt magna sapientiæ documenta, et suam sæcularem sapientiam intelligent esse stultitiam. Videbunt enim quam provido et sapienti consilio nos, qui per superbiam cecideramus, ipse per humilitatem suam erexit. Ob hoc etiam vocatur Christus Dei virtus, quia per ipsum omnia fecit Deus; et Dei sapientia, quia per ipsum cognitus est Deus. Unde et apparet idem Filius coæternus et coequalis Patri. Cum enim ipse Filius sit Dei virtus et Dei sapientia, si aliquando fuit Deus

sine illo, fuit sine virtute et sapientia, id est fuit infirmus et insipiens. Item si quis dicat quod Dei virtus sit minor illo, aut ejus sapientia minor illo, magnam deo contumeliam ingerit, cum nec quilibet homo potens id sibi dici æquanimitè ferret. Nec mirum si Christus crucifixus, est credentibus Dei virtus et Dei sapientia, *quia quod stultum est Dei*, id est humilitas et passio, *sapientius est hominibus*, id est quam homines possint videre et esse, et quod infirmum est Dei, id est incarnatio, *fortius est hominibus*, quia victus vicit mortem, quam nullus gigas evasit. Quia nos cum ad divinam sapientiam venimus, sapienter facimus; ipsa cum ad nos venit, ab hominibus superbis, quasi stulte fecisse reputata est. Et nos cum ad illam venimus, convalescimus; ipsa cum ad nos venit, quasi infirma existimata est. Serpentis sapientia decepti sumus, Dei stultitia liberamur (*Gen. iii*). Sed sicut illa vocatur sapientia, erat autem stultitia contemptibus Deum, sic ista quæ vocatur stultitia, sapientia est vincentibus diabolum. Non enim vere stultitia est, sed ab hominibus dum rationi mundanæ non convenit, putatur stultitia, cum sit ratio spiritalis. Nam hæc stultitia superat omnes sapientes, quia salutem humano generi sapienter reddit, quam nullus sapientium invenire sciebat. Hæc, inquam, stultitia omnem hominum sapientiam supergreditur, quia qui sapientia sua liberari non poterant, per crucis mysterium salvantur, Sed et infirmum Dei non est infirmum, quia infirmitas Christi magna victoria est. Vicit enim fortem armatum qui vicerat omnes (*Luc. xi*), et ideo fortior est hæc infirmitas Dei cunctis hominibus, quia superavit illum qui cunctos superaverat, et mortem quam nec gigantes evadere poterunt, crucifixi infirmitas vicit.

« Videte enim vocationem vestram, fratres, quia non multi sapientes secundum carnem, non multi potentes, non multi nobiles; sed quæ sunt stulta mundi elegit Deus, ut confundat sapientes; et infirma mundi elegit Deus, ut confundat fortia; et ignobilia mundi et contemptibilia elegit Deus, et ea quæ non sunt, ut ea quæ sunt destrueret, ut non gloriaretur omnis caro in conspectu ejus (*Jer. ix*). Ex ipso autem vos estis in Christo Jesu, qui factus est nobis sapientia a Deo et justitia et sanctificatio et redemptio, ut quemadmodum scriptum est: Qui gloriatur, in Domino gloriatur (*II Cor. x*). »

Vere stultum et infirmum Dei, est sapientius et fortius hominibus, quia in vobis potestis hæc experiri, insipientes enim et infirmos vos vocaverunt. Nam *videte vocationem vestram, fratres*, id est videte per quos vocati estis, *quia non multi ex illis sunt sapientes secundum carnem*, id est secundum humanam sapientiam, *non multi potentes secundum sæculi potentiam, non multi nobiles secundum carnis nobilitatem*. Et primo nulli ex vocationibus fuerunt tales. Non multi forsitan propter se dicit, qui solus inter apostolos sæcularium litterarum peritus, *terrenarum opum dives, Romanæ dignitatis parentela*

conspicius fuit, qui tamen hæc nihili pendit, nec usus est eis. Erant jam et aliqui alii prædicatores sancti ex illis, qui fuerant sapientes secundum carnem, et potentes et nobiles, sicut Dionysius Areopagita et alii. Vel ita: Videte vocationem vestram, id est in vobis ipsis probate quod dico, quia non multi ex vobis sapientes secundum carnem vocati sunt ad fidem, sed potius pauci sapientes crediderunt. Per superbiam enim sapientiæ sæcularis, multi sapientiæ Dei contempserunt esse subjecti. Vix enim istiusmodi homines ad fidem possunt adduci. Nec multi potentes in hoc sæculo vel nobiles inter vos, ad Christum sunt vocati. Difficile enim potentes et nobiles ac divites, et multo his difficilius eloquentes, credunt Deo. Obcæcatur enim mens eorum divitiis et opibus, atque luxuria vel superbia; et circumdati vitiiis, non possunt videre virtutes; simplicitatemque Scripturæ sanctæ non ex majestate sensuum, sed ex vilitate verborum judicant. Non multi tales vocati sunt, *sed quæ stulta sunt mundi*, id est ignaros homines mundanæ sapientiæ *elegit Deus* ut per eorum doctrinam *confundat*, id est erubescere faciat, et ad insipientiam redigat *sapientes sæculi*. Confunduntur enim sapientes, dum ea quæ ipsi negant, vident multos confiteri, id est partum virginis et crucem Filii Dei et resurrectionem a mortuis, cæteraque similia. Stulta mundi elegit Deus, id est ineruditos liberalibus disciplinis et omnino (quantum ad sæculi doctrinas pertinet) impolitos, non peritos grammaticæ, non armatos dialectica, pisca-
tores fecit suos prædicatores, ut videlicet cunctis in eis ostenderet, quod ad vitam credentes populos, non sermo, sed causa suaderet. *Et infirma mundi*, id est pauperes et impotentes *elegit Deus*, ut per eorum virtutem *confundat fortia*, id est superet et erubescere faciat potentes. Nam dum elati divites novas virtutes in humilibus peccatoribus aspicerent, eorum quorum prius contemnebant vitam, postmodum obstupuerunt miraculis, unde mox pavidi ad sua corda redeuntes, extimuerunt sanctitatem in miraculis, quam despexerant in præceptis. Per infirma ergo confusa sunt fortia, quia dum in veneratione vita surgit humilium, elatio cecidit superborum. *Et ignobilia mundi et contemptibilia*, id est homines in hoc mundo plebcios et abjectos *elegit Deus*, et ea quæ non sunt, id est non computantur, scilicet illos homines qui nihil esse videbantur, *ut ea quid sunt*, id est magna putabantur, *destrueret*, id est vincendo humiliaret. Elegit ergo indoctos, infirmos, ignobiles et pauperes; non quia reliquit sapientes, firmos, nobiles et divites; sed si ipsos primos elegisset, merito sapientiæ suæ vel potentix, seu natalium aut divitiarum suarum sibi eligi viderentur, atque inflati de his rebus, salutem humilitatis non reciperent. Si enim primo sapientes elegisset, doctrinæ eorum merito elegisse illos putaretur, et ita illorum scientia laudaretur, et laus Christi gratiæ minueretur. Si potentes elegisset, videretur eos merito dignitatis eorum elegisse, et similiter divites merito

divitiarum. Et ideo istos qui de semetipsis in semet-
 ipsis poterant gloriari, non quidem omisit nec con-
 tempsit, sed aliquantulum distulit; et illos primo
 eligere maluit, qui nihil in seipsis habebant unde
 gloriari possent. Quia uimirum ad prædicandum
 tales venire debuerunt, qui de laude propria nihil
 haberent, ut tanto solius veritatis cognosceretur esse
 quod agerent, quanto et aperte cerneretur quia ad
 hoc agendum per se idonei non fuissent. Tales ergo
 primitus elegit, ut per eos humiliaret cæteros, et ad
 fidem adduceret, ut non gloriatur omnis caro, id est
 omnis homo in conspectu ejus, id est coram ipso,
 vel non gloriatur omnis caro in conspectu ejus, id
 est in se nullus gloriatur eum conspiciens. Non
 gloriatur utique de meritis suis. Non, enim glo-
 riantur injusti, qui non habent unde glorientur;
 nec justii, quia ex ipso habent unde gloriari debeant;
 nec habent gloriam suam, nisi ipsum cui dicunt:
 « Gloria mea et exaltans caput meum (Psal. III). »
 Ac per hoc ad omnem hominem pertinet, sive ju-
 stum, sive injustum, quod nunc dictum est, ut non
 gloriatur omnis caro in conspectu ejus, scilicet ne-
 que de meritis, neque de sapientia, neque de potentia,
 neque de nobilitate, nec de divitiis aut alia re
 propria quisquam gloriatur. Nullus ex se potest
 gloriari, sed vos in Deo gloriimini, quia ex ipso
 Deo, id est ex ipsius dono vos estis in Christo Jesu,
 non ex vobis. Ex ejus gratia processit ut sitis in
 Christo, non ex vestris meritis, quia ejus propositum
 fuit ut essetis membra Christi. Si ergo ex ipso
 estis, nolite illos admirari quos ipse non elegit. In
 Christo estis, qui factus est vobis sapientia, ut ejus
 participatione sapientes efficeremur percipientes ab
 eo sensum prudentiæ, et factus est nobis justitia,
 ut nos ejus participatione justificaremur per opera
 virtutum et sanctificatio, ut nos sanctificaret in
 baptismo, faciens immunes a peccato, et redemptio,
 ut nos redimeret pro nobis seipsum dando. Sapien-
 tia ergo nobis factus est, id est illuminans nos ad
 veritatem et Dei cognitionem, et quia prius justificat
 bona operatione, per hoc justitia, quia prius
 emundat in baptisate; et hoc, quia prius redemit
 sua passione. Ipse qui in seipso est æterna et in-
 commutabilis sapientia, etiam nobis fit sapientia,
 cum nos ejus participatione efficitur utcumque sa-
 pientes ad recte sapiendum. Ita ipse cum in se sit
 ipsa justitia, quæ vivit in seipsa et incommutabili-
 ter vivit, etiam nobis fit justitia, cum nos ei cohæ-
 rentes juste vivimus; et tanto magis minusve justi
 sumus, quanto illi magis minusve cohæremus. Si-
 militer cum ipse sit in seipso æterna sanctitas,
 etiam nobis fit sanctificatio, cum nos sanctificat sui
 participatione. Factus est ergo nobis a Deo sapientia
 et justitia et sanctificatio, quia nos ad illum conver-
 timur temporaliter, id est ex aliquo tempore, ut cum
 illo maneamus in æternum, et ipse ex quodam tem-
 pore « Verbum caro factum est et habitavit in nobis
 (Joun. I). » Hæc omnia nobis a Deo factus est, ut
 qui gloriatur, non in se, sed in Domino gloriatur,

A sicut scriptum est, in Jeremia: « Non gloriatur sa-
 piens in sapientia sua, et non gloriatur fortis in for-
 titudine sua, et non gloriatur dives in divitiis suis,
 sed in hoc gloriatur qui gloriatur, scire et nosse me,
 quia ego sum Dominus, quia facio misericordiam et
 judicium et justitiam in terra (Jer. Ix). » Videte quem-
 admodum nobis abstulit gloriam, ut daret glo-
 riam, abstulit nostram, ut daret suam; abstulit
 inanem, ut daret plenam; abstulit nutantem, ut
 daret solidam. Quanto enim gloria nostra fortior et
 firmior quæ in Deo est, quam quæ in nobis? Non
 ergo gloriatur quisquam in sapientia sua, vel in
 fortitudine, vel in divitiis aut hujusmodi rebus; sed
 si gloriari voluerit, gloriatur in Domino qui facit
 misericordiam et judicium et justitiam. Ille enim in
 solo Domino gloriatur, qui cognoscit non suum,
 sed illius esse, non solum ut sit, sed etiam ut non
 nisi ab illo bene sit sibi, a quo habet ut sit; et qui
 in omnibus quæ facit, non suam, sed Domini glo-
 riam quærit. Et ideo gloriandum est in Domino,
 quia non poterit confundi qui gloriatur in eo; con-
 fundetur autem, qui gloriatur in hoc sæculo vel in
 seipso.

CAPUT II.

« Et ego cum venissem ad vos, fratres, veni non
 in sublimitate sermonis aut sapientiæ annuntians
 vobis testimonium Christi; non enim judicavi
 scire me aliquid inter vos, nisi Christum Jesum,
 et hunc crucifixum. Et ego in infirmitate et timore
 et tremore multo fui apud vos, et sermo meus et
 prædicatio mea non est in persuasibilibus humanæ
 sapientiæ verbis, sed in ostensione spiritus et vir-
 tutis, ut fides vestra non sit in sapientia hominum
 sed in virtute Dei. »

Dixi superius, quia infirmos et stultos prædica-
 tores elegit Deus. Et ego, quoque talis apparui vobis,
 quia veniens ad vos veni non in sublimitate sermonis,
 id est non in rhetoricis et dialecticis disputationi-
 bus, ut artificiose et composite prædicarem vobis
 secundum logicam, nec in sublimitate sapientiæ, id
 est humanarum rationum secundum physicam,
 quod laudatis in pseudoapostolis, qui per eloquen-
 tiam suam commendant pravam doctrinam suam,
 et per sapientiam mundi evacuavunt crucem Christi.
 Non in sublimitate sermonis aut sapientiæ veni, sed
 potius in humilitate, quia qui minus capacibus su-
 blimiora loquitur, non illorum utilitatem, sed sui
 ostentationem facit. Veni annuntians vobis testimo-
 nium Christi, id est quod de ejus incarnatione, pas-
 sione et resurrectione testati sunt prophete, vel
 quod ipse de semetipso moriendo et resurgendo
 testatus est, aut quod nos apostoli testamur de illo.
 Veni, inquam, non in sublimitate sæcularis eloquen-
 tiæ vel sapientiæ, quia nec in sublimitate illius quæ
 de Deo est. Et hoc feci ex judicio, non enim judicavi
 me aliquid scire inter vos, qui minus capaces vos
 videbam, nisi Jesum Christum, et hunc crucifixum,
 id est nisi salvatorem regem, et hoc per crucifixio-
 nem quod est dicere: Quia vos capere divinitatis

ejus myateria non posse pensavi, sola vobis infirma A humanitatis ejus locutus sum : hoc enim inter illos Apostolus nesciebat, quod ipsi per illum scire non poterant; et hoc solum se scire dicebat, quod eos per illum scire oportebat. Eo autem genere locutionis nescire quisque; dicitur quod occultat, quomodo dicitur fossa cæca quæ occulta est. In Christo autem crucifixo non parva scientia est, sed multa in eo discuntur; et maxime quod vetus homo noster simul crucifixus est, ut evacuetur corpus peccati, et ultra non serviamus peccato (*Rom. iv*). Nam ad ejus crucem pertinet, quod etiam nos in ejus corpore crucifigimur mundo, ubi intelligitur omnis coercitio malarum concupiscentiarum. Ac per hoc fieri non potest, ut eis qui in cruce Christi informantur, furta, adulteria vel alia crimina permittantur. Omnia enim vitia carnis ac spiritus mortificat crux Christi, ut vivere faciat in virtutibus; quia ipse pro peccatis nostris crucifixus est, ut nos redimeret ab omni iniquitate, et cruciatibus æternis salvaret. Hæc et alia multa discuntur in Christo crucifixo. Ita humilia et infirma vobis prædicavi. Et ego humilis et infirmus sui, quia apud vos sui in infirmitate, id est quasi nullius essem virtutis aut potentiae vel in infirmitate, id est in tribulatione et timore, id est anxietate animi, et tremore corporis propter afflictiones poenarum. Christum enim in stultitia humanæ sapientiae prædicans, odium mihi Judæorum atque gentilium et persecutiones provocavi, quasi rem vanam annuntians, et Deum mortuum prædicans; et dum ita conversarer vobiscum, sermo meus de moribus et prædicatio mea de Christo, vel sermo privatim coram paucis, et prædicatio publice coram omnibus, non fuit in persuasibilibus verbis humanæ sapientiae, id est in verbis quæ per humanam sapientiam suaderent credere quod dicebam, sed fuit in ostensione spiritus et virtutis, id est in eo quod ostendebam me habere Spiritum sanctum religiose vivendo et prophetando, et per manuum impositionem ipsum aliis impetrando, et ostendebam me habere virtutem miracula faciendo. Ideo sic feci, ut fides vestra non sit fundata in sapientia hominum, sed in virtute Dei, id est secundum humanam sapientiam, non quærat rationes eorum quæ debet credere, sed omnia imputet virtuti divinæ possibilis, sciens Deo nihil esse impossibile.

« Sapientiam autem loquimur inter perfectos. « Sapientiam vero non hujus sæculi neque principum hujus sæculi, qui destruuntur; sed loquimur « Dei sapientiam in mysterio quæ abscondita est, « quam prædestinavit Deus ante sæcula in gloriam « nostram, quam nemo principum hujus sæculi cognovit. Si enim cognovissent, nunquam Dominum « gloriæ crucifixissent. Sed sicut scriptum est : « Quæd oculus non vidit, nec auris audivit, nec in « cor hominis ascendit, quæ præparavit Deus his « qui diligunt eum (*Isa. lxiv*). Nobis autem revelavit « vir Deus per Spiritum suum. »

Quia supra dixerat : Veni non in sublimitate sermonis aut sapientiae, ne cui stultus videretur, et in prædicatione sua nihil sapientiae continere, ostendit quod ipse qui simpliciter istis est locutus, aliâ eructat profunda sapientiae. Inter vos, inquit, simpliciter locuti sumus, sed inter perfectos non cognitores, quibus opus non est ut loquamur, sed auditores non capaces, loquimur sapientiam, id est de secretis Dei, ac si diceret : Et nos habemus sapientiam, sed vos eam capere non potestis, quia et adhuc lacte nutrimini, atque parvi in sensu comprobamini. Sed inter perfectos eam loquimur, id est inter eos qui crucem Christi virtutis testimonio sapientiam fatentur. Omnes enim perfecti viri intelligunt esse summam sapientiam, quod vos putatis abjectionem, videlicet quod Deus homo factus est, quod esuriit, quod fatigatus, quod crucifixus est. Hæc enim omnia inter excæcatos prædicata, videntur esse stultitia; sed inter perfectos lumen cordis habentes, est summa sapientia. Loquimur sapientiam, sed sapientiam non hujus sæculi, id est non humanis rationibus constantem, non hujus sæculi, sed futuri; neque principum hujus sæculi, id est regum et philosophorum, qui in hoc sæculo primatum sapientiae tenere videbantur. Qui principes destruuntur, id est sapientia eorum dissipatur, quia Christianitas errores quos illi inseruerunt, excidit, id est idololatricam, avaritiam et cætera vitia. Non illorum sapientiam loquimur, sed potius Dei sapientiam de redemptione hominis per incarnationem et passionem Unigeniti ejus, loquimur eam in mysterio, id est in occulto sensu prophetorum dictorum vel operum reseramus, ut in immolatione Isaac (*Gen. xxii*), vel in victoria David de Philistæo (*I Reg. xvii*). Quæ sapientia abscondita est a sapientibus et prudentibus sæculi, et ideo stultitia putatur ab eis, quia nesciunt illam. Abscondita est, dum non in verbis, sed in virtute est; non humana ratione possibilis, sed spirituali efficacia credibilis. Vel loquimur eam in mysterio, id est in occulto sacramentorum, quod nequit intueri oculus rationis nostræ sine labore investigationis, et illuminatione Spiritus sancti quæ abscondita est in corde Patris, quia « Verbum erat apud Deum (*Joan. i*), » quam sapientiam quæ est Verbum Patris, prædestinavit Deus, secundum futuram ejus humanitatem, hoc est præordinavit ante sæcula, id est antequam mundus esset, ut Unigenitus suus in plenitudine temporis homo fieret (*Galat. iv*); et crucifigeretur ac resurgeret, in gloriam nostram qui credimus, sicut et in confusionem illorum qui non credunt, et crucem ejus stultitiam putant. Quam sapientiam divinitatis ejus nemo principum hujus sæculi cognovit a Deo absconditam esse; id est nemo superborum philosophorum aut legis doctorum aut sæculi potentum eam cognoverat quando hæc loquebatur Apostolus. Vel sapientiam Dominicæ incarnationis et passionis prædestinavit Deus in gloriam nostram, ut scilicet humanitas et mors ejus fieret nobis gloria sempiterna, quam sapientiam no-

mo principum hujus sæculi, id est nullus malignorum spirituum cognovit, quia nunquam aliquis illorum intellexit, quod per passionem ejus redimendum esset genus humanum. Inde apparet quod non cognoverunt, quia si cognovissent dæmones illam passionis ejus sapientiam valere ad redemptionem humani generis, nunquam crucifixissent, id est nunquam crucifigi fecissent *Dominum gloriæ*, id est nunquam suggessisset diabolus illum crucifigi, per quem jus suum perderet. Sed nec homines eum crucifixissent, si Deum gloriæ illum esse cognovissent, qui in forma servi crucifixus, tamen Dominus gloriæ crucifixus est. Talis enim erat illa susceptio, quæ Deum hominem faceret, et hominem Deum. Quod tamen propter quid et secundum quid dicitur, adjuvante Domino prudens et diligens et pius lector intelligit. Quia recte dicitur et Deus crucifixus, non ex virtute divinitatis, sed ex infirmitate carnis: una est enim persona Deus et homo. Quem qui crucifixerunt, ignoraverunt; fideles autem cognoverunt eum. Non noverunt eum, sed contingit ex hoc fieri, sicut in *Isaia scriptum est, quod oculus non vidit, nec auris audivit, nec in cor hominis ascendit, quæ præparavit Deus (Isa. LXIV) diligentibus se, sed nobis revelavit ea per Spiritum suum.* Sicut enim illa carnales homines juxta prophetiam latent, sed tamen nobis spiritualibus revelata sunt per Spiritum Dei; sic sapientia divinæ incarnationis, et nostræ per ejus mortem redemptionis, lateat infidelis, sed manifestata est fidelibus. Ea quæ Deus in regno cælorum præparavit his qui puro corde diligunt eum, tanta sunt et tam præclara atque tam spiritualia, quod oculus non vidit, quanta vel qualia sunt; nec auris audivit, nec in cor hominis ascendit. Oculus non vidit, quia non est color; auris non audivit, quia non est sonus, in cor hominis non ascendit, quia non est terrena cogitatio. Quod enim in cor hominis ascendit, infra cor hominis erat. Ideo in cor ascendit, quia supra illud est cor quo ascendit. Præmium vero quod in cælo servatur electis non ascendit in cor hominis, sed ascendit ad illud cor hominis. Oculus non vidit illud corporeo visu, nec auris audivit corporeo auditu, nec in cor hominis ascendit, id est nec cognosci potuit ratione ejus qui carnalis est, non spiritualis. Nam in eo quod dicitur, in cor hominis non ascendit, intelligi potest quod non sit homo, sed supra hominem, in cor ejus ascendit. Res namque dicitur ascendere in eor, quando intrat ut prudenter intelligitur, et bene intellecta placeat. Notandum vero quod hæc sententia non eisdem verbis, sed eadem sensuum veritate legitur in propheta. Sic namque ibi scriptum est: « A sæculo non audierunt, neque auribus perceperunt: oculus non vidit, Deus, absque te, quæ præparasti expectantibus te (*ibid.*). » Tamen propheta et Apostolus dicit similiter, oculus non vidit. Sed quod Apostolus ait, nec auris audivit: hoc propheta, nec auribus perceperunt. Et quod Apostolus, nec in cor hominis ascendit: hoc propheta, non

A audierunt, id est non intellexerunt. Quodque posuit Apostolus, his qui diligunt eum: hoc propheta dixerat, expectantibus te. Sed sicut præmisimus, idem sensus est in Apostolo, qui et in propheta. Homines enim a sæculo non audierunt, hoc est non intellexerunt præmia justorum, quia in cor hominis non ascendit quanta sint, id est cogitatio humana non comprehendit ea. Neque auribus perceperunt, quia auris humana non audivit ea loquente aliquo, et oculus non vidit ea, quoniam quæ promittuntur in futuro, non cernuntur in præsentī. Spes enim quæ videtur, non est spes, sed jam certa promissio. Sic fuerunt illa a sæculo hominibus ignota, sed nobis qui supra homines sumus, revelavit ea Deus non per industriam ingenii nostri (*Rom. VIII*), sed per Spiritum suum, quo mentem nostram illuminavit, ut intelligeremus illa ineffabilia bona, quæ ipse suis amatoribus præparavit. Quæ illi tunc habebunt, quando erit Deus omnia in omnibus (*I Cor. xv*). Deus ergo est omnia illa bona, quæ ipse præparavit diligentibus se.

« Spiritus enim omnia scrutatur, etiam profunda Dei. Quis enim scit hominum quæ sunt hominis, nisi spiritus hominis qui in ipso est? Ita et quæ Dei sunt, nemo cognovit, nisi spiritus Dei. »

Hæc nobis per spiritum sunt revelata, nec mirum, quia *Spiritus scrutatur omnia, etiam profunda Dei*, id est quæ in Deo latent longe remota a creaturarum cognitione. Scrutatur non utique ut quod nescit inveniat, sed quia nihil relinquit omnino quod nesciat; profunda Dei scrutatur, quia ejus secreta et arcana novit; ac per hoc Deus esse manifestatur, qui omnia Dei occulta scire ostenditur. Scrutari omnia perhibetur, quia in nobis manens, facit ut nos ea scrutemur. Et quod nos dono ipsius facimus, ipse dicitur facere, quia sine illo nos non possumus facere. Vere ipse Dei Spiritus occulta discrutatur, sicut et spiritus hominis occulta hominis. Nam *quis hominum scit ea quæ sunt occulta hominis, nisi spiritus ipsius hominis qui est in ipso?* Unusquisque enim homo habet in se proprium spiritum. Animus enim cujusque, proprius ejus est spiritus. Et ea quæ sunt hominis, nemo novit nisi spiritus ejus. Non enim D novi quid cogites, aut tu quid cogitem. Ipsa enim sunt propria nostra, quæ in animo cogitamus. Et cogitationum uniuscujusque hominis, ipsius spiritus testis est. Alius nescit quid in illo agatur, sed spiritus ejus novit. Ita et quæ Dei sunt occulta, nemo cognovit nisi Spiritus Dei. Non tamen sapientia Dei excluditur, quæ Filius est, ab hac secretorum notitia, quoniam Spiritus accipit a Filio omnia, sicut ipse discipulis ait: « Omnia quæcunque habet Pater, mea sunt (*Joan. XVI*). » Propterea dixi quia de meo accipiet, et annuntiabit vobis. Et nos accepto Spiritu Dei discimus et quid agatur in Deo, quia cum per ejus Spiritum scimus, etiam sic nemo scit nisi Spiritus Dei. Sic autem scit ipse in nobis, sicut loquitur in eis quibus dicitur: « Non enim vos

estis qui loquimini, sed Spiritus Patris vestri qui loquitur in vobis (*Matth. x.*) »

« Nos autem non spiritum hujus mundi accepimus, sed spiritum qui ex Deo est, ut sciamus quæ a Deo donata sunt nobis. Quæ et loquimur non in doctis humanæ sapientiæ verbis, sed in doctrina spiritus, spiritualibus spiritualia comparantes. Animalis autem homo non percipit ea quæ sunt Spiritus Dei : stultitia enim est illi, et non potest intelligere, quia spiritualiter examinatur. Spiritualis autem judicat omnia, et ipse a nemine judicatur, sicut scriptum est : Quis enim cognovit sensum Domini, aut quis instruxit eum? (*Isa. xl ; Rom. xi.*) Nos autem sensum Christi habemus. »

Solus Spiritus Dei novit ea quæ Dei sunt. Sed nos non spiritum mundi, sed Spiritum Dei accepimus, quo doceremur, non quæ mundi, sed quæ Dei sunt. Quia spiritus mundi non potest scire, quæ ab hoc nobis insinuata sunt. Spiritus enim mundi est, quem phitonem appellant, per quem arripiuntur fanatici, qui sine Deo sunt, qui solet conjecturis quæ mundi sunt divinare, qui per verisimilia fallitur et fallit. Qui et per Sibyllam locutus est sensum nostrorum secutus, locum volens inter cælestes habere, ipse et in pseudoapostolis erat, atque eos mundanam sapientiam sectari faciebat. Sed nos non spiritum hujus mundi accepimus, quo doceamur sapientiam mundi, sed Spiritum qui ex Deo est, per quem doceamur ea quæ ex Deo sunt. Spiritum qui ex Deo est accepimus, id est divinum quemdam radium illuminantem nos, ut per eum sciamus beneficia quæ sunt nobis a Deo donata. Spiritus enim Dei mentem quam replet, illuminat; spiritus autem mundi excæcat. Quem qui habent, non intelligunt Dei dona quæ perceperunt, neque a quo perceperunt. Sed nos per Spiritum ejus novimus et dona ejus nos habere, et ab eo accepisse. Ab ipso enim quicquid boni est, donatur. Et ipse nobis dedit Christum suum, atque in eo redemptionem et peccatorum remissionem, virtutumque multiplicationem et æternæ beatitudinis spem, et quicquid habemus vel sumus. Intelligimus hæc nos habere, et ab eo percepisse. Quæ et loquimur, ut hinc appareat scire nos hæc, quia et loquimur ea ut et alii discant ipsa. Loquimur non in verbis humanæ sapientiæ doctis ratione vel ornatu, sed in doctrina spiritus, quia mentes audientium, loquentibus nobis, docentur a sancto Spiritu. Verba enim humanæ sapientiæ hunc sensum non capiunt, nec litteratura studii apprehenditur, sed per fidem spirituali ratione concipitur. Ideoque Spiritus Dei per Evangelium spiritualiter docet corda hominum, excitans ea ad cognitionem sui Creatoris. Dico quia loquimur, et hoc facimus, comparantes spiritualia verba spiritualibus viris, id est ita moderantes ea quæ dicimus, ut convenienti capacitati singulorum, quia pro varietate sensus auditorum distinguimus ea quæ loquimur, et comparamus intellectui uniuscujusque, attendentes quid cui dicamus. Hoc faci-

mus spiritualibus, quod vos non estis; et ideo culpa vestra est, non nostra, quod majora non diximus vobis. Nos scimus quæ Dei sunt, et loquimur ea spiritualibus. Sed animalis homo, quales sunt pseudoapostoli, non percipit ea quæ sunt Spiritus Dei, ut partum virginis, ut resurrectionem mortuorum. Animalis homo dicitur, qui animalium more versatur, qui putat nihil esse post mortem. Animalis jure vocatur, quia fertur dissoluta lascivia animæ suæ, quam non regit spiritus, neque coercet intra metas naturalis ordinis, quia et ipse se non subdit regendum Deo. Animalis enim ab anima dicitur, sicut a carne carnalis. Iste talis non percipit ea quæ sunt Spiritus Dei, id est quid gratiæ credentibus conferat crux Christi, et sic audit quæcunque audit de Dei natura, ut aliud quam corpus cogitare non possit, quamlibet amplum, summum vel immensum, quamlibet lucidum ac speciosum, corpus tamen. Ob hoc etiam dicitur non percipere, id est non intelligere ea quæ sunt Spiritus Dei, quia sola præsentis vitæ bona carnalia cogitat et appetit, spiritualia vero et æterna non intelligit stultitia enim est illi quicquid de talibus audit, et non potest intelligere. Pecoribus enim similis sensum suum in terra deprimit, et ideo non assequitur nisi quæ videt, nec putat aliud posse fieri quam quod ipse scit; propterea quicquid aliter audit quam novit, stultum judicat. Ideo non potest hæc intelligere, quia spiritualiter examinatur, id est invisibiliter a Deo judicatur, ut justo Dei judicio spiritualia intelligere non sinatur. Vel spiritualiter examinatur, id est per spiritualia tantum probatur, quod animalis est, quia audita hæc improbat, et non ob aliud ei proponuntur. Sive ideo non potest intelligere, quia res illa quam ipse stultitiam reputat, spiritualiter examinatur, id est per Spiritum sanctum dijudicatur et intelligitur. Animalis non potest intelligere, sed spiritualis, id est ille cujus mens illuminatur luce Spiritus sancti, et spiritualiter vivere docetur, judicat, id est, dijudicat et discernit omnia. Judicat enim et approbat quod recte, improbat autem quod peperam invenerit in operibus moribusque fidelium. Judicat omnia, sed ipse a nemine judicatur, id est a nullo homine, sed sola ipsa lege, secundum quam judicat omnia, quoniam verissime dictum est. « Oportet nos omnes exhiberi ante tribunal Christi (*II Cor. v.*) » Omnia ergo judicat, quoniam super omnia est, quando cum Deo est. Et a nemine judicatur, quoniam ipse supra cæteros est, et inferiores non possunt judicare superiorem. Et vere a nullo judicatur, utrum bene an male intelligat vel operetur. Quia quis animalis cognovit sensum Domini quem vir spiritalis habet? Nullus. Et ideo non potest inde judicare, quia de incognitis nemo recte judicat. Et quis est qui instruxit eum? id est docuit Dominum quid agere debuisset. Nemo homines enim Spiritum Dei non habentes, Dominum instruere volunt dum secum dicunt: Deus nunquam mori debuisset ut creaturam suam a potestate diaboli liberaret, sed

solo præcepto ut omnipotens, suos salvare debuisset. Et quia eum sic instruere volunt, inde contingit quia sensum ejus non cognoscunt. Nesciunt enim quia Deus justus non debuit in hac re uti virtute potentiae, sed ratione justitiae. Vel taliter littera secundum alios codices potest legi. *Quis enim cognovit sensum Domini, aut quis instruxit eum?* Sensus namque Domini est, quo hæc fecit, per quæ sapientia mundi probatur stulta, negans posse fieri quæ facta sunt. Quem sensum nullus est qui cognoverit, ut si displiceat illi, emendare velit consilium Dei. Quia quicumque cognovit, laudat sapientiam et potentiam Dei. Quis cognovit sensum Domini nostri Jesu Christi? Sed nos spirituales *sensum Christi habemus*, id est participes facti sumus scientiæ Christi per acceptionem Spiritus sancti. Et ideo animales homines vel pseudoapostoli, nos judicare non possunt, qui sensum Domini habemus, quem illi ignorant.

CAPUT III.

« Et ego, fratres, non potui loqui vobis quasi spiritualibus, sed quasi carnalibus. Tanquam parvulis in Christo lac vobis potum dedi, non escam. Nondum enim poteratis, sed nec nunc quidem potestis, adhuc enim estis carnales. Cum enim sit inter vos zelus et contentio, nonne carnales estis, et secundum hominem ambulatis? Cum enim quis dicat: Ego quidem sum Pauli, alius autem, ego Apollo, nonne homines estis? Quid igitur est Apollo? quid vero Paulus? Ministri ejus cui creditis. Et unicuique sicut Dominus dedit. Ego plantavi, Apollo rigavit, sed Deus incrementum dedit. Itaque neque qui plantat est aliquid, neque qui rigat, sed qui incrementum dat, Deus. Qui plantat autem et qui rigat, unum sunt. Unusquisque propriam mercedem accipiet secundum suum laborem (*Psal. Lxi; Galat. vi; Matth. xx.*) »

Nos spiritualibus spiritualia comparamus, quia sensum Christi habemus. Et tamen *fratres vobis non potui ego loqui quasi spiritualibus, sed quasi carnalibus*, quia vidi vos non posse capere spiritualia propter imbecillitatem sensus vestri. Et ideo sic locutus sum vobis, quomodo audire poteratis; nec propter ignorantiam vestram, sed propter infirmitatem vestram, arcana Dei vobis reticui. Non enim audientium animi sunt ultra vires tradendi, sed alta quæque et eminentia debent multis auditoribus contegi, et vix paucis aperiri. Et inchoantibus quidem vel infirmis non alta et mystica, sed quædam quæ capere possint prædicanda sunt, perfectis vero profunda et mystica sunt dicenda. Sed timendum et cavendum est, ne sub hac occasione dicta pseudoapostolorum vel quorumlibet hæreticorum, velut ea quæ carnales capere non possunt, non solum excusatione dealbanda, sed etiam laudanda videantur. Unde sciendum est, quia ipse Christus crucifixus, quo velut lacte parvulos aluisse se dicit Apostolus, id est ipsa vera caro, in qua facta est vera mors ejus, et vulnera vera confluxi, sanguinisque percussi,

A non eo modo a carnalibus, quo a spiritualibus cogitantur. Et illis est lac, istis cibus. Quia, etsi non audiunt amplius, intelligunt amplius. Non enim æqualiter mente percipitur, etiam quod in fide pariter ab utrisque recipitur. Hoc igitur primitus cognitum, quod ea ipsa quæ simul audiunt spirituales atque carnales, pro suo quique modo capiunt, illi ut parvuli, isti ut majores, illi ut lactis alimentum, isti ut sibi solidamentum, nulla videtur esse necessitas, ut aliqua secreta doctrinæ taceantur et abscondantur fidelibus parvulis, dicenda seorsum majoribus, id est intelligentioribus, nisi quod solidus cibus, qui perfectis congruit, parvulis non proficit, dum non capitur ab eis, et ea quæ fortes sublevant, infirmos gravant, hoc enim ipsum quod Apostolus se non judicavit scire in eis nisi Christum Jesum et hunc crucifixum, ipsis non potuit loqui quasi spiritualibus, sed quasi carnalibus, quia id sicut spirituales capere non poterant. Quicumque autem spirituales inter eos erant, idem quod illi qui tanquam carnales erant, audiebant, spirituali intellectu ipsi capiebant, ut sic intelligatur quod ait: *Non potui loqui quasi spiritualibus, sed quasi carnalibus*, ac si diceret: Non potuistis quasi spirituales, sed quasi carnales capere quod loquebar. Quasi carnalibus, inquit, locutus sum vobis. Et hoc tam diligenter feci, quod *tanquam parvulis* cognitione in Christo *dedi vobis potum lac*, id est facilem doctrinam, dulcem et nutrientem, *non escam*, id est non robustam spiritualium rerum doctrinam, fieri tamen, sicut præmisimus potest, ut id quod dicitur, et parvulus lac, et grandibus esca sit; sicut in principio erat Verbum, et Verbum erat apud Deum, et Deus erat Verbum (*Joan. i*), et parvuli bibunt, et grandes mandunt. Lac tamen præcipue per carnem Salvatoris est expressum parvulis. Quomodo enim mater cibum comedit, ut per carnem trahat ad infantem lac factum, sic cibus angelorum Dominus Verbum caro factum est, et factus est lac. Lac quippe nostrum Christus humilis est: cibus noster, idem ipse Christus æqualis Patri. Lacte nutrit, ut pane pascat. Qui parvulus est, sugat ab uberibus Ecclesiæ lac omnium sacramentorum temporaliter pro æterna nostra salute gestorum, ut nutritus atque roboratus perveniat ad manducandum cibum æternæ divinitatis. Talibus nunc dicitur: *Lac vobis potum dedi, non escam*. Et quare? Quia *nondum poteratis escam percipere*, quandiu vobiscum eram, *sed nec nunc quidem potestis*, quia *adhuc estis carnales*, id est potius sensum carnis quam spiritus sectamini. Isti propterea quod sæculi adhuc voluptatibus serviebant, carnales erant, quamvis jam baptizati essent, et Spiritum sanctum accepissent. Nam quia post baptismum ad veterem vitam relapsi fuerant, ideo carnales appellantur. Ubi vero dicitur nondum vel non adhuc, profecto non desperatur, si eo tenditur, ut si aliquando quod nondum est. Adhuc enim, inquit, estis carnales, et ostendens unde sint carnales, *cum enim*, inquit, *sit inter vos zelus*, id est *invidia et contentio*, id est *litigatio verborum*,

nonne carnales estis, qui in carne, id est in homine confiditis, et secundum hominem ambulatis? id est in pejus proficitis. Ac si dicat: Qui discordes mentes ducitis, nonne adhuc ex reprehensibili humanitate peccatis? Homo enim hoc loco per culpam nominatur. Cum autem dixisset eos carnales, non ait, secundum carnem ambulatis, sed secundum hominem, quia et hoc voluit intelligi, secundum carnem. Nam utique si culpabiliter quidem secundum carnem, laudabiliter autem secundum hominem ambularetur, id est viveretur, non exprobrans diceret, secundum hominem ambulatis. Nam secundum hominem ambulare, hoc est carnalem esse. Qui autem non ambulat secundum hominem, sed secundum Deum, profecto non ambulat et secundum seipsum, quia et ipse est homo. Qui vero non secundum se, sed secundum Deum ambulant, non homines, sed dii vocantur (*Psal. lxxxii; Joan. x*). Et vere, inquit, zelus et contentio est in vobis, et secundum carnem ambulatis. Quia cum quis vestrum dicat, ego quidem sum Pauli, alius autem dicat, ego sum Apollos, nonne homines estis? Sicut enim gloriantes in Deo et omnem gratiam ab ipso sperantes, dii vocantur a Deo adoptati, ita et qui in homine gloriantur, homines dicuntur. Deos enim vel angelos esse cupit Apostolus, quos arguit quia homines sunt, id est in his contentionibus non quæ Dei sunt, sed quæ hominis sapiunt. A sua vero persona incipit, ne forte putaretur per invidiam magis personas aliorum destruere, ostendens magnum errorem esse, et ad Dei contumeliam pertinere, quando Deo prædicato, gloria datur hominibus; et spes quæ in Deo ponenda est, ponitur in hominibus: dicente Scriptura: « Maledictus homo qui spem ponit in homine (*Jer. xvii*). » Quid enim minus est a gentilitate, dum gloriam quæ danda est Creatori, datur creaturæ, id est homini? Et quando quidem alius vestrum dicit: Ego sum Pauli, alius autem: Ego Apollos, atque in his doctoribus vano errore gloriamini, igitur respondete mihi, Quid est Apollos, quid vero Paulus, qui adhuc major est. Et si vos respondere nescitis, ego respondeo quod non sunt Deus qui det, sed per quos Deus det, quia ministri sunt ejus cui credidistis. Et quia ministri sunt, spes in his ponenda non est, sed in Deo cujus ministri sunt. Illi enim gratiarum actio deferenda est, cujus donum est, non servis quos et inavitos oportet dispensare. Ministri sunt, et hoc non uno modo, sed sicut Dominus dedit unicuique, id est sicut voluit et sicut divisit singulis officia ministerii. Nam ego ipso dante plantavi, id est evangelizando vos ad fidem converti, et Apollos rigavit, id est utpote episcopus vester imbre sui eloquii, postquam in fide fundati estis, corda vestra rigavit. Non tamen nos, sed Deus incrementum dedit proficiendi vobis. Nos enim qui forinsecus loquimur ad aures vestras ita sumus quasi operarii adhibentes culturam forinsecus ad arborem, sed incrementum dare non possumus, nec fructus formare. Ille autem qui vos creavit, et redemit et vocavit per fidem et Spiritum

A sanctum, habitans in vobis, nisi loquatur vobis intus, sine causa nos perstrepimus. Interior ergo magister est, qui docet. Christus docet, inspiratio ipsius docet, ubi illius inspiratio et illius unctio non est, forinsecus inaniter perstrepunt verba, nam et agricola arborem potest plantare, aquam foris adhibere et diligentiam culturæ, sed non potest folia pomæque formare. Excedit enim hoc humanam humilitatem, excedit angelicam sublimitatem nec omnino pertinet nisi ad Creatorem, et quia solus Deus dat incrementum, itaque neque qui plantat, id est qui in fide fundat, est aliquid dando quidquam ex se, neque qui rigat, id est qui vel baptizat, vel postea mores instruit, sed Deus qui dat incrementum, ipse valet ad salutem, id est illius unctio quæ vos docet intrinsecus. Frustra quippe operarii omnia moliretur extrinsecus, nisi Creator intrinsecus latenter operaretur. Neque plantator, neque rigator est aliquid ad salutem eorum quæ rigantur sive plantantur, quia et plantata solent mori, et rigata ad effectum fecunditatis non pervenire, nisi det Deus vegetantem gratiam. Quantum ergo ad honorificentiam pertinet Dei, nihil est homo. Quantum vero ad ministerium pertinet, necessarius est ut honorificetur quasi servus, non ut aliquid de illo speretur ad injuriam Dei. Deus solus est, in quo gloriantum est, quia dat incrementum. Sed qui plantat et qui rigat, unum sunt, id est ambo ministri sunt, quamvis diversa sint illorum officia, unum sunt, id est ambo sunt homines, et idem concorditer de Deo sentiunt. Unum sunt, id est indifferentes. Posses enim videri quod etsi nihil ex se dant, tamen magis Deus per hunc quam per illum daret. Ideo dicitur quia unum sunt, id est non plus gratiæ confert unus quam alter, quia solus Deus dat per eos. In dando non differunt, sed in labore et mercede, quia unusquisque eorum accipiet propriam mercedem a Domino secundum suum laborem, id est qui magis laboravit, majus præmium hebet; et qui minorem per tulit laborem, minorem percipiet remunerationem. Deus enim reddet unicuique secundum opus ejus (*Rom. ii*). Unde patet neutrum illorum esse auctorem salutis, et ideo non esse gloriantum in eis.

Dei enim sumus adjutores, Dei agricultura estis, Dei ædificatio estis. Secundum gratiam Dei quæ data est mihi, ut sapiens architectus fundamentum posui. Alius autem superædificat. Unusquisque autem videat quomodo superædificet. Fundamentum enim aliud nemo potest ponere, præter id quod positum est, quod est Christus Jesus. Si quis autem superædificat super fundamentum hoc, aurum, argentum, lapides pretiosos, ligna, fenum, stipulam, uniuscujusque opus manifestum erit. Dies enim Domini declarabit, quia in igne revelabitur, et uniuscujusque opus quale sit ignis probabit. Si cujus opus manserit quod superædificavit, mercedem accipiet. Si cujus opus arserit, detrimentum patietur. Ipse autem salvus erit, sicut tamen quasi per ignem. »

Mercedem percipiemus, quia *Dei adjutores sumus* in colendo agro illius. Nam ei quem ipse per internam gratiam infundit, nos exhortationis voce concurrimus; hoc quod ille per spiritum agit intrinsecus, nos exterius ministerio vocis adjuvamus: et tunc solum nostra exhortatio ad perfectionem ducitur, si in corde fuerit Deus qui adjuvet. Nos sumus adjutores Dei, et vos *estis cultura agri Dei, et ædificatio templi Dei*. Et nos eum adjuvamus, dum agrum cordis vestri, quem ipse per internam gratiam excolit, nos aratro prædicationis excolimus; ac nostræ mentis ædificium, quod ipse ad inhabitandum sibi construit, et nos construere laboramus. Ager enim Dei colitur, dum vitia de populo exstirpantur fidelium, et virtutes inseruntur ut crescant et fructificent. Ædificatio ejus instruitur, quando *Ecclesia* exstruitur his qui fundamento fidei superponuntur, ut in altum surgant aliis alios portantibus, vel quando mens fidelium construitur impositione virtutum, ut dignum Deo fiat habitaculum. Dixi quia Dei ædificatio estis, et hujus ædificationis fundamentum ego posui, et hoc non a me feci, sed *secundum gratiam Dei quæ data est mihi*, ut dignus essem prædicare Evangelium Dei, et in humanis cordibus ponere fidei fundamentum. Unde apparet hoc Dei esse quod feci, non hominis. Secundum gratiam Dei, id est secundum apostolatam a Deo gratis mihi datum. Posui in ædificio vestræ mentis fundamentum, id est fidem Christi, et hoc utens discretionem, ut *sapiens architectus*, id est princeps ædificii qui fundamentum domus ædificandæ ponit in loco firmo ex fortibus et quadratis lapidibus. Sapiens architectus est, qui juxta disciplinam auctoris collocat fundamentum, id est qui juxta traditionem Salvatoris evangelizat fidem. *Alius autem superædificat*. Superædificat quisque prædicationem apostolorum superveniens aut bonus aut malus doctor prædicat. Sed *unusquisque videat quomodo superædificet*, id est ut superpositum ædificium congruat fundamento, ne si obliquum fuerit et frivolum, ruinam faciat manente incolumi fundamento. Quia si etiam male ille docuerit, Christi nomen permanet, quod est fundamentum, doctrina autem mala peribit. Videat, inquam, quomodo superædificet, non quomodo fundamentum ponat, nam *fundamentum aliud nemo potest ponere, præter id quod a me positum est, quod est Christus Jesus*, id est fides Christi Jesu. Ideo nemo potest ponere aliud fundamentum, quia nec hæretici docere valent nisi sub Christi nomine. Aliter enim commenta errorum suorum commendare non valent, nisi interposito Salvatoris nomine prædicent, ut res contrarias et absurdas nominis dignitas acceptabiles faciat. Fundamentum permanet, sed quod superædificatur, si inutile fuerit, non stabit, sed tantum illud quod utile est, si superaddetur, permanebit. Quia *si quis superædificat super hoc Christi nominis fundamentum aurum, argentum, lapides pretiosos*, per quæ tria designatur præclara doctrina, vel ligna, fenum, stipulam, per quæ significatur va-

ria et frivola et corrupta doctrina, *unusquisque opus in novissimo die manifestum erit*, id est unusquisque doctrina in judicio erit omnibus manifesta, utrum bona an mala fuerit. *Dies enim Domini hoc declarabit*. Dies judicii vocatur dies Domini, non quod omnes dies non sint ejus, sed per excellentiam hoc dicitur, et ad differentiam humani diei. Dies enim præsentis temporis est dies hominis, quia in isto agit homo quod vult; sed ille dies erit Domini, quia in illo faciet Dominus quod justum erit, reddens unicuique secundum opus ejus (*Matth. xvi*), et ideo declarabit ille dies qualitatem unusquisque operis, *quia in igne revelabitur*, id est manifestabitur idem dies, qui nunc omnes latet, et tunc omnibus erit notus. Cum enim viderint omnes ignem illum ante faciem judicis per totum diffundi orbem, scient adesse diem judicii. Vel Dominus in igne illo revelabitur, id est apparebit omnibus bonis et malis. Unde et Thessalonicensibus dicitur: « In revelatione Domini Jesu de celo cum angelis virtutis ejus in flamma ignis (*II Thess. i*). » Et ignis ille probabit quale sit opus unusquisque, id est an sit firmum an solubile. Ignis probabit opus, id est doctrinam unusquisque. Quia enim per ignem examinatio fiet, si in aliquo non invenerit quod exurat, manifestabit illum bonum fuisse doctorem. Mala vero et adultera doctrina idcirco per ligna et fenum et stipulam significata est, ut ostenderetur fore ignis esca. Vere ignis opera singulorum probabit. Nam *si cuius opus quod ipse superædificavit, manserit, mercedem accipiet*. Quia sicut aurum et argentum et lapides quos ignis non consumpserit, ita et bonus magister incorruptibilis permanebit. Cumque nihil in illo sordis inventum fuerit et pravæ doctrinæ, accipiet cum gloria mercedem remunerationis perpetuæ. Si vero *cujus opus arserit*, id est alicujus doctrina prava in igne defecerit, talis operarius *detrimtum patietur*, id est deorsum atteretur suppliciis. *Ipsæ autem salvus erit*, quia non interibit substantia qua constat: sicut et doctrina ejus mala peribit, quæ est accidens. Quod tamen non de hæretico doctore debet intelligi, sed de catholico qui non recte docuit. Nam et in libris sanctorum doctorum quos authenticè legit Ecclesia, nonnunquam inveniuntur quædam prava vel hæretica, non tamen pro his vel libri vel auctores damnantur. Perlegat eorum libros prudens lector, et inveniet esse verum quod dico. Et ipse salvus erit, *sic tamen quasi per ignem*, ut salus hæc non sine pœna sit. Salvus quidem erit, sed tamen pœnam ignis patietur, ut per ignem purgatus fiat salvus, et non sicut periti, æterno igne in perpetuum torqueatur, ut ex parte prosit illi in perpetuum credidisse. Potest et aliter intelligi verius: Ego fundamentum, inquit, posui, alius autem superædificat. Ac si dicat: Posito fundamento, id est fide fundata in vobis, nihil ulterius ad me pertinet ut superædificem, sed alterius est superædificare, id est, ejus qui fidem habet est ut bona opera superædificet. Credientis est superædificare. Sed unusquisque videat quod

modo superædificet, id est cujusmodi opera superaddat, scilicet utrum maluerit contemplativæ vitæ adhærere, et continenter absque jugo uxoris vivere, quod quidem melius est et laudabilius consilium, an magis expetat activam vitam et uxoris vinculum, quod infirmum est et minus laudabile. De superædificatione bonæ operationis, solummodo videndum est qualem quisque velit eam eligere, quia multa sunt genera bene operandi; sed de fundamento eligendo nulli datur potestas, quia non est nisi unum fundamentum, id est una fides, quam nemo valet mutare, sicut nituntur pseudoapostoli. Fides Christi Christus est in nobis, qui per fidem habitat in cordibus nostris (*Ephes. iii*). Et hoc est fundamentum, ex quo surgit totum bene vivendi ædificium. Neque enim fides hæc intelligenda est otiosa (*Jac. ii*), sed quidquid boni poterit, operabitur per dilectionem (*Galat. v*). Non enim fides dæmonum, qui et credunt et contra miscunt, ac Filium Dei continentur Jesum (*Matth. viii*; *Marc. v*; *Luc. viii*), potest accipi in fundamentum, quia non est quæ operatur per dilectionem, sed quæ exprimitur per timorem. Fides itaque Christi, fides gratiæ Christianæ, id est ea fides quæ per dilectionem operatur, posita in fundamento, neminem perire permittit. Sed si quis superædificat super fundamentum hoc aurum, argentum, lapides pretiosos, ligna, fenum, stipulam, uniuscujusque opus manifestum erit. Quisquis bene vivit ac Deum honorat et laudat, non inhærens ex dilectione terrenis rebus; sed desiderans æternam patriam, et aut vendens omnia sua, distribuensque pauperibus (*Luc. xviii*), aut possidens tanquam non possideat, et utens hoc mundo tanquam non utatur (*I Cor. vii*), iste superædificat aurum, argentum, lapides pretiosos. In auro sensus occultus designatur, in argento sermo docens, in lapidibus pretiosis opera Deo placentia. Aurum sapientiæ, quod in occulto sensu ejus est et in cordis arcano, splendet vero lumine Dei, superædificat iste; et argentum, id est nitorem sanctæ eloquentiæ qua docet alios; et lapides pretiosos, id est exempla virtutum et bonorum operum, quibus adornat ea quæ loquitur sive cogitat. Qui vero amat adhuc sæcularia, et negotiis terrenis implicatus est, ac vinculis quibusdam et affectionibus carnis deditus est, domui suæ et conjugii ac possessioni (*ibid.*), et tamen Christianus est, ita ut cor ejus non recedat a Christo, et nihil præponit fundamento, iste superædificat ligna, fenum, stipulam, per quæ non absurde possunt intelligi rerum sæcularium licite concessarum tales cupiditates, ut amitti sine dolore non possint; per ligna scilicet duræ et graves, per fenum vero et stipulam, parvæ et leves. Sed uniuscujusque opus manifestum erit in fervore tentationis. Dies enim Domini declarabit, dies utique tribulationis (*Soph. i*). Præsentis enim temporis tribulatio cruciat electos divino disponente judicio, quia tempus est ut incipiat judicium de domo Domini (*I Petr. iv*). Propterea dies tribulationis appellatur dies Domini, id est dies judicii. Quia,

A inquit, in igne revelabitur. Eandem tribulationem vocat ignem, sicut alibi legitur. « Vasa figuli probat fornax, et homines justos tentatio tribulationis (*Eccli. xxvii*). » Et uniuscujusque opus quale sit probabit ignis tribulationis. Ignis enim iste talis debet intelligi ut ambo per eum transeunt, id est et qui ædificat super hoc fundamentum aurum, argentum, lapides pretiosos, et qui ædificat ligna, fenum, stipulam. Ignis enim tribulationis in hac interim vita probat opus utriusque, si duobus accidat fidelibus, uni scilicet cogitanti quæ sunt Dei, quomodo placeat Deo, id est ædificanti super Christi fundamentum aurum, argentum, lapides pretiosos: alteri cogitanti quæ sunt mundi, quomodo placeat uxori (*I Cor. vii*), id est ædificanti super fundamentum ligna, fenum, stipulam. Illius enim opus non exuritur, quia non ea dilexit, quorum amissione crucietur. Exuritur autem hujus, quoniam sine dolore non pereunt, quæ cum amore possessa sunt. Et hoc est quod dicitur, si cujus opus manserit. Manet opus, quando quisque cogitat quæ sunt Domini, quomodo placeat Deo. Quod superædificavit, mercedem accipiet, id est unde cogitavit, hoc sumet. Nec solum post mortem, sed et in hac vita habet suam requiem anima contemnentis omnia. Si cujus opus arserit, id est igne tribulationis consumptum fuerit, detrimentum patietur, quia quod dilexit, non habebit. Ipse autem salvus erit, quia nulla eum tribulatio ab illius fundamenti stabilitate semovet. Sic tamen quasi per ignem, quia quod sine illicito amore non habuit, sine urente dolore non perdet. Qui enim ædificat amorem terreorum super fundamentum regni cælorum, id est super Christum, ardebit amor temporalium rerum, et ipse salvus erit, si in fundamento firmus permanserit, id est si Christum ante omnia sic dilexerit, ut ab ejus amore separari non possit. In rerum temporalium amissione patietur detrimentum, et per ignem quemdam doloris perveniet ad salutem. A quo dolore atque detrimento, tanto est quisque securior, quanto temporalia vel minus amaverit, vel tanquam non habens habuerit. Tale aliquid etiam post hanc vitam fieri incredibile non est, nonnullos scilicet fideles per ignem quemdam purgatorium, quanto magis minusve bona temporalia dilexerunt, tanto citius salvari. Nam de quibusdam levibus culpis esse ante corporum resurrectionem purgatorius ignis creditus est, pro eo quod Veritas dicit, quia si quis in Spiritum sanctum blasphemiam dixerit, neque in hoc sæculo remittetur ei, neque in futuro (*Matth. xi*). In qua sententia datur intelligi quasdam culpas in hoc sæculo, quasdam autem in futuro posse laxari. Quod enim de uno negatur, consequens intellectus patet, quia de quibusdam conceditur. Sed tamen hoc de parvis minimisque peccatis fieri posse credendum est, sicut est assiduus otiosus sermo, immoderatus risus, vel peccatum curæ rei familiaris, quæ vix sine culpa vel ab ipsis agitur, qui qualiter culpa declinari debeat, sciunt, caveri possunt, aut

in non gravibus rebus error ignorantiae. Quae cuncta A etiam post mortem gravant, si adhuc in hac vita positae non fuerint relaxata. Nam pensandum sollicitate est, quia et Apostolus illum dixit per ignem posse salvari, non qui super hoc fundamentum ferum, aes vel plumbum aedificat, id est peccata majora, et idcirco duriora, atque tunc insolubilia, sed ligna, fenum, stipulam, id est peccata minima atque leviora, quae ignis facile consumat. Hoc tamen sciendum est, quia illic saltem de minimis nihil quisque purgationis obtinebit, nisi bonis hoc actibus in hac vita adhuc positus, ut illic obtineat, promereatur. Sciendum est etiam quia gravior est ille ignis quam quidquid potest homo pati in hac vita. Omnia enim tormenta quae hic sunt, multo faciliora sunt. Et tamen homines ne ea patiantur, B quidquid ab homine fuerit jussum, faciunt. Quanto melius est, ut faciant quae jubet Deus, ne illa graviora patiantur?

« Nescitis quia templum Dei estis, et Spiritus Dei « habitat in vobis? (II Cor. vi.) Si quis autem templum Dei violaverit, disperdet illum Deus. Templum enim Dei sanctum est, quod estis vos. »

Dixi vos esse aedificationem Dei, et me posuisse fundamentum hujus aedificationis: unde patet vos esse templum Dei. Et hoc nescitis? *Nescitis quia templum Dei estis?* Templum Dei estis secundum fidem, templum Dei eritis aliquando secundum spiritum. Templum Dei estis, ut ipse in vobis per fidem maneat, et perfectionem sapientiae ac cognitionis secretorum suorum in vobis ponat. Templum Dei C estis, et spiritus Dei habitat in vobis. Non ait, et Spiritus Dei sanctificat et purgat vos, ut Deus habitet in vobis, sed ait: *Spiritus Dei habitat in vobis.* Utique in templo suo Deus habitat. Nam quid templum Dei est, nisi habitaculum Dei? Deus ergo est Spiritus sanctus, cujus sumus templum et habitaculum. Neque enim templum haberet, nisi Deus esset. *Nescitis, inquit, quia templum Dei estis, et Spiritus Dei habitat in vobis?* De his supra dixerat, quia « animalis homo non percipit ea quae sunt Spiritus Dei (supra ii). » Non ergo percipiebant cognitionem Dei Spiritus, qui habitabat in eis; et habitante in se Spiritu sancto, adhuc animales, nondum spirituales erant, quia nondum poterant habitantem suum spiritum cognitione percipere. Habitare autem ideo et in talibus dicitur, quia in eis occulte agit ut sint templum ejus. Idque in proficientibus et proficiendo perseverantibus perficit. Nec mirum videri debet quod quisque aliquid habeat, quodque habet ignoret: ut enim taceam de omnipotentis divinitate, quis facile scientia percipit quid sit anima? et quis non habet animam? Postremo, ut certissimi noverimus quod parvuli in Christo non percipientes quae sunt Spiritus Dei, id est non intelligentes, habent tamen Spiritum Dei, eos ipsos quos supra dixerat animales, ut praemisimus, et parvulos increpat nunc, dicens: *Nescitis quia templum Dei estis, et Spiritus Dei habitat in vobis?* Non

enim hoc ignorare debuissent. Templum enim Dei estis. Sed cavete ne templum ejus violatis, quia si quis templum Dei violaverit, id est sive suum, sive alterius corpus corrumpendo, sive populum Ecclesiae scindendo, *disperdet illum Deus*, id est diversis suppliciiis illum perdet et corpore et anima. Ideo cavetis corporalia peccata, ne offendatis eum cujus estis templum, ne recedat a vobis, et in ruinam vertamini, cavete et pravam doctrinam pseudoapostolorum, ne per eam violetur mens vestra. Et merito Deus violatorem sui templi disperdet, quia *templum Dei est sanctum*, ex quo Dei templum esse coepit, id est a tempore baptismi, *quod templum estis vos*. Hoc repeliit ut illos compungeret, qui turpiter viventes corpora sua violando corruperant.

« Nemo se seducat (Coloss. ii). Si quis inter vos « videtur esse sapiens in hoc saeculo, stultus fiat ut « sit sapiens (Rom. i). Sapientia enim hujus mundi « stultitia est apud Deum. Scriptum est enim: Com- « prehendam sapientes in astutia eorum (Job. v); et « iterum: Dominus novit cogitationes sapientium, « quoniam vanae sunt (Psal. xciii). »

Itaque nemo gloriatur in hominibus. Templum Dei estis, et ideo *nemo se seducat*, id est nemo sibi blandiatur propria vanitate deceptus, ut de violatione templi Dei impunitatem sibi in futuro promittat, quasi Deus peccata carnis negligat. Vel nemo se seducat, id est nemo seipsum ducat scorsum a veritate catholica in vanos errores, declinando post pseudoapostolos, quasi sapientiam eorum diligens: Hoc nemo faciat. Sed *si quis videtur inter vos esse sapiens in hoc saeculo*, id est si quis ex vobis stulta sapientia saeculi, quae est commentum hominum, putatur esse sapiens, *stultus apud se fiat*, id est vanam sapientiam abjiciat, et nihil sibi scire videatur, *ut sit in Deo veraciter sapiens*. Ad veram enim sapientiam venire non potest, qui falsae suae sapientiae fiducia decipitur, sicut pseudoapostoli, qui volentes videri in mundo sapientes, neque Deum habere Filium, neque incarnationem veram esse, neque carnem posse resurgere praedicabant. Unde nunc bene doctor egregius illos Corinthiorum, quos carnaliter sapientes invenerat, ut sapientiam veram possint comprehendere, prius fieri stultos admonet. Et subdit quare: D Quia scilicet *sapientia hujus mundi stultitia est apud Deum*, id est quod mundus sapientiam, hoc Deus stultitiam judicat. Et dum facit Deus quod fieri posse negat mundus, sapientiam illius monstrat esse stultitiam, et vere stultitiam. Nam *scriptum est* in libro Job: *Comprehendam*, id est undique coarctabo, et quasi juxta reledistrictionum mearum concludam, *sapientes mundi in astutia eorum*, ut nihil eis astutia valeat ad effugiendam manum meam, vel ad faciendum quod contra me machinantur, sive ad impediendum quod ego contra sapientiam eorum facere disposui. Hanc sententiam Eliphaz sic protulit: « Qui apprehendit sapientes in astutia eorum (Job v). » Divina tamen sapientia reprehendit amicos Job de locutione, dicens: « Non estis locuti coram me rectum, sicut

servus meus Job (*Job* XLII). » Cur ergo Paulus illorum sententiis tanta auctoritate utitur, si hæc ipsorum sententiæ Dominica reprehensione quassantur? Vel quomodo dicta eorum quasi prava respicimus, quæ Paulus ex auctoritate astruit? Aut quomodo attestatione Pauli recta putabimus, quæ per semetipsum Dominus non recta delinivit? Sed utraque hæc citius, quod non sint diversa cognoscimus, si ejusdem Dominicæ sententiæ subtilius verba pensamus; qui cum diceret: « Non estis locuti coram me rectum, » illico adjunxit, « sicut servus meus Job. » Liquet ergo quia quædam in dictis eorum recta sunt, sed melioris comparatione superantur. Nam inter aliqua quæ irrationabiliter dicunt ad beatum Job, fortes multas sententias proferunt; sed comparatæ dictis fortioribus, vim fortitudinis amittunt. *Et iterum:* de eadem re scriptum est in Psalmo: *Dominus novit cogitationes sapientium quoniam vanæ sunt*, scilicet hominum, quia et ipsi sapientes judicabant se solos esse homines, cæteros autem quasi bruta animalia. Sapientes sæculi non noverunt cogitationes Dei, quoniam justæ sunt; Dominus autem novit cogitationes sapientium, quoniam vanæ sunt. Nihil valet eis astutia eorum contra Deum, quia ipse novit cogitationes eorum. Quæ vanæ sunt, id est inanes et falsæ, quia putant esse vera quæ falsa sunt, et falsa quæ vera sunt. Vanæ sunt cogitationes sapientum, qui hic beati esse et a seipsis beati fieri mira vanitate voluerunt. Et quando quidem humanæ cogitationes sunt vanæ, atque consilia sapientum improvida sunt et infirma, qui se sibi vel aliis prodesse sine Deo putant, itaque nemo gloriatur in hominibus, quasi melius ab uno quam ab alio possit accipere. Nihil enim recte sapiunt, nihil possunt homines per seipsos; et ideo non in ipsis gloriandum est, sed in illo per quem sapiunt et possunt.

« Nemo gloriatur in hominibus. Omnia enim vestra sunt, sive Paulus, sive Apollo, sive Cephas, sive mundus, sive vita, sive mors, sive præsentia, sive futura, omnia enim vestra sunt, vos autem Christi, Christus autem Dei. »

Nemo gloriatur in hominibus, doctoribus vel baptizatoribus. Non in quibusdam doctoribus gloriari debetis, nec singulos vos defendere, cum omnibus utamini. Nam non solum isti, sed et omnia sunt vestra, id est ad serviendum vobis data, et non est gloriandum nisi in rebus excellentioribus. Et ideo in solo Christo, qui super vos est, vobisque subdidit omnia, gloriandum vobis est, non in his quæ subjecta sunt vobis. Omnia enim vestra sunt, ut vestræ utilitati serviant, etiam illa quæ inter homines sunt digniora, quoniam sive Paulus eligatur, sive Apollo, vestri sunt, ut vobis ministrent, sive etiam Cephas, id est Petrus, qui primus est omnium apostolorum. Et ita patet omnes apostolos esse vestros; eum primus sit vester. Ad hoc enim missi sunt omnes apostoli et prædicatores, ut vobis vel fratribus vestris qui sunt per orbem, verbum salutis ministrent. Et quod fratres vestris faciunt, vobis facere

credendi sunt, quia et vobis prosunt. Omnia sunt vestra, sive prædicatores, sive etiam mundus, si de illo secundum Dei voluntatem sentitis, et decretos cursus in Dei voluntate ponitis, sive vita, præsens est vestra, si modeste illam et cum Dei gloria transigitis, sive mors vestra est, id est dissolutio corporis et animæ vobis servit, quoniam vobis transitus est de hac miseria ad æternam beatitudinem, sive præsentia, si sic eis utimini, ne offendatis, sive futura, si ea credentes magis optatis, utpote meliora et æterna. Vel mundus est vester, id est quatuor elementa mundi serviunt vobis, quoniam ad hoc sunt condita, et vita vobis præsens servit, si in ea emendami, et æternam salutem promeremini, et mors, si pro Christo mori libenter parati estis spe futurae promissionis. Et præsentia bona, quibus sustentati Deo servire possitis; et futura, quorum spe serviat. Hæc sunt vestra, omnia enim, quæcumque sunt, vestra sunt ad possidendum. Sed vos estis Christi possessio, non hominis, ut quomodo omnia iudicio vestro concessa sunt et vobis subjecta, sic et vos Christo subjiciamini, quia per ipsum esse coepistis et in prima origine, et in regeneratione. Cur ergo ad injuriam Christi de hominibus speratis, cum ipse vobis et homines et omnia subjecerit, ut illi subjiciamini, et in illo spem omnem ponatis. Christus autem Dei est, ut proprius Filius faciens voluntatem ejus, ut et vos Christi voluntatem faciatis. Vos estis Christi, Christus vero Dei, et ita mediante Christo, vos estis Dei. Subditur autem Christus Deo, non tanquam dissimilis aut alterius naturæ, sed, ut dictum est, tanquam Patri Filius. Hactenus de gloria pseudoapostolorum locutus est Apostolus, hic de suo contemptu incipit loqui, quoniam minus de illo sentiebant aliqui Corinthiorum. Ideoque monet ut hoc de illo sentiat homo, quod et Deus qui illum elegerat, et dicit:

CAPUT IV.

(*I Cor.* IV.) « Sic nos existimet homo, ut ministros Christi et dispensatores ministeriorum Dei. Hic jam quaeritur inter dispensatores, ut fidelis quis inveniat. »

Ita, inquit, divinitus est ordinatum, ut omnia sint vestra, sive Paulus, sive Apollo, sive Cephas, vos autem sitis Christi. Et cum hoc ita sit, nec magis nec minus æstimet homo de nobis, quam quod Deus constituit; sed sic nos existimet ut ministros Christi, id est nec nos tanquam viles contemnat, nec tanquam per nos aliquid possimus, in nobis gloriatur; sed eum in nobis honoret, cujus ministri sumus in Evangelio quod vobis offerimus. Et æstimet nos non dominos, sed dispensatores ministeriorum Dei, quoniam ministeria ejus vobis distribuimus secundum cujusque modum. Quoniam nec verborum strepitui, nec humanæ sapientiæ imitebatur Apostolus, intelligi debuit ministeria Christi dispensare, in quibus non verba, sed virtus fulgebat, et per quæ non homo, sed Deus videretur gloriosus. Collega enim piscatorum, non aliter quam illi Christum prædica-

bat. Cum ergo se ministrum Christi et dispensatorem ministeriorum Dei probat, pseudoapostolos notat, et negat esse Christi quod tradunt, per id quod a traditione apostolica dissentiunt. Ego, inquit, et cœnervi mei sumus dispensatores ministeriorum æternæ salutis, docendo et cætera sacramenta distribuendo. Et multi quidem sunt dispensatores, per quorum ministerium pervenitur ad æternam salutem. Sed iam quæritur inter dispensatores baptizando, manus imponendo, Eucharistiam dando, ut quis inveniatur fidelis, ut possit credi quod bene dispenset. Neque enim omnes fideliter hoc agunt, sed plerique fraudem faciunt, dum quæ sua sunt quærun, non quæ Jesu Christi (*Philipp. 11*), et cœlestis ministerium in usum terreni lucri convertunt, nec salutem subjectorum, sed propria commoda quærun. Nonnulli qui non ita sola terrena quære videntur, aut verecundia, aut timore, aut commendationis suæ causa constanter arguere delinquentes trepidant. Et ideo quæritur quis inter eos inveniatur officium suæ dispensationis fideliter agens, ut solius Domini sui lucra sine fraude quærat. Vel ex hoc reprehenduntur subjecti, quod hic jam quæritur ab eis, quod in futuro sæculo quærendum est a Domino, scilicet quæritur et discutitur ab eis, ut inter dispensatores inveniatur aliquis fidelis, id est idoneus et dignus ad sacra Dei ministeria dispensanda cæteris. Unde talis inquisitores jure sunt reprehendendi, quia quod Deus in alia vita faciet, ipsi jam hic facere volunt; et præpositorum suorum vitam, a quibus ipsi debent judicari, judicare præsumunt; et a dignioribus digniora sibi sacramenta dispensari credunt, cum non juxta sanctitatem dispensantis, sed juxta devotionem percipientis sit magis aut minus utile sacramentum sanctorum.

« Mihi autem pro minimo est ut a vobis judicer, aut ab humano die, sed neque meipsum judico. Nihil enim mihi conscius sum, sed non in hoc justificatus sum. Qui autem judicat me, Dominus est. »

Vos, inquit, ita judicatis, alios dispensatorum esse fideles, alios non fideles; sed mihi pro minimo est ut a vobis judicer fidelis aut non fidelis. Non enim justi humana judicia, sed æterni Judicis examen aspiciunt, atque ideo derogantium verba despiciunt. Unde nunc derogantibus Corinthiis Apostolus dicit: Quia mihi pro minimo est ut a vobis judicer. Quos enim in tantis vitiis reprehendit, minimum ducit ab his se judicari, quia sicut justi non erant, sic justis judicare non poterant: aut ab humano die, id est ab humana luce et ratione; hoc est a legibus humanis judicari pro minimo deputabat. Supergressus enim humanam justitiam cœlesti justitiæ studebat. Vel ab humano die, id est ab humano intellectu, qui non videt occulta et potest falli. Sive ab humano die, id est ab hominibus, dum sunt in suo die, et non est dies Domini. Humanus enim dies dicitur, in quo judicant homines, quia erit et dies Domini, in quo judicabit et Dominus. Exiguum mihi est a vobis judicari, vel ab

humano die, sed neque ego meipsum judico, qui melius novi me quam vos. Et ita periculosum est vobis judicare de ignotis. Quomodo enim potestis dijudicare conscientiam meam? aut quomodo examinare potestis quo animo faciam quidquid facio? Quantum possunt homines de alio judicare, plus homo utique de se; sed Deus plus de homine, quam homo de se. Tanta enim est profunditas in homine, ut lateat ipsum hominem in quo est, sed Dominum latere non potest. Jure itaque doctor egregius humanas laudes aut vituperationes parvipendens, ait: Mihi pro minimo est ut a vobis judicer, aut ab humano die. Qui nec in corde suo, unde se reprehendero posset, inveniens, adjungit: Sed neque meipsum judico. — Nihil mihi conscius sum. Nullius utique peccati sibi conscius erat. Sed quia legerat: « Delicta quis intelligit? (*Psal. xviii*) » sententiam temperavit, ne forte per ignorantiam deliquisset, et addidit: Sed non in hoc justificatus sum. Videns enim quia ei ad perfectionem sanctitatis nec suum judicium sufficeret, ait non se in hoc justificatum. Cur vero non sibimetipsi de se credit, causam reddidit, cum subjunxit: Qui autem judicat me, Dominus est. Ac si aperte diceret: Nec meo de me judicio credendum existimo, quia ille judicat me, cujus ego judicium non comprehendo. Ab eo enim qui me judicat, examinari me subtiliter seio. Recte enim me egisse recolo, sed tamen de meritis non præsumo, quia ad ejus examen vita nostra ducitur, sub quo et virtutes nostræ trepidant (*Isa. Lxiv*). Nec ego, nec vos me judicatis; sed qui me judicat, Dominus est, qui sine hæsitacione novit omnia.

« Itaque nolite ante tempus judicare, quoadusque veniat Dominus, qui et illuminabit abscondita tenebrarum, et manifestabit consilia cordium, et tunc laus erit unicuique a Deo. »

Quando quidem ergo nec meipsum judico, sed Domino me judicandum reservo, itaque vos ipsos exemplo mei a judicando compescentes, nolite judicare ante tempus, quia nondum est tempus judicandi. Neque enim vera de actis hominum sentire nunc potestis, quia homines estis, sed aliter quam sunt de his suspicamini. Et si suspiciones non potestis continere quia homines estis, judicia tamen, id est diffinitas firmasque sententias continete, ne judicatis quidquam ante tempus, id est ante diem, quia adhuc nox est, nec potest videri quod in die videbitur. Ante illud tempus nolite judicare, sed quoadusque veniat Dominus ad judicium, et die suo cuncta illustret. Qui et illuminabit, id est aperta faciet, abscondita tenebrarum, id est latentia peccata [al. peccatorum] quæ mentem obscurant, et manifestabit consilia cordium, id est bonas cogitationes, quæ maturiore consilio et pertractione rationis in corde versabantur. Tunc enim omnibus in luce constitutis, nihil latebit proximum in proximo, sed omnia omnibus patebunt. Nihil enim occultari poterit eorum quæ gesta et cognita sunt. Ibi et simplicitas et hypocrisis apparebit, ut et qui despectus

habebatur, forte appareat dignus; et qui aliquid a case putabatur, inveniatur reprobis. Tunc ergo tempus erit sine errore iudicandi. Nunc autem quisquis in cogitatione a rectitudine exorbitat, in tenebris peccat. Unde nos tanto minus debemus aliena corda audacter reprehendere, quanto scimus quia visu nostro non possumus alienæ cogitationis tenebras illustrare. Sed tunc patebunt omnia. *Et tunc laus erit unicuique a Deo*, bene agentis vel cogitanti. Nunc enim ignoratur ab hominibus quis sit laude dignus. Tunc a Deo, quia id laudabitur et diligetur a proximo in proximo, quod ne lateat, in ipso illuminabitur a Deo. Quod de solis electis dictum est, quos Deus laudabit, et laude dignos monstrabit (*Matth. xxv*). Ac contra unicuique reproborum erit tunc improperium.

« Hæc autem, fratres, transfiguravi in me et Apollo propter vos, ut in vobis discatis ne, supra quam scriptum est, unus adversus alterum infletur pro alio. »

Dixi non gloriandum in nobis. Sed hæc, o fratres, transfiguravi in me et Apollo, ut in vobis non gloriemini, propter vos, id est propter utilitatem vestram, ut in vobis, qui majores sumus, discatis ne agendo supra quam scriptum est, ubi legimus: « Qui gloriatur, in Domino gloriatur (*supra*); » vel: « Maledictus homo, qui confidit in homine (*Jer. xvii*), » unus infletur adversus alterum pro alio, id est pro doctore vel baptizatore, vel pro se. Me, inquit, et Apollo proposui figuram pro omnibus, ut ab omnibus abhorreatis sicut a nobis. Transfiguravit enim hæc in se et in Apollo, dum pseudoapostolorum glorias et traditiones perversas sub sua et Apollo persona evacuaret, summam illos designans, non sigillatim, ne forte major discordia in populo nasceretur. Nemo enim audiens suum nomen notari, vel ejus cui favet, contentus est tacere. Tacito autem nomine, si quis aliquid audierit, etsi intelligat, de se tamen dictum dissimulat. Sub hac ergo propositione evacuavit personas illorum, cum diceret: « Ego plantavi, Apollo rigavit (*Sup. iii*), » etc., ut in his discerent nihil dandum hominibus.

« Quis enim te discernit? Quid autem habes quod non accepisti? Si autem accepisti, quid gloriaris quasi non acceperis? Saturati estis, jam divites facti estis, sine nobis regnatis. Et utinam regnetis, ut et nos vobiscum regnemus! »

Non debet alter adversus alterum inflari pro alio doctore vel baptizatore. *Quis enim doctor vel baptizator te discernit?* Id est, verbi gratia, si baptizatus es a Petro, quomodo discernis ab eo qui baptizatus est a Paulo? Nihil discretionis est, a quocunque bonam doctrinam vel baptismum perceperis. Sed tu per traditionem pseudoapostolorum putas te quasi sanctiorem discerni a cæteris. Sed *quid habes* ab illis quod non a me accepisti? Quidquid enim ab apostolica traditione non descendit, pravum est. Sed si a me accepisti quidquid boni habes, *quid* in te vel in illis gloriaris contra me quasi non hoc idem a me

accepisti? Hoc dicitur contra illos, qui eadem quæ ab Apostolo acceperant audientes a pseudoapostolis, gloriabantur de magisterio eorum, quoniam ipsi pseudoapostoli per eloquentiam se commendantes, gloriam in se vertebant, cum Apostolus se contemptibilem videri fecisset, ut gloriam Deo faceret. Vel ita: Jubet Apostolus ut nemo in homine, sed in Domino gloriatur. Pseudo autem apostoli et quia ab illis fuerant seducti, se ipsos a seipsis justos fieri putantes, quasi hoc eis non Deus dederit, sed ipsi sibi, non utique in Domino, sed in semetipsis gloriabantur. Unde nunc unicuique talium dicit Apostolus: *Quis enim te discernit?* Quod ideo dicit, quia de massa illius perditionis, quæ facta est ex Adam, non discernit hominem ut eum faciat vas in honorem, vel in contumeliam, nisi Deus (*Rom. ix*). Sed quoniam homo carnalis et inaniter inflatus cum audisset, Quis enim te discernit, posset respondere vel voce, vel cogitatione, et dicere: *Discernit me fides mea, discernit me oratio mea, discernit justitia mea, mox Apostolus occurrit cogitationibus ejus et dixit: Quid enim habes quod non accepisti? si autem accepisti, quid gloriaris, quasi non acceperis?* Sic enim gloriantur quasi non acceperint, qui se a seipsis justificari putant, ac per hoc in seipsis, non in Domino gloriantur. Nihil enim huic sententiæ tam contrarium est, quam de suis meritis sic quemquam gloriari, tanquam ipse sibi ea fecerit, non gratia Dei. Vel, sicut diximus, non debes inflari pro aliquo Doctorum, cujus te specialiter profiteris discipulum: quis enim eorum te discernit a pereuntibus? Nullus, sed solius Dei gratia, et tu te putas discerni per merita tua. Sed quid boni habes quod non accepisti a Deo? Fecit Deus ut esses, et tu fecisti ut bonus esses? Absit. Si enim Deus dedit ut esses, et alius tibi dare potuit ut bonus esses, melior est ille qui dedit ut bonus esses, quam ille qui dedit ut esses. Sed nullus Deo melior. Igitur a Deo accepisti et esse et bonum esse. Sed si ab illo accepisti, quid gloriaris quasi non acceperis? id est quasi a teipso habes. *Jam saturati estis.* Ironice legendum, non affirmative. Jam, id est, antequam sitis apti ad percipiendam escam, saturati estis spirituali cibo doctrinæ, id est videmini vobisipsis sufficienter validis sapientiæ escis repleti; et antequam paupertate exuti sitis, jam, ut putatis, spiritualiter divites facti estis, id est abundanter animæ divitiis, quæ sunt virtutes, repleti, et sine nobis, id est, sine auxilio nostro, regnatis, id est vitæ vestræ moderamina justè disponitis, ut vos æstimatis, glorianes de his quæ a pseudoprædicatoribus accepistis. Secundum vestram æstimationem regnatis. *Et utinam regnetis, ut et nos regnemus vobiscum,* id est sequamur vos, cum vos dedignemini sequi nos. Ac si dicatur: *Utinam non essetis falsa gloria decepti; fortasse enim simul regnaremus.* Regnare nunc sanctorum, est de spe et promissis Christi securos esse, et in adversis quæ propter nomen Christi accidunt, gaudere.

« Puto enim quod Deus nos novissimos apostolos

« ostendit tanquam morti destinatos. Quia specta- A
« culum facti sumus mundo et angelis et homi-
« nibus. »

Nos revera regnamus, et timeo ne sine vobis. Nam *puto*, id est putare credor, *quod Deus ostendit nos apostolos novissimos*, id est omnium vilissimos tanquam ad nullam utilitatem, sed ad mortem reservatos. Hoc secundum quod aestimatis *puto*, quasi quod nullatenus putandum est. Quod enim nunc dicit, *puto*, increpationem significat eorum quibus loquitur, non aestimationem ejus. Ideo sine vobis regnemus, quia per mala quæ patimur, Deus ostendit nos apostolos oculis superborum novissimos, id est abjectissimos, de quibus non curet, *tanquam morti destinatos*, id est ad mortem directos. Quod per hoc videtur, *quia spectaculum facti sumus huic mundo*, id est amatoribus hujus mundi, qui quasi ad spectaculum conveniunt ad aspicienda supplicia nostra. Sed per hæc omnia magis probamur esse chari Deo, qui sic nos passionibus glorificat. Ideo non (ut vos credebatis) *puto* quod Deus vilissimos nos fecerit, quia me humilio ut Deum exaltem. Vel idcirco debetis nobiscum regnare, quia *puto* et pro certo scio quod Deus nos apostolos novissimos ostendit mundo, quibus nulli succedent apostoli tam perfecti, tam necessarij salutis hominum, quales apparebunt in novissimo tempore Elias et Henoch, quos Deus reservat ut filios Israel ab Antichristi seductione liberent. Ita enim et nos misit ut a seductione pseudoapostolorum vos liberemus, et pro vita vestra mortem sustinamus, sicut et illi passuri sunt. Nos ostendit novissimos, id est illis novissimis præconibus consimiles in passione adversitatum, tanquam morti corporis ob liberationem aliorum destinatos quia *spectaculum facti sumus huic mundo*, quorum injurias omnes publice expectant in conspectu totius populi. Nam, sicut omnes concurrunt ubi jocus celebratur vel pugiles certant, aut aliquod monstrum producitur; sic omnes boni vel mali conveniunt ad aspiciendas pœnas nostras. *Spectaculum sumus et angelis et hominibus* tam bonis quam malis. Quia et inter angelos sunt sancti angeli, quibus bene vivendo placeamus, atque inter homines sancti viri, quibus placeat vita nostra; et sunt nequissimi homines, qui irrideant bonam vitam nostram. Et D hæc arma sunt dextra et sinistra, quibus hostem nostrum superamus, si nec prosperis corrumpimur, nec adversis frangimur (*II Cor. vi*). Boni angeli conveniunt ad spectaculum passionis nostræ, ut nos præsentia sua confortent, et cæteros ad exemplum nostri certaminis incitent; mali vero, ut gaudeant, cum nos suos adversarios cruciari viderint, et cæteros a fide motu pœnarum deflectant. Boni homines, ut laudent; mali ut insultent. Boni, ut exemplo nostro confortentur; mali, ut ex pœnis nostris delectentur.

« Nos stulti propter Christum, vos autem prudentes in Christo. Nos infirmi, vos autem fortes. Vos nobiles, nos autem ignobiles. Usque in hæc

horam et esurimus, et sitimus, et nudi sumus. et colaphis cædimur, et instabiles sumus, et laboramus operantes manibus nostris (*Act. xx; I Thess. ii; II Thess. iii*). Maledicimur, et benedicimus; persecutionem patimur, et sustinemus; blasphemamur, et obsecramus. Tanquam purgamenta hujus mundi facti sumus, omnium peripsema usque adhuc. »

Nunc ostendit quomodo illi regnent sine veris apostolis, et quomodo apostoli stultis appareant vilissimi. Et est increpatio cum ironia. *Nos*, inquit, *stulti* sumus habiti gentibus et Judæis *propter Christum*, quem ad salutem humani generis crucifixum prædicamus; *vos autem prudentes estis in Christo*, quia nihil de illo prædicare vel dicere vultis, quod humanæ sapientiæ stultum videatur; et ita vultis esse Christiani, ut non prudentiam amittatis sæculi. Quod est quasi duobus dominis velle servire more veterum Samaritanorum, qui et Deum colebant et idola (*Matth. vi; Luc. vi; IV Reg. xvii*). *Nos infirmi* sumus, qui vicem lædentibus non reddimus, nec resistimus; *vos autem fortes* estis, qui potenter adversantibus resistitis, et eos fortitudine sæculari reprimitis. *Vos estis nobiles*, id est reverendi et gloriosi, *nos autem ignobiles*, id est despecti et viles. Hæc omnia quæ negare videtur, affirmat; et quæ quasi confirmare videtur, negat. Irascentis enim verba sunt, qui negando confitetur et confitendo negat. Deinde confirmando loquitur, ostendens per partes infirmitatem suam, ut regni sui virtus amplior enjtecatur. *Usque in hæc horam*, id est a primâ die conversionis vel prædicationis nostræ usque nunc, penuriam cibi et potus et vestimentorum passi sumus, et etiam cæsiorem colaphorum, quia libere et juxta veram fidem Christum sine aliqua adulatione prædicantes, et gesta pravorum arguentes, gratiam apud homines non habuimus, sed colaphos ab eis pertulimus, *et instabiles sumus*, quia semper fugant nos et persequuntur, ne in uno loco diu manentes, plures doceamus; *et laboramus operantes manibus nostris*, ut habeamus unde vivamus, cum nemo det, quia non solum gratiam apud homines, ut dictum est, non habemus, sed etiam ab his accipere indignum est, qui errori student. Quod idcirco facere maluimus, quoniam libertatem arguendi amittit et peccat, qui ab eo accipit, qui ideo dat ne corripatur. *Maledicimur* a pravis hominibus, et nos e contrario *benedicimus* illos hortando ad bonum; *persecutionem patimur* ab illis, et licet ipsa persecutio sit gravis, tamen *sustinemus* illam, et non refugimus nec resistimus, *Blasphemamur* ab illis, quia dicunt nos seductores et maleficos, *et obsecramus* Deum pro illis, vel illos obsecramus ne blasphement, sed permittant sibi reddi rationem. *Et tanquam purgamenta hujus mundi facti sumus*, id est de quibus mundus inquinetur, et quibus abjectis purgetur, sicut domus purgatur a sordibus, quæ de illa projiciuntur, hoc est, usque adeo blasphemamur ab impiis, et viles judicamur, quod facti sumus illorum

reputatione tales, tanquam essemus in tantum peccatores et sordidi, ut totus mundus nobis sublatis omnimoda sorde purgetur : et etiam reputati sumus *omnium peripsema*, id est adeo superflui et immundi atque inutiles usibus hominum, sicuti purgamentum ferri vel corium pomi, quod undique aufertur, ut ipsum pomum sit aptius ac dulcius ad comedendum. Peripsema enim dicitur rasura aut limatura cujus-eunque rei, sive purgamenta pomorum, et nos ita nullius pretii nulliusque utilitatis esse judicamur, ut rasura ligni vel ferri seu stanni vel corium pomi. Et hæc sustinimus principio prædicationis nostræ usque adhuc, id est usque in præsens. Per hæc omnia probatur Apostolus cum similibus prudens in Christo et fortis et nobilis, per quæ videbatur stultus et infirmus ac ignobilis. Contemptibilis enim et despectus fiebat etiam apud Corinthios, pro quibus hæc quæ hucusque memoravit, mala passus est. Et quoniam humilitatem suam nihil proficere in his videbat, queritur dolore commotus tantam subjectionem et injurias nullum fructum habere potuisse, sed quod deterius est, in pejus profecisse. Qui et subjungit :

« Non ut confundam vos, hæc scribo, sed ut filios meos charissimos moneo. Nam si decem millia pædagogorum habeatis in Christo, sed non multos patres. Nam in Christo Jesu per Evangelium ego vos genui. Rogo ergo vos, imitatores mei estote, sicut et ego Christi (*Ephes. v; Philip. iii*). Ideo misi ad vos Timotheum, qui est filius meus charissimis et fidelis in Domino, qui vos commonefaciat vias meas, quæ sunt in Christo Jesu, sicut ubique et in omni Ecclesia doceo. »

Aspera blandis mitigat ut salutaris medicus. Nam quia graviter eos in his omnibus quasi latenter momorderat, ne ipsi ad iram provocati admonitiones ejus spernerent, ostendit se in omnibus quæ dixit paternam charitatis affectionem erga illos habuisse, ut libentius ei obedirent. Duri namque fuissent Corinthii si hac admonitione (qua ut filii dilecti a patre tam humane obsecrantur) emolliti non fuissent. Non ideo tamen, inquit, hæc scribo, ut vos confundam, id est ut tantam verecundiam vobis faciam, sed potius ut corrigamini moneo vos, id est ad meliora exhortor per hæc ut filios meos charissimos, spirituales scilicet, pro quibus tot labores et tot flagella passus sum, et quibus chariores nullos habeo. Vere filii mei estis, quia ego pater vester, nam si habeatis in Christo decem millia pædagogorum, id est tot instructores perfectos, quot vobis essent necessarii; quod per mille intelligitur, qui numerus perfectus est in scientia et in observantia decem præceptorum legis, quæ per denarium numerum figurantur: vel si decem millia pædagogorum, id est quantameunque erudientium multitudinem in observantia præceptorum quæ non sit in Judaismo, sed in Christo; si inquam pædagogos, id est eruditores habeatis, sed, id est tamen, non multos patres habeatis, imo. unum, quia ego solus vos genui, quia so-

lus ego vobis prædicavi, ad hoc enim selectus sum, ut annuntiem gentilibus salutem per Jesum Christum (*Act. xiii, xxii*), per Evangelium, id est per evangelicæ doctrinæ prædicationem, non in me, sed in Christo Jesu, id est in fide Christi Jesu et in novitate Christiana, quia in novam vitam me primam prædicante venistis. His dictis, ostendit nullum posse eo affectu diligere illos, quo ipse diligebat. Quis enim alienos filios sic diligit ut suos? ac per hoc monita ejus, qui tanta pro illis passus est, non debent spernere. Unus vero Pater Deus est, non ut hoc nomen cæteris tollatur, sed ne gratia Dei, qua in æternam vitam generamur, naturæ vel potestati vel etiam sanctitati cujusquam tribuatur. Quia, inquit, vos genui, ergo ex debito rogo vos ut filios, estote imitatores mei in his quæ facio et sustineo, sicut et ego sum imitator Christi in his quæ fecit et sustinuit, quia filiorum est imitari patrem. Vult enim illos imitatores sui esse, ut sicut ipse multa exitia pro illorum salute annuntiando Jesum Christum, ab incredulis et cæteris infidelibus passus est, et non cessit aut a fide descivit, sed constanter prædicavit, dummodo per dies et noctes evangelizaret illis donum gratiæ Dei; ita et illi manentes in fide ejus et doctrina, non recipient pseudoapostolorum, id est apostolorum falsorum, prava dogmata vel commenta, sed resistant, contemnentes opprobria et detractio-nes, ut patri suo spirituali inviolatum atque immaculatum reservent affectum. Ideo, inquit, ut me imitemini tanquam boni discipuli fidelesque patri credientes filii, misi ad vos Timotheum, per hunc creditur missa epistola, qui est filius meus in fide charissimus bene agendo, et fidelis in Evangelii prædicatione, quam fideliter omnibus palam ministrat, in Domino, non in lucro terreno. Vel in Domino est filius meus, id est quem genui non in carne, qui vos commonefaciat, id est commoneat faciendo, aut qui vos commonefaciat, id est admonendo vos instruat vias meas, institutiones, præcepta et documenta mea, quæ sunt in Christo Jesu, id est secundum voluntatem et doctrinam ipsius, in nullo enim discordo, et ideo sunt tenendæ, sicut ubique terrarum, et, id est, in omni ecclesia doceo, ideoque sunt authenticæ. Per istum reverti illos voluit ad regulam a se traditæ veritatis, ut commoniti verbis et exemplis operum ejus respicerent, cognoscentes non perperam se fuisse ab apostolo Paulo edoctos, quando eadem quæ sibi præcepta erant, tenere omnes ecclesias discerent.

« Tanquam non venturus sim ad vos, sic inflati sunt quidam. Veniam autem cito ad vos, si Dominus voluerit, et cognoscam non sermonem eorum qui inflati sunt, sed virtutem. Non enim in sermone est regnum Dei, sed in virtute. Quid vultis? In virga veniam ad vos, an in charitate et spiritu mansuetudinis? »

Opus erat Timotheum mitti, quia tanquam non sim ultra ad vos venturus, sic de philosophorum doctrina et oratorum eloquentia tam imperterrite sunt

quidam inflati inter vos. Ideo erant inflati et unus adversus alterum gloriantes, quoniam putabant apostolum Paulum non amplius ad se venturum: solent enim sæpissime discipuli a malis retrahi timore adventus magistri. Ob hoc etiam indignabantur quidam Corinthiorum, quia non veniebat ad eos, non desiderio, sed superbia, quod quasi indignos visitatione sua illos haberet, cum magis Apostolo studium hoc fuerit, ut de indignis faceret dignos. Habebat ergo votum euudi, sed majora erant quæ agebat. Vos, inquit, putatis me non esse venturum, vel indignamini quia non venio, sed *veniam ad vos cito, si Dominus voluerit*, cujus voluntas semper supponenda est, juxta illud Jacobi: « Dicitis: Si Dominus voluerit, et si vixerimus faciemus hoc vel illud (*Jac. iv.*) » Vel si Dominus voluerit, id est nisi culpa mea impenderit, ut sciamus non ex nobis, sed ex Dei cuncta pendere judicio. Veniam, inquit, ad vos cito, si Dominus voluerit. Qui enim dixit, veniam ad vos, ostendit se velle, monstrat se cupere, brevem promittit adventum. Sed ut cautius hoc loquatur, infert, si Dominus voluerit, ut si non veniret, Dominus eum justa causa retinere monstraretur, causa utique indignitatis et infidelitatis eorum. Veniam, inquit, et cognoscam, id est probabo, non sermonem terrenæ sapientiæ aut humanæ sapientiæ eorum qui de hujus mundi sapientia sunt inflati, sed ipsorum virtutem in bona operatione vel miraculorum perpetracione, quia et Dominus non dixit de Pharisæis aut hominibus subdolis: Ex verbis eorum, ex vestimentis ovium quibus persæpe induuntur, cognoscetis eos (*Matth. vii*); sed, ex fructibus, id est ex operibus. Ideo non sermonem humanæ faciundæ, ut diximus, sed virtutem bonæ vitæ cognoscam et approbabo, quia *regnum Dei non est in sermone, sed in virtute*, id est nemo per eloquentiam aut faciundiam sæcularem acquirit regnum Dei aut meretur, sed per virtutem honorum operum; nec splendore sermonis commendatur regnum Dei, sed virtute signorum, sicut nec bonum vinum hedera commendat. Veniam quidem quam citissime potero, sed *quid horum vultis?* Scilicet vultis ut veniam ad vos in virga, an in charitate et spiritu mansuetudinis. Superius dixerat eos indigere pædago, ac per hoc pueros significabat; dein eos amari a se ut filios charissimos; nunc ut prudens pater eis virgam, non mortem proponit; spiritum mansuetudinis et charitatis, non furoris aut odii. Virga enim austeritatem et correctionem significat. Et nunc verba terroris Apostolus infert, ut pudorem passi qui inflati erant, humiliarentur et se corrigerent, quia si incorreptos inveniret, in illos necesse haberet virgam exercere, alios excommunicando, id est a fidelium communione et consortio privando, alios dure increpando, alios corporaliter (ut decet patrem) flagellando. Si vere se dignos præpararent ad excipiendum eum, ut immunes a crimine invenirentur, tunc ad illos veniens lætitiâ haberet quasi pater cum filiis suis charissimis. Et hoc est quod dicit: Vultis ut veniam ad

vos in virga, id est rigore justitiæ et correptionis, ubi etsi sit charitas, non tamen videtur esse; an in charitate, id est non in occulto charitatis affectu, sed in manifesta et aperta dilectione, ut bona suppleam, et spiritu mansuetudinis? optabilius primum expetere, quam carere boni patris diligentis adventu, quamvis rigoroso, meliora nempe sunt vulnera diligentis, teste Salomone, quam oscula blandientis (*Prov. xxvii*). Spiritu mansuetudinis, id est animo mansueto et indulgenti, ut parcam peccatis vestris et per hilarem vultum ac dulcia verba mansuetudinem animi mei vobis ostendam.

CAPUT V.

Omnino auditur inter vos fornicatio, et talis fornicatio, qualis nec inter gentes, ita ut uxorem patris sui aliquis habeat. Et vos inflati estis et non magis luctum habuistis, ut tollatur de medio vestrum qui hoc opus fecit.

Opus est ut veniam ad vos in virga, non in charitate aut spiritu mansuetudinis, nisi vos ipsos correxeritis, quia omnino, id est ab omnibus vel omnibus modis, auditur, sciur, narratur atque percipitur a me et ab aliis quod sit inter vos notissima fornicatio, quæ nemini est licita, et talis fornicatio, qualis nec inter gentes, id est tam infamis et nefaria fornicatio auditur, quod nec talis est inter gentes, ita ut uxorem patris sui aliquis habeat, id est quidam ex vobis et cum noverca fornicetur. Nec testibus res indiget, quoniam publice perpetrata est. Utque hoc crimen nimis exaggeret, dicit nec ab illis tale committi qui Deum nesciunt, ut hinc ostendat qua pœna mulctandus sit iste, qui sub terribili et divina justitiâ constitutus, tanti sceleris crimen admiserat, et adhærentes ei non immunes ab eodem crimine demonstret. Talis fornicatio apud vos auditur. Et vos, cum tantum scelus inter vos sit, inflati estis superbia, et non magis hoc fecistis quod faciendum esset, id est non habuistis luctum, non luxistis super peccato fratris, nec compassi estis illi, ut tollatur, id est ejiciatur, de medio vestri qui hoc opus fecit, ut omnes uno consilio abjiciatis eum de communitate vestra, ut confusus agat pœnitentiâ, et non inficiantur cæteri, id est nec perpetrent alii simile, aut illud idem facinus propter indulgentiam, quia omnes videmini sceleris participes, quandiu patimini reum tanti criminis vobiscum incorruptum convenire. Cum enim omnes crimen ejus sciatis, nec tergiversatione aliqua possit celari, pellendus est de cœtu fraternitatis.

Ego quidem absens corpore, præsens autem spiritu (*Coloss. ii*), jam judicavi ut præsens, eum qui sic operatus est, in nomine Domini nostri Jesu Christi congregatis vobis et meo spiritu eum virtute Domini Jesu, tradere hujusmodi Satanæ in interitum carnis, ut spiritus salvus sit in die Domini nostri Jesu Christi.

Vos, inter quos ipse corporaliter est, non eum corripuistis, nec expulistis; et ego quidem absens corpore, præsens autem spiritu, id est absens quidem

facie, præsens autem auctoritate spiritus, qui replet orbem terrarum virtute (*Sap. 1*), non mole, et nusquam abest, *jam judicavi eum qui sic operatus est, ut per eundem spiritum præsens*, ne ex solo auditu me putetis proferre sententiam: *jam sine mora judicavi eum in nomine*, id est in vice, *Dominus nostri Jesu Christi*, cujus legatione fungor, *congregatis vobis*, id est ut omnes in unum sine dissentione conveniatis, et eum de communione fidelium ejiciatis. *Congregatis vobis in unum et meo spiritu*, id est auctoritate mea, quam habeo per Spiritum sanctum, qui mihi datus est *cum virtute*, id est potestate *Dominus Jesu*, qui est salvator hominum, *judicavi tradere Satanæ hujusmodi virum*, id est ut tradatis eum Satanæ pelendo de Ecclesia, quoniam mea auctoritas et Christi virtus in hoc vobis cooperabitur. *Judicavi hujusmodi reum tradere Satanæ in interitum carnis*, ut corporaliter eum vexet, et sic ille resipiscat. Magna quippe arte magisterii traditus est ipsi in poenam, cui sponte est subtractus in culpa, ut qui auctor fuerat ad vitium nequitiae, ipse flagellum fieret disciplinae. Hanc enim potestatem dicitur Apostolus habuisse, ut si quem excommunicasset, statim ille corripereetur a diabolo et vexaretur, quantum et quandiu vellet Apostolus. Nam cum dicit, tradere Satanæ in interitum carnis, interitus carnis significat validam corporis afflictionem per diabolum factam. Vel in interitum carnis, id est ut carnalis voluptas in eum interiret, traditus est Satanæ. Et hoc ut spiritus ejus *salvus sit in die Domini nostri Jesu Christi*, id est anima ejus salva sit in die judicii. Quoniam in spiritum ejus Satanæ non accepit potestatem dum corporaliter afflixit, et ideo salvus ad Domini extremum judicium reservatur. Vel salvus sit spiritus, id est anima ejus salva fiat in die Domini, id est si quando cor illius visitet Dominus, si quando illi Dominus in corde luceat.

« Non est bona gloriatio vestra. Nescitis quia modicum fermentum totam massam corrumpit » (*Gal. v.*)

Non est bona gloriatio vestra. Superbitis, cum potius lugere debueritis pro fratre tam graviter peccante, et eum a vobis remove, ne illi consentientes, pollueremini ejus contagione. An *nescitis quia modicum fermentum*, id est modicum veteris pastæ, videlicet fermentatæ, *totam massam corrumpit*? id est totam dulcedinem novitatis mutat in acedinem vetustatis, ita et peccatum unius, quod cognitum non arguitur, multos contaminat, imo omnes qui norunt et non devitant, aut cum possint arguere, dissimulant. Non enim sibi videtur peccare, quando a nullo corripitur aut vitatur. Si quis vero potestatem non habet, ut eum quem scit reum, abjicere vel probare non valeat, immunis est. Modicum fermentum totam massam corrumpit, quia nonnunquam unum vitium vel quodlibet nequitiae fomentum veneno suo inficit multitudinem virtutum (212). Adverte, diligens le-

ctor: Dicendum est, teste Hieronymo, modicum fermentum totam conspersionem fermentat, in epistola ad Galatas (cap. v), eodem capite ubi carpit veterem interpretem, dicens sensum potius suum quam verba Pauli transtulisse, et mavult dici conspersionem quam massam; diffiniuntque conspersionem esse farinam aqua conspersam.

« Expurgate vetus fermentum, ut sitis nova conspersio, sicut estis azymi. »

Expurgate de vobis vetus fermentum, id est, ejicite de vobis et de medio vestrum veteris nequitiae fomentum, quod est in fornicatore, qui est membrum veteris hominis, et totam populi multitudinem sibi consentientem corrumpit. Expurgate igitur hoc fermentum, id est extra vos ejicite, purgantes vos ab eo, ne corrumpat in vobis dulcedinem virtutum, per iniquitatis suæ consensum. Ideo vos purificate ab hoc fermento *ut sitis nova conspersio*, id est nova in unitate conglutinatio, *sicut estis azymi*, id est sicut per baptismum facti estis a corruptione sinceri. Conspersio quippe est farina per aquam conglutinata, quæ vulgo dicitur pasta. Sed nova conspersio est, in quam fermentum adhuc missum non est. Ideo vocatur azyma, id est sine fermento. Ζύμα (zyma) enim Græce fermentum dicitur. Sitis ergo, inquit, nova conspersio, sicut estis azymi, id est sitis omnes unum quid per dilectionem, puri a corruptione peccati, novum hominem induti, sicut in baptismo facti estis azymi.

« Etenim Pascha nostrum immolatus est Christus. Itaque epulemur, non in fermento veteri, neque in fermento malitiæ et nequitiae, sed in azymis sinceritatis et veritatis. »

Nova conspersio debetis esse, quia *pascha nostrum*, id est paschale sacrificium nostrum, *immolatus est Christus*. Agnus quippe, quem Judæi in Pascha immolabant, vocabatur pascha, sicut et Lucas aperte declarat, dicens: « Venit autem dies azymorum, in qua necesse erat occidi pascha (*Luc. xxii*), » et secundum hunc loquendi morem, Christus noster dicitur pascha nostrum. Pascha enim Judæorum immolatus est agnus: pascha nostrum immolatus est Christus. Nam sicut Judæi per immolationem agni liberati sunt a potestate Pharaonis et satellitum ejus, ac mare transeuntes venerunt in desertum (*Exod. xii*), atque intersecto temporis spatio terram promissionis intraverunt, sic nos per immolationem Christi liberati sumus a potestate diaboli ac malignorum spirituum, ac per baptismum trajecti venimus ad hanc conversionem, in qua nunc velut in deserto sumus, atque ingressum supernæ hereditatis exspectamus, Judæi agno immolato liberati a servitute Ægyptia, septem diebus comedunt azyma; et nos Christo immolato liberati a servitute dæmoniaca, per omne spatium vitæ præsentis, quod septem diebus volvitur, azyma comedamus, id est satiemur bonis operibus sine admistione corruptionis

vitiorum. Azyma quippe (id est panes sine fermento) A comedimus, si recta opera sine corruptione vanæ gloriæ exercemus, si præcepta Dei sine admistione peccati adimplemus. Pascha etiam interpretatur *transitus*, et Christus pro nostra redemptione immolatus, pascha nostrum, id est transitus noster, quia per eum a diabolo transimus ad ipsum, et ab isto instabili sæculo ad ejus fundatissimum regnum. Ideo quippe ad eum permanentem transimus, ne cum mundo transeamus; et Christus est nobis transitus a vitiis ad virtutes, et a præsentis exilio ad supernam patriam, quia ideo pro nobis est immolatus, ut nos liberans faceret ita transire. Nova itaque conspersio debemus esse, id est omnes innovati et infusione Spiritus sancti unum per charitatem effecti, ut pascha manducare simus idonei, quia pascha nostrum immolatus est Christus, ad cujus esum invitamur. Ob hoc etiam talis conspersio debemus esse, quia ipse Christus est transitus noster, ut nos si dignos invenerit, transferat ad patriam vitæ. Et quia ipse est pascha nostrum, id est paschale nobis sacrificium, itaque epulemur, id est comedamus hoc pascha, si volumus esse liberi a dominio Pharaonis, id est principis hujus mundi, qui est diabolus. Vel quia Christus est pascha nostrum, id est transitus noster, itaque epulemur, id est comedamus immolatum pro nobis corpus ejus, ut per hoc ad vitam transire valeamus, quoniam aliter ad Deum transire non possumus (*Joan. XII, XIV, XVI*). Non enim ad vitam et gloriam nobis transire volentibus sufficit novam nos conspersionem et azymos esse, nisi cibo spirituali et viatico singulari spiritus noster adjuvetur, et infirmitas nostra corroboretur. Epulemur ergo, id est epulis corporis et sanguinis ejus reficimur, ita ut non simus in fermento veteri, id est in corruptione veteris conversationis, quia qui pascha vult legitime comedere, debet fermentum vetustatis abjicere. Neque enim cognovit quæ sit solemnitas novæ incorruptionis, qui adhuc per incontinentiam vetustæ corruptioni subjacet; et ideo epulemur, non in fermento veteri, ut sacramentum resurrectionis et incorruptionis percipientes corruptioni jam per vitia nulla subjaceamus. Epulemur, inquam, non in fermento veteri, id est non in consueto nobis quondam carnalium desideriorum fervore, neque in fermento malitiæ, qua ferveamus ad aliorum læsionem, et nequitiam, qua deficiamus a bono in nobis ipsis, sed potius epulemur in azymis sinceritatis et veritatis, hoc est, ut sinceritatis mundam faciat vitam, et veritas omnem fraudem excludat. In azymis sinceritatis, ut simus sine carie, id est sine fermento vitiorum corruptente nos; et veritatis, ut veritas bonorum operum sit in nobis.

« Scripsi vobis in epistola, Ne commisceamini fornicariis. Non utique fornicariis hujus mundi, aut avaris, aut rapacibus, aut idolis servientibus. Alioquin debueratis de hoc mundo exiisse. Nunc autem scripsi vobis non commisceri. Si is qui frater nominatur inter vos, est fornicator, aut

avarus, aut idolis serviens, aut maledicus, aut ebriosus, aut rapax, cum ejusmodi nec cibum sumere. Quid enim mihi de his qui foris sunt judicare? Nonne de his qui intus sunt vos judicatis? Nam eos qui foris sunt Deus judicabit. Auferte malum ex vobis ipsis. »

Nunc commoneo vos ab hoc purgare. Sed et sine hac admonitione debueratis facere, quia in alia jam epistola scripsi vobis ne commisceamini fornicariis. Epistolam quamdam quæ modo non habetur, miserat illis, in qua præceperat, ne conjungerent se fornicatoribus, et cæteris de quibus nunc dicitur. Sed quia non distinxerat de quibus fornicariis et criminosis diceret, Christianis scilicet an gentilibus, putaverunt Corinthii de fornicariis gentilibus eum dixisse. Quam eorum erroneam intelligentiam ipse modo corrigit, et quæ dixerat, interpretatur, dicens: Non utique fornicariis hujus mundi, id est gentilibus, sed a fratribus talibus scripsi recedendum. Quod vos non recte intellexistis, et ideo illum qui uxorem patris habebat, inter vos esse non ægre ferebatis. Sed utique, id est in veritate, dico, quia præcepi vobis ut non commisceamini fornicariis hujus mundi, id est qui ex toto pertinent ad hunc mundum, qui nihil cum cœlesti mundo habent, sed propter infidelitatem suam et desideria terrena filii hujus sæculi existunt. Fidelis enim, etsi fornicetur aut avarus sit, non est tamen ex toto hujus mundi, quia credit et sperat. Istud non præcepi, sed potius in illa epistola scripsi vobis, quod et nunc servare debetis, ut non commisceamini fornicariis fidelibus, aut avaris fidelibus, aut rapacibus, id est rapinas exercentibus, aut etiam idolis post baptismum servientibus, qui timore suppliciorum vel qualibet alia causa postquam ad fidem venerant, idolis serviebant et sacrificabant. Talibus apostatis fratribus ne commisceamini. Alioquin, id est si his commisceamini, debueratis de hoc mundo exisse, id est melius esset vobis mori. Compendium est male agentibus si citius moriantur, quam diutius in peccatis versentur. Vel non scripsi ut non commisceamini fornicariis infidelibus et cæteris qui necdum fidem habent, et sunt criminosi; alioquin, id est si præcepissem gentilibus non misceri, debueratis de hoc mundo exisse, id est necesse esset de mundana conversatione vos exisse, cum ubique sint tales. Non enim possunt homines in hoc mundo viventes nisi cum talibus vivere, nec eos lucrari possunt Christo; si eorum colloquium conviviumque vitaverint. Unde et Dominus cum publicanis et peccatoribus comedens, aiebat: « Non est opus sanis medicus, sed male habentibus (*Matth. x*). » Et: « Non veni vocare justos, sed peccatores (*Luc. v*). » Tunc quidem scripseram ut fornicarios et cæteros vitaretis, quod vos non recte intellexistis, quia non determinavi de quibus dicerem. Sed nunc in præsentis epistolâ determinate scripsi vobis non commisceri illis qui post baptismum talia faciunt. Ecce sine ambiguitate vobis hoc dico. Si is qui frater nominatur inter vos, id

est qui Christianitatis vocabulum portat, est fornicator, id est probatus in scelere fornicationis, aut avarus, id est immoderate pecunie coacervator, confidens in ea magis quam in Dei largitione, aut idolis serviens, id est ad idola quæ deseruerat recurrens, vel idolothyta comedens, aut maledicus, id est in usu habens maledicere alios, et male loqui de eis, aut ebriosus, id est non semel, sed per consuetudinem se inebriat, aut rapax, id est qui aliorum res violenter auferre consuevit, cum ejusmodi criminoso fideli, id est non solum cum isto qui in aliquo horum criminum fuerit inventus, sed etiam cum aliis qui similibus vitiis detinentur, præcipio vobis nec cibum sumere. Cum infidelibus non prohibet Apostolus cibum sumere, sed in sequentibus istius epistolæ dicit: « Si quis infidelium ad cœnam vos vocat, et vultis ire, omne quod vobis apponitur, manducate (infra x). » Plerumque enim per conviviorum participationem et confabulationem fidelis viri, infidelis dum fidelem diligit, ad fidem convertitur. Cum fideli autem, in quo prænotata criminina vel similia reperiuntur, non solum sacramenta, sed nec communem cibum sumere permittit, ut dum a cunctis vitatur, erubescat et se corrigat. Non tamen sic vitandus est talis, nisi aut sponte confessus crimen suum aut omnibus notus esset talis, aut in aliquo sive sæculari sive ecclesiastico iudicio nominatus atque convictus. Plerique autem boni Christiani propterea tacent et sufferunt aliorum peccata quæ noverunt, quia documentis sæpe deservuntur; et ea quæ ipsi sciunt, iudicibus ecclesiasticis probare non possunt. Quamvis enim vera sunt quædam, non tamen iudici facile credenda sunt, nisi certis indiciis demonstrantur. Et ideo non temere et quomodolibet, sed per iudicium auferendi sunt mali ab Ecclesiæ communionem, ut si per iudicium auferri non possunt, tolerantur potius, ne per se malos evitando quisquam ab ecclesia ipse discedens, eos quos fugere videtur, mittat ad gehennam. Ideo, inquit, determinate scripsi, si frater talis fuerit comprobatus, cum illo nec cibum sumere, nedum orare, quia quid mihi attinet iudicare de his, id est infidelibus, qui sunt foris, id est extra ecclesiam, ut eos vobis cavendos iudicarem sicut putastis. His enim blandiendum est, ut per amorem et dulcedinem possint Christo lucrari, sed nonne de his qui intus sunt, id est de fidelibus, vos iudicatis, et ecclesiastica censura putredinem vitiorum ab eis resecat, ut in hac vita pro culpis suis puniantur, et ad Dei iudicium purgati postmodum veniant? Iudicat etiam de his qui intus sunt, qui discernit cui fratri adhæreat, quem arguat, quem devitet. Illos tantum qui sunt intus, iudicatis, ne damnentur in futuro iudicio, nam eos qui foris sunt, non commisit vobis Deus iudicandos, sed ipse iudicabit eos in futuro secundum districtiorem justitiæ suæ, reddens eis digna supplicia. Superius de incognitis et ambiguis rebus, ac maxime de præposito dictum est: « Nolite ante tempus iudicare (supra iv); » hic autem osten-

ditur quod ecclesiastici viri de manifestis et certis culpis debent iudicare fratres suos. Et quia meum et vestrum est de his tantum qui intus sunt iudicare, ideo auferte malum hominem ex vobis ipsis, id est de cœtu vestro ejicite fornicatorem, cujus societate coinquinamini. Quod enim dicitur Auferte malum ex vobis ipsis, non sic esse intelligendum, ut ex ipso quisque auferat malum, sed sic potius, ut homo malus auferatur ex hominibus bonis, quod fit per ecclesiasticam disciplinam, satis indicat Græca lingua, ubi sine ambiguitate scriptum est ut intelligatur, hunc malum, non hoc malum.

CAPUT VI.

« Audet aliquis vestrum habens negotium adversus alterum, iudicari apud iniquos, et non apud sanctos? An nescitis quoniam sancti de hoc mundo iudicabunt? Et si in vobis iudicabitur mundus, indigni estis qui de minimis iudicetis? Nescitis quoniam angelos iudicabimus? Quanto magis sæcularia? Sæcularia igitur iudicia si habueritis, contemptibiles, qui sunt in ecclesia, illos constituite ad iudicandum. Ad verecundiam vestram dico. Sic non est inter vos sapiens quisquam, qui possit iudicare inter fratrem suum, sed frater cum fratre iudicio contendit, et hoc apud infideles? »

Occasione hujus iudicii incipit agere de iudiciis. In quibus multimode peccabant, quod contemptis fidelibus infideles iudices adibant, vel stultos iudices instituebant, et litigabant atque fraudabant, et alia hujusmodi faciebant. Non solum, inquit, ex hoc reprehensibiles estis, quod fratrem iudicandum non iudicatis, cum de his qui intus sunt, iudicare debeatis, sed etiam ex eo quod ad paganos iudices causas vestras ad iudicandum transfertis. Nam aliquis vestrum, id est aliquis ex vobis, habens negotium, id est causam contendendi, adversus alterum ex vobis fidelem, audet, id est tam audacter reverentiam Christianitatis conculcat, ut quærat iudicari apud iniquos, et non apud sanctos, id est apud infideles iudices, qui non sunt æquitatis amatores, et non apud Christianos, qui sancte et juste vos iudicarent. Quasi dicat: In hoc nimis audacter religionem sacram contemnitis, quod vestra negotia quæ inter vos debetis iudicare, ad iniquos iudices defertis. Infideles vocat iniquos, quia leges a Deo hominibus concessas sæpe spernebant, vel falsa interpretatione auctoritatem illorum idolis deputabant. Ideo potius suadet apud Dei ministros agere causam, quia illi facilius de timore Dei sententiam legis veram pronuntiant. In hoc peccatis quod ad sanctos negotia vestra iudicanda non deferitis. Debent enim ipsi et de talibus iudicare, quia et de mundo iudicabunt. Et utique qui ipsum mundum iudicaturi sunt, non indigni sunt ea iudicare quæ mundi sunt. Et hoc est: An nescitis quoniam sancti de hoc mundo iudicabunt? De hoc scilicet mundo, qui in erroribus et nequitatis est, quia est alius superior. De hoc mundo, id est de hominibus qui ad hunc mundum in-

mum pertinent, sancti iudicabunt, quia cum Christo venient ad iudicium (*Matth. xix*), et ejus æquitati omnino concordabunt, quando mundanam pravitatem damnabit. *Et si in vobis tunc iudicabitur mundus*, id est actio prava mundi, *indigni estis qui de minimis*, id est de his terrenis rebus, *judicetis*. In vobis iudicabitur mundus, si in vobis tunc non inventum fuerit opus eorum, qui solum mundum diligunt, si in actione similes mundanis hominibus et perfidis non apparueritis. Et si hoc fuerit, indigni estis nunc iudicare de minimis. Ideo cavete ne infidelium et pravorum opera faciatis, ad eundo paganos iudices, sicut cæteri qui ignorant Dominum. Adhuc probo quod sancti de terrenis iudicare possunt. Nam *nescitis quoniam angelos apostatas iudicabimus? Quanto magis sæcularia iudicare possumus*, quæ sunt inferiora? Nos qui supra naturam nostram Dei auxilio servavimus obedientiam, iudicabimus illos angelos, qui peccaverunt contra suam naturam, quia concordabimus justitiæ Dei condemnantis illos, et ex comparatione nostra damnabiliores apparebunt. Cum enim ipsi qui sublimioris et dignioris naturæ erant, et quos nulla fragilitas ab illo summo et incommutabili bono retraherat, per superbiam sponte sunt lapsi; nos vero imbecilles, quos carnis infirmitas ad peccatum traherat, et ad inferiora deprimebat, per humilitatem et justitiam omni nisu tetenderimus ad superna, merito damnabuntur atrocius respectu nostri, et consolatio nostra cruciabit illos durius (*Sap. v*). Et quia satis rationabiliter ostensum est, nos posse iudicare de istis sæcularibus *igitur si habueritis sæcularia iudicia*, id est de rebus sæculi, *contemptibiles illos qui sunt in ecclesia, constituite ad iudicandum*. Hoc est dicere: Qui minoris meriti sunt in ecclesia, et nullis magnorum donorum virtutibus pollent, ipsi de terrenis negotiis iudicent, quatenus per quos magna nequeunt bona, minima suppleantur, et qui penetrare intima nequeunt, saltem necessaria foris operentur, ut ipsi videlicet dispensationibus terrenis inserviant, quos dona spiritualia non exornant. Tales ex vobis ad iudicandum debetis constituere, non ad infideles iudicia vestra deferre. Et *ad verecundiam vestram dico*, id est verecundiam habere potestis ex hoc quod dico, scilicet: *non est inter vos quisquam sic sapiens, qui possit iudicare inter fratrem et fratrem suum, sed potius frater cum fratre iudicio contendit*, quod est malum, *et hoc apud infideles*, quod est pejus. Sapientem ex fidelibus vult Apostolus iudicem eligi, quia noverat Corinthios tam inconsideratos, ut imperitos forte ex fratribus iudices eligerent. Sciebat enim quam tepidi et improvidi in reliquis causis fuerant deprehensi, et licet contemptibiles nominaverit eos, quos ad iudicandum institui præcepit, sapientes tamen ipsos nunc vocat. Qua ex re quid colligitur, nisi ut hi terrenas causas examinent, qui exteriorum rerum sapientiam perceperunt? qui autem spiritualibus donis ditati sunt, profecto terrenis

A non debent negotiis implicari, ut dum non coguntur inferiora bona disponere, exercitativius valeant bonis superioribus deservire. Qui tamen proximorum infirmantium negotia non debent funditus deserere, sed hæc aliis quibus dignum est, tractanda committere. Unde Moyses quoque viros ad populum pro se septuaginta constituit (*Num. xi*), ut quanto se ab exterioribus causis absconderet, tanto ardentius interna penetraret. Sicque fit ut et summi viri magis ad spiritualia dona proficiant, dum eorum mentem res infimæ non conculcant; et rursus in ecclesia ultimi sine bono opere non vivant, dum in rebus exterioribus inveniunt recta quæ agant.

« Jam quidem omnino delictum est in vobis, quod iudicia habetis inter vos. Quare non magis injuriam accipitis? quare non magis fraudem patimini? sed vos injuriam facitis et fraudatis, et hoc fratribus. »

Propter supradicta posset putari, iudicium habere adversus alterum, non esse peccatum, sed tantummodo id extra ecclesiam velle iudicari, nisi nunc secutus adjungeret, *jam quidem omnino delictum est in vobis quod iudicia habetis inter vos*. Nam et dominus dixerat: « Si quis voluerit tunicam tuam tollere, et iudicio tecum contendere, dimitte ei et pallium (*Matth. v*). » Prohibuit ergo suos de sæcularibus rebus cum aliis habere iudicium. Propter quod et Apostolus nunc dicit hoc esse delictum. Tamen cum sint in ecclesia talia iudicia finire inter fratres fratribus iudicantibus, extra ecclesiam vero terribiliter vetat, manifestum est quod secundum veniam concedatur infirmis. Quanquam enim Christianus litigare non debeat, tamen si grave fuerit et quod contemni non possit, causam ad Ecclesiam deferat, ne et damnum ad præsens et offensionem forte incurrat. *Jam quidem*, inquit, id est tam cito post baptismi sanctificationem *omnino delictum est in vobis*, ex hoc solo, *quod iudicia habetis inter vos*, de rebus caducis, cum deberetis exteriora cuncta despiciere, ut interna mentium bona possetis servare, et ne quisquam ita hoc excusaret, ut diceret iustum se habere negotium, sed iniquitatem se pati quam vellet a se iudicii sententia removeri, continuo talibus cogitationibus vel excusationibus occurrit, et ait: *Quare non magis*, id est non potius, *injuriam*, id est apertam violentiam injuste vobis illatam, *accipitis*, id est acceptabilem et gratam habetis, quam ut pacem cum fratre litigando dissipetis? et *quare non potius fraudem occultam de vestris rebus factam patimini*, quam ut tranquillitatem cordis amittatis iudicio contententes invicem? Per injuriam designatur hic injusta molestia violenter illata, sicut est rapina, percussio, vulnus, turpe convitium, et his similia; fraus vero per astutiam simulatorie et dolose agitur contra eum quem quis decipere molitur. Et quare vos utramque patienter non sustinetis? *Sed vos injuriam facitis*, qui factam sustinere debuistis; *et fraudatis*, non fraudem patimini; *et hoc fratribus facere non timetis, cum nos*

inimicis tale quid facere debuissetis. Injuriam facitis dum per injustitiam vestram jurgium generatur coram iudicibus; et fraudatis, dum ipsos iudices donis corrumpitis; et hoc fratribus facitis, quos vos juvare deberetis, et qui nec suis parcat, quid faciet al is?

« An nescitis quia iniqui regnum Dei non possidebunt? nolite errare. Neque fornicarii, neque idolis servientes, neque adulteri, neque molles, neque masculorum concubitores, neque fures, neque avari, neque ebriosi, neque maledici, neque rapaces regnum Dei possidebunt. Et hæc quidem fuistis, sed abluti estis, sed sanctificati estis, sed justificati estis in nomine Domini nostri Jesu Christi, et in spiritu Dei nostri (*Galat. vi, Ephes. v, 1 Tim. i.*) »

Vos injuriam et fraudem fratribus irrogatis, et de nomine Christiano vobis blandimini, quasi per hoc salvandi sitis qui talia facitis. Sed *an nescitis quia iniqui*, id est illi qui æquitatem transgrediuntur, faciendo injurias et fraudes et his similia, *regnum Dei non possidebunt*, quod justis et sanctis Deus promisit? Cavete ergo esse iniqui, ne regnum Dei perdatis, quia nullus iniquus illud possidebit; etiamsi sacramenta Christianitatis habuerit; et præter illud regnum salus nulla est, quia aut erit quisque in illo regno aut in inferno. Et ideo *nolite errare*, putantes esse extra regnum salutis locum vel quod Deus per misericordiam suam vos in illud propter solam fidem Christianam introducturus sit, si iniquos vos invenerit. Nam *neque fornicarii*, qui cum mulieribus non desponsatis concumbunt; *neque idolis servientes regnum Dei possidebunt*, sed in regno diaboli peribunt, *neque adulteri*, qui uxores aliorum violant; *neque molles*, qui seipsos per se inquinant; *neque masculorum concubitores*, more Sodomitarum; *neque fures*, qui occulte res alienas auferunt; *neque avari*, qui timentes quod Deus eis necessaria præbere desistat, congregant ultra modum superflua; *neque ebriosi*, qui vitium ebrietatis sectantur; *neque maledici*, id est detractores, qui student mala dicere de fratribus, vel qui eos maledicere non verentur; *neque rapaces*, qui aliorum res aperte consueverunt diripere: nullus eorum qui tales sunt, possidebit regnum Dei, quia unum quodlibet horum criminum tollit illud regnum. Et vos quidem hæc fuistis, id est tales, quoniam hæc omnia mala fuerunt in vobis; sed tamen ne desperetis de perceptione regni, quoniam *abluti estis* in baptismo ab istis, et ideo turpius est si ad ea reditis. Nunc solum abluti estis in remissionem peccatorum, sed etiam *sanctificati* in baptismo per Spiritum sanctum. Nec tantum sanctificati, sed *justificati* per fidem. Et hæc tanta gratiæ dona consecuti estis in nomine Domini nostri Jesu Christi, cujus nomen in baptismo super vos est invocatum, et in Spiritu Dei nostri qui replevit aquam baptismi. Utrumque enim invocatio nominis Christi et infusio Spiritus sancti vobis ista concessit; et ideo nolite rursus ad priora mala redire, ne bona

(113) Locus obscurus.

hæc omnia perdatis. Vel abluti estis lacrymis, et sanctificati melioratione vitæ, quam nimirum illos emendatio vita sanctificat, quos per poenitentiam abluens afflictio sletuum mundat. Et justificati estis justis operibus insistentes. Et idcirco cavete rursus crimina committere, ne contingat regnum amittere.

« Omnia mihi licent, sed non omnia expediunt (*infra. x, Eccli. xxxvii*). Omnia mihi licent, sed ego sub nullius redigar potestate. *Esca ventri*, et *venter escis*; Deus autem et hunc et hæc destruet. Corpus autem non fornicationi, sed Domino, et Dominus corpori. Deus vero et Dominus suscitavit, et nos suscitabit per virtutem suam. »

Quoniam supra dixerat potius ferendum esse damnum quam causas male agere, ne quis putaret sua nullo modo esse repetenda, supponit: *Omnia mihi licent*, id est omnia mea mihi sunt ad repetendum licita, sed tamen non repetam ea iudicio, quia non expediunt ad cursum meum, sed impediunt. *Omnia mihi licent* ad repetendum jure per iudicium, sed ego cum sim liber, sub nullius redigar potestate, id est nolo redigi sub potestate ullius iudicis vel testium, supplicando eis ut mihi magis saveant. Ideo non sunt repetenda (213), tamen *esca* debetur ventri pro quo creata est; et *venter escis*, quia aliter sustentari non potest; sed *Deus et hunc et has destruet*, ut neque venter indigeat escis, neque sustentationem ullam ventri præbeant. Dum dicitur: *Esca ventri et venter escis*, ostenduntur hæc quæ ad escas pertinent, esse naturæ necessaria, et ideo licet ea repeti. Sed non multum pro his laborandum est, quia destruentur, et ideo licet de his fieri iudicium vel prætermitti. *Esca* debetur ventri, sed corpus non debetur fornicationi, et ita iudicium prætermitti de hoc non potest, ut vos soletis, qui fornicationem non iudicastis. Sed quod dictum est, omnia mihi licent, sed non omnia expediunt, repetamus. Soli enim in illicitis non cadunt, qui se aliquando et a licitis restringunt. Qua videlicet constrictione religatum bene se nunc Apostolus insinuat, dicens: *Omnia mihi licent, sed non omnia expediunt*; at ut sua religatione ostenderet in quanta se mentis libertate dilataret, adjunxit: *Omnia mihi licent, sed ego sub nullius redigar potestate*. Cum enim mens concepta desideria sequitur, servare rebus convincitur, quarum amore superatur. Sed Paulus cui cuncta licent, sub nullius potestate se redigit, quia semetipsum etiam a licitis restringendo, ea quæ delectata premerent despecta transcendit. *Omnia*, inquit, *mihi licent, sed non omnia expediunt*. Ut ostendit ea licita esse, quæ nullo præcepto Domini prohibentur, sic expedit potius esse tractanda non præscripto legis, sed consilio charitatis. Hæc sunt quæ amplius erogantur saucio, qui curandus ad stabulum Samaritani illius miseratione perductus est (*Luc. x*), et ideo dicuntur non a Domino præcipi, quamvis Domino moneantur offerri, ut tanto intelligantur esse gratiora, quanto ostenduntur indebita. Potest ergo

non expedire; expedire autem, quod non potest. Ac per hoc non omnia quæ licita expediunt; omnia vero illicita non expediunt. ut videntur mihi licere et non expedire, quæ iustitiam quidem, quæ coram Deo est, permittuntur a salute, vitanda sunt; ea vero non licet ideo non expedire, quæ sic ipsa iustitia velut facienda non sint, etiamsi ab eis quibus iam fuerint perlata, laudentur. Quod si ita non nisi illicita prohibentur a Domino, ut licita sunt et non expediunt, non legis vindicta libera dilectionis beneficentia caveantur. Item etiam quod Apostolus ista eis prædicans, eis accepit, sed labore manuum suarum vixit. nonnulli eorum putabant illum ideo noluisse accipere, quia sciret se apostolum non esse, quos nunc dicit: *Omnia mihi licent*, omnia iuxta cæteris apostolis licent, mihi quoque licet licet mihi, sicut illis, accipere sumptus a iis. Sed non expediunt omnia quæ licent, quia licitos acciperem, occasionem accipiendi postulis darem. Omnia hæc mihi licent, sed propter ista stipendia non redigar sub potestate, ut auctoritatem meam propter sua dona. Si enim ab his Apostolos quos in tantis regerebat, acciperet, auctoritatem magisterii iam sibi a Domino inclinaret. Non enim potestanter argui a quo accipitur, maxime cum contemptus ad dandum sit malevolus, ut sibi et prædicatorem, et ideo dicit, Sed ego licet redigar potestate. Pseudo autem apostoli causa quæstus prædicabant, nolebant a peccantibus. *Omnia, inquit, mihi licent*, cæteris, ut accipiam stipendia sicut illi, a ventri debetur, et venter escis. Sed tamen illam curandum de his, quia transitoria gloria Deus et ventrem, et escas destruet. Item in futuro manducabimus et bibemus, vescemur pane, qui de cælo descendit, ut compleatur quod scriptum est: *« Panem manducavit homo (Joan. vi; Psal. lxxvii). »* Venter et ventrem destruet, cum occiderit indigentia mirifica, et corruptibile hoc incorruptionem sempiternam, ut sit salus per isto corpore, nulla remanente corruptione), nulla succedente defectione, ut nullo cibo fulciatur. Dixi quia venter escis debetur, temporaliter sustentatur. *Corpus autem non sibi debetur, sed Domino.* Sanctus Apostolus superfluitatem escarum disputans, consequenter ad fornicationem. Etenim superfluitas esum mater libidinis est, ventremque distentum vini potationibus irrigatum voluptas genitur; atque pro membrorum ordinis, ordo est. Corpus non debetur fornicationi, sicut modicis escis, quia corpus sine fornicatione semper subsistere, venter autem sine non valet subsistere. Et ideo fornicatio est

superflua, ciborum autem refectio necessaria. Unde quamvis ad tempus venter escis moderatis debeat, corpus tamen fornicationi nunquam debetur, sed semper Domino Christo, ut ei serviat; et Dominus Christus debetur corpori, ut ipse sit ei præmium, dans ei participationem immortalitatis suæ. Corpus enim Christo dicatum, dono spirituali remunerabitur merito ducis, id est animæ. Et gloria corporis Christi dabitur corpori, quod nunc assidue servit ejus præceptis: et ita Dominus Christus præmium debetur corpori nostro, si corpus nostrum ei subditum in omnibus fuerit. Sed *Deus Pater et Dominus Christum suscitavit, et nos similiter suscitabit.* Hoc est dicere: Sicut Deus Pater eum qui Dominus est suscitavit, quia in omnibus obedientem reperit; ita corpus nostrum, si eidem Domino fuit usquequaque subjectum, suscitabit, et gloriæ ipsius Domini particeps faciet illud; et hoc per virtutem suam, quæ Christus est, cui nihil est impossibile. Nam et Dominus Christum suscitavit per virtutem, quæ est ipse Christus, id est per potentiam divinitatis ipsius Christi, et nos per eandem virtutem suscitabit, ut sequamur caput nostrum ad incorruptionem et gloriam, si digna membra sumus. Propter quod recedendum est ab omni fornicatione et immunditia, et insistendum studiis sanctitatis, ut ad tantam gloriam digni simus pertingere.

« Nescitis quoniam corpora vestra membra sunt Christi? Tollens ergo membra Christi, faciam membra meretricis? Absit. An nescitis quoniam qui adhæret meretrici, unum corpus efficitur? Erunt enim, inquit, duo in carne una (*Gen. ii; Ephes. v; Matth. xix; Marc. x*). Qui autem adhæret Domino, unus spiritus est. »

Vere corpus non fornicationi debet mancipari, sed Domino. Quia an nescitis quoniam corpora vestra sunt membra Christi, qui est caput vestrum, eo quod homo factus est propter nos? Qui si tantummodo humanam animam suscepisset, membra ejus non essent nisi animæ nostræ. Quia vero et corpus suscepit, per quod etiam caput est nobis, qui ex anima et corpore constamus, profecto illius membra sunt et corpora nostra. Illius, inquam, membra sunt corpora nostra, propter corpus quod ipse ex genere corporis nostri suscepit, et quoniam ita est, ergo tollens membra Christi, faciam ea membra meretricis per fornicationem? Absit ut hoc faciam. Neque enim tollere Christo membra sua debeo, et dare meretrici. Non enim possunt simul esse et membra Christi et membra meretricis; sed desinunt esse membra Christi, ubi adhærent meretrici. Nam corpus nostrum quandiu perseverat in sanctimoniam munditia, membrum est Christi. Si vero complectitur meretricem, separatur a Christo, et fit membrum meretricis. Si ergo unusquisque cupiens fornicari vilescat sibi, et in seipso contemnat seipsum, non in se contemnat Christum, sed propter Christi reverentiam, cujus membrum est corpus ejus, contineat se ab hac turpitudine. Magnam enim injuriam, ma-

gnumque contemptum Christo faciet, si ei meretricam prætulit, separans se ab eo et adhærens scorto. Vere fiunt membra meretricis, qui illi adhærent. Nam an *nescitis quoniam qui adhæret*, id est commiscetur, *meretrici, unum cum ea corpus efficitur?* Fornicatio enim ambos unum facit, ut quomodo in natura, sic in macula unum sint, dum per illam nequissimæ voluptatis adhæsiōnem duo unum corpus efficiuntur, id est in eodem scelere uniuntur. Vere unum corpus, quia una caro. *Erunt enim*, inquit liber Genesis, *duo in carne una* (Gen. ii). Hoc etiam de legitime conjunctis dictum est. Et sicut in legitima copula duo per adhæsiōnem unum corpus efficiuntur et una caro, ita ut membra istius per consensum et delectationem carnalem fiant illius, sic est etiam in illicita adhæsiōne. Qui meretrici adhæret, unum cum ea corpus est; sed *qui adhæret Domino, unus spiritus est* cum eo. Diversus quidem natura spiritus hominis est et Spiritus Dei, sed inhærendo fit unus spiritus ex diversis duobus, ita ut sine humano spiritu beatus sit atque perfectus Dei spiritus, hominis autem spiritus non nisi cum Dei spiritu possit esse beatus. Tam potens vero est hæc humana mens, quæ est imago Dei, ut ei cujus imago est, valeat inhære, quoniam sic ordinata est naturarum ordine, non locorum, ut supra illam non sit nisi ille. Cui cum penitus adhæserit, unus spiritus erit, accedente quidem ipsa ad participatiōnem naturæ, veritatis et beatitudinis illius, non tamen crescente illo in natura, veritate et beatitudine sua. In illa utique cum ei feliciter adhæserit, immutabile videbit omne quod viderit, et tunc satiabitur in bonis desiderium ejus (*Psal. cii*).

« Fugite fornicationem. Omne enim peccatum quodcunque fecerit homo, extra corpus est. Qui autem fornicatur, in corpus suum peccat. »

Ne fiat unum cum meretrice corpus, sed unus cum Domino spiritus, *fugite fornicationem*. Non dico pugnatæ adversus eam; sed, fugite illam, quia cum aliis vitiis potest expectari conflictus, hæc autem fugienda est, quia non aliter melius vinci potest. Ideo viti longe debent esse a feminis remoti, nec etiam mente huic vitio propinquare, si cupiunt victores fieri, et jure debetis hoc malum fugere, quia nullum peccatum in corpus lædit et deturpat, ut fornicatio. Quia *omne peccatum quodcunque fecerit homo*, id est ille qui ad peccandum ex sua fragilitate pronus est, quoniam de humo factus est, illud peccatum est extra corpus, id est extra maculationem corporis, videlicet ex omnibus aliis peccatis nulla deformitas vel inhonestas infertur corpori. Sed *qui fornicatur, peccat in corpus suum*, id est contra honorem corporis sui: hoc est, fornicatio intantum polluit corpus ipsum, intantum libidinis æstus accendit, inquantum venenum delectationis illicitæ sese per totum corpus diffundit. In aliis etiam peccatis omnia membra non sic idem appetunt, sicut in fornicatione. Et ideo hoc peccato magis homo deformatur, quoniam istud magis quam aliud in corde

vagatur, et cuncta membra huic operi mancipantur. Vel omne peccatum quodcunque fecerit homo, extra corpus est, id est in omni appetitu peccati anima est extra naturam corporis, quia in suo sensu remanet, intelligens mala esse quæ agit. Sed qui fornicatur, in corpus suum peccat, quoniam in appetitu et operatione fornicationis sic peccat anima, ut redigatur in naturam sui corporis, quia nihil tunc cogitat, nihil sapit, nihil intendit nisi quæ carnis sunt. Sic enim totus homo absorbetur ab ipso et in ipso corpore, ut jam dici non possit ipse animus suus esse, sed simul totus homo dici possit caro esse et spiritus vadens et non rediens (*Psal. lxxvii*), et ideo videtur Apostolus exaggerare fornicationis malum super cætera omnia peccata, quæ, etsi per corpus committuntur, non tamen animum humanum concupiscentiæ carnali ita efficiunt obstrictum et obnoxium, sicut in solo opere fornicationis corporalis commiscetur animus et conglutinatur, devictus intantum, ut nihil aliud ipso momento et experimento hujus tam magni flagitii cogitare liceat homini vel intendere, nisi quod sibi met addicit. Unde merito in corpus suum peccare dicitur, quia nusquam sic totus homo corporis ipsius voluptati æffigitur, ut in comparatione hujus tanti mali cætera peccata extra corpus esse videantur, etiamsi per corpus exercentur, quoniam solius fornicationis vis tanta est, ut fornicans imperiosæ libidinis conditioni se subdat, propriumque ipsius corporis principium pessimum faciat in tempore ipsius immundissimæ operationis, ut sicut dictum est, non sit liberum humanæ menti cogitare vel intendere aliud, nisi quod agit in ipso corpore, et ita in corpus suum peccat, id est totus in corporis sui voluptatem miserabiliter demergitur in ipsa perpetratione peccati. Hæc dicta sunt de speciali fornicatione hujus corporis. Est autem et generalis fornicatio humanæ animæ, qua non adhærens quisque Deo, adhæret mundo. Cæterum Jacobus tales sic increpat: « Adulteri, nescitis quia amicitia hujus mundi inimica est Deo? Quicumque ergo voluerit amicus esse sæculi hujus, inimicus Dei constituitur (*Jac. iv*). » Et de hac generali fornicatione mentis, quæ omnia in se mala continet, qua non hæretur Deo dum hæretur mundo, recte valet intelligi quod nunc dicitur, quia omne peccatum quodcunque fecerit homo, extra corpus est, qui autem fornicatur, in corpus suum peccat. Quia si non fornicatur anima humana adhærens mundo, sed casta permanet adhærens Deo, quæcunque alia peccata vel ignorando, vel negligendo, vel obliviscendo, vel non intelligendo fragilitate mortalitatis potuerit incurrere, extra corpus erunt, id est corporalis et temporalis concupiscentiæ malum. Quod si adhærens mundo longe faciat se a Deo, peccat in corpus suum, quia corporali concupiscentia ad quæque temporalia et carnalia et carnali sensu et prudentia humanus animus trahitur atque distenditur, serviens creaturæ potius quam Creatori (*Rom. i*).

« An nescitis quoniam membra vestra templum A
 « sunt Spiritus sancti (II Cor. vi; supra iii), qui
 « in vobis est, quem habetis a Deo, et non estis
 « pretio magno (infra iv; I Petr. i). Glorificate et
 « portate Deum in corpore vestro. »

Item ideo fugienda est fornicatio, quoniam
 membra vestra corpora sunt templum Spiritus
 sancti, et hoc nescitis qui fornicari volebatis? Nolite
 ergo putare quod Deus peccata carnis non curet.
 Graviter eum offenditis, si templum ejus, id est
 membra corporis vestri corrumpitis. Quomodo non
 vultis maculari domus vestras, sic nec Deus do-
 mum suam, id est corpus vestrum. Si vobis non
 parcitis propter vos ipsos, parcite vobis propter Deum,
 qui fecit vos templum suum. Graviter enim peccatis,
 si templum ejus quod est in vobis, corrumpitis. B

Membra vestra templum sunt Spiritus sancti. Verum
 idem Spiritus apertissime declaratur esse Deus,
 quia nisi Deus esset templum utique non haberet.
 Nec minor est Christo, cujus templum sunt cor-
 pora vestra, quæ sunt membra Christi. Membra
 corporis vestri templum sunt Spiritus sancti, qui
 in vobis est tanquam Deus in templo suo, quem ha-
 betis a Deo Patre; et ita cavete ne offendatis Spi-
 ritum sanctum qui in vobis habitat, et Deum qui
 dedit vobis hunc Spiritum. Quia templum estis
 Spiritus sancti, ut ipse in vobis manens, omnia
 membra vestra gubernet et moveat ad bene agen-
 dum; et non estis vestri, ut facere vobis liceat quod
 vultis; sed estis ejus, qui sanguine suo vos emit,
 ut voluntatem ejus faciatis. Manifestum est enim, C
 quia qui emptus est, non est sui arbitrii, sed ejus
 a quo emptus est, ut non suam, sed illius faciat
 voluntatem. Ideo propensius servite Domino, qui
 vos emit de manu inimici, ne offensus a vobis, red-
 dat vos eidem vastatori. Vere non estis vestri ad fa-
 ciendum quicquid placuerit, quia *empti estis* ad Dei
 ærvitium *pretio magno*, id est sanguine ipsius Do-
 mini. Qui sanguis est pretium, non corporea quan-
 titate, sed spirituali virtute et sanctitate magnum,
 quia nullum fuit in eo peccatum, sed omnis justitia;
 et ideo membra vestra quæ sunt templum Spiritus
 sancti, et sunt redempta pretio sanguinis Domini,
 cavete meretrici adjungere ad contumeliam Redem-
 ptoris et Spiritus sancti; sed potius *glorificate et*
portate Deum in corpore vestro, id est Spiritum san-
 ctum in templo suo. Glorificare Deum, est secundum
 ejus legem vivere. Portare Deum, imaginem ejus in
 rebus bene gestis ostendere. Glorificare Deum bene
 operando, et portate Deum, jugum ejus super vos
 tollendo (*Math. ii*), et hoc facite in corpore vestro,
 id est in moderamine corporis vestri, ut nihil in
 vestro corpore notari possit quod ad Dei contumeliam spectet, quod non ejus gloriam com-
 mendet. D

CAPUT VII.

« De quibus autem scripsistis mihi, bonum est
 « homini mulierem non tangere. Propter fornicationem
 « autem unusquisque suam uxorem ha-

beat, et unaquæque suum virum habeat (I Petr. iii).
 « Uxori vir debitum reddat, similiter autem et uxor
 « viro. Mulier sui corporis potestatem non habet,
 « sed vir. Similiter autem et vir sui corporis pote-
 « statem non habet, sed mulier. Nolite fraudare
 « invicem, nisi forte ex consensu ad tempus, ut
 « vacetis orationi; et iterum revertimini in idipsum,
 « ne tentet vos Satanas propter incontinentiam ve-
 « stram. Hoc autem dico secundum indulgentiam,
 « non secundum imperium. Volo autem omnes
 « homines esse sicut meipsum. Sed unusquisque
 « proprium donum habet ex Deo, alius quidem sic,
 « alius vero sic. Dico autem non nuptis et viduis :
 « Bonum est illis, si hic permanserint, sicut et ego.
 « Quod si non se continent, nubant. Melius est enim
 « nubere quam uri. »

Corinthii pravis sensibus pseudoapostolorum
 exagitati, qui nuptias per hypocrisim (ut puriores
 cæteris viderentur) spernendas dicebant, epistolam
 de his apostolo miserunt, ut quid ipse sentiret
 agnoscerent. Quia enim non oblectabantur hac sen-
 tentia, ideo prætermisiss cæteris, quæsierunt solum-
 modo de nuptiis, et de his quæ ad has pertinere
 videbantur. Inter cætera enim per litteras quæsie-
 runt, utrum post fidem Christi cælibes esse debe-
 rent, et continentia causa quas habebant uxores
 dimitterent, aut si virgines credidissent, inirent ma-
 trimonia. Et cum e duobus ethnicis unus credidis-
 set in Christum, utrum credens relinqueret non
 credentem. Et si essent ducendæ uxores, Christianas
 tantum accipi juberet, an et ethnicas. Videamus
 igitur quid ad hæc Apostolus rescripserit. Sed ita
 continuatur littera : Moneo vos glorificare et por-
 tare Deum in corpore vestro mundo et sancto. Sed
 de his *de quibus scripsistis mihi*, volo vos scire, quia
bonum est homini mulierem non tangere. Unde patet
 quia malum est tangere. Nihil enim bono contra-
 rium nisi malum. Si autem malum est et ignoscitur,
 ideo conceditur, ne malo quid deterius fiat. Simul-
 que animadvertenda est Apostoli prudentia. Non
 dixit : Bonum est uxorem non habere; sed : *Bonum*
est mulierem non tangere, quasi et in tactu pericu-
 lum sit, quasi qui illam tetigerit, non evadat. Quem-
 admodum enim qui ignem tetigerit, statim adurit,
 ita viri tactus et feminae sentit naturam suam,
 et diversitatem sexus intelligit. Bonum est non tan-
 gere. Sed *propter fornicationem* vitandam *unusquis-*
que suam uxorem legitimam habeat, non concubi-
 nam, et *unaquæque virum suum habeat*. Solus
 fornicationis metus facit hæc concedi. Velut si quis
 desinat : Bonum est triticeo pane vesci, et edere
 purissimam similam, tamen ne quis fame compulsus
 comedat stercus bovinum, concedo ei ut vescatur et
 hordeo, non ideo frumentum non habebit suam pu-
 ritatem, si fimo hordeum præferatur, sicut nunc for-
 nicationi nuptiæ præferuntur. Nec dixit : Propter
 fornicationem unusquisque ducat uxorem. Alioquin
 hac excusatione libidini frena laxaret, ut quoties-
 cunque uxor moritur, toties ducenda sit alia ne

fornicemur : et qui continentiam promiserant, vel divinis auctoritatibus uxorem habere non possunt, viderentur ad hanc ducendam relaxari. Sed ait : Unusquisque uxorem suam habeat, suam scilicet, quam habebat antequam crederet. Quam bonum erat uxorem non tangere, et post fidem Christi sororem tantum nosse, non conjugem, nisi fornicatio tactum excusabilem faceret. *Uxori vir debitum reddit, similiter autem et uxor viro*: Post quam semel sociati sunt conjuges, non licet uni ut se contineat sine voluntate alterius, sed debitum compari reddere cogitur, ne qui incontinens est, cadat in adulterii damnabile flagitium. Acceptabilis autem est Deo sola continendi voluntas ejus, qui continentiam servare vellet, sed propterea debitum reddit ne conjux pereat. *Mulier sui corporis potestatem non habet*, ut tradat illud alii viro, vel contineat se, sed in viri ejus potestate est corpus ejus. Sed *et vir similiter potestatem non habet sui corporis* ad aliam mulierem, vel ad continentiam, *sed mulier* habet illud in potestate. Hic non dominium tollitur viro, sed vitium. In hac enim re sunt ambo pares, ut neuter possit agere de corpore suo quod voluerit, id est de parte corporis qua sexus utriusque carnali sorte discernitur, sed in aliis rebus præest vir, et quia neuter habet potestatem proprii corporis, ergo *nolite fraudare invicem*, id est subtrahere alter alteri conjugale debitum, ne dissensio generet adulterium. Quod conjuges coeunt præter intentionem generationis, non est nuptiarum malum, sed veniale propter nuptiarum bonum, quod est tripartitum, fides, proles, sacramentum : Fides, ne cum alio vel cum alia coeat. Proles, ut religiose educetur. Sacramentum, ne conjugium separetur. Nolite fraudare invicem, *nisi forte ex consensu*, id est ex conducto, *ad tempus*, id est aliquo sacratoris temporis spatio, *ut vacetis orationi*. Non enim valet infirmitas vestra complere (quod alibi præcipitur) ut sine intermissione oratis (*I Thes. v*), quia quotiescunque debitum adiuvicem redditis, orare non potestis. Cum ergo semper orandum sit, nunquam esset conjugio serviendum. Sed quia non ad hoc sufficitis, saltem interpositis temporibus vos continete, ut orationi possitis insistere, quoniam orationis suffragio indigetis. Ne enim damnatur talis conjugum vita, deprecatio simplex ad Deum est fundenda; et quamvis munda sint conjugia, tamen etiam a licitis abstinendum est, ut facilius ad effectum deducatur oratio. Nam et in lege sanctificari volentes, ab opere conjugali se continebant ut fierent sanctiores. Cum enim quis etiam concessa non contingit, ostendit se velle quod precatur accipere. Dixi ut propter orationem ad tempus consentiaris invicem servare continentiam, et expleto illius orationis tempore, *iterum revertimini in idipsum opus conjugale*, quia, etsi culpa est, tamen venialis est propter nuptias, et per hanc fornicatio vitatur (*Psal. v*). Concedenda est enim minima culpa, si aliter non potest declinari maxima. Revertimini in ipsum naturalem usum.

A *ne Satanas*, id est diabolus vestræ salutis adversarius, *tentet vos* de fornicatione *propter incontinentiam vestram*, id est propter hoc quia vos continere non potestis. Si enim continentiam ambo servare possentis, tentatio Satanzæ timeunda non esset. quoniam adversus neutrum ex vobis prævaleret. Dico ut in idipsum revertamini, sed *hoc secundum indulgentiam, non secundum imperium*, quia hoc vobis indulgetur, non præcipitur; et ideo non peccat qui aliter agit, imo peccat qui sic agit, sed levius. Non enim sine vitio est quod ignoscitur, et non præcipitur. Sed cum in dubiis constringimur, utiliter in minimis subdimur, ne in magnis peccemus. Culpa quippe esse invenitur, quod indulgeri perhibetur; sed quæ tanto citius relaxetur, quanto non per hanc illicitum quid agitur, si hoc quod est licitum, sub moderamine non tenetur. Tunc enim solum conjuges sine culpa sunt in admistione, cum non pro expleta libidine, sed pro suscipienda prole miscentur. Sed tamen et alia commistio quæ fit pro sola voluptate, veniam accepit propter nuptias. Hoc, inquit, vobis secundum indulgentiam infirmis permitto; sed tamen *volo* (si possibile sit) *omnes homines esse sicut meipsum*, id est abstinentes ab omni concubitu, sicut ego abstineo. *Sed unusquisque fidelium habet proprium donum ex Deo, alius quidem sic*, id est ut sit omnino continens; *alius vero sic*, id est, ut uxori copulatus nulli alii misceatur. Ubi satis apparet, non tantum continentiam donum Dei esse, sed conjugatorum etiam castitatem. Cum autem dona Dei esse monstrantur, a quo petenda sint, discitur, si non habentur; et cui sint agenda gratiæ, si habentur. Coniuncti quidem debitum reddant; sed *non nuptis*, id est virginibus, *dico et viduis*, quia *bonum est illis, si sic permanserint sicut et ego*, id est castæ. Postquam nuptis concesserat usum conjugii, et estenderat quid ipse vellet, quidve concederet, transit ad innuptas et ad viduas, et se ponit exemplum, et felices vocat si sic permanserint. Quomodo diceret : Bonum est innuptis si sic permanserint sicut et ego, nisi esset integer corpore? aut quomodo diceret : volo omnes homines esse sicut meipsum : Si enim uxorem habuit qui hoc dixit, ergo omnes homines uxoratos esse voluit, nullamque virginem esse. Sed absit ut suspicemur illum habuisse conjugem. Sic enim a pueritia fervebat spiritus, ut hujus rei curam non haberet, juvenculus a gratia Dei esset anticipatus. Ideoque vult omnes homines esse virgines sicut ipse est, et innuptas perseverare tales qualis ipse est. *Quod*, id est sed, *si non se continent*, id est si viderint se non posse incentiva carnis comprimere, *nubant*. Ideo autem non se continere valent, quia non toto corde id appetunt, et propterea non merentur adjuvari divinitus. Illum enim Deus adjuvat quem videt tota virtute contendere, nec sinit illum tentari supra vires proprias (*infra x*). Quæ ergo propter mentis imbecillitatem non possunt continere carnis impulsione, nubant, ne in barathrum diaboli per forni-

cationem corruant. Nam *melius est nubere quam uri* ardore desideriorum carnalium. Sine culpa scilicet ad conjugium veniunt, si tamen necdum meliora devoverunt. Ideo autem melius est nubere, quia pejus est uri. Melius enim ad comparationem deterioris respicit, non ad simplicitatem incomparabilis per se boni, velut si dicatur: *Melius est unum oculum habere quam nullum.* Uri autem est desideriiis carnis æstuarè. Cum enim mens calori carnis consentit, uritur. Pati vero desideria et non vinci, illustri viri est et perfecti.

« His autem qui matrimonio juncti sunt præcipio non ego, sed Dominus uxorem a viro non discedere. Quod si discesserit, manere innuptam, aut viro suo reconciliari. Et vir uxorem non dimittat (*Matth. ix; Marc. x; Luc. xvi.*) »

Innuptis et viduis suadeo ut sic permaneant, sed *his qui sunt juncti matrimonio*, id est viris et feminis, qui jam copulati sunt in conjugio non ego præcipio, sed Dominus ipse per Evangelium præcipit uxorem a viro non discedere. Quod, id est sed, si ab eo discesserit ea causa qua Dominus permisit, id est propter fornicationem viri, præcepit eam Dominus manere innuptam, dum vir ejus vixerit; aut si se non continet, reconciliari potius viro suo vel correpto, vel tolerando, quam alteri nubere, sed tamen particeps delicti mariti incorrepti fiet. Et vir uxorem non dimittat, quia si fornicata fuerit, non est uxor legitima. ideoque potest dimitti, et subintelligendum est idem de viro, quod de uxore præmissum est, ut si vir uxorem dimiserit ob fornicationem ejus, maneat inconjunctus; aut si se non potest continere, reconcilietur uxori suæ, vel correptæ vel tolerandæ. Tamen si correpta non fuerit, particeps fiet peccati ejus vir qui eam tenuerit. « Quoniam qui adhæret meretrici, unum corpus efficitur (*supra vi*), » et ut Salomon ait: « Qui tenet adulteram, stultus est et insipiens (*Prov. xviii*). » Hæc de his dicta sunt, qui post acceptionem Christianitatis sociati sunt in conjugio. De illos autem quos fides in conjugio invenerat, subditur:

« Nam cæteris ego dico, non Dominus. Si quis frater habet uxorem infidelem, et hæc consentit habitare cum illo, non dimittat illam. Et si qua mulier fidelis habet virum infidelem, et hic consentit habitare cum illa, non dimittat virum. Sanctificatus est enim vir infidelis per mulierem fidèlem, et sanctificata est mulier infidelis per virum fidèlem. Alioquin filii vestri immundi essent, nunc autem sancti sunt. »

Ubi uterque fidelis est, præcipit Dominus ne dissocientur. Nam cæteris, id est illis qui non ambo sunt fideles, sed unus credidit, alter in infidelitate permansit, ego dico, non Dominus. Si quis frater, etc. Quoniam ab infideli discedere nec prohibet, nec jubet Dominus, ideo ut non discedat: Apostolus dicit, non Dominus, habens utique Spiritum sanctum, in quo dare posset utile et fidele consilium.

Quod utique monendum, non jubendum fuit, quia non tanto pondere prohibendi sunt homines facere licita quæ non expediant, quanto prohibentur illicita. Cum ergo ait: Ego dico, non Dominus, satis ostendit Dominum non prohibere quod ipse prohibebat. Itaque licitum erat per justitiam, sed etiam licitum non erat faciendum propter liberam benevolentiam, scilicet ut credens relinqueret non credentem, quia fortasse conversurus eum erat ad fidem. Prohibuisset autem Dominus, si esset illicitum. Si quis frater, id est Christianus, habet uxorem infidelem, cui sociatus sit antequam venisset ad fidem, et hæc consentit habitare cum illo, id est non abhorret eum propter fidem Christi, nec execratur quod Christianus est, non dimittat illam, quia et ipsa postmodum fortasse fiet Christiana, si cum eo fuerit assidua. Jam enim aliquantulum facta est domestica, quod virum patitur Christianum. Et eo modo si qua Christiana mulier habet virum infidelem, cui sociata sit antequam crederet, et hic consentit habitare cum illa, quam scit Christianam, nec ideo adhorret illam, non dimittat virum, quia jam in aliquo domitus est. Hoc non præceptum, sed consilium est Apostoli et admonitio. Si quis vero aliter fecerit, non erit præcepti transgressor, sed Apostoli consilium non tenebit. Cum autem propter infidelitatem conjux dimitti possit, et juxta Domini sententiam dimitti nequeat nisi causa fornicationis, manifestum est et infidelitatem esse fornicationem. Quia scilicet idololatria, quam sequuntur infideles, et quælibet noxia superstitio, fornicatio est. Dominus autem permisit causa fornicationis conjugem dimitti (*Matth. v, xix*). Sed quia permisit, non jussit, dedit Apostolo locum monendi, ut qui voluerit, non dimittat infidelem, quia sic forsitan fiet fidelis. Potest enim esse multorum occasio lucrandorum, si fideles conjuges in reliquendis infidelibus permessa licentia non utantur. Sanctificatus est enim, id est sanctus effectus est, vir qui erat infidelis, per mulierem fidèlem; et sanctificata est mulier, quæ prius erat infidelis, per virum fidèlem. Credendum est, quia jam provenerat ut nonnulli viri per uxores fideles, et feminae per viros fideles in fidem venirent. Et quamvis non dicens nomina, exemplis tamen hortatus est ad confirmandum consilium suum. Deinde subjecit: Alioquin, id est si dissociaretur conjugium vestrum, filii vestri essent immundi, id est spurii non legali copula nati. Nunc autem sancti sunt, id est mundi, quia vos in vestro conjugio manetis, jam enim erant parvuli Christiani, qui sine auctore uno ex parentibus, sive utroque consentiente, sanctificati erant baptismate. Quod non fieret, si uno credente dissociaretur conjugium, et non toleraretur infidelitas conjugis usque ad opportunitatem credendi. Vel in eo quod dictum est, sanctificatus est vir infidelis, etc., potuit Apostolus per prophetiæ spiritum verbo præteriti temporis uti pro futuro, quoniam postea sæpe contigit ut alter per alterum ad fidem converteretur. Alioquin si alior

alteri non consentiret, filii vestri essent immundi. A Sed nunc sancti sunt, quia de licito conjugio procreati, et sub Creatoris veneratione nati sunt ex majore parte, dum unus ex vobis esset Christianus, et alter ei consentiret. Nam sicut omne quod per dedicationem fit idolorum, immundum est; ita et quidquid sub Dei Creatoris professione fit, sanctum est. Sed quod nunc magis verba Apostoli videntur sonare, et quodammodo cogere, aliqua hic intelligenda est sanctificatio, qua sanctificabatur vir vel mulier infidelis in conjugio fideli, et qua sancti nascebantur filii fidelium (215'), sive quia in menstruo sanguine mulieris a concubitu continebat, quicumque vir vel femina id in lege didicerat (nam hoc Ezechiel inter illa praecepta ponit, quae non figurata accipienda sunt) sive propter aliam quamlibet, quae B ibi aperte proposita non est, ex ipsa necessitate conjugiorum atque filiorum sanctitatis asperginem. Illud tamen sine dubitatione tenendum est, quaecumque illa sanctificatio sit, non valere ad Christianos faciendos atque ad dimittenda peccata, nisi Christiana et ecclesiastica institutione sacramentis efficiantur fideles; nam nec conjuges infideles, quamlibet sanctis et justis conjugibus hæreant, ab iniquitate mundantur, quae a regno Dei separatos in damnationem venire compellit, nec parvuli de quibuslibet sanctis justisque procreati, originalis peccati reatu absolvuntur, nisi in Christo fuerint baptizati.

« Quod si infidelis discedit, discedat. Non enim C servituti subjectus est frater aut soror in hujusmodi. In pace autem vocavit nos Deus. Unde enim scis, mulier, si virum salvum facies? aut unde scis, vir, si mulierem salvam facies, nisi unicuique sicut divisit Dominus? »

Fidelis non discedat ab infideli. Sed si infidelis vir aut mulier discedit odio fidei, discedat, permittatur discedere. Ideo dico, ut detur ei libertas abeundi, quia non est subjectus servituti frater aut soror, id est Christianus aut Christiana, in hujusmodi conjugio ut cogatur fidem dimittere, ne conjugem amittat infidelem. Sed quandiu possunt simul esse in pace, non separentur, quia Deus nos aversos a se vocavit in pace, id est dum essemus invicem concordēs; et ideo causa vocationis ejus non debemus pacem rumpere, in qua nos ejus vocatio reperit; sed D in ea, si fieri potest, manere, et vere manendum est in conjugali pace, nec expedit discedere, quamvis liccat. Quia unde scis, o mulier, si virum tuum salvum facies, convertens illum ad fidem, sicut jam saepe sanctificatus est vir infidelis per mulierem fidellem? aut unde scis, o vir, si tuam mulierem salvam facies, convertens illam ad Christum per cohabitationem et collocutionem et amicitiam tuam, sicut frequenter sanctificata est mulier infidelis per virum fidelem? Quod enim in aliis jam factum est, forte et in vobis fiet, fortasse enim sunt credituri, qui non abhorrent nomen Christi. Unde, inquam, scis

si salvum facies comparem tuum, nisi ita te habes ad eum sicut Dominus divisit unicuique id est viro praesesse, uxori subesse. Vel, unde scis si eum salvabis, nisi quemadmodum Dominus divisit unicuique quando salvetur, id est praedestinavit quando credat, et sustinet illum donec praefinita hora credulitatis ejus veniat? Sic et tu longanimiter expecta, ut credat.

« Unusquisque sicut vacavit Deus, ita ambulet, et sicut in omnibus ecclesiis doceo. Circumcisus aliquis vocatus est? non adducat praeputium. In praeputio aliquis vocatus est? non circumcidatur. Circumcisio nihil est, et praeputium nihil est, sed observatio mandatorum Dei (Galat. v, vi). Unusquisque in qua vocatione vocatus est, in ea permaneat (Ephes. iv). Servus vocatus es? non sit tibi curae, sed et si potes fieri liber, magis utere. Qui enim in Domino vocatus est servus, libertus est Domini. Similiter qui liber vocatus est, servus est Christi. Pretio empti estis (supra vi; I Petr. i). Nolite fieri servi hominum. Unusquisque ergo in quo vocatus est frater, in hoc permaneat apud Deum. »

Nolite, inquam, ab invicem separari. Sed sicut Deus vocavit unumquemque ita ambulet qui vocatus est, id est si quando credidit, erat conjugatus vel circumcisus, aut praeputiatus, talis permaneat et post baptismum, sicut ego non solummodo apud vos, sed etiam in omnibus ecclesiis doceo, et ideo tenendum vobis est quod omnes ecclesiae tenent, nisi alium ritum quam omnes ecclesiae tenere maueritis. Vere unusquisque debet ambulare ut vocatus est. Nam circumcisus aliquis vocatus est, id est si jam circumcisus erat quando ad fidem vocatus est, hic non adducat praeputium, id est non ita vivat quasi praeputium adduxerit; hoc est, quasi in eam partem quam nudavit, rursus tegimen carnis attraxerit, et quasi Judaeus esse destiterit, ut scilicet factus Christianus non putet se dignum, quia non habet praeputium, dans gloriam praeputio, quasi valeat aliquid. Sed si et in praeputio aliquis vocatus est ad fidem, et hic non circumcidatur, putans circumcisionem aliquid prodesse. Nam circumcisio nihil est, id est nec prodest, nec obest ad salutem; et praeputium nihil est, nec impedit, nec expedit; sed observatio mandatorum Dei valet ad salutem. Nam sive circumcisus, sive praeputiatus sit quisque, si mandata Dei custodierit, salvabitur; alioquin salvus esse non poterit. Nusquam Apostolus consuetudinem aufert, quae servata non impedit, monet tamen ne in talibus spes salutis ponatur. Unde et dicit ea nihil esse, et post subjungit repetendo praemissam sententiam: Unusquisque in qua vocatione vocatus est, id est in qua conditione vocationi non repugnante, in ea permaneat. Quod ad eas consuetudines vel vocationes vitae retulit, quae nihil obsunt fidei bonisque moribus. Non enim sicut et latro erat quisque cum

vocatus est, debet in latrocínio permanere. Dico ut in eadem conditione maneat. Nam si *servus vocatus es*, mone in eadem servitute. *Non sit tibi curæ quod servus es*, non inde doleas, non inde sollicitus sis, cupiens inde solvi. *Sed et si potes liber fieri, magis utere servitute quasi re bona et utili.* Servitus enim valet ad humilitatem servandam et ad patientiam exercendam, et qui in his terrenis bene servit intentione servandi justitiam et humilitatem, grande sibi meritum collocat apud Deum non respicientem conditiones hominum, sed mentes et actiones. Ideo quasi bonam rem amplectere servitutum nec putes non posse te placere Deo, si servis homini, quia *qui in Domino vocatus est servus, libertus est Domini*, id est Dominus Jesus liberavit eum a servitute peccati, quæ est deterior. Nam si peccata servos faciunt, cui peccata remittuntur, liber efficitur. *Similiter et qui juxta sæculi conditionem liber vocatus est ad fidem, servus est Christi*, ut ei serviat operando justitiam, et ita uterque est servus. Superbiam abscindit Apostolus et unitatem facit, ut neque servus pudore conditionis despectum se putet, neque liber inflatione mentis elatus servo se superponat. Vere servus est Christi quisquis ad fidem venit, etiam si liber apud homines judicatur, nam *pretio empti estis omnes*, id est sanguine Christi, quem pro vobis in cruce fudit, ut vos sibi servos emeret, qui eratis male liberi. Maximum namque crimen est, esse liberum a Deo; maximumque profectus, ex libero fieri servum Dei, et quia vos sibi servos emit, ideo servite illi soli, et *nolite fieri servi hominum*, ut propter homines postponatis Dei servitium, vel faciatis contra ejus præceptum. Ili sunt enim servi hominum, qui humanis superstitionibus se subjiciunt; qui tantum hominibus placere cupiunt, et Deo servire negligunt. Sicut antea fideles conjuges monuerat ne recederent ab infidelibus, ita servos quos in servitute fides invenit, hortatus est ne servitutum relinquere curarent. Nunc autem eos qui jam fidem perceperunt et semper liberi fuerunt, monet ut hominum servi amplius non fiant, ne forto retardentur a Dei servitio, si se humano subdiderunt obsequio. Unde et supradictam reiterat sententiam, dicens: *Unusquisque ergo frater in quo subauditur statu vocatus est, in hoc statu permaneat apud Deum*, id est in domo Dei, quæ est ecclesia. Id est si liber erat quando vocatus est, liber maneat; aut si servus, maneat. Non enim vocatio divina conditionem mutat, sed mores. Beatus autem Hieronymus aliter hæc interpretatur, et dicit quod ad superiorem disputationem, in qua docuerat Apostolus fidelem ab infidelibus non debere discedere, sed permanere in matrimonio sicut eos invenisset fides, et unum quemque vel cælibem vel maritum ita durare ut esset Christi baptismate deprehensus, infert parabolam circumcisi et ethnici, servi et liberi, et sub metaphora eorum de nuptis disputat et innuptis. Circumcisi aliquis vocatus est? non adducat præputium. Eo, inquit, tempore quo vocatus es et cre-

didisti in Christo, si circumcisi ab uxore vocatus es et cælebs eras, noli ducere, hoc est noli adducere præputium, ne circumcisionis et pudicitia libertatem oneres sarcina nuptiarum. Rursum in præputio quis vocatus est, non circumcidatur. Habebas, inquit, uxorem cum credidisti? noli fidem Christi causam putare dissidii, quia in pace vocavit nos Deus. Circumcisio nihil est, et præputium nihil est, sed observatio mandatorum Dei. Nihil enim prodest absque operibus cælibatus et nuptiæ, cum etiam fides quæ Christianorum est, si opera non habuerit mortua esse dicatur (*Jacob. 11*), et hac lege virgines quoque Vestæ in sanctarum queant ordine numerari. Unusquisque in qua vocatione vocatus est, in ea permaneat. Quando credit, inquit, sive habebat, sive non habebat uxorem, in eo permaneat quo vocatus est. Ac per hoc non tam virgines cogit nubere, quam repudia prohibet; et sicut habentibus uxores tollit licentiam dimittendi eas, sic virginibus nubendi amputat facultatem. Servus vocatus es? non sit tibi curæ. Sed et si potes liber fieri, magis utere. Etiam si habes, inquit, uxorem, et illi alligatus es, et solvis debitum, et non habes tui corporis potestatem, atque (ut manifestius loquar) servus uxoris es, noli propter hoc habere tristitiam, nec de amissa virginitate suspires. Sed etiam si potes causas aliquas invenire dissidii, ut libertate pudicitia perfruaris, noli salutem tuam cum alterius interitu querere. Habeto paulisper uxorem, nec præcurras morantem, sed expecta dum sequitur. Si egeris patienter, conjux mutabitur in sororem. Qui enim in Domino vocatus est servus, libertus est Domini. Similiter qui liber vocatus est, servus est Christi. Reddit causas cur nolit uxores deserere. Idcirco, ait, præcipio ut in Christum de gentilitate credentes inita ante fidem matrimonia non relinquunt, quia si uxorem habens credit, non tanto Dei servitio detinetur, quanto virgines et innuptæ, sed quodammodo est liberior, et servituti illi frena laxantur, et dum uxoris est, ut ita dicam, libertus est Domini, pro quo, qui uxorem non habens credit, et liber a servitute conjugii vocatus a Domino est, iste vere servus est Christi, non carne, sed Spiritu sancto. Qui enim adhæret Domino, unus spiritus est. Ac ne forsitan in eo quod supra dixerat servus vocatus es, non sit tibi curæ, sed etsi potes liber fieri, magis utere, suggillasse continentiam videretur, infert sententiam quæ omnem amputet cavillationem: « Pretio empti estis, nolite fieri servi hominum. » Redempti sumus pretiosissimo Christi sanguine, immolatus est pro nobis Agnus, et aspersi calidissimo rore hyssopi omnem impetum noxiæ voluptatis excoximus. Quibus in baptismate mortuus est Pharo et universus ejus suffocatus exercitus, cur rursus Ægyptum querimus? et post manna, angelorum cibo, allia et cepe et pepones et carnes varias suspiramus? Hæc Hieronymus: *Maritorum vera et continentium dispa-*

atione præmissa, tandem Apostolus ad virgines venit, et ait.

« De virginibus autem præceptum Domini non habeo, consilium autem do, tanquam misericordiam consecutus a Domino, ut sim fidelis. Existimo enim hoc bonum esse propter instantem necessitatem, quoniam bonum est homini sic esse. »

De conjugatis dedi præceptum Domini, quod acceperam ex Evangelio, et subjeci consilium meum. Sed de virginibus non habeo præceptum Domini, quod vobis proferam, quia Dominus nulla præcepti necessitate virgines coegit sic permanere, sed in arbitrio voluntatis eorum posuit, ut si vellent nubarent, vel virgines permanerent. Nam majoris est mercedis quod non cogitur, sed offertur. Quia si fuisset virginitas imperata, nuptiæ videbantur ablatæ; et durissimum erat contra naturam cogere, angelorumque vitam ab hominibus extorquere, et quodammodo damnare quod condidit. Si enim virginitatem Dominus imperasset, videbatur nuptias condemnare, et hominum auferre seminarium, unde et ipsa virginitas nascitur. Quæ si fuisset imperata, quisquis eam non servaret, damnaretur. Præceptum Domini de virginibus non habeo, sed consilium do. Quia ubi præceptum, ibi necessitas est servitutis; ubi vero consilium datur, ibi est arbitrium offerentis. Ibi aliud facere non licet, hic autem licet, et ideo plus amat virgines Christus, quia sponte tribuunt quod sibi non fuerat imperatum. Majoris autem gratiæ est auferre quod non debes, quam reddere quod exigeris. Consilium do tanquam de præteritis meis erratibus misericordiam a Domino consecutus, ut deinceps sim fidelis. Vel hanc misericordiam consecutus sum, ut sim fidelis, quia per Dei misericordiam mihi datum est, ut ab infidelitate exemptus sim fidelis; et ideo fidele est consilium quod do, et a Domino est, per cuius misericordiam fidelis sum. Vere do consilium, quia istud, quod existimo bonum esse hoc, id est virginitatem servare. Vel quia fidele possum dare consilium, ergo existimo bonum esse hoc, ut quicumque poterit, virgo permaneat; hoc, inquam, existimo bonum esse propter instantem necessitatem, quæ instat conjugia ineuntibus, quia deinceps semper necesse est illis cogitare de temporalibus, et tunc intumescunt uteri feminarum, atque cum maximo dolore parturiunt, et cum grandi labore nutriunt filios; ac deinde accidit frequenter, ut filiis orbentur et maritis; atque reliquum in egestate et calamitate ducant. Sed virginitatis observatio bona est, non solum propter supernam mercedem, sed etiam propter hujusmodi instantem necessitatem. Vel propter instantem necessitatem, quia necessitas instat omnibus, ut se præparent ad adventum judicis, quod conjuges minus facere possunt, dum curis mundanis occupantur. Propter hujusmodi necessitatem existimo bonum esse in virginitate manere, quoniam bonum est homini sic esse, id est in virginitate, quia non solum

in futuro sæculo gloriam, sed et in præsentem quietem et libertatem habet virginitas.

« Alligatus es uxori? noli quærere solutionem. Solutus es ab uxore? noli quærere uxorem. »

Dixi quia bonum est homini sic esse, et tamen si alligatus es uxori, noli quærere solutionem, ut continenter vivas, quia non licet uxorem dimitti nisi causa fornicationis (Matth. v, 19). Sed si solutus es ab uxore, tunc accipe meum consilium ut non quæras uxorem. Habet unusquisque nostrum terminos suos, redde mihi meum, et tu tene tuum. Et si alligatus es uxori, ne des illi repudium; si solutus es, ne quæras vinculum. Ut ego non solvo conjugia, si semel ligata sunt, ita tu non liges, quod solutum est.

« Si autem acceperis uxorem, non peccasti; et si nupserit virgo, non peccavit. Tribulationem tamen carnis habebunt hujusmodi. Ego autem vobis parco. »

Dixi, ne quæras uxorem. Sed tamen si acceperis uxorem, non peccasti. Aliud est non peccare, aliud bene facere. Non enim male agit qui uxorem ducit, sed contra malam fornicationis actionem se munit. Et si nupserit virgo, non peccavit. Non illa virgo, quæ se semel Dei cultui dedicavit. Harum enim si qua nupserit, habebit damnationem, quia primam fidem irritam fecit. Virgines enim quæ post consecrationem nupserint, non tam adulteræ sunt quam injustæ (I Tim. v). Ne autem videretur Apostolus in eo quod dixit: Et si nupserit virgo, non peccavit, rursus cælibes ad nuptias revocare, statim se refrenavit, et aliud inferendo infirmavit, quod concesserat, ac deterruit a nuptiis, dicens: Tribulationem tamen carnis habebunt hujusmodi, id est licet non peccent qui conjugia sortiuntur, tamen levius sine conjugio possunt vivere, quia tribulationem carnis habebunt qui sunt hujusmodi, et nos ignari rerum putabamus nuptias saltem carnis habere lætitiâ. Si autem nubentibus et in carne tribulatio est, in qua sola videbantur habere delicias, quid erit reliquum propter quod nubant, cum et in spiritu et in anima et in ipsa carne tribulatio sit? Nam et majores tribulationes hi frequenter ex carne suscipiunt, qui carnis voluptatibus delectantur. Tribulationem habebunt. Sed ego dum consulo vitare hanc, parco vobis, id est nolo vos illam sentire, sed immunes ab ea esse. Vel parco vobis, id est ostendo sic carnis tribulationem, quasi non majora sint propter quæ nubere non debeatis.

« Hoc itaque dico, fratres, tempus breve est. Reliquum est ut qui habent uxores, tanquam non habentes sint; et qui flent, tanquam non flentes; et qui gaudent, tanquam non gaudentes; et qui emunt tanquam non possidentes; et qui utuntur hoc mundo, tanquam non utantur. Præterit enim figura hujus mundi. »

Quandoquidem parco vobis a tribulatione, ut non cam per nuptiarum implicamenta sustinere cogamini, itaque, fratres, hoc dico vobis, quia temens vitæ

præsentis *breve est*; nec adhuc populus Dei propagandus est generatione carnali, sed jam recolligendus regeneratione spirituali, quoniam omnia in brevi finientur. *Reliquum est*, id est hoc solum restat agendum *ut et qui habent uxores*, etc. Uxorem namque habet, sed quasi non habens est, qui scit sic debita carnis exsolvere, ut tamen per ea mundo tota mente non cogatur inhærere. Nam cum Apostolus iste rursus dicat: Qui habet uxorem, cogitat quæ sunt mundi, quomodo placeat uxori; ille uxorem habet, quasi non habens, qui sic studet placere conjugii, ut tamen non displiceat Conditori. Flet quoque, sed quasi non fleat, qui sic temporalibus damnis affligitur, ut tamen de æternis lueris animum semper consoletur. Gaudet vero, sed quasi non gaudeat, qui sic de temporalibus hilarescit, ut tamen semper perpetua tormenta consideret; et in hoc quod mentem gaudium subleuat, hanc continuo pondere providi timoris premat. Uxorem, inquam, habet quasi non habendo, qui sic per illam carnali consolatione utitur, ut tamen nunquam ad prava opera melioris intentionis recitidine ejus amore flectatur. Uxorem quasi non habendo habet, qui hæc transitoria esse conspiciens curam carnis ex necessitate tolerat, sed æterna gaudia ex desiderio spiritus exspectat. Non flendo autem flere, est sic exteriora adversa plangere, ut tamen noverit internæ spei consolatione gaudere; et rursus, non gaudento gaudere, est sic de infimis animum tollere, ut tamen nunquam desinat summa formidare. Emit autem sed quasi non possidet, qui ad usum terrena præparat, et tamen cogitatione alta prævidet, quod citius hæc relinquat. Mundo quoque utitur, sed quasi non utatur, qui et necessaria cuncta exterius ad vitæ suæ ministerium redigit, et tamen hæc non sinit suæ menti dominari, ut subjecta foris serviant, et nunquam intentionem animi ad alia tendentis frangant. Quicumque igitur tales sunt, eis profecto terrena omnia non ad desiderium, sed ad usum adsunt, quia rebus quidem necessariis utuntur, sed nihil habere cum peccato cupiunt. De ipsis quoque rebus habitis quotidie mercedes quærunt, et plus gaudent bono opere quam bona possessione. Taliter, inquit, agere debetis, *præterit enim figura hujus mundi*. Ac si aperte diceret: Nolite constanter mundum diligere, quando ipse non potest quem diligitis, stare (*I Joan. II*). Incassum cor quasi manenter ligitis, dum fugit ipse quem amatis; et si mundus transit quo universa clauduntur, imo figura et conversatio hæc mundi quasi nubes præterit, inter cætera mundi opera et nuptiæ præteribunt (*Matth. XXI; Marc. XII; Luc. XX*). Neque enim post resurrectionem erunt conjugia. Si autem mors finis est nuptiarum, cur necessitatem in voluntatem non vertimus: et quod invitis extorquendum est, cum spe præmiorum offerimus Deo? Præterit figura mundi, non natura, ut in aliam speciem mundus vertatur, et de hoc veteri cælo ac terra fiat cælum novum et terra nova (*Isa. XXV, LXVI; II Petr. III; Apoc. XXI*). Tunc enim

A figura mundi quotidie senescentis perfecte præteribit, quando conflagratione mundana elementorum corruptibilium qualitates, quæ corporibus nostris corruptibilibus congruebant ardendo penitus interibunt, atque ipsa mundi substantia qualitates habere incipiet, quæ corporibus immortalibus mirabili mutatione conveniant, ut scilicet mundus in melius innovatus, apte accommodetur hominibus etiam carne in melius innovatis.

« Volo autem vos sine sollicitudine esse. Qui sine uxore est, sollicitus est quæ Domini sunt, quomodo placeat Deo. Qui autem cum uxore est, sollicitus est quæ sunt mundi, quomodo placeat uxori, et divisus est. Et mulier innupta et virgo cogitat, quæ Domini sunt, ut sit sancta et corpore et spiritu. Quæ autem nupta est, cogitat quæ sunt mundi, quomodo placeat viro. Porro hoc ad utilitatem vestram dico, non ut laqueum vobis injiciam; sed ut ad id quod honestum est, et quod facultatem præbeat sine impedimento Dominum obsecrandi. »

Mundi forma præterit, et hæc omnia temporalia. Sed ego volo vos esse sine sollicitudine temporalium, quam habent conjugati, ut possitis libera mente divinis intendere. Nam qui sine uxore est, sollicitus est eorum quæ sunt Domini, id est studet jejuniis et orationibus, humilitati ac misericordiæ cæterisque virtutibus, cogitans quomodo placeat Deo, faciens ea quæ sunt illi grata. Sed qui cum uxore est, sollicitus est eorum quæ sunt mundi, ut habeat unde pascat uxorem et filios, id est studet multiplicare divitias, et vineas agrosque fertiles et amplos habere, variamque suppellectilem possidere, intendens quomodo per hæc placeat uxori, et divisus est, id est in multas partes sollicitudinum miseriarumque distractus. Vel divisus est, quia singulariter Domino non servit, sed partim Domino, partim sæculo. Ex conjugiiis quippe terrenæ sollicitudines prodeunt, et idcirco vitam cælibem quisque magis debet eligere, ne propter conjugium cogatur sollicitudinibus mundanis intentus esse. Bonum est enim conjugium, sed mala sunt quæ circa illud ex hujus mundi cura succrescunt; et ideo nunc Apostolus cum ad cælibatus gratiam instrueret, non conjugium sprexit, sed curas mundi nascentes ex conjugio repulit. Et quemadmodum de viro dictum est, simili modo et de femina constat, quia mulier innupta et virgo cogitat quæ Domini sunt. Non omnis innupta et virgo est, quæ autem virgo, utique et innupta est. Hinc post mulierem posuit nunc Apostolus virginem, ut mulierem significaret non esse virginem. Quanquam ob elegantiam dictionis potuerit idipsum altero verbo repetere, mulier innupta et virgo; vel certe definire voluisse, quid esset innupta et virgo, ne et meretrices putarem innuptas, nulli certo matrimonio copulatas. Innupta et virgo cogitat quæ Domini sunt. Non jam cogitat temporalia nec cogitat quemadmodum non puniatur a Deo, sed quemadmodum placeat Deo pulchritudine interiore, decore

mentis, formositate interioris hominis. Ut nihil aliud esset, et nulla merces amplior virginem sequeretur, sufficeret ei hæc sola prælatio, cogitare quæ Domini sunt, et ornare se sponso cœlesti. Cogitat ut sit sancta corpore et spiritu, id est carne et mente: Nonnullæ enim sunt virgines carne, non spiritu, quarum corpus integrum est et anima corrupta. Sed illa virginitas hostia Christi est, cuius nec mentem cogitatio, nec carnem libido maculaverit. Est enim sancta corpore et spiritu. Non quod nupta fidelis et casta et secundum scriptum subdita viro, non sit sancta corpore, sed tantummodo spiritu. Fieri enim non potest ut sanctificato spiritu, non sit sanctum etiam corpus, quo sanctificatus utitur spiritus. Sed ampliorem in nuptiarum et in corpore et in spiritu sanctificationem Apostolus his verbis intelligi voluit, non corpus nuptiarum omni sanctificatione privavit. Minor est enim divina sanctitas ex ea parte curarum, qua mundana cogitatur voluptas. In nuptia, id est vidua, et virgo cogitat quæ Dei sunt. Sed quæ nupta est, cogitat econtrario ea quæ mundi sunt, studens quomodo placeat viro. Lege enim maritali contristata, sollicita est quomodo impleat jus maritalis officii, subdita mundanis necessitatibus. Quidquid itaque intentionis animi etiam in his rebus impenderetur quibus placendum esset viro, colligere quodammodo et redigere debet in nuptia in eam intentionem, qua placendum est Deo. Sed videmus virgines de sæculo cogitare et matrimonio junctas Dominicis operibus studere. His virginibus non imputabitur sanctimonia a Deo, et his nuptis erit merces apud Deum. Similiter et de viris sentiendum est. Apostolus autem his loquitur, qui mira devotione obsequi desiderant cœlestibus præceptis, ostendens quo compendio citius curritur ad Deum, scilicet si cœlibem vitam quis ducat, et solis divinis studeat. Qui ne forsitan putaretur onus gravissimum castitatis imponere nolentibus statim subjungit causas suadendi, et ait: Porro hoc dico, continentiam suadeo, ad utilitatem vestram, id est ut majorem apud Deum mercedem acquiratis, et levius in hoc sæculo vivatis, non ut injiciam vobis laqueum, id est non ut invitos vos ad hoc constringam, et laqueus iste sit vobis occasio fornicationis, si incontinentes fueritis, sed suadeo ad id quod honestum, decorum, est, id est sanctum et mundum, ut scilicet, homo sit corpore castus et animo: non quia conjugium sit inhonestum aut turpe, sed quia hoc honestius sit, et suadeo ad id quod præbeat facultatem obsecrandi Dominum sine impedimento, quod non est in conjugio, vel obsecrandi Dominum sine impedimento conjugalis operis.

« Si quis autem turpem se videri existimat super virgine sua, quod sit superadulta, et ita oportet fieri, quod vult, faciat: non peccat, si nubat. Nam qui statuit in corde suo firmus, non habens necessitatem, potestatem autem habens suæ voluntatis, et hoc judicavit in corde suo servare virginem suam, bene facit. Igitur et qui matrimonio jungit

virginem suam, bene facit; et qui non jungit, melius facit. »

Sicut de virginibus determinavit, sic et de patribus virginum determinat. Ego, inquit, ad cœlibatum provoco, quia hoc est honestius et expeditius. Sed si quis habens filiam virginem existimat, id est timet se quandoque videri turpem, id est infamem, super, id est de virgine sua, eo quod sit superadulta, id est ultra pubertatem et ad nubendum jamdiu matura, et ita oportet fieri, id est oportet eam tradi nuptiis, quia non vult se continere, atque in verbis ejus et actibus lascivia notatur, propter vitandum fornicationis opprobrium, faciat pater quod illa vult, id est tradat eam marito, quia non peccat ipse si illa nubat, cum sit jam superadulta et in desiderio nuptiarum. Ideo dico, si ita oportet fieri, non peccat, si eam tradat viro, quia qui non dat, sed in sanctimonia conservat, bene facit. Aliud est autem non peccare, aliud benefacere. « Declina, inquit, a malo et fac bonum (Psal. xxx, 6). » Illud declinamus, hoc sequimur; in altero vitium, in altero perfectio. Et hoc est, ille prædictus non peccat, id est non facit malum: nam iste de quo subjungo, faciet bonum: Qui firmus, id est constans et immutabilis, statuit in corde suo, id est proposuit in consilio suæ rationis servare virginem suam in perseverantia virginitatis, non habens necessitatem tradendi eam viro, cum illa non id optaret, sed habens potestatem suæ voluntatis implendæ, cum virgo non adversaretur, sed assentiretur huic paternæ voluntati ut integra perseveraret, et hoc ille judicavit in corde suo, id est ex judicio mentis bonum esse decrevit, et ex deliberatione rationis instituit servare intactam virginem suam, non tantum non peccavit in hoc, sed etiam bene facit, quia quod Deo gratum est facit. Vel nomine virginis intelligatur caro. Si quis, inquit, considerat virginem suam, id est carnem lascivire et ebullire in libidinem, neque refrenare se potest, duplexque ei incumbit necessitas, aut accipiendæ conjugis aut ruendi, quod vult faciat; non peccat si ducat uxorem. Faciat quod vult, non quod debet. Non peccat, si duxerit uxorem; non tamen bene facit si duxerit. Nam qui statuit in corde suo firmus servare virginem suam, id est carnem in virginitate, ille bene facit. Deinde ab utroque, infert Apostolus: Quandoquidem non peccat qui eam tradit viro quam oportet tradi, et bene facit qui eam servat quam potest servare, igitur et qui virginem suam jungit matrimonio bene facit, quia licitum est quod facit; et qui non jungit, cum habeat potestatem voluntatis suæ, melius facit, quia apud Deum illi meritum collocat, et a sæculi sollicitudine illam liberat. Nisi illaturus fuisset, melius facit, nunquam præmississet bene facit. Ubi autem bonum melius est, ibi boni et melioris non unum est præmium. Et ubi non unum præmium, ibi utique dona diversa. Tantum ergo est inter nuptias et virginitatem, quantum inter non peccare et bene facere; imo ut levius dicam, quantum inter

bonum et mellus. Finita disputatione conjugiorum et virginitatis, et inter utrumque cauto moderamine præceptorum, ut nec ad dexteram nec ad sinistram diverteret, sed via regia graderetur (*I Reg. vi; II Reg. xiv; IV Reg. xxii*), et illud impleret: Ne sis multum justus (*Eccl. vii*), rursus monogamiam digamiam comparat; et quomodo nuptias subdiderat virginitati ita digamiam primis nuptiis subjicit, et ait:

« Mulier alligata est legi quanto tempore vir ejus vivit. Quod si dormierit vir ejus, liberata est a lege (*Rom. vii*). Cui autem vult nubat, tantum in Domino. Beatior autem erit, si sic permanserit secundum meum consilium. Puto autem quod et ego Spiritum Dei habeam.»

Non est peccatum si virgo nupserit. Sed quæ vult nubere, audiat legem cui vult se subdere. *Mulier enim alligata est legi quanto tempore vir ejus vivit, nec potest a lege viri solvi ut alteri nubat dum illo vixerit.* Hæc namque alligatio non solvitur, etiam si per repudium adultera conjux a casto conjugè separetur, nec habet licentiam ut alteri nubat, quando sive castus sive mæchus vir ejus vivit. *Quod, id est sed, si dormierit, id est si mortis somnum gustaverit vir ejus, qui in resurrectione est evigilaturus, liberata est a lege ejus, ut possit alii nubere, si se non possit continere.* Si dormierit, liberata est. Non dixit primus aut secundus, nec tertius aut quotuslibet, nec nobis definiendum est, quod non definiit Apostolus. Unde nec illas nuptias debemus damnare, nec eis verecundiam numerositatis afferre. Nam nec Dominus in Evangelio ulla suæ sententiæ significatione damnavit mulierem quæ septem viros habuisse dicebatur (*Matth. xxi*), nec dixit in resurrectione electorum tales esse non posse. Quapropter nec contra humanæ verecundiæ sensum audeo, inquit Augustinus, dicere, ut quoties voluerit, viris mortuis, nubat femina, nec ex meo corde præter sanctæ Scripturæ auctoritatem, quotaslibet nuptias audeo condemnare. *Cui vult nubat, tantum in Domino.* Id est ut et sine suspitione turpitudinis nubat, et religionis suæ viro nubat. Neque enim vel virgo vel vidua permittitur gentili viro nubere. Dico nubat. Sed tamen *beatior erit, si sic innupta permanserit post viri mortem secundum consilium meum.* Beatior erit, si vidua permanserit, quia etiam si iterum nupserit, beata esse poterit servando justitiam. Beatior, inquit, erit, si sic permanserit. Continuo subjungit apostolicam auctoritatem, secundum meum consilium. Porro ne auctoritas Apostoli quasi hominis levior videretur, addidit: *Puto autem quod et ego Spiritum Dei habeam.* Ubi ad continentiam provocat, ibi non hominis, sed Spiritus Dei consilium est; ubi autem nubendi veniam dat, Spiritum Dei non nominat, sed prudentiæ librat consilium, ita singulis relaxatis, ut unusquisque ferre potest. Do consilium. Sed nolite hoc velut humanum contemnere, quia puto quod ege sicut alii apostoli, Spiritum Dei habeam. Id est

A nolite putare quia ex me hoc ipsum sit. Quod dico, Spiritus Dei in me loquitur, quem contemni non expedit. Quod Apostolus dixit: *Puto, dubitare videtur; sed ille increpat, non dubitat.* Increpat contemptores suos, qui non putabant eum ista loqui per Spiritum Dei. Nam et homines de his rebus quas certas habent, aliquando increpative dubitant, id est verbum dubitationis ponunt, cum corde non dubitent, velut si quis indignetur et dicat servo suo: Contemnis me? Considera, forsitan dominus tuus sum. Sic et Salvator non dubitat, sed increpat, cum dicit Judæis: « Si crederetis Moysi, crederetis forsitan et mihi (*Joan. v*). » Non dubitative, sed increpative dixit, forsitan.

CAPUT VIII.

B « De his autem quæ idolis sacrificantur, scimus quia omnes scientiam habemus. Scientia inflat, charitas vero ædificat. Si quis autem se existimat scire aliquid, nondum cognovit quemadmodum oporteat eum scire. Si quis autem diligit Deum, hic cognitus est ab eo.»

Ingreditur illos corrigere, qui carnes idolis immolatas edebant, dicentes: Omnis creatura Dei bona est, idolum vero nihil est, et hac imagine magis quam veritate rationis errabant. Nam cæteri qui simplices erant et idiotæ, dum viderent istos idolothyta comedere, putabant in illis carnibus aliquid sanctitatis esse, sicque infirmabantur in fide (*I Tim. iv*). De nuptiis, inquit, et cæteris quæ sunt hactenus tractata, quæsisit et docui: sed *de his quæ sacrificantur idolis, non fuit opus quærere, quia de his scitis ut ego, quoniam omnes scientiam istam habemus.* Perfectioribus loquitur, qui in sua scientia aliis erant scandalum id est idiotis, quia bene sciebant idolum nihil esse, et nullum Deum præter Christum esse, ideoque licebat eis quantum ad se, creaturam Dei comedere; sed tamen abstinere debent, ne fierent infirmis causa offensionis; quod enim illi per hujusmodi scientiam comedebant, alii ignari sub veneratione idoli manducabant. Scientiam habemus tam ego quam vos, quid fieri possit de carnibus immolatis. Sed non valet hæc scientia, quoniam inflat, id est facit vos superbire contra ignaros. Sed charitas ædificat infirmos, quæ quod eis obesse potest, dimittit; et ideo charitatem habere melius est, non ventosam scientiam. Nam scientia inflat, charitas autem ædificat, quia cum charitas ædificando non erigit, scientia inflando pervertit. Per se enim inutilis est scientia quando sola sine charitate est; sed per charitatem utilis, quando ei charitas adjuncta est. Temperat enim a charitate, ut non satis mera sit, et inebriet scientem, ut non se extollat. Sicut enim vinum non temperatum ex mistione aquæ mentem alienat, sic et superbium facit scientia, nisi charitate fuerit temperata. Tali scientia hi erant inflati, qui quoniam sciebant nihil esse idolum, contra salutem fratrum imperitorum, carnes sacrificiorum edebant, charitatem præ oculis non habentes, quia debuissent car-

nes contemnere, ne scandalum infirmis facerent. Scientia namque eorum destruebat animos imperitorum fratrum, putantium illic apud idolum aliquam gratiam, quando peritiores fratres interesse ibi et non horrere videbant; et ob hoc ait: Caritas ædificat, ut saluti fratrum studentes, scientiæ legibus illic non uterentur, nec scandalum illis facerent. Scientia enim sine charitate inflat, quod vero charitas ædificando impleverit, nihil ibi inane inveniet scientia quod inflat. Scientia, inquit, vos inflat, ut despiciatis cæteros, et ideo non est utilis nec perfecta scientia. Nam si quis vestrum existimat se in hac re aliquid scire, nondum cognovit quomodo debeat scire; et ita non sufficienter scit, quamvis de scientia gloriatur, et si scit quod liceat sibi carnibus vesci, non novit quod ipse debet illa scientia sic uti, ne noceat aliis. Ita enim quisque debet scire, ut scientia sua sibi et aliis prosit, non ut noceat. Nam qui per hujusmodi scientiam idolothya comedit, scientia et comestio ejus ad subversionem infirmorum fratrum, et ad confirmationem infidelium proficit; et ideo non ita scit ut oportet. Sed si quis diligit Deum, ad cujus dilectionem non potest pervenire nisi dilexerit proximum, hic est cognitus, id est probatus et electus ab eo. Dei enim dilectio in proximi dilectione probatur (Rom. xiv), quia qui studet fratri prodesse, pro quo Christus mortuus est, ostendit se Christum diligere; et ideo dignus est ut Deus illum dignetur cognoscere, qui reprobis dicit: « Nescio vos. (Matth. vii, 26). »

« De escis autem quæ idolis immolantur, scimus quia nihil est idolum in mundo, et quod nullus est Deus nisi unus. Nam, et si sunt qui dicantur dii, sive in cælo, sive in terra, siquidem sunt dii multi et domini multi, nobis tamen unus est Deus Pater, ex quo omnia, et nos in illum: et unus Dominus Jesus Christus, per quem omnia, et nos per ipsum (Exod. xx; Psal. lxxxii; Joan. x.) »

Quoniam propter interpositionem non potuit exponere quid scirent de escis immolatis, facta interpositione, et ostenso quod scientia sine charitate non sufficit, nec est utilis, sed noxia, redit ad rem, et exponit quid ipsi sciant de carnibus immolatis, propter quod licere sibi judicabant eas comedere. Qui de scientia gloriatur, non novit quomodo oporteat eum scire. Sed de escis quæ immolantur idolis, scit ipse et nos quod licitæ sunt ad comedendum intelligentibus. Vel de escis quæ immolantur idolis, scimus, id est scientiam istam habemus, quod scilicet nihil est idolum; et ideo licet escas manducare, quia non sunt ab idolis contaminatæ, cum idolum sit nihil. Idolum est simulacrum humana effigie vel belluina seu volucrina factum et consecratum, juxta vocabuli sui interpretationem; εἶδος enim Græce, Latine forma seu species interpretatur: et inde per diminutionem dicitur εἰδωλον, id est formula et quia idolum, ut Apostolus nunc dicit nihil est, idolum facit, qui illud facit, quod non est. Quid est autem non est? Species quam non videt oculus, sed

A ipse sibi animus fingit, verbi gratia, ut si quis humanis membris caput canis vel arietis formet, aut rursus in uno hominis habitu facies duas fingat vel humano pectori postremas partes equi seu piscis adjungat. Hæc et his similia qui facit, non similitudinem, sed idolum facit. Facit enim quod non est, nec habet aliquid simile, et idcirco Apostolus dicit: quia nihil est idolum in mundo, id est inter creaturas mundi. Si enim consideremus omnes creaturas, quas Deus fecit, nunquam invenimus idolum a Deo sic creatum. Materiam quidem ipse creavit, sed stultitia hominum hanc ei formam dedit, ideo secundum hoc quod a Deo non est factum, nihil est, cum omnia Deus fecerit. Nam et malum simili ratione nihil est, quia Deus illud non fecit. B Vel ad salutem nihil est idolum, sicut stulti putant qui ideo colunt illud, ut salutem aliquam illis conferat. Sed et quantum ad divinitatem, nihil est idolum, id est nihil divinitatis in se habet, ut coli debeat. Hoc scimus, et quod nullus est Deus nisi unus qui est incommutabilis Trinitas et vere unus tantum (Joan. x). Nam etsi sunt qui dicantur dii, id est qui nuncupative, non essentialiter dii vocantur quia Deus eis participationem sui per gratiam dedit; sive in cælo, sicut beati angeli; sive in terra, sicut prophetæ et apostoli: siquidem sunt dii multi tales, sicut angelici spiritus et sacerdotes: et domini multi sunt illi spiritus, qui vocantur dominationes; et prædicatores, qui nonnunquam in Scripturis appellantur domini: aut etiam sæculares principes, qui dominium exercent super cæteros, quamvis, inquam, sint tales dii et domini, nobis tamen quantum ad cultum pertinet, unus solummodo Deus et Dominus est. Non enim angelos vel homines sanctos, quamvis dii vocentur, colimus ut deos aut dominos. Nobis tamen ad colendum est unus Deus Pater, ex quo sunt omnia, id est ex cujus bonitate et consilio processerunt omnia, et nos fideles in illum respicimus. Bruta namque animalia et infideles homines in terram curvantur et terrena quærunt; nos vero per fidem et desiderium tendimus in eum, a quo descendimus. Et est nobis ad colendum unus Dominus Jesus Christus, per quem sunt omnia, quoniam sicut et Joannes asserit: « Omnia per ipsum facta sunt (Joan. i), » et nos per ipsum sumus non solum homines, sicut et cæteri, sed etiam boni ac sapientes. Ubi et spiritus Patris et Filii similiter colendus nobis intelligitur. Sed quia de diis et dominis loquebatur Apostolus, dixit nobis esse unum Deum Patrem et unum Dominum Filium, quanquam et Filius sit Deus, atque Pater sit Dominus. Ad illa enim duo, id est ad deos et dominos, subjecit ista duo, et idcirco tertium non addidit, id est Spiritum sanctum.

« Sed non in omnibus est scientia. Quidam autem cum conscientia usque nunc idoli quasi idolothytum manducant: et conscientia ipsorum cum sit infirma, polluitur. »

Nos quidem scimus quia nihil est idolum, et quod

nullus deus nisi una Trinitas creatrix omnium quam A colimus; *sed non in omnibus est ista scientia*, id est non omnes hoc sciunt, sed nonnulli putant aliquid numinis esse in idolis. Non omnes hoc sciunt, sed potius *quidam* sunt inter vos, *qui usque nunc cum conscientia idoli*, id est etiam nunc sicut ante conversionem, putantes idolum esse aliquid, manducant cibum idolo sacrificatum, quasi idolothytum, id est quasi per consecrationem idolo sanctificatum, et in spiritualem potentiam mutatum. Idolothytum enim dicitur, quasi idolo datum. Conscientia illorum est idoli, id est ab idolo possessa, usque nunc, id est etiam postquam ad fidem accesserunt, quia necdum ab errore idoli mentem suam penitus abstraxerunt, et quasi *idolothytum*, id est quasi idolo consecratum, manducant cibum illum cum reverentia idoli; *et sic conscientia ipsorum polluitur* contaminatione idoli, non propter cibum, sed propter infirmitatem suam: quia infirma est in fide, dum periclitantur ignari in vestra scientia, dum cibos quos a vobis comedi vident, comedunt exemplo vestro vel auctoritate. Mystice vero Corinthii, quoniam studiosi litterarum Græcarum erant et amatores philosophiæ, dogmata philosophorum quasi idolis immolata comedebant (*infra x*). Quæ tamen fortasse lædere non poterant eos qui plenam scientiam veritatis acceperant. Qui autem in Christo minus eruditi fuerant, si imitarentur eos legentes talia, et illis adhuc studiis operam dantes, vulnerari poterant, et diversorum dogmatum variis erroribus implicari. Sic ergo fieri poterat, ut inde læderentur indocti, unde qui perfectam scientiam habebant, lædi nequibant. Sed quoniam charitas non quærit quod sibi utile est, sed quod multis, ut salvi fiant, abstinendum nobis est a tali cibo doctriinæ, qui nos solos ædificat et delectat, sed proximos offendit et lædit. Sicut enim sermo qui pietatem et justitiam et veritatem docet, Deo immolatus est, id est Deo consecratus; ita et sermo qui ad impietatem et injustitiam et errorem respicit idolis immolatus est. Et qui eum recipit, quasi idolis immolata comedit. Sed juxta priorem sensum, videamus sequentia.

« Esca autem nos non commendat Deo. Neque enim si manducaverimus, abundabimus; neque si non manducaverimus, deficiemus. »

Infirmi læduntur nostra comestione. Sed *nos non commendat Deo esca* illa, quia non ideo placemus Deo, quod escam idolis immolatam comedimus pro eo quod nobis hanc esse licitam novimus, et idcirco respuenda est talis esca. Hac enim contempta, non utique deerit quod edatur. Si autem sumpta fuerit, non abundabit ita ut nihil ultra requiratur. Ac per hoc, ut diximus, abjicienda est, cum sit fratribus scandalum, et nos sine illa possimus vivere. Vel non commendat nos Deo, ut per hanc simus acceptabiliores ei, quia *si manducaverimus eam*, non idcirco abundabimus in hono, ut sufficiat nobis ad salutem, neque *si non manducaverimus*, ideo deficiemus, id est non minuetur nostrum meritum apud Deum.

« Videte autem ne forte hæc licentia vestra offendiculum fiat infirmis. Si enim quis viderit eum qui habet scientiam, in idolo recubentem: non ne conscientia ejus cum sit infirma, ædificabitur ad manducandum idolothyta, et peribit infirmus in tua scientia frater, propter quem Christus mortuus est? Sic autem peccantes in fratres, et percutientes conscientiam eorum infirmam, in Christum peccatis. Quapropter si esca scandalizat fratrem meum, non manducabo carnem in æternum, ne fratrem meum scandalizem (*Rom. xiv*). »

Vobis quidem licet edere de carnibus immolatis, quia scitis eas esse creaturam Dei, idolum autem nihil esse. Sed *videte ne forte hæc licentia vestra fiat offendiculum infirmis* in fide, id est ne generet offensionem fratribus, qui adhuc nesciunt idolum nihil esse. Per hoc quod dicit, *ne forte*, ostendit quod ex licentia eorum potest infirmis fratribus offendiculum contingere et non contingere. Et per hoc innuit, quia ubi nullum est offendiculum alicui, possunt uti licitis; ubi vero est offendiculum, ostendit omnino abstinendum. Cum enim prava æstimatio, in quantum sine peccato valet, ab intuentium mente non tergitur, cunctis mala credentibus per exemplum culpa propinatur. Unde et plerumque contingit, ut qui negligenter de se mala opinari permittunt, per semetipsos quidem nulla iniqua faciant, sed tamen per eos qui se imitati fuerint, multiplicius delinquant; et ideo recte nunc isti qui cibos immundos sine sui pollutione comedere poterant, admonentur ne sua hac comestione scandalum tentationis fratribus infirmis moveant. Nam possunt iude fratribus scandalum facere. *Si enim quis infirmus*, nondum sciens idolum nihil esse, viderit eum qui habet rectam scientiam, qua novit idolum nihil esse *recubentem in idolo*, id est comedentem cum infidelibus carnes immolatas in præsentia idoli, *nonne* exemplo periti *conscientia* ignari, *cum sit infirma*, ædificabitur, id est erigetur *ad manducandum idolothyta*, id est quasi ab idolo sanctificata, putans illic aliquid gratiæ esse, quia peritum fratrem vidit ea comedere nec horrere? Quomodo enim putatis simulacris decipi posse homines, quæ a Christianis honorari putant? Nam pagani dicunt in cordibus suis: Quare nos relinquamus deos quos Christiani ibi nobiscum colunt? Et infirmi fratres provocantur, ut non solum ibi manducare, sed et sacrificare desiderent. Idolium est locus in quo idolis immolatur, et infirmus si quemlibet doctum viderit ibi cum infidelibus edere, putabit eum intelligere cibos illos aliquam sanctificationem ab idolo sumpsisse, et tali mente incipiet illos comedere, *et ita peribit infirmus frater in tua scientia*, quem viderit taliter recubentem, peribit infirmus, si contra unius Dei fidem comederit de sacrificatis, peribit in tua scientia, id est tua peritia illum occidet, dum a te fieri viderit quod ipse aliter intelligit; et tu eris occasio mortis ejus, *propter quem Christus* ut redimeret *mortuus est*. In tua scientia, quam te dicis habere, ut scias quia nihil est

idolum, et animo cogitas Deum, et sic recumbis in A idolio, in hac scientiæ perit infirmus; et ne contemnas infirmum propter vitium in quo infirmus est, audi quia frater est, si firmus es, cura fratris infirmitatem, et ne etiam fratrem contemnas, adjungo, propter quem Christus mortuus est. Quem si vis contemnere, pretium ipsius attende. Considera qui mortuus est propter ipsum, et non negligas Christum propter infirmum, cum infirmum debeas diligere propter Christum. Vos, inquit, exemplo vestro ducitis in errorem infirmos, quod non est leve peccatum. Quia *sic peccantes in fratres et exemplo vestri operis percutientes*, id est lædentes conscientiam eorum infirmam, peccatis in Christum qui pro illis mortuus est, et cujus membra illi sunt: et ideo nolite hoc peccatum contemnere, si non vultis deleri de libro vitæ. Nolite putare quod in homines peccatis tantum, et ideo leve sit, quia taliter in Deum peccatis, cujus membra destruitis. Vel secundum alios codices, in Christo peccatis. Per hoc enim quod charitatis æmuli non estis, quia Christus vos liberavit, peccatis in Christo, non in Christum. Quia juxta hunc sensum, in Christum peccare, est Christum negare; in Christo autem peccare, est in his quæ Christi sunt peccare. Nam sicut qui sub lege est, in lege dicitur peccare (*Rom. 11*); ita et qui sub Christo sunt, in Christo dicuntur peccare. Et quia per prædictam comestionem peccando in fratres, peccatis in Christum vel in Christo, propter hoc *si esca mea scandalizat fratrem meum*, id est offendit, et a bono proposito disturbat, *non manducabo carnem ullam*, id est nunquam manducabo carnem ullam, sed semper ab esu carnis abstinere: non quod esca sit mala, sed *ne fratrem meum scandalizem* tali comestione. Sic et vos debetis agere. Nam sicut uxorem licet habere, sed si fornicata fuerit, abjicienda est; ita et carnem licet edere, sed si idolis oblata fuerit, respuenda est. In tantum enim charitati studendum est, ut et licita pro illicitis sint abjicienda, ne obsint fratri. Typice autem in eo quod dictum est: *Videte ne forte hæc licentia vestra*, etc. usque, *propter quem Christus mortuus est*, videtur Apostolus sub aliis verbis dicere: Ne legas philosophos, poetas, oratores, nec in eorum lectione requiescas, ne tali modo fratrem infirmum perdas. Nec nobis blandiamur, si in his quæ sunt scripta, non credimus, cum aliorum conscientia taliter vulneretur, et putemur probare, quæ dum legimus, non reprobamus. Alioqui quale erit ut æstimemus Apostolum ejus, qui vesceretur in idolio, conscientiam comprobasse, et eum dixisse perfectum, quem sciret de idolothytis manducare? Absit ut ore Christiano sonet Jupiter omnipotens, et mi Hercule, et mi Castor, et cætera magis portenta quam numina.

CAPUT IX.

« Non sum liber? non sum apostolus? Nonne Christum Jesum Dominum nostrum vidi? Nonne opus meum estis vos in Domino? etsi aliis non

sum apostolus, sed tamen vobis sum. Nam signaculum apostolatus mei vos estis in Domino. »

Incipit se proponere in exemplum, ut sicut ipse abstinet a licitis pro scandalo fratrum, ita et illi faciant, quasi dicat: Abstinete ab hoc licito propter fratrum utilitatem, quia ego habeo libertatem accipiendi stipendia, et tamen non accipio propter aliorum salutem. Et hoc est quod increpative dicit per interrogationem; *non sum liber?* id est nonne libertas est mihi data sicut cæteris apostolis, accipere stipendium ex bonis vestris? et *non sum*, id est nonne sum apostolus, ut et mihi liceat quod apostolis? Vere sum apostolus. Quia *nonne Christum Jesum Dominum nostrum vidi* in via vel in templo? Ac si dicat: Liber sum accipere, quia sum apostolus. Apostolus sum, quia Christum vidi. Apostolum se comprobat, quia occasione pseudoprædicatorum minus de eo sentiebant, et ad hoc comprobandum dicit se Christum vidisse, quia quidam dicebant illum non esse apostolum, quia nunquam viderat Christum. Sive liberum se dicit, quia nullius aliquid concupivit, nec in adulatione docuit. Apostolus autem est, id est missus a Christo dicente sibi: « Ego ad gentes mitto te (*Act. xxii*). » Vidit enim illum non adhuc mortalem, sed jam clarificatum, quando constitutus est ab ipso apostolus, ut per hoc patesceret dignitas apostolatus ejus. Vere inquit, sum apostolus, quia vos estis opus mei apostolatus. *Nonne enim vos opus meum estis in Domino?* id est nonne ego apostolus hoc operatus sum, ut vos sitis in Domino? *Etsi aliis*, id est Judæis *non sum apostolus, vobis tamen sum*, qui per me credidistis. Qui de Judæis crediderant, et legem adhuc carnaliter observabant, hunc esse negabant apostolum, quia ipse libera voce prædicabat legem amplius carnaliter non oportere servari. Cæteris enim apostolis propter scandalum ab hac re dissimulantibus, hic aliter docere videbatur, et ideo ab illis Judæis non recipiebatur. Vobis, inquit, sum apostolus. *Nam signaculum, id est signum et indicium apostolatus mei vos estis per me credentes in Domino.* Hoc est, forma apostolatus mei quasi similitudo sigilli expressa in vobis apparet, dum habetis ea, quæ alii fideles per alios apostolos habent.

« Mea defensio apud eos qui me interrogant, hæc est. »

Hæc scilicet defensio, quam dixi, est mea apud eos qui me interrogant, utrum sim apostolus, id est ostendo illis fidem et religiosam vestram conversationem, quam me docente consecuti estis, sicque per opera defendor esse apostolus contra eos, qui hoc negabant de me; et ita per vos apostolus esse comprobatur apud illos qui inde dubitabant, ideoque non convenit ut et vos inde dubitetis.

« Nunquid non habemus potestatem manducandi et bibendi? Nunquid non habemus potestatem sororem mulierem circumducendi, sicut et cæteri apostoli et fratres Domini et Cæphas? Aut solus

et Barnabas non habemus potestatem hoc A
ndi?)

supra dixi me esse liberum, quia nunquid
mei non habemus potestatem manducandi et
quæ nostra sunt? Habemus utique hanc po-
a, sicut cæteri apostoli. Potestatem habemus
to, non jussionem hujus rei, quia Dominus
t, non jussit prædicatoribus, ut acciperent
s, ut si qui eos non acciperet, majorem inde
m acquireret (*Matth. x*; *Luc. ix, 10*); sicut
nitatem laudavit, non præcepit, ad cumu-
riæ eorum qui eam servaverint (*Matth.*

*nunquid non habemus potestatem circumdu-
obis sororem mulierem?* in prædicatione, id
istianam et sanctam mulierem, ut ministret
facultatibus suis? Nunquid non possumus
ere si volumus, *quemadmodum cæteri apo-
fratres Domini et Cephas?* id est Jacobus Al-

Thadæus, qui fuerunt cognati Salvatoris,
ex sorore virginis Mariæ, et Petrus qui est
s apostolorum? Nam nec ipse Petrus refu-
mptus oblatos a feminis, sicut nec Dominus
rat (*Matth. xiii*; *Marc. vi*). Mulieres enim
o doctrinæ cœlestis ministrabant eis et sum-

servitia, ut non indigerent his quæ ad neces-
vitæ hujus pertinent. Ideo plus erat mulie-
umducere, quam ab auditoribus alimenta
e, quia mulieres indumenta et quæque ne-
præbebant (*Luc. viii*). Nec omnino repre-
e judicabatur hoc, maxime apud Judæos. Et

quit, potestas nonne et nobis est concessa
steris apostolis? *Aut solus ego et Barnabas,*
icet nobis ex labore manuum nostrarum vi-
m habemus potestatem hoc operandi? id est

endi, scilicet stipendia sumendi, et mulieres
lucendi? Nos duo soli non possumus hoc
cum omnes hoc agant? Non reprehendit
ed eorum more sibi probat licere quod eis
tum. Putabant enim nonnulli Corinthiorum,
n liceret ei sumptus accipere sicut cæteris,
n de labore suo vivebat, et inde minoris eum
is æstimabant, nec apostolum esse credebant,

apud se: Quia si esset apostolus, stipendia
s, ut omnes apostoli. Contra quos ipse nunc
s, ostendens se esse apostolum et potestatem
sumendi stipendia, sed nolle sumere, et ne
olos reprehendere videatur quia abstinet,
it:

s militat suis stipendiis unquam? Quis plan-
team, et de fructu ejus non edit? Quis pascit
m, et de lacte gregis non manducat.)

as similitudines humanæ consuetudinis osten-
onabiliter, quia sibi et aliis prædicatoribus
cipere sumptus. Nam et ipsi spiritualiter
regi militabant, et ideo a Christianis ple-
nquam a provincialibus stipendia sumebant.

lesiam quasi vineam plantabant, et idcirco
u ejus merito comedebant. Ipsi gregem ovium
doctrina veritatis pascebant, et ideo jure de

gregis lacte, id est de cibis ejus temporeis accipie-
bant. Paulus tamen qui hæc loquitur, suis stipendiis
militabat, et de fructu vineæ a se plantatæ non edo-
bat, nec de lacte potabat gregis quem pascebat.
Nullam enim in præsentī vita retributionem sumere
volebat, ut in futuro sæculo plenam de omnibus
mercedem reciperet. Qui præmissis similitudinibus,
subdit:

« Nunquid secundum hominem hæc dico? An et
« lex hæc non dicit? Scriptum est enim in lege
« Moysi: Non alligabis os bovi trituranti (*Deut.*
« xxv; *I Tim. v*). Nunquid de bobus cura est
« Deo? An propter nos utique hæc dicit? Nam pro-
« pter nos utique scripta sunt. Quoniam debet in
« spe qui arat, arare, et qui triturat, in spe fructus
« percipiendi. »

Dico quia miles debet a rege stipendia consequi,
et agricola de fructu vineæ carpere, et licet humanis
similitudinibus utar, *nunquid tamen hæc dico secun-
dum hominem?* id est nunquid sequor in his huma-
nam similitudinem? *An et lex Dei hæc quæ dico non
dicit?* Utique dicit hæc eadem. *Scriptum est enim
in lege Moysi (Deut. xxv): Non alligabis os bovi tri-
turanti,* id est non prohibebis prædicatorem vivere
de prædicatione. Concordare monstrat supradictas
rationes divinæ sententiæ, ut intelligamus quia non
sine causa respuit accipere sumptus, quando tot
documentis ostendit et dandum et accipiendum esse.

Sed ne ad litteram accipiatur hæc sententia, sub-
jungit: *Nunquid de bobus cura est Deo?* Quod non
sic intelligitur, tanquam non ipse pascat animalia
bruta, et volatilia, quæ non serunt, neque metunt,
neque congregant in horreum; sed quia ei cura
non est præcepto monere hominem, quomodo bovi
suo consulat. Nunquid ergo de bobus cura est Deo,

ut de his in lege præciperet? *An propter nos utique
qui sumus boves ejus, hæc dicit?* Nos enim tritu-
ramus, id est in area mundi serris notræ prædi-
cationis comminuiimus paleas infidelitatis et vitio-
rum, et separamus ab eis grana fidei cæterarumque
virtutum, vel credentes ab infidelibus tanquam a
paleis grana discernimus. Et ideo justum est ut non
prohibeamur ex area, quam trituramus, cibos su-
mere. *Nam propter nos utique sunt hæc scripta in*

*lege. Et vere propter nos spirituales boves. Quoniam
ille qui arat,* id est qui corda subjectorum vomere
prædicationis ad fidem aperit, *debet arare in spe,* id
est sperans fructum sui laboris consequi. Non quod
hæc sit ejus intentio, ut propter ejus expectatio-
nem, id est temporalis cibi prædicet, sed quod certus
sit non defore sibi victum, si in prædicatione
laboraverit. Similiter *et qui triturat,* id est grana
discernit a paleis, hoc est virtutes a vitiis, debet
hoc agere *in spe percipiendi fructus* stipendorum.

Historialiter quidem fit trituratio, quando boves aut
equi super segetes collectas et in area collocatas,
missi fuerint ad eas conterendas et grana excu-
tienda, sicut moris est in quibusdam regionibus.
Prædicatorum autem quando infidelium corda sciu-

dunt ac vomere prædicationis excolunt, et ad suscipiendum fidei semen arant, tunc demum terram ad semen gratiæ accipiendum præparant, et ab inculta solitudine, id est ab incredulorum multitudine separant; et qui prius arant in conversione, postea triturant in instructione, quia per assidnam correctionem et instructionem non localiter, sed moraliter bonos a malis sequestrant. Tamen et ante fidem trituratio fit, cum ab infidelibus quis per susceptionem fidei separatur, atque post fidem, cum in ipsa Ecclesia fit inter bonos, et malos quædam moralis discretio per prædicantium instructionem, et de hac Ecclesia loquitur nunc Apostolus, quæ fit quando alii respuunt, alii corriguntur, aliis in pejus proficiunt.

« Si nos vobis spiritualia seminavimus, magnum est si nos carnalia vestra metamus? (Rom. xv.) Si alii potestatis vestræ participes sunt, quare non potius nos? Sed non usi sumus hac potestate, sed omnia sustinemus, ne quod offendiculum demus Evangelio Dei. »

Ahuc probat per rationes, quia licet stipendia sumere. Si nos, inquit, seminavimus vobis, id est inchoavimus primi vestris mentibus spargere spiritualia, id est quæ a Spiritu sancto data sunt, et vestrum spiritum vivificant, ut fructificent in vobis sicut in bona terra, magnum est si metamus ad sustentationem nostri corporis vestra carnalia stipendia? Quasi dicat: Non est magnum, sed minimum, si tradentes vobis æterna, percipiamus a vobis temporalia. Item a minori, probat hoc ipsum. Si alii, inquit, sunt participes vestræ potestatis, id est tam potenter utuntur vestris rebus ut vosipsi, quare non potius nos id agimus, qui vestræ salutis causa fuimus? Quæ sunt autem spiritualia quæ seminavit, nisi verbum et ministerium sacramenti regni cælorum? Quæ vero carnalia, quæ sibi licere metere dicit, nisi hæc temporalia quæ vitæ atque indigentia carnis indulta sunt? Quæ potenter ab eis sumebant etiam alii, qui non eis primo Evangelium annuntiaverant, sed ad eorum ecclesiam id ipsum prædicantes postea venerant. Unde subiecit: Si alii potestatis vestræ participes sunt, id est potestatis quæ prædicatoribus concessa est in vos, ut utantur bonis vestris, cur non potius nos? Vel istos alios intelligamus pseudo apostolos, qui bona eorum devorabant, cum nihil utile eis contulissent. Ecce, inquit, probatum est, quia potestatem habemus sumendi stipendia. Sed tamen non usi sumus hac potestate, id est non accepimus sumptus ut poteramus. Tunc enim quis utitur sua potestate, quando quidquid pertinet ad illum, accipit, et a nullo suæ potestatis vult abstinere debito. Nos vero non ita fecimus, sed omnia sustinemus, id est famem et sitim et nuditatem libentissime toleramus, ne demus aliquod offendiculum Evangelio Christi, id est ne per nos Evangelium impediatur currere. Minus enim curret ad cor vestrum, si suspicaremur nos illud prædicare propter commodum terrenum. Vel si dedis-

setis nobis aliquid, putaretis forsitan vos emisse licentiam prædicandi, et nobis minueretur libertas arguendi. Vel si debitos sumptus acciperemus, jam pseudoapostoli nostro exemplo libere acciperent, et sic in prædicatione durarent. Aut si mulierem circumduceremus, inde posset oriri non bona suspicio. Talibusque modis impediretur cursus evangelicæ prædicationis.

« Nescitis quoniam qui in sacrario operantur, quæ de sacrario sunt, edunt? et qui altario deserviunt, cum altario participant? Ita et Dominus ordinavit his qui Evangelium annuntiant, de Evangelio vivere (Matth. x; Luc. ix, x). »

Iterum redit ad probationem, modisque omnibus etiam atque etiam commendat, quid sibi liceat et tamen non faciat. Licitum est, inquit, mihi sumptus ex prædicatione sumere, sicut ministrantibus apud Judæos in sanctuario licet de rebus sanctuarii vivere, quia et naturalis ratio hoc habet, ut unusquisque inde vivat, ubi laborat. Nam nescitis quoniam hi qui in sacrario, id est in tabernaculo vel templo operantur sicut ministri et artifices, edunt ea quæ sunt de sacrario, id est quasdam oblationes quæ offeruntur in eo pertinentes ad ipsos? et nescitis quia qui altario deserviunt, sicut sacerdotes et levitæ, participant cum altario? id est partem accipiunt de his quæ offeruntur in altari, et sicut antiquo more apud Hebræos antiquos hæc fiebant, ita et Dominus Jesus ordinavit in Novo Testamento, id est rationabiliter disposuit, his qui Evangelium annuntiant, id est prædicant, de Evangelio vivere, id est victum habere, ut expeditiores sint, cum de corporali cibo solliciti non fuerint. Hoc ordinavit, id est tali ordine disposuit Dominus, ut dantes spiritualia, sumerent carnalia, quando dixit: « In eadem domo manete, edentes et bibentes quæ apud illos sunt, dignus est enim operarius mercede sua (Luc. x). » Non quod ideo quisque debeat evangelizare ut manducet, sed ideo manducare ut evangelizet. Nam qui propterea evangelizat, ut manducet, vilius habet Evangelium quam cibum. Postquam vero multis similitudinibus et exemplis atque rationibus et auctoritatibus ostendit Apostolus sibi licere necessaria sumere, subjungit, dicens:

« Ego autem nullo horum usus sum. Non autem scripsi hæc, ut ita fiant in me. Bonum est enim mihi magis mori, quam ut gloriam meam quis evacuet. Nam etsi evangelizavero, non est mihi gloria. Necessitas enim mihi incumbit. Væ enim mihi est, si non evangelizavero. Si enim volens hoc ago, mercedem habeo; si autem invitus, dispensatio mihi credita est. Quæ est ergo merces mea? ut Evangelium prædicans sine sumptu ponam Evangelium, ut non abutar potestate mea in Evangelio. »

Tot, inquit, exemplis et auctoritatibus constat me licenter posse stipendia sumere. Sed tamen ego non sum usus aliquo horum exemplorum vel auctoritatum sive rationum, ut facerem quod facere his posse

demonstror, id est ut ex prædicatione sumptus et alimenta perciperem. *Nullo horum usus sum.* Sed nec uti volo, quia *non ideo scripsi hæc* licere mihi, *ut ita nunc fiant in me*, id est ut amodo mihi necessaria quæque dentur a subditis; et si ego propter aliorum salutem a debitis sumptibus et necessariis omnibus abstinui et abstineo, saltem tanto exemplo vos ab immolatis carnibus abstinete, ne multos fratrum præcipitets in interitum. Ob hoc etiam noluit Apostolus accipere sumptus, ne esset forma mercenariis et pseudoapostolis. Erant enim jam multi, qui occasione habere cupiebant acquirendi terrena [al., stipendia] et vendendi Evangelium, quibus eam volens imputare, victum manibus suis quæsit. Sed et propterea noluit a discipulis stipendium vel aliud quid sumere, ne per hoc acciperent fiduciam delinquendi, et vigor evangelicæ auctoritatis in illo torpesceret. Parcebat etiam in hoc illis, ut non esset eis onerosus, si de bonis eorum viveret. Nolo, inquit, ut hæc ita fiant in me. Nam *magis bonum est mihi mori*, id est magis opto mori quam sustinere ut quis dando *evacuet gloriam meam*, quam pro hæc abstinentia habere volo in Christo apud Deum, compatiens infirmis, dum nihil ab eis sumo. Vere taliter evacuaretur et inanis fieret. Nam si ideo evangelizavero ut hæc ita fiant in me, id est: Si propterea evangelizavero, ut ad illa perveniam, et finem Evangelii in cibo et potu et vestitu collocavero, non est mihi gloria apud Deum, sed ex eorum numero sum, de quibus dictum est: « Quia receperunt mercedem suam (Matth. vi). » Et quare non est mihi gloria? Quia *necessitas* sustentandæ hujus vitæ *incumbit mihi*, ut ideo evangelizem, quia unde vivam non habeo, ut acquiram temporalem fructum de prædicatione æternorum. Sic enim jam necessitas in Evangelio erit, non voluntas. Et vere necessitas incumbit, quia *væ mihi est si non evangelizavero*, id est malo meo non evangelizabo, quia fame cruciabor, et unde vivam non habeo. Vere non est gloria evangelizare pro corporis necessitate. Nam *si hoc ago volens*, hoc est sine ulla vitæ hujus fulciendæ necessitate, apud Deum habeo mercedem gloriæ sempiternæ. Sed *si invitus*, id est cogente necessitate id facio, *dispensatio est mihi credita*, ut aliis dispensem Evangelium ad profectum eorum, ego autem mercedem illam apud Deum gloriosam non habeam? Hoc enim loco talis dispensator intelligitur, qui alienum dispenset, unde ipse nihil accipiat. Dispensatio est mihi credita tanquam invicto servo, ut tanquam alienum erogem, et nihil inde capiam præter cibaria, quæ non de participatione regni, sed ad sustentaculum miseræ servitutis dantur extrinsecus. Et quia si volens evangelizo, mercedem apud Deum habeo, ergo *quæ est merces mea*, quam de prædicatione habere cupio, cum nullam inde mercedem terrenam recipere velim? Hæc scilicet est merces mea, ut ego *Evangelium prædicans sine sumptu*, ponam in cordibus hominum *Evangelium*, id est ut non sit credentibus sumptuosum Evangelium, ne putent ad

hoc sibi evangelizari, ut id evangelistæ quasi vendere videantur. Hanc mihi eligo mercedem, ut gratis ponam in auditorum mentibus Evangelium, *ut non abutar in Evangelio potestate mea*, qua Dominus concessit accipiendo stipendia, ne quod impedimentum generem Evangelio. Si enim stipendia sumerem, unde Evangelium impediretur et tardius iret, jam meæ potestatis abusus fieret, quoniam sumenda illa, contra hoc ad quod potestas ipsa fuit mihi concessa, facerem. Hactenus multifarie demonstravit licere sibi sumptus accipere, quos tamen non accipiebat. Jam vero quia infirmitati hominum compatiens a debitis sumptibus abstinebat, ostendunt sequentia, cum dicit:

« Nam cum liber essem ex omnibus, omnium me servum feci, ut plures lucrifacerem. Et factus sum Judæis tanquam Judæus, ut Judæos lucrarer: his qui sub lege sunt, quasi sub lege essem, cum ipse non essem sub lege, ut eos qui sub lege erant, lucrifacerem: his qui sine lege erant, tanquam sine lege essem, cum sine lege Dei non essem, sed in lege Christi essem, ut lucrifacerem eos qui sine lege erant. Factus sum infirmis infirmus, ut infirmos lucrifacerem. Omnibus omnia factus sum, ut omnes facerem salvos. Omnia autem facio propter Evangelium, ut particeps ejus efficiar. »

Hanc, inquit, solam mercedem in hac vita quæro, ut gratis ministrem cunctis Evangelium. Nam cum essem liber ex omnibus, id est cum sic ab omnibus essem separatus, ut nihil illis deberem, nec ullius merita me possent ad hoc deducere, ut illis verbum vitæ ministrarem, sponte me inclinavi ut a Domino exaltarer, et me servum omnium feci, sicut ipse Dominus dixerat: « Quicumque voluerit in vobis primus esse, erit omnium servus (Matth. xx; Marc. ix). » Liber eram ex omnibus, id est nulli quidquam debens, cum nihil ab aliquo suscepissem, unde sibi obnoxius essem ad exhibendam servitutem; et tamen pro Christo me feci servum omnium, ut commodis omnium deservirem; et hoc ideo, *ut plures ad fidem convertendo lucrifacerem*, id est lucrum eos prædicationis meæ facerem, et idcirco me modificavi omnibus. Quia *factus sum Judæis tanquam Judæus*, id est ita compassus sum eorum cæcitati et miseræ, ac si Judæus essem, et in eadem cæcitate et miseria cum eis detinerer. Hoc est dicere: Quantum dolorem ac sollicitudinem haberem de infidelitate et ignorantia et morte mea, si rem ipsam sicut esset animadvertere possem, tantum habui de Judæis, ut Judæos lucrarer, id est ut sic ad fidem eos adducerem, subveniens eis sicut mihi subvenire vellem, et *his qui sub lege sunt*, id est Samaritanis vel prædictis Judæis factus sum, quasi *sub lege essem*, id est misericorditer eis condolui, et eos a jugo servitutis eripere laboravi, sicut mihi recte vellem condoleri et me eripi, si unus ex illis essem. Ita per compassionem misericordiæ factus sum eis quasi sub lege essem, *cum ipse non essem sub lege serviliter*, id est cum eam non servarem

carnaliter, ut tam pia condescensione *lucrifacerem*, id est lucrum Christo acquirerem *eos qui sub lege erant*. Nequaquam doctor egregius ut quasi Judæus fieret, ad perfidiam erupit, nec quasi sub lege esset, ad carnale sacrificium rediit; sed condescendendo appropinquavit infidelibus, non cadendo, ut videlicet singulos in se suscipiens, et se in singulos transfigurans compatiendo colligeret, et impenderet illis ea quæ impendi sibi ab aliis recte voluisset; et tanto unicuique erranti concurreret, quanto salutis ejus modum ex propria consideratione didicisset. Non rediit ad carnale sacrificium, ut illud exhibendo putaret se aliquid justificationis aut salutis inde consequi. Alioqui propter vitandum scandalum, Hierosolymis veterem sacrificiorum morem servavit (*Act. xxi*). Neque simulando fecit hoc, ut nonnulli putaverunt, sed secundum liberam sententiam suam qua dicit: « Circumcisus qui vocatus est? » (*supra vii*) non adducat præputium, id est non sic vivat quasi præputium adduxerit, sicut alio loco dicit: « Circumcisio tua præputium facta est (*Rom. ii*). » Secundum hanc sententiam fecit illa, quæ non intelligentibus et parum attendentibus fluxisse putatus est. Judæus enim erat, et circumcisus vocatus, noluit adducere præputium, id est noluit ita vivere ac si circumcisus non esset. Hoc enim jam in potestate habebat, et sub lege quidem non erat, sicut illi qui eam serviliter custodiebant, sed tamen in lege Christi, quæ est et ipsa quam Judæi tenebant, erant, ut libere adimpleret eam. Qui vetera ejus sacramenta inter Judæos celebrans, hoc modo illa usque ad certi temporis dispensationem a Deo jussa esse commendavit, et a sacrilegis sacris gentium distinxit. Nam et in hoc factus est Judæis tanquam Judæus, et sub lege positus tanquam sub lege esset, quia hoc Hierosolymis fecit, et alibi Timotheum circumcidit (*Act. xvi*), et a cibis quos lex prohibet abstinuit inter Judæos, ac semper apud eos de lege et prophetis disputavit, asserens eorum testimoniis adventum Christi. Qui universa hæc et his similia idcirco faciebat, ut eos qui de lege erant, Christo acquireret, non ut aliquid justificationis jam in illis cæremoniis æstimaret. Qui et subjungit: *His qui sine lege erant*, id est gentilibus, factus sum *tanquam sine lege essem, cum non essem sine lege Dei, sed essem in lege Christi, ut lucrifacerem eos qui sine lege erant*. In eo quippe factus est gentilibus tanquam gentilis, quod præputium recipit, quod indifferenter permisit vesci cibis quos damnant Judæi, quod eis assensus est secundum physicas rationes mundum esse factum a Deo, et hujusmodi condescensionibus. Notandum quod Judæos sub lege dicit esse, se autem in lege, paganos vero sine lege. Aliud est autem esse sub lege, et aliud in lege. Qui enim sub lege est, secundum legem agitur; qui vero in lege est, secundum legem agit, et ille servus est, hic autem liber. Qui vero sine lege est, ab omni servitute divina alienus est, ut sicut onager in solitudine (*Job xxiv; Jer. ii*) præsentis sæculi male liber vivat. Utrisque autem,

id est eis qui sub lege, et illis qui sine lege erant, se testatur Apostolus congruisse per misericordiam scilicet et compassionem, non per versipellem simulationem, id est ut eo modo subveniret carnali Judæo vel pagano, quomodo sibi ipsi si hoc esset, subveniri tecte voluisset, portans utique eorum infirmitatem in compassionis similitudinem, non fallens in mendacii fictione, sicut continuo sequitur et dicit: *Factus sum infirmis infirmus, ut infirmos lucrifacerem*. Hinc enim loquebatur, ut etiam omnia illa superiora diceret. Sicut ergo quod factus est infirmis infirmus, non erat mendacium, sic et cætera quæ præmisit. Quam enim dicit infirmitatem suam erga infirmos fuisse, nisi compatiendi eorum in tantum, ut ne videretur venditor Evangelii, et verbi Dei cursum apud imperitos in malam suspicionem decidens impediret, nollet accipere quod ei jure Dominico debebatur? Eo enim ipso factus est infirmus, quo potestate sua uti noluit. Tam misericordii scilicet indutus affectu, ut cogitaret quemadmodum secum agi vellet, si et ipse ita infirmaretur, ut posset de illis per quos sibi Evangelium prædicaretur, si eos videret sumptus accipere, quasi mercimoniorum nundinas suspicari. Sic ergo illis qui corde infirmabantur, factus est infirmus compassione misericordie, non simulatione fallacie. Nam et qui ministrat ægrotis, fit tanquam ægrotus, non cum se febres habere mentitur, sed cum animo condolentis cogitat, quemadmodum sibi serviri vellet si ipse ægrotaret. Juxta quem sensum universaliter subjungit: *Omnibus omnia factus sum, ut omnes facerem salvos*. Quasi dicat: Quid diutius per partes enumerare singula? Breviter comprehendo, omnibus omnia factus sum, id est quasi omnium sectarum essem. Omnibus omnia factus est, non mentientis actu, sed compatiens affectu, id est non omnia mala omnium fallaciter agendo, sed aliorum omnium malis omnibus tanquam si sua essent, misericordis medicinæ diligentiam procurando. Cogitabit enim, ut homo, in eis vitiis etiam se esse potuisse, unde cupiebat alios liberare; et ita subveniebat illis, sicut sibi vellet subveniri, si ipse in eisdem vitiis esset. In se enim personas omnium pie transfigurans, ex semetipso discebat qualiter unicuique misereri debuisset, quatenus hoc singulis impenderet, quod sibi ipse, si ita esset, impendi recte voluisset. Ita, inquit, me contempero omnibus, non quod mihi errores et vitia eorum placeant, sed omnia hæc prædicta facio conformans me unicuique *propter Evangelium, ut particeps ejus efficiar*, id est ut particeps fiam bonæ intentionis, quam habet Evangelium erga salutem hominum. Vel omnia quæ dixi facio erga singulos quosque propter Evangelium, ut possim eis illud dulciter inferre, et ego fiam particeps remunerationis ejus.

« Nescitis quod hi qui in stadio currunt, omnes quidem currunt, sed unus accipit bravium? Sic currite ut comprehendatis. Omnis enim qui in agone contendit, ab omnibus se abstinere. Et illi

« quidem ut corruptibilem coronam accipiant, nos autem incorruptam. »

Idcirco omnia facio propter Evangelium, quia non aliter ero particeps ejus. Necessè enim mihi est ut omnia quæ faciendæ sunt, faciam, et ab omnibus a quibus abstinendum est, abstineam, quoniam aliter Evangelii coronam et remunerationem habere non potero. Quod evidenter apparet in hac similitudine quam nunc propono. Nullus enim in stadio bravium accipit, nisi qui omnia quæ faciendæ sunt fecit, et hoc omnes mundana consuetudine potestis scire. Quia an nescitis quod hi qui currunt in stadio, omnes quidem currunt, sed unus accipit bravium? Licet enim omnes ibi sint in cursu et labore similes, tamen omnes inaniter currunt, præter illum solum qui accipit bravium, quod est præmium cursus. Stadium autem constat centum viginti quinque passibus. Sed hoc loco, sive minus, sive magis longitudinis habeat, vocatur stadium illud viæ spatium, per quod usque ad metam quamdam solebat fieri cursus, ut postquam veniretur ad metam, esset standum. Unde stadium a stando nomen accepit. Bravium autem genus est palmæ, vel præmium quod currentibus proponitur. Omnes currunt, sed unus qui currendo cæteros vincit, accipit bravium, quia fecit omnia quæ pertinent ad cursum, et abstinuit ab omnibus quæ impediunt. Sic et ergo bravium supernæ remunerationis adipisci non potero, nisi omnia quæ currentibus faciendæ sunt fecero, et ab omnibus quæ contraria sunt abstinero. Similiter et unusquisque vestrum de se sentiat et legitime currat. Nam omnes quidem currunt, sed unus accipit bravium. Currunt enim Judæi, currunt hæretici, currunt nonnulli Christiani qui ad vitam non sunt prædestinati, quia omnes isti in fine præmium sperant se adepturos, et ad illud tendunt per vitæ præsentis stadium. Sed unus prædestinatorum Christianorum populus qui legitime currit accipit bravium, quoniam sola unitas eorum qui sunt corpus Christi palmam consequitur, et quia non omnes qui currunt accipiunt bravium, ideo sic currere faciendo quæ ad cursum pertinent, et vitando quæ impediunt, ut comprehendatis illud. Cautos et expeditos vos esse convenit in currendo, ne forte contingat non comprehendere præmium ad quod curritis. Non enim omnes comprehendunt illud. Currite credendo, sperando, desiderando, bene operando, corpus affligendo, orando, amando, et quibusque bonis studiis insistendo. Ita quidem est de his qui currunt. Sed de his qui pugilantur audiamus. Nam cursor quisque festinat ad bravium, sed omnis qui in agone contendit, ab omnibus se abstinere, id est ab escis et cæteris quæ impediunt agonem, id est certamen. Sic et omnis Christianus qui in arena hujus mundi contra diabolium luctatur, ab omnibus quæ Christianum ad terram implicant debet abstinere. Nam et ideo chrismate sumus uncti, quia luctatores sumus effecti; et propterea sic-

ut illi qui in arena luctantur, nudi sunt, ita et nos a mundanis rebus spoliati esse debemus, ut amando nihil possideamus in hoc sæculo, quia nec maligni spiritus, contra quos est nobis lucta, quidquam in eo proprium possident. Nudi ergo cum nudis, id est nihil possidentes cum nihil possidentibus luctari debemus, si eis succumbere nolumus. Armis tamen virtutum indui studeamus, quibus et protegamur, et adversarios feriamus. Sicque pugiles et luctatores imitemur, qui se intantum ab omnibus agoni suo noxis abstinere, ut et nocturnam pollutioem, quæ per somnum accidere solet, diligenter cavere studeant, ne per hanc molliores in certamine fiant. Et isti quidem abstinere, et pugilantur ut corruptibilem coronam ex floribus contextam cum laude et mercede cito perituram accipiant; nos autem ob hoc abstinemus et pugnamus ut incorruptam, id est æternam percipiamus coronam, et idcirco diligentiores esse debemus, quibus non terrenis et marceantibus floribus, sed æterna consorta gemmis in modum regii diadematis corona spiritalis servatur.

« Ego igitur sic curro, non quasi in incertum: sic pugno, non quasi aerem verberans. Sed castigo corpus meum et in servitutem redigo ne forte, cum aliis prædicaverim, ipse reprobus efficiar. »

Seipsum proponit Apostolus cæteris in exemplum. Quandoquidem, inquit, in stadio vitæ præsentis est nobis cursus et certamen, atque victori proposita est incorruptibilis et æterna corona, igitur ego, qui, sicut supra dictum est, omnia propter Evangelium facio, sic curro, id est tam legitime, tam alacriter, tam expedite cursum boni operis exsequor, ut non quasi in incertum tendam, quia certus sum de corona. Ille enim currit in incertum, qui talia facit, ut ex quibusdam sperare, et ex quibusdam possit desperare. Sed ego ex omnibus quæ post conversionem feci, certitudinem bonæ spei tenens, non curro velut in incertum, sicut illi qui currunt ad sæculare bravium, nec si poterunt illud accipere sunt certi, ego sic pugno contra diabolium, ut non sim quasi aerem verberans, id est non inaniter pugno sicut ille, qui jactat ictus incassum, et pro hoste ferit aerem. Scilicet non verbis, sed rebus contendo, quia non sum de illis prædicatoribus, qui dicunt et non faciunt (Matth. xxiii). Quantumcunque enim prædicator fundat verba, gladius oris ejus non pervenit usque ad læsionem hostis, sed vox inanis et otiosa reputatur, si ipse prædicationi suæ contrarius existat. Quia qui aliter facit quam prædicat, suspectos facit audientes ut de promissis dubitent; et ideo malum de cordibus eorum non valet expellere, nec hostem qui in eis habitat, lædere. Ego autem non vacuos ictus verborum in adversarium jacto, sed ut illum possim lædere, castigo jejuniis et afflictionibus corpus meum, ut et exemplum abstinentiæ dem aliis: et ideo non quasi aerem verberans pugno, quia dum carnem restringo, ipsis abstinentiæ meæ ictibus non aerem, sed diabolium ver-

bero; et dum hoc quod intra me est subji-
 cium, extra me positum adversarium ferio. Corpus vero castigare,
 est jejuniis reprimere illud, et ea illi dare, quæ ad
 vitam proficiant, non ad luxum. *Corpus meum* per
 abstinentiam castigo, ne per lasciviam insolescat, et
 in servitutem illud redigo, ut non perficiat suam, sed
 spiritus voluntatem: et in omnibus serviat spiritui,
 non repugnet. Ideo sic corpus refreno, ne forte si
 aliter egero, contingat quod adhuc contingere po-
 test, quando sum in hac mutabili vita, scilicet ne
cum ego aliis prædicaverim, et in partem electionis
 illos per doctrinam meam adduxerim, ipse male vi-
 dendo efficiar reprobus, id est a Deo reprobatus, et
 a gaudiis cælestibus quæ prædico, alienus. Certe
 jam de hoc Apostolo voce Dominica dictum fuerat,
 « quoniam vas electionis mihi est (Act. ix), » et ta-
 men adhuc ipse castigans corpus suum, metuit ne
 reproberetur, licet supra dixerit, sic curro, non quasi
 in incertum. Ita enim certus est de præmio, ut ti-
 meat illud amittere: et ita metuit amittere, et cer-
 tus sit de eo. Et cum iste quem Deus vas electionis
 esse testatur, sic metuat reprobus fieri, quid de no-
 bis miseris erit, qui nullam adhuc Dei vocem de
 electione nostra audivimus, et jam in otio quasi de
 securitate torpemus? Omnia enim quæ nunc de se
 dixit, ideo locutus est, ut nos similiter agere suo
 exemplo doceret, scilicet ut sic strenue cursum re-
 cti operis ageremus, quatenus de perceptione futuri
 præmii spem certam haberemus; et sic cum anti-
 quo hoste pugnaremus castigantes corpora nostra,
 ut non aere, sed ipsum hostem certis ictibus absti-
 nentiæ nostræ feriremus, ne forte per superbia
 vitia reprobi adhuc efficeremur, et reprobationem
 adhuc posse contingere, probat exemplo Judæorum,
 cum subjungit:

CAPUT X

« Nolo enim vos ignorare, fratres, quoniam pa-
 tres nostri omnes sub nube fuerunt, et omnes
 mare transierunt, et omnes in Moyse baptizati
 sunt in nube et in mari, et omnes eandem escam
 spiritalem manducaverunt, et omnes eundem po-
 tum spiritalem biberunt (Num. ix; Exod. xiii,
 xiv, xvi, xvii). Bibebant autem de spiritali conse-
 quente eos petra (Num. xx), petra autem erat
 Christus. Sed non in pluribus eorum benepla-
 citum est Deo, nam prostrati sunt in deserto
 (Num. xiv). »

Hoc namque exemplum de priori populo ideo pro-
 ponit, ut in Christianorum populo nullus in eo solo
 confidens quo baptizatus est, et escam ac potum
 corporis et sanguinis Domini percepit, putet sibi
 Deum parcere si peccaverit; sed tunc omnia hæc co-
 gnoscat sibi profutura, si Deo humiliter obedire per-
 severaverit. Quasi dicat: Currere et pugnare sicut
 ego debet omnis Christianus, quando in stadio vitæ
 mortalis est: et metuere, ne post omnia bona quæ
 divinitus accepit, fiat adhuc reprobus, nec perveniat
 ad bravium pro quo currit, sicut videmus quod He-
 braei qui nos prædicatorum, post transitum maris

et cælestem escam, quia Deum peccatis suis offe-
 derunt, ad terram promissionis velut ad propositum
 bravium pervenire non potuerunt. *Nolo enim vos
 ignorare*, id est nolo ut ignoretis, o fratres, quoniam
 patres nostri, id est Hebræi antiqui institutores no-
 stræ fidei et moralitatis, omnes tam boni quam mali
 cum egredierentur de Ægypto, priusquam mare
 transierunt, fuerunt sub nube (Num. ix; Exod. xiii),
 quæ non sinebat exercitum Ægyptiorum ad eos ac-
 cedere, et significabat præsidium supernæ protec-
 tionis, et omnes pariter mare transierunt (Exod. xiv),
 in quo persecutores eorum perierunt, et omnes a
 Moyse, id est in ducatu Moysi baptizati sunt in nube
 et in mari, quia submersis hostibus suis erepti sunt
 a morte, quod nobis præstat baptismus: et purgati
 sunt a peccatis prioribus, ut ultra non imputaren-
 tur illis: et mundati ab ignorantia Dei, quæ preme-
 bat omnes gentes, ut idonei forent accipere divinam
 legem. Baptizati sunt, quia signum baptismi acce-
 perunt, quod tantumdem valet eis credentibus,
 quantum valet nobis ipse baptismus, et deinde om-
 nes similiter boni ac mali manducaverunt eandem
 escam spiritalem (Exod. xvi), id est manna spiritali
 virtute paratum. Omnes eandem escam comede-
 runt, quia non aliam salvandi et aliam perituri man-
 ducaverunt, sed omnes eandem. Simili modo et
 omnes biberunt eundem (Exod. xvii), non diversum,
 potum spiritalem, id est aquam de petra productam
 spiritali gratia. Manna enim et aqua illa dicuntur
 nunc spiritalis cibus et potus, quia non mundi lege,
 sed Dei virtute sine elementorum commistione ad
 tempus creati sunt, habentes in se figuram corporis
 et sanguinis Domini. Unde et manna vocatum est
 panis angelorum, quia virtute qua angeli subsistunt
 creatum est, significans eum qui ait: « Ego sum
 panis vivus qui descendi de cælo (Psal. lxxvii;
 Joan. vi). » Vel eandem escam corporis Christi,
 quam nos in pane manducamus, ipsi manducave-
 runt in manna; et eundem potum sanguinis Chri-
 sti, quem nos ex calice bibimus, ipsi biberunt ex
 petra, et ideo spiritalem manducaverunt eandem
 quam et nos, corporalem vero alteram. Quia v sibi-
 lem escam spiritaliter intellexerunt, spiritaliter
 esurierunt, spiritaliter gustaverunt, ut spiritaliter
 satiarentur. Nam et nos accepimus visibilem cibum,
 sed aliud est sacramentum, aliud virtus sacramenti.
 Similiter potum spiritalem perceperunt eundem
 quem et nos, nam corporalem alium. Sed hunc spi-
 ritalem potum non undecunque bibebant, sed de
 spiritali petra, id est de Christo. Sicut enim cibus et
 potus ille fuit spiritalis, simili ratione fuit petra
 spiritalis, quæ potum manavit spiritalem. Bibebant
 de petra consequente eos, id est satisfaciens
 desideriis eorum, quoniam consecuta est eos abun-
 dantia suæ largitatis, prius siti confectos, et ad
 Moysen clamantes, dum satiavit eos sic, ut amplius
 tunc non quærerent potum. Vel sequebatur eos per
 desertum petra spiritalis, quia ubi deficiebat eis hu-
 manum suffragium, aderat Christus. Qui ideo so-

quebatur, ut ubi homo defecisset, ille subveniret. Non enim petra, sed Christus aquam dedit. Qui et nunc similiter suos per subsequentem gratiam comitari non desistit post baptismum, velut post maris transitum. Bibeant de petra, sed *petra erat Christus*. Non est dictum, petra significabat Christum; sed, petra erat Christus, quia sic solet loqui Scriptura, res significantes tanquam illas quæ significantur, appellans. Omnia enim significantia videntur quodammodo earum rerum quas significant gerere personas; et ideo tanquam hoc esset, dictum est, petra erat Christus; quod utique per substantiam non hoc erat, sed per significationem. Propter firmitatem, petra dictus est Christus. Qui duobus lignis crucis affixus, profudit ex suo latere sacramenta nostræ salutis, quibus interior sitis nostra potaretur: sicut petra illa bis percussa, dedit aquam unde populus ille satiaretur; gemina enim percussio, duo ligna crucis significat. Ecce omnes pariter hæc omnia Dei beneficia consecuti sunt, sed non omnes pariter ad salutem pervenerunt. Quia *non in pluribus eorum beneplacitum est Deo*, id est plures eorum non bene placuerunt Deo post hæc omnia, sed graviter displicuerunt; quod inde patet, quia *prostrati sunt in deserto* (Num. xi, xiv), nec pervenerunt ad terram promissæ hæreditatis. Caveamus itaque ne et nobis similiter contingat. Omnia enim illa beneficia quæ ipsi divinitus acceperunt, spiritualiter sunt eadem quæ et nos accepimus. Ægyptum namque interpretari novimus afflictionem, vel afflictionem, vel comprimentem, sive tenebras, et sæpe poni in imagine hujus sæculi, a quo spiritualiter recedendum, ne simus jugum ducentes cum infidelibus (II Cor. vi). Quod fit per primum calorem fidei. Sic enim quisque Jerusalem cælestis fit civis idoneus, cum primum huic sæculo renuntiaverit, quomodo ille populus in terram promissionis induci non potuit, nisi prius ab Ægypto recederet. Sed sicut ille non inde discessit, nisi divino præsidio, ita nemo corde ab hoc sæculo avertitur, nisi Dominicæ misericordiæ munere præventus et adjutus. Quem et nubes protegens comitatur, quæ procul arceat exercitum Ægyptiorum sequentium, quia catechumenus per fidem quam recipit, habet gratiam Dei obumbrantem velut nubem, quæ non sinit ad illum accedere pristinam consuetudinem vitiorum, quæ diabolo instigante, subsequitur illum, sed in aqua baptismatis exstinguitur velut in mari Rubro. Apte enim per mare Rubrum baptismus designatur, sanguine Christi consecratus. Mors enim Ægyptiorum in mari, significat abolitionem peccatorum in baptismo. Israelitæ transeuntes, præsignant eos qui nunc baptizantur, et tali mysterio patres illi omnes de Ægypto egressi fuerunt sub nube, et omnes mare transierunt, ac in Moyse baptizati sunt in nube et in mari. Moyses Christum significat, nubes Spiritum sanctum, mare aquam baptismi. Dicuntur ergo in Moyse baptizati in nube et in mari, velut si dicerentur in Christo baptizati in Spiritu

A sancto et aqua. Postea ducti sunt per desertum. Similiter et nunc baptizati omnes, nondum perfruentes promissa patria regni cælorum, sed quod non vident sperantes, et per patientiam expectantes, tanquam in deserto sunt. In quo pascuntur manna, et potantur aqua de petra, id est corpore et sanguine Christi. Nam sicut ille populus ante transitum maris non potuit manna comedere, sic nemo valet ante baptismum corpus Redemptoris accipere. Deinde sicut Hebræis data est lex, ita fidelibus ostenditur sublimitas scientiæ charitatis Christi. Sed qui post hæc omnia criminaliter peccaverint, ad cælestem patriam non perveniunt, nisi congruam egerint poenitentiam; sicut Judæi qui propter culpas suas ad terram promissionis non pervenerunt, sed in deserto perierunt, etsi enim in aliquibus, non tamen in pluribus eorum beneplacuit Deo. Communia fuerunt omnibus illis sacramenta, sed non communis gratia. Ita et nunc baptismus nobis omnibus communis est, sed non virtus baptismi, commune nobis est sacramentum corporis et sanguinis Domini, sed non communis virtus sacramenti. Non ergo solis sacramentis confidamus, quia his solis ad regnum cæleste non pervenimus, si bona operari neglexerimus, aut si Salvatorem more veterum offendere non timuerimus.

« Hæc autem in figura facta sunt nostri, ut non
« simus concupiscentes malorum sicut et illi concu-
« cupierunt (Num. xi); neque idololatræ efficiamini,
« sicut quidam ex ipsis, quemadmodum scriptum
« est: Sedit populus manducare et bibere, et sur-
« rexerunt ludere (Exod. xxxii). »

Judæi post maris transitum, post angelicum cibum et spiritualem potum, quia graviter Deum offenderunt, ad promissam hæreditatem non pervenerunt, sed in deserto perierunt. Sed hæc quæ de illis narrantur, facta sunt tunc in figura nostri, qui eramus futuri, quoniam in illis præfiguratum est quod nos si post baptismum, si post Dominici corporis et sanguinis cibum et potum similiter peccaverimus, ad cælestem patriam non pervenimus; sed in hoc sæculo maligno morientes, ad pœnas inferni duemur, quas pœnæ illorum præsignabant. Caveamus igitur similiter offendere, ne talia patiamur in veritate, qualia illi pertulerunt in imagine. Hæc enim, ut dictum est, *facta sunt in figura nostri*, ut nos metu pœnarum, quæ illis acciderunt, corrigamur, *ut nos simus concupiscentes malorum*, id est concupitores vitiorum, *sicut et illi concupierunt*, per concupiscentiam enim desideraverunt cibos Ægypti, quos reliquerant dum manna pascerentur cælitus misso, et pro esu carniū stentes murmuraverunt. Caveamus et nos illecebras gulæ, ventrisquæ ingluviem, ne similibus epularum concupisceremus percamus. *Neque idololatræ efficiamini* manducantes in idolo, *sicut quidam ex ipsis*, manducantes coram vitulo. Neque idololatræ efficiamini, id est non ædificetis ad idololatriam exemplo vestri infirmam fratrum conscientiam, qui videntes vos in idolo re-

eumbere, putant quod ibi ob honorem idoli comedatis. Non efficiamini idololatræ, sicut facti sunt non omnes Judæi, sed quidam ex ipsis idololatræ facti sunt, adorantes vitulum aureum, dum Moyses in monte quadraginta diebus cum Domino moraretur, quemadmodum in Exodo scriptum est (*Exod. xxxii*) : *Sedit populus ante vitulum manducare et bibere, et cum alacres facti essent ex cibo et potu, surrexerunt ludere*, id est ludos facere in vituli veneratione. Surrexerunt ludere, id est coram vitulo saltare. Vel ludere, id est vitulum adorare. Quid enim lusui puerili tam simile, quam idola colere! Cavete igitur, ne et vos similiter coram idolo nunc sedeat is manducare et bibere, et infirmos excitetis ad lusum idololatriæ.

« Neque fornicemur, sicut quidam ex ipsis fornicati sunt (*Num. xxv*), et ceciderunt in una die viginti tria millia. Neque tentemus Christum, sicut ut quidam eorum tentaverunt, et a serpentibus perierunt (*Num. xxi*). Neque murmuraveritis, sicut quidam eorum murmuraverunt, et perierunt ab exterminatore (*Judith. viii*). »

Neque in idololatriam declinemus, postquam de tenebris infidelitatis educti sumus, ut illi declinaverunt, postquam de Ægypto, ubi servierunt idolis, fuerant educti. *Neque fornicemur* cum paganis mulieribus ne per eas ad cultum idolorum seducamur, sicut quidam ex ipsis fornicati sunt (*Num. xxv*). cum filiabus Madian, et comederunt de sacrificiis earum, adoraveruntque deos ipsarum, et hoc factum est consilio Balaam. Videte ne vos similiter consiliis pseudoapostolorum decipiamini, qui vestram perniciem moliantur, sicut Balaam filios Israel perdere machinabatur. Nam propter hanc fornicationem *ceciderunt in una die gladio viginti tria millia*, quoniam Moyses statim præcepit iudicibus Israel, ut occideret unusquisque proximos suos, qui initiati fuerant Beelphegor, et occisa est tanta multitudo eorum. Ubi præfiguratum est, quod etiam viros in dilectione et in observantia Decalogi perfectos et in fide Trinitatis, si fornicati fuerint, occident eos in iudicio futuro quasi in una die iudices Israel (*Math. xix; Luc. xxii*), id est Apostoli. Nam per decem intelligitur Decalogus legis; per viginti, id est per geminationem denarii numeri, exprimitur gemina dilectio, quæ legem facit impleri; per tria, fides Trinitatis; per mille, perfectio, et ita, sicut diximus, per viginti tria millia designantur illi, qui in dilectione et præceptorum divinorum observantia et fide sunt perfecti; sed caveant fornicationem, quia propter hanc solam in infernum cadere possunt in die iudicii. *Neque tentemus Christum*, diffidentes de ejus auxilio, et fastidientes ejus spiritualem cibum, ne malignis spiritibus perimendi tradamur, sicut quidam eorum tentaverunt illum, et a serpentibus perierunt. Nam sicut Scriptura refert, lædere cœpit populum itineris ac laboris, locutusque contra Dominum et Moysen, ait : « Cur eduxisti nos de Ægypto ut moreremur in solitudine? Deest panis, non

sunt aquæ. Anima nostra jam inanis nauseat super cibo isto levissimo. Quamobrem misit Dominus in populum ignitos serpentes (*Num. xxi*). » Ita enim Christum tentaverunt, dum loquerentur contra Dominum, qui est ipse Christus, et contra Moysen famulum ejus, propter lædium viæ longioris et laboris et penuriam cibi crassioris, cum velut pro nihilo manna ducerent. Ac per hoc Christus comprobatur esse Deus qui jam ab illis est tentatus. Quibus ipse ad significanda peccata, quorum veneno invisibiliter moriebantur, visibiles serpentes quibus admonerentur immisit, et plaga emendatoria mortes animarum mortibus corporum figuravit. Cavemus et nos, ne Christum simili modo tentemus, loquentes contra eum et contra prælatum quem ipse nobis dedit, cur nos eduxerit de Ægypto, id est, de tenebris sæculi voluptatibus, dum affigimur in solitudine conversationis hujus, et penuriam sustinemus corporalis victus, cum spiritualis abundet; et lædet nos itineris ac laboris, dum per patientiam diu nolumus expectare quod non videmus, sed cupimus ad regnum pervenire cito, sine laboris ullius tolerantia. Nam cum per multas tribulationes oporteat nos intrare in regnum cœlorum (*Act. xiv*), si tribulationes in via longanimiter sufferre respicimus, justo Dei iudicio trademur ignitis serpentibus (*Judith. viii*), id est malignis spiritibus, qui nos igne vitiorum inflamment, et animas nostras veneno peccatorum inficiant et exstinguant. Notandum etiam quia sicut Judæi Christi in Moyse contempserant, sic Corinthii contemnebant eum in Apostolo, dum male loquerentur de Apostolo duce suo, sicut Judæi de Moyse (*Exod. xv, xvi, xvii; Num. xiv, xvii, xix*), et adeo nunc talis exemplo vult eos comperere. Qui et addit : *Neque murmuraveritis*. Murmurabant enim contra majores suos, quibus invidebant charismata meliora, vel etiam contra ipsum Apostolum. Ne murmuraveritis, inquit, sicut quidam eorum murmuraverunt, id est injuste de præpositis suis conquesti sunt, et ideo *perierunt ab exterminatore* (*Judith. viii*), id est ab angelo qui extra terminos promissæ terræ percussit eos, vel extra terminos sortis electorum misit. Nam Core et socii ejus murmuraverunt contra Moysen et Aaron (*Num. xvi*), quod non divina electione, sed quasi per seipsos prælati essent populo; et idcirco sic externi nati sunt, ut vivi descenderent in infernum, disrupta terra sub pedibus eorum. Propter quod et sequenti die murmuravit contra Moysen et Aaron multitudo filiorum Israel, dicens : « Vos interfecistis populum Dei (*ibid*), » et ob id egressa est ira a Domino in eos, et vastati sunt incendio, fueruntque qui percussi sunt quatuordecim millia hominum, absque his qui perierant in seditione Core. Ita propter murmuraciones suas, quibus falso de rectoribus suis conquerebantur, perierunt, et de medio multitudinis exterminati sunt per angelum administrantem pœnas eorum. Videte ergo, ne et vos similiter contra me murmurantes, vel contra

quoslibet vobis superiores aut praelatos, similiter, imo deterius pereatis. Non enim est ambiguum, illos peccantes plus subjiciendos tormentis, quibus peccantium poenae ad hoc relatæ sunt, ne peccarent.

« Hæc autem omnia in figura contingebant illis. Scripta sunt autem ad correptionem nostram, in quos fines sæculorum devenerunt. Itaque qui se existimat stare, videat ne cadat. »

Ita post maris transitum et cœlestem cibum propter varias offensiones suas variis modis perierunt. Sed hæc omnia contingebant illis in figura, quia tunc figurabatur, quod pro similibus culpis perire possumus post baptismum et corporis Christi sacramentum. Nam quod in pluribus eorum non fuit beneplacitum Deo, et prostrati sunt in deserto, præfiguravit quod nunc in populo Christianorum multi quidem sunt vocati, pauci vero electi (*Matth. xx*). Lata enim via quæ ducit ad perditionem, et multi sunt qui vadunt per eam (*Matth. vii*), nec in illis beneplacitum est Deo. Quod illi mala concupierunt, et corde in Ægyptum redierunt figurabat quod carnales Christiani erant mala desideraturi, et mente ad sæculi relicta vitia redituri. Quod quidam ex illis idololatræ facti sunt, quod quidam fornicati sunt, quod quidam Christum tentaverunt, quod quidam murmuraverunt, significabat quod quidam ex Christianis erant in idololatriam casuri, et quidam fornicaturi, et quidam Christum tentaturi, et quidam murmuraturi, et invisibiliter poenas eorum passuri. Unde non omnes illi, sed quidam ex ipsis memorantur hæc mala fecisse, quia nec omnes Christiani, sed quidam similia nunc faciunt; et qui modo vetustas illorum culpas imitantur, necesse est ut et poenas ipsorum patiantur. In figura ergo contingebant illis hæc omnia. Sed scripta sunt ad correptionem nostram, id est, ut corrigamur auditis culpis et poenis eorum, atque caveamus esse de illis qui similia faciunt et patiuntur. In figura contingebant omnia sub Veteri Testamento, et ideo jam non opus est ut cum re: manifestas agimus, figurarum prænuntiantium celebrationi serviamus, id est ut Sabbata custodiamus et ciborum differentias et his similia. Sed tamen scripta sunt propter nos, et ideo magna nobis cura sunt legenda et intelligenda, et in magna auctoritate habenda. cum propter nostram utilitatem sint scripta. Vitia quoque et tormenta veterum scripta sunt ad correptionem nostram, in quos, id est in nos devenerunt, id est declinaverunt fines sæculorum. quia in ultima ætate sumus, et tot exemplis priorum magis corrigi debemus. Alioquin poena illorum geminabitur nobis, quia major notitia legis magis reum facit eum qui eam non custodit. Fines autem sæculorum tanquam senectus veteris hominis, cum totum genus humanum tanquam unum hominem constituerimus, sexta ætate significatur, qua Dominus venit. Sunt enim ætates sex etiam in uno homine, infantia, pueritia, adolescentia, juvenus, gravitas, senectus. Prima igitur humani generis

ætas est ab Adam usque ad Noe, secunda a Noe usque ad Abrahami, tertia ab Abraham usque ad David, quarta a David usque ad transmigrationem Babylonis, et inde quinta usque ad adventum Domini. Sexta vero agitur ab adventu Domini usque ad finem sæculi, quia exterior homo tanquam senectute corrumpitur, qui etiam vetus dicitur, et interior renovatur de die in diem. Inde requies sempiterna est, quæ significatur Sabbato. Quia ergo fines sæculorum sic devenerunt in nos, id est sæcularitas in nobis decrevit et finire cœpit, ideo turpius erit si jam ultra peccaverimus. Post hæc salubris admonitio subditur: Quoniam Israelitæ post accepta divinitus beneficia ceciderunt in varias offensiones, per quas perire meruerunt, et casus Israelitarum præfigurare casus Christicolarum atque omnia quæ tunc illis acciderunt, scripta sunt ad correptionem nostram, itaque quicumque se existimat stare, id est, statutum rectitudinis habere, videat, id est sollicitus sit ne cadat, id est ne labatur in culpam gravem, quia justus septies cadit in levem et resurgit (*Prov. xxiv*). Videat ne cadat, dum se stare putat. Hoc maxime ad eos ex Corinthiis dictum est, qui præsumentes de sua scientia, qua licitum esse noverant omnia edere, infirmis fratribus scandalo erant; et putabant se aliquid profecisse ex doctrina pseudoapostolorum, unde facti erant deteriores, atque judicabant Apostolum, cum ipsi essent rei. Superbiam igitur eorum amputat, ne per hanc in varias culpas sicut Judæi, corruant, quia et Apostolo superbe detrahentes, Christum tentabant. Multos etiam alios qui futuri erant, reprimit ab elatione pernicioso, dum hortatur ut stans observet ne cadat, id est ne peccato consentiat, vel ne alium peccare faciat (*Osee. xiii*). Voluntate enim sua cedit qui cadit, sed voluntate Dei stat qui stat, aut resurgit.

« Tentatio vos non apprehendat nisi humana. Fidelis autem Deus est qui non patietur vos tentari supra id quod potestis, sed faciet etiam cum tentatione proventum, ut possitis sustinere. »

Stans videat ne cadat. Non quod penitus sine casu perseverare possit. Sed hoc saltem videte ut tentatio, id est peccati delectatio, vos non apprehendat, id est rationem vestram in consensum non trahat, nisi humana, id est nisi de his levibus peccatis, sine quibus humana vita non potest duci, vel non dæmoniaca, sed humana tentatio vos apprehendat. Nam humanum quidem est, in corde tentationem perpeti; dæmonicum vero est tentationis certamine et in operatione superari. Item aliud sapere quam se res habet, humana tentatio est. Hujus autem vel illius vel suam ipsius amando sententiam, vel invidendo melioris usque ad præcedendæ communionis et condendi schismatis aut hæresis sacrilegium pervenire, diabolica præsumptio est. In nullo autem aliter sapere quam se res habet, angelica perfectio est. Quia igitur homines sumus, sed æquales angelis in resurrectione futuri sumus (*Matth. xxii*;

Marc. xii; Luc. xx), quandiu non habemus angelicam perfectionem, caveamus diabolicam praesumptionem. Humanum quippe est de occultis aliorum non vera sentire, ut homo credat bonum quem nescit malum; et iterum opinione non certa credat malum, quem non probavit malum, et ante tempus iudicet quod nescit. Sunt etiam humanae tentationes, cum bono quisque animo, secundum humanam tamen fragilitatem in aliquo consilio labitur; aut irritatur in fratre studio corrigendi, paulo tamen amplius quam christiana tranquillitas postulat. In his et talibus est humana tentatio, non daemoniaca. Daemonis est enim accienter et voluntarie peccare, cum nulla ad hoc fragilitate trahatur; hominis autem est per ignorantiam vel per infirmitatem peccare, et quia necesse est vos tentationibus probari, non dico vel oro ut non tentemini, sed ut tentatio nulla vos apprehendat nisi humana, id est ut sicut homines, non sicut daemones tentemini, scilicet ut per tentationes proficiatis, non succumbatis. Ego quidem hoc dico, sed Deus adimplebit quod dico, quia ipse est fideliter adimplens quod promisit, cum diceret: « Ecce ego vobiscum sum omnibus diebus usque ad consummationem saeculi (*Matth. xxviii*). » *Fidelis est Deus*, id est verax in hac promissione, ut sit semper vobiscum in omni tentatione, et non sinat vos ultra vires tentari, sed tentationem leviget ut vincatis. Aliter de aliquo dicimus, non mihi habuit fidem; aliter, non mihi servavit fidem. Nam illud est, non credidit quod dixi: illud non fecit quod dixit. Secundum hanc fidem qua credimus, fideles sumus Deo; secundum illam vero, qua fit quod promittitur, etiam Deus ipse fidelis est nobis. Fidelis est Deus in eo quod se suis promisit auxiliaturum et coronam gloriae post tentationes daturum (*Jac. i*), et ideo non patietur vos tentari supra id quod potestis ferre, id est non permittet ultra mensuram vestrarum virium exerescere pondus alicujus tentationis. Nisi enim misericors Deus cum viribus tentamenta modificet, nullus profecto est, qui malignorum spirituum tentationes [*al. insidias*] non corruens portet. Quia si mensuram iudex tentationibus non praebet, eo ipso protinus stantem dejicit, quo ultra vires onera imponit; et idcirco pia dispensatione hostem nostrum permittit et retinet, relaxat et refrenat, ut et tentemur ad profectum nostrum, et non superemur ad hostis desiderium. Fidelis enim est, et ideo facit ut aut cito cesset tentatio, aut si proluxa fuerit, det ipse tolerandi virtutem. Non patietur vos tentari supra vires, sed cum ipsa tentatione faciet etiam proventum tolerantiae, ut possitis sustinere pondus tentationis. Subvenit enim ut impleat quod promisit, quia fidelis est: et illud facit provenire, quod potest humana fragilitas sustinere. Novit enim quando procellam tentationis exurgere sinat, quando exurgentem reprimat. Novit pro custodia nostra restringere, quod con-

tra nos egredi pro nostra exercitatione permittit, ut saeviens nos diluat procella, non mergat. Proventum ergo facit in tentatione, quia et tentationem prout expedire novit, facit provenire, et citius opus consolationis occurrere facit, atque surgenter tentationis stimulos mitigat, impugnantisque se cogitationum motus interna pace tranquillat. Moxque anima immensam de spe caelesti laetitiam percipit dum devictum respicit malum quod toleravit.

« Propter quod charissimi mihi, fugite ab idolorum cultura. »

Dixi quod omnia contingebant Israelitis in figura, qui post caeleste pabulum conversi sunt ad idola, multisque modis offenderunt, et quod vos Deum fidelem habetis adiutorem in omni tentatione. Propter quod, o charissimi, quibus ego propter magnam charitatem consulo, fugite, id est cito vos elongate, non solum animo, sed et corpore ab idolorum cultura, ne sicut Judaei stalis ite:um idololatriae. Qui enim assiduus est in idolio, aliquid sperat de eo; et de eo sperare, de Deo dubitare est. Sic enim Saul ad idololatriam quam exterminaverat rediit, sperans aliquid de ea (*I Reg. xxviii*). Fugite ergo ab idolorum cultura, ne per hanc vobis nascatur in Deum tentatio. Fugite quasi pestem, quasi venenum, quasi mortem, quia nisi cito fugeritis, non evadetis. Fugite de idolio, ut non comedatis ibi cum offendiculo simplicium fratrum, quia jam in eorum infirma conscientia facti estis idololatriae, dum vos aestimant ob honorem idolorum ibi comedere.

« Ut prudentibus loquor, vos ipsi iudicate quod dico. Calix benedictionis cui benedicimus, nonne communicatio sanguinis Christi est? et panis quem frangimus, nonne participatio corporis Domini est? Quoniam unus panis et unum corpus multi sumus, omnesque de uno pane participamus. »

Fugite ab idololatria, et ut inde fugiatis, loquor vobis altum aliquid, non quasi rudibus, sed quasi prudentibus et rationis capacibus. Ideoque vos ipsi velut prudentes iudicate quod dico, id est an propter hanc rationem quam subjungo, debeatis fugere procul ab idolis, et abstinere prorsus ab illorum sacrificiis. Calix benedictionis, etc. Ideo prius de calice loquitur, quia de pane postea plus erat loeuturus. Calix benedictionis cui benedicimus, id est calix cui Christus in caena benedixit, et cui nos sacerdotes in missa benedicimus, vel calix benedictionis, id est cujus haustu benedictio crelentibus infunditur, cui nos sacerdotes in sacramentorum confectione benedicimus, nonne est communicatio sanguinis Christi? id est nonne facit eos qui digne bibunt illum, esse participes vitae Christi quae per sanguinem designatur, quoniam anima carnis, ut Moyses dixit (*Levit. xvii*), in sanguine est. Hoc est, nonne facit nos esse illius beatitudinis et gloriae participes, in qua cum anima ipsius

anima vestra unum quid fiat per ejusdem gloriæ consortium? Ubi innuitur, quia similiter calix maledictus idolorum, potantes se facit participes mortis dæmoniorum, et panis quem nos sacerdotes in altari *frangimus*, et quem unum in multas partes dividimus ad designandam unionem charitatis accipientium, *nonne participatio corporis Domini est?* id est nonne hoc operatur in nobis, ut tandem corpora nostra recipiant participationem immortalitatis et gloriæ corporis nostri? Hoc est dicere: Participatio calicis et panis Domini, facit ut anima nostra et corpus tandem conformetur animæ et corpori Christi secundum receptionem ejusdem beatitudinis. Tunc autem hoc erit si quod in sacramento visibiliter sumitur, in ipsa veritate spiritualiter manducetur, spiritualiter bibatur. Sicut enim ut sit species visibilis panis, multa grana in unum consperguntur, tanquam illud fiat quod de fidelibus, ait Scriptura, erat illis cor unum et anima una (*Act. iv*), et sicut in confectione vini liquor granorum in unitatem confunditur, ita Dominus Jesus nos ad se pertinere per unitatem charitatis significavit, ac mysterium pacis et unitatis nostræ in sua mensa consecravit; et ideo qui accipit mysterium unitatis, et non tenet vinculum pacis, non mysterium accipit, pro se, sed testimonium contra se. Panis quem *frangimus*, est participatio corporis Domini, quia ipse panis quem multis dividimus, est verum corpus Domini: et qui de illo accipiunt de corpore Domini accipiunt, atque fiunt etiam ipsi quod accipiunt. Quoniam nos multi sumus unum panis et unum corpus. Nam, sicut unus panis ex multis granis, et unum corpus ex multis membris componitur, sic Ecclesia Christi ex multis fidelibus charitate copulante connectitur. Unus ergo panis sumus. Nam jejuniis et exorcismis cœpimus moli, deinde in baptismo conspersi sumus, et per acceptionem sancti Spiritus sumus decocti, et ita panis Domini effecti, si unum esse perseveravimus. Nam ideo Dominus, sicut dictum est (*Matth. xxvi, Marc. xiv, Luc. xxii*), corpus et sanguinem suum in eis rebus commendavit, quæ ad unum aliquid rediguntur e multis, quoniam aliud in unum ex multis granis conficitur, aliud in unum ex multis acinis confluit. Et ob hoc, communicatio corporis et sanguinis Christi societatem æternam sanctorum designat et facit, ubi pax erit et unitas plena atque perfecta. Propter quæ omnia recte dicimur omnes unum panis et unum corpus, quia et omnes de uno pane corporis Christi *participamus*. Quod enim quisque suam partem ex hoc pane percipit, significat quia unusquisque juxta mensuram suam particeps fit hujus gratiæ. Si autem unus panis Domini sacramenti unum corpus Christi efficit in ecclesia, sic panis idolatriæ dæmonum participatio est; et sicut omnes qui de uno pane ac de uno calice Domini sumimus, unum corpus effimur; ita si cum idolo-

latris de sacrificio eorum comedimus et bibimus, unum profecto cum illis corpus effimur. Qui enim comedit idolothytum, unum cum dæmone fit; sicut qui comedit corpus Christi, fit unum cum Christo.

« Videte Israel secundum carnem. Nonne qui edunt hostias, participes sunt altaris? »

Dixi quia qui edunt carnem Christi, et bibunt sanguinem ejus, participes sunt Christi, et hoc vobis per similitudinem ostendo. Nam videte id est considerate eum *Israel*, qui non secundum spiritum ut nos, sed secundum solam carnem est Israel, id est populum Judæorum, qui sola carne sunt filii Jacob, et carnaliter intelligunt et servant legis præcepta. Nonne illi qui apud eos edunt hostias, carnaliter immolatas, sunt participes altaris? id est de sacrificio altaris partem in esum accipiunt. Ita est. Pars enim cremabatur in altari, et pars comedebatur: et sicut Judæi participes fiebant altaris per esum hostiarum, sic nos effimur participes Christi per esum carnis ejus. Quoniam vera carnis substantia quæ in Christo est in nos transit, quoniam sacrificium illud idem quod erat in altari, transibat in eos qui comedebant de illo. Similiter et qui idolothyta sacrificia manducant, fiunt socii dæmonum, quomodo carnalis Israel socius erat altaris in templo, qui de sacrificiis manducabat.

« Quid ergo? Dico quod idolis immolatum sit aliquid? aut quod idolum sit aliquid? Sed quæ immolant gentes, dæmoniis immolant, et non Deo (*Deut. xxxii*). Nolo autem socios vos fieri dæmoniorum. Non potestis calicem Domini bibere et calicem dæmoniorum. Non potestis mensæ Domini participes esse et mensæ dæmoniorum. »

Quoniam monebat Apostolus ut fugerent ab idolorum cultura, ne cibus talitus contaminarentur, sensit motum cordis eorum, et ideo prævenit ne quis illi diceret: Ergo dicis vim aliquam habere idolum vel posse polluere. Non, inquit, idolum insensibile polluit, sed dæmones qui templis præsent, ad homines depravandos et suo servitio mancipandos, non quod offerebatur culpans, sed quia illis offerebatur. Quasi diceret: Quoniam dixi, fugite ab idolorum cultura, ergo ne quis ex hoc moveatur, interrogo, quid, dico in illis verbis præmissis? An intendo dicere, quod immolatum idolis sit aliquid, id est immutetur in aliquam dignitatem? Aut intelligo, quod idolum sit aliquid, id est valeat in aliquo prodesse vel obesse? Non hoc dico, sed potius istud assero, quia sacrificia quæ immolant gentes, non idolis, sed dæmoniis (quæ latent in idolis) immolant, et non Deo. Dæmoniis enim magis dediti sunt, quod est periculosius. Nam si tantum idola colerent, sicut eos nihil adjuvarent, ita nihil eis nocerent. Nam simulacrum vere nihil est, sed sub tegmine simulacri diabolus colitur. Gentes

immolant dæmoniis. Sed ego vos qui Christo A concorporati estis, *nolo fieri socios dæmoniorum* per sacrificia gentium. Non enim hoc totum quod videtur, est in idolo, sed sub tegmine idoli est occultum iniquitatis mysterium. Ideo abstinendum est ab esu talium sacrificiorum. Dominus tamen dicit, quia « quod intrat in os, non co inquinat hominem (*Matth. xv; Marc. vii*). » Ubi sciendum quia ipsi quidem cibi, et Dei creatura omnis quidem per se munda est (*I Tim. iv*), sed idolorum ac dæmonum invocatio ea facit immunda. Ideo debetis idolorum sacrificia respuere, quia *non potestis calicem Domini*, in quo sanguis est ejus, *bibere et calicem dæmoniorum*, in quo vinum est sacrilegæ superstitionis, *nec potestis mensæ*, id est altaris Domini in quo corpus ejus est, *participes esse et mensæ*, id est altaris dæmoniorum, et tam magnum sustinebitis incommodum, ut a corpore et sanguine Domini, sine quo vitam habere non potestis, separemini, quoniam sacrificium Christi et sacrificium diaboli nemo potest comedere (*Joan. vi*). « Quæ enim conventio Christi ad Belial? Aut quæ pars fidei cum infidei? Vel quis consensus templo Dei cum idolis? (*II Cor. vi*). » Nulla his adinvicem societas, quoniam mors et vita simul non conveniunt. Sequitur :

« An æmulamur Dominum? Nunquid fortiores « illo sumus. »

Non debemus ad subversionem fratrum manduca- re sacrificia idolorum. Quia *an æmulamur Domi- num?* id est an invidemus Domino, ut regnum ejus C minuamus, comedendo idolothyta ad perditionem fratrum? non oportet ut æmulemur eum, conantes ei auferre membra sua. Quia *nunquid fortiores sumus illo*, ut possimus contra eum prævalere, et eos ad perniciem trahere, quos ipse vult ad vitam servare, vel nos ipsos ab ejus percussione defendere? Malo nostro utimur, si contra Christum agimus. Vel ita : *An æmulamur Dominum*, id est an imitamur Christum comedentem cum publicanis et peccatoribus (*Matth. ix; Marc. ii; Luc. v*), dum cum idololatriis manducamus? Nequaquam illum imitamur in hoc facto, quia ipse non cum idololatriis cibum sumpsit, sed cum his qui unum Deum colebant, et tamen peccatores erant, ut eos dulcedine D familiaritatis suæ traheret ad pœnitentiam. An imitamur Dominum? Minime. Et nunquid sumus fortiores illo? id est nunquid agimus fortiora quam ipse, per scientiam qua novimus idolum nihil esse, sumentes idolothyta quod ipse non fecit? Hoc est enim fortiores illo esse, quod tamen non est fortitudo sed debilitas, ea facere quæ ille non fecit.

« Omnia mihi licent, sed non omnia expediunt « (*Ezech. xxxvii; supra vi*). Omnia mihi licent, « sed non omnia ædificant. Nemo quod suum est « quærat, sed quod alterius. »

Abstinendum est ab immolatis, et *omnia* quidem ciborum genera *mihi licent*, qui possum ea sumere mundo corde, *sed non omnia expediunt* mihi, id est

A quædam eorum non adjuvant, sed implicant cursum meum. Secundum legem naturæ licent, quoniam munda sunt omnia naturaliter, et ideo licent, id est nullo præcepto mihi prohibentur. *Omnia* quidem ciborum genera *mihi licent*, et lege naturæ et potestate liberi arbitrii, *sed non omnia ædificant* proximos, quoniam quæ idolis oblata sunt, destruunt illos, et a fide subvertunt; et ideo a licitis etiam abstinendum est, ne fratres scandalizentur. *Nemo enim quærat quod suum est*, id est suum proprium commodum, *sed commodum alterius*. Nam qui veraciter intelligit idolum nihil esse, et omnem Dei creaturam bonam esse (*I Tim. iv*), atque sic comedit idolorum sacrificia, non verens scandalizare fratres propter suam escam, iste quod suum est quærit, non quod aliorum. Qui vero ne fratribus noceat, a licitis abstinere, ille non quod suum est quærit, sed quod aliorum, quia charitate compulsus, etiam per sua damna quærit aliorum commoda. Quod de esca diximus, hoc de omni re sentiendum est, quia qui suas utilitates negligit pro utilitatibus proximorum, ille justus est.

« Omne quod in macello venit, manducate, nihil interrogantes propter conscientiam. Domini « est terra et plenitudo ejus (*Psal. xxiii*). »

Quoniam licita sunt hæc, et tamen non est utendum eis semper, determinat quomodo et qua ratione possint manducari, scilicet si venalia fuerint in foro reperta. *Omne*, inquit, *quod in macello venit*, id est quod venditur in loco ubi carnes venduntur, *manducate, nihil interrogantes*, id est non quærentes an sit immolatum vel non immolatum, et hoc facite *propter conscientiam*, id est ut libera sit conscientia vestra, quia licet aliquid sit oblatum idolo, tamen si hoc nescierit qui emit, nullum patitur scrupulum, et apud Deum immunis est. Vel propter conscientiam vendentis conservandam, quia si manducaretis postquam diceret immolatum esse, ille si infidelis esset, confirmaretur in infidelitate; vel si fidelis, revocaretur a fide. Nihil interrogate, quia si interrogaveritis infideles, qui vos sciunt esse Christianos, propter irrisionem vobis respondebunt omnia esse immolata. Dixi ut manducetis sine interrogatione, quia *Domini est terra*, quæ cuncta nutrit et sustinet, *et plenitudo ejus*, id est omnia quibus impletur terra. Nec potest immundum esse quod Domini est. Si ergo idolis immolatum aliquid, vel non est, vel nescitur, sine ullo conscientie scrupulo in usum necessitatis assumitur. Si vero certum est immolatum esse, melius Christiana virtute respuitur.

« Si quis vocat vos infidelium ad cœnam et vultis ire, omne quod vobis apponitur manducate, « nihil interrogantes propter conscientiam. Si quis « aut dixerit, hoc immolatum est idolis, nolite « manducare, propter illum qui indicavit, et propter conscientiam. Conscientiam autem dico, non « tuam, sed alterius, ut quid enim libertas mea judicatur ab aliena conscientia? Si ego cum gratia

« participo, quid blasphemor pro eo quod gratias ago? Sive ergo manducatis, sive bibitis, vel aliud quid facitis, omnia in gloriam Dei facite. »

Dixi qualiter manducandum sit quod emitis, dicam et gratis datum qualiter edi possit (*Coloss. III*). Ita scilicet: *Si quis infidelium vocat vos ad cenam, etc.* Cœna a communione vescentium appellatur; *κοινό* quippe commune Græci dicunt. Unde et communicantes, quod communiter, id est pariter conveniant. Apud veteres enim solitum erat in propatulo vesci, et communiter epulari, ne singularitas luxuriam gigneret. Si vos ad cenam quis infidelium vocarit, non præcipio ut eatis, sed in vestra voluntate pono. Tunc autem Christianus ad cenam infidelis ire debet, si aliquem fructum ibi habet, id est si scit se illum lucrari: sicut Christus ideo cum peccatoribus edebat, ut eos ad pœnitentiam converteret (*Matth. IX*). *Si vultis ad talem cenam ire, omne quod vobis apponitur, manducate, simpliciter, non interrogantes unde sit, propter conscientiam simul discumbentium, ne confirmetis infideles in errore suo, si scienter manducaveritis coram eis cibus idololatriæ. Hoc tamen perfectis dicitur, qui possunt contemnentes idolum quia nihil est, manducare de sacrificio, certi quia quod sub Dei Creatoris nomine editur non potest polluere. Nihil interrogantes edite quod apponitur. Sed si quis dixerit de eo quod apponitur, hoc immolatum est idolis, nolite jam manducare propter illum qui indicavit, ne putet vos illud comedere sub idolorum veneratione, et propter conscientiam aliorum. Qui enim idolis servit, gloriabitur, si vos edere de sacrificiis viderit, et in errore confirmabitur, malumque fratribus dabit exemplum. Patet quia caro per se non est immunda. Nam si natura ipsa immolatiæ carnis esset immunda, utique et nescientem contaminaret. Neque enim eo minus ipsa esset, quo a nesciente sumeretur. Sed propter conscientiam, ne dæmonibus communicasse videaris. Conscientiam autem dico non tuam, quæ firma est in cognitione veritatis, sed alterius, qui adhuc infirmus est in fide, vel necdum venit ad fidem. Apud conscientiam enim suam lætabitur infidelis quisque, si viderit te libenter appetere quod idolis immolatum est, et dicet: Quomodo Christiani vetant nos immolare quasi sit malum, et ipsi illa manducant quasi sancta et munda? Et idcirco abstinendum est, ne mala de nobis opinio generetur in aliorum mentibus, quia ut quid iudicatur mea libertas, ab aliena conscientia, id est cum ab idoli veneratione sit libera conscientia mea, quid opus est ut malam de me dans opinionem, faciam æstimari quia venerationis causa manducem idolis immolata? Judicaret enim non distare ab idololatriis, si non abhorrerem, quod oblatum est idolis, et si ego cum gratia participo, id est si ego gratiæ Dei communico, quia in ipsius nomine edo, quid blasphemor pro eo quod gratias ago? id est quid opus est me cadere in blasphemiam imperitorum? quid necesse est ut faciam æstimari quia ego devotus*

A sum idolo, dum quæ illi sunt oblata non horreo? Blasphemor enim inde ac vituperor, quia magnum aliquid de idolo sentire videor, et infideles gaudent in idololatria, dum me putant participem habentes occasionem permanendi in errore, et fidelibus malum datur exemplum. Et quia hæc mala inde contingerent, ergo cavete idolis oblata, ut possitis ad laudem Dei comedere. Quamvis enim per puritatem conscientiæ vestræ licitum sit vobis ista sumere, inimicum tamen Deo est ea scienter edere, quoniam ad opprobrium unius Dei hæc diabolo dedicantur. Ergo ne faciatis cibo vestro vel actu Deum blasphemari, sed sive manducatis, sive bibitis, vel aliud quid facitis, omnia facite in gloriam Dei, id est sic facite omnia, ut ex his glorificetur et laudetur Deus. Modeste et frugaliter et temperanter manducando et bibendo, glorifica Deum. Si enim quod manducas et bibis, ad refectionem corporis sumis reparationemque membrorum, gratias agens ei qui tibi præbuit mortali et fragili ista supplementorum solatia, et cibus tuus et potus tuus laudat Deum. Si vero modum naturæ debitum immoderatione voracitatis excedas, et vinolentia te ingurgites, manducans et bibens Deum blasphemans. Si post cibum et potum requiescis ut dormias, et in lecto nihil turpiter egeris, nec excesseris ultra concessam licentiam in lege Dei, laudas eum; et cum dormis, si mala conscientia non te excitat a quiete, innocentia somni tui laudat Deum; et cum vigilas et bene agis, atque Deus laudatur de bono opere tuo, opere tuo Deum laudas. Sic ad laudem ejus omnia sunt agenda.

« Sine offensione estote Judæis et gentibus et Ecclesiæ Dei, sicut et ego per omnia omnibus placeo, non quærens quod mihi utile est, sed quod multis, ut salvi fiant. »

Ita vestram conversationem modificate, ut nullus scandalum ex ea patiat. Estote scilicet sine offensione Judæis et gentibus et Ecclesiæ Dei. Offensio enim Judæis fit, si Christianum qui se dicit legem et prophetas recipere, viderint idola quæ illi abominantur non horrere. Gentilibus vero hæc est offensio, si in eo in quo sunt, non solum non arguantur, sed et promptiores fiant, dum non vitantur vota idolorum suorum. Ecclesiæ autem Dei fit offensio, dum quosdam ex numero suo videt his quæ inimica Deo sunt, adhærere. Cavete igitur uno cibo vestro sic omnes offendere, sicut et ego non solum non offendo quemquam, sed etiam placeo omnibus per omnia quæ facio. Non quidem ita placebat Apostolus omnibus, ut placeret etiam tam multis persecutoribus suis, sed placebat omni generi hominum, quod Christi congregabat Ecclesia, sive jam intus positus, sive introducendis in eam. Oportet enim ut rectores boni placere hominibus appetant, sed idcirco ut suæ æstimationis dulcedine proximos in affectum veritatis trahant, non ut se amari desiderent, sed ut dilectionem suam quasi quamdam viam faciant, per quam corda au-

dientiam ad amorem Conditoris introducant. Difficile quippe est, ut quamlibet recta denuntians prædicator, qui non diligitur libenter audiatur. Debet ergo qui præcet, studere se diligi, quatenus possit audiri; et tamen amorem suum pro semetipso non quærere, ne inveniatur ei cui servire per officium cernitur, occulta cogitationis tyrannide resultare. Recte igitur Apostolus nunc dicit, quia ego per omnia omnibus placeo, quamvis alibi se deneget hominibus placere (*Galat. 1*). Addit enim, *non quærens quod mihi utile est, sed quod multis ut salvi fiant*. Nulli autem utile est ad salutem, si homo ei propter seipsum placuit, quia non recte placet aliter, nisi cum propter Deum placet, id est ut Deus placeat et glorificetur, cum dona ejus attenduntur in homine, aut per ministerium hominis accipiuntur. Cum autem homo sic placet, non jam homo, sed Deus placet. Placet ergo Paulus et non placet, quia in eo quod placere appetit, non se, sed per se placere hominibus veritatem quærit.

CAPUT XI.

« Imitatores mei estote, sicut et ego Christi. »

Ego, inquit, omnibus placeo, quærens omnibus prodesse, et vos estote imitatores mei, ut nullum offendatis, sed tali intentione per laudabilem vitam hominibus placere quæritis. *Imitatores mei estote sicut et ego sum imitator Christi*, quoniam ita per me imitabimini Christum qui nullum offendit, sed omnes salvare venit. Imitatores mei estote sicut et ego Christi. In ecclesia iste ordo est, alii præcedunt, alii sequuntur et qui præcedunt, exemplo se præbent sequentibus; et qui sequuntur, imitantur præcedentes (*I Tim. 11*). Sed et illi qui se exemplo præbent sequentibus, sequuntur ipsum Christum. Nam quia omnes superaverunt proficiendo, nec jam remansit homo quem imitentur, ipse Christus eis remanet, quem usque in finem sequantur.

« Laudo autem vos, fratres, quod per omnia mei memores estis, et sicut tradidi vobis, præcepta mea tenetis. Volo autem vos scire quod omnis viri caput Christus est: caput autem mulieris vir (*Ephes. v*); caput vero Christi, Deus. Omnis vir orans aut prophetans velato capite, deturpat caput suum; omnis autem mulier orans aut prophetans non velato capite, deturpat caput suum. Unum enim est ac si decalvetur. Nam si non velatur mulier, tondeatur. Si vero turpe est mulieri tonderi aut decalvari, velet caput suum. »

Postquam mores et conversationem eorum arguit, nunc traditiones vult corrigere. Ideo non confirmando, sed per ironiam incipit loqui. Præcepi, inquit, ut me imitemini, et non possum reprehendere vos de inobedientia, sed *laudo vos quod per omnia estis memores mei, et præcepta quæ vobis tradidi, tenetis*. His verbis plus illos tangit, quam si manifeste increparet eos. Quia cum esset apostolus eorum, immemores erant traditionum ejus; neque quod adhuc non didicerant ex aliarum Ecclesiarum *traditione*, sequebantur; et ideo quasi noviter tradi-

dit illis, dicens: *Volo autem vos scire, etc. Quasi diceret: vos obliiti estis mei, et traditiones meas non tenetis, sed volo ut ista quæ subjungo, sciatis. Volo vos scire quod Christus est omnis viri caput, quoniam vir a Deo quidem, sed per Christum factus est (*Gen. 11*), sed vir est caput mulieris; quia, quamvis et mulier per Christum, de viro tamen facta est, ac per hoc subjicitur viro. Et sicut vir Christum, ita mulier debet sequi virum, et exemplo illius agere bona. Sicque secundo per virum subjicitur Christo. Vir enim nulli subjectus est nisi Christo, mulier autem et viro et Christo debet esse subjecta. Christus est caput viri, qui regitur a sapientia; sed vir caput mulieris, quæ regitur a viro. Designatur autem per virum spiritus rationalis et per mulierem anima. Est enim animæ quasi maritus quodammodo spiritus hominis, quia animale affectionem tanquam conjugem regit. Christus ergo caput viri est, id est sapientia Dei gubernatrix est illius spiritus qui est in homine, quo potest homo intelligere spiritualia, si ipse spiritus pie se subjicit Deo, nihil enim altius illo spiritu, nisi sapientia quæ Deus est. Sed vir est caput mulieris quia spiritus regit animam. Aliud est enim in homine rationale quod regit, aliud animale quod regitur, ut scilicet caro non concupiscat adversus spiritum (*Galat. v*), sed spiritui subjugetur, id est concupiscentia carnalis non adversetur rationi, sed potius obtemperando desinat esse carnalis, ut appetitum animæ per quem voluptates corporis operamur, habeat mens interior tanquam virilis ratio subjugatum. Ita est caput viri Christus, et caput mulieris vir. *Caput vero Christi, Deus est*, secundum quod Pater major est illo (*Joan. xiii*), ut hunc ipsum Deum esse, quod illi cum Patre unum est, caput sit hominis mediatoris. Quod ipse solus est. Si enim mentem recte dicimus principalem hominis, id est tanquam caput humanæ substantiæ, cum ipse homo cum mente sit homo, cur non multo congruentius, imo multo magis verbum cum Patre simul sit Deus, caput Christi, quamvis Christus homo nisi cum verbo quod caro factum est (*Joan. 1*), intelligi non possit? *Omnis vir orans, etc. Venit ad causam, quia et viri quidem apud Corinthios nutriebant comam, et mulieres nudato capite procedebant in ecclesiam, gloriantes in crinibus. Quod non solum inhonestum erat, sed etiam concupiscentiæ fomitem præstabat, et quoniam Christus est caput viri, ideo omnis vir tam dives quam pauper, in ecclesia dum orans aut cæteris prophetans, id est futura et occulta, pronuntians velato capite corporeo, deturpat, id est dehonestat spirituale caput suum Christum, vel etiam corporale caput. Sed econtra omnis mulier, quia inferior et subjecta viro, si fuerit orans in ecclesia aut prophetans, non velato capite, deturpat et inhonestum reddit caput suum, quod ita nudum omnibus ostendit. Quoniam Christus cui servire est summa libertas, caput est viri, ideo non est justum ut in ecclesia oret vel doceat velato capite, quoniam inter eum et Christum non est aliquid medium.**

terea non debet ostendere signum servitutis sed libertatis. Nam quia sine alio mediante is est caput ejus, et per Christum Deus, et signum libertatis non habet velum, quod est ionis signum. Deturparet enim caput suum, et vel prophetaret cooperto capite, quia vide-putare dedecorosum sub Christo esse, tan- sub suo capite, et quod ignominia esset illi, umma libertas et gloria debet videri. Sed in ecclesia stans non velato capite, id est gno subjectionis quam debet viro, deturpat uum, id est dehonestat virum, quasi non ha- m medium inter se et Christum, vel caput arnale dehonestat, dum denudat illud, quia *ut ac si decalvetur*, id est tantumdem est ad dinem, ac si decalvaretur. Vere idem valet. *non velatur mulier, etiam tondeatur.* Debet videri, si non est velata. Sed *si turpe est mu- deri aut decalvari, velet caput suum.* Nam at in ecclesia retortis crinibus in tergo et onte, hoc est adeo turpe, ac si capilli per de- nem vel detonsionem essent ablati. Nunc lem intelligentiam breviter attingamus. In im, ut supra dictum est, rationalis sensus ir, in muliere autem anima hominis intelli- uæ a rationali sensu, velut mulier a viro, res- pæa quoque anima hominis, quæ utrumque lit, si quando ea quæ Dei sunt cogitat, quasi

A qua contemplatione spirituali per vela- l est carnalibus cogitationibus se cohibere et, sed revelata facie, id est mundo corde C emplanda cœlestia et spiritualia se extend- quando vero ea quæ mundi sunt cogitat, ulier est. Sed ne supra quam necesse est, errenis actibus occupet, oportet ut discre- elamine restringatur, ne forte dum licita et ria vult procurare, ad illicita et superflua co- illiciatur. Et hoc est spiritualiter quod vir clare non debet, sed mulier. *Vir enim*, id est ensus rationis; *orans*, id est desiderans su- rat prophetans, id est futura præmeditans; *apite*, id est obumbrato nebulis terrenarum onum suo acumine: deturpat caput suum, turpitudine cogitationum suarum obscurat chritudinem supernæ sapientiæ. Sed mulier, D inferior pars mentis intenta temporalibus; id est appetens quæ corpori sunt necessa- prophetans, id est futura quæ sibi sunt prævidens; non velato capite, id est non per onis temperantiam restricto suo acumine: de- uum caput, id est turpitudine interiorum de- um frædat superiorem mentis aciem, quæ de- is cœlestibus inhiare. Tantumdem enim valet, ne velo modestæ cohibitionis se relaxat in um temporalium rerum; ac si decalvetur, id detegatur et appareat omnibus prava intentio qua debet erubescere. Hæc enim per fron- æ pudoris sedes est et præeminet, designa- m mulier, id est pars rationis intenta rerum

A temporalium administrationi, si non velatur, id est si non modeste restringitur a superfluis cogitandis, etiam tondeatur, id est auferat a se universas cogitationes mundanarum curarum. Melius est enim ut omnes mundi curas abjiciat, quam ut in omnia mundi desideria spargatur, dum necessaria procurat. Si vero turpe est mulieri tonderi vel decalvari, id est si hæc inferior pars animæ, quæ parum ad aliud valet, incongruum deputat abscindere velut capillos a se omnes mundi curas, vel detegere eun-ctis impudentiam suæ intentionis erga temporalia, velet caput suum, id est modeste cohibeat a super- fluis cogitationibus acumen suum.

« Vir quidem non debet velare caput suum quia « imago et gloria Dei est. Mulier autem gloria viri « est. Non enim vir ex muliere est, sed mulier ex « viro (*Gen. ii*). Etenim non est creatus vir propter « mulierem, sed mulier propter virum. Ideo debet « mulier velamen habere super caput suum, et pro « pter angelos. Verumtamen neque vir sine mulie- « re, neque mulier sine viro in Domino. Nam sicut « mulier de viro, ita et vir per mulierem. Omnia « autem ex Deo. »

Vir quidem non debet velare caput suum, id est non debet habere signum servitutis vel potestatis super se, sed libertatis, quia non habet aliquid super se nisi Deum. Quoniam *imago et gloria est Dei*. Imago, id est similitudinis impressio, et gloria Dei cernitur in viro, quia unus Deus unum fecit hominem, ut sicut ab uno Deo sunt omnia, ita essent ab uno homine omnes homines, ut unius Dei invisibilis unus homo visibilis imaginem haberet in terris, ut unus Deus in uno homine videretur auctoritatem unius principii conservare ad confu- sionem diaboli, qui sibi neglecto uno Deo, dominium et deitatem voluit usurpare. Homo igitur imago et gloria Dei est, ut sicut Deus præest omnibus per om- nipotentiam, sic homo terrenis per intelligentiam. *Mulier autem gloria est viri*, quoniam facta est illi in adiutorium, ut haberet vir gloriam de ea cum ei præiret ad Deum, et se ei daret imitandum in sanctitate, sicut ipse esset gloria Dei, cum ejus sapientiam sequeretur. Gloria viri est mulier, dum ille regit, hæc obtemperat; ille a sapientia regitur, hæc a viro. Gloria viri est, quoniam ex eo est et ei subjecta est. *Non enim vir ex muliere est, sed mulier ex viro*, id est Adam non ex Eva, sed Eva ex Adam. Et adhuc alia ratione demonstro, cur mulier sit gloria viri. *Quia non creatus est vir propter mulierem, sed mulier propter virum*, id est non est creatus Adam in auxilium Evæ, sed Eva in adiuto- rium Adæ. Hoc confirmat illud, quod diximus unum Deum unum hominem fecisse, quoniam vir et mulier unum sunt in natura, quia origo mulieris vir est. *Ideo mulier*, ut ostendatur esse subjecta, *debet habere velamen super carut suum*, id est potestatem, ad designandam potestatem viri super se. Non ha- beat caput liberum in ecclesia, sed velamine tectum, *et propter angelos*, id est propter sacerdotes divinos

voluntatis nuntios, ne in ejus faciem irriterentur ad libidinem; et quia sacerdos personam habet Christi, idcirco mulier quasi ante judicem, sic ante sacerdotem qui vicarius ejus est, propter reatus originem subjecta debet videri. Vel propter angelos, qui nobis sunt ad custodiam deputati, ne displiceat eis lasciva mulieris denudatio, si viderint fomitem peccati per eam excitari. Dixi quia mulier est gloria viri, et propter virum, et ex viro creata in principio. Sed tamen in subsequenti generatione non est ita, quia neque vir sine muliere, neque mulier sine viro creatur in Domino, id est in operatione Domini, qui ex uno fecit primitus ambos et unum. Una enim caro et unum corpus in Domino, id est secundum Deum, qui creavit. Vel ita: Licet mulier propter reatus originem portet signum subjectionis, non tamen exclusa est a salute, quia neque vir sine muliere, id est exclusa muliere, neque mulier sine viro, id est excluso viro est in Domino, id est in gratia Domini et salute æterna. Neuter enim excluditur, sed uterque admittitur, et cur hoc? Quia sicut mulier de viro prius facta est, ita et vir per mulierem postea nascitur. Mulier est ex viro, vir per mulierem. Sed omnia sunt ex Deo. Quæ omnia, nisi de quibus nunc sermo est? id est et ille vir ex quo mulier, et illa mulier quæ est ex viro, et ille vir qui per mulierem. Postquam Apostolus singula gradatim exposuit, ut omnia Deo subjiceret, unum servans principium ait: *Omnia ex Deo*, ut neque mulier de subjectione doleret, neque vir quasi de exaltatione superbiret. Sed congruum est ut ad spiritalem intelligentiam revertamur; vir enim non debet velare caput suum, quia imago et gloria Dei est. Genesis docet virum et mulierem factos ad imaginem Dei. Fecit, inquit, Deus hominem, ad imaginem Dei fecit eum, masculinum et feminam fecit eos (*Gen. 11*). Ad imaginem quippe Dei naturam ipsam humanam factam dicit, quæ sexu utroque completur, nec ab intelligenda imagine Dei separata feminam. Quomodo igitur dicit Apostolus virum esse imaginem Dei unde caput velare prohibetur, mulierem autem non, et ideo caput velare jubetur, nisi in natura humanæ mentis intelligamus mulierem cum viro suo esse imaginem Dei, ut una imago sit tota illa substantia? Cum autem ad adjutorium distribuitur, quod ad eam solam attinet, non est imago Dei. Quod autem ad virum solum attinet, imago Dei est tam plena atque integra, quam in unum conjuncta muliere. Vir enim principaliter creatus est ad imaginem Dei, in quo naturaliter amplius viget ratio, quasi ipse sit ratio, quæ est gloria Dei. Mulier autem est ipsa sensualitas, quæ subserviendi gloria est rationis, quia hæc in femina naturaliter prævalet. Et ideo natura mentis humanæ non est imago Dei, nisi ex qua parte æternis rationibus considerandis adhærescit. Quia, etsi tota contempletur veritatem, imago Dei est; et cum ex ea distribuitur aliquid et quadam intentione derivatur ad actionem rerum temporalium, nihilo-

minus ex qua parte conspectam consulit veritatem, imago Dei est; ex qua vero intenditur in agenda inferiora, non est imago Dei, et quia quantumcumque se extenderit in id quod æternum est tanto magis inde formatur ad imaginem Dei, et propterea non est cohibenda ut se inde contineat ac contemneret, ideo vir non debet velare caput suum. Quia vero illi rationabili actioni, quæ in rebus temporalibus corporalibusque versatur, periculosa est nimia in inferiora progressio, debet habere potestatem super caput, quod indicat velamentum quo significatur esse cohibenda. Vir non est ex muliere, sed mulier ex viro, id est æternæ contemplationis veritas non ex administratione temporalium rerum, ut ab ea regatur, neque ratio ex sensualitate, sed e converso, quia non est creatus vir propter mulierem, id est rationalis sensus subserviat sensualitati, nec æternam contemplationem ut subjiciatur temporalium actioni, sed e contrario, et idcirco mulier, id est sensualitas et pars illa rationis, quæ ad temporalia gubernanda deflectitur, habeat potestatem, id est jugum superioris moderaminis super caput, ut per disciplinam prematur a noxia libertate vagarum cogitationum propter angelos Dei, qui nos semper aspiciunt, ne dissoluta lascivia cogitationum nostrarum offendantur. Sed tamen neque vir sine muliere, id est rationalis sensus sine sensualitate vel temporalium procuracione; neque mulier sine viro, id est neque sensualitas vel temporalis actio sine superiori sensu; in Domino, id est in Domini operatione, sed potius et illud quod regendi habet potestatem in homine, et illud inferius quod regendum est, Dominus fecit. Nam sicut mulier de viro, id est sicut actio bona ex cognitione veritatis habet originem, ita ut vir per mulierem, id est similiter et cognitio veritatis post exacuitur per bonam actionem. *Omnia autem sunt ex Deo*, id est et contemplatio veritatis et bona operatio, vel superior et inferior pars animæ. Aliter: Per virum spirituales rectores plebis ecclesiasticæ designantur, in quibus velamen ignorantie non debet esse. Per mulierem vero figurantur animæ infirmæ, quæ nihil spirituale, nihil de invisibilibus capere possunt. Quibus tamen ignorantie velamen non officit, si de his quæ non intelligunt, nihil de proprio sensu præsumunt, sed sacerdotibus suis velut angelis honorem dantes, inquirunt ab illis quæ nesciunt. Cæterum si quælibet infirma, quæ adhuc carnaliter sapit, spiritualibus viris se conferre præsumperit, deturpat caput suum, id est inhonorat sacerdotes ecclesiæ. Sed hæc omittentes, videamus sequentia, nam subditur:

« Vosipsi judicate. Decet mulierem non velatum orare Deum? Nec ipsa natura docet vos, quod vir quidem si comam nutriat, ignominia est illi: mulier vero si comam nutriat, gloria est illi, quoniam capilli pro velamine dati sunt ei? »

Dixi quia mulier in ecclesia debet habere velatum caput, et vosipsi judicate, si hoc rationabiliter

dicat si decet mulierem non velatam orare. Non decet, quia *nec ipsa natura docet vos hoc ens, quæ capillos mulieris ita multiplicat.* e esset apostolica: traditionis ratio, ut veteres essent in ecclesia, illi econtra revelati in ecclesia patiebantur (*Ezech. XLIX*). Ideo

per auctoritatem traditionis quam neglectæ per ipsam naturam suadere illis nititur.

Nec ipsa, inquit, natura docet vos hoc. Et hoc docet natura, quod vir quidem si contrariatur, cum et lex hoc prohibeat, ignominiam, unde opprobrium est illi; sed si mulier nutriatur, gloria est illi, quod coma ipsius tam

tam decora crescit ac multiplicatur, ut gloria et pulchritudo videatur. Ideo gloria

comæ capilli a naturali institutione datur, non velamine habendo, id est dati sunt ei ut

amen apponatur, quod per productionem manifestum innuitur. Coma enim indicium velaminis, ut naturæ voluntas addatur. Et ideo vir naturaliter comatus, quia non est velandus.

Superiorem tractatum spiritualis intellectus docet ipsa natura mulierem sine velamine orare, quoniam erectus hominis status

non illa pars rationis ejus, quæ temporalia, non sine velo discretionis ea debet appetere, ne sicut Dei animalia totam se de appetitum terrenarum rerum. Velo enim

liberi a nimio cogitatu et appetitu inferiorum, id est superior mentis sensus, natura serenus debet cogitare, si nutriatur

comæ densitate superfluarum cogitationum, non est illi. Mulier autem, id est pars illa

temporalia dispensat, si nutriatur comam, multitudinem utilium cogitationum, per quas

impleat necessariam rerum corporalium cognitionem, gloria est illi, quoniam apud

Deum inde mercedem. Quoniam capilli datur velamine, id est multiplex cogitatus

variis rebus est illi datus, ut sub hoc tegatur condatur a dissoluta vagatione inutilium

comæ cogitationum. Quibus autem videtur contentiosus esse nos consuetudinem non habemus, neque Ec-

clesiæ Dei. Hoc autem præcipio, non laudamus quod non in melius, sed in deterius con-

cedimus, vos non debere comatos esse, sed mulieres comam nutrire et caput velare, multas

res inde monstravi. Sed si quis videtur esse, ut adhuc de hac re velit contentiorem auctoritati debet acquiescere, quia

comam a quorum instructione processit habitus ecclesiæ, et qui sumus semper populus

habemus talem consuetudinem, ut viri sint velati mulieres nudent capita, neque etiam Ec-

clesiæ ex Judæis et gentibus constituta. Postquam venit auctoritatem, ut contentiosos vincat, et Judæismus hoc habuit, nec Ecclesia Dei,

ostendens quia neque Moyses, neque Salvator sic tradidit. Deinde jam amplius disputare non vult de virorum tonsione vel mulierum velatione, sed præ-

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

ceptum inde tribuit dicens: *Hoc autem præcipio, scilicet ut dissidentis solertia non requiratur, sed præ-*

rum insidias asserentes, vigilantiores et cautiores
simus, etiam si eos ad salutem revocare non pos-
sumus. Oportet igitur et hæreses esse, ut qui pro-
bati sunt manifesti fiant in nobis. Hi enim probati
sunt Deo, qui bene possunt docere. Sed manifesti
hominibus esse non possunt, nisi cum docent. Do-
cere autem nolunt nisi eos qui doceri quærent. Sed
multi ad quærendum pigri sunt, nisi per molestias
et insultationes hæreticorum quasi de somno exci-
tentur, et in imperitia sua erubescant sibi, ac de illa
periclitari se sentiant. Ideo providentia divina mul-
tos diversi erroris hæreticos esse permittit ut cum
insultant nobis et interrogant nos ea quæ nescimus,
vel sic discutiamus pigritiam, et divinas Scripturas
nosse cupiamus. Hæreticus autem est, qui alicujus
temporalis commodi, et maxime gloriæ principa-
tusque sui gratia, falsas opiniones ac novas vel gi-
gnit vel sequitur.

« Convenientibus ergo vobis in unum, jam non
est Dominicam cœnam manducare, unusquisque
enim suam cœnam præsumit ad manducandum.
Et alius quidem esurit, alius autem ebrius est.
Nunquid domos non habetis ad manducandum et
bibendum? aut Ecclesiam Dei contemnitis, et con-
funditis eos qui non habent? Quid dicam vobis?
Laudo vos? in hoc non laudo. »

Quando quidem scissuræ sunt inter vos, ergo vo-
bis convenientibus in unum, jam non est manducare
Dominicam cœnam, id est illud manducare quod ibi
facitis, quia discordanter hoc facitis, jam non est
manducare Dominicam cœnam. Quia unusquisque
vestrum præsumit in ecclesia manducare seorsum
cœnam suam, id est oblationem suam, cum Domi-
nica cœna communis esse debeat omnibus Chri-
stianis, sicut Christus cum suis discipulis commu-
niter cœnavit. Tangit eorum consuetudinem, quia
frequenter in anno certis diebus solebant omnes, ad
ecclesiam convenire, ut et corpus et sanguinem Do-
mini perciperent, et in ecclesia convivium agerent
ex oblationibus suis, ad exemplum cœnæ quam Do-
minus cum discipulis suis fecit. Sed hanc consuetu-
dinem plurimi eorum perverterant; et secundum
quod alius alio prior veniebat afferens cibos suos,
manducabat et inebriabatur, non expectans paupe-
rem fratrem; et postea corpus Domini sumebat, vel
cibus suæ mensæ miscibat, non judicans illud ab
aliis cibis differre. Nam munera sua offerentes adve-
nientibus presbyteris, quia adhuc rectores ecclesiis
non omnibus locis fuerant constituti, totum sibi
quod obtulerant vendicabant schismatis causa. Nam
pseudoapostoli dissensiones inter eos seminaverant,
ita ut oblationes suas zelarentur, cum una atque ead-
em prece omnium oblationes benedicerentur, ut hi
qui (ut assolet fieri) nihil obtulerant, vel unde offer-
rent non habebant, pudore correpti confunderentur,
non sumentes partem. Et tam cito illud agebant, ut
supervenientes non invenirent quod ederent. Ideo-
que Apostolus illos increpat. Si sic, inquit, conve-
nitis, ut unusquisque cibum suum sumat, domi hæc

agenda sunt, non in ecclesia, ubi unitatis et myste-
rii causa convenitur, non dissensionis et ventris.
Munus enim oblatum, totius populi fit, quia in uno
pane omnes significantur. Per id enim quod omnes
unum sunt, de uno pane omnes sumere oportet.
Itaque dicitur: *Convenientibus vobis in unum, jam
non est Dominicam cœnam manducare*, id est jam
non potestis sacramenta Redemptoris accipere, nec
jam ad similitudinem cœnæ Domini facitis ibi con-
vivium. Quare? Quia *unusquisque vestrum cœnam
suam*, id est quod secum attulit, *præsumit*, id est
ante Dominicam cœnam, et antequam cæteri con-
veniant, sumit, *ad manducandum*, non ad erogan-
dum pauperibus. *Et alius quidem* qui non attulit quod
ederet, vel sero venit, *esurit; alius autem*, qui ci-
bos suos edere præoccupavit, *ebrius est*. Et ita jam
non estis idonei Dominicam cœnam manducare, id
est sacram eucharistiam percipere quæ a jejuniis et
concordantibus est percipienda, quamvis apostoli
primo non jejuni eam perceperint. Placuit enim Spi-
ritui sancto, ut in honorem tanti sacramenti in os
Christiani prius Dominicum corpus intraret quam
cæteri cibi. Nam ideo per universum orbem mos
iste servatur. Neque quia post cibos illud dedit Do-
minus, propterea pransi vel cœnati fratres ad illud
percipiendum convenire debent, aut sicut faciebant
quos nunc Apostolus arguit et emendat, *mensis
suis hoc miscere*. Namque Salvator quo vehemen-
tius commendaret mysterii illius altitudinem, ulti-
mum hoc voluit infligere cordibus et memorizæ disci-
pulorum, a quibus ad passionem mox digressurus
erat; et ideo non præcepit quo deinceps ordine su-
meretur, ut apostolis per quos Ecclesiam disposi-
turus erat, servaret hunc locum. Vos inquit, ita co-
meditis, quisque suas oblationes, nec facitis eas ut
deberetis omnibus communes. Sed cur ad talem co-
mestionem venitis in ecclesiam. *Nunquid non ha-
betis domos ad manducandum et bibendum*, ut ibi
convivia hujusmodi celebretis? *Aut Ecclesiam Dei*,
id est, domum orationis (*Isa. lvi; Matth. xxi*) quæ
consecrata est ad exorandum in ea Deum, et ad
percipienda illius sacramenta, *contemnitis*? Utique
contemnitis eam, dum irreverenter in ea carnales
cibos sumitis. Et etiam confunditis eos qui non ha-
bent quod ibi comedant, cum vos in conspectu eo-
rum deliciis affluatis, et ipsi vel jejuni remaneant
vel solum panem suum comedant. In hoc etiam con-
funditis pauperes qui non habent quod edant, quia
vos antequam ipsi veniant manducatis, et nihil illis
relinquitis, atque ita cum ipsi veniunt, quod man-
ducent non inveniunt et erubescunt. Sic enim con-
funditis et eos qui præsentibus sunt et nihil accipiunt,
sive juxta superfluas opes vestras suam tenuitatem
comedunt, et illos qui post venientes nihil inveniunt,
et quid dicam vobis qui talia facitis: Non invenio
quid dignum pro commissione talium operum vobis
dicam. *Laudo ego vos? in hoc quod ista tam male
agitis, non laudo, sed multum reprehendo. Vel laudo*

nonnullis aliis, sed in hoc nihil laudabile in-
 go enim accepi a Domino, quod et tradidi vo-
 quoniam Dominus Jesus in qua nocte tra-
 atur, accepit panem : et gratias agens, fregit
 lixit : Accipite et manducate, hoc est corpus
 im, quod pro vobis tradetur. Hoc facite in
 am commemorationem. Similiter et calicem,
 quam cœnavit, dicens : Hic calix Novum Te-
 nentum est in meo sanguine. Hoc facite quo-
 cunque bibetis, in meam commemorationem
 t. xxvi; Marc. xiv; Luc. xxii.)
 vos non laudo, sed vitupero in hoc quod ita
 re et irreverenter ad Dominicam cœnam conve-
 quia traditionem meam super hæc re non bene-
 tis. Quam tamen diligenter servare debuisset
 ego non a meipso inveni eam, nec a Petro
 drea didici, sed accepi a Domino, quod et vobis
 ita re tradidi, et ideo reverenter atque inviola-
 debetis retinere, quod mihi Dominus tradidit
 vobis. Hoc vobis tradidi, quoniam Dominus
 etc. Ostendit Apostolus mysterium eucharis-
 tiam cœnam celebratum, non cœnam esse.
 na enim spiritualis est, quæ cum reverentia
 ata, purificat sibi devotum; et memoria re-
 lationis nostræ est, ut Redemptoris memores,
 ab eo consequi mereamur. In nocte autem
 is est ad passionem, sed venit inde ad resur-
 ris lucem. Dominus Jesus, id est Salvator
 titium, in qua nocte tradebatur, jam imminente
 assionis articulo, accepit panem, et gratias
 fregit. Accipit panem, ut significaret se ac-
 corpus quo nos pasceret. Et gratias agit
 le reparatione hominum futura per passio-
 jus, ac per sacramentum corporis et sanguinis
 it fregit panem, ut ostenderet corporis sui fra-
 n, id est passionem non absque sua sponte ac-
 atione venturam, sed se facturum illam,
 it : « Quia ego pono animam meam, ut ite-
 ram eam : et nemo tollet eam a me, sed ego
 am a me ipso (Joan. x). » Fregit panem, ut
 us suis ex eo daret et unum omnes illos fa-
 et dixit eis : Accipite hanc spiritalem escam
 ducate hoc sacramentum, id est et mente ac-
 et ore comedite, scilicet ut carnem meam non
 tantum in sacramento, sicut et multi mali alii
 sed usque ad participationem spiritus man-
 et, ut in meo corpore tanquam membra ma-
 et meo spiritu vegetemini. « Quia qui man-
 carnem meam et bibit sanguinem meum, in-
 net et ego in illo (Joan. vi). » Signum enim
 manducavit et bibit, hoc est, si manet et ma-
 si inhabitat et inhabitatur, si hæret, ut non
 tur. Sic do vobis ad edendum carnem meam,
 ut hanc edentes non relinquatis unitatem
 Manducate quod tribuo, quia hoc est corpus
 Sensibus quidem exterioribus videtur esse
 sed sensibus cognoscite mentis, quia hoc est
 meum, non aliud, sed illud idem substantia-

A liter, quod pro vobis redimendis tradetur ad mortem
 et crucifigetur. Hoc quod dixit : Facite, id est cor-
 pus meum accipite et manducate per successio-
 nem temporis usque in finem sæculi, in meam com-
 memoracionem, id est in memoriam passionis meæ,
 ut pertractetis et consideretis, quam dignam et
 sanctam et humanæ salutis efficacem medicinam
 accipitis, quatenus ex consideratione tantæ sau-
 ctitatis cum majori veneratione sacram eucharis-
 tiam percipiat, et imitari passionem meam desi-
 deretis, ut si opus fuerit, pro salute fratrum mori
 parati sitis. Accipientes enim corpus meum, memo-
 res mei esse debetis, ut diligenter recogitatis quis
 ego sim, et quæ inter homines conversans operatus
 sim vel quæ pertulerim, ut sicut præcessi sequa-
 mini. Vel vos sacerdotes hoc facite, id est ex pane
 corpus meum per mystica verba consecrate, in me-
 moriam passionis meæ, ut recogitetis eam dum sa-
 crificium istud obtuleritis. Similiter ut acceperat
 panem et fecerat ex eo vinum et verum corpus
 suum, accepit et calicem, et fecit ex vino sangui-
 nem suum, postquam cœnavit, id est jam et finito
 veteri pascha quod cum discipulis tunc manduca-
 verat. Transiit enim a veteri ad novum Pascha,
 quod tradebat celebrandum Ecclesiæ, ut pro carne
 et sanguine legalis agni, sacramentum sui corporis
 et sanguinis substitueret. Ob hoc etiam post finem
 cœnæ, ut illud quod cum eis ultimum ageret, ar-
 ctius eorum mentibus imprimeret. Quoniam illud
 quod eorum saluti magis erat utile debuit eis ad ul-
 timum reservare, et maxime cordibus eorum com-
 mendare. Accipit calicem et dixit : Hic calix, id est
 hic potus est Novum Testamentum, id est nova pro-
 missio cœlestis hæreditatis in sanguine meo, quo
 plenus est idem calix. Hoc est, potus hujus calicis
 est sanguis meus, qui non vetera, sed nova, id est
 non terrena, sed cœlestia bona promittit (Hebr. ix).
 Nam calix Moysi Vetus Testamentum fuit, quia ter-
 renam hæreditatem promisit in sanguine vitulorum
 et hircorum, de quo idem Moyses ait : « Hic san-
 guis testamenti quod mandavit ad vos Deus (Exod.
 xiv). » Per testamentum enim datur hæreditas, et
 in sanguine Christi accepimus Novum Testamentum,
 id est novam legem quæ obedientibus sibi dat hære-
 ditatem regni cœlorum. Testamentum Novum in
 Christi sanguine consecuti sumus, per quod ad no-
 vam hæreditatem perveniamus, quia beneficii divini
 sanguis testis est. Unde et ad tuitionem corporis et
 animæ nostræ sacramenta ejus percipimus, quia
 caro ejus pro salute nostri corporis est oblata; san-
 guis vero pro anima nostra effusus est, ut utraque
 nostri substantia hæreditatem vitæ perennis acci-
 pere posset. Nec mirum, quod de pane et vino car-
 nem et sanguinem suum fecit. Nam et in quolibet
 homine carnem et sanguinem de pane et vino facit,
 quia panis comestus mutatur in carnem, et vinum
 potatum vertitur in sanguinem per Creatoris opera-
 tionem. Calix Christi quem in mysterio bibimus,
 propterea etiam dicitur testamentum in sanguine

ejus, quem semel in cruce fudit pro nobis, quia A ducat et bibit, qui sine debita reverentia sacram
munivit et defendit nos adversus calumnias hostis anti- eucharistiam percipit. Indigne manducat et bibit,
tiqui, ne cæl. stem nobis hæreditatem possit auferre, qui non prius per pœnitentiam purgatus, ad hoc
sicut litteræ illæ quæ vocantur testamentum, hære- sacramentum accedit. Hoc est enim indigne acci-
dem muniunt adversus calumniatorem, ne tollat ei p- pere, si eo tempore accipiat quo debet pœnitentiam
hæreditatem. *Hoc, inquit, facite*, id est calicem hunc agere. Fit igitur reus corporis et sanguinis Domini,
bibite in meam commemoratorem, quotiescunque bi- id est non purgationem, sed maculam culpæ pro
betis illum ut scilicet nunquam sine memoria pas- qua pereat, trahit ex eo quod male accipit bonum
sionis meæ bibatis enim, sed in mente habeatis, sacramentum corporis et sanguinis Domini. Nec
quia ego mortem pertuli pro vobis. Aut certe vos sibi si indignus accesserit applaudat, quia continuo
qui sacerdotes estis, hoc facite quod ego nunc feci, damnatus non fuerit, quoniam multoties peccatoris
id est calicem vini consecrate, ut fiat sanguis meus, supplicium differtur, sed perendinatur occultum ju-
hoc facite in meam commemoratorem, ut in hoc dicio. Nemo præsumat accedere indignus, sed
facto sitis memores mei et eorum quæ pro vobis homo, id est rationabiliter agens, *probet*, id est dis-
passus sum. Hoc ita dixit Dominus, velut si quis cutiat et examinet prius seipsum, qui etiam ex eo
morietis relinquat ei quem diligit aliquod pignus; B quod homo est, sine peccato non est. Probet antea
quod dum ille post mortem ejus aspicit, lacrymas seipsum, id est vitam suam inspiciat et consideret,
continere non potest, si eum perfecte dilexit. an digne possit accedere vel non. Raro enim potest
inveniri quisquam ita magnus et justus, ut in eo
per discussionem non inveniatur aliquid, quod de-
beat eum a corpore et sanguine Domini retardare,
nisi confessus fuerit illud, et per pœnitentiam dele-
verit. Probet se, *et sic*, id est postquam se probave-
rit, *edat de pane illo et bibat de calice*, quia tunc ei
proderit. Ideo prius se discutiat et purget, quia
qui manducat et bibit indigne, id est sine sui exami-
natione, *judicium sibi manducat et bibit*. Indigne
manducat et bibit, qui vel aliquod grave peccatum,
vel multa levia comisit, et non constitetur ea prius-
quam ad communionem accedat. Duobus etiam mo-
dis manducare et bibere debemus hoc sacramen-
tum, id est ore cordis et ore corporis. Nam qui solo
ore corporis manducat, indigne manducat. Qui au-
tem et ore corporis et ore cordis accipit, ille digne
comedit. Qui indigne manducat *judicium sibi man-
ducat*; id est damnationem extremam, quæ nunc
appellatione *judicii* signatur, sicut et cum Dominus
ait: « Qui vero mala egerunt, in resurrectionem
judicii (Joan. v). » *Judicium sibi manducat*, non
alii, quia communio malorum non maculat aliquem
participatione sacramentorum, sed confessione fac-
torum. Nam si in factis malis non eis quisque con-
sentiat, portat malus causam suam et personam
suam, et ideo boni debent tolerare malos. *Judicium*
sibi manducat, non quia mala res sit quam accipit,
sed quia ille malus male accipiendo ad *judicium*
accipit bonum quod accipit. Sicut enim Judas cui
buccellam tradidit Dominus (Joan. XIII), non malum
accipiendo, sed male accipiendo, locum in se dia-
bolo præbuit; sic indigne quisque sumens Domini-
cum sacramentum, non efficit ut quia ipse malus
est, malum sit, aut quia ad salutem non accipit,
nihil acceperit. Corpus enim Domini et sanguis Do-
mini nihilominus est, sed ille accipit hoc non ad
vitam, sed ad *judicium*, quia non *dijudicat* corpus
Domini, id est non discernit quam sit dignius om-
nibus creaturis hoc corpus, quod videtur esse pa-
nis. Si enim cogitaret hoc corpus esse, verbo Dei
personaliter unitum, et vitam ac salutem eorum esse

« Quotiescunque enim manducabitis panem hunc
et calicem bibetis, mortem Domini annuntiabitis
donec veniat. »

Exponit in quam commemoratorem Christi de-
beamus celebrare vel accipere sacramentum corpo-
ris et sanguinis ejus, scilicet in commemoratorem
mortis ejus. Ideo, inquit, dixit Dominus in suam
commemoratorem hoc debere fieri, quia *quoties-
cunque manducabitis hunc vitæ panem et hunc æternæ
salutis calicem bibetis, mortem Domini pro nobis
factam annuntiabitis*, id est repræsentabitis *donec
ipse veniat* ad *judicium*, quia hoc sacramentum non
mutabitur sicut sacramenta Judæorum. Significat C
finem sæculi, quando erit sanctorum requies non
adhuc in sacramento spei, quo in hoc tempore con-
sociatur Ecclesia, quando bibitur quod de Christi
latere manavit, sed jam in ipsa perfectione salutis
æternæ, cum tradetur regnum Deo et Patri (*infra*,
xv), ut in illa perspicua contemplatione incom-
mutabilis veritatis, nullis mysteriis corporalibus
egeamus.

« Itaque quicumque manducaverit panem hunc et
et biberit calicem Domini indigne, reus erit corporis
et sanguinis Domini. Probet autem seipsum ho-
mo, et sic de pane illo edat et de calice bibat.
Qui enim manducat et bibit indigne, *judicium*
sibi manducat et bibit, non *dijudicans* corpus D
Domini. »

Quandoquidem auctoritate Domini Jesu probavi-
mus panem illum esse corpus ejus, et vinum sangui-
nem ejus, atque celebrandum vel accipiendum
esse mysterium illud in commemoratorem mortis
ipsius, itaque quicumque homo, sive dives, sive me-
diocris, sive pauper, sive clericus, sive laicus, *man-
ducaverit panem Domini hunc et biberit calicem Do-
mini indigne, reus erit corporis et sanguinis Domini*.
Indigne manducat et bibit, qui hoc mysterium ali-
ter celebrat vel accipit, quam a Christo traditum.
deo fit reus corporis et sanguinis Domini, id est
habet pœnas mortis Domini. Occisus enim pro his
qui beneficium ejus in irritum ducunt. Indigne man-

ducatur et bibatur, qui sine debita reverentia sacram
eucharistiam percipit. Indigne manducat et bibit,
qui non prius per pœnitentiam purgatus, ad hoc
sacramentum accedit. Hoc est enim indigne acci-
pere, si eo tempore accipiat quo debet pœnitentiam
agere. Fit igitur reus corporis et sanguinis Domini,
id est non purgationem, sed maculam culpæ pro
qua pereat, trahit ex eo quod male accipit bonum
sacramentum corporis et sanguinis Domini. Nec
sibi si indignus accesserit applaudat, quia continuo
damnatus non fuerit, quoniam multoties peccatoris
supplicium differtur, sed perendinatur occultum ju-
dicio. Nemo præsumat accedere indignus, sed
homo, id est rationabiliter agens, *probet*, id est dis-
cutiat et examinet prius seipsum, qui etiam ex eo
quod homo est, sine peccato non est. Probet antea
seipsum, id est vitam suam inspiciat et consideret,
an digne possit accedere vel non. Raro enim potest
inveniri quisquam ita magnus et justus, ut in eo
per discussionem non inveniatur aliquid, quod de-
beat eum a corpore et sanguine Domini retardare,
nisi confessus fuerit illud, et per pœnitentiam dele-
verit. Probet se, *et sic*, id est postquam se probave-
rit, *edat de pane illo et bibat de calice*, quia tunc ei
proderit. Ideo prius se discutiat et purget, quia
qui manducat et bibit indigne, id est sine sui exami-
natione, *judicium sibi manducat et bibit*. Indigne
manducat et bibit, qui vel aliquod grave peccatum,
vel multa levia comisit, et non constitetur ea prius-
quam ad communionem accedat. Duobus etiam mo-
dis manducare et bibere debemus hoc sacramen-
tum, id est ore cordis et ore corporis. Nam qui solo
ore corporis manducat, indigne manducat. Qui au-
tem et ore corporis et ore cordis accipit, ille digne
comedit. Qui indigne manducat *judicium sibi man-
ducat*; id est damnationem extremam, quæ nunc
appellatione *judicii* signatur, sicut et cum Dominus
ait: « Qui vero mala egerunt, in resurrectionem
judicii (Joan. v). » *Judicium sibi manducat*, non
alii, quia communio malorum non maculat aliquem
participatione sacramentorum, sed confessione fac-
torum. Nam si in factis malis non eis quisque con-
sentiat, portat malus causam suam et personam
suam, et ideo boni debent tolerare malos. *Judicium*
sibi manducat, non quia mala res sit quam accipit,
sed quia ille malus male accipiendo ad *judicium*
accipit bonum quod accipit. Sicut enim Judas cui
buccellam tradidit Dominus (Joan. XIII), non malum
accipiendo, sed male accipiendo, locum in se dia-
bolo præbuit; sic indigne quisque sumens Domini-
cum sacramentum, non efficit ut quia ipse malus
est, malum sit, aut quia ad salutem non accipit,
nihil acceperit. Corpus enim Domini et sanguis Do-
mini nihilominus est, sed ille accipit hoc non ad
vitam, sed ad *judicium*, quia non *dijudicat* corpus
Domini, id est non discernit quam sit dignius om-
nibus creaturis hoc corpus, quod videtur esse pa-
nis. Si enim cogitaret hoc corpus esse, verbo Dei
personaliter unitum, et vitam ac salutem eorum esse

digne accipiunt, non præsumeret indignus **A** sed dignum se præparet. Devoto enim cum timore accedendum est ad illum, ut se ei reverentiam debere ad cuius corpus accedit, et dijudicet apud se cuius digni illud corpus. Inde enim Apostolus nunc indicat acceptum a Corinthiis, quia hoc non abant a cæteris cibis veneratione singulariter Continuo quippe cum dixisset, iudicium sibi at et bibit, addidit, non dijudicans corpus Domini enim dijudicabant illud, sed velut quemam cibum indiscrete negligenterque sumequitur :

Inter vos multi infirmi et imbecilles, et dormulti. »

Indigne manducatis hoc corpus et sanguinis, ideo sunt inter vos multi infirmi, qui orbo languent, et imbecilles, qui diuturna inne torpent, et dormiunt etiam multi, id est mortis sunt occupati. Ut verum probaret amen futurum est accipientium corpus Domini hic imaginem iudicii ostendit in nonnulli inconsiderate corpus illud acceperant, dum ionibus et longis invaletudinibus tenerentur, i morerentur, ut in his cæteri discerent se pane corpus Domini negligenter accipere, et im exemplo cæteri territi emendarentur, quia graviores pœnas in futuro sæculo hanc culpam ipsi forent passuri, si non cor- tur. Nam et adhuc propter huiusmodi cau- lti homines post pascha variis infirmitatibus untur, quia corpus Redemptoris indigne per- it.

Id si nosmetipsos dijudicaremus, non uti- dijudicaremur. Dum iudicamur autem a no, corripimur, ut non cum hoc mundo emur. »

Malum divino iudicio patimur ob contemptum ci corporis. Sed si dijudicaremus nosmetipsos, i in diversas partes actionum et cogitationum um oculos mentis circumduceremus, et de . quæ nos male fecimus aut cogitavimus, s districte pœnitendo iudicaremus, non uti- lomino iudicaremur. Ascendat itaque homo im se tribunal mentis suæ, constituat se apud D m suam. Atque ita constituto in corde judi- sit accusatrix cogitatio, testis conscientia, timor. Inde quidam sanguis animi confi- profluat per lacrymas. Postremo ab ipsa sententia talis proferatur, ut se indignum udicet participatione corporis et sanguinis , si tales culpas in se repererit. Versetur ulos ejus imago futuri iudicii ; et quidquid derit quod a iudice venturo reprehendi pos- uniri, ipse nunc in seipso reprehendat et Peccata enim, sive parva, sive magna, in- esse non possunt, quia aut homine punien- Deo iudicante plectuntur. Cessat autem vin- vina, si conversio præcurrat humana. Quia

si nosmetipsos dijudicaremus, non utique a domi- no iudicaremur, id est puniremur, vel in futuro sæ- culo, vel in isto. Sed dum in præsentī vita iudicamur a Domino, id est plectimur infirmitate vel ad- versitate vel corporis morte pro peccatis nostris, corripimur ab eo clementer et emendatur, ut in futura vita non damnemur æternaliter cum hoc mundo, id est cum infidelibus et amatoribus huius mundi. Idcirco enim nobis modo non parcat, ut in perpetuum parcat. Illis autem nunc parcat, quos in æternum puniri disposuit.

Itaque, fratres mei, cum convenitis ad mandu- candum, invicem expectate. Si quis esurit, domi manducet, ut non in iudicium conveniatis. Cætera autem, cum venero, disponam. »

Quandoquidem quisquis indigne corpus Domini percipit, iudicium sibi percipit, et multi etiam in præsentī sæculo propter hanc offensionem variis languoribus aut mortibus plectuntur, itaque, o fratres mei, cavete jam indigne illud sumere, caveto non schismate ad illud convenire, sed cum convenitis ad manducandum illud, per fraternam dilectionem expectate invicem alii alios, ut multorum oblatio simul celebretur, et omnibus ministretur. Sed si quis esurit, et propter acriorem famem non potest expectare donec omnes conveniant, domi manducet suum corporalem cibum, et post veniens ad Ecclesiam, non accipiat eucharistiam. Ita vos invicem propter has causas expectate, ut non in iudicium conveniatis, id est ut non reprehensibiliter et cum offensione sacrum mysterium agatis, ne iudicium damnationis inde conquiratis. Hæc interim observe. Sed cætera quæ sunt agenda, disponam vobis cum venero. Prius ostendit quomodo vir et quomodo femina caput agere debeat, deinde qualiter ab utroque sexu in ecclesiam convenire oporteat; in quibus rebus si error fuerit, non leve peccatum est. Cætera vero quæ ad ædificationem ecclesie pertinent, præsentia sua ordinaturum se promisit, quia multum erat ut in epistola sua totum illis agendi ordinem insinuaret, quem universa per orbem servat Ec- clesia.

CAPUT XII.

De spiritualibus autem nolo vos ignorare, fra- tres; scitis autem quoniam cum gentes essetis, ad simulacra muta, prout ducebamini, euntes. Ideo notum vobis facio, quod nemo in Spiritu Dei loquens, dicit anathema Jesu, et nemo potest dicere Dominus Jesus, nisi in Spiritu sancto (Marc. ix.) »

Crescente fide, gratia linguarum minuebatur, quam propter infideles acceperant. Hinc ergo pluri- mi contristati, cœperunt adhuc habentibus gratiam hanc invidere, putantes hoc majus aliis omnibus charismatibus. Unde nunc Apostolus eos corrigit, quia quasi per quamdam unitatem plus appetebant linguarum scientiam, et ostendit quæ maxime forent appetenda. Cætera, inquit, permitto vos ignorare donec veniam. Sed de spiritualibus, id est de donis

sancti Spiritus, propter quæ majores superbiunt, et minores invident vel desperant, ut non sit schisma inter vos, sed pax et concordia. Quod ostendo per simile. Nam scitis quoniam cum essetis gentes, id est gentiles diversis erroribus dediti, eratis euntes ad simulacra muta, prout ab uno spiritu maligno ducebamini; et si tunc unus diabolicus spiritus vos ducebat, alios ad alia simulacra, alios ad alia, cur non modo vos unus divinus ducat, alios ad alia bona opera, et alios ad alia, vel aliis alia dona tribuat, et aliis alia. Unus enim spiritus bonus est nunc in omnibus vobis, licet diversis diversa dona præstiterit; sicut tunc unus spiritus malus erat in omnibus vobis, licet ad diversos errores simulacrorum vos duceret. Quæ simulacra erant muta, licet vos ab illis responsa peteretis. Dicturus Apostolus quod omnia bona sint a Spiritu sancto, similitudinem præmittit a contrario, scilicet quod omnia mala sint a spiritu malo. Ostendit enim a simili, ut dictum est, quod omnes eundem spiritum Dei habeant, reprehendens illos qui ex eo quod majora charismata perceperant, abrumpebant se ab inferioribus minora charismata habentibus, quia cum essent in infidelitate idololatriæ, uno spiritu maligno participant omnes communiter et majores et minores. Tunc ipsi erant multæ gentes, sed modo sunt una gens, quia una fides, quia una spes, quia una charitas, quia una expectatio, quia una patria cœlestis. Scitis, inquit, ut experti, quia cum essetis diversæ gentes, id est gentiliter in variis erroribus viventes, eratis euntes quasi assidui ad simulacra muta et ratione carentia, prout a deceptorio spiritu ad hæc ducebamini. Ideo quia scitis quod malus spiritus vos retractos a bono duxit ad tam irrationabile malum, id est ad idololatriam, per hoc facile vobis notum facio, quod per Spiritum Dei abstinetur a malo, et fit bonum, et hoc est, nemo in Spiritu Dei loquens cogitando, loquendo, operando, dicit similiter tribus modis anathema Jesu, id est alienationem a Christo: hoc est, quodlibet peccatum per quod alienus fiat a Salvatore, quia per Spiritum sanctum abstinetur a malo, et nemo quantuscunque sit, potest dicere corde, lingua et opere, quia Jesus est Dominus, cui omnia servire debent, nisi in Spiritu sancto, a quo est omne verum, hoc est per Spiritum sanctum fit bonum. Vel nemo in Spiritu Dei loquens, id est nemo cujus mentem et os moveat Spiritus Dei, dicit anathema Jesu, id est dicit alienationem Salvatori, ut dicat ei quod ipse sit alienus a substantia Patris, sicut dicebat Arius, qui in spiritu diaboli loquebatur. Et nemo potest dicere, id est hanc veritatis confessionem proferre, ut dicat quia Jesus est Dominus, nisi in Spiritu sancto loquens. Non enim adulatione hominum appellatur Dominus, sicut idola quæ ab hominibus dii vocantur, cum non sint. Non ergo favor est hominum, quod Jesus Dominus dicitur, sed donum Dei, qui mysterium suum hominibus declaravit. Nec qui hoc dicit, præstat beneficium reli-

gioni, sed accipit, sicut gentiles qui gratia principum vel antistitum idola dicunt deos, cum non sint. Sed quomodo nemo dicit, Dominus Jesus, nisi in Spiritu sancto, cum ipse Jesus asserat, quia non omnis qui dicit mihi: « Domine, Domine, intrabit in regnum cœlorum (Matth. vii). » Sed hoc ipsum dicere quod Apostolus posuit, non sermone, sed affectu cordis est ponderandum, quia proprie posuit verbum quod est, dicit, ut significaret voluntatem atque intellectum dicentis. Dominus vero generaliter posuit solum oris sermonem. Videtur enim dicere etiam ille, qui nec vult nec intelligit quod dicit. Sed ille proprie dicit, qui voluntatem atque mentem suam sono vocis annuntiat; et ille Dominum Jesum dicit, qui eum diligit, si eo modo dicit, quo intelligi Apostolus voluit. Multi enim voce dicunt, corde autem et factis negant. Item nemo in spiritu Dei loquens dicit anathema Jesu, id est alienationem a Salvatore, hoc est aliquod verbum per quod ipse vel alius a Salvatore fiat alienus. Nam sicut malus spiritus qui præsidet simulacris, nihil in aliquo loquitur unde quis a simulacris separetur, ita Spiritus Dei qui præsidet Ecclesiæ, nihil in quocunque loquitur unde quis a Christo vel a membris Christi separetur. Sunt enim nonnulli, qui se in Spiritu Dei existimant loqui, id est recte se putant dicere, dum loquuntur ea quæ vel ipsos vel cæteros qui audiunt separant a Christo, sicut minores Corinthiorum, qui stulta humilitate se scindebant ab unione majorum, et a societate membrorum Christi se faciebant alienos, quia non erant majoribus similes in charismatibus. Sed et detractores et quicunque discordias inter fratres seminant sub specie rectæ locutionis, aut qui corrumpunt fidem audientium, seu bonos mores suis alloquiis aliquo sanctitatis fuco coloratis (I Cor. xv), quasi in Spiritu Dei loquentes videntur, dum dicunt anathema Jesu, quia sub imagine veritatis et rectitudinis loquuntur ea; per quæ suos auditores a Salvatore faciunt alienos. Sed hujusmodi verba nunquam Spiritus sanctus docuit. Et nemo potest dicere, Dominus est Jesus, id est nemo devote potest gloriam Domini Jesu Christi prædicare, ut annuntiet vel confiteatur quia ipse est Dominus, cui debet universitas servire, nisi in Spiritu sancto, id est nisi mentem ejus illuminaverit Spiritus sanctus, et amore veritatis accenderit. Nam sicut ille spiritus nihil docet loqui, unde quis a Christo separetur; ita iste omne verbum loqui docet, per quod ad Christum trahuntur homines, et ideo quisquis gloriam Dei prædicat ut auditores ad eum trahat, non sibi hoc tribuat, quia non habet hoc a seipso, sed a Spiritu sancto, qui ubi vult spirat (Joan. iii). Majores enim Corinthiorum arroganter de bonis spiritualibus gloriabantur, quasi a seipsis hæc haberent, et cæteros despiciebant qui hæc habere non poterant, quasi Spiritus sanctus non et illis quos spernebant, posset ipsa dona dedisse, et eis non dedisse, ideoque non recte de beneficiis Dei super alios extollebantur, cum utique

humiliores inde fieri deberent, et gratias Deo reddere.

« Divisiones vero gratiarum sunt, idem autem spiritus; et divisiones ministratum sunt, idem autem Dominus; et divisiones operationum sunt, idem vero Deus, qui operatur omnia in omnibus. »

Commune est omnibus electis ut sint participes Spiritus sancti, sed gratiæ quas ab eo suscipiunt, sunt variæ. Quia sunt *divisiones gratiarum*, id est donorum quæ Spiritus sanctus gratis dat, sed unus atque *idem est spiritus*, qui easdem gratias dividit hominibus; divisiones gratiarum sunt officii ecclesiæ, non humanis meritis deputatæ. Sicut enim qui dicit Dominus Jesus, in Spiritu sancto dicit, quilibet sit, ita et in loco ordinis officii ecclesiastici positus gratiam habet quisquis sit, non utique propriam, sed ordinis per efficientiam spiritus, et *divisiones sunt ministratum*, per quas variis modis fideles ministrant Deo, dum pro ejus amore famulis ejus subserviunt et necessaria tribuunt, sed *idem est et non varius Dominus Jesus*, cui variis modis ministratur, et qui varia tribuit ministeria, et *divisiones operationum sunt*, quas agunt electi, sed *idem est Deus Pater, qui operatur omnia bona in omnibus fidelibus*. Non in uno omnia operatur, ne unus superbiat; sed in omnibus, ut quod non habet quis in se, habeat in alio, ut sic maneat charitas. Quoniam Ariani qui gradus in trinitate facere volunt, calumniantur quod Pater primum nominetur, secundo Filius, tertio Spiritus sanctus: idcirco Apostolus mutavit hunc ordinem, ut primum spiritum, deinde Dominum, id est Filium; tertio Deum, id est Patrem poneret. Et dum dicit, idem Spiritus, idem Dominus, idem Deus, eandem prorsus substantiam trium personarum ostendit. Vel contra Macedonium et cæteros hæreticos qui Spiritum sanctum negaverunt esse Deum, potest de solo spiritu intelligi totum, ut et Dominus et Deus ab Apostolo nominetur. Qui non dividitur, cum dona sua dividit; et quod ipse operatur, tota trinitas operatur. Deus enim natura incorporea, quia immutabiliter una æterna stabilitate in seipso manens totus adesse rebus omnibus potest, et singulis totus, quamvis in quibus habitat, habeant eum pro suæ capacitatis immensitate et diversitate, alii amplius, alii minus, quos ipse sibi dilectissimum templum gratia suæ bonitatis ædificat. Et gratiarum quidem divisiones sunt tanquam per partes membra unius hominis, ubi et simul omnes unum templum et singula templa sumus, quia non est Deus in omnibus quam in singulis major, et fit plerumque ut plures eum minus capiant, et unus amplius. Sic enim et apud Corinthios erat, quia pauci spirituales magis eum capiebant, et multitudo carnalium minus. Sic diversa dona varie sunt membris Christi distributa, ut omnia membra sibi quadam necessitate cohæreant, et se invicem diligant, ac sibi invicem serviant. Nam oculus solus videt in corpore. Sed nunquid sibi soli videt? Et manui videt, et pedi videt et cæteris mem-

bris videt. Rursum sola manus operatur in corpore. Sed nunquid sibi soli operatur? Sic pes ambulando omnibus membris militat. Membra cætera tacent, et lingua pro omnibus loquitur. Atque ita diversis officiis concorditer distributa sunt membra. Sic et de membris Christi Spiritus sanctus agit, ut omnia necessario comparentur et sibi cohæreant. Si enim amas unitatem, etiam tibi habet, quisquis in illa aliquid habet. Tolle invidiam, et tuum est quod habet. Tolle invidiam, et meum est quod habes. Livor separat, unitas jungit. Ideo tenenda est unitas, quia quantum quisque diligit membra Christi, tantum habet Spiritum sanctum; et tantum habet in eis, quod in seipso habere non valet.

« Unicuique autem datur manifestatio Spiritus ad utilitatem. Alii quidem per spiritum datur sermo sapientiæ, alii autem sermo scientiæ secundum eundem spiritum: alteri fides in eodem spiritu, alii grætia sanitarum in uno spiritu, alii operatio virtutum, alii prophetia, alii discretio spirituum, alii genera linguarum, alii interpretatio sermonum. Hæc autem omnia operatur unus atque idem spiritus, dividens singulis prout vult (Rom. xii; Ephes. iv). »

In omnibus Christi membris est Spiritus sanctus, sed *unicuique* eorum tam majori quam minori *datur manifestatio ejusdem spiritus*, id est donum gratiæ, per quod aliis manifestetur Spiritus sanctus qui in eo est, et manifestetur *ad utilitatem* ejus et aliorum, quia et sibi et aliis ex accepto dono prodest, dum vitam suam bene gubernans exemplum bonæ conversationis ostendit, vel etiam voce prædicat; et quod variis modis unicuique detur manifestatio Spiritus, ostendit per partes. Nam *alii quidem* non per humanum ingenium, nec per studium litterarum, sed per *Spiritum sanctum datur* non solum sapientia, sed etiam *sermo sapientiæ*, ut loqui possit aliis ipsam sapientiam quam intelligit; *alii autem datur secundum eundem Spiritum* non tantum scientia, sed etiam *sermo scientiæ*, per quem alios doceat. Ipse spiritus qui dat alii sermonem sapientiæ, dat huic sermonem scientiæ: nec tamen est in se diversus, sed idem permanet. Sapientia est in contemplatione æternorum, scientiaque in actione temporalium. Sermo sapientiæ per Spiritum datur, ut quis de æterno et incommutabili hono, ac de perennibus gaudiis loquens, alios ad amorem patriæ cælestis erigat; sermo autem scientiæ tribuitur, ut loquendo quis alios docet de his, quæ in tempore facta sunt historialiter; et de his quæ facienda vel quæ cavenda sunt moraliter, id est de virtutibus et vitiis. Vel aliter: Sunt enim quidam qui per donum gratiæ et ipsa intelligunt, quæ exponi a doctoribus non audierunt: hi videlicet sermonem sapientiæ perceperunt. Et sunt quidam qui audita per semet intelligere nequeunt, sed ea quæ in expositoribus legerint retinent, atque scienter proferunt quæ lecta didicerint; et hi sermone scientiæ pleni sunt. Quamvis hoc intelligi etiam aliter possit, quia sa-

piantia ad vitam, scientia vero pertinet ad doctrinam. Qui bene igitur vivit et prudenter prædicat, sapientiam et scientiam divinitus accipit, alteri datur *fides*, id est constantia fidei in eodem spiritu Sancto, ut quamvis alios prædicando nesciat instruere, tamen recte et firmiter credat, nulloque metu vel pudore fidem suam ore confiteri omittat, *alteri datur gratia sanitatum*, ut infirmos sanet, in uno spiritu, id est in uno Spiritu sancto, qui est unus, id est incommutabilis et indivisus in seipso, alii per eundem spiritum datur *operatio virtutum*, id est ut operari virtutes miraculorum contra naturam possit; sicut est suscitatio mortuorum aut virtutes in expulsione dæmonum, *alii datur prophetia*, ut Spiritu repletus pronuntiet futura, *alii discretio spirituum*, ut sciat discernere spiritus malos a bonis, dñm auçt eos loquentes. Discretio enim difficillima est, cum et spiritus malignus quasi tranquillus agit, ac sine vexatione aliqua corporis assumpto humano spiritu dicit quod potest, quando etiam vera dicit et utilia prædicat ad hoc, ut cum illi in manifestis bonis creditum fuerit, seducat ad sua. Iste quippe discerni non potest nisi dono Spiritus sancti. Non enim magnum est tunc cum dignoscere, cum ad aliqua devenierit vel perduxerit, quæ sunt contra bonos mores vel regulam fidei. Tunc enim a multis discernitur. Dono autem Spiritus sancti in ipso primordium, quo multis adhuc bonus apparet, continuo dijudicatur an malus sit. Sed et spiritus hominum, id est voluntates hoc dono discernuntur bonæ a malis. *Alii dantur genera linguarum*, ut multis loquantur linguis, sicut Græca et Latina et Hebræa. *Alii datur interpretatio sermonum*, ut in una lingua sciat obscuros sermones Scripturarum interpretari, et ita datur unicuique manifestatio spiritus ad utilitatem dum unusquisque proprium donum accipit a Deo, per quod prosit aliis qui hoc non habent. Potest enim in uno eodemque spiritu fieri, ut iste verbo sapientiæ polleat, nec tamen sermone scientiæ, id est doctrina fulciatur, quia sentire atque invenire sufficit, etiam quod per discendi studium non apprehendit; ille per sermonem scientiæ fulgeat, nec tamen verbo sapientiæ convalescat, quia et sufficit explere quantum didicit, et ad sentiendum ex semetipso subtile aliquid non assurgit. Iste per fidem et elementis imperat, nec tamen per sanitatum gratiam infirmitates corporum curat. Ille per orationis opem morbos subtrahit, nec tamen arenti terræ verbo pluvias reddit. Iste per operationem virtutum ad præsentem vitam etiam mortuos revocat, et tamen prophetiæ gratiam non habens, quæ sibi ventura sunt ignorat. Ille ventura quæque velut præsentia attendit, et tamen in nulla signorum operatione se exerit; iste per discretionem spirituum in factis subtiliter mentes conspicit, et tamen diversi generis linguas nescit. Ille diversi generis linguas examinat, sed tamen viribus similibus dissimilia corda non pensat. Alius in una lingua quam novit, sermonum pondera in-

terpretando prudenter discutit, et tamen reliquis bonis quæ non habet, patienter caret. Sic itaque Creator noster ac dispositor cuncta moderatur, et qui extolli poterat ex dono quod habet, humiliatur ex virtute quam non habet. Sic cuncta moderatur, ut cum per impensam gratiam unumquemque sublevat, etiam per disparem alteri aliorum subdat, et meliorem quisque dono alio cum qui sibi subjicitur attendat, ac licet se præire ex aliis sentiat, eidem tamen quem superat, se in aliis postponat. Sic cuncta moderatur, ut dum singula quæque sunt omnium, interposita quadam charitatis necessitudine fiant omnia singulorum, quatenus unusquisque sic quod non accipit, in altero possideat, ut ipse alteri possidendum quod accipit, humiliter impendat. Et ideo pulcherrima varietate distributa sunt electis spiritualia dona. Sed hæc omnia operatur unus atque idem spiritus. Superius dictum de Patre intelleximus, quia idem Deus qui operatur omnia in omnibus, et nunc legimus spiritum omnia operari, ut inseparabilis intelligatur operatio trinitatis, ita ut cum operatio Patris dicitur, non eam sine Filio et Spiritu sancto intelligamus operari; et cum operatio Filii, non sine Patre et Spiritu sancto; et cum operatio Spiritus sancti, non sine Patre et Filio. Quod ergo dicitur de Spiritu quia omnia hæc operatur, non ideo dicitur, quia non ei cooperantur Pater et Filius: sed idcirco dicitur, quia unus atque idem Spiritus hæc operatur, quoniam in his operibus non sunt multi spiritus, sed unus, et in diversis suis operationibus non est a seipso diversus. Hæc omnia operatur Spiritus utique sicut Deus. Quis enim hæc operari potest nisi Deus? Omnia hæc operatur, *dividens ea singulis* non ipse divisus, et hæc omnia facit ac dividit *prout vult*, id est sicut Dominus omnium, sicut Deus, sicut nulli subjectus. Non enim missus, sed voluntarius operatur, quia solius Dei est facere voluntatem suam. Dona sua distribuit, non prout vult homines, sed prout ipse vult, qui solus novit quid velle debeat, et quid unicuique expediat. Unde nec huic dolendum est, nec illi superbiendum, cum enim contristaris quod minorem gratiam acceperis, æmularis alium, quasi majorem partem invaserit, cum hoc non in nostra, sed in donantis sit positum potestate. Invidebant enim, ut supra dictum est, minores Corinthiorum majoribus quasi majora sibi charismata vindicantibus, non intelligentes hæc solius Dei voluntate dispensari.

« Sicut enim corpus unum est, et membra habet multa, omnia autem membra corporis cum sint multa, unum corpus sunt, ita et Christus. Etenim in uno Spiritu omnes nos in unum corpus baptizati sumus, sive Judæi, sive gentiles, sive servi, sive liberi: et omnes uno Spiritu potati sumus. »

Ideo Spiritus sanctus diversis diversa dona tribuit, quia *sicut corpus unum est hominis et membra habet multa*, quæ sunt variis officiis dedita, sed omnia membra corporis quamvis sint multa, unum tamen corpus sunt, ita et Christus unum corpus ha-

bet ex variis membris. Unum est enim corpus Christi, quod est Ecclesia constans ex diversitate membrorum, id est ex varietate personarum, diversa officia, diversasque gratias habentium. Et idcirco decuit ut unus Christus Spiritus per diversa membra unius corporis Christi varias actiones exleret, quia et unus spiritus hominis aliter operatur in oculis, aliter in auribus, aliter in naribus, et aliter in manibus. Sic et Spiritus Christi varie operatur in membris Christi. Nam si charismata non essent diversa singulis concessa, sed eadem, tunc essent diversa membra idem donum habentia, neque multa fierent unum per charitatem, quoniam alter alterius officio non indigeret propter ejusdem doni participationem. Humani corporis utitur comparatione, ut ostendat officia diversa esse, non naturam membrorum : et neminem debere quæri cujus officii sit, dum omnes uno spiritu animentur, et in uno corpore coaptentur. Per hoc etiam docet nullius personam quasi despecti contemnendam, et nullius quasi perfecti præferendam, nec gloriam quæ soli Deo debetur, hominibus esse tribuendam, quando in omnibus unus atque idem Deus sit gloriosus. Loquens enim de membris Christi, id est fidelibus ejus, non ait, ita et membra Christi, sed totum hoc Christum appellavit. Ergo simul omnes fideles cum capite suo sunt Christus, et propterea caput de cælo clamavit : « Saule, Saule, quid me persequeris? (Act. ix.) » Christus enim caput et corpus, idemque Christus verbum Dei, unigenitus æqualis Patri. Et inde videmus quanta gratia pertineamus ad Deum, ut ipse voluerit esse nobiscum unus, qui est cum Patre unum. « Ego, inquit, et Pater unum sumus (Joan. x.) » Nobiscum vero est unus, quia non dicit, et seminibus, quasi in multis, sed « quasi in uno, et semini tuo, qui est Christus (Galat. iii.) » Vere nos omnes cum capite nostro simul sumus Christus, quia in uno Spiritu, id est in gratia et operatione sancti Spiritus, qui unus atque idem semper est, nos omnes, sive Judæi, sive gentiles, sive servi, sive liberi, id est qui prius et natione et conditione diversi et impares eramus, baptizati sumus in unum corpus, id est baptismatis ablutione per fidem deducti sumus in unum Christi corpus, ut amodo sumus omnes unum, sicut illi, quorum erat cor unum et anima una (Act. iv), et omnes potati sumus uno Spiritu, id est pro capacitate uniuscujusque percepimus omnes Spiritum sanctum, quo debriemur, et qui cum sit unus, diversis modis operaretur in nobis, sicut una hominis anima vivit in oculo, audit in aure, loquitur in ore, ambulat in pede, et in cæteris membris cætera facit.

« Nam et corpus non unum est membrum, sed multa. Si dixerit pes, quoniam non sum manus, non sum de corpore, num ideo non est de corpore? Et si dixerit auris, quoniam non sum oculus, non sum de corpore, num ideo non est de corpore? Si totum corpus oculus, ubi auditus? Si totum auditus, ubi odoratus? Nunc

autem posuit Deus membra, unum quodque eorum in corpore sicut voluit. Quod si essent omnia unum membrum, ubi corpus? Nunc autem multa quidem membra, unum autem corpus. »

Et bene nos omnes unum dicimur : nam et corpus humanum, cui Ecclesia similis est, non est unum membrum, sed multa. Sic et nos ex quibus constat Ecclesia, non omnes unum officium vel donum habemus, sed multa. Ideoque minori non est dolendum quia mius habet, neque majori superbiendum ex eo quod majus donum vel officium sortitus est. Vere multa sunt in Christi corpore membra. Nam si pes, id est aliquis fidelis qui inferius donum habet, et per terrenas actiones incedit, dixerit quoniam non sum manus, quoniam non habeo superiorem et mundam spiritualium operationem non sum de corpore Christi, num ideo non est de corpore? id est num ideo consequens est ut non sit de corpore Christi, quia potest aliud esse quam manus, et tamen in hoc corpore manere? Et eodem modo si auris, id est ille qui doctrinam audit a magistris dixerit, quoniam non sum oculus, id est quoniam non intueor præclarum lumen sapientiæ, ut mihi et aliis providere queam, non sum de corpore Christi, num ideo non est de corpore, id est num ideo consequens est ut non sit de hoc corpore, quia multa sunt in eo membra præter oculos? Hoc dicitur propter minores Corinthiorum, qui desperantes dicebant se non pertinere ad corpus Christi, quoniam habere non poterant illa magna charismata, quæ in spiritualibus viris cernebant. Propter eosdem pusillos dictum est superius, quia nemo in Spiritu Dei loquens dicit anathema Jesu. Dicebant enim anathema Jesu, quod interpretatur a Salvatore alienatio, dum se alienos a corpore Salvatoris dicerent, quia non erant ex superioribus membris. Sed necesse est ut sint in corpore diversa membra. Nam si totum corpus oculus esset, id est si tota Ecclesia solum officium aspiciendi spiritualia haberet, ubi esset auditus, id est ubi essent discipuli, qui vocem prædicationis a doctoribus audirent? Vel si totum corpus esset auditus, id est tota Ecclesia esset populus subjectorum, obedienter audiens præcepta magistrorum, ubi esset odoratus? id est illi qui bonum odorem virtutum et malum odorem vitiorum quasi nares subtiliter discernunt et a longe præsentunt? Ac si dicatur : Si omnes essent unius officii vel operis quomodo impleretur reliqua necessitas corporis, cum constet multis officiis opus esse ad gubernationem corporis? Nam Ecclesia superni capitis corpus est. In qua alius alta videndo, oculus; alius recta operando, manus; alius ad injuncta discurrando, pes; alius præceptorum vocem intelligendo, auris; alius malorum fetorem, bonorumque fragrantiam discernendo, naris est. Qui corporalium more membrorum dum vicissim sibi accepta officia impendunt, unum de semetipsis omnibus corpus reddunt; et cum diversa in charitate

peragunt, diversum esse prohibent ubi continentur. Si autem unum quid cuncti agerent, corpus utique quod ex nullis continetur membris, non essent. Quia videlicet multipliciter compactum non existeret, si hoc concursus membrorum diversitas non teneret. Sed nunc propter vitanda hæc inconvenientia, posuit Deus membra in corpore Christi unum quodque eorum, id est majus et minus, sicut ipse voluit. Et ideo nec major debet superbire, minoremque despiciere, nec minor dolore vel majori invidere. Deus enim sic disposuit eos, cujus dispositio non est ab homine mutanda; et sic voluit eos esse, cujus voluntas nunquam est injusta. Quod si essent omnia unum membrum, id est si omnes fideles essent unius officii, ubi esset corpus Ecclesie, quod non nisi variis membrorum officiis gubernatur? Si enim omnes unius dignitatis essent, jam deperisset honesta compositio variarum partium. Sed nunc, id est ne corpus pereat, quod non nisi ex diversis membris constare potest, multa quidem sunt membra, sed unum corpus ex illis omnibus. Quoniam multa cum invicem sui egeant, non discrepant in unitate naturæ, quamvis diversa sint, quia diversitas hæc in unum concurrit, ut corporis utilitas expleatur.

« Non potest autem dicere oculus manui : Opera tua non indigeo ; aut iterum caput pedibus : Non estis mihi necessarii. Sed multo magis quæ videntur membra corporis infirmiora esse, necessaria sunt ; et quæ putamus ignobiliora membra esse corporis, his honorem abundantio-rem circumdamus ; et quæ inhonestam honestatem habent. Honestam autem nostra nullius egent. »

Membra quidem sunt multa, sed nullum ex his superfluum, imo omnia sibi invicem sunt necessaria, quoniam oculus, id est ille qui cæteris viam rectæ operationis prævidet, non potest dicere manui, id est operatori, non indigeo opera tua, id est studio tuæ operationis. Nam sicut manus indiget oculo ut operari valeat, id est discipulus provisione doctoris ut bonum opus expleat, ita oculus indiget operatione manus, id est doctor qui per seipsum agere non potest quod agendum prævidet, necessarium habet discipulum, per quem fiat quod necessarium prævidet. Inaniter enim prævideret, si non esset qui consequenter faceret, aut iterum caput, id est ille qui in summa dignitate positus est, non potest dicere pedibus, id est novissimis Ecclesie membris, non estis mihi necessarii. Omnino necessarii sunt ei subjecti, quia potest humilis quod non potest sublimis, quia et ferrum potest quod aurum non potest ; et quanvis aliquis dignitate sublimis sit, tamen si subjectus defuerit qui obsequiis illum faciat gloriosum, ipsa dignitas contemptibilis erit. Hoc præcipue nunc dicitur propter eos, qui summis charismatibus inter Corinthios præeminabant, et minores quasi superfluos et inutiles despiciabant et abjiciebant. Sed talia Ec-

clesie membra licet sint inferiora, non tamen sunt inutilia. Sed multo magis ea membra corporis Ecclesie quæ videntur esse infirmiora, id est spirituali charitate magis carentia, sunt necessaria, quia minores qui sunt in Ecclesia, quamvis infirmi et contemptibiles appareant, plus tamen utiles sunt aliquoties ; et quæ putamus esse ignobiliora membra corporis Ecclesie, id est per ignobilitatem morum degenerare, his circumdamus abundantio-rem honorem, id est nonnunquam circumtegimus verbis nostris degeneres eorum mores. Despectis enim exhortatio bonæ locutionis est necessaria, per quam addatur illis aliquis honor ut fiant utiles ; alioqui ipso contemptu negligentiores circa se et deteriores fient, et membra nostra quæ per aliquod peccatum sunt inhonestam, id est carnales filii Ecclesie, abundantio-rem honestatem habent a nobis celantibus feditatem eorum. Sed honestam nostram, id est Ecclesie membra quæ satis habent honoris per decorem sue sanctitatis, nullius egent honestationis per tegimen obscenitatis. Quod melius ostendimus, si ipsa quæ plerumque accidunt proferamus. Nam quilibet potens et protervus, cum aliquid iniique perpetrasset cognoscitur, tempus quæritur ut de malo quod fecit increpetur. Nisi enim prædicator sustineat quando ferre congruè correptionem possit, augetur in eo malum quod insequitur. Sæpe enim contingit ut talis sit, qui nulla increpationis verba sustineat. Quid itaque in hujus culpa prædicatori agendum est, nisi in sermone admonitionis quam pro communi salute omnium auditorum facit, tales culpas ad medium deducat, quales eum perpetrasset considerat? Qui et præsto est, et de se solo adhuc argui non potest, ne deterior fiat ; et cum generaliter contra culpam invectione intenditur, correptionis verbum libenter ad mentem reducit, quia potens pravus ignorat quod sibi hoc specialiter dicatur. Unde fit plerumque ut eo vehementius perpetratam culpam lugeat, quo reatum suum, et cum percussus sentit, nesciri putat. Magna itaque arte prædicationis agendum est, ut qui ex aperta correptione deteriores fiunt, quodam correptionis temperamento ad salutem redeant. Unde nunc aperte dicitur : Quæ putamus ignobiliora esse membra corporis, his honorem abundantio-rem circumdamus ; et qua inhonestam sunt nostra, abundantio-rem honestatem habent. Honestam autem nostra nullius egent. Sicut enim inhonestam membra in corpore, ita quidam intra sanctam Ecclesiam potentes et pravi. Qui dum aperta invectione ferri non queunt, quasi honore tegminis velantur. Sed hæc de occultis potentum delictis loquimur. Nam quando et aliis cognoscentibus peccant, aliis etiam cognoscentibus increpandi sunt, ne si prædicator tacet, culpam approbasse videatur, atque hæc crescens in exemplum veniat, quam pastoris lingua non secatur. Vel si de corporalibus membris uniuscujusque nostrum hæc intelligantur, manifestum est, quia pudenda nostra, quæ turpia videntur dum aspectus publicos vitant,

honestate se tegunt, ne per irreventiam horreant. Absit enim ut aliqua turpitudine in membris sanctorum etiam genitalibus esse dicatur vel credatur. Dicuntur quidem inhonesta, quia non habent illam speciem decoris, quam membra quæ in promptu locata sunt. Vel certe (quod probabilius dici potest), propter legem in membris repugnantem legi mentis, quæ de peccato accidit, non de prima nostræ institutione naturæ. Illicitus itaque et temperantiæ legibus non subiectus membrorum illorum usus, est turpis, non ipsa membra.

« Si Deus temperavit corpus, ei cui deerat, abundantiore tribuendo honorem, ut non sit schisma in corpore, sed in idipsum pro invicem sollicita sint membra, et si quid patitur unum membrum, compatiuntur omnia membra; sive gloriatur unum membrum, congaudent omnia membra (Hebr. vi; Rom. 1, 8).

Ea quæ videntur inhonesto in membris Ecclesiæ, non sunt inhonesta. Sed Deus temperavit ipsum corpus varietate membrorum, officia diversa in unitatis compage servantium, tribuendo per digna membra abundantiore honorem ei membro cui deerat in se, sicut ostendimus de protervo potente. Vel tribuendo abundantiore honorem per bonam vitam ei membro, cui deerat per scientiam prædicandi. Vel ei qui despicibilis apparebat hominibus, tribuit Deus largiorem honorem per immensam miraculorum vel aliorum charismatum gratiam. Ita temperavit Deus Ecclesiæ corpus, ut nullum ex membris ejus sit superfluum, sed omnia sint necessaria, ideo ut non sit schisma in corpore Ecclesiæ, ubi debet esse unitas et concordia, id est ne alter alterum abiciat quasi inutilem aut superfluum; sed membra sint sollicita pro se invicem, id est majora pro minoribus, et minora pro majoribus, quoniam alia sine aliis non possunt; membra dico, tendentia in idipsum, id est in unitatem, ut omnia studeant habere cor unum et animam unam, ut dum sic agunt, si quid adversi patitur unum membrum, compatiuntur ei omnia membra, quasi adversitas illa sit omnium, sive gloriatur de bono unum membrum, congaudent ei omnia membra, quasi bonum illud sit omnium. Nam et in membris humani corporis, ex quorum unitate atque compage charitas nunc suadetur membris Ecclesiæ, videmus hæc omnia, dum unumquodque eorum non sibi soli, sed et cæteris propriis agit officium. Oculus enim videt, et non audit; auris audit, et non videt, manus operatur, nec audit, nec videt; pes ambulat, nec audit, nec videt, nec facit quod manus. Sed in uno corpore si sit sanitas, et non adversus se litigent membra, et auris videt in oculo, et oculus audit in aure. Nec objici potest auri quia non videt, ut dicatur ei: Nihil es, minor es. Nunquid videre et discernere colores potes, quod facit oculus? Respondet enim auris de pace corporis, et dicit: Ibi sum ubi est oculus, in eo corpore sum. In me non video in illo cum quo sum, video. Ita cum auris dicit: Oculus mihi

videt, oculus dicit, auris mihi audit, oculus et aures dicunt, manus nobis operantur: manus dicunt, pedes nobis ambulant: omnia in uno corpore cum operantur, si sit ibi sanitas et concordent membra, gaudent et congaudent sibi; et si aliquid molestiæ est in aliquo membro, non se deserunt, sed compatiuntur sibi. Sic et filii Ecclesiæ, id est membra Christi, omnino debent agere. Nec putent se ad Deum non pertinere, si miracula non fecerint. Sed quisquis in corpore non potest resuscitare mortuum, non illud quærat, ne discordet in corpore, quomodo si auris quærat videre, discordare potest, nam quod non accepit, non potest facere. Si autem ei objectum fuerit et dictum: Si justus esses, resuscitares mortuum quomodo fecit Petrus, respondeat: Petrus et mihi fecit, quia in eo corpore sum, in quo Petrus fecit. In illo quo potest possum, a quo divisus non sum. Quod minus possum, compatiuntur mihi; et quod plus potest, congaudeo illi. Si ergo unusquisque quod potest, juste egerit, ac de bono quod accepit, aliis prodesse studuerit, et in eo quod alius plus potest, non inviderit, sed congratulatus fuerit tanquam in uno corpore cum eo constitutus, custodietur in membris Christi, quod eustodiunt invicem corporea membra cujuslibet hominis.

« Vos autem estis corpus Christi, et membra de membro. Et quosdam quidam posuit Deus in Ecclesia, primum apostolos, secundo prophetas, tertio doctores, deinde virtutes, exinde gratias curationum, opitulationes, gubernationes, genera linguarum, interpretationes sermonum (Ephes. iv). Nunquid omnes apostoli? nunquid omnes prophetæ? nunquid omnes doctores? nunquid omnes virtutes? nunquid omnes habent gratiam curationum? nunquid omnes linguis loquuntur? nunquid omnes interpretantur? »

Ostendit Apostolus nostram se causam per membrorum carnalium rationem tractasse, quia non omnes eadem possumus, sed singuli pro qualitate fidei et gratia quam accepimus. Hæc, inquit, concordia varie operandi et congaudenti vel compatiendi est in membris humani corporis. Sed vos estis corpus Christi, id est conjuncti et uniti estis in Christiana fide et veritate, et estis etiam membra Christi, ut invicem vobis per charitatem serviat unusquisque de dono vel officio quod habet. Membra estis pendentia de membro, id est de me qui sum majus membrum Christi, et vos mihi sicut digitos manui adhærere in ejus corpore feci. Nam aliud quidem est membrum corporis, aliud membrum membri. Membrum quippe corporis, pars ad totum est; membrum vero membri, particula ad partem. Membrum namque membri est digitus ad manum, manus ad brachium; membrum vero corporis est totum hoc simul ad corpus universum. Sic ergo in spirituali dominico corpore membra de membro dicuntur, qui in ejus Ecclesia ab aliis reguntur. Hinc Apostolus exponit diversitatem in fidelibus, quam dixerat in membris, et determinat de donis Dei,

peragunt, diversum esse prohibent ubi continentur. Si autem unum quid cuncti agerent, corpus utique quod ex multis continetur membris, non essent. Quia videlicet multipliciter compactum non existeret, si hoc concursus membrorum diversitas non teneret. Sed *nunc* propter vitanda hæc inconvenientia, *posuit Deus membra in corpore Christi unum quodque eorum*, id est majus et minus, *sicut ipse voluit*. Et ideo nec major debet superbire, minoremque despiciere, nec minor dolore vel majori invidere. Deus enim sic disposuit eos, cujus dispositio non est ab homine mutanda; et sic voluit eos esse, cujus voluntas nunquam est injusta. *Quod si essent omnia unum membrum*, id est si omnes fideles essent unius officii, *ubi esset corpus Ecclesie*, quod non nisi variis membrorum officiis gubernatur? Si enim omnes unius dignitatis essent, jam deperisset honesta compositio variarum partium. Sed *nunc*, id est ne corpus pereat, quod non nisi ex diversis membris constare potest, *multa quidem sunt membra*, sed *unum corpus* ex illis omnibus. Quoniam multa cum invicem sui egeant, non discrepant in unitate naturæ, quamvis diversa sint, quia diversitas hæc in unum concurrit, ut corporis utilitas expleatur.

« Non potest autem dicere oculus manui : Opera tua non indigeo ; aut iterum caput pedibus : Non estis mihi necessarii. Sed multo magis quæ videntur membra corporis infirmiora esse, necessaria sunt ; et quæ putamus ignobiliora membra esse corporis, his honorem abundantiorum circumdamus ; et quæ inhonesta sunt nostra, abundantiorum honestatem habent. Honesta autem nostra nullius egent. »

Membra quidem sunt multa, sed nullum ex his superfluum, imo omnia sibi invicem sunt necessaria, quoniam *oculus*, id est ille qui cæteris viam rectæ operationis prævidet, *non potest dicere manui*, id est operatori, *non indigeo opera tua*, id est studio tuæ operationis. Nam sicut manus indiget oculo ut operari valeat, id est discipulus provisione doctoris ut bonum opus expleat, ita oculus indiget operatione manus, id est doctor qui per seipsum agere non potest quod agendum prævidet, necessarium habet discipulum, per quem fiat quod necessarium prævidet. Inaniter enim prævideret, si non esset qui consequenter faceret, *aut iterum caput*, id est ille qui in summa dignitate positus est, non potest dicere *pedibus*, id est novissimis Ecclesie membris, *non estis mihi necessarii*. Omnino necessarii sunt ei subjecti, quia potest humilis quod non potest sublimis, quia et ferrum potest quod aurum non potest; et quamvis aliquis dignitate sublimis sit, tamen si subjectus defuerit qui obsequi illum faciat gloriosum, ipsa dignitas contemptibilis erit. Hoc præcipue nunc dicitur propter eos, qui summis charismatibus inter Corinthios præminebant, et minores quasi superfluos et *inutiles despiciabant et abjiciebant*. Sed talia Ec-

clesie membra licet sint inferiora, non tamen sunt inutilia. *Sed multo magis ea membra corporis Ecclesie quæ videntur esse infirmiora, id est spirituali charitate magis carentia, sunt necessaria, quia minores qui sunt in Ecclesia, quamvis infirmi et contemptibiles appareant, plus tamen utiles sunt aliquoties; et quæ putamus esse ignobiliora membra corporis Ecclesie, id est per ignobilitatem morum degenerare, his circumdamus abundantiorum honorem, id est nonnunquam circumlegimus verbis nostris degeneres eorum mores. Despectis enim exhortatio bonæ locutionis est necessaria, per quam addatur illis aliquis honor ut fiant utiles; alioqui ipso contemptu negligentiores circa se et deteriores fient, et membra nostra quæ per aliquod peccatum sunt inhonesta, id est carnales filii Ecclesie, abundantiorum honestatem habent a nobis celantibus seditatem eorum. Sed honesta nostra, id est Ecclesie membra quæ satis habent honoris per decorem sue sanctitatis, nullius egent honestationis per tegimen obscenitatis. Quod melius ostendimus, si ipsa quæ plerumque accidunt proferamus. Nam quilibet potens et protervus, cum aliquid inique perpetrasset cognoscitur, tempus quaeritur ut de malo quod fecit increpetur. Nisi enim prædicator sustineat quando ferre congruæ correptionem possit, augetur in eo malum quod insequitur. Sæpe enim contingit ut talis sit, qui nulla increpationis verba sustineat. Quid itaque in hujus culpa prædicatori agendum est, nisi in sermone admonitionis quam pro communi salute omnium auditorum facit, tales culpas ad medium deducat, quales eum perpetrasset considerat? Qui et præsto est, et de se solo adhuc argui non potest, ne deterior fiat; et cum generaliter contra culpam invectionio intenditur, correptionis verbum libenter ad mentem reducit, quia potens pravus ignorat quod sibi hoc specialiter dicatur. Unde fit plerumque ut eo vehementius perpetrata culpam lugeat, quo reatum suum, et cum percussum sentit, nesciri putat. Magna itaque arte prædicationis agendum est, ut qui ex aperta correptione deteriores fiunt, quodam correptionis temperamento ad salutem redeant. Unde nunc aperte dicitur: Quæ putamus ignobiliora esse membra corporis, his honorem abundantiorum circumdamus; et quæ inhonesta sunt nostra, abundantiorum honestatem habent. Honesta autem nostra nullius egent. Sicut enim inhonesta membra in corpore, ita quidam intra sanctam Ecclesiam potentes et pravi. Qui dum aperta invectione ferri non queunt, quasi honore tegminis velantur. Sed hæc de occultis potentum delictis loquimur. Nam quando et aliis cognoscentibus peccant, aliis etiam cognoscentibus increpandi sunt, ne si prædicator tacet, culpam approbasse videatur, atque hæc crescens in exemplum veniat, quam pastoris lingua non secatur. Vel si de corporalibus membris uniuscujusque nostrum hæc intelligantur, manifestum est, quia pudenda nostra, quæ turpia videntur dum aspectus publicos vitant,*

honestate se tegunt, ne per irreventiam horreant. Absit enim ut aliqua turpitudine in membris sanctorum etiam genitalibus esse dicatur vel credatur. Dicuntur quidem inhonesta, quia non habent illam speciem decoris, quam membra quæ in promptu locata sunt. Vel certe (quod probabilius dici potest), propter legem in membris repugnantem legi mentis, quæ de peccato accidit, non de prima nostræ institutione naturæ. Illicitus itaque et temperantiæ legibus non subjectus membrorum illorum usus, est turpis, non ipsa membra.

« Si Deus temperavit corpus, ei cui deerat, abundantiore tribuendo honorem, ut non sit schisma in corpore, sed in idipsum pro invicem sollicita sint membra, et si quid patitur unum membrum, compatiuntur omnia membra; sive gloriatur unum membrum, congaudent omnia membra (Hebr. vi; Rom. 1, 8).

Ea quæ videntur inhonesto in membris Ecclesiæ, non sunt inhonesta. Sed Deus temperavit ipsum corpus varietate membrorum, officia diversa in unitatis compage servantium, tribuendo per digna membra abundantiore honorem ei membro cui deerat in se, sicut ostendimus de protervo potente. Vel tribuendo abundantiore honorem per bonam vitam ei membro, cui deerat per scientiam prædicandi. Vel ei qui despicibilis apparebat hominibus, tribuit Deus largiorem honorem per immensam miraculorum vel aliorum charismatum gratiam. Ita temperavit Deus Ecclesiæ corpus, ut nullum ex membris ejus sit superfluum, sed omnia sint necessaria, ideo ut non sit schisma in corpore Ecclesiæ, ubi debet esse unitas et concordia, id est ne alter alterum abiciat quasi inutilem aut superfluum; sed membra sint sollicita pro se invicem, id est majora pro minoribus, et minora pro majoribus, quoniam alia sine aliis non possunt; membra dico, tendentia in idipsum, id est in unitatem, ut omnia studeant habere cor unum et animam unam, ut dum sic agunt, si quid adversi patitur unum membrum, compatiuntur ei omnia membra, quasi adversitas illa sit omnium, sive gloriatur de bono unum membrum, congaudent ei omnia membra, quasi bonum illud sit omnium. Nam et in membris humani corporis, ex quorum unitate atque compage charitas nunc suadet membris Ecclesiæ, videmus hæc omnia, dum unumquodque eorum non sibi soli, sed et cæteris propriis agit officium. Oculus enim videt, et non audit; auris audit, et non videt, manus operatur, nec audit, nec videt; pes ambulat, nec audit, nec videt, nec facit quod manus. Sed in uno corpore si sit sanitas, et non adversus se litigent membra, et auris videt in oculo, et oculus audit in aure. Nec objici potest auri quia non videt, ut dicatur ei: Nihil es, minor es. Nunquid videre et discernere colores potes, quod facit oculus? Respondet enim auris de pace corporis, et dicit: Ibi sum ubi est oculus, in eo corpore sum. In me non video in illo cum quo sum, video. Ita cum auris dicit: Oculus mihi

videt, oculus dicit, auris mihi audit, oculus et aures dicunt, manus nobis operantur: manus dicunt, pedes nobis ambulant: omnia in uno corpore cum operantur, si sit ibi sanitas et concordent membra, gaudent et congaudent sibi; et si aliquid molestiæ est in aliquo membro, non se deserunt, sed compatiuntur sibi. Sic et filii Ecclesiæ, id est membra Christi, omnino debent agere. Nec putent se ad Deum non pertinere, si miracula non fecerint. Sed quisquis in corpore non potest resuscitare mortuum, non illud quærat, ne discordet in corpore, quomodo si auris quærat videre, discordare potest, nam quod non accepit, non potest facere. Si autem ei objectum fuerit et dictum: Si justus esses, resuscitares mortuum quomodo fecit Petrus, respondeat: Petrus et mihi fecit, quia in eo corpore sum, in quo Petrus fecit. In illo quo potest possum, a quo divisus non sum. Quod minus possum, compatiatur mihi; et quod plus potest, congaudeo illi. Si ergo unusquisque quod potest, juste egerit, ac de bono quod accepit, aliis prodesse studuerit, et in eo quod alius plus potest, non inviderit, sed congratulatus fuerit tanquam in uno corpore cum eo constitutus, custodiatur in membris Christi, quod custodiunt invicem corporea membra cujuslibet hominis.

« Vos autem estis corpus Christi, et membra de membris. Et quosdam quidam posuit Deus in Ecclesia, primum apostolos, secundo prophetas, tertio doctores, deinde virtutes, exinde gratias curationum, opulationes, gubernationes, genera linguarum, interpretationes sermonum (Ephes. iv). Nunquid omnes apostoli? nunquid omnes prophetæ? nunquid omnes doctores? nunquid omnes virtutes? nunquid omnes habent gratiam curationum? nunquid omnes linguis loquuntur? nunquid omnes interpretantur?»

Ostendit Apostolus nostram se causam per membrorum carnalium rationem tractasse, quia non omnes eadem possumus, sed singuli pro qualitate fidei et gratia quam accepimus. Hæc, inquit, concordia varie operandi et congaudenti vel compatiendi est in membris humani corporis. Sed vos estis corpus Christi, id est conjuncti et uniti estis in Christiana fide et veritate, et estis etiam membra Christi, ut invicem vobis per charitatem serviat unusquisque de dono vel officio quod habet. Membra estis pendencia de membro, id est de me qui sum majus membrum Christi, et vos mihi sicut digitos manui adhærere in ejus corpore feci. Nam aliud quidem est membrum corporis, aliud membrum membri. Membrum quippe corporis, pars ad totum est; membrum vero membri, particula ad partem. Membrum namque membri est digitus ad manum, manus ad brachium; membrum vero corporis est totum hoc simul ad corpus universum. Sic ergo in spiritali dominico corpore membra de membro dicuntur, qui in ejus Ecclesia ab aliis reguntur. Hinc Apostolus exponit diversitatem in fidelibus, quam dixerat in membris, et determinat de donis Dei;

quæ sicut altiora et quæ inferiora; qui de his putabant Corinthii quod minus esset, majus; et quod majus minus. Vos, inquit, estis membra Christi, et cum sitis membra, non estis æqualia, quoniam *Deus posuit in Ecclesia quosdam diversorum graduum fideles*, scilicet *primum dignitate et tempore apostolos* vice Christi prædicantes; *secundo dignitatis loco prophetas* futura prædicentes, qui post adventum Domini fuerunt, sicut Agabus, et beatus Benedictus' (*Act. xi, 12*); *tertio gradu dignitatis posuit doctores*, id est prædicatores, qui doctrina veritatis Ecclesiam instruerent; *deinde virtutes*, id est eos qui fortia miracula faciunt, ut in expulsiōe dæmonum et mutatione elementorum sicut aeris serenitatem in pluviam convertendo, vel super aquam siccis pedibus ambulando, *exinde posuit gratias curationum*, id est eos qui per orationem curant infirmos, et *opulationes*, id est eos qui opulantur majoribus, ut Titus Apostolo vel archidiaconus episcopo et *gubernationes*, id est minorum personarum prælationes ut sunt presbyteri, et *genera linguarum*, id est scientiam loquendi linguis variis per donum gratiæ ei. Quia Corinthii donum istud magis appetebant, æstimantes hoc esse maximum, ideo novissimum hoc posuit Apostolus, innuens esse inferius et indignius cæteris præmissis. Talia dona fidelibus suis Deus varie distribuit, secundum mensuram donationis suæ dans unicuique gratiam. Aliud enim habet ille, aliud iste; et quod habet ille, non habet iste. Mensura est divisio quædam donorum. Non enim omnes sunt apostoli, sed illi soli quos Christus misit; nec omnes habent spiritum prophetiæ, sed quibus hæc gratia divinitus est concessa; nec omnes habent scientiam docendi alios, neque omnes operantur virtutes miraculorum, neque omnes habent gratiam curandi infirmitates, nec omnes diversis linguis loquuntur, nec omnes interpretantur Scripturas aut linguas. Nam si omnes haberent hæc omnia, jam non essent quibus hæc officia servirent. Ideo pulchrum et necessarium est, ut alii habeant quod non habent alii, et alii rursus alia, quatenus unusquisque quod ipse habet, cæteris ministret qui non habent.

« Æmulamini autem charismata meliora. Et adhuc excellentiorem vobis viam demonstro. »

Ilucisque revocavit illos a schismate ad concordiam et unionem, ut nullus gloriaretur de charismate superiori, nullusque doleat de inferiori. Hinc eos ad charitatem innuit, ostendens sine ea nihil cætera valere. Deus, inquit, varia dona consuevit fidelibus suis impendere. Sed vos æmulamini charismata meliora, id est de his quæ supra demonstravi, desiderate utiliora, non linguas, ut solebatis. Et adhuc præter hæc in prædictis ostensa, demonstro vobis excellentiorem viam, id est charitatem, quæ supereminetissimum locum inter cæteras virtutes obtinet, et est via per quam illi gradiuntur qui tendunt ad regnum cælorum. Nam per cæterarum virtutum vias ambulare possunt et illi, qui ad inferiora descen-

dunt. Quicumque autem viam charitatis sectantur, ad supernam patriam tendunt. Quomodo enim oleum nullo humore premitur, sed disruptis omnibus exsilit et supereminet, sic est charitas. Non potest premi in ima, sed necesse est ut ad superna emicet; et ideo qui vult ad superna cælorum regna pervenire, studeat per viam charitatis incedere. Nam quare charitatem apostolus excellentiorem viam appellaverit, declarat ipse, cum protinus subjungit:

CAPUT XIII

« Si linguis hominum loquar et angelorum, charitatem autem non habeam, factus sum velut æsonans aut cymbalum tinniens. Et si habuero omnem prophetiam, et noverim mysteria omnia et omnem scientiam, et si habuero omnem fidem ita ut montes transferam, charitatem autem non habuero, nihil sum, et si distribuero in cibos pauperum omnes facultates meas, et si tradidero corpus meum ita ut ardeam, charitatem autem non habuero, nihil mihi prodest (*Matth. xxi; Marc. xi*). »

Quoniam loqui diversis linguis præcipue desiderabant Corinthii, propterea donum hoc in primis ostendit Apostolus sine charitate non prodesse. Si ego, inquit, loquar linguis omnium hominum et angelorum, id est si mihi per gratiam datum sit ut sciam loqui sicut omnes homines qui sunt in terra, et sicut angeli, qui sunt in cælo sed charitatem non habeam, qua carere potest omnibus linguis loquens, factus sum similis æri sonanti vel cymbalo tinnienti. Nam variis linguis loqui vel similia facere non semper ad meritum datur, sed ad gloriam Dei gentibus ostendendam, nec per hæc vitam æternam consequi valent illi qui ea faciunt. Charitas vero et meritum semper auget, et vitam æternam præbet. Habent autem et angeli suas linguas, quibus majores intimant minoribus, quod de Dei voluntate senserunt, vel quibus ad homines missi utuntur. Nam primi angelorum suscipiunt ab ipso Deo illuminationes scientiarum, ac deinde tradunt eas subjectis spiritibus. Lingvæ vero quibus sic alii loquuntur aliis, intelliguntur aliqui nutus vel interiores motus, per quos intimant sibi vicissim quod voluerint. Neque enim minores sciunt omnia quæ majoribus sunt nota, sed ea tantum, quæ sibi fuerint a superioribus intimata. Sed si data, inquit, fuerit mihi tanta linguarum scientia, ut loquar linguis et angelorum et hominum, nec charitatem habuero, factus sum velut æsonans aut cymbalum tinniens. Nam sicut æs aut cymbalum non per se, sed impulsu aliquo resonat; sic loquens linguis, non per se qui nescit, sed per impulsum Spiritus profert ea quibus audientes mulceat. Ære quippe vel cymbalo insensibiles ac mortuæ hominum mentes, quæ vitam charitatis non habent, designantur. Nam sicut corpus sine spiritu, id est si fuerit sine anima mortuum est, sic anima si sine sancto Spiritu, id est sine charitate fuerit, mortua deputabitur. In sonitu æris vel cymbali delectantur audientes, sive percipiunt aliquam utilitatem; sibi vero

prodest, sed potius in suo detrimento commo-
rum operatur. Sic et prædicator qui sensum
non habet in eo quod loquitur, alios delectat
, et ipse detrimentum inde percipit, unde
suis proficit. Nam sicut quod æs sonat, dulce
sed sibi labori et diminutioni, sic et quod
prædicator charitate vacuus. Nec solum de
ore potest hoc intelligi. Aptè enim et quo-
insensibilium hominum corda per æs et
m designantur, qui sæpe et supernos ictus
t, et tamen nulla disciplinæ percussione
nt. Æs vero cum percuitur, canorus valde
ex ejus percussione formatur. Et quidem
eris in nullo discrepantes, cum flagella su-
reussionis accipiunt, piæ confessio et soni-
tunt; sed quia humilitatis voces ex corde
erunt, ad statum salutis reducti, nesciunt
miserunt. In nullo igitur æris imitationem
qui in percussione positi, bona quæ non sen-
tuuntur. Quisquis enim bona loquitur, sed
rem eadem bona non sequitur, velut æs aut
m sonitum reddit, quia ipse non sentit
æ ipse facit. *Et si habuero*, inquit, *prophe-*
per Spiritum Dei quæ futura sunt prænun-
ut Balaam (Num. xxii, xxiii, xxiv) et Cai-
im. xi). Et noverim mysteria omnia, id est
feteris et Novi Testamenti sicut Salomon,
m *omnem scientiam* de his quæ fuerint, et
t, et quæ futura sunt, vel de divinis et hu-
icet idem Salomon, *et si habuero fidem om-*
est de omni re unde est habenda, ita perfe-
ejus virtute montes de loco ad locum
m, sed omnia hæc habens, *charitatem non*
nihil sum, etsi hæc magna sint. Salvator
fidem quæ fuerat sicut granum sinapis,
esse transferre (*Matth. xvii*); et nunc Apo-
cit omnem fidem esse quæ montes trans-
ide intelligitur perfectam esse fidem quæ
apis comparatur, et hoc non propter exi-
sed propter integritatem dictum esse. Sed
charitate nil valet ad salutem (*Jacob. ii*),
æmones habent hujusmodi fidem. *Et si dis-*
inquit, facultates meas, id est omnia quæ
habere divisero, ut pluribus prosim, dans
cibus non divitum qui reddant, sed paupe-
non habent unde reddere possint (*Luc. xiv*);
est majus, si tempore persecutionis tradidero
corpus meum sævissimis cruciatibus, ita ut
sed *charitatem non habuero*, id est non cha-
rd jactatione hoc fecero, vel odium in corde
versus aliquem retinero, nihil mihi totum
est. Magna itaque et mirabili
tas,
nec locutio diversarum
nec prophetia, nec my-
otitia, nec fides, nec f-
yrii passio; et enim
charitatis
na p

A non nisi soli possident electi. Cujus membra et
species Apostolus consequenter describit, dicens :

« Charitas patiens est, benigna est. Charitas non
æmulatur, non agit perperam, non inflatur, non est
ambitiosa, non quærit quæ sua sunt (*Philip. ii*),
non irritatur, non cogitat malum, non gaudet su-
per iniquitate, congaudet autem veritati. Omnia
suffert, omnia credit, omnia sperat, omnia susti-
net. Charitas nunquam excidit. »

Omnia bona sine charitate vilia sunt et inutilia,
sed cum charitate chara sunt et utilia. Quæ charitas
habet in se virtutes, quæ nunc enumerantur. Est
enim patiens, id est patientiam servans. Patientiam
vero servare, est aliena mala æquanimiter perpeti;
contra cum quoque qui mala irrogat, nullo dolore
morderi. Nam qui sic proximi mala portat, ut ta-
men tacitus doleat, et tempus dignæ retributionis
quærat, patientiam non servat, sed simulat. Sed
charitas est patiens, quoniam aliena mala æquo ani-
mo tolerat, et *est benigna*, quia ipsos etiam a quibus
mala patitur, amat. Patiens, quia illata a proximis
mala æquanimiter portat; benigna vero, quia pro
malis bona largiter administrat. Patiens est, quia
tranquillam mentem in adversis servat; benigna ve-
ro, quoniam misericorditer sua bona proximis indi-
gentibus impendit. Patiens est, quia contra tentationes
sæculi vel procellas in Deum fixa, persistit im-
mobilis; benigna vero, quia proximorum delectatur
profectibus. *Charitas non æmulatur*, id est non invidet,
quia ubi est invidia, ibi fraternus amor esse non
potest. Non æmulatur, quia per hoc quod in præ-
senti modo nil appetit, invidere terrenis successibus
nescit. Non æmulatur, quoniam alterius bonum dili-
git ut suum, *non agit perperam*, id est perverse, quia
quo se in solum Dei ac proximi amorem dilatat quid-
quid a rectitudine discrepat ignorat; *non inflatur*, id
est non intumescit de temporali felicitate, vel carnis
generositate, vel scientiæ vel merito, seu qualibet
alia re, quia cum præmium internæ retributionis
anxia desiderat, de bonis se exterioribus aut transi-
toriiis non exultat, *non ambitiosa*, id est cupiens ho-
nores sæculi, quia major aliis esse non ambit, et super
cæteros dominari, vel ea sibi vindicare quæ sunt
alieni juris; non est igitur ambitiosa, quia quo arden-
ter intus ad sua fatigat, foris nullatenus aliena concu-
piscit, *non quærit ea quæ sua sunt*, quia cuncta quæ
hic transitorie possidet, velut aliena negligit, cum
nihil sibi esse proprium nisi quod secum permaneat,
agnoscit. Non quærit quæ sua sunt, quia propter
aliorum commoda suas utilitates deserit; nec se, sed
alios exaltare studet; *non irritatur*, id est non pro-
vocat iram, quia et injuriis lacessita ad nullos
motus excitat, dum pro magnis labo-
post præmia expectat; *non cogitat*
um cogitare modo ei qui sibi facit
reddere, sed cogitat malum, quia in
e nullo modo cum omne odium
inveniat, nescit. Non
atione erga om-

nes inhiat, nec de perditione adversantium exultat. Sunt enim nonnulli qui nec faciunt malum, nec facere cogitant eis a quibus adversa perferunt; sed tamen si factum illis ab aliis fuerit, lætantur; et ideo nunc postquam dictum est, quia charitas non irritatur, nec cogitat malum, additur quia non gaudet super iniquitate, id est non ei placet si quid inique passus fuerit vel ipse qui ei adversatur. Sed *congaudens veritati*, delectatur verbis veritatis, vel operibus veræ sanctitatis, quia cæteros ut se diligens, per hoc quod rectum in aliis conspicit, quasi de augmento proprii profectus hilarescit. *Omnia suffert*, quia pro spe quietis æternæ nihil adversitatis pati recusat. Supradictum fuerat quia patiens est, id est non murmurans in adversis, sed corde tacito cuncta perferens; et nunc dicitur quod omnia suffert et in actu sustinet quidquid adversitatis acciderit. Ibi enim laudata est tranquillitas cordis, hic fortitudo passionis, et ideo suffert omnia in præsentis vita, quia credit omnia de futura vita. Et sustinet omnia quæ hic gravia immittuntur, quia sperat omnia quæ sibi dulcia promittuntur; et propterea nunquam excidit, id est nunquam cadit, sed sine casu persistit. Nec quod dictum est, omnia credit, sic accipiamus, ut charitatis cujusquam derogemus si malum quod de fratre audierit, non statim crediderit (*I Joan. iv*). Quia ipsa charitas, quæ omnia credit, non omni spiritui credit. Ac per hoc omnia quidem credit, sed Deo, quia non dictum est, omnibus credit. *Omnia ergo quæ sanctis credenda sunt, credit; et omnia quæ sibi divinitus promissa sunt, sperat; et omnia sustinet*, id est expectat per patientiam longanimitate eadem bona quæ sperat, vel interim sustinet adversa pro spe honorum ipsorum. Habet etiam hoc *charitas* præter cæteras virtutes, in quo rursus dignior illis est, quia *nunquam excidit*, id est nunquam ex toto cadit. Licet enim opera ejus cadant, hoc est deficient et cessent in futuro sæculo, ipsa tamen nunquam a suo statu decedit, sed validior stabit, ac perseverabit in alio sæculo quam in isto. Si enim dum credit et sperat ac præstolatur, diligit quod nondum videtur, quanto magis diliget cum videbit et tenebit?

« Sive prophetiæ evacuabuntur, sive linguæ cessabunt, sive scientia destruetur. Ex parte enim cognoscimus, et ex parte prophetamus. Cum autem venerit quod perfectum est, evacuabitur quod ex parte est. »

Charitas quidem nunquam excidit, id est nec nunc, nec in alia vita a suo statu decedit, ut minuitur aut deficiat, sed cætera charismata decidunt et deficiunt. Quia *sive prophetiæ* accipiuntur quæ nunc necessariae sunt in tempore cæcitatæ nostræ, in luce futuri sæculi *evacuabuntur*, id est ab omni utilitate fient vacuæ, et ideo cessabunt. Nam ubi erunt omnia præsentia, quomodo prædiceretur aliquid futurum? *sive linguæ* accipiuntur, id est variarum linguarum locutiones, in illo sæculo *cessabunt*. Ubi erunt enim manifesta omnia, cur alicui diceretur

aliquid? Poterunt quidem loqui ad invicem sancius voluerint, sed non necesse erit, ubi scientia vocem præveniet. Et si quid inter se locuti tunc fuerint, non eo modo id facient quo nos nunc loquimur; sed eo potius, quo in supernis angelici spiritus ad invicem loquuntur, *sive scientia* nunc habeatur, per quam de Deo et secretis ejus aliquid sciatur, in futuro sæculo *destruetur*, quia si quam nunc de Deo cognitionem habemus, hanc non in natura divinitatis ipsius, sed per similitudinem et naturas exteriores habemus. Nam quantalibet mens humana se intentione tetenderit, etiam si jam phantasias imaginum corporalium a cogitatione compescat, si jam omnes circumscriptos spiritus ob oculis cordis amoveat, adhuc tamen in carne posita mortali, videre vel cognoscere gloriam Dei non prævalet, quidquid est; et de illa sicut est, quod in mente resplendent, similitudo, et non ipsa est. Et ideo talis nostra scientia destruetur, quando veritas ipsa pure manifestabitur. Scientia hæc et prophetia vel locutio destruetur, quæ capere vel narrare non possunt plenitudinem veritatis, quia ex parte sunt. Nam *ex parte cognoscimus* veritatem, non ex toto, id est imperfecte scimus quidquid adhuc de Deo novimus; *et ex parte prophetamus* de futuris, quia quædam futura per prophetiam prænuntiamus, sed plurima ignoramus. Sed omne quod ex parte est, destruetur. Quia cum venerit quod perfectum est, id est quando dabitur Dei notitia, quæ non ex parte, sed ex perfectione fit, quoniam videbimus eum, sicuti est (*Joan. xiii*), tunc *evacuabitur quod ex parte est*, id est omnis imperfectio ad nihilum veniet. Nostra imperfectio destruetur, non id quod verum est, evacuabitur. destructio imperfectio erit quando id quod perfectum est, implebitur perfectione veritatis. Deinde Apostolus ut aliqua similitudine ostenderet quantum ab illa quæ futura est, distet hæc vita, non qualiumcunque hominum, sed etiam illorum qui præcipua sic sanctitate sunt præditi, subjicit :

« Cum essem parvulus, loquebar ut parvulus, sciebam ut parvulus, cogitabam ut parvulus. Quando autem factus sum vir, evacuavi quæ erant parvuli. »

Ad illa enim ineffabilia quaecumque adhibeas de notis rebus exemplum, parvulam ætatem virili comparavit ætati. In hac ergo vita mirabilium, hominum prophetia vel scientia ita comparanda est illi vitæ, quasi scientia parvuli ad virum. Quia sicut vita hæc imperfecta est, sic et scientia. Tunc autem pertingemus ad virilem perfectionem, cum forti sensu pervenerimus ad angelorum æqualitatem. Quasi dicatur : Prophetia et scientia quæ sunt ex parte, sic evacuabuntur cum venerit illa veritatis perfecta cognitio sicut sensus et locutio parvuli evacuatur, cum ille ad perfectam scientiam pervenerit. Cur enim hoc Apostolus dixerit, insinuat subdendo.

« Videmus nunc per speculum in ænigmate, tunc autem facie ad faciem. Nunc cognosco ex parte, tunc autem cognoscam sicut et cogitus sum. »

Inde potest videri quoniam cum perfectio venerit, **A** evacuabitur imperfectio, quia nunc, id est caligine præsentis vitæ videmus per speculum, id est cognoscimus Deum per imaginem suam; sed tunc, id est in futuro sæculo, manifeste videbimus: in speculo enim cernitur imago. Et nos qui sumus imago Dei, conamur utcumque videre eum per hanc imaginem suam tanquam per speculum. Speculum est anima rationalis, in cujus consideratione aliquo modo videmus Deum, sed obscure. Videmus enim per speculum in ænigmate. Ænigma autem est, non omnis, sed obscura allegoria. Nam sicut omnis equus animal est, non autem omne animal equus, ita omne ænigma allegoria est, non autem omnis allegoria ænigma. Allegoria vero est, cum aliud ex alio significatur, id est aliud dicitur, et aliud intelligitur; sicut est: « Non alligabis os bovi trituranti (*Deut. xxv; supra ix*), » id est non prohibebis prædicationem vivere de prædicatione. Sed ibi solummodo allegoria est ænigma, ubi difficile patet intellectus. Ubi autem facile intelligitur, non est ænigma. Cum ergo dicitur, videmus nunc per speculum in ænigmate, sicut in nomine speculi imago designatur, ita nomine ænigmatis similitudo obscura, et ad dispartendum difficilis. Nemo itaque miretur etiam in hoc videndi modo, qui concessus est huic vitæ per speculum, scilicet in ænigmate laborare nos, ut quomodocumque videamus. Nomen quippe hic non sonaret ænigmatis, si esset facilitas visionis. Nunc videmus per speculum in ænigmate, sed tunc cum venerit illa perfectio, videbimus facie ad faciem, id est manifeste ad similitudinem duorum, qui se invicem directo vultu sine aliqua re interposita aspiciunt. Facies autem Dei, manifestatio ejus intelligenda est. Facies vero nostra intentio cordis nostri. Videbimus ergo facie ad faciem, id est manifestatione Dei posita ad nostræ mentis intentionem, ut nihil inter nos et ipsum intersit. In nullo enim membro tam bene cognoscitur quisque, sicut in facie. Et cum facies unius directa est in faciem alterius, tunc sine aliqua ambiguitate se cognoscunt. Sic videbimus eum in seipso manifeste. Modo enim non videmus eum in facie, sed in extranea et multum ab eo diversa creaturarum similitudine. Et ego etiam ipse qui tanta scientia præ cæteris donatus sum, nunc cognosco, Deum ex parte, sed tunc cognoscam eum ita sicut ab eo cognitus sum. Magna enim est interpositio cordis nostri ad contemplandam sublimitatem Dei, ipsa infirmitas nostra. Sed tunc ad purum intuebimur eum, a quo nunc subtiliter intuemur, cum, hac infirmitate deposita, ad contemplationis internæ gratiam venerimus. Tunc cognoscam eum sicut et ipse me novit, quia tunc non per aliud videbimus eum, sed manifeste contemplabimur in illo ipso hoc quod ipse est, sicut ipse hoc quod nos sumus, perfecte cognoscit. Vel tunc cognoscam eum ita sine ambiguitate in mani-

festâ visione, sicut olim antequam essem, cognitus sum ab eo in prædestinatione.

« Nunc autem manent, fides, spes, charitas: tria hæc. Major autem horum est charitas. »

Ad tantam Dei cognitionem perventuri sumus. Sed ut pertingere ad hanc valeamus, nunc interim manent in peregrinatione hæc nobiscum fides, spes, atque charitas, quæ nos præparant illi visioni. Fides, qua credimus quidquid Scripturæ sanctæ nobis credendum intimant; et spes, qua speramus promissa nobis divinitus præmia; et charitas, qua Deum ac proximum diligimus, et ipsa præmia. Et ita sibi tres istæ virtutes copulantur in hujus vitæ tempore, ut nulla earum sine duabus reliquis proficiat. Nunc manet in sanctis, fides, spes et charitas, tria hæc, pauca quidem, sed multum utilia, quoniam sine his nemo fit dignus ad illam visionem ascendere. Et magna quidem sunt hæc tria bona, sed horum major est charitas, id est charitas quæ horum trium est una, ipsa est major, id est majus meritum habet quam fides et spes. Sciendum quia quando eomparatio sit ad plura ejusdem generis, ut nunc charitatis ad fidem et spem, quæ similiter sunt virtutes, potest et debet fieri per genitivum. Ethorum, ponitur propter tria, quod præcesserat, major est charitas, cui fides et spes non possunt deesse, sed fides et spes sine charitate possunt esse. Vel ideo major, quia fides cessabit, dum futura quæ creduntur advenerint; et spes finem habebit, dum beatitudinem quam quisque præstolatur, acceperit; sola vero charitas in æternum perseverabit, et de visione Conditoris ac beatitudine sanctorum sine fine gaudebit.

CAPUT XIV.

« Sectamini charitatem, æmulamini spiritalia, magis autem ut prophetetis. Qui enim loquitur lingua, non hominibus loquitur, sed Deo. Nemo enim audit. Spiritus autem loquitur mysteria. Nam qui prophetat, hominibus loquitur ad ædificationem et exhortationem et consolationem. »

Quoniam tanta est charitas, et sola est quæ perducit ad vitam, atque permanet in æternum, ideo sectamini toto desiderio charitatem: æmulamini etiam spiritalia, id est desiderate etiam illa spiritalia dona, ut sunt genera linguarum, etc. sed magis, post charitatem desiderate ut prophetetis, quam ut linguis loquamini, vel virtutes miraculorum operemini. Post charitatem, prophetandi studium magis habendum hortatur, quia quamvis magni sint spiritalium donorum gradus, quos superius enumeravit, hic tamen major est, quoniam ad utilitatem Ecclesiæ proficit. In quod enim quis animum dederit, in eo ipso donum accipit. Ideo gratia prophetandi est desideranda, ut præ desiderio accipiatur ob multorum ædificationem potius quam linguarum varietas, quæ non proficit auditoribus. Nam qui loquitur lingua incognita, non loquitur hominibus, id est intelligentiæ hominum, sed Deo, cujus laudes dicit, et qui novit ea quæ ille dicit. Homines enim nesciunt,

ideoque nullus est eis ex hac locutione profectus. **A** « in revelatione, aut in scientia, aut in prophetia, *Nemo enim audit*, id est intelligit ea quæ ille loquitur. Sed tamen Spiritu sancto loquitur ipse mysteria, id est secreta Dei, quamvis homines ignorent quod dicit. Vel *Spiritus sanctus per eum loquitur mysteria* secretorum Dei, non ipse. Ideo magis æmulari prophetare debetis, quia *qui prophetat*, id est qui ventura vel occulta manifestat, iste *loquitur hominibus ad ædificationem* eorum in mente, quæ ædificatur ut sit templum Dei, et ad *exhortationem* eorum ad bene agendum in operatione et ad *consolationem* eorum ne desperent de peccatorum præteritorum magnitudine, vel ad consolationem tristitiæ præsentium tribulationum per promissionem futurarum remunerationum. Possunt et doctores, qui Scripturas aliis exponunt, nomine prophetarum designari, juxta illud Sapientis : « Adhuc doctrinam quasi prophetiam effundam (*Eccli. xxiv.*) » Sicut enim propheta prædicit futura quæ nesciuntur, ita et doctor dum Scripturarum sensum, qui multis occultus est, manifestat, dicitur prophetare. Et iste ad multorum utilitatem sic prophetat, nec ab homine, sed a Spiritu sancto est sensus dictorum ejus.

« Qui loquitur lingua, semetipsum ædificat; qui autem prophetat, Ecclesiam Dei ædificat. Volo autem omnes vos loqui linguis, magis autem prophetare. Nam major est qui prophetat, quam qui loquitur linguis, nisi forte interpretatur ut Ecclesia ædificationem accipiat. »

Item magis prophetiam quam linguam ideo debetis optare, quia *qui loquitur lingua peregrina mysterium* aliquod et non interpretatur quod dicit, semetipsum solum ædificat per id quod solus fortasse scit quod loquitur; sed *qui prophetat*, id est qui futura cæteris prænuntiat, vel bona quæ in abditis Scripturarum intelligit, fratribus ex charitate revelat, *Ecclesiam Dei ædificat*, quia omnes intelligunt quod loquitur. Qui lingua ignota loquitur, ædificat se, non alios. Sed *ego volo*, id est voluntas mea est, nec mihi displicet, *vos omnes loqui linguis*, id est si omnes donum loquendi linguis variis haberetis, quia alter adversus alterum non haberet materiam gloriandi vel invidendi, quoniam omnes in hoc essetis æquales. Non prohibeo vos omnes, si poteritis loqui diversis linguis, quia donum est Spiritus sancti, sed magis volo vos prophetare, quia utilis est. *Nam major est qui prophetat*, id est majoris dignitatis est in Ecclesia qui futura prædicit, vel Scripturas aperit, *quam qui loquitur linguis*, id est qui incognitis locutionibus mysteria profert, quæ sibi soli proficit. Hoc enim majus est quod pluribus prodest. Qui linguis loquitur, minor est, *nisi forte interpretetur*, id est exponat aliis quod ipse Deo loquitur. Si enim interpretari dicta sua poterit, ut *Ecclesia ædificationem* inde accipiat, non erit minor. Forte, dicit, ut innuat quoniam raro solet contingere ut utrumque uni concedatur?

« Nunc autem, fratres, si venero ad vos linguis loquens, quid vobis prodero, nisi vobis loquar aut

« in revelatione, aut in scientia, aut in prophetia, aut in doctrina. »

Dixi qui prophetat, major est, propter ædificationem quam præbet Ecclesiæ, quam qui lingua loquens, se solum ædificat. Sed hoc potestis etiam in meipso videre, quia *si venero ad vos, o fratres, loquens incognitis linguis, quid vobis prodero, cum nesciatis quid dixerō? Nihil prodero, nisi loquar vobis aut in revelatione*, id est in expositione revelationis, in qua mihi per quasdam figuras ostensa fuerint mysteria Christi, sicut et Joanni ostensa leguntur in sua revelatione; aut *nisi loquar vobis, in scientia*, quam studio et disciplina mea acquisivi, ut vos scire faciam qualiter his temporalibus uti debeatis, et quid de his sentire; *aut in prophetia*, ut vobis prænuntiem futura, vel manifestem occulta; *aut in doctrina*, ut doceam vos de fide et moribus. Et cum nunc vobis, quando jam fratres, id est Christiani estis, non prodessem si linguis incognitis loquerer: patet quia multo minus tunc prodessem, cum adhuc essetis infideles. Cumque ego qui tantus sum apostolus, loquendo linguis non possem vobis prodesse, constat vos multo minus tali locutione audientibus prodesse. Lingua intelligitur in hoc loco, obscuras dicere et mysticas significationes, a quibus si intellectus mentis removeatur, nemo ædificatur audiendo quod non intelligit. Unde et supra dixit: « Qui loquitur lingua, non hominibus loquitur, sed Deo. Nemo enim audit. Spiritus autem loquitur mysteria. » Ibi enim satis indicavit eam se linguam appellare, ubi sunt significationes velut imagines rerum ac similitudines, quæ ut intelligantur, indigent mentis obtutu. Cum autem non intelliguntur, in spiritu eas dicit esse, non in mente. Qui loquitur lingua, id est spiritu nondum intelligens significationes quas lingua spiritus voluit, plus semetipsum ædificat. Contingebat enim ut qui sic loquebantur mysteria Dei, quamvis profunditatem non intelligerent, tamen ex ipsa locutione ad compunctionem cordis, et multoties ad bonum opus incitarentur. Quia ergo etiam lingua, id est membro corporis quod movemus in ore, cum loquimur, signa utique rerum dantur, non res ipsæ proferuntur, propterea translato verbo linguam appellavit Apostolus quamlibet signorum prolationem, priusquam intelligantur. Quo cum intellectus accesserit, qui mentis est proprius, fit revelatio, vel scientia, vel prophetia, vel doctrina. Proinde ait: Si venero ad vos linguis loquens, quid vobis prodero, nisi loquar vobis in revelatione, aut in scientia, aut in prophetia, aut in doctrina? id est nisi signis, hoc est lingue accesserit intellectus, ut non spiritu tantum, sed etiam mente agatur quod agitur. Proinde cui signa per aliquas rerum corporalium similitudines demonstrantur in spiritu, nisi accessisset mentis officium ut etiam intelligerentur, nondum erat propheta: Magis propheta erat, qui interpretabatur quod alius vidisset, quam ipse qui vidisset. Unde apparet magis ad mentem pertinere prophetiam,

quam ad istum spiritum, qui modo quodam proprio vocatur spiritus, vis animæ quædam mente inferior, ubi corporalium rerum similitudines exprimentur. Sic olim magis Joseph propheta fuit, qui intellexit quid significarent septem spicæ et septem boves, quam Pharaon qui eas vidit in somnis (*Gen. xlj*); illius enim spiritus informatus est ut videret, hujus mens illuminata ut intelligeret. Ac per hoc in illo erat lingua, in isto prophetia, quia in illo rerum imaginatio, in isto imaginationum interpretatio. Minus ergo propheta est, qui rerum quæ significantur, sola ipsa signa in spiritu per rerum corporalium imagines videt; et magis propheta, qui solo earum intellectu præditus est. Sed maxime propheta, qui utroque præcellit, ut et videat in spiritu corporalium rerum significativas similitudines, et eas vivacitate mentis intelligat, sicut Danielis excellentia tentata est et probata, qui regi somnium quod viderat dixit, et quid significaret aperuit (*Dan. ij*). Et ipsæ quippe imagines corporales in spiritu ejus expressæ sunt, et earum intellectus revelatus in mente. Sed ad epistolæ sequentia transeamus.

« Tamen quæ sine anima sunt vocem dantia, sive tibia, sive cithara, nisi distinctionem sonituum dederint, quomodo scietur id quod canitur, aut quod citharizatur? Etenim si incertam vocem det tuba, quis parabit se ad bellum? Ita et vos per linguam nisi manifestum sermonem dederitis, quomodo scietur id quod dicitur? Eritis enim in aera loquentes. Tam multa ut putaverat genera linguarum sunt in hoc mundo, et nihil sine voce est. »

Linguas non prodesse sine interprete, superius ostendi per me qui sum rationalis, et tamen per inanimata idem patet. Nam ea quæ sunt sine anima dantia vocem, sive hoc sit tibia, sive cithara, nisi dederint distinctionem sonituum, id est distinctos intelligibiles sonos, quomodo scietur id quod canitur, aut quod citharizatur, id est cithara resonatur? Sic et locutio vestra, cujus spiritualis suavitas non aures debet mulcere, sed mentem, inanis erit si intellecta non fuerit. De tibia et cithara nescietur, quia nec de tuba. Alia similitudo est de eadem re. Etenim si tuba det vocem incertam, id est quæ bellum aperte non significet, quis parabit se ad bellum? Judæis erat usus tubæ in festis et hellis, diversis sonis; et hoc est quod dicitur, quia si vox tubæ incerta fuerit, nemo discernet utrum solemnitatis an belli sit, nemoque se ad bellum armabit. Ita et vos, qui quasi tuba exaltare vocem vestram debetis (*Isa. lviij*), ut Christi milites ad spirituale bellum contra dæmones præparetis, per linguam alienam loquentes, nisi interpretando dederitis manifestum sermonem, qui palam audientes retineat, quomodo scietur ab aliis id quod a vobis in lingua aliena dicitur? Nescietur ab auditoribus vestræ locutionis sensus. Nam eritis loquentes in aera, id est ea quæ nulli proficiunt, sed in aera solventur, dum non inventientia locum receptaculi in audientium auribus ut intelligantur, dif-

fundentur in aera, quia nec auscultare talia dignabuntur homines. Non ad corda hominum loquemini, sed in aera, id est non utilia erunt verba vestra, sed otiosa et inania eritis loquentes. Tam multa utputa sunt genera linguarum, id est etiam si tam multa loquamini ut sunt genera linguarum in toto hoc mundo, quid proderit hæc vestra locutio, cum nullus intelligat? Multa sunt genera linguarum, et nihil sine voce est, quia nulla res est sine sua voce et appellatione in unaquaque lingua. Cum sint enim plurima linguarum genera, habent tamen vocum significationes proprias ut intelligantur, nec potest aliquid inveniri quod non habeat vocem significativam sui. Et idcirco inanis est locutio quæ non intelligitur.

« Si ergo nesciero virtutem vocis, ero ei cui loquar, barbarus: et qui loquitur, mihi barbarus. Sic et vos, quoniam æmulatores estis spirituum, ad ædificationem Ecclesiæ quærite ut abundetis. Et ideo qui loquitur lingua, oret ut interpretetur. Nam si orem lingua, spiritus meus orat, mens autem mea sine fructu est. Quid est ergo? Orabo spiritu, orabo et mente: psallam spiritu, psallam et mente. »

Quandoquidem alii sine interprete non intelligent, vel quando quidem tot linguæ sunt, et unaquæque propriam distinctionem habet, ergo si nesciero virtutem vocis, id est si ignoravero vim propriam vocis quam profero, ut illi qui tantum dona linguarum habent, ero non intellectus, sed barbarus ei cui loquor, quem instruere debeo, quia non potero illi sensum dictorum meorum interpretari; et ille vicissim qui mihi loquitur, erit mihi barbarus, cum ignoret sententias vocum quas profert, nec valeat exponere mihi. Sic et vos eritis ad invicem barbari, si per incognitam linguam alter alteri locutus fuerit, et ita erit dissensio inter vos. Propterea non dissonantiam ignotarum linguarum, per quas discordia generetur, debetis appetere, sed unitatem intellectus, per quem communi lætitia gloriemini. Et quoniam estis æmulatores spirituum, id est desideratores spiritualium donorum, quærite ut his abundetis ad ædificationem Ecclesiæ, id est ut non solum linguis loquamini, sed etiam interpretemini ut ædificationem sumat Ecclesia, quoniam æmulatores estis spiritualium charismatum. Et ideo, id est ut Ecclesia ædificetur, qui loquitur lingua, oret ut interpretetur, id est oret ut accipiat donum interpretandi, ut proficiat cæteris studium ejus. Oret non labiis tantum, sed affectu cordis, ut exaudiri mereatur. Nam si etiam ego qui tantus sum, orem lingua, id est voce sola, spiritus meus, id est status oris mei orat dum loquor in oratione; sed mens mea est sine fructu, id est non capit fructum ex ipsa oratione, ad quam non est intenta. Hoc sæpe nobis accidit, dum psalmum vel orationem labiis proferimus, et mente quod os profert, non cogitamus. Et quando quidem mens quæ intus pio affectu non orat, quod os loquendo foris precatur, fructum orationis non habet, ergo quid est mihi faciendum? Quid est mihi utile?

Hoc scilicet, *Orabo spiritu per os prolato*, id est orabo sermone orans, *orabo et mente*, id est affectu mentis, *psallam*, id est psalmos dicam; *spiritu*, id est prolatione oris; *psallam et mente*, id est mentis attentione. Vel ita: Qui loquitur lingua, sic oret, id est sic loquatur ut interpretetur quod dicit. Nam me ipsum do vobis exemplum, quia si orem, id est si loquar lingua, spiritus meus orat, sed mens mea est siue fructu, id est sine intelligentia eorum quæ dico. Si enim dicam lingua quod non intelligo, velut afflatus spiritus in ecclesia loquor, et mens est sine fructu. Ignorat enim animus si lingua loquatur quam nescit, sicut solent Latini homines Græce cantare, oblectati sono verborum, nescientes tamen quid dicant. Ut supradictum est spiritus vocatur vis animæ quædam mente inferior, ubi corporalium rerum similitudines exprimuntur. Mens autem est illa superior pars animæ, ubi intellectus et ratio proprie sedem habent. Lingua quoque sicut et superius dictum est, designare potest quamlibet signorum prolationem priusquam intelligantur. Itaque dicitur: *Si orem lingua*, id est si loquar prolatione signorum adhuc non intellectorum, spiritus meus orat, id est illa pars animæ meæ tantum loquitur, in qua corporalium rerum imagines exprimuntur; sed mens, id est superior animæ meæ subtilitas, est sine fructu, quia nullam ibi refectionem intelligentiæ habet. Cum enim spiritus et inferior animæ natura loquitur proferendo signa quæ non intelligit, mens ad quam pertinet intellectus, nullum fructum inde reportat. Quid ergo est agendum? Hoc scilicet, quod me acturum dico. Quia orabo spiritu, orabo et mente, id est loquar spiritu et mente, ut signa rerum mihi formentur in spiritu, et eorum refuleat intellectus in mente, sicut et Daniel in spiritu vidit somnium regis (*Dan. II, 4*), et mente interpretationem ejus intellexit. Ita enim et ego faciam, quia et spiritu signa loquar, et mente sensum eorum intelligam. Spiritu dictiones loquar, mente sententias, et similiter psallam spiritu, id est consonantiam vocum psalmodiæ in spiritu resonabo, psallam et mente, id est consonantiam sententiarum attentione mentis modulabor, delectans me intelligentia spiritualium sensuum. Vel psallam spiritu, et psallam mente, id est concordiam in membris ecclesiæ componam, ut concordent et mente, ac de sua consonantia dulcem melodiam pulchre variatam expriment. Sic et vos spiritu et mente loqui debetis, ut et signa videatis, et sensum intelligatis, et cæteris exponatis; atque id est psallere spiritu et mente, ut psalmodiarum sensus in corde vestro resonet, quos ore canetis.

« Cæterum si benedixeris spiritu, quis supplet locum idiotæ? Quomodo dicit: Amen super tuam benedictionem? Quoniam quid dicas nescit. Nam tu quidem bene gratias agis, sed alter non ædificatur. »

Orare debetis mente et spiritu, ut et verba historiarum vel litteraturæ proferatis, et mysticum sensum

A exponatis ad instructionem audientium. Cæterum, id est sed si benedixeris spiritu, id est si aliqua dixeris, si Dei laudes dixeris, vel si benedictionem aliquam protuleris ignota lingua, quam non possis audientibus interpretari: quis supplet locum idiotæ? In spiritu, non in mente benedicit, qui bona quæ loquitur non intelligit, quoniam signa rerum cum non intelliguntur, et in spiritu sunt, non in mente. Idiota vero est ineruditus, qui nihil scit nisi quod ei proprietas naturæ dedit, quoniam *ιδιωτα* Græce, *proprietas* dicitur Latine. Locus autem idiotæ est, ut in novissimo benedictionis dicat, Amen, quod interpretatur *verum*, per hoc enim et consensum suum indicat, et benedictionem confirmat. Sed si benedixeris spiritu, id est si benedictionem dederis ignota lingua, ut nec tu sensum dictorum tuorum intelligas, nec aliis exponas, quis supplet locum idiotæ? id est quis loco idiotæ respondet Amen in fine sermonis? Nec sapiens hoc facere novit, nedum idiota. Quomodo enim dicit Amen super tuam benedictionem, cum nesciat quid dicas? Imperitus enim et absque litteris, audiens quod non intelligit, nescit finem orationis, et non respondet Amen, id est *verum*, ut confirmetur benedictio. Per hoc enim completur confirmatio precis, qui respondent Amen, ut omnia dicta veritatis testimonio in audientium mentibus confirmentur. Non poterit idiota respondere benedictioni tuæ quam non intelligit, nam tu quidem bene gratias agis Deo in illa benedictione, et bonum est quod loqueris, sed alter non ædificatur ex verbis tuis, quæ non intelligit. Ideo cum ad ecclesiam propter ædificationem conveniatis, ea debent in Ecclesia dici, quæ intelligantur ab hominibus et præstant ædificationem audientibus. Propterea qui loquitur ignota lingua, debet in ecclesia tacere, ut hi loquantur qui prosint audientibus.

« Gratias ago Deo meo, quod omnium vestrum lingua loquor. Sed in ecclesia volo quinque verba sensu meo loqui, ut et alios instruam, quam decem millia verborum in lingua. »

Proponit se exemplum, quod publice non debeant loqui linguis, in quibus accipientium non sit ædificatio, sicut ipse in ecclesia linguis non utitur, cum omnes eorum linguas noverit. Non vitupero, inquit, in vobis locutionem linguarum, eo quod hanc habere nequeam, sicut est consuetudinis quibusdam, ut invadeant quod ipsi non valent assequi. Nam *omnium vestrum lingua loquor* ego, id est nullus vestrum aliqua loquitur lingua qua et ego non loquar quoties volo. Et inde *gratias ago Deo meo*, qui mihi per donum gratiæ suæ concessit ut loqui possim linguis, quas inter vos omnes habetis. Sed quamvis tanta linguarum notitia divinitus sit mihi data in Ecclesia tamen cui debeo prodesse, *volo quinque*, id est pauca verba loqui meo sensu, id est quæ intelligam et exponam, ut et alios instruam *quam decem millia*, id est valde nimiam multitudinem, *verborum in lingua*, id est ut neque intelligam, neque alios doceam.

Quod ait, quinque verba et decem millia, vulgari consuetudine locutus est. Vel sicut nonnullis visum est per quinque verba, quinque libros Mosi designavit. Volo, inquit, in ecclesia loqui meo sensu, id est spirituali intelligentia quinque verba, id est quinque legis volumina, quam decem millia verborum, id est quam legis perfectionem in lingua, id est in prolatione signorum non intellectorum. Denarius enim propter Decalogum significat legem, millenarius perfectionem. Posuit autem Apostolus quam sine magis, ut notaret istam partem, cum qua jungitur quam, nullo modo esse amplectendam. Nam ubi sic ponitur quam, ostendit alteram partem posse stare, alteram vero minime.

« Fratres, nolite pueri effici sensibus, sed malitia parvuli estote, sensibus autem perfecti estote. In lege enim scriptum est, quoniam in aliis linguis et in labiis aliis loquar populo huic (Isa. xxviii), et nec sic audient me, dicit Dominus. Itaque linguæ in signum sunt non fidelibus, sed infidelibus, prophetiæ autem non infidelibus, sed fidelibus. »

Ideo etiam non debetis appetere loqui linguis tantum, quia hoc modo haberetis puerorum sensum, qui non attendunt quid sit aliis utile, sed quid se ipsos pueriliter delectet. Sed vos nolite effici pueri sensibus, ut pueriles sensus habeatis in appetitione linguarum, quibus tanquam puerorum ludis intendatis, non cogitantes quid prosit utilitatibus proximorum. Nolite esse pueri sensibus, sed estote viri. Qui enim non perdurant occurrere in virum perfectum, vel infirmitate virium, vel mentis levitate, mulieribus et parvulis comparandi sunt. Nolite sensibus esse pueri, id est nolite esse insipientes. Sed quia Dominus ait: « Nisi conversi fueritis et effecti sicut parvuli, non intrabitis in regnum cælorum (Matth. xviii), » malitia pueri estote: si vos delectat imitari pueros, non delectet imperitia, sed innocentia et humilitas. Malitia estote parvuli. Qua malitia maxime, nisi superbiæ? Ipsa enim de vana granditate præsumens, non sinit hominem ambulare per arctam viam et intrare per angustam portam; puer autem facile intrat per angustam. Et ideo nemo nisi ut puer, intrat in regnum cælorum. Estote ergo parvuli malitia, id est deponite omnem granditatem quam malitia superbiæ facit, ut sitis remoti ab omni malitia sicut pueri, studentes his quæ faciunt ad utilitatem fratrum, quod est perfectio sensus. Itaque nolite pueri effici sensibus pro imperitiam, ut sicut pueri non intelligatis quod dicitis; sed malitia parvuli estote, ut sitis immunes ab omni malitia velut pueri; sensibus autem perfecti estote, ut intelligatis plene quod dicitis, et quid ad instructionem Ecclesiæ sit necessarium sciatis. Nec debetis pueriliter appetere loqui linguis quas non intelligitis, quia linguæ in signum infidelibus dantur, quod vos jam non estis; et non ad ædificationem, quæ necessaria vobis est jam fidelibus, et hoc est: Nolite quærere linguas, quia in lege, id est in libro Isaia, scriptum est (Isa. xxviii), quoniam in aliis linguis,

id est diversis generibus linguarum, et in aliis labiis, id est verbis spiritualibus, loquar per apostolos huic populo Judæorum, et nec sic exaudient me, qui per legem et prophetas nunquam me voluerunt exaudire, dicit Dominus. Vel in aliis linguis loquar, id est Novum Testamentum prædicabo; et in aliis labiis, id est Vetus Testamentum spiritualiter exponam, quod illi carnaliter exponebant. Hoc est enim aliter eis loqui, quam se legis veteris habent verba, dum audiunt Sabbatum solvi, neomenias evacuari, circumcisionem cessare, sacrificia immutari, escas dudum prohibitas licere edere, Christum de Deo Deum prædicari. Hoc est aliis linguis et aliis labiis loqui, propter illam varietatem linguarum, quæ per apostolos in die Pentecostes sonuit (Act. ii). Sed nec sic infideles Judæi voluerunt exaudire Deum, ut ei per fidem et devotam conversationem obedi-
rent. Videte ergo ne et vobis loquatur Deus in variis linguis, et vos non exaudiat verba præceptorum ejus faciendo. Et quandoquidem illis, qui non exaudierunt ut ad finem converterentur, locutus est Dominus in aliis linguis, itaque linguæ sunt in signum non fidelibus, qui credunt Deum omnia posse; sed infidelibus qui hoc non credunt. Nam idcirco sunt exteriora miracula, ut mentes hominum ad interiora perducant, quatenus per hoc quod mirum visibiliter ostenditur, ea quæ invisibilia sunt, mirabiliora credantur. Linguæ igitur datæ sunt in signum, id est ut sint signum invisibilis præsentia Dei, quia infideles per miraculum linguarum potentiam Dei, qui eis prædicatur, adesse præsentem intelligunt. Sed prophetiæ non sunt signum infidelibus, quia infideles non credunt futura, quæ necdum videre possunt, si eis per prophetiam prænuntientur. Et idcirco prophetiæ non infidelibus datæ sunt, qui prophetis ventura prædicentibus credere nolunt, sed fidelibus, qui futurorum prænuntiationi prudenter acquiescunt; et ideo fideles non linguas appetere debent, sed prophetias. Vel nomine prophetiarum interpretationes Scripturarum designari possunt. Prophetiæ ergo non sunt signum infidelibus, sed fidelibus, quia infideles per expositionem Scripturarum quibus nullam fidem adhibent, nequaquam Deum cognoscunt, fideles autem secreta ejus ibi mysteria intelligunt. Major autem et utilior est prophetia, id est prophetarum interpretatio, quæ fidelibus prodest et semper est opus, quam linguarum locutio, quæ propter infideles ad tempus data est.

« Si ergo conveniat universa Ecclesia in unum, et omnes linguis loquantur, intrent autem idiotæ aut infideles, nonne dicent quod insanitis? Si autem omnes prophetent, intret autem quis infidelis aut idiota, convincitur ab omnibus, judicatur ab omnibus. Occulta enim cordis ejus manifesta fiunt, et ita cadens in faciem adorabit Deum, pronuntians quod vere Deus in vobis sit. »

Alia ratio cur non debeat loqui linguis, sed potius prophetare. Quia linguæ in signum sunt infidelibus, non in ædificationem fidelibus, prophetiæ

vero fideles semper ædificant, ergo si conveniat in unum universa Ecclesia, id est si coadunetur in unum universa fidelium congregatio, et omnes ibi sine interprete loquantur linguis, sed intrent idiotæ vel imperiti vel infideles, nonne dicent quod insanitis quasi arreptitii, cum alter alterum non intelligat? Dicent utique vos insanire, cum videant locutionem vestram nemini prodesse, sed tumultum quemdam incognitum fieri, velut phrenesim sustinentium. Et sic præbetis vos illis derisui, quos exemplo vestro debetis convertere. Sed si omnes in Ecclesia prophetent, id est ventura vel occulta per prophetiam manifestent, intret autem ad eos aliquis infidelis vel idiota, vincitur ab omnibus de suo errore quem non valet negare contra eos qui cor ejus per spiritum prophetiæ intuentur, et judicatur ab omnibus, id est damnabilis ostenditur, dum unusquisque dicit de eo quam reus sit, et occulta cordis ejus sunt manifesta, vel cogitationes ejus deteguntur a prophetantibus, et ita cum viderit arcana suæ mentis per Spiritum sanctum, qui in vobis loquitur, esse denudata cadens in faciem, id est humilians se, conversus ad pœnitentiam tam manifesta Dei præsentia superatus, adorabit Deum, id est Spiritum sanctum, qui cordis ejus occulta sicut Deus per vos patefacere potuit, pronuntians oris confessione quod intelligit corde, scilicet vere Deum in vobis esse, qui cordium alienorum secreta per vos rimatur. Notandum quia proprie idcirco dicatur prophetia, quoniam prædicat futura. Sunt tamen tria prophetiæ tempora, præteritum, præsens et futurum. Prophetia enim de præterito, ubi de casu primi angeli dicitur: « Quomodo cecidisti de cælo Lucifer, qui mane oriebaris? (Isa. xiv.) » Prophetia de futuro est: Dominus ad judicium veniet cum senioribus populi sui (Isa. iiii.) » Prophetia vero de præsentibus Apostoli verbis ostenditur. Cum enim dicitur: Occulta cordis ejus manifesta fiunt, profecto monstratur quia per hunc modum prophetiæ spiritus non prædicat quod futurum est, sed ostendit quod est. Quo autem pacto dicitur prophetiæ spiritus, qui nihil futurum indicat, sed præsens narrat? Sed recte prophetia dicitur, non quia prædicat ventura, sed quia prodit occulta. Rem quippe quamlibet sicut ab oculis nostris subtrahunt tempora in futuro, ita ab oculis nostris in præsentibus subtrahit causa. Ventura enim res occultatur in futuro tempore, præsens autem cogitatio absconditur in latenti corde.

« Quid est ergo, fratres? Cum convenitis, unusquisque vestrum psalmum habet, doctrinam habet, apocalypsim habet, linguam habet, interpretationem habet. Omnia ad ædificationem fiant. »

Jam incipit determinare, quomodo linguis sit utendum; quandoquidem hæc quæ diximus, eveniunt de locutione linguarum, ergo quid est agendum, o fratres? Ad ædificationem exercendæ sunt ut cætera. Nam cum convenitis in Ecclesia, ubi ædificationem audientium operari debetis, unusquisque ve-

strum habet unde possit aliis proficere. Ideo nullus se excuset. Alius enim habet psalmum, id est laudem Dei per canticum; alius habet doctrinam, id est sensuum expositionem per spiritualem prudentiam, qua se et alios de moribus instruere valeat; alius habet apocalypsim, id est revelationem occultorum quæ sibi Spiritus sanctus ostendit; alius habet linguam. Hoc idcirco dixit, ut eos qui linguis loqui poterant, non contristaret. Permisit enim eos loqui linguis, ita tamen, ut interpretatio sequeretur. Et ideo subjecit, interpretationem habet. Quod propterea dixit, ut si interpret adesset, daretur locus loquenti linguis. Non dixit quod unusquisque haberet hæc omnia, sed ostendit quia non erat quisquam in eis, qui horum aliquid non haberet. Talis enim locutionis hujus est sensus, ut qui intelligit psalmum, loquatur de psalmo, qui habet scientiam docendi, doceat: qui habet apocalypsim, id est revelationem aliquam mysteriorum, dicat quæ sibi revelata sunt; et cætera similiter, ut nihil sit in eis quod non alterutrum ædificet. Omnia, inquit, ad ædificationem fiant. Conclusio hæc est, ut nihil incassum in Ecclesia geratur, sed magis laboretur, ut et imperiti proficiant. Et idcirco omnes paratos vult convenire diversis donis spiritualibus, ut ipsa aviditate mentis vigilantes, invicem se exhortari, meliora bona commulentur ad illuminationem fratrum.

« Sive lingua quis loquitur, secundum duos aut (ut multum) tres; et per partes, et unus interpretetur. Si autem non fuerit interpret, taceat in Ecclesia, sibi autem loquatur et Deo. »

Incipit ostendere quomodo hæc omnia fiant ad ædificationem. Omnia, inquit, fiant ad profectum, sive linguarum locutio sive cætera, et hoc est. Sive quis lingua loquitur, secundum duos fiat locutio, aut ut multum, dicam, secundum tres fiat, id est duo vel tres loquantur linguis, et non plus, ne occupent diem, et non sit locus loquendi prophetis, qui maxime sunt utiles. Et per partes loquantur, id est non simul omnes, ne insanire videantur, sed singuli, id est unus post alium, sive in diversis ecclesiæ locis; et unus interpretetur, hoc est aliquis exponat populo verba illius loquentis. Consuetudo tunc erat, ut quando conveniebant in Ecclesia, vel in aliquo loco propter doctrinam, illi qui scientiam linguarum acceperant, loquerentur et alii exponerent, et hoc fiebat in Ecclesia per catervas. In una parte Ecclesiæ erat quædam collectio, et in altera parte alia; et unaquæque pars suum babeat loquentem, et suum interpretem: et hoc est quod Apostolus dixit, ut in una ecclesia non loquantur nisi duo vel tres; et per partes, ut ubi unus loquitur, non loquatur alter; vel unus post alterum loquatur, et unus interpretetur unicuique. Sed si non fuerit interpret, id est qui interpretetur, taceat linguis loquens in Ecclesia, ubi non debet audiri locutio nisi quæ ædificet; sed sibi loquatur, id est intra se tacite oret, et loquatur Deo, qui audit muta omnia. Sibi loquitur, qui ex his

quæ dicit, compungitur: et Deo loquitur, quia **A** Deum orat vel laudat.

« Prophetæ autem duo aut tres dicant, et cæteri dijudicent. Quod si alii revelatum fuerit sedenti, prior taceat. Potestis enim omnes per singulos prophetare, ut omnes discant et omnes exhortentur, et spiritus prophetarum prophetis subjectus est. Non enim dissensionis est Deus, sed pacis, sicut et in omnibus Ecclesiis sanctorum doceo. »

Sicut de his qui lingua loquuntur dixi, ita et de prophetis dico, ut *duo aut tres prophetæ dicant*, id est loquantur ad populum in diversis Ecclesiæ partibus. Duo vel tres loquantur, quia sufficit sermo tot hominibus, et in ore duorum vel trium stat omne verbum; cæteri vero prophetæ dijudicent verba eorum, discernentes a bonis meliora et a melioribus optima (*Deut. xviii; Matth. xvii; Joan. viii; I Cor. xiii*). Sed si interim per Spiritum sanctum fuerit revelatum aliquid melius alii sedenti qui audiebat, prior qui loquebatur, taceat, ut et iste loquatur quod sibi divinitus est revelatum. Sæpe enim juniori revelat Dominus quod melius est; et ideo permittat eum prior loqui. Nec sibi putet injuriam fieri, si tacuerit ut inferior loquatur, quia plerumque datur inferiori quod non est concessum superiori. Ideo loqui debet ille cui revelatum est, quia *potestis omnes prophetare*, tam ille qui prius accepit revelationem, quam ille qui prior cœperat loqui. Omnes inquam, potestis prophetare, non quidem simul, ne conturbatio fiat, sed *per singulos*, alius post alium: ut omnes etiam majores discant quæ ignorant, et omnes exhortentur, id est moneantur in his quæ, cum intelligunt, negligunt. Et debet loquens cedere sedenti ut loquatur, quia *et spiritus prophetarum est subjectus prophetis*, id est in hoc facit voluntatem prophetarum, ut quando vult propheta, permittat eum tacere; et rursum quando vult, permittat eum loqui. Ne quis diceret se non posse tacere, quoniam spiritus ministrans sibi cogeret eum, dicitur quia spiritus prophetarum prophetis subjectus est, ut in sua habeant potestate quando taceant et quando loquantur. Subjectus est spiritus prophetis, ut quando volunt, tacere possint; et quando volunt, loqui; nec cogit eos ut Pythonicus aliqua clamare vel subtacere. Unde si prior propheta non cedit alii, videtur non esse in eo Spiritus Dei. Vere subjectus est eis spiritus ut pro voluntate sua possint ratione tacere vel loqui, quia *non est Deus dissensionis, sed pacis*, id est Spiritus sanctus qui Deus est et prophetas replet, non est auctor dissensionis et discordiæ, sed pacis et concordia. Esset enim auctor dissensionis, non pacis, si et eum qui prior cœperat loqui, non sineret tacere; et hunc qui interim repentina revelatione impletus est cogeret loqui. Inde enim discordia et dissensio nasceretur. Sed iste spiritus pacem generat, non discordiam, ut alter propheta rationaliter cedat alteri, non simul ambo loquantur. Deus, inquam, est pacis, non discordiæ, ut quicumque Deo

PATROI. CLXXXI.

A adhærere cupiunt, pacem sequantur, dissensionem fugiant, *sicut* ego doceo in omnibus ecclesiis sanctorum. Et ideo si vultis sanctorum ecclesiis quæ sunt per orbem, communicare, pacem in Deo vicissim servate sicut illæ. Vel qui linguarum notitiam acceperunt, qui prophetiæ gratiam habent, ita loquantur in ecclesia sicut nunc docui, et sicut in omnibus ecclesiis sanctorum doceo. Ac si dicatur: Non est singulare vel novum quod nunc dixi, ideo firmiter tenete quod omnes tenent ecclesiæ.

« Mulieres in ecclesiis taceant. Non enim permittitur eis loqui, sed subditas esse, sicut et lex dicit (*Gen. iii*). Si quid autem volunt discere, domi viros suos interrogent. Turpe est enim mulieri loqui in ecclesia. An a vobis verbum Dei processit? an in vos solos pervenit? »

Quamvis dixerim quia potestis omnes prophetare, mulieres tamen *in ecclesiis taceant*. Nunc redit Apostolus ad id quod supra prætermiserat. Superius enim velari mulieres in ecclesia præcepit, modo ut quietæ sint et verecundiæ ostendit, quia contra ordinem est naturæ vel legis, ut in conventu virorum feminæ loquantur. *Non enim* ab aliqua auctoritate permittitur eis in ecclesia loqui, sed præcipitur eas subditas esse, sicut lex in Genesi dicit: « Sub viri potestate eris, et ipse dominabitur tui (*Gen. iii*). » Lex ista specialis est mulieribus imposita, et ob hoc Sara subjecta erat Abrahæ, dominum eum vocans (*Gen. xviii; I Petr. iii*). Duabus de causis jubetur mulier esse subjecta, quia ex viro est, et per ipsam intravit peccatum (*Gen. ii*). Jure enim tacet inter viros, quæ cum loqueretur viro suo, suasit peccatum (*II Cor. ii; Gen. iii*). Non loquantur in ecclesia; sed si quid volunt discere, interrogent domi viros suos cum disciplina et subiectione. Nam *turpe est mulieri in ecclesia loqui*. Turpe est, quia contra disciplinam est, ut in domo Dei, qui eas viris subjectas esse præcepit, de lege loqui præsumant, cum sciant illie viros habere primatum et sibi magis competere ut in domo Dei precibus vacent, et retinentes linguam, aures aperiant, ut audiant quomodo misericordia Dei mortem vicit per Christum, quæ per eas regnavit. Nam si audeant in ecclesia loqui, dedecus est, quia idcirco velantur ut in humilitate appareant. Si autem inverecunde se ostendunt, opprobrium est viris, quia in mulierum insolentia etiam mariti notantur. Hæc quæ vobis trado, tenere debetis, non vestra instituta meis traditionibus præferre, et cæteris fidelibus quasi fontem religionis velle tradere. Quia *an processit a vobis verbum* prædicationis Dei? Non utique, sed a nobis ad vos venit, quoniam a nobis qui de circumcisione sumus, cœpit evangelica prædicationis, non a vobis; nec beneficium vos dedistis, sed accepistis. Nec quasi singulariter electi debetis gloriari, aut de singulari scientia extolli. Quia nunquid *in vos solos pervenit* verbum Dei? Non utique, sed in alios per orbem similiter pervenit, et ideo nolite velle fieri magistri, constituendo nova-

traditiones vestras, sed tenete quod ubique tenent alia gentium Ecclesiae.

« Si quis videtur propheta esse aut spiritualis, cognoscat quæ scribo vobis, quia Domini sunt mandata. Si quis autem ignorat, ignorabitur. »

Ego quidem talia vobis scribo. *Et si quis inter vos est, qui videtur esse propheta, id est præsciens futurorum, aut spiritualis, id est, spiritualiter vivens, quamvis non habeat notitiam futurorum, cognoscat ista quæ scribo vobis quia non sunt a me, sed sunt mandata Domini.* Hoc dixit Apostolus, aliter ista quæ scribebat a parvulis, et aliter a capacioribus posse intelligi sciens. Solidam enim voluit esse scientiam spiritualium, ubi non solo accommodaretur fides, sed certa cognitio teneretur. Ac per hoc parvuli ea credebant, quæ spirituales insuper cognoscebant. Coercet etiam his verbis et ad pacificum ordinem revocat inquietos, tanto ad seditionem faciliores, quanto sibi videbantur spiritu excellere, cum superbiendo cuncta turbarent. Si quis, inquit, videtur propheta esse aut spiritualis, cognoscat quæ scribo vobis, quia Domini sunt mandata. Si quis videtur esse, utique non est. Nam qui est, sine dubitatione cognoscit. Nec admonitione, nec coercitione opus habet, quia omnia judicat, et a nemine judicatur. Illi ergo seditiones, et perturbationes in Ecclesia faciebant, quia videbantur esse quod non erant. Et hos docet cognoscere Domini mandata esse quæ scribit. Præcipue tamen pseudoapostolos, a quibus fuerant depravati, in hac sententia tangit, qui pro desideriis hominum non divina, sed terrena docebant, ideo hic nihil suum tradere se dicit, sed Domini, ut quibus suadet, Deo acquisiti, non hominibus videantur. Cognoscat, inquit, ea quæ scribo vobis de linguis, prophetis ac mulieribus, et de cæteris spiritualibus, quia sunt Domini mandata. Sed si quis hæc ignorat, ignorabitur a Domino, id est improbabitur cum illis quibus dicitur: « Non novi vos (Matth. vii), » id est non novi esse meos, vel non novi inter prædestinatos. Nam hoc dicitur contra pusillos, qui in cruce Christi gloriantur, et tamen ignorant ea quæ de divinis mysteriis subtilissime disseruntur. Non enim perit unus de pusillis (Matth. x; Luc. xii), pro quibus mortuus Christus. Sed sicut præcedentia et subsequenta declarant, de his quæ fidem et mores multorum ædificarent, dixit Apostolus, quod ignorans ea ignorabitur, id est ut linguis prophetia præponeretur, ut non perturbate illa gererentur, quasi prophetiæ spiritus etiam invitos loqui cogeret, ut mulieres in Ecclesia tacerent, ut omnia honeste et secundum ordinem fierent. Hæc et his similia qui ignorat, ignorabitur, non illa secreta mysteria, quæ vix ad paucorum intelligentiam pertinent.

« Itaque, fratres, æmulamini prophetare, et loqui linguis nolite prohibere. Omnia autem honeste et secundum ordinem fiant in vobis. »

Quandoquidem prophetia tam utilis est, ut supra demonstraverimus, itaque, o fratres! æmulamini, id

est desiderate prophetare ad multorum ædificationem; et quamvis linguae parum prosint, nolite tamen prohibere loqui linguis ne fiat dissensio. Sed omnia tam hæc quam alia, fiant in vobis honeste, id est cum pace et disciplina, et secundum ordinem, ut alia prius et alia posterius agantur, et prophetia linguis præferatur (Galat. i).

CAPUT XV.

« Notum autem facio vobis Evangelium, fratres, quod prædicavi vobis, quod et accepistis, in quo et statis, per quod et salvamini, qua ratione prædicaverim vobis si tenetis, nisi frustra credidistis. »

Hic ingreditur Apostolus reprehendere Corinthios, qui, seducti a falsis apostolis, dubitabant de resurrectione communi, existimantes neminem resurrecturum, cum viderent corpora mortuorum sepeliri et putrefieri. Hunc errorem destruit apostolus, probans mortuos in fine sæculi resurrecturos, et hoc facit per resurrectionem Christi, de qua certissimum erat illis. Hactenus, inquit, de spiritualibus donis disserui. Sed modo notum facio vobis Evangelium, id est bonum nuntium, quo justi nuntiantur resurrecturi ad gloriam, quod non est novum, sed olim vobis a me prædicatum: quod et vos accepistis, id est dignum acceptione judicastis, et devote illud suscepistis, in quo etiam et statis, id est firmiter perduratis. Quod enim dicit, in quo et statis, illis dicit, qui erant firmi in fide resurrectionis. Promiscuis enim loquitur, ut et hi qui in fide sunt, gaudeant; et qui nesciunt, corripere se debeant et corrigantur. Statis, inquit, in Evangelio resurrectionis vos, qui in fide constantes estis per quod et salvamini, id est ad salutem æternam pertingitis, cum de hac vita migratis, vel salvamini jam ex certitudine spei per illud. Salvamini, dico, si memoria et fide retinetis qua ratione prædicaverim vobis, id est quomodo ea ratione qua Christus resurrexisset creditur, docuerim resurrectionem mortuorum. Hoc retinetis sive tenetis, nisi frustra credidistis. Id est, aut tenetis resurrectionem mortuorum aut incassum fidem suscepistis, quæ non suscipitur nisi spe resurrectionis. Omnis enim spes credentium in hoc est, quia mortui resurgent. Quod qui non sperat, frustra etiam cæteras partes fidei suscipit.

« Tradidi enim vobis in primis quod et accepi, quoniam Christus mortuus est pro peccatis nostris secundum Scripturas (Isa. liii), et quia sepultus est, et quia resurrexit tertia die secundum Scripturas (Joan. ii; Ose. vi). »

Nunc primo ponit hoc quod erat certissimum, per quod consequenter et illud probet, quod habebatur dubium. Vere, inquit, notifico vobis Evangelium de resurrectione, quod dudum prædicavi vobis, et ostendo qua ratione illud prædicaverim. Nam tradidi in primis, id est inter maxima fidei sacramenta vel in primis, id est in exordiis fidei, quod et ego ab ipso Domino occulta inspiratione accepi, non per me inveni, quoniam Christus mortuus est non pro sua

necessitate, sed pro peccatis nostris, et hoc secundum A Scripturas propheticas, quæ id prænuntiabant, et tradidi vobis quia post mortem sepultus est, ut Scripturæ prædixerant; et quia resurrexit tertia die, id est tam cito ut ea potestate credatur posse non suscitare. Pro peccatis nostris mortuus est et sepultus, sicut per Isaiam dicit de illo Pater: « Propter scelus populi mei percussi eum, et dabit impios pro sepultura, et divitem pro morte sua (Isa. LIII). Qui et resurrexit die tertia sicut Osee prædixerat: Vivificabit nos post duos dies, in die tertia suscitabit nos (Osee. VI). » Nam in ejus resurrectione vivificati sumus, et suscitati, sicut alibi dicit Apostolus iste: « Convivificavit nos Christo, et conresuscitavit, et consedere fecit in cælestibus (Ephes. II). » Si ergo mortuus et sepultus resurrexit, eadem ratione debemus credere mortuos et sepultos resurgere.

« Et quia visus est Cephæ, et post hoc undecim. « Deinde visus est plus quam quingentis fratribus simul, ex quibus multi manent usque adhuc, quidam autem dormierunt. Deinde visus est Jacobo, et deinde apostolis omnibus (Joan. XX; Luc. XXIV). »

Tradidi vobis, secundum testimonia prophetarum, veraciter surrexisse Christum. Et etiam in argumentum certioris fidei tradidi vobis quia visus est Cephæ, id est Petro, priusquam aliis viris in die resurrectionis appareret, et post hoc undecim apostolis ad vesperum, qui se metu Judæorum clausurant. Sed cum Jadas mortuus esset, et juxta Joannem Thoma deesset, et quomodo tunc Dominus undecim visus est, nisi per synecdochen accipiatur? Ubi enim pars major est aut potior, solet ejus nomine etiam illud comprehendere quod ad ipsum nomen non pertinet. Quanto magis ergo Thomas, qui unus erat ex illis undecim, potuit in undenario eorum numero comprehendere, quamvis defuisset quando Dominus venit? Deinde visus est plus quam quingentis fratribus simul positus, de quibus evangelium tacet, ex quibus multi manent, qui testes sunt quærentibus, usque adhuc Jesu testimonio permanentes, quidam autem eorum in somno mortis dormierunt, quia rursus evigilaturi sunt. Deinde visus est Jacobo fratri Domini, propria manifestatione singulariter. Et de hac re tacent quatuor evangelistæ. Sed in Evangelio quod appellatur secundum Hebræos, quod et in auctoritate fuit apud antiquos, narratur per resurrectionem quia Dominus venit ad Jacobum Justum et apparuit ei. Juraverat enim Jacobus se non comesturum panem ab illa hora qua biberat calicem Domini, donec videret eum resurgentem a mortuis. Rursumque post paululum: « Asserte, ait Dominus, mensam et panem. » Statimque additur: « Tulit, panem et benedixit ac fregit, et dedit Jacobo Justo, et dixit ei: Frater mi, comede panem tuum, quia surrexit Filius hominis a dormientibus (Luc. XXIV; Act. I). » Deinde visus est apostolis omnibus in monte Galileæ, vel in loco ascensionis.

« Novissime autem omnium, tanquam abortivo visus est et mihi (Act. IX). Ego enim sum minimus

apostolorum, qui non sum dignus vocari Apostolus, quoniam persecutus sum Ecclesiam Dei. Gratia autem Dei sum id quod sum, et gratia ejus in me vacua non fuit, sed abundantius illis omnibus laboravi (Ephes. III). Non ego autem, sed gratia Dei mecum. Sive enim ego, sive illi, sic prædicavimus, et sic credidistis. »

Ita ut dixi, visus est cæteris. Sed novissime omnium visus est et mihi de cælo vocans me post ascensionem suam, vel dum orarem in templo. Mihi dico, tanquam abortivo, id est abortivo simili, quia sicut abortivus quadam naturæ violentia ante tempus compellitur nasci, ita ego per terribilem Domini visionem et luminis oculorum amissionem coactus sum, antequam vellem, exire de cæco synagogæ utero, et ad lucem fidei atque libertatem prodire. Novissime post omnes mihi visus est, ut recentiore intelligatis meam visionem, et habeatis inde majorem certitudinem. Nec mirum si novissime visus est mihi. Nam ego sum minimus apostolorum. Minimus tempore, non dignitate. Minimus humilitate, non operatione. Minimus in me, magnus in Domino, qui non dignus sum vocari apostolus, quia ex præcedenti vita mea nihil boni habeo, sed multa mala me fecisse reminiscor, pro quibus eram dignus pœna, non apostolica gratia, quoniam persecutus sum Ecclesiam Dei. Apostolus iste, cum cæterorum sanctorum sollicitudinem in prædicatione robustius laborando transenderet, ut ab elatione se premeret, et vires suas in humilitatis gremio nutrirer, antiquæ crudelitatis suæ non immemor, aliorum apostolorum innocentiam contemplatus: Ego, inquit, sum minimus apostolorum, quia non sum dignus vocari apostolus, quia persecutus sum Ecclesiam Dei. Consideravit enim apostolorum, ut diximus, innocentiam, et propter præcedentem malitiam vilis in eis oculis facta est omnis, quam exhibebat in Ecclesia, sollicitudo sua. Et quam multos ex accepto intellectu præcederet, non attendit, quia illorum innocentiam pensans, persecutorum aliquando fuisse se doluit. In cujus verbis quid aliud quam duritia nostræ mentis accusatur? Quia ipse plangebat quod ante baptismum commiserat, nos vero et post baptismum multa commisimus, et tamen flere recusamus. Non sum, inquit, dignus vocari apostolus, sed gratia Dei sum id quod sum. Quod est dicere: Per merita mea nihil boni consecutus sum, sed potius gratia, id est gratuito Dei munere datum est mihi hoc esse quod sum et in sanetitate et in scientia et in apostolatu. Et hæc gratia ejus postquam mihi data est, non fuit in me vacua, id est otiosa, sed bonis operibus plena, quia in prædicatione laboravi abundantius omnibus illis apostolis qui me præcesserunt. Illi enim prædicaverunt Judæis, qui per legem et prophetas erant instructi, et auctoritate Scripturarum convincebantur ut ad novam gratiam converterentur; ego autem graviori labore gentibus quæ nihil de Deo audierant, nullisque divinorum librorum auctoritatibus acquiescebant, ad fidem converti. Illi stipendium ab illis

quibus prædicabant, acceperunt; ego autem nihil ab auditoribus meis accepi, sed ex labore manuum mearum vixi. Postremo nullus eorum in tot locis prædicavit, neque tot epistolas omnes illi scripserunt. Abundantius itaque in apostolatu laboravi ego quam illi. Sed non ex me ego hoc feci, sed potius gratia Dei mecum operando hoc egit. Notandum quod superna pietas prius agit aliquid in nobis, sine nobis, ut, subsequente quoque nostro libero arbitrio, bonum quod jam appetimus, agat nobiscum. Quod tamen per impensam gratiam in extremo iudicio ita remunerat in nobis, ac si solis processisset ex nobis. Quia enim divina nos bonitas, ut innocentes faciat, prævenit, apte nunc Apostolus ait: *Gratia Dei sum id quod sum*. Et quia eadem gratia nostrum liberum arbitrium sequitur, adjungit: *Et gratia ejus in me vacua non fuit, sed abundantius illis omnibus laboravi*. Qui dum se de nihil esse conspiceret, ait: *Non autem ego*. Et tamen quia se esse aliquid cum gratia invenit, adjunxit: *Sed gratia Dei mecum*. Non enim diceret, mecum, si cum præveniente gratia subsequens liberum arbitrium non haberet. Ut ergo sine gratia nihil esse ostendat, ait: *Non ergo*. Ut vero se cum gratia operatum esse per liberum arbitrium demonstraret, adjungit: *Sed gratia Dei mecum*. Bona itaque nostra, et Dei sunt et nostra. Quia ipse nos prævenit ut velimus, aspirando, qui adjuvando subsequitur ne inaniter velimus, sed possimus implere quod volumus. Præveniente ergo gratia et bona voluntate subsequente, hoc quod Dei donum est, fit meritum nostrum. Quod bene nunc Apostolus explicat, dicens: *Abundantius illis omnibus laboravi*. Qui ne videretur suæ virtuti tribuisse quod fecerat, adjunxit: *Non autem ego, sed gratia Dei mecum*. Quia enim cælesti dono præventus est, quasi alienum se a bono suo opere agnovit, dicens: *Non autem ego*. Sed quia præveniens gratia liberum in eo arbitrium fecerat in bono, quo libero arbitrio eandem gratiam subsecutus est in opere, adjecit: *Sed gratia Dei mecum*. Ac si diceret: In bono opere laboravi, non ego, sed et ego. In eo enim quod solo Dei dono præventus sum, non ego; in eo autem quod donum voluntate subsecutus sum, et ego. *Laboravi*, inquit, *plus illis omnibus*. Unde apparet et me et illos in prædicatione laborasse. Nam sive ego, sive illi, sic prædicavimus ut supra memini, id est Christum pro peccatis nostris mortuum, tertia die resurrexisse, et frequenter apparuisse multis. Sic prædicavimus Christi mortem, et resurrectionem secundum testimonia prophetarum, sive ego, sive illi, quia concorditer eandem rem prædicamus ego et illi, nec est in nostra prædicatione discordia, sed pax consensionis et societas charitatis. Sive igitur ego, sive illi, sic prædicavimus Christum resurrexisse, et vos sic credidistis. Unde magis apparet quantum desipiatis, quia cum manifesta sit credulitas hæc apud omnes ecclesias, quam et vos suscepistis, nunc ab ea propter falsos apostolos recessistis.

« Si autem Christus prædicatur quod resurrexit a mortuis, quomodo quidam dicunt in vobis quoniam resurrectio mortuorum non est? Si autem resurrectio mortuorum non est, neque Christus resurrexit. Si autem Christus non resurrexit, inanis est prædicationis nostra, inanis est et fides vestra. »

Modo venit ad rem, propter quam locutus est de Domini resurrectione. Postquam enim multis rationibus probavit Christum resurrexisse, ingreditur per ejus resurrectionem probare cæterorum mortuorum resurrectionem. Ego, inquit, et cæteri apostoli prædicamus Christum resurrexisse, et vos pro certo sic credidistis. Sed si Christus prædicatur quod resurrexit a mortuis, quomodo, id est qua ratione quidam in vobis, id est apud vos, dicunt quoniam resurrectio mortuorum non est futura? Si enim Christus resurrexit, concedendum est necessario quia resurgent et mortui. Sed hoc illi negabant, qui per falsos prophetas depravati erant. Nam et prudentes sæculi stultum judicant, cum audiunt resurrectionem mortuorum. Ideoque nonnulli Corinthiorum, ne stulti judicarentur ab illis, dicebant resurrectionem mortuorum futuram non esse. Sed si resurrectio mortuorum non est futura, neque Christus resurrexit. Nam et ipse veraciter mortuus fuit, utpote verus homo. Et si cæteri non resurgent, nec ipse resurrexit. Nam ejus resurrectio resurrectionem cæterorum facit. Sicut enim gratis mori non potuit, ita nec gratis surrexit, quia sicut mortuus est ut mortem nostram destrueret, ita resurrexit ut nos resuscitaret. Cum igitur incassum resurgere non potuerit, si nos non resuscitat, nec ipse resurrexit. Si ergo generalis mortuorum resurrectio non est, neque Christus resurrexit. Quisquis itaque mortuos negat resurrecturos, Christum quoque negat resurrexisse. Si Christus non resurrexit, ergo audite quanta inde sequantur inconvenientia. Si enim ipse non resurrexit, ergo inanis, id est inutilis et absque veritatis pondere est prædicationis nostra, qui prædicamus eum resurrexisse; et inanis est fides vestra, qui nobis prædicantibus credidistis eum resurrexisse, et membra ejus in fine resurgent. Hoc Corinthii crediderant, Apostolo docente, quia sicut Christus resurrexit, ita et mortui resurgent, et hac spe attracti fuerant ad fidem. Quod utique nunc ad detrimentum illorum proficere asserit, si crediderint quod futurum non est. Et pudoris est, ut aliquis profiteatur hoc se credidisse quod falsum est. Et verecundiam ergo illis incutit, et labores eorum dicit infructuosos, si quod a falsis apostolis audierunt verum, est quia mortui non resurgent, quod utique nemo patitur audire, ut videntes hoc contra se esse, reverterentur ad primam fidem. Inanis, inquit, non solum prædicationis nostra est, sed et fides vestra, id est in vanum et sine fructu remunerationis et nos prædicavimus resurrectionem, et vos credidistis, si mortui non resurgent, quos necesse est resurgere,

si Christus resurrexit : non enim resurrexit, si et illi non resurgent.

« Invenimus autem et falsi testes Dei, quoniam testimonium diximus adversus Deum quod suscitaverit Christum, quem non suscitavit, si mortui non resurgent. Nam si mortui non resurgunt, neque Christus resurrexit. Quod si Christus non resurrexit, vana est fides vestra. Adhuc enim estis in peccatis vestris. Ergo et qui dormierunt in Christo, perierunt. Si in hac vita tantum in Christo sperantes sumus, miserabiliores sumus omnibus hominibus. »

Non solum prædicatio nostra et fides vestra est inanis, id est cassa et falsa et infructuosa, si Christus non resurrexit, ut per eum cæteri resurgerent ; sed etiam nos apostoli, quibus omnes credunt, invenimur falsi testes Dei super hac re. Et utique non minori, sed fortassis etiam majori scelere in Deo laudatur falsitas, quam vituperatur veritas. Falsi testes, si hoc est, comprobamur, quoniam diximus testimonium adversus Deum, id est contrarium Deo cui omnis falsitas est contraria, asserentes quod suscitaverit Christum, quod nequaquam verum est, si mortui non resurgunt. Et sic erit nobis ad damnationem hoc mendacium (Prov. xix), quia falsus testis non erit impunitus. Sed et vos qui hoc creditis participes eritis damnationis. Quisquis asserit quod Deus Christum suscitavit, falsus est testis, si non est factum. Virtutem tamen Dei prædicat non ut inimicus, qui tam admirabile factum virtuti ejus ascribit. Nec tamen pœnas evadet. Quod si verum est quia Deus Christum suscitavit, quid illi patientur, qui et testes contra Deum facti sunt, et opus ejus stultitiam asserunt ? Jure dixi, quia falsum est Christum a Patre suscitatum si mortui non resurgunt. Nam si illi non resurgunt, neque ipse resurrexit. Sed si Christus non resurrexit, tunc fides vestra est vana, id est falsa, qua credebatis per Christi mortem et resurrectionem vos a peccatis liberatos. Nam adhuc, post baptismum, estis in peccatis vestris, quæ remissa credebatis, si Christus non resurrexit. Terret illos Apostolus ut doleant se hoc per seductores cœpisse credere, quod contra ipsos est. Quis enim peccata sibi non remissa velit audire ? Sunt autem veræ istæ connexiones ratiocinationis apostolicæ, falsas habentes sententias, quæ consequuntur errorem illorum contra quos agitur, quæ tamen ad hoc inferuntur ab Apostolo, ut in his erubescerent illi, quorum errorem consequuntur, eundem relinquant errorem, quia si in eodem manere voluerint, necesse est ut etiam illa quæ ipsi damnant, tenere cogantur. Non enim vera infert, cum dicit, neque Christus resurrexit, et cum dicit, inanis est prædicatio nostra, inanis est et fides vestra, et cætera quæ omnino falsa sunt, quia et Christus resurrexit, et non erat inanis prædicatio eorum qui hoc annuntiabant, nec fides eorum qui hoc crediderant. Sed ista falsa verissime connectuntur illi errantium sententiæ, qua dicebatur, non esse re-

urrectionem mortuorum. Istis autem falsis repudiatis, consequens erit resurrectio mortuorum. Sed ad ordinem dilectionis revertamur. Adhuc, inquit, estis in peccatis vestris, si Christus non resurrexit. Et quia vos adhuc manetis in peccatis, ergo et illi qui dormierunt in Christo, id est mortui sunt in fide Christi, fuerunt similiter in peccatis, et ideo perierunt. Hoc addit illis ad terrorem, cum utique charorum suorum excessum nolint æstimare perditionem. Qui enim sub hac spe de sæculo exierunt, sive occidi non timuerunt, quia resurgere exemplo Christi crediderunt, si non est verum, perierunt. Hoc illis dicit, quod amore suorum defunctorum nolunt audire, ut illis amputet quod prius per errorem male cœperant credere. Addit et aliud inconveniens : Quia si tantum in hac vita sperantes sumus in Christo, id est si nihil boni post mortem speramus a Christo nos consecuturos, sed tantum propter vitæ præsentis bona colimus eum, tunc miserabiliores sumus omnibus aliis hominibus, qui tot adversa semper sustinemus. Infideles enim vel præsentis mundo fruuntur. Nos vero continentia et jejuniis atque vigiliis et afflictionibus variis in hac vita fatigamur. Et si pro his nullam in futuro sæculo mercedem expectamus, omnium stultissimi sumus. Sed manifestum est quia et in præsentis vita et in futura speramus in Christo, qui et nunc dat suis gratiam et in futuro sempiternam gloriam.

« Nunc autem Christus resurrexit a mortuis, primitiæ dormientium (Coloss. i), quoniam quidem per hominem mors, et per hominem resurrectio mortuorum (I Thess. iv) Et sicut in Adam omnes moriuntur, ita et in Christo omnes vivificabuntur. Unusquisque autem in suo ordine. »

Dictum est superius quia si mortui non resurgunt, consequens est nec Christum resurrexisse. Et si concedatur quod Christus non resurrexit, sequuntur inde (sicut disputatum est, inconvenientia multa et gravia. Sed nunc, id est ne sequantur prædicta inconvenientia, manifestum est quod Christus resurrexit. Nunc, id est ex his inconvenientibus et supra memoratis prophetarum Scripturis ac visionibus, quæ factæ sunt discipulis, patet quia Christus resurrexit a mortuis, ipse dico primitiæ dormientium id est primus resurgens a mortuis, et causa resuscitans mortuos, qui tam facile integri resurgent, sicut evigilant dormientes. Ipse est primitiæ dormientium, id est tempore et dignitate primus evigilans ex dormientibus, ut et multitudinem eorum a somno mortis excitet, sicut primitiæ cujuslibet rei quæ offeruntur Deo, totam subsequentem massam consecrant, ut quia peccato primi hominis mors omnium inventa est, Christi justitia resurrectionem mortuorum meruerit. Et bene per hominem Christum potuerunt resurgere, quoniam per hominem quidem multo minorem, id est per Adam, venit mors, et ideo per hominem Christum apte venit resurrectio mortuorum. Sicut per Adam mors intravit, quia ipse primus est mortuus ; ita et per

Christum resurrectio, quia primus ipse resurrexit. Sicut ille forma morientium, sic iste est forma resurgentium. *Et sicut in Adam omnes moriuntur, quia sunt ejus filii, sic et in Christo omnes vivificabuntur, quia sunt ejus filii.* Nemo enim venit ad mortem nisi per Adam, nemo ad vitam æternam nisi per Christum. Hoc quippe est, omnes et omnes. Quia sicut omnes homines per primam, id est per carnalem generationem pertinent ad Adam; sic omnes homines per secundam, id est per spiritualem regenerationem ad Christum veniunt, quicunque ad eum perveniunt. Ideo ergo dictum est hic omnes, et ibi omnes, quia sicut omnes qui moriuntur, non nisi in Adam moriuntur, ita omnes qui vivificabuntur, non nisi Christo vivificabuntur. Hæc enim vivificatio proprie ad electos pertinet. Generalem tamen faciet Christus resurrectionem, ut, sicut in Adam omnes, sive justī, sive injusti, moriuntur, ita et in Christo omnes, sive credentes sive diffidentes, resurgant. Non tamen infideles ita vivificabuntur in Christo, ut sint in membris Christi, quia nec justī sic moriuntur in Adam, ut sint in massa pereuntium per Adam. Sed ita potius vivificabuntur infideles in Christo, id est in potentia vel jussu Christi, ut sine fine vivant ad pœnam. Electi autem vivificabuntur in Christo, id est in Christi justitia, quam servaverunt, ut in Christi corpore quod est ecclesia, perenniter vivant. Quia sicut in regno mortis nemo sine Adam, ita in regno Christi nemo sine Christo. Omnes, inquit, vivificabuntur, et hoc erit omnibus commune, sed differet inter se tamen, quia *unusquisque* resurget *in suo ordine*, id est martyr in ordine martyrum, virgo in ordine virginum, conjugatus in ordine conjugatorum, sacerdos in ordine sacerdotum. Vel in suo ordine, id est in suorum meritorum dignitate, ut etiam plerisque martyribus præferatur egregius Vincentius, et plerisque sacerdotibus magnificus Martinus.

« Primitiæ Christus. Deinde hi qui sunt Christi, qui in adventu ejus crediderunt. Deinde finis, cum tradiderit regnum Deo et Patri, cum evacuaverit omnem principatum et potestatem et virtutem. »

Omnes resurgent, quia Christus est primitiæ eorum, qui primus resurrexit, ut fieret causa et forma et signum futuræ resurrectionis omnium : sicut manipuli qui primo colliguntur et primitiæ vocantur, significant totam massam fore colligendam. Ipse quidem jam resurrexit, quemadmodum primitiæ primo colliguntur et offeruntur, sed deinde, sicut multitudine segetis colligitur, resurgent hi qui sunt Christi, non quidem modo sed in adventu ejus novissimo. Nam si caput resurrexit, necesse est ut et membra sequantur. Ipse enim, ut diximus, *primitiæ Christus* est, id est primus et maximus et præcedens et consecrans cæteros; *et deinde*, id est *post eum sunt cæteri* ut minus digni, *hi qui sunt membra Christi, qui in adventu ejus crediderunt, et*

A ipsi evigilabunt in adventu ejus ut occurrant ei. Deinde erit finis, id est consummatio et omnimoda perfectio secundum sufficientiam bonorum corporis et animæ, *cum tradiderit regnum Deo et Patri*, id est cum perduxerit justos, in quibus nunc regnat ex fide viventibus, Dei mediator et hominum, homo Christus Jesus, ad contemplationem Dei, qui eum secundum humanitatem creavit; et Patris, qui eum secundum divinitatem generavit. Regnum quippe ejus hoc loco vocatur Ecclesia fidelium. Aliter enim dicitur regnum ejus secundum potestatem divinitatis, quia ei omnis creatura subjecta est; et aliter regnum ejus dicitur Ecclesia secundum proprietatem fidei, quæ in illo est. Nec sic arbitremur eum traditurum hoc regnum Deo et Patri, ut adimat sibi, quia ipse simul cum Patre unus est Deus. Tradet itaque regnum Deo et Patri, non se inde separato, nec Spiritu sancto, quoniam perducet credentes ad regnum et contemplationem Dei. Ubi est finis omnium bonorum, et requies sempiterna, et gaudium quod non auferetur. Neque enim quæremus aliud, cum ad illius contemplationem pervenerimus, quia nec erit quod amplius requiratur. Aliter enim dicitur finis, qui pertinet ad consummationem, aliter qui pertinet ad consumptionem. Aliter namque tela finitur texendo, aliter cibus comedendo. Finis ergo pertinens ad perfectissimam bonorum omnium consummationem, erit cum Christus regnum tradiderit Patri. Non quia et nunc non teneat regnum Pater, sed ideo dicitur regnum traditurus Patri, quia Patrem regnare monstrabit, ut per speciem manifestationemque clarescat, quod nunc a fidelibus creditur et ab infidelibus non putatur. Nunc enim Christi regnum pertinet ad humanitatem ejus proprie, quia modo regnat in nobis dispensatione sacramenti sui per incarnationem atque passionem. Nam secundum id quod verbum Dei est ipse, tam sine fine quam sine vitio et sine intermissione regnum ejus est, sicut et Patris. Secundum id autem quod Verbum caro factum est (*Joan. 1*), cepit regnare in credentibus per fidem incarnationis suæ. Sed tradet regnum Patri, id est nutritos fide incarnationis suæ perducet ad speciem, quia æqualis est Patri. Regnum tradet Patri, cum per id regnabit in contemplantibus veritatem quo æqualis est Patri, et per se unigenitum per speciem faciet videre Patrem. Tradet, inquam, regnum Patri a fide incarnationis suæ ad speciem deitatis perducens eos qui nunc sibi credunt, non ut ipse amittat, sed ut uterque se unum ad fruendum contemplantibus præbeat. Tradet regnum Patri, *cum evacuaverit omnem principatum et potestatem et virtutem*. Unde evacuabit, nisi humilitate et patientia et infirmitate? Quis enim principatus non evacuatur, cum Filius Dei propterea regnat, quia eum principes sæculi judicaverunt? Quæ potestas non evacuatur, cum ille per quem facta sunt omnia, propterea regnat in credentibus, quia ita subjectus fuit potestatibus, ut diceret homini: « Non haberes in me potestatem, nisi datum tibi

esset desuper (*Joan. xix.*). Quæ virtus non evacuatur, cum ipse per quem cœli solidati sunt, ideo regnat in credentibus, quia usque ad crucem mortemque infirmatus est (*Philip. ii.*). Ita, regnante Christo per fidem in his qui credunt, evacuatur omnis principatus et potestas et virtus creaturarum. Quod cum plene factum fuerit, tunc tradet ipse, quemadmodum diximus, regnum Patri, id est promovebit fideles ad visionem Patris, ut per speciem quæ æqualis est Patri, cum Patre regnet in eis. Vel tunc evacuabit omnem principatum et potestatem et virtutem, manifestando utique regnum Patris, ut omnibus notum sit nullum principum, nullamque potestatum et virtutum, sive cœlestium, sive terrestrium, per se habuisse aliquid principatus vel potestatis aut virtutis, sed ab illo, a quo sunt omnia non solum ut sint, sed etiam ut ordinata sint. In illa manifestatione nulli spes aliqua remanebit in quoquam principe, vel in quoquam homine. Quod etiam Propheta canit : « Bonum est sperare in Domino quam sperare in principibus (*Psal. cxvii.*) » ut ista meditatione anima jam in regno Patris assurgat, nec cujusquam potestatem præter illum magnificans, nec de sua sibiipsi perniciosissime blandiens. Evacuabit ergo omnem principatum et omnem potestatem atque virtutem, ut nulli Patrem intuenti per Filium opus sit, aut libeat in cujusquam creaturæ vel in sua conquescere potestate. Quamdiu ergo præsentis vitæ conversatio tenetur, necessarios hactenus angelicos principatus et potestates et virtutes habemus, per quorum dispensationem gubernemur, et bona operari et mala superare possimus, ac virtutibus illustremur. Sed et homines necesse est ut nobis præsent, sicut pontifices et presbyteri ac diacones, et sicut reges et consules, aliique principes. Sed in futuro sæculo evacuabuntur omnes hujusmodi prælationes, ubi jam nulla earum nobis erit necessaria.

« Oportet autem illum regnare, donec ponat inimicos omnes sub pedibus ejus (*Psal. cix.*). Novissime autem inimica destruetur mors. Omnia enim subjecta sunt ei, sine dubio præter eum qui subjecti ei omnia (*Psal. viii.*). Cum autem subjecta fuerint illi omnia, tunc et ipse Filius subjectus erit illi qui subjecti sibi omnia, ut sit Deus omnia in omnibus (*Hebr. ii.*) »

Dixi quia tradet regnum Patri, id est perducet credentes ad suam et Patris visionem manifestam. Sed interim oportet illum regnare per fidem in suis, donec ponat omnes inimicos suos sub pedibus ejus. Quod est dicere. Tandiu opus est ut omnibus valentibus æqualitatem Patris ac Filii perspicua mentis luce contueri, per hoc regnet Christus, quod tales capere possunt, et quod pro eis proprie suscepit, id est incarnationis humilitatem donec ponat inimicos suos sub pedibus suis, id est donec omnis superbia sæcularis incarnationis ejus humilitati subdatur. Quod quotidie fit, et in fine sæculi prorsus completum

erit, et tunc tradet ipse regnum Patri, sicut supra exposuimus. Vel ita : Ipse quidem tradet regnum Patri, et tunc patebit omnibus eum perenniter regnare cum Patre. Sed interim oportet eum regnare, donec ponat omnes inimicos suos sub pedibus suis, id est oportet regnum ejus in tantum manifestari, donec omnes inimici ejus ipsum regnare fateantur. Hoc enim intelligitur : sub pedibus ejus futuros inimicos. Quod si de justis acceperimus, ideo dictum est, inimicos, quia ex injustis justificantur, et ei credendo subduntur. De injustis autem qui ad justorum beatitudinem futuram non pertinent, sic accipiendum est, quoniam et ipsi eum regnare, ipsa regni ejus manifestatione confusi, fatebuntur. Ergo oportet eum regnare, donec ponat omnes inimicos suos sub pedibus suis, non ita dictum est, quasi cum posuerit, non sit postea regnaturus ; sed oportet eum, inquit, ad tantam evidentiam suum regnum perducere, donec inimici ejus nullo modo audeant negare quod regnet. Donec pro eo positum est, ut non amplius intelligas. Quæ enim amplius, id est ad quem majorem manifestationem manifestari poterit regnum ejus, nisi quousque omnes inimici eum regnare fateantur? Quando enim manifestus erit regnum ejus, quam cum claruerit omnibus inimicis ; et inde permanebit in æternum (*Psal. lx.*). Omnes inimici ponentur sub pedibus. Sed *novissime inimica destruetur mors* per resurrectionem mortuorum. Novissime, id est post omnia destruetur mors, ut qui resurrexerint, amplius non dissolvantur : « Non enim erit aliquid quod destruat, posteaquam mortale hoc induerit immortalitatem. Tunc destruetur mors, quæ est nobis inimica, quia vitam nobis invidet, Vere inimici ponentur sub pedibus Christi et mors ab eo destruetur, quoniam, sicut Scriptura loquitur, *omnia Pater subjecti sub pedibus ejus* (*Psal. iii.*) id est ut etiam mortem destruat. Inter alia enim quæ illi subjecta sunt, constat quod potestatem super mortuos habeat. Omnia quæcunque sunt in universitate totius creaturæ, subjecti Pater sub pedibus ejus, id est sub humilitate humanitatis ejus. Quod nondum ex toto completum esse cernimus, quoniam infideles adhuc dedignantur subjecti pedibus ejus, sed in fine, velint nolint, subjicientur. Sed præteritum pro futuro ad majorem certitudinem posuit tam Apostolus quam et propheta. Sed *cum dicat* propheticus sermo, quod *omnia subjecta sunt ei, sine dubio* dicit non solum bonos sibi esse subjectos, sed et malos, atque universa præter eum Patrem qui *subjecti ei omnia*. Tam late enim intelligenda est hæc sententia, ut nihil sit quod non intelligatur ei subjectum, præter cuiusque ei universa subjecti. Solus enim Deus excipitur ab hac subjectione. Deus enim non ei subjectus est, sed ipse Deo, secundum quod est homo. Quia *cum subjecta ei fuerint omnia*, secundum quod hæc psalmi Scriptura prædixit, *tunc etiam ipse Filius in ipsa prælatione erit subjectus ei qui sibi subjecti omnia*. Subjectus erit secundum humanitatem, ne quis pu-

taret humanam naturam quam assumpsit, in natura divinitatis commutandam, ut fieret æqualis Patri, non subjecta. Non autem absurde sic intelligimus, quod et ipse subjectus erit illi qui ei subjecit omnia, ut eum non solum caput Ecclesiæ, sed omnes cum eo sanctos intelligamus qui sunt unum in Christo, unum semen Abrahæ, scilicet universa Ecclesia quæ est corpus Christi et plenitudo ejus. Ac per hoc cum omnia Christo subjecta fuerint, et capiti et corpori, erunt sine dubio subjecta. Nam secundum id quod sine tempore Deus natus est, nihil unquam potuit ei non esse subjectum. Intelligimus ergo, sicut dictum est, caput cum corpore futurum Deo subjectum; subjectum autem secundum contemplationem sempiternæ veritatis ad obtinendam beatitudinem, nullo motu animi, nulla parte corporis resistente, ut in illa vita nemine amante propriam potestatem, sit Deus omnia in omnibus. Nunc autem quibusdam membris adhuc repugnantibus, videtur caput quoque non esse subjectum. Cum autem omnia membra Deo fuerint tam carne quam spiritu devote subjecta et cohærentia, tunc ipse Filius qui caput eorum est, manifeste cognoscetur in omnibus Deo subjectus. Et tunc erit Deus omnia in omnibus, id est quæcunque ab hominibus honeste desiderantur: et vita, et salus, et victus, et copia, et gloria, et honor, et pax, et omnia bona. Ipse finis erit desideriorum nostrorum, quia tunc nihil deerit satiæti justorum desideriorum. Hic enim finem supra commemoravit Apostolus, cum totum breviter primo vellet concludere, deinde quasi membratim explicare et exponere. Et venit ad hoc ut in ultimo diceret, quia Deus erit omnia in omnibus. Nihil enim amplius quæremus, postquam ad hanc bonorum omnium plenitudinem pervenimus. Ad hunc fidem debemus tendere per omnia quæ nunc agimus. Sequitur:

« Alioquin quid facient qui baptizantur pro mortuis, si omnino mortui non resurgunt? Ut quid et baptizantur pro illis? »

Supra dictum est quia resurget unusquisque in suo ordine. Alioquin, id est si non resurrexerint, quid facient, id est quid proficiant illi qui baptizantur pro mortuis amicis suis, si omnino mortui non resurgunt? id est quam utilitatem per baptismum conferent eis, si nullatenus sunt resurrecturi? Ut quid et baptizantur pro illis, si non resurrexerint, cum peccata baptismis non remittantur nisi causa futuræ resurrectionis? Fuerunt quidam imperiti, qui pro amicis suis qui sine baptismo defuncti fuerant, baptizabantur, putantes illis prodesse. Nec factum illorum probat Apostolus, sed fixam fidem in resurrectione ostendit. In tantum enim ratam et stabilem vult ostendere resurrectionem, ut exemplum det eorum, qui tam securi erant de illa, ut etiam pro mortuis baptizarentur, si quem forte mors prævenisset, timentes ne aut male resurgeret, aut omnino non resurgeret, qui baptizatus non fuerat, et unius nomine mortui tingebatur, æstimans illi

A remissionem peccatorum per hoc conferri, ut in sorte justorum resurgeret. Ac si dicat Apostolus: Si stulti adeo certi sunt de resurrectione, non debetis vos dubitare.

« Ut quid et nos periclitamur omni hora? Quotidie morior propter [at. per] vestram gloriam, fratres, quam habeo in Christo Jesu Domino nostro. Si secundum hominem ad bestias pugnavi Ephesi (Act. xix), quid mihi prodest si mortui non resurgunt? Manducemus et hibamus, cras enim moriemur. Nolite seduci. Corrumpunt mores bonos colloquia mala. Evigilate, justi, et nolite peccare. Ignorantiam enim Dei quidam habent. Ad reverentiam vobis loquor. »

B Inspicientes, ut dictum est, baptizantur pro mortuis spe resurrectionis. Cur enim hoc facerent, nisi resurrecturos sperarent? Et ut quid, id est quare, etiam nos qui sapientes videmur, periclitamur, id est pericula propter evangelicam prædicationem incurrimus, omni hora id est semper, nisi quia speramus futuram resurrectionem? Dicendo, ut quid et vos periclitamur, discernit se a prædictis, ostendens non catholicos esse qui pro mortuis baptizantur. Dixi quia nos prædicatores omni hora periclitamur. Et ego non solum pericula patior, sed etiam morior quotidie, id est tam duras [at. diras] afflictiones sustineo, ac si spiritum exhalarem, et hoc juro propter vestram gloriam, fratres, quam habeo in Christo Jesu Domino nostro, id est per gloriam remunerationis, quam apud Deum habeo pro labore in vobis expenso. Quod enim dicitur propter vestram gloriam, juratio est. Propter vestram gloriam quam habeo in Christo, id est per gloriam quam acquisitione restæ salutis ita sum certus in Christo me habiturum, ac si jam tenerem illam. Propter hanc gloriam juro me quotidie mori spe resurrectionis; ne mihi credere dubitetis. Amplius quidem hoc est quam « Est est, Non non (Matth. v; Jacob. v); » et ideo a malo est, sed infirmitatis et incredulitatis restæ, qui non aliter movemini ad fidem. Et iterum dico, quia si secundum hominem, id est rationabiliter pugnavi ad bestias Ephesi (Act. xix), id est contra Demetrium et cæteros bestiales, qui cum eo movebant adversum me seditionem populi propter idolum Dianæ, cujus culturam destruebam, quid mihi prodest sic pugnasse, si mortui non resurgunt? Nam propter spem resurrectionis pugnavi contra eos, id est expugnavi errores eorum, offerens me bestiali eorum furori sine metu mortis. Ipsi enim erant bestię, id est bestiales, quia bruto sensu de diti erant ventri, et in terrena proni, nullam aliam vitam credentes fore post istam, et bestiali rabie sævientes contra me pro idoli defensione. Sed ego viriliter pugnavi ut miles Christi, destruens errores illorum; et hoc feci secundum hominem, id est loquens et agens ut homo, id est ut creatura rationalis, dum ostenderem non esse rationabile ut, contempto Creatore, coleretur creatura, vel, contempto perenni vita, diligeretur temporalis vita. Sic pugna-

vi secundum hominem, id est disputavi, et bestialiter frementibus me obtuli secundum rationem. Et quid mihi valet ita periculis pugnasse, si non resurrexero, ut in carne gauderem in qua pro Deo molestias pertuli? Si ergo mortui non resurgunt, quid ultra carnem affligeremus in præsenti vita? Non amplius jam studeamus abstinentiæ, sed luxuriæ et ventri tantum simus dediti velut bruta animalia, dicentes: *Manducemus et bibamus* (Isa. xxii), id est carnem deliciis nutriamus, quia *cras*, id est cito moriemur, et in nihilum redigemur. Talia suadebant Corinthiis pseudoapostoli, ut scilicet per diffidentiam resurrectionis attraherent eos ad satisfaciendum carni, quatenus et ipsi licenter satisfacerent sibi cum illis. Ideo volebant ut putarent hanc solam esse vitam, quam cum pecoribus habemus communem, post mortem vero finire totum hominem, nec esse ullam spem vitæ ulterius melioris. Unde subjungit Apostolus: *Nolite seduci*, id est nolite verbis stultorum a recto tramite semoveri, qui desperatione resurrectionis cupiunt vos carnis voluptatibus mancipari. Et ideo vitate colloquia eorum, quoniam *colloquia mala corrumpunt bonos mores*. Assiduitas enim pravi colloquii vitiat mentem, et idcirco vitanda est, maxime ab infirmis. Sic enim verba proximorum audiendo quotidie sumimus in mente, sicut flando et respirando aerem trahimus corpore. Et sicut malus aer assiduo flatu tractus inficit corpus, sic perversa locutio assidue audita infirmantium inficit animum, ut tabescat delectatione pravi operis et assiduitate iniqui sermonis. Ita corruppebant falsi apostoli suis confabulationibus mentes infirmantium Corinthiorum, dum dicerent ut jumenta morituros homines, nec ulterius surrecturos; ideoque suaderent manducare et bibere, ac voluptates carnis explorare. Dum enim negarent aliam esse vitam, negabant et malis poenam et bonis gloriam fore tribuendam. Et dum supplicia malorum gaudiaque bonorum negarent, impellebant ad quæcunque vitia quæ sunt huic vitæ delectabilia, et omne bonum propositum mentis evertabant. Talibus et innumeris aliis modis corrumpunt mores bonos colloquia mala. Idcirco ab infirmis vitari societas malorum debet, ne dum corrigi non valent, ad imitationem trahant, et cum ipsi a sua malitia non mutant, eos qui sibi conjuncti fuerint, pervertant. Notandum quia de Menandri comœdia versum hunc iambicum Apostolus sumpsit:

Corrumpunt mores bonos colloquia mala.

Nolite, inquit, seduci ab his qui bonos mores suis confabulationibus corrumpere student, sed potius evigilate, id est torporis et negligentiae somnum excutite, et mentis oculos ad aspectum veri luminis aperite, ut mente vigiles sitis, ne circumventionem pravi sensus capti, et a fide abducti, depravemini non credendo resurrectionem. Evigilate contra seductores, qui vobis insidiantur. *Evigilate, justii*, id est qui fide justificati estis, et in ea parumper obdormistis, dum de resurrectione dubitare cœpistis,

A resumite fidei constantiam et vigilantiam, ne penitus amittatis justitiam. Vos, justii, evigilate, ne a peccatoribus seducamini. Evigilate in fide resurrectionis et cautela providæ circumspectionis, et nolite peccare, id est nolite ventri et voluptatibus, more jumentorum, servire, quasi post hanc vitam non speretis aliam, ut corruptores mentium suadent, dicentes: *Manducemus et bibamus, cras enim moriemur*. Et debetis evigilare, ne verbis stultorum illuciamini ad peccandum. Nam *quidam habent ignorantiam Dei*, id est ignorant propositum Dei de resurrectione mortuorum, et ideo suadent vobis, ut in præsenti vita porcorum more vivatis, nihil ultra sperantes. Et hoc, quod ipsi Deum ac propositum ejus ignorant, loquor vobis ad reverentiam, id est ad verecundiam vobis incutiendam; qui tam imprudentes estis, ut crederetis eis qui, per ignorantiam Dei, stulta docent. Ad reverentiam loquor hoc vobis, ut amodo vereamini acquiescere illis, et pudeat credere ignaris.

« Sed dicit aliquis: Quomodo resurgent mortui? « Quali autem corpore venient? Insipiens tu, quod « seminas, non vivificatur, nisi prius moriatur. Et « quod seminas, non corpus quod futurum est « seminas, sed nudum granum, utputa critici aut « alicujus cæterorum. Deus autem dat illi cor- « pus sicut vult, et unicuique seminua præprium. « corpus. »

Hactenus resurrectionem Apostolus per rationes probavit, modo per ipsam rerum naturam posse fieri ostendit. Quasi dicat: Certum est ex supra dictis rationibus, quia resurrectio mortuorum erit. Sed tamen dicit mihi forsitan aliquis: Quomodo resurgent mortui? Quasi fieri per naturam non possit. Quomodo resurgent, id est quomodo potest fieri ut resurgant. Vel quomodo resurgent, id est quis erit modus resurgentium? Sed si hoc erit ut resurgant, quali corpore venient ad vitam, id est ponderoso an levi; mortali, an immortalis? Quasi dicat: Non poterit aliud esse quam nunc, id est passibile et mortale. Huic quæstioni respondens Apostolus, adhibet documenta seminum, et dicit: O tu insipiens, qui sapientiam mysterii hujus ignoras, illud quod tu in agro seminas non vivificatur, id est vegetatur, nisi prius moriatur, id est putrescat. Vivunt enim herbæ et arbores, non per animam, sed per viriditatem. Cum animali homine non legis auctoritate disputat, quam si reciperet, non erraret; sed physica ratione, de qua sibi blanditur, ut non credat resurgere resoluta et emortua corpora. Ostendit enim mortua rursum ad vitam reparari multiplicibus, ut confundatur error humanus. Tu, inquit, qui te sapientem putas, dum per mundi sapientiam asseris, mortuos non posse resurgere, audi ex rebus mundi, unde tua sapientia probetur insipientia. Nam semen quod in agri cultura seminas, non vivificatur nisi prius moriatur. Sic et humanum corpus non fit immortaliter vivens, nisi prius moriatur et in terram revertatur, ut semen quod seritur. Si enim granum se

minatum prius necessario putrescit et solvitur in terram, ut postea vivificetur et crescat, tunc corpus humanum postquam fuerit mortuum et putrefactum, simili ratione vivificabitur. Ecce habes quomodo resurgent mortui, et nunc audi quali corpore venient. Quia quod tu *seminas, non seminas corpus quod futurum est*, id est non seminas herbam vel stipulam et multiplicia in paleis tegumenta granorum, *sed nudum granum*, quod postea cum culmo et foliis nascitur, et spicam profert cum multis granis virentibus. *Nudum palea granum seminas, ut puta tritici aut alicujus cæterorum* seminum. Sed *Deus dat illi grano postea corpus sicut ipse vult*, id est traducit illud in spicam magnam, et in grana multa non nuda, sed vestita paleis et aristis. Et non omnibus granis dat idem corpus sed unicuique *seminum dat proprium*, ut tritico tritici et milio milii. Si ergo Deus potest adducere quod non erat in nudo semine, multo magis potest reparare quod in hominis erat corpore. Si enim nudum granum seminatur, et Dei nutu quodammodo elementorum ministerio vestitum resurgit, multa secum habens incrementa utilitatis humanæ, cur non credibile sit Dei virtute mortuum hominem posse resurgere meliorata substantia, non numero multiplicatum? Nam sicut grano uniuscujusque seminis dat Deus proprium et novum corpus sic unicuique reddet homini proprium corpus, renovatum. Tali ergo corpore resurgentes venient, id est ejusdem substantiæ, sed melioratæ et innovatæ corpus suum recipiet unusquisque. Jam vero quod Apostolus subjungit, ad differentiam pertinet resurgentium, propter diversas glorias fidelium atque sanctorum.

« Non omnis caro, eadem caro; sed alia hominum, alia pecorum, alia volucrum, alia autem piscium. Et corpora cœlestia, et corpora terrestria. Sed alia quidem cœlestium gloria, alia autem terrestrium. Alia claritas solis, alia claritas lunæ, et alia claritas stellarum. Stella enim a stella differt in claritate, sic et resurrectio mortuorum. »

In omnibus his iste sensus est: Sed genera carnis, cum cuncta sint mortalia, differunt tamen inter se pro diversitatibus animantium; et si corpora, cum omnia visibilia sint, differunt tamen pro diversitatibus locorum: unde alia cœlestium gloria est, alia terrestrium; et si in locis sublimibus cum sint cuncta cœlestia, differunt in se claritates luminum, non mirum est quod in resurrectione mortuorum distabit gloria meritorum. Quemadmodum ergo ex una impensa diversorum animantium una caro est, ita et unius carnis homines diversi erunt ex dignitate, cum resurrexerint, ut talis unusquisque appareat, qualis meriti fuerit. Nec solum caro diversorum animantium differt inter se, sed etiam corpora terrestria differunt a cœlestibus siderum corporibus. Et qui tam lucida fecit corpora elementorum, cur non præclara faciat corpora justorum? Per significationem autem cœlestia sunt corpora resurgentium, terrestria vero priusquam moriantur

aut resurgent, et quia Christus cœlestis est, ex cœlestia corpora dicuntur; ex Adam vero, quia terrestris est, terrestria corpora nuncupantur. Sicut autem sol et luna vel stella, cum sint unius naturæ, differunt tamen in claritate, ita et homines, cum sint unius generis, merito dissimiles erunt in gloria. Nunc enim de solis electis sermo est, quos virtutes, non peccata facient esse diversos. Aliter enim ibi lucebit virginitas, aliter ibi lucebit castitas conjugalis, aliter ibi lucebit sancta viduitas. Diversæ lucebunt, sed omnes ibi erunt. Splendor dispar, cœlum commune. Etsi alius electorum est alio fortior, alius alio sapientior, alius alio justior, alius alio sanctior, in domo Patris mei mansiones multæ sunt, unusquisque mansionem pro suo accepturus est merito (*Joan. xiv*). Tanquam stellæ enim sancti diversas mansiones diversæ claritatis tanquam in cœlo sortiuntur in regno, sed propter unum deaurium nullus separatur a regno. Atque ita Deus erit omnia in omnibus, ut quoniam Deus charitas est, per charitatem fiat ut quod habent singuli, commune sit omnibus. Sic enim quisque etiam ipse habet, cum amat in altero quod ipse non habet. Non erit itaque aliqua invidia imparis claritatis, quoniam regnabit in omnibus unitas charitatis. Hinc jam venit Apostolus ad illud quod communiter habet omnis caro quæ ad vitam resurgit æternam, et dicit:

« Seminatur in corruptione, surget in incorruptione; seminatur in ignobilitate, surget in gloria; seminatur in infirmitate, surget in virtute; seminatur corpus animale, surget corpus spirituale. »

Seminare est sepelire, quia sicut triticum tegitur in agro ut resurgat innovatum, sic corpus defuncti in sepulcro ponitur ut inde resurgat melioratum. *Seminatur ergo in corruptione*, id est sepelitur corpus hominis corruptibile; sed *surget in incorruptione*, id est surget incorruptibile, quia jam corrupti non poterit. Vel in creatione potest seminatio hæc intelligi. *Seminatur in corruptione, surget in incorruptione*, id est quamvis homo ex quo concipitur, usque ad dissolutionem sit in corruptione, tamen surget in incorruptione, *seminatur in ignobilitate*, id est sepelitur in vilitate et abiectione, ut fœteat et vermibus scateat; sed *surget in gloria*, id est gloriosum et lucidum. Quid enim ignobilius carne mortua? Vel quid interim est gloriosius ea resurgente, et incorruptelam percipiente? *seminatur in infirmitate*, id est sicut granum seminis commendatur terræ imbecillum et debile, sed *surget in virtute* fortitudinis angelicæ. Et quid per singula describerem *seminatur corpus animale*, id est quod cibis sustentatur, et ad ultimum ab anima dissolvitur, ut corpora cæterorum animalium, sed *surget corpus spirituale*, id est nullis alimentis indigens, ab anima separari jam non valens. Resurgent ergo sanctorum corpora sine ullo vitio, sine ulla deformitate, sine ulla corruptione, onere, difficultate. In quibus tan-

ta facilitas, quanta felicitas erit. Propter quod et spiritalia dicta sunt, cum procul dubio corpora sint futura, non spiritus. Sed sicut nunc corpus animale dicitur, quod tamen non animal est, ita tunc corpus spiritale erit, corpus tamen non spiritus erit. Ob hoc enim dicitur, quia seminatur corpus animale, surget autem corpus spiritale, quoniam tanta erit concordia tunc carnis et spiritus, vivificante spiritu sine sustentaculi alicujus indigentia subditam carnem, ut nihil nobis repugnet ex nobis; sed sicut foris neminem, ita nec intus nosipsum patiamur inimicos. Sicut enim spiritus carni serviens, non incongrue carnalis; ita caro spiritui serviens, recte appellatur spiritalis. Non quia in spiritu convertitur, sed quia spiritui summa et mirabili obtemperandi facilitate subdetur, usque ad implendam immortalitatis indissolubilis securissimam voluntatem, omni molestiæ sensu atque omni corruptibilitate et tarditate detracta, omni fragilitate ac labe terrena in cœlestem puritatem ac stabilitatem mutata atque conversa, ut cœlesti habitationi conveniat.

« Si est corpus animale, est et spirituale, sicut scriptum est : Factus est primus homo Adam in animam viventem, novissimus Adam in spiritum vivificantem (*Gen. 11*). Sed non prius quod spirituale est, sed quod animale est, deinde quod spirituale. Primus homo de terra, terrenus; secundus homo de cœlo, cœlestis. Qualis terrenus, tales et terreni : et qualis cœlestis, tales et cœlestes. Igitur sicut portavimus imaginem terreni, portemus et imaginem cœlestis. Hoc autem dico, fratres, quia caro et sanguis regnum Dei possidere non possunt, neque corruptio incorruptelam possidebit. »

Vere, inquit, surget corpus spiritale, quia si modo corpus est animale, est et spiritale, id est constat esse quandoque spiritale, sicut enim animales sumus, quia pater noster carnalis Adam factus est in animam viventem; sic erimus in resurrectione spiritalis, quia Pater noster spiritalis Christus, factus est in resurrectione sua in spiritum vivificantem. Quod sic exponit, sicut scriptum est in Genesi, scilicet nos esse animales, ab animali patre descendentes. Factus est primus homo Adam in animam viventem, id est, in animam potentem vivere tantum per sustentamenta ciborum, non vivificantem. His Moysi verbis addit Apostolus : Novissimus Adam factus est in spiritum vivificantem, id est Christus in spiritum qui ita vivificaret corpus, ut ultra non egeret aliqua ciborum sustentatione, nec esset solubile. Vel quasi a relativis probat esse corpus spiritale. Si est, inquit, corpus animale, est et spirituale. Cum enim dicitur corpus, frustra additur animale, nisi sit et aliud spirituale, ad cuius discrepantiam dicatur animale. Et quia sit animale, probat per Genesim, quoniam factus est primus homo in animam viventem. Dictum est etiam de animalibus : « Producat terra animam viventem (*Gen. 1*). » Intelligitur ergo corpus animale dici simile cæteris animalibus propter mortis dissolutio-

nem et corruptionem, quæ quotidie cibo reficitur et postea separata animantis compago dissolvitur, spiritale autem corpus, quod jam cum spiritu immortale est. Factus est primus Adam in animam viventem, novissimus Adam in spiritum vivificantem. Sive intelligatur primus Adam, qui de pulvere ante formatus est; novissimus autem Adam, qui de virgine procreatus est, sive in unoquoque homine utrumque compleatur, ut primus Adam sit homo in corpore mortali, novissimus Adam idem ipse in corpore immortalis; tamen inter animam viventem et spiritum vivificantem hoc interesse voluit, ut illic sit corpus animale, hic spiritale. Anima quippe in corpore animali vivit quidem, sed non vivificat usque ad auferendam corruptionem; in corpore vero spiritali, quoniam perfecte adhærens Domino unus spiritus est, sic vivificat, ut spiritale corpus efficiat, absumens omnem corruptionem, nullam metuens separationem. Proinde sequitur : Sed non prius quod spirituale est, sed quod animale, deinde quod spirituale. Prius enim est animale corpus, quale habuit primus Adam, quamvis non moriturum, si non peccasset; quale nunc habemus nos hactenus ejus mutata vitiatæque natura, quale in illo postquam peccavit, effectum est; unde habet jam moriendi necessitatem, quale pro nobis etiam Christus primitus habere dignatus est, non necessitate, sed potestate. Postea vero est spiritale corpus quale jam præcessit in Christo tanquam in capite nostro, secuturum est autem in membris ejus ultima resurrectione mortuorum. Nam primus homo de terra terrenus, etc. Sed merito quæritur cur Christus dicatur homo secundus post tot homines, aut cur Adam novissimus, tam multis post ipsum generationibus succedentibus, cum et secundus non possit esse post multos, et novissimus dici non debeat post quem multi. Ratio hic non carnis, sed operationis est intuenda. Quam Apostolus non humanis sensibus explicat, dum et Adam veterem et Dominum Christum ad primitias rerum bonarum malarumque revocat ac reducit, duas formas vitales collocans in duobus, ut primus Adam habeatur, quisquis per vestigia ejus erroris inceserit; postremus autem ille, qui Dominum fuerit imitatus. Interim novissimus de primo ex eo dicitur Dominus, quod usque ad ipsum mors ab illo primo inventa descendit, quod usque ad crucem Domini pristini hominis potestatem tenuit, quam postremus Dominus dum per mortem expungit, obliterat. Et ideo morti novissimus, non saluti, qui solus chirographum quod ex protoplasto per omnes generationes hæreditario jure veniebat, ut moriendo solvit, sic moriendo delevit. Primus homo factus de terra, id est de limo terræ, fuit terrenus. Qui tamen non propter carnem, sed propter peccatum dicitur terrenus, quia cum jam reus esset factus, et mortis supplicio destinatus, audivit : « Terra es, et in terram ibis (*Gen. 3*). » secundus homo de cœlo, cœlestis, quia Filius Dei venit ad carnem, qua suscepta, et homo exterius fieret, et Deus

interius permaneret. Non enim cecidit propter se, sed descendit propter nos; et sine peccato carnem assumpsit, in qua resurrectionem ostenderet nostræ carnis. Nam *qualis terrenus, tales et terreni; et qualis cælestis, tales et cælestes*. Quid est: Qualis terrenus, tales et terreni, nisi mortales ex mortali? Et quid est, qualis cælestis, tales et cælestes, nisi immortales per immortalem? Illud per Adam, hoc per Christum. Dominus enim ad hoc terrenus factus est, cum esset cælestis, ut eos qui terreni erant, faceret cælestes. Hoc est, ideo ex immortalis factus est assumendo servi formam, non Domini mutando naturam, impertiendo Dominicam gratiam, non perpetiando servilem injuriam. Qualis terrenus, tales et terreni, id est omnes morituri. Et qualis cælestis, tales et cælestes, id est omnes resurrecturi. Jam enim cælestis resurrexit. Et quandoquidem terreni sunt similes terreno, et cælestes cælesti, igitur sicut portavimus imaginem terreni, portemus et imaginem cælestis, id est sicut imitati sumus terrenum, imitemur cælestem. Imaginem terreni hominis induimus propagatione prævaricationis et mortis, quam nobis intulit generatio; imaginem vero cælestis hominis induimus gratia indulgentiæ vitæque perpetuæ, quam nobis per Christum præstat regeneratio. Unus enim generat in mortem, alius in salutem. Per Christum, inquam, renovamur, qui homo cælestis appellatur, quia de cælo venit in terram, ut terrenæ mortalitatis corpore vestiretur, quod cælesti immortalitate vestiret. Alii vero propterea dicuntur cælestes, quia fiunt per gratiam membra ejus, ut cum illis sit unus Christus velut caput et corpus. Portemus ergo imaginem hujus cælestis hominis interim corde et moribus atque digna operatione, postea vero in resurrectione mortuorum etiam corpore. Quod non frustra moneo, sed ideo dico hoc, o fratres! scilicet ut portemus imaginem cælestis, quia caro et sanguis, id est corruptio vitiorum et mortalitatis, regnum Dei possidere non possunt. Caro et sanguis regnum Dei non possidebunt, quia non erit ibi corruptio et mortalitas carnis et sanguinis. Secundum has enim qualitates, hoc loco nuncupantur caro et sanguis. Nam caro secundum substantiam de qua dictum est: « Spiritus carnem et ossa non habet, sicut me videtis habere (Luc. xxiv), » possidebit regnum Dei; caro autem secundum corruptionem cum intelligitur, non possidebit. Hoc enim declaratur, cum protinus additur, *neque corruptio incorruptelam possidebit*. Hæc enim repetitio prædictorum verborum est expositio, ut quod dictum est caro et sanguis, intelligamus corruptionem, non substantiam carnis; et quod dictum est regnum Dei, intelligamus incorruptelam patriæ cælestis: atque ita nihil aliud dictum putemus, caro et sanguis regnum Dei non possidebunt; quam si diceretur, corruptio incorruptelam non possidebit, id est corruptio carnis et sanguinis in illius regni incorruptela non erit, propter immutationem scilicet incorruptionis. Et ideo non carnis resurrectioni con-

tradicit in eo quod ait: Caro et sanguis regnum Dei non possidebunt, quia per carnem et sanguinem ventrem et libidinem, id est opera carnis, quæ ibi omnino non erunt, significat. Nolebat enim ad eos hoc ædificari, ut arbitrarentur se talia facturos in regno cælorum, qualia fiunt in hac vita in corruptionibus manducandi et bibendi, uxores ducendi, filios generandi. Non autem ipsam carnem dixit abolendam, quia corporis resurrectione facta a cunctis passionibus liberati, æterna vita cum ineffabili claritate atque stabilitate sine corruptione fruemur. In illa itaque cælestis regni gloria caro secundum naturam erit, sed secundum passionis desideria non erit, quia, devicto mortis aculeo, in æterna incorruptione regnabit. Et ideo quisquis ad hæc desiderat incorruptionis gloriam pervenire, festinet nunc opera corruptionis deponere, et cælestis hominis imaginem sancte vivendo portare.

« Ecce mysterium vobis dico: Omnes quidem resurgemus, sed non omnes immutabimur, in momento, in ictu oculi, in novissima tuba. Canet enim tuba, et mortui resurgent incorrupti, et nos immutabimur. Oportet enim corruptibile hoc induere incorruptionem, et mortale hoc induere immortalitatem. »

Dixi, quia caro et sanguis regnum Dei non possidebunt, cum tamen prædicem carnis resurrectionem. Et ecce dico vobis inde *mysterium*, id est arcanum quoddam, quod multis est occultum, in quo possitis intelligere quomodo caro non erit, et caro erit, quæ regnum Dei possidebit. *Μυστήριον* enim Græce dicitur, eo quod secretam et reconditam habeat repositionem. Mysterium est quod dico, id est obscurum et latens, quia infideles hoc ignorant. Hoc scilicet mysterium dico, quia *omnes quidem tam boni quam mali resurgemus*, vel (sicut in Græcis codicibus legitur) dormiemus, id est moriemur; *sed non omnes immutabimur* ad gloriam, quia soli boni immutabimur. Et ideo natura nostræ carnis tunc idonea fiet ut possideat regnum Dei, quia a tempore illius immutationis angelicæ, non jam caro erit et sanguis, sed solummodo corpus lucidum et spiritale. Omnes dormiemus in somno mortis, et resurgemus. Resurgere enim proprie dicitur, qui prius dormiendo cecidit. Sed quomodo omnes dormiemus vel resurgemus, si tam multi quos in corpore inventurus est Christus, non dormient nec resurgent? Si ergo sanctos qui reperientur Christo veniente viventes, eique obviam rapiuntur, crediderimus in eodem raptu de mortalibus corporibus exituros, et ad eadem mox immortalia redituros, nullas in his verbis patiemur angustias, ubi nunc dicitur, omnes resurgemus vel omnes dormiemus, sive ubi dictum est, tu quod seminas, non vivificatur nisi prius moriatur, quia nec illi per immortalitatem vivificabuntur, nisi quamlibet paululum tamen ante moriantur. Ac per hoc et a resurrectione non erunt alieni, quia dormitione præcedent quamvis brevissima, non tamen ulla. Omnes ergo resur-

gemus, quicunque naturam in nobis humanam habemus; sed tamen non omnes immutabimur, quia resurrectio quidem communis est omnium, sed immutatio ad gloriam et impassibilitatem proprie justorum est. Resurgemus omnes, et hoc fiet in momento sive in atomo, id est in puncto temporis quod dividi non potest, in ictu oculi, id est in summa celeritate, in novissima tuba, id est in novissimo signo quod dabitur ut ista compleantur. Ad ostendendam Dei omnipotentiam hoc dicitur contra illos, quibus impossibile videbatur, ut mortuorum corpora ex antiquis cineribus repararentur et reviviscerent. Tanta enim celeritate fiet resurrectio, ut vivi quos in corporibus suis conformationis tempus invenerit, mortuos de pulvere resurgentes prævenire non valeant; nec alii primi et alii novissimi resurgent, sed omnes simul in momento, ut mirabilior sit resurrectio. Et quia in momento est aliqua morula quamvis brevissima, ideo additur, in ictu oculi, quia scilicet tanta velocitate transcurrit, ut pene sensum videntis effugiat. Ictus enim oculi est, non quo palpebram moventes claudimus oculum vel aperimus, sed emissio radorum ad aliquid videndum. Qui dicitur ictus, quia cito icit visa. Mox enim ut aperueris oculum, emittitur radius tuus, non dico ad parietem proximum, sed ad montem longe distantem: nec dico ad montem, qui ideo proximus videtur quoniam in terra est, sed ad solem, ad lunam, ad sidera, quæ tam magno intervallo distant a terra. Si enim clausis oculis faciem contra solem ponas, nonne mox ut eos aperueris, ibi potius aciem tuam te invenisse, quam illuc eam perduxisse putabis, ita ut nec ipsi oculi prius aperti fuisse videantur, quam illo quo intenderant, pervenisse? Ut ergo radius oculorum tuorum non citius pervenit ad propinquiora, et tardius ad longinquiora, sed utraque intervalla parili celeritate conjungit, ita cum in ictu oculi fit resurrectio mortuorum. Omnipotentia Dei et ineffabili nutui tam facile est quæque recentia, quam diuturno tempore dilapsa, cadavera, suscitare. Tubæ autem nomine aliquod evidentissimum et præclarissimum signum vult Apostolus intelligi, quam vocem archangeli et tubam Dei alio loco dicit (*I Thess. iv*), quæ et vox Filii Dei in Evangelio dicitur (*Joan. v*), quam audient omnes qui in monumentis sunt, et procedent; itaque clangor tubæ aut vocis indicat magnitudinem, juxta quod scriptum est: « Quasi tuba exalta vocem tuam (*Isa. lvm*), » aut aperiam omnium resurrectionem, secundum quod dicitur: « Cum facis eleemosynam, noli tuba canere ante te (*Matth. vi*), » id est abscondite fac misericordiam et in secreto, ne videaris de alterius miseria gloriari. Sed quærendum cur ad novissimam tubam mortui dicantur surrecturi. Neque enim novissima diceretur, nisi aliarum præcedentium respectu. In Apocalypsi Joannis (*Apoc. viii, ix, x, xi*) septem angeli describuntur cum tubis, et clangente primo eorum ac secundo et tertio quartoque et quinto atque sexto, quid per singulos actum sit, in-

A dicatur; novissimo autem, id est septimo angelo tuba canente, mortui suscitantur. Quos scilicet angelos plurimi doctorum senserunt esse prædicatores in septem statibus ecclesiæ, et novissimum angelum eos prædicatores, qui in carne reperientur veniente Domino; et ob hoc in voce eorum mortuos suscitari, quæ intelligitur novissima tuba, quia post illam non audietur vox prædicantium. Vere in novissima tuba fiet resurrectio. *Canet enim tuba, et mortui resurgent incorrupti, et nos immutabimur.* Mortui resurgent, id est omnes defuncti. Vel nomine mortuorum intelliguntur peccatores, et nos qui ad gloriam pertinentes, immutabimur. Quando dicit: Nos, alium se et eos qui secum sunt, præter mortuos esse significat. Mortui resurgent incorrupti, et Paulus ac consortes ejus immutabuntur. Reprobi enim non commutabuntur in illam incorruptelam, quæ nec doloris incorruptionem pati potest. Illa namque fidelium est atque sanctorum. Isti vero perpetua corruptione cruciabuntur, quia ignis eorum non exstinguetur, et vermis eorum non morietur (*Isa. lxxvi; Marc. ix*). » Quid sibi ergo vult ista distinctio: Mortui resurgent incorrupti, et nos immutabimur, nisi quia omnes incorrupti resurgent, sed ex his justi etiam immutabuntur in illam incorruptelam, cui omnino nulla possit nocere corruptio? Ac per hoc quod in eam commutabuntur, incorrupti quidem resurgent integritate membrorum, sed tamen corrumpendi dolore pœnarum. Habebunt quippe incorruptionem carnis, in qua doleant, non in qua moriantur. Alioquin et illi dolores finirentur. Ad hoc enim resurgent incorrupti, ut possint æterna sustinere supplicia. Incorruptio itaque propterea communis est omnium, quia in ea miserabiliores erunt peccatores ut ad tormenta perpetui sint, et immortalitati atque incorruptibili corpore solvantur. De illa vero commutatione justorum cum dixisset: *et nos immutabimur*, tanquam quæreremus quomodo istud fiat, vel qualis illa commutatio futura sit, adjungit: *Oportet enim corruptibile hoc*, etc. Ubi manifeste docet id ipsum corpus quidem resurgere quod sepultum est, sed mutare gloriam, non naturam. Quando enim dicit hoc, videtur quodammodo duobus digitulis comprehensum corpus ostendere. Hoc in quo nascimur; hoc, in quo morimur; hoc, quod timent recipere qui puniendi sunt. *Nos*, inquit, *immutabimur*; quia *oportet*, id est necesse est, hoc fieri, quia bene servivimus et quia Deus promisit, oportet hoc corruptibile corpus induere velut ornamentum incorruptionem, ut ultra non esuriant, vel aliquatenus lædatur; et mortale hoc induere immortalitatem, ut ultra non dissolvatur. Vel ad id quod dixerat: *Mortui resurgent incorrupti*, intulit: *Oportet corruptibile hoc induere incorruptionem*; ad id vero quod subdiderat, *et nos immutabimur* adjecit: *Et mortale hoc oportet induere immortalitatem*. Aliud est enim immortalitas, aliud incorruptio, sicut et aliud mortale, et aliud corruptibile. Quidquid enim mortale est, corruptibile est; sed

« Si autem venerit Timotheus, videte ut sine timore sit apud vos. Opus enim Domini operatur sicut et ego. Ne quis ergo illum spernat. Deducite autem illum in pace, ut veniat ad me. Exspecto enim illum cum fratribus. »

Quamvis ea prædicaret Timotheus quæ ab Apostolo acceperat, tamen quia non erat auctoritatis ejusdem, commendat illum Apostolus, ne forte ab his qui dissentiebant in plebe, non ut erat dignus reciperetur, et perstreptentibus eis, nasceretur illi timor, nihilque proficeret adventus illius saluti eorum. Possent enim et gentiles excitari ad seditionem discordia plebis, accepta occasione irruendi in Timotheum. Ideo ne spernat eum aliquis, inquit, quoniam *opus Dei operatur sicut et ego*, ut scilicet in ea auctoritate accipiatur qua et apostolus, erat enim et ipse episcopus. Quem tanti meriti esse declarat, ut non solum inter eos honorandum illum præcipiat, sed etiam cum proficisci pararet, deducendum cum obsequio ut apostolum Domini. Tam enim necessarium eum ostendit, ut etiam ipse illum exspectaret cum fratribus propter evangelium Christi.

« De Apollo autem fratre vobis notum facio, quoniam multum rogavi eum ut veniret ad vos cum fratribus; et utique non fuit voluntas ejus ut nunc veniret, veniet autem cum ei vacuum fuerit. »

Hic Apollo ex Judæis erat, Alexandrinus natione, doctus in lege et eloquentissimus, atque Corinthiorum episcopus (*Act. xviii*); sed propter dissensiones eorum recesserat a Corintho. Quem dicit Apostolus redire noluisse, significans in hoc culpam eorum, ut, hoc audientes, respuerent falsos apostolos, et paci studerent, quatenus mererentur ut ad eos suos antistes reverteretur. Ideoque de Timotheo dixerat: Videte ut sine timore sit apud vos, quia aliqui missi non bene fuerant suscepti; ac per hoc non venturum Apollo, nisi concordēs fierent. *Non fuit*, inquit, *ejus voluntas* vel *Dei ut nunc veniret* dum tales estis; *sed veniet cum ei tempus vacuum fuerit*, id est quando vos a pseudoapostolis et dissensionibus sic vacuos invenerit, ut audiendæ prædicationi ejus vacare velitis, vel quando ab his quæ nunc facit, exoccupatus fuerit.

« Vigilate et state in fide, viriliter agite et confortamini. Omnia enim vestra in charitate fiant. »

Ut Apollo gratanter ad vos veniat, *vigilate*, id est mentis oculos ad diaboli astutias præcavendas aperite, ne vel ab inmundis spiritibus, vel a falsis prædicatoribus decipiāmini. *State in fide*, id est ræ cedatis vel pseudomagistris vel gentilibus, qui fidem vestram impugnare satagunt, et vos ab ejus arce pellere. *Viriliter* [al. *viritim*] *agite*, id est nolite dissolvi, nolite vigorem perdere, nolite effeminari, sed viriliter bona facite, et mala tolerate, et confortamini, id est semper robustiores efficiāmini ut sit in vestra virtute profectus. *Et omnia vestra fiant non in dissensione vel ira vel cupiditate sæcularis*

A gloriæ, sed in charitate. Nam quidquid sine charitate agitur, nihil est, quamvis esse bonum valde videatur. Cum dicit omnia, satis ostendit etiam ipsas correptiones, quas asperas et amaras sentiunt qui corripiuntur, cum charitate esse faciendas.

« Obsecro autem vos, fratres, nostis domum Stephanæ et Fortunati et Achaici, quoniam sunt primitiæ Achaicæ, et in ministerium sanctorum ordinaverunt seipsos, ut et vos subditi sitis ejusmodi et omni cooperanti et laboranti. Gaudeo autem in præsentia Stephanæ et Fortunati et Achaici, quoniam id quod vobis deerat, ipsi suppleverunt. Refecerunt enim et meum spiritum et vestrum. Cognoscite ergo qui ejusmodi sunt. »

Monui ut omnia vestra opera in charitate fiant. Sed nunc *obsecro ut subditi sitis eis* qui sunt tales, qualis est domus Stephanæ et Fortunati. *Nostis enim domum Stephanæ et Fortunati et Achaici*, quia sunt *primitiæ Achaicæ*, id est primi crediderunt ex his qui sunt in Achaia, nam et Corinthii sunt Achaici, et *ordinaverunt seipsos in ministerium sanctorum*, id est ut calcata avaritia, sagittis de laboribus suis ministrarent necessaria, et maxime prædicatoribus. Obsecro vos ut subditi sitis operariis ejusmodi, et omni cooperanti, id est cum talibus operanti, et laboranti. Vos talibus estote subditi. Sed *ego in præsentia Stephanæ et Fortunati et Achaici gaudeo*, vel quia præsentēs sunt apud vos, et in illis potestis magnum habere profectum, vel quia mihi venerunt pro vobis ministrare. *Quoniam id quod est vobis deerat, ipsi suppleverunt*, id est ministraverunt mihi quod vos non fecistis. *Refecerunt enim et meum spiritum* mihi ministrando necessaria, et *vestrum* quibus apostolum servaverunt. Refecerunt spiritum meum, pro mea lætitia; refecerunt vestrum, pro charitate pro vobis exhibitā. *Ergo cognoscite*, id est diligite et honorate eos qui ejusmodi sunt.

« Salutant vos omnes ecclesiæ Asiæ. Salutant vos in Domino multum Aquila et Prisca cum domesticis ecclesia, apud quos et hospitor. Salutant vos omnes fratres. Salutate invicem in osculo sancto. Salutatio mea manu Pauli. »

Salutant, inquit, vos omnes *ecclesiæ Asiæ*. Ac si dicat: Quod ego scribo, omnes desiderant. Per hoc etiam commonet eos, ut studeant illis fieri similes a quibus salutantur. *Aquila et Prisca sunt maritus et uxor*, qui in Actibus apostolorum leguntur (*Act. xviii*). *Domestica eorum ecclesia*, congregatio fraternitatis apud eos manens. Erant enim hospitales. Osculum vero sanctum, signum pacis est. In quo ut invicem sibi adhæreant, sublata discordia, monet ut casta et pacifica sint oscula, quæ in ecclesiis dantur, et simulata non sint. Delinc se in hac epistola subscripsisse ostendit, dicens: *Salutatio mea manu Pauli*, ut indubitanter sciant epistolam ejus esse. Sequitur:

« Si quis non amat Dominum nostrum Jesum Christum, sit anathema maranatha. »

Amatores, inquit, Christi saluto. Sed si quis non amat Dominum nostrum Jesum Christum, sit anathema, id est alienatus a Deo. Anathema quippe alienatio vel alienatus interpretatur. Secundum Augustinum, anathema dicitur condemnatus, *maranatha*, id est donec Dominus redeat. Excommunicat ergo Apostolus eum, qui non amat Christum, usque ad diem iudicii, quo ipse reddet unicuique quod justum fuerit reddere (*Matth. xvi; Rom. ii*), ut tunc si Christo placuerit, communionem qui anathematizatus fuerat recipiat. Hieronymus autem sic ait: Maranatha magis Syrum est quam Hebræum, tametsi ex confinio utrarumque linguarum aliquid et Hebræum sonet; et interpretatur, *Dominus noster venit*. Ut sit sensus: Si quis non amat Dominum nostrum Jesum Christum, sit anathema. Et illo completo, deinceps inferatur Dominus noster venit. Quod superfluum sit adversus eum odiis pertinacibus velle contendere, quem venisse jam constat. Si quis non amat, etc., ac si dicatur: Si quis non diligit Dominum Jesum, non sit ei utilis adventus ejus qui jam

completus est; et sic ad damnationem sit ei securus, qui adhuc futurus est.

« Gratia Domini nostri Jesu Christi vobiscum. Charitas mea cum omnibus vobis in Christo Jesu. Amen. »

Sit vobiscum semper gratia Christi, sine cujus auxilio subsistere non potestis, nec aliquid boni facere (*Joan. xv*). Propter illos qui dissensionem studentes Christum non amabant, dictum est: Si quis non amat Dominum nostrum Jesum Christum, sit anathema. Qui enim dicebant, ego sum Pauli, ego autem Apollo, ego vero Cephe, non amabant Christum, quia non Christo, sed hominibus gloriam dabant. Quia ergo non in hominibus, sed in Christo spes omnis ponenda est. Gratia, inquit, Domini nostri Jesu Christi sit vobiscum. Et addit: Charitas mea cum omnibus vobis in Christo, id est ea charitate vos invicem in Christo diligite, qua ego vos diligo. In Christo Jesu vos diligite exemplo mei, non in amore sæculi. Deinde subjungit, Amen, quod interpretatur, vere ac fideliter dicta esse confirmantur. Amen quippe omnium confirmatio est præcedentium.

IN EPISTOLAM II AD CORINTHIOS.

ARGUMENTUM.

Sciens Apostolus epistolam profecisse, quam Corinthiis miserat, aliam eis iterum scribit ad exhortandam obeditionem eorum, et tangit contumaciam nonnullorum qui emendari noluerant. In hoc tamen animo revelatus, quod ea quæ ad ecclesiasticam ordinationem pertinent, audierat esse correctæ, certus deinceps quia et vitia eorum paulatim corrigerentur, præterea quia ex parte magna esse cœperant obediens. Qui enim ea quæ ad fidem et ad ecclesiasticum ordinem pertinent emendaverant, certam spem de se dabant, quia et mores atque conversationem essent emendaturi. Propter quod et festinanter scripsit eis Apostolus, ut contristati ex correptione prioris epistolæ, in hac consolationem acciperent, et cresceret in eis fructus pœnitentiæ, quatenus videntes jam placere se ei cui displicuerant, promptiores fierent circa bonos actus. Et hæc principalis hujus epistolæ causa est. Quidam tamen eorum, ut dictum est, noluerant corrigi, sed delectatione peccatorum irretiti, et a falsis apostolis depravati, postposito veritatis Apostolo, ipsis falsis apostolis obediabant. Unde magister egregius ut eos a connectatu eorumdem pseudo prædicatorum revocet, multis modis ostendit errorem et deceptionem fallaciæ eorum, ut nullam amplius in eis fiduciam habeant, nec dolosis prædicationibus fidem adhibeant, quos vident ad perniciem animarum tendere. Propter quod et seipsum multifarie commen-

dat, ut cognoscentes cujus auctoritatis atque dignitatis ipse sit, libenter ejus doctrinam suscipiant, et sic ad salutem animarum suarum perveniant. Præcipit quoque fornicatorem correptionem recipi. Notat etiam eos in elemosynis parcos. Quia vero pro quorundam peccatis in epistola superiori doctores eorum præcipue corripuerat, et multam fuerant contristati, nunc eos consolatur, suam eis proponens exemplum, et docens non debere impatienter ferre, quod pro aliorum salute sunt correpti, cum ipse pro aliena salute per culis et mori quotidie subjaceret. Sed et de tribulationibus quas patiebantur, consolatur eos exemplo suarum tribulationum, quas multo graviores sustinebat. Semper etiam vel principaliter vel secundo videtur intendere revocare a pseudoapostolis illam partem plebis, quæ adhuc illos sequebatur.

CAPUT PRIMUM.

« Paulus Apostolus Jesu Christi per voluntatem Dei, et Timotheus frater Ecclesiæ Dei, quæ est Corinthi, cum omnibus sanctis qui sunt in universa Achaia. Gratia vobis et pax a Deo Patre nostro et Domino Jesu Christo. »

Quasi dicatur: Vos Corinthii mihi debetis obedire, et falsos apostolos respicere, quia sum Paulus apostolus Jesu Christi, id est mirabilis legatus Salvatoris Regis. Ille Rex qui solus in æternum salvat, misit me, ut vos ad eum ducerem, ut regnaret in vobis, et vos salvaret. Ideoque libenter mihi debe-

tis obtemperare. Apostolus Christi sum, non usurpative, sed per voluntatem Dei Patris, id est a Christo constitutus sum apostolus per voluntatem Patris, sicut ipse Christus ait: « Quoniam quæ placita sunt ei, facio semper (Joan. viii). » Dei autem voluntatem justam et rationabilem manifestum est esse. Ac per hoc rationabiliter et juste dicor apostolus, quem per voluntatem Patris ad vos misit Filius. Pseudo autem apostoli, nec a Christo sunt missi, nec per Dei voluntatem venerunt, nec salutem audientium quærunt. Ideoque respuendi sunt. Paulus vos alloquitur, et *Timotheus frater*, qui primam illam ad vos epistolam portavit, et correptionem vestram vobis renuntiavit. Notandum quod non ait, Paulus et *Timotheus*; sed, Paulus et *Timotheus frater*, quia non ambo apostoli. Ad Philippenses tamen, ubi non erat tanta auctoritas necessaria, servi ambo ponuntur, quia ambo sunt servi, non ambo apostoli. Paulus et *Timotheus* scribunt *Ecclesie Dei, quæ est Corinthi, cum omnibus sanctis qui sunt in universa Achaia*. Corinthus enim metropolis est Achaia; et ideo quod Corinthiis scribitur, omnibus fidelibus Achaia provinciae scribitur. Vobis ad quos scribimus, sit gratia per quam peccata vestra remittantur; et pax, per quam Deo reconciliemini. *Gratia et pax sit vobis a Deo Patre nostro*, qui vos a loptavit in filios; et *a Domino Jesu Christo*, qui vos suo dominio benigne mancipavit. Ideo ponit a Patre et Filio tantum, quoniam eo tempore nullus errabat de Spiritu sancto, sed vel de Patre vel de Filio errabat, quicumque in fide Trinitatis errabat. Namque Spiritus sanctus de quo nunc tacet manifestabatur satis per opera sua, id est varias linguas, per prophetias, per sermonem sapientiae vel scientiae, etc.

« Benedictus Deus et Pater Domini nostri Jesu Christi, Pater misericordiarum et Deus totius consolationis, qui consolatur nos in omni tribulatione nostra, ut possimus et ipsi consolari eos, qui in omni pressura sunt per exhortationem, qua exhortamur et ipsi a Deo. Quoniam sicut abundant passiones Christi in nobis, ita et per Christum abundat consolatio nostra. Sive autem tribulamur, pro vestra exhortatione et salute; sive consolamur, pro vestra consolatione; sive exhortamur, pro vestra exhortatione et salute, quæ operatur tolerantiam earundem passionum quas et nos patimur, ut spes nostra firma sit pro vobis, scientes quoniam sicut socii passionum estis, sic eritis et consolationis. »

Primum perfectis loquitur de tribulatione, proponens se exemplum patientiae et consolationis a Deo acceptæ. Et inde se ostendit commendabilem, unde pseudoapostoli et sequaces eorum reputabant eum vilem ac contemptibilem, qui ab omnibus apud quos prædicabat, tam ignominiose tractabatur, et sic omnibus erat invisus, ut semper contumeliis et tribulationibus afficeretur. Hæc de eo dicebant derogatores eius volentes gloriam ejus minuere; sed

A ipse in his omnibus gloriatur, et inde benedicit Deum, quia hæc pro Christo patitur, et in his nunquam sine consolatione deseritur. Sit, inquit, *benedictus Deus*, qui Christum secundum humanitatem creavit, et secundum divinitatem genuit, atque ita est Deus et Pater ejus. Sit benedictus Deus et *Pater Domini nostri Jesus Christi* pro tot et tantis in nos beneficiis suis. Ipse dico: *Pater misericordiarum*, quia ex visceribus ejus proveniunt in nos misericordiae ejus, per quas et multitudinem peccatorum nostrorum relaxat, et ut aurum nos in igne tribulationum examinat, et *Deus totius*, id est, integræ consolationis, quia perfectam dat consolationem his, qui pro nomine ejus adversa patiuntur, vel qui in luctu poenitentiae affliguntur. Hoc et propter Corinthios dicitur, qui correptionis causa fuerant contristati. Multum enim refrigerii dat, quod auferat Deum esse Patrem misericordiarum quia intelligunt se ad hoc correctos, ut ad pium patrem converterentur, qui per multas misericordias multa peccata eorum deleteret, et gratiam eis virtutum daret. Cur enim Pater misericordiarum vocatur, nisi quia per paternarum misericordiarum viscera recipit filios poenitentiae, et in antiquam gratiam reducit, ut non sola sit venia, sed et pristini status restauratio? Et ipse est Deus totius consolationis, qui contristatis in poenitentia dat perfectam consolationem, tribuendo spem non solum evadendi tormenta, sed et consequendi præmia. *Qui nos Christi prælicatores consolatur in omni nostra tribulatione*, tam corporis quam animæ. Non in quadam, sed in omni tribulatione nos consolatur, ne deficiamus. Consolatur nos vel per se nobis apparens, vel per angelum admonens, vel per Scripturas, vel per alios sanctos, vel per occultam inspirationem, vel per tribulationis alleviationem, sive per nostram de tribulatione liberationem. Ita consolatur nos, ut et nos ipsi possimus consoari eos, qui in omni pressura sunt tribulationum pro nomine Christi, vel qui sunt in omni pressura peccatorum, id est quos premit sarcina criminum. His enim consolationem exhibemus, dum eis spem veniæ poenitentibus damus. Consolatur nos Deus, ut et nos consolemur alios, atque ita neminem suorum relinquit desolatum, et multo magis in futuro remunerat, quos etiam in præsentem non deserit. Eos qui sunt in adversitatum pressura, possumus consolari exhortando ad poenitentiam et tolerantiam per exhortationem qua etiam nos ipsi a Deo intus exhortamur ad constantiam passionum. Vere consolationem et exhortationem a Deo percipimus, ut et nos aliis solatia ministremus. Quoniam sicut passiones Christi, quas ipse prior pertulit, et nobis perferendas dereliquit, abundant in nobis, qui sumus membra ejus, ita, id est non minus abundat etiam consolatio nostra, quam Deus nobis intus per Christum exhibet. Nam sicut Christus est causa passionum, sic idem ipse est causa et consolationum; et ideo non viliores, sed gloriosiores æstimandi sumus, ex eo quod passionibus

Christi communicamus, quos Deus in omnibus adversis semper ita consolatur, ut et alios consolari possimus. Nos quidem a pravis hominibus passiones sustinemus, et a Deo consolationes vel exhortationes accipimus: sed hæc omnia pro vobis sunt, quia *sive tribulamur*, id est igne tribulationis examinamur, hoc fit pro *vestra exhortatione et pro vestra salute*, quia nostro exemplo vos hortatur Deus ad tolerantiam tribulationum, per quas ad æternam salutem pervenietis: *sive consolamur* intus a Deo, pro *vestra*, id est *consolatione*, id est ut vos inde potissimum consolemini, *sive exhortamur* a Deo, finitis malis, vel data virtute nobis ad graviora perferenda, hoc iterum fit pro *vestra exhortatione et salute*, quia et vos Deus sic exhortatur permanere in fide, et pro ea pati majora quam pertulistis, quæ scilicet exhortatio operatur, id est intendit operari in vobis *tolerantiam earundem passionum, quas et nos patimur*. Vel operatur tolerantiam, id est operatur in hoc, ut servetis tolerantiam earundem passionum. Sive pro una parte legamus intolerantiam, id est gravem tolerantiam. Nam sicut nonnunquam impotens dicitur valde potens, ita nunc intolerantia potest dici magna tolerantia. Exhortatio igitur quam a Deo per nos accipitis, operatur in vobis intolerantiam, id est fortem tolerantiam earundem passionum, quas et nos patimur, et ideo hoc fit, ut *spes nostra* quæ est pro vobis, id est qua speramus vestram salutem, *firma sit et rata*. Nos patimur adversa et de vobis spem bonam habemus, scientes pro certo *quoniam sicut nobis estis socii passionum, sic eritis* in futuro sæculo socii etiam consolationis æternæ, quam percepturi sumus. His verbis multum eos animat Apostolus ad tolerantiam adversitatum pro Christo. Qui et subjunxit:

« Non enim volumus ignorare vos, fratres, de tribulatione nostra, quæ facta est in Asia, quoniam supra modum gravati sumus supra virtutem, ita ut læderet nos etiam vivere. Sed ipsi in nobismetipsis responsum mortis habuimus, ut non simus fidentes in nobis, sed in Deo, qui suscitavit mortuos, qui de tantis periculis nos eripuit et eruit, in quem speramus quoniam et adhuc eripiet, adjuvantibus et vobis in oratione pro nobis, ut ex multarum personarum facierum, ejus quæ in nobis est donationis, per multos gratiæ agantur pro nobis. »

Majores exponit adversitates, quas pro Christo et aliorum salute passus est, ut cum ipse passus sit tantas, discipuli et alii minores non recusent pati quaslibet tribulationes, et comparatione magistri erubescant discipuli suam dolere injuriam, cum magistrum multo majora pertulisse cognoverint. Dixi quia nos tribulationes patimur, ut et vos imitemini. Et vere patimur. *Non enim volumus ignorare vos, fratres*, id est ut ignoretis de tribulatione nostra, ne forte doleatis de vestra. Vobis enim proficit eam nosse, quia tunc cognoscetis vos parva pati. Pseudoapostoli suas narrant glorias, nos autem passiones

nostras. Nolumus ut ignoretis de tribulatione nostra, *quæ facta est nobis in Asia minore*, quæ est pars majoris Asiæ, *quoniam supra modum*, id est supra quantitatem omnium præcedentium tribulationum, *gravati sumus* pondere tribulationis illius *supra virtutem* humanam. Nulla enim virtus humana tantum pondus afflictionis sustinere posset cum vita, nisi humanæ fragilitati vires tribuisset gratia divina. Et ita magnitudine tribulationum sumus oppressi, ut læderet nos non solum sustinere, sed etiam vivere. Nec solum lædebat nos vivere, sed ipsi etiam responsum mortis habuimus, id est cum quidam de vita nostra ab aliis quærerent, nihil responsum est illis de vita, sed solummodo de morte, quia nullus nobis vitam promisit. Responsum, inquam, mortis habuimus non tantum in aliis, sed etiam in nobismetipsis, id est quando rationem nostram consulimus, nullum nobis remedium nisi mortem promisit. Responsum, id est certitudinem mortis in nobismetipsis habuimus, quoniam intima nostra responderunt nobis mortem adesse. Vel responsum mortis habuimus, id est mors ipsa respondit nobis et docuit nos omne humanum auxilium defecisse; et ab illo solo sperandum esse remedium, cui etiam mortuos suscitare possibile est, *ut non simus fidentes in nobis, sed in Deo, qui suscitavit mortuos, qui de tantis periculis eripuit nos*. Tanta insolentia iniquitatis contra fidei prædicatores insurrexit, ut mortuos ante oculos haberent. Denique erepti de tanta pressura, resuscitados se dicunt. Sic enim afflicti fuerant, ut desperarent de præsentī vita. Sed quia Deus præsidia sua non negat in necessitate positus, maxime suis, erupuit illos desperantes de semetipsis, fidentes autem de Deo. Nimia enim pressura deficere se profitentur, nisi Deus adesset, et hoc est, ut non simus fidentes in nobis, sed in Deo, qui suscitavit mortuos, et velut a morte nos suscitavit a pressura tribulationis, qui nos de tantis periculis eripuit, et quotidie nos eruit ab adversis. *In quem speramus, quoniam et adhuc nos eripiet, adjuvantibus et vobis* ereptionem nostram *in oratione facta pro nobis*, id est non solum cæteri fideles nos adjuvabunt apud Deum ut a malis eripiamur, sed etiam vos orantes pro nobis. Ideo nos eripiet orantibus vobis et aliis, *ut ex personis multarum facierum*, ad Deum per prædicationem nostram conversis, *agantur per multos fideles gratiæ Deo pro nobis; gratiæ, dico, ejus donationis*, id est liberationis a periculis *quæ in nobis est*. Quoniam gratia Dei eripit nos causa multorum, pro quibus et patimur, ideo multi pro nobis gratias Deo referant cum eripimur, vel orent cum patimur. Personarum multarum facierum sunt homines multarum ætatum et qualitatum diversarum, id est pueri, adolescentes, juvenes ac senes ac veterani utriusque sexus. Et hæc personarum sunt ejus donationis quæ in nobis est, id est per doctrinam nostram factæ sunt participes ejus fidei, quam Deus nobis donavit. Ideo ex his personis ad Deum per nos conversis, et ejus donationis, id est fidei quæ in nobis est,

participibus effectis, agantur per multos eredentes gratiæ Deo pro nobis ab adversitate ereptis. Vel personæ vocantur sancti, qui sunt apud Deum honorabiles et acceptabiles. Et hi sunt multarum facierum, quia in interiori homine suo habet unusquisque eorum suam faciem, per quam a Deo cognoscitur, id est intentionem bene agendi, quoniam alius intendit ad hoc, ut alios prædicando instruat, alius ut elemosynas tribuat, alius ut frequenter oret, alius ut orantibus subsidia corporis ministret. Et ita suam faciem, id est suam bonam intentionem habet unusquisque, et hæ multarum facierum personæ sunt ejus donationis, id est ejus gratiæ nobis divinitus datæ, quæ in nobis est; et ideo ex his agantur gratiæ Deo per multos pro nobis, qui eos fecimus participes donationis nostræ.

¶ Nam gloria nostra hæc est, testimonium conscientiæ nostræ, quod in simplicitate cordis et sinceritate Dei et non in sapientia carnali, sed in gratia Dei conversati sumus in hoc mundo, abundantius autem ad vos. Non enim alia scribimus vobis, quam quæ legistis et cognovistis. Spero autem quod usque in finem cognoscetis, sicut et cognovistis nos ex parte, quia gloria vestra sumus, sicut et vos nostra in die Domini nostri Jesu Christi.

¶ Ideo, inquit, non diffidimus de auxilio Dei, sed speramus quia nos eripiet, quoniam pura est conscientia nostra, et inde gloriamur in oculis ejus. Nam gloria nostra hæc est testimonium scilicet bonum quod perhibet nobis conscientia nostra, quæ testatur nos bono ac simplici animo fecisse quidquid fecimus. Sicut magna pœna est impiorum conscientia, sic magnum gaudium est piorum conscientia. Nam, etsi diabolus vel homo perversus falsas eis criminationes impingere quærat, ipsi tamen coram Deo intus gloriantur ex bonæ conscientiæ testimonio. Unde nunc gloriam suam Apostolus testimonium conscientiæ suæ memorat, quia favores oris alieni non appetens, vitæ suæ gaudia extra semetipsum ponere ignorat. Ac si dicat: Ideo glorior in tribulationibus, quia conscientia mea me non reprehendit prædicasse causa lucri vel gloriæ temporalis, sed testis est mihi, me pio studio vestram salutem quæsisse. *Nam gloria nostra hæc est, testimonium conscientiæ nostræ, quod scilicet in simplicitate cordis et sinceritate Dei conversati sumus in hoc mundo.* Hæc est gloria conscientiæ nostræ, simplicitas et sinceritas. Simplicitas, quia nihil per duplicitatem fecimus, ut aliud haberemus in corde, aliud in ore, sed totum per simplicem puritatem. Sinceritas (214), quia sine carie, id est sine corruptione conscientiam habuimus integram. Et hæc sinceritas et simplicitas fuit Dei, quia sinceriter et simpliciter Deo placere studuimus in cunctis quæ gessimus, et in eo simplices ac sinceri fuimus. Pseudo autem apostoli non simpliciter, sed dupliciter ambulant, quia per hypocrisim faciunt quidquid boni facere videntur, et evangelicæ

gratiæ miscent carnales observantias legis. Nec sinceriter, id est sine carie terebratæ et corruptæ conscientiæ quidquam faciunt. Nos vero conversati sumus in simplicitate cordis et sinceritate Dei, et non in sapientia carnali, quæ est voluptates diligere et labores vitare, ac corporis commoda quærere, et hominibus placere, vel secundum naturas rerum et non contra prædicare, sed in gratia Dei, id est in gratia evangelicæ prædicationis et sanctitatis, conversati sumus in hoc mundo, ubi tot mala sunt, sed abundantius ad vos hoc fecimus, quia nihil unquam a vobis accepimus, cum possemus stipendia sumere de bonis nostris. Pseudoapostoli autem et juxta mundi sapientiam prædicebant, ne offenderent homines, et quæstus causa prædicabant. Unde Apostolus nunquam a Corinthiis voluit sumptus accipere, ne his occasionem daret accipiendi, et hoc est quod abundantius ad eos (id est apud eos), in gratia Dei conversatum se dicit, quia cum ab aliis interdum acceperit, ab his nunquam aliquid sumere voluit, ne sibi auctoritatem arguendi eos minueret. Vere apud vos abundantius quam apud alios conversati sumus in gratia, id est gratis omnia vobis ministravimus, quia modo non alia scribimus vobis quam ea quæ legistis in epistola priore, et quæ cognovistis in experientia operum nostrorum, id est nec modo per hanc epistolam a vobis aliquid exigimus, nec per præmissam epistolam aliquid exegimus, nec cum præsentibus essemus, quidquam a vobis suscepimus sicut recognoscitis. Et non solum nunc istud recognoscitis, sed etiam spero quod usque in finem vitæ nostræ cognoscetis idem de nobis, id est nos in eodem permanere, ut nihil a vobis sumamus sicut et cognovistis nos ex parte, non ex toto, quia et scitis quod abstinuimus, non tamen scitis quanta dilectione id fecimus. Ideo cognoscetis nos in hoc perseverare, quia nos sumus gloria vestra, sicut et vos nostra, id est per nos gloriam æternam consequi debetis, et nos per vos bene instructos. Quod non esset, si cum offendiculo a vobis acciperemus. Et hæc gloria nobis est futura non in nocte præsentis sæculi, sed in die et clarificatione Domini nostri Jesu Christi, quia ipse manifestabit omnia, et ejus voluntati nemo resistet. Tunc et vos glorificabimini, quia bene nobis obedistis; et nos, quia vos bene docuimus. Ideo perseverare debetis in bonis quæ cepistis, et semper meliorari.

¶ Et hac confidentia volui prius venire ad vos, ut secundum gratiam haberetis, et per vos transire in Macedoniam, et iterum a Macedonia venire ad vos, et a vobis deduci in Judæam. Cum ergo hoc voluisssem, nunquid levitate usus sum? aut quæ cogito, secundum carnem cogito, ut sit apud me, Est et Non?

Postquam se commendabilem ostendit de tribulationibus suis, unde vilis et abjectus apud quosdam poterat æstimari, purgat se etiam de quadam re, de

qua mendax et levis poterat reputari a quibusdam. **A** In priore enim epistola promiserat se venturum ad eos, cum Macedoniam pertransiret, et apud eos aliquandiu moraturum, et tamen non venit. Et inde, quantum ad reputationem quorundam simpliciter intelligentium, videri poterat mendax, et instabilis; sicque jam apud eos amittebat firmitatem auctoritatis. Unde se excusat, et multis rationibus ostendit, quia non ideo mendax aestimari debet quoniam non venit ad eos, quia non absolute dixit se hoc facturum, sed ait: « Si Dominus permiserit (*I Cor. xvi.*) » Nec est judicandus mendax, qui dicit falsum quod putat verum, quia quantum in se est, non fallit, sed fallitur; et e contra mentitur, qui dicit verum quod putat falsum; nec est liber a mendacio, qui ore nesciens vera loquitur, sciens autem, voluntate mentitur. Vestra, inquit, gloria sumus, et vos nostra. *Et hac confidentia*, quia confido quod sumus invicem alii gloria aliorum, id est quia jam emendata est vita vestra, ut sit digna nos glorificare, *volui priusquam irem in Macedoniam, venire ad vos, ut ex adventu meo haberetis secundam gratiam* qui dudum habuistis primam, quando vos ad fidem converti, id est ut haberetis confirmationem, quæ est post fidem. Non est igitur otiosum quia volui venire et non veni. Intelligere enim debetis, esse aliquos inter vos, quorum causa voluntatem meam non implevi, qui se prius debent corrigere, ut me possint læti suscipere. Volui ad vos venire, quos emendatos desiderabam videre, *et per vos*, id est vestro ductu transire in Macedoniam, quia licet compendiosius per aliam viam illuc ire possem, vestro tamen amore per vos transire disposui; *et iterum a Macedonia venire ad vos*, ut multipliciter vos confirmarem, *et a vobis deduci in Judæam*, ut ferrem elemosynam. Et quia hoc volui nec implevi, *ergo cum hoc voluissem, nunquid levitate usus sum*, ut non firma ratione, sed mentis levitate hoc vellem, et eadem levitate dimitterem? Nequaquam hoc est putandum. Nam levitatis vitio non succumbo, et ideo mutabilitatis aura non moveor. Quia non levitate, sed consilio feci, ut non implerem quod disposueram, nec aliud feci, quam quod faciendum erat, quia utilitas anteponenda est voluntati, non voluntas utilitati, aut, ea quæ cogito secundum carnem cogito, id est more carnalium hominum, qui pro terreno commodo facile mutant voluntatem suam. Nunquid carnaliter cogito ut pro carnali commodo vel ire disposuerim, et quia non erat, dimiserim? Non. Qui enim secundum carnem cogitat, tunc non implet quod disposuit, quando aut amplioribus personis differt, aut certe lucris aut apparatus vincitur. Spiritualis autem tunc dispositum non implet, quando providentius aliquid pro salute animæ meditatur. Sic et ego ideo non implevi quod volueram, ut vos per hoc ipsum efficeremini meliores, scientes me propterea distulisse, quia quidam adhuc inter vos non se purificaverant a peccatis. Nunquid secundum carnem cogito, ut per hoc sit apud

me, *Est et Non?* id est affirmatio et negatio de eadem re per inconstantiam animi, scilicet ut sit in me duplicitas, et in verbis meis contrarietas. Nequaquam.

« Fidelis autem Deus, quia sermo noster qui fuit apud vos, non est in illo, *Est et Non*, sed *Est*, in illo est. Dei enim Filius Jesus Christus, qui in vobis per nos prædicatus est, per me et Silvanum et Timotheum, non fuit in illo *Est et Non*, sed *Est* in illo fuit. Quotquot enim promissiones Dei sunt, in illo *Est*. Ideo et per ipsum dicimus: Amen Deo ad gloriam nostram. »

Non est in sermone meo contrarietas, ut quod affirmavi, negem, dicendo *Est et Non*. Sed Deus est fidelis, id est verax, qui per os meum loquitur, *quia sermo noster qui fuit apud vos*, id est quem loquimur ad vos; vel qui fuit apud vos, id est quem locuti sumus vobis in conversione vestra, dum moraremur apud vos, non est fluctuans et mendaciis permistus, sed stabilis et verus, quia *non est in illo Est et Non*, id est ambiguitas et variatio, *sed Est in illo est*, id est certa puræ veritatis assertio. Nam quod dixi me venturum ad vos, ideo distuli, quia nondum estis bene correcti, ut in adventu meo possitis lætari; et ideo non in me, sed in vobis remansit quod non veni; sed semper habui voluntatem veniendi, et nunquam fuit in me velle et non velle, sed est semper in me velle. Et ita non variatur sermo meus, sed in affirmatione sua permanet. Non est in sermone meo *Est et Non*. Nam *Dei Filius Jesus Christus, qui in vobis per nos prædicatus est, per me et Silvanum et Timotheum*, id est quem vobis prædicavimus ego et Silvanus (id est Silas), et Timotheus, non habet in prædicatione sua *Est et Non*, id est duplicitatem, ut aliquid ibi nunc affirmetur, et nunc negetur; nec fuit unquam *in illo Est et Non*, *sed Est in illo fuit*, id est certa affirmatio consummatæ veritatis. Quod si mendaces essemus, tunc ipse mendax esset, quia hoc tantum prædicamus quod ille docuit. Sed ille non docuit de eadem re dicere: *Est et Non est*, quia non fuit in illo: *Est et non est*, ac per hoc nec in nobis. Non est in illo *Est et Non*, id est duplicitas vel falsitas; sed *Est in illo fuit*, id est veritas et immutabilitas, sicut Moysi dixit: « Ego sum qui sum (*Exod. iii.*) » Ille enim vere est, qui semper idem ipse est, et immutabilis permanet. Vel in illo *Est fuit*, id est, rata assertio eorum quæ temporaliter in homine gessit. Non fuit in illo *Est et Non*, sed *Est in illo fuit*, quia nunquam aliud voluit, quam hoc quod est utile. Semper enim voluntas ejus cum utilitate est, nec immutatus est ut faceret invitus sicut homo quod est utile, aut ut ambigeret dealiquibus et mutaret voluntatem. Vere non est in eo ista varietas, sed immutabilis firmitas, quia *quotquot promissiones Dei sunt*, id est quotquot promissiones per legem et prophetas Deus Pater fecit, *in illo Est sunt*, id est essentialiter habent in illo, quia omnes adimpletæ sunt, vel adimplentur in illo. Omnes promissiones Dei in illo firmatæ sunt et exhibitæ, quia in illo completum est quicquid

pro salute nostra prophetatum est. Et ideo patet quia in sermonibus suis vel per se vel per alios mendax non fuit, per quem Pater verax apparuit. Et quia Dei promissiones habent in illo esse, id est consistunt in illo atque completæ sunt, ideo per ipsum est Amen, id est veritas Deo Patri, quia per ipsum verax esse probatur, ad gloriam nostram per quos hoc manifestatur. Manifestum est quia semper in Deo veritas est, hoc est: Amen, manifestata per Christum, et per apostolos prædicata, signorum virtutibus testimonium perhibentibus vera esse per Christum quæ promisit Deus, et est sensus: Omnis veritas promissionum in Christo est, quæ per nos annuntiatur. Unde et nos gloriam habemus, quoniam vera dicere comprobamur. Gloria enim apostolorum fuit, magistrum veracem in quo promissiones Dei completæ essent, prædicare, et miraculis sua dicta firmare.

« Qui autem confirmat nos vobiscum in Christo, et qui unxit nos, Deus, et qui signavit nos, et dedit pignus Spiritus in cordibus nostris. Ego autem testem Deum invoco in animam meam, quod parcens vobis non veni ultra Corinthum. Non quia dominamur fidei vestræ, sed adjutores sumus gaudii vestri. Nam fide statis. »

Gloriam vestram dixi, non tamen nobis tribuo, sed qui confirmat nos, Deus est. Vel ita: Nos per Christum dicimus Amen Deo, id est veracem laudamus eum; sed qui nos in Christo confirmat, Deus est. Et ideo totum ab illo est. Sed et nos veraciores inde sumus, quia ipse nos in veritate quæ Christus est, confirmat. Deus est, qui nos confirmat in Christo, id est in vera prædicatione Christi, ut simus in eo stabiles et firmi, ne unquam ad verbum falsitatis declinemus. Confirmat nos, et hoc vobiscum. Hoc per ironiam dici videtur. Ac si dicatur: Si vobis constat de confirmatione vestra, tunc etiam constet de nostra, qui non minus quam vos, sumus in Christi veritate confirmati. Magis enim constat de confirmatione doctorum, quam de discipulorum, qui per doctores sunt confirmati. Vel confirmat nos vobiscum, id est Judæos cum gentibus solidat in fide Christi, et qui unxit nos, id est Christos fecit unctione sancti Spiritus in baptismo. Unxit nos in reges et sacerdotes, quia reges et sacerdotes ungebantur dum constituerentur, et qui signavit nos, id est discrevit nos ab infidelibus signo crucis, quod nostris frontibus imposuit, et dedit in cordibus nostris pignus spiritus, quando per impositionem manuum accepimus Spiritum sanctum in pignus futuræ beatitudinis. Qui enim mortalibus adhuc spiritum suum dedit, dubium non est quin immortalibus addat gloriam. Ad hoc enim pignus accipimus, ut de promissione quæ nobis sit, certitudinem teneamus. Donum ergo sancti Spiritus pignus dicitur, quia per hoc anima nostra ad interioris spei certitudinem roboratur. Donum autem sancti Spiritus habet quisquis igne charitatis ardet; et ideo se ad æternam beatitudinem perventurum, si perseveraverit, non dubi-

tet. Qui vero necdum gustavit quoniam dulcis est Dominus (*Psal. xxxiii*), et amorem charitatis non sensit adhuc sine pignore est, nullam futuræ beatitudinis [*al. salutis*] certitudinem habet. Dixi quia Deus nos in Christo qui veritas est, confirmat, ut in veritate firmiter maneamus, nec in ejus doctrina quidquam mentiamur. Sed ego quod ultra non veni Corinthum, non feci mentiens, sed potius vobis parcens, id est nolens vos ferire, qui nondum estis correcti. Et inde testem invoco Deum in animam meam, ut ipse inspiciat si verum dico, et sit mihi testis; si autem mentior, puniat. Nunc manifestat qua causa, cum voluisset ire ad illos, distulit, scilicet ut tunc iret, quando jam prope omnes emendatos inveniret. Illis enim nunc loquitur, qui videbantur velle se corrigere, sed operam nondabant ut hoc implerent. Quia ergo corrigere illos necesse erat, iter suum ab illis avertit, ne contristaret multos, vel in seditionem verteret aliquos; et ita pepercit illis, ut ipsi sua sponte corrigerentur antequam veniret. Quod ut mentibus eorum commendat, Deum testem dat, ne putent se contemptos ab illo. Quo comperto, ut præsentiam ejus mereantur, emendent se. Et hoc est: Parcens, inquit, vobis non veni ultra Corinthum post primam vicem, id est ultra primam vicem non veni ad vos, ne compellerer vos ferire. Et ne indignarentur quasi de dominio, addidit Dixi parcens; non quia dominamur vestræ fidei, sed quia sumus adjutores gaudii vestri. Fide enim statis. Ac si diceret: Ideo non dominamur fidei vestræ, quia fide statis. Non enim prælati, sed æquales vobis sumus, in quo vos stare cognoscimus. Hoc loco se prælatum ignorat Apostolus. Sed superius cum gravem fornicatoris culpam agnovisset, illico magistrum se esse recoluit dicens: « Quid vultis? In virga veniam ad vos? (*I Cor. iv.*) » Summus enim locus bene regitur, cum is qui præest, vitiis potius quam fratribus dominatur. Quia ergo fides non necessitatis, sed voluntatis res est, non dominamur, inquit, fidei vestræ. Dominatus enim, necessitatis causa est. Non dominamur vestræ fidei, quæ coactionem pati non potest; sed sumus adjutores gaudii, quod in emendatione estis habituri, quia vobis emendare volentibus admonitionem ministramus, ut quod coepistis velle, possitis implere; et bene correcti cum venero, gaudium habeatis, atque tandem in regno cœlesti gaudeatis. Ideo non dominamur vestræ fidei, quia fide statis, quæ per dilectionem operatur (*Galat. v*), non ver dominium cogit.

CAPUT II.

« Statui autem hoc ipsum apud me, ne iterum in tristitia venirem ad vos. Si enim ego contristo vos, et quis est qui me lætificet, nisi qui contristatur ex me? et hoc ipsum scripsi vobis, ut non cum venero, tristitiam super tristitiam habeam, de quibus oportuerat me gaudere, confidens in omnibus vobis, quia mecum gaudium omnium vestrum est. Nam ex multa tribulatione et angustia cordis scripsi vobis per multas lacrymas, non

contristemini, sed ut sciatis quam charitatem A
eam abundantius in vobis. »

l, quia peperi vobis in eo quod non veni, ne
casset ut vos aspere tractarem. Nec solum re-
vi iter meum parcendo vobis, sed *statui hoc*
apud me, id est decrevi in corde meo, ut
enirem ad vos iterum in tristitia, id est ut
tum meum differrem donec essetis correcti,
mens contristarer iterum de incorrectione ve-
qui nunc contristor de peccatis vestris. Vel
mel ad vos veni, quando vos ad fidem converti,
ne iterum venirem ad vos in tristitia, id est ne
contristarem corripiendo quosdam cum iterum
am. Ideo statui non venire, ne iterum tristi-
haberem, vel ne iterato adventu meo vos con-
rem, quia *si ego nunc per epistolam vos contristo*, B
et vos me per peccata contristatis, quis est qui me
venero lætificet, nisi qui nunc contristatur ad
sentiam ex me contristato, id est ex eo quod
nis peccatis contristavit, vel ex me, id est ex
verbis. Si ergo nunc in absentia mea vos ad
iam et lacrymas pœnitentæ commoveo, certus
quia cum venero, gaudebo. Quis enim est qui
me lætificet, nisi qui modo ad pœnitentiæ tri-
m convertitur ex me quem contristavit? Con-
ri enim debetis, non solum quia peccastis et
offendistis, sed etiam quia me magistrum
am peccando contristastis. *Et hoc ipsum*, quod
me lætificat nisi qui contristatur ex me, *scripsi*
nunc, ut hoc scientes desleatis modo peccata C
t, *ne cum venero, tristitiam super tristitiam*
me, id est contrister iterum de vobis, sed gau-
. Sive hoc ipsum, quod parco vobis non ve-
, et quod statui non venire, in tristitia scripsi
, ut interim cito convertamini ad luctum pœni-
tæ, ne cum venero, tristitiam habeam de incor-
tæ vestra, super tristitiam quam habeo de
tis vestris. Non addatur mihi tristitia de vobis,
ibus oportuerat me gaudere, non solum nunc,
olim quando me contristastis, et sic graviter
istis Scripsi vobis, et hoc feci *confidens in om-*
robis, quod ultra non habeam tristitiam de vo-
et videte ne frustra confisus sim, *quia gau-*
reum est omnium vestrum, id est, gaudium
n est purificatio vestra, et profectus vester vos D
lætificans in Domino. Dixi ne tristitiam de vo-
abeam super tristitiam pristinam. Nam gravem
is sum tristitiam ex deformitate vestra, quam
ndo contraxistis, quia primam epistolam
si vobis ex multa tribulatione et angustia cordis
id est ex multo dolore multaque sollicitudine
is pro vestro casu, scripsi *per multas lacry-*
quæ foris ostendebant internum animi dolorem.
scripsi aspere vos reprehendens, *non ut contri-*
ini ex verbis meis, sed ut sciatis quam charita-
habeam abundantius in vobis, id est quam ma-
dilectionis affectu vestram salutem quæram,
ans vos a peccatis eripere et Christo reddere.
quis aliquem hoc affectu corripit, ut plus ill-

doleat peccatum ejus, non utique ut illum contristet,
corripit, sed ut ostendat illi quo amore diligit eum.
Qui autem non hoc affectu corripit, contristat fra-
trem. Insultat enim, qui non condolet fratri.

« Si quis autem contristavit me, non me contri-
stavit, sed ex parte, ut non onerem omnes vos.
« Sufficit illi qui ejusmodi est, objurgatio hæc quæ
« sit a pluribus, ita ut econtrario magis donetis
« et consolemini, ne forte abundantiori tristitia ab-
« sorbeatur qui ejusmodi est. Propter quod obse-
« cro vos (*Joan. iv*), ut confirmetis in illum chari-
« tatem. Ideo enim et scripsi vobis, ut cognoscam
« experimentum vestrum, an in omnibus obedien-
« tes sitis. Cui autem aliquid donatis, et ego. Nam
« et ego quod donavi, si quid donavi, propter
« vos in persona Christi, ut non circumveniamur
« a Satana. Non enim ignoramus cogitationes ejus.»

Ego tristitiam habui. Sed *si quis peccans contri-*
stavit me, non me solum contristavit, sed et vos ip-
sos ex parte, id est quosdam ex vobis, hoc est bo-
nos et correctos, qui de peccato fratris doluerunt.
Ideo dico vos ex parte contristatos, ut non onerem
omnes vos; id est, ut onus tristitiæ non omnibus
vobis imponam, quia non omnes sincere justitiam
diligitis, ut pro peccato contristari velitis. Hic re-
prehendit illos, qui de gravissima morte animæ fra-
tris non doluerunt. Potest et ita intelligi: Non me
contristavit ex toto, sed ex parte, ut non onerem
omnes vos magnitudine tristitiæ meæ, si ex toto con-
tristatum me dixerō. Ipse me contristavit, et tamen
parcite illi. *Sufficit enim illi qui est ejusmodi*, id est
qui tam graviter deliquit, *objurgatio hæc quæ fit a*
pluribus. Magnum enim dolorem patitur, qui deli-
ctum suum videt a pluribus horreri et argui. Et quia
talis facile desperaret, sufficit illi objurgatio multo-
rum, id est sufficiens medicina est ad evacuationem
culpæ illius sola objurgatio qua illum objurgastis.
Et ita sufficit, ut non amplius eum exasperetis, sed
magis, id est potius econtrario condonetis ei, quia
quanto a pluribus est objurgatus, tanto magis est
illi condonandum. Nunc revocat eum quem Satanæ
tradiderat, et ecclesiæ membris associat (*I Cor. v*).
Quod utique non faceret, nisi processu temporis dig-
nos in eo pœnitentiæ fructus prævidisset, et nisi
caro illius jam præscriptum interitum pertulisset,
peccato scilicet et vitiis mortua, ut sic Deo viveret.
Condonate illi, consolamini illum, id est, ita nunc
estote prompti ad ignoscendum et consolandum, sic-
ut tunc fuistis ad objurgandum et ejciendum, *ne*
forte qui ejusmodi est, id est qui sic objurgatus et
abjectus est, *absorbeatur abundantiori tristitia*, id
est mergatur fluctibus immoderate tristitiæ, si se
diutius viderit a cunctis abjici, et desperans de se,
det animum ad mundum fruendum, quasi qui lo-
cum apud Deum jam non habeat. Hoc est enim ab-
sorberi majori tristitia, desperantem de se converti
ad admittenda peccata, quibus gravatus absorbea-
tur a morte secunda. Ideo consolamini illum post
objurgationem, quoniam pœnitentia si de vero ani-

mo est, id est si ille qui corripitur, statim animo do-
 leat, protinus habet fructum. Et vera pœnitentia
 est, jam cessare a peccato. Sic enim probat se res-
 picere, et dolore, si de cætero desinat. *Propter quod,*
 id est ne per nimis asperam correctionem absor-
 beatur fluctu vehementioris tristitiæ, et cadat in ha-
 rathrum desperationis, ego qui jubere possem, ob-
 secro vos, ut recipientes eum in communionem,
confirmetis charitatem vestram in illum, ut firma
 fiat charitas, qua illum diligitis, et affectus vestræ
 dilectionis firmiter in eum transire probetur per dul-
 cedinem piæ consolationis. Vel in illo confirmate cha-
 ritate[m] ejus vestris exhortationibus, quæ nunc
 propter hanc mœstitudinem infirma et vacillans est.
 Et debetis hoc agere. Nam *ideo et scripsi vobis,*
 id est scripto persuadere id studui, ut in hoc *cogno-*
scam experimentum vestrum, id est cognoscam quale
 fuit illud quod expertus sum, vos obedisse mihi in
 ejus excommunicatione; hoc probem et sciam utrum
 bono an malo animo expulsistis eum. Expertus sum
 enim vos fuisse obedientes in ejus abjectione, sed
 illud experimentum cognoscere volens, scripsi vobis
 de confirmatione charitatis, quia si nunc in recon-
 ciliatione apparueritis charitativi in eum, tunc co-
 gnoscam quod non odio, sed charitate libenter eum
 abjecistis. Experimentum vestri volui cognoscere,
 probans *an in omnibus sitis obedientes,* id est an ita
 nunc obedieritis in recipiendo et consolando, sicut
 obedistis in ejiciendo et obiurgando, vel etiam sicut
 obedistis emendando illa quæ ad ecclesiasticum ordi-
 nem pertinent. Moneo vos clementes in eum fieri,
 sed vos jam in cordibus vestris condonastis ei, quo-
 niam vidistis eum asperam egisse pœnitentiam, et
 cui vos *aliquid donastis, et ego illi condonavi.* Et
 vere hoc feci sicut et vos. *Nam et ego quod illi do-*
navi, id est condonavi, si quid ei donavi, hoc feci
propter vos, quos super eum pie commotos agnovi.
 Quod tamen de sanctoribus viris intelligitur, non
 de multitudine carnalium, qui viscera pietatis adhuc
 non habebant et ideo moventur ad misericordiam.
 Propter vos qui spirituales estis, pie condonastis ei,
 et ego condonavi illi. Et ne irrita videatur hujus-
 modi condonatio, quæ propter amicos facta est, ego
 in *persona Christi* hanc feci, id est ac si ipse Chri-
 stus illi condonaret. Et hoc feci *ut non circumveniamur a Satana,* id est ne decipiamur ab adversario, ut
 per unius asperam pœnitentiam quam illi imposui-
 mus, faciat eum desperare. Et debemus artes ini-
 mici præcavere, quia non ignoramus ejus astutias,
 quibus nos et illum cogitat perdere. Nam consola-
 tio debet subsequi fratrem delictum flentem, ne diu
 contristatus et contemptus a charitate Ecclesiæ, inci-
 piat desperare de se; et videns qui semper in in-
 sidiis est, subtilis diabolus mentem ejus vilem effe-
 ctum, accedat et suggerat ei, ut vel præsentibus
 fruatur qui de spe futuri præmii dejectus est, et
 pereat possessus a diabolo, cui ad hoc pœnitentia
 data erat, ut conversus reformaret se. Notandum
 quam studiose unitatem cum discipulis servet

A Apostolus. Dum enim cognovisset eos super hanc
 fratrem jam misericorditer motos, quia bene
 egerat pœnitentiam, ait : *Cui aliquid donatis et ego;*
 ac si diceret : A bono vestro non dissentio,
 meum, quidquid ipsi fecistis. Atque mox subdi-
 dit, *Et ego si quid donavi, propter vos.* Ac si diceret
 Vestris actibus bonum addidi, quidquid
 propter vos misericorditer feci. Vestra ergo est uti-
 litas bonitas mea, mea est utilitas bonitas vestra.
 Qui ipsam mox compagem cordium, in qua sic te-
 netur, adjungens, subdidit : *In persona Christi.* Cui
 velut si dicere præsumamus, quare te ita caute dis-
 cipulis copulas, quare vel te illorum, vel illos tuis
 actionibus tam sollicita mente conformas, illico sub-
 junxit : *Ut non circumveniamur a Satana.* Ideo enim
 tanta humilitate voluntati eorum in parcendo se so-
 ciat, quia sollicito Providentiæ oculo attendit, quod
 plerumque dum alter donat, alter irascitur, et quale
 est jam misericordiæ sacrificium, quod cum discor-
 dia proximi offertur? Unde recte dicitur : *Ut non*
circumveniamur a Satana, non enim ignoramus cogi-
tationes ejus. Quia videlicet inde in alterius corde
 rixæ malum solet immittere, unde in alterum con-
 spicit pietatis negotium fecisse. Imperfectum enim
 bonum est quod sic agitur ut quid ex alio latere ma-
 lum subrepat, non attendatur, nisi forte hoc quod
 sine cujuscumque scandalo fieri non potest, culpa sit
 non fecisse. Jure ergo malum discordiæ in bona ac-
 tione sua præcavens Apostolus, *ut non circumveniamur,*
 inquit, *a Satana.* Qui scilicet solet de bonis
 mala generare, et hoc quod per charitatem agitur,
 ad discordiam trahere. Potest hoc et de alio sic in-
 telligi. Dixi ut in prædicto pœnitentiæ confirmetis
 charitatem, sed hoc libenter debetis propter me
 facere, quia ego propter vos similia feci. Quia
 si alicui reo donastis, id est condonastis aliquid
 culpæ, et ego pro vobis similiter feci. Ideoque
 justum est, ut et vos huic pro me ignoscatis. Nam
 et ego quod donavi si cui aliquod peccatum do-
 navi, propter vos hoc feci, id est precibus vestris
 annuens. Hoc dicto gravat illos. Quia si ma-
 gister petentibus donavit discipulis cui veluerunt
 peccatum, quanto magis obedire debent discipuli
 magistro, ut ei donent cui rogat ipse? Et ut ratum
 D ei cui donavit, ostenderet apud Deum, ait in per-
 sona Christi se donasse quod donavit, id est vice
 Christi qui ait : « Quorum remisistis peccata re-
 mittuntur eis (Joan. xx). » Si ergo huic pro quo
 petierunt Apostolum, ipse pro Christo ignovit, quan-
 to magis illi ignoscendum erat, cui ut donent, et
 ipse hortatur? Donate, inquit, sicut ego donavi, ne
 per discordiam circumveniamur a Satana, quoniam
 si causa vestri non donarem, et vos causa mei,
 jam inter nos discordia fieret, et mutua charitas
 deperiret, et sic noster adversarius victor exulta-
 ret. Non enim ignoramus, quam callide mala con-
 tra nos incessanter exquirat.

« Cum venissem autem Troadem propter Evan-
 gelium Christi, et ostium mihi apertum esset in

« *Domino, non abui requiem spiritui meo, eo*
 « *quod non invenerim Titum fratrem meum. sed*
 « *vale faciens eis, profectus sum in Macedoniam.*
 « *Deo autem gratias, qui semper triumphat nos in*
 « *Christo Jesu, et odorem notitiæ suæ manifestat*
 « *per nos in omni loco, quia Christi bonus odor*
 « *sumus Deo in his qui salvi fiunt, et in his qui*
 « *pereunt; aliis quidem odor mortis in mortem,*
 « *aliis autem odor vitæ in vitam. Et ad hæc quis*
 « *tam idoneus? Non enim sumus, sicut plurimi,*
 « *adulterantes verbum Dei, sed ex sinceritate,*
 « *sicut ex Deo, coram Deo in Christo loquimur. »*

Narrat nunc Corinthiis quæ passus sit, et quomodo in cunctis Deo gratias agat, ut sub exemplo sui illos provocet ad certandum. In Asia, inquit, passus sum gravissimam, ut supra dixi, tribulationem. Sed et cum venissem Troadem non quicivi. Vel ita: Non solum propter prædictas causas non veni, scilicet ut non veniendo parcerem vobis, et ne tristitiam super tristitiam haberem, sed etiam ideo, quia Titum quem miseram ad vos, ut renuntiaret mihi si essetis correcti, cum Troadem venissem non inveni, sicut illic disposueram. ideoque nihil sciens de correctione vestra, non potui ad vos venire. Sed et aliis grave damnum incorrectio vestra fecit, quoniam Troadensibus parum proficere sine Tito potui, quem vestra incorrectio detinebat. Sicut enim vestra culpa fuit quod non veni Corinthum; sic quod non profeci in Troade, dum apud vos impeditus moraretur Titus, sine quo non poteram ibi proficere. Et hoc est: *Veni, inquit, Troadem, quæ prius Troia vocabatur, ut Evangelium Christi in Asia prædicarem. Cumque mihi ostium apertum esset in Domino, id est plurimi credidissent, sive per signa atque virtutes, quæ in me operabatur Deus, spes esset fidei nascentis, et in Domino succrescentis, non habui requiem spiritui meo, id est speratam consolationem invenire non potui eo quod Titum non invenerim, sicut ante condixeramus. Ostium enim appellatur aditus vel oportunitas prædicandi, sive quia Deus aperuit corda eorum quibus ille prædicabat; et ut beatus Hieronymus loquitur, cum Apostolus haberet sanctarum scientiam Scripturarum, et sermonis diversarumque linguarum gratiam possideret, divinorum sensuum majestatem non poterat Græci eloquii digno explicare sermone (215). Habebat ergo Titum interpretem, sicut beatus Petrus Marcum. Et ideo contristatus est, quia prædicationis suæ fistulam organumque, per quod Christo caneret, in præsentem non invenerat. Est et alia fortasse probabilior causa, cur Titum absesse doluerit, quia solus non poterat et fideles instruere, et perstreptentibus incredulis repugnare. Quamvis enim quidam eorum aperuissent corda sua, ad suscipiendum Dei verbum, impudentia tamen infidelium non minima exurgebat in Apostolum zelo credentium. Et hæc ab uno impleri non poterant, ut et credentes instrueret, et*

(215) Locus obscurus.

infidelibus resisteret; ideoque labor erat intolerabilis, cum deesset solatium Titi. Et ideo recessit inde, valefaciens eis qui crediderant, in quorum scilicet cordibus evangelizanti apertum est ostium. Et hoc est, non habui requiem spiritui meo, id est non potui satisfacere voluntati meæ, quia ibi sicut sperabam non inveni Titum, qui ibi necessarius erat, quoniam ipse lingua eorum fortassis expressius uti poterat: *sed valefaciens eis qui erant conversi, profectus sum in Macedoniam, si forte vel ibi Titum invenirem, ut haberem interpretationis Evangelique solatium. Ergo illuc perrexi, et ibi quoque multa perituli. Sed Deo gratias ago, qui non sinit nos deficere, sed semper triumphat nos in Christo, id est triumphare nos facit. Vel triumphat de nobis, sive triumphum suum per nos agit, et odorem, id est bonam famam notitiæ suæ per nos ubique spargit. Apostolus multa perpassus adversa, gratias agit Deo in Christo Jesu, quem gentibus prædicabat quod dignum se elegerit triumpho Filii sui. Triumphus Dei est passio martyrum, pro Christi nomine crucis effusio, et inter tormenta lætitia. Cum enim quis viderit tanta perseverantia stare martyres atque torqueri, et in suis cruciatibus gloriari, odor notitiæ Dei disseminatur in gentes, et sibi tacita loquitur cogitatio, quod nisi verum esset Evangelium, nunquam sanguine defenderetur. Hoc etiam est Deum apostolos triumphare in Christo, victores illos facere in fide Christi, ut calcata perfidia, trophæum habeat fides, dum ex perfidis fiunt fideles, et malevoli non proficiunt in persequendo fideles. Odor autem notitiæ Dei per signa et prodigia manifestatur, dum vera esse prædicatio Dei virtutis testimonio comprobatur. Quæ scilicet prædicatio per odorem designatur, quia cum Deus non videatur per hæc quæ visibiliter operatur, in apostolis esse intelligitur, ut veritas doctrinæ manifestetur. Sicut enim quædam res cum non videantur, per odorem tamen agnoscuntur, ita et Deus qui invisibilis est, per evangelicam prædicationem voluit agnosci, quæ invisibiliter ad aures, sicut odor ad nares, pervenit. Et notandum quia hucusque locutus est de suis tribulationibus, et cur Corinthum non venerit. Hinc vero incipit se commendare et pseudoapostolos deprimere. Et quidquid nunc dicit de se, totum ab illa est removendum. Odorem, inquit, id est suavem famam notitiæ suæ manifestat per nos in omni loco, id est ubicunque prædicamus, quia sumus odor Christi bonus et suavis Deo, etsi non ita vobis odor Christi, id est puritas nostræ conversationis Christum redolet, et prædicationis nostræ longe lateque spirat fragrantia. Et sumus odor bonus in his qui salvi fiunt, et in his qui pereunt. Nam quia homines suo arbitrio derelicti sunt, neque enim bonum necessitate faciunt, sed voluntate, ut credentes coronam accipiant, et increduli suppliciiis mancipentur; ideo noster odor, qui per se bonus est, virtute eo-*

rum et vitio qui suscipiunt, sive non suscipiunt, in vitam transit aut mortem; ut qui crediderint, salvi fiant; et qui non crediderint, pereant. Nec mirum, cum et solis radios tam munda loca excipiant quam immunda, et sic in floribus ut in stercore luceant, nec tamen polluantur inde radii solis. Ita et Christi bonus odor, qui nunquam mutari potest nec suam naturam amittere, credentibus vita est, incredulis mors. Bonus Christi odor, prædicatio veritatis est. Quem odorem in vitam capit, qui Evangelio moribus bonis servit et congruit. Mortem incurrit, cujus ab his quæ bene loquitur, vita dissentit. Quæ conditio etiam auditores astringit, cum recta prædicatio ab aliis per incredulitatem auditur in mortem, ab aliis per fidem suscipitur in salutem. Bonus, inquit, odor sumus, et horum respectu qui inde salvantur, et horum qui contemnentes pereunt, quia bona intentione facimus. Sive enim consideraveris salvatos prædicatione nostra, sive perditos contemptu ejus, nos tamen Deo semper videmur bonus odor, quoniam ipse videt intentionem nostram, id est quid intendamus dum loquimur, scilicet quia intendimus ut omnes auditores salvi fiant, non ut aliqui ex illis pereant; et ideo sumus Deo bonus odor. Sed hominibus aliis quidem videmur odor mortis, quia prædicamus crucem, id est ministri mortis æstimamur; aliis autem odor vitæ credimur, id est odor spirans vitam per Salvatoris prædicationem. Et utriusque sit juxta quod æstimant. Nam quibus æstimamur odor mortis, æstimatio hæc vertitur eis in æternam mortem; et quibus videmur odor vitæ, fides eorum ducit eos in vitam æternam. Hæc ita Deus per nos operatur. Et ad hæc quis est tam idoneus, ut intelligat quomodo facit Deus miris modis, ut bono odore et boni vivant, et mali moriantur? Paulum apostolum bene agentem, bene viventem, justitiam verbo prædicantem, opere demonstrantem, doctorem mirabilem, fidelem dispensatorem, fama usquequaque disseminabat. Quidam diligebant, quidam invadebant. Illi qui diligebant, bono odore vivebant; illi qui invadebant, bono odore peribant. Ideo percutibus non malus odor, sed bonus erat. Inde enim magis invadebant, quia tam bona gratia prævalebat. Nemo enim invidet misero. Erat enim gloriosus in prædicatione verbi Dei, et vivens secundum regulam præceptorum Dei. Et diligebant eum, qui in illo diligebant bonum (quem sequebantur) odorem. Alii autem quanto magis ei invadebant in gloria prædicationis et in vita inculpabili, tanto magis invidia torquebantur et occidebantur bono odore. Quisquis enim invidet gloriosæ famæ Christi vel alicujus sancti, bono odore moritur; qui autem diligit eam, bono odore vivit. Quia ergo difficile est intelligere, qua ratione quis bono odore pereat, vel quia occultis Dei judiciis, quæ in hac vita ab hominibus comprehendere non possunt, agitur ut eodem bono odore alii vivant et alii moriantur, recte dicitur: *Et ad hæc quis tam idoneus?* ac si dicatur: Idonei quidem sumus ad hæc consideranda quia fiant, sed idonei

non sumus ad hæc investiganda cur fiant. Quis est tam idoneus ad hæc discutienda, ut inveniat cur ita fiant? Vel quis est tam idoneus ad hæc intelligenda, ut cognoscat quomodo bonus odor alios vegetat, et alios necat? Id est quis est idoneus intelligere quam juste fiat quod Dominus ait: « Ego veni ut qui non vident videant, et qui vident cæci fiant? » (Joan. ix.) Ipsa est enim altitudo divitiarum sapientiæ Dei, qua facit ex eadem massa, aliud vas in honorem, aliud in contumeliam (Rom. ix). Vere, inquit, bonus odor sumus Deo, quia non sumus adulterantes verbum Dei, id est falsa illi adniscentes, et pro voluptate, non pro gignenda prole semen verbi suadentes. Vel contra falsos apostolos et contra mercenarios dicit, et ad hæc quis tam idoneus? Id est ad hæc quæ per vos Deus agit, quis est tam idoneus ut vos? Difficile enim dignus præco virtutum Christi inveniri potest, qui in annuntiandis illis non suam, sed ejus gloriam quærat; nec sua lucra, sed Dominica cogitet. Et vere nullus præter nos est ad hæc tam idoneus. *Non enim sumus adulterantes verbum Dei, sicut plurimi*, id est sicut pseudoapostoli et mercenarii, qui vel corrumpunt admistione falsitatis sensum divinæ prædicationis, vel ex ea quærunct voluptatem lucri carnalis, *sed ex sinceritate*, id est ex sincera intentione, non pro quæstu loquimur, *et sicut ex Deo* habentes quidquid dicimus, *coram Deo loquimur*, id est illi soli, et non hominibus placere ex nostra locutione quærimus; et loquimur in Christo, nunquam excedentes, ut pseudo, qui de legali observantia et sæculi philosophia cum Evangelio Christi loquebantur. Adulter in carnali coitu, non prolem, sed voluptatem quærit. Et perversus quisque ac vanæ gloriæ serviens, recte adulterare verbum Dei dicitur, quia per sacrum eloquium non Deo filios gignere, sed suam scientiam desiderat ostentare. Quem enim libido gloriæ ad loquendum trahit, voluptati magis quam generationi operam impendit. Adulterare namque verbum Dei, est aut aliter de illo sentire quam est, aut ex eo non spiritaliter fructus, sed adulterinos foetus quærere laudis humanæ. Ex sinceritate vero loqui, est nihil in eloquio extra quod oportet quærere. Sicut ex Deo autem loquitur, qui scit non se a se habere, sed ex Deo accepisse quod dicit. Coram Deo vero loquitur, qui in omni quod dicit, non humanos favores appetit, sed omnipotentis Dei præsentia intendit; nec suam, sed auctoris gloriam requirit. Et in Christo loquitur, cujus sermo totus in Christi veritate persistit ut nec mendax sit, nec aliud quam Christum prædicet. Qui autem scit quidem ex Deo se accepisse quod dicit, et tamen dicendo propriam gloriam quærit, sicut ex Deo loquitur, sed non coram Deo, quia eum quem cordi suo non proponit, cum prædicat, quasi absentem putat. Sed sancti viri et ex Deo loquuntur, et coram Deo, quia ab eo se sciunt habere, quod dicunt, et ipsum suis sermonibus adesse judicem auditoremque considerant.

Potest et mysterium Trinitatis in hujus capituli fine monstrari. Ex Deo, id est ex Spiritu sancto, coram Deo Patre in Christo loquimur.

CAPUT III.

« Incipimus iterum nosmetipsos commendare? aut nunquid egemus (sicut quidam) commendatiis epistolis ad vos, aut ex vobis? Epistola nostra vos estis, scripta in cordibus nostris, quæ scitur et legitur ab omnibus hominibus, manifestati quoniam epistola estis Christi, ministrata a nobis et scripta non atramento, sed Spiritu Dei vivi, non in tabulis lapideis, sed in tabulis cordis carnalibus. »

Quia sciebat sinistre accipere eos suam commendationem etiam in prima epistola, quasi suam gloriam quæreret, incipit contra opinionem eorum loqui. Nam pseudoapostoli hoc in eo reprehendebant, quod se commendabat, et quod bona quæ Deus in eo posuerat, aliis annuntiabat, atque inde superbum et iuani gloriæ studentem asserebant. Et propterea nunc ipse demonstrat, quod commendatio sua non ad se commendandum spectet, sed ad illum solum, cujus est minister idoneus, et hoc est quod increpative per interrogationem, vel per ironiam dicit: *Incipimus iterum sicut in prima epistola commendare nosmetipsos, non Deum? Incipimus quasi semper in hoc novi, nosipsos rursus commendare, dum dicimus quia Christi bonus odor sumus, etc. Quasi dicat: Commendamus quidem nos et in hac epistola sicut in prima, sed non nosmetipsos, quia in nostra commendatione illum maxime commendamus, ad cujus gloriam cuncta referimus. Non ergo carnaliter, sed spiritualiter nos commendamus ad profectum vestræ salutis, ut hoc de nobis credatis quod est, quia qui de bono male sentit, peccat. Et vobis expedit ut nos cognoscatis, quia tunc dicta nostra libenter suscipietis, et sic ad salutem pervenietis. Ac propterea commendatio vobis potius proficit. Non enim nos propter nos commendamus, sicut pseudoapostoli, qui propriam gloriam et propria lucra querentes, seipsos commendant. Aut nunquid egemus commendatiis epistolis, missis ab aliis fidelibus ad vos, aut ex vobis ad alios sicut quidam, id est sicut pseudo, quos nulla propria virtus aut sapientia commendat? Ipsi enim indigent ut per epistolas commendentur, dum proprii honoris et quæstus causa circueunt ecclesias, non adtribuendam, sed ad auferendam salutem. Nos vero, quos Deus virtute mirabilium operum et luce sapientiæ, quocumque pergamus commendat, non opus habemus ut per epistolas hominum alicubi commendemur. Nam vos estis epistola et commendatio nostra apud homines, hoc est, vestra fides et charitas et omne bonum quod in vobis est, nos reddit commendabiles, quia inde laudamur, quod per nos Deus vobis hæc omnia dedit. Epistola enim salutis indicium est. Epistola nostra vos estis, in quibus scientia et vita nostra repræsentatur aliis. Epistola nostra, dico, scripta in cordibus nostris, id est in memoria nostræ mentis posita, quia vos semper in nostro cor-*

de retinemus, et sollicitudinem de salute vestra semper habemus, dum peccatorum vestrorum correctionem desideramus, et processum in melius ac perseverantiam in bono vobis semper optamus, quæ scilicet epistola scitur et legitur ab omnibus hominibus. Scitur ab omnibus hominibus, id est omnes sciunt quod per nos estis instituti; et legitur, id est in vobis discunt nos imitari. Sicque fit ut scientia et lectione hujus epistolæ, id est notitia et consideratione bonæ conversationis vestræ, nos efficiamur commendabiles omnibus. Dixi, quia estis epistola nostra, vos dico, manifestati omnibus quoniam epistola Christi estis, ministrata a nobis. Omnibus enim manifestum est, vos Christo per ministerium nostrum credidisse confirmanti doctrinam nostram per virtutes. Et ita principaliter estis epistola Christi, secundo nostra, quia ipse principaliter vos scripsit, nos secundo, id est per ministerium nostrum ipse scripsit in vobis fidem, spem et charitatem ac reliqua bona. Vos estis epistola scripta non atramento, sed spiritu Dei vivi, id est quod estis representatio Christi et nostra, firmiter scriptum est in cordibus nostris, non debilibiter, ut quod atramento scribitur. Non atramento scriptum est, id est non ita ut possit deleri, sicut ea quæ atramento scribuntur; sed Spiritu Dei vivi, id est ut æternaliter et vivaciter in cordibus nostris aut vestris permaneat, sicut ille qui scripsit, vivit et æternus est. Quoniam æterna sunt quæ nobis promissa sunt, idcirco Dei spiritu qui semper est, dicitur scripta hæc epistola. Temporalia autem atramento scribuntur, et quod obliteratur et perdit memoriam. Vel non atramento, id est non tetrinotus est scripta, sicut pseudo scribunt, qui hæreses interserunt, sed luce Spiritus sancti, non in tabulis lapideis, ut antiqua lex, sed in tabulis cordis carnalibus. Ibi enim in tabulis lapideis digitus Dei (*Exod. viii; Exod. xxxi*), id est Spiritus sanctus, operatus est hic in cordibus hominum. Ibi lex extrinsecus posita est, qua iniusti terrentur; hic intrinsecus data est, qua iustificarentur. Illud enim extra hominem scribitur, ut eum forinsecus terrificet, hoc in ipso homine est cum intrinsecus iustificet. Carnales vero tabulas cordis dixi, non carnalis prudentiæ, sed tanquam viventis, sensumque habentis, in comparatione lapidis qui sine sensu est. Respexit enim ad illud quod Deus per prophetam promiserat: « Auferam cor lapideum de carne vestra, et dabo cor carneum (*Ezech. xi*). » Cor namque carneum a corde lapideo voluit vitam sentientem discerni, et per vitam sentientem significavit intelligentem. Non ergo propterea dictum est, in tabulis cordis carnalibus ut carnaliter vivatis, qui debetis spiritaliter vivere. Sed quia lapis sine sensu est, cui comparatum est cor durum, cui nisi carni sentienti cor intelligens debuit comparari? quandoquidem ipsum cor lapideum, non significat nisi durissimam voluntatem et adversus Deum omnino inflexibilem. Judæi enim in lapideis tabulis legem acceperunt, ad significandam duritiam cordis eorum

erga dilectionem Dei et intelligentiam, quia neque A Deum erant amaturi, neque legem ipsam intellectu-
ri. Per lapideas enim tabulas dura et insensibilia
corda eorum designata sunt. Per tabulas vero cor-
dis, mentes dilatatae charitatis latitudine. Unde et
carnales dicuntur, id est molles et sentientes, et af-
fectum dilectionis vel bene agendi habentes. Caro
enim animata sentit, et affectum habet circa illud
quod tangit, ut per cor habeamus intellectum, et
per carnem dilectionis affectum. Itaque Spiritus
sanctus scripsit epistolam nostram in tabulis cordis
carnalibus, id est sic in vobis præcepta sua posuit,
ut daret vobis facultatem ad intelligendum, et affec-
tum dilectionis ad complendum.

« Fiduciam autem talem habemus per Christum
« ad Deum (*Hebr. iv*), non quod sufficientes simus
« cogitare aliquid a nobis quasi ex nobis, sed suf-
« ficientia nostra ex Deo est. »

Postquam ostendit quare non eget commendati-
tis epistolis, respondet ad illud quod præmiserat,
scilicet quia non commendat seipsum, sed Deum a
quo habet omnia. Quasi dicat: Diximus quia Deus
per nos semper triumphat, et odorem notitiæ suæ
per nos ubique manifestat, et quia Christi bonus
odor sumus Deo. Et quod tam fiducialiter hæc et
his similia loquimur, non ad commendationem nos-
tram facimus, quasi de nostris viribus gloriantes,
et ad nos ista referentes, sed talem ac tantam *fidu-
ciam habemus*, id est referimus *ad Deum*, a quo no-
bis est datum quidquid boni habemus. Vel ita con-
tinuatur ad proximum, Epistola Christi et nostra
estis. Sed fiduciam dicendi talia, non ad nos, sed
ad Deum referimus. Nam ex puritate conscientiæ
habemus talem fiduciam ad Deum, id est confidimus
quod ei placet quia sic loquimur; et habemus
eam *per Christum* mediatorem, per quem nobis hæc
potestas est data. Sed nihil viribus nostris ascribi-
mus. Habemus enim apud Deum mediatore Christo
magnam fiduciam, sed *non ita quod simus sufficientes
saltem cogitare aliquid boni quod sit a nobis*, id est
a nostra parte veniens, *quasi ex nobis* initium ha-
bens, *sed potius omnis sufficientia nostra* ad bene
cogitandum et agendum *ex Deo* nobis est. Et hinc
cognoscimus quia nihil sumus, nisi misericordia et
gratia Dei regamur. Attendant hæc verba, qui put-
tant ex nobis esse fidei cœptum, et ex Deo esse fidei
supplementum. Quis enim non videat prius esso
cogitare quam credere? Nullus quippe credit aliquid,
nisi prius cogitaverit esse credendum. Si ergo non
sufficiamus cogitare boni aliquid ex nobis, profecto
nec credere sufficiamus, quod sine cogitatione non
possumus; sed sufficientia nostra, qua et credere
incipiamus, ex Deo est. Cogitantes credimus, cogi-
tantes loquimur, cogitantes agimus quidquid agi-
mus. Quod autem attinet et ad pietatis viam et ve-
rum Dei cultum non sufficiamus vel cogitare aliquid
a nobis quasi ex nobisipsis, sed sufficientia nostra
ex Deo. Non enim est ex potestate nostra cor nos-
trum et cogitationes nostre. Hæc ideo loquitur

Apostolus, ut ostendat se suosque socios nihil sua
virtute vel prudentia facere, cum utique tam pauci
homines et idiotæ nunquam sine Dei gratia coope-
rante totum mundum ad fidem convertere potuis-
sent. Ob hoc etiam ista præmisit, ne quid sibi arro-
gare videretur, ubi dicturus erat tanto majus se mi-
nisterium suscepisse quam Moyses, quanto majus est
Novum Testamentum quam Vetus. Nam subjungit:

« Qui et idoneos nos fecit ministros Novi Testa-
« menti, non littera, sed spiritu. Littera enim occi-
« dit, spiritus autem vivificat. »

Et incipit se nunc alio modo quam superius
commendare, ut et pseudoapostolos deformet, in-
nuens eos esse ministros Veteris Testamenti, dum
ostendit se ministrum esse Novi. Sufficientia nostra
ex Deo est. *Qui et intantum nos sublimavit, ut ido-
neos ministros Novi Testamenti nos faceret*, id est ut
per nos scientiæ et vitæ perfectione decoros mini-
straret aliis Novum Testamentum. Novus enim li-
quor in vasa nova mittendus erat (*Matth. ix; Marc.
ii; Luc. v*), unde sine acedine propinaretur. Testa-
menti dico, existentis *non in littera* tantum docent;
sed in spiritu adjuvante, qui per nos a Deo tribui-
tur. Non alia nunc intelligitur littera, quam ipse de-
calogus in illis duabus tabulis scriptus. Spiritus
autem intelligi potest lex fidei, quæ non scribitur,
sed animo continetur. Ideo non in littera, sed in
spiritu per nos ministratur Novum Testamentum,
quia *littera occidit, spiritus autem vivificat*. Littera
occidit, dum facit scienter peccare, et addit præva-
ricationem et magis incitat; sed spiritus vivificat,
dum facit implere quæ jussa sunt. Littera enim pro-
hibens peccatum, non vivificat hominem, sed potius
occidit augendo concupiscentiam, et iniquitatem
prævaricatione cumulando, nisi liberet gratia per
legem fidei, quæ est in Christo Jesu, cum diffundi-
tur charitas in corde per Spiritum sanctum. Nam
lex quando non adjuvat gratia, prævaricatores fa-
cit, et tantummodo in littera est. Accedat ergo ad
litteram spiritus, non occidit littera quam vivificat
spiritus. Non igitur putemus damnatam vel repre-
hensam esse litteram, quia dictum est: *Littera oc-
cidit*. Hoc est enim: Littera reos facit. Nam et hæc
locutione dictum est: « Scientia inflat (*I Cor.
viii*). » Quid est, scientia inflat? Scientia damnata
est? Absit. Sed quoniam adjunxit: « Charitas vero
ædificat (*ibid*). » quomodo et nunc adjunxit: *Spiri-
tus autem vivificat*, dedit intelligi, littera sine spi-
ritu occidit, spiritus vivificat et impleri litteram fa-
cit. Si scientia sine charitate inflat, charitas vero
cum scientia ædificat. Itaque littera sola prohibens
malum et imperans bonum occidit animas eorum,
qui prævaricantur illam. Spiritus autem qui per
Novi Testamenti gratiam est in cordibus fidelium,
vivificat in præsentem animas eorum, justificando il-
las, et in futuro corpora quoque cum animabus
perpetualiter vivere faciet. Vel littera carnaliter in-
tellecta occidit animam. Cavendum est enim, ne
figurata locutio ad litteram accipiatur. Cum enim

figurata dictum sic accipitur, tanquam proprie dictum sit, carnaliter sapitur. Neque ulla mors animæ congruentius appellatur, quam cum id etiam quod in ea bestiis antecellit, hoc est, intelligentia, carni subjicitur sequendo litteram. Qui enim sequitur litteram, translata verba sicut propria tenet; neque illud quod proprio verbo significatur refert ad significationem; sed cum sabbatum audierit, verbi gratia, non intelligit nisi unum diem de septem, qui continuo volumine repetuntur; et cum audierit sacrificium non excedit cogitatione illud, quod fieri de victimis pecorum vel terrenis fructibus solet. Ea demum est miserabilis animæ servitus, signa pro rebus accipere, et supra creaturam corpoream oculum mentis ad hauriendum æternum lumen levare non posse. Spiritus autem vivificat et liberat qui intus docet animam, qualiter ea quæ audit, intelligere debeat.

« Quod si ministratio mortis litteris deformata in lapidibus, fuit in gloria, ita ut non possunt intendere filii Israel in faciem Moysi propter gloriam vultus ejus (*Exod. xxxiv.*), quæ evacuatur, quomodo non magis ministratio spiritus erit in gloria? Nam si ministratio damnationis in gloria est, multo magis abundat ministerium justitiæ in gloria. »

Nos, inquit, sumus ministri Novi Testamenti, et hæc ministratio erit in gloria perenni. Atque hoc probat per minus, id est per Vetus Testamentum quod olim fuit in gloria. Quasi dicat: Nos in spiritu, non littera novum ministramus, ubi per spiritum vivificantur cultores. Quod, id est sed si ministratio mortis, id est lex cujus littera occidit, fuit in gloria Moysi ministro suo, quomodo ministratio spiritus, id est Novum Testamentum quod in spiritu ministratur, et in quo spiritus datur, non multo magis erit vobis in gloria? « Lex quidem sancta et mandatum justum et sanctum et bonum (*Rom. vii.*) » Et tamen quia de ipso bono interficitur inobediens anima, ubi non adjuvat Dei gratia, ministratio mortis facta est lex in Veteri Testamento propter occidentem litteram, et ministratio vitæ facta est gratia in Novo, propter vivificantem spiritum. Distinguitur ergo lex a gratia, eo quod sub illa elidantur elati, sub ista erigantur elisi; et quod illa in tantum bona sit ut bona jubeat, hæc in tantum ut bona conferat: illa justitiæ faciat auditorem, ista factorem. Et ideo sub illa peccator, insuper etiam prævaricator, amissa excusatione ignorantia convictus jacet; sub ista vero et parcente, et opitulante, nec qui mala est operatus, exstinguitur; et ut bona operetur, accenditur. Quod ergo mirum est si illa dicta est ministratio mortis, ubi littera occidit, malum prohibendo quod fit, et bonum imperando quod non fit; ista vero dicta est ministratio spiritus, utique vivificantis, nisi ut a prævaricationis morte surgamus, et justitiam non rei legamus in tabulis, sed liberi in cordibus et in moribus habeamus? Ad Judæos enim dicta

A est lex ministratio mortis, ad quos et in lapidibus scripta est ad eorum duritiam figurandam, non ad eos qui legem per charitatem implent. Fuit enim litteris deformata, id est evidenter descripta, ut bene posset legi in lapidibus duarum tabularum, ut et patenter agnosceretur, et duritiam cordis eorum convinceret. Et hæc ministratio licet esset mortis, id est per Moysen ministrata, quamvis prævaricatoribus esset causa mortis, tamen ita ministro Moysi fuit in gloria, ut filii Israel non possent aeiama visus sui intendere in faciem ejus propter gloriam vultus ejus, quam acceperat ex colloquio Domini. Non poterant aspicere splendorem vultus ejus cum descendisset de monte, portans legem in tabulis quas a Domino susceperat, quia et reatus vituli retundebat visum eorum, ne gloriosam justiciam manifeste conspicerent (*Exod. xxxiv.*) Ubi et significatum est, quia spiritalem sensum legis non erant visuri. Facies enim Moysi splendida, figuram habebat veritatis, quæ figura evacuatur per manifestationem veritatis, id est visibilis gloria legis evacuatur per gloriam Evangelii. Ita enim evacuatur, ut proficiat, sicut infantia evacuatur in juventute, et semen in fructu. Evacuatur ergo Moysi gloria, quoniam omnes umbræ significantes evacuantur, cum res quæ significatur, advenit. Quemadmodum enim scientia quæ nunc est, evacuabitur, cum venerit illa quæ erit facie ad faciem (*I Cor. xiii.*); sic et ista quæ umbris tradita erant Judæis in Veteri Testamento, necesse fuit evacuari revelatione Novi Testamenti. Gloria quam Moyses habuit, evacuatur nunc in ministris illius legis, ne pseudoapostoli qui carnales ejus observantias adhuc prædicant, gloriæ Moysi participes fiant. Quoad enim carnales istæ observationes statum habuerunt, ministri earum quamdam gloriam et reverentiam inde habuerunt. At postquam carnali spiritalis observantia successit, gloria ministrorum carnalium evanuit. Sed et in ipso Moyse non semper hæc gloria permansit. Itaque si ministratio mortis fuit Moysi in tanta gloria, quomodo non multo magis erit nobis in gloria ministratio spiritus, id est Testamentum novum quod ministramus, in quo fides impetrat spiritum vivificantem? Erit utique nobis in gloria multo magis quam Vetus fuit Moysi. Splendor enim in facie Moysi tanquam in facie carnali et mortali diuturnus aut æternus esse non potuit, quia vel morte ablatus est. Splendor autem gloriæ Domini nostri Jesu Christi, cujus participes erimus, sempiternus. Nam sicut promissiones Testamenti Veteris fuerunt temporales, id est temporalia bona pollicentes, ita et Moysi gloria temporalis. Et sicut promissiones Testamenti Novi quod per nos ministratur, sunt æternæ, sic et gloriam quam pro ministerio hoc sumus percepturi in Christo, est æterna. Vere ministratio spiritus erit nobis in maxima et permanenti gloria. Nam si ministratio damnationis, id est lex quæ damnat prævaricatores ut statim perimantur, non reservans eos ad penitentiam, est Moysi in

gloria, tunc *ministerium justitiæ*, id est Novum Testamentum quod per nos ministratur, in quo per fidem et Spiritum sanctum datur vera justitia, *multo magis abundat in gloria*, id est multo abundantior gloriam dat nobis ministris suis. Illa enim gloria sicut diximus, temporalis est, hæc autem æterna; illa terrena, hæc cœlestis. Vel in se ipso habet Novum Testamentum majorem gloriam quam Vetus, quia major gloria est peccatorem justificare quam damnare. Quamvis enim juste damnet, tamen ad laudem magis proficit, si indulgeat ut possit se reus corrigere et ad justitiam resurgere.

« Nam nec glorificatum est, quod claruit in hac parte, propter excellentem gloriam. Si enim quod evacuatur, per gloriam est, multo magis quod manet, in gloria est. »

Vere Novum Testamentum habet majorem gloriam. Nam in ejus comparatione gloria Moysi nec gloria est. Et hoc est: *Nam quod claruit*, id est facies Moysi quæ radium claritatis emisit ut cornuta videretur, *nec glorificatum est in hac parte*, id est nec gloriam habuit in hac consideratione Novi Testamenti, *propter excellentem gloriam* quæ ibi est. Non est glorificatum, quia non habuit fructum gloriæ. Quando enim gloria vultus ejus nulli profuit, sed magis obfuit, licet non suo, sed peccantium vitio, tamen in hac parte gloria non est. Illa autem magis est gloria, quæ abundat in gratia, ut purificati homines dono Dei, abstersa mentis caligine, possint videre gloriam Christi. Excellentior enim est Novi Testamenti gloria, in quo gratia supereminet et misericordia. Et ad comparationem gloriæ Evangelii obumbratur gloria legis ut nec esse videatur, sicut ortu solis cæcatur lumen lucernæ, quod antea videbatur magnum habere fulgorem. Vere supereminet gloria Novi. Quia si Vetus Testamentum quod secundum carnales observantias evacuatur, est per gloriam vultus Moysi ministratam et receptam, sine qua non commendaretur; *multo magis Novum quod manet*, id est cui non succedit aliud, *est in gloria*. Per gloriam enim Moysi est illud, id est existit suo tempore authenticum. Sed tamen evacuatur secundum figuras in adventu permanentis veritatis. Ideo major est gloria Novi quam Veteris, quia quantum interest inter figuram et veritatem, tantum distat inter gloriam vultus Moysi et gloriam Christi. Sicut enim in vespere stellæ gloriosæ sunt, oriente autem sole evacuatur earum claritas; ita et Moysi gloria quæ prius radiabat, evacuatur apparente gloria Christi. Vel ad ministrum os referenda est gloria Novi Testamenti. Vere nobis abundat in gloria. Nam quod claruit, id est facies Moysi quæ in legislatione claruit, nec glorificatum est, id est nec etiam habuisse gloriam videtur in hac parte, id est respectu hujus nostræ partis, propter excellentem gloriam quam de Novo Testamento habemus et habituri sumus. Sive quod claruit in hac parte prædicta, id est Moyses, qui clarus et gloriosus apparuit in facie, nec glorifica-

tum est, quantum ad nos, propter excellentem gloriam quæ nobis dabitur. Non hoc de futura Moysi gloria dicitur, sed de illa, quam visus est habere cum descenderet de monte (*Exod. xxxiv*). Vere excellentem gloriam ex hoc ministerio consequemur, quia manens est et sine immutatione perduraturum. Nam si illud quod evacuatur, id est quod secundum umbras carnalis intelligentiæ vel observationis cessat, est in suo tempore per gloriam Moysi, vel *sicut in antiquis codicibus invenitur* in gloria fuit, multo magis hoc Novi Testamenti ministerium, quod sine immutatione manet, est in gloria ministris suis.

« Habentes igitur talem spem, multa fiducia utimur: et non sicut Moyses ponebat velamen super faciem suam, ut non intenderent filii Israel in faciem ejus, quod evacuatur (*ibid.*). Sed obtusi sunt sensus eorum. Usque in hodiernum enim diem idipsum velamen in lectione Veteris Testamenti manet non revelatum, quoniam in Christo evacuatur. Sed usque in hodiernum diem, cum legitur Moyses, velamen est positum super cor eorum. Cum autem conversus fuerit ad Dominum, auferetur velamen. Dominus autem Spiritus est (*Joan. iv*). Ubi autem Spiritus Domini, ibi libertas. »

Quandoquidem ministerium Novi Testamenti erit nobis in permanenti gloria, *igitur nos habentes talem spem*, id est sperantes quia ex prædicatione nostra percipiemus æternam et immensam gloriam, *multa fiducia utimur* in prædicatione, id est tam constanter prædicamus, ut neque minis neque verberibus, nec ullis tormentorum cruciatibus ab annuntiatione veritatis taceamus, et non ita prædicamus, *sicut Moyses quando ponebat velamen suum super faciem suam*, id est non celamus sensum nostrum sicut Moyses, sed aperte dicimus, quia non prædicamus carnales observantias, sed potius ipsam veritatem et Veteris Testamenti significationem. Qui enim carnales observantias prædicat, velamen ponit super faciem suam, et velamine litteræ sensum interiorem operit. Nos vero faciem non velamus, quia vobis aspectum splendoris interioris non negamus, sicut Moyses ponebat velamen carnalium figurarum super faciem suam, id est super clarum dictionum suorum spiritualium intelligentiam, ideo *ut filii Israel non intenderent in faciem ejus*, id est non inspicerent spiritalem sensum ejus, quia non possent sufferre propter suam imbecillitatem et irreligiositatem. Claritas enim vultus Moysi, veritatem novæ legis quæ per carnales observantias designata est, significavit. Et sicut Judæi tantam illam claritatem non poterunt pati, nisi mitigaretur eis per oppositio- nem aliqujus velaminis, eodem modo perfectionem vitæ vel intelligentiæ, quæ fuit ibi significata, non auferret imbecillitas mentis eorum, si eis ipsa veritas Novi Testamenti nudata monstraretur. Ideo *pe velamen carnalium observationum et promissionum obumbrata est facies veritatis, quæ tempore gratiæ fuerat*

revelanda. Si enim dicta Moysi spiritaliter intellexissent, infirmitas eorum ad tantam perfectionem non ascendisset, nec lippiens eorum oculus tantam sapientiæ claritatem sustinisset. Et si ipsa veritas sine velamine fuisset illis ostensa, tanto damnabiliores essent, quanto majorem justitiæ perfectionem cognovissent, cum nihil perfectionis in actione tenuissent. Propterea velamine litteræ textit illis Moyses faciem spiritalis intelligentiæ, ne ad hunc splendorem vultus ejus intenderent, quod velamen evacuatur nunc tempore gratiæ, ut interna pulchritudo veritatis quæ latuerat, manifestetur. Sed pseudoapostoli qui carnales observantias adhuc prædicant, nolunt ut velamen evacuatur, sed ut veritas semper figuris adumbretur, nec unquam manifestetur. Ideoque suos auditores in umbram ducunt, non veritatis lucem illis ostendunt. Velamen quidem modo per nostras expositiones evacuatur et removetur, sed sensus Judæorum sunt obtusi, id est hebetati, nec possunt oculis cordis aspicere fulgorem nudæ veritatis. Quæ obtusio causa infidelitatis accidit. Ideo conversis ad fidem acuitur acies mentis, ut videant splendorem divini luminis. Hebetati sunt oculi sensuum illorum, ne lucem spiritalem videant. Nam usque in hodiernum diem, cum jam manifestata veritas ubique refulget id ipsum velamen carnalis intelligentiæ manet in lectione Veteris Testamenti, quia cum audiunt legi Scripturam illam, non intelligunt, nisi quod littera foris carnaliter sonat, et ita celatur eis sensus interiorum. Unde et Moyses cum ad eos loqueretur, faciem velabat, significans quia populus ille verba quidem legis cognosceret, sed ejusdem legis claritatem omnino non videret. Facies enim Moysi splendida, sicut dictum est, figuram habebat veritatis, facies Moysi Christum designabat. Sonabat vox Moysi per velum, et facies Moysi non apparebat. Sic et modo Judæis sonat vox Christi per vocem Scripturarum veterum. Vocem loquentis audiunt, et faciem ejus non vident. Personam ejus gererebat Moyses, et ideo velum ante se ponebat quando loquatur populo. Id ipsum ergo velamen usque hodie manet in lectione Veteris Testamenti, quia quandiu in lege carnalia gaudia et voluptates et terrena bona promitti intelligunt, velamen est positum contra faciem cordis eorum, ne videant in Scripturis Christum. Id ipsum velamen quod Moyses posuit, manet adhuc in illa lectione, quia et nunc sicut ante Salvatoris adventum, abscondit eis sensum spiritalem super facies litteræ carnaliter intellecta. Velamen dico, non revelatum eis esse velamen quia neque hoc sciunt quod sit velamen, id est neque vel hoc animadvertunt, quod illa litteralis superficies sit velamentum alicujus occulti sensus quem velet intra se. Nihil enim ibi putant debere intelligi, nisi quod littera carnaliter sonat. Nec mirum si velamen adhuc eis manet, ita ut nec intelligant hoc esse velamen absconditæ pulchritudinis, quoniam in Christo, id est in fide Christi solummodo evacuatur. Evacuatur namque in Christo non Vetus

A Testamentum, sed velamen ejus, ut per Christum intelligatur et quasi denudetur, quod sine Christo obscurum atque adopertum est. His quidem qui sunt in Christo, evacuatur velamen. Sed super cor eorum qui in infidelitate perdurant, est usque hodie velamen positum, id est cæcitas deprimens rationem eorum, cum legitur Moyses, quia totum carnaliter intelligunt, nec ad spiritalem sensum propter nebulam cæcitatatis, quam in corde portant, aspicere possunt. Et ita duo illis obsunt ne intelligant, id est velamen lectionis et velamen cordis. Sed cum aliquis eorum fuerit ad Dominum Jesum conversus, mox auferetur ei velamen. Velamen enim auferitur, quando similitudinis et allegoriæ cooperimento ablato, veritas nudatur ut possit videri. Velamen quippe auferri, est carnalem scientiam legis evacuari. Conversi namque intentio mutatur de Vetere ad Novum Testamentum ut non jam intendat accipere carnalem, sed spiritalem felicitatem, id est ab intentione qua expectabatur in regno terreno beatitudo umbratilis et carnalis, ad intentionem qua expectatur in regno cælesti beatitudo verissima et spiritalis. Et sic auferitur velamen, quo tegebantur utilia legis arcana, dum ab eo qui venit ad Christum, tollitur insipientia et ignorantia nebula. Sed quid mirum? Dominus enim est spiritus (Joan. iv), id est Spiritus sanctus Dominus, hoc est suæ potestatis, valens perficere quod vult. Ac per hoc quos vult, illuminat; et quos vult, in tenebris ignorantia deserit. Tanquam proprie videtur Filius vocari Dominus. Sed et Spiritus sanctus hoc loco Dominus vocatur, cum dicit Apostolus: Dominus autem spiritus est. Ne enim quisquam arbitraretur Filium significatum, et propter incorpoream substantiam dictum Spiritum, secutus contexit: Ubi autem Spiritus Domini, ibi libertas. Dominus ergo est, id est nihil servitutis habens, sed imperiali potentia omnibus dominans Spiritus sanctus. Et ideo sicut Dominus auferit velamen antiquæ servitutis ab his qui convertuntur, ipse Spiritus est Dominus. Sed ubicunque est Spiritus Domini, id est idem Spiritus sanctus qui est Spiritus Filii, ibi est mentis libertas, ut remoto servili velamine, possit libere mens veritatem inspicere. Nam quia iste Spiritus est Dominus, et est Spiritus Domini, ideo per hunc Dominus Jesus dedit libertatis legem, non litteris utique scriptam, sed per fidem animis intimatam, non quæ visibilia doceat, sed quæ invisibilia credi suadeat, quæ animus spiritualiter colligat, non quæ oculus corporaliter cernat. Sicque per hunc spiritum auferitur velamen carnalis intelligentiæ quod est servitutis, et dono spiritalis intelligentiæ, tribuitur gratia libertatis. Sed et in actione semper est libertas, ubicunque spiritus iste habitat, quia facit bonum operari non timore pœnæ, sed amore justitiæ. Ignorat enim mens gratiam libertatis, quam ligat servitus timoris. Nam qui idcirco bona facit, quia tormentorum mala metuit, vult non esse quod metuat, ut au'tenter illicita commi-

tat. Sed cum iste spiritus charitatem ubicunque manserit infundat, charitas vero servilem timorem foris mittat, patet quia in quacunq[ue] mente spiritus vitæ fuerit, ibi mox libertas regnum obtinebit. Origenes, quia nunc sermo Apostoli ad subtiliorem et spiritalem intelligentiam provocat auditores, et vult eos nihil carnale in lege sentire; dicit: Qui vult auferri velamen de corde suo, convertatur ad Dominum, non quasi ad carnem Dominum; est enim et hoc quia verbum caro factum est, sed ad Spiritum Dominum. Si enim quasi ad Spiritum Dominum convertatur, de carnalibus ad spiritalia veniet, et ad libertatem de servitute transibit, ubi enim Spiritus Domini, ibi libertas. His ergo qui de carnali ad spiritalem intelligentiam provocantur, dicitur: *Dominus autem Spiritus est, ubi autem Spiritus Domini, ibi libertas.* Potest et sic intelligi: Cum quis eorum fuerit conversus ad Dominum, qui est Pater et Filius et Spiritus sanctus, auferetur ei velamen carnalis intelligentiæ. Ipse convertetur de carnalitate ad Dominum, qui est ut diximus, individua trinitas. Sed Dominus ad quem convertetur, est Spiritus, id est incorporeus, sicut in Evangelio dicitur de tota hac trinitate: « Spiritus est Deus (Joan. iv), » et eos qui adorant eum, in spiritu et veritate oportet adorare. Similiter et hic dicitur quia Dominus est Spiritus, ut animadvertamus quia quisquis ad eum intentionem animi convertit, ut intelligat eum, in spiritu et veritate oportet intelligere, non in carne et umbra, sicut volunt facere qui tenentur sub lege. Dominus est Spiritus, et spiritaliter debet intelligi, atque spiritalem dat intelligentiam. Sed ubi fuerit Spiritus Domini, id est spiritalis gratia charitatis, ibi libertas est et recte intelligendi et recte faciendi.

« Nos vero omnes revelata facie gloriam Domini speculantes, in eandem imaginem transformamur a claritate in claritatem tanquam a Domini Spiritu. »

Illi quidem, quia non conversi sunt ad Dominum, qui Spiritus est, habent velamen super cor. Sed nos omnes, qui libertatem consecuti sumus per Spiritum Domini, *revelata facie* cordis nostri, id est ab omni velamento erroris detecta mentis intentione, *gloriam Domini* sumus *speculantes*, id est per speculum intuentes. Speculantes, enim dictum est per speculum videntes, non de specula prospicientes. Quod in Græca lingua non est ambiguum. In speculo autem non nisi imago cernitur. Et nos qui sumus imago Dei, speculamur, id est per speculum, hoc est per hanc imaginem suam videmus gloriam Domini. Dum enim diligenter nos ipsos acutissime rationis consideramus, ad visionem gloriæ ejus cujus imago sumus, quodammodo penetramus, et in eandem imaginem Dei, per quam speculamur, transformamur, id est transmutamur ad hoc, ut perfecte simus imago Dei. Transformamur, id est de forma in formam mutamur, atque transimus de forma obscura in formam lucidam. Quia et ipsa

obscura imago Dei est. Cum enim natura humana a Creatore suo cujus est imago, ab impietate justificatur, a deformi forma, formosam transformatur in formam. Et transformatur a claritate creationis in claritatem justificationis. Atque transformamur tanquam a Spiritu Domini, id est tanquam illi quos Spiritus Domini transformat, et per gratiam suam in melius transmutat. Cum ergo hac transformatione ad perfectum fuerit hæc imago renovata, similes Deo erimus, quoniam videbimus eum non per speculum, sed sicuti est (I Joan. iii). Vel quia speculatio solet dici contemplatio, possumus et ita intelligere: Nos omnes revelata cordis facie a legis velamine, quod est umbra futurorum (Hebr. x), gloriam Domini speculantes, id est per fidem contemplantes, transformamur, id est quotidiano profectu transmutamur, in eandem imaginem, id est in eandem similitudinem gloriæ Domini, quam contemplamur, ut post mortalitatis hujus tenebras, ad plenum inveniamur similes gloriæ ejus. « Scimus enim quia cum apparuerit, similes ei erimus (I Joan. iii). » Transformamur autem a claritate in claritatem, id est euntes ab una clara cognitione in aliam. A claritate fidei in claritatem speciei; a claritate qua filii Dei sumus, in claritatem qua similes ei erimus, quoniam videbimus eum sicuti est (ibid.). Et ita ducimur a claritate in claritatem tanquam a Domini Spiritu, quia tanta nobis claritas datur, quæ sublimitati congruat dantis. Tantam enim claritatis vel gloriæ nobis dabitur, quantum dignum est dare Dominum per Spiritum suum.

CAPUT IV.

« Ideo habentes hanc administrationem, juxta quod misericordiam consecuti sumus, non ambulantes in astutia, neque adulterantes verbum Dei, sed in manifestatione veritatis, commendantes nosmetipsos ad omnem conscientiam hominum coram Deo. »

Hinc ergo conicere debemus, quanto majora nobis, quam Judæis superna clementia gratiæ suæ dona contulerit. Judæi enim cum minor esset gloriæ vultus Moysi, eam speculari non poterant; nos vero non Moysi gloriæ quæ inferior est, sed excellentem Salvatoris gloriæ visuros nos credimus. Judæi gloriæ servi non meruerunt videre, nos autem omnium Domini gloriæ sumus visuri. Et ideo nos habentes hanc Domini administrationem, quæ nos ad tantam promovet gloriæ, et habentes eam juxta quod misericordiam consecuti sumus, id est habentes eam non ex meritis, sed ex Dei misericordia, quæ nos abluit et justificavit et ministros suos fecit, non defcimus in pressuris propter spem gloriæ quam expectamus, nec minoratur in nobis animi fortitudo, sed inter adversa constanter adimplemus officium nostræ ministræ. Non defcimus pro aliquibus adversis, sed abdicamus, id est abnegamus, et procul a nobis removemus *occulta dedecoris*,

ocultos actus nequitiae, qui dedecus et opus generant, et idcirco fiunt in absconso, ne dico dedecus suis operariis inferant. « Omnis qui male agit, odit lucem (Joan. 11). » Et : in occulto fiunt ab ipsis, turpe est et dicere . v). » Hæc sunt occulta dedecoris, quæ s abdicamus. Vel occulta dedecoris sunt, cones alicujus turpis actionis, sive ea quæ pravo quis meditatur ad prædicandum, ut auditores Ad dedecus enim et deformationem ejus propui subdola mente confingit doctrinam ad delum corda simplicium. Hæc contra pseudolos dicuntur, qui non habebant revelatam, nec Testamenti Novi ministrationem; et sitio illis accidisset, mox deficiabant. Et licet is faciem religionis ostenderent, interius taeculta dedecoris non abdicabant, sed turpia cogitationibusolvebant, et in secretis locis rabant. Nec sunus, inquit, *ambulantes in*; id est hypocrisi, sicut prædicti pseudoapopui videntur humiles et religiosi coram homiIn astutia enim ambulat, dum occulta sua tegunt; sed imaginem sanctitatis ostendunt, nihil accipiunt, sed famulis suis totum dariunt, per quos ad usum suum omnia reditura, *neque sumus adulterantes verbum Dei*, sicut est non prædicamus propter delectationem æ laudis, vel terreni lucri, nec admistione is veritatem corrupimus. Hæc perversa non s, *sed sumus commendantes nosmetipsos in statione veritatis*, quia manifestamus veritauæ fuerat operta velamine Moysi, et ita combilers reddimus nosmetipsos sine comparadversariorum. Hoc est dicere : Veritas, quam stamus, nos ipsos efficit commendabiles. Et *l omnem conscientiam hominum*, ut conscientium qui rationabiliter intelligunt noverit nos r a cunctis debere suscipi, qui tam evidenter us veritatem. Et commendatio ista sit *coram l laudem et placitum ejus*, qui ad hoc nos eudamus hominibus, ut videant opera nostra et glorificent non nos, sed Patrem nostrum, cælis est (Matth. 5). Vel coram Deo id agiua ipse testis est nos manifestare puram ven, cujus oculos nihil latet.

Id si etiam opertum est Evangelium nostrum, is qui pereunt, est opertum in quibus Deus s sæculi excæcavit mentes infidelium, ut non at illuminatio Evangelii gloriæ Christi, qui mago Dei »

quidem revelata facie prædicamus et veritanifestamus. *Quod*, id est *sed si etiam opertum angelium nostrum in his qui pereunt, est operion in his qui salvi fiunt*. Infideles enim vel apostoli prædicationem nostram non intelligifideles autem Deo revelante cognoscunt et sunt. Increduli vero, qui in perditionem tenea quæ dicimus videre non possunt, quia vererroris et ignorantiae est super cor eorum. In

PATROL. CLXXXI.

A his qui pereunt, id est in corde eorum est opertum velamine cæcitatiss ipsorum Evangelium nostræ prædicationis. In quibus pereuntibus *Deus excæcavit mentes infidelium hujus sæculi*. Deus excæcavit mentes infidelium, qui et Filium suum misit dicentem : « In judicium veni, ut, qui non vident, videant, et qui vident, cæci fiant (Joan. 1x). » Excæcavit autem non malitia, sed astutia. Non enim est iniquitas apud eum, cui dicitur : « Misericordiam et judicium cantabo tibi, Domine (Psal. c). » Illuminat ergo misericordia, excæcat judicio utique æquissimo, etsi occultissimo. Præcedit enim aliquid occultum in occultis, ubi ipse agat justissimum examen judicii sui, ut quorundam mentes excæcentur, et quorundam illuminentur, cui verissime dictum est : « Judicia tua abyssus multa (Psal. xxxv). » Deus itaque justus mentes infidelium hujus sæculi excæcavit, id est ex toto cæcas fecit. Erant enim in Adam quodammodo cæcata, sed non ita quin, si vellent, Creatorem suum intueri possent. Quia vero noluerunt, excæcavit eas Deus, quando lucem Spiritus sancti præsentem subtraxit eis, et splendorem suæ visionis occultavit. Sic excæcavit mentes eorum propter infidelitatem. Ac si diceret eis : « Nisi crederitis, non intelligetis (Isa. 1x, sec. LXX). » Et erant hujus sæculi, id est non pertinebant ad aliud sæculum, ubi est perpetua lux et felicitas. Vel Deus hujus sæculi excæcavit mentes infidelium. Idcirco enim Deus quem prædicant apostoli, dicitur Deus hujus sæculi, ne in hoc sæculo, ubi tot mala fiunt, putaretur aliquis alius Deus esse. Non solum enim invisibiles creaturas, sed etiam hoc visibile sæculum regit Deus noster, nullusque Deus est præter eum, qui et pravorum malitia bene utitur. Qui ad hoc excæcavit mentes infidelium, *ut non fulgeat eis illuminatio Evangelii*, id est ut non videant fulgorem Evangelii, quod illuminat mentes credentium, nec appareat eis quod Evangelium sit lux, qua fideles illustrantur. Evangelii dico *gloriæ Christi*, quia ibi prædicatur excellentia divinitatis, et gloria resurrectionis ejus, quam nolunt infideles audire. Nam prædicationem contumeliæ passionis ejus libenter audiunt. Prædicationem vero gloriæ resurrectionis et divinitatis ejus veram esse non credunt. Et hoc est quod non fulget eis illuminatio Evangelii gloriæ Christi. *Qui est imago Dei*, id est omnino per omnia simillimus Patri, sicut ipse dicit : « Qui videt me, videt et Patrem (Joan. xiv). » Nam qualis est iste, talis est ille. Quantum est ille, tantus et iste. Sicut ille caret initio, sic et iste. Sicut ille est æternus et incommutabilis, sic et iste. Sicut ille Deus, sic et iste. Sicut ille Creator, sic et iste. Sicut ille scit omnia et potest, sic et iste. Et quod est ille, hoc et iste. Quia ergo iste de illo est, et consubstantialis atque coæternus et coequalis est illi ac per omnia similis, recte vocatur ejus imago. Et hanc illius gloriam prædicat Evangelium, cujus illuminatio fulget mentibus credentium. incredulis autem justo Dei judicio

absconditur. Qui enim oculos ad lucem claudunt, **A** scientiam quam habemus de claritate Dei. Hæc est enim scientia claritatis ejus, qua scimus ipsum esse lumen quo tenebræ nostræ illuminantur, ut qui aliquando fuimus increduli in ignorantia, id est in tenebris. nunc exhibeamus lumen aliis. Quod enim de tenebris lucem fecit. hoc significavit, quia eos qui in regione dissimilitudinis per ignorantiam abierant, et in tenebris positi erant, illis illuminaret, illis verbum prædicationis committeret, et ita de tenebris lucem splendescere faceret. Illuxit ergo in cordibus nostris, ut et nos luceamus vobis, ad hoc ut percipiatis illuminationem scientiæ claritatis Dei in facte, id est in cognitione Christi Jesu, quia per faciem unusquisque cognoscitur. Ipse nostris mentibus illuxit. Sed hunc *thesaurum* divitiarum æternæ sapientiæ habemus in vasis fictilibus, id est in corporibus terrenis et fragilibus. **B** Thesaurus iste est sacramentum Dei in Christo, quod fidelibus erogatur, incredulis autem absconditur. Hunc thesaurum quo alios ditamus, et quo signa frequenter operamur, habemus in vasis fictilibus, id est in terrenis corporibus, per quæ ipsi nos infirmamur, qui sanitatem aliis sæpe conferimus, *ut sublimitas* mirabilium operum nostrorum et prædicationis sit virtutis Dei, et non ex nobis, id est appareat esse ex Dei virtute, et non ex nostris viribus. Quod non ita pateceret, si thesaurus iste angelis ad erogandum commissus fuisset. Et idcirco infirmis hominibus est commissus ad dispensandum aliis, ut hujus thesauri sublimitas, **C** id est tanta sapientia, tanta eloquentia, tanta miraculorum ostensio, tanta in tribulationibus constantia, intelligatur esse virtutis Dei, et non ex nobis. Fictilia vasa significant naturæ humanæ infirmitatem, quæ nihil potest, nisi a Deo acceperit virtutem, ut ad laudem suam Deus, per infirma vasa se prædicet, ut gloria illi detur, non homini, qui ex luto fictus est (*Gen. 11*).

« Non enim nosmetipsos prædicamus, sed Jesum et Christum Dominum nostrum, nos autem servos vestros per Jesum. Quoniam Deus, qui dixit de tenebris lucem splendescere (*Gen. 1*), qui illuxit in cordibus nostris ad illuminationem scientiæ claritatis Dei in facie Christi Jesu. Habemus autem thesaurum istum in vasis fictilibus, ut sublimitas sit virtutis Dei, et non ex nobis. »

Neque Evangelium adulteramus, neque nosipsos commendamus in manifestatione veritatis. Quia non prædicamus nosmetipsos, sed Jesum Christum, id est prædicationis nostra non tendit ad gloriam nostram vel lucra, sed ad Christi gloriam, qui est Salvator et Rex suorum, et cujus dominio libenter subjicimur. Non gloriam nostram, sicut pseudoapostoli consueverunt, denuntiamus, ne quis nos dicat propter nosipsos evangelizare, ut gloriosi appareamus, et quæstum nobis de rebus vestris faciamus. Qui enim propria commoda quærit, non Christum prædicat, sed se, sicut illi qui suo ventri deserviunt. Jesum prædicamus Dominum nostrum esse. Sed nos esse dicimus servos, id est ministros vestros per Jesum, qui nobis præcepit ut vobis serviremus in ministerio prædicationis. Cum simus ministri, dicimus nos propter humilitatem servos, ut appareat quia non ad gloriam nostram prædicamus Evangelium, sed ad claritatem Christi; cui obedimus, dum vobis in ministerio verbi servimus, non propter vestrum meritum, sed propter Domini præceptum. Nos, inquam, per Jesum hoc facimus, ut vobis in ministerio prædicationis serviamus, quia et Deus per cum majora fecit nobis. Quoniam Deus qui in mundi constitutione dixit, id est verbo suo (quod est filii ejus) fecit de tenebris lucem splendescere, quando dixit: « Fiat lux, et facta est lux (*ibid.*), » ipse est qui illuxit in cordibus nostris. Et qui tunc per verbum suum in mundo corporalem fecit lucem, ipse nunc per idem verbum in nobis spiritalem dedit lucem. Non sine initio semper fuerunt tenebræ, sed cœperunt esse, ex quo confusa moles cœli esse cœpit ac terræ, antequam lux ista esset facta, quæ illuminaretur, quod sine luce fuerat tenebrosum. Quid autem inconveniens, si mundanæ materiæ fuerant tenebrosa primordia, ut accedente luce, melius, quod factum est, videretur, et tanquam proficientis, quod postea futurum erat, hoc modo significaretur affectio? Nam sicut suum de tenebris lux visibilis initium sumpsit, ita post tunc lux invisibilis, cui dictum est: « Fuitis aliquando tenebræ, nunc autem lux in Domino (*Ephes. v*). » Et quis hoc fecit, nisi ille qui cum tenebræ essent super abyssum, dixit: « Fiat lux, et facta est lux? (*Gen. 1*). » Deus ergo est qui in separatione elementorum dixit, id est verbo suo fecit de tenebris lucem splendescere, qui illuxit, id est lumen quod ipse est lucere fecit in cordibus nostris, ad illuminationem scientiæ claritatis Dei, id est ad hoc, ut illuminemus alios per

« In omnibus tribulationem patimur, sed non angustiamur. Aporiamur, sed non destituimur. Persecutionem patimur, sed non derelinquimur. Humiliamur, sed non confundimur. Dejicimur, sed non perimus. »

Inde probatur nos esse idoneos ad illuminationem aliorum, et ad erogationem divini thesauri, quia in omnibus locis, vel in omnibus modis tribulationem patimur, sed non in animo angustiamur, id est non tantum opprimimur, ut pusillanimes effecti cedamus. In omnibus tribulationum modis affligimur, quoniam vincula, carceres et verbera et cætera tribulationum genera in corporibus nostris sustinemus. Sed non angustiamur, imo dilatamur ampliori latitudine cordis, ut intus regnet charitas, et spatiatur animæ libertas, apud se habens thesauri cœlestis divitias, quibus et aliorum ditet inopiam. Aporiamur, id est inopiam patimur. Quia *ropia* Græce dicitur facultas, abundantia, & vero privativum est. Aporiamur, id est sine lucro efficitur; *aporis* namque est spoliatio omnium honorum. Aporiamur ergo, id est bonis corporalibus privamur, *sed non*

destituimur, Deo necessaria nobis ministrante. Vel **A** aporiamur, id est laborando sudamus. Nam poros vocamus foramina per quæ sudor exit. Et inde aporiatius, id est sudans appellatur. Aporiamur ergo, id est in labore tribulationum desudamus, sed non destituimur a Deo, qui nos confortat ne deliciamus. Sive aporiamur, id est quasi sine poris efficimur, hoc est sine sudore, dum velut frigore constringimur egestatis necessitate. Sed non destituimur a thesauro cœlesti, quem habemus in vasis fictilibus. *Persecutionem patimur*, id est de loco ad locum fagmur, sed non derelinquimur in manus inimicorum, ne satisfaciant sibi de nobis (216). *Dejicimur*, id est verberibus prosternimur, sed non perimus, id est non mortificamur. Vel non perimus, id est a confessione veritatis et prædicatione non cessamus. **B** Tunc enim fieret nostrum perire, si sicut habent dominium in carne, dominarentur et prædicationi nostræ.

« Semper mortificationem Jesu Christi in corpore nostro circumferentes, ut et vita Jesu manifestetur in corporibus nostris. Semper enim nos qui vivimus, in mortem tradimur propter Jesum, ut et vita Jesu manifestetur in carne nostra mortali. Ergo mors in nobis operatur, vita autem in vobis. »

Quid per singula numeraremus ea quæ patimur? Quia *semper sumus circumferentes*, id est exterius et in aperto ferentes, et ad exemplum aliis ostendentes *in corpore nostro mortificationem Jesu*, id est quam Jesus pro nobis sustinuit, et nobis sustinendam reliquit. Hanc in nostro corpore semper circumferimus, quoniam ad ejus imitationem assidue carnem mortificamus, ut et aliis exemplum abstinentiæ præbeamus. Quod ideo facimus, *ut et vita Jesu*, sicut nunc mortificatio, id est ut gloriosa immortalitas resurrectionis manifestetur omnibus etiam inimicis *in corporibus nostris*. Ecce quomodo circumferimus mortificationem Jesu. Quia videlicet *nos qui per observationem justitiæ intus vivimus, semper tradimur in mortem*, id est in pericula mortis propter Jesum, quem prædicamus, vel nos qui vivimus, semper tradimur in mortem, id est cum præsentem vitam habeamus et vivere possimus, nunquam recusamus in mortem tradi propter Dominum nostrum Jesum. Et hoc ideo, *ut et vita Jesu*, id est quam ipse jam habet ex quo resurrexit, manifestetur cunctis *in nostra carne*, quæ nunc est mortalis. Et quia mortificationem in nostro exteriori homine circumferimus, nec in mortem propter nomen ejus tradi recusamus, ut et vitæ ejus participes simus, ergo mors qua quotidie pro Salvatore morimur, non est inutilis, sed operatur magnum quid *in nobis*, id est vitam perpetuæ felicitatis. Sed e contrario vita qua delectamini in terrenis, *operatur in nobis*, mortem æternam. Inceptive hoc dicitur. Nos huic mundo quotidie morimur, ut Deo vivamus; vos mundo vivitis, ut Deo moriamini. Mors operatur, id

(216) Hic videtur aliquid deesse.

est dominium exercet in nobis, vos ad voluptates vitæ tenditis.

« Habentes autem eundem spiritum fidei, sicut scriptum est : Credidi, propter quod locutus sum (Psal. cxv); et nos credimus, propter quod et loquimur, scientes quoniam qui suscitavit Jesum, et nos cum Jesu suscitabit, et constituet vobiscum. Omnia enim propter vos, ut gratia abundans per multos in gratiarum actione abundet in gloriam Dei. »

Semper quidem mors in nobis operatur, sed nos fidem Christi propter quam morimur, loqui non cessamus. Et hoc est, nos *habentes eundem spiritum fidei*, quem habuerunt prophetæ, *sicut scriptum est*, dicente David : *Credidi, propter quod locutus sum; et nos similiter credimus, propter quod et loquimur*, id est oris confessione fidem nostram proferimus. Eundem spiritum fidei habemus. Non ait, scientiam fidei, sed spiritum fidei. Quod propterea dixit, ut intelligeremus quia fides etiam non petita conceditur, ut ei petenti alia concedantur : « Quomodo enim invocabunt in quem non crediderunt? (Rom. x). » Ergo spiritus gratiæ facit ut habeamus fidem, ut per fidem impetremus orando, ut possimus facere quod jubemur. Ipsa vero fides tenuit corda præcedentium, quæ replevit corda sequentium. Spiritales quippe illi patres omnipotentem Deum trinitatem ita esse crediderunt, sicut eandem trinitatem novi patres aperte locuti sunt. Sed et eadem fides incarnationis Christi salvavit eos, qua et nos salvamur, quia sicut nos credimus eum venisse, passum esse, resurrexisse, ita et illi crediderunt venturum, passurum, resurrecturum. Tempora variata sunt, non fides. Habemus enim eundem spiritum fidei, quem habuerunt illi, sicut scriptum est in eorum libris : *Credidi, propter quod locutus sum*, id est perfecte credidi. Non enim perfecte credunt qui, quæ credunt, loqui nolunt. Ad ipsam enim fidem pertinet etiam illud credere quod dictum est : « Qui me confessus fuerit coram hominibus, constebor et ego eum coram Patre meo; qui autem me negaverit coram hominibus, negabo eum coram angelis Dei (Matth. x). » Jure ergo non ait : *Credidi et locutus sum; sed propter hoc dicit se locutum, quia credidit*. Simul enim credidit, et quod primum loquendo speraret, et quia pœnam tacendo timere non deberet. Illi crediderunt, et propterea locuti sunt. Et nos credimus, propter quod et loquimur. Hæc vox præcipue martyrum est. Si enim tantummodo credidissent, et non loquerentur, non peterent. Credendo apprehenderunt vitam, et loquendo invenerunt mortem. Sed mortem, in qua corpus corruptibile seminaretur et incorruptio meteretur. Nullo metu suppliciorum omitterent loqui ea quæ credimus, scientes, pro certo, quoniam qui suscitavit Jesum, ipse etiam nos propter confessionem ejus fidei mortuos suscitabit cum Jesu, ponens in eadem gloria, et constituet nos in illa regione viventium, usque ultra non moriamur. Atque vobiscum nos ibi consti-

tuet, ut qui unam fidem habemus, in uno regno simus. Nos vobiscum, non vos nobiscum, ut non inferiores, sed pares nobis sitis, si volueritis. Et reete de vobis hoc asserimus. Nam *omnia propter vos instruendos facimus*, id est quidquid loquimur et quidquid patimur, pro salute vestra totum agimus, ut exemplo nostro vos ad similia provocemus, et ad cœnam Dei perducamus. Et ita spectant ad vos omnia quæ facimus, *ut gratia Dei abundans in nobis abundet per multos*, id est per vos, et per alios longe lateque cumuletur, *in actione gratiarum*, ut semper in adversis et prosperis Deo gratias agatis, vel de nobis illi gratias referatis, qui per nos vobis gratiam suam infundit. Et abundet hæc gratia in gloriam Dei, ut ipse glorificetur ab omnibus. Ideo cuncta facimus, ut abundans, id est copiosum Dei munus, quod ipse paratus est omnibus dare, sed non omnes digni sunt accipere, non minuatur per paucos, sed abundet per multos in actione gratiarum in gloriam Dei. Gloria enim Dei est, ut multi referant illi gratias pro multitudine largifui doni gratiæ ejus.

« Propter quod non deficimus. Sed licet is, qui foris est noster homo corrumpatur, tamen is qui intus est renovatur de die in diem. Id enim quod in præsentem est momentaneum et leve tribulationis nostræ, supra modum in sublimitate æternam gloriæ pondus operatur in nobis, non contemptibus nobis quæ videntur, sed quæ non videntur. Quæ enim videntur, temporalia sunt; quæ autem non videntur, æterna sunt. »

Spem beatæ resurrectionis habemus, et abundantem gratiam Dei per multos spargere ad gloriam ipsius studeamus. Propter quod non deficimus in adversis, sed officium nostrum constanter implemus. Non deficimus, quamvis gravia patiamur. Sed licet is homo noster qui foris est expositus malis, id est corpus, corrumpatur pressu is, plagis, fame, siti, frigore, nuditate, tamen is qui intus est, id est anima munita, ad quam non accedit humanus furor, renovatur in agnitione Dei de die in diem, id est assidue purior efficitur per ignem tribulationis. Vel de die in diem, id est de claritate in claritatem proficiens. Interior homo pro spiritu mentis positus est, exterior autem pro corpore atque mortali vita. Non tamen utrumque horum simul duos homines Apostolus unquam legitur appellasse, sed unum quem Deus totum fecerit, id est et id quod interius est, et id quod exterius. Sed totus iste homo, id est interiore et exterioris sui parte, inveteravit propter peccatum, et pœnæ mortalitatis addictus est. Renovatur autem nunc secundum interiorem hominem, ubi secundum sui Creatoris imaginem reformatur. In resurrectione vero etiam exterior percipiet cœlestis habitudinis dignitatem. Renovatio interioris inchoatur a fide, bonisque moribus augetur, et roboratur de die in diem. Non enim momento uno fit ipsius conversationis renovatio, sicut momento uno fit in baptismo peccatorum remissio. Neque enim vel unum quantum-

A cunque remanet, quod non remittatur. Sed quemadmodum aliud est carere febribus, aliud ab infirmitate quæ febribus facta est, revalescere; itemque aliud est infixum tulum de corpore demere, aliud vulnus quod eo factum est, secunda curatione sanare: ita prima curatio est causam removeere languoris, quod per omnium fit indulgentiam peccatorum; secunda, ipsum sanare languorem, quod fit paulatim proficiendo in renovatione hujus imaginis. Quæ duo demonstrantur in psalmo, ubi canitur: « Qui propitiatur omnibus iniquitatibus tuis (Psal. cii), » quod fit in baptismo. Et additur: « Qui sanat omnes infirmitates tuas (ibid.), » quod fit quotidianis profectibus, cum hæc imago magis ac magis renovatur. Nondum enim ex integro est renovata. Renovatur autem quotidie proficiens in sanctitate, dum transfert amorem a temporalibus ad æterna, a visibilibus ad intelligibilia, a carnalibus ad spiritualia, et ab istis cupiditatem frenare vel munit, atque illorum se charitate alligare diligenter insistit. Corpus vero tanquam homo exterior, quanto est in hac vita diuturnius, magis magisque corrumpitur vel ætate, vel morbo, vel variis afflictionibus, donec veniat ad ultimam, quæ ab omnibus mors vocatur. Quia ergo sancti quo exterius deliciunt, eo interius proficiunt, et quo magis exterius adversa tolerant, eo verius lumine interius eoruscant, recte dicunt, quia licet is qui foris est noster homo corrumpatur, tamen is qui intus est, de die in diem renovatur. Et ideo, inquit, non deficimus in pressuris, quia id tribulationis nostræ, id est exiguum tribulationis quod nunc patimur, quod est in præsentem, id est in hujus vitæ tempore, ubi nemo sine afflictionibus est, et est momentaneum, id est parum durans et ad tolerandum leve, operatur in nobis, id est in exteriori nostro sempiternam gloriam, et hoc supra modum, id est supra quantitatem universæ tribulationis. Parvis enim laboribus magna merces acquiritur, ut pro humiliatione levis tribulationis supra modum sublimitas æternæ gloriæ rependatur. Et ad comparisonem æternitatis, omne quod in præsentem vita patimur, momentaneum est, licet diuturnum esse videatur. Ideo supra modum tribulationis est magnitudo remunerationis, quia si recte censemus, æterna requies æterno labore fuerat emenda, sed Deus misericorditer pro brevissimo labore dat æternam requiem, pro brevi despectione sempiternam gloriam. Ideo supra modum. Vel supra modum, id est supra mensuram et comprehensionem humanæ rationis, « quia dabitur quod oculus non vidit, nec auris audivit, nec in cor hominis ascendit (Isa. LXIV; I Cor. II). » Operatur nobis in sublimitatem, id est ut sublimemur usque ad angelorum celsitudinem, vel in sublimitate, id est in cœlorum altitudine. Et contra momentaneum ac leve tribulationis operatur æternum pondus pro tribulatione pondus gloriæ, ut pro momentaneo æternum, pro levi pondus, pro tribulatione gloriam accipiamus. Sine fine erit hæc gloria, sine fine erit re-

quies ista, sine fine erit hæc lætitia, sine fine erit hæc remuneratio et incorruptio. Ideoque pro nihilo reputamus quidquid molestiarum in præsentis sæculo toleramus, *non contemplantibus*, id est non appetentibus vel attendentibus *nobis ea quæ videntur*, id est quæ corporeis oculis sunt subjecta, *sed ea quæ videri corporaliter nequeunt*. Nam hæc visibilia cito transeunt cum tempore, invisibilia vero permanent sine fine. Sic enim visibilia hæc sunt ad invisibilia, quomodo figura ad veritatem. Figura deperit, veritas permanet. Et ideo justi gaudent exire de hoc sæculo.

CAPUT V.

« Scimus enim quoniam si terrestris domus nostra hujus habitationis dissolvatur, quod ædificationem ex Deo habemus, domum non manu factam, sed æternam in cœlis. Nam et in hoc ingemiscimus, habitationem nostram quæ de cœlo est, superindui cupientes, si tamen vestiti et non nudi inveniamur. Nam et qui sumus in hoc tabernaculo, ingemiscimus gravati eo quod nolumus exspoliari, sed supervestiri ut absorbeatur quod mortale est a vita. Qui autem efficit nos in hoc ipsum, Deus, qui dedit nobis pignus spiritus. »

Non deficimus in momentaneis et levibus tribulationibus, propter æternam gloriæ pondus quod exspectamus. Nam *scimus quoniam si terrestris domus nostra*, id est caro quæ de terra est, et proclivis ad terrena, et domicilium animæ *hujus habitationis*, in qua habitamus quandiu vivimus, *dissolvatur*, id est destruatur pro Christo, *scimus quod ædificationem*, id est beatam mansionem habemus statim *ex Deo*, scilicet domum æternam in cœlis, *non manu fabricatam*, sed a Deo præparatam, vel de temporali et terrena domo expulsi, in æternam et cœlestem recipiamur domum. Prædicatores enim Ecclesiæ postquam de corporibus transeunt, nequaquam per morarum spatia, sicut antiqui patres, cœlestis patriæ perceptione differuntur, sed mox, ut a carnis colligatione exeunt, in cœlesti sede requiescunt, sicut in hac sententia demonstratur. Non enim dicitur, habebimus domum æternam in cœlis, sed habemus, quia videlicet protinus habetur illa domus, ex quo ista dissolvitur. Prius autem quam Redemptor noster morte sua humani generis pœnam solveret, eos etiam qui cœlestis patriæ vias sectati sunt, post ingressum carnis inferni claustra tenuerunt, non ut pœna quasi peccatores plecteret, sed ut eos in locis remotioribus quiescentes, quia necdum intercessio mediatoris advenerat, ab ingressu regni reatus primæ culpæ prohiberet. Nunc autem perfecti quique mox in regnum suscipiuntur. Domus æterna, mansio cœlestis est inter angelos, ubi vices temporum non inveniuntur. Supergreditur enim distinctionem et omne spatium ætatis volubile, cui semper inhærere Deo bonum est (*Psal. LXXII*). Quæ domus vocatur ædificatio, quia nunc operibus nostris bonis ædifi-

catur, ut in fine parata inveniatur. Vel domum hanc æternam in cœlis, immortale corpus accipe, in quo resurgentes semper manebimus, cujus forma jam in cœlis est in Domini corpore declarata. Domum dico non manu factam, quia corpus animale fit operatione viri et feminæ, sed corpus spiritale fiet per spiritum sine humana operatione. Non enim coitu parentum indigebimus ad resurgendum, sicut indignimus ad nascendum. Ædificabitur autem domus ista divinitus, quando fiet quod Ezechiel præmonstratum est: « Accesserunt, inquit, ossa ad ossa, unumquodque ad juncturam suam, et super ea nervi et carnes accesserunt, et extenta est in eis cutis desuper (*Ezech. xxxvii*). Sic ædificabitur absque manu domus animæ nostræ, quando corpus nostrum nutu divino in integrum restituetur ex pulvere. Et habebimus domum æternam in cœlis. Nam in hoc ut habeamus eam, *ingemiscimus*, id est intus recentem semper gemitum habemus, videlicet illam desiderantes, suspiramus et in precibus gemimus ex dilatione tantæ quietis et gloriæ. Nos dico, *cupientes superindui habitationem nostram, quæ est in cœlo*, id est immortalitatis gloriam. Mors enim de terra est, resurrectio de cœlis. Tamen hac conditione cupimus eam superindui si vestiti recepto corpore, *non inveniamur nudi*, id est alieni a promissa gloria. Opus enim est ut anima corpore induta, superinduatur et gloria, quæ est immutatio in claritatem. In hoc, id est in consideratione tantæ gloriæ et desiderio ingemiscimus præ dilatione, et precibus insistimus, quia cupimus super innovationem animæ quam jam accepimus, indui nos habitationem nostram, id est dari nobis animæ vitam non de terra, id est non corruptibilem, sed de cœlo, id est incorruptibilem et impassibilem ad instar cœlestium; si tamen in illa resurrectione vestiti corpore, non inveniamur nudi Christo, sed Christum induti. Illis enim solis proderit immortalitas qui, cum fuerint induti corpore, vestiti Christum invenientur, hoc est indumento justitiæ circumdati. Nec mirum si idcirco gemimus, quia nondum ad beatitudinem quam desideramus pervenire possumus. Nam etiam de hac minori re gemitum habemus, quia corpore exuimur, ut illuc pervenire queamus. Et hoc est *nam qui sumus in hoc tabernaculo*, id est in hoc corpore quod est tabernaculum animæ, ut in eo militet ad tempus Deo in via præsentis vitæ, *ingemiscimus gravati sarcina carnis*, et *ingemiscimus eo quod nolumus exspoliari corpore, sed supervestiri stola immortalitatis*, ut absorbeatur quod mortale est a vita, id est ut ab infirmitate ad immortalitatem etiam ipsum corpus sine morte transferatur. Si fieri posset, ita vellemus fieri immortales, ut jam veniret ipsa immortalitas, et modo sicut sumus mutaret nos, ut mortale hoc nostrum a vita absorberetur, non per mortem corpus poneretur, ut in fine iterum sumeretur. Quamvis ergo a malis ad bona transeamus, tamen ipse transitus aliquantulum amarus est propter consortium quoddam animæ et

corporis, et quamdam in his duobus familiaritatem A
 conglutinationis atque compaginis. Et ideo mortis
 diem differre conantur etiam illi qui post mortem
 se beatus credunt esse victuros. Tantam vim habet
 carnis et animæ dulce consortium. « Nemo enim
 unquam carnem suam odio habuit (*Ephes. v.*) »
 Et propterea non vult anima, vel ad tempus ab ejus
 infirmitate discedere, quamvis eam se sine infirmi-
 tate in æternum recepturam esse confidat. Et ag-
 gravamur ergo corruptibili corpore, et ipsius ag-
 gravationis causam, non naturam, substantiamque
 corporis, sed ejus corruptionem scientes, nolumus
 corpore spoliari, sed ejus immortalitate vestiri,
 quod et ipsum tunc erit. Sed quia corruptibile non
 erit, non gravabit. Sub terrena tunica gemimus, ad
 cœlestem festinamus, illam volumus accipere, istam
 nolumus ponere. Ergo fiet hæc injuria tanto illi
 vestimento cœlesti, ut veniat nobis super hos pan-
 nos mortalitatis, et corruptionis, ut hoc sit inferius,
 illud superius; hoc interius, illud exterius? Absit!
 Non ita volumus supervestiri, ut sub incorruptione
 maneat corruptio, sed ut absorbeat mortale a
 vita, id est ut sine aliqua læsione vita destruat in
 nobis mortalitatem, ut nusquam sit in nobis aliquid
 mortale, non infra, non supra; non intra, sed ex-
 tra. Nos ingemiscimus nolentes spoliari corpore,
 sed immortale corpus habere. Sed *qui efficit*, id est
 qui ex toto facit et format *nos in hoc ipsum* ut inge-
 miscamus desiderio incorruptibilis corporis, non
 homo est, sed *Deus qui dedit nobis* hujus rei im-
 plendæ pignus, id est donum sancti Spiritus. Dedit
 nobis pignus spiritus, id est dedit nobis Spiritum
 sanctum, qui est nobis pignus et certitudo immor-
 talitatis futuræ. Per Spiritum enim quem dedit no-
 bis, facit nos suspirare desiderio incorruptibilis
 vitæ; et certus reddit quod hanc consequemur, cu-
 jus jam pignus tenemus.

« Audentes igitur semper, et scientes quoniam,
 « dum sumus in hoc corpore, peregrinamur a Do-
 « mino. Per fidem enim ambulamus, et non per
 « speciem. Audemus autem et bonam voluntatem,
 « habemus magis peregrinari a corpore, et præsen-
 « tes esse ad Dominum. Et ideo contendimus, sive
 « absentes, sive præsentem, placere illi. »

Quandoquidem Deus facit nos ingemiscere desi-
 derio immortalium corporum, et dedit nobis pignus
 hujus rei Spiritum sanctum, igitur semper sumus
 audentes, id est semper audemus velle corpus deponere,
 ut ad supernam gloriam perveniamus. Ideo
 voluntas deponendi corpus vocatur audacia, quoniam
 res est difficilis et omnibus reformidanda. Propterea
 sumus audentes ad exuendum corpus, quia
 sumus scientes quod quamdiu sumus in corpore mor-
 tali, peregrinamur, id est remoti sumus a Domino,
 quia non videmus eum, licet ipse sit ubique. Per
 hoc enim exsules et peregrini sumus ab eo, quia
 longe projecti a facie contemplationis ejus cæcitatibus
 nostræ tenebras in hac valle lacrymarum patimur.
 Adhuc enim nos antiqua nox gravat, et corruptibili-

lis hujus carnis oculos, quos hostis callidus ad con-
 cupiscentiam aperuit, iudex justus a contuitu interi-
 ni sui fulgoris premit. Quisquis enim arbitratur ho-
 mini vitam istam mortalem adhuc gerenti posse
 contingere, ut dimoto atque discusso omni nullo
 phantasiarum corporalium atque carnalium, serenissima
 incommutabilis luce veritatis potiatur, e-
 mente penitus et consuetudine vitæ hujus alienata,
 illi constanter et indeclinabiliter hæreat, nequaquam
 quid quærat intelligit. Jure ergo sumus audentes in
 depositione corporis, ut veniamus ad manifestarum
 visionem sempiterni luminis, quia scimus quod
 dum sumus in hoc corruptibili corpore, peregrina-
 mur a Domino, id est extranei sumus ab illa patria
 beatorum, in qua semper Deus sicuti est videtur.

B Nam per fidem invisibilium ambulamus, id est ten-
 demus ad patriam viventium, in qua Deus apparet
 et non per speciem, id est non per manifestarum divi-
 nitatis ejus contemplationem. Contemplatio quippe
 merces est fidei, cui mercedi, per fidem corda mu-
 dantur, sicut scriptum est: « Fide mundans corda
 eorum (*Act. xv.*) » Credenti colligitur meritum, vi-
 denti redditur præmium. Qui ergo peregrinatur et
 per fidem ambulat, nondum est in patria, sed jam
 est in via. Qui autem non credit, nec in patria est,
 nec in via. Per fidem enim ambulamus, et non per
 speciem. Incipitur a fide, ut perveniatur ad speci-
 em. In corpore nunc peregrinamur a Domino et a
 patria nostra. Sed cum hoc perpendamus audemus,
 id est cum audacia istud magis eligimus, ut sepa-
 remur a corpore et præsentemur Domino, ut eum
 in specie divinitatis suæ videamus, et apud eum
 maneamus. Nollemus enim, si fieri posset, exspoliari,
 sed immortales fieri, et Domino præsentari, sed
 cum sine exspoliatione id fieri non possit, audemus
 optare exspoliari, ut ad Dominum perveniamus, et
 bonam voluntatem habemus, id est non murmura-
 mus de hoc, sed desideramus id bona voluntate.
 Audemus, inquam, et bono animo volumus peregrinari,
 id est removeri a corpore magis quam hic morari,
 ut et præsentemur Deum, et inhæreamus illi.
 Non enim satiat animam nisi incorruptibilis gaudii vera
 et certa æternitas. Et quia Domino cupimus assistere,
 ideo contendimus, id est omnibus modis quibus possumus,
 corde, verbo et opere conamur illi placere, sive nunc
 absentes, id est in hac vita peregrinantes, sive præsentem,
 id est in patria manentes. Hoc est, illa nitimur operari,
 per quam nunc et in futuro illi placeamus. Modo contendimus,
 quia est pugna. Sed cum absorpta fuerit mors in
 victoria (*I Cor. xv.*) nulla jam erit pugna, nullusque
 lapsus, quia nulla corruptio. Et ideo jam non
 contendemus placere, sed omnino placebimus Domino
 in regione vivorum.

« Omnes enim nos manifestari oportet ante
 « tribunal Christi, ut referat unusquisque pro-
 « pria corporis, prout gessit, sive bonum, sive ma-
 « lum. »

Et recte dixi præsentem, quia omnes præsentabi-

Christo iudici, vel merito contendimus ut illi
 placeamus, ne in iudicio displicentes dam-
 ir. Nam *omnes nos*, cujuscunque sexus vel æta-
 tis conditionis sumus, *oportet*, id est necesse est
 festari unuscujusque cogitationes et verba et
 c. Ibi videbitur quis sit unusquisque, modo
 parum dignoscitur. Omnia nostra patebunt
tribunal, id est ante judiciariam sedem Chri-
 stiano coram Deo iudice astabimus. Pro ma-
 gne potestatis et iudicis, magnitudo tribunalis
 iudicii æstimanda est. Quanto enim major pote-
 stas iudicis, tanto major terror iudicii sit necesse
 est. Omnes omnino manifestabuntur ante tribunal
 iudicis, *ut unusquisque* sive justus, sive injus-
 tus ad similitudinem messorum *referat*, id est re-
 ferat illuc *propria gesta corporis, prout gessit*, id
 est ipse unumquodque opus fecit, *sive bonum,*
malum. Eodem modo et eadem quantitate, qua
 unusquisque quodlibet opus, recitabit illud
 suum ante tribunal æterni iudicis. Unusquis-
 que referet, propria corporis, id est quæ gessit vel
 fecit dum in corpore fuit. Neque enim si quis
 bona mente atque impia cogitatione blasphemet,
 nullis membris corporis operetur, ideo non erit
 quia id non motu corporis gessit, cum hoc
 illud tempus gesserit, quo gessit et corpus. Prout
 tamen mente, lingua vel manu dum esset in corpo-
 re referet unusquisque, etiam parvuli, qui non per-
 ceperunt, sed per alios gesserunt. Nam si in illa parva
 parte moriantur, utique iudicantur secundum pro-
 gesta corporis, id est secundum ea quæ gesse-
 runt in corpore, quando per corda et
 restantiam crediderunt, vel non crediderunt,
 quando baptizati vel non baptizati sunt, quando
 in Christi manducaverunt vel non manducave-
 runt quando ejus sanguinem biberunt, vel non bi-
 bierunt. Secundum hæc ergo quæ in corpore gesse-
 runt iudicantur, non secundum ea quæ gesturi erant
 si hic viverent. Neque huic apostolicæ sententiæ
 obstant beneficia, quæ pro defunctis commen-
 dantur agimus, quia etiam meritum hoc sibi quis-
 dum in corpore viveret, comparavit, ut ei pos-
 set prodesse. Non enim omnibus prosunt. Et
 non prosunt omnibus, nisi propter differen-
 tiam vitam quam quisque gessit in corpore? Quibus
 non prosunt, aut ad hoc prosunt, ut sit plena
 satisfactio, aut certe ut tolerabilior fiat ipsa dam-

Scientes ergo timorem Domini, hominibus sua-
 demus, Deo autem manifesti sumus. Spero au-
 tem et in conscientiis vestris manifestos nos es-

Non iterum commendamus nos vobis, sed
 occasione damus vobis gloriandi pro nobis, ut
 veatis ad eos qui in facie gloriantur, et non in
 corde.

quia coram Christo iudice necesse est nos
 manifestari, ut recipiat unusquisque prout
 meretur, ergo scientes hoc suademus hominibus timo-
 re Domini, id est suademus illis ut per sin-

gula quæ nunc faciunt timeant futurum Domini
 iudicium, et desistant a pravis operibus, ne tunc
 incipiant timere, cum jam non poterunt damnatio-
 nem evitare. Vel quia necesse est omnes manife-
 stari ante tribunal Christi iudicis, ergo scientes ti-
 morem Domini, id est scientes quam timendus sit
 Dominus in suo iudicio, qui tamen subtiliter exami-
 naturus est opera et cogitationes singulorum, sua-
 demus hominibus ut timeant et provideant sibi, ne
 in iudicio damnationis incurrant. Hominibus qui-
 dem hoc suademus, sed *manifesti sumus Deo*, si ali-
 ter agimus quam docemus, id est Deus novit si est
 in nobis quod aliis suademus, et qua intentione fa-
 cimus istam suasionem. Deo quidem scimus nos es-
 se manifestos, qui videt occulta nostra; *sed spero*
etiam in conscientiis vestris manifestos non esse.
 Manifesta erat puritas eorum Corinthiis, quia neque
 aliquando in adulatione fuerant deprehensi, neque
 prædicatio eorum displicerat sanctis, nec ab aliquo
 illorum quidquam, ut assolet, occulte elicere tenta-
 verant, ut foris simplices turbis apparerent, intus
 vero dolosi essent. Ideo conscientias eorum pulsant,
 ut sibi testes essent de veritate. Ac si aperte
 verbis aliis dicat: Licet vobis male de nobis locuti
 sint pestiferi homines, puto tamen quod non reci-
 piam vestra conscientia de nobis aliter suspicari
 quam novit, nec potestis magis aliis fidem accom-
 modare quam vobismetipsis. Et quia modo se lau-
 dare videbatur, subjungit: *Non iterum nos commen-*
damus vobis, id est sicut nec in prima epistola nos-
 ipsos vobis commendavimus, ut putastis, sic nec in
 ista nunc nos commendamus, quia per hæc quæ di-
 cimus, laudem nostram a vobis non quaerimus; *sed*
propter utilitatem vestram damus vobis per hæc ver-
 ba *occasionem*, id est materiam *gloriandi pro nobis*
 contra pseudoapostolos, ut gloriemini quia inte-
 gram puræ veritatis doctrinam a nobis suscepistis,
 et fallacem prædicationem pseudoapostolorum re-
 spuistis. Vel pro nobis, quos Deo placere nostis,
 gloriemini, *ut habeatis occasionem gloriandi ad eos*
qui in facie gloriantur, et non in corde, id est contra
 pseudoapostolos, qui per hypocrisis gloriantur de
 specie pietatis, et non de puritate cordis. Vel in fac-
 cie, id est in exterioribus, hoc est in carnalibus
 observantiis gloriantur; et non in corde, id est in
 spiritualibus, quæ fiunt in interiori homine. Pseu-
 doapostoli animos Corinthiorum commovere vide-
 bantur in odium Apostoli ut ab eorum cordibus
 fides apostolica facilius laberetur; et multi jactabant
 se ab aliis apostolis didicisse qui semper cum Do-
 mino fuerant. Ideoque nunc dicit se his dare occa-
 sionem, id est rationem, per quam ipsi gloriarentur
 adversus eos, quoniam apostolus erat, a quo et isti
 didicerant, sicut et a quibus illi gloriabantur se
 doctos fuisse. Talis enim gloriatio in facie erat, non
 in corde, quia de personis gloriabantur, non de ve-
 ritate.

« Sive enim mente excedimus, Deo; sive sobril-
 itate sumus, vobis. Caritas enim Christi urget nos,

« æstimantes hoc, quoniam si unus pro omnibus A
 « mortuus est, ergo omnes mortui sunt. Et pro om-
 « nibus mortuus est Christus, ut, et qui vivunt, jam
 « non sibi vivant, sed ei qui pro ipsis mortuus est
 « et resurrexit. »

De nobis, inquit, potestis gloriari, quia quidquid
 a. amimus, vel honor est Dei, vel utilitas proximi. *Sive
 enim mente excedimus omnia temporalia ut contem-
 plumur æterna, Deo id facimus, sive sobrii sumus,*
 id est ab illa mentis ebrietate ad communem sensum
 eximus, hoc vobis fit, id est pro utilitate vestra.
 Excessus mentis est intentio ad superna, ita ut
 quodammodo de memoria labantur infima. In hoc
 mentis excessu fuerunt omnes sancti, quibus arcana
 Dei mundum istum excedentia revelata sunt. De hoc
 excessu nunc dicitur : *Sive mente excedimus, Deo.* B
 Quod enim Apostolus mente excedebat, Deo excede-
 bat. Excelens enim mente omnem humanam
 fragilitatem, omnem sæculi temporalitatem, omnia
 quæcunque nascendo et occidendo vanescunt
 transeuntia, habitabat corde in quadam ineffabili
 contemplatione quantum poterat, de qua dicit,
 quod audivit ineffabilia verba quæ non licet homi-
 mini loqui (*infra XII*). Itaque si semper manere
 vellet in eo quod viderat, et loqui non poterat, non
 levaret alios ut et ipsi videre hoc possent. Descendit
 ergo pro eorum sublevatione. Et hoc est quod ad-
 dicitur : *Sive sobrii sumus, vobis.* Quid est, sobrii sumus?
 Sic loquimur, ut capere possitis. Hæc agebat
 Apostolus, et boni rectores agere debent, quia tunc
 ad alta charitas mirabiliter surgit, cum ad se ima
 proximorum misericorditer attrahit. et quo benignius
 descendit ad infima, eo valentius recurrit ad
 summa. *Sobrii, inquit, sumus vobis.* Charitas enim
 Christi urget nos sic agere. Nam charitas Christi,
 quæ sanctorum mentes ad superna sublevat, eas pio
 moderamine pro fraterna dilectione etiam ad humili-
 tatem condescensionis format. Itaque dicitur : *Sive
 mente excedimus, Deo; sive sobrii sumus vobis. Cha-
 ritas enim Christi urget nos.* Hoc est : Si ea tantum
 agere vellemus, et ea tantum contemplari, quæ
 mentis excessu intuemur, vobiscum non essemus,
 sed in supernis tanquam contemptis vobis. Et
 quando vos ad illa superiora et interiora infirmo
 passu sequeremini, nisi rursus urgente nos chari-
 tate Christi « qui cum in forma Dei esset, non rapi-
 nam arbitratus est esse se æqualem Deo, sed se-
 metipsum exinanivit, formam servi accipiens (*Phi-
 lip. II*) » considerarem nos esse servos, et non
 ingrati ei a quo accepimus altiora, propter eos qui
 infirmi sunt, non contemneremus inferiora, et tem-
 perarem nos eis qui non possunt nobiscum videre
 sublimia? Hoc ergo est, sive mente excedimus,
 Deo. Ille enim videt quod videmus in mentis exces-
 su, ille solus revelat secreta sua. Vobis autem pro-
 ficat quando sobrii sumus, id est quando ab illo
 mentis excessu qui mentem ipsam debriat et a
 sensu temporalium immutat, ad communem sensum
 descendimus, ut a vobis intelligi possimus. Chari-

tas Christi nos urget ad vos inclinari, æstimantes
 hoc, quoniam si unus Christus mortuus est pro omni-
 bus ad vitam prædestinatis, ergo omnes participa-
 tione mortis ejus mortui sunt in hoc quod prius
 erant, id est secundum hoc quod veteris hominis
 membra fuerunt. Ideo libenter ad eos debemus in-
 clinari, qui jam per baptismum Christo sunt com-
 mortui. Vel si unus Christus mortuus est pro om-
 nibus, id est ut omnes vivant, ergo necesse est fieri
 quia omnes mortui sunt in anima per peccatum,
 quorum vivificatio quæsitæ est morte unius qui pec-
 cato solus carebat, nec mortis animæ particeps esse
 poterat. Et idcirco nos debemus ad eos instruendos
 humiliari, pro quibus vivificandis Salvator usque ad
 mortem dignatus est inclinari. Omnes itaque mor-
 tui sunt in peccatis, nemine prorsus excepto, dem-
 pta matre Dei, sive originalibus, sive etiam volun-
 tate additis, vel ignorando, vel sciendo, nec faciendo
 quod justum est. *Et pro omnibus mortuis mortuus,*
 est unus Christus, id est nullum habens omnino
 peccatum, qui solus hostia sufficiens fuit pro peccatis
 omnium ut qui, per remissionem peccatorum vivunt,
 jam non sibi vivant, sed ei qui pro ipsis omnibus
 mortuus est propter peccata nostra, et resurrexit,
 propter justificationem nostram, ut credentes in
 eum qui justificat impium (*Rom. IV*), ex impietate
 justificati, tanquam ex morte vivificati, ad primam
 resurrectionem quæ nunc est, pertinere possimus.
 Non ergo sibi vivat quisque, sed Christo, faciens
 non suam, sed ipsius voluntatem, ut possit dicere :
 C Vivo autem jam non ego, vivit vero in me Christus,
 et anima mea illi vivet. Illi utique, non sibi. Debet
 enim vita humana in se deficere, in Christo profi-
 cere, qui mortuus est, ut nos moreremur peccatis;
 et resurrexit, ut resurgeremus ad opera justitiæ. Et
 quid est aliud non sibi, sed illi vivant, nisi ut non
 secundum carnem vivant in spe terrenorum et cor-
 ruptibilium honorum, sed secundum spiritum in spe
 resurrectionis, quæ jam ex ipsis in Christo facta
 est? (*Galat. II; Psal. XXI.*)

« Itaque nos ex hoc neminem novimus secundum
 « carnem. Et si cognovimus secundum carnem
 « Christum, sed nunc jam non novimus. »

Suo more vitam nostram futuram, quæ jam in
 D Christo capite nostro resurgente completa est, ita
 spe certa meditatur Apostolus, tanquam jam adsit
 præsensque teneatur. Quæ utique vita non erit se-
 cundum carnem, sicut Christi non est secundum
 carnem. Carnem hoc loco non ipsam corporis nostri
 substantiam, sed corruptionem mortalitatemque
 carnis vult intelligi, quæ tunc non erit in nobis
 sicut jam in Christo non est. Quia, inquit, resur-
 rectio Christi nos resurgere fecit, itaque ex hoc tem-
 pore resurrectionis neminem eorum pro quibus
 Christus mortuus est et resurrexit, et qui jam non
 sibi vivunt, sed illi, novimus secundum carnem, id
 est secundum carnis corruptionem propter spem
 futuræ immortalitatis, in cujus expectatione vivunt,
 quæ in Christo jam non spes, sed res est. Et si co-

gnovimus Christum secundum carnem, id est secundum carnis mortalitatem, cum adhuc moriturus esset, sed, id est tamen *jam non novimus*, quia illud eis mortale jam induit immortalitatem. Noveramus ergo Christum secundum carnem, id est secundum carnis mortalitatem antequam resurgeret, sed nunc jam non novimus, quia « resurgens a mortuis jam non moritur, mors illi ultra non dominabitur (Rom. vi). » Nam si Christus secundum hæreticos ideo non habuit carnem, quia dixit Apostolus nunc jam non nosse Christum secundum carnem, nec illi habuerunt carnem, de quibus præmisit; itaque nos amodo neminem novimus secundum carnem. Sed quia illorum secum vitam futuram, ut diximus, tanquam præsentem meditabatur, qui resurgentes commutabuntur, amodo, inquit, neminem novimus secundum carnem, id est tam certam spem tenemus futuræ nostræ incorruptionis et immortalitatis, ut amodo jam in ipsa notitia gaudeamus.

« Si qua ergo in Christo nova creatura, vetera « transierunt, ecce facta sunt omnia nova (Apoc. xxi). « Omnia autem ex Deo, qui nos reconciliavit sibi « per Christum, et dedit nobis ministerium recon- « ciliationis. Quoniam quidem Deus erat in Chri- « sto, mundum reconcilians sibi, non reputans illis « delicta ipsorum, et posuit in nobis verbum recon- « ciliationis. Pro Christo ergo legatione fungimur, « tanquam Deo exhortante per nos. Obsecramus « pro Christo reconciliamini Deo. Eum, qui non no- « verat peccatum, pro nobis peccatum fecit, ut nos « efficeremur justitia Dei in ipso. »

Et quia Christus jam non est secundum carnem, nec aliquis eorum qui ei vivit, ergo si qua nova creatura, nec est si quis innovatur, esse potest in Christo, nunc patet quod vetera corruptionis transierunt, et ecce facta sunt omnia nova immortalitatis. Quoniam omnes in Christo, etsi nondum re, jam tamen spe immortales sumus, vetera transierunt, et facta sunt omnia nova. Omnis ergo nova creatura, id est populus innovatus per fidem, ut habeat interim in re, quod in spe postea perficiatur, in Christo habet jam quod in se sperat; itaque nunc vetera transierunt secundum spem, quia modo jam non est tempus Veteris Testamenti, quo temporale atque carnale regnum expectetur a Deo; et facta sunt omnia nova secundum eandem spem, ut regnum cælorum, ubi nulla erit mors atque corruptio, promissum teneamus. In resurrectione autem mortuorum non jam secundum spem, sed secundum rem; et vetera transibunt, cum inimica novissima destruetur mors; et fient omnia nova, cum corruptibile hoc induerit incorruptionem, et mortale hoc, immortalitatem. Quod jam in Christo factum est, quem secundum rem jam noverat Apostolus, non secundum carnem. Eorum vero pro quibus mortuus est et resurrexit, nondum secundum rem, sed secundum spem neminem noverat secundum carnem. Sed et moraliter vetera, id est veteris hominis vitia transierunt, et facta sunt omnia nova, id est novi

hominis opera. Ad veterem quippe hominem pertinet, præsentem mundum quærere, transitoria ex concupiscentia amare, mentem in superbiam erigere, patientiam non habere, ex dolore malitiæ de proximi læsione cogitare, sua indigentibus non dare, ad multiplicandum aliena quærere, nullum pure propter Deum diligere, inimicitias inimicis reddere, de afflictione proximi gaudere. Cuncta hæc vetusti sunt hominis, quæ videlicet trahimus de radice corruptionis. Sed qui jam ista exsuperat, et ad præcepta Dominica mentem in benignitate commutat de hoc recte dicitur, quia vetera transierunt, et ecce facta sunt omnia nova. Tunc enim in nostris mentibus nova fiunt, cum a nobis vetusti hominis vitia transierunt. Dixi quia in Christo nova creatura et facta sint omnia nova. Sed tamen *ex Deo* Patre sunt omnia hæc nova, quæ vel in moribus, vel in spe, vel in re consistunt. Ex Patre sunt omnia, quæ per Christum vel in Christo habemus, quia et ipse Christus ex Patre est. Nihil novitatis est nobis, sed omnia sunt ex Deo, qui ex antiquis inimicis reconciliavit nos sibi per Christum mediatorem. Quia enim creatura humana peccaverat in Deum, nec pœnitebat ut reverteretur ad eum, Deus opus suum nolens perire, misit Filium suum, per quem prædicata remissione peccatorum, reconciliaret sibi per ipsum, per quem eos creaverat. Per Christum nos reconciliavit sibi, et dedit nobis ministerium reconciliationis, id est injunxit nobis legationem, ut per orbem discurrentes, ministrarem us ubique doctrinam Evangelii, per cujus observantiam omnes Deo reconciliarentur, et in amicitiam revocarentur. Vere per ipsum et per nos dedit hominibus reconciliationem. Quoniam in Christo quidem erat ipse Deus reconcilians sibi mundum, et in nobis posuit verbum reconciliationis. Deus erat in Christo, qui ait: « Pater in me manens, ipse facit opera (Joan. xiv). » Pater enim est in Filio, quia una est eorum substantia. Deus ergo erat in Christo conversante inter homines reconcilians sibi mundum, id est homines de mundo, pro quibus ipse Christus ait: « Ut mundus credat quia tu me misisti (Joan. xvii). » Mundus enim in hoc loco non ille intelligitur, qui totus in maligno positus est, sed ille pro quo misit Deus Filium suum (I Joan. v), ut salvetur mundus per ipsum (Joan. iii), id est Ecclesia per mundi latitudinem fundata. Hunc mundum sibi Deus reconciliavit hoc modo videlicet non reputans illis delicta ipsorum, ut pro his puniret illos, sed tam origi alia quam actualia dimisit omnia in baptismo. In Christo quidem erat per naturam, sed in nobis per gratiam, quia posuit in nobis, id est in interiori nostro verbum, id est prædicationem reconciliationis. Hoc est, per Spiritum sanctum illuminavit corda nostra, et docuit quibus rationibus ei possemus homines reconciliare, convertendo eos ad fidem et pœnitentiam et ad bonam operationem. Et quandoquidem post Christum posuit nos reconciliatores, ergo pro Christo, id est vice Christi fungimur legatione Dei. Chri-

stus enim proprie fuit legatus Patris, sed nos pro eo fungimur legatione, ut vice ejus prædicemus reconciliationem gentibus. Legatione Dei ad vos fungimur, *tanquam Deo* vos ad reconciliationem *exhortante per nos*. Ipse enim in nobis loquitur, et verba ejus sunt ea quæ ex ore nostro processerunt, ideoque libenter nobis obtemperare debetis. Et quia vice Christi sumus directi, *obsecramus pro Christo*, id est tanquam vos Christus obsecret, *reconciliamini Deo*. Obsecramus vos, id est per omnia sacra adjuramus, ut reconciliemini Deo per poenitentiam, cui per peccatum estis inimici. Nemo enim reconciliatur nisi ex inimicitiiis, et nihil inter Deum et homines facit inimicitias nisi peccatum. Plerumque autem homo qui alteri homini irascitur, discordanti sibi reconciliari appetit, sed ire ad satisfaciendum prior erubescit. Pensemus facta veritatis, ut videamus quo jaceat nostræ pravitas actionis. Ecce inter nos et Deum discordiam peccando fecimus, et tamen ad nos Deus suos legatos prior misit, ut nos ipsi, qui peccavimus, ad pacem Dei rogati veniamus. Erubescat ergo humana superbia. Confundatur quisque si non satisfaciat proximo, quando post culpam nostram, ut ei reconciliari debeamus, et ipse qui offensus est, legatis intervenientibus, obsecrat Deus. Quomodo autem ei reconciliaremur, nisi deleteretur peccatum, quod inter nos et ipsum erat, et nos ab eo separabat? Proinde cum dixisset Apostolus, obsecramus pro Christo, reconciliamini Deo, quasi diceremus quomodo poterimus reconciliari Deo, subjunxit: *Eum, qui non noverat peccatum*, id est Christum qui non noverat peccatum per experientiam, licet nosset illud per sapientiam, *fecit pro nobis Deus Pater peccatum*, id est sacrificium pro peccato. Bene ergo possumus ei reconciliari, qui sanguine Christi sui delet omne peccatum nostrum, si nos illud poenitendo damnemus. Qui videlicet Christus peccatum non novit, quia nunquam peccati delectationem sensit. Sed per sapientiam qua ipse peccatum damnat, novit ipse peccatum, id est novit hoc esse malum, non ergo fecit ipse peccatum, sed eum Deus pro nobis peccatum fecit, hoc est, ut dixi, sacrificium pro peccato. In lege enim peccata vocabantur, sacrificia quæ pro peccatis offerebantur. Et eodem modo locutionis appellatur nunc Christus peccatum, quia pro peccato est oblatus. Similitudo etiam carnis peccati, in qua venit, dicta est peccatum. « Misit, inquit, Deus Filium suum in similitudine carnis peccati, et de peccato damnavit peccatum in carne (Rom. viii), » id est de similitudine carnis peccati, quæ ipsius erat, damnavit peccatum in carne peccati, quæ nostra est. Eum itaque qui non noverat peccatum, id est Christum, pro nobis peccatum fecit Deus, cui reconciliandi sumus, id est sacrificium pro peccatis, per quod reconciliari valeremus. Ideo fecit eum peccatum, ut nos efficeremur iustitia Dei in ipso. Ipse

A ergo peccatum, ut nos iustitia, nec nostra, sed Dei; nec in nobis, sed in ipso, sicut ipse peccatum non suum, sed nostrum; nec in se, sed in nobis constitutum similitudine carnis peccati, in qua crucifixus est. Hæc est illa iustitia Dei, non qua ipse justus est, sed qua nos ab eo justificati sumus. Ut efficeremur, inquit, non solum iusti, sed etiam iustitia, id est ut per nos alii fiant iusti. Efficeremur iustitia Dei in ipso, id est in ejus corpore, quod est Ecclesia, cui ipse est caput (Colos. i).

CAPUT VI.

« Adjuvantes autem exhortamur ne in vacuum gratiam Dei recipiatis. Ait enim: Tempore accepto exaudivi te, et in die salutis adjuvi te (Isa. xlix). Ecce nunc tempus acceptabile, ecce nunc dies salutis. »

Deus per Christum pro peccatis nostris immolatum reconciliat vos sibi. Sed nos adjuvamus opus reconciliationis hujus. Dei enim sumus adjuvatores. Nos ministerio prædicationis nostræ adjuvantes beneficium divinæ operationis, exhortamur vos ne in vacuum gratiam Dei recipiatis, quam vobis offert. Gratia Dei est remissio peccatorum. Quam in vacuum recipit, quisquis in bonis operibus se postea non exercet. Gratia Dei est facultas bene concessa divinitus homini, de qua dicitur: « Sine me nihil potestis facere (Joan. xv). » Quam in vacuum recipit, qui cum Dei gratia non laborat, nec adjungit studium suum, ut possit Dei præcepta ipso adjutore implere. In vacuum, id est in hoc ut sit eis res vacua, recipit hanc gratiam, qui bonis operibus eam implere non satagit. Sed nos bene cum auxilio gratiæ agendum vos exhortamur ne per desidiam vestram in vacuum eam recepisse inveniamini. Et hoc facimus, ut dictum est, adjuvantes opus cælestis gratiæ et reconciliationis, vel adjuvantes vos ipsos nostris meritis et orationibus atque sermonibus. Sive ita: Nos prædictis causis et rationibus vos adjuvantes, id est ad reconciliationem provocantes, exhortamur ne in vacuum gratiam Dei recipiatis, id est ne falsis apostolis credentes, ita recipiatis et intelligatis baptismum et fidem, quam suscepistis, ut eat in vacuum, id est transeat vobis in rem vacuum et omni plenitudine utilitatis privatam. Illi enim qui putant solam fidem Christi sine carnali observantia legis non sufficere ad iustitiam et salutem æternam, gratiam Dei, id est fidem ipsam intelligunt quasi rem vacuum, id est non refertam innocentia et omnium virtutum perfectione. Et sicut hanc fidei gratiam putant vacuum, sic fit eis vacua, quia per eam nec remissionem peccatorum, nec aliquam gratiam consequuntur. Sed vos eam nolite recipere sic, nolite sic de ea sentire, ut vobis eat in vacuum, id est ut fiat omni commodo vestro vacua. Vere non debetis eam putare vacuum nec vobis facere vacuum, quia non est vacua, sed bonis operibus referta. Nam ipse Deus qui gratiam

istam humano generi offert, ait in Isaia (*cap. XLIX*): *Tempore accepto*, id est tempore quod est mihi vel hominibus acceptum, *exaudiri te orantem* pro peccatis tuis. Non est ergo vacua hæc gratia, in cuius tempore Deus orantes exaudit. Quod tempus est hominibus gratum, et cum omni amplexu cordis acceptum. Plus enim est acceptum quam acceptabile, quoniam acceptabile dicitur, quod est habile ut recipiatur; acceptum vero, quod jam mentis devotione receptum est. Et postquam hoc tempus tibi fuerit acceptum, id est postquam hoc susceperis, exaudit Deus preces tuas, quas tempore legis non exaudiebat. Tempore, inquit, accepto, id est tempore gratiæ, quod accepisti veniens ad fidem, exaudivi te deprecantem pro remissione culparum tuarum, *et in die salutis*, id est in hoc eodem tempore gratiæ, quo vera salus de cælo ad homines venit, et lux fidei, atque justitiæ tenebras infidelitatis atque peccatorum effugavit, *adjuvi te* de assecutione virtutum. Lex autem non adjuvat, sed tantum præcipiebat. Sub gratia vero Deus nos, inquit, adjuvat, ut bona quæ præcipit facere valeamus. Nam ideo adjuvi te, quia ipse liberum in nobis arbitrium restituit, et ex libero arbitrio nostræ laboramus, et divina gratia adjuvante potentes efficimur, sine qua nihil facere possemus. Hoc Deus Ecclesiæ de gentibus per prophetam dixit: *Tempore accepto exaudivi te, et in die salutis adjuvi te*, hoc eidem Ecclesiæ de gentibus conversæ replicat nunc Apostolus, et exponendo subjungit: *Ecce*, id est non ultra differtur illud tempus, sed *nunc* præsentialiter est *tempus acceptabile*, quod omnes gratanter accipere debent, ut et ipsi fiant Deo acceptabiles; et *ecce nunc* præsentialiter est *dies salutis*, id est lucidum tempus gratiæ, in quo per bona opera possint homines æternam promereri salutem. Ex quo enim Salvator in carne apparuit, semper est acceptabile tempus, et dies salutis usque ad finem sæculi. Unicuique tamen finitur hoc tempus in hora obitus sui. Dies enim salutis per Christi gratiam est vita præsens, quoniam apta est ad bene operandum; et concludentur nocte iudicii, in qua nemo poterit operari. Et ideo adesse tempus dicit Apostolus, quo possint ad indulgentiam proficere peccatores; diem adesse dicit, quo morbis mortalibus animarum possit adhiberi medicina salutis. Sequitur:

« Nemini dantes ullam offensionem, ut non vituperetur ministerium nostrum (*I Cor. iv*). Sed
 « in omnibus exhibeamus nosmetipsos sicut Dei
 « ministros, in multa patientia, in tribulationibus,
 « in necessitatibus, in angustiis, in plagis, in carceribus,
 « in seditionibus, in laboribus, in vigiliis,
 « in jejuniis, in castitate, in scientia, in longanimitate,
 « in suavitate, in Spiritu sancto, in charitate non ficta,
 « in verbo veritatis, in virtute
 « Dei. »

Exhortati sumus vos ne in vacuum gratiam Dei

recipiatis, et exhortamur ut nemini sitis dantes ullam offensionem. Cavete ne malo exemplo vestro seu verbo pravo detis alicui fratrum ullam offensionem, id est ne faciatis eum offendere, ut cadat per vos in peccatum; ne sitis ei offendiculum, ut exemplo pravitatis vestræ offendant corruens in nequitiam, vel ne offendatis eum, id est ne conturbetis et irasci faciatis eum. Idcirco videte ne male vivendo vel loquendo præparetis offensionem ulli proximorum, ne propter vos vituperetur ministerium nostræ prædicationis, qui vos docuimus qualiter agere debeatis. Qui enim vos male agere viderint, putabunt nos ita docuisse, et incipient nostram doctrinam vituperare. Non detis, inquam, ulli offensionem, sed potius exhibeamus nosmetipsos in omnibus et vos sicut Dei ministros. Ut melius exhortetur eos, conjungit se illis, ac velut seipsum admonet, quia infirmitatem illorum quasi suam æstimat; et si profecerint, profectus illorum ipsius erit. Exhibeamus, inquit, id est offeramus Deo, nosmetipsos, id est me et vos. Ut ergo unusquisque seipsum exhibeat, exhibeamus, id est offeramus et demonstremus nos in omnibus sicut Dei ministros. Ac si dicat: Non vos admoveo ut omnes sitis apostoli, vel ministerium prædicationis assumatis, sed ut sitis sicut ministri Dei, id est in omnibus ministros divinæ prædicationis imitemini, ut similitudo religiosæ conversationis eorum exprimat in vobis. Et si non omnes sumus ministri, omnes tamen sicut ministros Dei nosipsos exhibeamus, ut, sicut illi vivunt, ita et nos vivamus. Et hoc faciamus in patientia, quæ sit multa, id est sustinens multa, et neque murmurans contra Deum, neque indignans contra hominem qui mala intulerit. Hæc ita generaliter omnibus dicuntur Christianis. Specialiter vero ministris evangelicæ prædicationis hoc modo possunt dici: Nos qui alios exhortamur ne in vacuum gratiam Dei recipiant, ita conversationem nostram cauta circumspectione custodiamus, ut nemini simus dantes ullam offensionem, id est nosipsi faciamus quæ aliis facienda suademus; non faciamus quæ prohibemus, ne si aliter docere et aliter facere visi fuerimus, exemplo nostro cæteros offendere faciamus. Infirmus enim quisque plus attendit facta prælati sui quam verba, et putat sibi licere quidquid illum viderit agere. Et ita prælatus qui male vivit, licet bene doceat, offensionem subditis parat. Nemini ergo simus dantes ullam offensionem, ut non vituperetur ministerium nostrum. Vituperabitur enim, et linguis obrectantium lacerabitur, non si fecerimus mala solum quæ improbamus, sed etiam si non fecerimus bona quæ docemus. Neminem offendamus, sed in omnibus verbis et actibus nostris exhibeamus nosmetipsos sicut decet Dei ministros, id est ut ex operibus nostris homines Deum glorificent, et nos intus Deo placeamus. Et id faciamus in multa patientia, per quam et indisciplinatos mores fratrum

tolerando paulatim corrigamus, et infidelium persecuciones fortiter sustineamus. Nam subsequenter ostenditur per partes, quam multa debeat esse ista patientia. Nec solum ministris, id est praelatis Ecclesie iubentur ista, sed et subjectis, ut premissimus, qui similes in moribus debent esse bonis ministris. Multam, inquit, patientiam habeamus in tribulationibus, id est in pressuris et vexationibus, quae nobis inferentur a pravis hominibus, in necessitatibus, id est in egestatibus cibi vel potus vel indumenti; in angustiis, id est in sollicitudinibus et curis animi, atque timore poenarum, unde mens angustiatur; in plagis, id est in verberibus sicut est virgarum caesio; in carceribus, id est in tenebrosis et fetentibus locis reclusi; in seditionibus, id est in commotionibus populi contra nos. Si populus contra nos insurgat, et cum quodam tumultu conetur nos a bono opere revocare, nos patienter feramus, et a bono non separemur. Sed et in laboribus habeamus patientiam, id est si pravi homines longis itineribus aut gravibus operibus nos laborare cogunt, vel si labore manuum nostrarum nobis victum quaesierimus. Et in vigiliis, id est si necesse fuerit nos vigilare, ut per noctem operemur unde vivamus, vel in vigiliis ad psallendum et orandum. Atque in jejuniis, quae vel sponte facimus, vel indigentia facere coegerit, aut quaelibet necessitas. In his omnibus patientiam teneamus, et nos ut Dei ministros exhibeamus. Ministri enim sunt, quicumque bene operantur, quia Deo ministrant, id est deserviunt. Excepto igitur praedicationis officio et altaris ministerio, omnes agnoscamus nos esse Dei ministros, ut tanti Domini famulos, exhibeamus nos idoneos in castitate mentis et corporis, et in scientia, ne, fatuis virginibus similes, amittamus per imprudentiam meritum castitatis (*Matth. xxv*). Habeamus ergo scientiam Scripturarum, vel scientiam qua prudenter agere bona sciamus et mala respicere. Et ut ministros Dei nos exhibeamus in longanimitate, id est in longa animi expectatione, qua patienter usque in finem perseveremus, adversa praesentis vitae ferendo et gaudia sequentis vitae sperando. Et in suavitate, ne per rancorem animi efficiamur illis asperi, a quibus longanimiter mala toleramus, sed per dulcedinem mentis simus illis suaves et blandi, ut nec verbo nec opere nostro illis vel aliis generemus asperitatem amaritudinis. Et in Spiritu sancto, ut omnia benigne et sincere faciamus, sicut Spiritus sanctus docet. Et in charitate non ficta ut affectum dilectionis non tantum in vultu et verbo, sed etiam in corde habeamus, ne simus de illis, « Qui loquuntur pacem cum proximo suo, mala autem in cordibus eorum (*Psal. xxvii*). » Atque in verbo veritatis praedicando vel loquendo, ut habeat puram veritatem sine falsitatis admistione vel praedicatio nostra vel locutio. Et in virtute Dei ut non nostris viribus, sed dono virtutis divinae credamus non posse quidquid boni poterimus agere. Omnia haec in Apostolo maxime praefulgebant, et in talibus

A ducebatur ejus conversatio, qui nunc secum hortatur; ministros Evangelii et omnes Christi servos, ut taliter vivere studeant. Fervens enim Dei amor facile tolerat omnes adversitates, et assequitur omnes virtutes. Adhuc autem subjungit Apostolus in admonitione:

« Per arma justitiae a dextris et a sinistris, per gloriam et ignobilitatem, per infamiam et bonam famam, ut seductores, et veraces: sicut qui ignoti et cogniti; quasi morientes, et ecce vivimus: ut castigati, et non mortificati; quasi tristes, semper autem gaudentes; sicut egentes, multos autem locupletantes; tanquam nihil habentes, et omnia possidentes. »

B Exhibeamus, inquit, nos ipsos ut Dei ministros per arma justitiae, quibus regnum peccati debellamus, id est per virtutes vitiiis contrarias, ut humilitas dejiciat superbiam, largitas exstirpet avaritiam, benevolentia invidiam, et sic caeterae virtutes destruant opposita sibi vitia. Virtutes enim sunt arma justitiae, quibus muniri debemus a dextris et a sinistris, id est a parte prosperorum et a parte adversorum, ut, contra prospera et adversa virtutum armis semper muniti, nec prosperis elevemur, nec adversis perturbemur, nec blandis ad voluptatem demulceamur, nec asperis ad desperationem premamur. Et audite quae sint dextra et sinistra, id est prospera et adversa. Per gloriam et ignobilitatem, etc., usque, Tanquam nihil habentes, et omnia possidentes. Dextra enim justorum sunt gloria, bona fama, et quod veraces sunt, quod cognoscuntur, quod vivunt, quod non mortificantur, quod gaudent, quod multos ditant, quod omnia possident. Sinistra vero, quod ignobiles et infames habentur, quod seductores putantur, quod ignorantur, quod moriuntur, quod castigantur, quod contristantur, quod egent, quod nihil habere videntur. Sed milites Christi per arma justitiae a dextris et a sinistris muniti debent incedere, ut, hinc et inde diabolus expugnantes, et in prosperis timeant, et in adversis confidant. Exhibeamus ergo nos ut Dei ministros per gloriam et ignobilitatem, id est quando in gloria et veneratione apud homines erimus, non inde extollamur; et quando nos judicabunt esse ignobiles atque contemptibiles, non inde frangamur. Eodem modo agamus per infamiam et bonam famam, id est si falso infamamur de aliquo crimine, vel si bonam famam habemus de religiosa conversatione, utrumque per patientiam aequanimiter ducamus, ut nos nec detrahentes dejiciant, nec laudantes extollant, quia contingit nonnunquam utrosque mentiri. Item exhibeamus nos ut seductores et veraces, id est ad viam veritatis adducamus eos qui errant, ut caeteri qui in errore perseverant, judicent nos esse seductores, cum simus veraces. Si enim seducere, aliunde aliquem ad aliud persuadendo ducere est, quaerendum est unde et quo. Si a malo ad bonum, bonus seductor est, unde et Jeremias ait: « Seduxisti me, Domine, et seductus sum (*Jer. xx*). Si autem quis aliquem seducendo ducat a bono ad malum, malus seductor est. In hanc ergo partem, qua seducuntur

homines a malo ad bonum, utinam omnes seductores et vocemur et simus. Sed infideles aut quilibet errantes vocabunt nos malos seductores, si quos poterimus, ex sociis eorum ad fidem et religiosam conversationem attraxerimus. Erimus enim veraces et vera docentes, sed illi putabunt nos esse fallaces, et falsitate alios seducentes. Nos dico apud alios habiti sicut qui sunt a Deo ignoti, id est reprobati, et apud alios a Deo cogniti, id est approbati. Vel ita sumus sicut illi qui sunt ignoti, quia infideles et superbi non dignantur nos aspicere et agnoscere, vel agnitos abjiciunt, et tamen fideles et religiosi nos agnoscunt. Et tormentis sumus quasi morientes, quia tandiu torquemur ab impiis donec credamur esse mortui, et ecce Deo liberante vivimus, quoniam eripimur a morte et restituimur vitæ. Sumus enim ut castigati quia infideles putant se nos duris verberibus ac minis castigasse, ne ulterius novam religionem prædicemus; et non sumus mortificati, quia nec corporis nec animæ necem ab illis pertulimus. Corpus enim nostrum adhuc vivit, anima quoque vitam non amisit, quia infidelibus non cessit, ut a prædicatione vel confessione veritatis sileret. Etsi multi martyres occiduntur, Ecclesia tamen non moritur. Atque electi Dei dum super se exterius rapti in altum animum figunt, quæque in hac vita patiuntur, quasi longe infra labentia a se aliena aspiciunt, et (ut ita dixerim) dum mente extra carnem fieri decertant, pene ipsa quæ tolerant, ignorant. Hæc autem de se sui que similibus ita loquitur Apostolus, ut omnes fideles ad ea toleranda vel agenda exhortetur. Ac si discipulis dicit: Nos qui magistri sumus, ita vivimus; vos autem qui nos imitari debetis, exemplum nostræ conversationis insequimini. Qui et adjungit: quasi tristes, subaudi, foris apparemus, propter molestias tribulationum quas patimur, sed semper sumus gaudentes intus propter spem futuræ remunerationis. Non solum enim non contristamur in adversis, sed etiam gaudemus, et hoc semper. Et sumus sicut egentes, quia nihil in præsentis sæculo videmur habere, sed tamen multos sumus locupletantes, quia spirituales divitias largimur credentibus. Sumus enim tanquam penitus nihil habentes, quia nihil proprium carnaliter habemus, etiam omnia possidemus, id est non solum pecunias, sed etiam ipsos pecuniarum dominos, qui se nobis tradunt, et res suas ad pedes nostros ponunt. Similiter et vos, licet in adversis quasi tristes appareatis, semper tamen per spem intus gaudete. Et si habetis divitias, estote quasi egentes, quanvis non sitis egentes, id est in spiritu pauperes estote, sed multos elemosynarum vestrarum beneficiis locupletare curate. Estote tanquam nihil habentes, id est mentis respectu cuncta quæ habetis pro nihilo ducentes, et tali cogitatione sitis omnia vestra possidentes quia tunc mens vestra per hæc non tenebitur in imis. Sed et quilibet sancti pauperes omnia possident, etiam temporalia, quoniam nihil deest timentibus Deum. Apostoli vero cum nihil habere viderentur, in hoc

erant omnia possidentes, quod cum essent principes Ecclesiarum, habebant potestatem sumendi ex rebus subjectorum quæcunque sibi forent necessaria (Matth. x; Marc. vi; Luc. ix). Notandum autem quia in his quæ sunt adversa, dictum est, quasi, ut, sicut, tanquam; in his vero quæ sunt prospera, non est dictum. Ait enim: Quasi tristes, semper autem gaudentes, etc. Tristitia nostra habet, quasi; gaudium autem nostrum non habet quasi; quia spes qua gaudemus, certa est. Tristitia vero nostra quasi, habet, quia in somniis transit. Qui somnium judicat, addit quasi. Quasi sedebam, quasi loquebar, quasi prandebam, quasi equitabam, quasi disputabam. Totum quasi, quia cum evigilaverit, non invenit quod videbat. Quasi thesaurum inveneram, dicit mendicus. Si quasi non esset, mendicus non esset. Sed quia quasi erat, mendicus est. Itaque qui nunc ad lætities sæculares oculos aperit, et corda claudunt, transit quasi eorum, et venit verum ipsorum, quasi ipsorum, felicitas est sæculi; verum ipsorum pœna est. Nostrum autem quasi tristitia est, gaudium non est quasi. Non enim ait Apostolus, quasi gaudentes, semper autem tristates; aut quasi tristes, et quasi gaudentes; sed ait, quasi tristes, semper autem gaudentes, et item: Sicut egentes et ibi est sicut vel quasi. Multos autem ditantes, hic non est quasi vel sicut. Nihil habebat Apostolus, omnia sua dimiserat, divitias nullas possidebat, tamen addidit: Tanquam nihil habentes, et ipsum enim nihil habere Apostoli, quasi nihil habere erat. Et omnia possidentes, ibi non dixit quasi. Quia quasi egebat, non autem quasi, sed vere multos ditabat. Nam et sanctis qui erant in Jerusalem, victum ministrabat. Quasi nihil habebat; non autem quasi, sed omnia possidebat. Itaque in his quæ existimantur adversa, quæ superius per ignobilitatem et infamiam præsignavit, quæque a sinistris esse descripsit, addidit quasi, vel sicut, aut tanquam. In his vero quæ prospera reputantur, et dextræ partes appellantur, quæque vocabulo gratiæ et bonæ famæ præmonstravit, non apposuit quasi vel aliquid tale. In prosperis enim vel dextris est veritas, in adversis autem et sinistris umbra vel similitudo, non ipsa res. Quæ autem a dextris descripsit, sunt arma dextra justorum. Illa etiam quæ a sinistris denotavit, sinistra sunt arma eorum. Efficiuntur enim viro perfecto arma justitiæ, si hæc illata sibi magnanimiter sustinuerit, quia per hæc dimicans, et istis ipsis quibus impugnari putatur adversis, tanquam armis utendo, eis que velut arcu et gladio, scutoque validissimo contra illos qui hæc ingerunt, munitus, profectum suæ patientiæ et virtutis acquirat, et gloriosum constantiæ triumphum, nec adversis dejectus, nec prosperis elatus, nec ad lævam tristibus impulsus, nec ad dexteram lætis motus, sed in medio per viam rectam indeclinabiliter gradens.

Os nostrum patet ad vos, o Corinthii, os nostrum dilatatum est. Non angustiavimus a vobis

« angustiamini autem in visceribus vestris. Eamdem
 « autem habentes remunerationem, tanquam filii
 « d.co, dilatamini et vos. Nolite ducere jugum cum
 « infidelibus. Quæ enim participatio justitiæ cum
 « iniquitate? aut quæ societas luci ad tenebras?
 « Quæ autem conventio Christi ad Belial? aut quæ
 « pars fidei cum infidei? Qui autem consensus
 « templo Dei cum idolis? »

Solent plerumque etiam justii laudare bona quæ dicunt, non quo ipsi suis laudibus inhiant, sed quo auditores suos ad audiendi sollicitudinem accendant, ut dum eorum voce præferuntur, ab eorum cordibus ardentiori affectu rapiantur. Unde nunc Apostolus cum mira Corinthiis et multa dixisset, adjunxit : *Os nostrum patet ad vos, o Corinthii, cor nostrum dilatatum est.* Et hoc etiam causa libertatis dixit ac puræ conscientiæ. Male enim sibi conscia mens loqui trepidat, sensum perdit, in verbis errat. Est autem sensus : Ita provocati sumus profectus vestro, ut tacere non possimus. Profectus enim discipulorum aperit os magistri. *Os nostrum patet ad vos*, quoniam multa diximus ac dicimus ad vos corrigendos et instruendos, quæ gratanter accipere cuncta debetis. Et ideo patet ad vos os nostrum, quia charitate dilatatum est cor nostrum. Lata dilectio cordis nostri, quæ vos omnes complectitur, non sinit ut aceamus ea quæ prosunt vobis. Ex abundantia enim cordis os loquitur ; et ubi charitas est, non sunt angustia (Matth. xii). *Cor nostrum dilatatum est.* Cordis dilatatio, justitiæ est delectatio. Hoc munus est Dei, ut in præceptis ejus non timore pœnæ angustemur, sed in dilectione et delectatione justitiæ dilatemur. *Cor nostrum dilatatum est.* Licet enim caro nostra sit tribulationibus et pressuris angusta, cor tamen intus latitudini liberum gaudet exterioribus pœnis. Charitas enim non angustatur. Si quis vult non angustari in terra, in latitudine charitatis habitet. Quidquid enim fecerit ei homo, non eum angustat, quia illud diligit quod non nocet. Et quia nostrum cor ita dilatatum est, atque nostrum os patens, ideo non angustiamini in nobis, id est nolite putare, quod habeatis in nostro magisterio vel nostræ conversationis exemplo ullam scientiæ vel boni operis stricturam et inopiam. Nos enim dicimus et facimus quidquid erga vos dicere et facere debemus, sed potius angustiamini in visceribus vestris, id est intelligite quod angustia et parvitas scientiæ et boni operis quam habetis, est in cordibus vestris, quæ dura sunt ad intelligendum et faciendum. Qui enim nobis pseudo præfertis apostolos, putatis quod angustia et parvitas intelligentiæ vestræ vel sanctitatis, sit in nobis, id est in nostra culpa, cum ipsa sit potius in cordibus vestris, id est in culpa duritiæ mentium vestrarum, quia non sunt dilatatae sicut cor nostrum. Sed nunc dico vobis tanquam filiis, id est tanquam illis qui exemplum meum cum sim pater vester, sequi debetis, dilatamini et vos, sicut ego dilatatus sum, id est per intellectum dilatamini auxilio gratiæ Dei, ut

majora ipsius dona capiatis. Dilatamini per amorem justitiæ, ut copiam virtutum capiatis in latitudine mentis vestræ. Vos dico habentes in futuro eamdem remunerationem quam ego, si nunc ita dilatati fueritis ut ego, dilatemini amplitudine charitatis, ut omnes homines pie diligatis, et non per timoris angustiam, sed per amoris latitudinem bona faciatis, dilatamini et vos in bonis operibus per libertatem amoris, et nolite jugum antiquæ servitutis quæ in lege est, ducere cum infidelibus, id est cum pseudoapostolis, qui fidem Christi conantur evertere, et carnales observantias legis statuere. Ipsi enim cum sint sub jugo servitutis, ubi omnia per timorem sunt, student vobis suadere, ut, abjecta lege libertatis, id est libertate charitatis, subjiciatis colla vestra cum eis jugo legis. Sed vos nolite participes fieri servitutis eorum, quia vos estis justii per fidem, illi vero iniqui per legis transgressionem. Et quæ participatio est justitiæ cum iniquitate? Nulla. Quoniam mox annullatur justitia, si participationem habuerit cum iniquitate; et ideo ne pareat justitia vestra, caveat habere participationem cum iniquitate illorum. Nulla communio vel in cibo vel in potu, vel in aliquo sacramento vos eis jungat, cum sint ob iniquitatem perfidiæ ab Ecclesia separati. Aut quæ societas luci ad tenebras? id est in quo possunt habere communionem illi qui sunt lux sufficiens ad aliorum illuminationem, cum illis qui sunt tenebræ, id est cæci et cæcantes alios? Nulla societas est lucis et tenebrarum, quia lux hujus mundi obscuratur, si se sociaverit tenebris. His non est societas. Sed Christi ad Belial, id est ad diabolum quæ conventio potest fieri? Id est illi in quibus habitat Christus, et qui sunt membra Christi, in que convenire possunt cum illis, in quibus habitat diabolus, et qui sunt membra diaboli? In nullo. Quia mox deserit eos Christus, si se membris Satanae conjunxerint. Belial interpretatur absque jugo (Judic. xix), et significat illum angelum, qui nec Deo subjectus esse voluit. Cujus membra sunt omnes, qui præceptis Dei nolunt subjici. Aut quæ pars fidei, id est Christiano cum infidei? id est cum pseudoapostolo fidem Catholicam destruyente. Nulla est his pars communis. Sed templo Dei, id est illis in quibus habitat Deus, quis consensus potest esse cum idolis? id est cum sacrificiis carnalium observantiarum, quæ non jam Deo, sed diabolo offerunt, et idololatriæ deputantur. Nullus eis consensus ad invicem. Tot modis ostensum est, communionem pseudoapostolorum esse vitandam. Possunt et aliter forsitan hæc verba tractari. Nolite jugum ducere iniquitatis cum infidelibus, id est cum gentibus, ut subditi sitis jugo peccati sicut illi, cum debeat in libertate charitatis servire justitiæ. Quæ enim participatio est justitiæ cum iniquitate? aut quæ societas luci ad tenebras? nulla participatio est justitiæ et iniquitati, non solum quæ foris, sed etiam quæ intus in Ecclesia est. « Novit enim Dominus qui sunt ejus, et recedat ab iniquitate omnis qui invocat no-

men Domini (II Tim. 11). » Nulla etiam societas est luci et tenebris, non solum quæ foris, sed etiam quæ intus sunt. « Quoniam Deus lux est, et tenebræ in eo non sunt ullæ (I Joan. 1). » — « Qui autem odit fratrem suum in tenebris est, et in tenebris ambulat (I Joan. 11). » Si dixerimus quod societatem habemus cum Deo, et in tenebris ambulamus, mentimur (I Joan. 1). Non est ergo societas luci et tenebris. Quid igitur faciemus? Societas cum Deo habenda est. Alia spes vitæ æternæ nulla est. « Deus vero lux est, et tenebræ in eo non sunt ullæ (ibid.). » Iniquitates autem et peccata sunt tenebræ. Iniquitatibus et peccatis premimur, ne societatem cum Deo habere possimus. Quæ ergo spes est? Si confiteamur peccata nostra, fidelis et justus est, ut remittat nobis peccata nostra, et emundet nos ab omni iniquitate. Quo facto societatem habebimus cum illo, quia lux erimus in ipso. Quæ autem conventio Christi ad Belial? Belial, ut diximus, interpretatur absque iugo (Judic. 1x). Quicumque ergo non Dei, sed suam voluntatem sequuntur, hoc vocabulo possunt designari, quia sunt absque iugo timoris Dei, absque iugo disciplinæ spiritualis. Et sæpe tales dicunt se Christianos. Sed quæ conventio Christi ad Belial? Christus humiliavit semetipsum, factus obediens usque ad mortem (Philip. 11); isti autem extollunt semetipsos, nolentes obedientiæ iugo subjici. Quæ igitur conventio istis et Christo? Non sit itaque sine Dei iugo, quicumque vult convenire Christo. Aut quæ pars fideli cum infideli? Vel quis consensus templo Dei cum idolis? Hoc recte dictum est illis Corinthiorum, qui cum infidelibus manducabant sacrificia idolorum. Potest et aliter intelligi: « Fidelis enim Dominus in omnibus verbis suis (Psal. cXLIV), » quoniam fideliter adimplet vel adimplebit quæcunque locutus est. Ille autem est infidelis, qui verba sua negligit adimplere, ut faciat bona quæ se facturum promisit. Quæ igitur pars est fideli Deo cum infideli homine? Qui enim mandata Dei adimplere noluerit fideliter, quam partem cum Deo habere poterit? Quis autem consensus templo Dei cum idolis? « Templum enim Dei sanctum est, quod estis vos (I Cor. 11), » et avaritia est idolorum servitus (Colos. 111). Cur ergo illi qui sunt vel debent esse templum Dei, consentiunt avaris, nec redarguunt eos? Cur non timent ne per hunc consensum Deus, qui in eis habitare solet, deserat eos, et fiant etiam ipsi habitaculum Satanæ?

« Vos enim estis templum Dei vivi (I Cor. 111, vi), » sicut dicit Deus: Quoniam inhabitabo in illis, et inambulabo inter eos; et ero illorum Deus, et ipsi erunt mihi populus (Levit. xxvi). Propter quod exite de medio eorum, et separamini, dicit Dominus, et immundum ne tetigeritis; et ego recipiam vos, et ego ero vobis in patrem, et vos eritis mihi in filios et filias, dicit Dominus omnipotens (Jer. xxxi; Isa. L11).»

Recte dixi quia templum Dei consensus non ha-

bet cum idolis. Vos enim estis ipsum templum non deorum mortuorum, sed Dei vivi, id est vos estis in quorum cordibus habitat, et præsidet Deus qui in se vivens est, et vitam suis dat æternam; sicut e contrario idola sunt mortua suis cultoribus, quia eis sunt causa mortis æternæ. Ita estis templum Dei, sicut ipse Deus per scripturam Testamenti Veteris dixit: Quoniam inhabitabo in illis (Lev. xxvi), id est in mentibus illorum. Cum Deus ubique sit, in illis tamen habitat, qui ejus sentiunt beneficium, et faciunt voluntatem. Inhabitabo, inquit, in illis et inambulabo inter eos, id est promovebo illos in propectu virtutum. Inambulabo enim Deus in nobis præsentia suæ majestatis, si latitudinem invenerit charitatis. Quam enim latum est ubi deambulat Deus; et ero inquit illorum Deus, id est illi me solum colent Deum, quia non erunt de illis, quorum deus venter est (Philip. v), vel qui vitium quodlibet pro Deo colunt, et ego protegam illos ab incursu vitiorum, atque dabo illis successum virtutum, et ipsi erunt mihi populus, id est ita mihi erunt dovoti et dediti in unitate concordiæ, ut non sint de hoc mundo. Propter quod, id est quia promitto me in vobis habitare et inambulare, exite de medio eorum, id est de medio pseudoapostolorum, et separamini ab eis. Quamdiu enim patimini eos morari inter vos, et sustinetis prædicationem eorum, tandiu estis in medio eorum, id est intra consortium eorum, et irretiti errore ipsorum. Exite de medio eorum, ne sitis in medio communionis eorum, conclusi in eodem reatu. Et ita exite, ut separemini, id est ut seorsum parati sitis ad bene agendum, sequestrati a communionem eorum. Et hoc dicit ac præcipit Dominus, non ego. Et ne tetigeritis immundum, id est carnales observantias, quas illi suadent vobis, quæ jam post Domini resurrectionem non valent ad emundationem, sed ad contaminationem eorum qui tangunt, id est custodiunt eas, et si ita vos a communionem perversitatis eorum separaveritis, ut sancte et juste vivatis, ego recipiam vos in cœleste regnum, quos a paradiso ejeceram. Vel exite de medio perversorum qui sunt in Ecclesia, exite non corporaliter, sed spiritualiter, id est facite quod pertinet ad correptionem eorum, quantum pro uniuscujusque gradu atque persona salva pace fieri potest. Qui enim sic agit, liber exit de medio nequitæ et damnationis eorum. Objurgando enim criminosos, exit de medio eorum liber in conspectu Dei, cui neque Deus sua peccata imputat, quia non fecit; neque aliena, quia non approbavit; neque per negligentiam, quia non tacuit; neque per superbiam, quia in unitate permansit. Sic ergo spiritualiter exite de medio eorum, non scindentes unitatem Ecclesiæ, sed increpantes perversitatem nequitæ, ne majus malum committatis in separatione bonorum, quam fugitis in conjunctione malorum, et separamini non corporaliter ab eis, sed spiritualiter a consortio pravitatis eorum. Et immundum ne tetigeritis, id est peccato eorum ne consenseritis. Tolerandi sunt

enim ubique proximi, quia Abel fieri non valet, quem Cain malitia non exercet. Unum vero est, pro quo vitari malorum societas debeat, ne si fortasse corrigi non valent, ad imitationem trahant; et cum ipsi a sua nequitia non mutentur, eos qui sibi conjuncti fuerint, pervertunt. «Corrumpunt enim mores bonos colloquia mala (1 Cor. xv). » Sicut ergo perfecti viri perversos proximos non debent fugere, quia et eos sæpe ad rectitudinem trahunt, et ipsi ad perversitatem nunquam trahuntur; ita infirmi quicunque societatem declinare debent pravorum, ne mala quæ frequenter aspiciunt et corrigere non valent, delectentur imitari. Unde nunc eis apte dicitur : *Exite de medio eorum et separamini.* Hoc enim agendum est, non more schismaticorum, sed more eorum qui causa religionis petunt eremum vel remotiorem locum. Et ne tetigeritis immundum, id est immunditiam coinquinationis eorum, cum ipsi tangere participando nolunt munditiam vestræ sanctitatis. Et ego, sicut dictum est, vos olim abjectos nunc recipiam in caelestem gloriam. *Et vobis in illa regni gloria receptis ero in Patrem*, id est ero Pater, et ita vos diligens ut Pater, quia meipsum vobis perpetualiter dabo, *et vos eritis mihi in filios et filias*, id est eritis mihi filii et filiæ hoc est eritis mihi similes, ut scriptum est : « Similes ei erimus quoniam videbimus eum sicuti est (1 Joan. iii). » Non solum enim in filios critis mihi, id est gloriam meam, sed et in filias. Quod vel propter utrumque sexum, vel propter fortes et infirmos dicitur, vel quia major diligentia cultus et custodiæ filiabus adhiberi solet, quam filiis. Et ideo per filias voluit fortassis ostendere, quia sic se habebit erga fileles animas, sicut pater erga filias, ornando veste jucunditatis, et removendo voluntatem totius turpitudinis, ut sponso cælesti semper placeant in ornatu decoris et amore puritatis. Et inde nolite, inquit, dubitare, quia hæc dicit Dominus omnipotens, id est ille promittit vobis ista, qui omnia potest facere. Notandum quod Apostolus hæc vel juxta sensum, vel juxta litteram ex diversis Scripturarum locis posuit. Nam quod ait : *Inhabitabo in illis, et inambulabo inter eos, et ero illorum Deus, et ipsi erunt mihi populus*, sic legimus apud Ezechielem : « Dabo sanctificationem meam in medio eorum in perpetuum, et erit tabernaculum meum in eis, et ero eis Deus, et ipsi erunt mihi populus (Ezech. xxxvii). » Nam pro eo quod dictum est : « Dabo sanctificationem meam in medio eorum, » Apostolus posuit, *inhabitabo in illis.* Et pro eo quod dictum est : « Erit tabernaculum meum in eis, » Apostolus subjecit, *inambulabo in illis.* Tabernaculum enim est in itinere. Sed et in Levitico reperitur hæc sententia, præter quod ibi est secunda persona. Sic enim dictum est : « Ponam tabernaculum meum in medio vestri, ambulabo inter vos, et ero vester Deus, vosque eritis mihi populus (Levit. xxvi). » Quod autem subjunxit Apostolus : *Propter quod exite de medio eorum, et separamini, dicit Dominus; et immun-*

dam ne tetigeritis, et ego recipiam vos, ita legitur in Isaia : « Recedite, recedite, exite inde, potum nolite tangere, exite de medio ejus, mundamini, et congregabit vos Deus Israel (Isa. lii). » Illud vero quod sequitur, et ego ero vobis in Patrem, et vos eritis mihi in filios et filias, non facile, sicut reor, in nostris codicibus apparet unde sumptum sit, nisi forte ex eo quod per Jeremiam dixit, « et factus sum Israeli Pater (Jer. xxxi); » et per Isaiam : « Affer filios meos de longinquo, et filias meas ab extremis terræ (Isa. xliii), » vel ex aliquo simili loco. Sequitur :

CAPUT VII.

« Has ergo habentes promissiones, charissimi, mundemus nos ab omni inquinamento carnis et spiritus perficientes sanctificationem in timore Dei. »

Quoniam Dominus præcepit ut exeamus de medio coinquinationis peccantium, et tauta nobis inde bona promisit, ergo, *charissimi*, nos qui tales habemus promissiones, id est quibus promissa sunt talia, et nos separaverimus a contaminatione malorum, mundemus nos ab omni inquinamento carnis, et spiritus, et perficiamus sanctificationem utriusque. Inquinamentum carnis est, quod per carnem committitur, sicut luxuria, homicidium et similia. Inquinamentum spiritus, quando sola cogitatione peccatur, sicut mentis elatione vel invidia sive odio. Emundemus ergo nos non tantum ab inquinamento, sed prorsus ab omni inquinamento carnis, ut omnia vitia carnalia fugiamus. Et ab omni inquinamento spiritus, ut consensum peccati, et cætera omnia quæ spiritum inquinant, expellamus a cordibus nostris. Tunc vero perficimus sanctificationem carnis et spiritus, si utraque munda servamus, et bonis actibus insodamus. Hæc enim sanctificatio utriusque facta est divinitus in baptismo. Sed nos perficimus eam si per membra corporis insistimus bonis operibus, et mentem intus magis ac magis adornamus sacris virtutibus. Quæ perficienda est in timore Domini, ut semper vereamur Dominum offendere, sine cujus gratia nihil boni possumus agere. Qui enim sine timore Domini vult bonum aliquod facere, superbus est, et perdit quidquid facit. Vel mundemus nos ab omni inquinamento carnis, id est ab omni contaminatione carnalis observantiæ, et simus *perficientes sanctificationem* spiritus, id est spiritualis observantiæ quam cœpimus facere, ut spiritaliter legem impleamus, non carnaliter, et hoc in timore Domini, qui legem dedit, non ut carnaliter observaretur semper, sed tantum usque ad tempus correctionis.

« Capite nos. Neminem læsimus, neminem corripimus, neminem circumvenimus. Non ad condemnationem vestram dico. Prædiximus enim quod in cordibus nostris estis ad commoriendum et ad convivendum. »

Nos ita vos admonemus. Et vos capite nos, id est accipite quod dicimus, accipite spiritualem cibum

quem vobis offerimus. Vel capite nos, non pseudo-
apostolos, id est nostrum exemplum, non illorum
accipite in omnibus imitandum. Aut capite nos, id
est considerate quales sumus. Et debetis nos ca-
pere, quia neminem vestrum læsimus impropere
ei præterita crimina, sicut pseudo, qui vobis veterem
improperant idololatriam; et neminem vestrum cor-
rupimus, id est nullius animæ integritatem violavi-
mus, sicut pseudo, qui multos ex vobis corruerunt,
vitiando castitatem fidei et integritatem innocentie.
Neminem vestrum circumvenimus, id est nullum
astuta circumventionem fraudulenter decepimus, ut ei
per nos aut per subditos nostros bona sua subtrahe-
remus, sicut pseudo qui vos adulatione callida
blande circumveniunt, et res vestras artificiose sub-
trahunt. *Non ad condemnationem vestram dico*, id est
non vos abjicio, sed ut corrigamini moneo. Qui enim
aliquem condemnat, non illi dimittit. Et est sensus
apertior: Non me excusando vos condemno, quasi
tales sitis. Non propterea hæc commemoro, ut cal-
lide dicam vos fecisse, quod me fecisse nego. Non
enim possum ita de vobis sentire, quos tantum dili-
go, sicut dixi superius, eo quod dilectio vestra tan-
tum me faciat habere fiduciam. Prædixi enim quod
in cordibus nostris estis epistola. *Prædiximus quod
in cordibus nostris estis*, id est cura et sollicitudo
vestræ salutis manet in cordibus nostris *ad commo-
riendum et ad convivendum*, id est ad hoc ut vos
nobiscum pro Christo, si necesse fuerit, moria-
mini, et nobiscum in regno Christi perpetualiter vi-
vatis. Ex prædictis vult illos cognoscere quo animo
nunc loquatur ad eos. Quos enim participes vult
habere et ad præsentem passionem pro Christo et ad
futuram vitam, non utique illos abjicit, sed ut parti-
cipatione dignos faciat exhortatur. Vel in cordibus
nostris estis ad commoriendum et ad convivendum,
id est ad hoc, ut nos vobiscum moriamur et viva-
mus; hoc est, si vos sustinetis mortem peccati in
anima, nos æstimemus illam mortem esse nostram;
et si vos in observatione justitiæ vivitis, nos creda-
mus tunc nosipsos vivere. Perfecta enim charitas
profectum vel detrimentum aliorum credit esse
suum.

« Multa mihi fiducia est apud vos, multa mihi
« gloriatio pro vobis. Repletus consolatione, super-
« abundo gaudio in omni tribulatione nostra. »

Ideo estis in cordibus nostris, quoniam *multa fidu-
cia est mihi apud vos*, id est multum confido de ves-
tra correctione et salute, dum considero ea quæ
apud vos sunt, et *multa gloriatio est mihi pro vobis*,
id est multum glorior apud alios pro vestra reli-
gione. Videte ne frustra confidam de vobis, videte
ne in vacuum glorier pro vobis. *Repletus etiam sum
consolatione* cum audissem vestram correctionem, et
superabundo gaudio in omni tribulatione nostra, id
est gaudium quod de vestra emendatione habeo, su-
perat omnem mœrorem tribulationum nostrarum,
quas in animo partim sustinemus pro peccatis ves-
tris. *Multa*, inquit, *fiducia mihi est apud vos*. Fidu-

A cia hæc de primæ epistolæ correctione est, quam
quia non aspere susceperunt, fiduciam dederunt ad-
monendi se. Visi sunt enim velle corrigere se. Unde
gloriatur pro eis, animumque suum ex hac parte
consolatum pronuntiat, in tantum ut in omni pres-
sura superabundare se gaudio dicat. Videns enim
esse spem in his, pro quibus angustias patitur, gau-
det cum tribulatur, certus se mercedem a Deo recep-
tuum acquisitionem salutis eorum.

« Nam et cum venissemus in Macedoniam, nul-
« lam requiem habuit caro nostra, sed omnem tri-
« bulationem passi sumus. Foris pugnæ, intus ti-
« mores. »

Memorat quæ patiebatur causa credentium, ut eos
provocet ad charitatem et compassionem, dixi; quia
superabundo gaudio in tribulatione nostra. Nam
tribulationem passi sumus non solum in Asia, sed
et *cum venissemus* ad Macedones, ut eis vitæ viam
monstrarem, *nullam requiem habuit caro nostra*,
sed incessanter vexata est assiduis tribulationibus.
Caro non habuit requiem. Ac si aperte dicatur:
Quia spiritus requiem habuit, dum per profectum
animæ persecutionum supplicia caro toleravit.
Spiritus enim requievit in spe futuræ retribu-
tionis, dum caro laboraret in dolore præsentis af-
flictionis. Non permissi sumus respirare, *sed omnem
tribulationem* pertulimus, quia et in corpore flagel-
lati sumus, et animo timebamus pro his, quos ad
fidem converteramus. *Foris* enim, id est in corpore
nostro erant *pugnæ* suppliciorum, *intus*, id est in
corde nostro *timores*, ne hi qui nuper erant conver-
si, delicerent.

Nunc intelligeremus Apostolum memorare sedi-
tionem et plagas et carcerem, quæ legitur in
Philippis cum Sylva pertulisse, et iterum seditio-
nes ac persecutiones in Thessalonica et Berrœa
(Act. xvi, xvii), nisi sciremus Apostolum nequa-
quam adhuc venisse Corinthum, quando illa per-
tulit. Hæc autem quæ nunc memorat, post conver-
sionem Corinthiorum passus est, quando vice se-
cunda perrexit in Macedoniam, nec referuntur in
Actibus apostolorum. Foris erant pugnae corpori
dum cæderentur, et intus animo timores. Illic enim
est timor, ubi et intellectus est. Sed timor iste erat,
D sicut dictum est, propter eos qui crederant, ne
passione ejus scandalizarentur. Nam sibi quid jam
timeret qui patiebatur? Vel foris erant illis pugnae,
quia impugnabantur ab infidelibus qui sunt extra
ecclesiam; intus, id est in ecclesia timores, quia
timebant ne diabolus ibi aliquid operaretur. Foris
pugnæ ab apertis inimicis, intus timores a falsis
fratribus. Sic et Ecclesia semper habet inimicos, et
quos ferat foris, et quos gemat intus. Foris facilius
evitabiles, intus difficiliter tolerabiles. Sunt enim
falsi fratres, sunt mali filii, et tamen filii, qui non
contra nos blasphemant Christum sed nobiscum
adorant Christum, et in nobis persequuntur Chri-
stum, sicut Absalon patrem suum (II Reg. xy). De
his est timor in Ecclesia, ne cæteros ad imitationem

sui pertrahant. Valde enim periculosum est infirmis, A habitare cum talibus.

« Sed qui consolatur humiles, consolatus est nos
« Deus in adventu Titi. Non solum autem in adventu
« ejus, sed etiam in consolatione qua consolatus est
« in vobis, referens nobis vestrum desiderium, ve-
« strum fletum, vestram æmulationem pro me, ita
« ut magis gauderem. »

Nos gravem tribulationem passi sumus. Sed Deus qui consolatur humiles, id est humiliatos passionibus pro suo nomine, consolatus est nos in adventu Titi revertentis a vobis, ut nobis esset solatio. Nam quia Deus suorum non est immemor, sed semper dat eis in adversitate solatium, acceleravit adventum Titi, ut refrigerio nobis esset positus in fervore tribulationis. Magna enim consolatio est patientis, si secum habeat condolentem. Et magna nobis consolatio fuit dum nostræ prædicationis adesse videremus adiutorem. Sed non solum in adventu ejus consolatus est nos Deus, sed etiam in consolatione qua ipse Titus, qui dolorem habebat de inobedientia vestra, consolatus est in vobis, id est consolationem accepit de pœnitentia vestra. Nam quia vidi Titum consolatum in vobis, et ego consolatus sum in vestra emendatione. Ipse enim consolatus est in vestra voluntate ad conversionem prompta referens nobis vestrum desiderium de emendatione, vestrum fletum de commissis, vestram æmulationem, id est indignationem contra pseudoapostolos pro me, id est pro mea defensione, ita ut magis gauderem de vestra correctione, quam dolebam de nostra tribulatione. Nuntiavit Titus illos habere desiderium emendandi se, et flere pro his quæ male egerant, et æmulationem habere pro Apostolo. Addiscentes enim quæ promissa sunt bene viventibus, incitati sunt desiderio bene agendi, ut æterna præmia mererentur adipisci. Et correpti non nitebantur excusare, sed flebant dolentes quia peccaverant. Intelligentes charitatem apostoli erga se, cœperunt illum contra adversarios defendere. Unde ipse magis gavisus est, quia non solum se correxerant, sed etiam amplius profecerant. Profectus enim illorum augmentavit ejus gaudium. Vel desiderium habebant videndi Apostolum et flebant præ desiderio ejus, et alter æmulabatur alterius desiderium pro Apostolo videndo.

« Quoniam, etsi contristavi vos in epistola, non
« me pœnitet. Etsi pœniteret, videns quod epistola
« illa (etsi ad horam) vos contristavit, nunc gaudeo,
« non quia contristati estis, sed quia contristati
« estis ad pœnitentiam. Contristati enim estis secundum Deum, ut in nullo detrimentum patiamini ex nobis (I Petr. II). Quæ enim secundum Deum tristitia est, pœnitentiam in salutem stabilem operatur. Sæculi autem tristitia mortem operatur. »

Vere magnum percepi gaudium, referente Tito quæ in vobis gesta sunt. Quia etsi contristavi vos, id est si errores vestros severius corripui in prima

epistola, non me pœnitet asperè scripsisse, quia hoc causa posebat, et bonus effectus est secutus. Non me modo pœnitet, quod vos durius increpans contristavi, quia vester profectus facit me non pœnitere. Etsi me pœniteret propter charitatem quia vos contristavi, nunc gaudeo, quia profuit quod vos contristavi. Gaudeo videns quod epistola illa tam aspera vos contristavit, etsi ad horam, id est quamvis parvo tempore. Perpendo enim utilitatem, que processit ex illa tam brevi tristitia. Gaudeo enim, non ideo quia contristati estis, sed ideo quia ad pœnitentiam estis contristati, id est non mihi gaudium facit vestra tristitia, sed vestra pœnitentia, que non potuit esse sine tristitia. Gaudeo quia cum pudore estis contristati, non cum ira. Qui enim reprehensus pudorem patitur, corrigere se promittit. Qui autem irascitur, pejorem se futurum ostendit. De hac tristitia gaudeo, quia contristati estis secundum Deum, id est secundum voluntatem et inspirationem Dei, ut in nullo, id est nec in contristatione vestra patiamini detrimentum ex nobis sed ad profectum omnia proveniant. Detrimentum enim auditur ex prædicatione doctoris patitur, quando præceptum ejus inobediens existit, et priori peccato peccatum inobedientiæ adjungit. Quia secundum Deum contristati estis, idcirco detrimentum non patiemini, sed commodum assequemini. Nam tristitia que est secundum Deum, id est qua quis dolet se fecisse quod Deus odit, operatur pœnitentiam ducentem in salutem non transitoriam, sed stabilem et æternam. Qui enim inde tristis est, quia hoc ei in seipso displicet quod Deo displicet, elaborat illud pœnitendo delere et Deo satisfacere, ut possit ad salutem quam peccando amiserat, pervenire. Agit enim pœnitentiam, et sperat Dei misericordiam. Sed e contrario tristitia sæculi, id est qua peccator qui se non vult corrigere, tristis est et dolet, atque erubescit detectum esse in hoc sæculo, ubi nil verecundie de suis nequitias vult habere, operatur æternam mortem. Et ideo cavete tristitiam illam. Tristitia enim sæculi est aut de verecundia reprehensæ culpæ aut de amissis rebus presentibus, aut de alienis non invasis, aut de aliena felicitate, vel de aliqua hujusmodi retorqueri. Dum ergo tali quis tristitia tenetur, cor ejus a principe mortis diabolo possidetur, et mortem in eo tristitia hæc operatur. Tristitia vere secundum Deum est, aut sua, aut aliena peccata lugere. Et ideo pœnitentiam operatur, que dicit ad salutem.

« Ecce enim hoc ipsum secundum Deum costitui vult, quantum in vobis operatur sollicitudinem, sed defensionem, sed indignationem, sed timorem, sed desiderium, sed æmulationem, sed vindictam. »

Vere tristitia quæ secundum Deum cor afficit, operatur pœnitentiam in salutem. Nam operatur ea quæ conducunt. Ecce enim in vobis ipsis hoc apparet, in vobis ipsis hoc experti estis. Quia hoc ipsum contristari vos secundum Deum, id est hoc ipsum

contristati estis secundum Deum, licet parvideatur esse, quantam, id est quam magnam, *itur in vobis sollicitudinem* emendandi quod detis, vel ne amplius delinquantis. Nec solum itudinem ne denuo peccetis *sed et defensionem* rursus impugnationes demonum, quia non jam s vos ab eis vinci, sed strenue vosipsos defen-

Et non solum defensionem adversum inimicos *indignationem* contra vosipsos pro malis quæ is. Nec tantum indignationem, *sed et timorem* immemini pro peccatis quæ commisistis, vel ne *reps* in culpas cadatis, quoniam « beatus homo *semper* est pavidus (*Prov. xxviii*). » Neque *soimorem*, *sed et desiderium*, quo desideratis in is provehi. Et non solum desiderium, *sed et ationem*, id est zelum atque fervorem imitandi el alios bonos. Neque tantummodo *æmulatione* bene agendi ad exemplum sanctorum, *sed et ctam*, quia punitis in vobis ipsis mala quæ fe- . Hæc omnia operatur in vobis hoc, quod *seam* Deum contristati estis; et ideo patet quod *lia* quæ secundum Deum est operatur *pœnium* in salutem, quia generat omnes has virtutu- *quæ* ducunt ad æternam salutem. Vel *sollicitu- n*, id est mentis vigilantiam adversus *deceptio- cendo* apostolorum; et defensionem, ut me seu *pœos* defendatis contra illos; et indignationem, is vel cæteris male agentibus indignemini; et *em* gehennalis pœnæ, atque desiderium cœle- *loriæ*; vel timorem, id est suspicionem vestræ *C* *ltatis*, ne per eam vobis contingat ut cadatis; *siderium* recte semper vivendi; et *æmulatione* ut zelus domus Dei vos comedat (*Psal. lxxviii*), *deatis* intrinsecus fervore corrigendi ea quæ *sunt* in Ecclesia, id est in plebe Christiana; *idictam*, ut eodem zelo Dei puniatis peccantes . ii), sicut Ecclesiæ disciplina exigit. Omnia bona prodeunt ex tristitia quæ est secundum *l*, idcirco supra dixi quia non me pœnitet quod *la* contristavi.

n omnibus exhibuistis vos incontaminatos *e* negotio. Igitur, etsi scripsi vobis, non pro- *eum* qui fecit injuriam, nec propter eum qui *sus* est, sed ad manifestandam sollicitudinem *tram* quam habemus pro vobis coram Deo. Ideo *D* *que* consolati sumus. »

universaliter dicam, quid vobis tristitia quæ *idum* Deum est, contulerit *in omnibus exhibui- re* esse *incontaminatos negotio*, id est ut sitis *taminati* Christiano negotio agendo, ut libere *is* aliorum peccata punire, contaminatus enim *ritatem* non habet in alios vindicare. Vel *ex* itis vos esse incontaminatos, id est probastis *æse* immunes a negotio, id est a peccato illius *atris* uxorem habuit. Quia secundum discipli- *vindicastis* in eum, ostendistis vos non jam *contaminatos* negotio iniquitatis illius, cui *consentiendo* inquinati eratis. Et quia incon- *tati* estis, igitur apparet quia non propter

illos principaliter scripsi, sed magis propter eccle- *siam*. Et hoc est : *igitur etsi scripsi vobis* de illis, non scripsi *propter eum qui fecit injuriam* patri, tollens uxorem ejus, *nec propter eum qui passus est*, id est propter patrem cui uxor ablata est, non et ipse graviter peccavit, negligens uxoris suæ salutem, vel filii, et scienter ferens et silenter tantum flagi- *tium*, sed potius scripsi pro omnibus vobis *ad ma- nifestandam sollicitudinem nostram quam habemus pro vobis*, id est ut manifestaremus vobis quam so- *liciti* et studiosi simus de vestra salute *coram Deo* qui videt occulta intentionis vestræ. Hanc vobis manifestare volumus, ut et vos eam sciretis, quam in divinis obtutibus habemus. Nam injustos emen- *dando*, et pollutos sanctificando, et ecclesiæ re- *conciliando* totius populi sollicitudinem me ha- *bere* demonstro. Quia in uno male agente multi *confunduntur*, et in uno contumeliam patiente multi *indignantur*, et quia pro salute et emendatione omnium *vestrum* scripsi de illis, et evenit quod intendebam, *ideo* consolati sumus dum vos audiremus esse cor- *rectos*. Vel exhibuistis vos esse incontaminatos a *negotio* sæculari, quo prius eratis contaminati, cum *dicerem* vobis : « Audet aliquis vestrum habens ne- *gotium* adversus alterum, judicari apud iniquos, et non apud sanctos? » (*I Cor. vi*.) Contaminati enim *eratis* hoc negotio dum dicerem : « Omnino deli- *ctum* est in vobis, quod judicia habetis inter vos (*ibid.*) » Et quia nunc vos exhibuistis ab eo esse in- *contaminatos*, igitur etsi scripsi vobis, non scripsi *principaliter* propter eum qui fecit injuriam vel qui *passus est*, id est propter quemlibet eorum qui in- *jurias* et fraudes fratribus faciebant, vel patiebantur *a fratribus*, sed magis pro omnibus vobis, ut omnes *talia* facere caveretis. Et scripsi ad hoc, ut mani- *festarem* vobis me pro vobis coram Deo sollicitum *esse*. Et quia nunc estis a tali negotio incontaminati, *ideo* consolationem habemus in vobis

« In consolatione autem nostra abundantius ma- *gis* gavisi sumus, super gaudio Titi, quia refe- *ctus* est spiritus ejus ab omnibus vobis. Et si *quid* apud illum de vobis gloriatus sum, non sum *confusus*. Sed sicut omnia vobis in veritate locuti *sumus*, ita et gloriatio nostra quæ fuit ad Titum, *veritas* facta est. Et viscera ejus abundantius in *vobis* sunt, reminiscens omnium vestrum obe- *dientiam*, quomodo cum timore et tremore exce- *pistis* illum. Gaudeo quod in omnibus confido in *vobis*. »

Nos in hoc quidem consolati sumus, quod incon- *taminatos* vos exhibuistis negotio, sed amplius de *gaudio* Titi quod habet in vobis. Cum audisset Apo- *stolus* eos per primam epistolam increpatos velle *se* corrigere, consolationem accepit. A Tito etiam *discens* quia dolorem paterentur erroris sui, auctus *est* in consolatione et repletus gaudio, quia voluntas *eorum* in opere cœperat probari, Tito id cum lætitia *referente*. Et hoc est quod dicit : Nos consolati su- *mus* de vestra melioratione. Sed *in consolatione*

auti pertrahant. Valde enim periculosum est infirmis, **A** *epistola, non me pœnitet* aspere scripsisse, quia hoc causa posebat, et bonus effectus est secutus. Non

me modo pœnitet, quod vos durius increpans contristavi, quia vester profectus facit me non pœnitere. *Etsi me pœniteret propter charitatem quia vos contristavi, nunc gaudeo*, quia profuit quod vos contristavi. Gaudeo videns *quod epistola illa tam aspera vos contristavit, etsi ad horam*, id est quamvis parvo tempore. Perpendo enim utilitatem, quæ processit ex illa tam brevi tristitia. Gaudeo enim, non ideo *quia contristati estis, sed ideo quia ad pœnitentiam estis contristati*, id est non mihi gaudium facit vestra tristitia, sed vestra pœnitentia, quæ non potuit esse sine tristitia. Gaudeo quia cum pudore estis contristati, non cum ira. Qui enim reprehensus pudorem patitur, corrigere se promittit. Qui autem irascitur, pejorem se futurum ostendit. De hac tristitia gaudeo, quia *contristati estis secundum Deum*, id est secundum voluntatem et inspirationem Dei, *ut in nullo*, id est nec in contristatione vestra *patiamini detrimentum ex nobis* sed ad profectum omnia proveniant. Detrimentum enim auditor ex prædicatione doctoris patitur, quando præceptis ejus inobediens existit, et priori peccato peccatum inobedientiæ adjungit. Quia secundum Deum contristati estis, idcirco detrimentum non patiemini, sed commodum assequemini. Nam *tristitia quæ est secundum Deum*, id est quæ quis dolet se fecisse quod Deus odit, *operatur pœnitentiam* ducentem in salutem non transitoriam, sed stabilem et æternam. Qui enim inde tristis est, quia hoc ei in seipso displicet quod Deo displicet, elaborat illud pœnitendo delere et Deo satisfacere, ut possit ad salutem quam peccando amiserat, pervenire. Agit enim pœnitentiam, et sperat Dei misericordiam. Sed e contrario *tristitia sæculi*, id est quæ peccator qui se non vult corrigere, tristis est et dolet, atque erubescit se detectum esse in hoc sæculo, ubi nil verecundiæ de suis nequitias vult habere, *operatur æternam mortem*. Et ideo cavete tristitiam illam. Tristitia enim sæculi est aut de verecundiâ reprehensæ culpæ aut de amissis rebus præsentibus, aut de alienis non invasis, aut de aliena felicitate, vel de aliqua hujusmodi retorqueri. Dum ergo tali quis tristitia tenetur, cor ejus a principe mortis diabolo possidetur, et mortem in eo tristitia hæc operatur. Tristitia vere secundum Deum est, aut sua, aut aliena peccata lugere. Et ideo pœnitentiam operatur, quæ ducit ad salutem.

« Sed qui consolatur humiles, consolatus est nos Deus in adventu Titi. Non solum autem in adventu ejus, sed etiam in consolatione qua consolatus est in vobis, referens nobis vestrum desiderium, vestrum fletum, vestram æmulationem pro me, ita ut magis gauderem. »

Nos gravem tribulationem passi sumus. *Sed Deus qui consolatur humiles*, id est humiliatos passionibus pro suo nomine, *consolatus est nos in adventu Titi* revertentis a vobis, ut nobis esset solatio. Nam quia Deus sanctorum non est immemor, sed semper dat eis in adversitate solatium, acceleravit adventum Titi, ut refrigerio nobis esset positus in fervore tribulationis. Magna enim consolatio est patientis, si secum habeat condolentem. Et magna nobis consolatio fuit dum nostræ prædicationis adesse videremus adiutorem. Sed *non solum in adventu ejus* consolatus est nos Deus, *sed etiam in consolatione qua ipse Titus*, qui dolorem habebat de inobediencia vestra, *consolatus est in vobis*, id est consolationem accepit de pœnitentia vestra. Nam quia vidi Titum consolatum in vobis, et ego consolatus sum in vestra emendatione. Ipse enim consolatus est in vestra voluntate ad conversionem prompta *referens nobis vestrum desiderium* de emendatione, *vestrum fletum* de commissis, *vestram æmulationem*, id est indignationem contra pseudoapostolos *pro me*, id est pro mea defensione, *ita ut magis gauderem* de vestra correctione, quam dolebam de nostra tribulatione. Nuntiavit Titus illos habere desiderium emendandi se, et flere pro his quæ male egerant, et æmulationem habere pro Apostolo. Addiscentes enim quæ promissa sunt bene viventibus, incitati sunt desiderio bene agendi, ut æterna præmia mererentur adipisci. Et correpti non nitentur excusare, sed flebant dolentes quia peccaverant. Intelligentes charitatem apostoli erga se, cœperunt illum contra adversarios defendere. Unde ipse magis gavisus est, quia non solum se correxerant, sed etiam amplius profecerant. Profectus enim illorum augmentavit ejus gaudium. Vel desiderium habebant videndi Apostolum et flebant præ desiderio ejus, et alter æmulabatur alterius desiderium pro Apostolo videndo.

« Quoniam, etsi contristavi vos in epistola, non me pœnitet. Etsi pœniteret, videns quod epistola illa (etsi ad horam) vos contristavit, nunc gaudeo, non quia contristati estis, sed quia contristati estis ad pœnitentiam. Contristati enim estis secundum Deum, ut in nullo detrimentum patiamini ex nobis (I Petr. II). Quæ enim secundum Deum tristitia est, pœnitentiam in salutem stabilem operatur. Sæculi autem tristitia mortem operatur. »

Vere magnum percepi gaudium, referente Tito quæ in vobis gesta sunt. Quia *etsi contristavi vos*, id est si errores vestros severius corripui in prima

epistola, non me pœnitet aspere scripsisse, quia hoc causa posebat, et bonus effectus est secutus. Non me modo pœnitet, quod vos durius increpans contristavi, quia vester profectus facit me non pœnitere. *Etsi me pœniteret propter charitatem quia vos contristavi, nunc gaudeo*, quia profuit quod vos contristavi. Gaudeo videns *quod epistola illa tam aspera vos contristavit, etsi ad horam*, id est quamvis parvo tempore. Perpendo enim utilitatem, quæ processit ex illa tam brevi tristitia. Gaudeo enim, non ideo *quia contristati estis, sed ideo quia ad pœnitentiam estis contristati*, id est non mihi gaudium facit vestra tristitia, sed vestra pœnitentia, quæ non potuit esse sine tristitia. Gaudeo quia cum pudore estis contristati, non cum ira. Qui enim reprehensus pudorem patitur, corrigere se promittit. Qui autem irascitur, pejorem se futurum ostendit. De hac tristitia gaudeo, quia *contristati estis secundum Deum*, id est secundum voluntatem et inspirationem Dei, *ut in nullo*, id est nec in contristatione vestra *patiamini detrimentum ex nobis* sed ad profectum omnia proveniant. Detrimentum enim auditor ex prædicatione doctoris patitur, quando præceptis ejus inobediens existit, et priori peccato peccatum inobedientiæ adjungit. Quia secundum Deum contristati estis, idcirco detrimentum non patiemini, sed commodum assequemini. Nam *tristitia quæ est secundum Deum*, id est quæ quis dolet se fecisse quod Deus odit, *operatur pœnitentiam* ducentem in salutem non transitoriam, sed stabilem et æternam. Qui enim inde tristis est, quia hoc ei in seipso displicet quod Deo displicet, elaborat illud pœnitendo delere et Deo satisfacere, ut possit ad salutem quam peccando amiserat, pervenire. Agit enim pœnitentiam, et sperat Dei misericordiam. Sed e contrario *tristitia sæculi*, id est quæ peccator qui se non vult corrigere, tristis est et dolet, atque erubescit se detectum esse in hoc sæculo, ubi nil verecundiæ de suis nequitias vult habere, *operatur æternam mortem*. Et ideo cavete tristitiam illam. Tristitia enim sæculi est aut de verecundiâ reprehensæ culpæ aut de amissis rebus præsentibus, aut de alienis non invasis, aut de aliena felicitate, vel de aliqua hujusmodi retorqueri. Dum ergo tali quis tristitia tenetur, cor ejus a principe mortis diabolo possidetur, et mortem in eo tristitia hæc operatur. Tristitia vere secundum Deum est, aut sua, aut aliena peccata lugere. Et ideo pœnitentiam operatur, quæ ducit ad salutem.

« Ecce enim hoc ipsum secundum Deum contristari vos, quantum in vobis operatur sollicitudinem, sed defensionem, sed indignationem, sed timorem, sed desiderium, sed æmulationem, sed vindictam. »

Vere tristitia quæ secundum Deum cor afficit, operatur pœnitentiam in salutem. Nam operatur ea quæ conducunt. *Ecce enim in vobis ipsis hoc apparet, in vobis ipsis hoc experti estis. Quia hoc ipsum contristari vos secundum Deum, id est hoc ipsum*

quod contristati estis secundum Deum, licet parvum videatur esse, quantam, id est quam magnam, operatur in vobis sollicitudinem emendandi quod deliquistis, vel ne amplius delinquatis. Nec solum sollicitudinem ne denuo peccetis sed et defensionem adversus impugnationes dæmonium, quia non jam sinitis vos ab eis vinci, sed strenue vosipsum defenditis. Et non solum defensionem adversum inimicos sed indignationem contra vosipsum pro malis quæ fecistis. Nec tantum indignationem, sed et timorem ne damnemini pro peccatis quæ commisistis, vel ne deinceps in culpas cadatis, quoniam « beatus homo qui semper est pavidus (Prov. xxviii). » Neque solum timorem, sed et desiderium, quo desideratis in melius proveli. Et non solum desiderium, sed et æmulationem, id est zelum atque fervorem imitandæ vel alios bonos. Neque tantummodo æmulationem bene agendi ad exemplum sanctorum, sed et vindictam, quia punitis in vobis ipsis mala quæ fecistis. Hæc omnia operatur in vobis hoc, quod secundum Deum contristati estis; et ideo patet quod tristitia quæ secundum Deum est operatur pœnitentiam in salutem, quia generat omnes has virtutes, quæ ducunt ad æternam salutem. Vel sollicitudinem, id est mentis vigilantiam adversus deceptiones pseudoapostolorum; et defensionem, ut me seu vos ipsos defendatis contra illos; et indignationem, ut illis vel cæteris male agentibus indignemini; et timorem gehennalis pœnæ, atque desiderium cœlestis gloriæ; vel timorem, id est suspicionem vestræ fragilitatis, ne per eam vobis contingat ut cadatis; et desiderium recte semper vivendi; et æmulationem, ut zelus domus Dei vos comedat (Psal. lxxviii), et ardeatis intrinsecus fervore corrigendi ea quæ male fiunt in Ecclesia, id est in plebe Christiana; et vindictam, ut eodem zelo Dei puniatis peccantes (Joan. ii), sicut Ecclesiæ disciplina exigit. Omnia hæc bona prodeunt ex tristitia quæ est secundum Deum, idcirco supra dixi quia non me pœnitet quod vos ita contristavi.

« In omnibus exhibuistis vos incontaminatos esse negotio. Igitur, etsi scripsi vobis, non propter eum qui fecit injuriam, nec propter eum qui passus est, sed ad manifestandam sollicitudinem nostram quam habemus pro vobis coram Deo. Ideo quoque consolati sumus. »

Ut universaliter dicam, quid vobis tristitia quæ secundum Deum est, contulerit in omnibus exhibuistis vos esse incontaminatos negotio, id est ut sitis incontaminati Christiano negotio agendo, ut libere possitis aliorum peccata punire, contaminatus enim auctoritatem non habet in alios vindicare. Vel exhibuistis vos esse incontaminatos, id est probastis vos esse immunes a negotio, id est a peccato illius qui patris uxorem habuit. Quia secundum disciplinam vindicastis in eum, ostendistis vos non jam esse contaminatos negotio iniquitatis illius, cui antea consentiendo inquinati eratis. Et quia incontaminati estis, igitur apparet quia non propter

illos principaliter scripsi, sed magis propter ecclesiam. Et hoc est: igitur etsi scripsi vobis de illis, non scripsi propter eum qui fecit injuriam patri, tollens uxorem ejus, nec propter eum qui passus est, id est propter patrem cui uxor ablata est, nam et ipse graviter peccavit, negligens uxoris suæ salutem, vel filii, et scienter ferens et silenter tantum flagitium, sed potius scripsi pro omnibus vobis ad manifestandam sollicitudinem nostram quam habemus pro vobis, id est ut manifestarem vobis quam solliciti et studiosi simus de vestra salute coram Deo qui videt occulta intentionis vestræ. Hanc vobis manifestare volumus, ut et vos eam sciretis, quam in divinis obtutibus habemus. Nam injustos emendando, et pollutos sanctificando, et ecclesiæ reconciliando totius populi sollicitudinem me habere demonstro. Quia in uno male agente multi confunduntur, et in uno contumeliam patiente multi indignantur, et quia pro salute et emendatione omnium vestrum scripsi de illis, et evenit quod intendebam, ideo consolati sumus dum vos audiremus esse correctos. Vel exhibuistis vos esse incontaminatos a negotio sæculari, quo prius eratis contaminati, cum dicerem vobis: « Audet aliquis vestrum habens negotium adversus alterum, judicari apud iniquos, et non apud sanctos? » (I Cor. vi.) Contaminati enim eratis hoc negotio dum dicerem: « Omnino delictum est in vobis, quod judicia habetis inter vos (ibid.) » Et quia nunc vos exhibuistis ab eo esse incontaminatos, igitur etsi scripsi vobis, non scripsi principaliter propter eum qui fecit injuriam vel qui passus est, id est propter quemlibet eorum qui injurias et fraudes fratribus faciebant, vel patiebantur a fratribus, sed magis pro omnibus vobis, ut omnes talia facere caveretis. Et scripsi ad hoc, ut manifestarem vobis me pro vobis coram Deo sollicitum esse. Et quia nunc estis a tali negotio incontaminati, ideo consolationem habemus in vobis

« In consolatione autem nostra abundantius magis gavisus sumus, super gaudio Titi, quia relictus est spiritus ejus ab omnibus vobis. Et si quid apud illum de vobis gloriatus sum, non sum confusus. Sed sicut omnia vobis in veritate locutus sumus, ita et gloriatio nostra quæ fuit ad Titum, veritas facta est. Et viscera ejus abundantius in vobis sunt, reminiscens omnium vestrum obedientiam, quomodo cum timore et tremore excipistis illum. Gaudeo quod in omnibus confido in vobis. »

Nos in hoc quidem consolati sumus, quod incontaminatos vos exhibuistis negotio, sed amplius de gaudio Titi quod habet in vobis. Cum audisset Apostolus eos per primam epistolam increpatos velle se corrigere, consolationem accepit. A Tito etiam discens quia dolorem paterentur erroris sui, auctus est in consolatione et repletus gaudio, quia voluntas eorum in opere cœperat probari, Tito id cum lætitia referente. Et hoc est quod dicit: Nos consolati sumus de vestra melioratione. Sed in consolatione

nostra abundantius magis gravisi sumus super, id est de gaudio Titi. De utroque enim, id est de correctione vestra et de gaudio Titi abundantius gavisi sumus, quam tristaremur de tribulatione nostra, sed magis de gaudio Titi, quia spiritus ejus qui mœrore pro vestra subversione defecerat, refectus est ab omnibus vobis, non quia jam omnes sitis correcti, sed quia jam quiddam sperat de reliquis. Spiritus ejus, qui fame honorum operum vestrorum defecerat, refectus est a vobis illo cibo, de quo Dominus ait: « Meus cibus est ut faciam voluntatem ejus qui misit me (Joun. iv.) » Et si gloriatus sum apud illum de vobis quid, id est aliquid boni de vobis asserens, non sum confusus, id est non erubui de hac gloriatione. Antequam pergeret Titus ad eos, audivit ab Apostolo quia erant bonæ voluntatis in emendandis vitiis. Ac per hoc regresso illo et idem referente, non erubuit Apostolus, sed alacer factus est, quia non aliter invenerat Titus quam audiverat ab eo. Non sum, inquit, contusus pro vobis, sed sicut omnia quæ audistis a nobis, locuti sumus vobis in veritate sine aliqua falsitatis admistione, ita et gloriatio nostra quæ fuit de vobis ad Titum, facta est, non solum vera, sed, ut plus dicam, ipsa veritas, id est apparuit ei veritas, dum videret ita esse ut dixeram. Efficientia enim vestræ correctionis tam vera facta est, quam et prædicatio nostra. Veritas enim argumentis apparet, si hi qui arguuntur, incipiunt se emendare, quia dum correcti immutantur, testimonium perhibent arguenti. Vos, inquam, spiritum ejus refecistis, et me vera de vobis illi dixisse probastis. Et ideo viscera ejus, id est affectiones dilectionis ejus abundantius sunt in vobis quam in aliis, quia vidit profectum vestrum. Sancti enim animus in omni bono est. Viscera cordis ejus sunt in vobis, remniscentis omnium vestrum obedientiam, quomodo, id est quam accurate excepistis eum cum omni timore cordis et tremore corporis. Scientes Corinthii ab Apostolo missum esse Titum, et se in multis vitiis ab Apostolo fuisse reprehensos, territi sunt in adventu ejus. Et quia vitam suam ceperant emendare, solliciti erant obedire præceptis ejus, ut regressus Apostoli animum mitigaret eis. Quamobrem Titus eos laudavit, quia in eo reveriti sunt Apostolum. Ideo subjungit. Gaudeo vos ita profecisse, quod in omnibus, rebus, confido in vobis, id est confido quod in omnibus amodo bene agetis. Non solum enim in bonæ voluntate eorum letatus est, sed et in operibus bonis, quibus ea quæ peccaverant, emendabant. Et ideo sicut sapiens medicus jam pene sanata vulnera lenissimis medicamentis curabat, ut prioris increpationis ustura sanaretur.

CAPUT VIII.

« Notam autem facimus vobis, fratres, gratiam Dei, quæ data est in ecclesiis Macedoniæ, et quod in multo experimento tribulationis abundantia gaudii ipsorum fuit, et altissima paupertas eorum abundavit in divitiis simplicitatis eorum, quia secundum virtutem, testimonium illis reddo, et

« supra virtutem voluntarii fuerunt, cum multa exhortatione obsecrantes nos gratiam et communionem ministerii, quod fit in sanctos, et non sicut speravimus, sed semetipsos dederunt primum Domino, deinde nobis per voluntatem Dei, ita ut rogarem Titum ut, quemadmodum cepit, ita et perficiat in vobis etiam gratiam istam. »

Postquam correcti sunt, hortatur eos ad bene agendum, et exemplo ecclesiarum Macedoniæ ad misericordiam illos provocat, ut non putent grave quod viderint Philippenses vel alios jam fecisse. Et quia supra dixerat: « cum venissemus in Macedoniam, nullam requiem habuit caro nostra (supra vii), » ne quis putaret quod nullum ibi fructum fecisset, sed solummodo penas sustinisset, quod non multum ad commendationem valeret, ostendit multos ibi fuisse conversos, et ad cursum perfectionis subito perductos. Quasi dicat: Hucusque notam fecimus vobis consolationem, quam de vestra correctione habuimus in tribulatione, quam apud Macedones perfolimus. Sed nunc notificamus, vobis gratiam Dei, id est gratulam largitionem spiritualium bonorum, quæ data est divinitus in ecclesiis Macedoniæ. Nos enim non defecimus in tribulatione, sed perstitimus fortiter, donec ibi multæ construerentur ecclesiæ. Et data est illis tanta gratia, quod in multo experimento tribulationis, id est cum multas experirentur tribulationes, abundantia gaudii ipsorum semper abundavit. Quia devoto animo perceperunt verbum Dei, idcirco divinitus eis data est gratia, ut in tribulatione Pauli et Sylæ quam supra memoravi, non scandalizarentur, sed de spe promissa gauderent, et se passionibus eorum probatos ostenderent. Et hoc est in multo experimento nostræ vel etiam suæ tribulationis, abundantia gaudii interni ipsorum quod de spe cælestium præmiorum conceperant, non minorata est, sed abundavit. Et altissima paupertas eorum abundavit in divitiis. Quasi dicat: In tribulationibus quas patiendo experti sunt et etiam de bonis suis pauperibus Christi copiose largiti sunt. Quia et altissima, id est profundissima et humillima; vel altissima, id est nobilissima et præconiis extollenda paupertas eorum abundavit in divitiis, id est major facta est dum tenderet divitiis dare. Vel abundavit in divitiis dandas, id est cum esset magna illis paupertas, abundanter tamen erogaverunt sanctis divitiis. Quia cum tennes essent substantia facultatum, animus ipsorum dives inventus est in ministerio sanctorum. Divitiis dico, simplicitatis eorum, quia simplici intentione ex eo quod habebant, erogaverunt, non ut hominibus, sed ut soli Deo placerent. Non enim duplici, sed simplici corde dederunt, qui non inde quaesierunt remunerationem ab hominibus et a Deo, sed tantum a Deo. Vere paupertas eorum abundavit in divitiis, quia secundum virtutem, rerum suarum, reddo illis, inde testimonium, id est assero quia secundum quod vires eorum sufferre poterant erogaverunt et etiam servavitur fuerunt ad dandum voluntarii, quoniam

amplius volebant dare, quam eorum vires admittebant. Non enim coacti, sed voluntarii in hoc fuerunt etiam supra virtutem facultatum suarum, quia etiam de suis rebus necessariis, quibus vita illorum cavere non poterat, obtulerunt nemine cogente. Ipsi dico *obsecrantes nos*, id est eum adjuratione sacrarum deprecantes ut de suis rebus facerent *gratiam*, id est gratuitam donationem et *communicationem*, id est ut sua bona non quasi propria sibi retinerent, sed quasi communia sanctis impenderent, quæ communicatio esset *ministerii quod fit in sanctos*, id est in hoc fierent bona eorum communia, ut ex his ministraretur in sustentationem sanctorum qui erant in Jerusalem. Tam simpliciter et devoto obtulerunt quod ultra vires eorum erat, ut cum lacrymis deprecantes offerrent, ut vel sic cogere accipi a se quod accipiendum non videbatur, quia plus erat quam poterat eorum substantia, ne forte eis postea egestas pœnitentiam boni operis suaderet. Sed quia tales se ostenderunt, ut puro animo jam præsentia postponentes futuris promissionibus, confidentia Dei se confirmarent, accipi ab eis visum est, ne boni cordis gratia fructum amitteret. *Et non egerunt, sicut speravimus*, ut quasi pro redimendis culpis suis hoc darent, ut parceremus vitiis eorum, sed *dederunt Domino*, non solum res suas, sed et *semetipsos* quasi sacrificium immaculatum. Primum *Domina*, ut ei soli servirent, se devoverunt; *deinde et nobis se dederunt*, ut essent parati nobis in omnibus obedire; et hoc *per voluntatem Dei*, qui vult homines subdi vicariis suis, ut ipsi a nobis admoniti, operarentur singula mandata Domini juxta modum nostræ jussionis. Et ideo ab his accipere debuimus quod offerebant, quia prius emendantes errores pristinos et vitæ ac morum vitia, ultra quam sperabamus Deo se voverunt. Visum est enim simpliciter illos hoc agere, ut non timeret cui offerebatur accipere, quia non utique hoc animo offerebant, ut redimentes præpositos suos numeribus sibi mulcerent, ut vitia eorum non arguerent, quia mupera excæcant oculos sapientium, et pervertunt verba justorum. Dantes ergo se primum Deo dum emendant vitia, deinde nobis dum sanctis offerunt sumptus, contristari non debuerunt, qui pene antequam inciperent perfecti esse voluerunt. Horum igitur exemplo, libenter ea quæ cœpistis in ministerio sanctorum vos Corinthii debetis perficere. Ita enim institerunt, et ita provocati sumus largitate eorum, ut *rogaremus Titum*, ut ad simile opus vos animaret, ut *quemadmodum cœpit vos*, postquam correcti estis, ad bene agendum informare, *ita perficiat in vobis etiam gratiam istam*, ut incitet vos ad dandum. Quoniam Titi affectum sincerum noverat Apostolus circa istos, necnon et hos obedientes ei, ideo per ipsum etiam ad hoc opus exhortari illos facilius posse significat ut quomodo in cæteris rebus exhortationis suæ fructum in eis habuit, haberet etiam in hac gratia, ut ad ministerium sanctorum promptos eos faceret, ut quia

A jam vitia emendabant, hujus largitatis fructum facerent.

« Sed sicut in omnibus abundatis fide, et sermone et scientia et omni sollicitudine, insuper et charitate vestra in nos, ut et in hac gratia abundetis; non quasi imperans dico, sed per aliorum sollicitudinem etiam vestræ charitatis ingenium bonum comprobans. Scitis enim gratiam Domini nostri Jesu Christi, quoniam propter vos egenus factus est, cum esset dives, ut illius inopia vos divites essetis. Et consilium in hoc do. Hoc enim vobis utile est, qui non solum facere, sed et velle cœpistis ab anno priore. Nunc vero et facto perficite, ut quemadmodum promptus est animus voluntatis, ita sit et perficiendi ex eo quod habetis. Si enim voluntas prompta est secundum id quod habet, accepta est, non secundum id quod non habet. »

Rogavimus Titum ut vos moneat ad gratiam largitatis. Sed et ego vos ad hanc moneo, ut in hac abundetis *sicut in omnibus rebus abundatis fide*, quia in omnibus recta fides jam vobis abundat; et *sermone*, id est gratia loquendi vel in una lingua vel in pluribus abundatis; et *scientia* Scripturarum, vel peritia quarumlibet rerum divinitus concessa. Sunt enim nonnulli qui satis abundant in sermone, sed tamen parum habent scientiæ: et sunt alii qui scientia abundant, sed eloquentiam sermonis non habent. Vobis autem concessit Deus abundanter utrumque, et sermonem scilicet et scientiam, et abundatis in *omni sollicitudine*, quia sufficienter in omnibus estis solliciti, in quibus vos oportet sollicitos esse. *Insuper abundatis et charitate in nos*, id est vestra charitas trausit abundanter in nos, quia copiose nos diligitis. Et sicut jam in his virtutibus abundatis, ita suadeo ut *et in hac gratia largitatis abundetis*, quatenus de vestris rebus abundanter juxta modum possibilitatis vestræ sanctis impendatis. *Non quasi imperans hoc vobis dico* ne videar vos ad hoc invitos cogere, quos ad bene agendum spontaneos volo semper esse, et ne vos sitis transgressores imperii mei. Non quasi imperans, sed quasi consulens dico, ut sanctis necessaria mittatis, et *comprobans*, id est, probatum Deo et hominibus ostendere volens, *bonum ingenium vestræ charitatis per sollicitudinem aliorum*, id est per hoc quod pro aliis, id est pro sanctis criticis solliciti, relevantes inopiam eorum, ut videamini non didicisse, sed naturaliter possidere misericordiam et largitatem. Ita volo comprobare vestram charitatem esse ingeniosam et prudentem, cum sine imperio meo susceperit pauperum Christi sollicitudinem, mittens eis unde relevent egestatem. Vel per sollicitudinem aliorum, id est Macedonum, quos refero vobis sollicitos esse de sustentatione sanctorum pauperum; volo comprobare etiam bonum ingenium vestræ charitatis, ut ostendam charitatem vestram habere bonum ingenium, cum sine jussu meo cœperit sua sponte facere ea quæ audit Macedones fecisse. Et

justum est ut in hac gratia abundetis, atque pauperibus temporalia bona largiter ministretis, quia vos ipsi scitis quantam gratiam vobis Dei Filius contulit, quam misericorditer erga vos egit, qui pauper pro vobis temporaliter fieri voluit, ut vos permanentium divitiarum participes efficeremini. Hanc ejus gratiam scitis, quia cum esset dives in sua majestate propter vos egenus factus est in mundo, ut vos illius inopia divitiis spiritualibus repleremini. Si ergo ille, qui omnium Creator et Dominus est, pro vobis paupertatem sustinuit, cur vos pro ejus amore partem divitiarum vestrarum ejus membris indigentibus non tribuatis? Dives erat. Unde enim homines sunt divites? Auro, argento, familia, terra. Sed omnia per ipsum facta sunt (Joan. 1). Quid ergo illo ditius, per quem factæ sunt divitiæ, etiam illæ quæ non sunt veræ divitiæ? Per illum enim et illæ divitiæ, ingenium, memoria, vita, ipsius corporis sanitas, sensus, confirmatioque membrorum. Et enim cum hæc salva sunt, et pauperes divites sunt. Per illum et illæ majores divitiæ, fides, pietas, justitia, charitas, boni mores. Nemo enim et has habet, nisi per eum qui justificat impium. Ecce quam dives. Quis enim dives, qui habet quod vult alio faciente, an qui facit quod vult et alium habentem? Puto quia ditior est, qui fecit quod habes, quia quod ille habet, tu non habes. Dives est, cum sit in forma Dei æqualis omnino Patri. Sed egenus propter nos factus est, quando semetipsum exinavit formam servi accipiens (Philip. 1). Non autem dictum est, egenus factus est, cum dives fuisset; sed, egenus factus est cum dives esset. Paupertatem enim assumpsit, et divitias non amisit. Intus dives, foris pauper. Latens Deus in divitiis, apparens homo in paupertate. Quia ejus paupertate sumus ditati, quia in sanguine ejus peccatorum nostrorum concisus est saccus. Per illum sanguinem abjecimus pannos iniquitatis, ut indueremur stolam immortalitatis. Ne ergo divitias expavesceremus, et ad eum accedere cum nostra mendicitate non auderemus, pauperem se exhibuit, id est Deus nasci dignatus est homo, virtutem suæ potestatis humilians, ut hominibus divitias suæ divinitatis acquireret, et eos consortes divinæ naturæ faceret. Qui tamen in divinitatis suæ divitiis nobis invisibilis permanens, miris nos poterat virtutibus ditare; sed ut ad internas divitias rediret homo, foras apparere dignatus est pauper Deus. Quia videlicet minus nos amasset, nisi et paupertatem nostram susciperet; nec vim vobis suæ dilectionis ostenderet, nisi hoc quod a nobis tolleret, ad tempus ipse sustineret. Et hoc est quod nunc Apostolus, ut ad largitatis gratiam viscera nostræ compassionis accenderet, ait: Propter vos egenus factus est cum dives esset. Et his verbis hortatur auditores ut largiendo quasi pauperes fiant, ut prosit paupertas eorum, sicut Christi paupertas nobis profuit. Et in hoc, inquit, id est in consideratione tanti beneficii Dei, do, vobis consilium, ut scilicet ad similitudinem Christi paupertatem

A subire non recusetis, ut a sanctis paupertatem effugitis.

Hoc enim vobis est utile, ut per imitationem paupertatis Christi tendatis ad divitias ejus. Hoc vobis est utile, quia magis prodest facientibus quam accipientibus. Utile est vobis, qui jam cœpistis hoc non solum facere, sed etiam velle ab anno priore, id est præterito, vel a priore anno vestræ conversationis usque nunc. Facile quippe est in bono opere obedire etiam nolentem, sed hæc magna in vobis virtus exstitit, qui hoc bonum quod vobis nunc suadeo, et ante voluistis. Sed nunc etiam id factio perficite quod jam voluntate fecistis, ut non solum velitis in corde, sed etiam compleatis in opere. Ita factio peragite, quod voluntate jam dudum cœpistis agere, ut quemadmodum promptus est animus voluntatis, ita promptus sit et animus perficiendi, id est sicut promptus est animus vester ad volendum, ita promptus sit et ad perficiendum ex eo, id est secundum id quod habetis, sive plus, sive minus, ut unusquisque tantum det quantum potest, quoniam voluntas retinens quod dare posset, infructuosa est. Idcirco vobis suadeo dare ex eo quod habetis, quia si voluntas est prompta et parata dare, secundum id quod habet, accepta est Deo secundum illud quod ita tribuit, non secundum id quod non habet. Ac si aperte dicatur: Ne putetis me ab aliquo supra vires exigere, aut tantum a paupere quantum a divite expetere. Omnes enim æqualiter dant, si unusquisque ex tanto dat quantum habet. Quia enim Corinthi ad hoc opus ministerii provocantur, hoc eis iudicatur, ut non plus tribuant quam possunt; ne forte plus offerentes, coacti, non voluntarii, viderentur sine mercede facturi, quia qui coactus aliquid facit, mercedem non habet. Et ideo dicitur eis, quia si voluntas est prompta dando secundum id quod habet, accepta est Deo, non secundum id quod non habet. Ille enim dat ex eo quod habet, qui sibi necessaria retinet, et cætera quibus carere potest, largitur pauperibus. Qui vero de his tribuit quæ suo usui necessaria sunt, ille dat secundum id quod non habet, id est ultra vires suas, quoniam illa quibus indiget, quasi non habet, quia carere non potest, et idcirco ad dandum illa non habet. Propter quod nunc dicitur Corinthiis qui tenaces sunt, quia voluntas quæ sua sponte tribuit secundum id quod habet, ut sibi scilicet necessaria retineat, placens est Deo: non illa quæ coacta tribuit secundum id quod non habet, id est quod sine murmuratione ferre non potest. Non enim intelligendum est, non esse Deo acceptum si quis devoto corde obtulerit etiam ultra suum posse, cum Macedones inde multum sint laudati, quoniam supra virtutem fuerunt ad dandum voluntarii. Illi enim non indigerunt admonitione ut Corinthii, sed ultro obtulerunt cum precibus, ut probarent se tota voluntate hoc facere, ut plus offerrent quam poterant. Ideoque fuit acceptabile. Quanto enim amplius obtulerunt, tanto plus accepturi sunt. Corinthiis vero

tanquam adhuc infirmantibus parcitur, unde et A subditur :

« Non enim ut aliis sit remissio, vobis autem e tribulatio, sed ex æqualitate in præsentī tempore e vestra abundantia illorum inopiam suppleat, ut e et illorum abundantia vestræ inopiæ sit supple- e mentum, ut fiat æqualitas, sicut scriptum est : e Qui multum, non abundavit; et qui modicum, non e minoravit (Exod. xvi). »

Jure dixi voluntatem esse acceptam, si prompta fuerit dare secundum id quod habet. Non enim suadeo vobis tantum dare, ut aliis quibus dederitis, sit remissio, id est inopiæ allevatio et relaxatio, sed vobis tribulatio, id est inopia nimia. Hæc procul dubio Apostolus condescendendo infirmis, ut præmisimus, intulit, quoniam quibusdam inopiam ferre non valentibus tolerabilius est minus tribuere, quam post largitatem suam ex inopiæ angustia murmurare; cum enim dantis mens ferre inopiam nescit, si multa sibi subtrahit, occasionem contra se impatientiæ exquirat. Prius ergo præparandus est animus patientiæ, et tunc aut multa aut cuncta sunt largienda ne dum minus æquanimitèr inopia irruens fertur, et præmissæ largitatis merces pereat, et adhuc mentem deterius murmuratio subsequens perdat. Non hoc, inquit, suadeo ut alii otiose vivant de bonis vestris, et tribulatione famis vos cruciemini; sed ut ex æqualitate subveniatis illis in præsentī tempore, id est ut unusquisque quantum habet, ad tempus dividat cum sanctis, quia non plus exigitur quam sibi retinere debet, dicente Scriptura : « Diliges proximum tuum sicut teipsum (Levit. xix), » etc : « Qui habet duas tunicas, det non habenti (Luc. iii). » Vel in præsentī tempore brevis hujus vitæ communique illis vestras divitias, ut et ipsi in æterna vita communicent vobis suas. Et hoc est quod subditur : vestra abundantia carnalium bonorum suppleat, etsi non ex toto compleat illorum corporalem inopiam, qui omnia mundi deseruerunt, ut illorum spiritualis abundantia, sit supplementum spiritualis vestræ inopiæ. Hoc jubet Apostolus, ut quia juxta tempus sancti inopiam patiebantur, deserentes omnia mundi, et se solis divinis operibus mancipantes, ut orationi vel doctrinæ insistant ad profectum multorum, cæteri fideles qui negotiis vel artibus insistent, aut D paternas habent facultates, ministrent eorum inopiæ, ut iterum sancti illis ubi divites sunt, et isti inopes, id est in spiritualibus et æternis communicent eis, quasi vicem rependentes ministerio eorum. Nam cum pauci sint qui spiritualia dona percipiunt, et multi qui rebus temporalibus abundant, per hoc se divites virtutibus pauperum inserunt, quod eisdem sanctis pauperibus de suis divitiis solatia ministrent. Vestra, inquit, abundantia illorum inopiam suppleat, ut et illorum abundantia vestræ inopiæ sit supplementum, ut videlicet sollicitè perpendamus, quia et eos quos nunc inopes cernimus, abundantes quandoque videbimus; et qui abundantes aspiciamus, si largiri negligimus, quandoque inopes erimus.

Qui itaque nunc in hoc tempore subsidium pauperi tribuit, ab eo postmodum perpetua recepturus, ut ita dicam, quasi ad frugem terram excolit, quæ quod acceperit uberius reddit. Restat ergo ut nunquam elatio surgat ex munere, quando videlicet dives, ex eo quod pauperi tribuit, agit ut in perpetuum pauper non sit. Qui enim vivunt in sæculo, non habent merita ad vitam æternam sufficientiâ (Matth. v). Sed quia pauperes Christi, quorum est regnum cælorum per eleemosynas, amicos et debitores sibi fecerunt, per merita eorum consequentur quod per se non merentur, ut tunc fiat utrorumque æqualitas, non quia non differant, sed quia omnes idem regnum habebunt, et unicuique sufficiet quod habebit. Vel æqualitas est ut, quia isti in hoc tempore ministrant sanctis, reddantur eis vices ab eis in futuro, quia debitores illi faciunt sanctos. Æqualitas ipsa est pax nostræ Jerusalem, ut opera misericordiæ corporalia jungantur operibus prædicationis spiritualibus, et fiat pax dando et accipiendo. Fiat æqualitas in regno, sicut scriptum est (Exod. xvi) in signo. Qui multum subaudi collegerat de manna, id est amplius quam gomor, non abundavit, id est non plus habuit quam gomor, et qui modicum collegerat, id est minus quam gomor, non minoravit, id est non minus habuit quam gomor. Quando enim ventum est ad epulas, omnes æqualiter habuerunt, hoc significante Deo, quia populus suus, qui per desertum hujus vitæ graditur ad terram promissionis æternæ, æqualitatem habiturus in convivio est supernæ refectionis, quia omnes Deum videbunt. Et qui multum hic laboravit, atque plurima merita congregavit, non plus quantum ad æternam vitam pertinet habebit, quam ille qui modicum bonæ operationis egit. Unde dicitur in Evangelio quia illi qui diversis horis ad vineæ culturam accesserunt, omnes pariter in vespera denarium acceperunt (Matth. xx). Tunc ergo fiet æqualitas, quia omnes habebunt vitæ æternæ æqualitatem. Omnes erunt in æqualitate, quia omnes erunt in æternitate. Non enim longior erit vita sanctorum pauperum, quam vita electorum sæcularium. Tamen sancti pauperes majorem habebunt in carne et anima gloriam et beatitudinem. Idcirco autem æquabuntur ita divites sanctis pauperibus in perceptione denarii vitæ perennis, quia nunc æquant sibi illos in divitiis suis non secundum paritatem, sed ut sustententur de rebus eorum sicut ipsi. Rex enim de toto suo regno non plus habet nisi victum et indumentum, quo carere præsens vita non potest. Et idcirco dives pauperem sibi æquat, ei ei cibos et vestimenta præbeat, licet ipse plus retineat quam largitur. Qui multum, inquit, habuit non abundavit, quia scilicet quod plus habebat, dedit indigentibus; et qui modicum, non minoravit, quia accepit ab illo, qui abundavit. Vult nos omnia communiter possidere, ut perfecti doctrinam non abscondant, et habentes substantiam, eis non denegent victum. Plus etiam in spe futuri sæculi habent sancti, quam hi qui in isto tempore videntur divi-

tes; et tamen utrique, sicut dictum est, in illo sæculo æquabuntur, ut sicut istorum beneficio nunc sustentatur inopia sanctorum, ita et hi beneficio sanctorum tunc divites fiant. Non enim totos se dederunt Deo, ut hic pauperes, illis essent divites, ideo videntur illic esse pauperes. Sed ditabuntur sanctorum suffragio, quorum se virtutibus inseruerunt, dum eos ad bene agendum sustentarent, ministrando illis necessaria, quia « qui recipit justum in nomine justii, mercedem justii accipiet (*Matth. x.*) »

« Gratias autem ago Deo, qui dedit eandem sollicitudinem pro vobis in corde Titi, quoniam exhortationem quidem suscepit, sed cum sollicitior esset, sua voluntate profectus est ad vos. Misimus etiam cum illo fratrem nostrum, cujus laus est in Evangelio per omnes ecclesias. Non solum autem, sed et ordinatus est ab ecclesiis comes peregrinationis nostræ in hac gratia, quæ ministratur a nobis ad Domini gloriam et destinatam voluntatem nostram, devitantes hoc, ne quis nos vituperet in hac plenitudine, quæ ministratur a nobis. Providemus enim bona non solum coram Deo, sed etiam coram hominibus (*Rom. xii.*). Misimus autem cum illis et fratrem nostrum, quem profectus habemus in multis sæpe sollicitum esse, nunc autem multo sollicitiorem, confidentia multa in vos, sive pro Tito, qui est socius meus et in vobis adiutor; sive fratres nostri apostoli ecclesiarum, gloria Christi. Ostensionem ergo quæ est charitatis vestræ et nostræ gloriæ pro vobis, in illos ostendite in facie ecclesiarum Dei. »

Deus quia justus est, sciens Corinthios velle proficere, Titi affectum accendit erga eos, ut adimpleret exhortatione sua voluntatem illorum in opere bono, qui videns profectum illorum, lætatus est in eis. Et hoc est: Ego quidem, inquit, sollicite vos ad opus misericordiæ provoco, sed gratias ago Deo, qui per Spiritum sanctum dedit in corde Titi eandem sollicitudinem, quam ego habeo pro vobis, ut non deficiatis, sed proficiatis in opere bono, quoniam non repugnavit, sed exhortationem nostram suscepit, qua exhortabamur eum ire ad vos incitandos. Exhortationem quidem nostram suscepit, voluntatem vero non per nos habuit, quia jam habebat. Et voluntate quidem propria sollicitus erat pro vobis, sed exhortatione nostra factus est sollicitior. Et cum ita sollicitior factus esset, profectus est ad vos sua voluntate, quam illi Deus inspiraverat. Vel suscepit exhortationem, id est suscepit hoc onus laboris, ut vos exhortaretur ad largitatem sustentationis sanctorum; sed dum propter vestrum profectum esset factus sollicitior, profectus est ad vos sua voluntate, id est videns vos proficere circa bonos actus, sollicitior factus est erga curam vestræ salutis, ita ut voluntarius proficisceretur ad vos, qui prius etiam rogatus excusabat ire propter vitia vestra. Ipse quidem profectus est sponte. Sed nos misimus etiam cum illo fratrem illum egregium, cujus

est in Evangelio per omnes ecclesias. Hoc de

Luca intelligitur, qui laudem in Evangelio præ cæteris habet, quia ubicunque recitatur Evangelium, laudatur Lucas, qui tam eleganter illud scribere meruit. Sed non solum laudatur ubique de Evangelii descriptione, sed etiam ordinatus est ab Ecclesiis comes peregrinationis nostræ, ut mecum pergeret quocunque vado peregrinans ad prædicandum, et sit mihi comes et adiutor ubique in hac gratia, quæ ministratur a vobis, id est in hac largitione elemosynarum faciendæ, cujus nos ministri sumus ad Domini gloriam, ut Dominus noster Jesus Christus inde glorificetur: et ad voluntatem nostram, quæ volumus ut bene detis; voluntatem dico, destinatam ad hujusmodi studium, et debitam ac divinitus præordinatam. Vel in hac spiritali gratia Novi Testamenti, quæ gentibus per Evangelium ministratur a nobis ad gloriam Domini, et ad complendam voluntatem nostram, quæ volumus ut gentes salvæ fiant, quæ voluntas ad hoc destinata est. Lucam commendat Apostolus, quia hunc ignorabant Corinthii, ut scirent in quanta jam essent boni opinionone, ad quos tales viri mittebantur, ut congauderent cum eis, augentes eos in fide operationis Dei, ad cujus gloriam sollicite hoc agebant, ut ipse agnosceretur in his. Nonnulli vero senserunt id et de Barnaba posse intelligi, quia et ipse ordinatus est comes peregrinationis Pauli (*Act. xiii.*), quando cum eo missus est ad gentes, licet cum eo non perseveravit, Lucas autem perseveravit. Et constitutus est comes ejus in hac elemosynarum gratia, quia hoc decreverunt apostoli, ut ipse et Barnabas prædicarent gentibus (*Act. xv.*), sed tantum memores essent sanctorum pauperum qui erant in Judæa, ut quando famæ illa duraret, mitterent eis victualia. Et Barnabæ laus erat in Evangelio, quod strenue prædicaverat per omnes Ecclesias, in quibus cum Paulo fuerat. Sed hoc dissonare videtur, ut hunc Paulus fratrem, et non potius apostolum vel socium nominet; et quod hunc cum Tito quasi minorem misisse se dicat, et non potius Titum cum eo; vel quod hunc Corinthiis quasi ignotum commendet, cum in priore epistola declaraverit hunc eis incognitum non esse, dicens: « Aut solus ego et Barnabas non habemus potestatem hoc operandi (*I Cor. ix.*)? » id est stipendia sumendi. De Luca vero congrua sunt omnia, quia, etsi nunc apud nos Lucas major est Tito, apud animos tamen Corinthiorum minor erat, ideoque convenienter missus esse cum eo dicitur. Excellentiam vero Titi noverant Corinthii, quia ipse Corinthius erat. Misimus, inquit, cum Tito comitem nostræ peregrinationis, qui per omnes Ecclesias in Evangelio laudatur, devitantes hoc, ne quis nos vituperet, id est reprehendat in hac elemosynarum plenitudine, quæ ministratur a nobis, id est quæ nostro ministerio fit. Nisi enim testes idoneos et boni testimonii secum Apostolus habuisset, infirmi vel infideles cum tantam largitionem tanque copiosam viderent, aliquid super Apostolo sinistre possent æstimare, ut putarent eum tanquam sibi accipere et

In suos convertere ea quæ accipiebat ad supplendas necessitates sanctorum, per se offerenda vel distribuenda indigentibus. Sed ut omnem pravam suspicionem a se removeret, multos idoneos adhibuit testes in hac gratia plenarie pauperibus ministranda. Ideo, inquit, devitamus vituperium, quia *providemus bona*, id est providemus ut ea quæ facimus, sint bona non solum coram Deo, sed etiam coram hominibus. Coram Deo sufficit nobis bona conscientia, sed coram hominibus necessaria est bona fama. Propter nos enim conscientia nostra sufficit nobis, sed propter homines fama nostra non pollui, sed pollere debet in eis. Qui enim fidens conscientia, negligit famam suam, crudelis est, quoniam salutem proximorum spernit. Vel ideo se dixit Apostolus devitare, ne quis eum vituperaret in hac plenitudine doctrinae ac miraculorum, quia negligens circa curam sanctorum judicari posset, si segnius ea quæ illis erant necessaria, procuraret, quoniam illi et Barnabæ injunxerant priores apostoli, ut memores essent pauperum, sicut jam diximus (Act. xv). Ne ergo diceretur de eo: Bene quidem prædicat, et religiose vivit, sed non est memor sanctorum pauperum, ut sibi fuerat injunctum, cum ipse in omnibus esset invituperabilis, nec in hac parte indiligens judicari voluit, sed ad faciendam sanctis largitionem, credentes ex gentibus monuit, quatenus et hoc opere completo, in omnibus appareret ejus sollicitudo et providentia. Providemus enim, inquit, bona non solum coram Deo, sed etiam coram hominibus. Providit bona coram Deo, dum quod jubet Deus circa ministerium sanctorum fieri doceret, Providit bona coram hominibus, dum tales ad hoc opus suadendum mitteret, qui non facerent eis scandalum, sed probitate sua provocarent eos, ne bona ejus doctrina per improvidos ministros in vituperationem caderet. Nec solum, inquit, duos istos misimus, sed etiam fratrem alium cum illis, quem quidam dicunt esse Apollo, sed incertum est. *Quem sæpe probavimus in multis sollicitum esse de vestra salute, sed nunc experti sumus eum multo sollicitiorem pro vobis*, cum audisset vos esse correctos, certus quia obedietis ad bene agendum. Sollicitior, inquam, factus est videndi et exhortandi ad ministerium sanctorum pro hac confidentia vestrae immutationis in melius; sive pro Tito, qui de vobis ei multa retulit, qui non mentiretur, qui est socius meus, pergens mecum ubique ad prædicandum; et in vobis est adjutor meus, id est in vestra conversione et correctione. Ipse est adjutor meus in vobis, sive cæteri fratres nostri, quos ad vos direxi, qui sunt apostoli, id est fundatores ecclesiarum, gloria Christi quia in locis illis prædicaverunt Christum, ubi nunquam fuerat; et ad gloriam construxerunt ecclesias ex his, quos ad fidem converterunt. Vel fratres nostri priores apostoli, qui cum Domino in carne fuerunt, sunt adjutores mei in vobis; sive quia nonnunquam per vos transierunt, et vobis aliquid meliorationis contulerunt, sive quia

A suæ prædicationis fama ac vitæ vobis profuerunt. Et quandoquidem tales misimus viros ad vos, ergo suscipite eos cum honore et dilectione sicut oportet. Scilicet ostendite nunc in illos ostensionem vestrae charitatis, id est charitatem quam ostendere consuevistis honorifice suscipiendo cæteros fratres, nunc ostendite suscipiendo istos accuratius, ut bona quæ de vobis audierunt probent esse vera. Et ostensionem gloriae nostræ pro vobis, id est opera charitatis, quæ similiter ostendere solent in susceptione fratrum, unde et nos gloriamur pro vobis apud alias Ecclesias, nunc ostendite in istos, reverentius et devotius eos suscipiendo. Et hoc facite in factis et in conspectu Ecclesiarum, ut cæteræ Ecclesiae cognoscant vera esse bona quæ de vobis audierunt, et accipiant a vobis bonum exemplum.

CAPUT IX.

« Nam de ministerio quod fit in sanctos, ex abundanti est mihi scribere vobis. Scio enim promptum animum vestrum, pro quo de vobis glorior apud Macedones. Quoniam et Achaia parata est ab anno præterito, et vestra æmulatio provocavit plurimos. Misimus autem fratres, ut, ne quod gloriamur de vobis, evacuetur in hac parte, ut, quemadmodum dixi, parati sitis, ne, cum venerint Macedones mecum, et invenerint vos imparatos, erubescamus nos, ut non dicamus vos in hac substantia. Necessarium ergo existimavi rogare fratres ut præveniant ad vos, et præparent repromissam benedictionem hanc paratam esse sic quasi benedictionem, non quasi avaritiam. »

De receptione justorum vos admoneo, nam de ministerio quod fit in sanctos, non necesse est ut vos admoneam. De illo enim ministerio est mihi ex abundanti, id est ex superfluo scribere vobis. Superfluum est enim, si commoneas eum, quem scis facturum. Sed tamen ut diligentiam meam ostendam, et vos promptiores faciam, non est otiosum si scribo, ut sciatis magna vos diligentia debere peragere quod frequenter vobis intimatur. Ideo autem videtur superfluum ut vobis de hac re scribam, quia acio animum vestrum ad hanc largitionem faciendam esse promptum, pro quo animo vestro ad hanc gratiam devoto glorior apud Macedonas; videte ne frustra. Solet enim se meliorem præbere ille, de quo bene sentitur ab alio. Idcirco de vobis glorior, quoniam non solum Corinthus, quæ est metropolis civitas, sed etiam universa Achaia quæ est magna regio, parata est ab anno præterito dare quod sanctis mittatur, et vestra æmulatio, id est fervor imitandi vos provocavit plurimos ad hoc pietatis opus. Cæteræ enim Ecclesiae dum audiunt Corinthios prius multis erroribus fuisse implicatos, postea vero correctos et misericordiae operibus intentos, æmulatione eorum incitatae sunt ad bonum opus, quasi cogitantes apud se et dicentes, quia si hi qui post acceptam fidem male conversati fuerant, hanc coeperunt habere voluntatem, cur non magis illi, in quibus hæc vitia

non sunt reperta? Ego quidem, inquit, glori-
 splendore animi vestri, qui promptus est ad largien-
 dum, sed *misimus fratres*, non ut vos ad hoc exhor-
 tarentur, ad quod ex animo parati estis; sed ut vos
 faciant memores, ne circa votum et promissionem
 existatis negligentes. Et hoc est, animus quidem
 vester promptus est, sed *misimus prædictos fratres*
 ad vos, ut *sitis parati* ad proferendum quod dede-
 ritis, ne si imparati fueritis, *evacuetur* in hac parte
 totum quod gloriamur de vobis. *Misimus*, inquam,
 illos, ut, *quemadmodum dixi* illis vos esse paratos,
sitis parati vel quemadmodum dixi vobis, *sitis pa-*
rati; sive quemadmodum dixi Macedonibus, *ne forte,*
cum venerint mecum Macedones, et invenerint vos
 imparatos, *erubescamus nos in hac substantia*, id est
 in hac re possessa, in hac divitiarum substantia,
 quæ pauperes sustentare debuit. Dixi ne erubescam
 nos qui de vobis gloriabamur, *ut non dicamus*
 vos erubescere, id est ut vestram erubescientiam ta-
 ceamus, Vester enim pudor erit maximus in nostra
 verecundia, si inventa fuerit impræparatio vestra.
 Nam si hoc inventum non fuerit, quod testificatus
 sum de vobis, et ego erubescam in vobis, qui sub-
 stantiam sanctis promissam non reddidistis; et vos
 amplius confundemini, qui nec propterea quod testis
 vobis fui, studuistis agere, ut me dixisse verum de
 vobis probaretis, ne ergo contingat ut et vos et nos
 graviter erubescamus, *necessarium existimavi rogare*
prædictos fratres, ut me præveniant euntes ad vos,
et præparent interim benedictionem, id est largam et
 charitativam donationem; benedictionem dico, *re-*
promissam, quia jam promisistis et repromisistis
 eam; et præparando faciant *hanc esse paratam* in
 adventu nostro, *sic quasi benedictionem*, id est quasi
 opis charitatis, *non quasi avaritiam*, id est non quasi
 strictam dationem, de qua doleat qui dederit. Avari-
 tia enim vocatur datio, quæ fit tenaci et parco ac
 tristi animo; benedictio autem, quæ fit largo et ala-
 cri animo. Tractum est hoc vocabulum a patriarchis,
 qui benedictione sua filios suos omnium fertilitate
 bonorum replebant, ut Isaac benedicens Jacob et
 Esau, et ut Jacob benedicens Ephraim et Manassen
 (Gen. xxvii, xlviij).

« Hoc autem dico : qui parce seminat, parce et
 metet; et qui seminat in benedictionibus, de bene-
 dictionibus et metet. »

Hoc loco ad magna largiendi studia mentes au-
 dientium accendit Apostolus, ne qui multa dare po-
 test pauca largiatur. Fratres, inquit, præcesserunt
 me ut præparent dationem vestram, sed ego cur
 large detis præscribo, quia *hoc dico* vobis, quod *qui*
parce seminat, id est avare tribuit, *parce* etiam *me-*
tet, id est parum in futuro sæculo recipiet. Parcus
 enim est avarus, cui extorquetur quod dat, dum
 compellitur tribuere vel propter verecundiam, vel
 propter longam multorum admonitionem. Huic par-
 va messis est, quia parco animo dedit, licet magna
 videatur dedisse. E contrario vidua quæ in gazophy-
 lacium misit duo-minuta est laudata misisse plus

quam omnes divites (Mare. xii; Luc. xxi), quia
 largo animo totum quod habebat misit, cum cæteri
 parco animo mitterent, et multo majora quam mite-
 rebant, sibi retinerent. Et ideo parce seminabant,
 quamvis multa seminare viderentur, quia tantum
 seminare nolebant, quantum poterant. Dare enim
 non est amittere, sed seminare; ad tempus carere,
 ut postmodum multiplicius habeatur. Sed qui parce
 seminat, id est qui non vult large tribuere cum pos-
 sit, parce et metet, id est exiguum remunerationis
 colliget, quia sicut ipse nunc est parcus ad tribuen-
 dum, ita et Deus erit parcus ad retribuendum, *et qui*
seminat in benedictionibus, id est qui tribuit volun-
 tate bona sub spe futuræ remunerationis, hic *metet*
de benedictionibus, quando cum cæteris eleemosy-
 nariis audiet: « Venite, benedicti Patris mei, perci-
 pite regnum, quia esurivi, et dedistis mihi mandu-
 care (Matth. xxv). » Seminat enim in benedictio-
 nibus, ubi plus pensatur affectus quam census, id
 est qui pro posse suo bona large tribuit in benevolis
 affectionibus, et idcirco de benedictionibus Dei me-
 tet fructum vitæ perennis.

« Unusquisque prout destinavit in corde suo, non
 ex tristitia aut ex necessitate. Hilarem enim da-
 torem diligit Deus (Eccli. xxxv). »

Et quia de benedictionibus supernis metet, qui
 nunc in benedictionibus bonæ voluntatis seminat,
 id est læto et largo animo dat, sive parum, sive
 multum sit illud quod dat, ideo *unusquisque det*
prout destinavit in corde suo, id est sicut deliberavit
 et præordinavit in consilio suæ rationis et volunta-
 tis, ut quidquid in corde suo disposuit se daturum,
 det; et eo devotionis affectu quo proposuit det; sci-
 licet *non ex tristitia aut ex necessitate*, id est non
 invitatus aut coactus. Eleemosyna enim plerumque fit
 a tristibus et murmurantibus ut careant tædio in-
 terpellantis, non ut viscera reficiant indigentis; sed
 non est acceptabilis Deo talis datio. Et ideo non ex
 tristitia, sed ex lætitia cordis, est dandum quod datur
 quia ex his qui tribuunt, hunc eligit Deus, ut ei re-
 tribuat, qui devoto animo tribuit, quasi thesauri-
 zans apud Deum. Sunt enim nonnulli qui multum
 rogati ab aliquibus, tædio precis sibi factæ ad dan-
 dum compelluntur importunitate postulationis as-
 siduæ; et sic dant tristes et inviti, non ex affectu
 dilectionis aut piæ compassionis (Luc. xviii). Non-
 nulli sunt etiam, qui licet non sint tristes vel co-
 actione dolentes, tamen quando largiuntur, faciunt
 ex necessitate; sive quia omnes alii dant, sive quia
 multi ut largiantur, admonent; et cum sic honestate
 sua non possint non dare, quadam neces-
 sitate ad dandum coguntur. Sed quisquis dationem
 suam Deo vult esse gratam, non det ex tristitia vel
 ex necessitate, sed ex lætitia et ex voluntate, quia
hilarem datorem diligit Deus, id est illum qui per
 charitatem lætus et hilaris ac serenus spe supernæ
 retributionis tribuit.

« Potens est autem Deus omnem gratiam abun-
 dare facere in vobis, ut in omnibus semper occa-

« nem sufficientiam habentes, abundetis in omne
« opus bonum, sicut scriptum est : Dispersit, dedit
« pauperibus, justitia ejus manet in sæculum sæ-
« culi (*Psal. cxl.*) »

Ego quidem vos admoneo ad hanc largitatis gratiam, sed Deus potens est facere in vobis quod admoneo. Ego enim verba exhortationis edere possum, sed ille mentes vestras in melius promovere potest, quia ego quidem plantare et rigare possum, ille autem dare sufficit incrementum (*I Cor. iii.*). Et ideo potentiam ejus adesse vobis exopto, ut sicut in emendatione vitiorum et veritate doctrinæ corda vestra tetigit, ita et in gratia largitatis faveat cœptis vestris. Ipse est enim potens facere *ulterim abundare in vobis* non solum istam, sed et *ceteram gratiam*, ita ut in omnibus rebus semper habentes omnem sufficientiam, id est non indigentes aliquando his quæ ad salutem necessaria sunt, *abundetis in omni opus bonum*, id est in largitione sicut in cæteris. Si enim solam vobis sufficientiam elegeritis, poteritis in Dei opere abundare, quia illud vobis retinendo quod sufficit, cætera in usus pauperum expendetis, et hoc erit abundare in opere bono. Licet enim exigui hominis parvum sit munus. abundat tamen. quia bono animo fit. Exteriora enim nostra Domino quamlibet parva sufficiunt. Cor namque et non substantiam pensat nec perpendit quantum in ejus sacrificio, sed ex quanto profertur. Qui enim plus habet, plus offerre debet. Ita potest Deum omnem gratiam facere in vobis abundare, ut sine damno vestro aliis beneficia largientes, abundetis tendentes per largitatem in omne opus bonum, *sicut scriptum est*, id est ut neque si in vobis avaritia, neque prodigalitas, sed bona vestra diffuse et rationabiliter detis cum bona intentione, non pro temporali commodo, sed pro æterna remuneratione, sicut justum virum fecisse dicit Scriptura (*Psal. iii.*): *Dispersit*, id est non uni omnia tribuit, sed diverso modo his et illis sparsit, ut pluribus proficeret, et unicuique juxta quod decebat. Per hoc avaritia removetur. *Et dedit* non indiscrete omnibus, neque divitibus aut histrionibus, sed cum ratione et discretione solis *pauperibus*, qui in hoc sæculo non possent ei reddere. Per hoc removetur vitium avaritiæ contrarium, id est prodigalitas, et etiam appetitio temporalis retributionis. Et ideo *justitia ejus*, id est justum opus misericordiæ ejus *manet in sæculum sæculi*, id est in æternum quia ex eo quod temporaliter juste egit, æternam habet justitiam et vitam. Justus enim est, qui bona mundi communia reputat, qui sciens Deum omnia communiter omnibus dare, quia solem suum oriri facit omnibus et pluit omnibus, et terram dedit omnibus (*Matth. v.*); idcirco dividit cum his qui copiam terræ non habent, ne beneficiis Dei privati videantur. Et quia sibi soli non detinet quoddam a Deo scit omnibus datum, sed credit esse justum ut habens det non habenti, idcirco justitia ejus manet in æternum quia in futuro sæculo hanc secum habebit in per-

petuum. Et si hujus, qui pauperibus dedit, justitia manet in æternum, quanto magis ejus qui ministravit sanctis? Pauperes enim dici possunt, qui publice egeni sunt. Sancti autem discernuntur ab his, quia ipsi sunt servi Dei insistentes orationibus ac jejuniis, et puram vitam ducentes.

« Qui autem administrat semen seminanti, et panem ad manducandum præstabit, et multiplicabit semen vestrum, et augebit incrementa frugum justitiæ vestræ, ut in omnibus locupletati, abundetis in omnem simplicitatem, quæ operatur per nos gratiarum actionem Deo. »

Vos debetis alacriter ministrare sanctis ob spem supernæ retributionis. Sed et in hac vita penuriam non timeatis quia Deus *qui administrat semen seminanti, præstabit* ei etiam panem ad manducandum interim, donec ex illo semine frugem colligat, et *multiplicabit semen vestrum*, quod in terram misistis, ut inde copiosa messis exsurgat, unde plures eleemosynas facere possitis. Omnia Dei sunt, et semina et nascentia, et Dei nutu crescunt et multiplicantur ad usus hominum. Deus ergo qui hæc dat, et ipse jubet de his dari illis qui indigent. Ac per hoc qui dat juxta voluntatem Dei, augetur ei divinitus, ut habeat unde adhuc amplius largiatur. Vult enim Deus ut fideles qui habent hujus mundi substantiam, ministrent necessitatibus sanctorum, ut nihil illis desit, qui celsiorem sanctitatis gradum in ecclesia tenere voluerunt, ut spei sæcularis vincula cuncta præcederent, et animum liberum divinæ militiæ dedicarent; et quisquis eis bene ministraverit, amplificetur illi semper unde largius ministrare possit. Deus itaque qui administrat semen seminanti, unde in futuro anno vivat et eleemosynas faciat, præstabit interim et panem, id est subsidium vitæ præsentis, non ad superfluitatem, sed ad manducandum, id est ad necessarium usum. Et ne sitis solliciti de tempore futuro, quia ipse propter alimenta præsentia quæ vobis largietur, non dimittet quin semen vestrum multiplicet, et fruges crescere faciat, ut semper magis ac magis dare sufficiatis, et augebit incrementa frugum justitiæ vestræ, id est multo abundantiora incrementa dabit frugibus, quas promeretur justitia vestra. Justitia enim est, ut quia Deus dat retribuatur ex eo et homo illi cui deest. Et quia vos hujusmodi justitiam servastis, ut, sicut Deus vobis non habentibus tribuit, ita et vos aliis qui non habent tribuatis, idcirco divinitus augetur incrementa frugum vestrarum, *ut in omnibus necessariis locupletati* rebus. *abundetis in omnem simplicitatem* id est in omnem largitionem non duplici, sed simplici animo factam. Qui enim bene et simpliciter sanctis ministrat, amplificatur ei nutu divino, ut habeat unde semper largiri possit, et in præsentis locupletatus, et in futuro sæculo. Semel enim seminans bis metet, id est ex una operatione bona hic et in futuro retributionem percipiet. Ipse tamen non duplici intentione debet operari bonum, ut inde quærat et in isto et in alio sæculo remunerationem, ne computetur

in eis, de quibus dictum est: Receperunt mercedem suam (*Matth. v*); sed simplici corde solam in superis retributionem appetat, licet Deus illi et in hoc sæculo retribuatur. Potest semen intelligi, quidquid pro Deo datur. Et ipse qui administrat semen seminanti, id est qui dat eleemosynario rem quam pauperi tribuat, præstabit etiam panem ad manducandum, id est præbebit unde possit vivere. Et multiplicabit semen vestrum, id est multipliciter abundare faciet rem vestram, quam seminatis dando pauperibus, ut habeatis et quod largius seminatis, et unde vivatis. Et auget incrementa frugum justitiæ vestræ, id est augmentabit eleemosynas vestras, pro quibus frugem æternæ retributionis accipiet justitia vestra. Justitia enim est observatio mandatorum Dei, et inde fruges, id est fructus æternæ remunerationis proveniunt. Incrementa frugis hujus, sunt eleemosynæ, pro quarum merito et hic virtutes augentur, et in futuro gloria crescit. Vel incrementa cœlestium frugum vestrarum sunt affectiones dandi largius, et subveniendi indigentibus, quia quanto majori affectu piæ compassionis subvenit quis indigentia proximi, tanto majorem sibi frugem acquirit æternæ refectionis. Et Deus sic auget semen vestrum et frugem, ut locupletati in omnibus corporalibus et spiritalibus rebus, abundetis, id est interiori bona voluntate, et exteriori bona operatione. Abundetis dico, tendentes in omnem simplicitatem, id est in hoc ut puro et simplici corde faciatis omnia, ut a solo Deo retributionem de omnibus queratis, ut neque subjectionem a pauperibus, neque laudem ab hominibus desideretis, nec ullam in hac vita remunerationem, quæ simplicitas vestræ intentionis in opere bono operatur per nos gratiarum actionem Deo, id est facit nos agere gratias Deo, qui vobis inspiravit hanc voluntatem, ut ita simplici intentione faciatis in sanctos collationem, et cætera quæ pertinent ad animæ vestræ salutem. Vel per nos prædicatores et exhortatores operatur gratiarum actionem, id est agit ut illi qui beneficia suscipiunt, gratias agant Deo.

« Quoniam ministerium hujus officii non solum supplet ea quæ desunt sanctis, sed etiam abundat per multas gratiarum actiones in Domino, per probationem ministerii hujus, glorificantes Deum in obedientia confessionis vestræ, in Evangelio Christi, et simplicitate communicationis vestræ in illos et in omnes, et in ipsorum obsecratione pro vobis, desiderantium vos propter eminentem gratiam, Dei in vobis. Gratias ago Deo super inenarrabili dono ejus. »

Ideirco pro vestra simplicitate, id est pro largitione simplici animo facta aguntur Deo gratiæ, quoniam multa bona continentur in ea. Quoniam ministerium hujus officii, id est ministratio quæ per officium nostrum a vobis exhibetur sanctis, non solum supplet ea quæ desunt sanctis, id est non solum repellit indigentiam sanctorum, qui non laborant, sed orationibus et divinæ contemplationi vacant,

sed etiam plus operatur, scilicet abundat gratiarum actione facta per multos in Domino, id est causa et incitamentum est multis ut agant gratias pro vobis in operatione Domini, quæ refulget in vobis. Hoc est dicere: Ministratio nostra quæ fit per dispensationem officii nostri, non solum necessarios sumptus exhibet sanctis, sed etiam in hoc abundat, ut non hi soli qui beneficio vestro sustentantur, sed et alii multi gratis pro vobis agant Deo, commendantes factum vestrum Domino, ut paucis tribuentes, a multorum obsecrationibus Deo commendemini. Per multos agantur pro vobis gratiæ, et hoc per probationem ministerii, id est per hoc quod experiuntur, sive laudant hanc ministrationem vestram. Multos dico glorificantes Deum in obedientia confessionis vestræ, in Evangelio Christi. Probantes enim mentem vestram in hoc opere, glorificant in vobis Deum, cujus spe firmati, obedistis in Evangelio Christi; et quod ore confitemini, actione demonstratis. Inde glorificant Deum, quia vos obedistis facientes opera quæ exigit confessio Christianæ fidei, et hoc in Evangelio, id est in præceptis Evangelii Christi, et glorificant illum etiam in simplicitate vestræ communicationis, id est in eo quod non duplici, sed simplici spe facitis vestra bona communia in illos sanctos, qui sunt Hierosolymis, et in omnes alios quos videtis egentes. Glorificant etiam Deum in obsecratione ipsorum pro vobis, id est in eo, quod ipsi quos sustentatis, obsecrant pro vobis. Ipsorum dico, desiderantium vos videre in cœlesti regno, vel etiam in præsentis sæculo, ut gaudeant ex conspectu vestro. Quis enim non cupiat oculis videre necessitatibus suis propter Dei nomen subjectos? Ipsi vos desiderant videre, et hoc propter gratiam Dei eminentem in vobis, id est propterea quia Deus tam excellenter gratiam suam accumulavit in vobis, ut ita sanctis egentibus communicetis ob affectum piæ dilectionis. Et quia tot bona hinc et inde procedunt ex hoc ministerio, idcirco gratias ago Deo super inenarrabili dono ejus, id est de dono charitatis quod in vobis et in sanctis illis posuit, quod quantum sit et quam multiplex, vel quam honestum et quam justum et quam utile, nemo potest manifeste narrare. Tanta pinguedine sanctæ lætitiæ perfusus est Apostolus dum loqueretur de alterna indigentia, et de alterno supplemento indigentia provincialium Christi et militum Christi, hinc de rebus carnalibus in illos, inde autem de spiritalibus in istos, ut nunc in fine sermonis exclamaret, et tanquam sanctorum gaudiorum sagina eructaret, dicens: Gratias Deo super inenarrabili dono ejus. Inenarrabile enim donum Dei est, quod incitat homines ad bene agendum, quando bona operantur propter spem eorum quæ oculus non vidit, nec auris audivit, neque cor hominis excogitavit (*I Cor. ii*).

CAPUT X.

« Ipse autem ego Paulus obsecro vos per mansuetudinem et modestiam Christi, qui in facie quidem humilis sum inter vos, absens autem cog-

« fido in vobis. Rogo autem vos, ne præsens audeam per eam confidentiam, qua existimor audere in quosdam, qui arbitrantur nos tanquam secundum carnem ambulemus. »

Ad incorrectos loquitur, qui pseudoapostolos sequebantur, et eum ferocem putabant, quia mordaciter in priore epistola vitiosos increpavit. Quasi dicat: Correctos ad eleemosynas invitavi, sed vos alios obsecro ego ipse idem vobis existens qui et illis, cum tamen vos sitis alii. Ego Paulus, id est *humilis* vel *mirabilis*, obsecro vos humiliter, ut mores vestros emendetis. Vel prænissi fratres hortati sunt ad ministerium sanctorum eos de vobis, qui correcti fuerant, sed nunc ego Paulus ipse non alius, obsecro vos obnixè qui corrigi debuistis, sed distulistis, ut ultra non differatis. Obsecro vos *per mansuetudinem Christi*, id est per eam mansuetudinem, qua Christus cum se posset vindicare, sustinuit injuriosos ut corrigeret eos, et per modestiam ejus, qua culpas eorum modesto poenitentiae flagello per baptismum delevit, dicente illis Petro: « Poenitentiam agite, et baptizetur unusquisque vestrum (Act. II), etc. » Mansuetus erga nos fuit Christus, quando sine aliqua ultione per baptismum nobis peccata dimisit. Modestus fuit, quando, et si non absque ultione, non tamen immoderata, sed tolerabili et modesta tribulationum punitione, nos ad vitam perennem revocavit. Mansuetus est Christus, pie parcendo et tolerando; modestus est, moderata ultione puniendo. Et mansuetudo atque modestia Christi, cujus imitator sum, est causa cur non imperans, sed obsecrans vobis loquor, quia et lenis sum exemplo Christi ad parcendum, et modeste ad modificate puniendum severus, *qui in facie quidem*, id est in præsentia et visione corporis *sum inter vos humilis* et quasi contemptibilis, sed *absens confido in vobis*, id est confidenter per epistolam vos reprehendo. Et vos putatis quod tantum absens, id est in epistola confidentiam severitatis habeam, et non præsens facie. Sed rogo vos ne præsens audeam, id est rogo ut vosipsos corrigatis, ne, cum venero, audacter puniam *per eam confidentiam, qua tantum putor absens confidere*. Apostoli confidentia est fiducia sibi datæ potestatis a Christo, cujus vicarius est, ut vindicet eos qui sub nomine Christi agentes, non obaudiunt ut se corrigant, in quibus reprehenduntur. Et nunc absens obsecrat eos, ne præsens audeat in eos vindicare per hanc confidentiam, id est ne cum præsens fuerit, cogatur irasci propter vitia eorum, ut componentes se qui adhuc non emendaverant, molliant sibi rigorem ejus, ut moderatos eos inveniens, pressa severitate, ketetur in eis. Rogo, inquit, ne præsens audeam, id est ne cum præsens adero, propter vitia vos audacter (ut jus ecclesiasticæ correctionis exit) feriam per eam confidentiam velut arrogantiam, qua nonnullis existimor audere in quosdam incorrectos, dum peccantes punio, sicut eum qui fornicatus fuerat. Unde quidam vestrum putant me nimis audacem per fiduciam arrogantiam et dominationis, quia

A vel tales audeo punire. *Qui nos arbitrantur tanquam secundum carnem ambulemus*, id est tanquam secundum morem carnalium agamus. Vel arbitrantur nos tanquam secundum carnem ambulemus, non recipiendo spiritalia quæ dicimus; sic nos existimant quasi carnalia loquamur, quæ recipienda non sint. Ideo enim nos arbitrantur secundum carnem ambulare, id est carnali sensu prædicare, quia qui spernit spiritalia, putat illa esse carnalia.

« In carne enim ambulantes, non secundum carnem militamus. Nam arma militiæ nostræ non carnalia sunt, sed potentia Deo ad destructionem munitionum. Consilia destruentes et omnem altitudinem extollentem se adversus scientiam Dei, et in captivitatem redigentes omnem intellectum in obsequium Christi, et in promptu habentes ultisci omnem inobedientiam, cum impleta fuerit vestra obedientia. »

Ipsi nos arbitrantur, ut dixi, tanquam secundum carnem ambulemus. Et merito dixi tanquam, quia non re vera secundum carnem ambulamus, ut illi putant. *In carne enim ambulantes*, id est in corpore vitam præsentem ducentes, *non militamus secundum carnem*, id est non exercemus pro carnali conmodo militiam a Deo nobis datam; nec carnaliter, sed spiritaliter militamus, licet in carne fragilli degamus. Spiritaliter enim militat, qui spiritaliter vivit, quia contra spiritalia nequitiis pugnat. Secundum carnem vero militat, qui desiderii carnis obtemperat. Potest et ita intelligi, ut hi militare secundum carnem dicantur, qui Vetus Testamentum carnaliter intelligunt; qui vero sequuntur intelligentiam spiritalem, sint quidem in carne, quia eandem habent litteram quam Judæi, sed non juxta carnem militant, a carne ad spiritum transcendentem. Non secundum carnem militamus. *Nam arma militiæ nostræ non sunt carnalia, sed spiritalia et potentia Deo regi nostro, cui militamus*. Non enim materialem lanceam vel ense bajulamus, sed potentius hostes nostros verbo dejicimus, quam alii carnalibus armis. Arma enim nostra sunt, sermo prædicationis, sapientia, miracula, charitas, et aliæ virtutes. Ideo arma, quia repugnant vitiis, et debellant regnum diaboli. Potentia Deo, ut per hæc valenter expugnemus inimicos ejus, et subjiciamus ei orbem universum. Sicut enim terrenus imperator per suos milites vindicat suum regnum, ita et Christus per nos defendit unius Dei professionem et disciplinam. Et arma nostra sunt ei potentia, *ad destructionem munitionum*, id est sæcularium doctrinarum et argumentorum vel astutiarum, quibus perversi homines corda sua muniunt et circumdant, ne sermo veritatis ad ea pertingere valeat, quoniam aries apostolicæ prædicationis munitionis hujusmodi valenter penetrat, et evertit virtute gratiæ spiritalis. Et nos, ut dictum est, Christo militamus, *destruentes consilia*, id est præmeditatas impiorum hominum, vel demonum calliditates. Consilium enim est faciendi vel non faciendi excogitata mentis ratio. Est etiam con-

silium, quod dat perversus ei quem sub specie consulendi seducit, dum quasi rationabiliter ostendit ei utile esse quod admonet. Unde dicitur, quia « beatus vir qui non abiit in consilio impiorum (*Psal. 1*). » Sed nos huiusmodi consilia destruimus, dum ad effectum ea pervenire non sinimus. Et destruimus omnem superbam altitudinem cordis, sive tyrannorum, sive sapientium sæculi, extollentem se adversus scientiam Dei, id est contra sensum evangelicæ veritatis. Nam et illi qui in sublimitate sæcularium dignitatum erant positi, et illi qui celsitudinem mundanæ sapientiæ erant assecuti, extollebant se superbo fastu, repugnantes adversus humilem scientiam divinæ prædicationis, sed jam dejecta est extollentia talium, et scientia veritatis subiecit sibi mundum. Dæmones etiam se extollebant, dum in idolis colebantur, adversus scientiam unius Dei; necnon et hæretici adversus scientiam catholicæ veritatis, sed destructi sunt apostolicis machinis. Et etiam sumus redigentes in captivitate omnem intellectum, id est captum nostris rationibus astringimus omnem intellectum perversæ doctrinæ, et captivum ducimus eum usque in obsequium Christi. Captivat enim intellectum, qui contradicentem ratione vincit, et ad fidem Christi, cui prius repugnauerat, humilem ac mansuetum inducit. Et sumus etiam habentes in promptu, id est in manifesto et veloci effectu, quia nihil nos remordet quo minus audeamus, *ulcisci omnem inobedientiam*, id est punire culpas eorum, qui nobis obedire noluerunt ut se corrigerent. Quod faciemus, *cum impleta fuerit vestra obedientia*, id est cum vos reliqui omnes ex dilectione fueritis in omnibus obedientes.

« Quæ secundum faciem sunt, videte. Si quis « confidit sibi Christe se esse, hoc cogitet iterum « apud se, quia sicut ipse Christi est, ita et nos. « Nam etsi amplius aliquid gloriatus fuero de potestate nostra, quam dedit nobis Dominus in ædificationem et non in destructionem vestram, non « erubescam. Ut autem non existimer tanquam ter- « rere vos per epistolas, quoniam quidem epistolæ, « inquirunt, graves sunt et fortes, præsentia autem « corporis infirma et sermo contemptibilis, hoc cogitet qui ejusmodi est, quia quales sumus verbo « per epistolas absentes, tales et præsentis in « facto. »

Nunc vult eos quæ palam sunt considerare, id est ea quæ dicturus est, quæ sunt aperta dijudicare, velut si dicat: Si vobis non sufficiunt ea quæ dixi, pro quibus me potius quam pseudoapostolos sequi debeatis, quia forsitan ea non satis patenter intellexistis, videte hæc quæ subjungo, quæ sunt secundum faciem ita evidentiā, sicut ea quæ sunt oculis subjecta. Hæc scilicet *si quis confidit*, etc. Vel ita: Videte ea quæ sunt secundum faciem, id est considerate diligenter opera eorum, qui tantummodo coram oculis hominum facere bona student, ne forte vos per hæc seducant. Ista videte, id est intelligite, quæ nunc subiecio, quia sunt secundum faciem, id

A est cunctis perspicua, scilicet *Si quis confidit sibi se esse Christi*, id est si quis merito bonæ vitæ sibi certus est quod ipse sit Christi, id est de electis Christi, qui sunt ejus possessio, *hoc cogitet iterum apud se*, id est apud subtilitatem suæ rationis, ut vim rationis non excedat, nec propter honorem suum, nec propter odium nostrum, quia sicut ipse Christi est per quæcunque Christi Lona, ita et nos per eadem bona sumus Christi. His loquitur, quorum tangit superbiam, qui de seipsis præsumentes inflationem animi, minus quam dignum erat de Apostolo sentiebant, quasi non egeret præceptis ejus. Quos admonet, ut si de se confiderent quia erant servi Christi, non utique deberent de Apostolo dubitare, sed etiam de eo vel similiter sentire, cum utique magis præferre sibi deberent magistrum. Sed ipse nunc humilitatem illos in se docet, æquans se illis, cum esset vas electionis et doctor gentium. Hoc ergo vult illos considerare, quod utique clara luce videtur, quia cum de Apostolo nemo credentium non plus æstimaret quam de se, quanto magis nemo minus quam de se debeat æstimare. Hos itaque contestatur ac docet, ne elatione mentis meritum bonæ vitæ perdant, quia qui scit se aliquid esse, humiliat se ut major fiat. Recte dixi nos esse Christi, ut ille dicitur qui se nobis præfert. Nam etiam excellentius sumus nos Christi per potestatem quam præsumptor ille non habet. Et hoc est: *Nam, et si amplius*, etc., id est si me potestatem a Deo accepisse dixerō, verum me apostolum prædicando, non erubescam, quia verum dicam, non gloria elatus, sed vestræ ædificationis causa compulsus. Pseudo autem usurpatam in destructionem vestram volunt exercere potestatem. *Non erubescam si amplius aliquid* quam illi gloriatus fuero de potestate nostri apostolatus, quam nobis non illis Dominus dedit in ædificationem, et non in destructionem vestram, id est ut vos in virtutibus ædificemus, non ut tyrannidem exercendo vos destruamus, vel exemplo malo sive prava doctrina subvertamus, ut pseudo faciunt. Hæc dicendo, significat quia superius se humiliavit ipsis se comparando, cum si se exerit non erubescat, quia potestatem prædicandi et absolvendi accepit a Christo, ut salvet, non ut perdat obaudientes; et ut religiosos mores eorum ædificet, non ut destruat. Sic et Junusquisque prælatu Ecclesiæ potestatem divinitus accepit, ut subjectis prosit, non ut eis noceat. Si ergo iste qui a Domino missus est, inclinat se inferioribus et comparat, quanto magis illi qui nullius erant testimonii comparare se non debebant, non dicam præferre, majoribus? Nos, inquit, habemus potestatem ædificandi vos et puniendi perversos. Sed *ut non existimer tanquam terrere vos per epistolas*, dum absens scribo, quia incorrectis non parcam cum præsens fuero, quasi qui non audeam implere quod minatus sum, *hoc cogitet*, id est hoc sciat, *qui ejusmodi est*, id est qui ita de me opinatur, *quia quales*, id est quam aperti sumus in verbo per epistolas dum sumus absentes, *ta-*

les erimus et præsentem in facto, id est in exhibitione A
 correptionis peccantium. Hoc dicit occasione præ-
 missæ sententiæ, qua dixerat se habere in promptu
 ulcisci omnem inobedientiam. *Ut, inquit, non exi-*
stimer, etc. Ille potest videri per epistolas terrere,
 qui neque auctoritatis alicujus est, neque præsens
 fiduciam habet arguendi; absens autem ideo audet,
 quia præsens timet. Ut non existimer tanquam terrere
 vos per epistolas, quæ existimatio inde potest ve-
 nire, quod quidam *inquit, quoniam epistolæ qui-*
dam graves, id est ponderosæ ad intelligendum, *et*
fortes ad terrendum, sed præsentia corporis ejus est
infirma, non valens exercere severitatem, *et sermo*
ejus contemptibilis, id est inverosimilis, et rusticanus:
 quisquis ejusmodi verbis mihi derogat, sciat
 quia quod per epistolas minamur, per facta comple-
 bimur, quoniam a Domino potestatem accepimus, et
 ideo quod absentes minamur, præsentem implebi-
 mus. Cui autem non est data potestas, absens po-
 test audere, præsens autem pudorem patitur et ti-
 morem. Sed ego non erubescō nec metuo dum cor-
 ripo, quoniam fiducia potestatis hoc ago. Sciendum
 quia linguas detrahentium sicut nostro studio non
 debemus excitare, ne ipsi pereant; ita persuam ma-
 litiæ excitatas debemus æquanimitè tolerare, ut
 nobis meritum crescat. Aliquando autem etiam com-
 pescere eas debemus, ne dum de nobis mala disse-
 minant, eorum qui audire nos ad bona poterant,
 corda innocentium corrumpant. Unde nunc Aposto-
 lus derogantes sibi Corinthios rationibus compescit,
 ne malam de eo famam spargentes, nocerent aliis,
 qui doctrinam ejus audire poterant. Notandum etiam,
 quia ex eo quod dicunt, quoniam epistolæ graves
 sunt et fortes, nec dicunt, epistola gravis et fortis,
 ostendunt se jam duas epistolas ab Apostolo acce-
 pisse, præter istam de qua nunc tractamus, quam
 nondum viderant. Sequitur:

« Non enim audemus inserere aut comparare nos
 quibusdam, qui seipsum commendat; sed ipsi in
 nobis nosmetipsos metientes et comparantes nos-
 metipsos nobis. Nos autem non in immensum
 gloriamur, sed secundum mensuram regulæ, quæ
 mensus est nobis Deus mensuram pertingendi
 usque ad vos. Non enim quasi non pertingentes
 ad vos, superextendimus nos. Usque ad vos enim
 pervenimus in Evangelio Christi, non in immen-
 sum gloriantes in alienis laboribus. Spem autem
 habentes crescentis fidei vestræ, in vobis magni-
 ficari secundum regulam nostram, in abundan-
 tia etiam in illa quæ ultra vos sunt evangelizare,
 non in aliena regula, in his quæ præparata sunt
 gloriarī. »

Vere, inquit, tales sumus in facto, quales in ver-
 bo, quia non facimus nos similes pseudoapostolis,
 qui potestatem usurpant et vitia palpant. Et hoc est:
 Non audemus inserere aut comparare nos quibusdam,
 qui seipsum commendat, id est non possumus de no-
 bis majora jactare quam sumus, nec audemus ita
 Deum contemnere, ut similes simus quibusdam, qui

se malunt suis laudibus quam Dei gratia commen-
 dare. Pseudo enim semetipsos commendabant, qui
 non accepta potestate dominari volebant, nomini
 suo vindicantes auctoritatem. Qui autem mittitur,
 non sibi, sed ei a quo mittitur, vindicat potestatem.
 Non audemus illis nos inserere qui non missi præ-
 dicant, id est non audemus nos in numero eorum
 ponere, ut gloriam nostram, sicut illi suam, quæra-
 mus, quia ad dominum revertemur a quo missi
 sumus, ut nihil ultra concessum præsumamus.
 Quidquid enim contra Deum fit, audacia est. Nec au-
 demus nos illis comparare, id est similes vel pares
 illis facere, ne sicut illi, pereamus, id est propter
 timorem Dei non audemus (ut illi) vobis adulari, et
 vitiis vestris blandiri. Hæc non facimus, sed ipsi in
 nobis non extra, sumus metientes nosmetipsos, non
 aliud quam injunctum est usurpando; et sumus
 comparantes nosmetipsos nobis, quia secundum quod
 officium nostrum exigit facimus, dum nec plus, nec
 aliud dicimus vel monemus, quam facere possumus
 aut debemus. Quod illi non faciunt, contra quos
 nunc agitur, id est pseudo qui seipsum ultra quam
 oportet magnificare conantur. Sed nos non gloriabi-
 mur in immensum, id est non assumemus nobis au-
 ctoritatem ultra mensuram, sed secundum mensuram.
 Tanta se uti dicit potestate, quanta concessa
 est ab auctore, nec mensuram egredi. Idcirco non
 superba erit gloria, in qua non egreditur terminum
 datæ potestatis. Gloriam vero pro auctoritate posuit,
 qua utebatur in correptionibus, ut salvos eos face-
 ret. Nec tamen se gloriari dicit in extollentia pote-
 statis, sed ad ædificationem illorum. Corripienti enim
 constanter vitiosos, gloriabatur in emendatione illo-
 rum; et potestas data proficiebat saluti illorum, non
 elationi suæ. Duobus ergo modis non gloriabatur
 in immensum, id est et secundum datam sibi pote-
 statem, et quia non ultra quam prædicatio ejus per-
 sonabat, vindicabat sibi auctoritatem. In his enim
 auctoritatem debito sibi jure vindicabat, quos ipse
 per evangelium ad fidem converterat. Cæteris autem
 non tali fiducia loquebatur, quia erant in aliena re-
 gula, id est in parte alius evangelistæ. Non gloriabi-
 mur, id est potestatem non exercebimus in immen-
 sum, id est ultra modum nostræ mensuræ, sed se-
 cundum mensuram regulæ, qua mensus est nobis Deus
 mensuram pertingendi usque ad vos, id est juxta men-
 suram regiminis, quod Deus nobis dedit, ut ad vos
 regendos nostra potestas pertingeret. Nam monente
 Christo vobis evangelizavimus, et ita nos fecit usque
 ad vos pertingere. Non enim superextendimus nos
 quasi non pertingentes usque ad vos, id est non nos
 extendimus super alterius provinciam, dum in vo-
 bis jus potestatis vindicamus, quasi non pertingeret
 usque ad vos jus nostræ potestatis. Non enim hoc
 usurpatione facimus, sed præcepto; nec quasi non
 missi pervenimus ad vos in prædicatione, sed des-
 tinati Deo mittente ad vos. Superextendi autem est,
 ultra extendi quam conceditur, vel super episcopa-
 tum alius extendi. Sed non ultra quam oportet, nec

super aliorum provincias extendimur, quia super eos quos alii prædicatores ante nos in fide fundaverunt, non nobis jus debite potestatis arrogamus. Nam usque ad vos pervenimus id est dum ad diversas gentes prædicando tenderemus, pervenimus usque ad vos in Evangelio, id est in prædicatione Christi, et nomen ejus nos primi vobis annuntiavimus, non gloriantes in immensum, id est ultra mensuram in alienis laboribus, id est ubi alius fundamentum fidei posuisset. Ideo enim tam fiducia vobis loquimur, quia non labore alterius ad fidem estis adducti. Non ergo extra mensuram gloriamur, qui in labore nostro gloriamur. Sed pseudoapostoli in immensum gloriabantur in alienis laboribus, quia semper ad fideles ibant, qui signa minime requirebant, quæ illi facere nequibant. Ideo se superextendebant, id est super eos qui ab aliis ad fidem adducti fuerant, extendebant, et in eis dominium exercere volebant. Quia illam provinciam his Deus concesserat, cum singulas regiones sanctis prædicatoribus distribuere; et propterea vagabundi per omnes discurrebant, super tritici sationem zizania seminantes. Sed nos non gloriamur in immensum, id est ultra quam nobis Deus mensus est, quia non quærimus gloriam in locis ubi ante nos alii prædicatores laboraverunt; sed habentes spem crescentis fidei restæ, id est sperantes per fidem vestram crescentem ac proficientem magnificari apud Deum in vobis, quia quanto fides vestra quam per nos didicistis, profecerit in virtutibus, tanto et nos apud Deum majus meritum habemus, sperantes dico, magnificari in vobis secundum regulam nostram, id est secundum normam recte vivendi et credendi, quam vobis tradidimus, parati sumus evangelizare etiam in illa loca quæ ultra vos sunt. Non enim sufficit nobis usque ad vos pervenisse, sed cum vestra fides creverit, transicimus in abundantia gratiæ Dei et miraculorum etiam ad illas gentes, quæ ultra vos sunt, Evangelium prædicare. Profectus enim vestræ fidei nos accendit, ut non simus pigri et alios adhuc ad fidem vocare, qui exemplo vestri possint in ea proficere. Vel etiam apud homines speramus in vobis magnificari, ut, dum vos ita proficere viderint, agnoscant esse veros apostolos, et libenter etiam ipsi doctrinam nostram excipiant. Et speramus ita magnificari secundum regulam, id est regimen nostrum sub quo bene proficitis. Non enim habemus spem gloriandi in aliena regula, id est in his qui sunt sub regula cujuslibet alterius apostoli. In abundantia etiam evangelizandi, non in paucis locis speramus evangelizare, etiam in illa loca transeuntes quæ sunt ultra vos. In abundantia, vel quia prædicatio hæc abundabit super prædicationem quam ad vos habuimus, vel quia cælestium donorum abundantia erit in ea. Et evangelizabimus ibi, non in aliena regula, id est in alieno regimine, quia nec illi qui ultra vos sunt, de alieno regimine sunt. Speramus, inquam, illuc evangelizare, et non speramus in aliena regula gloriari in his virtutum incrementis, quæ preparata

sunt ab aliis prædicatoribus. Manifestum est quia vir prudens non in his confidit, neque gloriam sperat, quæ aliorum laboribus constant. Ideo Apostolus non audeat in hos qui aliis prædicantibus crediderunt, ne in alienis laboribus gloriari videatur; sed hoc nititur, ut eis prædicet quibus non erat annuntiatam, ut gloriam labore suo acquirat.

« Qui autem gloriatur, in Domino gloriatur (1 Cor. 1; Jer. 1x). Non enim qui seipsum commendat ille probatus est, sed quem Deus commendat. »

Significat Apostolus ipsam evangelizandi confidentiam et gloriam Domino esse dandam, cujus gratia est, ut qui in potestate evangelica confidit, Deo auctore confidat, ut quæstus omnis negotii divini Domini in lucrum veniat. Sed qui non accepit potestatem a Domino, non potest in Domino gloriari, quia suam gloriam quærit. Ego, inquit, non gloriabor in aliena regula. Similiter autem qui gloriatur, id est vult potestatem exercere, in Domino gloriatur, id est in mensura a Domino sibi data. Vel ita: Spem habeo gloriandi, non tamen in me, sed in Domino. Nam nullus in se debet gloriari. Sed quicumque de aliquo bono gloriatur, gloriatur in Domino, id est omnem gloriam retorqueat et ascribat non sibi, sed Domino. Quidquid enim boni habemus vel agimus, hoc non a nobis, sed tantum a Domino habemus quod agimus. Ideo non in se, sed in Domino quisque debet gloriari, quia qui seipsum commendat, id est qui suam gloriam in prædicatione quærit, qui extra Dominum gloriatur, ille non est probatus a Deo vel ab hominibus, sed ille quem Deus commendat miraculis et gratia sanctæ conversationis. Illum Deus commendat, et ille probatus est, quem habet dignum et mittit ut prædicet donum ejus. Quem vero non mittit, illum non commendat. Ipse autem se commendat, qui non missus prædicat. Ac per hoc idoneus non est, sed presumptor et reprobus.

CAPUT XI.

« Utinam sustineretis modicum quid insipientiæ meæ, sed et supportate me. Emulor enim vos Dei emulatione. Despondi enim vos uni viro virgini castam exhibere Christo. Timeo autem ne, sicut serpens Evam seduxit astutia sua (Gen. iii), ita corrumpantur sensus vestri, et excidant a simplicitate quæ est in Christo Jesu. »

Incipiens vero de semetipso narrare, insipientem se dicit, quia ad laudem ejus videntur pertinere quæ dicturus est, et per Dei sapientiam dictum a Salomone fuerat: « Laudet te alienus, et non os tuum: extraneus, et non labia tua (Prov. xxvii). » Sed hic dolore compellitur in laudem suam erumpere, propter salutem ipsorum qui cum de ejus præceptis bene sentire deberent, indigne sentiebant. Et hoc non Apostolo, sed ipsis nocebat. Ideoque profectum eorum quærit, et in eo quod quasi glorianter loqui videtur: Glorior, inquit, de regimine, quod videtur insipientia. Sed utinam sustineretis, id est velle: ut sine indignatione sustineretis modicum quid insipienti-

sua meæ, id est parum aliquid gloriationis meæ, quæ videtur insipientia. Modicum gloriationis meæ sustinete, quia multo plus possem gloriari. Opto ut hanc insipientiam meam vel in modico sustineatis, *sed et præcipio* ac quasi ex debito requiro, ut me supportetis in hac insipientia gloriationis, supportate, inquam, me ut subjecti, quia *æmulator vos*, id est casto amore inflammor ad custodiendam mentis nostræ castitatem; et hoc facio non mea, sed *Dei æmulatione*, quia non mihi, sed Deo vos æmulator. Quæ locuturus est, amore eorum dicturum se ostendit, ut non magis ad laudem ejus proficiat, sed ad eorum profectum. Ac si dicat: Non stimulo livoris inflammor humani, sed vos tanquam pater æmulatione divina custodio, ut immaculatos possim conjungere cælesti sponso. *Despondi enim vos*, id est annulo fidei vos desponsavi non multis, sed uni, non adulecto, sed *viro virginem castam exhibere Christo*, id est ut vos omnes unam virginem incontaminatam assignem judici Christo. Omnis enim Ecclesia virgo est in mente. Virginitas enim mentis est integra fides, solida spes, sincera charitas. Ergo et Ecclesia imitans Domini sui matrem, quoniam corpore non potuit, mente tamen et mater et virgo est. Nullo itaque modo virginitatem matris suæ nascendo Christus ademit, qui Ecclesiam suam de fornicatione dæmonum redimendo virginem fecit. Nunc desponsata est Ecclesia et virgo est, cum se continet a corruptione sæculari; sed tunc nuptura est, quando Sponsus ejus in claritate veniet, et eam secum in regni thalamum perpetuo mansuram introducet. Ego, inquit, vos huic tam digno viro ita desponsavi, ut immaculatos ei vos in die judicii exhibeam. Sed timeo ne virginitas in vobis violetur, et ad amplexum Sponsi non perveniatis. Sicut enim membris corporis violatur in quodam loco, sic seductio linguæ violat virginitatem cordis. *Timeo ne, sicut antiquus serpens Evam seduxit astutia sua (Gen. III), ita corrumpantur* ab eodem serpente *vestri sensus*, id est vestræ mentes. Non enim carnis, sed cordis virginitatem serpens ille, id est diabolus corrumpere quærit. Et sicut adulter homo lætatur nequitia sua cum carnem corrumpit, sic diabolus lætatur quando mentem corrumpit. Revera enim corrumpitur mens et fides eorum qui præponunt mendacium veritati. Qui ergo mendacium ædificant in hominibus, quid ab eis expellunt nisi veritatem? Immittunt diabolus, excludunt Christum; immitunt adulterum, excludunt Sponsum. Quando enim mentem falsitas possidet, tunc serpens eam possidet. Timeo ne, sicut serpens Evam seduxit astutia sua, id est ne, sicut diabolus in serpente latens et per os ejus loquens, Evam seduxit, ita corrumpantur sensus vestri ab eodem fallaci deceptore in falsis apostolis latente et per os eorum loquente, *et excidant a simplicitate quæ est in Christo Jesu*, id est corruant a paradiso simplicis fidei Christianæ, quæ nil alienum recipit, sed simplicem veritatem sine admistione falsitatis retinet. Serpens namque Evam mentiando ac Deo se-

A duxit, dicens solo terrore Deum eis comminatum esse mortem, non illaturum si peccassent. Ita et pseudoapostoli dicebant, ideo præcepta Evangelii addita esse, ut vel sic lex custodiretur, et ea sola sufficeret custodita. Sed et nunc serpens similiter seduxit, gehennam propter solum terrorem asserens nominari; eam autem aut non esse omnino aut non æternam esse confirmans. Adhuc mussitat ille serpens et non tacet. Quærit pollicitatione quadam scientiæ dejicere de paradiso Ecclesiæ, quem non permittat redire ad illum paradysum, unde primo ejectus est. Quod gestum est in illo paradiso, hoc geritur in Ecclesia. Nemo seducat nos ab isto paradiso. Sufficiat quod hinc lapsi sumus, vel experti corrigamur. Ipse est serpens qui semper suggerit iniquitatem, ipse aliquando promittit impunitatem, et, sicut ibi pronisit, dicens: « Nequaquam morte moriemini (*ibid.*) » Ipse talia suggerit, ut modo male vivant Christiani. Nunquid omnes, inquit, perditurus est Deus? Nunquid omnes damnaturus est Deus? Et ita corrumpit sensus multorum, ac peccare facit, ut expellantur a sedibus istorum.

« Nam si is qui venit, alium Christum prædicat quem non prædicavimus, aut alium Spiritum accipitis quem non accepistis, aut aliud Evangelium quod non recepistis, recte pateremini. Existimo enim nihil me minus fecisse a magnis apostolis. « Nam, etsi imperitus sermone, sed non scientia. In omnibus autem manifestus sum vobis. »

C Ideo dixi me timere ne, sicut serpens Evam seduxit astutia sua, sic et isti vos corrumpant, qui prædicant eandem fidem quam nos, et per astutiam suam et seductionem veritati miscent venenum falsitatis. Si enim aliam fidem, et omnino aliud prædicarent quam nos prædicamus, non adeo vos decipere possent. Et hoc est: *Nam si is prædicator qui venit et a Deo mittitur, prædicat, id est prædicaret vobis alium Christum quem non prædicavimus*, id est meliorem; aut per ejus doctrinam accipitis, id est acciperetis, *alium Spiritum sanctiorem quem non accepistis per nos, aut aliud Evangelium* reciperetis ab eo quod non recepistis a nobis, *recte pateremini* ejus dominationem; possetis enim dicere, prædicatio hujus melior est quam Pauli. Nunc vero, cum eundem Christum prædicet, et ex sua parte plura respuenda addat, pati non debetis. Vel ita Vere simplicitas est in Christo, non duplicitas, quia unus est Christus non duo Christi; et unus Spiritus Christi, atque unum Evangelium. Nam si is doctor qui post nos venit ad vos, etc. Hoc de quolibet vero prædicatore nunc est intelligendum. Locutus enim fuerat de pseudoapostolis corruptoribus fidei, et nunc adjungit de veris prædicatoribus, quia plebs Corinthiorum variis erroribus fluctuabat, ut aliqui faverent pseudoapostolis, quidam autem eis a quibus compositis verbis eadem audiebant quæ ab Apostolo audierant; alii vero apostolis favebant, qui cum Domino fuerant; et Paulo derogabant, quia in carne Dominum secutus non fuerat. Unde nunc tali sensu loquitur.

Si ipse idem Christus ab his prædicatur, quia a nobis annuntiatur, et idem Evangelium, quid causæ est ut nos inferiores habeamur, cum nihil amplius ab illis quam a nobis dicatur? Nam etsi prædicator qui venit ad vos, prædicaret vobis excellentiorem Christum quem non prædicavimus, quod fieri non potest; aut per eum acciperetis alium meliorem Spiritum, quem per nos non accepistis; vel aliud Evangelium, quod a nobis non recepistis, id est aliam de humana redemptione prædicationem, quod esse non potest, recte pateremini talem doctorem ad contemptum nostri. Sed quia hoc non est, non recte patimini illum ad depressionem nostri. Cur autem dicit, *recte pateremini*, si alius vobis Christus prædicatus fuisset, aut si alius Spiritus, vel aliud Evangelium vobis traditum fuisset, cum dicat Galatis: « Si quis vobis evangelizaverit præter id quod accepistis, anathema sit! » (*Gal. 1.*) Si enim Galatis perversum erat accipere aliud quam ab apostolis erat traditum, quomodo Corinthiis rectum erat, si alius Christus prædicatus illis fuisset? Sed sciens Apostolus nunquam alium Christum, nisi hunc qui crucifixus est, prædicari, idcirco ait quia recte pateremini, si vobis alius potior Christus, ab his qui veniunt prædicatus fuisset. Galatis autem anathema dixit, si aliud audirent quod non utique majus esset, sed contrarium. Quia vero posset dici quod, etsi eadem cæteri prædicaverint quæ et iste, melius tamen ea prædicaverint, removet hoc. Non recte, inquit, patimini. Ego enim existimo, id est pro certo scio, sed dubitationem vestram verbo existimationis increpo; ego, inquam, existimo *me nihil minus fecisse vobis a magnis apostolis*, id est quam fecissent magni apostoli, ne putetis vos minus quam cæteræ Ecclesiæ aliquid accepisse, quibus prædicaverunt cæteri; et idcirco opera mea illis me coæquant. Non vult gratiam inferiorem in se videri, quia similiter docuit, et eadem fecit quæ faciebant apostoli, qui propensiores videbantur, quia priores cœperant docere et fuerant cum Domino, unde majoris auctoritatis esse putabantur, cum hujus apostoli electio cum testimonio sit, et amplius cæteris laboraverit, atque Dominum in via et in templo viderit, et verba ejus audierit. Non minus, inquit, feci. Nam etsi sum imperitus sermone, quia non adorno verba, vel impeditam habeo linguam, sed, id est tamen, non sum imperitus scientia, quoniam scio quidquid est magni. Hoc non ad apostolos pertinet, quia non erant eloquentes, utpote sine litteris, pleni tamen Spiritu sancto (*Act. ix*); sed pseudoapostolos tangit, quos præferebant Apostolo causa accurati sermonis, cum in religione vis sermonis sit necessaria, non sonus dulcis. Valde tamen se humiliat, qui se imperitum in sermone fatetur; cui, præ magnitudine eloquentiæ ac sapientiæ Festus ait: « Insanis, Paule, insanis; multæ te litteræ ad insaniam perducunt (*Act. xxvi*). » Hoc ergo dicens, non se loqui nescire voluit intelligi, sed propter eos qui, non per fidem, sed per eloquentiam commendari volebant. Qui tamen in eo se dixit imperitum, quod

A non habet crimen; in eo autem quod non deest sine culpa, et cum adest acquirit salutem, non se imperitum pronuntiavit. Qui imperitus est in sermone, reus non est apud Deum; quia autem scientiam Dei non habet, reus est ignorantiae, cui non licet ignorare, maxime quod pertinet ad salutem. Ideo Apostolus spreta eloquentia id agebat, ut fides teste virtute acceptabilis esset, ut non fidem eloquentia commendaret, sed virtus, cui cedit eloquentia. Etsi imperitus, inquit, sum in sermone, id est etsi non curo illam sæcularem peritiam sermonis, ut adaptem pulchre positarum dictionum consonantiam, tamen non potestis me vocare imperitum in scientia, qui tam bene scio rei veritatem, et tam profunde loqui de Deo, sicut et alii, vel subtilius. In scientia divinorum non sum imperitus. Sed et vos hoc nostis, nam *manifestus sum vobis in omnibus*, id est in scientia, in miraculis, in sanctitate vel potentia, et his similibus. Et ideo scitis me habere etiam loquendi peritiam. Unde pejus est, quia faventes aliis in sermonis peritia, in qua me non inferiorem esse scitis, postponitis me illis, cum videatis per me non solum impleri prædicationem, sed et signa atque prodigia fieri apostolica.

« Aut nunquid peccatum feci, me ipsum humilians ut vos exaltemini, quoniam gratis Evangelium Dei evangelizavi vobis? Alias Ecclesias exspoliavi, accipiens stipendium ad ministerium vestrum. Et cum essem apud vos et egerem, nulli onerosus fui. Nam quod mihi deerat suppleverunt fratres qui venerunt a Macedonia. Et in omnibus sine onere me vobis servavi et servabo. Est veritas Christi in me, quoniam hæc gloriatio non infringetur in me in regionibus Achaiae. Quare? Quia non diligo vos? Deus scit. Quod autem facio, et faciam, ut amputem occasionem eorum qui volunt occasionem, ut, in quo gloriantur, inveniantur sicut et nos. »

Non feci, inquit, minus quam alii, sed possem dicere quia plus feci, quoniam gratis prædicavi. Non feci minus. Aut si minus, nunquid in hoc peccavi? *Nunquid peccatum feci, me ipsum humilians operando manibus meis, unde victum quærerem et haberem, ut vos exaltemini*, id est ad virtutum alta proficiatis, abjecto jugo falsorum apostolorum quo deprimi mini? Vere me humiliavi, quoniam gratis, id est nil exigendo a vobis, *Evangelium Dei evangelizavi vobis*. Quoniam inflati erant eo quod sumptus ab eis accipere noluit, et propter hoc alios ei præponebant, idcirco nunquid peccavi, ait, quia me humiliavi, ut me indignum ad accipiendum judicarem, quia inde mihi irascimini, cum hoc non peccati sit, sed gloriæ? Seipsum enim humiliavit, quando stipendia sibi debita non exegit. Quæ propter duas causas accipere noluit, ne et pseudoapostolis similis inveniretur, qui non ad gloriam Dei, sed ad suam utilitatem prædicabant, ut non occasionem acciperent deprecandi; alio enim non accipiente, non potest alter multum expectere; et ne vigor eva-

gelicæ potestatis torpesceret, quoniam qui a peccantibus accipit, arguendi auctoritatem amittit. Sic ergo exaltantur, cum ideo ab illis non accipitur, ut a pseudoapostolis qui eos deprimebant eripiantur, et correpti emendentur, a morte ad vitam, et a vitiis ad virtutes elevati. Vobis, inquit, Evangelium gratis prædicavi, sed ab aliis interim victum habui. Nam *alias Ecclesias exspoliavi*, id est multa ab his quæ in vos impenderem assumpsi, *accipiens stipendium ad ministerium vestrum*, id est accipiens unde viverem, dum vobis evangelium ministrarem, necesse fuit ut ab aliis panem corporis acciperem, *et cum essem apud vos et egerem* his quæ corpori sunt necessaria, nulli vestrum *fui onerosus*, accipiendo aliquam corporis sustentationem ab eo. Hoc Apostolus Corinthiis dum inter eos esset, nunquam dicere voluit, ne scilicet quod erga eum ab illis factum ex bona voluntate non fuerat, fieret ex jussione; et cum innotesceret eorum misericordia, remaneret ignota. Postmodum vero longe positus hoc eis scripsit, ne scilicet omnimode incorrepti [*al.*, incorrepti] remanerent, et quales magistro in tenacia fuerant, aliis fratribus, tales essent. Vere et in hoc magister gentium, sua negligens, aliena curans, implevit quod ait: « Nemo quod suum est quærat, sed quod alterius (*I Cor. x*). » Tantam enim illic inopiam pertulit, ut victus sui gravi necessitate laboraret, et panem terræ a discipulis non accepit, quibus panem cæli prædicavit. Insistebat verbo pro vita audientium, insistebat labori manuum pro vita corporis sui. De terris quoque aliis ei stipendia a discipulis mittebantur, ut Corinthiis prædicare sufficeret. *Cum essem*, inquit, *apud vos, et egerem, nulli vestrum onerosus fui* accipiendo aliquid, ne scilicet putaretis me lucri terreni causa Evangelium prædicare. *Nam quod mihi deerat* post spolia Ecclesiarum et laborem manuum, *suppleverunt fratres qui venerunt a Macedonia*. A Macedonibus semper accepit, quia subversi a pseudoapostolis non fuerant. Et sicut a Corinthiis accipiendum non erat, ne illis in scandalum proficeret, sic iterum a Macedonibus accipiendum erat, ne bene seminantes fructum amitterent. Non enim idcirco dabant, ut vitia sua palpari vellent. Macedones quod mihi deerat suppleverunt. Et non solum stipendiis, sed etiam *in omnibus* verbis et factis *servavi me vobis sine onere* quia non me jactavi de genere contra vos, nec aliquid hujusmodi feci, et adhuc me semper vobis talem servabo, ne dem exemplum rapacitatis vel falsitatis falsis apostolis. *Est veritas Christi in me*, id est verax Christus in me loquitur, *quoniam hæc gloriatio*, id est hæc causa gloriationis quod gratis prædico, quod a licitis abstineo propter salutem vestram, *non infringetur*, sed integra perseverabit in me in omnibus regionibus *Achaie*. Gloria est enim a licitis abstinere, maxime pro aliorum salute. Non infringetur in me gloria hæc in regionibus vestris. Et quare putatis me hoc facere? Putatis quod hoc ideo faciam, quia non diligo vos? id est quod odio vestri

abstineam a rebus vestris, ut pseudo dicunt. Deus qui occulta cordis novit, ipse scit quia non ideo munera vestra respuo, quod vos non diligam; sed ideo magis quia vos amo, ut hoc ipsum prosit vobis quod nihil a vobis accipio. Non propter odium vestri dona vestra nolo, sed ut auferam pseudoapostolis occasionem accipiendi pecunias vestras, quia si non acceperint non diu prædicabunt. Non idcirco hoc facio quia vos non diligam, sed quod in hac re facio, etiam adhuc faciam, id est semper a vestris muneribus abstinebo, ut exemplo meo *amputem occasionem* sumendi vestra bona; occasionem dico, *eorum qui* per me volunt invenire occasionem accipiendi res vestras. Ideo illis auferam hujusmodi occasionem, *ut, in eo quo gloriantur, inveniantur sicut et nos*, id est similes nobis. Gloria pseudoapostolorum in pecuniis erat accipiendis, et ideo Apostolus hoc refutavit, ne illis similis videretur; quia, nisi ab Apostolo fuisset vitatum, major occasio illis data fuisset accipiendi, vel etiam extorquendi, quando in hac re formam ab Apostolo datam ostenderent. Erant etiam quidam pseudo qui, imitantes Apostolum, pro sæculari gloria nihil volebant accipere; acciperent tamen libenter, si prius Apostolum accipere viderent. Unde nunc dicit se ideo nihil velle accipere, ut illis amputet occasionem accipiendi, et permaneat in similitudine sui, in quo multum gloriatur, scilicet ut semper sint non accipientes.

« Nam ejusmodi pseudoapostoli sunt operarii subdoli transfigurantes se in apostolos Christi. Et non mirum. Ipse enim Satanas transfiguratur se in angelum lucis. Non est ergo magnum, si ministri ejus transfigurentur velut ministri justitiæ. Quorum finis erit secundum opera ipsorum. »

Volo illis auferre occasionem accipiendi res vestras; multum enim desiderant invenire occasionem qua possint eas accipere, licet fingant se nolle quidquam sumere. *Nam ejusmodi pseudo*, id est falsi apostoli sunt operarii subdoli, id est operantes sub dolo simulationis, quia callide sub specie religionis decipiunt. Subdoli sunt, quia non amore vitæ perennis, sed amore pecuniarum prædicant Christum, nomen sibi apostolicum usurpantes, cum nequaquam sint missi. Subdolos enim operarius aliud fugit et aliud agit, sicut et isti sub specie simplicis prædicationis Christi belluinam rapacitatem contegunt. Tales ut placeant et placendo accipiant, necesse est adulentur, et adulando decipiant, illa dicentes quæ placeant, non quæ expediant audiendi. Sunt itaque operarii subdoli, dum sic operantur, et hujusmodi artibus *transfigurant se in apostolos Christi*, id est transmutant speciem suæ falsitatis, assumendq figuram verorum apostolorum, ut dum malitia callide tegitur, et figura sanctitatis cernitur, possint incautos decipere. Et quia veris apostolis similes volunt apparere, non accipio res vestras, ut me non accipiente, nec ipsi se transfigurent in apostolos veritatis, ut ita decipiant. *Et non est mirum*

de ministris Satanæ, si hoc faciunt. Nam ipse Satanæ cui serviunt, *transfiguratur se in angelum lucis*, id est assumit præclarum habitum et apparet hominibus ut credatur sanctus angelus, et ita decipiat. Et cum sic se transfiguratur, opus est nobis iudicare et dignoscere, ne fallendo ad aliqua perniciosam seducat. Nam quando sensus corporis fallit, mentem vero non movet a vera rectaque sententia qua quisque vitam fidelem gerit, nullum est in religione periculum. Vel cum se bonum fingens ea facit vel dicit, quæ bonis angelis congruunt, etiam si credatur bonus, non est error Christianæ fidei periculosus aut morbidus. Cum vero per hæc aliena ad sua incipit ducere, tunc eum dignoscere, nec ire post eum, magna et necessaria vigilantia opus est. Sed nemo potest omnes mortiferos dolos ejus evadere, nisi regat atque teneat Deus. Et ipsa hujus rei difficultas ad hoc utilis est, ut nemo spem ponat in se vel in alio homine, sed in solo Deo. Et quando quidem Satanæ (qui interpretatur *adversarius*, quia humanæ salutis adversatur) ita se transformatur, et pollicendo bona humanis aspectibus lucis se angelum simulat, *ergo magnum non est, si ministri ejus transfigurentur ut appareant velut ministri justitiæ*, id est si pseudoapostoli mentiantur se socios apostolorum Christi, ut ita decipiant audientes. Quorum Satanæ ministrorum *finis erit secundum opera ipsorum*, quia in fine iudicabuntur secundum simulatas actiones suas, qui non propter Dominum, sed propter suum ventrem prædicaverunt, simulantes se ministros Dei. Finis eorum erit secundum opera ipsorum, quia sicut cura ventris et opera quæ pro ventre fiunt, intereunt, sic et ipsi interibunt.

« Iterum dico : Ne quis me putet insipientem esse. Alioquin velut insipientem accipite me, ut et ego modicum quid glorier. Quod loquor, non loquor secundum Deum, sed quasi in insipientia in hac substantia gloriæ. Quoniam multi gloriantur secundum carnem, et ego gloriabor. »

Supra jam dixit, utinam sustineretis modicum quid insipientiæ meæ, et nunc hoc repetit, quoniam semper proponit quod multis postpositis, prosequatur. Quod ergo superius proposuit, modo incipit narrare. Dixi, inquit, ut sustineretis aliquid insipientiæ, id est gloriationis meæ : et nunc *iterum dico*, ut nemo putet insipientem me esse in hac gloriatione, quia non glorior ea intentione qua illi, sed pro vestra utilitate. *Alioquin*, id est si non vultis me insipientem non putare, *accipite me* non revera insipientem, sed *velut insipientem*, dum videor me laudare, *ut et ego sicut illi modicum quid glorier secundum carnem*. Modicum, quia in vobis, non in sensu est gloriatio mea. Non enim vere ad gloriam suam Apostolus hæc loquitur, sed dolens, quia se contempto falsos apostolos glorificabant, cogitur invitum bona sua detegere ; nec inde reprehensibilis est, sed magis laudabilis. Nam justus quisque, si in humili cogitatione permanens, exigente causa vel dolore bona de se veracia dixerit, in tantum

a justitia non recessit, in quantum a veritate nullo modo discrepavit. Apostolus ergo multa de se fortia pro discipulorum ædificatione narrat, sed hæc narrando non peccat, quia a veritatis tramite et attestazione certa et humili corde non recedit. Dixi, inquit, me velut insipientem, quia *quod loquor in hac substantia gloriæ*, id est in gloria carnis quam putant substantiam, *non loquor secundum Deum, sed quasi in insipientia*. Secundum Deum modo non loquitur, quia ad carnis tumorem hæc pertinent, nec de inflatione carnis apud Dominum surgit gloria, apud quem sola humilitas gloriosa est, sed quasi insipientia. Non plenam dixit insipientiam, sed quasi insipientiam, veritas enim est. Sed quia elatio vitiosa res est, ideo quamvis verum sit quod dicitur, quasi insipientia tamen est, unumquemque laudare se, cum dicat sapientia : « *Laudet te alienus, et non os tuum : extraneus, et non labia tua (Prov. xxvii).* » Plena autem insipientia est, si se falsis laudibus quis attollit. Ille enim de vero est superbus, hic de falso stultus. Substantia tantum gloriationis in hac causa carnalis est, quia sicut flos feni (*Isa. xi ; Jac. i*), ita decedit gloria ista. Velut in insipientia loquor. Nam quia *multi gloriantur secundum carnem*, id est quoniam pseudoapostoli nobilitatem sibi carnis vindicant, et inde sibi defendunt generis prærogativam, quoniam filii dicuntur Abrahamæ, *et ego gloriabor*, quia et ego filius sum Abrahamæ. Sed nihil apud Dominum prodest filium esse Abrahamæ, si desit justitia vel fides Abrahamæ. Gloriari se dicit secundum carnem, sed hoc insipientiæ deputat, ut gloriam hanc exinaniat, et se coactum in laudem carnis erupisse doceat. Ob hoc enim gloriatur, ut ostendat se excellentius habere omnia etiam carnaliter, in quibus pseudoapostoli gloriabantur ; et sic ipse potius qui sine falsitate Christum prædicat, suscipiatur, et susceptores ejus salvificentur.

« Libenter enim suffertis insipientes, cum sitis ipsi sapientes. Sustinetis enim si quis vos in servitute redigit, si quis devorat, si quis accipit, si quis extollit, si quis in faciem vos cædit. Secundum ignobilitatem dico, quasi nos infirmi fuerimus in hac parte. »

Dixi ut me velut insipientem accipiatis, ut et ego modicum quid glorier secundum carnem. Nam *libenter suffertis insipientes*, id est non coacti, sed voluntarii sustinetis falsos apostolos, qui nobilitate generis et circumcissione carnis gloriantur, atque nos ipsos ad insipientiam suam pertrahere conantur. Et quia non bona patientia suffertis illos taliter gloriantes, justum est ut me potius sufferatis glorientem, quia non pro extollentia mei, sed pro utilitate vestra gloriabor. Illos insipientes, id est secundum carnem glorientes, et secundum carnem sapientes, suffertis libenter, quod mirum est, cum vos *ipsi sitis sapientes*, id est cœlesti sapientia per doctrinam meam imbuti. Inde enim magis estis re-

prehensibiles, quia cum sitis evangelica sapientia A per me imbuti, nunc libenter suffertis istos deceptores, qui vos ad insipientiam carnalis intelligentiæ et observantiæ legis inducere volunt. *Sustinetis enim si quis eorum vos ex libertate Christi redigit in servitutem legis*, quæ ex servili timore servatur. Vel insipientes suffertis, cum vos ipsi sitis non quidem omnes, sed quidam in sensu divinorum sapientes. Vel insipientes suffertis, cum sitis sapientes, id est in hoc probatur vos non esse sapientes, quia libenter suffertis insipientes. Amicus enim stultorum efficietur similis, et vere in eo quod eorum perversitatem sufferre vultis, sapientes non estis, quia tam hebetes estis, quod hanc injuriam sustinetis, si quis illorum vos a libertate Evangelii redigit in servitutem legis. Vel per partes ostendo quater suffertis insipientes. Nam sustinetis jugum eorum si quis ipsorum vos in servitutem legis redigere velit; et *si quis eorum devorat*, id est cum magna ingluvie bona vestra comedens consumit; et *si quis*, id est si aliquis accipit more accipitris res vestras, quas ego vobis parcens accipere nolo; et *si quis talium extollitur* jactando se de nobilitate generis, illum quoque sustinetis; et *si quis eorum cædit vos in faciem*, id est contumeliam improperii vobis coram positus ingerit, contemnens vos quia carnaliter circumcisi non estis et idola coluistis, illum etiam suffertis. In faciem namque cæditur, in cuius os injuria irrogatur. In faciem ergo vos cædit, qui conviciorum ictibus vultum vestrum feriens erubescere facit. *Secundum ignobilitatem dico* vos ita cædi, quam vobis pseudoapostoli obijciunt, quia estis ex genere idololatrarum, quoniam ipsa ignobilitatis objectio, est faciei percussio. Et dum ipsi vobis obtreccant quia estis incircumcisi, ac de se gloriantur quia sunt ex semine Abrahæ, se præferentes et nos humiliantes, vos ita sustinetis eos et nobis præfertis, *quasi nos infirmi fuerimus in hac parte*, id est impotentes in hac gloriatione carnalis nobilitatis. Hoc est, ita patimini vos cædi ab illis, et non a nobis, quasi non possemus similiter contemptoria verba vobis irrogare, extollendo nos de genere, et vos despiciendo. Non enim infirmi sumus in hac parte gloriæ, infirmi namque judicabuntur illi, qui de aliis nationibus applicati fuerant generi Abrahæ. Sed nos in hac re firmi sumus, quia de Abrahæ stirpe descendimus. Cur ergo falsos apostolos nobis in hac carnis gloria præfertis, in qua non sumus inferiores?

« In quo quis audet, in insipientia dico, audeo et ego. Hebræi sunt? et ego. Israelitæ sunt? et ego. Semen Abrahæ sunt? et ego. Ministri Christi sunt? et ego. »

Non sumus infirmi in hac parte gloriationis, quia in quocunque audet quis eorum gloriari, audeo similiter et ego, et hoc dico in insipientia, quia temeritas est ut quis se jactet sive laudet, cum dicat, ut præmisimus, Sapientia, « Laudet te alienus, et non os tuum : extraneus, et non labia tua (Prov. xxvii) ; »

et Idcirco in insipientia dico me audere in eo, in quo audent hi, qui se jactant quod sunt filii Abrahæ, ut illos insipientes esse designem, et gloriam ipsorum annihilarem. Vere in nullo sum eis inferior. Quia sunt ipsi Hebræi, id est de genere Hebræi patriarchæ, et ego similiter sum Hebræus genere et lingua. Per interrogationem enim et responsonem legendi sunt isti versiculi, ut interrogetur, sunt Hebræi? et respondeatur, et ego sum Hebræus; sunt ipsi Israelitæ? id est de genere Jacob, qui et Israel divinitus est appellatus, et ego non minus sum Israelita, id est filius ejusdem egregii patris; et sunt ipsi semen Abrahæ? id est non proselyti, sed naturales filii Abrahæ, et ego similiter sum semen ejusdem patriarchæ. Cur ergo in his mihi præferuntur, in quibus ergo non sum illis impar? et sunt ipsi ministri Christi secundum quod dicunt? et ego veraciter sum Christi minister. Ipsi enim se dicunt esse Christi ministros, ut per hoc decipiant; sed ego sine mendacio sum minister ejus, ut omnes quos potero ad eum pertraham.

« Ut minus sapiens dico, plus ego. In laboribus plurimis, in carceribus abundantius, in plagis supra modum, in mortibus frequenter. A Judæis quinque quadragenas una minus accepi. Ter virgis cæsus sum, semel lapidatus sum, ter naufragium feci, nocte et die in profundo maris fui. »

Sciendum quia justis atque perfecti aliquando virtutes suas prædicant, et bona quæ divinitus acceperunt narrant, non ut ipsi apud homines sua ostensione proficiant, sed ut eos, quibus prædicant, exemplo suo ad vitam trahant. Unde nunc Apostolus quoties fustibus cæsus, quoties lapidatus, quoties naufragium pertulit, quanta pro veritate sustinuit, quod ad tertium cælum raptus, quod in paradysum ductus sit, Corinthiis narrat, ut eorum a falsis prædicatoribus sensum avertat, ut dum innotesceret qualis ipse esset, illi eis vilescerent, quos ab eis cognoverat inique venerari. Quod perfecti cum faciunt, id est cum virtutes proprias loquuntur, in hoc quoque omnipotentis Domini imitatores sunt, qui laudes suas hominibus loquuntur ut ab hominibus cognoscatur. Nam cum per Scripturam suam præcipiat, dicens : Laudet te os alienum, et non os tuum, quomodo facit ipse quod prohibet (Prov. xxvii)? Sed si virtutes suas omnipotens Dominus taceret, eum nullus agnosceret; si nullus agnosceret, nullus amaret; si nullus amaret, nullus ad vitam rediret. Unde per Psalmistam dicitur : « Virtutem operum suorum annuntiabit populo suo, ut det illis hæreditatem gentium (Psalm. cx). » Virtutes enim suas annuntiat, non ut laudibus suis ipse proficiat, sed ut hi qui hæc ex sua laude cognoverunt, ad perpetuam hæreditatem veniant. Justis itaque et perfecti etiam cum virtutes, quas habent, infirmis loquuntur, reprehensibiles non sunt, quia per suam vitam quam referunt, aliorum animas ad vitam quærunt. Jure ergo Paulus.

virtutes proprias Corinthiis narrat, ut cujus meriti sit apud Dominum, illis innotescat, quatenus meritum ejus cognoscentes, doctrinam ejus per quam salventur, libenter suscipiant; et falsos apostolos per quos seducebantur, respuant. Ipsi, inquit, gloriantur se esse ministros Christi, licet in veritate non sint ejus ministri; et ego veraciter sum, quod illi se esse fingunt. Et plus etiam quam ipsi, sum ego minister Christi, vel plusquam cæteri prædicatores Christi. Et hoc dico ut minus sapiens, quia non est hominis laudare seipsum. Vera de se dicens, minus sapientem se pronuntiat, ut intelligatur coactus in laudem suam prorupisse. Nam qui sponte ea refert, quæ ad laudem ejus proficiant, non se fatetur insipientem. Ostendit ergo quæ sint quæ faciunt illum ministrum Christi plus esse quam sunt reliqui prædicatores. Occasione enim inventa, omnium tangit personas, etiam apostolorum; dolens quia gratia Dei minor in illo judicabatur, cum ipse eadem operaretur, quæ cæteri apostoli, et pro fide majora toleraret exitia. Plus sum ego minister Christi quam sunt alii prædicatores, comprobatus in laboribus plurimis, quia plus illis omnibus in ministerio prædicationis evangelicæ laboravi. Nam et ipsi laboraverunt, sed ego durius et multiplicius, quia et plura adversa pertuli, et pluribus gentibus prædicavi, et plura scripsi, et stipendium non accepi. Et in carceribus sum comprobatus minister Christi abundantius quam illi quos mihi præfertis, quia si ipsi pro ministerio prædicationis fuere in carcere, ego tamen sæpius et diutius. Et in plagis supra modum eorum, vel supra modum humanæ virtutis, quia si illi cæsi sunt, ego tamen atrocius et multiplicius. Et in mortibus frequenter, quia sæpe cruciatus sum usque ad mortem. Ego a Judæis accepi quinquies quadragenas una minus percussiones, id est quinquies flagellatus sum a Judæis secundum legem Moysi, quasi transgressor legis, quia novam gratiam prædicabam, accipiens singulis vicibus plagas triginta novem (Dext. xxv). Præceptum quippe legis erat ut quando iudices delinquentem verberarent, ita modum vindictæ temperarent, ut plagarum modus quadragenarium numerum non excederet. Unde ipsi unam percussione[m] quasi pro misericordia mihi conlonaverunt in unaquaque ex illis quinque vicibus, quibus me verberaverunt. Ego ter virgis cæsus sum a gentibus, sicut in Philippis, ego a Judæis semel lapidatus sum in Listris (Act. xvi). Ego ter naufragium feci, id est periculum navis fractæ pertuli, dum maria transnavigarem, ut multis gentibus evangelizarem. Possent hæc naufragia forsitan intelligi contigisse in illa navigatione, qua Romam venit Apostolus; sed quando rerebatur hanc epistolam, nondum ascenderat Hierosolimam, ubi captus est a Judæis, et post a Festo præside Romam missus (Act. xxvii). Nam in superioribus Epistolæ hujus multa locutus est Corinthiis de præparatione eleemosynæ, quam portaturus erat in Jerusalem. Omnes ergo tribulationes et pe-

ricula, quæ commemorantur in hac Epistola, prius acciderunt quam iret Hierosolimam. Non autem leguntur omnia in Actibus apostolorum, quia et ibi reperiuntur multa, quæ in his Epistolis nequaquam aperte commemorantur. Nam et hoc quod subjungit, nescitur quando factum sit; nocte et die in profundo maris sui. Quod tamen juxta litteram intelligendum est, id est quia Apostolus casu aliquo deveniens in profundum maris, die simul et nocte ibi demoratus sit, ac deinde liber ad terram Deo gubernante redierit; unde et inter cætera divina miracula ascribitur, quod homo tanto tempore sub undis retentus, neque a circumstantibus undis præfocari, neque a belluis maris devorari potuerit. Quid est enim mirabilius, Petrum super aquas ambulasse (Math. xiv), an Paulum sub aquis die ac nocte vixisse? Quod si in utriusque apostoli tam dissimili miraculo aliquid mysticum requirimus, Paulus non solum tertio naufragus, sed etiam nocte et die in profundo maris positus, atque ubique protectus et liberatus a Domino, significat justos de omnibus periculis divinitus eruendos: nec tantum de tentationibus extrinsecus ingruentibus salvandos, sed etiam si mortis ipsius viderentur gurgite depressi, atque ab humanis rebus absconditi, nihilominus virtute sui Conditoris eos esse revocandos ad vitam. Petrus vero super undas vento commotas incedens, sed ubi ob timorem mergi cœpit, dextera Christi erectus, significat eosdem justos omnia impiorum tentamenta ac persecutiones diabolico instinctu sibi illatas, fide invicta superare et calcare; nec posse omnino sæculi fluctibus immergi, qui præsentis semper Dei contemplantur auxilium, qui etsi ut homines aliquando titubaverint, mox divinitus erecti confirmantur. Post hæc memorat Apostolus alia pericula, variosque labores, ut se terra marique pro Christo vexatum secundum carnem ostendat, et in omnibus locis vel in omnibus afflictionum modis se pro Evangelio laborasse doceat. Ait enim:

In itineribus sæpe, periculis fluminum, periculis latronum, periculis ex genere, periculis ex gentibus, periculis in civitate, periculis in solitudine, periculis in mari, periculis in falsis fratribus; in labore et ærumna, in vigiliis multis, in fame et siti, in jejuniis multis, in indigentia. Præter illa quæ extrinsecus sunt instantia mea quotidiana, sollicitudo omnium Ecclesiarum. Quis infirmatur, et ego non infirmor? Quis scandalizatur, et ego non uror?

Sæpe in itineribus probatus sum, inquit minister Christi, periculis fluminum quæ pertuli, quia dum semper de loco ad locum pergerem, ut nomen Christi ubique manifestarem, frequenter inveniebam flumina, quæ non sine periculo transire poteram. Et periculis latronum quoniam diabolus, invisens itineri meo, latrones mihi excitabat, cum nihil ferrem quod latrones cuperent. Et periculis ex genere meo, id est ex Judæis, qui mihi plusquam cæteris

apostolis Invidabant, me semper interficere querebant, quia fortius et evidentius cæteris novam gratiam et abolitionem veteris observantiæ prædicabam, eum prius fuissem æmulator legis, et persecutor sectatorum gratiæ. Et *periculis ex gentibus* quia et gentiles me querebant occidere propter destructionem idololatriæ et prædicationem unius Dei. Et *periculis in civitate*, sicut in Epheso ubi propter defensionem Dianæ cum impetu cucurrere unanimiter in theatrum (Act. xix), et cum vellem intrare in furentem populum ut paterer martyrium, non permiserunt discipuli. Et *periculis in solitudine*, quia dum iter facerem, passus sum in deserto periculum vel a bestiis, vel ab hominibus, vel a potus, vel a cibi penuria. Et *periculis in mari*, quia et ibi vel ab hominibus, vel ab indigentia, vel a tempestatibus perituli pericula. Nam et cum essem in Græcia, factæ sunt mihi insidiæ a Judæis navigaturo in Syriam (Act. xx). Et *periculis in falsis fratribus*, id est qui Christianismum susceperant, et Judaismum non reliquerant, sed legem carnaliter observabant, et me persequebantur eo quod prædicato Christo legem jam cessare dicerem. Fuere et alii falsi fratres, sicut Demas et Hermogenes qui dilexere hoc sæculum (II Tim. iv; II Tim. i), et nunc talibus plena est Ecclesia. Cætera enim pericula quiescere possunt, pericula vero a falsis fratribus quiescere usque ad finem sæculi non noverunt. Item probatus sum minister Christi plusquam cæteri in labore manuum, quo querebam victum, et ærumna, id est molestia doloris vel paupertatis. Et in *vigiliis multis*, quia non solum diebus, sed et noctibus prædicabam, et causa orationis sæpe vigilabam, atque manibus meis opus aliquod, unde victum haberem, nonnunquam per noctem faciebam. Et in *fame ac siti*, quia dum nihil a discipulis acciperem, necesse erat ut per inopiam famem et sitim tolerarem. Tunc etiam fame ac siti laborabam, quando persecutores meos frequenter de loco ad locum fugiebam. Et in *jejuniiis multis*, quia sæpe jejunavi eo quod non haberem quod ederem. Sæpe etiam sponte me jejuniiis maceravi, castigans corpus meum et servituti subjiciens (I Cor. ix). In *frigore etiam et nuditate* laboravi, dum tenuitas ac disruptio vestium mihi esset in hieme. Et hæc omnia pro Christo pertuli, cujus sum minister. Sed præter illa quæ extrinsecus sunt, id est præter illa mala quæ exterius in corpore tolero, angit me *quotidiana instantia mea*, quæ nec una hora remittitur. Et quæ est illa? sollicitudo simul omnium Ecclesiarum, quia quotidie iusto sollicitudini salutis omnium qui sunt in universis Ecclesiis. Vere magnam de his semper gero sollicitudinem. Nam quis fidelium infirmatur in fide, vel in conscientia, vel in actione, et ego non infirmor? id est non compatior illi et condescendo, ut possim infirmitati ejus, quam velut meam doleo, adhibere medicinam? Et quis scandalizatur, id est pedibus actionum offendit, ut cursus boni operis ejus retardetur, vel etiam igne cadat in culpam, sive aliquo

A errore turbetur fides ejus, et ego non uror? id est zelo Dei inflammor? Valde enim mens mea cruciatur igne spiritalis zeli, dum infirmos quosque æterna deserere et rebus temporalibus delectari conspiciat. Uror sicut aurum ad purgationem igne pii doloris, quoniam affectus iste magis purgat, quia de charitate venit. Quanto enim major charitas, tanto majores plagæ de peccatis alienis. Non enim uror tanquam irascens peccantibus, sed tanquam dolens pro illis. Unde scriptum est: « Qui apponit scientiam apponit dolorem (Eccle. i). » Enumerat itaque, sicut lectum est, Apostolus bella quæ extrinsecus tolerat, dicens: *Periculis fluminum, periculis latronum, periculis ex genere, periculis ex gentibus, periculis in civitate, periculis in solitudine, periculis in mari, periculis in falsis fratribus*. In hoc autem bello quot contra adversarium spicula intorquet, adjungit: *In labore et ærumna, in vigiliis multis, in fame et siti, in jejuniiis multis, in frigore et nuditate*. Sed inter tot certamina deprehensus, dicit quanto vigiliarum munimine etiam castra custodiat. Nam post hæc exteriora quæ narravit, protinus interiora cœpit dicere, subjungens: *Præter illa quæ extrinsecus sunt, instantia mea quotidiana, sollicitudo omnium Ecclesiarum*. Ecce in se bella fortiter suscepit, et tuendis se proximis misericorditer impendit. Narrat mala quæ patitur, subjungit bona quæ impartitur. Pensemus ergo cujus charitatis sit plus de utilitate proximorum, quam de sua afflictione curare. Pensemus cujus laboris sit uno eodemque tempore foris adversa tolerare, et intus infirma protegere. In se enim contemnit vulnera corporis, et in aliis sanat vulnera cordis. Valde autem minoris laboris est aut docere cum nihil toleras, aut tolerare cum nihil doces. Sed Apostolus ad utrumque se solerter extendit, quia sic exteriora bella suscipit, ut sollicitè cogitet ne proximorum interiora lacerentur. Unde non immerito plus omnibus se laborasse fatetur. Quis itaque huic in honore aliquem audeat præponere, qui cunctis præest in labore? Qui et subjungit:

« Si gloriari oportet, quæ infirmitatis meæ sunt, gloriabor. Deus et Pater Domini nostri Jesu Christi scit, qui est benedictus in sæcula, quod non mentior. Damasci præpositus gentis Arethæ regis, custodiebat civitatem Damascenorum, ut me comprehenderet (Act. ix). Et per fenestram in sporta demissus sum per murum, et sic effugi manus ejus. »

Si gloriari oportet, non expedit quidem. Si oportet, inquit, gloriari, sicut et oportet pro vobis gloriabor, non in potentia vel genere, sed in his quæ sunt infirmitatis meæ, id est in passionibus quas pro Christo patior, licet hoc videatur abjectio. Si enim gloriandum est Christiano, in humilitate gloriandum est, de qua crescit apud Deum. Sed pseudoapostoli, quia non habent merita passionum, in quibus gloriari possint, gloriantur in sublimitate generis. Ne autem me putetis aliquid falsi dicere, Deum vobis adhibeo testem veritatis. Deus enim

qui novit omnia, ipse scit quia non mentior. Deus, A qui secundum humanitatem Christi, Deus ejus est; et secundum divinitatem ejus, est Pater ipsius, ipse qui est benedictus in omnia sæcula, scit, id est fert mihi testimonium quod non mentior in omnibus supradictis, vel in hoc quod sujungo. Quia etiam post conversionem meam, dum essem Damasci, præpositus gentis Arethæ regis custodiebat ipsam civitatem, id est portas ejus, ut me comprehenderet quatenus inde placeret Judæis qui mihi insidiabantur, et diligens in officio sibi credito videretur, si eum quem perturbatorem audiret, causa quietis interficeret. Portas custodiebat, quia me in civitate esse noverat, sed invenire non poterat, vel quia intus me comprehendere nolebat, ne violaret jus civitatis. Et interim ego per fenestram in sporta demissus sum a B fratribus per murum, et sic effugi manus ejus. Non ita fugit Paulus, sicut fugere solet mercenarius relinquens oves lupo venienti (Joan. x), quia lupo ille non oves, sed ipsum pastorem quærebat, et ideo pastor seipsum utilitati eorum fugiendo servavit. Neque eo recedente deserta est Ecclesia, quæ ibi erat, necessario ministerio; sed ab aliis fratribus ibidem constitutis, quod oportebat impletum est. Eis quippe volentibus hoc Apostolus fecit, ut seipsum servaret Ecclesiæ, quem proprie persecutor ille quærebat. Quando enim quisque prælatorum Ecclesiæ specialiter a persecutoribus quæritur, tunc debet ille fugere, sic tamen, ut ab aliis qui non ita requiruntur, non deseratur Ecclesia, C sed præbeant verbi cibaria conservis suis, quos aliter vivere non posse noverat. Cum autem omnibus simul instat commune periculum, tunc aut simul omnes, id est prælati et subditi ad alia loca transeant, aut simul omnes ibidem maneant. Necesse etiam est ut per omne quod agimus, in mentis trutinam positum hinc pondus laboris, illinc fructum mercedis pensemus. Cum enim pondus laboris fructum retributionis superat, tunc laborem quisque innoxie declinat, dummodo se in aliis exerceat, in quibus lucro fructuum pondus laboris vincat. Cum vero subsequente quantitate fructuum mensura laboris aut æquatur aut vincitur, tunc labor non sine gravi culpa declinatur. Propterea doctor egregius, cum Damasci valde obstinatas mentes persequentium D cerneret, eorum noluit adversitati confluere, quia et semetipsum quem profuturum multis noverat, vidit posse reficere, aut nullis se illic aut paucis prodesse. Secessum ergo a certamine petiit, et pugnatorem feliciter ad alia se bella servavit. Non enim loco virtus, sed locus virtuti defuit. Et idcirco fortissimus miles ab obsidionis angustia certaminis campum quæsivit, ubi et mysticum aliquid præsignatum est. Nam hoc effugii genus usque hodie in Ecclesia servatur, quando quis antiqui hostis insidiis, vel hujus sæculi laqueis circumfusis, spei fidique suæ munimine salvatur. Murus enim Damasci, quæ sanguinem bibens interpretatur, adversitas sæculi est. Præpositus Damasci, persecutor ali-

quis potens in hoc mundo. Rex Arethas qui interpretatur descensio, diabolus intelligitur. Sporta, quæ juncis palmisque solet confici, spei fideique conjunctionem designat. Juncus enim viriditatem fidei, palma vero spem vite æternæ significat. Quisquis ergo se muro adversitatis cinctum videt, sportam virtutis qua evadat festinus ascendat. Apostolus vero, postquam hanc evasionem suam retulit, protinus addidit :

CAPUT XII.

« Si gloriari oportet, non expedit quidem. »

Si gloriari oportet, id est si ideo gloriandum mihi est, quia evasi, quoniam manus insidiantium a perperatione homicidii immunes servavi, non expedit quidem gloriari quoniam qui gloriatur mortem se evasisse, quæ pro fide infertur, significat inane videri pro Christo pati. Vel si propter pseudoapostolos oportet me gloriari in hac gloriatione mea et in supradictis, non tamen expedit propter superbiam, quia ex humilitate crescimus, et auxilium Dei mitibus proficit, non elatis. Non expedit quidem, sed tamen propter vestram utilitatem necesse est gloriari.

« Veniam autem ad visiones et revelationes Domini. Scio hominem in Christo ante annos quatuordecim (sive in corpore, sive extra corpus nescio, Deus scit) raptum hujuscemodi usque ad tertium cælum. Et scio hujuscemodi hominem (sive in corpore, sive extra corpus, nescio, Deus scit) quoniam raptus est in paradysum, et audivit arcana verba, quæ non licet homini loqui. »

Hactenus, inquit, narraui tribulationes et pericula, de quibus me Dominus eripuit, et nunc narrando veniam ad visiones et revelationes Domini, id est ad secreta, quæ de Domino vidi et aperte intellexi, non ut Pharaon, qui vidit septem spicarum visionem, et non intellexit, quia non est revelatam quid significarent (Gen. xli). Ego enim mysticas visiones aspexi, et revelante Domino quid in his sapientiæ contineretur, intellexi. Et audite visiones: Scio hominem, etc. Ostendit quo sublevatus est, ut perinde quanta et qualia sint quæ illi ostensa et dicta sunt, possint intelligi, ne, sicut quibusdam videbatur, junior cæteris apostolis crederetur. De seipso enim quasi de alio loquitur, ut jactantiam caveat, quia hoc refert, quod ad laudem maximam pertinet. Et quid inde perit veritati, quando et res ipsa dicitur, et modo quodam dicendi jactantia devitatur? Scio, inquit, hominem in Christo existentem ante annos quatuordecim raptum usque ad tertium cælum. Ex quo ita raptus est Apostolus, usque ad tempus quo scripsit hanc epistolam completi sunt anni quatuordecim. Quod ideo adnotavit ut intelligeretur multo majoris meriti esse dum ista scriberet, quam fuerat dum ea vidisset, et quia non jactantia, sed necessitate diceret, quæ per tot annos tacebat. Scio, inquit, hominem raptum, sive in corpore nescio, sive extra corpus; id est scio quia raptus est homo ille, sed nescio utrum cum corpore, an sine

corpore. Hoc nescio, *Deus scit*, id est solito mihi juramento vobis istud confirmo. Juratio enim est quod dicitur : *Deus scit*. Hujusmodi hominem scio raptum usque ad tertium cœlum. *Et scio hujusmodi hominem raptum in paradysum*. Bis enim raptus est homo ille, id est in tertium cœlum, et rursus in paradysum, de quo Dominus latroni promisit : « Hodie mecum eris in paradiso (*Luc. xxiii*). » Ignoravit autem utrum quando sic raptus est in corpore fuerit, quo modo est anima in corpore cum corpus vivere dicitur, sive vigilantis, sive dormientis, sive in in exstasi a sensibus corporis alienata, an omnino de corpore exierit, ut mortuum corpus faceret, donec peracta illa demonstratione membris mortuis anima redderetur, et non quasi dormiens evigilaret, aut exstasi alienatus denuo rediret in sensus, sed mortuus omnino revivisceret. De tertio autem cœlo multa possunt dici : Novem enim sunt ordines angelorum, qui juxta Dionysium in tres ternas distinctiones distributi sunt. Prima enim triplex eorum dispositio, id est illa quæ terris est vicinior, constat ex angelis et archangelis, et principatibus ; media vero ex potestatibus et virtutibus et dominationibus ; suprema autem ex thronis et cherubim atque seraphim. Prima igitur dispositio primum cœlum recte potest accipi ; secunda vero secundum cœlum, tertia autem tertium cœlum. Apostolus itaque raptus in tertium cœlum, intelligitur supremis angelorum choris interfuisse, id est inter agmina seraphim sive cherubim secreta Dei vidisse. Qui et in paradysum raptus est, sive terrenum, sive cœlestem ; et *audivit ibi arcana verba*, id est intimam de secreta Dei essentia, quæ non licet homini loqui, id est quæ non licet ei pandere ulli mortali, vel quæ nullus homo potest in hac vita loqui. Vel per tres cœlos tria genera visionum intelligamus ; primum corporale, secundum spirituale, tertium intellectuale. Ecce enim in hoc uno præcepto, cum legitur : « Diliges proximum tuum sicut te ipsum (*Levit. xix*), » tria occurrunt genera visionum ; unum per oculos, quibus ipsæ litteræ videntur ; alterum per spiritum hominis, quo proximus et absens cogitatur ; tertium cœlum per concursum mentis, quo ipsa dilectio intellecta conspicitur. Corporali enim visione videtur cœlum et terra et omnia corporeis oculis conspicua. Spirituali visione cernuntur in spiritu corporales imagines, sicut sæpe per cognitionem volumus in animo similitudines rerum corporalium. Intellectuali visione cernuntur illæ res, quæ non habent imagines sui similes, sicut est charitas, gaudium, pax, patientia et cætera hujusmodi. Præstantior autem est visio spiritualis quam corporalis, et rursus præstantior intellectualis. Quod enim non imaginaliter, sed proprie videtur et non per corpus, hoc ea visione videtur, quæ omnes cæteras superat. Corporea visione vidit Balthasar digitos manus scribentis in pariete (*Dan. v*). Spirituali visione vidit Petrus vas plenum diversis

(217) Locus obscurus.

animalibus (*Act. x*). Intellectuali visione videtur sapientia, veritas, charitas, et ipse Deus. Quapropter si hoc tertium visionis genus, quod superius est non solum omni corporali, quo per corporis sensus corpora sentiuntur, sed etiam omni illo spiritali genere quo similitudines corporum spiritu, non mente cernuntur, tertium cœlum appellavit Apostolus, in hoc videtur claritas Dei non per aliquam corporaliter vel spiritaliter figuratam significationem, tanquam per speculum in ænigmate, sed facie ad faciem, per speciem scilicet, quia Deus quidquid quantumcumque eum mens quæ non est quod ipse etiam ab omni terrena labe mundata (217) ab omni corpore et similitudine corporis alienata et obrepta capere potest. Cur autem non credamus quod tanto apostolo, doctori gentium, raptus usque ad istam excellentissimam visionem voluerit Deus demonstrare vitam, in qua post hanc vitam videndus est in æternum ? Et cur non dicatur iste paradysus, excepto illo, in quo corporaliter vixit Adam ? Si enim proprie quidam nemorosus locus, translato autem verbo omnis etiam spiritalis quasi regio, ubi animæ bene est, merito paradysus dici potest, non solummodo tertium cœlum, quidquid illud est, quod profecto magnum sublimiterque præclarum est, sed etiam in ipso homine læticia quædam bonæ conscientiæ, paradysus est. Si ergo primum cœlum recte accipimus generali nomine hoc omne corporeum, quidquid est super aquas et terram, secundum autem in similitudine corporali, quod spiritu cernitur, sicut illud unde animalibus plenus in exstasi Petro discus ille submissus est (*ibid.*) ; tertium vero quod mente conspicitur, ita et secreta et remota et omnino abrepta a sensibus carnis atque mundata, ut ea quæ in illo cœlo sunt, et ipsam Dei substantiam, verbumque Domini per quod facta sunt omnia (*Psal. xxxii*), in charitate Spiritus sancti ineffabiliter valeat videre et audire, non incongruenter arbitramur et illuc Apostolum esse raptum et ibi fortassis esse paradysum omnibus meliorem, et (si dici oportet) paradysum paradysorum. Nec contrarium est huic intelligentiæ illud quod Moyses Dominus ait : « Non videbit me homo et vivet (*Exod. xxxiii*), » quia necesse est abstrahi ab hac vita mentem quando in illius ineffabilitatem visionis assumitur, sicut Apostoli mens divinitus rapta est ex hac vita ad angelicam vitam antequam per istam communem mortem carne solveretur. Et ibi, perfruens Dei allocutione, audivit ineffabilia verba quæ non licet homini loqui. Ideo cum prædicaret, dixit quod posset hominibus dici, et tenuit apud se quod non posset dici. Ergo audiat id quod possumus, mente comprehendere, et id quod non possumus credatur. Si illi diceremus, rogamur te, explica magnitudinem ipsius, nonne forte responderet nobis, non est valde magnus quem vidi, si a me potest explicari ?

« Pro hujusmodi gloriabor, pro me autem nihil

« nisi in infirmitatibus meis. Nam, etsi voluero
 « gloriari, non ero insipiens. Veritatem enim dicam.
 « Parco autem, ne quis me existimet supra id quod
 « videt in me, aut audit aliquid ex me. »

Pro hujusmodi homine vel visione gloriabor, id est commendabo me, sed pro me filio Abrahæ vel circumeiso nihil gloriabor, nisi in infirmitatibus meis, id est in tribulationibus quas patior. Pro hujusmodi homine, id est qui tam dignus est Deo, ut ad hanc visionem excellentiam sublevaretur, gloriari se dicit, et non vult aperte dicere quod de se loquitur, ne laudare se videatur. Et sic pro se non gloriatur, dum non aperte de se proflitetur. In infirmitatibus autem gloriatur, quia exponere pressuras passionum et infirmitates angustiarum non videtur gloriosum, sed flebile. Idcirco in his secure se fateatur gloriari, sciens qui ad perfectum perducunt cœlestium remunerationum. Quid enim tam gloriosum in futurum Christiano, quam exitia pro Christo illata narrare? Pro isto homine gloriabor non pro me. Nam etiam si voluero pro me gloriari, id est meritum meum quod apud Deum habeo profiteri non ero insipiens in hac gloriatione, licet quibusdam videar esse. Non enim falsa loquar sed veritatem de meipso dicam et ideo non in meipso, sed in ipsa veritate quæ superior me est humiliter, et veraciter gloriabor. Et de pluribus quidem adhuc gloriari poteram, sed parco, id est parce refero, ne quis me existimet supra id quod videt in me, id est ne quis me putet excellentioris esse naturæ, quam suis oculis comprehendere valeat, et incipiat errare in me, credens me divinam vel angelicam habere naturam, sicut illi qui de me et Barnaba dicebant: « Dii similes facti hominum descenderunt ad nos (Act. xiv). » Illi enim existimabant nos esse supra id quod videbant in nobis, quia, cum viderent in nobis terrenum et mortale corpus, existimabant nos cœlestes et immortales, et propterea parco gloriari, ne si plura retulero, putet quisquam me esse supra id quod videt in me, id est supra naturam humanitatis quam cernit in me; aut supra id quod audit ab aliis aliquid referri ex me. Vel ne quis existimet supra id quod videt in me, sive audit de me, id est ne quis me arbitretur ultra gloriam meam tendere, quam limes meritorum admittit. Omnes sancti non solum gloriam supra modum suum omnino non appetunt, sed etiam hoc ipsum videri refugiunt, quod esse meruere. Unde nunc prædicator egregius contra pseudoapostolos loquens, dum virtutes eximias operationis suæ pro discipulorum eruditione narraret, dum tot pericula tolerasse coacervata persecutione describeret, et post hæc usque ad tertium cœlum, rursumque in paradysum raptum se esse memoraret, ubi tanta agnoscere potuisset, quanta loqui omnino non posset, erat de se adhuc fortasse mirabilia locuturus, sed ab humana laude alta consideratione se temperans, subdit: Parco autem, ne quis me existimet supra id quod videt in me, aut audit aliquid ex me, id est ne si cætera di-

xero, putet me aliquis esse supra naturam humanam infirmitatis, cum non nisi infirmitas in me videatur, vel ab aliis qui vident, audiatur. Habebat ergo adhuc de se dicendum aliquid, quod parcat dicere. Sed egit utrumque doctor egregius, ut et loquendo quæ egerat, discipulos instrueret, et tacendo se intra humilitatis limitem custodiret. Nimis itaque esset ingratus, si de se discipulis tanta taceret; et fortasse nimis incautus, si de se omnia discipulis proderet. Sed mirabiliter, ut dictum est, egit utrumque, ut et loquendo erudiret audientium vitam, et tacendo custodiret suam.

« Et ne magnitudo revelationum extollat me, datus est mihi stimulus carnis meæ angelus Satanæ, ut me colaphizet. Propter quod ter Dominum rogavi ut discederet a me, et dixit mihi: Sufficit tibi gratia mea, nam virtus in infirmitate perficitur. Libenter igitur gloriabor in infirmitatibus meis ut inhabitet in me virtus Christi. »

Ego, inquit, tam magna, tamque sublimia divinitus vidi, et ne magnitudo tam ingentium revelationum extollat me, datus est mihi stimulus carnis meæ. Non me extulit, sed ne me extolleret, providit mihi Deus remedium, quod adversus elationem quæ evenire poterat, opponeret. Valde enim timenda est elatio de abundantia gratiarum, ne quis de dono Dei superbiat, sed magis servet humilitatem, et quanto major est, humiliet se in omnibus (Eccli. iii). Apostolus iste, quamvis ex persecutore factus prædicator, abundantior gratiam assecutus est in omni labore apostolico, quam cæteri apostoli, ut magis Deus ostenderet suum esse quod dat, non hominis, quomodo solent medici potentiam artis suæ in desperatis ostendere. Cum ergo esset magnæ gratiæ, et magna dona a Deo percipisset, quia ex abundantia gratiæ et revelationum poterat ei elatio subrepere, idcirco Deus, qui novit omnia antequam fiant, apposuit ei quemdam monitorem humanæ infirmitatis in similitudinem triumphantium, quibus in curru retro comes adhærebat, per singulas acclamationes civium, dicens: Hominem te memento. Ne extollat, inquit, ex magnitudine revelationum datus est mihi a Deo, id est ad meam utilitatem, ut me in humilitate custodiat, stimulus carnis, id est pungens carnem meam. Et quis est stimulus iste? angelus Satanæ, id est angelus malignus, missus a Satana, ut me colaphizet, id est ut me percutiat, reprimens omnem motum superbæ, excitando mihi semper tribulationes, aut corporis infirmitates, vel tentando ut quidem aiunt per libidinem. Tentatio autem cui non consentitur, non est peccatum, sed materia exercendæ virtutis. Nam stimulus iste forsitan concupiscentia carnis erat. Quibus malis Apostolus consideratis in corpore mortis suæ, in quo bellum intestinum cum invisibili hoste gerebat, remedium salutis suæ nullum penitus nisi solam gratiam Dei in Christo Jesu liberantem se, invenisse Romanis loquitur (Rom. vii). Sed et dolore quodam corporis traditur ex-

gitatus vehementer. Dolores autem corporum ple-
rumque immittuntur ab angelis Satanæ, sed hoc
non possunt nisi permitti. Nam et Job sic probatus
est (Job 11). Permissus est ad eum probandum
Satanas, et percussit eum ulcere, ita ut vermibus
putresceret. Sic et angelus Satanæ quasi libenter
missus est colaphizare Apostolum, sed tamen Apo-
stolus curabatur. Hoc ergo remedium divinitus ac-
cepit, ut per iniquum angelum semper injuriis et
tentationibus pressus, non posset ex revelationi-
bus extolli, quia otiosum pectus ex his quæ vide-
rat, intumescere posset. Secreto enim dispensatio-
nis ordine, unde sævire permittitur iniquitas dia-
boli, inde pie perficitur benignitas Dei. Elatos enim
in sanctitate viros non amitteret, nisi tentaret.
Sancti quippe non essent qui de sanctitatis gloria
superbirent; et tanto sub ejus jure caderent, quanto
se in suis virtutibus elevarent. Sed miro dispensa-
tionis ordine, dum tentantur, humiliantur; dum hu-
miliantur, ejus esse desinunt. Apostolus vero, prius-
quam morbum elationis incurreret, providente sup-
perno medico, accepit medicamentum humilitatis. Et
quia illud quod medicus apposuerat, molestum erat
ei, rogavit ut auferret. *Propter quod*, inquit, *ter Do-
minum rogavi* qui trinus est Deus, *ut discederet a me*
stimulus ille, et rogavi Dominum ut a me tolleret
acre medicamentum quod mihi apposuerat. Et non
fecit quod petebam, sed quod mihi expediebat,
quia non est magnum exaudiri ad voluntatem, sed
magnum exaudiri ad utilitatem. Nam *dixit mihi* :
Sufficit tibi gratia mea, id est hoc tibi satis est ut
habeas gratiam meam : et ideo noli superfluam car-
nis sanitatem quærere quia non iratus, sed gratio-
sus te uro. Ego novi quid apposuerim, ego novi
unde ægrotes, ego novi unde saneris. Quid enim
tibi utile sit, magis ego novi quam tu. *Nam vir-
tus in infirmitate perficitur*, id est virtus ad perfe-
ctionem ducitur per infirmitatem contrariam, cum
qua legitime certat, ut postea coronetur. Virtus in
infirmitate perficitur, quia infirmitatis actio fit vir-
tutis perfectio, ut præsentate infirmitate et tentatione
reprimatur virtutis elatio, ut ad ejus perfectionem
pertineat etiam ipsius imperfectionis et in veritate
cognitio, et in humilitate confessio. Et quia infirmi-
tas ita proficit virtuti, *igitur libenter*, id est non
minus, sed libens *gloriabor in infirmitatibus meis* ad
hoc datus *ut inhabitet in me virtus Christi*, id est
summam gloriam deputabo quod in me sum infir-
mus, ut sortem me faciat Christi virtus. Tunc glo-
riatur Apostolus, quando injuriis humiliatur, a
Christo autem virtus tolerandi præbetur, ut, quia
prius aspere fastidiendæ injuriæ videbantur, postea
libenter susciperentur, ut Christi auxilio lenirentur.
Libenter ergo cædi se patitur, dummodo a Christo
curetur, postquam cognovit prodesse quod nocere
putabat, sciens quia plus addit medicina Dei ad sa-
lutem, quam infirmitas detrahit hic sanitati.

« Propter quod placeo mihi in infirmitatibus
« meis, in contumeliis, in necessitatibus, in perse-

« cutionibus, in angustiis pro Christo. Cum enim
« infirmior, tunc potens sum. »

Virtus, ut dictum est, in infirmitate perficitur
Propter quod placeo mihi, id est multum, *delector*
in infirmitatibus meis. Omnes superiores passiones
atque inferiores hoc loco infirmitatum nomine de-
finivit Apostolus, eo quod humanæ infirmitati ista
prævaleant. Ut ergo discipulos instrueret, summa
de se retulit, ut vero se in humilitate custodiret,
considerationis oculum non in virtutibus suis, sed
in infirmitatibus fixit. Placeo, inquit, in infirmita-
tibus meis, et in contumeliis non in honoribus sæ-
culi, et in necessitatibus non in epulis, vel in otio,
sicut pseudoapostoli, qui causa ventris prædi-
cabant; et in persecutionibus (*Matth. v; I Petr.*
III), non in salutationibus, et susceptione adula-
tionis, et in angustiis; non in jactantia elationis et
superatione divitiarum. Et hoc *pro Christo*, non pro
aliquo crimine, quia beati qui persecutionem pa-
tiuntur propter justitiam. Non enim omnes beati
qui persecutionem et adversa patiuntur, sed qui
justitiæ causa patiuntur. Vel placeo mihi in infir-
mitatibus carnis, in contumeliis verborum, in ne-
cessitatibus, id est in indigentia necessariorum; in
persecutionibus de loco ad locum; in angustiis, id
est in anxietatibus animi pro Christo illatis. Et
jure placeo in talibus, quia quando *infirmior* in ta-
libus exterius *tunc potens sum* interius, id est quando
aliqua supradictarum tribulationum affligor, tunc a
Deo datur mihi potentia superandi. Tunc enim vin-
cit Christianus, cum perire putatur; et tunc perit
perfidia, cum se vicisse gratulatur.

« Factus sum insipiens, vos me coegistis, ego
« enim a vobis debui commendari. »

Post omnem commendationem suam ostendit
quia non ad jactantiam suam ista retulit. In his,
inquit, quæ hactenus ad commendationem meam
narravi, *factus sum insipiens*, secundum quod in
exterioribus verbis sonat, quia videor merita mea
prædicasse; sed hoc non jactanter, sed necessitate
compulsus feci pro vestra utilitate, quia *vos me coe-
gistis* ita loqui, qui de me non recta sentiebatis et
falsos apostolos mihi præferebatis; et ideo non mea
culpa, sed vestra est, quod de me tanta sum locutus.
Coactum se dicit ut quid esset ostenderet. Et uti-
que non est insipiens qui de se vera locutus est,
quia superius ait : « Si voluero gloriari, non ero in-
sapiens, veritatem enim dicam. » Sed nunc inclinat
se, et præ nimia humilitate vel cordis dolore se fa-
tetur insipientem, ut declaretur quia non voluntate
merita sua manifestavit. Insipientis enim est suos
narrare labores, et proprias jactare virtutes. Justus
autem nunquam bona sua detegit, nisi eum aut
proximorum utilitas, aut certe nimia necessitas
cogat, sicut Apostolus, cum virtutes suas enume-
rasset, coactum se dicit hoc fecisse. Nam, si virtu-
tes suas tacuisset, discipuli non cognovissent eum.
Si non cognovissent eum, non omitterent præferra
illi falsos apostolos, et dicta illorum dictis illius.

Sicque ignorantia dignitatis Apostoli causa esset A
 ut semper in errore permaneret discipuli. Ut ergo
 eos ab errore revocaret, coactus est monere quis
 esset. Vos, inquit, me coegistis, quia cum aliis de
 me satisfacere debuissetis nunc iterum opus habetis
 ut ego ipse me commendam vobis. *Ego enim debui*
a vobis commendari, id est vos adversus obtrecta-
 tores debuistis mihi testimonium ferre, apud quos
 ego Ecclesiam institui, et signorum prodigio feci, ut
 vos me tacentem defenderetis, quem in Christo pa-
 trem habetis.

« Nihil enim minus fui ab his qui sunt supra
 modum apostoli. Tametsi nihil sum, signa tamen
 apostolatus mei facta sunt super vos in omni pa-
 tientia, in signis et prodigiis et virtutibus. Quid
 est enim quod minus habuistis præ cæteris Ec-
 clesiis, nisi quod ego ipse non gravavi vos? Donate
 mihi hanc injuriam. »

Revera debui a vobis commendari cæteris. Nam
nihil minus fui vobis vel in prædicatione, vel in mi-
 raculis *ab his*, id est quam illi qui sunt apostoli supra
 modum meum, sicut quibusdam videtur quia Domi-
 num in carne sunt secuti. Non fui vobis in actione
 minor, quam Petrus vel Joannes sive Jacobus qui
 sunt supra modum meum apostoli, non dignitate,
 sed tempore, cum ego plus illis laboraverim. Nam
 si de tempore mihi præscribendum putatis, ante cœ-
 pit Joannes prædicare quam Christus, et non Chri-
 stus Joannem, sed Joannes Christum baptizavit
 (Matth. iii; Joan. 1). Andreas quoque prior secutus
 est Christum quam Petrus, nec tamen primatum ac-
 cepit Andreas, sed Petrus. Quare ergo quibusdam
 non videor apostolus, cum eadem possim per Dei
 gratiam, quæ et cæteri apostoli? Illis non videbatur
 apostolus esse, qui ejus prædicationem æmulatione
 legis respuebant, quasi esset inimicus traditionis
 Moysi, quia legem cessare dicebat; et cæteris apo-
 stolis favebant, præ istum illis humiliantes, quia illi
 non tam constanter contra legem aliquid asserabant.
 Ideo dolet minorem se videri, et compulsus ostendit
 quantæ sit dignitatis. Non fui, inquit, vobis in opere
 minor præcessoribus meis, quia, tametsi nihil sum,
 signa tamen apostolatus, etc. Sic se humiliat, ut eri-
 gat. Patientiam tamen primam memorat, quia diu
 illos portavit quasi impatientes ægros, ut adhibita
 medicina signorum, atque virtutum, curaret vulnera
 erroris illorum. Ego quidem, inquit, nihil sum, quia
 homo sum; sed apostolatus quem mihi Christus
 ipse dedit, signa in vobis ostendit, id est potentiam,
 virtutes atque prodigia. *Tametsi*, id est quamvis
nihil sum, secundum quod homo sum, vel secundum
 quod quibusdam videretur, qui me nihil esse judi-
 cant, tamen ea quæ feci, me apostolum designant,
 quoniam *signa apostolatus mei facta sunt super vos*,
 id est quod desuper descendant in vos a Patre lumi-
 num per doctrinam meam, ut crederetis, ut conver-
 teremini, ac religiose conversarem, signum et
 demonstratio est apostolatus mei. Et hoc factum est
 in omni patientia mea, quoniam patienter omnia su-

stinui, quæ mihi a vobis vel pro vobis illata sunt
 mala. Nam et contemptum et paupertatem, aliasque
 molestias apud vos pertuli; et mores vestros, ut
 paulatim eos corrigerem, longanimitè sustinui. Nec
 sola patientia vos ad fidem et morum meliorationem
 adduxi, sed etiam *signis et prodigiis et virtutibus*.
 Distat autem inter signum et prodigium atque vir-
 tutem, quia signum est genus prodigii, virtus ve-
 ro genus utriusque. Virtus enim vocari potest omne
 miraculum; signum autem illud tantum, quod in
 quocunque tempore aliquid significat; prodigium
 vero, quod in futuro tantum. Prodigium vero ap-
 pellatum est quasi porro dictum, quod porro dicat,
 porro significet, et aliquid futurum esse portendat,
 sicut sanationes corporum quæ per apostolos fe-
 bant, sanationes animarum portendebant. Nihil,
 inquit, vobis minus feci, quam fecissent priores apo-
 stoli, imo amplius. Nam *quid est quod minus habui-*
stis præ cæteris Ecclesiis, id est quid minus accipi-
 stis per me, quam cæteræ Ecclesiæ per alios aposto-
 los, nisi quod ego ipse non gravavi vos? id est non
 accipi stipendium a vobis, sicut cæteri prædicatores
 a suis accipiunt. Gratis enim Evangelium prædicavi
 vobis, quod nullis concessum est aliis Ecclesiis. *Do-*
nate mihi hanc injuriam, id est si tam imprudentes
 vel maligni estis, ut hoc putetis injuriam, ignoscite
 mihi. Date mihi veniam hujus facti, pro quo laude
 dignus sum, non reprehensione. Hoc enim non est
 injuria, sed misericordia et amicitia.

« Ecce tertio hoc paratus sum venire ad vos, et non
 ero gravis vobis. Non enim quæro quæ vestra sunt,
 sed vos, nec enim debent filii parentibus thesauri-
 zare, sed parentes filiis. Ego autem libentissime
 impendam et superimpendar ipse pro animabus
 vestris, licet plus vos diligens minus diligar. »

Ne forte putaretur inter initia stipendii abstinuisse
 ad commendationem suam, postea vero mercede
 evangelicæ prædicationis velle accipere, ostendit
 in ea se voluntate durare, ne sanctum suum postea
 mutare videretur, et esset quod obtrectatoribus
 reprehenderetur. Non gravavi, inquit, vos, sed nec
 gravabo. Quia *ecce hoc tertio*, id est hac tertia vice,
paratus sum venire ad vos, et non ero vobis gravis
 ut de vestro quidquam accipiam, sicut nec aliquid
 a vobis sumpsit. Non tertio venit ad eos, sed tertio
 paratus fuit venire. Non ero gravis vobis, accipien-
 do munera vestra, quia *non quæro ea quæ sunt vestra*,
sed vos ipsos, id est non pecunias vestras, sed vos
 ipsos lucrari volo ex prædicatione mea, ut vos ha-
 beam mecum in æterno Christi regno. Non quæro
 vestra; nec enim debent filii parentibus thesaurizare,
 id est divitias congregare, quod facitis pseudoapo-
 stolis; sed parentes filiis debent divitias præparare,
 quod pseudo non faciunt vobis. Consuetudo enim nunc
 loquitur. Consuetudo enim est, ut carnales parentes
 filiis suis thesaurizent. Spirituales vero patres dignum
 est ut a filiis suis accipiant sumptus. Sed Aposto-
 lus in tantum probat se nolle accipere, ut transferat
 causam carnalis patris ad spiritalem, ut non solum-

non accipiat ab eis, sed, si fieri possit, ipse eis tri-
buat. Quo dicto tangit eos, ut intelligatur quantus
sit, et quid mereantur qui tanti apostoli providen-
tiam negligunt. Parentes, inquit, debent filiis suis
thesauros præparare, sed ego non solum thesauros,
sed et meipsum paratus sum impendere. Tanto enim
affectu charitatis erga vos ego moveor, quod non
invitus, sed *libentissime impendam* vobis vel carnalia
vel spiritualia bona, et post omnia si opus fuerit,
ego ipse *superimpendar pro animabus vestris*, ut mori-
ari pro salute animarum vestrarum, *licet plus vos
diligens, minus diligar* a vobis. Qui enim tantam
habet charitatem, ut paratus sit pro fratribus etiam
mori, perfecta est in illo charitas (*Joan. xv*). Et ego
dum pro vobis mortem excipere sum paratus, per-
fecte vos diligere comprobor. Plus enim vos diligo,
non accipiendo res vestras, quam si eas acciperem;
vos autem minus quam debetis, vel minus quam
pseudoapostolos, diligitis me, quia me plus amare
debetis, maxime per quem viam vitæ didicistis.

« Sed esto. Ego vos non gravavi, sed cum essem
« astutus, dolo vos cepi. Nunquid per aliquem eorum
« quos misi ad vos circumveni vos? Rogavi Titum,
« et misi cum illo fratrem. Nunquid Titus vos cir-
« cumvenit? Nonne eodem spiritu ambulavimus?
« Nonne eisdem vestigiis? »

Nihil eorum quæ possent ei ex adverso proponi
tacet, ut se per omnia purget. Quia nihil per cir-
cumventionem egit apud eos, sed pura virtute sibi
simpliciter, et illis dupliciter consuluit, ut ipse nihil
præter futuram supernæ beatitudinis retributionem
quereret, et illis apud Dominum provideret, atque
censum eorum non acciperet. Forte enim suspi-
carentur, ideo illum sua dona contempsisse, quia parva
erant quæ offerebantur, ut magna consequeretur;
et circumspiciens merita sua, non pecuniam refuta-
ret, sed numerum indignum sibi æstimans contem-
neret. Ego, inquit, non accepi vestra, sed paratus
sum vobis impendere mea; et inde minus a vobis
diligo, quia non intelligitis quam charitativa mente
hoc feci. Sed esto, hoc est sit, id est nunc conceda-
mus istud, quia ego non gravavi vos per meipsum,
accipiendo res vestras; *sed cum essem astutus, dolo
eos cepi*, id est decepi vos callida arte simulationis,
extrañando vobis per alios bona vestra. Ironice di-
cit, nam pseudoapostoli affirmabant eum sic agere.
Vel inquit: Talia de me suspicamini, sed effectu
rei probatur quia falsa sunt quæ putatis. *Nunquid
enim per aliquem eorum quos misi ad vos circumveni
et artificiose decepi vos, ut callide vobis per eos ex-
torquerem res vestras?* Hoc est quod dicit, quia quos
misi, non illis hoc intimaverunt, ut si vellent placat-
um habere Apostolum, dignam quantitatem personæ
illius offerrent, quoniam ideo nolisset accipere, quia
minus quam dignum erat offerebatur. Quod composi-
tum Apostoli astutia intelligerent, ut quod egit, non
per contemptum, sed per avaritiam egisse putaretur.
Vere, inquit, non circumveni vos per aliquem legato-
rum meorum, quia per Titum id non feci, per quem
facilius hoc possem implere. Nam *rogavi Titum ut*

A ad vos pergeret, quia illi facilius obediebatis, *et misi
cum illo fratrem*, cujus laus est in Evangelio, qui in-
telligitur Lucas. *Nunquid Titus*, cujus dictis facile
acquiescebatis, *circumvenit vos*, callide vobis sua-
dens ut mihi mitteretis aliquid? Nequaquam. *Nonne
enim ambulavimus*, id est perseveravimus, *eodem
spiritu*, id est eadem voluntate qua cœpimus, ut, sicut
in principio nihil accipere a vobis voluimus, ita et
deinceps? Et *nonne eisdem vestigiis* quibus cœpimus,
id est eisdem passibus actionum semper ambulavi-
mus, ut non in accipiendo perseveraremus? Una
enim in bono sententia nostra esse probatur, exclusa
omni suspitione avaritiæ, quando ab his quos misi
nihil tale dictum aut factum est, in quo deprehende-
retur avaritia. Vel ita: Non circumvenit vos Titus,
B sicut nec ego circumveneram. Quia nonne eodem
spiritu, id est eadem bona voluntate ambulavimus
ego et ille? Et nonne eisdem vestigiis ego et ille am-
bulavimus, id est eisdem operationibus per quas
apparet voluntas? « Unaquæque enim arbor ex fructu
suo cognoscitur (*Matth. xii*). »

« Olim putatis quod excusemus nos apud vos?
« Coram Deo in Christo loquimur, omnia autem,
« charissimi, propter ædificationem vestram. »

Olim putatis, id est dudum æstimatis, *quod excuse-
mus nos apud vos*, id est quod causam excusationis
quasi reus dicam, quia non gravavi vos? Jam diu est,
quod de nobis dubitatis, arbitantes quia non simpli-
citer agamus vobiscum, quoniam pseudoapostolis cre-
ditis, qui dicunt nos tergiversatione quadam dona ve-
stra respere, ut majora possimus accipere. Et puta-
tis quod hujusmodi fictam conscientiam excusemus
apud vos? Sed nos *coram Deo in Christo loquimur*.
Coram Deo, sicut supradictum est loquitur, qui in
omni quod dicit, humanos favores non appetit, sed
omnipotentis Dei præsentis intendit; nec suam, sed
auctoris gloriam requirit. In Christo autem loqui-
tur, cujus sermo totus in Christi veritate persistit,
ut nec mendax sit, nec aliud quam Christum præ-
dicet. Et nos ita coram Deo loquimur in Christo.
Sed omnia hæc loquimur et facimus *propter vestram
ædificationem*, ut bene de nobis sentiat, et falsos
apostolos repellatis, atque per doctrinam nostram
in Christi templum ædificemini. Ædificationi enim
vestræ proficit, quidquid de tribulationibus nostris
et revelationibus supra diximus, et quod malam de
nobis suspicionem a cordibus vestris tollimus, vel
quod censum vestrum idcirco non suscepimus, ne
auctoritatem nostræ potestatis qua vitiosos argui-
mus, inclinaremus. Sine dubio enim prodest ei, qui
corripitur ut emendet, si præpositus ejus ideo ob-
lata refutet, ut libere arguat.

« Timeo enim ne forte cum venero, non quales
« volo inveniam vos, et ego inveniar a vobis qualem
« non vultis, ne forte contentiones, æmulationes,
« animositates, dissensiones, detractones, susurra-
« tiones, inflationes, seditiones sint inter vos: ne
« iterum cum venero, humiliet me Deus apud vos,
« et lugeam multos ex his qui ante peccaverunt, et
« non egerunt penitentiam super immunditia et for-

« nitatione et impudicitia quam gesserunt (I Cor. v.) » A
 Omnia, ut præfatus sum, propter vestram ædifi-
 cationem vobis loquor aut facio. Nam *timeo ne, cum
 venero, inveniam vos incorrectos, quales non volo vos
 invenire, quod forte erit, quia ad utrumque se
 habet, et ex libertate arbitrii vestri potest quodlibet
 horum contingere. Ideo præparate vos, ne inveniam
 vos in vitiis perdurantes, quales invenire nolo; et
 ego inveniar, id est sentiar a vobis severus et asper,
 et peccata vestra juste puniens, qualem non vultis
 invenire. Ille enim invenit aliquem qualem non vult,
 qui se talem facit, ut discordet ab illo. Et ideo tales
 vos exhibete, ut non discordetis a mea sanctitate,
 ut, cum venero, possimus invicem gaudere. Scilicet
 ne forte sint inter vos contentiones, et cætera quæ in
 priore epistola reprehendi (I Cor. i), quando per-
 sonis deferentes, et alterum alteri præponentes
 dissidebatis ab invicem. Contentio est, ubi non
 ratione aliquid sed animi pertinacia defenditur.
 Æmulatio est hoc loco invidia. Animositas est ma-
 gna commoti animi adversus alterum pertinacia,
 qualis erat in illis, qui judicia habebant inter se,
 quæ deferebant ad infideles determinanda, et inde
 irascebantur ad invicem. Dissensio est, ubi non
 omnes in una voluntate et in uno sensu concordant,
 sed diversa volunt, et partes faciunt. Detractio est,
 quando quis bona alterius deorsum trahit (I Cor.
 vi), id est loquendo humiliat et premit, vel de
 ipsis bonis aliqua trahit, ut pauciora seu minora
 quam sunt ostendat ea esse. Susurratio, est quando
 quis murmurat et non in facie loquitur alicui, sed
 de illo aliis male loquitur. Inflatio est, quando quis
 tumore cordis turgescit interius. Seditio est com-
 motio civium invicem contra se. Et timeo, inquit,
 ne vitia hæc inter vos reperiantur, cum venero, ne
 sint inter vos contentiones de meritis prælatorum,
 ut erant dum diceretis, ego quidem sum Pauli, ego
 autem Apollonis, ego vero Cephæ (I Cor. i). Et æmu-
 lationes, id est invidiæ, propter meliora charismata
 per quas minores solent invidere majoribus. Et
 animositates in repetitione rerum et ultione, pro-
 pter quas solebatis apud infideles iudicio contende-
 re. Et dissensiones, id est mentium diversitates,
 aut voluntatum divisiones. Et detractiones, per
 quas alius loquendo detrahit, et auferit quiddam
 potest ex bene gestis alterius (I Cor. vi). Atque
 susurrationes, per quas latenter seminantur discor-
 diæ. Et inflationes, per quas nonnulli quasi de
 excellentioribus meritis intumescunt, et alios despi-
 ciunt. Atque seditiones, id est tumultus irascentium
 atque litigantium in populo usque ad percussiones.
 Timeo, inquam, ne in vobis talia reperiam, ne, sci-
 licet, cum venero, humiliet me iterum Deus apud vos,
 id est ne, sicut dolui pro peccatis vestris, ita rur-
 sum doleam pro impoenitudine vestra, et lugeam ibi
 multos ex his qui ante primam epistolam peccave-
 runt, et adhuc permanentes in sua nequitia, non
 egerunt penitentiam. Illis in peccato perdurantibus,
 se dicit humiliari et lugere, quia ut pius pater incipit*

culpam filiorum debere, et se pro his in orationibus
 et jejuniis affligere. Quis enim pater non gaudeat
 bene agentibus filiis? Sic iterum necesse est lugeat,
 si prave conversentur. Ideo admonet ut si qui non
 egerunt penitentiam, sicut alios significat egisse,
 non agant eam, ut veniens sine tristitia sit cum
 illis. Cum enim dicit, et lugeam multos ex his qui
 ante peccaverunt, et non egerunt penitentiam, pro-
 bat quosdam ex his penitentiam egisse, quosdam
 vero non agere. Agenda est autem penitentia om-
 nibus qui peccaverunt, quia non sufficit mores in
 melius commutare, et a factis malis recedere, nisi
 et de his quæ facta sunt, satisfaciat Domino per
 penitentiam dolorem, per humilitatis gemitum, per
 contriti cordis sacrificium, cooperantibus eleemo-
 synis. Non egerunt, inquit, penitentiam super im-
 munditia, id est de immundissima perpetrations
 libidinis quæ fit inter mares, vel ab uno solo: et
 fornicatione, quæ fit cum publicis meretricibus, quæ
 prostant in fornicibus, unde etiam fornicatio dicitur;
 et impudicitia, quæ fit cum feminis suæ con-
 sanguinitatis, sicut cum sorore vel nepte, sive
 fratris uxore, et vocatur incestus. Et cum de his
 tam execrandis libidinum perpetrations peni-
 tentiam fieri suadeat Apostolus, patet quia non est
 ulla criminum tam horrenda macula, quæ per peni-
 tentiam deleri non possit.

CAPUT XIII.

« Ecce tertio hoc venio ad vos. In ore duorum
 vel trium testium stabit omne verbum (Deut. xvii;
 Matth. xviii; Hebr. x; I Joan. viii). Prædixi enim
 et prædico ut præsens vobis et nunc absens, his
 qui ante peccaverunt, et cæteris omnibus, quo-
 niam si venero iterum, non parcam. »

Timeo, inquit, ne tales vos inveniam quales nolo,
 et inveniar a vobis durus cum venero. Ideoque ne
 differatis penitentiam agere, quia ego non differam
 venire. Nam ecce certum sit vobis quia in proximo
 venio ad vos hoc tertio apparatu. Non dixit quod bis
 venerit, et hac tertia vice venturus sit, sed quod bis
 se præparaverit, et venire nequiverit, hoc autem ter-
 tio apparatu venturus sit. Tertio, inquit, venio. In
 ore duorum vel trium testium stabit omne verbum
 (Deut. xvii). Hoc in lege dictum est, ut aliquis
 duobus aut tribus testibus aut purgetur aut condem-
 netur. Ita et hi secundo vel tertio adventu Apostoli,
 aut purgati invenientur, aut damnabiles. Vel præ-
 sente Apostolo, omne verbum accusationis sive
 excusationis stabit in ore duorum aut trium testium,
 id est stabile et ratum erit sub assertione duarum
 aut trium idonearum personarum. Ubi innuitur
 quia prælatus Ecclesiæ, licet ipse pro certo sciat
 culpam cujuslibet subjecti sui, non tamen potest
 eum condemnare, nisi eadem ejus culpa duobus aut
 tribus testibus fuerit probata. Testibus, inquit, ege-
 bit qui se coram me excusare voluerit. Nam prædixi,
 dum essem apud vos, et adhuc prædico ut tunc
 præsens, ita et nunc absens his qui ante epistolam
 peccaverunt, et cæteris omnibus, qui post peccave-

runt, quoniam si iterum venero, non parcam eis, sed puniam eos; vel si venero, non parcam eis iterum, sicut olim peperi. Pridem se dixisse significat præsentem ut corrigerent se, ne cum pudore corripere-
rentur; et nunc iterum absentem eadem se dicere contestatur, ut post secundam correptionem, si se non emendaverint, parci eis non debeat.

« An experimentum quæritis ejus, qui in me loquitur Christus, qui in vobis non infirmatur, sed potens est in vobis? Nam, etsi crucifixus est ex infirmitate, sed vivit ex virtute Dei. Nam et nos infirmi sumus in illo, sed vivemus cum eo ex virtute Dei in vobis. »

Dixi quia non parcam incorreptis, sed puniam eos. Et an quæritis experimentum eius qui in me ista loquitur, qui est Christus, id est vultis experiri si Christus audeat punire, ut non dicam si ego audeam, sed Christus qui in me manet et loquitur? Experimentum quærent Christi loquentis in Apostolo, dum præceptis ejus non obediunt, volentes probare si audet vindicare, ut per hoc intelligatur esse firmæ auctoritatis, ac de cætero timeatur. Qui enim magistrum contempnit, emendare se non quærit. Et notandum quod doctrina ejus non hominis, sed Christi esse probatur, quam qui reprehendit, contumax invenitur. Christus enim in eo loquitur intrinsecus omnia quæ ipse loquitur extrinsecus; et Christum in eo tentat, qui vult experiri si ipse peccantes ferire audeat. Ideo non de se, sed de illo terrens, an quæritis, inquit, experimentum, id est probationem ejus qui in me loquitur Christus? Et addit: Qui non infirmatur in vobis, id est inter vos, sed potens est in vos. Non infirmus, sed potens inter eos apparuit, quando per Apostolum signa et prodigia fecit, et diversa charismata gratiarum dedit. Quod experti sciant, quia et in eos puniendos est potens, si eum irritaverint. Vere potens est punire peccantes. Nam, etsi crucifixus est ex infirmitate carnis, qua visus est impotens fuisse contra suos hostes, sed, id est tamen, vivit æternaliter ex virtute Dei, id est ex eo quod ipse est Deus. Ex nostra enim infirmitate occisus, resurrexit ex virtute sua et Patris. Vere nunc perenniter et in carne vivit, licet prius in ea infirmus fuerit. Nam et nos infirmi sumus in illo, id est nos apostoli in ejus prædicatione plagas infirmitatis sustinemus, dum pro ejus nomine cædimur, et variis injuriis afficimur; sed vivemus cum eo, id est in simili beatitudine resuscitati ad æternam vitam ex virtute Dei. Virtute enim Dei resurgemus, ut semper cum Christo vivamus. Et hoc in vobis, quia mors martyrum floret in fide populorum. In vobis, id est in cordibus vestris vivemus cum Christo, quia intelligetis nos vivere cum eo. Non est ergo mirum, si Christus ex virtute divinitatis vivit, cum et nos qui multo minores sumus, ex eadem virtute victuri simus.

« Vosmetipsos tentate, si estis in fide, ipsi vos probate. Annon cognoscitis vosmetipsos, quia

Christus Jesus in vobis est, nisi forte reprobi estis? »

Dixi quia nos vivemus in vobis. Nam fidem accepistis a nobis. Et ideo tentate, id est discutite et probate vosmetipsos, si estis in fide; et si vos esse in fide videritis, tunc nos in vobis vivere cognoscatis. Dum auditis quia nos pro fide tot tribulationes patimur, tentate, id est probate vosmetipsos; et si estis in fide, ipsi vos probate. Ac si dicatur: Persecutionum certamina ad mentem reducite, et cordis vestri intima atque occulta pensantes, quales inter supplicia valeatis existere, invenite. Annon cognoscitis vosmetipsos, id est non cognoscitis quales sitis intus, scilicet quia per fidem, quam a nobis accepistis, est Christus Jesus in vobis? Qui enim fidei sensum in corde habet, hic scit Christum Jesum in se esse. Et vos ita scitis eum in vobis esse, nisi forte reprobi estis. Hoc est enim reprobum esse, nescire fidem professionis suæ. Reprobis enim, id est retro a probitate alienus, qui probitatem fidei et bonæ operationis, quam in baptismo accepit, ignorat vel deseruit. Et vos cognoscitis quia per sensum fidei et per affectum dilectionis, ac strenuitatem rectæ actionis est Christus in vobis, nisi forte reprobi estis, id est ab eo quod prius cœpistis, retro conversi et a Deo rejecti.

« Spero autem quod cognoscetis, quia nos non sumus reprobi. Oramus autem Deum ut nihil mali faciatis, non ut nos probati parcamus, sed ut vos quod bonum est faciatis, nos autem ut reprobi simus. Non enim possumus aliquid adversus veritatem, sed pro veritate. Gaudemus enim quoniam nos infirmi sumus, vos autem potentes estis. Hoc et oramus vestram consumptionem. Ideo enim hæc absens scribo, ut non præsens durius agam secundum potestatem quam Dominus dedit mihi in ædificationem, et non in destructionem. »

Provocat eos ad scientiam fidei et rectæ vitæ. Cum enim cœperint scire apostoli sui certam auctoritatem et meritum apud Deum, poterunt et ipsi circa se esse solliciti. In vobis, inquit, habitare Christum cognoscitis, nisi forte reprobi estis. Sed quidquid de vobis sit, de nobis spero quod amodo cognoscetis, quia nos non sumus reprobi, sed electi Dei. Dum enim falsos apostolos nobis præferretis, illos putabatis divinitus electos esse, nos autem reprobos. Sed spero quia per hujus epistolæ doctrinam cognoscetis, quod non nos, sed illi sunt reprobi; et ideo relictis illis, monita nostra sequemini. Vel qui Christum in nobis tentabatis, volentes experiri si possemus in peccantes vindicare, spero quod cognoscetis quia nos non sumus reprobi, id est per aliquam culpam a nostra potestate privati, cum videritis nos delinquentes apud vos potenter arguere. Sed oramus Deum ut hoc non eveniat, oramus Deum ut nihil mali faciatis, propter quod sit necesse ut a nobis arguamini. Poterat dicere, monemus vos ut nihil mali faciatis. Quod quidem si diceret, certam dice-

ret, quia et voluntas nostra aliquid agit, sed sola non sufficit. Maluit tamen dicere, oramus, ut gratiam commendaret, ut intelligerent quando non faciunt aliquid mali, non sua voluntate sola se vitare malum, sed adiutorio Dei implere quod iustum est. Oramus, inquit, Deum, sine quo nihil valet humanæ voluntatis arbitrium, ut nihil mali faciatis, non ut nos probati appareamus, id est non ut in auctoritate videamur vobis peccantibus; sed potius ut vos quod bonum est faciatis, non autem ut quasi reprobi simus, id est quasi sine potestate. Non orat ut ipse sit reprobus, sed ut his bene agentibus, dum non audent corripere, quasi humiliantur, et humiliati vel reprobi appareant. Probati enim a Deo videntur, dum iudicant peccatores auctoritate concessa. Si ergo quos iudicent non sint, cessante in his auctoritate, quasi reprobi videntur. Nam ne putentur et injuste posse damnari, apte subditur: *Non enim possumus, etc. Simus, inquit, id est pareamus reprobi, non habentes quid vindicemus. Non enim possumus aliquid adversus veritatem, id est potestas non est nobis data contra veritatem, ut arguamus eos qui in veritate ambulant, id est bene vivunt; sed pro veritate tuenda, ut vindicemus in eos qui inimici sunt legis. Ideoque cessabit potestas, si illi quod bonum est fecerint. Unde Romanus dictum est: « Vos non timere potestatem? Bonum fac, et habebis laudem ex illa (Rom. xiii). » Qui ergo potestatem non timet, bonum operando, evacuata est apud eum potestas. Hoc est quasi reprobum esse, quia hoc in eo cessat, unde probatur potestas. Ob hoc autem oramus Deum ut nihil mali faciatis, quia gaudemus nos quoniam sumus infirmi, id est quod non est necesse ut nostra virtus appareat puniendo peccantes. Hoc est enim infirmari, potestatem non exercere. Gaudemus, si nos taliter infirmi sumus; sed vos potentes estis, id est si bene agentes vitia vincitis, ut prohibeatis a vobis vindictam aut correptionem. Tunc enim potentes estis, quando vitiis fortiter prævalentes, potestatem nostram non timetis. Hoc etiam oramus agere vestram consummationem, id est rogamus vos ut in eo perficiamini, ne peccetis, consummati in virtute bonæ vitæ et incorrupta fide. Et quia id volo atque oro, ideo hæc quæ ad correptionem vestram dixi, scribo vobis absens, ut cum fuero præsens non agam in vobis durius quam volo, ut scilicet correptiones inveniam vos, et non coram hominibus increpem cum pudore, ne qui peccaverunt erubescant in cœtu fraterno. Hæc scribo, ne durius quam vultis agam secundum potestatem arguendi et puniendi reos, quam Dominus mihi dedit in ædificationem, et non in destructionem, id est ut per hanc subjectos meos ædificem, et non destruam. Si enim peccata illorum reliquero impunita, destruam, et non ædificabo; item, si bene agentes puniero, destruam, et non ædificabo. Sed ita discrete exercenda est hæc potestas ad ædificationem, et non ad destructionem, ut bene agentes ad meliora hortemur, et male agentes arguamus, ut correpti ædificentur. Non enim destruantur, qui arguuntur ut se corrigant,*

sed potius ædificantur. Sic exercenda est potestas, ut et pœnitentes absolvamus, et impœnitentes vinculo anathematis astringamus. Qui aliter agit, perverse utitur hac potestate, et in oculis Dei se privat ab ea.

« De cætero, fratres, gaudete, perfecti estote, exhortamini, id ipsum sapite, pacem habete, et Deus pacis et dilectionis erit vobiscum, »

Illicque vos ad dilectionem et correctionem monui, ut de his quæ hactenus male egistis, corrigamini. Sed de cætero, id est de reliquo vitæ vestræ spatio, gaudete, id est de conscientia honorum meritum gaudium habete, et peccata, de quibus iterum contristari necesse sit, cavete. Et ut gaudere possitis, estote perfecti in bonis operibus. Et ut perfecti sitis, exhortamini alius alium, ut unusquisque magis magisque provehatur in perfectione virtutum. Et in ipsa perfectione id ipsum sapite omnes, ut non sit inter vos ulla dissensio, sed unum sentiat. Vel certe vos perfecti exhortamini minores ad eandem perfectionem, et vos minores id ipsum sapite quod majores, ne ab eis jam dissentiat. Et omnes tam majores quam minores, habete simul pacem, ne sit amplius in vobis prior discordia, sed sicut unius corporis membra sitis ad invicem omnes concordēs. Et si hæc feceritis, tunc Deus pacis et dilectionis, et si hæc feceritis, tunc Deus pacis et dilectionis, erit Christus, erit vobiscum adjutor in omnibus et director. Christus enim est Deus pacis et dilectionis (I Cor. i), quia dixit suis: « Pacem meam do vobis (Joan. xiv), » etc. Hoc est præceptum meum ut diligatis invicem (Joan. xv). Cum quibus ipse est, sicut ait: « Ecce ego vobiscum sum omnibus diebus usque ad consummationem sæculi (Matth. xxviii). » Sequitur:

« Salutate invicem in osculo sancto. Salutant vos omnes sancti. Gratia Domini nostri Jesu Christi, et charitas Dei, et communicatio sancti Spiritus sit cum omnibus vobis. Amen. »

Ut pax sit inter vos, salutate invicem in osculo non doloso vel libidinoso, sed sancto, id est in Christo, vera pace pleno et casto. Et sic facere libenter debetis, quia ita optant omnes sancti. Salutant enim vos, ut ex voto salutationis eorum proficiatis, et ipsorum sanctitatem imitemini. Illi vos salutant, et ego affectuosius, dicens: Gratia Domini nostri Jesu Christi, quia gratis peccata condonantur, atque salus tribuitur; et charitas Dei Patris, qua nos ita dilexit, ut Unigenitum suum pro nobis in mortem daret (Joan. iii); et communicatio sancti Spiritus, qui in utraque, id est in prædicta gratia et charitate communicavit Christo et Deo, communiter et pariter operans cum illis humanam salutem, sit cum omnibus vobis, majoribus atque minoribus seu mediocribus. Trinitas hic complexio est, et unitas potestatis, quæ totius nostræ salutis perfectio est. Charitas enim dimisit nobis Salvatorem Jesum, cujus gratia salvati sumus; et ut possideamus hanc gratiam salutis, communicatio facit Spiritus sancti. Hæc enim dilectos a Deo et salvatos gratia Christi tuetur, ut trium perfectio, consummatio sit hominis in salute.

IN EPISTOLAM AD GALATAS.

ARGUMENTUM.

Galatia est regio in Asia, cujus incolae Paulus ad se convertit, ac bonis moribus informavit. Cum accessisset ab eis, ut et aliis gentibus more suo liceret, venerunt pseudoapostoli et praedicantes ritum legis observationem, in tantum eos pertraxerunt, ut illorum sententiae assensum verbore (necdum tamen opere) praebent, ita ut circumcisionem et Sabbathum, neomenias quoque et alia hujusmodi vellent observare. Nam praedictores multis modis suadebant eis carnales obtinuit, dicentes fidem Christi non posse sufficere etiam justificationem et salutem, nisi ex antiquo more servarentur. Et ideo suadere facilius potest, quia Petrus et caeteri apostoli, qui cum Doctuerant, permiserunt ad tempus judaizare primum Ecclesiam, ne scandalum Judaeis facerent. enim mox potuerunt destruere Judaismum, paulatim ad veritatis sinceritatem Judaeos convertunt, quia si in primo aditu omnes ritus illo neciperent destruere, fidem nostram potius aberrant quam susciperent. Paulus vero, quia genitulum ritum Mosaicae legis habentibus praedidit, discipulos suos nullatenus judaizare sinebat, et observantia evangelicae veritatis eos instruit. propterea pseudoapostoli dicebant circumcisionem esse necessariam, quoniam magni apostoli, qui domino Jesu instituti fuerant, hanc praedicabant; tamen non faciebant, sed propter scandalum idem intentione bona hanc adhuc servari perant. Et ideo pessimi deceptores occasione indela, circumcisionem et carnales observantias praedicasse dicebant; atque Paulum, quoniam non observantias destruxerat, in quantum potest primebant, dicentes quia non viderat Christum et quia aliud quam caeteri apostoli qui Dominum viderant, praedicabat Evangelium, et ita nullo illi esse credendum. Intenit itaque nunc solus ab Epheso scribens, redarguere Galatas, pseudoapostolos receperant, et praedicationi assensum praebant, volentes circumcidi et legem observare. Et prius insistit ac immortale auctoritatis suae commendatione, ut postea pondus habeant verba sua. Nam facta suadentatione, ingreditur carnales observantias multis et rationibus disputando destruere. secundam ad Corinthios haec congrue locata quoniam affinitatem quamdam cum illa obtinuit modo reprehensionis. In utraque eam reprehensionem, qui pseudoapostolos recipiebant, et eorum praedicationi, postposito veritatis Apostolo, acquiescent. Et ob hoc etiam, quia in illa Corinthii re-

Aprehenduntur non solum ex receptione pseudoapostolorum, sed etiam quia multis et variis vitiis erant irretiti. Galatae non alia de causa redarguuntur in ista, nisi quia pseudoapostolorum falsitati sine aliqua ratione animum implicabant. Ideo et ista sequitur post illam, quia cum in illa niteretur Apostolus in carnalium observantiarum destructionem, in ista fortius ad earum tendit annihilationem in illa multis modis denotat pseudoapostolos, in ista anathematizat illos. Sic autem incipit :

CAPUT PRIMUM.

« Paulus apostolus non ab hominibus, neque per
« hominem, sed per Jesum Christum et Deum Patrem,
« trem, qui suscitavit eum a mortuis, et qui mecum
« sunt omnes fratres, Ecclesiis Galatiae. Galatia vobis
« et pax a Deo Patre nostro, et Domino nostro Jesu
« Christo, qui dedit semetipsum pro peccatis nostris,
« stris, ut eriperet nos de praesenti saeculo nequam,
« secundum voluntatem Dei et Patris nostri, cui est
« gloria in saecula saeculorum. Amen. »

Ut ipsi recognoscant eum qui mittit, praepone nomen suum, quod est *Paulus*; et nomen officii sui vel dignitatis subjungit, id est apostolus. Vult enim illos auctoritate sua ad se audiendum constringere. Illis namque sicut dictum est, primo praedicaverat, et eorum apostolus erat. Quasi dicat: Vos, Galatae, abjicite mendacium et fictorum falsitatem, ac sub specie veri superinfusam simplicitati vestrae venenositatem, et ad apostolum vestrum qui doctor est veritatis, intendite, quia Paulus, qui interpretatur *electus* vel *mirabilis*, scribit vobis et cujus nomen per multas Ecclesias in auctoritatem recipitur, quod non est de pseudoapostolis, quia nec electi sunt divinitus, nec in operatione signorum mirabiles existunt, nec ullius auctoritatis apud fideles sunt. Et *apostolus*, id est vere missus, scilicet non usurpans officium alterius, quoniam verus existit apostolus. Pseudo autem apostoli invadunt aliorum officia, nec mittuntur, sed impudentes se iugunt, et innocentium corda sub veritatis specie fallunt. De quibus per Jeremiam Dominus ait: « Non misi eos et non precepi eis, neque locutus sum ad eos (*Jer. xi*). » Et iterum: « Non mittebam eos, et ipsi currebant; non loquebar ad eos, et ipsi prophetabant (*Jer. xiii*). » Ideoque nullatenus est eis acquiescendum. Paulus vero, ut dictum est, apostolus est, id est missus, non ab hominibus, sed a Deo. Quatuor modis fit apostolorum, id est missorum electio: a Deo, et non ab hominibus; a Deo et ab hominibus; ab hominibus et non a Deo; nec ab hominibus, nec a Deo, sed a diabolo vel a scipso. A Deo et non ab hominibus, sicut Moyses et Aaron

divinitus missi sunt ad Pharaonem (*Exod. iv, x*). A Deo et ab hominibus, sicut Josue et Caleb missi sunt ad explorandam terram (*Num. xiii; Deut. i*). Ab hominibus et non a Deo sicut factum est, quando a Pharisæi consilium inierunt ut caperent Jesum in sermone, et miserunt ei discipulos suos cum Herodianis, dicentes : Magister, scimus quia verax es, etc. (*Matth. xxii; Marc. xii; Luc. xx*). » Nec ab hominibus, nec a Deo, sed a diabolo vel a se ipsis, sicut pseudoapostoli, qui instigante Satana, sine electione se ingerunt, et in aliorum messem mittere falcem præsumunt (*I Joann. ii*). Paulus itaque in primo genere electionis invenitur, quia non ab hominibus, ut ab apostolis; neque per hominem, ut per Ananiam, qui baptizavit eum, est electus in apostolum (*Act. ix*), sed per Jesum Christum, et per Deum Patrem, nec per mortalem Christum, sicut Petrus et Andreas (*Joan. i*); sed per immortalẽ; quia Pater suscitavit eum a mortuis. Per hoc quod præmittit Christum, et subjungit Patrem, innuit eum esse Patri æqualem; et quod nullus ad Patris gratiam pertingit, nisi per eum, sicut ipse dixit : « Nemo venit ad Patrem nisi per me (*Joan. xiv*). » Priores apostoli sunt electi per Christum adhuc ex parte hominem, id est mortalem, Paulus vero novissimus apostolus per Christum jam Deum totum, id est ex omni parte immortalem. Hoc enim ait, non ab hominibus, neque per hominem, sed per Jesum Christum et Deum Patrem, quasi Christus Jesus non sit homo. Sequitur enim : *Qui suscitavit eum a mortuis*, ut hinc appareret cur dixerit, neque per hominem. Proinde propter immortalitatem jam nunc non homo Christus Deus, propter substantiam vero naturæ humanæ, in qua ascendit in cælum, et mediator Dei et hominum et homo Christus Jesus (*I Tim. ii*). » Per quod innuitur, quia cum Paulus differret a primis apostolis ex eo quod Dominum in carne non viderat, nec ei in terra degenti cum cæteris adhæserat, suppletum est sibi ex ipsius Christi dignitate, quod deerat ex tempore, quia electus est ab immortali et impassibili, ac per hoc adæquatur prioribus apostolis. Illi enim tam longo tempore Christum sequentes, vix potuerunt discere Evangelium; hic autem brevi spatio raptus in tertium cælum et in paradysum, non solum didicit inter angelos quæ docturus erat inter homines, sed et audivit arcana verba, quæ non licet homini loqui (*II Cor. xii*). Hujus enim apostolatus consecratus est in cælo, cæterorum autem in terra. Quia ergo electus est non ab hominibus, neque per hominem, sed per Jesum Christum non mortalem sicut præcessores apostoli, sed resuscitatum et per Deum Patrem, acquiescendum est incunctanter dictis ejus, non falsitati pseudoapostolorum. Ac si dicat : Paulus talis et ita electus, scribit *Ecclesiis Galatiæ*, id est conventiculis fidelium, quæ sunt localiter in illa provincia quæ vocatur Galatia, moraliter vero in transmigratore, quoniam ad servitutem legis ex libertate gratiæ cœperunt transmigrare. Galatia nam-

que interpretatur *transmigrata*, vel *transmigratio*. Et apte sic interpretatur eorum regio qui ad perditionem a fide migraverunt, ut et ipsa terra quam inhabitant, nomine suo testetur instabilitatem eorum. Ego Paulus eis scribo, et omnes fratres qui sunt mecum, quos constat esse magnos apud Deum et apud Ecclesias, qui de eorum subversione sunt vehementer contristati. Quod ponit omnes fratres, retrahit multum illos ab errore, quia ostendit non tantum sibi displicere, sed etiam multitudini prædicatorum, quos Galatæ sic diligebant, ut eos nolent offendere. De Apostolo enim fortasse parum curarent, quia magnum de eo suspicionem fecerant illis pseudoapostoli, male loquentes de illo. Idcirco ponit omnes qui secum erant, ut vel propter illos Galatæ respiscerent, quia citius respiscit qui suum errorem multis et maxime amicis displicere intelligit. Facta commendatione, ostendit eis optationem salutis ipsorum, subdens : *Gratia et pax sit vobis a Deo Patre nostro, et a Domino Jesu Christo*. Ac si dicat : Quod vobis dico vel dicturus sum, non venit ex malevolo animo, sed ex nimia dilectione et vestræ correctionis sollicitudine. Quid ex hoc patet, quia opto ut non ira et discordia, sed gratia et pax sit vobis a Patre et Filio. Meruistis enim iram, quia abiecestis gratiam; et amisistis Dei pacem, quia fecistis discordiam, sed nunc rogo ut finita ira Dei, quæ super vos rellit, et discordia quæ rebellare cœpistis, sit vobis reconciliatis gratia Dei, qua vobis peccata remittantur, et familiaris Dei amor tribuatur; et pax, qua semper ejus voluntati mentis et operibus concordetis. Et hæc gratia et pax datur vobis non a carnali observantia legis, sed a Deo Patre, et a Christo ejus, qui Christus est noster Dominus, quia dominium super nos acquisivit, ubi nos de manu seductoris eripuit. Nam *semetipsum dedit* hostiam *pro peccatis nostris delendis*, nullas legis oblationes quærens, ut justo sanguine suo principem iniquitatis potenter vinceret, ac nos a Jugo ejus liberans, eriperet de presenti sæculo nequam, ubi tot laqueos adhuc tendit ille deceptor. Nequam dicitur hoc sæculum, tum quia sæculum est invitans nos ut illud sequamur, et generans nequitias ex concupiscentiis suis in cordibus sequentium suorum, tum quia nostris sensibus quinque præsens est, offerens se nobis per illecebras suas ad videndum non videnda, et audiendum non audienda, sicque de cæteris sensibus. Vel dicitur nequam, propter nequissimos homines qui in eo sunt, sicut mala domus quæ malos habet habitatores. Dedit, inquam, se Dominus ut nos eriperet, et hoc secundum piam voluntatem Dei et Patris nostri, quia non legalibus sacrificiis, sed oblatione corporis Christi completa est Patris voluntas, qui in hac ereptione nostra, se Deum et Patrem nostrum esse declarat. Nam qui per unigenitum suum nos creaverat, per eundem post lapsum culpe, ad antiquam vel sublimiorem dignitatem reducit, et affectu paternæ dilectionis nos in adoptivos filios assumit. *Cui pro hac ereptione nostra est gloria cum eodem Filio et Spiritu*

saucto perseverans in sæcula sæculorum, id est in A universitatem æternitatis. Amen, id est vere.

« Miror quod sic tam cito transferimini ab eo, « qui vos vocavit in gratiam Christi, in aliud Evan- « gelium, quod non est aliud, nisi sunt aliqui qui « vos conturbant, et volunt convertere Evangelium « Christi. »

Qui in aliis epistolis a gratiarum actione et laude solitus est incipere, in hac incipit a redargutione. Mentis enim duræ, nisi aperta essent increpatione percussæ, nullo modo malum cognoscerent quod egissent. Nam sæpe hi qui impudentes sunt, tantum se peccasse sentiunt, quantum de peccatis quæ fecerunt, increpantur, ut minores culpas suas æstiment, quas minor invectio castigat; et quas vehementer objurgari viderint, majores esse depræhendant. Unde necesse est ut semper sermo prædicantis cum auditorum debeat qualitate formari, ne aut verecundis aspera, aut impudentibus levia loquatur. Hoc itaque Paulus ostendens, alios leniter inchoat alloqui; Galatas vero, quos a fide discessisse cognoverat, ab ipso epistolæ exordio post salutationem invehendo redarguit. Et etiam quia omnes erant subversi, vel jam in ipso motu, de quibus gratias ageret non habebat; ideo velut ex quadam mentis commotione de illorum subversione incipit, ut per hoc citius eos revocet, et quasi ex abrupto inchoat. De re enim magna et insolita mirari consuevimus. Et idcirco ut ostendat eos Deum graviter offendisse, subito velut abruptum ponit initium, dicens: *Miror* C *quod vos prius in fide et bonis operibus instituti, nunc transferimini sic, id est ita incaute et temere a nova libertate ad antiquam servitutem; tam cito, id est tam brevi spatio temporis, quia si per longi temporis assiduitatem seduceremini, non esset tam mirum, sed nunc est valde mirandum. Non ait, transtati estis; sed transferimini, ostendens eos nondum ad hoc pervenisse, ut Judaicum ritum susceperent, sed in ipso motu perveniendi jam esse. Transferimini, inquit, et hoc non a malo ad bonum, sed a bono ad inale, quoniam ab eo Patre, qui vos gratuita bonitate sua vocavit in gratiam Christi, id est in remissionem peccatorum et justificationem, quæ in Christo datur fidelibus, transferimini in aliud Evangelium, id est in aliud dogma quod a D pseudoapostolis prædicatur, et videtur vobis esse Evangelium, id est bonum nuntium, quod tamen aliud non est Evangelium, quia non potest aliud esse nisi illud quod prædico. Quod autem pseudoapostoli prædicant, Antichristi prænuntiatio est, non Evangelium Christi. Non est, inquam, aliud Evangelium præter illud quod prædico (I Joan. II), nisi sunt aliqui qui vos conturbant, id est nisi quantum ad reputationem illorum, qui more limpidae aquæ mentem reddunt vestram turbulentam. Vel quod transferimini non est aliud, nisi hoc quod sunt aliqui qui vos conturbant, id est qui sincerum vestræ fidei sensum admistione falsitatis foetidum ac cænosum faciunt, et volunt, etiam convertere*

Evangelium Christi, id est cum carnales observantiæ convenienter sint versæ in Evangelium Christi, hoc est umbra in veritatem, ipsi volunt ordine contrario veritatem ad umbram vertere, ut Evangelium annulletur, et carnales observantiæ teneantur. Vel transferimini in aliud Evangelium, in Testamenti Veteris observantiam, quod tamen non est aliud, id est non est diversum a Novo. Si enim spiritualiter intelligatur Vetus, nihil discrepat a Novo. Non est, inquam, aliud nisi sint aliqui qui vos conturbant, id est si desint illi qui carnaliter et perverse illud exponunt, intelligetis Vetus nihil esse aliud in sensu quam Novum. Conturbant enim velut aquam mentem vestram, ne puritatem habeatis aquæ illius, quæ de Jesu ventre fluit credentibus; et in alium sensum convertere Evangelium, quod fieri non potest (Joan. VII), cum Joannes dicat: « Vos quod audistis ab initio, maneat in vobis (I Joan. II). » Unde per Scripturas sanctas Evangelium æternum et Testamentum æternum appellatur pro eo quod nunquam mutabitur, sicut Testamentum Vetus est mutatum, sed ut a Christo datum est, permanebit.

« Sed licet nos aut angelus de cælo evangelizet « vobis, præterquam quod evangelizavimus vobis, « anathema sit, sicut prædiximus, et nunc iterum « dico: Si quis vobis evangelizaverit præter id quod « accepistis anathema sit. »

Ipsi volunt, ut diximus, Evangelium convertere. Sed quicumque illi sint, omnes anathematizentur. Quod non de quibuslibet nunc ita dico, sed etiam de me ac sociis meis, etiam de cælesti angelo, quia si evangelizarem vobis aliud Evangelium, anathematizandi essemus. Licet enim nos ipsi vellemus ea quæ vobis prædicavimus, immutare, non esset nobis credendum; aut licet angelus de cælo visibiliter veniens evangelizet, si fieri queat, præterquam hoc quod evangelizavimus vobis anathema, id est condemnatus sit. Non se tantummodo, sed etiam angelum posuit, ne si illos seductores posuisset, causa invidiæ fecisse videretur. Et per hoc ostendit, quia si ipse vel summus angelus pro annuntiatione falsi dogmatis anathematizandus esset, multo magis pseudoapostoli. Unde sententiam repetit ac validius confirmat, dicens de quolibet, quod de se et angelo dixerat; Sicut prædiximus, inquit, ego et omnes qui mecum sunt, ita et nunc iterum repetens dico: Si quis vel homo vel angelus, quicumque ille sit, evangelizaverit vobis præter id quod accepistis, id est prædicaverit aliud quam quod vobis tradidimus, ut in prædicatione sua excedat regulam fidei quam dilectistis, et exorbitet de via veritatis quam a nobis accepistis, anathema sit ille, id est condemnatus vel anathema, id est alienatus ab Ecclesia Dei. Anathema quippe condemnatus interpretatur, sive alienatus vel alienatio. In eo autem quod ait, licet nos aut angelus, etc., videbat posse fieri ut aliqui ex his qui apostolicæ perfectionis esse creduntur, adhuc deviant ad falsitatis annuntiationem, videbat posse

fallacem mediatorem transfigurare se in angelum lucis (*II Cor. 11*), et aliquid falsum annuntiare.

« *Molo enim hominibus suadeo, an Deo? An quæro hominibus placere? Si adhuc hominibus placerem, Christi servus non essem.* »

Quasi aliquis diceret: Tu Paule, cur sic asperere loqueris? Ideo ponit istud, ac si dicat: Merito sic loquor. Quia *suadeo modo hominibus, an Deo?* id est sit nunc suasio et exhortatio et prædicatio mea ad hominum voluntatem et honorificentiam, an ad Dei voluntatem et gloriam? Non ad hominum, sed ad Dei gloriam spectat, quod ego nunc vobis suadeo. Olim vero serviebat suasio mea voluntati hominum, cum ob gratiam pontificum traherem Christianos, et suaderem illis ut a Christo recederent. Sed increpando loquitur Apostolus per interrogationem. Unde et adjungit: *An quæro hominibus placere*, subauditur sicut olim quærebam placere Judæis, cum a principe sacerdotum litteras accepissem pergens Damascum (*Act. 13*)? Nequaquam illis jam placere quæro, quia *si adhuc post baptismum placerem hominibus*, prædicando carnales observantias, tunc *non essem Christi servus*, id est non servassem spiritualia Christi præcepta. In omnibus his contrarius est Paulus pseudoapostolis, quoniam suasio illorum spectabat ad honorem hominum, non ad Dei gloriam, dum suaderent credi, hominem posse justificari ex operibus legis, non ex fide Christi; et ipsi quærebant hominibus placere, id est perfidis Judæis, ob quorum gratiam se per mundum disperserant ad subversionem fidelium. Aliter quoque potest intelligi quod Apostolus non quærebat hominibus placere, quia non hoc in suis operibus intendebat, ut ipse laudaretur ab hominibus, sed ut per ea quæ faciebat, glorificaretur Deus. Quisquis enim se apud homines jactat, et ita ventilat bona opera sua, ut finem eorumdem operum in laude hominum ponat, eandemque laudem hominum quasi mercedem computet operum suorum, necdum Christi servus est. Quisquis vero bona quæ facit aut loquitur, idcirco placere cupit hominibus, ut eos ad imitationem bonæ conversationis trahat, vel ad Dei laudem corda eorum accendat, non hominibus querit placere, sed Deo (*I Cor. 10*). Hoc etenim molo Paulus placebat hominibus, qui se alibi per omnia omnibus placere testatur. Sed quia hypocritarum more, qui transitorias laudes, non salutem videntium ex suis operibus querunt; volebat hominibus placere, ideo nunc se illis placere denegat.

« *Notum enim vobis facio, fratres, Evangelium, quod evangelizatum est a me (I Cor. 15)*, quia non est secundum hominem. Neque enim ego ab homine accepi illud, neque didici, sed per revelationem Jesu Christi. »

Superius dixerat se apostolum esse, non ab hominibus, neque per hominem, sed per Jesum Christum; et hoc nunc probat, suamque personam commendat, ut ea quæ post dicturus est, accipiant ut

authentica. Multum enim per pseudoapostolos imminuta fuerat apud Galatas ejus auctoritas. Non sum, inquit, missus ab homine, sed a Christo; nec suasio mea voluntati hominum famulatur, sed Dei; quia nec doctrinam quam prædico, accepi ab homine, sicut vos putabatis. Nam molo *notum facio vobis, o fratres*, quod ignorabatis, scilicet quanta auctoritatis sit *Evangelium, quod tam vobis quam aliis evangelizatum, id est prædicatum est a me, quia non est secundum auctoritatem alicujus hominis, sed potius secundum auctoritatem ipsius Christi. Neque enim ego ab homine illud accepi*, id est non est mihi injunctum ab homine. Quia vero posset non injunctum sibi fuisse ab homine, idcirco addit: *neque etiam didici illud ab homine. Non ab homine didici, sed per revelationem Jesu Christi. Ipse me docuit, ipsemet injunxit mihi. Hic ostendit quia sicut antiqui prophetae de futura Christi incarnatione, passione ac resurrectione et ascensione per spiritum prophetiæ sunt docti, sic ipse hæc omnia de Christo jam præterita, per eundem prophetiæ spiritum, ipso Christo docente, cognovit. Spiritus enim prophetiæ non solum ex futuro tangit animum prophetantis, sed etiam ex præterito, sicut nunc declaratur animum Pauli tetigisse. Nam et Moyses de præteritis prophetavit, dum ea scriberet, quæ facta sunt in principio mundi, priusquam homo creatus esset.*

« *Audistis enim conversationem meam aliquando in Judaismo, quoniam supra modum persequebar Ecclesiam Dei, et expugnabam illam, et proficiebam in Judaismo supra multos coetaneos meos in genere meo, et abundantius æmulator existens paternarum mearum traditionum.* »

Ad commendationem sui, probat apertius quia non didicit Evangelium ab homine. Non didici, inquit, ab homine; nam nec ante conversionem meam, nec post conversionem. Ante conversionem non didici, sed potius persecutus sum Ecclesiam. Hinc enim patet, quia tunc Evangelium non didici, cujus eram inimicus. *Audistis enim et vosipsi conversationem meam, quæ fuit aliquando in Judaismo, id est in Judæorum religione, quoniam supra modum cæterorum Judæorum persequebar Ecclesiam Dei zelo legis accessus, fugando sanctos, et ad poenam trahendo vinctos, et expugnabam illam, id est devastabam, cupiens ipsam prorsus delere. Vel supra modum patientium; id est supra quam quod possent fideles pati, et hæc agens proficiebam secundum scientiam et observantiam legis carnalem in Judaismo, id est in ritu Judaico, quia et carnaliter intelligebam Scripturas, magisque ac magis ipsas observabam. Et hoc non supra senes, qualis erat Gamaliel magister meus et cæteri tales, quod videretur mirum (*Act. 22*); sed supra multos coetaneos meos, non supra omnes qui erant ætatis meæ, et non proselyti, sed in genere meo, id est in filiis Israel. Et quia plus intelligendo et adimplendo proficiebam, ideo et abundantius existebam æmulator paternarum*

nearum traditionum, id est ferventiori zelo conabar ulcisci in eos, qui ad Evangelium conversi, violabant traditiones seniorum quas a parentibus acceperam. Vel omnia legis mandata carnalia paternæ traditiones vocantur, quia prius erant mandata Dei; sed nunc sunt traditiones hominum, postquam veritas apparens umbram repulit.

« Cum autem placuit ei qui me segregavit ex utero matris meæ, et vocavit per gratiam suam, ut revelaret Filium suum in me, ut evangelizarem illum in gentibus, continuo non acquievi carni et sanguini; neque veni Hierosolymam ad antecessores meos apostolos, sed abii in Arabiam, et iterum reversus sum Damascum. Deinde post auctores nos tres veni Hierosolymam videre Petrum, et mansi apud eum diebus quindecim. Alium autem apostolum non vidi neminem, nisi Jacobum fratrem Domini. Quæ autem scribo vobis, ecce coram Deo, quia non mentior. Deinde veni in partes Syriae et Ciliciæ. »

Probavit se ante conversionem Evangelium nequaquam didicisse, et incipit probare quia post conversionem hoc non didicit ab homine. Hoc modo, inquit, me habui ante conversionem, unde patet quia tunc Evangelium non didici; sed postquam placuit Deo ut cor meum illuminaret et converteret, alio more vixi, in quo rursus apparet, quia nec tunc, nec post ab homine didici. Et hoc est. *Cum autem placuit ei benigno Patri*, etc. Placuit hoc Deo, id est non fuit hoc meritum meum, sed solum Dei placitum; qui me segregavit, id est seorsum a massa perditorum secrevit, ex utero matris meæ, id est occulto consilio pietatis suæ jam me eligens. Et hic notatur gratuita Dei misericordia (Rom. ix). Quasi dicat: Aut quam aliquid Loni egissem, sua gratia me prædestinavit ad vitam, et post vocavit me per gratiam suam. Illic necesse fuit ponere gratiam, quia post nativitatem aliquid potuisset egisse boni, per quod meruisset vocari a Deo. Sed sicut segregatio, ita et vocatio ejus gratis facta est. Vel ex utero meæ matris, id est de cæcitate Synagogæ, ubi clausus tenebar, segregavit me, id est sequestravit a multitudine cæterorum, quos in illa cæcitate reliquit. Sicut enim uterus infantem intra se clausum continet, nec eum aliquid videre permittit, nec in ullam partem spatium, sic cæca destructio disciplinæ, quæ est in Synagoga, eos quos continet, non sinit lucem veritatis aspicere, nec in libertate charitatis spatium, sed undique miserabiliter coarctat, ut nec ad lucem, nec ad libertatem procedant. Sed de hoc Synagogæ utero me Deus segregavit, quando a plebis cæca consuetudine me separavit, ut libere possem Christi lumen intueri, et in ejus charitate dilatari. Et vocavit me ad hoc, ut in me, id est in corde meo, ubi vera existit cognitio, revelaret Filium, id est detegeret notitiam unigeniti sui, quæ mihi erat velata, dum haberem super cor velamen legis. Et ideo mihi revelaret, ut evangelizarem illum in gentibus, id est prædicarem illum inter gentes.

A Postquam ei placuit ut me sic vocaret, et Filium suum mihi revelaret, continuo non acquievi carni et sanguini, id est assensum mox præbere desii Judæis et propinquis meis carnalibus, mihi sensu carnali suadentibus, ut in carnali observantia legis permanerem. Illis non acquievi, quia erant caro et sanguis, id est carnaliter sapiebant, et carnaliter docebant; nec etiam ad spirituales magistros, id est ad apostolos qui me in Christo præcesserant, et in Jerusalem manebant, veni ut ab illis doctrinam quærerem; sed exiens de Damasco, profectus sum in Arabiam prædicare ubi nullus apostolorum erat, et inde redii Damascum. Finitisque tribus annis a tempore conversionis meæ, quibus in Arabia et Damasco moratus sum, veni in Jerusalem non discere Evangelium, sed videre Petrum ut illi spiritualiter adgaderem. Neque enim ab illo tunc Evangelium didici, quia non mansi apud eum nisi diebus quindecim, infra quod spatium discerem latitudinem tantæ scientiæ. Sed nec ab aliis apostolis didici, quia ibi præter Petrum alium apostolorum non vidi neminem, nisi Jacobum fratrem Domini, id est cognatum Salvatoris. Maria enim virgo mater Domini, et Maria mater Iulij Jacobi, sorores fuerunt; et ideo vocatus est ipse frater Domini, qui et primus episcopus fuit in Jerusalem. Cæteri apostoli jam per orbem erant ad prædicandum dispersi. Unde quia Joannes ibi deerat, credimus matrem Domini jam in cælum tunc assumptam fuisse, cujus sepulchrum ostenditur in vallo Josaphat. Ego quidem talia vobis de me et apostolis refero, et fortasse videntur vobis incredibilia, sed hæc quæ scribo vobis, ecce coram Deo, quia non mentior, et hoc sic esse est coram Deo, id est manifestum est in præsentia divini conspectus, quem nihil latere potest. Hoc loco jurat Apostolus, nec tamen peccat, quia videbat quosdam Galatarum non aliter sibi credere. Non enim a malo jurantis fuit hæc juratio, sed a malo illorum, quorum incredulitas compulit eum jurare (Matth. v). Deinde profectus ad Jerusalem veni in partes Syriae et Ciliciæ, ut et ibi prædicarem. Et hanc professionem suam ideo memorat, ut sciant Galatæ quia de loco ad locum sæpe transiens, non didicit Evangelium ab homine, et indubitanter acquiescant ejus doctrinæ.

D « Eram autem ignotus facie ecclesiis Judææ quæ erant in Christo. Tantum autem auditum habebant, quoniam qui persequabatur nos aliquando, nunc evangelizat fidem quam aliquando expugnabat, et in me clarificabant Deum. »

Non solum ab apostolis non didici, sed nec a cæteris fidelibus qui erant in Judæa, quippe quibus omnino eram ignotus facie. Nondum enim me post conversionem viderant. Et propterea liquido constat, quia me non docuerunt Evangelium. Nondum me viderant nec cognoverant facie, sed tamen ab aliis Christianis fama corrente audierant, quoniam illo qui aliquando nos Christianos persequabatur, nunc pluribus evangelizat fidem Christianitatis, quam aliquando expugnabat. Et in me, id est in consideratione

tione conversionis et conversationis meæ *clarificabant*, id est clarum prædicabant *Deum*, qui me sic converterat, et de tam crudeli tam pium fecerat. Hoc est, ego illis eram materia *Deum* glorificandi, qui tam bene conversus eram. Vel in me, id est in consideratione prædicationis meæ, clarificabant *Deum* et ipsi prædicando, quoniam audientes quod ego constanter fidem prædicarem, quam impugnare solebam, et ipsi exemplo meo accensi. provocabantur ad prædicandum *Christum*.

CAPUT II.

« Deinde post annos quatuordecim iterum ascendi
« Hierosolimam cum Barnaba, assumpto et Tito.
« Ascendi autem secundum revelationem. Et con-
« tuli cum illis Evangelium quod prædico in genti-
« bus, seorsum autem his, qui videbantur aliquid
« esse, ne forte in vacuum currem aut cucurris-
« sem. »

In Syria et Cilicia prædicaveram. Deinde ascendi rursus in Jerusalem, quæ est in montanis, nec potest adiri nisi ascendendo, *ascendi*, inquam, *post annos quatuordecim*, ex quo prius veneram Petrum videre. Ideo tempus et numerus annorum computat, id est antea tres et post quatuordecim qui simul sunt decem et septem, ut per hoc sciatur, quia antequam conferret Evangelium, tanto ante tempore prædicavit. Et quando ab apostolis nihil accepit, constat quia a nullo accepit vel didicit. *Ascendi in Jerusalem cum Barnaba*, quem ad testimonium ducebam, *assumpto* etiam nobiscum *Tito* qui erat gentilis et incircumciscus, duxi illum ad testimonium meæ prædicationis confirmandæ, scilicet ut cæteri gentiles videntes illum incircumciscum credere, crederent et ipsi absque scrupulo. Si vero ipse Titus ibi fuisset circumciscus, pater et omnibus me non recte docuisse, qui non docuissem eum circumcisci, sed incircumciscum duxissem socium. *Ascendi* et hoc non temere, sed *secundum revelationem*, id est Spiritu sancto mihi revelante et admonente, ut per præsentiam meam validius annullarentur carnales observantiæ. *Ascendi et Evangelium quod in gentibus convertendis prædico, cum illis Hierosolymitanis*, qui prius dubitaverant de veritate prædicationis meæ, *contuli*, quia ego dixi Evangelium meum, et illi dixerunt suum, nullaque in nostris sententiis reperta est dissonantia. Propter hoc incipit totum, ut per hoc Galatas retrahat a circumcissione et carnalibus caeremoniis, quandoquidem sua prædicatio non dissentit a doctrina ipsorum apostolorum; et Titus qui erat præeas, non fuit circumciscus, quavis esset gentilis. Tunc enim et isti non debent ulterius dubitare, quandoquidem nec ecclesiæ Judæorum quidquam potuerunt ei conferre. Ideo namque fecit hanc collationem, quia de cælo post ascensionem Domini vocatus, nisi inveniret in carne apostolos, quibus communicando et cum quibus Evangelium conferendo, ejusdem esse societatis apparet, ecclesia illi omnino non crederet. Unde nunc *decesse fuit, ut hanc collationem Galatis dubitan-*

tibus referret. Contuli cum illis Hierosolymitanis, non cum omnibus, quia in turba non potest bene discuti veritas. Si enim in præsentia omnium dixissem circumcissionem et carnales observantias non esse faciendas, statim contra me vulgus indoctum conclamasset. Et ideo non cum omnibus, sed cum *his tantum qui videbantur esse aliquid*, id est majoris auctoritatis et scientiæ. Et hoc *seorsum*, id est a turba senotim. Non quod aliqua falsa pluribus dixissem ut seorsum paucioribus vera dicerem; sed quia nonnulla tacueram, quæ parvuli portare non poterant; et necesse erat ut sapientiam loquerer inter perfectos, quatenus cæteri apostoli et seniores perfectionem meam cognoscerent. Ideo etiam contulit Apostolus evangelium suum cum Evangelio illorum, ut auferret suspicionem ab ecclesiis Judæorum, qui putabant illum aliud longe diversum Evangelium prædicasse et adhuc prædicare, quia neque cum Domino fuerat conversatus, a quo esset instructus; nec cum aliquo apostolorum, qui Dominum in carne viderant, ut exemplo doctrinæ eorum prædicaret gentibus. Ut ergo ab ecclesiis Hebræorum, sed et cæterorum per orbem fidelium hanc suspicionem auferret, idcirco sicut et supra dictum est contulit; contulit, inquam, ne modo curreret vel olim cucurrisset in vacuum, id est sine fructu remunerationis. Per hoc enim constaret quia illi quibus prædicabat, aut prædicaverat, mercedem habituri non essent, si nec remunerationem ex sua prædicatione consecuturus esset. Vel quod ait, *ne forte in vacuum currem aut cucurrissem*, quasi per interrogationem dictum potest intelligi, ad increpationem eorum qui hoc suspicabantur, ut hinc appareat eum non in vacuum currere vel cucurrisse, quia jam attestatio cæterorum comprobatur nihil ab Evangelii veritate dissentire.

« Sed neque Titus qui mecum erat, cum esset
« gentilis, compulsus est circumcisci, sed propter
« subintroductos falsos fratres, qui subintroierunt
« explorare libertatem nostram, quam habemus in
« Christo Jesu, ut nos in servitatem redigerent.
« Quibus neque ad horam cessimus subjectioni, ut
« veritas Evangelii permaneat apud vos. »

Non solum Evangelio meo nihil addiderunt, sed neque Titum circumcisci fecerunt. Cum enim mecum esset in illa collatione, et esset gentilis, id est sicut natus fuerat, in præputio manens, non est compulsus circumcisci, id est nulla ratio veritatis potuit ibi a quoquam proferri, ob quam ipse vel alius cogereetur circumcisci. Et ne putetis quod apostoli voluissent illum compellere ut circumcidetur, et ille contra voluntatem eorum permansisset incircumciscus, sciatis quia non propter apostolos vel seniores dixi compulsus, sed propter subintroductos falsos fratres, qui intus quo conferebam Evangelium meum subintroierunt explorare libertatem nostram, qua per Christum ab omni servitate legis sumus absoluti, vel qua ex libero arbitrio voluntarie servimus Deo non timore servimus. Ad hoc,

inquam, subintroierunt, ut verbis et disputationibus suis ad carnales observantias coram omnibus qui aderant, nos cogèrent, et sic a libertate gratiæ in *servitutem legis nos redigerent. Quibus neque vel ad horam volumus cedere, ut subjiceremur servituti legali, sed viriliter illis restitimus, ut veritas Evangelii quæ omnem hominem absque legis operibus per fidem et opera charitatis posse salvari docet permaneat apud vos, sicut prædicavi vobis. Insidiabantur Apostolo fratres falsi isti, explorantes si viderent eum in aliquo vel circumcissioni vel cæteris carnalibus observantiis acquiescere, ut redigerent eum in servitutem, id est ut jam in circumcissionem eos revertere etiam ipsius Pauli exemplo vel attestatione, tanquam salutem necessariam prædicarent. Titum ergo circumcidere noluit, ne daret illis occasionem, qui sine ulla circumcissione dicebant credentes non posse salvari, et ad deceptionem gentium hoc etiam et Paulum sentire jactabant. Alibi vero Timothæum propterea circumcidit (Act. xvi), ne Judæis et maxime cognationi ejus maternæ, qui ex gentibus in Christum crediderant, viderentur sic detestari circumcissionem, sicut idololatria detestanda est, cum illam Deus fieri præceperit, hanc Sathanas persuaserit. Habebat itaque Apostolus hanc in Christo libertatem, et faciendi circumcissionem et non faciendi, ut ostenderet illa sacramenta nec tanquam sacrilega debere damnari, nec tanquam necessaria debere appeti. Et hanc libertatem subintraverunt explorare prædicti calumniatores, scire volentes an faceret in Tito quod fecerat in Timotheo, ut jam exemplo ejus circumcissionem omnibus necessario faciendam prædicarent.*

Ab his autem qui videbantur esse aliquid quales aliquando fuerint, nihil mea interest. Deus enim personam hominis non accipit (Rom. ii; Ephes. vi; Colos. iii; Act. x; Jacob. ii; Petr. i). Mihi enim qui videbantur esse aliquid, nihil contulerunt. Sed e contra, cum vidissent quod creditum est mihi evangelium præputii, sicut Petro circumcissionis (qui enim operatus est Petro in apostolatu circumcissionis, operatus est et mihi inter gentes) et cum cognovissent gratiam quæ data est mihi, Jacobus et Cephas et Joannes, qui videbantur columnæ esse, dextras dederunt mihi et Barnabæ societatis, ut nos in gentes, ipsi autem in circumcissionem; tantum, ut pauperum memores essemus. Quod etiam sollicitus fui id ipsum facere.

Contuli quidem Evangelium cum apostolis et aliis senioribus qui erant in Jerusalem. Sed tamen illi qui videbantur esse aliquid ab his Hierosolymitanis, id est alicujus magnæ dignitatis, nihil mihi contulerunt. Hoc videtur debuisse statim dicere, sed facit interpositionem, velut si quis ei diceret: Tu dicis quia videbantur esse aliquid, imo nihil erant, quia piscatores et idiotæ fuerant. Et ad hoc quasi respondet: Revera tunc erant aliquid. Nam quales aliquando priusquam a Christo voca-

rentur, fuerint, sive piscatores sive telonarii, sive illiterati, nihil interest mea veritate vel mea sententia, quia non loquor secundum illud quod antea fuerant, sed secundum id quod tunc erant. Præmissum erat, ut veritas Evangelii permaneat apud vos; et ad hanc veritatem respicere videtur quod nunc dicitur, nihil mea interest, id est nihil a mea veritate distat, qualescunque illi quondam fuerint. Refert et interest, hæc duo verba, solent cum genitivis et possessivorum pronominum ablativis construi. Vel etiam sine interpositione potest legi. Qui ab his videbantur esse aliquid, Petrus scilicet atque Joannes et Jacobus, nihil mea veritate vel mea sententia interest, quales fuerint, id est nihil secundum meam sententiam differt, quales loco et scientia quondam fuerint, sive nobiles, sive ignobiles. Non aliis apostolis derogat, sed quia Galatæ alios apostolos ultra modum magnificabant, huic eos præferentes, atque ideo auctoritatem hujus viliorum habebant, ostendit se æqualem esse, et doctrinam ab eis non accepisse. Nihil interest, quales olim fuerint, quia Deus non accipit personam hominis (Lev. xix; Deut. i, xvi; II Par. xix; Job xxxiv; Prov. xxiv; Sap. vi; Eccl. xxxv et xlii), id est non eligit dignitatem vel nobilitatem alicujus personæ. Nam me neque desepxit idcirco vel inferiorem judicavit, quia novissimus veni, imo parem illis omnino monstravit. Nam illi priores, qui videbantur esse magnum aliquid, nihil contulerunt mihi de scientia prædicationis; sed e contra fuit, id est ego illis contuli, quia prius fuerant certi se bene prædicasse, et carnales observantias debere destrui; sed nunc facti sunt certiores, me non ab ullo mortalium, sed ab ipso Christo doctum, audientes idem prædicare. Nihil mihi contulerunt, sed e contra cum vidissent quod evangelium præputii creditum est mihi, sicut Petro evangelium circumcissionis, id est quod Dominus evangelicam doctrinam sicut fidei dispensatori credidit, ut præputiatis gentibus evangelizem, quemadmodum Petro constituerat prædicare populo circumcissionis, dextras societatis mihi dederunt. Et vere mihi est creditum sicut Petro Evangelium, quia qui Petrum fecit apostolum circumcisorum, fecit et me apostolum gentium. Et hoc est: Nam qui operatus est Petro, id est ad honorem et auxilium Petri, sublimando eum in apostolatum circumcissionis, id est Judaici populi, tum per prædicationem, tum per miraculorum ostensionem, operatus est et mihi virtutes miraculorum atque diversas gratias et eloquentiam validæ prædicationis inter gentes. Hic ostenduntur isti duo principales apostoli ad salutem duorum populorum fuisse electi, Petrus ad Judæorum, Paulus ad gentium. Et cum pro certo cognovissent gratiam apostolatus et sapientiæ, quæ mihi a Christo data est, Jacobus et Petrus et Joannes, qui videbantur esse columnæ, id est erecti et fortes ac immobiles, atque roborantes multitudinem aliorum, et continentem, ac sustentantes, dederunt mihi et Barnabæ dextras. Jacobus hoc loco ponitur ante Petrum et Joannem.

propter primatum suum quem habebat in Jerusalem, ubi erat episcopus. Dexteras nobis dederunt societatis, id est signum socialis amicitiae et dignitatis apostolicae, quod ab his quae ipsi didicerant, in nullo discrepamus. Sicut enim invicem osculari, signum est pacis ac dilectionis, ita et jungere dexteras. Societatis dico, ita decretæ, ut nos in gentes iremus prædicare, ipsi vero in circumcisionem; et illi essent participes beneficii quod ageremus in conversione gentium, nosque similiter essemus socii remunerationis ipsorum pro conversione Judæorum. Licet Paulus dicat Barnabam secum esse receptum in societate apostolorum, non tamen sibi dicit esse æqualem in prædicatione, quia ipse est doctor gentium, qui secundum majorem partem illas convertit a Jerusalem usque in Illyricum, prædicans per circuitum, ac deinde non solum usque Romam, sed etiam usque in Hispaniam (Rom. xv). Hæc omnia valent ad commendationem suæ auctoritatis, et etiam ad intentionem, ut eos revocet a circumcisione et legis servitute. Nihil contulerunt, sed etiam arrogaverunt tantum, ut essemus memores pauperum qui erant in Jerusalem, et pretia rerum suarum pro Christo posuerant ad pedes apostolorum. (Act. ii). Quod etiam, id est habere memoriam eorum et mittere eis alimoniam, ego sollicitus fui facere hoc ipsum studiose complens. Recte Paulus ut ab observantia legis Galatas revocaret, prædictam Evangelii sui collationem memoravit: quia idcirco tunc in Jerusalem ascendit, ut audiret quid de legis observantia priores apostoli sentirent. Unde Lucas refert de Paulo et Barnaba, quia morati sunt Antiochiæ tempus non modicum cum discipulis (Act. xv); et quidam descendentes de Judæa docebant fratres, quia nisi circumcidamini secundum morem Moysi, non potestis salvari. Facta ergo seditione non minima Paulo et Barnabæ adversum illos, statuerunt ut descenderent Paulus et Barnabas et quidam alii ex aliis, ad apostolos et presbyteros in Jerusalem super hac quæstione. Cum autem venissent Hierosolymam, suscepti sunt ab ecclesia et apostolis, nuntiantes quanta Deus fecisset cum illis. Surrexerunt autem quidam de hæresi pharisæorum qui crediderant, dicentes quia oportet circumcidi eos, præcipere quoque servare legem Moysi. Conveneruntque apostoli et seniores videre de verbo hoc, etc. In hoc conventu facta est prædicta Evangelii Pauli collatio.

« Cum autem venisset Cephas Antiochiam, in faciem ei restitit, quia reprehensibilis erat. Prius enim quam venirent quidam a Jacobo, cum gentibus edebat; cum autem venissent, subtrahabat et segregabat se, timens eos qui ex circumcisione erant. Et simulationi ejus consenserunt ceteri Judæi, ita ut et Barnabas duceretur ab eis in illam simulationem. »

Et hoc factum est, postquam Paulus et Barnabas a supradicto concilio cum Juda et Syria reversi sunt Antiochiam, ferentes epistolam apostolorum, in qua

A decretum erat, ne gentes cogerentur circumcidi vel judaizare (Act. xv). Tunc enim scriptum est: Paulus autem et Barnabas demorabantur Antiochiæ, docentes et evangelizantes cum aliis pluribus verbum Domini (ibid.) Et eo tempore Petrus intelligitur supervenisse, et quod nunc Paulus narrat, fecisse. Nihil, inquit, mihi in Jerusalem contulerunt Petrus et alii, sed cum venisset Cephas, id est Petrus Antiochiam, ego illi contuli. Vel ita: Non solum in Jerusalem ego contuli Petro, sed etiam in Antiochia. Nam restitit ei in faciem, id est non in absentia ejus ego derogavi illi, sed ante eum veniens, aperte contradixi ei, et libere eum reprehendi, quia reprehensibilis erat, id est dignus reprehensione. Nam prius quam venirent quidam Judæorum a Jacobo de Hierosolymis Antiochiam, edebat cum conversis gentibus absque ulla ciborum discretione, ita ut nec suilla carnes reproberet; sed postmodum cum venissent Judæi, subtrahat se a convivio eorum, ne Judæi qui noviter ad fidem venerant, et adhuc legem servabant, scandalizarentur in cibis, quos lex immundos judicavit. Et non ita subtrahabat se a gentium societate, ut saltem aliquoties cum illis, et aliquoties cum Judæis esset, sed et omnino segregabat se, id est seorsum a grege gentium separatus, gregem suum cum Judæis faciebat. Et sic quadam simulatione dabit intelligi, hanc discretionem ciborum et alias canales observantias esse necessarias ad justificationem; gentesque conversos ad Christum, non posse Judæis credentibus adungi. Quod quidem propterea erat quam si fratres scandalizaret, quia deterius est veritatem relinquere, quam permittere nasci scandalum. Et ita segregabat se ac sequestrabat a grege et a cibis gentium, faciens de uno grege duos, cum Christus de duobus unum fecisset, quia timebat non cibos gentium, sed Judæos qui erant ex circumcisione, ne recederent a fide et simulationi ejus, qua finget se cibos discernere, et gentium conversationem abhorrere, consenserunt ceteri Judæi, qui prius erant cum eo, ac removerunt se a convivio et gentium consortio, ita ut Barnabas, qui erat doctor gentium et gentes deberet sinceriter instruere, utpote necum ad gentes missus, duceretur ab eis in illam simulationem Judæicæ comestionis et conversationis. Dixerat tamen Petrus in supradicto apostolorum et seniorum conventu: « Quid tentatis imponere jugum super cervicem discipulorum, quod neque patres nostri, neque nos portare potuimus? Sed per gratiam Domini Jesu credimus salvari, quemadmodum et illi (Act. xv). » Bene ergo sentiat de abolitione legis, sed simulavit pro timore Judæorum, ne occasione gentium a fide recederent, et sic perderet suum gregem. Simulavit autem et Paulus simili metu, quando Timotheum circumcidit (Act. xvi), et comam more Nazarenæ nutritivam, quam in Cenchreis rasis (Act. xxi), vel quando purificatus in templo sacrificium obtulit (Act. xviii). Petrus ergo utpote Judæorum apostolus, salutem Judæorum pro-

videbat in hac simulatione, timens ne si coram Judæis communes citos ederet cum gentibus, illi prædicationem ejus respuerent et a fide discederent. Ideoque permittet adhuc illis ut facerent circumcisionem, cæterosque ritus legis observarent, et ipse cum eis ex parte servaret, ut paulatim et ad fidem et ad Evangelii puritatem allaceret. Et ideo si quis gentilium circumcidi vellet, in præsentia Judæorum non prohiberet. Paulus autem magno fidei ardore succensus, præcepta legis teneri carnaliter noluit; et qui gentium erat apostolus, circumcisionem in gentibus fieri vetuit. Et quia Petrus vel in populo circumcisionis ad. ut legis consuetudinem servari voleat, ut gentes converse Judæis inæquales judicarentur, in faciem ei restitit, cumque in hac re non solum reprehensibilem dicit. Et hoc ejus studium non solum culpam, sed (quod majus est) hypocrisim (id est simulationem) nominat. In qua simulatione Petrus, ut dictum est, salutem Judæorum providebat, sed salutem gentium negligebat. Unde Paulus, gentium apostolus, et de salute gentium sollicitus, in faciem ei restitit. Ipse vero Petrus quod a Paulo ferebat utiliter libertate charitatis sanctæ ac benignæ, pietate humilitatis accepit. Atque ita rarius et sanctius exemplum posteris tribuit, quo non dedignarentur majores (sicubi forte recti tramitem reliquissent) etiam a posterioribus corripiri. Nec solum tunc patienter hanc reprehensionem pertulit, sed etiam postquam secundam scriberet epistolam, laudavit epistolam Pauli, in quibus reprehensionem istam legerat (*II Pet. III*). Certe enim nisi legisset Pauli epistolam, non laudasset. Si autem legit, quia illic ipse reprehensibilis diceretur, invenit. Amicus ergo veritatis, laudavit etiam quod reprehensus est, atque ei et hoc ipsum placuit, quia in his non placuerat, quæ aliter quam cœbuerat sensit. Sequere etiam minori fratri ad consensum dedit, tunc enim Paulus adhuc erat minor, quamvis nunc sit æqualis, atque in eadem re factus est sequax minoris sui, ut etiam in hoc præiret, quatenus qui primus erat in apostolatus culmine, esset primus et in humilitate. In hac itaque re est in Paulo laus justæ libertatis, in Petro sanctæ humilitatis. Sunt vero nonnulli, qui non Petrum apostolorum principem, sed quemdam alium ejusdem nominis, qui a Paulo reprehensus est, accipiunt. Qui si verba Pauli studiosius legissent, ista non dicerent. Dicitur enim: Cum venisset Petrus Antiochiam, in faciem ei restitit, ut de quo Petro loqueretur ostenderet, in ipsa narratione præmisit, dicens: Qui enim operatus est Petro in apostolatam circumcisionis, operatus est et mihi inter gentes. Patet ergo de quo Petro Paulus loquitur, quem et apostolum nominat, et præfuisse Evangelio circumcisionis narrat. Et ne quis adhuc inhaerendo litteræ dicat hunc, quem Paulus reprehendit, non Petrum, sed Cepham vocari, quamvis idem sit utrumque nomen, revolvat quod ibidem præmissum est, Jacobus et Cephas et Joannes, qui videbantur esse columnæ, dextris mihi dederunt.

A Constat enim hunc Cepham, qui inter Jacobum et Joannem positus est, non mino em Joanne vel Jacobo fuisse. Quod si nullus Cephas præter apostolum Petrum invenitur, qui Jacobo et Joanni valeat æquari, fatendum necessario est, hunc Cepham esse cui Christus ait: « Tu vocaberis Cephas, quod interpretatur *Petrus* (*Joan. I*). »

« Sed cum vidissem quod non recte ambularent ad veritatem Evangelii, dixi Cephæ coram omnibus: Si tu cum Judæis sis, gentes liter vivis, et non Judaice, quomodo gentes cæcis judaice? Nos natura Judæi, et non ex gentibus peccatores. Scientes autem quod non justificatur homo ex operibus legis, nisi per fidem Jesu Christi; et nos in Christo Jesu credimus, ut justificemur ex fide Christi, et non ex operibus legis. Propter quod ex operibus legis non justificabitur omnis caro (*Rom. III*). Quod si querentes justificari in Christo, inventi sumus et ipsi peccatores nunquid Christi peccati minister est? Absit! Si enim quæ destruxi, iterum hæc reedifico. prævaricatorem me constituat. Ego enim per legem legi motus sum, ut Deo vivam. Christo confusus sum cruci. Vivo autem jam non ego, vivit vero in me Christus. Quod autem nunc vivo in carne in fide vivo Filii Dei, qui dilexit me, et tradidit seipsum pro me. Non abjicio gratiam Dei. Si enim per legem justitia, ergo gratis Christus mortuus est. »

C Petrus quidem et Barnabas simulabant, sed ego solus sinceritatem servans, increpavi pulchre simulationem eorum. Vidi enim quod non recte ambularent, id est non utroque pede pariter incederent, quia in uno claudicabant, quantum ad gentes, quarum salutem negligebant; quantum vero ad intentionem bonam de salute Judæorum recte ambulabant. Quantum ad gentes, non recte ambulabant ad veritatem Evangelii teneandam et prædicandam, quia per hoc peribat veritas, si gentes judaizarent. Veritas quippe Evangelii est, ut homo justificetur sola fide opere legis, et ut omnes eum naturaliter mundi esse cœlantur, atque ut doctores Ecclesiæ, nec Judaice nec gentilium salutem negligent. Ipsi taliter agebant. Sed ego cum vidissem quod non recte, sed flexuose ambularent ad veritatem Evangelii servandam et docendam, succensus divino zelo, dixi Cephæ coram omnibus ea quæ sequuntur: Si clam soli Petro Paulus ista diceret, Judæis et gentibus nihil proferret. Ideo cunctis audientibus dixi, ut cunctis proferret. Ideo voluit non timide obtegere, sed flenter asserere, quod eum pariter sentire jam noverat, sive quia Evangelium eum eo contulerat (*Act. XV*), sive quia in Cornelii vocatone etiam divinitus eum de hac re admonitum acceperat (*Act. X*), sive quia antequam illi quas timebat venissent Antiochiam, cum gentibus eum discumbentem viderat. Non ergo tunc eum quid in ea re verum esset docebat, sed ejus simulationem qua gentes exemplo suo judaizare cogeret, arguebat. Si tu, inquit, cum sis Judæus, vi-

ris gentiliter, id est indiscrete cibis omnibus uteris nullumque hominem reputans immundum, *et non Judaice*, id est non cum ciborum discretione sicut Judæi, *quomodo*, id est qua ratione, qua utilitate, cogis exemplo tuo *gentes judaizare*? id est Judæorum ritum sequi in discretione ciborum et receptione carnalium observantiarum, dum te ab his segregas, eo quo omnem creaturam Dei bonam esse credunt, et sine legis observantia per Evangelium justificari quærunt? Tu qui naturaliter Judæus es, reliquisti judaizare, et gentes cogis judaizare? Tu qui Judæus eras, Judæismum deseruisti, et hi qui nunquam fuerunt Judæi, assument Judæismum? Non vivis Judaice, id est non servas Judaicum morem in tuo victu, quia scis nihil utilitatis ibi esse. Quomodo ergo nunc gentes cogis judaizare, quæ omnia quæ vident in te, putant saluti necessaria esse? Vere non debent judaizare gentes quia nunquam justificarentur; et vere nunquam justificarentur judaizando, quia nec nos qui naturaliter sumus Judæi, potuimus unquam judaizando justificari, ideoque dimisimus legem, et confugimus ad fidem. Et hoc est: *Nos natura sumus Judæi*, id est non proselyti, sed genere sumus Judæi, ex semine Abrahæ prodeuntes, et legem Dei habentes, *et non peccatores ex gentibus*, id est non ita peccatores, ut omnes gentes idololatræ et immundæ. Peccatorum enim nomen gentibus imposuerant Judæi jam vetusta quadam superbia, tanquam ipsi essent justi, videntes festucam in oculo alieno, et non trabem in suo. Non sumus, inquam, ex gentibus peccatores, a cultura Dei omnino remoti et peccatis dediti, sed naturaliter Judæi, id est sub divina lege nutriti. Sed tamen *scientes quod non justificatur ullus unquam homo ex operibus legis*, sive Judæus, sive gentilis, *nisi per fidem Christi*, quæ carnales observantias aufert, et spiritualiter impleri legem facit, ut nos credimus. Opera sunt ex gratia, sed non ex operibus gratia, quia ipsa prima est, ex qua impetrantur cætera. Ideo nullus aliquo modo justificari valet ex operibus, nisi per fidem quæ procedit ex gratia. Quod scientes, et nos quoque Judæi sicut gentes, *in Christo Jesu positi credimus in Ipsum*, ut justificemur ex fide Christi, per divinam gratiam, *et non ex operibus legis per vires nostras*. *Propter quod*, id est quia nos Judæi nequimus ex legis operibus justificari, qui ex his essemus justificati, si quis inde posset justificari, *ex operibus legis carnalibus non justificabitur omnis caro*, id est nullus in carne vivens, consequetur per hæc justitiam. Dixit superius Judæos non esse ex gentibus peccatores, et post subjecit quod etiam ipsi justificentur ex fide Christi. Omnis autem qui justificatur, injustus erat, id est peccator. Videtur autem fortassis alicui male intelligenti, quod Christus Judæis ad se venientibus peccata prius ministraret, ut eos per fidem et gratiam suam post modum justificaret. Et hoc est quod dicitur: *Non sumus ex gentibus peccatores*. *Quod*, id est sed si quærentes justificari in Christo, inventi sumus etiam nos ipsi pec-

catores, id est si accedentes ad lumen Christi, vidimus in eo tenebras peccatorum nostrorum, quas prius cæci videre non poteramus, et si a.l. subtilem regulam justitiæ Christi propinquantes, ut ad eam dirigamur, animadvertimus deformem tortitudinem injustitiæ nostræ, qui nos antea rectos arbitrabamur, nunquid ideo Christus nobis *minister est peccati*, id est nonquid ideoque consequens est, ut Christus ministret nobis peccatum, qui tollit peccata mundi (*Jouan. 1*). Absit hoc a fidelium cordibus, ut Christum putent alicui ministrare peccatum, qui pro abolitione peccatorum nostrorum semetipsum obtulit sacrificium. Nam et aliquid deforme latet in tenebris, sed in radio solis evidenter apparet, nec tamen sol deformitatem illam operatur. Sic et Judæi qui se justos antea putabant, illustrati lumine Christi viderunt deformitates culparum suarum, quas Christus eis non ministraverat ut facerent, sed ostenderat ut agnoscerent et corrigerent. Vel ita: Ex operibus legis, ut dictum est, nemo justificabitur. Sed si nos Judæi transeuntes ad Christum, et in illo quærentes justificari, qui in lege nequivimus justitiam adipisci, inventi sumus etiam nos peccatores, sicut et gentiles, quia cognitum est nos semper in corde legem transgressos esse, licet eam servassemus in opere, nunquid Christus qui monuit ut legem relinqueremus, et ad se transiremus, est minister peccati, id est ministrat nobis peccatum in eo, quod jubet ut a rigore legis discedamus, et ad gratiam veniamus? Absit ut ipse nobis peccatum in hoc ministraret. Non est enim peccatum, sic relinquere legem vel destruere; sed peccatum est, rursus ad eam redire vel eam reedificare. Nam, *si quæ destruxi*, ut carnalia legis opera quæ jam in me et in aliis everti, *iterum hæc reedifico*, id est rursus statuo, vel per simulationem ut Petrus, vel per prædicationem ut pseudoapostoli, *prævaricatorem me constituo*, id est contra ipsam legem facio, quæ se determinandam prænuntiavit. Nam per auctoritatem legis ipsam legem dimisi, quasi ei mortuus, nullum sensum ejus habens. Et hoc est: *Ego enim per legem legi mortuus sum, ut Deo vivam*. Vere enim destruxi in me opera legis, quia sum mortuus legi, id est non vivo jam in operibus legis, nec in ejus carnali sensu; et ita sum mortuus per legem, quia ut in Christum crederem, lex ipsa mihi prædicavit, et de sua terminatione ac evangelici dogmatis susceptione commonuit, dicens per Moysen; prophetam vobis suscitabit Dominus Deus vester de fratribus vestris, tanquam me, ipsum audietis (*Deut. xviii*). Id est postquam Christus venerit, non ulterius durabit lex, sed novam Christi doctrinam audietis. Vel per legem spiritualiter intellectam mortuus sum legi meæ, ne carnaliter in ea vivam, non mihi, id est ut voluntatem Dei, non meam in omni vita mea faciam. Quod jam possum quia *Christo confixus sum cruci*, id est cum Christo affixus sum cruci, socius passionis Christi; hoc est, *cruz Christi exstinguit in me ardorem peccati*,

ne jam in me vigeat; et ligat manus meas, ne ad illicitum opus extendantur; et pedes, ne ad malum gradiantur. Sum quidem cum Christo crucifixus, sed tamen vivo in virtutibus, id est vigorem bene operandi habeo *jam non ego* ille qui prius peccator eram, sed *vixit in me Christus*, id est vigeat et regnat in me Christi novitas. Crucifixus sum, sed vivo, sed jam non ego qualis vixera n. Non ego vivo, sed vixit in me Christus. Quod est dicere: Ego quidem a meipso extinctus sum, quia carnaliter non vivo, sed tamen essentialiter extinctus non sum, quia in Christo spiritualiter vivo. Hoc est dicere: Non est in me justitia mea, quæ ex lege est, in qua prævaricator effectus sum, sed justitia Dei, id est quæ mihi ex Deo est, non ex me. Sic quippe in me vivit, non ego, sed Christus, qui factus est nobis sapientia a Deo et justitia et sanctificatio (I Cor. 1). Ego jam non vivo, sed Christus in me, id est non facio voluntatem meam, sed ejus qui habitat in me, sed tamen *quod nunc vivo in carne*, id est quod non exstinguor in carnis igne, quod in corpore positus bene possum operari, *in fide vivo*, id est non per laboriosa opera legis, sed per fidem *Filii Dei*, cujus fides valere potest. Justus enim vivit ex fide (Habac. 11; Rom. 1), quando est in corpore. Et per hoc Christi fides efficientiam habet in me, quia ipse dilexit me, et per illam dilectionem tradidit ad mortem pro me redimendo seipsum qui tantus est, non aliud animal. Et propterea non abjicio gratiam Dei, qui me per passionem Filii sui liberavit a peccatis, et dedit veram justitiam, quod lex facere non poterat, id est non quæro per legem justificari, quod esset abjicere gratiam. Nec debeo eam abjicere quia si per legem justitia, ergo Christus gratis, id est frustra sine causa, sine utilitate mortuus est, cum absque morte ejus per legem justificarentur observatores legis. Sed non frustra mortuus est, quia nec per legem, nec per aliam rem haberi poterat justitia quæ duceret ad salutem, nisi per Christi mortem. Sequitur:

CAPUT III.

O insensati Galatæ, quis vos fascinavit non credere veritati, ante quorum oculos Jesus Christus præscriptus est et in vobis crucifixus? Hoc solum a vobis volo discere, ex operibus legis Spiritum accepistis, an ex auditu fidei? Sic stulti estis, ut cum spiritu cœperitis, nunc carne concummimini. Tanta passi estis sine causa, si tamen sine causa. Qui ergo tribuit vobis spiritum et operatur virtutes in vobis, ex operibus legis, an ex auditu fidei, sicut Abraham credidit Deo, et reputatum est ei ad justitiam? (Gen. xv; Rom. 1v; Jac. 11.) Cognoscite ergo, quia qui ex fide sunt, hi illi sunt Abrahamæ.

Finita narratione, in qua docuit se non didicisse Evangelium ab homine, ipsumque Evangelium suum cum apostolis se contulisse, ac deinceps de simulatione judicandi Petrum reprehendisse vertit se ad increpationem Galatarum, et fortiter arguit demen-

tiam illorum, quia doctrinam ejus quæ tantis auctoritatibus fulcitur, deseruerant, et falsitati pseudoapostolorum credebant. Unde subversionem illorum attendens, prorupit subito in exclamationem, ut exagitando magnitudinem reatus illorum, facilius revocare eos possit. Quod quidem more rhetorum videtur facere. O inquit, Galatæ insensati, id est omni sensu rationis carentes sicut animalia bruta, quis vos fascinavit, id est livido intuitu læsit, non credere, id est ut non credatis evangelicæ veritati? Re enim vera insensati estis, qui mortiferam suasionem accipitis cujuslibet pseudoapostoli, qui nullius nominis et auctoritatis est, qui in populo latet, et cujus etiam vocabulum ignoro; meamque doctrinam præstiponitis, quam a solo Deo, non ab homine accepi, cui apostoli nihil novi in collatione Evangelii contulere, sed a me certiores facti sunt. Quis vos fascinavit, id est respectu invidiæ vos tenellos læsit, dolensque de promotu vestræ perfectionis ac fidei, solo livore nocuit, sicut aliquis qui solo respectu dicitur posse res alterius diminuere; et ita vos liventi aspectu suo tabefecit, non ut credatis veritati meæ prædicationis, sed falsitati sui pravi dogmatis? Vel sicut incantatores fascinant et deludunt homines, ut credant verum esse quod falsum est, ita nescio quis fascino suæ deceptionis adeo vos incantavit, ac verbis suis imputavit ut falsitatem pro veritate teneatis. Unde et scriptum est, quia fascinatio nugacitatis obscurat bona (Sap. 1v). Non creditis veritati sicut insensati, ante quorum interiores oculos Jesus Christus præscriptus est, id est præostensus et prænotatus a nobis, non in tabulis lapideis sicut lex, sed et in vobis, id est in cordibus vestris, est crucifixus, quia crux et passio ejus qua redempti estis, erat maxime intimanda vobis. Unde magis dementes estis, qui Christum vobis præmonstratum, pro peccatis vestris crucifixum, negastis, non credentes vos ex fide posse justificari, sed ex operibus legis, vel, tales olim fuistis, ut ante oculos vestros præscriptus esset Jesus Christus crucifixus, quia ob compunctionem mentis habendam pingebatis eum crucifixum in locis illis, ubi semper eum videre possetis et memoria retinere. Vel ita estis insensati, quod Jesus Christus proscriptus est, id est exheredatus ante oculos vestros, et non advertitis. Illi enim dicebantur proscripti, qui pro facto aliquo in exilium trusi, hæreditate et patria privabantur. Et Galatæ cum ad Apostoli prædicationem credidissent se per mortem Christi posse justificari, facti sunt hæreditas Christi, quam ipse sua morte de diaboli possessione eripuit. Sed post ab hac fide recedentes, et justificationem in operibus legis quærentes, quantum in se erat, Christum exheredabant, sese illi subtrahendo. Jesus Christus proscriptus est, id est damnatus et exheredatus in vobis sibi sublatis; ipse dico, crucifixus, quod cum pondere legendum est, quasi qui tam charo pretio vos acquisivit in hæreditatem, patiendo pro vobis crucis asperitatem. Vel dum per legem Christum

deseritis, Christus a vobis proscriptus est, id est A damnatus sicut a Pilato. Et dum insufficientem creditis, a crucifixoribus non differtis, vel proscriptio damnationis ejus quæ a Pilato facta est, ita fuit vobis nota, quasi ante vos fuisset facta, et in vobis, id est in intelligentibus vestris crucifixio ejus, ut sciretis qualiter facta fuerit, et quid contulerit. Commoveat illos per prædictam increpationem, et nunc consequenter probat illis, quod lex non est observanda, quia non ex ea, sed ex fide veniunt omnia bona. Quasi dicat: Licet insensati et fascinati sitis, tamen *hoc solum* quod dicturus sum *volo dicere a vobis*, quia hoc tam evidens est, ut et stulti docere id queant; et si nihil aliud esset, hoc solum sufficeret ad profundum, quod lex tenenda non est. Cum constat quod Spiritum accepistis, docete me utrum accepistis hunc ex operibus legis quæ non solum feceratis, an ex fide quam a me audistis. Vel ita: Possim uti per vobis profundis argumentis, sed hoc solum quod planum est, volo dicere a vobis, id est volo ut respondeatis mihi, quia vel in hoc solo satis apparet justificationem non ex lege esse, sed ex fide. Spiritum, id est Spiritus sancti charismata, sicut laici diversis linguis, prophetare, infirmos sanare, et cætera hujusmodi: accepistis vos divinitus ex operibus legis, an ex auditu fidei, id est utrum accepistis Spiritum ex carnali observantia legis, an ex fide, quam solo auditu prædicationis sumpsistis? Non puto quod dicatis vos hæc spiritualia dona ex operibus legis accepisse, cum sciatis adhuc legis opera tunc nulla fecisse. Restat igitur tantum ex fide vos accepisse. Prius ex fide percepistis charismata, et nunc ex lege quæritis justitiam? Ergo sic, id est tam stulti estis, ut cum Spiritu ceperitis, id est spirituale inceptum habueritis, dum charismata per fidem acceperitis, nunc carne consummemini, id est carnali conversatione in nihilum redigamini, dum bona spiritualia vestra per legis custodiam annullatis. Cum Spiritu sancto ceperitis vel spiritualiter vivere, vel legem spiritaliter intelligere, nunc carne, id est vel carnali vita, vel lege carnaliter intellecta, consummamini, id est annihilamini, amittendo quidquid habuistis. Et ideo sine causa, id est sine utilitate vestra, passi estis ab adve saris tanta, id est tam magna et tam multa adversa pro fide tuenda, quam nunc sponte relinquitis. Non tamen affirmando hæc dico, ne in desperationem ca latis, et adhuc profundius in barathrum perditionis demergamini; sed quia utrumque est in voluntate vestra, dico conditionabiliter, quod tanta adversa pro Christo passi estis sine causa, si tamen sine causa hæc passi estis. Sine causa enim passi estis, si in hoc errore perseveretis; non sine causa, si respiscatis. Et quando quidem ita perdere potestis omnia bona per legis observantiam, ergo Deus qui etiam nunc tribuit vobis Spiritum prophetiæ et sapientiæ, aliarumque gratiarum, et operatur in vobis virtutes miraculorum, dat vobis hoc ex operibus legis, an ex fide quam audistis? Item interrogat quod superius, sed secundum præsens tempus, cum supra præteritum posuerit. Ne enim ipsi ad primam interrogationem, respondere possent. Nos adhuc legis opera non feceramus, quando Spiritum sanctum accepimus, sed si fecissent us illa, tunc majorem ejusdem spiritus gratiam accepissemus per ea; idcirco voluit eos interrogare secundo, quia neque nunc respondere possunt se ex operibus accipere spiritum. Ac si dicat: Nec in principio, nec nunc accepistis ex lege Spiritum sanctum, sed ex fide. Et ita percepistis ex fide Spiritum, sicut per fidem Abraham percepit justitiam, qui credit Deo promittenti, et reputatum est ei ad justitiam, id est ex fide justificatus, id est alique legis operibus, quia credere est causa sufficiens justificandi. Et quando quidem Abraham ex fide justificatus est, ergo cognoscite, id est scitote quia qui ex fide sunt, id est quorum essentia est ex fide, hi sunt filii Abraham, id est justis ad exemplum Abraham.

Providens autem Scriptura, quia ex fide justificat gentes Deus, prænuñtiavit Abraham, quia benedicentur in te omnes gentes (Gen. xxii; Eccl. xliv). Igitur qui ex fide sunt, benedicentur cum fidei Abraham. Quicunque enim ex operibus legis sunt, sub maledicto sunt. Scriptum est enim: Maledictus omnis qui non permanset in omnibus quæ scripta sunt in libro legis, ut acciat ea (Deut. xxvii). Quoniam autem in lege nemo justificatur apud Deum, manifestum est quia justus ex fide vivit (Habac. ii; Rom. i). Lex autem non est ex fide: sed qui fecerit ea, vivet in illis (Lev. xviii).

Non solum justitia datur ex fide, sed et benedictio, quia Scriptura dixit Abraham, quod benedicentur in te, id est in tua fidei conformitate. Vel ita: Dixi quia qui ex fide sunt, hi sunt filii Abraham, et hoc non est novum sed antiquitus in Scriptura notum. Quia Scriptura, id est Spiritus sanctus, vel Moyses Scripturæ compositor, providens, id est ostendens esse provisum longe ante quam fieret, quia ex fide non ex legis operibus, justificat gentes Deus, prænuñtiavit, id est prænuñtatum esse retulit Abraham, quia non tantum Judæi, sed et omnes gentes benedicentur in te, id est in tua fide, et in Christo qui nasciturus est ex te. Benedictionem hic intelligimus baptismi consecrationem et in bonis operibus justificationem, ac pereunibus vite consecutionem. Et quia hoc Scriptura prænuñtiavit, igitur illi qui sunt ex fide, id est qui ex fide ceperunt spiritualiter esse, benedicentur cum fidei Abraham, id est benedictionem consequentur ex fide, sicut Abraham per fidem est benedictus, et cum tanto patriarcha sociabuntur. Et vere qui ex fide sunt, benedicentur, nam qui ex operibus legis sunt maledicentur. Quicunque enim sunt ex operibus legis, id est quaerunt justificari ex carnalibus observantiis, sub maledicto sunt, ut nequeant evadere nisi Christo liberante, id est merito suæ transgressionis obnoxii sunt, et preparati maledictioni sempiternæ

damnationis. Sic enim scriptum est in Deuteronomio (cap. xxvii): *Maledictus, id est æterna maledictione damnatus erit, omnis qui non permanserit assidue, non dico in quibusdam, sed in omnibus quæ scripta sunt in libro legis, nec ita dico, ut vel solum intelligat ea et velit agere, sed ut faciat ea, id est opere compleat. Quod nullus adimplere valet. Hoc est enim iugum, quod, sicut Petrus ait, neque nos, neque patres nostri portare potuimus (Act. xv.) Ideoque nullus ab hoc maledicto liber est, qui iugo legis collum supposuit, et auxilium gratiæ non quaerit. Nemo enim omnia legis præcepta unquam adimplere potuit. Maledictus erit, qui omnia illa non fecerit; sed tamen si quis ea fecerit, non inde justificabitur. Et hoc est: Quoniam in lege nemo justificatur apud Deum, qui veritatem inspicit, quamvis apud homines qui falluntur, justus videatur, manifestum est ex verbis Habacuc, qui dicit quia ex fide vivit justus (Habac. ii) in anima, id est justificatur ex fide, non ex lege. Vita enim animæ interim iustitia est, donec ad visionem Creatoris perveniat, qua perenniter vivat, et hæc iustitia ex fide est. Justus vivit ex fide, id est ex eo quod credit ea quæ non videt. Sed lex non est ex fide, id est nihil mandat credendum, sed per timorem cogit ad faciendum, dicens quod qui fecerit ea quæ ibi scripta sunt, non punietur, quia non est transgressus, sed temporaliter rivet in illis, quæ carnaliter est operatus, aliter enim plecteretur.*

Christus nos redemit de maledicto legis, factus pro nobis maledictum, quia scriptum est: *Maledictus omnis qui pendet in ligno (Deut. xxi), ut et in gentibus benedictio Abrahæ fieret in Christo Jesu, ut pollicitationem Spiritus accipiamus per eum fidem.*

Superius cum diceret: *Maledictus omnis qui non permanserit in omnibus quæ scripta sunt in Libro legis, ut faciat ea,* visus est contra se agere, quia per hoc videbatur circumcissionem et carnalis observantias prædicare, ut qui eas servarent, non damnarentur æterna maledictione. Et quasi respondet nunc istud: *Nos Judæi quandiu servivimus legi, fuimus sub maledicto; sed Christus morte sua delens peccata nostra, et nobis dans justificationem, redemit nos de maledicto legis; ideoque non est opus ut in ipsius legis umbra jam maneamus, postquam veritas nobis illuxit. Vel ita: Ex lege est maledictum, non iustitia; sed Christus nos Judæos qui sub maledicto eramus, redemit de maledicto legis. Cur ergo vos ad illud tenditis? Ipse nos a maledicto redemit, factus pro nobis maledictum; id est reputatus non solum maledictus, sed etiam ipsum maledictum. Vel factus in morte sua maledictum, id est hostia pro nostro maledicto, videlicet caro mortalis quæ vocatur maledictum, quia maledicto, id est peccato primi parentis facta est mortalis, quia scriptum est in Deuteronomio (cap. xxi): *Maledictus, id est morti addictus est omnis qui pendet in ligno crucis. Omnis proorsus qui pendet in li-**

gno, etiam Filius Dei. Omnis enim dixit, contra hæreticos, qui veram Redemptoris nostri mortem erant negaturi, et insipienti honorificent illum a morte separaturi. Qui enim semper benedictus est in sua iustitia, maledictus a hominibus fieri dignatus est propter delicta nostra in morte, suscepta ex pœna nostra. Maledictus autem non a quocumque, sed a Deo, sicut lex loquitur. Nisi enim Deus oisset peccatum et mortem nostram, non ad eam suscipiendam atque delendam Filium suum mitteret. Quid ergo mirum est, si maledictum est a Deo quod odit Deus? Tanto enim libentius dat nobis immortalitatem, quæ futura est Christo veniente, quanto misericordius odit mortem nostram, quæ in ligno pependit. Quoniam mors ipsa ex maledicto est, et maledictum est omne peccatum, vel ipsum quo fit ut sequatur supplicium, vel ipsum supplicium, quod et vocatur peccatum, quia fit ex peccato. Suscepit autem Jesus sine reatu supplicium nostrum, ut inde solveret reatum nostrum, et finiret etiam supplicium nostrum. Itaque quia mors ejus vera fuit, eo crucifixo, maledictum nostrum pependit in ligno. Ipse enim maledictum suscepit pro nobis, quia mortuus est pro nobis. Nam pœna peccati nostri quam pertulit per divinæ sententiæ iustitiam ex maledictione venit. Ita factus est maledictus pro nobis ut nos a maledicto liberaret, et benedictionem conferret, scilicet ut benedictio promissa Abrahæ qua dictum est: *In semine tuo benedicentur omnes gentes (Gen. xxi), completeretur in justificatione gentium per fidem Jesu Christi, qui est semen Abrahæ. Ita enim nos Judæos a maledicto redemit, ut etiam in gentibus quæ non erant sub maledicto legis fieret benedictio Abrahæ de gentium credulitate in Christo Jesu, ut tandem utrique accipiamus per fidem, et non per legis opera pollicitationem spiritus, id est beatitudinem, quam Spiritus sanctus in arrham datus promittit, vel pollicitationem Spiritus, vel Spiritum sanctum promissum credentibus, sive pollicitationem spiritus, id est munera gratiarum a Spiritu sancto promissa.*

Fratres, secundum hominem dico; tamen hominis confirmatum testamentum nemo spernit aut superordiat (Hebr. xix). Abrahæ dicæ sunt promissiones, et semini ejus (Gen. xii, xxi). Non dicit, et seminibus, quasi in multis, sed quasi in uno, et semini tuo, qui est Christus.

Locutus sum superius secundum rationes et secundum Scripturarum auctoritates, quod per fidem, non per legem datur Spiritus sanctus et iustitia et beatitudo; et nunc fratres hoc idem dico secundum hominem, id est secundum humanam consuetudinem, in qua licet sæpe desit firmitas, tamen firmum est testamentum hominis, id est ab homine factum suis hæredibus. Sic et testamentum divinarum promissionum datum Abrahæ, non potest per subsequenter legem infirmari. Quamvis enim secundum hominem loquar, tamen hominis ejusque Testamentum, id est chirographum, in quo constituit, quod

post se suam possideant hæreditatem, postquam morte ejus fuerit confirmatum (*Hebr. ix*). Mors enim testatoris, confirmatio est testamenti, nemo alius ultra spernit illud, ut irritum ducat, volens ex toto destruere, omnes hæredes auferendo et alios ibi ponendo; nec etiam superordinat, ut partim destruat et partim sic dimittat, alios ex hæredibus relinquendo, et alios tollendo, ac pro eis alios ponendo. Et si testamentum hominis jam mortui et in pulverem reversi non mutatur, sed ita permanet, ut ille dum adhuc viveret, constituit, quanto magis Testamentum Dei viventis et æterni sine immutatione permanet? Nam sicut *hominis confirmatum testamentum nemo spernit aut superordinat*, sic testamentum Dei factum Abrahamæ et semini ejus, in quo Deus constituit ut Abraham cum semine suo sit hæres patriæ cœlestis, non facit irritum lex subsequens, neque vel ex parte immutat. Abrahamæ namque dictæ sunt promissiones, id est frequenter promissa est illi divinitus hæreditas et semini ejus, velut dum sub specie terræ Chanaan promitteretur ei terra viventium, dicente Domino: « Omnem terram quam conspicias, tibi dabo et semini tuo (*Gen. xii*). » Non dicit et seminibus tui dabo terram hanc, quasi in multis seminibus, id est in multis filiis esset possidenda, sed quasi in uno semine, id est in uno filio sit obtinenda, et semini tuo, inquit, dabo illam, qui est Christus. Ideo posuit qui, et non quod, quia quod relativum nomen, positum inter proprium et appellativum, ad proprium debet respicere, sicut hic ad Christum, licet Christus non sit pure nomen proprium. Abrahamæ dictæ sunt promissiones et semini ejus. Semen Abrahamæ Christus est, quia de Abraham processit populus Israel; et de populo Israel nata est Virgo Maria quæ peperit Christum (*Luc. ii*). Et quia et nos ad id pertinemus quod est Christus, nobis simul incorporatis et illis pariter capiti cohærentibus unus est Christus. Nam Christus unum est cum omnibus membris suis, tanquam caput cum corpore suo, quod est Ecclesia. Unum ergo semen posuit Apostolus, ut ostenderet Galatas et alias gentes in fide non esse inferiores Judæis, nec Judæos illis superiores, sed omnes semen in fide, quasi unum corpus Christi (*Ephes. ii*). Quod ne ipsi post perceptionem torperent a bono opere, sed unusquisque fratrem suum in sanctis actionibus studeret prævenire, ut posset illum et in remuneratione præcedere, quoniam « unusquisque propriam mercedem accipiet secundum suum laborem (*I Cor. iii*), » et « in domo Patris mansiones multæ sunt (*Joan. xiv*). » Ideo posuit promissiones pluraliter, ut per merita dignioris vitæ festinarent ad præmium majoris gloriæ, quia et « stella a stella differt in claritate (*I Cor. xv*). » Sed tamen, ut diximus, unum est semen cui factæ sunt istæ promissiones, quia unum remunerationis denarium omnes accipient (*Matth. xx*): et omnes sunt unum in Christo. Non enim dicit Deus Abrahamæ: Tibi et seminibus tuis dabo hæreditatem vel benedictionem, quasi

A in multis seminibus vel filiis velit hoc intelligi, sed quasi in uno, id est Christo, utpote re vera in uno semine Christo volens intelligi; et semini tuo, inquit, dabo hæreditatem sive perpetuam benedictionem, quod semen est Christus cum corpore suo.

« Hoc autem dico, testamentum confirmatum a Deo, quæ post quadringentos et triginta annos facta est lex, non irritum facit ad evacuandam promissionem. Nam si ex lege hæreditas, jam non ex promissione. Abrahamæ autem per repromissionem donavit Deus. »

Abrahamæ dictæ sunt promissiones. Lex vero post data, non destruxit illas. Fecit enim Deus Abrahamæ testamentum promissionum hæreditatis, sed ergo Paulus dico, quia lex quæ facta est in Sina post quadringentos et triginta annos a tempore promissionum, non facit irritum, id est falsum, hoc testamentum divinarum promissionum, confirmatum non ab homine, sed a Deo, non facit hoc irritum ad evacuandam promissionem Dei, quæ illi eo facta est de æterna hæreditate. Quod faceret, si per eam daretur hæreditas regni cœlorum. Hoc namque sonant verba istius versiculi, quod lex illa quæ data est sancto Moysi, non potest evacuare vel cassare promissiones illas, quas longo ante tempore Deus Abrahamæ locutus fuerat (*Gen. xii, xv, xxii*). Postquam enim Dominus beato Abrahamæ promissiones illas spondere dignatus est, descendērunt in Ægyptum filii Israel, et habitaverunt ibi quadringentis triginta annis (*Gen. xlvii*). Quibus expletis, exierunt inde, et ita Dominus legem etiam dedit Moysi in monte Sina (*Exod. xii, xiii, xiv, xix*). Non ergo decebat ut lex facta post tempore data, faceret irritum, id est cassum et falsum, hoc sanctum testamentum prius ab omnipotente Deo confirmatum. Volebant enim pseudoapostoli, ut lex faceret illud irritum, dum conarentur asserere justificationem ei regni cœlestis hæreditatem non per gratiam, ut Deus Abrahamæ promiserat, sed per legis opera dari; et ita evacuaretur divina promissio, et Deus fieret mendax. Sed non facit lex illud irritum, ut promissionem evacuet, dando cultoribus suis hæreditatem salutis, quia si ex lege, id est ex legis operibus esset hæreditas, id est æterna beatitudo, jam non esset ex promissione, id est ex dono Dei, et ita fallax esset promissio, hoc est, si ex lege Moysi proveniret cœlestis hæreditas, promissio quæ facta est Abrahamæ, non esset vera, quoniam ex illa non daretur hæreditas. Si est ex lege hæreditas, jam non est ex promissione. Sed ex promissione, ergo non est ex lege. Et quod sit ex promissione, Apostolus subiungit, dicens: Abrahamæ autem per repromissionem donavit Deus, hoc est hæreditatem donavit Deus Abrahamæ non per legem quam non habuit, quæ nondum erat, sed per gratiam quam repromisit. Hoc constat omnibus, quia Abraham habet hæreditatem, quoniam nullus id negare potest. Et cum habeat, aut per observantiam legis habet, aut per gratiam promissionis; sed per legis observantiam non habet, quia lex nondum

erat data, ergo per gratiam divinæ promissionis habet illam. Et si beatus Abraham ex gratia supernæ promissionis per fidem adeptus est hæreditatem, consequens est, ut et nos qui semen ejus sumus, eandem hæreditatem ex gratia divinæ promissionis consequamur per fidem. Repromissionem ideo dixit, quia non semel Deus hæc Abrahæ promisit (*Gen. XII, XV, XXII*).

« Quid igitur lex? Propter transgressiones posita est, donec veniret semen cui promiserat, ordinata per angelos in manu mediatoris. Mediator autem unus non est. Deus autem unus est. »

Poterat aliquis interrogare: Si lex hæreditatem patriæ cælestis dare non potuit, quid igitur data fuit post Abrahæ promissiones? Et ideo Apostolus ipse quæstionem sibi proponit, et ipse solvit. Quasi dicit: Quandoquidem ex lege non est justitia neque hæreditas, quia nec cultores suos justificavit, nec regnum cælorum illis aperuit. *Quid igitur lex utilitatis contulit? Quærendum est enim cui divinitus data sit, qua utilitate, qua necessitate data sit, quid commodi dederit, cur inter illa duo intervenèrit, scilicet inter promissionem et rem promissam. Nunc ostendit quare data sit. Posita est, inquit, inter promissionem et promissam hæreditatem, propter illos qui naturalem legem transgrediebantur, ut vel timore cessarent transgredi, et paulatim erudirentur ad hoc, ut bona ex amore facerent. Sed videamus ordinem constructionis. Lex ordinata per angelos in manu mediatoris, posita est in populo Judæorum propter transgressiones, donec veniret semen cui Deus promiserat. Lex est ordinata per angelos, quia non per seipsum Deus, sed per angelos Moysi loquebatur, et præcepta legis disponebat (*Act. VII*). Et quia in ipsis angelis Christus erat, qui est mediator Dei et hominum, ac per eos legem ordinabat ideo dicitur ordinata fuisse per angelos in manu mediatoris. Ordinata est ergo, id est bono ordine posita inter promissionem et promissionis redditionem; ordinata est inter tempus naturalis legis, de qua conjuncti fuerant homines, quod juvare non potuit; et tempus gratiæ, ante cuius adventum erant convincendi de lege scripta. Et ideo qui nullæ legem post adventum gratiæ reducit, contra ordinem qui divinitus per angelos dispositus est, facit. Ordinata est enim ita, ut semper esset in manu mediatoris, id est in potestate Christi, ut quando vellet maneret, et quando vellet cessaret. Et tali ordine posita est in populo Judæorum propter transgressiones illorum coercendas, ut scilicet audientes. Si quis hoc vel illud fecerit, morte moriatur, vel talem poenam patiatur, saltem timore mortis aut poenæ desisterent peccare. Nam propter justos et prophetas non fuit posita, qui non timore poenæ, sed amore justitiæ Deo serviebant; et plenam habentes de Christo fidem, jam ad Novi Testamenti gratiam pertinebant, et in illorum libertate jam vivebant; sed tamen ipsi propter varias causas ejusdem legis opera carnaliter faciebant, tum quia intelligebant illa esse*

A futurarum rerum signa, tum quia cæteris pro quibus ipsa lex data erat, exemplum dare volebant observandi eam. Si enim qui sapientiores et sanctiores erant, ipsi carnales observantias legis postponere viderentur, jam populus ille minus eruditus putaret legem esse inutilem, nec custodiret eam. Illi autem qui timore poenæ legem ipsam carnaliter observabant, et redemptionem humani generis expectabant, ac de adventu Redemptoris qualemcunque fidem habebant, licet non ita plenam ut prophetæ, per eundem Redemptorem salvati sunt, etsi non habent magnitudinem sublimioris gloriæ quam assecuti sunt prophetæ. Quia vero ex semine Abrahæ Christus erat nasciturus, in quo omnium gentium fuerat benedictio repromissa, et per quem patria cælestis erat danda, et ab Abraham usque ad ipsum Christum multa fuerant sæcula transitoria, providens Deus ne soboles dilecti sui Abrahæ cæteris nationibus misceretur, et paulatim familia ejus fieret incerta, gregem Israeliticum quodam circumcisionis cauterio denotavit, ut viventes inter Ægyptios, Chananæos, Assyrios, hoc signaculo distinguerentur. Quandoquidem fuerunt in Ægypto, inter idololatras et immundos circumcidebantur, ut se populum Dei dissimilem ab illis semper recognoscerent, nec opera eorum aliquando facerent (*Josue V*). Sed postquam in desertum pervenere, circumcisionem dimiserunt; præsertim ipso legislatore, quoniam omnes erant Judæi, colentes unum Deum, et gentes cum quibus in idololatria miscerentur non videbant. Statim autem ut Jordanis ripam transgressi sunt, circumcisionem quam intermiserant, repetierunt (*ibid.*), propter quod et secunda vocata est illa circumcisio, quia inter gentes conversaturi, timebant ne ad idololatriam exemplo gentium declinarent, et ideo se illis dissimiles ostendere volebant. Unde possumus videre circumcisionem et carnales legis observantias prophetis et cæteris justis ad Novum Testamentum pertinentibus, nullatenus fuisse necessarias, eo quod non timore poenæ, sed amore justitiæ Deo servirent, et se ab omnibus idololatriis dissimiles sine lege recognoscerent. Nunc quoque jam nec signo circumcisionis, per quod Dei populus agnoscat, opus est, quia modo non una gens est Dei, sed ex omnibus gentibus una congregatio, quia jam venit expectatio gentium Christus. Itaque non propter justos, ut diximus (*Gen. XII, IX*), posita est lex, sed propter cæterorum transgressiones refrenandas, quæ vel præcesserant, vel voluntatibus eorum instabant. Et posita est donec veniret semen Abrahæ, cui Deus promiserat, id est ad hoc posita est, ut duraret donec veniret Christus, cui Pater promiserat supernam hæreditatem, ut cum corpore suo quod es. Ecclesia, perenniter eam possideret. Qui ergo legem adhuc vult protelare, aut Christum negat venisse, aut Deum usque ad adventum ejus legem posse, aut Deum usque ad adventum ejus legem posse fecerat, vult ostendere de quo dicebat, et quam misericorditer ille mediator curam nostræ salutis

semper habeat. Ait enim : *Mediator autem unius non est.* Lex enim est in manu mediatoris, sed mediator non est unius. Hoc satis notum est, quia mediator non est unius rei, vel unius partis, sed duarum. Quod est dicere : Mediator, id est conciliator vel pælator, non est necessarius uni rei vel uni parti, sed duabus. Inter duos enim reconciliandos, necessarius est mediator qui utrique sit amicus, id est inter duos discordantes mediator, id est reconciliator debet currere, qui valeat illos ad pacis concordiam revocare, sicut Christus per humanitatem suam nobis amicus, et per divinitatem suam Patri, sanguine suo pacem inter nos et Deum fecit. Mediator non est unius, sed *Deus est unus.* Igitur mediator i.o. est Dei solius, sed Dei et hominum. Inter nos enim et Deum Christus mediator est; ac per hoc dum per humanitatem suam nos Deo reconciliat, Patri et sibi sanctoque Spiritui reconciliat, quoniam trinitas unus Deus est. Vel ita : Mediator non est unius, sed duorum, quia duos discordes populos, Judaicum et gentilem, Christus pacificavit, faciens ex utroque unum Christianum populum. Christus est duorum mediator, sed Deus est unus, quia Pater et Filius non sunt duo dii, sed unus Deus. Quamvis enim Pater sit Deus, et Christus Deus, uterque tamen unus est, non duo dii. Sed prior sententia melior est et venior.

Lex ergo adversus promissa Dei? Absit! Si enim data esset lex, quæ posset vivificare, vere ex lege esset justitia. Sed conclusit Scriptura omnia sub peccato (*Rom. iii*), ut promissio ex fide Jesu Christi daretur credentibus.

Quia dictum est superius, quod si ex lege est hæreditas, jam non est ex promissione, videretur alicui quod lex esset contraria promissioni. Et hoc nunc Apostolus quasi vice adversarii objicit sibi ipsi, et refellit. Quandoquidem (inquit, ex promissione non potest hæreditas esse, si fuerit ex lege, ergo lex est adversus promissa Dei, id est contraria præcedentibus promissis, quæ Deus Abraham responderat. Absit ut lex Dei adversetur promissis Dei! Non potest hoc esse, ut Deus legem dederit quæ adversaretur promissis suis, quia jam in hoc sibi ipsi Pater esset contrarius. Nunquam lex subsequens adversata est præcedentibus promissis, sed ut homines digne se prepararent ad ea accipienda, jugiter ammonuit. Vel ita: Quandoquidem lex propter transgressionem posita est, ergo est adversus promissa Dei, ut per eam impleantur aliter quam Deus promisit? Absit hoc! Non est illis contraria, ut in aliquo obsistat vel in aliam partem ea deflectat, quoniam aliter non potest haberi cælestis hæreditas, nisi quæ modum Abraham promissum est. Lex enim non potest illam hæreditatem dare, quia non potest veram justitiam conferre, sine qua nullus aliter supernam hæreditatem valet pervenire. Et vere non potest justificare, quia nec a morte peccati valet animam vivificare. Si enim data esset lex quæ posset vivificare, vere ex lege esset justitia. Si per Moysen data

esset lex, quæ posset homines ab interna morte, quam prævaricatione protoparentis et sua iniquitate incurrerant, vivificare, tunc sine dubio veram justitiam lex ipsa posset conferre, per quam et regno cælorum homines essent idonei. Sed non est data lex quæ posset vivificare, imo quæ posset occidere. (Littera enim occidit, spiritus autem vivificat (*II Cor. iii*).) Littera enim legis prohilens peccatum, non vivificat hominem, sed potius occidit, augendo concupiscentiam et iniquitatem prævaricatione cumulando, nisi liberet gratia per legem fidei, quæ est in Christo Jesu, cum diffunditur claritas in corde per Spiritum sanctum (*Rom. v*). Lex ergo Moysi non potuit vivificare, quia hoc servalatur evangelicæ gratiæ. Quod pulchre figuratum est, quando Giezi præcurrens cum baculo, non potuit mortuum suscitare; sed Elisæus post veniens, suscitavit eum (*IV Reg. iv*). Puer enim mortuus, humanum genus est, jacens in morte peccati. Giezi cum baculo, Moyses cum terrore legis. Elisæus subsequens, Christus post veniens. Sed Giezi præmissus cum baculo, non suscitavit mortuum, quia Moyses Christum præcedens cum terrore legis, non potuit humanum genus a morte animæ suscitare, quoniam juxta Apostolum non est data lex quæ posset vivificare. Elisæus vero post veniens suscitavit puerum, quia Christus in fine legis incarnatus apparens, humanum genus ab interna morte suscitavit. Lex itaque non potuit vivificare, quod si potuisset, tunc et justificare valeret. Unde liquido patet, quia evangelicæ gratiæ quæ mentem a peccati morte vivificat, veram præbet justitiam quæ facit homines idoneos hæreditati cælorum. Non est data lex quæ posset vivificare, sed potius Scriptura, id est ipsa lex manens et scripta, vel quæ non dat Spiritum, sed tantum est Scriptura, conclusit omnia hominum genera sub peccato, id est omnes Judæos circumsepsit, ac sub peccati dominio detinuit, ut a nulla parte jugum peccati dum in lege tenerentur, possent evadere; vel quia tam difficilis erat, ut cum a nullo posset impleri, omnes faceret prævaricatores et accusabiles redderet, quod enim lex omnia quæ continebat sub peccato conclusisset, apte signavit piscina illa in Jerusalem, quinque porticus habens, in quibus jacelat multitudo magna languentium (*Joan. v*). Nam aqua piscine, vel plebem Synagoga, vel doctrinam legis figuravit. Quæque porticus cingentes piscinam, quinque libros legis concludente Synagogam. In quibus porticibus jacelat multitudo magna languentium, quoniam Scriptura legis, sicut nunc dicitur, conclusit omnia sub peccato, omnesque qui intra legis ambitum clauduntur, jacelant in languore peccati, exspectantes medicum Christum, per quem sanarentur. Ideo autem Scriptura conclusit sic omnia sub peccato, ut homines nota sua et legis infirmitate, properarent ad gratiam, et ita promissio benedictionis et hæreditas Abraham daretur eis credentibus, non ex operibus legis, sed ex fide Jesu Christi.

« Prius autem quam veniret fides, sub lege custodiebamur, conclusi in eam fidem quæ revelanda erat. Itaque lex pædagogus noster fuit in Christo, ut ex fide justificemur. At ubi venit fides, jam non sumus sub pædagogo. »

Modo fides nos liberat, et facit consequi promissionem; sed priusquam cum Christo veniret, custodiebamur sub lege. Lex enim conclusit omnia sub peccato, sed tamen fuit utilis, quia custodiebamur sub illa priusquam sponte sua veniret fides, nullis meritis nostris advocati, *sub lege custodiebamur conclusi*, id est constricti timore velut servi, ut nos ita concluderet onere carnalium observantiarum, ne per insolentiam et lasciviam evagaremur ad idololatricam. Ideo conclusi custodiebamur, ut legis disciplina coerciti, duceremur *in eam fidem quæ* tempore Christi *revelanda erat*, ubi multa sunt patefacta, quæ prius erant clausa et velata. Custodiebamur conclusi quasi in ergastulis servire coacti, ut transiremus in eam fidem quæ erat revelanda, id est in manifestissimam et plenariam fidem, quæ erat tempore gratiæ detegenda, quia in antiquis sanctis erat velata. Et quia lex nos custodivit ad fidem, *itaque lex eadem fuit pædagogus noster*, id est nos sensu pueros ab illicitis comprimens et ad recta dirigens timore pœnarum. Quia enim nos custodivit donec ad fidem inveni veniremus, idcirco pædagogus noster fuit, id est custodia ad tempus, non ut semper maneret, sed sicut pædagogus cessaret. Sicut enim pædagogus flagellat puerum, ut hunc reddat aptum ad regendam domum, et possidendam hæreditatem patris in ætate sua virili, ita lex fuit nobis imposita custodia, ut onera legis gravia saltem metu pœnæ servata nos reprimerent, ut idoneos hæredes summi Patris nos facerent. Lex fuit nobis pædagogus *in Christo*, id est in exspectatione Christi, ut sic venientes ad fidem quasi pueri ad perfectionem, *justificemur nunc ex fide*, et iustificati consequamur hæreditatem. Ante fidem fuimus sub pædagogo, id est sub restrictione et onere legis, sed postquam *venit fides*, jam non sumus sub pædagogo servitutis legis, sed in libertatem charitatis, utpote non jam pueri sensibus, sed adulti.

« Omnes enim filii Dei estis per fidem quæ est (218) in Christo Jesu. Quicumque enim in Christo baptizati estis, Christum induistis (Rom. vi). Non est Judæus neque Græcus, non est servus neque liber, non est masculus neque femina. Omnes enim vos unum estis in Christo Jesu. Si autem vos Christi, ergo semen Abrahamæ estis, secundum promissionem hæredes. »

Quasi dicerent Galatæ, Judæi legem pædagogum habuerunt quæ illos custodivit, et ideo nunc filii possunt esse per gratiam, ut cœlestis patriæ hæreditatem accipiant; sed nos qui non habuimus pædagogum, non sumus filii: ideoque necessarius est nobis pædagogus, id est lex, ut possimus esse filii. Respondere videtur Apostolus: Non est verum. Nam (218) Anselmus hæc duo verba, *quæ est*, non legit.

A omnes per fidem quam accepistis sine pædagogo, *facti estis filii Dei*, id est apti hæreditatem possidere cœlestem. Vel potius ita continuatur: Nos Judæi tempore fidei pædagogum deserimus, quia omnes vos gentiles qui non habuistis pædagogum, estis filii Dei per fidem. Nos qui exemplo vestro pædagogum deserimus, et vos illum accipitis, filii estis per fidem, existentes *in Christo Jesu*, id est facti membra Christi, et participes innocentiae ac sanctitatis ejus, et ita digni possidere filiorum hæreditatem. Et vere estis in Christo per fidem, quam suscepistis in baptismo. Nam quicumque, id est cujuscunque conditionis vel sexus vel ætatis, *baptizati estis in Christo*, id est in Christi nomine, vel in Christo, id est in Christi baptismo, quem ipse fieri decrevit in aqua et in spiritu ac in nomine Trinitatis (*Joan. iii; Matth. xxviii*), *Christum induistis*, id est Christum pro veste accepistis, ut indumento justitiæ illius circumdati (*Isa. lxi*), non ostendatis ultra jam ab ulla parte quidquam in operibus et conversatione vestra, nisi sanctitatem Christianitatis. Christum vestem accepistis, quod est vobis honor et contra tentationum æstus protectio. In qua Christi induitione *non est Judæus neque Græcus*, id est in illa Christi conformitate nec Judæus prodest, neque Græcus obest, quia nec Judæus propter Judæismum suum est ibi superior, neque Græcus propter Græcitatem suam inferior. Sed nec servus est ibi abjectior, quoniam sine discretionem nationis ac conditionis ac sexus estis omnes in Christo. Non estis ibi differentes, quia omnes vos sive Judæi, sive Græci, sive servi, sive liberi, sive mares, sive feminae, *unum estis in Christo Jesu* per unitatem fidei et charitatis. Et si nos sic vivificat fides, per quam in hac vita recte ambulatur, quanto perfectius atque feliciter nos efficiet ipsa species, qua videbimus sicuti est id ad quod tendimus? Omnes enim unum estis in Christo, id est in Christi corpore, et ita ejus membra estis effecti. Sed si vos membra Christi estis, id est Christo uniti, *ergo semen Abrahamæ estis*, futuri hæredes regni cœlorum non secundum carnem, sed *secundum promissionem* quam Deus fecit Abrahamæ. Vos enim facti estis hæredes secundum promissionem Abrahamæ gratia Dei. Non de carne Abrahamæ fecit illi cohæredes Deus. Nam imitando fidem Abrahamæ, facti estis filii Abrahamæ.

CAPUT IV.

« Dico autem: Quanto tempore hæres parvulus est, nihil differt a servo, cum sit dominus omnium, sed sub tutoribus et actoribus est usque ad præfinitum tempus a patre. Ita et nos cum essemus parvuli, sub elementis mundi eramus servientes. At ubi venit plenitudo temporis, misit Deus Filium suum, factum ex muliere, factum sub lege, ut eos qui sub lege erant redimeret, ut adoptionem filiorum reciperemus. »

Ab eo loco quo dixerat, *jam non sumus sub pædagogo*, fecit usque nunc interpositionem propter

Galatas. Modo autem exponit, qua similitudine vocaverat legem pædagogum, et adaptat similitudinem, atque ostendit quia non debuimus esse sub lege, postquam fides venit. Quasi dicat: Superius dixi manifeste, quia priusquam veniret fides, sub lege quasi sub pædago custodiebamur, postquam vero fides venit, jam non sumus sub pædago, sed nunc dico idipsum per similitudinem, quia scilicet puer, qui patris sui futurus est *hæres*, quanto tempore est parvulus, ætate et scientia, nihil differt a servo id est cogitur alterius parere voluntati, et nullam potestatem habet, cum id est, quamvis sit jam secundum naturam dominus omnium quæ pater ejus possidet. Non quidem est servus, sed tamen nihil differt a servo, quia non est speciose vestitus, nec est in libera potestate sua, sed sub custode qui illum servat, et ducit quo ducendus est, quoniam *παῖς*; puer dicitur, et *ἀγὼ* duco. Non differt a servo. sed est sub tutoribus, qui tuentur illum ab injuriis; et sub actoribus, qui pro illo agant ea quæ necdum ipse valet aut scit agere. Vel sub actoribus, id est præceptoribus et morum informatoribus, quorum auctoritatem et gravitatem sequatur, et qui auctoritate sua pro illo causas ipsius agant, et est sub illis usque ad tempus præfinitum a patre, id est usque ad quinque annos, vel usque ad aliud temporis spatium quod pater ejus præordinavit, ut deinceps liberæ voluntati suæ relaxetur. Simili modo sentiendum est et de populo Judæorum, qui per Christum gratiam futurus erat regni cælorum hæres, quia quandiu fuit scientia et actione parvulus, servili timore compressus sub disciplina legis quasi sub districtione pædagogi, et coactus servire præceptis divinis, cum tamen futurus esset per Christum dominus omnium bonorum patriæ cælestis, id est possessor cælestium divitiarum. Quando erat parvulus cognitione Dei et viribus resistendi peccato, non differebat a servo, quia lex ei dominabatur, et minis eum terreat ne peccare auderet. Nam erat sub tutoribus et actoribus, id est sub legis sermonibus, qui velut tutores contra malignorum spirituum impugnationes, et contra gentiliū ad idololatriam persuasiones defendebant, illum admonendo et increpando atque puniendo, et velut actores informaverunt mores ejus, atque causam ipsius apud Deum egerunt, dum per sacrificia et expiationes Deum ei placaverunt. Et sub his fuit usque ad præfinitum tempus a patre, id est usque ad adventum Christi, in quo Deus constituit ut populus ille perfectus et liber fieret, et hæreditatem obtineret. Si vero prædictis tutoribus vel actoribus quandiu parvulus fuit, dedignaretur subijci, non posset idoneus esse opportuno tempore paternam hæreditatem adipisci. Nam hæc ita debere intelligi declarat ipse Apostolus, dum consequenter similitudinem adaptat, dicens: Ita, id est similiter ut prædictus puer, et nos Judæi cum essemus parvuli non ætate, sed intellectu et discretionem ac mentis viribus et operum actione, eramus servientes, id est in servitute legis viventes, sub elementis mundi, id est sub

A carnalibus observantiis quibus comprimebamur, ne libere lascivire liceret. Sicut enim pueri discunt elementa et conjunctionem elementorum, nec tamen possunt intelligere profunditatem sententiarum quousque sint in libera potestate, postea vero se conferunt ad liberales artes, nec tamen possunt ad harum scientiam venire nisi per elementa, sic Judæi per carnales legis observantias instructi sunt. Ipsa fuerunt illis quasi elementa, id est primordia per quæ venerunt ad fidem, et ad majorem Dei cognitionem, scilicet ad spiritualem intelligentiam ipsarum carnalium observantiarum. Quæ elementa dicuntur mundi, quia data sunt amatoribus hujus mundi, qui nesciebant appetere æterna et invisibilia, sed temporalia et visibilia; ideoque terroribus corporalium pœnarum et promissionibus temporalium bonorum per legem pueriliter sive serviliter compellendi erant ad Dei cultum. Elementa ergo mundi, lex Moysi et omne Vetust Instrumentum intelligitur, quibus et nos adhuc quasi elementis et religionis exordiis Deum discimus: quomodo elementa appellantur litteræ, per quas syllabas ad verba conjungimus, et ad texendam orationem longa meditatione procedimus. Ars quoque musica habet elementa sua, et geometria ab elementis incipit linearum. Sic elementis veteris instrumenti, ut ad evangelicam plenitudinem veniat, sancti viri eruditur infantia. Unde et centesimus nonus decimus psalmus, omnesque alii qui litteris prænotantur, per Ethicam nos ducunt ad theologiam, et ab elementis occidentis litteræ quæ destruitur, transire faciunt ad spiritum vivificantem. Propter quod et elementa quasi elevamenta dicuntur, quia nos elevant a visibilibus ad invisibilium intelligentiam. Sub quibus elementis, id est sub lege et prophetis carnaliter intellectis serviliter tenebantur Judæi, dum essent parvuli, et nescirent seipos regere, ideoque indigerent pædagogi districtione et instructione. Ita, inquit, dum essemus sensu parvuli, eramus servientes sub elementis mundi usque ad præfinitum tempus a Patre. Sed postquam venit plenitudo temporis id est postquam impletum omne spatium illud temporis, in quo cælestis Pater præfinitur nos sub legis quasi sub pædagogi districtione mors puerorum manere, et nos in virilis animi robur profecissemus, nec jam pædagogi custodia indigeremus, tunc Deus Pater, ut nos a vinculo pristinae servitutis solveret, misit non angelum, non archangelum, sed Filium suum unigenitum. Misit eum, id est fecit incarnari, ut hominibus esset visibilis; ipsum dico, secundum carnem factum ex muliere, id est ex femina matre, qui secundum divinitatem non est factus, sed genitus a Patre. Et factum sub lege, id est creatum secundum carnem sub legis observatione, ut susciperet circumcisionem et portaretur ad templum cum hostiis Judaico more, sicut veraciter filius Abrahæ cui promissus fuerat. Hunc ergo Deus factum ex muliere, id est maternæ carnis substantia, sine virili admistione conceptam,

ad humanos aspectus hominem verum protulit, qui in divina virtute ac substantia manens per omnia quod erat, veram naturæ mortalis infirmitatem, quam non habebat, induit. Usus namque divinarum Scripturarum, et maxime Hebraicarum, mulieres appellare consuevit, non corruptas, sed feminas, sicut legimus, quia ædificavit Dominus Deus costam, quam tulerat de Adam in mulierem, et adduxit eam ad Adam (*Gen. 11*). Ut autem Dei Filius nobis necessariam obediendi virtutem præcipuo commendaret exemplo, factus est sub lege, id est subditus est legi; non quia ipse quidquam legi deberet, qui unus est legislator et iudex, sed ut eos qui sub lege positi legis onera portare nequiverant, sua compassione juvaret, ac de servili conditione quæ sub lege erat, ereptos in adoptionem filiorum quæ per gratiam est, sua largitate reduceret. Factus est sub lege, ut eos qui sub lege erant redimeret, id est a legis servitute liberaret, sicut et mortem subire dignatus est, ut eos qui mortis Dominum evadere non poterant, a morte redimeret. Factus est sub lege non ut ab ea expiaretur, sed ut eos qui sub illa erant pressi et rei, liberaret; ita ut nos omnes Judæi, et gentiles recipere pariter adoptionem filiorum, quia nostram participavit naturam, et nos adoptavit ad suam. Propterea ergo voluit sub lege fieri et legem implere, ut eos qui erant sub onere legis compressi, a iugo legis redimeret; et nos omnes, tam Judæi quam gentiles, per gratiam novæ libertatis recipere adoptionem filiorum, quam in Adam perdidideramus, id est efficeremur adoptivi filii, ac hæreditatem Patris æterni consequeremur.

Quoniam autem estis filii Dei, misit Deus spiritum Filii sui in corda nostra, clamantem, Abba Pater. Itaque jam non est servus, sed filius. Quod si filius, et hæres per Deum.

Modo repetit quod superius dixerat, Galatas esse filios Dei, ut ostendat similiter illos adoptivos filios esse, sicut Judæos, quasi dicat: Dixi vos esse filios Dei per fidem. Nec frustra hoc estis. Sed quoniam vos Galatæ estis adoptivi filii Dei, sicut et nos Hebræi, misit Deus Spiritum naturalis Filii sui in corda nostra, id est Spiritum sanctum, qui et a Patre procedit, et a Filio (*Joan. xv*). Nam et missio qua mittitur a Patre, ipsa est processio qua procedit a Patre. Et ideo dicit eum Apostolus mitti a Patre et Filio, ut ostendat eum ab utroque procedere. Misit Deus Pater Spiritum filii sui in corda nostra, id est in corda nostra omnium nostrum qui credimus, tam Judæorum quam gentilium. Nam propter utrumque populum misit eum clamantem, Abba Pater. Clamat enim in cordibus nostris ad Deum, id est magna piæ mentis devotione facit nos intus clamare, o Abba Pater. Abba namque et Pater, idem est. Sed propter Judæos clamat Abba, et propter gentiles Pater, ut ostendat ambos unum Patrem habere Deum. Abba enim Hebraice, pater dicitur. Effectus ergo probat utrosque Dei filios esse, dum in cordibus utrorumque clamat Spiritus san-

ctus ad Deum, Abba Pater. Et quid est spiritualis ille clamor, nisi pius affectus electorum erga Deum, et pia mentis postulatio esurientis, et sitientis iustitiam? Quia vero superius dixerat hæredem, quando parvulus est, nihil a servo differre, quod de populo qui sub legis servitute fuerat, mystice voluit intelligi, et addiderat quomodo idem populus per adventum Filii Dei liberatus sit, facit inde consequenter illationem, quod jam non sit servus. Ac si dicat: Populus ille qui prius erat sensu et actione parvulus, et sub lege serviliter deprimebatur, postmodum per gratiam unigeniti Dei est in libertatem adductus, et in Filium adoptatus. Itaque jam non est servus ut antea sub lege, sed filius, quia filiorum adoptionem recepit dono gratiæ. Vel ita: Spiritus Christi clamat in cordibus utriusque populi, Abba Pater. Itaque jam neuter eorum est servus post acceptionem sancti Spiritus, sed est per gratiam filius. Quod, id est sed si jam, filius est, ergo et hæres in futuro erit per Deum, id est per Dei operationem, et per Dei gratiam. Vel per Deum juro ita fore. Hæc enim filiatio et hæreditas utrique populo concessa est. Sed quia Galatis Apostolus loquitur, ad eos sequentia verba respiciunt, cum dicitur:

Sed tunc quidem ignorantem Deum, his qui natura non sunt dii, serviebatis. Nunc autem cum cognoveritis Deum, imo cogniti sitis a Deo, quomodo convertimini iterum ad infirma et egena elementa, quibus denuo servire vultis? Dies ob servatis, et menses, et tempora, et annos. Timeo vos, ne forte sine causa laboraverim in vobis.

Modo, inquit, estis filii, sed prius eratis servi, non in carnalium legis caeremoniarum servitute, sicut Judæi, sed idolorum, quia tunc quidem ignorantem Deum, serviebatis his qui non sunt dii natura, sed opinione insensatorum hominum, id est non sunt naturales, sed falsi dii. Hic ostendit non esse serviendum, nisi illi qui natura Deus est. Tunc quidem ignorabatis verum Deum, cui soli serviendum est; et ideo aliquid excusationis habebatis, quod falsis diis serviebatis. Sed nunc cum jam cognoveritis Deum, nulla ulterius vobis superest excusatio, si erraveritis, sed longe deterius quam olim delinqueritis. Nunc non est jam locus errandi, cum aperta sit veritas, cum cognoveritis Deum per fidem, imo, melius possum dicere, cum sitis a Deo cogniti, id est approbati per bonam operationem. Vel Deus cognovisse dicitur, quia fecit ut ab his cognosceretur, a quibus ignorabatur. Neque enim fas est ut credamus quod tunc Galatas Deus primo cognoverit, quos ante mundi constitutionem præcognitos habuit; sed tunc cognovisse dictus est, quod tunc ut cognosceretur effecit. Nam quia tunc ipsi eum illius munere, non suo merito vel facultate cognoverant, maluit typice loqui, ut tunc ab illo cognitos diceret, quando eis cognoscendum se præstitit; et verbum corrigere, quasi hoc minus recte dixerat, quod proprie dixerat, quam sinere ut hoc sibi arrogarent, se potuisse quod eis posse ille donaverat. Cum enim dicitur, quod

nos cognoscit Deus, cognitionem suam nobis præstat ut per hoc intelligamus, ne hoc quidem nobis tribuendum, quod nos scimus Deum, sed eam quoque scientiam illius misericordiæ tribuamus. Prius quidem, inquit, per ignorantiam Dei serviebatis idolis; sed modo cum jam cognoveritis Deum, ino cogniti sitis a Deo, id est cognitionem ejus perceperitis ab ipso, *quomodo*, id est qua causa, qua ratione, *convertimini iterum* (ut ante Dei notitiam) ad servitum erroris? Quomodo postquam vobis veritas illuxit, *convertimini iterum* ut antea, dum a Judæis efficeremini proselyti? Quomodo, inquam, *convertimini ad elementa*, id est ad carnalia legis mandata, quæ sunt divini cultus Judæis exordia, et sunt *infirmia*, quia per se non valent cultores adjuvare; *et egena*, quia egent auxilio gratiæ? Quomodo ad hæc *convertimini, quibus denuo*, id est iterum *vultis servire*? sicut quondam eis servierunt Judæi, sed jam ab eorum servitute sunt liberati. Illi desierunt eis servire, et vos qua ratione vultis iterum eis servire? Quæ scilicet elementa, id est carnalia legis præcepta, prius fortia et velut quamdam firmitatem dantia steterant, dum Judæos adhuc comprimerent, et cohortarentur ad justificationem fidei, et ad majorem Dei notitiam paulatim promoverent; et erant ditia, dum locupletarent eos, dando quamdam ipsis apud homines justificationem, ut non punirentur, ut nihil mali paterentur. Hæc namque erant illis quædam divitiæ, quæ præparabant illos ad veras divitias, ad fidem scilicet et justificationem, nec non et ad hæreditatem in supernis accipiendam. Sed nunc infirma et egena sunt hæc elementa, quia priusquam veritas advenit, jam neminem ad ejus susceptionem præparant, jam neminem ad Dei cultum constringunt, jam nihil præfigurant, nihil cultoribus suis prosunt, nihil boni conferunt. Et his ita destitutis ac inanibus elementis vultis denuo servire, sicut ante veritatis adventum Judæi quondam illis servierunt, cum jam nemo debeat illis servire, sed omnes in libertate quam Christus dedit, permanere: nec jam sub pædagogo vivere, postquam impletum est tempus præfinitum a Patre. Vere vultis denuo his elementis servire, et post expletum infantia tempus iterum jugo pædagogi colla vestra miserabiliter subdere. Nam *observatis*, id est observare disponitis *dies*, sicut Sabbata, *et menses*, sicut per primum et septimum mensem, vel menses, id est exordia mensium, hoc est neomenias, *et tempora*, sicut quando ter in anno omnes Judæi ad templum conveniebant, ac solemnitates agebant, *et annos*, sicut septimum et quinquagesimum annum. Hunc annum Galatæ nuper subversi necdum observaverant, et ideo (secundum quod præmisimus) quod ait, *dies observatis et menses et tempora et annos*, sic accipiendum est, non quod jam observarent, sed quod hoc observare velent. Non enim tam fecerant quam facere disponebant carnalia legis opera. Et quia talibus, inquit, subijci non respucistis, *timeo vos*, ne *mibi damnum* de vobisipsis faciatis, scilicet *ne sine*

A causa, id est sine utilitate vestra *laboraverim in vobis* convertendis et instruendis. Non idcirco timeo eos, ut putet quod illi possint ei per apostasiam suam auferre mercedem laboris, quam in eorum instructione pertulit, sed quia metuit ne seipsos a fide subtrahendo, faciant ut non prosit eis labor apostolicus. Non enim suam mercedem, sed illos amittere timet. Quod forte, id est illorum arbitrio potest fieri. Utrumlibet contingere valet, ut vel sine causa quantum ad eos laboraverit in ipsis, si in errore perduraverint; vel non sine causa, si resipuerint. Dicamus quod nonnullis visum est, scilicet quia Galatæ partim ex Judæis, partim ex gentibus ad fidem venerant, sed post discessum Apostoli cogebantur a pseudo prædicatoribus, his qui de Judæis conversi fuerant, iterum Judaizare; qui vero de gentibus crediderant, rursus elementa observare. Quibus apte congruit quod dicitur: Sed tunc quidem ignorantes Deum, his qui natura non sunt dii, serviebatis. Nunc autem cum cognoveritis Deum, quomodo *convertimini iterum*, sicut ante quam Deum cognovissetis, ad elementa, id est ad impiam observantiam solis et lunæ ac stellarum et cæli æ terræ? Quæ quidem sunt infirma, quantum ad vos, quia nequeunt vos adjuvare; et egena, quantum ad se, quia nihil habent nisi ex Dei dispositione, hic tamen post nostram conversionem vultis denuo servire sicut antea. Nam dies observatis, dicentes: Non proficiscar hodie, quia posterus dies est, aut quia sic luna fertur; vel: Proficiscar, ut prospera cedant, quia sic se habet positio siderum, et menses observatis, dicendo: Nunc agam hoc mense commercium, quia illa stella mihi agit mensem, vel idcirco agam, quia suscepit mensem. Et tempora prævidentes in arguriis, quale tempus, sive carum, sive calidum aut pestiferum, evenire debeat et annos, ut illi qui dicunt: Non plantabo hoc anno vineam, quia bisextus est. Sive ergo his, sive aliis perversis modis, nonnulli Galatarum observabant dies et menses, atque tempora et annos, et inde culpant eos Apostolus, atque omnes qui talibus observationibus ad hæc student, et quam grave sit periculum talia observare demonstrat, dum esse incassum quod illis qui hæc observant, laborasse timet. Quis enim æstimaret quam magnum peccatum sit talia observare, sicut observant, ut dictum est, qui certis diebus aut mensibus, sive temporibus, sive annis, volunt, vel nolunt aliquid inchoare, eo quod secundum vanas doctrinas hominum fausta vel infausta æstimant tempora, nisi magnitudinem ex timore Apostoli pensarem, qui nunc talibus ait: *Timeo ne forte sine causa laboraverim in vobis.*

Estote sicut ego, quia et ego sicut vos: Fratres, obsecro vos nihil me læsistis. Scitis autem quia per infirmitatem carnis evangelizavi vobis jam pridem, et tentationem vestram in carne mea non sprevisistis, sed sicut angelum Dei excepistis me, sicut Christum Jesum. Ubi est ergo beatus vultus vestra? Testimonium enim perhibeo vultus,

« quia si fieri posset, oculos vestros eruissetis et
 « dedissetis mihi. Ergo inimicus vobis factus sum,
 « verum dicens vobis? »

Ne labor meus in vobis sit inanis, *estote sicut ego* liberi a servitute elementorum, id est a legis observatione carnali, *quia et ego*, qui legi subditus fui, et legis observantiam novi, sum modo *sicut vos* sine lege. Nam quia ego qui legem habui consilio rationis eam deserui, ex quo Christum cognovi, scire potestis, quia nihil utile christicolis in ea esse consideravi, quam sic ex toto reliqui. Si igitur ego qui hanc habebam, dimisi, tunc vos, qui eam non habetis, assumere non debetis. Vel estote sicut ego in fidei charitate, quia et ego sum sicut vos homo correctus de errore. Nam et nunc potestis exemplo meo a legis observantia retrahi, sicut olim ab idolorum estis cultu revocati. Et debetis esse sicut ego, quia *obsecro vos, o fratres*, ut sitis sicut ego, id est dulcedine fraternæ dilectionis rogo. Ideo vos fraterno amore obsecro, ut non inimicus decipere quæro, sicut falsi apostoli de me vobis asserunt, quia dum essem apud vos, *nihil me læsistis*, sed in magno honore habuistis. Superius aspere correctos nunc demulcet ac revocat blandiendo, obsecrando, et bene gesta eorum memorando. Non me læsistis, sed potius vosipsi *scitis quia per infirmitatem carnis*, id est eo tempore quo infirmabar in carne mea, prædicavi vobis evangelium Christi jampridem; et tamen *non sprevistis*, ut me vilem judicaretis, *tentationem vestram in carne mea* ægrotante. Tanta enim, fuit infirmitas corporis in me, ut vos inde tentari possetis, et putare quod non esset in me virtus aliqua spiritualiter, qui corporaliter sic infirmabar; nec essem apostolus Christi, quem ita doloribus infirmitatis agitari permitteret. Vel hæc infirmitas fuit passio diversarum tribulationum. *Evangelizavi vobis jampridem* per infirmitatem carnis, id est per tolerantiam adversitatum, quibus vehementer affligebatur caro mea; et tentationem vestram in carne mea factam non sprevistis, id est non vilem existimavistis passionem tribulationum mearum, per quam tentabamini, utrum timore me desereretis, an charitate amplecteremini. Et inde vos esse firmos cognovi, quod adversitatibus quæ mihi in carne acciderant, non estis a charitate deflexi. Nam dum me propter annuntiationem Evangelii tam contumeliose tractari ab incredulis videretis, vos quoque similiter ab illis male tractandos fore propter ejusdem Evangelii susceptionem credere poteratis; et ideo consideratione tantæ persecutionis ac pænæ quidam deficiebant a fide, vel metuebant ad eam accedere. Atque ita omnes tentabantur, et alii probati, atque alii reprobi per ignem tribulationis declarabantur. Hanc infirmitatem, quæ in carne mea fuit vestra tentatio, non sprevistis, ut de me sic abstracto et afflicto non curaretis; nec ex toto respuistis, ut omnino converti propter illam renueretis, sed potius ita me excepistis, ac si nihil paterer, ac si essem immortalis et impassibilis. Cum tanta scilicet

reverentia me excepistis, cum quanta Dei angelum venientem de cœlo exciperetis; et ut plus dicam, ita me excepistis, sicut ipsum Christum, si descendisset rursus in terram, et venisset vobis prædicare. Tante enim auctoritatis me habuistis, ac si de sublimibus veniens angelus loqueretur vobis, vel ipse Christus angelorum Dominus. Et quandoquidem in tanto honore me tunc habuistis, nunc autem sine causa spernitis ac respuitis, *ergo ubi est beatitudo vestra?* id est illa affectio et humilis devotio quam erga me habuistis, quæ erat causa futuræ beatitudinis vestræ. Bene revocat illos, vocando illam affectionem beatitudinem, quia si causam amittunt, effectum perdent; si amittunt illam devotam affectionem, perdent sine dubio futuram beatitudinem. Vere, inquit, *sicut angelum, vel sicut Christum Jesum me excepistis*, et inde beatitudinem meruistis, quia si posset juste et cum mea utilitate fieri, illa membra vestra quæ chariora sunt in homine, tulissetis a vobis, et dedissetis mihi. *Testimonium enim vobis perhibeo, quia si ad utilitatem Ecclesiæ fieri posset*, si cum justitia vestra et commoditate mea fieri posset, *oculos vestros eruissetis, et dedissetis mihi*, id est ad utilitatem meæ prædicationis. Consueto more loquitur, sicut solemus dicere: De carne mea vellem pro vestro profectu dare, si possem, et propter nimiam erga se charitatem illorum exaggerandam, dicit talia. Sed cum tanta charitas, et tantus honor illi fuisset exhibitus, nunquid propter ipsum honorem sibi exhibitum, ac dilectionem pepercit illis errantibus, ne forte negaretur ei et minus ipse cum argueret eos, laudaretur vel amaretur? Non utique, quia propter honorem sibi impensum non gauderet, sed propter eorum salutem. Ideoque propter eandem ipsorum salutem non timuit, et vituperari ab illis, vel odio haberi, dummodo quod verum et utile erat, prædicaret. Unde mox subjicit: *Ergo inimicus vobis factus sum, verum dicens vobis?* Quia, inquit, tantum me dilexistis, ergo propter veritatem quam annuntiavi, inimicum vobis me factum putatis? Persuadebant enim illis pseudæ apostoli, quod ipse causa odii noluisset eos docere circumcisionem, sed aliis illam prædicaret, et inde putaverunt eum sibi inimicum. Propter quod increpando nunc dicit: Ergo inimicus vobis factus sum, verum dicens vobis? Ac si dicat: Non debetis aestimare quod sim vobis inimicus, sed magis amicum me debetis agnoscere ex eo quod puram vobis veritatem prædicavi, scilicet ut absque legis observantia, per solius Evangelii custodiam quæretis salvari, vel quia nemo vult se argui, reprehendens eos nunc videtur illis inimicus.

« Æmulantur vos non bene, sed excludere vos
 « volunt, ut illos æmulemini. Bonum autem æmu-
 « lamini in bono semper, et non tantum cum præ-
 « sens sum apud vos, filioli mei, quos iterum partu-
 « rio, donec formetur Christus in vobis. Vellens
 « autem esse apud vos modo, et mutare vocem
 « meam, quoniam confundor in vobis. »

Ego qui veritatem dico, videor inimicus; sed si blanditiis vos fallerem, tunc putarer amicus. Ego autem non sum vobis inimicus, sed illi potius, quos putatis amicos. Nam ipsi *æmulantur vos non bene*, id est non bona voluntate, quia non legitimo sponso vos *æmulantur*. Sancti viri *æmulantur* zelo Dei anima fidelium, ne castitatem mentis quam Christo sponso illibatam servare debent, aliqua perfidie subreptione vel peccati perpetracione violent. Et pseudoapostoli quasi zelo Dei se istos *æmulari* fingebant, quos quasi per transgressionem legis a castitate spirituali recedere iudicabant. Sed non bene id faciebant, quia ex quo sponsus ipse Christus per fidem vos justificari decrevit, non est jam casta anima quæ per carnalia legis opera quærit justificari, quoniam aversa est ab amore sponsi. Et hoc est: Non bene vos *æmulantur*, id est non bene student in vobis castitatem custodire; *sed excludere vos volunt* a sponsi thalamo, id est ab Ecclesia catholica, *ut illos in fornicacione*, id est in hæresi sua foras *æmulemini*, id est quodam mentis fervore studeatis imitari. Ipsi volunt ut illos *æmulemini*, id est imitari, vos autem nolite eos imitari, sed *bonum* quemlibet virum *æmulamini*, id est ferventi amore imitari studete; non ad horam, sed *semper*, et non in illis operibus, quæ vel mala sunt, vel nec bona nec mala, sed *in bono* tantum. Petrus enim bonus erat, et tamen in illa simulatione, qua metu Judæorum a gentilibus qui crediderant segregabatur, non est imitandus, sed tantum in bono quod egit. Vel malum quod in pseudoapostolis est, nolite *æmulari*, sed bonum ubicunque repertum fuerit, *æmulamini*, id est fervida mente imitamini in bono, id est in eo quod ipsum est bonum, non in alia re. Nonnulli enim bonum *æmulantur* non in bono, quia videntes justos pro bono opere laudari ab hominibus, student et ipsum opus agere, ut humanas laudes recipiant. Ideo tantum in bono, non autem in malo bonum est *æmulandum*, id est propterea solummodo quia bonum est, debetis illud imitari, ut ipsum bonum vos delectet, et ex amore sequamini illud. Et hoc *agite non tantum cum præsens sum apud vos corpore*, sed etiam dum absens sum, o *filioli mei, quos nunc iterum parturio, donec formetur Christus in vobis*. In absentia ejus non *æmulati* fuerant bonum, sicut fecerant dum ille cum illis esset; et idcirco monet eos, ut non sint similes servo ad oculum servienti, sed bona facere studeant illo absente, sicut et præsentem. Quos vocat *filiolos*, quia diminuto corde fuerant; et rursus adhuc in obscuro matris utero manebant, nondum prolati in lucem per correctionem. Vocat et suos, quantum ad bonam voluntatem suam, et ad spem quam habet de illorum correptione. Qui materno more ex Deo conceperat illos prius per bonam voluntatem ac dilectionem, parturierat per prædicationem, pepererat per ipsorum conversionem. Sed postea per pseudoapostolos a vita fidei fuerant extincti. Ideo rursus modo concepit illos per bonam

voluntatem, et iterum prædicando laborat, ut eos in lucem pariat. Et tandiu in eorum parturitione dolet et laborat, donec formetur Christus in eis, qui deformatus fuerat in ipsis. Quod gravius est dictum, quam si diceret eos formari in Christo. *Donec, inquit, formetur in vobis Christus*, id est similitudo Christi exprimat in vobis, ut non nisi forma novi hominis appareat in fide, et operibus vestris. Parturire se dicit eos, quod matris est, non patris, ut ostendat maternum laborem et affectum, quem pro eis vel erga eos habet, quoniam sola mater dolores parturitionis sentit, et affectuosius quam pater diligit. Nunc, inquit, absens voco vos *filiolos*, sed *modo vellem esse præsens apud vos, et mutare vocem meam*, id est negare vos filios. *Vellem esse præsens*, ut digna vobis dicerem, quæ nolo scribere ne permaneant. Dum enim absens sum, blande alloquor, ne si vos exasperarem, malevolo animo fieri putaretis; sed vellem nunc esse vobis *præsens*, et vocem lenitatis ac mansuetudinis qua absens utor, mutare in vocem asperitatis et severitatis. Quia non ita commovet epistola vel quælibet Scriptura corda hominum, sicut viva vox præsentialiter loquentis. Motus etiam corporis et habitus ac vultus et modus loquendi, multum commovet audientes. Ideo vos aspere vellem redarguere, *quoniam confundor in vobis*, id est apud alios erubesco pro vobis ita recedentibus a doctrina mea. Vel aliter: Ego nunc absens multa vobis per similitudines loquor, volens vos corrigere, sed vellem esse modo vobis *præsens*, ut alio genere loquendi rem profundius et subtilius aperirem, et non parabolice, sed palam veritatem dissererem. Si enim profundiora nunc eis diceret, non haberent qui exponeret. Sed si ipse *præsens* esset, ubi dubitarent, ipse exponeret. Et *præsens* esse vellet, ut aliter loquens manifestius et profundius rem exponeret. Vellem esse *præsens*, quoniam absens confunditur in eis, id est doctrina absentis patitur confusionem in cordibus eorum confuse intelligentium dicta ejus subtilia. Sed prior sententia est verior et melior. Sequitur:

« Dicit mihi qui sub lege vultis esse, legem non legistis? Scriptum est enim, quoniam Abraham duos filios habuit, unum de ancilla, et unum de libera. Sed qui de ancilla, secundum carnem natus est (*Gen. xvi*); qui autem de libera, per re-promissionem (*Gen. xxi*). Quæ sunt per allegoriam dicta. Hæc enim sunt duo Testamenta. Unum quidem in monte Sina, in servitutem generans, quæ est Agar. Sina enim mons est in Arabia, qui conjunctus est ei, quæ nunc est Jerusalem, et servit cum filiis suis. »

Rursus Apostolus incipit ostendere ex ipsa lege quod non sit tenenda. *Dicite, inquit, hoc est, respondete, mihi vos qui sub lege carnaliter vultis esse, legem non legistis? Quidquid eligant, probantur stulti. Si non legerunt, non debent recipere, quam nesciunt. Si legerunt, ipsa probat se dimittendam. Quod si non intelligunt, stulti sunt. Trans-*

lata in Græcum fuerat lex per Septuaginta interpretes, et idcirco poterat a Galatis legi. Ideo autem quæro an legeritis legem, quia in ea scriptum est, quoniam Abraham duos filios habuit; quod si attenderetis, nunquam ad eam recurreretis, ibi enim innuitur, quia qui sub lege sunt, per gratiam sunt in libertate. Cum enim plures filios ille pater habuerit, de duobus spiritualiter agit Scriptura, innuens aliquid egregium in his præfigurari. Unus ergo pater duos filios habuit, unum de Agar ancilla, et unum de Sara libera. Quamvis enim pater unus esset, non tamen conditio et genitura utriusque fuit similis. Sed ille quidem qui de ancilla est procreatus, secundum carnem, id est secundum carnis naturam vel consuetudinem natus est, quia juvenula, sicut erat Agar, de sene solet concipere. Ille autem qui de libera genitus est, non per carnis usum, sed per Dei reppromissionem natus est. Ob hoc enim ex Sara natus est, quia Deus promisit, imo reppromisit, non quia caro id potuit. Sara enim erat sterilis et vetula, nec de sene marito si nunquam sterilis fuisset, concipere jam anus poterat (Gen. xviii), sed Deus mirabili operatione dedit ex ea filium Abraham per gratiam reppromissionis suæ. Quæ sunt dicta per allegoriam, id est per aliam locutionem, ut aliud exterius sonet, et aliud interius intelligatur. Quia hæc, id est hæ duæ matres sunt, id est significant duo testamenta. Duo tantum exponit, id est ancillam et liberam, ut per hæc intelligamus et cætera. Abraham ergo Deus Pater intelligitur. Duo filii, duo populi, Judæorum scilicet et Christianorum. Ancilla, carnalis doctrina Veteris Testamenti, quæ gignebat sub jugo servitutis, dum timore cogebatur Deo servire. Libera autem, prædicatio sive gratia Novi Testamenti, quæ liberos generat, qui per charitatem Deo servant. In utroque enim Testamento genuit Deus filios qui sibi servirent, sed in Veteri Judæos servos, qui timore pœnæ et promissionibus temporalium ei serviliter obedirent, et hoc est secundum carnem, quæ et pœnas horret, et dulcia amat; in gratia vero Novi Testamenti liberos, qui ex dilectione servant, non vi carnis, sed opere Dei. Quis enim impossibilia secundum naturam crederet, quæ suavija sunt in præsentem contemneret, non visa speraret, nisi Dei virtus hoc in eo operaretur? Duæ matres, ut dictum est, sunt duo Testamenta. Unum quidem veniens a monte Sina, vel datum in monte Sina, id est Vetus Testamentum, in servitutem generans Deo filios, qui essent sub distractione formidinis, et ex timore Deo servirent, quæ res, id est quod servile Testamentum est Agar, id est significatur per Agar. Hic relinquatur nobis intelligendum, quod Sara libera matrem gratiam vel prædicationem evangelicam significaverit. Dehinc redditur causa, cur per Agar significetur illud Vetus, quod deletum est. Sina enim ubi Testamentum illud datum est, mons est in Arabia, quæ est provincia extraneorum gentium, non in terra promissionis, quæ est hæreditas filiorum, ut intelligamus eos qui Testamentum illud

carnaliter observant, nequaquam ad hæreditatem pertinere filiorum, sed extraneos esse a terra viventium, et alienos a patria sanctorum. Qui mons conjunctus est Jerusalem, quia quod in monte illo carnaliter et serviliter jussum est, in Jerusalem ubi templum erat observatum est. Conjunctus et consociatus est ille mons non futuræ Jerusalem, sed ei quæ nunc est, id est non cœlesti, sed terrestri; et non est libera, sed servit cum filiis suis, quæ doctrinam ejus sequuntur, et ex timore cuncta faciunt. Vel quia mons tumorem superbix designat, et Sina interpretatur mandatum, Judæi habuerunt servile testamentum a monte Sina, id est a superbia mandati, quoniam propterea digni fuerunt talem accipere legem, quæ reprimeret eorum cervicositatem, quia de mandato ipsius legis erant supra modum contra cæteras gentes gloriaturi. Quod testamentum generat eos in servitutem legis vel peccati, quia et terrore minarum cogit eos legi carnaliter deservire, et omnes facit prævaricatores, dum non possunt ipsam legem implere. Quæ Testamenti servitus est Agar, id est designatur per Agar ancillam, quæ interpretatur advena vel alienatio, quoniam peregrina est cum filiis suis, et alienat eos ab hæreditate cœlesti. Arabia vero interpretatur humilis, significans infirmam et humo repentem conversationem eorum qui legi serviunt, sicut et mons Sina tumorem designat elationis ipsorum, qua de mandato ejusdem legis extolluntur. Sina enim mons est in Arabia, id est mandatum legis tumor elationis est in humili (hoc est, per humum repentis) conversatione Judæorum, dum se legem Dei hæere gloriantes justos se putant, et cunctos homines velut peccatores despiciunt, licet ipsi nunquam vel intelligendo, vel operando subleventur a terra. Qui mons, id est qui superbus tumor, conjunctus est et semper adhæret ei Jerusalem, quæ nunc est, id est ei parti Judæorum quæ in infidelitate persistens, sola temporalia quærit. Jerusalem namque visio pacis dicitur. Quo nomine plebs illa recte designatur, quæ nunc semper videre pacem temporalem desiderat, ut carnis suæ voluptatibus sine inquietudine vel metu servire valeat. Et ideo nunc esse dicitur, quasi quæ in alio sæculo futura non sit, quia nunc bonis præsentibus quantum potest fruitur, et in amore hujus sæculi habet cor omnino fixum, sed in alia vita bonis omnibus carebit, et suppliciis perpetualiter deficiens velut in nihilum redigetur. Ipsa est nunc sicut disseruimus, et servit adhuc miserabiliter sub jugo legis cum filiis suis, sicut Agar cum Ismaele, quia noluit recipere libertatem quam Christus attulit. Ex quibus omnibus evidenter ostenditur, legem amplius post adventum Christi non esse tenendam, sed servitutem quæ sub ea est, a cunctis hominibus fugiendam.

• Illa autem quæ sursum est Jerusalem, libera est, quæ est mater nostra. Scriptum est enim: Lætare sterilis quæ non parit, erumpe et clama quæ non parturis, quia multi filii desertæ magis

« quam ejus quæ habet virum (*Isa. lrv*). Nos autem fratres secundum Isaac promissionis filii sumus. »

Ita quidem terrestris Jerusalem servit cum filiis suis, quoniam ancilla est, et in servitute generat ut Agar. Sed illa Jerusalem quæ est sursum mente cum Deo, libera est ut Sara, et est mater nostra generans nos in libertatem sicut Isaac. Sursum est enim sanctorum civitas, quamvis hic pariat cives, in quibus peregrinatur, donec regni ejus tempus adveniat. Nam et sancti angeli qui in cælis feliciter habitant, cives ejus sunt. Illa Jerusalem cujus conversatio in cælis est, quæ sursum cor habet, quæ superna appetit, quam Sara figuravit, libera est, id est ex amoris libertate bono animo studet placere Deo, non ex timoris servitute querit pœnam evadere. Libera per spiritum dilectionis, quem accepit a Christo. « Ubi enim Spiritus Domini, ibi libertas (*II Cor. vi*). » Et hæc in libertate sua exemplo Saræ genuit nos, ut non quasi servi, sed sicut filii serviamus Patri nostro, qui est in cælis. Vere est mater nostra, licet fuisset diu sterilis ut Sara. Hinc enim scriptum est in Isaia: *Lætare sterilis (Isa. lrv)*, etc. Isaias namque per spiritum sanctum prænuntians futuram Ecclesiæ fecunditatem, ait: Lætare tu, superna Jerusalem, id est Ecclesia post adventum Christi futura, modo quidem, sterilis ut antea Sara, quæ nunc tempore prophetarum non parit filios in fide, erumpe in vocem prædicationis, ut quæ diu siluisti, vocem cum magno impetu per virtutem sancti Spiritus emittas, et clama, ut a multis audiri valeas, tu quæ modo ante adventum sponsi non parturis, id est non conaris parere, non doles ut parias. Idcirco te moneo hæc agere, quia tui desertæ ac derelictæ erunt filii multi magis quam ejus synagogæ quæ modo virum habet Deum vel legis sermonem. Dum plures filii promittuntur Ecclesiæ, non penitus Synagoga excluditur a partu, sed multitudo gentium illi præfertur. Et ipsa enim in apostolis, ac per apostolos primum populum genuit de Judæis. Sicut autem primo Abraham sibi in conjugium sociaverat Saram, sed propter ejus sterilitatem cognovit ancillam, ut vel ex ea prolem gigneret, et tandem ex Sara per donum gratiæ Dei Filium genuit, ita Deus ab initio mundi Ecclesiam in paucis electis sibi conjunxit; sed quia tunc illa per prædicationem filios non generabat, interim Synagoga velut ancilla ad amplexus ejus introducta, semen prædicationis accepit, unde carnalem populum in servitute legis pareret, donec circa finem sæculi per divinam gratiam Ecclesia multis filiis dotaretur, imo populum Christianum velut Isaac pareret. Unde exponendo subdit Apostolus: *Nos autem fratres secundum Isaac promissionis filii sumus*. Ac si dicat: Judæi quidem secundum formam quæ præcessit in Isaac, sumus filii promissionis. Vel ita: Deus promisit Ecclesiæ filios, sicut Saræ promiserat Isaac; sed nos, o fratres, secundum formam Isaac sumus filii promissionis. Ubi ostendit priorem promissionem de vocatione gentium in Isaac, id est in filio pro-

A missionis. Nam sicut Sara genuit Isaac, quia Deus promiserat, sic Ecclesia gentilem populum in fide peperit, quia Deus hoc per prophetas prædixerat. Quod enim Sara formam Ecclesiæ præferens, sterilis erat, nec spem generandæ prolis habebat, significat quod natura generis humani peccato vitata, ac per hoc jure damnata, nihil veræ felicitatis in posterum merebatur. Sed gratuito Dei munere postmodum fecundata, multitudinem liberorum Ecclesia genuit exemplo Saræ, quæ per gratiam divinæ promissionis genuerat Isaac. Qui scilicet Isaac risus vel gaudium interpretatur, et significat eos, qui in lætitia Deo serviunt, non ex tristitia vel ex necessitate; et gaudent si quid pro justitia protulerunt, vel a doctoribus suis audire digni sunt. Vos estis gloria nostra et gaudium. Itaque ex eis quæ nunc usque hac lectione dicit Apostolus, notandum est quod Agar legem et Synagogam designat, Ismael vero filius ejus populum Judaicum et singulos Judæorum. Et quando Agar legem, tunc Ismael populum significat. Quando vero Agar Synagogam vel plebem figurat, tunc Ismael singulos Judæorum vel omnes insinuat. Apostolus enim quando dixit unum Testamentum esse a monte Sina, in servitute generans velut Agar, evidenter ostendit quod legem Agar significaverit, et Ismael populum. Sequenti quoque versu demonstravit Agar significasse Jerusalem, id est Synagogam, et Ismael filios ejus, id est singulos Judæorum. Similiter Sara novam legem et Ecclesiam designat, Isaac vero populum Christianum et singulos Christianorum. Nam quando Sara novam legem, tunc Isaac novum populum præfigurat. Quando autem Sara Ecclesiam, tunc Isaac filios Ecclesiæ. Ubi enim dixit Apostolus duas matres designare duo Testamenta, et Agar figurare Vetus, ibi necessario ostendit intelligendum, quod Sara novam legem expresserat, et Isaac populum Christianorum. Et in sequentibus dicens sub similitudine Saræ: *Lætare sterilis*, etc. indicat Saram designare Ecclesiam, et Isaac singulos quosque fidelium. Aptè enim qui per repromissionem natus est, designat filios gratiæ, qui non per carnis generationem, sed per spiritualem regenerationem nascuntur ex Ecclesia.

« Sed quomodo tunc is qui secundum carnem natus fuerat, persequeretur eum qui secundum spiritum, ita et nunc. Sed quid dicit Scriptura? Ejibe ancillam et filium ejus (*Gen. xii; Rom. ix*). Non enim hæres erit filius ancillæ cum filio liberæ. »

D Nos, ut dictum est, sumus filii promissionis, id est per gratiam geniti, secundum formam quæ præcessit in Isaac. Sed quomodo tunc Ismael qui secundum carnem natus fuerat, persequeretur eum qui secundum spiritum genitus fuerat, id est Isaac qui secundum spiritalem operationem divinæ gratiæ procreatus erat ex anu sterili, ita et tunc fieri cernimus, dum Judæus quilibet ex ancilla Synagoga secundum carnem natus, Christianum ex libera Ecclesia secundum spiritalem gratiam natum persequitur, vel pœnis corporalibus eum affliciendo, vel (quod nunc

melius ad rem pertinet) carnales observantias sua-
 dendo. Nam qui legem secundum carnem intelli-
 gunt, adversantur his qui secundum spiritum senti-
 unt, et persequuntur eos, vel seducere conantur.
 Nulla autem persecutio Ismael adversus Isaac nota
 refertur, nisi quidam ludus infantiae. Ludebat enim
 Ismael cum puero Isaac (*Gen. xxi*), et ludum illum
 vocat nunc Apostolus persecutionem. Nam et Saræ
 displicuit ludus ille, quia intellexit ibi seductionis
 aliquid inesse. Nam lusio illa, illusio erat. Si illu-
 sio, seductio et deceptio. Omnis enim ludus puero-
 rum, simulacrum est negotii majoris. Et quando
 major ludit cum minimo, ad hoc ludit, ut quodam-
 modo seducat eum, sciens se habere negotia alia
 quæ intendit; et simulat quædam puero, id est in-
 firmo, ludens cum illo. Major erat Ismael, et roboratus
 in malitia. Sed ludens cum puero Isaac seducebat
 eum, et quasdam fraudes ludendi cum infirmo
 faciebat. Animadvertit mater ludum illum persecu-
 tionem esse. Sic et Ecclesia nunc per Apostolum in-
 tellexit ludum, quo Galatis pseudoprædicatores il-
 ludebant et maligna fraude illos seducebant, perse-
 cutionem spiritalem esse. Plus enim persequuntur,
 qui illudendo seducunt. Judaicus ergo populus in
 Ismaele designatus per pseudoapostolos perseque-
 batur in Galatia populum Christianum in Isaac de-
 signatum, quasi superior et dignior fieri volens, ve-
 lut primogenitus ad possidendam cum illo hæredita-
 tem. Sed non ita erit, quid enim dicit Scriptura
 (*ibid.*) de eo? *Ejice de domo tua (ancillam) Synago-
 gam et filium ejus* populum Judaicum, ne particeps
 fiat hæreditatis Christianorum. Et necesse est ut ita
 fiat. Non enim hæres erit filius ancillæ cum filio libe-
 ræ, id est non possidebit hæreditatem regni cælo-
 rum populus Judaicus ex ancilla Synagoga natus,
 cum populo Christiano ex libera Ecclesia nato. Hoc
 ita completum cernimus, videntes ancillam synago-
 gam vel legem carnalem cum filio suo foris eje-
 ctam, et ab hæreditate superna repulsam. Nam
 sicut Agar ancilla cum Ismaele filio suo ante nati-
 vitatem Isaac mansit in domo Abraham, sed post nati-
 vitatem expulsa est, ita lex secundum carnalem ob-
 servantiam, vel Synagoga cum populo Judaico man-
 sit apud eum priusquam populus Christianus cœpisset
 ex baptismo nasci; sed post ejecta est de Ecclesia
 et separata a summi Patris amplexu et familiaritate
 atque hæreditate.

« Itaque, fratres, non sumus ancillæ filii, sed li-
 bera, qua libertate Christus nos liberavit. »

Quando quidem nos sumus filii promissionis secundum
 Isaac, et Judæi filii ancillæ persequuntur nos, suadendo
 carnalem legis observantiam, itaque patet, o fratres,
 quia non sumus ancillæ filii ut serviliter sub-
 jiciamur legi, sed sumus filii liberæ Ecclesie vel gratiæ,
 ut libertate charitatis vivamus. Si enim essemus filii
 ancillæ, Judæi filii ejus pacem erga nos servarent.
 Sed quia nos ex alia matre, id est ex libera genitos
 vident, libertatem nobis invident et auferre moliuntur.
 Ne quis autem putaret

A nos ita liberos esse naturaliter, sicut fuit Isaac, sci-
 licet ut servitus nulla præcessisset, subjungitur
 quia Christus hac libertate nos liberavit, a jugo videlicet
 diaboli, sub quo prius tenebamur servi, id est non per
 liberum arbitrium nostrum, sed per Christum liberatorem
 a servitute peccati venimus ad libertatem innocentie, ac
 sanctitatis et justitiæ, secundum quam appellamur filii.
 Sed in hac lectione possunt adhuc aliqua subtilius
 inspicere. Scriptum est enim quoniam Abraham duos
 filios habuit, etc. Abraham senex (ut supra dictum est)
 Deum patrem designat, quem Daniel Antiquum dierum
 appellat (*Dan. vii*). Qui habuit duos filios, id est duos
 populos: unum terrena diligentem, alterum cælestia
 quærentem: et ideo unum ex ancilla natum, alterum
 ex libera. Nam quicumque etiam nunc in Ecclesia
 terrenam felicitatem quærent a Deo pro bonis quæ faciunt,
 adhuc filii sunt ancillæ, id est servitutis antiquæ.
 In Ismael namque sunt omnes, qui carnaliter Deum
 diligunt, id est pro temporali retributione, ad ipsos enim
 et Vetus Testamentum pertinet, et ipsi sunt adhuc in
 servitute. Qui enim propter bona terrena suscipiunt
 vel servant legem Dei, ipsi sunt hæredes Veteris
 Testamenti. Similiter quicumque vel in Veteri vel in
 Novo Testamento pro sola cælesti remuneratione Deo
 servierunt aut serviunt, per Isaac designantur, et
 hæredes sunt Novi Testamenti. Nam et antiqui justii,
 licet Vetus Testamentum pro temporum distributione
 divinitus datum populo veteri congruenter servaverint,
 tamen pro Dei gratia filii promissionis effecti sunt,
 et Novi Testamenti hæredes in occulto Dei consilio,
 deputati sunt. Etenim illis temporibus fuerunt spiri-
 tales viri, quos non occidebat littera jubens, sed
 vivificabat spiritus juvens; et nunc quoque sunt plu-
 rimi carnales, qui vel hæreses faciunt non intelligendo
 Scripturas, vel in ipsa Catholica fide aut adhuc parvuli
 lacte nutriuntur, aut tanquam palea perseverantes [*al.*
perseverans] futuris ignibus præparantur. Itaque ad
 Vetus Testamentum pertinent, utpote filii ancillæ,
 dilectores temporalium, dilectores hujus sæculi,
 quocumque tempore sint vel fuerint; et ad Novum
 Testamentum, utpote filii liberæ, dilectores æternæ
 vitæ. Omnes ergo qui per fidem veniunt ad agnitionem
 Dei, possunt filii Abraham dici. Sed in his sunt
 aliqui pro bonis temporalibus Deo servientes, et alii
 qui pro charitate Deo adhærentes. Et hi sunt duo filii,
 unus de ancilla, et alter de libera. Sed qui de ancilla,
 secundum carnem natus est, id est secundum carnis
 affectum vel cupiditatem, processit in hanc conversationem,
 ut honeste vivat pro temporalibus præmiis. Qui autem
 de libera genitus est, processit ad spiritalem vitam, et ad
 intentionem supernæ remunerationis, per repromissionem,
 qua Deus Abraham filios ut stellas, id est præclaros et
 cælestes repromisit. « Sina enim mons est in Arabia,
 qui conjunctus est ei, quæ nunc est Jerusalem, et servit
 cum filiis suis. » Ut supra dictum est, Sina interpretatur
 mandatum, Arabia humilis, Jerusalem visio pacis. Et

Arabia significat humilem, id est humo inhærentem, nec ad cœlestia se erigentem, in tentationem eorū qui tantum terrena quærunt pro bonis quæ faciunt; Jerusalem vero pacem ac prosperitatem, quam se in præsentem videre gaudent, ut sine perturbatione vel metu bonis hujus sæculi fruantur. Sina ergo mons est in Arabia, id est mandatum Dei, tumor elationis est in mente per intentionem humi dejecta, quia quisquis infima de his quæ bene videtur agere, quærunt, tumet de observatione divini mandati, et quasi justum se esse gloriatur coram hominibus. Qui tumor arrogantiae conjunctus est ei Jerusalem, id est ei prosperitati quæ nunc est, et servit peccatis et voluptatibus vel cupiditatibus cum filiis suis, quia prosperitatem et divitias solet comitari superbia, maxime apud eos, qui tantum præsentia diligunt. Illa autem quæ sursum est Jerusalem, libera est, etc. Hæc Jerusalem, id est hæc visio pacis, hæc prosperitas sæcularis, hæc civitas carnalium quæ nunc est, quæ nunc ad momentum floret, servit, id est servilia peccati opera, quæ lege prohibentur, facit, et servilibus mundi cupiditatibus acquiescit. Sed illa Jerusalem, id est visio pacis, illa prosperitas, illa sanctorum civitas, quæ sursum est, libera est ab omni servitute peccati, et ab omni cupiditate sæculi, quia nec peccat, nec sæcularia concupiscit. Quæ est mater nostra, si et nos exemplo ejus servire peccato contempnimus, et concupiscentias sæculi respiciamus. Quæ per Saram vetulam designata est, quia et ipsa cœpit ab origine mundi. Sterilis autem dicta est, vel quia secundum carnem non parit, vel quia diu filios in terra non genuit. Sed lætari jubetur pro multitudine futurorum filiorum, quia si gaudium erit coram angelis Dei super uno peccatore pœnitentiam agente (*Luc. xv*), quanto magis super multis ad justitiam conversis? Quæ non parturit, quia dolores non patitur, sed generat spiritaliter sine passione, clamans in lætitia. Quæ et deserta fuit hominibus cœlestem justitiam vita deserentibus, atque terrena lucra sectantibus. Sed tandem fecundata est innumerabili multitudine filiorum. Sed quomodo tunc qui secundum carnem natus fuerat, persequatur eum qui secundum spiritum, ita et nunc illi qui secundum carnem nati sunt, persequuntur eos qui secundum spiritum nati sunt. Secundum carnem quippe nati sunt dilectores mundi, amatores sæculi. Sed secundum spiritum nati sunt amatores regni cœlorum, dilectores Christi, desiderantes vitam æternam, gratis colentes Deum. Spirituales ergo patiuntur persecutionem a carnalibus, quia ludus carnalium, persecutio et afflictio est spiritalium. Ludit namque Ismael, et fratrem suum ludendo quærunt seducere, quando carnales dulcibus verbis illicita suadent, vanitates loquuntur, ad delectationes provocant, risum movent, libidinem excitant, malis colloquiis mores bonos corrumpunt (*I Cor. xv*). Et talibus ludis gravius persequuntur spirituales, quam si gladiis illos appeterent. In omnibus ergo adversatur caro spiritui. Sive enim

A populus carnalium hominum adversatur populo spiritalium, sive etiam in unoquoque nostrum caro concupiscit adversus spiritum, et spiritus adversus carnem, et hæc sibi invicem adversantur, atque lex in membris nostris repugnat legi mentis nostræ, et captivos nos ducit in lege peccati. Si ergo caro, cujus personam gerit Ismael, qui secundum carnem natus est, spiritui blandiatur, qui est Isaac, et illecebrosis cum eo deceptionibus agat, si delectationibus illicitis, voluptatibus molliat, hujuscemodi ludis carnem spiritum, Saram maxime, quæ est virtus, offendit; et hujusmodi blandimenta acerbissimam persecutionem judicat Paulus. Et tu igitur, quisquis hæc audis, non illam describi nunc persecutionem putes, quando furore gentilium ad immolandum idolis cogeris; sed si forte voluptas carnis te illicitis, si tibi libidinis illudat illecebra, hæc, si virtutis es filius, tanquam persecutionem maximam fuge, idcirco enim dicitur: « Fugite fornicationem (*I Cor. vi*). » Sed et si injustitia blandiatur, ut personam potentis accipias, et gratia ejus flexus non recte judicium feras, intelligere debes quia sub specie ludi blandam persecutionem ab injustitia pateris. Verum et per singulas malitiæ species, etiam si molles et delicatæ sint et ludo similes, persecutionum species dicito, quia in his omnibus virtus offenditur. Ita ergo filius ancillæ ludendo persequitur filium liberæ. Sed quid dicit Scriptura? Audi vocem ipsius liberæ: « Ejice ancillam et filium ejus, non enim hæres erit filius ancillæ cum filio liberæ. » C Ejice legis servitutem, qua pro temporali retributione servitur Deo, et populum carnalem, licet nomen Christianitatis habentem, non enim filius vetustæ servitutis erit regni cœlorum hæres cum filio novæ libertatis. Quicumque enim mores veteris hominis adhuc retinet, filius est ancillæ, id est servitutis antiquæ, licet Christianus vocetur, et ideo in fine de Ecclesia justorum ejicietur, ut non sit hæres cum his qui in novitate vitæ ambulant. Rursum ejice hæresim, et populum quem ipsa genuit: non enim hæres erit filius hæresis cum filio Catholice veritatis. Nam et hæresim designat ancilla. Itaque, fratres, non sumus filii ancillæ, ut serviamus peccato, et concupiscentiis sæculi vel erroribus; sed filii liberæ, ut nostram vel Dei voluntatem compleamus in charitatis libertate, exuti mundana cupiditate. Qua scilicet libertate Christus per gratiam suam nos liberavit, ut jam per liberum arbitrium bonæ voluntatis nostræ, possimus gratum Deo servitium reddere.

CAPUT V.

« State, et nolite iterum jugo servitutis contineri. « Ecce ego Paulus dico vobis, quoniam si circumcidamini, Christus vobis nihil proderit (*Act. xv*). « Testificor autem rursus omni homini circumcidenti se, quoniam debitor est universæ legis faciendæ. »

Modo per Christum, sicut dixi, vos estis liberi, et ideo state in libertate quam accepistis, id est non recedatis ab ea, sed permanete semper usque ad

mortem in illa, et nolite iterum contineri a jugo servitutis. Prius enim vos continuit jugum servitutis idolorum, et nunc iterum vultis colla vestra subdere sub jugo servitutis legalium observantiarum. Ex hac admonitione et multis aliis epistolæ hujus sententiis apparet, quia nondum se subjecerant per actionem servitutis legis, sed subicere volebant. Nolite jugo servitutis iterum contineri, nec saltem jugo solius circumcisionis. Nam ecce, id est notum sit vobis, quia ego Paulus, qui notæ sum auctoritatis, qui hoc Evangelium non accepi ab homine, sed a Christo, qui et in me loquitur, dico vobis, veraciter, quia si circumcidamini sicut facere vultis, ut in circumcisione spem salutis ullam habeatis, tam ingens damnum incurretis, quod Christus nihil proderit vobis, quoniam circumcisio jam non solum non prodest, sed etiam obest. Tali intentione posset quis circumcidi, quod non magis obesset vel prodesset sibi illius pelliculæ abscisio, quam unguium vel capillorum reseccatio. Sed istis persuasum erat, quod sine legis operibus salvi esse non possent, ideoque circumcidi volebant, et legis duritiam custodire, quasi per hæc justificandi atque salvandi. Quia ergo in hujusmodi legis operibus, et maxime in circumcisione putabant suam spem salutemque contineri, idcirco tanquam a certa pernicie vetantur. Nam si post Salvatoris adventum gentes illa prophetica legis sacramenta servarent, aut Christus adhuc venturus per ea promitti videretur, aut nunquam in eis fuisse promissus. Quisquis itaque adhuc umbram illam custodit, veritatem quæ Christus est, venisse contradicit, et propterea nihil proderit. Volebant enim, ut dictum est, ideo circumcidi, quia putabant non aliter in Christo se posse salvari. Qui si hoc animo circumciderentur, Christus eis omnino nihil prodesset. « Si enim per legem justitia, ergo Christus gratis mortuus est (supra II). » Nec solum, inquit, hoc dico, quia si circumcisi fueritis, nihil commodi ex Christo percipietis, sed etiam rursus testificor omni homini qui se circumcidit, tam Judæo quam gentili pro adipiscenda justitia, quoniam debitor est faciendæ, id est factis implendæ universæ legis, sicut qui baptismum percepit, debitor est faciendi præcepta Evangelii. Ac si dicat: Non solum hoc damnum ex circumcisione habebitis, quod Christi

fides et baptismus nihil vobis proderit, sed etiam necesse erit vos subire laborem tantæ servitutis, ut assidue cuncta legis præcepta faciatis. Et ideo magis dimittenda est circumcisio.

« Evacuati estis a Christo. Qui in lege justificamini, a gratia excidistis. Nos enim spiritu ex fide spem justitiæ exspectamus. Nam in Christo Jesu neque circumcisio aliquid valet, neque præputium, sed fides quæ per charitatem operatur. »

Circumcisis vobis necesse erit totam servare legem, etiam si nolueritis. Et mox ut illa dura litteræ prædicamenta servare cœperitis, evacuati estis a Christo, quo pleni eratis, ut non maneat amplius in vobis. Eratis enim vasa per fidem Christo plena, et

A Christo in vobis manente, eratis referti innocentia et remissione peccatorum, atque gratia sancti Spiritus et justificatione in bonis operibus et spe futuræ gloriæ; sed nunc Christo recedente evacuati estis omni illo tam divite thesauro, si legis servitutum subieritis. Et qui in lege justificamini, id est justificari putatis, excidistis, id est ex toto cecidistis, a gratia Evangelii, in qua prius stabatis, dum spiritaliter in Christo vivere studeretis. Ad hoc enim venit gratia, ut cessante legis onere, sola justificet. Et ideo qui legis servitutum reducit, libertatem gratiæ perdit. Sic loquitur Apostolus, quasi jam omnia hæc fecerint aut pertulerint, ut magis a faciendo deterreat, cum viderint quanta ex his detrimenta sequantur. Possumus etiam intelligere quosdam eorum jam ad opera legis dilapsos fuisse, et ad eos specialiter nunc Apostolum verba dirigere, cum dicit: Evacuati estis a Christo, qui in lege justificamini, a gratia excidistis. Vos, inquit, justificamini, id est justificari creditis in lege, sed erratis, quia nos soli justificabimur, qui justificari ex fide quærimus. Nos enim spiritu, id est per Spiritum sanctum qui non fallit, quem habemus ex fide, indubitanter exspectamus spem justitiæ, id est speratur ipsa justitia. Quamvis enim justificati simus ex fide, speramus tamen in ipsa justitia de die in diem proficere, et mens nostra esuriens sitiensque justitiam, non nisi in futuro sæculo satlabitur plenarie. Et hanc spem exspectamus spiritu gratiæ, non ex operibus legis. Ex his enim nemo justificabitur. Vel qui in lege carnaliter justificamini, a gratia futuræ beatitudinis in appetitum terrenæ felicitatis excidistis, quia nos soli consequemur gratiam illius retributionis pro justitia, quam ex fide credimus provenire. Nos enim spiritu accepto ex fide exspectamus per patientiam spem justitiæ, id est spem quam sperat justitia, hoc est gratiam felicitatis æternæ. Fides enim præcessit, et ex ea Spiritum sanctum divinitus accepimus, qui facit nos exspectare gratiam superæ remunerationis pro labore nostro. Gratiam recte dico, quia nemo labore temporali juste sufficit æternam requiem promereri. Ex fide autem propterea dixi, quia ipsa fides est quæ valet apud Deum. Nam circumcisio quam vultis facere, nihil ibi prodest. Nam in Christo Jesu, id est in Christi membris, in Christi religione, neque circumcisio neque præputium valet aliquid, sed integra fides. Ne dicerent Galatæ se velle facere circumcisionem, quam fecit Abraham qui legem non habuit, quia, etsi non inde justificarentur, majoris tamen per hanc dignitatis essent in Christiana religione, dicit Apostolus quia in Christo Jesu, id est in Christi corpore, quod est Ecclesia, non valet aliquid circumcisio, id est nihil utilitatis vel dignitatis confert. Et rursus ne inciperent gloriari de præputio, existimantes illud alibi aliquid valere, quia circumcisionem dicit inutilem, subjungit quia nec præputium valet ibi quidquam. Nam sive circumcisis, sive præputiatis sit quisque, non propter hoc aut dignior aut vilior est in Chri-

stiana religione. *Sed sola fides est ibi magnæ dignitatis, et fides quæ per charitatem operatur, id est non mortua, sed viva.* Sicut enim corpus sine spiritu mortuum est, ita et fides sine operibus mortua est, nec fides Veteris Testamenti, serviens ex timore, sed fides evangelica faciens ex charitate opera bona, non exspectans temporalem retributionem, sed videndam perpetuo Creatoris faciem. Hæc est fides electorum, quæ perducit ad salutem. Nam et dæmones credunt et contremiscunt, non tamen diligunt nec bene operantur. Et ideo fides quæ non habet charitatem et bona opera, fides dæmonum est, non Christianorum. Illa ergo sola fides, quæ et charitate flagrat, et bonis operibus insudat, valet in Christo Jesu.

« Currebatis bene. Quis vos fascinavit veritati non obedire? Nemini consenseritis. Persuasio hæc est non ex eo qui vocat vos. Modicum fermentum totam massam corrumpit (1 Cor. v). »

Prædicta fides via est ad speciem divinæ contemplationis. In qua fide vos operando et desiderando currebatis bene ad bravium remunerationis æternæ. Sunt enim nonnulli qui male currunt. Sed vos bene currebatis, dum per opera fidei cum charitate ad cœlestem patriam festinaretis. Nunc autem quis vos fascinavit, id est quis vos livido aspectu læsit, non obedire, id est ne obediretis veritati, quæ ultro se vobis ingerit? Quis, id est cuius peritiæ, et cuius auctoritatis est, qui fascinatione suæ locutionis impedit, ne obediretis veritati quam tradidi vobis, ut scilicet sine legis operibus per observantiam Evangelii curretis ad vitam? Miræ enim sapientiæ et auctoritatis esse debuit, cui vos magis quam mihi credendum fore iudicastis. Sed vos nemini talia vobis suadenti consenseritis, imo viriliter illi resistite, quoniam persuasio hæc non est ex eo, qui vos ad supernam patriam vocat, sed potius ex diabolo qui vos inde revocat. Nemini illorum qui legis opera vobis suadent, consenseritis, quia modicum fermentum totam massam corrumpit, id est pauci errantes totam Ecclesiæ multitudinem plerumque corrumpunt acedine fervoris perversæ doctrinæ suæ. Vel modicum fermentum totam massam corrumpit, id est modica persuasio erroris si ei consentiatur ut in corde recipiatur, acerbam et inutilem reddit totam virtutum omnium multitudinem. Ubicumque enim vel modicum perfidiæ admissum fuerit, ibi protinus omne bonum deperit. Sive de scilicet circumcissione potest hoc intelligi, quoniam de illa multum dubitabant, quam fuisse quondam in parte fidei nostræ videbant. Quamvis, inquit, circumcisio sit modicum, id est modica pars legis, tamen vobis innovatis nullo modo facienda est, quia modicum fermentum, id est modica pars veteris doctrinæ, sicut est in circumcissione, corrumpit totam massam, id est totam plebem novellam et Julcem vertit in amaritudinem, et tumorem antiqum plebis Judaicæ.

« Ego confido in vobis in Domino, quod nihil

aliud sapietis. Qui autem conturbat vos, portabit iudicium, quicumque est ille. »

Modicum prævæ doctrinæ corrumpit totam puritatem veritatis Catholicæ. Sed ego confido, id est confidentiam et certitudinem habeo in vobis, quos corrigendos prævideo in Domino salutem vestram operante, quod nihil aliud quam sinceritas Catholicæ fidei continet, sapietis. Et ita vos quidem bene per Domini misericordiam evadetis. Sed ille portabit iudicium suæ damnationis, qui vos conturbat, id est qui purum fontem vestri intellectus ac limpiditatem vestræ fidei cœno suæ hæresis immisso turbidum reddit, vel rectum ordinem gressus vestri confundit, quo de servitute venistis ad libertatem. Hunc enim ordinem permutare volunt pseudoapostoli, qui de libertate ad servitutum vos reducere conantur, quod est ordo per-versus. Sed quisquis hoc facere nititur, portabit iudicium, id est sustinebit pondus suæ damnationis, quicumque est ille, id est etiam si sit filius Abrahæ, si sit facundus, si sit potens. Eodem spiritu quo præviderat Apostolus correctionem Galatarum, prævidit et pertinaciam atque damnationem pseudoapostolorum, qui eos seduxerant. Qui et subjungit :

« Ego autem fratres, si circumcissionem adhuc prædico, quid adhuc persecutionem patior? Ergo evacuatum est scandalum crucis. »

Intelligendum est quia pseudomagistri cum velent Galatis servitutum legis persuadere, et viderent eos Pauli apostoli auctoritate revocari, dicebant etiam ipsum Paulum id sentire, sed non eis aperire voluisse sententiam suam. Unde opportunissime subiecit: *Ego autem, fratres, etc.* Nam et ab ipsis patiebatur persecutionem, qui talia persuadere moliebantur, cum jam Evangelium suscepisse viderentur. Quos tangit et alio loco, ubi ait: « Periculis in falsis fratribus (1 Cor. xi). » Nam quia Timotheum propter vitandum scandalum Iudæorum, quos ad fidem quærebat adducere, circumciderat (Act. xvi), idcirco dicebant eum circumcissionem apud alios prædicare. Quod ipse nunc removet. Illi, inquit, vos conturbant, suadendo vobis circumcissionem, legisque servitutum, et dicendo me quoque aliis adhuc prædicare circumcissionem. Sed ego, o fratres, si adhuc post fidem ut olim prædico circumcissionem, sicut ipsi dicunt, quid, id est quare, adhuc patior persecutionem ab ipsis et a Judæis? Inde enim patet me non prædicare circumcissionem, quoniam patior a Judæis persecutionem, cum non sit alia causa cur me persequantur, nisi quia circumcissioni non acquiesco. Si enim illam prædicarem, nunquam me persequerentur; et si illam, ut asserunt, prædico, ergo evacuatum est scandalum crucis, id est non irascuntur Judæi de cruce Christi, si assero homines circumcissione justificari. Si illam justificationi vel saluti necessariam prædico, evacuatum, id est vacuum ab utilitate factum est Dominicam

crucis scandalum, quo Judæi scandalizantur et irascuntur contra me, dum sola cruce et passione Christi assero credentes justificari. Sed utrumque fieri non potest, ut ego justitiam vel salutem esse prædicem et ex circumcisione, et ex cruce. Nam si ex circumcisione prædico salutem, destructa est evangelica prædicatio mea, qua annuntio reparationem humanæ salutis ex cruce Domini, unde et Judæi indignantur salutem ex cruce prædicari. Non est ergo causa ut persecutionem patiar, si circumcisionem prædico, quia prædicando illam, prædicationem crucis, quæ persecutionis meæ causa est, destruo. Sicque evacuatum est, id est supervacuum et inutile factum est scandalum crucis, quod Judæos conturbat : hoc est, Christus gratis mortuus est, si adhuc oportet circumcisionem et legem carnaliter observare eos, qui justificari quærunt et salvari.

« Utinam et abscondantur, qui vos conturbant !
 « Vos enim in libertatem vocati estis, fratres, tantum ne libertatem in occasionem detis carnis,
 « sed per charitatem spiritus servite invicem.
 « Omnis enim lex in uno sermone impletur :
 « Diliges proximum tuum sicut teipsum (*Matth.*
 « *xxii* ; *Lev. xix*). Quod si invicem mordetis et comeditis, videte ne ab invicem consumamini. »

Scandalum crucis est evacuatum, si circumcisionem prædico, sicut pseudoapostoli dicunt me tacere. Utinam autem et ipsi qui crucem Christi evacuare volunt nostra salute, evacuentur suo errore. *Utinam et ipsi abscondantur*, id est castrentur, sunt enim spadones qui seipsum absciderunt propter regnum cælorum (*Matth. xix*). Utinam abscondantur non carnaliter, sed spiritaliter, id est vim generandi perdant, ut neminem corrumpere valeant, ut seminare in vobis et in aliis carnalia desistant, nullamque omnino generandi efficaciam habeant ipsi, qui nunc carnalia semina legalium observantiarum diffundendo *conturbant vos*, et generant erroris filios. Bonum illis optat Apostolus, ut scilicet spiritali ferro abscondatur ex eis illud, unde fervent spiritaliter ad corruptionem mentium aliorum. Quod si maledicendo intelligitur hoc dixisse, sciendum quia sancti viri cum maledictionis sententiam proferunt, non ad hanc ex voto ultionis, sed ex justitiæ examine erumpunt. Intus enim subtile Dei judicium aspiciunt, et foras exurgentia quo maledicto ferire debeant, cognoscunt ; et eo maledicto non peccant, quo ab interno judicio non discordant. Hinc est quod Petrus in offerentem sibi pecuniam Simonem sententiam maledictionis protulit, dicens : « Pecunia tua tecum sit in perditione (*Act. viii*). » Qui enim non ait, est, sed sit, non indicativo, sed optativo modo se hæc dixisse signavit. Hinc Elias duobus quinquagenariis ad se venientibus dixit : « Si homo Dei sum, descendat ignis de cælo, et consumat vos (*IV Reg. i*). » Quorum utrorumque sententia, quanta veritatis ratione convaluit, terminus cau-

sa monstravit. Nam et Simon æterna perditione interiiit, et duos quinquagenarios desuper veniens flamma consumpsit. Virtus ergo subsequens testificatur, qua mente sententia maledictionis promittitur. Cum enim et maledicentis innocentia permanet, et tamen eum qui maledicatur, usque ad interitum maledictio absorbet, ex utriusque partis sine colligitur, quia ab imo et intimo iudice in reum sententia jaculatur. Igitur et Paulus eodem modo pseudoapostolos, quos in errore perseveraturos videbat, maledicere potuit, dicens. *Utinam abscondantur qui vos conturbant?* Nam si omnis arbor quæ non facit fructum bonum excidetur, et in ignem mittetur (*Matth. iii*), quanto magis quæ facit fructum malum? Melius est ergo ut pauci qui perituri sunt pereant, ne alios qui salvari possunt, diutius in errore teneant, quam longo tempore viuentes, multos secum in perditionem trahant. Itaque pro multorum salute paucos illos, quos spiritu prophetico perituros prævidebat, optare potuit ab hac vita citius abscondi, ne amplius peccata peccatis superadderent, et graviores sibi perditionem, acquirerent. Hæc quippe maledictio non fuit ex malitia delinquentis, sed ex rectitudine iudicis. Qui enim tam recta maledicens intulit, non perturbationis vitio succubuit, sed Dei iudicio concordavit. Vel sic intelligatur hæc absconditio, sicut Dominus in Evangelio præcepit membra quæ nos scandalizaverint, abscondi et projici a nobis (*Matth. v*), ut quia isti pseudo scandalum generant inter eos, separentur penitus et alienentur ab eis. Et expedit, inquit, ut abscondantur ex vobis, qui vos conturbant, et rectum ordinem itineris vestri confundunt, revocantes vos a libertate in servitutem, quia vos a servitute peccati *vocati estis* divinitus in libertatem fidei, o fratres, qui unum Patrem habere cœpistis Deum, unamque matrem Ecclesiam. In libertatem vocati estis, ut non timore, sed amore bona faciatis. Quisquis enim vera charitate fervet, adeo liber est, ut ei libeat agere quidquid voluerit, quia non vult nisi quod bonum est. Et ita charitas ac bonæ voluntatis affectus ipsa est libertas, ad quam vocati estis. Liberi ergo estis, tantum ne libertate abutamini, faciendo quod vobis carna er placuerit. Tunc enim amitteretis libertatem, si vos ad satisfaciendum carni liberos putaretis, quia qui facit peccatum, servus est peccati (*Joan. viii*). Cum ergo sitis in libertate gratiæ, et non in servitute legis, in libertate bonæ voluntatis, et non in servitute peccati, hoc tantum vobis est observandum, ne spiritalem vestram libertatem detis in occasionem carnis, ne scilicet quia liberi estis et metus legis non incumbit, ideo carnis desideria sequamini, quasi liberam potestatem habentes faciendi quod caro voluerit. Non permittatis ut caro ex libertate accipiat occasionem voluptuose vivendi, sed potius per charitatem spiritus quæ est virtus mentis, servite invicem. Quia vocaverat eos liberos, nolent

jam alicui servire, sed ex libertate propria unus A
adversus alterum præsumeret. Et hoc iterum re-
movet. Ac si dicat: Non debetis libertatem ve-
stram pervertere, sed potius servire invicem per
charitatem Spiritus, id est alter alteri, non timore
servili, sed libertate charitatis. Quod fieri non po-
test, nisi alterius infirmitatem quisque habeat
sicut suam, ut eam æquanimiter ferat, donec ab
ea liberetur ille, cujus curat salutem. Et hanc
liberam servitutem debetis libenter amplecti, quia
omnis lex quam vultis implere, in uno sermone,
id est in uno mandato impletur quo dicitur: *Di-
liges proximum tuum sicut teipsum (Lev. xix)*. In
proximi dilectione potestis omnia legis præcepta,
quæ ad bonos mores pertinent, implere. Merito
enim qui proximum diligit ut se legem dicitur
implere, quia quidquid non vult sibi ab alio fieri,
studet cavere ne faciat alii; et quidquid jure sibi
vult ab alio fieri, quantum potest, ipse facit alii.
Sic enim quidquid lex prohibet, vitatur; et quid-
quid ipsa moraliter jubet, impletur. Nam et Deum
necesse est diligat, qui proximum sicut se diligit;
quia non se diligit, sed odit, qui Deum non dili-
git. Qui enim Deum non diligit, iniquitatem dili-
git; et qui autem diligit iniquitatem, odit ani-
mam suam (*Psal. x*). Itaque in proximi perfe-
cta dilectione complentur omnia quæ jubentur in
lege. Si ergo per charitatem servieritis invicem,
tunc fraterna dilectione complebitis universam
legem. *Quod*, id est sed si vos invicem odiose
mordetis, tunc omnia legis jura violatis. Si vos in-
vicem mordetis, id est in aliquo alter alteri detra-
hitis, et comeditis, id est totum quod in vobis est
devoratis, videte ne ab invicem consumamini, id est
in nihilum redigamini. Occasione charitatis tangit
hoc vitium eorum. Si vos invicem canino dente
mordetis, clam detrahentes alter alteri, et lacerantes
mutuo vitam vestram, ac manifeste verbis conten-
dentes, comeditis vos vicissim, id est devoratis fu-
riose totam ad invicem vestram conversationem
litigando criminantes, et omnia bona vestra vicis-
sim carpendo blasphemantes, vel injurias inferentes,
videte ne dum more canum vivitis, more canum al-
ternis morsibus consumamini, id est ne omnia vir-
tutum bona quæ in vobis erant, devorentur ab invi-
cem. Qui enim virtutibus alterius detrahit, virtutes
propriam minuit vel anittit. Et qui bona alterius
lacerat, ipse sua bona corrodit et annullat. Et qui
injuriam alii facit, justam sibi damnationem acqui-
rit. Qui ergo detractionibus et injuriis, vel crimi-
nationibus invicem se mordent et comedunt, invi-
cem bona sua consumunt et perdunt. Consumuntur
enim ab invicem, quia ille qui accipit injuriam,
consumit eum qui infert, id est causa consumptionis
ejus est; et alius similiter dum et ipse ab eo
patitur injuriam vel criminationem sive detractionem,
consumit eum, id est causa fit consumptionis
virtutum ac honorum ejus.

« Dico autem : Spiritu ambulate, et desideria

carnis non perficietis. Caro enim concupiscit ad-
versus spiritum, spiritus autem adversus carnem.
« Hæc enim sibi invicem adversantur, ut non qua-
cunque vultis, illa faciatis. Quod spiritu ducimini,
« non estis sub lege. »

Superius, inquit, dixeram, ne libertatem detis in
occasione carnis, sed per charitatem serviatu in-
vicem; sed nunc dico, qualiter hæc agatis. Scilicet
ambulate in spiritu, id est de virtute in virtutem
(*Psal. lxxxiii*) promoveamini in bonis operibus
duce Spiritu sancto, quod est per charitatem ser-
vire invicem, et non perficietis desideria carnis, id
est non complebitis actu vel consensu delectationes
quas caro desiderat, quod est, non detis libertatem
vestram in occasionem carnis. Ambulandum, id est
proficiendum spiritu semper est, ut mente et opere
semper ad interiora tendatis, dum estis in via vite
præsentis; et econtra cavendum vobis est, ne desi-
deria carnis quæ militant adversus animam perficia-
tis. Non dico, ne faciatis, id est ne habeatis illa,
quoniam in hoc sæculo non habere illa non pote-
sis, sed ne perficiatis ea, id est ne opera eorum
consensu voluptatis impleatis. Non enim perficiuntur
in malo, quando eis non accedit nostræ volun-
tatis assensus; sed tamen fiunt in eo ipso quod in
nobis sunt, quia non potest esse quin desideremus.
Et debetis omnino reluctari, ne carnis desideria, id
est carnales concupiscentias perficiatis, quia *caro
concupiscit adversus Spiritum vestrum*, vel adversus
C Spiritum Dei, qui in vobis est. Nam in malis homi-
nibus non habet contra quem concupiscere. Ibi enim
concupiscit adversus spiritum, ubi est spiritus. In
malis autem non est Spiritus Dei. Sed et contra spi-
ritum eorum non concupiscit caro, quia non in-
venit eum rebellem carnalibus concupiscentiis suis,
sed secum pariter concupiscentem. In bonis vero,
ubi et Spiritus Dei est, et spiritus humanus repugnat
desideriis carnis, caro concupiscit adversus
spiritum, sed et *spiritus adversus carnem*. Et hoc
est grave et intestinum bellum. Quod nunquam in
vobis esset, si natura humana per liberum arbi-
trium in rectitudine, in qua facta est, persistisset.
Nunc vero quæ pacem felix cum Deo habere noluistis,
secum pugnat infelix. Et cum sit hoc malum mise-
rabile, melius tamen est, quam sine ullo conflictu
vitiis servire. Melius est enim bellum cum spe salu-
tis æternæ, quam sine ulla liberationis cogitatione
captivitas. Caro itaque concupiscit adversus spiri-
tum, sed et spiritus adversus carnem. Caro nihil
nisi per animam concupiscit. Sed concupiscere caro
adversus spiritum dicitur, quando anima carnali
concupiscentia spiritui reluctatur. Causa vero car-
nalis concupiscentiæ non est in anima sola, sed in
anima et carne. Ex utraque enim fit, ex anima sci-
licet, quod sine illa nulla delectatio sentitur; ex car-
ne autem, quod sine illa carnalis delectatio non
sentitur. Caro igitur concupiscens adversus spiri-
tum, carnalis delectatio est, quam de carne et cum
carne spiritus habet, adversus delectationem quam

solus habet. Solus quippe habet (nisi fallor) illam delectationem, non cum carnis voluptate vel carnium rerum cupiditate commistam, de qua dicitur. « Delectare in Domino, et dabit tibi petitiones cordis tui (Psal. xxxvi). » Contrariæ ergo sunt concupiscentiæ carnis concupiscentiis spiritus, concupiscentiæ spiritus concupiscentiis carnis. *Hæc enim duo*, id est caro et spiritus, *adversantur sibi invicem tantum, ut quæcunque vultis*, sive bona sive mala *non faciatis*, id est non permittamini facere illa. Quæ enim vultis, nisi ut omnino nullæ concupiscentiæ malarum et illicitarum sint delectationum? Quis sanctus non hoc velit? Sed non efficit. Non vos permittunt implere quod vultis. Nolite eas permittere implere quod volunt, et ita nec vos, nec illæ faciatis quod vultis. Dum enim pugna hæc in nobis est, non facimus quod volumus. Quid enim facere volumus, cum perfici volumus sine summi boni, nisi ut caro adversus spiritum non concupiscat, nec sit nobis hoc vitium, contra quod spiritus concupiscat? Quod in hac vita quamvis velimus, quoniam facere non valeamus, id saltem in adjutorio Dei facimus, ne carni concupiscenti adversus spiritum succumbentes cedamus, et ad perpetrandum peccatum nostra consensione pertrahamur. Nec carnis ergo concupiscentiæ perficiuntur, quamvis fiant; nec nostra perficiuntur bona opera, quamvis fiant. Sicut enim tunc perficitur carnis concupiscentia, cum consentit et spiritus ad opera mala, ut non concupiscat adversus illam, sed cum illa; sic et bona opera nostra tunc perficientur, quando spiritui caro consenserit, ut adversus eum etiam ipsa non concupiscat. Hoc enim volumus, cum perfectionem justitiæ concupiscimus. Sed hæc nostra voluntas non perficitur, quandiu carnis concupiscentiarum quibus non consentimus, permanent notus. Nec in hac dissensione carnis et spiritus alterutrum putare debemus inimicum, sed vitium quo caro concupiscit adversus spiritum. Quod sanatum nec ipsum erit, et substantia salva erit utraque, et inter utramque nulla pugna erit. Postquam autem dixit Apostolus carnem et spiritum invicem adversari, ut ea quæ volumus facere nequeamus, ne ab ipsa pugna desides nos faciat, et per hanc sententiam laxamentum peccandi dedisse videatur, adjunxit: *Quod si spiritu ducimini, non estis sub lege*. Quasi diceret: Cum caro concupiscit adversus spiritum, et spiritus adversus carnem, his qui ducuntur desideriis carnis, jure dominatur lex, quæ terrendo compescat eos. Sed vos si spiritu ducimini, non estis sub lege. Sub lege enim est, qui timore supplicii quod lex minatur, non amore justitiæ abstinere ab opere peccati, reus in voluntate, qua mallet non esse quod timeret, ut libere faceret quod occulte desiderat. Ergo nondum habet iste Spiritum sanctum quo ducatur. Quisquis enim Spiritu Dei ducitur in operibus suis, non est sub lege, quæ timorem inculcit, sed in charitate, quæ non per legis litteram, sed per eundem spiritum diffunditur in cordibus electorum.

A Hi vero damnabiliter sunt sub lege, quos lex reos facit non implentes legem, dum nescientes gratiæ beneficium ad facienda Dei præcepta, quasi de suis viribus præsumunt, quia Spiritum sanctum non habent, quo rectore ducantur et adjuventur. Ab hoc autem loco demonstrare inchoat Apostolus, quia spiritu (sicut monuerat) sit ambulandum, et non perficienda carnis desideria, hinc carnis inhonestates et inutilitates, hinc spiritus honestates et utilitates proponendo. Nam subjungit:

« Manifesta sunt autem opera carnis, quæ sunt: « Fornicatio, immunditia, impudicitia, luxuria, « idolorum servitus, veneficia, inimicitia, contentiones, æmulationes, iræ, rixæ, dissensiones, « sectæ, invidiæ, homicidia, ebrietates, comessationes, et his similia, quæ prædico vobis sicut prædixi, quoniam qui talia agunt, regnum Dei non consequentur. »

B Ambulandum, inquit, est spiritu, quia sicut dictum est, si a Spiritu sancto ducimini, jam istud commodum inde habetis, quod non estis sub onere vel servitute legis; sed in libertate charitatis; et econtrario cavendum est, ne perficiatis desideria carnis, quoniam ex perfectione eorum præcedunt opera, quæ cunctis apparent mala. Non enim dubia, sed *manifesta sunt opera carnis*, id est prava et detestanda videntur doctis et indoctis, et ideo sunt fugienda, quæ quidem sunt hujusmodi: Fornicatio vulgariter fit cum meretricibus, quæ prostituuntur sub arcuatis, et loca illa vocabantur fornices, unde et fornicatio nomen accepit. Fornicatio prima ponitur inter opera carnis, quia nullum peccatum ita redigit animam ad carnalitatem sicut fornicatio, quoniam misera anima nihil aliud cogitare valet, nisi ea quæ carnis sunt, quandiu turpissimo fornicationis opere est occupata. Immunditia vero est quam mares inter se perpetrant, vel quam solus quis agit. Impudicitia, ea vero est quam cognati inter se exercent, alio nomine dicta incestus, quemadmodum supra admonuimus. Luxuria autem fit cum mulieribus, quæ nec publicæ meretrices sunt, nec legitimæ uxores. Idolorum quoque servitus inter opera carnis numeratur, quia nonnunquam ob amorem mulierum committitur, sicut a Salomone propter alienigenas uxores (*III Reg. xi*), vel a filiis Israel in Sethim, propter filias Madian (*Num. xxxi*). Sed et veneficia, id est inherbationes et venenorum confectiones sæpe fieri solent ob fornicationem et libidinosum amorem. In his omnibus apparet quam magnum et principale vitium sit fornicatio, de qua tot mortiferæ pestes prodeunt. Inimicitia vero sunt, quando aliqui se invicem odio habent, et mollitium vicissim malum quod possunt vel faciunt. Quæ plerumque ex contentionibus oriuntur, quando prius verbis contenditur, et inde ad inimicitias venit. Contentio enim pro lite accipitur. Contentio namque est, ubi non ratione, sed animi pertinacia defenditur, et ubi non veritas quæritur, sed animositas fatigatur. Vel contentio de primatu est, quando al-

ter præferri alteri vult. Quam apte sequitur æmulatio, quæ dicitur esse dolor animi, cum alius pervenit ad honorem, quem duo vel plures appetebant, et cæteri livore torquentur, qui non potuerunt assequi. Ira autem est subita tempestas animi, quæ multa mala sæpe perpetrare solet, dum nec rationem nec justitiam attendit, sed irrationabiliter irruit ad faciendum quod concitatus animus stimulat. Rixa vero est, ubi duo se invicem percutiunt, vel inter se confligunt. Dissensio est, ubi non omnes in una voluntate vel in uno sensu concordant, sed diversa volunt et partes faciunt. Unde et secta, id est hæresis plerumque generatur. Invidia vero, quæ aliena felicitate torquetur, et in duplicem scinditur passionem, cum aut quod ipse est, alium esse non vult; aut alium videns esse meliorem, dolet se non esse consimilem. Homicidium autem est hominis occisio, et recte homicidia subnectuntur invidiis, quia sæpe invidia generat homicidium, sicut diabolus per malignitatem invidiæ primum hominem occidit, et Cain Abel fratrem suum (*Gen. iv*), atque summi sacerdotes Christum. Ebrietas est nimia vini potatio, statum mentis immutans. Hæc namque simul cum corpore animam debilem reddit. In ebrietatis enim ægritudine corpus simul et anima corrumpitur, spiritus pariter cum carne vitatur. Omnia membra fiunt debilia, pedes, manus, lingua resoluta. Oculos tenebræ, mentem velat oblivio, ita ut hominem se nec sciat esse, nec sentiat. Comessiones vero sunt inhonesta et luxuriosa convivia. Hæc omnia dicit Apostolus opera carnis esse. Et fornicationes quidem, imunditiæ, impudicitæ, luxuriæ, ebrietates, ac comessiones ad voluptatem carnis pertinent. Servitus autem idolorum, veneficia, inimicitæ et cætera quæ sequuntur, animi potius quam carnis vita sunt, quandoquidem fieri potest, ut propter idololatriam vel hæresim a voluptatibus carnis temperetur. Et tamen etiam tunc homo quamvis carnis libidines cohibere videatur, secundum carnem vivere hac apostolica auctoritate convincitur; et eo quod abstinet a voluptatibus carnis, damnabilia opera carnis demonstratur. Hæc enim omnia et *his similia* doctor gentium opera carnis appellat, quia eo locutionis modo quo totum significatur a parte, ipsum hominem vult nomine carnis intelligi. Qui enim non secundum spiritum, id est secundum Deum vivit, sed secundum carnem, id est secundum hominem, scilicet secundum seipsum, merito vocatur caro. Hæc, inquit, et his similia sunt opera carnis, quæ nunc per epistolam absens prædico ac prænuntio vobis, sicut et dum præsens essem, prædixi mortifera esse. Prædico et præmonstro nunc vobis, dum licet cavere, dum licet pœnitere, ante iudicium, ante damnationem, quæ sunt factura illa opera, id est ablatiura illa regnum cælorum, quia etiam quodlibet eorum tollet illud regnum, *quoniam qui talia agunt opera, regnum Dei non consequentur*. Non qui adversus talia confligunt, sed qui talia agunt. Alii

enim est prava opera facere; aliud, adversus ea confligere. Et hactenus quidem partim descripta sunt inutilia et execranda carnis opera, post hæc autem exponuntur et utilia ac sacra spiritus opera, cum dicitur:

« Fructus autem spiritus est charitas, gaudium, pax, patientia, longanimitas, bonitas, benignitas, mansuetudo, fides, modestia, continentia, castitas. Adversus hujusmodi non est lex. »

Opera carnis qualia sunt, dictum est. Sed opera sancti Spiritus habitantis in homine, sunt ista quæ subduntur, quæ magis sunt appellanda fructus, quoniam ex bona arbore sicut optimi fructus prodeunt, ut refectionem perpetuæ saturitatis præbeant electis, ideoque propter seipsa sunt appetenda. Fructus enim a fruendo dicitur, et frui proprie non dicimur, nisi rebus illis in quibus finem lætitiæ nostræ ponimus, in æternis scilicet bonis, quæ in Deo possidere quandoque paramus; his ergo fructibus prima est charitas, qua diligitur Dominus et proximus, quia major est omnibus cæteris virtutibus, et ex ejus radice vigent omnes aliæ. Nam ex ista oritur gaudium, id est elatio non superba sed benigna mentis de bono exsultantis. Qui enim diligit Dominum, gaudet in Deo pura conscientia; et qui diligit proximum, gaudet de bono ejus. Pacem quoque servat erga Deum, qui diligit eum, quia in quantum potest cavet eum offendere et studet ei placere. Sed et cum proximo pacem custodit, non inquietans eum, si eum diligit. Non tamen violat pacem, si eum errantem pio studio increpat, vel etiam, si ita oportet, verberat. Quia vero multa sunt in conversatione humana, quæ pacem turbare possunt, necessario subjungitur patientia, per quam injuriæ et adversitates æquo animo sustineantur, ut fraterna pax queat observari. Patientia enim est, mala æquanimitèr tolerare, et contra eum quoque qui mala irrogat, nullo dolore inderi. Et quia non ad horam, sed quandiu voluerit Dominus servanda est hæc patientia, subnectitur et longanimitas, per quam omnia perseveranter usque in finem sustineantur. Longanimitas enim est longitudo animi patienter adversa tolerantis et æterna præmia diu expectantis. Ne quis vero inter eos quos longo tempore patitur, non amare versetur, sequitur bonitas, quæ est dulcedo animi et affectio pia, ut non rancorem animi, sed dulcedinem erga eos qui nos tribulant, habeamus, per quam eis et bona quæ possumus, impendamus. Ne enim sit inanis hæc bonitas, subjungitur alia virtus sibi cognata et consimilis, id est benignitas, quæ et ipsa est bona affectio animi, gratis sua tribuentis et hilariter propter Deum quidquid potest largientis. Et quia sunt nonnulli, qui dum bona proximis impendunt, aspere loquuntur eis et austeritatem ostendunt, congrue subnectitur mansuetudo, in qui benigne tribuit, non intractabilis sit vel asper, sed mansuetus et levis, id est mitis et affabilis et familiaris. Mansuetus enim, quasi manu assuetus dicitur. Fides vero est, qua

veraciter credimus id quod non possumus videre. A Cujus nomen inde appellatur, quod omnino fiat quod dictum est aut promissum. Fides enim vocatur ab eo quod fit illud quod inter utrosque placitum est, id est inter Deum et hominem, quando et homo facit opere quod dixit ore, et Dominus reddit quod promisit. Et ideo fides sine operibus non est vera fides, quia non facit quod dicit. Propter quod et inter duos homines servatur fides quando illud quod dixerunt et statuerunt invicem, custodiunt veraciter et faciunt. Modestia autem est, quando modus stat, id est tenetur et servatur in dictis et in factis. Continentia vero, ubi ab illicitis actibus carnis temperatur; castitas autem, cum jam caro sedata fuerit. Continentia enim in luctamine est, castitas autem in pace. Non enim castitas, sed continentia dicitur, ubi adhuc ei resistit adversitas voluptatis. Consummatio enim veræ castitatis est, quæ non impugnat carnalis concupiscentiæ motum, sed toto horrore detestatur, ac jugem et inviolabilem sui retinet puritatem, nec potest aliud esse quam sanctitas. Hi sunt itaque fructus spiritus, quos contra carnis opera commendare volens Apostolus, a capite, ut præmissum est, cœpit, dicens: *Fructus autem spiritus est charitas*. Ac deinde cætera tanquam ex isto capite exorta et religata contexuit, quæ sunt gaudium, pax, etc. Omnia enim hæc ex fonte charitatis manant. Quis enim bene gaudet, nisi qui bonum diligit unde gaudet? Quis pacem veram habere potest, nisi cum illo quem veraciter diligit? Quis vere patiens, nisi dilectionem habuerit? Quis longanimis in bono perseveranter manendo, nisi ferveat diligendo? Quis est bonus, nisi diligendo efficiatur? Quis est benignus, nisi diligit cui opitulatur? Quis utiliter mansuetus, nisi cujus dilectio moderetur? Quis salubriter fidelis, nisi ea fide quæ per dilectionem operatur? Quis bene modestus, nisi cui dilectio modum ponit in omnibus? Quis ab eo continet unde turbatur, nisi diligit unde honestatur? Quis sanctioniam castitatis assequitur, nisi in cujus mente charitas dominatur? Charitas ergo non potest haberi sine cæteris bonis, et cætera bona sine charitate nequeunt prodesse. Adversus hujusmodi spirituales fructus, quos necesse est sequi gratiæ spiritum, non est lex, quia in nullo contradicit eis, sed favet D in omnibus. Sed adversus præostensa carnis opera lex posita est.

« Qui autem sunt Christi, carnem suam crucifixæ runt cum vitiis et concupiscentiis. »

Ostensa utraque acie, vitiorum scilicet atque virtutum, ostendit qui sunt qui pugnant contra vitia. Non enim omnes vitia reluctantur, sed soli illi tantum, qui sunt ex parte Christi, qui sunt possessio Christi, *qui sunt membra Christi, illi sequentes vestigia passionis ejus, crucifixerunt*, id est cruciaverunt carnem suam, configendo, *cum vitiis et cum concupiscentiis*. Vitia secundum operationem intelligamus, concupiscentias secundum consensum. Quia servi Christi laborant, ut neque opera vitiorum fa-

PATROL. CLXXXI.

ciant, neque concupiscentiis carnalibus vel in corde consentiant. Et reprimendo carnis voluptates, crucem sibi ipsis faciunt, ac præceptis justitiæ quasi quibusdam clavis se configunt, ut pravam actionem, et perversam voluntatem in seipsis refrenent. Potest et de his qui intentione remunerationis superbiæ carnem jejuniis affligunt, hæc sententia specialiter intelligi. Cum vitiis quippe et cum concupiscentiis carnem crucifigimus, si sic gulam restringimus, ut jam de mundi gloria nihil quæramus. Nam qui corpus macerat, sed nonoribus anhelat, crucem carni intulit, sed mundo per concupiscentiam pejus vivit.

« Si spiritu vivimus, spiritu et ambulemus. Non efficiamur inanis gloriæ cupidi, invicem provocantes, invicem invidentes. »

B Quia communiter dixerat eos qui sunt Christi, crucifixisse carnem suam cum vitiis et cum concupiscentiis, retorquet sermonem ad eos quibus scribebat, et se eis connumerat, quasi dicens: Non dico vobis quod ipse non velim. Qui sunt Christi, *ut agunt ut dixi*; et nos, quia Christi sumus, spiritu ambulemus, quia spiritu ad hanc vitam venimus. Quicumque enim vitiis carne mortificati sumus, jam virtutibus spiritu vivimus. Si *spiritu vivimus*, id est si per Spiritum Dei spiritaliter vivimus, *spiritu etiam duce ambulemus*, id est non remaneamus pigri in eo ad quod pervenimus, sed semper ad meliora promoveamur, quia nemo tam sanctus est in hac vita, qui non possit adhuc quotidie proficere. Quia vero nonnulli postquam in virtutibus excreverint, incipiunt velle laudari velut sanctiores, apte subjungitur: *Non efficiamur inanis gloriæ cupidi*, id est si spiritaliter vivimus et spiritaliter de virtute in virtutem proficiendo ambulamus, non inde vanam gloriam transitoria laudis cupiamus, ne simus fatuis virginibus similes, quæ foris lucentes ostenderunt lampadas, et intus oleum in vasis suis recondere neglexerunt; ideoque veniente sponso, lampades eorum defecerunt (*Matth. xxv*). Ob hoc etiam caveamus cupiditatem inanis gloriæ, quia inde efficeremur *invicem alii alios provocantes* ad contentionem et iram vel ad deteriora, et *invicem alii aliis invidentes* meliora. Sicque per appetitum vanæ gloriæ fieret in nobis tanta subversio, ut qui putabamur cæteris meliores, nunc efficeremur aliis peiores.

CAPUT VI.

« Fratres, etsi præoccupatus fuerit homo in aliquo delicto, vos qui spirituales estis, instruite e hujusmodi in spiritu lenitatis, considerans te ipsum, ne et tu tenteris. »

Hactenus toti Ecclesiæ locutus est Apostolus, improbando legem et commendando gratiam, et prælatos nunc alloquitur. Spiritaliter quidem, ut docui, vivendum est omnibus. Et tamen, *o fratres mei*, qui cæterorum curam sumpsistis, etiam si aliquis homo, id est infirmus ac fragilis ex ipsa humana fragilitate *præoccupatus fuerit*, id est subito lapsus in aliquo delicto, tractandus est humane. Delictum

est desertio boni. Quid enim sonat aliud delictum nisi derelictum? Et qui delinquit, quid derelinquit nisi bonum? Græci etiam duo nomina huic pesti imposuerunt. Nam delictum apud eos et *πλημείδεια* dicitur, et *παράπτωμα*. Et *πλημείδεια* simile nomen est negligentiae, quoniam Græce negligentia *ἀμέλεια* dicitur, quia curæ non est quod negligitur. Hoc autem loco, *παράπτωμα* est in Græco. In paraplomate vero, tanquam decidere intelligitur qui delinquit. Unde cadaver quod Latini a cadendo dixerunt, Græce *πτῶμα* dicitur. Qui ergo peccando malum facit, prius delinquendo a bono cadit. Delictum quippe est, declinare a bono; peccatum vero est, facere malum. Potest etiam illud esse delictum, quod ab ignorante fit; illud autem peccatum, quod a sciente. Indifferenter tamen plerumque dicuntur. Præoccupatio autem est, in qua delinquitur, dum quid faciendum sit aut ad horam non videtur, aut et quia viderit, vincitur, ut scilicet fiat peccatum, cum vel latet veritas, vel compellit infirmitas. Et cum non malitia, sed sola infirmitate vel ignorantia delinquitur, pro peccato necesse est, ut magno modamine ipsa delicti correctio temperetur. Hoc est itaque quod nunc præcipitur: *Si præoccupatus fuerit homo in aliquo delicto, vos præpositi qui spirituales estis*, id est spiritualiter vivitis, non despiciatis, sed neque exasperetis hujusmodi hominem non per singula vitia quotidiano usu defluentem, aut sponte mala facientem, sed subito per imprudentiam vel infirmitatem in aliquo lapsum. Non exasperetis eum, sed *instruite hujuscemodi* rationabiliter ad penitentiam ut fratrem, *in spiritu* non nimii fervoris, sed lenitatis et mansuetudinis. Corripe, inquam, eum dulciter, mone ut surgat, tu qui ei prælatus es, *considerans teipsum*, id est propriam fragilitatem tuam, *ne forte et ipse tu ex ea tenteris*. Videlicet cum displicet ex aliena infirmitate quod conspicias, pensa quod es, ut increpationis zelo se spiritus temperet, dum sibi quoque quod increpat, timet. Cuncti quippe quousque in hac mortali carne subsistimus, corruptionis nostræ infirmitatibus subjacemus. Ex se ergo debet quisque colligere, qualiter alienæ imbecillitati oporteat misereri, ne contra infirmitatem proximi, si ad increpationis vocem ferventius rapitur, oblitus sui esse videatur. Post hæc ad generalem instructionem redit Apostolus, dicens:

« Alter alterius onera portate, et sic adimplebitis legem Christi. Nam, si quis existimat se aliquid esse, cum nihil sit, ipse se seducit. Opus autem suum probet unusquisque, et sic in semetipso tantum gloriam habebit, et non in altero. Unusquisque enim onus suum portabit (I Cor. iii).

Vos prælati, sicut dictum est, instruite leniter subditum, si deliquerit. Et vos subditi *portate alter onera alterius*. Verbi gratia: iram fratris tunc portabis, cum adversus eum iratum non irasceris, ut rursus eo tempore quo te ira præoccupaverit, ille te lenitate et tranquillitate supportet. Ita diversis temporibus eadem

infirmitas potest invicem ab utroque portari. Diversum autem infirmitatis genus uno simul tempore portari potest ab ambobus, veluti si quis in se loquacitatem vicerit, et pertinaciam nondum vicerit; alius vero adhuc loquax, sed jam pertinax non sit: debet ille hujus loquacitatem, et iste illius pertinaciam, donec illud in illo et hoc in isto sanetur, charitate portare. Similiter de cæteris infirmitatibus agendum. Et hoc est quod dicitur: *Alter alterius onera portate*, id est invicem infirmitatum vestrarum pondera sufferite, et sic adimplebitis legem Christi, id est charitatem, de qua ipse dixit: « Hæc mando vobis ut diligatis invicem (Joan. xv). Hujus enim dilectionis officium est, invicem onera vestra portare. Et justum est, ut alter compatiatur alteri, et propter onus infirmitatis ejus. Nam, si quis se supra cæteros extulerit, despiciens illos propter varias morum infirmitates, neque dignans onera illorum compatiendo portare, sed se quasi solum justum apud se magis istans, ipse sibi est inimicus. Si quis in corde suo existimat se aliquid magnum esse comparatione alterius peccantis, cum tamen sit nihil ex se, ipse seducit a veritate se ipsum, dum illud credit quod non potest esse. Qui enim sanctitatem sibi arrogat, nihil dicitur, quoniam comparatione spiritualis hominis, qui scit gratia Dei esse se quod est, quisquis vana præsumit, nihil est. Electus enim quisque non attendit laudem quæ jam percepit, sed quæ necdum percipere valuit; ideoque magis humiliatur considerans inopiam suam, sicque cætera bona meretur accipere. Reprobis vero non attendit ea quæ non habet ut humilietur, sed ea quæ habet considerans, extollitur. Et se alicujus momenti esse judicans, nihil fit, amittendo quæ bona perceperat, quoniam conscientia sua quæ suggerit cogitationem superbiam, ut magnum aliquid in virtutibus se esse putet, seducit eum, id est seorsum a via humilitatis ducit, et a charitate proximi quem jacentem despicit. Nihil esse dicitur talis homo, quia omnis creatura, quæ non adhæret ei qui semper habet esse, nihil est. Vel qui laudantibus aliis erudens, æstimat hoc esse verum quod ab illis de illo dicitur, cum falsum sit, et ideo se magnum ac sanctum putat, non adulatorem seducunt eum, sed ipse se ipsum, dum plus aliis credit quam suæ conscientiam. Non debet quis inaniter de se magna sentire, nec adulatoribus credere; sed potius probet et examinet unusquisque opus suum, non peccatum alterius, ut pharisæus qui non re, sed fallaciter justus erat (Luc. xviii). Et, cum sic opus suum probaverit esse veraciter bonum, tunc *gloriam habebit in semetipso tantum*, id est in conscientia sua et non in altero, id est in ore alterius. Gloriam intus habere, et non ex aliena laude pendere, hoc est oleum in vase clo servare cum virginibus illis prudentibus (Matth. xxv). Sed quam gloriam habet intra se justus, nisi eum cui dicitur: « Gloria mea et exaltans caput meum? » (Psal. iii.) Ut, quod sæpe dicendum est: « Qui gloriatur, in Domino gloriatur (I Cor. i; II Cor. x; Jer. ix), » non æstimet quisquam se tantum aliquid

esse in comparatione cadentis, sed opus suum probet, et circumspiciat ac diligenter inspiciat unusquisque non lapsum alterius; et sic, id est probando suum opus non alterius, habebit gloriam in seipso, id est in sua actione bona, et non in altero, id est in casu alterius. Hoc est, non extra se quaeret gloriam, ut aliis jacentibus se praeferat; sed remanens in consideratione suimet solius, cum se bene agere probaverit, gloriabitur puro corde in Deo, a quo ut bonum operaretur, accepit. Ideo enim debet nunc unusquisque proprium opus examinare, et non alterius, quia unusquisque in iudicio Dei *onus suum portabit*, id est gravabitur propria sarcina peccatorum suorum. Non est sibi contrarius Apostolus qui supra iussit ut invicem onera nostra portemus, et nunc dicit quia unusquisque opus suum portabit. Alia enim sunt onera participandae infirmitatis, alia reddendae rationis Deo de actibus nostris. Illa cum fratribus sustentanda communicantur, haec propria ab unoquoque portatur. Non enim cum alio portat haec alter, nec projicit in alterum; sed solus cogitur unusquisque sustinere proprium, ut juxta quod magis aut minus peccavit, gravetur in iudicio.

Communicet autem is qui catechizatur verbo, ei qui se catechizat, in omnibus bonis. Nolite errare. Deus non irridetur. Quae enim seminaverit homo, haec et metet. Quoniam qui seminat in carne sua, de carne et metet corruptionem. Qui autem seminat in spiritu, et de spiritu metet vitam aeternam.

Ea quae dixi, invicem vel apud se unusquisque custodite; sed erga doctores vestros, ut nunc moneo, largi estote. Scilicet *is qui catechizatur*, id est instruitur verbo sacrae doctrinae ab aliquo, *communicet in omnibus bonis* suis corporalibus *ei qui se instruit*, id est omnia terrena bona quae habet, faciat sibi et doctori suo esse communia, ministrans ei ex bonis propriis cibum et indumentum et quaeque necessaria sicut cibi. Et in hoc *nolite errare* excusando vos avari, et dicendo: parum vel nihil dare possum magistro meo; quia Deus, qui videt quid aut quantum dare possitis, *non irridetur*, ut aliquis injustus vel fallax ridendo transeat iudicium ejus, sed unusquisque recipit ab eo quod meruit. Nam ea quae nunc *seminaverit homo*, id est opera quae sibi velut semen reposuerit, vel bona, vel mala, sive multa, sive pauca sint, haec eadem, id est fructum eorum metet in Dei iudicio. Opera enim vitae praesentis, semen sunt futurae messis. Vel ita: Is qui instruitur verbo doctoris, communicet ei qui se instruit, id est communicatorem et participem ejus se faciat in omnibus bonis, recipiendo doctrinam ejus, et imitando virtutes ac bonos mores ejus. Communicat enim discipulus magistro in omnibus bonis ejus, quando omnium, quae ille bene agit et loquitur, particeps et imitator efficitur. Et in hac communione nolite errare, faciendo eam simulatorie, sed puritatem cordis in hac exhibete; quia Deus non irridetur, id est non fallitur sicut homo, ut ignorare possit aliquid, sed videt

intima cordis. Vel etiam sic: Is qui instruitur, et si in solo verbo, non exemplo praedicatoris, communicet ei non in malis, si ea facit, sed in omnibus bonis quae ille dicit, id est participem se exhibeat, recipiendo verbum ejus et in omnibus implendo. Et nolite errare imitando pravos mores ejus, si ipse male vivit et bene loquitur, quia Deus non irridetur, id est Dei iudicium nullus potest irridere, seu magister, seu discipulus, sed ibi recipit unusquisque prout gessit. Quae enim seminaverit, id est operatus fuerit homo, haec et metet, id est horum mercedem recipiet iudicante Deo. Et vere quae seminaverit metet, sive bona sive mala: *Quoniam ille qui modo seminat in carne sua*, id est opera carnis agit in carne, *de carne metet etiam corruptionem*, ut tormentis incessanter corrumpatur, id est conteratur, et jugem habeat in se fetorem. Sed econtrario ille qui *seminat in spiritu*, id est spiritalia operatur in spiritu sancto, de ipso *spiritu metet*, id est quasi messem capiet in futuro *vitam aeternam*, quae est contraria praedictae corruptioni. Potest forsitan et hominis spiritus intelligi, in quo seminat, et ex quo vita metetur, juxta illud Salomonis: «Omni custodia serva cor tuum, quia ex ipso vita procedit (Prov. iv).» Nam quod Salomon ait ex corde vitam procedere, hoc videtur esse, quod ait Apostolus ex spiritu vitam fore metendam. Qualis enim radix est cordis, talis in conspectu interni arbitrii est omnis fructus actionis. Sed quisquis in futuro saeculo messem vitae sine fine cupit colligere, debet in isto semper quantumdiu vivit opera bona seminare. Unde subjungitur: «Bonum autem facientes, non deficiamus, tempore enim suo metemus, non deficientes (1 Thes. ii). Ergo, dum tempus habemus, operemur bonum ad omnes, maxime autem ad domesticos fidei.» Quae seminaverit homo, haec et metet. Ideo nos malum nullum debemus seminare, id est facere, sed bonum. Et *bonum facientes*, id est bonum emanantes, nunquam cessemus quantumdiu tempus est satisfactionis, ne deficiamus aliquo labore fatigati, quia et erit tempus messonis ac quietis. *Tempore enim suo*, id est huic rei praedicto metemus, id est mercedem operum nostrorum colligemus, *non deficientes*, id est incessanter et sine fine, quia, sicut non deficiamus seminando, sic non deficiemus metendo. Et quia tunc non deficiemus metendo fructum boni operis, id est seminis nostri, ergo, *dum tempus seminandi et operandi habemus*, quod ignoramus quantumdiu habituri sumus, operemur nunc assidue bonum, sicut eleemosynas et caetera beneficia, *ad omnes* quoscunque poterimus, sed *maxime ad domesticos fidei*, id est ad justos, quia «justus ex fide vivit (Habac. ii; Rom. i).» Domesticus enim fidei est, qui eadem tibi religione conjungitur, quem a consortio fraternitatis peccata non separant. Domesticus quippe quasi in domo stans dicitur. Domesticus ergo et sanctis praecipue debemus impendere beneficia. Non tamen aliis hominibus etiam peccatoribus misericordiae claudenda sunt viscera, nec si etiam adversus nos hostilem

animum gerant, ipso Domino monente. « Diligite A inimicos vestros, benefacite his qui vos oderunt (Matth. v; Luc. vi). »

« Videte qualibus litteris scripsi vobis mea « manu. »

Hactenus per epistolam vos revocavi et instruxi. Quam ut sciatis a me missam, *videte qualibus eam litteris*, id est quam bene formatis scripsi vobis non notarii manu sed mea. Ne suspicarentur hanc epistolam non ab Apostolo, sed ab alio aliquo fallaciter sub ejus nomine sibi missam, et dubitarent obedire monitis ejus, ideo nunc certum dat illis signum cognoscendi eam. Ac si dicat : epistolam istam scripsi ego propria manu. Et hoc recognoscite per formas et qualitates ipsarum litterarum, per quas manum meam poteritis recognoscere. Multum etiam per hoc B invitat eos ad audiendum se, quod tantam sibi curam de illis indicat fuisse, ut propria manu scriberet illis. Vel dum dicit, videte qualibus litteris scripsi vobis, monet eos ut considerent et intelligant quam profunda sacramenta, et quam rationabilia vel utilia monita contineantur in litteris hujus epistolæ. Litterarum enim nomine frequenter epistola solet appellari : *Videte*, inquit, *qualibus litteris*, id est quali epistola, quam spiritali, quam vera, quam rationabili, *scripsi vobis* correptionem manu propria.

« Quicunque enim volunt placere in carne, hi « cogunt vos circumcidi, tantum, ut crucis Christi « persecutionem non patiantur. Neque enim qui « circumciduntur, legem custodiunt; sed volunt C « vos circumcidi, ut in carne vestra glorientur. »

Opus fuit ut scriberem vobis, quia pseudoprædicatores instant ut circumcidamini. *Quicunque enim talium magistrorum volunt Judæis infidelibus placere in carne*, id est in carnali observatione, *hi cogunt* improbitate, non ducunt ratione *vos circumcidi*, non ut legem impleatis, sed tantummodo ut ipsi non patiantur persecutionem crucis Christi, id est quæ nobis infertur propter prædicationem crucis Christi. Præceptum fuerat a Romanis principibus, ut Judæis sine perturbatione vel impedimento liceret observare suos ritus et legem, ubicunque essent, et si quis gentilium vellet illis consentire, circumcisionem, et legem, atque ritus ipsorum posset assumere, et cum D illis viveret in securitate. Sed Christianos Judæi apud principes gentium accusabant, quia legem ac circumcisionem et carnales observantias illorum destruere videbant. Et quia neque gentilem ritum, neque Judaicam legem tenebant, occasionem accusandi illos sumebant. Quod huic Apostolo invidia concitati fere in singulis civitatibus gentilium faciebant. Sed pseudoapostoli ut absque persecutione Christum et crucem prædicarent, circumcisionem quoque et legis observantiam pariter docebant. Christum enim prædicabant, ut quæstum a fidelibus haberent; legem autem, ut Judæis placerent. Et hoc est quod dicitur, quia quicunque volunt placere in carne, hi prædicando carnaliter legem, cogunt vos

circumcidi, propter hoc tantum, ut non patiantur persecutionem pro cruce Christi. Et vere tantum idcirco ut non patiantur adversa, circumcidi vos cogunt, non enim pro lege implenda id faciunt. *Neque enim illi qui circumciduntur, custodiunt legem, sed magis prævaricantur, quia nec carnaliter, a circumcisis, sed spiritaliter a baptizatis potest custodiri.* Non ut vos legem custodiatis, *volunt vos circumcidi, sed potius ut in carne vestra, id est in dolore carnis vestræ circumcisæ gloriantur apud Judæos, quatenus placeant eis, ne forte accusent eos apud gentium principes de nova prædicatione, et aliquid adversitatis pati faciant.*

« Mihi autem absit gloriari, nisi in cruce Domini « nostri Jesu Christi, per quem mihi mundus crucifixus est, et ego mundo. »

Illi gloriantur in circumcisa carne, et timent crucem prædicare; sed *mihi absit gloriari* in potentia Christi, vel in majestate seu potestate, sed in cruce, de qua sapientes mundi erubescunt, et in qua erat omne opprobrium quod Christiani patiebantur, ac persecutio quam sustinebant ! Et ideo in cruce gloriabatur, de qua illi ab impiis insultabantur, quia sciebat in morte Christi vitam nostram consistere, in ejus humilitate nostram sublimationem, in ejus infirmitate nostram fortitudinem. Nam in fronte credentium ubi sedes est verecundiæ, idcirco crux figitur, ut de nomine ejus non erubescant. Signum Veteris Testamenti, circumcisio est in latenti carne. Signum Novi Testamenti, crux est in libera fronte. Ibi enim est occultatio, hic revelatio. Illud est sub velamine, hoc in facie. Cum quis inde transierit ad Christum, auferetur ei velamen, ut qui habebat in occulto circumcisionem, in fronte portet crucem. Et pseudo quidem apostoli tanquam in tenebris et in umbra remanentes gloriabantur in circumcisione, id est in veteri et operto signo. Paulus autem egressus ad lucem, transtulerat signum ad frontem, et gloriabatur in cruce, id est in signo novitatis, utpote innovatus. Non gloriatur, inquit, *nisi in sola cruce Domini nostri Jesu Christi, per quem mihi mundus est crucifixus*, ut nec minis nec blandimentis, possit in me manus extendere, id est animam meam attingere, ut me revocet a fidei puritate; *et ego quoque per Christum mundo sum crucifixus, id est mortificatus, ut nullatenus eum possim appetere.* Si enim mihi mundus crucifixus est, scio quia mortuus est. Non diligo eum, scio quia præterit. Non concupisco eum, scio quia corruptela consumetur. Eunque quasi fetidum vito, quasi lutum caveo, quasi nociturum relinquo. Ego quoque velut mortuus et fetens ab eo contemnor. *Mihi mundus crucifixus est, ut me non teneat; et ego mundo, ut eum non teneam, quia nec mundus in me suum aliquid cognoscit, nec ego in mundo aliquid cupio.* Plerumque enim contingit, ut jam homo mundum mente non teneat, sed tamen mundus eum occupationibus astringat. Et ipse quidem mundo jam mortuus est,

sed ipsi mundus adhuc mortuus non est. Quasi enim vivus adhuc mundus eum conspiciat, dum aliis intentum, suis actibus alio rapere contendit. Sed Apostolus cum et ipse sæculum perfecte despiceret, et talem se factum videret, qui jam ab hoc sæculo concupisci omnino non posset, ruptis hujus vitæ vinculis, liber dicebat : *Mihi mundus crucifixus est, et ego mundo.* Mundus quippe ei crucifixus erat, quia hunc corde suo jam mortuum non amabat. Sed et se ipsum mundo crucifixerat, quia talem se exhibere studuerat, ut ab eo quasi mortuus concupisci non posset. Quia ergo nec mundi gloriam quærebat, nec a mundi gloria ipse quærebatur, et se mundo et mundum sibi crucifixum esse gloriatur. Nos quoque, in quantum Dei sapientiam, per quam facta sunt omnia, spiritualiter intelligimus, in tantum carnalibus affectibus morimur, ut mortuum nobis hunc mundum deputantes, nos ipsi huic mundo moriamur et dicamus : *Mihi mundus crucifixus est, et ego mundo.* Nemo enim faciem, id est manifestationem ipsius divinæ sapientiæ potest videre et vivere (*Exod. xxxiii*). Ipsa enim species quæ rapit omnem animam rationalem desiderio sui, tanto ardentior, quanto mundior; et tanto mundior, quanto ad spiritalia resurgentem; tanto autem ad spiritalia resurgentem, quanto a carnalibus morientem.

« In Christo enim Jesu neque circumcisio aliquid valet, neque præputium, sed nova creatura. »

Idcirco gloriatur in cruce tantum, et non in circumcisio, quia in *Christo Jesu*, id est in Christiana religione, neque circumcisio aliquid valet, neque præputium prodest quidquam, sed nova creatura, id est innovatio morum. Non enim magni est meriti, si quid foris erga nos agatur; sed magno opere pensandum est quid agatur in mente. Nam præsentem mundum despiciere, transitoria non amare, mentem medullitus in humilitate Deo et proximo sternere, contra illatas contumelias patientiam servare, et custodita patientia dolorem malitiæ a corde repellere, egenis propria tribuere, aliena non ambire, amicum in Deo diligere, propter Deum et eos, qui inimici sunt amare, de afflictione proximi lugere, de morte inimici non exultare, hæc nova est creatura.

« Et quicumque hanc regulam secuti fuerint, pax super illos et misericordia, et super Israel Dei. »

Ego vos docui quid agendum sit. *Et quicumque ex vobis gentilibus hanc regulam, id est reclusionem doctrinæ meæ et gloriandi in cruce, secuti fue-*

rint, ut secundum ea quæ in hac epistola docui, dirigant suam fidem et opera, pax, id est reconciliatio ad Deum, sit *super illos et misericordia*, id est propitiatio peccati quod egerunt recedentes a fide, et *super Israel Dei*, id est super illos Judæos, qui per fidem et opera sunt possessio Dei.

« De cætero nemo mihi molestus sit, ego enim stigmata Domini Jesu in corpore meo porto. Gratia Domini nostri Jesu Christi cum spiritu vestro, fratres. Amen. »

His rationibus et argumentis ostendi vobis, non esse justificationem vel salutem in vetustate legis. Et de cætero disputationum genere, quo adhuc possem probare, nemo vestrum sit molestus mihi, ut amplius me fatigare velit, quærens ut aliis profundioribus rationibus hoc idem sibi adhuc probem, cum jam sufficienter probatum sit et ostensum. Vel de cætero vitæ spatio nemo vestrum sit mihi molestus, sed amodo fidem et opera sic servate, ut non mihi molestiam ultra faciatis, quoniam satis gravorum alii molestiis; ego enim porto in corpore meo stigmata Domini Jesu, id est ego, quasi servus ex fuga retractus, et per serviles notas cauteriatus, in toto corpore meo cicatrices vulnerum, quæ pro Christo passus sum, porto, et variis injuriis affligor. Stigmata enim proprie vocantur serviles notæ, quibus inurebantur servi, vel fugæ, vel alterius culpæ convicti. Vel ita : Nemo vestrum sit mihi molestus ut aliquid amplius quærat, quia verbis meis indubitanter credendum est. Ego enim porto stigmata Domini Jesu in corpore meo, id est ego sum de familia Christi, ego sum annumeratus in militia Regis æterni, quod multiplices plagæ in corpore meo per cicatrices ostensæ designant. Et ideo nullus verba mea leviter accipiat, sed auctoritati dictorum meorum in omnibus acquiescat. Stigmata enim vocabantur signa quædam quæ in manibus militum fiebant, per quæ recognoscebantur esse de militia Romani imperatoris. Sic et Paulus non una tantum corporis, sed multis et variis partibus gerebat notas et signa plagarum pro Christo perpessarum, per quas miles fortissimus summi Regis esse declarabatur. Qui in fine ponit : *Gratia Domini nostri Jesu Christi*, id est quam Dominus dedit, sit cum spiritu vestro, fratres, id est cum rationali sensu vestro, ut omnes cogitationes et actiones bene disponat auxilio gratiæ, et non per se quærat justificari ex lege. Ad confirmationem solidæ veritatis omnium quæ dicta sunt, subjungitur. Amen, quod interpretatur vere vel fideliter, sive fiat.

IN EPISTOLAM AD EPHESIOS

ARGUMENTUM.

Ephesus metropolis civitas est Asia, in qua Pau-

lus triennio moratus est prædicans Evangelium, ita ut omnes, qui habitabant in Asia, audirent verbum

CAPUT PRIMUM.

Domini, Judæi et gentiles. Ipse enim primus Ecclesiam ibi fundavit, et Ephesios in fide ac moribus nobiliter instruxit, atque thesauro divinæ scientiæ mirabiliter ditavit, sed sancto sibi revelante Spiritu, prævidit surrecturos postea quosdam pseudo-prædicatores in ipsorum Ecclesia, et promulgatos impia dogmata, ex quibus fuerunt Ebion et Cerinthus, quos Joannes antichristos appellat (*I Joan. 11; II Joan. 1*). Unde eis novissime dixit: « Vos scitis quomodo vobis nihil subtraxerim utilium, quo minus annuntiarem vobis et docerem publice et per domos (*Act. xx*). » Et item: « Quapropter contestor vos hodierna die, quia mundus sum a sanguine omnium. Non enim subterfugi quo minus annuntiarem omne consilium Dei vobis. Ego scio quoniam intrabunt, post discessionem meam, lupi rapaces in vos, non parentes gregi, et ex vobis ipsi exsurgent viri loquentes perversa, ut abducant discipulos post se. Propter quod vigilate, memoria retinentes quoniam per triennium die ac nocte non cessavi, cum lacrymis monens unumquemque vestrum (*ibid.*). » Tanto itaque labore et studio, tantoque tempore et tam perfecte beatus Apostolus Ephesios docuit, et tales lupos in medio surrecturos præscivit, volentes scilicet legis cæremonias inducere, et eos tam liberos gratia, carnalibus observantiis serviliter subdere. Et alios quidem eorum Christum simpliciter esse Deum et non hominem affirmaturos, alios autem eum hominem et non Deum dogmatizatos. Et ideo placuit sibi quadam circumspectione Ephesios hac epistola præmonire, ne hæretici qualibet astutia suasionis ad eos possent introire, vel lupinis dentibus transjugulare. In qua quidem epistola intendit primo confirmare eos in fide, qua Christus a Catholicis creditur Deus omnipotens et homo verus, atque excellentiam gratiæ Dei multipliciter commendare, ne libero arbitrio suo quid honorum, sed gratiæ ascriberent omnia; dehinc eos non debere suscipere jugum legalis observantiæ. Non enim aperte reprehendit eos de aliqua culpa, per quod ostenduntur bene servasse ejus præcepta, sed timendum erat ne laberentur. Et quia ipse sapientiam inter perfectos loqui consuevit (*I Cor. 11*), profundos valde sensus et arcana mysteria sæculo antea prorsus ignota pandit eis a Roma de carcere in hac epistola. Quæ post illam ad Galatas recte locata est, quia ibi Galatæ revocantur ad fidem, hic Ephesii confirmantur in fide. Ibi carnales observantiæ ab illis qui eas suscipere cœperant, remouentur; hic ne suscipi debeant, prædamnantur. Quia vero nullus adeo perfectus est, ut adhuc crescere non possit, hortatur ad meliora proficere, et ne cedant pro tribulationibus ejus, sed maneant in charitate radicati et fundati, ac de morum instructione nobiliter agit. Et ne perfectio erigat illos in tumorem, ostendit etiam de quo statu ad quam dignitatem vocati sunt.

« Paulus Apostolus Jesu Christi per voluntatem Dei, omnibus sanctis qui sunt Ephesi, et fidelibus in Christo Jesu: Gratia vobis et pax a Deo Patre nostro et Domino Jesu Christo. »

Paulus scribit, cujus scripta sunt authentica, quia est *Apostolus Jesu Christi*, id est legatus Salvatoris ac Regis fidelium. Et est apostolus non per meritum suum, vel per humanam electionem, sed per *Dei voluntatem*, quoniam sola Dei Patris voluntas fecit hunc Christi apostolum. Dum dicit se apostolum Christi, id est missum a Christo per voluntatem Dei, commendat se in apostolatus auctoritate, ut per hoc suæ monitioni magis obediant, et ut insinuet omnes qui ab ejus doctrina voluerint dissentire, imperio Christi contraire, et Patris voluntati resistere. Per voluntatem Dei, et non per Deum, posuit, ut insinuaret solo nutu voluntatis divinæ constitutionem omnium rerum esse. « Nam omnia quæcunque voluit fecit (*Psal. cxiii*). » Paulus tantæ auctoritatis, scribit *omnibus sanctis*, id est in sancta religione perfectis, et *fidelibus in Christo Jesu*, id est minoribus qui jam fidem susceperunt, hoc est scribit omnibus, perfectis et imperfectis, *qui sunt Ephesi*, id est in illa urbe quæ caput est Asiæ Minoris. Quod si mysticum sensum requirimus, Ephesus interpretatur *voluntas ejus*, id est Dei. Quicumque ergo ita sancti sunt et fideles, ut maneant in voluntate Dei, non transgredientes voluntates ejus, ad eos nunc scribit Apostolus, ubicunque sint corporaliter positi. Interpretatur etiam *Ephesus consilium meum*, ut dicat Paulus, quia scribo sanctis et fidelibus qui sunt in Epheso, id est in consilio meo, qui non recedunt a munimento consilii mei. Et sunt sancti atque fideles in Christo Jesu, quia nihil prodest sanctitas vel fidelitas nisi in Christo. Nonnulli enim philosophorum visi sunt sanctitatem habuisse, jejunando, caste vivendo, mundum contemnendo, sed non in Christo. Item nonnulli sunt fideles, sed non in Christo. Si quis reddat depositum, si quis commendata non abneget, fidelem se exhibet. Et iste fidelis est, sed non in Christo. Ad distinctionem ergo talium dicit Apostolus se scribere sanctis et fidelibus in Christo Jesu, qui sanctitatem et fidem habent in Christo, id est in Christiana religione. Quos et salutatur, dicens: *Gratia et pax sit vobis*. Gratia, qua vobis peccata remittantur, et virtutes conferantur; pax, qua Deo et sanctis angelis per bonam voluntatem et actionem semper concordetis. Et hæc gratia et pax sit vobis a Deo Patre nostro, id est Creatore qui nos in filios adoptavit; et a Domino Jesu Christo, id est a Redemptore, qui nos ab hoste clementer eripuit, et suo dominio mancipavit. Qui est Jesus, qui interpretatur *salvator*, quia salvum facit populum suum a peccatis eorum (*Matth. 1*); et Christus, qui est *unctus*, id est rex vel sacerdos (*Hebr. vii*), regnans in nobis et interpellans pro nobis, quia reges et sacerdotes unctione consecrabantur (*I Joan. 1*).

« Benedictus Deus et Pater Domini nostri Jesu Christi, qui benedixit nos in omni benedictione spirituali, in cœlestibus, in Christo, sicut elegit nos in ipso ante mundi constitutionem, ut essemus sancti et immaculati in conspectu ejus in charitate. »

Primo omnium benedixit Deum, considerans illum esse principium et fontem honorum omnium. Ostenso enim quod Dominus Jesus sit æqualis Patri, dum gratia et pax æqualiter a Patre et Filio dari monstraretur, ostendit quod Deus benedicendus est a nobis propter beneficia gratuita, quæ nobis tot et tanta contulit. Non enim debemus illi esse ingrati, ut ea quæ ab illo accepimus, ascribamus nobis, sed agnoscentes a quo sint nobis data, benedicere semper illum debemus, et gratias ipsi debitas persolvere. Et cum similiter a Filio nobis dentur hæc eadem beneficia, patet quia et ipse pari benedictione est exaltandus cum Patre, ut omnes honorificent Filium sicut honorificant Patrem (*Joan. v*). Sicque compotentialis et cœqualis Patri esse declaratur. *Benedictus* sit a nobis Deus, ut omnes illum benedicamus, et gratias ac laudes illi referamus pro beneficiis quæ ab ipso percepimus, non æstimantes a nobisipsis habere nos aliquid boni. Benedicamus illum, quia est Deus, id est creator noster, et creatura debet creatorem suum benedicere, et *Pater Domini nostri Jesu Christi*, id est Pater illius qui nos a diaboli tyrannide ereptos, dominio suo misericorditer subdidit, et salvavit nos a peccatis nostris, atque regnat in bonis actibus nostris. Dum dicit, benedictus sit Deus, aperte demonstrat quia et ipse est Deus. Ostendit, inquam, Filium Patris benedictione laudandum, quando dicit, benedictus sit Deus, id est creator omnium, quia et Filius est creator. « Quæcunque enim Pater facit hæc et Filius similiter facit (*ibid.*) » et ita constat cum esse æqualem Patri, et compotentialem atque cœternum. Sed et dum dicitur, benedictus sit Pater Christi, liquido demonstratur, quia et ipse Christus similiter a nobis sit benedicendus, quia qui non honorificat Filium, non honorificat Patrem qui misit illum (*ibid.*). Non enim recte Patrem benedicere potest, qui Filium pariter non benedicit, cum Pater non dicatur nisi respectu Filii. Unde patet Filium esse cœternum Patri, et cœqualem, quia si Pater fuisset aliquando sine Filio, non esset Pater. Ac per hoc nec tantæ dignitatis tunc esset, quantæ nunc est : sicque cœpisset crescere, quod nefas est vel suspicari. Nunquam ergo fuit ante Filium, sed sine initio Filius est æternaliter genitus. Vel in eo quod dictum est : *Benedictus Deus et Pater Domini nostri Jesu Christi*, ostenditur Christus homo simul et Deus esse. Homo enim est, cujus est Deus ille qui benedicitur : et Deus est, cujus est Pater idem ipse quem benedicimus. Deus enim Christi est secundum humanitatem ejus, et pater Christi secundum divinitatem ejus. Qui merito benedicitur a nobis, quia ipse

prior benedixit nos. Hinc ergo Apostolus incipit enumerare beneficia, quæ a Deo per Christum humano generi sunt concessa. Sit, inquit, benedictus, qui benedixit nos. Deus nos benedicit, cum virtutes nobis tribuit, vel in ipsis virtutibus nos promovet. Nos vero Deum benedicimus, cum pro beneficiis quæ contulit nobis ipsum laudamus. Benedixit nos non in quadam, sed in omni benedictione, non corporali, sed spirituali, id est in sermone Dei et sapientia et veritate, cunctisque reliquis virtutibus, et non in terrenis, sed in cœlestibus, ut, quamvis adhuc corpore hic detineremur, mente tamen et conversatione jam in cœlestibus essemus. Et hæc tam copiosa virtutum honorumque spiritualium benedictio data est a Patre nobis in Christo, id est postquam cœpimus in ipso Mediatore ac Reconciliatore manere, incorporati visceribus Ecclesiæ, quæ est corpus ejus. Non enim extra Christum datur cuiquam ista benedictio. Vel præteritum pro futuro positum est, ut quasi jam factum indubitanter crederemus, quod faciendum speramus. Benedixit, id est benedicet nos, hoc est ditabit in die judicii, in omni benedictione spirituali, non corporali, quoniam divitias spirituales, non carnales dabit. Neque enim carnales cibos tunc præbebit, vel uxores et aurum, cæterasque delicias quas habent impii, sed illas spirituales, quas in supernis habent angeli. Unde et corpus nostrum ut illarum deliciarum particeps fiat, erit spirituale, quia seminatur corpus animale, et surget corpus spirituale, potestate utique, non natura (*I Cor. xv*). Tantæ enim levitatis erit et claritatis, quantæ spiritus. Et ideo quidquid boni illud glorificatum corpus habebit, spirituale erit. Nihil ergo carnale, sed totum spirituale expectemus illa benedictione, quoniam spiritualis erit; et non particularis, sed universalis. Omni enim benedictione spirituali nos beatificabit, replens omnibus bonis, ut nihil omnino spiritualium bonorum desit nobis, cum dixerit Christus : « Venite, benedicti Patris mei (*Matth. xxv*), » percipite regnum, et ponet localiter in cœlestibus inter agmina sanctorum angelorum et virtutum ac dominationum, ut eandem cum ipsis beatitudinem et gloriam atque scientiam habeamus, ut simus illis etiam loci sublimitate pares. Et hæc est illa gloriosa beatitudo, quam oculus non vidit, nec auris audivit, nec cor hominis excogitare potuit (*I Cor. ii*), quam nobis Pater dedit, si in Christo nos invenerit, id est vera Christi membra. Aliter enim nullus ad hanc beatitudinem ascendere poterit, quia nemo ascendit in cœlum, nisi qui descendit de cœlo, Filius hominis qui est in cœlo (*Joan. iii*). Quod Apostolus præteritum posuit, significat, ut dictum est, quia hoc quod Deus est nobis benedicturus in futuro, ita est stabile et impermutabile, sicut illud quod jam præteritum est, quod nulla ratione mutari potest. Nam quod factum est, non potest non fieri. Quod autem posuit, benedixit, et non donavit; et quod ait, benedictione, et non beatitu-

dine, voluit nobis designare Patris et Filii potentiam. Suum enim benedicere, est benefacere. Et quid est aliud tunc benefacere, quam participationem beatitudinis impendere? Unde Psalmista : « Convertere, anima mea, in requiem tuam, quia Dominus benefecit tibi (*Psal. cxiv.*) » Et quod ipse nos benedicit illa tanta benedictione, ita est firmum et certum, sicut et illud quod antequam mundus fieret, nos elegit prædestinando ad vitam. Vel quod nos benedicit, non faciet improvide, sed *sicut elegit nos a* massa perdendorum ante mundi principium. Ita enim benedicit sicut prædestinavit, quia unicuique benedictionem dabit, juxta modum quem ei præordinavit. Elegit nos, id est extra de massa peccatorum legit et abstraxit, et hoc fecit *in ipso*, id est in Christo, ut essemus membra Christi, et ista electio facta est *ante mundi constitutionem*, id est ante omnem creaturam. Et ad hoc nos elegit, *ut essemus sancti et immaculati*. Inter sanctum et immaculatum hoc interest, quod sanctus immaculatus quoque intelligi potest, immaculatus vero non statim sanctus. Nam parvuli quoque immaculati sunt, quia integro corpore nullum possunt facere peccatum; et tamen sancti non sunt, quia sanctitas voluntate et studio comparatur. Et quod immaculatus dici potest ille, qui peccatum non fecit, sanctus autem is qui virtutibus plenus est. Sancti ergo intelliguntur perfecti, immaculati vero imperfecti. Sancti in virtutibus promoti, immaculati per baptismum a peccatis mundi, et post non inquinati. Tales igitur nos prædestinavit Deus futuros, et hoc non in vana æstimatione hominum, sed *in conspectu ejus* qui veritatem conspicit, et occulta considerat. Si enim viderit nos veraciter esse sanctos et immaculatos, quidquid homines de nobis æstiment, ipse nobis præmium reddet. Et econtra si per hypocrisim volerimus simulare sanctitatem, licet nos judicent sanctos indocti homines, ipse tamen damnabit. Elegit ut essemus sancti et immaculati in oculis ejus, et hoc *in charitate*, id est ut in illam sanctitatem et immaculationem promoveremur, non timore poenæ, sed amore justitiæ. Notandum itaque quod ad commendandam magnitudinem gratiæ enumerat Apostolus beneficia ejusdem gratiæ, quæ a Deo per Christum humano generi data sunt. Deus enim ante mundi constitutionem, cum nullus quidquam meruisset, quia nullus adhuc erat, præordinavit quod in tempore gratiæ aliquos a perdendis separaret, et justos immaculatosque faceret, præordinavit quod et illos ad æternitatem perduceret. Harum prædestinationum alteram hic implet, quod sanctos facit; alteram in futuro complebit, dando immortalitatem et beatitudinem. Sic enim prædestinando jam benedixit nos in cælestibus, cum adhuc in terris maneamus, sicut prædestinando elegit ante mundi constitutionem, cum necdum essemus. Et elegit non quia futuri eramus sancti, sed ut essemus sancti, id est ipse diligendo per gratiam fecit ut essemus sancti et immaculati.

« Qui prædestinavit nos in adoptionem filiorum per Jesum Christum in ipsum, secundum propositum voluntatis suæ, in laudem gloriæ gratiæ suæ, in qua gratificavit nos in dilecto Filio suo. In quo habemus redemptionem per sanguinem ejus, remissionem peccatorum secundum divitiis gratiæ ejus, quæ superabundavit in nobis in omni sapientia et prudentia : ut notum faceret nobis sacramentum voluntatis suæ, secundum beneplacitum ejus, quod proposuit in eo, in dispensatione plenitudinis temporum, instaurare omnia in Christo, quæ in cælis, et in terra sunt in ipso. »

Prædestinatio est gratiæ præparatio, gratia vero jam ipsa donatio. Et nos jure benedicimus Deum, qui non solum prælegit nos ut faceret sanctos et immaculatos, sed etiam *prædestinavit in adoptionem filiorum*. Prædestinavit, id est ante et firme ordinavit. Et hoc est præ, id est ex antiquissimo tempore. Destinare enim, per se longinquitatem notat, præteritum, indicat tempus remotum. Prædestinavit, et hoc in adoptionem filiorum, id est ad hoc ut iremus in filios secundum multimodam conformitatem virtutum ejus in nobis expressam, scilicet ut quantum humanæ naturæ possibile est, in sanctitate et justitia nostro Patri efficiamur conformes; et imago bonitatis ejus, in quantum fieri potest, exprimator in nobis. Quod ire in filios non est ex merito nostro, sed ex gratia sua, qua adoptavit nos in filios. Quod Apostolus notare voluit, dicens adoptionem. Majus vero est quod dicit adoptivos Dei filios, quam quod dixerat sanctos et immaculatos. Nos prædestinavit in filios, et hoc *per Jesum Christum* mediatorem, ut per eum qui naturalis est filius, faceret sibi adoptivos filios, tendentes *in ipsum* Christum, id est in conformitatem ejus per fidem et bonos mores. Vel hanc prædestinationem fecit per Jesum Christum, id est per virtutem et sapientiam suam, quia nihil fecit unquam Pater nisi per Filium, qui est virtus et sapientia ejus. Unde patet Filium esse coæternum et coæqualem Patri (*Philip. ii.*) Et quod nos prædestinavit, hoc fecit, *secundum propositum voluntatis suæ*, id est sequendo hoc propositum quod proposuit in prophetis, quibus suam voluntatem de nobis revelavit et intimavit, id est sicut per prophetas proposuit, ita ab æterno prædestinavit, hoc est non minus neque alio modo nos ire in filios prædestinavit ab æterno, quam post in prophetis proposuit. Non tamen quantum ad se prædestinatio præcessit propositum, sed quantum ad nos, quia illi presentia sunt omnia, quæ nobis per tempora vel spatia transeunt. Quod propositum fuit voluntatis suæ, id est non meritorum nostrorum, sed suæ gratiæ voluntatis. Gratis enim ab æterno prædestinavit, gratis in tempore per prophetas proposuit ac prænuntiavit. Et hoc totum fecit *in laudem gloriæ gratiæ suæ*. Nam quasi gloria gratiæ ejus est æterna adoptio. Hoc fecit in laudem gloriæ gratiæ suæ, id est ut in interiori et exteriori affectu laudemus gloriam,

Id est abundantiam gratiæ suæ qua nos adoptavit. **Quæ** abundantia dicitur gloria, quia tanta et tam magna est, et in tantum debetur honor a nobis sibi, quam et in quantum de ipsa gloria multum nobis contulit, quod in prophetis prædixit, quod ante sæcula prædestinavit. Nam per hoc firmos et certos nos reddidit. Gratiæ fuit quod nos prædestinavit et quod elegit. Et hæc gratia in tantum abundavit, ut ea quæ prædestinaverat, per prophetas prædiceret. Et ideo quia prædixit, ex ipsa abundantia laudatur a nobis sua gratia. Nisi enim per prophetas quos solus prædestinaverat prædixisset, nobis sua prædestinatio nota non fuisset. Et, si nobis occulta fuisset, ad laudem suæ gratiæ nos non traxisset. Ex hoc igitur apparet, quod ex abundantia suæ gratiæ, qua nobis prædestinationem suam per prophetas voluit aperire, laus suæ gloriæ aucta debet procedere. Multum igitur est glorificandus, qui et nos prædestinavit in adoptionem filiorum, et ipsum gratis, et in prophetis hoc prænuntiavit. Quod autem nos dicitur prædestinasse, diversum est ab eo quod supradictum est, elegisse. Aliud enim est prædestinare, et aliud eligere, quia electio semper consideratur inter duos vel plures, prædestinatio autem minime; et electio fit de bonis tantum, prædestinatio autem de bonis et malis. Boni enim dupliciter prædestinatur, id est ad primam et secundam resurrectionem. At mali prædestinantur simpliciter ad insufficientis pœnæ retributionem, quam digne patientur pro peccatis commissis, ad quam quidem Deus nullum prædestinavit. Ad nihil enim aliud est quisque a Deo prædestinatus, nisi ad hoc quod ipsemet Deus post in eo operatur, quia ad hoc non valet aliquis prædestinari, quod inter creaturas Dei non poterit inveniri. Patet igitur nullum ad peccandum prædestinari, quia constat nullum a Deo peccatum creari. Ad pœnas autem prædestinatur, quas Deus fecit, ut re justa puniatur. Prædestinavit nos Deus secundum propositum voluntatis suæ, vel potius, ut in Græco legitur, secundum beneplacitum voluntatis suæ, quia non omne quod placet, potest et bene placere. Sed ibi tantum dicitur beneplacitum, ubi quod placuit, recte placitum comprobatur. Prædestinavit nos secundum beneplacitum voluntatis suæ, non nostræ, ne in tanto beneficio gratiæ de placito gloriaremur voluntatis nostræ. *In qua* utique voluntate sua *gratificavit nos*, id est sibi gratos fecit, ut ei grates redderemus pro suis beneficiis. Hoc est, non solum beneficia nobis collata procedunt ex voluntate ejus gratia, non ex merito nostro, sed etiam istud quod sumus ei grati, propter ipsa beneficia ascribendo sibi omnia. Sic dictum est gratificavit a gratia sicut justificavit dicitur a justitia. Gratificavit nos, et hoc *in Filio suo*, id est in operatione Filii sui proprii et naturalis, qui et sibi coæternus et consubstantialis existit. Et quia connaturalis, ideo in ejus operatione factum est. Et etiam in dilecto, id est propter hoc etiam potuit fieri, quia dilectus est a Patre

A super omnes alios filios, quoniam Filius est ab æterno, et semper manet et regnat cum eo. Vel nos qui prius displicebamus et inimici eramus, gratificavit sibi, id est gratia sua implevit; et hoc in dilecto Filio suo, id est per mortem et resurrectionem Filii sui, qui egregie ab eo diligitur, quia nihil in eo sibi displicet. Vel in dilecto Filio suo, id est in fide ejus gratificavit nos sibi. In Græcis tamen codicibus non habetur in dilecto Filio suo, sed simpliciter, in dilecto. Et cum non sit additum in dilecto Dei, vel in dilecto Patris, sive in dilecto Ecclesiæ, sed absolute dictum sit, in dilecto, ita intelligendum est, ut subaudiatur ab omnibus, ab omnibus enim diligitur, quia est summum bonum. Omnis ergo gratia quam consequimur in laudem et gloriam ejus, qui nos gratificavit, completur in dilecto, id est in Domino et Salvatore nostro, quia nihil boni esse potest nisi ex summo bono et in summo bono, quod naturaliter diligit et appetit omnis creatura. *In quo habemus redemptionem*, id est a Deo manumissionem Satanæ, hoc est, manumissi sumus et liberati a jugo diaboli, qui impediēbat in nobis facultatem bene operandi. Non dixit, habuimus, sed habemus, ut continue nos habere illam manumissionem notaret. Et hoc *per sanguinem ejus*, id est per effusionem sanguinis ejus, quia ejus sanguis innocens effusus, pretium fuit, quo redempti sumus, et libertati redditi, qui tenebamur captivi. Per hoc quod dicit ejus sanguinem tantam efficaciam habuisse, ostendit eum non solum hominem sine peccato, sed etiam Deum omnipotentem existisse. Habemus in eo redemptionem. Et quam redemptionem? *Remissionem peccatorum* originalium et actualium in baptisate. Diabolus enim per peccata dominabatur nobis. Remissis autem peccatis nostris, amisit ille malignus dominum in nobis. Et ita peccatorum remissio facta est nobis redemptio et liberatio, ut in libertate serviremus Redemptori nostro. Aliud tamen intelligitur redemptio, et aliud remissio, quia remissio redemptionem facit, et redemptio est manumissio, ac nostri arbitrii ad bene operandum restituit, quia et justii post mortem nullo tenentur vinculo, sed liberi ingrediuntur in regnum. Remissio autem simpliciter intelligitur peccatorum abolitio. Habemus remissionem peccatorum, et hoc *secundum divitias gratiæ ejus*, id est secundum divitem et copiosam gratiam misericordiæ, hoc est secundum multitudinem misericordiæ ejus gratis impensæ nobis, quæ, sicut est multa et exsuperans omnem sensum (*Philtip. iv.*), sic multiplicia et innumera delevit peccata nostra. Gratiæ dico, *quæ superabundavit in nobis*. Hic vult ostendere quæ Deus benigne circa eum et reliquos apostolos egit, ut per hæc ponderet suam auctoritatem, et sic efficacius possit suadere quod proposuit. Hactenus enim de his quæ toti sanctorum Ecclesiæ data sunt, est locutus; et nunc de his agit, quæ specialiter apostolis concessa sunt. Cum enim gratia in omnibus sanctis abundasset vel abundet super-

abundavit tamen in apostolis, quia ipsi copiosorem largitatem ejus acceperunt quam ceteri. *In omni sapientia et prudentia.* Sapientiam et prudentiam esse diversas Stoici quoque opinantur, dicentes: Sapientia est rerum divinarum cognitio, prudentia vero tantum mortalium. Juxta hanc divisionem, possumus sapientiam invisibilium accipere fidem; prudentiam vero de his, quæ corporaliter a nobis exercentur, vel de moribus et de providentia temporalium. Gratia vero in apostolis superabundavit in omni sapientia et prudentia, quia Spiritus sanctus infuderat eis plusquam cæteris sapientiam, qua nosset Patrem, et Filium, et Spiritum sanctum æternaliter ab utroque procedentem, atque Filium solum incarnatum, non Patrem neque Spiritum, et alia mysteria incarnationis, et arcana celestia, nec non et dona Ecclesiæ conferenda. Prudentiam quoque superabundanter dedit eis idem Spiritus de ministeriis Ecclesiæ, ut providerent ea quæ futura vel facienda erant in Ecclesia, et futuros status ac tempora prosperitatis et adversitatis ejus usque ad finem sæculi intelligerent, et quomodo per orbem dilatanda esset et exaltanda, atque ritus suos honorabiliter ubique celebratura, et omnes hæreses destructura. Subtilius enim sciebant de trinitate et unitate Divinitatis, et de mysteriis incarnationis Christi, et de statu Ecclesiæ acutius quam alii providebant. Vel prudentiam intelligamus, quantum ad regnum Ecclesiæ. Majorem enim notitiam habebant regendi Ecclesiam, quam alii. Sciebant namque qualiter unumquemque deberent admonere, et quos increpare, vel quos obsecrare, et cætera hujusmodi. Et quia omnis sapientia et prudentia per supernam gratiam superabundavit in eis, adhibenda est fides doctrinæ eorum, qua prædicant Christum, Deum creatorem et hominem verum esse. In tantum autem, inquit, superabundavit in nobis illa gratia, *ut notum faceret*, id est notificaret nobis sacramentum, id est mysterium voluntatis suæ, hoc est mysticam et occultam voluntatem suam quæ antea latebat. Voluntatem, inquam, suam de incarnatione Filii et renovatione humani generis, atque statu Ecclesiæ, et donis ejus conferendis, et ejus regimine. Licet enim prophetæ partim hæc novissent, nullus tamen eorum vel omnia quæ apostoli, vel tam lucide perspexit ut apostoli. Prophetæ namque noverunt ut illi, qui fuerunt in rerum prænuntiatione, apostoli vero ut illi qui erant in rerum exhibitione. Voluntatis dico, exhibitæ non hominum meritis, sed secundum bonum et pium *beneplacitum ejus*, id est quia tantum ei misericorditer placuit, ut vellet humanum genus reparare. Quod beneplacitum ipse proposuit, id est procul anteposuit, vel prorsus posuit, sive omnibus palam obtulit, *in eo*, id est in Christo, non alio tempore implendum, sed *in dispensatione plenitudinis temporum*, id est in plenitudine temporum dispensata et ordinata divinitus, cum jam impleta essent tempora, quæ ipse disposuerat prius implenda. Vel notum faceret nobis sa-

cramentum voluntatis suæ, et hoc faceret secundum placitum ejus, id est secundum quod ex sola potestate sibi placuit, et placitum illud est bonum, id est utile nobis. Quod sacramentum antequam notificaret nobis, proposuit ipse in prophetis, id est sacramentum illud prædixit per prophetas, qui mysteria incarnationis Domini, et dona quæ collaturus erat Ecclesiæ, præcinerunt. Si enim penitus ignari essent homines, et non aliquantulum prædocti, non reciperent illud. Quod sacramentum fuit in eo, id est in Christo, in morte ejus et resurrectione. Sacramentum dico, tendens in dispensatione plenitudinis temporum, id est ad hoc proposuit in prophetis, ut in plenitudine temporis, id est tempore præfinito, tempore gratiæ, distribueretur illud sacramentum per apostolos. Dominus dispensavit illud, quia aliis in Ecclesia tribuit fidem et notitiam incarnationis Christi, aliis virtutes quoque et charismata, et quæcunque dispensanda et distribuenda prædixerunt prophetæ. Et quod erat illud sacramentum? Instaurare, id est ad primum statum reducere, omnia per peccatum destructa. Et illam instaurationem facere *in Christo*, id est in fide et gratia Christi, ut in eo restaurentur, *quæ in cælis sunt*, id est numerus beatorum angelorum qui divinitus erat stabilitus, cadentibus inde reprobis angelis; *et quæ in terra sunt*, id est homines; et omnia quæ instauraret, permanerent *in ipso Christo sine fine*, ne jam ulterius caderent. In eo quippe instaurantur quæ in cælis sunt, cum id quod inde ex angelis lapsus est, ex hominibus redditur; in ipso instaurantur et quæ in terris sunt, cum ipsi homines qui prædestinati sunt in vitam æternam a corruptionis vetustate renovantur. Instaurantur quæ in cælis sunt, dum illuc humiliati homines redeunt, unde apostatæ angeli superbiendo ceciderunt; instaurantur et quæ in terris sunt, dum peccatores ad justitiam convertuntur. Vel ea quæ sunt in cælis, sunt instaurata, id est in melius commutata in Christo, id est in Christi operatione, quia in revelatione mysterii incarnationis Dominicæ receperunt angeli quamdam in melius promotionem. Sed et gaudium eorum crevit, cum homines in suum consortium cœpissent recipere. Non enim pro angelis mortuus est Christus. Sed ideo etiam pro angelis fit, quidquid hominum per ejus mortem redimitur et liberatur a malo, quia cum eis quodammodo reditur in gratiam post inimicitias, quas inter homines et sanctos angelos peccata fecerunt, et ex ipsa hominum redemptione ruinæ illius angelicæ damna reparantur. Et sic instaurantur cælestia et terrena, sed tamen ea tantum quæ sunt in ipso ante mundi constitutionem electa et prædestinata. In ipso enim semper fuerunt et sunt, quos elegit ab æterno. Quod dixit instaurare, non dixit proprie, nisi respectu eorum quæ erant in cælis, quia quæ sunt in terra, non sunt instaurata, sed restaurata. Nam instaurare dicimus, quando restauratum in melius instauratur, ut bonum in melius; restauratur autem,

quod cum prorsus destitutum sit, Instauratur, ut A vos, speravimus in Christo; et ideo tales sumus ut malum in bonum.

« In quo etiam sorte vocati sumus, prædestinati
« secundum propositum ejus, qui omnia operatur
« secundum consilium voluntatis suæ, ut simus in
« laudem gloriæ ejus nos qui ante speravimus in
« Christo. »

In Christo restaurata sunt omnia, *in quo etiam nos vocati sumus* de infidelitate ad fidem, et hoc sorte, id est gratia sola, non nostro merito. Nam sortis nomine designatur gratia, quia in sorte non est electio, sed voluntas Dei. Ubi enim dicitur, iste facit, et iste non facit, merita considerantur. Et ubi merita considerantur, electio est, non sors. Quando autem Deus nulla nostra merita invenit, sorte voluntatis suæ nos vocavit, quia voluit, non quia digni sumus. Sorte vocati sunt et ipsi apostoli, in quibus superabundavit gratia, ne viderentur meruisse aliquid melius cæteris. Vocati sumus, nos dico prædestinati, id est prius præparati in ejus sapientia, ab æterno præordinati ad vitam, et hoc *secundum propositum ejus*, id est secundum quod postea prædixit in prophetis. Prophetæ enim apostolos ad fidem Christi convertendos prænuntiant, et sicut ipsi prænuntiant, ita et Deus prædestinaverat. Prædestinati enim sunt secundum propositum ejus, quia sicut magnifice illos ad fidem venturos, in prophetis prænuntiavit, ita magnifice illos prædestinaverat. Vel prædestinati sumus secundum propositum ejus, id est secundum firmam et perseverantiam institutionem ejus. Qui etiam in apostolis operatur omnia etiam velle juxta *consilium voluntatis suæ*, ut nemo gloriatur de suis meritis. Ac si dicatur: Cur nos magis elegerit ad officium apostolatus nescimus, sed tamen concilio facit omnia, id est rationabiliter et provide, non temere. Nam ad hoc solet fieri consilium, ut rationabiliter fiat illud, unde consilium habetur. Et consilium quo facit omnia, est voluntatis suæ, id est non extraneum, quia non ab alio accepit consilium, sed a sola voluntate sua. Et hoc consilio agit ipse, ut simus in æterna vita euntes *in laudem gloriæ ejus*, id est ut in illa vita laudemus diligendo et admirando ineffabilem gloriam ejus, scilicet illum gloriosum, laudabilem et admirabilem, nos, qui ante speravimus in Christo, id est antequam D

per nos alii sperent et laudent. Prius enim crediderunt apostoli quam cæteri.

« In quo et vos, cum audissetis verbum veritatis,
« Evangelium salutis vestræ, in quo et credentes
« signati estis Spiritu promissionis sancto, qui est
« pignus hæreditatis nostræ, in redemptionem ac-
« quisitionis, in laudem gloriæ ipsius. »

Quia se et alios apostolos dixerat vocatos, ne videretur latenter dixisse Ephesios non esse vocatos, subjunxit quasi dicens: Nos ante sumus in Christo vocati, *in quo et vos* postea jam vocati estis, etsi non principaliter, tamen per ejus membra et ejus præcepta. Vocati estis ad fidem quam non accepistis ex merito aliquo, sed ex auditu solo, quia, *cum audissetis ex ore meo verbum veritatis*, tunc vocati estis. In hoc multum commendatur gratia Dei, quam tam leviter, scilicet solo auditu receperunt, quia non intercessit eorum meritum, non vis arbitrii ipsorum, sed solus auditus, ut gratiam in fidem acciperent. Ideo credidistis, quia audistis verbum non falsitatis, ut antea in laude idolorum, sed veritatis in prædicatione Christi, quæ est nimia veritate suffulta, id est ideo credidistis, quia verum esse quod dicebatur, cognovistis. Quod verbum est *evangelium vestræ salutis*, id est bonum nuntium, quia in eo annuntiata est vobis salus, id est remissio peccatorum, et justificatio, et vita æterna. Et quia possent audisse illud et non credidisse, addit: *In quo Evangelio et credentes signati estis*, id est segregati ab infidelibus Spiritu sancto cujus gratiam accepistis. Sanctus enim Spiritus credentes signat, id est ab aliis hominibus discernit et separat, quia a peccatis eos purgat, et spiritualibus gratiis ornat. Vel in quo Christo signati estis imagine ejus, id est vos qui culpa primi parentis deformati eratis, et quibus jam perierat imago et similitudo Dei, signati estis, hoc est imagine et conformitate Dei estis impressi, id est restituta facultate bene operandi secundum innocentiam et justitiam representatis imaginem Dei Patris, scilicet institutione liberi arbitrii estis impressi similitudine Dei secundum innocentiam et bona opera; et hoc per Spiritum sanctum, non per merita nostra, fide interveniente. Hoc notavit, dicens, *credentes*, etc. Quasi diceret: Quia credidistis, ideo signati estis Spiritu sancto, id est hoc signum accepistis, quo distingueremini a cæteris, quod Spiritu sancto repleti estis, quem non habent increduli. Qui spiritus est *promissionis*, id est promissus a Deo, sicut discipulis Salvator præcepit ab Hierosolymis ne discederent, sed expectarent promissionem Patris. Et item de eo dixit: « Ego mittam promissum Patris mei in vos (Luc. xiv). » Vel promissionis est iste Spiritus, quia his quos replet, promittit vitam æternam, et hoc ideo facit, quia ipse est *pignus* et arrha et certitudo *nostræ hæreditatis*, quam accepturi sumus a Deo, id est charitas quam nobis ille Spiritus infudit, arrha est futura hæreditatis. Pignus enim hoc loco pro arrha positum est.

Pignus enim quando datur, cum datum fuerit propter quod datum pignus est, pignus aufertur. Arrha vero quando aliqua pretii particula primum datur, ut sit signum totius massæ dandæ. Sic charitas per Spiritum sanctum data fidelibus, signum et arrha est dandæ plenitudinis vitæ perpetuæ. Hoc enim implebitur, unde arrha data est; nec ipsa arrha, id est charitas nobis auferetur, sed adimplebitur quando summa reddetur. Signati estis Spiritu sancto, et hoc in redemptionem acquisitionis, ut ultra non dominetur inimicus in vobis, sed Christus qui vos sanguine suo redemit, ut possideat, non ut amittat. Redemptio enim hoc loco vocatur immortalitas, quæ erit per resurrectionem. Acquisitio autem familiaritas illa quæ Deum quærit. Ducet ergo nos Spiritus ille in redemptionem immortalitatis et impassibilitatis, scilicet ut redimamur ac liberemur ex mortuis, id est faciet nos immortales per mortem Christi et resurrectionem. Et redemptio illa erit tanta, ut sit acquisitionis, quia illa immortalitas sic nos acquirat Deo et conjunget, ut ultra non separemur vel amittamur ab eo, sed semper illi inhæreamus, et ab illo possideamur; et hoc in laudem gloriæ ipsius, scilicet ut laudemus admiratione, dilectione, participatione gloriam ipsius, id est beatitudinem ejus, ideo posuit ipsius, ut innueret, quia quidquid boni habemus, a Deo est.

« Propterea et ego, audiens fidem vestram, quæ est in Domino Jesu, et dilectionem in omnes sanctos, non cesso gratias agens pro vobis, memoriam vestri faciens in orationibus meis, ut Deus Domini nostri Jesu Christi, Pater gloriæ, det vobis spiritum sapientiæ et revelationis in agnitionem ejus, illuminatos oculos cordis vestri, ut sciatis quæ sit spes vocationis ejus, et quæ divitiæ gloriæ hæreditatis ejus in sanctis, et quæ sit supereminens magnitudo virtutis ejus in nos, qui credimus secundum operationem potentiæ virtutis ejus, quam operatus est in Christo, suscitans illum a mortuis, et constituens ad dexteram suam in cœlestibus, supra omnem principatum et potestatem et virtutem et dominationem et omne nomen quod nominatur, non solum in hoc sæculo, sed etiam in futuro, et omnia subjecit sub pedibus ejus, et ipsum dedit caput supra omnia Ecclesiæ quæ est corpus ipsius, plenitudo ejus qui omnia in omnibus adimpletur. »

Invitat eos Apostolus ad veram fidei constantiam, quam ab eo perceperunt de Domino Jesu, scilicet Christum vere esse creaturam in humanitate, et vere Creatorem in divinitate, id est esse verum hominem et verum Deum. Nam, ut in hanc fidem eorum, quæ per dilectionem operatur, roborarentur et auferentur, gratias pro ea Deo referebat, ut ipse Deus qui dederat, multiplicaret eam et confirmaret. Quasi dicat: Vocati estis, Evangelium audistis et credidistis atque Spiritu sancto signati estis. Propterea, id est propter has causas, gratias ago, quia non solum vicini vestri, sed et ego longe positus in Romano car-

cere, audio fidem vestram, quasi jam famosas et vobis solidatam, quæ jam multis ut convertam proponitur exemplar, quia constantes estis in ea. Et hoc ideo quia est in Domino Jesu, id est firmè fundata et permanens in Domino Salvatore, qui suo dominio mancipavit, vosque salvavit. Et adhuc etiam dilectionem vestram redundare in omnes sanctos, id est charitatem vestram qua sanctos omnia ita diligitis, ut quidquid pie potestis, impenditis illis. Et ita charitatis opera, quæ facitis in sanctis, faciunt vestram charitatem longe divulgari, multique eam proponunt exemplar. Unde ego hæc audiens, non cesso gratias agere Deo pro vobis, quia fidem hanc et dilectionem vobis contulit. Magna illis erat utilitas, quod tantus apostolus pro illis gratias agebat, quia per hoc divinitus confirmabantur et promovebantur in fide et dilectione, quam nuper acceperant prædicato sibi Evangelio. Gratias, inquit, ago pro his quæ jam accepistis, et orationes facio, ut quæ necdum habetis, habere possitis. Memoriam vestri facio in orationibus meis, ut Deus det vobis intelligere quæ credidistis, scilicet ut quod fide credidistis, notitia percipere possitis discernendo. Et hoc det vobis Deus Domini nostri Jesu Christi, id est Deus illius quem revereri debemus, quia ejus servi sumus, et ipse Dominus noster: et est Jesus, id est salvator noster; et est Christus, id est rex noster sive sacerdos. Hoc totum dicitur respectu humanæ naturæ, quia secundum humanitatem tantum est Deus Christi, qui secundum divinitatem ejus, est Pater ipsius. Qui enim in tempore creavit eum ex virgine, ipse ante omnia tempora de seipso genuerat eum. Unde dicitur Pater gloriæ, quia ipse Christus secundum excellentiam æternæ divinitatis suæ est gloria Patris, id est virtus et sapientia et verbum ejus. Per hoc itaque quod dicit: Deus Domini nostri Jesu Christi, ostendit illum esse verum hominem; et per hoc quod subjungit, Pater gloriæ, notat illum esse verum Deum ex Patris substantia. Et rogo ut iste pater det vobis spiritum sapientiæ de cœlestibus ac divinis et revelationis in agnitionem ejus, ut non obscure, sed siue velamine agnoscatis eum, id est Christum, secundum quod Deus est omnipotens atque principio et fine carens, et omnia divinitate implens. Det vobis Spiritum sapientiæ in agnitionem ejus, id est Spiritum sanctum, quo infunditur hominibus sapientia, ut agnoscatis illum juxta quod agnoscendus est ab his qui adhuc in carne vivunt, ut omnia, quæ de illo possunt in hac vita cognosci, cognoscatis. Et det vobis spiritum revelationis de humanitate ejus, Spiritum sanctum, quo revelet vobis mysteria humanitatis Christi in agnitionem ejus, ut manifeste agnoscatis incarnationem ejus, non per umbram, sicut illi, qui fuerunt ante adventum ejus. Ideo orat ut hanc Christi notitiam det illis Deus, quia, si hanc habuerint, nulla adversitate superabuntur ab ejus fide et dilectione. Et declarat consequenter, ejusmodi sapientiam et revelationem vult ut det illis. Illuminatos, inquit,

oculos cordis vestri det vobis, id est aspectum vestrae mentis et rationis faciat clarum et perspicuum. Quod est dicere: Ita illuminet vestram rationem, ut perspicue remota umbra phantasmatum, advertat ratio vestra quod primum speretur de fide, scilicet vitam angelis æterna. Et hoc est, ut sciatis quæ sit spes vocationis ejus, id est fidei ejus. Hoc est, sic illuminet interiores oculos vestros, ut intelligatis quod primum erit pro fide ejus illis, qui constanter in ea perseverant, ad quod per Evangelium vocati estis. Vel quæ sit spes vocationis ejus, id est qualis et quanta sit gloria quam speratis, et ad quam vos vocavit; quam pretiosa est summa beatitudo, quam adipisci speratis per eum, qui vos ad fidem suam vocavit. Et ut sciatis quæ sunt divitiarum gloria, id est copia beatitudinis, id est quam sufficiens et multiplex et copiosa est beatitudo illius gloriosæ hereditatis, quam firmo jure possidebant communiter sancti, in perfectione virtutum consummati. Istæ enim divitiarum erunt in sanctis. Vel tantam esse beatitudinem illam intelligatis, quanta est in sanctis, id est quantam ipsi habent vel intelligunt esse. Et ut sciatis quæ et quanta sit magnitudo virtutis ejus in nos apostolos, id est quam larga et copiosa provenit virtus ejus in nos, ut spirituali scientia illustrati, et virtute Spiritus sancti confortati, nihil timeremus, sed magna auctoritate regibus et tyrannis contradicentes, Evangelium ubique predicaremur, et miracula potenter operaremur, atque cunctos errores destrueremus. Et hæc magnitudo virtutis et fortitudinis, quæ data est nobis præ cæteris, est supereminens. id est super alios manens, quia nobis excellentiora sunt data quam aliis, ut et illi post nos studeant ad virtutem alta proficere. Et ista magnitudo tam celsa est in nobis apostolis, qui credidimus, quia nos intensius et firmiter credidimus quam alii. Et est desuper a Deo missa in nos, et hoc secundum operationem potentiarum virtutis ejus, id est secundum opus quod virtus Dei, id est vis Dei operata est. Virtus dico potentiarum, id est potens in omnibus. Vel nos credidimus secundum operationem potentiarum virtutis ejus, id est attendentes potentem virtutem ejus factam. Et quam virtutem? Scilicet illam quam operatus est potenter in Christo, suscitans illum ita ut procul esset a mortuis, id est ut nunquam amplius moreretur, sed immortalitatis virtute permaneret. In hac enim operatione ostensa est nobis potentia virtutis ejus. Quem et constituit, id est simul secundum animam et corpus statuit ad dexteram suam, id est in potentiori dignitate sua positum in cælestibus, præferens illum omni creaturæ. Dextera enim Dei æterna beatitudo est, quæ sanctis datur; sicut sinistra ejus recte dicitur miseria perpetua, in qua sunt impii. In cælestibus est Christus, ut ejus dignitas etiam ex loco monstratur. Et est etiam loco supra omnem principatum et potestatem et virtutem et dominationem, ut per hoc ostendatur esse majoris dignitatis et amplioris felicitatis ac beatitudinis, quam aliquis spiritus in his ordinibus, quoniam

A excelsior cælis, id est spiritibus angelicis factus est. Isti enim quatuor ordines angelorum, et juxta librum Dionysii Areopagitæ de cælesti hierarchia numerantur ascendendo. Principatus enim est sub potestate, potestas sub virtute, virtus sub dominatione. Super dominationem vero est ille ordo qui vocatur thronus, quia Deus in eo sedet. Cum ergo Christus super dominationem exaltatus dicitur, liquido demonstratur sedere in throno cum Patre. Principatus autem vocantur, qui ipsis quoque bonis spiritibus angelicis præsumt. Qui subjectis aliis, dum quæ sunt agenda disponunt eis ad explenda divina ministeria, principantur. Ex quibus unus (nisi fallor) apparens Josue, dixit se esse principem exercitus Domini (Josue v). Potestates vero dignioris potentiarum intelliguntur esse quam principatus, ut et subjectis ordinibus angelorum potenter præsent, et ad divinam contemplationem super se potenter extendantur. Virtutes autem dicuntur illi spiritus, [qui virtuti divinæ fortitudinis firmiter cæteris assimilati, ad omnia quæcunque voluerunt, fortiter prævalent. Dominationes vero nuncupantur, qui nobilissimi in illa cælesti curia sunt, et subjectis quibusque dominantur, atque possident eos ut Domini. Et super omnes istos exaltatus est secundum humanitatem suam Christus, qui est caput nostrum, ut et nos membra ejus usque ad istorum societatem et æqualitatem pertingamus. Unde et quod supradictum est, ut sciatis quæ sit supereminens magnitudo virtutis ejus, quam operatus est in Christo, suscitans illum a mortuis, et constituens ad dexteram suam in cælestibus, de nostra resurrectione intelligi potest, ut quemadmodum Christus magnifico resuscitatus est et elevatus in cælum, sic et nos in fine sæculi pro modulo nostro magnifice resuscitemur, et ad cælestia sublimemur. Mirabilis enim et supereminens, id est super omnes alios ex toto manens magnitudo virtutis in nos a Deo veniet, quando in ictu oculi resurgemus, et immutabimur (I Cor. xv), atque rapiemur in nubibus obviam Christo in aera, et sic semper cum illo erimus (I Thes. iv.) Qui, ut dictum est, exaltatus est super omnes præfatos angelorum ordines, et super cæteros altiores. Et ut generaliter dicam, super omne nomen, id est super omnem ordinem vel personam magnæ famæ et magni nominis, quod nominatur non solum in hoc sæculo, ut Michael et Gabriel, sed etiam in alio futuro, ut quædam personæ beatorum spirituum majoris dignitatis in illo cælesti regno, quarum fama et appellatio ad nos in terra manentes nunquam perveniet. Id est dignitas ejus superat dignitatem omnium majorum inter cælestes creaturas, et non solum sublimavit eum Pater super omnes choros angelorum vel personas, sed etiam omnia subjecit sub pedibus ejus (Psal. viii). A similitudine dictum est. Nam, sicut qui submissus est, sub pedibus conculcatur et conculcanti resistere non potest, sic omnia imperio et potestati Christi subjecta sunt, et illi contraire non valent. Omnia subjecit, et ita ut sint sub, id est inferiora. Aliud,

sub, notat omnimodam subjectionem, scilicet quod nec audeant, nec possint contraire imperio ejus. Per pedes enim intelligimus humanitatem ejus, quia sicut pedes sunt inferior pars corporis nostri, sic humanitas est inferior natura Christi. Divinitas enim superior natura ejus est. Et hæc scientia de futuro accipienda est, quando in die judicii omnes cognoscant se subjectos ei, alii recipiendo præmium vitæ, alii patiendo sententiam mortis aternæ, et ipsum Dominum, qui tantus et tam potens tamque sublimatus est, dedit non ex merito nostro, sed sola sua gratia caput super omnia bona virtutum Ecclesiæ, ut ipse caput et fons esset omnium bonorum Ecclesiæ, vel supra omnia membra Ecclesiæ, ut ipse majorum et minorum fidelium caput esset. Vel, sicut in aliis libris habetur, supra omnem Ecclesiam, Judæorum scilicet atque gentilium, ut nullus ad Ecclesiam pertineret, qui hunc caput non haberet. Nam, sicut omnia membra humani corporis reguntur a capite, id est visus, auditus, gustus, odoratus et tactus, ita omnes spirituales sensus Ecclesiæ sunt in Christo, ut in eo videat Deum, et audiat verbum ejus, et gustet quam suavis est Dominus (*Psal. xxxiii*), et odorem notitiæ ejus attrahat, et spiritualiter cum tangat, dicens : « Mihi autem adherere Deo honum est (*Psal. lxxii*). » Qui longe aliter est caput Ecclesiæ, quam princeps aliquis caput exercitus, quia illa est corpus ipsius. Unum enim suat sponsus et sponsa, ut caput et corpus. Ecclesia dico, plenitudo ejus, id est plenarium corpus ejus, nullum enim membrum deest ibi, quod soleat esse in humano corpore, sed sunt ibi qui provident aliis, ut oculi ; sunt qui ministrant, ut manus ; sunt qui loquuntur verbum salutis, ut os, et sic cætera membra. Qui Christus adimpletur non in se, quia sic plenus est et perfectus, ut non possit augmentari, sed in omnibus fidelibus suis. Et quid adimpletur ipse in eis? Omnia bona quæ sunt in eis, id est charitas, humilitas, patientia, castitas, et his similia. Hæc enim omnia Christus est in electis suis. Et dum hæc augmentur in eis et multiplicentur usque ad plenitudinem, ipse nimirum adimpletur in eis. Qui et in futuro feliciter adimplebitur in ipsum, ut sit Deus omnia in omnibus. Vel adimpletur ipse nunc omnia in omnibus, dum membra ejus quotidie secundum quantitatem proficiunt ; et dum defunctis his qui modo sunt in Ecclesia oculi vel os, succedunt alii pro eis ; et sic de cæteris, ut integer maneat numerus membrorum, et secundum successionem semper crescat. Omnia prædicta valent ad confirmandum eos in fide Christi, ut credant eum verum hominem et Deum, perfectamque salutem dare credentibus. Sequitur :

CAPUT II.

« Et vos cum essetis mortui delictis et peccatis vestris, in quibus aliquando ambulastis secundum sæculum mundi hujus, secundum principem potestatis aeris hujus spiritus, qui nunc operatur in filios diffidentiae. In quibus et nos omnes ali-

quando conversati sumus, in desideris carnis nostræ, facientes voluntatem carnis et cogitationum, et eramus natura filii iræ, sicut et ceteri Deus autem, qui dives est in misericordia, propter nimiam charitatem suam qua dilexit nos, carnesemus mortui peccatis, convivificavit nos in Christo, cujus gratia estis salvati, et conresuscitavit et consedere fecit in coelestibus in Christo Jesu, ut ostenderet in sæculis supervenientibus abundantes divitias gratiæ suæ in bonitate super nos in Christo Jesu. Gratia enim estis salvati per fidem, et hæc non ex vobis. Dei enim donum est, non ex operibus, ut ne quis gloriatur. Ipsi enim sumus factura, creati in Christo Jesu in operibus bonis, quæ præparavit Deus, ut in illis ambulemus. »

Ingreditur Apostolus dissuadere et superfluis ostendere carnales observantias, quas prævidetur fore introducendas ab hæreticis, commemorat etiam priora mala, ut in bonis quæ prius perciperunt, humiliantur ; et certum sit quia, si hæc inimicis data sunt, multo magis ampliora dabuntur amicis. Ne enim in tumorem ex bonis erigantur, ostendit de quo statu ad quam dignum vocati sunt, dicens omnia beneficia eis vel apostolis vel toti humano generi, per solam Dei gratiam esse data. Littera sic conjungitur : Suscitavit Christum a mortuis, et ad dexteram suam elevavit, et vis quæ conresuscitavit, et in coelestibus consedere fecit. Sed istud inferius ubi dicit, Deus autem, qui dives est, ideo interposuit, ut dissuaderet carnales observantias, et illos humiliaret ex recordatione præcedentium culparum ; ac si diceret : Deus corporaliter suscitavit Jesum Christum a mortuis, et respiritualiter cum eo resuscitavit ab interna morte, cum essetis mortui in anima delictis et peccatis vestris. Sicut enim justitia est vita animæ, sic peccatum mors ejus. Delictum nonnulli volunt accipere secundum consensum malæ voluntatis, et peccatum secundum executionem operis, vel delictum est, quando aliquis facere negligit, quod a Deo præcipitur ; peccatum, quando præsumit agere quod prohibetur. Vos mortuos delictis et peccatis gratia Dei vivificavit. Hoc multum valet ad dissuasionem carnalium observantiarum, quia si de morte animæ ad vitam non illis observantibus, sed gratia duce pervenire, non est ratio ut post acceptam vitam his indigeant. Mortui eratis, quia aliquando, id est ante conversionem vestram ambulastis in illis delictis et peccatis. Et ambulastis in illis de alio ad aliud, secundum sæculum hujus mundi, id est sequendo et imitando sæculares homines ista mandana appetentes. Vel secundum malitiam sæculi hujus mundi, qui totus in maligno positus est (*I Joan. v*), ambulastis. Nam superior mundus, id est regnum cælorum, habet aliud sæculum, in quo regnat justitia, vel secuti hoc sæculum, quia sicut in hoc sæculo succedit tempus tempori, ita semper in vobis succedebat peccatum peccato ; et ita com-

parabiles sæculo fuistis in continuata serie peccatorum. Sæculo dico, hujus corruptibilis et caduci mundi, cujus sectatores diversis vitiis assidue corumpuntur, et cito decidunt in interitum. Nec solummodo secundum hoc sæculum ambulastis in via iniquitatis, sed etiam, *secundum principem potestatis aeris hujus*, id est secundum quod suadebat vobis princeps, qui in hoc aere potestatem habet vel infideles tentandi, vel ipsum commovendi. Secundum hunc iniquitatis principem ambulant, qui secundum voluntatem ejus peccant. Qui est princeps potestatis aeris, quia principatur exercitui dæmonum, qui sunt potestas aeris, quia possunt in eo discurrere, et suggestiones hominibus ministrare; vel quia ipse Satanas in hoc eodem caliginoso aere, vicino terris, potestatem habet, ut diximus, volitandi ad suadendum mala, sive commovendi aliquoties tempestates ad incommoda hominum, sicut fecit adversum Job (*Job 1, 11*). Et quis est iste princeps? *spiritus*, id est non carnalis substantia, sed incorporea. Per hoc quoque innuitur, quia multum erant in peccatis, quoniam spiritus, id est res invisibilis a quo nesciebant cavere sibi, eos impugnabat. Periculosius enim impugnatur homo re invisibili quam visibili, quia si hostem videret, sibi fortasse caveret. *Qui spiritus operatur in filios diffidentis*, id est in illos qui volunt tenere carnales observantias, qui diffidunt de Christo, non credentes eum sufficere ad justitiam et salutem, nisi et carnales observantias superadjiciant. Ob hoc dicuntur filii diffidentis, quia diffidentia infidelitatis genuit eos in tali errore, id est fecit eos diffidere. In quibus operatur diabolus ut diffidant a Christo et carnales caeremonias quærant *nunc*, id est post adventum Christi, qui vera lux est, et umbram veterum observantiarum exhibitione veritatis removet. Ac si dicatur: Quandoquidem malignus hæc operatur, etiam postquam Veritas apparuit, id est opus illius est adhuc facere diffidere, videte ne forte vos diffidatis. Et hoc valet ad propositum. Nam si, cum adhuc tanta ac tali multiplicitate peccatorum irretiti erant, liberati sunt sola gratia, non carnalibus observantiis, patet, quia post liberationem superflue eas tenerent. Vel in filios diffidentis, id est in illis qui propter sua multa peccata diffidunt de æternis bonis, et desperant de salute sua, operatur diabolus *nunc*, id est postquam de manu ejus erepti fuerant. Vel ideo vocantur filii diffidentis, quia de eorum salute diffidit mater Ecclesia, considerans in eis operationem nequissimi spiritus. Ne autem viderentur Ephesii ideo fuisse tam gravibus irretiti peccatis, quia carnalibus observantiis non studuerant, ostendit etiam servientes illis caeremoniis similiter implicitos fuisse peccatorum multitudine. Et hoc est: *In quibus delictis et peccatis non solum vos, qui non habetis carnales observantias, sed et nos qui illas custodiebamus, et illi qui modo sunt tanti*

A apostoli, nos, inquam, *omnes conversati sumus*, id est per omnia genera vitiorum versati sumus *aliquando*, id est ante conversionem nostram *in desideriis carnis nostræ*, id est in concupiscentiis ejus. Et eramus *facientes voluntatem carnis*, id est opere complebamus, quod carnalitas nostra exigebat secundum libidinem et crapulam, et cætera quæ ad delectationem carnis attinent, et voluntatem *cogitationum* faciebamus, secundum iram et superbiam et ambitionem et cætera vitia, quæ in corde sunt, et non in delectatione corporis. Si vero carnis nostræ sic legatur (219), ita dico nos fuisse in delictis, quando manebamus in desideriis carnis nostræ, id est in vehementia concupiscentiæ, ministratæ a carne, plus voluit in desideriis notare, quam concupiscentiam, id est multiplicem et omnimodam vehementiam concupiscentiæ quam per legem incurrerunt. Unde Romanis ait: « Cum enim essemus in carne, passiones peccatorum quæ per legem sunt, operabantur in membris nostris (*Rom. vii*). » Et item: « Peccatum per mandatum operatum est in me omnem concupiscentiam (*ibid.*). » Et propterea de maledicto mortis venientes *eramus filii iræ*, id est filii ultionis, filii gehennæ, et hoc *natura*, id est originali peccato, *sicut et cæteri* qui legem non acceperant. Nam cum ira Dei nascuntur omnes mortales, et peccante primo homine, vitium pro natura inolevit. Sed per Dei gratiam nonnulli de filiis iræ sunt filii adoptionis, quod per legem non valet fieri; ideoque Judæi carnales licet haberent legem, nihilominus filii iræ manebant sicut nati fuerant, quemadmodum et cæteri populi terrarum qui sine lege erant. Et per hoc voluit innuere, legem nihil posse ad peccatorum alleviationem, cum ipsi qui observabant legalia præcepta, debiti essent iræ Dei, sicut et alii qui mandata legis ignorabant. Hoc enim de lege sola sine adjunctione gratiæ dicitur. Quod totum ad gratiæ commendationem valet, et sic ad carnalium observationum destructionem, quia, cum essent mortui multiplicitate peccatorum, serviendo etiam illis caeremoniis, gratia Dei eos convivificavit, quod lex facere non potuit. Vos eratis mortui, et nos similiter, et eramus ex natura vitiata filii iræ; sed *Deus, qui dives est in misericordia* (*Rom. v*), quoniam secundum largas misericordiæ suæ divitias omnia peccata et originalia et actualia per baptismum remisit, ut ubi abundavit peccatum, superabundaret gratia propter nimiam charitatem suam erga nos summam, id est omnium sensum superantem, cum ipse Filium sibi coæternum faceret incarnari et mori, *que dilexit nos Deus, cum essemus spiritualiter mortui peccatis, convivificavit nos in Christo*, id est vivificavit nos cum Christo secundum remissionem peccatorum, et innocentiam atque virtutum consummationem; hoc est, sicut Christo perpetuitatem vitæ in æterna beatitudine attribuit, sic nobis largitus est veram vitam innocentis et

justitiæ. *Cujus Christi gratia vos Ephesii et alii gentiles salvati estis*, sicut et nos secundum remissionem, et innocentiam et justitiam. Et non solum convivificavit nos, sed etiam *conresuscitavit*, id est spe cum Christo jam resuscitavit, ut quemadmodum Christus est resuscitatus, sic nos spei certitudine expectemus resuscitandos, et etiam *fecit nos consedere*, id est spe cum Christo sedere ut judices in æterna beatitudine, et hoc *in cœlestibus locis*, vel inter cœlestes essentias. In sessione enim designatur judicium, quia sedere solet qui judicat. Faciet ergo nos sedere cum Christo, quia faciet judicare cum illo. Imo cum eo jam nos resuscitavit, et cum eo sedere fecit in cœlestibus, quia, quamvis corpus nostrum nondum ibi sit, tamen spes nostra jam ibi est. Et hoc totum *in Christo Jesu*, id est in potentia et virtute et gratia ejus. Hæc omnia multum valent ad intentionem, quia, cum hæc universa det sola dives gratia, frustra post hæc inducuntur carnales observantiæ. Ideo sua prædestinatione et nostra spe nos fecit jam consedere, *ut ostenderet in sæculis venientibus super ista temporalia sæcula*, id est in sæculis æternitatis, vel in sæculis, quæ post nos in hoc sæculo venient, *abundantes divitias*, id est æternam beatitudinem, quæ adeo dives erit, ut ibi nulla re quis indigeat, vel donationem beneficiorum suorum abundanter divitem et copiosam, divitias dico *gratiæ suæ*, id est propter gratiam suam datas, et hoc *in bonitate sua*, non in consideratione meritorum nostrorum, « quoniam melior est misericordia ejus super vitas (*Psal. LXXII*). » Et tantæ ejus divitiæ erunt *super nos*, id est multo majores quam digni sumus accipere. Vel super nos erunt, id est omnem intelligentiæ nostræ capacitatem exsuperabunt, quia tam magnæ et tales erunt, quas nec oculus vidit, nec auris audivit, nec cor hominis excogitavit (*I Cor. I*). Tantum enim dabitur, quantum mens investigare non potest. Quis enim intellectus capere sufficiat illa supernæ civitatis quanta sint gaudia, angelorum choris interesse, cum beatissimis spiritibus gloriæ Conditoris assistere, præsentem Dei vultum cernere, incircumscriptum lumen videre, nullo mortis metu affici, incorruptionis perpetuæ munere lætari? Et hæc omnia dantur *in Christo Jesu*, id est in potentia et gratia et largitate Christi. Ad quid igitur post hæc carnales observantiæ inducerentur? Vere gratia Dei largas habet divitias, nam *gratia ejus estis salvati* et mundati a peccatis, et hoc *per fidem*, id est fide interveniente, quia credidistis vos gratia posse salvari. Et tamen *hoc non est ex vobis*, sed ex vocante Deo, quia ex auditu Evangelii accepistis fidem. *Dei enim donum est ipsa fides*, vel vocatio vestra, et non [partim, sed pure donum Dei, quia *non ex operibus vestris*, id est non est ibi admistio operum, *ut ne quis gloriatur quod fidem habeat ex operibus vel sine gratia salvatus sit propriis operibus*. Hic videtur Apostolus innuere quod de operibus isti gloriarentur, non de gratia Dei. Sed ille maxime vult de suis operibus gloriari,

qui per carnales observantias fidem et justitiam petit, vel se accepisse putat. Et vere gratia salvati estis, non ex operibus vestris, quæ ex vobisipais habetis, sed tantum his operibus, in quibus vos fecit, id est formavit et creavit (*Gen. I*). Et hoc est: *Ipsius enim sumus factura* et nos et vos, *creati in Christo Jesu in operibus bonis*, non illa creatione, qua homines facti sumus, sed ea de qua ille dicebat, qui utique jam homo erat: « Cor mundum crea in me, Deus (*Psal. I*). » Et Apostolus iste novam creaturam alibi laudat (*Galat. VI*). Facti ergo sumus et creati in operibus bonis, quia restitutione liberi arbitrii data est nobis libertas bene operandi, id est facti sumus habiles ad bene operandum. Et hoc factum est *in Christo Jesu*, id est in gratia ejus, non in merito nostro. Quæ opera bona Deus prædestinando præparavit præveniens arbitrium nostrum. Omne namque bonum a gratia Dei sumit originem. Et ita præparavit, ut in illis ambulemus, id est promoveamur et proficiamus de bono ad melius. Et quia his modis nos salvavit, manifestum est nos gratia ejus esse salvatos. Et si gratia ejus sumus salvati, tunc frustra carnales observantiæ superinducuntur.

« Propter quod memores estote quod aliquando vos gentes eratis in carne, qui dicimini præputium ab ea dicitur circumcisio in carne manfacta, quia eratis illo in tempore sine Christo, alienati a conversatione Israel, et hospites testamentorum, promissionis spem non habentes, et sine Deo in hoc mundo. Nunc autem in Christo Jesu vos, qui aliquando eratis longe, facti estis prope in sanguine Christi. »

Contulerat Judæos et gentes quod utrique fuissent sub peccato. Nunc ostendit gentes fuisse indigniores et impropria Judæorum perpressas, ut modo æquales Judæis, magis sint obnoxii gratiæ Dei. Ac si dicat: Quando quidem factura Dei estis, creati in operibus bonis, ergo nolite oblivisci de quantavilitate vitiorum ad quantam sublimitatem virtutum Deus vos promovit, ut majorem gratiarum actionem ei referatis pro tantis beneficiis quæ vobis contulit. Et hoc est: *Propter quod*, id est quia de malis vos eripuit Deus et bonis ditavit, *estote memores, quod aliquando*, id est ante conversionem olim vos eratis gentes, id est quales geniti fueratis; nec solum secundum originem, sed etiam *in carne*, id est secundum carnem, hoc est secundum carnis voluntatem et carnis appetitum, quia faciebatis omnia, quæ carnis voluptas suggerebat. Vos dico, qui in tantum eratis peccatores, ut a peccatrice gente Judæorum despiceremini, objiciente vobis vos esse præputium, id est præputiatos. Et hoc est: *qui dicimini*, id est qui vocamini hoc nomine opprobrii, quod est, *præputium*, quia secundum illam partem viri magis ad delectationem carnis incenduntur, et libidine punguntur atque immunditiâ polluantur, et hoc *ab ea plebe, quæ peccatis est plena*, sed tamen dicitur vere esse circumcisio *in carne*, non in spiritu; et *manfacta*, non a Deo. Sola

namque caro amputabatur, non cordis prava cogitatio. Et merito despiciebamini, *quia eratis illo in tempore* in nequitia notabili, *sine Christo*, id est sine Christi fide vel notitia. Et eratis *alienati* et separati a *conversazione Israel*, id est Judaici populi, quia dedignabantur vos secum habitare. Et eratis *testamentorum hospites*, id est si quis vestrum veniebat ad Judaismum, ut hospes et advena accipiebatur in lege, et vilis inter Judæos reputabatur. Legem dicit pluraliter testamenta propter multiplices promissiones suis cultoribus factas, et quia in Veteri Testamento continebatur Novum. Vos dico *non habentes ante spem promissionis*, id est de nulla promissione sperantes, quia nec ea sperabatis quæ promissa sunt Abrahæ (*Gen. xxii*), nec ea quæ promissa sunt David (*Psal. cxxxi*), vel cæteris patribus, et ideo non erat vobis spes illius divinæ promissionis, quia eratis *sine Deo*, id est sine Dei Patris notitia *in hoc mundo*, tam malo, qui totus in maligno positus est (*I Joann. v*). Quod nunc dicit, *sine Deo*, id est sine Dei Patris agnitione et gratia, hoc est quod dixerat, *sine Christo*, id est sine Christi notitia et gratia, quia quisquis ignorat Patrem, ignorat et Filium; vel quisquis non habet Filium, nec Patrem habet; et qui unum habet, habet et alium. Olim tales fuistis, *sed nunc*, id est post acceptionem gratiæ *in Christo Jesu*, id est in potentia et largitate Christi, *vos qui aliquando*, id est ante conversionem, *eratis longe a Deo*, non corpore, sed corde et meritis, *facti estis ei prope* vel omnibus supradictis, a quibus longe eratis, et *hoc in sanguine Christi*, id est in vi effusionis sanguinis Christi. Ille enim sanguis tantæ efficacæ fuit, ut per illum hæc omnia possent haberi. Qui nisi emanasset, nihil prædictorum bonorum nobis contigisset. Omnia hæc accepistis cum in potentia Christi Jesu, tum in efficacia fusi sanguinis ejus, et non in carnalibus observantiis. Si ergo tunc cum tam multipliciter essetis remoti a Deo, ut notatum est, non indignistis carnalibus observantiis, sed sola gratia salvati estis in gratia et sanguine Christi, multo minus modo, cum jam recepistis vestram salvationem. Solus itaque Christus vobis est tenendus firmiter et amandus, qui vos de tantis malis eripuit, et Hebræis fidelibus pares et socios fecit.

« Ipse enim est pax nostra, qui fecit utraque
« unum, et medium parietem maceriæ solvens in-
« imicitias in carne sua, legem mandatorum de-
« cretis evacuans, ut duos condat in semetipsum,
« in unum novum hominem, faciens pacem, ut re-
« conciliet ambos in uno corpore Deo per crucem,
« interficiens inimicitias in semetipso. Et veniens
« evangelizavit pacem vobis, qui longe fuistis, et
« pacem his qui prope, quoniam per ipsum ha-
« bemus accessum aucto in uno Spiritu ad Pa-
« trem. »

Vere sanguis Christi Deo vos proximos fecit in Israelitis atque testamento et promissionibus quia ipse Christus est pax nostra. id est qui nos Deo et

angelis pacificavit, et qui Judæos et gentes diversis ritibus discordantes fecit in fide concordantes. Pax enim pacatos facit, sicut justitia justos. Pax nostra ipse est, *qui utraque fecit unum*, id est Judaicum populum et gentilem fecit unanimes in fide et cultura unius Dei et moribus. Et quomodo hoc fecerit, subditur: *Medium parietem maceriæ solvens*, parietem intelligitur vocare circumcisionem, quæ dividebat Judaicum populum a gentili. Sicut enim paries medius dividit locum a loco, ita circumcisio separabat populum a populo. Qui paries in adventu Christi facta est maceria, quoniam circumcisio quæ ante ejus adventum evacuari non poterat, postquam ipse venit, facile fuit ut destrueretur. Maceria quippe quasi macra series dicitur. Est enim maceria congeries lapidum, ubi nulla cæmenti colligatio est, quæ levi pulsu ruinam patitur. Paries autem vocatur series lapidum cæmento colligata et constricta, quam dejici non est facile. Sic circumcisio præcepto Domini firmata usque ad tempus correctionis, non poterat evacuari, sed tempore correctionis voluntate Dei debilitata, ruinæ subjecta fuit. Et bene posuit, solvens parietem, quia circumcisio quæ ante adventum Christi ligata erat ligamine præcepti, in adventu ejus soluta fuit, nullo jam præcepto eam cogente fieri. Nec solum circumcisionem solvendo fecit utraque unum, sed etiam solvendo *inimicitias in carne sua*. Inimicitias vocat idololatriam. Judaicus enim populus inimicabatur gentili idolis servienti, et gentilis Judaico idola contemneret. Et recte vocavit idololatriam inimicitias, et non parietem, circumcisionem vero parietem. Circumcisio enim ante tempus correctionis fuerat in ædificio legis justitiæ, quia præceptum erat in lege, ut circumcisio fieret; at idololatria nullo modo unquam in ædificio Dei fuit, quia Deo semper contraria fuit. Destruxit inimicitias, et hoc in carne sua, id est per incarnationem suam, scilicet quia incarnatus est, ideo evacuata est idololatria. Postquam enim carnem assumpsit; discipulos elegit qui doctrina veritatis gentes illuminarent. Et proprie dictum est, solvens idololatriam, quia gentilibus astricta et ligata erat vinculo usus. Vel obstaculum legis vocatur paries, quia legales observationes erant quasi

D quidam paries disjungens gentes a Judæis. Paries dico maceriæ, id est qui facile destrueretur veniente gratia. Erat autem medius hic paries, ut neuter populus alteri concordaret. Stante enim hoc pariete, erant inimicitias, ira et invidia inter eos. Ideoque destruendus erat, ut inimicitias destruerentur. Et hoc factum est in carne Christi assumpta vel immolata, qui in carne apparens, et a mortuis resurgens, omnem legem cessare fecit, et ablato omni obstaculo et dissensione, utrumque populum in sua fide conjunxit. Vel paries erat obscuritas legis et prophetarum, obstruens nobis viam vitæ, et medium se inter nos et Deum objiciens. Christus carne et passione sua solvit medium parietem et maceriam, id est obscuritatem veterum prophetarum, et

omnis antiquæ legis aperuit sacramenta, et dissipata incendendi difficultate, viam oculis omnium revelavit, ut qui vult ad Deum pergere, nullo impediatur obice, nec obscuritatis caligine terreatur. Unde eo in cruce spiritum emittente velum templi acissimum est medium, et Sancta sanctorum omnibus patuerunt. Idem enim significat illud velum quod et iste paries. Sed et inimicitias quæ inter nos et Deum erant, solvit in carnis suæ sacrificio Christus. Et hæc omnia fecit, *evacuans*, id est destruens et annihilans *legem mandatorum*, id est aliarum carnalium observantiarum, præter circumcisionem, quia de illa jam dictum est. Et bene carnales observantiæ dicuntur mandata, quia non erant stabiles, sed mutabiles; sicut illa quæ mandantur, possunt et solent permutari. Evacuans dico, et hoc suis decretis, id est impermutabilibus statutis, ex ratione firmiter factis, scilicet præceptis Novi Testamenti, cui succedit aliud testamentum. Decretum solemus dicere, quod a Deo ratum et autorisabile, ut non sit fas illud permutari. Quia ergo illa erant mandata, id est transitoria, et ista decreta, id est stabilia, merito illa, id est carnales observantiæ evacuatur, istis id est præceptis Novi Testamenti. Ubi enim baptismum et fidem suadet Novum Testamentum, ibi evacuatur secundum carnales ceremonias Vetus Testamentum. Et hoc totum, scilicet solvere inimicitias, evacuare legem, fecit ipse, ut duos populos prius per legem divisos condat, id est conjungat in tantum, ut eant ambo simul in semetipsum, id est in Christum, videlicet ut ambo tendant pariter in unum novum hominem qui Christus est, ut unitatem et novitatem in ipso habeant, et conformitatem ejus simul teneant. Ipse dico, *faciens pacem*. Inter eos destructis inimicitias, ut alius non inquietet illum, sed diligat ut seipsum. Pax enim, id est remotio inquietationis, est gradus quo pervenitur ad unionem dilectionis. Quod dicit faciens pacem, diversum est ab eo quod superius dixit: « Ipse enim pax nostra, » quia illud declarat eum esse ipsam pacem, quæ pacificat discordantes; hoc autem quod dicitur, *faciens pacem*, notat illum esse mediatorem et auctorem pacis. Et iterum ad aliud ponitur. Nam illud, id est esse pacem, ad hoc ponitur, ut demonstret illos qui longe erant, factos esse prope in Christo Jesu; faciens vero pacem, ad hoc, ut ostendat quo gradu ad charitatem perveniatur. Et quod dicit, ut duos condat populos in semetipsum, diversum ab eo quod posuit, qui fecit utraque unum, quod intelligimus secundum fidem; condere autem duos in semetipsum, accipimus secundum charitatem. Ostendo itaque quomodo Christus utrumque populum sibi invicem conjunxit, et consequenter ostendere quomodo utrumque reconciliavit Deo. Quasi dicat: Ita conjunxit duos in semetipsum, ut reconciliet Deo Patri ambos positos in uno corpore Christi, quod est Ecclesia. Et hoc fecit per crucem, id est crux fuit via, qua perventum est ad reconciliationem. Nisi enim Christus

A se hostiam Patri obtulisset in cruce, nostra reconciliatio ad Deum facta non fuisset. *Interficiens inimicitias in semetipso*. Ac si dicatur: Cum per crucem nos reconciliaret Deo, non fecit hoc per crucem quam alius passus sit; sed ita, ut interficeret, id est deleret inimicitias quas Deus juste culpa primi parentis et nostrorum reatu peccaminum in nos habebat; et hoc faceret non in alieno corpore videlicet prophetæ vel apostoli, sed in semetipso. Ipse enim pro nobis Deo satisfecit, sustinendo passiones et opprobria vice nostri, quas nos merito pati deberemus. Et quia per eum inter nos et Deum facta est reconciliatio, frustra igitur post hæc observantur carnales ceremoniæ. Et non solum pacem facit in cruce, sed et antequam crucem ascenderet, veniens, id est in carne apparens, *evangelizavit pacem*, id est bene nuntiavit ore proprio *obis* gentilibus, *qui longe ab eo fuistis*, id est recessistis in idololatriam, et *pacem his qui prope erant*, id est Judæis, quia unum Deum colebant. Hanc enim pacem evangelizavit, cum diceret: « Alias vos habeo, » etc., usque, « et unus pastor (Joan. x). » Et item: « Nemo venit ad Patrem nisi per me (Joan. xiv). » Jure enim pacem nobis ad invicem nuntiavit et ad Deum, *quoniam per ipsum habemus ambo populi accessum*, id est facultatem accedendi ad Deum Patrem, et hoc in uno spiritu, id est in unanimi voluntate fidei et religionis atque charitatis, ut sit nobis cor unum et anima una (Act. iv). Vel in uno spiritu, id est in Spiritu sancto, qui unus atque idem est, licet varia dona distribuat. Ad Patrem accedimus secundum conformitatem bonitatis ejus, et in futuro secundum participationem beatitudinis illius. Et cum hæc omnia facta sint per Christum et fiant, cur amplius carnales observantiæ inducentur?

« Ergo jam non estis hospites et advenæ: sed estis cives sanctorum et domestici Dei, superædificati super fundamentum apostolorum et prophetarum, ipso summo angulari lapide Christo Jesu. In quo omnis ædificatio constructa crescit in templum sanctum in Domino. In quo et vos cœdificamini in habitaculum Dei, in Spiritu sancto. »

Quandoquidem vos gentiles unum cum Judæis in Christo facti estis, et Deo pariter reconciliati, ergo jam a tempore fidei non estis hospites Testamentorum et advenæ, sicut olim eratis. Hospites enim et advenæ erant gentiles inter eos qui Testamenta habebant, vel quia ad tempus more hospitem veniebant et recedebant, vel quia si qui eorum ad Judæum ritum convertebantur, advenæ, id est proselyti vocabantur. Hospites enim sunt in transitu. Sed jam isti non erant hospites Testamentorum, quia non in transitu et recessu videbant ipsa Testamenta, sed assidue morabantur et exercebantur in eis, et prout decebat, observabant ea. Advenæ autem dicuntur, qui cum non sint indigenæ morantur tamen in loco unde non sunt indigenæ. Sed isti postquam effecti erant unum cum illis, igitur qui quasi indigenæ

Testamentorum erant, non jam alienigenæ sed indigenæ reputabantur, ut ipsi cum his, cum quibus erant, essent unum, quoniam ita quasi naturaliter habebant Testamenta, ut illi qui in primis habuerant ea. Gratia enim divina utrisque æqualiter Novum Testamentum præbuit, sed et Vetus juxta spiritale sensum, et gentiles ideo quoque non erant jam advenæ in Testamentum, sed indigenæ, quia regenerati erant ex baptismo, qui prædicatur in utroque Testamento. In uno enim dicitur: « Effundam super vos aquam mundam, et mundabimini ab omnibus inquinamentis vestris (*Ezech. xxxvi*); » in alio: « Ite, baptizate omnes gentes (*Math. xxviii*). » Non estis jam hospites Testamentorum id est peregrini vel indigniores Hebræis in fide, sicut olim recepti in lege; et advenæ, id est alieni et exsules; *sed estis cives sanctorum*, id est ejusdem juris et dignitatis in civitate Dei; cives non carnalis Israel, sed sanctorum, quia cum sanctis unam incolitis civitatem, quæ est Ecclesia. Habetis enim communionem cum sanctis in omnibus sacramentis Ecclesiæ, qui olim fuistis alienati a conversatione Israel. Nec solum cives sanctorum estis, *sed et domestici Dei*, id est familiares et amici Dei in domo ejus, secundum multam perfectionem scientiæ et virtutum, et secundum multam dilectionem quam ipse erga vos habet. Domesticos enim suos familiariter diligit, et arcana secretorum suorum eis revelat ut amicis, atque dona largitur amplissima. Nunc estis domestici Dei, qui olim eratis sine Deo, vos dico *superædificati* in ædificio Dei *super fundamentum apostolorum et prophetarum*, id est super fidem Christi, super quam primo fundati sunt apostoli et prophætæ. Christus enim fundamentum est totius divini templi vel diviniæ civitatis, quia ex eo et ex ejus fide et gratia inchoant omnia bona, et ipse totum spiritale portat ædificium. Ipse ergo est fundamentum apostolorum et prophetarum, quia super illum incumbunt et firmi permanent apostoli et prophætæ qui totam deinde fabricam sancti ædificii portant. Ipse est fundamentum, id est fides ejus est prima firmitas, et initium ac sustentaculum omnis ædificii virtutum ac bonorum operum. Super quam fidei firmitatem innitentes, *superædificati estis* in bonis operibus, id est ad altiora proVecti in crescendo de virtute in virtutem. Et hoc factum est in *ipso summo angulari lapide*, scilicet *Christo Jesu*, qui duos in se populos quasi duos parietes conjungit, et fortitudo est totius ædificii. Qui ita est angularis lapis, ut non solum sit fundamentum ipsius ædificii, id est non solum sit in inferiori parte, sed etiam sit summus in ipso ædificio. Ita est summus iste lapis, ut non possit alius lapis angularis huic superaddi. Illi enim volunt huic superponere alium angularem lapidem, qui carnales observantias quærunt superaddere, et eas contendunt ad salutem valere. Sed nihil potest huic superponi. Ipse enim inferius est lapis angularis secundum fidem, ipse est et summus secundum justitiæ consummationem. Vel ideo est

A summus lapis, cum sit fundamentum, quia origo fundamenti hujus summitatem tenet. Et sicut fundamentum corporæ fabricæ in imo est, sic fundamentum spiritualis fabricæ in summo est. Si ad terram ædificaremur, in imo nobis ponendum erat fundamentum. Quia vero cœlestis fabrica est, ad cœlos præcessit fundamentum nostrum. *In quo* fundamento, in quo lapide summo *omnis ædificatio* tam Judæorum quam gentilium, constructa secundum fidem et sacramentorum perceptionem, atque secundum innocentiam et justitiam, *creciscit* in virtutibus proficiens, quia nemo tam perfectus est, qui non possit crescere. Crescit unusquisque electorum: et major et minor, quando est in hac vita. Neque enim ad ædificium electorum pertinet, licet Christianitatis vocabulum habeat, qui crescere in bonis et augmentari non studet. Omnis enim ædificatio tam singularum personarum fidelium, quam singularum virtutum, constructa in Christo, crescit assidue eundo et proficiendo *in templum sanctum*, id est ut fiat sanctum et mundum Dei templum, et hoc totum *in Domino*, id est in operatione Domini, quia Dominus hoc agit, non aliqua carnalis observantia. *In quo* Christo non solum Judæi ædificantur, sed et vos gentiles *coædificamini*, id est æque ut Judæi ædificamini cum eis secundum justitiam, et in tantum, ut eatis *in habitaculum Dei*, id est ut efficiamini domus et sanctuarium Dei, et hoc *in Spiritu sancto*, id est in operatione Spiritus sancti, et non in carnalibus observantiis.

CAPUT III.

« Hujus rei gratia ego Paulus vincetus Christi Jesu pro vobis gentibus, si tamen audistis dispensationem gratiæ Dei, quæ data est mihi in vobis, quoniam secundum revelationem notum mihi factum est sacramentum, sicut supra scripsi in brevi, prout potestis legentes intelligere prudentiam meam in mysterio Christi, quod aliis generationibus non est agnatum, filiis hominum, sicuti nunc revelatum est sanctis apostolis ejus et prophetis in Spiritu, esse gentes cohæredes et concorporales et participes promissionis in Christo Jesu per Evangelium, cujus factus sum ego minister secundum donum gratiæ Dei, quæ data est mihi secundum operationem virtutis ejus. »

Hujus rei gratia, id est pro hac re grata mihi, scilicet ut vos coædificemini, vel pro gratis Dei implenda in hac re (*I Cor. xv*), *ego Paulus vincetus sum*. Et ponit per quæ ipsi sunt coædificati, quia scilicet Deus revelavit illi salutem ad gentes pertinere, et misit illum eis prædicare, et facit pati pro illis, et magis sint Deo grati. *Ego Paulus vincetus Christi Jesu*, id est pro servitio et nomine Christi, vel in potestate et voluntate ejus ego vincetus sum, quia quando voluerit, me dissolvat. Vel ego vincetus pro Evangelio sum Christi, non diaboli, ut illi qui pro suis criminibus tenentur in vinculis. Vincetus Christi sum, et hoc *pro vobis gentibus* quibus viam salutis

dine, voluit nobis designare Patris et Filii potentiam. Suum enim benedicere, est benefacere. Et quid est aliud tunc benefacere, quam participationem beatitudinis impendere? Unde Psalmista :

Convertere, anima mea, in requiem tuam, quia Dominus benefecit tibi (*Psal. cxiv.*) » Et quod ipse nos benedicet illa tanta benedictione, ita est firmum et certum, sicut et illud quod antequam mundus fieret, nos elegit prædestinando ad vitam. Vel quod nos benedicet, non faciet improvide, sed *sicut elegit nos a* massa perdendorum ante mundi principium.

Ita enim benedicet sicut prædestinavit, quia unicuique benedictionem dabit, juxta modum quem ei præordinavit. Elegit nos, id est extra de massa peccatorum legit et abstraxit, et hoc fecit *in ipso*, id est in Christo, ut essemus membra Christi, et ista electio facta est *ante mundi constitutionem*, id est ante omnem creaturam. Et ad hoc nos elegit, *ut essemus sancti et immaculati* Inter sanctum et immaculatum hoc interest, quod sanctus immaculatus quoque intelligi potest, immaculatus vero non statim sanctus. Nam parvuli quoque immaculati sunt, quia integro corpore nullum possunt facere peccatum; et tamen sancti non sunt, quia sanctitas voluntate et studio comparatur. Et quod immaculatus dici potest ille, qui peccatum non fecit, sanctus autem is qui virtutibus plenus est. Sancti ergo intelliguntur perfecti immaculati vero imperfecti. Sancti in virtutibus promoti, immaculati per baptismum a peccatis mundi, et post non inquinati. Tales igitur nos prædestinavit Deus futuros, et hoc non in vana æstimatione hominum, sed *in conspectu ejus* qui veritatem conspicit et occulta considerat. Si enim viderit nos veraciter esse sanctos et immaculatos, quidquid homines de nobis æstiment, ipse nobis præmium reddet. Et econtra si per hypocrisim voluerimus simulare sanctitatem, licet nos judicent sanctos indocti homines, ipse tamen damnabit. Elegit *u* essemus sancti et immaculati in oculis ejus, et hoc *in charitate*, id est ut in illam sanctitatem et immaculationem promoveremur, non timore pœnæ, sed amore justitiæ. Notandum itaque quod ad commendandam magnitudinem gratiæ enumerat Apostolus beneficia ejusdem gratiæ, quæ a Deo per Christum humano generi data sunt. Deus enim ante mundi constitutionem cum nullus quidquam meruisset, quia nullus adhuc erat præordinavit quod in tempore gratiæ aliquos a perdendis separaret, et justos immaculatosque faceret, præordinavit quod et illos ad æternitatem perduceret. Harum prædestinationum alteram hic implet, quod sanctos facit; alteram in futuro complebit, dando immortalitatem et beatitudinem. Sic enim prædestinando jam benedixit nos in cœlestibus, cum adhuc in terris maneamus, sicut prædestinando elegit ante mundi constitutionem, cum necdum essemus. Et elegit non quia futuri eramus sancti, sed ut essemus sancti, id est ipse diligendo per gratiam fecit ut essemus sancti et immaculati.

« Qui prædestinavit nos in adoptionem filiorum
« per Jesum Christum in ipsum, secundum propositum voluntatis suæ, in laudem gloriæ gratiæ
« suæ, in qua gratificavit nos in dilecto Filio suo.
« In quo habemus redemptionem per sanguinem
« ejus, remissionem peccatorum secundum divitias
« gratiæ ejus, quæ superabundavit in nobis in
« omni sapientia et prudentia : ut notum faceret
« nobis sacramentum voluntatis suæ, secundum
« beneplacitum ejus, quod proposuit in eo, in dispensatione plenitudinis temporum, instaurare
« omnia in Christo, quæ in cœlis, et in terra sunt
« in ipso. »

Prædestinatio est gratiæ præparatio, gratia vero jam ipsa donatio. Et nos jure benedicimus Deum, qui non solum prælegit nos ut faceret sanctos et immaculatos, sed etiam *prædestinavit in adoptionem filiorum*. Prædestinavit, id est ante et firme ordinavit. Et hoc est præ, id est ex antiquissimo tempore. Destinare enim, per se longinquitatem notat præteritum, indicat tempus remotum. Prædestinavit, et hoc in adoptionem filiorum id est ad hoc ut iremus in filios secundum multimodam conformitatem virtutum ejus in nobis expressam, scilicet ut quantum humanæ naturæ possibile est, in sanctitate et justitia nostro Patri efficiamur conformes et imago bonitatis ejus, in quantum fieri potest, exprimator in nobis. Quod ire in filios non est ex merito nostro, sed ex gratia sua, qua adoptavit nos in filios. Quod Apostolus notare voluit dicens adoptionem. *Majus* vero est quod dicit adoptivos Dei filios, quam quod dixerat sanctos et immaculatos. Nos prædestinavit in filios, et hoc *per Jesum Christum* mediatorem, ut per eum qui naturalis est filius, faceret sibi adoptivos filios, tendentes *in ipsum* Christum, id est in conformitatem ejus per fidem et bonos mores. Vel hanc prædestinationem fecit per Jesum Christum, id est per virtutem et sapientiam suam, quia nihil fecit unquam Pater nisi per Filium, qui est virtus et sapientia ejus. Unde patet Filium esse coæternum et coæqualem Patri (*Philip. 11*). Et quod nos prædestinavit, hoc fecit, *secundum propositum voluntatis suæ* id est sequendo hoc propositum quod proposuit in prophetis, quibus suam voluntatem de nobis revelavit et intimavit, id est sicut per prophetas proposuit, ita ab æterno prædestinavit, hoc est non minus neque alio modo nos ire in filios prædestinavit ab æterno, quam post in prophetis proposuit. Non tamen quantum ad se prædestinatio præcessit propositum, sed quantum ad nos, quia illi presentia sunt omnia, quæ nobis per tempora vel spatia transeunt. Quod propositum fuit voluntatis suæ, id est non meritorum nostrorum, sed suæ gratuite voluntatis. Gratis enim ab æterno prædestinavit, gratis in tempore per prophetas proposuit ac prænuntiavit. Et hoc totum fecit *in laudem gloriæ gratiæ suæ*. Nam quasi gloria gratiæ ejus est æterna adoptio. Hoc fecit in laudem gloriæ gratiæ suæ, id est ut in interiori et exteriori affectu laudemus gloriam,

Id est abundantiam gratiæ suæ qua nos adoptavit. **A** super omnes alios filios, quoniam Filius est ab æterno, et semper manet et regnat cum eo. Vel nos qui prius displicebamus et inimici eramus, gratificavit sibi, id est gratia sua implevit; et hoc in dilecto Filio suo, id est per mortem et resurrectionem Filii sui, qui egregie ab eo diligitur, quia nihil in eo sibi displicet. Vel in dilecto Filio suo, id est in fide ejus gratificavit nos sibi. In Græcis tamen codicibus non habetur in dilecto Filio suo, sed simpliciter, in dilecto. Et cum non sit additum in dilecto Dei, vel in dilecto Patris, sive in dilecto Ecclesiæ, sed absolute dictum sit, in dilecto, ita intelligendum est, ut subaudiatur ab omnibus, ab omnibus enim diligitur, quia est summum bonum. Omnibus ergo gratia quam consequimur in laudem et gloriam ejus, qui nos gratificavit, completur in dilecto, id est in Domino et Salvatore nostro, quia nihil boni esse potest nisi ex summo bono et in summo bono, quod naturaliter diligit et appetit omnis creatura. *In quo habemus redemptionem*, id est a Deo manumissionem Satanæ, hoc est, manumissi sumus et liberati a jugo diaboli, qui impendebat in nobis facultatem bene operandi. Non dixit, habuimus, sed habemus, ut continue nos habere illam manumissionem notaret. Et hoc *per sanguinem ejus*, id est per effusionem sanguinis ejus, quia ejus sanguis innocens effusus, pretium fuit, quo redempti sumus, et libertati redditi, qui tenebamur captivi. Per hoc quod dicit ejus sanguinem tantam efficaciam habuisse, ostendit eum non solum hominem sine peccato, sed etiam Deum omnipotentem existisse. Habemus in eo redemptionem. Et quam redemptionem? *Remissionem peccatorum* originalium et actualium in baptisate. Diabolus enim per peccata dominabatur nobis. Remissis autem peccatis nostris, amisit ille malignus dominum in nobis. Et ita peccatorum remissio facta est nobis redemptio et liberatio, ut in libertate serviremus Redemptori nostro. Aliud tamen intelligitur redemptio, et aliud remissio, quia remissio redemptionem facit, et redemptio est manumissio, ac nostri arbitrii ad bene operandum restituitio, quia et justi post mortem nullo tenentur vinculo, sed liberi ingrediuntur in regnum. Remissio autem simpliciter intelligitur peccatorum abolitio. Habemus remissionem peccatorum, et hoc *secundum divitias gratiæ ejus*, id est secundum divitem et copiosam gratiam misericordiæ, hoc est secundum multitudinem misericordiæ ejus gratis impensæ nobis, quæ, sicut est multa et exsuperans omnem sensum (*Phlip. iv.*), sic multiplicia et innumera delevit peccata nostra. Gratia dico, *quæ superabundavit in nobis*. Hic vult ostendere quæ Deus benigne circa eum et reliquos apostolos egit, ut per hæc ponderet suam auctoritatem, et sic efficacius possit suadere quod proposuit. Hactenus enim de his quæ toti sanctorum Ecclesiæ data sunt, est locutus; et nunc de his agit, quæ specialiter apostolis concessa sunt. Cum enim gratia in omnibus sanctis abundasset vel abundet super-

abundavit tamen in apostolis, quia ipsi copiosiore largitatem ejus acceperunt quam cæteri. *In omni sapientia et prudentia.* Sapientiam et prudentiam esse diversas Stoici quoque opinantur, dicentes: Sapientia est rerum divinarum cognitio, prudentia vero tantum mortalium. Juxta hanc divisionem, possumus sapientiam invisibilium accipere fidem; prudentiam vero de his, quæ corporaliter a nobis exercentur, vel de moribus et de providentiâ temporalium. Gratia vero in apostolis superabundavit in omni sapientia et prudentia, quia Spiritus sanctus infuderat eis plusquam cæteris sapientiam, qua noscent Patrem, et Filium, et Spiritum sanctum æternaliter ab utroque procedentem, atque Filium solum incarnatum, non Patrem neque Spiritum, et alia mysteria incarnationis, et arcana cœlestia, nec non et dona Ecclesiæ conferenda. Prudentiam quoque superabundanter dedit eis idem Spiritus de ministeriis Ecclesiæ, ut providerent ea quæ futura vel facienda erant in Ecclesia, et futuros status ac tempora prosperitatis et adversitatis ejus usque ad finem sæculi intelligerent, et quomodo per orbem dilatanda esset et exaltanda, atque ritus suos honorabiliter ubique celebratura, et omnes hæreses destructura. Subtilius enim sciebant de trinitate et unitate Divinitatis, et de mysteriis incarnationis Christi, et de statu Ecclesiæ acutius quam alii providebant. Vel prudentiam intelligamus, quantum ad regnum Ecclesiæ. Majorem enim notitiam habebant regendi Ecclesiam, quam alii. Sciebant namque qualiter unumquemque deberent admonere, et quos increpare, vel quos obsecrare, et cætera hujusmodi. Et quia omnis sapientia et prudentia per supernam gratiam superabundavit in eis, adhibenda est fides doctrinæ eorum, qua prædicant Christum, Deum creatorem et hominem verum esse. In tantum autem, inquit, superabundavit in nobis illa gratia, *ut notum faceret*, id est notificaret nobis sacramentum, id est mysterium voluntatis suæ, hoc est mysticam et occultam voluntatem suam quæ antea latebat. Voluntatem, inquam, suam de incarnatione Filii et renovatione humani generis, atque statu Ecclesiæ, et donis ejus conferendis, et ejus regimine. Licet enim prophetæ partim hæc novissent, nullus tamen eorum vel omnia quæ apostoli, vel tam lucide perspexit ut apostoli. Prophetæ namque noverunt ut illi, qui fuerunt in rerum prænuntiatione, apostoli vero ut illi qui erant in rerum exhibitione. Voluntatis dico, exhibitæ non hominum meritis, sed secundum bonum et pium *beneficium ejus*, id est quia tantum ei misericorditer placuit, ut vellet humanum genus reparare. Quod beneficium ipse proposuit, id est procul anteposuit, vel prorsus posuit, sive omnibus palam obtulit, *in eo*, id est in Christo, non alio tempore implendum, sed *in dispensatione plenitudinis temporum*, id est in plenitudine temporum dispensata et ordinata divinitus, cum jam impleta essent tempora, quæ ipse disposuerat prius implenda. Vel notum faceret nobis sa-

cramentum voluntatis suæ, et hoc faceret secundum placitum ejus, id est secundum quod ex sola potestate sibi placuit, et placitum illud est bonum, id est utile nobis. Quod sacramentum antequam notificaret nobis, proposuit ipse in prophetis, id est sacramentum illud prædixit per prophetas, qui mysteria incarnationis Domini, et dona quæ collaturus erat Ecclesiæ, præcinerunt. Si enim penitus ignari essent homines, et non aliquantulum prædocti, non reciperent illud. Quod sacramentum fuit in eo, id est in Christo, in morte ejus et resurrectione. Sacramentum dico, tendens in dispensatione plenitudinis temporum, id est ad hoc proposuit in prophetis, ut in plenitudine temporis, id est tempore præfinito, tempore gratiæ, distribueretur illud sacramentum per apostolos. Dominus dispensavit illud, quia aliis in Ecclesia tribuit fidem et notitiam incarnationis Christi, aliis virtutes quoque et charismata, et quæcunque dispensanda et distribuenda prædixerunt prophetæ. Et quod erat illud sacramentum? Instaurare, id est ad primum statum reducere, omnia per peccatum destructa. Et illam instaurationem facere *in Christo*, id est in fide et gratia Christi, ut in eo restaurentur, *quæ in cœlis sunt*, id est numerus beatorum angelorum qui divinitus erat stabilitus, cadentibus inde reprobis angelis; *et quæ in terra sunt*, id est homines; et omnia quæ instauraret, permanerent *in ipso* Christo sine fine, ne jam ulterius caderent. In eo quippe instaurantur quæ in cœlis sunt, cum id quod inde ex angelis lapsus est, ex hominibus redditur; in ipso instaurantur et quæ in terris sunt, cum ipsi homines qui prædestinati sunt in vitam æternam a corruptionis vetustate renovantur. Instaurantur quæ in cœlis sunt, dum illuc humiliati homines redeunt, unde apostatæ angeli superbiendo ceciderunt; instaurantur et quæ in terris sunt, dum peccatores ad justitiam convertuntur. Vel ea quæ sunt in cœlis, sunt instaurata, id est in melius commutata in Christo, id est in Christi operatione, quia in revelatione mysterii incarnationis Dominicæ receperunt angeli quamdam in melius promotionem. Sed et gaudium eorum crevit, cum homines in suum consortium cœpissent recipere. Non enim pro angelis mortuus est Christus. Sed ideo etiam pro angelis fit, quidquid hominum per ejus mortem redimitur et liberatur a malo, quia cum eis quodammodo reditur in gratiam post inimicitias, quas inter homines et sanctos angelos peccata fecerunt, et ex ipsa hominum redemptione ruinæ illius angelicæ damna reparantur. Et sic instaurantur cœlestia et terrena, sed tamen ea tantum quæ sunt in ipso ante mundi constitutionem electa et prædestinata. In ipso enim semper fuerunt et sunt, quos elegit ab æterno. Quod dixit instaurare, non dixit proprie, nisi respectu eorum quæ erant in cœlis, quia quæ sunt in terra, non sunt instaurata, sed restaurata. Nam instaurare dicimus, quando restauratum in melius instauratur, ut bonum in melius; restauratur autem,

quod cum prorsus destitutum sit, instauratur, ut A **vos, speravimus in Christo; et ideo tales sumus ut per nos alii sperent et laudent. Prius enim crediderunt apostoli quam cæteri.**

« In quo etiam sorte vocati sumus, prædestinati secundum propositum ejus, qui omnia operatur secundum consilium voluntatis suæ, ut simus in laudem gloriæ ejus nos qui ante speravimus in Christo. »

In Christo restaurata sunt omnia, in quo etiam nos vocati sumus de infidelitate ad fidem, et hoc sorte, id est gratia sola, non nostro merito. Nam sortis nomine designatur gratia, quia in sorte non est electio, sed voluntas Dei. Ubi enim dicitur, iste facit, et iste non facit, merita considerantur. Et ubi merita considerantur, electio est, non sors. Quando autem Deus nulla nostra merita invenit, sorte voluntatis suæ nos vocavit, quia voluit, non quia digni sumus. Sorte vocati sunt et ipsi apostoli, in quibus superabundavit gratia, ne viderentur meruisse aliquid melius cæteris. Vocati sumus, nos dico prædestinati, id est prius præparati in ejus sapientia, ab æterno præordinati ad vitam, et hoc secundum propositum ejus, id est secundum quod postea prædixit in prophetis. Prophetæ enim apostolos ad fidem Christi convertendos prænuntiant, et sicut ipsi prænuntiant, ita et Deus prædestinaverat. Prædestinati enim sunt secundum propositum ejus, quia sicut magnifice illos ad fidem venturos, in prophetis prænuntiavit, ita magnifice illos prædestinaverat. Vel prædestinati sumus secundum propositum ejus, id est secundum firmam et perseverantiam institutionem ejus. Qui etiam in apostolis operatur omnia etiam velle juxta consilium voluntatis suæ, ut nemo gloriatur de suis meritis. Ac si dicatur: Cur nos magis elegerit ad officium apostolatus nescimus, sed tamen concilio facit omnia, id est rationabiliter et provide, non temere. Nam ad hoc solet fieri consilium, ut rationabiliter fiat illud, unde consilium habetur. Et consilium quo facit omnia, est voluntatis suæ, id est non extraneum, quia non ab alio accipit consilium, sed a sola voluntate sua. Et hoc consilio agit ipse, ut simus in æterna vita euntes in laudem gloriæ ejus, id est ut in illa vita laudemus diligendo et admirando ineffabilem gloriam ejus, scilicet illum gloriosum, laudabilem et admirabilem, nos, qui ante speravimus in Christo, id est antequam transeamus ad illam cœlestem patriam, posuimus in Christo spem nostram, vel nos Judæi qui ante conversionem nostram speravimus in Christo venturo, priusquam ille venisset. Judæi enim ab antiquis temporibus sperabant in Messia venturo, et in eodem sperabat Paulus antequam ad fidem novam conversus esset. Per hoc quod in Christo speratur, Deus esse monstratur. Et quia in eo speratum est ante adventum ejus, constat eum sine initio semper apud Patrem fuisse. Nisi enim ille fuisset, perissent omnes qui speraverunt in eo, quasi sperantes in nihilo. Vel ad hoc sorte vocati sumus, ut simus in laudem gloriæ ejus, id est ut per nos alii laudent gloriam ejus, vel nosipsi: nos dico, qui antequam

per nos alii sperent et laudent. Prius enim crediderunt apostoli quam cæteri.

« In quo et vos, cum audissetis verbum veritatis, Evangelium salutis vestræ, in quo et credentes signati estis Spiritu promissionis sancto, qui est pignus hæreditatis nostræ, in redemptionem acquisitionis, in laudem gloriæ ipsius. »

Quia se et alios apostolos dixerat vocatos, ne videretur latenter dixisse Ephesios non esse vocatos, subjunxit quasi dicens: Nos ante sumus in Christo vocati, in quo et vos postea jam vocati estis, etsi non principaliter, tamen per ejus membra et ejus præcepta. Vocati estis ad fidem quam non accepistis ex merito aliquo, sed ex auditu solo, quia, cum audissetis ex ore meo verbum veritatis, tunc vocati estis. In hoc multum commendatur gratia Dei, quam tam leviter, scilicet solo auditu receperunt, quia non intercessit eorum meritum, non vis arbitrii ipsorum, sed solus auditus, ut gratiam in fidem acciperent. Ideo credidistis, quia audistis verbum non falsitatis, ut antea in laude idolorum, sed veritatis in prædicatione Christi, quæ est nimia veritate suffulta, id est ideo credidistis, quia verum esse quod dicebatur, cognovistis. Quod verbum est evangelium vestræ salutis, id est bonum nuntium, quia in eo annuntiata est vobis salus, id est remissio peccatorum, et justificatio, et vita æterna. Et quia possent audisse illud et non credidisse, addit: In quo Evangelio et credentes signati estis, id est segregati ab infidelibus Spiritu sancto cujus gratiam accepistis. Sanctus enim Spiritus credentes signat, id est ab aliis hominibus discernit et separat, quia a peccatis eos purgat, et spiritualibus gratiis ornat. Vel in quo Christo signati estis imagine ejus, id est vos qui culpa primi parentis deformati eratis, et quibus jam perierat imago et similitudo Dei, signati estis, hoc est imagine et conformitate Dei estis impressi, id est restituta facultate bene operandi secundum innocentiam et justitiam representatis imaginem Dei Patris, scilicet institutione liberi arbitrii estis impressi similitudine Dei secundum innocentiam et bona opera; et hoc per Spiritum sanctum, non per merita nostra, fide interveniente. Hoc notavit, dicens, credentes, etc. Quasi diceret: Quia credidistis, ideo signati estis Spiritu sancto, id est hoc signum accepistis, quo distingueremini a cæteris, quod Spiritu sancto repleti estis, quem non habent increduli. Qui spiritus est promissionis, id est promissus a Deo, sicut discipulis Salvator præcepit ab Hierosolymis ne discederent, sed expectarent promissionem Patris. Et item de eo dixit: « Ego mittam promissum Patris mei in vos (Luc. xiv). » Vel promissionis est iste Spiritus, quia his quos replet, promittit vitam æternam, et hoc ideo facit, quia ipse est pignus et arrha et certitudo nostræ hæreditatis, quam accepturi sumus a Deo, id est charitas quam nobis ille Spiritus infudit, arrha est futuræ hæreditatis. Pignus enim hoc loco pro arrha positum est.

Pignus enim quando datur, cum datum fuerit propter quod datum pignus est, pignus auferitur. Arrha vero quando aliqua pretii particula primum datur, ut sit signum totius massæ dandæ. Sic charitas per Spiritum sanctum data fidelibus, signum et arrha est dandæ plenitudinis vitæ perpetuæ. Hoc enim implebitur, unde arrha data est; nec ipsa arrha, id est charitas nobis auferetur, sed adimplebitur quando summa reddetur. Signati estis Spiritu sancto, et hoc in redemptionem acquisitionis, ut ultra non dominetur inimicus in vobis, sed Christus qui vos sanguine suo redemit, ut possideat, non ut amittat. Redemptio enim hoc loco vocatur immortalitas, quæ erit per resurrectionem. Acquisitio autem familiaritas illa quæ Deum quærit. Ducet ergo nos Spiritus ille in redemptionem immortalitatis et impassibilitatis, scilicet ut redimamur ac liberemur ex mortuis, id est faciet nos immortales per mortem Christi et resurrectionem. Et redemptio illa erit tanta, ut sit acquisitionis, quia illa immortalitas sic nos acquirit Deo et conjunget, ut ultra non separemur vel amittamur ab eo, sed semper illi inhæreamus, et ab illo possideamur; et hoc in laudem gloriæ ipsius, scilicet ut laudemus admiratione, dilectione, participatione gloriæ ipsius, id est beatitudinem ejus, ideo posuit ipsius, ut innueret, quia quidquid boni habemus, a Deo est.

« Propterea et ego, audiens fidem vestram, quæ est in Domino Jesu, et dilectionem in omnes sanctos, non cesso gratias agens pro vobis, memoriam vestri faciens in orationibus meis, ut Deus Domini nostri Jesu Christi, Pater gloriæ, det vobis spiritum sapientiæ et revelationis in agnitionem ejus, illuminatos oculos cordis vestri, ut sciatis quæ sit spes vocationis ejus, et quæ divitiæ gloriæ hæreditatis ejus in sanctis, et quæ sit supereminens magnitudo virtutis ejus in nos, qui credimus secundum operationem potentiæ virtutis ejus, quam operatus est in Christo, suscitans illum a mortuis, et constituens ad dexteram suam in cælestibus, supra omnem principatum et potestatem et virtutem et dominationem et omne nomen quod nominatur, non solum in hoc sæculo, sed etiam in futuro, et omnia subjecit sub pedibus ejus, et ipsum dedit caput supra omnia Ecclesiæ quæ est corpus ipsius, plenitudo ejus qui omnia in omnibus adimpletur. »

Invitat eos Apostolus ad veram fidei constantiam, quam ab eo perceperunt de Domino Jesu, scilicet Christum vere esse creaturam in humanitate, et vere Creatorem in divinitate, id est esse verum hominem et verum Deum. Nam, ut in hanc fidem eorum, quæ per dilectionem operatur, roborarentur et augerentur, gratias pro ea Deo referebat, ut ipse Deus qui dederat, multiplicaret eam et confirmaret. Quasi dicat: Vocati estis, Evangelium audistis et credidistis atque Spiritu sancto signati estis. Propterea, id est propter has causas, gratias ago, quia non solum vicini vestri, sed et ego longe positus in Romano car-

cere, audio fidem vestram, quasi jam famosam et in vobis solidatam, quæ jam multis ut convertantur proponitur exemplar, quia constantes estis in ea. Et hoc ideo quia est in Domino Jesu, id est firmiter fundata et permanens in Domino Salvatore, qui vos suo dominio mancipavit, vosque salvavit. Et audio etiam dilectionem vestram redundare in omnes sanctos, id est charitatem vestram qua sanctos omnes ita diligitis, ut quicquid pie potestis, impendatis illis. Et ita charitatis opera, quæ facitis in sanctos, faciunt vestram charitatem longe divulgari, multique eam proponunt exemplar. Unde ego hæc audiens, non cesso gratias agere Deo pro vobis, quia fidem hanc et dilectionem vobis contulit. Magna illis erat utilitas, quod tantus apostolus pro illis gratias agebat, quia per hoc divinitus confirmabantur et promovebantur in fide et dilectione, quam nuper acceperant prædicato sibi Evangelio. Gratias, inquit, ago pro his quæ jam accepistis, et orationes facio, ut quæ necdum habetis, habere possitis. Memoriam vestri facio in orationibus meis, ut Deus det vobis intelligere quæ credidistis, scilicet ut quod fide credidistis, notitia percipere possitis discernendo. Et hoc det vobis Deus Domini nostri Jesu Christi, id est Deus illius quem revereri debemus, quia ejus servi sumus, et ipse Dominus noster: et est Jesus, id est salvator noster; et est Christus, id est rex noster sive sacerdos. Hoc totum dicitur respectu humanæ naturæ, quia secundum humanitatem tantum est Deus Christi, qui secundum divinitatem ejus, est Pater ipsius. Qui enim in tempore creavit eum ex virgine, ipse ante omnia tempora de seipso genuerat eum. Unde dicitur Pater gloriæ, quia ipse Christus secundum excellentiam æternæ divinitatis suæ est gloria Patris, id est virtus et sapientia et verbum ejus. Per hoc itaque quod dicit: Deus Domini nostri Jesu Christi, ostendit illum esse verum hominem; et per hoc quod subjungit, Pater gloriæ, notat illum esse verum Deum ex Patris substantia. Et rogo ut iste pater det vobis spiritum sapientiæ de cælestibus ac divinis et revelationis in agnitionem ejus, ut non obscure, sed sine velamine agnoscatis eum, id est Christum, secundum quod Deus est omnipotens atque principio et fine carens, et omnia divinitate implens. Det vobis Spiritum sapientiæ in agnitionem ejus, id est Spiritum sanctum, quo infunditur hominibus sapientia, ut agnoscatis illum juxta quod agnoscendus est ab his qui adhuc in carne vivunt, ut omnia, quæ de illo possunt in hac vita cognosci, cognoscatis. Et det vobis spiritum revelationis de humanitate ejus, Spiritum sanctum, quo revelet vobis mysteria humanitatis Christi in agnitionem ejus, ut manifeste agnoscatis incarnationem ejus, non per umbram, sicut illi, qui fuerunt ante adventum ejus. Ideo orat ut hanc Christi notitiam det illis Deus, quia, si hanc habuerint, nulla adversitate superabuntur ab ejus fide et dilectione. Et declarat consequenter, cujusmodi sapientiam et revelationem vult ut det illis. Illuminatos, inquit,

oculos cordis vestri det vobis, id est aspectum vestrae mentis et rationis faciat clarum et perspicuum. Quod est dicere: Ita illuminet vestram rationem, ut perspicue remota umbra phantasmatum, advertat ratio vestra quod primum speretur de fide, scilicet vitam cum angelis aeterna. Et hoc est, *ut sciatis quæ sit spes vocationis ejus*, id est fidei ejus. Hoc est, sic illuminet interiores oculos vestros, ut intelligatis quod primum erit pro fide ejus illis, qui constanter in ea perseverant, ad quod per Evangelium vocati estis. Vel quæ sit spes vocationis ejus, id est qualis et quanta sit gloria quam speratis, et ad quam vos vocavit; quam pretiosa est summa beatitudo, quam adipisci speratis per eum, qui vos ad fidem suam vocavit. Et ut sciatis *quæ sunt divitiæ gloriæ*, id est copia beatitudinis, id est quam sufficiens et multiplex et copiosa est beatitudo illius gloriosæ *hereditatis*, quam firmo jure possidebit communiter sancti, in perfectione virtutum consummati. Istæ enim divitiæ erunt *in sanctis*. Vel tantam esse beatitudinem illam intelligatis, quanta est in sanctis, id est quantam ipsi habent vel intelligunt esse. Et ut sciatis *quæ et quanta sit magnitudo virtutis ejus in nos apostolos*, id est quam larga et copiosa provenit virtus ejus in nos, ut spirituali scientia illustrati, et virtute Spiritus sancti confortati, nihil timeremus, sed magna auctoritate regibus et tyrannis contradicentes, Evangelium ubique prædicarem, et miracula potenter operarem, atque cunctos errores destrueremus. Et hæc magnitudo virtutis et fortitudinis, *quæ data est nobis præ cæteris, est supereminens*. id est super alios manens, quia nobis excellentiora sunt data quam aliis, ut et illi post nos studeant ad virtutem alta proficere. Et ista magnitudo tam celsa est in nobis apostolis, *qui credidimus*, quia nos intensius et firmiter credidimus quam alii. Et est desuper a Deo missa in nos, et hoc *secundum operationem potentiae virtutis ejus*, id est secundum opus quod virtus Dei, id est vis Dei operata est. Virtus dico potentiae, id est potens in omnibus. Vel nos credidimus secundum operationem potentiae virtutis ejus, id est attendentes potentem virtutem ejus factam. Et quam virtutem? Scilicet illam *quam operatus est potenter in Christo, suscitans illum* ita ut procul esset a mortuis, id est ut nunquam amplius moreretur, sed immortalitatis virtute permaneret. In hac enim operatione ostensa est nobis potentia virtutis ejus. Quem et constituit, id est simul secundum animam et corpus statuit *ad dexteram suam*, id est in potentiore dignitate sua positum *in caelestibus*, præferens illum omni creaturæ. Dextera enim Dei aeterna beatitudo est, quæ sanctis datur; sicut sinistra ejus recte dicitur miseria perpetua, in qua sunt impii. In caelestibus est Christus, ut ejus dignitas etiam ex loco monstraretur. Et est etiam loco *supra omnem principatum et potestatem et virtutem et dominationem*, ut per hoc ostendatur esse majoris dignitatis et amplioris felicitatis ac beatitudinis, quam aliquis spiritus in his ordinibus, quoniam

A *excelsior cælis*, id est spiritibus angelicis factus est. Isti enim quatuor ordines angelorum, et juxta librum Dionysii Areopagitæ de cælesti hierarchia numerantur ascendendo. Principatus enim est sub potestate, potestas sub virtute, virtus sub dominatione. Super dominationem vero est ille ordo qui vocatur thronus, quia Deus in eo sedet. Cum ergo Christus super dominationem exaltatus dicitur, liquido demonstratur sedere in throno cum Patre. Principatus autem vocantur, qui ipsis quoque bonis spiritibus angelicis præsent. Qui subjectis aliis, dum quæ sunt agenda disponunt eis ad explenda divina ministeria, principantur. Ex quibus unus (nisi fallor) apprensus Josue, dixit se esse principem exercitus Domini (*Josue v*). Potestates vero dignioris potentiae intelliguntur esse quam principatus, ut et subjectis ordinibus angelorum potenter præsent, et ad divinam contemplationem super se potenter extendantur. Virtutes autem dicuntur illi spiritus, [qui virtuti divinæ fortitudinis firmiter cæteris assimilati, ad omnia quæcunque voluerunt, fortiter prævalent. Dominationes vero nuncupantur, qui nobilissimi in illa cælesti curia sunt, et subjectis quibusque dominantur, atque possident eos ut Domini. Et super omnes istos exaltatus est secundum humanitatem suam Christus, qui est caput nostrum, ut et nos membra ejus usque ad istorum societatem et æqualitatem pertingamus. Unde et quod supradictum est, *ut sciatis quæ sit supereminens magnitudo virtutis ejus*, quam operatus est in Christo, suscitans illum a mortuis, et constituens ad dexteram suam in caelestibus, de nostra resurrectione intelligi potest, ut quemadmodum Christus magnifice resuscitatus est et elevatus in cælum, sic et nos in fine sæculi pro modulo nostro magnifice resuscitemur, et ad caelestia sublimemur. Mirabilis enim et supereminens, id est super omnes alios ex toto manens magnitudo virtutis in nos a Deo veniet, quando in ictu oculi resurgemus, et immutabimur (*I Cor. xv*), atque « rapiemur in nubibus obviam Christo in aera, et sic semper cum illo erimus (*I Thes. iv*). » Qui, ut dictum est, exaltatus est super omnes præfatos angelorum ordines, et super cæteros altiores. Et ut generaliter dicam, *super omne nomen*, id est super omnem ordinem vel personam magnæ famæ et magni nominis, *quod nominatur non solum in hoc sæculo*, ut Michael et Gabriel, *sed etiam in alio futuro*, ut quædam personæ beatorum spirituum majoris dignitatis in illo cælesti regno, quarum fama et appellatio ad nos in terra manentes nunquam perveniet. Id est dignitas ejus superat dignitatem omnium majorum inter caelestes creaturas, et non solum sublimavit eum Pater super omnes choros angelorum vel personas, sed etiam *omnia subjecti sub pedibus ejus* (*Psal. vii*). A similitudine dictum est. Nam, sicut qui submissus est, sub pedibus conculcatur et conculcanti resistere non potest, sic omnia imperio et potestati Christi subjecta sunt, et illi contraire non valent. Omnia subjecti, et ita ut sint sub, id est inferiora. Aliud,

sub, notat omnimodam subjectionem, scilicet quod nec audeant, nec possint contraire imperio ejus. Per pedes enim intelligimus humanitatem ejus, quia sicut pedes sunt inferior pars corporis nostri, sic humanitas est inferior natura Christi. Divinitas enim superior natura ejus est. Et hæc scientia de futuro accipienda est, quando in die judicii omnes cognoscent se subjectos ei, alii recipiendo præmium vitæ, alii patiendo sententiam mortis æternæ, et ipsum Dominum, qui tantus et tam potens tamque sublimatus est, dedit non ex merito nostro, sed sola sua gratia caput super omnia bona virtutum Ecclesiæ, ut ipse caput et fons esset omnium bonorum Ecclesiæ, vel supra omnia membra Ecclesiæ, ut ipse majorum et minorum fidelium caput esset. Vel, sicut in aliis libris habetur, supra omnem Ecclesiam, Judæorum scilicet atque gentilium, ut nullus ad Ecclesiam pertineret, qui hunc caput non haberet. Nam, sicut omnia membra humani corporis reguntur a capite, id est visus, auditus, gustus, odoratus et tactus, ita omnes spirituales sensus Ecclesiæ sunt in Christo, ut in eo videat Deum, et audiat verbum ejus, et gustet quam suavis est Dominus (*Psal.* xxxiii), et odorem notitiæ ejus attrahat, et spiritualiter eum tangat, dicens: « Mihi autem adhærere Deo bonum est (*Psal.* lxxii). » Qui longe aliter est caput Ecclesiæ, quam princeps aliquis caput exercitus, quia illa est corpus ipsius. Unum enim sunt sponsus et sponsa, ut caput et corpus. Ecclesia dico, plenitudo ejus, id est plenarium corpus ejus, nullum enim membrum deest ibi, quod solet esse in humano corpore, sed sunt ibi qui provident aliis, ut oculi; sunt qui ministrant, ut manus; sunt qui loquuntur verbum salutis, ut os, et sic cætera membra. Qui Christus adimpletur non in se, quia sic plenus est et perfectus, ut non possit augmentari, sed in omnibus fidelibus suis. Et quid adimpletur ipse in eis? Omnia bona quæ sunt in eis, id est charitas, humilitas, patientia, castitas, et his similia. Hæc enim omnia Christus est in electis suis. Et dum hæc augmentur in eis et multiplicentur usque ad plenitudinem, ipse mirum adimpletur in eis. Qui et in futuro feliciter adimplebitur in ipsum, ut sit Deus omnia in omnibus. Vel adimpletur ipse nunc omnia in omnibus, dum membra ejus quotidie secundum quantitatem proficiunt; et dum defunctis his qui modo sunt in Ecclesia oculi vel os, succedunt alii pro eis; et sic de cæteris, ut integer maneat numerus membrorum, et secundum successionem semper crescat. Omnia prædicta valent ad confirmandum eos in fide Christi, ut credant eum verum hominem et Deum, perfectamque salutem dare credentibus. Sequitur:

CAPUT II.

« Et vos cum essetis mortui delictis et peccatis vestris, in quibus aliquando ambulastis secundum sæculum mundi hujus, secundum principem potestatis aeris hujus spiritus, qui nunc operatur in illos diffidentia. In quibus et nos omnes ali-

quando conversati sumus, in desideris carnis nostræ, facientes voluntatem carnis et cogitationum, et eramus natura filii iræ, sicut et cæteri. Deus autem, qui dives est in misericordia, propter nimiam charitatem suam qua dilexit nos, cum essemus mortui peccatis, convivificavit nos in Christo, cujus gratia estis salvati, et conresuscitavit et consedere fecit in cœlestibus in Christo Jesu, ut ostenderet in sæculis supervenientibus abundantes divitias gratiæ suæ in bonitate super nos in Christo Jesu. Gratia enim estis salvati per fidem, et hoc non ex vobis. Dei enim donum est, non ex operibus, ut ne quis gloriatur. Ipsius enim sumus factura, creati in Christo Jesu in operibus bonis, quæ præparavit Deus, ut in illis ambulemus. »

Ingitur Apostolus dissuadere et superfluum ostendere carnales observantias, quas prævidebat fore introducendas ab hæreticis, commemorat etiam priora mala, ut in bonis quæ prius perceperunt, humiliarentur; et certum sit quia, si hæc inimicis data sunt, multo magis ampliora dabuntur amicis. Ne enim in tumorem ex bonis erigantur, ostendit de quo statu ad quam dignum vocati sunt, dicens omnia beneficia eis vel apostolis vel toti humano generi, per solam Dei gratiam esse data. Littera sic conjungitur: Suscitavit Christum a mortuis, et ad dexteram suam elevavit, et vos quoque conresuscitavit, et in cœlestibus consedere fecit. Sed istud inferius ubi dicit, Deus autem, qui dives est, ideo interposuit, ut dissuaderet carnales observantias, et illos humiliaret ex recordatione præcedentium culparum; ac si diceret: Deus corporaliter suscitavit Jesum Christum a mortuis, et vos spiritualiter cum eo resuscitavit ab interna morte, cum essetis mortui in anima delictis et peccatis vestris. Sicut enim justitia est vita animæ, sic peccatum mors ejus. Delictum nonnulli volunt accipere secundum consensum malæ voluntatis, et peccatum secundum executionem operis, vel delictum est, quando aliquis facere negligit, quod a Deo præcipitur; peccatum, quando præsumit agere quod prohibetur. Vos mortuos delictis et peccatis gratia Dei vivificavit. Hoc multum valet ad dissuasionem carnalium observantiarum, quia si de morte animæ ad vitam non illis observantiis, sed gratia duce pervenire, non est ratio ut post acceptam vitam his indigeant. Mortui eratis, quia aliquando, id est ante conversionem vestram ambulastis in illis delictis et peccatis. Et ambulastis in illis de alio ad aliud, secundum sæculum hujus mundi, id est sequendo et imitando sæculares homines ista mundana appetentes. Vel secundum malitiam sæculi hujus mundi, qui totus in maligno positus est (*I Joan.* v), ambulastis. Nam superior mundus, id est regnum cælorum, habet aliud sæculum, in quo regnat justitia, vel secuti hoc sæculum, quia sicut in hoc sæculo succedit tempus tempori, ita semper in vobis succedebat peccatum peccato; et ita com-

parabiles sæculo fuistis in continuata serie peccatorum. Sæculo dico, hujus corruptibilis et caduci mundi, cujus sectatores diversis vitiis assidue corumpuntur, et cito decidunt in interitum. Nec solummodo secundum hoc sæculum ambulastis in via iniquitatis, sed etiam, *secundum principem potestatis aeris hujus*, id est secundum quod suadebat vobis princeps, qui in hoc aere potestatem habet vel infideles tentandi, vel ipsum commovendi. Secundum hunc iniquitatis principem ambulant, qui secundum voluntatem ejus peccant. Qui est princeps potestatis aeris, quia principatur exercitui dæmonum, qui sunt potestas aeris, quia possunt in eo discurrere, et suggestiones hominibus ministrare; vel quia ipse Satanas in hoc eodem caliginoso aere, vicino terris, potestatem habet, ut diximus, volitandi ad suadendum mala, sive commovendi aliquoties tempestates ad incommoda hominum, sicut fecit adversum Job (*Job 1, 11*). Et quis est iste princeps? *spiritus*, id est non carnalis substantia, sed incorporea. Per hoc quoque innuitur, quia multum erant in peccatis, quoniam spiritus, id est res invisibilis a quo nesciebant cavere sibi, eos impugnabat. Periculosius enim impugnatur homo re invisibili quam visibili, quia si hostem videret, sibi fortasse caveret. *Qui spiritus operatur in filios diffidentis*, id est in illos qui volunt tenere carnales observantias, qui diffidunt de Christo, non credentes eum sufficere ad justitiam et salutem, nisi et carnales observantias superadjiciant. Ob hoc dicuntur filii diffidentis, quia diffidentia infidelitatis genuit eos in tali errore, id est fecit eos diffidere. In quibus operatur diabolus ut diffidant a Christo et carnales caeremonias quærant *nunc*, id est post adventum Christi, qui vera lux est, et umbram veterum observantiarum exhibitione veritatis removit. Ac si dicatur: Quandoquidem malignus hæc operatur, etiam postquam Veritas apparuit, id est opus illius est adhuc facere diffidere, videte ne forte vos diffidatis. Et hoc valet ad propositum. Nam si, cum adhuc tanta ac tali multiplicitate peccatorum irretiti erant, liberati sunt sola gratia, non carnalibus observantiis, patet, quia post liberationem superflue eas tenerent. Vel in filios diffidentis, id est in illis qui propter sua multa peccata diffidunt de æternis bonis, et desperant de salute sua, operatur diabolus *nunc*, id est postquam de manu ejus erepti fuerant. Vel ideo vocantur filii diffidentis, quia de eorum salute diffidit mater Ecclesia, considerans in eis operationem nequissimi spiritus. Ne autem viderentur Ephesii ideo fuisse tam gravibus irretiti peccatis, quia carnalibus observantiis non studuerant, ostendit etiam servientes illis caeremoniis similiter implicitos fuisse peccatorum multitudinem. Et hoc est: *In quibus delictis et peccatis non solum vos, qui non habetis carnales observantias, sed et nos qui illas custodiebamus, et illi qui modo sunt tanti*

A apostoli, nos, inquam, *omnes conversati sumus*, id est per omnia genera vitiorum versati sumus *aliquando*, id est ante conversionem nostram *in desideriis carnis nostræ*, id est in concupiscentiis ejus. Et eramus *facientes voluntatem carnis*, id est opere complebamus, quod carnalitas nostra exlegebat secundum libidinem et crapulam, et cætera quæ ad delectationem carnis attinent, et voluntatem *cogitationum* faciebamus, secundum iram et superbiam et ambitionem et cætera vitia, quæ in corde sunt, et non in delectatione corporis. Si vero carnis nostræ sic legatur (219), ita dico nos fuisse in delictis, quando manebamus in desideriis carnis nostræ, id est in vehementia concupiscentiæ, ministratæ a carne, plura voluit in desideriis notare, quam concupiscentiam, id est multiplicem et omnimodam vehementiam concupiscentiæ quam per legem incurrerunt. Unde Romanis ait: « Cum enim essemus in carne, passiones peccatorum quæ per legem sunt, operabantur in membris nostris (*Rom. vii*). » Et item: « Peccatum per mandatum operatum est in me omnem concupiscentiam (*ibid.*). » Et propterea de maledicto mortis venientes *eramus filii iræ*, id est filii ultionis, filii gehennæ, et hoc *natura*, id est originali peccato, *sicut et cæteri* qui legem non acceperant. Nam cum ira Dei nascuntur omnes mortales, et peccante primo homine, vitium pro natura inolevit. Sed per Dei gratiam nonnulli de filiis iræ sunt filii adoptionis, quod per legem non valet fieri; ideoque Judæi carnales licet haberent legem, nihilominus filii iræ manebant sicut nati fuerant, quemadmodum et cæteri populi terrarum qui sine lege erant. Et per hoc voluit innuere, legem nihil posse ad peccatorum alleviationem, cum ipsi qui observabant legalia præcepta, debiti essent iræ Dei, sicut et alii qui mandata legis ignorabant. Hoc enim de lege sola sine adjunctione gratiæ dicitur. Quod totum ad gratiæ commendationem valet, et sic ad carnalium observationum destructionem, quia, cum essent mortui multiplicitate peccatorum, serviendo etiam illis caeremoniis, gratia Dei eos convivificavit, quod lex facere non potuit. Vos eratis mortui, et nos similiter, et eramus ex natura vitiosa filii iræ; sed *Deus, qui dives est in misericordia* (*Rom. v*), quoniam secundum largas misericordiæ suæ divitias omnia peccata et originalia et actualia per baptismum remisit, ut ubi abundavit peccatum, superabundaret gratia propter nimiam charitatem suam erga nos summam, id est omnium sensum superantem, cum ipse Filium sibi coæternum faceret incarnari et mori, *quæ dilexit nos Deus, cum essemus spiritualiter mortui peccatis, convivificavit nos in Christo*, id est vivificavit nos cum Christo secundum remissionem peccatorum, et innocentiam atque virtutum consummationem; hoc est, sicut Christo perpetuitatem vitæ in æterna beatitudine attribuit, sic nobis largitus est veram vitam innocentis et

quæ et domus et corpus Christi est. Tales prælatos A dedit Christus Ecclesiæ, et tandiu dabit, *donec occurramus omnes*, id est donec omnes qui modo sumus in una et non discrepanti fide, et in una et non discrepanti agnitione Filii Dei, occurramus nobis invicem in die iudicii de diversis mundi partibus, vel ipsi Christo, quasi desiderio currentes ad gaudium, *in irum per e tum*, ut unusquisque sit vir perfectus, quia sive claudus modo sit aliquis, sive cæcus, sive quolibet membro careat, in resurrectione perfectionem omnium membrorum habebit; *et in mensuram ætatis plenitudinis Christi*, id est ut nec infra, nec ultra juvenilem formam resurgamus, sed in ætate et robore, ad quæ Christum hic pervenisse cognovimus, id est in ea meta ætatis, usque ad quam naturaliter crescit homo, et ultra quam nihil B ei naturaliter accrescit, in qua et salvator habuit plenitudinem annorum et corporis, cum de hoc mundo transiret. Non aut mensuram corporis vel mensuram staturæ, sed mensuram ætatis plenitudinis Christi. Neque enim fas est dicere, cum resurrectionis omnium tempus advenerit, accessuram corpori alicujus eam magnitudinem quam non habuit. Si autem dixerimus ad Dominici corporis modum etiam quorumcumque majora corpora redigenda, peribit de multorum corporibus plurimum, cum ipse nec capillum periturum esse promiserit (*Luc. xxi*). Restat ergo ut suam recipiat quisque mensuram, quam vel habuit in juventute, etiam si senex obiit; vel fuerat habiturus, si est ante defunctus. Vel ita: Prælatos C dedit Christus in Ecclesia, qui sibi alii aliis succedentibus perdurent, donec occurramus omnes in virum perfectum, id est donec ita conveniamus et conjungamur omnes secundum charitatem, ut simus vir perfectus. Perfectus vir dicitur, quando jam nullum membrorum suorum crescit secundum quantitatem. Non est enim perfectus, donec habet ubi crescat. Sic Ecclesia tunc erit in statu perfecto, cum jam nullum membrorum suorum per successionem poterit excrescere. Crescit enim quotidie manus, quando uno mortuo, qui necessaria ministrabat fratribus, succedit alius hoc idem faciens, et sic de cæteris membris. Sed postquam numerus electorum completus fuerit tunc istud successionis crementum cessabit, quoniam tunc erimus vir perfectus, quia D nullum membrorum jam crescendi locum habebit, quoniam completus erit numerus omnium. Donec occurramus in virum perfectum, id est donec Ecclesia efficiatur vir perfectus; hoc est, quando omne membrum Ecclesiæ suam quantitatem habebit. Occurramus omnes, et ita occurramus, ut nullum membrum remaneat quod suam quantitatem non recipiat. Per hoc quod dicit, occurramus, et non conveniamus, ostendit quod multum erimus prout et prompti ad ipsam dilectionem. Currere enim majorem velocitatem notat, quam venire. Hoc totum tale est: Tandiu dabit doctores et pastores, quandiu *erit necessarium, id est donec* Ecclesia efficiatur vir

A perfectus cui nihil desit, et nihil post addendum sit in numero vel viribus. Et hoc erit, quando occurreremus in mensuram ætatis plenitudinis Christi, id est quando ætas mensurata a Christo, erit plena. Mensura erit plena, quando Christus ipse in corpore suo plenus erit, omnes habens qui nunc per singulos crescit, et omnes in eo immortales et beati erunt. Et ultra non erit necessaria prælatio, neque durabit amplius, quæ modo necesse est ut permaneat usque ad illum terminum. Et ideo non est graviter ferenda, quæ cito transibit. Ob hoc autem in virum perfectum occurreremus, quia manemus in *unitate fidei*, id est unam non variam fidem habemus de Filio Dei; et quia manemus in *unitate agnitionis Filii Dei*, id est quia agnoscimus, id est intelligimus idem de Filio Dei. Hoc est dicere, quia credimus et intelligimus idem de Filio Dei. Illi enim non occurrerent in virum perfectum, qui idem non credunt in Ecclesia, et idem non intelligunt. Illi vero non tendunt ad idem intelligere, qui schisma volunt in Ecclesia facere. Vel Christo, sicut supradictum est, occurreremus venienti ad iudicium, et gaudentes eum excipiemus; nos dico qui nunc sumus in unitate fidei, id est qui tenemus unam fidem trinitatis et unitatis divinæ, qui sumus in unitate agnitionis Filii Dei, id est qui unam et concordem in fide tenemus agnitionem Filii Dei, credentes eum incarnatum et passum ac resuscitatum et exaltatum. Ad hoc enim nobis dati sunt prælati, *ut jam post tempus gratiæ*, post acceptionem spiritualis doctrinæ *non simus parvuli* sensibus, sed proveci in sapientia; *et non simus fluctuantes*, id est titubantes nostra debilitate in bonis operibus, seu dubitantes in fide; *non simus fluctuantes* inter undas tentationum, sicut navis tempestati exposita, sed firmi et immobiles, et ut non circumferamur, id est non in gyrum erroris feramur *omni vento doctrinæ*, id est omni flatu inanis dogmatis. Doctrina enim pravorum et hæreticorum, est quasi ventus tempestatis aut turbinis, quia statum mentis evertit, et in vertiginem errorum ducit, atque levis est et vana, non habens pondus veritatis, ideoque prudenter cavenda est. Doctrinæ dico, manentis in *nequitia hominum*, quoniam nequitia hominum est sedes perversæ doctrinæ. Nam hæresis non est nisi in anima subdita peccatis, quia peccata commissa, sunt causæ ut Deus permittat eos corruere in *barathrum hæresis*. Quæ seductionis doctrina manet etiam in *astutia*. Astutia denotatur, si dici potest, dolosa scientia, quoniam in ea manet doctrina hæresis, quia ipsius causa est et sustentaculum. Astutia dico, tendente *ad circumventionem erroris*, id est ad hoc studente ut circumveniat incautos et ducat in errorem. Nam per dolositatis et astutiæ fraudem solent hæretici multos decipere. Sed ab his tuti sumus per doctrinam veritatis, quam prædicant prælati Ecclesiæ. Apostoli enim et prophetæ Novi Testamenti qui exponunt Scripturas, reddunt nos non parvulos, sed fortes ad intelligendum. Per evangelistas qui Evangelium prædicant efficiuntur non fluctuan-

tes in fide, sed certi. Per pastores et doctores fit ut non circumferamur omni vento doctrinæ, sed constantes simus in fide et proposito religionis nostræ.

« Veritatem autem facientes, in caritate crescemus in illa per omnia, qui est caput Christus : ex quo totum corpus compactum et connexum per omnem juncturam subministrationis, secundum operationem in mensuram uniuscujusque membri, augmentum corporis facit in ædificationem sui in charitate. »

Non circumferamur omni vento doctrinæ sed facientes veritatem, id est veram argumentationem contra astutiam illorum, id est ad inventiones veras et firmas et rationabiles contra illos qui hæresim volunt inducere, crescamus in illo per omnia quæ habemus, id est in omnibus quæ jam percepimus, scilicet in innocentia, humilitate, patientia et cæteris virtutibus augmentemur, et hoc fiat in charitate. Vel faciamus veritatem, id est bene operemur secundum doctrinam mandatorum Dei, de quibus dicitur :

« Omnia mandata tua veritas (Psal. cxviii), » et hoc non in hypocrisi vel in timore faciamus, sed claritate ut sola claritas nos faciat hæc agere. Et ita crescimus ac proficiamus per omnia, bona quæ habemus, tam sensuum mentis quam et operum bonorum atque verborum, in illo qui est caput nostrum, id est providens nobis et regens nos. Et quis est ille? Christus, id est rex noster, sive pontifex. Et in isto atque sub isto capite debemus semper crescere et augmentari per omnia, ut sequamur eum ut membra caput, et in eo maneamus qui se nobis habitaculum dedit, dicens : « Manete in me (Joan. xv). »

Dehinc Apostolus metaphoram capitis et membrorum prosequitur, ostendens quod nullus fidelium in aliquo loco possit crescere, nisi adhæreat capiti Christo sicut et in humano corpore si membrum aliquod a capite suo abscinditur, jam non crescit sed marcescit. Et hoc est : Ex quo capite Christo fit quod totum corpus, id est tota Ecclesia secundum omnia est compactum, id est conjunctum unanimitate fidei, et connexum vinculis charitatis. Et ita est ex fide compactum et charitate connexum, quod si eamus per omnem juncturam membrorum, inveniemus ibi esse omne, scilicet quia pes conjunctus est non solum cruri, sed etiam manui et capiti, et cæteris omnibus membris. Et sic invenitur ibi omnis junctura, quia et junctura pedis ad crus, et cruris ad manum et caput, et ita in cæteris. Quæ junctura est subministrationis quia præcedentibus electis subministrantur atque sibi subjunguntur per officia sacerdotum, qui sunt Ecclesiæ membra. Subministrationis dico, digne existentis secundum operationem, quia ille digne subnexus est præcedentibus Ecclesiæ membris, qui bona quæ potest operatur. Et hæc operatio est in mensuram uniuscujusque membri, quia unusquisque juxta modum suum operatur bona, et per hæc crescit usque ad mensuram quantitatis suæ. Unusquisque enim secundum ea quæ

operatur, magnus aut parvus dicitur. Vel junctura hæc est subministrationis, id est ad hoc ut alius subministretur alii. Ad hoc enim sunt juncti in Ecclesia fide et charitate, ut sicut in nostro corpore oculi provident pedibus ; sic illi qui in Ecclesiæ corpore sunt oculi, provideant illis qui sunt pedes, et sic cætera membra vicissim faciant. Quæ subministratio secundum operationem fit, ut ministret alius alii secundum ea quæ operari potest, id est in tantum subserviat, in quantum valet operari. Illi autem recusant in Ecclesia ministrare vel ministrari, quia schisma volunt facere. Et quid est aliud in Ecclesia schisma facere, quam dissolvere quod Christus compegit et connexuit? Hæc autem operatio fit in mensuram uniuscujusque membri, id est secundum quod unumquodque membrum potest operari. Et ita corpus istud compactum et connexum, dum membris membra subministrant vel subministrantur, facit augmentum corporis, id est sui ipsius, id est augmentat illos in virtutibus et numero, quæ jam sunt corpus. Et hoc facit in ædificationem sui, id est ut se ædificet, et se templum Dei construat, ponens semper in ædificio sui quoscunque potest convertere. Et hoc totum facit in charitate, quia propter solam charitatem ponit illos in ædificio Dei et in charitate docet permanere et operari. Econtra autem faciunt qui schisma generant, et hoc sacrum corpus minuere conantur, et ædificium cælestis destruerent. Aliter quoque potest intelligi quod dictum est, in mensuram uniuscujusque membri augmentum corporis facit. Augmentatur enim corpus Ecclesiæ proficiendo in mensuram uniuscujusque membri, ut unumquodque membrum in quantum crescere debet, in tantum crescat per successionem. Crescunt oculi in hoc corpore, dum uno doctore mortuo, crescit et succedit ei alius. Non tamen dicitur divisi oculi, quia non efficiuntur plures, sed augmentantur. Unus enim semper episcopus in civitate præest, et non plures. Et ita de cæteris sentiendum. Cum autem ista successio et ædificatio peracta fuerit, tunc completa erit mensura ætatis plenitudinis Christi.

« Hoc igitur dico et testificor in Domino (Rom. 1) ut jam non ambuletis sicut et gentes ambulantes in vanitate sensus sui, tenebris obscuratum habentes intellectum, alienati a vita Dei per ignorantiam, quæ est in illis propter cæcitatem cordis ipsorum ; qui desperantes semetipsos traderunt impudicitæ, in operationem immunditiæ omnis in avaritiam. »

Admonet ut caveant ab antiqua consuetudine gentilitatis. Quasi dicat : Quandoquidem tanti capitis membra estis effecti, igitur hoc dico et suo teo vobis, ut ultra non vivatis more illorum, qui ad hoc caput non pertinent. Non obsecro nunc ut superius, sed dico, id est doceo et auctoritate mea veterem nequitiam inhibeo et testificor, id est testem me hujus rei facio in Domino, id est in confirmatione veritatis Domini et æquitatis ejus, vel testificor in Do-

mino, id est sub testimonio Domini assero. Hoc scilicet dico, ut jam post conversionem vestram non ambuletis sicut olim ambulastis, id est non operemini sicut prius operabamini, sicut et gentes quæ nunc sunt, ambulant euntes in vanitate sensus sui, id est habentes sensum vanitate plenum, quia non cogitat mens eorum nisi de transitoriis quæ sunt vanitas, ut scriptum est : « Vanitas vanitatum et omnia vanitas (Eccle. 1). » Quia ergo nihil sapiunt et nihil appetunt nisi caduca et temporalia, ambulare dicuntur in vanitate sensus. Et naturalem intellectum rationis habent obscuratum et hebetatum tenebris peccatorum ; et ideo minus mirum de illis est si ambulant in vanitate, quam de vobis, qui estis illuminati, et internæ lucis radiis illustrati. Præterita enim peccata sic obscuraverunt intellectum mentis eorum, ut non possit exercere vim propriam, id est vim discretionis. Et quia ambulant in vanitate sensus, ideo sunt alienati a vita Dei, id est a vita quæ in Deo est, a vita quæ Deus, id est separati a Deo qui est vita animæ, et cui adhærere vita est. Nam sicut vita corporis humani anima est, sic vita animæ Deus est. Vel secundum alios codices, alienati sunt a via Dei, quia scilicet nunquam ambulant in ea. Et quod alienati sunt a vita vel a via Dei, hoc fit per ignorantiam quæ est in illis permanens. Ignorant enim gloriam vitæ cælestis et viam justitiæ, quæ ducit ad illam ; ideoque alieni remanent utriusque et illa ignorantia locum in eis habet propter cæcitate cordis ipsorum, quia ad aspectum veri luminis oculos cordis apertos non habent, quos evangelicæ prædicationi clausurunt, ideoque jure cæcati sunt. Anima enim recedens a luce justitiæ, quanto magis quærit quod contra justitiam inveniat, tanto plus repellitur a lumine veritatis, et in tenebrosa demergitur. Hoc autem diversum est ab eo quod dixit, tenebris obscuratum habentes intellectum, quia illud accipitur de obscuritate peccatorum, istud autem de cæcitate ignorantie. Et revera sunt cæci, qui de venia et salute pro sua turpitudine desperantes, id est divitiarum supernæ gratiæ præmium non sperantes, nullo cogente, sed sua sponte tradiderunt semetipsos impudicitie, quæ fit in consanguineas, id est sic ex toto tradiderunt se libidini servos, ut nec a consanguinearum concubitu absterent. Ipsi dico cadentes in operationem immunditiæ omnis, id est in hoc devoluti, ut operentur omnimodam carnis immunditiam, sive in semetipsis, sive invicem, sive in pecudibus. Et hoc faciunt euntes in avaritiam, id est in insatiabilitatem, quia sicut avarus nunquam reputat se satis habere, ita nunquam isti perveniunt ad fornicationis saturitatem. Vel ita distinguamus : Delapsi sunt in operationem immunditiæ, quia se ipsos inquinant voluptatibus carnis, tendentes omnes in avaritiam, id est in immoderatum amorem habendi, sive ambiendo honores, sive quamcunque pecuniam.

« Vos autem non ita didicistis Christum, si tamen illum audistis, et in ipso edocti estis sicut

A « est veritas in Jesu. Deponite vos secundum « pristinam conversationem veterem hominem qui, « corrumpitur secundum desideria erroris (Co- « 1088. 111). »

Gentes quæ excæcatæ sunt, ambulant in hujusmodi operibus ; sed vos non debetis taliter ambulare, quia non ita didicistis Christum, id est non ita percepistis a prædicatoribus notitiam Christi et doctrinæ ejus, ut in ea, sicut gentes in erroribus turpiter ambulant, ambuletis. Didicistis dico, sed tamen hac conditione, si illum audistis, id est si prædicationem quæ de eo fit, intellexistis, vel eum interius loquentem audistis. Loquitur enim Christus homini, cum rationem ejus intrinsecus illuminat et excitat. Homo vero audit, cum intelligit ad quid ratio ejus excitetur, et facit quod sibi divinitus suadetur. Et iterum hac conditione dico, si in ipso edocti estis, ut sciatis ea quæ scire et quæ agere in ejus religione debetis. Si in ipso edocti estis, sicut in Jesu, id est in ipso est perfecta et integra veritas, sine ulla admistione falsitatis, veritas fidei et bonæ operationis et sapientiæ et salvationis. Ideoque veraciter bona debent esse opera eorum, qui in ejus scholis discedere cœperunt, et veritatem æternæ salutis in eo adipisci cupiunt. Et quæ sit illa veritas in Jesu, subjungitur, scilicet deponere vos veterem hominem, id est ut veraciter non simulatorie deponatis veterem hominem, non secundum substantiam quam traxistis de Adam, sed secundum pristinam conversationem vestram quæ erat in vetustate primi hominis, id est secundum priores actus pravitatis vestræ. Deponatis veterem hominem, id est imaginem et conformitatem veteris hominis, cujus vitæ conformitas ducit ad vetustatem et corruptionem. Veterem, inquam, hominem deponatis, id est omnes pravos actus qui defluerunt ab eo, et pravos mores ejus. Qui scilicet homo jure deponitur, quia corrumpitur in suis delectationibus vel carne, vel spiritu, sive utroque. Corruptur non solum secundum opera, sed etiam secundum desideria quæ sunt erroris, id est error suadet illa, non veritas Domini Jesu. Et ideo si vere deponitis hunc hominem, deponite etiam desideria ejus quæ veniunt ab errore, vel ducunt in errorem.

D « Renovamini spiritu mentis vestræ, et induite « novum hominem (Rom. vi), qui secundum Deum « creatus est in justitia et sanctitate veritatis. »

Non solum deponere veterem hominem debetis, sed etiam renovamini, id est ad id quod retro est novamini, id est ad priorem novitatem quam habuit pater vester Adam, quando creatus fuit ad imaginem Creatoris (Gen. 1). In mente autem et ratione et intelligentia qua Deum cognoscere potuit, factus est ad imaginem Dei. Sed peccando inveteravit, et deformis ac decolor facta est hæc imago. Unde nunc sectando justitiam renovatur et reformatur. Propter quod cum dictum esset, renovamini, subjunctum est, spiritu mentis vestræ ut in mente intelligatur fieri ista renovatio. Quod enim ait, spiritu mentis

vestræ, non ibi duas res intelligi voluit, quasi aliud sit mens, aliud mentis spiritus, quia omnis mens spiritus est, non autem omnis spiritus meus est. Nam et Deus est spiritus (*Joan. iv.*), qui nec renovari nec veterascere potest. Dicitur etiam spiritus in homine, qui mens non sit, ad quem pertinent imagines similes corporum, de quo dicit alibi: « Si autem oravero lingua, spiritus meus orat, mens autem infructuosa est (*I Cor. xiv.*) » Hoc enim fit, quando id quod dicitur, non intelligitur, quia nec dici potest nisi corporalium vocum imagines sonoris in spiritus cogitatione præveniant. Sed et hominis anima dicitur spiritus. Et etiam spiritus pecoris. Ventus quoque qui res est apertissime corporalis, vocatur spiritus, juxta illud: « Dixit et stetit spiritus procellæ (*Psal. cvi.*) » Quia ergo tot modis dicitur spiritus, spiritum mentis dicere voluit eum spiritum qui mens vocatur. Et in hoc jubet ut etiam post novationem baptismi quotidie renovemur exercitio divini fervoris. Mens enim quæ igne superni amoris excoquitur, semper in se servat claritatem pulchritudinis quotidiana innovatione fervoris. Nescit enim mens per torporem inveterascere, quæ studet per desiderium semper inchoare. Sic ergo renovamini spiritu mentis vestræ. Et ut ita possitis renovari, induite novum hominem, id est accipite velut indumentum conformitatem conversationis Christi, quæ vos undique sic cooperiat, ut nihil in moribus vestris appareat, nisi similitudo operum quæ Christus egit, qui creatus est non secundum operationem carnalis concupiscentiæ, sed secundum Deum, id est sola virtute Dei et potentia Spiritus sancti conceptus est, ac per hoc immunis a labe originalis peccati. Creatus, id est conceptus est in justitia et sanctitate veritatis, id est in vera justitia ac vera sanctitate, non in peccatis, sicut cæteri homines non præservati speciali Dei privilegio. Justitia et sanctitas veritatis non solum in conversatione, sed in creatione ejus fuit, ad distinctionem eorum, qui falsam justitiam et simulatam sanctitatem habent. Et ideo induendus est vobis. Potest esse ordo: Induite novum hominem in justitia et sanctitate veritatis. Sic enim induitur Christus. Justitia est observatio præceptorum Dei. Sanctitas vero est, juxta Dionysium, omni iniquatione libera et incontaminatissima et perfectissima puritas. Et hæc pro modulo nostro veraciter in nobis esse debent, ut novi hominis novitas sit nobis indumentum.

« Propter quod deponentes mendacium, loquimini veritatem unusquisque cum proximo suo, quoniam sumus invicem membra (*I Petr. ii.*). Irascimini et nolite peccare (*Psal. iv.*). Sol non occidat super iracundiam vestram. Nolite locum dare diabolo (*Jacob. iv.*). Qui furabatur, jam non furetur; magis autem laboret, operando manibus suis quod bonum est, ut habeat unde tribuat necessitatem patienti. »

Deponere veterem hominem debetis, et induere novum. Propter quod agendum, agite sequentia.

A Nam quia vetus homo deponendus est, deponite mendacium, id est desistite mentiri, quia « os quod mentitur occidit animam (*Sap. i.*) » Quia vero novus est induendus, loquimini veritatem, quod ad novum pertinet. Loquimini veritatem unusquisque cum proximo suo, id est cum quolibet homine. Proximus enim est omnis homo, qui ex uno parente sumus omnes geniti. Omnesque proximi sumus conditione terrenæ nativitatis. Et aliter: Spe cœlestis hæreditatis debes proximum tuum putare omnem hominem, et antequam sit Christianus. Non enim nostri qualis futurus sit apud Deum, qui modo vel Judæus est, vel hæreticus, vel paganus. Forte enim per misericordiam Dei ita convertetur, ut inter sanctos primum locum habere mereatur. Et secundum hanc spem, quasi membrum Ecclesiæ aestimari potest. Nam ideo loqui debemus alter alteri veritatem, quoniam sumus invicem membra, ut vicissim serviat alter alteri, et diligat eum sicut se. Deponite veterem hominem. Si autem contigerit ut vos aliquid adhuc vetusto more agatis, irascimini inde vobismetipsis, id est agite pœnitentiam, et ulterius peccare desistite. Quid est enim pœnitens nisi homo irascens sibi? Ut accipiat veniam, de seipso exigat pœnam. Potest et prælati juberi, irascimini viliis delinquentium, id est severitatem in corrigendo exhibete, et nolite peccare, id est nolite in hoc nimis districte agere, ne modum excedendo peccetis. Vel omnibus etiam ita dici potest: Irascimini, id est si forte irascimini, id est si surgit motus animi qui jam propter pœnam peccati non est in potestate, nolite peccare, id est saltem non ei consentiat mens et ratio. Elsi contigerit irasci, non occidat sol super iracundiam vestram, id est non tenetis eam diu, nec in crastinum reservetis, sed ante solis occasum ejicite illam de corde vestro. Iracundia enim dicitur quasi ira abscondita, quia scilicet diu tenetur in animo. Sed aliter melius intelligitur hæc sententia, quia noster sol Christus est, qui veritas et sapientia et justitia est, cujus luce anima humana illustratur. Sed hanc lucem desinit mens videre, cum perturbatione iracundiæ fuerit tanquam nubilo superata. Et tunc quasi occidit super iracundiam hominis sol, quia cum menti iracundia confusionis tenebras incutit, huic Deus radium suæ cognitionis abscondit. Propter quod multum cavenda est iracundia, per quam lux veritatis amittitur. Qua amissa, princeps tenebrarum diabolus locum in homine sibi invenit. Unde sequitur: Nolite locum dare diabolo. Iratus enim mala cogitat, et sic se diabolo ingerit atque pandit, ut cogitata perficiat. Pandit ostium cordis et hostem sinit intrare. Sed vos nolite ei locum dare, quærenti per suggestionem malorum invenire locum consensus aut delectationis in vobis. Qui enim suggestionibus ejus consentit, dat ei locum in se. Claudendum est cordis ostium, ne tentator ingrediatur. Tentator non cessat pulsare, ut irrumpat. Si clausum invenerit, transit. Quia ergo in vestra potestate est hoc ostium claudere, nolite,

locum dare diabolo. Etenim si intravit et possedit, aut tu negligenter clausisti, aut claudere neglexisti. Hoc ostium habet tanquam duas valvas, cupiditatis et timoris. Aut cupis aliquid terrenum, et hac intrat; aut times aliquid terrenum, et hac intrat. Cupiditatis ergo et timoris januam claude contra diabolum, si vis tutus esse. Nam de cupiditate qua Satanas intrat, subiungitur: *Qui furabatur, jam non furetur.* Et hoc quoque, sicut et prædictorum vitiorum prohibitio, pertinet ad depositionem veteris hominis. Quodque sequitur, magis autem laboret, etc., ad inductionem Novi pertinet. Furtum vero hic intelligi potest, non solum occulta alienarum rerum ablatio, sed etiam quidquid acquiritur sub alterius damno vel deceptione. Qui ergo dum veterem vitam duceret, furabatur aliena bona, jam postquam novum hominem induit, non furetur, id est non auferat dolo vel aliqua machinatione fraudis aliquid alienum, sed magis, id est potius laboret non per servos, sed *manibus suis*, id est propriis operando non illud opus quod displiceat Deo, sed illud *quod est bonum*, id est utile et sine peccato. Ideo scilicet laboret, *ut habeat non solum unde vivat, sed etiam tribuat necessitatem patienti*, id est penuriam: hoc est ut possit pauperes de justo labore sustentare. Hinc enim ostenditur, quod elemosyna debet fieri ex eo quod bonum est, id est quod juste habetur, non de eo quod injuste. Sequitur.

« Omnis sermo malus, ex ore vestro non procedat, sed si quis bonus est ad ædificationem fidei, ut det gratiam audientibus. Et nolite contristare Spiritum sanctum Dei, in quo signati estis in die redemptionis. »

Omnis sermo malus non procedat, id est nullus sermo malus procedat *ex ore vestro*, etiam si fuit corde conceptus, sed comprime illum ne possit exire, ut nihil mali unquam loquamini. Sermo contumeliosus et lascivus aut inurmuriosus, vel alius huiusmodi, non exeat ab ore vestro; *sed si quis est in corde vestro bonus*, id est humilis et charitativus et utilis, ille procedat non otiose, sed *ad ædificationem fidei*, id est ita opportune, ut ædificet alios in fide, quæ per dilectionem operatur, quia illa est vera fides et salutifera. Ad ædificationem procedat bonus sermo. Ubi ostenditur quia nec bonus sermo proferri debet nisi ad ædificationem. Unde Psalmista: « Obmutui et humilitatus sum, et silui a bonis (Psal. xxxviii). » Ad hoc proferatur bonus, *ut det gratiam audientibus*, id est ut auditores per eum hauriant dulcedinem supernæ gratiæ, et promoveantur in bonis operibus. Talis sermo processit ex ore matris Domini, quando ad vocem salutationis ejus repleta est Spiritu sancto Elizabeth (Luc. xxxi). Nolite malum sermonem proferre. *Et nolite contristare Spiritum sanctum Dei* in mala conversatione vestra, id est nolite talia facere quæ Spiritui sancto sic displiceant, ut recedat a vobis, quasi offensus ac contristatus. « Spiritus enim sanctus, ut scriptum est, disciplinæ effugiet fictum, et auferet se a cogi-

ationibus quæ sunt sine intellectu, et corripietur a superveniente iniquitate (Sap. 1). » Nam in sua substantia Spiritus sanctus contristari non potest, cum ipse sit æterna et incommutabilis beatitudo; sed ad similitudinem hominis contristari dictum est, qui domum illius, qui eum contristavit, egreditur. Vel Spiritum sanctum dicitur contristare, qui pravis moribus suis contristat sanctos, in quibus habitat Spiritus sanctus. Sancti enim sicut de profectibus fidelium gaudent, sic de lapsibus eorum contristantur. Propterea Spiritus sanctus dicitur contristari ab eis qui sic agunt, ut eorum factis contristentur sancti, non ob aliud nisi quia Spiritum sanctum habent, per quem tam boni sunt, ut eos mali mœstificent, hi maxime, quos bonos fuisse vel noverunt vel crediderunt. Contristari dicitur Spiritus sanctus, quia suis electis inspirat charitatem, per quam facit ut contristentur de aliorum detrimentis. Sancti autem qui sic contristantur, maxime sunt pii præpositi Ecclesiæ. Unde nunc subjectis præcipitur, ne per inobedientiam suam contristent eos, quia in eis contristarent Spiritum sanctum. Ut exaugeret peccatum, voluit Apostolus ita dicere. Præpositos enim contristant, qui eorum verba contemnunt, et eis obedire despiciunt. Non debetis hunc spiritum contristare, *in quo vos quasi cera signati estis*, ejus imagine vobis impressa. Vel signati, id est ab infidelibus discreti. Et hoc factum est *in die redemptionis*, id est quando transacta nocte infidelitatis et ignorantiae, illustrati estis luce fidei in baptismo, et redempti de servitute diaboli. In baptismo enim Spiritus sanctus fide et sacramentis et spiritualibus gratis signat fideles, id est ab infidelibus secernit.

« Omnis amaritudo, et ira, et indignatio, et clamor, et blasphemia tollatur a vobis cum omni malitia. Estote autem invicem benigni, misericordes, donantes invicem, sicut et eis obedire despiciunt. Non debetis hunc spiritum contristare, in quo vos quasi cera signati estis, ejus imagine vobis impressa. Vel signati, id est ab infidelibus discreti. Et hoc factum est in die redemptionis, id est quando transacta nocte infidelitatis et ignorantiae, illustrati estis luce fidei in baptismo, et redempti de servitute diaboli. In baptismo enim Spiritus sanctus fide et sacramentis et spiritualibus gratis signat fideles, id est ab infidelibus secernit. »

Omnis amaritudo quæ quidem contraria est benignitati, id est rancor et asperitas in dictis vel in factis sive in cogitationibus, *tollatur a vobis*; *et ira*, id est subita commotio animi, aliquandiu ipsum animum possidens; *et indignatio*, id est vehementis furor animi cum quodam arrogantiae vitio. Hoc fit plerumque, si major viderit minorem in aliquo honore sublimari. Indignatur enim ex hoc nonnunquam graviter. Et quia istum impetum animi solent sequi clamorosa verba, subsequenter ponitur *et clamor*. Clamorem hic accipimus, quando omnes cum sunt in iræ furore, mala verba et ad contumeliam pertinentia proferunt; *et blasphemia*, id est prolatio verborum contra Deum vel sanctos ejus. Blasphemia enim est, per quam de ipso Deo falsa dicuntur vel sanctis ejus. Et omnia hæc jubet Apostolus ut tollantur a vobis, exhortans nos ad patientiam. Et quasi cunctis exterius jam bene compositis, ad interiora convertitur, dum subiungit: *cum omni malitia*. Malitia enim proprie ad mentem per-

tinet. Et frustra indignatio et clamor et blasphemia ab exterioribus tolluntur, si in interioribus vitiorum mater malitia dominatur. Et incassum foris nequitia ex ramis inciditur, si subreptura multiplicius intus in radice servatur. Malitia ergo quæ est occulta radix vitiorum, extirpanda funditus est a corde; et dulcedo charitatis inserenda, ne vitiorum rami foras erumpant. Sic enim tolerare debemus eos qui mala nobis irrogant, ut et puro corde diligamus illos. Hæc vitia dum tollimus a nobis, deponimus veterem hominem; novum autem induimus, facientes quod subditur: *Estote autem*, etc. Quasi dicatur: Nolite esse amari, sed e contra *estote invicem*, id est alter erga alterum benigni, id est bonum ignem piæ dulcedinis habentes. Benignitas enim est serenitas animi, quando aliquis clare et hilariter loquitur, et sua tribuit, et conversatur cum alio. Quæ, sicut diximus, contraria est vitio amaritudinis. Et nolite iram habere adversus quemquam, sed estote *invicem misericordes*, id est viscera miserationis habentes, ut affectum benefaciendi proximis semper habeatis, etsi deest quod tribuatis. Et non clametis irati contra aliquem, vel non deferatis ad iudicem, de injuria vobis illata clamorem, sed estote *donantes invicem*, id est condonantes alter alteri, quidquid læsionis vel offensionis pertulistis. Et hoc facite non fite, nec ex parte, sed ita pure et perfecte, *sicut et Deus in Christo donavit vobis*, id est sicut Deus per Christum omnia, quæ commiseratis, condonavit vobis, sine aliquo respectu vindictæ ulterius futuræ, sic et vos condonate vobis semper ad invicem sine respectu alicujus ultionis. Alioquin Deus repetet quæ vobis dimiserat.

CAPUT V.

« Estote ergo imitatores Dei, sicut filii charissimi mi; et ambulate in dilectione, sicut et Christus dilexit nos (*Joan. XIII, xv*), et tradidit semetipsum pro nobis oblationem et hostiam Deo in odorem suavitatis. »

Quandoquidem Deus in Christo vobis peccata, quæ in eum commiseratis, donavit, ergo estote imitatores Dei, id est sequimini exemplum bonitatis ejus, ut et vos fratribus dimittatis quidquid in vos delinquant. Et hoc facite *sicut filii charissimi*, quia si hoc feceritis, tunc filii charissimi eritis illius Patris. Unde dicit Unigenitus ejus: « Diligite inimicos vestros, benefacite his qui oderunt vos, orate pro persequentibus et calumniantibus vos, ut sitis filii Patris vestri qui in cælis est, qui solem suum oriri facit super bonos et malos, et pluit super justos et injustos (*Matth. v; Luc. vi*). Et non solum in condonatione peccatorum sitis imitatores Dei, sed etiam in dilectione, ut diligatis eos qui vobis adversantur. Scilicet in dilectione positi ambulate, id est promoveamini et proficite in ea in tantum, ut si opus fuerit, ponatis animas pro his quos diligitis, *sicut et Christus dilexit nos*, et posuit animam suam pro nobis (*Joan. x*). Magna et inenarrabilis dilectio, ut unicus Filius Dei semetipsum pro nobis traderet morti, Dominus

pro servis, Creator pro creatura. Nam *tradidit pro nobis* redimendis, non arietem, non hircum, non etiam prophetam aut apostolum, sed *semetipsum* qui Deus est. Tradidit se, id est non invitus est ductus ad mortem, sed ipse spontaneus se dedit, et in hoc apparuit vis dilectionis. Tradidit enim se *oblationem et hostiam Deo*. Oblatio namque dicitur, quando nullo quærente aliquid sponte offertur. Sic Christus cum nemo id quærere auderet, obtulit se pro nobis in cruce sacrificium Deo. Hostia vero dicitur, quæ pro hostibus vel victis vel superandis celebratur. Sic et hostia Christi diabolus et dæmones superati sunt atque peccata. Vel oblatio fuit Christus, quia morte sua nobis dona virtutum et divinam gratiam acquisivit; hostia vero, quia nos ab hoste liberavit. Vel oblatio, dum fuit injuriatus; hostia dum fuit occisus. Qui dedit se hostiam talem, quæ iret *in odorem suavitatis*, id est in odorem suavem Deo. Quia sicut suavis et bonus odor est alicui acceptabilis, sic Deo sacrificium Dominicæ carnis. In quo Pater delectatus est non respectu simplicis mortis Christi, sed respectu fructus ab ea procedentis. Ex ea enim nunc salus humano generi provenit, in qua quidem Deus delectatus est. In intentione etiam Salvatoris et affectu pietatis ejus, dum se pro nostra redemptione immolari permetteret, delectatus est Pater, ut in odore suavissimo. Nam quia Justus pro justitia occisus est, optimum de sua morte præbuit odorem. Sicut enim peccatum fetorem, sic justitia bonum spirat odorem.

« Fornicatio autem et omnis immunditia aut avaritia, nec nominetur in vobis, sicut decet sanctos, aut turpitude, aut stultiloquium, aut scurrilitas, quæ ad rem non pertinet, sed magis gratiarum actio. »

Deum imitari studete. Sed fornicatio et immunditia et avaritia sic prorsus rejiciantur a vobis, ut neque vel nominentur in vobis, id est nomen alicujus horum vitiorum non sit in aliquo ex vobis, scilicet nemo saltem solo verbo dicat quemquam vestrum esse talem; sed ita coram Deo et hominibus irreprehensibiles estote, ut nullum locum malæ suspicioni detis. Fornicatio dicitur a fornicibus, qui et arenarii nunc appellantur. Sunt enim theatrales arcus et lupanaria loca, in quibus erant meretrices, cum quibus spurcissimi quique commiscebantur. Immunditia autem vocatur omnis incontinentia ad libidinem pertinens, quoquo modo fiat. Fornicatio igitur quantum ad mulieres, hic accipitur; immunditia vero, quantum ad hoc quod fit contra naturam, sive in se, sive in alium. Avaritia vero illa pestis est animi, quæ nunquam dicit nisi accipe. Quam ideo ponit Apostolus cum fornicatione et immunditia, ut innuat eam esse fornicationem animæ, sicut illicita corporis operatio, corporis est fornicatio, sicut enim qui fornicatur, non sua, sed aliena muliere abutitur; sic qui peste avaritiæ contaminatur usque ad aliena habenda extenditur; et quod sub rapina habet, omnibus retinere molitur. Per hoc

quod posuit disjunctivam conjunctionem inter immunditiam et avaritiam, quod quidem non fecerat inter immunditiam et fornicationem, voluit significare alterius generis esse fornicationem et immunditiam, et alterius avaritiam, quia illæ sunt corporis, ista vero animæ. *Fornicatio et omnis immunditia aut avaritia non solum non sit in vobis, sed nec etiam nominetur*, id est tantopere vobis providete ab istis vitiis, ut neque vel infamiam illorum patiatur aliquis vestrum *sicut decet sanctos* a vitiis esse immunes et a nota infamiae, *aut turpitudine non nominetur in vobis, aut stultiloquium, aut scurrilitas*. Turpitudine est, qua mens inflammatur ad libidinem, ut in oculis et amplexibus et multis aliis hujusmodi. Stultiloquium vero est stulta verborum prolatio, nullam utilitatem, nullamque scientiam continens, sine industria et discretione facta. Scurrilitas vero est facetia joculariorum verborum, quæ quadam industria et ingenio artis proferuntur, ut auditores ad risum moveantur. Quæ scurrilitas licet magno labore studii agatur, tamen *non pertinet ad rem*, id est ad aliquam utilitatem, sed tantum ad vanitatem et mentis enervationem. Hæc vitia non nominentur in vobis, *sed magis*, id est potius nominetur in vobis *gratiarum actio*, id est ita Deo semper agito gratias super beneficiis ejus, et ita laudibus ejus insistite, ut nihil de vobis dici possit, nisi quod omnis actio vestra Deo gratias rependit, scilicet et verbis et actibus assidue gratias Salvatori redidite.

« Hoc enim scitote intelligentes, quod omnis fornicator, aut immundus, aut avarus, quod est idolorum servitus, non habet hæreditatem in regno Christi et Dei. »

Ratio quare fornicatio et cætera non debent esse in vobis, quia hoc sine ambiguitate sciatis, *quod omnis fornicator, etc.* Omnis dico, id est numeratis singulis partibus cujusque, nulla reperietur quæ habeat hæreditatem in regno Christi et Dei, id est quæ habeat hæreditario jure locum in regno gloriæ. Et hoc ideo, quia Christi est, contra cujus præcepta operantur tales; et Dei Patris, cui injurias faciunt. Et hoc erit vobis manifestum, si fueritis intelligentes, id est si adverteritis quod advertendum est, videlicet quid sit fornicatio et immunditia, id est quam immunda res sit et sordida omni vituperatione digna, et item quam pessima et prava res sit avaritia, videlicet quod avarum esse sit non solum idolis serviens, sed etiam ipsa idolorum servitus. Avari enim Deus, nummus est. Nam sicut qui idolis servit, cultum debitum Creatori imaginatæ creaturæ attribuit; sic et avarus impendit cultum effigiatæ pecuniæ, cum Deum colere deberet, non pecuniam. Ideoque pecunia quam diligit, veneratur et colit, facta est illi idolum, quia spem suam in ea posuit, et a Dei cultu pro ea recessit. Dum enim deberet adire Ecclesiam, custodit arcam. Dum deberet rogare Deum, petit forum, ut augeat lucrum. Quapropter idololatria merito judicatur. Vel etiam ideo, quia sicut idolo-

latria rapinam facit, honorem Dei tollendo et idolis dando, sic avarus rapit pauperibus ea, quæ superflue sibi coacervat. Res enim quas Deus servire vult indigentibus, ipse sibi usurpat et recondit. Et propter hujusmodi causas avaritia est idolorum servitus. Et econtrario si adversitatis quod sit regnum illud, scilicet quanta felicitate plenum, ubi nullus locus desiderandi est, nisi quod quisque habet, quia unicuique sufficit omnino quod habet, et item si advertatis quid sit Christus, id est quam sanctus, quam immunis ab omni peccato; et quis sit Deus, id est quam justus iudex; et quantum bonum, id est summum; si hæc omnia vultis advertere, scietis fornicatorem et similes excludi a regno Dei. Non enim intrabit in illud, sicut legimus, aliquid immundum (*Apoc. xxi*). Christus nunc primo nominatur, et postea Deus, ne secundum Arianos æstimaretur minor Patre Filius.

« Nemo vos seducat inanibus verbis (*II Thess. ii*); *Matth. xxiv*; *Marc. xiii*; *Luc. xxi*). Propter hæc enim venit ira Dei in filios diffidentiae. Nolite ergo effici participes eorum. »

Seducerent quidam auditores suos, promittentes impunitatem eis ex misericordia Dei, et persuadentes quia propter peccata superiora non amitteret homo regnum Dei. Contra quos nunc Apostolus: *Nemo*, inquit, *vos seducat inanibus verbis*. Inania enim sunt, id est ventosa, et omni veritate vacua, verba eorum, qui dicunt vel dicebant, non omnem fornicatorem aut immundum, aut avarum damnari, proponentes hoc, et dicentes: Si omnis fornicator et immundus, et avarus damnatur, tunc pauci in mundo salvantur. Quod reputant inconveniens et impossibile, cum sit conveniens et possibile. « Multi enim sunt, ut ait Dominus, vocati, pauci vero electi (*Matth. xx*). » Dicunt etiam aliquando misericordiam Dei tantam esse, ut etiam fornicatorem vel avarum non sinat æternaliter cruciari; atque naturale esse prædicant, ut his vitiis serviatur, dicentes: Cur fecit Deus mulieres, aurum, argentum, et similia, nisi ut his utemur? Sed Apostolus e contrario clamat: *Nemo vos seducat inanibus verbis*, id est a nemine vos permittatis seorsum ab hac ratione duci, scilicet quod fornicator et cæteri tales non habebunt partem in regno Dei. Omnes enim rationes eorum, qui vos ita seducere volunt, sunt inania verba. Et revera non debetis hujusmodi verbis ab hoc sano intellectu divelli, quia propter hæc verba venit ira Dei, id est ultio divina, ut in æternum pereant, *in filios diffidentiae*, id est in eos qui cum sint filii Ecclesiæ non secundum bonam vitam, sed solummodo secundum sacramentorum participationem, sunt tamen diffidentiae et desperationis, quia de illis diffidimus propter pravitatem eorum. Et quia ira divinæ animadversus in obitu eorum venit in eos, ergo ne vos similis patiamini, nolite effici participes eorum, videlicet vel quod eadem dicatis, vel quod fidem eis adhibeatis. Sed et secundum veterem historiam (*Num. xxx, xxxv*,

propter inania verba et fornicationem, et his
, venit ira divinæ ultionis in Judæos, pro-
is cadavera eorum in deserto; qui erant filii
tiæ, quia de promissionibus diffidebant, non
tes quod essent veræ; et ideo murmurabant
ocabantur, propter quæ et perierunt. Nolite
imiliter vel agere vel loqui ne similiter
s.

atis enim aliquando tenebræ, nunc autem
in Domino. Ut filii lucis ambulate. Fructus
lucis est in omni bonitate et justitia et veri-
probantes quid sit beneplacitum Deo. »

debetis jam effici participes eorum, quia vos
ido, id est ante conversionem *eratis tenebræ*,

obscuritas nigredinis peccatorum et in vobis-
t in aliis, p:avo exemplo illos excæcando, et
rem præcipitando, sed *nunc*, id est postquam

liam accessistis, facti estis *lux* secundum
t justitiam et puritatem vitæ, quia lumine et
lo vestræ operationis et scientiæ alios illu-

s. Et hoc non in vobis, sed *in Domino*, quia
e fuistis in vobis, sed nunc estis lux in Do-
ut « qui gloriatur, in Domino gloriatur (*Jer.*

or. 1). » Lux estis, sed lux illuminata, sicut
i nostri dicuntur lux, sed illuminata, quia
non possunt, nisi vel in die sol luceat, vel in
liquod luminare fulgeat. Et quia oportet ut

i lux talis estis, ut a vera luce quæ Deus est,
emini, non in vobis lux esse dicimini, sed
vino. Et ideo filii lucis jure vocari potestis.

go lux estis et filii lucis, idcirco non jam ut
ebrarum, sed *ut filii lucis ambulate*, id est

eamini de lucidis operibus in lucidiora. Et
iadet ut sic ambuletis, quia *fructus lucis*, id
e opus quod gignit lux, sicut arbor fructum,

mei bonitate, qua quisque sit bonus in se-
t in omni *justitia* qua proximis quod justum
endat; et in omni *veritate*, qua id quod ve-

l, credat et loquatur. Possumus autem justi-
veritatem partes bonitatis intelligere. Justi-
o tenetur in observantia bonorum operum,

autem in sermonibus non falsis et cogita-
s. Et hæc omnia bona sunt, ideoque partes
is. Et lux quæ tales fructus facit, homo est,

lus a vera luce, quæ Christus est. Ambulate
ucis, et hoc facite, *probantes*, id est discu-
et scire studentes atque discernentes *quid*

placitum Deo, id est quid Deus multum vel-
llud faciatis, quod ei optime placere proba-

Quidquid enim facere volumus, antequam
choemus, probare debemus an Deo placitu-
. Et si Deo placiturum probaverimus, tunc
is illud; si autem displiciturum, non facia-

equitur :
nolite communicare operibus infructuosis
rarum, magis autem redarguite. Quæ enim
culto sunt ab ipsis, turpe est et dicere. »

ii lucis ambulate, et nolite communicare, id
habeatis voluptatem communicandi, id est.

A consentiendi *operibus infructuosis tenebrarum*, id est
eorum qui sunt tenebræ, id est excæcati in se, et
excæcantes alios, quia infructuosa sunt illa opera,

id est nullam utilitatem afferentia. Non communi-
cetis operibus hujusmodi, sed *magis*, id est potius
redarguite et corrigite ea. Duobus enim modis non

nos inquinant mali cum quibus degimus, id est si
non consentimus, et si redarguimus, hoc est non
communicare, non consentire. Communicatur enim

peccatori, quando facto ejus consortium voluntatis
vel approbationis adjungitur. Hoc ergo nos admo-
nens Apostolus, ait : *Nolite communicare operibus*

infructuosis tenebrarum hominum. Et quia parum
erat non consentire, si quæreretur negligentia disci-
plinæ, magis autem, inquit, et redarguite. Videte

B quoniam utrumque complexus est : *Nolite commu-
nicare, magis autem et redarguite*. Quid est, nolite
communicare? Nolite consentire, nolite laudare,

nolite approbare. Quid est, magis redarguite? Re-
prehendite, corripite, coercete. Prælati vero datum
est maxime hoc præceptum. Ideo non debetis com-
municare, sed potius redarguere, quia *turpe est* non

solum facere vel videre, sed *et dicere ea quæ ab
ipsis* tenebrosi hominibus *fiunt in occulto*, id est in
secretis locis, quia verecundantur talia palam face-
re. « Omnis qui male agit, odit lucem (*Joan.* 11). »

Sequitur :
« Omnia autem quæ arguuntur, a lumine man-
festantur. Omne enim quod manifestatur, lumen
est. Propter quod dicit : Surge qui dormis, et ex-
surge a mortuis, et illuminabit tibi Christus. »

Ipsi faciunt in occulto turpia. Sed *omnia* opera
eorum *quæ arguuntur, manifestantur eis a lumine*
redargutionis ejusdem. Plerumque ignoratur culpa
ab ipso, qui perpetravit eam. Sed dum increpatur,
manifestatur ei. Et istis qui nunc ab Apostolo vo-
cantur tenebræ, sic obscurata est usu peccandi con-
scientia, ut jam ea quæ faciunt, mala esse non in-
telligant; vel si intelligunt, pro nihilo ducant et
obliviscantur. Quasi enim sub quadam obscuritate
teguntur et latent peccata quæ sunt, ut vel non in-
telligantur, et post ad memoriam non revocentur.

Sed dum ab increpante ingeruntur oculis cordium
suorum culpæ, quas nesciebant, et arguuntur, tunc
a lumine veritatis manifestantur mentibus eorum,
ut eas videant et constentur, ac pœnitendo deleant.

Ecce quanta utilitas ex redargutione procedat. Et
vere manifestantur a lumine. Nam *omne* peccatum
quod manifestatur, est lumen, id est evidens et non
ambiguum, nec potest excusatione tegi, quod palam
dictum est. Vel omne malum opus quod per con-
fessionem manifestatur, lumen est; id est illumi-
nans conscientiam, quia ex consideratione malorum
quæ fecit, illuminatur pœnitentis animus ad agenda
bona, ut videat quantum in pœnitentia se debeat
affligere, et quanto studio bonis operibus insudare.

Propter quod, id est quia omne quod manifestatur,
fit lumen, dicit Isaias : « Surge, illumina, quia
venit lumen tuum (*Isa.* 60). » Sed Apostolus more

« Omnia autem quæ arguuntur, a lumine man-
festantur. Omne enim quod manifestatur, lumen
est. Propter quod dicit : Surge qui dormis, et ex-
surge a mortuis, et illuminabit tibi Christus. »

Ipsi faciunt in occulto turpia. Sed *omnia* opera
eorum *quæ arguuntur, manifestantur eis a lumine*
redargutionis ejusdem. Plerumque ignoratur culpa
ab ipso, qui perpetravit eam. Sed dum increpatur,
manifestatur ei. Et istis qui nunc ab Apostolo vo-
cantur tenebræ, sic obscurata est usu peccandi con-
scientia, ut jam ea quæ faciunt, mala esse non in-
telligant; vel si intelligunt, pro nihilo ducant et
obliviscantur. Quasi enim sub quadam obscuritate
teguntur et latent peccata quæ sunt, ut vel non in-
telligantur, et post ad memoriam non revocentur.

Sed dum ab increpante ingeruntur oculis cordium
suorum culpæ, quas nesciebant, et arguuntur, tunc
a lumine veritatis manifestantur mentibus eorum,
ut eas videant et constentur, ac pœnitendo deleant.

Ecce quanta utilitas ex redargutione procedat. Et
vere manifestantur a lumine. Nam *omne* peccatum
quod manifestatur, est lumen, id est evidens et non
ambiguum, nec potest excusatione tegi, quod palam
dictum est. Vel omne malum opus quod per con-
fessionem manifestatur, lumen est; id est illumi-
nans conscientiam, quia ex consideratione malorum
quæ fecit, illuminatur pœnitentis animus ad agenda
bona, ut videat quantum in pœnitentia se debeat
affligere, et quanto studio bonis operibus insudare.

Propter quod, id est quia omne quod manifestatur,
fit lumen, dicit Isaias : « Surge, illumina, quia
venit lumen tuum (*Isa.* 60). » Sed Apostolus more

« Omnia autem quæ arguuntur, a lumine man-
festantur. Omne enim quod manifestatur, lumen
est. Propter quod dicit : Surge qui dormis, et ex-
surge a mortuis, et illuminabit tibi Christus. »

Ipsi faciunt in occulto turpia. Sed *omnia* opera
eorum *quæ arguuntur, manifestantur eis a lumine*
redargutionis ejusdem. Plerumque ignoratur culpa
ab ipso, qui perpetravit eam. Sed dum increpatur,
manifestatur ei. Et istis qui nunc ab Apostolo vo-
cantur tenebræ, sic obscurata est usu peccandi con-
scientia, ut jam ea quæ faciunt, mala esse non in-
telligant; vel si intelligunt, pro nihilo ducant et
obliviscantur. Quasi enim sub quadam obscuritate
teguntur et latent peccata quæ sunt, ut vel non in-
telligantur, et post ad memoriam non revocentur.

suo et auctoritate apostolica verbis aliis ponit hanc sententiam, et addit aliqua : *Surge*, inquit, *qui dormis*, etc. Somnus animæ est oblivisci Deum suum. Quæcunque enim anima oblita fuerit Deum suum, dormit. Sicut enim qui corpore dormit, etiam si dies jam fuerit, tanquam in nocte est, quia non vigilat ut videat jam ortum diem; sic quibusdam jam præsentem Christo, jam prædicata veritate, adhuc inest somnus ruinæ. Ideo unicuique talium clamat propheta vel Apostolus : *Surge*, illuminare, quia venit lumen tuum, id est Christus. *Vel surge qui dormis*, id est qui torpes in obscuritate cordis, non recogitans Deum, nec advertens peccata tua, sed in terrenis desideriis oculos mentis habens, surge ab illa pigritia per recordationem Dei et intelligentiam culparum tuarum, et *exsurge*, id est ex toto surge per dignam pœnitentiam, tu dico, elevatus et separatus a mortuis, id est ab illis qui per peccata spiritualiter mortui sunt in anima, ut jam cum illis non jaceas similiter mortuus. Vel surge per confessionem, et exsurge per satisfactionem. *Exsurge a mortuis*, id est a peccatis, quæ in Epistola ad Hebræos vocantur opera mortua (*Hebr. vi*). Et tunc *Christus* qui illuminator est mentium, *illuminabit tibi*, id est lumen sapientiæ et veritatis et gratiæ suæ sic infundet cordi tuo, ut maneat tibi, id est ut ultra non amittas illud. Plus enim notat dicens illuminabit tibi, quam si dixisset, illuminabit te. Quia illuminabit te, notaret Christum ei lumen virtutum infundere; sed illuminabit tibi, non solum vocat virtutum jubar expandere sed etiam in eo conservare. Non enim illi, id est, ad utilitatem illius Christus illuminaret, si non illum in virtutum lumine conservaret usque in finem.

« Videte itaque, fratres, quomodo caute ambuletis, non quasi insipientes, sed ut sapientes, redimentes tempus, quoniam dies mali sunt (*Col. iv*). Propterea nolite fieri imprudentes, sed intelligentes quæ sit voluntas Dei (*Rom. xii; I Thess. iv*). »

Debetis, sicut dictum est, ut filii lucis ambulare, et operibus tenebrarum non communicare, sed potius ea redarguere. Et quia sic agendum vobis est, itaque, o fratres, videte, id est considerate quomodo caute ambuletis, id est prudenter agatis. Caute enim ambulant, qui sic per viam bonæ operationis incedunt, ut ab insidiantibus vitiis se sapienter custodiant. Caute ambulant, qui et bona faciunt, et nec suis nec aliorum vitiis maculantur. Quod agere soli possunt, qui et juste vivunt, et peccantibus non consentiunt, sed eos studio charitatis redarguunt. Ambulate caute non quasi insipientes, id est non solum cavete vobis a peccato, sed etiam a similitudine peccati; hoc est, ita vos custodite, ut nullo modo videamini habere similitudinem cum insipientibus. Multi enim sunt qui caute ambulant, conservando se cum Dei adjutorio immunes a peccato digno reprehensione, et tamen ambulant quasi insipientes. *Ut si quis sacerdos redarguendo meretricem, fre-*

quentat domum ejus, videtur insipiens, licet nullum animum peccandi in eam habeat. Sed non decet sanctos malam de se opinionem dare per negligentiam vel indiscretionem suam. Non quasi insipientes ambuletis viam justitiæ, sed ut sapientes, id est ita irreprehensibiliter, ut in ipsa ambulatione videamini sapientes. Vel non ambuletis ut insipientes sæculi amatores, qui non provident sibi in futurum; sed ut sapientes qui sic in hoc sæculo vivere student, ut in futuro vitam æternam habeant. Vos dico, redimentes tempus. Redimere tempus est, ut quando aliquis infert tibi litem, perdas aliquid ut Deo vaces, non litibus. Quod enim perdis, pretium est temporis. Quomodo perdis nummos ut emas tibi aliquid, sic perde nummos vel quodlibet aliud, ut emas tibi quietem. Non enim habebis quietum cor, sed everteris cogitationibus tuis irriatus contra adversarium tuum. Et ita perdes tempus. Sed melius est ut nummos perdas, et tempus redimas. Vel tempus redimimus, quando anteactam vitam, quam lasciando perdidimus, flendo reparamus. Dum enim male agimus, tempus, in quo bene operari debemus, amittimus, sed damnum temporis redimimus, si ita vitam commendamus, ut ea bona quæ olim facere negleximus, et ea quæ nunc facere debemus, faciamus. Nec mirum si minus fecimus, quoniam dies mali sunt, id est temporis variatio nociva est, quia peccantes attrahit ad varietatem delectationum. Dies sunt mali, quia in ipsis viget malitia, et in ipsis leviter peccatur, quoniam tempus dat materiam male operandi, proponendo varietates rerum quas ex se affert. Dies enim malos duæ res faciunt, malitia et miseria. Nam per malitiam hominum et miseriam dicuntur dies mali. Cæterum dies isti quantum ad spatia horarum, ordinati sunt, ducunt vices, agunt tempora. Cui molesta sunt tempora, si homines sibi non sint molesti? Ergo dies malos, sicut dixi, duæ res faciunt, malitia et miseria. Sed miseria hominum communis est, non debet autem malitia esse communis. Ex quo enim lapsus est Adam et de paradiso expulsus, nunquam fuerunt dies nisi mali. Et quia dies mali sunt, et nos positi sumus in proclivio peccandi, propterea nolite fieri imprudentes, id est indiscreti vel inconsiderati, ut non possitis mala prudenter vitare, et bona eligere, vel consideratione rationis omnia facere; sed sitis intelligentes quæ sit voluntas Dei, id est quid Deus velit, ut illud faciatis.

« Et nolite inebriari vino, in quo est luxuria; sed implemini Spiritu sancto, loquentes vobismetipsis in psalmis et hymnis et canticis spiritualibus cantantes et psallentes in cordibus vestris Domino : gratias agentes semper pro omnibus in nomine Domini nostri Jesu Christi Deo Patri, subiecti invicem in timore Christi. »

Intelligite voluntatem Dei. Et ut eam possitis intelligere et facere, nolite inebriari vino. Non prohibeo quin moderate vinum bibatis, sed modum non excedatis. Ebrietatem enim interdico. Non in-

briemini vino, in quo immoderate bibito est luxuria, A id est luxuria est in nimia potatione vini. Non in natura vini est luxuria, sed in immoderatione potationis, ne quis perverse intelligens, conetur ostendere creaturam Dei, id est vinum, malum esse, sic argumentando: Cujus effectus malus est, ipsum quoque malum est; sed effectus vini, id est luxuria, malus est, igitur vinum est malum. Quod non procedit, cum sit creatura Dei. Idcirco dicendum est, in quo, id est in inebriari, est luxuria. Vel certe vinum in quo est luxuria, possumus intelligere concupiscentiam et cæteras vitiorum potiones, quæ mentem inebriant et evertunt. De cujusmodi Salomon ait: « Luxuriosa res vinum (Prov. xx). » Nolite vino ingurgitari, sed implemini, id est studete impleri Spiritu sancto, qui vos laudabiliter inebriet mutando mentes vestras, et amore æternorum calefaciens. Quo scilicet Spiritu impleri hoc modo poteritis, id est si ea quæ ore cantatis, mente cogitatis et intelligitis, ac vos de his intus instruitis. Et hoc est: Implemini Spiritu sancto, loquentes vobismetipsi intus secundum attentionem, id est intelligite quæ labiis profertis, quia non modicum placet Deo, ut quisque advertat quæ loquitur in psalmis, qui ad bonam operationem commonent; et hymnis qui de laudibus Dei, et canticis spiritalibus quæ de æterno gaudio resonant, et ideo spiritalia sunt. Sunt enim sæcularium hominum cantica, sed non spiritalia. Et post locutionem horum sitis cantantes, id est Deum laudantes, et de æternis exsultantes, sicut hymni et cantica docent, et psallentes opere sicut psalmi sudent. Cantate, inquam, et psallite in cordibus vestris, id est sicut in ore vestro laudes resonant Domino, sic resonent in cordibus vestris; et hoc facite non vanæ gloriæ vel alii rei, sed soli Domino, id est ad honorem ejus. Cantate, id est cœlestia resonate et desiderate. Nam qui desiderat, etsi lingua taceat, cantat corde. Qui autem non desiderat, quolibet clamore aures hominum feriat, mutus est. Desiderium enim et amor cordis, amœna vox est intus cantantis. Sic cantate in cordibus vestris Domino. Vos dico, gratias agentes non ad horam, sed semper pro omnibus quæ dedit vel dederit, sive sint prospera, sive adversa. Gratias ei semper agite, et hoc in nomine Domini nostri Jesu Christi, per quem hæc omnia vobis a Patre dantur, ut ipse Filius in illis gratiarum actionibus glorificetur. Gratias, inquam, agite Deo qui vos creavit, et Patri qui vos in filios adoptavit. Vos dico, subjecti invicem, humiliter curam agendo alter alterius, et pie vicissim ministrando, et hoc facite in timore Christi casto, qui hujus vitæ subjectionis humilitatem præcepit, et venit non ministrari, sed ministrare (Matth. xx).

« Mulieres viris suis subditæ sint, sicut Domino, quoniam vir caput est mulieris (I Cor. xi; I Petr. iii), sicut Christus caput est Ecclesiæ, ipse salvator corporis ejus. Sed sicut Ecclesia subje-

cta est Christo, ita et mulieres viris suis in omnibus. »

Ad familiaria præcepta se transfert Apostolus, et unicuique gradui quid debeat, præcipit. Mulieres sint subditæ reverendo, obediendo, viris suis, non alienis, sicut Domino, id est ad bene agendum solummodo, sicut nos subjicimur Domino Deo, ut illi serviamus bona faciendo, non mala. Vel sicut Domino, id est in simplicitate et charitate qua Deo servirent, serviant viris suis. Quod ideo facere debent, quoniam vir est caput mulieris, id est principium, quia mulier primum de viro facta est (Gen. ii). Ideo etiam caput, quia rector. Per virum enim regitur mulier, sicut per caput corpus. Et dignum est ut corpus regatur et subdatur capiti, id est mulier viro. Ita est vir caput mulieris, sicut Christus caput est Ecclesiæ, quia sicut Christus regit et instruit Ecclesiam, sic vir regere debet et instruere uxorem suam; et sicut Christus et Ecclesia spiritaliter sunt unum, sic vir et uxor carnaliter unum. Sicut Christus est decus Ecclesiæ, sic bonus vir decus mulieris. Christus est caput Ecclesiæ, ipse dico, salvator corporis ejus, id est Ecclesiæ, quia ipse salvat totum corpus ecclesiæ. Nullum enim membrum Ecclesiæ salvatur nisi per Christum, qui caput et Salvator est omnium electorum, et vir similiter pro modulo suo debet uxorem ab omnibus malis salvare. Nam sicut Ecclesia vitæ suæ causam habet ex Christo, sic mulier ex viro, quia ut consistat, virum accipit. Mulieres sint subditæ viris, et non qualitercunque, sed sicut Ecclesia subjecta est Christo in omnibus, sic mulieres viris suis subjiciantur in omnibus, quæ non sunt contra Deum. In omnibus est ita subjecta Ecclesia Christo, ut in nullo ei se præferat, ne velit esse superior eo vel etiam æqualis ei. Et eodem modo mulieres viris suis subdantur, ut in nullo velint eos superascendere.

« Viri, diligite uxores vestras (Colos. iii), sicut et Christus dilexit Ecclesiam, et seipsum tradidit pro ea, ut illam sanctificaret, mundans eam lavacro aquæ in verbo vitæ, ut exhiberet ipse sibi gloriosam Ecclesiam, non habentem maculam aut rugam, aut aliquid hujusmodi, sed ut sit sancta et immaculata. Ita et viri debent diligere uxores suas, ut corpora sua. Qui suam uxorem diligit, seipsum diligit. Nemo enim unquam carnem suam odio habuit, sed nutrit et fovet eam, sicut et Christus Ecclesiam. Quia membra sumus corporis ejus, de carne ejus, et de ossibus ejus. Propter hoc relinquet homo patrem et matrem et adhærebit uxori suæ, et erunt duo in carne una (Gen. ii). Sacramentum hoc magnum est, ego autem dico in Christo et in Ecclesia. Verum tamen et vos singuli unusquisque uxorem suam sicut seipsum diligit. Uxor autem timeat virum suum. »

Diligite, inquit, o viri, uxores vestras quarum caput estis, sicut et Christus dilexit Ecclesiam, cujus

caput, id est illa bonitate illas amate, qua Christus Ecclesiam, ut peccatum non ametis in eis, sed omnem bonum, et juste gubernetis eas atque foveatis. Christus dilexit Ecclesiam, et præ nimia dilectione tradidit in mortem seipsum pro ea redimenda. Ita et vos pro salute uxorum, si necesse fuerit, tradite vos. Ideo se tradidit, ut illam suo sanguine sanctificaret, quia multis erat peccatis inquinata. Ipse dico, mundans eam ab omnibus peccatis lavacro aquæ sanctificatæ in verbo vitæ, id est lavacro baptismi. Baptismus enim Christi, lavacrum est aquæ in verbo vitæ. Tolle aquam, non est baptismus. Tolle verbum, non est baptismus. Verbum vocat invocationem divinitatis, quod a baptizante super aquam profertur. Idecirco mundavit eam, ut ipse qui hoc bene poterat, exhiberet sibi, id est præpararet ad honorem suum electorum Ecclesiam pulchritudine virtutum gloriosam, non habentem maculam aut rugam, id est mundam ac simplicem. Maculam quippe et rugam non habet, quæ et turpitudine operis et duplicitate sermonis caret. Quia et per justitiam munda est, et per simplicem intentionem tensa. A similitudine vestis dictum est, quæ prius lavatur et post extenditur. Ecclesia enim non solum sponsa Christi, sed et vestis Christi solet appellari. Quæ mundata est, ut non habeat maculam; extensa est, ut non habeat rugam. Non habet in electis maculam crininis, nec rugam dolositatis. Non habet in eis rugam, quia nesciunt aliud de se foras ostendere, et aliud intus haberé. Vel ideo non habet in eis rugam, quia non flectuntur ad amorem terrenorum, sed extenduntur spe et desiderio cælestium honorum. Non habet maculam aut rugam, sed nec aliud hujusmodi, quia nec consuetudine venialium peccatorum ita gravari se permittit, ut multitudo eorum possit alicui crimini comparari, sed ut sit sancta in bono opere, et immaculata in abstinentia mali. Immaculata est, id est sine crimine. Non enim sine peccato quisquam esse potest in hac vita. Vel ad futurum sæculum possunt hæc referri. Mundavit Christus Ecclesiam, ut ipse post diem iudicii in æterna beatitudine exhibeat, id est præsentet eam sibi gloriosam, id est animo et corpore fulgentem, quia tunc justi fulgebunt sicut sol in regno Patris eorum (Matth. xiii; Sap. iii). Tunc plene atque perfecte erit Ecclesia, non habens maculam peccati, vel rugam duplicitalis, aut aliquid hujusmodi, quia tunc etiam erit vere gloriosa. Non enim modo in tantis malis, in tantis scandalis, in tanta permixtione hominum pessimorum, in tantis opprobriis impiorum dicenda est esse gloriosa; sed tunc potius, quando malis omnibus liberata, gaudebit perenniter in bonis cum Christo. Et tunc erit vere sancta et immaculata, quia sic sola sanctitas in ea regnabit, ut omnis macula cujuscumque peccati procul sit ab ea. Vel sancta erit per carnis immutationem, et immaculata per corruptionis remotionem. Christus, ut dictum est, dilexit Ecclesiam, quæ est carnis eius. Ita etiam viri de-

bent uxores suas diligere ut corpora sua, id est sicut se, quia illæ sunt corpora eorum, et illi capita eorum. Vel sicut spiritus hominis diligit et regit, et sibi in bono subijctus corpus et carnem cui conjunctus est, sic viri diligant et regant, et sibi subijcti in bono uxores suas. Quod facere debent, quia qui uxorem suam diligit, seipsum diligit, quoniam ipse et uxor unum corpus sunt, et uxor est caro ejus. Et ideo vir debet eam diligere, quia nemo unquam odio habuit carnem suam. Nam quod nonnulli dicunt se malle esse sine corpore, omnino falluntur. Non enim corpus suum, sed corruptiones ejus et pondus oderunt. Non ergo nullum corpus, sed incorruptum et celerrimum corpus volunt habere. Sed nec illi qui se occidunt, odio habent carnem suam, sed aliqua gravia incommoda se per mortem effugere putant. Qui vero continentia quadam et laboribus persequuntur corpora sua, qui hoc recte faciunt, non id agunt ut non habeant corpus, sed ut habeant subjugatam et paratam ad opera necessaria. Libidines enim male utentes corpore, id est consuetudines inclinationis animæ ad fruendum inferioribus, per ipsius corporis laboriosam quamdam militiam extinguere affectant. Nam non se interimunt, et curam suæ valetudinis gerunt. Nemo itaque unquam odio carnem suam habuit, sed nutrit eam cibo et potu, et fovet indumentis, sicut et Christus Ecclesiam spiritualiter nutrit cibo potuque corporis ac sanguinis sui, vel cibo fortioris intelligentiæ et potu facillioris doctrinæ, et fovet eam indumentis virtutum. Ita et vir de uxore debet facere, quem caro ejus est. Christus fovet Ecclesiam, quæ est corpus ejus. Et vere corpus ejus, quia nos omnes membra sumus hujus sacri corporis. Quia membra sumus corporis ejus, id est Ecclesiæ, de carne, id est de imbecillitate ejus, et de ossibus, id est de fortitudine ejus; hoc est, alii sumus infirmi, et alii fortes in hoc corpore ejus quod est Ecclesia. Sicut enim corpus humanum ex carne et ossibus constat, et caro ejus sustentatur ab ossibus, sic Ecclesia de minus perfectis et magis perfectis constat, et perfectiores exemplo suo et exhortatione sustentat imperfectos. Ita et mulier quæ est quasi caro fragilis, debet a viro sustentari, qui est veluti firmitas ossis (I Cor. xii). Vel de carne ejus et de ossibus ejus est, quisquis per gratiam ejus potest dicere, quia cum infirmor, tunc fortior sum et potens. De carne ejus et de ossibus ejus est, quisquis ad imitationem ejus dicere potest, quia factus sum infirmus infirmus, ut infirmos lucrifacerem (I Cor. ix). Vel ideo sumus de carne ejus et de ossibus ejus, quia carnem ejus in ministerio sumentes, carni nostræ jungimus, et virtute spiritus ejus confortamur velut internis ossibus. Nam sicut Eva de Adam facta, traxit ab eo carnem et ossa, sic Ecclesia ex Christo procreata, carnem ejus et spiritum, ut diximus, in se traxit. Vel de carne ejus et de ossibus ejus sumus, id est eandem carnem et eadem ossa quæ ipse habuit, habemus, quia de nostra mortali-

tate carnem suscepit cum ossibus. Potest et ita intelligi, corporis constantis de carne ejus et de ossibus ejus, id est de firmis et infirmis, *propter hoc*, id est quia sumus de carne ejus et de ossibus ejus, et ipse dilexit Ecclesiam, ab initio fuit prophetatum de eo, quia *relinquet homo patrem et matrem, et adhærebit uxori suæ, et erunt duo in carne una* (*Matth. xix*; *Marc. x*; *I Cor. vi*). « Homo enim iste, mediator Dei et hominum, homo Christus Jesus (*I Tim. ii*) » significabatur: Qui reliquit patrem, quando semetipsum exinanivit, formam servi accipiens (*Philip. ii*). Ita enim reliquit Patrem, non quia deseruit et recessit a Patre, sed quia non in ea forma apparuit hominibus in qua æqualis est Patri. Reliquit et matrem, id est Synagogam Judæorum, de qua secundum carnem natus erat. Et adhæsit uxori suæ, id est sociavit et conjunxit se electorum Ecclesiæ. Et ipsi duo, id est Christus et Ecclesia sunt in carne una, quia carnem quam ille de virgine sumpsit, quotidie in missarum celebrationibus sumit Ecclesia. Vel in carne una, quia, ut supra dictum est, ipse de mortalitate nostra carnem suscepit, et per carnem participans noster factus est, ut illius capitis corpus esse possemus. Sicque facta est ex duobus una quædam persona, ex capite et corpore, ex sponso et sponsa. Totus itaque Christus caput et corpus tanquam integer vir, quia et femina ex viro facta est, et ad virum pertinet. *Sacramentum hoc magnum est* de conjunctione Christi et Ecclesiæ. Et ne quis istam magnitudinem sacramenti in singulis quibusque hominibus uxores habentibus intelligeret, ego autem, inquit, dico in Christo et in Ecclesia. Ego quidem allegorice interpretor hæc verba Genesim de conjugio Christi et Ecclesiæ, sed tamen vos moraliter et ad litteram ea intelligite, et vos singuli unusquisque uxorem suam sicut seipsum diligit; uxorem autem monemus, ut timeat virum suum, id est casto timore diligit eum, et obediat ei in omni bono et revereatur eum.

CAPUT VI.

† Filii, obedite parentibus vestris in Domino (Col. iii). Hoc enim justum est. Honora patrem tuum et matrem tuam (*Exod. xx*; *Eccli. iii*; *Matth. xv*; quod est mandatum primum in promissione, ut bene sit tibi, et sis longævus super terram.

Præcipit filiis ut obediant parentibus suis in Domino, id est in his quæ ad Deum pertinent. Non enim suadet obediendum esse in eis quæ sunt contra Deum. Et ideo est obediendum parentibus, quia hoc est justum, ut eis obediant a filiis, id est naturale jus habet. Nec solum jus naturale est hoc, sed etiam præceptum Domini dicentis: « Honora patrem tuum et matrem tuam (*Exod. xx*). » Quod ideo præcipue est observandum, quia est mandatum primum in promissione. Licet enim hoc mandatum sit quartum in Decalogo, tamen primum est in promissione, quia huic primo addita est promissio, cum cæteris præcedentibus non esset adjuncta. Tria

quippe mandata præcesserunt istud, et pertinent ad charitatem Dei, quia Deus trinitas est. Alia vero septem in quibus est hoc primum, ad dilectionem proximi respiciunt et docent quomodo vivatur inter homines. Nam ipse septenarius præceptorum numerus incipit ab honore parentum. *Honora, inquit, patrem et matrem*. Ad parentes enim suos homo aperit oculos, et bona ejus vita ab eorum amicitia sumit exordium. Quisquis autem parentibus non desert honorem, quibus parcere poterit? Primum est hoc mandatum in secunda tabula, quæ continet mandata pertinentia ad dilectionem proximi. Et est in promissione. Nam et ita distingui potest, scilicet ut et primum intelligatur esse in altera tabula, et esse in promissione. Sed verius dici potest in utraque re primum esse, et in tabula, et in promissione. Quæ promissio magna est. *Honora, inquit, parentes, ut bene sit tibi*, id est carnalia et spiritualia bona per hoc a Deo consequaris; *et sis longævus super terram*, id est longævitatem æternitatis habeas super stabilem mansionem cælestis patriæ.

« Et vos, patres, nolite ad iracundiam provocare filios vestros, sed educate illos in disciplina et correptione Domini. »

Vos filii, obedite parentibus, et vos parentes, nolite illis dare occasionem inobedientiæ; nolite illos ad iracundiam provocare, id est nolite illis ea facere, propter quæ peccent per iracundiam, quia patres estis illorum, et quia illi sunt filii vestri; sed educate illos dum pueri sunt, in disciplina Domini, ne indiscipline incipiant vivere; et in correptione Domini, ut de pravitate morum suorum corripatis illos secundum Deum bono animo, et ad rectitudinem reducatis.

« Servi, obedite dominis carnalibus cum timore et tremore, in simplicitate cordis vestri, sicut Christo, non ad oculum servientes, quasi hominibus placentes, sed ut servi Christi, facientes voluntatem Dei ex animo, cum bona voluntate servientes sicut Domino, et non hominibus (*Colos. iii*; *Tit. ii*; *I Pet. ii*), scientes quoniam unusquisque quodcumque fecerit bonum, hoc recipiet a Domino, sive servus, sive liber (*Matth. xvi*). » Et vos domini, eadem facite illis, remittentes minas, scientes quia et illorum et vester Dominus est in cælis, et personarum acceptio non est apud Deum (*Rom. ii*; *Jacob. ii*). »

Vos servi, obedite dominis carnalibus, id est qui vobis temporaliter dominantur secundum carnalia, non secundum spiritualia. Habetis enim et spiritualement Dominum in cælis æternum, qui vestris mentibus dominatur; sed non vult ut occasione ejus dedignemini servire carnalibus dominis, quibus ipso ordinante subjecti estis. Etiam si sunt iniqui vel infideles, servite illis donec transeat iniquitas. Multi enim religiosi dominis iniquis, non tamen liberis serviunt, quia « omnis qui facit peccatum, servus est peccati (*Joan. viii*). » Et utique felicius servitur homini quam libidini. Ordinavit enim sic Deus Ec-

clesiam, ut omnis potestas ordinata in sæculo habeat honorem aliquem et a melioribus. Et ideo obedite dominis vestris ut oportet, scilicet *cum timore et tremore*. Timor enim est causa tremoris. Filii parentibus cum reverentia honoris obediant, servi autem cum timore animi et tremore corporis, scilicet ut gestus corporis et apparitio ostendat interiorem timorem. Et hoc facite non in simulatione, sed in *simplicitate cordis vestri*, id est in puritate intentionis vestræ, quia licet sit habendus timor, tamen intentio servanda est simplex, id est absque duplicitate simulationis, ut sicut exterius ostenditis vos libenter obedire, sic habeatis in corde, scilicet non hoc faciatis solo timore effugiendi pœnas temporales, sed pura intentione bene agendi. *Sicut Christo* illis obedite, id est ex puritate intentionis, qua Christo debetis obedire. Cum enim Christo jubente servitis hominibus, non illis servitis, sed ei qui iussit. Vel sicut Christo illis obedite, id est tantum in bono. Præcipiunt enim sæpe mala agere, sed in his non est eis obediendum. In simplicitate cordis obedite, *non ad oculum servientes*, id est non existentes prompti et strenui ad serviendum tunc solummodo, cum a dominis vestris videmini, et illis absentibus agentes negligenter, quia hoc faciunt subdoli servi, qui volunt placere hominibus dominis, quos fallere possunt, non Deo, qui videt omnia. Non ita fecte serviat, *quasi hominibus solum placentes, sed ut servi Christi*, id est in puritate cordis et veritate, nulli alii rei nisi veræ justitiæ studentes, vos dico, *facientes in hoc voluntatem Dei*, qui voluit ut carnalibus dominis serviretis, non invit, *sed ex animo*; nec ex malo animo, sed ex bona voluntate, ut, etsi non potestis liberi fieri, vestram tamen servitutem quodammodo liberam faciatis, non timore subdolo, sed fideli dilectione serviendo. Ecce non fecit Christus de servis liberos, sed de malis servis bonos servos. Ex animo *cum bona voluntate servientes sicut Domino* Deo, et non hominibus, cujus præcepto servitis hominibus. Vos dico, *scientes quoniam unusquisque quodcumque fecerit bonum, hoc recipiet a Domino, sive servus, sive liber*. Id est ideo debetis servire dominis prout rectum est, quia certum vobis est, vos remunerationem a Deo fore percepturos, non solum de hoc, sed de omni bono quod feceritis, sive servi, sive liberi sitis, quoniam neque servitus impedit aliquem ad consecutionem præmii, neque libertas expeditum reddit, tantum quisque bonum faciat. Deus enim remunerator est omnium operum vere bonorum, quicumque faciat ea, *Et vos Domini eadem facite illis*, non quod illis serviat, sed in simplicitate cordis, et bona voluntate secundum Deum illos tractate, id est sicut illis convenit subjectionem debitam et justam exhibere vobis serviendo, sic vos justam et dulcem potestatem exercete super eos humiliter dominando. Suavius illos tractate, *remittentes*, id est relaxantes illis minas. Non interdico minas fieri, sed jubeo remissius fieri. Et si *minæ remissius faciendæ sunt*, quanto magis ver-

bera? Humane, inquam, illos tractate, *scientes quia in cælis est et illorum et vester Dominus*. Id est licet sint vestri, tamen vos estis illorum conservi, unum Dominum habentes, contra quem de munere ejus superbitis, si illos quos per conditionem tenetis subditos, æquales vobis per naturæ consortium non agnoscitis. Nam si male illos tractaveritis, non ignosco nobilitati vestræ. *Non enim personarum acceptio est apud Deum*, id est non accipit homines propter personarum dignitates, quia in ejus judicio sublimitas personæ non confert aliquid alicui, nec humilitas personæ obest alicui; sed unusquisque secundum opera sua recipit, vel bona vel mala, sive liber sit ille, sive servus. Ideo et servi et domini studere debent ut juste agant.

B « De cætero, fratres, confortamini in Domino et in potentia virtutis ejus. Induite vos armaturam Dei, ut possitis stare adversus insidias diaboli. » Specialibus expletis instructionibus mulierum et virorum, filiorum et parentum, servorum atque dominorum, ad generalem redit exhortationem, et ad spiritale bellum omnes simul instruit. Quasi dicat: Hactenus aliqui vestrum putaverunt se suis viribus sine adjutorio gratiæ bonum aliquid agere posse, *sed de cætero, fratres*, si bono animo volueritis agere, confortamini non in vobis, sed in Domino. Vel ita: Hucusque vos juvi, sed de cætero quod superest vobis vivendi spatio, confortamini jam in Domino, ut sine me fortes efficiamini contra bellum diaboli. Sive etiam ita: Multa vobis hucusque dixi, *sed de cætero* quod adhuc dicere possem hoc tantum agite; de cætero quod restat, sic agite, scilicet confortamini, id est fortes efficiamini contra omnes impugnationes adversarii, in Domino, id est in eo respectu quod Dominum habeatis, cujus dominio tuebimini, et confortamini in potentia virtutis ejus, id est in virtute ejus quæ omnia potest. Et ideo confortari debetis, tum quia Dominum habetis, tum quia ille potentem in omnibus virtutem habet. Et quia non in sola gratia confortandum vobis est, sed etiam liberum adhibere debetis arbitrium, *induite vos armaturam Dei*. Scilicet non solum confortamini in Domino, sed etiam excitando liberum, arbitrium, induite armaturam Dei, id est induite vos omnibus armis quibus militatur Deo. In armatura enim omnia comprehenduntur arma. Induite armaturam Dei, quod prædictum est respectu liberi arbitrii, *ut possitis stare adversus insidias diaboli*. Taliter enim insidiis ejus resistere poteritis, id est mediante auxilio divinæ gratiæ, et exercitio liberi arbitrii, quia aut sola gratia, aut solo arbitrio nemo potest ei resistere. Et ideo prius confortamini in Domino, et post induite armaturam Dei, quia gratia prævenit liberum arbitrium. Idcirco vobis induenda est armatura Dei, ut ei viriliter militantes possitis in prælio non cedere, non succumbere, sed stare adversus insidias diaboli, tum quia diabolus est criminator, tum quia insidiosè agit contra vos. Longe enim gravior pugna quæ fit insidiis, quam quæ fit vi. Non

videat diabolus homines cum quo pugnant, sed tamen facile habent remedium; seipsos interius vincant, et de illo foris triumphent. Ob hoc induenda est armatura Dei. Et quæ induenda est armatura, nisi omnium virtutum profectio, quibus a jaculis Satanæ defendimur?

« Quoniam non est nobis colluctatio adversus carnem et sanguinem, sed adversus principes et potestates, adversus mundi rectores tenebrarum harum, contra spiritualia nequitiae in caelestibus. »

Ideo spiritualibus armis oportet nos undique munitos esse, quia contra spirituales hostes est nobis pugna. Quoniam non est nobis colluctatio adversus carnem et sanguinem, id est adversus homines qui caro et sanguis sunt. Galatis minus perfectis indixit aliud bellum, quod est adversus carnem et sanguinem, dicens: « quia caro concupiscit adversus spiritum, spiritus autem adversus carnem (Galat. v). » Ephesiis vero, quasi jam spiritualibus et concupiscentiæ carnis prævalentibus, atque persecutionem pro justitia foris sustinentibus dicit: Non est nobis colluctatio adversus carnem et sanguinem, id est adversus homines qui nos persequi videntur, sed adversus malignos spiritus qui eorum mentibus principantur, et per eos nos persequuntur. Et quia sic est, debemus homines diligere, dæmones cavere, homines misericorditer eripere, dæmones viriliter superare. Quomodo enim si contra aliquem in prælio constitutum de parte adversaria armatus equo sedens veniet, non equo, sed equiti irascitur, et quantum potest, agit ut equitem percutiat et equum possideat; sic contra omnes malos homines agendum, et non contra illos, sed contra illum qui illos instigat, totis viribus laborandum est, ut dum diabolus vincitur, infelices quos ille possidebat, liberentur. Non est nobis colluctatio adversus carnem et sanguinem, id est adversus homines quos videmus sævire in nos, qui potius miserandi sunt, quam odio habendi; sed adversus principes eorum dæmones, et adversus potestates iniquas malignorum spirituum. Principes dicuntur illi spiritus, qui principantur in vitiis suis, quæ specialiter suggerere soliti sunt; sicut est spiritus fornicationis, qui impugnat homines secundum luxuriam, et luxuriosis principatur, et spiritus superbiæ, qui impugnat secundum superbiam, cæterique tales, et sic unusquisque principatur in suo vitio. Potestas autem vocantur illi spiritus, qui habent vim et officium præcipitandi homines in majora peccata, quia præsent illis secundum immissionem majorum et graviorum vitiorum. Et quam sit periculosum contra tales pugnare, quis non intelligat? et quo modo vincimus hujusmodi hostes quos non videmus, nisi quia carnales interiores motus nostros sentimus, hisque confligimus et illos percutimus? Vel principes intelligantur illi dæmones, qui principantur aliis dæmonibus; et potestates, qui super alios possunt. Sunt enim inter eos alii nequiores aliis et in malo fortiores; contra quos nobis lucta est, et adversus rectores mundi,

A id est adversus illos dæmones, qui justo Dei judicio regunt eos, qui sunt mundus, id est immoderate mundanis adhærentes. Hi sunt qui nos per homines sibi subditos persequuntur, quia regunt eos ad male agendum, et de vitio ducunt in vitium. Rectores enim sunt mundi, qui mundanos, ut dictum est, regunt. Rectores sunt, non mundi elementorum, id est cæli et terræ, maris et aeris; sed mundi tenebrarum harum, id est omnium istorum infidelium, et istorum iniquorum hominum. De quo mundo dictum est: « Totus mundus in maligno positus est (Joan. viii). » Et conversis peccatoribus. « Fuisitis, inquit, aliquando tenebræ, nunc autem lux in Domino (Sap. v). Istum mundum qui hujusmodi tenebris, id est tenebrosis hominibus constat, regunt maligni spiritus. Et adversus istos est nobis pugna, non adversus eos quos regunt; et etiam contra spiritualia, etc. Per hoc ostenditur magna impugnationis vehementia. Multo enim graviore pugna et periculosiori exagitat homo, cum ab hoste qui non subjacet oculis, impugnatur, quia nescit qua parte ab adversario impetatur. Spiritualia dico nequitiae, id est defectio nis et impossibilitatis. Nequitia quippe dicitur a nequam, quia per eam tenditur ad non esse, sicut reprobi angeli Deum, qui solus vere esse, deseruerunt, et in perpetuum defectum ceciderunt. Quæ spiritualia nequitiae sunt in caelestibus, id est in hujus aeris infirmi caliginoso habitaculo ubi et nebulæ conglobantur. Vel in caelestibus, id est in mentis nostræ sanctis virtutibus patimur impugnationem a nequissimis spiritibus. Sive in caelestibus pugnant contra nos, id est pro cælesti hæreditate tollenda. Itaque adversus principes et potestates, atque rectores mundi tenebrarum harum, et adversus spiritualia nequitiae in caelestibus grave nobis certamen indicit Apostolus. Ipsa vero certaminis species sic intelligenda est, cum damna, cum pericula, cum opprobria, cum criminationes excitantur adversum nos, non id agentibus adversariis potestatibus, ut hæc tantummodo patiamur; sed ut per hæc vel ad iram multam, vel ad nimiam tristitiam, vel ad desperationem ultimam provochemur, vel (quid est gravius) fatigati et victi tædiis compellamur adversus Deum conqueri, tanquam humanam vitam non æque justequè moderantem, ut per hæc vel infirmemur in fide, vel decidamus a spe, vel transferri cogamur a veritate dogmatum, et impium aliquid de eo sentire suadeamur. Talia enim scripta sunt de Job, cum diabolus dari sibi facultatem bonorum ejus petisset a Deo (Job xii). Per quæ etiam illud edocemur, quoniam non fortuitis aliquibus incursionibus impugnamur, si quando nos talia aliqua facultatum damna percusserint; nec fortuito nostrorum aliquis captivus abducitur, vel domorum ruinæ in quibus chari quisque opprimantur eveniunt, vel aliquid hujusmodi contigit. In quibus omnibus, vel in quolibet horum unusquisque fidelium dicat adversario. Non haberes adversum me potestatem, nisi data tibi esset desuper (Joan. xix). Nihil enim

potuit contra Job, nisi quantum a Deo permissus est. Sic nec contra quemquam fidelium poterit amplius. Taliter nos oportet instrui, qui contra tales confli-
gimus adversarios.

« Propterea accipite armaturam Dei, ut possitis resistere in die malo, et in omnibus perfecti stare. State ergo succincti lumbos vestros in veritate, et induti lorica[m] justitiæ, et calceati pedes in præparatione Evangelii pacis in omnibus sumentes scutum fidei, in quo possitis tela nequissimi ignea exstinguere, et galeam salutis assumite, et gladium spiritus, quod est verbum Dei. »

Talibus armis nos armat Apostolus, laudabilibus et invictis, insuperabilibus et splendidis, spiritualibus et invisibilibus, quia hostes invisibiles expugnamus. Si vides hostem tuum, videantur arma tua. Si autem non vides hostem, cur videntur arma quibus eum impugnas? Quia tam gravis et tam multiplex, atque tam periculosa est pugna, propterea accipite armaturam Dei, id est arma virtutum, quibus suos milites Deus armat. Accipite de manu imperatoris summi arma fortia, ut possitis non cedere prædictis hostibus, sed resistere fortiter illis in die malo, id est in hora tentationis, quando velut diem prosperitatis arridere faciunt offerendo delectationem peccati. Vel in die malo, id est in tempore quo viget malitia in tempore impugnationis diabolicæ, in tempore præsentis vite, quæ tota tentatio est (Job vii). Ut possitis non subjacere, sed stare perfecti in omnibus virtutibus, ut non in quibusdam virtutibus bonis perfecti sitis, et in quibusdam imperfecti, sed in omnibus (prout fas est) perfecti. Tunc enim a nulla parte vinci poteritis. Vel in omnibus impugnationibus stetit perfecti, quod plus est quam resistere. Sive in omnibus, tam prosperis quam adversis. Aut aliter: Ut possitis resistere in die malo, id est in die iudicii; qui malus propterea dicitur, quia terribilis erit accusationibus diaboli, ut quando suos accusaverit, puritate conscientiæ possitis vos defendere, sed etiam perfecti stare possitis in omnibus cum electis. Standum vobis est contra hostes in armatura Dei. Ergo state succincti lumbos mentis vestræ, id est state in castitate, quia ipsa est initium bonæ operationis, ideoque nunc prima ponitur in spiritualibus armis quæ describuntur. Quam diu enim quis luxuriæ subjacet, nihil boni potest agere, quia nihil eorum quæ facit, potest Deo placere. Sed postquam deseruerit luxuriam, incipit operari justitiam. Et ideo nunc prius jubemur succingere lumbos, et post indere lorica[m] justitiæ. Lumbos enim succingimus, cum carnis luxuriam quæ in lumbis est, per continentiam coarctamus. Sed quia nonnulli simulant se lumbos habere succinctos et non habent, ideo præcipitur nobis, ut in veritate succinctos habeamus eos, non in simulatione, quatenus vera sit nostra castitas, non simulata. Vel mentis lumbos succingamus in veritate, ut cingulo casti amoris Christi nos contineamus a mendacio, quia qui mendacium loquitur, quantum in se est, cor-

rumpit veritatem, et ita fornicatur. Qui autem vera semper loqui studet, quasi legitimo conjugio utitur, veritatem vel sapientiam habens conjugem, sicut ille qui dicebat: « Hanc amavi et exquæsi a juventute mea, et quæsi sponsam mihi eam assumere (Sap. viii). » Ita ergo succingendi sunt in veritate lumbi vestri, ut non accedamus ad scortum, id est ad mendacium, sed in legitima sponsa quæ est veritas, delectemur, et ex ea filios generemus. Deinde subiungitur, ut simus et induti lorica[m] justitiæ, id est forti vestimento bonæ operationis undique muniti, ut nihil injustum appareat in operibus nostris, sed totum ab omni parte justum et æquum. Et hæc justitia recte vivendi est nobis lorica, quia interiora nostra non sinit transigi, sed defendit undique præcordia nostra ab omnibus telis inimici. Sicut enim lorica multis hamis conficitur, ita vestis justitiæ multis operibus bonis et virtutibus connectitur. Et hujusmodi lorica debet interior homo noster indui, ne possit ab ulla parte vulnerari. Postquam vero libidinem vicerimus, et nos lorica justæ operationis induerimus, tunc et aliis bona prædicare idonei erimus. Unde sequitur: Et state calceati pedes, id est habentes calceatos pedes, hoc est munitos affectus vestræ mentis, ne tangant terrena, hoc est ne terrenis commodis innitantur, in præparatione Evangelii pacis, id est in eo quod præparatis cordibus aliorum evangelicam prædicationem, quæ annuntiat pacem inter Deum et homines. Calceamenta sunt ex coriis mortuorum animalium, et significant exempla patrum jam defunctorum, quibus ab omni terrena læsione defenduntur pedes nostræ mentis, id est affectiones, quibus tanquam pedibus ad faciendum aliquid promovemur. Læditur enim pes prædicatoris a terra, si affectus ejus terrenum commodum ex prædicatione appetit, id est si propter terrenum commodum, non propter regnum cælorum, prædicat Evangelium, Et ideo prædictis calceamentis induantur pedes nostri, id est exemplis patrum muniuntur, ut sicut patres studio supernæ intentionis, non appetitu terrenæ commoditatis prædicaverant Evangelium, sic et nos faciamus. Cujus prædicatores in nullo fidei debent regulam deserere. Unde subditur: In omnibus sumentes scutum fidei. Fides enim pro scuto sumenda est in omnibus congressionibus, quoniam ipsa prima resistit malignis spiritibus, et eorum tela excipit et repellit. Sub ea namque proteguntur cæteræ virtutes, quia ad omnia virtutum arma protenditur, et eam diabolus impugrare primam aggreditur. In omnibus præliis et in omnibus tentationibus sitis sumentes scutum fidei, in quo scuto possitis non solum repellere, sed etiam exstinguere omnia tela nequissimi diaboli, id est omnes suggestiones ejus acutissimas, quibus corda nostra ut vulneret impetit; tela dico ignea, id est ignem vitiorum in humanis cordibus accendentia. Inflamant enim mentes hominum ad concupiscentiam, et igne totius malitiæ succendunt. Et hæc tela nequissimi hostis sunt, id est qui etiam ea quæ nô-

quit perficere præsumit, et in quibus nequidquam laborat. Sed adversus hæc fide invisibilium rerum armamur, et invisibilem adversarium sternimus. Illis armis vos induite, et *galeam quoque salutis assumite*, id est spem quæ salutem æternam expectat; quæ ideo galea dicitur, quia sicut galea est in superiori parte armorum, scilicet in capite, ita spes altior est omnibus aliis virtutibus, et semper respicit ad superiora, spirans ad cœlestia. Et ob hoc addidit salutis, ut ostenderet spem assequi quod desiderat, id est salutem. Vel sicut scutum fidei fides est, sic galea salutis salutem est. Cujus scilicet perpetuæ salutis memoria vel expectatio caput mentis contra omnes ictus dæmonicæ impugnationis tutum facit. Qui enim cogitat diligenter quæ sint æterna gaudia, facile delectationes peccati a suo corde respuit, et adversitates vincit. Hæc sunt arma quibus muniti, nunquam diabolo vel alicui membro illius cœletis. Sequuntur arma, quibus illum et suos devincatis; et assumite *gladium spiritus*, id est ensem spiritalem, *quod est verbum Dei*, id est sermo divinæ prædicationis, quo diabolus interficitur, hoc est impugnationes ejus annihilantur, et quo tyrannos hujus sæculi et hæreticos, membra scilicet Satanæ devincatis, et vobis subjicietis; cæterosque peccatores. Cum dicitur, et gladium spiritus, quod est verbum Dei; quod ad significatum respicit, non ad gladium. Ecce hæc sunt arma, quibus muniuntur et pugnant milites Dei. Sequitur:

« Per omnem orationem et obsecrationem orantes
 « omni tempore in spiritu, et in ipso vigilantes in
 « omni instantia et obsecratione pro omnibus sanctis
 « etis et pro me, ut detur mihi sermo in apertione
 « oris mei, cum fiducia notum facere mysterium
 « evangelii, pro quo legatione fungor in catena,
 « ita ut in ipso audeam prout oportet me loqui. »

Prædictis armis state muniti. Sed quia non est nostræ potestatis ut his muniamini, nisi donante Deo, nec his vincere poteritis nisi ipse dederit, estote *orantes per omnem orationem*, id est per omnia quæ oranda sunt, ut per omnem orationem quæ faciendâ est, transeat nostra supplicatio, id est nihil relinquatis de his quæ petenda sunt in oratione; et non solum per orationem, sed etiam per *obsecrationem*, id est per omnium sacrorum adjurationem. Majorem enim orandi expressionem notat obsecratio quam oratio, quia obsecratio est oratio cum adjuratione vel obtestatione, oratio autem simpliciter facta, est rogatio. Per omnem orationem et obsecrationem sitis orantes *omni tempore* competenti, id est omnibus horis ad orandum constitutis, vel omni tempore, id est tam in adversis quam in prosperis, et hæc oratio fiat *in spiritu*, id est mente, ut mentis affectus concordet verbis orationis quæ preferuntur ex ore, vel in spiritu, non in carne orate. In carne enim, non spiritu orat, qui polluta mente orat, iterum peccaturus non casu, sed ex proposito, vel omni tempore orate in spiritu, id est in cordis

A devotione, ut licet os non semper orare queat, spiritus tamen semper bonis desideriis intus oret. Et in ipso spiritu sitis intus *vigilantes*, id est solliciti, id est sicut oculi foris vigilant, sic spiritus agat intrinsecus, et hoc *in omni instantia*, ut spiritus et corpus instanter perseverent in vigiliis, et in omni *obsecratione*, ut pro omnibus obsecretis, pro quibus obsecrandum est, scilicet pro *sanctis*. Pro sanctis enim videtur esse obsecrandum, et pro infidelibus orandum, qui nihil sacri habent. Vigilate, inquam, et obsecrate pro omnibus sanctis, id est pro perseverantia et salvatione omnium sanctorum et specialiter *pro me*, ut tribulatio non me obtundat, *sed detur mihi sermo in apertione oris mei*, id est cum aperuero os meum, hoc est cum alta mysteria et altas sententias dixerò. Nam hoc in divina Scriptura non reperitur, nisi ubi magnum quid et profundum debet dici. Cum os meum aperuero, ut absconditos sensus proferam, detur mihi sermo, id est facundia exprimiendi ea quæ voluero, ut luculenter ea possim exponere, scilicet *cum fiducia notum facere*, id est ut auctacter et non timide notum faciam *mysterium Evangelii*, id est occultum secretum incarnationis et passionis Christi, ut occultas eorum causas notificem audientibus (*Psal. 1*). Nam quia occultum est hoc mysterium, ideo necesse est ut notum faciam illud; et hoc agere volo, quia pro eo annuntiando *fungor legatione in catena*. Nam nec pro catena cesso a legatione. Quanquam enim pro Evangelio quod annuntiabam, sicut catenatus, tamen illud sicut a Christo missus sum prædicare non omitto. Detur, inquam, mihi sermo ad notificandum mysterium Evangelii, ita scilicet detur mihi, *ut in ipso Evangelio audeam sine timore loqui aliis prout oportet me*, id est sicut expedit mihi, qui hoc agere missus sum. Sequitur in quibusdam codicibus hoc loco talis versiculus: Verbum autem Dei non potest alligari. Ac si dicat Apostolus: Pro Evangelio quidem vincus sum, sed tamen prædicare non desisto, quia verbum Dei, quod annuntiari debet, nullo potest impedimento retardari.

« Ut autem et vos sciatis quæ circa me sunt,
 « quid agam, omnia vobis nota faciet Tychicus
 « charissimus frater et fidelis minister in Domino,
 « quem misi ad vos in hoc ipsum, ut cognoscatis
 « quæ circa nos sunt, et consoletur corda vestra. »

Dixi ut oretis pro me, et quia pro Evangelio vincus sum; sed quibus tribulationibus afficiar, non dixi. Sed quæ circa me sunt molestiæ, referet vobis Tychicus, ne de minimis adversitatibus meis moveamini, metu earum recedentes a fide. *Quæ*, id est eujusmodi tormenta *sunt circa me*, id est in corpore meo, quia ad mentis interiora non penetrant, et *quid agam*, id est quam constans sum, indicabit vobis Tychicus, qui est non vilius; *sed charissimus frater*, id est Christianus et non fraudulentus vel fallax, *sed fidelis*; ideo hunc audite, quia *fidelis minister est in Domino*, id est in his quæ sunt Domini.

Cui credere debetis, quia illum *ad vos misi*, ut puram veritatem de me vobis dicat, et consoletur corda vestra, id est leniat et mulceat; et dolorem, qui pro auditu tribulationum mearum increverat, temperet. Vel si de nostris tribulationibus dolebatis, nunc consolationem accipiat ab eo, cognoscentes me libenter pati multo graviora.

« Pax fratribus et charitas cum fide a Deo Patre, et Domino Jesu Christo. Gratia cum omnibus qui diligunt Dominum nostrum Jesum Christum in incorruptione. Amen. »

Pax cum Deo sit fratribus, id est Christianis, et *charitas*, ut cum toto corde diligant; et hæc pax et charitas detur eis *cum integra fide a Deo Patre et Filio ejus Domino nostro Jesu Christo*. Per pacem enim manebunt in charitate, quæ in fide est; et a quo est pax et charitas, ab illo est et fides, id est a

Deo. Non enim fides, quia datur priusquam postuletur ab illo cui datur, ideo dicenda est non esse donum Dei, sed esse a nobis, quia data est nobis non petentibus. Omnia enim bona sunt a Deo. *Gratia* generaliter accepta, quæ est mater omnium bonorum et nutrix, sit *cum omnibus qui Dominum nostrum Jesum Christum Ecclesiæ sponsum diligunt in incorruptione*, id est casto amore sicut sponsam, quæ corruptionem non admittit. Non enim Christum in incorruptione diligunt; vel quorum fides in aliquo est corrupta, vel qui eum pro temporalibus et corruptilibus bonis diligunt, non pro æternis et incorruptilibus. Sed qui Christum propter solum Christum, et propter spem perpetuæ incorruptibilitatis amant, illi eum in incorruptione diligunt, quia sic eum diligunt, neque nunc corrumpi valeat mens eorum, neque tunc caro eorum.

IN EPISTOLAM AD PHILIPPENSES.

ARGUMENTUM.

Philippi, civitas est in partibus Macedoniae, unde Philippenses dicuntur. Quibus prædicaverat Apostolus, qui fidei veritate ac morum honestate illos instruxerat. Et ipsi in fide morumque nobilitate in omnibus fere secundum apostolicam doctrinam perstiterunt, sed de primatu tantum inter eos erat contentio, quoniam alii se volebant aliis præferre, quasi gloriando de meritis. Qua de causa præcipue Apostolus scribens illis a Roma intendit illos ad humilitatem revocare, scilicet ut de meritis non gloriarentur, neque alter alteri se præferat; sed quidquid boni habet, sive remissionem peccatorum, sive dona virtutum, gratiæ Dei ascribat, a quo totum habet et nihil a se. Miserant autem ei aliquid substantiæ per Epaphroditum Romanum, quem cum hac remittit epistola. In qua quia præsens non potest, munit eos contra duplex bellum tribulatorum, sed et pseudoprædicatorum, ut omnia pro Christo sustineant adversa cum humilitate, sicut et Christus fecit, et legalia a pseudoprophetis nunquam recipiant. Qui quoniam ad humilitatem illos invitavit, ideo non posuit nomen officii sui et auctoritatis, quod est Apostolus; sed et ideo forsitan, quia ipsi nunquam de eo minus vel contra eum senserant. Secum vero Timotheum addit in principio epistolæ, quia ipse socius Apostoli fuerat in conversione eorum, atque sollicitus erat cum eo de salute ipsorum, et fortasse rogaverat eum ut scriberet illis. Sic enim exorsus est.

CAPUT PRIMUM.

« Paulus et Timotheus servi Jesu Christi, omnibus sanctis in Christo Jesu, qui sunt Philippis,

« cum episcopis et diaconis : gratia vobis et pax a Deo Patre nostro et Domino Jesu Christo. »

Servos Christi se dicunt *Paulus et Timotheus*, quod est signum humilitatis, ut eis exemplo suo humilitatem suadeant. Sed cum ipse dominus dicat : « Jam non dicam vos servos, quia servus nescit quid faciat Dominus ejus (*Joan. xv*, ») qua ratione se servos nuncupant? Sed sciendum quia sicut est timor servilis, quem perfecta charitas foras mittit (*I Joan. iv*), atque timor castus permanens in sæculum sæculi, sic est servus qui non manet in domo in æternum, atque servus intrans in gaudium domini sui (*Joan. viii*; *Matth. xxv*). Nam cum timore quem charitas expellit, etiam servitus quæ ad eum pertinet, simul expellenda est. Erant ergo *servi* Paulus et Timotheus, quantum ad timorem castum, non quantum ad timorem servilem; neque principis alicujus mortalis, sed Jesu Christi. Qui mandant ea quæ sequuntur, *omnibus sanctis*, id est omni plebi mundatæ per baptismum a peccatis, et sanctificatæ non in suo merito, sed in *Christo Jesu*, id est in gratia Christi, scilicet quia Deus factus est homo, passus est et resurrexit. Curialiter illos ad humilitatem revocat, ostendens illos esse sanctos in Christo Jesu, non in se, et determinat quibus sanctis, scilicet *qui sunt Philippis*, id est in illa civitate. Interpretatur autem *Philippi os lampadis*, et illi sancti sunt Philippis, id est in ore lampadis, qui sunt in lucidissima Dei illuminatione, quam et cæteris undique spargant, sicut et istis dicitur in sequentibus. In medio nationis pravæ et perversæ, inter quos lucetis sicut luminaria in mundo, ver-

bum vitæ continentes. Talibus ergo sanctis ubicun- que sint corporaliter degentes, scribitur hæc episto- la. Omnibus sanctis qui sunt Philippis, id est omnibus subditis, *cum episcopis*, id est presbyteris et diaconis, id est minoribus cum maioribus. Epi- scopos namque pro presbyteris more suo posuit. Non enim plures episcopi in una civitate erant, neque presbyteros intermitteret, ut ad diaconos de- scenderet. Sed dignitatem et excellentiam presby- terorum declarat, dum eosdem qui presbyteri sunt, episcopus esse manifestat. Quod autem postea unus electus est, qui cæteris præponeretur, in schismatis remedio factum est, ne unusquisque ad se trahens Christi Evangelium rumperet. Nam et Alexandriae a Marco evangelista usque ad Heraclam et Dionysium episcopos, presbyterum unum de se electum, et in excelsiore loco et gradu collocatum episcopum nomi- nabant; quomodo si exercitus imperatorem faciat, aut diaconos eligant de se quem industrium noverint, et archidiaconum vocent. Constat ergo apostolica institutione omnes presbyteros esse epi- scopos, licet nunc illi majores hoc nomen obti- neant. Episcopus enim superintendens dicitur, et omnis presbyter debet intendere curam super oves sibi commissas. Omnibus, inquit, sanctis qui sunt Philippis, cum episcopis et diaconis (220). Quia mi- nores præmittit, ad humilitatem invitat. Quia vero et minores subnectit, ostendit non esse quemquam adeo perfectum, qui non hæc egeat admouitione. Quod autem subdit, *gratia vobis et pax a Deo Patre nostro, et Domino Jesu Christo*, in superioribus epi- stolis expositum est.

« Gratias ago Deo meo in omni memoria ve- stri semper, in cunctis orationibus meis pro om- nibus vobis cum gaudio, deprecationem faciens super communicatione vestra in Evangelio Chri- sti, a prima die usque nunc, confidens hoc ipsum, quia qui cœpit in vobis opus bonum, perficiet usque in diem Christi Jesu, sicut est mihi justum hoc sentire pro omnibus vobis, eo quod habeam vos in corde et in vinculis meis, et in defensione et confirmatione Evangelii socios gaudii mei om- nes vos esse. »

Illorum benevolentiam captans, ostendit princi- pium boni operis a Deo illis datum, et finem ab eo- dem esse dandum, ut de se non præsumant, sed gratiæ Dei omnia bona sua attribuant. *Ago*, inquit, *gratias Deo meo*, qui mihi facit quod volo in vobis, id est illum qui tanta nobis beneficia spiritualia contulit gratis, laudo quia non nostro merito, sed ejus dono ad bonum Christianæ religionis venistis, in qua et multum profecistis. Gratias ago, inquam, *pro omnibus vobis*, id est pro religiosa conversatione omnium vestrum ab illo data, *in omni memoria vestri*, id est quoties vestri memor fio; memoria dico, non ad horam, sed *semper*, scilicet *in cunctis orationibus meis*, id est quotiescunque oro. Vel me-

moriam vestri dico, non pro parte vestrum facta, sed pro omnibus vobis. De præteritis beneficiis a Deo vobis collatis ago ei gratias, non cum tristitia, sed *cum gaudio*, quia non contristor de culpis vestris, sed de sanctitate vestra gaudeo, *faciens deprecationem*, id est Deum toto mentis affectu deprecans, *super communicatione*, id est de communicatione vestra; hoc est, ut magis ac magis communicetis semper, et unanimes atque unum cor habentes sitis, *in Evangelio Christi*, id est in fide et præceptis evangelicæ doctrinæ. Vel deprecationem facio super communicatione vestra, id est ut persistatis in eo quod mihi communicavistis in fide et operibus Evangelii. Et non horarie istud deprecor, sed *a prima die conversionis vestræ, usque nunc*, id est ex quo cœpistis credere, non cessavi pro vobis preces effundere. Sive communicatio vestra fuit in Evan- gelio, quoniam res vestras fecistis communes propter illud a prima die conversionis vestræ usque nunc, et ideo amodo magis standum vobis est in hoc. Deprecor Deum pro vobis, *confidens hoc ipsum* de bonitate ejus, *quia ipse qui per prævenientem gratiam cœpit in vobis opus bonum*, per subsequen- tem et cooperantem *perficiet* illud, dans perseveran- tiam *usque in diem Jesu Christi*, id est usque ad ex- tremum diem vitæ uniuscujusque quando anima de corpore egrediens præsentatur ante tribunal Chri- sti judicanda. Cooperando enim in nobis Deus per- ficit, quod operando incipit, quoniam ipse ut velimus operatur incipiens, qui volentibus cooperatur perficiens. Nam ut velimus sine nobis operatur. Cum autem volumus et sic volumus ut faciamus, nobiscum cooperatur. Qui cœpit in vobis opus bo- num, ipse perficiet. Ego ita confido, videte ne fru- stra. Videte ne a vestra parte opus bonum rema- neat, quod Deus vobiscum paratus est in vobis per- ficere. Ego istud certa fiducia spero, *sicut est mihi justum*, ut hoc sentiam et credam *pro omnibus vo- bis*, non enim justum est ut aliud sentiam de tam bonis. Hoc debeo sentire de vobis, *eo quod habeam vos in corde meo*, non in solis labiis, quia continuo vos amore præcordiis meis teneo, et eo quod ha- beam vos *in vinculis meis*, quia vos quoque pia com- passione condoletis afflictioni vinculorum meorum, et vos pariter mecum victos esse putatis, et quod habeam vos *in defensione Evangelii*, quia et vos de- fenditis illud (sicut ego) disputationibus contra im- pugnatores, et in *confirmatione* ejus vos habeam, quia vos quoque studetis illud confirmare in cordi- bus fidelium, Et propterea justum mihi est sentire, *vos omnes esse socios gaudii mei futuri*, id est æternæ lætitiæ, sicut nunc operum meorum et passio- num socios esse vos video.

« Testis enim mihi est Deus, quomodo cupiam omnes vos in visceribus Jesu Christi. Et hoc oro, ut charitas vestra magis ac magis abundet in scientia et in omni sensu, ut probetis potiora, ut

« sitis sinceret sine offensa in diem Christi, repleti fructu justitiæ per Jesum Christum in gloriam et laudem Dei. »

Ego, ut dixi, sentio, et desidero vos fore socios gaudii quod habeo. Nam cupio *ros omnes* esse in *visceribus Jesu Christi*, id est in interno sinu perpetuæ beatitudinis receptos. Et quomodo, id est quam ardenti desiderio hoc *cupiam*, *testis est vobis Deus*, qui occulta cordium nostrorum inspicit. Vel pro vobis, ut supradictum est, idcirco deprecationem facio, quia sicut et Deus testis est, cupio vos omnes esse in visceribus Jesu Christi, id est in intimo amore ejus, ut ab eo diligamini quasi ejus viscera. In visceribus enim sentitur plusquam in alia parte corporis, et ideo viscera pro dilectione ponuntur in Scripturis aliquoties. Ego quidem vobis talia cupio. Et ut hoc desiderio consequamini oro ut *charitas vestra* semper proficiens *magis ac magis abundet* et excreseat in *scientia* divinorum et utilium et in *omni sensu* prudentiæ ac discretionis, ut *probetis potiora*, id est ut probare et discernere sciatis non solum mala et bona, sed etiam inter bona potiora, hoc est meliora, ut post probationem *sinceret*, id est sine carie sitis ne vos corrumpat aliquod vitium, sicut vermis lignum intrinsecus edens, sed integri permaneat in bono. Sinceret (221) sitis, quantum ad vos, id est sine corruptione vitiorum; et *sine offensa*, quantum ad proximum, ut non eum offendatis in diem Christi, id est usque in diem vitæ novissimum. Vel *sinceret*, id est sine admistione vitiorum, quæ se bonis operibus immiscere solent; et *sine offensa*, id est sine crimine, euntes passibus operum bonorum ac desideriorum in diem Christi, id est in diem justi judicii Dei, qui bona vobis pro sinceritate vestra sine malorum admistione retribuet. Sitis etiam ut bonæ arbores, *repleti fructu iustitiæ*, id est abundantes bonis operibus *per Jesum Christum*, id est per gratiam Christi, non per vires vestras, in *gloriam et laudem Dei*, id est ut inde glorificetur et laudetur Deus, qui vos ita fructificare facit, non ut vos inde vanam gloriam capiat, quasi per vos talia facientes. Hic satis congrue humilitas bene agentibus commendatur ab Apostolo. Vel in die Christi sitis repleti fructu, id est mercede justitiæ accepta per Jesum Christum iudicem; in gloriam et laudem Dei, id est ut inde perpetualiter glorificetur et laudetur Deus, et dicatur, « mirabilis Deus in sanctis (Psal. LXVII). »

« Scire autem volo vos, fratres, quia quæ circa me sunt, magis ad profectum Evangelii venerunt, ita ut vincula mea manifesta fierent in Christo in omni prætorio, et in cæteris omnibus, ut plures et fratribus in Domino confidentes, vinculis meis abundantius auferent sine timore verbum Dei loqui. Quidam quidem et propter invidiam et contentionem, quidam autem et propter bonam voluntatem Christum prædicant; quidam ex chari-

tate, scientes quoniam in defensionem Evangelii positus sum. Quidam autem ex contentione Christum annuntiant, non sincere, existimantes pressuram se suscitare vinculis meis. Quid enim dum omni modo sive per occasionem, sive per veritatem Christus annuntietur? et in hoc gaudeo, sed et gaudebo. »

Quia superius dixerat se habere in corde et vinculis, ne illi audientes eum esse vinculum, putarent evangelicam prædicationem deficere, et cederent pseudo apostolis, addit: *Scire autem volo vos*, etc. Ac si dicat: Ego quidem vinculus sum, sed tamen ideo non minuitur evangelica prædicatione. *Volo vos, fratres, scire quoniam ea quæ circa me sunt*, id est vincula mea et tormenta quæ patior undique, vel quæ non pertingunt ad interiora, *magis venerunt ad profectum Evangelii*, quam ad defectum, ut mali intenderent, ita ut vincula mea manifesta fierent in Christo, id est in Christi nomine et prædicatione manifestarentur ubique; et per hæc Christus. Dum enim sermo de vinculis meis ubique volitat, Christus qui vinculorum causa est, in ore omnium resonat. Manifesta enim sunt in omni prætorio, ubi nobiles et divites conveniunt; et in cæteris omnibus locis Romæ ubi populares conversantur. Hoc omnibus Romanis nobilibus et ignobilibus notum est, me vinculum esse pro fide Christi quam prædicabam. Et ita profuerunt vincula mea, ut plures quam antea et fratribus, id est ex Christianis, non in se, sed in Domino confidentes, *vinculis meis*, id est consideratione vinculorum meorum, *auderent abundantius solito loqui publice verbum Dei sine timore*, cogitantes apud se: Si iste vinculus loquitur, cur non potius nos? Ideo autem dixi plures et fratribus in Domino confidentes, annuntiare ob mea vincula verbum Dei, et non omnes ita faciunt. Alii enim ex ipsis sunt mercenarii, alii filii. Nam *quidam quidem*, id est mercenarii, *prædicant Christum* etiam propter invidiam et contentionem, quia invident gloriæ meæ, et contendunt illam sibi usurpare, cupientes esse famosi et honorabiles apud homines sicut erant apostoli; sed *quidam* ab istorum intentione diversi, upote Loni filii, prædicant eum exemplo meo propter bonam voluntatem, id est studio generandi filios vitæ æternæ; quidam qui et boni sunt, annuntiant, illum ex charitate et amore mei scientes quoniam positus sum a Deo in defensionem Evangelii disputando et verum ac saluterum esse probando. Et ideo quia vident me modo catenis detentum, non posse ad plenum exercere officium meum, vice ac loco mei prædicant Christum, ut ipsi suppleant quod ego nunc minus possum. Isti quidem casta intentione prædicant. Sed quidam ab his longe diversi, *annuntiant Christum ex contentione*, id est per contentionem, quia contendunt per hoc majora inferre supplicia, ut si qui de prædicatione eos accusaverint, indicent eis me ejus auctorem esse,

(221) Hujus etymologiæ superius mentio facta est.

sicque mala in me convertant. Vel ex contentione, id est ex privato odio inde genito, quod aliquando mecum contenderunt et confutati sunt. Et ne viderentur esse correcti, adjungo quia *non sincere*, id est non puro animo, sed malitia infecto prædicant, existimantes hoc modo *se suscitare*, id est commovere pressuram vinculis meis, id est ut ego victus opprimar adversis scilicet, ut dum Nero et ministri ejus viderint Romæ tot prædicatores Evangelii existiment me causam eorum esse, et majora mihi tormenta vel etiam mortem inferant. Et tali intentione salutem quam ipsi non habent, prædicant aliis; consulentesque terrenis cupiditatibus suis regnum cælorum annuntiant, habentes in pectore falsitatem, in lingua veritatem. Et isti prædicant Christum nec prohibentur, sicut et boni. *Quid enim refert*, quia intentione Christus prædicetur, dum, id est tantummodo *annuntietur omnimodo* annuntiandi, id est *sive per occasionem* suscitandi tribulationes fidelibus aut acquirendi lucra temporalia, *sive per veritatem* puræ conscientiæ? *Et in hoc gaudeo*, quod omnes isti prædicant, etiam illi qui moluntur hoc modo suscitare pressuram vinculis meis. Nec solum nunc gaudeo, *sed et semper gaudebo* ex hoc. Potest enim fieri, ut dum isti vel studio suscitandi tribulationes, vel cupiditate acquirendi pecuniam, sive temporalem gratiam, Christum per hujusmodi occasionem, utpote mercenarii, prædicant, his auditis nascantur fideles, et de malo eorum Deus operetur bonum; sicut aliquoties fit, ut homo ad concubitum ingrediatur non voluntate generandi, sed libidinem explendi, et tamen nascatur homo, bonum Dei opus de fecunditate seminum, non de turpitudine vitiorum. Et ideo tolerandi sunt tales mercenarii (Matth. xx), dum per occasionem Christum annuntiant, quia et ipsi sunt ad aliqua utiles, ut quæ dicunt faciamus, quæ autem faciunt respuamus; Christus enim veritas est. Veritas a mercenariis occasione annuntietur, veritas a filiis veritate annuntietur. Filii hæreditatem æternam Patris expectant patienter, mercenarii temporalem mercedem conducentis, festinanter expectant. Mercenarii quippe occasione Christum annuntiant aliud quærentes, pastores autem Deum propter Deum prædicant.

Scio enim quia hoc mihi proveniet ad salutem per vestram orationem et administrationem spiritus Jesu Christi, secundum expectationem et spem meam, quia in nullo confundor, sed in omni fiducia sicut semper et nunc magnificatur Christus in corpore meo, sive per vitam, sive per mortem. Mihi enim vivere Christus est et mori lucrum. Quod si vivere in carne hic mihi fructus operis est, et quid eligam ignoro. Coarctor autem e duobus, desiderium habens dissolvi, et esse cum Christo multo magis melius; permanere autem in carne, magis necessarium propter vos.

Gaudeo, sicut dixi, dum malevoli prædicatores Christum annuntiant, etiam suscitatio mihi pres-

suram. Nam *scio quia* etiam hoc, id est suscitatio pressuræ *proveniat mihi ad salutem æternam* in futuro consequendam, non ad oppressionem, ut illi putant. Et hoc non fiet non solum meo merito, sed et *per vestram orationem*, quæ mihi auxiliabitur, et *per administrationem spiritus Jesu Christi*, id est per occultam dationem Spiritus sancti, qui sicut columnam vel fundamentum fulsit me subter, ne corruam. Ipse enim spiritus est fons omnium bonorum, ideo sanctis dicitur subministrare, quia de ejus fonte procedit quicquid illi beneficiorum accipiunt. Proveniet, inquam, mihi *secundum expectationem et spem meam*, id est secundum quod exspecto donec veniat, et spero donec veniam. Non enim frustrabitur me exspectatio mea. Et quare *quia in nullo confundor*, id est in nulla re erubasco, quoniam nec in conscientia mea quicquam est, unde coram Deo erubescam, nec de his quæ pro Christo foris patior, verecundari possum. Et ideo certus sum quia consequar quod spero. Si enim videret Apostolus se in aliquo confundi et delicere, posset desperare de salute. Sed quia videt se constantem per omnia, et hanc Dei gratiam jam sibi esse concessam, ideo sperat quod majus est. Non confundor ut in aliquo cedam, quia et spes magna, et res vera atque honesta. Non confundor, inquam, ut timidus miles, *sed in omni fiducia*, et in omni audacia et constantia mentis, per quam fortiter prædicare soleo, *sicut semper a tempore conversionis meæ magnificatus est Dominus Christus in me*, ita et *nunc*, id est in hoc tempore, vel in vinculis meis, apud omnes *magnificabitur Christus*, id est fama et gloria ejus etiam *in corpore meo*, quod est fragilius, *sive per vitam, sive per mortem*, quia quamdiu vixero, semper cum magnifico prædicatione et bonis operibus; in morte quoque pro nomine ejus accepta glorificabo eum. Non enim ob aliud vivo, nisi ut cum magnificem, quia ipse *Christus est mihi vivere*, id est quod ego vivo, Christus est, non habeo vitam nisi Christum; non vivo veterem hominem, sed novum, qui totam vitam meam innovavit. *Et mori est mihi lucrum*, quia tunc pro terrenis cælestia, pro temporalibus accipiam æterna. Mori est mihi lucrum. Quod, id est *sed si hic in hac præsei* si *vita vivere in carne est mihi fructus operis*, id est fructuosum et utile opus, dum multos Deo per prædicationem acquirere non cesso, quamdiu vivo, tunc etiam *ignora quid eligam*, mori scilicet an vivere. Quia nisi hic fructificare adhuc quotidie possem, haud dubium quin mori eligerem, cum Christum haberem lucrum. Sed quia me video multis assidue prodesse, charitas eorum adhuc me retinet in carne. Coarctor enim, id est constringor et compellor e duobus istis, id est ex morte et vita, quia dilectabiliter morerer, et patienter vivo. Non enim presentem vitam diligo, sed tolero. Tedium mihi est manere in carne, et ex duobus patior angorem, *habens desiderium dissolvi* a compedibus mortalitatis qui-

bus constringor; et esse cum Christo præsentialiter in cœlesti patria, multo magis melius quantum ad me, quam in præsenti sæculo vivere; sed *permanere in carne* est mihi magis necessarium, non propter me, sed *propter vos*, quibus evangelium ministro. Cum enim e duobus coarcter, alterius habeo desiderium, et alterius necessitatem; desiderium scilicet dissolvi et esse cum Christo in cœlestibus, necessitatem vero manere in carne propter aliorum salutem. Dissolvi desidero, quia vinctus sum. Compedes enim nobis sunt infirmitas et corruptibilitas corporis, quod aggravat animam (Sap. ix). Et cum corruptibili carne exuimur, quasi ab his quibus nunc astringimur, molestiæ vinculis relaxamur. Præsentiari namque jam Deo cupimus, sed adhuc mortalis corporis obligatione præpedimur. Jure enim vincti dicimur, quia adhuc incessum nostri desiderii ad Deum liberum non habemus. Unde nunc Apostolus æterna desiderans, sed tamen adhuc corruptionis suæ sarcinam portans, vinctus clamat: Desidero dissolvi et esse cum Christo. Dissolvi enim non quæreret, nisi se procul dubio vinctum cerneret. Qui idcirco dissolvi desiderat, ut cum Christo possit esse, quia perfectorum justorum animæ, mox ut hujus carnis claustra exeunt, in cœlestibus sedibus recipiuntur. Sed tamen hujus tantæ beatitudinis gaudia eligit adhuc differri, præ nimia dilectione eorum quibus in carne manens prodesse potest, cum subjungit:

« Et hoc confidens, scio quia manebo et manebo omnibus vobis ad profectum vestrum et gaudium fidei, ut gratulatio vestra abundet in Christo Jesu, in me, per meum adventum iterum ad vos. Tantum digne Evangelio Christi conversamini, ut sive cum venero et videro vos, sive absens audiam de vobis, quia statis in uno spiritu unanimes, collaborantes fidei Evangelii. Et in nullo terreamini ab adversariis, quæ est illis causa perditionis, vobis autem salutis. Et hoc a Deo, quia vobis donatum est pro Christo, non solum ut in eum credatis, sed ut etiam pro illo patiamini, idem certamen habentes, quale et vidistis in me, et nunc audistis de me. »

Ecce Paulus, ut dictum est, non quod sibi melius est, sed quod multis expedit, id est manere in carne eligit, propter charitatem quæ major est omnibus aliis virtutibus. Prius enim ambigens dixerat, quid eligam ignoro; sed postea deliberans, victus est charitate discipulorum, et permanere se omnibus illis dicit. Ac si dicat: Necessè est me propter vos manere in carne. Et ego *confidens hoc* in misericordia Dei, scilicet me victurum adhuc propter vos, *scio quia manebo* adhuc in corpore; et non parum quidem, sed *permanebo* adhuc aliquandiu *omnibus vobis* majoribus atque minoribus, *ad profectum vestrum*, id est ut vos per me proficiatis et crescatis in virtutibus, et ad *gaudium fidei*, id est ut vos gaudeatis de fide quam didicistis a me, cum vos adhuc in ea confirmavero præsens, vel ut ego de

A fide vestra gaudeam, ut *gratulatio vestra abundet*, id est ut abundanter agatis Deo gratias cum gaudio in Christo Jesu, qui benefecit vobis in me vobis servato; id est in Christo gratulemini, per quem nos Deus respexit in me vobis reddito, scilicet *per meum adventum ad vos* confirmandos iterum futurum. Veniam rursus ad vos, tantummodo facite interim quod dicam, scilicet *conversamini digne Evangelio*, id est conversationem vestram facite talem, ut digne concordet Evangelio Christi. Ac si dicatur: Si ita vixeritis, tunc secundum meritum vestrum dabitur mihi vita ad opus vestrum. Digne, inquam, conversamini, *ut sive cum venero et videro vos*, ut dixi inveniam vos quales volo; sive non venero, *audiam absens de vobis* quod cupio, scilicet istud, **B** quod vos non succumbitis aut ceditis, sed statis fortiter contra omnia adversa, et statum rectitudinis firmiter tenetis *in uno spiritui unanimes*, id est in Spiritu sancto, cui non hæret contrarius spiritus; et sicut est unus, ita vos facit unanimes sine dissensione, ut quod vult unus, velit et alius; *collaborantes fidei Evangelii*, id est simul omnes totis viribus laborantes ad implendum ea quæ fides evangelica exigit; et hæc agentes, non terreamini, id est non timeatis *ab adversariis* in ullo periculo, vel in ullo opere vestro, sive in ulla re, ut metu cadatis a proposito vestro. *Quæ res*, id est quod vobis adversantur et mala irrogant, *est illis causa perditionis æternæ, vobis autem causa salutis perpetuæ*. Nam etsi propterea sine fine peribunt, quia vos **C** persequuntur; et vos ideo in æternum salvabimini, quia pro Christo ab illis patimini, *et hoc* non a vobis ipsis habetis, ut salutem per passionem consequamini, sed *a Deo*, ne gloriari de meritis incipiat. Etiam quod patimini, non est a vobis, sed a Deo, quia inter alias gratias data est vobis hæc ab illo, *quia vobis donatum est* quasi præmium pro Christo quem diligitis, id est pro merito Christi, qui usque ad mortem crucis obedivit, *non solum ut in eum credatis, sed etiam ut pro illo patiamini* ad cumulum gloriæ. Utrumque enim ad Dei gratiam pertinet, et fides creditium, et tolerantia patientium, quia utrumque est Dei donum. Patiamini, dico, habentes contra adversarios idem, id est simile certamen non armis, sed *fide quale et vidistis in me*, dum **D** apud vos præsens essem, *et nunc audistis de me* absente. Apud istos enim Paulus et Silas publice virgis cæsi sunt, et tunicæ eorum scissæ, et ipsi in carcerem reclusi, atque pedes eorum ibi ligno stricti. Nunc quodque Paulus Romæ multa pertulerat, et ad similes agones nunc incitat istos (Act. xvi). Qui et hortando atque docendo subinfert, dicens:

CAPUT II.

« Si qua ergo consolatio in Christo, si quod solatium charitatis, si qua societas spiritus, si quæ viscera miserationis, implete gaudium meum, ut idem sapiatis, eandem charitatem habentes, unanimes, id ipsum sentientes, nihil per contentionem, neque per inanem gloriam, sed in humili-

« litate, superiores sibi invicem arbitrantes, non A
 « quæ sua sunt singuli considerantes, sed et ea
 « quæ aliorum. »

Quasi dicat : Quia in uno spiritu unanimes, ut supra dixi, stare debetis et pati pro Christo, sicut et ego, igitur implete gaudium meum, quod habere cœpi de bona conversatione vestra, ut idem sapiatis, et eandem charitatem habeatis, etc., et hoc facite, si qua consolatio est vobis in Christo, id est si per charitatem quam in Christo habetis, aliquem consolari potestis, quia id agentes, consolabimini me in tribulationibus meis. Bona enim vita vestra erit consolatio mea. Vel si aliqua consolatio vobis in Christo, id est si vultis habere consolationem in rebus Christi, in remissione peccatorum et in aliis donis, si quod solatium communis charitatis, id est si vultis ut charitas cæterarum ecclesiarum, quæ pro fratribus orant et bona agunt, sit vobis solatium in adversitatibus vestris; vel si habetis aliquod solatium charitatis erga proximum, ut per fraternam dilectionem præbeatis ei solatium, id est consolationem in mœrore tribulationis, si qua societas spiritus est vobis, id est si aliquam unionem concordis animi per Spiritum sanctum habetis adinvicem, vel si est aliqua societas Spiritus sancti ad spiritum vestrum. « Ipse enim Spiritus testimonium reddit spiritui nostro, quia sumus filii Dei (Rom. viii). » Ad ipsum enim pertinet societas, qua efficitur unum corpus unici Filii Dei. Propter quam societatem illi in quos venit primum Spiritus sanctus, linguis omnium gentium sunt locuti (Act. ii), quia per linguas consociator est societas generis humani. Societas ergo spiritus, est illa conjunctio fidelium, quam dat ei Spiritus sanctus, per quam omnes unum fiunt; si qua viscera miserationis, id est si quis pius affectus est in vobis, de quo procedat misratio erga me. Si hæc sunt in vobis, tunc implete, id est perficite gaudium meum, quo de vestra religione gaudeo; hoc est, plenarie religiosam ducite vitam, ut idem sapiatis in fide et cæteris, prout oportet; nec sit in vobis diversus sensus, sed idem, licet in aliis major et in aliis minor; habentes eandem charitatem ad omnes, ut æqualiter omnes diligatis, sicut scriptum est : « Diliges proximum tuum sicut teipsum (Matth. v; Levit. xix). » D Vel eandem charitatem, ut iste diligat illum sicut se, et ille similiter istum sicut se; unanimes, id est unius voluntatis, ut sit vobis cor unum et anima una (I Cor. xii), id ipsum sentientes, id est mala cujusque putant omnes sua esse, et bona similiter, ut si quid patitur unum membrum, compatiantur omnia membra; nihil per contentionem agentes ut vel dictis vel factis adinvicem contendatis. Erant enim (ut ex his Apostoli verbis apparet) inter eos aliqui dissidentes, inquieti, inanis gloriæ causa contententes, pacem Ecclesiæ rumpentes. Propter quod nunc monentur ut sint id ipsum sentientes, id est nihil dissensionis habeant, neque per contentionem aliquid faciant, ut nec de primatu, nec de aliqua re

contendant, quia etiam bona non sunt contentiosis verbis dicenda, sed potius reticenda; nec per inanem gloriam, id est, propter famam sæculi quæ est inanis, faciant aliquid, ut de suis operibus humanum favorem appetant; sed in humilitate agant omnia, ut semper de seipsis humilia sentiant. Hoc enim proprium specimen electorum esse solet, quod de se semper infra quam sint sentiunt. Ideo nunc subditur, ut sint arbitrantes alii alios sibi invicem superiores. Nam quia iniquus quisque inferiorem se omnem quem cogitat putat, e diverso justus studeat, ut superiorem quemlibet proximum attendat. Ac ne dux se aliis alter humiliat, humiliatio iret alteri in elationem, utramque partem monuit Apostolus, dicens : Superiores sibi invicem arbitrantes, ut cogitationibus cordis et ego illum mihi præferam et vicissim ille me sibi, ut cum ab utraque parte cor inferius premitur, nequaquam ex impenso honore inflectur. Nec ita debemus hoc æstimare, ut non existimemus, sed nos existimare fingamus, sed vere existimemus posse esse aliquid occultum in aliquo, quo nobis superior sit, etiam si bonum nostrum quo illo videmur superiores esse, non sit occultum. Istæ cogitationes deprimentes superbiam et augentes charitatem, faciunt onera fraterna invicem non solum æquo animo, sed etiam libentissime sustineri. Unde subditur : Non quæ sua sunt singuli considerantes, sed et ea quæ aliorum. Optime enim docet quomodo vitent contentionem et inanem gloriam, et quomodo arbitrentur alios superiores, scilicet si consideraverint non sua bona, sed aliorum. Vel non sint considerantes ea quæ tantum ad utilitatem propriam pertinent, sed quæ aliorum, id est ea quæ pertinent ad utilitatem aliorum. Nam et Christus non sua, sed aliorum commoda quæsit; nec se super alios extulit, sed infra omnes dejecit, cum tamen super omnes esset. Ita namque sequitur :

« Hoc enim sentite in vobis, quod et in Christo
 « Jesu; qui cum in forma Dei esset, non rapinam
 « arbitratus est esse se æqualem Deo, sed semet-
 « ipsum exinanivit, formam servi accipiens, in simi-
 « litudinem hominum factus, et habitu inventus ut
 « homo, humiliavit semetipsum, factus obediens
 « usque ad mortem, mortem autem crucis. »

Ubi monemur, ut sicut ille in eo quod Verbum caro factum est et habitavit in nobis (Joan. i), et sine peccato cum esset, peccata nostra suscepit, non attendens sua, sed nostra; ita et nos ad ejus imitationem invicem onera nostra portemus, et non nostram utilitatem, sed aliorum quæramus. Non enim ulla res officiosum istum laborem ad portanda onera aliorum facit libenter impendi, nisi cum cogitamus quanta pro nobis pertulerit Dominus. Unde Apostolus cum admoneret, dicens : « Superiores sibi invicem arbitrantes, non quæ sua sunt singuli considerantes, sed quæ aliorum, » mox Domini exemplum quod imitaremur, subjecit, dicens : Hoc enim sentite in vobis, quod et in Christo Jesu, id est humilitatem et patientiam pro aliorum salute in vobis

veraciter sentite et habete, sicut sentitis et intelligitis in Christo fuisse. Cujus alta præmittit Apostolus unde se sua sponte usque ad infimam humilitatem inclinavit, ut prius visa sublimitate ejus, humilitas quoque major appareat; et homines in quibus locus est abjectionis, non dedignentur exemplo ejus humiliari, *qui cum in forma Dei esset, id est omnimoda æqualitate Patris, non rapinam, id est usurpationem alienæ rei arbitratus est esse se æqualem Deo.* Non enim ei rapina fuit, sed natura, æqualitatem Dei habere, quoniam noscendo eam sumpsit, non superbiendo præsumpsit. Sed ideo totum quod habet et quod potest, non tribuit sibi, sed Patri, quia a seipso non est, sed a Patre. Æqualis est enim Patri, sed hoc quoque accepit a Patre. Nec sic accepit, ut incremento fieret æqualis, sed natura et æternitate esset æqualis, sicut semper natus, ita semper æqualis. Non itaque inæqualem Pater genuit, et æqualitatem non nato dedit, sed gignendo eam dedit, quia æqualem, non imparem genuit. Ideo non rapina fuit, sed natura æqualitas Filii cum Patre. Non ergo rapinam arbitratus est esse æqualem Deo. Erat enim æqualis et sine rapina erat, quia æternus ab æterno natus erat. Erat in forma Dei, quia tantus quantus ille, talis qualis ille, hoc quod ille, non hic qui ille, sed hoc quod ille. Ille enim Deus, et iste Deus; ille omnipotens, et iste omnipotens; ille immutabilis, et iste immutabilis. Hoc est quod ille, non hic qui ille, quia et ille Pater, et hic Filius. Sic erat et est semper in forma Dei, id est in plena essentia Patris. Et cum tantus naturaliter esset et sine initio, non arbitratus est rapina, id est violenta invasione alienæ rei se esse æqualem Deo, quia sciebat se per naturam veraciter et omnino æqualem. Rapina enim est, quando quilibet alienam rem per violentiam sibi usurpat, quæ sibi non competit. Et per rapinam diabolus æqualitatem Dei quæ sibi nullatenus competebat, usurpare voluit, cum diceret: «Ascendam super altitudinem nubium, similis ero Altissimo (Isa. xiv.)» Sed ita Filius per rapinam non æstimavit superbe Patris æqualitatem habere se, sed, ut dictum est, scivit naturaliter se æqualem prorsus esse. Vel secundum alios codices, non rapinam esse arbitratus est esse se æqualem Deo, id est æqualitatem Dei non arbitratus est alienam, sed suam; quia non alienum judicavit esse quod natus est, sed suum. Quod erat æqualis Deo, non arbitratus est esse rapinam, quia non rapuit illum æqualitatem, sed naturaliter habuit. Unde et inter homines corporaliter conversans, Patrem suum Deum dicebat, æqualem se faciens Deo, sicut in Evangelio legimus (Joan. x). Non enim propter assumptionem hominis amiserat æqualitatem Patris, quia non est mutabilis natura divinitatis, ut possit minui vel augeri. Æqualitatem Dei non est arbitratus rapinam, id est alienam, sed suam. Vel non est arbitratus rapina, id est violenta usurpatione se æqua em Deo, sed naturaliter habuit, *sed tamen propter infirmorum salutem semetipsum*

exinanivit, id est formam divinitatis quam oculi videre nequeunt, nostris visibus ad tempus subtraxit, accipiens formam servi, id est hominis, non quæreas quæ sua sunt, sed quæ nostra. Et quippe semetipsum exinanivisse, est ab invisibilitatis suæ magnitudine se visibilem demonstrasse, ut servi forma tegeter hoc, quod incircumscripse omnia ex divinitate penetraret. Semetipsum exinanivit, quia non in ea forma apparuit hominibus, in qua æqualis est Patri. Exinanivit se, non formam Dei amittens, sed formam servi accipiens. Forma servi accessit, non forma Dei discessit. Non amisit vel minuit quod erat, sed accepit quod non erat. Ac per hoc et minor factus est, et mansit æqualis; in similitudinem hominum factus, id est passibilis et mortalis, ut cæteri homines; et habitu, id est induta humanitate, non sibi, sed eis quibus in homine apparuit, inventus ut homo, id est habendo hominem inventus ut homo est. Non enim poterat inveniri ut homo ab his, qui cor immundum habebant, et verbum apud Patrem videre non poterant, nisi hoc suscipiendo quod possent videre, et per quod ad illud lumen interius ducerentur. Habitus ejus est humanitas, qua se velut indumento vestivit. Habitus enim in ea re dicitur, quæ nobis ut habeatur accidit. Sed cum sint et alia quæ nobis accidunt ut habitum faciant, nunc de ea re sermo est, quæ cum accidit, mutatur ut habitum faciat, et non mutat eum cui accidit, sicuti est vestis. Nam cum deposita est, non habet eam formam quam sunit, cum induitur et inducitur membris; sed ipsa membra, et cum induuntur, et cum exuuntur, in suo statu manent. Sic et habitus Christi assumptus est, ut commutaretur ineffabiliter et excellentius atque conjunctius, quam vestis ad hominem cum induitur, nec mutaret assumentem. Igitur nomine habitus oportet intelligi non mutatum esse verbum susceptione hominis, sicut nec membra veste induta mutantur, quanquam illa susceptio ineffabiliter susceptum suscipienti copulaverit. Itaque appellatione habitus, ostendit quomodo sit in similitudinem hominum factus, quia non transfiguratione in hominem, sed habitu factus est, cum indutus est homine, quem sibi veniens quodammodo atque conformans, immortalitati et æternitati sociaret. Et non solum ita se inclinavit, ut qui Deus erat fieret homo, sed etiam humiliavit semetipsum, tam altum factus obediens Patri, ut per ejus obedientiam salvaremur, qui per inobedientiam Adæ perieramus. Obediens non solum usque ad convicia et opprobria, sed etiam usque ad mortem, et non ad qualemcunque mortem, sed ad mortem crucis, quæ contumeliosior et acerbior erat. Ita enim morte pejus nihil fuit inter omnia genera mortium. Denique ubi dolores acerrimi exagitant, cruciatus vocatur, a cruce nominatus. Pendentes enim in ligno crucifixi, clavis aut ligno pedibus manibusque confixi, producta morte necabantur. Non enim crucifigi hoc erat occidi; sed diu vivebatur in cruce, non quia longior vita eligebatur, sed quia mors ipsa protendebatur, ut dicitur

citius finiretur. Et tam pessimam mortem Salvator A
elegit, ut omnem mortem nostram occideret.

« Propter quod et Deus exaltavit illum, et donavit
« illi nomen, quod est super omne nomen, ut in
« nomine Jesu omne genu flectatur, cœlestium, ter-
« rarium, et infernorum, et omnis lingua confi-
« teatur, quia Dominus Jesus Christus in gloria est
« Dei Patris. »

Ipse se tantum humiliavit, ut ultra non posset,
propter quod et Deus tantum exaltavit illum, ut ultra
non posset. Non enim major humiliatio vel major
exaltatio fieri poterat. Deus illum secundum huma-
nam naturam exaltavit, in quo et divina natura po-
test dici exaltata secundum ostensionem, quia cœpit
sciri quod erat, sicut in assumptione infirmitatis
dicitur exinanita. Sed propter unitatem personæ, B
potest divinitas dici exaltata in humanitatis exal-
tatione. Deus exaltavit illum, suscitans a mortuis et
elevans in cœlum super omnes angelos ad dexteram
suam, *et donavit illi nomen quod est super omne no-
men*, ut in ipsa forma nominetur Filius unigenitus
Dei. Hoc et ante resurrectionem habuit, sed post re-
surrectionem quod erat manifestatum est, ut scirent
homines et dæmones, et omnes ei genu flecterent
(222). Post crucem manifestatur quid a Patre
cum generaretur accepit, cum a creatura cœpit sciri
homini non esse datum nomen Dei, sed æqualem
qui se exinanivit, cujus omnia a Patre sunt. Tam
præcellens nomen ei datum est, ut omnia sint ei
subdita, *ut in nomine Jesu, exaltando flectatur omne
genu*, quod est evidens signum subjectionis, cœles-
tium, id est angelorum; et terrestrium, id est homi-
num; *et infernorum*, id est dæmonum, quia et
ipsi tremunt sub ejus imperio et penitus subjiciun-
tur. Non quod angeli vel dæmones habeant (ut nos)
genua quæ flectant, sed per simile dictum est. Dum
enim videmus aliquem genua flectere alicui, credi-
mus illum exhibere humilitatem et venerationem
ei, ante quem genua flectit. Sic cœlestia et terres-
tria, id est beati angeli et sancti homines, et omni
affectu piæ humilitatis Christo se libenter subjiciunt.
Inferna quoque, id est dæmones, ut nequissimi servi
tremunt sub ejus dominio, et se subjectos metu
cogente fatentur. Sed et pravi homines vel in fine
subjectos ei se animadvertent. Et non solum datum
est ei ut omnis creatura se ei subjiciat, sed et ut
omnis lingua confiteatur, id est omnes linguæ gen-
tium diversarum, quæ in mundo sunt, concorditer
prædicent, *quia Dominus Jesus Christus est in gloria
Dei Patris*, id est eadem gloria honoratur qua Pa-
ter, æqualis per omnia Patri. Hoc enim vel sponte
vel inviti confitentur seu confitebuntur omnes boni
et mali.

« Itaque, charissimi mei, sicut semper obedistis,
« non ut in præsentia mei tantum, sed multo magis
« nunc in absentia mea, cum timore et tremore
« vestram salutem operamini. Deus est enim qui

operatur in vobis et velle et perficere pro bona
« voluntate. »

Christus, ut præmissum est, se humiliavit,
obediendo usque ad mortem, et propterea ex-
altatus est. *Itaque et vos, charissimi mei, exemplo
ejus humiliare vos obedientes Deo, ut et vos
similiter exaltari vestro modo mereamini, sicut a
die conversionis vestræ semper obedistis Deo et mihi
vel præpositis vestris, ita nunc agite, non tantum
sicut in præsentia mei egistis, sed multo magis nunc
agere laborate in absentia mea, scilicet operamini
vestram salutem*, id est bonis operibus agite ut digni
sitis in æternum salvari. Et hoc facite non superbe,
non præsumptuose, sed *cum timore* intimæ humili-
tatis; qui enim semper timet ne cadat, humilis est,
et cum tremore corporis, id est et intus et extra
sit omnino humiles in bonis quæ agitis, ut nihil vo-
bis, sed totum gratiæ Dei ascribatis, quia non vos
operamini, sed Deus in vobis. Ideo timendum est.
Ipse est enim qui operatur in vobis et velle bonum, et
perficere illud pro sua bona voluntate, non pro me-
ritis vestris. Quando jubet ut operentur, liberum
eorum convenit arbitrium. Sed ideo cum timore et
tremore, ne sibi tribuendo quod bene operentur, de
bonis tanquam suis extollantur operibus. Tanquam
ergo interrogaretur Apostolus et diceretur ei, quare
dixisti cum timore et tremore, horum verborum
rationem reddit, dicens: *Deus est enim qui operatur
in vobis*. Ne enim sibi inde aliquid darent quia dixit
operamini, continuo subjunxit: *Deus est qui
operatur in vobis*. Ideo cum timore et tremore, id
est cum humilitate. Si enim timetis et tremetis, non
extollimini quasi de vestris operibus, quia Deus
operatur in vobis. Timendum est vobis, ne forte
quod datum est humilibus, auferatur superbis. Nam
neque de perseverantia boni voluit ipse sanctos in
viribus suis gloriari, sed in ipso, quia eis non so-
lum dat adjutorium, quale primo homini dedit, sine
quo non possint perseverare si velint, sed in eis
operatur et velle, ut quia non perseverabunt, nisi
et possint et velint, perseverandi eis et possibilitas
et voluntas divinæ gratiæ largitate donetur. Tantum
quippe Spiritu sancto accenditur voluntas eorum,
ut ideo possint, quia sic volunt; et ideo sic volunt,
quia Deus operatur ut velint. Sic operatur Deus in
eis velle, et pro bona voluntate quam operatus fue-
rit, operatur et perficere.

« Omnia autem facite sine murmurationibus et
« hæitationibus, ut sitis sine querela et simplices
« filii Dei, sine reprehensione in medio nationis
« pravæ et perversæ, inter quos lucetis sicut lumi-
« naria in mundo, verbum vitæ continentes ad glo-
« riam meam in die Christi, quia non in vacuum
« cucurri, nec in vacuum laboravi. »

Dixi, ut operemini vestram salutem, id est per
bona opera conquiritis vobis æternam salutem. Sed
omnia quæ facietis, *facite sine murmurationibus*. Hic

adjungitur prædictæ humilitati patientia. Superius enim dictum est, cum timore et tremore vestram salutem operamini; et nunc præcipitur, ut sine murmure cuncta faciant, id est æquo animo laborent in operibus bonis, quæ sibi jumentur a prælatis suis. Omnia facite sine murmurationibus, ut non sitis indevoti in ipsis bonis quæ facietis, neque sit vobis grave pro vestra salute labore; *sine hæsitationibus*, ut non hæsitetis in corde vestro, utrum faciatis an non bonum quod facere vultis, sed firma definitione bonum omne quod agere proposueratis, perficite prompti, ne sitis animo fluctuantes. « Qui enim hæsitat, sicut ait Jacobus, similis est fluctui maris, qui a vento movetur et circumfertur (*Jacob. 1*). » Vel de præmio bonorum operum non hæsitetis. Sive non hæsitetis pati pro Christo, sed prompti sitis. Et hæc ideo sic agite, *ut sitis sine querela*, id est ut proximus non possit de vobis conqueri; et quantum ad vos sitis simplices, id est sine duplicitate cordis, quia « vir duplex animo, inconstans est in omnibus viis suis (*ibid.*), » et « nemo potest duobus dominis servire (*Matth. vi; Luc. vi*). » Duplex enim est, qui et Deo et sæculo placere cupit, volens et in hoc mundo et in cælo dives esse. Sed vos qui filii Dei esse cœpistis, in simplicitate cordis quærite illum, ut sicut ipse unus est, ita et vos ad imitationem ejus simplices sitis, ut ei soli placere studeatis. Et etiam quantum ad externos, sitis *sine reprehensione*, ut nihil reprehensibile possit in vobis ab infidelibus inveniri *in medio nationis*, id est gentilium qui non sunt renati, sed sicut nati sunt carnaliter, ita vivunt. Nationis dico, *pravæ* per opera, *et perversæ* per diversas sectas. *Inter quos* gentiles lucetis exemplo bonæ vitæ sicut luna et stellæ. Et ideo maxime decet vos esse sine reprehensione. Lucetis *sicut luminaria cæli*, quia sicut luna et stellæ non amittunt lucem suam propter noctem, sed magis lucent, sic vos mente in cælo fixi, licet inter tenebrosos et infideles sit vestra conversatio, non obscuramini, sed magis lucetis bene operando. Hæc sententia et laudantur et roborantur ab Apostolo discipuli, ut quia se tales esse cognoscunt, studeant valentius perseverare tales. Tales enim sancti de conversatione quam habent in cælo, despiciunt omnia quæ iniqui faciunt in terra. Sicut stellas cæli non exstinguit nox, sic mentes fidelium adhærentes firmamento sanctæ Scripturæ vel cœlestibus desideriiis, non obscurat mundana iniquitas. Qui enim mente sunt in supernis et de supernis cogitant, sicut dictum est: « Ubi est thesaurus tuus, ibi est et cor tuum (*Matth. vi*), » de ipsis cogitationibus supernorum patientes sunt; et quidquid in terra fiat sic non curant, donec peragant itinera sua, quemadmodum luminaria cæli non curant quomodo exerceant dies et noctes, quamvis tanta mala videant fieri super terram. Et sicut luminaria patienter ferunt, quidquid de eis homines fingunt, ita justi debent patienter ferre omnes etiam de se falsas criminationes. Nam qui perdidit tolerantiam, non est quasi luminare cla-

rus desuper, sed obscuratus est et de cælo cadit. Lucetis, inquit, sicut luminaria *in mundo*. Ac si dicat: « Vos estis lux hujus mundi (*Matth. v*), » et estis etiam vasa Evangelii, quia continetis in cordibus vestris verbum evangelicæ prædicationis, quo vivit anima vestra, non enim sinitis illud a vobis effluere. Et hoc facitis *ad gloriam meam*, necdum ad vestram, quia et ego de bona conversatione vestra gloriam accipiam *in die Christi*, id est in die qua Christus judicabit. Et vere tunc habebō gloriam, *quia non in vacuum*, id est non sine fructu, non frustra cucurri ad illam, quia vos et alii me prædicante credidistis. Non in vacuum cucurri in via Domini, *nec in vacuum laboravi* in vinea ejus, quæ est Ecclesia, quoniam plenam mercedem recipiam. Vel cucurri in his quos facile potui convertere, laboravi in illis, quos difficilius converti.

« Sed etsi immolar supra sacrificium et obsequium fidei vestræ, gaudeo et congratulor omnibus vobis. Idipsum autem et vos gaudete, et congratulamini mihi. »

Vestra religio fit ad gloriam meam in die judicii, quia pro vobis laboravi. Nec tantum hoc libenter egi, *sed etsi immolor*, id est occidit pro vobis, tunc gaudeo; hoc est, si sacrificium mei corporis addo *supra sacrificium vestræ fidei et obsequium*. Jam enim vestram fidem sacrificium Deo dignum obtuli, et obsequium bonæ operationis vestræ, qua Deo obsequimini, sacrificavi. Sed si etiam ipse pro vobis offeror, gaudeo, quia ad coronam pertingo; *et congratulor*, id est simul gratias ago omnibus vobis, quia estis mihi causa mortis qua vitam ingredior. Nec solus ego id agere debeo, sed etiam *vos gaudete idipsum*, hoc est, immolari pro me, si contigerit vobis; *et congratulamini*, id est grates reddite mihi, qui vobis causa sum ut martyres efficiamini.

« Spero autem in Domino Jesu Timotheum me cito mittere ad vos (*Act. xvi*), ut et ego bono animo sim, cognitis quæ circa vos sunt. Neminem enim habeo tam unanimem, qui sincera affectione pro vobis sollicitus sit. Omnes enim quæ sua sunt quærunt (*I Cor. xiii*), non quæ Jesu Christi. Experimentum autem ejus cognoscite, quoniam sicut Patri Filius mecum servivit in Evangelio. Hunc igitur spero me mittere ad vos, mox ut videro quæ circa me sunt. Confido autem in Domino, quoniam et ipse veniam ad vos cito. »

Hanc quidem epistolam nunc mitto vobis per Epaphroditum, sed spero non in me, sed *in Domino Jesu*, id est in misericordia Salvatoris, *me cito mittere*, id est dirigere, *Timotheum ad vos*, ut sicut vos bono animo eritis, cum cognoveritis quæ circa me sunt, ita *et ego bono animo sim* atque gaudeam, *cognitis quæ circa vos sunt*, vel adversis vel prosperis. Ideo autem magis Timotheum mittam quam alium, quia *neminem habeo nunc tam unanimem*. Hoc tempore multi cum Apostolo mercenarii erant,

fili vel pastores nulli, nisi Timotheus. Neminem, A inquit, modo mecum habeo tam unanimem, id est ita concordantem meæ voluntati in hoc negotio, *qui sincera*, id est pura et non ficta cordis affectione, id est germana charitate *sit sollicitus pro vobis*, id est pro vestra salute. Multi enim videntur esse solliciti pro aliis, sed revera non pro ipsis solliciti sunt, sed pro rebus ipsorum quas habere cupiunt. Recte dixi quia neminem habeo tam unanimem; *omnes enim* quos nunc habeo, quærent in vobis *quæ sua sunt*, non Christi lucra. Sic et modo faciunt in Ecclesia mercenarii sua quærentes. Quid est, sua quærentes? Non Christum gratis diligentes, non Deum propter Deum quærentes, temporalia commoda consecrantes, lucris inhiantes, honores ab hominibus appetentes. Et quando hæc a præposito amantur, atque propter hæc servitur Deo, quisquis talis est, mercenarius est; inter filios non se computet. De talibus enim dicitur, quia receperunt mercedem suam (*Matth. v*). Non quærent ea quæ sunt *Jesu Christi*, id est multiplicationem boni gregis, religiosam conversationem subditorum, salutem animarum. Et ideo nullum istorum voluit nunc Apostolus mittere, sed Timotheum, qui sicut pastor salutem gregis quæreret, atque non solum verbo, sed et exemplo qualiter vivendum esset, ostenderet. Timotheum quidem vobis mittam, vos autem *cognoscite experimentum ejus*, id est quomodo sum expertus fidelem in omnibus in vita et doctrina, *quia sicut Filius Patri* devote obedit, ita mecum Deo *servivit in Evangelio* prædicando, in quo potuit experiri. Et quia de vobis sollicitus est et mihi probatus, *igitur spero me hunc ad vos mittere* non post longa temporis spatia, sed *mox ut videro ea quæ circa me sunt*, id est quem exitum sint habitura, utrum de his evadam an non. Et non solum spero me eum mittere, sed etiam confido in Dei misericordia, *quoniam et ego ipse cito*, id est non post multum temporis *veniam ad vos*.

« Necessarium autem existimavi Epaphroditum fratrem et cooperatorem et commilitonem meum, vestrum autem apostolum, et ministrum necessitatis meæ mittere ad vos, quoniam quidem omnes vos desiderabat, et mæstus erat propterea quod audieratis illum infirmatum. Nam et infirmatus est usque ad mortem, sed Deus misertus est ejus. Non solum autem ejus, verumetiam et mei, ne tristitiam super tristitiam haberem. Festinantius ergo misi illum, ut viso eo iterum gaudeatis, et ego sine tristitia sim. Excipite itaque illum cum omni gaudio in Domino, et ejusmodi in honore habetote, quoniam propter opus Christi usque ad mortem accessit, tradens animam suam, ut impleret id quod ex vobis deerat erga meum obsequium. »

Timotheum quidem, ut spero, mittam ad vos, et ipse veniam, sed interim, *existimavi necessarium esse mittere ad vos Epaphroditum* cum hac epistola fratrem, id est Christianum, et cooperatorem in prædi-

catione, et commilitonem meum in bello contra dæmones et vitia, et contra omnes qui regno Christi resistunt, sed vestrum apostolum, id est specialem doctorem, et ministrum necessitatis meæ, id est qui mihi ministravit necessaria, vel necessitati inopiæ meæ ministravit, sive de labore manuum suarum, sive quod ab aliis fidelibus quæsit. Ideo volui eum mittere, quia vos omnes videre optabat, *et mæstus erat quoniam audieratis eum infirmatum* fuisse. Forsitan quia verberatus est ab infidelibus in ministracione. Nec falsus ad vos rumor de ejus infirmitate pervenit, quia *et infirmatus est* ægrotatione sicut audistis; et hoc non leviter, sed usque ad mortis periculum, *sed Deus* miserando sanavit eum. Et non solum ejus in hoc *misertus est, sed etiam et mei, ne haberem tristitiam* de morte ejus, super tristitiam quam habueram de infirmitate ejus, quæ vobis nocebat. Et quia vos desiderabat, vosque de ejus languore timebatis, *ergo festinantius*, quam fecissem nisi hoc evenisset, *misi illum, ut eo viso iterum gaudeatis*, qui prius de eo, cum esset apud vos, gaudebatis; *et ego sim* absque tristitia, quam de vobis tristibus habebam. Ego quidem mitto illum propter has causas, et vos *itaque excipite illum* honorifice, non indevoti, sed *cum omni gaudio*, ut omne gaudium habeatis de adventu ejus, et illud gaudium sit *in Domino*, id est non vanum, non lascivum, non immoderatum, sed pium et castum. Nec solum in principio lætantes illum excipiat, sed postea conversantem vobiscum *habetote in honore* virum ejusmodi, quia iste vester apostolus est. Et merito debet honorari, *quoniam usque ad mortem accessit propter opus Christi*, qui venerat non ministrari, sed ministrare (*Matth. xx*). Propter opus quod Christus fecerat accessit iste ad mortem, quia ministrabat mihi de eleemosynis aliorum fidelium suo labore congestis, tradens ex deliberatione et exponens *animam suam*, id est vitam in mortis periculum, scilicet mori potius volens et animam reddere, quam opus Christi quod in me exercebat, dimittere. Et ideo hoc faciebat, *ut impleret erga meum obsequium id quod ex vobis deerat*, quia vos mihi de bonis vestris dederatis, sed ille supplere studuit quod vos minus feceratis, vel quia rem dederatis, sed qui ferret, ex vobis defuit, et ille attulit; vel quia quod miseratis defecit, ille mihi ex aliorum eleemosynis ministravit.

CAPUT III.

« De cætero, fratres mei, gaudete in Domino. Eadem vobis scribere mihi quidem non pigrum, vobis autem necessarium. Videte canes, videte malos operarios, videte concisionem. Nos enim sumus circumcisio, qui spiritu servimus Deo, et gloriamur in Christo Jesu, et non in carne fiduciam habentes, quanquam et ego habeam confidentiam in carne. »

Nunc de sinceritate fidei agere contra pseudo-prædicatores incipit, quasi dicat: Illa quæ superius dixi, ita servate, sed de cætero quod dicendum est

hoc facite, scilicet *gaudete in Domino*, id est omne gaudium sit vobis in Deo, non in carnalibus observantiis. Vel ita : Olim gavisi estis in sæculo, sed de cetero vivendi spatio quod volis superest, gaudete jam in Domino, ut quamdiu amodo vixeritis, sit vobis omne gaudium in eo. Non gaudeatis in carnalibus et sæcularibus, ut pseudoapostoli suadent, sed in Domino, ut sæpe dixi vobis. Nam eadem quæ præsens dixi, id est ut in Domino tantum gaudeatis, *mihî quidem non est pigrum vel tædiosum scribere vobis*, ut diutius maneat quam verborum prolatio, sed *vobis est necessarium contra perversos doctores*. Videte enim canes, id est cognoscite illos esse canes, hoc est non ratione, sed consuetudine contra insolitam veritatem latrantes. Hæc est enim canum natura, ut cum quibus habent consuetudinem, sive illi boni sint, sive mali, non ad eos latrent; insolitorum autem personis visis, etiam innocentibus, irritentur. Ita pseudo consuetudinem legis tenent et contra veritatis nuntios irrationabiliter latrant et mordent; *videte malos operarios*, id est notate et cavete eosdem pseudoprædicatores, quia in agro Dei super frumentum seminant zizania errorum. *Videte concisionem*, id est eos concisos et excurtatos, quia carnem amputaverunt, sed vitia nutriunt, et a Christo cæsi, id est abscisi sunt. Hos voco concisionem, non circumcisionem, quia nos fideles, non illi, *sumus circumcisio* non carne, sed ratione, id est mundati a superfluis vitiorum. Hoc est, nos sumus justitia, qui Deo servimus spiritu, id est toto mentis affectu, non carnali custodia litteræ legis; et *gloriamur* non in nostris meritis vel in carnalibus observantiis, sed in solo *Christo Jesu* et in ejus gratia. Non carne, sed spiritu Deo servimus. Carne enim servit Deo, qui de rebus carnalibus sperat se placere Deo. Cum vero et ipsa caro ad bona opera spiritui subditur, spiritu servimus Deo, qui carnem domamus, ut spiritus obtemperet Deo. Vel secundum alios codices, et maxime Græcos, spiritu Deo servimus, ea scilicet servitute de qua dictum est : « Dominum Deum tuum adorabis, et illi servies (*Deut. vi, x*). » — « Ipse enim spiritus Deus est (*Joan. iv*), » cui ab omnibus sanctis talis servitus exhibetur. Et gloriamur, inquit, in Christo Jesu, et non in carne fiduciam habentes. Respexit quosdam in carne fidentes, ipsi erant qui de carnis circumcisione gloriabantur. Non sumus habentes fiduciam, id est spem salutis in carne, id est in carnalibus observantiis, vel generis nobilitate, *quam et ego habeam*, si voluero, *confidentiam gloriandi in carne*, id est in carnis nobilitate, et carnali custodia legis.

« Si quis alius videtur confidere in carne, ego magis, circumcisus octavo die, ex genere Israel, de tribu Benjamin, Hebræus ex Hebræis, secundum legem Pharisæus (*Act. xxiii*), secundum æmulationem persequens Ecclesiam Dei, secundum justitiam quæ in lege est, conversatus sine querela. »

A Ne putetis, inquit, me contemnere quod non habeo. Quid enim magni est, si homo abjectus, vel plebs ignobilis contemnat nobilitatem? Habeo ista, sed contemno; et ideo vos doceo talia contemnere, quoniam videtis me habere quod contemno. Nam si quis alius, id est a me diversus qui vos decipere quærit, *videtur confidere in carne* quasi inde justus, ego magis confido quam ille pseudo. Et audi in carne fiduciam; circumcisus sum octavo die sicut lex jussit (*Gen. xvii*), id est non proselytus, non advena ad populum Dei, non major circumcisus, sed a parentibus natus Judæus, habeo circumcisionem octavi diei. Et sum *de genere Israel*, non alienigena; et non de viliori tribu, sed *de tribu Benjamin*, quæ dignior erat, quoniam procreata est ex Rachel, dilecta uxore Jacob; et cum decem tribus in Samaria cohererent vitulis, ista et tribus Juda non recesserunt a templo Domini. Et sum *Hebræus ex Hebræis* partibus, id est non de ignobili gente progenitus, sed ex eis qui fuerunt nati ex Heber filio Sale, filii Sem, majoris filii Noe. Sum etiam *secundum legem*, id est secundum egregiam legis observationem, *Pharisæus*, id est divisus ab aliis, utpote religiosior. Nam primarii quidam erant et quasi ad nobilitatem Judæicam segregati, non contemptibili plebi commisti, qui dicebantur Pharisæi quasi divisi. Et *secundum æmulationem* quæ in me fervebat *persequens Ecclesiam Dei* quia non eram piger Judæus, sed quidquid erat quod legi meæ videretur adversarium, impatienter ferebam, acriterque insequabar. Et *secundum justitiam* legis, quæ manus comprimit, non animum, et timore, non amore servatur; *conservatus* sum sine querela, id est sine clamore facto de me, quia nemo poterat conqueri quod aliquam injuriam ei fecissem, contra legis instituta carnalia faciens. Hæc apud Judæos nobilitas est, sed apud Christum quæritur humilitas.

« Sed quæ mihi fuerunt lucra, hæc arbitratus sum propter Christum detrimenta. Veruntamen existimo omnia detrimentum esse, propter eminentem scientiam Jesu Christi Domini mei. Propter quem omnia detrimentum feci et arbitror ut stercora, ut Christum lucrifaciam, et inveniar in illo, non habens meam justitiam quæ ex lege est, sed illam quæ ex fide est Christi Jesu, quæ ex Deo est justitia in fide ad cognoscendum illum et virtutem resurrectionis ejus, et societatem passionum illius, configuratus morti ejus, si quomodo occurram ad resurrectionem quæ est ex mortuis. »

Ita diversis modis possum gloriari in carne, sed non jam glorior in talibus. Sed omnia illa carnalia quæ mihi ante Christum notitia fuerunt lucra, id est utilia et chara, hæc post fidem arbitratus sum detrimenta salutis propter Christum, qui in his prænuntiatus fuerat. Et si adhuc ista servarem, ejus adventum ostenderem nondum factum. Quæ enim venturum eum significabant, si jam servantur, venisse eum negant. Et ideo sunt detrimenta, quia

deterunt veritatem fidei. Unde paulo superius Judæi A
dicti sunt concisio quia carnalis circumcisio, plena
abscisio est a Christo. Non solum propter Christum
hæc arbitratus sum detrimenta, *verumtamen id est*
sed etiam *propter scientiam Jesu Christi Domini mei*,
quam de eo habemus, eminentem omnibus scientiis
aliis, sed quæ eminet in eo plus quam in aliis, *epi-*
stimo omnia illa detrimentum esse, quia retrahunt
sectatores suos a tam eminenti scientia. Vel ita:
Hæc olim fuerunt mihi lucra, sed existimo tamen
nunc omnia ea detrimentum esse et impedimentum,
propter sublimem Christi scientiam, qua mihi in-
notuit eum esse Deum super omnia, ut per eam
Scripturas intelligerem. Nam etiamsi ipsum non
possem assequi, vel propter solam ejus scientiam
quæ tanta et tam præcellens est, respuerem omnia
illa vetera. *Propter quæ* Christum venerandum, et
propter cujus dilectionem omnia illa non solum existi-
mo detrimentum, sed et feci ea detrimentum bono-
rum, vivendo spiritaliter et docendo, ut aliis appa-
reret ea esse detrimentum, et quod plus est, ar-
bitror ea non tantum ut detrimenta bonorum, sed *ut*
stercora, id est quæ coinquinant jam observatorem.
Et hoc ideo, *ut Christum lucrifaciam*, id est in fu-
turo Christum habeam præmium, et hic sim in illo
membrum. Quod aliter nequit fieri, scilicet rationa-
biliter attendendo, nisi *et inveniar in illo fidele mem-*
brum, non habens meam justitiam quæ ex lege est;
quoniam ea justitia pœnam timet, non amat virtutem;
sed *illum quæ ex fide est Christi, quæ justitia*
est ex Deo, non ex hominibus. Justitia dico,
manens in fide, quia sicut ex fide nata est, sic
existere non habet nisi ex fide. Justitia in fide
valente *ad cognoscendum illum*. Quasi dicatur: Qui
in lege putat justificari, non agnoscit Christum;
sed ego ex fide justificari volo, ut agnoscam illum,
cur natus, cur passus sit, et agnoscam quæ est
virtus *resurrectionis ejus*, id est justificatio creden-
tium, quia resurrexit propter justificationem no-
stram (Rom. iv), et agnoscam *societatem passionum*
ejus, quam bene noscit, qui se per eam ad cœli
gaudia pervenire credit. Vel justitia in fide ad
cognoscendum eum, quia fides ut in illa vita facit
perfecte eum agnoscere, qui in ista creditur et haberi
virtutem resurrectionis ejus, id est immortalitatem,
quia nostra resurrectio est virtus et efficacia resur-
rectionis ejus, et in hac vita facit haberi societatem
passionum ejus, ut et nos patiamur adversa quæque
pro eo, nisi enim per fidem, nemo tanta pateretur,
et configurationem mortis ejus, ut moriamur sicut
ipse, si opus est; vel moriamur semel vitiis,
sicut ipse carne mortuus est semel. Sed littera sic
jungitur: *Ut inveniar in illo non habens meam justitiam,*
quæ ex lege est, sed eam quæ est ex fide, configu-
ratus morti ejus, id est per passionem consummatus
ut ille, tentans si quomodo occurrat lætus ad
resurrectionem. Si quomodo occurrat, quia difficile
est. Si quomodo contingat, tum ex Dei misericordia,
tum ex meo merito, ut occurrat Christo gau-

dens in judicio, quod sanctorum est tantum, veniens
ad resurrectionem, *quæ est non ex vivis, ut nunc,*
sed *ex mortuis*, ut ultra mori nequeat. Hæc Apo-
stolus idcirco se ita egisse vel agere commemorat,
ut illi similiter exemplo ejus omnes legis carnales
ritus contemnant, et per justitiam fidei atque socie-
tatem passionis Christi festinent ad regna cœlorum.

« Non quod jam acceperim, aut jam perfectus
« sim; sequor autem, si quo modo comprehendam.
« in quo et comprehensus sum a Christo Jesu.
« Fratres, ego me non arbitror comprehendisse.
« Unum autem, quæ quidem retro sunt obliviscens,
« ad ea vero quæ sunt priora, extendens meipsum.
« ad destinatum prosequor, ad bravium superum
« vocationis Dei in Christo Jesu. Quicumque ergo
« perfecti sumus, hoc sentiamus; et si quid aliter
« sapitis, et hoc vobis Deus revelabit. Verumtamen
« ad quod pervenimus ut idem sapiamus, et in
« eadem permaneamus regula. »

Iste qui ad tertium cœlum raptus fuerat (II Cor
xii), et tanta scientia emicabat, putabatur jam
comprehendisse quod alii æquuntur, sed ipse hoc
negat. Ne enim videatur superfluum tot adversa
pati, cum fidem et alia bona habeat, addit quasi
dicens: Merito pro illa gloria tantum laboro, quia
non dico quod jam acceperim aliquid, quia si quid
gloriæ accepi, nihil est ad comparisonem futuræ,
aut si quid accepi de cognitione Christi, non dico
quod in illa jam perfectus sim. Et si ita de me, quid
de aliis? Non est quod jam acceperim, quod peto;
aut jam perfectus sim, ut nihil mihi desit. Non
dico, sufficit quod egi; sed semper aliquid addo,
semper ambulo, semper proficio, semper sequor
quod comprehendere laboro, *si quomodo fiat ut*
comprehendam, id est perfecte teneam illud in eo
modo, *in quo et ego sum comprehensus a Christo*
Jesu, id est ut videam ipsum Christum sicut ipse
me videt, et cognoscam eum perfecte sicut ab eo
cognitus sum, ut sicut ipse plenarie me videt et
cognoscit, ita ego plenarie humano modo eum co-
gnoscam. Vel comprehendam eum, in quo et com-
prehensus sum ab eo, id est ut videam eum in ea
claritate, in qua mihi apparuit in via, quando me
comprehendit (Act. ix). Ideo enim sequor. Prævenit
me justitia ejus, sequatur eum mea. Cœperunt mi-
rari qui audiebant Apostolum dicentem, non quia
jam acceperim, aut jam perfectus sim. *Fratres,*
inquit, *ego non me arbitror jam comprehendisse*, id
est nolite in me falli, plus me ipse novi quam vos,
scio quid mihi desit, scio quid adsit. Ego me non
arbitror apprehendisse. *Unum autem* hoc me non
arbitror apprehendisse. Multa habeo, sed unum
nondum apprehendi. « Porro unum est necessarium
(Luc. x). » — « Unam petii a Domino, hanc requi-
ram (Psal. xxvi). » Et quæ est illa? « Ut inhabitem
in domo Domini omnibus diebus vitæ meæ (ibid.). »
Ipsum est unum quod nondum apprehendi. Et in
quantum mihi hoc deest, in tantum nondum per-
fectus sum, quia nondum æqualis angelis. Quia

ergo agis? quid agendum exemplo tuo doces? **E** *A* misericordiam vobis revelabit. Similiter et de aliis quidem quæ sunt retro, id est terrena quæ reliqui erroribus pro bona vita vos liberavit. Sive ita: Si obliviscens, id est a memoria cogitationis auferens, quid modo alter sapitis quam in futuro et de Deo et de omnibus, etiam hanc imperfectam cognitionem ad ea vero quæ sunt priora, id est ad cœlestia quæ vobis Deus per spiritum suum revelabit. Vel si quid sunt elevantia in divina, extendens desiderio meipsum aliter sapitis, et si quid melius ad cultum Dei excogitaveritis, sive in interpretationibus Scripturarum opere. Ante nos enim æterna sunt, post nos temporalia, quia et illa pergentes invenimus, et ista recedentes quasi post dorsum relinquimus. Vel ea quæ aliter secundum regulam veritatis senseritis, etiam hoc donum Dei esse sciatis, quia ipse vobis hoc retro sunt, id est præterita merita mea obliviscens, revelavit. *Verumtamen*, id est sed tamen teneamus et quasi pro nihilo ducens, ad futura merita me omnes illud, ad quod pervenimus, ut idem sapiamus extendo, semper addens aliquid. Adhuc enim proficendo, adhuc ambulo, adhuc in via sum, adhuc me credendo, et permaneamus in eadem regula disciplinæ, id est rectitudine vivendi, scilicet ut nemo propter novam inventionem vel intelligentiam suam deserat communem sensum fidei, seu regulam justæ vivendi constitutam a patribus. Vel ita: Sentire debemus omnes quia nondum perfecti sumus, nec plenariam Dei notitiam apprehendimus; sed tamen illud ad quod pervenimus, id est illam scientiam quam attingimus, tota mente teneamus, scilicet ut idem in fine sapiamus, et in eadem vitæ regula maneamus, id est nec diversa credamus, nec diversos vivendi ritus habeamus, sed omnes uno modo sincere et munde credamus et vivamus.

C *«* Imitatores mei estote, fratres, et observate eos qui ita ambulant, sicut habetis formam nostram. *«* Multi enim ambulant, quos sæpe dicebam vobis, *«* nunc autem et flens dico, inimicos crucis Christi *«* (Rom. xvi); quorum finis interitus, quorum deus *«* venter est, et gloria in confusione ipsorum qui *«* terrena sapiunt. Nostra autem conversatio in *«* cœlis est, unde et Salvatorem exspectamus Dominum nostrum Jesum Christum, qui reformabit *«* corpus humilitatis nostræ configuratum corpori *«* claritatis suæ, secundum operationem virtutis *«* suæ, qua etiam possit subjicere sibi omnia. *»*

D Idem, ut dixi, sapiamus et in eadem vivendi regula maneamus. Et in his, id est in fidei unitate et regula disciplinæ *estote imitatores mei, fratres*, id est sicut me notis idem sapere, et eandem regulam servare, sic facite. Ac sicut ego, tradite oblivioni ea quæ retro sunt, id est præterita vitia, ut si vos delectavit aliquando vanitas, jam non delectet; et in anteriora, id est in profectum virtutum atque in æterna bona piis desideriis atque conatibus semper extendamini. Extenditur enim animus desiderio lætitiæ nondum consecutæ. Et tota vita Christiani boni, sanctum desiderium est. In his et talibus me imitamini, et *observate*, id est considerate diligenter, et æquimini eos qui mihi sunt similes in via Dei, *qui ita ambulant*, id est promoventur in operibus bonis, *sicut habetis formam nostram*, id est sicut tradidi vobis formam recte ambulandi, vel exemplo conversationis meæ, vel sermone prædicationis. Eos, inquam, qui ita ambulant, observate solliciti, *multi enim* sunt qui aliter incedunt, nec imitandi sunt, sed cavendi. Multi ambulant latam viam perditionis, id est multi promoventur in via perverse actionis, quos esse *inimicos crucis Christi sæpe dicebam vobis*, dum præ-

sens essem, sed *et nunc idem dico*, *flens* tum de A perditione eorum, tum de subversione simplicium quos decipiunt. Inimici enim Dominicæ crucis sunt pseudoprædicatores, quia dicunt mortem Christi non sufficere credentibus ad salutem, sine carnalibus legis observationibus. Et conantur ita impugnare crucem Salvatoris, ideoque merito pereunt, *quorum finis est interitus*, id est mors sempiterna, quia tunc non inveniunt auxilium crucis, cujus hostes fuerunt. *Quorum deus venter est*, quia quidquid faciunt, pro ventre faciunt. Vel escas quæ ventris sunt, Deum sibi faciunt, dum eas justificare homines dicunt, et salutem animæ putant in escis, *et gloria eorum in confusione ipsorum*, quia in talibus gloriantur, unde confundi et erubescere possent, id est in pudendis membris suis circumcisis; *qui terrena sapiunt*, quia in lege nihil spiritaliter intelligunt, sed omnia carnaliter. Malis etiam catholicis conveniunt hæc verba. Et ipsi enim sunt multi, quia multitudo palearum abundat in area, et ambulant in ampla via, quæ ducit ad perditionem. Ipsi sunt inimici crucis Christi, qui contra crucem semper faciunt. Cum enim crux Christi in omnibus electis carnem affligat, et crimina mortificet, illi e contrario carnem voluptatibus fovent, et vitia nutriunt. Ideoque finis eorum erit interitus perpetuus, quia propter solam fidem, quam sine bonis operibus habuerunt, non evadent tormenta æterna (*Jacob. 11*). Quorum deus venter est, quia sicut Deum summo honore venerari deberent, et omnia meliora de rebus suis illi offerre, sic venerantur suum ventrem, offerentes ei pretiosa et summo studio præparata ciborum genera, ac semper dediti sunt ventris servitio, colentes illum pro Deo, nec reminiscentes Creatoris sui. Et gloria eorum in confusione ipsorum, quia jam amissa peccandi verecundia, ex illis operibus nequitie gloriantur, de quibus erubescere debuerunt. Qui terrena sapiunt, quia in terrenis nil nisi quod vident, intelligunt: nec sensum mentis nisi in terrenis ponunt, sed semper cogitatione versantur in infimis. Sed *nostra conversatio* longe distat ab illis, quia jam secundum fidem, et secundum spem *est in cælis*. Si enim non est in cælis, quomodo habemus sursum cor? Corpore ambulamus in terra, sed corde habitamus in cælo. Sicut enim domus exterioris conversationis est ædificium, quod inhabitat corpus, ita domus nostræ cogitationis est res quælibet, quam per dilectionem inhabitat animus. Omne enim quod diligimus, quasi in hoc quiescentes habitamus. Unde nunc apostolus quia in supernis cor fixerat, in terra quidem positus, sed tamen a terra extraneus, de se sui que similibus dicit: *Nostra conversatio in cælis est*, id est et vivendo et intelligendo sumus angelis similes, unde, id est, ex quibus præter commoda quæ jam habemus, *et Dominum nostrum Jesum Christum exspectamus* venturum ad iudicium, Salvatorem jam animarum nostrarum, et tunc etiam

Nam ipse tunc reformabit, id est in meliorem formam resuscitabit *corpus humilitatis*, id est vilitatis et dejectionis nostræ, id est hoc corpus nostrum vile et abjectum, quod nunc tot miseris subjacet. Ita reformabit illud, id est pristinam ei formam ita gloriosam in resurrectione restituet, ut sit *configuratum corpori claritatis suæ*, id est assimilatum clarissimo corpori suo, quod sumpsit ex virgine, et eandem claritatis figuram habeat corpus nostrum, quam habet suum, quando justi fulgebunt sicut sol in regno Patris eorum (*Matth. XIII*). Et hoc ipse faciet *secundum operationem* omnipotentis suæ, *qua possit* non solum corpus reformare, sed *etiam subjicere sibi omnia*, quia tunc omnino complebitur: « Omnia subjecisti sub pedibus ejus (*Psal. cix; I Cor. xv*). »

CAPUT IV.

« Itaque, fratres mei charissimi et desideratissimi, mi, gaudium meum et corona mea, sic stete in Domino charissimi. »

Quia Christus reformabit corpus humilitatis nostræ, et ad tantam pervenimus gloriam de tanta utilitate, *itaque, fratres mei*, stete in eo quod cœpistis, ne tantam gloriam amittatis. Vos dico, mihi charissimi, quia multum ego vos habeo charos *et desideratissimi*, quia multum ego vos desidero, vel vos me; *gaudium meum*, id est de quorum fide et opere gaudeo; *et corona mea* in futuro, quia propter vos coronam gloriæ percipiam. Vos qui tales estis, stete firmi *in Domino sic*, id est ut ego vos stare docui, et ut cœpistis; vel sicut me et mihi similes scitis, quia tunc eritis charissimi.

« Evodiam rogo et Syntychen deprecor, id ipsum sapere in Domino. Etiam rogo et te, germane compar, adjuva illas quæ mecum laboraverunt in Evangelio, cum Clemente et cæteris adiutoribus meis, quorum nomina sunt in libro vitæ. »

Evodia et Syntyche erant matronæ religiosæ, quæ prædicatores suscipere solebant. Et forte audierat illas Apostolus a fide dissentire, ideoque nominatim rogavit, ut id ipsum quod cæteri saperent in Domino, id est in ejus fide. Quasi dicat: Omnes mones stare, sed specialiter Evodiam et Syntychen, quia plus de eis timeo. *Etiam rogo et te, o germane compar*, id est coadjutor meus in prædicatione, *adjuva illas* firmando tuis exhortationibus et instructionibus atque orationibus, ut possint unanimes stare in fide, quæ non sunt parvipendendæ, quia necum laboraverunt in Evangelio, id est de labore quo ministraverunt mihi stipendium in prædicatione Evangelii. Laboraverunt, inquam, *cum Clemente*, qui in hoc laborabat, et cum cæteris qui me adjuvabant. Iste Clemens fuit tertius papa Romanus (225). Vel adjuva illas *cum Clemente et cæteris adiutoribus meis*, id est tu et cæteri adiutores mei qui sunt Philippis, adjuvate illas. Adjuutores dico, qui

non frustra laboraverunt ut me adjuverent, quia nomina eorum scripta sunt in libro vitæ, id est assignata tenentur ad vitam in memoria divinæ prædestinationis. Quis est enim liber vitæ, nisi memoria Dei, in qua sunt illi qui vivunt in æternum? (*Apoc. xx, xxii.*)

« Gaudete in Domino semper, iterum dico, gaudete (*I Cor. i, Jer. ix*). Modestia vestra nota sit omnibus hominibus. Dominus prope est. Nihil solliciti sitis, sed in omni oratione et obsecratione cum gratiarum actione petitiones vestræ innotescant apud Deum. Et pax Dei quæ exsuperat omnem sensum, custodiat corda vestra et intelligentias vestras in Christo Jesu. »

Lætatus in fide et operibus eorum Apostolus, ut alacres sint in his proficientes, monet gaudere in Domino, et id iterat, ut se in eis gaudere vere ostendat. *Gaudete*, inquit, id est cor vestrum exhilarate, et omne bonum unde gaudendum est, statuite vobis in Domino, non extra. Et hoc adeo necessarium vobis est, quod iterum dico *gaudete*, ut tristitia sæculi nullum in vobis locum inveniat, sed totos lætitia spiritualis vos repleat. Gaudete in Domino, et non per intervalla, ut modo gaudeatis, modo non gaudeatis, sed semper gaudeatis, sive in prosperis, sive in adversis. Et non semel dico, sed iterum ut gaudeatis, confirmans et inculcans repetita commotione gaudium. Gaudete, sed in Domino, non in sæculo. Sicut enim « nemo potest duobus dominis servire » (*Matth. vi; Luc. xvi*), sic nemo potest et in Domino et in sæculo gaudere. Contraria enim sunt hæc duo gaudia. Nam sæculi gaudium est impunita nequitia. Luxurientur homines, fornicentur in spectaculis, nudentur in ebriositate, ingurgitentur turpitudine, et ista mala non impediatur fames, non belli, non alicujus rei timor, non aliquis morbus, non aliqua adversitas, sed sint omnia redundantia in pace carnis, in securitate mentis, et videte sæculi gaudium. Et ideo non in sæculo gaudete, sed in Domino, id est non in iniquitate, sed in veritate; non in flore vanitatis, sed in spe æternitatis. In Domino sit gaudium vestræ mentis, sed homines videant modestiam vestræ conversationis, ut exemplo vestro discant modeste agere. Modestia quasi modus dicitur, quando modus servatur in omnibus. Modestia est in animo, continens moderationem cupiditatum. Modestia in operatione, modificans omnes actiones, similiter et in verbis. Hæc modestia tantum fulgeat in vobis, ut nota sit omnibus hominibus; fidelibus, ut imitentur; infidelibus, ne possint reprehendere. Modestiam morum servate, quia Dominus prope est, ut auxilietur vobis assidue nisi per socordiam vestram defeceritis. Etsi enim super omnes cælos ascendit corpore, non tamen recessit majestate. Ubique præsens est, qui fecit omnia. Dominus prope est, paratus dare quicquid opus est vobis in spiritualibus et corporalibus. Et ideo solli-

itudinem vani timoris abjicite, quia et in operibus vestris aderit Dominus vobis adiutor, et in passionibus quas pro nomine ejus perferetis, nec alimenta vobis corporea denegabit. Nihil ergo, id est de nulla re solliciti et timidi sitis quasi de futuro, sed estote sine mundi sollicitudine, habentes promissa Dei præ oculis, et ab ipso petentes omnia. Non sitis, inquam, solliciti, sed petitiones vestras de his quæ vultis accipere, ita sint vehementes et instantes, ut innotescant apud Deum, id est perveniant ad Deum, hoc est acceptabiles sint Deo qui omnia novit, sed ea scire dicitur, quæ elegit et approbat. Vel vobis innotescant apud Deum per tolerantiam, non apud homines per jactantiam. Aut forte innotescant etiam angelis, qui sunt apud Deum, ut quodam modo offerant Deo, et de his consulant; et quod Deo jubente implendum esse cognoverunt, hoc vobis vel evidenter, vel latenter reportent. Petitiones dico factæ in omni oratione, id est in oratione quæ nihil de his quæ oranda sunt prætereat, sed omne quod expedit, orando petat a Deo; et obsecratione, quæ cum adjuratione sacrorum fiat, cum gratiarum actione, de acceptis beneficiis, quia qui vult alia impetrare, debet ex perceptis gratus esse. Vel secundum alios oratio est pro præteritis excessibus ac delictis, obsecratio autem pro adipiscendis futuris bonis, gratiarum actio pro collatis beneficiis, petitio vero de rebus nominatim necessariis. Et talibus quidem precum modis hortor vos ut insistatis, et Deum sine quo humanus labor inutilis est oro ut præstet effectum, scilicet ut pax Dei, qua in seipso pacatus est, et cujus participatione pacificantur angeli et homines, custodiat corda vestra, quæ exsuperat omnem sensum, id est omnem intellectum hominum et angelorum, quia pacem Dei, qua Deus ipse pacatus est, sicut Deus novit, nec nos, nec angeli nosse possumus. Sed quia et nos pro modo nostro pacis ejus participes facti sumus, summam in nobis atque inter nos et cum ipso pacem, quantum nostrum summum (224); hoc modo juxta suum modum sciunt eam sancti angeli, homines autem nunc longe infra scientiam istam sunt, quantumque propectu mentis excellent. « Videmus enim nunc per speculum in ænigmate (*I Cor. xii*). » Cum vero æquales angelis fuerimus, tunc (sicut illi) facie ad faciem, id est manifeste videbimus; tantamque pacem habebimus erga eos, quantum et ipsi erga nos, quia tantum dilecturi sumus, quantum ab eis diligimur. Itaque pax eorum nota nobis erit, quia nostra talis ac tanta erit, nec præcellet tunc intellectum nostrum. Dei vero pax, quæ est illis erga eos, et nostrum et eorum intellectum sine ulla dubitatione præcellit. Et ista pax Dei custodiat in Christo Jesu corda vestra, id est voluntates vestras, et intelligentias vestras, ut extra Christum nihil appetatis vel intelligatis. Contra illecebras sæculi custodiat corda, et contra fraudes pseudopredicatorum ca-

stodiat intellectus vestros. Corda custodiat contra adversa omnia, intelligentias contra errores.

« De cætero fratres, quæcunque sunt vera, quæcunque pudica, quæcunque justa; quæcunque sancta, quæcunque amabilia, quæcunque bonæ famæ, si qua virtus, si qua laus disciplinæ: hæc cogitate, quæ et didicistis, et accepistis, et audistis et vidistis in me: hæc agite, et Deus pacis erit vobiscum. »

In conclusione quæ ad perfectionem sunt, exponit Apostolus. Quasi dicat: Hactenus contra persecutores, et contra pseudoprædicatores vos monui, sed de cætero monendi genere, quod ad mores optimos pertinet, nunc breviter dicam; scilicet cogitate et agite quæcunque sunt veru, et quæcunque sunt pudica, ut nec in cogitatione, nec in actione falsum aliquid aut libidinosum admittatis, sed in omni sermone veridici, et mente et corpore pudici sitis, ne vel in aspectu vestro sit aliquid lasciviæ. Similiter quæcunque justa, et quæcunque sancta, cogitate et facite. Justa ad proximum, sancta in propria vita, id est erga proximum juste servanda; sancta, id est animas, et corpora sanctificantia. Qui semper cogitat et agit quæ justa sunt, nec Deo, nec homini facere potest injuriam. Et qui sancta cogitat et facit assidue, nulla potest macula sordidari; quæcunque amabilia cogitate et facite, id est studete ut dicta et facta vestra in bono placeant hominibus, quatenus per hoc ad imitationem vestram eos alliciatis sicque Deo jungatis, quæcunque bonæ famæ sunt ea similiter cogitate et facite, ne de vobis habeatur mala opinio, sed bona, ut prosit aliis. Sanctorum enim conversatio etiam causa debet esse, ne forte cum mala vita non sit per lasciviam, mala sit fama per negligentiam. Nec audiendi sunt, qui quando reprehensi in aliqua negligentia sua, per quam fit ut in malam veniant suspicionem, unde suam vitam longe abesse sciunt, dicunt sibi coram Deo sufficere conscientiam, existimationem hominum non solum imprudenter, sed etiam crudeliter contententes, cum occidunt animas aliorum, sive blasphemantium vitam Dei, quibus secundum suam suspicionem, quasi turpis quæ casta est, displicet vita sanctorum, sive etiam cum excusatione imitantium, non quod vident, sed quod putant. Proinde quisquis a criminibus flagitiorum atque facinorum vitam suam custodit, sibi bene facit; quisquis autem famam et in alios misericors est. Nobis enim necessaria est vita nostra, aliis fama nostra. Et utique etiam quod aliis ministramus misericorditer ad salutem, ad nostram quoque redundat utilitatem. Si qua virtus est, hanc sectamini, si qua laus disciplinæ, hanc habete, virtus sit in vobis, et post sequatur laus, ut homines qui virtutem vestram laudabunt, proficiant. Vel cogitate et facite ea quæ sunt bonæ famæ si qua virtus est in eis, vel si qua laus disciplinæ Christianæ. Non enim curanda est bona fama de viribus vel scientia vel aliis sæcularibus; hoc, inquam, cogitate, id est in memoria versate, quæ omnia et didicistis,

me docente, et accepistis ut digna teneri, quia vobis accepta et grata fuerunt postquam ea didicistis, et audistis ea in me esse, et vidistis. Hæc agite, id est non tantum cogitate, sed et actu implete; et tunc Deus dator pacis, erit vobiscum, adjuvans vos hæc facere. Qui enim sic vixerit, non solum cum Deo pacem habebit, sed et ab omnibus fere hominibus amabitur.

« Gavisus sum autem in Domino vehementer, quoniam tandem aliquando refluistis pro me sentire, sicut et sentiebatis, occupati autem eratis. Non quasi propter penuriam dico. Ego enim didici in quibus sum sufficiens esse. Scio et humiliari, scio et abundare. Ulique et in omnibus institutus sum, et satiari, et esurire, et abundare, et penuriam pati. Omnia possum in eo, qui me confortat. Verumtamen bene fecistis communicantes tribulationi meæ. »

Bona acta eorum memorat, et gratias agit, ut incitet eos ad talia ferventius agenda, quasi dicens: Ego vos ad futura religionis studia moneo, sed de præteritis beneficiorum vestrorum studiis gaudeo, et gavisus sum vehementer, non in dono quod promisistis, sed in Domino, qui vobis inspiravit hanc charitatem, et redditurus est remunerationem, quoniam tandem, id est post multa tempora, aliquando, id est aliquo tempore, quia non omnia potuistis, refluistis, id est pristinum largitatis florem resumpsistis, ut aliqua daretis mihi, sicut olim dare solebatis. Largitio enim est flos, quia inde fructus æternæ vitæ procedit. Et ab hoc flore quadam sterilitate marcueratis, ac velut hiemis frigore torpueratis. Sed nunc velut austro flante sancto Spiritu, ver ad corda vestra rediit, et refluistis velut bonæ arbores. Refluistis sentire pro me, id est compati mihi pro me, quia mihi prodest vestra compassio. Sentire pro me, id est ut sentiretis quod me pungebat sicut et prius sentiebatis ministrantes mihi. Nec aliqua mala causa hoc intermisistis, sed occupati eratis et impediti aliquibus adversis vel actionibus. Imprudenter delinquentes Galatas aperte increpat superius, dicens: « O insensati Galatæ, quis vos fascinavit? (Galat. iii.) » Nunc vero culpas istorum verecundantium quasi compatiens reprehendit, ut et illorum culpas increpatio detegeret, et horum negligentiam sermo mollior velaret. Similiter unusquisque rector Ecclesiæ juxta modum culpæ debet unumquemque rationabili discretione increpare. Gavisus sum et refluistis. Non quasi propter penuriam hoc dico, id est non dico me gavisum esse quasi propter penuriam meam, quem consolati es is, quia non propter angustiam meam quæ relaxata est, sed propter affectum vestrum gaudeo. Vel non dico ista quasi propter penuriam meam adhuc relevandam, ut per hæc dicta vos invitare studeam ut iterum suppleatis inopiam meam. Ego enim didici et a Deo et ab usu quotidiano esse sufficiens, id est contentum rebus in quibus sum sive parvis, sive magnis. Nam et humiliari paupertate scio, quia non

inde frangor; *et abundare rebus scio*, quia non inde erigor. *Ubique*, id est in omni loco, sive Romæ, sive alibi, sive coram principibus, sive aliis eum positus, *et in omnibus*, id est in omni genere rerum *institutus sum* et doctus a Deo, scilicet *et satiari*, ne noceat satietas; *et esurire tolerabiliter, et abundare humiliter, et penuriam pati moderanter*. Hæc scio, et possum exsequi omnia ista, eo confortante, qui docuit. Magna scientia est scire humiliari et abundare, satiari et esurire, abundare et penuriam pati. Quem enim penuria sua non frangit, a gratiarum actione non retrahit, in rerum temporalium desiderio non accendit, scit humiliari. Hoc enim loco Apostolus humiliari dicit penuriam pati. Nam statim e contrario subjunxit, scio et abundare. Qui enim acceptis rebus non extollitur, qui per eas ad usum vanæ gloriæ non intorquetur, qui solus non possidet quod accepit, sed hoc cum indigentibus misericorditer dividit, scit abundare. Qui acceptis alimentis, non ad ingurgitationem ventris utitur, sed ad reparationem virtutis, nec plus carni tribuit, quam necessitas petit, scit satiari. Qui alimentorum inopiam sine murmuratione tolerat, nec pro necessitate victus aliquid agit unde anima peccati laqueum incurrat, scit esurire. Quem ergo nec in abundantia superbia elevat, nec in necessitate cupiditas irritat, novit abundare, novit penuriam pati. Ubi cum statim Apostolus subderet, *omnia possum*, adjunxit *in eo qui me confortat*. Ecce in altum ramus producit, sed quia in radice se tenet, in virilitate permansit. In altum enim surgens aresceret, si se a radice divisisset. Sibi enim nihil tribuit, qui omnia se posse non in se, sed in Domino qui se confortat, fatetur. Ego quidem, inquit, hæc omnia scio et possum; sed *tamen vos bene fecistis* quantum ad vos, qui quod justum est explevistis *communicantes vestra bona tribulationi meæ*. Inde mihi placet actio vestra, quia bene egistis, ministrantes mihi misericorditer in afflictione mea, non quia mihi res misistis quibus carere possem.

« Scitis autem et vos Philippenses, quod in principio Evangelii quando profectus sum ad Macedoniam, nulla mihi ecclesia communicavit in ratione dati et accepti, nisi vos soli, quia et Thessalonicam semel, et bis in usum mihi misistis. Non quia quæro datum, sed requiro fructum abundantem in ratione vestra. Habeo autem omnia et abundo, repletus sum acceptis ab Epaphrodito, quæ misistis in odorem suavitatis, hostiam acceptam, placentem Deo. Deus autem meus impleat omne desiderium vestrum secundum divitias suas in gloria in Christo Jesu Deo autem et Patri nostro gloria in sæcula sæculorum. Amen. »

Vos communicastis et nunc et olim mihi res vestras, sed alii non. Nam *scitis et vos Philippenses*, sicut et alii et plures, *quod in principio Evangelii*, id est quando prius prædicavi vobis Evangelium, *nulla ecclesia nisi vestra communicavit mihi in ratione dati et accepti*, id est ut rationabiliter cons-

deraret quod deberet dare carnalia, qui accipiebat spiritualia, juxta illud: « Si nos vobis spiritualia seminavimus, magnum est si vestra carnalia metamus (I Cor. ix). » Vos soli communicavistis, quæ non tantum cum essem præsens apud vos, hoc fecistis; sed et Thessalonicam, id est apud illam urbem moranti misistis mihi de rebus vestris in usum semel et iterum. Hoc memorat Apostolus, ut quasi laude digni magis studeant prædicatoribus ministrare, et ne illi putarent eum fuisse oblitum charitatis sæpe sibi impensæ. Qui ab eis hæc non refutabat, quia non idcirco dabant, ut vellent eum vitis suis parcere. A cæteris vero non accipiebat, ne auctoritatem sibi correctionis minueret, et ne forte illis esset grave, cibum ei corporalem impendere. Dico, inquit, vos bene fecisse, non ut ego implear, sed ne vos inanes sitis. Et hoc est: *Non dico ideo, quia quæro datum vestrum, sed requiro fructum dati abundantem in ratione vestra, non mea. Datum est res ipsa quæ impenditur, veluti nummus, cibus, vestis. Fructus vero dati est, si benigna mente futura mercedis studio aliquid impendatur. Ergo datum in re accipimus, fructum in corde. Unde et idem fructus in ratione, id est in cordis lumine, debet abundare. Veli in ratione eorum debet abundare, ut cum rationem de suis actibus Deo reddiderint, abundet eis fructus justitiæ. Quia igitur discipulorum suorum Apostolus mercede potius quam munere pascetur, nequaquam datum, sed fructum se quærere fatetur. Unde et subdit protinus, diceas: Habeo autem omnia et abundo. Quasi dicens: Non quæro datum, sed habeo omnia, quia Deum habeo, in quo omnia possideo; et abundo non in uno, ut in alio egeam, sed repletus sum, quoniam nihil deest timentibus Deum. Repletus sum, etsi nihil dedisset; sed acceptis ab Epaphrodito vestris muneribus, quæ misistis mihi in odorem suavitatis, hostiam acceptam, placentem Deo, id est quæ placerent Deo, ut suavissimus odor puræ orationis. Quod enim odor sit oratio, testatur Joannes, ubi se vidisse refert seniores habentes phialas aureas plenas odoramentorum, quæ sunt orationes sanctorum (Apoc. v). Sed et istorum munera dicuntur nunc odor suavitatis, quia orant pro eis, sicut scriptum est: « Conclude eleemosynam in corde pauperis, et hæc pro te exorabit ab omni malo (Eccli. xxix). » Sunt et hostia, quia data suut ab eis, ut vincerent hostes suos, vel quia vicerant. Et hæc hostia accepta est Deo et placens, quia Deus accepit eam placite. Vos me replevistis vestris bonis, sed Deus meus repleat vos suis. Proprio exemplo declarat Apostolus, quia pro his orare debemus, a quibus temporalia bona percipimus. Deus omne desiderium vestrum impleat, largiendo bona omnia quæ desideratis, ut nihil vobis desit ex his quæ optatis. Et hoc faciat secundum divitias suas, id est secundum quod ipse est dives, et plus dare potest, quam quis mereatur. Impleat, dico, vestrum desiderium, non in terrenis, sed in gloria supernæ felicitatis, et hoc in Christo Jesu, ut*

in eo perenniter deliciis affluatis. Cujus beneficiis non simus ingrati, sed gratias ei semper et laudes referamus, scilicet *Deo* qui nos creavit, et *Patri nostro* qui nos in filios adoptavit, sit gloria; et non ad horam, sed in *sæcula sæculorum*, id est in æternum. Amen.

« Salutate omnem sanctum in Christo Jesu. « Salutant vos qui mecum sunt, fratres : salutant « vos omnes sancti, maxime autem qui de Cæsaris « domo sunt. »

Salutate, inquit, omnem apud vos manentem sanctum in Christo Jesu, id est qui non in lege, sed in Christo sanctus est, et nihil sanctitatis nisi in Christo habet, et a Christo. Vos autem salutant fratres, id est filii Catholicæ matris Ecclesiæ, qui mecum sunt, id est morantur. Nec ipsi solum, sed et omnes sancti qui sunt Romæ. Omnes quidem vos salutant,

sed maxime illi qui sunt de domo Cæsaris, id est Neronis. In hoc multum confirmat eos in fide, dum ostendit eos præcipue diligere, et specialiter salutari ab his qui Christianæ religioni jam deserviunt in domo Cæsaris. Nec ultra debere tribulationes metuere, quasi graves et diu permansuras, cum jam consilarii et amici imperatoris sunt Christiani.

« Gratia Domini nostri Jesu Christi cum spiritu « vestro. Amen. »

Gratia Christi Jesu Domini nostri sit cum spiritu vestro, ut quod spiritus per liberum arbitrium bene voluerit, adjuvante gratia possit implere, ne sitis generatio quæ non direxit cor suum et non est creditus cum Deo spiritus ejus (Psal. LXXVII.) Cum Deo enim debet credi spiritus noster, quia nisi crediderimus quod spiritus nostræ voluntatis per seipsum nihil potest sine adjutorio gratiæ Dei, nihil unquam boni facere poterimus. Amen.

IN EPISTOLAM AD COLOSSENSIS.

ARGUMENTUM.

Est civitas in Asia nomine Colossæ, unde Colossenses dicuntur. His non ipse Apostolus prædicavit, sed ejus discipuli Epaphras et Archippus, quando ex his originem ducebant. Epaphras enim quæ a Paulo didicerat prædicans eis, convertit illos, et factus est apostolus eorum; Archippus vero episcopatum super eos accepit. Supervenientibus autem pseudoapostolis, et carnalibus observantiis prædicantibus, dubium fuit quibus potius credendum esset. Unde Paulus, cujus auctoritas celebris erat, quasi medius judicat quæ pars sit potius tenenda. Describit autem Christum et ejus beneficia, quomodo est sufficiens ad omnia; carnalia vero omnino improbat, ut deinceps sincere fidem Christi teneant. Instruit et moraliter, confirmando quod illi docuerant. Unde fit ut hæc epistola magnam affinitatem et similitudinem habeat cum illa quæ est ad Ephesios. In illa quippe et in ista simili modo commendatur eminentia divinarum beneficiorum, et carnalium observatio legis destruitur, et mores Dei instruuntur.

CAPUT PRIMUM.

« Paulus Apostolus Jesu Christi per voluntatem Dei, « et Timotheus frater, his qui sunt Colossis, sanctis « et fidelibus fratribus in Christo Jesu : Gratia vobis « et pax a Deo Patre nostro, et Domino Jesu « Christo. »

Quia Paulus Apostolus gentium constitutus erat, ideo istis qui gentiles erant, pure se scribit apostolum, licet eis per se non prædicaverat, sed per discipulos suos. Nam et istis erat apostolus. At contra in epistola quam scripsit Hebræis, non se dixit apostolum, quia non erat apostolus Hebræorum, sed gentilium. Paulus cujus dicta sunt authentica, quia

est apostolus, id est legatus Jesu Christi; et hoc non per sua merita, vel per humanam electionem, sed per voluntatem Dei, contra cujus voluntatem faciunt pseudoapostoli, et Timotheus frater, qui est vir magnæ auctoritatis, mandant ea quæ sequuntur his qui sunt Colossis, non quidem idololatri, sed sanctis et fidelibus fratribus, id est majoribus et minoribus Christianis. Sanctis, id est in divina religione promotis; et fidelibus, id est qui jam fidem habent, sed nondum in sancta conversatione sunt promoti. Vel eisdem sanctis et fidelibus, id est bonos mores et fidem habentibus, et hoc in Christo Jesu, id est in Christi gratia, non in legis observantia, nec in viribus liberi arbitrii. Quid volunt, aut quid petunt, ut gratia vobis sit et pax a Deo Patre nostro, et Domino Jesu Christo.

« Gratias agimus Deo et Patri Domini nostri Jesu « Christi, semper pro vobis orantes, audientes fi- « dem vestram in Christo Jesu et dilectionem, quam « habetis in sanctos omnes, propter spem quæ re- « posita est vobis in cælis, quam audistis in verbo « veritatis Evangelii, quod pervenit ad vos, sicut et « in universo mundo est, et fructificat, et crescit; « sicut et in vobis ex ea die, qua audistis et cogno- « vistis gratiam Dei in veritate, sicut didicistis ab « Epaphra charissimo conservo nostro, qui est « fidelis pro vobis minister Christi Jesu, qui etiam « manifestavit nobis, dilectionem vestram in spi- « ritu. »

A gratiarum actione inchoat, ut eos sibi benevolos reddat, et ad gratias Deo semper agendas pro acceptis beneficiis accendit. Scribit autem a Roma. Gratias, inquit, agimus, ego et Timotheus, id est gratiosas laudes referimus Deo, quia vobis omnia

dedit bona quæ habetis. Ideo gratias illi agimus, non vobis. Gratias agimus *Deo*, id est Creatori Jesu Christo, secundum quod homo est; *et Patri* ejusdem *Christi Jesu Domini nostri*, secundum quod Deus est, qui per eundem Mediatorem vobis omnia tribuit. Nos dico, *semper orantes pro vobis*, ut crescat et proficiatis die ac nocte, vel quoties oramus. Gratias agimus, *audientes*, id est quia audivimus *fidem vestram esse in Christo Jesu*, quia et fides vestra donum Dei est. Alioquin non essent illi agenda gratiæ pro ea, et quia audivimus *dilectionem quam habetis* non otiosam, sed bonis operibus redundantem, non in quosdam *sanctos* sed in *omnes* quoniam beneficia vestræ charitatis abundant in eos quos vivere sancte nostis. Ideoque grates illi referimus, qui vobis talem inspiravit charitatem. Et hæc non propter humanam laudem, sed *propter spem quæ vobis est in cælis reposita*, quæ non apparet modo, sed tamen est vobis in cælis, tutoque loco servatur; hoc est, propter vitam perennem, quam vos in cælis assecuturos speratis. Et quomodo res tam laetens speratur? *Quam audistis*, inquit, id est quia audistis illam *in verbo veritatis*. Vel quia spem non habetis a vobis, sed a Deo, quia in verbo, id est in prædicatione non falsitatis, sed veritatis; nec cuiuslibet veritatis, sed *Evangelii*, id est boni nuntii, quo annuntiatur Deus homo factus esse, ut homines deos faceret, id est angelis pares, et ne ipsi dissimularent se Evangelium audisse, quasi non esset eis prædicatum, sed alios audisse inde tenuiter loqui, quibus fuerat prædicatum, addit: *Quod Evangelium pervenit ad vos*, subauditur, etsi non per me, tamen per eos qui didicerant a me, sicque veritas vos non latuit. Rursum ne illi superbirent, quasi ad eos pervenisset Evangelium, et cæteras gentes devitasset, subdit: *Ita pervenit ad vos, sicut et in universo mundo*, id est non soli vos audistis illud, sed et omnis mundus, quia non est aliquod mundi regnum, in quo Christi nomen non sit prædicatum. Vel ita pure et vere pervenit ad vos, sicut per me et alios venit in universum mundum, et adhuc est et manet in eo, id est non minus est vobis factum, quam aliis ecclesiis et cum sit in mundo Evangelium, *fructificat* ibi per bona opera intellectus, *et crescit* augmento scientiæ et numero fidelium; non quod plus habeant alii quam vos, sed ita est factum illis, *sicut et in vobis*. Et ideo nihil debetis superaddere vel mutare, sed ita ut didicistis, Evangelium sinceriter servare, quod totus servat mundus, ne vos soli dissentiat ab universo orbe. Sicut in orbe terrarum, ita et in vobis est, et fructificat et *crescit ex ea die qua audistis* illud, quia non fuistis rebelles, sed mox credere cœpistis et fructificare, vel in die illo, id est illuminatione cordis audistis credendo *et cognovistis* discernendo *gratiam Dei*, id est remissionem peccatorum, et cætera Dei dona gratuita *in veritate*, non in fictione, quia veraciter dat ea Deus, non fingitur dare, vel in veritate prædicationis ea cognovistis. *sicut didicistis ab Epaphra*. Epaphram modo

laudat, et de Archippo tacet, quoniam Epaphras erat valde fervens studio charitatis, et sollicitus et apostolus eorum; Archippus vero episcopus, sed aliquanto remissus et tepidus. Cognovistis gratiam Dei, non sicut vos ipsi vestro ingenio invenistis, sed sicut didicistis ab Epaphra magistro non vili, sed *charissimo et conservo nostro*, quia nobiscum in prædicatione servit Domino Christo. Cujus doctrinam non debetis spernere, sed honorare et servare, quia est non subdolos, sed *fidelis minister Jesu Christi*, id est dona Christi ministrans in prædicatione vobis, vel bona vestra offerens Christo, *fidelis minister est pro vobis*, non pro suis, qui non vestra quærit, sed vos; non res vestras cupit acquirere, sed vos Deo adungere, quorum salutem desiderans, cœpit doctrinam *meam vobis prædicare*. *Qui et manifestavit nobis* relatione sua *dilectionem vestram ad Deum* et proximum esse fundatam *in Spiritu sancto*, non in carne dilectionem vestram nobis intimavit, quæ non est in affectu carnis, sed in gratia Spiritus sancti.

« Ideo et nos ex qua die audivimus, non cessamus pro vobis orantes et postulantes ut implemini agnitione voluntatis ejus in omni sapientia et intellectu spirituali, ut ambuletis digne Deo per omnia placentes, in omni opere bono fructificantes et crescentes in scientia Dei, in omni virtute confortati secundum potentiam claritatis ejus, in omni patientia et longanimitate, cum gaudio gratias agentes Deo Patri, qui dignos nos fecit in partem sortis sanctorum in lumine, qui eripuit nos de potestate tenebrarum, et transtulit in regnum filii dilectionis suæ. »

Epaphras nobis nuntiavit dilectionem vestram spiritualem. Ideo non solum ipse Epaphras, sed et nos ex ea die qua hoc audivimus non cessamus orantes humili affectu et pia devotione et postulantes quasi quadam audacia pro meritis vestris assumpta. Hoc scilicet oramus et postulamus incessanter a Deo pro vobis, ut impleamini agnitione voluntatis ejus, id est ut plene cognoscatis quid ipse velit, et quid non. Magnum est plene scire quid Deus velit in omnibus rebus activæ vitæ vel contemplativæ. Modo tamen consequenter exponitur per partes quid ipse velit. Agnoscatis, inquam, voluntatem ejus in omni sapientia rerum, quæ activæ vitæ sunt, et intellectu spirituali, id est cognitione spiritualium rerum, vel in omni sapientia divinorum atque celestium, et intellectu spirituali sacrarum Scripturarum, ut vos ambuletis digne Deo, id est agatis ita ut digni sitis Deum accipere præmium; vel ambuletis ut Deum deceat ambulatio vestra, per omnia quæ egeritis placentes ei. Ita scilicet, ut sitis non in quodam, sed in omni opere bono fructificantes multipliciter in majus, et per hoc bonorum operum merita crescentes in scientia Dei, in cognitione divinitatis sensu spiritali, juxta illud: « A mandatis tuis intellexi (Psal. cxviii). » Bona enim operatio sensum mentis illuminat. Vos dico, confortati in Deo in omni virtute, id est fortes et constantes effecti in

charitate, et justī in sanctitate et cæteris similibus, et hoc secundum potentiam claritatis ejus, id est secundum quod potest vos fortes reddere claritas ejus, qua illuminantur electorum mentes, ut claram Dei notitiam habeant, et omnia clare discernere valeant, ut jam nullatenus ad peccati consensum flecti queant, sed semper quod bonum est, faciant. Dixi ut in omni virtute sitis fortes, scilicet in omni patientia, ut fortiter omnia adversa sustineatis per patientiam. Non enim in quadam patientia rogo vos esse fortes, ut quædam patienter sufferatis, et quædam non sufferatis: sed potius in omni patientia, ut videlicet omnia molestiarum genera patienter pro Deo sustineatis, et in omni longanimitate, id est longa animi perseverantia, in adversitatum toleratione et promissorum cælestium expectatione. Patientiæ enim addenda est longanimitas, ne quis postquam per aliquod temporis spatium servaverit patientiam, deficiat in adversis, vel fastidiat tam longam patientiæ observantiam, et incipiat impatienter agere, sed potius per longanimitatem patienter omnia toleret usque in finem, et hanc patientiam atque longanimitatem servate cum gaudio, vel non sitis inter adversa quæ patimini tristes, sed potius sitis spe gaudentes, dum fueritis in tribulatione patientes. Non enim contristari, sed gaudere debetis, si contigerit ut propter justitiam adversa toleretis. Vos dico, agentes gratias Deo Patri, qui tanta nobis beneficia contulit, ut co-sortes sanctorum nos faceret; hoc est nolite contra Deum murmurare, quia vos sinit in præsentī sæculo adversa tolerare, sed gratias illi agite semper, quia vos dignatus est in numero sanctorum computare, ut cum eo perenniter possitis regnare. Gratias illi exsultanter agite, qui nos per suam fecit dignos transire in partem, id est in participationem sortis, id est æternæ hæreditatis sanctorum in lumine, id est in claritate divinæ visionis, ut æternaliter irradiemur splendore majestatis ejus. Sors enim vocatur hæreditas, quando non meritis humanis, sed electione divina datur; sanctis patriarchis et prophetis. Et partem hujus sortis nos habere Deus voluit, ut cum sanctis patribus hæreditatem possideremus in lumine viventium. Vel Dei voluntas in humano genere sors est, apud quem non est iniquitas. Non enim ille personas accipit (Rom. 11), sed occulta illius sors est unicuique hominum. Sortis nomine designatur gratia qua salvamur, quia in sorte non est electio, sed voluntas Dei. Nam ubi dicitur, iste facit, et iste non facit, merita considerantur. Et ubi merita considerantur, electio est, non sors. Quando autem Deus nulla merita nostra invenit, sorte voluntatis suæ nos fecit, quia voluit, non quia digni fuimus, hoc est sors. Et in partem sortis hujus nos, qui eramus indigni, fecit ipse misericorditer dignos, quod ad fidem vocavit, non solum ex Judæis, sed et ex gentibus (Rom. 11). Et hoc fecit in lumine, quo mentes nostras illustravit, ut cognosceremus eum, et verba prædicatorum ejus intelligeremus. Fecit autem hoc modo nos di-

gnos, quia scilicet eripuit nos, id est potenter extraxit de potestate tenebrarum, id est dæmonum, qui nobis dominabantur intrinsecus, dum cæcitas infidelitatis et ignorantiae, vel peccatorum obscuritas in nobis adhuc esset. De potestate hujusmodi tenebrarum, id est malignorum angelorum, ne nos in nocte suæ damnationis sine fine possiderent, eripuit nos Deus Pater; in baptismo delens peccata nostra, per quæ illi potestatem habebant in nobis, et transtulit in regnum Filii sui in Ecclesiam Christi, de qua dictum est, quia mittet Filius hominis angelos suos, et colligent de regno ejus omnia scandala (Matth. 13). Transtulit, inquam, nos in regnum Filii dilectionis suæ, ut per fidem et opera bona regnaret in nobis Filius ejus. Sed quid est, dilectionis suæ? Si enim in divina Trinitate non est alia dilectio nisi Spiritus sanctus, profecto Christus in hoc loco non solius Patris, sed et Spiritus sancti filius invenitur. Quod si hoc absurdissimum est, restat ut non solus ibi sit dilectio Spiritus sanctus; quod autem dictum est: Filii dilectionis suæ, nihil intelligatur aliud quam Filii sui dilecti, quam Filii postremo substantiæ suæ. Caritas enim vel dilectio Patris, quæ in natura est ineffabiliter simplici, nihil est aliud quam ejus ipsa natura atque substantia, ac per hoc filius charitatis sive dilectionis ejus nullus est alius, quam qui de substantia ejus genitus est. In regnum Filii dilectionis suæ dicitur nos transtulisse, ut intelligamus quia nos quoque diliget, si perseveramus esse regnum Filii sui, quem ipse naturaliter et ineffabiliter diligit, id est si peccatum in nobis amplius non regnaverit. Ubi enim peccatum regnare incipit, ibi Christus regnare desistit (Rom. 7).

« In quo habemus redemptionem et remissionem peccatorum, qui est imago Dei invisibilis, primogenitus omnis creaturæ. »

In regnum Filii sui nos transtulit, in quo Filio habemus redemptionem de potestate diaboli, et remissionem peccatorum. In hanc enim redemptionem tanquam pretium pro nobis datus est sanguis Christi. Quo accepto diabolus non ditatus est, sed necatus, ut nos ab eis nexibus solveremur, nec quemquam eorum secum, quos Christus ab omni debito liber, indebite fuso suo sanguine redemisset, peccatorum retibus obvolutum traheret ad secundæ æ sempiternæ mortis exitum. Tunc enim sanguis ille, quoniam ejus erat, qui nullum omnino habebat peccatum (II Cor. 5; I Petr. 1), ad remissionem nostrorum fusus est peccatorum, ut quia eos diabolus merito tenebat, quos peccati reos conditione mortis obstrinxerat, hos per eum merito dimitteret, quem nullius peccati reum immerita pœna mortis affect, hac enim justitia et hoc vinculo vinctus est ille fortis, ut vasa ejus eriperentur, vel homines quos tenebat, liberarentur (Marc. 11). S. c. habemus in Christo redemptionem et remissionem, quæ in baptismo consecuti sumus, destructa potestate diaboli, et restituta libertate nostri arbitrii. Vel trans-

tulit nos Deus in regnum Filii dilectionis suæ, id est transvexit nos jam per spem in cœlum, quia concrescivit et consedere fecit in cœlestibus in Christo (*Ephes. 11*). In quo per spem similiter habere redemptionem, id est liberationem ab his miseris et afflictionibus, quas nunc patimur; et per rei exhibitionem habemus jam in illo peccatorum remissionem, quia et semel in baptismo per effusionem sui sanguinis delevit peccata nostra, et quotidie (si peccamus) non indigemus aliis hostiis; unde patet qui legales hostiæ non amplius offerendæ sunt, quia nullam omnino jam utilitatem præstant. Qui Christus secundum divinitatem est imago Dei invisibilis, et omnimoda similitudo Patris, sicut ait: « Qui me videt, videt et Patrem (*Joan. xiv*). » Nam sicut per contemplationem cujuslibet imaginis datur nobis ejus notitia, cujus illa imago est, licet ipse absens et nunquam visus a nobis, sic et apostoli videntes Filium, intellexerunt Patrem, qui corporaliter eis non apparebat. Et nos quidem sumus imago Dei, sed Filius est aliter ejus imago. Nam sicut imago imperatoris aliter est in nummo, et aliter in filio; sic et imago Dei aliter in Filio, qui est consubstantialis et coæqualis atque coæternus, et aliter in homine, qui est creatura. Et notandum quod admirabiliter commendat Apostolus excellentiam Christi in utraque natura, nunc de divinitate, et nunc de humanitate ejus sententiam proferens, ut hunc solum ad justificationem, et ad æternam salutem sine legis operibus sufficere cunctis creditibus ostendat (*ibid*). Nam de divinitate ejus sententiam protulit, dicens quia Pater transtulit nos in regnum Filii dilectionis suæ. Et de humanitate ejus subjunxit, quia in ipso habemus redemptionem et remissionem peccatorum; item secundum formam Dei dixit, quia ipse est imago Dei invisibilis. Nunc secundum formam servi subjungit, quia est primogenitus omnis creaturæ. Nam secundum formam Dei, non est primogenitus, sed unigenitus; secundum formam vero servi, ipse est primogenitus in multis fratribus. In substantia divinitatis est unigenitus, in susceptione humanitatis primogenitus in gratia. Primogenitus ergo dicitur omnis creaturæ, quia sicut primogenitus omnium fratrum primatum dignitatis obtinet inter omnes fratres, sic humanitas Christi primatum dignitatis obtinet inter omnes creaturas, ut sedeat cum principibus, et solum gloriæ teneat (*I Reg. 11*).

« Quoniam in ipso condita sunt universa in cœlis et in terra, visibilia et invisibilia, sive throni, sive dominationes, sive principatus, sive potestates. Omnia per ipsum et in ipso creata sunt, et ipse est ante omnes, et omnia in ipso constant, et ipse est caput corporis Ecclesiæ, qui est principium, primogenitus ex mortuis, ut sit in omnibus ipse primatum tenens (*I Cor. xv*). Quia et in ipso complacuit, omnem plenitudinem divinitatis inhabitare, et per eum reconciliare omnia in ipso,

A « pacificans per sanguinem crucis ejus, sive quæ in cœlis, sive quæ in terris sunt. »

Non est mirum si humanitas Filii Dei tantum præcellat omnibus, ut juxta eam sit ipse primogenitus omnis creaturæ, quoniam secundum divinitatis ejus potentiam condita, id est facta sunt in ipso universa, sicut et in Psalmo canitur Patri: « Quam magnificata sunt opera tua, Domine, omnia in sapientia fecisti (*Psal. ciii*), » id est in Filio tuo. Universa quæ sunt in cœlis et in terra, visibilia, sicut sol et luna, vel hominum corpora, et invisibilia, sicut angeli et animæ, creata sunt in ipso. Et ostenduntur per partes, invisibilia, quæ minus facta per eum videbantur propter magnitudinem excellentiæ ipsorum. Universa, inquam, sunt in ipso facta, sive throni, id est illi digniores spiritus, in quibus Deus sedet, sive dominationes, id est illi nobiliores spiritus, qui cæteris dominantur, sive principatus, id est illi qui præsumt aliis, et quæ agere debeant disponunt, sive potestates, id est illi spiritus, qui subjectis aliorum ordinibus potenter præminent. Throni enim vocantur, quibus ad exercendum judicium semper Deus præsidet. Nam quia *θρόνος*; *thronos* Latine eloquio *sedes* dicimus, throni Dei dicti sunt ii qui tanta divinitatis gratia replentur, ut in eis Dominus sedeat, et per eos sua judicia decernat. Unde et ei canitur: « Sedes super thronum, qui judicas justitiam (*Psal. ix*). » Throni quippe dignitate loci superioris excedunt, ut sex alios angelorum ordines subter se relinquunt. In quibus statim post thronos sunt dominationes, id est illi spiritus, qui in superni regis curia sunt nobilissimi, et subjectis quibusque dominantur, ac possident eos ut domini. Principatus etiam vocantur, qui ipsis quoque bonis angelorum spiritibus præsumt. Qui subjectis suis, dum quæcunque sunt agenda, disponunt eos ad explenda divina ministeria, principantur. Dominationes tamen potentiam principatuum alta dissimilitudine mirabiliter transcendunt. Nam principari, est inter reliquos priorem existere. Dominari vero est, etiam subjectos quosque possidere. Potestates autem, juxta Dionysium, et ipsæ dignioris potentiæ, quam principatus esse creduntur, ut subjectis ordinibus cæterorum potenter præsent, et ad divinam contemplationem super se potenter extendantur. Vel juxta beatum Gregorium, potestates vocantur hi, qui hoc potentius cæteris in suo ordine perceperunt, ut eorum ditioni subjectæ sint potestates adversæ, quorum potestate refrenantur, ne corda hominum tantum tentare prævaleant quantum volunt. Et cuncta hæc invisibilia cœlestium atque præcellentium spirituum agmina, in Christo sunt creata, ut per hæc ostendatur esse non minor Patre. Nec solum angelici spiritus, sed omnia prorsus quæcunque sunt vel fuerunt, creata sunt a Patre per ipsam, sicut et evangelista testatur, quia « omnia per ipsum facta sunt, et sine ipso factum esse nihil (*Joan. 1*), » id est nulla creatura. Et in ipso facta sunt omnia, sicut et Psalmistam cecinisse præmisimus: « Omnia in sa-

pientia fecisti (*Psal.* ciii). » *Per ipsum*, id est per virtutem ejus omnipotentiam, et in ipso, id est intra signum immensae magnitudinis sapientiae ejus creata sunt omnia, et secundum formam servi ipse est ante omnes, id est omnibus praelatus, quia nullus est ei aequalis, etiam secundum quod ipse est homo, et secundum formam Dei omnia in ipso constant, quia sicut omnia creavit, sic omnia continet et regit. Omnia in ipso constant, quia secundum immensitatem incircumscriptionis et incomprehensae divinitatis ejus, omnia sunt intra ipsum; et ne in nihilum redeant, per eum consistunt, et secundum formam servi ipse est caput corporis sui, scilicet Ecclesiae, quia unius naturae sunt caput et corpus. Ecclesiae caput est homo ille, cujus susceptione et verbo caro factum est, et habitavit in nobis (*Joan.* i); » membra vero caetera sunt omnes sancti, quibus perditur et completur Ecclesia. Sicut ergo anima totum corpus nostrum animat et vivificat, licet in capite sentit et vivendo et audiendo et odorando et gustando et tangendo, in caeteris autem membris tangendo tantum; et ideo capiti cuncta subsunt ad operandum, illud autem supra collocatum est ad consulendum, quia ipsius animae quae consulit corpori, quodam modo personam sustinet caput. Ibi enim omnis sensus apparet; sic universo populo sanctorum tanquam uni corpori, et caput est mediator Dei et hominum homo Christus Jesus (*I Tim.* ii), » quod Dei sapientia non sic assumpsit ut caeteri, sed multo excellentius multoque sublimius, quomodo illum solum assumi oportuit, in quo sapientia hominibus appareret, sicut eam visibiliter decebat ostendi, qui et ipsius sapientiae personam gereret, per quam caeteri fiunt sapientes. Ipse igitur est caput, caeteri vero membra, quia in ipso sunt omnia bona, sicut in capite omnes sensus; in caeteris vero quaedam partes honorum distributae sunt, juxta mensuram uniuscujusque membri. Et ipse universa membra regit, omnia vero membra illi adherent. Qui et secundum formam Dei est principium, quia ipse est Dei sapientia, quae permanens in se, sicut scriptum est (*Sap.* vii), innovat omnia. Principium enim quodammodo semper incipit et nunquam deficit, sicut Filius aeternam de Patre nativitatem habet. Vel sicut ipse dixit in Apocalypsi Joannis: « Principium est creaturae Dei (*Apoc.* iii), » quoniam omnis creatura ab illo habet esse. Vel omnium virtutum omniumque bonorum est nobis principium, quia nemo quidquam boni habere valet, nisi ab ipso acceperit, ideoque et caput jure vocatur. Et secundum formam servi est ipse primogenitus ex mortuis, quia primus resurrexit, non ultra moriturus (*Rom.* vi). Ipsa enim resurrectio mortuorum, est quaedam generatio, sicut scriptum est: « In regeneratione cum sederit Filius hominis (*Matth.* xix), » etc. Reliqui ergo mortui adhuc tenentur in matris utero, id est in sinu terrae clausi jacent in monumentis, hic autem jam ex utero matris processit, id est veniens de tumulo surrexit quasi gigas non ultra moriturus, sed in aeternum cum

A Patre regnaturus in caelestibus. Ideoque primo genitus ex mortuis, vel primogenitus mortuorum, id est ad immortalitatem genitus per resurrectionem. Et hoc idcirco, ut ipse sit in omnibus tenens primatum, id est dominium, quia potest et alios suscitare. Sicut enim primus omnium resurrexit, unde et ipse primitiae dormientium appellatur (*I Cor.* xv), sic in omnibus sanctis tam prioribus quam sequentibus, tenet ipse primatum dignitatis et potentiae, ac sanctitatis. Vel in omnibus dignitatibus tenet ipse primatum, quia sicut primus surrexit, ita primus caelos ascendit, et primus faciem Dei vidit, et in universis dignitatibus omnes praecellit. Et recte primatum habet, non solum quia est primogenitus, sed etiam quia complacuit Trinitati, quod in ipso omnis plenitudo scientiae et virtutum non modo esset, sed habitaret. Quia et complacuit, id est Patri simul cum Verbo et Spiritu sancto placuit, inhabitare, id est permanere in ipso omnem plenitudinem, id est omni modo perfectam abundantiam divinitatis, et omnium (*Joan.* i) gratiarum atque virtutum, omniumque bonorum. Hoc complacuit Deo, ut tanta bonorum plenitudo maneret in illo homine, cui non ad mensuram dedit Spiritum, sicut caeteris sanctis dare consuevit. Et placuit Deo per eum reconciliare sibi omnia humana in ipso posita, id est Judaeos et gentes in fide illius constitutos, qui prius abinvicem, et a Deo discordabant. Hoc Deus, ut dictum est, voluit, ipse dico, pacificans adinvicem non per legis sacrificia, sed per sanguinem crucis ejus, id est per sanguinem ejus in cruce fustum, sive ea quae sunt in caelis, sive quae sunt in terris, id est angelos et homines. Qua enim hora sanguis redemptionis exivit de latere Domini in cruce pendens, dimissum est peccatum Adae humano generi, et pacificata sunt caelestia et terrestria, quia tunc patuit hominibus introitus in regnum caelorum. Magna enim discordia separabat homines et angelos, quia nemo tam sanctus erat, ut in consortium angelorum susciperetur, sed omnes ad infernum propter culpam primi hominis descendebant. Morte autem Christi pax tanta inter homines et angelos effecta est, ut nunc animae justorum cum de corporibus exeunt, mox penetrent caelos gaudentibus angelis. Vel pacificata sunt Deo per Christi sanguinem, sive ea quae sunt in caelis, id est animae sanctorum, quae jam sunt in regno caelorum, et olim discordabant a Deo vel per suam, vel protoparentis culpam; sive ea quae sunt in terris, id est electi qui adhuc peregrinantur in exsilio vitae praesentis.

« Et vos cum essetis aliquando alienati et inimici et sensu in operibus malis, nunc autem reconciliavit et in corpore carnis ejus per mortem exhibere vos et sanctos et immaculatos et irreprehensibiles coram ipso; si tamen permanetis in fide fundati et stabiles, et immobiles a spe Evangelii, quod audistis, quod praedicatum est in universa creatura quae sub caelo est cujus factus sum ego Paulus et minister, qui nunc gaudeo in passionibus pro vo-

• bis ; et adimpleo ea, quæ desunt passionum Christi in carne mea pro corpore ejus, quod est Ecclesia, cujus factus sum ego minister secundum dispensationem Dei, quæ data est mihi in vobis, ut impleam verbum Dei, mysterium quod absconditum fuit a sæculis, et a generationibus ; nunc autem manifestatum est sanctis ejus quibus voluit Deus notas facere divitiarum sacramenti hujus in gentibus, quod est Christus in vobis spes gloriæ. Quem nos annuntiamus, corripientes omnem hominem, et docentes omnem hominem in omni sapientia, ut exhibeamus omnem hominem perfectum in Christo Jesu ; in quo et laboro, certo secundo operationem ejus, quam operatur in me in virtute. »

Dixerat generaliter omnia reconciliata, et nunc dicit specialiter illos reconciliatos, non per sua merita, nec per carnales observantias, sed per Christum, ut magis studeant subijci dominio tanti regis, et non sint ingrati tantis beneficiis. Placuit, inquit, Deo per Christum reconciliare sibi omnia ; et vos etiam, o Colossenses, reconciliare sibi per eundem voluit, cum aliquando, id est ante fidem essetis alienati ab eo, id est nihil cum eo habentes, dum diis alienis adhæreretis, et inimici ejus non natura, sed sensu, quia per hoc quod ei contraria sentiebatis, putantes idola deos esse, et amantes quæ ipse odit, inimici ejus eratis, permanentes in operibus malis. Nam olim quidem tales fuistis, sed nunc, id est in hoc tempore, gratiæ reconciliavit vos Deus in corpore carnis ejus, id est in corpore Christi, quod est caro. Corpus enim carnis dictum est, ad distinctionem cæterorum corporum, quæ non sunt caro. In corpore carnis Christi per mortem ejus reconciliavit vos sibi Deus exhibere, id est ut exhiberet vos sanctos in virtutibus, et immaculatos a peccatorum sordibus, et irreprehensibiles, ut nihil mali in vobis appareat coram ipso qui videt omnia. Quod in hac vita fieri non potest, sed in alia fiet, quando sancti jam nihil maculæ, nihilque reprehensionis habentes, coram suo Creatore permanentes, videbunt faciem ejus in æternum. Tales vos exhibebit ipse coram se, id est præsentabit et offeret ante conspectum gloriæ suæ atque præsentiam ; tamen hac conditione, si permanetis in fide. Aliter enim non potestis ad hanc gloriam pervenire. Sed tunc pervenietis ad hanc, si nunc in fide quam didicistis, permanseritis fundati, id est alta radice firmati, et non titubantes, et stabiles, id est ut neque cadatis, neque cedatis, id est ut neque fraudulentis locutionibus pseudoapostolorum seducamini, neque persecutionibus gentilium a constantia fidei recedatis ; et si permanseritis immobiles a spe Evangelii, id est si perduraveritis in bonis operibus ita firmi, ut nihil vos movere possit a spe retributionis æternæ, quam promittit Evangelium ; quod audistis a doctoribus vestris, ideoque illud tenere debetis, quia melius esset non cognovisse viam justitiæ quam post cognitionem retrorsum converti (II Petr. II). Quod Evangelium non ad vos solum-

A modo pervenit, ne inde superbiatis, vel vos solos per ipsum delusos putetis, sed prædicatum est in universa creatura quæ sub cælo est, sicut Dominus iusserat : « Euntes in mundum universum, prædicatè Evangelium omni creaturæ (Marc. XVI). » Potest enim omnis creaturæ nomine omnis natio gentium designari, quæ est sub cælo in universo orbe. Non est enim ulla natio gentium, in qua prædicatum non sit Evangelium. Vel omnis creaturæ nomine signatur homo, qui habet commune esse cum lapidibus, vivere cum arboribus, sentire cum animalibus, intelligere cum angelis. Si igitur commune habet aliquid cum omni creatura homo, juxta aliquid omnis creatura homo. Sic namque omnis creaturæ Evangelium invenitur in solo homine. Universæ ergo creaturæ prædicatur Evangelium, cum soli homini prædicatur, quia videlicet ille docetur, propter quem universa in terra creata sunt, et a quo universa per quamdam similitudinem aliena sunt. Vel universa creatura, est universa Ecclesia per novam gratiam spiritaliter creata, secundum illud. « Cor mundum crea in me, Deus (Psal. I), » etc. Ipsius sumus factura, creati in Christo Jesu, in operibus bonis (Ephes. II). Quæ scilicet creatura est sub cælo, id est adhuc peregrinatur in hac valle lacrymarum, sed tandem sublevaritur in cælum. Dicitur enim, quia Evangelium prædicatum est in universa creatura quæ sub cælo est. Ac si dicatur : Hoc Evangelium et hanc fidem atque spem evangelicam tenere debetis, quia sic tenet universus mundus fidelium. Quod Evangelium et Apostolus auctoritate sua commendat, subdendo : Cujus scilicet Evangelii, factus sum minister, id est ministrator et prædicator, ego Paulus, qui tantæ famæ tantæque sum auctoritatis. Et etiam potestis scire quia verum est, atque firmiter illud debetis retinere et illi obedire. Factus sum ejus minister, qui nunc pro ejus annuntiatione constrictus vinculis et Romæ retentus, gaudeo in passionibus, quia inde proficiunt credentes. Gaudeo inquam, in passionibus pro vobis confirmandis in veritate Evangelii ; et adimpleo ea, quæ desunt passionum Christi in carne mea, id est ea quæ Christus in carne sua minus pertulit, ego in carne mea perfero pro multiplicando corpore ejus, quod est Ecclesia. Passiones enim Christi non sunt in solo Christo, imo passiones Christi non sunt nisi in Christo. Si enim Christum intelligamus caput et corpus, passiones Christi non sunt nisi in Christo. Si autem Christum intelligamus solum caput, passiones Christi non sunt in solo Christo. Nam Apostolus : Adimpleo, inquit, ea quæ desunt passionum, non mearum, sed Christi ; in carne non jam Christi, sed mea. Patitur, inquit, Christus adhuc passiones, non in carne sua in qua ascendit in cælum, sed in carne mea, quæ adhuc laborat in terra. Quisquis ergo es in membris Christi, quidquid pateris ab eis, qui non sunt in membris Christi, deerat passionibus Christi. Ideo additur, quia deerat, mensuram adimplens, non superfundens. Tantum pateris, quantum ex passionibus

tuis inferendum erat *universæ* passioni Christi, qui passus est in capite nostro, et patitur in membris suis, id est in nobis ipsis. Ad *communem* hanc quasi rempublicam nostram, quisque pro modulo nostro exsolvimus quod debemus, et passione virium nostrarum quasi canonem passionum nostrarum inferimus. Partitio plenaria non erit passionum omnium, nisi cum sæculum finitum fuerit. *Adimpleo*, inquit, *eu quæ desunt*. Cui desunt? Passionibus Christi. Et ubi desunt? *In carne mea*. Nam in carne Christi quam virgo peperit, nihil passionum deest, sed omnes in illa passionibus sunt impletæ; sed adhuc restat pars passionum ejus in mea carne, quas quotidie tolero pro universali corpore ejus, quod est Ecclesia. Si enim ab eruditione fidelium cessarem has passionibus ab infidelibus non sustinerem. Sed quia semper Ecclesiæ studeo prodesse, semper adversa cogor tolerare. *Cujus Ecclesiæ factus sum ego minister*, id est officium accepi ut ei verbum vitæ ministrem; et hoc non dispositione hominum, vel usurpatione mea sive merito meo, sed *secundum dispensationem Dei*, id est secundum quod mihi Dei gratia ordinavit. Vel factus sum minister Ecclesiæ secundum dispensationem Dei, id est ut ei dispensem cibaria Domini mei. *Quæ dispensatio data est mihi in vobis*, quia tantumdem valet quod per meos discipulos cibum vitæ vobis dispensavi, quantum si per me id fecissem. Vel in vobis, quia in cunctis gentibus est mihi data, et vos estis gentes. Idcirco data est mihi, *ut impleam verbum Dei*, id est impleam quod Deus præordinavit de vobis, et quod in secreto consilii sui locutus est ante sæcula de salute vestra, ne putetis salutem gentibus non fuisse promissam. Nam in secreto sapientiæ suæ, vel in prophetis locutus est bona de vobis. Et hoc verbum implere studeo, dum vos ad promissam salutem festinare moneo. Vel impleo verbum Dei, id est verbum prædicationis, quod Christus annuntiare per seipsum cœpit; id adimpleo per ministerium meæ prædicationis, quia in doctrina mea perficitur quidquid minus in Scripturis sanctis dictum fuerat, id est omnis perfectio justitiæ et sapientiæ quam mortales adipisci valent, completur in mea prædicatione. Adimpleo verbum, id est *mysterium*; hoc est secretum occultum redemptionis humanæ per incarnationem ac mortem Filii Dei, per quam gentes illuminatæ sunt, et credentibus Judæis sociatæ et cœquatæ, cæteri vero Judæi exæcati. *Quod mysterium fuit hominibus absconditum a sæculis*, id est ex quo sæcula esse cœperunt, hoc est dies succedere nocti, noxque diei, *et generationibus*, id est ex quo generationi generatio successit usque ad adventum Domini. Absconditum fuit omnibus tam longo mundi spatio, nisi paucis quibus per Spiritum sanctum Deus hoc revelavit (*Luc. x; Matth. xi*). Nam, etsi nonnulli philosophorum de divinitate Filii Dei multa recte dixerunt, nihil tamen de incarnatione et morte ejus, ac nostra per eam redemptione cognoverunt. Abscondit enim Deus hoc a sapientibus et prudentibus, et revelavit ea parvulis.

Olim quidem fuit absconditum; sed *nunc* tempore gratiæ *manifestatum est* non cunctis hominibus, sed *sanctis ejus*; nec his omnibus, sed *quibus voluit Deus ex sola gratia notas facere*, id est notificare *divitias gloriæ sacramenti hujus in gentibus*, in quo sunt multa, fides, remissio, justificatio, conjunctio Judæorum et gentilium, dona Spiritus sancti, futura beatitudo, et propterea dixi divitias. *Quod sacramentum est Christus in vobis gentibus*, id est Christi incarnatio, passio et resurrectio, per quas facta est humani generis reparatio, et Judæorum atque gentilium cœquatio, quod nequivit facere carnalis observantia legis. Christus dico, existens in vobis *spes gloriæ*, id est per eum qui in cordibus vestris habitat, speratis gloriam sempiternam sine carnalibus legis operibus. *Quem*, id est qualem nos eum cunctis *annuntiamus*, quod scilicet gentes sperant per eum, et consequentur gloriam sine lege. Hunc prædicamus, qui gentibus in se credentibus est spes gloriæ, et salus æterna, nos *corripientes*, id est increpantes et castigantes, non solummodo vos, sed etiam *omnem hominem* qui deviat a tramite fidei, vel rectæ agnitionis. *Omnem hominem*, id est tam Judæum quam gentilem, tam nobilem quam ignobilem, tam divitem quam pauperem, tam liberum quam servum, tam marem quam feminam, sumus *corripientes*; et *docentes omnem hominem* qui ignorat, docentes, inquam, eum *in omni sapientia*, quæ laudatur in Scripturis sanctis, per quam Deus agnoscitur et colitur. Quod ideo facimus, *ut exhibeamus*, id est præparemus atque reddamus *omnem hominem perfectum* fide et moribus *in Christo Jesu*, non in lege; nihil enim ad perfectum adduxit lex (*Hebr. vii*). Hoc loco declarantur tres gradus actionis, quos magnus Dionysius esse testatur non solum in ecclesiastica, sed etiam in angelica hierarchia, id est sacro principatu, scilicet purgatio et illuminatio et perfectio. Purgatio in his qui corripuntur, illuminatio in his qui docentur, et perfectio in his qui perfecti exhibentur. Homines enim purgantur a peccatis et errore, et illuminantur doctrina sapientiæ, ac perficiuntur sublimiori virtutum et sapientiæ assecutione. Angeli quoque purgantur ab ignorantia, et illuminantur divina scientia, et perficiuntur majori cognitione ejusdem scientiæ. Hos ergo gradus hierarchiæ, id est sacerdotalis actionis insinuans Apostolus, dicit de se, suisque sociis, quia Christum annuntiamus, corripientes omnem hominem, qui scilicet correptione indiget pro qualunque culpa, et docentes in omni sapientia divinorum omnem hominem qui jam correptus est, et ab errore vel peccatis purgatus. Non enim prius tradenda est homini doctrina sapientiæ, quam vas cordis ejus purgatum sit ad susceptionem illius. Ideo sic corripimus, ac deinde docemus, ut exhibeamus, id est faciamus omnem hominem qui correptus et doctus fuerit, perfectum in Christo, id est in Christiana religione. Vel in cœlesti patria exhibeamus, id est offeramus eum Deo tanquam sacrificium in

non frustra laboraverunt ut me adjuvarent, quia nomina eorum scripta sunt in libro vitæ, id est assignata tenentur ad vitam in memoria divinæ prædestinationis. Quis est enim liber vitæ, nisi memoria Dei, in qua sunt illi qui vivunt in æternum? (*Apoc. xx, xxii.*)

« Gaudete in Domino semper, iterum dico, gaudete (*I Cor. i, Jer. ix*). Modestia vestra nota sit omnibus hominibus. Dominus prope est. Nihil solliciti sitis, sed in omni oratione et obsecratione cum gratiarum actione petitiones vestræ innotescant apud Deum. Et pax Dei quæ exsuperat omnem sensum, custodiat corda vestra et intelligentias vestras in Christo Jesu. »

Lætatus in fide et operibus eorum Apostolus, ut alacres sint in his proficientes, monet gaudere in Domino, et id iterat, ut se in eis gaudere vere ostendat. *Gaudete*, inquit, id est cor vestrum exhilarate, et omne bonum unde gaudendum est, statuite vobis in Domino, non extra. Et hoc adeo necessarium vobis est, quod iterum dico gaudete, ut tristitia sæculi nullum in vobis locum inveniat, sed totos lætitia spiritualis vos repleat. Gaudete in Domino, et non per intervalla, ut modo gaudeatis, modo non gaudeatis, sed semper gaudeatis, sive in prosperis, sive in adversis. Et non semel dico, sed iterum ut gaudeatis, confirmans et inculcans repetita conmonitione gaudium. Gaudete, sed in Domino, non in sæculo. Sicut enim nemo potest duobus dominis servire (*Matth. vi; Luc. xvi*), sic nemo potest et in Domino et in sæculo gaudere. Contraria enim sunt hæc duo gaudia. Nam sæculi gaudium est impunita nequitia. Luxurientur homines, fornicentur in spectaculis, nudentur in ebriositate, ingurgitentur turpitudine, et ista mala non impediatur fames, non belli, non alicujus rei timor, non aliquis morbus, non aliqua adversitas, sed sint omnia redundantia in pace carnis, in securitate mentis, et videte sæculi gaudium. Et ideo non in sæculo gaudete, sed in Domino, id est non in iniquitate, sed in veritate; non in flore vanitatis, sed in spe æternitatis. In Domino sit gaudium vestræ mentis, sed homines videant modestiam vestræ conversationis, ut exemplo vestro discant modeste agere. Modestia quasi modus dicitur, quando modus servatur in omnibus. Modestia est in animo, continens moderationem cupiditatum. Modestia in operatione, modificans omnes actiones, similiter et in verbis. Hæc modestia tantum fulgeat in vobis, ut nota sit omnibus hominibus; fidelibus, ut imitentur; infidelibus, ne possint reprehendere. Modestiam morum servate, quia Dominus prope est, ut auxilietur vobis assidue nisi per socordiam vestram defeceritis. Etsi enim super omnes cælos ascendit corpore, non tamen recessit majestate. Ubique præsens est, qui fecit omnia. Dominus prope est, paratus dare quicquid opus est vobis in spiritualibus et corporalibus. Et ideo solli-

itudinem vani timoris abjicite, quia et in bonis operibus vestris aderit Dominus vobis adiutor, et in passionibus quas pro nomine ejus perferetis, nec alimenta vobis corpora denegabit. Nihil ergo, id est de nulla re solliciti et timidi sitis quasi de futuro, sed estote sine mundi sollicitudine, habentes promissa Dei præ oculis, et ab ipso petentes omnia. Non sitis, inquam, solliciti, sed petitiones vestras de his quæ vultis accipere, ita sint vehementes et instantes, ut innotescant apud Deum, id est perveniant ad Deum, hoc est acceptabiles sint Deo qui omnia novit, sed ea scire dicitur, quæ elegit et approbat. Vel vobis innotescant apud Deum per tolerantiam, non apud homines per jactantiam. Aut forte innotescant etiam angelis, qui sunt apud Deum, ut quodam modo offerant Deo, et de his consulant; et quod Deo jubente implendum esse cognoverunt, hoc vobis vel evidenter, vel latenter reportent. Petitiones dico factæ in omni oratione, id est in oratione quæ nihil de his quæ oranda sunt prætereat, sed omne quod expedit, orando petat a Deo; et obsecratione, quæ cum adjuratione sacrorum fiat, cum gratiarum actione, de acceptis beneficiis, quia qui vult alia impetrare, debet ex perceptis gratus esse. Vel secundum alios oratio est pro præteritis excessibus ac delictis, obsecratio autem pro adipiscendis futuris bonis, gratiarum actio pro collatis beneficiis, petitio vero de rebus nominatim necessariis. Et talibus quidem precum modis hortor vos ut insistatis, et Deum sine quo humanus labor inutilis est oro ut præstet effectum, scilicet ut pax Dei, qua in seipso pacatus est, et cujus participatione pacificantur angeli et homines, custodiat corda vestra, quæ exsuperat omnem sensum, id est omnem intellectum hominum et angelorum, quia pacem Dei, qua Deus ipse pacatus est, sicut Deus novit, nec nos, nec angeli nosse possumus. Sed quia et nos pro modo nostro pacis ejus participes facti sumus, summam in nobis atque inter nos et cum ipso pacem, quantum nostrum summum (324); hoc modo juxta suum modum sciunt eam sancti angeli, homines autem nunc longe infra scientiam istam sunt, quancumque propectu mentis excellent. « Videmus enim nunc per speculum in ænigmate (*I Cor. xii*). » Cum vero æquales angelis fuerimus, tunc (sicut illi) facie ad faciem, id est manifeste videbimus; tantamque pacem habebimus erga eos, quantum et ipsi erga nos, quia tantum dilecturi sumus, quantum ab eis diligimur. Itaque pax eorum nota nobis erit, quia nostra talis ac tanta erit, nec præcellet tunc intellectum nostrum. Dei vero pax, quæ est illis erga eos, et nostrum et eorum intellectum sine ulla dubitatione præcellit. Et ista pax Dei custodiat in Christo Jesu corda vestra, id est voluntates vestras, et intelligentias vestras, ut extra Christum nihil appetatis vel intelligatis. Contra illecebras sæculi custodiat corda, et contra fraudes pseudopredicatorum ca-

stodiat intellectus vestros. Corda custodiat contra adversa omnia, intelligentias contra errores.

« De cætero fratres, quæcunque sunt vera, quæcunque pudica, quæcunque justa; quæcunque bonæ sancta, quæcunque amabilia, quæcunque bonæ famæ, si qua virtus, si qua laus disciplinæ: hæc cogitate, quæ et didicistis, et accepistis, et audistis et vidistis in me: hæc agite, et Deus pacis erit vobiscum. »

In conclusione quæ ad perfectionem sunt, exponit Apostolus. Quasi dicat: Hartenus contra persecutores, et contra pseudoprædicatores vos monui, sed de cætero monendi generi, quod ad mores optimos pertinet, nunc breviter dicam; scilicet cogitate et agite *quæcunque sunt vera, et quæcunque sunt pudica*, ut nec in cogitatione, nec in actione falsum aliquid aut libidinosum admittatis, sed in omni sermone veridici, et mente et corpore pudici sitis, ne vel in aspectu vestro sit aliquid lasciviæ. Similiter *quæcunque justa, et quæcunque sancta*, cogitate et facite. Justa ad proximum, sancta in propria vita, id est erga proximum juste servanda; sancta, id est animas, et corpora sanctificantia. Qui semper cogitat et agit quæ justa sunt, nec Deo, nec homini facere potest injuriam. Et qui sancta cogitat et facit assidue, nulla potest macula sordidari; *quæcunque amabilia* cogitate et facite, id est studeate ut dicta et facta vestra in bono placeant hominibus, quatenus per hoc ad imitationem vestram eos alliciatis sicque Deo jungatis, *quæcunque bonæ famæ* sunt ea similiter cogitate et facite, ne de vobis habeatur mala opinio, sed bona, ut prosit aliis. Sanctorum enim conversatio etiam causa debet esse, ne forte cum mala vita non sit per lasciviam, mala sit fama per negligentiam. Nec audiendi sunt, qui quando reprehensi in aliqua negligentia sua, per quam fit ut in malam veniant suspicionem, unde suam vitam longe abesse sciunt, dicunt sibi coram Deo sufficere conscientiam, existimationem hominum non solum imprudenter, sed etiam crudeliter contemnentes, cum occidunt animas aliorum, sive blasphemantium vitam Dei, quibus secundum suam suspicionem, quasi turpis quæ casta est, displicet vita sanctorum, sive etiam cum excusatione imitantium, non quod vident, sed quod putant. Proinde quisquis a criminibus flagitiorum atque facinorum vitam suam custodit, sibi bene facit; quisquis autem famam et in alios misericors est. Nobis enim necessaria est vita nostra, aliis fama nostra. Et utique etiam quod aliis ministramus misericorditer ad salutem, ad nostram quoque redundat utilitatem. Si qua virtus est, hanc sectamini, si qua laus disciplinæ, hanc habete, virtus sit in vobis, et post sequatur laus, ut homines qui virtutem vestram laudabunt, proficiant. Vel cogitate et facite ea quæ sunt bonæ famæ si qua virtus est in eis, vel si qua laus disciplinæ Christianæ. Non enim curanda est bona fama de viribus vel scientia vel aliis sæcularibus; hoc, inquam, cogitate, id est in memoria versate, quæ omnia et didicistis,

A me docente, et accepistis ut digna teneri, quia vobis accepta et grata fuerunt postquam ea didicistis, et audistis ea in me esse, et vidistis. Hæc agite, id est non tantum cogitate, sed et actu implete; et tunc Deus dator pacis, erit vobiscum, adjuvans vos hæc facere. Qui enim sic vixerit, non solum cum Deo pacem habebit, sed et ab omnibus fere hominibus amabitur.

« Gavisus sum autem in Domino vehementer, quoniam tandem aliquando refluistis pro me sentire, sicut et sentiebatis, occupati autem eratis. Non quasi propter penuriam dico. Ego enim didici in quibus sum sufficiens esse. Scio et humiliari, scio et abundare. Ubique et in omnibus institutus sum, et satiari, et esurire, et abundare, et penuriam pati. Omnia possum in eo, qui me confortat. Verumtamen bene fecistis communitantes tribulationi meæ. »

Bona acta eorum memorat, et gratias agit, ut incitet eos ad talia ferventius agenda, quasi dicens: Ego vos ad futura religionis studia moneo, sed de præteritis beneficiorum vestrorum studiis gaudeo, et gavisus sum vehementer, non in dono quod promisistis, sed in Domino, qui vobis inspiravit hanc charitatem, et redditurus est remunerationem, quoniam tandem, id est post multa tempora, aliquando, id est aliquo tempore, quia non omnia potuistis, refluistis, id est pristinum largitatis florem resumpsistis, ut aliqua daretis mihi, sicut olim dare solebatis. Largitio enim est flos, quia inde fructus æternæ vitæ procedit. Et ab hoc flore quadam sterilitate marcueratis, ac velut hiemis frigore torpueratis. Sed nunc velut austro flante sancto Spiritu, ver ad corda vestra rediit, et refluistis velut bonæ arbores. Refluistis sentire pro me, id est compati mihi pro me, quia mihi prodest vestra compassio. Sentire pro me, id est ut sentiretis quod me pungebat sicut et prius sentiebatis ministrantes mihi. Nec aliqua mala causa hoc intermisistis, sed occupati eratis et impediti aliquibus adversis vel actionibus. Imprudenter delinquentes Galatæ aperte increpat superius, dicens: « O insensati Galatæ, quis vos fascinavit? (Galat. iii.) » Nunc vero culpas istorum verecundantium quasi compatiens reprehendit, ut et illorum culpas increpatio detegeret, et horum negligentiam sermo mollior velaret. Similiter unusquisque rector Ecclesiæ juxta modum culpæ debet unumquemque rationabili discretione increpare. Gavisus sum et refluistis. Non quasi propter penuriam hoc dico, id est non dico me gavisum esse quasi propter penuriam meam, quem consolati es is, quia non propter angustiam meam quæ relaxata est, sed propter affectum vestrum gaudeo. Vel non dico ista quas: propter penuriam meam adhuc relevandam, ut per hæc dicta vos invitare studeam ut iterum suppleatis inopiam meam. Ego enim didici et a Deo et ab usu quotidiano esse sufficiens, id est contentum rebus in quibus sum sive parvis, sive magnis. Nam et humiliari paupertate scio, quia non

ne. *Quia in ipso inhabitat non quædam pars celestis gratiæ, sicut in cæteris sanctis, sed omnis plenitudo divinitatis non umbratiliter, sicut in templo Salomonis, sed corporaliter, id est solide ac veraciter. Non enim ideo corporaliter [al. corporeus] quod corporalis sit Deus; sed aut verbo translato usus est Apostolus, tanquam in templo manu facto non corporaliter, sed umbratiliter habitaverit, id est præfigurantibus signis, nam omnes illas observationes umbras futurorum vocat (Hebr. x), etiam ipso translato vocabulo; summus enim Deus, sicut scriptum est (Act. vii), non in manu factis templis habitat aut certe corporaliter dictum est, quia in Christi corpore quod assumpsit ex virgine, tanquam in templo habitat Deus. Unde Judæis ait de templo corporis sui, « Solvite templum hoc, et in triduo excitabo illud (Joan. ii). » Quamvis igitur in quolibet præcipuo membro velut in aliquo magno propheta vel apostolo divinitas inhabitet, non tamen sicut in capite quod est Christus omnis plenitudo divinitatis. Deus enim qui ubique præsens est, et ubique totus præsens, non ubique habitat, sed in templo suo, cui per gratiam benignus est et propitius. Captur autem habitans ab aliis amplius, et ab aliis minus. In Christo enim, qui est caput omnium justorum, habitat omnis plenitudo divinitatis, cæteris vero secundum mensuram distribuitur gratia. Nam et in nostro corpore inest sensus singulis membris, sed non tantus quantus in capite, ubi prorsus omnis est quinquepartitus. Ibi enim visus est et auditus et olfactus et gustus et tactus, in cæteris autem solus est tactus. Et etiam præter hoc, quod tanquam in templo in illo corpore habitat omnis plenitudo divinitatis, est aliud quo interest inter illud caput et cujuslibet membri excellentiam, quia de nullo sanctorum potest dici: « Verbum caro factum est (Joan. i), » nec quisquam eorum qualibet præsentia gratiæ unigeniti nomen accipit. Itaque in Christo habitat omnis plenitudo divinitatis corporaliter, id est veraciter. Neque enim divinitatis corpus est. Sed quia in sacramenta Veteris Testamenti vocat Apostolus umbras, ut præmisimus, futurorum, propter umbrarum comparisonem, corporaliter dixit habitare in Christo plenitudinem divinitatis (Hebr. x), quod illo impleantur omnia, quæ illis umbris figurata sunt, et sit quodammodo umbrarum illarum ipse corpus, id est figurarum et significationum ipsarum ille sit veritas. Qui vero dicit carnales observantias adhuc necessarias, dicit Christum non esse corpus umbrarum, nec Deum ad omnia sufficientem. In Christo quidem manet omnis plenitudo divinitatis corporaliter, et vos estis in illo repleti gratia divinitatis, per quam virtutibus et sanctis operibus abundetis. Nec mirum si in vos per eum transfunditur divina gratia, qui tantæ excellentiæ est, ut sit caput omnis principatus et potestatis. Neque enim est ullus principatus aut ulla potestas in cælo sive in terra, qui ab hoc capite*

A non descendat, et huic capiti subdatur, atque ab hoc capite regatur.

« In quo et circumeisi estis circumcissione non manufacta in exspoliatione corporis carnis, sed in circumcissione Jesu Christi, consepulti ei in baptismo, in quo et resurrexistis per fidem operationis Dei, qui suscitavit illum a mortuis, et vos cum mortui essetis in delictis et præputio carnis vestræ (Ephes. ii), convivicavit cum illo, donans vobis omnia delicta, delens quod adversum nos erat chirographum decreti, quod erat contrarium nobis, et ipsum tulit de medio, affigens illud cruci, et exspolians principatus et potestates, tradidit confidenter, palam triumphans illos in semetipso.»

B Modo latenter ingreditur Apostolus ostendere observantias legis esse superfluas, et solam Christi fidem sufficere ad salutem. Vos, inquit, estis in Christo, spiritualibus bonis repleti, in quo et circumeisi estis. Resurrectio enim Christi, quæ facta est tertio quidem a die passionis, sed octavo in diebus hebdomadis, ipsa vos circumcidit. Resurrexit enim Christus, abstulit vobis desideria carnalia, abstulit concupiscentias malas, abstulit superfluum cum quo nati eratis, et multo pejus quod male vivendo addideratis. Circumeisi in Christo estis circumcissione non manu hominis carnaliter facta in exspoliatione corporis carnis, id est in ablatione superflue cutis, sed in circumcissione Jesu Christi, quæ non carnem amputat, sed vitia. Non enim duas res intelligi voluit, quasi et aliud sit caro, et aliud corpus carnis; sed quia corpus multarum rerum nomen est, quarum nulla caro est (nam multa sunt, excepta carne, corpora cælestia et corpora terrestria) corpus carnis, dixit corpus quod caro est, sicut alibi spiritum mentis, eum spiritum qui mens est. Circumeisi, inquit, estis circumcissione, quæ non est manu, id est opere humano facta in exspoliatione carnis corporis, id est in amputatione superflue carnis; sed est facta divinitus in circumcissione Jesu Christi, id est in resecatione carnalium vitiorum et concupiscentiarum. Circumcisio enim Christi quæ octavo die facta est, significavit nos per fidem resurrectionis ejus ab omni superfluitate vitiorum fuisse spoliandos, et in octava ætate sæculi per resurrectionem corporum ab omni labe mortalitatis et corruptionis exuendos. Circumeisi estis spiritaliter circumcissione Christi (Luc. ii), consepulti ei in baptismo. Hæc est enim in vobis circumcisio Christi, vitii scilicet vos esse mortificatos, ut sepulturæ ejus in baptismo participes facti, resurrectionis quoque ipsius incorruptibilitate morum et novæ conversationis sitis participes. Trina enim mersio baptismi, imago est triduanæ sepulturæ Domini, ut quisquis in aquam velut in sepulcrum deponitur, mortuus sit omnino peccatis, ut possit resurgere virtutibus. In quo scilicet Christo, et resurrexistis a morte animæ post sepulturam baptismi per fidem, qua credidistis eum resurrexisse, et vos per eum resurrecturos. Resurrexistis, inquam, per fidem operationis Dei, id est per hoc

quod credidistis operationem quam Deus fecit in eo, **A** qui suscitavit illum a mortuis, et vos convitificavit atque conresuscitavit, cum illo, cum essetis spiritaliter mortui in delictis, quæ commiseratis delinquendo bonum, et præputio carnis vestræ, id est carnali immunditia ad quam lapsi fueratis. Præputium enim hic vocatur illud, quod præputio significatur, hoc est peccata carnis. Cum ita essetis mortui, convitificavit vos Deus cum Christo, id est resuscitans Christum corporaliter, resuscitavit cum eo spiritaliter; donans, id est dimittens vobis omnia delicta tam originalia quam actualia, ipse delens chirographum decreti, quod erat adversum nos. Non solum enim vobis gentibus delicta donavit, sed et nobis Judæis prævaricationes quæ sunt ex lege dimisit. Et hoc est, delens chirographum, etc. Chirographum enim vocatur manualis scriptura, ad alicujus rei memoriam commendandam facta. Quod chirographum dividunt homines, inter quos res, unde sit chirographum, constituitur; et inde partem suam unusquisque reservat. Chirographum vero a Deo deletum fuit memoria peccatorum ex legis transgressione venientium, quæ non recedebat a mente Judæorum et malignorum spirituum. Delevit ergo chirographum decreti, id est memoriam transgressionis, quæ erat ex decreto, id est ex lege. Conscientia enim nostra et diabolus ad accusandum erat memoria illius transgressionis; et ita hæc memoria erat adversum nos, nocens nobis, et nos crucians. Sed hoc reatu per baptismum deleto, nec conscientia nostra jam timet, nec diabolus quod objiciat habet. Quod decretum erat nobis contrarium, id est rectitudo justitiæ quæ decreta fuerat in lege, erat contraria pravitati nostrarum prævaricationum; sed per auxilium novæ gratiæ concordavimus adversario nostro, id est legi divinæ, obtemperantes præceptis ejus, sicut ait Dominus: Esto consentiens adversario tuo cito, dum es cum illo in via, id est esto concors et obediens sermoni præceptorum cælestium, qui tuis pravitatibus adversatur, cito dum es cum illo in itinere præsentis vitæ. Vel chirographum, id est manu scriptum, erat perpetratio prævaricationis Adæ. Quod erat adversum nos, id est adversabatur salutis nostræ, et intercludebat nobis ingressum cælestis patriæ. Decretum vero quod erat contrarium nobis, ipsa fuit sententia damnationis nostræ, quæ erat **D** cunctis hominibus adversa. Sed delevit Deus hoc chirographum, id est veteris culpæ cautionem, qua nos diabolus debitores mortis tenebat, ideo chirographum ipsum erat decreti, id est decretæ damnationis nostræ, qua decretum erat ut juste teneremur sub hoste captivi, cui nos sponte subdideramus ad consensum iniquitatis. Vel decretum Dei fuit: « De ligno scientiæ boni et mali ne comedas (Gen. ii). » Hujus decreti violati chirographum, id est memoriam delevit Deus, quando peccatum primi parentis per sanguinem Christi abluit, et quasi oblivioni tradidit, et ipsum tulit de medio. Erat enim hoc peccatum inter Deum et nos, separans nos a Deo: sed

Deus tulit ipsum de medio, ut possimus adhærere Deo. Ipsum tulit de medio, affigens illud cruci, ut sicut a ligno cæperat, ita in ligno finiretur. Crucifixo enim innocente Christo, interemptum est peccatum Adæ. Vel si decretum intelligimus legem Moysi, ipsum Deus tulit de medio Judæorum et gentilium, ne per legem amplius separarentur, sed in Christo fierent unus populus, affigens illud cruci, ut jam cesset, postquam omnia sacrificia in oblatione veri Agni sunt impleta; sicut nos a lege et a legis prævaricatione liberavit, sic et patres antiquos ab inferis eripuit, ne quis putet eos per legem salvatos, et hoc est quod de Filio subditur, cum de Patre ageretur, quoniam inseparabilia sunt opera Patris et Filii, **B** *exspolians principatus et potestates, traduxit confidenter.* Exspoliavit enim principatus et potestates dæmonum, auferendo illis animas justorum, quas in inferno propter culpam primi parentis detinebant; et traduxit, id est trans infernum duxit ad regna cælorum ipsas ab inferis ereptas sanctorum animas; et hoc confidenter, id est cum magna fiducia fecit, non timens dæmones, utpote qui nullum habebat peccatum. Nec istud quod dicitur, *exspolians principatus et potestates, repugnat sententiæ qua dictum est, « qui est caput omnis potestatis, »* quia ibi est sermo de bonis principatibus ac potestatibus, hic autem de contrariis. Principatus enim vocantur illi nequam spiritus, qui principantur in vitiis suis, quæ specialiter suggerere consueverunt; sicut spiritus fornicationis, qui principantur **C** libidinis; et spiritus superbiæ, qui dominantur superbis. Potestates vero dicuntur illi spiritus, qui habent vim præcipitandi in majora peccata homines, quibus prævalent per internas eorum cupiditates. Ibi ergo vincuntur inimicæ nobis invisibiles potestates, ubi vincuntur invisibiles cupiditates. Et ideo si in nobis ipsis vincimus temporalium rerum cupiditates, necesse est ut in nobis ipsis vincamus et illum, qui per ipsas cupiditates regnat in homine. Spoliavit itaque Christus hos principatus et potestates, eripiens illis homines quibus dominabantur, dum per donum sancti Spiritus exstingueret sæculi cupiditates in cordibus ipsorum hominum, et traduxit easdem cupiditates vel principatus, id est ab **D** his qui ad fidem conversi sunt, expulit, sicut dixerat: « Nunc princeps hujus mundi ejicietur foras (Joan. xii), » et hoc fecit confidenter, sciens se justam habere causam, et palam, id est coram omni populo pendens in cruce, triumphavit, id est cum gloria vicit illos in semetipso, id est in passione proprii corporis, qui postea triumphaturus erat et in martyribus suis.

« Nemo ergo vos judicet in cibo aut in potu, aut in parte diei festi, aut neomeniæ, aut sabbatorum, quæ sunt umbra futurorum, corpus autem Christi. »

Et quidem circumcisi spiritualiter estis circumcissione Christi, per quem non egetis circumcissione carnali, ergo nullam aliam carnalem observantiam.

debetis legi, cum istam quæ major est accipere non debeatis, præsertim quia Deus chirographum decreti, id est legis, sicut supradictum est, tulit de medio utriusque plebis, affligens illud cruci, ut jam quasi mortuum cesset, et per triumphum Dominicæ passionis a potestate dæmonum liberati sumus, a qua eripi per legem non valebamus. Cum hæc ita sint, et a servitute legis per novæ gratiæ libertatem sitis erepti, igitur nemo, id est nullus pseudo vos *judicet*, id est judicabiles et reprehensibiles dicat *in cibo aut in potu*, id est in discretione ciborum et potuum quod alii sint assumendi, et alii respuendi, quia quos cibos Judæi vitant in peccatis, nos vitamus in moribus; et quos potus illi cavent in liquoribus, nos cavemus in voluntatis affectionibus. Nemo eorum qui magistros legis esse se jactant, vos *judicet in cibo vel in potu*, quod alii immundi sint, alii mundi, quoniam « omnia munda sunt mundis, coinquinatis autem nihil est mundum (Tit. 1); » *aut in parte diei festi*, ut alios dies festos putent, et alios non festos, quia nobis qui in Christum credimus resurgentem, jugis et æterna festivitas est, *aut in parte neomeniæ*, id est Kalendarum et mensis novi, quando decrescens luna finitur, et noctis umbris tegitur, quia Christianorum lumen est æternum, et semper solis justitiæ radiis illustratur; *aut in parte sabbatorum*, ut non faciant servitæ opus et onera non portant, quia nos Christi sumus libertate donati, et onera peccatorum gestare desinimus. *Νέον* Græce, *novum* dicitur Latine, *μην* luna. Neomenia, nova luna, et novæ lunæ observatio, novæ vitæ est sanctificatio. Sabbatum verum perpetuum observat, qui spe futuræ quietis sanctis est operibus intentus, nec in ipsis bonis actibus suis quasi de propriis et de his quæ non acceperit, gloriatur illum in se operari cognoscens, qui simul operatur et quietus est. Sabbatum enim quod interpretatur *requies*, significavit requiem, quam animæ sanctorum habent a vitis in præsentî vita, et quæ habituræ sunt corporibus exultæ donec resument corpora. *Quæ omnia sunt umbra futurorum (Hebr. x)*, quia nihil sub Veteri Testamento carnaliter observabatur, quod non præfiguraret aliquid spirituale futurum vel in hac Ecclesia, vel in ea quæ jam in cælis regnare cœpit; *corpus autem*, id est solida veritas hujus umbræ est *Christi*, id est pertinet ad Christum. Omnia illa sunt umbræ futurorum, in quibus Judæi juxta litteram hærent, et tenentur in terra; nos vero juxta spiritum transeamus ad Christum, qui ad distinctionem umbrarum nunc corpus appellatur. Quomodo enim in corpore veritas est, et in corporis umbra mendacium, sic in spiritali intelligentia mundus omnis cibus et potus, et tota festivitas, et perpetuæ Kalendæ, nec non, æterna requies expectanda est. Universa hæc loquitur Apostolus contra eos, qui credentes ex Judæis in Dominum Salvatorem, Judaicas cæremonias observare cupiebant, (Matth. xxiv. Marc. xiii; Luc. xxi) unde et adhuc subdit :

A « Nemo vos seducat, volens in humilitate, et religione angelorum, quæ non vidit, ambulans, frustra inflatus sensu suæ carnis, et non tenens caput ex quo totum corpus per nexus et conjunctiones subministratum et constructum, crescit in augmentum Dei. Si ergo mortui estis cum Christo ab elementis hujus mundi, quid adhuc tanquam viventes in mundo decernitis? Ne tetigeritis, neque gustaveritis, neque contrectaveritis quæ sunt omnia in interitum ipso usu, secundum præcepta et doctrinas hominum, quæ sunt rationem quidem habentia sapientiæ in superstitione et humilitate, et non ad parcendum corpori, non in honore aliquo ad saturitatem carnis.»

B Ipsi qui de circumcissione venerant, et se Christianos dicebant, judaizandi consuetudinem non deserebant, aliosque in errorem suum trahere satagebant. Ideo credentibus dicitur de illis. *Nemo vos seducat* vel superet, id est nemo vos veritate in errorem trahat, nemo vos in certamine disputationis fraudulenter vincat, ut bravium vobis supernæ remunerationis tollat, *volens ea quæ non vidit*, id est volens tenere vel suadere carnalia legis mandata, quæ nunquam intellexit *in humilitate litteræ et angelorum religione* atque cultura, ut non serviat spiritali intelligentiæ, sed exemplaribus futurorum. Humilitas enim hoc loco non est illa, quæ laudatur in Scripturis, sed illa, quæ deprimit sensum mentis in terrenam atque carnalem intelligentiam. Vere enim humilis sensus et miseranda suspicio est, Dominum credere hircorum atque taurorum sanguine delectari, et nidore thymiamatis, quem sæpe homines declinamus. Religio angelorum vocatur hoc loco cultura, quæ non Deo, sed malignis spiritibus exhibetur. Ex quo enim factum est quod Dominus ait : « Relinquetur domus vestra deserta (Luc. xxi; Matth. xxiii), » omnis judaicarum observationum cultura destructa est; quascunque offerunt victimas, non Deo offerunt, sed angelis refugis, id est spiritibus immundis. Vel in humilitate et religione angelorum, quia hujusmodi sectatores plerumque solent in seipsis humilitatem et religionem angelorum ostendere, ut citius credatur eis quasi sanctissimis. Angelos enim juxta hunc sensum vel cælestes spiritus, vel sanctos prædicatores intelligimus. Nemo ita religiosum se fingens, seducat vos, *ambulans frustra*, id est faciens in vacuum et sine utilitate quidquid facit, qui infideliter cuncta facit; *inflatus sensu carnis suæ*, id est carnaliter cuncta intelligens, et traditionum judaicarum deliramenta perquirens, atque ex earum notitia tumens et non tenens caput omnium Scripturarum atque scientiarum. id est Christum qui est Dei sapientia, et est caput ecclesiæ sanctorum; et quia non tenet Christum, qui est caput omnis sacræ intelligentiæ et caput omnium electorum, patet quia fatuus et reprobus est. *Ex quo capite totum corpus Ecclesiæ per nexus et conjunctiones subministratum et constructum, crescit in augmentum Dei.* Corpus quippe il-

lius nos omnes sumus. Per nexus et conjunctiones corpus ligatur, quia dum capiti pectus, dum pectori brachia, dum brachiis manus, dum digiti manibus sunt conjuncti, ac membra cætera membris inhærent, corpus omne perficitur. Sicut sancti apostoli, quia Redemptori nostro propinqui steterunt, ei quasi pectus capiti inhæserunt. Quos quia martyres sunt secuti, conjuncta brachia pectori fuerunt. Quibus dum pastores et doctores subuniti sunt per bona opera manus brachiis inhæserunt. Hoc vero omne corpus Redemptoris nostri quotidie per nexus et conjunctiones subministratur et constructur in cælo, quia dum ad eum illuc electæ animæ ducuntur, ei sua membra colligantur. De quo recte dicitur, subministratum et constructum crescit in augmentum Dei quia Deus omnipotens redemptor noster, qui in se in quo proficiat non habet, adhuc per membra sua quotidie augmentum habet. Sed quisquis adhuc carnaliter legem observandam prædicat, non tenet caput hujus corporis, quia fidem et gratiam ejus impugnat, et corpus ejus quod ita connexum est scindere quærit; et ideo subtiliter vobis cavendus est, ut inimicus Christi et Ecclesiæ, licet Christianum se fingat. Non solum enim vaniloquos et mentis seductores, fabulosa et vana garrientes, id est in eis vanitatibus velut altam scientiam promittentes contra regulam fidei, quam catholicam suscepistis, cavere debetis; sed etiam ipsos, qui de ipsa incommutabilitate divinæ naturæ, vel incorporeæ creatura sive creatore veraciter disputant; et quod dicunt, omnino documentis atque rationibus certissimis probant, et tamen ab uno Dei et hominum mediatore conantur avertere, tanquam pestem insidiosiore cæteris fugite. Quod autem sequitur, *si ergo mortui estis cum Christo ab elementis hujus mundi, quid adhuc tanquam viventis in mundo decernitis*, hunc sensum habere videtur: Si baptizati estis in Christo, et cum eo in baptisate mortui ab elementis mundi, cur necum non dicitis: « Mihi autem absit gloriari nisi in cruce Domini nostri Jesu Christi, per quem mihi mundus crucifixus est, et ego mundo (*Galat. vi*)? » nec auditis Dominum dicentem ad Patrem: « De mundo non sunt, sicut et ego non sum de mundo (*Joan. xvii*); » sed e contrario quasi viventis in mundo, decernitis: *Ne tetigeritis corpus hominis mortui, nec vestimentum aut scabellum in quo sedit mulier menstruata; neque gustaveritis carnem suillam, neque leporum, neque sepiarum, neque murenæ, neque anguillæ, neque universorum piscium qui squamas pinnulasve non habent neque contrectaveritis aliquid horum.* Illic loquitur Apostolus eis, qui jam servare legem carnaliter ex parte cœperant. Hucusque enim monuerat stantes, ne seducerentur; et nunc aggreditur eos, qui jam aliqua de lege servabant. Quasi dicat: Vos videte ne seducamini. Sed vos alii dicite cur legem servatis. *Si mortui estis cum Christo, etc.* Si, inquit, cum fidem Christi accepistis, estis mortui ab electis, id est separati ab omni superstitione et abstinentia creaturarum mundi, quid adhuc decernitis alias esse vitandas, et alias esse assumendas? Elementa enim vocat has visibiles creaturas, quæ tota universitate per se considerata partes mundi sunt. Et isti erant, ut dictum est, ab elementis mortui, id est separati ab abstinentiâ creaturarum mundi, quibus in laico rite abstinabant. Vel elementa dicit, quæ ipsi colebant in idolis, sicut mare in Neptuno, et aerem in Junone. Sed per fidem Christi ab his separati erant. Nam ubi invenimus aliter et aliter, facta est ibi quædam mors. Mors enim est, non esse qui fuit. Immortalis quidem est anima, qui semper vivit; et est in illa semper quidem permanens, sed mutabilis vita; ideoque secundum mutabilitatem ejusdem vitæ, potest et mortalibus dici, quia si olim vivebat sapienter et nunc dissipat, mortua est in deterius, si vivebat insipienter et sapit, mortua est in melius. Ita mortui in melius erant isti, quibus nunc dicitur: *Si mortui estis ab elementis, quid adhuc tanquam viventis decernitis?* Cum Christo per fidem associati, mortem istam, laudabilem assecuti sunt, propterea mortui esse cum Christo dicuntur. Vel cum Christo mortui, quia Christo patiente et moriente, et illi compassi sunt et commortui, non quidem eo tempore quo ille mortem sustinuit, sed quo ipsi fidem perceperunt. Et quia mundo semel cum Christo mortui erant non iterum quasi viventis mundo decernere carnaliter debebant, dicentes adinvicem vel ad sequaces suos: *Ne tetigeritis mortuum, sive reptile, ne inquinemini ab eo; neque gustaveritis carnem animalium quæ non ruminant, neque manu contrectaveris horum quidpiam.* In his verbis adhibenda est quædam pronuntiatio in vultu et in modo vocis. Per irrisionem quippe verba posuit eorum qui dicunt, ne tetigeritis, neque gustaveritis, cum sint omnia munda mundis (*Tit. i*), quæ omnia ipso usu, id est, si quis utatur eis Judaico ritu, ut ab his abstineat, et illis utatur, credens se ita justificari, *sunt in interitum*, id est ducunt in mortem animæ, quia sunt *secundum præcepta et doctrinæ hominum*, non Dei. Postquam enim veritas advenit, jam non Deus ea præcipit, sed Pharisei; et quoniam auctoritate sua vel Dei male intellecta præcipiunt hæc, et rationibus docent, ideo usus eorum et cultura interimit, quia sunt præcepta et doctrinæ hominum, non Dei. Unde per Isaiam dicitur: « Populus hic labiis me honorat, cor vero ejus longe est a me (*Isa. xxi*). » Frustra autem colunt me, docentes doctrinas et præcepta hominum (*Matth. xv; Marc. vii*). Nam et super illa quæ lex carnaliter præcipit, addiderunt Pharisei et Scribæ multa, adeo ut propter inventiones suas frequenter violarent ipsa legis carnalia mandata. Unde Dominus arguit eos, dicens: « Irritum fecistis mandatum Dei, ut traditiones vestras statueritis (*Matth. xv*). » Et quibus justum est, ut diebus Sabbati sedeat unusquisque in domo sua, et non egrediatur, nec ambulet de loco in quo habitat, si quando eos juxta litteram cœperimus arctare ut

non ambulent, nec jaceant, nec stent, sed tantum A sedeant si velint præcepta servare, solent responde-
re et dicere : Barachias et Simeon et Ellel magistri nostri, tradiderunt nobis ut duo millia pedum ambulemus in Sabbato. Et cæteras hujusmodi doctrinas hominum præferunt doctrinæ Dei, quæ sunt quidem rationem habentia sapientiæ in superstitione et humilitate. Pro superstitione in Græco legitur falsa religio, et humilitas hic intelligenda est, quæ humilia sentiat atque terrena. Videntur igitur observationes Judaicæ apud imperitos et vilem plebeculam imaginem habere rationis humanæque sapientiæ in falsa religione, et humilitate, id est in infimo et carnali atque terreno sensu. Vel sunt quidem rationem habentia sapientiæ in superstitione, id est non in veritate, sed in falsitate, quæ est superabundans, et in qua nulla est utilitas; et in humilitate, id est dejectione animæ. Quod si ad nonnullos id referatur, qui in Ecclesia de abstinentiæ virtute gloriantur, notandum est quod Apostolus superstitioni humiliatis speciem jungit, quia dum plus quam necesse est per abstinentiam caro atteritur, humilitas foris ostenditur, sed de hac ipsa humilitate graviter interius superbitur. Apud Judæos tamen multo magis in ostentatione humilitatis regnat superstitio, quia unde se cæteris humiliores ostendunt, inde super omnes superbiunt. Et ea quæ observant, sunt non ad parcendum corpori, non in honore aliquo ad saturitatem carnis. Non parcent Judæi corporibus suis in assumptione ciborum, contemnentes interdum quæ habent, et quærentes quæ non habent. Et quia hoc faciunt, necessitate debilitates interdum et morbos contrahunt. Nec honorant semetipsos, cum omnia munda sint mundis (Tit. 1), nihilque possit esse pollutum quod cum gratiarum actione percipitur (I Tim. 1v), et idcirco a Domino sit creatum, ut saturitate et adimpletione carnis humanos artus vegetet atque sustentet. Elementa quoque mundi, a quibus fideles esse mortuos dicit, possumus et legem Moysi atque omne Vetus Instrumentum accipere, quibus quasi elementis et religionis exordiis Deum discimus; quomodo elementa appellantur litteræ, per quas syllabas ac verba conjungimus, et ad texendam orationem longa meditatione procedimus. Ars quoque musica habet elementa sua, et geometrica ab elementis incipit linearum. Sic elementis Veteris Testamenti, ut ad evangelicam plenitudinem veniat, sancti viri eruditur infantia (I Cor. 111). Unde et illi Psalmi qui litteris prænotantur, per ethicam nos ducunt ad theologiam; et ab elementis occidentis litteræ quæ destruitur, transire faciunt ad spiritum vivificantem.

CAPUT III.

« Igitur si consurrexistis cum Christo, quæ sursum sunt quærite, ubi Christus est in dextera Dei sedens: Quæ sursum sunt sapite, non quæ super terram. »

Quando quidem si mortui estis cum Christo ab

elementis mundi, non debetis ultra tanquam viventes in mundo, mundana carnaliter discernere, et alia ac alia quærere, aliaque et alia respuere; igitur si consurrexistis cum Christo, debetis incessanter superna in quibus jam Christus est, quærere, ut ea cum ipso valeatis possidere. Nam sicut cum Christo mortui mundo, mundana debetis postponere, ita consequens est ut cum Christo resuscitati, superna debeatis appetere. Igitur si consurrexistis cum Christo, quærite ea quæ sunt de sursum, id est cœlestia bona, ubi jam corporaliter Christus est in dextera Dei Patris sedens. Non utique surreximus sicut Christus, sed tamen secundum spem quæ nobis in illo est, jam nos cum illo resurrexisse testatur Apostolus: « Spe enim salvi facti sumus (Rom. vii). » Spe resurrectionem nostri corporis in Christi corporis resurrectione tenemus, et resurrectionem spiritus jam in re habemus, ut amodo in novitate vitæ ambulemus. Exstinctis enim vitiis nostris per mysterium ac virtutem Dominicæ mortis, a morte animæ resurreximus per gratiam Dominicæ resurrectionis. Vel ideo recte nunc dicitur: Si consurrexistis cum Christo, quærite bonis operibus et devotis precibus ea quæ sunt super cœlum, ut mereamini ea invenire, quia omnis qui quærit, invenit (Matth. vii); et debetis ea quærere, quia Christus quem invenire desideratis, est jam ibi in dextera Dei (Matth. xxv). Recte in dextera quia oves pæcandæ sunt ad dexteram, et congruum est ut immaculatus Agnus locum immaculati gregis primus obtineat. Per dexteram enim, significatur æterna beatitudo. Et ibi jam sedet Christus, id est quiescit post laborem passionis. Sedere vel regnantis est, vel judicantis, et Christus in dextera paterni throni sedet, quia cum eo regnat in æternum. Ob hoc, inquam, sedere dicitur, quia nunc omnia judicat, et ad extremum iudex videbitur. Quærite ergo perpetua bona, in quibus ipse jam ita secundum humanitatem sedet, et sapite ea quæ sunt sursum, id est palato cordis dulcem saporem supernorum bonorum tangite, non quæ sunt super terram, id est terrenorum et temporalium. Si enim terrena vobis dulcia non fuerint, tunc cœlestium dulcedinem gustare poteritis. Si terrenas concupiscentias non habueritis, tunc cœlestibus gaudiis inhiare valebitis, vel sapite superna, non terrena, id est habete sapientiam et prudentiam de cœlestibus et æternis, non de temporalibus et caducis.

« Mortui enim estis, et vita vestra abscondita est cum Christo in Deo. Cum autem Christus apparuerit vita vestra, tunc et vos apparebitis cum ipso in gloria. »

Superna, non terrena sapere debetis, quia mente mortui estis huic mundo. Morimur enim secundum spiritum, et resurgimus secundum spiritum, ut postea mortui secundum carnem resurgamus secundum carnem. Quomodo enim præcedit mors secundum spiritum resurrectionem, quæ est secundum spiritum; sic præcessura est mors secundum carnem.

nem, resurrectionem quæ futura est secundum carnem. Nam non facere quod faciebamus, nec credere quod credebamus, mors et resurrectio quædam in nobis est. Si qui idolis serviebat unum Deum cognovit, mortuus est in idololatria, resurrexit in fide. Si qui ebriosus erat, sobrius est, mortua est ebrietas, resurrexit sobrietas. Omnia ergo facta mala quæ desinimus facere, quasi mors in nobis est, quia non esse quod eramus, mors quædam est. *Mortui*, inquit, *estis*, sed mortui specie, vivi radice, sicut arbores in hieme, quoniam *vita vestra abscondita est cum Christo in Deo* Patre, nec apparet nunc hominibus. Mortui enim estis, quomodo videntur arbores per hiemem quasi aridæ, quasi mortuæ. Sed ne arescatis, intus est radix, intus est vita, intus est charitas, quia vita abscondita est cum Christo in Deo. Erit autem postea tempus vestrum, erit æstas vestra, quando circumvestiemini dignitate foliorum, et replebimini ubertate fructuum. *Cum autem Christus apparuerit* veniens ad iudicium, qui est *vita vestra, tunc et vos*, non adversarii vestri, *apparebitis in gloria cum ipso*. Modo tempus est hiemis, æstas autem vestra erit adventus Christi. Hiems vestra est Christi occultatio, æstas vestra Christi revelatio. Considerandum est, quia sancti viri ab importunitate desideriorum temporalium, a tumultu inutilium curarum, a clamore perstreptentium perturbationum semetipsos sacri verbi gladio mortificare non desinunt, atque intus ante Dei faciem in sinu mentis abscondunt. Unde recte per Psalmistam dicitur: « Abscondes eos in abscondito faciei tuæ a conturbatione hominum (*Psal. xxx*). » Quod quomvis perfecte postmodum fiat, et nunc ex magna parte agitur; cum a temporalium desideriorum tumultibus delectationes in interiora rapiuntur, ut mens eorum dum in amore Dei tota tenditur, nulla inutili perturbatione laceretur. Hinc est quod nunc apostolus per contemplationem ab exteriori vita mortuos et quasi in sepulcro absconditos discipulos viderat, quibus dicebat *Mortui estis, et vita vestra abscondita est cum Christo in Deo*. Mortui videlicet carnalibus desideriis et temporalium rerum cupiditatibus; et vita vestra abscondita est cum Christo in Deo, quia intus apud Deum cum Christo vivit affectus desideriorum vestrorum, ut extinctus mundo lateat, et a cunctis exteriorum rerum perturbationibus intra sinum intimi amoris abscondat. Vere cum Christo abscondita est, quia cum Christo manifestabitur, cum enim Christus apparuerit esse vita vestra, id est cum omnes in iudicio viderint Christum esse vitam et salvationem vestram, tunc et vos apparebitis cum ipso in gloria, id est cum magno honore atque splendore apparebitis omnibus ad dexteram ejus, participes gloriæ ejus. Notandum quia et Joannes hanc sententiam aliis verbis explicat, dicens: « Charissimi, nunc filii Dei sumus, et nondum apparuit quid erimus. Scimus autem quia cum apparuerit, similes ei erimus, quoniam videbimus eum sicuti est (*I Joan. iii*). » Nam

A quod Paulus ait: *Mortui estis et vita vestra abscondita est cum Christo in Deo*, hoc est quod Joannes asserit, quia « nunc filii Dei sumus, et nondum apparuit quid erimus, » et quod Paulus addidit: *cum Christus apparuerit vita vestra, tunc et vos apparebitis cum ipso in gloria*; hoc Joannes subiecit: « Scimus quia cum apparuerit, similes ei erimus, quoniam videbimus eum sicuti est. » Hoc igitur erit apparere cum Christo in gloria, in manifestatione ejus videre speciem divinitatis ejus sicuti est, et ex visione ejus accipere similitudinem ejus, ut qualis est ipse tales et ipsi pro modo suo fiant qui viderint eum. Hæc perfectis dicta sunt, deinde cæteris qui necdum tantam perfectionem assecuti sunt, dicitur:

B « Mortificate ergo membra vestra quæ sunt super terram, fornicationem, immunditiam, libidinem, concupiscentiam malam et avaritiam, quæ est simulacrorum servitus propter quod venit ira Dei super filios incredulitatis. In quibus et vos ambulastis aliquando, cum viveretis in illis. Nunc autem deponite et vos omnia, iram, indignationem, malitiam, blasphemiam, turpem sermonem de ore vestro. Nolite mentiri invicem. »

Propter unitatem corporis, quia et majores et minores fideles membra sunt Ecclesiæ, cum sermo Apostoli dirigeretur latenter, quasi non essent alii, sed iidem ipsi, cæpit minores alloqui et ex his quæ præmiserat, causam exhortationis eorum assumpsit. Quia, inquit, ea quæ sursum sunt sapere debetis, non quæ super terram, quoniam in majoribus Ecclesiæ membris mortui jam estis huic mundo et vitiis, ergo quod in illis factum est, in vobis facite; mortificate, scilicet in vobis ipsis *membra quæ sunt super terram*, id est exstinguite vitia vestra quæ ad corpus peccati pertinent, et in terrena conversatione vigent, vel super terram vestri corporis male dominantur. Corpus peccati est conformitas veteris hominis, et hujus corporis membra sunt omnia vitia et mala opera. Hæc itaque membra vestra quæ non ad naturam hominis, sed ad corpus peccati pertinent, mortificate, scilicet non membra naturæ vestræ quæ Deus creavit, sed membra corporis peccati, quæ vos fecistis, exstinguite, ne amplius in vobis vivant. Et exponam vobis illa membra, videlicet *fornicationem* mortificare, id est concubitus cum meretricibus quæ prostant in fornicibus, unde fornicatio nomen accipit; *et immunditiam*, quæ et mollietis appellatur, atque ab uno sexu perpetratur; et libidinem, quæ fit cum feminis quæ non sunt pullicæ ut meretrices; et *concupiscentiam malam*, qua male concupiscitur vel mulier, vel aurum, vel aliud aliquid, quod non licet haberi. Concupiscentia vocatur hoc loco mala, ad differentiam bonæ concupiscentiæ, de qua dicitur: « Concupiscit et deficit anima mea in atria Domini (*Psal. lxxiii*), » et: « Concupiscentia sapientiæ deducet ad regnum perpetuum (*Sap. vi*). » Non solum ergo opera prædictorum vitiorum debetis mortificare, sed et concupiscentiam talium, ut

nec in corde concupiscatis aliquid illicitum, sed cor ab omni desiderio malo servetis mundum, et avaritiam, id est insatiabilem amorem habendi mortificare. Quæ avaritia omni Christiano est detestanda (Galat. v; Ephes. v), quia est simulacrorum servitus. Sicut enim qui idolis servit, cultum debitum Creatori imaginatæ creaturæ tribuit; sic et avarus cum Deum solum colere deberet, colit potius nummos, in quibus præfiguratæ sunt imagines imperatorum; hoc enim unusquisque Deum habet, quod præ omnibus diligit, in quo præ omnibus spem atque fiduciam habet. Et quoniam avarus hoc agit specialiter de nummis, id est plus diligit nummos quam aliud, et plus cogitat de nummis quam de alia re, atque plus sperat et confidit in nummis quam in alia re, idcirco nummi ejus dii sunt. Jure ergo vocatur idololatra, qui Deum non colit, sed idola, id est imagines mortuorum regum nummis impressas. Hæc prædicta vitia, id est fornicationem (ibid.), etc. mortificare debetis, ne propter hoc si in vobis reperta fuerint, pereatis; propter quæ jam olim venit ira Dei, id est animadversio divini ultionis super filios incredulitatis, id est super homines quos incredulitas in errorem genuerat, quia non credentes in Deum, verterunt se ad hæc vitia exercenda; et propterea perierunt aquis diluvii et igne Sodomorum (Gen. vii, xix), vel tempore Moysi (Num. ii, xii, xiv, xvi, xxi, xxv) in deserto variis exterminationibus. Cavete ergo, ne et vos similiter aut gravius propter eadem vitia pereatis, quia nunc quoque propter hæc venit quotidie ira, id est ultio Dei super filios incredulitatis, id est super eos qui cum sint Ecclesiæ filii per susceptionem sacramentorum, non tamen firmiter credunt æternam iniquorum damnationem, et idcirco audent agere talia. In quibus vitiiis et vos ambulastis, id est opera operibus velut passibus addidistis, aliquando, id est olim cum viveretis in illis vitiiis, id est cum vitam vestram in talibus duceretis. Sed nunc postquam per baptismum talibus mortui estis, deponite et vos sicut et majores deposuerunt, omnia vitia. Deponite ea, id est deorsum ponite ut non super vos sint, sed subter vos, ut non premant vos, sed premantur a vobis. Deponite scilicet iram, id est perturbati animi commotionem adversus aliquem et indignationem, id est vehementem animi commotionem cum quodam arrogantia vitio in læsionem et in alicujus despectum accensi; et malitiam, qua mens intrinsecus mordetur, et quærit foris lædere fratrem; et blasphemiam, id est prolationem mendacii contra Deum contra sanctos ejus, et de sanctis ejus. Blasphemia enim est, per quam de Deo ipso dicuntur falsa, vel de sanctis ejus. Nec solum blasphemiam caveatis, sed et quemlibet turpem sermonem non emiseritis de ore vestro, ne per hunc, et os vestrum et aures audientium et mentes eorum maculetis, et nolite mentiri invicem, ut alter alterum fallat, men-

adacium ei pro veritate loquens, sed puram veritatem, quam cor vestrum noverit, ore proferte.

« Exspoliantes vos veterem hominem cum actibus suis, et induentes novum, eum qui renovatur in agnitione Dei secundum imaginem ejus qui creavit eum. Ubi non est gentilis et Judæus, circumcisio et præputium, barbarus et Scytha, servus et liber, sed omnia et in omnibus Christus. »

Prædicta vitia deponite, exspoliantes vos in eorum depositione veterem hominem cum actibus suis, id est veterem vitam quæ in peccato est, in quo secundum Adam vivitur; et induentes novum hominem, id est novam vitam quæ in justitia ducitur, in qua secundum Christum vivitur. Exspoliate ergo vos hunc veterem hominem, id est injustitiam; et induite novum hominem, id est justitiam; eum scilicet, qui renovatur in agnitione Dei secundum imaginem ejus qui creavit eum. Totus enim homo, id est et interiore et exteriori sui parte inveteratus propter peccatum et pænæ mortalitatis addictus est; sed nunc renovatur secundum interiorem sui partem, ubi reformatur secundum sui conditoris imaginem; in resurrectione vero renovatur et secundum exteriorem sui partem. Sicut enim post lapsum peccati homo in agnitione Dei renovatur secundum imaginem ejus qui creavit eum, ita in ipsa agnitione creatus est, antequam delicto veterasceret, unde rursus in agnitione eadem renovatur. Nam inter notionem et agnitionem aliquid interesse dicitur, eo quod notio sit earum rerum quas ante nescimus, et ipsas scire postea cepimus; agnitio autem earum, quas ante scientes, deinceps scire desinimus, earumque postea recordamur. Homo igitur in agnitione Dei creatus est, quia in principio creationis suæ, Creatorem suum ex ratione cognovit; sed postea per peccatum cæcatus, agnitionem Creatoris amisit. Nunc vero per illuminationem Evangelii et per infusionem gratiæ Spiritus sancti eundem Creatorem suum recognoscit, et mox interius renovatur, qui vetustatem contraxerat, dum Creatorem ignoraret. Fit ergo renovatio reformatioque mentis secundum imaginem Dei. Ideo autem dicitur, secundum imaginem Dei, ut in ea re intelligatur fieri, ubi est imago Dei, id est in mente, sicut dicimus secundum corpus mortuum esse, non secundum spiritum, eum qui de corpore fidelis et justus abscedit. Quid enim dicimus secundum corpus mortuum, nisi corpore vel in corpore, non anima vel in anima mortuum? Aut si dicamus, secundum corpus est pulcher aut secundum corpus fortis, non secundum animum, quid est aliud quam corpore, non animo, pulcher aut fortis. Et innumerabiliter ita loquimur. Non itaque sic intelligamus secundum imaginem ejus qui creavit eum, quasi alia sit imago secundum quam renovatur, non ipsa quæ renovatur. Ipsa enim imago Dei renovatur in homine, quæ

fuerat inveterata delicto. Novum, ut dixi. hominem induito, id est conversationem, ubi, id est in quo homine novo *non gentilis est* neque *Judæus*, id est nihil operatur, nihil prodest vel obest quod ille qui hunc hominem induit, secundum carnis originem gentilis sit aut Judæus; nec est ibi *circumcisio et præputium*, id est nihil ibi utilitatis operatur *circumcisio*, de qua Judæi præcipue gloriabantur, nec aliquid nocet ibi *præputium*. Neque *barbarus* est ibi, id est non nocet cuiquam sua barbaries, quia sit civis sanctorum et domesticus Dei (*Ephes. II*). Vel *barbarus*, id est aliquis tam longe remotus et tantæ feritatis, ut vix posset a Romanis vinci, non impeditur sua barbarie in hoc novo homine ne admittatur, et *Scythæ* non est ibi, id est populus qui est in sinistro margine mundi ferocior aliis barbaris, et tam pugnax, ut vix unquam a Romanis superari posset, non juvatur sua feritate in novo homine, sed potius oportet omnem feritatem deponere, ut discat a Christo mitis esse et humilis corde (*Matth. XI*). Et neque *servus* est ibi abjectior, neque *liber* acceptior, quia neque servitus neque libertas corporalis nocet vè adjuvat ibi quidquam. Itaque nec natio, nec ritus carnalis, nec conditio, nec sexus ullam differentiam facit, aut valet sive operatur ibi aliquid; *sed omnia* in homine hoc novo Christus, id est nihil in eo est nisi Christiana pietas et Christiana religio. Christus est ibi sanctitas et justitia et charitas et omnia bona, et in omnibus *Christus* est qui hoc homine novo sunt induti; quia quidquid boni habent, a Christo habent; et quidquid boni faciunt, per Christum faciunt.

« Induite vos ergo sicut electi Dei, sancti et dilecti, viscera misericordiæ, benignitatem, humilitatem, modestiam, patientiam, supportantes invicem et donantes vobismetipsis, si quis adversus aliquem habet querelam; sicut et Dominus donavit vobis, ita et vos. »

Illatio est quasi a toto. Quandoquidem induere debetis novum hominem, ergo induere debetis hic virtutum ornamenta, quæ sunt quasi membra vel partes ejusdem novi hominis, id est novæ conversationis, *sicut electi Dei*, id est Dei sapientia præcogniti, et a massa perdendorum separati, atque ad vitam æternam præordinati, et sancti id est baptismi sanctificatione a peccatis mundati, et sic jam a Deo dilecti, postquam purgati estis a peccatis quæ Deus odit. Et propterea ut amplius diligat ab eo mereamini, induite vos virtutes quas ipse diligit. Induite vos *viscera misericordiæ*, id est internum affectum misericordiæ circumdate vobis in opere, ut internus affectus piæ conversationis, quam erga proximos in corde habueritis, undique appareat in operibus vestris, undique vos adornet. Vestis quippe qua induimur ab omni parte nos tegit. Itaque et vos ab omni parte circumtegi debetis visceribus misericordiæ, ut in cunctis actibus vestris fulgeant viscera misericordiæ,

A quæ mens vestra concepit erga revelationem misericordiæ proximorum, et similiter foris in operibus induite benignitatem, id est bonum ignem piæ dulcedinis, qui fervet in corde vestro. Benignitas enim est quædam serenitas animi qua aliquis hilariter loquitur et sua tribuit pro Deo ac conversatur cum proximo; humilitatem quoque induite, ut humilitas mentis appareat in omnibus verbis et operibus vestris, in vestibus, in incessu atque omni motu corporis. Idemque et modestiam quasi vestem vobis circumdate, ut in omnibus dictis et actibus vestris modum teneatis. Modestia enim quasi modi statio dicitur, quia per hanc virtutem modus competens servatur in omnibus, modificans universas actiones, et ut modum non excedatis, induite patientiam, qua undique muniti, tranquillo animo toleretis omnia mala quæ vobis ingerentur a proximis. Impossibile est enim, ut qui cum aliis hominibus conversatur, non frequenter ab illis quædam sustineat, quæ in multis ad excessum compellant, si virtute patientiæ quasi vestimento circumdatus non fuerit. Si vero undique adversus omnia quæ acciderunt sibi, patientiam tenuerit, semper modestiam servare poterit. Et ideo patientiam induite, *supportantes vos invicem*, ut alter alterutrum sustineat in his quæ sunt gravia et aspera. Supportate invicem, id est portate invicem, alii alios, ut illos qui portaverunt se, judicent superiores, et se inferiores illis quibus sunt superiores. Non enim patienter alium portat, qui se superiorem illo reputat. Et estote *donantes vobismetipsis*, id est condonantes atque dimittentes alii aliis, si forte *quis adversus aliquem habet querelam* de contumelia vel injuria sibi ab eo illata. Donate invicem, quidquid læsionis vel offensiois pertulistis, unde merito conqueri poteratis. Et hoc facite non fecte, nec ex parte, sed *sicut Dominus donavit vobis*, ita et vos facite. Id est sicut Dominus in baptismo quidquid injuriarum ei feceratis condonavit vobis sine ullo respectu alicujus vindictæ ulterius sumendæ, ita et vos bono animo condonate vobis semper ad invicem omnia sine respectu alicujus ultionis. Debetis enim conservis non negare, quod a bono Domino gaudetis vos percepisse. Alioquin juxta parabolam evangelicam, *repetet a vobis omne debitum quod dimiserat*, si non remiseritis unusquisque fratri suo de cordibus vestris (*Matth. XVIII*).

« Super omnia autem hæc charitatem habete, quod est vinculum perfectionis. Et pax Christi exsulet in cordibus vestris, in qua et vocati estis in unum corpus, et grati estote. Verbum Christi habitet in vobis abundanter. In omni sapientia docentes et commonentes vobismetipsos in psalmis et hymnis et canticis spiritalibus, in gratia cantantes in cordibus vestris Domino. Omne quodcunque facitis in verbo aut in opere, omnia in nomine Domini nostri Jesu

« Christi facite, gratias agentes Deo et Patri per A
« ipsum. »

Prædicta virtutum ornamenta induite, *sed super omnia hæc charitatem*, quasi nobilior ornamentum, habete, quæ contineat et superornet omnia reliquarum virtutum insignia. Superexcellit enim et superfulget omnibus aliis virtutibus atque magis placet immortalis sponsi conspectibus, *quod*, id est quæ res, videlicet charitas (*I Cor. xii*), *est vinculum perfectionis*; quia per hanc ligatur omnis virtutum perfectio, ne dissoluta defluat et dilabatur ac dispercat. Perfectionis vinculum est charitas, quia omne bonum quod agimus, per hanc, ne pereat ligatur. A tentatore namque citius et quodlibet opus evellitur, si solum a vinculo charitatis invenitur. Si vero mens charitate ducitur et proximi dilectione constringitur, cum tentationum motus quilibet ei injusta suggererint, obicem se illis ipsa dilectio opponit, et nascentia in corde vitia reprimit. Charitas bona nostra vinciat in perfectione, *et pax Christi*, id est quam Christus habet et dat (*Joan. xiv, xvi, xx*), *exsultet in cordibus vestris*. Pax Christi est, qua reconciliati sumus Deo et sanctis angelis ejus, et qua diligimus Deum, atque peccatum exsecramur, et qua nos turbare cavemus, et qua nobis invicem credimus quod nos invicem diligamus; et qua invicem corda jungimus ut concordessimus atque cor unum in bona voluntate habeamus; et qua spiritui nostro carnem subjungamus, et hæc pax non sit torpens in cordibus vestris, sed exsultet ibi præ gaudio atque tripudiet, ut sitis scilicet semper memores hujus pacis, et eam assecutos esse vos gaudeatis, in qua pace etiam *vocati estis* evangelica prædicatione *in unum corpus*, id est in hoc ut sitis unum corpus Ecclesiæ, servantes pacem omnes invicem, sicut diversa nostri corporis membra pacem et concordiam invicem servant, et in hac pacis exultatione non sitis ingrati Deo, qui vobis eam dedit, *sed estote ei grati*, ut pro tantis beneficiis semper ei gratias corde, verbis et operibus agatis; et ut hanc pacem intelligere valeatis atque servare eam, et grati in ea semper Deo existere, *verbum Christi*, id est doctrina Christianæ religionis, *habitet in vobis*, id est maneant in corde et ore vestro non parce, *sed abundanter*, id est affluenter et plenarie, ut et sciatis et loquamini verbum sacræ ædificationis. Dixi ut grati sitis, et verbum Christi habitans in vobis habeatis, docentes vosipsos invicem, vel unusquisque seipsum, *in omni patientia* divinorum. Hæc est abundantia verbi Christi quæ debet in cordibus vestris habitare, videlicet omnis sapientia, ut sensum perfectum habeatis in cognitione divinæ Trinitatis et Unitatis, et quidquid ad cultum ejus pertinet noveritis, atque piis desideriis gaudia regni ejus prægustetis, et bonis operibus incessanter quærat. In hujusmodi rebus est omnis sapientia, quam Christianus habere debet in hac vita. Sitis ergo in omni sapientia docentes, ut dixi, vosmetipsos invicem, id est unusquisque seipsum ea quæ necdum scieba-

tis, et commomentes vosmetipsos in his quæ jam scitis, ut ea firmiter retineatis et opere compleatis: Docete, inquam, et commovete vosmetipsos, ut et instruamini, et ad bene agendum excitemini. *In psalmis*, qui ad bonam operationem commonent; *et hymnis*, qui de laudibus Dei canuntur; *et canticis*, non carnalibus, sed spiritalibus, quæ de æterno gaudio resonant, et ideo spiritalia sunt. Nam et carnalia cantica frequenter a carnalibus hominibus canuntur, et ad carnis voluptates pertinent. Sed his contraria sunt spiritalia cantica, quæ in solo conditore nos delectari admonent et gaudere. In talibus vosipsos docete et commonet, vos dico, *in gratia*, id est in gratiarum actione *cantantes in cordibus vestris Domino*. Neque enim omnis qui labiis personat, Domino cantat; sed qui devoto corde eum laudans amat, et ad ejus visionem suspirat. Intus enim est hoc gaudium, ubi vox laudis canitur et auditur, qua voce laudatur, qui gratis amandus est toto corde, tota anima, tota mente, amatoremque suum accendit in se gratia sancti Spiritus sui. Ille enim in gratia cantat Domino, qui gratia sancti Spiritus accensus, gratis amat eum quem laudat. Ita cantate. Et omne etiam *quodcumque facitis in verbo aut in opere*, id est quæcumque loquimini, et quæcumque operamini, omnia facite in nomine Domini, id est nomen ejus invocate in exordio locutionis et actionis vestræ, atque sequentia verba et opera ad gloriam ejus semper dirigite. Tunc enim et peccata locutionis et operationis vitabitis, et bona erunt quæ dicetis vel facietis. *Omnia in nomine Domini facite*, in omnibus nomen Domini invocantes et glorificantes. In nomine Domini *nostri Jesu Christi* facite omnia, per quem habetis omnia quæ vobis a Patre dantur, vos dico, *semper ipsum* per quem omnia bona accipitis, *agentes gratias* de omnibus Deo, qui vos creavit, *et Patri* qui vos in filios adoptavit. Vel Deo, qui secundum humanitatem ejus Christum creavit; et Patri, qui Christum secundum divinitatem ipsius genuit.

« Mulieres, subditæ estote viris sicut oportet in
« Domino. Viri, diligite uxores vestras, et nolite
« amari esse ad illas. Filii, obedite parentibus per
« omnia (*Ephes. vi*): hoc enim placitum est in
« Domino. Patres, nolite ad indignationem provo-
« care filios vestros, ut non pusillo liant animo. »

Hucusque generaliter illos instruxit et movit. Nunc vero specialiter ad familiarem et domesticam conversationem vertit exhortationem suam et mulieres viris, atque filios parentibus subjicit. Est enim etiam naturalis ordo in hominibus, serviant feminae viris, et filii parentibus, quia et illis justitia hæc est, ut infirmior ratio serviat fortiori. Hæc enim in dominationibus et servitutibus clara justitia est, ut qui excellunt ratione, excellent et dominatione. Unde nunc Apostolus congrua dat præcepta. Vos, inquit, *o mulieres, estote viris vestris subditæ* ad omnia non tamen ad male agendum, *sed sicut oportet vos in Domino* subdi, id est sicut vos in Christiana

religione viventes decet ad omnia illis subjici, præterquam ad transgressionem mandatorum Dei. Et vos, o viri, diligite uxores vestras. Uxorum timere est et cum timore diligere, virorum autem tantum diligere, quia dilectio perfectorum est. Viri, diligite uxores vestras, et nolite amari esse ad illas. Licet illæ ad iracundiam provocent, et talia faciant per quæ mereantur amaritudinem, vos tamen nolite eis amaritudinem vicem reddere. Vos quoque filii, obedite parentibus vestris per omnia, sive carnalibus, sive spiritalibus. Obedite illis per omnia, sed tamen in Domino, id est in his tantummodo quæ præceptum Domini non excedunt, hoc enim placitum est Deo, ut illis taliter obediat. Et vos, o patres, nolite filios vestros, sive carnales, sive spirituales, provocare ad indignationem, nimis aspere illos tractando, ut non fiant pusillo animo, id est ut non deficiat animus eorum, non valens sustinere nimietatem asperitatis vestræ, et fugiant a vobis, vel aliquid mali faciant per defectum animi. Et ideo cavete illis occasionem dare inobedientiæ, ne scilicet percent per iracundiam, et frangatur mens eorum in adversis atque deficiat.

« Servi, obedite per omnia dominis carnalibus (Ephes. vi; I Petr. ii), non ad oculum servientes, quasi hominibus placentes, sed in simplicitate cordis, timentes Dominum. Quodcumque facitis, ex animo operamini, sicut Domino, et non hominibus, scientes quod a Domino accipietis retributionem hæreditatis (Levit. xix). Domino Christo servite. Qui enim injuriam facit, recipiet id quod inique gessit, et non est personarum acceptio apud Deum (Deut. i, x, xvi; II Par. xix; Job xxxii, xxxiv; Rom. ii; Ephes. vi; Act. x). »

Vos, inquit, o servi, obedite dominibus carnalibus, id est qui vobis secundum corpus, non secundum spiritum dominantur. Obedite illis in bono per omnia non ad oculum servientes, quasi hominibus placentes, id est non tunc solummodo bene agentes, quando videmini ab illis; et quando non videmini, negligenter agentes. Non ita subdole agatis cupientes fraudulenter placere illis per ea, quæ coram ipsis positi strenue agere videbitur, sed in simplicitate cordis, non in duplicitate servite illis, ut quod foris in opere ostenderitis, intus in corde habeatis, timentes Dominum, qui inspector est cordium, et damnator dolosarum simulationum. Et quodcumque facitis, operamini illud ex animo, id est ex voluntate. Eam quippe Deus innocentiam probat, qua homo non metu sit innocens, sed amore justitiæ. Nam qui timore non peccat, quamvis ei non noceat cui vult nocere, sibi tamen plurimum nocet; et abstinens ab iniquo opere, sola mentis reus est voluntate. Simulata enim innocentia non est innocentia, et simulata æquitas non est æquitas, sed duplicatur peccatum in quo est iniquitas et simulatio. Propterea quidquid boni facitis, facite ex animo, non ex simulatione, sicut Domino facientes illud, non hominibus: scientes quod ex hoc a Domino, qui remunerator est

A omnium bonorum operum, accipietis retributionem æternæ hæreditatis cum filiis. Et ideo servite Domino nostro Christo in omnibus quæ facietis. Si enim propter præceptum bono animo servieritis carnalibus dominis, Christo potius quam illis servietis, et ab eo retributionem percipietis, licet ab illis nihil bonæ remunerationis consequamini. Vel quamvis hominum servitio sitis occupati, Domino tamen Christo servite, ut propter eorum servitium non omittatis Christo servire. Nec frangatur mens vestra, si vos male tractaverint; qui injuriam facit, licet sit in hoc mundo potens et nobilis, recipiet a mundi iudice Deo id quod inique gessit. Ideo melior est tristitia patientis iniqua, quam lætitia facientis iniqua, quia et de malitia mali sæpe flagellatur bonus. Qui injuriam facit, recipiet quod gessit, ut ipse juste crucietur, qui injuste cruciavit alium. Et hoc ideo, quia non apud Deum acceptio personarum, ut nobilibus parcat, si inique egerint, cum ignobiles puniat, qui male egerunt. Omnes enim æquo iudicio, sive dominos, sive servos, sive divites, sive pauperes, iudicat, et unicuique reddit secundum quod egit.

CAPUT IV.

« Domini, quod justum est et æquum, servis præstate, scientes quoniam et vos Dominum habetis in cælo. »

Ideo vos domini, præstate, id est largimini servis vestris illud quod justum est, id est quod suo servitio promeruerunt; et quod est æquum, id est quod naturæ vel rationis exigit, eorum scilicet necessaria dari ipsis, etiam ultra quod servitium eorum promeruit. Multi enim sunt servi, qui vel infirmitatis, vel alicujus rei causa non promerentur suo labore ea quæ sunt illis necessaria; et tamen debent domini illis ea quibus indigent retribuere. Hæc ita debetis præbere servis vestris, scientes quoniam et vos habetis Dominum in cælo, cujus servi estis, et a quo bona accipere etiam ultra meritum vestrum indigetis. Contra quem etiam de munere ejus superbitis, si illos, quos per conditionem tenetis subditos, æquales vobis per naturæ consortium non cognoscitis. Nam justis etiam qui imperant, serviunt illis quibus videntur imperare, quia non dominandi cupiditate impetrant, sed officio consulendi; nec principandi superbia, sed providendi beneficentia. Et si sancti Patres nostri habuerunt servos, sic administrabant domesticam pacem, ut secundum hæc temporalia bona filiorum sortem a servorum conditione distinguerent; ad Deum autem colendum, in quo æterna bona speranda sunt, omnibus domus suæ membris pari dilectione consulerent.

« Orationi instate, vigilantes in ea in gratiarum actione, orantes simul et pro nobis, ut Deus aperiat nobis ostium sermonis ad loquendum mysterium Christi, propter quod et vinctus sum, ut manifestem illud ita ut oportet me loqui. »

Reddit generalem exhortationem. Hoc enim omnibus convenit, ut instent orationi. Et bene in ea vigilare jubet, ut cum stamus ad orationem, cogi-

tatio omnis carnalis et sæcularis abscedat, nec tunc quidquam animus cogitet præter id solum quod preceatur. Subripit enim frequenter hostis, et subtiliter fallens, preces nostras a Deo vocat, ut aliud habeamus in corde, et aliud proferamus in voce, cum intentione sincera Deum debeat non sonus vocis, sed animi sensus orare. *Instate orationi* ut obnix et indeficienter oretis, *vigilantes* vivaci studio mentis *in ea*. Et hoc ut oratio sit *in gratiarum actione*, ut rogantes a Deo beneficia, gratias illi referatis pro his quæ jam vobis contulit. Ita orate pro vobis, *orantes simul et pro nobis, ut Deus aperiat nobis ostium sermonis*, id est aperiat nobis os, quo sermo prædicationis egrediatur a nobis *ad loquendum*, id est ad disserendum et exponendum *mysterium Christi*, id est occultum secretum incarnationis et passionis Christi, ut occultas eorum causas pandamus audientibus, et in his restaurationem salutis humanæ consistere doceamus. *Propter quod* mysterium, quia illud prædicabam, *et vincituum*, id est detineor in vinculis Romæ, ne possim ire quo voluero, et pluribus evangelizare. Orate ut Deus det mihi loqui illud mysterium, *ut manifestem illud* et declarem aliis, *ita ut oportet* et convenit *me loqui* de tanto sacramento qui et annuntiare illud missus sum.

« In sapientia ambulate ad eos qui foris sunt, « tempus redimentes. Sermo vester semper in « gratia sale sit conditus, ut sciatis quomodo « oporteat vos unicuique respondere.

Vos in Ecclesia, id est incorporati membris Christi, simul omnes orationi, ut expositum est, instate, sed procedentes *ad eos qui foris sunt*, id est venientes ad loca ubi vos videbunt illi, qui adhuc per fidem in Ecclesiam non intraverunt, *ambulate in sapientia*, id est agite sapienter, operamini prudenter, figite gressum operis caute, ne quid insipientiæ, ne quid reprehensionis ab infidelibus notetur in vobis, ne nomen Domini per vos blasphemetur ab eis (Rom. 11). Vos dico, *tempus redimentes*, id est vitam male actam pœnitendo et bene agendo redimentes, ut transacta damna quotidianis meritorum lucris recompensetis. Tempus quippe redimimus, quando anteactam vitam quam lasciviendo perdidimus, fendo reparamus. Dixi ut in vestra ambulatione et in vestra actione luceat sapientia, et nunc addo ut et in sermone vestro semper appareat, scilicet *sermo vester in gratia*, id est, in dulcedine charitatis *semper sit conditus sale* sapientiæ, sicut bonus animæ cibus, ut nihil insipidum, nihil putidum habeat. Nam cibus cui sal immisceatur, fit sapidus; et caro bene salita, non putrescit nec fetet. Ita sit et sermo vester, ut quasi cibus sapidus recipiatur ab ore cordis audientium, non sit insipidus per insipientiam, nec putidus per admistionem carnalis delectationis, nec corruptus per admistionem falsitatis, sed semper sale spiritualis sapientiæ con-

ditus, et integritate veritatis incorruptus, atque odorem cœlestis et incorruptibilis delectationis spirans. Et ita condimentum divini salis in se habeat sermo vester, *ut sciatis quomodo oporteat vos unicuique respondere*, id est, per prudentiam moderatæ discretionis sciatis quomodo respondendum sit fideli, quomodo infideli, quomodo diviti, quomodo pauperi, quomodo seni, quomodo juveni, quomodo viro, quomodo feminæ, et quomodo cæteris gradibus vel conditionibus; unusquisque enim suo modo alloquendus est, et unicuique suo modo respondendum est: Respondendum est verbis ejus, si ipse prior locutus fuerit, vel respondendum facto ejus, si verbis tacuerit. Unusquisque suo modo vel corrigendus est, vel admonendus.

« Quæ circa me sunt, omnia vobis nota faciet « Tychicus charissimus frater et fidelis minister « et conservus in Domino, quem misi ad vos ad « hoc ipsum, ut cognoscat quæ circa vos sunt, « et consoletur corda vestra cum Onesimo charissimo et fideli fratre, qui ex vobis est, qui « omnia quæ hic aguntur nota facient vobis.»

Quæ circa me sunt, omnia vobis nota faciet Tychicus. Quia dixerat se vincituum causa Evangelii, ne putarent eum graviora pati, dicit Tychicum omnia sua eis et adversa et prospera dicturum. Cui credendum est, quia est frater, id est, Christianus, et pro vitæ suæ merito clarissimus Deo vel sanctis ejus, *et fidelis minister*, id est, fideliter ministrans sine fraude verbum prædicationis. Vel minister, id est, diaconus, *et conservus*, id est necum serviens, *in Domino*, id est, in his quæ Domini sunt; *quem ad hoc ipsum*, id est ideo ad vos misi, *ut cognoscat quæ circa vos sunt* et mihi referat, et idcirco videte ne quid mali apud vos inveniat quod mihi renuntiet. Ob hoc etiam illum misi, *ut et consoletur corda vestra*, ne immoderatam habeatis tristitiam de his quæ patimini, vel quæ me pati audistis. Misi eum cum *Onesimo charissimo et fideli fratre*, non vilissimo et fraudulento servo, sicut olim fuit. Iste est enim Onesimus servus Philemonis, qui peracto furto apud Philemonem dominum suum vel postquam consumpsit vel dissipavit illud, confugit ad apostolum, et audivit ab eo verbum salutis, atque conversus est, et ideo sic commendat eum Apostolus, ne sit illis in aliquo suspectus. Unde liquido demonstratur, quod hanc epistolam a Roma de carcere Apostolus miserit sicut illam ad Philemonem direxit. Nam eosdem salutatores in ista ponit, et in illa, quos secum esse declarat, et adjuutores suos appellat, id est, Aristarchum et Marcum et Epaphram et Lucam et Demam. Unde patet utramque epistolam ex uno eodemque loco missam, ubi vincituum tenebatur Apostolus. Nam Onesimum in vinculis Christo genuit (*Philem.*, 1). Vincula autem eum in Epheso pertulisse tacet omnino liber Actuum apostolorum. Et ideo probatur non habere veritatem sententiam eorum, qui dicunt Apostolum

Ephesi tantum in vinculis fuisse, et inde hanc epistolam Colossensibus misisse.

« Salutat vos Aristarchus concaptivus meus, et Marcus consobrinus Barnabæ (de quo accepistis mandata; si venerit ad vos, excipite illum), et Jesus qui dicitur Justus, qui sunt ex circumcissione. Hi soli sunt adjutores mei in regno Dei, qui mihi fuerunt solatio. »

Aristarchus iste Thessalonicensis erat, et Apostolum secutus esse legitur. Unde et ad cumulum gloriæ cum eodem Apostolo captus teneri meruit pro nomine Christi. Marcus autem consobrinus, id est consanguineus Barnabæ apostoli, ipse est Joannes cognomento Marcus, pro quo facta est dissensio inter Paulum et Barnabam (Act. xii). « Barnabas enim volebat secum assumere et hunc Marcum. Paulus autem rogabat eum, ut qui discussisset ab eis de Pamphylia, et non isset cum eis in opus Evangelii, non deberet recipi. Sicque facta est inter eos dissensio, ita ut discederent ab invicem: et Barnabas quidem, assumpto Marco, navigaret Cyprum. Paulus vero electo Sila, profectus est, traditus gratiæ Domini a fratribus (Act. xv). » Quoniam Marcus iste in ipsa se aciei fronte constituens, nimis tepide steterat, et insuper ex acie socors recesserat, merito eum Paulus abjecit, ne illius quasi contagione vires corrumperentur aliorum. Prædicator enim fortia debet in seipso cæteris exempla monstrare, et in bonis quæ cœpit, viriliter perseverare. Sed quia Marcus nec fortiter egerat, nec perseveraverat, merito Paulus eum ulterius in via prædicationis socium habere noluit. Timens etiam ne alios exemplo suo vanos ac desidiosos redderet, mandavit Ecclesiis suis, ne reciperent eum. Sed postea correptus est Marcus, atque dignus effectus ut eum Paulus adjutorem habere gauderet. Et hoc est quod dicit: *Salutat vos Aristarchus concaptivus meus, et Marcus consobrinus Barnabæ, de quo accepistis mandata, ne scilicet eum reciperetis, sed nunc si venerit ad vos, excipite illum*, quia videlicet bene correptus est, et Jesus vos salutat, qui dicitur Justus, id est cui ab eventu sanctitatis suæ datum est hoc agnomen quod est Justus, qui scilicet Marcus et Justus, sunt ex circumcissione, id est ex genere Judæorum. Hi soli sunt adjutores mei in regno Dei, id est in prædicatione Evangelii, de qua Dominus Judæis ait: « Aufertur a vobis regnum Dei, et dabitur genti facienti fructus ejus (Matth. xxi), » vel in regno Dei, id est in Ecclesia ædificanda, de qua idem Dominus ait: « Mittet Filius hominis angelos suos, et colligent de regno ejus omnia scandala (Matth. xiii). » Qui videlicet adjutores fuerunt mihi solatio in tribulatione mea.

« Salutat vos Epaphras, qui ex vobis est, servus Christi Jesu, semper sollicitus pro vobis in orationibus ut stetis perfecti et pleni in omni voluntate Dei. Testimonium enim illi perhibeo,

« quod habet multum laborem pro vobis, et pro his qui sunt Laodiceæ, et qui Hierapoli. »

Iste est sanctus Epaphras, de quo in principio epistolæ hujus dictum est. « Cognovistis gratiam Dei in veritate, sicut didicistis ab Epaphra charissimo conservo nostro, qui est fidelis pro vobis minister Jesu Christi (supra 1). » Quia ergo prædicaverat eis gratiam Dei, idcirco sollicitus precibus Deum semper exorabat, ut ipsi in eadem gratia permanerent, ne labor ejus fieret vacuus. Corporali enim præsentia illinc abierat, et propterea Deo qui nusquam deest, illos commendabat. Et hoc est: *Salutat vos Epaphras, qui est ex vobis originem ducens, et est servus Christi Jesu*, id est serviens mandatis evangelicis, ipse dico, *semper sollicitus pro vobis in orationibus*, id est semper sollicite et attentè orans pro vestra salute, ut scilicet stetis, id est perseveretis. Unde dictum est de diabolo: « In veritate non stetit (Joan. viii), » quia fuit ibi, sed non perstitit. Et vos estis in religione Christiana, ideoque precatur Epaphras, ut stetis, id est permaneatis in ea. Stetis perfecti bona operatione, et pleni bona voluntate. Perfecti exteriorius, et pleni interiorius, ne sit mens interior vacua, cum perfecta foris apparuerint opera. Tales, inquam, stetis in omni voluntate Dei, id est in observantia omnis divinæ voluntatis, ut scilicet omnem Dei voluntatem perseveranter impleatis. Hoc ille vobis a Deo concedi precatur, sine cujus gratia nihil potestis. Nam ego testimonium illi perhibeo, quod multum laborat orando et vigilando pro vobis, id est pro vestra salute, et pro his qui sunt Laodiceæ, quæ est urbs vobis proxima, et pro illis qui sunt Hierapoli, quæ et ipsa est civitas non procul a vobis posita.

« Salutat vos Lucas medicus charissimus et Demas. »

Lucas iste primo fuit medicus corporum, deinde conversus ad Christum, factus est medicus animarum. Inde est quod plus quam alii evangelistæ, loquitur de misericordiis Redemptoris, per quas languores peccatorum ab animalibus pelluntur, et sacerdotis personam in Christo describit, intervenientis pro peccatis totius mundi.

« Salutate fratres qui sunt Laodiceæ, et Nympham, et quæ in domo ejus est Ecclesiam. Et cum lecta fuerit apud vos epistola hæc, facite ut in Laodicensium ecclesia legatur; et ea quæ Laodicensium est, vobis legatur. »

Prædicti sancti vos salutant. Vos autem salutate vicinos vobis fratres qui sunt Laodiceæ, et inter eos specialiter et nominatim salutate Nympham illam matronam religiosam, et Ecclesiam quæ est in domo ejus, id est familiam ejus, vel multitudinem fidelium apud eam congregatorum, quos ipsa hospitatur et pascit. Et cum apud vos lecta fuerit hæc epistola, facite ut et in Laodicensium ecclesia legatur, id est curate in conventu Laodicensium recitari, quia et propter eos secundarie scripta est, sicut

propter vos principaliter, et ea similiter epistola, quæ Laodicensium est, id est quam ego Laodicensibus nisi, legatur vobis, quamvis et hanc epistolam quintam decimam, vel sextam decimam Apostolus scripserit, et auctoritas eam apostolica sicut cæteras firmavit, sancta tamen Ecclesia non amplius quam quatuordecim tenet, ut ex ipso epistolarum numero ostenderet, quod doctor egregius legis et Evangelii secreta rimatus esset. Quatuordecim quippe, quatuor et decem sunt; et quatuor significant Novum Testamentum, propter quatuor libros Evangelii; decem autem Vetus Instrumentum, propter Decalogum legis. Ex ipso itaque numero voluit Ecclesia sancta demonstrare, omnem sapientiam vel perfectionem Veteris ac Novi Testamenti breviter in his epistolis comprehendi; ideoque numerum qui hæc significabat, excedere noluit.

« Et dicite Archippo: Vide ministerium quod accepisti in Domino, ut illud impleas. »

Dicite, inquit, Archippo episcopo vestro a nostra parte: Vide ministerium quod accepisti, id est attende et considera quale opus suscepisti, in Domino, id est in Domini gratia, vel in his quæ Domini sunt. Noli cæcus esse, noli oculos avertere ab officio ministerii tui, id est ab actione episcopatus tui, sed vide sollicita consideratione quale ministerium suscepisti, ut strenue illud impleas, non otiose vacuum teneas. Archippum præpositum eorum per eos commonet, ut qui regendam Ecclesiam eorum accepit, sit sollicitus de eis. Plebis causa scribitur epistola, et ideo non ad rectorem dirigitur. Vel quia ipse tepide agebat cum pseudoapostolis, idcirco Apostolus non per se, sed ad majorem confusionem per subditos suos, quasi pluris illos faciens, admonet eum.

« Salutatio mea manu Pauli. Memores estote vinculorum meorum. Gratia vobiscum. Amen. »

Salutatio, inquit, scripta mea manu Pauli, id est manu propria, ut ex subscriptione mea sciatis epistolam a me missam. Memores estote vinculorum meorum. Memoriam vinculorum suorum hortatur eos habere, sive ideo, ut ejus exemplo informati, patientiam in tribulationibus habere discant; sive ut orent pro eo, ut citius absolvatur, et ad prædicandum liber discurrat: sive (quod minus est credendum) ut

aliquid ei largiatur, in ipsis vinculis minus necessaria procurare valenti. Deinde: Gratia, inquit, Domini sit vobiscum, ut ea cooperante valeatis opera bona facere. Hucusque protenditur epistola, quæ missa est ad Colossenses. Congruum autem videtur, ut propter notitiam legentium subjiciamus eam, quæ est ad Laodicenses directa, quam, ut diximus, in usu non habet Ecclesia. Est ergo talis.

EPISTOLA PAULI AD LAODICENSES, UT NONNULLI OPINANTUR.

Paulus Apostolus non ab hominibus, neque per hominem, sed per Jesum Christum, fratribus qui estis Laodiceæ, gratia vobis et pax a Deo Patre nostro et Domino Jesu Christo. Gratias ago Christo per omnem orationem meam, quod permanentes estis et perseverantes in operibus bonis, promissionem expectantes in die judicii, neque disturbent vos quorundam vaniloquia insimulantium veritatem, ut vos avertant a veritate Evangelii, quod a me prædicatur. Et nunc faciet Deus, ut qui sunt ex me, ad perfectum veritatis Evangelii sint deservientes, et benignitatem operum facientes, quæ sunt salutis vitæ æternæ. Et nunc palam sunt vincula mea quæ patior in Christo, in quibus lætor et gaudeo, et hoc mihi est ad salutem perpetuam, quod factum est orationibus vestris, administrante Spiritu sancto. Sive per vitam sive per mortem, est mihi vita in Christo, et mori gaudium, et ipse in vobis faciet misericordiam suam, ut eandem dilectionem habeatis, et sitis unanimes. Ergo, dilectissimi, ut audistis præsentiam Domini, ita sentite, et facite in timore, et erit vobis vita in æternum. Est enim Deus qui operatur in vobis, et facite sine peccato quæcunque facitis. Et quod optimum est, dilectissimi, gaudete in Domino Jesu Christo, et cavete omnes sordes in omni lucro. Omnes petitiones vestræ sint palam apud Deum. Estote firmi in sensu Christi, et quæ integra et vera et pudica et casta et justa et amabilia sunt, facite. Et quæ audistis et accepistis, in corde retinete: et erit vobis pax. Salutate omnes fratres in osculo sancto. Salutant vos omnes sancti. Gratia Domini nostri Jesu Christi cum spiritu vestro. Amen. Hanc facite legi Colossensibus, et eam quæ est Colossensium vobis.

IN EPISTOLAM I AD THESSALONICENSES

ARGUMENTUM.

Thessalonica est urbs nobilis in Macedonia, ad quam cum venissent Paulus et Silas, quoniam ibi erat synagoga Judæorum, secundum consuetudinem suam Paulus introivit ad eos, et per Sabbata tria disserabat eis de Scripturis. Et quidam ex eis crediderunt, et adjuncti sunt Paulo et Silæ, et de colen-

tibus, id est proselytis gentilibusque multitudo magna, et mulieres nobiles non paucæ. Zelantes autem Judæi, assumentesque de vulgo viros quosdam malos, et turba facta, concitaverunt civitatem, et assistentes domui Jasonis, quærebant eos producere in populum. Et cum non invenissent eos, trahebant Jasonem et quosdam fratres ad principes civitatis, clamantes,

Quoniam hi sunt qui urbem concitant, et huc venerunt, quos suscepit Jason, et hi omnes contra decreta Cæsaris faciunt, regem alium dicentes esse Jesum. Concitaverunt autem plebem, et principes civitatis audientes hæc. Et accepta satisfactione a Jasone et a cæteris, dimiserunt eos, fratres vero confestim per noctem dimiserunt Paulum et Silam Berrhæam. Taliter conversi sunt Thessalonicenses, et talia mox pro fide pali cæperunt. Nam et postquam apostolos dimiserunt, multa pro Christi nomine pertulerunt. Quorum constantiam Apostolus collaudans scribit illis ab Athenis, et intendit exhortari illos, ut immobiles inter adversa permaneant, ac semper in melius proficiant. Deinde errorem quorundam mortuos suos inconsolabiliter lugentium, quasi non amplius resurrecturos, corrigi; docens communem resurrectionem veraciter esse futuram. Sed et in aliis pluribus vitam illorum atque mores instruit. Et quia ipsi ad obediendum proni erant, ideo non ponit nomen auctoritatis suæ vel officii, sed ut pares admonet. Silvanum autem (id est Silam) et Timotheum idcirco secum ponit, quia in conversione eorum fuerant cum illo participes laboris, vel quia tunc erant cum ipso Athenis. Et hæc epistolam (nisi fallor) primam omnium scripsit. Non enim ante istam invenio illum aliquid scripsisse. Sic autem inchoat :

CAPUT PRIMUM.

« Paulus et Silvanus et Timotheus, Ecclesie Thessalonicensium in Deo Patre et Domino Jesu Christo. Gratia vobis et pax. »

Paulus et duo socii ejus Silvanus et Timotheus mittunt hanc epistolam Ecclesie Thessalonicensium. Judæorum proprie Synagoga dici solet, quamvis et Ecclesia dicta sit. Nostram vero apostoli nunquam Synagogam dixerunt, sed semper Ecclesiam, sive discernendi causa, sive quod inter congregationem, unde Synagoga, et convocationem, unde Ecclesia nomen accepit, distet aliquid, quod scilicet pecora congregari solent, quorum et greges proprie dicimus; convocari autem magis est utentium ratione, sicut hominum. Paulus et socii ejus dirigunt has litteras Ecclesie Thessalonicensium, consistenti in Deo Patre et Domino Jesu Christo, id est in fide et charitate Patris et Filii, subintelligitur et Spiritus sancti, quo unctus est Christus. Vel in Deo Patre et Filio mittit Paulus et socii ejus hanc epistolam. Gratia, inquit, et pax sit vobis. Bene primo gratiam dicit, deinde pacem nominat, quia sine gratia Dei ad pacem reconciliationis pervenire non possumus, imo nihil pacificum nisi per gratiam ejus habere valemus. Gratia enim gratis datur sine præcedentibus meritis, et per hanc dum culpas remittit, accedimus ad pacem reconciliationis. Potest et ita intelligi: Gratia et pax a Deo sit vobis, ut qui humana gratia et sæculari pace privati estis, apud Deum gratiam et pacem habeatis.

« Gratias agimus Deo semper pro omnibus vobis, memoriam vestri facientes in orationibus

nostris sine intermissione, memores operis fidei vestræ et laboris et charitatis et sustinentiæ spiritus Domini nostri Jesu Christi, ante Deum et Patrem nostrum, scientes, fratres dilecti a Deo, electionem vestram, quia Evangelium nostrum non fuit ad vos in sermone tantum, sed in virtute et in Spiritu sancto, et in plenitudine multa. sicut scitis, quales fuerimus in vobis propter vos. »

Solito more incipit a gratiarum actione, quia multam Dei gratiam in his videt refulgere. Et idcirco Deum primo laudat, qui dedit eis gratiam, deinde ipsos, qui fide et operibus secuti sunt eum. Ac si dicat: Tenete quæ tenetis, agite quæ agitis, quoniam talia sunt, ut pro eis Deo gratias agamus. Agimus enim gratias et laudes Deo non ad horam, sed semper pro omnibus vobis, majoribus et mediis et minoribus, vel viris et mulieribus, quia gratiam quam vobis primo contulit, adhuc in vobis conservat et augmentat. Ab ipso enim sunt omnia bona quæ habetis, et ideo gratias illi pro his referimus. Nos dico, facientes memoriam vestri in orationibus nostris, et hoc sine intermissione, id est nunquam intermittimus facere memoriam vestri, quotiescunque oramus. Nam sumus memores operis fidei vestræ, id est quomodo fides vestra non est otiosa, sed semper bonum opus agit, et ideo libenter pro vobis oramus. Memores, inquam, sumus operis vestri et laboris, quem in ipso opere ducitis, id est mente retinemus, quomodo bene operantes laboratis, et charitatis, id est fraternæ dilectionis, quam bonis operibus ostenditis. Vel laboris tolerantiae adversitatum, et charitatis qua inimicos diligitis, et sustinentiæ, id est exspectationis spei Domini nostri Jesu Christi, quoniam bona facientes et mala patientes, exspectatis longanimiter supernum illud præmium, quod a Christo speratis accipere cum venerit. Et hæc omnia facitis ante Deum, quia in his non humanos favores appetitis, sed omnipotentis Dei præsentiae intenditis. Præsentem enim Dominum adesse cogitatis, et vos ante conspectum ejus omnia facere consideratis. Vel nos sumus memores vestri in orationibus ante Deum; ante Deum, qui nos creavit; et Patrem nostrum, qui nos adoptavit. Ita sumus memores vestri, scientes electionem vestram, id est scientes vos esse electos, et ad æternam vitam prædestinatos, o fratres dilecti a Deo, id est quos Deus diligit, quia paternis flagellis vos ad æternam hæreditatem erudit. « Quem enim diligit Dominus, corripit; et flagellat omnem filium quem recipit (Hebr. xii; Prov. iii). » Vel memores sumus vestri, scientes electionem vestram, id est scientes quomodo Deus per doctrinam nostram vos elegit de multitudine cæterorum, qui sunt in infidelitate relictii. Vere Deus, prædicantibus nobis, vos elegit, tangens interiorius corda vestra dono sancti Spiritus, quia Evangelium nostrum, id est prædicatio nostra non fuit ad vos in sermone tantummodo, sed etiam in virtute operis, vel in virtute miraculorum, et in Spiritu sancto, quia per impositionem manuum

nostrarum dabatur vobis Spiritus sanctus; *et in plenitudine multa*, quia plenarie vos instruximus, et spiritalibus gratiis, auctore Deo, replevimus, et copiose in vobis talia operati sumus; *sicut vospsi scitis* et testes estis, *quales*, id est quam religiosi et mirifici fuerimus in vobis propter vos convertendos et instruendos, ut non solum ratione verborum, sed et exemplo operum nostrorum vos informaremus.

« Et vos imitatores nostri facti estis et Domini, excipientes verbum in tribulatione multa cum gaudio Spiritus sancti, ita ut facti sitis forma omnibus credentibus in Macedonia et in Achaia. A vobis enim diffamatus est sermo Domini, non solum in Macedonia et in Achaia, sed et in omnem locum fides vestra, quæ est ad Deum, profecta est, ita ut non sit nobis necesse quidquam loqui. Ipsi enim de nobis annuntiant, qualem introitum habuerimus ad vos, et quomodo conversi estis ad Deum a simulacris, servire Deo vivo et vero, et exspectare Filium ejus de cœlis (quem suscitavit ex mortuis) Jesum, qui eripuit nos ab ira ventura. »

Ipsi scitis quales fuerimus vobis propter vos informandos. *Et vos facti estis imitatores nostri, et quod est amplius, imitatores Domini, excipientes verbum nostræ prædicationis in multa tribulatione vestra vel nostra, cum gaudio Spiritus sancti*, id est quod vobis Spiritus sanctus de spe cœlestis mercedis inspiravit. Et propterea non immerito supradiximus nos scire electionem vestram, id est vos esse de electis Dei, quia non estis paleæ, sed grana. Non solum enim nostri, sed et Christi imitatores facti estis, dum nulla vos tribulatio a susceptione verbi cœlestis revocare valeret, sed potius gauderetis in tribulationibus pro verbo. Nam excepistis illud, id est ex omnibus, vel extra omnis reverenter susceptis in tribulatione multa, quæ vobis propter verbum est illata. Et licet tribulationes perferret vestra caro, animus tamen gaudebat in Spiritu sancto. Et in his Dominum atque nos imitati estis, *ita ut facti sitis forma*, id est exemplum permanendi constanter in fide inter adversa, *omnibus credentibus* qui sunt in Macedonia et in Achaia. Et ideo vos qui tot alii exemplum fidei et patientiæ facti estis, videte ne deficiatis, sed semper robustiores in Christo perduretis. Vere forma facti estis multis, nam effectus hoc indicat. Nam *sermo Domini*, id est Dominicæ prædicationis, egrediens a vobis, *diffamatus est non solum in Macedonia et in Achaia, sed et in omnem locum* vobis affinem in circuitu *profecta est*, id est transivit audita fides vestra quæ est ad Deum se extendens. Et ita pervulgata est apud omnes, *ut non sit nobis necesse quidquam loqui* de vobis ad commendandum aliis bonam vitam vestram, ut eos ad fidem et religiosam conversationem exemplo vestri provocemus. Vere non est necesse nobis ut nos loquamur, nam ipsi loquuntur. *Ipsi enim* qui in circuitu degunt, *annuntiant de nobis*. id est narrant alii aliis, *qualem in-*

troitum habuerimus ad vos, id est quanta virtute miraculorum et abundantia spiritualium bonorum accesserimus ad vos convertendos, *et quomodo*, id est quam facile, aut quam devote *conversi estis ad Deum* et quam facile doctrina nostra introierit ad corda vestra. *Conversi estis ad Deum a simulacris*, id est ad cultum Dei a cultura idolorum, *servire*, id est ut serviatis Deo, non mortuo et falso, sicut est Jupiter vel Hercules et cæteri, quos ex mortuis hominibus pagani deos constituerunt; *sed vivo et vero*, quia naturaliter Deus est, et exspectare, id est ut bene operantes exspectetis longanimitè sine murmuratione piis desideriis *Filium ejus Jesum de cœlis venturum reddere mercedem servis suis, quem Pater suscitavit ex mortuis; et qui Filius ideo est exspectandus a nobis remunerator*, quia delendo peccata nostra *eripuit nos ab ira ventura*, ab animadversione futuræ ultionis. Ira enim Dei non perturbatio est, sed iudicium quo irrogatur pœna pro peccatis.

CAPUT II.

« Nam ipsi scitis, fratres, introitum nostrum ad vos, quia non inanis fuit, sed ante passi multa et contumeliis affecti (*Act. xvi, xvii*), sicut scitis, in Philippis, fiduciam habuimus in Deo nostro loqui ad vos Evangelium Dei in multa sollicitudine. Exhortatio enim nostra non de errore, neque de immunditia, neque in dolo; sed sicut probati sumus a Deo, ut crederetur nobis Evangelium, ita loquimur, non quasi hominibus placentes, sed Deo qui probat corda nostra. »

Alii nuntiant qualem introitum habuerimus ad vos, nam vos ipsi fratres scitis cum qualis fuerit, quia scilicet non fuit inanis, id est infructuosus et levis; sed ante quam ad vos veniremus, passi sumus multa et contumeliis affecti sumus in Philippis, id est in urbe Philippensium, de qua migravimus ad vos. Ibi enim ego et Silas ad iudices contumeliose tracti sumus, ita ut tunicæ nostræ scinderentur, et publice virgis cæsi atque in carcerem trusi, et in ligno pedes constricti. Hæc et alia passi sumus in Philippis, antequam ad vos accederemus, *sicut et vos scitis*. Et patientia talium afflictionum vel injuriarum confortati, *habuimus fiduciam* et audaciam non in viribus nostris, sed in Deo nostro, id est in ejus virtute et potentia loqui ad vos, id est prædicare Evangelium Dei in multa sollicitudine, ne scilicet priusquam vos bene instruerem, ab infidelibus impediret, et tamen fiducialiter et audacter locuti sumus vobis, quia *exhortatio nostra non est de errore*, ut aliquem errorem cujuslibet pravæ sectæ suademus: *neque de immunditia*, ut immundam vitam in carnis pollutione exhortemur; neque in dolo, ut aliud in ore, et aliud in corde habeamus. Nam etiam veritatis est in dolo, quando non pro amore veritatis et utilitate audientium prædicatur, sed ut gloria vel aliquod lucrum acquiratur. Exhortatio nostra non est de errore, quia non exhortamur aliquem ut erret in veritate, neque de immunditia, quia nemini sua-

demus ut seipsum maculet; neque in dolo, quia A fraudulenti simulationem in verbis non habemus; sed sicut probati, id est probi habiti sumus a Deo ut crederetur, id est committeretur nobis Evangelium, ita loquimur, hoc est: sicut illi quos approbavit et elegit non per errorem, vel per immunditiam, vel per dolum, sed per veritatem fidei et munditiam vitæ ac simplicitatem cordis: sic prædicamus aliis Evangelium, non quasi hominibus placentes, id est non sicut illi qui favorem hominum appetunt, sed Deo placere studentes, qui probat, id est scrutatur et inspicit corda nostra et cogitationum secreta. Ipse enim qui occulta cordium rimatur, novit quia non hominibus, sed illi placere quærimus. Et si hominibus placere quærimus, hoc non propter nos, sed propter ipsorum salutem agimus.

Neque enim aliquando sumus in sermone adulationis, sicut scitis; neque in occasione avaritiæ, Deus testis est; nec quærentes ab hominibus gloriam, neque a vobis, neque ab aliis, cum possemus oneri vobis esse, ut Christi apostoli; sed facti sumus parvuli in medio vestrum, tanquam si nutrix foveat filios suos. Ita desiderantes vos cupide, volebamus tradere vobis non solum Evangelium Dei, sed etiam animas nostras, quoniam charissimi nobis facti estis.

Vere non sumus ex prædicatione quærentes placere hominibus, sed Deo; neque enim fuimus aliquando, id est unquam in sermone adulationis, ut per adulatoria verba placeremus hominibus, palpando vitia eorum sive laudando, sicut scitis; neque fuimus in occasione avaritiæ, id est non prædicavimus ea intentione vel occasione, ut res vestras nobis congregaremus, et inde nobis Deus est testis, qui novit arcana pectoris; nec fuimus aliquando quærentes ab hominibus gloriam; et hoc ostendo per partes hominum, quia neque a vobis, neque ab aliis. Quas vires nocendi habeat humanæ gloriæ amor, non sentit, nisi qui ei bellum indixerit. Quia, etsi cuiquam facile est laudem non cupere dum negatur, difficile tamen est in ea non delectari cum offertur. Justus autem quisque aut tantum temporalem gloriam non habet, aut hanc sub semetipso frangit, si habet, ut honori suo liber emineat, nec ei victus delectatione succumbat. A vobis, inquam, non quæsivimus aliquid terrenum, cum tamen possemus vobis oneri esse, id est vos gravare exigendo a vobis stipendia, ut cæteri apostoli Christi exigunt vel accipiunt ab auditoribus suis. Nos nec rebus vestris pasci, nec laudibus vestris magnificari quæsivimus; sed facti sumus parvuli in medio vestrum, id est apostolatus nostri gloriam ante oculos vestros humiliavimus, et magnitudinem nostri sensus ad parvitatem vestræ capacitatis inclinavimus, tanquam si nutrix foveat filios suos, quæ sedet in terra, et tenet in gremio filios ac lacte nutrit, et blandiens consolatur, atque balbutiendo informat ad loquendum. Sic enim propter vos humiliati sumus, et materno affectu vos in sinu pietatis patienter fovendo portavimus, et lacte

inchoationis potavimus, atque blanditiis promissorum cælestium vos consolati sumus, et de humanitate Christi vobis quasi balbutivimus, ut ad loquendum verbum divinitatis ejus vos instrueremus. Sunt nutrices foventes quidem, sed non filios suos. Et item sunt matres nutricibus dantes, non foventes filios suos. Apostolus vero germano et pingui affectu charitatis et nutricis personam suscipere videtur, dicendo foveat, et matris, addendo filios suos. Et nutrici ergo se comparavit, quia alebat; et filios suos addidit, quia pepererat, dicens: Filioli mei, quos iterum parturio (Galat. iv). Assimilati, inquit, sumus nutrici proprios natos alenti, quia ita desiderantes vos cupide, sicut nutrix desiderat filios suos, volebamus tradere vobis non solum Evangelium Dei, sed etiam animas nostras, id est non solum prædicationem veritatis, sed etiam totam vitam nostram expendere in salute vestra, et hoc ideo, quia facti estis charissimi nobis, propter meritum vestræ sanctitatis, quam ab exordio vestræ conversionis protinus arripuistis.

Memores enim estis, fratres, laboris nostri et fatigationis: nocte et die operantes, ne quem vestrum gravaremus, prædicavimus in vobis Evangelium Dei. Vos testes estis et Deus, quam sancte et juste et sine querela vobis qui credidistis, fuimus; sicut scitis, qualiter unumquemque vestrum tanquam pater filios suos, deprecantes vos et consolantes testificati sumus, ut ambularetis digne Deo, qui vocavit vos in suum regnum et gloriam. Ideo et nos gratias agimus Deo sine intermissione, quoniam cum accepissetis a nobis verbum auditus Dei, accepistis illud non ut verbum hominum, sed sicut est vere verbum Dei, quia operatur in vobis, qui credidistis in ipsum.

Vere facti sumus parvuli vobis ut nutrix, quia humiliati sumus in labore, sicut nostis. Vel ita: Vere animas nostras parati eramus tradere vobis, sicut effectus operum nostrorum indicabat, quia incessanter laborabamus pro utilitate vestra, quemadmodum recordamini. Memores enim estis, o fratres, laboris nostri, quem apud vos habuimus, et fatigationis. Est plerumque labor sine fatigatione, sed labor noster non fuit talis, et non fuit levis et momentaneus, sed gravis et continuus. Assidue enim et in prædicatione, et in manuum opere laboravimus, et ideo præ nimietate jugis laboris fatigabamur, nec tamen deficiebamus. Nam nocte et die operantes manibus nostris, unde victum haberemus, ne quem vestrum, id est ex vobis gravaremus, accipientes ab eo stipendium, prædicavimus in verbis Evangelium Dei, ut exemplo nostro vos informaremus ad laborandum manibus propriis unde vivatis et indigentibus ministretis, atque falsos apostolos ventri servientes repellatis. Nam vos estis testes nobis et ipse Deus, qui novit omnia, quam sancte, quantum ad puritatem mundissimæ conversationis, fuerimus vobis; et quam juste, quantum ad æquitatem erga proximos servandam, faciendo debita; et

quam *sine querela*, id est quam innocenter et irreprehensibiliter *vobis fuimus qui credidistis*, quia nihil fecimus vobis, unde possetis conqueri de nobis; *sicut scitis*, vel sine querela fuimus vobis, quia nunquam questi sumus de vobis, dum imbecillitatem vestram portaremus. Taliter fuimus conversantes vobis, id est ad utilitatem vestram. Sicut scitis, id est ita hæc scitis, sicut et alia quæ subjungimus, scilicet *qualiter*, monebamus amicabiliter *unumquemque vestrum* tanto affectu, *tanquam si pater filios suos* instruat; nos dico, *deprecantes vos*, ut in melius proficeretis, *et consolantes* in tribulationibus, ne deficeretis. Et hæc facientes, *testificati sumus*, id est sub testimonio divinæ majestatis vel sanctorum vos adjuravimus, *ut ambularetis* in via recta, proficiendo et ad cœlestem patriam tendendo ambularetis, inquam, *digne Deo*, id est per viam quæ esset digna perducere ad Deum, vel sicut dignum est electos Dei ambulare, *qui vocavit vos in regnum suum et gloriam*, ut per iter virtutum festinetis ad eum, quatenus in regno ejus et in gloria ejus perenniter cum eo maneatis. Vel in regnum suum, id est in præsentem Ecclesiam vos vocavit, et post in gloriam suam, id est in angelorum societatem. Et quia vos ad tantam beatitudinem vocavit, vosque libenter sequi vocantem cœpistis, ideo non solum vos, sed et nos *agimus sine intermissione gratias Deo*, qui hoc fecit in vobis per gratiam suæ aspirationis, *quoniam cum accepissetis a nobis verbum auditus Dei*, id est Evangelium, in quo audistis notitiam Dei, *accepistis illud non ut verbum hominum*, id est non inutiliter et negligenter, sicut verba hominum solent accipi, vel non ut verbum hominum, id est quasi a sapientibus esset, *sed sicut est vere verbum Dei*, id est ita reverenter et honorifice, sicut illud quod revera locutus est Deus. Quod effectus indicat, quia ipse Deus *operatur* quotidie bona opera *in vobis, qui credidistis*, tendentes in ipsum per fidem et desideria. *Gratias*, inquit, *agimus Deo sine intermissione, quoniam cum accepissetis*, etc. Quid est quod hic Deo gratias agit? Nempe vanum est atque inane, si qui gratias agit pro hoc quod ipse non fecit. Sed quia hoc vanum et inane non est, profecto Deus, cui de hoc opere gratias agit, ipse fecit, ut qui percepissent ab Apostolo verbum auditus Dei, exciperent illud non ut verbum hominum, sed sicut est vere verbum Dei. Dicit igitur: *Operatur* in cordibus hominum vocatione illa secundum propositum suum, ut non inaniter audiant Evangelium, sed eo audito convertantur et credant, excipientes non ut verbum hominum, sed ut verbum Dei sicut et vere est. Hucusque multa dixit contra pseudoapostolos, significans in eis esse cuncta vitia, quæ in se et sociis suis esse denegavit, ac deesse illis omnia virtutum bona, quæ in se et comitibus suis esse demonstravit. Jam vero ne Thessalonicenses pro sua vel apostolorum tribulatione moveantur, subjungit.

« Vos enim imitatores facti estis, fratres, Eccle-

« siarum Dei quæ sunt in Judæa in Christo Jesu, « quia eadem passi estis et vos a contribulibus « vestris, sicut et ipsi a Judæis. Qui et Dominum « occiderunt Jesum et prophetas, et nos persecuti « sunt, et Deo non placent, et omnibus hominibus « adversantur, prohibentes nos gentibus loqui ut « salvæ fiant, ut impleant peccata sua semper. « Pervenit enim ira Dei super illos usque in « finem. »

Contra falsos apostolos latenter fuerat locutus ut eos non susciperent, nunc contra Judæos manifeste loquitur, ut eos non metuant. Vere, inquit, in ipsum credidistis, quia *vos estis facti imitatores Ecclesiarum Dei, quæ sunt in Judæa*, id est in terra Judæorum, *in Christo Jesu*, id est in instructione ipsius Christi. In hoc estis imitatores, *quia eadem passi estis et vos*, quæ passæ sunt et illæ ecclesiæ. Passi, inquam, estis *a contribulibus vestris*, id est ab illis, de quorum tribubus originem ducebatis, *sicut et ipsi a Judæis*. Cives enim et amici vel consanguinei vestri vos persecuti sunt, sicut et illos sui. Nec mirum si Judæi more suo fideles persequuntur, *qui et ipsum Salvatorem Dominum Jesum occiderunt* et prophetas antea, qui prænuuntiabant eum; et nos apostolos postea *persecuti sunt*, qui prænuuntiabamus illis eum advenisse (*Act. vii*); et ideo ne miremini, sed patienter sustinete, si et vos persequuntur, qui semper persecuti sunt, et licet æmulatione legis hæc facere videantur, *Deo tamen non placent*, cujus gratiam impugnant. Nec tantum Deo rebelles sunt, sed *et omnibus hominibus*, id est salutem omnium hominum *adversantur, prohibentes*, in quantum prævalent, *nos loqui*, id est ne loquamur verbum Dei *gentibus ut credant et salvæ fiant*; et ita hostes sunt omnibus, dum conantur facere ut verbum salutis per nos ad neminem veniat, sed omnes in perditione relinquuntur. Et hoc ex more faciunt, *ut impleant sua peccata semper*, id est peccata peccatis incessanter accumulunt usque ad consummatam plenitudinem, quando pro his mittitur in gehennam (*Matth. xxiii*). Ideo autem semper peccata sua implent, quia ira Dei, ut excæcarentur, pervenit super illos, id est jam olim effusa est super corda illorum, ex quo reprobaverunt Salvatorem qui missus eis fuerat. Quando enim patres eorum dixerunt: « Sanguis ejus super nos et super filios nostros (*Matth. xxvii*), » tunc pervenit ira Dei super illos, et durabit usque in finem, quando, prædicante Elia, recipient gratiam. Vel ita: Ut impleant peccata sua semper. Quadraginta enim annos post passionem Domini dedit Deus Judæis ad pœnitentiam: illis transactis, cum credere nollent, completa sunt peccata eorum, ut pro his perire deberent. Quando autem hoc dixit Apostolus, stabat Jerusalem, nec erant peccata eorum adhuc completa, sed completa sunt, venientibus Romanis, unde subdit: *Pervenit enim*, id est antequam resipiscerent venit, antequam putarent venit *ira Dei super illos*, opprimens eos. Ira Dei est ultio quæ per Romanos facta est, quæ

ira perdurat super illos captivos usque in finem sæculi, vel hæc temporalis ira idcirco dicitur pervenisse super illos captivos, quia sequitur æterna, cum sine fine post hanc vitam puniuntur in inferno. Pervenit ira præsentis ultionis, perdurans super illos usque in finem; sequitur ira futuræ damnationis, perdurans sine fine.

« Nos autem, fratres, desolati a vobis ad tempus horæ, aspectu, non corde, abundantius festinamus faciem vestram videre cum multo desiderio, quoniam volumus venire ad vos, ego quidem Paulus et semel et iterum, sed impedit nos Satanas. Quæ est enim nostra spes aut gaudium, aut corona gloriæ? Nonne vos ante Dominum nostrum Jesum Christum estis in adventu ejus? vos enim estis gloria nostra et gaudium. »

Vos multa passi estis a civibus vestris, sed nos, o fratres, desolati, id est sine consolatione facti sumus a vobis. Desolatos non fecistis tristitia quam habuimus de tribulationibus vestris, antequam sciremus constantiam fidei vestræ. Desolati sumus ad tempus horæ quoniam horaria, et non diurna fuit vel erit hæc nostra desolatio. Desolati, inquam, sumus ore, quia non possumus vobis præsentialiter loqui; et aspectu, quia non videmus faciem vestram; non corde, quia cor nostrum vos semper intuetur et est vobiscum. Os et aspectus cessat, sed cor et sollicitudo non quiescit. Nos ita desolati, festinamus abundantius, id est multo magis acceleravimus videre faciem vestram, ne sit immutata, id est ne forte defeceritis in tribulationibus, quas passi estis a civibus vestris. Festinavimus, inquam, videre faciem vestram, id est vos videre facie ad faciem, videre præsentiam vestram, cum multo desiderio exhortandi vos, et ad constantiam perseverantiæ festinavimus quidem, sed quod festinabamus implere nequivimus. Quoniam volumus quidem omnes venire ad vos, sed non potuimus; ego quidem Paulus, qui plus aliis curro et devotior sum, volui et semel et iterum ad vos venire, sed non potui, quia impedit nos Satanas, qui interpretatur adversarius, id est diabolus, qui saluti semper hominum adversatur, opposuit nobis impedimenta. Ideo magis evigilate adversus insidias ejus, ne et iter vestrum, per quod ad cælestem patriam tenditis, impediatur. Nequaquam per semetipsum Satanas præpedire vias tanti Apostoli potuit, sed occultæ dispensationis nutibus dum adversaretur, nesciens deservivit, ut nimirum Paulus ad alios vellet accedere nec valeret, eis a quibus recedere non poterat prodesset. Ideo, inquit, volumus ad vos venire, et ideo Satanas obstitit, quia quæ est spes nostra nisi vos? id est pro qua re nunc speramus quod in futuro mercedem accepturi sumus, nisi pro vobis? aut quod est gaudium nostrum? id est unde nunc et in futuro gaudeamus, nisi de sanctitate vestra? aut quæ est nostra corona gloriæ, quæ victoribus dabitur, nisi vos? Nonne vos nobis hoc estis ante Dominum nostrum

A Jesum Christum, id est ante tribunal summi judicis in adventu ejus? Quia ante justum judicem nimirum gloriam tunc inveniemus, quam nunc in vestris moribus studio prædicationis exquirimus, et propter bonam conversationem vestram nostro labore præparatam coronabimur. Vere tunc eritis nobis corona gloriæ, quia et modo estis vos gloria nostra apud ecclesias, et gaudium apud nos. Gloriamur enim apud alios de profectu vestræ fidei et sanctitatis, et gaudemus in cordibus nostris. Sed et in futuro sæculo eritis nobis æterna gloria et perenne gaudium.

CAPUT III.

« Propter quod non sustinentes amplius, placuit nobis remanere Athenis solos, et misimus Timotheum, fratrem nostrum et ministrum Dei in Evangelio Christi, ad confirmandos vos et exhortandos pro fide vestra, ut nemo moveatur in tribulationibus istis. Ipsi enim scitis quod in hoc positi sumus. Nam et cum apud vos essemus, prædicebamus vobis passuros nos tribulationes, sicut et factum est, et scitis. Propterea et ego amplius non sustinens, misi ad cognoscendam fidem vestram, ne forte tentaverit vos is qui tentat, et inanis fiat labor noster. »

Dixi quia desolati sumus a vobis, qui estis gloria nostra. Propter quod ego et Silvanus non sustinentes amplius, quia grave pondus erat nobis, dum nesciremus quid ageritis, placuit nobis duobus remanere solos Athenis, et misimus ad vos Timotheum, qui vos in proposito vestro confirmaret, et nobis certitudinem de vobis referret. Non modo cum hac epistola miserunt eum, sed antea. Alioquin non cum eis salutasset eos in postremo. Misimus Timotheum, qui veraciter suscipiendus est et audiendus, quia est frater noster, id est habens partem in cælis nobiscum, et est minister Dei in Evangelio, id est ministrans fidelibus ea quæ Dei sunt in prædicatione Evangelii. Hunc misimus ad confirmandos vos, ut in his staretis in quibus eratis, et exhortandos, ut ad meliorem proficeretis. Misimus eum confortare vos et exhortari pro fide vestra tenenda et defendenda, ut nemo vestrum moveatur a constantia sinceræ fidei in tribulationibus istis, quas et nos et vos ad tempus in exilio præsentis sæculi toleramus. Nec debetis in his ab intentione vestra moveri, quia vos ipsi scitis quod in hoc positi sumus, ut adversa temporaliter sustineamus. Hinc est quod per Jeremiam de antiquo hoste dicit electorum populus: « Posuit me quasi signum ad sagittam (Thren. III). » Fidelis enim populus quasi signum ad sagittam hosti suo est positus, quia semper velut sagittis impetitur, dum ejus persecutionibus affigitur. Qui enim in hac vita assidua mala tolerat, quasi in signum positus, sagittas suscipit ferientis. Unde nunc recte prædicator egregius cum persecutionum mala toleraret, atque sub persecutore de adversario gemeret, teneram discipulorum mentem suis afflictionibus consolans ait: *Ipsi enim scitis*

quod in hoc positi sumus. Ac si aperte dicat : Quid in hoc tempore vulnera nostra miramini, qui si æterna gaudia quærimus, huc ad hoc venimus ut feriamur? Hoc, inquit, scitis. Nam non tantum absentes hoc dicimus, sed et cum essemus præsentibus apud vos, prædicebamus et prænuntiabamus vobis passuros nos tribulationes, id est quia tribulationes passuri eramus, sicut et factum est postea, et vos ipsi scitis, quia experimento in vobis ipsis hoc probatis. Et sicut nos præscivimus tribulationes nos fore passuros, nec fugimus, ita vos qui scitis quod in hoc positi sumus, nolite moveri, sed immobiles in proposito vestro perdurate, patienter omnia tolerantes. Et quia nos prædictas tribulationes jam passi sumus, propterea ne vos pro nostris tribulationibus terreamini, etiam nisi ad vos, ego amplius non sustinens me esse incertum de vobis, quia incertus formidabam tribulationes nostras fore causas defectus vestræ fidei, nisi Timotheum non modo cum hac epistola, sed prius ad cognoscendam fidem vestram, id est ut cognosceret et renuntiaret mihi si permaneretis in fide, et si ipsa fides vestra esset fortis ac infirma, ne forte tentaverit vos et tentando superaverit is qui tentat, id est deceptor antiquus, cujus officium est tentare homines et seducere. Deus autem intentator malorum (Jacob. 1) tentamentorum est, ipse enim neminem tentat, secundum eam scilicet tentationem, quæ deceptionis vel seductionis est. Secundum vero eam tentationem quæ probationis est, tentavit Deus Abraham (Gen. xxii). Sed ego timui ne vos tentaret is deceptor, qui tentat ad decipiendum; et inanis, id est infructuosus fuit in vobis labor noster, quem pro vobis pertulimus, nec est ne deceptor succumberetis, et non prodesset vobis quidquid in conversione et eruditione vestra laboravimus.

« Nunc autem veniente Timotheo ad nos a vobis, et annuntiante nobis fidem et charitatem vestram, et quia memoriam nostri habetis bonam, semper desiderantes nos videre, sicut nos quoque vos, ideo consolati sumus, fratres, in vobis, in omni necessitate et tribulatione nostra per fidem vestram, quoniam nunc vivimus, si vos statis in Domino. Quam enim gratiarum actionem possumus Deo retribuere pro vobis in omni gaudio, quo gaudemus propter vos ante Deum nostrum, nocte ac die abundantius orantes, ut videamus faciem vestram, et compleamus ea quæ desunt fidei vestræ? Ipse autem Deus et Pater noster et Dominus Jesus Christus dirigat viam nostram ad vos. Vos autem Dominus multiplicet, et abundare faciat charitate in invicem et in omnes, quem admodum et nos in vos ad confirmanda corda vestra sine querela in sanctitate ante Deum et Patrem nostrum in adventu Domini nostri Jesu Christi cum omnibus sanctis ejus. Amen. »

Priusquam sciremus quid ageretis, desolati fuimus a vobis. Sed nunc, revertente Timotheo, quem ad vos miseramus, et renuntiante bona de vobis,

consolati sumus. Nunc autem, veniente Timotheo ad nos a vobis, et annuntiante nobis fidem et charitatem vestram, id est referente nobis quia inter adversa bene permanetis in fide, nec deseruistis charitatem, qua Deum et proximos vel etiam inimicos diligitis, et referente quia memoriam nostri bonam habetis, id est nostri memores estis, et nihil nisi bonum de nobis cogitatis, semper optantes nos videre, sicut et nos quoque desideramus vos cernere, ideo quia hoc de vobis audivimus, consolati sumus, fratres, in vobis, qui prius eramus desolati. Consolati, inquam, sumus per fidem vestram, id est constantia fidei vestræ est causa ut nos consolationem habeamus in omni necessitate, id est penuria, quam patimur in victu et vestitu, et in omni tribulatione, quæ nobis exterius ab adversariis inferitur. Et vero consolati sumus quoniam nunc in hac miseria vivimus quasi jam in cælo essemus, et quasi jam nos a mortuis resuscitados æstimamus, si vos statis, id est si statum rectitudinis perseveranter in Domino tenetis. Nolo stetis in nobis, sed in Domino, quia neque qui plantat est aliquid, neque qui rigat, sed qui incrementum dat, Deus (I Cor. iii). O quam mollia viscera gestabat Apostolus, quando circa filios suos tanto æstu amoris inhiabat, ut diceret : Nunc vivimus, si vos statis in Domino. Metuebat nimis, ne ejus discipuli in prædicatore suo tot persecutionum probra cernentes, fidem in eo despicerent, contra quam imminentes passionum contumeliæ prævalerent. Et idcirco nimis dolebat in tormentis, sed magis filiis de tormentorum suorum tentatione metuebat; parvipendebat in se plagas corporis, dum formidaret in filiis plagas cordis. Ipse patiendo suscipiebat vulnera tormentorum, sed filios consolando curabat vulnera cordium. Pensemus ergo cujus charitatis fuit filiorum salutem inter sua detrimenta requirere, inter dolores proprios aliis timuisse, et statum mentis in primis etiam ex sua dejectione custodire. Qui securus erat de mercede sua, etsi discipuli caderent, et tamen velut si in casu illorum mercedem laboris sui perderet, in statu ipsorum dixit se vivere, id est vitæ præmium habere. Nolebat enim vivere illis cadentibus, sed illis stantibus in Domino, ut fructus ejus esset illis integer, et merces ejus apud Deum plena gaudiorum. Consolati, inquit, sumus per fidem vestram, nam Deo non possumus dignas grates ex hoc reddere. Quam enim gratiarum actionem possumus Deo retribuere pro vobis bene stantibus, positi in omni gaudio, quo gaudemus propter vos ante Deum nostrum, cujus oculis manifesta sunt occulta cordium? Non enim ante homines est gaudium nostrum, quia foris apparemus quasi tristes propter adversa quibus circumdamur, sed intus ante Dominum gaudemus semper de profectu vestro. Nec tantum agimus illi pro vobis quanta scunquæ gratias possumus, sed et nocte ac die sumus abundantius orantes, ut veniamus ad vos et videamus faciem vestram, atque ore ad os vobis loquamur, et compleamus ea quæ

desunt fidei vestrae, quæ olim non potuimus complere, quia eratis parvuli, et quia longo tempore vobiscum manere nequivimus. Quia ergo fidem firmiter, qui jam adhuc totam perfecte non didicistis, retinere inter adversa studuistis, ideo cupimus ad vos pervenire, et ea quæ desunt vestrae fidei supplere. Ex hoc loco apparet, quia quod superius ait, « ita ut non sit nobis necesse quidquam loqui (supra 1), » non idcirco dixit quod ipsi jam omnia fidei mysteria sufficienter scirent, sed ut diximus, propterea hoc dicit, quia non erat necesse ut ipse de illis quidquam loqueretur aliis, cum illos fama procul celebraret. Nos, inquit, oramus faciem vestram videre, et fidem vestram ad plenum instruere, sed Deus faciat quod oramus. *Ipsæ autem Deus*, Creator noster, qui potest, et *Pater noster* cælestis, qui vult bonum, et paterno affectu nos diligit ac regit, et *Dominus Jesus Christus*, qui nos ab hoste redemit, et suo domino mancipavit, dirigat, id est directam, ab impedimentis liberam faciat *viam nostram ad vos*. Sed vos Dominus, id est Spiritus sanctus, multiplicet in numero fidelium, et abundare vos faciat *charitate in invicem*, id est inter vos vicissim, et in omnes, et in eos qui vobis adversantur, et hoc faciat ita perfecte, quemadmodum et nos abundare fecit *charitate in vos*. Et istam charitatis abundantiam det vobis *ad confirmanda corda vestra*, id est ad hoc ut per ipsam dilectionem confirmetur corda vestra *in sanctitate*, id est in omni puritate atque munditia, et honorum actuum observatione, *sine querela*, id est sine crimine, ut sitis tam innocentes, ut nemo de vobis possit jure conquiri. Et tales sitis *ante Deum*, id est in oculis Dei, qui veritatem inspicit, nec latet eum aliquid. Sunt enim qui sancti videntur coram hominibus, sed non coram Deo (Matth. xxiii). Vos autem estote veraciter sancti et sine querela, id est irreprehensibiles ante oculos Dei, qui vos cernit et creavit, et Patris qui nos adoptavit. Tales esse studete ante Deum et Patrem nostrum in adventu Domini nostri Jesu Christi, cum omnibus sanctis ejus, id est quando Dominus Jesus veniet ad iudicium cum omnibus sanctis suis. Quales enim quisque præsentem vitam finierit, talis in die iudicii apparebit. Illi autem non sine querela esse apparebunt, de quibus iudex queretur, dicens: « Esurivi, et non dedistis mihi manducare (Matth. xxv). » Vel, cum omnibus sanctis agite quæ dixi, quia sic agunt omnes sancti. Ad confirmationem omnium quæ præmissa sunt, subjungitur: Amen, quod interpretatur *vere* vel *fideliter*.

CAPUT IV.

« De cætero ergo, fratres, rogamus vos et obsecramus in Domino Jesu, ut quemadmodum accepistis a nobis, quomodo oporteat vos ambulare et placere Deo, sicut et ambulatis, ut abundetis magis. »

Hactenus patientiam illam in sua vel aliorum tribulatione suasit, nunc eos in bonis actibus pro-

cre admonet; et quales vel in seipsis, vel erga fratres esse debeant, docet. Magis tamen congruunt perfectis superiora, in quibus multifarie patientiam suasit; et sequentia magis aptantur imperfectis, ubi munditia et innocentia suadetur. Quia, inquit, hucusque bene vixistis, quemadmodum superius demonstratum est, ergo de cætero quod superest, vivendi spatio, rogamus ut illud ita ducatis, ut in bonis operibus magis abundetis, et hoc est: de cætero quod restat, rogamus vos, fratres, et obsecramus, id est per sacra adjuramus in Domino Jesu, ut sicut eum timetis et amatis, ita propter reverentiam et amorem ejus quod obsecramus, faciatis. Obsecrauius ut quemadmodum accepistis a nobis, id est sicut didicistis ex doctrina nostra quomodo oporteat vos ambulare si vultis ad patriam pervenire, id est quomodo per viam justitiæ debetis incedere, et in omnibus Deo placere, sicut et ambulatis, quia quod vobis de hac ambulatione tradidimus, mox agere cœpistis; obsecramus, inquam, ut abundetis magis in hac bonorum operum ambulatione, id est amodo propensius quam antea tendatis ad cælestem patriam per executionem mandatorum Dei. Vel secundum alios codices obsecramus, ut quemadmodum accepistis a nobis, quo modo vos oporteat ambulare, et in ipsa ambulatione Deo placere, sic et ambuletis, de virtute in virtutem (Psal. lxxxiii) proficiendo ac perseverando, ita ut abundetis magis ac magis quotidie.

« Scitis enim quæ præcepta dederim vobis per Dominum Jesum, hæc est enim voluntas Dei, sanctificatio vestra, ut abstineatis vos a fornicatione, ut sciat unusquisque vestrum vas suum possidere in sanctificatione et honore, non in passione desiderii, sicut et gentes quæ ignorant Deum. Et ne quis supergrediatur, neque circumveniat in negotio fratrem suum, quoniam vindex est Dominus de his omnibus, sicut prædiximus vobis et testificati sumus. Non enim vocavit nos Deus in munditiam, sed in sanctificationem. Itaque qui hæc spernit, non hominem spernit, sed Deum, qui et dedit Spiritum suum sanctum in nobis. »

Propterea moneo ambulare sicut accepistis a nobis, quia vos scitis quæ præcepta ambulandi et recte vivendi dederim vobis ferenda et commendanda, idque non per me, sed per Dominum Jesum. Et licet sciatis, tamen ex parte replicabo. Nam hæc est voluntas Dei, sanctificatio vestra, quæ vobis prodest, non ipsi, id est hoc vult Deus, et exigit a vobis, ut sanctificemini, ut abstineatis vos a fornicatione, id est ab omni illicito concubitu, ne tollentes membra Christi, faciatis membra meretricis (I Cor. vi). Vel, hæc est voluntas Dei et sanctificatio vestra, ut abstineatis vos longe remoti a fornicatione, quia dum vos abstinetis ab immundo opere, sanctificatur in vobis corpus et anima castitate. Ita vos abstineatis a fornicatione, ut unusquisque vestrum sciat possidere, et dominio mentis subditum tenere suum vas, id est suum corpus quod est vas animæ. Ille enim

possidere suum vas dicitur, qui in potestate sua suum corpus tenet, ut non serviat mens desideriis carnis, sed caro rectis voluntatibus mentis. Ita sciat unusquisque vestrum suum vas possidere, in *sanctificatione*, id est mundissima purificatione; et *honore*, ne inhonoretur opprobrio turpitudinis. Ex continentia enim fornicationis nascitur sanctificatio castitatis, et inde est honor apud homines. Nam etiam in hoc sæculo honoratur, qui mundam et castam vitam ducit; sicut e contra qui seipsum qualibet fornicatione contaminat, infamis et ignominiosus habetur. Ita possidete vestra vasa in sanctificatione et honore, *non in passione desiderii*, id est quando peccatum desideratur, et non perlicitur, non in passione desiderii, id est nec saltem fornicandi desiderium habeatis, quod est passio et læsio animæ. Passio enim desiderii est, ut non patiamini interius incentiva carnis, quæ procedant ex desiderio vestro. Non præcipio ut non patiamini incentiva carnis, quia hoc est inevitabile, sed videte ut non procedant ex desiderio vestro, id est ne præmeditando concupiscatis aliquem illicitum concubitum, ut non postea patiamini intrinsecus desiderium, et subjiciamini pravis suggestionibus a desiderio ortis *sicut et gentes*, id est gentiles faciunt, de quibus non est mirandum; nec vos debetis esse similes eis, quia *ignorant Deum*, et ideo sine respectu divinæ formidinis aut reverentiæ cocunt nefarie, non solum cum quibuslibet mulieribus, sed etiam cum pecudibus. Et hæc est voluntas Dei, *ne quis ex vobis supergrediatur in negotio*, id est mercatione *fratrem suum*, id est alium Christianum, ut mercaturam centum solidorum extorqueat ab eo pro quolibet minore pretio; *neque circumveniet*, id est neque fraudulenter decipiat, ostendens illi congeriem pannorum exterius valde pulchram et quasi magni pretii, cum sit interius vilis; aut æs deauratum vendens illi pro auro, vel his similia faciens. Supergressio enim est, ubi pro minore pretio illud quod majoris pretii est, elicitur; circumventio autem, ubi per dolum frater in ipsa venditione vel emptione decipitur. Sed vos ab his vitiis, id est a fornicatione et a passione desiderii atque supergressione et circumventionem fratris, idcirco vos continete *quoniam vindex est Dominus de his omnibus*, id est ipse punit hæc omnia in suo iudicio, videlicet non solum opus fornicationis, sed et desiderium illiciti operis, atque iniquitatem non justæ mercationis. Ipse de his omnibus ultionem sumet, *sicut prædiximus*, id est sicut ante iudicium denuntiavimus vobis, cum essemus apud vos, *et testificati sumus*, id est testimoniis Scripturarum probavimus. Vel testificati sumus, id est testes divini iudicii fortiter hæc asseruimus. Ideo etiam ab his est abstinendum, quia *non vocavit nos Deus in immunditiam*, id est ut immundam et sordidam vitam duceremus; *sed in sanctificationem*, id est ut incontaminatissimam atque mundissimam et virtutibus plenam duceremus conversationem. Unde et per legem clamat: « Sancti eritis, quia ego sanctus

sum (Lev. xi, xix, xx; I Petr. i). » Et quia Dei voluntas est sanctificatio vestra, quæ tenenda est eo ordine quo subjunximus, nec vocavit nos Deus ut immunde viveremus, sed sancte; *itaque qui hæc spernit*, quæ nunc de sanctitate et munditia servanda diximus, et de vitiis exstirpandis, *non hominem spernit, sed Deum*, id est non me spernit, sed Deum, cuius præcepta loquor, et cuius voluntatem annuntio; *qui et dedit in vobis*, id est in cordibus nostris Spiritum suum sanctum, ut omnia per spiritum ejus loqueremur et faceremus; et ideo qui dicta nostra quasi verba hominum spernit, Spiritum sanctum per quem omnia loquimur spernit, et Deum cuius est ille spiritus (Luc. x). Erant inter Thessalonicenses nonnulli in supradictis vitiis manentes, et Apostoli verba spernentes; propter quos ita loquitur, ostendens quia contemptus apostolicorum præceptorum in Deum potius refunderetur non in Apostolum.

« De charitate autem fraternitatis non necesse habemus scribere vobis. Ipsi enim vos a Deo didicistis, ut diligatis invicem (Joan. xiiii, 15; I Joan. xxiv). Etenim illud facitis in omnes fratres in universa Macedonia. Rogamus autem vos, fratres, ut abundetis magis, et operam detis, ut quieti sitis, et ut vestrum negotium agatis, et operamini manibus vestris, sicut præcepimus vobis, et ut honeste ambuletis ad eos qui foris sunt, et nullius aliquid desideretis. »

De supradictis fuit opus scribere vobis, quia quidam vestrum sunt culpabiles in illis, sed *de charitate fraternitatis*, id est de dilectione qua fratres amare debetis, *non habemus necesse scribere vobis*, id est non est necessarium nobis ut per epistolam vos instruamus. Vere non habemus hoc necesse. Nam *vos ipsi didicistis a Deo*, id est docti estis ab Evangelio Dei, *ut vos invicem diligatis*, quia Christum dicentem audistis: « Hoc mando vobis, ut diligatis invicem (Joan. xiiii, xv). » Vel per internam aspirationem didicistis hoc a Deo, quia Spiritus sanctus mox ut cor hominis repleverit, addere illud charitate facit; nec potest unquam discere charitatem, qui Spiritum sanctum non habet intus docentem. Vos hoc didicistis, sicut effectu declaratis.

Nam *facitis illud in omnibus fratres*, id est diligitis omnes Christianos, et operibus charitatis vos ostenditis illos diligere, non solum in urbe vestra, sed et in universa Macedonia, vos illud facitis, id est fratres diligitis; sed tamen *rogamus vos, fratres, ut abundetis magis*, in dilectione fratrum, id est adhuc abundantiore erga fratres studeatis habere charitatem, *et operam detis ut quieti sitis* a curiositate, quæ non sinit cor curiosi esse quietum. *Operam detis*. Quasi diceretur: Difficile est dimittere consuetudinem, sed cogite vos. Studete ne curiositas vastet quietem vestræ mentis ut antea. Quæ scilicet curiositas, cum alienam quærit vitam discutere, semper sua intima nesciens, studet exteriora cogitare. Grave namque est curiositatis vitium, quæ

dum cujuslibet mentem ad investigandam vitam proximi exterior ducit, semper ei intima sua abscondit, ut aliena sciens, se nesciat. Et curiosi animus quanto magis peritus fuerit alieni meriti, tanto fit magis ignarus sui. Ideoque quietem habere non potest, dum semper laborat aliorum vitam inutiliter scire; et sæpe vagatur per diversa loca, ut discere possit aliena facta. Sed vos satagite ut quieti sitis, et ut vestrum negotium agatis, id est unusquisque officium quod ad se pertinet, dimissis alienis, quia vobis est utile in emendatione vitæ vestræ sic agere, et operemini manibus vestris, unde victum habeatis, et unde beneficia tribuatis, sicut præcepimus vobis dum præsentem essemus, quia et opus manuum adjuvat quietos esse. Illud enim malum ex otio venit. Hinc est quod Scriptura dicit, « quia multum malitiam docuit otiositas (Eccli. xxxiii), » et date operam ut honeste ambuletis, id est irreprehensibiliter agatis ad eos, qui foris sunt, id est coram infidelibus qui sunt extra Ecclesiam, ut exemplo vestræ honestatis convertantur ad honestos mores et ad fidem. Non ergo sectandum est otium, sed opus faciendum, quia honestum est, et quasi lux ad infideles, et adhuc date operam, ut nullius aliquid, id est nullam rem cujuscunque fidelis desideretis, nedum rogetis vel tollatis; sed sufficiat vobis quod habetis, vel ex justo labore vestro quod vobis deest, acquiratis. Qui enim in otio vivit, res aliorum concupiscit. Idcirco abjicite otium, ut vincatis alienarum rerum appetitum.

« Nolumus autem vos ignorare, fratres, de dormientibus, ut non contristemini sicut et cæteri, qui spem non habent. Si enim credimus quod Jesus mortuus est et resurrexit, ita et Deus eos, qui dormierunt per Jesum, adducet cum eo. »

Quia quidam illorum inconsiderabiliter desolebant suos amicos mortuos, quasi non amplius resurrecturos, docet eos revera futuram omnium resurrectionem, et ideo non debere eos immoderate contristari de morte suorum. Quasi dicat: De charitate non indigebatis a nobis doceri, sed de resurrectione mortuorum indigetis. Et ideo, fratres, nolumus vos ignorare, id est nolumus ut ignoretis, sed volumus ut sciatis quæ scienda sunt de dormientibus, id est de mortuis, qui quasi de somno facile surgent, et integro corpore. Sicut enim citius homo a somno evigilat, ita concitæ ad conditoris nutum a morte corporis surgent. Ideo nolumus vos hæc ignorare, ut non contristemini de morte charorum vestrorum, sicut et cæteri, id est infideles contristantur de morte suorum, qui spem non habent, spem scilicet resurrectionis et incorruptionis æternæ. Nam et ideo etiam dormientes eos appellat scripturæ veracissima consuetudo, ut cum dormientes audierimus, evigilatos non dubitemus. Unde et in psalmo dicitur: « Nunquid qui dormit, non adjiciet ut resurgat? (Psal. xl.) » Vehementer enim ab infirmis mentibus nomen mortis pertimescitur, somni autem vocabulum non timetur. Est autem de mortuis qui diliguu-

tur, quædam tristitia quodammodo naturalis. Mortem quippe horret non opinio, sed natura; nec mors homini accidet, nisi ex pœna quam præcesserat culpa. Quapropter si animalia quæ ita creata sunt ut suo quæque tempore moriantur, mortem fugiunt et vitam diligunt, quanto magis homo qui sic fuerat creatus ut, si sine peccato vivere vellet, sine termino viveret! Itaque necesse est ut tristes simus, quando moriendo nos deserunt quos amamus, quia, etsi novimus eos non in æternum nos relinquere hic manentes, sed aliquantum præcedere secuturos, tamen mors ipsa quam natura refugit, cum occupat dilectum, contristat in nobis dilectionis affectum. Ideo non admonuit Apostolus ut non contristemur, sed ut non contristemur sicut et cæteri qui spem non habent. Contristamur ergo in nostrorum mortibus necessitate amittendi, sed cum spe recipiendi. Inde angimur, hinc consolamur; inde infirmitas afficit, hinc fides reficit; inde dolet humana conditio, hinc sanat divina promissio. Permittantur itaque pia corda charorum de suorum dolere mortibus tristitia sanabili, et consolabiles lacrymas fundant conditione mortali, quas tamen reprimat fidei gaudium, qua creduntur fideles, quando moriuntur, aliquantulum a nobis abire et ad meliora transire. Vere, inquit, non debetis inconsolabiliter contristari, sicut infideles, de morte charorum vestrorum, quasi non sint amplius victuri et vobiscum futuri, quia si credimus quod Jesus mortuus est et resurrexit, ita pro certo credere debemus, quia et Deus eos qui dormierunt per Jesum, id est mortui sunt in Christo, adducet cum eo ad judicium in die resurrectionis omnium, ut cum Christo judicent mundum et regnent. Unde et Zacharias ait: « Et veniet Dominus Deus meus, et omnes sancti cum eo (Zach. xiv). » Vel per Jesum mediatorem adducet eos Deus cum eo, quia quod resurgent, et quod cum Christo judices venient, hoc non nisi per Christum a Deo Patre accipient. Si credimus, inquit, quod Jesus mortuus est, etc. Quid est quod prædicator egregius mortem Domini, mortem vocat: mortem vero servorum Domini, non mortem, sed somnum nominat, nisi quia infima corda audientium respiciens, medicamentum prædicationis suæ mira arte apponit; et illum quem jam resurrexisse noverant, eis mortuum insinuare non dubitat, eos vero qui necdum resurrexerant, ut spem resurrectionis insinuet, non mortuos, sed dormientes vocat? Non enim verebatur dicere mortuum, quem auditores jam resurrexisse cognoverant; et verebatur dicere mortuos, quos resurrecturos vix credebant.

« Hoc enim vobis dicimus in verbo Domini, quia nos qui vivimus, qui residui sumus, in adventu Domini non præveniemus eos qui dormierunt (I Cor. xv). Quoniam ipse Dominus in jussu et in voce archangeli, et in tuba Dei, descendet de cælo, et mortui qui in Christo sunt, resurgent et primi. Deinde nos qui vivimus, qui relinqui-

« mur, simul rapiemur cum illis in nubibus ob-
« viam Christo in aera, et sic semper cum Domino
« erimus. Itaque conso amini invicem in verbis istis. »

Vere illi qui nunc in mortis somno dormiunt, venient vivi cum Christo. Nam *hoc dicimus vobis* non in nostro, sed in Domini verbo, quia non noster, sed Domini est sermo, quem de hac re vobis loquimur, quoniam, ipso docente ac jubente, vel per os notatum loquente, loquimur vobis talia. Hoc scilicet dicimus, quia nos qui tunc temporis in carne vivimus, qui residui sumus, omnibus præcedentibus sanctis, id est quorum vita tunc est adhuc in corpore residua, non præveniemus in adventu Domini eos qui dormierunt, id est non anticipabimus eos qui longe ante mortui fuerant, ut primi ante illos occurreremus Domino, sed cum illis pariter occurreremus. Hunc modum resurrectionis ideo docet Apostolus, quia viderentur viventes citius posse Domino occurrere quam mortui. Tam velociter enim fiet omnium resurrectio, ut viventes nequeant præcedere mortuos. Nam voce justorum qui tunc viventes in carne sunt invenienda, locutus est nunc Apostolus, quia et ipse justus erat, atque in carne vivebat, et novissimos sanctos fore communionis suæ prævidebat, ideoque verbis eorum utebatur. Sed Thessalonicenses hoc non intelligentes, putaverunt quod Paulus et qui cum eo scribebant epistolam, dicerent se reperiendos in die consummationis in carne, et conjecturis variis fluctuabant atque dicebant: Si Paulus invenendus in corpore est, proximus est dies judicii. Unde corrigat eos in secunda Epistola. Putabant enim quod in diebus eorum futura esset generalis resurrectio, quoniam Apostolus verbo præsentis temporis dixerat, nos qui vivimus. Qua causa præcipue coactus est aliam illis epistolam scribere. Viventes namque et residuos, ut diximus, nominavit, non quo vellet intelligi se cum sociis suis tempore resurrectionis in corpore reperiendos, sed nos dixit pro eo quod est, justos, de quorum numero et ipse erat. Ipsi enim rapiemur obviam Christo, et non peccatores. Viventes autem, non juxta tropologiam sanctos accipimus, qui peccato mortui non sunt, sed omnes quos in corpore inveniet Christus adveniens. Quodque sequitur: non præveniemus eos qui dormierunt, non ad peccatores est referendum, qui somno negligentiae sopiti sunt, neque enim peccatores cum justis rapiemur obviam Christo, sed ad eos referendum est quos mors dissolverat. Non præveniemus ad occurrendum Domino eos qui dormierunt, sed ipsi prius evigilabunt, id est resurgent, quam nos incipiamus occurrere Domino. Quoniam ipse Dominus in propria persona descendet localiter de cælo, vel de cælo, id est de occulto, et hoc in jussu Patris. Descendet enim missus a Patre, non diversitate virtutis, sed dispensatione judicis. Vel in suo jussu descendet, quia jubebit resurgere mortuos et occurrere sibi. Non enim veniet humilis et occultus ut olim, sed excelsus et manifestus et cum imperiosa auctoritate ut omnia

A mox fiant quæcunque jusserit, et in voce archangeli, quoniam archangelus voce magna clamabit, ante eum excitans mortuos. De cujusmodi voce dicit ipse: « Media autem nocte clamor factus est. Ecce sponsus venit, exite obviam ei (Matth. xxv). » Et in tuba Dei, id est in aliquo sono magno et publico, divinitus facto. De cujusmodi tuba rursus ipse dicit, « quia venit hora in qua omnes qui in monumentis sunt audient vocem Filii Dei, et procedent (Joan. v). » Hæc tuba omnes excitabit, et inimicos terribit, suos ad bellum invitabit, ut expugnent adversarios, et effugient a facie Domini atque mittant in gehennam. Et iterum sicut tuba quondam in festis convocabat populum Hæbræorum (Num. x, xxix, xxxi): sic hæc tuba convocabit ad solemnitatem æternæ lætitiæ populum sanctorum. Deo, inquit, jubente et voce archangeli atque tuba Dei sonante (Psal. lxxx), descendet Dominus Jesus de cælo in aera, non in terram. Nam quia in judicio erunt, et qui ad cælum assumuntur, et qui in terra relinquuntur, idcirco Dominus inter cælum et terram, id est in aere faciet de utriusque judicium. Et ipso descendente, mortui qui in Christo sunt, id est qui in fide et dilectione Christi præsentem vitam finierunt, resurgent primi, id est antequam illi qui tunc vivent, occurrant Christo. Deinde, id est facta illorum resurrectione, nos qui vivimus, id est illi de nobis qui vivi tunc inveniuntur, qui relinquimur, id est qui tormentis Antichristi erunt residui ex nobis, simul cum illis rapiemur a angelis in nubibus obviam Christo in aera. Ultimis sanctis se continuat Apostolus propter unitatem Ecclesiæ, cujus membra sunt et primi et novissimi justis, et propter similitudinem passionum, quoniam similes apostolis erunt in passionibus illi novissimi, propter quod et dignissimi erunt. Qui tamen cum vivi reperientur non prævenient mortuos. Adeo velociter fiet resurrectio mortuorum. Sed cum illi fuerint resuscitati, occurrant Domino in suis corporibus et illi, qui viventes in corporibus fuerint inventi, ita tamen, ut in gloriam et corruptivum, et mortale, gloria, et incorruptione, et immortalitate mutetur, ut qualia corpora surrectura sunt, in talem substantiam etiam vivorum corpora transformentur. Revera enim quantum ad præsentia verba pertinet, videtur Apostolus asserere quosdam in fine sæculi, adveniente Domino, cum futura est resurrectio mortuorum, non esse morituros, sed vivos repertos in illam immortalitatem, quæ sanctis etiam cæteris dabitur, repente mutandos, et simul cum illis rapiendos in nubibus. Sed videamus ne huic sensui sit contrarium quod idem Apostolus scribit ad Corinthios: « Omnes quidem resurgemus vel omnes quidem dormiemus (I Cor. xv). » Si ergo sanctos, qui reperientur Christo veniente viventes, eique venienti obviam rapiemur, crediderimus in eodem raptu de mortalibus corporibus exituros, et ad eadem mox immortalia redituros, nullas in verbis Apostoli patiemur angustias, ubi dicit: « Omnes resurgemus, vel omnes dormiemus, » quia nec illi erunt a resur-

rectione alieni, quam dormitione præcedent, quamvis brevissima, non tamen nulla. Neque enim dicendum est, fieri non posse ut dum per aera in sublime portantur, et moriantur et reviviscant. Quod autem subjecit : *et sic semper cum Domino erimus*, non ita accipiendum est, tanquam in aere nos dixerit cum Domino semper esse mansuros, quia neque ipse utique ibi manebit. Venienti quippe ibitur obviam, non manenti. Sed ita cum Domino erimus, id est sic erimus habentes corpora sempiterna, ubicunque cum illo fuerimus. Omnes scilicet electi, et qui de somno mortis excitati, et qui viventes in carne reperti fuerimus, rapiemur in nubibus obviam Domino in aera, et sic, id est omnes simul immortales erimus semper cum Domino, sicut ipse dixit : « Pater, quos dedisti mihi, volo ut ubi ego sum et illi sint mecum, ut videant claritatem meam (Joan. xvii). » Quandoquidem omnes resurgemus, et cum Domino semper erimus, *ituque consolamini invicem*, id est consoletur alter alterum de morte amicorum suorum *in verbis istis* quæ diximus de resurrectione et societate vel gloria perenni omnium justorum. Pereat contristatio, ubi tanta est consolatio. Detergatur luctus ex animo, fides expellat dolorem in tanta spe gloriæ. Omnes enim justi cum amicis suis sine fine simul manebunt immortales atque beati in regno Christi. Et ideo non debetis amicos vestros, qui mortui sunt, lugere quasi amissos, quia non amisistis eos, sed præmisistis.

CAPUT V.

« De temporibus autem et momentis, fratres, non indigetis ut scribamus vobis. Ipsi enim diligenter scitis quia dies Domini sicut fur in nocte, ita veniet (II Petr. iii). Cum enim dixerint, pax et securitas, tunc repentinus eis superveniet interitus, sicut dolor in utero habenti, et non effugient. »

De resurrectione indignistis per epistolam nostram doceri, sed de temporibus et momentis quibus futura est ipsa resurrectio, non indigetis ut scribamus vobis. *De temporibus*, id est utrum ætate au hieme, et utrum die ac nocte, sive quo mense vel post quot annos venturus sit Christus; *et momentis*, id est qua hora diei vel noctis venturus sit Christus, *non indigetis, fratres*, id est non est necesse ut scribamus vobis, quia non prodesset vobis hoc scire. Non est opus ut de his scribamus vobis, quia vos ipsi scrutando Scripturas vel docti a nobis, *diligenter*, id est studiose *scitis quia dies Domini*, id est dies iudicii vel dies mortis, in quo Dominus unumquemque judicabit, *ita veniet* latenter incautis, *sicut fur in nocte*; veniet enim in nocte, id est in ignorantia, hoc est veniet nullo sciente aut sperante, veniet subitaneus et improvisus (I Cor. xv), veniet ut fur, qui latenter venit dum dormiunt homines, et omnia subripit, ut qui dives obdormierat, evigilans nihil inveniat. Sic enim continget securis et negligentibus per improvisum adventum diei Domini. Et propterea cœpit Apostolus

A loqui de temporibus, ut moneret discipulos cavere sibi, ne ita deprehendantur. Hoc igitur opus est scire, ut curent filii lucis esse, et parato corde vigilare, qui nolunt ab illa die sicut a nocturno fure comprehendi. Nam si ad cavendum hoc malum, id est ne dies Domini tanquam fur inveniat imparatum, opus esset nosse temporum spatia, non diceret Apostolus, non opus esse ut hoc scriberet, sed hoc potius esse scribendum tanquam doctor providentissimus judicaret. Nunc autem nec opus illis esse monstravit, quibus sufficiebat ut scirent, imparatis atque dormientibus diem Domini sicut furem esse venturam; atque sciendo hoc, essent ipsi vigilantes et parati post quanta libet tempora veniret; et suum servavit modum, ut scilicet Apostolus non tantum præsumeret alios id docere, de quo apostolis Dominum dixisse cognoverat : « Non est vestrum nosse tempora vel momenta, quæ Pater posuit in sua potestate (Act. i); » de his enim temporibus et momentis non erat opus ut scriberet eis. Vere, inquit, ut fur veniet amatoribus sæculi dies illa. *Cum enim dixerint, pax est nobis et in ipsa pace securitas* de futuro, quia nihil molestiarum amplius eventurum nobis formidamus, *tunc subito*, descendente iudice, *repentinus eis superveniet interitus*, id est mors æterna corporis et animæ, *sicut dolor* supervenit mulieri *habenti in utero* prolem, quia malum conscientiæ ipsorum incipiet eos subito torquere, eum per iudicis adventum cœperit urgeri ut ad lucem prodeat, id est omnibus appareat. Mulier enim prægnans quod in utero diu portavit cum pondere, tandem ejicit cum dolore, quia et reprobi malum, quod diu latuit intra conscientiam ipsorum et gravavit eam, in conspectu iudicis cum gravi tormento cunctis manifestabunt. Mulier cum voluptate pondus illud concepit, sed, ut dictum est, cum dolore ejicit, quia et reprobi culpam cum voluptate libenter commiserunt, sed ante districtum iudicem hanc invitam multa cum amaritudine manifestabunt. Mulier dura non sperat, subitis doloribus incipit urgeri ut pariat, quia et reprobi dum non prævident, incipiunt repentinis cruciatibus compelli, ut latentia mala quæ intus habent, ante tribunal æterni iudicis ad publicum proferant. Ita ergo subitis doloribus incipient torqueri intrinsecus instar prægnantis, *et non effugient*. Mulier namque evadit, sed illi non effugient. Dominus circa finem sæculi tribulationem maximam esse denuntiat futuram (Luc. xxi), et dicit, arescentibus hominibus præ timore et expectatione, quæ supervenient universo orbi. Apostolus vero testatur, quia dicent : *Pax est et securitas*. Sed Dominus hoc de electis loquitur, Apostolus vero de reprobis. Intelligamus ergo non ea impleri modo quæ Dominus prænuntiavit, sed tunc esse potius ventura, quando sic erit tribulatio universo orbi, ut ad Ecclesiam pertineat quæ in universo orbe tribulabitur, non ad eos qui tribulabunt eam. Ipsi enim dicturi sunt, pax et securitas, ut repentinus illis superveniat interitus, et eos adventum Domini sicut fur in nocte

comprehendat, quando econtrario gaudebit et exultabit, qui diligit manifestationem Domini. Sed et hoc notandum, quia post mortem Antichristi, quadraginta quinque dies concedentur ad emendationem his, qui ad vitam prædestinati sunt, et in Antichristi persecutione offenderunt. Sed qui ad vitam præordinati non sunt, nec morte principis sui corrigentur, sed toto corde mundanis inhærentes, gaudebunt, et uxores ducent, atque convivia facient, et domos ædificabunt, dicentes: *Pax est nobis et securitas*, licet princeps noster sit mortuus. Et dum ita pacatos et securos se putaverint, subito iudex apparebit, omnesque tales condemnabit.

« Vos autem, fratres, non estis in tenebris ut vos dies illa tanquam fur comprehendat. Omnes enim vos filii lucis estis et filii diei, non estis noctis neque tenebrarum. »

Illis erit improvisus dies Domini, ut illaqueet eos ad mortem propter cordis ipsorum cæcitate. Sed vos, o fratres, non estis in tenebris ignorantie et infidelitatis vel cupiditatum sæcularium, ita ut vos dies illa tanquam fur comprehendat ad mortem. Illi enim sunt in tenebris et non vigilant adversus adventum furis, qui præsumentes de cupiditatibus suis, et in deliciis hujus sæculi diffluentes, tument et eriguntur adversus humiles, et insultant sanctis intelligentibus atque tenentibus angustam viam, quæ ducit ad vitam (*Matth. vii; Luc. xiii*). Sed vos non estis tales, quia non cæcant vos sæculi cupiditates. Nam omnes vos estis filii lucis, id est Christi, qui ait: « Ego lux in mundum veni, ut omnis qui credit in me, in tenebris non maneat (*Joan. xi*); » et filii Dei, id est ecclesie sanctorum quam illuminat sol justitie Christus. Vere filii estis Christi et Ecclesie, quia non estis filii noctis, id est diaboli, qui est nox, de qua sanctus Job dicit: « Noctem illam tenebrosam turbo possideat (*Job. iii*), » neque estis filii tenebrarum, id est infidelium et iniquorum, qui si conversi fuerint, audiunt: « Fuistis aliquando tenebræ, nunc autem lux in Domino (*Ephes. v*). » Vel omnes vos estis filii lucis, id est fidei; et filii diei, id est sancte conversationis. Et ne quis putet partim posse esse diei, partimque noctis, addo quia non estis noctis, id est ignorantie vel infidelitatis; neque tenebrarum, id est malorum operum. Nam filii noctis et tenebrarum, sunt infideles et iniqui. Noctis, inquam, et tenebrarum filii sunt, qui omnia mala operantur; et usque adeo filii noctis sunt, ut timeant videri quæ faciunt. Qui autem publice talia operantur, sunt quidem in luce solis, sed in tenebris cordis.

« Igitur non dormiamus sicut cæteri, sed vigilemus et sobrii simus. Qui enim dormiunt, nocte dormiunt; et qui ebrii sunt, nocte ebrii sunt. Nos autem qui diei sumus, sobrii simus, induiti lorica fidei et charitatis et galeam spei salutis. Quoniam non posuit nos Deus in iram, sed in acquisitionem salutis per Dominum no-

strum Jesum Christum, qui mortuus est pro nobis, ut sive vigilemus, sive dormiamus, simul cum illo vivamus. Propter quod consolamini invicem et ædificate alterutrum, sicut et facitis. »

Quandoquidem non sumus noctis, igitur non dormiamus, id est non torpeamus in bonis sæcularibus, sicut cæteri, id est sicut infideles, qui ad noctem pertinent; sed vigilemus, id est vigili corde adventum occulti judicis exspectemus, attendentes omnia hæc esse transitoria et cito peritura; et sobrii simus, id est sobrie his utamur non quasi bonis nostris, sed ad sustentationem datis. Non dormiamus, id est non simus securi et desidiosi, quasi hoc nobis sufficiat quod Christianitatis religionem suscepimus, et ideo negligenter agamus; sed vigilemus, id est corporis et negligentie tenebras a nobis repellamus, et oculos mentis ad aspectum veri luminis apertos teneamus; et sobrii simus, id est ebrietatem sæcularium cupiditatum caveamus. Et justum est ut nos, qui ad noctem non pertineamus, somnum et ebrietatem fugiamus, quia qui dormiunt, id est qui delectabiliter torpent et quiescunt in præsentibus, nocte dormiunt, id est iniquitate delectantur; et qui ebrii sunt, id est quos inebriat amor sæculi, ut immoderate utantur his rebus transitoriis, in nocte cordis sunt ebrii. Nox enim est iniquitas, in qua illi obdormierunt et inebriati sunt cupiendo ista terrena, et omnes istæ felicitates quæ videntur sæculi, somnia sunt dormientium; et quomodo qui videt thesauros in somnis dormiens dives est, sed evigilans pauper, sic omnia vana ista hujus sæculi, de quibus homines gaudent, in somno apparent et in ebrietate cernuntur. Evigilabunt et sobrii fient amatores talium quando nolent, si modo quando utile est, non evigilaverint et sobrii fuerint; et invenient somnia fuisse illa et transisse sicut umbram. Illi qui sunt noctis, dormiunt et inebriantur; sed nos qui sumus diei, simus sobrii, id est moderate utamur his temporalibus, et propter præsentia bona non obliviscamur quærere futura, id est æterna. Sobrii, inquam, simus. Quod esse poterimus, si fuerimus, induiti lorica fidei et charitatis, id est si fides et charitas instar lorice nos undique munierint adversus omnia diaboli jacula, id est contra universa vitiorum tentamenta. Sicut enim lorica munit vitia, sic fides et charitas munit cor nostrum, ne lædatur a vitiis irruentibus. Et quamvis nunc Apostolus dicat lorica fidei, alio tamen loco dixit scutum fidei (*Ephes. vi*). Scutum ergo est fides, quia tela inimicorum excipit et expellit. Lorica etiam est, quia interiora nostra transigi non sinit. Similiter et charitas nobis est lorica, quia malignorum spirituum jacula non sinit ad cor nostrum interius penetrare. Simus etiam induiti galeam, scilicet spei salutis ut spes æternæ salutis ad superna tendens, obvolvatur, id est protegat caput interioris hominis, id est mentem nostram, ne lædatur ab ictibus inimicorum, id est a tentamentis dæmonum in hoc

conflictu vitiorum. Spes enim protegens mentis caput, est nobis galea, quæ scilicet spes dicitur salutis, quia per spem venimus ad salutem. Et recte dicitur spes salutis, *quoniam non posuit Deus nos in iram, sed in acquisitionem salutis*, id est non posuit nos ad hoc in spe, ut eamus in iram damnationis, sed ut acquiramus salutem bene operando. Non enim otiosis datur salus, sed his qui merito honorum operum acquisierint eam. Et hoc *per Dominum nostrum Jesum Christum*, quia nullum justitiæ meritum salutem nobis acquirere posset, nisi per mediatorem Dei et hominum. Vel ideo sobrii simus et armis virtutum induamur, quia non posuit Deus nos in iram, sed in acquisitionem salutis, id est non ordinavit et statuit nos ad hoc ut iram exerceret in nos, sed ut acquireret nos ad salutem per Christum mediatorem *qui mortuus est pro nobis*, id est qui nos morte sua redemit ab æterna morte, *ut sive vigilemus*, id est in corpore vivamus, *sive dormiamus*, id est in somno mortis quiescamus, *simul cum illo* qui est vivamus, id est semper sit et vivat cum illo mens nostra, sive dum in hoc sæculo vivimus, sive dum in sepulcro dormimus. *Propter quod*, id est quia hæc spes est nobis, quia Christus mortuus est ad horam pro nobis, ut nos semper cum illo vivamus, *consolamini invicem*, id est consoletur ex vobis alter alterum in adversis præsentium tribulationum, vel in obitu charorum. *Et ædificate alterutrum*, id est vicissim vosmetipsos per bona colloquia et per bona exempla ædificate in virtutibus, ut et singuli et simul omnes ædificemini templum Domino. *Ædificate, inquam, sicut et facitis*. Collaudat eos, ut magis ac magis provocet ad studium bene agendi. Huc usque autem generaliter locutus est omnibus, sed nunc singulariter ad subditos admonendos, ut prælatos suos honorent et diligant, se transfert; postea inonebit et prælatos, ut corrigant subditos. Quia vero humiles erant et ad obediendum prompti, ideo non imperando, sed rogando injungit eis ea quæ vult ut faciant. Unde nec apostolum se dixit in exordio epistolæ, quia non erat necesse ut cogerentur apostolica auctoritate. Sic et nunc prælati Ecclesiæ bonos subditos humiliter rogare debent, ut in melius proficiant non imperiose compellere, ut inviti bona faciant. Ecce enim subjungit Apostolus:

« Rogamus autem vos, fratres, ut noveritis eos qui laborant inter vos, et præsumunt vobis in Domino, et monent vos, ut habeatis illos abundantius in charitate; et propter opus illorum pacem habete cum eis. »

Vos omnes consolamini et ædificatis invicem alii alios, ut monemus. Sed *vos, o fratres*, qui subditi estis, *rogamus ut noveritis*, id est ostendatis nosse vos per reverentiam et honorem *eos qui in regimine ecclesiastico laborant inter vos, et præsumunt vobis in Domino*, id est ordinatione Domini, vel in his quæ ad Dominum pertinent *et monent vos* ut mala caveatis et bona faciatis, vel ad meliora proficiatis.

Ita scilicet noveritis eos, *ut habeatis illos abundantius in charitate*, id est magis quam cæteros diligatis et honoretis illos, ac bonis corporalibus alatis. Volo enim ut ex charitate presbyteros honoretis, ac reverentiam illis exhibeatis. *Et propter illorum opus*, id est quia increpant vos aut etiam aliquando puniunt vos, videntes sic oportere fieri, *habete pacem cum eis*, id est nolite murmurare, nolite pacis amicitiam relinquere, si rescaverint vestra vitia, sed ideo magis pacem firmam servate, quia ipsi non ex odio, sed ex charitate corripiunt vos. Pulchre obviat Apostolus perversitati eorum, qui dum pro culpulis suis increpantur aut verberantur pacem, quam cum prælatis suis habebant, abijciunt, ac discordias et murmurationes faciunt, dum cum prælatis suis haberi pacem jubet propter opus ipsorum. Vel ita distingui potest: habete illos abundantius in charitate propter opus illorum, id est propterea magis amate illos, qui monent vos et corrigunt, sicut scriptum est: « Argue sapientem, et diliget te (Prov. ix), » et habete pacem cum eis ut nunquam discordetis ab illis, etiam si graviter vos increpaverint aut verberaverint.

« Rogamus autem vos, fratres, corripite inquietos, consolamini pusillanimes, suscipite infirmos, patientes estote ad omnes. Videte ne quis malum pro malo alicui reddat, sed semper quod bonum est sectamini invicem et in omnes. »

Nunc ad prælatos est sermo. Subditos rogavimus ut honorent præpositos suos, et pacem cum eis habeant. Sed *vos, fratres* qui præestis, *rogamus, corripite inquietos*, id est castigate curiosos et pacis quietem turbantes, atque indisciplinatos ac vagos. Corripite illos, ne sitis mercenarii, quia qui ideo cessat a correptione talium, ne perdat munus quod ab his accipere solebat, vel ne patiat ab his adversa, mercenarius est, non pastor. *Consolamini etiam pusillanimes*, id est eos qui pusillum habent animum ad tolerantiam præseutium adversitatum, et contristantur pro malis quæ sibi accidunt, sive illos qui a spe deficient pro magnitudine peccatorum suorum. *Suscipite infirmos*, id est nolite abjicere eos qui in conscientia sua, vel in actionibus suis sunt infirmi, sed suscipite illos ad sanandum sicut spiritales medici. Et si in hoc officio (vobis aliquid injuriæ a subditis illatum fuerit, *estote patientes ad omnes*, qui vobis molesti fuerint. Hoc etiam videte, id est diligenti consideratione attendite, *ne quis alicui reddat malum pro malo*, id est non solummodo vos non reddatis malum pro malo, sed etiam videte ne alius reddat. Tunc etiam *malum pro malo* reddetis, si eos qui malum vobis irrogant, ad pœnitentiam non provocaveritis. Hoc namque loco intelligendum est tunc potius malum pro malo reddi, si is qui corripiendus est, non corripitur, sed prava dissimulatione negligitur. Aliquando autem homines correptores suos putant inimicos suos. Ideo cum dixisset, *corripite inquietos*; subjecit, *consolamini pusillanimes*. Si forte enim de correptione incipit

comprehendat, quando e contrario gaudebit et exsultabit, qui diligit manifestationem Domini. Sed et hoc notandum, quia post mortem Antichristi, quadraginta quinque dies concedentur ad emendationem his, qui ad vitam prædestinati sunt, et in Antichristi persecutione offenderunt. Sed qui ad vitam præordinati non sunt, nec morte principis sui corrigentur, sed toto corde mundanis inhærentes, gaudebunt, et uxores ducent, atque convivia facient, et domos ædificabunt, dicentes: *Pax est nobis et securitas*, licet princeps noster sit mortuus. Et dum ita pacatos et securos se putaverint, subito iudex apparebit, omnesque tales condemnabit.

« Vos autem, fratres, non estis in tenebris ut vos dies illa tanquam fur comprehendat. Omnes enim vos filii lucis estis et filii diei, non estis noctis neque tenebrarum. »

Illis erit improvisus dies Domini, ut illaqueet eos ad mortem propter cordis ipsorum cæcitate. Sed vos, o fratres, non estis in tenebris ignorantie et infidelitatis vel cupiditatum sæcularium, ita ut vos dies illa tanquam fur comprehendat ad mortem. Illi enim sunt in tenebris et non vigilant adversus adventum furis, qui præsumentes de cupiditatibus suis, et in deliciis hujus sæculi diffluentes, tument et eriguntur adversus humiles, et insultant sanctis intelligentibus atque tenentibus angustam viam, quæ ducit ad vitam (*Matth. vii; Luc. xiii*). Sed vos non estis tales, quia non cæcant vos sæculi cupiditates. Nam omnes vos estis filii lucis, id est Christi, qui ait: « Ego lux in mundum veni, ut omnis qui credit in me, in tenebris non maneat (*Joan. xi*); » et filii Dei, id est ecclesie sanctorum quam illuminat sol justitie Christus. Vere filii estis Christi et Ecclesie, quia non estis filii noctis, id est diaboli, qui est nox, de qua sanctus Job dicit: « Noctem illam tenebrorum turbo possideat (*Job. iii*), » neque estis filii tenebrarum, id est infidelium et iniquorum, qui si conversi fuerint, audient: « Fuistis aliquando tenebræ, nunc autem lux in Domino (*Ephes. v*). » Vel omnes vos estis filii lucis, id est fidei; et filii diei, id est sancte conversationis. Et ne quis putet partim posse esse diei, partimque noctis, addo quia non estis noctis, id est ignorantie vel infidelitatis; neque tenebrarum, id est malorum operum. Nam filii noctis et tenebrarum, sunt infideles et iniqui. Noctis, inquam, et tenebrarum filii sunt, qui omnia mala operantur; et usque adeo filii noctis sunt, ut timeant videri quæ faciunt. Qui autem publice talia operantur, sunt quidem in luce solis, sed in tenebris cordis.

« Igitur non dormiamus sicut cæteri, sed vigilemus et sobrii simus. Qui enim dormiunt, nocte dormiunt; et qui ebrii sunt, nocte ebrii sunt. Nos autem qui diei sumus, sobrii simus, induiti lorica fidei et charitatis et galeam spem salutis. Quoniam non posuit nos Deus in iram, sed in acquisitionem salutis per Dominum no-

strum Jesum Christum, qui mortuus est pro nobis, ut sive vigilemus, sive dormiamus, simul cum illo vivamus. Propter quod consolamini invicem et ædificate alterutrum, sicut et facitis. »

Quandoquidem non sumus noctis, igitur non dormiamus, id est non torpeamus in bonis sæcularibus, sicut cæteri, id est sicut infideles, qui ad noctem pertinent; sed vigilemus, id est vigili corde adventum occulti judicis exspectemus, attendentes omnia hæc esse transitoria et cito peritura; et sobrii simus, id est sobrie his utamur non quasi bonis nostris, sed ad sustentationem datis. Non dormiamus, id est non simus securi et desidiosi, quasi hoc nobis sufficiat quod Christianitatis religionem suscepimus, et ideo negligenter agamus; sed vigilemus, id est corporis et negligentie tenebras a nobis repellamus, et oculos mentis ad aspectum veri luminis apertos teneamus; et sobrii simus, id est ebrietatem sæcularium cupiditatum caveamus. Et justum est ut nos, qui ad noctem non pertineamus, somnum et ebrietatem fugiamus, quia qui dormiunt, id est qui delectabiliter torpent et quiescunt in præsentibus, nocte dormiunt, id est iniquitate delectantur; et qui ebrii sunt, id est quos inebriat amor sæculi, ut immoderate utantur his rebus transitoriis, in nocte cordis sunt ebrii. Nox enim est iniquitas, in qua illi obdormierunt et inebriati sunt cupiendo ista terrena, et omnes istæ felicitates quæ videntur sæculi, somnia sunt dormientium; et quomodo qui videt thesauros in somnis dormiens dives est, sed evigilans pauper, sic omnia vana ista hujus sæculi, de quibus homines gaudent, in somno apparent et in ebrietate cernuntur. Evigilabunt et sobrii fient amatores talium quando nolent, si modo quando utile est, non evigilaverint et sobrii fuerint; et invenient somnia fuisse illa et transisse sicut umbram. Illi qui sunt noctis, dormiunt et inebriantur; sed nos qui sumus diei, simus sobrii, id est moderate utamur his temporalibus, et propter præsentia bona non obliviscamur quærere futura, id est æterna. Sobrii, inquam, simus. Quod esse poterimus, si fuerimus, induiti lorica fidei et charitatis, id est si fides et charitas instar lorice nos undique munierint adversus omnia diaboli jacula, id est contra universa vitiorum tentamenta. Sicut enim lorica munit vitia, sic fides et charitas munit cor nostrum, ne lædatur a vitiiis irruentibus. Et quamvis nunc Apostolus dicat lorica fidei, alio tamen loco dixit scutum fidei (*Ephes. vi*). Scutum ergo est fides, quia tela inimicorum excipit et expellit. Lorica etiam est, quia interiora nostra transigi non sinit. Similiter et charitas nobis est lorica, quia malignorum spirituum jacula non sinit ad cor nostrum interius penetrare. Simus etiam induiti galeam, scilicet spem salutis ut spes æternæ salutis ad superna tendens, obvolvatur, id est protegat caput interioris hominis, id est mentem nostram, ne lædatur ab ictibus inimicorum, id est a tentamentis dæmonum in hoc

conflictu vitiorum. Spes enim protegens mentis caput, est nobis galea, quæ scilicet spes dicitur salutis, quia per spem venimus ad salutem. Et recte dicitur spes salutis, *quoniam non posuit Deus nos in iram, sed in acquisitionem salutis*, id est non posuit nos ad hoc in spe, ut eamus in iram damnationis, sed ut acquiramus salutem bene operando. Non enim otiosis datur salus, sed his qui merito honorum operum acquisierint eam. Et hoc *per Dominum nostrum Jesum Christum*, quia nullum justitiæ meritum salutem nobis acquirere posset, nisi per mediatorem Dei et hominum. Vel ideo sobrii simus et armis virtutum induamur, quia non posuit Deus nos in iram, sed in acquisitionem salutis, id est non ordinavit et statuit nos ad hoc ut iram exerceret in nos, sed ut acquireret nos ad salutem per Christum mediatorem *qui mortuus est pro nobis*, id est qui nos morte sua redemit ab æterna morte, *ut sive vigilemus*, id est in corpore vivamus, *sive dormiamus*, id est in somno mortis quiescamus, *simul cum illo* qui est vivamus, id est semper sit et vivat cum illo mens nostra, sive dum in hoc sæculo vivimus, sive dum in sepulcro dormimus. *Propter quod*, id est quia hæc spes est nobis, quia Christus mortuus est ad horam pro nobis, ut nos semper cum illo vivamus, *consolamini invicem*, id est consoletur ex vobis alter alterum in adversis præsentium tribulationum, vel in obitu charorum. *Et ædificate alterutrum*, id est vicissim vosmetipsos per bona colloquia et per bona exempla ædificate in virtutibus, ut et singuli et simul omnes ædificemini templum Domino. *Ædificate*, inquam, *sicut et facitis*. Collaudat eos, ut magis ac magis provocet ad studium bene agendi. Huc usque autem generaliter locutus est omnibus, sed nunc singulariter ad subditos admonendos, ut prælatos suos honorent et diligant, se transfert; postea monebit et prælatos, ut corrigant subditos. Quia vero humiles erant et ad obediendum prompti, ideo non imperando, sed rogando injungit eis ea quæ vult ut faciant. Unde nec apostolum se dixit in exordio epistolæ, quia non erat necesse ut cogentur apostolica auctoritate. Sic et nunc prælati Ecclesiæ bonos subditos humiliter rogare debent, ut in melius proficiant non imperiose compellere, ut inviti bona faciant. Ecce enim subjungit Apostolus :

« Rogamus autem vos, fratres, ut noveritis eos qui laborant inter vos, et præsumunt vobis in Domino, et monent vos, ut habeatis illos abundantius in charitate; et propter opus illorum pacem habete cum eis. »

Vos omnes consolamini et ædificatis invicem alii alios, ut monemus. Sed *vos, o fratres*, qui subditi estis, *rogamus ut noveritis*, id est ostendatis nosse vos per reverentiam et honorem *eos qui in regimine ecclesiastico laborant inter vos, et præsumunt vobis in Domino*, id est ordinatione Domini, vel in his quæ ad Dominum pertinent *et monent vos* ut mala caveatis et bona faciatis, vel ad meliora proficiatis.

A Ita scilicet noveritis eos, *ut habeatis illos abundantius in charitate*, id est magis quam cæteros diligatis et honoretis illos, ac bonis corporalibus alatis. Volo enim ut ex charitate presbyteros honoretis, ac reverentiam illis exhibeatis. *Et propter illorum opus*, id est quia increpant vos aut etiam aliquando puniunt vos, videntes sic oportere fieri, *habete pacem cum eis*, id est nolite murmurare, nolite pacis amicitiam relinquere, si rescaverint vestra vitia, sed ideo magis pacem firmam servate, quia ipsi non ex odio, sed ex charitate corripunt vos. Pulchre obviat Apostolus perversitati eorum, qui dum pro culpis suis increpantur aut verberantur pacem, quam cum prælati suis habebant, abjiciunt, ac discordias et murmurationes faciunt, dum cum prælati suis haberi pacem jubet propter opus ipsorum. Vel ita distingui potest: habete illos abundantius in charitate propter opus illorum, id est propterea magis amate illos, qui monent vos et corrigunt, sicut scriptum est: « Argue sapientem, et diliget te (Prov. ix), » et habete pacem cum eis ut nunquam discordetis ab illis, etiam si graviter vos increpaverint aut verberaverint.

« Rogamus autem vos, fratres, corripite inquietos, consolamini pusillanimes, suscipite infirmos, patientes estote ad omnes. Videte ne quis malum pro malo alicui reddat, sed semper quod bonum est sectamini invicem et in omnes. »

Nunc ad prælatos est sermo. Subditos rogavimus ut honorent præpositos suos, et pacem cum eis habeant. Sed *vos, fratres* qui præcistis, *rogamus, corripite inquietos*, id est castigate curiosos et pacis quietem turbantes, atque indiscipulatos ac vagos. Corripite illos, ne sitis mercenarii, quia qui ideo cessat a correptione talium, ne perdat munus quod ab his accipere solebat, vel ne patiat ab his adversa, mercenarius est, non pastor. *Consolamini etiam pusillanimes*, id est eos qui pusillum habent animum ad tolerantiam præsentium adversitatum, et contristantur pro malis quæ sibi accidunt, sive illos qui a spe deficiunt pro magnitudine peccatorum suorum. *Suscipite infirmos*, id est nolite abjicere eos qui in conscientia sua, vel in actionibus suis sunt infirmi, sed suscipite illos ad sanandum sicut spiritales medici. Et si in hoc officio vobis aliquid injuriæ a subditis illatum fuerit, *estote patientes ad omnes*, qui vobis molesti fuerint. Hoc etiam videte, id est diligenti consideratione attendite, *ne quis alicui reddat malum pro malo*, id est non solummodo vos non reddatis malum pro malo, sed etiam videte ne alius reddat. Tunc etiam *malum pro malo* reddetis, si eos qui malum vobis irrogant, ad pœnitentiam non provocaveritis. Hoc namque loco intelligendum est tunc potius malum pro malo reddi, si is qui corripendus est, non corripitur, sed prava dissimulatione negligitur. Aliquando autem homines correptores suos putant inimicos suos. Ideo cum dixisset, *corripite inquietos*; subjecit, *consolamini pusillanimes*. Si forte enim de correptione incipit

deficere, et perturbatur, tunc oportet consolari. Suscipite infirmos, ne per infirmitatem cadant. Si titulare eum fecit infirmitas, sinu tuo suscipiat charitas. Ac deinde: *Videte ne quis alicui malum pro malo reddat*. Ergo non est malum, correptio si fit. Ille autem malum pro malo ei reddit, cui correptionem subtrahit. Videte ne quis aliquando cuiquam id faciat, *sed semper sectamini omnes quod bonum et rectum est invicem*, id est vicissim inter vos, *et in*, id est erga omnes alios.

« Semper gaudete in Domino, sine intermissione « orate, in omnibus gratias agite : hæc est enim « voluntas Dei in Christo Jesu in omnibus vo- « bis. »

Hæc communiter omnibus dicuntur. Licet frequenter adversa patiamini, tamen nolite contristari, sed semper et in prosperis et in adversis gaudete. Sed quia malum est sæculari gaudio gaudere, propterea subjungo ut gaudeatis *in Domino*, non in sæculo nec in vobisipsis. In Domino gaudete, ut intus apud eum sit gaudium vestrum et gloriatio vestra. *Sine intermissione orate*, id est ut nullo die intermittatis certa tempora orandi. Sed et continuum cordis desiderium, continua oratio est. Nunquid enim sine intermissione possumus genu flectere, corpus prosternere, vel manus levare, ut de hoc nobis dicatur : *Sine intermissione orate*. Sed qui nunc vult intermittere orare, non intermittat desiderare. Sic enim orabat Moyses, cui tacenti dixit Dominus : « Quid clamas ad me? (Exod. xiv.) » Clamabat enim corde, quamvis diceret ore. Ita iuge desiderium et incessabilis amor, assidua est oratio sanctorum. *In omnibus Deo gratias agite*. Vera fidelium humilitas est, in nullo superbire, in nullo murmurare, nec ingratum esse, nec querulum; sed in omnibus Dei iudicii Deo gratias agere, Deumque laudare, cujus omnia opera aut justa sunt, aut benigna. In omnibus ergo quæ vobis acciderint, agite Deo gratias. Et debetis hæc non inviti facere, id est gaudere semper et orare et gratias agere, quia *hæc est voluntas Dei*, id est hoc vult Deus ut ista faciatis. Quæ voluntas est *in Christo Jesu*, quia in Christi beneficio concessit Dei voluntas hominibus, ut ista possint facere. Et est *in omnibus vobis* hæc Dei voluntas, id est Deus hoc vult ut omnes vos majores atque minores ista faciatis.

« Spiritum nolite extinguere, prophetias nolite « spernere. Omnia autem probate, quod bonum est « tenete, ab omni specie mala abstinete vos. »

Quia quidam inter eos habebant spiritualia dona, sed ab aliis propter invidiam prohibebantur exercere illa, nec prophetare sinebantur, sed prophetiæ ipsorum ab æmulis contemnebantur, ideo nunc per Apostolum dicitur : *Spiritum nolite*, etc. Non quia Spiritus sanctus exstingui possit, sed quia quantum in ipsis est, exstinctores ejus merito vocantur, qui sic agunt ut exstinctum velint. *Spiritum*, inquit, *nolite extinguere*. Et tanquam exponens quid diceret, adjecit : *Prophetias nolite spernere*. Exstin-

gunt ergo quantum ad eos, spiritum, qui prophetias spernunt, quoniam ignem Spiritus sancti, qui prophetas ad loquendum illuminat et inflammat, extinguere et annullare conantur. Nolite spiritum extinguere, id est si Spiritus sanctus alicui revelat aliquid, nolite prohibere quod sentit loqui. Et prophetias nolite spernere, id est quæ sancti per Spiritum sanctum prædixerint, nolite putare falsa esse vel negligere, sed credite vera esse, et reverenter suscipite; sed tamen juxta Joannem : « Nolite omni spiritui credere, sed probate spiritus si ex Deo sunt (I Joan. iv.) » Unde et hic subditur : *Omnia autem probate, quod bonum est tenete*. Honorate prophetias, sed tamen non omnium dicta indiscrete recipiatis, sed probate, id est ratione discutite omnia, utrum bona an mala sint; quod bonum invenietur, tenete. Postquam singula quæque discussieritis, et certa probatione quale sit unumquodque noveritis, quod bonum esse noveritis tenete; et econtra *ab omni specie mala abstinete vos*, id est non solum ab eo quod veraciter malum est, sed etiam ab ipsa similitudine mali, hoc est : si quid mala specie malum aliquid prædicit, etsi malum non sit, vos tamen abstinete sitis ab eo, ne mala specie malum exemplum detis hominibus. Non enim occasionem male suspensionis de vobis dare hominibus debetis, cum vos malam conscientiam non habeatis.

« Ipse autem Deus pacis sanctificet vos per omnia, « ut integer spiritus vester et anima et corpus sine « querela in adventum Domini nostri Jesu Christi « servetur. Fidelis est Deus qui vocavit vos, qui « etiam faciet. »

Ego quidem vos moneo ita vivere et sanctitati operam dare, *sed ipse Deus faciat in vobis quod moneo*. Deus pacis, id est, Deus cui per Christum qui pax nostra est, reconciliati sumus, et qui potest inquietudinem præsentium tribulationum remove, *sanctificet vos* interius exteriusque *per omnia*, ut nulla pars vestri absque sanctificatione sit. Ita vos sanctificet, *ut integer servetur vester spiritus*, id est illud quo intelligitis; *et anima*, id est illud quo vivitis; *et corpus*, id est illud quo visibiles atque contrectabiles estis. Tria sunt enim quibus homo constat, id est spiritus et anima et corpus. Quæ rursus duo differunt, quia sæpe anima simul cum spiritu nominatur. Pars enim quædam ejus rationalis, qua carent bestię, spiritus dicitur. Principale itaque nostrum, spiritus est. Deinde vita quæ conjungit hunc corpori anima vocatur. Postremo ipsum corpus, quoniam visibile est, ultimum nostrum est. Illud enim quo ratiocinamur et intelligimus atque sapimus, ita proprie spiritus nuncupatur, ut non sit universa anima, sed aliquid ejus, id est rationale nostrum, quo sentit et intelligit ipsa anima, non sentitur corporis sensibus, sed sicut ille est intus sensus, ex quo est appellata sententia. Hinc autem pecoribus sine dubitatione præponitur, eo quod sint illa rationis expertia. Non enim spiritum habent, id est intellectum et rationis ac sapientię

sensum, sed animam tantum. Et si spiritus peccatorum in Scripturis appellatur, spiritus pro anima nominatur. Sit ergo vester spiritus integer, id est nullo consensu peccati vulneratus; et anima vestra integra, id est delectationibus carnis non sauciata; et corpus integrum, id est peccati perpetratione non læsum. Et ita servetur integra omnis vestræ substantia naturæ in adventum Domini nostri Jesu Christi, ut cum venerit Dominus, non inveniat in vobis peccatorum vulnera. Usque in adventum Domini, id est usque in finem vitæ præsentis servetur integra; quia qualis quisque de hac vita exierit, talis apparebit in adventum judicis. Et servetur sine querela, id est tam innocens ut nemo possit de ea juste conqueri. Aliud namque est, esse sine peccato, quod de solo in hac vita Unigenito dictum est (I Petr. II; Luc. I; Philip. III); aliud est, esse sine querela, quod de multis sanctis etiam in hac vita dici potuit. Quoniam est quidam modus bonæ vitæ, de quo etiam in ista humana conversatione justa querela esse non possit. Quis enim juste queritur de homine qui nemini male vult, et quibus potest fideliter consulit, nec contra cujusquam injurias tenet libidinem vindicandi, ut veraciter dicat: « Sicut et nos dimittimus debitoribus nostris? (Matth. VI; Luc. XI.) » et tamen ex eo quod iterum dicit: Dimitte sicut et nos dimittimus, sine peccato se non esse declarat. Itaque sine que-

rela conservemini usque in adventum Domini, id est usque ad terminam vitæ hujus, ut nemo possit de vobis querelam facere. Et vere integri sine querela conservabimini, quia *fidelis est Deus*, id est verus in promissis, *qui vos vocavit ad vitam, qui etiam faciet ut integri perveniatis ad eam.*

« Fratres, orate pro nobis. Salutate fratres omnes in osculo sancto. Adjuro vos per Dominum, ut legatur epistola hæc omnibus sanctis fratribus. Gratia Domini nostri Jesu Christi vobiscum. Amen. »

Orate, inquit, fratres, pro nobis, ut auxilio vestræ orationis liberemur a malis, et bona quæ cupimus assequamur, et ex nostra parte salutate fratres omnes, ut per hanc salutationem impleantur majori gratia, et magis accendantur in amorem nostri. Salutate illos in osculo non lascivo nec ficto, sed sancto, id est casto et vera dilectione pleno. Adjuro etiam vos per Dominum, ut si propter simplicem justificationem neglexeritis facere, vel saltem propter sacramentum adjurationis hæc faciatis. Adjuro vos ut hæc epistola quam mitto vobis, legatur omnibus fratribus sanctis, id est baptismo sanctificatis, ut omnes ædificentur per eam et confirmentur; vel sanctis, id est perfectis, ut et ipsi proficiant. Et ut hæc omnia facere valeatis, gratia Domini nostri Jesu Christi vobiscum, cujus auxilio complectis. Amen.

IN EPISTOLAM II AD THESSALONICENSES.

ARGUMENTUM.

Perseverantibus vel exercentibus se magnis tribulationibus, aliam scribit Apostolus ad Thessalonicenses epistolam, iterum monens eos ad patientiam, et ostendens feri justo Dei judicio, ut boni per præsentis tribulationes ad gloriam perpetuæ quietis perveniant, et mali propter injurias quas sanctis inferunt, pœnas æternas subeant. Ostendit etiam non instare temporibus eorum diem Domini, sicut ipsi putabant propter quædam ejus verba, quæ de resurrectione posuerat in præcedente epistola. Nam quod dixerat: « Mortui qui in Christo sunt, resurgent primi; deinde nos qui vivimus, qui relinquimur, simul rapiemur cum illis in nubibus obviam Christo in aera (I Thes. IV), » hoc ipsi non intelligentes, conturbati sunt, æstimantes quod in diebus eorum qui tunc vivebant, venturus esset Dominus. Qua de causa præcipue secundam hanc Apostolus scribens eis ab Athenis epistolam, intendit hujusmodi opinionem destruere; ne cum transiret tempus, quo Dominum crediderant esse venturum, et venisse non cernerent, etiam cætera fallaciter sibi promitti arbitrantes, de ipsa mercede fidei desperarent. Nam si Apostolus in hoc mentitus putaretur, per omnia reprobaretur; et ita diabolus tali

opinio deluderet eos ac deciperet. Propterea corrigi Apostolus hunc eorum errorem, et ostendit quædam certa signa demonstrari antequam dies judicii veniat, scilicet primo venturam discessionem et revelandum hominem peccati, qui est Antichristus. Remotione autem erroris hujus facta suo more transit ad moralem exhortationem, ubi et uspere corripit quorundam inquietudinem. Sic autem incipit.

CAPUT PRIMUM

« Paulus et Silvanus et Timotheus Ecclesiæ Thessalonicensium in Deo Patre nostro et Domino Jesu Christo, gratia vobis et pax Deo Patre nostro et Domino Jesu Christo. »

Hæc superius exposita sunt. Post salutationem sic inchoatur:

« Gratias agere debemus semper Deo pro vobis, fratres, ita ut dignum est, quoniam supercrescit fides vestra, ut abundat charitas uniuscujusque vestrum invicem, ita ut nos ipsi in vobis gloriamur in Ecclesiis Dei, pro patientia vestra et fide in omnibus persecutionibus vestris et tribulationibus, quas sustinetis in exemplum justi judicii Dei, ut digni habeamini in regno Dei, pro quo et

« patimini; si tamen justum est apud Deum retribuere tribulationem his qui vos tribulant, et vobis qui tribulamini, requiem nobiscum in revelatione Domini Jesu de cœlo cum angelis virtutis ejus in flamma ignis dantis vindictam his qui non noverunt Deum, et qui non obedierunt Evangelio Domini nostri Jesu Christi. »

A magna laude eorum inchoat, ut laudando eos roboret et nutriat, sed de omnibus quæ in eis laudat præmittit Deo gratias, significans eos a Deo habere omnia quæ laudat, vel pro quibus laudat eos, ne forte ex his quæ divinitus acceperant, extollerentur quasi ex seipsis hæc habentes. Superbia enim plerumque nascitur ex bene gestis. Debemus, inquit, o fratres, agere semper Deo gratias pro vobis, ita magnifice ut dignum est, quia pro magnis magnæ gratiæ sunt agenda, quoniam fides vestra non decrescit in tribulationibus, sed supercrescit, id est quotidie major efficitur et superat adversitates, vel adeo proficit, ut operetur supra quam præcepimus, et similiter claritas uniuscujusque vestrum abundat, id est abundanter exuberat invicem, id est inter vos, et quia ita supercrescit fides vestra et abundat charitas, inde gratias agere debemus Deo pro vobis, non ita vos laudare tanquam hoc habeatis ex vobis. Ita supercrescit et abundat fides et charitas vestra, ut nosipsi qui non de parvo gloriaremur, in vobis gloriemur in Ecclesiis Dei, id est apud Ecclesias fidelium, quibus exemplum de vobis damus. Videte ergo ne sitis exemplum defectus, gloriamur apud sanctorum Ecclesias in vobis, id est de bonis qui sunt et augmentur in vobis. Gloriamur scilicet pro patientia et fide vestra, id est quia non deficitis nec murmuratis, sed patientes estis et fidem servatis in omnibus persecutionibus vestris de loco ad locum, et tribulationibus, id est tormentis et afflictionibus, quæ vobis in uno loco fiunt, quas sustinetis in exemplum justii judicii Dei. Ac, si diceret: Dum tam dura toleratis, qui tam recta agitis, quid aliud quam justii judicii Dei exemplum datis? Quia ex vestra pœna colligendum est quomodo feriat quibus irascitur, si sic vos affligi patitur, in quibus lætatur; aut quomodo illos percussurus est, quibus justum judicium exhibet, si etiam vos sic cruciat, quos pie redarguens fovet. Hinc enim intelligitur quomodo non parcat impiis, tanquam sarmentis præcis ad combustionem, quando justis non parcat propter perficiendam purgationem. Unde et Petrus ait: « Tempus est ut incipiat judicium de domo Domini (I Petr. iv). » Si autem primum a nobis, quis finis eorum qui non crediderunt Dei Evangelio? Hoc est exemplum futuri judicii, quod nunc cernitur in afflictione piorum, sed si illi modo pro levibus peccatis suis graviter judicantur, multo gravius impii pro suis criminibus in fine judicabuntur. Ideo sustinetis flagella præsentium tribulationum, ut per hoc purgati habeamini digni in regno Dei, id est in æterna beatitudine, ad quam nullus intrabit mundus, quia non est dignus. Sed vos per has

A passiones efficiamini digni illo regno, pro quo et patimini, non pro humano favore, nec pro aliquo crimine. Nihil aliud enim querit mens vestra pro his passionibus, nisi regnum Dei, nihilque criminis admisistis, pro quo talia pateremini. Dixi quia sustinetis in exemplum justii judicii Dei, quo puniuntur adversarii vestri, ut habeamini digni in regno Dei; tamen hac conditione fiet istud, si est justum apud Deum, his dari pœnam et vobis quietem, id est si opera eorum tam pessima sunt, ut Deus judicet justum esse pro his retribui cruciatus æternos, et si opera vestra adeo vere bona coram eo sunt, ut ipse justum ducat pro his recompensare quietem perpetuam. Aliter enim judicat Deus et aliter homo, quia sæpe quod nos improbamus, ipse approbat, et quod nos laudamus, ipse condemnat. Satisfacta enim et justa sunt judicia Dei. Et ideo ne isti nimium securi fiant de futura salvatione sua, et incipiant negligenter agere, ac nimium certi de damnatione suorum adversariorum, incipiant desperare conversionem illorum, pulchre temperatam dedit Apostolus de utrisque sententiam. Sustinetis, inquit, in exemplum justii judicii Dei, ut digni habeamini in regno ejus; si tamen justum est apud Deum, retribuere tribulationem æternam his qui vos ad tempus tribulant, et vobis qui temporaliter tribulamini, requiem nobiscum sempiternam, non in præsentis vita, sed in revelatione Domini Jesu, id est quanto revelabitur et palam coram omnibus apparebit Dominus, ut reddat unicuique secundum opus ejus (Matth. xix). Domini dico, venientis de cœlo cum angelis virtutis ejus, id est per quorum ministerium ostendet ipse virtutem suam, dum bonos per eos elegerit, et malos foras miserit, et venientis in flamma ignis, non quod sit flamma circumdatus, sed per effectum, quia inimicos exuret. Ignis dico, dantis, id est inferentis vindictam his qui non noverunt Deum, id est infidelibus; et qui non obedierunt Evangelio Domini nostri Jesu Christi, id est illis qui fidem habuerunt, sed mandata Domini servare neglexerunt. Gravius peccat sciens, quam nesciens. Nec tamen ideo confugiendum est ad ignorantie tenebras, ut in eis quisque requirat excusationem. Aliud enim est nescire, aliud scire noluisse. Voluntas quippe arguitur in eo, de quo dicitur: « Noluisti intelligere ut bene ageret (Psal. xxxv). » Sed illa ignorantia quæ non est eorum qui scire nolunt, sed eorum qui tanquam simpliciter nesciunt neminem sic excusat, ut sempiterno igne non ardeat, si propterea non credidit quia non audivit quod crederet, sed fortasse ut mitius ardeat. Et si illi æterno igni cremandi sunt, qui Deum nescierunt, quid de illis fiet, qui prædicatores Dei vel servos ejus causa nominis ejus persecuti sunt? Aut si illi perpetuo passuri sunt, qui Evangelio quod acceperant, non obedierunt, quid illi patientur, qui præcepta ipsius Evangelii scienter et voluntarie prævaricati sunt?

« Qui pœnas dabunt in interitu æternas a facis

« Domini et a gloria virtutis ejus, cum venerit glorificari in sanctis suis, et admirabilis fieri in omnibus qui crediderunt, quia creditum est testimonium nostrum super vos in die illo. In quo etiam oramus semper pro vobis, ut dignetur vocatione sua Deus noster, et impleat omnem voluntatem bonitatis et opus fidei in virtute, ut clarificetur nomen Domini nostri Jesu Christi in vobis, et vos in illo, secundum gratiam Dei nostri et Domini Jesu Christi. »

Ignis ille dabit vindictam, id est inferet pro culpis pœnam infidelibus, qui non noverunt Deum; et vanis fidelibus, qui non obedierunt Evangelio Domini. *Qui utrique dabunt*, id est luent pœnas non horarias sed æternas; nec immodico dolore, sed *in interitu*, id est in morte perpetua, longe remoti a facie, id est a præsentia visionis Domini et a gloria virtutis ejus, ne eam videant gloriam, quam virtus ejus ostendit in se et dabit sanctis, sicut scriptum est: Tollatur impius ne videat gloriam Dei. Nam in judicio videbunt boni et mali formam servi, ac deinde cum mali in gehennam præcipitati fuerint, boni sublevabuntur ad videndum claritatem divinitatis ejus. Tunc pro ignorantia et inobedientia sua dabunt mali pœnas æternas, projecti a facie Domini, ut *cum venerit glorificari in sanctis suis*, id est replere et illustrare sanctos suos gloria sua ut videntes eum sicuti est (*I Joan. III*), similes ei fiant, et ipse gloriosus in eis appareat; *et admirabilis fieri*, id est admiratione et laude dignus ostendi in omnibus etiam minoribus, qui crediderunt ea fide, quæ per dilectionem operatur (*Galat. V*). Admirabilis tunc fiet in his qui crediderunt, impiis admirantibus tantam salutem justorum, quos hic despiciebant, et ipsis justis suam salutem mirantibus (*Sap. V*). Ideo autem, sicut dictum est, dabit tunc vobis requiem nobiscum, *quia testimonium nostrum*, id est quidquid testificati sumus vobis de his quæ fierent in illo die, id est de gloria honorum et pœna malorum creditum est a vobis, quamvis esset super vos, id est superans vestrum intellectum. Quamvis enim supra sensum esset quod dicebamus, nec posset illud intelligentia vestra capere, tamen vos nostro testimonio fidem accommodatis. Vel super vos fuit, id est vobis dominans, non quærentibus rationes. Vel quasi de loco sublimiori loquentes, super vos testimonium protulimus, quod creditum est a vobis de his quæ fierent in die illo. In quo die ut dignetur vos, id est dignos habeat vocatione sua Deus noster, nos etiam oramus semper pro vobis, id est non solum instruximus vos de illa justorum glorificatione vel impiorum damnatione, sed etiam oramus assidue pro vobis, ut ad illam gloriam pertingat, ut scilicet dignetur vos sua vocatione Deus noster, id est dignos vos judicet quos ad regnum vocet, dicens: « Venite, benedicti Patris mei, percipite regnum (*Matth. XXV*), » et impleat omnem vestram voluntatem bonitatis, id est plenarie faciat quidquid bene vultis. Vel interim in hoc sæculo impleat omnem voluntatem bonitatis in vobis,

A id est plene vos faciat velle omne bonum, et impleat in vobis opus fidei, id est omne bonum opus quod fides exigit, et hoc in virtute potentis actionis. Vel confessio est proprie opus fidei, ut quod mens credit, lingua fateatur. Impleat in vobis opus fidei, id est confessionem, et hoc in virtute constantiæ, ut nullo modo flecti possitis a fidei confessione. Ita videlicet impleat hoc in vobis, ut in præsentia vita nomen Domini nostri Jesu Christi clarificetur in vobis, id est clarum et gloriosum appareat in bonis operibus vestris; et vos in alia vita clarificemini in illo, et hoc secundum gratiam Dei nostri Patris, et Domini Jesu Christi, id est secundum quod Pater et Filius per gratiam sancti Spiritus electis suis gratuita bonitate tribuunt supra quam mereri possunt.

CAPUT II.

B Rogamus autem vos, fratres per adventum Domini nostri Jesu Christi, et nostræ congregationis in ipsum, ut non cito moveamini a vestro sensu, neque terreamini, neque per spiritum, neque per sermonem, neque per epistolam tantam quam per nos missam, quasi instet dies Domini. » Captata illorum benevolentia, illisque laudatis, secure descendit ad principalem intentionem, id est ad remotionem erroris, quo maxime turbati fuerant. Quasi dicat: Vos quidem, fratres, patienter omnia sustinetis, propter remunerationem quam a Deo speratis; sed rogamus vos, ut a sensu catholicæ fidei nullatenus moveamini. Rogamus autem vos, fratres, non per leve aliquid, sed per adventum Domini nostri Jesu Christi, si vultis ut vobis prosit, et per adventum nostræ congregationis in ipsum Christum, si vultis esse in ea, quando omnes qui electi fuerimus, conveniemus et congregabimur in ipsum Salvatorem, ut non cito moveamini, id est non cito titubetis a vestro sensu, id est a sensu catholicæ veritatis, vel a puro intellectu quem hactenus habuistis. Non cito moveamini. Si enim movemini, cito est, quia nihil vobis infertur quod diu duret, neque terreamini quasi de vicino periculo imminenti judicii, neque per spiritum moveamini aut terreamini, id est si malignus Spiritus quasi angelus lucis apparens in visione (*II Cor. XI*), persuadeat vobis diem Domini vestris diebus imminere, vel si quis dicat se per Spiritum sanctum hoc cognovisse, non credatis ei; neque per sermonem, id est si quis præsentialiter apud vos publico sermone et inter alia voluerit hoc astruere, nolite unquam credere; neque per epistolam alicujus absentis tanquam per nos, id est jussu nostro missam vel sub nomine nostro, nolite seduci. Sive per epistolam quam vobis ante misimus, nolite turbari, id est nolite putare quod epistola nostra dicat vestris diebus Christum esse venturum. Nolite his omnibus terreri, quasi instet dies Domini, id est quasi vicinus imminet dies, in quo Dominus potentiam suam ostendet, puniendo malos et salvando bonos. Non ideo dicit hoc Apostolus, ut velit illos securitate torpere ac negligenter agere et imperatos esse, sed ne in ipsa perturbatio-

expectationis celerrimi adventus Dominici possent A seduci, ad suscipiendum pro Christo diabolum, qui hoc agebat, ut sub nomine Christi se faceret adorari, sicut et beato Martino suadere voluit. Quod ut non possit, tempus et signa Dominici adventus describit Apostolus. Nam animos eorum vel occasio non intellectæ epistolæ, quæ ipse eis miserat, vel ficta revelatio quæ per somnium deceperat, vel aliquorum conjectura, Isaiaæ et Danielis evangeliorumque verba de Antichristo prænantiantia, in illud tempus interpretantium moverat atque turbaverat, ut in majestate sua tunc Christum sperarent esse venturum. Cui errori medetur Apostolus, et exponit quæ ante adventum Christi debeant prætolari, ut cum illa facta fuerint, tunc expectetur Christus. Parcens tamen eorum verecundiæ vel teneritudini, nequaquam eos aperte reprehendit, quia commoti fuerant, sed ne moveantur rogat, et prius etiam multum eos laudat. Plerumque enim pusillanimes utilius emendamus, si et eorum bene gesta memoramus et si qua ab eis inordinate gesta sunt, non jam tanquam perpetrata corripimus, sed quasi adhuc ne perpetrari debeant prohibemus, ut et illa quæ approbamus, illatus favor augeat; et contra ea quæ reprehendimus, magis apud pusillanimes exhortatio verecunda convalescat. Unde nunc magister egregius, ut dictum est, cum Thessalonicenses in accepta prædicatione perdurantes, quasi de vicino mundi termino quadam cognosceret pusillanimitate turbari, prius in iis quæ fortia prospicit, laudat; et caute monendo postmodum quæ infirma sunt, roborat. Cum enim multa laude digna dixisset, subjunxit hoc de quo loquimur: *Rogamus autem vos, fratres, per adventum Domini*, etc. Egit enim verus doctor, ut prius audirent laudari quod recognoscerent, et postmodum quod exhortati sequerentur, quatenus eorum mentem, ne admonitio subsequens concuteret, laus præmissa solidaret. Et qui commotos eos vicini finis suspitione cognoverat, non jam redarguebat commotos, sed quasi transacta nesciens, adhuc commoveri prohibebat, ut dum se de ipsa levitate motionis prædicatori suo incognitos crederent, tanto reprehensibiliores essent, quanto magis ab illo se cognosci formidarent.

« Ne quis vos seducat ullo modo (*Matth. xxiv*; D
« *Ephes. v*). Quoniam nisi venerit discessio primum,
« et revelatus fuerit homo peccati, filius perditionis,
« qui adversatur et extollitur supra omne quod dicitur
« Deus, aut quod colitur, ita ut in templo Dei
« sedeat, ostendens se tanquam sit Deus. Non retine-
« tis quod cum adhuc essem apud vos, hæc dicebam
« vobis? Et nunc quid detineat scitis, ut reveletur
« in suo tempore. Nam mysterium jam operatur
« iniquitatis, tantum ut qui tenet, nunc teneat,
« donec de medio fiat. Et tunc revelabitur ille iniquus,
« quem Dominus Jesus interficiet spiritu oris sui (*Isa. xi*),
« et destruet illustratione adventus sui eum, cujus est
« adventus secundum operationem Satanæ in omni virtute et in signis et prodigiis mendacibus, et in omni seductione iniquitatis

« his qui pereunt, eo quod charitatem veritatis non receperunt, ut salvi fierent. Ideo mittet illis Deus operationem erroris, ut credant mendacio, ut judicentur omnes qui non crediderunt veritati, sed consenserunt iniquitati.

Videte, inquit, *ne quis vos seducat ullo modo*, id est ne quis errorem trahat vos, aut per spiritum, aut per sermonem, aut per epistolam, aut per alium quemlibet seductionis modum, ut credatis instare diem Domini. Quoniam non instabit, nisi primum venerit discessio, ut omnes gentes quæ Romano imperio subjacent, discedant, ab eo; sive ut multitudo Ecclesiarum discedat a pontifice Romano, aut multitudo hominum discedat a fide, et nisi revelatus, id est manifestatus et ostensus fuerit, qui omnium prophetarum verbis prænantiantur, homo peccati, id est Antichristus, qui non est Deus justitiæ, ut fingit, sed homo peccati, in quo fons omnium peccatorum est; et filius perditionis, id est diaboli, qui est universorum perditio, vel filius perditionis, id est natus ad hoc ut perdat alios, et tandem ipse perdatur, qui scilicet homo pestifer, adversatur Christo, ideo vocatur Antichristus, id est contrarius Christo. Vel omnium saluti adversatur, et extollitur, id est offert se supra omne quod dicitur Deus, aut quod colitur, id est super illos qui nuncupative, non essentialiter sunt dii, et super illum qui naturaliter est Deus. Deus enim dici aliquando et homo potest, quod juxta Moysen dicitur: « Ecce constitui te Deum Pharaonis (*Exod. vii*). » Deus vero coli, purus homo non potest. Quia vero se Antichristus et super sanctos quosque homines, et super ipsius potentiam divinitatis extollit per exactum sibi nomen gloriæ, et hoc quod Deus dicitur, et hoc quod Deus colitur, transire conatur. Et ita erigetur, ut sedeat et se adorari jubeat in templo Dei (*II Cor. vi*), fortasse quod est in Jerusalem. Vel potius in templo Dei sedeat, id est in mentibus Christianorum quos seducet, qui fuerant templum Dei. Nam juxta hunc sensum dicitur in Psalmo: « Deus, venerunt gentes in hæreditatem tuam, polluerunt templum sanctum tuum (*Psal. lxxviii*). » Gentes enim templum Dei polluerunt, quando pagani quosdam Christianos in persecutione idolis sacrificare coegerunt. In hujusmodi igitur templo sedeat Antichristus, ostendens se tanquam sit Deus, id est, super eorum mentes quos seducere poterit fastu gloriæ sæcularis, erigetur, ita ut cum sit homo peccator, homo tamen existimari despiciens, Deum se super homines mentiat. Nisi ita fuerit Romanum imperium antea desolatum, et Antichristus ita manifestus præcesserit, Christus non veniet, qui ideo venturus est, ut Antichristum destruat. Non retinetis in corde quod hæc ipsa quæ nunc scribo per epistolam cum adhuc apud vos essem, præsentis sermone narrabam et dicebam vobis, Christum scilicet non esse venturum, nisi præcesserit Antichristus? Hoc debuissetis firmiter retinere, nec de suspitione

proximi adventus Domini fluctuare. Ego præsens dicebam Antichristum prius venturum. *Et nunc quid detineat scitis*, id est quæ causa sit quod Antichristus modo non veniat, optime nostis. Quoniam scire illos dixit, aperte hic dicere noluit; et ideo nos qui nescimus quod illi sciebant, aut vix aut nequaquam pervenire valeamus ad id quod ipse in hoc loco sensit. De Romano tamen imperio intelligitur, qui et ideo videtur aperte noluisse dicere illud esse destruendum, quod ipsi qui imperabant æternum putabant, ne eos in odium Christiani nominis excitaret. Si enim aperte et audacter dixisset: Non veniet Antichristus, nisi prius Romanum deleatur imperium, iusta causa perditionis adversus nascentem tunc Ecclesiam consurgere videretur. Velavit ergo quaedam obscuritate quod dicebat, ne Romanos incitaret ad persecutionem Ecclesiæ, vel impediret a suscipienda fide. Scitis, inquit, quid cum nunc detineat, ut modo non veniat, hoc scilicet detinet eum, quia ea quæ fieri debet ante adventum ejus, prius facienda erit discessio, ut gentes discedant a Romano imperio, sicut jam factum cernimus. Et adhuc prius est facienda gravior discessio, ut ingens multitudo eorum qui Christianitatis vocabulum portant, discedat a religione, vel ab ipsa fide Christiana, in tantum ut cum venerit Antichristus, facile suscipiat eum. Hoc et his similia sunt quæ adhuc detinent et retardant eum. Non enim debet aut potest venire, nisi quando ita depravatum fuerit genus humanum ut cum venerit, mox suscipiat eum. Scitis quid eum nunc detineat, id est quæ causa sit dilationis ejus, *ut reveletur*, id est manifestius cunctis appareat in tempore suo, id est sibi congruo, quando videlicet Satanas solvetur et adversus Ecclesiam totis viribus relaxabitur. Tunc namque erit tempus Antichristi, quia tunc regnabit, cum quod voluerit faciet, ideoque tunc aperte revelabitur. Nam in membris suis iam operatur *mysterium iniquitatis*. Quod est dicere multis malis atque peccatis quibus Nero impurissimus Cæsarum mundum premit, Antichristi parturitur adventus; et quod ille operaturus est postea, in isto ex parte completur. Sic ergo in Nerone, cujus opera velut Antichristi videbantur, et in cæteris similibus operatur adversarius ille jam ab ipso tempore apostolorum *mysterium iniquitatis*, quia Nero et cæteri

rent illum, ut reveletur in suo tempore, quando parati erunt homines illum suscipere. Nam *mysterium* jam operatur iniquitatis. Ac si dicatur: Tunc Antichristus manifestus videbitur, nam in cordibus iniquorum secreta sua jam nunc occultus operatur. Jam in malis et fictis qui sunt in ecclesia, operatur *mysterium iniquitatis*. Quod ideo dicitur *mysterium*, quia videtur occultum, quia tales operarii ostendunt se velut ministros aut famulos Christi, cum revera ministri sint Antichristi. Nam iniquitas eorum est mystica, id est pietatis nomine palliata et sub specie boni perpetrat malum. Tantum est, ut qui tenet nunc fidem Christianæ religionis, teneat illam, id est donec perseveret in ea, donec de medio fiat, id est donec de medio Ecclesiæ exeat *mysterium iniquitatis*, quod nunc occultum est, cum manifestum erit, quando omnes de Ecclesia palam exhibunt, qui non ad Christum, sed ad Antichristum pertinebunt. *Et tunc revelabitur iniquus*. Vel Romanus pontifex, qui tenet nunc Ecclesias teneat illas donec de medio fiat, id est donec ab ipsa Romana Ecclesia, quæ est medium et cor Ecclesiarum, fiat iniquitas, ob quam ab ea multæ discedant Ecclesiæ. Variis modis intelliguntur hæc Apostoli obscurissima verba, ubi tamen nullum temporis spatium aperuit. Ait enim ut reveletur in suo tempore, nec dixit post quantum temporis id futurum sit. Et subjunxit, nam *mysterium operatur iniquitatis*, nec expressit quandiu hoc operetur. Item quod sequitur, *tantum qui tenet nunc, teneat donec de medio fiat, et tunc revelabitur ille iniquus*, docet nos Antichristum manifestum futurum; sed post quantum temporis revelandus sit, nec saltem obscure locutus est Apostolus. Quid enim sit, qui modo tenet teneat; vel quid sibi velit, donec de medio fiat, potest quisque sic coaptare, ut intelligat vel aliquatenus suspicetur, quia quoquo modo scriptum legit, quandiu teneat, aut post quanta temporum spatia de medio fiat, hic tacetur omnino. Sed quantumcunque lingua ac breve sit hoc intervalum, omnia tamen in eo flent, quæ prius fieri debent; et tunc Antichristus manifeste revelabitur fons totius iniquitatis. Qui nec modo in membris suis, nec tunc in seipso timendus est, quia ipsum *Dominus Jesus interficiet spiritu oris sui*; id est invisibili virtute spiritus sui, procedentis a se sicut a Patre, divina scilicet potestate et imperio majestatis suæ, cujus jussisse fecisse est, non in exercitu multitudinis, non in robore militum, non in auxilio angelorum. Sed quomodo tenebræ solis fugantur adventu, sic *et illustratione adventus sui eum* Dominus destruet atque delebit. Occidetur autem sicut e volumine Danielis intelligimus (*Dan. xi*), in monte Oliveti in papillone in solio suo, illo videlicet loco, quo Dominus in cælum ascendit (*Act. i*). Post ejus interfectionem concedentur ad penitentiam quadraginta quinque dies his, qui ad vitam præordinati sunt, et persecutionem illam non sine offensione transierunt. Utrum vero completis illis quadraginta quinque diebus, mox adveniat Dominus, an alius

supersit aliquantulum temporis, omnino nescimus. A Quod ergo dicitur: *Quia Dominus Jesus interficiet eum in spiritu oris sui, et destruet illustratione adventus sui* non ita intelligendum est, quasi in ipso iudicis adventu sit interficiendus atque destruendus, sed antea. Illustratio enim adventus ejus non inconvenienter intelligitur aliqua claritas prænuntians adventum ejus, quæ tanta sit, ut visa ea, mox præ timore moriatur ille pestifer. Destruet itaque cum Dominus, *cujus est adventus secundum operationem Satanæ*, id est qui cum venerit faciet omnia diabolo instigante, non tamen sine sensu, ut phrenetici, qui culpam non habent de malis quæ faciunt. Nam sicut Deus erat in Christo mundum reconcilians sibi (*II Cor. v*); ita diabolus erit in Antichristo, mundum seducens. Et sicut Christus ait: «*Pater in me manens, ipse facit opera (Joan. xiv)*; » sic diabolus in Antichristo manens, faciet omnia quæ illi videbitur facere. Ejus itaque adventus erit secundum operationem Satanæ *in omni virtute*, quia tunc Satanæ relaxabitur, ut in omni virtute sua per eum operetur; et operabitur *signis*, quæ in quocunque tempore significant aliquid; et *prodigiis*, quæ in futuro tantum aliquid significant. Vel signis minoribus et prodigiis majoribus. Quæ scilicet signa et prodigia erunt mendacia, id est falsa; sive quia mortales sensus per magica phantasmata decepturus est, ut quod non faciet, facere videatur; sive quia illa ipsa etiamsi erunt prodigia, ad mendacium pertrahent credituros. Operabitur ergo per eum et per sequaces ejus Satanæ in omni virtute fortitudinis contrariæ, et in signis atque prodigiis falsorum miraculorum vel ad falsitatem ducentium; et in omni seductione iniquitatis, quia simulabit se religiosum, ut sub specie decipiat pietatis, imo se Deum esse dicet, et se adorari faciet, atque regna cælorum promittet. Alios quoque donis temporalium divitiarum corrumpet, alios autem cruciatibus et minis atque terroribus frangat; et in omni arte seductionis fraudes suas exercebit *his qui pereunt*, id est qui ad vitam prædestinati non sunt, sed ad perditionem vadunt. Illa ergo Antichristi tentatio cunctis præteritis major apparebit, quando pius martyr corpus suum tormentis subjiciet, et tamen ante ejus oculos miracula tortor faciet. Quis enim ad fidem convertatur incredulus, cujus jam credentis non paveat, et concutiatur fides, quando persecutor pietatis fiet etiam operator virtutis, idemque ipse qui tormentis sæviet ut Christus negetur, miraculis provocabit ut Antichristo credatur? Sed potens est spiritus Dei, corda suorum etiam inter tam gravia tentamenta custodire. Nam his signis atque prodigiis seducuntur, qui seduci merebuntur, *eo quod charitatem veritatis non receperunt*, Judæi scilicet vel alii infideles, qui noluerunt recipere charitatem veritatis, id est spiritum Christi. Dicitur enim Spiritus sanctus charitas, et Christus est veritas (*ibid.*). Charitas ergo veritatis, ut diximus, est spiritus Christi. Sed hanc charitatem Judæi non rece-

perunt *ut salvi fierent*, ideo seducuntur ut pereant. Vel charitatem veritatis non receperunt, ut non bona spiritalia concupiscerent, sed carnalia. Et quia spe invisibilium bonorum gaudere non norunt, in laqueos Antichristi ruituri sunt, ut crederent mendacia, quod illo duce velut in conspectu inimicorum suorum visibilibus, qui eos visibiliter captivaverant, habituri sint visibilem gloriam. Quia ergo veritatem charitatis non receperunt, ut invisibilia bona, quæ sola sunt vera, diligerent, et Salvatore suscepto salvi fierent, *ideo mittet*, id est venire permittet illis Deus non operatorem, sed ipsam operationem, id est fontem erroris, *ut credant mendacio* quia « mendax est ille ipse et pater ejus (*Joan. viii*). » Ut judicentur, id est in adventu iudicis condemnentur omnes qui non crediderunt veritati Christi, sed consenserunt iniquitati Antichristi. Deus illis operationem erroris mittet, quia diabolum facere ista permittet justo ipse iudicio, quamvis faciat ille inique malignorum concilio. Ut judicentur, inquit, omnes et cætera. Proinde judicandi seducuntur, et seducti etiam judicabuntur. Sed judicandi seducuntur illis iudiciis Dei, occulte justis, juste occultis, quibus ab initio peccati rationalis creaturæ nunquam judicare cessavit, seducti autem judicabuntur novissimo manifestissimoque iudicio. Et quidem si Antichristus de virgine natus esset, et prior venisset in mundum, poterant Judæi habere excusationem et dicere quod postea venerit veritas, et ideo primitus mendacium poterant pro veritate suscipere, sed cum non ita sit, ideo judicandi sunt, imo procul dubio condemnandi, quia Christi veritate contempta, postea mendacium, id est Antichristum suscepturi sunt.

« Nos autem gratias agere debemus Deo semper pro vobis, fratres dilecti a Deo, quod elegerit nos Deus primitias in salutem, in sanctificatione spiritus et in fide veritatis, in quam et vocavit vos per Evangelium nostrum, in acquisitionem gloriæ Domini nostri Jesu Christi. »

Illi condemnabuntur, qui veritate reprobata mendacium suscipient; sed nos et vos salvabimur, qui veritatem suscepimus, unde et gratias agere debemus. Et hoc est: *Nos autem debemus semper gratias agere Deo pro vobis*, quos ad suam notitiam vocavit, o fratres dilecti a Deo, pro merito vestræ sanctitatis, vel dilecti ab eo gratis priusquam aliquid boni merissetis, et sic per prævenientem dilectionem vocati, quoniam ipse prior dilexit nos. Gratias, inquam, Deo agere debemus, eo quod ab æterno elegerit nos apostolos Deus in consilio providentiæ vel sapientiæ suæ, et elegerit nos primitias, id est primos et præcipuos, non ultimo tempore periculoso, sed in exordiis evangelicæ gratiæ et hoc in salutem æternam, ut in eam nos perducatur, positos in sanctificatione spiritus, qui in baptismo sanctificat et in fide veritatis, non erroris, quia quicquid nostra fides credit, verum est, nec fallitur opinio alicujus erroris, sicut illi qui sequuntur Antichri-

stum: *In quam fidem et vos vocavit*, id est non solum A nos primitus vocavit, sed etiam deinde vos per *Evangelium nostrum* quod vobis prædicavimus, in *acquisitionem gloriæ Domini nostri Jesu Christi*, id est ut per fidem acquiratis gloriam quam habet Jesus. Vel in acquisitionem gloriæ Christi, id est ut vos sibi Christus acquireret, ad glorificandum se, ut essetis populus acquisitionis, et bene vivendo glorificaretis (*I Petr. II*).

« Itaque, fratres, state et tenete traditiones quas didicistis, sive per sermonem, sive per epistolam nostram. Ipse autem Dominus noster Jesus Christus, et Deus et Pater noster qui dilexit nos, et dedit consolationem æternam et spem bonam in gratia, exhortetur corda vestra, et confirmet in omni opere et sermone bono. »

Quandoquidem vos Deus ad fidem convertit, ut per hanc ad gloriam pertingatis, nec instat adhuc dies Domini. *Itaque, fratres, state in fide*, et nolite moveri a vestro sensu, ut stare firmiter in fide valeatis, atque statum rectitudinis in operibus bonis servetis, tenete in corde et operibus *traditiones quas didicistis, sive per sermonem nostrum, dum essemus præsentibus; sive per epistolam, quam vobis misimus absentes*. Et nos quidem sermonibus et epistolis vos admonemus, ut in bono stetis; sed ipse Deus per internam gratiam suam exhortetur interior corda vestra. Nos enim foris in vacuum laboramus, si ipse intus non fuerit operatus. Et ideo *ipse Dominus noster Jesus Christus*, qui nos suo dominio principavit; et *Deus* qui nos creavit, et Pater noster, qui nos in filios adoptavit, et paterno affectu *nos dilexit*, dans Unigenitum pro nobis, et per Spiritum Paracletum, qui interpretatur *consolator*, dedit nobis *consolationem æternam*, cum jam inter adversa præsentis miseræ incipimus æterna gaudia prægustare; et *spem bonam*, qua de exsilio ad patriam exspectamus redire in gratia, id est in ejus gratuito munere, quia hoc non merueramus; ipse, inquam, Filius et Pater, qui jam tot et tanta nobis largitus est, *exhortetur corda vestra*, id est incitet ad meliora voluntates vestras, et *confirmet* contra impugnantes *in omni opere bono, et in omni sermone bono*.

CAPUT III.

« De cætero, fratres, orate pro vobis, ut sermo Dei currat et clarificetur, sicut et apud vos, et ut liberemur ab importunis et malis hominibus. Non enim omnium est fides. Fidelis autem Dominus est, qui confirmabit vos, et custodiet a malo. Confidimus autem de vobis, fratres, in Domino, quoniam quæ præcipimus vobis, et facitis et facietis. Dominus autem dirigat corda vestra in charitate Dei et patientia Christi. »

De his quæ ad vos pertinent, diximus et monuimus quomodo agere debeatis; sed *de cætero*, id est de eo quod ad alios pertinet, *fratres, orate pro nobis, ut sermo Dei* quem loquimur, *currat* siue impedi-mento ad omnes gentes, ut multi velociter conver-

tantur. Currat, id est sine obstaculo festinanter ad omnes perveniat; et *clarificetur*, id est clarus intelligibilis fiat audientibus, *sicut et apud vos* currat et clarificatus est; et *orate ut liberemur*, ne detineamur *ab importunis et malis hominibus*, id est infidelibus, qui resistunt nobis, sed ubique liberi discurremus ad prædicandum. Liberemur ab importunis, id est infidelibus, qui resistunt veritati; disputando verbis contra eam, et malitia nos persequuntur, et tormentis cruciant. Ideo dico liberemur, quia *non omnium est fides*, id est non ad omnes pertinet fides, id est non adhuc omnes fident accepere, qui accepturi sunt. Vel *orate ut liberemur*, quia non omnium est fides, id est non ad omnes pertinet fides, non omnes credituri sunt

B etiam orantibus vobis, sed tantum qui præordinati sunt. Nam posse habere fidem, sicut posse habere charitatem, natura est hominum, habere autem fidem, sicut habere charitatem, gratia est fidelium. Ideo autem Deus per orationes fidelium non credentes credere facit, ut ostendat quia ipse facit. Nempe est enim tam imperitus, tam carnalis, tam tardus ingenio, qui non videat Deum facere, quod se rogari præcepit ut faciat. Non omnium est fides, sed tamen nolite eos timere qui sine fide sunt, quia *Dominus est fidelis*, id est verax in promissis, quæ pollicitus est electis suis, dicens: « Ecce ego vobiscum sum omnibus diebus usque ad consummationem sæculi (*Matth. xxviii*). » Fidelis est, id est fideliter adimplens quæ promisit, *qui confirmabit vos in bono, et custodiet a malo*. Confirmabit, id est firmos et stabiles faciet, ne sitis fluctuantes, et circumferamini omni vento doctrinæ in nequitia hominum (*Ieph. iv*), et custodiet a malo, non ut nihil adversitatis patiamini, sed ut nihil possit nocere vobis. Diximus ut teneatis traditiones nostras, et cætera quæ jussimus impleatis; nec puto frustra, sed *confidimus de vobis, fratres, in Domino*, qui in vobis operatur, *quoniam ea quæ præcipimus vobis, et nunc facitis, et semper facietis*. Sed non frustra hæc de vobis confidamus, Dominus, id est Spiritus sanctus *dirigat corda vestra*, id est reetas faciat voluntates vestras, existentes *in charitate Dei Patris, ut eum toto corde diligatis; et in patientia Christi, ut parati sitis libenter pati pro Christo*, sicut ille passus est pro vobis. Tota Trinitas in hac brevi sententia declaratur. Dominus enim præmittitur, ipse, ut diximus, est Spiritus sanctus. Qui recte Dominus appellatur, sicut Pater et Filius, quia ubi vult spirat (*Joan. III*), et quidquid vult facit, atque regit universa, nec regitur, ut omnia illi serviunt. Unde et in superiori etiam epistola similiter Dominum Apostolus eum vocavit, dicens: « Vos autem Dominus multiplicet (*I Thess. III*), » etc. Post hoc autem de curiosis agitur, cum subditur:

D « Denuntiamus autem vobis, fratres, in nomine Domini nostri Jesu Christi, ut subtrahatis vos ab omni fratre ambulante inordinate, et non accen-

ditur: « Denuntiamus autem vobis, fratres, in nomine Domini nostri Jesu Christi, ut subtrahatis vos ab omni fratre ambulante inordinate, et non accen-

« dum traditionem quam acceperunt a nobis. Ipsi enim scitis quemadmodum oporteat imitari nos (II Cor. xi). Quoniam non inquieti fuimus inter vos, neque gratis panem manducavimus ab aliquo, sed in labore et fatigatione, nocte et die operantes, ne quem vestrum gravaremus. Non quasi non habuerimus potestatem, sed ut nosmetipsos formam daremus vobis ad imitandum nos. Nam et cum essemus apud vos, hoc denuntiabamus vobis, quoniam si quis non vult operari, nec manducet. Audivimus enim inter vos quosdam ambulare inquiete, nihil operantes, sed curiose agentes. Illis autem qui ejusmodi sunt, denuntiamus et obsecramus in Domino Jesu Christo, ut cum silentio operantes, suum panem manducent. »

Vos quidem præcepta nostra sicut confidimus facitis et faciatis, sed quicumque ea non fecerint, subtrahite vos ab illis. Ethoc vobis denuntiamus, fratres, id est de hac re nuntium vobis divinum afferimus in nomine Domini nostri Jesu Christi, id est in auctoritate nominis ejus, vel in gloria ejus, ut propter reverentiam nominis ejus, vel propter gloriam nominis ejus faciatis quæ dicimus, ut scilicet *subtrahatis* vos et separetis ab omni fratre, id est ab omni Christiano ambulante inordinate, id est vivente non sicut ordo naturæ, vel ordo Christianæ religionis exigit, et ambulante non secundum traditionem ambulandi, id est vivendi vel operandi quam acceperunt a nobis. Ab omni fratre qui sic ambulat, vos subtrahite, id est non communicetis ei in cibo, vel in potu, vel in mercatura, sive in colloquio, vel in alia re, nisi causa corrigendi eum, ne participes sitis delictorum ejus; sed vitate eum, ne videamini fovere pravitatem ejus ut erubescat et corrigatur, cum se viderit ab omnibus caveri. Ab eis qui non secundum traditionem nostram ambulant, vos subtrahite; nam vos ipsi scitis quemadmodum oporteat imitari nos, id est non est opus ut exponam vobis eam traditionem, quia scitis eam. Scitis videlicet quomodo, qui recte volunt ambulare, debent ambulare per viam, per quam nos ambulamus, id est exempla nostra sequi. Quoniam non inquieti fuimus inter vos, ut illi qui aliena negotia curant otiose vagantes huc et illuc, ac divinum officium relinquentes, et vitam singulorum superflue scrutantes, ac fratribus detrahentes, et murmurationes ac dissensiones, vel scandala nutriendes. Dum enim vacant et nihil operantur, callidus hostis vanam mentem eorum occupat talibus, quia sicut scriptum est, « multam malitiam docuit otiositas (Eccli. xxxiii). » Sed nos non ita fuimus inquieti. Neque gratis, id est, sine pretio justitæ laboris manducavimus, non dico deliciosas escas, sed nec ipsum panem sumptum ab aliquo, sed in labore manuum et fatigatione, quia laboramus usque ad fatigationem; nocte et die operantes unde victum haberemus ne quem vestrum gravaremus, id est ne alicui vestrum essemus oneri stipendia sumendo. Et non laboravimus quasi non habuerimus potestatem sumendi vestra, id est non

ideo victum proprio labore quæxivimus, quod non possemus a vobis accipere sumptus, sed ideo ut nosmetipsos formam daremus vobis, id est exemplum ad imitandum nos, id est ut vos otium dimitteretis, et in opere nos imitaremmini. Si enim nos cum possemus ex prædicatione victum habere, maluimus ex labore nostro vivere, multo magis vos debetis in sudore vultus panem vestrum præparare (Gen. v). Propter aliam causam apud justos in opere laboravit Apostolus, et propter aliam apud Corinthios. Corinthii enim tenaces erant, et multis vitis occupati; et si quid Apostolo dedissent, videretur eis quod Apostolus deberet levius erga eos agere, nec asperè increpare, sed eis blandiri propter dona ipsorum.

Isti vero solebant in otio vivere, et idcirco dedit illis Apostolus in seipso exemplum operandi manibus propriis, ut inde haberent unde possent vivere, et indigentibus eleemosynam præbere. Sciendum itaque beatum Apostolum opera corporalia servos Dei operari voluisse, quæ finem haberent in magnam spiritalem mercedem, ad hoc ut et ipsi victi ac tegumento nullo indigerent, et manibus suis hoc sibi procurarent. Neque huic apostolico præcepto exemplo contrarium est quod Dominus ait: « Nolite solliciti esse, dicentes quid manducabimus, aut quod bibemus, aut qua operiemur? » (Matth. vi.) Non enim Dominus prohibuit servis suis ut ista non procurent, quantum necessitati sat est, unde honeste vivere possint, sed superfluitatem nimiam sollicitudinis deliciosarum escarum et vestium interdixit. Non enim ait: Ne solliciti sitis animæ vestræ ut manducetis, sed quid manducetis; neque corpori vestro ut induamini, sed quid induamini: prohibeus scilicet nimiam accurationem in eligendis vestibus et cibis, non laborem operis, aut moderatam curam in rebus necessariis. Nos ipsos, inquit, formam dedimus vobis, ut nos imitaremmini in labore operis, nam et hoc dicebamus vobis. Qui videlicet non solum nunc dum sumus absentes, hoc vobis dicimus; sed etiam cum essemus præsentibus apud vos denuntiabamus ac præcipiebamus vobis, quoniam si quis non vult operari, nec manducet. Non diximus, si quis non operatur, non manducet, sed, si quis non vult operari, quia sunt nonnulli qui vellent, sed non possunt, et ideo licet non operentur, inculpabiles tamen sunt, quia in terra pax hominibus bonæ voluntatis (Luc. xi). Qui vero possunt, sed nolunt, illi merito culpantur, et illis etiam corporeus cibus interdicitur. Idcirco autem et laboris nostri mentionem fecimus, et ut similiter agatis præcipimus, atque superius, ut ab omni fratre ambulante inordinate vos subtrahatis, admonuimus, quia audivimus, id est relatum est nobis, quosdam inter vos ambulare inquiete, id est de loco ad locum tota die vagari, et nihil operantes manibus suis, quod utile sit illis vel aliis, sed curiose agentes, id est cum quadam superflua et inutili sollicitudine et studio, quærentes ab aliis quid agat rex Francorum, aut quanti sit. »

uona, seu quale tempus in hoc anno sit futurum, A per hoc ad amorem nostræ religionis attrahantur, vel his similia. Multa enim breuiter hic reprehendit vitia, id est inquietudinem et otiositatem et curiositatem et multiloquium, in quo non decribit peccatum (*Prov. x*). Nam inquietudo, dum sollicitè domus aliorum circuit, vel aliena acta curiose perquirit, in multis offendit. Curiose enim agunt, qui ad hoc vacant, ut dicere aut audire aliquid novi possint. Sed *his qui ejusmodi sunt denuntiamus, et insuper obsecramus*, id est per sacra adjurantes eos rogamus, in Domino Jesu Christo, ut saltem propter ejus reuerentiam faciant quod dicimus, ut scilicet non curiose loquantur, vel interrogent quid agat ille vel ille, nec otiosi manentes vivant ex alieno labore, sed cum silentio operantes, id est linguam refrenantes, et manus in opere exercentes, manducent non alienam panem, sed suum, id est proprio labore præparatum, non ab aliis sibi datum.

« Vos autem, fratres, nolite deficere benefacientes. Quod si quis non obediit verbo nostro per epistolam, hunc notate, et ne commisceamini cum illo, ut confundatur. Et nolite quasi inimicum existimare, sed corripite ut fratrem. »

Propter necessitates sanctorum qui, quamvis obtemperant præceptis Apostoli, ut cum silentio operantes panem suum manducent, possunt tamen multis ex causis indigere supplemento aliquo talium sustentationum, ne illi qui habebant unde seruis suis necessaria præberent, hac occasione pigrescerent, præuidens continuo subjunxit: *Vos autem, fratres, nolite deficere benefacientes.* Monuimus, inquit, loquaces et otiosos, ut silentium teneant, et manibus suis operentur, unde victum habeant. Sed vos fratres, qui habetis hujus mundi substantiam, nolite propter hoc quod diximus, deficere benefacientes illis, sed sustentate illos de bonis vestris quia, etsi operentur, possunt tamen nonnullis, imo pluribus indigere, cum sint forsitan infirmæ et delicatæ naturæ. Præcipimus ut operentur quantum poterunt. Quod, id est sed si quis non obediit verbo nostro, id est huic præcepto, sive etiam cuiilibet alii mandato, quod vobis damus per epistolam, hunc notate, id est notam reprehensionis huic imponite. Vel per epistolam hunc notate, id est per litteras quis sit mihi notificare; et ne commisceamini cum illo, id est ne communicetis illi, sed excommunicate illum, et a vobis separate, ut a vobis abjectus confundatur, id est erubescat, cum se viderit a cunctis abhorreret, et sic vel propter verecundiam corrigatur et obediat. Et licet præcipiam non commisceri, tamen nolite illum existimare quasi inimicum, id est nolite illum odio habere, putantes quod sit inimicus, sed affectu dilectionis corripite illum ut fratrem, quia unum habet vobiscum Patrem. Ac si dicat: Pacem cum eo exteriorè solvite, sed interiorem circa illum medullitius custodite, ut mentem peccantis sic vestra discordia feriat, quatenus pax a vestris cordibus nec abnegata discedat. Nam, licet cum extraneis vel etiam paganis communia sint agenda, ut

per hoc ad amorem nostræ religionis attrahantur, cum fratribus tamen aliquoties non sunt agenda, ut corrigantur. Extranei enim blandimentis ad bene agendum sunt alliciendi: fratres vero, si sponte peccaverunt, asperitate moderata sunt corrigendi.

« Ipse autem Dominus pacis det vobis pacem sempiternam in omni loco. Dominus sit cum omnibus vobis. Salutatio mea manu Pauli, quod est signum in omni epistola. Ita scribo. Gratia Domini nostri Jesu Christi cum omnibus vobis. Amen. »

Monui ut inobedientem fratrem exterius corripatis, et tamen interius apud vosmetipsos pacem erga eum teneatis; sed quia hoc non nisi per donum gratiæ cœlestis facere valetis, ipse Dominus qui est pacis et concordiae dator et amator, det vobis pacem non horariam, sed sempiternam, id est quæ finem non habeat. Pacem, id est fratrum concordiam, vel sedationem tribulationum, quas ab adversariis patimini, sive quietem ab impugnatione vitiorum, vel pacem cum Deo et sanctis angelis, quæ nunquam finiatur vel interrumpatur, det ipse vobis in omni loco, id est et apud domesticos et apud extraneos, et in hoc sæculo, et in futuro. Et ut pacem habeatis, Dominus sit cum omnibus vobis, qui vos et a malo defendat, et in bono custodiat. *Salutatio mea* subjungitur, *scripta manu Pauli*, id est propria manu mea, non manu notarii, quod est signum in omni epistola, ut per hoc cognoscatur esse mea ita enim scribo. Ne quis pseudo poneret nomen suum in principio pro Pauli nomine, et diceret suam esse epistolam, ideo Paulus in fine consueverat hoc signum ponere, per quod ab eo recognosceretur. Non tamen in unaquaque epistolarum ejus hoc invenitur, sed in ista, et in illa, quæ est ad Colossenses, et in prima ad Corinthios. Galatis hoc idem sic dicitur: « Videte qualibus litteris scripsi vobis mea manu (*Galat. vi*). » Et Philemoni: « Ego Paulus scripsi manu mea (*Philem. xix*). » Quod ergo dicit, quia hoc signum est in omni epistola, non sic intelligendum est, ut prorsus in unaquaque sit hoc ita scriptum, sed in multis, quia omne non semper plenariam universitatem significat, sed aliquando quamdam multitudinem. Nam quod dictum est ad Corinthios: « Salutant vos omnes sancti (*II Cor. xiii*), » nequaquam putandum est quod omnes sancti qui erant in universo mundo, tunc per illam epistolam salutarent eos, cum plures essent qui scripturam illius epistolæ ignorarent. Similiter et quod Romanis dictum est: « Salutant vos omnes Ecclesiæ Christi (*Rom. xvi*), » non de omnibus Ecclesiis, quæ erant in orbe, intelligitur. Sic ubi legimus, quia « omnes gentes narrabant de præliis Judæ (*I Mach. iii*), » nequaquam credimus quod omnes gentes quæ erant in Scythia, vel in India, vel in remotis insulis, tunc loquerentur de Machabæi præliis. Multa quoque similia in Scripturis sanctis reperiuntur, in quibus omne, non universitatem significat.

Non ergo mentitus est Apostolus, qui dixit hoc signum esse in omni epistola sua, quod tamen non per singulas quasque posuit, quia secundum usitatum Scripturarum sanctarum locutionem hoc dixit. Deinde *gratia Domini nostri Jesu Christi*, inquit, hoc est generale auxilium Christi ad omnia, et donum sit *cum omnibus*, tam majoribus quam minoribus, tam viris quam mulieribus. Vel si hoc quod

A dicit nunc : *Gratia Domini nostri Jesu Christi cum omnibus vobis*, est illa saluatio quam sua manu in omni epistola pro signo se testatur scribere, tunc veraciter omne potest intelligi universalitatem plenarie significare, quia hoc reperitur in fine uniuscujusque epistolæ. Omnes enim quas scripsit finiuntur in precatione gratiæ. Amen.

IN EPISTOLAM I AD TIMOTHEUM.

ARGUMENTUM.

Sicut Lucas refert, cum discessisset Paulus a Hieronyma perambulabat Syriam et Ciliciam, confirmans Ecclesias pervenitque Derbem et Lystram (Act. xv, et xvi). Et ecce discipulus quidam erat ibi nomine Timotheus, filius mulieris viduæ fidelis, patre gentili. Huic testimonium bonum reddebant qui in Lystris erant et Iconio fratres. Hunc voluit secum proficisci, et assumens, circumcidit eum propter Judæos, qui erant in illis locis. Sciebant enim omnes quod pater ejus gentilis esset. Non propterea circumcidit eum Paulus, quod putaret aliquid justificationis illi tam ex circumcisione pervenire; sed ne Judæi propter eum, si esset incircumciscus, retardarent fidem suscipere. Quem cum postea Paulus in Asia pontificem Ephesiorum reliquisset, pseudoapostoli, qui carnales observantias inducere nitentur, propter hanc ejus circumcisionem vires in eum assumebant. Ipse minus fortiter quam oporteret resistebat eis. Et ideo scribit ei Apostolus, ostendens quodammodo rationes, quas illi objiciat. Scribit etiam de episcopali officio, quomodo scilicet Ecclesiam instruat, quales presbyteros vel diaconos ordinet, quales viduas honoret; quomodo seipsum in Ecclesia habeat, et quomodo eam regat: Sicque incipit:

CAPUT PRIMUM.

« Paulus Apostolus Jesu Christi secundum imperium Dei Salvatoris nostri, et Christi Jesu spei nostræ, Timotheo dilecto filio in fide: Gratia et misericordia et pax a Deo Patre nostro et Jesu Christo Domino nostro.»

Timotheo scribit Paulus, cui credendum est, quia est *Apostolus Christi Jesu*, id est legatus regis Salvatoris; et hac auctoritate munitus, resistit pseudoapostolis. Et est Apostolus non secundum suam præsumptionem, sed *secundum imperium Dei*. Et idcirco qui ei resistit, imperio Dei resistit (Rom. xiii). Spiritus sanctus præcepit: « Segregate mihi Barnabam et Paulum in opus ad quod assumpsi eos (Act. xiii); » et nunc ipse Paulus dicit se apostolum esse juxta imperium Dei, quia imperium Spiritus sancti est imperium Dei Patris, cum inseparabilis sit voluntas et operatio Trinitatis: Paulus est apostolus secundum imperium Dei Salvatoris nostri, et Jesu

D *Christi spei nostræ*, id est juxta præceptum summi Patris, qui nos salvat, et Filii in quo est spes salutis et gloriæ nostræ, non in carnali observatione. Paulus, qui tantæ auctoritatis est, mittit hanc epistolam Timotheo dilecto filio in fide, id est quem ipse genuit non in carne, sed in fide. Licet enim jam fidelis esset, et bonum testimonium haberet, quando Paulus eum invenit, tamen per eum in eadem fide et religione sic instructus est, ut recte dicatur ab eo genitus in fide. Vel in fide scribit ei contra corruptores fidei. Et hunc Filium salutem, dicens: Sit tibi gratia, id est donatio Spiritus sancti, qua ministri Dei, id est episcopi armantur; et misericordia, per quam divinitus a miseria hujus sæculi, vel omnium malorum libereris (1 Petr. iv); et pax, id est tranquillitas animi et prælibatio æternæ pacis, ut, vitis et hostibus superatis, in pacata quiescas Ecclesia. Et hoc sit tibi a Deo Patre nostro, qui nos creavit, atque paterno affectu nos diligit; et a Christo Jesu Domino nostro, id est ab eo quem unxit Deus, et Salvatorem constituit, qui et nos suo dominio clementer mancipavit.

« Sicut rogavi te ut remaneres Ephesi, cum irem in Macedoniam, ut denuntiarem quibusdam, ne aliter docerent, neque intenderent fabulis et genealogiis interminatis, quæ quæstiones præstant magis quam ædificationem, quæ est in fide.»

Ita sit tibi gratia, misericordia et pax, sicut rogavi te ut remaneres Ephesi, id est resideres pontifex apud Ephesios. Vel subauditur, ita fac, sicut rogavi te facere cum irem in Macedoniam, ut scilicet remaneres Ephesi, id est vice mea præsens ageres, et ordinares Ecclesiam Ephesi, quam ego absens non poteram sufficienter gubernare, ut denuntiares, id est ex parte Dei nuntius esses quibusdam, quorum nomina Spiritus sanctus, qui in me loquitur, ignorat, ne aliter quam nos docerent, neque auditorum eorum intenderent eorum fabulis et genealogiis interminatis, id est locutionibus generationum et compositionibus, quæ sine termino sunt præ longitudine, quia finis earum non potest inveniri; quæ ideo sunt respiciendæ, quia præstant quæstiones disputationum, id est generant lites magis, id est potius, quam ædificationem morum et justitiæ, quæ est in fide, non in

carnali observatione. Prius præcipitur de pseudo A repellendis, tam doctoribus quam auditoribus, ut illis primo repulsis, deinde valeat puritas catholicæ veritatis prædicari et audiri. Fabulas vocat, quas alibi traditiones dicit, quas præter legitimas et propheticas Scripturas Judæi tenent, quas non scriptas habent, sed memoriter retinent, et alter in alterum loquendo transfundit, quas deuteriosim vocant. Ubi etiam dicere audent et credere, Deum homini duas creasse mulieres, ex quibus texunt genealogias vere, sicut tunc dicit Apostolus infinitas, parientes infructuosissimas quæstiones. Et pseudoapostoli, qui volebant esse partim Judæi, partim Christiani, erant autem hæretici, docebant apud Ephesios non solum carnales observantias legis, sed etiam has Judæorum traditiones a libris prophetis et legitimis alienas, et nonnulli Ephesiorum intendebant verbis eorum. Sed Timotheus ad hoc relictus est Ephesi, ut auditores et doctores hujusmodi corrigeret aut expelleret.

« Finis autem præcepti est charitas de corde puro et conscientia bona et fide non ficta. A quibus quidam aberrantes, conversi sunt in vaniloquium, volentes esse legis doctores, non intelligentes neque quæ loquuntur, neque de quibus affirmant. »

Ipsi docent fabulas et legem carnaliter implendam, sed *finis præcepti*, hoc est plenitudo legis est *charitas*. Finis enim non consumptionem præcepti, sed consummationem hoc loco significat. Omnis itaque præcepti finis est charitas, id est ad charitatem referitur omne præceptum, et per charitatem impletur. Totam enim magnitudinem et amplitudinem divinarum eloquiorum secunda possidet charitas, qua Deum proximumque diligimus. Finis igitur, id est consummatio omnis præcepti, quod vel in Veteri, vel in Novo Testamento legitur, charitas est non qualiscunque, sed ea quæ est de puro corde. Nam et male viventes irretiuntur sibi societate perditæ conscientia, et dicuntur se amare, nolle discedere ab invicem, suis colloquutionibus conciliari, desiderare se absentes, gaudere ad mutuam sibi præsentiam. Sed amor iste tartareus est. Quamobrem ut a tali amore vera charitas Christianorum distinguatur, de corde puro esse dicitur. Latrones enim inter se et cæteri tales, charitatem de corde puro non habent, quia purum cor in charitate est, quando diligitur homo secundum Deum, et nihil aliud quam id quod diligendum est, diligitur, et conscientia bona subjungitur propter spem, et conscientiam ponit pro spe. Ille enim sperat, qui conscientiam bonam gerit; quem vero pungit conscientia mala, retrahit se a se, et non sibi exspectat nisi damnationem. Tertio et fide, inquit, non ficta. Si enim fides nostra mendacio caruerit, tunc et non diligimus, quod non est diligendum, et recte id credimus quod speramus, et speramus quod credimus, ut in nullo spes nostra fallatur. Qui vero fingunt sibi quod credant et sperent sicut hæretici et Judæi sive gentiles, fi-

dem habent fictam et ideo non possunt habere charitatem, quæ complet mandatum. Ille etiam fidem habet fictam, qui bene quidem credit, sed propter metum aut verecundiam, seu propter quamlibet aliam causam non confitetur quod credit, sed quodammodo fingit se non credere. Sed illa charitas consummat omne præceptum, quæ est de corde puro, quæ nihil diligit, nisi quod debet diligi; et de conscientia bona, id est de bona spe quam gerit conscientia bene operantis; et de fide non ficta, id est non ab hominibus inventa, sed a divinis eloquiis sumpta; vel non ficta, id est non propter metum in corde celata, sed oris confessione libere prolata. A quibus virtutibus, id est a charitate de corde puro, et a spe bonæ conscientia, et a fide vera quidam procul aberraverunt, putantes se Deum et proximum puro corde diligere, cum non pure diligerent; putantes se spem bonæ conscientia habere sine merito actionis religiosæ, et putantes se non fictam fidem habere, cum haberent fiduciam, sed fallabantur. Tales erant qui carnales observantias prædicabant, quia Deum se diligere putabant, cum non diligerent eum, sicut in actione eorum declarabatur, dum putarent se præcepta ejus adimplere, sed magis ea transgrederentur; et putabant se bonam habere conscientiam, quasi de observatione legis, et æstimabant se fidem non fictam habere, sed a divinis eloquiis sumptam, cum magis haberent fictitiam, credentes Deum hircorum atque taurorum sanguine delectari et odore thymiamatis, quem nos homines sæpe declinamus. Et hoc est quod dicitur, quia quidam a charitate et a bona conscientia et a fide non ficta aberrantes, conversi sunt in vaniloquium, ut vane loquantur de lege, volentes esse doctores legis, dum carnaliter eam docent observari debere; non intelligentes verba quæ docent, videlicet neque ea quæ ipsi loquuntur, id est verba quæ docent et mandata carnalium cæremoniarum quæ ipsi docent, quia non intelligunt quid sit Sabbatum vel circumcisio, vel hirci seu tauri immolatio vel aliquid hujusmodi, id est nesciunt quid in his significetur, neque ea intelligunt de quibus affirmant, id est auctoritates, et quibus assumunt quædam testimonia, per quæ conantur asserere cæremonias illas juxta litteram carnaliter esse complendas, quia non animadvertunt Scripturarum intentionem, et sensum spiritalem, ideoque vane loquuntur, volentes esse magistri aliorum, cum ipsi nihil sciant. Vel neque ea quæ loquuntur, neque ea de quibus affirmant, intelligunt, id est neque quæstiones quas proponunt, neque rationes quibus eas probant. Similiter faciunt hæretici, vel quilibet temerarii præsumptores, cum, si quando de prava et falsa opinione sua reprehendi et convinci cœperint ad defendendum id quod levissima temeritate et apertissima falsitate dixerunt, libros sanctos unde id probent proferre conantur, vel etiam memoriter, quæ ad testimonium valere arbitrantur, multa inde verba pronuntiant, non intelligentes neque quæ loquuntur, neque de quibus affir-

nant. Postquam his verbis Apostolus improbat adversarios, mox suam partem approbat, subdeus :

« Scimus autem quia bona est lex, si quis ea legitime utatur, sciens hoc quia lex justo non est posita, sed injustis et non subditis, impiis et peccatoribus, sceleratis et contaminatis, parricidis et matricidis, homicidis, fornicariis, masculorum concubitoribus, plagiariis, mendacibus et perjuris, et si quid aliud sanæ doctrinæ adversatur, quæ est secundum Evangelium gloriæ beati Dei, quod creditum est mihi. »

Ipsi non intelligunt legem quam docere volunt, et ideo vane de eo loquuntur; sed nos intelligimus eam, et ideo vere de ea loquimur. Nam *scimus quia bona*, id est *utilis est lex, si quis ea legitime utatur*, id est sicut intendit ipsa lex, ut scilicet per eam confugiat ad gratiam, *sciens quia justo lex non est posita, sed injustis*. Justo non est lex posita, quæ tamen bona est, si quis ea legitime utatur. Hæc autem duo Apostolus velut inter se contraria connectens, monet lectorem ad scrutandam quæstionem atque solvendam. Quo modo enim bona est lex, si quis ea legitime utatur, si justo non est posita? Nam quis legitime utitur lege, nisi justus? At justo non est lex posita, sed injusto. Annon etiam injustus, ut justus fiat, legitime uti lege debet, qua tanquam pædago perducatur ad gratiam (*Gal. iii*), per quam solam quod lex jubet, possit implere? Per ipsam quippe justificatur gratis, id est nullis suorum operum præcedentibus meritis. « Alioquin gratia jam non est gratia (*Rom. ii*); » quando quidem ideo datur, non quia bona opera fecimus, sed ut ea facere valeamus, id est non quia legem implevimus, sed ut legem implere possimus. Injustus ergo legitime lege utitur, ut justus fiat. Quod cum factum fuerit, ea jamjam non utitur tanquam pædago, cum eruditus fuerit. Quomodo enim justo lex non est posita, si et injusto est necessaria, non qua injustus ad justificandam gratiam perducatur, sed qua legitime jam justus utatur? Vel legitime utitur lege jam justus, cum eam terrendo imponit injustis, ut cum et in ipsis cœperit inolitæ concupiscentiæ morbus incentivo prohibitionis et cumulo prævaricationis augeri, confluent per fidem ad justificandam gratiam, et per domum spiritus sanitate justitiæ delectati, pœnam litteræ minantis evadant. Ita non erunt contraria, nec pugnant inter se duo ista, ut etiam justus bona lege legitime utatur, et tamen justo lex posita non sit. Non enim ex ea justificatus est, sed ex lege fidei qua credidit. Legitime utitur lege, qui intelligens quare sit data, per ejus comminationem confugit ad gratiam liberantem. Et ideo bona est ei lex, quia plurimum prodest ei, dum perducit illum ad gratiam. At huic gratiæ qua justificatur impius, quisquis ingratus velut ad legem implendam de suis viribus fudit, ignorans Dei justitiam, et suam volens constituere justitiæ De non est subiectus (*Rom. v*). Et ideo fit ei lex

non absoluti adjutorium, sed criminis vinculum ideoque non est ei *lex*, non quia malum sit *lex*, sed quia peccatum per eam talibus operatur mortem (*Rom. vii*). Per mandatum enim gravius delinquit, qui per mandatum scit quam malum sit quod admittit. Justo autem non est lex posita, id est imposita ut supra illum sit. In illa enim est potius quam sub illa, quia non sua vita vivit cui coercendi lex imponitur. Injustus vero sub illa est, quia sua vita vivit, cui coercendi lex imponitur. Ut enim sic dicam, ipsam quodammodo legem vivit, qui cum delectatione justitiæ juste vivit, non proprio aut transitorio, sed communi ac stabili gaudens bono. Sub lege autem quisque vivit, in quantum peccator est, id est in quantum a veteri homine non est immutatus. Suam enim vitam vivit et ideo lex supra illum est, quia qui eam non implet, infra illam est. Sed pseudoapostoli hæc non intelligentes, non legitime utebantur lege, et ideo volebant eam imponere justis, id est Christianis per gratiam juste viventibus. Nec contrarium est huic sententiæ Apostoli, quod Psalmista utique justus precatur: « Legem pone mihi, Domine, viam justificationum tuarum (*Psal. cxviii*), » quia de Novi Testamenti gratia id postulat, cum de duritia litteræ Veteris Instrumenti dicat Apostolus, legem non esse justo positam, sed injusto. Qui enim sponte facit ea, quæ lex moraliter jubet vel amplius, cur ei necessitas legis imponeretur? Libertate enim facit, non necessitate, quod facit. Injustus vero, qui sponte noluit bonum facere, cogendus est legis necessitate. Apostolus itaque, ne videretur legem culpæ, dicit quia bona est, si quis ea legitime utatur. Et rursus, ne videretur eam inducere, dicit quia non est posita justo ut ei dominetur, sed injustis, id est eis qui legem naturalem non servabant; et non subditis, id est contumacibus, qui cum eis aliquid prohibetur, tunc illud magis et quadam superbia faciunt. *Impiis quoque posita est*, id est pietatem rectæ fidei non habentibus; et *peccatoribus*, id est sub ipsa fide graviter peccantibus. Et subsequenter exponitur per partes quibus peccatoribus videlicet *sceleratis*, sicut sunt raptores et fures ac sanguinis effusores; et *contaminatis*, sicut qui seipsos libidine polluunt, vel etiam turpiloquiis, vel ebrietatibus, inhonestisque conviviis sordidant. *parricidis quoque et matricidis* lex ponitur, id est iis qui patrem vel matrem occidunt, ut quia lex naturæ in eis est soluta, reformetur per legem litteris scriptam; *homicidis* etiam, id est hominum occisoribus, et *fornicariis*, id est illis qui miscentur cum meretricibus, *masculorum concubitoribus*, id est Sodomiticam abominationem agentibus; et *plagiariis*, id est sicariis, vel quolibet gladio plagas facientibus *mendacibus*, qui falsa loquuntur; et *perjuris*, qui falso jurant. Illis qui talia faciunt est lex imposita, et qui aliud quid tale perpetrant: *si quid aliud adversatur sanæ doctrinæ*, id est morali doctrinæ legis naturalis vel scriptæ, quæ sensum mentis sanat, *quæ scilicet doctrina est secundum Evangelium*, id est concordat

Evangelio *gloriæ beati Dei*, id est quod prædicat vel dat gloriam Deo, qui ex seipso naturaliter est beatus, cum ipse sit æterna beatitudo, *quod Evangelium est mihi creditum* a Deo, sicut fideli dispensatori.

« Gratias ago ei, qui me confortavit in Christo Jesu Domino nostro, quia fidelem me existimavit ponens in ministerio, qui prius blasphemus fui et persecutor et contumeliosus; sed misericordiam Dei consecutus sum, quia ignorans feci in incredulitate. Superabundavit autem gratia Domini nostri, cum fide et dilectione, quæ est in Christo Jesu. »

Deus mihi credidit Evangelium, id est commisit prædicationem Evangelii. Unde gratias illi ago, id est laudes ei devotus offero de hoc ejus gratuito dono, quia lex nullum meritum bonum in me posuerat. Ostendit se multis peccatis plenum fuisse sub lege, justificatum vero postquam recessit ab ea. *Gratias*, inquit, *ago ei*, id est Deo Patri, *qui me confortavit*, id est mentem roboravit in Christo Jesu Domino nostro, sicque fortem reddidit, ut nec mors, nec vita me possit a Christo separare; sed fortis sim et ad agenda bona, et ad toleranda mala. Ita me confortavit, et inde gratias illi ago. Et justum est ut illi gratias referam, *quia fidelem me existimavit*, id est prævidit, cum sub lege fuisset infidelis. Fidelem, inquam, me existimavit, *ponens in ministerio prædicationis*, quia præscivit me fideliter dispensaturum Evangelium, ita ut nihil subtraherem, nihilque peregrinum adderem, *qui prius sub lege fui blasphemus*, id est male loquens de Jesu Nazareno; *et persecutor* (Act. ix) sanctorum ejus; *et contumeliosus*, id est contumelias multas verbis et operibus faciens Christianis, *sed misericordiam Dei*, id est remissionem peccatorum a Deo *consecutus sum quia non malignæ mentis studio id feci, sed ignorans*, id est nesciens me male agere, quia zelo legis fervens, persequer prædicatores gratiæ et inde putabam me Deo placere; sicut Dominus prædixerat: « Venit, inquit, hora, ut omnis qui interficit vos arbitretur obsequium se præstare Deo (Joan. xvi). » Quamvis enim et illis sæpe venia concedatur, qui scienter peccaverunt, ego tamen multo facilius ideo sum misericordiam consecutus, quia non per malitiam, sed per ignorantiam peccavi, degens in incredulitate, quia ignorabam malum esse persequi Christianos, nec credebam Jesum esse Christum. Nec tantum misericordiam sum consecutus, quia mihi peccata dimitterentur; sed etiam *superabundavit*, id est super omni peccatorum meorum enormitatem abundavit, *gratia Domini nostri Jesu Christi*, quia superveniens nova gratia major fuit in me quam fuerat culpa, ut sanctitas vinceret peccata præcedentia. Gratia, inquam, *superabundavit in me cum fide et dilectione, quæ est in Christo Jesu*, id est cum fide qua in Christum credidi, et charitate qua dilexi Christum, vel in Christo proximum. Cum hac enim fide et dilectione *superabundavit in me magnitudo*

coelestis gratiæ, ut divinis charismatibus exuberarem.

« Fidelis sermo et omni acceptione dignus, quia Christus Jesus venit in hunc mundum peccatores salvos facere, quorum primus ego sum. Sed ideo misericordiam consecutus sum, ut in me primo ostenderet Christus Jesus omnem patientiam ad informationem eorum qui credituri sunt illi in vitam æternam. Regi autem sæculorum immortali, invisibili soli Deo honor et gloria in sæcula sæculorum. Amen. »

Gratia Christi superabundavit in me. Nam sermo quem de hac re loquor, est *fidelis*, id est verus; *et est dignus omni acceptione* cordis et operis, quia corpus et animam salvat, ideoque dignus est, ut omnibus modis accipiatur a cunctis hominibus, tam Judæis quam gentilibus. Et quis est ille sermo? *quia scilicet Christus Jesus*, id est rex salvator *venit in hunc mundum peccatores salvos facere*, id est a peccatis salvare, vel a peccatis liberare. Nulla enim causa fuit ei ad nos veniendi, nisi ut peccatores salvos faceret. Omnes autem peccaverunt, vel in seipsis, vel in primo parente. Sed venit unus sine peccato, qui salvos faceret a peccatis. Venit peccatores salvare, *quorum primus ego sum*, non tempore, sed culpæ magnitudine, qua omnibus pejor sum. Pejorem enim voluit intelligi primum. quomodo in artificibus quicumque vult ædificare, dicit: Quis est hic primus structor? quis est primus faber? Aut si curari vult, dicit: Quis est primus medicus? Non utique interrogat quis prior sit ætate, aut quis prior sit professione, sed quis prior sit arte. Quomodo illi in arte primi sunt, sic iste in iniquitate primus, et in peccatis excellens. Sed cum, inquit, in malis actibus cæteros præissem, dum princeps persecutorum essem, ideo *misericordiam consecutus sum, ut in me primo*, id est maximo peccatore misericordiam consecuto, *ostenderet Christus Jesus omnem patientiam*, qua diu sustinet peccantes, ut tandem convertantur; et ostenderet eam *ad informationem eorum qui credituri sunt illi ut eant in vitam æternam*, id est ut informaret eos ad penitentiam exemplo meæ conversionis, dum viderent quanta patientia ipse me exspectavit ut converteret, tandemque conversum quanta gratia donavit, ut nemo jam desperare posset remitti sibi quæcumque peccata, cum ego tantorum scelerum indulgentiam accepissem, sed unusquisque peccator sibi diceret: Si Saulus sanctus est, ego quare despero? Si a tanto medico tam desperatus æger sanatus est, ego vulneribus meis illas manus non optabo? ad illas manus non festinabo? Ut hoc dicerent homines, ideo Saulus factus est ex persecutore apostolus. Quia cum venit medicus volens sibi famam comparare, infirmum quærit aliquem desperatum, et ipsum sanat. Et si pauperrimum inveniat, non ibi quærit mercedem, sed commendat artem. Ita et Christus potentiam specialis medicinæ spiritualis suæ ostendit in Saulo, ut omnes deinceps nossent eum sanare posse

omnes infirmitates omnium confugientium ad se. Deinde, ego, inquit, propter huiusmodi causam consecutus sum misericordiam. Sed inde sit honor et gloria regi sæculorum, id est Patri et Filio et Spiritui sancto, qui regnat ab æterno in æternum per omnia sæcula, et Dominus atque Rex est omnium rerum, utpote Creator. Regi dico, immortalis, id est incommutabili. Nam ubi invenis aliter et aliter, facta est ibi quædam mors. Mors enim est, non esse quod fuit. Et idcirco Deus est vere immortalis, quia nunquam mutatur, sed semper idem ipse permanet (*Psal.* c1). Et est invisibilis in sua substantia, quia videri divinitas humano visu nequaquam potest. Ideo enim dicitur invisibilis, quia hoc videri ab homine non potest, per quod videt homo corpora, non quia mentes piorum visione sua fraudentur, cum scriptum sit: « Beati mundo corde, quoniam ipsi Deum videbunt (*Matth.* v). » Vel idcirco Deus invisibilis est, quia ejus magnitudinem nemo saltem valet mente comprehendere, cum et pax ejus exsuperet omnem intellectum. Et iste est solus Deus, quia præter eum nullus alius. Sed movere quemquam potest, quomodo de hoc solo Deo qui est ipsa Trinitas, dictum sit, *invisibili soli Deo*, cum sint etiam quædam creaturæ invisibiles, quia et a Christo condita sunt omnia visibilia et invisibilia. Sed quia sunt dii falsi visibiles, ideo dictum est, invisibili Deo soli *honor et gloria*. Nam est et creatura invisibilis, quæ tamen non est nobis Deus. Honor ergo et gloria soli Deo, qui est Deus invisibilis. Honor sit ei a creaturis, et gloria in essentia sua. Vel honor in bona conversatione sanctorum, et gloria in multiplicatione eorum, perdurans *in sæcula sæculorum*, id est in longitudinem omnium temporum, vel potius in immensitatem spatiorum æternitatis. Amen.

« Hoc præceptum tibi commendo, fili Timothee, secundum præcedentes in te prophetias, ut milites in illis bonam militiam, habens fidem et bonam conscientiam; quam quidam repellentes, circa fidem naufragaverunt. Ex quibus est Hymenæus et Alexander, quos tradidi Satanæ, ut discant non blasphemare. »

Postquam commemoravit quæ et quanta sunt beneficia Patris et Christi circa peccatores, vult animare Timotheum ad bene agendum, ut scilicet sicut bonus miles pugnet contra vitia, et contra falsos apostolos, et populum sibi commissum defendat et doceat. Hoc, inquit, *præceptum commendo tibi, fili Timothee*. Cum filium vocat, ostendit quia patri præcipienti debet libenter obtemperare. Cum nomen ejus ponit, attentorem reddit, et ad magnum sui desiderium excitat. Recte etiam Timotheum nominat, quem ad bene agendum provocat, quia Timotheus interpretatur *beneficus*. Hoc præceptum commendo, id est omnibus modis quibus possum mando, et attentius injungo tibi *secundum præcedentes in te prophetias*, id est secundum scientiam Scripturæ prophetarum, quæ jam diu in te est, vel secundum quod spiritus propheticus

ostendit mihi de te. Hoc videlicet præ cæteris mandatis commendo, *ut in illis*, hoc est inter alios qui tibi sunt commissi, *milites bonam militiam*, id est in castris Dei sicut strenuus miles præliis contra universos hostes populi Dei, et spiritualibus armis eos expugnes, ut nec falsi doctores. nec maligni spiritus, nec vitia tibi vel populo quem regis, prævaleant. Bonam exerce militiam, *habens fidem rectam et bonam conscientiam*, ut nullius pravi consensus tibi sis conscius, sed cor tuum videat te in omnibus bene velle agere. Ideo enim potest implere quod dico, ut bene milites, quia fidem habes et bonam conscientiam, per quas agitur Dei militia. Et idcirco semper has habere studeto. Quam puritatis ac bonæ voluntatis et humilitatis conscientiam *quidam repellentes*, et consentire peccatis eligentes, ut « qui in sordibus est, sordescat adhuc (*Apoc.* xxi), » dum vento superbix impellerentur, *naufragaverunt*, id est navem animæ scopulis errorum fregerunt, atque se et alios in mare hujus sæculi demerserunt. Et ita naufragium pertulerunt *circa fidem* quasi per circuitum veritatis euntes, et non ex toto a fide recedentes, nec tamen intra eam manentes. *Ex quibus est Hymenæus et Alexander*, qui idcirco fidem perdidit, et naufragium erroris pertulerunt, quia conscientiam bonæ humilitatis habere noluerunt. Superbia enim demersit eos in pericula errorum, dum doctores videri voluerunt. *Quos tradidi Satanæ*, id est excommunicationi et diabolo vexandos permisi, *ut vel cruciatibus eruditi discant non blasphemare*, id est corrigantur, et ad salutem revertantur. Licet enim prima peccati persuasio venerit a Satanæ, et ipse sit auctor omnium peccatorum, quidam tamen ei traduntur ad correctionem, ut opus Satanæ excludatur opere Satanæ. Nulla enim creatura est, sive quæ in veritate manet dans gloriam Deo, sive quæ in veritate non stetit quærens gloriam suam, quæ aut volens aut nolens divinæ providentiæ non serviat. Sed volens servit, quæ hoc sponte facit quod bonum est. De illa vero quæ hoc non vult, fit quod justum est. Nam si etiam ipsi prævaricatores angeli cum principe suo diabolo non recte dicerentur procuratores vel actores providentiæ divinæ, non Dominus principem hujus mundi diabolum diceret (*Joan.* xii, xiv, xvi), nec apostolica potestas ei blasphematores traderet, ut a blasphematione corrigerentur. Sed princeps iste sub tanto imperatore non facit, nisi quantum illi permittitur, et procuratores isti nihil faciunt, nisi quantum Dominus sinit. Non enim latet eum sicut hominem aliquid, aut in aliquo est minus potens, ut procuratores et actores, qui sunt in ejus potestate, aliquid ipso sive non permittente, sive nesciente, in subjectis sibi pro suo gradu rebus efficiant. Non tamen eis rependitur quod de ipsis juste sit, sed quo animo ipsi faciunt, quia quo animo faciunt, ipse considerat. Quia neque liberam voluntatem rationali creaturæ suæ Deus negavit, et tamen potestatem qua etiam injustos juste ordinat, sibi retinuit. Recte ergo non-

nulli traduntur Satanæ ut corrigantur, quia non potest eis Satanæ facere, nisi quod divinitus ordinatur. Hactenus de pseudoprædicatoribus egit Apostolus, nunc de cunctis hominibus subjungit.

CAPUT II.

« Obsecro, igitur primum omnium fieri obsecrationes, orationes, postulationes, gratiarum actiones pro omnibus hominibus, pro regibus et omnibus qui in sublimitate constituti sunt, ut quietam et tranquillam vitam agamus in omni pietate et castitate. Hoc enim bonum est et acceptum coram Salvatore nostro Deo, qui omnes homines vult salvos fieri, et ad agnitionem veritatis venire. »

Hic monet orandum pro omnibus. Quia, inquit, Christus venit peccatores salvare, et tu in hoc militare debes, igitur doce orare, ut impetretur quod faciendum est. *Obsecro*, id est per sacra adjurans rogo, *primum omnium*, id est maxime præ omnibus fieri a te vel a subjectis tuis, sive ab omnibus sanctis, *obsecrationes*, id est rogationes cum adjuratione sacrorum, ad majorem expressionem rogandi; et *orationes*, id est preces simpliciter susas, atque *postulationes*, quibus petantur Dei beneficia generi humano tribuenda, et *gratiarum actiones*, quibus de jam perceptis beneficiis Deo referantur gratiæ. Vel ordo missæ in his verbis ostenditur, ut obsecrationes sint, quas facimus in celebratione sacramentorum, commemoratione sacrorum, antequam illud quod est in Domini nostri mensa, incipiat benedici; orationes vero, cum benedicitur et sanctificatur, et ad distribuendum comminuitur; postulationes autem cum populus ab episcopo benedicitur. Postulationes enim quasi ex debito petivit, velut cum quadam fiducia, vel adnisi, sic postulatio illi sit cum fiducia, ut quod hic geritur, in æterna vita perliciat. Quibus peractis, et participato toto sacramento, gratiarum actio cuncta concludit. Hæc autem causa præcipua fuit Apostolo ista dicendi, ut his breviter præscriptis atque significatis, non putaretur negligendum esse quod sequitur, *pro omnibus hominibus, pro regibus et omnibus qui in sublimitate sunt* constituti, ne quis (sicut se habet humanæ cogitationis infirmitas) æstimaret hæc non esse facienda pro illis, a quibus persecutionem patiebatur Ecclesia, cum membra Christi ex omni essent hominum genere colligenda. Unde et adjungit: *Hoc enim bonum est*, etc. Vel obsecrationes, id est cum adjuratione pro rebus difficilibus, ut pro conversione impiorum, vel pro removendis malis orationes, ut quando jam conversis virtutes et bona orantur. Postulationes, ut quando gloria cœlestis illis petitur. Gratiarum actiones de perceptis seu peractis bonis. Et hujusmodi preces fiant pro omnibus hominibus, ut nullus sit tam peccator, pro quo non oretur, cum et Saulus precibus Stephani sit conversus (Act. vii). Et pro illis etiam, de quibus minus videbatur, id est pro regibus, licet sint mali et sanctis infesti, et pro omnibus qui in subli-

mitate sæcularium dignitatum positi sunt; sicut consules et *duces*, quia de omni genere hominum convertuntur ad religionem, et perveniunt ad salutem, et de his qui fastu et elatione sæcularis potentia fidem et humilitatem videntur abhorreere, sicut cernimus quod etiam ipsi reges, desertis idolis, pro quibus persequebantur Christianos, unum verum Deum cognoverunt et colunt; et ideo pro illis orandum fuit, cum etiam persequerentur Ecclesiam. Ob hoc etiam orandum est pro principibus, ut nos, qui sub ipsis sumus, vitam agamus quietam a persecutione et tranquillam in pace, et hoc in omni pietate divini cultus, et castitate fidei, ut conversis principibus, gentiles non audeant inquietare nos, movendo persecutiones pro impietate idololatriæ; nec hæretici tranquillitatem nostram turbare præsumant, volentes corrumpere castitatem fidei quorundam. In pace principum, quies et regnum servatur Ecclesiarum. Nam in bellis et discordiis eorum dissipatur tranquillitas, tepescit pietas, solvitur disciplina vel districtio, Qua soluta, infirmorum castitas violatur. Et ideo pro his orandum est, ne eveniant hæc per dissensionem principum. Unde et per Jeremiam Dominus Judæis, qui in Babilone captivi tenebantur, præcepit, dicens: « Quærite pacem civitatis, ad quam transmigrare vos feci, et orate pro ea ad Dominum, quia in pace illius erit pax vobis (Jer. xxix). » Babilon vero (quæ dicitur *confusio*) societatem iniquorum significat. Judæi autem cives supernæ Jerusalem, qui in hoc sæculo peregrinantur inter malos, et regibus atque principibus tributa reddunt, et cætera quæ salvo Dei cultu constitutio sæcularis exigit. Idcirco debent orare pro pace eorum, quia in pace eorum erit illis pax, utique interim temporalis, quæ bonis malisque communis est. Utimur ergo et nos pace Babilonis, ex qua per fidem et cœlestis patriæ desiderium ita populus Dei lætabitur, ut apud hanc interim peregrinetur. Pax autem nostra propria et hic cum Deo est per fidem, et in æternum cum illo per speciem. Orate, inquit, pro pace principum, et pro salute omnium, quia hoc agere est bonum, id est ut le Ecclesie et acceptum, id est gratum atque placitum coram Deo Salvatore nostro, qui sicut nos salvat, ita et omnes homines vult salvos fieri, et ad agnitionem veritatis venire, sicut jam venimus. Quamvis certum sit nobis, non omnes salvos fieri, non tamen ideo debemus omnipotentissimæ Dei voluntati aliquid derogare; sed ita intelligere quod dictum est, *qui omnes homines vult salvos fieri*, tanquam si diceret nullum hominem fieri salvum, nisi quem salvum fieri velit; seu quod nullus fiat salvus, nisi quem velit. Et ideo rogandus est, ut velit, quia necesse est fieri si voluerit. De orando quippe Deo agebat Apostolus ut hoc diceret. Sic enim intelligimus quod in Evangelio scriptum est: « Qui illuminat omnem hominem (Joan. v), » non quia nullus hominum sit qui non illuminetur, sed quia nisi ab ipso non illuminetur. Vult itaque omnes salvos fieri

qui salvi fiunt, et omnes ad agnitionem veritatis venire qui veniunt, quia nisi ipso volente nullus salvatur, vel ad agnitionem veritatis accedit. Aut certe sic dictum est, qui vult omnes homines salvos fieri, non quod nullus hominum esset, quem salvum fieri nollet, qui virtutes miraculorum facere noluit apud eos, quos dicit acturos fuisse pœnitentiam, si fecisset (*Matth. xi*; *Luc. x*), sed ut omnes homines, omne genus hominum intelligamus, per quasunque differentias distributum, reges, privatos, nobiles, ignobiles, sublimes, humiles, doctos, indoctos, integri corporis, debiles, ingeniosos, tardi cordis, sapientes, fatuos, divites, pauperes, mediocres, marces, feminas, infantes, pueros, adolescentes, juvenes, senes, decrepitos, in linguis omnibus, in moribus omnibus, in artibus omnibus, in professionibus omnibus, in voluntatibus, et in conscientiarum varietate innumerabili constitutos, et si quid differentiarum aliud est in hominibus. Quid est enim, oro, eorum, unde non Deus per unigenitum suum in omnibus gentibus salvos homines fieri velit, et ideo faciat, quia omnipotens velle inaniter non potest quodcumque voluerit? Præceperat Apostolus ut oraretur pro omnibus hominibus, et specialiter addiderat pro regibus, et his qui in sublimitate sunt constituti, qui putari poterant fastu et superbia sæculari humilitatem Christianæ fidei abhorre. Proinde dicens: *Hoc enim bonum est coram Salvatore*, id est ut etiam pro talibus oretur, statim ut desperationem tolleret, addidit: *Qui omnes homines vult salvos fieri, et ad agnitionem veritatis venire*. Hoc quippe Deus bonum iudicavit, ut oratione humilium dignaretur salutem præstare sublimibus.

« Unus enim Deus, unus et mediator Dei et hominum, homo Christus Jesus, qui dedit redemptionem semetipsum pro omnibus testimonium temporibus suis (*II Tim. i*), in quo positus sum ego prædicator et apostolus. Veritatem dico, non mentior, doctor gentium in fide et veritate. »

Quia dictum erat quod Deus omnes homines vult salvos fieri, ne quisquam diceret posse esse salutis viam in bona conversatione, et unius Dei omnipotentis cultu, sine participatione corporis et sanguinis Christi, unus enim Deus, inquit, unus et mediator Dei et hominum homo Christus Jesus, ut illud quod dixerat, omnes homines vult salvos fieri, nullo alio modo intelligatur præstari, nisi per mediatorem, non Deum, quod semper erat Verbum; sed hominem Christum Jesum, cum « Verbum caro factum est, et habitavit in nobis (*Joan. i*). » Erant enim mortales et peccatores; Deus vero, cui erant reconciliandi, ut possent salvari, immortalis erat, et sine peccato. Mediator autem inter Deum et homines oportebat ut haberet aliquid simile Deo, et aliquid simile hominibus, ne in utroque esset hominibus similis longe a Deo; aut in utroque Deo similis, longe esset ab hominibus, et ita mediator non esset. Et ideo inter mortales peccato-

res et immortalem justum, apparuit mortalis cum hominibus, justus cum Deo, ut, quoniam vitæ stipendium pax est, per justitiam conjunctam Deo evacuaret mortem justificatorum impiorum, quam cum illis noluit habere communem. Et quia omnes homines, quandiu mortales sunt, etiam miseri sint necesse est, quærendus fuit medius qui non solum homo, sed et Deus esset, ut homines ex mortali miseria ad beatam immortalitatem hujus medii beata mortalitas interveniendo perduceret. Proinde inter nos et Deum mediatorem, mortalitatem habere oportuit transeuntem et beatitudinem permanentem, ut per id quod transit congrueret morituris ad id quod permaneret, transferret ex mortuis. Boni autem angeli inter miseros mortales et beatos immortales medii esse non possunt, quia ipsi quoque et beati et immortales sunt. Possunt autem medii esse angeli mali, quia immortales sunt cum illis, et miseri cum istis. His contrarius est mediator bonus, qui adversus eorum immortalitatem et miseriam, et mortalis esse ad tempus voluit, et beatus in æternitate persistere potuit. Ac sic eos et immortales superbos, et miseros noxios, ne immortalitatis jactantia homines seducerent ad immortalem miseriam, et suæ mortis humilitate, et suæ beatitudinis benignitate destruxit in eis, quorum corda per suam fidem mundans, ab illorum immundissima dominatione liberavit. Ad hoc enim se interponit medius immortalis et miser, ut ad immortalitatem beatam transire non sinat, quoniam persistit quod impedit, scilicet ipsa miseria. Ad hoc autem se interposuit mortalis et beatus, ut, mortalitate transacta, et ex mortuis faceret immortales, quod in se resurgendo monstravit, et ex miseris beatos, unde ipse nunquam discessit. Alius ergo medius malus, qui separat amicos; alius bonus, qui reconciliat inimicos. Et ideo multi sunt medii separatores, unus vero bonus, quia multitudo quæ beata est, unius Dei participatione fit beata. Cujus participationis privatione, misera multitudo malorum angelorum, quæ se opponit potius ad impedimentum, quam interponit ad beatitudinis adiutorium, et ipsa multitudine obstreperit quodammodo, ne possit ad illud unum beatificum pervenire, ad quod ut perduceremur, non multis, sed uno mediatore opus erat; et hoc tali, ut ejus divinitatis participatione efficeremur beati. Neque enim nos a mortalitate et miseria liberans, ad angelos immortales beatosque perduxit, ut eorum participatione etiam nos immortales et beati esse possimus, sed ad illam trinitatem, cujus participatione et angeli sunt beati. Mediator enim est non inter Patrem et hominem, sed solum inter Deum et homines. Deus est, Pater et Filius et Spiritus sanctus; homines sunt, peccatores et mortales. Inter illam trinitatem et hominum infirmitatem atque iniquitatem, mediator factus est homo non iniquus, sed infirmus, ut ex eo quod non est iniquus jungeretur Deo; et ex eo quod infirmus, propinquaret nobis, atque ita inter Deum et homines mediator existeret. Sed Apostoli verba

videamus. Vere, inquit, omnes vult salvos fieri, quia unus est Deus creator omnium, cujus participatione fient salvi omnes qui salvabuntur; et unus est mediator Dei et hominum, qui omnes uni Deo conjungat, ut fiant salvi. Christus Jesus est iste mediator, non secundum quod ipse est Deus, sed secundum id quod est homo; *qui dedit semetipsum in cruce redemptionem pro omnibus*, nullum excipiens, qui vellet reddimi ad salvandum. In hoc enim patet quantum Deus homines diligit, et eos velit omnes salvos fieri, si perversitas eorum non obstiterit, quia mediator Deus, quem Deus inter se et homines posuit, mortem pro omnibus sustinuit, ut omnes a morte redimeret. Et ideo qui non salvantur, non est quod de Deo, vel de mediatore possint conqueri, sed de se ipsis, qui nec redemptionem, quam mediator dedit, nec salutem, quam Deus obtulit, voluerunt accipere. Sed ipsum dedit redemptionem, et dedit se *testimonium salutis omnium electorum temporibus suis*, quia resurgens ex morte et ascendens in cælum tempore resurrectionis, et tempore ascensionis seipsum præbuit exemplum, et confirmationem securæ nostræ salvationis. Nam in eo quod resurrexit et ascendit, testatus est quod jam modo quia membra ejus resurgent et ascendent, imo ipse fuit ipsum testimonium. Sed et futuræ damnationis eorum qui nolent salvari, dedit se testimonium, quando persecutores suos una voce prostravit (*Joan. xviii*). Adventus enim ejus et quidquid in carne gessit vel pertulit, reprobis est testimonium damnationis, electis vero testimonium salvationis. In quibusdam codicibus legitur, cujus testimonium temporibus suis confirmatum est. Quod ita intelligitur: Testimonium quod prophetæ dixerunt de Christo, vel quod ipse Christus de se protulit, videlicet quando vel qualiter passurus esset; vel resurrecturus, et cæteris congruis temporibus revera et eventu confirmatum est. *In quo testimonio confirmando et annuntiando, positus a Deo sum ego prædicator et apostolus*, id est præco et legatus, ut omnibus testificer, quia ipse vult omnes salvos fieri. Prædicator, est nomen auctoritatis; apostolus, nomen dignitatis vel potestatis, quod plus est. Et in prædicatione testimonii hujus est mihi credendum, quia *veritatem de hoc dico, et non mentior in hac parte*. Et ideo omnes mihi debent credere, quia **D** omnes docere studeo fidem et veritatem, utpote *doctor in fide et veritate*. Fides est, quod non vides credere; veritas, quod credidistis videre. Fides ducit ad veritatem. Si maneat in eo quod creditur, pervenitur et ad id quod videatur.

« Volo ergo viros orare in omni loco, levantes puras manus sine ira et disceptatione. Similiter et mulieres in habitu ornato, cum verecundia et sobrietate, ornantes se non in tortis crinibus (*I Petr. iii*), aut auro, aut margaritis, vel veste pretiosa, sed quod decet mulieres, promittentes pietatem per opera bona. »

Quandoquidem sum doctor gentium et magister ecclesiarum, ergo volo viros orare, id est ut viri

Deum orent, non solum in Ecclesia, sed et in omni loco, quia Deus ubique est, et orent *levantes* ad cælestia, non deprimentes ad terrena *manus puras* a peccatorum sordibus. Ne enim confundantur manus ad Deum levatæ, debent et a peccatis esse puræ, et in bonis operibus exercitatæ. *Manus puras levare* jubemur, ut cum levas manus ad Deum, veniant tibi in mentem opera tua. Quia enim manus istæ levantur ut impetres quod vis, ipsas manus cogita in bonis operibus exercere, ne erubescant ad Deum levari. Et levantur *sine ira*, ut ne retineas iram in corde tuo adversus proximum, Sed libera conscientiam dicas: « Dimitte nobis debita nostræ, sicut et nos dimittimus debitoribus nostris (*Matth. vi; Luc. ii*). » Et *sine disceptatione*, id est sine litigio causarum, ne adhuc in corde retineas voluntatem contendendi iudicio adversus fratrem tuum, sed remitte quidquid illud est, ut et tibi oranti remittantur peccata divinitus. Vel sine disceptatione apud Deum, ut non disputes in corde tuo, et iudices de inscrutabilibus arcanis secretorum Dei, vel hæsites in fide. *Similiter et mulieres orent in habitu ornato*, ut vestes earum religionem prædant, non libidinem provocet ipsarum indisciplina nudatio. Et sint *cum verecundia*, ut sic humiles exaudiantur dum orant; et *cum sobrietate*, ut in cibo et potu modum teneant. *Ipsæ dico, ornantes se non in crinibus tortis, id est arte crispantibus, aut auro, aut margaritis, vel veste pretiosa*, quia talibus ornamentis concitant aspicientes ad luxuriam; *sed sint promittentes pietatem* non per verba jactantiæ, sed *per opera bona, quod decet mulieres*. Sic enim congruum est, ut illæ non verbis, sed operibus ostendant pietatem suæ mentis, et non induant se luxuriosis ornamentis.

« Mulier in silentio discat cum omni subjectione. Docere autem mulieri non permitto, neque dominari in virum, sed esse in silentio (*I Cor. xiv*). Adam enim primus formatus est, deinde Eva (*Gen. i, ii, iii*). Et Adam non est seductus, mulier autem seducta in prævaricatione fuit. Salvabitur autem per filiorum generationem, si permanserit in fide et dilectione et sanctificatione cum omni sobrietate. »

Mulier non in clamosa voce, sed in silentio discat, ne vox ejus audientes moveat ad libidinem. Et discat non erecta, sed *cum omni subjectione*, quia propter culpam primæ transgressionis subjecta est viro servitute conditionis potius quam dilectionis (*Gen. iii*). Sed *docere non permitto mulieri*, quia nimirum aliquando cum docuit, a sapientiæ æternitate separavit, *neque enim permitto eam dominari in virum*, etsi dominetur in aliam mulierem; quia vir fortioris naturæ est, et dominium debet habere super mulierem; *sed volo eam esse in silentio*, ut neque cum vicina fabuletur. Silentium teneat, quia dum loquitur, magis ad luxuriam irritat et irritatur. Et ne videretur mulieris dura conditio, quæ tam in mariti redigetur servitute, ad antiquum et originale exemplum redit Apostolus, quod *Adam primus factus est*

deinde Eva ex costa ejus; et quod diabolus Adam seducere non potuerit. Sed Evam; et quod post offensam Dei statim viro subjecta sit. Illi autem seducuntur, qui quod faciunt, non putant esse peccatum. Adam vero scivit esse malum quod faciebat, sed inexpertus divinæ severitatis, in eo falli potuit, ut veniale crederet esse commissum. Ac per hoc quidem in eo quod mulier seducta est, non est ille seductus; sed eum sefellit quomodo fuerat judicandum quod erat dicturus: « Mulier quam dedisti mihi sociam, ipsa dedit mihi et comedi (*ibid.*). » Sicut enim Aaron erranti populo ad idolum fabricandum non consensit inductus, sed cessit obstrictus (*Exod. xxiii*); nec Salomonem credibile est, putasse errorem non esse idolis servire, sed blanditiis femineis ad illa sacrilegia fuisse compulsam (*III Reg. xi*); ita credendum est, illum virum suæ femine ad Dei legem transgrediendam, non tanquam verum loquenti credidisse seductum, sed sociali necessitudine paruisse. Mulier enim quod ei serpens locutus erat, tanquam verum esset accepit; ille autem ab unico noluit consortio dirimi, nec in communione peccati. Nec ideo minus reus, si sciens prudensque peccavit. Noluit enim conjugem contristare, quam credebat posse sine suo solatio contabescere, si ab ejus alienaretur animo, et omnino illa interire discordia, non quidem carnis victus concupiscentia, quam nondum senserat in resistente lege membrorum legi mentis suæ, sed amabili quadam benevolentia, qua plerumque fit ut offendantur Deus, ne homo ex amico fiat inimicus. Ergo alio modo quodam et ipse deceptus est, sed dolo illo serpentino, quo mulier seducta est, nullo modo seduci potuit, ut qui spirituali mente præditus erat, crederet quod ei Deus ab esca illius ligni invidendo vetuisset. Hanc enim seductionem proprie appellavit Apostolus, quia id quod suadebatur, cum falsum esset, verum putatum est, id est quod Deus ideo lignum illud tangere prohibuerit, quia sciret eos si tetigissent, velut deos futuros, tanquam eis divinitatem invideret, qui eos homines fecerat. Adam itaque non est seductus, sed mulier seducta fuit in prævaricatione, ut per illam et vir prævaricaretur. Sed salvabitur per generationem filiorum, etc. Hoc est, illa quæ connubio copulata est et redacta semel in conditionem Evæ, delebit errorem veterem procreatione filiorum; ita tamen, si ipsos filios erudierit in fide et dilectione Christi, et sanctificatione et pudicitia. Non enim (ut male habetur in Latinis codicibus) sobrietas est legenda, sed castitas, sicut testatur Hieronymus. Ubi ergo nuptiæ videbantur prædicari ad conferendam salutem, ibi prædicatur virginitas. Nam si salvatur mulier in filiorum generatione, et liberorum numerus salus matrum est, cur additum est, si permanserint filii in fide et dilectione et sanctificatione cum omni castitate? Tunc ergo salvabitur mulier, si illos genuerit filios, qui virgines permaneant; si quod ipsa perdidit, acquirat in liberis, atque damnum et cariem radicis flore com-

A penset et pomis; filios religione nutriat et instruat, ut teneant fidem, ut non deserant charitatem, ut sanctificationem quam in baptismo perceperunt, servent cum omni castitate mentis et corporis. Vel juxta Latinos codices, cum omni sobrietate, id est cum temperantia contra æstum vitiorum. Quamvis enim in publico non permittatur mulier prædicare, filios tamen et familiam vel adolescentulas domi debet instruere. Potest vir in hoc loco rationalem spiritum, mulier vero carnem vel sensualitatem designare. Adam primus formatus est, deinde Eva, quia rationalis sensus principaliter in homine factus est, et secundario caro. Quod Adam non est seductus, sed Eva, id designat quia quoties peccavimus, rationalis sensus non est ita seductus in nobis, ut non putaret malum esse peccatum, cui consensiebat propter amicabilem carnis societatem; sed caro in delectationem ita est seducta, ut neque malum esse putaret, quod delectabiliter committebat. Sed per generationem filiorum salvabitur, quia per effectum bonorum operum perpetuæ saluti sociabitur. Et hæc opera bona maxime in officiis misericordiae frequentari solent. Opera vero misericordiae nihil prosunt paganis sive Judæis, qui Christo non credunt, sive hæreticis, sive schismaticis, ubi fides et dilectio non invenitur. Et ideo tantum salvabitur hæc mulier, id est caro per filiorum generationem, et per operum bonorum actionem, si ipsa opera permanserint in fide catholica dilectione gemita, et in sanctificatione cum omni castitate corporis et animæ vel sobrietate. Nam « sine fide impossibile est placere Deo (*Hebr. xi*), » nec habet aliquid viriditatis ramus boni operis, si maneat in radice dilectionis; nec prodest quidquid agitur sine sanctificatione, nec opus bonum est aliquid sine castitate.

CAPUT III.

« Fidelis sermo: Si quis episcopatum desiderat, bonum opus desiderat. Oportet ergo episcopum irreprehensibilem esse, unius uxoris virum, sobrius, prudentem, ornatum, pudicum, hospitalem, doctorem, non violentum, non percussorem, sed modestum; non litigiosum, non cupidum, sed suæ domui bene præpositum, filios habentem subditos cum omni castitate. Si quis autem domui suæ nescit præesse, quomodo Ecclesiæ Dei diligentiam habebit? Non neophytum, ne in superbiæ elatus in iudicium incidat diaboli. Oportet autem illum et testimonium habere bonum ab his qui foris sunt, ut non in opprobrium incidat et in laqueum diaboli. »

Fidelis, id est verax est nunc sermo, quem loquor, videlicet, si quis episcopatum desiderat bonum opus desiderat. Opus, non dignitatem; laborem, non delicias. Opus per quod in humilitate crescat, ne intumescat fastigio. Episcopatus, quid sit, noluit exponere, quia nomen est operis, non honoris. Græcum est enim atque inde ductum vocabulum, quod ille qui præficatur, illis quibus præficatur, superintendit, curam eorum scilicet gerens, ἐπιτοπία nam-

que *superintendere* est. Ergo *ἐπιτοροσ* *superintendens* interpretatur, ut intelligat se non esse episcopum, qui præesse dilexerit, non prolesse. Nee desiderare episcopatum æstimandus est, qui suum desiderat lucrum vel honorem, non plebis salutem. Non enim dicitur, qui episcopatum desiderat bonum gradum desiderat, sed bonum opus desiderat; quod in majori ordine constitutus possit, si velit, occasionem exercendarum habere virtutum. Ipse ergo sibi testis est, quia episcopatum non appetit, qui non boni operis ministerium, sed honoris gloriam quærit. Bene facit qui episcopatum desiderat, id est superintendere aliis et sollicitudinem gerere pro multorum salute. *Oportet ergo episcopum esse irreprehensibilem*, ut nulli vitio mancipatus sit, et ex subijuncta virtutum enumeratione manifestatur, quæ sit illa irreprehensibilitas. Ac si talibus appetitoribus dicatur: Laudo quod quæritis, sed prius discite quid quæritis, ne dum vosmetipsos mentiri negligitis, tanto scædior reprehensibilitas vestra pateat, quanto et a cunctis conspici in honoris arce festinatis. Notandum etiam, quia quando Apostolus hoc dixit, plebibus quicumque præerat, primus ad martyrii tormenta ducebatur. Tunc ergo laudabile fuit episcopatum quærare, quando per hunc quasi ad martyrium festinaretur, neque dubium esset, si non ad mortem, saltem ad supplicia graviora veniri. Nunc autem locus superior, siue quo populus regi non potest, etsi ita teneatur et administraretur ut decet, tamen indecenter appetitur. Si autem sarcina hæc imponitur, suscipienda est propter carnis necessitatem (*Eccli. xxxiii*). In actione enim non amandus est honor vel potentia, in hac vita, quoniam omnia vana sub sole, sed opus ipsum, quod per eundem honorem vel potentiam fit, si recte atque utiliter fit, id est ut valeat ad eam salutem subditorum quæ secundum Deum est. Et quandoquidem tale est officium episcopi, ergo oportet esse irreprehensibilem, id est talem, ut nullum in eo vitium notetur quod reprehendi possit, quæ res pene contra naturam est. Omne enim vitium, etiam in otioso verbo, reprehensione dignum est (*Matth. xii; Jacob. iii*). Et quis est, qui nec in his quæ loquitur, reprehendi queat? Sed futurus pastor Ecclesiæ talis debet eligi, ad cuius comparisonem recte grex cæteri nominentur, ut cum reprehenderit alios, ipse a nemine reprehendi possit. Perdit enim auctoritatem arguendi, cui possunt ab eo quem arguit, propria delicta impropèrari. Oportet eum esse *unius uxoris virum*, id est qui unam uxorem haberit, non habeat secundam, sicut beatus Hilarius, vel Antisiodorensis Germanus, *sobrium* sive vigilantem. Sacerdotes enim qui ministrant in templo Dei, prohibentur vinum et siceram bibere, ne in crapula et ebrietate graventur corda eorum (*Judic. xiii; Luc. xxi*), et ut sensus officium Deo exhibens viget semper et tenuis sit, *prudens*, ut excludatur illi, qui sub nomine simplicitatis excusent stultitiam sacerdotum. Nisi enim cerebrum sanum fue-

rit, omnia membra in vitio erunt; *ornatum* bonis operibus et honestis moribus, ut in his sapiens deprehendatur. Sunt enim quidam ignorantes mensuram suam et tantæ stoliditatis ac irreverentiæ, ut in motu et in incesu et in sermone communi risu spectantibus tribuant; *puicum*, id est verecundum vel castum, ne impudens sit vel castitatem violet; *hospitalem*, ut imitemur Abraham (*Gen. xviii, xix*), et cum peregrinis, imo in peregrinis Christum suscipiat, et hoc ante episcopatum quoque solitus sit agere; *doctorem*, id est qui habet gratiam docendi. Nihil enim prodest conscientia virtutum frui, ni et creditum sibi populum possit instruere, et *ca* qui contradicunt, redarguere. Innocens enim absque sermone conversatio quantum exemplo prodest, tantum silentio nocet. Et latratu canum ac hacule pastoris, luporum rabies deterrenda est; *non vinolentum, non percussorem*. Vitia virtutibus opponit. Dixit qualis esse debeat sacerdos, dicit et qualis non esse debeat. Non sit vinolentus, sed sic bibat, ut ignoretur an biberit. Vinolentia enim scæronum est, et commessorum, venterque mero æstuans cito despumat in libidinem. Non sit percussor, id est ita irascibilis et perturbati sensus, ut percutiat, qui debet patiens esse et eum imitari, qui dorsum suum posuit ad flagella, et maledicentes non remaledixit (*I Petr. ii*). Vel non sit percussor, id est non percutiat verbo vel exemplo pravo conscientias infirmorum. Non convenit eum esse vinolentum ac percussorem, *sed modestum*, ut temulentiam et iram modestia refrenet, et modeste agat in omnibus; *non litigiosum*, id est qui litigare soleat. Nihil enim imprudentius arrogantia quorundam, qui garrulitatem auctoritatem putant; et parati semper ad lites, in subjectum sibi gregem tumidis sermonibus tonant; *non cupidum*, quia cito deviare a justo propter cupiditatem munerum, sicut filii Samuelis (*I Reg. viii*). Avaritiam enim vel cupiditatem esse vitandam sacerdoti, et ipse Samuel exemplo suo docet (*I Reg. xii*), nihil se cuiquam rapuisse coram populo probans; et apostolorum paupertas, qui refrigeria sumptuum a fratribus accipiebant, et præter victum atque vestitum nihil aliud volebant (*infra vi*); *sux domui bene præpositum*, non ut opes au-geat, sed ut ea quæ populis præcepturus est, prius a domesticis exigat, *filios habentem subditos cum omni castitate*. In filiis ejus probatur disciplina, si bene fuerint subditi et obediens patri. Et tanta ab eo castitas exigitur, at si filii ejus casti non fuerint, ipse episcopus esse non possit, et eodem vitio offendat Deum, quo offendit et Heli pontifex, qui corripuerat quidem filios suos, quoniam in vestibulo templi cum mulieribus dormiebant; sed quia non abjecerat delinquentes, retrorsum cecidit et mortuus est (*I Reg. iv*). Domui suæ, sicut dictum est, debet esse bene præpositus, ut regat eam secundum Deum. Sed si quis nescit præesse domui suæ, quæ parva est respectu Ecclesiæ, quomodo habebit diligentiam Ecclesiæ Dei? id est quomodo sciet sollicitudinem ha-

lere, ut diligenter regat ecclesiam, quæ multo major est quam domus ejus, et majori prudentia est regenda? *Non neophytus*, id est rucem convenit cum esse. *Non sit neophytus*, id est noviter ad fidem conversus, qui ordinatur episcopus, *ne in superbiam elatus*, id est præ cæteris digniorem se putans, quasi eo indigeat Christiana religio, *incidat in iudicium diaboli*, id est damnetur propter superbiam ut diabolus qui se cunctis meliorem iudicavit, et factus est cunctis posterior (*Isa. xiv*). Nec nuper baptizatus, nec nuper a sæcularibus negotiis vel a malitia separatus fieri debet episcopus, quia unusquisque talis est neophytus. Nec congruit ut heri catechumenus, hodie sit pontifex; heri in amphitheatro, hodie in ecclesia; vespere in circo, mane in altari; dudum fautor histrionum, nunc consecrator virginum. Ignorat momentaneus sacerdos humilitatem et mansuetudinem, nescit seipsum contemnere. De dignitate transfertur ad dignitatem. Non jejunavit, non flevit, non mores suos sæpe reprehendit, et assidua meditatione correxerit, non substantiam pauperibus erogavit. Iudicium autem diaboli et ruina arrogantia est. Incidunt in eam, qui in puncto horæ necdum discipuli jam magistri sunt. Non solum prædictas virtutes habere qui ordinatur, prædictisque vitiis carere, sed et oportet illum bonum testimonium habere ab his qui foris sunt. Quale principium, talis est clausula sermonis. Qui irreprehensibilis est, non solum a domesticis, verum et ab alienis consono ore laudatur. Alieni extra Ecclesiam Judæi, gentiles et heretici. Talis ergo sit pontifex Christi, ut nec hi qui foris sunt, religioni vitæ ejus detrudere audeant, ne si reprehensibilis fuerit, *incidat in opprobrium*, ut exprobrentur illi vitia sua; et ita contemptus incidat in laqueum diaboli, odio habens illos a quibus se contemni viderit. Solet namque evenire his, qui ab aliis despiciuntur, ut despectores suos et ipsi despiciant; sicque in iram et odium, et cæteros diaboli laqueos incidunt. Ideoque pontifex sit talis, ut nemo possit ei exprobrare aliquam pristinam sordem. Si vero post fidem assumpta contraria virtutibus, quæ nunc descriptæ sunt habuit non ad pontificatum est recipiendus.

« Diacones similiter pudicos, non bilingues, non multo vino deditos, non turpe lucrum sectantes, habentes mysterium fidei in conscientia pura. Et hi autem probentur primum, et sic ministrent, nullum crimen habentes. Mulieres similiter pudicas, non detrahentes, sobrias, fideles in omnibus. Diacones sint unius uxoris viri, qui filiis suis bene præsent, et suis domibus. Qui enim bene ministraverint, gradum bonum sibi acquirunt et multam fiduciam in fide, quæ est in Christo Jesu. »

Ubi præmissis presbyteris, mox post episcopi descriptionem subjungit de diaconibus, dat intelligi quia nomine episcopi et pontificem designavit et presbyterum; atque omnia quæ de episcopo dixit, de presbytero secundarie sunt observanda. Nam et presbyter est episcopus, id est intendens Ec-

clesiæ quam regit. Sed ille est major episcopus, iste minor. Et quemadmodum per amissum est oportere episcopum esse pudicum, similiter diacones, oportere esse pudicos, id est castos; non bilingues, id est non dupliciter loquentes, ut in præsentia cujusdam loquantur de eo bene; et cum absens fuerit, loquantur de eo male; non multo vino deditos, ne inebrientur; quia qui inebriatur, et mortuus et sepultus est, neque ebriosi regnum Dei possidebunt (*I Cor. xi*), non turpe lucrum sectantes, sicut avari qui emunt et pluris vendunt, vel usuras accipiunt; habentes in conscientia, a sordibus vitiorum pura, mysterium fidei, id est tenentes in corde mundo quod de fide est aliis occultum, sicut est quod Christus de virgine natus est, et quod peccatum non fecit, et quod moriendo mortem destruxit, et quod vere corpus ejus sit panis qui in altari consecratur, et cætera fidei arcana. Tales sint diacones. Sed et hi primum probentur. Ilic innuitur, quia et episcopi sunt proaudi. Primum probentur, et si sic, id est tales inventi fuerint, quales descripsimus, ministrent sacris altaribus, nullum habentes, non dico peccatum, sed crimen, quia nullus homo sine peccato est, sed multi sine crimine. Crimen namque est peccatum grave, accusatione et damnatione dignissimum, sicut homicidium, adulterium, furtum, sacrilegium, et aliqua immunditia fornicationis (*Hebr. xi*). Mulieres, id est diaconissas, similiter ut diacones, oportet esse pudicas, ut munditia castitatis in eis regnum teneat, non detrahentes, id est non quærentes loquendo minuere bonam famam alicujus, sed sobrias, id est ab omni ebrietate immunes, et fideles in omnibus, dictis et factis suis, ut fidem Deo servent et hominibus. Diacones sint unius uxoris viri, id est non ordinetur diaconus qui duas aut plures habuerit uxores, sed qui tantum unam habuit; et ei non miscatur, postquam ordinatus fuerit. Ita sint diacones viri singularem uxorum, qui bene præsent filiis suis, si quos prius genuerunt, erudientes eos in disciplina domini; et suis domibus, bene prælati, ut eas bene regant. Et justum est ut filios suos atque domos bene gubernent; quia qui bene ministraverint in parvis rebus, acquirunt sibi bonum gradum, id est altiore gradum in bono, et acquirunt fiduciam multam in fide quæ est in Christo Jesu, id est certitudinem sument vel dabunt, se bene conversaturos fideliter in majori, et instructuros alios in fide Christiana. Vel bene præesse filiis et domibus suis debent, ut his prius assueti, bene postea sciant ministrare in ecclesia, quoniam qui in diaconatus officio bene ministraverint, gradum sibi bonum acquirunt, ut promovendi mereantur ad episcopalem gradum, et multam sibi fiduciam æternæ remunerationis acquirunt in fide, quæ est in Christo, qui per humilitatem obedientiæ meruit exaltari (*Philip. ii*).

« Hæc tibi scribo, fili Timothee, sperans me ad te venire cito. Si autem tardavero, ut scias quomodo oporteat te in domo Dei conversari, quam

« est Ecclesia Dei vivi, columna et firmamentum A
 « veritatis. Et manifeste magnum est pietatis sacra-
 « mentum, quod manifestatum est in carne, justi-
 « ficatum est in spiritu, apparuit angelis, prædica-
 « tum est gentibus, creditum est in mundo, assum-
 « ptum est in gloria. »

Hæc omnia firmiter retine et custodi, quoniam
 ea scribo tibi, fili Timothee, sperans me ad te cito ve-
 nire, ut te præsens instruam adhuc plenius. Et ideo
 studiosius interim observare debes, quæ tibi adjungo,
 ut non erubescas cum te videro. Veniam, ut spero,
 velociter. Sed si tardarero, scribo tibi hæc, ut inte-
 rim scias quomodo conersari te in domo Dei oporteat,
 ut prolesse possis omnibus qui in ea sunt, et scias
 qualiter unumquemque debeas instruere. Quæ dom-
 us in qua Deus habitat Ecclesia est, ex multis collec-
 ta fidelibus, qui variis modis sunt docendi. Eccle-
 sia, Dei æternaliter vivi, et ideo æternaliter bene-
 facientis eis, qui voluntatem ejus custodiunt; et
 econtra æternaliter punientis illos, qui præcepta
 ejus contemnunt. Et ipsa ejus Ecclesia est in perfe-
 ctis, columna, id est sublimis et recta et inconcussi-
 bilis, et sustentans juniores atque sustollens, et in
 eisdem perfectis est ipsa, firmamentum veritatis,
 quia verbis et exemplis firmat in cordibus infirmo-
 rum veritatem fidei et mandatorum Dei. Et mani-
 feste magnum est in ea pietatis sacramentum, in quo
 salus humana consistit. Sacramentum est res occul-
 ta, id est mysticum sive aliquid. Et in hoc recte
 potest intelligi sacramentum, de quo dictum est Co-
 lossensibus : « *Mysterium quod absconditum fuit*
 a sæculis et generationibus, nunc autem manifesta-
 tum est sanctis ejus, quibus voluit Deus notas fa-
 cere divitiis gloriæ sacramenti hujus in gentibus,
 quod est Christus in vobis spes gloriæ (Coloss. 1). »
 Sacramentum enim pietatis est, quia Dei Filii per
 viscera misericordiæ suæ visitavit nos oriens ex alto,
 illuminare his qui in tenebris et in umbra mortis
 sedebant (Luc. 1). Sacramentum pietatis in eo est,
 quod Unigenitus Dei misericorditer homo fieri dignatus
 est per gratiam ut sibi fratres acquireret, qui cum eo
 possiderent hæreditatem regni cælorum. Et hoc sacra-
 mentum manifeste magnum est, quia cuncti fideles
 noverunt hoc ita magnum esse, ut nemo sufficiat
 magnitudinem ejus excogitare, quod nobis manifesta-
 tum est in carne, Christi, quia in eo quod ipse
 carnem assumpsit, intelligimus omnes electos esse
 membra ejus vel fratres, ideoque simul regnatu-
 ros; justificatum est in spiritu, quia homo ille
 singularis quem virgo genuit, factus est per Spiritum
 sanctum justus in utero matris, id est in ipsa
 conceptione et creatione fecit eum Spiritus sanctus
 justum, ac deinde in præsentī vita servavit eum sine
 peccato. Nos quoque dum membra efficitur, in Spiritu
 sancto per baptismum justificamur. Et hoc tantæ
 pietatis sacramentum apparuit angelis, id est innotuit
 apostolis et prædicatoribus, qui pro eo quod glori-
 am regni cælestis annuntiant, angelorum nomine
 designantur. Unde et Joannes in Apocalypsi

A septem angelis scribit, id est episcopis septem Eccle-
 siarum Asiæ. Et per hujusmodi angelos, id est per
 veritatis nuntios, prædicatum est hoc sacramentum
 gentibus, ac per eorum prædicationem creditum est
 in mundo. Quod autem sequitur, assumptum est in
 gloria, in nostro quidem capite perfecte jam comple-
 tum est, sed in membris ejus completum ex toto
 non erit, donec omnes electi receptis corporibus,
 in regnum cælorum simul sint ingressi.

CAPUT IV.

« Spiritus autem manifeste dicit, quia in novissi-
 « mis temporibus discedit quidam a fide (II Tim.
 « III; II Petr. III; Jud. 1; Eccli. xxxvi), attendentes
 « spiritibus erroris et doctrinis dæmoniorum, in hy-
 « pocrisis loquentium mendacium et cauteriatam ha-
 « bentium suam conscientiam, prohibentium nubere,
 « abstinere a cibis quos Deus creavit ad percipiendum
 « cum gratiarum actione fidelibus, et his qui cogno-
 « verunt veritatem, quia omnis creatura Dei bona est,
 « et nihil rejciendum quod cum gratiarum actione
 « percipitur. Sanctificatur enim per verbum Dei et
 « orationem.»

Ecclesia quidem est columna et firmamentum
 veritatis, sed tamen Spiritus sanctus manifeste
 in me vel per me dicit, quia in novissimis tem-
 poribus, id est regnante Antechristo, vel antea,
 discedunt a fide quidam notabiles, propter cujus-
 modi discessionem dictum est : « Nisi venerit discessio
 primum (II Thess. II). » Et quia tales surrecturi sunt,
 ideo vigilandum est, ne nostris temporibus surgant;
 vel si resurrexerint, ne alios seducant. Discedent
 enim a fide veritatis, attendentes spiritibus erroris,
 id est dæmonibus, qui per artem fallaciæ loquentur
 eis vel apparebunt, et aliqua velut bona dabunt, ut
 eos errare faciant, vel in errore delinquant, sicut
 Agimnensibus hæreticis novimus contigisse, quos
 dæmones in eorum specie noctibus apparentes
 potant per æra ubicunque voluerint, et copiam eis
 temporalium rerum ministrant, atque pravīs dogma-
 tibus imbuunt. Vel attendentes spiritibus erroris, id
 est hæresiarchis, in quibus maligni spiritus loquentur
 et errorem docebunt. Et attendentes doctrinis dæ-
 moniorum, id est hominum dæmonia habentium,
 loquentium mendacium in hypocrisis, id est simulata
 religione, ut magis decipiant, et habentium consci-
 entiam suam cauteriatam, id est corruptam et putre-
 factam, atque putredinem cum fetore semper emi-
 tentem. Demoniolum dico, prohibentium nubere, et
 abstinere nubentium a cibis quos Deus creavit. Hoc
 Agimnenses faciunt et Manichæi, nonnullique alii
 fecerunt. Ille enim prohibet nubere, qui hoc esse
 malum dicit, non qui huic bono aliquid melius an-
 teponit. Multum ergo interest inter hortantes ad
 virginitatem, bono minori bonum amplius proponen-
 do; et prohibentes nubere, concubitum propagatio-
 nis, qui solus proprie nuptialis est vehementius ac-
 cusando. Item multum interest inter abstinentes a
 cibis propter sacramentam significationem, vel propter
 corporis castigationem, et abstinentes a cibis quos

Deus creavit, dicendo quod eos Deus non creavit. A Nam et primi patres nostri a quibusdam cibis abstinerunt, non tamen eos damnandi, sed significandi gratia; et nunc fideles, non quia cibos putent immundos, sed edomandi corporis causa, propter animam in orationibus amplius humiliandam, non solum a carnibus, sed a quibusdam terræ fructibus abstinent, vel semper sicut pauci; vel certis diebus atque temporibus, sicut per quadragesimam fere omnes. Manichæi vero ipsam creaturam negabant esse bonam, et dicebant esse immundam, eo quod carnes diabolus operaretur. Et ab escis huiusmodi temperabant quod non significatione, sed natura malæ et immundæ essent. Qua in re Creatorem earum sine dubio blasphemabant, quod pertinebat ad doctrinam dæmoniorum. Deus enim creavit escas ad percipiendum cum gratiarum actione fidelibus, id est ut cum gratiarum actione perciperentur a fidelibus, qui bene credunt de ipsis escis, licet necdum intelligant quod credunt; et his qui cognoverunt veritatem, id est qui intelligunt quod de eisdem escis credunt. Hanc scilicet veritatem cognovere, quia omnis creatura Dei bona est in natura sua, et nihil ciborum est rejiciendum, id est abhorrendum et respuendum quasi naturaliter malum vel immundum, quod percipitur, id percipi solet, cum gratiarum actione, id est ut agantur Deo gratiæ a percipiente. Omnia quippe quæ naturaliter sunt, in ordine suo bona sunt; et nemo in eis peccat, nisi qui ordinem suum in Dei obedientia non custodiens, eorum quoque ordinem male utendo perturbat. Patres autem nostri qui Deo placuerunt, tenuerunt ordinem suum in ipsa obedientia, ut quidquid Deus temporibus congruis jubendo distribuit, sic observarent quomodo ille distribuit. Itaque non solum carnes ad cibos datas, cum omnes natura mundæ sint vel essent, quasdam tamen nonnulla significatione immundas illo tempore non ederunt, quo eas non edi præceptum erat, ut talibus significationibus futura rerum manifestatio præfiguraretur, sed et azymum panem, et cætera ejusmodi in quibus fuit umbra futurorum. Qui tam rei essent illius temporis et illius populi homines, si observare contemnerent (quando illa sic fieri, et ista quæ nunc revelata sunt, sic prænuntiari oportebat), quam nos desipientes essemus, si nunc jam manifestato Novo Testamento, illas prænuntiativas observationes aliquid nobis prædesse putaremus. Nihil ergo ciborum est rejiciendum, quod cum gratiarum actione percipitur. Sanctificatur enim cibus ipse per verbum Dei, quod est in actione gratiarum, et orationem, quæ adjungitur ne diabolus per eum noceat. Verbum enim sanctificat, oratio autem impetrat, diabolus vero per cibum tentat.

« Hæc proponens fratribus, bonus eris minister Christi Jesu, enutritus verbis fidei et bonæ doctrinæ, quam assecutus es. Ineptas autem et aniles fabulas devita, exerce autem te ipsum ad pietatem. Nam corporalis exercitatio ad modicum

utilis est. Pietas autem ad omnia utilis est, promissionem habens vitæ quæ nunc est et futuræ. Fidelis sermo et omni acceptione dignus. In hoc enim laboramus et maledicimur, quia speramus in Deum vivum, qui est salvator omnium hominum, maxime fidelium. »

Hæc de cibis et creaturis quæ dixi, proponens fratribus ad tenendum, bonus eris minister Christi Jesu; tu dico, enutritus vel a matre tua vel ab aliis fidelibus, verbis fidei, id est verbis quæ fidem docent et verbis bonæ doctrinæ, quantum ad bonos mores, quam assecutus es ab infantia, et tunc cum studio perquirens eam et inveniens. Bonam quidem doctrinam tene et doce quam assecutus es; sed ineptas et aniles fabulas, id est Judæorum traditiones devita, quia sunt ineptæ, id est sine aptitudine; et aniles, id est veterularum sermonibus infusæ juniorum cordibus; et sunt fabulæ, id est inanità verba sine veritate et utilitate. Hoc non de divinis eloquiis dicitur, sed, ut dixi, de traditionibus, quas Judæi a senioribus suis acceperunt præter legales et propheticos libros, et de stultiloquiis hæreticorum, qui prohibent nuptias et interdiciunt cibos quos Deus creavit ut cum gratiarum actione sumerentur. Fabulas quidem devita, sed te ipsum exerce ad pietatem, hoc est, fabulas impiorum cave, et ad pietatem te ipsum exerce, id est hoc sit studium tuum, ut mente sis religiosus, et erga Dei cultum devotus, atque fidei pietate sincerus. Idcirco moneo ut esse studeas mente pius erga Deum et proximum, quia corporalis exercitatio, quæ est in jejuniis et vigiliis ac labore manuum, atque multimoda corporis afflictione, in qua te fatigas, ad modicum utilis est, id est parum utilitatis habet respectu magnæ utilitatis, quam habet pietas religiosæ mentis. Nam illa corporalis exercitatio et in hypocritis vel hæreticis invenitur, pietas autem devoti ac benevoli cordis, non nisi in electis reperitur. Illa corporalis exercitatio ad modicum utilis est, pietas autem ad omnia utilis est, quia omni bono studet, habens promissionem vitæ quæ nunc est et futuræ, quia Deus piis promissit vitam quam habent in hoc sæculo animæ justorum, vel subsidia temporalia, et vitam futuræ beatitudinis, dicens: « Querite primum regnum Dei et justitiam ejus et hæc omnia adjicientur vobis (Matth. vi; Luc. xii). » Et per Salomonem, dicens de sapientia: « Longitudo dierum in dextera ejus, et in sinistra ejus divitiæ et gloria (Prov. iii). » Dextera enim vitam perennem, sinistra vero vitam præteritam, designat. Vel exerce te ad pietatem, id est ad compassionem proximorum, et ad opera misericordiæ. Pietas est ad omnia utilis, quia et in futuro et præsentis sæculo prodest, dans temporalia et æterna remedia. Habens promissionem vitæ quæ nunc est et futuræ, quia qui pietatis beneficia pauperibus impendit, et in præsentis dat ei Deus unde temporaliter vivat, et in futuro vitam sempiternam. Et fidelis est iste sermo de pietate, id est verax, quia scilicet pietas est utilis ad omnia, et fideliter adimpletur quod d

promissum est, ut habeat vitam presentem et futuram. Iste sermo est fidelis, neminem fallens, et est dignus omni acceptione, ut a cunctis hominibus omnino accipiatur. Verè pietas habet promissionem vitæ presentis et futuræ, nam in hoc laboramus, ut promissionem hanc consequamur; et maledicimus ab impiis et blasphematoribus. In hoc laboramus; quia speramus in Deum vivum, id est in hoc insudamus pietatis ac justitiæ operibus, quia speramus vitam quam Deus vivens promisit pie agentibus. Qui est Salvator omnium hominum, quia solum salutem fecit oriri super bonos et malos, et pluit super justos et injustos (Matth. v), atque salutem corporis in hac vita communiter parat bonis et malis, maxime tamen ipse est Salvator fidelium, quia præter temporalem salutem; quæ illis est communis cum reprobis, dat eis æternam salutem, quam possideant cum angelis.

Præcipere hæc et doce. Nemo adolescentiam tuam contemnat, sed exemplum esto fidelium in verbis, in conversatione, in charitate, in fide, in castitate. Dum venio; attende lectioni, exhortationi et doctrinæ. Noli negligere gratiam quæ est in te, quæ data est tibi per prophetiam, cum impositione manuum presbyterii. Hæc meditare, in his esto; ut profectus tuus manifestus sit omnibus. Attende tibi, et doctrinæ, insta in illis. Hoc enim faciens; et teipsum salvum facies, et eos qui te audiunt.

Hæc quæ dixi de fabulis vitandis et pietate secunda præcipe scientibus et doce nescientes. Præcipe hæc ut flant, et doce quomodo flant. Et ut præceptum tuum atque doctrina suscipiatur; nemo adolescentiam tuam contemnat, id est ita vive, et maturum te moribus ostende, ut nemo te quasi adolescentem possit contemnere, nec vitæ ætatem tuam faciat reprehensibilem, quamvis corpore sis adolescens, si quid reprehensibile feceris, audacius reprehenditur et quasi contemnitur. Potest etiam ad subjectos referri ut dicatur, nemo eorum quibus præcipies et quos docebis contemnat adolescentiam tuam, quia in sacro eloquio nonnunquam adolescentia juvenus vocatur, Salomone testante, qui ait: « Lætare, juvenis, in adolescentia tua (Eccl. xi). » Si enim unum esse utraque non decerneret, quem monebat in adolescentia, juvenem non vocaret. Sic et in hoc loco adolescentia pro juventute intelligitur, ut sanctus Timotheus in auctoritate prædicationis sit etiam solidæ ætatis. Nemo ætatem tuam contemnat, sed tu exemplum esto fidelium in verbo, ut ipsi exemplo tuo bona loquantur; et in conversatione, ut exemplo tuo bene et honestè conversentur; atque in charitate Dei et proximi, et in integritate fidei, et munditia castitatis. Et ut ita possis exemplum bonorum operum aliis præbere, attende lectioni divinarum Scripturarum interim dum venio. Valde enim inter humana verba cor defluit. Cumque indubitanter constet, quod externis occupationum tumultibus impulsus a semetipso

corruat, studere incessanter debet, ut per eruditionis studium resurgat. Attende, inquam, lectioni, et post lectionem, attende exhortationi jam volentium, et doctrinæ nescientium. Sic enim debes agere, ut quod lectio faciendū doceret, facies; et subditos tuos; ut hoc item faciant; admonens; atque illos qui hoc ignorant, doceas. Sic age et noli negligere gratiam episcopalis officii, quæ est in te, quia ad hoc gratis Deus te prætulit illi populo, ut sic agas; quæ gratia est tibi data per prophetiam, cum impositione manuum presbyterii. Videtur Apostolus prophetiam vocare inspirationem sancti Spiritus, per quam præciebat quid de hoc et de cæteris esset acturus. Vel certe de hoc quod fieri deberet, episcopus specialiter prophetavit, sive ipse Apostolus, sive quilibet alius sanctus. Impositionem vero manuum eam dicit, quæ in ordinatione ejus facta est. Quæ manuum impositio fuit presbyterii, quia per hanc impositionem accepit presbyterium, id est episcopatum. Episcopus enim vocatur sæpe ab apostolis presbyter, et presbyter episcopus. Vel hæc impositio manuum fuit presbyteri, qui Latine dicitur senior, quia ipse Apostolus qui juxta hunc sensum presbyter intelligitur, imposuit manus suas capiti ejus, dum illum consecraret episcopum. Nam et Petrus (I Petr. v) atque Joannes in Epistolis suis seipsum vocant seniores (II Joan. 1; III Joan. 1), id est presbyteros, propter gravem maturitatem morum et sapientiæ, vel etiam propter ætatem. Deinde, hæc, inquit, meditare, id est hæc pertracta etolve in animo tuo quæ injungo tibi, quia idcirco constitutus es pontifex; et in his actionibus atque meditationibus jugiter esto, ut dum ita vixeris et docueris, ut dixi, profectus tuus sit manifestus omnibus, id est cuncti te patenter sciant omnibus proficere. Et ut tibi aliisque proficias, attende tibi, id est mentis intuitum frequenter reduce ad teipsum, et diligenter attende qualiter vivas; ac si quid in te corrigendum inveneris, statim corrige, et semper ad meliora nitere; et doctrinæ insta in illis, id est instanter doce illos qui sunt commissi tibi. Et liberiter debes utrumque facere, quia hoc ita faciens, duplicem fructum afferes, quoniam et teipsum salvum facies, et eos qui te audiunt. Te enim salvabis, si tibi attenderes; et auditores tuos, si doctrinæ institeris. Sic enim debet rector propriam salutem querere, ut communem non deserat; et sic communem profectum querere, ut proprium non negligat. Nam hæc de subjectis suis rationem Christo judici reddet, ut et de seipso reddere cogatur.

CAPUT V.

Seniorem ne increpaveris, sed obsecra ut patrem, juvenes, ut fratres; anus, ut matres, juvenulas, ut sorores in omni castitate.

Dixi ut instes doctrinæ, sed tamen hoc age cum discretione, ut unumquemque doceas vel admonedas prout congruum fuerit. Aliter namque admonendi sunt juvenes, et aliter senes. Quia illos pernamque

severitas admonitionis ad profectum dirigit, istos A vero ad meliora deprecatio blanda componit. Et ideo *seniorem ne increpaveris, sed pro pietatis honore obsecra eum reverenter ut patrem*, quatenus per benignam obsecrationem, facilius tuam suscipiat admonitionem. Indignatur enim et erubescit, si fuerit asperè correptus; *juvenes* vero admone cum affectu dilectionis, *ut fratres*. Senes et in Scriptura sacra vocantur, non qui sola quantitate temporum, sed qui morum grandævitate maturi sunt. Jvenes autem, qui nulla consilii gravitate deprimuntur. Et ideo tales etiam hoc loco possunt intelligi. Seniore ergo qui maturitate proventus est, si in aliquo aliter quam oportet egerit, ne increpaveris, sed blande obsecra ut se emendet, et de cætero in melius proficiat; juvenes vero, quos morum levitas agit, increpa benigne (si deliquerint) ut fratres; *anus* similiter quæ vel ætate vel bonis moribus sunt provectæ, admone cum reverentia *ut matres*; *juvenculas* autem ætate vel moribus admone *ut sorores*, et hoc *in omni castitate*. In alloquio juvenularum rectissimo juvenis de omni castitate admonetur, ut nec saltem minima carnis titillatione circa eas moveatur.

« Viduas honora quæ vere viduæ sunt si qua autem vidua filios aut nepotes habet discat primum domum suam pie regere, et mutuam vicem reddere parentibus. Hoc enim acceptum est coram Deo, quæ autem vere vidua est et desolata, sperat in Deum, et instat obsecrationibus et orationibus nocte ac die. Nam quæ in deliciis est, vivens mortua est. Et hoc præcipe, ut irreprehensibiles sint. Si quis autem suorum, et maxime domesticorum curam non habet, fidem negavit, et est infideli deterior. »

Viduas, inquit, *honora quæ vere viduæ sunt*, id est quæ omni auxilio suorum sunt destitute, quæ manibus suis laborare non possunt, quas paupertas debilitat, ætasque conficit, quibus Deus spes est et omne opus oratio. Ex quo datur intelligi adolescentulas viduas exceptis quas excusat infirmitas, vel suo labori, vel liberorum, vel propinquorum ministerio delegari. Honor autem in præsentem, pro elemosyna vel pro munere accipitur. Nam et quod alibi dicitur: « Honora patrem et matrem (*Exod. xx, Ephes. vi*), » non in verborum sono, qui inopiam parentum cassa potest adulatione frustrari, sed in victus necessariis ministrandis debet intelligi. Itaque viduas honora, id est sumptibus ecclesiasticis alere, non tamen omnes, sed *quæ vere viduæ sunt*, id est quæ non habent auxilium nisi solius Dei. Sed *si qua vidua habet filios vel nepotes, discat primum pie regere domum suam*, in quo probabitur. Hoc discat primum, id est antequam ad ecclesiam veniat stipendiis ecclesiæ honoranda. Discat domum regere, et parentibus qui eam aluerunt, mutuam vicem reddere, ut et pari lege alios nutriat. Nec solum genitores, sed et filii, vel nepotes, cæterique propinqui dicuntur parentes, unde et tota progenies parentela vocatur. Et in mundana lege parens pa-

renti per gradum et parentelam succedere jubetur. Mutuam ergo vicem, ut dictum est, reddit parentibus, qui nutritus a majoribus, nutrit minores; et quod a præcedentibus accepit, subsequentibus impendit. Vel mutuam vicem parentibus reddit, qui filiis et propinquis sibi servitiis impendentibus subsidia rependit. Hoc agat bona vidua, quia *hoc est acceptum coram Deo*; et hæc tamen nondum est vere vidua, quæ parentes habet qui illi sunt solatio. Sed illa *quæ vere vidua est*, id est ab omni auxilio mundano destituta, et ab omni terreno solatio desolata, sperat in Deum, id est videns ex nulla parte se habere suffugium, toto animo adhæret Deo, a quo solo sperat auxilium vitæ et salutis; et ideo *nocte ac die instat obsecrationibus* pro remotione solius mali, et *orationibus* pro adeptione bonorum. Talis erat sancta Anna, quæ non discedebat de templo, jejuniis et obsecrationibus serviens die ac nocte (*Luc. 11*). Præ cæteris enim viduæ debent vacare orationibus quia et Dominus cum ad semper orandum hortaretur, viduam commemoravit, quæ videlicet iniquum judicem ad audiendam causam assidue interpellando commovit (*Luc. xviii*). Quapropter cum in viduis destitutio et desolatio notetur, sic se omnis anima intelligat in hoc sæculo destitutam et desolatam, quandiu peregrinatur a Domino, profecto quamdam virtutem suam Deo defensori assidua et impensissima precatione commendat. Mystice enim vel Ecclesia vel omnis anima quæ intelligit se derelictam omni auxilio, nisi solius Dei, vidua est. Unde enim mulier est vidua? Quia non habet auxilium aliunde, nisi solus Dei. Ille vero quæ habent viros, quasi superbiunt de auxilio virorum. Videntur autem viduæ deserte, sed robustissimum est auxilium earum. Ergo tota ecclesia una vidua est, sive in viris, sive in feminis, sive in conjugatis, sive in maritalis feminis, sive in adolescentibus, sive in senibus, sive in virginibus. Omnis ecclesia una vidua est, deserta in hoc sæculo, si sentit illud, si novit viduitatem suam, tunc enim auxilium præsto est illi. Sed simpliciter viduam mulierem iterum sicut superius intelligamus. Quæ enim vere vidua est et desolata, persistit in precibus, et fit Deo proxima. Nam e contrario illa *quæ in deliciis est*, id est quæ carnem suam deliciose fovet, et in precibus et jejuniis nullatenus affligit *vivens communi vita, mortua est* in anima, quoniam Deus ab ea recessit, qui est vita animæ. Unde et beatus Job de sapientia quæ Deus est, dicit, quia « non invenitur in terra suaviter viventium (*Job xxviii*), » id est in mente eorum qui voluptatibus hujus vitæ serviunt. Hoc est enim viventem mortuum esse non habere Deum manentem in sua mente. Ne ergo vivens sit mortua deliciae spirituales deliciis carnalibus in sancta castitate succedant, id est oratio, jejunium, bona cogitatio, bonorum operum frequentatio. Nam quando vidua pro deliciis nuptiarum quas in carne viri habere solebat, aliarum et carnalium deliciarum tanquam in solatio usum assumit, tunc *vivens mortua*

est. Nam sicut in ipsis sensibus corporalibus acutius audiunt qui non vident, et tangendo multa discernunt, nec tanta vivacitate tangunt qui oculis utuntur, non intelligitur ex uno auditu nempe ex sensu auditus (225), luminum repressa intentione sentiendi, eam se in alios sensus promptiori dignoscendi acumine exercere, tanquam ex altero cōnetur implere quod negatur ex altero; ita et sæpe carnis cupiditas a concubendi voluptate cohibita, majori voluptate in pecuniæ se porrigit appetitum; et illic aversa, huc se impetitu ardentiori convertit. Mors autem est ipsa lætitia in perfuendo, cum quisque adipiscitur quod perditē concupivit. Et ideo mortua est vidua quæ in deliciis vivit, ad quas delicias per cupiditates tanquam portas mortis pervenitur. Et ideo præcipe viduis ne deliciose vivant. *Et hoc est, præcipe illis, ut irreprehensibiles sint*, id est ut caveant facere ea quæ sunt digna reprehensione. Dixi superius, *ut vidua si filios vel nepotes habet, discat regere domum*. Si autem hoc agere neglexerit, fidem perdidit, quia *si quis non habet curam suorum, et maxime domesticorum*, ut quantum potest procuret illis necessaria, *fidem negavit operibus*, etsi non verbis, quia proximum non diligit, et infideliter erga eum agit. Vel viduæ non studeant congregare delicias, sed vel illi, vel catei propinqui impendant illis quod necessarium est. Sed si quis est qui nolit, fidem negavit quam in baptismo promisit, quando diaboli operibus abrenuntiavit, *et est deterior infideli*, qui nunquam fidem habuit. Hic enim veritatem novit, et se bene acturum promisit; infidelis autem nec novit adhuc nec promisit. Sed iste promisit, et implere noluit, ideo deterior est illo qui fidem nondum percepit. Multo enim gravius delinquitur scienter quam ignoranter, et multo pejus est bona opera promittere et non facere, quam nec promittere nec facere. Curam ergo suis, et maxime domesticis quisque debet impendere, quia cum cœperit velle prodesse quibus poterit primitus inest ei cura suorum. Ad eos quippe habet opportuniorem facilioremque aditum consulendi vel naturæ ordine, vel ipsius societatis humanæ. Nam infidelis curam suorum habet, et ideo deterior est infideli, qui hanc non habet.

« Vidua eligatur non minus sexaginta annorum, quæ fuerit unius viri uxor, in operibus bonis testimonium habens, si filios educavit, si hospitio recepit, si pedes sanctorum lavit, si tribulationem patientibus subministravit, si omne opus bonum subsequuta est. »

Hic commune dat præceptum de his viduis, quæ ecclesie pascuntur alimonis; et ideo ætas præscribitur, ut illæ tantum accipiant pauperum cibos, quæ jam laborare non possunt, atque maturitatem habent morum pariter et ætatis. Simulque considera quod illa quæ duos habuit viros, etsi anus, etsi decrepita, etsi egenus est, ecclesie stipes non mere-

tur accipere. Dixi superius ut veras viduas honores sumptibus ecclesie. Et vidua quæ sic est honoranda, eligatur habens non minus sexaginta annorum, nisi jam est extinctus fomes libidinis, quæ fuerit unius viri uxor, id est quæ non habuit nisi unum maritum, post mortem ejus habens testimonium in bonis operibus, scilicet si filios enutrivit quos habuerit; si pauperes hospitio recepit, si sanctorum prædicatorum pedes lavit, quos tunc recipere periculosum fuit. Cum fratres hospitio suscipiuntur, mos inolevit apud plerosque sanctos, ut pedes eorum laventur; et magna in hoc facto commendatio est humilitatis, ne dedignetur facere Christianus quod prior fecit Christus (Joan. xiii). Cum enim ad pedes fratris inclinatur corpus, etiam in corde ipso excitatur; vel si jam inerat, confirmatur ipsius humilitatis affectus. Et vidua est eligenda quæ testimonium habet hæc omnia fecisse, et si tribulationem patientibus, id est incarceratis vel quilibet afflictis bona quæ potuit subministravit, atque ut breviter concludam, si omne opus bonum subsequuta est. Et hæc talis pascatur alimentis ecclesie, et si vires habuerit, serviat sacerdoti.

« Adolescentiores autem viduas devita. Cum enim luxuriatæ fuerint, in Christo nubere volunt, habentes damnationem, quia primam fidem irritam fecerunt. Simul autem et otiosæ discunt circuire domos, non solum otiosæ, sed et verbosæ et curiosæ, loquentes quæ non oportet. Volo ergo juveniores nubere, filios procreare, matres familias esse, nullam occasionem dare adversario maledicti gratia. Jam enim quædam conversæ sunt retro post Satanam. Si quis fidelis vel si quæ fidelis habet viduas subministret illis, et non grave vetur Ecclesia, ut his quæ veteres viduæ sunt, sufficere. »

Dixi ut vidua eligatur non minus sexaginta annorum, nisi compressa est omnis lascivia. Sed adolescentiores viduas, quarum adhuc sanguis fervet, devita ad ministerium ecclesie. Et quare? Quia cum luxuriatæ fuerint, volunt nubere in Christo, id est quia sæpe contingit ut relicto proposito castitatis, per multos amatores luxurientur, vel in luxu ciborum et deliciarum versentur et post multam luxuriam velint nubere, id est copulari viris in Christo, id est per legitimas nuptias, quasi tunc non sit peccatum nubere. Ipsæ dico habentes damnationem æternam, quia primam fidem irritam fecerunt, id est quia castitatem Domino voverunt et non reddiderunt; voverunt videlicet virginitatem vel viduitatem, non solum nubere, sed etiam velle nubere est damnabile: ideo videlicet habent damnationem, quia primam fidem irritam fecerunt, et si non nubendo, tamen volendo. Non quia ipsæ nuptiæ velut malum damnandæ judicantur, sed damnatur propositi fraus, damnatur fracta voti fides; non damnatur susceptio de bono inferiore, sed ruina a bono superiore. Postremo damnantur tales non quia conjugalem fidem

posterius iniere, sed quia continentiae primam fidem irritam fecerunt, volentes nubere. Voluntas enim quæ a proposito cecidit, damnatur, sive subsequatur nuptiæ, sive desint. Et ideo tenenda est in corde perseveranter voluntas boni propositi, ne quis vel quæ retro aspiciat (*Luc. ix, xiii*), et uxori Lot similis fiat. Quid enim fecit uxori Lot? Liberata est a Sodomis, et in via posita, retro respexit (*Gen. xix*). Ubi respexit, ibi permansit, facta est statua salis, ut illius contemplatione condiantur homines, cor habeant, et non sint fatui, non retro respiciant, ne malum exemplum dantes, ipsi remaneant et alios condiant. *Simul autem et otiosæ*, etc. Nec solum quæ diximus, faciunt prædictæ mulieres; sed cum illis malis addunt, quod sunt otiosæ, nihil manibus operantes, et fiunt propter mentis vagationem etiam corpore instabiles, quia non stant in domibus suis, sed discunt, id est assuescunt circuire sine rationali causa domos alienas, quod religioni inimicum est. Nec solum otiosæ sunt, *sed et verbosæ*, id est abundantes multiloquio fabularum et inutilium sermonum. Nec solum verbosæ, *sed et curiosæ*, id est investigantes aliorum facta, et negligentes sua, et studentes aliquid semper audire. Et sunt *loquentes ea quæ non oportet*, id est turpia et ad libidinem pertinentia, vel quolibet alio modo religioni contraria. Et quia quædam viduæ postquam Deo continentiam et religiosam conversationem promiserunt, talia mala faciunt, *ergo volo juniores* viduas non continentiam vovere, quam servare non possunt, *sed nubere, et filios procreare* legitimos, ne si quos ex fornicatione genuerint, extinguant eos propter metum et verecundiam, et *volo eas esse matresfamilias*. Nubant, ne vagentur per alienas aedes; sed sub viris positæ, habeant frenum quo regantur. Procreent filios, et sint matres familiarum, ut non sint otiosæ, sed in nutritura filiorum et gubernatione familiarum utilibus occupentur actionibus. Bonum est enim nubere, bonum filios procreare, bonum matresfamilias esse, et ideo faciant hæc bona, ne forte committant supra dicta mala. Hoc volo eas facere, et *nullam occasionem dare adversario*, id est infideli, *gratia maledicti*, id est causa male locutionis. Hoc est, nolo ut infideli qui nobis adversatur, et cui magnum est de nobis male loqui, dent ullam occasionem, ut possit aliquid maledicere de eis; et fortasse darent occasionem, sicut jam nonnullæ dedere, quia *jam conversæ sunt quædam retro a bono continentiae*, quod proposuerunt, cunctes *post Satanam* qui retro cessit et periit. Hoc Apostolus addidit, ut in his verbis ejus intelligeremus eas quas nubere voluit, melius potuisse continere quam nubere, sed melius nubere quam retroire post Satanam, id est ab excellenti illo virginali vel viduali castitatis proposito, in posterlora respiciendo cadere et interire. Dixi ut juniores nubant. Sed si aliquæ nubere volunt, procurent eas sui. Et hoc est: *Si quis fidelis, vel si qua fidelis habet viduas*, id est viris *orbatas sorores* aut consanguineas, quæ aliqua linea

generis ad eum pertineant, *subministret illis necessaria, et non gravetur ab eis ecclesia, ut his quæ vere viduæ sunt*, id est omni auxilio destitutæ *sufficiat* alimenta præbere. Hic ostendit Apostolus quia et fideles sibi et aliis in posterum necessaria providere debent, ut intelligeremus quod præcipit Dominus non cogitandum esse de crastino (*Matt. vi*), non ad hoc fuisse præceptum, ut nihil pecuniæ servetur a sanctis, sed ne Deo propter ista serviatur, et propter inopiæ timorem justitia deseratur.

Qui bene præsumt presbyteri duplici honore digni habeantur, maxime qui laborant in verbo et doctrina. Dicit enim Scriptura: Non infrenabis os bovi trituranti (*Deut. xxv; I Cor. ix*), et dignus est operarius mercede sua (*Matt. x; Luc. x*). Adversus presbyterum accusationem noli recedere, nisi sub duobus aut tribus testibus.

De viduis ita fiat, ut hactenus ostendi. Sed de bonis presbyteris aliter, scilicet ut qui bene præsumt Ecclesiæ, habeantur digni duplici honore, ut in præsentia accipiant honorem stipendorum a subditis suis, et in futuro a Deo honorem gloriæ perennis, maxime qui laborant in verbo scientibus, et in doctrina nescientibus, id est qui monere student eos qui sciunt, et docere eos qui nesciunt; et cum duplex honor, id est gemina retributio talibus debeat, de uno honore probò, quem illis debent subjecti in oblatione sumpturum. Nam legis Scriptura dicit: Non infrenabis os bovi trituranti, id est non prohibebis prædicatorem cibos ex ecclesia sumere. Et Evangelii Scriptura secundum Lucam dicit quia, dignus est operarius mercede sua (*ibid.*), id est dignus est prædicator receptione sumptuum. Ex Evangelio enim Lucæ sumpsit Apostolus hanc sententiam, probans auctoritate sua. Dignus est operarius mercede sua, quia jam de mercede sunt operis ipsa alimenta sustentationis, ut hic merces de labore prædicationis inchoetur, quæ illic de veritatis visione perficitur. Qua in re considerandum, quod uni nostro operi duæ mercedes debeantur, una in via, altera in patria: una quæ nos in labore sustentat, altera quæ nos in resurrectione remunerat, quoniam digni honore duplici boni presbyteri sunt. Merces itaque quæ in præsentia recipitur, hoc in nobis debet agere, ut ad sequentem mercedem robustius tendamus, quia unusquisque verus prædicator non ideo prædicare debet, ut in hoc tempore mercedem recipiat, sed ideo mercedem recipere, ut prædicare subsistat. Quisquis enim ideo prædicat, ut hic vel laudis vel muneris mercedem recipiat, æterna procul dubio mercede se privat. Quisquis vero se vel ea quæ dicit, ideo placete hominibus appetit, ut dum placet quod dicitur, non ipse, sed Dominus ametur, vel idcirco terrena stipendia in prædicatione consequitur, ne a prædicationis voce per indigentiam lassetur, huic procul dubio ad recipiendam mercedem nihil obstat in patria, quia sumptus sumpsit in via. Nam et homo dat in labore cibum operario suo, ut laborare sufficiat, et post

laborem reddit ei mercedem. Multo magis ergo A Deus operarium suum dupliciter honorabit, id est remunerabit. Et ideo non facile recipias accusationem *adversus presbyterum*, quia non facile est accusanda tam alti nominis persona, *noli contra eum accusationem recipere, nisi sub duobus aut tribus testibus*, id est nisi accusator duos vel tres produxerit testes tam idoneos, ut accusatio sit sub eis, id est ut ipsi testes sint accusatore superiores, ut vita eorum non sit inferior vita accusantis. Testes enim, ut ait Isidorus, considerantur conditione, natura et vita. Conditione, si liber, non servus. Nam sæpe servus metu dominantis testimonium supprimit veritatis. Natura, si vir, non femina. Nam varium et mutabile semper femina (*Ænei. iv*). Vita, si innocens et integer actu. Nam si vita bona defuerit, fide caret. B Non enim potest iustitia cum scelerato homine societatem habere. Duo autem sunt genera testium: aut dicentium id quod viderunt, aut proferentium id quod audierunt. Duobus autem modis testes delinquent, cum aut falsa promunt, aut vera silentio obtegunt. Nam apud veteres non minoris erat culpæ veritatem tacere, quam mendacium dicere.

Peccantes autem coram omnibus argue, ut et cæteri timorem habeant. Testor coram Deo et cæteri Jesu Christo et electis angelis, ut hæc custodias, sine præjudicio nihil faciens, in alteram partem c declinando. »

Sic age erga presbyterum, ut dixi. Sed peccantes argue coram omnibus ut et cæteri qui peccare volebant timorem habeant, ne talia facere præsumant. Dominus dicit: « Si peccaverit in te frater tuus, corripe illum inter te et ipsum solum (*Matth. xviii*), » et nunc Apostolus peccantes coram omnibus jubet argui. Sed nulla contrarietas est in his duobus præceptis, quia aliquando corripiendus est inter te et ipsum solum, aliquando coram omnibus arguendus. Tunc enim secreto monendus est, quando peccavit in te, id est quando tu scis quia peccavit. Quia enim secretum fuit quando in te peccavit, secretum quære cum corrigis quod peccavit. Nam si solus nosti quia peccavit in te, et eum vis coram omnibus corrigere, non es corrector, sed proditor. Ergo illa corripienda sunt secretius, quæ peccantur secretius; illa vero arguenda coram omnibus, quæ peccantur coram omnibus. Demum ad confirmationem observantiæ eunctorum præceptorum subitur: « Testor coram Deo, ac si dicatur: Deus est mihi testis quod animam meam liberavi, dicendo quæ dicere debui, tu tibi cave ne per eas transgrediens quæ jussi, et coram Christo Jesu testor, qui judicabit; et coram electis angelis, qui separabunt malos a bonis (*Matth. xiii, xxiii*). Testor ut custodias hæc quæ nunc præcepi de accusatione presbyteri non leviter suscipienda, et de manifesta correctione peccantium, vel etiam cætera præcepta per totam superius Epistolam data, et inferius adhuc danda. Hæc custodias, nihil unquam faciens sine præjudicio, id est sine præmeditatione, an sit faciendum an non facien-

dum, declinando in alteram partem, nisi in eam quam præmeditando cognoveris justam. Vel hæc custodias sine præjudicio, id est sine reprehensione, nihil faciens declinando in alteram partem quam non jussi, id est in partem sinisteræ actionis. Vel hæc quæ dixi de accusatione presbyteri, custodias, nihil faciens sine præjudicio, id est sine præexaminatione, et ab examinatione non declines in aliud quam examinatio invenit.

« Manus cito nemini imposueris, neque communicaveris peccatis alienis. Teipsum castum custodi. Noli adhuc aquam bibere, sed modico vino utere, propter stomachum tuum et frequentes tuas infirmitates. Quorundam hominum peccata manifesta sunt, præcedentia ad iudicium, quosdam autem et subsequuntur. Similiter et facta bona manifesta sunt, et quæ aliter se habent, abecondi non possunt. »

Quia tam graviter tractanda est causa presbyteri, et ideo prius diligenter considera, quis sit ille quem ordinaveris presbyterum. Non enim facile debet ordinari, qui non facile potest ab ordine deponi; et ideo *nemini cito imposueris manus* ordinando illum, sed diu proba illum antea, quia in morando poteris vitam ejus cognoscere; *neque communicaveris* consentiendo peccatis alienis, si inconsiderate peccatorem ordinaveris. Qui enim indignum ordinat peccatis ejus communicat. Et ut viles ab ordinatione possis expellere, *teipsum castum custodi*, ac si dicatur: Qui indignos vis repellere, teipsum debes in vitæ munditia custodire. Et qui alios judicas, vide ne possis ab aliis de pravo actu judicari: quisquis peccata caves aliena, cave propria. Dico ut te custodias castum, et jam tamen *noli adhuc aquam bibere*, sicut prius consueveras, *sed modico vino utere*, quia modice sumptum non nocet castitati. Et hoc præcipio propter dolentem ex longa abstinentia stomachum tuum in quo sedes est infirmitatis; et propter infirmitates tuas frequentes, id est frequenter tibi venientes. Quia de castitate admonuit, hac occasione immoderatam abstinentiam prohibet quam Timotheus inierat, et modicum vinum præcipit ob infirmitates sumendum, medici consilio magis quam apostoli, licet apostolus sit medicus spiritalis, et ne Timotheus imbecillitate superatus, non posset implere prædicationis opus. Vix tamen etiam propter has necessitates vini potio conceditur, quia vinum et adolescentia duplex incendium voluptatis (*Prov. xx*). Sed stomachi dolor et frequens infirmitas in sancto Timotheo fomenta libidinum reprimebat. Apostolus itaque cum dilectum discipulum de instituendis ecclesiæ officiis admoneret, ne quos forte ad sacros ordines inordinate proveheret dixit: *Manus cito nemini imposueris, neque communicaveris peccatis alienis. Teipsum castum custodi*. Qui ad infirmitatem ejus corporis protinus se convertens, ait: *Noli adhuc, etc., usque, tuas infirmitates*. Statimque subjunxit, dicens: *Quorundam hominum peccata manifesta sunt, procedentia ad iudicium.*

quosdam et subsequuntur. Et quid ad illud pertinet, A quod ab infirmo bibi aquam prohibet, hoc quod de peccatis quorundam hominum manifestisque subjunxit, nisi quædam interposita de ejus infirmitate sententia ad hoc in extremo rediit quod superius dixit, manus cito nemini imponere, etc. Ut enim hæc eadem peccata quanta sollicitudine refellenda essent ostenderet, interposita contra infirmitatis molestiam discretionis a monitione, protinus intulit quod in aliis patescerent, et in aliis laterent dicens: Quorundam hominum, etc. Similis interpositio reperitur in libro Domini Job, ubi de reprobis dicitur: « De mane usque ad vesperam succidentur, et quia nullus intelligit, in æternum peribunt (Job iv), » statimque de electis additur, « quia autem reliqui fuerint, auferentur ex eis (ibid.), » iterumque mox de reprobis subjungitur: « Morientur, et non in sapientia (ibid.). » Sed in aliis Scripturarum sanctarum locis inveniuntur frequenter hujusmodi interpositiones. Cum ergo Timotheus, vel quilibet episcopus nemini debeat cito manus imponere, ne peccatis alienis communicet, si peccatorem ordinaverit, subjungitur causa, cum dicitur: Quorundam hominum peccata manifesta sunt, præcedentia ad judicium, id est quorundam peccata ita sunt aperta, ut eorum fama vel notitia prius veniat ad judicium, id est locum in quo fit discussio personarum, quam ipsi infames qui veniunt ad ordinandum. Quosdam autem et subsequuntur ad judicium peccata sua, quia tunc primum manifesta fiunt, cum ordinandi discutuntur. De quibusdam peccatis hoc intelligendum est. Non enim omnia panduntur in illa discussione, sed aliquando latent plurima. Nec solum peccata quædam ita manifesta sunt, et quædam in discussione vel in conversatione paulatim deteguntur, sed etiam quædam bona facta similiter manifesta sunt, præcedentia ad judicium, ut non sit opus probandi ea esse bona; et quædam iterum esse bona, quæ aliter se habent, id est quæ non ita sunt manifestata, non possunt abscondi vel in ipsa discussione, et ideo probanda. Hieronymus. Quod dicit istiusmodi est. Quidam tam libere et palam peccant, ut priusquam eos videris, statim intelligas peccatores; alios autem qui callide occultant vitia sua, ex consequenti conversatione cognoscimus. Similiter et bona apud aliquos in propatulo sunt, in aliis longo usu discimus. Augustinus: Manifesta ea dicit, de quibus clara est quo animo fiant. Hæc præcedunt ad judicium, quia si fuerint ista subsecutum judicium, non est temerarium. Subsequuntur autem illa quæ occulta sunt, quia nec illa latebant tempore sermo. Sic et de bonis factis intelligendum est. De manifestis ergo judicemus, de occultis vero judicium Deo relinquamus, quia et ipsa abscondi non possunt, sive mala, sive bona, cum tempus advenit quo manifestentur.

CAPUT VI.

« Quicumque sunt sub jugo servi, dominos suos cum honore dignos arbitrentur, ne nomen Do-

mini et doctrina blasphemetur. Qui autem fideles habent dominos, non contemnant, quia fratres sunt, sed magis serviant, quia fideles sunt; et dilecti, quia beneficii participes sunt. »

Quod de servo Hebræo præcipitur, ut sex annis serviat, septimo dimittatur liber gratis, ne servi Christiani hoc flagitent a dominis suis, apostolica nunc auctoritas jubet servos dominis suis esse subditos, ne nomen Domini et doctrina blasphemetur. Pseudo enim dicebant, non licere servos teneri nisi sex annis, vel potius neminem debere esse servum alterius, sed omnes æqualiter esse liberos, quia omnes ex uno patre Adam descenderant, et omnes Christus redimendo liberaverat. Et horum præsertim persuasione contradicit Apostolus, dicens Christianos servos debere quibuscunque dominis, sive paganis, sive Christianis bene servire, quia hoc præcepit Christus, cum diceret: « Reddite quæ sunt Cæsaris Cæsari, et quæ sunt Dei Deo (Luc. xx). » Et hoc est: Servi Christiani qui sunt gravati sub jugo infidelium dominorum, quicumque sint illi servi, id est etsi justus, etsi sapientes sint, dominos tamen suos arbitrentur dignos omni honore, bene serviendo illis, ne si servire contempserint, blasphemetur a dominis eorum propter eos nomen Domini quasi aliena invadentis, et doctrina Christiana quasi prædicans injusta, et contra legem mundanam decernens. Sciant qui dominos habent infideles. Sed illi qui habent fideles dominos, non ideo quidem contemnant servire, sicut per apostoli dogmatizabant. qui sunt fratres, id est dominis suis in Christo pares, quoniam atque Christiani; sed magis, id est majori affectione serviant eis, quia fideles sunt, id est participes sacramentorum Ecclesiæ; et dilecti sunt a Deo, quia participes sunt ejus beneficii præsentis et futuri.

« Hæc doce et exhortare. Si quis aliter docet et non acquiescit sanis sermonibus Domini nostri Jesu Christi, et ei quæ secundum pietatem est doctrinæ, superbus est, nihil sciens, sed languens circa questiones et pugnas verborum: ex quibus oriuntur invidia, contentiones, blasphemie, suspiciones malæ, conflictationes hominum mentis corruptorum, et qui a veritate privati sunt, existimantium quæstum esse pietatem. »

Hæc quæ dixi de servis, doce ignorantem, et exhortare scientem. Et hoc age, si quis aliter docet, id est si quis prædicaverit communem omnibus in Christo libertatem, dicens omnes debere liberos esse, tu e contrario tunc præcipe, id est prædica, ut servi dominos suos omni honore dignos arbitrentur, et non contemnant eis servire. Nam semper expedit quidem ista docere, sed tunc maxime quando perversus quis aliter docet, prædicans ut omnes sint liberi; et non acquiescit sanis sermonibus Domini nostri Jesu Christi, dum ei obijcitur Christum dixisse: « Reddite quæ sunt Cæsaris Cæsari, et quæ sunt Dei Deo (Luc. xx); » et præcepisse Petro ut pro se et pro ipso Christo staterem repertum in ore

piscis daret his qui tributum exigebant (*Matth. xvii*), A et item dixisse: « Discite a me quia mitis sum (*Matth. xi*); » et non acquiescit ei doctrinæ nostræ, quæ est secundum pietatem, id est quæ non facit odiosam Christianitatem, docendo insolere. Ille qui his et huiusmodi sermonibus Domini et huic doctrinæ non acquiescit, sed aliter docet *superbus est*, id est non patiens vinci, et a sententia sua deflecti. Et quamvis se sciolum putet, tamen *nihil sciens est, sed est semper circa quæstiones languens*, id est inefficax et impeditus ad solvendum, et ad veritatis indaginem pervenire non valens; et similiter est languens circa *pugnas verborum*, id est circa repugnantiam quæ videtur esse in quibusdam Scripturarum verbis, licet sensus concordet, sicut B est: « Si vos filius liberaverit, vere liberi eritis (*Joan. viii*); » et iterum: « Quicumque voluerit in vobis primus esse, erit omnium servus (*Marc. ix; Matth. xx*). » Videntur enim hæc verba huic stulto repugnare, ut nos filius liberos faciat, et iterum sit servus qui voluerit esse primus, cum primus inter nos maxime sit liber, si nos liberi sumus. Vel circa pugnas verborum languet, id est circa disputationes, in quibus disputatores pugnant verbis invicem. Ex quibus quæstionibus et verborum pugnis oriuntur invidia et contentiones blasphemie et suspiciones malæ, quia propter verba pseudoapostolorum libertatem huiusmodi prædicantium, hi qui servos habent, i. vident Christiano nomine contendunt adversus fideles, C et blasphemant Deum quasi qui aliena sibi tollit, et suscipit male de nobis, quasi hanc libertatem fluxissent ad lucrum. Et contra illos oriuntur inde conflictationes hominum mente corruptorum, id est pseudo prædicantium, quorum intelligentia vel ratio errore corrupta est, ne possit inviolata veritatis cognitionem habere in vera rerum notitia, vel mente corruptorum, quia, etsi caro eorum propter simulationem sanctitatis est integra, mens tamen interiorius delictatur immunditatis libidinum, et turpitudinibus vel amore pecuniarum. Et qui privati sunt a veritate, quia, etsi aliquando veritatem catholicæ doctrinæ aliquatenus cognoverunt, propter errores, quos menti suæ inseruerunt, cognitionem illam penitus amiserunt. Hominum dico existimantium pietatem, id est Dei cultum, esse quæstum temporalium rerum, quia pseudo putabant quod Christus esset colendus propter commoda presentis vitæ, non futuræ, quoniam et ipsi propter acquisitionem presentium lucrorum prædicabant.

« Est autem quæstus magnus, pietas, cum sufficientia. Nihil enim intulimus in hunc mundum, « haud dubium quia nec auferre quid possumus. « Habentes autem alimenta et quibus tegamur, hi contenti sumus. »

Ipsi putant pietatem nostræ religionis esse quæstum evolutum carnalis, et verum quidem est quod Christiana pietas est quæstus, non tamen exiguus ut temporalia tantum acquirat, ut ipsi putant,

sed *magnus*, id est æterna corporis et animæ bona conquirens. Magnus quæstus est *pietas cum sufficientia*, id est pietas cui sua parva sufficiunt, nec desiderat plus habere quam necesse est. Hanc autem sufficientiam non indecenter vult, quisquis eam vult, nec amplius vult. Alioquin non ipsam vult, et ideo nec decenter vult. Hanc optat qui precabatur, dicens: « Mendicantem et divitias ne dederis mihi; tribue tantum victui meo necessaria (*Prov. xxx*). » Hæc necessaria debent nobis sufficere, quia incongruum est, ut qui nihil huc attulimus, et nihil hinc portabimus, multa hic habere quæramus. Nihil videlicet intulimus in hunc mundum quando nati sumus; et *haud*, id est non est *dubium quia nec auferre hinc aliquid possumus*, quando morientes de mundo eximus. Nudus enim egreditur de matris utero, et nudus migrat de mundo (*Job i*). Unus ergo introitus est omnibus ad vitam, et similis exitus. Cur itaque alius in hac vi a quærit fieri dit or alio? vel cur dives contra pauperem inflatur, cum uterque sine divitiis venerit, et sine divitiis abiturus sit? Non igitur divitias multiplicare quæramus, quas hinc nobiscum portare non possumus; sed *habentes alimenta quibus pascamur, et indumenta quibus tegamur, hi contenti sumus*, nihil ultra quærentes in hoc sæculo, quia frigus et fames simplici vestitu et cilo expelli potest.

« Nam qui volunt divites fieri, incidunt in tentationem et laqueum diaboli, et desideria multa inutilia et nociva, quæ mergunt homines in interitum et perditionem. Ratio enim omnium malorum est cupiditas. Quam quidam appetentes, erraverunt a fide, et inserperunt se doloribus multis. Tu autem, o homo Dei, hæc fuge. Sectare vero justitiam, pietatem, fidem, charitatem, patientiam, mansuetudinem. Certa bonum certamen fidei, apprehende vitam æternam, in quam vocatus es, et confessus bonam confessionem coram multis testibus. »

Nobis apostolis quos cæteri debent imitari, sufficientia alimenta et tegumenta, omnibusque Christianis sufficere debent. Nam qui volunt divites fieri, in tentationem incidunt. Non dico qui divites sunt, sed qui volunt fieri divites. Aliud enim est esse divitem, aliud fieri velle divitem. Illic cupiditas accusatur, non aurum, non argentum, non divitiæ. Diviti præcipitur ut croget pauperi, ne desideret. Nam qui volunt divites fieri, etsi non fiant, ipsa tamen voluntate incidunt in tentationem, et in laqueum diaboli, id est in hoc ut consentiant suggestioni diaboli; amando divitias quarum amorem ille suggerit, et illa queantur ab eo per consensum iniquæ persuasionis, et per actionem pravitatis, et cadunt in desideria multa inutilia et nociva, quia nihil prosunt, sed valde nocent, quæ ita nocent, ut *mergant homines in interitum corporum et perditionem, animarum*. Et recte dixi quia per cupiditatem divitiarum cadunt in multa desideria; nam *cupiditas est radix omnium malorum, id est non est aliqua species mali*,

quæ non ex aliqua cupiditate aliquando procedat. A Hac enim et primus angelus cecidit (*Isa. xiv*), qui utique non amat pecuniam, sed propriam potestatem. Hac et primi homines dejecti sunt (*Gen. iii*), qui non aurum, sed inconcessam sibi divinitatem superbe cupierunt. Plus enim volentes habere quam acceperant, et quod acceperant, amiserunt. Nam cum initium omnis peccati sit superbia (*Eccli. x*), recte malorum omnium radix esse dicitur cupiditas. Vel avaritia hoc loco generalis intelligitur, qua quisque appetit aliquid amplius quam oportet, propter excellentiam suam et quemdam propriæ rei amorem. Talis enim perversitas mentis, competenter vocatur superbia vel cupiditas. Cum sit ergo specialis quædam cupiditas, quæ usitatus amor pecuniæ dici potest, Apostolus nunc cupiditatem nominans, per speciem genus significavit, et universalem cupiditatem intelligi voluit, dicens: *Radix omnium malorum est cupiditas*. Ipsa quippe latenter oritur in mente, sed peccatorum omnium punctiones patenter producit in opere. Quas videlicet punctiones ab hac radice surgentes, statim prædicator egregius insinuavit, subdens: *Quam quidam appetentes, erraverunt a fide, et inseruerunt se doloribus multis*. Qui enim multos dolores dixit, quasi nascentes ex hac radice punctiones vel spinas innotuit. Quidam per cupiditatem erraverunt a fide, et inseruerunt se doloribus multis, sicut illi qui propter dona principum adoraverunt idola, et post etiam in hoc sæculo viles omnibus effecti, multas miseras pertulerunt. Nunc quoque multi per cupiditatem errant a fide, quoniam avaritia est idolorum servitus (*Ephes. v*; *Col. iii*), et inserunt se doloribus multis, quoniam mens eorum assidue pungitur spinis sollicitudinum pro acquisitione vel conservatione divitiarum, et multiplici labore corpus illorum atteritur. Illi per cupiditatem irrationabilem in tot mala decidunt. Sed tu, o homo ratione utens, quia es Dei non cupiditatis, fuge hæc mala, si quando per aliquam delectationem humanæ fragilitatis apprehendere te voluerint. Hæc quidem fuge, sed *justitiam sectare* ut nunquam observatio justitiæ te possit effugere, sed semper per omnes vias actionum ejus sequere. Sectare justitiam; faciendo unicuique quod jus exigit, non quod cupiditas. Et sectare *pietatem* ut egenti vel afflicto condendas per compassionem, et ei clementer subvenias, prout hec esse habuerit, et sine avaritia tribuas quod opus fuerit. Et sectare *fidem*, ut credendo bona invisibilia, contempnas visibilia, quia qui veram fidem de Deo et futura beatitudine habet non curat hic cum impiis in exilio fieri dives, nec pluris est ei mundus quam Deus. Sectare *charitatem* erga Deum et proximum, qua penitus caret avarus, quia nec Deum diligit, cujus mandatum de dandis elemosynis contemnit (*Luc. xi, xii*); nec proximum diligere probatur, cui de suis operibus nihil impartitur. Tu vero ut charitatem sectari possis, adde *patientiam*, qua perferas æquanimitèr, quæ tibi a proximis inferentur, ne

A mordearis intrinsecus ullo dolore indignationis adversus eos qui tibi hæc inferent, sed serenum et tranquillum cor erga eos serves. Multa enim oportet te æquanimitèr a proximis tolerare, si charitatem non vis frequenter amittere. Et erga eos præcipue a quibus adversa perferes, sectare *mansuetudinem* ut nihil asperitatis, nihil amaritudinis illis rependas, sed mitis et tractabilis erga eos maneat. Cupidus autem neque patienter adversa tolerat, neque mansuetudinem erga quempiam servat. Certa quoque, id est pugna pro anima tua in agone præsentis vitæ, et coronam percipias in fine. *Certa* non malum certamen, sicut avari, qui certant alios superare divitiis: vel sicut hæretici, qui certant fideles a fide separare; sed certa *bonum certamen fidei*, ut B benigne contendas fide et bonitate alios superare, et infideles fidei subijcere. Vel certamen fidei, id est quod fides exigit, certa ut vel in martyrio, vel in agone justitiæ, vel contra hostes fidei vel contra quælibet vitia pugnes assidue. Et per victoriam hujus certaminis *apprehende*, id est vi quadam ad te prede *vitam æternam*, quam debes viriliter apprehendere, quia in eam *vocatus es* a Deo per evangelicam prædicationem, vel per propositum divinæ voluntatis, et tu *confessus es bonam confessionem fidei et justitiæ coram multis testibus* quando baptizatus es, sive quando in episcopum consecratus; ideoque fructum hujus confessionis, id est vitam æternam, nitere apprehendere.

C Præcipio tibi coram Deo qui vivificat omnia, et Christo Jesu, qui testimonium reddidit sub Pontio Pilato bonam confessionem, ut serves mandatum sine macula irreprehensibile, usque in adventum Domini nostri Jesu Christi, quem suis temporibus ostendet beatus et solus potens Rex regum et Dominus dominantium (*Apoc. xvii, xix*), qui solus habet immortalitatem, et lucem habitat inaccessibilem, quem nullus hominum vidit, sed nec videre potest (*Joan. i*; *I Joan. iv*), cui gloria, honor et imperium sempiternum. Amen.

Ut vitam æternam possis apprehendere, et bonam confessionem tuam servare, *præcipio tibi coram Deo qui vivificat omnia* quæ vivificantur; et coram Christo, qui in passione sua bonam confessionem reddidit, ut serves mandatum. Non enim vitam consequeris æternam, nisi per eum qui vivificat omnia, et ideo nunc illum præceptionis meæ testem adhibeo, ut ipse tibi vitam tribuat, si obedieris; nec bonam confessionem tuam servabis, nisi imitando Christum, qui sicut sub Pilato bonam confessionem dedit, ita et tu coram potestatibus hujus sæculi non timeas veritatem confiteri, et propterea coram Christo tibi præceptum trado. Deus Pater vivificat omnia, non tamen sine Filio, quia quæcumque ille facit, hæc et Filius similiter facit. Et sicut Pater suscitavit mortuos et vivificat, sic et Filius quos vult et vivificat (*Joan. v*). Nec sine Spiritu sancto agitur ista vivificatio, quia sicut idem Filius ait: Spiritus est qui vivificat (*Joan. vi*). Non

solus Pater, sed tota Trinitas quæ unus Deus est, vivificat omnia. Quod autem sequitur *et Christo Jesu, qui testimonium reddidit sub Pontio Pilato bonam confessionem* de Filio proprie intelligitur, quia sub Pilato in forma servi solum Filium novimus passum esse, non etiam Patrem, vel Spiritum sanctum. Tunc enim ipse Filius bonum reddidit testimonium, quia dixit se regem esse, quamvis sciret se inde moriturum esse; et illud testimonium fuit bona confessio veritatis. Hoc testimonium et hanc confessionem reddidit ipse, quando respondit Pilato: « Tu dicis quia rex sum ego. Ego in hoc natus sum, et ad hoc veni in mundum, ut testimonium perhibeam veritati. Omnis qui est ex veritate, audit meam vocem (Joan. xviii). » Sic et tu nullo metu tyrannorum debes a confessione veritatis reticere. Itaque præcipio tibi coram Deo qui est Trinitas, et coram Christo, qui est mediator Dei et hominum homo Christus Jesus (supra II), ut *mandatum bene agendi et bene docendi, quod tibi trado, serves sine macula* criminalis peccati, et serves illud *irreprehensibile*, id est ut non sis habitile ad reprehendum propter aliquam similitudinem iphonestatis. Et ita serves illud *usque in adventum Domini nostri Jesu Christi*, de quo ipse dicit: « Vigilate, quia nescitis qua hora Dominus vester venturus sit (Matth. xxiv), » id est usque ad obitum tuum. Vel in Timotheo præcipitur unicuique rectori Ecclesiæ, quia successurus est alius post alium usque in novissimum Domini adventum, ut servet sine macula criminis, et sine reprehensione inhonestæ similitudinis hoc mandatum. *Quem Dominum Christum, vel quem adventum Domini, suis, id est congruis et dispositis temporibus ostendet (ibid.)*, id est palam omnibus visibilem ponet Deus Trinitas, qui naturaliter in seipso, et ex seipso beatus est, quod nulli creaturæ congruit. Nulla enim creatura potest esse beata, nisi participatione beatitudinis sui Creatoris (Rom. xiii). *Qui et solus potens est*, quia per seipsum naturaliter omnia potest. Creaturæ vero si quam habent potestatem, ab illo hanc accipiunt. Non est enim potestas nisi a Deo. Et ipse est *Rex regum*, quia sub ejus imperio regnant omnes quicumque regnant; *et est Dominus dominantium*, quia illi serviunt aut volentes, aut inviti, quicumque aliis dominantur. Hæc, ut diximus, de tota Trinitate dicuntur, quæ unus est Deus. *Qui solus habet immortalitatem* quia solus est immutabilis. In omni enim mutabili natura, nonnulla mors est ipsa mutatio, quia facit aliquid in ea non esse quod erat. Proinde et ipsa anima humana, quæ propterea dicitur immortalis, quia qualitercunque secundum modum suum nunquam desinit vivere, habet tamen pro ipso suo modo quamdam mortem suam. Quia si juste vivebat et peccat, moritur justitiæ. Si peccatrix erat et justificatur, moritur peccato. Ut alias ejus mutationes taceam, de quibus longum est disputare, et creaturarum natura cælestium mori po-

nit, quia peccare potuit. Nam et angeli peccaverunt, atque dæmones facti sunt; et qui non peccaverunt, peccare potuerunt. Et cuicumque rationali creaturæ præstat ut peccare non possit, non est creaturæ proprium, sed Dei gratiæ. Ac per hoc solus Deus habet immortalitatem, qui non alicujus gratia, sed natura sua nec potuit, nec potest aliqua conversione mutari; nec potuit, nec poterit aliqua mutatione peccare. *Qui et lucem habitat inaccessibilem*. Sed si inaccessibilis est lux, in qua ipse manet, quomodo nobis dicitur: « Accedite ad eum et illuminamini? » (Psal. xxxiii.) Sed inaccessibilis est viribus nostris, acceditur autem ad eum muneribus suis. Moyses enim accessit ad caliginem in qua erat Deus (Exod. xix). Illa enim caligo lux ista est quæ hic dicitur inaccessibilis, quia et omnis etiam corporea lux quæ præ nimietate claritatis non potest aspici, recte caligo et inaccessibilis potest appellari. De hac caligine ad quam Moyses accessit, Dionysius ita scripsit: *Divina caligo est inaccessibile lumen, in quo habitare Deus dicitur, et invisibili eo existente propter supereminentem claritatem, et inaccessibili eodem per superexcellentiam superessentialis luminum emanationis*. In hoc fit omnis scire Deum et videre dignus, eum non vivendo neque cognoscendo vere super visionem et cognitionem factus, hoc ipsum cognoscens, quia post omnia est sensibilia et intelligibilia, et quia prophetice videns: « Mirabilis facta est scientia tua ex me, confortata est, et non potero ad eam (Psal. xiii). » Inaccessibilis ergo dicitur lux ista, sive caligo quam Deus inhabitat, propter superexcellentiam splendoris, in cujus visione caligat interior oculus rationalis creaturæ, quia sicut idem Dionysius alibi de eo loquitur, educit super et verbum et intellectum, in obscuritatem super omne et verbum et intellectum superessentialiter superessentialis superdivinitatis, neque nomen ejus, neque verbum, sed superexaltatur (226). Ista exaltatio est illa lucis inaccessio. *Quem nullus hominum vidit, sed nec videre potest (Joan. I)*, propter supereminentem claritatem, quæ exsuperat et reverberat humanum visum. Videri enim divinitas humano visu nullo modo potest, sed eo visu videtur, quo jam qui viderint, non homines, sed ultra homines sunt. Scriptura quippe sacra omnes carnalium sectatores, humanitatis nomine solet notare. Unde Corinthiis dictum est: « Cum sit inter vos zelus et contentio, nonne carnales estis, et secundum hominem ambulatis? (I Cor. iii.) » Et paulo post: « Nonne homines estis? (ibid.) » More enim suo Apostolus et hic et ibi homines vocavit, humana sapientes, quia qui divina sapiunt, supra homines sunt. Videbimus igitur Deum, si per cælestem conversationem supra homines esse mereamur. *Cui sit gloria in amplificatione fidelium, et honor in assiduitate bonæ conversationis, et imperium in plenaria humilitate cordis eorum*. Imperium dico *sempi-*

ternum ut ipse perenniter in bono corde eorum regnet. Vel sine initio et sine fine, et sine mutabilitate est ei permanens in seipso naturaliter gloria et honor, nec non et imperium sempiternum, quo voluntas ejus æternaliter amplectitur. Non enim coepit imperium habere, quando coepit creaturas facere, sed ab æterno possidet imperium sempiternum. Amen, id est fideliter dicta sunt hæc omnia.

« Divitibus hujus sæculi præcipe non sublime sapere, neque sperare in incerto divitiarum, sed in Deo vivo, qui præstat nobis omnia abunde ad fruendum, bene agere, divites fieri in operibus bonis, facile tribuere, communicare, thesaurizare sibi fundamentum bonum in futurum, ut apprehendant veram vitam. »

Superius ostendit pericula, quæ contingunt his qui volunt fieri divites, et ideo ne Timotheus de salute divitum desperaret, ipsosque devitaret, docet eum qualiter eis viam salutis ostendat. *Divitibus*, inquit, *hujus sæculi*, id est qui sæculares habent divitias, *præcipe non sublime, id est non superbe sapere*. Ubi notandum valde est, quod humilitatis doctor memoriam divitum faciens, non ait: Roga, sed præcipe, quia etsi impendenda est charitas vel pietas infirmitati, honor tamen non debetur elationi. Talibus ergo rectum quod dicitur, tanto rectius jubetur, quanto et in rebus transitoriis altitudine cogitationis intumescunt. Nihil enim tam timeandum in divitiis quam superbia. Non enim divitias expavit Apostolus, sed morbum divitiarum. Morbus autem divitiarum est superbia. Nam grandis est animus, qui inter divitias isto morbo non tentatur. Magnus ergo est dives, qui non se ideo magnum putat, quia dives est. Qui autem ideo se magnum putat, superbus et egenus est. *Præcipe*, inquit, *divitibus hujus sæculi*. Non addere: hujus sæculi, nisi essent et alii divites, qui non sunt hujus sæculi. Ipsi sunt enim, quorum princeps et caput ille, de quo dictum est: « Propter vos egenus factus est cum dives esset, ut illius inopia divites essetis (II Cor. viii). » Paupertas enim Christi non pecuniam nobis attulit, sed justitiam. Paupertas illius unde? Quia mortalis effectus est. Ergo veræ divitiæ immortalitas est. Ibi enim vera copia, ubi nulla indigentia. Qui ergo has habet divitias, dives est, sed non hujus sæculi. Nec tamen et divites hujus sæculi contempti sunt, sed eis ostenditur, quomodo veras possint habere divitias. *Præcipe*, inquit, *divitibus hujus sæculi, non sublime sapere*, id est ut sublimitas non sit eis sapida et dulcis, *neque sperare in incerto divitiarum*, id est ut non sperent in divitiis, de quibus incertum habent quandiu illas possideant, et quid sibi pro illis venturum sit. Sicut poma vel arbores habent suos vermes, ita divitiæ suum vermem habent. Vermis divitiarum est superbia. Ergo præcipitur divitibus, non ut divitias abjiciant, sed ut superbe non sapiant. Vermis enim excluditur, usus divitiarum permittitur. Inde autem superbit dives, quia sperat in incerto divitiarum. Nam si incerta divitiarum prudenter

attenderet, nunquam superbiret, sed semper timeret; et quanto esset ditior, tanto fieret sollicitior, etiam secundum hanc vitam. Multi enim pauperes in istis sæculi perturbationibus securiores fuere. Multi autem propter suas divitias quæsitæ et comprehensæ, atque cruciati vel interfecti sunt. Multi erant heri divites, et venientibus latronibus atque cuncta auferentibus, evigilant pauperes: ergo non est sperandum in incerto divitiarum, sed in Deo vivo. Ne enim se spem perdidisse arbitrarentur, subjunctum est, sed in Deo. In Deo sperent, qui præstat nobis abunde omnia ad fruendum temporalia et æterna. Sed magis ad fruendum æterna, ad utendum temporalia. Temporalia tanquam viatoribus, æterna tanquam habitatoribus. Temporalia, unde bona faciamus; æterna, unde boni efficiamur. Hoc ita debent facere divites et bene agere, id est bonis operibus insulare, et divites fieri in bonis operibus, ut replantur divitiis bonorum operum. Sperent in Domino, qui dat omnia abundantem ad fruendum, id est qui nobis erit omnia ad fruendum. Nam non mihi videtur dictum, qui dat nobis abunde omnia ad fruendum nisi seipsum. Videtur enim aliud esse uti, aliud frui. Utimur enim pro necessitate, fruimur pro jucunditate. Ergo ista temporalia dat utendum, se autem dat ad fruendum. Si igitur se, quare dictum est omnia, nisi juxta illud quod dictum est, et ut sit Deus omnia in omnibus (I Cor. xv)? Divites, inquit, fieri in operibus bonis, *facile tribuere*. Hoc prosint illis divitiæ, ne sit eis difficultas tribuendi. Vult enim pauper, et non potest. Vult dives, et potest. Ergo quia facile potest, facile tribuat indigentibus. Divites enim debent *communicare*, id est bona sua sanctis pauperibus communia secum facere, et *thesaurizare sibi fundamentum bonum*, id est firmitatem perpetuæ stabilitatis in futurum ubi sunt vere divites, sed non hujus sæculi. Non enim, quia dico, ut facile tribuant et communicent, exspoliare eos volo et inanes relinquere. Non doceo lucrum, cum dico ut thesaurizent sibi. Non ut divitias perdant, moneo; sed quæ eas præmittant, doceo. Præmittant thesauros suos in locum ubi est vera vita, ut ipsi postmodum sequentes, *apprehendant* eam, ne si hic thesaurizaverint, decipiantur a falsitate hujus vite, sicut ille dives purpuratus, qui Lazaro micam dare noluit; et ideo flammis postea traditus, impetrare guttam aquæ non potuit (Luc. xvi).

« O Timothee, depositum custodi, devitans profanas vocum novitates, et oppositiones falsi nominis scientiæ; quam quidam promittentes, circa fidem exciderunt. Gratia tecum. Amen. »

Cum plurima Timotheo Apostolus injunxisset, post omnia jubet ut depositum, id est commendatum sibi thesaurum scientiæ, videlicet acceptum a Domino talentum bene custodiat, ut multiplicatum illud reddat; et idcirco nomine proprio illum vocat, ut vigilantiores et attentiores reddat ad servandum quod admonet. O, inquit, *Timothee, depositum*, id est thesaurum scientiæ, *custodi, quem Deus et*

ego tibi commendamus, ne quis illum tibi furetur per novas inductiones verborum. Et ideo custodi illum. *devitans novitates vocum profanas*, id est quæ sunt extra religionem. Aliæ enim non sunt vitandæ quæ congruunt doctrinæ religionis, sicut ipsum nomen Christianorum, quod post ascensionem Domini cœpit, quando primum in Antiochia discipuli sunt appellati Christiani (*Act. xi*), res tamen ipsa et ante nomen erat. Et adversus impietatem Arianorum novum nomen Patres addiderunt, *ἁποστόλων*, sed non rem novam tali nomine signaverunt. Hoc enim vocatur *ἁποστόλων*, quod est : Ego et pater unum sumus (*Joan. x*), » unius, videlicet ejusdemque substantiæ. Nam si omnis novitas profana esset, nec a Domino diceretur : « Mandatum novum do vobis, nec testamentum appellaretur novum (*Joan. xiii*). » Sed profanæ sunt *vocum novitates*, quoties hæretici novum quemlibet errorem inveniunt, et loqui cæteris præsumunt. Et hujusmodi novitates devita, si depositum vis custodire, et oppositiones scientiæ falsi nominis cave, id est oppositiones quæ Christianæ doctrinæ possunt objici ex scientia hæreticorum, qui se scientes esse jactant, cum sint inscii, vel ex scientia sæ-

culari, quæ falso nomine vocatur scientia, cum nomen ejus verum sit ignorantia, sive error vel imperitia. Ex qua prædicationi evangelicæ multa opponuntur, sicuti est non potuisse Virginem parere, nec Deum potuisse mori, nec mortuum resuscitare seipsum potuisse, et his similia, quæ nobis ab imprudentia physicorum vel hæreticorum opponuntur. Sed hujusmodi oppositiones devita, quæ veniunt ex scientia, quæ falso nominatur scientia, quia non est scientia, sed inscientia, quam scientiam quidam promittentes aliis se daturos, exciderunt, id est ex toto ceciderunt in errores, cundo circa fidem semper, et nunquam intus intrando. Nihil enim sic amant isti quam scientiam promittere, et fidem rerum verarum quas credere parvuli præcipiuntur, velut imperitiam deridere. *Gratia tecum*; ac si dicatur : Multa tibi per hujus epistolæ textum injunxi, sed ut hæc omnia custodire valeas, gratia Dei sit tecum, id est cum viribus arbitrii tui manens et cooperans. *Amen*, id est fideliter dicta sunt universa quæ continentur in hac epistola. Nam sicut amen, quod in fine orationis respondetur, totam confirmat orationem : sic amen, quod in fine epistolæ scribitur, confirmat epistolam.

IN EPISTOLAM II AD TIMOTHEUM.

ARGUMENTUM.

Paulus Romæ vinculis tentus, et jam de mundo transiturus, scribit iterum Timotheo infirmitatibus et adversis fatigato, ut constanter laboret in gratia Dei sibi credita, exhortans multis modis eum ad martyrium. Roborat eum contra falsos prædicatores, et instruit de regula omnis veritatis, et de his quæ futura sunt temporibus novissimis, et de sua passione. Sicque incipit :

CAPUT PRIMUM.

« Paulus Apostolus Jesu Christi per voluntatem Dei, secundum promissionem vitæ quæ est in Christo Jesu, Timotheo charissimo filio : gratia, misericordia, et pax a Deo Patre et Christo Jesu Domino nostro. »

Timotheo scribit Paulus qui est apostolus, id est legatus Christi Jesu, quem misit Salvator rex prædicare viam salutis, et est apostolus non per suam usurpationem, sed per Dei Patris voluntatem. Est, inquam, apostolus, id est prædicare missus, secundum promissionem vitæ, quæ est in Christo Jesu, id

PATROL. CLXXXI.

C est ut annuntiet credentibus factam a Deo promissionem illius incorruptionis, quæ jam in Christo a mortuis resuscitato, quod scilicet Deus promisit membris eam vitam, quæ jam est in capite. Et ille qui taliter est apostolus, scribit Timotheo non vili, sed charissimo filio in sanctitate et sapientia genito. Et huic filio sit gratia, id est donum Spiritus sancti, per quod sanctificetur quicquid gerit; et misericordia, qua misericorditer a peccatis et hostibus, cunctisque miseriis liberetur; et pax, quam suis Christus reliquit in observatione fraternæ charitatis, quamque daturus est illis in requie beatæ perennitatis. Et hæc sint illi a Deo Patre, qui nos creavit, et in filios adoptavit, et a Christo Jesu Domino nostro, qui est rex et salvator et dominator nostri.

« Gratias ago Deo meo, cui servio a progenitoribus meis in conscientia pura, quam sine intermissione habeam tui memoriam in orationibus meis nocte ac die desiderans te videre, memor lacrymarum tuarum, ut gaudio implear, recordationem accipiens ejus fidei, quæ est in te non ficta, quæ et habitavit primum in avia tua Loide, et matre tua Eunice. Certus sum autem quod et

hC

« in te. Propter quam causam admoneo te, ut resuscites gratiam Dei, quæ est in te per impositionem manuum mearum. Non enim dedit nobis Deus spiritum timoris, sed virtutis et dilectionis et sobrietatis. »

Gratias ago de te Deo meo, cui ego in conscientia pura servio a progenitoribus meis, id est ab Abraham, Isaac et Jacob, cæterisque sanctis patribus Hebræis, a quibus exemplum accipio divinæ servitutis, vel si de carnali patre et matre hoc intelligitur, ex quo ab his, processi et intelligere cœpi, semper Deo servivi in conscientia pura ab intentione mala. Nam etiam in persecutione quam zelo legis Christianos exercui, puram conscientiam habui, quia inde multum Deo me placere putavi, sicut ipse Christus eis prædixerat. « Venit, inquit, hora, ut omnis qui interficit vos, arbitretur obsequium se præstare Deo (Joan. xvi). » Itaque semper conscientiæ puritatem, id est cordis mundam intentionem habens ab infamia, non cesso servire Deo. Cui nunc gratias ago quam, id est quantum habeam tui memoriam sine intermissione. Hoc est perpendens assidue quantum animi tui memor, gratias Deo refero qui te talem fecit, ut sis dignus semper in memoria meæ mentis permanere. Vel secundum alios codices facilius legitur ita : Gratias ago Deo, cui servio a progenitoribus in conscientia pura, quod habeam sine intermissione memoriam tui, quod scilicet sis dignus propter meritum tuæ sanctitatis in corde meo semper esse. Hæc est sapiens exhortatio ad meliora. Memoriam tui habeo sine intermissione in orationibus meis, id est nunquam intermitto tui memor esse, quotiescunque oro, ut pro te orem nocte ac die. Et ideo te sic precibus meis sic intermisceo, quia sum desiderans te videre, ut aliquod solatium habeam in conspectu præsentis tuæ, qui tot malis afficior in hoc carcere. Videre, inquam, te desidero, memor lacrymarum tuarum, quas uberes fudisti, cum te Ephesi relinquerem, quia nimis erat tibi durum non semper esse mecum. Et propterea te desidero videre, ut videns te quem tantum diligo, implear gaudio. Magnum enim mihi gaudium erit, si te adhuc videre potero priusquam moriar. Dixi quia sum memor lacrymarum tuarum. Et sum memor earum, accipiens recordationem ejus fidei, quæ est in te non ficta, non simulata, nec fictitia, sed vera, et bonis operibus ornata, quæ te movet ut fortiter agas, cum etiam in feminis firma fuerit, quoniam et habitavit primum in avia tua Loide, et in matre tua Eunice, pater enim tuus fuit gentilis (Act. xvi). In illis habitavit fides, sed et ego certus sum, id est pro certo novi quod et in te habitet eadem fides, cujus exemplum ab illis accepisti, et ideo serva diligenter eam; propter quam causam, id est quia fidem a bonis parentibus velut hæreditario jure possides, et tam bonus hucusque fuisti, ut non possis auferri de memoria cordis mei, admoneo te, ut resuscites gratiam Dei, quæ est in te per impositionem manuum mearum, id est prædicando exercere officium episcopale, quod accepisti, quando tibi

manus in ordinatione tua imposui, quod quasi mortuum est in te timore martyrii. Gratia enim episcopatus admonet eum resuscitare, ut confidentius prædicet verbum Dei, non timens terrenas potestates, nec erubescens se dicere servum Crucifixi, et discipulum victi. Aliquantulum enim in hoc negligens et timidus fuerat factus, quoniam adversis erat fatigatus. Sed aviæ et matris ejus mentio præmittitur, quæ mulieres fuerunt, et fidem constanter tenuerunt, cum adhuc recentior esset, paucique fideles essent, ut cogitet quia ipse qui vir est, et sub eis nutritus, multo magis nunc cum jam multitudine fidelium abundet, fidem et gratiam viriliter tenere et prædicare debet. Moneo, inquit, ut resuscites gratiam Dei, quæ metu tribulationum quodammodo cecidit in te. Quod potes et debes agere, quia Deus non dedit nobis spiritum timoris, sed spiritum virtutis, id est non dedit nobis spiritum, qui faciat nos timere adversitates hujus sæculi, sed qui nos faciat fortes contra adversa omnia, ut per virtutem constantiæ semper vincamus timoris adversitatem. Non accepimus spiritum timoris illius, de quo dicit Dominus : « Nolite timere eos qui occidunt corpus (Math. x), » ne scilicet negemus eum illo timore, quo turbatus est Petrus (Joan. xviii); sed accepimus spiritum illius timoris, de quo subjungit : « Timeo eum, qui habet potestatem et corpus et animam perdere in gehennam (Math. x). » Major quippe libertas est necessaria adversus tot et tantas tentationes, ut cum omnibus amoribus, terroribus, erroribus suis vincatur hic mundus. Hoc sanctorum martyria docuerunt, donante illo a quo perceperunt spiritum non timoris, quo persequentibus cederent; sed virtutis et dilectionis et sobrietatis, quo cuncta minantia, cuncta mutantia, cruciantia cuncta superarent. Virtutis, ut contra adversa fortes essent; dilectionis, ut Deum super omnia diligerent; sobrietatis, ut sæculi cupiditatibus inebriari fugerent

« Noli itaque erubescere testimonium Domini nostri, neque me victum ejus, sed collabora Evangelio secundum virtutem Dei, qui nos liberavit, et vocavit vocatione sua sancta, non secundum opera nostra, sed secundum propositum suum et gratiam, quæ data est nobis in Christo Jesu ante tempora sæcularia, manifestata est autem nunc per illuminationem Salvatoris nostri Jesu Christi, qui destruxit quidem mortem, illuminavit autem vitam et incorruptionem per Evangelium, in quo positus sum ego prædicator et apostolus et magister gentium. Ob quam causam etiam hæc patior, sed non confundor. Scio enim cui credidi, et certus sum, quia potens est depositum meum servare in illum diem. »

Quoniam spiritum timoris non accepisti, sed virtutis et charitatis, itaque noli erubescere testimonium Domini nostri Jesu Christi, id est non solum non timeas, sed etiam non erubescas prædicare Christum crucifixum, quia surrexit, et ideo gloria resurrectionis penitus excludit confusionem crucis. Cum

ipse sit Dominus noster, cui omnes servire debemus, noli erubescere testimonium ejus, id est non sit tibi verecundia hunc prædicare Deum immortalem, qui pro omnibus in assumpta carne dignatus est ad horam gustare mortem, ne incidas in illam comminationem qua dixit : « Qui me erubuerit, et meos sermones, hunc Filius hominis erubescet, cum venerit in majestate sua (Luc. ix). » *Neque erubescas me vinctum ejus*, quia non est rubor confusionis pro justitia pati vincula. Non est in hac re quidquam verecundiæ, et ideo noli propter insultationes infidelium erubescere me vinctum esse pro Christo, *sed collabora*, id est mecum labora, *Evangelio*, id est profectui Evangelii *secundum virtutem Dei*, id est a Deo nobis datam, *qui nos sanguine Christi liberavit a jugo diaboli*, sicut antea sanguine agni filios Israel a potestate Pharaonis, et per evangelicam prædicationem, vocavit nos, qui eramus avari. *Vocavit nos vocatione sua*, id est sibi soli congrua; vocatione dico, *sancta*, id est ad hoc spectante, ut nos sanctos faciat. Vocationem Apostolus duplicat, ut insinuet nos a Deo vocatos per Filium et apostolos. *Vocavit*, inquam, nos, et hoc *non secundum opera nostra*, quia non feceramus opera, pro quibus digni essemus ab eo vocari, sed potius damnari, *sed ipse*, sine præcedentibus bonis operibus nostris, misericorditer vocavit nos *secundum propositum suum*, id est secundum quod proposuerat nos per misericordiam salvare quos posset, per justitiam damnare, et secundum *gratiam* suam vocavit nos, id est secundum gratuitam Dei donationem *quæ data est*, id est prævisa dari nobis *in Christo Jesu ante tempora sæcularia*, id est antequam cœpissent cum sæculo ista tempora, quæ suis spatiis volvuntur et transeunt. Nam ante sæculum non erat tempus, sed ævum; sed cum sæculo, sicut diximus, exordium habuit tempus, quando cœpit mutabilitas et vicissitudo diei et noctis. Et in illo ætatis ævo, postquam mundus ferebat, data est nobis in consilio divinæ Providentiæ per Christum ista gratia, *sed nunc manifestata est* in nostræ vocationis et salvationis completionem *per illuminationem Salvatoris nostri Jesu Christi*, id est per illuminationem novæ scientiæ quam Salvator attulit, et qua nos illuminavit, aperiens nobis sensum ut intelligeremus Scripturas (Luc. xxiv). *Qui destruxit*, etc. Hæc est illa gratia, quod scilicet Salvator mortem quidem nostram destruxit, *vitam autem et incorruptionem* sua resurrectione *illuminavit*, id est clara luce manifestavit, ut sit vita et incorruptio animæ et corporis, ad quam nos tendere voluit. Et hanc illuminationem fecit *per Evangelium*, id est per manifestationem Evangelii, in qua denudantur ea, quæ in lege velabantur. *In quo Evangelio immobilis positus sum ego prædicator*, id est præco clamans, *et apostolus*, id est legatus potestatem habens, *et magister gentium*, id est quotidie gentes docens. *Ob quam causam*, id est quia Evangelium prædico, *etiam hæc* adversa nunc Romæ tanta *patrior*, *sed non confundor*, id est non erubescio in om-

nibus contumeliis et tormentis quæ perfero, sciens quia per hæc gloriam acquiro. Nam *scio cui credidi*, id est scio quis sit cui fidem meam commisi, *et certus sum* quia omnia potest, *et quia potens est depositum meum servare*, id est thesaurum meritorum meorum quem illi occulte servandum commendavi. Ipse potens est et hoc pretiosum justitiæ meæ depositum servare, differendo *in illum* notabilem judicii diem, ut tunc illud mihi restituat, et divitias justitiæ, quas illi commendavi, reddat. Usque in illum judicii diem, de quo frequenter loquor et cogito, potest ille thesaurum spiritualium divitiarum mearum sibi commissum custodire, ut tunc illum mihi copiosius reddat, et magnis me divitiis repleat.

« Formam habens sanorum verborum, quæ a me audisti in fide et dilectione in Christo Jesu, bonum depositum custodi per Spiritum sanctum, qui habitat in vobis. »

Christus servabit depositum, quod ego illi commendavi, et tu serva depositum, quod Christus tibi commendavit. Tu *habens formam verborum sanorum*, id est regulam verborum, in quibus nihil est insaniam, *sed pura cordis sanitas, quæ non a quocunque magistro, sed a me audisti in fide et dilectione quæ est in Christo Jesu*, id est sicut Christus Jesus instituit, *custodi bonum depositum*, id est thesaurum scientiæ a Christo tibi commendatum, vel officium tibi commissum, et *custodi* illud non per tuam industriam, sed *per Spiritum sanctum qui habitat in nobis*, id est in te sicut in me.

« Scis hoc quod avari sunt a me omnes qui sunt in Asia, ex quibus est Phygelus et Hermogenes. Det misericordiam Dominus Onesiphori domui, quia sæpe me refrigeravit, et catenam meam non erubuit; sed cum Romam venisset, sollicita me quæsivit et invenit. Det illi Dominus invenire misericordiam a Domino in illa die. Et quanta Ephesi ministravit mihi, tu melius nosti. »

Idcirco opus est ut tu bonum depositum a Deo tibi vel a me commendatum diligenter custodias, quia *scis quod avari sunt*, id est recesserunt a me omnes qui in Asia sunt ficti, a quibus maxime est tibi cavendum, ne furentur depositum tuum. Illi de Asia qui ficto corde fuerant cum Apostolo, simulantes se ejus amicos, reliquerunt eum, cum viderent ipsum in arcto constitutum. Et istos ad hoc nunc commemorat, ut Timotheus sibi caveat, ne et ipse similiter ab eo se avertat. *Omnes*, inquit, *avari sunt, a me*, non quidem omnes qui sunt in Asia, sed omnes illi Asiani, *ex quibus est Phygelus et Hermogenes*, id est qui tales sunt in Asia, quales isti duo. Illi simulatores tandem se qui essent detegentes, terga mihi dedere in faciem sed non ita fecit Onesiphorus, vel familia ejus. Onesiphori beneficia commemorantur, ut et Timotheus hunc imitatur, ipsique gratiam reddat, et in eo confidat, quoniam Ephesianus vel Asianus est. *Qui cum ad imperatorem*, utpote qui nobilissimus erat, *magnæque di-*

gnitatis, seu pro qualibet alia causa Romam venisset, requisivit ubi esset Apostolus; et cum didicisset illum esse in carcere, non est dedignatus venire ad illum, sed consolatus est illum, et præbuit illi quæ necessaria erant. Et hoc est quod Apostolus pro magno commemorat. Et quia misericordes misericordiam consequentur, misericordiam illi a Domino retribuere precatur (*Matth. v*). *Det, inquit, misericordiam Dominus domui*, id est familiæ Onesiphori, quia non solum ipse, sed et familia quæ cum ipso venit, sæpe me refrigeravit suo colloquio et consolatione, ac pœnarum mearum mitigatione, et bonorum suorum ministracione; *et catenam meam non erubuit*, sicut prædicti simulatores, qui aversi sunt a me, *sed cum venisset Romam* sollicitè me quæsit, ut opem mihi ferret, *et invenit*. Hic ostenditur quia fideles qui sunt in carcere vel in infirmitate, vel alicubi in afflictione tenentur aliqua necessitate, sollicitè debent ab his qui misericordiam a Deo expectant, inquiri et refrigerari. *Det illi*, id est Onesiphoro qui tam misericors in me fuit, *Dominus Christus invenire misericordiam a Deo Patre in illa die* iudicii de qua sæpius cogito. *Det illi Dominus invenire misericordiam a Domino*. Tale est illud quod in Genesi legitur: « Pluit Dominus super Sodomam ignem et sulphur a Domino (*Gen. xix*). » Hæc quæ dixi, fecit mihi Romæ Onesiphorus. *Et quanta ipse mihi Ephesi ministravit, tu melius nosti, quam ista quæ scribo, quoniam illa vidisti.*

CAPUT II.

« Tu ergo, fili mi, confortare in gratia quæ est in Christo Jesu; et quæ audisti a me per multos testes, hæc commenda fidelibus hominibus, qui idonei erunt et alios docere. Labora sicut bonus miles Christi Jesu. Nemo militans Deo implicat se negotiis sæcularibus, ut ei placeat cui se probavit. Nam qui certat in agone, non coronatur nisi qui legitime certaverit. Laborantem agricolam oportet primum de fructibus accipere. Intellege quæ dico. Dabit enim tibi Dominus in omnibus intellectum. »

Quandoquidem Onesiphorus aliis recedentibus me quæsit, et multa mihi non solum Romæ, sed Ephesi ministravit, ergo tu, fili mi, exemplo illius confortare. Tu, quasi dicatur: Tu confortare quoniam alii defecerunt. Confortare in gratia quæ in Christo, ut non solum in ea maneat, sed etiam robustior fias in ipsa quotidie ad bona faciendâ et prædicandâ, et mala per patientiam superandâ. Et verba quæ audisti a me per multos testes, id est per multorum testimonia prophetarum confirmata, hæc commenda fidelibus. Vel per multos testes hæc commenda fidelibus, id est coadjutores tibi constitue, per quos ista quæ te docui commendes fidelibus, id est sanæ fidei hominibus, id est sine fraude fideliter agentibus, qui vita et scientia et facundia erunt idonei etiam alios docere, sicut ipsi docentur a te vel a tuis adjutoribus. Ita enim multiplicabitur doctrina virtutis, et crescit religio. Commenda hæc

A fidelibus. Et in hujusmodi exercitiis labora sicut bonus miles Christi Jesu. Et, ut more strenui militis Christi possis agere, audi qualiter agat quis talis miles: *Nemo militans Deo, implicat se negotiis sæcularibus*, « quia nemo potest duobus dominiis servire (*Matth. vi; Luc. xvi*), » id est Deo et sæculo. Clericus hac sententia tenetur. Si enim non contentus stipendiis quæ de altari, Domino jubente, consequitur, exercet mercimonia, intercessionem vendit, viduarum munera libenter accipit: hic negotiator magis potest videri quam clericus. Multo minus autem licet monacho, ut sit negotiator sæcularium mercimoniorum, vel implicatus curis sæcularibus. Itaque definitio boni militis Christi est, quia soli Deo qui dividi non potest, totus militans, non implicat se negotiis sæcularibus, id est non se involvit propter terrena lucra curis et actionibus sæculi, scieus iam multos peccatorum laqueos abscondi, ut solis divinis libere vacans, ei placeat cui se probavit, id est devovit. Et vere bonus miles præter regis sui militiam nihil debet agere, si eidem regi vult placere, sub cujus signis decrevit militare, quia agonista qui coronam appetit, agonem suum debet legitime perficere. Et hoc est: *Nam qui certat in agone*, id est qui cum adversario confligit in certamine, *non coronatur*, id est non consequitur victoris præmium, nisi legitime, id est prout lex agonis postulat, certaverit. Sic et athleta Christi qui cum diabolo pugnat in agone præsentis vitæ, non percipiet coronam æternæ gloriæ, nisi victor fuerit secundum legem Christianæ pugnæ. Delectet igitur mentem magnitudo præmiorum, sed non deterreat certamen laborum, quia ad magna præmia perveniri non potest, nisi per magnos labores. Et profectus fidelium sine tentatione non provenit, nec sibi quidquam innotescit nisi probationis examine. Nec coronabitur nisi vicerit, neque vincet nisi certaverit, nec certabit nisi inimicum habens et tentationi resistens. Prosunt ergo justis labores certaminum, quia per hos merentur coronari. Dixi quia miles Dei non implicatur negotiis sæcularibus, nec justus certator transgreditur legem certaminis, sed tamen laborantem agricolam, id est prædicatorem oportet primum, id est ante alios accipere de fructibus agri in quo laborat, id est de carnalibus bonis Ecclesiæ. Timotheus iste exemplo Apostoli labore manuum suarum volebat vivere, et ab eis quibus verbum salutis prædicabat, nihil accipere. Unde et penuriam multam patiebatur, quia infirmus erat, et labori manuum vacare non poterat. Admonet ergo eum sub specie agricolæ, ut de agro quem colit, fructum quo sustentetur non spernat accipere. Itaque quoniam sciebat illum corpore infirmum, nec in opere corporali posse laborare, dicit illi quod miles Dei sæcularibus negotiis se non implicat, ne forte cum indigeret victu quotidiano, vellet ab eis, quibus Evangelium ministrabat, aliqua sibi negotia quærere, quibus animi ejus implicaretur intentio. Aliud est enim, corpore laborare animo libero, sicut opifex potest, si non sit

fraudentus, aut avarus, et privatæ rei avidus; aliud autem ipsum animum occupare curis colligendæ sine corporis labore pecuniæ, sicut vel negotiatores, vel procuratores, vel conductores faciunt. Cura videlicet præsumunt, non manibus operantur; ideoque ipsum animum occupant habendi sollicitudine. Timotheum ergo ne in talia incideret, quia per infirmitatem corporis operari manibus non poterat, sic exhortatur et consolatur: *Labora, inquit, sicut bonus miles, etc., usque, nisi legitime certaverit.* Hic, ut ille angustias pateretur, dicens: « Fodere non valeo, mendicare erubescio (*Luc. xvi*), » adjunxit statim: *Laborantem agricolam oportet primum de fructibus percipere*, secundum id quod ad Corinthios dixerat: « Quis plantat vineam, et de fructibus ejus non edit? » (*I Cor. ix.*) Fecit itaque securum, non ad hoc ut Evangelium venderet, sed tamen ut ab eis quibus Evangelium ministrabat, et quos tanquam vineam vel agrum excolebat, huic vitæ necessaria (quæ sibi suis manibus exhibere non valebat) sumeret. *Laborantem agricolam oportet primum de fructibus, etc.,* id est, ille qui laborat in verbo prædicationis et regimine Ecclesiæ, debet, sicut primus est, ex bonis ecclesiæ primus sumere, et sic cæteris distribuere. *Intellige*, id est discerne, quæ dico, etsi videar contrarius esse, et contra id quod ipse facio, dicere. Tu enim infirmus es, ideo debes accipere; ego vero si acciperem, scandalum generarem. Et bene poteris hæc ita intelligere, quia *Dominus tibi intellectum dabit* non solum in his, sed et in omnibus.

« Memor esto Jesum Christum resurrexisse a mortuis ex semine David secundum Evangelium meum, in quo laboro usque ad vincula quasi male operans: sed verbum Dei non est alligatum. »

Ut legitime certando tendas ad coronam, memor esto Jesum Christum resurrexisse a mortuis, id est sæcula meditatione in animo tuo revolve Christum per laborem passionis pervenisse ad gloriam resurrectionis, teque similiter opportuno tempore ad gloriam resurrectorum, si nunc pro ejus nomine non respueris amaritudines passionum. Fides resurrectionis Christi eos distinguit a paganis et Judæis, quia illi credunt esse eum crucifixum, nos autem credimus eum die tertia resurrexisse. Libenter enim credunt crucis contumeliam, sed confiteri nolunt resurrectionis gloriam, ideoque perpetuam sustinebunt ignominiam. Nos vero post crucem et sepulturam alacriter constemur resurrectionis gloriam, ut ejus exemplo per certamina spiritualium bellorum accipere mereamur perennem victoriæ coronam. Qui est ex semine David, quia incorrupta ejus Genitrix veram de stirpe David duxit carnis originem. Nam Filius Dei, per quem facti sumus, et filius hominis per assumptionem carnis factus est, ut moreretur propter delicta nostra, et resurgeret propter justificationem nostram (*Rom. iv*). Et hoc secundum Evangelium meum, quia secundum authenticam veritatem meæ prædicationis asseritur Christus, et ex

stirpe David incarnatus esse et post mortem resurrexisse, licet perversi negent. *In quo Evangelio laboro usque ad vincula*, et tu similiter agere debes. Laboro usque ad vincula in Evangelio, quoniam universos præcedentes labores, et ad ultimum vincula patior in evangelica prædicatione, habitus quasi male operans. Et ego quidem in corpore meo vincula porto, sed verbum Dei non alligatum, quoniam libere procedit ex ore meo; nec solum præsentibus sermonibus instruo, sed et absentes epistolis confirmo. Quia ego ligari possum ab eis qui veritati contradicunt, non ipsa veritas quam loquor. Sic et tu in illis pœnis non debes a prædicatione veritatis cessare.

« Ideo omnia sustineo propter electos, ut et ipsi salutem consequantur, quæ est in Christo Jesu, cum gloria cælesti. Fidelis sermo. Nam si commortui sumus, et convivemus; si sustinemus, et conregnabimus: si negaverimus, et ille negabit nos; si non credimus, ille fidelis permanet, nec gare seipsum non potest. Hæc commane, testificans coram Domino. »

Dixi quia verbum Dei non potest alligari. Et ideo, id est quia cohiberi non possum a prædicatione veritatis, sustineo libenter omnia mala, quæ mihi pro hac re inferuntur, et hoc facio propter electos, quia his qui ad vitam prædestinati sunt, valde proficit quod nulla me pœnarum acerbitas ab instantia prædicationis frangit. Vel quia sum memor resurrexisse, ideo sustineo patienter omnia propter electos exemplo mei informandos, ut et ipsi quemadmodum ego sustinentes, consequantur veram salutem, quæ est in Christo Jesu, et consequantur eam cum gloria cælesti, ut simul accipiant et salutem æternam, et cælestem gloriam. Et iste sermo de consecutione salutis et gloriæ eorum, quos Deus in prædestinatione sua jam elegit, fidelis est, id est verax et nihil fallaciæ habens. Et vere fideliter iste sermo complebitur. *Nam si commortui sumus*, id est si cum Christo mortui sumus, hoc est, si imitatione mortis ejus mortificati sumus in baptismo vitæ, ut ultra jam non vivamus in eis, et convivemus, id est etiam cum illo vivemus in æterna beatitudine. *Et si sustinemus* adversa pro ejus nomine, sicut illi sustinuit pro nostra salute, tunc et conregnabimus; id est cum illo regnabimus participes regni ejus. Si vero negaverimus illum metu passionum, et ille negabit nos in futuro judicio, dicens: « Nescio vos unde sitis, recedite a me, operarii iniquitatis (*Matth. vii, xxv*). » Hoc est enim quod ipse minatus est, dicens: « Qui negaverit me coram hominibus, negabo et ego eum coram Patre meo (*Matth. x; Luc. xii*). » Et si non credimus de illo quæ credenda sunt, ille permanet fidelis, id est verax in his quæ de seipso locutus est, et non potest negare seipsum. De qua re Dionysius Areopagita sic argumentatur: Suimet negatio casus veritatis est. Veritas autem ÷ est, et veritatis casus non ÷v. ÷v vero interpretatur existens, vel quod est. Si igitur veritas ÷v est, negatioque veritatis non

ὄν, οὐτός; casus, ex onto cadere. Deus cadere non potest, et non esse non ὄν. Tanquam si quis dixerit, non posse non potest, et nescire secundum privationem nescit. Hæc ex dictis Dionysii. Si ergo Deus non potest negare se, et non potest mentiri vel aliquid injustum facere, quomodo est omnipotens, nisi quia hæc vel his similia posse non est potentia, sed impotentia? Nam qui talia potest, quod sibi non expedit potest, et quod non debet potest. Quæ quanto magis potest, tanto magis adversitas et perversitas possunt in illum, et ipse minus contra illas. Qui ergo sic potest, non potentia potest, sed impotentia. Sed Deus inde vere est omnipotens, quia nihil potest per impotentiam, et nihil potest contra eum aliquid. Recte itaque de omnipotente dictum est, quia negare seipsum non potest. Nam et de Judæis legimus, quod propterea non poterant credere, quia dixit Isaias : « Excæcavit oculos eorum et induravit cor eorum (Isa. vi; Joan. xii). » Sic autem dictum est, non poterant, ubi intelligendum est quod volebant, sicut et de Deo nunc dicitur, quia negare seipsum non potest. Sicut ergo quod Dominus seipsum negare non potest, laus est voluntatis divinæ, ita quod illi non poterant credere, culpa est voluntatis humanæ. Hæc commune attendere et servare, *testificans*, id est ut idoneus testis affirmans, ea *coram Domino*, id est in oculis Dei qui nos præsens aspicit.

« Noli contendere verbis. Ad nihil enim utile est, nisi ad subversionem audientium. Sollicite autem cura te ipsum probabilem exhibere Deo, operarium inconfusibilem, recte tractantem verbum veritatis. »

Hucusque dedit rationes cur esse debeat constans in prædicatione. Et ne ipse studio constantiæ vellet contentionebus more garrulorum deservire, *noli*, inquit, *verbis contendere*. Non ait, *noli* rationibus contendere, quia hoc bonum est, sed, *noli* contendere verbis, ubi procax garrulitas est. Ideo *noli* verbis contendere, quia *ad nihil est utile* sic contendere, id est ad nihil valet hujusmodi contentio, *nisi ad subversionem audientium*. Auditores enim per hanc subvertuntur, putantes adversarios habere aliquam rationabilem causam, dum sic eos clamantes attendunt. Litigiosa verba desere, et adversarios tuos bonis operibus vince. Et hoc est : *Sollicite cura te ipsum exhibere Deo probabilem*, id est laudabilem, ut scilicet te talem Dei oculis exhibeas, quatenus ipse te approbet. Et exhibe te *operarium inconfusibilem*, vel secundum alios codices *irreprehensibilem*, quod idem significat. Ex reprehensione enim nascitur confusio illi qui reprehenditur; et qui non potest reprehendi, non confunditur. Exhibe te ergo *operarium inconfusibilem*, id est irreprehensibilem, id est talem te fac in cunctis operibus tuis, ut in nullo eorum sustineas confusionem recunditiæ, nec reprehendi possis in aliquo, nec quisquam impropere tibi valeat quid dignum confusionem. Et exhibe te *recte tractantem verbum veritatis*,

A ut neque sanctum des canibus, nec margaritas porcis (*Matth. vii*), sed, prout oportuerit, secundum qualitatem uniuscujusque personæ verbum Dei annunties, et nihil pravæ intelligentiæ admisceas. Hæretici enim non recte, sed perverse tractant verbum veritatis, quia conantur illud ad pravitatem sui sensus inflectere. De quorum doctrina subditur :

« Profana autem et vaniloquia devita. Mukum enim proficiunt ad impietatem, et sermo eorum ut cancer serpit. Ex quibus est Hymenæus et Philetus, qui a veritate exciderunt, dicentes resurrectionem jam factam, et subvertunt quorundam fidem. Sed firmum fundamentum Dei stat, habens signaculum hoc : Cognovit Dominus qui sunt ejus, et discedat ab iniquitate omnis qui nominat nomen Domini. »

B Verbum veritatis, ut dixi, recte tracta. Sed profana, id est verba hæreticorum aliena a pietatis religione, et vaniloquia eorum, id est dicta ipsorum quæ vacua sunt ab omni utilitate, devita. Et quare? Quia, si audita fuerint, *proficient multum ad impietatem* perfidia roborandam et augmentandam, dum destruunt fidei pietatem, et sermo eorum serpit ut cancer, id est magis ac magis occupat et devorat ac maculat mentes, in quibus radicare cœperit, sicut morbus qui dicitur cancer, latius semper occupat, et fosdat ac devorat illam partem corporis in qua nascitur; vel, sicut piscis qui dicitur cancer, non in ante, sed retro tendit, sic sermo eorum non auditores suos ad Deum ducit, sed a Deo retrahit, et apostatare facit *Ex quibus* sic loquentibus est Hymenæus et socius ejus Philetus, qui a veritate fidei, in qua positi fuerant, exciderunt, imitantes diabolum, qui in veritate non stetit (*Joan. vii*), dicentes jam esse factam resurrectionem in eorum cordibus, qui crediderunt, nec aliam amplius futuram; et talibus dictis *subvertunt quorundam fidem*, ut non credant corporum resurrectionem. Omnes enim sectæ, quæ se aliquam religionem hominibus inserere præsumpserunt, non negaverunt istam mentium resurrectionem, ne diceretur eis : Si non resurgit anima, quare mihi loqueris? Quid in me facere vis! Si non facis ex deteriore meliorem, quare mihi loqueris? Si non facis ex iniquo justum, quare mihi loqueris? Si autem facis ex iniquo justum, ex impio pium, ex stulto sapientem, fateris resurgere animam meam, si tibi obtemperavero, si tibi credidero. Volentes ergo credi sibi omnes qui instituerant alicujus etiam falsæ religionis sectam, negare istam resurrectionem mendacio non potuerunt. Omnes de ista consenserunt, sed multi carnis resurrectionem negaverunt. Dixerunt in fide jam factam esse resurrectionem. Attendentes enim verba quæ assidue dicit Apostolus, quia et mortui sumus cum Christo, et resurreximus cum eo, nec intelligentes quare ista dicantur, arbitrati sunt jam factam esse resurrectionem, nec ullam ulterius in fine temporum esse sperandam. Et talibus nunc resistit idem apostolus

Ex quibus, inquit, est Hymenæus et Philetus, qui a veritate exciderunt, dicentes resurrectionem jam factam esse, et subvertunt quorundam fidem. Jam factam esse resurrectionem dicebant, sed eo modo, ut non speraretur alia; et reprehendebant homines, qui sperabant resurrectionem carnis, velut jam resurrectionis quæ promissa erat, credendo impleteretur in mente. Subverterunt, inquit, fidem quorundam. Et quasi diceretur ei, et quis eis potest resistere, subjecit statim: *Sed firmum fundamentum Dei stat.* Fides quorundam infirmantium, et ad electorum sortem non pertinentium subvertitur ab hæreticis, sed firmum fundamentum Dei, id est firma fides, quam Deus per Spiritum sanctum in cordibus electorum suorum fundavit [at. solidavit], stat, id est nullatenus subverti vel inclinari potest, *habens hoc signaculum*, id est hanc velut sigilli impressionem, quia scilicet *cognovit Dominus qui sunt ejus, et discedat ab iniquitate quicumque nomen Domini nominat.* Hoc signaculum cordi suo impressum bonus habet, id est hanc cogitationem suæ menti firmiter infixam, ut apud se dicat: Quid mihi prodesset, si exterius simularem esse justum vel fidei, et interius nequam essem? Nihil. Quia qui corda omnium inspicit, ipse novit qui sunt ejus. Ideoque veraciter in oculis ejus studeo fidelis vel justus apparere, ut possim ad eorum sortem qui sunt ejus, pertinere. Talis cogitatio est divini sigilli impressio. Per hoc etiam hæreses et omnia salutis contraria devitat, quia scit debere discedere ab iniquitate omnes qui Dominum invocant. Hæc itaque sigilli impressio, qua distinguuntur a cæteris qui subvertuntur, est in fundamento Dei firmo, id est in robusta fide electorum Dei, quia novit Dominus qui ad ejus hæreditatem pertineant; et aliis recedentibus a fide, illi qui prædestinati sunt, non possunt recedere, vel si recesserint, necesse est eos redire. Nec moveat quod sæpe diabolus seducit etiam illos, qui regenerati, in Christo jam vias ingrediuntur Dei, quia novit Dominus qui sunt ejus. Ex his in æternam damnationem neminem ille seducit. Sic eos novit Dominus, ut quem nihil latet, etiam futurorum. Nam sunt etiam quidam ex eorum numero, qui adhuc nequiter vivunt, aut etiam in hæresibus, vel in gentiliis superstitionibus jacent, et tamen etiam illic novit Dominus qui sunt ejus. Namque in illa ineffabili præscientia Dei, multi qui foris videntur, intus sunt; et multi qui intus videntur, foris sunt. Et ne quis diceret, non curo amplius quid faciam, quia securus sum quod si Dominus me novit esse suum, non potero perire, et econtrario, si novit me suum non esse, non potero ad salutem pervenire, subjungitur utilis admonitio, ut discedat ab iniquitate omnis qui novit nomen Domini. Liberum enim arbitrium dedit nobis Dominus, ut arbitrio propria voluntatis recedamus ab iniquitate, et simus ex illis quos ipse novit suos esse, vel permaneamus in iniquitate, et simus ex illis quos novit ad se non pertinere. Nam et hoc est illud signaculum, quod fundamento no-

A stræ fidelis apparebit impressum, et propria sponte recesserimus ab iniquitate. Ab iniquis enim recedere non possumus, quia mista est palea tritico donec area ventiletur. Mira comparatio. Nam ecce in ipsa area triticum recedit a palea cum exspoliatur, et non recedit ab area cum tritatur. Quando autem omnino separabitur? cum venerit ventilator. Ergo modo area in orbe terrarum est. Necesse est ut si proficis, inter iniquos vivas, quia Abel esse non potest, quem Cain malitia non exercet. Ab iniquis recedere non potes, ab iniquitate potes. Satis enim fixum atque immobile velut sigilli impressione debet corde retineri Jerusalem captam ab hujus sæculi Babylonia, decursis temporibus liberandam esse, nullumque ex illa fore periturum, quia qui peribit, non ex illa erat. Recedat ergo ab iniquitate omnis qui nominat nomen Domini, quia nisi ab illa recesserit, non ei proficiet nominatio Domini nominis, quoniam non omnis qui dicit Christo, Domine, Domine, intrabit in regnum caelorum, sed qui facit voluntatem Patris ejus (Matth. vii).

« In magna autem domo non solum sunt vasa aurea et argentea, sed et lignea et fictilia, et quædam quidem in honorem, quædam autem in contumeliam. Si quis ergo emundaverit se ab istis, erit vas in honorem, sanctificatum et utile Domino ad omne opus bonum paratum. »

Ab iniquitate recedat, qui nomen Domini nominat. Sed ab iniquis, ut diximus, non potest recedere, quia in magna domo, in Ecclesia toto orbe dilatata, non solum sunt aurea et argentea vasa, id est justis sapientia et eloquentia præditi, sed et lignea et fictilia, id est peccatores comburendi et confringendi. Cum enim auro sapientia vel charitas, et argento eloquentia designari soleat, per aurum quod pretiosius est metallis omnibus, intelliguntur nunc illi, quos charitas, quæ cæteris virtutibus præfertur, vel sapientia decorat; per argentum vero quod mira claritate micat, illi qui nitore acris eloquentiæ resplendent in eruditione multorum. Hi enim merito vocantur aurea et argentea vasa ministerio summi Regis apta in ejus domo magna. Ligna vero et fictilia vasa carnales designant, quos ignis vitiorum facile incendit, et impetus adversitatis frangit. Sed et in die Domini lignea hæc vasa pœnalis ignis incendio concremabuntur; et fictilia ab eo cui data est ferrea virga, frangentur. Hæc tamen vasa sunt nunc cum vasis aureis et argenteis in domo magna, quia cum electis admisti sunt reprobi nunc in Ecclesia. Et quædam quidem vasa sunt ibi in honorem æternum constituta, sicut aurea et argentea; quædam autem in contumeliam opprobrii sempiterni congrua, sicut lignea et fictilia. Et quandoquidem in hac domo sunt etiam vasa in honestis usibus deputata: ergo si quis se emundaverit ab istis contumeliæ vasis, ut se reddat immunem a contaminatione eorum, erit vas in honorem deputatum et sanctificatum, id est locus sanctus Domino in hac do-

mo. Nam sicut in magna hominis domo, non in aliquo utique secretiori et honoratiori loco : sic Dominus noster non in omnibus, qui in domo ejus sunt, habitat. Non enim habitat in vasis contumeliæ, id est in illis qui turpitudini vitiorum deserviunt, sed in vasis honoris, id est in illis qui honorabilem coram Deo et hominibus vitam ducunt. Qui emundaverit se ab his contumeliæ vasis, ut non sit particeps eorum coinquinationis, erit vas in honorem, sanctificatum in honorabilem honestæ actionis usum, *et utile Domino*, id est utilitatem conferens domui Domini, *paratum ad omne opus bonum*, ut non respuat agere quidquid boni operis ei fuerit injunctum vel qualibet grave [*ut. quolibet genere*] sacræ actionis vel verbo prædicationis idoneum; et hoc erit tam sibi quam aliis prodesse, seu quælibet gradum sacrorum ordinum tenere.

« Juvenilia autem desideria fuge, sectare vero justitiam, fidem, charitatem, pacem cum his qui invocant Dominum de corde puro. Stultas autem et sine disciplina quæstiones evita, sciens quia generant lites. Servum autem Domini non oportet litigare, sed mansuetum esse ad omnes, docibilem patientem, cum modestia corripientem eos qui resistunt veritati, nequando det illis Deus penitentiam ad cognoscendam veritatem, et respiciant a diaboli laqueis, a quo capti tenentur ad ipsius voluntatem. »

Dixi quia in domo Dei sunt vasa honoris et vasa contumeliæ. Sed, ne fias vas inhonesti usus, fuge juvenilia desideria, quæ te juvenem prosequuntur, ne ad consensum pravæ delectationis te possint apprehendere. Hæc, inquam, fuge, sed justitiam sectare, ne te possit effugere. Sectare, id est frequenter sequere eam per vias justarum actionum, in quibus te præcedit, ut possis eam apprehendere. Similiter et fidem sectare, ne te in aliqua parte regula fidei latere possit vel effugere. Sed quoniam operatio justitiæ et veritas fidei non prodest sine charitate, sectare et charitatem, ut per eam operetur tua fides opus justitiæ. Illa enim fides est salutifera, quæ per charitatem operatur. Et sectare pacem cum bonis, ut nunquam discordes ab eis vel inquietes eos. Sive ita : Sectare justitiam, faciendo unicuique quod jus exigit; et fidem invisibilium honorum, non invisibiles honores, quos juvenus desiderare solet, id est charitatem, ut diligas Deum plusquam te et proximum tanquam te, quod juvenus sæpe negligit, id est pacem cui manifeste repugnat desiderium juventutis. Pacem, inquam, sectare non cum perversis, sed cum his qui invocant Dominum de corde puro, id est qui cor suum purificaverunt, id est Deum in illud venire piis orationibus petunt. Hæc, ut dixi, sectare, sed stultas et sine disciplina quæstiones cave. Stultæ quæstiones sunt, insolubiles et secreta humano generi prohibita quærentes. Sine disciplina vero quæstiones, quæ non humiliter ac modeste fiunt, et quas qui facit, non discere vult,

sed litigare. Sed hujusmodi quæstiones evita, ut non respondeas eis sciens quia generant lites. Sed servum Domini non oportet litigare, quia lis generat odium; sed oportet eum esse mansuetum, id est quasi manu assuetum, hoc est contractabilem, id est mitem vel lenem ad omnes, ut nemini sit asper, id est quasi ferus; et docibilem, id est habilem, ut facile doceatur. Hoc enim distat inter docilem et docibilem, quod docilis est qui alios potest docere; docibilis autem qui facile potest doceri. Unde dicitur : « Erunt omnes docibiles Dei (Joan. vi), » id est facile docebuntur a Deo. Non oportet servum Domini litigare, quia mundo et simplici oculo opus est, ut inveniatur via sapientiæ, cui tantæ malorum et perversorum hominum deceptiones et errores obstrepunt, quos omnes evadere convenit, hoc est venire ad certissimam pacem et immobilem stabilitatem sapientiæ. Vehementer enim metuendum est, ne studio altercandi vel contendendi quisque non videat quod a paucis videri potest, ut parvus sit strepitus contradicentium, nisi et sibiipsi obstrepant. Recte ergo dicitur, quia servum Domini non oportet litigare, sed mitem esse ad omnes, et docibilem atque patientem. Et ne quisquam ex eo putet cessandum esse a correptione erroris alterius, adjungitur quia oportet eum esse cum modestia corripientem eos qui resistunt. Ita nos nec deesse convenit fratrum correptioni, nec studere certamini. Quomodo cum modestia corripimus, nisi cum lenitate cordis retinemus, et aliquam medicamenti acrimoniam verbo correptionis aspergimus? Pax igitur et dilectio in corde retinenda est, modus autem sermonis, sive acrius, sive blandius proferatur, sicut salus ejus qui corripitur, postulare videtur, moderandus est. Modeste sunt corripienti illi, qui adhuc procaciter resistunt, nequando det illis Deus penitentiam. Nam correptionis utilitas, quæ nunc major, nunc minor pro peccatorum diversitate salubriter adhibetur, tunc est salubris, quando supernus medicus respicit. Non enim aliquid proficit, nisi qui facit, ut peccati sui quemcumque poeniteat; et quis hoc dat, nisi qui respexit Petrum negantem, et fecit flentem? Ideo non solum cum agitur poenitentia, verum et ut agatur necessaria est ejus misericordia. Hic sermo quo dicitur, nequando; pro, si forte, ponebatur antiquitus, sed modo inusitatus habetur. Corripientem, inquit, eos qui resistunt, nequando, id est si quando, vel si forte det illis Deus poenitentiam. Vel etiam ita potest hæc sententia concordare. Non desperemus de eorum salute qui adhuc resistunt, sed corripiamus eos, ne nobis eos non corripientibus, Deus aliquando per seipsum det eis poenitentiam, et erubescamus qui de salute eorum desperabamus. Ob hoc enim studere debemus, ut eos ad poenitentiam convertamus, ut mercedem nobis inde conquiramus, nequando sine nobis per internam aspirationem det illis Deus poenitentiam, et nos mercedem inde non habeamus. Det illis poenitentiam erroris sui ad cognoscendam veritatem ca-

tholici dogmatis, quod ignorantes impugnabant; et respiciant a laqueis diaboli, a quo capti tenentur ad voluntatem ipsius implendam. Resipiscere est quasi resapere, cum quis ab eo quod male sapuit revertitur ad illud quod antea recte sapuit, vel sapere debuit.

CAPUT III

« Hoc autem scito, quod in novissimis diebus
 « instabunt tempora periculosa, et erunt homines
 « seipsos amantes, cupidi, elati, superbi, blasphemi,
 « parentibus non obedientes, ingrati, scelesti sine
 « affectione, sine pace, criminatores, incontinentes,
 « immites sine benignitate, proditores, protervi,
 « tumidi, voluptatum amatores magis quam Dei,
 « habentes quidem speciem pietatis, virtutem au-
 « tem ejus abnegantes. »

Qui tenentur illaqueati a diabolo, resipiscant fortassis aliquando; sed tamen hoc scito quod tales abundabunt in novissimis diebus, id est in novissima ætate. Tunc enim instabunt tempora periculosa, in quibus multæ periclitabuntur animæ, et deinde periculosa, quia tunc erunt homines seipsos amantes. Nescio enim quo inexplicabili modo quisquis seipsum, non Deum amat, non se amat; et quisquis Deum, non seipsum amat, ipse se amat. Qui enim non potest vivere, de se moritur utique amando se. Non ergo se amat, qui ne vivat, se amat. Cum autem ille diligitur de quo vivitur, non se diligendo magis diligit, qui propterea se non diligit, ut cum diligit de quo vivit. Quia vero circa finem sæculi maxime abundabunt, qui neglecto Dei ac fratrum amore, seipsos male amabunt, et sic amando se peribunt, ideo tempora periculosa tunc instabunt. Erunt homines seipsos amantes, quia non curabunt nisi de seipsis; nec quærent nisi propria lucra, propria commoda, proprios honores, proprias glorias. Et ab hoc velut fonte, quod scilicet erunt seipsos amantes, manabunt multi vitiorum rivi. Nam quia secundum præsentem vitam seipsos male diligunt, ideo erunt cupidi pecuniæ, elati corpore, superbi mente, blasphemi, id est falsa et impia de Deo loquentes; parentibus, sive carnalibus, sive spiritualibus, non obedientes; ingrati benefactoribus; scelesti, id est transcendentes domum peccati, et in atrociam graviter delapsi; sine affectione, id est sine visceribus compassionis; sine pace, id est discordes et inquieti; criminatores, id est crimen bonis impingentes; incontinentes, id est libidinem non cohibentes; et immites, id est asperi et litigiosi, sine benignitate, id est immisericordes; proditores, id est secreta honorum adversariis eorum delegentes; protervi, id est procaces; tumidi, id est vento superbix inflati; voluptatum carnalium amatores magis quam Dei, sicut ipse dixit, quia « lux venit in hunc mundum, et dilexerunt homines magis tenebras quam lucem (Joan. III). » Habentes quidem in habitu et verbis, sicut falsi monachi speciem pietatis, id est similitudinem religionis; sed virtutem ejus, id est rem factis et moribus abnegantes. Sed beatus Au-

gustinus hæc a pastoribus Ecclesiæ specialius removere studens, loquitur: Non sint seipsos amantes, qui pascunt oves Christi, ne tanquam suas, non tanquam ipsius pascant eas, et velut ex illis sua lucra quærere videantur, sicut amatores pecuniæ; vel eis dominari, sicut elati; vel gloriari de honoribus, quos ab eis sumunt, sicut superbi; vel infantum progredi, ut etiam hæreses faciant, sicut blasphemi, nec cedant sanctis patribus, sicut parentibus non obedientes; et eis qui illos corrigere volunt, quia perire nolunt, mala pro bonis reddant, sicut ingrati; interficiant animas suas et alienas, sicut scelesti, materna Ecclesiæ viscera dirumpant, sicut irreligiosi, non compatiuntur infirmis, sicut sine affectione; alios quiescere non sinant sicut sine pace; famam B sanctorum maculare conentur, sicut criminatores; cupiditates pessimas non refrenant sicut incontinentes; exerceant lites, sicut immites; nesciant subvenire, sicut sine benignitate; indicent inimicis piorum quæ occultanda cognoverint, sicut proditores; humanam verecundiam inverecunda excogitatione perturbent, sicut procaces; superbia scientia inflentur, sicut tumidi; lætitiis carnales spiritualibus gaudiis anteponant, sicut voluptatum amatores magis quam Dei; simulent religionem, sed hanc in veritate non teneant, sicut habentes quidem speciem pietatis, virtutem autem ejus abnegantes. Hæc enim atque hujusmodi vitia sive uni homini accidant omnia, sive his alia, et aliis alia dominantur, ex illa radice quodammodo pullulant, cum sint homines C seipsos amantes, quod vitium maxime cavendum est eis qui pascunt oves Christi, ne sua quærant, non quæ Jesu Christi, et in usum cupiditatum suarum conferant, pro quibus sanguis fusus est Christi.

« Et hos devita. Ex his enim sunt qui penetrant
 « domos, et captivas ducunt mulierculas oneratas
 « peccatis, quæ ducuntur variis desideriis, semper
 « discentes, et nunquam ad scientiam veritatis per-
 « venientes. »

In novissimis diebus tales erunt homines, quales descripsi, et hos devita, quia jam multi ex his apparuerunt. Ex his enim sunt, qui penetrant domos, etc. Non ait, penetrabunt, tanquam futurum prænuntians, sicut supra dixerat, instabunt tempora periculosa, sed ait, penetrant domos, et captivas ducunt mulierculas. Non ait, ducent vel ducturi sunt; sed, jam ducunt. Nec putandus est hoc loco pro temporis futuri verbis præsentis temporis verba posuisse, quandoquidem illos ab eo cui scripsit evitare admonerat. Nec tamen frustra dixit, in novissimis diebus instabunt tempora periculosa; et hinc ea periculosa futura demonstrans, tales homines futuros esse prædixit, quia tanto plures erunt et magis abundabunt, quanto magis appropinquabitur ad finem. Videmus ergo tales nunc abundare. Sed quid si abundantiores erunt post nos, et omnino abundantissimi, quando jam jamque ipse fluvis instabit? Ex his jam sunt hæretici, qui penetrant domos, id est intrant

ut secrete loquantur illis qui sunt intus. Vel domos, id est conscientias audientium verbis seductoriis male penetrant, et captivas ducunt mulierculas, id est in captivitatem errorum trahunt insipientes et infirmas ac viles et inconstantes, seu virorum, seu mulierum animas. Animas dico, *peccatis oneratas*, et ideo dignæ erant seduci quæ ducuntur variis desideriiis, id est nunc ista, nunc illa cupiunt, et ea quæ jam tenent fastidientes, alia semper appetunt, ac novis delectantur. Tales enim facile deserunt veritatem catholicam, et sermonibus novorum errorum libenter aurem accommodant; *semper discentes, et nunquam ad scientiam veritatis pervenientes*. Semper discunt, et nunquam ad scientiam veritatis perveniunt, qui studium in discendo videntur habere, sed non veniunt ad hoc, ut discernant inter veritatem et mendacium, inter bonum et malum. Tales sunt discipuli hæreticorum atque Judæi (*Rom. 1*). In hac enim vita semper sunt discentes, et ad notitiam veritatis non pertingunt. Cum vero de hac vita exierint, jam non erunt discentes, sed erroris sui mercedem recipientes. Sic enim dictum est, *semper discentes, et ad veritatis scientiam non pervenientes*; ac si diceretur: *Semper ambulantes, et ad viam non pervenientes*. Non solum enim illuc non perveniunt, quo ducit via, sed nec ad ipsam viam pervenientes. Nos autem semper ambulemus in via, donec eo veniamus quo ducit via. Nunquam in illa remaneamus, donec perducatur ubi maneamus.

« *Quemadmodum autem Jannes et Mambres resistunt Moysi, ita et hi resistunt veritati, homines corrupti mente, reprobi circa fidem, sed ultra non proficient. Insipientia enim eorum manifesta erit omnibus, sicut et illorum fuit.* »

Tales non perveniunt ad scientiam veritatis, sed potius resistunt veritati, quæ a catholicis doctoribus prædicatur, sicut Jannes et Mambres resistunt Moysi veritatem prædicanti (*Exod. vii*). Hi enim fuerunt magi Pharaonis, quorum nomina nunc dicit Apostolus, sed in Exodo non leguntur. Et hoc est: *Quemadmodum autem Jannes et Mambres sub Pharaone resistunt Moysi, ne de Ægyptia servitute educeret populum Dei: ita et hi hæretici resistunt veritati prædicatorum, ne per eam fideles ab ignorantie tenebris et a servitute peccati liberentur.* Ipsi dico *homines corrupti mente*, quia mens eorum vitiata est ab adultero diabolo, amissa castitate, quæ est in Christo. Et sunt *reprobi circa fidem*, id est retro a probitate conversi, circumeuntes exteriora fidei, sed intus non manentes. Ipsi taliter captivant mulierculas, id est misellas et hebetes animas, et resistunt veritati, *sed ultra non proficient* in seductione hominum. Nam *insipientia eorum* quæ nunc latet, dum ipsi putantur esse sapientes, *erit omnibus manifesta* per Joannem apostolum, *sicut et illorum fuit per Moysen*. Per Joannem enim in Asia detegitur et destruetur insipientia erroris eorum, sicut per Moysen manifestata est illorum in Ægypto. *Animositas hæreticorum semper inquieta est, quos*

magorum Pharaonis habere conatum declarat nunc Apostolus, dicens: *Quemadmodum Jannes, etc. usque, sicut et illorum fuit.* Quia enim per ipsam corruptionem mentis inquietissimi fuerunt, in tertio signo defecerunt, fatentes adversum se esse Spiritum sanctum, qui erat in Moysen. Nam deficientes dixerunt. « *Digitus Dei hic est (Exod. viii).* » Sicut autem conciliatus Spiritus sanctus, requiem præstat mitibus et humilibus corde: ita contrarius et adversus malignus spiritus immites et superbos inquietudine exagitat. Quam inquietudinem muscæ illæ brevissimæ significaverunt, sub quibus ipsi magi, sicut dictum est, defecerunt, dicentes: « *Digitus Dei est.* » Quorum insipientia fit omnibus manifesta, cum ostenduntur palam omnibus esse insipientes, ne jam aliquos seducere valeant, qui primo tanquam per pollicitationem et ostentationem excellentis sapientiæ seducebant.

« *Tu autem assecutus es meam doctrinam, institutionem, propositum, fidem, longanimitatem, dilectionem, patientiam, persecutiones, passiones; qualia mihi facta sunt Antiochiæ, Iconiæ, Lystri; quales persecutiones sustinui, et ex omnibus eripuit me Dominus. Et omnes qui volunt pie vivere in Christo Jesu, persecutionem patientur.* »

Hæretici resistunt veritati et sunt circa fidem reprobi. *Sed tu assecutus meam doctrinam*, id est ea quæ doceo didicisti, et scis aliis tradere, et *assecutus es institutionem meam*, id est quomodo institui vitam ducere, vel alios instruere; et *propositum meum assecutus es*, quia proposuisti vivere sicut ego proposueram, ut scilicet eodem modo vel eodem tempore jejunes et vigiles, quo ego, et cætera similiter facias; et *fidem meam*, quia similiter credis ut ego; et *longanimitatem*, quia didicisti longanimitatem, sicut ego, inter adversa non murmurans, expectare divina promissa; et *dilectionem*, quia didici et adversarios sicut ego, diligere; et *patientiam*, quia toleres æquo animo aliena mala, sicut ego, nec adversus eum doleas qui tibi hæc intulerit; et *persecutiones meas* de civitate in civitatem, quia tu mecum nonnunquam has sustinuisti; et *passiones*, id est afflictiones meas et tormenta quia tu factus es earum particeps et nosti eas; et *qualia mihi adversa sunt Antiochiæ et Iconiæ, et Lystri*, et *quales persecutiones*, vel ibi vel aliis locis sustinui, *tu assecutus es*, id est nosti et participasti; et in nulla relictus sum ut deficerem, *sed ex omnibus me eripuit Dominus*, et te similiter non deseret, sed eripiet. Antiochiæ et Pisiidiæ excitaverunt Judæi persecutionem in Paulum et Barnabam, et ejecerunt eos de finibus suis (*Act. xiii*). At illi excusso pulvere pedum in eos venerunt Iconium. Ubi cum factus esset impetus gentilium et Judæorum cum principibus suis, ut contumeliis afficerent et lapidarent eos, intelligentes confugerunt ad civitates Lycaoniæ Lystram et Derbem. Supervenerunt autem quidam ab Antiochia et Iconio Judæi; et persuasis turbis impi-

dantes Paulum, traxerunt extra civitatem, æstimantes eum mortuum esse (Act. xiv). Et hoc nunc commemorat Antiochia et Iconii et Lystris se pertulisse. Et ne quis putaret se sine tribulationum tolerantia posse Deo placere, adjungit: *Et omnes qui volunt, etc.* Ego, inquit, sustinui persecutiones, et omnes qui volunt pie vivere in Christo Jesu, id est qui volunt religiose et devote vitam ducere in Christi fide, patientur persecutionem. Nunquam deest pie viventibus persecutio, quia cum et ab eis qui foris sunt, non sevientibus videtur esse tranquillitas, multi sunt intus qui corda pie viventium suis perditis moribus cruciant quoniam pereos blasphematur Christianum nomen. Quod quanto est clarius eis qui volunt pie vivere in Christo, tanto magis dolent quod per malos intus positos sit, minus quam piorum mentes desiderant, diligatur. Hæretici quoque cum conantur habere nomen et sacramenta Christianorum et Scripturas et professionem, magnum dolorem faciunt in cordibus piorum quia multi volentes esse Christiani, propter eorum dissensiones hæsitare coguntur; et multi maledici in his etiam inveniunt materiam blasphemandi nomen Christianorum, quia et ipsi quoquo modo Christiani appellantur. His et hujusmodi pravis moribus et erroribus hominum persecutionem patientur, qui volunt in Christo pie vivere etiam nullo infestante, nulloque vexante corpus illorum. Patiuntur quippe hanc persecutionem non in corporibus, sed in cordibus. Pia tristitia est, visis alienis tribulari, non implicari; mœrere, non hærere, dolore contrahi, non amore attrahi. Hæc est illa persecutio, quam patiuntur omnes qui in Christo pie volunt vivere. Quid enim hic tam persequitur vitam honorum, quam vita iniquorum? Nec cogit pium imitari quod displicet, sed cogit dolere quod videt. Quoniam vivens impie etsi non obligat consentientem, cruciat sentientem. Sed et diabolus incessanter pius persequitur, et tanto periculosius quanto occultius. Persequitur, inquam, eos hostis, cui nomina sunt mille et mille nocendi artes (Virg.). Persequitur eos et hic mundus illecebris suis, persequitur eos innumerabilium exercitus vitiorum, persequitur eos caro ipsorum, persequuntur eos illicitæ cogitationes suæ.

« Mali autem homines et seductores proficient in Deo pejus, errantes et in errorem mittentes. Tu vero permane in his quæ didicisti et credita sunt tibi, sciens a quo didiceris, et quia ab infantia sacras litteras nosti, quæ te possunt instruere ad salutem per fidem quæ est in Christo Jesu. Omnis Scriptura divinitus inspirata, utilis est ad docendum, ad arguendum, ad corripiendum, ad erudiendum in justitia, ut perfectus sit homo Dei, ad omne opus bonum instructus. »

Pii patientur persecutiones, mali autem homines et seductores habebunt prosperitates. Mali, quantum ad se; seductores, quantum ad alios. Seductores dicuntur, qui quasi sub specie dulcedinis infundunt virus pestiferæ persuasionis. Mali et seductores pro-

« scient in pejus, id est successus habebunt in erroribus, et ad graviora pervenient, errantes ipsi et alios in errorem mittentes. Non tamen diu proficient, quod a Paulo superius dictum est, sed ultra non proficient. Tales errabunt et successum habebunt, aliosque trahent post se. Sed tu noli post eos in errorem ire, sed permane semper in his bonis quæ didicisti a me, et credita sunt, id est commissa sunt tibi a Deo, sciens a quo magistro didiceris, id est quam verax et quantæ auctoritatis, et quantum te diligens sim ego qui te docui, et ob hoc etiam in his permane, quia sacras litteras nosti, id est sacris litteris, legis videlicet et prophetarum scriptis, eruditus es ab infantia, quæ litteræ possunt te instruere, id est sufficienter doctum reddere, ad æternam salutem consequendam, et hoc per fidem quæ est in Christo Jesu, quia Veteris Instrumenti dicta non instruunt ad salutem, sed ad mortem, si Christus in eis non intelligitur et fides ejus tenetur. Recte dixi quia sacre litteræ te possunt instruere ad salutem, tibi et aliis conquirendam. Nam omnis Scriptura divinitus inspirata, id est divino Spiritu facta, utilis est ad hoc. Illæ enim Scripturæ arcem auctoritatis obtinent, quæ per Spiritum Dei prolatae sunt, quæ et canonicæ nuncupantur. Omnis Scriptura quam Deus aspiravit, id est quæ per divinam aspirationem est composita, utilis est ad docendum ignaros, et ad arguendum, id est ad convincendum eos qui resistunt; et ad corripiendum, id est ad increpandum, vel secundum alios codices, ad corrigendum, id est emendandum eos qui peccant; et ad erudiendum rudes, ut ad perfectum sensum proficiant in justitia, id est in observatione justitiæ, ut homo Dei qui sic eruditur, sit perfectus in conversatione, instructus per Scripturas ad omne opus bonum agendum, id est diligenter sciens qualiter agendum sit unumquodque opus bonum. Talis enim vir merito homo Dei dicitur, quia sequestratus a nequitiiis eorum qui vitiiis serviunt, possessio factus est Creatoris sui.

CAPUT IV.

« Testificor coram Deo et Christo Jesu, qui judicaturus est vivos et mortuos, et adventum ipsius et regnum ejus, prædica verbum, instane oportune, importune, argue, obsecra, increpa in omni patientia et doctrina. »

Quoniam sacris litteris es instructus, ideo testificor, id est adjuro te ut prædicare non cesses. Testificari enim est adjurare, quia qui adjurat, testem ponit in ipsa adjuratione. Testificor coram Deo Patre, id est in præsentia Dei, qui ubique est et omnia videt, te adjuro et ipsum testem adhibeo et coram Christo Jesu, id est coram Mediatore Dei et hominum, qui sicut Pater divinitate coelum et terram implet, te obtestor ut prædices. Cujus Mediatoris testimonium spernere non debes, quia ipse judicaturus est omnes. « Neque enim Pater judicat quemquam, sed judicium omne dedit Filio, ut omnes honorificent Filium, sicut honorificant Patrem (Joan. v). » Ipse judicaturus est vivos id est omnes

quæ in carne vivi reperientur cum venerit (I *Thes.* v); et mortuos, id est illos quorum animæ jam a corporibus fuerunt egressæ; et testificor, id est testimonium facio et in testimonium hujus mœz adjurationis erga te adhibeo *adventum ipsius*, in quo recipiet unusquisque prout gessit (II *Cor.* v), et *regnum ejus*, in quo justî perpetualiter regnabunt. Et quid est quod sub tam magnis et timendis testibus tam fortiter testificor? Hoc scilicet, *prædica verbum Evangelii*, et in hoc non sis horarius, sed *insta*, id est in prædicatione assiduus esto. Et hoc fac *opportune* volentibus, et *importune* nolentibus. *Opportune*, cum inveneris auditores qui verba tua libenter excipiant; *importune*, cum inveneris qui monita tua fastidiant. Vel *opportune* importune, id est *opportune* importunitatem exhibe, quia apud auditoris mentem ipsa sua vilitate destruit se, si habere importunitas opportunitatem nescit. *Argue* resistentes, ut rationibus convicti cedant; *obsecra* bene agentes, ut in melius proficiant; *inrepa* delinquentes, ut confusi se corrigant. Et hoc age *in omni patientia*, id est patienter expectando emendationem eorum, non mox ipsos repellendo, si fuerint inobedientes, et in omni *doctrina*, id est docendo eos attente, non irascendo illis vel indignando. Vel ita distingui potest. *Insta* opportune, ut alius sit sensus: *Importune* argue, deinde cætera contexamur, obsecra, increpa in omni patientia et doctrina, ut tunc opportunus sentiaris, cum instas ædificando; cum autem destruis arguendo, non culperis, etsi importunus videaris. Ita duo quæ sequuntur, ad duo superiora possunt sigillatim referri; obsecra, cum opportune instas; increpa, cum importune arguis. Deinde cætera duo similiter, sed converso ordine referuntur; in omni patientia, ad sustinendas indignationes eorum, quos destruis; et doctrina, ad instruenda eorum studia quos ædificas. Pensandum nobis est qualiter loquamur, quia sæpe verba quæ hunc ad salutem revocant, alium vulnerant. Unde nunc Apostolus qui Titum admonet, dicens: « Argue cum omni imperio (Tit. ii), » Timotheum exhortatur, dicens: *Argue, obsecra, increpa cum omni patientia*. Quid est quod uni imperium, alii patientiam præcepit, nisi quod unum lenioris, alterum vero ferventioris spiritus esse conspexit? Leni per auctoritatem imperii injungenda erat severitas verbi; is autem qui spiritu fervebat, per patientiam temperandus fuerat, ne plus justo infervescens, non ad salutem vulnerata reduceret, sed sana vulneraret. Ob hæc ergo doctrinam suam Apostolus tanta arte dispensat, ut exhibendo hanc alteri imperium et alteri patientiam proponat, quia, ut dictum est, mansuetioris spiritus Titum, et paulo ferventioris vidit esse Timotheum. Illum per æmulationis studium inflammavit, hunc per lenitatem patientiæ temperavit; illi quod deest jungit, huic quod superest subtrahit; illum stimulo impellere nititur, hunc freno moderatur. Magnus quippe susceptæ Ecclesiæ colonus, alios palmites ut crescere debeant, rigat; alios, cum

plus justo crescere conspicit, reserat, ne aut non crescendo fructus non ferant, aut immoderate crescendo quos protulerint, amittant. Sequitur:

« Erit enim tempus, cum sanam doctrinam non sustinebunt, sed ad sua desideria coaccervabunt sibi magistros, prurientes auribus. Et a veritate quidem auditum avertent, ad fabulas autem convertentur. »

Ideo, inquit, tanta instantia debes prædicationi insistere, quia erit tempus in quo veritatis prædicationi non suscipietur, et ideo festina tempus illud prevenire, dum tua prædicationi potest effectum habere. Non ante finiatur tempus quam ea [quæ] dico fiat: sed erit adhuc tempus cum sanam doctrinam, id est ad sanitatem animæ pertinentem non sustinebunt homines, sed velut onus grave rejicient eam ab hameris suis. Hanc non sustinebunt, sed ad sua desideria complenda coaccervabunt sibi magistros, id est acervum sibi congregabunt magistrorum, qui doceant eos ea quæ desiderant, ipsi dico prurientes auribus, id est prurimum habentes in auribus spiritualiter fornicantibus, sicut quodam pruritu libidinis etiam in carne corrumpitur integritas castitatis. Nam sicut caro quæ prurit, semper vult fricari, sic aures eorum semper cupient audire verba, quæ errores doceant et ad delectationes illiciant, et a veritate quidem avertent auditum, id est fugient audire sermonem veritatis quæ illis erit aspera, quia non mulcebit eos in nequitia suis, ad fabulas autem convertentur, ut audiant eas, id est allocutiones falsas et otiosas. Nec solum ad tales fabulas, quales in theatris recitantur, vel quales a vanis hominibus sæpe dicuntur; sed etiam ad tales, quales contra Dominum hæresiarchæ poterunt fingere. De his quos nunc Apostolus prænuntiat, locutus est et Isaias: « Populus enim ad iracundiam provocans est, et filii mendaces, nolentes audire legem Dei. Qui dicunt videntibus: Nolite videre; et aspicientibus: Nolite aspicere nobis ea quæ recta sunt. Loquimini nobis placentia, videte nobis errores, auferte a me viam, declinate a me semitam, cesset a facie nostra sanctus Israel (Isa. xxx). » Sic autem illi maxime loquentur, qui relinquent Ecclesiam, et sequentur Antichristum cum regnaverit. Et sanam Christianæ

prædicationis doctrinam non sustinebunt. Sed avertent auditum ab ea, et convertentur ad Antichristi fabulas. Sed et olim temporibus hæreticorum fere hæc omnia facta sunt. Nunc quoque multi sunt qui volunt sustinere doctrinam sanæ mortalitatis, et veritatem quæ in Ecclesia prædicatur, audire fastidiunt, fabulas autem histrionum libenter audiant.

« Tu vero vigila, in omnibus labora, opus fac evangelistæ, ministerium tuum imple, sobrius esto; ego enim jam delibor et tempus resolutionis meæ instat. Bonum certamen certavi, cursum consummavi, fidem servavi. In reliquo reposita est mihi corona justitiæ, quam reddet mihi Dominus in illa die justus iudex. Non solum autem mihi, sed et his qui diligunt adventum ejus. »

Illi respicient veritatem catholici dogmatis, et suscipient fabulas errorum; sed tu *vigila* prudenter attendendo veritatem et repellendo omnem errorem, et in omnibus actibus labora et opus fac evangelistæ, id est evangelici prædicatoris. Opus enim evangelistæ est, bene vivere et bene docere, moribus et verbis subditos instruere. *Ministerium tuum*, id est, tui officii imple ut non sit vacuum a bona actione tua, sed quidquid in eo debes agere, plenarie perficias, et *sobrius esto*, id est, non inebriet mentem tuam ullus error, aut sæculi amor vel avaritia, seu quodlibet aliud vitium. Idcirco te moneo vigilare adversus insidias dæmonum et hæreticorum et errorum atque vitiorum, et bene laborare, et opus evangelistæ facere, quia ego qui hucusque vigilavi et opus evangelistæ implevi, jam delibor, vel secundum alios codices, *immolor*, quod idem significat. Nam delibatio quæ est sacrificiorum degustatio, sacrificiationem, id est immolationem proprii corporis hoc loco designat. Jam delibor, id est jam immolari cœpi, et hostia Deo grata pro populo mihi commisso per passionem offerri, et tempus meæ resolutionis instat, id est jam vicinum imminet tempus, in quo resolver a vinculis istius corporis, ut liber in cælum evolem. *Bonum certamen certavi*, hoc secundum Græcam locutionem dicitur, velut si diceretur, strenuam militiam militavi, fidelem servitutem servivi. Nam Latinus sermo diceret, bono certamine certavi. *Bonum*, inquit, *certamen certavi*, id est bene pugnavi, bene contra impugatores fidei et contra mala transeuntia sine defectu certavi, *cursum bonæ actionis meæ* quo ad bravium cœlestis festinabam, *consummavi*, fidem inviolabilem servavi. Quomodo potuit hoc dicere, cui adhuc restabat ipsius passionis, quam sibi impendere jam dixerat, tam magna conflictatio, tam molestum atque grande certamen? an ad ejus consummandum cursum parum adhuc deerat, quando illud deerat, ubi erat futurus acrior et crudelior inimicus? Quod si ideo talibus verbis certaminis certum cum securumque jam fecerat, qui eandem passionem jam illi revelaverat imminere, non re plenissima, sed spe firmissima hoc dicit; et quod futurum esse præsumpsit, tanquam factum fuerit indicavit. *Cursum*, inquit, *peregi*. Et in reliquo, id est in eo spatio quod restat amodo et usque in æternum, *reposita est mihi corona justitiæ*, id est secreto tutoque loco, servatur mihi corona quam juste merui, quam non dabit, sed reddet mihi quasi debitam Dominus Jesus in illa notabili die communis judicii, de qua sedule cogito; vel in illa optata die resolutionis meæ, et ideo reddet eam mihi, quia *justus judex* est, reddens unicuique secundum opus ejus (*Matth. xvi; Rom. ii*). Sed non solum mihi reddet coronam hujusmodi ipse, sed et his qui diligunt adventum ejus, id est etiam omnibus qui sibi de bona operatione sunt conscii. Adventum enim judicis non diligunt, nisi qui in causa sua habere se justitiæ meritum sciunt. Et ideo quisquis non dili-

git, sed metuit adventum ejus, corrigat vitam suam, ut bonam habens causam possit ut veniat desiderare; et coronam ab eo, non damnationem sperare.

« Festina ad me venire cito. Demas enim me dereliquit, diligens hoc sæculum, et abiit Thessalonicam. Crescens in Galatiam, Titus in Dalmatiam, Lucas est mecum solus. Marcus assume et adhuc tecum: est enim mihi utilis in ministerio (Colos. iv). Tychicum autem misi Ephesium. Penulam quam reliqui Troade apud Carpum, veniens affer tecum, et libros, maxime autem et membranas. »

Quia tempus meæ resolutionis instat, *festina ad me venire cito*, id est festinanter antequam morte resolver, ut te plenius adhuc instruam, vel ut sis mihi solatio, quoniam solus remansi, Nam Demas qui interpretatur *silens*, quoniam a prædicatione vel confessione veritatis obmutuit formidine mortis, *dereliquit me* in adversis, *diligens hoc sæculum* cum suis illecebris, et dimittens Romam ubi timebat mori, *abiit Thessalonicam* ut ubi posset vivere. *Crescens*, id est ille alius discipulus, *abiit Galatiam*, non me deserens, sed a me missus aliqua rationabili causa exigente. Similiter et *Titus* a me missus est in Dalmatiam. Lucas evangelista est mecum solus, qui semper mihi adhærere consuevit. Dixi ut cito venias ad me, et cum veneris, *assume Marcus et adhuc tecum*. Iste est Marcus Evangelii scriptor, vel sicut magis credimus, iste est Marcus consobrinus Barnabæ (*Colos. iv*), quem nunc correctum jubet Apostolus adduci, quia quondam abjecerat eum, cum esset negligens ac tepidus. *Est enim*, inquit, *mihi utilis in ministerio* prædicationis, qui quondam ad hoc fuit inutilis. Titus abiit, ut dictum est, in Dalmatiam, sed *Tychicum misi Ephesum*, fortasse cum epistola quæ ad Ephesios est directæ. *Penulam quoque*, id est vestem illam quæ sic vocatur, quam reliqui Troade apud Carpum discipulum meum, qui ibi manet, *veniens affer tecum*. Dicamus de hac penula, quæ ab aliis dicta reperimus. Penula vestis erat consularis, qua induebantur Romani consules in curiam intrantes. Sed fortasse quærit aliquis, unde hoc genus vestimenti beato Paulo acciderit, cui respondendum est, Romanos ante incarnationem Christi hunc habuisse morem, quando sibi monarchiam totius orbis acquirebant, ut quæcunque gens illis cum pace et coronis occurrisset, ejusmodi libertatem eis concederent, ut fratres illorum dicerentur, civesque Romani appellarentur, dabantque eis potestatem, ut curiam ædificarent et consules haberent, sicut illi habebant. Pater igitur beati Pauli de Giscali oppido Galilææ, unde indigena erat, migravit Tharsum Ciliciæ, cum Romani cepissent illud oppidum. Quodam vero tempore venientibus Romanis per Ciliciam, occurrit eis cum aliis transeuntibus, utpote qui nobilis inter illos habebatur, et excepit eos cum pace. Tunc Romani dedere eis supradictam libertatem, scilicet potestatem ut curiam

edificarent et consules haberent, sicut ipsi, vestesque consulares induerent, et penulati more Romanorum curiam intrarent. Ibiq̄ue data est insigne penula a Romauis patri beati Pauli, quando susceptus est in socium et civem Romanum. Hæc ante nos scripta sunt, et fides veritatis horum apud eos sit qui scripserunt. Non enim omnia quæ facta sunt, legimus in nostris historiis; multæque noscuntur esse historiarum quas non novimus. Nam et his quæ dicta sunt, valde consonat quod Paulus frequenter in apostolorum Actibus legitur se Romanum appellesse, et maxime ubi tribunus interrogavit eum: « Dic mihi si tu Romanus es, et ille dixit: Etiam. Et respondit tribunus: Ego multa summa civitatem hanc consecutus sum, et Paulus ait: Ego autem et natus sum (Act. xvi, xxii, xxiii). » Quomodo enim juxta litteram verum potest esse, quod Paulus ex civitate Romana sit natus, nisi quia ex cive Romano natus est? Absit autem ut putemus eum in hoc sermone mendaceum. Natus ergo est in civitate Romana, id est in domo parentum, qui erant cives Romani. Sed et juxta spiritalem intelligentiam, in eo quod se dixit natum in urbe Roma, prophético spiritu prænuntiavit, natalitium suæ passionis in illa civitate futurum, et verbum præteriti temporis pro verbo futuro posuit. Si ergo vera sunt quæ de penula præmisimus, facile est animadvertere quod Apostolus hanc idcirco afferri jusserit, ut per eam apud Romanos licet paucò tempore, libertatem sibi vindicaret, quatenus ad prædicandum libere quovellet, ire posset, et multos ad fidem per diversa loca converteret. Ait itaque: *Penulam quam reliquit Troade apud Carpum, veniens affer tecum.* Hunc Carpum Dionysius multum in Epistola ad Demophilum laudat, referens quamdam valde mirabilem ejus visionem. Penulam, inquit, affer et libros quos ipse forsitan ibidem reliquerat, *maxime autem et membranas*, id est pelles ad scribendum (quas tamen Hieronymus aliter interpretatur) aptas.

« Alexander ærarius multa mala mihi ostendit; reddet ei Dominus secundum opera ejus: Quem et tu devita; valde enim restitit verbis nostris. »

Scias quod Alexander ærarius, id est faber æris vel custos ærarii, ostendit, id est fecit, mihi multa mala sed non impune, quia Dominus reddet ei secundum opera ejus quæ in me operatus est, quem et tu devita, ne tibi fiat impedimentum, quia valde restitit verbis nostris, et multo magis poterit resistere tuis. Non ait, valde restitit nobis, sed, verbis nostris, id est evangelicæ prædicationi quod multo gravius est, quia non hominibus restitit, sed Evangelio Dei. Nec ait, reddat ei Dominus secundum opera ejus, sed reddet, quod verbum pronuntians est, non imprecantis.

« In prima mea defensione nemo mihi adfuit, sed omnes me dereliquerunt, non illis imputetur. Dominus autem mihi astitit et confortavit me, ut per me prædicatio impleretur, et audirent omnes gentes, et liberatus sum de ore leonis; liberabit me

« Dominius ab omni opere malo, et salvum faciet in regnum suum cœleste, cui gloria in sæcula sæculorum. Amen. »

Multoties, inquit, ductus sum ante Neronem pro defensione fidei, sed in prima mea defensione, id est quando ante tyrannum illum prima vice defendi Evangelium, nemo, id est nullus ex discipulis meis adfuit mihi, ut me adjuvaret coram Nerone ad defendendum dogma Christianorum; sed omnes me dereliquerunt metu suppliciorum: non illis imputetur hoc a Deo, sed ignoscatur. Non orabat pro Alexandro, qui invidentia fraternitatem oppugnando peccaverat; pro his autem qui non obruperant amorem, sed timore succubuerunt, orat, ut eis ignoscatur. Multum enim interest, cum post agnitionem Dei per gratiam Domini nostri Jesu Christi quisquam oppugnat fraternitatem et adversus ipsam gratiam qua reconciliatus est Deo, sicut intelligitur Alexander fuisse, invidentiæ facibus agitur; et cum quis a fratre amorem non alienavit, sed officia fraternitati debita per aliquam infirmitatem animi non exhibet, sicut nunc discipuli timore Paulum deseruerunt in prima defensione, vel ipsi apostoli Christum in passione (Matth. xxvi; Marc. xiv), quem tamen non desisterunt amare. Quapropter non orat pro Alexandro, qui gratiæ Dei ingratus existens, ipsam gratiam impugnando, et charitatem fraternam persequendo peccabat ad mortem, quia Joannes dicit: « Est peccatum ad mortem, non pro illo dico ut roget quis (I Joan. v); » sed pro his qui non malitia, sed timore ab eo recesserunt, orat; quia idem Joannes ait: « Qui scit fratrem suum peccare peccatum non ad mortem, petat, et dabitur ei vita peccanti non ad mortem (ibid.). » Omnes, inquit, me dereliquerunt, sed Dominus astitit mihi derelicto ab hominibus, consolando me per internam aspirationem suam et loquendo per os meum, et mitigando furorem tyranni, et confortavit me, id est constantem me fecit, ut non cessarem a doctrina veritatis, sed rationibus tyrannum potenter superarem, ut me dimitteret, ut per me impleretur evangelica prædicationis, et audirent omnes gentes non solum in Italia, sed et usque in Hispaniam. Et ita per Dominum qui mihi adfuit, liberatus sum de ore leonis, id est a rabie leonis, qui me devorare voluit, id est a rabie Neronis, ne me mox interficeret. Et adhuc liberabit me Dominus ab omni opere malo ut nullius tormentis possim compelli ad perpetrationem mali operis; et sic martyrio consummatum salvum faciet me, perducens in regnum suum cœleste, cui Domino pro his omnibus sit gloria in sæcula sæculorum, id est in æterna sæcula. Amen. Eusebius in historia Ecclesiastica scribit: Festus a Nerone in Judæam missus est succedere Felici, apud quem dicta causa, Paulus cum Luca et Aristarcho, quem conceptivum appellat, victus Romam mittitur (Act. xxiv, xviii). Ubi biennio positus, verbum Dei prædicabat, nemine prohibente. Quem tamen adfuisse ibi et defendens se apud Neronem, et rursus profectum esse ad

prædicationis officium, sermo confirmat, et post hæc denuo redisse ad supra dictam urbem, ubi et martyrio consummatus est; et tunc in vinculis positus, secundam ad Thimotheum scribit epistolam, in qua et de prima defensione, et de præsentis simul indicat passione ita: *In prima mea defensione nemo mihi adfuit, sed omnes me dereliquerunt, non illis imputetur. Dominus autem mihi assistit, et confortavit me, ut per me prædicatio impleretur, et audirent omnes gentes, et liberatus sum de ore leonis*: manifestissime per hæc designans, quia primo quidem ut per ipsum cœpta prædicatio compleretur, liberatus est de ore leonis. Neronem scilicet in leone pro crudelitate significans. Prævidens autem in spiritu consummationem suam, adjecit: *Liberabit me Dominus ab omni opere malo, et salvum faciet, in regnum suum cæleste*; significans per hæc quod esset confestim martyrio coronandus. Non igitur eo tempore quo Pauli actus in urbe Roma conscripsit Lucas, martyrio perfunctus est Paulus, potuit enim fieri, ut inimicus adhuc lenior esset Nero, et defensionem Pauli pro nostro dogmate non aspernenter acciperet. Beda quoque in novissimo versu Actuum apostolorum, quo dicitur quia Paulus biennio docebat sine prohibitione, subjecti: Non solum Romæ prohibitus non est, sed necdum, Neronis imperio roborato, nec in tanta erumpente scelera, quanta de eo narrant historiæ, dimissus est ut Evangelium Christi in occidentis quoque partibus prædicaret, sicut et ipse Romanis ait: « Nunc igitur proficiscar Jerusalem ministrare sanctis (Rom. xv); » et paulo post « Hoc igitur cum consummavero, proficiscar per vos in Hispaniam (ibid.). » Postea vero, id est ultimo Neronis anno, retentus ab eo, martyrio coronatus est. Quod utrunque in secunda ad Timotheum Epistola, passurus de vinculis dictans, exponit: *In pri-*

ma, inquit, mea defensione, etc., usque de ore leonis manifestissime propter crudelitatem Neronem leonem esse significans. Et in consequentibus, et salvabit me, et salvum faciet in regnum suum cæleste, quod scilicet præsens sibi sentiret imminere martyrium.

« Saluta Priscillam et Aquilam, et Onesiphori domum, Erastus remansit Corinthi. Trophimum autem reliqui infirmum Mileti. Festina ante hiemem venire. Salutant te Eubulus et Pudens et Linus, et Claudia et omnes fratres. Dominus Jesus Christus cum spiritu tuo. Gratia vobiscum. Amen. »

Saluta, inquit, Priscillam et Aquilam amicos meos, apud quos frequenter hospitari consuevi. Priscilla et Aquila uxor et maritus erant; et tamen Priscilla sæpe nominatur prior. Unde patet quod ipsa virum suum meritis optimis præcesserit, licet uterque apud Deum magni meriti fuerint. *Saluta et Onesiphori domum*, quæ mihi tantam exhibuit humanitatem. Quod si de Erasto scire volueris ubi sit, ipse remansit Corinthi. *Trophimum reliqui ægrotantem Mileti*, qui postea factus est Arelatensium episcopus. Dixi ut cito ad me venias, et nunc dico, ut ante hiemem venire festines, ne rem difficultas hiemis retardet, quia forsitan me in corpore non invenires. Romæ vero morantes te salutant Eubulus et Pudens et Linus (iste Linus fuit primus Romanæ sedis episcopus); et Claudia; neque solum isti te salutant, sed et omnes fratres. *Dominus Jesus Christus sit cum spiritu tuo*, ut per præsentiam deitatis suæ custodiat mentis tuæ cogitationes, et bonam voluntatem tuam ad omne bonum opus admittat. *Et gratia ejusdem Domini sit vobiscum*, ut ejus auxilio mala cavere et bona facere valeatis, tam tu quam subditum

IN EPISTOLAM AD TITUM.

ARGUMENTUM.

Titum apud Cretenses episcopum reliquerat Apostolus, ut universam Cretam regeret et doceret, ideo nunc per epistolam instruit eum, quales episcopi debeat ordinare, et qualiter falsos prædicatores repellere, qui legales cæremonias volebant inducere. Docet enim qualiter unumquemque debeat admonere, et instruit de spiritali conversatione, scribens ei a Nicopoli, quæ situ est in Actiaco littore.

CAPUT PRIMUM.

« Paulus, servus Dei, apostolus autem Jesu Christi secundum fidem electorum Dei et agnitionem veritatis, quæ secundum pietatem est, in spe vitæ æternæ, quam promisit qui non mentitur Deus, ante tempora sæcularia, manifestavit autem tem-

poribus suis verbum suum in prædicatione, quæ credita est mihi secundum præceptum Salvatoris nostri Dei, Tito dilecto filio secundum communem fidem, gratia et pax a Deo Patre et Christo Jesu Salvatore nostro. »

Paulus servus Dei scribit Tito, non tamen servus ea servitute quæ est ex servili timore, sed illa potius, quæ fit ex amore et casto timore. Servus Dei est, qui peccati servus non est. « Omnis enim qui facit peccatum, servus est peccati (Joan. viii), » etc. « Nemo potest duobus dominis servire (Matth. vi; Luc. vi). » Paulus igitur qui peccati servus non erat, recte Dei servus est dictus. Deus autem hoc loco Pater intelligitur, vel etiam tota Trinitas. Paulus est quidem servus Dei, sed *apostolus Jesu Christi,*

id est legatus et princeps Mediatoris. Nam quod dicitur Apostolus Jesu Christi, tale est ac si diceretur, præfectus prætorii Augusti Cæsaris, magister exercitus Tiberii imperatoris. Ut enim iudices sæculi hujus, quo nobiliores esse videantur, ex regibus quibus serviunt, et ex dignitate qua intumescunt, vocabula sortiuntur: ita et Apostolus grandem inter Christianos sibi vindicans dignitatem, apostolum se Christi in titulo prænotavit, ut ex ipsa nominis auctoritate lecturos terreret, indicans omnes qui in Christum crederent debere sibi esse subjectos. Apostolus, inquit, sum *secundum fidem electorum Dei*, id est non dissensio in apostolatu meo a fide illorum, qui sunt a Deo non tantum vocati, sed electi. Apostolus, inquam, sum secundum fidem electorum Dei, et secundum fidem quæ habet *agnitionem veritatis*. Nam Salvator ad Judæos qui in eum crediderant est locutus: « Si permanseritis in verbo meo, cognoscetis veritatem (Joan. viii). » Illi ergo fidem habebant, sed agnitionem veritatis consecuti non fuerant. Agnitionem dico veritatis *quæ secundum pietatem est*, id est secundum piam religionem, velut si quis grammaticam artem noverit vel dialecticam, ut rationem recte loquendi habeat, et inter falsa et vera dijudicet. Sed agnitionem veritatis secundum pietatem, est nosse legem, intelligere prophetas, Evangelio credere, apostolos non ignorare. Et hæc veritas, cujus agnitionem secundum pietatem est, *in spe vitæ æternæ* posita est, quia statim ei qui se cognoverit spem tribuit immortalitatis. *Quam promisit ante tempora sæcularia Deus, qui non mentitur*. Quomodo promisit, cum hominibus utique promiserit, qui nondum erant ante tempora sæcularia, nisi quia in ejus æternitate atque in ejus verbo sibi coæterno, jam prædestinatione fixum erat, quod suo tempore futurum erat? vel cui promisit nisi sapientiæ suæ, promittens omnes qui in illam credituri essent, habituros esse vitam æternam? Et promisit ante tempora sæcularia, vel secundum aliam translationem, ante tempora æterna. Ex quo juxta historiam Geneseos (Gen. i), factus est mundus, et per vices noctium et dierum, mensium pariter et annorum, tempora constituta sunt, in hoc curriculo et rota labuntur sæcularia tempora quæ cum sæculo cœperunt; et ante hæc, id est antequam mundus cœpisset, promisit vitam æternam electis quos noverat futuros. Sed ante hæc mundi tempora æternitatem quamdam temporum fuisse credendum est, quæ vocatur ævum quia non variabatur mutationibus. Nam inter ævum et tempus hoc distat, quod ævum quidem stabile est, tempus vero mutabile. Et ante æterna tempora, id est ante ævum promisit Deus interminabilem vitam electis suis. Nam sicut legimus: « Omnis sapientia a Domino Deo est, et cum illo fuit semper et est ante ævum (Ecclesi. i). » In hac ergo sapientia quæ cum illo est ante ævum, id est ante æterna tempora, promisit ipse electis vitam ante æterna tempora. Promisit qui non mentitur, non quia possit mentiri, et *nolit in falsitatis verba prorumpere; sed quia qui*

A Pater sit veritatis, nullum in se mendacium habeat; et quia nunquam mentiri potest, ideo sine ambiguitate credamus vera esse quæ promisit; et tales nos studeamus præparare, ut digni simus ea percipere. Promisit quidem ante sæcularia vel æterna tempora vitam æternam, *sed temporibus suis*, id est congruis manifestavit eam, scilicet *verbum suum in prædicatione*. Vitam quam promisit, manifestavit verbum suum. Ergo vitam quam promisit, ipsa est Verbum quod « in principio erat apud Patrem, et Deus erat Verbum, et Verbum caro factum est, et habitavit in nobis (Joan. i); » dixitque: « Ego sum resurrectio et vita.—Ego sum via, veritas et vita (Joan. xi, xiv). » Hanc vitam et hoc verbum manifestavit Deus mundo temporibus congruis in prædicatione B Evangelii *quæ credita est mihi*, ut eam fideliter annuntiarem gentibus, et *secundum præceptum Salvatoris nostri Dei*, qui nos salvos esse voluit, implendo quod promiserat. Paulus qui taliter est apostolus, et tantæ salutis annuntiator, scribit *Titio dilecto*, id est cæteris meliori et germaniori filio. Sermo quippe et sapientia et doctrina, qua Titus Christi Ecclesias instruebat, efficiebat eum egregium Apostoli filium, non secundum carnem, sed *secundum fidem illi et Apostolo communem*, vel omnibus qui recte credunt communem, quæ Græce dicitur *catholica*, quia sicut unum baptisma est, sic et una fides. Ab hac communi, id est catholica fide separati sunt hæretici, qui in varios errores declinaverunt. Titus vero non secundum privatam sectam quorumlibet talium sed secundum fidem communem omnium electorum filius est Apostoli, quia recte docet catholicam veritatem, quam ab Apostolo didicit. Cui Titus sit *gratia* Spiritus sancti, quæ consecret omnia opera sacerdotalis officii ejus, *et pax*, quæ eum repressis hostibus et vitiis requiescere faciat, semperque cum Deo et sanctis angelis concordem permanere, et hoc a *Deo Patre et Filio ejus Christo Jesu Salvatore nostro*.

« Hujus rei gratia reliqui te. Cretæ, ut ea quæ de-
 « sunt corrigas, et constituas per civitates presby-
 « teros, sicut et ego disposui tibi. Si quis sine cri-
 « mine est, unius uxoris vir, filios habens fideles,
 « non in accusatione luxuriæ, aut non subditos
 D « Oportet enim episcopum sine crimine esse, sicut
 « Dei dispensatorem, non superbum, non iracun-
 « dum, non vinolentum, non percussorem, non
 « turpis lucri cupidum; sed hospitalem, benignum,
 « sobrium, justum, castum, sanctum, continentem,
 « et amplectentem eum qui secundum doctrinam
 « est, fidelem sermonem, ut potens sit exhortari
 « in doctrina sana, et eos qui contradicunt, ar-
 « guere. »

Postquam dura Cretensium corda Paulus ad Christi fidem mollierat, et tam sermone quam signis edomuerat eos non jam in Jovem, sed in Christum credere, reliquit Titum discipulum suum Cretæ, ut rudimenta nascentis Ecclesiæ confirmaret; et si qui videretur deesse, corrigeret; ipse peregrinus ad alios

nationes, ut et in eis fundamentum Christi poneret. Et hoc est quod dicit: *Gratia*, id est causa *hujus rei reliqui te, Cretæ, ut ea quæ desunt corrigas*. Cum enim dicit, *ut ea quæ desunt corrigas*, ostendit necdum eos ad plenam venisse scientiam veritatis; et licet ab Apostolo correcti fuissent, tamen adhuc indigere correctione. Omne enim quod corrigitur imperfectum est. *Ut ea*, inquit, *quæ desunt corrigas*, id est ut ea quæ a me correctæ sunt, et necdum ad plenam veri lineam sunt redacta, a te corrigantur, et normam æqualitatis recipiant; et quia solus non sufficeres hoc facere, *constituas per civitates presbyteros*, id est episcopos, *sicut et ego tibi disposui*, id est tales quales tibi designavi, non quales forte animus carnaliter voluerit, aut homines tibi persuaserint. *Ut constituas*, inquit, *presbyteros*, et post pauca subjungit, quod *oporteat episcopum sine crimine esse*, ostendens quia idem est presbyter qui episcopus: Nam antequam diaboli instinctu studia in religione fierent, et diceretur in populis: « Ego sum Pauli, ego Apollo, ego autem Cephæ, communi presbyterorum consilio gubernabantur ecclesiæ (I Cor. 1). » Postquam vero unusquisque eos quos baptizaverat, putabat suos esse non Christi, in toto orbe decretum est, ut unus de presbyteris electus superponeretur cæteris, ad quem omnis cura ecclesiæ pertineret, et schismatum semina tollerentur. Nam et alibi scriptum est: « Paulus et Timotheus servi Jesu Christi, omnibus sanctis in Christo Jesu qui sunt Philippis, cum episcopis et diaconibus (Philip. 1). » Philippis una est urbs Macedoniæ, et certe in una civitate plures episcopi esse non poterant. Sed quia eosdem episcopos illo in tempore, quos presbyteros appellabant, propterea indifferenter de episcopis quasi de presbyteris locutus est. Et in Actibus apostolorum ad unius ecclesiæ sacerdotes ait: « Attendite vobis et cuncto gregi, in quo vos Spiritus sanctus posuit episcopos (Act. xx). » Hæc idcirco diximus, ut ostenderemus apud veteres eosdem fuisse presbyteros quos episcopos; paulatim vero, ut dissensionum plantaria evellerentur, ad unum omnem sollicitudinem esse delatam. Sicut ergo presbyteri sciunt se ex ecclesiæ consuetudine ei qui sibi præpositus fuerit, esse subjectos, ita episcopi noverint magis se consuetudine, quam dispositionis Dominicæ veritate presbyteris esse majores. Et in communi debere ecclesiam regere imitantes Moysen, qui cum haberet in potestate solus præesse populo Israel, septuaginta elegit, cum quibus populum judicaret (Exod. xviii). Videamus igitur qualis presbyter vel episcopus ordinandus sit. *Constituas*, inquit, *per civitates presbyteros, sicut et ego tibi disposui. Si quis sine crimine est*, illum subaudi constituas. Non ut eo tempore quo ordinandus est, sine ullo crimine sit, et præteritas maculas nova conversatione deleverit, sed ut ex eo tempore quo in Christum renatus est, nulla criminis conscientia mordeatur. Crimen autem est grave peccatum, accusatione et damnatione dignissimum. Et prima libertas est carere

A crimibus. Multi quippe fideles sunt sine crimine, sine peccato autem nullus est in hac vita. Et ideo Apostolus designans quis sit ordinandus, non ait: Si quis sine peccato est hoc enim si diceret, omnis homo reprobaretur, nullus ordinaretur. Sed ait: *Si quis sine crimine est*, sicuti est homicidium, adulterium, aliqua immunditia fornicationis, furtum, falsus, sacrilegium et cætera hujusmodi. Cum ea homo non habet, debet autem omnis Christianus homo non habere, incipit caput erigere in libertatem. Et idcirco qui ordinatur, careat omni crimine, ut libera fronte possit aliorum crimina redarguere, et nemo valeat illi sua objicere. Et sit *unius uxoris vir*, quam habuerit, non habeat. Multi superstitiosius magis quam verius, etiam eos qui cum gentiles fuerint, et unam uxorem habuerint, qua amissa, post baptismum Christi alteram duxerint, putant in sacerdotium non eligendos, cum utique si hoc observandum sit, illi magis ab episcopatu arceri debeant, qui vagam per meretrices prius exercentes libidinem, unam regenerati uxorem acceperint; et multo detestabilius sit, fornicatum esse cum pluribus quam unam uxorem habuisse. Hæc Hieronymus. Augustinus autem ait: Unius uxoris virum acutius intellexerunt, qui nec eum, qui catechumenus vel paganus habuerit alteram, ordinandum esse censuerunt. De sacramento videlicet agitur, non de peccato. Nam in baptismo dimittuntur. Propter sacramenti autem sanctitatem, sicut femina (etiam si catechumena) vitata, non potest post baptismum inter Dei virgines consecrari, ita non absurde visum est, eum qui excessit uxorum numerum singularem, non peccatum aliquid commisisse, sed normam quamdam sacramenti amisisse, non ad vitæ bonæ meritum, sed ad ordinationis ecclesiasticæ signaculum necessariam. Ac per hoc, sicut plures antiquorum patrum uxores, significaverunt futuras ex omnibus gentibus ecclesias uni viro subditas Christo; ita noster antistes unius uxoris vir, significat ex omnibus gentibus unitatem, uni viro subditam Christo. Sit etiam *filios habens fideles*, non in accusatione luxuriæ, aut non subditos, hoc est non in patris potestate: Ponamus enim aliquam bene instituisse liberos suos, et a parva ætate semper Dominicis erudisse præceptis, hi si postea se luxuriæ dederint, et superantibus vitiis, libidini frena remiserint, nunquid culpa eorum in patrem redundabit, et sanctitatem patris filiorum nequitia maculabit. Nam et Isaac credendus est bene instruxisse filium suum Esau qui tamen post fornicarius et profanus exstitit (Gen. xxv-xxviii). Samuel quoque filios habuit, qui declinaverunt post avaritiam, et propter munera perverterunt iudicium (I Reg. viii). Ergo si tunc electio fieret sacerdotum, et Isaac propter Esau, et Samuel propter filios suos indigni sacerdotio putarentur. Sed sciendum qui tam sanctum est nomen sacerdotii, ut nobis etiam ea quæ extra nos sunt posita, reputentur, non quo propter vitia nostra episcopi non flamus, sed quo propter filiorum incontinentiam ab hoc gradu arguendi [al.

arcendi] sumus. Qua enim libertate alienos filios corripere et docere possumus quæ recta sunt, cum nobis statim possit, qui fuerit correptus, ingere: Antedoce filios tuos? aut qua fronte extraneum corripio fornicantem, cum mihi conscientia mea ipsa respondeat, exhæreda ergo filium fornicantem abjice filios tuos vitiiis servientes? Cum autem nequam filius in una tecum domo maneat, tu audes de alterius oculo festucam detrahere, in tuo trabem non videns? (*Matth. vii.*) Non itaque justus polluitur ex vitiiis filiorum, sed libertas ab Apostolo ecclesiæ principi reservatur, ut talis fiat, qui non timeat propter vitia liberorum extraneos reprehendere. Unde et considerandum adversus eos qui de episcopatu intumescunt, quia non statim omnibus his meliores sunt, quicumque episcopi non fuerint ordinati, cum nonnulli idcirco ad sacerdotium non pervenerint, quia eos liberorum vitia impediunt. Si autem peccata filiorum ab episcopatu justum prohibent, quanto magis se unusquisque considerans, debet retrahere ab hoc non tam honore quam onere, et non ambire alienum locum, quem magis digni debent occupare? Solent et per filios opera designari, ut ille intelligatur debere ordinari, qui in propria potestate habet opera sua, ut nulla subreptentium vitiorum labe sint ea maculari. Ideo, inquit, dixi ut ordinetur, si quis sine crimine est, quia oportet episcopum esse sine crimine, sicut dispensatorem Dei, qui est sine peccato, ut Domini sui puritatem in aliquo imitetur, quoniam non sua sunt quæ præstat, sed Dei qui dispensat. Et oportet eum esse non *superbum*, id est non tumentem vel placentem sibi quod episcopus sit, sed quasi bonum villicum, id requirentem quod pluribus prosit; oportet esse et non *iracundum*: iracundus est, qui semper irascitur, et ad levem responsionis auram quasi a vento folium movetur. Et revera nihil est sædus præcepto furioso, ut cum debeat esse mansuetus, patiens et sapiens, torvo vultu et tremantibus labiis, raguta fronte, effrenatis convitiis, facie inter pallorem et ruborem variata, clamore perstrepat; et errantes non tam ad bonum retrahat, quam ad malum sua sævitia præcipitet. Neque vero qui aliquando irascitur, iracundus est, sed qui crebro hac passione superatur. Oportet et non *violentum* esse. Quale enim est, episcopum videre violentum, ut sensu occupato vel exaltet risum contra gravitatis decorem, vel labiis dissolutis cachinnet, vel paululum tristis quasi cujusdam rei fuerit recordatus, inter pocula in singultus prorumpat, et lacrymas seu quid aliud amentius faciat? Ubicumque saturitas et ebrietas fuerint, ibi libido dominatur. Specta ventrem et genitalia, nam juxta ordinem membrorum est et ordo vitiorum. Dehinc additur, non *percussorem* oportere esse sacerdotem. Quod quidem et simpliciter intellectum, ædificat audientem, ne facile manum porrigat ad cædendum, ne in os alterius verberandum insanus erumpat. Melius est autem ut non percussorem illum dicamus, qui mansuetus

A et patiens, sit in tempore quid loquendum sit, quid tacendum, nec sermone inutili conscientiam percussit infirmorum. Non enim Apostolus ecclesiæ principem formans, velat esse pugilem, et corporeis ictibus alios corporaliter lædentem, quod etiam in plebeio et quocunque gentili si fuerit, reprehenditur; sed hæc, ut diximus, ne contumeliosus et garrulus perdat eum, quem potuit modestia et lenitate corrigere. Oportet etiam hunc esse non *turpis lucri cupidum*, ut non cupiat aggregare pecuniam; sed habens victum atque vestitum, his contentus sit. Hucusque, qualis non debeat esse episcopus vel presbyter, Apostoli sermo descripsit; et nunc e contrario, qualem oporteat eum esse ostendit. *Sed hospitalem*, inquit, *benignum, sobrium, justum, castum, sanctum, continentem, et amplectentem*, etc. Ante omnia hospitalitas futuro episcopo denuntiatur. Si enim omnis homo audire desiderat: « Hospes fui et suscepistis me (*Matth. xxv.*) », quanto magis episcopus cujus domus omnium commune esse debet hospitium? Laicus enim vel duos aut paucos recipiens, implevit hospitalitatis officium; episcopus vero nisi omnes receperit, inhumanus est. Si etiam benignus, ut benigne diligit omnes; et quidquid boni potest tam corporaliter quam spiritaliter, impendat. Sit et sobrius, ut corporalis ebrietas longe sit ab eo, nec sensum ejus mundana cupiditas, vel ira, seu quodlibet aliud vitium inebriet, sed acuto sensu dijudicet omnia, sicut vir spiritalis (*I Cor. ii.*) Justus quocumque sit, ut justitiam in populis quibus præest exerceat, reddens unicuique quod meretur, nec accipiat personam in judicio. Inter laici autem et episcopi justitiam hoc interest, quod laicus potest apparere justus in paucis; episcopus vero in tot debet exercere justitiam, quot subditos habet. Sit etiam castus (*I Cor. vii.*) Si enim laicis imperatur ut propter orationem abstinere ab uxorum coitu, quid de episcopo sentiendum est, qui pro suis populique peccatis illibatas Deo oblaturus est victimas? Quomodo igitur hospitalitas et benignitas atque justitia præcipua esse debet in episcopo, et inter cunctos laicos eminent, sic et castitas propria et ut ita dixerim, pudicitia sacerdotalis, ut non solum ab opere immundo se abstinere, sed etiam a jactu oculi et cogitationis errore, mens confectura Christi corpus, sit libera. Unde et additur, ut sit sanctus. Sanctitas enim quantum secundum nos, et dicenda ab omni iniquatione libera et perfectissima et incontaminatissima puritas. Sit etiam continens non solum ab uxoris amplexu, sed ab omnibus animi perturbationibus, ne ad iracundiam concitetur, ne illum tristitia dejiciat, ne terror agitet, ne lætitia immoderata sustollat. Continentia enim non solum in carnis opere et in animi concupiscentia, sed in omnibus rebus est necessaria, ne honores indebitos appetamus, ne accendamus avaritia, ne ulla passione superemur. Ad extremum sit amplectens eum qui secundum doctrinam est, fidelem sermonem, ut quomodo sermo Dei fidelis est et omni acceptione di-

gnus, sic et ille talem se præbeat, ut omne quod loquitur, fide dignum existimetur, et verba ipsius sint regula veritatis, ac desiderio claritatis amplectatur hujusmodi sermonem, quo possint audientes doceri, *ut potens sit in doctrina sana exhortari eos ad bene agendum*. Sana doctrina dicitur, ad distinctionem languidæ infirmæque doctrinæ. Potens sit *et arguere eos qui contradicunt*, id est hæreticos vel Judæos et sæculi istius sapientes, sive etiam malos catholicos, qui moribus contradicunt, id est non loquendo, sed male vivendo. Nam præcipitur illis ut non fornicentur, et fornicantur; præcipitur illis ut non rapiant, et rapiunt; sicquæ cætera mala a quibus prohibentur, faciunt: et ita non lingua, sed vita semper doctrinæ sanctæ contradicunt. Superiora quidem quæ in episcopi virtutibus posuit, ad vitam pertinent: hoc vero quod ait, *ut potens sit exhortari in doctrina sana, et eos qui contradicunt arguere*, ad opus prædicationis refertur. Quia si episcopi tantum sancta sit vita, sibi potest prodesse sic vivens; porro si doctrina et sermone fuerit eruditus, potest cæteros quoque instruere; nec solum suos instruere, sed adversarios repercutere; qui nisi refutati fuerint atque convicti, facile quærent simplicium corda pervertere. Hic locus adversus eos facit, qui inertie se et otio ac somno dantes, putant peccatum esse si Scripturas legerint, vel negligunt eas legere; et eos qui in lege Domini meditantur die ac nocte (*Psal.* 1), quasi garrulos inutilesque contemnunt, non animadvertentes Apostolum post catalogum conversationis episcopi, etiam doctrinam similiter præcepisse.

« Sunt enim multi et inobedientes, vaniloqui et seductores, maxime autem qui de circumcissione sunt, quos oportet redargui, qui universas domos subvertunt, docentes quæ non oportet turpis lucrari gratia. Dixit quidam ex illis proprius eorum propheta. Cretenses semper mendaces, malæ bestię, ventres pigri. Testimonium hoc verum est. Quam ob causam increpa illos dure, ut sani sint in fide, non intendentes Judaicis fabulis, et mandatis hominum aversantium se a veritate. »

Ideo qui ordinatur episcopus, debet esse potens arguere eos qui contradicunt, quia *sunt multi*, latam viam quæ ducit ad perditionem ambulantes, et divinis mandatis *inobedientes*. Qui ergo futurus est ecclesiæ princeps, habeat eloquentiam cum vitæ integritate sociatam, ne opera absque sermone sint tacita, vel dicta factis deficientibus erubescant, maxime quia sunt non pauci, sed multi, nec acquiescentes, sed inobedientes; *vaniloqui*, id est vanas factas [fabulas?] prædicantes; *et seductores*, id est alios a veritate in errorem post se trahentes, sed illi maxime sic agunt, *qui sunt de circumcissione*, id est qui ex Judæis ad baptismum venerunt, nec carnales observantias legis deseruerunt, hi tunc temporis nascentem Christi ecclesiam subvertere nitebantur, et

A *introducere legalia præcepta*. Nam sine Scripturæ auctoritate garrulitas eorum non haberet fidem, ubi viderentur perversam doctrinam suam divinis testimoniis roborare, *quos oportet redargui*, id est tales homines doctores ecclesiæ debent ratione Scripturarum superare, et silentium illis imponere pondere testimoniorum, *qui non unam vel paucas domos, sed universas cum dominis familiisque subvertunt*, id est a statu fidei subruunt, *docentes ea quæ non oportet* ob gratiam turpis lucrari, id est quasi sub specie consulendi, agentes negotium decipiendi propter pecuniæ quæstum, docent ea quæ non oportet, id est ciborum differentias, et otium Sabbati jamdudum aboliti, atque circumcissionis injuriam, et utinam zelo fidei talia docerent, ex parte enim aliqua posset eis ignosci, atque dici quod emulationem Dei haberent, sed non secundum scientiam (*Rom.* xv). Sed quia venter est Deus ipsorum (*Philipp.* iii), turpis lucrari gratia volunt proprios facere discipulos, ut quasi magistri a sectatoribus alantur sive pecunias accipiant. Possumus et aliter intelligere turpe lucrum, quia omnes hæretici dum perversa docent, lucratores hominum se solent asserere, cum non lucrum, lucrum sit, sed perditio, animas interficere deceptorum. Econtra qui errantem fratrem suum juxta Evangelium corripuerit (*Matth.* xviii), si fuerit ille conversus lucratum est eum. Quod enim majus vel pretiosius lucrum esse potest, quam si humanam animam quis lucretur? Omnis igitur doctor ecclesiæ, qui ad Christi fidem recta ratione persuadet, honestus lucrator est. Et omnis hæreticus qui fraudulentis sermonibus homines fallit, loquitur quæ non oportet turpis lucrari gratia. Sequitur: *Dixit quidam ex illis*, etc. Quantum ad textum sermonis et continentiam loci pertinet hoc quod ait: *Dixit quidam ex illis proprius eorum propheta*, videtur ad eos referri, de quibus præmissum est: *Maxime qui de circumcissione sunt, quos oportet redargui, qui universas domos subvertunt, docentes quæ non oportet turpis lucrari gratia*; ut sequatur, *dixit quidam ex illis proprius eorum propheta: Cretenses semper mendaces*, etc. Sed quia in illo prophetarum qui apud Judæam vaticinati sunt (227), hic hexameter versus reperitur:

D *Κρήτες ἀσι ψεύσται, κατὰ θηρία, γαστήρες ἀργαί,* referatur (si placet) ad superiora, ubi dictum est: « Reliqui te Cretæ, ut ea quæ desunt corrigas, » ut sequatur, *dixit quidam ex illis proprius eorum propheta*, id est Cretensium. Quia vero multa in medio sunt, et hoc absurdum fortasse videtur, ideo cum his superioribus, quæ minoras sunt, aliter aptandum est, ut legamus: *Sunt enim multi et inobedientes, vaniloqui et seductores, maxime autem qui de circumcissione sunt; quos, scilicet multos et inobedientes, vaniloquos et seductores, cum his qui de circumcissione sunt oportet redargui, qui universas domos subvertunt, docentes quæ non oportet, turpis*

*lucris gratia. Dixit quidam ex illis proprius eorum propheta; Cretenses semper mendaces, ut id quod dictum est, proprius eorum propheta, non specialiter ad Judæos, et eos qui de circumcissione sunt, referatur: sed ad multos et inobedientes, vaniloquos et seductores; qui utique quia in Creta erant, Cretenses fuisse credendi sunt. Qui quod vaniloqui sunt, quidam proprius eorum propheta sic prænuntiavit, Cretenses semper mendaces. Et quod sint seductores, atque domos subvertant, ita subnexuit malæ bestiæ. Et quod temporalis lucris gratia doceant ea quæ non oportet, ita subjecit, ventres pigri. Mendaces quippe sunt et malæ bestiæ et ventres pigri, quia falsa persuadent, et ferarum ritu sanguinem sitiunt deceptorum, et non cum silentio operantes suum panem manducant, quorum Deus venter est (Philip. III), et gloria in confusione ipsorum. Dicitur autem iste versus in Epimenidis Cretensis poetæ oraculis reperiri, quem nunc Apostolus sive alludens prophetam vocat, quod scilicet tales Christiani tales merentur habere prophetas, quomodo prophetas Baal, et quoscunque otiosos prophetas Scriptura commemorat (Jer. II, XXIII), sive vere, quia de oraculis scripserat atque responsis, quæ et ipsa futura prænuntiant, et ea quæ ventura sunt, multo ante prædicant. Denique tempore ex illo exstabat oraculorum titulo prænotatus liber quidam Epimenidis, quem, quia videbatur divinum aliquid repromittere, propterea Apostolum arbitror inspexisse, ut videret quid in eo promitteretur, et in tempore usum versiculo scribentem ad Titum, quia erat Cretæ, ut falsos doctores Cretensium proprio insulæ suæ auctore contereret. Non tamen totum opus Epimenidis, quod de oraculis scripserat, per unum versiculum confirmavit; sed Cretenses tantum mendaces vitio mentis increpavit ob ingenitam mentiendi facilitatem, de propriæ gentis eos auctore confutans. Nam nemo est tam sicarius, tam parricida, tam veneficus, qui non aliquid boni aliquando fecerit. Ergo si unum bonum illius videntes laudaverimus, necesse erit ut et cætera quæ male agit, laudemus? absit! Et si inimicus adversum nos jurgitet et clamitet, nonne inter verba simultatis et rixæ aliquid loquitur veritatis, quod et a nobis quoque adversum quos loquitur, non usquequaque reprehenditur? Sic et Epimenides non ideo vera dixit omnia, quæ in carminibus ejus continentur, quia cæteræ res fallaces sunt, sed in eo tantummodo verum locutus esse probatur, quia ingentis Cretensium mendacii vitium expressit, et eos malas bestias pro crudelitate, et ventres pigros pro commessatione et otiositate vocavit. Unde Apostolus considerate et circumspicte loquens, adjunxit: *Testimonium hoc verum est.* Non totum carmen de quo testimonium sumptum est, non universum opus, sed tantum hoc testimonium, hic versiculus. Nam qui in una tantum poematis parte consensit, cætera confutasse credendus est. Verum est, inquit, testimonium hoc, quia tales sunt Cretenses, quales illos esset testatur, licet non omnes.*

A *Quam ob causam, id est quia tales sunt, increpa illos non molliter, ut soles, sed dure, id est dura eorum corda penetret increpatio dura, ut sani sint in fide, id est ut mens eorum non infirmetur in fide, sed convalescat, et omnem languorem perfidiae precul repellat a sua fide. Sani, inquam, sint in fide puritate, quæ nullo tabescit languore perfidiae, non intendentes Judaicis fabulis, quasi magistri Judæorum sine auctoritate Scripturarum, et sine ulla assertione rationis docent, et mandatis non Dei, sed hominum, id est Judæorum, humana tantum et carnalia sapientum, aversantium se a veritate spiritualis intelligentiæ. Si quis post adventum Christi conciditur, non circumciditur, sed Judaicis servit fabulis, et mandatis hominum aversantium se a veritate.*

B *Non enim qui in manifesto Judæus est, neque qui in manifesto in carne circumcisio, sed qui in occulto Judæus est, et circumcisio cordis in spiritu, non littera (Rom. II). Si quis pascha agit, non in azymis sinceritatis et veritatis, ut exterminet ex anima sua omne vetus fermentum malitiæ et nequitiae (I Cor. V), iste attendit fabulis, et sequitur umbras veritate neglecta. Si quis non resurgens cum Christo, nec quærens ea quæ sursum sunt, sed quæ super terram sunt (Colos. III), dicit: « Ne tetigeritis, neque gustaveritis, neque attractaveritis, quæ sunt omnia in interitu ipso usu, secundum præcepta et doctrinas hominum (Colos. II), » iste fabulis est intentus, et observat mandata hominum, umbram tenentium et veritati terga vertentium. Unde et subditur:*

C *« Omnia munda mundis, coinquinatis autem et infidelibus nihil est mundum, sed inquinatæ sunt eorum et mens et conscientia. Confitentur se nosse Deum, factis autem negant, cum sint abominati et incredibiles, et ad omne opus bonum reprobi. »*

D *Quia superius, dixerat, sunt enim multi et inobedientes, vaniloqui et seductores, maxime qui de circumcissione sunt, et de his qui ab eis seducti fuerant, consequenter addiderat, increpa illos dure, ut sani sint in fide, non intendentes Judaicis fabulis, et mandatis hominum aversantium se a veritate, et putabant inter cibos esse distantiam, ut aliqui mundi et aliqui essent immundi, propterea nunc subjungit: *Omnia munda mundis, id est omnia ciborum genera secundum naturam sunt munda, et apud illos nihil habent immunditiæ, qui in Christum credunt, et sciunt omnem creaturam Dei bonam esse, et nihil abjiciendum, quod cum gratiarum actione percipitur. Mundis quidem munda sunt omnia, sed coinquinatis, id est carnaliter legem intelligentibus et infidelibus, id est tempus gratiæ a legis tempore non discernentibus, nihil ciborum est mundum, quia et his quæ respuunt, et his quæ sumunt, non sancte nec juste utuntur; sed inquinatæ sunt fetore infidelitatis; et mens, id est ratio eorum et conscientia, id est cordis arcanum. Propterea etiam quæ munda sunt per naturam, eis immunda fiunt.**

quia pro qualitate vescentium et mundum mundis, et immundum contaminatis fit. In nobis itaque est vel munda comedere vel immunda. Si enim mundi sumus, munda nobis est creatura. Si autem immundi et infideles, fiunt nobis universa immunda, vel propter inhabitantem in mente nostra hæresim, vel propter conscientiam delictorum. Nihil est talibus mundum, qui tantum voce *confitentur se nosse Deum*, sed *factis negant eum, cum sint abominati*, id est ab humanitate destituti bestialiter vivendo; et *incredibiles*, id est indigni quibus debeat credi, quia toties sunt in mendacio deprehensi. Hi, quorum polluta est mens et conscientia, Deum verbis confitentur, factis autem negant, juxta illud Isaïæ: « Populus hic labiis me honorat, cor eorum longe est a me (Isa. xxix). » Quomodo enim quis labiis honorat et corde recedit, ita sermone Deum quis confitens, operibus negat. Talis quisque merito dicitur abominatus, id est nulla veritatis ratione persuasus; et incredibilis, id est nolens credere divinis præceptis, ut eis obediat; et ad omne opus bonum reprobus, quo scilicet etiam ea quæ naturali bonitate superatus forte bona fecerit, non sint bona, dum mentis perversitate sunt reproba. Tales enim aut prava sunt quæ faciunt, aut recta opera non recto corde sectantur. Non enim de suis operibus retributiones perpetuas, sed transitorios favores quærunt, vel hæretico sensu quæ operantur faciunt. Æstimant quidam in eo tantum negari Deum, si in persecutione quis a gentilibus comprehensus, se negaverit esse Christianum. Ecce Apostolus omnibus factis quæ perversa sunt, Deum, asserit denegari. Deus charitas est (I Joan. iv), et per odium negatur charitas. Christus sapientia est, Justitia, veritas, sanctitas, fortitudo, et his similia; per insipientiam negatur sapientia, per iniquitatem justitia, per mendaciam veritas, per turpitudinem sanctitas, per imbecillitatem animi fortitudo. Et quotiescunque vincimur vitiis atque peccatis, toties Deum negamus; sicut e contrario quoties boni quid agimus, toties Deum confitemur. Nec arbitrandum est, in die iudicii illos tantum a Dei Filio denegandos, qui in martyrio Christum negaverunt, sed per omnia opera et sermones atque cogitationes, Christus vel negatus negat, vel confessus confitetur.

CAPUT II.

« Tu autem loquere quæ decent sanam doctrinam. Senes ut sobrii sint, pudici, prudentes, sani in fide, in dilectione, in patientia. Anus similiter in habitu sancto, non criminatrices, non multo vino servientes, bene docentes, ut prudentiam doceant adolescentulas, ut viros suos ament, filios suos diligant; prudentes, castas, sobrias, domus curam habentes, benignas, subditas viris suis, ut non blasphemetur verbum Dei. Juvenes similiter exhortare, ut sobrii sint in omnibus. Te ipsum præbe exemplum honorum operum in doctrina, in integritate, in castitate, in gravitate, verbum sanum, irreprehensibile, ut is qui ex

adverso est, vereatur, nihil habens malum dicere de nobis. Servos dominis suis subditos esse in omnibus (Ephes. vi; Colos. iii; I Petr. ii), placentes, non contradicentes, non fraudulentos, sed in omnibus fidem bonam ostendentes, ut doctrinam Salvatoris nostri Dei ornent in omnibus. »

Illi docent, ut supradictum est, quæ non oportet, sed tu loquere ea quæ decet ut loquaris, id est sanam doctrinam, quæ nullum erroris aut vitiorum in se languorem habeat, sicut hæreticorum vel philosophorum doctrina, quæ dum ab aliis vitiis retrahit, sæpe ad alia impellit. Sola enim Christiana doctrina ab omni languore vitiorum et errorum sanat. Generaliter Apostolus Tito præceperat, quid ipse deberet loqui ad cunctos, in eo quod ait: *Tu autem loquere quæ decent sanam doctrinam*, et nunc per singulas species quid unamquamque ætatem deceat, exponit. Primum senibus viris convenientia demonstrat, deinde anus quid deceat, tertio quæ adolescentibus apta sint, tam majoribus quam feminis, licet in præcepto mulierum veterularum de adolescentibus feminis mandata subjecerit, ut non tam ipse doceret adolescentulas, quam quid a vetulis docerentur, exponeret, extremo de servis præcipit. Et per singulas ætates atque conditiones sic decenter præcepta constituit, ut sermo ejus vitæ morumque sit regula. Loquere, inquit, ea quæ decet ut tu loquaris, qui doctor ecclesiæ Christi constitutus es, videlicet *ut senes sint sobrii*, id est in cibo et potu temperati, ut ætatis gravitas morum gravitatem habeat, et modum servare sciat, et sint *pudici*, ne in ultima ætate luxurient, ne jam frigidus ad libidinem sanguine, exemplo sint adolescentibus ad ruinam, et sint *prudentes* in respuendis vel cavendis malis, et eligendis atque faciendis bonis, ut cum solerti discretionem faciant omnia. Sint etiam *sani in fide*, ut nullo infidelitatis vel perditionis languore infirmetur, sed sint valentes in fide, sicut *justus qui ex fide vivit (Habac. ii; Rom. i; Hebr. x; Rom. iv)*, et sicut Abraham qui non infirmatus est fide, nec in repromissione hæsitavit diffidentia, sed confortatus est fide, dans gloriam Deo, plenissime sciens, quia quæcumque promisit, potens est et facere, et sint *sani in dilectione*. Sanus est in dilectione, qui Deum diligit ex toto corde, et ex tota anima, et ex tota mente, et proximum tanquam seipsum (Deut. vi). Qui sanus est in dilectione, non æmulatur, non inflatur, non agit perperam, non inhoneste, non ad iracundiam concitatur, non cogitat malum, non gaudet super iniquitate; congaudet autem veritati, omnia sustinet, omnia credit, omnia sperat, omnia præstolatur (I Cor. xiii). Languor autem dilectionis est, quando abundante iniquitate refrigescit charitas (Matth. xxiv). Hoc frigore charitatis et Amnon in sorore sua Thamar obrigit (II Reg. xiii). Timendum ergo, ne forte et nos hac infirmitate charitatis aliquando tabescamus. Nunquam enim evenit, ut primum a nobis in virgli-

nem, aut in quemlibet feminam sit sancta dilectio, et cum mollita mens fuerit in affectus, paulatim sanitas charitatis languore pallescat et infirmari incipiat, et diligentem ad extremam mortem ferat. Unde Timotheo caute præcepit Apostolus, ut exhortetur adolescentulas in omni castitate. Omnis enim castitas in carne et spiritu et anima est, ne scandalizetur oculus, ne in pulchritudine vultus feminei pendeamus, ne blanda nos audire verba delectet, ne ad singulos sermones mens prius dura marcescat. Caveant ergo non solum juvenes, sed et senes, ne per sanitatem dilectionis introeat morbus charitatis; et per amorem sanctum fiat non sancta dilectio, quæ illos pertrahat ad gehennam. Sint et sani in patientia, ut nullo languore impatientiæ vel murmurationis infirmetur, cum pertulerint adversa; sed glorientur in tribulationibus, et omne gaudium existiment, cum in tribulationes varias inciderint (I Cor. xii). Anus similiter doce. Quamvis apostolus Petrus moneat, ut viri uxoribus suis tanquam infirmiori vasculo honorem tribuant, non tamen arbitrandum est, quod uxor quæ corporis vasculum habet infirmum, statim et anima infirmior sit. Unde et nunc præcipitur eis, ut in ipsis quoque illud Apostoli compleatur: « Virtus in infirmitate perficitur (II Cor. xii), » et dicitur ut et omnia habeant, quæ senibus viris sunt præcepta communiter, in eo scilicet quod ait: Anus similiter, hoc est ita ut viri senes, in omnibus sobriæ sint et pudicæ atque prudentes et sanæ in fide et dilectione et patientia. Et pro sexu suo hoc habeant proprium, ut sint in habitu sancto, ut ipse quoque earum habitus et vestitus et incessus atque motus et vultus ac sermo et silentium, quamdam sacri decoris præferant dignitatem. Et quia hoc genus mulierularum solet esse garrulum, ideo subditur non sint criminatrices, id est aliis male loquentes, ne ipsæ quæ adolescentiam jam transgressæ sunt, de adolescentularum ætatibus disputent, et dicant, illa sic ornatur, illa sic comitur, sic procedit, amat illum, amatur ab illo, cum etsi hæc vera sint, non tam apud cæteros debent infamare, quam ipsam secreta Christi charitate corripere; et magis docere ne faciat, quam in publico accusare quod fecerit. Solent autem hæc ætates, quia corporis fringere luxuria, licet quædam nec pudicæ fiant, vino sedare pro libidine. Unde a nimio potu vini prohibentur, quia quod in adolescentibus libido, hoc in senibus ebrietas est, et expresse dicitur, non vino multo servientes. Servitus enim quædam est et extrema conditio, vino sensus hominis occupari, et suum non esse, sed vini. Quia igitur docuit quales primo anus esse deberent, et post illas, quæ cum senibus viris habent communia, et propria eorum exposuit, ut in habitu honesto et sancto sint, nec aliarum criminatrices, nec vino proprios sensus occupantes, nunc consequenter doctrinæ ejus frena permittit, ut cum tales fuerint, docendi habeant libertatem, ut scilicet sint bene docentes, id est ea quæ bona sunt, ut doceant pruden-

tiam, id est discretionem boni et mali, ut bonum fiat, et malum caveatur, et hanc prudentiam doceant adolescentulas; licet enim alio loco dixerit: « Docere autem mulieribus non permitto (I Tim. ii), » sic intelligendum est, ut in viris sit illis doctrina sublata. Cæterum adolescentulas doceant quasi filias suas, ut ament viros suos, et diligant filios suos. Quæ doctrina est amare viros, cum hoc non in eloquio docentis, sed in corde amantis sit constitutum? Vult ergo eas amare viros suos caste, vult inter virum et mulierem esse pudicam dilectionem, ut cum pudore et verecundia et quasi necessitate sexus reddat potius debitum viro, quam ipsa exigat ab eo, et operam liberorum ante oculos Dei et angelorum perpetrare se credat. Filios autem diligunt, si eos in Dei disciplina erudiant. Cæterum molle eos contristare docendo quæ bona sunt, et libertatem tribuere peccandi, non est amare filios, sed odisse. Doceant et vetulæ juvenulas esse prudentes, ut licet corpore sint adolescentes, mente tamen per prudentiæ acumen sint bene callentes, et doceant eas esse castas, quia adversus castitatem magis in ætate florenti pugnat inimicus, et virtus ejus omnis contra feminas in umbilico ventris est (Job xl), et sobrias, ne per immoderatam potationem magis incalescant ad libidinem. Et habentes curam domus, et diligenter omnia procurent quæ sunt in domo; et benignas, id est mites et clementes, quia poterat evenire ut diligentia domus austeritate regeretur, et per hoc apostoli præceptum severior matrona fieret in servulos, ideo copulavit benignas, ut tunc se crederet mariti domum bene regere, si hoc benignitate impetraret a servulis, non terrore. Doceant eas et subditas esse viris suis, ne forte divitiis et nobilitate tumentes, Dei sententiæ non meminissent, per quam subjectæ sunt viris, ait enim mulieri: « Sub viri potestate eris, et ipse dominabitur tui (Gen. iii). » In quo consideranda est Scripturæ sanctæ prudentia, quia non viro Dominus ait: Dominaberis uxori tuæ, sed ipsi mulieri dixit, quia « vir dominabitur tui, » ut illi præmium relinqueret obsequiæ, dum in potestate ejus est, si Dei velit obedire præcepto, ut serviat viro, et subdita sit marito, ut scilicet et quodammodo esset libera servitus, et dilectionis plena, ideo serviens viro, quia metuuit eum offendere. Cum vero caput mulieris vir sit, caput autem viri Christus (I Cor. ii: Ephes. v), quæcunque uxor non subditur viro, id est capiti suo, ejusdem criminis rea est, cujus et vir si non subjiciatur Christo capiti suo, ideo sint subditæ viris, ut non propter eas blasphemetur verbum Dei. Verbum enim Dei blasphematur, vel dum contemnitur, et pro nihilo ducitur prima Dei sententia, vel dum infamatur Christi Evangelium, qui contra legem fidemque naturæ est, si ea quæ Christiana est, et ex Dei lege subjecta viro, imperare ei desiderat, cum et gentiles feminæ viris suis serviant cum communi lege naturæ. Juvenes similiter exhortat. Sicut in eo quod supra præceperat, dicens: habitus

dominis suis fraudes faciant, furando res eorum, et infideliter illis serviendo. Non sint ergo fraudantes, id est fraudulenter ex rebus dominorum aliqua minuentes, *sed in omnibus fidem bonam ostendentes*, ut appareat eos fideliter in omnibus agere. Et hoc ideo, ut doctrinam Salvatoris nostri Dei ornent in omnibus. Si enim apud carnales dominos in minimo fideles fuerint, incipient eis apud Deum majora committi. Ornat autem doctrinam Dei, qui ea quæ conditioni suæ apta sunt, facit; e diverso confundit eam, qui non est subjectus hominibus, cui conditio sua displicet qui contradictor atque fraudator in nullo fidem bonam ostendit. Quomodo enim potest fidelis esse in substantia Dei, id est in doctrina ejus, qui carnali domino fidem exhibere non potuit? vel hoc quod additur, ut doctrinam Dei ornent in omnibus, non solum ad servos referendum est, sed et ad omnes superius nominatos, ab eo loco ubi dictum est, senes ut sobrii sint, quatenus scilicet ut senes et anus et adolescentulæ et juvenes atque servi, ornent quasi margaritis operibus bonis doctrinam Dei nostri.

« Apparuit enim gratia Dei Salvatoris nostri omnibus hominibus, erudiens nos, ut abnegantes impietatem et sæcularia desideria, sobrie et juste et pie vivamus in hoc sæculo, expectantes beatam spem et adventum gloriæ magni Dei et Salvatoris nostri Jesu Christi, qui dedit semetipsum pro nobis, ut nos redimeret ab omni iniquitate, et mundaret sibi populum acceptabilem sectatorum bonorum operum. »

Post catalogum doctrinæ ad Titum, ubi descriperat, quid senes, quid anus, quid adolescentulas, quid juvenes, quid ad extremum servos admonere deberet, recte nunc addit, quia apparuit vel illuxit gratia Dei Salvatoris omnibus hominibus. Non est enim aliqua differentia liberi et servi, græci et barbari, circumcisi et præputium habentis, viri et mulieris; sed cuncti in Christo unum sumus, universi ad regnum Dei vocamur, omnes post offensam patri nostro reconciliandi sumus non per merita nostra, sed per gratiam Salvatoris, vel quod Dei Patris vivens et subsistens gratia ipse sit Christus, vel quod Christi Dei Salvatoris hæc sit gratia, et non nostro merito salvati sumus, secundum quod alibi dictum est: « Pro nihilo salvos facies illos (Psal. lv). » Ideo servi bene vivendo debent ornare doctrinam Dei, quia gratia Dei per quam doctrina possit impleri, apparuit omnibus hominibus. Et cum omnibus, utique servis. Vel ideo debes omnis ætatis et sexus et conditionis homines ad bene vivendum monere, quia gratia Dei Salvatoris, id est gratis datus nobis Filius Patris, humanum genus salvare volentis, apparuit per fidem omnibus hominibus, senibus et juvenibus, maribus et feminis, liberis et servis, nullumque a sua cognitione exclusit. Vel gratia Dei Salvatoris, id est gratia Domini Jesu Christi, genus humanum gratis per baptismum salvare cupientis, apparuit per illuminationem Evangelii om-

nibus hominibus, nullum excipiens, nullum qui cordis oculos aperire velit, præteriens. Gratia dicitur erudiens nos, id est ex rudibus provectos faciens, et perfecte instruens nos, ut abnegemus impietatem, id est infidelitatem paganorum et perfidiam hæreticorum, et sæcularia desideria, id est cupiditates voluptatum hujus sæculi. quæ decipiunt multos catholicorum. Impietas enim est, ubi fidei pietas non est, sæcularia vero desideria sunt, quæ a mundi istius principe suggeruntur; et cum sint sæculi, cum sæculi hujus nube pertranseunt. Qui impius antea fuit, si conversus ad Christum factus est pius, ista impietatem abnegavit. Si luxuriosus quisque ad continentiam vitam mutavit, abnegavit sæculi desideria. Si avarus quisque ambire jam desiit, et largiri didicit propria, qui aliena rapiebat, abnegavit desideria sæculi. Nam qui esuriunt et sitiunt justitiam (Matth. v), quia gaudia patriæ cœlestis appetunt, isti videlicet illecebrosa desideria præsentis sæculi quæ assequebantur, jam abnegaverunt, abnegantes ergo impietatem et sæcularia desideria, vivamus in hoc sæculo tam fragili sobrie et juste contra sæculi desideria, et pie contra impietatem. Sobrie autem quantum ad nos, et juste erga proximum, et pie erga Deum. Sobrie, id est temperanter vivamus, ut modum servemus, et a vitis nos abstinenceamus; et juste, ut opera justitiæ per observantiam mandatorum Dei faciamus; et pie, ut in fidei pietate perseveremus, sive pium cor erga compassionem afflictionis proximorum habeamus; nos dico expectantes pro his beatam spem supernæ retributionis, id est expectantes beatitudinem, quam pro bonis speramus. Hanc abstinentiam in tempore præsentis vitæ velut in quadragesima debemus omnes observare. Jejunium enim magnum et generale est, abstinere ab erroribus et illicitis sæculi voluptatibus, ut abnegantes impietatem et sæcularia desideria, sobrie, juste, et pie vivamus in hoc sæculo. Huic jejunio subnectitur merces, dum ait: simus expectantes beatam spem. In hoc igitur sæculo quasi quadragesimam abstinentiæ celebramus, cum ab impietate et illicitis voluptatibus abstinemus, et bene vivimus. Sed quia hic abstinentia sine mercede non erit, expectamus illam spem beatitudinis. Non ergo in præsentem vitam retributionem quæramus, sed toto corde simus expectantes beatam spem æternæ remunerationis, et adventum gloriæ magni Dei, quando veniet in nubibus cum virtute magna et gloria (Matth. xxv), et cognoscetur magnus Deus, qui in primo adventu visus est parvus homo. Expectemus adventum hujus magni Dei, et Salvatoris nostri Jesu Christi, quia qui magnus Deus reprobris sentietur, nobis Salvator esse dignabitur. Est et ordo sensuum. Expectemus adventum gloriæ Jesu Christi magni Dei, et Salvatoris nostri. Quem idcirco debemus expectare et salutem ab eo sperare, quia non aliud pretium dedit pro nobis qui tenebamur a diabolo capti, sed semetipsum qui tantus est, ut pretioso sanguine nos redimeret, quia ejus eramus.

Nam aliena dicimur emere, nostra vero redimere. **A** Redimeret nos *ab omni iniquitate*, ut nulla jam iniquitas nobis dominaretur, id est nullum peccatum, sicut Joannes ait : « Omnis qui facit peccatum, et iniquitatem facit, et peccatum est iniquitas (*I Joan. III*), » et *mundaret sibi populum*, id est ut non solum a jugo diaboli et iniquitatis nos redimeret, sed et mundaret nos, abluendo sordes peccatorum nostrorum in baptismo, et sic faceret nos populum sibi *acceptabilem* vel (sicut in græco habetur) *peculiarem*, populum dico, *sectatorem* sive ut Græcus habet, *æmulatorem bonorum operum*. Redemit ergo nos sanguine suo, ut sibi Christianum populum peculiarem et acceptum faceret, et horum sectator esset, ut in his perseveraret.

« Hæc loquere, et exhortare, et argue cum omni imperio. Nemo te contemnat. »

Hæc quæ dicta sunt de apparitione gratiæ et abnegatione impietatis, et quod Dominus seipsum dedit redemptionem pro nobis, ut nos liberaret ab iniquitate, et mundaret sibi populum peculiarem sectatorem bonorum operum, *loquere* ignorantibus, et *exhortare* scientes ut ita vivant, et *argue*, id est convince contemptores vel resistentes. Et hæc age *cum omni imperio*, id est cum imperiosa auctoritate. Imperii nomine non dominationem potentiæ, sed auctoritatem suadet vitæ. Cum imperio quippe docetur, quod prius agitur quam dicatur. Nam doctrinæ fiduciam subtrahit, quando conscientia præpedit linguam. Non ergo ei potestatem claræ locutionis, sed fiduciam insinuat bonæ actionis. Unde et de Domino scriptum est : « Erat enim docens sicut potestatem habens, et non sicut scribæ et Pharisæi (*Matth. v; Marc. I*). » Singulariter namque ac principaliter solus ex potestate bona locutus est, quia ex infirmitate mala nulla commisit. Ex divinitate quippe potentiam habuit, id quod nobis per humanitatis suæ innocentiam ministravit. Ob hoc et jubetur Titus et loqui, et exhortari, et arguere *cum omni imperio*, quia valde mitis erat, et propter nimiam lenitatem poterat sermo ejus inefficax esse, nisi per auctoritatem imperii ferventius juberetur. Quod autem imperii nomine, sicut præmisimus auctoritas vitæ principaliter designetur, ex eo declaratur quod protinus additur : *Nemo te contemnat*, id est nolo te talem exhibeas, ut merito possis ab aliquo contemni. Vel nemo te contemnat, id est nemo eorum qui in Ecclesia sunt, te sequitur agente sic vivat, ut se putet esse meliorem, et te despiciat velut inferiorem. Qualis enim ædificatio erit discipuli, si intelligat magistro se esse majorem. Unde non solum episcopi, presbyteri et diacones debent magnopere providere, ut cunctum populum cui præsident, conversatione et sermone præcedant, sed et inferior gradus, exorcistæ, lectores, æditui, et omnes omnino qui domui Dei serviunt, quia vehementer Ecclesias Dei destruit, meliores laicos esse quam clericos.

CAPUT III.

« Admone illos principibus et potestatibus subditos esse, dicto obedire, ad omne opus bonum paratos esse, neminem blasphemare, non litigiosos esse, sed modestos, omnem ostendentes mansuetudinem ad omnes homines. »

Quia superius dixerat, tantum servos dominis suis subditos esse debere, putaret forsitan aliquis, quod illi qui non essent de servili conditione, nemini deberent esse subditi, et ideo nunc dicit : *Admone illos*, licet a servili conditione sint alieni, tamen *subditos esse*, id est ut sint subditi principibus, id est regibus, quia, prima et maxima sunt populi capita; et *potestatibus*, id est ducibus, consulibus, tribunis et similibus, qui potestatem super alios habent. Ob hoc etiam fortassis ista jubet, quia Judæ Galilæi per illud tempus adhuc dogma vigeabat, et habebat plurimos sectatores, cujus et in Actibus apostolorum fit mentio (*Act. v*). Qui inter cætera hoc quasi probabile proferebat ex lege, nullum debere dominum nisi solum Deum vocari, et eos qui ad templum decimas deferrent, Cæsari tributa non reddere. Quæ hæresis tantum creverat, ut et Pharisæorum, et populi partem multam conturbaret, ita ut ad Dominum quoque nostrum referretur hæc quæstio, Licet tributum dare Cæsari an non? Quibus ipse prudenter cautequæ respondens, ait : « Reddite quæ sunt Cæsaris Cæsari, et quæ sunt Dei Deo (*Matth. xxii; Marc. xii; Luc. xx*). » Cui responsi nunc Apostolus congruens, docet principibus et potestatibus credentes debere esse subjectos, etsi sint infideles, quibus indignum se subdere jublicabant et dicto eorum obedire, ne oporteat illos violentia cogi, et quia poterat his qui tormenta formidabant, occasio ad negandum dari, dum juxta Apostoli præcepta assererent se principibus et potestatibus esse subjectos et facere quod juberent, propterea subjunct, *ad omne opus bonum paratos esse*. Si bonum est, inquit, quod jubet imperator aut præses, paratos sit obedire jubenti. Si vero malum est et contra Deum, quod præcipit, responde ei, quia « obedire oportet Deo magis quam hominibus (*Act. v*). » Hoc ipsum et de servis intelligamus apud dominos, et de uxoribus apud viros, et filiis apud parentes, sive carnales, sive spirituales, quod in illis tantum eis debeant subjici, quæ contra Dei mandata non fuerint. Potest et ita distingui, dicto obedire ad omne opus bonum, ac deinde alius sensus sit, paratos esse. Paratos autem esse, ut omnia quæcunque evenire possunt, sibi in animo præfigurent; et cum acciderint, nihil quasi novum sustineant, sed præparati sint ad omnia. Admone illos *neminem blasphemare*, quia plebs sæpe detrahit rectori suo, et male loquitur de eo. Sed nec fideles perversum principem blasphemare debent, ne premantur et affligantur ab illo. Non tamen simpliciter accipitur, *neminem blasphemare*. Neque ait, *neminem hominem blasphemare*, sed absolute, *neminem*, id est non hominem,

non angelum, non aliquam creaturam Dei. Omnia A quippe a Deo facta sunt bona valde, nec omnino Christi discipulis convenit, ut aliquem blasphement aut maledicant. *Non litigiosos esse, sed modestos.* Si enim sumus filii pacis, et volumus super nos pacem requiescere, et accessimus ad Jerusalem caelestem quæ ex pace nomen accepit, cum his qui oderunt pacem, habeamus pacem (*Psal. cxix*); et quantum in nobis est, cum omnibus hominibus pacati simus, non solum cum molestis, sed et cum rixosis, quia nulla virtus est ferre mansuetos, locumque demus iræ. Non ergo decet Christianos esse litigiosos, sed modestos, id est temperatos, ne prorumpentes in iram, blasphement aliquem, vel infidelem appellent canem, vel diaboli filium, nec aliquid hujusmodi per iram dicant vel faciant. Et ostendentes omnem mansuetudinem ut non solum in corde sint mansueti, id est mites et tractabiles, sed et foris aperte demonstrant omnem mansuetudinem in incessu suo, atque in verbis et operibus suis. Hanc ostendant non ad quosdam, sed ad omnes homines, tam bonos quam malos; ad bonos, ut perficiat: ad malos, ut respiscant. Non quo vanæ gloriæ desiderio nos esse mansuetos omnibus hominibus ostendere debeamus, sed quia dum omnes ferimur, et injuriæ vicem non rependimus, ipsa opera notiora fiant universis. Potest aliquis ob jactantiam et opinionem vulgi auramque popularem, simulare apud quosdam mansuetudinem, et fingere bonitatem; sed ubi non est vera et germana et solida mansuetudo, nescio an cum esse mansuetum possit omnibus persuaderi.

« Erasmus enim aliquando et nos insipientes et increduli, errantes, servientes desiderii et voluptatibus variis, in malitia et invidia agentes, odibiles, odientes invicem. »

Idcirco neminem blasphemare debent, nec contra quemquam litigare, sed modestiam servare, et mansuetudinem omnibus ostendere, quia et hi qui nunc perverse videntur agere, forsitan convertentur a pravitatibus suis, sicut et nos conversi sumus. Nam et nos eramus aliquando, id est olim seu quandoque, insipientes, id est sapientiam divinæ cognitionis non habentes; et increduli, id est non credentes quod de Deo credendum est; et errantes, id est credentes quod de Deo non est, putantes lucem tenebras, et tenebras lucem (*Isa. v*), putantes falsum quod verum est, et verum quod falsum est. Et eramus servientes, id est obedientes desiderii nostris, quia post concupiscentias nostras ibamus, et illicita desideria sequebamur, satisfaciendo illis prout poteramus; et voluptatibus variis serviebamus, id est voluptatibus carnis et voluptatibus gulæ, ac voluptatibus mollium vestimentorum, et similium rerum. Nos dico, agentes in malitia, quantum ad alios, id est actionem malam contra alios exercentes; et in invidia, id est in malevolentia, quia si malum facere non poteramus, malevoli saltem et invidi quod poteramus, aliis eramus, malum eorum desiderantes, et bonum ipsorum detestantes, quia ideo eramus odibiles, id est

habiles ad odiendum, hoc est digni ut odiremur ab aliis; et odientes invicem, quia et nos odiebamus alios, et alii odiebant nos. Tales non solum fuere gentiles ante fidem, sed et Judæi non credentes post Domini resurrectionem, postquam videlicet clamaverunt: « Crucifige eum; » et: « Non habemus regem nisi Cæsarem; » et: « Sanguis ejus super nos, et super filios nostros (*Luc. xxiii*; *Joan. xix*; *Matth. xxvii*). » Ex eo tempore fuere insipientes, id est sapientiam Dei quæ Christus est, non habentes; et increduli, id est nolentes credere Christum in carne venisse; et errantes, id est pro Christo Antichristum exspectantes, atque carnalibus desideriis ac voluptatibus servientes, et cætera quæ describuntur, agentes. Annon insipiens erat Saulus et incredulus, et errans, quando æmulationem Dei habebat, sed non secundum scientiam, et persequabatur ecclesiam, et lapidantium Stephanum vestimenta servabat (*Act. vii*), cum in tantum odium contra Salvatorem instigatus exarserat, ut litteras a sacerdotibus acciperet, pergens Damascum ad eos (*Act. ix*), qui in Christum crediderant, vincendos? an æstuantem flammam voluptatum restinguere poterat, cum non esset templum Dei? Quæ autem major potest esse malitia et invidia, quam contra absentes epistolas sumere, et ubique Christi vastare discipulos, nolle seipsum salvum fieri, et cæteris qui salvi esse poterant, invidere, odisse Christianos, et consequenter ab omnibus odium promereri?

« Cum autem benignitas et humanitas apparuit Salvatoris nostri Dei, non ex operibus justitiæ, quæ fecimus nos, sed secundum suam misericordiam salvos nos fecit, per lavacrum regenerationis et renovationis Spiritus sancti, quem effudit in nos abunde per Jesum Christum salvatorem nostrum, ut justificati gratia ipsius, hæredes simus secundum spem vitæ æternæ. »

Tales fuimus ante Christi notitiam, quales descripsimus: ideo merueramus damnationem, sed per Dei gratiam in Christi cognitione reperimus salutem, nam salvos nos fecit, cum apparuit, id est quando illuxit nobis, benignitas, id est largitas exhibitionis misericordiæ, et humanitas, id est affectus misericordiæ Dei Patris et Salvatoris nostri, benignitatem videlicet vocat exhibitionem operum divinæ misericordiæ; humanitatem vero, ipsum bonum affectum ejusdem misericordiæ. Et dicitur humanitas in Deo ad similitudinem nostri. Nam ille apud nos dicitur humanus, qui humanitus et misericorditer erga homines afficitur, quia humanitas ipsa misericordiæ est effectus. Secundum fidem et intellectum nobis apparuit humanitas et benignitas Dei Salvatoris, quando comperimus Deum Patrem esse miseratorem et misericordem. Et tunc salvos nos fecit, qui nostris meritis eramus perditione digni. Non enim ex operibus justitiæ quæ fecimus nos, processit hæc salus, quia nulla opera justitiæ feceramus, unde salutem meruissemus, sed ipse secundum misericordiam suam salvos nos fecit, non secundum merita nostra

nobis hanc salutem dedit; *per lavacrum regenerationis et renovationis Spiritus sancti*, id est per baptismum, in quo regenerati et renovati sumus adveniente in nos Spiritu sancto, per quem data est nobis peccatorum remissio. Spes quidem futuræ salutis, non ipsa salus quæ promittitur, data est nobis in baptismo; et tamen quia certa spes est, tanquam jam data esset, eadem salus salvos, inquit, nos fecit. Alio videlicet loco dicit, quia spe salvi facti sumus (*Rom. 1*). Nondum ergo re, sed jam certa spe salvos nos fecit, id est salutem æternam corporis et animæ nobis dedit per lavacrum regenerationis et renovationis Spiritus sancti, id est per abluitionem baptismi, in quo sumus a peccatorum sordibus loti, et iterum post carnalem generationem spiritaliter generati, ac vetusto homine deposito, renovati per Spiritum sanctum, ut nunc iterum perciperemus in baptismo novitatem innocentiae, quam perceperamus in primo parente priusquam peccasset, ac deinceps ambularem in novitate vitæ, quem Spiritum sanctum Deus Pater effudit in nos, id est extra fudit in nos, quid adhuc foris a paradiso sumus exsules, ut major ejus super nos clementia monstraretur. Effudit, videlicet *abunde*, id est sufficienter ad remissionem omnium peccatorum, et ad dationem virtutum. Vel *abunde*, id est abundantem spiritalibus donis suis, et hoc fecit *per Jesum Christum Salvatorem nostrum*, id est per operationem Jesu Christi, qui sanguine suo salvos fecit nos a peccatis nostris, et salvos adhuc faciet ab omnibus malis. Ad hoc effudit Pater in nos, id est in interiora nostra hunc spiritum, ut justificemur per eum, et *justificati* non nostris meritis, sed *gratia ipsius*, Patris, vel Spiritus sancti, *simus jam secundum spem hæredes vitæ æternæ*, etsi nondum secundum rem, id est hæreditario jure jam nunc possideamus in spe certa vitam æternam.

« Fidelis sermo est. Et de his volo te confirmare, ut curent bonis operibus præesse qui credunt Deo, hæc sunt bona et utilia hominibus. Stultas autem quæstiones, et genealogias et contentiones, et pugnas legis devita, sunt enim inutiles et vanæ. »

Fidelis est iste sermo quem præmisi, ut justificati ipsius gratia, hæredes efficiamur secundum spem vitæ æternæ. Dignus est videlicet fide sermo de hæreditate Dei, et de spe vitæ æternæ. *Et de his volo te confirmare*, id est de his supradictis volo te non dubium esse, sed certum, et ut credant cæteri, confirmare te illos, id est ut tu confirmes alios de his prædictis, de gratia, de justificatione, de hæreditate, de spe vitæ æternæ, et his similibus. Vel volo te confirmare de his id est volo ut confirmando loquaris de his, et vehementer hæc asseras, ita ut qui te audierint, credant tibi, et curent præesse, id est studeant alios præire bonis operibus. Qui videlicet hæc vera esse crediderint, necesse est ut curam habeant bonorum operum, per quam hæreditas Dei et spes vitæ præparatur æternæ. Curent bonis operibus præesse aliis, id est summa cura et maximo studio laborent agere bona opera unde præbeant aliis exemplum bene operandi, et

A hæc agere sic studeant, *qui credunt Deo*, ut fidem operibus adornent, quia *hæc sunt bona*, id est justa et sancta, et sunt *utilia*, id est utilitatem æternæ remunerationis tribuentia hominibus. De his, inquam, volo ut confirmes Deo credentes, quia bona sunt et utilia; *stultas autem quæstiones devita*, quia econtra vanæ sunt et inutiles, stultæ quæstiones sunt, ubi evidenter apparet stultitia, sicut in multis hæreticorum interrogationibus, quas de Christo vel de aliis rebus faciunt ad deprecationem catholicorum, sed hujusmodi quæstiones devita; et *genealogias*, id est computationes generationum, quas Judæi faciunt, qui in eo se jactant et putant legis habere notitiam, si nomina teneant singulorum, et ab Adam usque ad extremum Zorobabel omnium generationes memoriter velociterque percurrunt, atque in supputatione annorum et in referendis nepotibus, abnepotibus, avis, proavis, doctores se credunt; et contentiones devita eorum, qui per argumentationes artis dialecticæ non ratione, sed stomacho litigantium disputant, in hoc diebus ac noctibus vacantes, ut vel interrogent, vel respondeant, vel dent propositionem vel accipiant, assumant, confirmant atque concludant. Si igitur illi hoc faciunt, quorum proprie ars contentio est, quid debet facere Christianus, nisi omnino fugere contentionem? *Et pugnas quoque legis devita*. Frequenter enim accidit ut habeamus pugnas legis, non ob desiderium veritatis, sed ob jactantiam gloriæ, dum apud eos qui audiunt, docti volumus æstimari, aut certe ex hoc rumusculo turpia sectamur lucra. Quid enim prodest spumantibus labiis et latratu garrire canum, cum simplex et moderata responsio possit te placare, si vera est, aut si falsa, leniter a te et placabiliter emendari? Occasione legis oriebantur altercationes, dum alij dicerent a quibusdam cibis abstinendum esse, quoniam sic fuerat in lege præceptum; et alii responderent in Evangelio esse concessum, dicente Domino: « Non quod intrat in os, coinquinat hominem (*Matth. xii*); » et aliis contententibus totam ipsam legem oportere carnaliter intelligi et servari, aliis vero respondentibus et dicentibus non jam carnaliter, sed solummodo spiritaliter eam debere servari et intelligi. Sed hujusmodi quæstiones et genealogiæ et contentiones et pugnae ideo sunt vitandæ, quia *sunt inutiles*, id est nec dicentibus nec audientibus prosunt; et *vanæ*, id est inanes, quia tantummodo speciem scientiæ habent.

« Hæreticum hominem post unam et secundam correptionem devita, sciens quia subversus est, qui ejusmodi est, et delinquit cum sit proprio iudicio condemnatus. »

Hæresis Græce *ab electione* dicitur, quod unusquisque scilicet id sibi eligat, quod ei melius esse videatur. Unde stoici, Peripatetici, Academici et Epicurei, illius vel illius hæreseos appellabantur. Hæreticus ergo est, qui generalis ecclesiæ doctrinam deserens, errorem sibi perversi dogmatis eligit, quem specialiter sequatur. Et ideo hæreticus, quia

homo est humana tantum sapiens, et de Deo secundum humanas rationes disputans. Sed iste debet corripri, et si in errore perduraverit, caveri, sicut et Dominus pessimos doctores arbitrio suo dimittendos præcipit, sciens eos difficulter ad veritatem posse trahi : « Sinite, inquit, illos, cæci sunt, et duces cæcorum (Matth. xv). » Inde est quod et Apostolus nunc hæreticum jubet vitari. Non solum, inquit, prædictas quæstiones et genealogias cave, sed et hæreticum hominem devita post unam et alteram correptionem vel commonitionem. Quasi dicat : « Si vides aliquem a fide errantem, commune illum rationabiliter, ut catholicam teneat fidem ; et si distulit, adhuc severius corripere illum de erroris sui pravitare. Non videlicet sufficit tantum semel eum corripri vel commoneri, sed et secunda est ei adhibenda correptione, ut in ore duorum vel trium testium stet omne verbum (II Cor. xiii; Deut. xvii). Si bina correptione vel commonitione noluerit respicere, ulterius jam illum devita, non habens cum illo participationem aliquam vel societatem, nec admonens eum, sciens quia subversus est. Qui videlicet, semel bisque correptus, audito errore suo, non vult corrigi, errare æstimat corrigentem ; et e contrario se ad pugnas et jurgia verborum parans, eum vult lucrifacere, a quo docetur. Qui ergo hujusmodi est, id est tam perversi erroris, et tam pravæ obstinationis, subversus est, id est a contemplatione supernorum versus ad superiora intuentia, ut terrena semper intueatur, et nihil nisi terrenum et infernum (sic) sapiat ; et delinquit, id est derelinquit magis ac magis veritatem, cum sit proprio iudicio condemnatus, id est corpore simul et anima damno sempiternæ damnationis deditus. Qui propterea suo iudicio dicitur esse condemnatus, quia fornicator, adulter, homicida, et cæteri criminosi per sacerdotes de ecclesia propelluntur ; hæretici autem in se ipsos sententiam ferunt, suo arbitrio de ecclesia recedentes. Quæ recessio, propriæ conscientie videtur esse damnatio. Inter hæresim autem et schisma hoc distat, quod hæresis perversum dogma habeat, schisma vero propter episcopalem dissensionem ab ecclesia se separet. Nullum tamen schisma est, quod non sibi aliquam confingat hæresim, ut recte ab ecclesia recessisse videatur.

« Cum misero ad te Artemam aut Tychicum, festina venire ad me Nicopolim. Ibi enim statui hyemare. Zenam legis peritum et Apollo sollicito præmitte, ut nihil illis desit. Discant autem et nostri bonis operibus præesse ad usus necessarios, ut non sint infructuosi. »

Hæc interim quæ scribo, conserva, et cum misero ad te Artemam vel Tychicum, tunc festina venire ad me Nicopolim, ut et alibi prædices, quia ibi statui, id est firmiter proposui hiemare, id est in hieme morari. Dictum est in exordio istius epistolæ : Hujus rei gratia reliqui te Cretæ, ut ea quæ desunt corrigas, et constituas per civitates presbyteros (supra i), ut quia Cretenses nuper crediderant, reco-

dente Paulo, et ad alias ecclesias proficiscente, non dimitterentur orphani, sed haberent apostolicum virum, qui ea quæ videbantur deesse, corrigeret. Quia ergo post fundamentum aliarum ecclesiarum necessarius erat Titus, qui ædificium substrueret, scribit ei ut cum Artemam vel Tychicum, unum scilicet e duobus qui secum fuerant, Cretam misisset, qui impleret locum ejus, ipse Nicopolim veniret, ibi se hiematurum contestans. Ex quo paternos affectus Pauli in Cretenses, a quibus idololatriæ semina primum pullulaverant, probamus. Necessarium habet Titum in Evangelii ministerium, tamen non eum ante ad se vult venire, nisi in locum ejus Artemas vel Tychicus successor advenerit, cujus doctrina et solatio Cretenses confoveantur. Nicopolis ipsa est, quæ ob victoriam Augusti, quod ibi Antonium Cleopatremque superaverit, nomen accepit : νικίπολις videlicet Græce, quasi victoriæ civitas dicitur Latine. Dixi venias ad me et antea præmitte Zenam legis peritum, et Apollo ita sollicito ut nihil desit illis, id est ut nullis careant necessariis, sed secum afferant quæcunque illis necessaria, quoniam non est mihi facultas procurandi eos. Hic innuit se pauperem esse, nec terrenis rebus colligendis inhare. De hoc Apollo dictum est Corinthiis : « Unusquisque vestrum dicit : Ego quidem sum Pauli, ego autem Apollo, ego vero Cephæ (I Cor. i; Act. xviii). » Fuit autem vir Alexandrinus ex Judæis, valde eloquens et doctus in lege, episcopus Corinthiorum, quem propter dissensiones quæ in Corintho erant, ad vicinam insulam Cretam, cum Zera legis doctore putandum est transfretasse, et Pauli epistola dissensionibus Corinthiorum temperatis, rursus Corinthum remeasse, Zenam vero legis peritum vel doctorem, de alio Scripturæ loco, qui fuerit, non possumus dicere, nisi hoc tantum, quod ipse apostolicus vir fuerit, obtinens id operis, quod Apollo habuerit Christi ecclesias extruendi. Præcipit itaque Tito, ut quoniam de Creta ad Græciam navigaturi erant, non eos faciat marsupiiis indigere, sed habere ea, quæ ad viaticum necessaria sunt. Et quia poterat suboriri occulta responsio, ut non tam Titus, quam quicumque epistolæ lector hoc diceret : Et unde Tito ut viaticum non habentibus largiretur? solvit hanc quæstionem, et quasi nihil sibi opponatur elidit, dicendo : Discant autem et nostri bonis operibus præesse ad usus necessarios, ut non sint infructuosi. Nostros, suos vocat, qui in Christum crediderunt ; qui, quia Christi erant, recte et Pauli et Titi appellari merebantur, habentes videlicet victum et vestitum, his contenti erant. Et ne forsitan vel epistolam Pauli (I Tim. vi), vel præceptum Titi facile contemnant, infructuosos vocat, quicumque evangelistis non ministraverint. Non sint, inquit, infructuosi. « Omnis enim arbor quæ non facit fructum bonum, excidetur, et in ignem mittetur (I Matth. iii). » Qui ergo sanctis prædicatoribus necessaria non vult tribuere, arbor infructuosa est, et ob suam sterilitatem combustionem digna. Littera

sic legitur : Illos præmitte. Sed et nostri, id est illi A quos ego ad Christum converti, et tibi diutius instruendos reliqui, discant te docente, præesse bonis operibus eorum ad usus necessarios, id est parati esse semper ministrare prædicatoribus eorum quæ necessaria sunt. Vel discant præesse, id est cæteros prævenire in bonis operibus, factis ad necessarios usus prædicatorum, ut non sint infructuosi, non ministrando eis necessarios sumptus.

« Salutant te qui mecum sunt omnes. Saluta eos, qui nos amant in fide. Gratia Dei cum omnibus et vobis. Amen. »

Salutant, inquit te, id est salutem tibi imprecantur, omnes qui sunt mecum. Vel solita consuetudine usus est, ut Titum ab omnibus qui secum erant, diceret salutari, vel certe proprie in Titum, quod B talis esset ut amorem eorum qui cum Paulo erant, omnium mereretur. Magna videlicet est laus Titi, per Paulum ab omnibus salutari. Illi, inquit, te salutant, et tu ex nostra parte, *saluta eos qui apud Cretam, nos amant in fide*, non in carne. Neque enim omnis qui amat, amat in fide, sed multi sunt

qui amant absque fide, amant quippe et matres filios, sed non amant in fide, et uxores maritos, sed amor ille non fidei est. Sola sanctorum dilectio in fide diligit intantum, ut etiam si ille qui diligitur, in fide non sit, tamen sanctus in fide eum diligit. Ideo enim in fide diligit, quia credit in eum, qui pollicitus est se pro expletione mandati retributurum esse mercedem; et infidlem quem diligit ea intentione diligit, ut efficiatur fidelis. Deinde Tito et cæteris qui cum eo erant, imprecat gratiam Dei, dicens : *Gratia Dei cum omnibus vobis sit. Amen.* Et quomodo Isaac patriarcha benedixit filium suum Jacob (*Gen. xxvii*), et ipse Jacob duodecim patriarchas (*Gen. xlix*), Apostoli quoque ingredientes domum dicebant : « Pax huic domui (*Math. x*) ; » et si digna erat domus, requiescebat pax Domini super eam (*Luc. x*) ; si vero se exhibebat indignam, revertebatur ad eos qui jam fuerant imprecati : et nunc in fine epistolæ suæ Apostolus gratiam credentibus imprecat, quæ cum voto habebat effectum, et erat in potestate credentium, si talem se benedictus, qualem benedicens imprecabatur, præbere voluisset.

IN EPISTOLAM AD PHILEMONEM.

ARGUMENTUM.

Philemoni familiares litteras mittit Apostolus a Romano carcere, pro servo ejus Onesimo rogans, quia rem ipsius furatus fuerat, et ab eo ne comprehenderetur, Romam fugerat; sed ibi familiaritatem Apostoli consecutus, baptismum Christi perceperat, et in tantum se correxerat, ac doctrinam apostolicam didicerat, ut idoneus Christi prædicator efficeretur. Ideoque veniam a Philemone intendit illi Apostolus impetrare, remittens eum cum hac epistola.

CAPUT UNICUM.

« Paulus victus Christi Jesu, et Timotheus frater, Philemoni dilecto et adjutori nostro, et Appiæ sorori charissimæ, et Archippo commilitoni nostro, et ecclesiæ quæ in domo tua est : D Gratia vobis et pax a Deo Patre nostro, et Domino Jesu Christo.

Paulus victus Jesu Christi scribit Philemoni. In eo quod nomen suum præmittit celeberrimum, innuit ei quod tanto viro denegare non debeat quod expetit. Apostolum vero se non dicit, quia cum impetrare veniam intendat, verba tantum blandientia oportet eum ponere, non nomen auctoritatis præferre. Non imperat, sed orat. Majoris tamen videtur supercilii, victum Jesu Christi se dicere, quam apostolum (*Act. v*). Gloriantur enim apostoli, quod digni fuerant pro nomine Jesu Christi contumeliam pati. Sed neces-

saria est auctoritas vinculorum. Rogaturus enim pro Onesimo, talis rogare debuit, qui posset impetrare quod posceret, et mentione suorum cruciatuum Philemonem ad misericordiam flecteret, ne et dolorem super dolorem adderet, si veniam Onesimo denegaret. Non omnis autem qui victus est, Jesu Christi victus est; sed ille tantum, qui pro Christi nomine, et pro ejus confessione vincula patitur, sicut sanguis effusus ille tantummodo martyrem facit, qui pro Christi nomine funditur. Scribit igitur ad Philemonem Romæ victus in carcere, quo tempore videntur ad Philippenses et Colossenses et Ephesios epistolæ esse dictatæ. Ad Philippenses illa ex causa primum (*Philip. iv*), quod cum solo Timotheo scribit, quod in hac epistola facit. Dehinc quod vincula sua manifesta dicit facta pro Christo in omni prætorio. Quod sit autem prætorium in ipsius epistolæ siue significat. Salutant vos omnes sancti, maxime autem qui de domo Cæsaris sunt. A Cæsare videlicet missus in carcerem, notior familiæ ejus factus, persecutoris domum Christi fecit ecclesiam. Porro et ad Colossenses principium est simile : « Paulus apostolus Jesu Christi per voluntatem Dei, et Timotheus frater (*Coloss. i*) . » Et in fine dicit : « Memores estote vinculorum meorum (*Coloss. iv*) ; » et idem Onesimus qui nunc Philemoni commendatur, etiam perlator ejusdem epistolæ fuit. Sic videlicet legimus : « Quæ circa

me sunt, omnia vobis nota faciet Tychicus charissimus frater, et fidelis minister et conservus in Domino, quem misi ad vos ad hoc ipsum, ut cognoscat quæ circa vos sunt, et consoletur corda vestra, cum Onesimo charissimo et fideli fratre, qui est ex vobis (*ibid.*). » Hic autem Philemon, ad quem hæc epistola scribitur, Onesimi dominus est, imo frater esse cœpit in Domino, et ad Colossenses refertur quod Onesimus ex eis sit, unde ratio nos ipsa et ordo deducit, quod et Philemon Colossensis sit, et eo tempore communem ad omnem ecclesiam Onesimus epistolam tulerit quo privatas et sui commendatrices ad dominum litteras sumpserat. Est et aliud iudicium, quod in hac eadem epistola et Archippus nominatur, cui hic cum Philemone scribitur: « Dicit, inquit, Archippo: Vide ministerium quod accepisti in Domino, ut illud impleas (*ibid.*). » Quod est ministerium, quod Archippus accepit a Domino? ad Philemonem legimus, « et Archippo commilitoni nostro; » ad Ephesios etiam scribit se vincetum in Domino (*Ephes.* III. VI), et in fine dicit: « Ut sciat quæ circa me sunt, omnia nota vobis faciet Tychicus charissimus frater et fidelis minister, quem misi ad vos in hoc ipsum, ut cognoscatis quæ circa me sunt, et consoletur corda vestra (*Coloss.* IV). » Tychicus autem is est, qui et ad Colossenses cum Onesimo mittitur; et eo tempore Onesimum habuit comitem, quo Onesimus ad Philemonem litteras perfererat. In quarum principio Paulus sibi Timotheum adjungit, ut epistola majorem haberet auctoritatem, quæ non ab uno scriberetur, et Philemon non solum propter Apostolum, sed propter Timotheum, qui sibi familiaris erat, faceret quod rogabatur. Paulus et Timotheus frater scribunt *Philemoni dilecto*, et quia dilectus est ab eis, debet eorum gratia concedere veniam Onesimo. In Græco tamen non habetur *dilecto*, sed: diligibili. Inter dilectum autem et diligibilem hoc distat, quod dilectus appellari potest et ille, qui dilectionem non meretur; diligibilis autem is tantum, qui merito diligitur. Denique et inimicos nostros diligere præcipimur (*Matth.* V; *Luc.* VI), qui sunt dilecti, sed non diligibiles. Amarus quippe illos, non quia amari merentur, sed quia Dominus hoc præcepit. Philemon vero et dilectus et diligibilis est, quia et diligitur, et diligi meretur. Philemoni, inquit, dilecto et adjutori nostro, id est per suam prædicationem adjuvanti nos ad disseminandum Christi evangelium; et ideo dilectus est a nobis, quia in eodem sanctæ prædicationis opere quo et nos laborat. et *Appiæ sorori charissimæ* non habenti in se falsæ aliquid et fictæ germanitatis; et *Archippo commilitoni nostro*, quem arbitror cum Paulo et Timotheo contra adversarios pro Christi nomine dimicantem, existisse victorem; et propterea nunc commilitonem dicit, quod in eodem certamine belloque superaverat, vel quod adhuc commilitaret il-

lis in prædicatione assidua et hostium repressione. Illud quod ad Galatas scribens Apostolus ait (*Galat.* III), in Christi fide nihil referre, gentilis sit aliquis an Judæus, vir an mulier, servus an liber, etiam in hoc loco perspicuum fit. Inter duos quippe viros apostolicos, inter cooperatorem Pauli et commilitonem ejus, medium Appiæ nomen inseritur, ut tali ex utroque latere fulta comitatu, non videatur ordinem sexus habere, sed meriti. Sunt qui intelligant Appiam conjugem esse Philemonis, et Archippum ejus filium. Quod satis videtur congruum, ut scilicet Philemoni tanquam patrifamilias principaliter mittatur epistola, deinde Appiæ uxori ejus et Archippo filio ejus, necnon *et ecclesiæ*, id est convocationi fidelium, *quæ est in domo ejus*, id est in familia ipsius, vel quam ipse pro Christi nomine pascit et tenet in domo sua. Uxorem et filium, et domesticam ecclesiam ideo salutatur Apostolus, ut omnes pro Onesimo interveniant, et ei ex corde dimittant, quia et ipsi ab illo offensi fuerant. *Gratia*, inquit, *et pax sit vobis a Deo Patre et Domino Jesu Christo*. Gratia est, qua nullo merito, nulloque opere salvamur; pax qua reconciliati Deo per Christum sumus. Sed quoniam a Patre et a Christo gratia et pax rogatur, una Filii Patrique natura esse vel potentia monstratur, cum id potest Filius præstare quod Pater, et id dicitur Pater præstare quod Filius. Hucusque Paulus et Timotheus Philemoni et cæteris, hinc jam solus Paulus soli Philemoni usque ad finem epistolæ loquitur.

« Gratias ago Deo meo, semper memoriam tui faciens in orationibus meis, audiens charitatem tuam et fidem, quam habes in Domino Jesu, et in omnes sanctos, ut communicatio fidei tuæ evidens fiat in agnitionem omnis boni, quæ in nobis est in Christo Jesu. »

Multipliciter laudat Philemonem, ut postmodum facilius cum flectat ad concedendum quod rogabit. *Gratias*, inquit, *ago* et cætera, quasi dicat: O Philemon, ignoscere debes Onesimo, nec jam ullum rancorem vel odium retinere contra eum in corde tuo, quoniam es egregiæ charitatis et fidei; unde *gratias ago Deo meo*. Quomodo enim tam charitativus vir charitatem suam non extendet usque ad servum bene correptum? Aut quomodo tam fidelis non indulget illi, qui eandem fidem jam habet? *Gratias ago* pro te Deo. Deo dico, meo, id est quasi proprio, quoniam speciali quadam excellentia præ cæteris illi servio. Gratias illi ago *semper memoriam tui faciens in orationibus meis*. Ambiguum est utrum gratias agat Deo suo semper, an memoriam Philemonis faciat in orationibus suis semper. Et utrumque intelligi potest. Qui enim præcipit aliis ut in omnibus gratias agant Deo, nullis angustiis poterat concitari, ut gratias semper Deo ipse non referret. Si autem pro sanctis et melioribus quibusque semper orabat, credibile est eum pro Philemone semper orasse, ut fides ejus et charitas,

Christi misericordia servaretur. *Gratias*, inquit, **A** *ago semper*, vel semper sum *memoriam tui faciens in orationibus meis*, id est quotiescunque oro pro me, intermisceo et orationem pro te. Gratias ago, audiens, id est quoniam frequenter audio *charitatem tuam et fidem, quam habes in Domino Jesu, et in omnes sanctos ejus*. Ob hoc enim grates refero, et orationes pro te facio, quoniam sæpe narratur mihi te habere charitatem in Domino Jesu, qua diligis eum super omnia; et in omnes sanctos ejus, quos tanquam teipsum diligis, ideoque debes et Onesimum diligere, quia jam sanctus ejus est. Fidem quoque habes in Domino Jesu, et in sanctis ejus, juxta quod in Exodo legimus (*Exod. xiv*), quia credidit populus Deo et Moysi servo ejus. Quicumque credit Deo, aliter ejus fidem recipere non valet, nisi credat et sanctis ejus, id est prædicatoribus et Scripturarum sanctarum auctoribus. Nec est in Deum vera dilectio et fides, quæ in ministros ejus odio et infidelitate tenetur. Talem habes charitatem et fidem, *ut communicatio fidei tuæ fiat evidens* in bonis operibus. Vel ideo pro te oro, ut communicatio fidei tuæ, id est quod fides tua credit omnia quæ habes, debere sanctis omnibus esse communia. Fiat evidens, id est exterius videatur in opere, ut quod intus credit, foris demonstret in operis executione. Et hoc faciat, proficiens *in agnitionem omnis boni*, ut scilicet bene credendo et bene operando ad hoc perveniat, ut omne bonum prout in hac vita possibile est, agnoscat, id est intelligat et a malo discernat, et quale sit sciat. Sunt enim plerique simplicium, qui faciunt opera justitiæ, et non habent eorum quæ ipsi operantur scientiam. Sed tu bona cuncta quæ feceris intellige, ut communicatio fidei tuæ fiat evidens in agnitionem omnis boni; boni dico, existentis *in Christo Jesu*. Quantis gradibus, quantisque profectibus apostolicus in altiora se sermo tendit? Habet quispiam charitatem et fidem in Deum et in sanctos ejus, sed forsitan non æquali eam in omnes lance communicat. Et communicat forsitan in omnes, sed opere non explet voluntatem. Implet aliquis et opere, sed gestorum suorum perfectam non valet habere notionem. Sit alius quoque qui et opus habeat et scientiam, sed non habet **D** omnis boni. Multa enim juste, mansuete, studioseque perpetrans, impar est suis in aliqua parte virtutibus. At non talis Philemon, habet quippe communicationem operatricis fidei et charitatis evidentem in Deum et in omnes sanctos ejus, in agnitionem omnis boni. Quæ scilicet agnitio cum in apostolis sit, non eam putemus ob id tantum esse perfectam, quod similis sit; sed in eo totam esse, quia Christi est: ut quidquid boni et in Philemone laudatur et de apostolorum exemplo sumitur, inde bonum sit, quia de Christi fonte ducatur.

« Gaudium enim magnum habui et consolationem
« in charitate tua, quia viscera sanctorum requie-

runt per te, frater. Propter quod multam fiduciam
« habens in Christo Jesu imperandi tibi, quod ad
« rem pertinet, propter charitatem magis obsecro,
« cum sis talis ut Paulus senex, nunc autem et
« victus Jesu Christi. Obsecro te pro meo filio,
« quem genui in vinculis, Onesimo, qui tibi aliquan-
« do inutilis fuit, nunc autem et mihi et tibi utilis,
« quem remisi tibi. Tu autem illum ut viscera mea
« suscipe. »

Plenius inculcat et docet quia dixerat: « Gratias ago Deo meo semper memoriam tui faciens in orationibus meis. » Ideo, inquit, gratias ago, quoniam audita charitate tua, quam in sanctos exerceas, *habui in ea gaudium*, non qualecunque, sed *magnum et consolationem*. Desolationem videlicet quamdam et tristitiam habueram, dum vererer ne si ad te reverteretur Onesimus, aliquid mali a te pateretur. Sed audito quod in omnes sanctos charitas tua redundaret, consolationem et gaudium habui, credens quod et Onesimo qui jam unus ex sanctis est, veniam dares. Ideo gaudium et consolationem *in tua charitate percepi quia tanta est, quod viscera*, id est corda sanctorum, quos frequenter hospitio suscepisti, *requieverunt per te*, o bone frater, id est tanta illis beneficia foris exhibuisti, ut etiam internus eorum affectus in bonitate tuæ charitatis requiesceret. Requiescunt videlicet mens et voluntas sanctorum per eos, qui pietatis opera sectantur, sicut et affligitur per illos, qui perverse agunt, et dignum erat agere gratias Deo pro charitate Philemonis, qui internum cordis affectum et profundos animi recessus sanctorum recipiendo refecerat. Hanc videlicet habet apostolus consuetudinem, ut semper viscera vocet, volens plenam mentis ostendere charitatem. Unde gaudens cum gaudensibus (*Philip. iv*), et cum his qui requieverant, reffectum esse se credens, habet lætitiā non transitoriam et levem, et quæ fortuito possit accidere, sed magnam et prout erat in Philemone charitas eminentem, quam augebat consolatio super ejusdem Philemonis charitate, descendens a Patre misericordiarum et Deo totius consolationis (*II Cor. i*). Hinc ad rem venire paulatim incipit, subdendo: *Propter quod*, id est quia sæpe viscera sanctorum per te requieverunt, ego *habens in Christo Jesu*, pro quo tanta facis *multam fiduciam imperandi tibi*, id est multam certitudinem quod *si voluero* possim imperare tibi illud, *quod pertinet ad rem*, id est ad utilitatem tuam et meam, *propter charitatem* nolo imperare, id est nolo te imperiosa auctoritate cogere, sed intermisso imperio *magis*, id est potius obsecro, id est per sacra te precor, scilicet per fidem, per charitatem tuam te rogo, ut facias quæ postulo. Obsecro, inquam, te, *cum sis talis ut Paulus senex*, id est quia es talis qualis ego Paulus senex, id est tam propectus ætate corporis sicut ego; et ideo non impero tibi, sed te obsecro, quia senes non sunt imperio cogendi, sed obsecratione rogandi, sicut in alia epistola dictum est: « Seniore *ne increpa-*

veris, sed obsecra ut patrem. (1 Tim. v.) » In hoc A ipso senem Apostolus se nominat, et illam in senectute sibi æquiparat, ne senem offendere negando quod possit debeat, cum et ipse sit senex, liquido notat. Senex, inquit, sum, nec tantum senex, sed etiam nunc vinctus sum, id est catenis in senectute constrictus, ideoque magis annuere debes petitioni meæ, ut sic quodammodo lenias vinculorum meorum aggravationem; vinctus, inquit, sum et vinctus Jesu Christi, id est pro ejus Evangelio vinculis mancipatus. Et propterea non me contristes, ne et illum offendat cujus vinctus sum. Multis in Philemonem laudibus ante præmissis, cum sit talis res pro qua rogaturus est, quæ et præstanti sit utilis et roganti, poterat Paulus magis imperare quam petere. Et hoc ex fiducia illa veniebat, quod qui B tanta ob Christum opera perpetraverat, utique impar sui in cæteris esse non poterat. Sed vult magis petere quam jubere grandi potentis auctoritate proposita, per quam et apostolus supplicat, et senex, et vinctus Jesu Christi. Totum autem pro quo rogat, hoc est, sicut et in exordio prælibavimus: Onesimus servus fugam furto cumulans, quædam ex bonis domini sui tulit, et pergens ad Italiam, ne e proximo facilius posset apprehendi, pecuniam domini prodige dissipavit. Hic igitur, cum ob confessionem Christi Paulus esset in carcere, credidit in Dominum Jesum, et ab eo baptizatus, digna poenitentia maculas vitæ prioris abstersit, in tantum ut is apostolus conversionis ejus testis fieret, qui C quondam Petrum increpaverat non recto pede in Evangelii veritate gradientem (Galat. n). Quantum igitur ad peccatum et ad facinus pertinet, quo Dominum læserat, veniam non meretur. Quantum vero ad Apostoli testimonium, qui scit eum plene esse conversum, grandi pondere premitur qui rogatur ut veniam non neget, qui e servo fugitivo atque rapto minister Apostoli factus erat. Quod autem aliud habebat Apostolus ministerium, nisi evangelii Jesu Christi, ut non quasi a domino, sed quasi a converso et coevangelista ignosceretur ei, qui servus esset Christi, similiter et minister? hoc est itaque quod rogat, subdens: 'Obsecro te pro meo filio, et cætera. Quasi dicat: Dixeram, propter charitatem magis obsecro, et non manifestaveram pro D quo, vel quid obsecrem te. Sed nunc scias, quia obsecro te pro filio meo, id est proprio et quasi singulariter dilecto, quem spiritaliter genui in vinculis positus. Et quia ille vincula mea non abhorruit, sed animosius fidem suscepit, condonandum est ei quod prius erravit. Modo primum nominat ipsum filium, pro quo postulat, præmissis multiplicibus causis, cur debeat impetrare quod pro illo rogat, scilicet pro Onesimo, inquit, obsecro. Et cur pro illo sit obsecrandum, subjungit: Qui tibi aliquando inutilis fuit. Ideo, inquit, pro illo obsecro, quia aliquando, id est olim fuit tibi inutilis, id est, non quærens utilitatem tuam, sed damnum, cum pecuniam tuam furaretur, et fugeret. Sed nunc est uti-

lis tibi et mihi ideoque debes illi ignoscere quem remisisti tibi ut a te veniam peteret, et tibi satisfaceret, tuoque servitio deditus esset. Domino tantum antea inutilis fuit. Neque enim servus fur atque fugitivus alteri nocuit nisi domino suo. Nunc e contrario utilitas compensatione, qua et ipsi domino et Paulo utilis est, cæterisque per Paulum, plus charitatis meretur quam odii ante meruerat. Unde ait: Qui tibi aliquando inutilis fuit. Tibi, inquit, soli, non cæteris, nunc autem tibi et mihi utilis. Utilis domino suo, quia posset Paulo servire pro domino suo. Paulo vero in eo utilis, quia illo in carcere vinculisque detento, posset in Evangelio ministrare, id est, Evangelium pro illo foris prædicare. Simul autem admirandum de magnanimitate Apostoli et in Christum mente ferventi. Tenetur carcere, vinculis stringitur, squalore corporis, charorum separatione, pœnalibus tenebris coarctatur, et non sentit injuriam, non dolore cruciatur, nihil novit aliud nisi de Christi Evangelio cogitare. Sciebat servum, sciebat fugitivum, sciebat aliquando raptorem ad Christi fidem esse conversum. Grandis laboris est, talem hominem in eo perseverare quod cœpit. Idcirco filium suum et filium vinculorum suorum et ministrum Evangelii in vinculis constituti inculcat ac replicat, ut Philemon illo prudenter et dispensatorie tantum in præfatione laudatus, non auderet negare, ne suis laudibus videretur indignus. Remisi, inquit, illum tibi, id est iterum misi ad te unde discesserat, quoniam alieno servo nolebam abuti. Sed tu non repellas eum vel affligas, sed suscipe, id est sursum accipe illum, hoc est, honorifice illum accipe, illum dico, viscera mea, hoc est quod supra diximus viscera significare internum cordis affectum, et plenam ex animo voluntatem, cum totum quidquid in nobis est, suscipitur a rogante. Alioquin autem omnes liberi viscera sunt parentum.

« Quem ego volueram mecum detinere, ut pro te mihi ministraret in vinculis Evangelii. Sine consilio autem tuo nihil volui facere, uti ne velut ex necessitate bonum tuum esset, sed voluntarium. »

Remisi illum ad te quem primo volueram detinere mecum ego tanti nominis et auctoritatis apostolus, qui satis auctoritate mea possem illum detinere. Ad hoc, inquam, eum detinere volueram, ut mihi necessaria ministraret pro te, id est loco tui qui mihi solebas ministrare, ut illud servitium quod ipse mihi impenderet, tibi imputarem et tu inde fructum æternæ remunerationis colligeres. Mihi dico, in vinculis posito, et ideo multum indigenti ejus ministerio, in vinculis dico Evangelii, id est, quæ pro Evangelio patior, non pro crimine meo. His de causis volueram eum detinere. Sed postea mecum retractans, nihil de servo tuo volui facere sine tuo consilio, id est sine tuo nutu et communi voluntate, uti ne velut ex necessitate, id est ut non quasi ex necessitate esset bonum tuum, id est ut non esset invitum bonum tuum sed voluntarium, id est ex tua

voluntate procedens. Bonum Philemonis erat ministerium quod servus ejus pro eo exhibebat Apostolo. Qui scilicet Apostolus poterat et absque voluntate Philemonis Onesimum sibi in ministerio retinere. Sed si hoc sine ipsius voluntate fecisset, bonum quidem erat, sed non voluntarium. Quod autem non erat voluntarium, alio genere arguebatur non esse bonum. Nihil quippe bonum dici potest, nisi quod ultroneum est. Ex quo apostoli considerata prudentia, quod idcirco fugitivum servum remittit ad dominum, ut prosit domino suo, qui prodesse non poterat, si domino teneretur absente et invito. Potest etiam ex hoc loco solvi, quod a plerisque semper quaeritur, quare Deus hominem faciens ad suam imaginem et similitudinem, facere eum ita noluit ut malus esse non posset. Si enim Deus voluntarie, et non ex necessitate bonus est, debuit hominem faciens ad suam imaginem et similitudinem, facere ut ipse voluntarie et non ex necessitate bonus esset. Qui autem asserunt ita eum debuisse fieri, ut malum recipere non posset, hoc dicunt: Talis fieri debuit, qui necessitate bonus esset et non voluntate. Quod si talis factus esset, qui bonum non voluntate, sed necessitate perficeret, non esset Deo similis, qui ideo bonus est, quia vult, non quia cogitur. Ex quo manifestum est, rem eos postulare contrariam. Nam ex eo quod dicunt: Debuit homo similis Deo fieri,

illud petunt, ut liberi fieret arbitrii sicut ipse Deus est. Ex eo autem quod addunt: Talis debuit fieri, qui malum recipere non posset, — dum necessitatem ei boni important, illud, ut homo similis Deo non fieret, volunt. Solvitur ergo ista quaestio: Potuit Deus sine voluntate ejus hominem facere bonum. Porro si hoc fecisset, non erat bonum voluntarium, sed necessitatis. Quod autem necessitate bonum est, non est bonum, et alio genere malum arguitur esse; igitur proprio arbitrio nos relinquens, magis ad suam imaginem et similitudinem fecit. Similem enim esse Deo absolute bonum est.

«Forsitan enim ideo discessit ad horam a te, ut in aeternum illum reciperes, jam non ut servum, sed pro servo charissimum fratrem maxime mihi. Quanto autem magis tibi et in carne et in Domino?»

Nonnunquam malum occasio fit bonorum, et hominum prava consilia Deus vertit ad rectum. Quod dico, manifestius exemplo fiet: «Joseph fratres sui, stimulis invidiae concitati, vendiderunt Ismaelitibus (Gen. xxxvii); » hoc initium patri et fratribus et toti Aegypto bonorum omnium fuit. Denique ipse fratribus postea dixit: «Vos cogitastis de me malum, et Deus vertit illud in bonum (Gen. i.). » Simile quid et in Onesimo possumus intelligere, quod mala principia occasiones fuerint bonae rei. Si videlicet dominum non fugisset, nunquam venisset Romam, ubi erat Paulus vinculus in carcere. Si Paulum in vinculis non vidisset, fidem Christi non recepisset. Si Christi fidem non habuisset, nunquam Pauli

A effectus filius in opus Evangelii mitteretur: ex quo gradatim colligitur, quod ideo minister Evangelii factus est Onesimus, quia fugit a domino. Et hoc est quod dicitur: Debes illum honeste et libenter suscipere, quia *forsitan ideo ad horam*, id est ad breve tempus *discessit a te, ut in aeternum illum reciperes*. Pulchre autem addens *forsitan*, sententiam temperavit. Occulta quippe sunt judicia Dei, et temerarium est quasi de certo pronuntiare quod dubium est. Forsitan, inquit, ideo discessit, caute, timide, trepidanter loquens, et non totum fixo gradu, ne si non posuisset *forsitan*, omnibus servis fugiendum esset ut apostolici fierent. Forsitan idcirco discessit a tuo servitio non diu, sed ad horam, id est quasi ad unius horae spatium, ut pro tam brevi recessione reciperes illum in aeternum, id est aeternaliter tecum permansurum, qui tantummodo temporaliter erat tecum mansurus nisi recessisset; hoc est, fortasse Deus praevidit et eum a te ad horam, id est ad breve tempus discedere secreto consilio voluit, ut tu qui non eras illum aeternaliter tecum habiturus, si non discederet, ut ad me perveniens fidem acciperet, reciperes illum habitaturum tecum non horarium sed aeternum. Cum enim eandem fidem ac religionem teneat quam tu, hic et in futuro tecum semper erit, qui perenniter a te separandus erat et suppliciis mancipandus, si non ad horam discessisset, ut infidelitatem exueret. Licet haec Apostolus quasi dubitative dixerit, tamen ita veraciter completa sunt ut pronuntiavit. Nam Onesimus iste, sicut ex litteris patris didicimus, factus est postea pontifex et martyr gloriosus. Reciperes, inquam, in aeternum, *jam*, id est post acceptum libertatis spiritum in baptismo, non ut servum sicut prius, sed pro servo fratrem, quia coepit eundem in caelo tecum habere patrem. Fratrem non qualemcunque, sed *charissimum* cunctis ecclesiae filiis, qui sanctitatem quam nunc habet noverunt; sed *maxime*, id est multo plus quam aliis est charissimus *mihi*, qui magis novi quos chariores aestimare debeam et qui magis hujus perfectam conversionem scio quam alii. Et mihi quidem pro sola spiritali fraternitate tam excellenter charus est, sed *quanto magis*, id est valde amplius debet esse tibi charissimus, et in

B
C
D
carne, id est respectu carnis, quia tibi carnale servitium debet, utpote servus, et in Domino, id est in respectu Domini, quia ejus per fidem factus est filius et regni ejus particeps est tecum futurus. In eo quod ait, ut aeternum illum reciperes, notanda est, quod nullus sit aeternus dominus servi sui. Potestas quippe ejus et utriusque conditio morte finitur. Onesimus vero ex fide Christi factus est aeternus aeterno Philemoni; et spiritu libertatis accepto, jam non servus, sed frater coepit esse de servo; frater, pro sanctitate sua charissimus, frater aeternus aeterno et ipsi apostolo et domino suo, cui Onesimum ut carnis ante conditio, illum postea spiritus copulabat. Et tunc quidem quando erat ei subjectus in carne, non erat ei junctus in Domino, nunc au-

tem et in carne junctus est, in Domino. Ex quo intelligimus, servum qui crediderit in Christum, si dominus ejus fidelis est, duplici lege eidem domino suo constringi, ut ei et carnis necessitate jungatur ad tempus, et in æternum spiritu copuletur.

« Si ergo me habes socium, suscipe illum sicut me. Si autem aliquid nocuit tibi aut debet, hoc mihi imputa. Ego Paulus scripsi mea manu, ego reddam, ut non dicam tibi, quod et teipsum mihi debes. Ita frater, ego te fruar in Domino, refice viscera mea in Christo. »

Quando quidem tam bene emendatus est Onesimus, et intantum factus est mihi charissimus, ergo suscipe illum reverenter sicut me, id est quam accurate, quam studioso hospitio et animo tuo me susciperes, si venirem ad te, sic illum suscipe, ita dico, si habes, id est si habere vis me socium, id est consortem et amicum. Aliter videlicet non ero tibi socius. Philemon Paulum socium habere cupiebat, et in Christum credens, tales utique volebat habere profectus, ut Paulo similis fieret, et ei communicaret in vinculis. Consideremus ergo quantum hic laudetur Onesimus, quantum profecisse monstretur, cum ita recipiendus sit ut apostolus, et sic dominus ejus ut Pauli debeat desiderare consortium. Breviter quod dicit, tale est : Si me vis habere consortem, habeto Onesimum, quem ego consortem et filium et viscera mea habeo. Quem si non susceperis, nec habere volueris, scias quod me habere non possis. Suscipe, inquam, illum sicut me. Sed si nocuit tibi aliquid destruendo ex rebus tuis, sicut vineam eradicando, vel domum incendiando, vel aliud aliquid tale committendo, quod sæpe faciunt fugitivi, aut si debet tibi aliquid, id est si quid pecuniæ tuæ secum tulit, quod debeat tibi restituere, hoc quod ille nocuit, vel debet imputa mihi, id est puta in me esse, non in illo nocumentum et debitum, ut ego reddam illud tibi pro Onesimo, sicut et Christus pro nobis in passione quod non debebat, exsolvit. Ego Paulus, qui tam famosi nominis sum, et tam probatus in veridica locutione, scripsi non per notarium, sed mea propria manu epistolam istam, in qua me redditurum promitto quod ille debet, ego videlicet reddam. Et hoc ita dico ut non dicam tibi aliud, quod juste possem dicere, scilicet quod debes mihi etiam teipsum, id est non solum tua, sed quod est majus, etiam teipsum mihi debes, ut si necesse fuerit, reddas mihi teipsum moriendo pro me, quoniam quidquid boni est in te, totum est per tūdem, quam didicisti a me; et ideo totum mihi debetur, quidquid bonorum est in te. Quod dicit, tale est : Quod Onesimus furto rapuit, ego me spondeo redditurum, hujus sponsonis epistola hæc et manus testis est propria, quam non solito more dictavi, sed mea manu ipse conscripsi. Crede igitur mihi, pro Onesimo pollicenti. Hoc autem dico quasi ad extraneum loquens. Cæterum si ad jus meum redeam, propter sermonem Christi quem tibi evangelizavi et Christianus effectus es, teipsum mihi debes. Quod si tu meus es, et tua omnia sunt mea. Si autem tua omnia mea sunt, Onesimus quoque qui tuus est, meus est. Poteram igitur eo uti ut meo, sed voluntati tuæ relinquo, ut mercedem habeas ignoscendo. Quod autem ait : Ego reddam, non de pecuniali, sed de spiritali redditione, id est de cœlesti remuneratione intelligendum est, scilicet quod suis intervenientibus impetraturus sit perpetuam a Domino retributionem spiritalium honorum pro temporali damno, quod pertulit ab Onesimo. Suscipe, inquam, illum sicut me, quia quod ille debet, ego spiritaliter reddam. Ita, frater, in illa cœlesti retributione ego te fruar, id est in te delectabor in Domino, id est in illa beatitudinis gloria quæ est sanctis in Domino. Et ideo nunc refice viscera mea, id est benigne refove Onesimum, et hoc age in Christo, id est in Christi charitate. Vel refice viscera mea, id est recrea internum affectum meum, et comple desiderium meum in Christo, dando veniam Onesimo, et honorifice jam illum habendo. Quod dicitur : Itc, frater, in Græco est quasi adverbium blandientis, sed in Latina lingua proprie non potest dici. Significat enim deprecantis affectum. Ego, inquam, te fruar in Domino. Cum homine in Deo fruatur, Deo potius quam homine fruatur; illo enim fruatur, quo efficitur beatus, et ad Deum se pervenisse lætabitur, in quo spem ponit ut veniat. Recte ergo dicit, ego te fruar in Domino, quod si non addidisset, in Domino, et tantum te fruar, dixisset, in eo constituisset spem beatitudinis suæ. Quanquam etiam vicinissime dicitur frui, cum delectatione uti. Cum videlicet adest quod diligitur, etiam delectationem secum gerat necesse est. Per quam si quis transierit eamque ad illum in quo permanendum est, retulerit, utitur ea; et abusive, non proprie dicitur frui. Si vero inhæserit atque permanserit, finem in ea ponens lætitiæ suæ, tunc vere et proprie frui dicendus est. Quod non est faciendum, nisi in illa Trinitate quæ est summum et incommutabile bonum. Apostolus itaque Philemone fruatur in Domino, habens eum secum in illa contemplatione Creatoris, in qua est perfecta consummatio delectationis et gaudium justorum. Qui et viscera sua Onesimum, quem et superius eodem nomine appellaverat, reficit vult per Philemonem. Et ambigue dictum est, utrum viscera Pauli in Christo Onesimus sit, an viscera Pauli Onesimus per Philemonem in Christo reficienda sint. Si superius accipere voluerimus, recte Pauli in Christo viscera dicitur Onesimus, quem in Christi vinculis genuit; si posterius, in Christo reficiendus est Onesimus a Philemone, ut ejus in Christo sermonibus erudiat.

« Confidens in obedientia tua scripsi tibi, sciens quoniam et super id quod dico, facies. »

Reficere debes viscera mea, nam ego confidens in obedientia tua, id est omnino fiduciam habens et certus existens, quia in hac re mihi obedies, sicut in cæteris semper obedire consuevisti, scripsi tibi de Onesimo, ut ignoscas ei et suscipias illum sicut me.

Hæc, inquit, scripsi tibi, *sciens quoniam et facies super id quod dico*, vel plus dabis quam peto, et ultra id quod rogo facies, atque amplius quam postulo concedes. Qui præsumit de eo quem rogaturus est, ipsa quodammodo præsumptione præjudicat quod rogat. Porro, si scit ille qui postulat, plusquam rogavit, rogatum esse facturum, in Deo majora petit, ut habeat rogatus spontaneam voluntatem et majorem ex præstatione mercedem. Si autem Philemon hoc ob hominis præceptum facit, quanto magis faciet ob dilectionem Dei? Unde et merito Apostoli voce laudatur, quod mandata ejus opere prævenit, et possit dicere: « Voluntaria oris mei complacent tibi, Domine (*Psal. cxviii*), » ut plus faciens quam ei præceptum est, vincat eos qui tantummodo imperata faciunt. Nam et virginitas idcirco majori præmio coronabitur (*I Cor. vii*), quia præceptum Domini non habet, et ultra imperata se tendit.

« Simul autem et para mihi hospitium. Nam spero per orationes vestras donari me vobis. »

Non solummodo suscipias Onesimum sicut me, sed *et mihi para simul hospitium*. Nam spero quod Deus adhuc per orationes vestras dabit me vobis, ut liberatus ab hoc carcere, revertar ad vos, et iterum vos aliosque doceam. Non puto tam divitem fuisse Apostolum et tantis sarcinis occupatum, ut præparato egeret hospitio; et non una contentus cellula, ædes amplissimas quæreret; sed ut dum eum exspectat Philemon ad se esse venturum, magis faciat quod rogatus est, ne forte cum venerit erubescat. Si autem hic non dispensatorie, sed vere quis æstimat imperatum, ut sibi hospitium præparet, apostolo magis quam Paulo hospitium præparandum est. Venturus enim ad novam civitatem prædicaturus crucifixum, et inauditum dogma delaturus, sciebat ad se plurimos concursuros. Et necesse erat primum ut domus in celebri esset urbis loco ad quem facile conveniretur; deinde ut ab omni importunitate vacua esset ac ampla, quæ plurimos caperet audientium, nec proxima spectaculorum locis, ne turpi vicinia detestabilis, postremo ut in plano potius esset sita, quam in cœnaculo. Quam ob causam cum æstimo et Romæ in conducto mansisse biennio, nec parva (ut reor) erat mansio, ad quam Judæorum turbæ frequenter confluebant. Spero, inquit, *per orationes vestras donari me vobis*, Filium patri Deus rogatus indulget, et frater sæpe oratione fratris servatur. Apostolus vero totius Ecclesiæ precibus conceditur, ob eorum qui eum audituri sunt utilitatem; et hoc donum non tam in eum dicitur esse, qui differtur a martyrio, ad martyrium paratus, quam in eos ad quos Apostolus mittitur. Quod autem crebro Paulus in carcere fuerit, et de vinculis liberatus sit, ipse in alio loco dicit: « In carceribus abundantius (*II Cor. xi*). » De quibus nonnunquam Domini auxilio, crebro ipsi persecutoribus nihil dignum in eo morte invenientibus, dimittebatur. Necdum enim super nomine Christiano seratus-consuta processerant, necdum Christianum

A sanguinem Neronis gladius dedicaverat; sed pro novitate prædicationis, sive a Judæis invidentibus, sive ab his qui sua videbant idola destrui, ad furorem populis concitatis, missi in carcerem, rursum impetu et furore deposito, laxabantur. Et hæc ita esse ut dicimus, apostolorum Acta testantur, in quibus et Agrippa loquitur ad Festum, potuisse dimitti Paulum si non appellasset Cæsarem (*Act. xxvi*); et Festus ad Agrippam, quia nullam invenerit causam præter quæstiones quasdam de religione propria, et de quodam Jesu quem Paulus vivere prædicabat. (*Act. xxv*). Ex quo animadvertimus et a cæteris iudicibus similiter eos potuisse dimitti id agente Domino, ut in toto orbe nova prædicatio disseminaretur, propter quod et nunc dicit Apostolus se sperare quod possit adhuc dari fidelibus per orationes eorum.

» Salutat te Epaphras concaptivus meus in Christo Jesu, Marcus, Aristarchus, Demas et Lucas, « adjuutores mei. »

Id quod principio dicebamus, quoniam ad Colossenses epistola eodem in tempore et per eundem esset scripta bajulum litterarum, quo et ad Philemonem quoque scripta est, etiam eorum qui salutantes inducuntur, nomina docent. Nam et in ipsa subscribitur: « Salutat vos Aristarchus concaptivus meus, et Marcus consobrinus Barnabæ, et Epaphras qui est e vobis servus Christi; » et paulo inferius: « Salutat vos Lucas medicus charissimus et Demas; et dicite Archippo: Vide ministerium quod accepisti in Domino, ut illud impleas. » Et: « Memores estote vinculorum meorum (*Colos. iv*). » Si autem ex eo aliquis non putat pariter scriptas, quod ad Colossenses pauca sint nomina quæ hic non ferantur ad scripta, sciat non omnes omnibus aut amicos esse, aut notos; et aliud esse, privatam ad unum hominem, aliud, publicam ad universam Ecclesiam epistolam fieri. *Salutat te* ergo, inquit, *Epaphras concaptivus meus in Christo Jesu*, de hoc Epaphra dictum est Colossensibus: « Cognovistis gratiam Dei in veritate, sicut didicistis ab Epaphra charissimo et conservo nostro, qui est fidelis pro vobis minister Christi Jesu, qui etiam manifestavit nobis dilectionem vestram in spiritu (*Coloss. i*). » C Quem et concaptivum suum in Christo dicit nunc Apostolus, quia cum eo Romæ tenebatur pro Christi Evangelio captus ac vinculis astrictus. Marcum vero quem subjungit, crederemus illum esse qui scripsit Evangelium, nisi ad Colossenses diceretur consobrinus Barnabæ, ideoque magis credimus hunc esse Marcum, pro quo inter Paulum et Barnabum fuerat olim dissensio, id est Joannem qui cognominatus est *Marcus*; et sic ex societate Barnabæ melioratum, ut dignus esset Paulo adhærere, qui quondam ab eo fuerat rejectus. Aristarchus autem, quem et ad Colossenses concaptivum suum Apostolus scribit (*Colos. iv*), Thessalonicensis erat, et comitatus est eum Hierosolymis ascendentem, atque inde cum eo ipse et Lucas Romam sunt missi, sicut et eccle-

siastica historia meminit. Demas vero ipse est, de quo ad Timotheum queritur Apostolus : « Demas me dereliquit, diligens hoc sæculum, et abiit Thessalonicam (II Tim. iv). » Qui fortasse postmodum pœnitentia ductus, et in Christo confortatus, rediit ad Apostolum, aut, si non est ad eum reversus, tunc constat hanc epistolam prius esse scriptam, quam scriberetur ad Timotheum secunda. Lucas autem medicus charissimus, ipse est frater ille gloriosus, « cuius laus est in Evangelio per omnes Ecclesias (II Cor. viii). » Qui Evangelium et Actus apostolorum Ecclesiis derelinquens, quomodo apostoli de piscatoribus piscium piscatores hominum facti sunt, ita de medico corporum in medicum est versus animarum. Cujus scripta quotiescunque leguntur in ecclesiis, toties ejus medicina non cessat. Hujus B autem epistolæ talis est terminatio :

« Gratia Domini nostri Jesu Christi cum spiritu
« vestro. Amen. »

Sicut a meliori parte hominis, id est capite dinumeratur populus Israel, dicente Scriptura, secundum capita eorum, ita in toto quidem homine et omni parte sanctorum gratia est Domini nostri Jesu Christi, sed a majori et meliori parte, id est spiritu per synecdochen de toto homine dicitur : Gratia Domini nostri Jesu Christi cum spiritu vestro. Amen. Cum autem in spiritu gratia Domini fuerit, totum facit hominem spiritualem, ut et caro spiritui serviat, et anima non vincatur a carne; et reducta simul in substantiam spiritalem, adhæreat Domino, quoniam qui adhæret Domino, unus spiritus est.

IN EPISTOLAM AD HEBRÆOS.

ARGUMENTUM.

Paulus in Italia positus, Hebræo sermone scripsit hanc epistolam et misit Judæis ad fidem Domini Jesu conversis, et in Judæa post veritatis agnitionem conversantibus, intendens principaliter eos in puritate fidei Christianæ confirmare, et a legalibus observantiis quibus adhuc detinebantur, prorsus avellere. Putabant enim fidem Christi solam sine admistione legalium cæremoniarum ad beatitudinis consecutionem nullatenus esse sufficientem, sed utrumque simul dicebant ad salutem esse necessarium. Nullum namque in fide Christi sine legali observatione, vel in legis observantia sine fide, dignum vitæ perpetuitate judicabant. Et apostolus eorum beatus Petrus permisit eos adhuc in legalibus cæremoniis vivere; timens ne, si carnales observantias illis omnino auferret, et ab operibus legis in quibus semper vixerant, removeret, potius a fide Domini Jesu recederent, quam legem desererent. Consideravit enim quod si ad fidem Salvatoris converterentur, atque post fidem et veritatis meritum inutilitas signorum et umbræ manifestaretur eis, facilius ab errore illo revocari possent, quam si primo auditu diceretur eis, ut a legis operibus omnino cessarent. Et quod tunc Petrus prævidit posse fieri, nunc Paulus aggreditur facere. Timebat enim ne fides eorum, quæ nimis imperfecta erat, et conversio ipsorum inanis fieret et superflua. Ideoque scribit eis per multas rationes de eminentia Christi et inutilitate legis, ad ultimum et de moribus instruit. Studet enim, ut dictum, est persuadere illis fidem Salvatoris sine carnalibus observantiis ad vitam æternam sufficientem esse, et ut ulterius carnalibus observantiis non insistant, sed in fide Christi justificationis et salvationis suæ fiduciam ponant. Quod autem hæc epistola superscriptionem solitam non habet, id est Pau-

lus apostolus, ista ratio est, quia præjudicatum Hebræis erat de Pauli nomine, ne dicta ejus susciperent; et idcirco prudenter declinavit, ne statim in principio Pauli nomine inspecto, ejus lectio repudiaretur; et quia a Domino omnipotente Paulus dicitur missus ad gentes præcipue, non ad Hebræos. Pro humilitate ergo Paulus, qui ad gentes fuerat destinatus, non scribit semetipsum Hebræis apostolum, vel propter honorem Domini, qui se missum dixerat ad oves domus Israel (Matth. xv), vel quia gentium videbatur apostolus, et non Hebræorum. Nam neque fidem, neque aliud quidquam illis contulerat. Interpretantur autem Hebræi transitores vel transeuntes. Et quicunque radicem cordis in amore præsentis mundi non plantaverunt, sed assiduis desideriis ad superna trans-eunt; qui peregrinationem terræ non diligunt pro habitatione patriæ, sed veram patriam inquirunt, ipsi sunt vere Hebræi, et ad se scriptam esse credant hanc epistolam. In qua Apostolus primum proponit audienda esse Verba Christi, conferendo cum prophetis, quia in eo locutus est Deus ut in prophetis, et major est eis, sic enim dicit :

CAPUT PRIMUM.

« Multifariam multisque modis olim Deus loquens
« patribus in prophetis novissime diebus istis locutus est nobis in Filio. »

Multifarium, id est multis locutionum generibus aliquando manifeste, aliquando obscure, aliquando proprie, aliquando figurate, aliquando per angelum, aliquando per occultam inspirationem, aliquando Hebraice, aliquando Chaldaice, aliquando blandiens, aliquando terrenis, locutus est Deus; et multis modis, id est diversis et variis actionum generibus, quia non solum dicta prophetarum, sed et omnia facta eorum prænuntiavere ea, quæ nostris temporibus

erant futura. Et quam varia sint et quam multa prophetarum gesta, quæ referuntur in Scripturis, quis facile noscat? Et in omnibus illis patrum gestis locutus est futura. Nam de verbis eorum quæ multa sunt, atque diverso et multiplici genere locutionum prolata, non est dubium quin ipse ea locutus sit. Ita ergo multifariam et multis modis et qualitatibus olim, id est in antiquis temporibus, loquens Deus patribus, qui nos carnaliter genuere, et fidem suam de Christo nobis reliquere. Et loquens eis in prophetis, quia ipse in cordibus eorum dixit, quidquid illi foras vel dictis vel factis locuti sunt hominibus. Nec vacat quod dicit, loquens olim, et jungit præsens cum præterito. Nam ea quæ locutus est patribus in prophetis, omnia nobis usque hodie loquitur in Scripturis, ut sicut ipsi, ita et nos credendo ea et opere complendo vitam consequamur æternam. Potest et de solis verbis intelligi, quod ait, multifariam multisque modis. Multifariam, id est multis locutionibus, multisque modis, id est multis locutionum qualitatibus, olim Deus Pater loquens patribus, qui in carne et in fide nos genuere; novissime, id est in fine temporum, quando jam alia non sequitur Dei locutio, quoniam in hac continetur omnis perfectio sanctitatis et justitiæ, diebus istis, id est tempore istorum hominum, qui adhuc in carne vivunt, locutus est nobis in Filio suo, quia quidquid foras Christus locutus est hominibus, Pater in eo loquebatur intus. In prophetis fuit Deus secundum inhabitationem gratiæ et revelationem voluntatis sapientiæ suæ, in Filio autem omnino totus manebat, scilicet usquequaque mentem et rationem illius illuminans, ut nihil sibi deesset ad perfectionem animæ, utpote cui sapientia Dei personaliter erat unita. Et qui loquebatur in prophetis, quod in eis loquebatur patribus nostris, hoc nobis ad ultimum locutus est in Filio suo; et ideo verba Filii non minoris auctoritatis sunt, quam prophetarum; imo majoris, quia illi sunt servi, iste Filius in quo Pater locutus est; novissime, quia post istam nulla alia futura est locutio. Illa enim quæ, facta est Moysi, non fuit novissima, quia tantum posita fuit usque ad tempus correctionis, et ideo quandiu durabit hæc novissima locutio, id est Novum Testamentum, pro certo durabit fides nostra, quia in aliud non poterit transmutari, quod nobis plus valeat ad acquisitionem vitæ cælestis (infra ix). Et ut diligentius observentur ea quæ locutus est Filius, transfert se Apostolus commendationem ejus secundum utramque naturam, dicens :

« Quem constituit hæredem universorum, per quæ fecit et sæcula. Qui, cum sit splendor gloriæ et figura substantiæ ejus, portansque omnia verbo virtutis suæ, purgationem peccatorum faciens, sedet ad dexteram majestatis in excelsis. »

« Ostendit videlicet quantus sit Filius, in quo Pater

locutus est hominibus, ut cognita magnitudinis ejus dignitate, fides de eo sufficiens esse ad salutem æternam cognoscatur. Quem ipse Pater secundum humanitatem constituit jam immutabilem hæredem universorum, id est possessorem omnium creaturarum, atque totius mundi Dominum, ut jam non sit tantum Jacob funiculus hæreditatis ejus, sed fiat quod scriptum est : « Dabo tibi gentes hæreditatem tuam, et possessionem tuam terminos terræ (Psal. 11). » Unde patet quia omnes in eum debent credere. Et per quem, secundum quod verbum Patris est, ipse Pater fecit non solum æterna, quæ minus sunt etiam nobis nota, sed et sæcula, id est omnia mutabilia, quæ variari cernimus per tempora. Sæculum enim a sequendo dicitur, eo quod semper sit in motu, quia semper aliquid præcedit, et aliud sequitur : Et cum sæcula per Filium facta sint, manifestum est eum esse Creatorem hominis et omnium reliquorum, quæ in cælis facta sunt. Qui Filius post laborem militiæ et obedientiæ suæ sedet, id est requiescit, nihil ultra laboris sustinens, ad dexteram paternæ majestatis. Et jure secundum humanitatem exaltatus est ad dexteram Patris cum sit secundum divinitatem eidem Patri coæternus et coequalis. Est enim splendor gloriæ et figura substantiæ ejus. Splendor gloriæ quasi lumen de lumine, Pater enim est gloria, sicut idem Filius eicanit in Psalmo : « Gloria mea, et exaltans caput meum (Psal. 111). » Et hujus gloriæ, id est Patris splendor est Filius, quia a Patre est, sicut splendor de sole, et coæternus est Patri, sicut splendor coævus soli. Nam, sicut natura non patitur ut sit unquam sol sine splendore, et ignis sine calore, ita Pater nunquam potuit esse sine sapientia sua; et sicut sol non est a splendore, nec ignis a calore, ita Pater non est a Filio, sed Filius a Patre; et sicut splendor ostendit illud cuius est splendor, ita Filius manifestat Patrem cuius ipse est sapientia; et sicut substantialiter splendor in sole est, et sol in splendore, ita substantialiter Filius in Patre est et Pater in Filio. Et quia posset esse coæternus, et tamen non esset eadem substantia, addit, et figura substantiæ ejus, per quod ostenditur consubstantialis Patri. Quia est figura substantiæ ejus, id est expressa similitudo ejus, non secundum exteriora, sed secundum substantiam. Figura substantiæ ejus est, id est forma et imago substantiæ ejus, quia quantus est Pater, tantus et ipse; qualis est Pater, talis est ipse, cuius substantiæ est Pater, ejusdem et ipse, quod est Pater, hoc et ipse. Filius enim, qui est sapientia Patris, per hoc quod ipsum revelat et facit cognosci, figuram substantiæ ejus exprimit, cum semetipsam primum describit eadem sapientia, et sic Patrem manifestat (228). Cum enim æternitas Patris cernitur a nobis, prout infirmitatis nostræ possibilitas admittit, imago ejus mentis nostræ oculis antefertur, quia, cum vere in Patrem tendimus, hunc quan-

tum accipimus per suam imaginem, id est per Filium, videmus et per eam speciem, quæ de ipso sine initio nata est eum aliquo modo cernere, qui nec cœpit, nec desinit, conamur, et hæc est figura expressa substantiæ Dei. Unde idem Filius dicit : « Nemo venit ad Patrem nisi per me (Joan. xiv), » et : « Qui videt me, videt et Patrem (ibid.). » Qui et portat omnia, id est sursum tenet ne decendant, et in nihilum revertantur, unde creata ab ipso fuerant et sustentat ea non labore, nec difficultate, sed verbo virtutis suæ, id est imperio suæ potentiæ, hoc est sola voluntate sua, quæ in eo virtus est et omnipotentia, per quod patet, quia Patri compotentialis est. Et est purgationem peccatorum faciens, quia sanguine suo nos a peccatis mundat. Commonet Apostolus crucis ejus et mox resurrectionis et ascensionis. Nam, postquam fudit in cruce sanguinem, ut faceret peccatorum nostrorum purgationem, suscitatus est de sepulcro, et elevatus est in cœlum. Ubi sedet nunc, id est quiescit et regnat et judicat sublimatus ad dexteram, id est æqualitatem et honorificentiam majestatis, id est Patris, qui est majestas, id est major potestas, quia omnibus potestatibus major est, ad cujus dexteram Filius est in eadem sede, sicut æqualis, ne si, in alia parte sederet, minor esse videretur, et sedet in excelsis, id est super omnem creaturam in eminentissimis spiritibus angelicis, qui vocantur thronus, id est sedes Dei.

« Tanto melior angelis effectus, quanto differentius præ illis nomen hæreditavit. Cui enim dixit aliquando angelorum: Filius meus es tu, ego hodie genui te? (Act. xiii; Psal. ii.) et rursus: « Ego ero illi in Patrem, et ipse erit mihi in Filium? » (II Reg. vii; II Par. xxii). »

Hic comparat eum angelis et præfert, usque ad locum, quo ait: Propterea abundantius oportet. Sedet in excelsis, effectus tanto melior, id est dignior angelis secundum humanitatem, secundum quam minoratus fuerat paulominus ab angelis, quanto hæreditavit, id est hæreditario jure possedit nomen (quod est Filius) differentius, id est magis differens. Dum enim mortalis esset differens nomen habuit, quia angeli ministrabant ei, sed tamen confortasse eum legitur angelus in passione. Postquam autem immortalis factus est, magis differens nomen habuit, quia ministrare adhuc ei possunt angeli, sed jam confortare eum non possunt (Matth. iv; Luc. xxii). Et ante passionem, licet nonnunquam vocaretur Filius Dei, tamen fere semper vocatus est Filius hominis, post resurrectionem vero Filius Dei vocatur. Et secundum quod ipse differentius nomen habet est præ illis, non post illos. Nam etsi angeli aliquando vocantur filii Dei, hoc nomen significat illos a Deo creatos esse, non eandem substantiam habendo cum Deo, sed potius quod sunt sola Dei voluntate facti. In Christo autem significat illum esse naturaliter a Patre genitum, et ejusdem cum Patre substantiæ, et humanitatem ejus personaliter unitam eidem unigenito Dei. Propter

A quod et ipsa humanitas appellationem Filii Dei meruit; et ita nomen istud quod Filius, est in Christo differentius et longe dissimilius quam in angelis, et longe præ illis. Vel præ illis habet Christus nomen, quia honorificentior quam illi factus est quando surrexit et ascendit. Et vere præ illis nomen habet. Nam cui angelorum dixit Deus, quod Christo dixit? Nec majori angelorum dixit hoc aliquando, id est nec in creatione, nec postquam confirmati sunt in supernis. Similiter nullus angelorum tam sublimis est, cui legatur Deus aliquando dixisse quod Christo dixit Filius meus es tu consubstantialis mihi, quia ego hodie, id est in die æternitatis, quæ caret principio et fine, semperque præsens habet siue præterito et futuro, genui te, ex substantia mea. Genui te, dixit et non gigno te, ne imperfectus videretur esse Filius, et ne contra prophetam Deus recens esse putaretur idem unigenitus: Si enim dixisset, hodie gigno te, posset existimari hæc genitura hodie principium habuisse. Sed, cum dicit, genui, ostendit quod hodie sit, sed non hodie cœperit. Ac per hoc nullum principium habuisse declaratur. Tamen si in Actibus apostolorum verba Pauli consideremus, videbimus eum hanc sententiam ad resurrectionem Domini retulisse: dixit enim de Patre: « Resuscitans Jesum Christum, sicut in Psalmo secundo scriptum est: Filius meus es tu, ego hodie genui te (Act. xiii). » Juxta hoc igitur Apostoli testimonium dixit ei Pater in die resurrectionis: « Filius meus es tu, ego hodie genui te, » ut illa resurrectio ejus quam Pater operatus est, intelligatur quædam generatio. Nam et nostra resurrectio vocatur regeneratio, cum dicitur: « In regeneratione, cum sederit Filius hominis in sede majestatis suæ (Matth. xix); » et iterum de electis dicitur, quia in futuro sæculo sunt filii Dei, cum sint filii resurrectionis (Luc. xx). » Christus ergo secundum humanitatem qui, dum esset mortalis, erat Filius hominis, in resurrectione vestiens immortalitatem, factus est Filius Dei, sic tamen, ut non amitteret esse Filius hominis, quia verus homo permansit; sed gloriam, quam humanus non habebat, accipit, et ita homo ille quem Unigenitus Dei in sua persona susceperat, audivit in resurrectione: « Filius meus es tu, ego hodie genui te, » quod nulli unquam angelorum dictum est: quia nec propter aliquam promotionem quæ illis aliquando facta est, dignus fuit aliquis illorum hoc audire. Et rursus, cui angelorum dictum est quod de Filio hominis Verbo Dei personaliter unito dixit: Ego qui Verbi mei semper sum Pater, ero illi in Patrem, id est ero pater illi homini quem Verbum meum assumet, et ipse homo erit mihi in Filium (II Reg. vii), id est erit mihi filius? Nulli angelorum dictum est hoc, vel de nullo angelorum. Sed homo iste propter unitatem personæ, verbi et carnis, factus est ejusdem Patris Filius cujus et verbum; quia et virgo, Dei genitrix idcirco dicitur, quod non solum

hominem sed et Deum genuit (*Psal. xcvi.*) Caro enim communicat altioribus, sicut et divinitas humilioribus.

« Et cum iterum introducit Primogenitum in orbem terræ, dicit : Et adorent eum omnes angeli Dei ; et ad angelos quidem dicit : Qui facit angelos suos spiritus, et ministros suos flammam ignis (*Psal. ciii.*) Ad Filium autem : Thronus tuus Deus in sæculum sæculi, virga æquitatis virga regni tui (*Psal. xlv.*) Dilexisti justitiam et odisti iniquitatem, propterea unxit te Deus, Deus tuus oleo exultationis præ participibus tuis. Et : Tu in principio, Domine, terram fundasti, et opera manuum tuarum sunt cœli. Ipsi peribunt, tu autem permanebis, et omnes ut vestimentum veterascent ; et velut amictum mutabis eos, et mutantur, tu autem idem ipse es, et anni tui non deficient (*Psal. ci.*) »

Ostenso per auctoritates quoniam differentius nomen præ angelis Christus hæreditavit, ostendit per alias auctoritates eum esse meliorem et præstantiorem angelis. Quasi dicat : Antequam Filius Dei homo fieret, promissit Deus se eidem homini fore in Patrem. *Et iterum, cum introducit in orbem terræ, id est in hunc mundum primogenitum in multis fratribus, dicit de eo, ut adoretur ab omnibus sanctis angelis. Iterum introducit visibilem carne assumptam, qui ante invisibilis in mundo erat. Quæ assumptio dicitur exitus a Patre, et introductio in hæreditatem. Vel introducit, id est intus usque ad corda hominum ducit eum, ut cognoscatur ab eis, pro quorum salute carnem induit, et in orbem terræ, id est in reparationem humani generis ubique terrarum existentis. Qui Filius secundum divinitatem quidem, in qua fratres non habet, dicitur unigenitus ; sed secundum humanitatem, in qua fratres habere dignatus est, appellatur primogenitus. In qua humanitate eum adorare monentur angeli, quia in divinitate ut adorarent eum, non indigebant admonitione, et quia homo unitus Deo, adoratur ab angelis, patet quia longe melior est ipse quam angeli. Hoc autem testimonium in cantico Deuteronomii juxta Septuaginta interpretes ita legitur : « Lætamini cœli simul cum eo, et adorent eum omnes angeli Dei (*Deut. xxxii.*) » Ubi notandum est quod translatio Septuaginta interpretum authentica erat Hebræis, quibus scribebat Apostolus, utpote Græcam et Hebræam linguam scientibus. Quia ergo cœli lætantur cum homine quem Dei Filius assumpsit, et adorant eum omnes angeli Dei, manifestum est ex hoc, quantum ipse prælatus sit angelis ; et etiam ex hoc quod sequitur, quia ad angelos dicit, qui facit angelos, etc. Illud enim quod supra dictum est refertur ad Filium, ostendendo illum esse meliorem angelis ; et istud quod subditur, refertur ad angelos, ostendendo eos inferiores illo cui serviunt et ministrant. Et hoc est quod dicit Scriptura, quod ad angelos quidem pertinet : Qui scilicet Filius facit angelos, id est nuntios et legatos suæ voluntatis ad*

homines. suos spiritus cœlestes, angelus enim nomen officii, non naturæ. Nomen vero naturæ spiritus est. Nam sancti illi Spiritus supernæ patriæ semper quidem sunt spiritus, sed non semper angeli. Tunc enim solummodo sunt angeli, cum nuntiant. Eos ergo, quos semper Christus habet spiritus, quando vult, angelos facit, mittendo eos nuntiare quod jusserit, *et flammam ignis, id est seraphim, qui ardentes interpretantur, quia igne divini amoris toti sunt inflammati, et ante omnes alios sunt, facit ministros suos, ut ministrent ei et serviant, scilicet primos cœlestium spirituum facit sibi ministrare, et hoc quidem ad angelos dictum est, ad ostendendam subjectionem eorum, sed ad Filium quod sequitur, id est ad declarandam ejus excellentiam : O Deus Fili, tuus thronus (*Psal. xlv.*), id est tua sedes regia permanet in sæculum sæculi, id est in æternum. Non enim posset Deus habere sedem temporalem. Dominum vocat eum, ut omnibus, qui videbant eum esse hominem, divinitas ejus innotescat. Per thronum, id est per sedem regiam designatur regnum ejus. Qui thronus perseverat in sæculum sæculi, quia regni ejus non erit finis (*Luc. i.*), et alibi dicitur : « Quia sedebit Dominus rex in æternum (*Psal. xxii.*) » Per virgam quoque, id est sceptrum, insigne regnantis exprimitur. Quæ virga est æquitatis sicut et per prophetam de eo dictum est : « Ecce in justitia regnabit rex (*Isa. xxxii.*) » Vel thronus intelligatur judiciaria sedes, et per hanc ipsum judicium. Qui thronus permanet in sæculum sæculi, quia novissimum Christi judicium semper stabit. Unde ait : « Ibunt hi in supplicium æternum, illi autem in vitam æternam (*Matth. xxv.*) » Per virgam autem æquitatis, intelligi potest rectitudo sententiæ judicii ejus, quia percutiet reprobos. Hæc virga, fortitudo est in vindicta et æquitas rectissima. Vel certe *virga regni tui, id est disciplina et regnum, qua bonos regis et malos flagellas, est virga æquitatis, id est regula directa et inflexibilis. Nec mirum, quia dilexisti justitiam, id est omne bonum non coactus habuisti, sed est amore ; et econtra odisti iniquitatem, id est omne malum. Nam, sicut Joannes in Epistola dicit : « Omnis qui facit peccatum, et iniquitatem facit, et peccatum est iniquitas (*I Joan. iii.*) » Non simul utraque habuisti, id est bonum et malum ; sed unum ex amore tenuisti, et alterum ex odio detestatus es, et propterea, id est ut bonum diligeres et malum odires, unxit te, o Deus Fili, Deus tuus Pater per se, non per ministros. In eo enim quod dicitur, unxit te Deus, Deus tuus, sicut et in Hebræo et Græco patet, primum nomen Dei vocativo casu intelligendum est, sequens nominativo. Unxit te Deus, Deus tuus. Unxit secundum hominem, quia deitas nullo indigebat. Deus enim, qui unctus est, homo factus erat ; et ideo unctus est Deus, quia homo erat Deus. Unctus est oleo, id est Spiritus sancti dono. Sed præ participibus suis unctus est, quia omnes nos prius in peccato existimus, et postmodum per unctionem**

sancti Spiritus sanctificamur. Ipse autem qui existens Deus ante sæcula, per Spiritum sanctum in utero Virginis homo conceptus est, in fine sæculorum ibi ab eodem Spiritu unctus est, ubi conceptus. Nec ante conceptus et postmodum unctus est sed hoc ipsum de Spiritu sancto et carne Virginis concipi, a Spiritu sancto ungi fuit. Non potuit apertius dici nomen Christi, quam ut diceretur unctus Deus. Christus enim Græce, unctus dicitur Latine, et unctus significat regem, vel sacerdotem. Unctus est Deus oleo, sed spirituali. Oleum enim visibile in signo est, oleum autem invisibile in sacramento. *Oleo exsultationis unctus est*, id est Spiritus sancti gratia quæ conscientiam ejus exhilaravit, facietis ut nullum omnino peccatum in ea unquam esset, sed omnis omnino sanctitas. Et ideo præ participibus suis unctus est, quia nullus sine peccato, nisi iste solus, nullusque tantum sanctitatis habere potest. Nam neque boni aliquid habere quisquam valet, nisi ab isto acceperit. Quia enim omnes sancti ab eo accipiunt quidquid habent, ideo participes ejus dicuntur, sicut et in sequentibus epistolæ hujus legimus : « Participes enim Christi effecti sumus (*infra* III). » Propter quod et ipse vocatur Christus, illi vero Christiani; in qua appellatione declaratur, quia ipse singulariter unctus est majori gratia præ omnibus. Non enim ad mensuram dedit ei Spiritum Deus (*Joan.* III), sed totum Spiritum sanctum ei largitus est; nobis vero dedit ad mensuram. Hæc dicta sunt ad Filium, in quibus humanitatis ejus excellentia demonstratur. Et iterum Propheta (*Psal.* CI) insinuans æternitatem divinitatis ejus, ait ei : O Domine Fili, tu fundasti terram in principio mundi, id est nutu et dispositione tua immobilem subsidere [*al.* subsistere] fecisti. In principio fundasti eam, quia tu jam eras ante omne principium, et in principio dedisti esse creaturis. *Et cæli sunt opera manuum tuarum*, quia manibus tuis, id est virtute jussionis tuæ operatus es cælos. *Ipsi* qui tam durabiles sunt, *peribunt in die judicii*. Non tamen hoc intelligitur de superioribus cælis, sed de novissimis, qui sunt propinqui terræ, et in quibus aves volitant. Qui secundum quantitatem et spatia aeris hujus peribunt igne judicii occupante tantam aeris capacitatem, quantam occupavit aqua diluvii. Ipsi peribunt ab ea quam habent specie, ut in meliorem mutantur. *Tu autem permanebis*, quia sicut ante omnia permanebas incommutabilis in æternitate tua, sic et postquam illi perierint, permanebis semper, id est æternaliter; *et omnes illi cæli aerii veterascent ut vestimentum*, id est longævitate paulatim deteriores fient. Quod nos quotidie cernimus impleri ipsa jam aeris immutatione et terræ sterilitate. Nam et de terra similiter hoc intelligitur. *Et velut amictum mutabis eos*. Amictui comparantur cæli, quia terram operiunt et circumdant. Sicut amictum mutabis eos, id est tam facile, sicut amictus extenditur et plicatur. Ita ergo peribunt cæli et terra, ut mutantur, non ut omnino desinant esse, quia ab ea quam nunc

A habent specie, tergentur per ignem, et tamen in sua semper natura manebunt. Creaturæ quidem mutantur, sed tu immutabilis et non mutor (*Malach.* III); » et : « Ego sum qui sum (*Exod.* III). » Tu semper *idem ipse es* æqualiter incommutabilis, *et anni tui non deficient*, id est æternitas tua, anni nostri quotidie deficient, nec stant omnino. Sed anni tui non deficient, quia semper stant; et quia stant, ipsi anni qui stant, unus annus est, et ipse annus qui stat, unus dies est. Quia ipse unus dies, nec ortum habet, nec occasum, sed semper stat et lucet. Hi sunt anni qui non deficient, sed permanent. His itaque dictis evidenter ostenditur Dei Filius æternaliter incommutabilis in sua deitate, sine initio et sine permanere, et omnium creator esse, ac per hoc fides ejus ad æternam salutem optime sufficere. In Psalmo possunt hæc prophetica verba mystice tractari, sed in hoc loco juxta litteram melius intelliguntur, quia tunc in eis manifestius æternitas et potentia Filii, quam nunc Apostolus studet ostendere, declaratur. Nam ad Filii personam, non ad Patris in hac epistola dicitur : *Tu in principio, Domine, terram fundasti*, etc., licet in Psalmo et ad Patrem convenienter ista dicantur, vel potius ad totam Trinitatem. Sed nunc Apostolus excellentiam solius Filii propheticiis testimoniis intendit ostendere, qui Judæis propter assumptionem carnis minor videbatur. Unde et adhuc subjungit :

C « Ad quem autem angelorum dixit aliquando ;
 « Sede a dextris meis quoadusque ponam inimicos
 « tuos scabellum pedum tuorum? (*Psal.* CIX.) Nonne
 « omnes sunt administratorii spiritus, in ministerio
 « rium missi propter eos qui hæreditatem capient
 « salutis? »

Item de gloria humanitatis ejus loquitur, ostendens eum angelis multo digniorem. Quasi dicat : Non solum per supradicta major angelis esse declaratur, sed etiam per hoc, quia *ad quem angelorum* quantæcunque excellentiæ fuisset, *aliquando*, id est in aliquo statu eorum vel ante ruinam superbiorum, vel post confirmationem humilium, *dixit Pater* quod Christo dixisse legitur, scilicet : *Sede a dextris meis?*
 D Nam de excellentissimis angelis scriptum est, quia seraphin stabant in circuitu ejus (*Isa.* VI; *Apoc.* VII). Seraphin stant ut ministri, Filius sedet ut Dominus. Seraphin in circuitu, Filius ad dexteram. Nam victori Christo Pater in die ascensionis ejus obtulit sessum suum, dicens : *Sede a dextris meis*, id est quiesce et regna in potioribus meis, et hoc, donec ponam inimicos tuos scabellum pedum tuorum, id est prorsus subjiciam tibi. Per pedes stabilitas æterna designatur, ubi quasi vestigiis positus virtute omnipotentæ consistit, vel certe humanitas ejus, et his pedibus ejus quotidie subjiciuntur inimici, vel per spontaneam conversionem, vel per justam damnationem (*I Cor.* V). Cum autem omnes subjecti fuerint, id est in fine sæculi, tunc patebit omnibus,

quia ipse perenniter sedebit ad dexteram Patris (229), A et ideo nunc necesse fuit dicere, quod ipse ibi sedurus sit post diem iudicii, sed tantum usque ad illum diem propter eos qui adhuc eum ibi sedere non credunt : hoc nulli angelorum dictum est, scilicet : *Sede a dextris meis*, quia non est ministri sedere ad dexteram illius cuius minister est, sed Filii est sedere ad dexteram Patris. Nam omnes angeli sunt ejus ministri, et hoc interrogative quasi per increpationem dicitur. *Nonne omnes angeli tam magni quam parvi, sunt spiritus administratorii*, id est ad ministrandum apti, ut unusquisque Deo ministret ex officio suo? administratorii sunt, id est ministrandi officium habent, et quia possent officium habere ministrandi, ut non ministrent, ut dapifer regis dicitur ejus minister, etiam si non ministret, B subditur : *missi in ministerium*, subaudi actualiter explendum, hoc est, et ministrandi officium habent, et ministrant, ministrando scilicet serviunt, et id faciunt non propter se, sed propter homines, quibus licet minoribus imperio Christi serviunt, propter eos in bonis operibus adjuvandos et malignis spiritibus defendendos; *qui capient hæreditatem salutis*, id est consequentur hæreditatem patriæ cælestis, ubi perpetuam animæ corporisque salutem habebunt. Mittuntur itaque propter nos huc angeli, vel a Domino, vel a majoribus angelis. Ex minoribus enim angelorum agminibus foris ad exemplum ministerium inmittuntur, id est ad humana solatia vel angeli vel archangeli C veniunt. Nam sublimiora agmina ab intimis nunquam recedunt quoniam ea quæ præminent, usum exterioris ministerii non habent. Unde Daniel ait : *Millia millium ministrabant ei, et decies millicies centena millia assistebant ei (Dan. vii).* Aliud enim est ministrare, aliud assistere. Nam ministrant Deo, qui ad nos nuntiando exeunt; assistunt vero qui contemplatione intima perfruuntur, ut ad explenda foras opera non mittantur. De minoribus ergo intelligendum est, qui sint in ministerium missi propter homines qui hæreditatem salutis percipient. Nusquam enim legimus dominationes vel thronos in ministerium mitti. Qui tamen dici possunt administratorii spiritus, quia et intus ministrant Deo, dum divinas scientias ab eo susceptas inferioribus D tradunt, et ad supernam eos contemplationem adducunt. Sed et illi qui foras exeunt, semper ei assistunt, quia et cum ad nos veniunt, sic exterius implent ministerium, ut tamen nunquam desint interius per contemplationem. Unde Salvator de parvulis, id est humilibus ait : *quia angeli eorum in cælis semper vident faciem Patris mei (Matth. xviii).* et mittuntur igitur, et assistunt, quia, etsi circumscriptus sit angelicus spiritus, summus tamen spiritus ipse qui Deus est, circumscriptus non est. Angeli itaque et missi ante ipsum sunt, quia quolibet missi veniant, intra ipsum currunt.

CAPUT II.

« Propterea abundantius, oportet observare nos « ea quæ audivimus, ne forte perefluamus. Si « enim qui per angelos prævaricatus est sermo, factus est « firmus, et omnis prævaricatio et inobedientia accepit « justam mercedis retributionem, quomodo « nos effugiemus, si tantum neglexerimus salutem? « Quæ cum initium accepisset enarrari per Domi- « num, ab eis qui audire, in nos confirmata est, « contestante Deo signis et portentis et variis vir- « tutibus et Spiritus sancti distributionibus secu- « dum suam voluntatem. »

Hucusque multis auctoritatibus demonstravit Filium esse meliorem angelis; et nunc consequenter asserit, quod verba ejus magis sint observanda quam angelorum. Locutus fuerat Deus in prophetis, locutus fuerat et in angelis, sed novissime locutus est nobis in Filio. Et propterea quoniam ille tanto dignior est eis, oportet nos ea quæ ab ipso audivimus, observare et opere complere abundantius, quam illa quæ a prophetis vel ab angelis qui ministri legis fuerunt, audieramus. Abundantius, id est largius et studiosius servare debemus verba quæ locutus est Deus in Christo, quam servavimus ea quæ locutus est in angelis, id est præcepta Evangelii quam legis. Ea enim quæ Deus refertur dixisse Moysi, certum est angelos esse locutos (Act. vii). Sed dicit aliquis : Cur ergo scriptum est, Dixit Dominus ad Moysen, et non potius, Dixit angelus ad Moysen? Quia cum verba iudicis præco pronuntiat non scribitur in gestis, ille præco dixit, sed ille iudex. Locuti sunt itaque angeli verba legis. Sed magis observare nos oportet verba Evangelii quæ locutus est Christus, ne forte perefluamus, id est puniamur; fluvius enim, quia sicut fluvius in defluxu et mutabilitate sumus, de infantia ad pueritiam de pueritia ad juventutem, de juventute ad senectutem, et inde ad decrepitam ætatem. Effluimus vero, cum in morte anima et corpore dissolvimur. Effluimus, id est extra fluvius, cum animam exhalamus; perefluimus si a vero Dei esse perpetualiter separati per varia tormenta sine fine desicimus; et ne hoc nobis contingat, observemus verba Christi saltem timore pœnæ, si necdum regnat in nobis amor justitiæ. Vel fluvius per pœnas mortalis naturæ, effluimus peccatum addendo, perefluimus in æterna damnatione. Vel ita : Fluere, est mori, effluere pati pœnas sive in hoc sæculo, sive in futuro : perefluere acriora tormenta perpetualiter pati et hæc cavenda nobis sunt. Sed et moraliter perefluere est ab intima intentione appetitus interiorum et æternorum, penitus extra fluere, cogitando et appetendo sola exteriora et temporalia, quod eis accidit, quorum mentes gratia Dei prorsus deserit, et qui custodire negligunt, merito suæ perversitatis deseruntur a Spiritu sancto, ut concupiscentias suas sequantur et pereant. Unde mox de pœna futuræ damnationis eo-

rum, comparatione vindictarum, quæ prævaricatoribus legis quondam inferebantur, terribiliter subditur : *Si enim qui per angelos dictus est sermo*, etc. Nam, si illi puniti sunt, qui verba angelorum contempserunt, quanto gravius punientur qui verba Christi contemnunt? A minori probatur hoc. Vel secundum priorem sensum ita continuatur : *Revera perfluemus in tormentis, nisi ea quæ dicta sunt nobis a Filio servaverimus*. Nam quomodo effugiemus penas æternæ ultionis, si tantam salutem novæ gratiæ neglexerimus, cum nec illi effugerint, qui legem veterem neglexerunt? et hoc est : *Si sermo Dei qui dictus est Moysi per angelos, id est per officium angelorum, factus est firmus, id est ratus et stabilis et in minis et in promissis, quia et quidquid minata est lex et quidquid promisit, completum est, et si omnis prævaricatio et inobedientia*, etc. Prævaricatio est vitia facere, inobedientia vero jussa non facere. Et non solum omnis prævaricator qui multorum reus erat, sed et omnis prævaricatio, id est omnis culpa transgressionis, ut pro singulis ultio fieret, et omnis culpa inobedientiæ, quæ legis præcepta facere contempsit, *accepit retributionem factorum suorum, retributionem dico mercedis, id est meriti, justam, id est parem, non pro levi culpa magnam, nec pro magna, levem, sed juste modificatam, ut oculum pro oculo, dentem pro dente* (*Exod. xxi; Levit. xxxiv; Deut. xvi*). Melius positum est prævaricatio et inobedientia, quam si poneretur, prævaricator et inobediens quia per hoc, ut diximus, ostenditur pœna illata fuisse pro unaquaque transgressionem et inobedientia. Nam prævaricator non solum de uno, sed de multis dicitur; et si hic positus esset prævaricator posset intelligi quod non pro una, sed pro multis culpis quis puniretur. Si, inquam, sermo angelorum tam firmus factus est, ut tanta necessitate cogerentur nostri majores illum operibus adimplere, quoniam si quis aliter fecisset, non poterat evadere, *quomodo nos debitam ultionem effugiemus*, si nunc neglexerimus tantam salutem, id est æternam beatitudinem, quæ nobis offertur in observatione mandatorum Novi Testamenti? Nullo modo pœnas effugiemus, si hanc inestimabilem salutem parvipendamus. Non enim tanta salus fuit in Veteri Testamento, quanta est hæc quam Filius nobis attulit. Illa temporalis fuit, hæc est perpetua. Illa terrenas divitias, hæc cœlestes promisit. Illa victoriam de carnis hostibus, hæc concessit de spiritualibus. Illa temporalem feliciter vitam, hæc tribuit æternaliter beatam. Ideoque saltem non negligenda, quod est minus quam prævaricari. Gravior enim vindicta sumetur de his qui salutem istam neglexerint, quam sumpta est de illis qui sermonem angelorum prævaricabantur; ibi enim sermo, hic autem salus, quia ibi tantum littera jubens, hic vero spiritus adjuvans. Quia vero Judæi possent respondere. Non sequitur, quod si illi puniti sunt qui legem per angelos datam prævaricabantur, nos quoque puniamur, si negligamus ea

A quæ dicta sunt a Filio Dei, quia ipsi videre angelos et audire, nos vero Filium nec vidimus, nec audimus, ideo subjungit : *Quæ salus in nos confirmata est ab eis qui audire, ac si dicat : Non ideo pœnam evadetis, quod eum fortasse præsentem in carne non audistis quia audistis eos qui eum audire, et hoc est : Quæ salus et vita perennis electorum, cum per Dominum Jesum accepisset initium non constitutionis, quia ab æterno est; sed enarrationis, quia unigenitus Filius qui est in sinu Patris, ipse enarravit; ab eis, id est ab apostolis, qui ab ejus ore audire, confirmata est, id est valida affirmatione prædicata est, transiens in nos, id est ad sedem et intelligentiam animæ nostræ pervenit. Confirmata est in nos ab eis qui audire, non in fine tantum Dominicæ prædicationis, sed a principio cum illa salus cœpisset enarrari, id est evidenter et manifeste enarrari per Dominum, non figuris involvi, sicut antea per prophetas. Confirmata est inquam, ab eis *Deo contestante*, id est cum eis testante quidquid illi dicebant, et quomodo contestabatur Deus, id est testimonium et certitudinem dabat prædicationi eorum, *signis*, id est minoribus miraculis, ut erectione claudi, *et portentis*, id est, majoribus et stupendis mirabilibus, ut sanatione omnium infirmitatum per umbram Petri (*Act. iii, xiv*), vel signa erant, quia aliud signabant (*Act. v*), ut erectio ejusdem claudi erectionem claudicantis populi Judæorum; et portenta, quia aliud portendebant, ut sanatio infirmitatum sub umbra Petri, sanationem omnium spiritualium languorum animæ nostræ in præsentem Ecclesia, quæ per umbram Petri figuratur, sicut superna Jerusalem per corpus ejus. Talibus signis et portentis contestabatur Deus verè esse quæ docebant apostoli, *et variis virtutibus*, aliorum miraculorum, quæ non ita erant mystica. Vel variis animæ virtutibus, id est charitate, humilitate, castitate et cæteris hujusmodi, quas Deus in eorum moribus relucere faciebat, ut eorum vita prædicationi concordaret, quatenus humilitatem docentes, humiles essent, largitatem prædicantes, largi essent, quibus nimirum virtutibus contestabatur Deus veram esse doctrinam eorum, *et etiam Spiritus sancti distributionibus*, id est donis Spiritus sancti diverso modo datis, ut ille haberet genera linguarum, iste interpretationem sermonum, alius prophetiam et alia alia. Distributionibus dico, factis non secundum meritum, sed *secundum suam voluntatem*, id est secundum placitum suæ misericordiæ. Secundum voluntatem ejusdem Spiritus, quia ipse est dividens singulis prout vult (*I Cor. xii*). Vel secundum voluntatem Dei Patris, quia una voluntas est individue Trinitatis.*

« Non enim angelis subiecit Deus orbem terræ
 « futurum, de quo loquimur. Testatus est autem in
 « quodam loco quis, dicens : Quid est homo quod
 « memo res ejus, aut Filius hominis quoniam visitas
 « eum? Minuisti eum paulo minus ab angelis, gloria
 « et honore coronasti eum, et constituisti eum

« super opera manuum tuarum. Omnia subiecisti
 « sub pedibus ejus (*Psal.* xviii; *I Cor.* xv). In eo
 « enim quod ei omnia subjecit, nihil dimisit non
 « subjectum ei. Nunc autem necdum videmus om-
 « nia subiecta ei. Eum autem, qui modico quam an-
 « geli minoratus est, videmus Jesum propter pas-
 « sionem mortis gloria et honore coronatum, ut
 « gratia Dei pro omnibus gustaret mortem. »

Dixit superius, quia oportet nos ea quæ a Christo
 audivimus, observare abundantius quam observavi-
 mus illa (*Philip.* iii), quæ audieramus ab angelis, id
 est carnales cæremonias, et nunc declarat cur
 abundantius, quia videlicet non angelis, sed Christo
 data est potestas judicandi nos in futuro sæculo et
 regnare super omnia. *Non enim angelis*, sed Christo
subjecit Deus Pater orbem terræ futurum, id est qui
 futurus est post diem iudicii, quando erit cælum
 novum et terra nova *de quo orbe tunc futuro nunc*
loquimur, non de eo quem nunc cernimus. Iste enim
 ex parte recusat adhuc subijci Christo, ille autem
 omnino subjicietur ei. Non angelis tunc subjectus
 est orbis terræ, sed potius Christo, quia sic asse-
 ruit in psalmo propheta, cujus nomen vobis reticeo,
 non abscondentis affectu, sed quia vos memoriter
 psalmos retinetis, et a rege David compositos scitis.
 Hoc *testatus est quis prophetarum*, qui pro habita
 excellentia sine proprio nomine intelligitur, et ex
 sola auctoritate cognoscitur, et testatus est *in loco*
Scripturæ quodam, id est egregio et notabili, ut per
 testem et per locum pateat sine ambiguitate verum
 esse quod dixit. Testatus est *dicens, quid est ho-*
mo, etc. Omnis filius hominis homo est; sed non
 omnis homo filius hominis. Adam quippe homo,
 sed non filius hominis. Homo igitur hoc loco terre-
 nus est; filius autem hominis, cælestis; et ille
 longe sejunctus Deo, hic autem præsens Deo; et
 propterea illius memor est tanquam longe positi,
 hunc vero visitat quem præsens illustrat vultu suo,
 de quo propter infirmitatem carnis et humilitatem
 passionis recte dicitur: *Minuisti eum paulo minus*
ab angelis; et propter clarificationem, qua resusci-
 tatus est et in cælum elevatus, *gloria et honore co-*
ronasti eum, etc. Quod ergo dicitur: *Quid est homo*,
 cum despectu legendum est. O, inquit, Domine Deus
 Pater, *quid est homo*, quasi fragilis, despectus, pec-
 cator, *quod memor es ejus*, quando peccata dimittis,
 aut quid est, id est quantæ dignitatis et excellentiæ
filius hominis, id est Christus, qui non ex duobus
 parentibus, sed ex sola Virgine natus est, *quoniam*
visitas eum, resuscitans de sepulcro? Ibi es memor,
 patriarchis de cælo miseris; hic visitas, quia Ver-
 bum caro factum est. Vel totus versus de Christo
 potest legi, et admirative dici: *Quid*, id est quam
 magnum et quam mirabile est mediator Dei et ho-
 minum homo Jesus Christus, quod memor es ejus,
 id est quia licet in terris conversetur, tu tamen non
 oblivisceris ejus aliquando ut peccet, sed semper es
 memor ejus, faciens ut semper sit immunis ab omni
 peccato, et plenus omni sanctitate; aut quid est,

A id est quam gloriosum est filius hominis, id est
 idem Christus, homo ex homine matre natus, quia
 per hoc quasi infirmum visitas cum resuscitando.
 Omnes enim alii sunt filii hominum, quia originem
 habent ex conjunctione duorum; sed Christus Filius
 est, ut diximus, solius hominis, quia sine carnali
 patre natus est de virgine et ideo magnum quid et
 incomparabile est ipse apud Deum. Quia, visitas, in-
 quit, eum sicut medicus in infirmitate ejus, et om-
 nem languorem mortalitatis et passibilitatis atque
 corruptionis per resurrectionem expellis ab eo. Et
 indigebat visitatione, quia *minuisti eum*. Erat enim
 et est semper consubstantialis et coæternus tibi, sed
 minuisti eum, dum exinanens seipsum, formam
 servi acciperet (*Philip.* ii). Minus angelis, quia mor-
 talis factus est; paulo, quia sine peccato. Nam mi-
 nor angelis fuit propter humilitatem carnalis gene-
 rationis atque passionis, non propter naturam hu-
 manitatis. Natura enim humanæ mentis, quæ ad
 imaginem Dei facta est, si peccato careat, par est
 angelis. Christus ergo corpore, non mente minor
 fuit angelis, et corpore mortali atque passibili. Cum
 dicitur, *paulo minus ab angelis*, illud *ab*, notat non
 esse intelligendum ita minorem, ut angeli aliquo
 modo habeant illam naturam, qua dicitur minor,
 sed ex toto ab eis esse remotam innuit. Ista non va-
 lent ad hoc ostendendum, quod ei subjecta sunt
 omnia; sed potius ostenduntur quidam gradus et
 merita, quibus ipse ab hoc pervenit, ut ei subderen-
 tur omnia, ut per hæc, quæ jam completa sunt, cre-
 damus et illa fore complenda, quæ necdum sunt
 completa. Minuisti, inquam, eum, id est minus mi-
 nuisti majori, hoc est hominem conjunxisti Verbo in
 unitate personæ, et post expletam passionis obe-
 dientiam *coronasti*, id est circumdedisti *eum* ad mo-
 dum coronæ, quæ totum caput circumdat, *gloria*
 quantum ad animam, ut omnes internæ vires ejus
 glorificarentur; et *honore*, quantum ad corpus, ut
 esset immortale et lucidissimum. Tres enim sunt
 vires in anima, id est ratio, sensibilis, vegetatio.
 Secundum rationem nihil recepit in resurrectione,
 quia neque sapientiam ampliorem, neque dilectio-
 nem Dei et proximi vehementiorem. Sed secundum
 vegetabilitatem et sensificationem recepit, quoniam
 anima suum corpus per resurrectionem ita vegeta-
 vit, ut subijci non posset ulli corruptioni; et sic
 etiam sensibilicavit, sic omnes sensus corporis vigere
 fecit, ut nullo modo posset detineri vel aliquid mo-
 lestiæ pati. Quod videlicet corpus ita tunc factum
 est pulchrum, ut pulchrius fieri non posset et se-
 cundum decorem coloris, et secundum aptitudinem
 corporis ipsius. Vel in resurrectione et ascensione
 coronatus est gloria, in similitudine triumphatoris
 et honore in consessu Patris, vel gloria, id est cla-
 ritate immortalitatis, et honore quod sibi flectitur
 omne genu, et etiam *constituisti*, id est stabiliter
eum posuisti, ut ibi regnet perenniter *super opera*
manuum tuarum, id est super angelos et homines,
 ambabus fecisse manibus diceris, quia digniores

sunt cæteris creaturis. Nec solummodo super angelos et homines eum posuisti, sed etiam super omnia, quoniam *omnia* quæ sunt in cælo et in terra et in inferno et in universitate totius creaturæ ita *subjecisti* ei, ut sint *sub pedibus ejus*, id est ut nullo sibi modo possint æquiparari, sed infra subiaceant ut adorent eum. Quia igitur omnia Pater ei subjecit et non angelis, ideo abundantius oportet nos ea servare, quæ ab illo audivimus, quam servavimus quæ ab angelis audieramus in lege. Per hoc omnia, quæ dicta sunt, ostendit ipse ad salutem sufficere sine carnalibus observantiis. Et si non amore præcepta ejus servamus, saltem terrore iudicii servemus ea, quoniam omnia subjecta sunt ei, vel post modicum subjecta erunt. Præteritum enim pro futuro posuit propheta. Omnia subjecit ei Pater. Dum dicit omnia, nec terrena excipit, nec cælestia. Nam in eo quod ei subjecit omnia, nihil dimisit non subjectum ei in universitate creaturarum, hac enim intentione protulit vates istam universalem sententiam, ut nullam facere vellet exceptionem, sed vel voluntariam, vel necessariam subjectionem omnium demonstraret. Dixit propheta quod Pater illi subjecerit omnia. Sed nos *nunc*, id est in hoc tempore *nequid videmus omnia subjecta ei*, quia nequid completa est tota hæc prophetia, licet major pars ejus sit jam completa; hic enim voluntariam tantum subjectionem credentium in eum videmus, sed in futuro videbimus invitam dejectionem superbiorum. Quotidie namque subjiciuntur aliqui, sed non omnes donec in iudicio; et quod omnia sint illi subjicienda, constat ex eo quod cætera prophetiæ verba jam sunt adimpleta. Nam adhuc non videmus, omnia illi subjecta, sed tamen jam videmus, id est ita patenter intelligimus, ac si corporeis oculis videremus eum, videlicet magnum et denotabilem in divinitatis natura, *qui minoratus est modico quam angeli*, id est qui factus est parum minor angelis, *propter passionem mortis*, qui pati et mori potuit, quod beati angeli non possunt. Eum, inquam, qui talis factus est, scilicet *Jesum*, id est Salvatorem qui sine carnalibus observantiis salvare potest, *videmus oculis fidei coronatum gloria et honore* secundum animam et corpus, qui coronatus est propter passionem mortis, id est qui usque ad mortem fuit obediens Patri. Illic jam incipit Apostolus ostendere, non pro potentia tantum vel ultione verba Christi audienda esse, sed potius pro dilectione, qua dilexit nos, ut pro nobis moreretur. Dico quia minoratus est, et hoc ideo, *ut gustaret mortem*, id est horariam et non longam, quasi aliquid gustando transiret, pro omnibus ad vitam prædestinatis, vel pro omnibus, quia pretium sanguinis ejus sufficit omnibus. Et hoc factum est *gratia*, id est gratuito munere *Dei*, quia homo non meruit; vel ipse Christus est gratia Dei, qui pro salute omnium mortem gustavit, quia non debebatur nobis, *ut Filius Dei moreretur pro nobis*. Qui mortuus

A est pro omnibus, quia etsi omnes non credunt, ipse tamen quod suum est fecit.

« Decebat enim eum, propter quem omnia, et per quem omnia, qui multos filios in gloriam adduxerat, auctorem salutis eorum per passionem consummare. Qui enim sanctificat, et qui sanctificantur, ex uno omnes, propter quam causam non confunditur fratres eos vocare, dicens: Nuntiabo nomen tuum fratribus meis, in medio Ecclesiæ laudabo te (*Psal. xxi*); et iterum: Ego ero fideus in eum (*Psal. xvi*); et iterum: Ecce ego et pueri mei, quos dedit mihi Deus (*Isai. viii*). Qui ergo pueri communicaverunt carni et sanguini, et ipse similiter participavit eisdem, ut per mortem destrueret eum, qui habebat mortis imperium, id est diabolum, ut liberaret eos qui timore mortis per totam vitam obnoxii erant servituti (*Os. xiii*; *I Cor. xv*). »

Christus est gratia Dei, id est gratuita donatio ejus, quia gratis eum dedit nobis, nullo id promerente. Dedit eum nobis, ut brevi haustu mortem gustaret pro nobis. Nam hoc facere decebat Deum Patrem, quia nihil in hoc fecit quod esset contra honorem suum, sed potius hoc illum decuit, ut per Filium suum majorem subveniret minoribus. Et hoc est, quia *decebat eum*, id est Patrem, *propter quem glorificandum sunt omnia*, et propter cuius summum esse, habet omnia inferius esse, et per quem sunt omnia, quoniam per ipsum constantia et perseverantia est omnibus impertita; qui jam prædestinatione, quamvis nondum re, *adduxerat in gloriam* supernæ beatitudinis multos filios adoptivos; eum, inquam, *decebat consummare*, id est simul omnium summum facere, id est super omnia sublimare *per passionem* et resurrectionem *auctorem salutis eorum*, id est Filium suum, qui est auctor salutis omnium adoptivorum, quia nemo salutem habet nisi per ipsum. Et ideo conveniens fuit, ut Pater eum morti traderet pro salute omnium. Vel, secundum alios codices, dicamus quia *decebat per passionem consummari eum*, id est Christum, propter quem laudandum et per quem creantem sunt omnia, qui multos filios, id est sibi fratres adoptatos jam prædestinando, adduxerat in gloriam, qui fecit quæ futura sunt, ut propheta testatur, eum dico auctorem salutis eorum qui, nisi pateretur, non esset auctor salutis; et ita falsa esset prædestinatio de adducendis ipsis, nec in his quæ propter eum glorificandum facta sunt, glorificaretur, sed frustra essent facta omnia, cum homo, cui cætera serviunt, perditus esset. Decuit ergo eum passione consummari. Videretur enim indecens quod auctor salutis pateretur. Sed non dedecet, quia ex Deo pendet, et ei est subditus, ut alii homines, et ideo convenit pati. Nam ipse Christus, qui sanguine suo sanctificat prædestinatos, et illi, qui per eum sanctificantur, omnes sunt ex uno Patre Deo, qui est unus et singularis, cui nemo adæquatur, id est ex eo omnes pendent, et omne bonum suum ab eo habent. Sed Christus

ex eo ut proprius Filius, cæteri ut adoptivi, et quia ille tantus et tantæ potentæ est, ut possit alios sanctificare, et alii adeo sunt infirmi, ut indigeant sanctificatione, ideo potius illum quam alium fratrem oportuit subire passionem. Omnes sunt ex uno, propter quam causam, scilicet quia utrique eundem Patrem habent, *non confunditur*, id est non erubescit *vocare eos fratres*. Confundi enim accipitur pro erubescere, quia, cum quis erubescit, simul confunduntur humores in facie. Cum dicit, *non confunditur fratres vocare*, ostendit non ejus naturæ esse fraternitatem nostram, sed misericordiæ secundum ejus divinitatem; et quod nos fratres vocet, probat auctoritate prophetica, ne putetur novum, dicens (*Psal. xxi*): *Nuntiabo post resurrectionem meam in toto orbe fratribus meis*, quos mihi adoptabis, *nomen tuum* quod est Pater, ut cognoscant te Patrem, qui eos paterno affectu ad hæreditatem supernæ beatitudinis ut filios vocas. Vel nomen tuum, quod est Deus, id est famam et gloriam deitatis tuæ, ut cognoscant omnipotentiam tuam, et te Creatorem suum esse sciant. Et etiam ego existens in medio Ecclesiæ, quasi columna, ut super me omnes convocati ad fidem undique invitentur, et me sustentatorem habeant, *laudabo te*, id est faciam te laudari, accendens omnes de circuitu ad tuam laudationem. Vel in medio Ecclesiæ, ut omnibus communiter adsim et consulam atque subveniam. Sive in medio, id est in corde fidelium laudabo te, et iterum, id est si hæc non sufficit vobis auctoritas, iterum alibi (hoc est, in Isaia) dicit, quod ad idem confirmandum valet, videlicet quia ipse et qui sanctificantur, ex uno sunt: *Ego, inquit, ero ut homo fidens in eum* (*Psal. xvii*), scilicet in Patrem. Id est homo flammam, et non in meis viribus confidam, sed ero fidens in eum, id est non in me remanebit fiducia mea, sed tota transibit in eum, quia ex ipso mihi omne bonum, sicut et aliis hominibus. Dum dicit quod confidat in eum, manifeste declarat quia ex eo est, et ejus auxilio indiget. Et cum se ex eo esse et pendere manifestet, ipse, qui major est, aperte docet illos longe inferiores se, et non in hominibus, sed in Deo fiduciam debere ponere; et iterum, id est iterato dicit ipse apud Isaiam (*Cap. viii*), quod ostendit eum et cæteros fideles ex uno esse. *Ecce, inquit, id est in aperto sumus ad præbendum exempla bene agendi cæteris hominibus, ego, qui me dignatus sum sic humiliare, et pueri mei*, id est qui per me puri facti sunt a criminibus, quos ex me tamen non habeo, sed Deus Pater eos mihi gratuita sua voluntate dedit, unde patet quod ex eo sumus ego et illi; et ideo jure recipitur et honoratur a nobis iste qui, cum sit auctor salutis nostræ, sic se humiliat, ut fratrem nostrum se tam in prophetis quam in Evangelio vocet. Nam et ipse juxta humanitatem et omnes sancti ex uno genere sunt, et ex uno Deo. *Ergo quia pueri*, id est quos humiles et a vitiis puros facere volebat, *communica-*

verunt *carni et sanguini*, id est communiter habere omnes carnem et sanguinem, id est erant homines corruptibiles ex corpore et anima, quæ nunc per sanguinem intelligitur, propter hanc rationabilem causam et ipse quoque qui tantus erat in divinitate, *participavit eisdem*, id est carne et sanguine, et hoc similiter ut pueri ejus, qui sanctificandi erant, quia similiter mortalem et passibilem naturam humanitatis accepit. Ecce quomodo veraciter nobis frater dignatus est fieri. Sanguis hoc loco pro anima positus est, quia sedes animæ, sanguis dicitur esse, testante Moyse (*Lev. xvii*), quoniam anima carnis in sanguine est, et quia sanguis Domini redemptio est humani generis, et ipse carnem suam obtulit pro nobis in ara crucis atque sanguinem fudit, designatum est quod integrum hominem redemerit, id est corpus et animam fidelium suorum ab originali culpa liberaverit. Quod etiam in sacramento corporis et sanguinis sui designare voluit, qui sine carnalibus observantiis hoc solum sacrificium nostræ redemptioni prorsus sufficit. Et ideo dicitur, *communicaverunt*, id est communem naturalem habuere ipse et pueri ejus, quoniam illam naturam quæ communis in hominibus fuit, assumpsit, ut omnes communiter redimeret, quorum naturæ ipse communicare dignatus est. Quæ tamen redemptio solis pueris ejus ad vitam prædestinatis proficit, qui puritatem mundæ conversationis custodiunt, et quia ipse et pueri ejus ex uno genere sunt, vel ex uno Deo, atque pueri omnes communiter habuere carnem et sanguinem, ergo et ipse carnis et sanguinis particeps factus est similiter, quia eodem modo fragilem naturam habuit ut illi, præter peccatum; et ideo talem assumpsit naturam, ut eam morti daret, pro illis, et moriens diabolum occideret. Nisi enim homo esset, qui diabolum vinceret, non juste, sed violenter ei tollerentur homines. Ideo mori voluit, ut per mortem sui innocentis destrueret principem mortis. Non quæsit alia arma quibus pugnaret contra mortis auctorem, nisi ipsam mortem. Et per eam destruxit eum, id est deorsum struxit atque subvertit velut aliquod ædificium altitudinem superbiam ejus et fortitudinem potentiam ipsius, qui habebat mortis imperium, quia ex quo sibi per Adam captivaverat humani generis liberum arbitrium, jam quadam potentia imperabat, id est suadebat hominibus ea quæ ad mortem ducunt, id est peccata, et nemo illi resistere poterat, quia nemo peccatum omnino respuere valebat. Non enim ob aliud dicitur imperium et potestatem mortis habuisse, nisi quia peccatum persuasit, ex quo mors accidit. Unde ille qui sine ullo peccato vel originali vel proprio mori dignatus est, innocenti morte sua hunc principem iniquitatis et morti destruxit, et potestate privavit, id est diabolum, qui interpretatur *deorsum fluens*, quia et ipse semper ad ima per nequitiam defluit, et eos, qui sibi consentiunt, defluere facit, donec in infernum decendant. Sic enim habet super eos mortis imperium. Sed nos econtra sursum tendamus, quo Christi-

stus nos vocat, qui et morte sua liberavit a principe A mortis. Nec tantum ideo mori voluit, ut hunc hostem destrueret, sed etiam ut liberaret a iugo timoris, et a servitute legis eos, videlicet Judæos, qui erant obnoxii servituti, id est ut timorem pœnæ eis auferret, et amorem justitiæ per Spiritum sanctum infunderet, ut in libertate Deo servirent. Qui non ad horam, sed per totam vitam præsentem quandiu-cunque duraret, erant obnoxii servituti legis, serviliter adimplendo carnales ejus observantias timore mortis corporis et animæ, quia timebant corporaliter occidi, si legem violarent, et post obitum in inferno cruciari, quoniam et in lege didicerant Abiron et Dathan cum suis vivos in infernum cecidisse (Num. xvi), et in prophetis æterna reprobatorum supplicia manifestius audierant. Sed Christus moriens, liberavit eos et a iugo legis, et ab inferno; et nunc electi ejus mortem desiderant, ut ad regnum trans-eant. Ecce quanta bona operatur mors per Christi gratiam. Qui utique poterat etiam hoc donare credentibus, ut nec istius experirentur corporis mortem. Sed, si hoc fecisset, carnis quædam felicitas adderetur, minueretur autem fidei fortitudo. Sic enim homines mortem istam timent, ut non ob aliud felices dicerent Christianos, nisi quod mori omnino non possent. Ac per hoc nemo propter illam vitam, quæ post mortem beata futura est, per virtutem etiam contemnendæ ipsius mortis ad Christi gratiam festinaret; sed propter removendam mortis molestiam delicatius crederetur in Christum. Plus ergo gratiæ præstitit fidelibus suis. Quid enim magnum erat, videndo non mori eos qui crederent, credere se non morituum? Quanto majus est ita credere, ut se speret morituum sine fine victurum? Enervis enim et debilis est fides, nec fides omnino dicenda, si homines credendo præmia visibilia consequantur, id est si fidelibus immortalitas in hoc sæculo reddatur. Hinc et ipse Dominus mori voluit, ut sicut dictum est, per mortem evacuaret eum, qui potestatem mortis habebat, et Judæos a servitute legis eriperet.

« Nusquam enim angelos apprehendit, sed semen Abraham apprehendit. Unde debuit per omnia fratribus simili, ut misericors fieret, et fidelis pontifex ad Deum, ut repropitiaret delicta populi. In eo enim in quo passus est ipse et tentatus, potens est et eis qui tentantur auxiliari. »

Dictum est quia participavit carni et sanguini ut moreretur, et ita principem mortis angelum destrueret, et merito sic dictum est, quia nusquam, in nullo Scripturarum sacrarum loco apprehendit ipse angelos, qui ab eo recesserant. Nusquam in Scripturis invenitur quod voluisset apprehendere, id est ad se prendere et reducere angelicam naturam quæ perierat, cum omnino Scripturæ de hominum reparatione concorditer loquantur. Duas enim ad intelligendum se creaturas fecerat, angelicam scilicet et humanam. Utamque vero superbia perculit, et a datu ingentis rectitudinis fregit. Sed una tegimen

A carnis habuit, alia vero nihil infirmum de carne gestavit, angelus namque solummodo spiritus, homo vero spiritus et caro. Misertus ergo Creator ut redimeret, illam ad se debuit reducere quam in per-petratione culpæ ex infirmitate aliquid constat habuisse, et eo altius apostatam angelum debuit repellere, qui, cum a persistendi fortitudine corruit, nil infirmum ex carne gestavit. Est adhuc aliud, quo et perditus homo reparari debuit, et superbiens spiritus reparari non possit, quia nimirum angelus sua malitia cecidit, hominem vero aliena prostravit. Propterea nusquam, id est in nullo, sicut diximus, Scripturarum loco vel nusquam, id est nec in cælo, nec in aere, nec in terra, nec in abyso apprehendit angelos apostatas, imo penitus deseruit, eos, sed semen Abraham apprehendit, quia nos quasi recedentes ab eo et longe fugientes insecutus misericorditer apprehendit, et in uam personam nostræ fragilitatis naturam sibi contemperavit. Semen, id est filios Abraham apprehendit. Melius posuit Apostolus semen, quam si posuisset filios, quia semen tam de longinquis quam de propinquis parentibus dicitur, filii vero magis dicuntur propinqui. Gentes ideo omittit, quia Judæis loquitur; et quod posuit semen Abraham, sufficit suæ intentioni. Et etiam per hoc reddit eos magis obnoxios Christo, qui non ad gentes, sed ad Judæos missus est, sicut ait: « Non sum missus nisi ad oves, quæ periire domus Israel (Matth. xv). » Vel etiam gentes ad fidem conversæ, sunt semen Abraham, quia, dum in Abraham semen, id est in Christum credidere, ejus filii facti sunt, cujus semini sunt uniti. Unde eis dicitur: « Si autem vos Christi, ergo Abraham semen estis (Galat. iii). » Sive igitur de Judæis, sive de gentibus fideles, semen Abraham sunt, quod Christus apprehendit. Unde, id est propter hanc causam, quia non angelos, sed homines apprehendit, debuit fratribus simili, ut homo fieret quod illi erant. Ipsa enim natura suscipienda erat, quæ liberanda. Idcirco namque redemptor noster non angelus, sed homo factus est, quia hoc procul dubio fieri debuit quod redemit, ut et perditum angelum non apprehendendo desereret, et hominem in semet- ipso apprehendendo repararet. Semen Abraham apprehendit, id est carnem de Abraham, ut filios ejus salvaret. Ideoque fratribus per omnia, præter peccatum, simili debuit, ut similiter esset homo mortalis et passibilis, et habens omnia cætera quæ sunt naturaliter hominis. Per omnia similatus est eis, quia natus, educatus, crevit, passus est et mortuus. Qui, si aliter appareret, quomodo non homines coactos, sed volentes ad salutem reduceret? Non enim haberent quem imitando sequerentur, nisi hominem viderent sibi per omnia similem quem imitari possent. Ob hoc præcipue nobis similari debuit, ut misericors fieret, id est ut ille Deus, qui semper misericors existit, et affectum pietatis erga creaturam suam habuit, humanum corpus haberet, ut in corde compungeretur nostra miseria et in-

firmitate, sicut Evangelium narrat eum frequenter pro nobis gemisse et flevisse, ut veraciter compatientem nobis et condolentem miseris nostris. Et, quia posset nobis compati per consortium ejusdem naturæ mortalis, nec tamen a miseris eripere, subditur : *Et fidelis pontifex ad Deum*; fidelis enim pontifex factus est, ut fideliter nobis exstrueret pontem super fluctus sæculi hujus ad terram viventium (*Marc. vii, viii; Luc. xix; Joan. xi*). Nullum enim fallit, sed omnes per pontem quem ipse fecit, gradientes fideliter ducit ad Deum. Pontem quippe fecit, qui facultatem dedit nobis calcandi et superandi mundanos fluctus, atque transeundi super eos ad patriam vitæ, et perveniendi ad Creatorem nostrum, per hoc quod liberum arbitrium nobis restituit, et auxilium suæ gratiæ nobis concessit, ac se mediatorem dedit, ut repropitiaret delicta populi, id est removeret negligentias et culpas, quibus Deum populus derelinquebat. Repropitiare componitur ex re, et prope, et cieo, cies. Et culpæ quibus delinquimus, id est derelinquimus Deum, et elongamur ab eo, quasi propinquant Deo, dum importune increscunt in oculis ejus, et iram ejus irritant. Sed benignus pontifex et mediator noster repropitiat eas, id est retro ciet eas de eo quod fuerant prope, hoc est removet eas a facie Dei, misericorditer interpellans pro nobis, et delens eas, et bene potest delicta nostra repropitiare, quia et a peccato nos potest in tentationibus custodire. Nam in eo in quo passus est, id est in inferiori substantia, in humanitate scilicet, de qua minus videretur, potens est nobis in tentationibus subvenire. In eo, id est in homine, in quo passus est a Pilato (*Joan. xix; Matth. xxvii; Marc. xv*), qui in divinitate semper mansit impassibilis, ipse idem antea tripliciter et tentatus a diabolo, potens est et eis qui tentantur, auxiliari, id est eis qui post baptismum vel a diabolo vel recursu pravæ consuetudinis tentantur, subvenire potest, ne corruant, ne ad ipsum, unde per gratiam Dei liberati sunt peccato ducente recurrant. Nam idcirco ipse prior tentari dignatus est, ut sic tentationes nostras suis tentationibus vinceret, sicut mortem nostram venerat sua morte superare. Notandum quod tentatus in propria significatione de ipso etiam Domino potest dici, quia multum contemnebat cum diabolus, cum impotentem hunc ad panem ex lapide faciendum arbitraretur, et avaritiam ei persuadere conaretur (*Luc. iv; Matth. iv*). Hucusque immoratus est Apostolus in hoc quod abundantius oportet nos observare ea quæ a Christo et ejus discipulis audivimus, quam quæ ab angelis, quoniam omnia illi subjecta sunt, sicut auctoritate prophetica probatum est. Nunc autem ingreditur facere comparisonem inter Christum et Moysen, ut ostendat quia verba Christi magis quam Moysi sunt observanda, ut sic magis ac magis persuadeat illis ea, quæ Christus prædicavit, esse tenenda omnia; et nihil eum fecisse vel docuisse, quod non

fuisset illi injunctum a Patre, et hoc est quod sequitur :

CAPUT III.

« Unde fratres sancti, vocationis cœlestis participes, considerate apostolum et pontificem confessionis nostræ Jesum, qui fidelis est ei, qui fecit illum sicut Moyses fidelis in omni domo illius (*Num. xii*). Amplioris enim gloriæ iste præ Moyse dignus habitus est, quanto ampliorem honorem habet domus, qui fabricavit illam. Omnis namque domus fabricatur ab aliquo. Qui autem omnia creavit, Deus est. Et Moyses quidem fidelis erat in tota domo ejus, tanquam famulus in testimonium eorum quæ dicenda erant: Christus vero tanquam Filius in domo sua. Quæ domus sumus nos, si fiduciam et gloriam spei usque ad finem, firmam retineamus. »

Dictum est superius quia Christus est pontifex noster ad Deum, et quia pro nobis passus est, et potest etiam secundum quod homo est, auxiliari nobis in tentationibus. Unde, id est ex omnibus his præmissis, vel propter omnia hæc supra dicta, o fratres, id est ex fide matre geniti, et per eandem sancti, id est a peccatis mundati, ac bonis operibus instituti, et participes quoque cœlestis vocationis, quia sicut et vos vocati estis ad cœlestia, ut æternam ibi cum Christo possideatis hæreditatem, propter quod et ei multum debetis esse obnoxii et obediens, qui vos ad cœlestia vocavit per gratiam suam, et animos vestros ad excellentiam novarum ejus promissionum erigere. Vos, inquam, o fratres, filii unius cœlestis Patris et unius Ecclesiæ matris, propter hæc omnia considerate, id est oculis cordium attentè conspiciat apostolum, quem vobis Deus misit, scilicet unigenitum suum. Merito Paulus istis se non scripsit apostolum, quibus nunc Jesum nominat apostolum, quoniam prærogative est eorum apostolus, sicut ait : « Non sum missus nisi ad oves quæ perierunt domus Israel (*Matth. xv*). » Et si carnales observantiæ ad cœlestem habitationem et vocationem sufficere possent, nunquam tantus, tam dignus esset eis missus, Ἀπόστολος enim missus interpretatur. Considerate igitur hunc apostolum, diligendo et imitando eum, et faciendo voluntatem ejus; et considerate hunc eundem pontificem, id est intercessorem, et viam nobis sternentem ad terram viventium, quia et pro nobis interpellat, et facultatem nobis parat, ut super fluctus sæculi ac super cuncta labentia transeamus ad cœlestem patriam, pontificem dico confessionis nostræ, id est quem omnes Christiani confitemur, et quem Jesum, id est Salvatorem agnoscimus. Omnes videlicet confitemur, quia hunc salutis largitorem habemus, et alio non indigemus, quia ipse omnino sufficit ad salutem. Qui fidelis est ei qui fecit illum, id est Patri qui, secundum humanitatem creavit illum, quia quidquid ei Pater injunxit, totum ipse fideliter adimplevit, quia non suam, sed Patris gloriam quæsit, nec ejus mandata abscondit, neque suam.

sed Patris voluntatem facere venit, et ideo, si carnales cæremonias evacuavit, in hoc paternæ voluntati non contradixit, sed potius fideliter obedivit, fidelis est Patri, sicut fidelis fuerat Moyses in omni domo illius, id est in omni plebe Judæorum. In domo illius, id est Jesu vel Patris, fuit fidelis Moyses, quia minister erat, non Dominus. Et quæcunque Dominus præcepit ut Moyses puniret, punit; quidquid illi Dominus injunxit, totum ille fecit vel docuit, et ad opera voluntatis Domini peragenda Judæos coegit. Sic et Christus fidelis est Patri, faciens omnes voluntates ejus in omni domo, id est in omni Ecclesia ejus tam Judæorum quam gentium. Et ideo fidelis est in hac domo, non solum idololatriam de gentibus evacuans, sed et carnales de Judæis annihilans. Dixi ut consideretis hunc apostolum, quod facere debetis, quia iste est præ Moysæ, id est major Moysæ, et hoc considerate. Nam, si Moyses vobis sufficere posset ad justitiam et salutem, nunquam iste tantus mitteretur vobis. Nam iste habitus est a Patre dignus amplioris gloriæ præ Moysæ, id est majoris honorificentæ et coronæ, quam Moyses. Secundum usum Latinæ locutionis dicere debuisset, dignus ampliori gloria; sed secundum Græcos dicit, dignus amplioris gloriæ. Vel amplioris gloriæ habitus et reputatus est iste præ Moysæ, quia dignus est per meritum, ut majoris gloriæ habeatur. Non enim per solam gratiam vel naturam hoc habet, sed et per justitiæ meritum. Præ Moysæ est in gloria et in merito. Nam iste est Filius, Moyses vero famulus; iste sanctificans, Moyses vero sanctificatus; iste immunis ab omni peccato, usquequaque consummatus in omni bono. Moyses autem non sine peccato, qui semper crescere potuit in aliquo bono, et in tantum judicatus est a Patre dignus habere majorem gloriam et exaltationem post hanc vitam, in quantum habuit in hac vita majorem venerationem apud fideles et sibi subditos, quam Moyses habuerat apud suos. Moyses enim reputatus est Dei famulus, Dei minister bonus, Dei dispensator fidelis, quem subditi venerantur non sicut Deum, sed sicut magistrum. Christum autem venerantur subditi sicut Deum, Creatorem suum, verum Deum, sufficientem ad gregem suum custodiendum, quod de Moysæ non est putandum. Et sic amplioris gloriæ est iste præ Moysæ, quanto ampliores honorem habet domus, id est de domo vel in domo, qui fabricavit illam quam qui dispensat in ea. Quod de spirituali domo intelligendum, videlicet de plebe Dei, cujus Moyses dispensator agnoscitur, sed Christus fabricator, ipse enim fabricavit, id est in fide fundavit et in bonis operibus ædificavit domum Dei, quæ est Ecclesia, in antiquis et novis sanctis, et ideo longe sublimis honoratur in ea, quam Moyses. Dico quia fabricavit domum Dei. Nam omnis domus, id est omnis anima quæ sit templum Dei, fabricatur ab aliquo alio, quia per se ipsam non potest construi, nisi ab alio superiore construat. Nihil enim boni valet habere a se sola.

A Sed ille qui creavit omnia virtutum bona in electis, Deus est, et hoc agere Christus potentia divinitatis suæ semper consuevit. Non solum enim creavit nos ut essemus, sed etiam ut boni essemus, si jam boni sumus. Quod si necdum boni sumus, rogandus est, ut qui nos fecit homines, faciat nos bonos. Ipse est ergo fabricator hujus sanctæ domus, ac per hoc aliter in ea quam Moyses honorandus. Et uterque quidem, sicut dictum est, fidelis fuit, quia officium injunctum bene implevit; sed tamen inter eos differentia fuit, quia Moyses quidem fidelis erat sicut famulus. Christus vero sicut Filius in domo Patris et Dominus. Et hoc est: Et Moyses quidem fidelis erat, id est fideliter implens quæcunque sibi divinitus imperabantur. Fidelis erat in domo non suam, sed ejus, id est Patris vel Christi; et in tota domo illa, id est in universa plebe Judaica, malos arguens atque puniens, bonos autem exhortans et semper ad meliora promovens, non ut Dominus, sed tanquam famulus, quia non se dicebat Deum, sed famulantem ei qui se miserat; nec a Deo diligebatur ut Dominus, cujus erat propria domus, Moyses in qua fidelis erat, et hoc in testimonium eorum quæ dicenda erant, id est ut testaretur et confirmaret ea quæ conveniebant dici carnalibus, qui nondum spiritualia capere poterant, non ut gratiam daret. Dicebat enim fideliter populo quæ Deus præceperat. Quibus dictis dabat testimonium multis rationibus et miraculorum signis et variis assertionibus. Dico quia Moyses erat ut famulus in domo Domini, Christus vero non sicut famulus, sed tanquam filius qui jure est hæres, et tanquam dominus in domo non aliena, sed sua, quia propria erat ejus, sicut et Patris, ac si dicatur: Et si uterque prælatus est domui Dei, et in sua locutione fidelis exstitit, magna tamen differentia est, quia Moyses erat in domo Domini tanquam famulus, Christus vero tanquam Filius in domo Patris, et hæres et Dominus. Et cum tanto sit major Christus, debet omnino recipi. Moyses vero minor, in carnalibus observantiis postponi. Moyses enim sine Christo non proderit. Christus autem solus ad omnia sufficit. Diceret nunc aliquis: Quid ad nos si Moyses vel Christus est in domo? Nescimus enim quæ sit illa domus, nec per hoc nobis Christus commendatur, quia, etsi homines fuerunt illa domus, illi potius credendi sunt hoc exstitisse, qui fuerunt temporibus Moysi vel Christi, non autem nos qui modo sumus, cui videtur respondere Apostolus, Quæ domus sumus nos. Quasi dicat: Ne diffidatis de domo, quia nos sumus domus Dei. Nos fideles et in hoc tempore, sicut antea patres nostri, sumus illa domus, quam Christus sua morte fabricavit. Hac tamen conditione dico nos esse domum divinæ habitationis, si retineamus fiduciam, id est si spem certissimam quam dedit nobis, non amittamus, sed indubiam fortiter retineamus, hoc est si certissime salutem in Christo speramus sine carnalibus observantiis, tunc sumus domus in qua per fidem habitat.

Fiducia namque pro spe hic accipitur. Et quia nemo potest sperare, nisi spes ex bona conscientia surgat, addit *et gloriam spei*, id est si retineamus et bonam conscientiam, quæ est causa spei, et decus et gloria mentis, per quam in spem erigimur, quia sic ut idem Apostolus dicit: « Gloria nostra est testimonium conscientiæ nostræ (II Cor. 1), » et quia nonnulli conscientiam boni operis habent, per quam gloriari in Deo possunt et sperare, sed tamen vacillantem, ponit *firmam*. Et quia firmam per mensem vel annum possent habere, subdit *usque in finem*, id est usque ad obitum, qui « quia perseveraverit usque in finem, hic salvus erit (Matth xxiv). » Vel fiduciam *retineamus*, ne subrepente aliqua infidelitate, diffidamus nos per Christum posse salvari, quærentes salutis auxilium in carnalibus observantiis, sed sine his solum Christum ad omnia sufficere indubitanter confidamus. Idcirco enim ostensus est Christus longe nobilior Moyse, ut solum Christum teneamus, in quo habebimus omnia, et gloriam spei, id est gloriosam spem, quia est de jucunditate cælesti; firmam, id est perdurantem usque in finem vitæ, quando accipietur quod nunc speratur.

« Quopropter, sicut dicit Spiritus sanctus: Hodie « si vocem ejus audieritis, nolite obdurare corda « vestra (Psal. xciv), sicut in exacerbatione secundum diem tentationis in deserto, ubi tentaverunt « me patres vestri, probaverunt et viderunt opera « mea quadraginta annis. Propter quod infensus « fui generationi huic, et dixi semper hi errant « corde. Ipsi autem non cognoverunt vias meas, « quibus juravi in ira mea, si introibunt in requiem « meam. »

Nunc iterum invitat eos terrendo ad fidem, ne propter incredulitatem perdant æternam requiem, sicut patres eorum in deserto; qui, quia increduli fuerunt, terram promissionis suæ significatam amiserunt. Domus Dei sumus, si non per incredulitatem diffidamus, sed certa fide fiduciam teneamus. Quapropter nolite per infidelitatem obdurare corda vestra, et hoc ita moneo, sicut dicit Spiritus sanctus, id est eandem intentionem ego nunc in vestra correctione habeo, quam habuit Spiritus sanctus, quando dixit istud ore Davidico. Nec solus ego hoc suadeo, sed Spiritus sanctus hoc idem similiter suadet. Et idem bonum ego vobis permitto, si obedieritis; vel malum, si cor obduraveritis, quod Spiritus sanctus promisit, cum ad vos et alios in tempore gratiæ facturos vocem dirigeret, dicens: *Hodie, si vocem, et cætera*. Sanctus enim Spiritus prævidens duritiam cordis Judæorum, quia contra vocem Domini Jesu obduraturi erant infideliter cor suum, et ideo auctoritate sua volens eos a duritia cordis revocare, et ad integritatem fidei Christi invitare, scilicet ut nihil salutis putarent esse in carnalibus observantiis post adventum veritatis, dixit: *Hodie, et cætera*. Et per hoc multum revocat Apostolus Judæos hanc prophetiam habentes, quoniam ostendit Spiritum sanctum hoc idem tanto tempore antea prædi-

xisse, quod nunc dicitur eis in tempore gratiæ. *Hodie*, id est hac egregia et nobili die, scilicet in hoc tempore gratiæ notabili et præclaro inter omnes alias ætates, in quo Deus majorem pietatis affectum hominibus exhibuit, quam in aliis temporibus; *si vocem ejus*, id est novam Christi prædicationem audieritis, nullum incredulitatis signum remaneat in vobis. Modo per se loquitur, qui prius per præcones loquebatur; si tunc duri fuistis, vel nunc estote molles. Quod ait, *si vocem ejus audieritis*, non dubitat illos eam audituros, sed per hoc magis attentos facit ad audiendum, quasi incertos reddit et suspensos, ne forte contingat ut non audiant. *Nolite obdurare*, id est contra eum dura facere corda quæ sunt vestra, id est in vestræ voluntatis arbitrio, sicut obduraverunt patres vestri carnales (Exod. xvi, xvii, xxxii; Num. ii, xxv) in exacerbatione, id est in acerrima offensione, qua sibi Deum redderunt acerbum, cum non crediderunt quod Deus esset illis traditurus terram repromissionis, sicut pollicitus fuerat, nec cælestem requiem, quæ per eam significabatur. Nolite, inquam, nunc obdurare corda secundum diem tentationis in deserto, id est sequentes et imitantes diem et tempus, in quo patres vestri me tentaverunt, et ex diffidentia panem petierunt, atque cum hæsitacione dixerunt: Nunquid poterit Deus parare mensam in deserto? (Psal. lxxvii) et alia hujusmodi, et hoc fecerunt in deserto, postquam de Ægypto educti fuerant, ubi Deum tentare non debuissent, cujus tot et tanta jam viderant opera, scilicet seipos in manu valida de Ægypto per mare Rubrum sicco pede eductos, et hostes eorum in mari submersos (Exod. xiv), et alia multa magnalia. Quare postmodum non debuissent de protectione gratiæ ipsius propter aliquos hostes diffidere. Cum enim audissent ab exploratoribus (Num. xiv), habitatores promissæ terræ fortes ad prælium, oblitii sunt virtutis Dei toties probatæ, nec crediderunt illum esse potentem ad terram illam populo suo subjugandam propter quod et indigni fuerunt intrare in illam. Vos autem cavete ne similiter facientes, a vera sanctorum patriæ excludamini. Nam et vos spiritaliter ab Ægypto educti estis, id est a tenebris ignorantiæ, et ab afflictione vitiorum liberati, submersis in baptismo vestris hostibus diabolo cum omni pompa ejus et exercitu vitiorum; et ducente Domino, ad hoc promoti estis, ut mundum istum et præsentis sæculi habitationem desertum, et locum horroris atque peregrinationem et exilium esse intelligatis. Et ideo non debetis amplius Deum tentare per aliquam diffidentiam, ut putetis vos sine carnalibus observantiis per Christum non posse salvari, quia tunc non intrabitis in electorum patriam, sed certissima fide credentes vos per eum esse salvandos, sola ejus præcepta servare. Quia vero dixit diem tentationis, et a quibus esset illa tentatio facta, non dixit, ideo nunc exponit qui Deum in deserto tentaverunt. Ubi, id est in quo deserto tentaverunt me patres vestri. quorum tenta-

tionis et exacerbationis filii et imitatores estis, dum in fide dubitatis, et ideo timendum est vobis, ne quos habetis patres in culpa, imitemini. in eadem pœna. Jam ergo tales non sint patres vestri, nolite eos imitari. Patres vestri erant, sed, si non imitati fueritis, patres vestri non erunt, *probaverunt me*, id est curiositatis causa exquisierunt an possem facere quæ petebant; *et viderunt opera mea quadraginta annis*, quia tam longo annorum spatio feci coram cis in manu Moysi miracula, et ipsi magis ac magis obduraverunt corda; ad hoc cum illis sui per quadraginta annos, ut ostenderem tale genus hominum quod me semper exacerbaret, usque in finem sæculi fore, quia per illos quadraginta annos totum hujus sæculi tempus significatum est. Ipsi me tentaverunt per infidelitatem suam. *Propter quod ego sui infensus*, id est contra iratus *generationi huic tam perversæ*, quæ et genus hujusmodi rebellium hominum in Ecclesia usque ad finem mundi semper futurorum designavit. Et licet me offenderent, tamen ego, *dixi semper* de illis, *hi errant corde*, id est per Moysen et Aaron misericorditer annuntiavi et corrigere studui errorem, quem corde etiam habebant et scienter et voluptionarie, dicens: *Illi errant corde*, id est ex propria deliberatione, quia serio peccant; et cum sciant se male agere, non desistunt. Ego quidem paterna benignitate revocabam eos, sed *ipsi non cognoverunt vias meas quibus incedebam*, id est misericordiam, quia eos corrigere studebam; et veritatem, quia eos, si in malo perseverarent, damnare disponebam, quia universæ viæ Domini misericordia et veritas (*Psal. xxiv*). Vel non cognoverunt vias meas, id est non intellexerunt præcepta mea, per quæ venit ad me, quia ego spiritaliter locutus sum, « scimus enim quoniam lex spiritalis est (*Rom. vii*), » ipsi autem carnaliter intellexerunt. Ita non cognoverunt vias meas, *sicut* illis merentibus ego *juravi*, id est immutabiliter confirmavi, et hoc feci *in ira mea*, id est in dispositione ultionis sumendæ, *si introibunt in requiem meam*, id est non introibunt in terram promissionis, in qua eos requiescere facturus eram; nec in regnum cælorum, quod per hanc significatur, ubi perennis est requies. Duo notat, et quod pœnas eis dedit, et quod requiem negavit. Nam in ira, qua negavit requiem, sumpsit ultionem. Defectus quoque dictionis, vehementiam iræ designat, cum dicitur: *Si introibunt in requiem meam*, quamvis ira Dei non sit ut hominis, id est perturbatio concitati animi, sed tranquilla dispositio justis simpliciter constituti. Vehementer enim minatur, cum quasi præ nimia ira imperfectam relinquit sententiam, dicens: *Si introibunt in requiem meam*. Et cum juramento minatur istud. Multum ergo timenda est hæc comminatio. Nam loqui Deum, magnum est, quanto magis jurare Deum. Jurantem hominem debes timere, ne propter jurationem faciat quod contra voluntatem ejus est. Quanto magis Deum, qui nihil temere jurare potest? Historialiter *hoc loco* reducit ad memoriam, quod miserunt vi-

A dere terram; et cum audierunt ibi esse inexpugnabiles viros, oblii virtutis Dei toties probatæ, dixerunt: « Revertamur in Ægyptum (*Num. xiii, xiv*). » Unde juravit Dominus quod non intrarent in terram illam, quæ est requies laborum, et sic omnes in solitudine mortui sunt præter duos; et sicut illi per incredulitatem et diffidentiam terram amiserunt, quæ illis parata erat ut requiescerent in ea, ita vos, si in fide Christi dubitaveritis, vel inobedientes illi fueritis, veram justorum patriam non ingrediemini. Hucusque terrendo locutus est, ne sint increduli Christo, sicut patres illorum Moysi, ne veram perpetuæ beatitudinis quietem amittant, sicut patres illorum requiem sibi promissæ terræ. Hinc blandiendo monere incipit, ne requiem illam amittat; et temporis opportunitatem suadet, ut ad eam festinetur, subjungens:

« Videte, fratres, ne forte sit in aliquo vestrum cor malum incredulitatis discedendi a Deo vivo, sed adhortamini vosmetipsos per singulos dies, donec hodie cognominatur, ut non obduretur quis ex vobis fallacia peccati. Participes enim Christi effecti sumus, si tamen initium substantiæ ejus usque ad finem firmum retineamus, dum dicitur: Hodie, si vocem ejus audieritis, nolite obdurare corda vestra, quemadmodum in illa exacerbatione. Quidam enim audientes exacerbaverunt, sed non universi qui perfecti sunt ab Ægypto per Moysen. Quibus autem infensus est quadraginta annis? Nonne illis qui peccaverunt quorum cadavera prostrata sunt in deserto? Quibus autem juravit non introire in requiem ipsius, nisi illis qui increduli fuerunt? Et videmus quia non potuerant introire propter incredulitatem. »

Leniter incipit admonere, ut libentius admonitionem suscipiant. *Videte*, inquit, o fratres, quasi dicat: Mihi debetis acquiescere, qui vos fraternæ dilectione admoneo. Videte, id est rationabili consideratione cavete, ne quis vestrum habeat cor incredulum, et excludatur ab æterna requie fidelium. Sed illud, quapropter, quod supradictum est, nonnulli volunt huic monitioni jungere, ita: *Domus Dei sumus, si fiduciam et gloriam spei retineamus.* Quapropter videte, fratres, ne diffidatis. Videte ne forte, quia in vestro est arbitrio, et ad utrumque se habet *sit in aliquo vestrum*, quia de multis non dubito, qui perfecti sunt, *cor incredulitatis*, ut non credat Christum ad salutem sufficere, quia, *malum*, est tale cor, quoniam sic ruit in multam peccatorum voraginem, et post in mortem. Nam hujusmodi cor est cor, id est voluntas *discedendi*, id est diversis viis cedendi et fugiendi *a Deo vivo*, id est a Christo, qui, sicut legimus, est Deus verus et vita æterna. Qui enim ab eo diversam viam incedit, a vita discedens ad mortem tendit. Quod inter istos nonnulli faciebant, dum in fide Christi dubitantes, eum sine carnalibus observantiis ad justitiam et salutem sufficere posse non crederent; et ita jam

pro exiguo fidem ejus ducentes, facile ab ea recedere vellent. Et minus est per aliam culpam a Deo discedere, quam per incredulitatem eum omnino postponere. Qui enim fidem abjicit, omnino a Deo recedit. Qui vero per aliam ab eo culpam discedit, sperat adhuc reverti. Per hoc quod dixit, cor incredulitatis, intelligi poterat cor malum, et cor discedendi a Deo vivo. Sed ideo posuit, quia istæ voces magis valent ad absterrendum eos. Non habeatis cor incredulitatis, sed potius *adhortamini*, non diversos, non alterius gentis homines, sed, *vosmetipsos*, adinvicem. Quod enim dixit, vosmetipsos, ostendit hortationem eorum adeo necessariam inter eos esse, ut non oporteat extendi ad alios, adhortamini vos invicem, ut sincere credatis, et pie ac sancte vivatis, et hoc *per singulos dies*, id est quotidie, et non per unum annum vel duos tantum, sed *donec cognominatur Hodie*, id est quandiu insimul dies hodie cognominantur. Nam quod dixit, hodie cognominatur, voluit notare multitudinem dierum esse in tempore gratiæ. Quod tempus est hodie, id est magnum et demonstrabile; et est dies, id est clarum post tenebras erroris et ignorantæ donec hodie cognominatur, id est quandiu tempus gratiæ durat, adhortamini vosipsos de incremento fidei cæterarumque virtutum, quia non minus modo potestis proficere, quam præsentem Christo, vel donec hodie cognominatur, id est quandiu vita præsens unicuique manet, in qua semper dicitur, hodie adhortamini vosipsos semper ad meliora. Si quis enim peccavit, usquequo est hodie, potest reverti. Nemo igitur desperet dum vivit. Sed neque securus incaute fiat, quia nescit quando sibi istud hodie determinetur, ideo vos adhortamini, id est *ut non obduretur quis ex vobis*, id est non fiat durus et incredulus contra monitionem Spiritus sancti, qui cor ejus molle vult facere, ut possit in eo verba sua velut in cera scribere. Non obduretur quis, neque enim de multis metuo. Nam obduratur contra fidem *fallacia peccati*, id est errore peccati se fallente sub virtutis specie, si cum fide Christi legem, quoniam a Deo data est, putaverit salutem necessariam. Sic enim fallitur peccato, id est male faciet, dum se putaverit benefacere quia ex observatione legis Deum offendet, cui se pereandem legis observantiam placere credet. Nam qui legem adhuc observat, Christum venisse negat. Et ideo non debet quisquam nostrum obdurari tali fallacia, ut sub occasione legalis observantiæ discedat a Christo evacuans fidem ejus. Nam *participes Christi sumus effecti*. Non enim potest fieri discessio, ubi primum non fuit conjunctio. Sed nos jam Christo sumus conjuncti, et ideo non discedamus ab illo. Effecti sumus participes Christi in nomine et gratia, quia et Christiani vocamur, et gratiam ejus percipimus; per quem quidquid boni habemus, assecuti sumus, scilicet fidem, peccatorum remissionem, innocentiam et justitiam, etc. Vel participes Christi sumus effecti, id est spe sumus jam participes ejusdem in corruptionis et gloriæ quam

A Christus habet. Ac si dicatur: Debetis adhortari et non esse duri, quia quod non eramus, facti sumus per gratiam, habentes partem cum Christo in hæreditate. Tamen, hac conditione dico, *si retineamus initium substantiæ ejus*, id est fidem quæ est initium verborum, per quam Deus existit in nobis, et per quam deificamur et divinæ substantiæ participamus. Fides enim est substantiæ initium, id est incorporationis ejus, quia fundamentum est origo virtutum, per quas ipse constat in nobis, et nos membra ejus efficitur. Et hoc initium oportet ut retineamus non titubans, sed, *firmum*, et inconcussum; nec per mensem vel annum, sed *usque ad finem*, vitæ præsentis, ut scilicet nunquam deseramus fidem. Et ne dicerent, vobis apostolis tantum et Christi contemporaneis jussum est ut fidem teneant, subjungit, *dum dicitur, hodie*, etc. Ac si dicat: Non tantum his qui Christum audire loquentem, præceptum est tenere fidem, et non obdurare corda, sed etiam vobis hoc idem est injunctum, et cæteris omnibus dum dicitur, id est quandiu dicitur, *hodie si vocem ejus audieritis*, hoc est per totum tempus gratiæ vel præsentis vitæ. Vel ita: Non solum auditores Christi, fidem debuerunt adhibere dictis ejus, sed et vos, quandiu dicitur hodie si vocem ejus audieritis, id est quandiu vocem divinæ prædicationis in hoc sæculo potestis audire, *nolite infideliter obdurare corda vestra*, contra vocem Dominicæ admonitionis, *quemadmodum*, obduraverunt patres vestri *in illa*, notabili et magna, *exacerbatione*. Nolite pravorum exempla sequi, sed honorum. Nam, *quidam*, illorum, *audientes*, in deserto vocem Dei, pollicentis quod induceret illos in terram promissionis, in qua et requies æterna figurabatur, dubitaverunt Deum hæc agere posse, et sic hæsitacione sua, *exacerbaverunt eum*, id est acerbum sibi et asperum reddiderunt. Qua sententia demonstratur non satis esse audire de illa requie, quia illi omnes audierunt, sed non omnes pervenerunt. Nam et vos nunc auditis quod Christus vobis credentibus requiem illam promittat. Si dubitaveritis eum sine carnalibus observantiis vos in illam inducere posse, exacerbabitis eum sicut patres vestri, nec intrabitis in illam. Pejus est enim exacerbare quam tentare.

D Quidam exacerbaverunt, *sed non universi qui profecti sunt ab Ægypto per Moysen*; id est per ducatum Moysi. Nam inter eos erant Caleb et Josue, qui non offenderunt, et hos debetis imitari. Nam et vos ducatu veri Moysi, id est Christi, educti estis a tenebris ignorantæ et erroris. Ideoque non debetis amplius Deum incredulitate et pravis moribus exacerbare, sed fide et bonis operibus ad terram perpetuæ beatitudinis vobis promissam festinare. Per hoc quod dicit quosdam exacerbasse, sed non universos, innuit quod intelligebat inter istos quosdam dubitantes, et quosdam non dubitantes. Dico quod quidam exacerbaverunt, sed non omnes. Sed *quibus horum infensus est quadraginta annis?* id est utrum illis qui exacerbaverunt, an illis qui non exacerbaverunt.

verunt? *Nonne illis qui peccaverunt?* Utique illis. Quod ex affectu apparuit, quia *prostrata sunt*, id est procul a castris, et ab omni vicino strata sunt, *in deserto*, et præ multitudine jacuerunt insepulta *cadavera* eorum, exposita bestiis et avibus, id est corpora eorum, sicut brutorum animalium *cadavera*, relictæ sunt *in deserto*, nec sepulturæ tradita, et in hoc apparuit ira Dei. Significant autem, ut supradictum est quadraginta anni totam præsentem vitam, vel spatium temporis usque ad finem sæculi. In quo quicumque post baptismum, vel infidelitate vel criminosa conversatione Deum irritant, non sunt digni pervenire ad terram viventium, sed in hujus mundi solitudine laniantur more *cadaverum a feris et avibus*, id est a malignis spiritibus, et ad æterna supplicia rapiuntur. Hieronymus in libro sexto super Ezechielem : « Pepercit, ait, oculus meus ne interficerem eos atque delerem; nec omnino consumerem (Ezech. xx). » In quo quæritur, quomodo eis pepercit, quorum *cadavera* in solitudine corruerunt, et excepto Jesu Nave et Caleb filio Jephone, terram repromissionis nullus ingressus est? Ex quo intelligimus vivere eos, nec æternis suppliciis reservatos, nec deletos esse de libro vel de terra viventium, nec consumptos ante faciem Domini. Si enim ex eo quod non sunt introducti in terram promissionis periisse credendi sunt, ergo Moyses periit, qui vidit tantum terram promissionis, et non est ingressus in eam. Peccantes quidem prostravit in mortem corporis, sed incredulis negavit requiem animæ post mortem. Et hoc est quod interrogative dicitur ad increpationem istorum, qui adhuc in fide dubitabant. Sed *quibus juravit non introire in requiem ipsius, æternam, quæ significabatur per terram promissionis, vel in ipsam terram promissionis, nisi illis qui increduli fuerunt*, ad vocem promissionis ejusdem requiei? Quasi dicat: Non aliis hoc juravit, sed illis. Et videmus, aperta ratione, quia non potuerunt, introire in illam requiem perpetuam, sicut nec in terram promissionis, propter incredulitatem suam. Complevit enim Deus comminationem juramenti sui, qua dixit incredulos in requiem suam non intraturos, et similiter faciet omnibus incredulis.

CAPUT IV.

« Timeamus ergo, ne forte relicta pollicitatione introeundi in requiem ejus, existimetur aliquis ex nobis deesse. Etenim et nobis nuntiatum est, quem admodum et illis. Sed non profuit illis sermo auditus, non admistus fidei ex his quæ audierunt. Ingreдемur enim in requiem qui credidimus, quemadmodum dixit: Sicut juravi in ira mea, si introibunt in requiem meam (Psal. xciv), et quidem operibus ab institutione mundi perfectis. Dixit enim in quodam loco de die septimo sic: Et requievit Deus die septimo ab omnibus operibus suis (Gen. ii), et in isto rursum: Si introibunt in meam requiem. Quoniam ergo superest introire quosdam in illam, et hi quibus prioribus annuntiatum est, non introierunt propter incredu-

litatem, iterum terminat diem quemdam hodie, in David dicendo post tantum temporis, sicut supra dictum est: Hodie si vocem ejus audieritis, nolite obdurare corda vestra. Nam si eis Jesus requiem præstitisset, nunquam de alia loqueretur post hac die. Itaque relinquitur sabbatismus populo Dei. Qui enim ingressus est in requiem ejus, etiam ipse requievit ab operibus suis, sicut et a suis Deus. Festinemus ergo ingredi in illam requiem, ut ne in idipsum quis incidat incredulitatis exemplum. »

Et quia propter incredulitatem illi perdiderunt requiem, ergo timeamus, id est solliciti simus, ne et nos similiter eam perdamus ob infidelitatem, ut si non amore, saltem timore fugiamus incredulitatem. Timeamus, quia timendum est, ne forte (forte dico, quia in arbitrio vestro est, et ad utrumlibet se habet) relicta pollicitatione, id est ne contempta et neglecta atque deserta frequenti promissione, quam nobis Deus fecit, vel quam nos in baptismo fecimus Deo, introeundi per fidem et operationem in requiem quæ est ejus, id est potestatis illius, quia potest eam dare cui vult, existimetur aliquis nostrum deesse. Requiem illam nobis Deus promisit credentibus, non relinquamus promissionem ejus, sed certa fide teneamus eam, credentes quod sine carnalibus observantiis sola Christi promissione percipiemus illam. Timeamus ne quis ex nobis, id est ex nostro collegio tam religioso, relinquens istam pollicitationem, et hæsitans in corde suo, atque titubans in fide, det malam de sua salute cæteris opinionem, ut existimetur deesse ab illa requie propter incredulitatem suam, sicut antiqui patres. Nam unusquisque debet studere tam firmus esse in fide et bona operatione, ut cum obierit, non sit dubium ad requiem illam hunc pervenire. Cæterum qui dum quoad viveret, in fide nutavit ei in opere negligens fuit, existimatur post mortem ab illa deesse. Et hoc timendum est, ne cui nostrum contingat. Nam et ad nos pertinet de illa requie sollicitos esse, sicut pertinuit ad patres nostros. Etenim et nobis tempore gratiæ nuntiatum de illa est per filium, quemadmodum per figuram terræ promissionis nuntiatum est et illis de ea per famulum; et ideo non possumus excusationem de ea prætere, quasi de ignorantia, quia non solum illis patribus, sed etiam nobis prædicata est illa requies. Nec solum in Evangelio, sed et ante legem, et sub lege docti sumus de illa. Nobis nuntiatum est sicut et illis. Sed illis non profuit, prosit vel nobis, non profuit illis sermo, id est illa quietis prænuntiatio, quia sermone tantum visa est eis; et ideo non profuit sermo, quia auditus tantummodo est, et non completus. Et vere tantum auditus, non factus vel creditus. Nam non admistus fidei, ut et sermo et fides simul jungerentur atque miscerentur, fidei dico quæ esset ex his quæ audierunt ab exploratoribus suis. Non enim fidem ex verbis eorum sumpserunt, sed magis amiserunt. Vel ex his quæ audierunt ab exploratoribus, factum est ut sermo,

quem prius audierant de illa requie, non admisceretur fidei illorum, sed falsus putaretur. Nam cum audirent terram promissionis circumdatam montibus, urbes habere munitissimas et habitatores fortissimos, desperaverunt intrare in requiem illam, quæ et futuram significat requiem; et si præsentis quietis spe perditâ, dubitaverunt de illa quæ in hac erat præfigurata. Dixi quia et nobis nuntiatum est de illa requie, quod effectus probat, quoniam ingrediemur in illam. Non enim viam ingrediendi scivissemus, nisi nobis esset nuntiata. Vel ita: illis qui non crediderunt, non profuit, quia nobis qui credimus, proderit. Nam *ingrediemur in illam requiem nos qui credimus, quemadmodum ex opposito dicit de incredulis, si introibunt in requiem meam*. Per quod patet, quia qui credunt, intrabunt. Ingridiemur enim credendo, sicut illi perdiderunt non credendo. « Non cognoverunt, inquit, vias meas, » sicut illis merentibus iram meam exhibui. Ita cæci fuerunt ad cognoscendum vias meas, sicut ego firmiter illis minatus sum quod non essent intraturi in requiem meam Palestinæ regionis, vel cælestis habitationis, et sicut ablata est illis, quia non crediderunt, sic nobis promissa si crediderimus. Quia vero dixerat nuntiatum esse de illa requie, ostendit quando et quomodo sit nuntiatum, scilicet ante legem post perfectionem operum, et sub lege, quando per terram promissionis designabatur, et tempore gratiæ in David. Tres enim requies memorat, unam Sabbati, secundam in Palæstina, tertiam in cælo. Nuntiatum est de requie, et quidem primo factis, deinde verbis. Nam *operibus Dei perfectis*, quæ fecerat per singulos dies *ab institutione mundi*, id est ex quo mundum cœperat instituere, subaudi, nuntiata est illa requies, quando Deus requievisse dicitur. Augustinus in sermone de decem chordis ait: in Spiritu sancto, hoc est in domo Dei requies nobis sempiterna promittitur. Nam quia Spiritus sanctus dicitur, propterea septimum diem sanctificavit Deus, quando fecit omnia opera sua, sicut in Genesi scriptum legimus, non ibi habes sanctificationem nominatam, nisi illo die in quo dicitur: « Requievit Deus ab operibus suis (Gen. 1). » Non enim fatigatus erat Deus, ut diceretur, « requievit Deus ab operibus suis, » sed in illo verbo tibi laboranti requiem promisit. Vel quia fecit omnia bona valde, et sicut dicitur, *requievit Deus*, intelligas etiam te post bona opera requieturum, et sine fine requieturum. Nam omnia opera superiora quæ dicta sunt, id est dies superiores, habent vesperam, Septimus iste dies non habet vesperam. Ubi Deus sanctificavit requiem, ibi dicitur, factum est mane, ut inciperet ipse dies. Non dictum est, facta est vespera ut finiretur dies: sed dictum est, factum est mane ut fieret dies sine fine. Sic ergo incipit requies nostra quasi mane, sed non finitur, quia in æternum vivemus. Ad hanc spem quidquid facimus, si facimus, Sabbatum observamus. Nunquam ab opere novo cessavit Deus, donec homo factus est; sed, eo facto,

A requievit ab omni opere, per quod designavit quia nullam aliam creaturam post hominem facturus erat, cui homo subderetur, et ad cuius servitium homo crearetur. Nam quia ipse requievit, homine facto, intelligimus quod propter hominem fecerat omnia. Ideo promissa est homini requies operibus perfectis; et quod requies ac beatitudo sit ei promissa, ostendit Scriptura. Nam *in quodam notabili et egregio loco dixit Spiritus sanctus de die septima*, per quam significata est requies æterna, quia non describitur habuisse vesperam, sic, id est talibus verbis, *dixit: Et requievit Deus die septimo*. Cur enim diceret post illam diem, in qua homo creatus est, sequenti die requievit et ab opere cessavit, nisi per hoc vellet innuere, quoniam illum, post cuius creationem requievit, ad requiem et beatitudinem fecit? Per sex dies ab illa creatione non requievit, quoniam nihil perfectum vidit, donec homo dominus et possessor omnium creatus fuisset. Sed eo perfecto, perfecta sunt omnia, et tunc tandem cessavit ab omni opere, quia tunc omnia perfecta fuerunt, quoniam hominem propter quem facta erant, habuerunt. Requievit Deus *ab omnibus operibus suis*, id est cessavit a nova operatione, ut nihil amplius faceret, nisi de materia ibi facta, vel ad similitudinem eorum, quæ jam ibi fecerat. Sex diebus operatus est, septima quievit. Sic et sexta ætate homo natus est mundo ad laborem. Sexta die et sexta diei hora passus, septima quievit in sepulcro. Per quod nos docuit post opera nostra, quæ sex ætatibus, id est infantia, pueritia, adolescentia, juventute, senectute et senio fiunt, debere quiescere in septima ætate, quasi septima die. Prima enim ætas, ut dixi, infantia est lactis ubere nutrienda. Secunda, pueritia solido cibo jam apta. Tertia est adolescentia, sufficiens ad generandam sobolem. Quarta, juvenus robusta et honoribus apta. Quinta est senectus, quando juventutis ardor refrigeratus et extinctus est, quoniam fervore carnis mitigato, vita ducitur in tranquillitate. Sexta est decrepita ætas, quando perit homo qui fuerat, quando, viribus amissis, jam positus est in introitu mortis. Post harum finem ætatum sequitur mors. Eodem modo et in spiritali vita sex possunt ætates notari. Infantes enim sunt, qui sensu imbecilles, sola auctoritate se defendunt, qui de sua fide sine aliqua ratione auctoritatibus Patrum humiliter acquiescunt. Pueri sunt quorum sensus jam aliquantulum sunt exercitati, qui non manent contenti sola auctoritate, sed quibusdam rationibus et investigationibus jam promoventur ad rationem fidei. Adolescentes sunt, quorum sensualitas jam subdita est rationi, ut jam sufficiant ad generationem bonorum operum, ut jam laborent et moveantur ad bene operandum. Juventus est, quando non solum generat mens per bonam operationem, sed etiam virtus ejus tantum induruit et roborata est, ut neque morte, nec vita separari valeat a charitate Dei, sed in martyrium, si opus fuerit, subire non vereatur. Senectus est, quando mens

Ita prævalet sensualitati, ut non solum non superetur, sed etiam non impugnetur ab ea, ut caro jam spiritui (prout est in hac vita possibile) consentiat, et eandem quietem et animæ puritatem concupiscat. Decrepita ætas est illorum, qui jam (prout fas est) contemplatione Domini fruentes, ad instar angelorum vivunt; jam filii hujus mundi non dicendi, jam in cœlestibus conversantes, ut vestigia humanæ conversationis in operibus illorum jam nulla videri possint. Post has sex morum ætates sequitur dies septima, æterna omnibus sic viventibus promissa, in qua dabitur *is vera requies et perennis lætitia*, ut non amplius futuri sint in aliquo labore vel miseria. Hæc nobis Deus significavit, quando post operationem sex dierum, septima quiescere voluit. In illo Scripturæ loco demonstratum est homini requiem esse promissam, atque nuntiatum est ibi ante legem de illo : *et rursus eadem requies sub lege per figuram terræ promissionis in isto loco nuntiata est et promissa, dicente Spiritu sancto de incredulis, Si introibunt in requiem meam, id est in terram quam Moyses promittebat, quæ significabat veram requiem, quam Spiritus sanctus paraverat, ac per hoc nec in illam veram intrare poterunt. Ubi enim incredulis facta est comminatio quod in eam non introibunt, ibi declaratum est quoniam promissa fuit aliquibus hominibus. Si enim nulli promissa esset, nec aliquem intraturum prædictum fuisset. Et non esset causa comminationis quod non essent intraturi, si nullus esset intraturus. Nec multum eos læderet, si minaretur illud auferre, cujus spem et certitudinem aliquam nequivissent habere. Ecce bis signata et promissa est requies per diem Sabbati, et per terram promissionis. Et quia Spiritus sanctus qui nec falli nec mentiri potest, eam signavit, nuntiavit et promisit, et illam aliquibus præparavit, quia superflue non fecisset eam, ergo superest, id est restat post promissionem, quosdam, id est egregios et electos introire in illam perennem promissionem et veram. Et quoniam superest quosdam introire, et hi quibus prioribus annuntiatum est ut intrarent, non introierunt propter incredulitatem in veram requiem, quam terra promissionis figurabat, ad quam non pervenerunt, ergo iterum, id est sub ejusdem requiei designatione terminat et distinguit Spiritus sanctus diem quemdam, quo nuntiata impleantur, id est egregium tempus gratiæ in adventu Christi, dicendo hodie in David, id est loquens per David, quia non ipse David loquebatur, sed Spiritus sanctus in eo et hoc post tantum temporis ab introitu filiorum Israel in terra promissionis. Unde patet non de illa terra tunc eum dixisse, quæ jamdudum habebatur, sed de vera requie, quæ adhuc exspectabatur. Introitus enim terræ promissionis jam tunc non poterat illis auferri. Ex quo autem fuit in deserto facta comminatio, quæ dicit : Si introibunt in requiem meam, processit magnum spatium usque ad corpus David. Sed a tempore comminationis hujus*

A usque ad introitum terræ promissionis, modicum tempus fuit. Et per hoc constat esse dictum de promissione veræ requiei, quam post tantum tempus David fecit his, qui futuri erant in Novo Testamento, quia contemporanei sui jam intraverant. Ideo terminat diem quo possimus in veram requiem intrare. Nunquam enim aliqui intrarent, nisi tempus gratiæ distinctum fuisset, in quo regna cœlorum paterent fidelibus. Ideo terminat diem intrationis, quoniam superest aliquos intrare. Et nisi videret intraturos, non terminaret. Qui, licet sub lege vivens, corde tamen positus in tempore gratiæ, dicens hodie, tertio nuntiat requiem illo tempore consummandam, diem terminat, hodie dicendo in David, quod hodie est intelligendum, sicut supradictum est:

B *Hodie si vocem ejus audieritis.* Diversis enim significationibus posuerat, hodie, quando dixit : « Hodie genui te (Psal. 11) ; » et quando rursus ait : « Hodie si vocem ejus audieritis (Psal. xciv). » Et ideo debuit terminare, quam significationem haberet nunc : Hodie, ne aliter intelligeretur. Hodie, id est in hoc luminoso tempore gratiæ, de quo Joannes scribit (I Joan. 11), quoniam tenebræ transierunt, et lumen verum jam lucet, si vocem prædicationis ejus audieritis, quia non omnes audiunt illam quæ sunt in tempore gratiæ, sicut nunc quoque multi paganorum, ad quos evangelica prædicationis non pervenit. Nolite contra vocem ejus obdurare corda vestra, ne tempus gratiæ vobis in vacuum transeat, quia post non erit tempus in quo possitis intrare in requiem. Diceret aliquis : Tu dicis quoniam hi quibus prioribus annuntiatum est, non introierunt, et nos videmus quia introierunt, quoniam per Jesum Nave eam consecuti sunt. Cui respondeatur : Non introierunt propter incredulitatem suam requiem homini promissam. Nam si Jesus filius Nave, id est Josue filius Nun, præstitisset eis illam requiem in distributione terræ promissionis, non ultra fieret sermo de alia die, qua pateret in requiem ingressus. Vel ita continuari potest : Superest quosdam intrare sicut David terminat. Nam si Jesus, id est Josue qui duxit in terram promissionis, præstitisset eis requiem, id est omnimodam quietem, ut nulla alia esset speranda ; nunquam, id est nullo tempore David vel Spiritus sanctus, post hac, id est deinceps loqueretur de alia die, id est de alio tempore, in quo requies esset danda. Sed quia post locutus est, patenter ostendit quia alia est requies de qua dixit hodie, quam illa ad quam duxerat Josue. Certum est igitur aliam esse ad quam ducit Christus, quæ per illam sub Josue figurabatur. Itaque relinquitur electis sabbatismus. Quando quidem non fuit illa requies vera, sed aliam post promisit Spiritus sanctus, itaque relinquitur, id est futuris servatura Deo, quia increduli patres nequiverunt ad illum pertinere. Relinquitur, non dico tantum requies, sed (ut magis exprimam) dico sabbatismus, id est feriatio et jucunditas Sabbati Sabbathismus quippe vocabatur, apparatus et gaudium atque festivitas

C quibus prioribus annuntiatum est, non introierunt, et nos videmus quia introierunt, quoniam per Jesum Nave eam consecuti sunt. Cui respondeatur : Non introierunt propter incredulitatem suam requiem homini promissam. Nam si Jesus filius Nave, id est Josue filius Nun, præstitisset eis illam requiem in distributione terræ promissionis, non ultra fieret sermo de alia die, qua pateret in requiem ingressus. Vel ita continuari potest : Superest quosdam intrare sicut David terminat. Nam si Jesus, id est Josue qui duxit in terram promissionis, præstitisset eis requiem, id est omnimodam quietem, ut nulla alia esset speranda ; nunquam, id est nullo tempore David vel Spiritus sanctus, post hac, id est deinceps loqueretur de alia die, id est de alio tempore, in quo requies esset danda. Sed quia post locutus est, patenter ostendit quia alia est requies de qua dixit hodie, quam illa ad quam duxerat Josue. Certum est igitur aliam esse ad quam ducit Christus, quæ per illam sub Josue figurabatur. Itaque relinquitur electis sabbatismus. Quando quidem non fuit illa requies vera, sed aliam post promisit Spiritus sanctus, itaque relinquitur, id est futuris servatura Deo, quia increduli patres nequiverunt ad illum pertinere. Relinquitur, non dico tantum requies, sed (ut magis exprimam) dico sabbatismus, id est feriatio et jucunditas Sabbati Sabbathismus quippe vocabatur, apparatus et gaudium atque festivitas

D loqueretur de alia die, id est de alio tempore, in quo requies esset danda. Sed quia post locutus est, patenter ostendit quia alia est requies de qua dixit hodie, quam illa ad quam duxerat Josue. Certum est igitur aliam esse ad quam ducit Christus, quæ per illam sub Josue figurabatur. Itaque relinquitur electis sabbatismus. Quando quidem non fuit illa requies vera, sed aliam post promisit Spiritus sanctus, itaque relinquitur, id est futuris servatura Deo, quia increduli patres nequiverunt ad illum pertinere. Relinquitur, non dico tantum requies, sed (ut magis exprimam) dico sabbatismus, id est feriatio et jucunditas Sabbati Sabbathismus quippe vocabatur, apparatus et gaudium atque festivitas

Sabbati, et Sabbatum *requies* interpretatur. Sabbatismus ergo non solum veram et omnimodam requiem designat, sed inenarrabile gaudium atque spiritualium divitiarum affluentiam. Qui sabbatismus non paucis reservatur, sed *populo*, id est magnæ multitudini; nec tamen cuilibet populo, sed tantum populo *Dei*. Et ideo si quis vult sabbatizare, sit de populo *Dei*. Et iste sabbatismus longe diversus erit ab illa requie quam Josue præstitit. Nam *qui ingressus est in requiem Dei*, id est in cœlestis regni tranquillam habitationem, sicut servus ille, cui dictum est: « Intra in gaudium Domini tui (*Matth. xxv*), » veram et perfectam adeptus est requiem, quia *requievit etiam ipse* perpetualiter et perfecte *ab operibus suis*, quibus hic laboravit, *sicut et Deus a suis*, quæ tamen sine labore fecit. Sicut enim Sabbathum in quo Deus requievit, non legitur habuisse vesperam, sic requies justorum non habebit finem. Quia sicut Deus cessavit ab operibus, sic illi cessabunt perpetualiter ab omni opere, liberi penitus ab omni laboris anxietate. At illi quibus Josue terram divisit, parum quieverunt, multosque labores et multas afflictiones pertulerunt. Et quandoquidem tanta est illa requies, atque est nobis promissa, et nunc tempore gratiæ superest quosdam introire; ergo *festinemus ingredi*, nec in his terrenis quæ nos impediunt, immoremur. Festinemus fide et bonis operibus, quod illi non faciunt, qui carnaliter adhuc legem observant, et erga fidem et spiritualem conversationem negligentes existunt. Festinemus, inquam, ingredi in illam requiem tantam, tam nobilem et tam gloriosam, atque toties nobis promissam. Ideo quoque festinemus ad illam requiem, ut pœnas evadamus perpetuas. Et hoc est: *Ut ne incidat*, id est ut non intus cadat in corde, ubi gravior casus est, *quis*, id est aliquis in infidelitate notabilis, *in id* in quod ceciderunt patres, et ita in id, ut in ipsum, id est non dissimiliter, sed per omnia eodem modo cadat in id, in quod patres ceciderunt, scilicet *exemplum incredulitatis*, id est ne cadat ad exemplum eorum in incredulitatem, et excludatur a divina requie. Illi enim non crediderunt Deum sufficere ad dandam etiam requiem terræ promissionis, et isti similiter Christum ad dandam requiem perpetuam sufficere non credebant, sine carnalibus observantiis. Ideoque sibi quietis aditum eadem ratione obstruebant, qua patres antea fecerant. Vel ne incidat aliquis id ipsum exemplum incredulitatis, id est in hanc eandem damnationem, quam patres vestri propter suam incredulitatem subierunt, quæ damnatio vel pœna vobis est exemplum, quia si increduli fueritis, similiter vobis contiget. Exemplum enim incredulitatis convenienter dicitur vindicta *Dei*, quæ tanta est illata eis, ut exemplo esse aliis possit, ne increduli esse præsumant. Vel incredulitas patrum, ut præmisimus, est vobis exemplum ne sitis increduli, et ideo pejus quam patres vestri peccabitis, nisi incredulitatem caveatis. Propter hæc omnia ruptis omnibus impedimentis infidelitatis

et sæcularium illecebrarum, festinemus quam maxime ad illam requiem, in qua perenniter quiescamus.

« Vivus est enim sermo Dei et efficax, et penetrabilior omni gladio ancipiti, et pertingens usque ad divisionem animæ ac spiritus, compagum quoque ac medullarum, et discretor cogitationum et intentionum cordis, et non est ulla creatura invisibilis in conspectu ejus. Omnia autem nuda et aperta sunt oculis ejus. Ad quem nobis sermo. »

Festinemus, ut dixi, ad illam requiem; nam *sermo Dei*, id est Christus verbum Patris, qui nos festinantes adjuvet, et pervenientes coronet, *vivus est*, id est vera vita in semetipso, et sufficiens ad aliorum vivificationem, et ita vivemus in eo. Sermo Dei, qui prædicavit illam requiem, est *vivus vita propria*, id est vivificans alios. « Sicut enim Pater habet vitam in semetipso, sic dedit et Filio habere vitam in semetipso (*Joan. v*). » Vel in assumpta humanitate, in qua mori voluit, jam vivus est, id est vitam æternam consecutus, et sequaces suos vivere similiter faciens, quia immortalis factus est, et vos immortales faciet, *et est efficax*, id est omnino faciens quidquid vult, sive salvando credentes, sive damnando incredulos. Vel ita potest continuari: Cavete ne quis vestrum incidat in exemplum incredulitatis patrum, id est in similem pœnam, qualem illi per incredulitatem meruerunt, quia vivus est sermo Dei, id est Filius, qui illos judicavit, et vos judicaturus est; et sicut ille vivit in æternum, sic iudicium ejus manet in æternum. Nam et illos quos ipse damnat, cruciabit pœna vivax in æternum, et eos quos ipse salvat, vivere faciet in æternum. Nam ad utrumque est ipse efficax. Nec solum est efficax in utroque, id est potenter faciens quodcumque voluerit, sed *et penetrabilior omni gladio ancipiti*, quia penetrat omnia; nec putetis eum latere cordium occulta, et per hoc minus justè judicare. Nam si non penetraret hominum conscientias, non posset veraciter judicare quis esset fidelis, vel quis infidelis, sive quis bonam vel quis malam haberet conscientiam; et tunc non valeret dignam singulis respondere vicem, quia potentiam ei auferret, quod occulta hominum videre non posset. Sed ut potenter in omnibus sit efficax, omnia visu suo penetrat, et acutior ac perspicacior est omni gladio ancipiti, omni subtilitate sermonis divinæ prædicationis. Iste sermo qui Deus est, quia Deus erat Verbum, est penetrabilior omni gladio ancipiti, quia magis penetrat hominum conscientias, quam ullus sermo prædicationis. Sermo enim doctrinæ est gladius anceps, id est utraque parte acutus, quia dicit de temporalibus, et dicit de æternis. In utroque probat quod dicit acute ac subtiliter, et eum quem ferit, separat a mundo. Quod non faceret nisi mentem ejus penetraret. Sed multo penetrabilior est iste sermo qui Deus est. Et est etiam *pertingens*, id est consideratione perveniens usque ad divisionem omni-

mæ ac spiritus. Spiritus noster non est universa anima, sed aliquid ejus, id est illud quo ratiocinamur, intelligimus, sapimus per quod et præponimur pecoribus, quia illa sunt rationis expertia. Non habent enim spiritum, id est intellectum rationis ac sapientiæ sensum, sed animam tantum. Nam et de illis dictum: « Producant aquæ repentia animarum viventium; » et: « Producat terra animam viventem (Gen. 1). » Itaque spiritu intelligimus cum angelis, anima vivimus cum bestis. Sed Dei sermo pertingit, id est perfecte tangit, quia per omnia tangit, nihil intactum sua cognitione relinquens, usque ad divisionem animæ ac spiritus, id est usque ad discretionem sensualitatis et rationalitatis, quia ipse insuperabili cognitione novit quomodo dividatur sensualitas a ratione, et quantum altera differat ab altera. Vel pertingit usque ad divisionem animæ, quia videt quomodo anima, id est sensualitas a se ipsa differat, dum plus dedita infimis rebus inferior est; vel ab his revocata dignior. Et pertingit usque ad divisionem spiritus, quia inijuncto quomodo rationalitas a seipsa dividatur, dum vel in Deum inhæat, vel inferius cœlestia considerat, sive rursum inferius de mundanis recte agendis pertractat. Anima enim tantum de mundanis, vel de his quæ ad corpus pertinent, cogitat, in quo vix a belluis distat. Quoddam inferius est in ea, ut cogitatus de cibo vel potu et similibus. Quoddam autem quasi superius est in ea, ut cum de honestis, sicut de gloria, celebritate, potentia et hujusmodi cogitat. Et hanc ejus divisionem bene novit sermo Dei, nec eum latet quando ipsa hoc vel illud agit. Spiritus vero rationalis est in suo superiori, cum Creatorem suum cogitat, et ad eum per solam dilectionem pervenire flagrat. In suo autem inferiori versatur, cum relicta sublimi contemplatione, inferiores virtutes quæ ad bonam operationem pertinent, meditatur. Cujus divisionem sermo Dei considerat, providens quid in eo superius sit et quid inferius. Inter se autem dividuntur anima et spiritus, quia, sicut dictum est, anima quidem de mundanis et corporalibus agit, spiritus autem de supernis et spiritualibus. Ideoque quod est inferius in spiritu, superat illud quod est altius in anima. Et hanc divisionem animæ ac spiritus tangit et scrutatur sermo Dei vivus. *Compagum quoque ac medullarum* divisionem novit, id est juncturarum animæ ac spiritus, quia videt quomodo juncturæ animæ, vel quo tempore dividantur, et quando de una junctura in aliam transeat, sic et de spiritu. Juncturæ animæ sunt augmenta quæ recipit secundum unamquamque ætatem. Nam sapientior est in adolescentia, quam fuit in pueritia, et rursus sapientior in juventute, quam in adolescentia, itemque maturior in virili ætate quam in juventute. Similiter spiritus per incrementa proficit. Quæ scilicet incrementa vocamus compages, eo quod unum alii videatur apponi quadam conjectura sine temporis discretionem; et harum compagum divisiones, sunt mutationes se-

cundum diversas ætates. Medulla vero quæ interior est, appellatur quidquid interius vel subtilius est in anima vel spiritu. Sicut enim in corporibus medulla est subtilior, et in secretis partibus atque in ipsis intimis recondita, sic quod subtilius est in anima vel spiritu et magis reconditum vocatur nunc medulla. Medullarum quoque talium animi divisionem novit sermo Dei, quia illa quæ sunt in nobis subtilissima, discernit inter se. Unde et subditur, quia est *discretor cogitationum et intentionum cordis.* Discernit enim cogitationes et ab invicem separat, id est bonas a malis, sive in eodem homine sive in diversis. Discernit et intentiones earum, id est quo singulæ tendant, ab bonum, an ad malum. Et quia sunt nonnullæ intentiones coactæ, velut si quis timore compulsus foderet agrum et intenderet perficere, non tamen ex corde, additur cordis, ut per hoc excludantur intentiones coactæ, quæ faciles sunt ad cognoscendum. Hoc est, novit discernere quam intentionem quis habeat in cogitatione, quæ est cordis, id est voluntaria et adhuc exterius non ostensa, sed latens intra cordis secreta. Vel in eo quod ait, quia *est pertingens usque ad divisionem compagum quoque ac medullarum,* intelligi potest compages dixisse conjunctiones cogitationum, medullas vero intentiones earum. Per compages quippe ossibus ossa junguntur. Et sæpe dum aliquid recta cogitatione agimus, sed subito in laudis amorem declinamus, atque hoc pro laude facimus, quod prius facere pro veritate cœperamus, quia cogitationes cogitationibus adjunguntur, quasi quædam in spiritu compages fiunt. Sed habent ossa quæ in compagibus juncta sunt, et medullas, id est subtiles intentiones. Quod Apostolus apertius intulit, dicens, *discretor cogitationum et intentionum cordis.* Compages enim nostræ, sunt cogitationes quæ sibi junguntur, quando altera alteram sequitur, medullæ autem intentiones; et sermo Dei discretor est compagum et medullarum, id est cogitationum et intentionum, quia si cogitatio cogitationi jungitur, ipse novit quæ sit secundum Deum, et quæ secundum sæculum, novit quoque quo vergat intentio earum. Sæpe enim aliud cogitamus, atque aliud per cogitationem intendimus. Nam si quis proposito munerum præmio, pupilli vel viduæ causam defendat, et fortasse ecclesiam ingrediens in suis precibus Deo dicat, tu vides quia causam pupilli et viduæ defendo, iste procul dubio quid cogitet scit, sed quo intendat ejus cogitatio, ignorat. Aliud quippe cogitat, et aliud intendit. Non enim defensionem pupilli et viduæ, sed mercedem munerum quærit. Nam tolle temporale præmium, et pupillum et viduam non defendit. Sermo itaque Dei discretor cogitationum et intentionum cordis est, quia non tantum aspicit quid apud temetipsum cogites, sed magis per medullam compagis, id est per intentionem cogitationis, quid apud temetipsum accipere requiras. Et ut plus dicam, breviterque concludam, *non est utra creatura* terrena vel cœlestis, corporea vel incorporea,

invisibilis, id est non habilis ad videndum *in conspectu* tantæ sapientiæ. Nihil est ei invisibile, sed *omnia sunt nuda*, id est discooperta *et aperta*, id est patientia *oculis ejus*, qui et foris et intus, ut dictum est, omnia plenarie videt. Per oculos ejus intelligitur potentia videndi. *Ad quem nobis sermo* est habendus in judicio, quia oportet nos illi rationem de actibus nostris reddere. Ad sermonem Dei vivum et efficacem et omnia pervidentem est nobis habendus sermo, quia sermocinaturi sumus ad eum, et rationem reddituri de cunctis quæ gessimus vel cogitavimus. Ideoque semper nobis omni sollicitudine præcavendum est, ne hunc vel dictis vel operibus vel cogitationibus offendamus. Hactenus terrendo locutus est Apostolus, revocans ab infidelitate Judæos exemplo patrum suorum, quibus ob incredulitatem negata est æterna requies; et asserens Filium Dei vivum atque potentem, ut remuneret eos si respuerint; et efficacem ut puniat, si neglexerint. Hinc iterum blandis rationibus vult eos revocare, commendando Christi pontificium, ut eo commendato, sufficere ad salutem ostendat, et carnales observantias comprobet esse superfluas. Sicenim subinfert:

« Habentes ergo pontificem magnum, qui penetravit cælos, Jesum Filium Dei, teneamus confessionem. Non enim habemus pontificem qui non possit compati infirmitatibus nostris, tentatum autem per omnia pro similitudine absque peccato. Ad eam ergo cum fiducia ad thronum gratiæ ejus, ut misericordiam consequamur, et gratiam inveniamus in auxilio opportuno. »

Incipit, ut dictum est, agere de pontifice Christo, quomodo sufficiens, quomodo dignior veteri, quem et immutat et legem quæ sub illo est, per meliorem legem suam, et quomodo necessarius. Quia sermo Dei vivus et efficax est, atque talis qualem descripsimus, ergo teneamus confessionem, ut nec terror, nec cruciatus auferat de ore nostro confessionem fidei ejus quam corde gestamus. Et est justum ut eam teneamus, *habentes pontificem*, id est quia habemus pontificem *magnum*. Nam idem sermo Dei, secundum quod homo est, noster est pontifex, qui sacrificium sui corporis obtulit pro nobis, et non cessat interpellare pro nobis. Unde et pontem accessumque nobis ad patrem facit, ut temporalia (quæ sicut fluvius currunt et labuntur et transeunt) sub nostris pedibus relinquentes festinemus ad terram viventium, habentes pontificem magnum super omnes pontifices, qui non in Sancta sanctorum templi Salomonis intravit, sed *cælos* ascendendo *penetravit*, ut et nos sequi possimus. Moyses vero tunc terram promissionis non intrare valuit, hic au-

tem cælos penetravit, id est ingressu suo patefecit. Pontificem habemus, et quem? *Jesum*, id est Salvatorem. qui nos absque carnalibus observantiis salvare potest. Jesum dico *Filium Dei*, non adoptivum, sed consubstantialem; nec minorem, sed æqualem. Alii vero pontifices neque cælos penetrant, neque salvare possunt, neque filii Dei naturaliter sunt. Unde iste omnibus illis jure præfertur, sicut multis et longis disputationibus probare nunc exorsus est Apostolus. *Teneamus*, inquit, *confessionem*, ut fidem ejus ore proferamus, vel etiam peccata nostra confiteri studeamus, quia non habemus pontificem immisericordem; hoc contra illos dicitur, qui propter lapsum suum desperabant, et iram ejus se posse placare diffidebant, et quasi dicebant quia non valet nobis confessio, quoniam iste pontifex, qui tam altus est, utpote super cælos exaltatus ac Dei Filius, non recipiet eam, nec condescendet fragilitati nostræ. Quibus velut respondetur: Vobis lapsis non est desperandum, nec confessio dimittenda, quia non habemus pontificem austum vel dedignantem, sed misericordem; non a nobis remotum, sed naturæ nostræ participem. *Non enim habemus pontificem qui non possit compati infirmitatibus nostris*, id est condescendere fragilitati nostræ, et misereri humana fragilitate peccantibus, quia, etsi ita altus est, non ideo nos abjecit, sed clementer condescendit imbecillitati nostræ, et condolet etiam illi qui per infirmitatem carnis labitur. Non tamen aliquid jam doloris sentire potest, sed quod ei displicet miseria nostra et lapsus noster, atque præstat auxilium ut surgamus, et interpellat pro nobis, vocatur ergo ejus compassio. Non potest nobis non compati, sed potentiam hujus compassionis habet, quia ipse fragilitatem nostram expertus est, quoniam per omnia sustinuit tentationem sine peccati cognitione. Tentatus enim in nostra carne et expertus est miseras nostras præter peccatum; tentatus est *per omnia* tentationis genera, quia in tribus illis tentationibus, quas a diabolo pertulit, omnia tentamenta continentur. Vel in sola tentatione, qua diabolus ostendit omnia regna mundi et gloriam eorum (*Matth. iv; Luc. iv*), in quibus omnia continentur, de quibus humana corda tentantur, potest dici per omnia genera peccandi tentatus. Vel quia omnes tentationes sustinuit, irrisus, crucifixus, et cætera omnia perpeccatus. Tentatus est *pro similitudine* quam a nobis traxit, id est secundum illam naturam, qua nobis erat similis, mortalis et passibilis, tamen *absque peccato* fuit, licet similis esset aliis hominibus. Vel tentatus est per omnia sine peccato, quia, licet omnia tentamentorum genera pertulerit, non tamen succubuit, nec delectatus est in aliqua persuasionem mali, et ideo bene potest a peccato et tentatione liberare. Nam cum Apostolus eum dicit *tentatum* per omnia, et non superatum, ostendit quoniam in eo ponenda est fiducia subveniendi; et hoc ideo, quia nobis similis factus est. Non est enim remotus a nobis, sed in illa sui natura tenta-

tus fuit, in qua nobis est similis. Et ideo credendum est, quia vult et potest subvenire tentationibus nostris. Et quoniam habemus tantum pontificem sic nobis compati volentem, et nostræ imbecillitati subvenire potentem ergo omni spe et fiducia ad eum ad thronum gratiæ ejus, id est voluntate, et orationibus, et correctione vitæ ac bonis operibus accedamus ad eum throno judiciali præsentem. Thronus enim judiciaria sedes est. Sed thronus Christi est thronus gratiæ his qui, dum in præsentem vitam sunt, humiliter respicientes veniunt ad eum, ut poenitentiam judicium accipiant; cæteris vero post hanc vitam est thronus justitiæ. Licet ergo simus peccatores, non tamen desperemus de venia, sed cum fiducia impetrandi misericordiam, ad thronum gratiæ ejus, id est iudicem non severitatis et districtæ justitiæ, sed pietatis et indulgentiæ, quia non est iudex qui pro confessione puniat, sed qui pro humilitate remuneret. Accedamus, inquam, ad eum ut misericordiam apud eum consequamur, id est remissionem præcedentium peccatorum, et de reliquo inveniamus apud eum gratiam, id est facultatem ad conversationem innocentiam et ad promotionem in bono, in auxilio, id est ut auxilietur nobis contra tentationum impugnationes, et cooperetur ad completionem bonorum operum. Auxilio dico, opportuno, id est congruo et necessario, quia nonnunquam fit auxilium, quod non est opportunum, nec congruum. Sed auxilium Christi nobis est opportunum, id est competens et necessarium, quia sine illo nihil boni possumus facere, et æterna vita non potest haberi sine bona operatione. Nunc enim est tempus auxilii, dum tempus est operandi. Vel thronus ejus sedes est pontificalis, et ideo gratiæ, quia compatitur nobis et interpellat pro nobis. Ac propterea nos peccatores accedamus ad thronum nostri pontificis cum fiducia veniæ, procidamus ad pedes ejus in precibus, ut per eum apud Patrem consequamur misericordiam, id est peccatorum indulgentiam et bonæ conversationis gratiam.

CAPUT V

« Omnis namque pontifex ex hominibus assumptus, pro hominibus constituitur in his quæ sunt ad Deum, ut offerat dona et sacrificia pro peccatis, qui condolere possit his qui ignorant et errant, quoniam et ipse circumdatus est infirmitate. Et propterea debet quemadmodum pro populo, ita etiam pro semetipso offerre pro peccatis. Nec quisquam sumit sibi honorem, sed qui vocatur a Deo tanquam Aaron (II Par. xxvi). Sic et Christus non semetipsum clarificavit ut pontifex fieret, sed qui locutus est ad Deum: Filius meus es tu, ego hodie genui te (Psal. ii), quemadmodum et in alio loco dicit: Tu es sacerdos in æternum secundum ordinem Melchisedech (Psal. cix). »

Probat enim a minori, quod iste noster pontifex possit nobis impetrare misericordiam et gratiam, cum pontifices Veteris Testamenti quodammodo sacrificiis et orationibus impetrarent misericordiam,

A qui puri homines erant et peccatores. Quasi dicat: Per eum possumus consequi misericordiam, quia hoc fit etiam per omnem alium pontificem. Nam omnis pontifex, tam major quam minor in ordine Aaron, ex hominibus assumptus, id est ex numero hominum ad aliquid dignius sumptus ut præsit aliis, constituitur, id est communi omnium sententia statuitur, pro hominibus, id est pro salute hominum, ut per eum impetrent a Deo beneficia. Constituitur in his quæ sunt ad Deum pertinentia et subjectos ducuntia, id est in muneribus et hostiis offerendis ac precibus, quæ ducunt ad Deum ut offerat, id est obviam Deo ferat, et quasi contra impetum, indignationi ejus objiciat, ut eam retineat et placeat, vel quia Deus pie condescendit dum ei sincero corde offertur aliquid, ferat obviam ejus pietati dona ut prinitias frugum et hujusmodi, et sacrificia de animalibus, ut de hœbus et avibus pro peccatis hominum delendis. Et si ille qui est ex hominibus tantum, id est in nullo dissimilis ab hominibus, et ita assumptus ex eis, subditos suos donis et sacrificiis purgat et dirigit ad Deum, tunc multo magis eundem est nobis ad thronum gratiæ nostri pontificis, qui non ex hominibus tantum, sed Deus et homo est qui peccatum non habet, nec indiget offerre pro se, qui in seipso sufficiens est illud facere, in quo alii detinentur humana infirmitate. Ex hominibus assumptus pontifex est talis, qui pius et misericors sit, qui pro consueta bonitate condolere possit, id est affectum compassionis habeat erga subditorum infirmitatem. His qui ignorant, id est ignoranter peccant, et qui errant, id est post monstratam veritatis viam errore suo quasi scienter peccant; et debet illis pie compati, quoniam non solum illi, sed et ipse qui major est fortior esse videtur, circumdatus est in infirmitate carnis, per quam et peccare necesse habet. Christus vero jam infirmitate circumdatus non est, et ideo potest juvare magis quam ille. Et quia infirmitate circumseptus est, propterea debeat, id est debito jure compellitur offerre sacrificium pro peccatis, id est pro expiatione peccatorum quemadmodum et pro populo, id est cum quanta necessitate et supplicatione offert pro populo, ita etiam et non dissimiliter offerat pro semetipso, ut condonentur ei peccata propria. Christus vero non pro seipso necesse habet offerre, sed tantum pro suis fidelibus. Omnia vero quæ nunc de pontifice Veteris Testamenti dicuntur, observanda sunt in electione pontificum Ecclesiæ, et in eorum moribus et actionibus, licet alia sint sacrificia quæ offeruntur a nostris. Dixi quia pontifex constituitur pro hominibus, et præfertur cæteris: nec quisquam, licet valde nobilis aut sapiens, sumit sibi honorem, ut ascribat sibi et se querat honorari. Non sibi imputat honorem, sed Deo qui vocat; nec se ingerit ad accipiendum honorem, sed divino nutu eligitur. Percutiuntur hac sententia, qui honores ecclesiasticos, ad quos divinitus non vocantur, arripere cupiunt. Qui enim se ingerit et propriam gloriam querit, non sumit honorem, et

pontifex aut prælatus in Ecclesia factus fuerit; sed gratiæ Dei rapinam faciens, jus alienum usurpat. Et ideo non accipit benedictionem, sed maledictionem. Nemo per semetipsum sumit illum honorem, sed ille qui vocatur a Deo. Qui enim recte et canonicè eligitur, a Deo vocatur. Ille sumit honorem apud Deum et homines, qui per Ecclesiæ procuratores et viros fideles a Deo vocatur ad hanc prælationem, ita digne et sincere, *tanquam Aaron*, qui non sibi imputavit, nec aliquo modo ingessit, sed jubeante Deo per Moysen electus est. Core autem voluit sibi sumere honorem, et ideo divinam sensit ultionem. Sed Aaron sublimatus est in sacerdotem, quia Deus eum vocavit (*Exod. vii, 27; Num. xvii*). Sic et Christus nos clarificavit per suas virtutes semetipsum, ut sibi sumeret ejus honorem, ita ut pontifex fieret. Non se clarificavit, sed Patrem, quia non suam, sed Patris gloriam in omnibus quæsit. Non semetipsum quasi discretum a cæteris clarificavit, id est clarum fecit sublimando in honorem pontificatus; sed Pater eum clarificavit, ut pontificem constitueret, et totius mundi magistrum ostenderet, quando dixit: « Hic est Filius meus dilectus in quo mihi bene complacui, ipsum audite (*Matth. xvii*). » Quasi diceret: Hactenus audistis legis doctores et alios pontifices, sed amodo ipsum verum pontificem audite. Nam dicens: « Hic est Filius meus dilectus, in quo mihi bene complacui » nobiliter clarificavit. Quem se ideo clarificare ut pontificem constitueret, demonstravit, cum subjecit: « Ipsum audite. » Sed hanc sententiam clarificationis noluit Apostolus contra Judæos proferre, quia vel non habebant Evangelium, vel minoris auctoritatis esse putabant, ideoque de suis libris protulit illis testimonia. Nam hæc clarificatio longe ante per Prophetam prædicta est *Filius meus es tu*. Non clarificavit seipsum, sed potius eum Pater clarificavit, et testimonio propriæ vocis et multis miraculis, qui et in Psalmo locutus est ad eum: Tu es filius meus naturalis et coæternus, quia ego hodie, id est in luce semper manentis æternitatis meæ, genui te ex substantiâ mea. His verbis clarificavit eum Pater, ut pontificem constitueret, *quemadmodum*, id est sicut et in alio loco dicit ei: Tu es sacerdos, id est sacra dans per te et per tuos in æternum, id est quando durabit hoc sæculum, quia non transibit sacerdotium Christi, ut aliud succedat, sicut transivit Leviticum. Sacerdos es, et hoc secundum ordinem Melchisedech, quia sicut ille panem et vinum obtulit Abrahæ revertenti a cæle regum (*Gen. xiv*), sic tu in figura panis et vini dabis corpus et sanguinem tuum victoribus vitiorum. Vel in æternum es sacerdos, quoniam una oblatione consummasti in sempiternum sanctificatos; sive quia sine fine interpellas pro eis eadem hostia quam semel obtulisti, hac auctoritate manifestatur, quod eum Deus Pater sacerdotem et pontificem constituit. Si ergo cæteri pontifices quibus necesse est pro se offerre, possunt aliis subvenire, quoniam a Deo vocantur, tunc iste multo magis potest nobis subvenire, et om-

nia bona nobis obtinere qui pro se nunquam egit oblatione, qui seipsum non clarificavit, nec ingessit, sed a Patre clarificatus est, et ad pontificatum electus.

« Qui in diebus carnis suæ preces supplicationesque ad eum, qui posset illum salvum facere a morte, cum clamore valido et lacrymis offerens, exauditus est pro sui reverentia, et quidem cum esset Filius Dei didicit ex his quæ passus est, obedientiam; et consummatus, factus est omnibus obtemperantibus sibi causa salutis æternæ, appellatus a Deo pontifex juxta ordinem Melchisedech. »

Dixit quod non per se, sed per voluntatem Patris factus est pontifex. Nunc autem ingreditur ostendere, quoniam pontificis obsequium exsecutus est, quia totum fecit quod pontificem decet. Qui in diebus carnis suæ, etc. Ostenditur etiam adhuc in his verbis quod per eum possumus consequi misericordiam, cum jam sedeat ad dexteram Patris, nec cesset interpellare pro nobis, si ita est exauditus, cum adhuc in terra conversaretur et esset mortalis. Qui in diebus suæ carnis, id est mortalitatis et passionis suæ quando natura carnis apparuit, quia famem, sitim, lassitudinem et dolorem sustinuit, sicut verus pontifex obtulit preces. Nam in Evangelio sæpe legitur orasse et maxime apud Lucam (*Luc. vi, xi, xxii, xxiii*), qui sacerdotis in eo descripsit personam. Sed et quidquid ipse egit in carne, preces et supplicationes fuerunt pro hominibus. Tota vita sua Patrem oravit de resurrectione carnis suæ ac de nostra salute, et instante jam passione obtulit supplicationes, id est humillimas et intentissimas orationes, cum summa devotione cordis et affectione quando factus in agonia prolixius orabat, et factus est sudor ejus sicut guttæ sanguinis decurrentis in terram (*Luc. xxii*). Et has preces supplicationesque obtulit, id est obviam tulit Patri per exauditionem sibi obvianti. Obtulit eas ad eum qui posset illum a morte salvum facere, id est resuscitare, ad eum quem scivit esse sufficientem, ut salvaret eum, id est immortalem et impassibilem faceret eripiendo a morte, ut nec anima remaneret in inferno, nec caro putresceret in sepulcro. Et obtulit has cum clamore valido, id est cum intentione piæ devotionis vehementissima et efficacissima, ut quando prolixius orabat, et etiam cum lacrymis, quia in illa prolixa oratione credendus est lacrymas effudisse, cum et guttæ sanguinis pro sudore decurrerent ab ejus corpore, et exauditus est, quia quod quæsierat, accepit in resurrectione. Exauditus est, id est extra numerum aliorum omnium auditus est, quoniam super omnem creaturam post laboris sui militiam a Patre sublimatus est, et hoc pro sui reverentia, id est secundum hoc quod ipse, sicut Dei Filius, dignus est reverentia et veneratione. Vel pro sua reverentia in Deum, id est propter quod ipse super omnia Patrem reveritus est et honoravit. Sive pro sua reverentia, id est sicut sua religio meruit. Sanguinis quoque ejus effusio, potest

Intelligi clamor validus, in quo exauditus est pro reverentia ejusdem passionis. Reverentia est, quod sine peccato passus est pro sola charitate. Et ideo melior fiducia in eo habenda est, quia fecit quod nullus pontifex alius, dum seipsum pro nobis hostiam offerret: *et quidem tempore minoritatis cum esset, id est quamvis esset secundum divinitatem Filius Dei, didicit obedientiam* secundum quod homo est, id est non solum preces et supplicationes obtulit, sed obedire didicit in passione, id est expertus est in seipso laborem obedientiæ. Non enim scire potest afflictorum labores, qui afflictionis experimentum non habuit. Sed Christus secundum quod homo est, didicit obedientiam, quia omnes labores obedientiæ sustinuit et sensibiliter pertulit, *ex his quæ passus est, id est ex acerbitate tormentorum quæ pertulit, didicit obedientiam, id est experimento cognovit laborem obedientiæ; et consummatus, id est passione finitus, vel consummatus, id est ad summum ductus, quoniam ad dexteram Patris elevatus, factus est causa salutis æternæ, id est perennis vitæ omnibus obtemperantibus sibi, id est obedientibus suæ voluntati, quia omnibus sufficit ad salutem sine ullis carnalibus observantiis. Per exauditionem ejus designatur resurrectio, per consummationem exaltatio. Vel consummatus est in omni operatione sanctitatis, quando completis omnibus obedientiæ suæ actionibus, dixit: « Consummatum est, et emisit spiritum (Joan. xix). » Sicque factus est causa salutis non cujuslibet, sed æternæ; nec paucis, sed omnibus: hac tamen conditione, ut obtemperent ei. Non enim aliter salutem consequi poterunt, et bene potest ipse causa salutis esse cæteris, quoniam *appellatus est a Deo pontifex*, sicut et ipse suis operibus realiter ostendit se hoc esse. Nam quia pontificis officium implevit, atque Patri fuit in omnibus obediens, et in seipso pervenit ad tantam bonorum omnium consummationem, ut sufficeret etiam ad aliorum salutem, idcirco appellatus a Deo est pontifex, et hoc *juxta ordinem Melchisedech*, scilicet ut omnis ordo divinitatis in eo consideretur, qui considerari potuit in Melchisedech.*

« De quo nobis grandis sermo et interpretabilis est ad dicendum, quoniam imbecilles facti estis ad audiendum. Etenim cum deberetis magistri esse propter tempus, rursus indigetis ut vos doceamini, quæ sint elementa exordii sermonum Dei et facti estis quibus lacte opus sit, non solido cibo. Omnis enim qui lactis est particeps, expertus est sermonis justitiæ. Parvulus enim est. Perfectorum autem est solidus cibus, eorum qui pro consuetudine exercitatos habent sensus ad discretionem boni ac mali. »

De quo, id est de qua re, quomodo scilicet ipse sit pontifex juxta ordinem Melchisedech, est nobis grandis sermo, id est restat sermo alius subtilis, et profunda mysteria continens atque prolixus et magnus, et interpretabilis, id est multas habens expositiones sacramentorum et allegiarum ad dicen-

dum, id est ad exponendum vobis qui parvæ capacitatis estis, nec aliter intelligeretis nisi interpretaretur. Grandis est, et interpretatione indigens, non quantum ad me, sed quantum ad vos, qui sensu debiles estis, ad intelligendum profunda mysteria, quoniam facti estis imbecilles, id est sine spiritali baculo, quo sustentetur interior homo vester, ne nutet aut corruat. Imbecilles estis ad audiendum, id est ad intelligendum, quia pondus sententiarum vos facile potest præcipitare, qui robore virilis sensus non fulcimini. Interserit increpationem de infirmitate, ut alta de Christo laborent intelligere. Vere estis imbecilles ad audiendum. Nam cum deberetis esse magistri aliorum et sufficere ad instructionem eorum, et hoc propter tempus, id est diuturnitatem temporis quod jam transactum est, ex quo fidem recepistis, et vobis priusquam cæteris prædicatum est, rursus sicut in primis quando ad fidem venistis, indigetis ut vos doceamini, sicut pueri quibus prima elementa litterarum dantur ad intelligendum. Vel propter tempus debuissetis esse cæterorum magistri, quia semper exercitati estis in lege et prophetis de Christo. Sed iterum sicut a principio indigetis ab aliis doceri quæ sint elementa exordii sermonum Dei, id est ut vobis ostendantur opera quæ primam discuntur, quando aliquis sermones Dei exorditur. Elementa enim vocantur illæ partes, de quibus sermo Dei prius contextitur, scilicet incarnatio, passio, resurrectio, commune judicium, damnatio malorum, corona justorum, et cætera, quæ primum annuntiantur eis qui convertuntur. Exordium enim sermonum est Symbolum Christianæ fidei, quod isti non solum non intelligebant, sed nec ipsam litteraturam, qua profertur memoriter, sciebant. Exordium sermonum est simplex doctrina. Elementa ejus prima materia fidei, ut nativitas Christi, passio, etc. Et facti estis etiam negligentia vestra tales, quibus more infantium sit opus lacte, id est humili et parva eruditione, et non solido cibo, id est perfecta doctrina. Lac quippe est brevis insinuatio fidei et facilis observantia morum. Solidus autem cibus est ratio ipsius fidei et perfecta institutio vitæ. Solidus cibus sapientiæ est: « In principio erat Verbum (Joan. 1); » lac vero est, Verbum caro factum est. Vere non est vobis opus solido cibo sapientiæ, cum sitis lactentes, nam nulli lactenti est opus. Omnis enim qui particeps est lactis, sicut vos estis, id est cujus pars est lac, et qui ita est tener, ut nec etiam totum lac simplicis doctrinæ possit capere, sed partem expertus, id est sine parte est sermonis justitiæ, qui justis et perfectis convenit, id est doctrinæ quæ pertinet ad eos, qui bene proveci sunt in intelligentia magnæ capacitatis et justitia religiosæ conversationis. Expertus est, id est sine parte hujus sermonis, quia nec partem ejus capere valet intelligendo vel operando. Ideo lactens non capit sermonem justitiæ, quia parvulus est in sensu, sicut et vos in fide pusilli, et ut ille qui ætate parvulus est non discernit cibos atque perit sumendo noxios, sic

animo parvulus, id est indoctus non discernit bonum a malo, et peccat faciendo malum. Vos quidem lacte opus habetis, ut dictum est, non solido cibo. Sed *perfectorum* sensu et opere est *solidus cibus*, id est forma fidei et morum instructio. Ideo et vos post lactis potum debetis ad robustam sapientiæ escam proficere, *eorum*, scilicet est iste cibus, *qui habent sensus*, id est intellectus *exercitatos pro consuetudine* legendi et in multis scripturis studendi. Sensus habent *exercitatos ad discretionem boni ac mali*, id est ut discretionem habeant inter bonum et malum, et inter bonum et aliud bonum, et inter malum et aliud malum, aliud majus et aliud minus judicantes.

CAPUT VI.

« Quapropter intermittentes inchoationis Christi sermonem, ad perfectionem feramur, non rursus jacientes fundamentum pœnitentiæ ab operibus mortuis, et fidei ad Deum, baptismatum, doctrinæ, impositionis quoque manuum ac resurrectionis mortuorum et iudicii æterni. Et hoc faciemus, siquidem permiserit Deus. »

Dixi quia perfectorum est solidus cibus. Quapropter ad perfectionem feramur, ut solido cibo pascamur, nos dico *intermittentes sermonem inchoationis Christi*, id est de initio fidei. Nam quia exercitatos sensus in lege Domini nos oportet habere, ideo prætermittamus sermonem inchoationis et ad ulteriora promoveamus sensus nostros. Sermo inchoationis Christi, est initium fidei, quo Christus inchoat esse in nobis secundum intelligentiam et operationem. Sicut enim qui adducitur in doctrinam litterarum, elementa primum oportet audire, sic Christianus primum omnium de fide Catholica erudiri debet, quæ est fundamentum nostræ salutis. Sed hujus initii sermonem dimittentes, *feramur ad perfectionem*, nos docendo, vos audiendo. Ita scilicet feramur, *non rursus jacientes fundamentum pœnitentiæ*, id est non negligenter et inconsulte, sicut olim, faciamus pœnitentiam, quæ debet esse fundamentum, super quod exstruat et in altum surgat actio bona et perfectio; ille enim jacet fundamentum pœnitentiæ, id est non firmiter et ordinate ponit, sed quasi rem non bene provisam negligenter ponit, qui ita dolet ac pœnitet, ut adhuc iterum redeat ad hoc quod non bene delevit commissum. Et nos jam taliter jecimus fundamentum, ideoque, destructum est, id est prior pœnitentia nostra periit et in irritum deducta est, redeuntibus peccatis, de quibus pœnitentiam egeramus. Sed modo sit perfecte nos pœniteat tendentes ad perfectionem, ut non simus iterum jacientes, id est negligenter et incuriose ponentes fundamentum, quod sicut antea dissipetur, sed firmum et stabile maneat, nec ultra sit opus ponere aliud. Fundamentum dico pœnitentiæ *ab operibus mortuis*, id est qua pœniteat nos ex eo quod opera bona, quæ prius vivebant in nobis, mortua sunt admistione peccati. Ejus enim qui in criminale peccatum cadit, bona opera priora mor-

tificantur et pereunt. Unde minatur Dominus : « Etiam si dixero justo quod vita vivat, et confusus in justitia sua fecerit iniquitatem, omnes justitiæ ejus oblivioni tradentur (Ezech. xxxiii). » Vel peccata sunt opera mortua, id est nihil vitale habentia, sed justitiæ vita prorsus carentia, et auctores suos occidentia, et de his omnibus agenda est rata pœnitentia, id est et de bonis amissis et de malis commissis; et non rursus jacientes fundamentum *fidei* ducentis *ad Deum*, id est non iterum negligenter fidem sitis ponentes in cordibus vestris, sicut antea, firmiter ut amplius non vacillet aut corruat sicut prius, dum eam non putaretis ad justitiam et salutem sufficere sine carnalibus observantiis. Nec rursus jacientes fundamentum *baptismatum* ut quæeratis iterum baptismatis unda lavari, quod impossibile est; sed purgationem peccatorum, quam semel in eo percepistis, conservate, non ultra quærentes eam per carnales observantias. Male enim tenet baptisma, qui non credit omnia in eo peccata ablui, nisi superadditis carnalibus observantiis. *Baptismatum* dixit pluraliter quia est baptisma in aqua, est et in lacrymis pœnitentiæ, et est in sanguine martyrii. Nec rursus jacientes fundamentum *doctrinæ*, quæ in exordio tradita est vobis per Symbolum et Orationem Dominicam, ut hac iterum incipiatis imbui. Nec iterum jacientes fundamentum *impositionis manuum* episcoporum in confirmatione neophytorum, sed firmiter illud retinentes. Qui enim non credit quod per manuum impositionem detur Spiritus sanctus ad remissionem et corroborationem, non est fundatus. Talis est, quicumque putat carnales observantias juvare ad acceptionem Spiritus sancti, qui per manuum impositionem accipitur. Nec fundamentum *resurrectionis mortuorum* iterum jacientes, sed quod semel inde etiam credidimus retinentes, id est per Christi resurrectionem mortuos esse resurrecturos. Qui enim non credit quod resurrectio Christi resurrectionem mortuorum faciat, non habet fundamentum super quod ædificet. Si sciretis in baptismo omnia peccata dimitti, et per manuum impositionem Spiritum sanctum dari, lex vobis superflua videretur; nec præter Christum aliud quæreretis, si sciretis per eum resurrecturos mortuos et judicandos. Nam neque *iudicii æterni* fundamentum rursus jacere debemus, sed semel positum in corde nostro firmiter tenere, ut tantum de fide Christi et de virtutibus sine legis cæremoniis iudicium exspectemus, quod erit æternum, quia quidquid ibi statuetur, in æternum durabit. Quod iudicium qui non credit, absque fundamento est, nec ædificare quidquam potest. Hæc enim omnia nisi in fundamento præcesserint, nemo potest bene operari. Nam quicumque aliquos ad fidem convertit, plus facit pœnitere et in Deum credere, ac baptizari in remissionem peccatorum, et doceri quid credere debeant, atque confirmari per manuum impositionem, et resurrectionem ac diem iudicii præstolari, ut super hæc valeant ædificium bonæ conver-

ationis construere. Idcirco de his dicitur, jacentes hæc omnia, scilicet sicut lapis in fundamento jacitur, non rursus, id est non ut olim, nec sicut prius cecidere iterum cadant, vel non rursus jacentes, id est ita modo jacentes, ut amplius jacere non sit opus, et hæc omnia superius lactis nomine sunt appellata, quia his potatur fidelium infantia. Sic autem Deus vult eos lacte nutriri, ut non ibi remaneant; sed crescendo per lac ad solidum cibum perveniant. Nam si lacte nutrieris, sic nutrire ut crescas, sic cresce ut panem manduces. Dixi, feramur ad perfectionem et intelligendo scilicet, et in moribus proficiendo; *hoc faciemus, si Deus quidem permiserit*, id est si nutu suæ voluntatis et favore suæ gratiæ concesserit, quia nullus ex libero tantum arbitrio valet ad hanc perfectionem promoveri, nisi auxiliante gratia Dei. Feramur ad perfectionem intelligentiæ et morum, non rursus jacentes fundamentum pœnitentiæ, quia impossibile est perfectos, si graviter prolapsi fuerint, renovari ad pœnitentiam. Nemo nunc verbis nostris obviet, sed modicum ut hæc declarem patienter expectet. Nam sequitur:

« Impossibile est enim, eos qui semel sunt illuminati, gustaverunt etiam donum cœleste, et participes sunt facti Spiritus sancti, gustaverunt nihilominus bonum Dei verbum virtutesque sæculi venturi, et prolapsi sunt, rursus renovari ad pœnitentiam, rursus crucifigentes sibi metipsis Filium Dei, et ostentui habentes. Terra enim sæpe venientem super se bibens imbrem, et generans herbam opportunam illis a quibus colitur, accipit benedictionem a Deo; proferens autem spinas et tribulos reproba est et maledicto proxima, cuius consummatio in combustionem. »

Feramur, inquit, ad perfectionem, non iterantes fundamentum deinceps pœnitentiæ, quia perfecti post lapsum renovari nequeunt ad pœnitentiam. Nam qui semel sunt illuminati per fidem, id est qui in suo interiori acceperunt lumen fidei quod semel datur credentibus, et gustaverunt etiam donum cœleste, id est quodam interno gustu præenserunt lumen fidei quod est donum cœleste, vel per ipsam quasi suavem et sapidum gustum in cordis palato sensere remissionem peccatorum in baptismo cœlestus datam, et facti sunt participes Spiritus sancti, id est partem cupientes spiritualis gratiæ per impositionem manuum, sive participes spiritualium charismatum, ut sunt genera linguarum et prophetia, et gustaverunt, id est sapidum in ore cordis præsensere, nihilominus quam nos, vel nihilominus quam spiritualem gratiam bonum Dei verbum de quo ipse loquitur: « Eructavit cor meum verbum bonum (Psal. XLIV), » non dico secundum quod hoc verbum caro factum est (Joan. 1), sed secundum quod summum bonum incommutabile est, cujus participatione cætera sunt bona verba, et hoc tale verbum gustavere, id est gustu cordis attingere, ut dulce saperet eis, seu verbum evangelicæ prædica-

tionis saporum et delectabile sensere, virtutesque sæculi venturi, resurrectionem et immortalitatem ac impassibilitatem gustu mentis quasi prælibavere, intelligendo illas vires corporis et illam pulchritudinem atque charitatem et levitatem carnis atque virtutes in corpore et anima futuras, et beatam cum angelis vitam æternaliter, qui ad tantam perfectionem pervenere, ac deinde neglectis omnibus his, ad amantem iniquitatem prolapsi sunt, id est sponte sua devoluti sunt in gravia peccata, et in eis delectabiliter jacent, impossibile est eos recuperatis omnibus his, quæ perdidere, bonis, renovari rursus ad pœnitentiam, revertentes, id est exuere jam per pœnitentiam vetustatem, quam iterum contraxere, et reinduere novum hominem. Non quia Montani vel Novati hæresim hic approbemus, qui contendunt non posse renovari per pœnitentiam eos, qui crucifigere sibi met filium Dei. Sed ideo impossibile esse dicimus ut tales renoveantur, quia nolunt renovari. Nam si vellent, esset utique possibile. Quod ergo renovari nequeunt, non est excusatio infirmitatis eorum, sed culpa voluntatis ipsorum, qui malunt veteres perdurare quam renovari. Sic enim tepuit mens eorum erga dilectionem virtutum, et exarsit in amorem vitiorum, ut nulla ratione consentiant peccata relinquere, quibus pertinaciter adhæsere. Propter quod et in pravitatibus suis justo valde judicio relinquuntur ab eo, qui dixit, quia « sine me nihil potestis facere (Joan. xv), » nec juvantur ab eo, sed assumuntur a diabolo, ut magis adhuc alligentur et aggraventur ab illo. Sicque fit ut ad pœnitentiam redire non valeant. Non quia mutari homines dum in hoc sæculo sunt, in melius non possint, sed quia dum ex intimo corde vitia diligunt et virtutes negligunt, nec divinitus adjuvantur, sed ab antiquo deceptore præmuntur, converti nullo modo possunt. Tales sunt, qui prius ad summa virtutum profecere, et post ad ima vitiorum prolapsi sunt, id est prorsus lapsi, vel procul lapsi, vel longe lapsi a priore statu, ita ut longo tempore jaceant in ipsis vitiis ad quæ lapsi sunt. Non enim prolapsos intelligere nunc debemus religiosos, qui in aliqua gravia subito cecidere, et cito surrexere; sed qui longa deliberatione et longo usu vitiis adhæsere, et a puritate virtutum recessere, quia raro quisquam talium invenitur egisse pœnitentiam, si tamen uspiam invenitur. Non ergo prolapsus intelligitur David in perpetratione adulterii et homicidii, de qua cito pœnitentiam egit (II Reg. 11); sed Salomon in amore alienigenarum mulierum, per quas et a fide separatus est, nec resipiscere voluit, cum semel et iterum divinitus admoneretur (III Reg. 11). Sic nec Aaron prolapsus intelligitur, dum metu populi seu volens ei placere, fecit vitulum, qui ad primam Moysi vocem fecit pœnitentiam (Exod. xxxii), sed prolapsus est Balaam per avaritiam, qui mercedem iniquitatis amavit, dans consilium quomodo populus Israel Creatorem offenderet, oblitus quæ antea prophetaverat et quæ divinitus audierat (Num.

xxii, xxiii, xxiv). Pro nihilo enim duxit omnia, ut avaritiæ suæ satisfaceret. Petrus quoque non est prolapsus in illa negatione, quia mox flevit amare, sed Judas et ipse per avaritiam in illa proditione, quam diutius excogitavit, et post implevit, nec congruam inde pœnitentiam egit (*Matth. xxvi, xxvii*). Religiosos itaque, qui excogitato diu consilio nequitii se sponte subjiciunt, et in eis diutius permanent, intelligimus prolapsos. Quales et in monasteriis hodie sunt nonnulli, habentes quidem speciem pietatis, virtutem autem ejus abnegantes, et ideo pœnitentiam agere non possunt, quia de solo exteriori habitu gloriantur, et sanctos se esse putant, quia sanctitatis indumentum portant. Recte itaque de talibus dicitur, quia impossibile est eos renovari ad pœnitentiam, quia vel nunquam, vel raro quisquam eorum renovatur. Et Apostolus ita terribilem protulit sententiam, ut per terrorem excitaret ad studia virtutum duras mentes Hebræorum, qui post illuminationem et Spiritus sancti perceptionem relapsi fuerant ad pristina vitia. Non possunt, inquit, renovari, sed sunt *rursum crucifigentes sibi metipsis Filium Dei, et ostentui*, id est irrisioni habentes, quia Christianitatem in seipsis exstinguunt et irrident, in se enim crucifigunt Filium Dei et contumeliæ habent, dum gratiam ejus vilipendentes, in peccato jacent, et tales, sicut exposuimus, nequeunt ad pœnitentiam redire, sed in sua pravitate perdurantes, ad æternam mortem festinant. Nam e contrario bona terra quæ fructum bonum facit, æternam meretur benedictionem, et hoc est, *Terra*, id est mens vel Ecclesia fidelium subjectorum, quæ velut terra excolitur vomere doctrinæ, *bibens imbrem prædicationis et gratiæ cœlestis*, id est quadam aviditate hauriens *venientem cœlitus super se* per ora prædicatorum; et hoc *sæpe*, quia si raro veniret, non sufficeret; si semper descenderet, vilesceret. Terra, inquam, quæ sic excipit hunc imbrem et generalitatem, id est profert bonam operationem, *opportuna*, id est congruam *illis a quibus colitur*, id est prædicatoribus, a quibus aratro doctrinæ scinditur et innovatur, scilicet ut operatio subjectorum congruat verbis magistrorum, hæc terra *accipit a Deo benedictionem*, id est augmentum virtutum in hoc sæculo, et perpetuam remunerationem in futuro, cum audit: « Venite, benedicti, etc. (*Matth. xxv*). » Hæc quidem terra benedicitur, sed illa quæ malas herbas gignit, maledicitur. *Proferens autem ut videantur spinas*, id est graviora peccata, et *tribulos*, id est minora vel multipliciora et acutius pungentia, tribus enim acuminibus lædit tribulus, *reproba est a Deo*, cum et ipsa pluviam doctrinæ suscipiat, et pro bonis herbis tribulos et spinas germinet. *Reproba est*, id est retro habens probitatem, ut ille cui Deus ait: « Projecisti sermones meos retrorsum (*Psal. xliix*), » et *proxima maledicto*, id est æternæ damnationi, ut audiat: « Discedite a me,

maledicti, » etc. (*Matth. xxv*). Nondum est in maledicto, sed proxima est illi, quia adhuc licet reverti; et nisi sibi caveat, prope est ut damnetur. *Cujus consummatio*, id est finis, si in malo perseveraverit, *ducat in combustionem*, ut sine fide comburantur, id est simul urantur corpus et anima. Hactenus terribiliter et aspere locutus est Apostolus, ut duras et torpentes Hebræorum mentes ad pœnitentiam et ad studia virtutum provocaret. Sed ne in desperationem terrendo præcipitaret eos, et sic in malo potius remanere faceret, demulcet eos consequenter blandis sermonibus, et ad bene agendum hortatur, dicens:

« Confidimus autem de vobis dilectissimi meliora et viciniora saluti, tametsi ita loquimur. Non enim injustus est Deus, ut obliviscatur operis vestri et dilectionis, quam ostendistis in nomine ipsius, quia ministrastis sanctis et ministratis. Cupimus autem unumquemque vestrum eandem ostentare sollicitudinem ad expletionem spei usque in finem, ut non segnes efficiamini, verum imitatores eorum, qui fide et patientia hæreditabant promissiones. »

Locutus sum, inquit, ut vos a peccatis retraherem, et desperationis (230) metu facerem cautiore. Cæterum confido de vobis meliora. Non hoc dico putando vos esse tales, sed timendo ne sitis tales, terreo verbis ne ipsa re impleatis. Dure locuti sumus, sed *confidimus de vobis o dilectissimi*, quos ex nimia dilectione monemus non ex aliquo prælationis debito, *confidimus, inquam, meliora*, quam ut sitis prolapsi, proferentes spinas et tribulos, et *viciniora saluti*, quam sunt illi qui nequeunt ad pœnitentiam renovari et maledicto sunt proximi. Meliorem de vobis confidentiam habemus, *tametsi ita dure loquimur* terrendo et increpando. Deo de vobis confidimus, quia olim multa operati estis, pro quibus, si de malis pœnitentiam egeritis, benefaciet vobis Deus. *Non enim injustus est Deus, ut obliviscatur operis vestri*. Revera enim grandis esset injustitia Dei, si tantum peccata puniret, et bona opera non susciperet. Non obliviscetur operis vestri, ut irremuneratum relinquat, quod vestra bona fecistis communia sanctis, et *dilectionis vestræ*, qua opus illud implestis, quoniam sanctorum charitas incitavit cor vestrum, ut eis ministraretis (*Matth. vi*), *quam dilectionem non infructuosam intus occultatis*, sed per opera bona foris ostendistis ad exemplum aliis, nec hæc fecistis propter humanos favores sicut hypocritæ, sed *in nomine ipsius*, id est ad honorem Dei, scilicet et ideo foras in operatione cæteris ostendistis dilectionem quam in corde retinebatis, ut luceret lux vestra coram hominibus, quatenus videntes opera bona, glorificarent non vos, sed Patrem vestrum qui est in cœlis (*Matth. v*). Dilectionem opere demonstrastis, *quia ministrastis*, id est humiliter ut subditi et servi quæ

necessaria erant de vestris facultatibus impendistis **A** sanctis qui sua posuerant ad pedes apostolorum et adhuc ministratis illis, perseverantes in eodem opere bono. Unde sciatis quia Deus hoc non obliviscetur, sed remunerabit. His verbis patet, quia superior increpatio et præsens consolatio non ad perfectos diriguntur, qui reliquerant omnia et habebant cor unum et animam unam (*Act. iv*), sed ad cæteros, qui sæcularia relinquere noluerunt, et negligenter ac remisse vixere. Quos Apostolus per pauca bona quæ fecere, allicit et recreat animos eorum atque confortat. Vos quidem ministrastis et ministratis, sed tamen nolumus ut ab hac adhuc ministracione cessetis, quasi jam sufficiat quod hactenus egistis, sed cupimus ut usque in finem in hac actione perseveretis. *Cupimus autem*, id est magno charitatis affectu desideramus unumquemque vestrum, ut nec unus desit, sed omnes communiter studeatis ostentare, id est frequenter ostendere aliis exemplum, *eandem sollicitudinem* ministrandi sanctis, id est solerter citationem, ut solerter et cito agatis; et non ad horam, sed usque in finem vitæ vestræ, et hoc *ad expletionem spei*, id est ut quod speratis ex toto impleatur in vobis in receptione beatitudinis æternæ, et ita cupimus vos usque in finem perseveranter ministrare sanctis, *ut non segnes*, id est sine igne efficiamini, in hac sollicitudine, hoc est non sitis torpentes, et igne sancti fervoris carentes, sed sine igne charitatis non sitis, id est sanctos quibus corporalia beneficia tribuitis, diligere ardentem non omittatis, *verum sitis imitatores eorum*, quibus ministratis, cæterorumque sanctorum, *qui hæreditabunt*, id est hæreditario jure possidebunt *promissiones*, id est multiplicia dona sempiternæ beatitudinis sæpe promissa, et has obtinebunt non nobilitate generis, sed *fide et patientia*, quia et fidem ipsis promissionibus adhibuere, et patienter eas expectantes, multa interim adversa passi sunt.

Abrahæ namque promittens Deus, quoniam neminem habuit per quem juraret majorem, juravit per semetipsum, dicens: Nisi benedicens benedicam te, et multiplicans multiplicabo te (*Gen. xxi*). Et sic longanimitè ferens, adeptus est re-promissionem. Homines enim per majorem sui jurant et omnis controversiæ eorum finis ad confirmationem est juramentum. In quo abundantius volens Deus ostendere pollicitationis hæredibus immobilitatem consilii sui, interposuit jusjurandum, ut per duas res immobiles, quibus impossibile est mentiri Deum, fortissimum solatium habeamus, qui confugimus ad tenendam propositionem, quam sicut anchoram habemus animæ tutam ac firmam et incedentem usque ad interiora velaminis, ubi præcursor pro nobis introivit Jesus, secundum ordinem Melchisedech pontifex factus in æternum. »

Exponit promissiones quas hæreditabunt qui fidem et patientiam servant, illas scilicet, quas Deus fecit Abrahæ. In quibus non relinquitur nobis locus

dubitationis, quando eas Abrahæ promisit et juravit, et etiam omnibus imitatoribus ejus in fide et patientia. Quasi dicat: Inde potestis videre quoniam qui fidem et patientiam habent promissiones hæreditabunt, quia Abraham qui primas eas audire cepit, sic adeptus est eas. *Namque Deus promittens Abrahæ*, id est promissionem futuræ gloriæ faciens, *juravit*, id est firmiter et immutabiliter stabilivit, *per semetipsum*, id est per incommutabilitatem suam. Ideo juravit per semetipsum, *quoniam neminem habuit sese majorem per quem juraret*, quia si esset aliquid majus, per illud suæ promissionis immobilitatem ostendisset. Juravit, inquam, dicens: O Abraham, nisi benedicens te assidue in spiritualibus filiis, qui erunt sicut stellæ, benedicam te incremento virtutum et semper multiplicans te in carnalibus, qui erunt sicut arena, multiplicabo te in futura beatitudine. Ac si dicat: Nisi hoc fecero, nemo mihi amplius credat. Defectus enim sermonis, vehementiam indicat assertionis. Vel nisi benedicens te, id est ditans virtutibus, benedicam te, id est promovebo ut opereris juxta eas; et nisi multiplicans, id est adhuc copiosiore virtutum abundantia te dilatans, multiplicabo te, id est in cœlesti patria te multiplica remuneratione beabo. Deus ita jurejurando promisit, Abraham certus de promissione non statim eam quæsivit accipere, nec contra Deum murmuravit de dilatione, sed longanimitè ferens inter multa adversa, et fideliter exspectans, tandem adeptus est re-promissionem, id est illud quod sibi promissum fuit. Vel re-promissionem, quia in una promissione multa sibi promissa sunt. Similiter ergo qui fidem et patientiam usque in finem custodiunt, hæreditabunt promissiones, ut dictum est. Post hæc causa redditur, quare Deus in promissione juraverit cum dicitur: *Homines enim per majorem sui jurant*. Idcirco enim juravit Deus quia hominibus loquebatur et homines jurant. In Deo enim ita firmum est solum promittere, sicut et jurare. Sed hominum incredulitatem voluit juramento certam reddere. Quod hoc autem per se juravit, cum majorem non haberet, quia homines per majorem sui, id est per majorem se jurant. Juravit enim per illud, quod invenire majus potuit. Homines jurant, *et juramentum est finis omnis controversiæ eorum*, id est altercationis, quando unus affirmat et alter negat, quia in juramento finitur altercatio, et est finis, valens ad confirmationem alterius partis, id est ad omnimodam certitudinem faciendam, quia postquam juratum est tunc utrique parti certum et ratum est. Et si homini qui mendax est, creditur per juramentum, quanto magis Deo qui mentiri non potest? *in quo*, id est in cujus rei consideratione, hoc est quia considerabat juramento finiri omnem controversiam et fieri confirmationem, *interposuit*, id est inter se et homines medium, cui crederent, posuit jusjurandum Deus, vel inter promissionem et ipsius promissionis adimpletionem posuit juramentum. Ipse dicit,

volens ex propria bonitate abundantius ostendere per A jurationem, quoniam abundanter per promissionem, abundantius vero per juramentum ostendit; volens, inquam, ostendere *immobilitatem sui consilii*, id est suæ secretæ rationabilis dispositionis, quæ paucis est nota, quia vix aliquis novit per fidem Christi salvari homines, et cui vel quibus volens ostendere *hæredibus pollicitationis*, id est illis qui hæreditario jure et firmiter habituri sunt pollicitationem, id est promissionem frequenter factam. Illis volens ostendere firmitudinem sui consilii, adhuc abundantius per juramentum, quam sine juramento ostenderat, interposuit, id est inter promissiones posuit jusjurandum, condescendens consuetudini hominum, ut perfectius et certius crederent illud quod ipse de eis immutabiliter ordinavit. Ideo juravit in promissione, *ut per duas res immobiles*, id est per promissionem et juramentum, quæ mutari non possunt, quibus ipse qui Deus est, cogitur ut immobile fiat consilium ejus, quia *impossibile est mentiri Deum*, id est ut ipse in his duabus rebus mentiatur, cum nec in aliqua re mentiri possit, *habeamus* in omni tribulatione *fortissimum solatium doloris et anxietatis*. Vel per duas res immobiles, id est per hoc quod Deus juravit et hoc quod per semetipsum, in quibus duabus ipse non potest mentiri, cum nunquam mentiatur. Habeamus solatium fortissimum, id est quod nos in omni adversitate fortes faciat volentes ad horam pati, ut in æternum regnemus. Cum enim tribulationem patimur, si ad futuram *gloriam nobis promissam respicimus, refrigerium mentis et angustiarum mitigationem in camino tribulationis habemus*. Nos dico, *qui dum nos tribulationes insequuntur, et omni genere impugnationem appetunt, confugimus, id est ex toto fugimus, ad spem futuræ quietis ac beatitudinis et gloriæ nobis promissæ tenendam*, id est non pro adversis descendendam, sed totis animi viribus firmiter tenendam. *Spem*, id est omnibus oblatam, vel propositam, id est ab antiquis temporibus in Abraham et cæteris patribus ad exemplum nobis in propatulo positam. Ad quam spem confugit, quisquis spe beatitudinis omnes tribulationes spernit, et utile nobis est ad eam confugere, ipsamque tenere, *quam habemus sicut anchoram*, id est retinaculum et firmamentum *animæ nostræ* ne in mari hujus sæculi frangatur scopulis adversitatum. Sicut enim anchora navem retinet et firmat, ne ventorum rabie et tempestate maris insurgente submergatur, et ludibrium maris et fluctuum fiat, sic spes nostra cælestibus infixæ, irrevocabiliter adhærens gloriæ quam desiderat, animam fidelem tenet, et consolidat contra omnes hujusmodi impugnationes velut contra maris tempestates, et confortat in suo proposito, ne deficiat velut scopulis adversitatum et tribulationum fracta, et retinet ne mergatur consentiendo iniquitati. Spem dico, *tutam*, id est nihil timentem ac firmam, id est inconcussam, ne saltem titubet. Spes enim cælestium mentem solidat, ne concutiat fluctibus

tumultuum terrenorum. Quod est dicere: Spes in nobis similitudinem exercet anchoræ, quæ navem, ne ad scopulos frangatur, retinet et tutam facit ut non timeat submergi, atque firmam, ne vel titubare possit. *Et incedentem* dico hanc spem, id est nos sperando introducentem usque ad interiora velaminis, id est usque ad ipsa cælestia et arcana, quæ oculus non vidit, nec auris audivit, nec in cor hominis ascendit (*I Cor. II; Isai. LXIV*), quæ nobis adhuc in carne viventibus sunt velata, id est ignorantia nostræ velo tecta; et tamen nostra spes penetrat usque ad illa. Nautis arenæ quibus anchora figitur et hæret; sunt tectæ, nec videri possunt et tamen nautæ sunt in securitate, licet illa videre non possint, quibus anchoræ brachia firmiter adhæsere. Sic et nos in hujus sæculi fluctibus positi cælestia non videmus; et tamen illis ita per spem conjuncti sumus, ut nullo timoris incursum moveri possimus. Sed et hoc notandum, quia cum dicit, *incedentem usque ad interiora velaminis*, alludit historiæ, quæ inter duo tabernacula velum fuisse narrat, quod interioris tabernaculi secreta velabat, in quo pontifex semel in anno intrabat, et secretum internæ beatitudinis præfigurabat. *Ubi*, id est in quæ interiora et æternæ patriæ secreta introivit secundum humanitatem *Jesus*, id est Salvator noster, qui secundum divinitatem ubique semper est, introivit *pro nobis*, id est pro nostra salute, ut interpellaret pro nobis, sicut pontifex Sancta sanctorum ingrediebatur, ut rogaret pro populo. Et introivit *præcursor* pro nobis, ut et nos post eum illuc eurramus. Cursor, quia nulla culpa eum impedit. Præcursor, et tempore et dignitate. Pro nobis, introducendis. Ipse dico, *factus a Deo pontifex*, id est faciens nobis pontem et accessum ad Patrem per hoc quod interpellat pro nobis, offerens obedientiam suæ passionis, ac repræsentans Patri pro salute humani generis. Et hoc *in æternum*, quia non solum quandiu præsens sæculum manet, aut quandiu vivimus, sed etiam in futuro pontificis agit opus; non tunc pro peccatis nostris offerens quæ nulla erunt, sed ut bonum quod in bonis operatus est, indeficiens et stabile permaneat. Pontifex est, non secundum ordinem Aaron, sed *secundum ordinem Melchisedech*, qui solus rex et sacerdos fuit, et ante circumcisionem functus officio, ut non gentes a Judæis, sed Judæi a gentibus sacerdotium acciperent. Nec unctus oleo ut Moyses instituit, sed oleo exultationis et puritate fidei. Nec animalia immolavit, sed pane et vino sacerdotium Christi dedicavit. Patet ergo Christianos superiores esse Judæis, sacrificium melius pecudibus habere, scilicet rationabile obsequium quod ducit in cælum.

CAPUT VII.

« Hic enim Melchisedech rex Salem, sacerdos Dei
« summi, qui obviavit Abraham regresso a cæde re-
« gum (*Gen. XIV*), et benedixit ei, cui et decimas
« omnium divisit Abraham, primum quidem qui
« interpretatur rex justitiæ, deinde autem et rex

« Salem, quod est *rex pacis*, sine patre, sine matre, sine genealogia, neque initium dierum, neque finem vitæ habens, assimilatus autem Filio Dei, manet sacerdos in perpetuum. »

Postquam illos Apostolus monuit ut ad perfectionem promoverentur, quatenus illius grandis et interpretabilis sermonis capaces effici possent, et ad [hoc] multis verbis eos sollicitavit, iterum redit ad propositum, et ad illum grandem sermonem de pontificio Christi, ut scilicet præferre ipsum possit omnibus pontificibus Veteris Testamenti, et ita paulatim accedat hoc ad ostendendum, quod carnales observationes cessare debeant per translationem sacerdotii. Et prius exponit quos ordo præcesserit in Melchisedech, et quomodo juxta ordinem ejus Christus sit factus pontifex in æternum, ut exposito et commendato ordine Melchisedech, appareat quam dignum sit sacerdotium Christi, quod tam magnum est, ut sacerdotium Melchisedech illud præmonstraverit non sicut æquale, sed sicut umbra, dum enim magna umbra præcessisse ostenditur, patet satis quod magna veritas corporis sequatur. Quasi dicat: Recte pontificium Christi comparo ordini Melchisedech, quia *hic Melchisedech fuit rex Salem*. Salem autem non (ut Josephus (231) et plurimi nostrorum arbitrantur) credamus esse Jerusalem, sed oppidum juxta Scythopolim, quod usque hodie appellatur Salem, et ostenditur ibi palatium Melchisedech, ex magnitudine ruinarum veterem ostendens magnificentiam, de quo et posterius in Genesi dicitur: « Venit Jacob in Socoth, et transivit in Salem civitatem regionis Sichem (Gen. xxxiii). » Nam et Abraham revertenti a cæde hostium, quos persecutus est usque Dan, quæ nunc Paneas appellatur, non Jerusalem sed oppidum metropolcos Sichem in itinere fuit, de quo et in Evangelio legimus: « Erat autem Joannes baptizans in Ennon juxta Salem (Joan. 1). » Cujus urbis rex fuit Melchisedech, fuit et sacerdos, ut regnum et sacerdotium Christi præfiguraret, qui et nos fecit esse genus regale et sacerdotale (I Petr. 11). Sacerdos fuit, non idolorum, sed Dei, quia licet esset gentilis, et non de genere Judæorum, tamen erat sacerdos Dei; non Jovis aut Apollinis, sed potius *summi Dei* omnium Creatoris, qui est super omnia; et Christus est sacerdos Dei Patris, qui hostiam sui corporis et sanguinis semel obtulit in cruce (Joan. xix), sicut et Melchisedech panem et vinum legitur obtulisse. Ille dico, *qui obiit*, id est obviavit processit *Abraham regresso a cæde regum*, quando fuit majoris dignitatis habitus apud homines, id est in ipso triumpho, cum regrederetur non a fuga, sed a cæde, non unius, sed multorum regum. Hinc enim magna dignitas Melchisedech ostenditur quem Abraham, peregrinus in illa terra tantæ dignitatis intellexit, ut dignum judicaret ad illum qui rex et sacerdos erat accedere (232), et de omnibus spoliis decimas illi

dare, ac prius ad illum a quo benedictionem accepturus erat, quam ad domum suam declinaret. Cui triumphatori non solum obviavit Melchisedech, sed et benedictionem dedit. *Abraham* vero, accepta benedictione, *divisit illi decimas omnium* quæ secum adduxerat a cæde regum. Per Loth, qui amissis bonis in captivitatem ductus est, designatur anima vitiorum pondere per quinque sensus corporis incurvata et domino adversariæ potestatis mancipata. Cujus vincula nititur Abraham solvere, cum ratio captivitatem animæ recognoscens, armat se scuto fidei et galea spei ac gladio verbi Dei; et assumpta virtutum quasi vernaculorum caterva, cuneos vitiorum viriliter aggreditur; et tam diu pugnat, donec superatis hostibus animam liberet. Peremptis regibus, Abraham reduens Loth, gaudens redit ad propria, inveniens Melchisedech in itinere sibi obviantem, et sacros cibos offerentem ac benedicentem, quoniam extinctis vitiis, rationalis vigor animam liberatam reducere festinat ad paradisi gaudia et ad domum cælestis patriæ; sed priusquam illuc perveniat verum regem et sacerdotem Christum reperit obvium et offerentem sibi cibum et potum corporis et sanguinis sui, ac benedictionem cælestis gratiæ, id est incrementum virtutum tribuentem. Occurrit enim latus victoribus vitiorum, ut excipiat eos et sacris alimentis reficiat; et benedicit, id est promovet et multiplicat in virtutibus, et augmentat donis spiritualibus. Nec nisi victor quisquam cibos ejus debet accipere, quia nullus ut ad eucharistiam accedat, debet præsumere, nisi prius reges contra quos pugnat, devicerit, id est vitia quæ pugnaverunt in se, Domino adjuvante superaverit, alioquin iudicium sibi manducat et bibit (I Cor. 11). Abraham autem decimas omnium quæ hostibus abstulerat, dedit sacerdoti Melchisedech. Sic et unusquisque fidelis post victoriam suæ pugnæ gaudens Christo decimas offert, id est omnium bonorum operum suorum perfectionem et virtutum consummationem divini gratiæ ascribit. Si quid autem imperfectum et minus idoneum in se viderit, hoc sibi retinet, id est sibi deputat. Denarius enim ultra quem non progreditur numerus, sed replicatur, perfectionem designat, sicut et novem partes quas Abraham sibi retinuit, imperfectionem demonstrant. Quidquid enim primum et optimum est ac perfectum, designatur per denarium, in quo prius consummatur numerus. Et omne quod præcipuum est in nobis atque perfectum, Deo attribuendum est, quidquid vero imperfectum, nobis est ascribendum. *Primum quidem*, etc. Notat Apostolus ipsa verba, ut ostendat omnia ista in Christo esse eo ordine, quo præcesserit in Melchisedech. *Qui primum quidem interpretatur rex justitiæ*, sed deinde etiam rex Salem, quod est *rex pacis*. Quod Christo bene congruit, qui pacificat quæ in cælis et quæ in terra sunt (Colos. 1), qui suos per justitiam regit inter procellas sæculi,

(231) Lib. 1 Antiq. c. 1.

(232) Locus obscurus.

ac in eorum justis conversationibus regnat, et post in æterna pace non desistit eos regere et in ipsis regnare. Primum enim Melchisedech nobis est, deinde rex Salem; quia prius regit nos in justitia, post reget in pace. Primo regnum justitiæ nunc in nobis assequitur, et deinde post hanc vitam regnum pacis in nobis æternaliter quietum possidebit. Melchisedech dico, *sine patre, sine matre*. Non quod absque patre et matre fuerit, cum Christus quoque secundum utramque naturam et patrem habuerit et matrem, sed etiam quod subito introducatur in Genesi occurrisse Abrahamæ revertenti a cæde hostium (*Gen. xiv*), et nec ante nec postea nomen ejus feratur ascriptum. Unde et *sine genealogia* dicitur esse, cum fortassis uxorem et filios habuerit, et per initium, nec finem habuisse, cum sine dubio et initium per nativitatem habuerit, et per obitum finem. His enim omnibus carere dicitur, quia nihil horum in eo Scriptura loquitur. Vel genealogia est præcedentium Patrum narratio, qua iste caret, quia ex quibus patribus descendat, non invenitur, quoniam Spiritus sanctus altiori consilio voluit hoc de eo reticere, ut figuram Domini per omnia gereret. Christus enim sine patre secundum carnem est, quia sine virili admistione natus est ex virgine; et sine matre est secundum divinitatem, quoniam illa ineffabilis genitura manet in æternitate, et est sine genealogia, id est sine generatione filiorum, quia filios carnis non habuit, sed sine sobole, sine aliqua successione carnali permanet. Sive quia patres aliquos in divinitate non habuit præcedentes, *neque initium dierum, neque finem vitæ habens*, sed co-æternus Patri existens secundum divinitatem. Hic quoque notandum est, quia dum Melchisedech sine patre et sine matre dicitur esse, sacerdotes Novi Testamenti non pro parentum nobilitate sed pro vitæ suæ merito sunt eligendi; nec attendendum quos parentes habuerint, sed cujus meriti sint. Sed et sine genealogia est Melchisedech, quia Novi Testamenti sacerdotes et ministri altaris uxores habere non possunt. Quas si habere voluerint, profiteantur se esse sacerdotes Judaicæ institutionis, non Christianæ. Nec initium dierum, nec finem vitæ habet Melchisedech, quia sacerdotium ejus, id est sacerdotium Christi et Ecclesiæ, est æternum et in præteritum et in futurum. Sacerdotium autem Aaron, id est populi Judæorum, et principium habuit et finem. Sed sacerdotium Christi principio caret et fine, quia electi sumus in ipso ante mundi constitutionem, et sine fine pro nobis interpellat (*Ephes. i*). Talis et tantus est Melchisedech, sed in omnibus his quæ dicta sunt, *assimilatus est Filio Dei*, quoniam in omnibus gessit umbram veritatis, quæ in Christo lucet, et *manet sacerdos in perpetuum*, non quod adhuc vivens sacerdotio fungatur, sed quoniam Scriptura finem sacerdotii ejus non narrat (*Num. xx*). Nam de aliis sacerdotibus legitur quando mortui sunt, et quod alii loco eorum successere, sicut de Aaron invenitur qualiter obierit, et quis ei pontifex

successerit. Sed de Melchisedech non legitur quod aliquando mortuus sit vel sacerdotium perdidit. Moyses enim sicut mortem ejus tacuit, ita eum aliquando fuisse vel amisisse sacerdotium suum minime retulit. Manet ergo sacerdos in perpetuum quia sacerdotio ejus nullum aliud sacerdotium succedit, ut Levitico; sed ejus institutio quando mundus steterit, permanebit. Nam ipse panem et vinum obtulit Deo pro Abraham, et quotidie panem et vinum Deo sacerdotes offerunt pro salute fidelium; atque panis ipse et vinum fiunt corpus et sanguis Christi, ac permanent in æternum, ita ut vitam æternam digne accipientibus conferant. Propter ista recte dicitur Melchisedech manere sacerdos in perpetuum, quia nullus alius ritus instituetur, per quem ejus oblatio mutetur, et quia Christum designat perpetualiter interpellantem pro nobis.

Intuemini autem quantus sit hic, cui et decimas dedit de præcipuis Abraham patriarcha. Et quidem de filiis Levi sacerdotium accipientes, mandatum habent decimas sumere a populo secundum legem (*Num. xviii*), id est a fratribus suis, quanquam et ipsi exierint de lumbis Abrahamæ. Cujus autem generatio non annumeratur in eis, decimas sumpsit ab Abraham (*Gen. xiv*), et hunc qui habebat repromissiones, benedixit; sine ulla autem contradictione, quod minus est, a meliore benedicitur.

Immoratur Apostolus in commendatione dignitatis Melchisedech, præferens eum Abrahamæ, quem Judæi extollunt et de quo gloriantur, quem Christo præponere volunt, dicentes: « Nunquid tu major es patre nostro Abraham? (*Joan. viii*). » Quasi dicat: « *xx* supradictis vidistis qualis fuerit Melchisedech. Sed nunc intuemini, id est interiori considerate quantus sit hic. Intuemini, id est interiori visu cum magna diligentia, utpote magnum quid inspicite, *quantus*, id est quantæ dignitatis et sanctitatis ac perfectionis *sit hic intelligendus, cui non solum multas alias venerationes, sed et decimas dedit Abraham* qui est *patriarcha*, id est princeps patrum, cujus sanctitatem patres imitati sunt. Et non de vilioribus, sed *de præcipuis ac melioribus* dedit ei decimas, velut de equis, vestibus, loriceis et aliis, quæ præcipua videri poterant inter cætera. Unde maximus apparet et inæstimabilis magnitudinis esse, cui pater aliorum patrum decimas dedit, in quo se longe inferiorem illo esse reputavit, et illum meliorem, cui meliora et præcipua offerebat. Melchisedech, ut dixi, decimas ab Abraham accepit, in quo præferatur Abrahamæ, et ita cunctis filiis Levi, id est sacerdotibus veteris legis. Et quidem taliter apparet quantum ipse præeminat cunctis illis sacerdotibus, quia non omnes filii Levi, sed *quidam de filiis ejus accipientes sacerdotium* per electionem et consecrationem aliorum, *habent mandatum sumere decimas*; non enim aliter auderent. Mandatum istud habent *secundum legem*, id est secundum legis institutionem, sine cujus auctoritate nunquam præsumerent. Unde

secundum legem, id est non aliter quam præcipit lex, scilicet, ut nec plus, nec minus, nec alio modo accipiant, quam in lege decretum est. Accipiant a populo Hebræorum, id est a fratribus suis, hoc est, ab hominibus ejusdem dignitate superare, nisi quia erant sacerdotes constituti in lege. Tanta est enim excellentia sacerdotii, ut etiam similes genere, multo amplius digniores sint fratribus suis. Decimas, inquam, sumebant a populo, non tamen minori, ut erant proselyti, sed a fratribus suis secundum carnem non inferioribus; *quanquam et ipsi fratres qui eas dabant, exierint de lumbis Abrahamæ*, id est descenderint de propagine Abrahamæ; hoc est, quamvis et sacerdotes et populus ejusdem dignitatis essent in origine generis, tamen præceptione legis et auctoritate populus cogebatur ut eis decimas persolveret, sed Melchisedech a nullo homine accepit officium sacerdotale vel consecrationem, neque præceptum habuit ut decimas sumeret, vel ab aliquibus exigeret, et cum filii Levi non a minoribus, sed a comparibus, utpote a fratribus decimas accipiant, iste ab Abraham accepit, non ut a compari vel fratre, sed ut a minori, quia non fuit ex illa progenie. Non enim Abraham incircumciso alienigenæ decimas dedisset, nisi excellentiorem esse sciret, in quo et Levitici sacerdotes decimas ei persolverunt. Filii Levi sumebant a fratribus, sed ille *cujus generatio*, id est posteritas filiorum, quia nulla est, vel etiam si esset, *non arnumeratur in eis*, id est in filiis Levi, nec aliquam consanguinitatem habere cum eis refertur, *decimas sumpsit ab Abraham*. Quem sic per omnia superavit, ut nulla vis esse facta possit intelligi, quando illi Abraham decimas ex omnibus persolvit, sicut populus Judæorum quadam vi et necessitate compellebatur dare suis decimas sacerdotibus. Horum sensus ita breviter panditur: Tali modo patet Melchisedech digniorem et majorem esse filiis Levi, quia ipse ab Abraham majore omnibus illis decimas sumpsit ut a minori, Leviticus autem ordo non a minori se, sed a fratribus accepit. Nam si Levitici sacerdotes etiam paribus genere, id est fratribus suis præstantiores erant sacerdotii consecratione et legis institutione, quoniam decimas ab eis accipiebant, tunc Melchisedech dignius præfertur Abrahamæ, a quo decimas accepit quasi sacerdos a laico, et filiis Levi quos in ejus lumbis decimavit. Non tamen Melchisedech et Abraham ejusdem generis esse leguntur, ut vel in genere pares esse possint. Et si Melchisedech qui fuit signum et umbra, præfertur Abrahamæ et omnibus Leviticis sacerdotibus, quanto magis Christus qui est veritas et corpus? Dixit quia decimas sumpsit ab Abraham, et etiam benedixit eum, per quod magna ejus excellentia declaratur, qui tam magnum patriarcham, *qui habebat*, hoc est qui tam firmiter credebat ac si jam haberet *repromissiones*, id est iteratas ad se divinitus promissiones, *benedixit*, id est sacravit, *hoc est*, illum benedixit, cujus Deus benedictionem *repromiserat*. Cujus benedictione Abraham factus

est sacrator, non benedixit eum, sed decimas ei dedit, ut minor majori. Abraham ab eo percepit benedictionem, sed *sine ulla contradictione* verum est, quia *illud quod minus est, benedicitur a majore vel a meliore*. Nemo enim contradicere potest huic rationi, sed omnes hoc constare novere, quia omne quod benedicitur, minus est benedicente. Omnis enim qui benedictionem ab aliquo suscipit, in ipsa susceptione probatur esse minor. Sed Abraham, ut sæpe dictum est, benedictionem suscepit a Melchisedech in tempore majoris suæ dignitatis, dum cum triumpho rediret e prælio. Ergo minor esse non potest negari: et si typus Christi, id est Melchisedech major est promissiones habente, quam est ipse Christus!

B « Et hic quidem decimas morientes homines accipiunt, ibi autem contestatur quia vivit, et ut ita dictum sit, per Abraham et Levi qui decimas accepit, decimatus est, adhuc enim in lumbis patris erat, quando obviavit ei Melchisedech. »

Et adhuc alia ratione intuemini dignitatem Melchisedech, quia *hic quidem*, id est in hoc loco Scripturæ, ubi agitur de Leviticis sacerdotibus, *accipiunt decimas homines morientes*, id est ad mortem quotidie per multas miseras vergentes; hoc est, de illis loquitur Scriptura sicut de hominibus, quorum alii moriuntur, et alii succedunt; sed *ibi*, id est ubi sermo est de Melchisedech, *contestatur* Scriptura *quia ipse vivit*, dum de vita ejus loquitur, et de morte nihil dicit. Per quod dignior omnibus aliis sacerdotibus sufficienter ostenditur. Contestatur enim, id est simul tota illa Scriptura quæ de eo est, testatur, quia vivit. Et cum filii Levi sint morientes, et iste vivens, apparet quis sit præferendus. Et alio adhuc modo patet eum esse majorem filiis Levi, quoniam Levi qui decimas accepit, ipsi Melchisedech decimas persolvit, et hoc est, quia *et Levi*, id est illa tribus Levitica, unde sacerdotes Deus elegit, et ille quoque electus ordo, *qui decimas* ab omnibus aliis *accepit decimatus est a Melchisedech*, id est decimas ei persolvit, et hoc per *Abraham*, non enim proprie in sua persona Levi decimas dedit circumcisis sacerdos incircumciso. Sed ut ita dictum sit constans, non per se decimatus est, sed per medium, id est per Abraham patrem suum. *Adhuc enim erat in lumbis patris ipse Levi*, pater sacerdotalis prosapiæ, id est nondum exierat inde secundum genituram, *quando Melchisedech obviavit Abrahamæ*. Et ideo totus ordo Leviticus ipsi Melchisedech astrictus est in eodem debito et eadem subjectione, in qua Abraham pater ejus. Adhuc enim unum quid erat Levi cum illo, quoniam post genitus est ab ipso. Et ideo necesse est ut eidem subjiciatur, cui subjectus est pater ejus atque illum genuisset. Unde patet sacerdotium Judæorum esse subjectum sacerdotio Christianorum. Decimatus est enim Levi per Abraham a Melchisedech, quoniam adhuc in lumbis patris erat decimas dantis. Nam sicut Adam peccante, qui in tum-

bis ejus erant, peccavere; sic Abraham decimas dante, qui in lumbis ejus erant, decimati sunt. Sed hoc non sequitur in Christo, quamvis esset in lumbis Adæ et Abrahæ, quia non secundum concupiscentiam carnis inde processit. Non enim et ille ibi decimatus est, cujus caro inde non fervorem vulneris, sed materiam medicaminis traxit. Nam cum ipsa decimatio ad præfigurandam medicinam pertinuerit, illud in Abrahæ carne decimabatur quod curabatur, non illud unde curabatur. Et ita Christus non est inferior Melchisedech, quia non est decimatus ab eo, sicut Leviticus ordo, qui ei per Abraham decimas solvit. Eadem namque caro non Abrahæ tantum, sed ipsius primi hominis, simul habebat et vulnus prævaricationis et medicamentum vulneris. Vulnus prævaricationis in lege membrorum repugnante legi mentis (*Rom. vii*), quæ per omnem inde propagatam carnem seminali ratione quasi transcribitur; medicamentum autem vulneris in eo, quod inde sine opere concupiscentiæ in sola materia corporali per divinam conceptionis formationisque rationem de virgine sumptum est, propter mortis sine iniquitate consortum, et resurrectionis sine falsitate exemplum.

« Si ergo consummatio per sacerdotium Leviticum erat, populus enim sub ipso legem accepit, quid adhuc necessarium fuit secundum ordinem Melchisedech alium surgere sacerdotem, et non secundum ordinem Aaron dici? Translato enim sacerdotio, necesse est ut legis translatio fiat. »

Prætulit hactenus sacerdotium Christi, quod est secundum ordinem Melchisedech, Levitico; et nunc addit quod sacerdotium Christi Leviticum destruat, quo destructo, necesse sit et legem destrui secundum carnales observantias. Ac si dicat: Quoniam superius dictum est: Christum esse sacerdotem secundum ordinem Melchisedech, et omnes legem habentes novere hoc esse futurum, ergo quid necessitatis exstitit, ut non juxta Aaron, sed juxta Melchisedech surgeret iste novus sacerdos, sub quo perfecta daretur justitia? Si consummatio, id est perfectio justitiæ erat, id est dabatur vel fiebat, per sacerdotium Leviticum, cur alio ordine novus adhuc sacerdos prophetatus est surrecturus? Nam si Leviticum sacerdotium, ut Judæi putabant, consummabat, frustra surgeret alius secundum Melchisedech. Sed surgit alius, et non frustra, cum divino sit prænuntiatum oraculo. Ergo illud non consummabat. Sed cur consummare videretur, interponitur causa: *populus enim sub ipso legem accepit*. Nam quia sub illo sacerdotio data fuit lex, in cujus observantia consummatio putabatur esse, ideo putabatur consummatio per sacerdotium, quoniam lex et data est sub illo, et administrabatur per ipsum, sed non erat per ipsum consummatio. Nam si hoc esset, nunquam alius sacerdos quæreretur, qui alio ordine consummationem daret, et hoc est

A Si consummatio justitiæ sicut Judæi putabant, erat per sacerdotium Leviticum, ergo postquam illud vetus daret consummationem, quid adhuc necessarium fuit, id est quid causæ, quid utilitatis exstitit dici a Deo per David *surgere alium sacerdotem*, dum caneret: « Tu es sacerdos in æternum secundum ordinem Melchisedech (*Psal. cix*), » et non diceret *secundum ordinem Aaron*? Hic est enim verus sacerdos, quia et a peccato liberat, et omnem justitiæ consummationem præstat, quod illi facere nullatenus valebant. Ideo necesse fuit, ut post illos adhuc alius surgeret, et secundum ritum et secundum mores. Populus sub sacerdotio legem accepit et tenuit, et illud vetus novo sacerdotio veniente mutatur. Unde et legem similiter oportet mutari. Nam *translato sacerdotio* in novum sacerdotium, *necesse est ut et legis translatio fiat* in novam observationem. Quia enim simul utraque et ab eodem et sub eadem sponsione data sunt, necesse est, ut quod de uno dicitur, de altero intelligatur. Neque enim lex sine sacerdotibus, qui eam faciant, potest manere, sed destructo sacerdotio, destruitur et lex quæ non nisi sub eo stare valet. Sed destructum sive translatum est sacerdotium.

« In quo enim hæc dicuntur, de alia tribu est, de qua nullus altario præsto fuit. Manifestum est enim, quod ex Juda ortus sit Dominus noster, in qua tribu nihil de sacerdotibus Moyses locutus est. Et amplius adhuc manifestum est, si secundum similitudinem Melchisedech exsurrexit alius sacerdos, qui non secundum legem mandati carnalis factus est, sed secundum virtutem vitæ insolubilis. Contestatur enim, quoniam tu es sacerdos in æternum secundum ordinem Melchisedech. »

Ostendit translatum esse sacerdotium, ut sic sequatur et legis translationem esse factam. Vere sacerdotium est translatum, quoniam et in aliam tribum, et in alium ritum. Nam ille *in quo*, id est in cujus consideratione hæc dicuntur, scilicet Dominus Jesus propter quem commendandum has disputationes facimus, non ex tribu Levi, sed *de alia tribu est, de qua nullus præsto fuit unquam altario*, id est, nec minor, nec major quisquam ex illa tribu secundum legem ad altarium accessit, ut ministraret sacerdotali jure. Vere novus iste sacerdos qui æternum habet sacerdotium, de alia tribu est, nam de Juda. Et oportebat ut evacuaretur sacrificia, quæ secundum ordinem Aaron in sacerdotio Levitico fiebant, de alia tribu esset, non de Levitica, ne ad ipsum sacerdotium quod temporaliter umbra erat futuri, pertinere videretur mundatio peccatorum, quam ipse oblatione sui veri sacrificii fecit. De alia tribu est. Nam *manifestum est quod idem Dominus noster ortus sit ex Juda*, id est ex tribu Juda, ut eadem sit sacerdotalis et regalis, ut fuit Melchisedech rex et sacerdos. *In qua tribu Moyses nihil de sacerdotibus est locutus*, id est non dixit ut alicuius de ea sacerdos esset, vel aliquid sacerdotale

haberet. Quia ergo Dominus Jesus qui de alia tribu A est, sacerdotium accepit, patet quia translatum est sacerdotium, nec in tribu Levi amplius manere potest, et ita carnales observantiæ sub illo datæ, statum ulterius habere nequeunt post hoc. Dedi, inquit, superius rationem satis manifestam, et convenientem, et adhuc præter istam dico aliam, ex qua amplius erit manifestum et evidens omnibus quia translatum est sacerdotium. Manifestum enim est per tribum esse translatum, *et amplius adhuc manifestum est per ritum*, quia hæc est manifestior et firmior probatio, amplius, id est largius et evidentius manifestum est, sacerdotium esse translatum, si alio ritu observatur, videlicet *si secundum similitudinem Melchisedech exsurrexit alius sacerdos*, id est si Dominus Jesus extra omnes alios surrexit, ut B oblatione sua mundaret populum suum ab omnibus peccatis, quod nullus alius facere potuit; et quemadmodum Melchisedech Abrahæ panem et vinum sacratum dedit, ita et hic discipulis suis in eisdem speciebus corpus et sanguinem suum dedit. *Qui non est factus sacerdos secundum legem mandati carnalis*, id est secundum quod lex carnaliter mandat, quia non est unctus in sacerdotem oleo materiali, nec carnalia pro ejus ordinatione sunt oblata sacrificia, *sed secundum virtutem vitæ insolubilis*, id est æternæ, quæ nec solvi, nec corrumpi vel destrui potest quæ per Spiritum sanctum datur, quo Christus invisibiliter est unctus in sacerdotem. Et vere secundum virtutem vitæ insolubilis est unctus sacerdos, quia in æternum manet. Nam *contestatur*, C id est simul propheta vel Deus Pater mecum testatur *quoniam tu es sacerdos in æternum secundum ordinem Melchisedech*.

« Reprobatio quidem fit præcedentis mandati
• propter infirmitatem ejus et inutilitatem. Nihil
• enim ad perfectum adduxit lex, introductio vero
• melioris spei, per quam proximamus ad Deum et
• quantum est, non sine jurejurando. »

Dederat rationes cur sacerdotium sit translatum, et nunc similiter, ut consequens erat, profert causam et rationem translationis legis, dicens: *Reprobatio quidem fit præcedentis mandati*, id est priscae legis *propter infirmitatem*, id est debilitatem et imbecillitatem ejus. Ostendendum enim erat, cur vetus mandatum quod carnales cæremonias observari præcepit, reprobaretur, cum Deus illud dedisset, et novum substitueretur. Ideo scilicet fit reprobatio, id est repudiatio præcedentis mandati, quia infirmum erat et invalidum. Nam ut sit locus gratiæ sequenti, reprobatum mandatum præcedens. Quod ideo præcedens dicitur, quia aliud erat secuturum. Vetus enim præcessit novum, sicut umbra corpus. Sed sicut veniente corpore, umbra præterit et in nihilum vertitur, ita vetus mandatum veniente novo. Nam infirmum erat illud mandatum carnalium observantiarum, id est non sufficiens per seipsum justificationem dare; hoc enim quod per se solum *justa adimplere non potest*, infirmum judicatur. Et talis

erat lex, quæ sine auxilio gratiæ neminem justificare potuit. Et erat inutilis, id est veram utilitatem conferre non valens, quia regnum cælorum suis cultoribus dare non potuit, et nunc est inutilis omnino, id est nihil prorsus utilitatis conferens, imo pernicioosa, si post adventum Christi servetur. Vere propter infirmitatem reprobatum, quia *nihil*, id est nullum hominem *adduxit lex ad perfectum*, id est ad perfectionem. Nam, etsi aliqui perfecti sub ea fuere, non tamen ex ea perfectionem habuere, sed ex gratia. Lex enim etsi aliquid fecit, non tamen plene justificavit. Nam neque regnum peccati ex toto potuit evertere, nec perfectam innocentiam aut perfectam justitiam dare, nec vitam æternam acquirere, sed tantum bona temporalia promittere. Nam timorem mortis iniecit, non amorem justitiæ dedit, nec in intimo cordis regnavit, licet in operibus foris custodita sit. Et ideo jure reprobata est. Illa quidem reprobata est, sed loco ejus fit *introductio melioris spei*, id est cor nostrum penetrat et in illud introducit, ut in eo regnet gratia novæ legis, quæ nobis spem vitæ æternæ tribuit, quam lex antiqua dare non potuit. Illa enim promittebat temporalia, hæc pollicetur æterna. Et hæc virtutum consummationem largitur, quæ facit hominem sperare non sospitatem, quæ cito transeat; non copiam temporalium divitiarum, non multitudinem filiorum, sed potius vitam æternam, salutem indeficientem, Deum omnia in omnibus existentem *per quam spem proximamus ad Deum*, quia dum terrena despiciamus, et cælestia appetimus, mente Deo propinquamus, et ejus imaginem in nobis reformamus, atque illi inhærere cupimus, ut unus cum eo spiritus efficiamur. Introductio fit melioris spei, *et quantum est*, id est quam magnum et quam mirabile est, quod *non sine jurejurando* fit, sed cum jurejurando. Dum enim Deus jurat Christum esse sacerdotem in æternum, qui sine fine pro nobis interpellat, cum jurejurando spem nobis dat meliorem.

« Alii quidem sine jurejurando sacerdotes facti
• sunt, hic autem cum jurejurando per eum qui
• dixit ad illum: Juravit Dominus et non pœnitent
• bit eum, tu es sacerdos in æternum. In tantum
• melioris testamenti sponsor factus est Jesus. »

D Magnum est quod talem spem nobis Deus in sacerdotio Christi cum juramento dedit. Nam *alii quidem*, id est Levitici sacerdotes longe ab eo discreti, facti sunt sine jurejurando, quasi quandoque mutandi, sed *hic*, id est qui nunquam mutandus erat, factus est *cum jurejurando per eum* qui omnia potest, id est per Deum Patrem, qui jurando *dixit ad illum: Tu es sacerdos in æternum*, hæc est sententia. Sed ut magis ostendat Deum jurasse, interponit ipsa verba prophetæ hoc asserentis: *Juravit Dominus, id est inconcussa veritate firmavit, et non pœnitent eum*, id est hoc sacerdotium nulla ratione mutabit. Neque enim sicut hominem pœnitent Deum. Sed Dei dicitur pœnitentia, quævis ab illo institutæ rei cujusque mutatio, quæ credebatur esse

mansura. Proutde cum dicit, *non pœnitebit eum, tu es sacerdos*, etc., satis ostendit eum pœnituisse de institutione prioris sacerdotii, hoc est, mutare voluisse sacerdotium quod constituerat secundum ordinem Aaron. Unde satis apparet quantum iste sacerdos omnibus illis sacerdotibus sit dignior. De isto juravit Dominus quod in æternum maneat, *in tantum factus est ipse Jesus sponsor melioris testamenti*, id est promissor melioris hæreditatis quam illi. Illi enim per Vetus Testamentum, spondebant terrenam et temporalem hæreditatem, hic autem per novum spondet cœlestem et æternam. Testamentum quippe vocabatur chirographum hæreditatis, quod ille qui moriebatur, relinquebat ei quem post se constituebat hæredem. Et Jesus Dominus moriens Novum Testamentum nobis reliquit, in quo nos regni cœlestis hæredes fore spondidit, et ipse sacerdos ac mediator ejusdem Testamenti esse voluit. Vetus autem Testamentum sanguine brutorum animalium est dedicatum, et ideo vetustis hominibus terrenam spondidit hæreditatem. Longe itaque melior illis prioribus est sacerdos Jesus, melius testamentum eis, melior promissio.

« Et alii quidem plures facti sunt sacerdotes, idcirco quod morte prohiberentur permanere. Hic autem eo quod maneat in æternum, sempiternum habet sacerdotium. Unde et salvare in perpetuum potest, accedens per semetipsum ad Deum, semper vivens ad interpellandum pro nobis. »

In eo quod alii sine juramento, hic autem cum juramento factus est sacerdos, apparet, ut dictum est, ejus excellentia; et in hoc etiam, quod alii sunt plures, quia morientes: hic autem unus, quia semper vivens. Nam *alii quidem*, id est. Levitici longe ab eo dissimiles *facti sunt sacerdotes*; non unus, sed *plures* per multas successiones, dum alii morerentur, et alii succederent *idcirco quod a morte prohiberentur*, id est eo quod mors prohiberet eos in hac vita *permanere*. Idcirco enim plures constituti sunt, alii post alios, quoniam necessitate mortis interveniente, prohibiti sunt in sua dignitate permanere, id est ex toto manere. Mansit quidem ad tempus unusquisque illorum, sed nullus permansit; *hic autem* de quo loquimur, permanet; hic quem magnificare intendimus *habet sempiternum* id est semper æternum sacerdotium, id est officium dandi sacra populo, et interpellandi pro eo. Non enim quisquam jam ei succedit in sacerdotio, nec finem habet ejus sacerdotium, *eo quod ipse maneat in æternum*. « Nam resurgens a mortuis, jam non moritur, mors illam ultra non dominabitur (Rom. vi). » Unde quia manet, et habet manens sacerdotium *potest et salvare in perpetuum*. Ostendit Apostolus quia sacerdotium ejus destruit vetus sacerdotium et veterem legem, et nunc commendat actum ipsius. Unde, inquit, id est qui sempiternum habet sacerdotium, quod non habet omnis turba sacerdotum, non solum potest pro nobis intercedere, sed etiam salvare, id est sa-

lutem illis quorum est pontifex, dare, non ad tempus, sed in perpetuum. Hic evidenter apparet insipientia eorum, qui putabant Christum sine carnalibus observantiis ad salutem non posse sufficere. Potest in æternum salvare, quia et hoc indicat nomen ejus, quod est Jesus, id est salvator. Ipse dico, *accedens ad Deum* non per aliquod medium, non per angelum, non per aliam creaturam se digniorem, sed *per semetipsum* ad secretorum participationem accessit, ut voluntatem Patris cognosceret, et eum peccatoribus placidum ac propitium faceret. Ad similitudinem alicujus sapientis et potentis dictum est, qui ad regem vel aliam magnam personam, non per alium admittitur, sed per semetipsum intrat, et quicquid ipse vult operatur. Merito enim per seipsum accessit, per quem et omnes alii accedunt, sicut ipse loquitur: « Nemo venit ad Patrem nisi per me (Joan. xiv). » Vel non per alienas hostias accessit ad Deum nobis placandum, sed per semetipsum, offerens se in ara crucis. Ipse dico, post resurrectionem *semper vivens ad interpellandum pro nobis*, quia ad hoc ei data est vita perennis, ut semper Deum Patrem interpellat ut bonus mediator pro vita et gloria nostra, licet enim propter gloriam suam vivat et propter obedientiam suam remunerationem, tamen ad hoc etiam vivit, ut semper seipsum offerat, id est Patri ostendat ad nostram gloriam et exaltationem. Ex ea enim natura qua pontifex est, id est humana, quam cœlis intulit, interpellat ipse et intercedit pro nobis. Quia ergo per semetipsum accedit ad Deum, et semper vivit ad interpellandum pro nobis, vivumque semper habet sacerdotium, patet quod salvare nos in perpetuum potest. Alii vero sacerdotes nec semper vivunt, nec salvare possunt

« Talis enim decebat ut nobis esset pontifex, sanctus, innocens, impollutus, segregatus a peccatoribus et excelsior cœlis factus. »

Dixi quia per semetipsum accedit ad Deum et semper vivit ad interpellandum. Nam hoc *decebat*, id est congruum erat, *ut nobis filiis esset talis pontifex*. Servi vero alios habuere. Noster debuit esse *sanctus*, id est omni perfectione virtutum, in seipso consummatus, et *innocens*, quantum ad proximum, nemini unquam faciens quod noceret; et *impollutus*, id est cujus sanctitas et munditia per alicujus peccati consensum et delectationem nunquam esset polluta; et *segregatus a peccatoribus*, id est seorsum factus a grege peccatorum, ut nullo peccati nævo teneretur in grege eorum, utpote sine carnali concupiscentia per Spiritum sanctum conceptus et natus. Vel sanctus interius, innocens manibus, impollutus corpore, segregatus a peccatoribus, id est ab omni peccato immunis, et a grege cæterorum sacerdotum separatus, inter quos nullus sine peccato; et *factus excelsior cœlis*, ut ibi ministret in superno altari. Vel segregatus a peccatoribus ut jam conversatio ejus non sit inter mortales, qui quandiu sunt in hac vita, peccato carere non possunt; et excelsior cœlis factus, id est super omnes cœlestes creaturas elevatus,

ita ut ejus magnitudo vel sublimitas magnitudinem A primorum sic transcendat angelorum, ut inter ipsum et angelos nulla possit fieri comparatio secundum magnitudinem et excellentiam.

« Qui non habet necessitatem quotidie quemadmodum sacerdotes, prius pro suis delictis hostias offerre, deinde pro populi: hoc enim fecit semel seipsum offerendo. Lex enim homines constituit sacerdotes, infirmitatem habentes; sermo autem jurisjurandi, qui post legem est, Filium in æternum perfectum. »

Adhuc ostendit eum digniorem Leviticis sacerdotibus et potentem salvare. Qui cum talis sit, qualem descripsit, non habet necessitatem quotidie offerre hostias prius pro suis delictis, quemadmodum sacerdotes illi habebant, quia quotidie delinquebant, et quotidiana mundatione indigebant. Dicit cum non habere necessitatem offerre quotidie non quod aliquando hunc habere hujusmodi necessitatem velit intelligi, sed ut ab eo reinoveat, quod illis conveniebat. Non indiget, ut illi per singulos dies offerre prius pro suis delictis, ac deinde pro delictis populi. Non indiget quotidie offerre, quia hoc semel, non tamen pro suis, sed pro populi delictis fecit. Nec fecit hoc, offerendo taurum vel hircum, sed seipsum, quia non inveniebatur alia hostia, quæ digne posset offerri pro expiatione populi; nec alius sacerdos qui dignus esset illam offerre. Quis enim tam justus et sanctus sacerdos, quam unicus Dei Filius, qui non opus haberet per sacrificium sua purgare peccata, nec originalia, nec actualia? Et quid tam congruenter pro hominibus offertur quam humana caro? Et quid tam aptum immolationi, quam caro mortalis? Et quid tam mundum pro mundanis vitiis mortali-um, quam sine ulla contagione carnalis concupiscentiæ caro nata in utero et ex utero virginali? et quid tam grate offerri ac suscipi posset, quam caro sacrificii nostri corpus effectum sacerdotis nostri? Ut quoniam quatuor considerantur in omni sacrificio, quid offeratur, cui offeratur, a quo offeratur, pro quibus offeratur idem ipse unus verusque mediator per sacrificium pacis reconcilians nos Deo, unum cum illo maneret cui offerebat, unum in se faceret pro quibus offerebat, unus ipse esset qui offerebat et quod offerebat. Semel hoc obtulit, quia non fuit opus repetitione. Sufficit enim omnibus, et ideo non est necesse iterari. Nam adeo magnum est hoc sacrificium, ut quamvis unum sit et semel oblatum, sufficiat ad æternitatem. Dixi quia sacerdotes indigebant quotidie offerre non solum pro populi delictis, sed et pro suis; et hoc ideo fuit, quia lex homines constituit sacerdotes, non immortales jam sed adhuc habentes infirmitatem, id est fragiles ad peccandum, et ex ipsa corruptione naturæ mortales proclives, utpote homines puros, et conditionem humanæ fragilitatis vitare non valentes. Ideoque, sicut dictum est, necessarium fuit illis ita offerre pro suis delictis, sicut pro populi. Hoc remedio indiguit Phinees (Num. xxv), hoc Joiada (II Par. xxiv),

hoc Zacharias, hoc ipse Aaron, et quicunque alii in alio sacerdotio laudabiliter justeque vixere. Solus noster sacerdos ab hac necessitate liber fuit. Lex quidem constituit tales (Exod. xxviii), sed sermo jurisjurandi qui post legem est dictus a propheta David, id est promissio Patris facta cum iurejurando, constituit sacerdotem non hominem infirmum et proclivem ad peccandum, sed Filium comparem, et in omni sanctitate perfectum, ita ut perfectio illa nunquam defectum vel finem habeat, sed in æternum maneat. Perfectus quippe erat, quem nec fragilitas peccare faciebat. Et in æternum perfectus manet, quia ejus perfectio nunquam potest minui, vel in æternum sacerdos est constitutus, non ad tempus ut alii sacerdotes. Sermo jurisjurandi est post legem, ne si fuisset in lege, dicerent Judæi illud juramentum esse completum in lege per suum sacerdotium. Post legem ergo est, ut per hoc lex insufficientis esse demonstraretur. Si enim sufficiens esset, non post eam aliud per quod impleretur, fuisset pronuntiatum. Per hoc etiam ostenditur, hunc esse sacerdotem alio ritu et sacerdotio, quam secundum legem. Ex quibus omnibus apparet, hunc per se posse ad Deum accedere et perpetuallyter salvare, atque carnales observantias legis superfluere.

CAPUT VIII.

« Capitulum autem super ea quæ dicuntur: Talem habemus pontificem, qui consedet in dextera sedis magnitudinis in coelis, sanctorum minister et tabernaculi veri quod fixit Deus, et non homo. »

Ab eo loco quo dixit, unde et salvare in perpetuum potest, ostendit multis rationibus, quod potens sit salvare. Nunc quoque quadam brevi et capitulari ratione vult illud idem comprobare et quoddam certius apponere. Quasi dicat: De eo multa dixi, sed nunc de his facio capitulum, id est quamdam brevem comprehensionem. Capitulum enim brevis multorum complexio est, sic dicta, quia breviter capiat totam summam. Nam per hoc quod diminutivum est capitulum, designatur brevis; et per hoc quod venit a capite vel a capio, intelligitur quod magnum sensum capiat, et sit breve caput multorum, quæ late disseruntur. Loquor, inquit, multifarie de pontificatu Christi, sed quod nunc appono, est capitulum super ea quæ dicuntur hactenus a me de illo, id est hoc breve quod nunc dicturus sum, superat illa multa superius dicta, quia dignius laudem Christi continet quam illa, et firmius ac certius declarat hunc esse potentem salvare in perpetuum. Quia licet superius dictum sit, eum esse factum excelsiorem coelis, non tamen ex necessitate vocum ita probatus est sublimatus esse super coelos, ut non possit sublimius exaltari. Quod nunc in capitulo manifesto ponitur, ut intelligi oporteat illum in tantum esse sublimatum, ut non possit ascendere altius, ut major fieri nequeat, ut in sede majestatis cum Patre sedeat, cum dicitur: Talem habemus, etc. Hinc enim incipit capitulum. Talem, id est tam gloriosum, tam celsum, tam potentem habemus pontificem, qui

consedet, id est cum Patre sedet in regali solio majestatis, hoc est cum Patre regnat et judicat et quiescit; et hoc in *dextera sedis magnitudinis in caelis*, id est sic sedet cum Patre, ut maneat in aequalitate regni Patris; hoc est, aequalis sit Patri in regno et magnitudinem gloriae regni possideat, ut Pater in caelis, id est in caelesti patria, ut omnes caelorum virtutes glorificent eum, sicut et Patrem. Ille ergo quem in regno et omnium creaturarum gubernatione constat esse Deo aequalem, bene potest in perpetuum salvare suos, et ad vitam aeternam perducere. Vel *consedet*, id est secundum animam et secundum corpus sedet, hoc est quiescit et permanet, in dextera sedis magnitudinis in caelis, id est potiori parte quietis Dei, qui est magnus in caelis, id est in sanctis angelis, quia magnos eos facit, manens in eis, et ipse Pater qui est magnitudo caelorum, non potuit eum magis magnificare, quam ut super omnia eum exaltaret in aeterna beatitudine. Quia vero iste pontifex tam dignus et tam potens nostram salutem semper operatur, congrue subditur: *sanctorum minister*. Nam aeternam beatitudinem per Sancta sanctorum designatam, et in praesenti incipit nobis ministrare, dans charitatem ac perseverantiam etiam in futuro perfectius ministrabit. « Nam praecinget se et transiens ministrabit illis, quos in regno discumbere fecerit (*Luc. xi*). » Quod caeleste regnum dicitur Sancta sanctorum, id est dignissimum omnium aliorum sanctorum, quia ibi perfecte vivitur in sanctitate, ubi est vita in nobis sine pecca i cognitione. Ibi videlicet nihil sit quod Deo displiceat, quod oculos majestatis offendant. Et haec Sancta sanctorum Christus nobis ministrat, dum religiosam interim praestat vitam, ut dicere possumus: « Nostra conversatio in caelis est (*Philip. iii*), » et postmodum nos introducit in ipsum aeternae felicitatis secretum dicens: « Intra in gaudium Domini tui (*Matth. xxv*). » Vel minister sanctorum et sacerdos a Patre est institutus, ut omne bonum ministraret eis, qui jam sunt in Sanctis sanctorum, id est in sanctuario perpetuae beatitudinis. Vel potius Deo sicut vere summus pontifex pro nobis ministrat in Sanctis sanctorum, dum Patri carnem pro nobis assumptam semper ostendit, et memoriam suae passionis repraesentat, ut eum erga nos ad pietatem flectat. Sic est minister sanctorum et *tabernaculi*, et non umbratilis, non praefigurantis, sed *veri* id est significati tabernaculi, hoc est aeterni sanctuarii, quod significatum est per tabernaculum Moysi. Sed quia et illud prius tabernaculum fuit quodammodo verum, id est de veris pellibus et cortinis instructum, ideo additur: *Quod Deus fixit*, id est firmum et inviolabile posuit atque fundavit, et *non homo*, id est ita fuit, ut ibi non esset admista hominis operatio. Cum enim Moyses, juvante Deo, vetus tabernaculum sgeret, ibi sgebat Deus cum homine. Sed hoc verum tabernaculum, id est hanc beatam et serenam aeterni sanctuarii mansionem et gloriam Deus solus fixit, Deus ab initio paravit

A electis suis. Et ibi jam pontifex est, qui sine intermissione pro eis interpellat, sicut olim in Sancta sanctorum veteris tabernaculi semel in anno solus pontifex intrabat, ut oraret pro populo. Et ille pontifex erat minister sanctorum, praefigurans hunc Redemptorem nostrum aeternae beatitudinis ministrum, in quam ipse cum carne quam pro nobis fecit sacrificium ingressus est, ut ibi pro salute populi roget. Hoc de capitulo diximus. Post cujus finem subditur:

« Omnis enim pontifex ad offerenda munera et hostias constituitur. Unde necesse est et hunc habere aliquid quod offerat. Si ergo esset super terram, nec esset sacerdos, cum essent qui offerrent secundum legem munera, qui exemplari et umbræ deserviunt caelestium, sicut responsum est Moysi, cum consummaret tabernaculum. Vide, inquit, omnia facito secundum exemplar quod tibi ostensum est in monte (*Exod. xxv*). »

B
Dixi quia Christus est minister, Nam omnis pontifex constituitur ad ministrandum: *Omnis pontifex*, tam major quam minor, *constituitur* secundum legem *ad offerenda munera*, ut primitias frugum, panes propositionum et *hostias*, ut immolationes taurorum et hircorum, hoc est omnis pontifex ad hoc constituebatur, ut offerret, et per oblationem pro populo quod posebat, impetraret. *Unde*, quia omnis ad offerendum constitui solet, *necesse est et hunc nostrum pontificem habere aliquid* secum in caelis, *quod offerat* assidue pro nobis. Hoc est dicere: C
Quia omnis pontifex est minister, igitur necesse est (nisi falsa fuerit universalis affirmatio) quod et hic sit minister; dum enim dicimus quod omnis offert, intelligimus quod omnis ministrat, hoc est enim ejus officium, ut offerat et ministret Domino. Et quia necesse est et hunc habere aliquid quod pro salute mundi offerat, ergo si illud aliquid esset super terram, id est si in hoc mundo potuisset inveniri, quod digne pro totius mundi peccato quivisset offerri, etiam sacerdos aliquis non esset dignus illud sacrificium offerre, quamvis essent qui juxta ritum legis offerrent, et ideo Christus sacerdos mundus, seipsum obtulit mundum sacrificium. Vel ita melius: Quoniam ipse considet in dextera sedis in caelo, et est ibi minister ac more pontificis offert, ergo si esset adhuc super terram, id est si nondum introisset in Sancta sanctorum, hoc est in interiora caeli, non dicam quod esset pontifex, sed *nec etiam sacerdos*, ut ex necessitate comprobetur, quia si pontifex qui in perpetuum salvare potest, in caelo pro nobis offert et intercedit, tunc sacrificium Judaeorum non ultra est nobis necessarium. Quoniam sacrificium in ara crucis semel oblatum, sufficit ad ablutionem peccatorum omnium, ideoque tam superfluae sunt umbræ carnales, cum pro nobis veritas agat in veritate. Quando quidem ipse est pontifex et minister in vero tabernaculo, et per suum sanguinem introivit in vera Sancta sanctorum; ergo si post resurrectionem suam remansisset in terra, et sacerdo-

tium peragere vellet in umbra, non esset dicendus sacerdos, qui superflue fungeretur sacerdotali officio, nec etiam posset esse ut ille de alia tribu fieret sacerdos in lege. Non esset, inquam, sacerdos, cum adhuc essent multi alii sacerdotes de tribu Levi, sacerdotium suum juxta legis mandatum exsequentes. Tandiu enim debuit umbra manere, et sacerdotium legis existere, quousque verus sacerdos, verum sacrificium offerret in significato tabernaculo et veritate. Qui verum sacerdotium super terram exsequi non posset, neque sacerdotium legis adipisci, cum essent multi alii qui hostias et munera secundum legem offerrent. Nam ex alia tribu natus non admitteretur secundum legem ad sacerdotium, et superflue carnalia offerret, cum essent ex tribu Levi qui sufficerent offerre talia. Nec super terram, id est in carnalibus ulla ratione poterat sacerdos existere, ne forte videretur eadem dignius offerre. Propter quod et de illis sacerdotibus additur, *qui deserviunt exemplari et umbræ celestium*, id est valde et studiosè serviunt, ac plene omnia implent, et ita frustra hoc sacerdotium assumeret ipse. Qui adhuc hodie deserviunt exemplari et umbræ, non quod maneat exemplar et umbra in veritate, sed quantum ad repræsentationem Scripturæ, quæ sic agit adhuc de ordine sacerdotum, ac si repræsentetur sub oculis nostris officium illorum. Qui deserviunt et subditi sunt legi, sacrificantes et carnales observantias secundum quod lex præcipiebat, consummantes, quæ fuere exemplar, et quæ iam figura celestium. Et quia est aliquod exemplar, ubi major est veritas quam in illa re, cujus est exemplar, sicut Christus est exemplar omnium fidelium, et etiam celestium, terrenorum Deo supponit umbram, ut ostendat minus esse dignum exemplar. Vetus enim tabernaculum dicitur exemplar celestium, id est ecclesiæ, cujus pars est in cælis, et pars secutura peregrinatur in terris, quia ad similitudinem illius facta est spiritualis ecclesia. Et sicut umbra deterior est corpore, sic illud tabernaculum umbra erat et inane ad comparisonem ecclesiæ. *Deserviunt*, inquit, *exemplari*, id est figuris, et quia exemplar aliquando est veritas non figura, sicut liber ad cujus similitudinem fit alius liber, addit et *umbræ*. Quia omnia quæ in illo tabernaculo facta sunt, non erant nisi umbra veritatis leviter abitura veniente Christo. Exemplari deserviunt, id est tabernaculo veteri, quod est exemplar celestium, *sicut responsum est Moysi*, non cum inciperet, quia jam multa figuris expresserat, sed *cum consummaret tabernaculum*, quia cum per se non posset illud consummare, consuluit Dominum, qui et de figuris eum, sicut et de veritate, docuit. *Vide, inquit Dominus, id est diligenter considerera, et omnia tabernaculi necessaria facito* ita, ut sequaris in omnibus *exemplar celestium, quod tibi ostensum est in monte Sina* (*Exod. lxxv; Act. vii*). Exemplar est, ad cujus similitudinem aliquid fit. Exemplum, similitudo quæ inde trahitur. Et Dominus in monte Moysi veritatem ostendit, sed cum car-

nalis populus capere non posset, præcipit ut eam figuris imaginaretur, in quibus puerilis ille populus enutritus, quandoque veniret ad veritatem. Sicque res prius ostensa, dicitur exemplar figurarum juxta se factarum. Item figuræ dicuntur exemplar veritatis, quæ post impleta est in Ecclesia, sicut illæ præsignavere, quia quidquid ibi fuit, vel cœlestem vel præsentem Ecclesiam, vel sanctorum virtutes quæ modo sunt, significavit, et huic exemplari cœlestium, id est figuris verorum, deservire umbratici sacerdotes Judæorum. Quia vero illa fuere exemplar cœlestium atque spiritualium, quæ nunc in Ecclesia per Christum facta sunt, et fiunt, ideo non jam exemplar et umbra sunt necessaria. Sed non negligenter prætereundum, quod Moysi dicitur ostensum esse in monte exemplar celestium. Nam quadraginta diebus in monte Sina perseverans cum Domino, vidit sublimem angelicæ puritatis et immortalitatis vitam, ad cujus instar humanam in terra conversationem in quantum mortalibus imitari possibile fuit instituere jubebatur, ut cum exemplo eorum mutæ dilectioni in Deum, divinæ laudationi, unanimi paci, sinceræ castitati, cæterisque hujusmodi virtutibus in terra vacaremus, mereremur et in cælis esse consortes eorum. Exemplar ergo nobis Moyses angelicæ conversationis, quam in monte contemplationis vidit, præceptis legalibus ostendit, per quorum observantiam et ipsi de terra editi, ad consortium angelorum in cælis pervenire possimus. Exemplar idem nobis vitæ perfectioris et beatæ retributionis in figura tabernaculi et ministerii sacerdotalis et Levitici præbuit. Unde, sicut dictum est, angelica puritas ostensa Moysi, fuit exemplar figurarum, quas ipse in tabernaculi constructione formavit, et rursus illæ figuræ fuerunt exemplar ecclesiasticæ religionis ac salvationis. Et ideo Christus qui veritas est, in figuris et umbra sacerdotium habere non potuit.

« Nunc autem melius sortitus est ministerium, et quanto et melioris testamenti mediator est, quod et in melioribus repromissionibus sancitum est. »

Superius dixit, quia Jesus in terra, id est in terrenis ac legalibus victimis sacerdos esse non poterat. Et ita hoc esse res ipsa declarat, quia Dominus Jesus nunquam sub lege sacerdotium habuit. Sed nunc, id est tempore gratiæ, in hac novissima ætate, sortitus est, id est non usurpatione præsumpsit, sed electione divinæ gratiæ accepit gratis a Deo Patre melius ministerium sacerdotii, quanto et lex ejus est melior veteri lege. Jam a sacerdotio et sacrificio transit Apostolus ad differentiam Testamentorum, ut ostendat quantum Veteri præcellat Novum. Ministerium quod nunc in fine legis sortitus Jesus est, tanto est melius et utilius ministerio veterum sacerdotum, quanto ipse est mediator melioris testamenti, id est novæ legis, hoc est sicut vides testamentum, in quo ipse est mediator, ad vitam æternam efficacius esse quam Vetus, ita videre potes ministerium quod melius quam veterum sacerdotum, qui perum sub-

tis suis proficiebant. Moyses fuit mediator Veteris Testamenti quod a Deo accipiens, hominibus tradidit, sicut ipse dixit : « Ego sequester et medius interfui (Deut. v). » Sed Dominus Jesus Novi Testamenti mediator est, quia dedit illud medius inter Deum et homines, reconciliando nos Patri. Quod Testamentum melius Veteri est, quoniam meliora præcepta dat, et auxilium gratiæ qua compleantur, ministrat. Nam in Veteri concessum fuit propter Judæorum imbecillitatem ut vir uxorem suam dimitteret, si displiceret illi, et inimicum suum odio haberet (Deut. xxiv); in Novo autem nulla causa nisi propter fornicationem permittitur uxor dimitti, et inimicos nostros præcipimur diligere, et his qui nos oderunt, benefacere (Matth. xix). Unde patet, quia Christus dedit Testamentum melius ac perfectius, et ad æternam beatitudinem efficacius. Quod testamentum est sanctum, id est sancitum et confirmatum ut duret, et in quo est sancitum? in melioribus repromissionibus. Ideo enim ratum et firmum est magis quam vetus, quia meliora repromittit complementibus se. Nam in illo terrena promittuntur, in isto cœlestia. Præcepta quidem utriusque Testamenti omnia fere eadem inveniuntur. Nam « non occides, non mœchaberis, non furaberis, honora patrem et matrem (Exod. xx; Matth. xix; Marc. x), » et cætera hujusmodi, et nobis præceptum est. Sacramenta vero non sunt eadem, nec promissa eadem. Præcepta idcirco sunt eadem, quia secundum hæc Deo servire debemus. Sacramenta ideo non eadem, quia alia sacramenta dant salutem, alia salutem promittunt. Sacramenta Novi Testamenti dant salutem. Sacramenta Veteris promiserunt Salvatorem. Promissa quoque non sunt eadem quia ibi terrena promittuntur, hic cœlestia. Denique omnia quæ Judæis promissa sunt, ablata fuerunt. Ubi est enim regnum eorum? ubi templum? ubi unctio? ubi sacerdos? ubi jam apud illos propheta, ex quo venit qui per prophetas prædicabatur? In illa gente jam nihil horum est. Unde patet quia Vetus Testamentum secundum carnales observantias et terrenas promissiones jam nihil est.

Nam si illud prius a culpa vacasset, non utique secundi locus inquireretur. Vituperans enim eos, dicit : « Ecce dies venient, dicit Dominus, et consummabo super domum Israel et super domum Judæ, testamentum novum (Jer. xxxi), non secundum testamentum quod feci patribus eorum in die qua apprehendi manum eorum, ut educerem illos de terra Ægypti (Exod. xiii, xiv), quoniam ipsi non permanserunt in testamento meo, et ego neglexi eos, dicit Dominus, quia hoc est testamentum quod disponam domui Israel post dies illos, dicit Dominus, dando leges meas in mentem eorum, et in corde eorum superscribam eas. Et ero eis in Deum, et ipsi erunt mihi in populum. Et non docebit unusquisque proximum suum,

et unusquisque fratrem suum, dicens : Cognosce Dominum, quoniam omnes scient me a minore usque ad majorem eorum, quia propitius ero iniquitatibus eorum, et peccatorum eorum jam non memorabor. »

Probat quod Testamentum Christi melius est Veteri. Nam illud prius non vacat a culpa, hoc vacat. Si enim vacasset a culpa, non daretur secundum. Sed datur. Et ita apparet illud fuisse imperfectum, hoc perfectum. Illud non vacavit a culpa, id est non fuit vacuum a peccato, quia non perfecte mundavit observatores suos. Nam quasi ipsam culpam habuit, dum præciperet sine gratia, et prævaricatores faceret. Et dum timore pœnæ, non amore justitiæ custodiretur, mentes eorum non justificavit. Sed et in opere quædam criminalia concessit illis propter infirmitatem ipsorum venialia, velut uxorem dimittere cum displiceret, et si quis servum suum vel ancillam suam usque ad mortem verberaret, sic tamen, ut duobus aut tribus diebus superviveret innocens judicabitur (Deut. xxiv; Exod. xxi). Non ergo vacavit a culpa, id est non reddidit inculpabiles observatores suos, nedum plene justificaret eos. Nam si omnino vacasset a culpa, ut nulla suis cultoribus culpa inesset, sed pleni justificati essent, non inquireretur locus, id est opportunitas secundi Testamenti. Et hoc dico, utique id est in rei veritate. Judæis grave erat, ut ad destructionem Veteris inquireretur Novum, ideo posuit Apostolus hanc affirmationem ad comprimendam eorum incredulitatem. Inquisivit autem Deus locum et tempus opportunum quo deberet dare secundum (253), quia sapienter omnia disponens antea paulatim per prius instruxit et educavit atque promovit, ut postea perfectum daret testamentum; secundi locus non inquireretur, id est non in omnibus quæ præcesserunt quæreretur, quando posset competenter dari, nisi esset melius. Sed inquitur. Nam Deus per Jeremiam vituperans eos qui legi deserviebant, id est vitium impropers eorum, dicit : Ecce, id est in manifesto est, dies venient, id est paulatim propinquat tempus gratiæ, in quo fideles illustrabuntur multiplici claritate. Et hoc, inquit propheta, non dico ex mea auctoritate, sed hoc dicit Dominus, cui non audetis contradicere. Ideo præmisit auctoritatem Domini, quia dicturus est de mutatione Veteris Testamenti, quod audire nolebant Judæi. Dominus dicit, quia dies veniunt, id est luminosum tempus gratiæ, et in diebus illis ego consummabo, id est consummans ac perfectum faciens, dabo Testamentum Novum. Ita enim consummatum et perfectum erit in omnibus præceptis et institutionibus suis, ut nihil reprehensionis habeat et omnem justitiæ perfectionem contineat. Unde et summum erit, id est super omnes alias Scripturas, quia suos observatores ad culmen summæ perfectionis provehet, et hoc appellatur Novum, aliud autem Vetus. Nam propter veteris hominis uoxam,

quæ per litteram jubentem et minantem minime A sanabatur, dicitur illud Testamentum Vetus; hoc autem Novum, propter novitatem spiritus quæ hominem novum sanat a vitio vetustatis. Et hoc testamentum consummabo *super domum Israel et super domum Juda*, id est super Judæos, qui post Salomonem divisi sunt in duo regna (*III Reg. xii*). Nam decem tribus quæ habitaverunt in Samaria, dicebantur domus Israel, tribus autem Juda et Benjamin, domus Juda. Et super istos consummabo Testamentum Novum, ut dominetur eis et subditos habeat. Vel domus Israel et Juda, filii Abrahæ sunt, de quibus ei dictum est, « quia in Isaac vocabitur tibi semen (*Gen. xii*). » Non enim qui filii carnis, hi filii Dei, sed filii promissionis deputantur in semen (*Rom. ix*). Hæc est domus Israel et domus Juda, propter Christum qui venit ex tribu Juda, domus filiorum promissionis, id est non operum propriorum, sed beneficii Dei. Sed et nominum interpretatio congruit, quia Israel dicitur *rectissimus Dei*, vel *vir videns Deum*, Juda vero *confessio*, et domus Israel est familia perfectorum, qui sunt domus et habitaculum Dei, quia summam rectitudinem in operatione tenent, et Deum aliquatenus in contemplatione vident. Domus autem Juda, eorum est, qui confitendo peccata sua domum sui pectoris emundant, ut Dei fiat habitaculum. Et super omnes istos consummatum est Novum Testamentum, ut eos omnino subjectos haberet, et sensum ac perfectionem eorum transenderet. Nullus enim tam perfectus est, qui in hoc Testamento non inveniat unde semper proficere possit quando vivit. Novum, inquit, testamentum illis dabo, et hoc faciam *non secundum illud Testamentum quod feci cum patribus eorum*, quia non sequar in eo ritum Veteris, ut carnalia præcipiam et terrena promittam. Ecce, quia prophetizatum est non perseveraturum illud Testamentum, sed futurum aliud Novum. Non tamen secundum spiritualem sensum, sed secundum carnalem prædicitur destruendum. Quia vero Deus spirituale testamentum fecerat Abrahæ et Isaac et Jacob, ideo determinat: Quod feci, inquit, *in die qua apprehendi manum eorum, ut educerem eos de terra Ægypti*, id est in tempore quo eis lucem meæ cognitionis ostendens, apprehendi manum eorum de luto, per se surgere non valentium, sicut nutrix apprehendit manum parvuli, vel qui de fovea per manum attrahit aliquem sive secum ducit. Ideo sic apprehendi, ut educerem eos de terra Ægypti, id est de loco servitutis et afflictionis, unde per se exire nequibant. Totum illud tempus vocat unum diem, ex quo cœpit illis in Ægypto per Moysen providere et saluti eorum consulere, quousque in terram promissionis eos introduxit. Jure enim totum illud temporis spatium nomine unius diei significat, quia semper illis apparuit, semper cum illis misericorditer egit. Et in parte illius diei legem illis inter cætera beneficia contulit, postquam de manu Pharaonis potenter eos liberaverat. Ideo, inquit, Novum

Testamentum dabo, non juxta illud quod tunc dedi patribus eorum, *quoniam ipsi non permanserunt*, id est non per omnia manserunt in Testamento meo Veteri, quia, etsi carnaliter illud observaverunt timore pœnæ, non tamen spiritualiter intellexerunt, nec ex amore justitiæ compleverunt. Vel non permanserunt, id est non perseveraverunt, quia fecerunt vitulum in Oreb (*Exod. xxxii*), et post adoraverunt Beelphegor, ac deinde multis idolis servierunt (*Num. xxv*). Et quia studiose legem meam non servaverunt, ego quoque vicem eis reddens, *neglexi eos*, id est protectionem et salutem eorum non curavi, sed pro nihilo vel minimo duxi. Nec indigemi, inquit, si dico neglectos, quia *Dominus dicit*. Dum dicit, quia non permanserunt in Testamento, etc., vituperat eos, sicut Apostolus præmiserat et ostendit quoniam prius testamentum non vacuit a culpa. Vitio enim eorum deputat, quod non permanserunt, ne lex culpanda videatur. Vere nunc dabo testamentum non juxta illud quod dedi patribus eorum, *quia hoc est testamentum quod disponam*, id est diversis gradibus ordinabo, ut alii in eo relinquunt omnia et sequantur me, alii licite mundanis rebus utantur, alii continententes sint, alii conjugati, et unusquisque sui ordinis formam teneat, hoc disponam *domui Israel*, id est semini Abrahæ, scilicet filiis promissionis, *post dies illos*, id est non nunc in tempore perfectionis horum hominum, sed post expletionem dierum illorum, qui apud me præscripti et præordinati sunt. Et hoc dicit *Dominus*, id est ille qui omnipotens est, cujus voluntati nihil est impossibile, et cui omnia serviunt. Ita disponam hoc testamentum, scilicet *dando leges meas*, vel dabo leges meas, non in tabulis lapideis sicut prius, sed *in mente eorum*, ut ibi scribantur non atramento, sed Spiritu sancto, quatenus intelligentia et in bona voluntate animi depingantur. Quoniam illi ex amore justitiæ et ex virtutum delectatione Testamentum meum complebunt, et voluntatem meam in omnibus intelligent, nec velamen habebunt super faciem cordis. Judæi vero ignoraverunt quæ sibi injuncta fuerant, atque timore pœnæ et inviti semper legem servaverunt, et *superscribam eas* (scilicet leges) *in corde eorum*, id est ita ponam, ut quasi scriptæ maneant ibi, nec possint inde auferri, sed in intelligentia et voluntate eorum perdurent, et quasi supersint et dominantur eis. Sed quæ sunt istæ leges ab ipso Deo scriptæ in cordibus, nisi ipsa præsentia Spiritus sancti, qui est « digitus Dei (*Erod. viii*), » quo præsentem diffunditur charitas in cordibus nostris (*Rom. v*), quæ plenitudo legis est et finis præcepti. » Nam quia Veteris Testamenti promissa terrena sunt et exteriora, nunc ipsius cordis bonum promittitur, mentis bonum, spiritus bonum, id est intelligibile bonum, cum dicitur, *dabo leges meas in mente*, etc. Unde significavit eos non forinsecus terrentem legem formidaturos, sed intrinsecus habentes, ipsam legis justitiam dilecturos. Deinde addidit et mercedem. *Et ero eis in Deum et*

ipsi erunt mihi in populum : hoc est, quod alius propheta dicit : « Mihi autem adhærere Deo bonum est (Psal. LXXII). » Quid hoc bono melius, quid hac felicitate felicius, vivere Deo, vivere de Deo « apud quem est fons vitæ, et in cujus lumine videbimus lumen (Psal. XXXV), » ut in eo sit merces, in eo finis, in eo perfectio felicitatis? Unde continuo subjecit : *Et non docebit unusquisque proximum*, etc. Ibi enim non erit necesse ut alter doceat alterum, quia nullus ibi erit ignorans, sed omnes ipsum fontem scientiæ Deum videbunt. Tunc enim non per speculum in ænigmate, sed facie ad faciem videbunt eum (I Cor. XIII), sicuti est in ipsa pulchra specie substantiæ suæ (I Joan. III), et in ipso omne bonum omnemque jucunditatem possidebunt. Ita ergo perfecte sapientes erunt tunc omnes, quod jam non docebit nusquisque proximum suum quem amat, et unusquisque fratrem suum, quem plus diligit, *dicens ei. Cognosce Dominum*. Quare non dicet alter alteri ut cognoscat Dominum? Quia nullus ignorabit eum, nec opus erit doctore, *quoniam omnes scient me a minore usque ad majorem eorum*, id est nec major nec minor eorum ignorabit me. Minores et majores dicit, quia ibi unusquisque sanctorum juxta mensuram meriti sui major aut minor æstimabitur, « stella enim a stella differt in claritate (I Cor. XV). » Sive minores, tempore posteriores; majores autem, tempore priores intelligi voluit. Simul enim promissam Dei contemplationem accepturi sunt omnes, et ideo velut priores reperiuntur minores, quia minus dilati sunt, sicut in evangelico denario per similitudinem declaratur, quem prius acceperunt, qui posterius venerunt ad vineam (Matth. XX). Unde nunc nequaquam dicitur a majore usque ad minorem; sed a minore usque ad majorem omnes scient me. Hæc itaque differentia est Veteris ac Novi Testamenti, quod illud in lapide, hoc in corde scribitur; ibi merces terra est, hic visio Dei. Inter quem et homines nulla nisi peccata separant, quæ non nisi per eandem gratiam dimittuntur. Unde cum dixisset, *quia omnes scient me a minore usque ad majorem eorum*, mox addidit, *quia propitius ero iniquitatibus eorum, et peccatorum eorum jam non memorabor*. Quasi dicret : Vere cognoscent me manifesta visione, quia removebo parietem qui inter me et ipsos erat, et eos a facie mea separabat. Quia propitius ero iniquitatibus eorum, id est per donum gratiæ meæ misericorditer dimittam eis omnia, quæ inique, id est non æque egerunt contra proximos, et peccatorum quæ in seipsis sine proximorum offensione commiserunt, jam amplius memor non ero, quia nec improperebo hæc illis, nec propter hæc puniam illos, nec viliores habebō. Potest et in hac vita intelligi propitiatio ista, velut si dicat: Ideo ad tantam gloriam in futuro sæculo pervenient, et regna cælorum intrantes ad conspectum meæ majestatis elevabuntur, quia dum hic adhuc vixerint, propitius ero iniquitatibus eorum, per Novi Testa-

menti gratiam delens illas; et peccatorum eorum, jam tunc post expiationes non memorabor.

« Dicendo autem novum, veteravit prius. Quod autem antiquatur et senescit, prope interitum est. » (Hebr. VIII, 13.)

Deus dixit quia consummabo super domum Israel Testamentum Novum. Sed *dicendo Novum*, id est in eo quod dixit novum, *veteravit prius*, id est Vetus esse docuit sic finiendum. Non enim dixit Novum, nisi respectu Veteris. Vel veteravit prius, id est Vetus factum est, et quadam senectute debilitatum, et hoc a tempore Jeremiæ, quo Spiritus sanctus dixit Novum se daturum, prius veteravit. Sed *quod antiquatur*, id est quidquid antiquum jam incipit fieri in rebus inanimatis, et *senescit*, id est senectutem habere incipit in rebus animatis, *prope interitum*, id est modicum jam distat a morte. Antiquitas enim et senectus prænuntiant mortem. Quod videri potest in omnibus animatis et inanimatis. Nam cum antiquantur et senescunt, vicina sunt morti. Sed prius Testamentum jam antiquabatur, dum Jeremias in promissione gratiæ nominaret aliud Novum, sicque jam prope interitum erat. Cum ergo Christus longo post tempore veniret, necesse fuit ut illud juxta carnales observantias interiret, quod tanto ante morti propinquabat.

CAPUT IX.

« Habuit quidem et prius justificationes culturæ, et Sanctum sæculare. Tabernaculum enim factum est primum, in quo erant candelabra et mensa et propositio panum, quæ dicitur Sancta (Exod. XXV, XXXVII). Post velamentum autem secundum tabernaculum, quod dicitur Sancta sanctorum, aureum habens thuribulum et arcam testamenti, circumtectam ex omni parte auro, in qua urna aurea habens manna, et virga Aaron quæ fronderat, et tabulæ testamenti, superque eam erant cherubin gloriæ obumbrantia propitiatorium (Num. XVII), de quibus non est modo dicendum per singula. His vero ita compositis in priori quidem tabernaculo semper introibant sacerdotes sacriliciorum officia consummantes. In secundo autem semel in anno solus pontifex non sine sanguine, quem offerret pro sua et populi ignorantia; hoc significante Spiritu sancto, nondum propalam esse sanctorum viam, adhuc priore tabernaculo habente statum. Quæ parabola est temporis instantis, juxta quam munera et hostiæ offeruntur, quæ non possunt juxta conscientiam perfectum facere servientem solummodo in cibis, et in potibus, et in variis baptismatibus et justitiis carnis, usque ad tempus correctionis impositis. »

Diximus quia prius testamentum veteravit et vetustate defecit, ut novum surgeret, in quo daretur perfecta justitia, quod et res ipsa indicat, nec potest negari. Nam *et illud prius habuit quidem olim justificationes culturæ*, sed modo non habet; hæc autem et Sanctum sæculare, id est tabernaculum vel tem-

plum quo nunc caret. Unde manifestum est ipsum testamentum senio defecisse. Vel ita potest continuari. Novum Testamentum quod in corde scribitur, perfecte justificat. Sed et prius testamentum aliquam dedit justitiam, quia quondam habuit quidem et ipsum justificationes culturæ, id est justificavit in aliquibus cultores suos, dum manus eorum a perpetracione peccati retraheret, et aliqua bona operari faceret, sed conscientiam intrinsecus nunquam justificare potuit. Et habuit sanctum, id est sanctuarium. Quod ideo sanctum dicebatur, quia ad honorem Dei consecratum erat. Sed fuit seculare, id est de rebus secularibus et transitoriis. Aurum enim et argentum, lapides pretiosi et ligna et cætera, de quibus factum est illud sanctuarium res sunt ad sæculum pertinentes, et cum sæculo transeuntes nullamque stabilitatem in se continentes, et hæc omnia Vetus Testamentum habuit; sed nunc, sicut diximus, nihil horum habet. Nam dum dicitur: Habuit quidem, subintelligitur, sed nunc non habet, hoc enim inuit illud quidem. Nam et tabernaculo et templo caret, et justificare jam suos cultores non valet, sed magis a justitia repellere et peccatores facere. *Tabernaculum enim factum est primum, in quo erant candelabra et mensa, et propositio panum quæ dicitur Sancta* Nunc exponit illud sanctum seculare. Vere prius testamentum habuit sanctum seculare. Nam tabernaculum factum est primum, etc. Primum tabernaculum dicitur respectu secundi. Nam primum et secundum fecit Moyses, jubente et describente Domino, sed tamen utrumque fuit unum tabernaculum sed dividebatur velo quodam medio; habebat enim hoc tabernaculum triginta cubitos longitudinis, decem latitudinis, et decem altitudinis tectum habens æquale per totum, sicut in Ægypto et Palestina mos est ædificare domos. Sed in medio dependebat velum, quod sanctuarium et sanctuarii sanctuaria dividebantur, ita positum, ut viginti quidem cubiti longitudinis ad priorem domum, decem vero pertinerent ad secundam. Et ita quod nunc dicit Apostolus primum tabernaculum habebat viginti cubitos longitudinis et decem latitudinis, secundum vero decem cubitos longitudinis et decem latitudinis. In primo tabernaculo erat in parte australi candelabrum habens septem ramos, qui nunc ab Apostolo candelabra vocantur, et in parte septentrionali stabat mensa, super quam erant duodecim panes propositionis, et ante fores ipsius tabernaculi positum erat foris altare holocausti. Quod tabernaculum cum his quæ in ipso erant, dicitur, sancta, id est tabernaculum illud et quæ in eo erant, dicebantur Sancta, quia ad orationem et ad cultum Dei et laudem consecrata erant. Sed post velamentum, id est post velum quod in medio pendeat, erat secundum tabernaculum, quod dicitur Sancta sanctorum, id est ipsum tabernaculum cum his quæ in illo erant, vocabatur Sancta sanctorum, id est a Deo sancta, ut quæ in primo tabernaculo erant, respectu eorum non viderentur sancta. Et illud secun-

A dum tabernaculum habebat aureum thuribulum, in quo summus pontifex adolebat incensum pro salute populi, habebat et arcam testamenti, id est quæ continebat testamentum, id est decem præcepta legis, circumtectam auro, et ita quod ex omni parte, id est ab exteriori et interiori parte, quia non solum exterius sed et interius deaurata erat per omnia. In quæ scilicet arca erat urna aurea habens manna, quoniam Aaron in tabernaculo posuisse legitur vas plenum manna, ut qui hascituri erant, possent nosse cibum, quo patres eorum quadraginta annis in deserto pasti fuerant; et in eadem arca erat virga Aaron quæ fronderat (Num. vii). Cum enim Aaron minus æstimaretur dignus sacerdotio, et nonnulli de aliis tribubus viderentur digniores, suscepit Moyses jubente Deo duodecim virgas a singulis tribubus, et posuit in tabernaculo. Et altero die regressus, invenit virgam Aaron in tribu Levi floruisse et fructum fecisse. Quo miraculo probatus est Aaron dignus sacerdotio, et reservata est diligenter illa virga in tabernaculo. Sed et duæ tabulæ Testamenti, in quibus decem præcepta legis digito Dei scripta erant, continebantur in illa arca, quoniam ipse Moyses eas ibi posuerat. Et super eam erant duo cherubim gloriæ, id est gloriose decorata, obumbrantia, suis alia expansis propitiatorium quod erat super eandem arcam, id est quædam auream tabulam tantæ longitudinis ac latitudinis, quantæ erat et arca. Super quam tabulam quæ propitiatorium vocabatur, hinc et inde stabant illa duo cherubin ad ipsum propitiatorium inclinata, et sese invicem aspicientia. Quæ tabula ideo propitiatorium dicebatur, quia de super eam Deus loquebatur Moysi vel pontifici propitius, et annuntians bonitatem suæ voluntatis. De quibus omnibus non est modo in hac epistola dicendum per singula, quia prolixum esset disserere de singulis; et hæc quæ diximus, intentioni nostræ sufficere, quoniam per ista patebit quod et alia sint ad allegoriam accipienda nec in hoc tempore tenenda. Nonnullis autem visum est pro magnitudine sacramentorum, quod omne tempus vitæ præsentis ad hæc explananda idoneum neget Apostolus. Quod si verum est, quomodo nos tantilli hæc exponere valebimus? Aliqua tamen de his breviter dicere tentemus. Primum tabernaculum atque secundum, Ecclesiam præsentem atque futuram signavit. Ipsa enim Ecclesia partim adhuc peregrinatur in terris, partim jam regnat in cælis. Pars ejus quæ peregrinatur, figurata est, ut diximus, per primum tabernaculum; pars autem quæ regnat, per secundum. Velum quod interpositum dividebat primum tabernaculum a secundo, cælum designavit, quod nos in terris laborantes adhuc sua interpositione separat a regno quiescentium sanctorum. Primum tabernaculum habebat, ut diximus, viginti cubitos longitudinis et decem latitudinis, rursumque decem altitudinis. Decem cubiti latitudinis, significant dilatationem operationis fidelium in præceptis Dei, quæ per Decalogum legis designari solent. Viginti cubiti longitudinis, perseverantiam ejusdem

bonæ operationis per auxilium geminæ dilectionis; nam propter ipsam vivam dilectionem, quæ sola bene operari facit, dupliciter denarius numerus, ut ad vicinum perveniat, quia nemo sine charitate valet in observantia mandatorum Dei perseverare. Decem vero cubiti altitudinis, signaverunt expectationem supernæ beatitudinis, id est denarii quem accepisse leguntur, qui in vinea laboraverunt (*Matth. xx*). In hoc tabernaculo erant candelabra aurea. Candelabra pluraliter ponit, quia, licet unum esset, habebat tamen brachia septem. Erat enim in medio ejus hastile, a quo procedebant brachia, tria a dextera parte, et tria a sinistra. Primum tabernaculum, ut diximus, præsens est Ecclesia, in qua militatur Deo, et sacrificium bonæ actionis offertur, antequam veniatur ad cælum. In qua est candelabrum, id est Christus, fulgens lumine divinitatis in medio fidelium, qui et ipsi candelabra aurea sunt, quia sapientia lucent, quæ per aurum designatur, et claritate bonorum operum. Ipse Christus est medius stipes, qui portat tria brachia a dextris et tria a sinistris, quia ipse est vera vitis, ex qua procedunt fructuosi palmites (*Joan. xv*). Ipse est origo et concordia et caput omnium justorum, qui sibi sanctos Veteris ac Novi Testamenti hinc et inde facit adhærere. Omnes enim ab hoc fundamento consurgunt, et a tanto principe ac medio bono et communi omnium lumine gubernantur. Nam tria brachia de sinistra parte tres viri sunt Noe, Daniel et Job, id est tres ordines fidelium in Veteri Testamento, scilicet rectorum: continentium et conjugatorum. Nam per Noe qui rexit in undis arcam (*Gen. vii, viii*) figurati sunt rectores, per Danielem, cujus mira legitur abstinentia (*Dan. i*), abstinentes et continentis; per Job, qui uxorem et filios habuit (*Job i, xlii*), conjugati. Similiter et alia tria de parte dextera, sunt tres electi discipuli Petrus et Joannes et Jacobus, qui viderunt gloriam transfigurati in monte (*Matth. xvi*), id est tres ordines sanctorum, qui gloriam ejus in cælesti regno visuri sunt, hoc est rectorum, continentium et conjugatorum. Qui dextri, id est digniores sunt tempore gratiæ quam illi qui ante gratiam fuerunt, et ideo sinistri, id est minus digni sunt. Petrus enim rector Ecclesiæ signavit, Joannes autem calibes, et Jacobus reliquos, id est conjugatis utentis. Et hi omnes vel doctrina vel exemplis bonorum operum lucent, et cæteris lumen suum spargunt. Ima pars brachiorum de hastili procedentium, erat quasi calami aurei, post scyphi, inde sphærulæ, tandem in summitate quasi lilia (*Exod. xxv*). Calami sunt sancti, qui in humido fontis sapientiæ divinæ nutriti sunt, et concavi ad emittendum dulcem sonum in aures plurimorum, et resonantes laudem Dei, et dicentes: « Immisit in nos meum canticum novum, carmen Deo nostro (*Psal. xxxvi*). » Ipsi sunt scyphi, dum aliis vinum scientiæ quo pleni sunt propinant ut eos spiritualiter inebrient; et desiderio supernæ beatitudinis calefaciant; inde sphærulæ, id est rotundi et perfecti ac volubiles. Sphæra enim ex omni parte

volvitur, quia mentes electorum nec ullis adversitatibus sæculi retineri, nec prosperitatibus possunt corrumpi, qui omnibus quæ occurrunt, ad Deum per sancta desideria proficiantur. Sicque tandem perveniunt ad lilia, id est ad supernam patriam, quæ floribus vernat æternis, hoc est animabus sanctis et omni amœnitate. Hæc et hujusmodi sunt candelabra, quæ nunc Apostolus in nostro tabernaculo designat esse. Erat et mensa de lignis Sethim facta, et auro purissimo inaurata, et super eam duodecim panes Deo propositi, qui erant de simila; et habebant super se thus lucidissimum, ac per singula Sabbata mutabantur, et erant Aaron et filiorum ejus ut comederent eos in loco sancto. Mensa de lignis Sethim facta Scriptura est divina, de fortibus sanctorum Patrum verbis actibusque compacta. Quæ dum nobis quæ sint æternæ beatitudinis gaudia, et quomodo ad hæc perveniatur ostendit, cibum profecto nobis salutis ac vitæ suggerit. Quæ et inaurata est auro purissimo, quia sapientiæ cælestis sensu clara refulget. Duodecim panes in ea, sunt duodecim apostoli et eorum vicarii. Qui recte vocantur panes propositionis, quia ut mentes fidelium alimonia verbi cælestis reficiant, in propatulo semper sunt parati. Et bene iidem panes non de qualibet farina, sed de simila fiebant, quia quicumque aliis verbum vitæ ministrant, primo ipsos necesse est virtutum frugibus operam dare, quatenus ea quæ prædicando admonent, etiam faciendo commendant. Quod autem super eos thus lucidissimum ponebatur virtutem puræ orationis designat, quæ idem doctores ministerium suæ prædicationis, simul et devotionum operis Domino commendant. Qui bene per singula Sabbata mutabantur. Panes enim qui per sex dies operandi in mensa Dei manserant, Sabbato nobis mutantur, cum doctores quique sanctæ Ecclesiæ completo tempore sui sancti laboris, æterna in cælis quiete remunerantur, et alios post se in idem opus laborandi in verbo, sub ejusdem spe retributionis relinquunt. Sicque fit ut mensa Dei, nunquam panis inops remaneat, sed veteribus sublatis, mox novi panes substituuntur. Comedebat autem Aaron cum filiis suis panes qui de illa mensa fuerant sublatis, quia summus pontifex noster Christus raptos de hac vita, suos electos in augmentum corporis sui, quod est in cælis, id est summæ illius electorum multitudinis introducit (*Coloss. ii*). Mensa stabat in parte aquilonis, candelabrum autem in parte australi. Et per aquilonem frigus infidelitatis vel malitiæ potest intelligi, per austrum vero fervor charitatis et sanctæ devotionis. Congruum ergo fuit ut a parte aquilonis mensa staret, quia ne malitia tentationum a sinistra parte veniens nos imbecilles inveniatur ac superet, necesse est ut pane cælestis doctrinæ pascamur et confortemur. Si autem charitatis studio ferventes ad dexteram partem, id est ad virtutum exercitia transierimus, tunc candelabri luminibus illustrabimur, id est lucidissimis sanctorum exemplis et dictis illuminabimur, ut omnia, quæ recte agenda

sunt, videamus. Hæc de primo tabernaculo breviter attigimus. Secundum vero tabernaculum supernam Jerusalem designans, habebat decem cubitos longitudinis, et decem latitudinis, et similiter decem altitudinis. Unde et Joannes in Apocalypsi de eadem cœlesti Jerusalem dicit : « Civitas in quadro posita est. Longitudo ejus tanta est, quanta est latitudo (Apoc. xxi); » habet enim tam in longum quam in latum, vel etiam in altum decem cubitos, id est evangelicum denarium perfectæ beatitudinis, quia et in latitudine fraternæ charitatis, et in longitudine vitæ perennis, et in altitudine divinæ contemplationis beatitudinem possidet. Et illa cœlestis inhabitatio recte dicitur Sancta sanctorum, quia nihil ibi fit aut cogitatur, unde Deus offendatur, sed sola ibi quæ Deo placent, aguntur. Tanta est enim illa beatitudo, ut nec possit nec velit ibi quisquam peccare. Inter duo tabernacula positum erat velum, quo sanctuarium et sanctuarii sanctuaria dividebantur, quoniam sancta Ecclesia quæ ex angelis et hominibus constans partim adhuc peregrinatur in infirmis, partim jam in æterna patria regnat in supernis, adhuc cives suos, dirimente velo cœli, habet ab invicem segregatos. In his Sanctis sanctorum est aureum thuribulum, id est pretiosa humanitas Christi immunis ab omni peccato, et perfectissimam sanctitatem habens, quæ igne passionis impleta, suavissimum de se pro nobis emisit odorem Deo, et nunc ejusdem passionis assidua rememoratione semper interpellat pro nobis, et tale incensum offerre non cessat, quasi dicens : « Dirigatur oratio mea sicut incensum in conspectu tuo (Psal. xiv). » Idem mediator Dei et hominum, qui solus paternorum est conscius arcanorum, per arcam testamenti designatur. Nam et Novum Testamentum ipse per seipsum dedit, et Vetus quando voluit, clausum tenuit; et quando sibi placuit, intelligentiam ejus de arcano secretorum suorum edidit. Et hæc arca est in Sanctis sanctorum, quia ipse Salvator « in quo sunt omnes thesauri sapientiæ et scientiæ absconditi (Coloss. ii), » post resurrectionem suam ascendit super omnes cœlos, et sedet ad dexteram Patris. De constructione hujus arcæ dictum est Moysi : « Arcam de lignis Sethim compingito, cujus longitudo habeat duos et semis cubitos, latitudo cubitum et dimidium, altitudo cubitum similiter ac semissem, et deaurabis eam auro mundissimo intus et foris (Exod. xxv). » Ligna Sethim dicuntur esse levis et imputribilis naturæ, non multum a qualitate albæ spinæ distantia. Arca ergo de lignis Sethim facta est, quia corpus Dominicum ex membris constabat omni vitiorum labe carentibus. Et hæc ligna sunt spinis simillima, quia etsi non in carne peccati, tamen in similitudine carnis peccati venit. Longitudo arcæ, longanimis patientia ejusdem Redemptoris est, qua inter homines conversatus est. Quæ duorum cubitorum fuit, propter doctrinam et operationem quibus ipse refulgebat. Semis, id est dimidius cubitus, qui superadditur, tarditatem humanæ fragilitatis disci-

A pulorum insinuat, quæ sublimia ejus dicta vel opera necdum (prout dignum erat) capere valebat, quam et ipse longanimiter ferebat. Latitudo arcæ, amplitudo charitatis est, qua nos Christus dilexit. Quæ in ipso capite nostro cubitum integrum habuit, quia perfecta fuit, et electos suos vivificare studuit, dicens : « Ut omnes unum sint, sicut tu Pater in me et ego in te, ut et ipsi in nobis unum sint (Joan. xv). » Dimidius vero cubitus imperfectionem nostram designat, qui necdum in hac vita positi perfecte diligere Deum sufficimus, vel dilectionem quam erga nos habet comprehendere. Altitudo spes erat futuræ sublimitatis, qua ipse vel seipsum post passionem glorificandum vel suos se glorificaturum esse prævidit. Habebat arca plenum cubitum in altitudine, quia Dominus etiam corruptibili adhuc conversans in carne, plenissime noverat quanta vel sibi metipsi, vel membris suis (quæ nos sumus) esset gloria conservata in futuro. Habebat et dimidium cubitum altitudinis, quia nostræ quoque parvitas devotionem libenter in suo corpore suscipit, qui pia quidem intentione futuram vitam diligimus, sed necdum perfecte quæ sit ejus felicitas, capere valemus. Arca intus et foris auro mundissimo deaurata est, quia assumpta a Filio humana natura et intus virtute Spiritus sancti plena erat, et foris hominibus aperte Spiritus sancti opera præmonstrabat. Hoc est quod Apostolus eam asserit circumlectam ex omni parte auro, quia in cogitatione et sermone et opere ejusdem Redemptoris nostri, non nisi pura veritas et sapientia apparuit. Urna vero aurea in arca habens manna, anima est sancta in Christo, habens in se omnem plenitudinem divinitatis, qua pascuntur angeli, qua et patres vixerunt in deserto, sicut scriptum est : « Panem angelorum manduravit homo (Psal. lxxvii). » Virga Aaron quæ excisa fronderat, potestas est invicta sacerdotii illius, de qua dicit Propheta : « Virga æquitatis, virga regni tui (Psal. xliiv). » Quæ postquam ad tempus per mortem visa est, esse succisa, illucescente mane resurrectionis, vivacius refluuisse inventa est, ac perpetuo inviolabilis atque immarcescibilis permanens esse innotuit. Nam, sicut supra diximus, cum nec Aaron sacerdotium qui de tribu Levi fuerat despiceretur, nec digna tribus quæ offerret holocausta, crederetur, duodecim virgæ juxta duodecim tribus in tabernaculo poni præcepta sunt. Et ecce virga Levi viruit (Num. xvii), et quid virtutis manere Aaron haberet, ostendit. Quo videlicet signo quid innuitur, nisi quod omnes qui usque ad finem mundi jacemus in morte, quasi virgæ reliquæ in ariditate remanemus? Sed cunctis virgis in ariditate remanentibus, virga Levi ad florem rediit, quia corpus Domini, veri scilicet sacerdotis nostri, in mortis ariditate positum, in florem resurrectionis erupit. Quo flore Aaron recte sacerdos esse cognoscitur, quia hac resurrectionis gloria Redemptor noster, qui de tribu Levi ac Juda ortus est, intercessor pro nobis esse monstratur. Itaque virga Aa-

ron, ut præmisimus, sacerdotalis potestas Christi est. Tabulæ vero testamenti in arca omnem in Christo et scientiam paternorum secretorum et potentiam judiciorum designant. In tabulis namque testamenti et fides erat scripta æternæ divinitatis, quæ mundum creasset ac regeret, et mandata quibus Deo servire oporteret, et discretio iudicii qua ipse odientes se jure condemnaret, et diligentes se misericordia digna remuneraret. Sed, cum alia Scripturæ divinæ sententia nobis ad mentem reducit, ex his Apostoli verbis quæstio valde gravis oritur. In tertio namque Regum volumine (*cap. viii*), dum Salomon templum dedicaret, refertur quod in arca non erat aliud nisi duæ tabulæ lapideæ, quas posuerat in ea Moyses. Quomodo ergo verum est, esse vel fuisse in ea non solum tabulas, sed et urnam cum manna et virgam Aaron? Cum ego de re quosdam interrogassem qui videbantur periti, responderunt mihi post illa dedicationis tempora, virgam et urnam in arca fuisse positas, sed tamen nec Scripturarum sanctarum auctoritate, nec ullius historiæ narratione valuerunt hoc astruere. Videtur tamen huic intellectui non inconvenienter opitulari, quod rex Josias in Paralipomenum reperitur dixisse Levitis : « Ponite arcam in sanctuario templi quod ædificavit Salomon filius David, rex Israel (*II Par. xxxv*) ; nequaquam enim eam ultra portabitis. Manifeste enim in his verbis significat, post templi dedicationem educta sit arca de sanctuario, et a Levitis et a sacerdotibus portata. Et tunc fortassis in eam sunt missæ virga et urna. Nam in libris Moysi legimus eas in tabernaculo fuisse positas, non tamen in arca sicut tabulas. Ait enim Moyses in Deuteronomio : « Posui tabulas in quam feceram, quæ hucusque ibi sunt, sicut præcepit mihi Dominus (*Deut. x*). » Et in Exodo ad Aaron : « Sume vas unum, et mitte tibi manna quantum potest capere gomor, et repone coram Domino ad servandum in generationes vestras (*Exod. xxvi*). » Et Dominus ad Moysen in libro Numerorum : « Refer virgam Aaron in tabernaculum testimonii, ut servetur ibi (*Núm. xvii*). » Et fortasse quia juxta arcam in sanctuario positæ erant virga et urna, idcirco dicit eas Apostolus in arca fuisse, locum pro loco ponens, sicut evangelista cum dicit : « Ambulabat Jesus in templo in porticu Salomonis (*Joan. x*). » Quod enim dixerat in templo, exposuit addendo, in porticu Salomonis, ostendens se porticum illam vocasse templum, quoniam adhærebat templo. Sic et Apostolus locum, qui erat arca contiguus, habens urnam et virgam, potuit eodem modo locutionis arcam nominare. Rursus, ordo beatorum spirituum, in quo Deus specialiter sedet, thronus appellatur, et tamen Psalmista precatur : « Qui sedes super cherubim, manifestare coram Ephraim, Benjamin et Manasse (*Psal. lxxix*). » Dum enim in agminum distinctionibus ordo sanctorum cherubim jungitur thronis, sedere etiam super cherubim Deus ex vicini agminis æqualitate perhibetur. Sic et in arca potest dici fuisse propter loci vi-

acinitatem, quod erat juxta arcam. Nam et nos frequenter hujusmodi locutionibus utimur, ut rem pro alia re vicina, vel locum pro loco non inuenimus. Ita Apostolus locum arcæ proximum, pro arca nunc posuisse non inconvenienter accipitur, quia et ad spiritalem sensum magis aspiciebat, intelligens per arcam Christum, in quo spiritualiter suat, ut dictum est, tabulæ Testamenti et virga Aaron et una cum manna. Hanc quæstionem qui melius poterit, solvat ; qui vero melius eam solvere nequiverit, solutionem quæ ex nostris duabus præmissis probabilior fuerit tenere non dedignetur. Super arcam autem erat propitiatorium, quod et oraculum vocatur. Quod videlicet propitiatorium non aliud quam eundem Salvatorem, sed specialius in eo viscera pietatis designat, de quo dicit Apostolus : « Quem proposuit Deus propitiationem per fidem in sanguine ipsius (*Rom. iii*). » Nam et ideo superponitur, quia superexaltat misericordia iudicium (*Jacob. ii*). » Unde et Psalmista : « Suavis, inquit, Dominus universis et miserationes ejus super omnia opera ejus (*Psal. cxliv*). » De cherubim vero, propitiatorium obumbrantibus, dictum est Moysi : « Duos quoque cherubim aureos et productiles facies ex utraque parte oraculi. Cherub unus sit latere uno et alter in altero, utrumque latus propitiatorii tegant, expandentes alas et operientes oraculum, respiciantque se mutuo versis vultibus in propitiatorium quod dabo tibi. Inde præcipiam et loquar ad te, supra propitiatorium scilicet, ac de medio duorum cherubim qui erunt super arcam testimonii, cuncta quæ mandabo per te filiis Israel (*Exod. xxv*). » Cherubim specialis ordo est angelicarum virtutum, sed tamen generaliter omnes sancti angeli nonnunquam, sicut et nunc designantur hoc nomine. Et quidem numero singulari cherub, plurali autem cherubim dicitur, et est nomen generis masculini. Sed græca consuetudo neutri generis cherubim facit, *m* littera in *n* mutata. Unde nunc Apostolus dicit juxta Græcos, cherubin gloriæ obumbrantia propitiatorium, non obumbrantes, cum apud Moysen legamus (*ibid.*), duos cherubim aureos, non duo cherubim aurea. Interpretatur autem cherubim vel cherub *scientiæ multitudo*, quia spiritus angelici tanto multipliciore scientia replentur, quanto purioribus radiis divinarum illuminationum assidue illuminantur. Qui sunt duo, ut consortium angelicæ charitatis significant, quia charitas maxime inter duos habetur ; aurei, quia virtutes angelorum summæ claritatis gratia fulgent ; productiles, quia beatitudo eorum in æternum produci-tur, id est prolongatur, juxta quem productionis sensum et de regno Christi dicitur : « Illic producam cornu David (*Psal. cxxx*). » Qui stant in utroque, quia per illorum ministeria prophetæ præciserunt quæ pastores postea per eosdem angelos facta cognoverunt (*Luc. ii*) ; et ut utrumque latus propitiatorii tegunt, quia in utroque Testamento multa secretorum cælestium mortalibus occultantur, quæ illi intelligunt. Quos cum aliis figuravit Moyses, ut

in alto sedem habere angeli et quasi levi volatu ubique discurrere posse signentur, neque ullam habere tarditatem, quin confestim ubicunque voluerint adsint. Expandunt ergo alas et propitiatorium tegunt, quoniam angeli omnem suæ naturæ potentiam, quia in altis habitare, et cuncta supernæ illius patriæ loca levi ac læto itinere penetrare meruerunt, in obsequium sui Conditoris afferunt. Ac velut propitiatorium contuentes obumbrant, id est honorant velando, quia totum quem habent statum perpetuæ felicitatis, ejus gratiæ deputant, a quo, ut nihil mali velle possent, acceperunt. Respiciuntque se mutuo versis vultibus in propitiatorium, quia in glorificatione divinæ visionis sibi inter se alterutrum consonant. Sic autem sunt cherubim supra propitiatorium positi, quomodo civitas Christi, id est sancta Ecclesia super montem, id est super Jesum Christum esse constituta dicitur: non quod altior illo esse possit civitas sua (*Matth. v; Apoc. xxi*), sed quod ejus subsidio sustentata proficiat. Supra propitiatorium ac de medio duorum cherubim Deus loqui consuevit, quia per Christum, qui est propitiatio pro peccatis nostris (*I Joan. ii*), et cui ante adventum et post adventum suum quasi hinc et inde semper assistunt angeli ad obsequium parati, Deus Pater humano generi voluntatem suam clementer manifestare dignatus est. Nam secundum humanitatem Christi Deus Pater super eum est, non secundum divinitatem ejus, in qua ipse est æqualis Patri. Ob hoc autem propitiatorium illud vocabatur oraculum, quia Deus ibi loquebatur. Hæc erant intra Sancta sanctorum post illa quæ in priori sanctuario erant, de quibus, inquit, non est modo dicendum ita prolixè, ut per singula quæque noster sermo transeat disserendo. Vel in præsentī vita non est dicendum, id est non potest profunditas istorum mysteriorum aperiri per singula. De singulis quæ ibi erant vel fiebant, non est nunc dicendum. *His vero duobus tabernaculis ita* (ut breviter indicavimus) *compositis*, id est copulatis, dicendum est quod *in priori quidem tabernaculo semper*, id est quotidie vel assidue *introibant sacerdotes, consummantes*, id est complentes *officia sacrificiorum*. Istæ erant iustificationes culturæ, quas supra dixi habuisse Vetus Testamentum. In priori quidem omnes sacerdotes intrabant, quotiescunque volebant. *In secundo autem solus pontifex intrabat, et hoc semel in anno, et non intrabat sine sanguine*, sed secum portabat sanguinem, *quæ offerret pro sua et populi ignorantia*, id est pro peccatis quæ ignoranter egerunt tam ipse, quam populus. Quod autem in priore tabernaculo quotidie per annum introibant cum sacrificiis sacerdotes, significat quia in præsentī Ecclesia sancti Domino sine intermissione famulantes, quotidianos suæ fragilitatis erratus, sine quibus esse in hac vita nullatenus possunt, quotidianis bonorum operum victimis, quotidianis lacrymarum suarum libaminibus, quasi veri sacerdotes expiant. Summus vero pontifex, qui semel in anno Sancta san-

ctorum cum sanguine victimarum ingrediebatur, Christum designavit, qui semel in plenitudine temporis oblati pro peccatis nostris, ipse sacerdos et hostia per proprium sanguinem in ipsum cælum intravit, id est in vera Sancta sanctorum, ut appareat nunc vultui Dei pro nobis. Et pro sua, id est pro suorum prælatorum et universi populi sui ignorantia, offert intus sanguinem, qui foris effusus est, id est representat in cælo Patri memoriam passionis, quam in hoc sæculo pertulit. Annus vero singulariter iudicare potest omne tempus ab incarnatione ejusdem Salvatoris usque ad finem sæculi. De quo anno ipse per Isaiam dixit: « Ut prædicarem annum placibilem Domino (*Isa. lxi*). » Ignorantia autem quodlibet peccatum vocari potest, quia excæcat cor et errare facit hominem, dum peccati delectationem placere suadet. Quod vero singulis actis iterabatur ingressus pontificis in Sancta, significabat non venisse adhuc perfectionem. Solus intrabat pontifex, *Spiritu sancto* qui ita fieri instituit *hoc significante, nondum esse tunc propalatam* et apertam *viam sanctorum*, id est nondum esse patefactum hominibus iter, quo possent pervenire usque ad Sancta sanctorum, id est intrare secreta cælorum, quia nondum venerat Christus, qui viam istam credentibus propalaret, *adhuc priore*, (id est umbratilis) *tabernaculo habente statum in carnalibus observantiis*, id est ideo nondum erat patens hominibus ingressus æternæ beatitudinis, quoniam adhuc umbra veteris tabernaculi non cedebat, sed stabat et perdurabat, nec poterat veritas palam cunctis effulgere, nisi umbra removeretur. Christus enim prior ascendens aperuit nobis ingressum cæli, ut animæ corporibus exutæ possint illuc intrare. Prius tabernaculum non dicitur hoc loco respectu secundi, sicut supra, sed utrumque dicitur prius respectu Ecclesiæ novæ et Jerusalem supercælestis, vel sicut pontifice Sancta sanctorum introeunte, populus simul ingredi non poterat, ita nos in cælum mortales Christum sequi non possumus, Spiritu sancto significante in hoc solius pontificis veteris ingressu nondum esse nostro tempore propalatam, id est in propatulo carne vestitis factam viam sanctorum, id est aditum regni cælestis, adhuc priore tabernaculo, id est præsentī, Ecclesia habente statum. Prius enim tabernaculum destruetur, et secundum permanebit, quia præsens Ecclesia secundum eam quam nunc habet conversationem, dissipabitur, sed superna Jerusalem in illa conversatione, quam in angelis habet, sine fine permanebit. Quandiu enim præsens Ecclesia, quæ prius tabernaculum est, statum habet, cælum est inaccessible corporibus nostris, sicut ante Salvatoris ascensionem fuit inaccessible iustorum animabus. Sed patienter expectanda est nobis generalis resurrectio, quæ cum corpore et anima licebit nobis intrare regni cælestis habitationem post præsentis Ecclesiæ dissipationem, sicut animabus perfectorum licet post Redemptoris ascensionem. *Quæ parabola*, id est

quæ mystica similitudo de duobus tabernaculis, et de his quæ continebantur vel fiebant in illis, *est temporis instantis*, id est præsentis temporis; hoc est, omnia illa quæ ibi facta sunt præsignaverunt ista quæ in hoc tempore gratiæ palam geruntur. Parabola enim dicitur representatio rei gestæ ad aliud significandum. Sicut omnia illa quæ tunc fiebant representantur nobis per Scripturam ad significationem eorum quæ nostro tempore fiunt. Ex quibus patet, quia quod tunc pontificem in Sancta sanctorum populus sequi non poterat, signum fuit quod nos adhuc corporaliter in cælum sequi Christum non possumus. *Juxta quam parabolam offeruntur*, id est offerri jussa sunt munera, ut de frugibus; et *hostiæ*, ut de animalibus, quæ non possunt *servientem facere perfectum juxta conscientiam*; quia, etsi quis omnia exterius quæ jussa fuerant, adimpleret, interius tamen perfecte legem adimplere non poterat. Quamvis eniuius lex diceret: « Non concupisces (Exod. xx; Rom. vii), » concupiscentiam tamen non abstulit, sed potius ipsa prohibitione homines ad concupiscentiam animavit. Et licet quis secundum carnem per illas hostias a peccato mundari videretur, in conscientia tamen per eas plene mundari non poterat. Multi tamen spirituales viri fuerunt etiam tunc, qui ex fide justificati, et auxilium gratiæ habentes, spiritualis legis adimplerent Deo placuerunt. « Scimus enim quoniam lex spiritualis est (ibid.). » Sed, quia carnaliter custodiebatur, non potuit perfectum in conscientia facere servientem *solummodo in cibis et in potibus, et in variis baptismatibus, et justitiis carnis, usque ad tempus correctionis impositis*, id est eum qui nihil spiritualiter ibi faciebat, sed solummodo secundum litteræ superficiem in hoc serviebat legi, ut quosdam cibos vel potus velut immundos respueret, quosdam autem velut mundos eligeret, et varia baptismata, id est ablutiones diversas observaret, et justitiis varias non spiritus, sed carnis, quia non animam, sed carnem justificabant, dum manus a perverso opere, linguam a blasphemia timore pœnæ comprimerent, non cor a mala voluntate mundarent. Et hæc omnia, id est observatio differentiæ ciborum et potuum, et frequentes corporum seu vestium ablutiones, et umbratiles carnis justificationes, et cætera hujusmodi fuerunt eis velut onus imposita, ad refrenandum transgressores, non ut semper existerent, sed usque ad tempus correctionis durarent, id est usque ad tempus gratiæ, qua in melius corrigerentur et cessarent. Quoniam quod lex illa minus fecit, et in omnibus observantibus illam adimplere non potuit, gratia nova subintravit corripuit, et omnem ejus impossibilitatem ad perfectionem adduxit, dum carnales ritus auferens, in spirituales observantias mutavit.

Christus autem, assistens pontifex futurorum bonorum, per amplius et perfectius tabernaculum, non manufactum, id est non hujus creationis, neque per sanguinem hircorum aut vitulorum,

sed per proprium sanguinem introivit semel in sancta, æterna redemptione inventa.

Solus pontifex in anno semel intrabat in secundum tabernaculum, quod Moyses extruxerat; sed Christus in tabernaculum nobilius et æternum intravit, ubi pontificis agit officium, assistens Deo ad interpellandum pro nobis, sicut Stephanus vidit eum pro se stantem ad dexteram Patris (Act. vii). Tunc enim interpellabat pro Stephano, et ita quodammodo pro singulis electorum astat Deo, dum pro ipsis intercedit. Nam et sedere et stare legitur, ut modo ejus potentia, modo misericordia describeretur. Nam utique pro potestate regis vel judicis sedere dicitur, pro lenitate intercessoris stare suggeritur. Ipse dico, *pontifex* non carnalium et temporalium bonorum, sed spiritualium et æternorum, id est futurorum, quia intercessione sua et oblatione sui ipsius, non temporalia, sed æterna bona nobis impetrat, quæ sic erunt præsentia, ut semper sint futura, id est nunquam deficientia. Vel futurorum bonorum est pontifex, id est præsentis justitiæ et æternæ beatitudinis, quæ tempore suo erant futura. Ipse ingressus est verum tabernaculum, id est cælum per amplius, id est perfecte et prorsus amplius, quia plures capit quam terrenum illud; et perfectius, quia ibi est perfecta justitia et beatitudo. Tabernaculum dico, *non manu factum* sicut illud quod fecit Moyses, id est non hujus creationis, cujus in eremo fuit illud quod fixit homo. Non est factum manu hominis, sed dextera Dei, nec de materia corruptibili compositum, ut illud quod de cortinis et pelibus et auro et argento Moyses fecit, sed mira soliditate et pulchritudine consummatum. Non intravit in tabernaculum illud angustum et imperfectum et manu hominis constructum, sed per amplius, id est per omnia majoris amplitudinis, et perfectius, id est majoris perfectionis et opifice summo fabricatum, neque per sanguinem hircorum aut vitulorum introivit in Sancta sanctorum, ut olim sub lege pontifex consueverat, sed per proprium sanguinem. Nihil enim mundum invenit in hominibus, quod offerret pro hominibus; et idcirco seipsum obtulit mundam victimam ipse sacerdos. Suum pium sanguinem pro nobis effusum intulit in Sancta sanctorum, id est in cælum; et hoc semel, id est non per singulos annos, ut Leviticus pontifex, sed tantum una vice. Quoniam oblatio sanguinis ejus adeo placuit Deo, ut non ultra sit opus repetitione, quia per humilitatem illius sacrificii deletum est quidquid primus homo commisit; et omnes pro quorum salute sanguinem suum fudit, ad omnem consummationem adduxit. Ideo non opus est iterari, quia perfectum est. Per sanguinem semel introivit in Sancta sanctorum, *æterna redemptione inventa*; et hoc ideo, quia per illam oblationem semel factam inventa est omnium redemptio, quæ non inveniri poterat in universo genere humano. Nam, cum omnes homines captivi tenerentur a diabolo, quid apud eos inveniri poterat, quod pro tot captivorum re-

demptione daretur? Sed Christus in sanguine suo redemptionem omnium invenit, non temporalem, sed æternam, quia tantum fuit pretium quod dedit, ut æternam redemptis libertatem redderet. Delevit enim tam originalia quam actualia peccata, et omnem justificationem exhibuit, ac regnum cœlorum aperuit.

« Si enim sanguis hircorum et taurorum et cinis vitulæ aspersus (*Levit. xvi*), inquinatos sanctificat ad emundationem carnis, quanto magis sanguis Christi, qui per Spiritum sanctum semetipsum obtulit immaculatum Deo, emundavit conscientiam nostram ab operibus mortuis ad serviendum Deo viventi? (*I Petr. 1; I Joan. 1; Apoc. 1.*) »

Vere sanguine suo semel oblato invenit redemptionem nostram, nec fuit opus repetitione talis oblationis. Nam sanguis ejus emundavit conscientiam nostram, ut nullius mali consensus jam conscii simus, quod est vere liberos esse. Quasi quis dicat: Per sanguinem Christi potest esse redemptio et liberatio spiritualis et æterna. Nam, si sanguis umbratiliam in lege sacrificiorum, sanctificabat eos in carne, id est purificabat carnem eorum et mundam reddebat, multo potentius sanguis Christi purgat et sanctificat animas nostras, ut perpetualiter mundæ et liberæ mancant. Et hoc est: *Si enim sanguis hircorum, etc.* Si enim umbra carnem purificat, quanto magis veritas animam sanctificat? Illæ enim purgationes umbræ fuerunt purgationum, quæ sub gratia fiunt; et animalia quorum sanguine fiebant emundationes, figuram Christi gesserunt. Sanguis hircorum et taurorum qui immolabantur, nonnunquam aspergebatur super eos qui mundandi erant, vel pro ipsis contra velum septies, ut sanctificari possent; et Christus, qui nos aspersione sui sanguinis mundavit, per hircos designabatur propter similitudinem carnis peccati, et quia pro peccato mundi oblatas est. Hircus enim pro peccato semper immolabatur, atque per tauros propter fortitudinem, quia cornibus virtutis ventilat inimicos. Sed multo evidentius præfigurabat eum vitula, quæ comburebatur, ut cineres ejus aqua misti purgatio fierent hominum immundorum, de qua longum nimis est omnia dicere, sed aliqua breviter dicamus: « Præcipe, inquit, filiis Israel, ut adducant ad te vaccam rufam, ætatis integræ, in qua nulla sit macula, nec portaverit jugum, tradesque eam Eleazaro sacerdote. Qui eductam extra castra immolabit in conspectu omnium, et intingens digitum in sanguine ejus, asperget contra fores tabernaculi septem vicibus, comburetque eam cunctis videntibus tam pelle et carnibus ejus, quam sanguine et fimo flammæ traditis. Lignum quoque cedrinum, et hysopum coccumque his tinctum sacerdos mittet in flammam quæ vaccam vorat (*Núm. xix.*) » Vacca dicta est caro Christi sexu femineo, propter infirmitatem carnalem; rufa, id est sanguine passionis cruentata. Ætatis integræ, quia triginta annorum vel paulo amplius erat quando crucifixa est. In qua nulla erat macula iniquitatis, ne-

A que enim jugum portaverat peccati. Quod autem non Aaron pontifici, sed filio ejus Eleazaro tradita jussa est, significat non ad tempus quod tunc erat, sed ad posteros hujus sacerdotii passionem Domini perventuram, quorum nunc Eleazarus typum gerit. Qui eductum extra castra, id est extra civitatem immolaverunt, crucifigentes eum in conspectu omnium. Dehinc Eleazar significationem mutat, et veros Novi Testamenti sacerdotes, id est apostolos designat, dum intingens digitum sanguine vitulæ, aspergit septies contra fores tabernaculi. Apostoli enim digito sanguinem septies contra ostium aspererunt, quia passionem Christi operibus commendantes, introitum fidei per septiformem gratiam Spiritus sancti populis prædicaverunt; et comburet, inquit, eam cunctis videntibus. Combustio, signum est resurrectionis. Natura quippe ignis est, ut in superna moveatur, et in eum convertitur quod comburitur. Combusta est ergo vacca cunctis videntibus, quia Christus resurrexit, et ejus resurrectionis gloriam cuncti per orbem fideles aspiciunt. Jam quod sequitur, tam pelle et carnibus ejus, quam sanguine et fimo flammæ traditis, significat quod non solum substantia mortalis corporis Christi, quæ commemoratione felle et sanguinis et carniū intumata est, sed etiam contumelia et abjectio plebis, quæ nomine fimi designatur convertentur in gloriam, quam combustionis flamma significat. Lignum vero cedrinum quod in altum extollitur, spes est quæ debet in supernis firmiter habitare. Hysopum, quia radicibus hæret in petra, fides est in Christo fundata. Coccus bis tinctus, ignea charitas est quæ tingitur amore Dei et proximi, hæc tria sacerdos, id est quilibet Christianus mittere debetur in resurrectionem Christi, tanquam in medium combustionis illius, ut cum Christo sit vita ejus abscondita in Deo (*Coloss. iii*). Colliget autem vir mundus cineres vaccæ, et effundet eos extra castra in loco purissimo, ut sint multitudini filiorum Israel in custodiam et in aquam aspersionis, quia pro peccato vacca combusta est. Quid putamus esse cineres vaccæ, nisi famam quæ secuta est passionem resurrectionemque Christi? Nam et cinis erat, quia velut mortuus ab infidelibus contemnebatur; et tamen mundabat, quia et resurrexisse a fidelibus credebatur. Et quia hæc fama apud eos maxime claruit, qui in cæteris gentibus erant, et non erant de consortio Judæorum, ideo dictum est, quia colliget vir mundus cineres vaccæ, mundus utique ab interfectione Christi, quæ Judæos maculaverat, et effundet in loco purissimo, id est in corde credentium mundissimo extra castra, id est extra celebrationem Judaicæ consuetudinis, et ideo sic tractantur isti cineres, ut sint multitudini filiorum Israel, id est Christianorum, in custodiam mandatorum cælestium, et in aquam aspersionis, id est in lavacrum baptismatis. Nam aqua aspersionis, purificatio est. Ex his omnibus fiebat aqua aspersionis, unde mundabantur a contactu mortuorum.

quod utique significat ab iniquitate hujus mori- A bundæ vel morticinæ vitæ (236). « Qui tetigerit, inquit, cadaver hominis, et propter hoc septem diebus fuerit immundus, aspergetur ex hac aqua die tertio et septimo, et sic mundabitur. Si die tertio aspersus non fuerit, septimo non poterit emundari (Num. xix). » Qui tetigerit cadaver hominis, id est qui malis operibus communicaverit, et propter hoc septem diebus, id est in anima et corpore fuerit immundus, aspergetur ex hac aqua. Septem videlicet dierum immunditia propter animam et corpus dicitur, quia homo in anima et corpore septenarium suscipit, dum illa tribus motibus, istud quatuor elementis consistit. Unde et per Amos dictum : « Super tribus sceleribus Israel, et super quatuor non convertam eum (Amos 1). » Aspergetur ex hac aqua die B tertio et septimo, et sic mundabitur, id est aqua baptismatis in fide Trinitatis et Spiritus sancti confirmatione. Si die tertio aspersus non fuerit, septimo non poterit emundari, id est si baptismo quod in fide Trinitatis fit, ablutus non fuerit, septiformem gratiam accipere non poterit. Describuntur et aliæ multæ species immunditiæ, quæ omnes aspersione hujus aquæ illustrari jubentur. Sed ad epistolam revertamur, quia jam manifestum est quomodo vitula hæc Christum præsignaverit. Nam sanguis hircorum et taurorum et cinis hujus vitulæ aspersus sanctificabat, id est mundabat inquinatos aliqua immunditiarum, quas lex describit. Sanctificabat eos non ad emundationem animæ, sed ad emundationem C carnis, ut caro jam emundata judicaretur, et in consortium aliorum, qui sic emundatus erat, reciperetur. Et si hoc sanguis vel cinis animalium in carne poterat, quanto magis sanguis Christi potest in anima nostra munditiam et sanctificationem operari? Unde et in lege de eo sub figura carnalium victimarum dictum est : « Anima carnis in sanguine est, et ego dedi illum vobis, ut super altare meum expietis pro animabus vestris, et sanguis pro animæ piaculo sit (Levit. xxvii). » Itaque sanguis Christi, secundum quod lex prophetaverat et decreverat, emundavit conscientiam nostram, id est ex toto mundavit animam nostram, ut jam non esset sibi conscia alicujus peccati vel consensus illiciti. Emundavit eam ab operibus mortuis, id est a reatu peccatorum quæ feceramus, quibus ipsa fuerat inquinata. Opera enim peccati sunt mortua, id est vita justitiæ prorsus carentia. Quæ qui tangit, inquinatur; sicut ille qui tangebatur mortuum, inquinabatur; nec intrat in cælum, sicut nec ille in templum. A talibus mortuis emundavit cor nostrum Christus, ut nec consensus inquinamentum remaneret in nobis, et emundavit nos ad serviendum, id est ut serviremus Deo D viventi, cui servire non potest, qui mortuis operibus, id est peccatis servit. « Omnis enim qui facit peccatum, servus est peccati (Joan. viii), » et « Nemo potest duobus dominis servire (Matth. vi, Luc. vi). »

Sed Christus duo fecit, et a peccatis nos mundavit, et restituta libertate arbitrii, servire fecit Deo, qui vere vivit, et vitam veram sibi servientibus tribuit. Nec mirum si sanguis Christi tanta operatur, qui non brutorum animalium victimas, sed semetipsum obtulit Deo pro nobis immaculatum, quia nec originalis nec actualis maculæ quidquam habuit, et hoc factum est, per Spiritum sanctum, qui carnem ejus sine semine creavit in utero virginis, et immutem a peccato semper eum servavit. Vel per Spiritum sanctum obtulit se, quia Spiritus sanctus hoc illi suavit.

« Et ideo Novi Testamenti mediator est, ut morte intercedente, in redemptionem earum prævaricationum, quæ erant sub priore testamento repromissionem accipiant, qui vocati sunt, æternæ hæreditatis. »

Dico quia obtulit se Deo pro nobis, et ideo est ipse Mediator Novi Testamenti, id est medius inter Deum et homines in datione novæ legis, melius quam Moyses fuerat in datione Veteris. Discordia videlicet facta fuerat inter nos et Deum, et idcirco regni ejus hæredes fieri non poteramus, quia nec quomodo ad pacem ejus reverti nos oporteret, noveramus. Propter quod iste nobis mediator per Dei misericordiam datus est, qui nos Deo reconciliaret, et ejus voluntatem nobis interpretaretur, ut sciremus quid ipse nos operari vellet; et amici effecti, hæreditatem regni ejus per Novum Testamentum assequeremur, sicut Judæi per Vetus Testamentum adepti sunt hæreditatem terræ Chanaan. Et hoc est, ipse mediator Novi Testamenti, ut qui vocati sunt, id est ab æterno divinitus electi, de quibus alibi dicitur : « Beati qui ad cœnam nuptiarum Agni vocati sunt (Apoc. xix), » accipiant per illud Testamentum repromissionem æternæ hæreditatis, id est in hæreditatem consequantur æternam beatitudinem, quæ multoties illis est in Scripturis promissa; et hoc fiat morte ejus intercedente inter testamentum et hæreditatem. Ideo videlicet dedit illis Testamentum Novum, ut cum mors sua intercederet, acciperent hæreditatem qui Novum Testamentum habebant, sicut in omnibus testamentis est consuetum. Quicumque enim paterfamilias hæredi suo testamentum faciat, nihil prodest illi cui factum est, nisi prius moriatur qui fecit. Testamentum vocamus hic, scriptum quod alicui fit de obtinenda post mortem alicujus hæreditate. Et fit aliquando simpliciter, aliquando cum conditione, ut si quis dicat : Hoc fac, et habebis post me hæreditatem meam; quod si non feceris, non habebis eam. Scriptumque de hac conventionem illi relinquit, sicut et Christus de hæreditate perennis vitæ nobis testamentum conditione fecit, dicens : « Si quis sermonem meum servaverit, mortem non videbit in æternum (Joan. viii). » Ac deinde mortem suam interposuit, ut nos per observantiam sermonis ejus ad hæreditatem vitæ æternæ perveniremus. Morte, inquit, intercedente in redemptionem earum prævaricationum, quæ-

erant sub priore testamento, id est ad hoc mors ejus interveniret, ut suos redimeret ab illis prævaricationibus, quas operabantur dum adhuc essent sub veteri lege, quæ deprimebat eos in servitute timoris, non relaxabat in libertate charitatis; et ideo non sanctificabat eos, sed magis prævaricatores faciebat. Sub testamento enim ideo dicit, quia quasi onus quoddam grave erat eis lex. De peccatis gentilium, quæ similiter sanguine Christi deleta sunt tacet, qui Hebræis loquitur, quia se per legem putabant justificatos; et ostendit eos nunquam sub lege sine prævaricationibus vixisse; ideoque necesse fuit ut et ipsi morte Christi redimerentur a reatu prævaricationum suarum, quatenus digni possent fieri æterna hæreditate.

« Ubi enim testamentum, mors necesse est intercedat testatoris. Testamentum enim in mortuis confirmatum est. Alioqui nondum valet, dum vivit qui testatus est. Unde nec primum quidem sine sanguine dedicatum est. »

Dixi quia est mediator Novi Testamenti, ut morte ejus intercedente, perveniremus ad possessionem hæreditatis, quæ in Testamento scripta est; et necesse fuit ut mors ejus intercederet, si ad hæreditatem perventuri eramus. Nam ita fit in omnibus testamentis. Ubique enim fit testamentum, necesse est ut mors testatoris intercedat, id est ut prius moriatur ille qui testamentum fecit, quam ille qui in testamento designatus est hæres habere possit hæreditatem. Nunquam enim aliter potest illam consequi. Et quia in omni testamento id necesse est, ideo testator noster qui nobis testamentum fecerat, in quo vitæ æternæ hæredes fore nos instituerat, interposuit mortem suam, ut sine obstaculo perveniremus ad hæreditatem possidendam, neque aliter pertingere possemus ad illam. Et vere in omni testamento necesse est mortem testatoris intercedere. Nam *testamentum omne est confirmatum*, ut possit esse ratum, *in mortuis*, id est in morte testatoris. Secundum leges sæculi loquitur Apostolus, in quibus est decretum, ut vivente testatore non sit ratum, sed ab ejus morte firmitudinem accipiat, ut ulterius non mutetur. *Alioqui*, id est nisi mors testatoris intervenerit, *nondum valet*, id est nondum firmum est ipsum testamentum, *dum*, id est quando vivit qui testatus est, dum enim vivit potest illud (si voluerit) mutare, ut eum quem scripserat hæredem, auferat et alium subscribat. Sed in morte ejus ita confirmatur, ut amplius mutari nequeat, sed hæredes qui descripti sunt hæreditatem accipiant. Sic et testamentum Christi in morte ejus est confirmatum, ut quos ipse in eo præsignavit hæredes, absque immutatione accipiant hæreditatem. Non enim alii, sed illi soli, quorum nomina sunt in libro vitæ (*Philipp. iv*), consequentur illam hæreditatem. Dixi quia omne testamentum morte confirmatur, unde id est quia mors omne testamentum confirmat, *nec primum quidem testamentum est dedicatum sine sanguine*, sed in ejus dedicatione,

id est quando a filiis Israel in auctoritatem est receptum, immolata sunt animalia, quorum sanguine est confirmatum, ad significationem Novi Testamenti, quod Christi sanguine dedicatum est, et hoc est: *Nec primum quidem*, subaudi, sicut nec secundum, *est dedicatum absque sanguine*. Debuit enim morte confirmari, ut esset ratum et auctorabile.

« Lecto enim omni mandato legis a Moyse universo populo, accipiens sanguinem vitulorum et hircorum cum aqua et lana coccinea et hyssopo, ipsum quoque librum et omnem populum aspersit, dicens: Hic sanguis testamenti quod mandavit ad vos Deus (*Exod. xxiv*). Etiam tabernaculum et omnia vasa ministerii sanguine similiter aspersit, et omnia pene in sanguine secundum legem mundantur, et sine sanguinis effusione non fit remissio. »

Vere et primum testamentum est sanguine dedicatum. Nam lecto a Moyse omni mandato legis, ut nihil esset in lege quod careret auctoritate, sed omnia ejus mandata dedicarentur, et authentica fierent in sanguine *universo populo*, qui et totus sanguine mundatus est, postquam Moyses in auribus plebis omnia legis mandata perlegit, *accipiens sanguinem vitulorum et hircorum cum aqua et lana coccinea et hyssopo*, scilicet miscens sanguinem et aquam, et faciens de lana et hyssopo aspersorium, non solum cætera, sed ipsum quoque librum legis et omnem populum illo sanguine aspersit, et ut illi cum majori devotione susciperent, dixit: *Hic sanguis est testamenti*, quod per me *Deus mandavit ad vos*. Quasi non frustra vos aspergo, quia hic sanguis quo vos purifico, est confirmator testamenti quod mandavit mihi Deus ad vos deferre. Nec solummodo librum et populum, sed *etiam tabernaculum et omnia vasa ministerii*, id est quæ ad ministrandum in eo facta fuerant, *similiter* ut populum *aspersit sanguine*. Omnia enim illa vasa Moyses sanguine mundavit, et idonea ad ministrandum Deo per aspersionem sanguinis effecit, sicut et populum et reliqua sanguine mundaverat. Et inde sumpto postmodum exemplo et auctoritate illius, *omnia pene mundantur per sacerdotem in sanguine secundum legem*, id est secundum quod lex præcipit et Moyses instituit, *et sine sanguinis effusione non fit remissio*, quia sine sacrificio nullum in lege peccatum remittitur. Non tamen dicit Apostolus, quod sanguine brutorum animalium remitterentur hominibus peccata; sed significat quia nec illis qui sub lege erant, remissa sunt nisi sanguine Christi. Quod autem Moyses prius legem locuit, ac deinde librum et populum sanguine aspersit, præsignavit quia Christus primo prædicaturus erat, ac deinde prædicationem suam plebique credentium sanguine suo erat aspersurus. Liber enim Novi Testamenti aspersus est sanguine Christi, cujus passionem evidentius et frequentius memorat, et cujus morte confirmatus est, ut in auctoritate habeatur, et quæ in eo scripta sunt, sine immutatione compleantur, ut quia pro nobis Christus

mortuus est, præcepta ejus diligamus, qui ad gratiani, qua hæc complere possumus, nobis per mortem impetravit. Quod universus populus est aspersus, declaravit, quia omnes qui de populo Dei sunt, redemptionem et sanctificationem habent in sanguine Christi, quem sanguis hircorum et vitulorum præsignavit. Christus videlicet per figuram vitulus est, propter virtutem crucis, cujus cornibus impios ventilavit (*Psal. xliiii*). Vitulus tamen, non bos, quia nil vetustatis habuit, sed novitatem gratiæ nobis attulit. Ipse quoque dictus est hircus propter similitudinem carnis peccati, ut de peccato damnaret peccatum (*Rom. viii*), ibique sanguis vitulorum et hircorum, sanguinem Christi, sicut diximus, præfiguravit. Aqua mista est sanguine, quia ex latere Christi non solum sanguis, sed et aqua exivit (*Joan. xix*), unde et mos est, aquam in sancto calice misceri vino, quod in missa consecrandum est. Quod et ad baptismi sacramentum referri potest, quia baptismus noster, qui per Rubrum mare præfiguratus est, ruber sanguine Christi. Ideo Moyses sanguinem et aquam miscuit. Qui et lana coccinea sanguinem illum et aquam aspersit, quia Christus mirabili charitate sanguinem et aquam, quibus nos sanctificaret, de latere suo produxit. Color enim coccineus, ruborem ardentissimæ charitatis qua Christus nos dilexit, insinuat. Lana quoque calida est, et vestis, qua frigus repellatur, potest ex ea fieri. Unde et nos charitatem Christi quasi lanam calidam debemus assumere, et indumentum justitiæ nobis ex ea facere, quo circumdemur et adornemur in omnibus dietis et operibus nostris, et a frigore totius malitiæ defendamur. Hyssopus autem herba humilis et expellens tumorem pulmonis, humilitatem Christi designat, qua misericorditer humiliavit semetipsum, factus obediens usque ad mortem (*Philip. ii*). » Hac enim aspersit super nos pium sanguinem suum. Quam et nos imitari pro modulo nostro debemus, ne in vacuum recepisse hujus gratiam aspersionis inveniamur. Quid enim prodest nobis sanguis ejus nisi tumorem superbiæ prorsus a nobis expellamus? Librum et populum Moyses aspersit, dicens : *Hic sanguis testamenti quod mandavit ad vos Deus (Exod. xiv)*. Sic et Christus novam legem et universum mundum sanguine suo mox aspersurus, dixit in cæna discipulis suis : « Hic est sanguis meus Novi Testamenti, qui pro multis effundetur (*Matth. xxvi; Marc. xiv; Luc. xxii*). » Ecce quam concorditer utrumque sibi testamentum consonat. Ecce quam proprie prædicit, Moyses verba quibus Salvator utitur in cæna. Etiam tabernaculum, id est Ecclesiam fidelium, de quibus dixit Deus, « quoniam inhabitabo in illis et ambulabo (*Levit. xxvi*). » et omnia vasa ministerii, id est omnes sanctos qui altari deserviunt, ut diacones, presbyteri, episcopi, et qui sacratos cibos sanctæ prædicationis ministrant in Ecclesia sanguine similiter aspersit, quia et omnem simul Ecclesiam, et omnes sanctiores sicut et populares, Christus suo

sanguine mundavit et consecravit. *Et secundum legem pene omnia mundantur sanguine*, ut appareant omnia sanguine Christi debere mundari. Pene omnia dixit, quia quædam vasa lavabantur aqua tantum, ut mundarentur; et homines a quibusdam contagiis, ut a contactu mortuorum, purificabantur aqua aspersionis, nec indigebant sanguine ad suæ emundationem (*Levit. xiii, xv*). Sed in Evangelio nihil prorsus mundatur sine sanguine Christi. Et hoc quoque servatur in lege, quod *sine sanguinis effusione* in aliquo sacrificio facta, *non sit ulla peccati remissio*, per quod ostenditur, quia nisi passione Christi nullum omnino potest remitti peccatum.

« Necessè est ergo exemplaria quidem cœlestium his mundari, ipsa autem cœlestia melioribus hostiis quam istis. »

Quandoquidem Moyses ita fecit, et lex ita præcepit, *ergo necesse est exemplaria quidem cœlestium*, id est tabernaculum et vasa ejus, etc., quæ fuere figuræ cœlestium, id est præsignavere Ecclesiam quæ dicere potest : « Nostra conversatio in cœlis est (*Philip. iii*), » mundari his supradictis, id est sanguine vitulorum et hircorum, et aqua cum lana et hyssopo. Exemplaria quidem cœlestium talibus sacrificiis debere mundari, sed *ipsa cœlestia*, id est homines ad cœlum jam pertinentes, quos umbræ veteres figuraverunt, necesse est mundari *melioribus hostiis quam istis*, id est quam sanguine vitulorum et cæteris. Neque enim justum fuit, ut rationalibus hominibus brutorum animalium victimæ cæderentur. Cum ergo bruta animalia pro rationali animali, id est pro homine dignæ victimæ non fuerint, requirendus erat homo qui pro hominibus offerri debuisset, ut pro rationali peccante, rationalis hostia mactaretur, et deleteret culpam protoparentis. Sed quid, quod homo sine peccato inveniri non poterat? Et oblata pro nobis hostia quando nos a peccato mundare potuisset, si ipsa peccati contagio non careret? Inquinata quippe, inquinatos non mundaret. Ergo ut rationalis esset hostia, homo fuerat offerendus, ut vero a peccatis mundaret hominem, homo, et sine peccato. Sed quis esset homo sine peccato, si ex peccati commistione descenderet? proinde venit propter nos in utero virginis Filius Dei. Ibi, pro nobis factus homo sine peccato, fecit pro nobis sacrificium corpus suum, exhibuit pro peccatoribus victimam sine peccato, quæ et humanitate mori, et justitia mundare potuisset. Hoc est, inquam, quod nunc cœlestia, id est homines, cœlestium virtutum futuri consortes, dicuntur melioribus hostiis debuisset mundari, id est humanitate Christi, quæ plurimum hostiarum nomine designatur in hoc loco, quia per omnes supradictas est figurata, et plura fecit quam omnes illæ.

« Non enim in manufacta sancta Jesus introivit exemplaria verorum, sed in ipsum cœlum, ut appareat nunc vultui Dei pro nobis. Neque ut sæpe offerat semetipsum, quemadmodum pontifex

e Intrať in Sancta per singulos annos in sanguine
 e alieno. Alioquin oportebat eum frequenter pati
 e ab origine mundi. Nunc autem semel in consum-
 e matione sæculorum ad destitutionem peccati per
 e hostiam suam apparuit. Et quemadmodum statu-
 e tum est hominibus semel mori, post hoc autem
 e iudicium, sic et Christus semel oblatuſ est ad
 e multorum exhaurienda peccata, secundo sine pec-
 e cato apparebit expectantibus se in salutem (Rom.
 e v ; Petr. iii).

Utrumque probat, et quod cœlestia per hostias
 sint mundata, et quod per meliores hostias, quæ
 sunt una hostia, id est Christus. Quasi dicat : Ver-
 us Christus mundavit cœlestia, id est homines suo
 sanguine mundans, fecit cœlestes cœlestium parti-
 cipes. Nam ipse *Jesus*, id est salvator noster, qui
 est vera hostia, omnibus hostiis præcedentibus sig-
 nificata, non introiit in sancta quæ manu homi-
 num essent facta, quoniam illa fuerunt exemplaria
 verorum sanctorum, qui sunt in cœlo, sed in ipsum
 cœlum, quod significabatur per secundum taberna-
 culum. Manufacta sancta erant exemplaria, id est
 figuræ et umbræ verorum sanctorum, quæ sunt in
 cœlo, et idcirco verus sacerdos, *Jesus* non in um-
 bratilia, sed in vera intrare debuit. Intrasset quidem
 in manufacta sancta, si ea vellet mundare, id est si
 ea vellet ita sanctificare, ut in ea intrantes reciperent
 ab eis mundationem a peccatis. Sed non intrando in
 ea, designat quia jam nullus ibi munditiam animæ
 consequi poterit. Ideo contempsit ea, et non sanctifi-
 cavit quia sunt, ut dictum est, exemplaria et simili-
 tudines verorum non ipsa sunt vera. Sed intravit in cœ-
 lum, cœlum dico ipsum, id est per illa significatum.
 Sed cur *Jesus*, id est qui salutem nobis in omni-
 bus factis suis quærebat, cœlum intraret, nisi illo
 ascensu omnes ad hoc vellet mundari, ut fierent cœ-
 lestes, quatenus in eis quasi in cœlestibus habitaret,
 qui ad hæc ascendit, ut appareat nunc vultui Dei pro
 nobis, id est interpellet solus pro salute omnium
 nostrum, sicut olim pontifex in Sanctis sanctorum
 aulis orabat pro omnibus. Nunc facit hoc, dum non
 videmus eum. Vel nunc, id est in plenitudine tem-
 poris gratiæ post consummationem operum quæ
 gessit conversans inter homines, apparet vultui, id
 est præsentia et benevolentia Dei Patris, interce-
 dens apud eum pro nobis, ostendendo cicatrices
 vulnerum quæ pro nostra redemptione pertulit; et
 quantum pro nostra salute laboravit, perpetualiter
 representando. Mira enim et ineffabili nobis ordine
 eum, qui nihil unquam potest oblivisci, qui semper
 misereri paratus est, absque intermissione dominus
Jesus admonet, quam congrue hominibus misereri
 debeat, quorum particeps vere et doloris, ac passio-
 nis idem ipse Dei Filius effectus sit, et pro quibus
 ipse conflagras, mortis imperium mariendo prostra-
 vit. Sic enim sæpe intercedit pro nobis. Neque ita
 hoc facit, ut sæpe offerat semetipsum in ara crucis, et
 sæpe patiatuſ, quia sufficienter omnibus semel ob-
 latus est, nec opus est repetitione. Unde patet quia

dignior et efficacior sit ejus hostia omnibus aliis,
 quia illa sæpe intraverunt sine consummatione, hæc
 semel oblata, ad patriam reducit. Non ad hoc intra-
 vit in cœlum, ut seipsum sæpe offerat effusione pro-
 prii sanguinis, quemadmodum illa necessitate qua
 legalis pontifex intrat in Sancta sanctorum, per sin-
 gulos annos, id agendo, quia consummationem et
 perfectionem operari non valet; et hoc facit non in
 proprio, sed alieno sanguine, et hic per singulos an-
 nos, Christus autem non sæpe, sed semel; hic in
 alieno sanguine, Christus in proprio: hic protinus
 egreditur de sanctis, Christus perpetualiter in San-
 ctis sanctorum assistit vultui Dei semper interpel-
 lans pro nobis. Non ergo ita intravit sicut ille ponti-
 fex, ut post exiret et postea reverteretur, hostiam
 suæ passionis offerens, ut ille sanguinem brutorum
 animalium: sed semel sanguinem proprium obtulit,
 et cœlum penetravit. Alioquin, id est si aliter faceret,
 si sæpe se offerret, tunc oporteret eum frequen-
 ter pati incipiendo ab origine mundi, ut per singulas
 generationes pateretur, redimendo suos in unaqu-
 que generatione. Nam, si sæpe seipsum in ara crucis
 offerret, ideo faceret quoniam ad redemptionem
 omnium minime sufficiens esset. Et cum illos, quos
 in carne viventes invenit, redemisset, rursus oportet
 eum mori ad redemptionem aliorum, qui post
 nascerentur: sicque per singulas generationes esset
 necesse fieri. Et quoniam Abel et Noe et Abraham et
 Job et David, cæterique justi et ad vitam prædesti-
 nati, eodem modo fuerunt redimendi, quo et illi,
 quos in carne apparens justificavit, et eadem neces-
 sitas et causa præcessit in illis, quæ secuta est in
 istis; ideo, cum redimere omnes voluisset, et non
 nisi suos contemporaneos redimere posset, a primo
 justo, id est a temporale Abel incepisse pati de-
 buisset, quod esset magnum inconveniens. Ergo non
 sæpe, sed potius semel in ara crucis oblatuſ est.
 Quod nunc constat, quia per prædictum inconve-
 niens est ostensum. Vel ita: Non frequenter passus
 est ab origine mundi, sed nunc semel in consumma-
 tione sæculorum. Si semel oblatuſ non sufficeret
 omnium in se credentium peccata exhaurire, oportet
 eum pati sæpius ab origine mundi. Quod ne
 fieret, semel passus est in consummatione sæculo-
 rum, id est in ultima ætate mundi, in qua sunt om-
 nia consummata et adimpleta, quæ in sæculis trans-
 actis imperfecta fuere, et ideo non opus fuit ut in-
 ciperet pati ab origine mundi. Nam, si toties pateretur,
 esset miserabilior omnibus hominibus. Non cepit
 ab initio pati, sed nunc in consummatione sæculo-
 rum apparuit in Sanctis sanctorum vultui Patris,
 semel ingressus illuc per hostiam suam una vice
 mactatam ad destitutionem peccati, id est ad hoc, ut
 deorsum statueret peccatum, ne jam super nos, sed
 subter nos esset, id est ne jam dominaretur nobis,
 sed nos conculcaremus illud. Quod nulla alia hostia
 facere potuit. Et quia ejus hostia semel oblata, regnum
 peccati subvertit, nec jam per consensum vel ope-
 rationem prævalet super nos peccatum, non necesse

fuit ut iterum offerretur. Dixi quia semel apparuit A Deo per hostiam suam, ingrediens Sancta sanctorum. Et ob hoc passus est semel, quoniam hanc potestatem in omnes possidet natura, ut semel moriantur. *Et quemadmodum*, id est qua necessitate et naturali conditione *statutum est* omnibus hominibus *semel mori*, id est ut semel moriantur, sed *post hoc*, id est post mortem restat eis *judicium*, in quo secundum hoc quod egere, recipiant, id est non iterum restat ut surgant, et iterum moriantur, sed tantum ut veniant ad iudicium, recepturi præmia, vel tormenta, *sic*, id est eadem necessitate et immutabili jure naturæ et *Christus*, utpote verus homo, *semel* et non amplius in ara crucis *oblatus est*, et post faciet iudicium: hoc est, sicut hominibus post mortem nihil restat ex necessitate nisi ut iudicentur, ita Christo post mortem nil restat, nisi ut iudicet. Nam, si post resurrectionem suam iterum mori posset, non haberet in se naturam cæterorum hominum. Et ita nihil nobis prodesset, cum verus homo non esset. Sed, ut verus homo probaretur, sicut semel ex matre virgine natus est, ita semel in cruce moriens oblatus est Patri sacrificium, *ad exhaurienda*, id est prorsus auferenda, et annullanda *peccata*, non dico omnium, quia non omnes credunt: sed *multorum*, id est eorum qui ad vitam prædestinati sunt, quod aliæ non sufficiebant hostiæ, quia, etsi aliquo modo minuebant ea, non tamen exhauriebant; hoc est, semel venit, et eo adventu omnia peccata suorum exhaustit, secundo autem C adventu *apparebit* non ut iterum patiat, sed ut iudicet. *Apparebit enim sine peccato*, id est sine hostia, pro peccato, quia tunc non offert hostiam pro peccatis, sed damnabit perseverantes in peccatis. Consuetudo enim legis est, ut sacrificium quod, pro peccatis offertur, appelletur peccatum. Et secundum illam consuetudinem peccatum appellat Apostolus, quia loquitur Hebræis, quibus huiusmodi nomina per notitiam legis fuerant usitata. Quasi dicat: Estote timidi, quia jam amplius non immolabitur pro vobis. Tunc enim non erit hostia, sed iustitia in remunerando vel damnando, *apparebit expectantibus se*, id est illis qui propter conscientiam boni sui meriti cum quadam securitate expectabunt adventum ejus, vel qui modò longanimitè expectant eum perseverantes usque in finem cum patientia in bonis operibus, et intuitum cordis ad ejus adventum erigentes. *Apparebit eis in salutem*, quia visio ejus salus eorum erit perpetua, ut jam nec corporis nec animæ quidquam mali sentiant, sed in ejus aspectu sine fine gaudeant.

CAPUT X.

« Uram enim habens lex futurorum bonorum, « non ipsam imaginem rerum, per singulos annos « eisdem ipsis hostiis, quas offerunt indesinenter, « nunquam potest accedentes perfectos facere. Alio « qui cessassent offerri, eo quod nullam haberent « ultra conscientiam peccati cultores semel mun- « dati. Sed in ipsis commemoratio peccatorum fit

per singulos annos. Impossibile est enim sanguine « taurorum et hircorum auferri peccata. »

Probavit sufficienter quod Christus non nisi semel mori debuit, et nunc reddidit causam, cur semel mori necesse fuit. Lex enim non poterat perfectionem facere, et ideo hunc oportuit mori, qui faceret perfectionem. Vel ita continuandum est: Probavit Christum fuisse meliorem hostiam, ostendendo ea quæ in ipso erant, prioribus hostiis digniora. Ille idem nunc iterum facit per aliam partem, hostias legis improbando, et non sufficientes fuisse demonstrando. Quia sicut per dignitates ipsius ostenditur melior hostia, sic quoque econtrario melior apparet, hostiarum legalium imbecillitate monstrata. Probavit enim quod Christus peccata suorum exhaustit, et de operatione et etiam de consensu mentis eorum, quod hostiæ legis facere nequivere, ut Judæi vellent. Vere Christus exhaustit peccata, et fecit perfectos, quia lex neutrum facere potuit. Nunquam, id est nullo tempore, nec tempore Moysi, nec tempore aliorum potest facere perfectos accedentes in Sancta sanctorum pontifices. Sed quæritur quare non potest? Quia est habens et continens *umbram futurorum*, id est habens et præcipiens ea quæ sunt umbra futurorum bonorum. Nam quæcumque lex præcipiebat, ut tabernaculi vasa et hostiæ et cætera hujusmodi, non erant veritas, sed umbra verorum, et per hoc impotens ad perficiendum aliquem potest iudicari. Vel *umbram* habet lex futurorum bonorum, id est quamdam extraneam similitudinem eorum quæ futura erant, hoc est ita dubie et extranee futura bona ostendit, sicut aliqua umbra, et repræsentat oculis nostris illud corpus cujus est umbra. Et quia lex posset habere ex parte umbram futurorum bonorum, ex parte ipsam veram imaginem, addit: Ita dico, habens umbram futurorum bonorum, ut in nulla sui parte habeat *ipsam veram imaginem rerum*. Verius enim et expressius repræsentat aliqua rem aliquam quam umbra. Per imaginem enim et qualitates et quantitates illius cujus est imago aliquo modo cognoscimus, sed per umbram nil certum, nil determinatum habemus. Si Moyses aut Melchisedech pro populo Dei fuisset oblatus, forsitan imago Christi videretur, sed hircus et vitulus, et cætera quæ significabant Christum, non imago, sed umbra erant. Ipsa, inquam, lex *nunquam potest perfectos facere*, id est perfectione virtutum beatos et consummatos pontifices, per singulos annos ad Sancta sanctorum accedentes cum hostiis, non potest illos facere perfectos *eisdem ipsis hostiis, quas semper offerunt*, umbræ sunt enim, prænuntiantes gratiam qua justificamur, et in eis homines non justificantur. Non possunt in eis vel in ipsis pontifices perfecti in iustitia, id est non possunt in eis justificari vere, licet semper offerant eas revertente anno. Et quia possent auferre *per singulos annos* in spatio viginti annorum, sic tamen ut postea dimitterent, addit *indesinenter*, id est perseveranter. Quasi dicat: Licet pou-

« flos in Sancta sanctorum per singulos annos offerrent indesinenter, tamen lex non potuit illos facere perfectos; et quia lex per omnes hostias suas cum sint umbrae, nullum duxit ad perfectionem, ideo tale quid offerri debuit, quo perfectio iustitiae claretur humano generi. Non potest eos lex talibus hostiis facere perfectos, ut eorum conscientia libera fiat ab omni consensu pollutione. *Alioqui*, id est si aliter fecisset, si illos efficere perfectos posset, jam cessasset offerri illae hostiae, id est non esset aliqua necessitas, nec etiam causa, quare ulterius deberent offerri, et sic cessasset, *eo quod cultores*, id est sacrificatores *semel mundati*, id est una oblatione earum ab omni peccato purgati, *nullam habent ultra conscientiam peccati*, id est non essent sibi conscii de aliquo peccato, sed tam in corde, quam in operibus mundi perseverarent; et ideo jam hostia non indigerent, quoniam perfecti essent, quod lex facere non potuit. Una autem hostia Christi perfectos facit. Cujus corpus semel oblatum, omnes suos perfecte emundavit et emundat, quoniam usque in finem saeculi hostia illa sufficiens erit omnibus ad emundationem. Et si millies peccant, non indigent alia, quia haec sufficit ad omnia, et omnem conscientiam a peccato lavat. Ipsa enim et prius per baptismum purificat eos, etsi deinceps peccaverint, per poenitentiam rursus emundat, et in consummationem virtutum reformat, et si nos quotidie offerimus, recordatio mortis ejus est; et una haec hostia est, non multa, quia semel tantum oblata est. Nec a multis hominibus multi Christi offeruntur, sed unus ubique et semper plenus, ubique unum corpus. Semel oblatum non consumitur. Quod nos agimus, recordatio sacrificii est; nec causa infirmitatis suae repetitur, quia perficit hominem, sed nostrae qui quotidie peccamus. Dictum est superius, quod legales hostiae cessassent offerri, si perfectionem purgationis agere possent, quia superflue offerrentur, cum jam cultores per eas emundati, seirent se non habere peccati sordem aliquam. Sed videmus quia non purgant eos. Nam in ipsis hostiis per singulos annos oblati fit commemoratio peccatorum. Commemoratio, non absolutio; infirmitatis accusatio, non virtutis ostensio. Dum enim commemorantur et confitentur peccata sua, et offerunt pro eis illas hostias, constat eos habere peccata. Nec mirum: nam *impossibile est sanguine taurorum et hircorum*, aliarumve pecudum auferri peccata: etsi per illas hostias auferatur operatio, culpa tamen interior et consensus remanet. Nam solius Christi sanguine delentur peccata etiam si illis qui sub lege quondam remissionem per illa sacrificia videbantur accipere.

« Ideo ingrediens mundum dicit: Hostiam et oblationem noluisti, corpus autem aptasti mihi, holocaustomata et pro peccato non tibi placuerunt. Tunc dixi: Ecce venio. In capite libri scriptum est de me, ut facerem voluntatem tuam Deus (Psal. xxxix). Superius dicens quia hostias et oblationes et holocaustomata et pro peccato

« noluisti, nec placita sunt tibi quae secundum legem offeruntur, tunc dixi, ecce venio, ut faciam Deus voluntatem tuam: aufert primum, ut sequens statuatur. In qua voluntate sanctificati sumus per oblationem corporis Jesu Christi semel. »

Quoniam hostia corporis Christi sufficit ad multorum exhaurienda peccata, lex autem non ipsos pontifices potuit facere perfectos, ideo ad confirmationem hujus veritatis loquitur ista Dei Filius *ingrediens mundum*, id est assumens carnem, hoc est respectu illius temporis, quo erat mundum ingressurus assumendo carnem, dicit per prophetam, dum consideraret infirmitatem legis, et necessitatem oblationis corporis sui: O Pater, *noluisti hostiam* de pecoribus factam *et oblationem* quae sanguinis effusione fiebat. Non enim revera talibus hostiis delectatus est Deus, sed praecipit, eas ad significandam veram hostiam Christi, et ut per eas Judaicum populum retineret a sacrificiis idolorum. Nec unquam coloribus illis delectatus est, nisi in fide et devotione offerentium. Et praecipue ab adventu Domini noluit illa sacrificia, quoniam omnia illa erant quasi verba promittentis et verba promissiva, cum venerit quod promittunt, jam evacuanda. Tandiu quisque promissor erit, donec det, cum dederit, mutat verba. Non dicit, adhuc dabo, quod se daturum dicebat, sed dicit, dedi. Sacrificia ergo illa tanquam verba promissiva, ablata sunt, quia exhibita est veritas promissa, id est sacrificium Christi quod per ea promittebantur, et haec fuit causa quare Deus illa primo jussit, et post noluit. Hostiam, inquit, et oblationem noluisti. Quid ergo? jam nos hoc tempore dimissi sumus sine hostia et oblatione? Absit. *Corpus autem aptasti mihi*. Ideo illa noluisti, quia hoc mihi aptasti. Perfectio promissi, abstulit verba promittentis. Illa jam in tempore gratiae noluisti, sed corpus aptasti mihi, id est aptum et idoneum corpus, quia sine peccato et passibile et mortale mihi dedisti, quod valeat offerri in redemptionem omnium; *holocaustomata* etiam, id est illa sacrificia, quae omnibus aliis digniora videbantur, quia tota in altari incendebantur; *non placuerunt tibi oblata pro peccato*, quia propter haec non relaxasti peccatum. Et tunc, id est quando video omnia tibi displicere, et corpus aptum immolationi mihi datum, dixi: *Ecce*, id est sine retardatione *venio*, id est ad me offerendum spontaneus accedo, quia hanc solam hostiam tibi placituram considero. Nam in capite libri Psalorum scriptum est de me, ut facerem voluntatem tuam, Deus, ubi dictum est: « Beatus vir qui non abiit in consilio impiorum, » etc. (Psal. i.) Et oportebat impleri prophetiam hanc in me. Sent etiam qui universas Scripturas canonicas unum librum vocent, eo quod valde mirabili et divina unitate concordent. In cujus libri capite scriptum est de me, ut facerem voluntatem tuam, quoniam in primis partibus libri Genesios, qui principium Scripturarum est, legitur prophetarum, quia relin-

quet homo patrem suum, id est Dei Filius hominem induens, venit a sede paterna, et relinquit matrem suam (Gen. 11), id est synagogam, et adhærebit uxori suæ, id est Ecclesiæ. Vel caput libri est prædicatio divinitatis, qua nihil altius in Scripturis invenitur. Et in capite libri scriptum est de me, quoniam Scripturæ sanctæ demonstrant me esse Deum super omnia, cum dicunt: « Verbo Domini cæli firmati sunt » (Psal. xxxii), « et Deus erat Verbum (Joan. 1), » et cætera hujusmodi, et ego, qui tantus in eminentissimo capite, id est in altissimo prædicatione divinitatis libri Scripturarum invenior, induens misericorditer formam servi, volui o Deus, ut facerem vel ut faciam voluntatem tuam, factus obediens usque ad mortem (Philip. 11). Quia voluntatem meam juxta naturam humanitatis habebam, divinæ voluntati tuæ prorsus concordem feci, ut sicut immolatione mei corporis humanum genus redimi volebas, ita et ego vellem, et in omnibus voluntatem tuam adimplere optarem. Hæc verba Christus in psalmo locutus est, et nunc aperit nobis Apostolus, quid ipse de his sentiat. Quia scilicet non solum notat veteres hostias hæc auctoritas nullum perfecisse, et solam Christi hostiam de omnibus credentibus hæc sufficienter egisse vel agere, sed etiam oblationem Veteris Testamenti et substitutionem Novi demonstrat, si diligenter notentur hæc verba. Nam ipse Christus dicens superius, illa noluisti, et subjungens, Tunc dixi: Ecce venio, aufert primum sacrificium et cum eo Vetus Testamentum, et statuit novum sacrificium, ut stabile permaneat, et cum eo Novum Testamentum. Et hoc est: Superius dicens ipse Filius, quia hostias et oblationes et holocaustum etiam pro peccato noluisti, ostendit carnalia sacrificia esse reprobata, et cum eis carnales omnes observantias. Illas hostias noluisti, et ne viderentur displicere, qui non secundum legis institutionem offerebantur, subditur: Nec placita sunt tibi ea quæ secundum legem offeruntur. Et tunc cum illa omnia tibi displicerent, et aliud velles sacrificium, dixi: Ecce venio immolari, ut faciam et compleam voluntatem tuam, o Deus, quem ego juxta humanitatem meam adoro et colo, hæc dicens Dominus, aufert primum sacrificium, ut sequens statuatur. Dicendo enim hostias et oblationes noluisti, aufert primum, id est ostendit ablationem primi; et subdendo: Ecce venio, ut faciam voluntatem tuam, statuit sequens, id est ostendit novum, stabile, et firmum fore. Primum et sequens, vel sacrificium, ut diximus, vel testamentum intelligitur. Nam utrumque videmus impletum. Quia et vetus sacrificium a populo Dei prorsus est ablatum, et sequens Dominici corporis sacrificium est substitutum. Similiter primum testamentum juxta carnales observantias ablatum est, et successit Evangelium. Dixi, Ecce venio ut faciam voluntatem tuam, id est ut immoler sicut vis, et novam legem statuam. In qua voluntate, id est in qua sui immolatione secundum Patris voluntatem facta, nos

fideles sumus sanctificati, id est non solum a peccatis mundati, sed in virtutibus consummati; et hoc per oblationem corporis Jesu Christi in cruce facta, nobis vel amplius, sed semel; et ideo sequens est statutum, quia per illud sanctificati sumus. Primum vero dejectum est vel ablatum, quia neminem duxit ad perfectionem.

« Et omnis quidem sacerdos præsto est, quotidie ministrans, et easdem sæpe offerens hostias, quæ nunquam possunt auferre peccata. Hic autem unam pro peccatis offerens hostiam, in sempiternum sedet in dextera Dei, de cætero expectans donec ponantur inimici ejus scabellum pedum ejus (Psal. cix; I Cor. xv). »

Quæstio: Diceret aliquis: Sanguis hircorum et taurorum semel in anno per pontificem oblatus, nulum duxit ad perfectionem, sed illa sacrificia quæ quotidie fiebant, sacerdotes perfectos jure fecere, quoniam assidue sacrificabant, et gratiam Dei semper implorabant. Ad hoc quasi respondet, ostendens quoniam sicut pontifices per hostias suas non sanctificati sunt, ita nec sacerdotes, licet offerrent assidue sanctificati aliqua legali observatione. Quasi dicat: Omnis pontifex per singulos annos offert, et non pervenit ad aliquam consummationem; et eodem modo omnis sacerdos semper offert, et tamen per ea nunquam consummaretur. Et omnis quidem sacerdos præsto est, id est juxta paratus ut impleat officium suum, quotidie ministrans altari, et sæpe offerens eisdem hostias, quas jam obtulerat, id est similes prioribus, ut qui heri taurum obtulerat, hodie taurum, et cras taurum offerat, quæ hostiæ licet eadem crebro repetitæ, licet sacerdote qui præsto est, semper et sedulius in officio sint oblatæ, quantumcunque offerantur, nunquam, id est nullo tempore possunt auferre peccata. Sacerdos quidem multas offert hostias, semperque tali officio deditus est, et tamen casso labore consumitur. Sed hic noster verus sacerdos, de quo loquimur, et cujus esse sufficientem hostiam ostendere intendimus, ipse non sæpe, non multas hostias, sed unam quæ sola sufficiebat offerens hostiam pro peccatis omnium credentium delendis, post expletam suæ passionis obedientiam sedet, id est quiescit et regnat et judicat in dextera Dei, id est in potiori dignitate Patris, in sempiternum ibi permansurus, quoniam iterum laborare et iterum offerre non eget, nec opus est ut aliquid pro sua vel suorum imperfectione patiat. Tantæ enim perfectionis et efficacæ fuit ejus hostia, ut non sit opus eam rursus offerri pro peccatis aliquorum. Et licet nos eam quotidie offeramus, non tamen passionis dolorem ultra sentit Christus, sed memoria passionis ejus a nobis fit. Multum autem nobis in hac carne tribueremus, nisi usque ad ejus depositionem sub venia viveremus. Propterea nobis per mediatorem præstita est gratia, ut polluti carne peccati, carnis similitudine mundaremur, id est sacrificio corporis ejus, quod in missarum celebratione offertur. Unde, quia licet ipse amplius non patiat,

tamen eandem hostiam per suos sacerdotes adhuc offerre non destitit, apte nunc dicitur, quia unam pro peccatis hostiam offerens, sedet in dextera Dei. Offerens namque presentis temporis est, quia sicut diximus, ipse per suos sacerdotes eam adhuc offert, quia per semetipsum semel obtulit. Nam de passione ejus dictum est, quia semel oblata est ejus hostia, cum adhuc in ministeriis offeratur. Sacerdos legalis ministrat, hic autem sedet quia ministrare sanctorum est, sedere vero dominorum. Et sedet ad dexteram Dei, ut appareat quia bene potest suos consummare, quia sic meruit exaltari; *de cætero*, id est de eo quod restat, hoc est glorificatione corporum, quoniam remissis peccatis hoc solum restat. Vel potius de cætero quod restat, id est de gloria bonorum et pœna malorum *expectans donec ponantur inimici ejus*, id est usque ad illud tempus, quo illi qui adhuc ei inimicantur et contradicunt, ponantur *scabellum pedum ejus*, id est omnino ei subjicientur, alii interim per fidem, alii in futuro per damnationem. Causa est, quare jam glorificatus nondum suos glorificet, vel in passione judicatus nondum inimicos judicet, quoniam adhuc nonnulli ex inimicis fient amici, et optimum sibi locum sub pedibus ejus acquirant. Nam necesse est ut habeat ibi quisque locum aut gratiæ aut pœnæ; et ideo differtur judicium, ut quærat unusquisque quem ibi locum habeat.

« Una enim oblatione consummavit in sempiternum sanctificatos. Contestatur autem nos et Spiritus sanctus. Postquam enim dixit: Hoc autem testamentum quod testabor ad illos post dies illos, dicit Dominus, dabo leges meas in cordibus eorum, et in mentibus eorum superscribam eas, et peccatorum et iniquitatum eorum jam non recordabor amplius (*Jer. xxxi; supra viii*). Ubi autem horum remissio, jam non est oblatio pro peccato. »

Dixi quia unam pro peccatis obtulit hostiam. Et quare unam, et non multas? Quia illa suffecit ad omnia. Nam *una oblatio*, id est sui sanguinis effusione, *consummavit sanctificatos*, id est per baptismum a peccatis emundans sanctificavit, et sanctificatos consummavit, id est ad summam perfectionem virtutum provexit, in quantum potest homo in hac vita consummationem justitiæ consequi; et consummavit illos *in sempiternum*, quia sine fine possidebunt illam justitiæ consummationem in regno perpetuæ beatitudinis, nec immutabitur unquam illorum perfectio. Nec solus ego hoc dico, sed et Spiritus sanctus per Jeremiam (*cap. xxxi*) *contestatur nos*, id est simul testatur illud idem quod nos testamur de sanctificatione et consummatione. Vere contestatur. *Postquam enim hoc dixit: Hoc autem testamentum, etc.*, ibi contestatus est istud, quod asserimus. Postquam hoc dixit, contestatus est istud id est ex eo quod hoc dixit, consequens est eum contestari, quod nos de sanctificatione et consummatione fidelium Testamenti Novi testamur. Nam

quia illa consummatio non per Vetus, sed per Novum Testamentum sit, idcirco ipse Spiritus mentionem ejusdem Novi Testamenti facit, cum illam consummationem promittit, dicens: *Hoc autem testamentum, etc.* Quasi dicat: Non Vetus Testamentum docebo, non carnales observantias prædicabo, sed hoc est testamentum spirituale, *quod testabor et asfirmabo loquens et accedens ad illos; et hoc faciam post dies illos*, qui sunt apud me præfiniti, dicit Dominus per Jeremiam, non ipse Jeremias. Et non ita testabor illis hoc Novum Testamentum, sicut Vetus testatus sum, in lapideis tabulis scribendo duris patribus eorum; sed potius alio et utiliori modo, scilicet *dando leges meas in cordibus eorum*, id est manifestando internis sensibus eorum voluntates meas per Spiritum sanctum, qui sapientiam et charitatem illis infundet, ut intelligant eas, et delectabiliter adimpleant: *et eas leges quas dabo, superscribam in mentibus eorum*, quia tantæ dignitatis erunt nova præcepta, ut arbitrium mentis eorum superetur, nec sufficiat ex se ipso quisquam ea complere, sed auxilio gratiæ juvetur et corroboretur infirmitas ejus, ut ea compleat. Hoc loco designatum est, quia in virtutibus eos consummaturus erat in sempiternum; et de sanctificatione, quam daturus erat, subjungitur, quia *peccatorum quæ, quantum ad se, fecere; et iniquitatum eorum, quantum ad proximum, jam a tempore baptismatis non recordabor amplius*, quia nec in hoc sæculo pro his injungam illis aliquam pœnitentiam, nec in futuro ullam pro eis irrogabo pœnam. Ita promisit Spiritus sanctus per novam gratiam peccata remitti. Sed *ubi horum est remissio, jam non est facienda legis oblatio pro peccato*, sed cessare debet apud Christianos, quibus peccata sunt in baptismo remissa. Sed, etsi post baptismum peccaverit, remittitur per pœnitentiam, nec indigent oblatione legali. Vel in futuro sæculo remissis omnibus omnino peccatis, jam non offertur oblatio Christi pro aliquo peccato eorum, quia nullum erit.

« Habentes itaque fratres fiduciam in introitu sanctorum in sanguine Christi, quam initiavit nobis viam novam et viventem per velamen, id est carnem suam, et sacerdotem magnum super domum Dei, accedamus cum vero corde in plenitudine fidei, aspersi corda a conscientia mala, et abluti corpus aqua munda, teneamus spei nostræ confessionem indeclinabilem. Fidelis enim est qui repromisit, et consideremus invicem in provocationem charitatis et bonorum operum, non desistentes collectionem nostram, sicut consuetudinis est quibusdam, sed consolantes et tanto magis, quanto videritis appropinquantem diem. »

Multis modis commendato Christi pontificio, et Judæorum destructo, et ostenso quod Christus fuit melior hostia, et ad remissionem peccatorum sufficiens, et quod lex cum hostiis suis ad hoc erat impotens, fuit hoc loco de his disputationem et m-

nere incipit, ut sola Christi fides cum observantia bonorum operum teneatur; et ex omnibus quæ supra dixit, ex quo de Christi sacerdotio disputare cœpit, infert nunc. Quasi dicat: Quandoquidem Christus est sacerdos secundum ordinem Melchisedech, et suo sanguine cœlum aperuit, et una nos oblatione sanctificavit atque consummavit, et cætera superius tractata, itaque, o fratres, accedamus ad eum cum fide et bonis operibus, a quo per infidelitatem et pravam operationem longe eramus, nos dico, habentes fiduciam, id est spem certissimam, qua non est desperandum, si oberravimus, sed confidenter possumus accedere; habentes fiduciam in introitu sanctorum, id est introeundi in Sancta sanctorum, hoc est in cœlum, quo intelligimus præcessisse Pontificem nostrum. Fiduciam habemus quod intrabimus in illa Sancta sanctorum, et hoc non in legalibus sacrificiis, sed in sanguine Christi, quem ipse ideo effudit, ut eodem redempti illuc accedamus, et in illa sancta ingrediamur, quam viam, id est quem introitum modo factum viam tritam in patriam, ipse initiavit nobis, id est ipse primus omnium fidelium intravit, ipse primus per eam ambulavit, et fidelibus suis potestatem ambulandi per eam post se tribuit. Viam dico, novam, id est per quam nullus ante eum ambulavit, et viventem, id est durabilem et manentem atque nos sanctificatos exspectantem, quia postea fidelibus semper est aperta. Vel viventem, quia omnes qui intrant vivere facit. Viventem, quia nullus per eam ingreditur, nisi quem vita ducit, per velamen, id est per significatum illius velaminis quod duo tabernacula dividebat, id est per carnem suam, patefacta est nobis via in Sancta sanctorum, id est in supernam Jerusalem. Unde etiam eo in cruce moriente, et scissum est velum templi (Math. xxvii), significans morte ejus apertam esse nobis viam in Sancta sanctorum. Per velamen id est per carnem Christi qua velabatur divinitas, via illa manet pervia, quia sumunt fideles ut viaticum carnem Christi, et de hac vita recedentes, ingrediuntur januam cœli, et per velamen, id est per carnem suam initiavit nobis ipse viam illam, quia carne velatus transiit primus per eam. Per carnem initiavit eam, quia nisi carnem assumpsisset, non eam nobis inisset. Per carnem enim, non per divinitatem potest de loco ad locum ire; et ideo per carnem, qua se velaverat, initiavit nobis iter in cœlum, sicut ei Psalmista canit: « Qui ponis nubem ascensum tuum (Psal. ciii). » Nubem quippe posuit ascensum suum, quia carne ascendit, non divinitate. Nam, quod nunc Apostolus velamen, hoc Psalmista nubem appellat. Vel secundum quod nonnullis visum est caro Christi quam ex altari sumimus, idcirco velamen appellatur, quoniam sensibus nostris in sacramento velatur. Nam sensus nostri aliud renuntiant, et aliud fides. Visus enim persuadet nobis esse solummodo panem secundum panis speciem, fides autem insinuat esse carnem vivam et vivificatricem; gustus, panem in sapore,

A auditus etiam illud idem in fractione, fides vero integrum agnum a fidelibus sumi sine aliqua ipsius læsione. Non enim sumimus carnem exanimem, sed consecratione et operatione divina viventem. Christum scilicet et Agnum pro nobis oblatum in sacramento accipimus, non ut ipse quidquam contumeliæ vel læsionis in sacramento patiat, sed illud quod pro nostra vita sustinuit, nos æ memoriam repræsentatur. Per hoc itaque velamen Dominicæ carnis initiata est nobis vita nova, quia per sacramentum corporis et sanguinis Christi, cœlit in Novo Testamento patere fidelibus ingressus regni cœlorum, qui sub veteri lege nulli patebat; et habentes, inquit, sacerdotem magnum Christum pro nobis Patrem orantem. Ipse enim per hostiam suam in Sancta sanctorum introivit, ubi semper vivit et offert et interpellat pro nobis. Sacerdotem dico, super domum Dei, id est super Ecclesiam constitutum, ut eam regat, et contra omnes impugnationes defendat. Hoc totum tale est ac si dicatur: Fiduciam habemus introeundi ad Sancta sanctorum, ad visionem supernæ pacis, tum quia per sanguinem Christi genus humanum exiit servitutem, tum quia ipse primus intravit, tum quia fideles suos corroborat et nutrit esca suæ carnis, et potu sui sanguinis, tum quia pro nobis intercedit, tum quia Ecclesiam gubernat et protegit. Nos, inquit, habentes fiduciam per hæc omnia quæ dicta sunt, accedamus ad eum, id est passibus affectionis et processibus religiosæ operationis efficiamur ei magis ac magis propinqui ad introitum sanctorum. Accedamus, non cum ficto, sed cum vero corde, ut non simulatorio, sed puro et vero corde tendamus ad eum sicut scriptum est: « Et in simplicitate cordis quaerite illum (Sap. 1), » et hoc faciamus in plenitudine fidei, id est ut fides nostra de illo sit plenaria, nec aliquid minus quam oportet habeat, ne adhuc infideliter aestimemus eum sine carnalibus observantiis ad salutem minus posse sufficere. Nos dico, aspersi et purificati corda nostra ab omni mala conscientia, et abluti corpus aqua munda, id est baptismo, quo mundantur omnes peccatorum sordes. Hoc est, accedamus ad eum vero corde in plenitudine fidei, nos qui sumus aspersi corda, id est qui habemus corda rore Spiritus sancti aspersa in baptismo, et per hoc emundata a conscientia mala, id est ab omni reatu conscientiæ, et abluti corpus, id est qui habemus ablutum et purgatum a peccato corpus aqua munda baptismi. Omnia enim peccata delentur in baptismo, tam interiora quam exteriora. Quia ergo per baptismum facti sumus a peccato liberi, et restaurata est nobis libertas arbitrii, et gratia Dei data, et nullam habemus excusationem, accedamus, ut dictum est, ad eum qui tot beneficia nobis largitus est, et vero corde diligamus eum, atque fidem integram illi servemus, et fide plena eum credamus, et quod corde credimus ore confiteamur, scilicet teneamus spei nostræ confessionem, id est nihil sit tam grave

vel asperum, quod ab ore nostro auferat confessionem quæ est causa spei quæ facit nos cœlestem beatitudinem sperare, id est quæ confessio procedit ex spe. Nisi enim quis bona futura speraret, non illud confiteretur, pro quo præsentia bona amitteret. Hanc confessionem quæ facit nos æterna bona sperare, teneamus *indeclinabilem*, id est ita firmiter eam teneamus, ut non deorsum inclinetur ad cupiditatem vel timorem terrenorum, sed semper tendat sursum ad appetitum cœlestium. Et debemus constanter hanc spei confessionem tenere, quia *fidelis est Dominus in suis promissionibus*, et mentiri non potest, *qui repro-misit*, id est qui multoties per Scripturas nobis promisit æterna bona, quæ speramus. Hæc quantum ad Deum, monuit eos Apostolus. Deinde exhortatur eos ut satagant de utilitate proximorum, et admonet eos ad charitatem et bonam operationem. Quæ exhortatio ad eos maxime videtur pertinere, vel eos notare, qui existimantes se melioris vitæ, consortium aliorum deserebant. Quasi dicat : Fidem et confessionem teneamus quantum ad nos vel ad Deum; *et consideremus invicem*, id est diligenter et attente inspiciamus alter alterum, non ut invidet et insidiatur, sed *in provocationem charitatis et bonorum operum*, id est, ut majorem dilectionis fervorem habeat, et ad omnem bonam operationem provocetur. Scilicet perfecti considerent imperfectos, exhortando illos ad Dei et proximi dilectionem, et ad fructum dilectionis, id est ad opera bona. Imperfecti vero considerent perfectos, sumendo ex eis exemplum utilitatis quod imitentur. Et sic provocant se vicissim in charitatem et bona opera. Vel per omnia consideremus quid fratribus sit utile, invicem hoc agentes, ut quemadmodum nos de salute aliorum satagimus, ita et illi vicario modo de salute nostra sint solliciti, ut nullus habeatur seguis et infructuosus inter nos. Quia, dum dicitur, consideremus invicem, convenit singulis illa exhortatio. Hæc, inquit, faciamus, *non deserentes collectionem nostram*, id est illos qui collecti sunt ad fidem nobiscum, *sicut est consuetudinis quibusdam vestrum*, qui charitatem non habentes, et quasi de singularitate meritorum gloriantes, segregant se a cæteris. Tangit et culpatur seindentes unitatem charitatis, quasi inter alios non possent habitare causa sanctitatis suæ, qui potius suo exemplo debuerunt consolari alios. Laborantem quippe consolari, est pariter in labore persistere, quia sublevatio laboris, est visio collaborantis; sicut cum in itinere comes jungitur, via quidem non attrahitur, sed tamen de societate comitis labor itineris levigatur. *Et tanto magis*, inquit, *quanto videritis appropinquantem diem*. Ac si dicat : Eo labor crescat, quo jam præmia laboris appropinquant. Vel si tribulatio et persecutio infidelium ingruerit fratribus, non deseratis collectionem vestram, id est illos qui vobis per sacramenta fidei sunt associati

A in eodem corpore Ecclesiæ, sed potius consolamini eos in adversis dulcedine vestræ exhortationis. Dico ne deseratis in tribulatione pauperes Christi, sicut quidam, qui videntes immineere sanctis anxietates, subtrahunt illis adminiculi sustentationem. Non subtrahatis vos a sociis in certamine martyrii, denegando eis solatium vestræ exhortationis, *sed consolantes* sitis eos in ipsis passionibus; et tanto magis id facite, quanto magis videritis asperiores pœnas imminere, per quas finis eorum appropinquat, in quo de tenebris hujus sæculi ad diem perpetuæ claritatis transibunt, ne quis unquam desit illi tam felici diei propter subtractionem vestræ exhortationis. Vel etiam in pace vos qui sanctiores videmini, ne deseratis causa vestræ religiositatis collectionem fratrum, quia minus religiosi videntur, sed vestra cohabitatione et colloquutione consolationem illis exhibete, ne de sua salute desperent propter irreligiositatem suam, si viderint se desertos a vobis sanctoribus. Consolamini eos promittendo veniam, et in spem erigendo, et ad bene agendum monendo. Et hoc facite magis ac magis quotidie, sicut videritis appropinquare diem mortis. Quasi dicat : Non differatis, quia mors uniuscujusque prope est, et quotidie vicinior efficitur, tanto intentius hoc agite, quanto videritis illum diem singularem et timendum appropinquare

C « Voluntarie enim peccantibus nobis post acceptam notitiam veritatis (*supra 6*), jam non relinquitur hostia pro peccatis, terribilis autem quædam expectatio judicii et ignis æmulationis, quæ consumptura est adversarios. »

Vere non debetis peccare negligendo collectionem fratrum, et deserendo, quia *nobis* Christianis *voluntarie peccantibus*, id est sponte Deum offendentibus, et non ex ignorantia vel infirmitate, sed ex deliberatione delinquentibus, *post acceptam notitiam veritatis*, id est postquam interiorius illuminati sumus, et quid eligendum, quidve respuendum sit, absque dubio cognovimus, *jam* post hæc *non relinquitur hostia pro peccatis*, sicut in veteri lege mandatum erat sæpius hostias offerri pro peccatis. Non enim Christus iterum immolandus est pro peccatis, quod semel factum est et secundo non est opus, sed magis oportet nos in fide et bonis operibus manere. Non excludo pœnitentiam, sed secundum baptismum. Non dico, non est ultra pœnitentia vel remissio, sed hostia, id est crux secunda, quia una sufficit, nec amplius hanc expectemus, sed pœniteamus, quia rebaptizari in morte Christi non possumus. Qui enim iterat in baptismum, iterat rursus mortem Christi, ut ex ea iterata fiat iterata remissio. Sed hoc impossibile est. Non talis hostia nobis relinquitur, si post baptismum nos inquinaverimus. Vel voluntarie peccantibus, id est in voluntate peccandi manentibus, nobis non relinquitur hostia pro peccatis, id est nullum commo-dum potest conferre sacrifici-

cium Dominici corporis. Nam pro peccatis pœnitentium offertur Deo quotidie sacrificium et oblatio, non pro peccatis illorum, qui ipsa peccata relinquere nolunt. Si peccare nobis ita perseveranter et continue placuerit, non relinquitur nobis hostia pro peccatis, sed potius relinquitur *quædam* nobis notabilis *expectatio* iudicii quæ est *terribilis*, id est ad terrendum habilis, quia multum nos terere potest. Et hæc pœna interius est, quia *et foris* sæviet *ignis* perpetuus. Nam etiam timor iudicii resurgentibus malis est pœna, inenarrabilis et gravior quam gehenna. Et dicente iudice: « Discedite a me, maledicti, in ignem æternum (Matth. xxv), » statim assumet eos ignis *æmulatio*, id est vehemens infestatio, quia zelo quodam nimis accenso semper eos puniet, et quasi invidet eis, quia semper ad hoc exardebit, ut eos incessanter exurat, quæ nimirum fervens æmulatio *consumptura est*, id est perpetualiter devoratura *adversarios* Christi, ut semper in tormentis deficiant, et nunquam ad finem deliciendo perveniant qui nunc aut per infidelitatem, aut per malam operationem adversantur Christo.

« Irritam quis faciens legem Moysi, sine ulla miseratione duobus vel tribus testibus moritur (Deut. xvii; Matth. xviii; II Cor. xiii). Quanto magis putatis deteriora mereri supplicia, qui Filium Dei conculcaverit, et sanguinem testamenti pollutum duxerit, in quo sanctificatus est, et spiritui gratiæ contumeliam fecerit? Scimus enim qui dixit: Mihi vindictam, et ego retribuam (Deut. xxxii; Rom. xii). Et iterum: Quia iudicabit Dominus populum suum (Psal. cxxxiv). Horrendum est incidere in manus Dei viventis. »

Vere nobis, voluntarie et libenter peccantibus postquam veritatis notitiæ sumus illuminati, non relinquitur spes futuræ salvationis, dum in peccato jacere volumus, sed potius pœna perpetuæ damnationis. Quod patet a minori, quia *quis faciens irritam legem Moysi*, id est aliquis prævaricans aliquod præceptum veteris legis, *moritur* ea morte quam lex decrevit, vel lapidatur, vel incenditur, vel alio genere mortis exstinguitur, *sine ulla miseratione*, id est sine aliqua pœnarum imminutione. Ipse dico, convictus *duobus vel tribus testibus*, qui testantur quod legem in aliquo sit transgressus, et ille quidem sic interficiebatur propter illius legis transgressionem, in qua non recipiebant observatores divinam gratiam. Ergo *quanto magis* putare debetis *deteriora* et *acerbiora mereri supplicia* eum, contra quem in iudicio perhibebunt testimonium angeli sancti et propria conscientia, quod Filium Dei conculcaverit. In lege enim duo vel tres adhibentur testes, sed ibi testis erit multitudo angelorum atque sanctorum, et ipse peccator contra se. Et tunc excipient eum supplicia, id est pœnæ sub se eum plicantes et incurvantes et opprimentes. Supplicia dico deteriora,

A quia magis deterrent eum et comminuent quam legis cruciamenta. Tam diram ultionem sentiet et in perpetuum, *qui nunc Filium Dei conculcaverit, et sanguinem testamenti pollutum duxerit*, id est ita vilipenderit, ut eum non sufficere credat ad salutem, si bruta animalia secundum legem mactata putet adhuc saluti necessaria. Conculcat enim Filium Dei, qui fidem et constitutionem vivendi, quam ipse dedit hominibus, non credit ad æternam vitam sufficere, sed in carnalibus observantiis confidit, plusquam in præceptis ejus novis. Conculcat Christum, qui post acceptionem Christianitatis libere peccat absque timore et pœnitentia, et qui eo indigne participat. Sanguinem quoque Novi Testamenti, id est sanguinem Christi, confirmationem Evangelii, et B sponsorem novæ hæreditatis, pollutum ducit, qui eum minime credit genus humanum a peccatis emundantem, sed potius omnes in Christum credentes pollutentem. Quoniam necessario si non mundavit, tunc contaminavit; et peccatores constituit, quia carnales observantias et justificationes legis cessare fecit. Omne enim quod polluit, in se prius pollutum fuit; et sanguis iste pollutus in se esset, et nos pollueret, si inde nos retraheret, ubi remissio peccatorum esset, id est si a carnalibus observantiis nos separaret, cum per eas remissio peccatorum fieri posset. Ut autem ostendat acrius C et e puniendum illum, qui tam male sentit de hoc sanguine, addit: *in quo sanctificatus est*, id est in quo remissionem peccatorum accepit, et ita contra eum gravius peccat et ingratus existit. Ac per hoc magis punietur, quia a quo mundationem habuit, immundum esse credit. Sed et ille sanguinem hunc pollutum ducit, qui ab eo mundatus, ad vomitum redit et pœnitere negligit (II Petr. ii), et spiritui gratiæ, id est Spiritui sancto gratias dato vel gratiam danti, *contumeliam facit*, qui remissionem quam ipse spiritus operatur, ascribit carnalibus observantiis, vel qui eum male vivendo a se abiecit. Et quisquis hæc facit, jure sine misericordia morietur, quod in minori per vindictam legis est probatum, ubi prævaricator sine miseratione punitur. Nam, si transgressor legis digna morte perimitur pro uno mandato semel prævaricato, quanto acrius punietur, qui supradictis tribus modis Deum offendit, conculcando Filium ejus, et pollutum ducendo sanguinem ipsius atque contumeliam inferendo Spiritui sancto? Vere talis quisque punietur. Scimus enim qui dixit, id est scimus quam verax et quam potens est ille qui dixit: *Mihi vindictam, et ego retribuam*. Quasi diceret: Homines in præsentem sumunt vindictam de suis hostibus, et ego quoque reddam mihi vindictam in futuro, id est vindicabo me de meis adversariis, qui nunc me conculcant et contumeliis provocant, licet sub Christiana professione degant. Ubi nos in Ezechiele legimus: « Appropinquavere visitationes urbis (Ezech. ix), » Septuaginta translulere: *Mihi vindictam, et ego retribuam*, dicit Dominus. Et iterum ad idem probandum, quod qui

Filium Dei conculcaverit punietur, dicit Moyses (Deut. xxxii) vel Psalmista, quia *judicabit Dominus populum suum* (Psal. cxxxiv), id est peccata populi sui non relinquet impunita, sed unumquemque etiam fidelium judicabit secundum vias ejus. Ideo non sibi de impunitate, si peccaverit, blandiatur, quia jam est de populo Christianorum, sed sciat quia criminosi non possidebunt regnum Dei. Nam qui nunc in Ecclesia male vivendo Filium Dei conculcant, eliminandi sunt ab ea. « Multi enim sunt vocati, pauci vero electi (Matth. xx). » Dominus judicabit populum suum, et quos in eo damnabiles inveniet, damnabit atrociter. Nam *horrendum est*, id est horrore nimio timendum et præcavendum, *incidere in manus Dei viventis*, id est qui semper vivens est, et pœnas semper viventes infert eis quos damnat. Incidit in manus Dei, qui non sibi providet, sed subito deprehenditur, scilicet ventura damna minime prospiciens sine delictorum pœnitentia et virtutum decore venit ad examen æterni judicis, sensurus casum damnationis. Manus pro potentia ponuntur, quia, sicut aliquis a manibus inimici in quas forte incidit, arctatur ne unquam illæsus effugiat, sic quisque damnandus cogitur potenti judicio Dei, ut quas meruit pœnas, sentiat. Qui scilicet Deus, si aliquando moreretur, posset cessare pœna, quam ipse decrevit. Sed, quia semper vivit et omnipotens est, semper manet, quidquid in ejus judicio decretum est.

« Rememoramini autem pristinos dies, in quibus illuminati magnum certamen sustinuistis passionum. Et in altero quidem opprobriis et tribulationibus spectaculum facti, in altero autem socii taliter conversantium effecti. Nam et vincis compassi estis, et rapinam bonorum vestrorum cum gaudio suscepistis, cognoscentes vos habere meliorem et manentem substantiam. Nolite itaque amittere confidentiam vestram, quæ magnam habet remunerationem. Patientia enim vobis necessaria est, ut voluntatem Dei facientes, reportetis repromissionem. »

Aspere terruerat eos, compescendo a peccatis communicatione æterni supplicii; nunc vero terrores refovet, laudans eos de præteritis, et hortatur, ut in bonis quæ cœperant, perseverent. Turpe enim et dignum reprehensione, si hi, qui dum adhuc rudes in fide essent, religiose vivere, modo nequiter agendo Deum offendant; et qui in exordio quando ad fidem venerunt, magnanimitate varias persecutiones toleraverunt, postea pusillanimes effecti, deficiant in tribulationibus. *Rememoramini autem pristinos dies*, etc. Ostendit diu esse ex quo ad fidem venerant, et per hoc magis debuissent in religione proficere, et ad sustinendam persecutionem exercitati esse. Quasi dicat: Non deseratis collectionem nostram in tribulatione, neque male vivendo Filium Dei ulterius conculcatis, sed recordamini constantiæ vestræ et perfectionis, quam in pristinis diebus habuistis, et hoc est: Rememoramini, id est redu-

cite ad memoriam pristinos dies, id est recogitate quales in illis diebus fueritis, ne nunc deteriores sitis, cum ex temporis prolixitate multo meliores esse debeatis. *Recogitate dies, in quibus luce fidei illuminati, sustinuistis magnum certamen passionum*, id est non defecistis sustinendo, sed magnanimitate certastis, fidem corde et ore tenendo, quam volis extorquere persecutores contendebant. Plus etiam notat dicendo, *sustinuistis magnum certamen passionum, quam si simpliciter dixisset, sustinuistis magnas passiones*. Nam quod posuit ibi certamen, ostendit eos non defecisse, sed constanter certasse. Quod non notaretur, si certamen non esset appositum. Vel ideo dixit certamen passionum, quia ipse passiones certabant contra eos, ut patientiam et fidem eis extorquerent, sed non potuerunt. Et ideo qui sic fortiter steterunt in principio suæ conversionis, non debent nunc metu persecutionis deserere collectionem fratrum, qui eorum solatio indigent. Sive ideo posuit certamen passionum, quia aliud est passio quæ infertur, aliud difficultas passionis quæ contra rationem pugnat et, ut fidem postponat, exhortatur. Duobus itaque modis eos laudat, tum quia passiones et verbera exterius sustinuerunt, tum quia invictissime contra ipsas passiones interiorum certaverunt, quasi dicens: Duo in uno fecistis, quia unum patiebamini exterius, aliud interiorum. *Et in altero quidem*, id est in hoc quod exterius patiebamini *facti estis spectaculum*, id est admiratio quædam universo populo, *in opprobriis* quæ contra vos proferebant, quia omnes iridebant vos, et amentes atque insensatos dicebant. Et grave quidem est opprobrium, sed gravius est, cum spectaculum hominibus fit, non secreto exprobratur. Spectaculum fuistis in opprobriis, quoniam spectantibus universo populo, irrogabantur vobis multa convitia et ignominiosa verba, *et in tribulationibus*, quia publice flagellabamini, et diversas pœnas sustinebatis. In hoc maximam eorum constantiam ostendit, quando quamvis spectaculum essent, non tamen deficiebant a fide. Non enim modicum opprobrium est, fieri spectaculum, et ab hominibus insultationes perpeti, et quasi non sufficeret spectaculum, addebantur opprobria verborum, et opprobriis tribulationes verborum. Hæc quidem sustinuistis in altero, id est in altera parte certaminis, quæ, sicut dictum est, foris vigeat; *in altero autem*, quod interiorum erat, id est in altera parte certaminis, quæ in corde gerebatur, certastis sic quod effecti estis per compassionem socii taliter conversantium. Ideo dicit in altero et in altero, ut ostendat has duas partes certaminis tantum esse, et per hoc eas omne genus certaminis sustinuisse. Compatiendo et necessaria ministrando effecti estis socii taliter conversantium, id est assidue patientium, scilicet apostolorum et similium, qui totam vitam suam ducebant patiundo adversa pro Christo, quorum exemplo perseverare et vos debetis in observatione patientiæ. Vere socii eorum facti estis. *Nam et via-*

etis compassi estis, quia si pro Christi nomine patiebantur, vos inde sic dolebatis, ac si cum eis vincti essetis, et dolorem cordis operibus declarabatis, ministrando illis sustentationem de bonis vestris, quia non poterant sibi necessaria quærere, utpote vinctis et carceribus detenti. Illis compassi estis ministrando, et ob hoc suscepistis rapinam bonorum vestrorum. Nam idcirco vobis ab infidelibus propria bona sunt ablata, quia inde ministrabatis sanctis. Et hanc bonorum direptionem suscepistis non cum mœrore, sed cum gaudio et alacritate cordis, et hoc est quod dicit, quia et vinctis compassi estis; et bonorum vestrorum cum gaudio rapinam suscepistis, id est et de tribulationibus sanctorum doluistis, velut si eas in corpore vestro pateremini, et de damno rerum vestrarum propter sustentationem eorum vobis illato gavisus estis. Suscepistis læti quasi donum Dei amissionem facultatum vestrarum, cognoscentes, id est quia cognoscebatis vos idcirco habere substantiam longe meliorem ista et manentem, id est non transitoriam, sed æternam, hoc est spe certissima confidebatis vos æterna bona lucrari amissione temporalium, et æternam requiem labore transitorio, atque thesaurum cœlestem damno terreno; et quia spem certam, id est confidentiam supernæ retributionis habuistis, Itaque, nolite amittere confidentiam vestram, id est nolite deficere. Illatio est ex eo quod dixit eos tanta pertulisse, et vitam æternam inde exspectasse, id est manentem substantiam. Quasi dicat: Quoniam in principio fidei tot adversa passi estis, et inde confidenter sperabatis æternam mercedem, itaque nolite amittere confidentiam vestram, id est firmam spem vestram deficienti a patientia fidei, quia per patientiæ amissionem amittetis et æternæ vitæ spem. Et ne amissio spei parva jactura videretur, addit: Quæ magnam habet remunerationem. Itaque pro certo sperat illam remunerationem ineffabilem, quam oculus non vidit, nec auris audivit (I Cor. II; Isa. LXIV), ac si jam teneat eam. Vel in prædestinatione divina habet illam. Vere per, impatientiam non debetis amittere confidentiam perpetuæ retributionis. Nam patientia est vobis necessaria, id est necesse est ut nunc patienter adversa toleretis pro Deo, si cum eo postmodum regnare vultis, quia si compatimur, et conregnabimus (II Tim. II). Ideo est necessaria, ut vos per eam facientes voluntatem Dei, id est sustinentes æquanimiter omnes injurias vobis illatas, quia hoc placet Deo vel facientes voluntatem Dei, id est mandata ejus servantes, et quidquid adversitatis propter hæc acciderit, libenter perferentes, reportetis repromissionem, id est, sicut nunc pro Deo portaveritis pondus adversitatis, ita postmodum reportetis pondus beatæ remunerationis, quam sæpe Deus cœlestis promisit. Id enim quod in præsentibus est momentaneum et leve tribulationis nostræ, supra modum in sublimitate æternæ gloriæ pondus operatur in nobis. Hoc ergo pondus gloriæ quam Deus

repromisit, studete per præsentem patientiam tunc reportare.

« Adhuc enim modicum et quantum, et qui venturus est, veniet, et non tardabit. Justus autem meus ex fide vivit (Habac. II). Quod si subtraxerit se, non placebit animæ meæ. Nos autem non sumus subtractionis filii in perditionem, sed fidei in acquisitionem animæ. »

Tenenda est, ut dixi, patientia, nam nec longa est, nec vehemens, sed modica et quantula, ne vobis longum et durum videatur eam servare. Nam prope est finis uniuscujusque, et mox requiescetis a labore, et percipietis gloriam Christo judice. Nam juxta prophetiam Habacuc, adhuc modicum restat, id est parvo tempore adhuc servanda est patientia; et quantum, id est non vehemens vel magnum aliquid patiendum est, sed exiguæ quantitatis erit, quidquid in hoc sæculo perferendum fuerit. Hujus enim temporis patientia momentanea, et nullius vehementiæ est deputanda, si respicitur quod est in æternitate et summa gloria donandum. Adhuc, inquit, restat modicum et quantum, et post veniet judex, qui sine dubio venturus est quandoque, et non tardabit venire, sed cito veniet, ut reddat vobis prædictam repromissionem, si modo, patientiam servantem, feceritis ejus voluntatem. Nulla mora erit in reddenda mercede, sed cito veniet remunerator, interim autem vivit in anima ex fide justus meus, quia fides est nunc vita cordis, donec ille veniat, qui vitam æternam dabit et animæ et corporis; et per fidem, non per opera legis justificatur, quisquis meus justus est. Qui enim per opera legis justificatur, non meus, sed suus justus est, quia non a me, sed a se justificatur; et non in me, sed in se gloriatur. At qui per fidem justificatur, justus meus est, quia dono gratiæ meæ justificatur; et non sibi quod justus est tribuit, sed gratiæ meæ deputat. Et vivit interim ex fide, donec veniente Christo introducatur ad visionem meam, et æternaliter vivat ex specie. Vel ex fide quam nunc habet, vivit postmodum, quia, quod nunc credit, tunc accipit. Ex fide vivit. Quod, id est sed, si subtraxerit a fide se, ut vel metu persecutionis deserat fidem, vel in operibus legis justitiam quærens, incipiat corde a fide recedere, non placebit animæ, id est voluntati meæ; ac per hoc non poterit vivere, sed potius damnationem merebitur, quia me offendet subtrahendo se a fide et gratia. Hæc per prophetam locutus est Dominus. Qui sese subtrahit, displicet Deo. Nos autem non sumus, tales, non sumus apostatæ, ut subtrahamus nos a fide. Quasi dicat: non debemus apostatæ, ut subtrahamus nos, sed in melius proficere. In numero eorum se ponit Apostolus, ut magis suadeat; et non dicit esse tales, quales non vult eos esse, ut blanda monitione retineat eos, ne subtrahant se, quia nondum prorsus apostataverant, sed partim adhuc in fide manebant, id est partem fidei retinebant. Non sumus, inquit, subtractionis filii, id est apostasiæ ducentis nos in perditionem, sed sumus

filii Dei ducentis in acquisitionem animæ, hoc est, non sumus geniti ab apostasia trahente filios suos in perditionem, sed fides genuit nos, ducens in acquisitionem animæ, ut per fidem acquirat unusquisque nostram animam suam, non per subtractionem perdat. Nam sicut fide acquiritur anima, sic subtractione perditur. Acquiritur, ut libera possideatur: nobis in æterna beatitudine, ne per subtractionem transeat a nostra potestate, et fiat in tormentis possessio dæmonum.

CAPUT XI.

« Est autem fides sperandarum substantia rerum, argumentum non apparentium. In hac enim testimonium consecuti sunt senes. »

Quia isti multum duri erant ad fidem, ideo prolixum de fide tractatum facit Apostolus, ut eorum duritiam prorsus ad fidem inclinet, ostendens omnes sanctos, patres eorum, per fidem placuisse Deo. Dixi vos esse filios fidei. Quæ fides non est earum rerum quæ videntur, sed earum quæ non videntur, et quæ sperantur. Sed fides est substantia sperandarum rerum, id est fides est causa, quare res sperandæ quandoque subsistent in nobis, hoc est causa nobis est consecutionis æternarum rerum, quæ modo sunt sperandæ et desiderandæ, et proprie dicitur fides esse substantia sperandarum rerum, quoniam eis substat. Nam, sicut substantia substat formæ eam esse faciendo, sic fides sperandis rebus eas in nobis ponendo. Res sperandæ sunt, gloria, beatitudo, requies, æternitas, et huiusmodi; et istarum substantia dicitur esse fides, quia jam facit eas substare in corde nostro per certitudinem credulitatis. Facit eas substare, id est esse vel quasi sub aspectu nostro stare, et immobiles utpote æternas, permanere, et est eadem fides argumentum rerum non apparentium, id est certitudo rerum quæ non apparent, et (si quis de eis dubitet) probatio, sicut adhuc futura probatur resurrectio, quoniam ita credere prophetæ et apostoli, et cæteri sancti. Nam ea quando non apparent, vel præterita sunt, sicut de creatione mundi; vel præsentia, sicut de Domino Jesu sedente ad dexteram Patris: vel futura, sicut de die iudicii. Et horum omnium est argumentum, id est certitudo et probatio fides. Eorum ergo fides est argumentum, quæ apparere non possunt. Quæ enim sunt apparentia, fidem non habent, sed agnitionem. Nam, etsi dicuntur credi quæ videntur, sicut dicit unusquisque oculis suis se credidisse, non tamen ipsa esse fides, quæ in nobis ædificatur. Sed ex rebus quæ videntur, agitur in nobis ut ea credantur, quæ non videntur, sicut Thomas hominem vidit, et Deum credidit (Joan. xx). Est itaque fides substantia, id est fundamentum et firmitas et essentia sperandarum bonorum, et est argumentum non apparentium, id est certa et rationalis probatio invisibilium, ac præmonstratio futurorum. Argumentum enim dicitur esse ratio dubiæ rei faciens fidem. Vere fides est substantia sperandarum rerum, id est substare faciens eas in corde

A fidelium, ac per hoc justificans cor eorum, quia in hac fide consecuti sunt a Domino senes testimonium justitiæ, quia Deus ipse testis fuit puræ conscientiæ ipsorum, et testatus est eos esse justos, sicut et ad Noe dixit: « Te vidi justum coram me in generatione hac (Gen. vii), » et si per fidem consecuti sunt testimonium justitiæ, justitia vero causa et meritum est futurorum bonorum, tunc fides est substantia sperandarum rerum. Senes autem dixit antiquos patres, quia morum et fidei maturitatem habuere, et priscis temporibus fuerunt. Unde constat fidem non esse rem novam, nec deserendam, sed teneandam, quam tenuere antecessores, et per quam justificati sunt, et bonitatis suæ testimonium, quod quærebant, a Deo per eam consecuti sunt.

B « Fide intelligimus aptata esse sæcula verbo Dei, ut ex invisibilibus visibilia fierent (Gen. i). »

Probat quod fides est argumentum rerum non apparentium. Nam, fide intelligimus aptata esse tempora, etc. Vel quasi illi dicerent, quomodo rebus futuris possumus fidem adhibere, cum nullus eas videat, ostendit a simili, quia de futuris bene potest fides haberi, quoniam habetur de præteritis, quæ cum fierent, nemo vidit, et tamen creduntur esse facta. Non enim vidimus quod Deus mundum fecerit, et tamen credimus quia fecerit. Nam, cum non vidissemus eum hæc operantem, fide tamen intelligimus sæcula, id est omnia quæ sunt transitoria, esse aptata, id est apte qualitibus et formis assumptis composita verbo, et sapientia Dei, quæ Christus est, quoniam omnia per ipsum facta sunt (Joan. i). Et sic aptata, ut ex invisibilibus fierent visibilia, id est ex informibus elementis formata. Nam, antequam formæ darentur rebus, tenebræ erant et invisibilia elementa, sed in eorum separatione nata est lux. Informis enim materia, quam de nihilo fecit Deus, appellata est primo cælum et terra. Et dictum est « in principio fecit Deus cælum et terram (Gen. i), » non quia jam hoc erat, sed quia hoc esse poterat. Omnia enim elementa confuse tenebantur in illa informi materia, quæ chaos ab antiquis dicta est, et de qua formata sunt universa. Tuncque cedentibus tenebris, per exortum novæ lucis sunt facta visibilia, quæ prius videri non poterant. Vel ex invisibilibus facta sunt visibilia, id est ex intellectuali mundo visibilia. Invisibilis enim mundus in sapientia Dei erat, et ad cujus similitudinem factus est iste visibilis, et hæc omnia fide intelligimus ita esse facta.

C « Fide plurimam hostiam Abel quam Cain obtulit Deo (Gen. iv), per quam testimonium consecutus est esse justus, testimonium perhibente meritis ejus Deo (Matth. xxii), et per illam defunctus adhuc loquitur. »

Modo per partes ostendit, quomodo senes fide consecuti sunt testimonium suæ probitatis, et incipit a primo justo, qui propter fidem suam justus est inventus, et exemplum justitiæ ac fidei nobis est factus. vere senes in fide testimonium sunt adepti. Nam Abel primus consecutus est, qui fide, id est

per fidem *obtulit Deoplurimam*, id est pluris pretii, vel magis acceptabilem *hostiam quam frater ejus Cain*, per fidem consecutus est testimonium esse justus, id est quod esset justus, *Deo perhibente testimonium muneribus ejus*, dum ea se recipere demonstraret, mittens ignem de cœlo, qui ipsa consumeret. Nam, dum munera Cain non inflammavit, et munera Abel cœlitus igne misso combussit, præclare testimonium dedit eisdem muneribus, quod ea suscepisset, et quod oblatur eorum justus esset, ac fideliter obtulisset. Tale testimonium adeptus est per fidem dum viveret. *Et defunctus loquitur adhuc per illam*, id est monet omnes posteros exemplo suæ fidei, ut fidem cum bonis operibus habeant. Vel quia adhuc recitatur Scriptura, in qua Deus ad Cain dicit: « Vox sanguinis fratris tui clamat ad me de terra (Gen. iv), » Ille enim clamor sanguinis, est locutio defuncti. Vel defunctus loquitur, id est facit, nos loqui de se defuncto, qui est nobis materia loquendi, ut de ejus magna fide cæteris demus exemplum. Non enim mors exstinxit famam fidei, sed potius ubique divulgavit.

« Fide Henoch translatus est, ne videret mortem, et non inveniebatur, quia transtulit illum Deus (Gen. v; Eccli. xi). Ante translationem enim testimonium habuit placuisse Deo. Sine fide autem impossibile est placere Deo. Credere enim oportet accedentem ad Deum quia est, et inquirentibus se remunerator sit. »

Alterius senis exemplo habenda est fides. Nam *Henoch fide translatus est*, id est quia fidem habuit, et justitiam tenuit, translatus est in paradysum, unde Adam ejectus fuerat. Translatus est ideo, *ne videret mortem*, id est ut non solum non sentiret in seipso mortem, sed etiam in alio non videret eam, utpote remotus procul a terra morientium, et habitans in regione viventium. Nam non est ita translatus, ut in aliam terræ partem hominibus inhabitabilem poneretur; sed ita potius, ut ab omni societate mortalium separaretur. *Non enim inveniebatur, cum a suis per multa loca diligenter quæreretur*. Ideo scilicet non poterat inveniri, *quia transtulit illum Deus*, qui ipsum occultare potuit, ne a quoquam inveniretur. Posuit namque illum in alia secreta regione, ubi in magna carnis ac spiritus quiete viveret, donec circa finem sæculi cum Elia veniat reliquias Israel ad fidem convertere. Vere propter fidei meritum translatus est. Nam *ante translationem habuit testimonium placuisse Deo*, quia sicut Scriptura refert: Ambulavit Henoch cum Deo, et vixit Henoch postquam genuit Mathusalem, trecentis annis (Gen. v). Valde enim placuit Deo, qui tam sancte vixit, ut per viam justitiæ trecentis annis ambularet cum Deo. Et quia Deus tantum fecit eum ambulare secum in via rectitudinis, evidens illi testimonium perhibuit, quia sibi placeret. Ipse habuit testimonium, quia placeret Deo. Sed *sine fide impossibile est placere Deo*, id est nullus ad hoc un-

quam promoveri potest, ut Deo placeat, nisi meritum fidei præcedat. Patet ergo quia et Henoch per fidem placuit, atque per fidem transferri meruit. Fides enim ista quæ sic laudatur ab Apostolo, ea debet intelligi, quæ per charitatem operatur (Galat. v). Et vere nullus Deo placebit, nisi meritum fidei præmiserit, quia *accedentem ad Deum oportet credere*, id est quisquis Deo vult propinquare, ut ei proximus fiat, et ei placeat, necesse est ut primo fidem habeat, quoniam fides est primus gradus in quo mentem quis constituit, qui ad Deum accedere intendit. Credere eum oportet *quia Deus est*, id est quia ipse solus proprie habet esse, sicut Moysi loquitur: « Ego sum qui sum (Exod. viii). » Cætera enim verum esse non habent, quia sunt mutabilia. Sed ipse solus est, qui nunquam mutatur, sed semper est quod est; et quisquis varietatem suæ mutabilitatis superare cupit, ad Deum accedat, et credat quia ipse est incommutabilis, et sibi adherentes liberat a mutabilitate. Hoc oportet eum credere, et etiam qui sit *remunerator inquirentibus se*, id est illos in futuro muneribus donat, qui nunc per ea quæ faciunt, Deum solum inquirent, id est in cordis intentione quærent, hoc est nihil aliud quærit intentio cordis ipsorum nisi Deum ex operibus quæ foris ostendunt, et quod tales ab eo remunerentur, debet credere quisquis ad eum vult accedere.

« Fide Noe, accepto responso, de his quæ adhuc non videbantur, metuens, aptavit arcam in salutem domus suæ (Gen. vi), per quam damnavit mundum, et justitiæ quæ per fidem est, hæres est institutus. »

Refert Josephus Adam prædixisse exterminationem rerum omnium, unam ignis virtute, alteram vero aquarum multitudine fore venturam et inde forsitan Noe Deum consuluit, et responsum accepit quia diluvium venturum tunc esset, atque jussum est ei ut arcam construeret. Qui fideliter Deo credidit, et sibi imperata perfecit. Itaque *Noe, accepto divinitus responso fide*, id est per fidem metuens de his quæ adhuc non videbantur, id est de inundatione diluvii, quæ nondum perpendebatur, quia et aer adhuc serenus erat, nec aliquod hujus rei signum apparebat, *aptavit*, id est aptam composuit arcam in salutem domus suæ, id est ut per eam salvaret a diluvio suam uxorem et filios cum uxoribus eorum. In eo quod ponit, metuens de his quæ non videbantur, commendat fidem ejus, qui jam metuebat quæ nondum videbat, credens ea quæ Deus sibi prædixerat. Sic et nos omnia quæ Deus fore promittit aut minatur, indubitanter fore complenda credere debemus, et ejus mandatis in præsentia deservire, si exemplo sancti Noe volumus ad salutem pertinere. Cum enim nullum signum futuri interius videret, sola Dei voce audita credidit futuram mundi submersionem. Nos vero multa signa finis sæculi et futuri judicii videmus, et tamen raro invenitur qui de illo judicio nunc sic metuat, ut sanctus Noe de diluvio formi-

dabat. Aptavit arcam, *per quam damnavit mundum*, A quia tanto majus peccatum habuerunt homines, quanto majorem ejus in fabricanda arca instantiam videbant, et non credebant. Cum enim viderent eum per centum annos in constructione arcæ laborare, deberent futuros casus animadvertere, et ad pœnitentiam confugere. Quod, quia non fecere, gravio-rem sibi damnationem acquisiere, et hæc est prima laus fidei ejus, quia mundum incredulum damnavit : *et institutus est a Deo hæres justitiæ, quæ est per fidem*, et post diluvium hæreditario jure obtinuit religiosos mores, quos fides generat : et quos antecessores ejus qui justii fuerant, habuerant. Idcirco enim factum erat diluvium, ut finis imponeretur vitiiis, et justitia quam Abel et Henoch et cæteri sancti tenuerant, permaneret, et hujus hæres factus est beatus Noe. Et ita consecutus est in fide testimonium, quia justitiam fidei hæreditavit.

« Fide qui vocatur Abraham, obedivit in locum exire, quem accepturus erat hæreditatem, et exiit, nesciens quo iret (*Gen. xii, xiii*). Fide demoratus est in terra repromissionis tanquam in aliena, in casulis habitando cum Isaac et Jacob, cohæredibus repromissionis ejusdem. Expectabat enim fundamenta habentem civitatem, cujus artifex et conditor Deus. »

Adhuc per exemplum ostendit quod fides sit habenda, et quod in ea senes testimonium sint adepti, quoniam, ille qui prius vocabatur Abram, et post a Deo vocatus est Abraham (*Gen. xvii, 5*), dat nobis exemplum fidei. Nam fides causa fuit augmentationis vocabull ejus, ut qui prius dicebatur Abram, id est pater excelsus, post, accipiens promissionem quod omnes gentes fidem ejus essent secuturæ, et patrem eum habituræ, vocaretur Abraham (*Gen. xvii*), id est pater videns multitudinem, quia factus in fide pater credentium, vidit multitudinem omnium gentium venturam ad suam fidem. Et ille, qui hujusmodi causa vocatur Abraham, fide obedivit Deo, non enim obediret, nisi crederet. Obedivit dicenti : « Exi de te terra tua et de cognatione tua, et veni in terram quam monstravero tibi (*Gen. xii*). » Scilicet obedivit exire, id est obediens exivit a terra patrum suorum, et venit in locum illum, quem accepturus erat, id est in terram Chanaan, quam erat habiturus in hæreditatem in filiis suis, non in seipso. Et, audito Dei præcepto, exiit mox de terra sua, nesciens quo iret, sed tantum obedire cupiens, et credens quod esset a Deo consecuturus longe meliora, quam relinquebat in patria. Si enim certum locum sciret ad quem tendere posset, qui certum patriæ locum deserebat, non tam admirandæ fidei esset. Et si saltem post inveniret vacuum locum, ad quem docebatur, ut possidere terram illam posset, non ita commendaretur fides ejus. Sed invenit locum Chananæis plenum, et inter eos ut advena mansit. Et hoc est quod sequitur : *Fide demoratus est in repromissionis*, id est quæ sibi non semel, sed

A multoties promissa est, non ut possessor, sed ut advena, tanquam in aliena terra, non tanquam in propria. Fide melioris terræ moratus est ut peregrinus in ea, nec rediit ad paternum solum, sed obedire volens, mansit ubi jussum ei fuerat, non in domibus pomposis et magnis, sed in casulis et tuguriis habitando. Non enim magna domorum ædificia construebat, sed parva illi sufficiebant tuguria, quoniam mens ejus alio tendebat, et ipse semper exsulem se credebat, in quocumque loco præsentis mundi positus esset. Sic habitavit cum Isaac et Jacob, quia, sicut ex Genesi colligitur, Jacob quindecim annorum erat quando mortuus est Abraham (*Gen. xxv*). Et hi duo, scilicet Isaac et Jacob, cohæredes erant ejusdem repromissionis, quia ad ipsos fecit Deus eandem repromissionem terræ Chanaan, in qua cœlestis hæreditas figurabatur. Et quare velut pauper et advena morabatur in casulis Abraham cum filio et nepote, nec magnas domos ædificabat ? Quia expectabat civitatem, id est cœlestem patriam Jerusalem supernam, habentem fundamenta, id est stabilitatem diversorum præmiorum, quæ nunquam deficient vel diruentur, cujus civitatis artifex et conditor Deus est, quia ipse arte suæ sapientiæ illam dictavit, et post per rei evidentiam condidit. Hoc est, Abraham ita vilis et advena in casulis habitare sustinuit, quia non illam terram optavit, sed æternam civitatem, quam ipse Deus et non homo fecit ac condidit, dari sibi a Deo expectavit.

C « Fide et ipsa Sara sterilis virtutem in conceptionem seminis accepit, etiam præter tempus ætatis, quoniam fidelem credidit esse eum qui repromiserat (*Gen. xvii, xviii, xxi*). Propter quod et ab uno orti sunt, et hoc emortuo, tanquam sidera cœli in multitudinem, et sicut arena quæ est ad oram maris, innumerabilis. Juxta fidem defuncti sunt omnes isti, non acceptis repromissionibus, sed a longe eas aspicientes et salutantes, et confortantes quia peregrini et hospites sunt super terram (*Psal. xxxviii*). Qui enim hæc dicunt, significant se patriam inquirere. Etsi quidem illius meminissent, de qua exierunt, habebant utique tempus revertendi. Nunc autem meliorem appetunt, id est cœlestem. Ideo non confunditur Deus, vocari Deus eorum. Paravit enim illis civitatem. »

Non solum Abraham fide probatus est, sed et Sara, quia et ipsa, id est in propria persona, non in vicaria, accepit fide virtutem in conceptionem seminis, id est facta est virtuosa ut conciperet, etiam præter tempus ætatis, id est quæ virtutem concipiendi in frigido sanguine jam diu perdidit; et hoc decrepita meruit, cum a juventute semper fuisset sterilis. Et licet ista duo impossibilia viderentur, id est sterilitas et longæva senectus, tamen et ipsa Sara quæ hæc habebat accepit virtutem in conceptionem seminis id est ut posset cum semine suo capere viribus caloris semen viri : quod fides,

non natura operata est, quoniam fidelem credidit eum esse qui promiserat et repromiserat, id est Deum in promissionibus suis veracem credidit, et omnia illi possibilis esse non dubitavit. Prius enim risit, etsi ex gaudio, non tamen plena fide, sed post verbum Domini solidata est in fide (*Gen. xviii*). Propter quod, id est ideo quia Abraham credidit, et Sara Deum fidelem non dubitavit, et orti sunt multi ab uno patre; quod mirum fuit, quia si tot filii a pluribus patribus orti fuissent, non esset tam mirum. Sed quia tot ab uno orti sunt, valde mirandum est; et (quod est mirabilius!) hoc emortuo, id est ex toto secundum naturam senectutis mortuo, quoniam viscera illius frigida et mortua erant, nec semen emittere poterant. Emortuum namque non ad omnia sed ad aliquid; hoc est ad generandum intelligere debemus eum fuisse. Si enim ad omnia mortuus esset, non jam senex, sed defunctus esset. Et de tali orta est innumera multitudo. Vel ab uno utero Saræ orti sunt. Orti sunt ab uno et hoc emortuo. Emortuo, quantum ad seniore[m] maritum. Si enim femina ita sit provecioris ætatis, ut ei solita mulierum adhuc fluant, de juvene parere potest, de seniore non potest: quamvis adhuc possit ille senior, sed de adolescentula gignere sicut Abraham post mortem Saræ de Cethura potuit, quia vidam ejus invenit ætatem. Sed Sara sterilis erat, et cruore menstruo jam destituta, propter quod jam parere non posset, etiam si sterilis non fuisset. Verum contra hæc omnia operata est fides, ut sterilis et emortuus uterus Saræ conciperet ex seniore emortuo. Et sic non a pluribus, sed ab uno: et hoc non juvene, sed emortuo senectute, ut magis esset miraculum, orti sunt filii, procedentes in multitudinem tanquam sidera cæli, id est qui luce sanctitatis et sui multitudine comparantur sideribus, quia et clari sunt et innumeri; et sicut arena quæ est ad oram maris innumerabilis, id est qui gravidine et infructuositate atque instabilitate et multitudine comparantur arenæ. Quid vero per mare, nisi gentilitas designatur? Et quid per oram maris, nisi vicinus ritus gentilitatis? Quidam vero Judæorum instabiles erant ad oram maris, et non in ipso mari, dum adhærerent ritui gentilium, perverse vivendo et idola colendo, nec tamen gentiles essent, quia circumcisi erant. Isti non ex fide Abraham vel Saræ tales erant, sed ex proprio vitio. Non enim fides meruit tales filios habere, sed ibi postquam fuerant ab eo geniti, degenerabant ab ejus fide et probitate per nequitiam suam. Nihil ergo mali promeruit unquam fides. Quod autem subditur, juxta fidem defuncti sunt omnes isti, de illis solummodo qui stellis comparantur, intelligendum est, nec solum de filiis, sed de ipsis patriarchis. Nam omnes isti non ad horam habuere fidem, sed semper eam usque in fidem tenuerunt et semper juxta eam vivebant, ac juxta eam defuncti sunt: quia, et dum viverent, semper suos mores ut fides exigit, in religione duxerunt: et dum morerentur, promissiones divinas

expectaverunt, sicut Jacob moriens dicebat: «Salutare tuum expectabo, Domine (*Gen. xlix*).» Isti omnes non elongati a fide per dubitationem vel per malam operationem, sed, juxta eam persistentes, defuncti sunt, non acceptis in terra repromissionibus: et ideo expectabant eas in cælo, quia Deum qui promiserat, sciebant esse fidelem. Credebant enim ipsas promissiones non esse factas de terrestribus, sed promissa sperabant de cælestibus. Et in hac fide moriebantur. Per hæc omnia monet Apostolus Hebræos, ut inconcussam fidem exemplo patrum teneant, si se filios eorum recognoscunt. Nondum acceptis repromissionibus moriebantur sed aspicientes a longe eas et salutantes, id est oculis fidei considerantes, quia post mortem eas erant adepturi, non tamen protinus, sed post longa tempora in adventu Christi, qui regna cælorum paraturus erat. Descendebant tunc enim omnes justi in infernum, ibique quiescentes, expectabant Redemptoris adventum. Ex hoc est quod in obitu suo aspiciant non de prope, sed de longe supernas promissiones, quia desiderium suæ considerationis in longum ad eas percipiendas extendebant, et salutabant eas, id est multum optabant in quibus salutem consequi credebant. Vel salutabant eas, id est applaudebant eis hilares, et est dictum ad similitudinem navigantium, qui longe visis civitatibus ad quas tendunt, salutant præ gaudio; et quia promissiones cælestis patriæ post mortem expectabant, ideo erant confidentes quia peregrini sunt super terram, id est non in propria terra degentes. Et quia possent esse peregrini, sed tamen diu permanentes, ut excludatur diuturna mansio, subditur, et hospites. Hospes enim dicitur ille, qui statim recedit, nec diu manere quærit; peregrinus vero, qui in propria terra non moratur, etsi diu in aliena maneat. Et ita per hoc quod se dicebant peregrinos, ostenditur quia æstimabant se in alieno degere: per hoc quod se fatebantur hospites, apparet quia credebant se cito recessuros, et horam mortis quotidie suspectam habebant. Nam quod se peregrinos et hospites fatebantur, non solum ex Apostoli sententia, sed et ex verbis eorum patet. Dixit enim Jacob Pharaoni: «Dies peregrinationis vitæ meæ centum triginta annorum sunt, pravi et mali, et non pervenerunt usque ad diem patrum meorum, quibus peregrinati sunt (*Gen. xlvii*).» Sed ne quis patriarchas ideo peregrinantes fuisse dictos æstimet, quia in terra promissionis velut in aliena morati sunt, quoniam nec ipsi nec filii eorum adhuc illam in hæreditatem perceperant, attendat quid David qui regnum in ea tenebat ait Domino: «Quoniam advena ego sum apud te, et peregrinus sicut omnes patres mei (*Psal. xxxviii*).» Hæc itaque sanctorum patrum peregrinatio ista erat, de qua dicit Apostolus: «Quandiu sumus in corpore, peregrinamur a Domino (*II Cor. v*).» Hæc ratione dicebant peregrinos et hospites, quandiu super terram erant, id est donec corpora eorum sub terra sepelirentur, et animæ ad extra migrarent. Vel super

terram existentes, quia terrena conculcabant. Unde A constat quod exsules se credebant et patriam inquirebant, ex qua cives jam erant. *Qui enim hæc dicunt*, scilicet qui se fatentur peregrinos et hospites, hæc dicendo, *significant se inquirere patriam*. Ad hoc confitebantur se esse peregrinos, ut significarent se in omnibus quæ agebant, veram patriam quærere, et ad eam pio gemitu suspirare. Et ne quis putaret quod illam de qua exierant, quærerent, subditur : Et siquidem illius et cætera. Quasi dicitur : Ipsi quærerent patriam. *Et si illius quidem patriæ meminissent, de qua exierunt*, id est si recogitarent terram suæ nativitalis et illam desiderarent, ac se peregrinos respectu illius dicerent, *habebant utique tempus et spatium revertendi ad eam*, et nullus eis obsistebat in redeundo. Sed, quia illuc non redierunt, patet quod aliam patriam quæsierunt. Ad illam redissent, si illam quærerent. *Nunc autem cum constat quod illam non quæsierunt*, apparet quia *appetunt*, id est appetierunt *melioerem patriam*, id est celestem. Ideo scilicet quia non in terra cor posuerant, sed a J supernam patriam totis desideriis anhelabant, *non confunditur Deus*, id est non erubescit *vocari Deus eorum*, dum dicit : « Ego sum Deus Abraham, Deus Isaac, Deus Jacob, hoc mihi nomen est in æternum (Exod. iii). » Erubescere enim potest aliquis dominus cum dicitur inutilem servum habere. Sed, si bonum servum habuerit, per illum honoratur. Si Deus vocaretur Deus Cain, sicut vocatur Deus Abraham, non honor, sed dedecus esset ei ex tali servo. Sed, quia tres isti patriarchæ optimi servi fuerunt, idcirco Deus ex quadam familiaritate et privilegio voluit Deus eorum vocari, tanquam istorum solorum esset Deus, qui Deus est universæ creaturæ : non frustra utique tantum eis tribuens honorem, sed quia noverat in eis sinceram præcipuamque charitatem, et quia in ipsis tribus consummavit mirabile sacramentum futuri populi. Per liberas enim genuerunt et in libertatem, ut per Saram Isaac; et in servitatem ut per Rebeccam Esau, cui dictum est : « Eris servus fratris tui (Gen. xxvii); » et per ancillas non solum in servitatem, sicut Ismaelem per Agar, sed etiam in libertatem, sicut Dan ac Nephthalim per Balam, et Gad, ac Aser per Zelpham (Gen. xxx). Ita et in populo Dei per spiri- D tales viros nascuntur ad fidem non solum in libertatem laudabilem, qui eos imitantur, quibus dicitur : « Imitatores mei estote sicut et ego Christi (I Cor. iv, et xi), » sed etiam in damnabilem servitatem, sicut per Philippum Simon Magus (Act. viii); et per carnales nascuntur non solum in damnabilem servitatem qui eos imitantur, sed in laudabilem libertatem, quibus dicitur : « Quæ dicunt, facite; quæ autem faciunt, facere nolite (Matth. xxiii). » Hoc sacramentum quisquis in populo Dei prudenter agnoverit, unitatem spiritus in vinculo pacis usque in finem, quibusdam cohærendo, quosdam tolerando, custodit. Propter hujusmodi causas voluit Deus vocari Deus istorum patriarcharum, in quo-

rum posteritate præmonstrata est omnis propagatio bonorum et malorum qui sunt in Ecclesia. Nec mirum si *Deus eorum vocari dignatur*, qui Deus est angelorum, quia *paravit illis civitatem*, id est celestem Jerusalem, in qua illos exciperet, et non erubescit de illis quia concives angelorum sunt. In illis enim honoratur, sicut e contrario de malis blasphematur (Isai. lii; Jer. xxxvi).

« Fide obtulit Abraham Isaac cum tentaretur, et unigenitum offerrebat (Gen. xxii), in quo susceptus rat repositiones, ad quem dictum est : Quia in Isaac vocabitur tibi semen (Gen. xxi), arbitrans quia et a mortuis suscitare potens est Deus. Unde eum et in parabolam accepit. »

Rursus exemplo Abrahæ est habenda fides, quia ipse tantam fidem habuit, ut et filium offerre paratus esset, et tamen promissionem de semine in eo sibi divinitus factam non dubitaret esse veram. Non enim hæsitavit quod sibi reddi poterat immolatus, qui dari potuit non speratus. Tentabat eum Deus, id est ipse, qui eum noverat, ostendebat quis esset ad exemplum aliorum. « Qui fide accensus, obtulit super altare Isaac quem plus diligebat; non Ismaelem, qui ex ancilla natus erat. Et quem ex libera conjuge unigenitum habebat, hunc offerrebat, in quo etiam promissiones posteritatis susceperat, cum ei diceretur, quia in Isaac vocabitur tibi semen (ibid.). Licet enim Isaac esset vel unigenitus, nec alium haberet, per quem adimplerentur promissiones seminis, in neutro tamen dubitans, filium obtulit, nec de promissionibus dubitavit; ad quem dictum est a Domino, non ad alium ut diceret ei, id est non per alium mandavit, sed per seipsum Dominus dixit ei, quia in Isaac vocabitur tibi semen, id est in posteritate Isaac erit vocabulum seminis tui, quia vocabuntur filii tui, qui ex Isaac descendunt. Ismael namque et Esau et filii Cethuræ cum ex Abrahæ stirpe sint, non tamen in filios reputantur. Ipse Deus in solo Isaac, promisit Abrahæ posteritatem. Esset enim minus authentica promissio, si alii Deus hanc loqueretur, et ille post nuntiaret Abrahæ. Qui tamen jussus offerre Isaac, non sibi fecit quæstionem quasi de contrariis et sibi adversantibus verbis Dei, ut diceret : Promiseras mihi in Isaac semen, et nunc Isaac jubes occidi? Sed erat in corde ejus semper fides inconcussa et nullo modo deficiens. Cogitavit enim quia qui dederat ut ille, cum non esset, nasceretur de senibus, poterat etiam de morte reparare. Et hoc est quod Apostolus subdit : Arbitrans quia et a mortuis suscitare potens est Deus, id est non solum ab immolatione potest illum crueri ne occidatur, sed et post occisionem vitæ restituere. Credebat enim quod vel Deus illum ab immolatione eriperet, vel immolatum protinus suscitaret, sicque promissionem de futuro semine sibi in eo completeret. Quod in verbo ejus patenter ostenditur, cum dicit pueris : « Expectate hic cum asino, ego et puer illuc usque properantes, postquam adorave-

rimus, revertetur ad vos (*Gen. xxii*). » Non enim A dixit: Revertar ego ad vos; sed, Revertetur ego et puer. Unde, id est quia tam firmiter in omnibus credidit, accepit eum ab altari illæsum, quia immolatus non est. Accepit eum et in parabolam, id est in similitudinem Christi, cujus divinitas impassibilis mansit, licet humanitas passionem sustinuerit. Abraham enim filium unicum ducens ad immolandum, significavit Deum patrem, qui « proprio Filio non pepercit, sed pro nobis omnibus tradidit illum (*Rom. viii*). » Isaac sibi ligna ad victimæ locum, quibus fuerat imponendus ipse, portavit, sic et Christus crucem suam. Isaac ligatus est et altari superpositus, quia Christus quoque ligatus est in passione et cruci impositus. Isaac de altari abscissus illæsus, sed aries pro eo est immolatus, quia, sicut diximus, divinitas Christi mansit impassibilis, quæ per Isaac designata est, sed humanitas ejus, quam figuravit aries, morti subjacuit. Qui scilicet aries, inter vepres hærebat cornibus, quia Christus inter iniquos et peccatores, qui per vepres signati sunt, ita crucifixus est, ut manus ejus translixæ clavis adhærerent cornibus crucis, sicut scriptum est: « Cornua in manibus ejus (*Abac. iii*). » Similiter et cætera de immolatione Isaac ad Christi passionem mystice sunt referenda.

« Fide et de futuris benedixit Isaac Jacob et Esau. « Fide Jacob moriens, singulos filiorum Joseph benedixit, et adoravit fastigium virgæ ejus. Fide « Joseph moriens, de profectioe filiorum Israel « memoratus est, et de ossibus suis mandavit « (*Gen. xxvii, xlviii, xlix*). »

Abraham sic probatus est in fide. Isaac etiam fide benedixit de futuris filios suos Jacob et Esau, id est benedictione imprecatus est illis bona, in futurum credens quod ita illis ventura forent. Nam Jacob benedicendo dixit: « Det tibi Deus de rore cæli et de pinguedine terræ abundantiam frumenti et vini (*Gen. xxvii*), etc. » Et rursus Esau promisit: « In pinguedine terræ et in rore cæli desuper erit benedictio tua (*ibid.*), etc. » Nisi ergo sic crederet hæc illis ventura, nequaquam solemnem benedictionem promitteret ea. Jacob quoque moriens cum alia omnia oblivioni traderet, fide benedixit duos filios Joseph, Ephraim et Manassen, dans cuique propriam benedictionem quia credidit eis profuturum, et adoravit fastigium virgæ ejus. Hoc in veteri translatione ibi reperitur, ubi nos in novâ legimus, quia adoravit Israel Deum, conversus ad lectuli caput. Sanctus enim et Deo deditus vir, oppressus senectute, ita positum habebat lectulum, ut ipse jacentis habitus absque difficultate ad orationem esset. Sed secundum aliam translationem adoravit super caput virgæ ejus, id est filii sui, vel super cacumen virgæ ejus, et super caput ejusdem virgæ quam tenebat, inclinavit se ad Deum adorandum. Sed Apostolus sensum nostrum ad intelligentiam mysticam trahens, non dicit quod ille adorave-

rit super cacumen, sed potius ipsum cacumen et fastigium virgæ ejus. Virga enim Joseph quam ipse velut sceptrum gerebat ad designationem potestatis suæ, qua dominabatur in tota Ægypto, virgam potentiae Christi præfigurabat, qua ipse regnaturus erat in toto mundo. Et per Joseph Christus præsignabatur, per fastigium autem virgæ ejus, celsitudo regalis potentiae Christi, de qua dictum est: « Virga directionis virga regni tui (*Psal. xlv*). » Recta itaque fide adoravit fastigium virgæ filii sui, significans quia se tota devotione substernebat sublimes imperio Christi, quem ex sua carne nasciturum prævidebat. Nam si in Joseph Christum non intellexisset, non esset dicenda fides, si fastigium virgæ illius adorasset. Sed et ipse Joseph moriens, fide memoratus est de profectioe filiorum Israel, dicens: « Post mortem meam visitabit vos Dens, et ascendere faciet de terra ista ad terram quam juravit Abraham, Isaac et Jacob (*Gen. l*). » Hoc a patre suo audierat, et nunc moriens fide memorabat. Nisi enim ita futurum crederet, non memoraret. Et de ossibus suis mandavit, dicens: « Asportate vobiscum ossa mea de loco isto (*ibid.*). » Et hoc quoque fide mandavit, quoniam credebatur Christum in terra promissionis nasciturum, et post passionem resurrecturum, et cum eo resuscitari cujus inter cæteros sanctos, qui in ejus passione resuscitandi erant.

« Fide Moyses natus occultatus est mensibus « tribus a parentibus suis, eo quod vidissent elegantem infantem, et non timuerunt regis edictum (*Exod. ii*). »

Adhuc exemplo senum habenda est fides, quoniam Moyses natus occultatus est fide parentum tribus mensibus, quia videbant elegantem parvulum. Credebant enim Deum facturum aliquid magni per eum, cum esset adeo elegantis formæ. Quoniam ab ortu fuit illi infusa magna gratia venustatis, non natura, sed dono Dei. Et ideo non timuerunt edictum regis (*ibid.*), qui jusserat omnes masculos infantes Hebræorum mox ut nati essent interfici, sed fide confisi in Deo servaverunt puerum.

« Fide Moyses grandis factus, negavit se esse filium filiae Pharaonis, magis eligens affligi cum populo Dei, quam temporalis peccati habere jucunditatem, majores divitias æstimans thesauro Ægyptiorum improprium Christi. Aspiciebat enim in remunerationem. Fide reliquit Ægyptum, non veritus animositatem regis. Invisibilem enim tanquam videns sustinuit. Fide celebravit pascha et sanguinis effusionem (*Exod. xi*), ne qui vastabat primitiva, tangeret eos. Fide transierunt mare Rubrum tanquam per aridam terram, quod experti Ægyptii, devorati sunt (*Exod. xiv*). »

Adhuc exempla fidei prælucent in Moyses, qui, cum esset puer, adoptatus est in filium a filia Pharaonis, quæ juxta Josephum vocabatur Thermut, nec habebat legitimam prolem. Et ideo volebat ut Moyses post patrem suum, succederet in regnum. Moyses vero cum excrevisset, fide succensus, et re-

gnam Ægypti despiciens, *negavit*, juxta Apostolum *se esse filium filiae Pharaonis*, et rejecit regiam dignitatem, *magis*, id est potius *eligens affligi* et injuriis subjici *cum populo Dei*, qui serviebat in luto et latere, *quam habere jucunditatem temporalis ac transitorii peccati*, hoc est fide suadente maluit et super omnia elegit affligi propter Deum ad horam, quam jucunditatem eorum, in quibus erat peccatum et quæ cito transeunt, vivere. Peccatum enim putavit, se letari in aula, dum fratres sui affligerentur. Non tamen in libris Moysi refertur, quod negaverit se filium filiae Pharaonis, sed eo tempore id fecisse non dubitatur, quo fecit et quod ibi legimus, et postquam creverat, egressus est ad fratres suos filios Israel, et vidit afflictionem eorum; ipse dico, *æstimans improprium Christi esse divitias majores thesauro Ægyptiorum*. Improperium Christi, id est quod pateretur pro Christo, vel quod significaret improperium inferendum Christo post longa sæcula, vel quod sustinuit a suis, sicut et Christus post a suis. Hoc improperium magis elegit ipse, et minus credidit operibus Ægyptiorum, quia per id æternis divitiis se locupletari credebatur, si pro Christo contumelias et opprobria sustineret. Nam *aspiciebat plena fide in remunerationem æternam*, quam Christus pro se patientibus erat daturus: hoc est idcirco elegit esse pauper et despicibilis temporaliter apud homines, quia sursum cor habebat, et de æternis honoribus cogitabat, quos se per paupertatem et patientiam adepturum sperabat. Et etiam *fide reliquit Ægyptum*, educens inde filios Israel, quia credebatur quod bene evaderent, *non veritus animositatem regis*, qui contra eum indignationem magnam conceperat, sed de auxilio Dei confidens, subtraxit a jugo illius populum Israel. Et vere fide non veritus est regem. Nam *sustinuit*, id est non corde fractus, sed ut vere fortis sustinuit, id est sursum in suæ mentis constantia tenuit *invisibilem*, id est Deum quem non videbat, *tanquam videns*, id est ac si eum præsentem ibi cernebat. Miles enim accuratius pugnare solet præsentem rege quam absente. Sed Moyses pro Deo, quem non videbat, ita pugnavit, et ita eum *sustinuit*, id est auxilium ejus expectavit, ac si corporeis oculis eum coram se videret præsentem et adjuvantem. Unde et ei nil ore promenti dictum est a Domino: « Quid clamas ad me? (Exod. xiv.) » Clamabat enim corde, qui tacebat ore, quia piis desideriis ipse auxilium majestatis implorabat et expectabat. Et antequam reliquisset Ægyptum, *celebravit pascha*, et hoc fecit *fide*, id est celebrem et festum duxit transitum, vel potius noctem egit pro pascha, id est pro transitu de Ægypto, quia non dubitavit quin revera transituri essent. Et ideo fide lætificatus, antequam exirent, pro transitu suo celebre festum egit. Celebravit enim pascha, id est celebrem et communem fecit agni comestionem, quæ vocabatur Pascha, id est transitus, quia fuit causa transitus eorum de servitute in libertatem, et sanguinis effusionem fide celebravit, ne an-

gelus qui vastabat primitiva, id est qui interficiebat primogenita Ægyptiorum, tangeret eos, quia pro certo credebatur, quod angelus percussor non ingrederetur domos illas, quæ haberent in superliminari et in utroque poste sanguinem agni. Fide etiam omnes filii Israel *transierunt mare Rubrum* ita illæsi, *tanquam si irent per aridam et siccam terram*, quia crediderunt Deum ita eos posse educere per mare, sicut per siccam. Quod scilicet transire mare experti et volentes facere Ægyptii, qui nec partem fidei habebant, *devorati sunt ab aquis*, id est omnino absorpti. Vel experti utrum fide, an casu fieret ille transitus, devorati sunt gurgitibus. Si enim casu transirent Israelitæ, similem transitum haberent Ægyptii. Sed quia talem viam illis fides paraverat, idcirco infideles in ea perierunt.

« Fide muri Jericho corruerunt circuitu dierum septem (Josue II, vi). Fide Rahab meretrix non periit cum incredulis, excipiens exploratores cum pace. »

Non solum mare divisit fides, sed et muros Jericho præcipitavit. Nam Dominus jusserat: Circuite urbem cuncti bellatores semel per diem. Sic facietis sex diebus. Septimo autem die sacerdotes tollent septem buccinas, et præcedent arcam fœderis, septiesque circuitibus civitatem, et sacerdotes clangent buccinis. Cumque insonuerit vox tubæ longior atque concisior, et in auribus vestris increpaverit, conclamabit omnis populus vociferatione maxima, et muri funditus corruent civitatis, ingredienturque singuli per locum contra quem steterint. Et filii Israel huic divinæ jussioni ac promissionibus fidem adhibentes, fecerunt ut sibi fuerat imperatum, et tali ordine ceperunt civitatem. Sed in eadem urbe erat Rahab, quæ fide meruit non perire cum incredulis civibus. Omnes enim gladio perierunt, præter eos qui erant in domo ejus. Exceperat enim duos exploratores cum pace, quos Josue miserat, et absconderat eos, ne rex Jericho inveniret et occideret illos, quoniam visis illis credidit quod filii Israel per Dei potentiam essent habituri terram, sic enim ait: « Novi quod tradiderit vobis Dominus terram (Josue II). » Etenim irrui in nos terror vester, et elanguerunt omnes habitatores terræ. Dominus enim Deus vester, ipse est Deus in celo sursum et in terra deorsum. Et hac fide servavit exploratores, et per fenestram suæ domus latenter emisit, ideoque pereuntibus postmodum cæteris, ipsa cum omni cognatione sua vixit in populo Israel. Et antea quidem fuerat meretrix, sed populo Dei sociata, legitime vixit, ita ut et in genealogia Salvatoris poneretur (Matth. I). Et quia etiam meretrix fide justificari et salvari meruit, erubescat omnis vir esse infidelis, ne per infidelitatem omnibus peccatis oneretur et pereat.

« Et quid adhuc dicam? deficiet enim me tempus enarrantem de Gedeon, Barac, Samson, Jephthæ, David, Samuel, et prophetis qui per fidem vice-

« runt regna, operati sunt justitiam, adepti sunt re-
« promissiones. »

Multi, inquit, exempla veterum de habenda fide vobis attuli, et adhuc plura vobis afferre possem. Sed *quid adhuc dicam*, id est quod factum cujus personæ amplius in exemplum fidei proferam? Tot enim exempla protuli, ut omnibus sufficere debeant ad fidem. Et si proferrem aliâ omnia quæ possent proferri, fastidium magis quam utilitatem fortasse generarent. Nec in his amplius immorari debeo, quia, cum determinassem tempus, in quo mihi vobis scribere liceat, si illud consumpsero, exempla fidei veterum proferendo, infra præscriptum tempus alia quæ vobis scribere debeo, perficere non potero. Et hoc est quod subditur: *Deficiet enim me tempus*. Quasi dicat: Non est utile ut omnia quæ possem, exempla supponam, quia me enarrantem, id est evidenter et singula narrantem deficiet, id est deseret tempus, quod vobis ad scribendum determinavi, nec poterunt in eo explicari omnia quæ vobis scribere statui, hoc est temporis brevitatis qua sum impeditus circa alia, non sinit ut plenariam istorum enarrationem faciam. Vel tempus vitæ meæ deficiet, id est deseret me, si voluero omnia persequi. Et ideo supersedendum est, quia *deficiet tempus me enarrantem*, id est ex toto narrantem, vel extra et aperte narrantem *de Gedeon, Barac, Samson, Jephthe, David, Samuel, et prophetis*. Hoc est si omnia fortia facta eorum et aliorum quæ ipsi per fidem operati sunt, voluero in tam brevi tempore hujus epistolæ vel vitæ meæ explicare, hoc non potero. Grandia sunt enim quæ fecerunt isti. Qui devicerunt, id est deorsum ponentes et sibi subjicientes *vicarunt regna*, id est reges cum omnibus sibi subditis. Et hoc non per suas vires, sed *per fidem* qua Deo credebant, et in Deo confidebant. Ac per eandem fidem, qua credebant honorum operum remuneratorem, *operati sunt justitiam*, id est opera justitiæ fecerunt. Et per ipsam fidem in qua perseveraverunt, *adepti sunt repromissiones*, id est remunerationes supernæ beatitudinis, quas Deus in Scripturis promisit ac repromisit operariis justitiæ, non quod statim quando moriebantur, acciperent illas, quia nondum Christus eis viam fecerat, et erant in tenebris causa originalis peccati, sed quia cum Apostolus hæc scriberet, Christo passo, jam habebant repromissiones secundum animam. Ipse namque eos ab inferis abstraxerat et singulis stolis induerat (*Apoc. vi*). Vel adepti sunt repromissiones temporalium bonorum, quas lex observatoribus suis fecerat; quia non solum vitam æternam, sed et temporales divitias, et inimicorum subjectiones propter observantiam legis adepti esse dicuntur, Gedeon, Barac et cæteri (*Judic. vi*). Gedeon namque per fidem devicit regna, quia jubente ac permittente Deo in trecentis viris, quos non ferro, sed lagenis et lampadibus armaverat, superavit Madianitas et Amalecitas et alios orientales populos, quorum multitudo centum triginta quinque millia

virorum bellatorum habebat, et reges eorum cepit et interfecit. Et ipse operatus est justitiam, quia destruxit aram Baal, et ædificavit altare Domino, atque liberavit populum Israel. Et adeptus est repromissiones vitæ, quoniam mortuus est in senectute bona. Barac quoque per fidem devicit regna, cui Deus per Deborah prophetissam dixit: « Vade et duc exercitum in montem Tabor, tollesque tecum decem millia pugnatorum de filiis Nephtholim et de filiis Zabulon. Ego adducam ad te in loco torrentis Cison Sisaram principem exercitus Jabin, et currus ejus atque omnem multitudinem, et tradam eos in manu tua (*Judic. iv, v*). » Fecitque Barac ut Dominus jusserrat, et ascendit in montem. Quod cum audisset Sisara, congregavit nongentos falcatos currus, omnemque exercitum de Aroseth gentium ad torrentem Cison. Descendit atque Barac de monte Thabor, et decem millia pugnatorum cum eo. Perterruitque dominus Sisaram et omnes currus ejus, universamque multitudinem in ore gladii ad conspectum Barac, in tantum ut Sisara de curru desiliens, pedibus fugeret, et Barac persequeretur fugientes currus et exercitum usque ad Aroseth gentium, et omnis hostium multitudo usque ad interneccionem caderet. Humiliavitque Deus in die illo Jabin regem Chanaan, donec deleverent eum. Sic Barac per fidem devicit regna. Qui et justitiam operatus est in hoc ipso, quod liberavit filios Israel ab ipso rege, qui per viginti annos vehementer oppresserat eos: nec sibi victoriam arrogavit, sed Deo per illa canticum cecinit. Unde et supernas repromissiones adipisci dignus fuit. Sed et Samson per fidem devicit regna (*Judic. xiii, xvi*), quia cum esset unus vir, sed haberet in se Spiritum Domini, qui confortabat eum, iugentes strages Philistæorum multoties dedit, nullusque eorum fortitudinem habere poterat ut illi resisteret. Justitiam quoque operatus est, quia judicavit Israel viginti annis, et Philistæos oppressores eorum afflixit, et Nazaræus, id est consecratus fuit ex utero matris suæ, vinum et siceram non bibens, et nihil immundum comedens (*Luc. ii*). In fine tamen quod se cum hostibus oppressit, non aliter excusatur, nisi quia spiritus latenter hoc jusserrat, qui per illum miracula faciebat, sicut et antea illi inspiraverat ut uxorem de filiabus Philistæorum acciperet, cum lex hoc prohiberet. Nam, sicut in accptione uxoris alienigenæ fecit per voluntatem Dei, quod lex interdixerat, et non peccavit, ita credi potest quod Spiritus sanctus illi jusserrat extinguere secum ingentem illam hostium multitudinem, quæ de ejus humiliatione laudabat idolum suum, et ad majus improprium faciebat eum ebrium ludere, præsertim cum jam ille spiritus cõpisset ei pristinas vires reddere, ad designationem recuperationis prioris gratiæ. Unde et nunc Apostolus ponit eum inter eos, qui adepti sunt repromissiones. Jephthe quoque per fidem devicit regna, quia est factus super eum Spiritus Domini, et circumiens Galaad et inde trans-

lens ad filios Ammon, votum vovit Domino, dicens : « Si tradideris filios Ammon in manus meas, quicumque primus fuerit egressus de foribus domus meæ, mihiq̄ue occurrerit revertenti cum pace a filiis Ammon, cum holocaustum offeram Domino. Transivitq̄ue, Jephthe ad filios Ammon ut pugnaret contra eos. Quos Dominus tradidit in manus ejus. Percussitq̄ue viginti civitates plaga magna nimis. Et humiliati sunt filii Ammon a filiis Israel. Revertente autem Jephthe domum suam, occurrit ei unigenita filia cum tympanis et choris. Qua visa, scidit vestimenta sua et ait : « Heu! filia mi, decepisti me, et ipsa decepta es. Aperui enim os meum ad Dominum, et aliud facere non potero, et fecit ei sicut voverat (*Judic. xi*). » Et merito quæritur utrum pro jussu Dei sit habendum quod eam immolavit. Abraham enim non solum non est culpatus crudelitatis crimine, sed etiam laudatus nomine pietatis, quod filium voluit nequaquam scelerate, sed obedierit occidere. Jephthe vero non ita legitur accepisse præceptum ut filiam occideret; sed tamen in eo quod Scriptura refert quia factus est super eum Spiritus Domini, et tunc tale votum pro victoria fecit, atque victoriam adeptus est, non videtur temerarie vovisse, cui Spiritus sanctus præsidebat : nec injustum votum vovisse, qui victoriam pro qua votum faciebat, consecutus est. Consecutio enim victoriæ testatur Deo votum non displicuisse. Novit enim Dominus secretas causas, propter quas tale sacrificium ei placere potuit. Et ipse Jephthe semetipsum potius in hoc spiritualiter mactavit, quia cum non haberet filium aut filiam præter istam, omnem affectum ejus rigore voti superavit, et dolorem compassionis ardore fidei devicit. Qui et justitiam operatus est, quia satis rationabiliter et juste principatum suscepit, et causas suas contra regem filiorum Ammon per legatos juste disseruit, et juste bellum iniit atque populum Israel sex annis secundum legem Domini judicavit. Unde et repromissiones supernarum retributionum adeptus esse creditur. De David vero superfluum esse puto, demonstrare quomodo per fidem regna devicerit (235), cum constet eum tot reges impios juvante Domino peremisse. Justitiam autem sic operatus est, ut de illo diceret Deus : « Inveni David filium Jesse, virum secundum cor meum, qui faciat omnes voluntates meas. » Sed et repromissiones adeptus est non solum de æterna vita, sed etiam de adventu Christi : quia et ipse beatitudinem æternam possidet, et æternus rex Christus de semine ejus suscitatus est. Samuel quoque (236) per fidem vicit regna Philistæorum, quia, cum satrapæ gentis illius cum exercitibus suis adversus Israel convenissent, obtulit Samuel holocaustum et clamavit ad Deum pro Israel, et exaudivit eum Dominus. Nam in ipsa hora sacrificii contigit Philistæos inire prælium contra Israel. Et insonuit Dominus fragore

magno super eos atque exterruit eos, et cæsi sunt a facie Israel; factaque est manus Domini super eos cunctis diebus Samuel, et redditæ sunt urbes que tulerant ab Israel. Liberatusque est Israel de manibus eorum. Sed et justitiam ita operatus est Samuel, et nec in modico reprehensibilis unquam invenitur. Ideoque repromissiones beatitudinis æternæ absque ulla dubitatione adeptus est. Nonnulli quoque sequentium prophetarum, vel orationibus vel meritis suis devicerunt reges, sicut orante Isaia cum rege Ezechia, percussit angelus in castris Assyriorum centum octoginta quinque millia, et recessit turpiter a Judæa Sennacherib rex (*Isai. xxxvii; IV Reg. xix*). Elisæus quoque meritis suis obtinuit, ut Benadab rex Syriæ (*IV Reg. vii*), qui diu Samaritanos obsederat, cum omni exercitu suo territus fugeret. Dominus autem audiri fecit in castris Syriæ sonitum curruum et equorum et exercitus plurimi, fugeruntque Syri, et dereliquerunt tentoria sua et equos et asinos cum auro et opibus magnis; et hæc omnia diripuerunt filii Israel, ita ut fieret modus similæ statere uno, et duo modii hordei statere uno in porta Samariæ. Multaque hujusmodi contra reges impios sancti prophætæ per fidem egerunt, et justitiam in omni conversatione sua tenuerunt ac repromissiones divinas in regno cælorum adepti sunt.

« Obturaverunt ora leonum, exstinxerunt impetum ignis, effugerunt aciem gladii, convalescerunt de infirmitate, fortes facti sunt in bello, castra verterunt exterorum, acceperunt mulieres de resurrectione mortuos suos. »

Non solum super homines habuerunt antiqui sancti per fidem victoriam, sed etiam super bestias adeo feroces, ut sunt leones, et super insensibilia elementa, ut est ignis, hoc est : *Obturaverunt*, id est obturata et clausa fecerunt *ora leonum*, ut etiam jejuni leones fide servante non tangerent eos, sicut Daniel (*Daniel. vi, xiv*), quem illæsum in lacum leonum per noctis unius spatium fides servavit, aliaque vice sex diebus cum septem jejunis leonibus in lacu clausus sine læsione perduravit. Pluralis enim numerus pro singulari positus esse nunc intelligitur, in hoc quod dictum est, *obturaverunt ora leonum*, nisi et Davidicum factum in hac sententia memoratum accipiamus, qui, dum pasceret gregem, venit leo et ursus, tuleruntque arietem, et ipse persecutus est et percussit eos, eruitque pecus de ore eorum, istis consurgentibus in eum, apprehendit ipse mentum eorum et suffocavit et interfecit eos (*I Reg. xvii*). Alii per rorem fidei, *exstinxerunt impetum ignis*, id est vehementissimum ignem qui cum impetu virtutis irruebat, sicut Moyses : nam murmurantibus Hebræis (*Num. xi*), accensus est in eos ignis Domini, et devoravit extremam partem castrorum, cumque clamasset populus ad Moysen, oravit Moyses ad Dominum, et absorptus est ignis. Similiter et Aaron alia vice exstinxit impetum ignis

¹ (235) I Reg. xvi passim.

(236) I Reg. iii, iv, v, vi, vii, passim.

(Num. xvi), quando tollens thuribulum cucurrit ad mediam multitudinem, quam vastabat incendium et obtulit thymelama, ac stans inter mortuos et viventes, pro populo deprecatus est, et plaga cessavit. Sed et tres pueri in Babylone per fidem exstinxerunt impetum ignis, cum quibus in fornacem descendit angelus Domini, et excussit flammam ignis de fornace, et fecit medium fornacis quasi ventum roris flantem, et non tetigit eos omnino ignis (*Dan. iii*). Alii effugerunt aciem gladii, sicut Isaac quoque cum pater arrepto gladio vellet immolare, prohibuit angelus eum percuti (*Gen. xxii*); et sicut David, qui dum manu sua psalleret coram Saul, tenebat Saul lanceam et misit eam, putans quod confingere posset eum cum pariete. David autem declinavit a facie ejus (*I Reg. xix*). Hoc et alia vice similiter factum est de evasione ictus lanceæ (*I Reg. xx*). Vel effugerunt aciem gladii, id est exercitum accinctum gladio per fidem in fugam verterunt, sicut Gedeon in armis armatos Madianitas (*Judic. vii*), et Judas Machabæus sæpe cum paucis fere innumeras hostium multitudines (*I Mach. iii*). Alii per fidem convalescunt de infirmitate, id est sanati a corporeo languore, sicut Job et Ezechias (*Job xlii*). Alii per fidem fortes et insuperabiles facti sunt in bello, sicut Josue et David et Judas Machabæus (*IV Reg. xx*). Nonnulli verterunt in fugam castra exterorum, id est alienigenarum, qui super se veniebant, sicut Judith (*Judith xiii*) et sæpe dictus Gedeon (*Judic. vii*). Notandum vero, quod aliud est castra vertere, quoniam hoc etiam sine pugna, aliud fugare aciem gladii, quod sit pugna. Talia per fidem antiqui patres consequabantur et temporalem felicitatem adipiscebantur, sed in Novo Testamento non est tempus talium. Ante dedit talia Dominus, nunc dat meliora. Ac si diceret: Discite homines per gratiam Novi Testamenti vitam concupiscere sempiternam. Quid pro magno ita vos vultis a Domino de morte liberari, sicut liberati sunt patres vestri, quando commendabat Dominus etiam terrenæ felicitatis præter se non esse alium largitorem? Illa felicitas ad veterem hominem pertinet, quæ veritas ab Adam cœpit. Ego autem sum Christus, non Adam. A veteri veteres fuistis, a Novo Novi estote usque ad mortem. Unde ipse hoc voluit in conspectu inimicorum pati, quo eum tanquam derelictum putarent, ut commendaretur gratia Novi Testamenti, qua disceremus aliam quærere felicitatem, quæ nunc est in fide, postea vero erit in specie. Sed sub Veteri Testamento necesse fuit et temporalia bona sanctis præberi divinitus. Ideo a variis periculis liberati sunt, quando clauserunt ora leonum, exstinxerunt impetum ignis, effugerunt aciem gladii, convalescunt de infirmitate. Fortitudinem quoque et victorias adepti sunt divinitus, quoniam fortes facti sunt in bello, et castra verterunt exterorum. Magna etiam impetraverunt orando, quoniam acceperunt mulieres de resurrectione mortuos suos. Sareptana quippe mulier, orante Elia, filium suum accepit de

A resurrectione venientem (*III Reg. xvii*), et per Eli-seum Sunamitis accepit natum suum de resurrectione sibi redditum (*IV Reg. iv*).

« Alii autem distenti sunt, non suscipientes redemptionem, ut meliorem invenirent resurrectionem. Alii vero ludibria et verbera experti, insuper et vincula et carceres, lapidati sunt, secti sunt, tentati sunt, in occisione gladii mortui sunt. »

Ostendit quanta per fidem sancti fecerunt, nunc autem ostendit quanta pro fide pertulerunt, ut quod suaserat fide multorum exemplis pluribus persuadeat multarum passionum imitationibus. Quidam patrum in vita sua per fidem a variis adversitatibus erepti sunt. Sed alii eorum etiam pro fide distenti sunt, id est in suppliciis singula membra tensi, non suscipientes redemptionem, id est creptionem de pœnis quæ inferebantur illis, ut invenirent in sæculo alio meliorem redemptionem præsentem quæ respuebatur. Hoc fecerunt septem egregii fratres cum matre, quos rex Antiochus flagris et taureis crucians, compellebat contra legem carnes porcinas edere (*II Mach. vii*). Qui cum dicerent, Parati sumus mori magis quam patrias Dei leges prævaricari, iratus rex jussit ei, qui prior fuerat locutus, amputari linguam, et cute capitis abstracta, summas quoque manus ei et pedes præcidi; et cum jam per omnia mutilus factus esset, jussit ignem admoveri, et adhuc spirantem torreret in sartagine. Sic fecit de secundo atque omnes septem et octavam matrem talibus tormentis consumpsit. Ita distenti sunt in variis pœnis, atque manus et pedes ad percipiendum pœnas extenderunt et linguas protulerunt. Ac redimi a pœnis noluerunt, quia, cum suaderetur illis ut illicitas carnes ederent et pœnas evaderent, non consenserunt. Optabant enim meliorem resurrectionem, sicut et tyranno dicebant: Tu quidem, sceleratissime, in præsentem vitam perdis, sed rex mundi defunctos nos pro suis legibus in æternæ vitæ resurrectione suscitabit. Et hoc quidem isti tali fide pertulerunt. Sed alii experti sunt sustinendo ludibria et verbera quia et derisi sunt et verberati, sicut Jeremias qui ait: « Factus sum in derisum tota die, omnes subsannant me (*Jer. xx*), » et de quo scriptum est, quia D percussit Phassur Jeremiam prophetam, et misit eum in nervum (*ibid.*). Et quasi parum esset pertulisse ludibria et verbera, pertulerunt insuper et vincula et carceres. Per hoc enim quod dicit insuper, notat hæc quatuor eisdem personis illata fuisse. Et Jeremias vincula pertulit et carceres, quia, sicut dictum est Phassur in nervum misit, quem Sedechias rex in atrio carceris clausit, et iterum cum vellet ire in terram Benjamin (*Jer. xxxii*), et pervenisset ad portam Jerusalem, apprehendit eum custos portæ, dicens: « Ad Chaldæos profugis! et duxit eum ad principes. Quamobrem irati principes contra Jeremiam, cæsum eum miserunt in carcerem, ingressusque est in domum Jaci et in ergastulo, et sedit ibi diebus multis (*Jer. xxxvii*). » Sic legitur Je-

remias expertus esse ludibria et verbera insuper et vincula et carceres. Michæas quoque verbera pertulisse legitur et carcerem atque ludibria. Nam, cum rex Achab vellet ire contra Syros ad prælium in Ramoth Galaad, et prophetas suos consulisset, quos circiter quadringentos congregaverat, omnesque regi respondissent ut iret, quia prospere sibi eventurum foret, tandem Michæas adductus et interrogatus respondit : « Dominus dedit spiritum mendacem in ore omnium prophetarum tuorum, qui hic sunt. Accessit autem Seledcias filius Chanaan, et percussit Michæam in maxillam, et dixit : Mene ergo dimisit Spiritus Domini, et locutus est tibi? (III Reg. xxii.) » Ecce ludibria et verbera, cum ante regem derideretur, et percutitur sine iudicio. « Et ait rex : Tollite Michæam et mitte eum in carcerem, et sustentate eum pane tribulationis et aqua angustiae, donec revertar in pace (ibid.). » Ecce carcer, ubi et vincula forsitan fuerunt. Alii lapidati sunt, ut ille, de quo scriptum est, quia Spiritus Domini induit Zachariam filium Joiadae sacerdotem, et stetit in conspectu populi, et dixit eis : « Hæc dicit Dominus : Cur transgredimini præceptum Domini quod vobis non proderit, et dereliquistis Dominum ut derelinqueret vos? Qui congregati adversus eum miserunt lapides iuxta regis Joas imperium in atriis domus Domini, et interfecerunt eum (II Par. xxiv.). » Sed et Naboth Jezraelites injuste lapidatus est (III Reg. xxi). In eo quod subditur, *secti sunt*, pluralis numerus pro singulari positus esse creditur, quoniam de solius Isaiae passione dictum intelligitur, quia Hebræi certissime tradunt serra lignea a Manasse rege serratum esse. Alii *tentati sunt* voluptatum suasionibus aut sæcularium bonorum promissionibus, an divelli possent a fidei justificationibus, et sicut sanctus Joseph, cui impudica domina dicebat : « Dormi mecum (Gen. xxxix); » et sicut Judith, cui dixit Holofernes : « Tu eris magna in domo Nabuchodonosor, et nomen tuum nominabitur in universa terra (Judith. xi). » et sicut ultimus septem fratrum, de quibus supra diximus, quem rex Antiochus non solum verbis hortabatur, sed etiam juramento affirmabat, divitem se et beatum facturum, et translatum a patriis legibus amicum habiturum (II Mach. vii). Alii vero *mortui sunt in occisione gladii*, sicut octoginta quinque sacerdotes Domini, quos Saul propter David injuste trucidavit (I Reg. xxi), et sicut prophetæ Domini, quos regina Jezabel interfecit (III Reg. xviii).

« Circuierunt in melotis, in pellibus caprinis, egentes, angustiati, afflicti, quibus dignus non erat mundus. In solitudinibus errantes, et in montibus, et in speluncis, et in cavernis terræ. »

Circuierunt in melotis, in pellibus caprinis, etc. Melota est, ut aiunt, vestimentum ex pilis camelorum factum vel ex caprinis pellibus; et quis in veteri Judæorum populo usus sit hoc indumento, difficile in scriptis aperte reperitur, sed Joannes Baptista qui in hoc loco intelligi potest, legitur hoc usus fuisse (Matth. iii. Marc. i). Judith tamen cilicium

A habebat super lumbos suos (*Judith. ix*); et Isaia dictum est : « Solve saccum de lumbis tuis (*Isa. xx*); id est cilicium. Hoc indumento credimus et Eliam usum fuisse (*IV Reg. i*), nonnullosque prophetarum. Fertur etiam melota vocari pellis animalis, quod dicitur taxus sive taxo et religiosi viri domantes carnem suam, non molles et pretiosas vestes habebant, sed ciliciis utebantur et asperis animalium pellibus, ut taxonum et caprarum. Vel circuierunt sic induti loca multa, sicut Elias, qui jubente Domino, per varia loca ambulasse refertur (*III Reg. xix*); et sicut Joannes Baptista, qui venit in omnem regionem Jordanis, prædicans baptismum pœnitentiæ (*Luc. iii*). Ipsi dico, *egentes necessariis corporis*, quia nihil habebant, *angustiati cura animi*, quoniam peccata populi plangebant : *afflicti laboribus*, quia persecutionem pro justitia sustinebant. Qui ne propter penurias et afflictiones viderentur contemptibiles, subditur : *Quibus dignus non erat mundus*, id est tantæ dignitatis erant, quod mundus non erat dignus conversatione illorum. Unde et Elias in cœlum vivus est translatus (*IV Reg. ii*), atque Joannes citius martyrio consummatus (*Matth. xiv*; *Marc. vi*). Ili quoque erant egentes et angustiati atque afflicti, de quibus refertur, quia Judas Machabæus cum Jerusalem ab Antiochenis occupata esset, secesserat in desertum locum, ibique inter feras vitam in montibus cum suis agebat; et feni cibo vescentes, demorabantur ne participes essent coinquinationis (*II Mach. v*). Hi se a malitia mundi separaverant, et ideo dignus eis non erat mundus, de quibus intelligitur hoc quod Apostolus subjungit : *in solitudinibus errantes et in montibus*. Alii vero ad proximas coeuntes speluncas, et latenter Sabbati diem celebrantes, cum indicati essent Philippo præposito regis, flammis succensi sunt, eo quod verebantur propter religionem et observantiam manu sibi met auxilium ferre, et hos nunc dicit Apostolus *in speluncis et in cavernis terræ mansisse*. Speluncæ quidem naturales, cavernæ autem quæ manu vel aliquo casu factæ sunt. Elias in solitudinibus antea fuerat in montibus et speluncis; qui fugiens Jezabel, venit in Bersabee Juda. Et perrexit in desertum via unius diei, et inde ambulavit quadraginta diebus, et quadraginta noctibus usque ad montem Dei Oreb. Cumque pervenisset illuc, mansit in spelunca, et auditis ibi sermonibus Domini, reversus est idem per desertum (*III Reg. xix*). Sed et illi manserunt in speluncis vel cavernis, de quibus Scriptum est, quia cum interficeret Jezabel prophetas Domini, tulit Abdias centum prophetas et abscondit eos in quinque speluncis, et pavit eos pane et aqua (*III Reg. xviii*). Hucusque Apostolus exemplis eorum usus est, qui in fide testimonium consecuti sunt. Superius vero priusquam de fide tractatum inciperet, fere per totam epistolam argumentis utebatur (*Rom. i*). Egregius enim magister, sapientibus et insipientibus debitor, cum in Hebræis quosdam sapientes, quosdam vero tardiores cerneret, prudentiam sapientium

argumentis superavit; tarditatem vero simplicium A
solis exemplis atraxit, quatenus et illos victrix ratio
frangeret, et istos ad majora conscendere imitatio
blanda suaderet.

« Et hi omnes testimonio fidei probati, non
« acceperunt repromissionem, Deo pro nobis me-
« lius aliquid providente, ut non sine nobis consum-
« marentur. »

Multos hactenus memoravi, *et hi omnes* quos no-
minatim vel tacitis nominibus in exemplum adduxi
probatum testimonio fidei, id est sic probati sunt
in fide constantes, et bonum inde testimonium ha-
beant. Ad hoc revertitur in conclusione quod in
exordio præmiserat, quia in fide testimonium con-
secuti sunt senes. Et quamvis in fide fuissent pro-
bati, *non tamen acceperunt repromissionem*. Quid est
hoc? Nonne paulo superius dictum quosdam eorum
per fidem devicisse regna, operatos esse justitiam,
et adeptos esse repromissiones? Sed illi sancti
et repromissiones adepti sunt, et promissiones
expectant, quia beatitudinem animarum habent
sed resurrectionem corporum præstolantur. Unde
bene superius dictum est, quia adepti sunt repro-
missiones quasi plures et varias; nunc autem di-
citur, quia non acceperunt repromissionem, quasi
unam singularem, quoniam variæ sunt dignitates,
quas animæ juxta meritorum suorum distinctiones
acceperunt, sed una est corporum incorruptio,
quam generaliter expectant. Non igitur accepe-
runt repromissionem, quoniam resurrectio corpo-
rum, quam Deus sanctis suis repromisit, adhuc dif-
fertur, ut simul omnes resurgamus, quatenus in
communis gaudii omnium, majus fiat singulare. Ita
expectant adhuc, donec et nos accurramus, *Deo*
providente et sapienter ordinante pro nobis aliquid
melius, ut non consummarentur, id est ut non perciperent
consummatam beatitudinem animæ et corporis
sine nobis, quam ut ante nos consummarentur.
Cum enim adhuc nos expectant ad suam consum-
mationem, ardentius nostram exoptant liberationem,
et propter se, et propter nos atque pro nobis inter-
pellant, ut citius a præsentis sæculi miseria liberemur.
Nos quoque, etsi propter nos ipsos desides, saltem ne
diutius eos expectare faciamus, festinare debemus,
ob hoc etiam alacrius currere, quia non
tandiu expectabimus, quandiu expectaverunt
illi. Propter hujusmodi causas Deus pro nobis melius
ordinavit, ut nos expectarent ad consummationem.
Patriarchæ igitur et prophetæ omnesque prophetarum
spiritus, qui ad beatam vitam transierunt, nos ar-
denter gavisuros secum expectant, nec est illis ex toto
perfecta letitia donec quodammodo pro nostris erroribus
dolent. Neque enim discedentes hinc sancti, continuo
integra meritorum suorum præmia consequuntur, sed
expectant etiam nos licet morantes, licet desides, ut
nobiscum perfectam beatitudinem consequantur. Propter
hoc etiam mysterium illud in ultimum diem dilati
judicii, custoditur, quia unum corpus est, quod justi-

ficari expectatur, unum corpus est, quod resurgere
in judicium dicitur.

CAPUT XII.

« Ideoque et nos tantam habentes impositam
« nubem testium, deponentes omne pondus et cir-
« cumstans nos peccatum, per patientiam curramus
« ad propositum nobis certamen, aspicientes in au-
« ctorem fidei, et consummatorem Jesum, qui pro-
« posito sibi gaudio, sustinuit crucem, confusione
« contempta, atque in dextera sedis Dei sedet. »
(*Ephes. iv; Colos. iii; 1 Petr. ii.*)

Præmissis exemplis fidei et patientiæ sanctorum,
in quibus fides solidata est in cordibus auditorum,
subjungit illud quod fidei sociandum est, id est hor-
tari incipit ad tolerantiam adversitatum, ut sicut
patres omnia per fidem adversa patiendo vicerunt,
ita et nos faciamus. Quasi dicat: Antecessores
nostri tanta per fidem operati sunt et pertulerunt.
*Ideoque et nos similiter profide sustineamus ad imi-
tationem ipsorum*. Nos dico, *habentes impositam*
nobis ad protectionem et umbraculum tantam nubem
testium, id est tantam multitudinem sanctorum,
qui de terris instar nubium consurgentes, ad sublimia
cœlestis conversationis volaverunt ab omni sarcina
terrenæ cupiditatis, et ut nubes exemplo sui in
æstu tribulationum dant nobis refrigerium consola-
tionis, atque compluunt nos inundantia doctrinæ
suæ. Qui testes dicuntur, quia fidem testati sunt
ore et passione. Testes enim Latine, *μάρτυρες* græce
dicuntur. Sed et honorum operum testes fuerunt,
quia in suis actibus testati sunt esse facienda hu-
jusmodi opera. Quorum nubes, id est densa multi-
tudo est nobis imposita, ut nos protegat et exemplis
suis confoveat. Et nos hanc nubem levem super nos
habentes, deponamus, id est deorsum ponamus
omne pondus, id est omnem gravedinem mundanæ
cupiditatis, et quicquid mentem nostram in infimis
deprimit, ut leves effecti, ad nubem quæ super nos
est, evolemus et ei consociemur. Deponamus etiam
peccatum circumstans nos, id est ad alta elevemur,
et in imo relinquamus peccatum, quod inique nos
impetit et circumvallat, dum in infimis cor habemus,
sicut Zachæus, qui præ turba Jesum videre
non poterat, ascendit in arborem ut videret eum
(*Luc. xix*). Turba enim altior pusillum Zachæum
non sinit videre Jesum, quando inolita consuetudo
vitiarum quæ nos superavit et super nos excrevit,
atque tumultus perversarum cogitationum, qui sibi
cor nostrum subdidit, non nos sinit lumen divinitatis
intueri. Sed Zachæus ascendit in arborem, re-
lieta inferius turba, quia nos in arborem crucis
debemus ascendere, crucifigentes carnem nostram
cum vitiis et concupiscentiis (*Galat. v*), atque cor
ad alta sustollere, si Jesum absque turbæ nocentis
obstaculo cupimus aspicere. Sic itaque deponamus
omne pondus, et circumstans nos peccatum. Potest
etiam pondus intelligi sarcina peccatorum quæ
fecimus, quæ sicut onus grave gravata est super
nos. Peccatum vero quod circumstat, tentatio pec-

cati, quæ undique imminet, et ab omni parte nos A
obsidet (*Psal. xxxvii*). Sed nos per confessionem
deponamus omne pondus peccatorum quo gravamur,
et per sublimem conversationem deorsum relinqua-
mus omne peccatum, quod nos in infimis circum-
stat et impugnat. Et sic abjecto pondere et superatis
obstaculis, leves atque sublimes effecti, *curramus*,
id est sine mora hæsitationis cito transeamus *per*
patientiam ad certamen martyrii, quod *propositum* est
nobis ab infidelibus, qui proposuerunt aut nos a fide
separare, aut variis tormentis cruciare. Vel a Deo
propositum est nobis, qui per immensa gratiæ suæ
beneficia proposuit, non solum ut in eum crederem-
us, sed etiam ut pro illo pateremur (*Philip. 1*).
Et ita sine murmuratione vel hæsitatione curramus
per patientiam ad agonem martyrii *aspicientes in au-* B
ctorem fidei, id est attendentes quanta pro nobis
pertulit, qui fidem nobis et dedit et auxit, pro qua
nobis suadet martyrium. Ac si dicatur : Curramus
ad propositum certamen, tum propter exempla multa
præcedentium patrum, tum propter amorem fidei
et consummatorem Jesum, qui tam magnus est, et
ab eodem fidem accepimus pro qua patimur, atque
ab ipso consummandam plena beatitudine speramus.
Ipse enim est et auctor et consummator fidei, quia
et eo auctore fidem habemus, et eo consummatore
ad videndum quod nunc fides credit pervenimus.
In hunc aspiciamus, ne adversis deficiamus, *qui pro-*
posito sibi gaudio sustinuit crucem, id est qui pro-
posuit sibi in corde gaudium æternum, ad quod per
passionem erat transiturus, et sic libentissime per-
tulit supplicia crucis, *contempta confusione*, id est
neglecta omni verecundia, dum irrideretur pendens
in ligno. Vel proposito sibi a turbis gaudio, dum
vellent eum facere regem, noluit ille gaudium hu-
jusmodi suscipere (*Joan. vi*), sed postmodum susti-
nuit crucem et illusiones et opprobria, contemnens
omnem humanam verecundiam. Omnia enim terrena
bona contempsit, ut in illis non quæreretur felici-
tas. Crucem sustinuit, *atque ideo sedet in dextera*
sedis Dei, humiliavit enim semetipsum, factus obedi-
ens usque ad mortem, mortem autem crucis
(*Philip. 11*), » propter quod et Deus exaltavit illum.
Non ergo frustra sibi gaudium resurrectionis et
ascensionis proposuerat, dum pateretur et irridere-
tur, sed assecutus est illud gaudium. Itaque sicut
ille proposito sibi gaudio sustinuit crucem, contem-
nens verecundiam, et adeptus est fidei confessio-
nem, sic et nos proposito nobis æterno gaudio debe-
mus pro fide ejus omnia sustinere, et omnem op-
probriorum verecundiam contemnere, ut ad sedis
ejus participationem mereamur pertingere. Dicit
enim : « Qui vicerit, dabo ei sedere mecum in throno
meo, sicut et ego vici, et sedeo cum Patre meo in
throno ejus (*Apoc. 111*). »

« Recogitate enim eum qui talem sustinuit a
« peccatoribus adversus semetipsum contradictio-
« nem, ut non fatigemini animis vestris deficientes.
« Nundum enim usque ad sanguinem restitistis ad-

« versus peccatum repugnantes, et oblitus estis con-
« solationis, quæ vobis tanquam filiis loquitur,
« dicens : Fili mi, noli negligere disciplinam Do-
« mini, neque fatigeris dum ab eo argueris
« (*Prov. 111*). Quem enim diligit Dominus, castigat;
« flagellat autem omnem filium quem recipit
« (*Apoc. 111*). »

Dixi quia debemus aspicere in auctorem fidei pre
nobis crucifixum. Et justum est sic fieri. Nam *reco-*
gitate, id est assidue cogitate eum qualis et quantus
sit, *qui sustinuit contradictionem talem*, id est tam
turpem et tam vehementem, dum ei contradiceretur,
et diceretur, blasphemavit (*Matth. xxvi*; *Joan.*
xix), et secundum legem debet mori, quia Filium
Dei se fecit, et non a quibuscumque sed a peccatori-
bus hanc sustinuit, quod est indignius nec saltem
adversus membra sua, sed *adversus semetipsum*.
Hunc assidue recogitate ad imitandum, qui cum
sit tam sanctus et tam immunis a peccato et tam
magnus, patienter toleravit peccatores, qui ei con-
tradicebant et illudebant, et post crucifigebant eum,
hunc inquam recogitate ut perpendentes qualia et
quanta ipse pertulit, *non fatigemini* in aliquibus ad-
versis, *deficientes animis vestris*, id est licet corpore
deficiatis, mente tamen validi et insuperabiles per-
duretis. Nec debetis deficere, quia parva sunt quæ
adhuc pertulistis. Cur enim reatum defectionis sub-
biretis, qui non gravem passionis vehementiam
sustinetis? Cur corrumpere mini fidei defectione, quæ
adhuc caretis sanguinis effusione? Nam, etsi vestra
C jam amisistis, *nondum tamen usque ad sanguinem*,
id est usque ad sanguinis effusionem *restitistis re-*
pugnantes, id est iterum iterumque pugnantes, non
dico adversus peccatores, id est adversus homines,
sed *adversus peccatum*, quod illi vobis suadent, dum
vos a fide revocare conantur, vel aliquid illicitum
facere vos hortantur. Nondum pervenistis ad effu-
sionem sanguinis. Et jam tædio segnes effecti, *obliti*
estis consolationis, quam Dei sapientia vobis per Sa-
lomonem exhibet in adversis. Quasi dicat: Culpandi
estis, quod illam consolationem jugiter in memoria
non tenetis. Vel per interrogationem potest legi:
Nondum restitistis usque ad sanguinem et jam estis
obliti consolationis? Non debuissetis illius esse
obliti. Quæ consolatio legitur vobis, id est quæ
D verba consolatoria diriguntur ad vos per Dei sa-
pientiam, quæ Christus est, a quo fit consolatio,
loquitur vobis, non tanquam servis neque saltem tan-
quam amicis, sed potius *tanquam filiis* quod est
dulcius. Christus enim pater est credentium, sicut
ipse demonstrat, cum dicit : « Non possunt filii
Sponsi jejuna, quoadiu cum illis est Sponsus
(*Marc. 11*). » Et ideo unicuique fidelium adversa pa-
tienti loquitur in proverbiiis, *dicens : Fili mi, noli ne-*
gligere. Mi, adverbium blandientis. Noli negligere, id
est non sit tibi voluntas negligendi, hoc est vilipen-
dendi *disciplinam*, id est tribulationes per quas po-
tes discere, quod ideo vult Deus te tribulari, ut per-
sis velut aurum igne tribulationis probari. Vel hoc

potes ibi discere, quia si nunc tibi qui filius es non parcit, quanto magis in iudicio non parcat adversariis? Ex hoc etiam quod disciplina est, non debes negligere tribulationem quam pateris, et ex eo quod Dei est. Disciplinam quippe Dei negligere, est tribulationem recusare velut inutilem, cum necessitas patiendi eam ingruit; *neque fatigeris*, id est neque lassescendo deficias, *dum argueris*, id est reprehenderis *ab eo* qui Dominus est et tuus et omnium. Licet enim sis adoptatus in filium, tamen debes cognoscere Dominum. Et patienter debes adversitatem sustinere, quoniam ipsa adversitate argueris et increparis a Domino de malis, quæ fecisti, ut recogites ea et corrigas. Ideoque peccatis tuis humiliter imputa quidquid adversi pertuleris. Nec debes fatigari dum sic argueris, quoniam *Dominus castigat*, id est castum agit, hoc est per tribulationes facit a vitiis castum eum, *quem diligit*. Nec solummodo castigat et emendat verberibus cum fidelem quem diligit, sed etiam *omnem filium flagellat, quem recipit*, id est quem post culpam primi parentis ad se revocat. Omnem et majorem et minorem flagellat, quem recipit. Et tu forte dicis, Exceptus ero. Si exceptus eris a passione flagellorum, exceptus eris a numero filiorum. Ne te sine flagello futurum speres, nisi forte cogitas exhæredari. Aliter enim nullus recipitur in hæreditate æterna. Omnem flagellat quem recipit. Nullus exceptus, nullus sine flagello erit. Ita omnem flagellat, ut etiam unicum suum. Unicus ille licet sine peccato, non tamen sine flagello. Patet ergo quod, qui sine peccato flagellat unicum, non immunem a flagello relinquit cum peccato adoptatum. Omnem flagellat quolibet modo, vel per malos homines, vel per malos angelos, vel per damna rerum, vel per infirmitatem corporis, seu per aliud quid adversitatis.

« In disciplina perseverate. Tanquam filiis vobis offert se Deus. Quis enim filius, quem non corripit pater? Quod si extra disciplinam estis, cuius participes facti sunt omnes, ergo adulteri, et non filii estis. Deinde patres quidem carnis nostræ eruditores habuimus, et reverebamur eos. Non multo magis obtemperabimus Patri spirituum, et vivemus? Et illi quidem in tempore paucorum dierum secundum voluntatem suam erudiebant nos, hic autem ad id quod utile est, in recipiendo sanctificationem ejus. »

Quia omnis filius flagellatur, ut in hæreditate quam per Adam perdidit, recipiatur, ideo *perseverate in disciplina* quam inchoastis, id est in adversitatum tolerantia. Non enim potest erudiri quisquam sine labore, quia virtus in infirmitate perficitur (II Cor. xii). Et vos ad magnam rem his disciplinæ flagellis erudimini, quia *tanquam filiis offert se Deus vobis*, ut cum bene flagellis ejus eruditi fueritis, possideatis eum perenniter ut Patrem, et ipse vos ut filios. In aliis codicibus non est se, sed *tanquam filiis vobis offert Deus*. Quod idem

significat. Quia tanquam filiis offert vobis, ut perseveretis in disciplina et perveniatis ad hæreditatem, atque in hoc quod disciplinam dat, patrem se ostendit : « Visitabo, inquit, in virga iniquitates eorum, et in verberibus peccata eorum, misericordiam autem meam non auferam ab eis (Psal. lxxxviii). » Non ergo tantum misericordia vocantis est, sed et verberantis atque flagellantis. Sit itaque manus paterna super vos, etsi boni filii estis. Nolite repellere disciplinam ejus. Det disciplinam dum non auferat misericordiam. Cædat contumaces, dum tamen reddat hæreditatem. Si promissa Patris agnovistis, non timeatis flagellari, sed exhæredari. Non tam amarum vobis esse debet quod flagellat, quam dulce quod recipit. Quomodo enim non flagellat custodiens parvulos Dominus, quos grandes quærit hæredes? Nec mirum si ipse flagellat eos, quia hoc facit omnis pater de filio quem diligit et sapientem vult esse. Nam quis est *Filius quem non corripit pater* ejus, dum errare in aliquo viderit? Videmus enim homines in filiis suis hoc facere. Aliquando jam desperatos filios suos dimittunt vivere quomodo volunt. At qui spem habent, flagellant illos. Quos omnino viderint sine spe et indomitos esse, dimittunt ut faciant quod volunt. Jam qui dimittunt facere quod volunt, nolunt permittere ad hæreditatem suam. Quem autem flagellant filium, huic ipsam hæreditatem servant. Cum ergo flagellat Deus filium, currat ille sub manu patris flagellantis, quia dum flagellat, ad hæreditatem erudit. Non sit tam vano et puerili sensu, ut dicat : Plus amat pater meus fratrem meum, cui permittit facere quidquid vult. Ergo si me movero contra jussionem patris mei, flagella invenio. Tu gaude sub flagellis, quia tibi servatur hæreditas. Ad tempus emendat ne in æternum damnet. Alius autem ad tempus parcit, sed in æternum illos damnabit. Omnem filium pater suus flagellat, et verberibus disciplinæ castigat. *Quod si vos estis extra disciplinam* paternorum verberum, *cujus disciplinæ participes facti sunt omnes filii, ergo adulteri estis, et non filii estis*, id est, cum nullus filiorum absque disciplina patris sit, si vos in disciplina Dei, qua vos paterna bonitate castigat, non manetis, tunc non filii Dei estis, sed potius ex adulterino corruptore, qui diabolus est nec jure pater vocatur, geniti. Non enim jure pater appellari potest, qui ex adulterio genuerit. Deus namque legitimus pater est fidelium, diabolus autem non pater, sed corruptor est, ideoque non filios, sed adulteros gignit. Tales sunt qui in præsentia vita flagellum Dei non sustinent, quamvis nomen Christianitatis habeant. Propter has causas debetis in disciplina manere. Deinde propter ista, quia *patres quidem, sed carnis nostræ habuimus eruditores et reverebamur eos*, id est reverentiam exhibebamus in subjectione et obedientia, ergo non, id est nonne multo magis obtemperabimus Patri spirituum? id est obediemus Deo, qui spiritalis pater noster est. Nam obedientia sola virtus est, quæ hominem Deo cou-

ciliat, sicut e contra tumor, id est, inobedientia, longe a Deo separat. Quid enim aliud est, inobedientia, quam nolle subdi Deo, id est suæ velle esse potestatis? Nonne multo magis obtemperabimus Patri spirituum, id est Deo, qui formavit hominem de limo terræ, et inspiravit in faciem ejus spiraculum vitæ? (*Gen. ii.*) Non enim de materia fecit spiritum hominis sicut corpus, sed de nihilo per insufflationem suam creavit, et ita se patrem spiritus esse quodammodo monstravit. Ideo etiam pater spirituum dicitur, quia nos in baptismo secundum spiritum generavit. Et huic magis quam carnalibus parentibus obtemperare debemus, quia hoc facientes in æternum vivemus. Carnales autem patres parum utilitatis conferre possunt. Quid enim tibi potuit præstare pater tuus, quia corripuit, quia verberavit te? Nunquid præstare potuit ut viveres in æternum? Quod non potuit præstare sibi, quando præstaret tibi? Propter pecuniam suam quantulamcumque, quam de labore collegit, erudiebat te flagellis, ne tibi dimissam male vivendo disperderes. Quoniam reliquit tibi, quod nec tenere hic poterat, nec auferre. Non enim aliquid tibi dimisit quod ipsius esse posset. Cessit, ut succederes. Deus autem tuus, redemptor tuus, castigator tuus, pater tuus, erudit te ut accipias hæreditatem, ut non efferas patrem, sed hæreditatem habeas ipsum patrem. Ad hanc spem erudiris, et murmuras. « Erit enim tunc Deus omnia in omnibus (*I Cor. xv.*) » Nec erit ulla infelicitas quæ nos exerceat, sed felicitas sola quæ pascat. Ipse autem pastor noster, Dominus noster, ipse portus noster, divitiæ nostræ. Quicumque hic nobis varia quærimus, ipse nobis unus omnia erit. Ad hanc spem domamur, et domitor intolerabilis habetur. Nam carnales patres antea nos donauerunt et illi quidem verberibus erudiebant nos secundum voluntatem suam, id est in his quæ volebant, videlicet in vanis et caducis in tempore paucorum dierum, dum essemus pueri; hi autem scilicet pater spirituum, erudit nos ad id quod est utile id est ad fidem et bonam conversationem in recipiendo sanctificationem ejus, id est cum recipimus disciplinam ejus, quæ nos non solum a peccatis inundat, sed et sanctificat.

« Omnis autem disciplina in præsentem quidem videtur non esse gaudii, sed mœroris. Postea autem reddet fructum pacatissimum exercitatis per eam « reddet justitiæ. Propter quod remissas manus, et « soluta genua erigite, et gressus rectos facite pedibus vestris, ut non claudicans quis erret, magis autem sanetur. »

Monuit eos in disciplina perseverare. Sed quia filii poterant objicere gravem et asperam esse disciplinam, respondet id ipse prior, et occurrit cogitationibus eorum, atque solvit objectionem. Quasi dicat: Hortor vos stare in disciplina, sed fateor verum esse quod sit aspera. Nam omnis disciplina, id est afflictio, quam quisque pro peccatis suis patitur ut corrigatur, in præsentem quidem, id est inter ipsos dolores molestiæ videtur sufferenti esse non

gaudii, sed mœroris quia corpoream feriendo perturbat lætitiā. Disciplinam namque, quam Græci appellant *παιδεία*, ibi Scripturæ nostræ ponere consueverunt, ubi intelligenda est per molesus eruditio, sicut in hoc loco. *Παῖδια* quippe in Græco habet iste locus epistolæ. Disciplina vero, quæ a discendo vocatur, per quam res quæque discitur, ut sciatur *πιστεύειν* dicitur. Disciplina, quæ flagellando corrigit, videtur esse mœroris, sed non ita videbitur, si quis futura cogitaverit. Nam cogitantibus sola præsentia, videtur intolerabilis, sed cogitantibus æterna sit exoptabilis. Nunc quidem mœroris esse videtur, sed postea, id est in alia vita reddet fructum, id est fructuosam remunerationem, fructum dico justitiæ, id est quem justitia meretur. Et ille fructus erit pacatissimus, quoniam sine ulla vel corporali, vel spiritali adversitate possidebitur in omni pace. Et quibus reddetur? exercitatis per eam, id est per disciplinam, hoc est, ideo tunc alta pace fruuntur absque molestia, qui nunc paterna exercitantur disciplina. Propter quod, id est, qui tanta requies in futuro sæculo per exercitationem præsentis disciplinæ acquiritur, vos, qui mœrore affecti propter flagella disciplinæ torpueratis a bonis operibus, erigite jam alacriter ad bene agendum pro superna mercede manus remissas, id est pigras in elemosynis. Vel manus remissas, id est desideria repentina sursum erigite ad Deum, et genus soluta, id est consuetudinem fluxam erigite ad statum rectitudinis, et gressus rectos facite pedibus, id est actionibus vestris. Ad virtutis enim statum, dum non erigitur fluxa consuetudo, quo desiderium iactuetur, illuc gressus operibus efficaciter non sequitur [at. sequuntur]. Pedibus, id est affectionibus cogitationum vestrarum facite rectos gressus operum honorum, ut quo vocat intentio, sequatur, operatio ut non erret quis a recta via fidei claudicans, id est incessu cogitationum vel actionum suarum titubans, ut ille qui carnales legis observantias simul et Evangelium tenere volebat, vel sicut qui nunc in futuro sæculo volebat esse sine flagella. Non ita claudicet quis, quia tunc erraret a via rectitudinis exorbitans, sed magis, id est potius sanetur ab omni languore pedum cordis, ut fortis et rectus incedat per viam justitiæ.

« Pacem sequimini cum omnibus et sanctificationem (*Rom. xii.*), sine qua nemo videbit Deum. « contemplantes ne quis desit gratiæ Dei, ne quæ radix amaritudinis sursum germinans impediat. « et per illam inquinentur multi: ne quis fornicator aut profanus ut Esau, qui propter unam escam vendidit primitiva sua (*Gen. xxv.*). Scitote enim quoniam et postea, cupiens hæreditare benedictionem, reprobatus (*Gen. xxvii.*). Non enim invenit pœnitentiæ locum, quanquam cum lacrymis inquisisset eam. »

Monet qualiter cum hominibus sit conversandum. Pacem, inquit, sequimini non cum quibusdam, sed cum omnibus, id est jura pacis erga omnes ho-

mines ita sectamini, ut etiam cum illis qui vos persequuntur, pacem teneatis. Nam sunt nonnulli, qui dum plus sapere quam necesse est student, a proximorum pace resiliunt, dum eos velut hebetes, stultosque contemnunt. Quod vero de duabus his virtutibus diximus, hoc et de aliis omnibus sentendum est. Contra quod discordiæ malum, recte nunc Apostolus monet. Pacem sequimini cum omnibus, id est a pace concordiæ nunquam recedatis, ut cum aliquo homine discordiam habere incipiat; et *sanctimoniam* sequimini, id est castitatem mentis et corporis, vel sanctimoniam, id est perfectionem in bonis operibus, *sine qua* pace vel sanctimonia, *nemo videbit Deum*. Valde terruit Apostolus, sed non nisi amatores. Non enim dixit pacem sectamini cum omnibus et sanctificationem, quam qui non habuerit, æterno igne cruciabitur, sed dixit, sine qua nemo videbit Deum. Amatorem te voluit esse boni, non formidatorem mali, et ex eo ipso quod desiderabas, inde terruit. Si enim amas videre Deum tuum, si in hac peregrinatione illius amore suspiras, ecce probat te Deus tuus. Quasi dicat tibi: Ecce fac quod vis, imple cupiditates tuas, extende nequitiam, dilata luxuriam; quidquid libuerit, licitum puta. Non te hinc punio, non te in gehennam mitto, faciem meam tantum tibi negabo. Si expavisti, amasti. Si ad hoc quod dictum est, faciem suam tibi negabit Deus tuus, contremuit cor tuum, si in non videndo Deum magnam pœnam putasti, gratis amasti. Ergo pacem sequamur, sine qua nemo videbit Deum. Nam unde videamus, Deum non habebimus, si contendendo in nobis ipsum oculum exstinxerimus. Quam stulti essent duo volentes videre solem oriturum, si contenderent inter se qua parte oriturus esset, et quomodo videri posset, et nata inter se controversia litigarent, litigando se cæderent, cædendo oculos suos exstinguerent, ut illum ortum videre non possent? Igitur ut Deum videre possimus, fide corda mundemus, charitate sanemus, pace firmemus, quia hoc ipsum unde invicem diligimus, jam ex illo est, quem videre desideramus. Sed et sine sanctimonia nemo videbit Deum. Unde Joannes cum dixisset: « Scimus quia cum apparuerit similes ei erimus, quoniam videbimus eum sicuti est (I Joan. III), » continuo subiecit: « Et omnis qui habet spem hanc in eo, sanctificat se, sicut et ille sanctus est (ibid.). » Studendum itaque est paci et sanctitati, ut idonei simus eum videre. Has, inquit, duas virtutes sectamini, ut et sancti sitis, et propter sanctitatem vestram a pace perfectorum non recedatis, sed curam de illis habeatis, *contemplantes ne quis* ex illis vel ex vobis *desit gratiæ Dei*, quæ vobis adest, ut per eam et pacem et sanctimoniam, et cætera bona sectari possitis. Prævum est enim valde, si quis vestrum gratiæ Dei se subtrahat, cum ipsa se gratia vobis omnibus ingerat. Cui se per peccatum subtrahit, et illam a se rejicit, qui magis delectationi suæ, quam cœlesti gratiæ consentit. Unde subjungitur: Contemplantes

A *ne qua radix amaritudinis*, id est ne qua inchoatio delectationis peccati impediatur illam gratiam. Quæ peccati delectatio verius dicitur amaritudo, et ideo est vitanda. Ne qua radix amaritudinis, id est ne qua delectationis inchoatio, et ne qua cogitatio malitiæ *sursum germinans*, id est in actionem erumpens, *impediatur iter vestrum ad cœlum*. Radix enim in malis cogitationibus accipitur, germen autem in malis operibus atque sermonibus, quia quod latet in radice, monstratur in germine. Et intelligitur ista radix vel infidelitatis, vel peccati delectatio, nascens in corde, vel alia quælibet nequitie affectio. Et contemplandum est diligenter, ne sursum in actionem, vel in sermonem germinans ut lolium, *impediatur* virtutum ejus in quo sic germinaverit et deinceps *per illam inquinentur multi*, accipientes ab eo exemplum nequitie vel infidelitatis. Ideo enim cavendum est, ne talis radix germinet, quia quod in uno germinaverit, in alios diffunditur. Deinde per partes ostendit Apostolus hæc amaritudinis germina, et aliquos Judæorum notat. Contemplantes, inquit, *ne quis sit fornicator aut profanus*, id est a conventu fidelium alienus, *sicut Esau (Gen. xxv)*, qui pro amore gentilium mulierum sequestravit se a semine Abraham, et offendit patrem suum et matrem, atque *propter unam escam*, id est propter lentem, quam frater ejus coxerat, *vendidit ei primitiva*, id est primogenita sua, scilicet dignitatem quæ illi debebatur ex eo quod prior natus erat, propter quæ et a patre benedictionem accipere debebat. Sed ita fuit profanus, id est procul a religione, ut propter ventris ingluviem venderet benedictionem. Quamvis enim ex sanctis parentibus esset natus, tamen male vivendo degeneravit, et a semine Abraham, sicut dictum est, se separavit, nec promissiones Abraham factas hæreditavit. Ita et nunc inter Hebræos intelligitur Apostolus in spiritu vidisse aliquos sectatores Esau, in fornicatione et neglectu religionis et ingluvie ventris. Nam quos lex terrendo compecebat a nequitia fornicationis, nunc sub gratia quasi libere fornicabantur, quia non statim puniebantur, sed ad pœnitentiam expectabantur. Vel fornicator erat, quisquis inter eos carnalem legis observantiam velut concubinam cum fide tenebat; profanus vero, quisquis fidem prorsus negligebat, sicque primitiva sua, id est primatum, quem apud Deum habere posset, vendebat minori fratri, id est permittebat gentili populo ad fidem venienti, accipiens lentis escam rufam, id est delectationem peccati, quod per sanguinem designari solet. Et ita more Esau degenerans a fide et religione spiritualium patrum, a quibus per Evangelium in Christo genitus fuerat, promissiones supernæ hæreditatis consequi dignus non erat. Hæc itaque timens Apostolus, monet eos blande, ne sit inter eos quis fornicator vel profanus, sicut Esau, qui propter unius vilis escæ cupiditatem dedit primatus sui dignitatem. Nec debetis, inquit, esse sicut ille, qui reprobatus est. Nam *scitote quoniam et postea*, id est postquam primogenita

suam vendiderat, cupiens hæreditare benedictionem quæ primogenito debebatur, reprobatus est a Deo, licet enim pater eum benedicere vellet, divina tamen dispensatione factum est, ut fratrem ejus pro illo benediceret. Sicque divinitus reprobatus est ab acceptione benedictionis, quamvis pater eum ad benedicendum elegisset. *Non enim invenit tunc locum pœnitentiæ*, quanquam inquisisset eam cum lacrymis. Nam cum de venatu redisset, et agnovisset quod Jacob benedictionem, quam ipse exspectabat, accepisset, vehementer doluit et flevit, quod et antea primogenita, et nunc benedictionem perdidisset. Sed licet ubertim fleret, tamen pœnitentiæ locum non invenit, per quam primogenita quæ dudum venderat, recuperaret, vel benedictionem quam frater ejus acceperat, ipse sumeret, quia sero flevit, et sero pœnitentiam quæsivit. Impossibile enim jam erat mutari, quod factum fuerat. Sic et vos præcavete, ne cum post mortem debetis recipere benedictionem, reprobemini, et locum pœnitentiæ tunc non inveniatis, si modo primatum vestræ dignitatis propter brevem aliquam delectationem perdidideritis. Tarde enim in illo sæculo quæritur pœnitentia, cum jam fratres nostros benedictionem quam sperabamus, accepisse cognovimus, et nos sine benedictione relictos esse. Nunc enim tempus est pœnitentiæ, non tunc.

« Non enim accessistis ad tractabilem et accessibilem ignem, et turbinem, et caliginem, et procellam, et tubæ sonitum, et vocem verborum, quam qui audierunt, excusaverunt se, ne eis fieret verbum (*Exod. xix, xx*). Non enim portabant quod dicebatur; et si bestia tetigerit montem, lapidabitur (*ibid.*). Et ita terribile erat, quod videbatur: Moyses dixit: Exterritus sum et tremebundus. »

Dixit ne quis vestrum desit gratiæ Dei, parata est enim vobis. *Non enim accessistis ad asperitatem legis quæ nunc describitur, ut e contra intelligatur suavitas gratiæ. Non accessistis ad ignem, qui in vertice Sinai ardebat, tractabilem, id est palpabilem, et accessibilem, id est ad quem motu corporis accederetur, sed ad Spiritum sanctum, qui ignis est consumens peccata, et accendens in mente charitatem; qui non palpatur corporaliter, quia spiritus est, nec ad eum motu corporis, sed affectu cordis acceditur, quia nusquam localiter est. Non accessistis ad ignem, et turbinem, et caliginem, etc. Hæc in datione legis facta sunt, ut corda Judæorum concuterentur, ne auderent legem transgredi. Sed non ita in novæ legis acceptione factum est. Omnia enim suaviter et dulciter indicantur nobis, ut non ex timore, sed ex amore serviamus. Et non accessistis, inquit, ad turbinem: Turbo est vis ventorum cum grandine et pluvia, et significabat impetum vitiorum, quæ magis per legem damnata sunt. Sed modo venit ad serenitatem virtutum per gratiam sancti Spiritus. Et non accessistis ad caliginem, id est ad obscuritatem legis, sed ad claram intelligentiam.*

A *Et ad procellam, quæ tunc facta est, non accessistis, sed ad tranquillitatem. Procella enim, id est tempestas, quæ est major quam turbo, et quæquam [al. quocunque] propellit, ipsa est servitus peccati secundum operationem, quæ per legem trahat homines. Modo autem perfecti requiescunt a vitiiis; a tubæ ad sonitum non accessistis. Tubæ enim sonus, qui est signum motionis ad bellum, motus delectationis est, qui non per legem, sed per gratiam sopitur et extinguitur; et non accessistis ad vocem verborum, quam qui audierunt, excusaverunt se, ne eis a Domino fieret verbum, quando perterriti ac pavore concussi steterunt procul, dicentes Moysi: « Loquere tu nobis, et audiemus. Non loquatur nobis Dominus, ne forte moriamur (*Exod. xx*). » Hujusmodi vox, est legis præceptio et comminatio, quam populus gravem putavit et intolerabilem, quia sola præceptio erat sine gratia adjuvante. *Non enim portabant quod dicebatur, quia sine gratia insufficientes erant ad observanda præcepta. Potest ignis, ira legis intelligi. « Lex enim ira operatur (*Rom. iv*). » Turbo, comminatio qua dicitur, si quis hoc vel hoc fecit, morte moriatur. Caligo, obscuritas ignorantiae quæ in lege erat. Procella, vindicta culpæ quam lex faciebat. Sonus tubæ, adventus judicis, qui in tuba descendit de cælo (*1 Thes. iv*). Vox verborum, aspera locutio judicis, qua peccatores arguet. Et ideo vox ista merito visa est intolerabilis, quia nemo potest sustinere pondus illud judicii, si districte judicatus fuerit.**

C *Non enim portabant quod dicebatur, quia verbum illius judicis importabile est his, qui sine misericordia judicantur. Sed quid dicebatur quod importabile videbatur? hoc scilicet: *Et si bestia tetigerit montem, lapidabitur.* Sic enim præceperat Dominus quasi dicens: Longe state, qui etiam si bestia montem attigerit, lapidibus opprimetur. Ideo præ timore non poterant ferre vocem Domini terribiliter loquentis, quia præ timore mori formidabant. Spiritualiter vero, mons est divinitus contemplationis celsitudo. Bestia, defectus rationis. Quod est, quando verbum blasphemie refertur in Deum, vel irrationabiliter ad ejus contemplationem tenditur. Tangit ergo montem ut bestia qui offendit in divinitatem per suam irrationabilitatem, dum imprudenter [al. impudenter] cogitat et loquitur de Deo id quod non oportet. Bestia montem tangit, cum mens irrationabilibus desideriis subdit ad contemplationis alta se erigit. Sed lapidibus percutitur, quia suprema non sustinens, ipsis super ponderis ictibus necatur. Unde cum lex accipitur, populus a monte prohibetur, ut videlicet qui inferioribus adhuc mentibus terrena desiderant, considerent sublimia non præsumant. Prius enim mens ab appetitu gloriæ temporalis atque ab omni carnalis concupiscentiæ delectatione tergendam est, et tunc ad aciem contemplationis erigendam. Deus in igne loquens, minabatur bestiam quoque lapidandam cum si tangeret montem. *Et ita terribile erat quod vide-**

hatur, quia mons ardere videbatur, et dixerunt ad Moysen filii Israel: « Vocem Dei audivimus de medio ignis, et probavimus hodie quod loquente Deo cum homine vixerit homo. Cur ergo morimur, et devorabit nos ignis hic maximus? Si enim audierimus ultra vocem Domini Dei nostri, moriemur (*Deut. v.*) » Quid est omnis caro, ut audiat vocem Dei viventis qui de medio ignis loquitur, sicut nos audivimus et possit vivere? Ita terribile erat quod videbatur. Et vere terribile. Nam *Moyses dixit: Exterritus sum et tremebundus*. Valde enim fuit terribile, quod Moysen potuit exterrere. Et si ille sic timuit, quid putandum est de cæteris? *Moyses exterritus est, quoniam tanta erat asperitas, ut etiam perfecti terrerentur, quia non erat adiutrix gratia. Modo autem nec imperfectis gravis est præceptio, quia est jugum Christi suave, et onus ejus leve (Matth. ix).* Sequitur:

« Sed accessistis ad Sion montem, et ad civitatem Dei viventis Jerusalem coelestem, et multorum millium angelorum frequentiam, et ecclesiam primitivorum, qui conscripti sunt in cælis, et iudicem omnium Deum, et spiritus justorum perfectorum, et Testamenti Novi mediatorem Jesum, et sanguinis aspersionem, melius loquentem quam Abel. »

Non accessistis, inquit, ad tractabilem ignem, et ad cætera quæ descripsit hactenus. Non ad illa aspera accessistis, sed potius ad montem Sion. Non supponit contraria quæ ex opposito intelliguntur, sed præmium quod ex eis sequitur, ut per hoc magis suadeat tenendam esse gratiam. *Accessistis ad montem Sion*, id est ad celsitudinem supernæ beatitudinis, in qua Deus videtur. Mons namque sublimitatem, Sion vero quæ dicitur *speculatio*, contemplationem designat. Ad quam per fidem, et per virtutum merita accessistis, id est propinqui jam facti estis, ut post modum ad ipsam perveniatis, juxta illud: « Ibunt de virtute in virtutem, videbitur Deus deorum in Sion (*Psal. lxxxiii.*) » Sic accessistis proficiendo, nunc enim propior est nostra salus, quam cum credidimus (*Rom. xiii.*) Ascensiones ergo in cordibus vestris disponendo, propinquastis quidem, licet nondum perveneritis ad montem Sion, id est ad illius ineffabilis beatitudinis altitudinem, in qua sancti Deum speculantur, *et ad civitatem Dei viventis*, quæ ex ejus visione percipit, ut et ipsa sine fine vivat sicut ille. Ad civitatem Dei, scilicet ad *Jerusalem coelestem*, quæ dicitur *visio pacis*, quia nihil inquietudinis inter se vident in illo cælorum regno, sed quietem et pacem æternam; et accessistis ad *frequentiam multorum millium angelorum*, qui civitatem illam feliciter inhabitant. Et horum omnium futuri estis socii, quoniam cum pluribus major erit beatitudo, ubi unusquisque de alio gaudebit, sicut de seipso, vere diligens proximum suum sicut seipsum et accessistis ad *ecclesiam primitivorum*, id est apostolorum et cæterorum illius temporis sanctorum, qui jam ad superna migraverunt, et *conscripti sunt in cælis*, id est scripti sunt cum eis, qui sunt

A in cælis, hoc est in eorum ordine sunt, videlicet in angelorum sorte deputati. Et ideo ne dubitetis ad angelorum frequentiam vos esse perventuros, ad quam antecessores vestri jam pervenerunt; et accessistis etiam ad *Deum iudicem omnium*, ut et vos cum eo iudices efficiamini, atque persecutoribus vestris justam poenarum vicem tunc reddatis, et accessistis ad *spiritus*, id est ad animas *justorum perfectorum*, qui jam de hoc sæculo transierunt, quoniam et ipsi post apostolos ad regnum coeleste pervenerunt. Omnes enim justi quicumque in factis et dictis et cogitationibus perfecti sunt, mox ut animos de corporibus emittunt, cœlestibus habitaculis inferuntur. Ad horum spiritus accessistis, quoniam beatitudini eorum propinquastis, cum jam in fide et opere socii eorum sitis. Ad hæc omnia accedere magnum est jam præmium, quoniam ad hæc non pedum incessu, sed virtutum profectu acceditur ad Christum, qui via nobis ad hæc factus est. Unde subjungitur, *et Testamenti Novi mediatorem Jesum*. Sed accessistis ad Jesum, per quem ad omnia prædicta potuistis accedere, quoniam ipse est mediator Testamenti Novi, id est per seipsum dator Evangelii quod a patre acceperat, ut per illud perveniamus ad æternam hæreditatem. Moyses enim, sicut longe supra diximus, Veteris Testamenti, in quo temporalis hæreditas promittebatur, fuit mediator, qui ait: « Ego sequester et medius fui inter Dominum et vos in tempore illo, ut annuntiarem vobis verba ejus (*Deut. v.*) » Sed Dominus Jesus in tempore gratiæ fuit medius inter Patrem et nos, annuntians nobis verba ejus, et nos ei reconcilians, ac per se mediatorem dans nobis accessum ad eum, et ad omnia nunc superius denotata, et accessistis ad sanguinis ejus, inquit, aspersionem, per quam a peccatis vestris emundati estis atque sanctificati, sicut nonnulla, quæ in lege erant mundanda atque sanctificanda, aspergebantur sanguine hostiarum, ut mundari possent atque sanctificari. Sic igitur et nos omnes sanguine hujus veri sacrificii sumus aspersi, per quem non solum a peccatis emundati sumus, sed et sanctificationem atque justificationem accepimus. Aspersionem dico, *loquentem melius quam Abel*. Loquitur enim aspersione sanguinis Christi, quia Patrem interpellat pro nobis. Et ideo loquitur melius quam sanguis Abel, de quo dictum fuerat, « quia vox sanguinis fratris tui clamat ad me de terra (*Gen. iv.*) » quia sanguis Abel mortem parricidæ fratris petiit, sanguis autem Christi vitam persecutoribus impetravit. Sanguis Abel expetit vindictam, sanguis Christi misericordiam. Ille uni nocuit, iste multis profuit. Et idcirco melius loquitur. Vel loquitur loquitur, id est loquentes facit, quod Jesus est Filius Dei, a quo redempti sumus.

« Videte ne recusetis loquentem. Si enim illi non effugerunt, recusantes eum qui super terram loquebatur, multo magis nos, qui de cælis loquentem nobis avertimus. Cujus vox movit terram et tunc, nunc autem repromittit, dicens: Adhuc se-

« mel, et ego movebo non solum terram, sed et
 « cœlum (Agg. 11). Quod autem adhuc semel dicit,
 « declarat mobilium translationem tanquam facto-
 « rum, ut maneant ea quæ sunt immobilia. Itaque
 « regnum immobile suscipientes, habemus gratiam
 « per quam serviamus, placentes Deo cum metu et
 « reverentia. Etenim Deus noster ignis consumens
 « est (Deut. 1v.) »

Dominus Jesus ad quem accessistis, loquitur, ut dictum est, sanguine suo, quia et apud patrem pro nobis intervenit, et nos ad imitationem suæ passionis incitat. *Videte ergo ne recusatis loquentem*, dum vos hortatur ut sequamini vestigia ejus. Recusabitis etiam eum loquentem, si cum ipse pro vobis interpellat, quæsieritis per carnales observantias placere Deo. Nam et hoc loquitur sanguine suo, quod omnia legis sacrificia jam cessare debent, et solum ejus sacrificium manere loquitur, dum carnalia prohibet et spiritualia præcipit. Diligenter itaque attendite, ne recusatis eum loquentem, sed tanto mentis desiderio in omnibus quæ loquitur, amplectimini eum. Nam si illi, id est veteres Judæi, non effugerunt, dignam ultionem, *recusantes eum qui super terram loquebatur*, id est Moysen, qui licet Christo plenus, tamen homo tantum, non autem et Deus erat, et inter homines conversabatur, quibus præcepta Dei tradebat, *multo magis nos*, non effugiemus, *qui aversimus*, ab aure cordis nostri Christum, *loquentem nobis de cœlis*. Nam in cœlo jam sedet, qui de conversione nos admonet; et si illi dignas pertulere pœnas, qui Moysen licet mortalem et in terra positum, contempserunt, quid nos passuri sumus, si Christum immortalem et in cœlo sedentem contempserimus? Vel super terram loquebatur Moyses, quia terrenis hominibus carnalia præcepta dabat, et terrena bona promittebat. Super terram loquebatur, quia non super justum ponebat legem suam, sed super quemlibet peccatorem, cui dictum est: « Terra es, et in terram ibis (Gen. 111.) » Christus autem loquitur de cœlis, id est de cœlestibus et spiritualibus, quia et spiritualia, id est æterna bona promittit. Sed si illi non evasere, qui Moysen carnalia jubentem contempserunt, quomodo nos evademus, si Christum spiritualia jubentem audire neglexerimus? *Cujus, Christi, vox movit terram tunc*, cum Moyses super terram loqueretur, quia ipse Moysi legem dedit in monte Sina, et ejusdem legis decalogum, audiente universo populo, magna voce locutus est de vertice montis; et ut majorem illis terrorem incuteret, terram concussit. Tunc quidem ut comminaretur, ne recusarent ejus dicta, commovit sola voce terram; *nunc autem* non modo non minatur, sed blanditur et repromittit; ideo multo minus eum recusare debemus. Modo repromittit, id est iterum atque iterum velut in præmio promittit de novissimo die, in quo omnia elementa commovebuntur, vel iterum post illam terræ motionem, quæ in datione legis facta est, quando et cœlum intelligitur fuisse *motum*, promittit, *dicens*, per Aggeum prophetam

(cap. 11) : *Adhuc semel, et non amplius futurum est, scilicet in die judicii, et ego movebo non solum terram, sed etiam cœlum*. Cœlum autem non æthereum, sed aereum, non superius, sed inferius: non firmamentum, sed ventis et nubibus pervium. Cujus sententiæ sensum exponit Apostolus subdens: *Quod autem adhuc semel dicit*, etc. Ipse dicit adhuc semel movebo, quasi dicens: Jam fuere mota, sed adhuc semel ea movebo. Sed quod dicit, adhuc semel, *de-clarat translationem mobilium*. Nam per semel notat, quod ulterius non sint movenda, sed post futura sint immobilia. Per hoc quod dicit, movebo, declaratur cœli et terræ translatio, id est in alium statum transmutatio, ut fiat cœlum novum et terra nova, ex isto veteri cœlo et veteri terra (*supra* 1). Unde dictum est, « quia sicut vestimentum veterascent, et sicut opertorium mutabis eos, et mutabuntur (Psal. 111.) » Non ergo alia fient, sed hæc ipsa quæ ab initio facta sunt, renovabuntur igne judicii, et post sine fine manebunt. Declarat itaque translationem mobilium, id est transmutationem faciei terræ atque cœlorum, id est aeris hujus ventosi, non superiorum cœlorum, ubi sol et luna et cætera sidera sunt constituta. Quod autem in Psalmo dicitur: « Opera manuum tuarum sunt cœli, ipsi peribunt (Psal. 111); » nullum cœlorum videtur relinquere, quod perituum esse non dixerit, quia sicut nullum eorum ab opere Dei, ita nullum eorum a perditione fecit immune. Cui simile est: et quod hic dicitur, declarat translationem mobilium tanquam factorum. Nam non solum non immobilia sunt, sed etiam mobilia, quæ sunt in creaturis facta a Deo. Ne ergo totus mundus periturus esse credatur, a toto, sicut diximus, pars accipiatur, in eo quod dictum est, ipsi peribunt, cum soli cœli infirmi perituri sint, salvis illis superioribus, et in sua integritate manentibus, in quorum firmamento sidera sunt constituta. Similiter et hic per factorum, intelligitur, in his quæ sunt mobilia et transferenda. Sed ideo dicuntur a Deo facta quæ sunt transferenda, ut ostendatur quia bene poterunt in alium statum transferri, quæ potuerunt ex nihilo fieri. Declarat ergo translationem mobilium tanquam a se factorum, id est inferiorum cœlorum, qui quondam in diluvio periire, et eorum elementorum quæ in hac una parte mundi subsistunt procellosa et turbulenta, *ut maneant in perpetuum; ea quæ sunt immobilia*, id est superiores cœli cum habitatoribus suis, et terra postquam per ignem fuerit immutata. Vel declarat translationem mobilium, ut ea quæ nunc sunt et variantur, postquam translata fuerint, maneant æternaliter immobilia. Nam post illam translationem cœlum et terra erunt immobilia, sicut apparet in eo, quod semel movenda dicuntur. Et quandoquidem pereuntibus mobilibus ac temporalibus, ea quæ sunt immobilia manebunt, *itaque regnum Dei quod est immobile*, manebit in æternum, et nos illud spe jam *suscipientes, habemus gratiam Dei*, sine qua non possemus ad illud pervenire; et ideo nullus desit gratiæ Dei, quæ se nobis ingessit.

Habemus gratiam, in qua percipimus fidem, spem, charitatem bona operatione, per quam serviamus Deo placentes ei. Serviamus, inquit, et hoc *cum metu*, quia Deus est, et *reverentia*, id est tremore horroris, quia Pater est, vere per gratiam quam accepimus, servire debemus cum metu et reverentia. Etenim Deus noster ignis consumens est, cui servire volumus, sicut et Moyses antea dixit (*Deut. iv*). Deus quippe ignis consumens dicitur, quia per hunc peccatorum rubigo consumitur. Rubigo namque vitii non potest consumi nisi igne tormenti. Ignis quatuor sunt officia, id est quoniam purgat et urit et illuminat et calefacit. Sicque Spiritus sanctus purgat sordes vitiorum; et urit renes et cor ab humore libidinum, illuminat mentem notitia veritatis, et calefacit incendio charitatis. Et per hæc omnia facit placere Deo. Et idcirco per acceptam gratiam serviamus ei placentes. Vel cum metu et reverentia serviamus, quia Deus noster est ignis consumens, qui illos in iudicio consumet, qui nunc eum nec metuunt, nec reverentur. Non quod Deus sit ignis, sed quod sustinentibus pœnas ignis esse videatur. Nam sicut illuminabit justos, sic exuret impios.

CAPUT XIII.

« Charitas fraternitatis maneat in vobis et hospitalitatem nolite oblivisci (*Petr. iv; Rom. xii*). « Per hanc enim placuerunt quidam, angelis hospitio receptis. Mementote victorum tanquam simul « vincti, et laborantium, tanquam et ipsi in corpore « morantes. Honorabile connubium in omnibus, « et torus immaculatus. Fornicadores autem et « adulteros iudicabit Deus. »

Nunc moraliter instruit. Quoniam Deus est ignis accendens in corde charitatem, per quam non solum Deus, sed et proximus diligitur: ergo videte, ne charitas fratrum, quam ignis ille accendit in cordibus vestris exstinguatur, aut recedat a vobis, sed Jugiter *maneat in vobis charitas fraternitatis*, id est semper diligatis fraternitatem, hoc est fratres qui sunt aqua et spiritu renati (*Joan. iii*); sicut et vos: nec sit unquam aliquid, quod eorum amorem auferre possit de cordibus vestris; et *hospitalitatem* quam olim habuistis, priusquam rebus vestris spoliaremini, *nolite oblivisci* propter indigentiam vestram, sed estote frequenter memores ejus in opere, ut vel hospitium præbeatis cum charitate, etsi copiam alimenterum non sufficiatis exhibere. Nec debetis per in-con-suetudinem oblivisci hospitalitatem, quia *per hanc placuerunt Deo quidam nominatissimi patres*, id est Abraham et Lot (*Gen. xviii, xix*), *receptis angelis hospitio*. Nam quia pio studio consueverant hospites suscipere, meruere et angelis hospitium exhibere. Quos quidem homines esse putabant, dum eis cibos offerrent, sed post intellexerunt esse angelos, vel cum eis videntibus in cœlum irent, vel per alia aliqua indicia, quæ in ipsis viderunt. Præter hospites autem *mementote victorum*, id est memores estote eorum, qui pro nomine Domini tenentur in carceribus aut vinculis, nec possunt sibi subsidia

A quærere: et ideo pie de illis cogitate, ut eis necessaria ministretis. Non sint vobis oblivioni, quamvis teneantur in abditis reclusi; sed mementote eorum *tanquam simul vincti*, id est ita jugiter de eis cogitate, et eis compatimini et subvenite, ac si essetis vincti cum eis: et sicut vobis vinctis velletis subveniri, ita illis subvenire studete, et mementote *laborantium*, id est eorum, qui vel infirmitate corporis, vel aliqua necessitate laborant. Mementote frequenter eorum, beneficiendo illis *tanquam et ipsi passibiles*, et ad sentiendum afflictionis laborem habiles, hoc est quod dicitur, tanquam et ipsi *in corpore morantes*. Per hoc enim quod in corpore moramini, experti estis per vos ipsos, quid necesse sit laborantibus, et potest fieri ut et vos duriores adhuc laborem quam isti sustineatis, et desideretis vobis ab aliis subveniri: et ideo nunc vos priores subvenite, ut et vobis (si necesse fuerit) subveniatur. Aliud quoque vobis notifico, scilicet quia *connubium est honorabile*, id est legales nuptiæ sunt honorabiles *in omnibus*, nihil est in eis quod honore careat, et *torus talium conjugum est immaculatus*, id est sine macula criminis. *Fornicadores autem qui publicis mulieribus commiscuntur, et adulteros qui alienas uxores violant, iudicabit Deus*, id est in novissimo iudicio perpetualiter condemnabit. Adulterium enim in aliena conjuge perpetratur. Fornicatio autem in hoc loco non solum cum cæteris mulieribus intelligitur, sed etiam illa quæ Gomorrhæorum more agitur, vel quocunque modo castitas sponte violetur. Et hos omnes qui se quacunquē luxuria polluunt, iudicabit Deus. Longe quidem est dies iudicii, sed uniuscujusque hominis dies ultimus longe esse non potest; et quia brevis est vita, ipsaque brevitatis semper incerta, ita ut nemo nostrum sciat quando sit ultimus dies ejus, ideo quicumque est aliqua libidinis immunditia contaminatus, studeat cito mundari per pœnitentiam, dum adhuc potest, ne incipiat velle cum jam non poterit, et incidat in iudicium æterni Dei.

« Sint mores sine avaritia, contenti præsentibus. « Ipse enim dixit: Non te deseram neque derelinquam (*Josue i*), ita ut confidenter dicamus: Dominus mihi adiutor, non timebo quid faciat mihi « homo (*Psal. cxvii*). Mementote præpositorum vestrorum, qui vobis locuti sunt verbum Dei, quorum intuentes exitum conversationis imitamini « fidem. Jesus Christus heri et hodie, ipse et in sæcula. »

Postquam isti sua perdiderant, volebant iterum congregare. Quod nunc prohibet Apostolus. *Sint*, inquit, vobis *mores sine avaritia*, id est moribus vestris non se intermiscet avaritia. Sed sine pecuniarum immoderato amore sacri mores vestri ducantur, *contenti præsentibus*, ut non de futuris lucris tractent, nec ad futura tempora opes sibi coacervent. Sed ne dicerent, quid si necessaria defuerint, subdit consolationem. Non debetis avide congregare, quasi timentes ne Deus necessaria vobis sinat abesse,

quia ipse qui mentiri non potest, dixit omni speranti in se : *Non te deseram neque derelinquam.* Ad majorem fiduciam nobis faciendam ingemnavit promissionem non relictionis, dicens : *Non te deseram neque derelinquam.* Hoc dixit Josue (*cap. 1*) tenenti formam Domini Jesu Christi, et in Christo cuilibet membro Christi. Ita promisit se non derelicturum nos, et ita est nobiscum, ut *confidenter* dicat unusquisque nostrum : *Dominus mihi adjutor* est in cunctis laboribus et tribulationibus meis, et ideo *non timebo quid faciat mihi homo*, etiam si res meas auferat, etiam si corpus meum pœnis afficiat. Diabolus proprie est noster adversarius, sed per hominem sæpius mala nobis infert. Et ideo per Dei adjutorium non timemus hominem pravum, per quem diabolus operatur. Ut autem vincatis avaritiam, neque timeatis ullum malum hominem *mementote præpositorum vestrorum defunctorum, qui vobis locuti sunt verbum Dei*, id est recogitate quam perfecte ipsi reliquerunt omnia propter Evangelium et quam constanter omnes adversitates per patientiam intrepidi calcaverunt. Horum mementote, ut eos imitemini, et tunc nec paupertatem, nec persecutionem timebitis, *quorum conversationis exitum intuentes*, id est interioribus oculis inspicientes quomodo exierint de præsentis conversatione, et quo fine temporalem vitam terminaverint, transeuntes ad æterna gaudia, *imitamini fidem eorum*, quam usque in mortem tenuerunt, ut et vos similiter in fide moriamini, et ad fidei præmia perveniat. Ne autem dubitetis divinum vobis adjutorium adesse, quod illis adfuit, scitote quia *Jesus Christus heri fuit et hodie est, ipse et in sæcula erit.* Ac si dicatur : *Idem Christus qui cum illis fuit, vobiscum est : et erit cum eis qui futuri sunt, usque ad consummationem sæculi (Matth. xxviii).* Heri fuit cum patribus, hodie est vobiscum, ipse erit et cum posteris vestris usque in sæcula. Heri enim præteriti temporis est, hodie præsentis. Quod autem in sæcula manet, non videtur habere finem. Heri ergo, omne præteritum tempus et omne spatium æternitatis, quod ante mundi originem fuit, significat : hodie autem, omne præsens tempus ; perduratio in sæcula, omne spatium temporis et infinitatis quod futurum est. Itaque Jesus Christus fuit heri, quia *in principio erat Verbum (Joan. 1)*, et ab æterno usque ad nostra tempora, ipse est, hodie quoque, id est nostro tempore est. Erit et in sæcula, quia æternaliter manebit. Unde et per Joannem de eo dicitur : *Qui erat, et qui est, et qui venturus est (Apoc. 1).* Nam qui venturus est potest intelligi, qui futurus est per omnia sæcula, et hæc quidem secundum imbecillitatem humanæ intelligentiæ dicuntur. Cæterum divinitas ejus interminabilis plenitudinem totam pariter comprehendit ac possidet cui neque futuri quidquam absit, nec præteriti fluxerit, quoniam esse ejus totum est, et semper est necesseque mutabilitatem, quod neque coepit unquam, nec aliquando cessabit, insuperabile quoddam ac sine fine essentiæ pelagus, nullis terminis limitibusque circumdatum, omnem supergrediens sensum,

A omne tempus atque omnem naturam. Sequitur :

« Doctrinis variis et peregrinis nolite abduci. Optimum est enim gratia stabiliri cor, non escis, quæ non profuerunt ambulanti in eis. »

Quia Jesus Christus semper fuit et est et erit, nolite ab ejus fide abduci doctrinis pseudoprædicatorum variis, id est diversis, et a se invicem multipliciter differentibus ac discordantibus, dum alius alium errorem docet, et alius alium, sibi que vicissim contraria prædicant ; et peregrinis, id est a catholica veritate alienis. Talibus ergo doctrinis nolite abduci, id est ab integritate fidei et puritate religionis Christianæ separari. Nec debetis seductoriis falsiloquorum verbis abduci, quia *optimum est stabiliri cor in gratia fidei et sanctitatis, ut stabiliter persistat in ea, nec in ullum inducatur errorem, sed in gratia Dei quam accepit, maneat.* Gratia debet cor stabiliri juxta Evangelium, non escis juxta doctrinam pseudoprædicatorum. Datur enim intelligi, quosdam inter eos fuisse, qui dogmatizarent non esse peccatum escis vacare. Nam quia per gratiam licitum est omnibus cibis uti, prædicabant non esse culpam cibis affluere, sed bonum esse. Contra quos Apostolus : *« Nolite, inquit, abduci doctrinis stultorum, quæ sunt variæ, »* id est a nostris diversæ et peregrinæ, id est extraneæ. Debetis enim confirmare cor gratia, quæ solvendo a lege libertatem tribuit, et non studere escis, quia *non profuerunt ad salutem, non dico se sustentantibus ex eis, sed ambulanti in eis*, id est qui vitam suam ducunt in convivii et epulationibus. Vel gratia evangelica stabilite cor vestrum, ut in ea mens vestra maneat et studeat, non escis quas lex solas edendas docet prohibitis cæteris velut immundis, cum sint creaturæ Dei, qui fecit omnia bona valde (*Gen. 1*). Quæ legales escæ post adventum Domini non profuere, sed potius nocere ambulanti in eis, id est illis, qui vitam suam in observantia discretionis earum duxerunt.

« Habemus altare, de quo edere non habent potestatem, qui tabernaculo deserviunt. Quorum enim animalium infertur sanguis pro peccato in sancta per pontificem, horum corpora cremantur extra castra (*Num. 19*). Propter quod et Jesus ut sanctificaret per suum sanguinem populum, extra portam passus est. Exeamus igitur ad eum extra castra, improperium ejus portantes. Non enim habemus hic manentem civitatem, sed futuram inquirimus (*Mich. 11*). »

Tangit consuetudinem legis, et ad spiritalem intelligentiam revocat, legis enim præceptum fuit ut decima die mensis septimi, in festo scilicet propitiationis, acciperent vitulum et hircum, et immolarent intra castra, quorum sanguinem ferret solus pontifex in sancta sanctorum, oraturus pro universo populo; carnes vero extra castra cremarentur, nec esset licitum alicui tabernaculo deservienti ex illis comedere. Christus est ille vitulus propter novellam fortitudinem, quam ostendit in

resurrectione, et ille hircus propter similitudinem carnis peccati, et iste vitulus vel hircus pro peccato universæ plebis est immolatus. Quem præcepto legis acceperunt sacerdotes ad immolandum, quia secundum legem sibi visi sunt occidere Christum, quoniam solvebat secundum ipsos Sabbatum. Qui immolavere eum in castris, id est occiderunt vocibus suis in domo Caiphæ, dicentes: « Reus est mortis (Matth. xxvi); » vel in domo Pilati, clamantes: « Crucifige eum (Joan. xix), » sed post extra castra sunt carnes ejus crematæ, id est extra Jerusalem igne passionis consumptæ. Vel concrematio ad signum pertinet resurrectionis, quia natura ignis est ut in superna moveatur, et in id convertitur, quod crematur. Nam et ipsum cremare de Græco in Latinum ductum verbum est a suspensione (237). Sanguis autem ejus illatus est et in Sancta sanctorum per pontificem, id est per ipsum Christum cælo illatum, qui illuc intravit, ut interpellaret pro nobis. Altare vero ubi extra castra crematus est, altare est ecclesiæ, ubi consecratur corpus ejus, de quo non habent potestatem edere qui deserviunt tabernaculo, id est umbræ veritatis. Vel per tabernaculum intelligitur corpus, et qui deserviunt tabernaculo, id est corporis voluptatibus, sicut gulosi et ebriosi et fornicatores et hiis similes, non habent potestatem, id est licentiam edere de nostro altari, id est accipere corpus Domini. Dixerat enim, quia escis non est studendum, et statim apte subdidit, quia *habemus altare, de quo non habent potestatem edere illi, qui tabernaculo deserviunt*, id est qui voluptuose vivunt et carnalibus desideriis satisfaciunt. Nam sicut ille vitulus et hircus extra castra comburebatur, nec ab aliquo eorum qui tabernaculo serviebant, edebatur, sic memoria passionis Christi apud eos celebratur, atque corpus sumitur, qui extra voluptates corporis exierunt, nec potest ab illis accipi qui in carnis voluptatibus morantur, et tabernaculo corporis servant. Possunt et electi per hircum et vitulum intelligi. Per hircum, quoniam peccata carnis student in seipsis mactare; per vitulum, quia sacrificium justitiæ Deo student offerre. Qui extra castra cremantur, quia Spiritu sancto accensi, extra conversationem sæcularium consumunt quidquid in eis est carnale, dum seipsos jejuniis et aliis laboribus pie affligunt. *Quorum enim animalium sanguis*, id est vita laudabilis, *infertur in sancta per pontificem*, id est præsentatur Deo per Christum, et hoc *pro peccato eorum*, quia non solum ut Deo placeant, sed etiam ut priora peccata redimant, laudabiliter vivunt. Vel sanguis, id est animæ eorum inferuntur in sancta, id est in cælum per pontificem Christum, in altari cordis cremantur. Ad quod non possunt propter suam irreligiositatem accedere, qui tabernaculo deserviunt, id est carnales sæculum amantes, et voluptatibus corporis servientes; *horum animalium quorum sanguis in*

(237) κρέμαζω enim vel κρεμάω seu κρεμαμα appendere significat. Hinc auctor cremo deductum suspicatur.

Sancta per pontificem infertur, *corpora extra castra cremantur, propter quod mysterium implendum, et Jesus extra portam Jerusalem passus est, ut sanctificaret in veritate per suum sanguinem populum*, sicut ut sanguis illorum animalium in umbra sanctificaret. Vel per duplicem allegoriam, unam Veteris, et alteram Novi Testamenti, probavit corpus Christi non esse edendum ab his, qui tabernaculo deserviunt. Ad hoc enim corpora animalium extra castra cremabantur, etiam propterea Christus extra portam passus est, ut nos qui corpore et sanguine ejus a peccatis mundari volumus, impropria et angustias passuri, et delicias tabernaculi deseramus. Unde mox subditur: *Exeamus igitur ad eum extra castra, improprium ejus portantes*. Qui enim vult corpus et sanguinem ejus accipere, debet ad locum passionis ejus accedere, ut honores et opes tabernaculi relinquens, impropria et paupertatem pro nomine ejus ferre non respuat, et de castris, et de urbe exiens, ad crucem veniat, id est perversos mores multitudinis eorum, qui latam viam sæculi tenent, deserens, angustam viam quæ ducit ad vitam (Matth. vii), arripiat. Christus enim extra portam passus, innuit se in passionis redemptionem colligere eos, qui de carnis desideriis propter ejus passionis imitationem exierint. Exeamus igitur ad eum extra castra, id est communem sæcularium hominum carnis voluptatibus servientium nequitiam relinquentes, ne jam cum illis amplius in illicitis voluptatibus immoretur, sed relicto pravitate eorum consortio, ad Christi crucem properemus, portantes improprium ejus, ut et nos cum eo derideamur ab impiis et sæculi delictoribus. Exeamus ad eum, id est pia sollicitudine et operatione tendamus ad exitum vitæ præsentis, quo transeamus ad eum. Semper enim cordis oculos ad exitum ponere debemus, et sine cessatione meditari, quando a præsentis vita exeamus, ut ad Christum perveniamus; et debemus ad eum piis desideriis sic exire quotidie, mente meditando exitum nostrum, quia *non habemus hic manentem civitatem*, id est in hoc statu corpus manens, *sed futuram civitatem inquiremus*, id est corpus incorruptibile et impassibile, quod post resurrectionem erit, habere cupimus. Vel exeamus corde et opere de castris, id est de medio multitudinis amatorum sæculi, ut cum Christo simus inopes et despecti, cujus regnum non est de hoc mundo (Joan. xviii), quia non habemus hic manentem civitatem, id est non sumus cives Babylonis, quæ in amore præsentis sæculi radicem cordis plantavit, sed peregrini et hospites sumus in hoc sæculo (Galat. iv), et futuram civitatem, id est supernam Jerusalem, quæ mater nostra est, inquiremus, id est intus querimus, ut interiorum ejus beatitudinem inveniamus. « Beati enim mundo corde, quoniam ipsi Deum videbunt. »

« Per ipsum ergo offeramus hostiam laudis sem-

« per Deo, id est fructum laborum confitentium
« nomini ejus. Beneficentiæ autem et communica-
« tionis nolite oblivisci. Talibus enim hostiis pro-
« meretur Deus. »

Christus se obtulit sacrificium pro nobis, et nos
ergo per ipsum offeramus semper Deo Patri hostiam
laudis, quia ipse summus sacerdos omnes nos, si
membra ejus sumus, fecit sacerdotes. Offeramus
hostiam non pecoris, sed laudis, ut jam non car-
nes brutorum animalium offeramus et immolemus,
sed quod scriptum est faciamus : « Immola Deo sac-
rificium laudis (*Psal.* XLIX), » id est laudemus eum
amando, ut non serviliter, sed libenter colamus
eum. Timentes enim Deum homines Veteri Testa-
menti propter litteram terrentem et occidentem,
nondum habentem Spiritum vivificantem, currebant
cum sacrificiis ad templum; et quamvis in figuram
futuri sanguinis quo redempti sumus, tamen ne-
scientes quid per eas præfiguraretur, cruentas victi-
mas immolabant. Nunc per gratiam Novi Testa-
menti ablato legis terrore et dato Spiritu sancto,
reprobata sunt carnalia illa sacrificia, et pro illis
instituta sunt spiritalia, ut jam non extra se quæ-
rat homo quod offerat Deo, sed piam illi suæ men-
tis devotionem et dilectionem offerat sacrificium
laudis. *Offeramus*, inquit, *Deo semper hostiam lau-*
dis, hoc est incessanter eum laudemus corde et ore,
sicut ille qui ait : « Benedicam Dominum in omni
tempore, semper laus ejus in ore meo (*Psal.*
XXXIII). *Offeramus hostiam laudis*, id est fructum
laborum confitentium nomini ejus, fructum quem
labia nostra proferent, quando confitebimur nomini
ejus, hoc est quando videlicet ejus pia devotione
laudantes, confessionem laudationis et gratiarum
ei reddemus. Hanc ergo laudis hostiam, id est hunc
fructum laborum, scilicet affectum dilectionis in-
ternæ prolatum labiis Deum laudantibus, semper
offeramus, ut quod semper mens diligit, os fructuo-
sa laudatione loquatur, quia corde creditur ad jus-
titiam, ore autem confessio fit ad salutem (*Rom.*
X). Tales estote erga nominis Domini confessionem
et laudationem, sed erga sanctos *nolite oblivisci be-*
neficentiæ et communicationis, id est quamvis dudum
bonis vestris ideo spoliati sitis, quia sanctis inde
ministrabatis, tamen nolite oblivisci solitæ benefi-
centiæ et communicationis, sed ex eo quod post
acquisistis, benefacite sanctis indigentibus et com-
municate illis quod habetis, ut antea faciebatis. Et
debetis in eleemosynam sanctis vestra bona com-
municare, quia *talibus hostiis*, id est eleemosynis
quæ dantur sanctis, *promeretur Deus*, id est ipse
Deus est merces quam talibus sacrificiis acquiritis;
et ideo non jam sacrificia legis, sed sacrificia elee-
mosynarum offerte Deo, dicenti : « Quia misericor-
diam volui, et non sacrificium (*Os.* VI). » Quod
enim ab hominibus appellatur sacrificium, signum
est veri sacrificii. Misericordia autem verum est
sacrificium. Quæcunque igitur in mysterio taberna-
culi sive templi multis modis de sacrificiis leguntur

divinitus esse præcepta, ad dilectionem Dei et pro-
ximi significandam referuntur. In his duobus præ-
ceptis tota lex pendet et prophetæ (*Matth.* XXII).
Non vult itaque Deus trucidatorum pecorum; sed
vult sacrificium eleemosynarum, sicut præmisimus
eum dicere, quia misericordiam volui, et non sacri-
ficium.

« Obedite præpositis vestris, et subjacete eis.
« Ipsi enim pervigilant quasi rationem pro anima-
« bus vestris reddituri, ut cum gaudio hoc faciant,
« et non gementes : hoc enim non expedit vobis. »

Monuerat eos ne obliviscerentur beneficentiæ et
communicationis, sed semper meminissent benefa-
cere sanctis, et res suas communicare illis. Quod
ad subjectos specialiter dictum est, qui hæc facere
debent maxime prælatis suis. Unde et adhuc eisdem
subjectis evidentius modo dicit : *Obedite præpositis*
vestris, id est obtemperate jussis eorum in omnibus,
nisi forte malum aliquod jusserint, quoniam ma-
lum per obedientiam non est faciendum, sed cætera
omnia, etiam si non videntur esse bona, et non vos
comparate vel superponite illis superbiendo, sed
humiliter *subjacete eis*, et debitam reverentiam ex-
hibete. Quod utique debetis facere, quia Deo judici
rationem reddituri sunt pro animabus vestris, et
ipsi pervigilant, id est per omnia vigilant, semper
vigilant, hoc est solliciti sunt, pro vobis, *quasi ra-*
tionem reddituri, pro animabus vestris, quas in cu-
stodiam susceperunt. Et quia student recte vos du-
cere per viam justitiæ, ut cum vos perduxerint ante
tribunal Christi, non accusentur non recte vos du-
xisse, idcirco nunc obedite illis, ne et vos tunc ac-
cusemini declinasse de via, quam præceperunt vobis.
Ideo illis obedite et subjacete, *ut faciant hoc*, id
est vigilant pro vobis *cum gaudio* de profectu vestro,
et non gementes de detrimento vestro, quia *hoc non*
expedit vobis ut contristentur de vobis. Tunc vigi-
lant præpositi cum gaudio, quando vident subjectos
suos, proficere in Dei verbo, quia et agricola tunc
cum gaudio laborat, quando attendit arborem et
fructum videt, quando attendit segetem, et fructifi-
care prospicit ubertatem. Videt enim quia non sine
causa laboravit, non sine causa dorsum curvavit,
non sine causa manus attrivit, non sine causa fri-
gus et æstum toleravit. Sic est et de spiritalibus
agricolis, id est de prælatis Ecclesiæ, quia tunc in
labore suo gaudent, cum eos quorum mores excolunt,
proficere vident : hoc est enim quod ait, ut
cum gaudio faciant, et non gementes. *Hoc enim*
non expedit vobis. Non dixit : Hoc non expedit illis;
sed dixit : Hoc non expedit vobis. Nam quando illi
præpositi contristantur de malis vestris, expedit
illis ipsa tristitia, et prodest illis, sed non expedit
vobis. Simul ergo prælati et subditi in Dominico
agro bonum operemur, ut simul de mercede gau-
deamus.

« Orate pro nobis. Confidimus enim quia bonam
« conscientiam habemus in omnibus bene volentes

« conversari. Amplius autem deprecor vos hoc facere, quo celerius restituar vobis. »

Auxilium orationis eorum expetit Apostolus, quo vel liberaretur a carcere, et ad prædicationem redeat, vel martyrio consummatus ad Christum transeat. *Orate*, inquit, *pro nobis*, pluralem numerum pro singulari ponens, vel pro se, vel pro his qui secum tenebantur, orari petens. Et debetis orare pro nobis, quia *confidimus* nos bonam conscientiam habere. Conscientia enim nos non accusat. Ne ergo sinistre quid arbitremini de nobis. Accusabatur Apostolus quod suam gentem negligeret, sed ostendit se affectum habere ad omnes Judæos et gentiles. Dicebatur etiam a nonnullis aliter docere quam cæteri apostoli, et inimicus legis esse ac templi Judæorum, quia circumcisionem et carnales observantias fortius respuebat quam cæteri. Sed ostendit se bonam habere conscientiam, et studio placendi Deo facere quicquid, nec peccasse in his quæ docuit. *Confidimus*, inquit, *quia bonam conscientiam habemus*, id est pro certo scimus, nos non reprehendi a conscientia nostra ex his quæ fecimus vel docuimus, postquam ad fidem venimus. Et quare? Quia sumus *in omnibus bene volentes conversari*, id est non sumus duplices sed simplices. Non sumus volentes in quibusdam bene conversari, et in quibusdam non bene, sed in omnibus bene: hoc est, non ex parte, sed ex toto studemus bene vivere, deo quæ non remordemur a conscientia. Dixi ut oretis pro nobis. Sed *amplius deprecor vos hoc facere*, id est vestris orationibus impetrare, *quo celerius restituar vobis*, hoc est, amplius, pro vestra, quam pro mea salute deprecor vos ut oretis pro me, quia hoc rogo vestris precibus fieri, ut celerius a carcere dimissus, restituar non mihi, sed vobis, id est reddar pristino officio prædicationis, ut in diversas partes libere pergens et vos et alios diligentius instruam.

« Deus autem pacis, qui eduxit de mortuis pastorem magnum ovium in sanguine testamenti æterni, Dominum nostrum Jesum Christum, aptet vos in omni bono opere, ut faciatis ejus voluntatem, faciens in vobis quod placeat coram se, per Jesum Christum, cui est gloria in sæcula sæculorum. Amen. »

Ego quidem hactenus monui vos, et patientiam atque bona opera suasi vobis, sed Deus qui potens est, ipse faciat vos agere quod monui. *Deus pacis* qui pacem et quietem dat suis, quando scit oportere, sedans omnes persecutiones et vitiorum impugnationes, atque post hanc vitam dat eis pacem æternæ tranquillitatis, qui pro ejus nomine patienter adversa pertulerunt, Deus dico, *qui eduxit de mortuis*, id est resuscitavit separans a consortio mortuorum, *magnum pastorem ovium*, id est eum qui oves suas, omnes scilicet electas animas, pascit et conservat. Episcopi enim et cæteri custodes Dominici gregis sunt minores pastores, quia unusquisque eorum partem sibi commissam ejusdem gregis

fideliū pascit. Hic autem maximus pastor est, quia totum gregem conservat et pascit. Pascit autem non solum verbo doctrinæ, sed corpore ac sanguine suo. Unde nunc dicitur esse pastor *in sanguine testamenti æterni*, quia oves quas redemit, carnis et sanguinis sui sacramento pascit. Qui sanguis est confirmator non transeuntis, sed æterni testamenti, id est non veteris legis quæ præterit, sed novæ quæ manet. Novum enim Testamentum dicitur æternum quia aliud ei non succedet, sicut eidem Novum successit Veteri. Vel in sanguine testamenti æterni eduxit Deus Christum a mortuis, quia sicut eidem Christo per Zachariam dicitur: « Tu quoque in sanguine testamenti tui eduxisti vincitos tuos de lacu, in quo non est aqua (*Zach. ix*), » id est de inferno, sic et ipse Christus in sanguine eodem est eductus de mortuis, quia tanta fuit potentia sanguinis ejus, ut non solum justos, qui in inferno vinciti tenebantur eriperet, sed etiam ipsum *Dominum nostrum Jesum Christum* a mortuis suscitaret. Deus qui hæc facit, *aptet vos*, id est aptos et voluntarios vos faciat *in omni opere bono*, ut in omnibus bene agentes, *faciatis* atque compleatis opere *voluntatem ejus*. Ipse dico, *faciens in vobis quod placeat coram se*, quia nisi ipso in vobis operante nihil potestis agere, quod oculis ejus placeat. Hæc est gratia quæ mentem prævenit et adjuvat, ut homo suæ voluntatis et operationis obsequium subjungat; et dictum est hoc, ne de liberi arbitrii sui viribus præsumerent, et quasi ex seipsis hæc posse bene agere putarent. Sic faciat in vobis quod sibi placeat, et hoc non per carnalem legis observantiam, sed *per Jesum Christum*, per quem mediatorem omnia bona nobis a Patre dantur, cui Christo *est gloria*, non in brevi tempore, sed *in sæcula sæculorum*, id est in æterna sæcula temporalium sæculorum subsequiva. Illi quem deriserunt in passione Judæi, est gloria non paucis diebus permanens, sed in æterna sæcula. Amen, id est *vere*.

« Rogo autem vos fratres, ut sufferatis verbum solatii. Etenim perpaucis scripsi vobis. »

Hanc vobis epistolam misi, sed ne fastidiosa sit vobis, fratres, id est quibus fraterna charitate consulo, *rogo vos ut sufferatis verbum solatii* quod in ea vobis locutus sum, quoniam sermo ejusdem epistolæ consolatorius est, præbens vobis in tribulatione solatium, ne deficiatis; et debetis sine tædio sufferre, quicquid in hac epistola loquor, quia perpaucis, id est per omnia paucis dictis *scripsi vobis*. Per omnia enim quæ in ea disserui, pauca sunt quæ dixi, quoniam multa de singulis possent dici. Hic exemplo suo docet nos magister egregius, ut ea quæ sentimus, et valde humiliter et sine fastidiosa prolixitate dicamus. Multa enim humiliter hactenus Hebræis est locutus, sed exhortatione humili placare eos adhuc humiliter satagit, dicens: *Rogo autem vos*, etc. Hinc ergo colligat si quando aliquid recte sentit, quanta humilitate debet magistro loqui discipulus, si ipse magister gentium in his quæ cum au-

etoritate prædicat, submisso discipulos rogat, tum unusquisque colligat ex his, ut illis a quibus exempla bene vivendi percipit, hoc quod bene aut melius quam illi intelligit, humiliter dicat, si Paulus illi humili se voce subdidit, quos ad vitam ipse suscitavit. Curandum quoque est quantum loquamur, ut si cum qui multa ferre non valet, longius loquendo traxerimus ad fastidium perducamus. Hoc tamen infirmis præcipue congruit, ut pauca quidem et quæ capere prævalent, audiant, sed quæ eorum mentem impoenitentiae dolore compungant.

« Cognoscite fratrem nostrum Timotheum dimissum cum quo, si celerius venerit, videbo vos. Salutate omnes præpositos vestros, et omnes sanctos. Salutant vos de Italia fratres. Gratia cum omnibus vobis. Amen. »

Cognoscite fratrem nostrum Timotheum, cognoscite quantæ sanctitatis ipse sit, et quantæ ei reverentia debeatur, Timotheum dico, dimissum, id est euntem iter quod volebat, vel ad prædicandum (ut cupiebat)

A dimissum, aut fortassis a carcere relaxatum. *Cum quo, si celerius venerit, videbo vos, quia si velocius venire festinaverit, habebō facultatem eundi cum eo ad vos. In hac promissione reddit eos attentos et magis obedientes, ne si venerit, inveniatur eos inobedientes admonitioni hujus epistolæ, praveque agentes. Ac deinde: Salutate, inquit, omnes præpositos vestros, id est sacerdotes et cæteros qui præsent vobis in Domino, et omnes sanctos, id est omnes subjectos, qui baptismi sanctificationem perceperunt. Cum autem subjungit: Salutant vos de Italia fratres, ostendit se ab Italia scripsisse. Ideo autem quod supradixit, deprecor vos facere ut celerius restituar vobis, declaravit se vinculis tentum esse, dum scriberet, atque colligitur epistolam misisse a Roma, ubi vinctus tenebatur. Gratia, inquit, cum omnibus vobis sit, ut per auxilium gratiæ possitis bene vivere, qui per legem non potuistis Deo placere. Cujus et nos participes efficiamur, ut per eam justificemur, et ad æternam vitam pervenire mereamur. Amen.*

ANNO DOMINI MCL

HILDEBRANDUS JUNIOR

NOTITIA

(FABRIC., *Biblioth. med. et inf. Lat. t. III, p. 259*)

Hildebrandus junior, scriptor commentariorum in Matthæum. Ejusdem, ut videtur, magistri Hildebrandi est *Libellus de contemplatione*, quem ex ms. codice Hiemeradensis monasterii, annorum fere 500, vulgavit E. Martene, t. IX, *Ampl. Collect.*, p. 1237.

MAGISTRI HILDEBRANDI

LIBELLUS

DE CONTEMPLATIONE.

(MARTENE *Ampliss. Collect.*, tom. IX, p. 1237, ex codice ms. Himeradensi annorum circiter 500.)

Ex lectione evangelica Matthæi, quæ incipit, *Cum natus esset Jesus, etc.*, ubi beatorum trium regum commendatur Domini Jesu fidelis et devota visitatio, subtiliter duce gratia, investiganti tria occurrunt, in quibus recte et ordinate distinctis, et singulis per tria membra divisib, quæ collecta in novem crescunt,

C inveniri poterit, sed non nisi ab eo qui vere dilecti Jesu languet amore, status et modus veræ contemplationis. Primum est trium regum fidelis et devota pueri Jesu inquisitio, neque enim inquiri poterat, nisi a fidelibus et devotis. Unde habes: *Magi venerunt ab Oriente Jerosolimam dicentes: Ubi est qui*

natus est rex Judæorum? Secundum est ejusdem Domini Jesu læta et grata inventio, quia revera plenum prorsus omni gaudio invenire et videre hominem hominis Conditorem, de quo habetur: *Videntes stellam gavisii sunt gaudio magno valde, et intrantes domum invenerunt puerum.* Tertium etiam ipsius humilis et discreta adoratio: non enim Deo accepta sunt vota, nisi humilium et discretarum animarum. Unde sequitur: *Et procidentes adoraverunt eum, et apertis thesauris suis, etc.*

2. Notandum igitur quia inquisitio habet desiderium, inventio gaudium, adoratio cum oblatione ministerium. Ex desiderio inquisitionis causatur gaudium inventionis, et gaudium inventionis consequitur ministerium adorationis. Et quod desiderium est motus quidam animæ rationalis, quem habet in virtute concupiscibili: qui motus causatur a desiderato, sicut dicit philosophus, quod desideratum movet desiderium, et nostri desiderii objectum non esse debeat nisi ille qui totus est desiderabilis, quod etiam in ipsum desiderant angeli prospicere, et de quo propheta: *Ecce venit desideratus cunctis gentibus* (Agg. II, 8); et Psalmista: *Quemadmodum desiderat cervus ad fontes aquarum, ita desiderat anima mea ad te, Deus* (Psal. XLI, 2). Si bene et recte ex desiderato, scilicet Deo, nostræ mentis causatum et motum fuerit desiderium, tota in se videbitur continere.

3. Primum est spei fervida et devota præsumptio. Nihil enim inquiritur cum desiderio, nisi vere speratum, et quiddam speratur, desideratur et inquiritur, et spes in ipsum suspensa, quia non est præsentium, sed futurorum, certam sui habere debeat, si vera est, exspectationem, cum fiducia adipiscendi ipsum: aliter enim vera non esset. Habeat etiam ipsa de adipiscendo spei præsumptio extensionem in interius: quæ extensio spei in speratum, quia differitur, affligit animam, et ipsam donec desideratum inveniat, reddit circa inquisitionis negotium inquietam, sicut dicit Augustinus: Domine, fecisti nos ad te, et inquietum est cor nostrum, donec requiescat in te.

4. Recte sequitur secundum, quod est sollicita et inquieta in inquirendo mentis exercitatio. Quo enim amplius a desiderato vel sperato movetur desiderium, eo amplius exercitatur spiritus circa inquisitionis negotium. Unde Psalmista: *Renuit consolari anima mea* (Psal. LXXVI, 3), quia videlicet præsentem quem inquiri et desidero, non habeo: *Memor sui Dei et delectatus sum* (ibid.), in spe scilicet inventionis, sicut dicit beatus Bernardus: « Interim dum differitur præsentia, suavis est memoria. » Et exercitatus sum officio inquisitionis, et defecit nimirum spiritus meus, sustinere non valens moram tam diuturnæ exspectationis. Revera namque animo desideranti nihil satis festinatur, nunquam nimis festine desideratum præsentatur. Quæ studiosa spiritus Deum inquirentis exercitatio commendatur in Canticis, ubi dicitur: *Surgam et circuibo civitatem,*

A per vicus et plateas quæram quem diligit anima mea (Cant. III, 2). Videns enim sponsa in lectulo corporis et negligentia sponsum nullatenus inveniri posse, se ferventer in exercitium expandebat studiosæ et operosæ inquisitionis. Cæterum quia ista animæ inquietudo non circa plurima, sed circa unum, quod solum necessarium est, sollicita, et dedignatur exterioribus et transitoriis occupari, quæ plerumque impedire solent et retrahere animum ad æterna et permanentia bona suspirantis, congrue ponitur tertium, quod est mundi et omnium mundanorum contemptus et oblivio.

5. Non enim simul possunt transitoria et æterna diligi. Cum ergo sit Deus bonum tam æternum quam summum, tam incomprehensibile quam incommutabile, quomodo se ad diligendum aliquid commutabile inclinatur, qui ipsum comprehendere festinat? Unus enim ipse, non uni, sed omnibus sufficit. Satis unus ipse tibi sit, sine quo omnia nihil sunt. Sine ipso nihil tibi non solum satis, sed nec aliquid fit. Quis mihi det omnibus quæ ab ipso sunt privari, et ipso solo æternaliter donari? Non est, Domine Jesu, quod habere velim vel debeam, si te non habeam, nihil mihi sine te jucundum, nihil abundantum. Magis mihi bonum non esse, quam sine te esse. Velim quid velis, nolim quod nolis. Vis me te solum velle, nihil unquam amplius possim velle. Velle meum ad te liberum sit, nulli a te extraneo obnoxium. Si tamen te veraciter et efficaciter voluero, nihil extra te velle potero. Dulcissime Jesu, dulcescat mihi dulcedo tua suavitas et vera. Influat animæ meæ Deitatis tuæ sapor mellifluus, extricet a præcordiis meis omne quod temporaliter sapit. Præ dulcedine tuæ desiderantissimæ visionis, vilescat mihi omnis affectus transitoria delectationis. Concupivit anima desiderare te, si satis non fuerit secundum te, concupiscat amplius sicut libuerit de te. Suspendium a temporalium ambitu vel amore, o dilecte Jesu, elegit anima mea, et mortuam ossa mea. Trahe me post te, non me relinquant circa me. Si me derelinquis, delinquam; et certe scio, si deliquero relinquis. Noli ergo derelinquere me, ne delinquam; sed meum est si deliquero, non tuum. Sin autem, tuum est, non in meum. Age, benigne Jesu, totum me in sinum tuæ misericordia depono. A te bono, si dederis, bonus esse potero. Bonum depositum custodi. Scio enim cui credidi, et certus sum quia potens es depositum meum servare in illum diem. Inquirenti igitur Dominum necessarius est hujus mundi, et omnium quæ in ipso et ad ipsum sunt, contemptus, sicut dicit Joannes: *Nolite diligere mundum, neque ea quæ in ipso sunt* (I Joan. II, 15). Et Paulus: *Posteriora oblitus, ad anteriora me extendo* (Philip. III, 13). Quisquis ergo es, qui Deum spe fervida et sollicita exercitatione inquiris, si te terrenis actibus et terrenorum affectibus minus implicaveris, sicut nec usquequaque verum in inquirendo desiderium habere convinceris, ita nec de inveniendo plenum consequi poteris.

6. Convertamus igitur mentis oculos ad tria posita, quæ ex motu veri desiderii procedunt, et facile patebit, quia quodlibet eorum recte alterum consequar. Spes enim amore sperati se extendit ferventer ad inquirendum; sollicita mentis exercitatio perseverantiam præstat in inquirendo; discreta temporalium oblivio impedimentum tollit in inquirendo. Primum, scilicet spes, excludit diffidentiam; secundum, id est studiosa exercitatio propellit negligentiam; tertium, videlicet mundi contemptus omnem exterminat resistantiam. Eia, benedice Jesu, spes mea, exspectatio mea, amor meus, verbum mihi ad te, verbum de te, verbum plenum doloris et miseriæ. Tu qui Verbum es, unigenitum Patris ingeniti, propter me factum caro, Verbum de corde Patris eructatum, Verbum quod semel locutus est Deus, Verbum quo mihi his novissimis diebus locutus est Pater tuus cœlestis, dignanter audi mei cordis verbum ad te Dei Verbum plenè desiderii eructatum. Audi et vide quia tristis est anima mea et conturbat me, dum dicitur mihi quotidie: Ubi est Deus tuus? Non est quod respondeam, absentem te esse timeo, præsentem non sentio. Ardens est cor meum, desidero videre Dominum meum. Ubi enim est præstolatio mea et patientia? Tu es, Domine Deus meus, et quid faciam? Quæro, et non invenio; concupisco, et non video; sequor, et non apprehendo. Quæ est fortitudo mea et sustineam, aut quis finis meus ut patienter agam? Quid animæ meæ tristius? quid miserius? quid molestius? Putas, dilecte, tristitia mea vertetur in tuæ visionis gaudium? Miseria in tuæ cohabitationis contubernium? Molestia in tuæ comprehensionis colludium? Loquere ad cor animæ meæ. Loquere, Domine, quia audit servus tuus. Audiam quid loquaris in me, Domine Deus meus. Dic animæ meæ: Salus tua ego sum. Dic amplius, Domine, et sic dic ut audiam: *Fili, tu semper mecum es, et omnia mea tua sunt* (Luc. xv, 31). Eia Verbum Dei Patris, hoc est quod audire volui. Lætatus sum in his quæ dicta sunt mihi. Sonet hæc vox tua in auribus meis. Vere enim ista vox dulcis, imo dulcior omni voce citharædorum citharizantium in citharis suis. Convalescat hæc beata vox in intimis animæ meæ, nec foris erit quod audire libeat. Sufficiet enim mihi, si te de me dicturum scivero beatis illis ministris et Internuntiis gaudii mei: *Ite et adducite ad me. Optabo tamen et sperabo illud tuum verbum omni desiderio plenum circa me implendum, quod dixisti sanctis apostolis tuis: Veniam et accipiam vos ad me ipsum. Ego ipse qui loquebar: Ecce adsum; ego veniam, ego accipiam, ut ubi ego sum et vos sitis. Hæc jucundæ promissiones et consolationes tuæ lætificaverunt animam meam. Interim, dum moram feceris, exspectabo te, licet, si, ut sentio, loquar, vere incolatus meus nimis sit prolongatus, nimirum habitantis cum habitantibus Cedar, sciens et frequentissime recolens, quia sicut lætantium habitatio est in te, ita vallis me premit lacrymarum, locus me cruciat afflictionis, umbra me occupat mortis. Multa*

A mihi causæ doloris et tristitiæ, sola vero causa consolationis et lætitiæ, si suaviter et dulciter verbum illud, verbum bonum et suave crebrius animæ meæ repetieris: *Fili, tu semper mecum es, et omnia mea tua sunt*. Interim quia scire non possum, nec forte debeo, quando veniam et apparebo ante faciem tuam, quod utique accelerari opto, licet tu mihi, Christe, vivere sis, et mori lucrum, consolabor in his tuis promissionibus, quæ omne desiderium superant, et te lætus inquiram, lætior inveniam, lætissimus apprehendam. Est enim in hac vita quædam apprehensio tui plena gratiæ, quam nimirum sequitur illa quæ erit plena gloriæ. Quia igitur ego non arbitror me adhuc comprehensisse, sequar si quomodo apprehendam. Totam ergo spem meam, Domine Deus meus, in te reposui, inquietæ mentis meæ desiderium in te suspendi, regnum mundi et omnem ornatum sæculi propter amorem tuum contempsi. Non igitur me confundas ab expectatione mea, sed da quod peto accipere, quod quæro invenire, et tandem pulsanti Deitatis tuæ desiderantissima penetralia aperiri. Denique super tribus quæ de desiderio inquisitionis commemoravi, licet posuisse multas auctoritates et exempla potuissem; tamen quia intentionis meæ non fuit multa dicere, hæc pauca sufficiant. Sequitur ergo videre de secundo membro divisionis, quod est de gaudio inventionis.

7. Sed quoniam gaudium proprie loquendo una est quatuor affectionum animæ, quæ secundum Augustinum, Bernardum et Boetium, semina sunt vitiorum et virtutum; et secundum nomen suum nomen prædicabile sit communiter de statu vel differentia triplicis gaudii, ejus videlicet quod est hujus mundi et hominis tantum exterioris, et ejus quod est spiritus in Domino gaudens et hominis tantum interioris; ejus etiam quod est gloriæ et patriæ superioris. De primo habes in Evangelio Joannis ex verbis Domini: *Mundus quidem gaudebit* (Joan. xv, 20), etc.; de tertio etiam ibidem: *Iterum autem ridebo vos, et gaudebit cor vestrum* (ibid., 22). De secundo autem in Proverbiis sic: *Cor quod novit amaritudinem animæ suæ, in gaudio ejus non miscebitur extraneus* (Prov. xiv, 10). Et in Ecclesiastico: *Non est oblectatio super cordis gaudium* (Eccli. xxx, 16), nec præsentis materiæ vel propositi mei est prosequi de primo, quia hoc quantum ad præsens superfluum, nec de tertio, quia nimis arduum; tamen circa secundum negotiari intendo, quia hoc quantum ad contemplationem æstimatoriam necessarium.

8. Æstimatoriam contemplationem voco cum B. Bernardo, eam quæ media est inter dispensativam et speculativam. Dispensativa est qua dispensat quis diligens Deum sensus exteriores circa contemplationis negotium, et bene utitur eis ad promerendum Deum. Æstimatoria est, qua potentiæ animæ absolute a corpore, et affixæ organis corporalibus, nec obambulantæ phantasiis, prorsus se elevat in Dei agnitionem et dilectionem. De qua nobis ad præsens sermo. Speculativa est qua quis Deum in se et per speciem

speculari, quantum datur, et totus ipsi conjungi, quantum possibile est, anhelat, quæ rarissime et nonnisi perfectis simul datur, potius est patriæ quam viæ, nec unquam esse poterit, nisi in excessu vero.

9. Prima est motiva, secunda cognitiva, tertia affectiva. Prima secundum beatum Bernardum laborat, secunda adorat, tertia gustat. Prima incipientium, secunda proficientium, tertia quasi jam pervenientium et omnino placentium. Prima Deum invenit, secunda cognoscit, tertia apprehendit. Verumtamen nec sine prima secunda, nec sine prima et secunda tertia. Nam prima mentem ad dilectum erigit, secunda ad ipsum dirigitur, tertia ad ipsum intronit. Sed licet mediam, scilicet æstimatoriam, secundum quod de ea prosequi propono, diffiniverim, posset tamen propter simpliciores commodius et simplicius dici secundum vim ipsius nominis, eam esse quæ habetur in exercitio virium apprehensivarum et motivarum animæ rationalis, scilicet rationis et voluntatis et liberii arbitrii et aliarum, secundum quod sunt proportionatæ et affixæ organis corporalibus. Speculativam vero esse eam, quæ est potentiarum animæ, quæ nullam habent obligationem ad corpus, quæ sunt intellectus impermixtus phantasiis et synderesis. Nam istam quandoque possunt habere viatores; aliam vero raro, sed tantum comprehensores. Signa autem et proprietates istarum contemplationum, forsitan si Deus annuerit, inferius et lucidius exponemus.

10. Revertamur igitur ad propositum. Et certa quia tres sunt motivæ vires animæ, scilicet rationalis, concupiscibilis, et irascibilis, secundum quas nimirum dotabitur anima et præmiabitur, et secunda et tertia a philosophis attribuentur animæ sensibili; Joannes vero Damascenus et alii plerique animæ rationali loco concupiscibilis ponant voluntatem et loco irascibilis animum, ratio etiam sæpe supponat pro intellectu, et utique gaudium interioris hominis sit affectio quædam jucunda, causata ab iis tribus potentis; recte dicere possumus ad istud tale gaudium tria exigi, videlicet intellectus deiformem illuminationem, voluntatis boniformem devotionem, animi luciformem et jucundam exhilarationem. In intellectu deiformitas, in voluntate boniformitas, in animo quieta et tranquilla luciformitas. Quomodo enim gaudere poteris de dilecto Jesu invento, vel signa inventionis ejus habere, nisi ipso, prout desuper tibi datum fuerit, deiformiter intellecto, et boniformiter volito, et luciformiter gustato. Si enim ipsum perspicaciter intellexeris et cognoveris, nihil aliud quam ipsum velle poteris; et si ipsum boniformiter volueris, nihil aliud quam ipsum gustare luciformiter libebit. Intellectum deiformem voco, qui nullo obscuratur rerum sensatarum nubilo; boniformem voluntatem, quæ nullo delectatur commutabili bono; luciformem animum, qui nullo inquietatur vel disturbatur accidentali malo. Talis est Dei et ipso fruendum intellectus et voluntas et animus. Hæc tria invenies commendari per diversa

A loca, si bene intellexeris, in Hierarchia Dionysii, et in libro De divinis nominibus. Si igitur gaudere cum ipso et de ipso volueris, ad solum ipsum te vacare, solum ipsum videre, solum ipsum gustare et sapere debebit: vacare ad cognoscendum, videre ad volendum, gustare ad placendum. Unde Psalmista: *Vacate et videte* (Psal. xlv, 11), etc. Et iterum: *Gustate et videte, quoniam suavis est Dominus* (Psal. xxxiii, 9). Quando igitur vera est contemplatio in Deum suspensa, solum ipsum cognoscis et intelligis, vis et concupiscis, gustas et epis. Nihil intueris transitorium, nihil amplecteris perfunctorium, nihil vereris contrarium. Omnem fugis mundi fictam gloriam, omnem spernis fallacis boni memoriam, omnem oblivisceris factam injuriam. Quippe hæc sunt signa et multa alia veræ inventionis Domini Jesu, et jucundæ de ipso invento exultationis. Adhuc tamen plura ponam circa istam materiam.

11. Quoniam igitur, sicut ex parte supra probatum est, contemplatio est mentis perspicacia in sapientiæ spectaculo cum admiratione suspensa, recte primum membrum istius divisionis ponitur intelligentia illuminata, et cum ex tali intelligentia merito sequatur bonæ voluntatis devotio, quæ est suavis affectus in Deum correctus; secundum erit non incongrue voluntatis boniformitas, exigunt enim nimirum hæc duo tranquillam erga omne quod Dei est et placidam affectionem: ordinate ponitur tertium, quod est animi serena et luciformis exhilaratio. Intellectus deiformiter illuminatus, quia est inspectionis veri boni in se, te rapit et trahit in Deum, et ipsum facit cognoscere. Voluntas boniformiter affecta te facit ipsum diligere: nam dilectio actus voluntatis est; animi pacata exhilaratio, omne quod cognitioni et dilectioni Dei contrariatur, facit abnuere. *Beati enim mundo corde, quoniam ipsi Deum videbunt* (Matth. v, 8). Et statim sequitur: *Beati pacifici* (ibid., 9). Neque enim Deus sine proximo, nec proximus sine Deo vere cognosci poterit et amari.

12. Revertamur itaque ad primam partem istius dilectionis, et in ea contemplari studeamus Deum, secundum quod ipse donaverit. *Quis mihi det, dulcis Jesu, te fratrem meum et sugentem ubera matris meæ, ut inveniam te foris et deosculer, et jam nemo me despiciat?* (Cant. viii, 1.) Te foris inveniam per veram cognitionem, te deosculer per plenam dilectionem, nemo me despiciat propter communicativam cum omnibus piam affectionem. Foris sum, Domine, foris te, prout dare dignaberis, inveniam. Ecce sto ad ostium et pulso. Domine, Domine, aperi mihi, gloriosa mihi dicta sunt de te. Sicut audivi, cupio videre. Intus apud te est, quod foris postulo. Nondum intravi, heu! heu! in locum tabernaculi admirabilis usque ad domum Dei. Conabor interim, te propitio, prout fas et possibile mihi fuerit in excubiis extrinsecis manens, intelligere et cognoscere te. Emitte, Domine, sapientiam de sede magnitudi-

uis tuæ, ut mecum sit et mecum laboret, ut sciam A te, et quid acceptum sit coram te. Scio namque, quia te comprehendere ad plenum nullus valet intellectus. Te certe quis sis in natura, qualis in gratia, quantus in gloria. Natura incomprehensibilis, gratia inæstimabilis, gloria incogitabilis. Natura speciosus, gratia copiosus, gloria pretiosus. Natura albus et rubicundus, gratia amabilis et jucundus, gloria supereffluens et abundus. Natura albus candore divinitatis, rubicundus rubore assumptæ et passæ humanitatis, gratia amabilis et jucundus. Diffusa est enim gratia in labiis tuis, imo effusa de labiis tuis, et oleum scilicet gratiæ et lætitiæ effusum nomen tuum : ideo adolescentuæ dilexerunt te. Gloria pretiosus, quia si dederit homo omnem substantiam domus suæ, pro acquisitione gloriæ tuæ, quasi nihil despiciet eam. Dixerim te recte incomprehensibiliter speciosus, cujus pulchritudinem sol et luna mirantur. Pulchra scilicet opera tua, sed non ut tu. Miratur autem et tota illa supercœlestis et felix familia tua, tuæ illi indicibili pulchritudini cum desiderio, oculis insatiabilibus intenta, clamans cum admiratione : Vere enim, Domine mi, admirabilis es, et facies tua plena gratiarum. Nimirum autem et illa nimis beata genitrix tua voce gratulabunda : Ecce, inquit, tu pulcher es, dilecte mi filii, et decorus; imo etiam conversa ad consortes suæ gloriæ, talis ac tanti filii matrem fore se reverenter gloriatur, inquiens : *Ego mater pulchræ dilectionis, etc. (Eccli. xxiv, 24)*. Non solum autem, sed et Pater tuus cœlestis in te quasi in imagine suæ divinissimæ gloriæ jucundissime delectatus, suavissime intonat : *Tu es Filius meus dilectus, in te complacui mihi (Matth. xvii, v)*. O pulchritudo supereminens, in qua resultat nimirum splendor paternæ gloriæ quæ est candor lucis æternæ, et speculum sine macula majestatis divinæ; in cujus contuitu delectantur Pater et mater, quorum medius resides, nec utrique dissides Deus et homo, Deus ex Deo Patre, homo ex homine matre : idem cum Deo et ex Deo Patre Filius Deus, Verbum Patris Deus, ars Patris Deus, sapientia Patris Deus, imago Patris Deus, virtus Patris Deus. Talis ac tantus, tam pulcher et tam decorus, angelos et cives curiæ cœlestis tuæ pascis et relicis delectabiliter pulchritudinis gloria; terrigenas et filios hominum, reos et miseros, tuæ pietatis gratia et misericordia. Quis te, o pulcherrime filiorum, tam delectabilem, tam desiderabilem intueri non delectetur? Quomodo non gaudebo cum te talem, sed et nescio dicere qualem videbo? Quis det desideratum illum diem venire, ut videre contingat? Quis mihi det, ut ego moriar pro te quovis mortis genere, ut te aliquo modo tam dilectum et tam electum lucrifaciam? Omnis mihi dolor, omnis miseria, omnis tristitia, pro te solo promerendo lætitia. Interim, o pie Jesu, mei cordis intima tuæ claritatis splendor illuminet, omnis infidelitatis et impietatis tenebras effuget. Nihil te me irradiante in me sordidum, nihil obscurum rema-

neat. Perspicaciter te speculari et contemplari, quantum mortali possibile est, mihi liceat et libeat; quia non est lumen aliud nisi tu, quo illuminari valeam ut videam te, et te viso gaudeam. Optimum enim videndi genus erit, ut te viso, nultus egerim ad omne quod libuerit te contentus. In te quidquid est a te, videre dabitur per te. Claritas refulgens in te, resplendet mihi totum quod es, et omne quod est ex te. Non, inquam, sicut me satiare non possum de me; sic illuminare me non possum de me; quia in lumine tuo videbimus lumen, in tuo lumine, Fili Dei, videbimus lumen Patris Dei; videbimus et lumen Spiritus sancti Dei. Non autem tria videbimus lumina Dei, sed tuum Patrem lumen Deum, te Patris Filium lumen Deum, et Spiritum sanctum ex eodem Patre Deo et te naturaliter æqualiterque procedentem lumen Deum, videbimus in tribus discretis personis unum indiscretum lumen Deum. Non solum quippe in tuo lumine deiformiter illuminati, videbimus te divinum increatum lumen; sed etiam videbimus et nunc et tunc, quantum illuminatio vultus tui super nos, et pro quanto nos fecerit creata lumina lucentia, ante Dominum.

Quia igitur spero, ut pace tua dixerim, quod signatum sit lumen vultus tui super nos, dedisti lætitiæ in corde meo; hæc tam de divinæ, quam humanæ naturæ tuæ pulchritudine, Jesu Christe, decor et pulchritudo animæ meæ, licet non ex condigno et debito et pro desiderio meo dixerim : dicam autem, te propitio, coram throno gloriæ tuæ, contemplator et comprehensor tuæ divinitatis positus tanto plenius et jucundius, quanto nunc viderim perspicacius et feliciter. Intuebor etiam te Dei Verbum plenum gratia et veritate, de cujus nimirum plenitudine nos omnes accepimus, et delectabor in recordatione innumerabilium gratiarum et beneficiorum tuorum, ingratus tibi existere nec volens nec debens, sciens beneficium indignum accipienti, quod ipsum gratum non reddiderit largienti. O, o, o quam inæstimabilis gratiæ illud, Jesu misericordissime, quod tu cum Patre et Spiritu sancto unus existens, vivus et verus Deus, me, cum nihil essem, ad imaginem unius et summe divinitatis tuæ excellentissime condidisti, concivem angelorum, iucolam cœlorum, municipem ineffabilium tuorum gaudiorum decrevisti. Proh dolor! factus a te, et ad te, et secundum te, non manebam apud te; sed recessi abs te, dimittens et amittens te, et justitiam tuam injuste deserentem me, eadem justitia judicante projectum de te, non nisi culpa et poena manebat me. Et non immerito, utpote primorum illorum parentum interdicto et vere maledicto edulio natura deformatum, gratia vacuatum, gloria spoliatum; et non solum tanta felicitate infeliciter privatum, verum etiam miserabiliter exsiliatum, et perpetuis suppliciiis deputatum. Ileu me miserum! non erat qui redimeret, non erat qui cognosceret, non erat qui requireret animam meam. Tu autem demum, Pater misericordiarum, et Deus totius consolationis, non

valens in ira tua continere misericordias tuas, quia revera dives et copiosus in misericordia, non es passus me tantis passionibus æternaliter subjacere; sed Creatorem te cognoscens, et Redemptorem non abnuens, manens quod eras Deus Dei Filius, factus es quod non eras, homo hominis filius, ut me filium perditorum hominum meritis primorum prævaricatorum hominum, socium effectum dæmoniorum, servum vitiorum, æternorum materia incendiorum, tuæ crucis et mortis improperio, paternæ gloriæ restituens imperio. O dignam, mi Jesu, mea morte mortem, qua ne tibi morerer, mori voluisti! Moriturus omnino fueram, nisi mihi morereris. Culpa meæ mortis tibi causam intulit mortis, quomodo tu mihi non eris causa amoris, qui tibi tam amari occasio fui doloris? Amor meus tibi irrogavit causas doloris, quomodo dolor tuus mihi non ministrabit causas amoris? Si me amando mihi non doluisses, pro te dolendo amare te non potuissem, nec tuus dolor sine amore, nec meus amor sine dolore. Quanto tuus dolor in cruce pro me morientis erat vehementior, tanto nimirum meus amor tuum dolorem recolentis erit ardentior. Aqua de latere dilecti mei me in cruce fortissimis et vehementissimis amplexibus constringentis fluens, sanguis de corde exiliens, spiritus de corpore exiens, facta sunt mihi ut sciam quia non est dolor et amor sicut dolor et amor tuus. Hæreant semper, amantissime Jesu, illi tuæ sanctissimæ passionis dolores, illi tuorum venerandissimorum vulnerum rosei livores affectibus meis. Repræsententur sensibus meis, sint mihi materia continui doloris et amoris, provocent ad diligendum te, excitent ad laudandum te, adjuvent ad promerendum te. O mira, inquam, circa me tuæ pietatis dignatio! nihil eram, et me fecisti, et non solum aliquod, sed tuam imaginem; malus eram, et me refecisti, et non solum ad bonum aliquid, sed ad contemplandam cum sanctis angelis tuæ divinitatis summæ jucundam speciem. Nec his contentus, ut totum te refereres in me, et nihil tibi retineres de te, factus propter me, dedisti mihi te in exilio peregrinationis meæ amicissimum socium, in cruce redemptionis efficacissimum pretium, in altari spiritualis refectionis dulcissimum edulium, futurus etiam nimirum mihi in exitu desideratissimum viaticum, in conductu tutissimum præsidium, in cælo felicissimum præmium. Summa illa et divina potestas, qua in cælis præsides et imperas angelis, tu mihi condescendens, te intendis in fratrem et socium, appendis in pretium, impendis in poculum. Et ut de abundantissimæ bonitatis tuæ dispensatione adhuc, prout mihi sentire et intelligere tua gratia datur, aliquid plenius loquar, tanta me dignaris miseratione, ut mirabiliter et ineffabiliter in ipsa immolationis tuæ suavissimæ hora, ad vocem tui sacerdotis pro me fias et mihi sacerdos et sacrificium, conviva et convivium, cibus et cibans, munus et munerans. O redemptionis meæ vere venerandum sacrificium, quo Dei Unigenitus animæ meæ mira

A unione copulatur, Pater conciliatur, Spiritus sanctus propitiatur, cæli reserantur, angeli mihi sociantur, sanctorum vota et merita communicantur, crimina relaxantur, hostes salutis meæ exterminantur, virtutes donantur, dona cumulantur, præmia multiplicantur, et omnium denique bonorum copiarum plenissime ministrantur! O panis vive de cælo descendens, utique manu sancti Spiritus in utero gloriosæ Virginis formatus, in ara crucis igne passionis decoctus, quem in mensa sancti altaris tui paras in dulcedine tua pauper; Deus in delicatissimum convivium, habentem omne delectamentum, et omnem saporem suavitalis, quem cum amaverit anima mea, non esse poterit nisi gratiosa; cum tetigerit, speciosa; cum gustaverit, deliciosa; cum acceperit gloriosa! O vere felicem talis convivii dignum degustatorem, id cujus beata administratione et perceptione tota Trinitas gloriatur, felix illa supercælestis familia cum admiratione et reverentia famulatur, triumphantium in cælo animæ honorantur, militantium adhuc in terris adjuvantur, patientium in tormentis purgatoriis liberantur! Hoc pascha meum, bone Jesu, quod desiderio desideravi manducare tecum donec moriar, et jam conviva mensæ cælestis effectus, manducem illud novum in regno Patris tui, videlicet non jam in velamine sacramenti, sed sine omni pallio velamenti. Et, o sanguis pretiosissime de lilioso corpore dilecti mei in cruce pro me morientis, roseo colore largissime fluens, qui ne nulla mihi esset utilitas illius effusionis tuæ, si descenderem in corruptionem, nec in perfectione simul accepta beneficio redemptionis stare valeam, quia quotidie pecco, quotidie ministerio sacerdotum in remissionem peccatorum meorum effunderis, sed et cum te sumere mihi dederis, cum tanta plenitudine divinarum charismatum animæ meæ illaberis, ut jam scire non possim, quid desit mihi ad id quod satis est; quia nimirum de torrente voluptatis divinæ potatum ita multiplicasti divitiis, deliciis et gaudiis cælestibus locupletare me, ut jam evectus super me, videar mihi quandoque intronitum in quemdam inusitatum affectum, conversus nescio ad quam dulcedinem, quæ si perficiatur in me, nescio quid erit quod vita ista non erit, in cujus dulcedinis interim suspensus desiderio, totus pene deficio dilationis fastidio! O mira suavitas calicis pretiosi! o sancta fecunditas poculi deliciosi! o superexcellens dulcedo sanguinis generosi! Vere sitiit in te anima mea, quem quanto biberit decentius et reverentius, tanto sitiet ardentius. Cum enim influis ipsi, mundas eam ut te deceat, ornas ut placeat, munus ne pereat, inebrias ne deficiat, sustentas ut proficiat, oblectas ut tibi hæreat, donec introducta in locum tabernaculi admirabilis usque ad domum Dei, dilectum facie ad faciem videat, et ipso suavitate plena et mirifica perfruatur. Gratias tibi, dilecte Jesu, qui te dignatus Creatorem et Redemptorem, non abnuis talis convivii largitorem. Felix certe convivium, in quo te totum et nihil aliud nisi te mihi das; et in

me intrans transfers et mutas, et tam mira et dulci A
 unione me tibi connectis et copulas, ut unum tecum
 spiritum efficias. Quid igitur? *Quare tristis es anima
 mea, et quare conturbas me?* (*Psal. xli, 12.*) Quid
 causaris sponsi tui absentiam? Quid si tibimet præ-
 sens fueris, ipso præsentius? Tecum certe est, intra
 te est, infra te est, circa te est, supra te est. Inanis
 non venit, plenus quippe est gratia et veritate. Gra-
 tiam affert, quæ tuam culpam evacuet; veritatem,
 qua ignorantiam illuminet. Quid igitur ultra tibi de-
 buit facere et non fecit? Jam non est dicere: *Ut quid
 Domine, recessisti longe, quare faciem tuam aver-
 tisti?* (*Psal. x, 1.*) Ecce tecum est, non recedit a te,
 nisi tu forte recesseris; non se avertit, si te non
 averteris. Dic, dic, anima mea; gratulare et dic: Ego
 dilecto meo, et dilectus meus mihi. Amplexare dul- B
 cissimis et fortissimis affectibus, et tene quem ha-
 bes, utere eo, ut libet; conare, festina; ascende,
 intra in amatum, et ostendet tibi naturæ suæ inæsti-
 mabilem pulchritudinem, gratiæ dulcedinem, gloriæ
 plenitudinem, et videbis et afflues, et miraberis et
 dilataberis. Videbis nempe ipsum deiformiter illu-
 minata, afflues ipso dulciter affectata; miraberis te
 ex ipso sublimer exaltata, dilataberis in ipso mul-
 tipliciter locupletata. eatBam itaque, o anima mea,
 te dixeris, si dilectissimo sponso tuo pro his omni-
 bus grata exstiteris, et ab acceptis gratis non exci-
 deris, nec accipiendis indignam te reddideris. Ex-
 sulta interim et lætare in sponso quem habes in ter-
 ris in sacramento, habitura et visura ipsum in cœlis
 sine velamento. Age nunc, piissime Jesu, quid tuis C
 his beneficiis dignum rependam? Quid retribuam
 tibi pro omnibus quæ retribuisti mihi? Scio certe
 quod sicut nihil sum sine te, sic nec te mereri pos-

sum sine te. Debitum non est, sed gratuitum quod-
 cunque mihi impenderis beneficium. Indignum di-
 gnari non est justitiæ, sed gratiæ. Potenti tibi cedit
 ad gloriam, injustum punire nolle cum potueris.
 Pium te magis ostendis impio parcendo, quam ple-
 ctendo. Dederas te beneficium munerando immeritum,
 misericordius mecum egeris, quando debitum
 a me servitium exegeris. Si salvare me decreveris,
 judicio mecum non contendis: nam si in iudicium
 sederis, et locum misericordiæ non dederis, miseras
 in perpetuum clamabo; sin autem, misericordias
 tuas in æternum cantabo. Ecce nunc animam meam
 tibi colligo vinculo tui sacramenti, securum me
 æstimans, si me muniveris novi et æterni sanguine
 testamenti. Amplexere tibi fidei fœdere copulatum,
 tuere sacratissimo corpore tuo cibatum, confortatum
 et sanctificatum. Intuere prædulcissimo sanguine
 tuo potatum, ornatum et signatum. Non sit quod
 propellat te sequentem, non sit quod avellat tibi hæ-
 rentem, et nomini gloriæ tuæ plenissime confiden-
 tem, quod est benedictum in sæcula sæculorum.
 Amen.

13. Cæterum ad commendationem gratiæ Dei tan-
 tisper dixerim, ut habeas, diligens lector, verba mo-
 nentia te et promoventia ad gaudium interioris ho-
 minis. Hæc enim quæ posui attente prolata, et intente
 meditata, et alia his similia, quæ studium et usus
 invenient, et unctio suggeret, esse tibi debent in
 exercitio contemplationis æstimativæ. Quod enim
 perfectioribus facit interior imaginatio, hoc in mi-
 nus perfectis facere solet exterior pronuntiatio; quia
 quod facit status carboni, hoc facit pronuntiatio de-
 votioni.

ANNO DOMINI MCL

AIMO ABBAS S. PETRI DIVENSIS

ET

PETRUS MONACHUS

NOTITIA

(*Histoire littéraire de la France, t. XII, p. 357*)

1.

Aimon, religieux de Saint-Pierre-sur-Dive, au diocèse de Seez, remplaça Richard, abbé du même monastère (1). L'année de son élection est incertaine, mais elle doit se rencontrer entre 1140, temps auquel Richard entreprit la reconstruction de son église, et 1143, où nous voyons, pour la première fois, Aimon exercer les fonctions abbatiales. Deux ans après cette dernière époque, celui-ci mit la dernière main à

(1) Mab., *Annal.* l. LXXVIII, n. 67: Neustria pia, p. 503.

l'édifice entamé par son devancier. On ignore les autres particularités de sa vie, dont le terme est pareillement resté dans l'oubli. La Chronique de Robert du Mont nous apprend seulement qu'en 1150 Warin lui avait succédé (2).

On a de lui une longue lettre à ses confrères de Teuksburi (3), aujourd'hui dans le comté de Gloucester en Angleterre. Elle a pour objet de les exciter à rendre grâces à Dieu d'un nouveau genre de dévotion qui s'était emparé du peuple de Normandie, genre si extraordinaire, dit-on, qu'on en chercherait en vain des exemples dans les siècles passés. Cette dévotion, qui avait pris naissance à Chartres, consistait à se dévouer, hommes, femmes, nobles et roturiers, sans distinction de sexe ni d'état, à la construction des églises. Dans chaque diocèse de Normandie, il y avait une confrérie de ces dévots, dont la patronne était la sainte Vierge, et à laquelle présidait une personne de piété : pour y entrer, il fallait s'être confessé, avoir reçu la pénitence, et s'être réconcilié avec ses ennemis. Cette dernière condition était bien importante dans un temps où les nobles avaient presque toujours les armes à la main pour s'entre-détruire. Dès que les confrères apprenaient qu'il y avait quelque part une église à bâtir, ils s'y rendaient en troupe, et là ils faisaient les fonctions, non-seulement de manœuvres, mais même de bêtes de traits. « Quel prodige inouï, dit notre auteur, de voir des tyrans, des hommes puissants dans le siècle, enlêlés de leur naissance et de leurs richesses, des femmes accoutumées à une vie molle et voluptueuse, s'attacher à un char avec des traits, et voiturier eux-mêmes, à la place des animaux, le vin, le blé, la chaux, le bois, les pierres, le sable, et généralement toutes les provisions de bouche et tous les matériaux nécessaires pour la construction de l'édifice sacré. Mais ce qui est encore plus surprenant, c'est qu'au milieu de ces travaux, où quelquefois mille personnes, hommes et femmes, tirent ensemble le même char (tant la charge qu'on y met est pesante), il règne un si profond silence, qu'on n'y entend pas la moindre parole ni le moindre murmure ; en sorte que, sans le témoignage des yeux, on croirait qu'il n'y a pas une âme dans toute cette multitude. Quand on s'arrête dans les chemins, c'est alors que l'on parle ; mais de quoi ? de ses péchés, dont on fait une confession publique, avec des larmes et des prières pour en obtenir le pardon. Alors les prêtres font un discours à ces pénitents pour les exhorter à étouffer les haines, à bannir les dissensions, à remettre les dettes, et à resserrer entre eux les liens de l'union et de la paix. Se trouve-t-il quelqu'un assez endurci pour ne pas vouloir pardonner à ses ennemis, ou refuser de se soumettre aux avis que les prêtres lui donnent ? aussitôt il est détaché du char, son offrande en est retirée comme impure, et lui-même chassé avec ignominie de la sainte société. » L'auteur décrit ensuite divers miracles par lesquels Dieu fit connaître qu'il approuvait cette dévotion ; après quoi il rapporte en quel ordre les confrères s'acheminaient pour ces travaux. « Lorsque le peuple fidèle, dit-il, s'est mis en marche au son des trompettes et précédé des bannières, il continue sa route avec la plus étonnante facilité, sans que ni la hauteur des montagnes escarpées, ni la profondeur des eaux qu'il rencontre devant soi lui cause le moindre retardement. Vous croiriez voir les Hébreux qui passent le Jourdain sous la conduite de Josué, lorsque nos pèlerins traversent quelque rivière qui se présente sur leur passage, tant ils y entrent avec confiance et parviennent aisément à l'autre bord ; jusque-là que plusieurs d'entre eux assurent qu'étant au port Sainte-Marie, les flots de la mer qui venaient à eux s'arrêtèrent tout à coup pour leur laisser la liberté de passer... Arrivés à l'endroit où l'église doit être bâtie, ils forment une enceinte alentour avec les chars pour y établir une manière de camp spirituel, où, pendant toute la nuit suivante, l'armée est en faction, chantant des hymnes et des cantiques spirituels. Sur chacun des chars, on allume des cierges et des lampes, après y avoir placé les infirmes et les malades, auprès desquels on apporte les reliques des saints à l'effet de leur procurer du soulagement. On prie pour eux, on fait des processions, le clergé à la tête et le peuple à la suite, pour demander à Dieu et à sa bienheureuse Mère la guérison de leurs maux. » Aimon termine sa relation en disant que cet établissement avait passé de l'église de Chartres dans le territoire de Saint-Pierre-sur-Dive, où il avait été confirmé par un grand nombre de prodiges, et de là s'était répandu dans presque toute la Normandie ; mais qu'il avait principalement occupé les lieux dédiés à la *Mère de miséricorde*. C'est par de tels secours que fut élevée l'église de Saint-Pierre-sur-Dive. Si des faits aussi incroyables n'étaient attestés que par le seul Aimon, la critique aurait peine à se rendre. Mais le métropolitain de Normandie, Hugues d'Amiens, leur rend le même témoignage (4) dans une lettre que nous ferons connaître à son article. Raoul de Diceto atteste la même chose sur l'an 1144.

Suger, qui fit bâtir dans le même temps l'église de Saint-Denis, rapporte quelque chose de semblable en parlant de la manière dont on tira des carrières de Pontoise les colonnes qui devaient entrer dans cet édifice. Nous avons une traduction de cette lettre d'Aimon, publiée à Caen dans un volume in-12, l'an 1671, par D. Jean-Bernard Planchette (et non Blanchet, comme l'écrit le P. le Long [5]) ; mais le texte original d'Aimon n'a pas encore vu le jour. Dom Mabillon, qui en a donné les extraits que nous venons de rapporter, avait promis de l'insérer dans l'appendice du sixième volume de ses Annales. Cet engagement n'a point été rempli par dom Martène, éditeur de ce volume.

On fait encore honneur à notre auteur du Martyrologe de Saint-Pierre-sur-Dive, qui est demeuré manuscrit.

II.

Sous le gouvernement d'Aimon vivait un religieux, nommé Pierre, qui se mêlait de versification. Par le conseil de Milon Crispin, moine du Bec, dont il a été parlé ci-devant, il fit en vers héroïques l'éloge historique des sept premiers abbés de ce monastère. C'est la seule production de sa plume qui soit parvenue jusqu'à nous. Elle a été publiée par dom Martène, dans le VI^e volume de sa grande Collection (p. 93). Le septième abbé que notre auteur célèbre est Roger de Bailleul, dont le gouvernement commença l'an 1149. Il parle de lui comme vivant encore ; et, sans entrer dans aucun détail de ses actions, il se contente de louer ses bonnes qualités. Dom Ruinart estimait la versification de Pierre, qui, dans quelques manuscrits, est appelé *Petrus Angiensis*, par la raison que l'abbaye de Saint-Pierre-sur-Dive est dans le pays d'Auge, en Normandie.

(2) Mab., *ibid.* l. LXXX, n. 46.

(3) Mab., *ibid.* l. LXXVIII, n. 67.

(4) Mab., *ibid.*, n. 66.

(5) Bibl. Fr., p. 253.

AIMONIS EPISTOLA

AD FRATRES TOTESBERLÆ IN ANGLIA DEGENTES.

(MABILL. *Annal. Bened.*, lib. LXXVIII, n. 67.)

Ab anno Christi 1040 quo Beatæ Mariæ monasterium in oppido S. Petri super Divam inchoatum fuerat, basilica necdum absoluta erat ad hoc usque tempus quo Aimo abbas, Richardi de Aquila successor, supremam ei manum imposuit. Ejus intellecto consilio, Divenses oppidani et circumpositi populi, Carnutensium pietate animati (1), non modo plebei, sed etiam nobiles, omnis sexus et ætatis, congestam in carris lapidum, lignorum et arenæ materiam, nulla equorum boumve ope ipsi e longinquo summo cum silentio convehabant. Audiendus hac de re Aimo abbas, qui operi præsidebat, in libello hujusce argumenti, quem ad fratres suos, Totesbericæ (Tuttebery) in Anglia degentes, scripsit, ut eos ad gratias Deo agendas excitaret, qui in tanta sæculi corruptela novum quoddam pietatis genus, quo quæreretur, instituit; novum, inquam, et sæculis omnibus inauditum. Quis enim vidit unquam, quis audivit in omnibus generationibus retroactis, ut tyranni, principes potentes in sæculo, honoribus et divitiis inflati, nobiles natu viri et mulieres superba et tumida colla lorix nexa plaustris submitterent, et onusta vino, tritico, oleo, calce, lapidibus, lignis, cæterisque vel vitæ usui, vel structuræ ecclesiæ necessariis, ad Christi asylum animalium more brutorum pertraherent? Verum id mirabilis videtur quod subdit idem auctor: In trahendo autem, inquit, illud mirabile videre est, ut cum mille interdum, vel eo amplius viri, vel feminæ plastro innexi sint (tanta quippe moles est, tanta machina, tantum et onus impositum), tanto tamen silentio incedatur, ut nullius vox, nullius certe mussitatio audiatur; ac, nisi oculis videas, adesse nemo in tanta multitudine æstimetur. Ubi autem in via subsistitur, nihil aliud resonat, nisi confessio criminum, et supplex ad Deum puraque oratio pro impetranda venia delictorum. Ibi prædicantibus pacem sacerdotibus, sopiuntur odia, discordiæ propulsantur, relaxantur debita, et animorum unitas reparatur. Si quis autem in tantum malum progressus fuerit, ut nolit peccanti in se dimittere, aut unde pie admonetur, sacerdotibus obedire, statim ejus oblatio, tanquam immunda, de plastro abjicitur, et ipse cum pudore multo et ignominia a sacri populi consortio separatur. Hæc porro fidelium devotio in tantum Deo grata et accepta visa est, ut ad eorum preces et beatæ Mariæ invocationem infinita miracula facta sint, et peccatores ad pœnitentiam con-

A versi. Ibi, inquit Aimo, ad orationes fidelium videas infirmos quosque a languoribus variis debiles in plaustris, quibus impositi fuerant, sanos exsurgere, mutos ad laudes Dei ora aperire, et vezatos a dæmonibus saniolem mentem recipere. Videas sacerdotes Christi, plaustris singulis præidentes, ad pœnitentiam, ad confessionem, ad lamenta, ad melioris vitæ propositum universos hortari, ipsos humi prostratos, ac toto corpore incumbentes, terram diutius osculari; senes cum junioribus et pueris tantillæ ætatis Matrem Domini conclamare, atque ad ipsam præcipue singultus, suspiriaque ab intimis præcordiis cum voce confessionis ac laudis dirigere. Jam vero quo ordine ad laborem omnes progredierentur, idem auctor sic explicat: Ubi autem fidelis populus, ut ad cæpta redeam, ad clangorem tubarum, ad erectionem vexillorum præeuntium sese viæ reddidit (quod dictu mirabile est), tanta facilitate res agitur, ut eos ab itinere nil retardet; non ardua montium, non profunditas interjecta aquarum: sed, sicut de antiquo illo Hebræorum populo legitur, quod Jordanem ingressi sint per turmas suas; ita singuli, cum ad flumen transmeandum venerint, e regione subito, ducente eos Domino, incunctanter ingrediuntur: adeo ut etiam fluctus maris in loco, qui dicitur Sanctæ Mariæ portus, dum transirent, ad eos venientes stetisse, ab ipsis transeuntibus fideliter asseratur..... Ubi vero ad ecclesiam perventum fuerit, in circuitu ejus plaustra, velut castra spiritualia disponuntur, ac tota nocte sequenti ab omni exercitio excubiæ in hymnis et canticis celebrantur. Tum ceri et luminaria per plaustra singula accenduntur; tum infirmi ac debiles per singula collocantur; tum sanctorum pignora ad eorum subsidia deferuntur; tum a sacerdotibus et clericis processionum ministeria peraguntur, populo pariter devotissime subsequente, et Domini simul et beatæ Matris ejus clementiam pro restitutione debiliū attentius implorante. Hæc omnia tam nova et singularia videntur, ut ea paulo fusius referenda esse censuerim. Hujus sacræ institutionis ritus, ait idem auctor, apud Carnotensem ecclesiam est inchoatus, ac deinde in nostra virtutibus innumeris confirmatus; postremo per totam fere Normanniam longe lateque convuluit, ac loca per singula Matri misericordiæ dicata præcipue occupavit. Nihil simile in extrahendis e Pontisarenensi lapidina ingentis molis columnis, ad construendam S. Dionysii novam basilicam, testante Sugerio,

(1) Vide epistolam Hugonis Rothomagensis episcopi ad Theodericum Ambianensem, infra, in Hugoc. Edit.

factum est. Sic perfecta et ad coronidem usque A hodie quoque superest, inter patriæ sacras ædes vix perducta est Divensis Beatæ Mariæ basilica, quæ ulli inferior.

GESTA SEPTEM ABBATUM BECCENSIIUM

AUCTORE PETRO DIVENSI.

(MARTÈNE *Ampliss. Collect.*, tom. VI, col. 93, ex duobus mss. uno Beccensi, altero reginæ Sueciæ.)

OBSERVATIO PRÆVIA.

Gesta septem primorum abbatum Beccensium a Petro Divensi metricè conscripta suppeditaverunt nobis antiqui codices duo, alter Beccensis quem nobis perofficiose exscripsit sodalis noster dominus Richardus Houssaye, alter reginæ Sueciæ, Romæ a Mabillonio repertus, cujus apographum cum Beccensi codice contulimus.

Eorum auctor Petrus Divensis, hoc est monasterii S. Petri supra Divdm in diœcesi Sagiensi monachus, qui et Petrus Augensis, dictus a pago Augensi, ubi situm est illud monasterium, cum aliquando hospes apud Beccenses nostros divertisset, excitatus a nobilissimo viro Milone Crispini monacho et cantore Beccensi, opus illud suscepit. Porro in codice reginæ Sueciæ una cum prædictis gestis continetur et Chronicon Beccense, alias ab Acherio ad calcem operum Lanfrunci editum.

Petrus Divensis conscribit versibus istis
Structores primos Becci summosque magistros.

1. Ex quo principium Beccus jam sumpsit et esse, B Mundum despexit, seseque subinde retraxit,
A quo vel per quem primo processit ad esse,
Seu quibus ipse viris fundatus magnificetur,
Queis vel personis ditatus clarificetur,
Quot præcesserunt abbates, quive fuerunt,
Tempore vel quanto Beccum rexere fovendo,
Carmine decrevi perstringere metricali,
Ut sermone brevi signentur et ordine tali.
Non quia præsumptor operis dijudicer hujus,
Sæpe magis numero fuerim compulsus ad istud
Domni Milonis Crispini voce monentis,
Omnibus et votis nihilominus id satagentis.
His ita libatis in principioque locatis
Hoc opus aggrediar, licet huic sum viribus impar :
Infantum linguas sed qui facit esse disertas,
Spiritus ipse mihi nunc adsit ad hoc properanti.
- S. *Herluinus primus abbas Becci.*
2. Anno milleno ter deno necne quaterno
Quo Deus ipse Patris Verbum de viscere matris
Nostrum produxit corpus mundoque reluxit,
Cum Normannorum turgentia colla domaret
Guillelmus senior, quos et super imperitaret
Nobilis et prudens vir quidam, corde sed ingens,
Ut patet in Becci structura consobiali,
Qui fuit Herluinus sacro de fonte vocatus,
Inspirante Deo, mortisque timore citatus,
Cum foret in multis præsertim strenuus armis
Inter et ipse suos nimis esset honorificatus,
Hinc et apud primos patriæ satis appetiatus ;
Jam sibi plaudentem, jam pronum, jamque faventem
- Et monachus factus sancto jam flamine tactus
Præsule tunc urbis Herberto Lexoviensis
Attendente comam, simul et tribuente cucullam,
Protinus ecclesiæ se contulit et sua quæque,
Quam prius in fundo construxerat ipse paterno,
Haud procul a fluvio qui Beccus dicitur, a quo
Sumpsit et ipse locus nomen sub tempore Beccus.
Fratribus et secum quampluribus associatis,
Arctius instabant aptari posse beatis
Dulcibus hymnis, laudibus amplis invigilando,
Vestibus hirtis, sumptibus arctis membra domando.
Herbis vescentes crudis, laicemque bibentes,
Pane sed adjuncto quandoque siligine facto,
Crebro legentes, sero loquentes ordine certo,
- C Prava caventes, justa sequentes tranite recto,
Insuper et Pauli doctoris jussa probantes,
Instanter manibus quæcunque suis operantes.
Talis tantillus, humilis satis atque pusillus
Exstitit exorsus Becci, primus quoque motus :
Non ibi murmur erat, non fraus, nec bilis amara :
Multa sed intus erat pax et concordia mira.
- Lanfrancus Beccum appulit ex Italia.*
3. His igitur vitam ducentibus intro sopitani.
Cœpit diffundi paulatim rumor eorum.
Vallis et ex imo jam conscendebat in altum,
Unde perafflati quamplures atque citati,
Partibus e notis venientes, necne remotis,
Beccum quærebant, illuc et conveniebant,
Se patris Herluini subdentes relligiosi

Quos inter magnus vir quidem mitis ut agnus,
 Editus Italia, quæ dicitur urbe Papia,
 Stemmata non humilis, natalibus ac generosis,
 Magnificus rethor, notissimus undique doctor,
 Cui Lanfrancus erat nomen satis amplificatum,
 Gallis, Italicis, Græcis quoque clarificatum,
 Cum disceptando studiis et mira docendo
 Urbes lustrasset, regiones et peragrasset,
 Et foret hic clarus apud omnes, par quia rarus.
 Nam fore præclara fert Tullius omnia rara.
 Omnia conspiciens hæc vana superflua necne,
 Et quia mundus abit, sed in hoc quod cernitur omne
 Flamma succensus divi Lanfrancus amoris;
 Culmine calcato terreni prorsus honoris,
 Pauperiem Christi decernens ipse subire,
 Cœli divitias quo felix possit adire,
 Applicuit Becco tandem, sed præduce Christo,
 Hunc qui præcierat præ tempore, necne pararat
 Ecclesiæ purum vas, quam dignumque futurum.

Monachi schema induit.

4. Conspectaque loci jam paupertate cupita,
 Simplicitate Patris, mira fratrum quoque vita,
 Vestibus expolis queis tectus erat pretiosis,
 Induitur vili gaudens tunica monachali,
 Fratribus appositus, desiderioque potitus,
 Omnibus elegit abjectior ipse videri,
 Quam peccatorum domibus sublimis haberi,
 Illud habens oculis prædixum et cordis in arcto :
 Quanto major eris, tanto dejectior esto.
 Qua rogo lætitia pater Herluinus agebat,
 Cum, prout optavit, jam suscepisse sciebat.
 Cujus doctrina Beccus foret erudiendus,
 Qui radis intus adhuc fuerat, sed et instituendus,
 Cui deferre volens persæpe, decebat ut illi,
 Ipse refutabat, persolvens hoc magis illi,
 Ille verebatur subjici vatem sibi tantum,
 Hic venerabatur nimis abbatem sibi gratum.
 Gaudebatque satis vir tantæ nobilitatis,
 Qui foret ignotus, qui cognitione remotus.
 Intus et arcebat se strictius atque premebat,
 Ne sibi dilectam cito perderet ipse quietem.

Lanfrancus fit prior.

5. Explicitis vero tribus annis in monachatu
 Sub patris Herluini quo venerat ipse ducatu,
 Ne jam sub modio posset latuisse lucerna,
 Hactenus in medio fuerat quæ valis aperta,
 Est prior effectus, fratrum sed ab agmine lectus,
 Ut splendore sui sensus pariterque sophiæ,
 Lamine sublimis perlustrarentur usiæ,
 Et domus hæc nota, sed et ipsa Neustria tota,
 Quam licet abnuerit, suscepta denique cura,
 Omnibus intendit prodesse sub hac positura,
 Fratribus assignans essent quæ rite sequenda,
 Non minus insinuans illis quæ jure cavenda.
 Præ manibus semper doctrinam promptius habebat,
 Qua præcellenti sociorum corda rigabat.
 Gratus erat cunctis, nam cuncta scienter agebat,
 Hosque cibo forti, nunc illos lacte cibabat,
 Distribuens cunctis, ut cuique decere putabat.

A *Fama ejus percrebrescente, magnus fit ad eum nobilium et scholarium concursus.*

6. Fama sed ut crevit volitans, terramque replevit,
 De novitate loci, simul et de religione,
 Deque viri tanti Lanfranci cognitione,
 Nobilium multi, dites, comitum quoque nati,
 Hinc alii plures : inflati nempe scholares,
 Concurrent Becco, Lanfrancum nosse volentes,
 Institui tanto doctore magis cupientes.
 Cujus perspicua fundati philosophia,
 Horum nonnulli cordis ad intima puncti,
 Pneumatis atque sacri subito fervore peruncti,
 Jam mundi fastu dejecto carnis et astu,
 Colla jugo Christi festinant subdere miti,
 Ejus amore quidem remanentes prorsus ibidem.

B Ast alii plures sub eodem philosophantes,
 Artibus imbuti præclaris et bene docti,
 Ibant a studio Beccensi mira loquendo,
 Facti præcones ipsarum per regiones,
 Ac sic quæ penitus constabant annihilatæ
 Artes, Rollonis ex tempore partibus istis,
 Lanfranci studio noscuntur item reparatæ,
 Ipsius ascribi quod conderet utique laudi.

Beccus floret et omnibus abundat.

7. Tunc Beccus primo qui pauper adhuc et in imo,
 Cœpit ditari, succrescere, fructificari,
 Auro, divitiis, personis religiosis,
 Vitibus et terris, ornamentis pretiosis.
 Felix ecclesia, Christoque placens et amica,
 Ex istis unum quæ novit habere patrona !

C *Lanfrancus fit abbas S. Stephani Cadomensis.*

8. Tempore prolapso, cum jam floreret ab alto
 Beccus, et in totum fere dilucesceret orbem,
 Intus Lanfranco doctrinam distribuendo,
 A foris Herluino curam majoris agendo :
 Dux Normannorum Guillelmus laude suorum
 Sumpsit Lanfrancum merito cunctis venerandum,
 Non sine singultu multo, grandi quoque luctu
 Fratrum, necne patris Herluini jam senioris.
 Ecclesiæque suæ Cadomi tunc ædificatæ
 Contulit abbatem noliter ad utilitatem
 Cœnobiique rudis nihilominus et regionis.
 Hunc etenim sensu quo mirus erat, sed et acta
 Imbuit, ornavit, præstruxit, clarificavit
 D Ordine, doctrina, concentu, philosophia :
 Qui licet haud multis inibi vigilaverit annis,
 Cum fuerit raptus de cura cœnobiiali,
 Postmodum sedi proventus pontificali :
 Ejus signa tamen doctrinæ non pereuntis
 Sunt, et adhuc intus satis apparentia cunctis.

Deinde fit episcopus Cantuariæ.

9. At dux præfatus regnandi jure citatus
 Postquam devictis in bello cominus Anglis,
 Terram possedit rex, et regnando resedit,
 Ecclesias regni cupiens renovare subacti,
 Quæ nimis incultæ fuerant, vitis et adultæ
 Consilio procerum functus satrapumque suorum,
 Sustulit abbatem de cœnobio Cadomensis
 Domnum Lanfrancum, dictante sed Omnipotenti,

Atque reluctantem nimis, idque diu renitentem,
Tandem multorum precibus stringentibus ipsum,
Præsertimque patris Herluini fœdere victum,
Cujus ut auctori Christo parebat et ori,
Intulit eximix quæ Cantia dicitur urbi,
Atque sacerdotem summum præfecit eidem,
Clero sed populo cum laudibus amplificatis
Excipientibus hunc, et mentibus exhilaratis.

10. Culmen ubi talis fuit hic indeptus honoris,
Non castellorum structuræ materiali,
Non canibus, non hic avibus luxu laicali
Exstitit intentus, quia prorsus ab his alienus,
Ut mos pontificum dignoscitur Angligenarum :
Sed pius ut pastor structuræ spirituali
Sedulus instabat censura pontificali.
Mentes barbaricas doctrinis ædificando,
Usibus atque malis ad conspicuos revocando.
Non opus est crebris jam declamare loquelis
Anglorum genti quantum profecerit omni,
Namque status regni testatur et ecclesiarum,
Ipsius ingenti cura studioque frequenti,
Quod tunc justitiæ sub norma sit reparatus.
O tunc felicem populum nimis, atque virentem,
Cum rex insignis pacem sibi conciliabat,
Tantus et antistes doctrinam suppedibat!
Ille refrænabat stricto pugione rebelles.
Non etenim poterat sibi quis restare satelles.
Iste beatorum sedes passim renovabat,
Per patriam lectis rectoribus atque sacrabat.
Legibus ille novis reparabat templa vetusta.
Tunc effloreschat Britannia, tunc revirebat,
Tunc erat insignis, ducibus quia prædita dignis.
Tunc opulenta bonis, quia pax optata coronis,
Quorum sudore nimio grandique labore
Mundi pollentes hujus tum quique potentes
Materiam sumunt turgendi desipientes.
Sed quia deflexi paulisper ab ordine cœpto,
Est illuc iterum redeundum calle resumpto.

Herluinus annis fatiscens Anselmum sibi successorem eligit.

11. At Pater Herluinus mens veri conscia cujus,
Ut se conspexit Lanfranco jam viduatam,
Quem successorem gaudebat habere paratum,
Quoque suæ curam domus ipse refuderat omnem,
Eligit Anselmum vita studiisque probatum
Lanfrancique loco deliberat ire locatum.

Anselmi origo et prima studia. Lanfrancum adit. Fit monachus Becci. Prior instituitur post Lanfrancum.

12. Hic fuit Anselmus Augusta natus ab urbe
Stirpe satis clara nihilominus auctus in orbe ;
Qui post decursis ævi puerilibus annis,
Applicitus studiis, imbutus et artibus ipsis.
Primitus ad trivio, seu postulat ordo scholaris,
Postea quadrivio quo quisque stupet popularis,
Summos ipse brevi doctores æquiparavit.
Ilic cum floreret studiis in partibus illis,
Fama percelebri mira de laude magistri
Lanfranci motus, qui tunc prior oppido notus,

A Exstiterat Becci pastoris tempore primi,
Æde patris spreta, notis patriaque rejecta,
Pluribus emensis regionibus Italicensis,
Lætius optatum subiit tandem sibi portum,
Inventoque viro, vita verbis quoque miro,
Ejus et experta cum religione sophia,
Tanto constat eum complexum cordis amore,
Ejus ut ulterius discedere nollet ab ore.
Sumpto tunc igitur sibi religionis amictu,
In modico fertur tantum virtutis adeptus,
Qui nulli penitus fratrum foret ipse secundus.
Cui, post Lanfranci digressum commemorandi,
Qui fuit ecclesiæ translatus ab hac Cadomensi
Abbas, ob vitam, qua præpollebat, honestam,
Imperat officium de more prioris agendum.
B Quo non elatus fuit aut levitate notatus,
Sæpe quia mores mutant, ut fertur, honores.
Imo studebat eis queis præerat ultimus esse,
Lege ministrandi fuerat quod cuique necesse.

Herluinus migrat e vita.

13. Abbas Herluinus senio jam debilitatus
Postquam lustra novem minus anno continuasset,
Quo fugiens mundo se Christo consociasset,
Omnibus expletis quæ mens optaverat ejus,
Rebus in humanis et functis visibus ejus,
Tum quia basilica præstanter et ipsa peracta,
Hinc a Lanfranco tunc archipræsule summo
Multiplici pompa miroque decore sacrata,
Cum desiderii ejus jam nil superesset,
Ni quod dissolvi Christumque videre cupisset,
C Miles ut emeritus, et ab omni labe politus,
Corpore munitus, Christique cruore potitus,
Cœlo dans animam, virtutibus undique fultam,
Reddit humo corpus quo primus noscitur ortus.
Quantus ibi fletus, dolor omnis quippe replevit!
Quantus erat gemitus, quia pastor tantus obivit!
Concurrunt plures cum divitibus populares :
Ili dominum flentes, alii patrem repentes.
Tantus erat clamor lugentum tantus et angor,
Quod vix audiri psallentes, vix et adiri
Possent præ turba, foribus vi namque refusa.

Succedit ei S. Anselmus. Ejus virtutes.

14. At cum exsequiis singultibus haud sine crebria,
Utque viro decuit tanto de more peractis,
D Conveniunt fratres jam patre suo viduati,
Atque pari voto non schismate dissociati,
Abbatem statuunt Anselmum dignaque solvunt.
Quæ jam nimirum successio continuata,
Absque Dei nutu non creditur insinuata.
Tantus enim fuit hic ætate quidem juvenili,
Dignus ut tanto tunc præferretur ovili.
Dulcis in affatu, sed dulcior in famulatu
Exstiterat cunctis in cœnobio sibi junctis.
Sanis namque pater fuit, infirmis quoque mater
Et simul utrisque pater, et mater fuit ipse.
Neumate contactus erat omnibus omnia factus,
Ut sibi captaret quos Christo lucrificaret.
Fratribus hic igitur de quorum sobrietate
Jam bene fretus erat, vita simul et probitate,

Exterius causis solertius insinuat,
 Interius curis attentius ipse vacabat,
 Erudiensque suos doctrinis invigilabat,
 Contemplativos fructus carpebat aliquando,
 Nunc in consiliis dandis erat ipse morando.
 Quis ita discretus fuit et multis manifestus?
 Quod quasi divinum responsum consulisset,
 Ipsius alloquio quicumque frui potuisset;
 Gratia tanta quidem labiis insederat ejus,
 Quod gens cuncta fere verbis alluderet ejus.
 Regibus et primis patriæ, mediocribus, imis
 Haud fuit exosus, sed amabilis et pretiosus.

15. Floruit hoc Beccus sub tempore, crevit et hujus
 Oppido sub cura, nec enim Normannia sola,
 Verum longinquæ regiones atque propinquæ
 Ejus odore bono fragrant numine prono.
 E quibus exciti præsignes atque periti
 Conveniunt Becco, se dantes et sua Christo,
 Terras cum villis et prædia multa sub illis;
 Aurum cum gemmis pretiosis atque lapillis,
 Argentumque satis cum vestibus appretiatis,
 Illi subdentes solemniter attribuentes.

Anselmus Angliæ regem adit, pro Ecclesiæ suæ negotiis.

16. Jam tunc pollebat Beccus, se sic et habebat
 In melius semper succrescens proficiendo
 Ordine, divitiis, conventu religioso,
 Insuper et numero, meritis, et multiplicando.
 At cum bisseis superadjectis tribus annis
 Anselmus Beccum bene jam rexisset adultum,
 Fratrum constrictus prece, jussu denique victus,
 Ecclesiæ causis quampluribus hinc et abortis,
 Sic mare transivit, regem super his et abivit
 Compellaturus, quædam super et moniturus.
 A quo susceptus digne satis et veneratus,
 Obtinet ad libitum quod constat abiisse petitum.

Rapitur ad sedem Cantuariensem.

17. Tunc erat insignis urbs Anglica Cantuariensis
 Proh dolor! egregio meritis orbata patrono.
 Ferme decursis in gyro quatuor annis,
 Ex quo Lanfrancus mundo decessit amandus.
 Cum super id vero monitus rex crebro fuisset,
 Quatenus ecclesiæ lugenti consulisset,
 (1) Rufus et ille diu protendens dissimulasset,
 Tunc emollitus, tandem furore sopitus.
 Regni personis diversæ religionis,
 Principibus necnon super id pulsantibus ipsum,
 Annuit ut fieret electio pontificalis,
 Et procul abstaret contentio caudicalis.
 Omnibus ergo simul cum rege volentibus unum,
 Vocibus et crebris id subclamantibus ipsum,
 Abbas Beccensis, qui tanto dignus honore
 Esset, et insignis, sapiens grandique lepore,
 Quæritur Anselmus, capitur, trahitur violenter,
 Cum tentasset et his obsistere quam vehementer.
 Summus et antistes stabilitur Cantuariensi
 Ecclesiæ dignus successor et Italicensi.

(1) Guillelmus II, rex Angliæ, dictus Rufus.

A 18. Archiepiscopi qui sublimatus honore,
 Non sua sed Christi quærebat in ejus amore,
 Ecclesiis regni totius et invigilator
 Sedulus assistens, ipsarum sed relevator,
 Æquus judicio majoribus atque pusillis,
 Promptus in auxilio viduis pariterque pupillis,
 Dapsilis indigenis, non parcus et hic alienis,
 Totus et assidue fuerat perfusus egenis.
 Compatiens mœstis, non parcens ipse superbis.
 In commune tamen fuit omnibus ipse juvamen,
 Insuper et verbi divini semina fundens,
 Non erat in terris Domini commissa recondens:
 Imo, quod audierat per tecta docens resonabat,
 Pastor ut insignis, dispensatorque fidelis
 Talibus ornatus virtutibus iste beatus,
 B Jure subit curam tam digni pontificatus
 Hinc et amabatur a clero sufficienter,
 Atque colebatur a plebe satis reverenter,
 Tum quia defensor cleri fuit imperiosus:
 Tum quia provisor populi fuerit studiosus
*Guillelmus tertius abbas Becci. Ejus patria, morea,
 litteræ. Robertus Mellenti ejus consanguineus.*

19. Ut consecratus fuit hic et sede locatus,
 Istud et insonuit, jam quippe latere nequivit,
 Conventus fratrum Becci deductus in unum,
 Et super ablatum pastorem concionantes,
 Deque novo rursus reparando quæstionantes,
 Ipsius Anselmi consulto præsulis almi,
 Comminus eligitur quidam Guillelmus ab ipsis,
 Ex *Monfort* natus, sic et præponitur ipsis,
 C Moribus ornatus, sed religione probatus,
 Mitis, munificus, patiens et pacis amicus.
 Hic erat edoctus divina lege potenter,
 Nunc nova nunc vetera proferre sciens reverenter.
 Qui decus et speculum tum norma patens monacho-
 [rum,

Claruit ut lilium micat inter germina florum.
 Nec modo contiguis confratribus et sibi natis,
 Imo præcul positus, sublimibus, haud quoque notis
 Carus et acceptus fuit, hoc virtutis adeptus,
 Tempore sub cujus quammulti multa dedere
 Becco, divitiis ditantes, excoluere.
 Robertusque comes de *Mellenti* vir memorandus,
 Ipsius abbatis consanguinitate propinquus,
 Auxit præcipue non parvis ejus amore
 Beccum redditibus, Matrisque Dei sub honore,
 D Ordo sed interior sub eodem debilitatus
 Haud fuit; in modico quin firmior, at moderatus;
 Cultus et interior non laxabatur in urdo:
 Imo subaccrescens, flexusque gravedine nula.
 Non etenim Beccus tunc temporis intus egebat,
 Jam sed abundabat, jam de foris ipse cluebat.
*Guillelmus rexit annis xxx. De Bosone Becci IV ab-
 bate.*

20. At qui transactis ter denis circiter annis
 Ecclesiæ Becci, quibus abbas præfuit ipsi,
 Cum pastoralis cura prius invigilasset,

Orcumque suum, quod pulchre concelebrasset,
 Tandem Guillelmus carnis valetudine tactus,
 Posthabitis rerum curis plenusque dierum
 Sic obdormivit, sed et in Domino requievit,
 Appositusque suis hinc patribus et tumulatus.
 Cui prior ecclesie successit Boso vocatus,
 Pro libitu fratrum pastoris sede locatus.
 Hic fuit astutus, sapiens, subtilis, acutus
 Consilio, cura, scripturis, philosophia.
 Quisnam, quæso, virum tristis properavit ad ipsum,
 Et non continuo gaudens discessit ab ipso.
 Summi nempe viri, distantes atque remoti
 Quo satis edocti sermonibus exhilarati,
 Consilii causa venientes hunc repetebant,
 Hunc admirantes verbi virtute stupebant.
 At super illius quid dicam religione,
 Quidve super mentis quid proloquer integritate,
 Quis fuit Anselmo connexus ita reverendo,
 Quod vix aut sero disjungi posset ab ipso!
 Hic sibi subjectos in tanta pace tenebat,
 Insuper et tantæ dulcedinis arte regebat,
 Ut fieret notum, manifestius atque pateret
 Spiritus ille sacer, qui in ejus corde maneret.
 Claruit hic multis diversis partibus orbis,
 Sensu magnifico, verborum pondere miro;
 Notus et indicis fit summæ religionis
 Regibus, et primis cujusque procul regionis,
 Qui sibi commissum servare gregem satagendo,
 Nunc potabat eos exemplis instituendo,
 Nunc pascebat eos doctrina spiritali,
 Non tamen exceptans hos pastu materiali:
 Imo subimplebat laute quod cuique decebat,
 Affectu miro Christi neclens sibi tyro.
 Taliter egregius Boso pastorque peritus,
 Invigilans castris Domini ter quatuor annis,
 Justitiæ tectus lorica vir bene doctus,
 Neumatis at gladio sancti præcinctus acuto,
 Tum clypeo fidei tutus galeaque salutis,
 Fortis ut athleta non segniter intus agebat,
 Hostis ab incursu servando suos satagebat.
 Illic consummato vitæ præsentis agone,
 Transiit ad Christum mortis sed conditione;
 Et bene defertur super æthera spiritus ejus,
 Namque mori lucrum fuit ipsi vivere Christus.

Theobaldus V abbas Becci.

21. Cujus in officio quidam surrexit herilis
 Exque prior loci curam sortitur ovilis.
 Hic Thebaldus erat dictus, satis atque patebat
 Moribus insignis, natalibus et bene dignis,
 Artibus egregiis imbutus, et altius ipis.
 Qui post annorum jam decursum geminorum
 Desuper aptatis sex mensibus enumeratis,
 Cum regeret Beccum satis accuratius ipsum,
 A fo. is acceptans quæ congrua noverat ædi,
 Intus et assignans divinæ consona legi,
 Esset et hic gratus cunctis et amore ligatus,
 Illis subtrahitur, Christo sed compositore,
 Anglis atque datur, miro translatus honore,

A Summus et ecclesie fit præsul Canturiensis,
 Insula præsignis cui subditur Albionensis.

*Theobaldus creatur archiep. Cantuariæ; varios in
 Anglia motus compeccit. Becci possessiones in An-
 glia in primis tuetur.*

22. Tempore sub cujus, species ut denotat ejus,
 Anglia, quæ dudum fuerat ditissima rerum,
 Hinc opibus variis, hinc gentibus imperiosis,
 Proh dolor! orbatur, alienis et spoliatur
 Obruta languescit, fere jam subversa patescit,
 Invidia procerum regni patriæque potentum,
 Eusibus et flammis cum prodicione furentum.
 Hujus ob arcendam cladis rabiemque premendam,
 Quæ penes ecclesias etiam tunc depopulando,
 Sævius exarsit, vix ullam prætereundo,
 Tanta superborum tulit impedimenta virorum,
 Sæpe quod et capitis incurrerit ipse periculum.
 Christus at illæsum conservans altius ipsum,
 Omnibus eripuit ex his, pacique reduxit.
 Nam velut ipse Joseph auctore Deo perhibetur
 Missus in Ægyptum, Scripturis idque docetur,
 Fratribus atque patri, cunctæque suæ quoque genti
 Quo compensaret, pro tempore convenienti.
 Sic fuit iste Dei nutu provectus honori
 Regni totius Anglorum, sed potiori,
 Quo jam liberius, et matri compatiendo,
 Fratribus atque suis præstaret subveniendo;
 Insuper et rerum fleret protector earum,
 Quæ fuerant pronæ Becco procul in regione.
 Quæ bene compensans, et secum mente retractans,
 Muneribus dignis matrem venerando frequenter
 Extulit, adjuvit submissus ei reverenter.
 Quidquid erat Becci conservans inviolatum,
 Hostis et e manibus defensans intemeratum,
 Tempore quo cuncti noscuntur ad omnia moti.

Letardus VI abbas Becci.

23. Cui post successit vir summæ religionis,
 Infestus vitiiis, virtutibus ac studiosus
 Nomine Letardus, redolens velut Indica nardus.
 Porro sed ætatis provectæ, nam gravitatis
 Exstiterat multæ, mentisque procul bene cultæ.
 Prudens, maturus, patiens et corpore purus.
 Discipulis pandens exemplo sufficienti,
 Quod mandabat eis servandum voce patenti.
 Hic consummatis bis quinque beatus annis,
 Ex quo cænobium sumpsit Beccense regendum,
 Vitam finivit præsentem sic et obivit,
 Transiit, et virgo prodivit matris ut alvo,
 Cum sexagenum quintum superegerat annum.

Rogerius de Bailleul VII abbas.

24. Cui subit exemplo conventus e grege simplo,
 Quidam Rogerius de Bailleul qui fuit ortus,
 Indolis egregiæ, scrutator et ipse sophiæ.
 Ingenio promptus, sed et eloquio bene comptus.
 Qui non humanis, quo quisque tumescit inanis,
 Tantum, sed divis imbutus erat documentis.
 Quorum notitia pastorum qui viduatur
 Est asino similis, sed lauro qui decoratur.

ANNO DOMINI MCL

GUIDO CARILOCI ABBAS

NOTITIA

(*Ordin. Script. eccles.*, II, 1417)

Guido Cariloci abbas, ordinis Cisterciensis in Burgundia Sequana, ad quem duas epistolas sanctus Bernardus Clarævallis abbas conscripsit, circa hoc idem tempus, id est annum 1150, composuit *Tractatum de correctione cantus ordinis Cisterciensis*, quem sub sancti Bernardi nomine, ob Joannis Bona S. R. E. cardinalis et eruditissimi hominis auctoritatem, edidit Joannes Mabillon in editione sua *Operum divi Bernardi*. Fefellit Joannem Bonam codex manuscriptus quo utebatur, quem opinatus est esse *Tractatum divi Bernardi*, quia præmissam dicto tractatui divi Bernardi epistolam vilit. At ms. codex, quem hic Buciliaci habeo, varios tractatus ad musicam et cantum ecclesiasticum pertinentes continens, habet in fronte Operis nomen *Guidonis Cariloci abbatis*, et extranea ista divi Bernardi epistola caret, quæ cardinali persuaserat hunc Tractatum Bernardo attribuendum, qui Guidonis abbatis certo est. Vult tamen Joannes Mabillon, suam etiam opem huic cantus reformationi a divo Bernardo certis argumentis esse præstitam. Nullus quem noverim, hujus scriptoris unquam meminit.

TRACTATUS DE CORRECTIONE CANTUS

ORDINIS CISTERCIENSIS.

(Vid. *Patrologiæ* tom. CLXXXV, col. 1124, Opp. S. Bernardi tom. I.)

CIRCA ANNUM MCL

HERIBERTUS MONACHUS

NOTITIA

(*Histoire littéraire de la France*, tom. XII, pag. 446)

Fandis que l'hérétique Henri, ce restaurateur du manichéisme en France, infectait de ses erreurs le Languedoc et la Provence, un de ses disciples nommé Ponce, ou Ponne, le secondait dans le Périgord, et y faisait un grand nombre de prosélytes. La doctrine et les mœurs de ceux-ci se trouvent détaillées dans une lettre du moine Héribert, adressée à tous les fidèles en forme de dénonciation. Cet écrivain, sur la personne duquel on n'a aucune lumière, était vraisemblablement Périgourdin, car il parle en témoin oculaire de ce qu'il raconte. Il paraît que ce bon moine était un peu crédule, et se laissait aisément surprendre aux apparences trompeuses des fausses merveilles. Quoi qu'il en soit, la candeur qui règne dans son écrit dépose en faveur de sa sincérité. C'est un auteur qui rapporte ingénument ce que ses sens lui avaient appris sans aucune défiance sur la fidélité de leur témoignage. Sa lettre a dû précéder l'an 1147, époque de la mission de S. Bernard en Périgord. Après avoir été publiée pour la première fois par dom Mabillon dans le troisième volume de ses *Analectes* (p. 467), elle a été reproduite dans le premier tome des *Anecdotes* de dom Martène (p. 453) avec quelques corrections. Mais l'une et l'autre édition s'accordent à dire que les hérétiques dont il s'agit fléchissaient cent fois les genoux par jour, et non pas seulement sept fois, comme le dit le P. Pagi (*ad an.* 1163).

HERIBERTI MONACHI

EPISTOLA DE HÆRETICIS PETRAGORICIS.

(MARTÈNE *Anecd.* I, 453, ex ms. Elnon.)

Omnibus Christianis notum esse cupio ego Heriberti monachus, ut se caute agant a pseudopropheta, qui Christianitatem pervertentur. Surrexerunt enim in Petragoriensi regione quamplures hæretici, qui se dicunt apostolicam vitam ducere: carnes non comedunt, vinum non bibunt, nisi permodicum tertia die; centies in die flectunt genua, pecuniam non recipiunt. Illorum autem secta valde perversa est; *Gloria Patri* non dicunt, sed pro *Gloria Patri, Quoniam regnum tuum, et Tu dominaris universæ creaturæ in sæcula sæculorum. Amen.* Eleemosynam nihil esse, quia unde fieri possit, nihil debere possideri. Missam pro nihilo ducunt, neque communionem percipi debere dicunt, sed fragmen panis. Missam si quis cantaverit, seductionis causa, nec canonem dicit, nec communionem percipit, sed hostiam juxta aut retro altare, aut in missalem projicit. Crucem, seu vultum Domini non adorant, sed adorantes prohibent; ita ut ante vultum Domini dicant: *O quam miseri sunt, qui te ad-*

orant! psalmo dicente: *Simulacra gentium, etc.* In hac seductione quamplures jam non solum nobiles, propria relinquentes, sed et clerici, presbyteri, monachi et monachæ pervenerunt. Nullus enim tam rusticus est, si se eis conjunxerit, quin infra octo dies tam sapiens sit litteris, ut nec verbis, nec exemplis amplius superari possit. Nullo modo detineri possunt, quia si capiuntur, nulla vincione possunt servari, diabolo eos liberante, et ita universi, ut sperent et velint invenire eos qui se crucient et morti tradant. Faciunt quoque multa signa; nam sicubi ferreis catenis vel compedibus vincti missi fuerint in tonnam vinariam, ita ut fundus sursum vertatur, et custodes fortissimi adhibeantur, in crastino non inveniunt, quoadusque se voluntarie repræsentaverint, vas vini vacuum ex suo vino parumper immisso in crastino plenum invertitur. Alia quoque permulta et mira faciunt. Princeps eorum Ponnus vocatur

ANNO DOMINI MCLI

BARTHOLOMÆUS.

CATALAUNENSIS EPISCOPUS

NOTITIA

(*Gall. Christ. nov.*, tom. IX, col. 881)

Bartholomæus, ex decano Ecclesiæ Parisiensis factus est anno 1147 episcopus Catalaunensis, quo quidem anno vii Kal. Novembris adfuit dedicationi ecclesiæ suæ ab Eugenio III papa, ut fertur, celebratæ, eandemque cum episcopis Parisiensi, Antissiodorensi ac Nivernensi, intus et foris aspersione aquæ benedictæ lustravit. Eodem anno diploma regium obtinuit de hæreditate episcoporum Catalaunensium intestato morientium, quod habes in probationibus Libertatum Ecclesiæ Gallicanæ, tom. I, pag. 595, et apud Marten. Collect. Ampliss. tom. I, pag. 805. Anno sequenti adfuit concilio Remensi adversus Gilbertum Porretanum. Exstat apud Quercetanum Hist. Franc. tom. IV Bartholomæi epist. ad Sugerium abbatem. Obiit Bartholomæus anno 1151 in peregrinatione Jerosolymitana, ex Alberici et sancti Petri Catalaunensis chronicis, vel viii vel vii Kalendas Januarii, ex necrologiis.

BARTHOLOMÆI EPISTOLA

AD SUGERIUM ABBATEM.

(Vide Patrologiæ tom. CLXXXVI, in Sugerio abbate S. Dionysii.)

ANNO DOMINI MCLI

BERNARDI
CARTHUSIÆ PORTARUM PRIORIS PRIMI
EPISTOLÆ TRES

(Vide Patrologiæ tom. CLIII, col. 885)

ANNO DOMINI MCLI

S. RAINARDUS

ABBAS CISTERCIENSIS V

—
NOTITIA IN RAINARDUM

'Gall. Christ. t. IV, c. 985)
—

Rainardus, filius Milonis comitis Barri super Sequanam, ex monacho Clarævallensi assumptus in abbatem Cistercii 1135 perficitur a Waltero Cabilonensi pontifice; quo anno memoratur in charta ejusdem Walterii pro monasterio S. Petri (1). Statuta saluberrima condidit anno seq. seu potius statuta capitulorum generalium collegit. Anno 1128 S. Petro Stamedii primo abbati in Sabaudia præcepit ut oblatum Tarantasiensem archiepiscopatum acciperet. Petrum Abælardum cum S. Bernardo Clarævallensi abbate sub finem mensis Septembris anni 1140 reconciliavit. Eodem circiter anno scripsit ad Innocentium II papam pro Humberto Æduensi episcopo contra monachos Vezeliacenses; cumque hoc ipso anno agerentur comitia generalia Cistercii, pactum fecit cum Hugone et monachis Præmonstratensis ordinis, quo neutri monachos alterius ordinis in suum recipere liceret, neque abbatias ædificare, nisi eo intervallo, quo inter se distant Præmonstratense et Suessionense S. Medardi monasteria, ac insuper cavetur ne mutuæ querelæ aliis quam monachis utriusque ordinis finiendæ committantur, ex tabul. Bolbonæ. Scribit ad eum Petrus Venerabilis, lib. v, epist. 25, de quo etiam Exordium Cisterciense, lib. 1, cap. 28, et Vincentius in Speculo hist. lib. xxvii, cap. 27. Idem ann. 1148 visitatur ab Eugenio III summo pontifice in capitulo generali, et hic cœmeterium abbatiae consecravit. Aduit autem Rainardus consecrationi ecclesie S. Lazari Æduensis, factæ an. 1146 ab Humberto episcopo diœcesano; tandemque plurimis cœnobiis maximo religionis bono conditis, obdormivit in Christo 1151, ut est in Supplemento Sigeberti, xvii Kal. Januarii, ex martyrologio Cisterciensi; cujus in morte doluit S. Bernardus: *Dominus, inquit, epist. 270, Cisterciensis deseruit nos, magna plaga in ordine, mihi vero duplex incumbit mœroris ratio, qui in uno homine et patrem amisit et filium. Et nunc habemus pro eo domnum Gozuinum Bonæ-Wallis abbatem.* De Rainardo etiam ita loquitur scriptor æqualis vitæ B. Stephani Obazinæ abbatis, lib. II, cap. 11. *Eo tempore Cisterciensibus præerat abbas nomine Rainardus, vir... nullis facile comparandus: siquidem elegantia personæ, generis nobilitate, humilitatis decore, religionis fervore, cunctis quibus præerat abbatibus præminebat, et sanctæ religionis vigore flagrabat, ut ignis superaret ardorem, et exterius tanta dulcedine præminebat, ut mellis vinceret suavitatem.* Vide tom. II. Miscellan. Baluzii, pag. 117 et seq. ac Menologium Cisterciense ad diem 16 Maii.

(1) Prob. Hist. Cabilon. pag. 50.

SANCTI RAINARDI

CISTERCIENSIS ABBATIS V

INSTITUTA CAPITULI GENERALIS ORDINIS CISTERCIENSIS.

(*Nomasticon Cisterciense, seu antiquiores ordinis Cisterciensis consuetudines. Paris. 1664 fol.*)

ADMONITIO.

Hæc prima est Definitio capituli generalis ordinis Cisterciensis Collectio, a tempore *Chartæ Charitatis*; cujus auctor creditur sanctus Raynardus, filius Milonis comitis Barri super Sequanam (2), primum quidem monachus Clarævallis ac subinde quartus abbas Cistercii, quem inter angelorum choros S. Christianus vidit (3), cujus mortem S. Bernardus veluti *magnam*, ut ipse ait, *ordinis plagam* lacrymis prosecutus est (4). Hæc autem Collectio octoginta et septem distincta capitibus, complectitur varias definitiones ab initio ordinis in capitulis generalibus editas, usque ad annum 1134, quo ipsa prodiit in lucem.

S. RAINARDI PROLOGUS.

In Charta Charitatis inter cætera continetur, quod singulis annis convenient omnes abbates cœnobiolorum, quæ Dei gratia in diversis sunt ordinata provinciis, ad Cisterciensem ecclesiam, et quod ibi de observatione sanctæ Regulæ et ordinis totius vitæ suæ ac indissolubili inter se pace custodienda, diligentissime tractent: ut tenor vivendi sæpius replicatus ac divinarum Scripturarum auctoritate corroboratus, non facile tepere, sed per diuturna plurimorum annorum spatia possit vigere. Hac ergo ratione in loco prædicto congregati, hæc capitula instituerunt, et per universam congregationum nostrarum fraternitatem tenenda decreverunt:

INSTITUTA

Capituli generalis ordinis Cisterciensis (5).

CAP. I. Quo in loco sint construenda cœnobia.

In civitatibus, in castellis, aut villis nulla nostra construenda sunt cœnobia; sed in locis a conversatione hominum semotis.

CAP. II. De unitate conversationis in divinis et humanis.

Ut autem inter abbatias unitas indissolubilis perpetuo perseveret, stabilitum est primo quidem ut ab omnibus Regula beati Benedicti uno modo intelligatur, uno modo teneatur; dehinc ut iidem libri quantum duntaxat ad divinum officium pertinet; idem victus, idem vestitus, iidem denique per omnia mores inveniantur.

CAP. III. Quos libros non licet habere diversos.

Missale, Epistolare, Textus, Collectanum, Graduale, Antiphonarium, Regula, Hymnarium, Psal-

terium, Lectionarium, Kalendarium, ubique uniformiter habeantur.

CAP. IV. De vestitu

Vestitus simplex et vilis absque pelliciis, camisiis, staminiis, qualem denique Regula describit.

CAP. V. Unde monachis debeat provenire victus.

Monachis nostri ordinis debet provenire victus de labore manuum, de cultu terrarum, de nutrimento pecorum: unde et licet nobis possidere ad proprios usus aquas, silvas, vineas, prata, terras a sæcularium hominum habitatione semotas, et animalia, præter illa quæ magis solent provocare curiositatem et ostentare in se vanitatem, quam aliquam afferre utilitatem, sicut sunt cervi, grues et cætera hujusmodi. Ad hæc exercenda, nutrienda, conservanda, seu prope seu longe non tamen ultra

(2) Ordericus Vitalis, lib. viii Hist. Anglorum.

(3) Exord. mag. Cisterc., lib. i, cap. 28.

(4) S. Bernardi epist. 270.

(5) Anno Dom. 1134, Cistercii 36

diætā grangias possumus habere per conversos A rit, liber discedat. Si in cella novitiorum conversa-
custodiendas.

CAP. VI. Quod non debeat monachus extra claustrum habitare.

(5^o) Monacho cui ex Regula claustrum propria debet esse habitatio, licet quidem ad grangias quoties mittitur ire; sed nequaquam diutius habitare.

CAP. VII. Quod in ordine nostro feminarum cohabitatio interdicta sit et ingressus portæ monasterii sit eis negatus.

Remota omni occasione sive nutrimentorum augendorum vel conservandorum, sive rerum monasterii quarumlibet, ut quandoque necesse est, lavandarum, sive denique cujuscunque alterius necessitatis, feminarum cohabitatio nobis et conversis nostris omnino interdicta est. Ideo nec intus curtes B grangiarum hospitari, nec monasterii portam ingredi permittantur.

CAP. VIII. De conversis.

Per conversos agenda sunt exercitia apud grangias et per mercenarios, quos utique conversos episcoporum licentia tanquam necessarios et coadjutores nostros, sub cura nostra sicut et monachos suscipimus; fratresque et participes nostrorum tam spiritualium quam temporalium bonorum æque ut monachos habemus.

CAP. IX. Quod redditus non habeamus de alienis.

Ecclesias, altaria, sepulturas, decimas alieni laboris vel nutrimenti; villas, villanos, terrarum census, furnorum, molendinorum redditus, et cætera his similia monasticæ puritati adversantia, nostri et nominis et ordinis excludit institutio. C

CAP. X. Quid liceat vel non liceat habere de auro, argento, gemmis et serico.

Altarium linteamina, ministrorum indumenta, sine serico sint, præter stolam et manipulum. Casula vero non nisi unicolor habeatur. Omnia monasterii ornamenta, vasa utensilia, sine auro et argento, præter calicem et fistulam: quæ quidem duo sola argentea et deaurata, sed aurea nequaquam habere permittimus.

CAP. XI. Ut nullus recipiat aliquem ad aliam ecclesiam ire volentem.

Si quis monachus, clericus, aut laicus ad aliquam ecclesiarum nostrarum causa remanendi venire D voluerit, non ei dissuadeat alia ecclesia, nec eum retineat, etiamsi remanere voluerit, quia scriptum est: *Quod tibi non vis fieri, alii ne feceris*. Qui postquam ad illum locum in quo conversari disponit, venerit, ibique voluntate mutata remanere nolue-

(5^o) Reg. S. Ben. c. 4, cap. 66 et cap. 67.

(6) Nota hic mentionem fieri libri Usuum, ut jam conscripti et ubique ab omnibus habendi et observandi.

(7) Vide lib. Usuum cap. 70, de minutione.

(8) Per cucullas *foccatas* eas prohibet quæ et S. Bernardus in Cluniacensibus reprehendit in Apologia sua et in epistola ad Robertum, nempe cucullas amplas et superfluitate panni redundantes,

rit, liber discedat. Si in cella novitiorum conversatus fuerit, et proprio vitio vel expulsus, vel per se exierit, ab aliqua nostræ fraternitatis ecclesia, sine commendatitiis litteris non recipiatur, quia discordiæ inter ecclesias fomes de tali causa oriri potest. Quod idem de monacho peregrino in aliquo loco nostro suscepto et quoquo modo egresso, decernimus.

CAP. XII. Quomodo novella ecclesia abbate et monachis et cæteris necessariis ordinetur.

Duodecim monachi eum abbate tertio decimo ad cœnobia nova transmittantur, nec tamen ibi destinentur, donec locus, libris, domibus et aliis necessariis aptetur, libris duntaxat, Missali, Epistolari, Textu, Regula, libro Usuum (6), Psalterio, Hymuario, Collectaneo, Antiphonario, Lectionario, Graduali; domibusque, oratorio, refectorio, cella hospitem et portarii, necessariis etiam temporalibus, ut et vivere, et Regulam ibidem statim valeant observare.

CAP. XIII. De firmaculis librorum.

Interdicimus ne in ecclesiarum libris aurea, vel argentea sive deargentata, vel deaurata habeantur retinacula, quæ usu firmacula vocantur, et ne aliquis codex pallio tegatur.

CAP. XIV. De pane quotidiano.

Sicut in ecclesiasticis aliisque observationibus cavemus ne inveniamur discordes, sic etiam in victu quotidiano diversitas est cavenda, ne fratres carnis vel spiritus fragilitate victi grossiorem panem abhorreere et lautiores incipiant desiderare. Ideo stabilimus ne in cœnobiis nostris fiat panis candidus, nequidem in præcipuis festivitibus, sed grossus, id est cum cribro factus. Ubi autem frumentum defuerit, cum scatio liceat fieri, quæ lex infirmis non tenebitur, sed et hospitibus quibus visum fuerit album panem apponimus, et minutis in minutione sua, sicut in sententia eorum descriptum est (7). Cujus panis, albi videlicet qui minutis apponitur, sicut et quotidiani pasta in statera posita, nequaquam plus ponderare debet, sed æqua lance appendi.

CAP. XV. De cucullis et subtalaribus

In ecclesiis nostris non sint cucullæ deforis *foccatæ* (8): et subtalares diurni non sint caprini vel corduani, sed vaccini.

CAP. XVI. De monachis vel conversis fugitivis.

Si quis monachus vel conversus vitio suo de ecclesia aliqua exierit, et ad alienam venerit, suadeatur ei ut revertatur. Quod si abbas vel prior illius

non autem eas in quibus essent flocci seu particule lanæ eminentiores, ut vult Angel. Manriq. in suis Annal. ad an. 1134, c. 6. Hoc enim sensu contrarii essent SS. Patres nostri S. Benedicto qui in sua Regula cucullas villosas suis monachis in hieme concessit. Non admittebant igitur nostri cucullas aut floccos nisi simplices et angustiores, ut fatetur Petrus Venerabilis in epistola 28, et in epist. 47 lib. 1v.

loci intellexerit eum ad locum suum nolle redire, non eum sinat amplius una nocte illic manere, habitumque ei religionis jubeat auferri, nisi priusquam ad nostrum ordinem venerit monachum fuisse constiterit. Converso vero de rebus monasterii nihil dimittatur præter indumentum simplex et vile.

CAP. XVII. Quod monachus peregrinus infra breve tempus recipiatur aut recedat.

Monachus peregrinus si ad aliquod cœnobium ad habitandum venerit, nec ibi propter vicinitatem aut notitiam ecclesiæ suæ recipi potuerit, non diutius teneatur in domo hospitem; ob hoc ne inter hanc moram, aut aliquo ingenio, aut aliquarum ecclesiasticarum seu sæcularium personarum petitione, quæ sine dubio violenta constat esse, ab abbate suo extorqueatur.

CAP. XVIII. Quod omnia monasteria in honorem beatæ Mariæ dedicentur.

Quia antecessores nostri et Patres de ecclesia Molismensi, quæ in honorem B. Mariæ constructa est, ad Cisterciensem locum, unde et nos exorti sumus, primitus venerunt: idcirco decernimus ut omnes ecclesiæ nostræ ac successorum nostrorum, in memoriam ejusdem cœli et terræ reginæ sanctæ Mariæ fundentur ac dedicentur.

CAP. XIX. Ut pitantiæ (9) non administrantur in refectorio apud Cistercium tempore generalis capituli.

Nos abbates illo tempore decem sicuti solemus Cistercium post annum venientes, rogabamus dominum abbatem Stephanum et fratres, ne nobis in refectorio solitæ pitantiæ, post duo pulmentaria regularia præsentarentur; quia et in refectorio in distributione harum rerum videbatur esse quædam inquietudo fratrum, et in mora illa diminutio dormitionis eorum; tuncque abbate illo et fratribus consentientibus, stabilivimus ne ista illo tempore amplius ficerent.

CAP. XX. De sculpturis et picturis, et cruce lignea.

Sculpturæ vel picturæ in ecclesiis nostris seu in officinis aliquibus monasterii, ne fiant interdiximus: quia dum talibus intenditur, utilitas bonæ meditationis vel disciplinae religiosæ gravitatis sæpe negligitur; cruces tamen pictas, quæ sint lignæ, habemus.

CAP. XXI. Quod extra portam domus non habeatur.

Non est congruum ut extra portam monasterii domus aliqua ad habitandum construatur, nisi animalium; quia periculum animarum inde potest nasci.

CAP. XXII. Quod animalia vitium levitatis habentia non nutriantur.

Certum est nos, qui monachalem militiam arri-

(9) *Pitantiarum* nomine, quarum hic et alibi sæpius mentionem fieri invenies, intelligenda sunt quædam fercula pulmentis regularibus lautiora, ut jara in superioribus diximus. Itaque secundum Jacobum de Vitriaco et Stephanum a Sancta Genovefa, pulmenta nostrorum monachorum erant ex

A puimus, debere in cœnobiis nostris honestæ gravitati ac regularibus disciplinis, non levitatibus aut jocis vacare, et ob hoc fomenta vitiorum a sanctis locis elongari oportet, scilicet cervos, et ursos ac grues, cæteraque talia levitatis irritamenta.

CAP. XXIII. De clericis et laicis cœnobia construendis, et quod nullus sine probatione monachus efficiatur.

Si clerici vel laici locum aliquem ad honorem Dei construxerint, illumque locum alicui cœnobiorum nostrorum quatenus ad abbatiam proficiat concedere voluerint, abbasque illius loci a quo consilium flagitant, locum habilem perspexerit, suscipiat illum si voluerit. Ipsi vero clerici vel laici si sanctæ Regulæ jugo se subdere voluerint, aut in loco illo abbatiam faciendam præstolentur, aut cellam novitiorum intrent in cœnobia prænotati abbatibus ut regulariter probentur. Quod si ad aliquam aliam Ecclesiarum nostrarum secedere elegerint, vel aliud quid pro arbitrio facere, licenter agant; illud tamen magnopere nobis est cavendum ne isti aut alii aliqui sine regulari probatione aliquo modo nostro collegio socientur, exceptis monachis quos B. suscipit Benedictus.

CAP. XXIV. Quod intra monasterium nullus carne vescatur aut sagimine.

Intra monasterium nullus carne vescatur aut sagimine, nisi omnino infirmi et artifices conducti. Similiter nec intra curtes grangiarum, nisi propter easdem causas et etiam propter mercenarios.

CAP. XXV. Quibus diebus vescimur tantum quadragesimali cibo.

In toto Adventu, excepta prima Dominica, in secunda et tertia feria ante caput jejunii, in vigilia Pentecostes, et in jejuniis Quatuor Temporum in Septembri, in vigiliis sanctorum Joannis Baptistæ, Petri et Pauli, Laurentii, Assumptionis beatæ Mariæ, Matthæi apostoli, Simonis et Judæ, Omnium Sanctorum, Andreæ apostoli, quadragesimali tantum vescimur cibo.

CAP. XXVI. Ne monachi dent vel accipiant mediætatem vel cressementum.

Nullam cum sæcularibus societatem in pecoribus nutriendis, seu terris excolendis habere permittimur, videlicet dando vel accipiendo mediætariam vel cressementum.

CAP. XXVII. Quos suscipiamus ad confessionem, ad communionem et sepulturam

Ad confessionem, ad sacram communionem, ad sepulturam neminem extraneum, præter hospites et mercenarios nostros, in monasterio videlicet morientes recipimus; sed nec ad oblationem in conventu ad missam, nisi in Purificatione sanctæ Mariæ, ad sepulturam autem duos tantummodo oleribus et leguminibus confecta. Pitantiæ, ex ovibus et piscibus. Vide quæ de his diximus in lib. de prima vivendi ratione Cisterciensium, ut supra in cap. 17 lib. Usuum. (*Patrolog.* t. CLXVI, in S. Stephano).

quos voluerimus de amicis vel familiaribus nostris A cum uxoribus suis.

CAP. XXVIII. *Quid fiat de his qui se reddunt alicui ecclesie nostrae ad monachatum, et antequam in capitulum venerint, morte praeventi fuerint.*

Si quis mundum respuens monachatum desideraverit, et veniens ad aliquem de abbatibus nostris desiderium suum ei intimaverit, ac se etiam ei vel alicui illius Ecclesiae monacho reddiderit, hic talis si ante petitionem suam in capitulo regulariter factam obierit, non pro novitio habeatur, sed pro familiari.

CAP. XXIX. *Quod nullus nostri ordinis abbas monacham benedicat (10).*

Prohibitum est ne quis abbatum nostrorum monacham benedicere, infantulum baptizare, vel etiam B in baptismo tenere praesumat, nisi forte in articulo mortis, vel si presbyter defuerit.

CAP. XXX. *Quomodo causae in capitulo generali exortae definiantur.*

Si qualibet causa sponte confessa vel clamore exorta in generali capitulo Cistercii naseatur, communi assensu omnium abbatum, si possit concorditer fieri, definiatur; si autem pro capacitate sensus uniuscujusque, quod saepe accidit, inter se dissenserint, Pater Cisterciensis monasterii quatuor abbatibus ad hoc idoneis hanc definire praecipiat, et quod illi utilius judicaverint, omnis sanctae multitudinis conventus sine retractione teneat.]

CAP. XXXI. *De privilegiis.*

Constituimus ne quis contra instituta ordinis nostri privilegium facere praesumat; sed quod dispo-auerunt antecessores nostri sancti viri et adhuc permanent sano consilio moderni ratum et stabile permaneat: quod si quis contra statuta capituli accipere aliquid vel emere vel aedificare praesumpserit, remota omni dispensatione aedificia cadant, expensae et opera pereant.

CAP. XXXII. *Quod filia per annum semel visitet matrem ecclesiam.*

Statuit causa humilitatis Cisterciensis conventus solerti providentia, quatenus saltem semel in anno matrem ecclesiam per abbatem suum, si sanus fuerit, visitet filia.

CAP. XXXIII. *Quae poena injungatur negligentibus D instituta.*

Si quis abbatum capituli nostri generalis neglexerit instituta, publice clametur, et ad emendationem admoneatur. Quod si ipso anno non correxerit, et in sequenti capitulo notum fuerit, leviori cul- pae subjaceat, ubi et quandiu decreverit Cisterciense capitulum.

CAP. XXXIV. *De archiepiscopo vel episcopo.*

Nullus propter jussionem archiepiscopi vel epi-

(10) In cap. gen. an. 1241 determinatum est hanc monialium benedictionem non de illa quam in sua professione recipiunt, sed de illa quae consecratio est, et ad episcopos pertinet, intelligendam esse.

(11) Et hic errat praedictus Ang. Manriq. dum

scopi generale capitulum dimittere praesumat: sed si sanus est, caeteris occasionibus postpositis, venire contendat. Non quod debitam obedientiam praelatis nostris denegemus, sed quod in ordine nostro tenere statuimus, observare debemus. Et ideo sicut alias scripsimus cum quis abbatum abbatiam construere voluerit, primo hoc capitulum et caetera archiepiscopo vel episcopo sunt ostendenda diligenter.

CAP. XXXV. *De pulvinariibus.*

Pulvinaria ex nulla parte excedant pedem et dimidium.

CAP. XXXVI. *De electione abbatis aut monachi in episcopum.*

Abbas vel monachus nostri ordinis, si in episcopum eligatur, nunquam consentiat sine assensu abbatis sui et Cisterciensis capituli, nisi forte a domino papa cogatur.

CAP. XXXVII. *Quod monachi vel conversi in alia abbatia nihil quaerant.*

Monachi et conversi nostri ordinis a propriis abbatibus ad aliquod negotium directi in alia nostri ordinis abbatia, sine mandato abbatis sui nihil quaerant praeter victum et calcamentorum reparationem et equorum ferrationem, nisi eis aliquod infortunium in via contigerit.

CAP. XXXVIII. *Quo ordine benedicatur monachus peregrinus.*

Monachus peregrinus in aliquo ordinis nostri C monasterio receptus, eo ordine in quo novitius benedicatur, si prius benedictus non fuerit.

CAP. XXXIX. *Cui liceat ferre punctam culcitram (11).*

Nullus ferat secum in via punctam culcitram ad jacendum, nisi is cui in capitulo concessum fuerit.

CAP. XL. *Quot socii abbas veniens ad capitulum contentus esse debeat.*

Abbas veniens ad capitulum generale intra abbatiam monachum non adducat, nec plusquam duos equos, sed contentus sit uno converso vel uno serviente.

CAP. XLI. *Ubi monachi vel conversi minui debeant.*

Monachus vel conversus non debet minui nisi ad abbatias nostri ordinis, neque ad grangias nisi gravis necessitas incubuerit.

CAP. XLII. *De communicaturis.*

Illis diebus quibus monachi communicaturi sunt, possunt ad privatas missas ministri communicare. Licet etiam abbati monachos, novitios et conversos prout expedire judicaverit, dividere per altaria ad communicandum.

CAP. XLIII. *Quod nullus abbas in generali capitulo loquatur, nisi stando.*

Nulli abbatum, praeter Cisterciensem, liceat clamare, vel in audientia omnium loqui nisi stando;

per punctam culcitram intelligit pulvinum equestri sellae impositum. Hic enim, ut patet ex textu capituli, per *culcitram* intelligi debet stragulum tonenteo et floccis fultum quod dormituris substernatur.

aliis omnibus sedendo auscultantibus. Si quis autem aliorum vel contradicere, vel aliud dicere voluerit, illo sedente surgat.

CAP. XLIV. *Quod nullus præsumat terram alterius vel usuaria in ea quærere.*

Si quis abbatum terram habuerit vel usuaria vel inde aliquam conventionem habuerit, nullus abbatum quærat eam, vel in ea usuaria sine assensu illius abbatis.

CAP. XLV. *Quomodo satisfaciat abbas si ad gloriam primi psalmi non occurrerit.*

Abbas si ad gloriam primi psalmi non occurrerit, satisfaciat ad gradum ut monachus, excepto quod sine licentia alicujus post satisfactionem recedat ad sedem suam, nisi alius abbas in choro fuerit.

CAP. XLVI. *Quando exire debent a generali capitulo monachi Cistercienses (12).*

In prima die capituli post absolutionem defunctorum dicatur *adjutorium nostrum* et exeant omnes monachi, præter priores qui in loco abbatum adfuerint: idem fiat aliis diebus post expositionem Regulæ.

CAP. XLVII. *De psalmis et orationibus extraordinariis.*

Prohibitum est ne in conventu psalmi vel aliæ quælibet orationes pro quavis necessitate dicantur, nisi forte pro missa de conventu, alia missa pro imminente augustia, vel ad missam de conventu collecta.

CAP. XLVIII. *De misto adolescentiorum.*

Adolescentiores fratres quibus diebus jejuniorum mistum sumere conceditur, semper ante Tertiam illud sumant.

CAP. XLIX. *De nundinis.*

Periculosum quidem est minusque honestum religiosis frequentare nundinas nominatas; sed quia paupertas nostra hoc exigit, ut de rebus nostris vendamus vel necessaria emamus, quibus talis incumbit necessitas, poterunt ire ad mercatum vel nundinas, non tamen ultra tres dietas, vel ad plus ultra quatuor; nec plus de monachis vel conversis, quam duo de una abbatis, nec mare Anglicum trans-eundum censemus propter nundinas. Si qui tamen vicini maris portui fuerint, pro necessariis domus vicini emendis vel commutandis transire poterunt; non tamen ad nundinas, neque a portu applicuerint, plusquam duas dietas. Quicumque ergo monachus vel conversus ordinis nostri ad nundinas nominatus venerit, quandiu in nundinis fuerit, de nulla domo religiosa victum sibi vel equis suis accipiat, sed de suo magis vivat; et ea mensura qua decet virum ordinis sui: non enim pro se pisces (13)

(12) Et hoc cap. perspicuum est, omnes abbates interfuisse tunc temporis definitionibus edendis aliisque causis in capitulo generali ventilandis: etsi nunc juxta præsentem usum, aut abusum potius, soli definitores intersint; quasi vero abbates nunc deterioris essent conditionis quam tunc priores qui vices eorum agerent.

A emere debet, aut delicias quærere, sed nec vinum bibere nisi bene aquatum, et duobus pulmentis aut contentus. Ad opus sæcularium nec emant nec vendant aliquid.

CAP. L. *De tabernis.*

Neque per monachum, neque per conversum, neque per aliquem hominum liceat nobis vinum nostrum vendere ad tabernam, sive, ut vulgo dicitur, ad brocam, sive, ut lingua Teutonica, ad tapam in nostris sive in domibus alienis, nec alicubi omnino.

CAP. LI. *De abbatibus dum capitulum generale tenetur foris sedentibus.*

Quicumque abbas fuerit foris dum generale tenetur capitulum, ea die a vino absteinat.

CAP. LII. *De mensura avenæ.*

B Monachis seu aliquibus aliis nostri ordinis ad abbatias nostras sive ad earum loca venientibus, ad opus equorum ipsorum mensura avenæ in Cisterciensi capitulo constituta, sufficiat.

CAP. LIII. *De hospitibus ad generale capitulum venientibus.*

Eo die quo abbates Cistercium ad annum conveniunt capitulum reliquisque diebus quibus ibidem morantur, certum sit statutum esse in generali eorumdem abbatum Capitulo, nullum supervenientem debere suscipi hospitem. Quod si etiam talis aliquis supervenerit cui id omnino negari non possit, equos vel equum ejus nullomodo recipiendum: id enim solerter cavendum judicavere, ne forte rei pro qua de tam longinquis conveniunt provinciis, scilicet ut suo intendant ordini, ullum incurrant impedimentum, quod per hujusmodi susceptiones posse fieri arbitrabantur.

CAP. LIV. *De mensura pulmentorum*

Eadem mensura sicut panis et vini sit per omnes abbatias, qua æqualiter pulmenta (14) dividantur tam in abbatias quam in grangiis.

CAP. LV. *Cui liceat ferre calicem et cætera ad missam cantandam necessaria.*

Abbates nostri ordinis quolibet ierint, calicem et cætera ad missam cantandam necessaria non ferant, nisi ii quibus in annuo abbatum capitulo concessum fuerit.

CAP. LVI. *Si liceat alicui novos libros dictare*

D Nulli quoque liceat abbati, nec monacho nec novitio libros facere, nisi forte cuiquam in generali capitulo id concessum fuerit.

CAP. LVII. *De armentis sive pecudibus.*

Nullus abbas ordinis nostri sive armenta sive pecudes sinat ad pascua longius evagari per diem quin in nocte revertantur infra proprios fines et proprias terras; hac tamen lege non tenebuntur qui in Alpibus vel juxta Alpes habitant, in gregibus dunta-

(13) Nota hic pisces non censi inter pulmenta nostris monachis concessa.

(14) Pulmenta erant fercula regularia seu a regula permissa et præscripta, quæ, teste Stephano, Tornacensi *ager ex leguminibus vel ex oleribus hortus* nostris olim monachis subministrabat. *Epist. ad Hug. Pontigniacensem.*

at ovium. Propter porcos autem liceat habere longe ab abbacia, sive a grangia duabus leucis sive etiam tribus, si ita necesse fuerit : et circa domum illam, quantum opus fuerit, longe evagentur, ita tamen ut nocte revertantur. Custodibus autem ovium vel pecorum victus quotidianus aliunde non proveniat, nisi de sua propria abbacia vel grangia illa. Sed si qui etiam in aliis partibus pro penuria et ariditate locorum hanc forte legem tenere non potuerint, ea ipsi non tenebuntur, sed poterit in eis capitulum dispensare ut vivere possint, si tamen hoc testimonio vicinorum abbatum ostendere poterunt.

CAP. LVIII. *De placitis.*

Nou debent abbates vel monachi vel conversi nostri ordinis interesse placitis nisi suis aut aliorum de ordine nostro. Quod si aliis de causis quemquam eorum adesse contigerit, non sit tamen ibi iudex vel prolocutor, nec ad consilium partium nec ad iudicium eat.

CAP. LIX. *De episcopis ordinis nostri.*

Episcopi de ordine nostro assumpti consuetudinem nostram tenebunt in qualitate ciborum, in forma indumentorum, in observatione jejuniorum, in officio horarum regularium : excepto quod mantellum de vili panno et pelle ovina, et pileum similem aut simplicem habere poterunt, qui voluerint : cum quibus tamen rebus claustra minime intrabunt, nec conventibus nostris intererunt, propter dissimilitudinem (15). Solatia poterunt unicuique dari de domibus nostris usque ad duos monachos et tres conversos, si tot necessarii fuerint, ita tamen ut nemini illorum sæcularia negotia vel curæ imponantur. Propter episcopos ordinis nostri, si in infirmitorio jacent, poterunt infirmitarii sui, si opus fuerit, remanere ab horis canonicis ; similiter et socii eorum qui assidui sunt cum eis. Cæterorum autem nullus pro quolibet episcopo aliquam horam canonicam dimittat, et nullus monachorum ejus comedat cum eo ; sed in refectorio, nisi infirmus fuerit.

CAP. LX. *De pitantiis*

Abbas qui in infirmitorio fuerit, in conventum pitantiam non mittat, præter abbatem loci ; nullusque abbatum qui in refectorio comederint faciat pitantiam, nisi ille qui sedet ad nolam, nisi forte juxta se sedenti.

CAP. LXI. *Quibus speciebus non utimur.*

In conventu generaliter nec pipere, nec cimino, nec hujusmodi speciebus utimur, sed communibus herbis quales terra nostra producit.

CAP. LXII. *De gravibus culpis.*

Notum est in Cisterciensi capitulo annuali ab archiepiscopis ordinis nostri, tam fures quam conspiratores, quam etiam incendiarios excommunicatos specialiter fuisse. Quicumque ergo fratrum nostrorum in ejusmodi deprehensi fuerint, graviori culpæ subdantur. Quod si qui talium exierint pro eo vel

projecti fuerint ; nullatenus nisi sub eadem sententia recipiantur. Ipsa etiam in quemque secundum modum culpæ extendatur vel aggravetur. Hoc etiam attendendum est, ut et hora prandii sit tardior, et mensura cibi minor quam illius qui in leviori culpa ponitur. Verumtamen abbas attendat et corporum valetudinem et culparum modos, et cum susceptus fuerit in capitulo, non eadem die ponatur in ordine suo. Vasa quibus utitur, aut frangantur aut pauperibus erogentur. Ad fores oratorii prostratus jaceat non habens caputium in capite ; quoties autem missa vel officium defunctorum sine intervallo sequitur horam canonicam, non prosternatur, donec conventus exeat de ecclesia, non tamen omnes coguntur propter eum exire : qui vero exeunt, per ante eum exeant. Et item cum in capitulum receptus fuerit, dum completur opus Dei prosternat se in terram.

CAP. LXIII. *De levioribus culpis.*

Fratres, qui in leviori culpa sunt, extra refectorium comedant in loco quo abbati visum fuerit. Qui post refectionem servitorum, neque ad biberes eant cum aliis, neque illi qui pro versu tertio perditio in penitentia sunt, sed post alios eant in refectorium.

CAP. LXIV. *In quo ordine fugitivus recipi debeat.*

Fugitivus si infra undecim dies redierit, restitui potest in ordine quem prius habuerat ; si vero ultra undecim dies redierit, recipi quidem potest, ita tamen quod in eo gradu in quo ultimus recipitur, semper permanebit.

CAP. LXV. *De vocatione abbatum ad electionem novi abbatis*

Defuncto abbate Pater abbas vocetur, et si qui sunt abbates quos domus illa genuerit. Viciniores quoque ad diem quem ipse Pater abbas præscripserit pariter convocentur, et ad arbitrium Patris abbatis præsentibus abbates domus illius et monachi simul abbatem eligant. In domo Cisterciensi, qui mater est omnium nostrum, præsentibus abbates qui de Cistercio exierunt et monachi Cistercienses simul eligant.

CAP. LXVI. *De cura Grangiarum.*

Prohibemus ne quis abbas grangias suas vel aliquam earum alicui monacho committat, nisi cellerario qui secundum Regulæ auctoritatem, ad voluntatem ablati curam gerat de omnibus, et ei prout necesse fuerit, solatia administrantur, a quibus in his quæ agenda fuerint, adjuvetur.

CAP. LXVII. *Quid abbas Cisterciensis in generali capitulo inquirere debeat.*

Si aliqua abbacia in anno a patre suo abbate domus unde exivit non fuerit visitata vel per se vel per alium, in communi capitulo Cisterciensi abbas ejus hoc notificet interrogante id communiter eo qui præsidet in capitulo. Quærat etiam si quis deest abbatum, et auditis excusationibus eorum qui forte pro infirmitate venire non potuerunt de cætero ne-

(15) Nota primam simplicitatem, modestiam et sanctitatem ordinis, etiam in episcopis suis.

mo celaverit, si quem eorum qui eo anno venire ad debuerant abesse cognoverit, nec sine gravi animadversione id prætereatur.

CAP. LXXVIII. *Qualiter terminari debeant controversiæ inter abbates exortæ.*

Si forte aliqua controversia inter aliquos abbates ordinis nostri orta fuerit, convocent vicinos abbates ordinis nostri et eorum consilio pacem ineant; si vero nec sic sedari potuerint, reservetur causa eorum ad annum capitulum Cistercii, et ibi ad arbitrium et ad nutum Cistercii capituli terminetur, neque modo ad aliam audientiam appellare liceat.

CAP. LXXIX. *De domibus quæ in villis sunt.*

In domibus quæ in villis sunt aut castellis aut civitatibus non habitent monachi vel conversi.

CAP. LXX. *De monachis vel conversis ad proprias grangias venientibus.*

Monachi vel conversi cum ad proprias grangias venerint, sicut fratres grangiarum ita vescantur; nec loquantur cum fratribus, nisi cum magistro et hospitali.

CAP. LXXI. *De falsis vocibus.*

Viros decet virili voce cantare, et non more femineo tinnulis, vel, ut vulgo dicitur, falsis vocibus histrionicam imitari lasciviam: et ideo constituimus mediocritatem servari in cantu, ut et gravitatem redeat et devotio conservetur.

CAP. LXXII. *Si liceat alicui Romam ire.*

Nemo ordinis nostri Romam eat, nisi cum episcopo sui ordinis.

CAP. LXXIII. *De abbatibus qui abbatias suas relinquunt.*

Abbatibus qui abbatias suas relinquunt, in ordinem conversionis suæ redeant (16).

CAP. LXXIV. *Quod monachi vel conversi ad generale capitulum venientes verberentur.*

Ab hora nona diei præcedentis Exaltationem sanctæ crucis usque ad horam nonam diei quo abbates a generali capitulo discedunt, quicumque hospes monachus vel conversus inventus fuerit in monasterio vel in grangiis Cisterciensibus, ducatur in generale capitulum, et ibi coram omnibus abbatibus verberetur. Excusationem vero aliquam eis prætereare qui verberantur, nec abbas Cisterciensis potest.

CAP. LXXV. *Quod infirmarius potest loqui cum solatio suo.*

Qui magister erit de infirmitorio loqui poterit cum solatio suo, si tamen ita viderit abbas oportere: et hoc ipsum loco et modo quo ipse providerit. Conversum etiam pro solatio infirmarii liceat haberi in infirmitorio.

CAP. LXXVI. *De pueris litteras discentibus.*

Nullus puerorum doceatur litteras intra monasterium vel in locis monasterii, nisi sit monachus vel receptus in probatione novitius, quibus tempore lectionis discere liceat. Et notandum quia nullum nisi

(16) In subsequentibus capitulis generalibus concessum est huiusmodi abbatibus ut post alios abba-

PATROL. CLXXXI.

post quintum decimum ætatis suæ annum in probatione ponere licet.

CAP. LXXVII. *De pœna abbatis contemnentis Patrem abbatem.*

Abbas filius qui abbatem suum cum corripientem de ordine suo contempserit, clamatus in Cisterciensi capitulo levi culpæ subjaceat, aut in propria abbacia, aut in loco in quo abbas Cisterciensis constituerit.

CAP. LXXVIII. *Quando vel quibus major cellerarius computare debet.*

Major cellerarius, semel in mense, vel sæpius si abbas voluerit, de omnibus quæ accipit, abbati vel quibus jusserit computet. Alii autem sive grangiarum, sive qui aliquibus præsentibus operariis, in præsentia cellerarii, vel quibus cum eo abbas jusserit, similiter faciant. Substantiam autem monasterii in nummis vel in alia pecunia, is cui jusserit abbas custodiat; ipse vero abbas aliquos de suis monachis pecuniæ conscios secum habeat.

CAP. LXXIX. *De pœna loquentium ad mensam.*

Omni tempore secundum Regulæ præceptum debet monachus studere silentio, sed maxime nocturnis horis et ad mensam. Eapropter ordinamus ne monachus sive conversus ad mensam loquatur, nisi forte in via constitutus si non habuerit qui signa sua intelligat, singula verba dicendo, ut aquam, panem et vinum, et cætera comestioni tantum necessaria breviter et silenter requiratur. Qui vero aliter fecerit, in ipsa refectioe a vino absteineat: quod si vinum non habuerit, uno pulmento, si duo habuerit, careat.

CAP. LXXX. *Cum quot monachis liceat abbati hospiti simul loqui.*

Constituimus ut nullus abbas ad aliam domum veniens, monachum de labore sine licentia retineat, nec cum pluribus quam cum duobus simul loquatur, præter abbates visitatores, quos ei in auditorio vel in locum proximum auditorio monachorum evocare liceat. Cæterum per curiam vel infirmitorium aut extra terminos sine abbatis licentia vel prioris, si abbas defuerit, monachum ducere, exceptis, ut diximus, visitatoribus, nulli liceat. Dum autem abbas cum duobus loquitur, si tertius supervenerit, stando breviter, si necesse sit, loqui poterit; sed consedere etiam rogatus non præsumat.

CAP. LXXXI. *De litteris et vitreis.*

Litteræ unius coloris fiant et non depictæ. Vitreæ albæ fiant, sine crucibus et picturis.

CAP. LXXXII. *De lampade ecclesiæ.*

Lampadem tam die quam nocte ardentem in oratorio, qui voluerit et potest, habeat.

CAP. LXXXIII. *De generibus vestimentorum.*

Qui mollibus vestiuntur in domibus regum sunt: monasterium ista non decent. Ponamus delicatas vestes, et nullus deinceps Isebruno, Saia, Vates locum obtineant. *Novellarum Def. dist. 8, c. 2.*

lebruno vel ejusmodi aut etiam subtilioribus pan- A tandem lutum, sive ad expellendum frigus habere
nis utatur, neque novis, neque veteribus. licet eis.

CAP. LXXXIV. *Pro quibus liceat nobis scribere
D. papæ.*

Nullus scribat domino papæ nisi pro propriis
causis et coabbatum suorum, et episcoporum, ar-
chiepiscoporum, regum et principum suorum.

CAP. LXXXV. *De wandagiis (17).*

Directi in viam si voluerint wandengias ad devi-

(17) *Vandengiæ seu Vendagiæ sunt perones seu
indumenti genus tibias et pedes operiens.*

CAP. LXXXVI. *Quod monachus prostratus non
oret.*

Non est nostræ consuetudinis monachum ve-
versum prostratum toto corpore jacere in ora-
torio, sed super genua et stando.

CAP. LXXXVII. *De scriptoriis (18).*

In omnibus scriptoriis ubicunque ex consuetu-
dine monachi scribunt, silentium teneatur sicut in
claustro.

(18) *Scriptoria erant cellæ in quibus monachi li-
bris describendis vacabant.*

S. RAINARDI EPISTOLA

AD INNOCENTIUM II.

(Vide Patrologiæ tom. CLXXIX, col. 671, inter epistolas Innocentii II.)

ANNO DOMINI MLI

HUGO MATISCONENSIS

PONTINIACENSIS ABBAS PRIMUS, POSTMODUM EPISCOPUS ANTISSIODORENSIS

NOTITIA

Histoire littéraire de la France, tom. XII, pag. 408)

(1) Hugues, de la maison des comtes de Maçon, lia, dès sa première jeunesse, une étroite amitié avec saint Bernard, dont il était cousin et à peu près son égal pour l'âge. Bernard, en quittant le monde, ne crut pas devoir laisser ce cher parent au milieu des écueils que la crainte du naufrage lui faisait éviter. Il le pressa de le suivre à Cîteaux. Hugues résista quelque temps; mais enfin il se laissa vaincre, et fut un des trente compagnons que Bernard emmena dans cette sainte retraite. Les progrès rapides qu'il y fit dans la vertu, déterminèrent l'abbé saint Etienne à le mettre à la tête de la colonie qu'il envoya l'an 1114 pour fonder l'abbaye de Pontigni au diocèse d'Auxerre. Cette maison devint elle-même sous son gouvernement la mère de plusieurs autres. On dit que Hugues fut le premier qui, dans la profession d'obéissance que les abbés cisterciens faisaient à l'évêque diocésain, ajouta ces mots : *Salvo ordine nostro* (2), addition dont l'Ordre se trouva bien dans la suite.

S'étant rendu l'an 1127 au chapitre général de Cîteaux, il y vit arriver Etienne de Senlis, évêque de Paris, que les vexations du roi Louis le Gros avaient obligé d'abandonner son Eglise. Touchée de la situation du prélat, et attendrie par ses prières, l'assemblée députa au monarque les abbés de Clairvaux et de Pontigni pour l'engager à faire cesser cette espèce de persécution. Hugues assista l'année suivante au Concile de Troye, où il donna des preuves de sa capacité. Thibaut le Grand, comte de Champagne, instruit de son mérite par les évêques d'Auxerre et de Troyes, le choisit l'an 1155 avec André de Beaumont moine de Clairvaux, pour établir des chanoines réguliers dans l'église de Saint-Loup de Troyes.

(1) Manr., *Ann. Cist.* ad an. 1112, c. 2. n. 2. Le Nain, *Hist. de Cîteaux*, t. I, p. 155.

(2) Voici la formule du serment d'obéissance que les abbés de l'Ordre de Cîteaux faisaient à leur évêque : *Ego N. abbas Cisterciensis ordinis subjectionem et obedientiam a sanctis Patribus institutam secun-*

dum regulam S. Benedicti, tibi, Domine Episcopo, tuisque successoribus canonice instituendis, et sanctæ Sedis Apostolicæ, salvo ordine meo, perpetuo me habiturum promitto. (SYNOD., not. in ep. 7. lib. II Epist. Gaufr. Vindoc.).

desservie auparavant par des clercs séculiers. Les deux commissaires, après s'être acquittés de cette fonction, donnèrent aux nouveaux chanoines des statuts particuliers qui furent confirmés par le pape Innocent II.

La sage conduite de Hugues faisait prendre de jour en jour de nouveaux accroissements à l'abbaye de Pontigni, lorsque la Providence l'en retira pour le placer sur le siège épiscopal d'Auxerre (5), vacant par la mort de Hugues de Montaigne décédé l'an 1136. Il fut ordonné la même année par Geoffroi évêque de Chartres et Légat du Pape dans l'abbaye de Ferrière au diocèse de Sens (4). La pièce funèbre qu'on rapportera ci-après, énonce en précis les vertus qui caractérisèrent son épiscopat.

Il introduisit l'an 1141 les Prémontrés à Auxerre, et les dota de ses propres fonds. Appelé au grand concile de Reims, tenu l'an 1148 (5), il y fit preuve de son savoir théologique en combattant les erreurs de Gilbert de la Porrée. Hugues (6) fut un des trois commissaires que les prélats français de cette assemblée chargèrent de rédiger leur profession de foi contraire à ces nouveautés pour la présenter au Pape et au sacré Collège.

Ce respectable Prélat mourut le 10 octobre de l'an 1151. Son corps, inhumé dans l'église de Pontigni près le grand autel, fut trouvé l'an 1560 aussi entier que le jour qu'il avait été mis en terre. Les Calvinistes sur cet indice le prenant pour celui de saint Edme, portèrent leur aveugle fureur jusqu'à le brûler et le réduire en cendres. Simon Chevredor, Chanoine régulier de Saint-Victor, son contemporain, décora son tombeau de l'Épithaphe suivante :

*Antissiodori Præsul prælatus in urbe.
Mente polum scandens, membra reliquit humi.
Sexu, stirpe, bono præstans, illustris, honestus,
Hugo fuit largus nomine, voce, manu.
Et locuples et inops, pauper sibi, dives egenis,
Et nullis impar, et sibi nullus erat.
Hunc a justitiæ norma revocare nequibant
Obsequium, terror, gratia, dona, preces;
Sola triumphabat virtus pietatis in illo,
Cum post justitiam debuit esse pius.
Istius Ecclesiæ primus Pater amplificavit
Laudem, facta, locum, laude, vigore, bonis.
Bis quinos Octobre dies claudente, dierum
Finem clausit, habens nunc sine fine diem.*

Malgré cet éloge, nous ne dissimulerons pas que le testament de Hugues fait une tache à sa mémoire. Ce Prélat, au lieu de léguer aux pauvres et aux Eglises tout ce qu'il possédait, ne leur en laissa qu'une légère portion, donnant tout le reste à un de ses neveux, jeune homme laïque, qui n'avait rien de recommandable que l'honneur de lui appartenir (7). Le bruit courait qu'il lui avait donné jusqu'à sept Eglises dont il avait fait l'acquisition, avec leurs dîmes et des prés dans la forêt même de l'Évêque, sans compter son or et ses chevaux dont ce jeune homme se servit pour aller faire confirmer ce testament à Rome. Saint Bernard en étant informé se hâta de prévenir le Pape Eugène par une Lettre, où il le pria de casser cet acte qu'il traitait de frauduleux, comme ayant été surpris au Prélat par son diacre Etienne dans un de ces moments de faiblesse qui étaient fréquents chez lui dans les derniers temps de sa vie. Il soupçonnait même ce diacre de l'avoir fait dresser à l'insu de Hugues; ce qui est d'autant plus vraisemblable, dit-il, que l'année dernière étant tombé dangereusement malade, on lui fit faire la donation d'une Eglise en faveur de ce même neveu : donation dont il déclara dans sa convalescence n'avoir aucun souvenir.

Quoique M. Le Beuf, dans ses *Mémoires pour l'histoire d'Auxerre*, n'ait pas jugé à propos de mettre notre Prélat au rang des auteurs, il a laissé néanmoins des productions de sa plume qui semblent mériter ce titre. Dom Charles de Visch, dans sa *Bibliothèque de Cîteaux*, nomme un traité de sa façon intitulé : *De conservandis Ecclesiæ privilegiis*. Cet ouvrage n'a point encore vu le jour, et nous ignorons en quel dépôt il existe. Le même bibliographe incline avec assez de vraisemblance à lui attribuer le *petit Exorde de Cîteaux*. On a de plus deux lettres de lui à Suger : l'une, pour l'engager à établir une trêve entre Hugues de *Marinis* et Hugues de Borne qui se faisaient la guerre à outrance; l'autre, pour lui recommander la veuve et les enfants du médecin Robert que Suger avait honoré de son estime et de sa protection, lorsqu'il vivait. Nous pourrions encore ajouter la lettre écrite en son nom et au nom de saint Bernard au Pape Honorius II, pour lui faire des plaintes de la précipitation avec laquelle il avait levé l'interdit jeté par Etienne de Senlis évêque de Paris sur les terres du roi Louis le Gros. Il est auteur des Statuts de l'Abbaye de Saint-Loup de Troyes, et il a eu part aux Constitutions des Religieuses d'Hières. Enfin Dom Martène a publié dans le premier tome de ses *Anecdotes* (p. 402) une chartre de lui, touchant les biens qui avaient été possédés par Hugues du Til.

Nous nous garderons bien toutefois de mettre sur le compte de notre Prélat le poëme d'un Hugues de Mâcon, intitulé *De mirabilibus gestis Militum*. L'auteur de cet ouvrage n'avait de commun avec celui qui nous occupe, que la conformité de noms; et il est certain, comme on le fera voir en son lieu, qu'il ne florissait que vers la fin du quinzisième siècle

(3) Mab., *Ann.* l. LXXVI, n. 95.

(4) Le Nain, *ibid.*, p. 85.

(5) *Ann. Cist.*, t. I, p. 411, n. 6.

(6) Villefore, *Vie de S. Bern.* . . vi, c. 5; Le Nain,

ibid., n. 18; Mart., *anecd.* t. IV, p. 141.


(7) Bern., ep. 276.

HUGONIS EPISTOLÆ DUÆ

AD SUGERIUM.

(Vide Patrologie tom. CLXXXVI, in Sugerio.)

THIS VOLUME
DOES NOT CIRCULATE
OUTSIDE THE LIBRARY



THIS VOLUME
DOES NOT CIRCULATE
OUTSIDE THE LIBRARY



3 2044 054 760 392

